


UNIVERSITY OF TORONTO

3 1761 01479754 2











CÆSARIS BARONII

ANNALES ECCLESIASTICI

TOMUS SEXTUSDECIMUS

Cet ouvrage, par les corrections et les additions considérables qui y ont été opérées, est devenu la propriété des Editeurs, qui se réservent tous leurs droits. Toute contrefaçon ou imitation, quelle que soit la forme sous laquelle elle se présente, sera poursuivie rigoureusement, conformément aux lois.

Hoc in opere tam multa sunt aut correctata aut addita, ut id suum Editores reddiderint et, quidquid suorum jurium sit, sibi vindicent. Itaque, si quis idem aut furto ediderit aut quoquo modo erit imitatus, in crimine erit et de injuria postulabitur.

HEcel
B.
CÆSARIS S. R. E. CARD. BARONII

OD. RAYNALDI ET JAC. LADERCHII

CONGREGATIONIS ORATORII PRESBYTERORUM

ANNALES

ECCLESIASTICI

DENUO EXCUSI ET AD NOSTRA USQUE TEMPORA PERDUCTI

AB AUGUSTINO THEINER

EJUSDEM CONGREGATIONIS PRESBYTERO, SANCTIORUM TABULARIORUM
VATICANI PRÆFECTO, ETC., ETC.

TOMUS SEXTUSDECIMUS

934-1045



99202
22/10/59

BARRI-DUCIS, LUDOVICUS GUERIN, EQUES ORDINIS S. SILVESTRI, ET SOCII,
TYPOGRAPHI EDITORES.

—
MDCCC LXIX .

BR
145
B37
1864
t. 16

SUMMARIVM

TOMI XVI.

- DCDXXXIV. 1. Joannes papa Alberici arbitrio obnoxius. 2. Prodigia in Galliis.
- DCDXXXV. 1. Synodus Rhemis.
- DCDXXXVI. 1, 2. Henrici regis Germaniæ obitus et Ottonis successio. 3. Rodulpho mortuo, Ludovicus Francorum rex ungitur. 4. Joanni papæ mortuo subrogatur Leo VII. 5-7. Hugonis Italiæ regis fretus potentia Manasses plures sibi vindicat episcopatus. 8, 9. Unni sanctus archiepiscopus Hamburgensis et ejus dignus successor Adaldagus. 10-13. Odo abbas Cluniacensis Romam vocatus a Leone papa egregiis factis clarescit.
- DCDXXXVII. 1-3. Hungarorum incursiones in Italia et Gallia. 4-6. Aquisgrani ungitur Otto rex.
- DCDXXXVIII. 1, 2. Ingens adversus Arabes in Hispania dominantes victoria. 3-7. Odo iterum Romam vocatus regularis disciplinæ institutor. 8. Wenceslaus martyr. 9. Ottonis regis mira in hostes victoria.
- DCDXXXIX. 1-3. Otto rex pietate et armis insignis factiosos vincit. 4. De Gisberti ducis pietate. 5. Gerardi sanctitas. 6. Leoni mortuo succedit Stephanus papa IX.
- DCDXL. 1. Stephanus papa a sceleratis vultu deformatus. 2, 3. Edmundus rex in Anglia et Dunstanus ejus consiliarius. 4-6. Conflagratum monasterium Agaunense S. Udalricus visitat; ubi de pluralitate missarum unius diei.
- DCDXLI. 1. Synodus Suessionensis in causa archiepiscopatus Rhemensis. 2. Quid Fridericus episcopus Moguntinus in monachos egerit. 3, 4. Privilegia monasterio S. Vincentii ad Vulturum a regibus Italiæ collata. 5, 6. Russorum classis superata a Græcis.
- DCDXLII. 1. Damasus legatus a papa missus ad Francorum proceres. 2-8. Inter Hugonem et Albericum jube bellum Odo abbas componere studet, et sancte moritur. 9. Adelbero Metensis episcopus monasticæ disciplinæ restitutor. 10-12. Diploma Orientalium imperatorum continens privilegia monasterio S. Vincentii ad fontes Vulturni collata.
- DCDXLIII. Mortuo Stephano succedit Marinus papa.
- DCDXLIV. 1, 2. Tryphone patriarcha Constantinopolitano dolose deposito, subrogatur Theophylactus. 3, 4. Nuptiæ Berthæ cum Romano: et Sarracenorum grassatio, icto fœdere cum Hugone. 5-15. Christi imago famosissima Edessa Constantinopolim translata. 16-20. Paulus anachoreta sanctitate celebris imperatoribus charus. 21. Romanus et filii ejus imperio privati. 22. Admiranda in Germania. 23-29. Diploma Marini papæ ad monasterium S. Vincentii prope Vulturum.
- DCDXLV. 1. Hugo regnum Italiæ cedit filio Lothario, et fit monachus. 2, 3. Diploma datum canonicis Vercellensibus. 4. Theotili episcopi Turonensis obitus. 5. Lues Parisiis. 6. Ludovicus rex Francorum a Nortmannis captus.

- DCDXLVI. 1-4 Obitus Marini papæ, Agapiti successio : eorumque de monasteriis statuta. 5-6. Guibertus monasterium Gemblacense erigit privilegiis insigne. 7. Edredus rex Angliæ. 8, 9. Corpus S. Hune-gundis virginis repertum et elevatum. 10. Legatio Constantini imperatoris ad Berengarium.
- DCDXLVII. 1-3. Synodus Virdunensis in causa episcopatus Rhemensis, de qua Hugo subdole Agapitum papam consulit. 4. Ælfege in Anglia episcopi obitus et sanctitas. 5. Ædithæ reginæ obitus.
- DCDXLVIII. 1-7. Legatio Pontificis et Synodus in Gallia, in qua Rhemensis Ecclesia adjudicatur Artaldo contra Hugonem illegitimum episcopum. 8-10. Synodus Trevirensis in causa Ludovici regis et Hugonis principis.
- DCDXLIX. 1. Synodus Romana confirmans Acta in utrisque Synodis. 2-5. Dania ab Ottone victa ad Christi fidem convertitur, intercedentibus etiam miraculis. 6. Ungarorum nova incursio in Italiam pecunia redimitur.
- DCDL. 1, 2. Otto rex vocatus in Italiam ad Berengarii tyrannidem compescendam, mortuo Lothario. 3. Ramirus rex in Hispania, victis Arabibus, pie moritur.
- DCDLI. 1, 2. Conjugium Ottonis cum Adelaide vidua Lotharii. 3. Eadredus universæ Angliæ rex. 4, 5. De Commentario S. Idelphonsi in laudem virginitatis Dei Genitricis Mariæ.
- DCDLII. 1, 2. Otto Romam venire per Albericum prohibitus, Berengario in gratiam recepto Italiæ regnum reddit.
- DCDLIII. 1, 2. Per Arnolphum Ottoni rebellem Augustæ deprædatio. 3, 4. Pallium per legationem missum ab Agapito papa ad Brunonem archiepiscopum Coloniensem.
- DCDLIV. 1. Alberici obitus et successio Octaviani in Urbis tyrannide. 2. Corpus S. Matthæi Salernum translatum. 3. Pax inter Ottonem et filium per S. Udalricum episcopum. 4. Lotharius in regnum Francorum, Willelmus in sedem Mogantinam legitime adsciti. 5-8. Synodus Noviomen-sis, et de diebus festis servandis monita. 9-13. Ratherii Veronensis episcopi abjectio, restit-utio, virtutes et scripta.
- DCDLV. 1-4. Octavianus juvenculus, mortuo Agapito, Romanum pontificatum occupat. 5-8. Ungari in Germaniam irrumpentes tum precibus S. Udalrici, tum Ottonis armis penitus funduntur. 9, 10. Edvinus rex Angliæ S. Dunstanum ejus impudiciis aversantem in exilium pellit. 11. Veremundus regnat in Hispania.
- DCDLVI. 1. Lues in provinciis Borealibus. 2-5. Defuncto Theophylacto patriarchæ Constantinopolitano succedit Polyuctus. 6-8. S. Pauli anachoretæ obitus et laudes.
- DCDLVII. 1. Joannis papæ conatus in principem Capuanum. 2. Presbyter apostata junctus Sarracenis. 3. Edgarus regnat in Anglia, qui revocat Dunstanum mox episcopum Cantuariensem.
- DCDLVIII. 1. Berengarii tyrannis invalescit. 2. De Tarcis conversis ad fidem et apostatis. 3. S. Odoni in sede Cantuariensi succedit simoniace Ealfinus, qui misere perit.
- DCDLIX. 1. Adalbertus Russorum episcopus. 2-6. Arnulphi marchionis Flandriæ pia largitio, et mira sa-natio per preces Gerardi abbatis. 7. Edvinus rex Angliæ pœnitens moritur.
- DCDLX. 1-6. Legatio Joannis papæ et aliorum ad Ottonem contra Berengarii tyrannidem, cum juramento ab eodem præstando. 7-10. S. Dunstanus Romam veniens recipit pallium. 11-27. Constantini imp. Orientalis veneno sublatis vitia, virtutes, scripta : cui succedit filius Romanus.
- DCDLXI. 1, 2. Otto in Italiam venit, regno petitur. 3. S. Mauriti corporis translatio. 4-10. Creta insula a Sarracenis per Nicephorum liberata ad Christianam fidem revertitur ope Niconis Armeni sancti-tate celebris.
- DCDLXII. 1-12. Otto Romam venit, coronatur imperator, ablata restituit : Romanæ Ecclesiæ jura dato Di-plomate confirmat. 13-16. Papiam veniens persequitur hostes : Novarensi Ecclesiæ ablata resti-tuit. 17. Synodus Meldensis in causa Rhemensis episcopi. 18. Obitus S. Guiberti abbatis.
- DCDLXIII. 1-30. Synodus Romæ coram Ottone imperatore et singula ejus Acta in causa Joannis papæ damnati et depositi, subrogato Leone. 31-40. Hujus pseudosynodi judicium et Acta reprobatione digna. 41. Privilegium monasterio S. Vincentii datum. 42-46. Nicephorus Phocas succedit Romano imperatori Orientali : in patriarcham ob suum matrimonium offendit : in Sarracenos copias mittit.
- DCDLXIV. 1-4. Romanorum insurrectione Otto discedit, Joannes papa in Urbem recipitur. 5-15. Synodus Romana, in qua Leo pseudopapa deponitur, fautores damnantur. 16-20. Joanni papæ misere mortuo subrogatur Benedictus, qui in pseudosynodo per Leonem antipapam exauctoratur. 21. Pestis in exercitu imperatoris. 22-30. Leonis nomine constitutiones editæ falsitatis et impos-turæ arguuntur. 31. Privilegia concessa ab Ottone monasterio Casinati. 32-37. Nicephori impe-ratoris victoriæ in Sarracenos : ejusdemque vitia, quibus populo infensus evasit.

- DCDLXV. 1-3. Otto imperator in Saxoniam pergīt, Benedictum papam custodiendum secum ducens, qui ibidem moritur. 4, 5. Leoni antipapæ mortuo subrogatur Joannes dictus XIII. 6, 7. Poloni ad Christi fidem conversi legatos obtinent ab Joanne. 8, 9. Alia ejusdem Pontificis legatio in Wandaliā. 10. Obitus Brunonis archiepiscopi Coloniensis.
- DCDLXVI. 1, 2. Joannes papa revocatur in Urbem, Ottone imperatore in rebelles sæviēte.
- DCDLXVII. 1. Concilium Ravennæ celebratum. 2. De coronatione Ottonis filii. 3. Obitus Sancii regis in Hispania.
- DCDLXVIII. 1-3. Otto imperator in Apulia legatos Nicephori imperatoris recipit. 4-7. Ingens penuria Constantinopoli, unde certum tempus legationis Luitprandi episcopi Cremonensis. 8. Nortmanni Gallæciam invadunt. 9-10. Legatio Luitprandi ad Nicephorum imp. ab eodem Luitprando descripta. 11, 12. Capuana Ecclesia in archiepiscopatum erecta. 13. Campanæ benedictio et elevatio in Lateranensi Ecclesia. 14, 15. De donatione Gerbergæ reginæ.
- DCDLXIX. 1-4. Græcorum dolo Latini victi de iisdem Græcis ulciscuntur: unde obitus Nicephori imp. et nuptiæ Ottonis cum Theophane. 5-11. Rerum Ecclesiasticarum invasores divinitus afflicti. 12. Duorum patriarcharum nece. 13, 14. Patriarcha Constantinopolitanus resistit Joanni imperatori, quem resipiscentem coronat. 15, 16. Miraculum de catena S. Petri et SS. reliquiarum translationes.
- DCDLXX. 1, 2. Constantinopolis et Antiochiæ patriarchæ eliguntur. 3-12. Concilium generale in Anglia contra cleri et magnatorum incontinentiam, Dunstano archiepiscopo laborante.
- DCDLXXI. 1-3. Synodus Romana, in qua firmanur privilegia ab Edgardo Angliæ rege data monachis. 4-7. S. Uldaricus Roma rediens convenit Ravennæ Ottonem, per quem Adalberoni nepoti suo in Augustana sede successionem obtinet. 8-10. Nimia erga nepotem dilectione aliquid humani passus Uldaricus. 11-13. Magdeburgensis civitas constructa, cujus primus episcopus Adelbertus. 14. Cedente Petro archiepiscopo Ravennate, succedit Hlonestus. 15-18. Joannis imperatoris expeditio in Barbaros, divinitus relatæ victoriæ et inde triumphus.
- DCDLXXII. 1, 2. Joanni papæ mortuo succedit Donus, cui item mortuo Benedictus. 3-9. In Synodo Ingelheimensi causa successionis Adalberonis discussa, qui præmoritur S. Uldarico patruo.
- DCDLXXIII. 1, 2. Moriuntur Willelmus archiepiscopus Moguntinus et S. Mathildis, ille filius, hæc mater Ottonis. 3-6. Ottonis obitus, et de eo judicium, 7. Otto Junior solus imperator. 8. Synodus Mutinensis.
- DCCLXXIV. 1. Benedictus papa strangulatus a Bonifacio. 2. S. Romualdus Eremitarum institutor claret.
- DCDLXXV. 1. Benedictus papa VII. 2-7. Martyres in Hispania ex Diplomate Veremundi regis. 8. Imperium Orientale, mortuo Joanne, ad Basilium et Constantinum transfertur. 9. Sergius episcopus Damascenus Romam venit. 10. Antonius Studites patriarcha Constantinopolitanus. 11, 12. Regum successio in Anglia per episcopos judicata, et clericorum jurgia composita.
- DCDLXXVI. 1. Bardæ rebellio. 2-9. S. Nili res gestæ mirabiles, inter quas conversio Eupraxii præfecti,
- DCDLXXVII. 1, 2. Benedictus papa dat Sergio Ecclesiam S. Bonifacii. 3-9. Petrus Urseolus dux Venetiarum cum sociis vitam eremiticam amplexus Romualdum sectatur. 10, 11. S. Rudesindi episcopi Compostellani obitus.
- DCDLXXVIII. 1. S. Wolfgangi episcopi Ratisponensis miraculum. 2-3. Eduardus rex Angliæ per scelus occisus corrumpat miraculis. 4. De corpore S. Gudilæ virginis.
- DCDLXXIX. 1, 2. S. Dunstanus in Anglia regi Ethelredo dira prænuntiat, mira operatur.
- DCDLXXX. 1-4. S. Adalberti primordia, et ad sedem Pragensem assumptio. 5-9. S. Nilus Casinum montem petit, inter cætera de jejuniis in sabbato mira dat documenta. 10-17. Haraldo regi Danorum mors per scelus illata a Sueno filio, qui post multa inique acta pœnitens prosperatur, Eduardi necem punit.
- DCDLXXXI. 1-3. Bulgari Græciam invadunt, S. Niconis opera propulsantur. 4. Diplomata Ottonis II imperatoris.
- DCDLXXXII. 1-5. S. Niconis Lacedemone propulsantis pestem egregia facta.
- DCDLXXXIII. 1-6. Expeditio Ottonis II in Calabriam contra Sarraenos: ubi multa de Vesuvio narrata a Petro Damiani. 7-13. Ottonis bellum infustum et causæ. 14, 15. Ottonis imperatoris obitus et sepulchrum. 16. Otto III coronatur. 17. Concilium Romæ in causa Giseleri ad sedem Magdeburgensem evecti. 18-24. S. Adalbertus Bohemos deserens Romam venit, monasticam vitam profitetur. 25. Ethelredus rex in Anglia res Ecclesiasticas invadit suo damno.
- DCDLXXXIV. 1, 2. Benedicti papæ obitus, Epitaphium et gesta. 3, 4. Joannes papa XIV. 5. Sodalitium sacerdo-

- tum Romæ pro suffragandis consodalibus defunctis. 6. Ottonis imperatoris et sororum pietas. 7, 8. Obitus SS. Wintoniensis et Roffensis episcoporum. 9. Obitus S. Edithæ virginis.
- DCDLXXXV. 1, 2. Joannes papa impie necatus a Bonifacio invasore. 3. Bonifacius antipapa moritur : legitimus papa Joannes XV creatur. 4. Quomodo pax Romæ reddita post Crescentii tyrannidem. 5, 6. Sub Ramiro et Veremundo regibus res Hispanicæ.
- DCDLXXXVI. 1, 2. Lothario regi Francorum defuncto filius Ludovicus succedit. 3. Manso abbas Casinensis indignus. 4. Terræ motus Constantinopoli.
- DCDLXXXVII. 1-3. Hugo Capetus, cujus genus vindicatur, ad regnum Francorum evehitur, extincto Ludovico Carolinorum postremo. 4-7. S. Niconis circa res Orientales prophetiæ, et ejusdem Acta cum Gregorio prætore.
- DCDLXXXVIII. 1. Adaldago succedit Libentius in sede Hamburgensi, et ipse laudatissimus. 2. Adaldagus junior episcopus Ripensis. 3. Dunstani Cantuariensis obitus.
- DCDLXXXIX. 1-8. S. Adalberti reditus Roma in suum episcopatum Pragensem, et ejus apostolatus in Ungaria, ubi baptizat Stephanum regem. 9. Theophane imperatrix Romam venit.
- DCDXC. 1-3. Per legationem Joannis papæ in Angliam pax conciliata. 4-6. S. Adalbertus Romam repetens monasterium S. Bonifacii incolit sanctis viris celebre. 7-13. Concilium Silvanectense in Gallia contra invasores Rhemensis civitatis.
- DCDXCI. 1-11. Contra Arnulphum Rhemensem episcopum agunt per legationes rex et episcopi cum Romano Pontifice : ubi de Gerberti malis artibus. 12, 13. Dux Polonorum per uxorem ad Christum conversus. 14-17. Capuæ principatum filii Pandulphi amittunt.
- DCDXCII. 1-8. Pseudosynodus Rhemensis, in qua Arnulphus inique depositus. 9-41. Assertiones Gerberti narrantis Acta pseudosynodi refutantur. 42-49. Episcopos schismaticos excommunicat Joannes papa, in quem proinde Gerbertus acriter blaterat. 50-61. Cætera commenta Gerberti exploduntur adversus Romanos Pontifices eorumque litteras decretales prolata. 62. S. Oswaldi obitus.
- DCDXCIII. 1-9. Synodus Romana in canonizatione S. Udalrici. 10. Incendia. 11. Obitus Maioli abbatis Cluniacensis.
- DCDXCIV. 1, 2. Legatio Hugonis regis Francorum ad papam pro rebus Rhemensibus.
- DCDXCV. 1-11. Concilium Rhemense, præsentem Leone legato pontificio, in quo restituitur Arnulphus expulso Gerberto. 12. Gerbertus ad Ottonem se confert, dat Epistolam reginæ. 13-16. In Manso-nem abbatem divina vindicta. 17-22. Sub Nicolao et Sissinnio patriarchis Constantinopolitanis quæ tractata fuerint.
- DCDXCVI. 1, 2. Gregorius V succedit Joanni. 3. Gerbertus creatus episcopus Ravennæ. 4. Otto imp. S. Romualdum Classensi cœnobio præficiendum curat. 5-10. Otto Romæ electum Pontificem tuetur, Crescentium post obsidionem de medio tollit. 11, 12. De aliis Crescentiis pietate insignitis 13-19. Quomodo habitus fuerit pseudopapa, et quid B. Nilus in hoc negotio egerit, Romam veniens. 20-26. Ecclesia in Gallia consecrata per legatum pseudopapæ corrui. 27-31. Otto coronatur imperator : S. Romualdus excipit apud Tibur, ejusque consiliis ipse et alii in melius convertuntur. 32-34. S. Romualdus petit monasterium Casinense cum sociis, inter quos Bonifacius. 35. De monachis in Basilica S. Pauli. 36, 37. Synodus Romæ in causa episcopi Pragensis. 38-49. Elucidata quæstio de jure electorum Germaniæ quoad Romanum imperium. 50-74. Quid in dicta Synodo contulerit electoribus Gregorius V, et quando septenarius eorum numerus constitutus. 72, 73. Ottonis imp. reditus in Germaniam.
- DCDXCVII. 1, 2. S. Adalberti martyrium in Prussia. 3-5. S. Bonifacii apostolatus ad Russios. 6, 7. Stephanus in Ungariæ regno succedit.
- DCDXCVIII. 1-4. Robertus rex Francorum, qui a conjugio illicito recedit. 5. Abbonis Floriacensis abbatis ad Pontificem Romanum legatio. 6. S. Odilonis virtus innotescit. 7. De statu Ecclesiæ Nortmannorum. 8-11. Hispanorum victoriæ in Arabes. 12. Tragicum sed justum judicium Ottonis imp. 13, 14. Otto imp. Montem Casinum et Beneventum petit. 15-17. Malachenus Constantinopoli injuste accusatus, dein liberatus et honoribus auctus. 18, 19. De S. Niconis effigie mirabiliter picta. 20. Uxor ducis Venetorum nimis molliter vivens turpiter moritur.
- DCDXCIX. 1-8. Mortuo Gregorio, Sylvester II papa creatur, de cujus ingenio et moribus multa asseruntur, multa refutantur. 9-11. Franco episcopus Wormatiensis pie obit Romæ. 12-14. Otto imp. post Synodum Romanam in Germaniam redit, res varias Ecclesiasticas statuit. 15, 16. Benedicti papæ V corpus Romam translatum. 17-19. Donatio facta Ecclesiæ Vercellensi. 20. Sergius patriarcha Constantinopolitanus.
- M. 1. Anacephalæosis annorum mille decursorum. 2-4. Quorundam hærellicorum conatus et infelix exitus. 5-9. Otto imp. corpus S. Adalberti Romam defert, Ecclesiam illi ædificat, in qua præter alia S. Bartholomæi corpus condit, Benevento translatum. 10, 11. Otto imp. congregitur cum

S. Nilo : Adelaidem aviam extinctam deflet. 12, 13. S. Stephanus titulo regis Hungarorum insignitur a Sede Apostolica. 14-18. In Polonia, occasione coronæ regiae, martyrium subeunt monachi. 19-22. De regno Ungariæ oblato Sedi Apostolicæ, et inde animadversiones. — Peroratio cum gratiarum actione. — Divini auxilii imploratio.

- MI. 1-8. Opinio de fine mundi inducta, ejusque origo et causæ. 9-11. Temporis ratio dilucidata ex Diplomate Ottonis imperatoris. 12, 13. Congressus Ottonis imp. cum S. Romualdo. 14-18. Otto imp. Romam veniens rebelles compescit, Ecclesiam S. Adalberti ornat reliquiis, et aliis piis operibus vacat. 19, 20. Miraculum de chlamyde Ottonis imp. donata S. Alexio. 21, 22. Romanorum civium florens religio.
- MII. 1, 2. Ottonis III imperatoris obitus. 3-10. Hugo marchio Etruriæ dux Romæ, ejusque memoria vindicata. 11-13. Judicium de Ottone, et ejus stemmatis extinctio. 14-16. Henricus in regno Germaniæ succedit Ottoni. 17-23. Ecclesia Hungarica, Stephano rege, mire aucta florescit. 24. Norimannorum in Italiam primus adventus.
- MIII. 1-8. Sylvester II papa moritur, de ejus doctrina, moribus rebusque gestis accurata inquisitio. 9, 10. Qui duo Joannis nomine summum Pontificatum tenuerint. 11. Episcopi Magdeburgensis per legatum Apostolicum consecratio. 12. Frequens ubique Ecclesiarum ædificatio. 13-17. Abbonis Floriacensis abbatis martyrium, et de ejus vita multa.
- MIV. 1. Synodi in Italia et Galliis. 2-4. Roberti regis mira erga episcopos devotio. 5-7. Primordia hæresis Berengarii. 8-11. Lues in Urbe.
- MV. 1. Henricus contra Longobardos in Italiam descendit, Papiæ coronatur. 2, 3. Henricus misericors erga rebelles. 4. Synodus Tremoniensis.
- MVI. 1-3. Synodus Francofordiensis, in qua Bambergensis cathedra erigitur. 4. Fames et pestis. 5. S. Elphegus episcopus Cantuariensis Romam venit, pallium accipit.
- MVII. 1. Henrico regi oraculum de imperio. 2-8. Fulbertus creatur episcopus Carnotensis, jurium et bonorum Ecclesiæ vindex acerrimus.
- MVIII. 1-3. Reliquiæ sanctorum pluribus in locis inventæ : de quo et de aliis Fulberti Epistolæ. 4, 5. S. Brunonis episcopi et sociorum martyrium in Russia. 6, 7. S. Bonifacii prædicatio et martyrium ibidem. 8. S. Romualdus martyrii cupidissimus. 9. S. Everardi innocentissimi cædes. 10. S. Reibernus apostolus in Russia.
- MIX. 1-3. Joanni XIX mortuo, sub quo Constantinopolitana Ecclesia Romanæ fuit conjuncta, succedit Sergius IV. 4-10. Templum Hierosolymorum Judæorum fraude destructum.
- MX. 1. Legatio episcopi Hamburgensis ad papam. 2. De oleo Romæ mire scaturiente. 3. Episcoporum bellantium pravus usus. 4. De Theresiæ Hispanæ nuptæ regi Arabum sanctis factis.
- MXI. 1. Consecratio Ecclesiæ Bambergensis et Synodus. 2. Tagmonis Magdeburgensis episcopi laudatissimi obitus. 3. Supplicium sacrilegi militis. 4-6. Danorum persecutio in Ecclesia Anglicana, et inde virtutum prodigia. 7. Terræ motus Constantinopoli.
- MXII. 1-5. Sergio IV succedit Benedictus VIII papa. 6. Schisma Gregorii adversus Benedictum, qui adit Henricum regem. 7-10. Slavorum defectio a fide christiana et multorum martyria. 11-13. S. Elphegi martyrium per Danos, qui proinde pœnas luunt. 14, 15. Lievizo archiepiscopus Bremensis, et S. Macharius patriarcha Antiochenus vita defuncti. 16-18. Concilium Legionense. 19. S. Colomanni martyrium.
- MXIII. 1. Henricus rex Germaniæ Romam venit. 3. Dux Poloniæ consuetus solvere censum Romanæ Ecclesiæ. 4-6. Benedictus papa præmissus occurrit Henrico venienti in urbem. 7, 8. Unsanus archiepiscopus Hamburgensis, pallio decoratus, virtutibus episcopalibus insignis.
- MXIV. 1. Henricus a Benedicto papa coronatur imperator. 2-4. Tumultus Romæ, et egregia imperatoris acta. 5. De Symbolo cantari Romæ cœpto. 6-13. Privilegium ab imperatore Ecclesiæ Romanæ collatum, et donatio Ecclesiæ Novariensi facta. 14-16. SS. Popponem et Odilonem maxime colit Henricus imp. 17, 18. Sventus rex Danorum divinitus dat pœnas.
- MXV. 1. Erigendis Ecclesiis et monasteriis Henricus imp. cum conjuge dant operam. 2, 3. Ecclesia Merseburgii erigitur, et donis auget imperator. 4. Ernesti ducis Alemanniæ publica peccatorum confessio et obitus.
- MXVI. 1. Sarraceni Romana littora invadentes debellantur. 2, 3. Canutus regnat in Anglia, ad quem scribit Fulbertus episcopus. 4-8. Simeon Armenus crimine hæresis infamatus, sanctitate conspicuus innotescit.
- MXVII. 1-5. Manichæi in Galliis exsurgentes et prava dogmata disseminantes Roberti regis pietate exterminantur. 6, 7. Scelera et portenta.

- MXVIII. 1. Clades Borealium Ecclesiarum. 2. Dilmari obitus et scripta. 3-6. Nortmanni in Italia Græcos debellant.
- MXIX. 1-4. Benedictus papa in Germaniam proficiscitur ad confirmandum episcopatum Bambergensem, et implorandum auxilium ab imperatore. 5-8. Diploma de restitutione facta monasterio S. Gregorii in Urbe. 9. Sergii patriarchæ obitus et Eustathii subrogatio.
- MX. 1-6. Inter Henricum imp. et S. Heribertum episcopum orta dissidia mirabiliter componuntur. 7. Polonorum Ecclesia locupletata et stabilita.
- MXI. 1. S. Heriberti archiepiscopi Coloniensis obitus. 2. Henricus imp. sollicitus de expiando delicto.
- MXII. 1-4. Henricus imp. veniens in Italiam contra Græcos congreditur cum S. Romualdo. 5-8. Progressus expeditionis Henrici in Græcos pietate illustratus. 9-15. Henricus imp. in monasterio Casinensi suæ erga S. Benedictum devotionis fructum recipit. 16. S. Odilo in eodem monasterio. 17. Poloni Christo rebelles per regem Boleslaum ad bonam frugem reducti. 18. Concilium Salegunstadiense. 19. Obitus S. Berwardi. 20-25. Guido Aretinus artis musicæ peritus innotescit, ejusque liber cui nomen Micrologus.
- MXIII. 1. Reliquiæ sanctorum donatæ monasterio Casinensi. 2-4. Congressus Henrici imperatoris cum Roberto rege. 5, 6. Concilium Moguntinum, quod illustrat S. Gothardus. 7. Obitus S. Hartuici.
- MXIV. 1-3. Obitus Benedicti papæ, et de eo visio. 4-7. De Joannis papæ intrusione, et legatione Ecclesiæ Constantinopolitanæ præsumptis dici universalem. 8-11. Henrici imp. obitus sanctitate fulgentis una cum uxore Chunegunda. 12-14. Conradi in regno successoris origo et mores.
- MXV. 1. S. Chunegundis vitam monasticam proficitur. 2, 3. Guillelmus Aquitanie dux res Italiæ tentat et imperium. 4. Inventio capitis S. Joannis Baptistæ. 5. Obitus Basilii imp. Orientalis. 6. Obitus Boleslai Polonorum regis.
- MXVI. 1-5. Conradus rex convenit S. Burchardum, ejus morituri oratio et virtutes. 6. Conrado regi Romam venienti occurrit Joannes papa.
- MXVII. 1. Coronatio Conradi imperatoris. 2-7. Canuti Angliæ regis piissimi Epistola. 8-12. De falsis reliquiis impia nundinatio et portenta. 13. Obitus S. Romualdi. 14, 15. De Alphonso V in Hispania et Garsia rege Vasconum.
- MXVIII. 1, 2. Hugone Roberti regis filio defuncto, orta dissidia. 3-6. Discordiæ sedandæ vacat Fulbertus, qui sanctitate insignis moritur. 7-10. S. Olari regis Norwegiæ et Ulfridi episcopi martyrium.
- MXIX. 1-5. Dedicatio Basilicæ Aurelianensis in honorem S. Aniani, ejus Robertus rex fuit studiosissimus. 6-16. Concilium Lemovicense : ubi multa de elevatione corporis S. Martialis.
- MX. 1, 2. Bellum Conradi in Hungaros irritum redditur. 3, 4. S. Emericus S. Stephani filius moritur. 5. Romani imperatoris Orientalis res pie gestæ. 6-25. De fundatione monasteriorum S. Dominici et S. Sylvestri in agro Sorano et Casæmarii, ubi multa ad hæc spectantia.
- MXI. 1. Discordia in aula regis Roberti invalescit. 2. Obitus S. Dominici abbatis Sorani. 3. Imago S. Mariæ in Blachernis inventa.
- MXII. 1-3. De apostolatu S. Martialis controversia. 4. Joannis papæ concessio monachis Leirensibus facta.
- MXIII. 1-2. Conradus imp. iterum in Italia. 3-8. Joannes XX papa moritur, cui Benedictus IX valde juvenis ob factionem comitis Tusculani subrogatur. 9-14. Roberti regis obitus, virtutes et res pie gestæ, cui succedit Henricus. 15. Guillelmi abbatis obitus.
- MXIV. 1-7. Conciliorum frequentia in Gallia, in quibus plura statuta quoad disciplinam. 8-26. Universæ Actiones Concilii Lemovicensis. 27. S. Odilo recusat archiepiscopatum Lugdunensem. 28-31. Romano imperatore occiso, Michael per adulteram Zoem ad imperium evehitur. 32. De Ecclesiis Russa et Polona.
- MXV. 1-7. In Berengarium hæreticum emergentem pugnat Henricus rex opera Durandi episcopi.
- MXVI. 1, 2. Conradus imp. in Italia. 3. Clades ingens Polonorum Ecclesiæ. 4, 5. Contra Alexium patriarcham insidiæ.
- MXVII. 1, 2. Benedictus papa Cremonæ coronat Conradum imperatorem. 3. Canonizatio S. Simeonis. 4. Res Hispanicæ.
- MXVIII. 1-10. Conradus imp. Romam venit ad tyrannidem Pandulphi principis Capuani tollendam. 11-14. Divina ultio in Pandulphum. 15. Polonorum Ecclesia valde agitur. 16-18. S. Stephani regis Ungariæ obitus sanctissimus. 19-20. Orientales per famem et per Sarracenos vexantur.
- MXIX. 1. Conrado imp. mortuo succedit filius Henricus. 2. Michael imp. Orientalis a dæmone torquetur. 3-5. Legatio Polonorum ad Benedictum papam.

- MXL. 1. S. Chunegundis Augustæ obitus. 2. S. Jacobus pugnat contra Mauros. 3. Sarraceni divinitus superati.
- MXLI. 1. Michaelis imperatoris obitus. 2. Nortmanni potiuntur Apulia. 3-11. Casimirus ex monacho Cluniacensi rex Poloniæ coronatur, facta ad id potestate per Romanum Pontificem.
- MXLII. 1, 2. Uvo tyrannus Hungaricam perturbat Ecclesiam, resistente ei S. Gerardo episcopo. 3. Constantinus Monomachus imperator.
- MXLIII. 1, 2. Pallium missum Hamburgensi episcopo. 3. S. Eduardus rex Angliæ. 3. Conventus Constantiensis. 4. Michael Cerularius patriarcha Constantinopolitanus.
- MXLIV. 1, 2. Schisma in Romana Ecclesia tribus pseudopontificibus laborante. 3. Naufragium Gradensis Ecclesiæ. 4-11. Cedentibus pseudopapis Gregorius VI eligitur, cujus legitimitas propugnatur, et ad quem dat litteras Petrus Damiani. 12-16. Gregorii papæ inclytæ virtutes et optimæ res gestæ.
- MXLV. 1, 2. Legatio Casimiri Poloniæ regis ad Pontificem Romanum solutura obolum S. Petri. 3. S. Guntheri eremitæ obitus. 4-7. Nortmanni a monachis opera S. Benedicti devincuntur.

ANNALES ECCLESIASTICI.

JOANNIS XI ANNUS 4. — CHRISTI 934.

1. *Joannes papa Alberici arbitrio obnoxius.* — Annus Redemptoris nongentesimus trigesimus quartus, Indictione septima incipit, cum opera Alberici Romæ tyrannidem exercentis, grave Ecclesiæ Romanæ inflictum est vulnus, cogente ipso Joannem papam concedere inconcessa patriarchæ Constantinop. Quænam ista fuerint, a Luitprando in relatione suæ legationis ita narratur : « Sed quid hoc commemorem ? cum ipsa Constantinopolitana Ecclesia nostræ sanctæ Catholicæ atque Apostolicæ Ecclesiæ Romanæ merito sit subjecta. Scimus, imo videmus Constantinopolitanum episcopum pallio non uti, nisi sancti patris nostri permissu. Verum cum impiissimus Albericus, quem non stillatim cupiditas, sed velut torrens impleverat, Romanam civitatem sibi usurparet, dominumque Apostolicum quasi servum proprium in conclavi teneret : Romanus imperator filium suum Theophylactum eunuchum patriarcham constituit. Cumque eum Alberici cupiditas non lateret, missis eo muneribus satis magnis, effecit, ut ex papæ nomine Theophylacto patriarchæ litteræ mitterentur, quarum auctoritate tum ipse, tum successores absque papæ permissu palliis uterentur. Ex quo turpi commercio vituperandus mos inolevit, ut non solum patriarchæ, sed etiam episcopi totius Græciæ palliis utantur. Quod quam absurdum sit, censere opus non est ». Hæc Luitprandus. Et quidem quæ

conversa sunt in magnum detrimentum etiam ipsius Constantinopolitanæ Ecclesiæ, ista indebita accipientis, et abalienantis se magis ea occasione a sinu matris.

2. *Prodigia in Galliis.* — Hoc eodem anno diversis in locis Galliarum miranda contigisse Frodoardus narrat, atque in primis : « Rhemis, inquit, in Ecclesia beatæ Genitricis Dei Mariæ, sollemnitate Annuntiationis Domini, dum sacra missarum ab Artaldo præsule inibi celebrarentur, quidam juvenis contractis poplitum nervis repere solitus, repente resolutis extensisque genuum crurumque compagibus assurgit, retentatoque gressu, jam diu oblita recepit vestigia. Item in Ecclesia S. Hilarii ante portam Martis, cæcus quidam nomine Paulus illuminatur, admonitus prius in somniis, ut ad ipsum locum veniret, ibique lumen recipere deberet ». Et inferius : « Eodem anno diaconus quidam Viredunensis, nomine Adelmanus languore depressus, spiritum visus est amisisse. Sed antequam feretro imponeretur, reversus, ita surrexit validus, ut sibi videretur nihil ægritudinis fuisse perpessus. Qui se diversa suppliciorum vel refrigerii loca vidisse testatur, seque loco pœnali deputatum ; Dei vero Genitricis precibus, beato quoque Martino intercedente, ad agendam pœnitentiam præsentis vitæ redditum ». Hæc omnia Frodoardus hoc anno.

Anno periodi Græco-Romanæ 6427. — Anno Æræ Hispan. 972. — Anno Hegiræ 323, inchoato die 11 Decemb., Fer. 5. — Jesu Christi 934.

— Joannis XI papæ 4. — Constantini VIII imp. 23. cum Romano imp.

1. *Victoria Henrici Germaniæ regis de Hungaris.* — Continuator Reginonis ad an. DCDXXXIV ait : « Henricus rex (sc. Germaniæ) Hungaros multa cæde prostravit, pluresque ex eis comprehendit. Eodem anno Slavos, qui Uncrani vocantur, hostiliter invasit et vicit, sibi tributarios fecit ». Hos Slavos, Witichindus lib. 1 *Uchros* appellat, et cladem Hungarorum fuse narrat. Cum Henricus Germaniæ rex Hungarorum legatos, qui consueva munera deposcebant, sine honore dimisisset, adeo horum exacerbati animi, ut confestim bipartito agmine in Saxoniam irrumpere conarentur. Qui ab Occidente aditum moliebantur, a Thuringis et Saxonibus, cum prima congressione plerosque duces prostravissent, in fugam conjecti, fame, frigore, aut ferro misere perierunt. Acceptæ cladis fama etiam alterum agmen terruit, præsertim cum Henrici regis adventus nuntiaretur. Omisso ergo pugnæ consilio, recedere statuerant, et excitatis crebris ignibus palantes per agros socios ad signa revocaverant, cum Henricus festinato itinere fugam meditantibus suorum aciem objecit. Sed nec sic adduci potuere, ut prælio decernerent. Præcipiti pæne omnes cursu elapsi, quos solito velociores timor reddidit : pauci e tanta multitudinis cæsi, aut capti. Castra tamen occupata, et integri captivorum greges in libertatem asserti. « Rex vero victor reversus, modis omnibus gratiarum actiones divino honori, ut dignum erat, solvebat pro victoria de hostibus sibi divinitus concessa. Tributumque quod hostibus dare consuevit, divino cultui

mancipavit, et largitionibus pauperum deservire constituit. Deinde pater patriæ, rerum dominus, imperatorque ab exercitu appellatus, famam potentiæ virtutisque cunctis gentibus et regibus longe lateque diffudit », inquit Witichindus.

2. *Hungarorum irruptio in imperium Orient.* — Continuator anonymus Theophanis in Romano Lacapeno num. 37 scribit : « Turcorum prima expeditio adversus Romanos contigit mense Aprili, Indictione VII, (ideoque hoc Christi anno). Ili ad Urbem usque excurrentes, cunctos per Thraciam obvios præda abegerunt. Missus itaque Theophanes patricius protovestiarius, imperiique administer ac princeps senatus, ut cum eis pacem componeret captivosque reciperet. Porro Theophanes admiranda prudentia ac sagacitate illius usus, ex voto cuncta confecit ; multamque ex illis eo nomine laudem ac admirationem reportavit. Tunc quoque Romanus imp. quanta magnificentia ac humanitate præstaret, ostendit ; nullis sumptibus parcens, solum ut liberarentur captivi ». Nominè Turcorum *Hungaros* historici Byzantini intelligunt.

3. *Moritur Mahadis califa Africæ.* — Anno Hegiræ CCCXXII vita excessit *Abdalla Mahadis*, qui rerum potitus est Cairaiwani, cum imperasset annos viginti quatuor et aliquot menses. Post ejus mortem *Bianrilla* ejus filius, califa Africæ creatus est, teste Elmacino lib. 3 Hist. Sarac. cap. 1. Porro *Mahadis* primus Africæ califa fuit, et Saracenorum potentia novi hujus califatus institutione non parum infirmata.

JOANNIS XI ANNUS 5. — CHRISTI 935.

1. *Synodus Rhemis.* — Annus Redemptoris nongentesimus trigesimus quintus, Indictione octava sequitur, quo Rhemis apud S. Macram Synodus celebratur præsente Artaldo archiepiscopo

Rhemensi, in qua prædones et Ecclesiasticarum rerum invasores ad correctionem vocantur, ut Frodoardus testatur. De ea vero nihil præterea.

Anno periodi Græco-Romanæ 6428. — Anno Æræ Hispan. 973. — Anno Hegiræ 324, inchoato die 30 Novemb., Fer. 2. — Jesu Christi 935.

— Joannis XI papæ 5. — Constantini VIII imp. 24, cum Romano imp.

1. *Floret S. Elfegus episc. Wintoniensis.* — « Anno dcdxxxv religiosus monachus Elfegus, cognomento Calvus, beati Dunstani propinquus, suscepit episcopatum Wintoniensis Ecclesiæ », inquit Simeon Dunelmensis. Inter hujus sancti antistitis præcipua facta, illud memorandum, quod Dunstanum propinquum suum, postea archiepiscopum Cantuariensem et Ecclesiæ Anglicanæ magnum sidus, ad professionem monasticam adduxit. Factum illud commemorat Osbernus monachus in Vita sancti Dunstani recitata a Mabillonio Sæc. v Benedict. Osbernus, postquam narravit, *Dunstanum* traditum fuisse regi Athalstano, ab Athelmo archiepiscopo Cantuariensi, et quod unice a rege diligeretur, aliquos invidos conflictu mendacio ejus famam apud regem læsisse, ait : « Profectus inde cognatum pontificem adiit Elfegum, qui tunc temporis Wentanæ præsidens Ecclesiæ vitam virtutibus decorabat : a quo frequenti supplicatione rogatus, ut monachum indueret, quatenus qui Angelicæ conversationis initia haberet, perseverantiam in habitu demonstraret. Respondit ille, excellentioris gratiæ esse, qui in sæculo consenuit, et tamen quæ monacho digna sunt fecit, eo qui se monasterio dedit, nec

quicquam aliud præterquam quod sibi statutum est, post hæc facere potuit ». Subdit Osbertus, cum episcopus per singulos dies eidem consilio insisteret, et Dunstanus aut veris aut verisimillimis rationibus insistentem differret, gravissimam febrem Dunstanum invasisse, et cum ex insperato revaluisset, « confestim accito ad se episcopo, postulat sibi dilatæ religionis benedictionem dari. Episcopus immensa lætitia pro salute simul et conversione juvenis perfusus, celeriter illum monachali et sacerdotali gratia promovit, attitulans Ecclesiæ B. Mariæ Virginis, cui eum ab initio parentum suorum sponsio dicavit ». Ubi obiter notabis, monachos sine titulis ordinatos non fuisse, et inter titulos monasteria computata. Titulum enim paupertatis religiosi *Mendicantes* invexere.

2. *Monachismus in Anglia per S. Dunstanum restitutus.* — Cum *Dunstanus* in Angliæ lucem prodiiit, inquit ibidem Mabillonius in Observationibus præviis num. 7, usque adeo monachismus defecerat a tempore Danorum, ut vix in paucissimis cænobiis vita monastica reliqua esset : « Non dum in Anglia », inquit Osbernus num. 6, « communis vitæ ratio colebatur, non usus deserendi proprias voluntates hominibus affectabatur. Abbatis

nomen vix quisquam audierat, conventus monachorum vix quisquam satis noverat : sed cui forte id voluntatis erat, in peregrinam vellet transigere vitam, is modo solus, modo paucis ejusdem propositi comitatus, patrios fines egrediebatur ». Perseverabat tamen quibusdam in locis monastici status nomen, nempe (ut Crulandense monasterium, aliaque omittam) Cantuariæ in Ecclesia cathedrali, quod diserte attestatur Gervasius ejus loci monachus, qui relatis Osberni verbis Cantuariensem Ecclesiam excipit. Sed ita eo in loco deformata erat religio, ut monachi *more comitum potius, quam monachorum* ibi viverent, teste Osberto in miraculis S. Dunstani. Cætera pæne loca occupabant clerici vitæ solutioris. De monasterio Malmesburiensi testatur Willelmus loci monachus in lib. 2 de Reg. cap. 7. « Ipsum Dunstanum monachorum

principem in Flandriam propellit. Ea tempestate facies monachorum fœda et miserabilis erat. Nam et Malmesburiense cœnobium, plusquam ducentis septuaginta annis a monachis inhabitatum, clericorum stabulum fecit ». Non tulit hanc cladem Dunstanus, quin fugientem religionem in claustra revocavit : « Aucta est religio per Angliam in tantum, ut quadraginta et octo monasteria monachis vel sanctimonialibus instituerentur, cooperantibus B. Dunstano in hoc viris venerabilibus, Oswaldo videlicet, qui primo Wigorniensis, postea fuit episcopus Eboracensis, et Athelwoldo episcopo Wintoniensi », inquit Osbernus, quæ referre juvat, ut quantum *Elfegus* monasteriis restituendis in Anglia contulerit, manifestum fiat. De eo infra rursus sermo erit.

LEONIS VII ANNUS 1. — CHRISTI 936.

1. *Henrici regis Germaniæ obitus, et Ottonis successio.* — Annus Redemptoris nongentesimus trigesimus sextus, Indictione nona, quo moritur Christianæ religionis decus Henricus rex Germaniæ, relicto regno filio suo Ottoni, patri pietate atque fortitudine militari non impari. Quod ad tempus spectat, id hoc anno contigisse, testis est hujus temporis scriptor Frodoardus. Sed et Ditmarus etiam hujus sæculi scriptor testatur, eum hoc anno obiisse, sexto nonas Julii, anno suæ ætatis sexagesimo, regni decimo sexto. De ejus vero obitu ita Witichindus Saxo¹ : « Perdomitis itaque cunctis circumquaque gentibus, postremo Romam proficisci statuit, sed infirmitate correptus, iter intermisit. Cumque se jam gravari morbo sensisset, convocato omni populo, designavit filium suum Ottonem regem, etc. »

2. Porro ut qui de religione Christiana bene meritus est Henricus, commendatur ab omnibus; qui et² asseritur, duas novas sedes crexisse, alteram in Valletfleve in terra Luneburgensi, cui et primum episcopum Marcum præficiendum curavit, virum sanctitate vitæ conspicuum, miraculis cla-

rum; alterum vero episcopatum in oppido Misna ad Albim fluvium constituit; aliaque monasteria ædificavit; et ubi multipliciter pietatis post se egregia monumenta reliquit, a Deo ad requiem vocatus est, relicta conjuge valde pia Mathilda nomine, de qua isla¹ Luitprandus, dum agit de ejusdem Henrici sepulcro : « Henrici corpus in Saxoniam deportatum in nobilissimarum ac religiosissimarum monasterio puellarum, quod in ipsius regis prædio, vocabulo Quintelingaburch, situm liquet, in Ecclesia cum immensa est veneratione repositum. Ubi et venerabilis ejus conjux, regniq[ue] consors ex eadem gente, nomine Mathildis, ultra omnes quas viderim et audierim matronas, pro delictorum expiatione celebre exequiarum officium, vivam Deo hostiam offerre non desinit ». Addit Ditmarus, per eundem Henricum Causum Daniæ regem ad Christi fidem conversum, et Danos ipsos ab immolatione hominum per eum revocatos : post obitum vero Mathildem conjugem multis diversisque sanctis operibus ejus animam Deo commendasse. Hæc ipse libro primo. Idem addit, quod defuncto Henrico, Otto ejus filius inun-

¹ Witich. l. I. in fine. — ² Crant. in Metrop. l. III. c. 11.

¹ Luitpr. l. IV. c. 7.

ctus est Aquisgrani ab Hildeberto archiepiscopo Moguntino, habita licentia a Wigfrido archiepiscopo Coloniensi, in cujus diœcesi Aquisgranum esset.

3. *Rodulpho mortuo, Ludovicus Francorum rex ungitur.*— Quo pariter anno cogitur conventus episcoporum et procerum Lauduni, ubi recipitur et rex inungitur Francorum Ludovicus filius Caroli Simplicis, in Anglia hactenus conservatus, ob invasores regni tyrannos. De his enim hoc anno Frodoardus his verbis, ubi de Rodulphi regis obitu enarrasset, quem hoc pariter anno contigisse tradit : « Hugo comes trans mare mittit pro accersendo ad apicem regni suscipiendum Ludovico Caroli filio, quem rex Ethelstannus avunculus ipsius, accepto prius iurejurando a Francorum legatis, in Franciam cum quibusdam episcopis et aliis fidelibus suis dirigit. Cui et Hugo et cæteri proceres Francorum obviam profecti, mox navim ingresso in ipsis littoris arenis apud Bononiam sese committunt. Deindeque Laudunum ab ipsis deductus, et regali benedictione ditatus ungitur atque coronatur a domino Artaldo archiepiscopo Rhemensis, præsentibus regni principibus cum episcopis viginti et amplius ». Hæc ipse. Sicque ad progeniem Caroli Magni per Ludovicum regnum Francorum revertitur; sed quandin manserit, quæ suis locis dicuntur inferius declarabunt; nimirum per successores usque ad annum Redemptoris nongentesimum octogesimum septimum. Jam reliqua anni hujus videamus.

4. *Joanni papæ mortuo subrogatur Leo VII.*— Eodem quoque anno moritur intrusus papa Joannes, Sedis Apostolicæ potius inquinator, quam rector, de quo Frodoardus hujus temporis scriptor : « Joanne papa fratre Alberici defuncto, Leo quidam Dei servus Romæ papa constituitur ». Hæc ipse, secundum eorum sententiam, qui hunc sedisse annos quatuor et decem menses tradunt, cum hunc ad annum sextum pervenisse, ex Frodoardi testificatione hæc spectantis opus sit affirmare.

5. Addit his ista idem Frodoardus eodem anno : « Hugo Italiæ rex Romam nisus capere, afflicto suo exercitu fame et equorum interitu, pacta tandem pace cum Alberico, dans ei filiam suam conjugem, ab obsidione desistit. Repertisque quibusdam fratris sui Bosonis contra se, ut fertur, insidiis, eundem fratrem suum dolo capit atque in custodiam mittit ». At de Hugonis regis Romam adventu, et pace cum Alberico contracta Luitprandus¹ pluribus agit. Fuisse autem sequestrem hujus componendæ pacis Odonem abbatem a Leone papa vocatum, paulo inferius dicturi sumus. Subjicit vero ista :

6. « Per idem vero tempus in Jannensi urbe, quæ est in Alpibus Cocciis octingentis stadiis a Papia distans, super Africanum mare constituta, fons sanguinis largissime fluxit, subsequituram

cunctis patenter ruinam insinuans. Eo quippe anno Pœni cum multitudine classium illo perveniunt, civibusque ignorantibus civitatem ingrediuntur, cunctos, pueris exceptis ac mulieribus, trucidantes, cunctosque civitatis et Ecclesiarum Dei thesauros navibus imponentes, in Africam sunt reversi ». Hæc de his ipse.

7. Sed et quod novum immensum malum Dei Ecclesiam deturpare tunc cœperit, præter alia multa, quibus jam sacris silentibus omnino legibus, hoc deplorato sæculo est mirum in modum afflictata, sic narrare pergit : « Hoc in tempore Manasses Arelatensis civitatis episcopus, agnita regis Hugonis potentia, a cujus ipse sanguine affinitatis lineam traxerat, deserta commissa sibi Ecclesia ambitionis spiritu, multas violaturus, imo laceraturus Ecclesias, Italiam petiit. Hugo autem rex se regnum securius obtinere sperans, si affinitate conjunctis regni officia largiretur, contra jus fasque Veronensem, Tridentinam, Mantuanam commendavit illi, seu (quod verius est) in escam dedit Ecclesias ». Qui nec his contentus, Ecclesiam Mediolanensem invasit, ut idem auctor inferius pluribus narrat. Sed, ut aliquo velamento, tanquam ficus foliis, peccatum obtegeret nefarius homo, id se agere exemplo tradebat principis Apostolorum, qui Antiochenam, Romanam et Alexandrinam possedisset Ecclesias. Hæc ipsum rude et inconcinne, temereque garrientem idem auctor Luitprandus, acri (ut par erat) invectiva exagitavit. Qui de eodem homine, Dei ejusque legum contemptore addit, neque his acquievisse, sed Marchiam Tridentinam ab affine rege obtinuisse, atque armis indutum in ejusdem regis exercitu militasse.

8. *Unni sanctus archiepiscopus Hamburgensis et ejus dignus successor Adaldagus.*— Hoc item anno ex hac vita migrat sanctissimus vir ille, decus Saxoniae, Unni Hamburgensis archiepiscopus, potens opere et sermone, de quo plura superius. Testatur id Adam¹ antiquus chronographus, de quo ait : « Perfecto autem legationis suæ ministerio, cum tandem redire disponeret, Evangelista Dei apud Bircam ægritudine correptus ibidem fessi corporis tabernaculum deposuit, anima vero cum multo animarum (angelorum) triumpho stipata, cælestis patriæ Capitolium semper lætatura conscendit. Tunc discipuli pontificis exsequias ejus cum fletu et gaudio procurantes, cætera quidem membra sepelierunt eodem loco vel oppido Birca, solum caput reportantes Bremam, quod decenti honore condiderunt in Ecclesia sancti Petri coram altari. Obiit autem peracto boni certaminis cursu in Scythia (Suetia), ut scribitur, anno Dominicæ Incarnat. nongentesimo trigesimo sexto, Indictione nona, circa medium Septembris, hic est annus Ottonis Magni primus, a transitu S. Willehardi primi episcopi Bremensis centesimus quadragesimus octavus ». Ad hæc autem idem auctor adjicit hanc

¹ Luitpr. l. iv. c. 1. 2. 3.

¹ Adam. l. i. c. ult.

apostrophem : « Eia vos, episcopi, qui sedentes, gloriæ, lucri, ventris, et somni breves delicias in primo episcopalis officii loco ponitis : respicite, inquam, istum pauperem et modicum sæculi, imo laudabilem magnūque sacerdotem Christi, qui nuper tam nobili sine coronatus, exemplum dedit posteris, nulla temporum vel locorum asperitate vestram pigritiam excusari posse : cum per tanta pericula maris et terræ feroces Aquilonis populos ille pertransiens, ministerium legationis suæ tanto impleret studio, ut in ultimis terræ finibus expirans, animam suam pro Christo poneret ». Hæc ipse juste digneque, qui et de ejus in episcopatu non indigno successore ista subjicit¹ :

9. « Adaldagus archiepiscopus Unni successor, sedit annos quinquaginta tres. Iste est, qui nobis (ut dicitur) Rempub. restituit genere illustris, decorus specie, morumque probitate speciosior, a choro sumptus est Hiltenshermensi, consanguineus et discipulus B. Adalvardi Ferdensis episcopi, cujus tunc vita probata, fama illæsa, et fides in palatio erat cognitissima. Quem ferunt etiam doctrina et miraculis celebrem Slavorum populis eo tempore prædicasse, quo in Scythas legatus extitit : ejus nimirum opera et testimonio commendatus in curia Adaldagus ferulam pastorem suscepit a magno Ottone, pallium sumpsit archiepiscopale a papa Leone septimo, manus impositionem, sicut prædecessores ejus, a Moguntino præsule ». Hæc Adam.

10. *Odo abbas Cluniacensis Romam vocatus a Leone papa egregius factis clarescit.* — Hoc eodem anno contigit Odonem abbatem Cluniacensem Romam proficisci, vocatum a Leone Pontifice ob instaurationem monasterii S. Pauli, cum in via visitans servum Dei Adhegium cognovit de unctione Ludovici Francorum regis, id ipsi revelante S. Martino. Scribit hæc omnia Joannes ejusdem Odonis discipulus, qui eidem Odoni adhæsit, ut ipsemet testatur² in Vita ipsius Odonis, quam post obitum scripsit, ubi hæc in ejus exordio : « Institutus primus abbas Cluniacensis, Franciæ, Aquitaniæ, Hispanorum et Romanæ Urbis cœnobiorum dux fuit. Cumque Romam venisset, me miserum terrenis implicatum nexibus offendit, motusque misericordia, cum me ad summum traxit rete, ad Ticinense S. Petri monasterium perduxit, etc. » Visum est Leoni Pontifici sanctum virum magnique nominis e Galliis Romam accersire, ut collapsam in Urbe in monasteriis disciplinam monasticam restitueret, inciperetque a monasterio famosissimo S. Pauli.

11. At non ea tantum causa Romam vocatur a Leone papa Odo, sed etiam ut pacis componendæ inter Hugonem regem Italiæ, et Albericum Romæ principem sequester esset. Hoc etenim anno Hugonem venisse cum exercitu ad expugnandam Urbem, testis est Frodoardus in Chronico, et Luitprandus,

de quibus nuper est dictum. Quod autem spectat ad legationem Odonis, cum Romam ad has componendas discordias a Leone Romano Pontifice vocatus esset, hæc Joannes ejus discipulus et peregrinationis comes¹ : « Sub idem tempus a Leone summo Pontifice in Italiam missi sumus pacis componendæ causa inter Hugonem Longobardorum Italiæ regem, et Albericum Romanæ Urbis principem ». Et inferius de obsidione Urbis : « Cum Romuleam Urbem propter inimicitias quæ erant cum Alberico principe, Hugo rex, cujus ante meminimus, obsideret, vir sanctus et intra et extra Urbem discurrens, hortabatur eos ad mutuam pacem, regisque furorem sedare, et Urbem obsidione liberare connitebatur ». Quod, ut dictum est, eo modo transactum est fœdere nuptiarum, data filia Hugonis regis Alda nomine in conjugem Alberico, ut Luitprandus testatur. Recenset idem Joannes complures sancti viri tum in via, tum in Urbe, præclare res gestas, quibus ingentis charitatis atque humilitatis specimen haud vulgare dedit, e quibus sat erit hic unum vel alterum exemplum attexere.

12. « Interim accidit, inquit, ut euntem illum juxta beati Andreæ Apostoli monasterium, quod Clivum Scauri vocant, rusticus quidam cum propter aquæ lagunculam eum occidere meditaretur (ut enim Scriptura dicit : Qui ambulat simpliciter, ambulat confidenter) ille more suo nulli nocens, nihilque mali suspicans, demisso gradiebatur capite. In tantum enim ille studiosus erat observandæ regulæ, ut longo usu, ubicumque esset, sive stans, sive ambulans, aut sedens, semper inclinato esset capite, fixoque in terram vultu, quod quidem in causa fuit, ut a quibusdam, tempore conversionis suæ, per jocum appellatus sit fossorius. Cum autem fossor ille caput ejus ictu appeteret, quotquot juxta illam viam erant, clamoribus editis ejus manus cohibuerunt. At pater mitissimus nescio quos denarios mutuo acceptos ei dono dedit, beneficium pro maleficio reddens. Ubi vero princeps memoratus id comperit Albericus, manus illi amputare voluit, sed vir pius admodum obnixè pro illo deprecans misero veniam impetravit ». Hæc tunc sanctus Odo. Sed pergit auctor :

13. « Et ad multorum, et ad vestras aures pervenit, quid cuidam furi pater noster Odo, non ita pridem Romam veniens fecerit, quod tamen mihi annotare libet, non tam ut vestræ industriæ innotescat, quam ne in oblivionem abeat, si non sit litteris commendatum. Permanente igitur illo intra Urbem orationis causa, visum omnibus fuit, ut frater noster Godefridus in agrum mitteretur equorum pastoribus invigilaturus. Eadem nocte somno oppressis pastoribus, et Godefrido in precibus vigilante, fur affuit, raptumque conscendit equum, et fugam iniit. Videbat id quidem Godefridus, sed equum perdere maluit, quam frangere silentium

¹ Adam. l. II. c. 1. — ² Joan. in Odone l. 1. apud Sur. tom. VI. die x Novemb.

¹ Joan. in Odone l. II. apud Sur. tom. VI. die XVIII Novemb.

ex regula constitutum, quod si rupisset, fur ille mox relicto equo, in pedes (nempe in fugam) se coniecisset. Attamen unum e pastoribus excitans, id quod fiebat, signis ei indicabat. Nocte exacta, mane videns furem non procul remotum cum equo consistere. Itaque comprehensum illum, injectis vinculis ad patrem Odonem remittunt. Is vero mox quinque solidos argenteos ei dari jubet, dicens : Fas non est absque justa mercede dimittere, qui tota nocte magnos esset perpressus labores.

Postea vero, cum, Deo trahente, monasticum essem amplexus institutum, et deinde fratres me esse suum priorem voluissent, sæpe illum furem mihi indicabant, et quod filius esset molendinarii nostri, qui quoties pater ejus venisset contra ipsorum voluntatem, solidos illos repetere me cgebant ». Hæc et alia plura Joannes, qui ab eodem Odone, restituto monasterio S. Pauli, eidem præfectus est abbas. Quando vero iterum contigit Romam reverti post biennium, suo loco dicturi sumus.

ANNO periodi Græco-Romanæ 6429. — Anno Æræ Hispan. 974. — Anno Hegiræ 325, inchoato die 19 Novemb., Fer. 7. — Jesu Christi 936.

— Leonis VII papæ 1. — Constantini VIII imp. 25. cum Romano imp.

1. *Moritur Henricus Germaniæ rex.* — Ad num. 1 et 2. « Henricus rex (sc. Germaniæ) præcipuus pacis sectator, strenuusque paganorum insecutor, post plures fortiter et viriliter aclas victorias, dilatatis undique sui regni terminis, VI nonas Julii diem clausit extremum, cui filius suus Otto consensu primorum regni successor eligitur », inquit continuator Reginonis ad hunc Christi annum. Eundem annum signant Marianus Scotus et Hermannus Contractus, præter Sigebertum qui hanc mortem in annum sequentem perperam differt; sed cum Flodoardus in Chronico, qui hoc tempore vixit, Henricum hoc anno denatum esse asserat, et Ditmarus lib. 1, eundem annum ac *diem sextum nonas Julii* etiam habeat, annus emortualis Henrici, sicuti et dies in dubium non videntur revocandi. Litem Diplomata ejus dirimerent, sed nunc ad manum non sunt, et ex iis paucissima supersunt. Auctor anonymus, qui jussu S. Henrici imp. Vitam beatæ Mathildis Henrici Germaniæ regis uxoris elucubravit, num. 7, de utriusque virtutibus ac liberis ait : « Deus omnipotens sibi servientes nunquam derelinquens, clementer inspexit bona opera regis Henrici et beatissimæ Mathildis, atque illis multiplicavit excellentiam nobilissimæ prolis, etc. Otto præclarus ante regalem dignitatem procreatus, natu fuerat maximus, forma insignis, et moribus illustris. Henricus autem in regali solio natus junior fuit annis, sed haud inferior excellentia probitatis. Huic nimirum tanta inerat pulchritudo, ut tunc temporis vix posset alicui comparari viro. In fiducia armis patri fuerat consimilis, in omni autem tolerantia adversitatis caute observabat vestigia inclytæ genitricis, et propter hæc specialiter dilectus fuit matri; quæ, quasi esset unicus illius,

confovens eum in omnibus deliciis, cæteris in amore præposuit filiis, atque desideravit ipsum regno potiri post obitum inclyti regis Henrici, si permissu Dei voluntas illius posset adimpleri. Hinc et venit puero prima labes mali, et ob hoc Otto egregius contra fratrem parumper est commotus, talique modo inter ipsos crescebat invidia et lis assidua. Bruno vero ætate minimus, sed honestate morum haud infimus, in annis puerilibus scholasticæ deditus censuræ, divino famulatu insudabat die tenns.

2. *Tres filios reliquit.* — Paucis interpositis addit : « Post excessum inclyti regis Henrici, ductores primi conveniebant, et de statu regni consilium habebant. Perplures dijudicabant Henricum regno potiri quia natus esset in aula regali; alii vero desiderabant Ottonem possidere principatus honorem, quia ætate esset major, et consilio providentior. Quid plura? Disponente providentia Dei sceptrum regiminis cessit Oltoni. Inde magis ac magis inter fratres convalescebat discordia, quæ inter ipsos versabatur ab infantia assidue litigantes, nil pacificum mutuo loquebantur. Tunc regius juvenis Henricus multa sustinuit adversa : quem inclyta mater e contra salutaribus disciplinis lenivit, etc. Post hæc rex Otto præfecit fratrem suum Henricum ducem super Bajowariorum gentem (sed non ante annum DCXLVII). Sanctus vero Bruno ætate minimus adhuc debebat sub censura litteralis disciplinæ, et læta indole de die in diem proficiebat in Christi servitute. Cum autem profecisset ætate et sapientia, rex adjunxit eum sibi per amorem fraternitatis, in ministerium archiepiscopi. Interim obiit Wigfridus vir venerandus, qui archiepiscopalem Colonia sedem possedit, et munere superni

dispositoris, Brunoni cessit episcopalis honor dignitatis », anno scilicet DCCLIII, quo de eo verba faciemus.

3. *Ottonis Henrici filii coronatio.* — Witichindus l. 2, Ottonis inunctionis pompam ab Hildeberto archiepiscopo Moguntinensi factæ late describit, atque inter alia : « Proceedit pontifex cum rege tunica stricta more Francorum induto pone altare, super quod insignia regalia posita erant, gladius cum baltheo, chlamis cum armillis, baculus cum sceptro ac diademate. Ipse autem pontifex Moguntinus, Hildebertus nomine, Francus genere, monachus professione, nutritus et doctus in Fulda monasterio, et ad id honoris merito progrediens, ut pater ejusdem monasterii constitueretur, deinde pontificatus Moguntinæ sedis fastigium mereretur, etc. Et cum esset quæstio inter pontifices in consecrando rege, Treverensem videlicet et Coloniensem (etenim Treverensis asserebat, quod ejus sedes antiquior esset, et tanquam a beato Petro Apostolo fundata : Coloniensis vero quia ad ejus dioccesim locus pertinebat) et ob id uterque sibi convenire arbitrati sunt hujus consecrationis honorem. Cessit tamen uterque cunctis notæ Hildeberti almitati. Ipse autem accedens ad altare, assumpsit inde gladium cum baltheo et conversus ad regem ait : Accipe gladium, quo Christi ejicias universos adversarios, Barbaros quoque et malos Christianos, auctoritate divina tradita tibi omni potestate totius imperii Francorum ad firmissimam pacem omnium Christianorum. Deinde sumptis armillis et chlamyde induit eum : His cornibus, inquit, humi tenus dimissis monearis, quo Dei zelo ferveas et perdurare in pace tuenda usque in finem te debere scias. Exinde sumpto sceptro baculoque : His signis, inquit, monitus, paterna castigatione subjectos tuos corripas. Primum ergo Dei omnipotentis ministris, et viduis ac pupillis misericordiæ manus porrigas, nunquam oleum miserationis deficiat, ut Deo tibi propitio in præsentī pariter et in futuro, sempiterno præmio coroneris. Perfususque illico oleo sancto, et coronatus diademate aureo ab ipsis pontificibus Hildeberto ac Wigfrido, ac omni legitima consecratione completa, ab iisdem pontificibus ducitur ad solium, ad quod per

cochleas ascendebatur, et erat inter duas marmoreas miræ pulchritudinis columnas constructum, unde ipse omnes videre, et ab omnibus videri posset. Divina deinde laude dicta, sacrificioque solemniter celebrato, descendebat rex ad palatium, etc. (1) »

4. *Radulfi Francorum regis obitus.* — Ad num. 3. Chronographus sancti Petri-Vivi Senonensis tom. II Spicilegii Dacheriani exhibitus, ait : « VI idus Januarii, primo gallorum cantu, incensum est monasterium sanctæ Columbæ (in urbe Senonensi positum) et XVIII kal. Februarii, eodem mense obiit Radulfus rex (nempe Francorum) Autissiodoro, quem sepelierunt in Basilica sanctæ Columbæ. Post mortem ejus Hugo Magnus (pater Hugonis Capeti postea Francorum regis) una cum Francis accersiens Willelmum archiepiscopum (nempe Senonensem) misit illum ad Oginam (Eginam intelligit) uxorem Caroli Simplicis, ut inde (nempe ex Anglia) reduceret Hludovicum filium ejus. Fugerat enim ad patruum suum regem Anglorum (intelligit Athelstanum Anglorum regem, Eginæ fratrem) ob timorem Heriberti et Hugonis. Veniensque Willelmus archiepiscopus, datisque obsidibus sub sacramenti titulo Oginæ matri ejus, reduxit Hludovicum in Franciam. Igitur XIII kal. Julii (qui hoc anno in Dominicam cadebat) unctus est in regem Hludovicus filius Caroli Simplicis apud Laudunum ». Mortuus est Radulfus, seu Rodulfus sine liberis, et annum regni decimum tertium inchoavit.

5. *Epocha regni Ludovici Transmarini ab hoc anno proficiscitur.* — Ab hoc anno Ludovicus Transmarinus Francorum rex bujus nominis IV, epocham regni sui in Diplomati repetit, ut videre est in Bibliotheca Cluniacensi pag. 275 et seq., ubi tria ejus Diplomata referuntur, et apud Mabillonium lib. 6 de Re Diplom. pag. 568 et seq., ubi tria alia exhibet, in quibus anni regni Ludovici a præsentī desumuntur. Quare non audiendus Bollandus in Notis ad Vitam B. Joannis abbatis Gorziensis in territorio Metensi, a Joanne abbate Metensi ejus discipulo scriptam, qui ad num. 43, ubi hic auctor scribit, an. DCCXXXIII partem Franciæ obtinuisse Henricum Germanorum regem, et Ludovicum

(1) In amplissima Vet. Monumentorum Collectione PP. Martene, et Durand. tom. I, col. 287 et seq., Ottonis bujus Diplomata quædam occurrunt, ex quibus nonnulla quidem mendii suspensionem admittunt, alia vero quæ sinceriora videntur, nihilque corruptum sive in nota Indictionis, sive in aliis præferunt, Ottonis bujus regnum ab hoc anno, sed aliquandiu ante IV nonas Julii diem Henrici emortualem repetunt. Liqueat id ex collatione sequentium Diplomatum : « Actum Namuco, sub die IV non. Junii, anno ab Incarnat. Domini nostri Jesu Christi DCDXLVI, et regni serenissimi Ottonis XI, Ind. IV ». Aliud vero ita inscribitur : « Data IV kal. Junii, anno Dominicæ Incarnationis DCDLXI, Indict. III, anno videlicet regni serenissimi Ottonis XXVI. Actum Ingilnheim ». Denique huc etiam confert inscriptio Concilii Engilenheimensis in cujus Præfatione legitur : « Anno ab Incarnat. Dom. DCDXLVIII, Indict. VI, septimo idus Junias, anno serenissimi regis Ottonis XIII ». Ex his documentis liquet Ottonem regnum quidem anno DCDXXXVI incepisse, sed diu ante VI nonas Julii, cum vel ante diem XXIX Maii epocham suam exordiat. Sed et circa ipsum mensem Maium ejusdem anni DCDXXXVI, regnum illud iniisse probant sequentia Diplomata : « Data VI non. Maii A. D. DCDXLIX, Indict. VII, regnante pio rege Ottone XIII. Actum Aquisgrani. Datum IX kal. Maii, anno Dominicæ Incarnationis DCDLXVI, Indictione nona, anno regni domni Ottonis trigesimo, imperii autem quinto. Actum Quidelingeburg ». Extat Diploma utrumque in reliquiis Ludewig tom. VII, pag. 420. Profecto si anno DCDXLVI, die XXIII Aprilis trigesimum regni annum agebat Otto, inde inferas licet regnum non cepisse nisi anno DCDXXXVI, post diem illam Aprilis. An vero huic Epochæ exordium dederit Ottonis coronatio in regem, ante patris obitum peractam, ignorare me fateor. Quanquam scriptores omnes veteres, quotquot consului, coronationem hanc post Henrici obitum rejicere videntur. Forte igitur regni sui annos ante patris obitum supputare cepit Otto, quod ante obitum destinatus a patre in regem fuerit, ut non obscure prodit auctor Chronici regii abbatis S. Pantaleonis Coloniensis, vulgatum ab Eccardo in Corpore Historicorum tom. II. Ita enim ibi, pag. 885 : « Cum se jam gravari morbo (Henricus) sensisset, convocato omni populo, designavit Ottonem filium suum regem ».

filium Caroli, ait : « Falluntur ergo qui *Ludovici*, Carolo Simplici nati, cognomento *Transmarini*, initium statuunt anno *DCXXXVI*, quo Henricus Auceps rex Germaniæ decessit; cum hic, qui tunc vivebat auctor, anno *DCXXXIII* simul regnasse Henricum et Ludovicum scribat ». El sane ad annum *DCXXXVIII* ita scribit Sigebertus : « Ludovicus in Franciam reversus et licet ærumnose, tamen in regno restitutus, regnat annis *XXVII* ». Ita Bollandus. Jam enim an. *DCXXXIX* monuimus, Francos trans Ligerim sitos, qui in Caroli fide perstiterant, Acta publica hac formula subscripsisse, « Anno *III*, quo Karlus rex obiit, Christo regnante, regem sperante », cujus rei Baluzius ibidem laudatus plura alia exempla proferit, observatque morem istum notandi annos servatum quoque esse post mortem Radulfi regis, ut docet Chartularium monasterii Arulensis, in quo ista leguntur : « Facta ista scriptura Vindicio IV idus Decemb. anno *n* quod obiit Radulfus rex, Christo regnante, regem exspectante ». Hæc formula ab iis usurpata, qui Ludovicum Transmarinum ex Anglia reducem regem agnoscere nolebant. Præterea in annis principum memorandis alius sæpe est usus historicorum, alius cancellariorum, et ideo Sigebertus ad annum *DCXXXVIII* tradit, Ludovicum Transmarinum in regnum restitutum fuisse, quia an. *DCXXXVI* Caroli Simplicis mortem narravit, et majori errore Ludovici ejus filii reditum post biennium consignavit.

6. *Moritur Joannes XI PP.* — Ad num. 4. Flodoardus in Chronico hoc anno scribit : « Leo quidam Dei servus Romæ papa constituitur », postquam mortem Joannis XI retulit. Quare cum Joannes circa diem decimum quintum mensis Martii an. *DCXXXI* ordinatus fuerit, et secundum Catalogos fere omnes *annos quatuor et menses decem* Ecclesiam Romanam rexit, mortuus est initio mensis Januarii hujus anni, postquam annos *IV* et menses *X* incompletos Ecclesiæ Romanæ præfuisse. Hæc de eo idem Flodoardus in libello de Roman. Pontif. ubi tamen librorum errore ei anni tantum duo tribuuntur (1) :

Nato patriciæ hinc cedunt pia jura Joanni :
Undecimus Petri hoc qui nomine Sede levatur.
Vi vacuus, splendore carens, modo sacra ministrans.
Fratre a patricio juris moderamine raptò,
Qui matrem incestam rerum fastigia mœcho

Tradere conantem decimum sub claustra Joannem
Quæ dederat, claustris vigili et custode subegit.
Artoldus noster sub quo sacra pallia sumit,
Papaque obit, nomen geminum fere nactus in annum.

Sed loco, *geminum fere nactus in annum*, legendum, *quintum fere nactus in annum*. Joannes nunquam sui juris fuit, sed partim in matris *Marozie*, partim in custodia *Alberici* fratris, qui patricius erat, et Romæ dominabatur, partim in potestate vitrici sui fuit. Mortuo enim *Widone*, senioris *Alberici* filio, cui *Marozia* *Albericum* juniorem pepererat, cum *Marozia* *Hugoni* Italiæ regi *Widonis* demortui uterino fratri nupsisset, dotemque incestus dominium Romanæ Urbis attulisset, et novo vitrico minus commode aquam infudisset *Albericus* junior, impactæ sibi ab eo alapæ contumelia provocatus, *Hugonem* ab Urbe Romana expulit, « Joannem papam (qui frater ejus erat) sub custodia detinuit, matrem quoque suam *Mauroziam* clausam servans, et Romam contra *Hugonem* regem tenens », inquit Flodoardus ad an. *DCXXXIII*. Porro *Joannem* hoc anno vivere desiisse, et *Leonem VII* in ejus locum substitutum, cum Flodoardus in Chronico testetur, a seipso in libello de Rom. Pontif. dissentire non potuit in rebus suo tempore peractis. Quod si *Joannes XI* geminum tantum annum Ecclesiæ Romanæ præsedisset, ul existimavit Papebrocius in Paralipomenis ad Conatum Chronico-Hist. postquam Flodoardi versus legit, *Leo VII* non hoc anno, ut habet Flodoardus in Chronico, sed an. *DCXXXIII* Pontificatum suscepisset, quod nullus sibi persuaserit. Inde intelligimus, librariorum, quos in nominibus propriis describendis sæpe lapsos esse observavimus, non solum etiam in numeris, sed et in vocibus eos exprimentibus exarandis, dum animo peregrinantur, aut voces ex parte corrasæ sunt, quandoque auctores corrupisse, aut denique versus quandoque depravasse.

7. *Ei succedit Leo VII.* — *Leo septimus*, jam mense Januario Ecclesiæ præerat. Mabillonius enim Sæc. v Benedict. pag. 907, recitat Privilegium ab eodem concessum sancto *Odoni* abbati monasterii S. Benedicti, quod Floriacense dicitur. Eo statuit *Leo* licere monachis aliorum cœnobiolorum, ubi defecerat disciplina regularis, ad Floriacense sese recipere; quod pariter concesserat Joannes XI pro monasterio Cluniacensi, eidem

(1) Anno Christi *DCXXXV*, mense *Novembri*, ad hoc in cursu erat *annus quintus* Pontificatus *Joannis XI*. Charta in Regesto Sublaciensi pag. 96, col. 2 : « Anno Deo propitio Pontificat. domni Johannis summi Pontificis et universalis XI PP. in sacratissima Sede B. Petri Apostoli V, Indictione IX, mense *Novembrio*, die prima ». Indictio IX hic inchoatur a kalendis Septembris. Ibi *Petrus* filius quondam *Sergii*, seu *Guittruda* quondam jugalibus cedit, tradit, et vendit terram positam territorio Tiburtino, foris portam Salariam in fundo qui vocatur *Sancta Agnes*. Jurant per salutem *Johannis XI* papæ.

SUBSCRIPTIONES.

- † Signum manus superscripto Petro venditore.
- † Stephanus in Dei nomine consul et dux testis.
- † Benedictus consul et dux testis.
- † Roto consul et dux testis.
- † Stephanus consul et dux.
- † Petrus testis.

Ego Stephanus scriniarius et tabellio Urbis Romæ complevi et absolvi.

De annis Pontificatus *Johannis XI*, hæc habet Catalogus Rom. Pontificum in Cod. Vat. 1340 : *Joannes sedit annos IV.*

GEORGICUS.

Odoni, ut legere est in prima constitutione Bullarii Cluniacensis. Rescriptum autem Leonis VII, anno DCXXXVIII emissum, his verbis clauditur : « Scriptum per manum Theodori notarii et subdiaconi S. R. E. in mense Januario, Indictione XI. Bene valete. Datum V idus Januarii per manum Nicolai primicerii summæ Apostolicæ Sedis, anno Deo propitio pontificatus domini nostri Leonis Pontificis et universalis VII papæ, in sacratissima Sede B. Petri Apostoli III, in mense et Indictione superscriptis ». Quod si an. DCXXXVIII, die nona mensis Januarii, jam tertium Pontificatus annum inchoarat, currenti ante eundem diem Pontifex Romanus proculdubio consecratus fuerat. Mabillonius ibidem recitat alias litteras ejusdem Pontificis in fine mutilas, ex quibus discimus studium ejus in rem monasticam, et præcipue in S. Benedictum; quem his in litteris « egregium patrem, nostrum domnum beatissimum Benedictum » appellat, ex quibus vir doctissimus colligit, *Leonem VII* ante Pontificatum instituto Benedictino fuisse addictum, indeque a Flodoardo citato dici *servum Dei* fuisse, quia eo nomine monachi censi solent apud antiquos. Cæterum quantum doloris concepisset *Leo* ex miserabili Ecclesiæ statu, et quam strenue pro collata sibi potestate grassantibus malis mederi conaretur, satis superque utræque litteræ probant. Porro si a Leonis VII initio ad depositionem Joannis X, quæ certo anno DCXXXVIII contigit, indeque ad Formosi mortem intermediorum Pontificum annos retrocedendo enumeres, annos, menses et dies illis a Catalogis et antiquis attributos, a nobis nec auctos nec imminutos, et interpontificia, aut nulla aut brevissima fuisse comperies.

8. *Aliqua in chronotaxi Pontificia certissima.* — Ex libello porro Flodoardi de Romanis Pontificibus quædam inter alia certo nobis innotescunt. Primum Stephanum presbyterum, qui anno DCCLI Pontifex Romanus electus est, priscis temporibus inter Pontifices numeratum non fuisse, quia nempe nunquam consecratus fuit, et quia comitia, secus ac censuit Onuphrius, quem Baronius alique non pauci secuti sunt, licet vera et legitima, sine consecratione non sufficiebant, ut aliquis Pontifex Romanus esset. Quare Flodoardus *Stephanum* secundum numerat, qui vere secundus est, tertium qui tertius, quartum qui quartus, quintum qui quintum inter eos locum tenuit, et sic deinceps; cum contra Onuphrius et Baronius numerorum notas immutarunt, et eum, qui *quintus* v. g. fuit, *sextum* appellarunt, et sic de aliis. Secundo, ex eodem libello manifestissimum fit, *Joannem papissam*, quam Platina Joannem VIII appellat, sæculo nono et decimo nondum confictam fuisse, cum a Flodoardo Joannes VIII appelletur, qui vere inter Pontifices ejusdem nominis octavus fuit, et sic deinceps. Tertio, *Basilium*, quem Marianus Scotus Hadriani III successorem facit, *Agapitum* post Marinum apud eundem Marianum ac Sigebertum intrusum, ac *Marinum*, ejus mentio in

Vita sancti Udalrici Augustensis episcopi, dum de iis agitur quæ ante ejus episcopatum anno DCXXIV ab eodem sancto susceptum contigere, esse Pontifices Romanos mere commentitios; cum eorum Flodoardus in suo opusculo non meminerit. Ac denique antiquos chronographos male aliquando eorundem Pontificum ordinem invertisse, aut aliquot Pontifices, quod brevi sederint, prætermisisse. Hæc enim Leone VII sedente, quem Flodoardus Romæ vidit, et sub cujus Pontificatu libellum suum absolvit, notiora erant, quam ut eundem scriptorem latere potuerint.

9. *Fons sanguinis in civitate Genuensi.* — Ad num. 6. Petrus Bibliothecarius in Ms. a Papebrocio in Conatu Chronico-Historico laudato, de Joanne XI verba faciens, ait : « Ilujus Joannis tempore, primo anno, fons sanguinis largissime fluxit in civitate Genuensi, forte demonstrans ejus cladem imminentem. Nam eodem anno Saracenis ex Africa venientibus capta fuit, et hominibus ac thesauris evacuata ». Cladem hanc latius narrat Luitprandus, cujus Baronius verba recitat, in lib. 4, cap. 2. Sed quia primus Joannis XI annus cum anno Christi DCXXXI coincidit, ea ad illum referenda.

10. *Prima profectio Romana S. Odonis.* — Ad num. 10 et seqq. *Sancti Odonis* abbatis Cluniacensis secundi ardens in res divinas studium, intra monasteriorum latebras non sese continuit. Eum enim in Italiam accivere semel et iterum Romani Pontifices, ut afflictis rebus prudentia et auctoritate sua consulere. Primæ ejus Romanæ profectionis causam his verbis indicat Flodoardus in Chronico ad hunc Christi annum : « Hugo, inquit, Italiæ rex Romanis nisus capere, afflicto suo exercitu fame et equorum interitu, pacta tandem pace cum Albrico, dans ei filiam suam conjugem, ab obsidione desistit ». Quare Baronius recte hoc anno scribit, *Odonem* a Leone VII accersitum fuisse; cum tunc Hugo rex filiam suam (quam *Aldam* vocat Luitprandus hujus temporis scriptor) Alberico in matrimonium dederit, sicque a Romæ impugnatione destiterit. In procinctu quippe Romani itineris *Odo* Adhegrinum invisit, et ex revelatione sancti Martini episcopi Turonensis, qui Adhegrino apparuerat, didicit Ludovici Transmarini unctionem, hoc anno peractam.

11. *Gesta ab eo Romæ.* — Id itaque itineris *Odo* duplicem ob causam suscepit. Prima, ut cum *Alberico* principe, qui consulari potestate Romam cum matre Marozia administrarat, reconciliaret *Hugonem* Italiæ regem, apud quem magnam ipse gratiam obtinebat, ut patet ex tribus privilegiis, quæ Hugo in Odonis gratiam a Romanis Pontificibus impetravit, nempe a Joanne XI, Leone VI et Leone VII. Altera, « ut monasterium intra Ecclesiam B. Pauli Apostoli, ut olim fuerat, reedificaret, cogente domno papa, et universis ordinibus sacræ Sedis », inquit Joannes in Vita Odonis lib. 1, num. 27. Ad id tempus Baronius et Mabillonius referunt quod in lib. 2, num. 9, Joannes in hunc

modum scribit : « Tempore præterito, dum Romuleam Urbem ob inimicitiam Alberici jam fati principis prædictus Hugo rex obsideret, cepit ille intra extraque discurrere, et pacis concordæque monita inter utrosque disseminare, quatenus posset furorem prædicti regis sedare, et prædictam Urbem tueri a tanta obsidione. Interea quadam die, dum juxta monasterium B. Andreæ Apostoli iret, quod ad Clivum Scauri dicitur ex nomine, quidam rusticus voluit eum propter lagunculam aquæ occidere ». Rusticum Albericus, nisi ab Odone prohibitus fuisset, morte mulcasset; tanta erat non solum Hugonis, sed etiam Alberici in Odonem veneratio. De secunda Odonis profectioe Romana an. DCXXXVIII, quo de ea Baronius agit, disseremus.

12. *Fundatio monasterii S. Pontii.* — Hoc anno *Pontius* comes Tolosanus hujus nominis primus, et *Garsindis* ejus uxor, celebre monasterium

Thomeriense, a villa, in qua situm fuit, sic appellatum, in honorem S. Pontii martyris in Occitania fundarunt, et multis bonis locupletarunt, ut patet ex instrumento foundationis a Catello lib. 1 comitum Tolos. cap. 14 recitato, quod his verbis clauditur : « Facta donatio ista in mense Novembris anno DCXXXVI divinæ Incarnationis, primo anno Ludovico rege sedem regni ejus gubernante ». Qua ex subscriptione, ut id obiter observem, confirmatur quod mox diximus, Ludovici, nempe Transmarini, annos a præsentis in Actis publicis deductos fuisse. Habuit hoc monasterium abbates nominatissimos, quorum crebra mentio tam in Gallicis quam in Hispanicis historicis. Joannes papa hujus nominis XXII, S. Pontii abbatiam ab episcopatu Narbonensi divisit, eamque in episcopatum erexit.

LEONIS VII ANNUS 2. — CHRISTI 937.

1. *Ungarorum incursiones in Italia et Gallia.* — Annus sequitur Redemptoris nongentesimus trigesimus septimus, Indictione decima, clade Ungarica in Italiam illata memorabilis, præcipue vero Campanis, de qua ista habet Leo Ostiensis¹ : « Indictione decima venientes innumerabiles Ungari, omnia circa Capuam prædati sunt. Eadem vero et Beneventi fecerunt, Sarnum usque ac Nolam discurrentes, et devastantes omnia, peragrantesque Liburiam, iterum Capuam reversi, diebus duodecim in campo Gariliano commorati sunt. Quo scilicet tempore multos ex hominibus nostris, Cassinensis scilicet monasterii, captivos duxerunt. In quibus redimendis ea expendimus quæ infra notantur : coronam argenteam magnam cum catenis argenteis, pocula argentea quatuor, thuribulum argenteum inauratum, cochlearia argentea tria ponderis libræ, turenos viginti, planetam diarodinam Byzantium viginti, planetam aliam cum listis argenteis Byzantium sexdecim, planetam aliam cum leonibus, ulnas de pallio longitudine passuum quatuor, latitudine palmorum trium, pannum altaris diarodinum pro Byzantium octo,

ostiales tres pro Byzantium tredecim, astancas duas pro Byzantium octo, pulvinaria serica tria pro Byzantium decem. Et inde victoria elati, onusti præda, Marsorum fines ingressi sunt, et eadem facere cœperunt, incendentes et depopulantes omnia. Nutu igitur Dei, Marsi ac Peligni in unum convenientes, in eos dispositis insidiis irruunt, et omnibus fere trucidatis, ingentem prædam retulerunt. Quicumque autem ex eis evasere Marsorum gladios, fuga dilapsi ad suos se receperunt ». Hæc de Ungaris Leo.

2. Quo pariter anno alia pars eorundem invadens Gallias, ingentem cladem intulere, de qua ista admiratione digna Frodoardus hoc anno habet : « Cæli pars ardere visa est, et Ungarorum persecutio ab eadem parte per Franciam insecuta est, qua villæ et agri depopulati, domus Basilicæque conflagratæ, captivorum educta multitudo, nonnullas tamen Ecclesias, ignibus applicitis, non valere succendere. Ecclesiam S. Mariæ apud Rhemos, duabus etiam segetum metis, quæ parietibus pæne ipsius quibus inhærebant exustis, incendere nequiverunt. In Ecclesia beati Basoli, cum quidam Ungarorum ascendere super altare nitens, aræ manum applicuisset, ipsa manus ejus altaris

¹ Leo Ost. l. 1. c. 58.

inhæsit lapidibus, nec omnino quivit avelli, donec cæteris Ungaris aræ saxum circa ipsam manum incidentibus, partem lapidis, qui manni ejus inhæserat, in admirationem omnium, perferre conatus ethnicus. Quidam presbyter de Bavonis Curte (sic enim villa vocatur ejus Ecclesiæ) nomine Adalgarinus captus est ab eis et adductus usque ad pagum Bituricensem. Qui cum esset in vinculis et compedibus ferreis, noctu visio cuidam concaptivo apparuit, jussumque est, ut diceret eidem presbytero, quatenus fugam caperet, ut se resolutum videret, pariterque cum visione catena ipsius reserata est. At ille mortem metuens, quam barbarus illi sæpe minabatur, si eum de fuga forte reprehendisset: catenasibi pedes revinciens, et seram, quæ exsilerat in compede, requirens, iterum munire sibi sera studuit vincula, non ausus evadere fuga. Nocte altera iterum visio memorata facta est captivæ, quæ presbyterum ad eandem fugam roboraret, iterumque vincula ipsius resoluta sunt. Animatus ad id tunc tandem presbyter fugam petiit, et in palude quadam diebus aliquibus latens, ubi præterisse barbaros comperit, patriam tum demum repetiit.

3. « Is nobis retulit quod viderit in eadem hac captivitate quemdam Orbacensis cœnobii monachum, nomine Hucbaldum, quem frequenter ethnici trucidare voluerunt, nec carnem ejus incidere valuerunt: Deum ergo cum esse dicebant. Equidem (ut hic presbyter refert) nudum eum vidit in medio positum, et sagittis undique appetitum, nec summotenus saltem cute præcisa vulneratum: resiebant enim ab ejus corpore, ut ab adamante, recisæ sagittæ, nec signum ictus ullum ejus apparebat in cute. Sed et gladio cum omni conatu eum nudum se vidisse percuti dicit, ac nihilominus caro ipsius intemerata permansit ». Hæc miranda satis Frodoardus de captivis detentis ab Ungaris.

4. *Aquisgrani ungitur Otto rex.* — Eodem anno Aquisgrani conventus generalis habetur regni procerum et episcoporum, in quo Otto in fine anni superioris a patre relictus regni hæres, novis comitiis confirmatur, et ab archiepisc. Moguntino sacris ritibus ungitur. Hæc autem quomodo se habuerint, ita Witichindus ejus temporis scriptor enarrat¹: « Defuncto itaque patre patriæ et regum maximo optimo Henrico, omnis populus Francorum atque Saxonum jam olim designatum regem a patre filium ejus Ottonem eligit sibi principem. Universalis electionis notantes locum, jusserunt esse ad Aquisgrani palatium. Est autem locus ille proximus lulo, a conditore Julio Cæsare cognominato. Cumque illo ventum esset, duces ac præfectorum principes, cum cætera principum militumque manu congregata in xysto Basilicæ magni Caroli cohærenti, collocaverunt novum ducem in solio itidem constructo, manus ei dantes ac fidem pollicentes, operamque suam contra omnes

inimicos spondentes, more suo fecerunt cum regem. Dum ea geruntur a ducibus ac cætero magistratu, pontifex maximus (ita auctor nominat præcipuum illorum antistitem archiepiscopum Moguntinum) cum universo sacerdotali ordine, et omni plebe infra in Basilica præstolabatur processionem novi regis.

5. « Quo procedente, Pontifex obvius læva sua dexteram tangit regis, suæque dextera lituum gestans (pastoralem videlicet baculum), linea indutus stola, planetaque infulatus, progressusque in medium usque fani, substitit: et reversus ad populum qui circumstabat (nam erant deambulatoria infra supraque in illa Basilica in rotundum facta, quo ab omni populo cerni posset): En, inquit, adduco vobis a Deo electum, et a domino rerum Henrico olim designatum, nunc vero a cunctis principibus factum regem Ottonem. Si vobis ista electio placet, dexteris in cælum elevatis, significate. Ad hæc omnis populus dexteram in cælum levans cum clamore valido imprecatur sunt prospera novo duci. Proinde procedit pontifex cum rege, tunica stricta more Francorum induto, pone altare, super quod insignia regalia posita erant, gladius cum balteo, chlamys cum armillis, baculus cum sceptro ac diademate. Eo quippe tempore erat summus pontifex, nomine Hildebertus, Franco genere, monachus professione, nutritus et doctus in Fulda monasterio, et ad id honoris merito progrediens, ut pater ejusdem loci constitueretur, deinde summi pontificatus Moguntiacæ sedis fastigium promeruisse. Hic erat vir miræ sanctitatis, et præter naturalem animi sapientiam, litterarum studiis satis clarus, qui inter cætera gratiarum dona, spiritum prophetiæ habuisse prædicatur. Et cum quæstio esset pontificum in consecrando rege, Treviris videlicet et Colonia Agrippinæ: illius quia antiquior sedes esset, et tanquam a B. Apostolo Petro fundata; istius vero, quia ejus ad diocesim pertinebat locus: et ob id sibi convenire arbitrati sunt hujus consecrationis honorem. Cessit tamen uterque eorum Hildeberti cunctis notæ almitati.

6. « Ipse autem accedens ad altare, et sumpto inde gladio cum balteo conversus ad regem: Accipe, inquit, hunc gladium, quo ejicias omnes Christi adversarios, Barbaros, et malos Christianos, auctoritate divina tibi tradita omni potestate totius imperii Francorum ad firmissimam pacem omnium Christianorum. Deinde sumptis armillis ac chlamyde, induit eum: His cornibus, inquit, humitenus demissis, monearis, quo zelo fidei fervere, et in pace tuenda perdurare usque ad finem debeas. Exinde sumpto sceptro baculoque: His, inquit, monitus paterna castigatione subjectos corripas: primumque Dei ministris, viduis ac pupillis manum misericordiæ porrigas, nunquamque de capite tuo oleum miserationis deficiat, ut in præsentem et in futuro sempiterno præmio coroneris; perfususque illico oleo sancto, et coronatus

¹ Witichind. l. II.

diademate aureo ab ipsis pontificibus Hildeberto et Wigfrido, ac omni legitima consecratione completa, ab eisdem pontificibus ducitur ad solium, ad quod per cochleas ascendebatur; et erat inter duas marmoreas miræ pulchritudinis columnas constructum, unde ipse omnes videre, et ab omnibus videri posset. Divina inde laude dicta, sacrificioque solemniter celebrato, descendebat rex ad palatium, et accedens ad mensam marmoream regio ornatam apparatu, resedit cum pontificibus et omni populo, duces vero ministrabant». Hactenus de sacra Ottonis regis inauguratione tunc

facta. Et quidem divina per sacrum hujusmodi ministerium unctionis perfusus gratia, Barbaros ingruentes nullo ferme negotio superavit, et civilibus armis sæpe circumseptus et obrutus victor semper evasit, ut pluribus docent ejus temporis scriptores, qui res ab eo præclare gestas sunt prosecuti, Witichindus et Luitprandus. Ab hoc igitur anno, quo in regem unctus est, cæptum est numerari tempus regni ejus, ita testante Rotgero¹ monacho in Brunone.

¹ Rotger. in vit. S. Brun. c. 6

Anno periodi Græco-Romanæ 6430. — Anno Eræ Hispan. 975. — Anno Hegiræ 326, inchoato die 8 Novemb., Fer. 4. — Jesu Christi 937.

— Leonis VII papæ 2. — Constantini VIII imp. 26. cum Romano imp.

1. *Irruptio Hungarorum in Italiam et alias regiones.* — A num. 1 ad 4. Italia ab Hungaris *Indictione decima*, hoc scilicet anno, ut Baronius ex Leone Ostiensi, quemadmodum Gallia, ut ex Flodoardo in Chronico Baronius narrat, devastata. De hac clade Hermannus Contractus juxta editionem Canisianam scribit: « Ungari per Bajoariam Alamanniamque et Orientalem Franciam prædis, gladio, igneque furendo vagantes, transito Wormatiæ Rheno, Alsatiam, regnum Lotharii (id est Lotharingiam) et adjacentes usque ad Oceanum Gallias vastantes, per Burgundiam Italiamque tandem in Pannoniam redierunt: monasteria S. Bonifacii, sanctique Galli incendio conflagraverunt ». Witichindus lib. 2, quid tunc egerit Otto Germaniæ rex, paucis verbis explicat: « Antiqui hostes Hungari venire virtutem probare novi regis. Intrans Franciam, statuerunt, si possent, ab Occidentali plaga invadere Saxoniam. Rex autem audiens, nihil moratus, cum exercitu valido occurrit illis, fugavitque et a terminis suis abegit ». Et idem historicus in fine libri tertii recitat litteras Ottonis imperatoris hujus nominis II, et Ottonis M. morte narrata subdit: « Hujus anno primo, qui est a Dominica Incarnatione DCXXXVII, Ungari Franciam et Alemanniam, et Galliam usque ad Oceanum Burgundiamque devastantes, per Italiam redierunt. Monasteria S. Galli et S. Bonifacii cremantur ».

2. *Varie Galliarum urbes ab Hungaris afflictæ.* — Clarius in Chronico sancti Petri Vivi, postquam de coronatione Ludovici Transmarini verba fecit, de clade Gallica hæc refert: « Secundo

anno post hæc, XVI kal. Martii a gallorum cantu usque ad lucem diei, sanguinæ acies per totam cæli faciem apparuerunt. Sequenti autem mense, IX kal. Aprilis, Hungari adhuc in paganismo perdurantes, Franciam, Burgundiam, Aquitaniam ferro et igne depopulari cœperunt. Pervenientes autem Senones civitatem, incenderunt cœnobium sancti Petri, vastantes omnem provinciam. Cernens itaque Sanson abbas et monachi malum hoc grande, consilio accepto detulerunt corpora sanctorum Sabiniani et Potentiani cum cæteris sanctorum corporibus, et reliquiarum pignoribus, cum magno honore in Ecclesiam ejusdem abbatiæ infra muros urbis constructam in honore sancti Petri. Relictum vero est corpus S. Serotini in crypla retro altare S. Petri. Vastantes igitur pagani cunctam provinciam, redierunt ad propria incenso cœnobio S. Petri, remanente ibi solummodo oratorio S. Serotini, quod minime potuerunt incendere ». Falco Trenorciensis monachus in Chronico Trenorciensi tradit, tunc Trenorchum cum monasterio Hungaros incendisse. Hanc Hungarorum irruptionem cum præsentis anno etiam alligant Marianus Scotus et continuator Reginonis.

3. *Aliæ Hungarorum in Galliis devastationes.* — Inter alia monasteria, quæ tunc combusta fuere, chronographus Besvensis meminit monasterii ejusdem nominis a Clotario II in episcopatu Lingonensi fundati, aitque: « Anno DCXXXVI Incarnati Verbi, venerunt Hungri in Burgundiam mense Julio. Iterum anno DCXXXVII Incarnati Verbi, Luedowico filio Caroli uncto in regem, et nondum eo anno evoluta, Hungri venientes per Franciam

et per Burgundiam atque Aquitaniam, devastaverunt omnia : quæ vastatio in tantum huic loco obfuit, ut per LI annos (legendum XLV, ut numeranti patet) usque ad annum scilicet Incarnati Verbi DCCLXXXI, quo dominus Bruno Lingonensis Ecclesiæ præficitur episcopus, respirare ad priorem statum nequiverit ». Ita ille pag. 533 tom. I Spicilegii Dacheriani, qui jam pag. 429 scripserat, *Brunonem*, postquam creatus est episcopus, videntem statum monasterii Besvensis et abbatiæ sancti Benigni Divionensis in ambiguo positum, adiisse *sanctum Majolum* Cluniacensem abbatem, ut ejus auxilio interius religionem, et exterius possessiones repararet in melius, a quo duodecim monachos obtinuit. Cumque *Majolus* huic monasterio præesse non posset, industria ejus locis aliis intenta, *Willelmum* hujus monasterii gregi præfecit, qui postea abbas Divionensis nuncupatus mira sanctitate enituit, ut suo loco diximus. Bruno vero « ubique investigans ablata restituebat, et de suo jure quodcumque necessarium et utile eis foret, libenti animo tribuebat », inquit idem chronographus.

4. *A quo Christi anno Otto regni sui epocham deduxerit.* — Ad num. 4 et seqq. Rotgerus, qui Vitam sancti Brunonis Ottonis Germaniæ regis fratris ac Coloniensis episcopi scripsit, et Folcmaro archiepiscopo Brunonis successori dicavit, cap. 6 ait : « Postquam pater ejus, fundato et ad unguem pacato imperio, rebus humanis concessit, Ottho filius ejus major natu, benedictione Domini auctus, et oleo lætitiæ unctus, magna voluntate et consensu principum regnare cœpit anno ab Incarnatione Domini noningentesimo trigesimo septimo, vir, in quem spiritus Dei donum contulit singulare veritatis et fidei ». Ex his verbis Baronius colligit, Ottonem regni sui annos a coronatione sua repetiisse, hancque præsentī anno peractam. Verum Rotgerus indicat tantum *Ottonem* hoc anno in pacifica regni possessione fuisse, non vero ab eo annos suos deduxisse. Ejus Diplomatum subscriptiones hanc difficultatem certo dirimerent, nisi in iis numeri mendose plerumque descripti essent, saltem apud Goldastum tom. III Constitut. imperial. pag. 303 et seqq. ac apud Mabillonium Sæc. V Benedict. variis in locis. Meibomius tamen in fine Historiæ Witichindi inter varia, in quibus menses vel numeri corrupti, aliqua refert quæ certo rem evincunt, ut ibidem legere est. Cæterum in annis regum et principum exprimendis historicos et cancellarios aliquando differre, jam superiori anno notavimus.

5. *Moritur Rodulfus II Burgundiæ rex.* — « Ipso anno Rodolfus Burgundiæ rex defunctus Agauni apud sanctum Mauritium sepultus est. Filius ejus Conradus regnum pro eo suscepit », inquit Hermannus Contractus juxta editionem Canisianam, cui continuator Reginonis et Flooardus in Chronic. suffragantur. Est is Rodulfus hujus nominis secundus, « cujus viduam nomine

Bertham rex Hugo, Alda Lotharii regis filii sui matre defuncta maritali sibi conjugio sociarat », id est, sociavit, inquit Luitprandus lib. 4, cap. 6. Suscepit ex Bertha uxore Conradum *Pacificum* appellatum, qui ei in regnum successit, *Burchardum* episcopum Lausanensem et postea archiepiscopum Lugdunensem, *Rodulfum*, cujus successio ignota, et *Adelaidem* primum cum Lothario Italiæ rege ac prædicti Hugonis filio, et postea cum Ottone Germaniæ rege in matrimonio collocatam. Super sunt varia Diplomata Conradi, in quibus modo se regem *Alemannorum* vel *Alemandorum*, et *Provinciarum*, aut regem *Alemannorum et Provinciæ* appellat, ob partem scilicet Sueviæ, quam obtinebat, et quia tunc Provincia jam in duas divisa erat, quarum altera ultra Druentiam *comitatus Forcalqueriensis* appellata, alteraque intra eundem amnem et mare Mediterraneum posita.

6. *Moritur Arnolfus dux Bajoariæ.* — Subdit Hermannus : « Arnolfo etiam Bajoariæ duce mortuo, ducatum ejus Bertolfus acceperit. Bajoarii cum multis aliis Ottoni regi rebellant ». Tres filios reliquit, Everhardum, Arnulfum et Hermannum, qui principatum velut hæreditario jure ad se devolutum, contempta Ottonis regis auctoritate, sibi vindicabant. *Otto* Bertolfum defuncti fratrem compertæ fidei, regere Bajoariam jussit, et Arnulfi filios ac alios factiosos tandem ad obsequium reduxit; uti narrat Witichindus lib. 2, qui in calce libri tertii de rebus hoc anno gestis verba faciens inquit : « Rudolphus rex Burgundiæ et Arnoldus dux Noricorum obierunt ».

7. *Jus metropoliticum a civitate Salisburgensi ad Laureacensem translatum.* — Tom. IX Concil. pag. 595, refertur Epistola Leonis VII ad *Gerhardum Laureacensem episcopum*, qua ei pallium mittit, ex qua intelligimus, Ecclesiam Laureacensem dignitatem metropolitam, Leone VII Ecclesiam Romanam regente, recuperasse, eamque a Salisburgensi Ecclesia ad Laureacensem translata esse; quod confirmat altera ejusdem Pontificis Epistola ibidem recitata, dataque « regibus, ducibus, episcopis, abbatibus, comitibus, pari etiam modo Egilolpho Juvavensis, Isingrimo Ratisponensis, Lantberto Frisingensis, Wisundo Sebonensis Ecclesiæ venerabilibus episcopis, et cæteris per Galliam, Germaniam, Bawariam, Alemanniam commorantibus ». In ea Pontifex Romanus ait : « Gerhardus sanctæ Laureacensis Ecclesiæ archiepiscopus, causa orationis ad limina veniens Apostolorum, nostram Apostolicam præsentiam visitare, et benedictionis gratiam a nobis percipere sollicitè studuit : multa quæ reprehensione digna sunt, nostris auribus lacrymosis vocibus intimavit : tota cordis intentione a nostra Apostolica auctoritate, de his quæ contra canonum regulam et decreta majorum in vestris geruntur provinciis, quærens consilium, etc. De quibus ergo Apostolicam Sedem consuluit, et qualia nos ei responsa dedimus, per hos nostros apices vobis intimare

curamus ». Et postquam ad Gerhardi consultationem sigillatim respondit, subdit : « Præter hæc Eberhardo duci Bavariarum nostra auctoritate injungimus, ut præfato Gerhardo archiepiscopo in omnibus auxilium præstet (1) ». Quibus ex verbis apparet, hanc Epistolam currenti anno datam; cum *Everhardus*, qui ducis titulum nomenque sibi attribuebat, anno proximo ab Ottone rege in exilium actus fuerit, ut dicemus anno sequenti.

8. *Celebris victoria Æthelstani regis Angliæ.* — « Anno DCXXXVII, Hyberniensium multarumque insularum rex paganus Anlafus a socero suo rege Sclorum Constantino incitatus, ostium Humberæ fluminis valida cum classe, id est, cum DCCV navibus ingreditur; cui rex Athelstanus fraterque suus Clito Eadmundus in loco, qui dicitur Brumamburch, cum exercitu occurrerunt, et prælio a principio diei in vespertum tracto quinque regulos septemque duces, quos adversarii sibi in auxilium conduxerant, interfecerunt; tantumque sanguinis,

quantum eatenus in Anglia nullo in bello fustum est, fuderunt, et reges Anlafum et Constantinum, regem quoque Cumbriorum ad naves fugere compulerunt, magnoque cum triumpho reversi sunt », inquit Hovedenus part. 1, pag. 422, cui aliqui alii scriptores Anglici consentiunt. « Non fuit bellum hac in tellure majus patralum, nec cædes tanta præcessit istam; postquam huc venerunt trans mare latum Saxones et Angli, Britones pulsuri », inquit Pontindoniensis pag. 335. Ante pugnam *Æthelstanus* immunitatem promisit monasterio sancti Joannis de Beverlaco, si Dominus daret ei victoriam, et post victos Danos multis et magnis immunitatibus locum dotavit, et asyli jus concessit, ut videre est apud Alfordum hoc anno, ubi fuse de hac victoria agit. Uterque tamen chronographus Saxonicus, et Osbernus seu Eadmerus in Vita sancti Odonis tunc episcopi Schireburnensis, celeberrimum hoc prælium, cui sanctus Odo interfuit, in annum sequentem differunt.

(1) Gerhardus Laureacensis archiepiscopus a Leone VII pallio quidem donatus fuit, ut optime Pagius animadvertit. Sed non ideo metropolitica dignitas Salisburgensi Ecclesiæ subtracta fuit. In Continuatione enim Spicilegii Lunigiani pag. 276, recitantur litteræ Agapiti, qui anno DCXLVI Maruo II successit, ad Gerardum archiepiscopum Lauriacensem, in quibus certiore se factum asserit Pontifex ab Hademaro abbate Fuldensi de dissidio quod inter eundem Gerardum et Heroldum Saltzburgensem archiepiscopum intercesserat, *pro utrinque suscepta in provincia eadem pallii auctoritate*. Quibus componendis primo omnium Pontifex exequi se ait *statuta Leonis papæ, a quo Gerardus pallio et privilegio donatus fuit*. Quapropter addit : *Te reitronizomus, et archiepiscopamus, denuoque tibi pallium cum præsentis præcepto secundum usum prius concessum, successoribusque tuis perpetuum tenendum tradimus*. Tum ad componenda dissidia metropolim illa dividit : *Heroldo archiepiscopo occidentalis Pannoniæ cura committitur; tibi autem (Gerardo scilicet) orientalem Pannoniam, regionemque Avarorum, ac Magyarorum, sed et Sclavorum, qui modo Christiani, vel adhuc per baptismum Christo lucrandi sunt*. Ex his litteris nulla temporis nota distinctis, intelligimus litteras illas Leonis VII de restitutione archiepiscopatus Laureacensis, ad Agapitum usque executione caruisse, id forte Heroldo impediente. Sub Agapito vero metropolim Saltzburgensem in provincias geminas divisam fuisse, quarum alteri Laureacensis, alteri vero Saltzburgensis præfuit. MANSI.

LEONIS VII ANNUS 3. — CHRISTI 938.

1. *Ingens adversus Arabes in Hispania domi-
nantes victoria.* — Sequitur annus Redemptoris
nongentesimus trigesimus octavus, Indictione unde-
cima, quo die sexta mensis Augusti, ipso natali
SS. Martyrum Justi atque Pastoris Hispanis in pri-
mis solempni, Ramirus rex Legionensis in Hispania
de Arabibus Cordubæ regnantibus et Africanis in-
colentibus, arma simul adversus Christianos His-
panos communicantibus, votis nuncupatis, con-
ciliato numine, Deo favente, victoriam plane in-
gentem est consecutus, omnium scriptorum genere,
etiam hostium, eam narrantium celebratam. Accidit
enim, ut cum iterum copiæ regis Abderragham

tunc Cordubæ regnantis cæsæ ab eodem Ramiro
rege fuissent, ira fremens ille majorem quam
unquam antea adversus eum expeditionem paran-
dam curaret, ut acceptas ulcisci omnino posset
injurias; quamobrem præter eum quem ipse con-
gregavit ex sibi subditis, ex Africa petitis militibus,
collegit exercitum centum quinquaginta millium
peditum, equitum vero quinquaginta millium.
Sed cum longe numero esset impar exercitus Chri-
stianorum, ut cum tanta Barbarorum multitudine
congregari posset, pius rex ad divinum implorandum
auxilium se convertit, nuncupatisque divinitati
votis, aggressus est hosles, præviis (ut aliqui tra-

dunt) duobus Angelis equestrium militum formam præ se ferentibus, quorum ope est parva victoria, cæsis octoginta millibus hostium, ducto captivo rege Mauro, nomine Abenain Cæsaraugustæ regnante, cæteris in fugam conversis et dispersis, ipsoque rege Abderragham vix clapso, cum paucis profugo Cordubam revertente. Scripserunt hæc Sampyrus atque Tudensis, et ipsi quoque Arabes suis ista Annalibus intexuere. Exactaque temporis multipliciter ratione deducta, id hoc ipso anno accidisse Ambrosius ¹ Morales egregie posteris testatum reliquit. His feliciter actis, Deo debitæ persolutæ sunt gratiæ, vota quoque nuncupata impleta, prout ejusdem regis Diplomata fidem faciunt.

2. Porro his addunt nonnulli, qui persecuti sunt res Hispaniæ, ipsum Arabum regem Abderragham, hac accepta clade, ubi Cordubam reversus est, magnam adversus Christianos sibi subditos persecutionem excitasse, tuncque passum sanctum Victorem, necnon etiam Euphrosynam pari decoratam corona martyrii.

3. *Odo iterum Romam vocatus regularis discipline institutor.* — Hoc eodem anno (ut ad res urbanas convertamus orationem) accidit ut Odo abbas Cluniacensis, qui ante biennium Romam a Leone papa ad restituendam in monasteriis Urbis collapsam regularem monasticam disciplinam vocatus fuerat, ad liberandam Urbem ab Hugonis regis obsidione per pacis remedium, iterum Romam veniret, et quas bene plantaverat plantas sanctæ monasticæ institutionis, sua præsentia atque monitione rigaret. Quæ autem tunc contigerint admiratione digna, hic describenda putavi. Qui tunc Romæ aderat ejus discipulus, præfecturamque gerebat monasterii sancti Pauli Joannes, in rebus ab eo præclare gestis a se conscriptis inter alia, quæ ad præsentem annum spectant, hæc habet ² :

4. « Ante triennium nobis Romæ apud sanctum Paulum agentibus, abbas Balduinus rogavit Odonem, ut Vitam B. Martini episcopi, quam Sulpitius in Galli et Posthumiani dialogo scribit, quibusdam scholiis illustraret. Paruit illico vir sanctus, et accito fratre Othecario, operi manum admovit. Interim dum sunt in opera, pulsatur campana hora vespertina. Mox illi (ut habet regula) relictis illis, quæ in manibus habebant, ad Ecclesiam properant, relicto Codice aperto, in loco illo, ubi resederant. Erat autem tunc hiems. Eadem nocte tanta vis imbrium e cælo ruit, ut omnes monasterii officinæ implerentur.

5. « Porro locus ille, in quo Codex ab eis relictus erat, ita situs est, ut aqua, quæ ex obliquo e vicinis tectis labitur, instar torrentis in eum decidat. Mansit itaque apertus Codex, fluxerunt aquæ illa nocte copiosissimæ, et quamvis Codicis abluerent margines, scripturam ipsam attingere ausæ non fuere. Mane coram omnibus exhibitus est

liber, stupebant fratres nihil esse læsum a pluvia : sed vir sanctus mira prudentia usus : Quid miramini, inquit, fratres? Non dubitetis aquam non fuisse ausam attingere sancti Martini Vitam. Dicebat autem id ore jucundo. Quidam autem tunc frater, qui erat promptus ad loquendum, accepto Codice : Intuemini, inquit, et videte quam vetustus est hic liber, et a lineis exesus, et usque adeo nec humefactus, ut plane squalidus videatur, et ecce Pater noster dicit, cum dudum lotum, nunc aquam attingere formidasse. Tunc vero venerandus Pater : Tace, inquit, nec sic loqui pergas : non est enim difficile Martino simile, cujus laus apud omnes gentes celebratur. Ita vir sanctus, quæ ejus causa fecerat Dominus, in S. Martini laudem retulit ». Subjicit vero mox ista de miraculo valde insigni sancti viri a Deo precibus impetrato.

6. « Per idem, inquit, tempus Albericus princeps contulit nobis monasterium sancti Eliæ, cujus beatus Gregorius in dialogo meminit. Cum sit autem durum (ut idem beatus Gregorius ait) in mente veteri nova meditari : monachos, quos illic invenimus, ab esu carniū retrahere non potuimus. Constituit autem ibidem Pater noster præpositum unum e fratribus nostris Theodoardum nomine. Is ut vidit se virtute et sanctitate ab eo vitio eos revocare non posse, cœpit in finitimis regionibus pisces emere, ut vel sic eorum satisfaceret voluntati. Jam enim penitus defecerant equi, quos ei pater Odo reliquerat huc illucque discurrentes. Eam vero illorum improbitatem, suumque laborem præpositus Patri nostro identidem significavit. Illo igitur Dominum deprecante, vallis, cui monasterium præeminet, non ita procul, conjunctis inter se collibus, ita conclusa est, ut exiguo torrenti per eam mananti, aditus præcluderetur. Inde igitur paulatim magna aquarum collecta vis lacum effecit, ut nec deinceps opus fuit præposito pisces emere, lacu illo eos suppeditante. Cui vero hoc tribuendum esset, quidam imperiti homines minime adverterunt, eo quod ejus præces, quas eadem causa B. Odo ad Dominum fuderat, auribus suis non perceperant. Non attendentes illud ¹ Psalmodographi : Desiderium pauperum exaudivit Dominus, præparationem cordis illius audivit auris tua. Itemque ² illud : Voluntatem timentium se faciet, et deprecationem eorum exaudiet ». In quo plane impletum illud, quod est in promissionibus Domini ³, ut qui habuerit fidem quantum granum sinapis, montes e loco moveat.

7. Ita plane magnus Odo hoc deploratissimo sæculo a Deo electus, ut alter Jeremias, ut eyellat et destruat, dissipet, plantet et ædificet, vocandus secundum illud ⁴ propheticum, ædificator sepium : nam cum quamplurima monasteria observantiæ penitus monachalis expertia in diversis provinciis a diversis acceperant principibus, qui ea sibi vindicarent, eadem ad custodiam regularis disci-

¹ Ambr. Moral. Chron. Hispan. l. XIV. XV. XVI. — ² Lib. III. c. 40. tom. VI. Sur. XVIII Nov.

¹ Psal. X. — ² Ibid. — ³ Matth. XVII. — ⁴ Isa. LVIII.

plinæ, non sine magno labore perduxit. Hinc factum est, ut Cluniacense nomen per Cluniacensis abbatis alumnos in diversas provincias dispersit, fuerit brevi tempore mirifice propagatum. Qui hæc pluribus cupit, consulat Joannem jam dictum peregrinationis ipsius aliquando comitem.

8. *Wenceslaus martyr.* — Hoc ipso anno princeps Boemiæ Wenceslaus vir sanctus a fratre suo Boleslao occiditur ambitione capiendi principatus seducto. In cujus ultionem rex Otto bellum Boleslao indixit, et longa inter eos concertatio per annos quatuordecim perducta est. Relatus est autem ipse ab Ecclesia Romana inter martyres die natali ipsius, quarto kal. Octobris.

9. Eodem anno, rebellantibus adversus Ottonem regem Henrico fratre, Eberardo duce Francorum, atque Gisleberto duce Lotharingiæ, comparatoque validissimo exercitu, Ottone vero adversus eos expeditionem parante, ut ostenderet Deus, non vinci hostes armis tantum, sed precibus, et prævalere justam causam omni apparatu validissimo, atque fidendum potius divinæ, quam humanæ potentiae, in transitu Rheni sic permisit Ottonis discidi copias, ut aliis ad ripam ulteriorem transmissis, aliis in citeriorem remeantibus cum Ottone,

necesse fuerit illis, qui transmiserant amnem, ex improvise apparente ingenti exercitu hostium, cum illis conferre manus. Et quamvis paucissimi numero essent, eos tamen vicerunt atque fugarunt, incruenta parta victoria. Ut autem ista se habuerunt, Witichindus¹ Saxo describit, et Luitprandus² et alii³: « Tunc rex (inquit Luitprandus) denique suorum tantam constantiam non sine divino instinctu considerans, quoniam fluvio intercedente, corporali præsentia suis subvenire non poterat, recordatus populi Domini, qui repugnantes sibi Amalechitas orationibus Moysis servi Dei devicerat, protinus de equo descendit, seque cum omni populo lacrymas fundens ante victoriferos clavos manibus Domini nostri Jesu Christi affixos suæque lanceæ impositos, in orationem dedit. Quantumque justi viri (secundum justi viri sententiam⁴ Jacobi) tunc valeret oratio, res manifesta probavit. Eo namque orante, cum ex suis nullus occumberet, hostes sunt in fugam conversi; nonnullique eorum cur fugerent, penitus ignorabant ». Hæc Luitprandus.

¹ Witic. l. II. — ² Luitp. l. IV. c. 11. — ³ Sigeb. hoc anno. — ⁴ Jac. V.

Anno periodi Græco-Romanæ 6431. — Anno Æræ Hispan. 976. — Anno Hegiræ 327, inchoato die 28 Octob., Fer. 1. — Jesu Christi 938.

— Leonis VII papæ 3. — Constantini VIII imp. 27. cum Romano imp.

1. *Victoria ad Septimanicas de Saracenis reportata.* — A num. 1 ad 3. Victoria de Saracenis ad *Septimanicas*, oppidum ad Durium fluvium, non longe a Vallisoleto positum, a Ranimiro II Legionis rege reportata, qua hæc ætate nulla celebrior fuit, ad annum sequentem pertinet, quo eam Calvisius in opere Chronol. accurate collocavit. Eam Rodericus lib. 5, cap. 7, his verbis, sed non sine errore, ut mox videbimus, narrat: « Post hæc iterum Ranimirus (Legionensis rex) contra Cæsaraugustam exercitum congregavit. Abenaia autem, qui inibi princeps erat (seu verius Aben-Aia, non vero Abena, ut Baronius habet, aut Aborahia, ut in Codicibus editis Sampiri legitur), audito quod Ranimirus et Ferdinandus Gundissalvi comes Castellæ ad invicem concordarant, timuit in immensum. Unde et seipsum cum terra Ranimiri subdidit ditioni, mentitus Abderamen regi Cordubæ, cui

erat subjectione simili obligatus. Rex autem Ranimirus omnes munitiones regni Cæsaraugustæ, quæ Abenaia resistebant, cædibus et irruptionibus coegit Abenaia obedire. Post quæ Ranimiro ad sua reverso, Abenaia proditoris non immemor, fregit pacta, et reconciliatus principi Cordubensi ratus est posse invadere terminos Ranimiri, et agens exercitum pervenit celeriter Septemmanicas. Quod audiens Ranimirus, assumpto exercitu processit obvius contra eum, et ibidem adinvicem utroque exercitu dimicante, cæsi Arabes, nec fuga, nec strage, sed victoria caruerunt, et secunda feria, in festo scilicet sanctorum Justi et Pastoris, ex Arabibus usque ad octoginta millia perierunt, et Abenaia proditor fuit captus: cæteri qui evaserant, ad oppidum, quod Alfondega dicitur, confugerunt. Ranimirus autem plus sanguine Arabum, quam præliis vel spoliis cupiens satiari, eos viriliter

insecutus in castro Alfondega, quo confugerant, comprehendit. Abderamen autem cum paucis fugæ comitibus vix abscessit. Tunc fuit solis eclipsis per unam totam horam diei ».

2. *Ad sequentem annum pertinet.* — Baronius Moralem, uti fatetur, secutus, hoc prælum eum currenti anno alligavit; Morales vero Toletanum exscribit, qui cum in Sampiro hæc verba legisset: « Dedit Dominus victoriam regi Catholico (nempe Ranimiro) die secunda feria, imminente festo sanctorum Justi et Pastoris », ea sic interpretatus est, « in secunda feria, in festo sc. SS. Justi et Pastoris », quod cum die sexta Augusti celebretur, et hoc anno in feriam secundam incidat, inde deduxit hoc prælum die sexta Augusti præsentis anni commissum. Sed non animadvertit vir doctissimus falsam esse Roderici interpretationem. Hæc enim verba, *insto, immineo*, aliquando quidem tempus præsens significant, sed plerumque *propinquum*, vel proximum esse denotant, et hæc utriusque verbi frequentior usurpatio. Quare non die sanctorum Justi et Pastoris, sed in eorum Vigilia pugnatum. Præterea fullitur Toletanus in eo, quod eclipsim solarem a Sampiro memoratam post prælum contigisse insinuet; cum tamen Sampirus eam præcessisse diserte asserat: « Postea, inquit, Abderrhaman rex Cordubensis cum magno exercitu Septimancas properavit. Ostendit Deus signum magnum in cælum, et reversus est sol in tenebras in universo mundo per horam unam. Rex vero noster Catholicus hæc audiens, illuc ire disposuit cum magno exercitu, et ibidem adinvicem dimicantibus dedit Dominus victoriam regi Catholico, etc. » Si Morales mathematicos consulisset, nullam hoc anno eclipsim in Hispania apparere potuisse, eum certissimum fecissent, demonstrassentque eclipsim, de qua Sampirus, quæque prælum ad Septimancas habitum antecessit, *Salamancae* et in regno Legionensi visam fuisse die decima nona mensis Julii anni nongentesimi trigesimi noni, paucis ante meridiem boris, ut Calvisius laudatus ex calculo mathematico ostendit. Anno itaque sequenti, non vero anno *dcxxxviii*, ad Septimancas pugnatum die quinta mensis Augusti, quæ decima octava erat a die eclipsis solaris, quæque eo Christi anno in feriam secundam incidit, « feria secunda, imminente festo SS. Justi et Pastoris », ut loquitur Sampirus, seu Vigilia utriusque sancti, quæ cum die quinta Augusti concurrat. Die quidem decima sexta mensis Aprilis anni *dcxxxiv*, alia eclipsis solaris visa, de qua Calvisius citatus, indeque aliqui recentes scriptores Hispani hoc prælum ad eum annum retraxere, sed præfatæ temporariæ notæ in annum *dcxxxix* melius conveniunt; eclipsis enim tunc visa magna fuit, ac quatuor digitorum, quod de alia dici non potest, ut ex supputatione Calvisii intelligimus.

3. *Juxta Arabici scriptoris testimonium.* — Ad hæc Lupus protospata in Chron. nulla eclipsis anni *dcxxxiv* mentione facta, de posteriori habet:

« Anno *dcxxxix* obscuratus est sol, et apparuerunt stellæ mense Julio, adstante tres feria *iii* (hæc verba corrupta, legendumque feria *vi*), ad horas tres, luna *xxix* », juxta numerum aureum. Verum anonymus Andalusianus annum hujus victoriæ, quæ in maximum Ecclesiæ Hispanicæ bonum cessit, mihi extra omnem dubitationem ponere videtur. Hæc ejus verba ex lingua Arabica in latinam versa: « Abderrahman expeditionem sacram publicari jussit (quam cruciatam vocamus) adversus Christianos, eamque appellavit expeditionem potestatis, quia ipsemet in propria persona Musulmannis imperare volebat ». Addit anonymus expeditionem anno Hegiræ *cccxxvi*, mense Octobri anni Christi *dcxxxviii* absoluto, susceptam, et Musulmannos in prælio, quod commissum fuit (anno nempe Hegiræ *cccxxvii*, seu Incarnationis *dcxxxix*) in turpem fugam coniectos. Subjungit: « Christiani acriter persecuti sunt hostes, quos ceciderunt, aut captivos duxerunt, et illi tantum evasere, qui ad suas regiones aut urbes pervenire potuerunt ». Quare cum annus Hegiræ *cccxxvi* ab anonymo diserte expressus mense Novembri anni Christi *dcxxxvii* auspicatus fuerit, manifeste apparet. pugnam Septimancensem, quam eclipsis solaris ad annum Christi *dcxxxiv* aut *dcxxxix* pertinere demonstrat, ad priorem referri non posse, huncque anonymum jamdiu litem hanc diremisit. Postquam hæc scripseram, alius mihi hujus rei testis occurrit, Hepidannus scilicet, qui in Annal. ad annum *dcxxxix* habet: « Eclipsis solis facta est circa horam tertiam diei, XII kal. Aug. in iv anno Ottonis regis, in vi feria, luna *xxix*. Eodem die in regione Galliciæ innumerabilis exercitus Saracenorum a quadam regina nomine Tota penitus extinctus est, nisi rex illorum, et quadraginta novem viri cum eo ». Hepidannus quidem, qui sæculo sequenti in Germania vixit, in illa, quam narrat, circumstantia peccat, sed is error notationi temporis non officit, cum aliunde constet.

4. *Secunda profectio Romana S. Odonis abbatis Cluniacensis.* — A num. 3 ad 8. Mabillonius Sæc. v Benedict. in Elogio Historico S. Odonis abbatis Cluniacensis secundam ejus profectionem Romanam in annum sequentem differt, quod Joannes in ejus Vita, initio libri primi diserte hoc asserat. Verum locum Joannis, quem hic exhibeo, in numeris corruptum demonstrat alter ejus locus statim etiam a nobis recitandus. Hæc prioris loci verba: « Anno Dominicæ Incarnationis nongentesimo trigesimo nono (legendum, trigesimo octavo. Ipsemet Mabillonius ait, legi *trigesimo nono* in Ms. Codice Silviniacensi, in aliis vero, quotquot vidit omnibus mendose, *octingentesimo*; verum utraque lectio corrupta), et ejus ætatis sexagesimo, in monastica religione trigesimo anno Romam veniens, me miserum terrenis irretitum nexibus reperit, miseransque suo rete piscatus est, atque cænobium S. Petri Ticini positus usque perduxit. Parvo ibi tempore ab Hugone rege detentus, præ-

dicto viro domno Hildebranno regularibus disciplinis me tradidit educandum. Non post multo Romam veniens, me infelicem dignatus est sibi socium sumere; et quem canonicum parentibus abiens rapuit, rediens postmodum monachum reduxit». Nostram emendationem confirmat locus Joannis in lib. 2, num. 7 ad hanc secundam protectionem Romanam a Mabillonio revocatus: «Sub idem tempus Italiam missi sumus a Leone summo Pontifice, ut pacis legatione fungeremur inter Hungonem Longobardorum regem et Albericum Romanæ Urbis principem». Tum num. 8: «Necdum peracto itinere, et antea quam funditus nostra defecisset pecunia, obvium habuimus fratrem nostrum Petrum presbyterum, qui tunc conversationis gratia Romam veniebat: ex cujus substantia nostra dilata est inopia, quia ab eo sumpsimus ex quo iter nostrum perfecimus. Fiebat autem istud duobus mensibus, Januario videlicet atque Februario». Postea num. 9: «Tempore præterito, dum Romuleam Urbem ob inimicitiam Alberici jam fati principis prædictus Hugo rex obsideret», cœpit Odo concordie monita inter utrosque disseminare. Utraque itaque Odonis protectio Romana pro pace sancienda suscepta, et secunda mense Januario ac Februario peracta, Januario nempe et Februario sequentis Christi anni, qui ideo præsentis e Gallia discesserat.

5. *Gesta Romæ a S. Odone abbate Cluniacensi.* — Mabillonius ex citatis Joannis verbis, *non multo post Romam veniens*, etc. deducit Joannem Roma oriundum, ibidemque canonicum fuisse. Verum inde ego eruo, Joannem scribere non potuisse, hanc secundam Odonis protectionem anno dcccxxxix inchoatam esse, ideoque numerum illum corruptum. Joannes enim, si eo Christi anno Romæ parentibus raptus fuisset, non scripsisset: «Sub idem tempus Italiam missi sumus a Leone summo Pontifice», quia idem Pontifex an. dcccxxxix, medio circiter Aprili, vita functus est, et Joannes præfatis verbis innuit, se socium fuisse Odonis, quando e Gallia in Italiam a Leone Pontifice missus est, et quidem ante menses Januarium et Februarium, quibus, ut mox diximus, Odo et Joannes Romam pergentes Petrum presbyterum obvium habuere. Idem Mabillonius qui recte observavit, Baronium anno dcccxxvi, num. 10, de priori Odonis Romana protectione loquentem perperam tradidisse, Joannem tunc ejus socium fuisse, male revocat ad priorem illam protectionem quod Joannes lib. 2, num. 22, de Odone scribit, eum scilicet tunc sancti Martini Vitam Romæ ad sanctum Paulum correxisse, et glossulis illustrasse; cum Joannes ibidem dicat id factum, «ante triennium nobis Romæ apud sanctum Paulum agentibus», ideoque eo tempore, quo Joannes jam socius erat Odonis. Quare hoc accurate cum præsentis anno Baronius illigavit. Præterea recte Baronius ad hunc annum refert Suppentoniensis sancti Eliæ monasterii in Etruria positi reformationem ab Alberico Odoni

commissam, ut testatur Joannes in lib. 3, num. 7, cum ibidem scribat: «Eodem quoque tempore concessit nobis jam fatus Albericus princeps monasterium sancti Eliæ», illis enim verbis manifeste indicat se jam Odonis socium fuisse, ideoque illud in secunda protectione Romana contigisse.

6. *Martyrium S. Venceslai Bohemiæ ducis.* — Ad num. 8. Anno dcccxciv ostendimus, sanctum Methodium fidei lumen in Bohemiam primum invexisse, Borsivoium gentis ducem x, ut Aeneas Sylvius numerat, baptizasse, cum sancta Ludmilla uxore, quæ nepotem suum Venceslaum ad studium pietatis ab infantia erudivit, et facta est ferventissima famula Christi. Uratislaus Borsivoii et Ludmillæ filius, princeps religiosissimus liberos duos reliquit, Venceslaum et Boleslaum, et ille a Ludmilla avia sua educatus fuit. Verum Drahomira femina in Christianos immanissima, Uratislao marito demortuo, regimen invasit, et tam Ludmillam, quam Venceslaum occidendum curavit, ut videre est apud Surium in sancti Venceslai Vita a Joanne Dubravio Olomucensi episcopo, in Historia Bohemica scripta, et ibidem ad diem xxviii Septemb. tom. vii recitata. Licet autem hoc martyrium Sigebertus in Chronico in hunc annum differat, videtur tamen citius contigisse; cum Witichindus lib. 2 asserat, in hujus criminis ultionem Ottonem Germaniæ regem bellum indixisse Boleslao, qui ambitione percipiendi principatus illius sceleris causa fuerat. Deinde narrata Ottonis coronatione statim de illo bello verba facit, et postea de Hungarorum in Germaniam irruptione et Arnulphi Bajoariorum ducis morte, quæ duo anno superiori accidisse constat. Sancta Ludmilla xvi die Septemb. Officio duplici secundæ classis a Bohemis celebratur. S. Venceslaus vero die xxviii ejusdem mensis, sed Officio duplici primæ classis cum Octava, ad quem diem nomen ejus in Martyrologio Romano legitur.

7. *Otto Germaniæ rex rebelles comprimit.* — Ad num. 9. Hermannus Contractus juxta editionem Canisianam hoc anno scribit: «Otto rex contra Bajoarios procinctus movit; interim frater ejus Henricus ab Eberhardo comprehensus est; quo liberato, Eberhardoque in exilium relegato, denuo Noricos cum exercitu invasit, omnesque præter Arnolfi ducis filium Arnolfum subjugavit. Interim Ungarii Saxoniam invadentes a Saxonibus pugna victi caesique fugantur». Idem habet continuator Reginionis ad hunc Christi annum.

8. *Conjugium Hugonis regis cum Berta et Lotharii cum Adelaïda.* — Hoc anno contigit quod Luitprandus lib. 4, cap. 6, his verbis narrat: «Burgundionum rex Rodolphus mortem obiit (anno sc. superiori), cujus viduam nomine Bertham rex Hugo, Alda Lotharii regis filii sui matre defuncta, maritali sibi conjugio sociarat. Sed et filio suo regi Lothario Rodulfi et ipsius Berthæ natam nomine Athelheidem, tum forma honestissimam, tum morum probitate gratiosam conjugem

tulit ». Paulo post : « Hugo mittarum concubinarum deceptus illecebris, præfatam conjugem suam Bertham maritali non solum non cœpit amore diligere, verum modis omnibus exsecrari ». Mabilonius autem in Itinere Italico part. 1, pag. 222, loquens de archivis monasterii Ticinensis ordinis Benedictini, ab eadem Adelhaida tunc Augusta et Ottonis M. uxore conditi, ait : « Servantur in eodem archivo libelli dotis a *Lothario* primo ejus marito concessæ anno dcccxxxviii, tum eodem anno eisdemque verbis *Berte* reginæ, quam Hugo Italiæ rex in conjugem duxit ». Denique Porphyrogenneta lib. de Administr. imp. cap. 26, de Rodolpho Burgundiæ

rege loquens ait : « Eo mortuo in Burgundiam profectus est rex Hugo, et Rodulphi uxorem Bertam sibi junxit, filiam vero ejus Adelesam dedit Lothario filio nunc Italiæ regi » ; ideoque liber ille ante finem anni dcdl, quo Lotharius e vivis excessit, elucubratus. Quare perperam Sigonius lib. 6 de Reg. Ital. scribit, *Hugonem*, cum Lotharium filium regni socium sibi adjunxit, *Adelhaidem* mox illi in matrimonium collocasse, anno sc. dcccxxxii. Porro ex S. Adelhaida *Ennam* Lotharii Francorum regis postea uxorem suscepit Lotharius, ut in Chronico Virdunensi legitur.

LEONIS VII ANNUS 4. — CHRISTI 939

1. *Otto rex pietate et armis insignis factiosos vincit.* — Anno sequenti nongentesimo trigesimo nono, Indictione duodecima, Otto rex in Alsatia circumdatus potentissimo exercitu adversariorum, insperata potitur alia, Deo ministrante, victoria, de qua Witichindus et Luitprandus. Quod in primis ad tempus spectat, eam illo contigisse anno, quo Gislebertus dux Lotharingie infelix occubuit, Frodoardus est auctor. Sed quibus egregie factis idem Otto ad tantam victoriam consequendam absque labore, in summo discrimine positus, aperuerit sibi viam, discas a Luitprando, dum ait¹ : « Unum autem, unum, pater egregie, velim diligenter attendas (sic compellat episcopum Liberitanum, ad quem historiam illam scribit) quod, cum audieris plus Ottonem animi passiones, quam hostes vicisse, miraberis. Hujusmodi vincere adversarios, permittente Deo, nonnunquam et peccatores possunt ; inconcussam animi tenere virtutem, prosperis scilicet non extolli, et adversis non frangi, perfectorum solummodo est. Audi igitur in tanta hac fluctuante procella (cum scilicet desereretur a suis) quo fidei supra petram, quæ Christus est, sit ardore fundatus.

2. « Comes quidam tunc prædices cum eo erat, cujus multitudo militum regis aciem condecorabat. Ille itaque videns quamplurimos ex regis acie desertores ac transfugas fieri, non interiorem, sed

exteriorem considerans hominem, tacitus hæc secum loqui cœpit : Quidquid a rege in hac perturbatione constituto petiero, sine dubio impetrabo, præsertim cum et acre bellum immineat, ac, ne se deseram, timeat. Nuntiis itaque directis, regi supplicat, ut abbatiam quamdam Lauresheim dictam, prædiis ditissimam, sibi concedat cum suis possessionibus, ut quod sibi deerat, militibus suis ministrare prævaleat. Rex autem columbina non solum, sed, ut erat, viperina calliditate suffarcinatus, non hoc quid portenderet, minime advertere potuit : unde et his nuntiis apologeticum dedit, dicens : Illi, quid super hac re sentiam, verbis potius explicabo, quam nuntiis. Quod qui eos direxerat audiens, immensa est affectus animi lætitia, sperans quod poposcerat impetrasse. Unde et moræ impatiens regem adit, eumque sententiam super hac re promere postulavit. Cui rex populo circumstante : Obedire¹, inquit, magis oportet Deo, quam hominibus. Quis enim sanum sapiens ignorat, te hæc non humilitate petitionis, sed comminationis auctoritate dixisse ? Scriptum est enim¹ : Nolite sanctum dare canibus. Quod quamvis de doctoribus spiritualiter intelligendum esse prædicetur : ego tamen satis me dare canibus sanctum censeo, si monasteriorum prædia, quæ a religiosis viris Deo sunt militantibus tradita, tulero, et sæculo militantibus dederò. Tibi vero tam

¹ Luitp. lib. iv. c. 15. 16.

¹ Act. v. — ² Matth. vii.

procaciter injusta petenti, sub testimonio totius populi, nec hoc, nec aliud unquam te a me accepturum esse testificor : si cordi tibi est cum cæteris infidelibus avolare ; quanto citius, tanto melius. His auditis (quia facies speculum est mentis) cordis verecundiam vultus rubore nudavit, concitusque regis ad pedes corruens, se peccasse, se graviter deliquisse, confessus est ». Hæc de his ipse. Sed quomodo insperatam, Deo duce, de adversariis sit victoriam consecutus, attende quid subiciat :

3. « Everardus et Gislebertus, audito regem in Alsacia esse, quoniam neminem, qui eis resisteret, verebantur, permagno collecto exercitu, Rhæni alveum ad Andernacum pertranseunt, regisque fideles circumquaque demoliri procedunt. Udo sane Hermannii ducis Suevorum frater, necnon et Conradus cognomento Sapiens, quos superius diximus regi esse fideles, ipsis in partibus erant ; sed quia eorum copiarum istorum copiis impares extiterant, his occurrere trepidabant. Verum iubente Deo, non locutionis, sed inspirationis modo, hos cum multis spoliis redentes pone sequuntur. Cumque paululum processissent, quidam eis flens et ejulans obviam venit sacerdos. Qui rogatus ab eis, quo iret? cur fletet? Ab istis, inquit, prædonibus ego venio, qui paupertatis meæ ærumnam, uno, quod possidebam, jumento ablato, dilatarunt. Quod cum præfatus Udo et Conradus audirent : An Gislebertum atque Everardum viderit, examussim sunt seiscitati. Quo respondente : Quoniam cum præda cunctis pæne trans Rhenum missis, ipsi soli cum eorum electis militibus (quod nec bene vertat) capiunt cibum ; tanta celeritate super eos irruunt, ut si videres, non eos currere, sed diceres transvolare. Quid plura? Everardus gladiis occiditur, Gislebertus Rhæni undis submergitur, quas quoniam exsuperare præ multitudine non potuit, anima recedente defecit. Cæterorum vero nullus aufugit, qui non aut vivus caperetur, aut gladio truncaretur. Vides igitur quemadmodum super regem tribulantes Dominus manum miserit, quem in viis suis ambulantem cognovit ». Hæc de victoria Luitprandus hujus temporis scriptor, subjiciens his ingentes gratiarum actiones, quas Otto Deo retulit, ubi de victoria nuntium acceperat, cum ad Ecclesiam tunc temporis Deo justissimam causam suam commendaturus accederet. Sed et Henrico fratri rebellionis principi supplicibus votis veniam petenti benignus indulgit, imo et ducatu Burgundiæ ipsum donavit.

4. *De Gisleberti ducis pietate.* — Quod ad Gislebertum ducem Burgundiæ, ejusmodi factionis in Ottonem regem unum ex principibus, spectat, qui sororem ipsius Ottonis filiam Henrici regis duxerat

uxorem, non prætereundum, eundem ipsum, nisi regnandi cæca fuisset cupidine captus, inter sapientes piosque principes fuisse annumerandum, utpote qui ferme solus in Galliis, aliis res omnes Ecclesiasticas dissipantibus, divinum cultum propagare animo ardenti curavit. Ipse enim oraculo divino commonitus, nobile sancto Gerardo, invito licet, monasterium Bromiense contulit, ut monasticam illie collapsam restitueret disciplinam. Auctor ¹, qui in rebus gestis S. Gerardi ista fusius est prosecutus, de eodem Gisleberto ista subnectit : « Verum ne Gislebertus dux sine laude a nobis abscedat, fuit ille erga sanctum Gislei locum sive monasterium satis humanus et valde munificus, quædam prædia subtrahens militibus suis, quibus non pauca beneficii loco contulerat, eaque jure perpetuo possidenda tradens ibidem Christo militaturis. Ubi sane unum est, quod moneo repetens, iterumque monebo. Tibi dico Ursidonge Cellensis monacho, qui ducis Gisleberti largissima stirpe victitas, ne sis aliquando immemor animæ ejus, sed incomprehensam clementissimi Salvatoris benignitatem precibus importunis pulses, aurea perpetuæ ut contingat præmia vitæ. Et ne forte desperabundus obmurmures, quod adversus dominum suum Romanum principem rebellavit, cogites eum durissima morte luisse pœnas, et Dominum JESUM non bis vindicare in idipsum ». Hæc ipse. Extant hujus Gisleberti duo Diplomata data abbatibus diversorum monasteriorum, sed alterum ex his, quod notatum habetur anno sequenti, errore factum apparet, nam ad dictum annum non pervenit.

5. *Gerardi sanctitas.* — Quod vero spectat ad S. Gerardum, de quo est mentio, eluxit hoc sæculo tenebroso ipse egregia sanctitate prosapia, nobilis ex Austrasiarum ducibus ortus, qui solitariam primo vitam eligens, ad restituendam collapsam penitus monasticam disciplinam a Deo vocatus, utiliter hoc est functus munere, adeo ut decem et octo monasteria ad regularem revocarit observantiam, quibus ipse vigilantissimus cura pastoralis præerat.

6. *Leoni mortuo succedit Stephanus papa IX.* — Eodem anno defuncto Leoni papæ, cum sedisset annis tribus et sex mensibus, subrogatur Stephanus IX, dictus VIII, patria Germanus, quem idem qui nuper nominatus S. Gerardus Romam veniens adiit, ut acciperet ab eo Apostolicas litteras pro munimine monasterii Bromiensis, quas et libenter impertitas accepit. Hæc in ipsius Gerardi Vita pluribus.

¹ Extat apud Sur. die 1. Octob. l. v.

Anno periodi Græco-Romanæ 6432. — Anno Aræ Hispan. 977. — Anno Hegiræ 328, inchoato die 18 Octob., Fer. 6. — Jesu Christi 939.

— Stephani IX papæ 1. — Constantini VIII imp. 28. cum Romano imp.

1. *Germania et Gallia bellis concussæ.* — A num. 4 ad 4. Hermannus Contractus juxta editionem Canisianam hoc anno ait : « Otto rex Lotharingos rebellantes petens usque ad Campimontem cum exercitu venit. Interim Ludovicus rex Galliarum Caroli (cognomento Simplicis) filius Alsatiam invasit : sed mox Ottone hoc comperto redeunte, perterritus regnum suum repetit. Cumque castrum Brisacha ab Ottone rege obsessum oppugnaretur, capita rebellionis Eberhardus dux occisus et Gisalpertus (legendum, Gisalbertus) dux in Rheno submersus interierunt, episcopique et alii, qui cum eis contra regem venerant, fugati et dispersi sunt. Otto vero rex dedito castro in regnum Lotharii (id est, Lotharingæ) reversus, cunctos sibi rebelles præter Metensem episcopum subjugavit. Henricus quoque frater ejus projectis armis ipsi se subdit ». De his motibus fusius Witichindus lib. 2.

2. *Floret S. Gerardus abbas Broniensis.* — Ad num. 4 et seq. Varia fuit *Gisleberti* Lotharingæ ducis fortuna, qui modo Carolo Simplici, ac Ludovico Transmarino ejus filio favens, « trans Rhenum tandem profectus prædatum », inquit Flodoardus in Chronico ad hunc Christi annum, « Saxonibus sc, dum revertitur, insequentibus, in Rhenum lapsus » periit ; Gerbergam Ottonis Germaniæ regis sororem duxerat, quam postea Ludovicus Transmarinus sibi copulavit. Gislebertus summo in honore habuit *sanctum Gerardum* abbatem Broniensem, quod monasterium, gallice *Brugne*, in vicinia Namurcensis urbis situm. Hujus sancti Vitam a monacho anonymo, hoc vel insequenti sæculo scriptam, recitat Mabillonius Sæc. v Benedict. cum genuino stylo, quem Surius ad diem iii mensis Octob. mutaverat. Monachum induit apud sanctum Dionysium, ibique per annos decem Deo militavit. *Bronio* redditus constitutos ab se clericos loco cedere persuasit, et monachis ipse præfectus, longe lateque virtutum odore fragravit. Ilinc multis in locis expeditus, ut collapsa monasteria resarciret, tantum non extinctam in Belgio regularem disciplinam revocavit. Plerique omnes cum laudato anonymo cenobii numerant octodecim, quæ præter Broniense Gerardi cura complectebatur. Sed ampliora *Gerardi* zelo debebantur ; ut non immerito parens alter habeatur redivivæ cum

in Belgio, tum in toto regno Lotharii familiæ Benedictinæ, quæ ejus studio sacrisque adhortationibus reffloruit. Cum enim *Gisleberti* Lotharingæ ducis ditioni omnes illæ circa Mosam, Scaldis partem, Sabin, Mosellam, et cis Rhenum provinciæ subjacerent ; quotquot ejus ditioni parebant monasteria cum pluribus aliis in Francia secundum Chronicon Mosomense a Dacherio t. vii Spicilegii editum, novam a Gerardo formam acceperunt. Qua de re plura Mabillonius citatus.

3. *Moritur Leo VII PP.* — Ad num. 6. Leo VII Pontifex Romanus, qui anno *dcxxxvi* ante diem nonum mensis Januarii Pontificatum adeptus erat, præsentem e vivis excessit ; cum Honorius Augustodunensis, Martinus Polonus et Platina in Vitis Pontificum annos tres, menses sex et dies decem ei attribuant, eique plerique Catalogi suffragentur. Quare mors ejus conligit circa diem decimum octavum mensis Julii. Flodoardus, qui in Leone VII libellum suum de Pontif. Rom. absolvit, de eo ait :

Septimus exsurgit Leo, nec tamen ista volutans,
Nec curans, apicis mundi, nec eelsa requirens :
Sola Dei quæ sunt alacri sub pectore volvens,
Culminaque evitans, oblata subire renutans.
Raptus at erigitur, dignusque nitore probatur
Regiminiis eximii, Petrique in Sede locatur.
Sed minime adsuetam linquit decoramine curam,
Deditus assiluis pœcibus, speculamine eelsus.
Affatu lætus, sapiens, atque ore serenus.

Subdit, sese ab eo benigne Romæ exceptum, epulisque recreatum, ac, ut Deus diu illum servet, precatur.

4. *Stephanus VIII in ejus locum subrogatur.* — In Leonis VII locum *Stephanus* octavus, vulgo nonus, natione Germanus, suffectus est, ab eoque Petrus archiepiscopus Ravennas jurium suorum confirmationem obtinuit, ut refert Rubens lib. 5 Hist. Ravenn. qui ex eadem hæc verba exhibet : « Anno, Deo propitio, Pontificatus domni Stephani, summi Pontificis et universalis papæ, in Apostolica sacratissima beati Petri Sede, primo ; regnante domno Hugone piissimo rege, anno xiv. Sed et domno Lothario ejus filio item rege anno nono, die vicesimo nono Octob., Indict. XIII, Ravennæ ». Quare Stephanus VIII hoc anno Pontificatum iniit, Hugo anno *dcxxxvi* ante diem xxix Octob. rex Ita-

liæ dictus, et post eundem diem *Lotharius* anno dcccxxx in consortium regni ab eo adscitus. Baroni-
 us ait, *sanctum Gerardum* litteras Apostolicas ab
 hoc Pontifice obtinuisse pro munimine monasterii
 Broniensis, non Bromiensis, ut ibidem perperam
 legitur. Verum *Stephanus* ille, cujus mentio in
 Vita sancti Gerardi num. 29, ubi dicitur sanctum
 Gerardum Romam profectum, ut confirmationem
 rerum et libertatis præfati monasterii peteret, non
 est Stephanus VIII, sed Stephanus VII, ut notavit
 Mabillonius in Observat. præviis ad Vitam sancti
 Gerardi num. 41. Licet enim Miræus duplex *Stephani*
 papæ rescriptum referat : unum brevius in
 Notitia Ecclesiarum Belgii pag. 94, alterum pro-
 lixius in Diplomatis p. 274, et quidem sine chro-
 nicis præter diem notis, non tamen duo, sed
 unicum a Stephano papa privilegium Gerardus obti-
 nuisse videtur. Nam utrobique eadem verba, idem-
 que dati Diplomatis dies *V kal. Maii*. Deinde *Bene-*
dictus seu *Benno* Metensis episcopus, qui priori
 subscripsit, anno dcccxxix in ordinem redactus est,
 uti suo loco diximus, et *Stephanus* Cameracensis,
 unus item ex subscribentibus, anno dcccxxxv vi-
 vendi finem fecit. Itaque *Stephanus VII* Privile-
 gium *Gerardo* concessit, non vero Stephanus VIII.
 Hinc Henricus Auceps litteris anno dcccxxxii, statim
 nempe post mortem Stephani VII datis, cœnobii
 Bronii foundationem confirmat.

5. *Synodis et Privilegiis Ecclesiarum absentes*
subscribebant. — Notabilia sunt verba anonymi,
 qui Vitam S. Gerardi scripsit : « Quod cum mira
 alacritate animi dominus Stephanus sancte Ro-
 manæ Sedis tunc Apostolicus jussisset fieri : (ipso
 consistente viro Dei, imo dictante debentia scribi)
 plumbeo bullatum sigillo Privilegium, quod et *Per-*
tongar appellant (id est, *Pancharta*, ut explicat
 Mabillonius), contulit illi, concessa etiam licentia
 sibi, ut gratia id confirmandi ex præcepto ipsius
 domini Apostolici omnes subscriberent episcopi ».

Mabillonius lib. 2 de Re Diplom. cap. 20, num. 4
 et seqq. pluribus exemplis demonstrat, Synodicis
 Diplomatis Ecclesiarum seu monasteriorum Pri-
 vilegiis, Conciliis et litteris regiis absentes subscri-
 psisse, et aliquando futuros. Quod ob eam causam
 in more venerat, ne novas sæpius ad confirma-
 tionem Privilegiorum litteras obtinere necesse
 esset; nec cunctarentur futuri episcopi, abbates,
 et principes ea confirmare, quæ in vetustis monu-
 mentis ab antecessoribus suis roborata vidissent.
 Sic in Concilio Parisiensi tertio Patres postulant,
 ut « Canones hi ab episcopis absentibus, quibus
 oblati fuerint, subscribantur », sicut præfert ultimi
 canonis inscriptio : « quatenus », addit canon, « in
 hoc quod universis observandum est, universitas
 debeat consentire ». Privilegium pro Trenorchien-
 si monasterio in Synodo Cabillonensi an. dcccclxxv con-
 cessum, non solum præsentibus, qui erant episcopi
 confirmant; sed etiam « absentium quoque sacerdo-
 tum nec minus idoneis stipulationibus per Christum
 et in Christo fulciri postulant ». Quod pro eorum
 voto præstitum esse docent subscriptiones, in qui-
 bus archiepiscopi nonnulli post episcopos subscri-
 bunt, nempe qui absentes erant, aut postea suc-
 cessere. In litteris *Drogonis* comitis, quibus advo-
 cati jus refundit in monachos Gemeticenses, hæc
 apponitur chronologica nota : « Anno ab Incarna-
 tione Domini mxxx, Indictione xiii, regnante rege
 Francorum Rodberto, anno regni sui xlii, et filii
 ejus concorditer cum ipso regnantis anno jam
 quarto Henrici.... Ego Henricus gratia Dei Fran-
 corum rex hanc chartam a beatæ memoriæ patre
 meo Rodberto confirmatam, regia auctoritate simi-
 liter confirmo ». Tum sequuntur aliæ subscri-
 ptiones, quibus posterior, tametsi ordine prima,
 accessit Henrici regis subscriptio post mortem Rod-
 berti patris sui, ut indicant hæc verba *beatæ me-*
morie, quo tamen vivente charta confecta est.

STEPHANI IX ANNUS 1. — CHRISTI 940.

1. *Stephanus papa a sceleratis vultu deformatus.* — Sequitur annus nongentesimus quadragessimus, Indictione decima tertia, quo Stephanus papa, natione Germanus, cum a Romanis, posthabitis cardinalibus, esset electus, opera Ottonis regis tyrannorum in se odium concitavit, adeo ut a quibusdam sacrilegis fuerit crebris ictibus facie deformatus. Albericus enim, qui his temporibus (ut superius dictum est) principatum in Urbe gerebat, ratus non posse Urbis se dominium relinere securum, si non gentilis suus, et ipsi probe notus atque fidelis Pontifex Romæ sederet, in eundem Stephanum se exhibuit parum æquum, ita sinens eum manibus impiorum lancinari. Ipse vero Stephanus papa ita vultu vulneribus deturpatus, a publico abstinuit congressu hominum; licet revera non dedecori, sed ornamento sint quæque stigmata propter justitiam a satanæ ministris illata, et eo pulchriora, quo magis perspicua spectantibus fiunt. Hæc de Stephano a Romanis adeo male habito vetus liber de Romanis Pontificibus, ex quo reliqui accepisse creduntur, scripta continet. Quod vero Germanus natione electus Pontifex adeo male habitus a Romanis fuerit, Ottonis regis excitavit animum in eos ulciscendi, agendique ut ejusmodi vis tyrannica in promotione Pontificum auferretur. Quamobrem factum est, ut immiscendi se ipse in electione Romanorum Pontificum, occasionem aliquam cæperit cogitare: quando autem id perfecit, suo loco dicetur.

2. *Edmundus rex in Anglia et Dunstanus ejus consiliarius.* — Hoc etiam anno defuncto Ethelstano Anglorum rege, successit Edmundus, qui cum mox sanctum Dunstanum suum consiliarium elegisset, sed suasionem æmulatorum ejecisset, suo didicit periculo, quanti principes facere debeant viros veritatis amatores, Deum timentes. Rem gestam exacte narrat¹ Osbertus in Dunstano verbis istis: « Sublato ex hac vita rege Ethelstano, successit ei in regnum Edmundus frater ejus. Hic post aliquot consecrationis suæ dies, missis nuntiis, rogat Dunstanum venire ad se: sciens quippe

qua ratione, qua prudentia, qua omnis probi consilii gratia præditus fuerit, magnopere desiderabat illum sibi proximum esse, cujus industria fultus tam se, quam regnum sibi commissum sub æquitalis virga facilius gubernaret. Dunstanus itaque regi quasi præcellenti. secundum Apostoli² præceptum, obediendum esse perpendens, regem adiit, et salva in omnibus reverentia ordinis sui, ejus imperio se subjecit. Ipse suo consilio regni negotia disponebat, ipse lites et contentiones, si quando oriebantur, destruebat, ipse pacem et concordiam inter omnes nutrebat. Nullus in qualibet causa unquam de injuria sibi illata conquestus est, si ad comprobendam judicis sententiam Dunstanus medialis aut arbiter sederet. Rex ipse et princeps, quique ita ei submissi erant, ut contra id quod ipse juberet, ordinaret, nemo quidquam faceret. Magnus itaque habebatur a cunctis. Hæc omnium bonorum invidus hostis attendens, et quo modo ea turbaret, sua arte perquirens, invenit quosdam, quorum corda bene noverat virum non sincere diligere, sed ei specie tenus sui amorem prætere. Hos ad dissipandum bona quæ non amabat, ardentem contra virum inflammat, ac primo clam, postea palam ad detractionem ejus illorum ora relaxat. Quid dicam? in tantam discordiam profecerunt verba malignantium, ut subversa omni pace, Dunstanus non solum pristino honore privaretur, sed et curia depelleretur.

3. Quo facto, die tertia rex in silvam venatum ivit; silva autem ipsa montem magnæ altitudinis occupat, qui mons in summitate sui interruptus, ingens præcipitium et horridam abyssum offert. Cum ergo fugitantem cervum hac illacque rex insequeretur; cervus ad præruptum montis hiatus perveniens introrsum ruit, ac in partes discissus interiit. Insectantes canes par ruina involvit. Equus, quem rex sedebat, ruptis habenis, effrenis effectus, obstinato cursu regem post bestiam portans, ad ultimam sortem regi præceps barathrum patens intentat. Ille trepidat et angustiatur. Occurrit interim animo injuria Dunstano illata; inge-

¹ Osbert. in vit. Dunstani c. 13. 14. apud Sur. die XIX. Maii l. III.

² 1. Pet. II.

muit, et se quam citissime illam multiplici commendatione correcturum (solummodo imminenti sibi mortem ejus meritis ad horam avertat Deus) celeri mentis sponione Deo promittit. Cujus cordis præparationem auris Dei e vestigio audiens¹, illius misertus est. Equus namque illico substitit, et regem a periculo mortis liberatum valde gratiosum Deo reddit. Inde ad hospitium rex reversus, adunatis principibus suis, rei quæ acciderat ordinem pandit, et Dunstanum cum honore et reverentia adduci præcepit. Actaque coram eo pœnitentia pro injuriis, quas ei intulerat, veniam ab eo cum humilitate postulat. Qua potitus, fidum se amicum viro deinceps omni tempore futurum, nec ulterius cujusquam maledicis verbis de eo crediturum pollicitus est, etc. » Subdit his de accepto dono regis loco ædificandi monasterium, deque ejus erectione, quod Glascovia nuncupatur.

4. *Conflagratum monasterium Agaunense sanctus Udalricus visitat; ubi de pluralitate missarum unius diei.* — Eodem anno nobile Agaunense monasterium S. Mauriti a Sarracenis inflammatur. De quorum grassationibus in peregrinos Roman petentes, et occupatione ejus monasterii Frodoardus meminit. Verum quæ post conflagrationem ejusdem monasterii acciderint, in rebus gestis S. Udalrici Augustani episcopi ab auctore ejus temporis scriptis hæc leguntur¹: « Regionem quoque Burgundionum tempore alio adiit, et ad Agaunensium locum, ubi S. Mauritius cum suis sequacibus propter nomen Domini martyrium sumpsit, magnæ humilitatis studio visitavit: quia antea a rege Burgundionum promissionem accepit, ut unum de sanctis martyribus ex ejus datione et adjutorio inde ad Augustam referre mereretur. Et cum illuc die sabbati perveniret, monasterium noviter exustum a Sarracenis invenit, et nullum de habitatoribus ibi conspexit, nisi unum ædis ædilem, combustum monasterium custodientem. Cumque ille totam noctem in Dei laudibus ibi permaneret, et mane cum radius solis primum latitudini terræ lucem diffunderet, missam de sancta Trinitate celebravit. Qua expleta, cum alteram statim venerationi diei Dominicæ congruentem celebrare cœpisset, duodecim clerici cum multitudine populi advenientes, ministerii sui celebrationem audientes perstiterunt. Quo peracto, sanctus episcopus eosdem fratres salutavit, et muneribus honoravit, et ob quam rem illuc deveniret, notum fecit. Qui hilaritatis ejus dulcedinem et sanctitatis religionem persentientes, ne delectabili desiderio privatus abiret, aperta collocationis sanctorum spelunca in scopulo excisa, plurima parte sanctorum reliquiarum donatum lætificaverunt.

5. « Cum vero optabili licentia clericorum et amantissima dimissione populi inde rediret, Constantiam civitatem causa orationis visitavit, et inde ad Augiam insulam venit, et ab Alewico abbate charitative susceptus, et omnimodis commodis bene procuratus est: cumque amabili colloquio inter se sermocinarentur, omnia, quæ ei in itinere acciderunt, nota fecit. Benevolentia autem abbatis, cum audiret eum pro amore sanctorum reliquiarum exire, desiderio ejus satisfaciens, non modicam partem de corpore S. Mauriti et de aliorum multorum sanctorum reliquiis ei donans lætum abire permisit. Augustæ vero civitati cum appropinquaret, præmissis nuntiis demandavit, ut ad oplivum donum sanctorum reliquiarum, quod secum attulerat, honorifice clerici cum populo et cum crucibus et incenso pigmentorum, aquaque benedicta occurrerent, et suscipiendo gloriose, cum laudibus et melodiis congruis perducerent honorifice cum illo in Ecclesiam in honore sanctæ Dei Genitricis Mariæ consecratam. Illuc cum perductum esset, ab episcopo caute collocatum est in arcam auro et argento coopertam, ad laudem Dei omnipotentis et in auxilium populi advenientis in nomine Domini nostri Jesu Christi, cui est honor et gloria per infinita sæcula sæculorum. Amen ». Illicusque tum vivens, et forsitan etiam iisdem præsens auctor.

6. Quod vero audisti celebrasse sanctum duas missas eodem mane in Ecclesia monasterii Agaunensis, accipe quæ idem auctor de ipso ait superius capite tertio: « Missas autem tres vel duas, aut unam, secundum spatium temporis cantare quotidie non desiit, si infirmitas corporis aut aliquod studium bonum ei non subtraxit ». Ubi apponit ista nobilis scholiastes Velserus: Liberum olim erat sacerdotibus, quot vellent una die missas celebrare, quod ex Walafrido colligas capite vicesimo primo, et fortassis ex S. Leonis papæ Epistola septuagesima nona ad Dioscorum, capite secundo. Concilium vero Salegustadiense, cui Bruno Angustanus interfuit, anno millesimo septuagesimo tertio, constituit capite quinto, ne quis trium missarum numerum excederet. Alexander vero Pontifex, qui obiit anno millesimo septuagesimo tertio, ad unam revocavit¹.

Hoc pariter² anno apud Narbonam in oppido cui nomen, Fons Coopertus, Concilium celebratum est, in quo controversia agitata reperitur de finibus dioceseos inter episcopum Urgellitanum et Pallariensem, decretumque ut Pallaria urbs sacra peteret ab Urgellitano episcopo. Quæ præterea in eo Concilio decreta fuerint, ignorantur.

¹ Vil. S. Udal. a Marco Velsero edita, c. 15.

² C. Sufficit de consecr. dist. 1. — ² Marian. de rebus Hisp. l. 8. c. 5. hoc an. DCDXL.

ALIO periodi Græco-Romanæ 6433. — Anno Æræ Hispan. 978. — Anno Hegiræ 329, inchoato die 6 Octob., Fer. 3. — Jesu Christi 940.

— Stephani IX papæ 2. — Constantini VIII imp. 29. cum Romano imp.

1. *Aoritur Athelstanus Angliæ rex.* — Ad num. 2 et seq. Hovedenus part. 1 Annal. pag. 422, Athelstani Angliæ regis mortem his verbis refert: « Anno ab Incarnatione Domini DCXL, strenuus et gloriosus rex Anglorum Athelstanus anno XVI regni sui, Indictione XIV, sexto kalend. Novembris, feria IV, apud Glavornam vita decessit, et ad Maidulfi urbem delatus honorifice est tumulatus: cui frater suus Eadmundus XVII anno ætatis suæ in regnum successit ». Ita etiam plerique alii scriptores Anglici, et quicumque diem ejus emortualem memorant, idem ac Hovedenus scribunt. Verum loco *feria IV*, legendum, *feria III*, quæ cum die XXVII Octobris concurrit. Notabis obiter Anglos per hæc tempora *Indictiones* a Septembri sæpe auspiciatos esse, quod et variis aliis exemplis liquet. « Exuvie triumphales », inquit Malmesburiensis lib. 2 de Reg. cap. 6, « Malmesburiam delatæ, et sub altari tumulatæ sunt. Portata ante corpus multa in argento et auro donaria: simul et sanctorum reliquiæ de transmarina Britannia emptæ. In talibus enim patris thesauros, quos ille diu coæcervatos et intactos reliquerat, consumpsit, somnio, ut ferunt, admonitus; vir qui parum ætati vixit, multum gloriæ.

2. *Ei Edmundus frater succedit.* — Eo sine liberis defuncto successit *Edmundus*, Edoardi senioris et tertii conjugis filius, et defuncti regis frater, qui priorum regum pietatem secutus, virtutemque bellicam æmulatus, parvo quo regnavit tempore, magnam gloriam adeptus est. Primo regni sui tempore, virginem sibi in conjugem elegit, tam sanguine quam vitæ sanctitate illustrem, quam aliqui *Elfgivam*, aliqui *Algivam*, et alii *Alfgivam*, et omnes *sanctam* cognominant. Ex ea Edmundus duos filios suscepit, *Edwium* et *Edgarum*. « Cum rex Edmundus », inquit Westmonasteriensis hoc anno, « regalibus insignibus esset sublimatus, beatum Dunstanum, quem adhuc fratre superstite probabilis vitæ, et linguæ noverat expeditæ, suis consiliis interesse præcepit, ut inter palatinos regios, principesque connumeraretur electus ». Sed dum Dunstanus in aula a plerisque colitur, aliorum invidiam movet, qui eum tandem ex aula ejecerunt, uti narrat Baronius ex Osberno in sancti Dunstani

Vita. Postquam in aulam revocatus fuit, « cum præfato regi Edmundo filius nasceretur, nomine Edgarus, puer videlicet pacis ac justitiæ bajulus futurus, audivit idem beatus beatos in cælo angelos gratulantes et cum magna gratulatione psallentes: Sit pax, sit magna Anglorum Ecclesiæ lætitia, quandiu puer natus regnum tenuerit, et noster Dunstanus mortalis vitæ metas transegerit. Quod dictum quanta sit rerum veritate subnixum, congruus ordo præsentis lectionis faciet manifestum », inquit idem Osbernus uum. 19. Quando *Edgarus* regnum inierit, suo loco dicemus.

3. *Vita S. Dunstani non ab Osberto, sed ab Osberno et Eadmero composita.* — Porro sancti Dunstani Vita, qua Baronius usus, a Surio ad diem XIX Maii edita et ab eo adscripta Osberto, quia dixerat Osbernum monachum et præcentorem Ecclesiæ Cantuariensis sancti hujus præsulis Vitam elucubrasse, quem in Osbertum transformavit. Surii errorem Baronius, alique secuti sunt. Verum postquam genuinum Osberni opus prodiit, ea Osberno restituta fuit, uti in Actis SS. Bollandianis, et Sæculo V Benedictino. Wartonus tamen in Præfatione partis 2 Angliæ Sacræ num. 10, opera *Eadmeri* monachi Cantuariensis enumerans ei eandem Dunstani Vitam adscribit, atque vere ei deberi, licet *Osbernus* opus ejusdem argumenti publicarit, et antiquo quodam Vitæ Dunstani auctore, quo et Eadmerus usus, ipsemet etiam usus fuerit.

4. *Saraceni Frazinetum incolentes grassantur.* — A num. 4 ad 7. Baronius protectionem sancti *Udalrici* Augustani episcopi ad monasterium Agau-nense, in ejus Vita cap. 15 narratam, cum hoc anno recte copulavit; cum in ea dicatur monasterium *noviter a Saracenis exustum* fuisse. Et Flo-dardus in Chronico hoc anno scribat: « Collecta transmarinorum, sed et Gallorum, quæ Romam petebat, revertitur, occisis eorum nonnullis a Saracenis, nec potuit Alpes transire propter Saracenos, qui vicum monasterii sancti Maurilii (Agau-nensis dicti) occupaverant ». Huc referendum quod Luitbrandus lib. 5, cap. 4, de iisdem Saracenis tradit: « Montana, quibus ab occidua seu Septentrionali parte cingitur Italia, a Saracenis Fraxinetum

inhabitantibus crudelissime populantur. Quamobrem Hugo rex (Italiæ sc.) consilio accepto, nuntios Constantinopolim dirigit, rogans imperatorem Romanum, ut naves sibi cum græco igne transmittat : quas chelandria patrio sermone Græci cognominant. Hoc autem eo fecit, ut dum terrestri itinere ipse ad destrendum tenderet Fraxinetum, eam partem, qua mari munitur (arx itaque illa in ora maris posita erat, ut supra ostendimus), Græci obsiderent navigio, eorumque naves exurerent : ac, ne ex Hispania victus eis, aut copiarum subsidia provenirent, diligentissime providerent ». Tum cap. sequenti : « Constantinop. imperator cum regis Hugonis nuntiis suos dirigit, mandans naves, et omnia quæ desideraret se ei daturum, si nepoti suo (nempe Constantino Porphyrogennetæ imp.) filiam suam conjugem daret, etc. Rex itaque Hugo audita hac legatione, directis iterum nuntiis Romano denuntiat se legitimam ex conjugio natam non habere : sed si ex concubinarum filiabus vellet, egregiam ei forma posse præstare, etc. Imperator Romanus naves continuo cum Græco igne præparavit, munera maxima misit, atque ut illam nepoti suo conjungeret, mandavit ». Verum memoria labitur Luitprandus, quando ait, « si nepoti suo filiam conjugem daret, Constantinum autem Leonis imperatoris, non ipsius Romani filium dico ». Ipsemet enim postea cap. 9 testatur, filium Porphyrogennetæ ex Helena Romani majoris filia natum, Bertham Hugonis regis filiam ex Bezola meretrice natam, « quam mutato nomine Græci Eudoxiam dixerant », uxorem duxisse. Sed hac de re anno DCXLIV. Baronii ordinem sequentes, agemus.

5. *Berengarius ex Italia in Germaniam fugit.* — Contigit etiam hoc anno quod Luitprandus lib. 5, cap. 4, refert : « Interea Berengarius frater Anscharii, atque Eporegiæ civitatis marchio, occulte quædam in regem (sc. Hugonem) cœpit moliri. Quod dum regi compertum foret, simulata benevolentia dissimulataque ira, dum ad sese veniret, luce eum privare disposuit. Filius vero ejus nomine Lotharius rex et ipse parvulus, et necessariorum sibi rerum adhuc ignarus, quoniam consiliis his interfuit, celare quemadmodum puer haud potuit. Verum destinato ad Berengarium nuntio, quod pater suus illi facere vellet, aperuit. Hoc itaque Berengarius ut audivit, Italiam quam mox deseruit, ac per montem Jovis in Sueviam ad Hermannum ducem properavit. Uxorem vero suam Willam per aliam viam ad eandem provinciam venire præcepit, etc. Igitur Hermannus Suevorum dux venientem ad se Berengarium benigne suscepit, cumque cum magno honore ante piissimi

regis (nempe Ottonis) præsentiam duxit, etc. Verum quantum poterit designatis, cujus sanctilitatis, quantæque humanitatis rex fuerit, quantæque etiam Berengarius improbitatis extiterit, facile prudens lector animadvertere poterit ». Tum cap. 5 : « Rex Hugo, audita Berengarii fuga, nuntios suos regi Ottoni direxit : promittens se secundum voluntatis ejus deliberationem auri argentique copiam ei daturum, si Berengarium non susciperet, eique adminicula non conferret. Quibus rex (nempe Otto) apologeticum hujusmodi dedit : Berengarius non ob dominii vestri dejectionem, verum, si potis est, ob reconciliationem, nostram adiit pietatem ; si qua in re adminiculare illi penes dominium vestrum potero. Gazas mihi ab illo promissas non suscipio, verum illi meas libentissime tribuo. Berengario vero, seu cuilibet nostræ pietatis clementiam imploranti, subsidium non præbere, summæ dementiæ est ». Hic Berengarius, Berengarii imperatoris ex filia nepos, postea rex Italiæ fuit, ut suo loco videbimus.

6. *Moritur Arradis Billa califa.* — Anno Hegiræ cccxxix mortuus est Arradis Billa califa Babylonensis, *die sabbati, decimo sexto Rabii prioris*, ut habet Elmacinus lib. 3 Hist. Sarac. cap. 4, ideoque hoc Christi anno, die decima nona mensis Decembris, quæ in sabbatum incidit. Hic califa ultimus fuit, qui de exercitibus et pecuniis disposuerit. Nam, ut scribit idem Elmacinus, anno Hegiræ cccxxiv imperatorem Muhammedem ad se venire jussit, commisitque ei administrationem regni, *propter perturbationem imperii*. Venit autem Muhammedes Bagdadum *vicesimo quinto Dulyggæ*, id est, die decima quarta mensis Novembris anni Christi DCXXXVI. Reliquus itaque tantum fuit califæ Babylonensi vanus titulus *Amirolmuminæ*, id est, imperatoris fidelium. Quod etiam Abulpharaius in Historia Dynastiæ observavit. Arradim Billam excepit *Moctafis Billa* frater ejus.

7. *Moritur Eutychiûs patriarcha Alex.* — *Eutychiûs* patriarcha Alexandrinus, Annalium Alexandrinorum auctor, die quarta Maii currentis anni obiit. Fuit Ægyptius, ex oppido *Futatum* dicto, de quo geographus Nubiensis part. 3, Climat. 3. Ejus Annales non paucis erroribus refertos in linguam latinam vertit Edwardus Pocockius, et Oxonii anno MDCLVIII publicavit. Seldenus vero hujus auctoris integram de Marco evangelista et Ecclesiæ Alexandrinæ originibus et moribus vetustis Periocham edidit, sed eum Abrahamus Ecchelensis confutavit, et quæ inde in gratiam heterodoxorum deduxit, vana esse monstravit.

STEPHANI IX ANNUS 2. — CHRISTI 941.

1. *Synodus Suessionensis in causa archiepiscopatus Rhemensis.* — Annus Redemptoris non-gentesimus quadragesimus primus, Indictione decima quarta sequitur, quo (ut auctor est¹ Frodoardus) apud Suessiones Synodus habetur in causa altercationis inter duos, qui se archiepiscopum Rhemensem esse profiteretur, Itugonem videlicet, qui puer (ut dictum est) in gratiam patris ejus electus fuerat, et Artaldum, qui eo pulso, in eam sedem ex monacho fuerat cooptatus. In qua Synodo idem jussus est cessare Artaldus, eo quod jurasset se nunquam in eum archiepiscopatum intromissurum: Hugoque receptus, eo quod clero populoque petente vocatus esset, factum est, ut ordinaretur episcopus. Qui ut sedem recepit, ab exilio eundem revocavit Frodoardum, qui anno superiori cum peregrinaretur ad sepulcrum S. Martini, tentus fuit ab Heriberto comite Itugonis patre, atque mensibus quinque detentus. His peractis, qui Suessione conveniunt episcopi, Rhemos profecti in Ecclesia S. Remigii consecrant Hugonem ejus civilatis archiepiscopum, cui anno sequenti (ut suo loco dicitur) a Stephano Romano Pontifice missum est pallium, a Rhemensibus publica legatione petitum.

2. *Quid Fridericus episcopus Moguntinus in monachos egerit.* — Quo item anno Fridericus archiepiscopus Moguntinus, iterum postulatus judicio defectionis atque conjurationis initæ hoc ipso anno ab Henrico Ottonis fratre, et aliis principibus, in quos ipse Otto animadvertit: purgavit se publica testificatione per corporis et sanguinis Christi perceptionem. Hæc apud Reginonem hoc anno. Addit his² Witichindus: « Igitur cum bella intestina externaque cessarent, legesque divinæ atque humanæ auctoralis vigore pollerent, gravis persecutio monachis oritur in diebus illis, affirmantibus quibusdam pontificibus, melius arbitrari, paucos vita claros, quam plures negligentes inesse monasteriis oportere, oblitis, ni fallor, sententiæ³ patrisfamilias prohibentis servos zizania colligere, sed utraque crescere oportere et zizania et triticum usque

in messem. Quo factum est, ut plures propriæ infirmitatis conscii, deposito habitu, et relictis monasteriis, grave onus sacerdotum devitarent. Fuerunt autem quidam, qui summum pontificem Fridericum hoc non pure, sed fide fecisse arbitrati sunt, qualenus venerabilem virum et regi fidelem abbatem Fuldensem Hadumarum, quoquo modo posset, dehonestaret, ipse enim erat magnæ prudentiæ et industriæ, sub cujus temporibus templum famosum Fuldense igne consumptum est, et ab eo restauratum, et multo majore decore perfectum. Hic pontificem Fridericum sub custodia tenuit secunda conjuratione culpabilem, primum honorifice, sed cum litteras ab eo scriptas deprehendisset, satis severe. Pontifex vero dimissus, dum ultionem quærir, et contra tantum virum leges non prævalerent, humillima monasteria auctoritate tentavit, ut ad excellentissima æqualiter procederet. Sed hujusmodi simulationes incassum profusæ: nam abbas in gratia et amicitia regis permansit, et causis intervenientibus pontifex quod cogitavit, non implevit ». Hæc Witichindus.

3. *Privilegia monasterio S. Vincentii ad Vulturum a regibus Italiæ collata.* — Quod ad res Italiæ spectat, nihil præterea quod prodamus invenimus, nisi Diploma privilegii concessi ab Itugone et Lothario filio Italiæ regibus monasterio sancti Vincentii fontes ad Vulturum posito, quod recitat Joannes ejusdem monasterii monachus in suo Chronico, quod ab exordio mundi usque ad tempus Paschalis papæ secundi perduxit, ex quibus antiquitatis monumentis certa quæ in eis tempora consignantur, suscepto conducunt instituto. Est ejus exordium: « Si fervore charitatis accensi de statu et restauratione Ecclesiarum Dei diligenti cura et indagatione tractamus, regnum nostrum stabilire, ac feliciter nos regnare cum Christo, nequaquam ambigimus, etc. » Collata confirmat privilegia eidem a Desiderio rege Longobardorum, et Galliarum imperatoribus Carolo, Ludovico atque Lothario. In fine autem tempus ejus consignatum ita habetur:

4. « Giseprandus camerarius ad vicem Bosonis episcopi archicancellarii recognovit. Data XIII kal.

¹ Frod. in Chron. hoc an. et hist. Rhem. l. iv. c. 27. — ² Witic. l. ii prope fin. — ³ Matth. xiii.

Augusti, anno Incarnationis nongentesimo quadragésimo primo; regni vero domini Hugonis decimo quinto, Lotharii vero decimo, Indictione decima quarta, in Campania juxta oppidum Romaniae feliciter ».

5. *Russorum classis superata a Græcis.* — Quod ad res pertinet Orientales, hac decima quarta Indictione, Junio mense, tradit Curopalates, Russorum classem ab imperatore superatam esse ac penitus profligatam, ita ulciscente numine adversus eos, qui Christianis immensa intulerant mala: nam de his Curopalates: « Quæ vero isti mala perpetrarint, antequam debellarentur, ea superant omnem tragœdiam. Nam ex his quos ceperant, alios in

crucem egere, alios clavis in terram affixere, alios quasi scopos propositos sagittis petiere. Qui vero ex captis sacerdotii dignitate præstabant, horum capita acutis clavis trajecere. Sacra quoque templa non pauca combussere ». Hæc ipse.

6. Porro hujus gloriosæ victoriæ meminit etiam¹ Luitprandus, hosque quos Græci Russos vocant, ipse Northmannos appellat, cujus pariter ratione omnes populi Boreales essent appellandi Northmanni. Nam (ut ait) Nord, Aquilo, Man, vir dicitur; ita ut Nordman, idem quod Aquilonaris sonet. Ilorum autem ducem seu regem Inger nominatum tradit.

¹ Luitp. l. v. c. 6.

Anno periodi Græco-Romanæ 6434. — Anno Æræ Hispan. 979. — Anno Hegiræ 330, inchoato die 23 Septemb., Fer. 7. — Jesu Christi 944.

— Stephani IX papæ 3. — Constantini VIII imp. 30. cum Romano imp.

1. *Græcorum de Russis victoria.* — Ad num. 5. Russorum classis hoc anno a Græcis penitus profligata, uti narrat incertus Continuator Theophanis in Vita Romani Lacapeni, num. 39: « Quarta decima Indictione, inquit, mensis vero Junii undecima, Russi instructa classe, ad decem navium millia adversus Byzantium navigaverunt. Illos Dromitas vocant (velut palantes dicas ac cursu veloces) atque a Francis genus ducunt. Missus est itaque cum trimibus et celocibus, quotquot in urbe erant, illorum impetum excepturus Theophanes patricius. Instructaque ac peracta classe, jejunii ac lacrymarum apprimæ præsidio communitus, Russos operiebatur, navale cum eis certamen commissurus. Quod vero illi jam junxerant, ac prope Pharum venerant (vocatur vero Pharus, turris quædam et substructio, cui fax accensa imponitur, ad eorum, qui noctu applicant, iter dirigendum) ipse ad Euxini fauces stationem habens (sic enim contraria appellatione vocatus est, cum Cacoixius diceretur, idcirco nimirum quod latrones ea loca insidentes assidue adversus hospites grassarentur, quos ab Hercule sublato aiunt; proptereaque viatores tuto jam illius itinere, Euxini, quasi *hospitalis*, nomen indidisse) in loco quem Hierum vocant, repente in eos impressionem fecit. Hierum inde nominis appellationem sumpsit, quod Argonautæ illac transeuntes, templum ibi exstruxerint. Primus itaque sua ipse celoce vectus, cum Russicarum navium ordinem dissolvit, tum plerasque præparato igne nautico incendit; reliquas in fugam vertit: quem pone

secutæ naves reliquæ atque triremes, hostium omnem aciem penitus fuderunt: ac plures quidem navium cum vectoribus submerserunt, multos peremerunt, plurimos vivos ceperunt. Superstitès cladi reliquæ ad Orientalem plagam, ad locum Sgora dictum trajecerunt.

2. *Aliæ Græcorum de Russis victoriæ.* — « Ibi Bardas patricius Phocas exdux missus, cum equitum peditumque delecta manu, ad hostium iter terra interceptiendum, in eorum cohortem satis numerosam, ad pabulandum aliaque necessaria ad Bithyniæ partes missam incidit, ingentique cum strage fudit et profligavit, atque interneccione delevit. Sed et sapientissimus solertissimusque Joannes Curcuas scholarum domesticus cum Asiatico omni exercitu præsto fuit, multosque Russorum a reliquo agmine aliis aliisque locis divulsos offendens, sustulit; ita sane ut ejus aggressionis metu perculsi, in suis se navibus adunata classe continerent, nec usquam excurrere auderent. Hi porro ingentia maximaque mala perpetraverant, cum necdum illis Romanæ copiæ præsto essent. Nam Stenum omne, quod vocant, igne vastarunt. Ex illis, quos captivos ceperant, alios in crucem agebant, alios terræ configebant, alios velut ad melam erectos jaculorum imbre impetebant. Quotquot vero sacerdotalis ac clericalis ordinis deprehendebant, iis retro vinctis manibus, per medium caput clavos ferreos adigebant. Multas sacrarum ædium subjecta flamma combusserunt. Ingruente vero hyeme, cum eos jam necessarius commeatus deficeret, dum scilicet scholarum dome-

stici Curcnæ copiarum insultus, virique prudentiam ac consiliorum sagacitatem timent, necnon patricii Theophanis navalia prœlia, exque insidiis astinque aggreddientis impetum reformidant, domum redire constituerunt. Ac vero, hoc adnitentes, ut Romanam classem laterent, cum mense Septembri, Indictione quinta decima, ad Thraciæ partes transfretare aggressi essent, quem dicebam patricium Theophanem obvium habuerunt. Neque enim viri solertissimum ac pervigilem animum unaque fortissimum fefellerunt. Mox igitur navalis iterum pugna committitur; plurimæque hostium submersæ naves, multi occisi. Paucis cum navibus cladi subducti, inque Cules litus evecti, ingruente nocte, fuga evaserunt. Theophanes patricius cum insigni victoria maximisque erectis trophæis reversus, honorifice et magnifice suscipitur, ac accubitoris dignitate ornatur. Idem habent Symeon Logotheta, Georgius monachus, alique auctores Byzantini, Luitprandus lib. 5, cap. 6, et Elmacinus ad annum Hegiræ cccxxix mense Octobri superioris Christi anni inchoatum. Quare scriptores Byzantini has victorias cum Indictionibus xiv et xv exacte illigarunt.

3. *Helena Russorum regina fit Christiana.* — Luitprandus citatus ait, *Ingerem* regem Russorum, quos etiam *Northmannos* appellat, quia in regionibus Aquilonaribus habitant, post hanc expeditionem ingenti confusione ad propria reversum esse. Porphyrogenneta vero lib. de Administr. imp. c. 13, scribit: « Lintres ab ulteriore Russia Constantinopolim venientes sunt quidem a Nemogarda; ubi Sphendostlabus Ingor Russiæ principis filius habitabat, etc. » Porro Ingerus ante an. dcdxlv demortuus est; cum Cedrenus pag. 636 de rebus eo anno gestis verba faciens scribat: « Porro Elga Rossorum principis (nempe Ingeri) uxor, qui classem in Romanos duxerat (hoc sc. anno), marito defuncto, Constantinopolim venit; et baptizata, cum magnæ veræ pietatis studium demonstrasset, dignis suo instituto honoribus effecta, domum rediit. Elga seu Olha, ut ab Herbensteino in Commentario Rer. Moscovit. pag. 3 appellatur, in baptismo *Helena* vocata fuit, baptismumque accepit anno mundi 6463, inquit idem Herbensteinus, qui annus Æræ Constantinopolitanæ kalendis Septemb. anni Christi dcdxlv exorditur. Addit idem scriptor: « Hæc prima inter Ruthenos Christiana fuit, ut Annales eorum testantur, qui eam soli æquiparant. Suvastolaum autem filium ad baptismum nequaquam perducere potuit: qui cum adolevisset, strenuus ac promptus statim omnes bellicos labores periculaque consueva non detrectavit ». Ubi qui a Porphyrogenneta citato *Sphendostlabus*, ab Herbensteino aliisque *Suvastolaus* dicitur. De *Helena* et *Sphendostlabo* rursus infra.

4. *Adelbero episc. Metensis vitam regularem restituit.* — Hoc anno *Adelbero* Metensis episcopus *Ottonem* Germaniæ regem adiit, eique significavit, canonicos sancti Arnulphi monasterii in suo episco-

patu consistentis, *posthabita canonicæ regulæ conversatione*, laico more vivere, quos dum *post creberrimas admonitiones, incorrigibiles esse Adelbero cognoverit, consilio totius cleri sui, eos inde potius expelli, quam inhonestam inibi ducere vitam decreverit*; prælibatos quidem canonicos, inquit Otto, *pro hoc ad se proclamationem fecisse*. Verum inutilem eam considerantes, subditidem rex, « flagitationibus prælibati episcopi nostri, cæterorumque fidelium nostrorum obtemperantes, regia potestate sancimus, ut congregata inibi Domino famulantium honesta congregatione, ex hoc in antea monachica ibi perpetualiter vita ducatur ». Paulo post: « Data quarto idus Januarii anno Incarnationis Domini nongentesimo quadragesimo primo, Indictione decima quarta, anno domini Ottonis sexto ». Sed loco, *quarto idus Januarii*, legendum, *quarto idus Julii*. Librarii mensem Junium aut Julium sæpe in Januarium mutant, et e contra; indeque factum, ut, ex Ottonis Chartis vix certo deprehendi possit, an *Otto*, qui VI nonas Julii patri successit anno dcdxxvi, ab eodem annos regni sui, vel ab insequenti, ut putavit Baronius, deduxerit. Antiqua est sancti Arnulphi Ecclesia, extra muros civitatis Metensis, quam *Adelbero* magnis divitiis locupletavit, postquam in eandem monachos sancti Benedicti introduxit, quam et hodie obtinent, ut videre est apud Meurissium lib. 3 episcoporum Metensium, ubi laudatum *Ottonis* Diploma, variasque *Adelberonis* hanc in rem litteras refert. « Antea *Adelbero* monasterium Gorziense a prima sua fundatione neglectum reparavit, ex eoque ad restituendam disciplinam in monasterio sancti Arnulphi monachos evocavit ».

5. *Edmundus rex Angliæ Danos domat.* — Dani, qui *Northumbriam* possidebant, videntes *Edmundum* Angliæ regem vix annum ætatis xviii attigisse, statim ab ejus coronatione, uti refert Westmonasteriensis ad annum dcdxl, Anglorum jugum exuere, immunes a tributo esse, et summo jure in provincia dominari, satagunt. Iterum ergo Hibernos in factionis societatem vocant, et *Anala-fum*, seu, ut ab aliis appellatur, *Anlafum*, quem nuper *Ethelstanus* ex insula fugaverat, Northumbriæ regno liberaliter donant. Ille tempore et potestate usus in Britanniam trajicit, Eboracum petit, et inde victoriæ suæ trophæa explicat. Verum, ut habet idem Westmonasteriensis, « anno gratiæ nongentesimo quadragesimo primo, *Anlafus*, rex nuper creatus, dum vastaret Ecclesiam sancti Balteri, et Inningham igne cremaret, mox Dei judicio correptus, vitam miserabiliter terminavit; et rex Edmundus, Northumbriam petens hostiliter *Anlafum* filium Sithrici, et Reginaldum filium Cuthredi regis (melius Malmesburiensis lib. 2 de Gest. Reg. cap. 7, filium Gurmundi) inde potenter expellens, monarchiam totius Angliæ iterum subjugavit ». Tandem, uti testatur Huntindoniensis lib. 5, Edmundus rex partem Merciæ, quæ paganis diu subdita fuerat, usque ad latissimum flumen Humbri-

occupavit, quinque urbes expugnavit, et ab urbibus prædictis, infidelitate remota, Dei gratia, fidei fulgorem restituit. Porro Anlafus antequam in

Northumbria rex eligeretur, rex erat Noreganorum, sen Norvegiæ, ut Simeon Dunelmensis in Hist. de Gest. Reg. Angl. alique produnt.

STEPHANI IX ANNUS 3. — CHRISTI 942.

1. *Damasus legatus a papa missus ad Francorum proceres.* — Sequitur annus Redemptoris nongentesimus quadragesimus secundus, Indictione decima quinta, quo Francorum proceribus adversus Ludovicum regem rebellantibus, et recipere eum detrectantibus, « legatus Stephani papæ (inquit Frodoardus) nomine Damasus, episcopus Romæ ob hanc legationem peragendam ordinatus, in Franciam venit, afferens litteras Apostolicæ Sedis ad principes regni, cunctosque Franciæ, vel Burgundiæ habitatores, ut recipiant regem suum Ludovicum; quod si neglexerint, et eum amplius hostili gladio persecuti fuerint, excommunicationis depromens interminationem. Pro qua re colloquentes episcopi Rhemensis dioceseos cum Heriberto comite, deprecati sunt eum, ut intercederet apud Hugonem principem pro receptione regis ». Et paulo post : « Legati Rhemensis Ecclesiæ Roma regressi pallium deferunt Hugoni episcopo ab Stephano papa transmissum. Cum quibus pariter legatio venit principibus regni, ut Ludovicum regem recipiant, et sic legatos suos Romam dirigant. Quod si usque ad Nativitatem Domini facere non procurarint, excommunicandos tunc fore se noverint ». Hactenus de his Frodoardus, qui et paruisse principes Romano Pontifici docet; ut plane, tunc maxime quanti fecerint principes Romani Pontificis auctoritatem, omnibus innotuerit. Sic igitur Ottone etiam Germaniæ rege Ludovico studente, diu ingenti pace idem Ludovicus regnans potitus est.

2. *Inter Hugonem et Albericum iuge bellum Odo abbas componere studet, et sancte moritur.* — Qui vero extra provincias Italiæ trans montes ad conciliandos principes Stephanus papa mittit legationem, Romæ frustra laborat, ut Italiæ regem Hugonem et Albericum Romanum principem, iterum fracta pace, bello recrudescente, Hugone Romanos iugi bello hostiliter impetente, inter se federe sancto conciliet atque mutua concordia

jungat. De Hugonis namque regis conatibus hæc habes in ¹ Luitprando : « Ea tempestate Hugone rege turpiter expulso, Albericus (ut præfati sumus) Romanæ civitatis monarchiam obtinebat, quem rex Hugo quotannis graviter opprimebat, gladio et igne, quæ poterat, universa consumens, adeo ut civitates præter Romam, in qua ipse consederat, omnes auferret. Sed et ipsam sine dubio, tum depopulando, tum cives muneribus corrumpendo conquisivisset, nisi occulta et justa Dei sententia illi prohibuisset ». Hæc Luitprandus.

3. Porro sanctus Odo Cluniacensis abbas, qui ante annos sex eadem ex causa, ut Hugonem et Albericum pacis vinculo jungeret, a Leone papa vocatus fuerat, eosdemque mutuo nuptiarum fœdere colligarat, ad idipsum opus exhibendum Romam iterum a Stephano Romano Pontifice revocatur. De quo pauca tantum hæc Frodoardus hoc anno : « Domnus Odo abbas pro pace agenda inter Hugonem regem Italiæ et Albericum Romanum patricium apud eundem regem laborabat ». Hæc ipse. Porro ipsum S. Odonem et Romam venisse, et illuc ad ultimum fere spiritum ægrotasse, qui res ab eo gestas fideliter prosecutus est Joannes ejus discipulus monasterii sancti Pauli abbas, comesque peregrinationis ipsius, fideliter narrat his verbis ² :

4. « Postquam autem adventavit tempus illud, quo erat ad æternam perducendus requiem, et pro recte factis suis mercedem recepturus, Romæ manentem acuta eaque perpetua corripit febris. Membra dolore franguntur, frigidus ignis ipsas cum carnibus medullas absunit, diversaque perpessio- num genera in uno eodemque homine adeo cumulantur, ut magno essent argumento, eum jam jamque a Domino accitum iri. Et vir ille sanctus sic se affectum sentiens, toto pectore nihil cupit

¹ Luitp. l. v. c. 1. in fin. — ² Extat apud Sur. die XVIII Novemb. t. vi.

aliud, quam dissolvi, et esse cum Christo, Apostolum imitans¹. Percurrerat jam sanctorum laborum certamen, et totius virtutis cursum egregium compleverat, ut non immerito consideraret, divinæ benignitatis gratia, in cælis repositam sibi esse justitiæ coronam. Sed cum interim de sua vocatione hæreret, cupidus admodum fuit Martini sui orationis gratia prius invisendi, et ei extremum spiritum cum corporis favilla commendandi. Ab ipsis enim incunabulis eximium quemdam erga illum amorem conceperat. Nec defuit piis votis beati viri divina clementia.

5. « Sequenti nocte vidit virum quemdam præstanti forma, auditque in visione eum talia sibi dicentem : Jam quidem, o sancta et Deo dilecta anima, instat tempus vocationis et dissolutionis tuæ, sed Martinus retinet te precibus suis, utque possis redire in patriam, vires subministrat. Cum autem eo perveneris, mox tibi vita pro morte, et beata electorum societas pro laboribus tuis a Christo donabitur. Visionem istam non dubiam efficiunt signa mox sequentia; ægritudo corporis mox fit remissior, salus accelerata redit.

6. « Dat igitur se itineri quam molesto, corpusque præ ætate grave et præmortuum negligens duos exauulat labores pro beatissimi Martini amore, tanto jam in spirituali obsequio devotior, quanto de præmio securior. Tandem post multas itineris difficultates venit Turones, imminente jam beati Martini celebritate. Gemina tunc urbi illi importata lætitia, tum ex annua beati Martini solemnitate, tum ex domni optata Odonis patris præsentia cunctis gratissima. In ea autem celebritate beatus Odo quam pius et devotus fuerit, quas preces B. Martino lacrymis permixtas obtulit, quæ contriti cordis sacrificia, tanquam hostia vivens in salutaris illa ara immolavit, nos ob virium tenuitatem pro dignitate explicare non valemus. De sua enim vocatione sollicitus, animo erat ad Deum suspensus, et labentium rerum immemor puro mentis intuitu sola cælestia contemplabatur. Atque eum in modum totam illam diem transigens, cum videret se differri ab expectata e corpore migratione, angustissimo animo cœpit. Ecce autem quarto inde die febris redit; tum vero ille tanquam voti compos de Dei misericordia fit securus, et quamvis corporis deficerent vires,

Sed mens læta Deum cernit, suspirat, anhelat :
Ultima vox resonat : Tu, Christe, parce redemptis.
Martinum ingemnat, Martinum suspicit, orat.

7. « Porro monachos undique advolantes, et acerbissime suam desolationem deplorantes sermonibus instruit, precibus Deo commendat, impertit benedictionem, iisque non sine lacrymis ultimum vale dicit. Decimo quarto kalendas Decembris, in quem diem etiam incidit octava Martinianæ celebritatis, cum sacrosancta Eucharistia prius se com-

municasset, beatus ille spiritus corruptibilibus carnis vinculis absolutus, liber abijt ad superiores, et beatissimo Martino duce, creditorum sibi talentorum fructum multiplicem fideliter repræsentat, atque illic præmia amplissima recipiens, sanctorum cœtibus admixtus, beatæ immortalitatis splendet candore, præstante Domino nostro Jesu Christo, qui vivit et regnat in sæcula sæculorum. Amen ». Hæc Joannes.

8. Porro hoc quidem anno ejus ad Deum migrationem contigisse, idem qui supra testatur Frodoardus, qui de ipso in fine anni hujus hæc ait : « Dominus Odo venerabilis abbas multorum restaurator monasteriorum, sanctæque regulæ reparator, Turonis obiit, et sepultus est apud sanctum Julianum ». Hæc ipse, quæ habebat præ oculis. Ex quo erroris redarguas Sigebertum, qui eundem Odonem decessisse ponit ante annos quinque, nempe nongentesimo trigesimo septimo Redemptoris. Successit autem ipsi in monastica præfectura Adamarus, quem beatæ simplicitatis et innocentie filium nominat Odilo in Vita¹ sancti Maioli, quem in monasterio successorem aluit in Christo, commendatus ab eodem patientiæ nomine, quod oculorum luminis privationem mira patientia tolerasset.

9. *Adelbero Metensis episcopus monasticæ disciplinæ restitutor.* — Porro quod ad restitutionem pertinet monasticæ disciplinæ, non ipse Odo tantum abbas Cluniacensis ad hæc præstanda hoc tempore laboravit, sed incumbit in opus Adelbero Metensis episc., de quo ista² Sigebertus Gemblacensis in Vita, quam edidit S. Guiberti confessoris : « Ad hæc, inquit, inter primos a Deo missus est Adelbero primus hujus nominis Metensis episcopus, qui nobilium Christianissimus, et Christianorum nobilissimus (erat enim frater Friderici ducis) in hoc primum regiminis sui dedit exercitum, ut sæculari potentia et episcopali censura extirparet a sua diocesi irreligiositatis vitium. Hujus bonæ intentionis oculum intendens primum super monasticam disciplinam, elaborat eam ad Apostolicæ vitæ redigere normam; et incipiens a Gorzia, quæ cæteris monasteriis erat præstantior in sua parochia, ubi institutæ religionis vix ipsa apparebant vestigia, non prius destitit, quam monasticæ vitæ professores a sæculi vanitate retraclos rectæ viæ reddidit, et ante omnia radicem malorum, et malam monachorum novercam, scilicet proprietatum concupiscentiam mucrone pastoralis exstinxit, et qui in sæculi compitis patebant luporum moribus, Dominico ovili inclusit. Collaborabat sibi ad hoc opus abbas Agenoldus, restaurandæ religionis adjutor opportunus. Itaque extirpatis nocivis radicibus de Domini horti areola, Adalberone episcopo plantante, Agenoldo rigante, Deo autem incrementum dante, crescebant subito virtutum

¹ Philip. 1.

² Extat apud Sur. die XI. Maii 1. III. — ² Sigeb. Gembl. in vit. Guib. c. 8. Apud Sur. tom. III. die XXIII. Maii.

plantaria. Quicumque ergo abrenuntiantes sæculo suave jugum Christi tollere volebant, quam mites et humiles corde exemplo Christi esse deberent, hic addiscebant. Quicumque ex militari habitu in timore Domini fortitudinem suam mutabant; hic quasi in campo divini tirocinii experimentum sui capiebant. Quicumque ex clericali sorte ad altiorum humilitatis gradum optabant ascendere: hic cum ¹ Jacob non in somnis, sed revera scalam cælos attingentem merebantur videre, per quam angelos ascendentes et descendentes possent videre. Cum ergo hic tantus religionis fervor tam longe et tam late caloris sui diffunderet flammæ, huc ad disciplinam Domini omnis confluebat nobilitas, omnis dignitas, omnis sine personarum discretione professio concurrebat et ætas. Nec quisquam vel initium conversionis se credebat arripuisse, cui non contingeret Gorziensi regulæ initiatum esse, etc. » Pergit dicere de conversione et professione monastica cum vilæ sanctitate sancti Guiberti illuc ex nobili militia fugientis, de quo inferius latius dicturi sumus.

10. *Diploma Orientalium imperatorum continens privilegia monasterio S. Vincentii ad fontes Vulturii collata.* — Hoc anno mense Aprilis datum habetur privilegium a Constantinopolitanis imperatoribus Romano, Constantino, et aliis Romani filiiis, monasterio sancti Vincentii ad fontes Vulturii, quod in suo Chronico una cum aliis monumentis ad idem spectantibus Joannes monachus earum rerum scriptor intexuit. Flagrantia in Italia bella civilia effecerunt, ut Constantinopolitani imperatores potirentur Calabria, Apulia, atque ea Campaniæ parte, quam Vulturinus alluit, posita antea sub ditione ducum Longobardorum Beneventi et Capuæ. Privilegium autem ipsum ex græco male translatum, uti descriptum caractere Longobardo invenimus, ita reddimus, sicut se habet:

« In nomine Patris et Filii et Spiritus sancti. Romanus et Constantinus, Christophorus et Stephanus et Constantinus Christi amicissimi et fidelissimi in Domino benigni imperatores, disposuimus istud præsens nostrum benignum sigillum.

11. « Nostra imperialis magnifica providentia non solum sacerdotalibus actibus decet concedere

juvamen, sed et his, qui monasticam vitam eligunt, opportunum illorum juvamen amplificat, ut in omnibus rectitudo providæ nostræ virtutis ostendatur. Ergo et in ipsa venerabili mansioni beati Vincentii, quæ adjacet in ipsa amica Christi in nostro themate existente Longobardia, cum his quæ sub ea sunt monasteriis, et omnibus rebus eorum, sigillum excusationis illud, quod et Deo nostro charum imperium nostrum concedere præcepit, ut excusentur ipsa prædicta monasteria et hæreditates eorum ab omni tentatione et angaria publica, et ab ipsis patriciis et strategiis Græcorum, et ab imperialibus qui in Tassidiis diriguntur, ab imperio nostro et a trinarchis, drungariis et comitibus thematum, et a iudicibus, et usque a quocumque homine, cui creditur servitium publicum imperii nostri. Insuper ab ipsis Longobardis patriciis et castaldæis, vel ab omni homine Græco et Longobardo, cui creditur servitium publicum, et tantum attendere ministerio ipsius mansionis, et ipsis quæ sub ea sunt monasteriis et rebus eorum, ut orent pro imperio nostro.

12. « Sancimus vero licere, et potestatem tribuimus ipsius mansionis abbati per præsens nostrum benignum chrysobolum et sigillum, ut ea quæ ablata sunt loca ejus et monasteriorum, et eorum res a diversis faciebus potentissimis, ista exquirere, cum justa ratione eripere et habere sub sua potestate, et a nemine contra fieri, neque a Græco, neque a Longobardo iudice: sed ut dictum est, perquirere ista, et cum justa ratione recolligere, et habere sub sua dominatione. Præcipimus vero et istud, ut habeant licentiam, et non contra fiat a quolibet, ut ascendere abbas aut transmittere hominem suum ad imperium nostrum secundum petitionem suam, sustinens, qui præsumperit contrarium in his, quæ sunt præcepta a nobis, aliquid operari, atque ex nostra increpatione adveniet ei periculum. Sufficiens omnibus ostensio tantummodo istius præsentis nostri benigni sigilli facti secunda Aprilis mensis quinta decima Indictione. In quo et illud a Deo coronatum imperium nostrum per cinnabrim consuetam imperialis magnificentiæ subscriptionem propria manu composuit, et aurea bulla signari præcepit ». Ilucusque Diploma imperatorium.

¹ Genes. XXVIII.

Anno periodi Græco-Romanæ 6435. — Anno Æræ Hispan. 980. — Anno Hegiræ 331, inchoato die 15 Septemb., Fer. 5. — Jesu Christi 942.

— Marini II papæ 1. — Constantini VIII imp. 31. cum Romano imp.

1. *Moritur S. Odo abbas Cluniacensis.* — A num. 2 ad 9. Flodoardus in Chronico ad hunc Christi annum, scribit: « Dominus Odo abbas (nempe Cluniacensis) pro pace agenda inter Hugonem regem Italiæ et Albricum Romanum patricium apud eundem regem laborabat ». Paucis interpositis: « Dominus Odo venerabilis abbas multorum restaurator monasteriorum, sanctæque regulæ reparator Turonis obiit, et sepultus est apud sanctum Julianum ». Joannes in Vita sancti Odonis annum ejus emortualem non memorat, sed tantum diem, quem asserit fuisse quartam decimam ante Decembrem, « quæ etiam octava Martinianæ celebritatis habetur », ideoque die decima octava mensis Novembris vir sanctus obiit. Eundem annum signant anonymus apud Duchesnium tom. III, pag. 341, annum nempe Ludovici regis VII, et auctor Chronici Dolensis in Biblioth. Labbeana tom. I, pag. 315. Auctores duo res a sancto *Odone* gestas scripsere, ambo monachi Cluniacenses, Joannes scilicet scriptor cœvus atque Nalgodus, qui sæculo XII vixit, ut videre est apud Mabillonium Sæc. V Benedict., ubi utriusque scriptum refert, et multa de *Odone* notat.

2. *Ejus virtutes.* — *Odo* apud urbem Turoensem natus, postmodum sancto Martino Turoensi episcopo semetipsum ex patris voto addixit anno ætatis XIX, qui Christi fere est undenongentesimus, ibique clericus atque canonicus factus est. Post aliquantum temporis *Odonem* sacerdotio dignum reputans Berno, « promovit eum, et accersito episcopo, sine suo velle consecrare eum fecit sacerdotem », inquit Joannes lib. I, num. 37, qui num. 38 addit: « Per illud tempus exitiali languore cœpit decumbere pater Bernus, etc. Tunc manibus fratrum pater noster captus, et quasi violenter constrictus, coram abbate suo vi est ductus, etc. Ordinatus itaque ille: intra modicum tempus pater Bernus migravit ad Dominum », die scil. XII mensis Januarii anni DCXXVII, ut eo anno ostendimus. *Odone* abbate Cluniacum super omnia cœnobio caput extulit fama religionis. Fervebat eo in loco virtutum æmulatio, studium in res sacras, regulæ accurata observatio, charitas in pauperes, adeo ut « septemdecim millia pauperum in capite Quadragesimæ uno anno apud Cluniacum eleemo-

synam habuerint, et ducentas quinquaginta pernas acceperint », teste Udalrico in lib. 3 Consuetudinum Cluniacensium cap. 41. Complura monasteria ordinis sancti Benedicti reformavit, et non pauca condidit. Varia scripsit opuscula, ex quibus, quæ supersunt, leguntur in Bibliotheca Cluniacensi. Sancto *Odoni* in abbatiam Cluniacensem successit *Aymardus*, ejus Elogium historicum ibidem Mabillonius exhibet.

3. *Floret S. Guibertus fundator monasterii Gemblacensis.* — Ad num. 9. Monasterii Gemblacensis in Brabantia siti horis tribus a Namureo, natales Miræus in sua Notitia Belgica, et in Originibus Benedictinis ad annum DCXXII revocat, recente quodam distycho innixus, et recte quidem, cum *sanctus Guibertus* anno DCXLII mortuus tradatur, conversionis suæ anno fere quadragesimo, uti narrat auctor anonymus in Relatione elevationis corporis sancti Guiberti tom. II Biblioth. Cæsareæ, et Sæc. V Benedict. recitata. In eodem Sæculo V refertur Vita ejusdem sancti *Guiberti* monachi Gorziensis, et cœnobii Gemblacensis conditoris, a Sigeberto monacho Gemblacensi et chronographo scripta. In ea dicitur, *Guibertum* nobilissimis et ditissimis parentibus natum, *Gemblacense* monasterium ex propriis bonis construxisse, et vanam gloriam fugientem *Gorziæ* monasterium in confinio Metensis civitatis positum sese recepisse, ubi monasticam vitam auspicatus est. Cum in eo disciplina regularis processu temporis collapsa fuisset, *Adelbero* Metensis episcopus hujus nominis primus, de quo anno præcedenti verba fecimus, elaboravit ad monasteria suæ diœceseos ad Apostolicæ vitæ normam redigenda. Incepit a *Gorzia*, ubi institutæ religionis vix apparebant vestigia. Inter viros illustres, qui monasterium illud ingressi sunt, numeratur *Guibertus*, qui inde *Erlinnum*, virum lucrandis Deo animabus intentissimum assumpsit, ut eum Gemblacensi cœnobio præficeret, dum ipse *Gorziæ* regressus orationi et contemplationi vacaret liberius.

4. *Adelbero episc. Metensis monasteria reformat.* — Quia vero in ea Vita Sigebertus ait, monasterium Gorziense rectæ viæ redditum esse, *Adelberone* episcopo plantante, *Agenoldo* rigante (is tunc Gorziensis abbas erat), *Deo autem incre-*

mentum dante, juvat hic referre quod Joannes abbas Metensis scribit in Vita sancti Joannis abbatis Gorziensis, cujus fuit discipulus. Extat ea Vita apud Bollandum ad diem xxvii mensis Februarii et Sæculo v Benedict. et de Adelberone num. 41 ibidem legitur: « Cujus (nempe Adelberonis) deinceps actus de die in diem felicius procedentes, ut Christo duce succreverint, et ut in monasteriorum præcipue reparatione studium præ cunctis transfuderit, nequa quam brevi sermone stringi quisquam quæsierit, neque mihi id, si sapiam, arrogare præsumpserim. Et certe res ipsa ita se cunctorum ingerit oculis, ut quidquid dictum fuerit, minus videatur, et multitudo factorum nequaquam exæquari valeat facultate verborum. Ecclesiam siquidem, quam superiorum temporum perturbatione ab omni pæne studiorum bonorum fervore, tam in divinis, quam et humanis detritam susceperat, ita secum Domino cooperante, ex nullo, ut ita dixerim, in summum repente statum provexit, ut quæcumque diœcesi suæ suberant monasteria, longo jam et veteri morbo ab opere rectitudinis languida et pæne desperata, regularibus disciplinis reddiderit, viros vita et doctrina probatos singulis quibusque locis præficiens, qui mundo perfecte abdicato, cæteris documento et disciplina proficerent. Clericorum ipsorum conciliabula, eo quod divisam cum sæculo conversationem non satis probabat, in monachorum instituta mutavit. Sanctimonialium habitacula, quod ea, etsi non re, fama tamen obscurari quam ægre ferebat, omni sinistrae suspicionis morsu eripuit, et ad idem, quo monachos, institutum, et in nullo dispare observationes, pro sexus virtute coercuit.

5. *Monasterium Gorziense præ cæteris dilexit.* — « Nec jam antiquioribus et eminentioribus contentus locis, ipsas quoque cellulas longius ritu vago dispersas, in quibus vix octo aut certe minoris numeri clerici rurales, nuda verborum reddebant officia, monachorum habitu et observationibus insignivit, utque tempora resque tulerunt, terras sumptibus eorum necessarias, et quæ locorum erant, restituit, et propriis usibus subtractas, egregia liberalitate additis testamentis contradidit. Sed quanquam omnium miro studio eum cura tenuerit, Gorzia tamen unico sibi semper fuit amori, pro eo quod et principium operum ejus exlilerat, et sanctitas prædictorum virorum Einoldi, atque Joannis eum præcipue oblectabat ».

Einoldus a Sigeberto mox laudato vocatur *Agenoldus*, diciturque Adelberoni *restaurandæ sanctæ religionis adjutor opportunus*. Subdit Joannes abbas Metensis, *Einoldum* atque *Joannem* monasterium Gorziense ingressos esse anno *Incarnationis Dominicæ* mcdxxxiii, et Joannem multos annos agentem in cellula reclusum, religiosas feminas reclusas verbo Dei pavisse, et ex diversis mundi partibus sancti fervoris se ibidem examen infudisse. *Einoldus* mortuus est abbas sancti Apri in diœcesi Tullensi, et post aliquot annos *Joannes* abbas Gorziensis creatus fuit, ut suo loco ostendemus.

6. *S. Odo e sede Schireburnensi ad Cantuariensem transfertur.* — Godwinus in præsulibus Angliæ, et Alfordus in Annal. Angl. *Wulfhelmi* Cantuariæ archiepiscopi mortem, et S. Odonis in ejus locum subrogationem anno mcdxxxiv collocant; verum Wartonus tom. i Angliæ Sacræ pag. 790, in additionibus ad Historiam sedis Cantuariensis refert fragmentum quoddam Historiæ vetustissimæ Abdoniensis in anno mcdxl terminatæ episcopos tunc præsidentes in calce enumerans, habere: « *Wulfhelmus* archiepiscopus Ecclesiæ Cantuariensi præsidet nunc ». Auctor autem ille anonymus proxime ante episcopos enumeratos, *Eadmundum* regem Æthelstano fratri anno mcdxl defuncto successisse retulerat. Qui locus hominis tunc viventis egregius est ad eorum everlendam sententiam, qui *Æthelstani* regis mortem in annum mcdxli distulere. In Evidentiis Ecclesiæ Cantuariensis pag. 2220, refertur quædam donatio ab Æthelstano rege anno mcdxl facta, cui *Wulfhelmus* subscripsit, et postea ibidem exhibetur alia charta anno mcdxli ab Eadmundo rege et Eadredo fratre ejus data, qua aliquas terras Ecclesiæ Dorobernensi reddunt, cui subscribunt *Wulfhelmus* Dorobernensis archiepisc. et *Odo* Schireburnensis episcopus. Is enim ante aliquot annos ad Schireburnensem cathedram evectus fuerat, et quia Viltoniæ commorabatur, ab historicis sæpe episcopus Viltoniensis appellatur. *Sanctus* itaque *Odo* e sede Schireburnensi hoc anno, vel saltem sub finem superioris ad Cantuariensem translatus est. De eo plura infra.

Hoc anno mortuo Stephano VIII papa, succedit Marinus II, ut anno sequenti ostendam.

MARINI II ANNUS 1. — CHRISTI 943.

1. *Mortuo Stephano succedit Marinus papa.* — Redemptoris annus nongentesimus quadragessimus tertius, Indictione prima, ordinē sequitur, quo Stephanus papa, ubi sedisset annos tres, menses quatuor, et dies quinque (ut habet vetus Codex Vaticanus de Romanis Pontificibus) ex hac vita migravit : quoto autem mense vel die non dicit, sed tantum in locum ipsius fuisse subrogatum secundum hujus nominis Marinum, quem alii Martinum nominant, natione Romanum, qui omissis insanabilibus tumultibus bellicis, totum se tradidit ad componendam Ecclesiam, tam in cleri, quam in monachorum reformatione, et

in Basilicarum restauratione, et cura pauperum. Litteris vero egit, ut inter Christianos principes mutuo decertantes pax componeretur. Hunc jam olim fuisse dono prophetiæ imbutum, res gestæ Udalrici episcopi Augustani declarant, de quibus nos suo loco superius egimus.

Eodem quoque anno defuncto Heriberto Francorum comite, rursus per Artaldum de archiepiscopatu Rhemensi negotium facessitur Hugoni ejus filio, de quo anno superiori. Quomodo autem non nisi sub Agapito papa ejusmodi controversiæ habita Synodo definiri valuerunt, suo loco pluribus ex Actis synodalibus dicturi sumus.

Anno periodi Græco-Romane 6436. — Anno Æræ Hispan. 981. — Anno Hegiræ 332, inchoato die 4 Septemb., Fer. 2. — Jesu Christi 943

— Marini II papæ 2. — Constantini VIII imp. 32. cum Romano imp.

1. *Stephano VIII PP. succedit Marinus II.* — Ad num. 1. *Stephanus VIII*, vulgo *IX*, qui anno nongentesimo trigesimo nono circa diem xviii mensis Julii ad summum Pontificatum evectus fuerat, non hoc anno, ut Baronius, Papebrocius in Conatu Chronico-Historico, aliique arbitrati sunt, sed superiori vitam cum morte commutavit, ut Sigebertus in Chronico et Hermannus Contractus tam ex editione Pistoriana quam Canisiana recte notarunt. Cum enim Catalogi, Martinus Polonus et antiqui passim ei annos tres tribuant, et in illorum plerisque addantur menses quatuor et dies quindecim, dubitari imposterum non debet, quin anno superiori e vivis excesserit, idque

ineunte circiter Decembri. *Marinus II*, patria Romanus, in locum Stephani VIII subrogatus est. Tomo iii Spicilegii Dachériani pag. 464, extat rescriptum hujus Pontificis Vezeliacensi abbati concessum, ac « scriptum per manus Azzonis scribarii S. R. E. in mense Februario, Indictione 1, datum II nonas Februarii per manum Benedicti episcopi et bibliothecarii S. Sedis Apostolicæ: anno Deo propitio, Pontificatus domini nostri Marini summi Pontificis et universalis papæ, in sacratissima Sede B. Petri Apostoli anno 1, mense Februarii, Indict. 1 ». Verum inde non sequitur, ut putavit Papebrocius laudatus, Marinum hoc anno Pontificatum iniisse, sed tantum hoc anno mense

Februario sedisse (1). Porro quod ait Baronius ex Vita sancti Udalrici episcopi Augustani, liquere *Marinum II* prophetiæ dono imbutum fuisse, jam supra demonstravimus, *Marini* loco Sergii III nomen in Acta sancti Udalrici ab eorum scriptore intrusum esse. Sigebertus in Chronico ad an. DCDXLII, idem ac Baronius narrat, ideoque ejusdem auctoris lapsum non animadvertit. Lege quæ anno DCDX, num. 5, hac de re in medium attulimus.

2. *Occiditur Willelmus secundus Normanniæ dux.* — Willelmus Normanniæ dux jussu Arnulphi comitis Flandriæ in quadam Somniæ fluvii insula prodicione occisus est: « Cujus corpus post paululum ad se relatum cum devestirent (optimates scilicet Britonum ac Normannorum) argenteam clavim in ejus strophio reperiunt dependentem, satis ditissimum thesaurum sub se habentem, stamineam scilicet et cucullam monachilem. Quæ si comes ei vita fuisset, ab hoc conventu rediens, apud Gemneticum factus monachus proculdubio sumpsisset », inquit Willelmus Gemneticensis monachus lib. 3 Hist. Normann. cap. 42, qui subdit: « Mittentes itaque ad Bajocassinam urbem, puerum Richardum adseiscunt ad patris tumulationem. Ibi que ei iterato renovantes unanimiter tenorem fidei, tradiderunt illum sub tutela Bernardi Dani, ut sub ejus tam provida quam fidei cura tutius custodiretur intra muros civitatis. Complevit autem sacratissimus dux Willelmus vitæ suæ cursum XVI kal. Januarii, rege Ludovico (nempe Transmarino) regnum Francorum tenente, anno Domini Incarnationis DCCCXLIII ». Sed loco, DCCCXLIII, legendum, DCDXLIII. Flodoardus in Chronico, Meyerus lib. 2 Annal. Flandriæ, alique illustris hujus principis mortem cum hoc etiam Christi anno conjungunt. Normannorum natio Arnulpho Flandriæ comiti, aliisque non paucis invisa erat, et hoc tempore Willelmus et Arnulphus inter se bello contendebant. « post levia aliquot contracta certamina ad Pinciniacum in insula fluminis Somniæ colloquium indicitur, quo colloquio, postquam nihil convenisset, dirempto, Flandri Willelmum ducem, antequam ad suos revertere posset, circumventum occiderunt », inquit Meyerus. Fuit Willelmus filius Rollonis, ac secundus dux Normanniæ, Willelmus *Longa Spata* vulgo cognominatus. Ordericus lib. 3, pag. 459, *Willelmi* mortem cum anno DCDXLII connectit, et ducatum Normannorum xxv annis tenuisse asserit, sed Gemneticensi hoc in capite standum, licet novus chronographus Saxo Orderico consentiat.

3. *Nova Hungarorum irruptio in ditiones Græcorum.* — « Indictione prima, mense Aprili, rursum Turci (ita Hungari ab auctoribus Græcis

hoc tempore vocati) cum ingentibus copiis Romanæ ditionis fines invaserunt. Egressus vero Theophanes patricius accubitor, pacis cum eis fœdus percussit, acceptis obsidibus ex illustrioribus. Cæterum Romanus imperator plerasque per Macedoniam atque Thraciam urbes a fundamentis exstruxit, alias reparavit. Nec id modo; sed et in urbe Augusta magnificas ædes regias instauravit. Prata quoque opima ac uberissima, quæ longe maximam voluptatem præsent: sed in senum alimenta, hospitumque diversoria, ac ægrorum domicilia construxit, mercedem a Deo animique salutem sperans se recepturum esse », inquit incertus continuator Theophanis in Romano Lacapeno num. 45, illique alii Byzantini historici, quoad Hungarorum invasionem et pacem, suffragantur.

4. *Pia opera Romani Lacapeni.* — Jam numero superiori idem continuator scripserat: « Cæterum Romanus imperator urbis debita omnia, æsque alienum civium omne, divitum pariter pauperumque ac egenorum, quantum ex tabulis probari poterat, dissolvit. Suntque adeo qui dicant dedisse undeviginti centenaria. Nominum tabulas in Chalces Purpureo Umbilico combussit, universis fauste acclamantibus, votisque imperatorem prosequentibus. Imperii anno secundo supra vicesimum, pretia domorum civibus omnibus conductoribus, a maximo ad minimum usque dimisit. FERIA quarta et Parasceve ad conversarum exiens ædes, scortis omnibus argenteos duos erogabat: inclusis viris et feminis, singulis tres nummos impendebat. Ecclesias vero et monasteria plura exstruxit, vestes quoque auro contextas, calicesque cum discis sacros largitus est. Hospitale quoque ad Mabriani ædes excitavit, fecitque stabula ac hospitia pulcherrima: strata etiam stravit cubilia ac cubicula, eorum omnium gratia, qui hospites urbem petunt ac lites agunt. Quin et de illorum, ipsorumque eorum jumentorum ac famulorum cibo pabuloque statuit atque præcepit. Domos in eam rem firma donatione addixit, ut indelicienter sumptus sufficerent. Hoc autem illorum gratia fecit, qui hospites lites in urbe habent, ut inde procurentur atque alantur. Ad sepulcrum suum dari jussit quotidie frustula, ollasque triginta millia. Quarta feria et Parasceve in Prætorio et Chalce et Numeris, vinctis singulis folles quindecim erogari mandavit; magnaue Parasceve nummos singulos elemosynarum nomine illis tribui. Olympi monachos, et Cyminæ, et Athonis, et Barachei et Latri, omnesque nummum unum viritum ex suo monasterio accipere voluit ».

(1) *Marinum II* anno superiori Pontificium solum ascendisse non ambigo; sed citius tamen quam ineunte mense Decembri, nam anno DCDXLIII, III idus Novembris, cum jam inciperat Indictio II, annum secundum Pontificatus numerabat, ut constat ex ejus Bulla ad Joannem Beneventanum episcopum, data III id. Novembris, anno Marini II, Indict. II. Ughell. in Benevent. tom. VIII, p. 50, novæ edit. Id autem egregie deducitur ex his quæ de Azapiti, qui Marino successit exordio, in Nota ad A. DCDXLXI, I, disseremus. Cum enim Marinius sederit annis tribus, mensibus sex. et diebus tredecim; et ibidem ostenderimus Agapitum ejus successorem ante die VIII Martii anno DCDXLVI cepisse, fit inde ut Marini exordium ante Septembrem anni DCDXLII anticipandum sit.

MARINI II ANNUS 2. — CHRISTI 944.

1. *Tryphone patriarcha Constantinopolitano dolose deposito, subrogatur Theophylactus.* — Sequitur annus Redemptoris nongentesimus quadragessimus quartus, Indictione secunda, quo post celebratam Constantinopoli Synodum, in qua dolose depositus est Tryphon patriarcha Constantinopolitanus, in locum ejus substitutus est Theophylactus filius imperatoris. Quomodo autem ista se habuerint, ita Curopalates narrat: « Exacto autem definito tempore, quod Tryphon patriarcha definierat, nolebat, ut pollicitus fuerat, de sede decedere, sed iudicium quærebat et crimina sibi objici, quibus ab Ecclesia merito pelleretur. Et cum imperator hac in re quid consilii caperet, ignoraret, Cæsarius Theophanes, quem Charriuum etiam appellabant, eloquens vir tristem cernens imperatorem, neque illusionem, neque dolum Tryphonis æquo animo ferentem, pollicitus est ipsi incœpta ad exitum perducturum: imperator autem cum approbasset illius pollicitationem, dolo aggreditur patriarcham, et ad ipsum accedens, dixit: Multum, o domine, contra te conatur imperator, et causas inquiri, quibus te de sede merito detrahere possit, sed cum multum labore, non tamen invenit: quomodo enim insonti culpa adscribi aliqua potuerit? Verum unam causam afferunt, qui tibi detrahere student; aiunt te litteras prorsus ignorare. Si igitur hanc remove possimus, lupus inhians videbuntur ei, qui contra te machinantur. Si quid igitur mihi auscultes, tota Synodo præsente, in charta non scripta scriptum tuum nomen et sacerdotii dignitatem mittito imperatori, ut certior de hac re factus, de spe decidat, desistatque contra te aliquid moliri.

2. « Visum est illi utile consilium. Statim igitur cunctam Synodum alloquitur patriarcha: Qui me de sede injuria detrahere cupiunt, o sacri ministerii collegæ, multis admotis machinis, ut probabili causa inventa, me expellerent, non invenere. Ad extremum hoc mihi obijciunt: expertem me litterarum esse aiunt. Nunc igitur coram omnibus vobis has litteras inscribo, ut videntes, ac certiores facti calumniatores, desinant injuria mihi negotium facessere. Dixit, et sumpta charta non scripta,

coram omnibus ita scripsit: Tryphon miseratione divina archiepiscopus Constantinopolis novæ Romæ et œcumenicus patriarcha. Et scripta per protothronum mittit imperatori. Quibus ille acceptis, et alia in non scripta charta desuper contenta, causam cur se abdicaret, scripsit, videlicet indignum se throno cuicumque volenti cedere. Et hac excusatione ad Synodum allata, ab Ecclesia Tryphon removetur, multum conquerens de fraude, et protothronum graviter accusans: anno vero post et mensibus quinque (tantum enim temporis requirebatur ad perfectam Theophylacti ætatem, qua princeps sacerdotum deligeretur) Februarii mense, Indictione secunda, creatur patriarcha Theophylactus imperatoris filius ». Hæc Curopalates.

3. *Nuptiæ Bertæ cum Romano; et Sarracenorum grassatio, icto fœdere cum Hugone.* — Eodem quoque anno, dictaque Indictione secunda, idem auctor tradit missam fuisse legationem a Constantino imperatore Leonis filio ad Hugonem Italiæ regem, ut filio suo Romano ejus filiam Bertam nomine jungeret matrimonio, quod et factum, intercurrente pariter ab ipso rege Hugone ad eundem imp. legatione, pro mittenda classe adversus Sarracenos. Qui functus est legatione imperatoris, fuit (ut ait Curopalates) Paschalis protospatharius dux Longobardus: ab Hugone autem suum vitricum fuisse missum, Luitprandus¹ affirmat. Misit igitur² Bertam filiam suam ex concubina genitam Constantinopolim per Sigefredum Parmensem episcopum jungendam Romano filio Constantini Porphyrogeniti, Bertam autem ipsam Græco mutato nomine Eudoxiam vocavere. Præstitit quod pollicitus fuerat Constantinus classem mittens, quæ omnes Sarracenorum naves exussit, quæ Sarracenis Fraxineti commorantibus erant auxilio. Factum insuper ut ipse Hugo armis potens ipsum caperet Fraxinetum, Sarracenis fuga lapsis in montes proximos. Quibus hæcenus feliciter actis, infelicissime accidit, ut timens Hugo rex Italiæ Berengarium marchionem Eporediæ civitatis, tyrannum Italiæ, cum iisdem Sarracenis fœdus jungeret. Qui sic

¹ Luitp. l. v. c. 5. — ² Idem l. v. c. 9.

securi redditi hostes Christianæ fidei, sicut anlea, Christianos inde transeuntes, ut ex more Apostolorum limina frequentarent, neci tradiderunt. Ait enim¹ Luitprandus: «Eo vero loco constituti Sarraeni quam multorum Christianorum ad beatorum Apostolorum Petri et Pauli limina transeuntium sanguinem fuderint, ille scit solus numerum, qui eorum nomina tenet in libro viventium». Sane quidem Frodoardus, qui per singulos annos res gestas sui temporis digessit, frequentissime id factum memorat.

4. In ipsum autem Hugonem cum Christianæ religionis hostibus fœdus ineuntem ita invehilur Luitprandus: «Perquam inique tibi, rex Hugo, regnum defendere conaris. Herodes, ne terreno regno privaretur, innocentes multos occidit; tu ut obtineas, nocentes et morte dignos dimittis». Et paulo post: «Puto, seu (quod verius est) credo te non legisse, nec audivisse, qualiter iram Domini incurrit² rex Israel Achab, dum regem Syriæ morte dignum fœderatum dimitteret Benedad, etc.» Sane quidem ubi Hugo iniit fœdus cum Sarraenis, omnia ipsi infelicissime ad obitum usque cessere.

5. *Christi imago famosissima Edessa Constantinopolim translata.* — Sub eadem Indictione secunda, Curopalates de famosissima illa imagine Christi Redemptoris miraculo expressa, ipso Christo vivente, et ad Abagarum missa (de qua suo loco superius fusiùs dictum est) et Constantinopolim Edessa translata hæc habet³: «Cum vero Romanorum copiis Edessa obsideretur, Edesseni malis obsidionis graviter oppressi, legatos ad imperatorem miserunt, petentes, ut exercitus ab obsidione recederet; seque polliciti sunt pretium daturus sanctam Christi effigiem. Soluta igitur obsidione, tradita est imago, et ad regiam urbem perducta, eam excipiente imperatore cum splendido atque decenti satellitio per regii cubiculi præfectum Theophanem». Ilæc Curopalates, et alii ex eo.

6. Verum hæc, quæ summam Curopalates et alii ex eo scriptis prodidere, ipse tamen Constantinus Porphyrogenitus imperator prolixiorum de eadem sacra imagine historiam prosecutus, ubi de ejus origine et progressu orationem instituens plura locutus esset: demum ad ea, quæ ad hanc, de qua est sermo, translationem pertinent, sermonem convertens, exactam de his narrationem habet his verbis:

7. «Postquam autem ad hanc urbium regionem undique confluerunt quæ sunt optima et pulcherrima, eratque Dei voluntas, hanc quoque sacram imaginem hic recondi cum aliis thesauris: Romanus qui erat Romanorum dominus imperii studium adhibet, ut per ipsum civitatum regina hanc consequatur. Diversis vero temporibus mitens Edessam, petebat ut ea cum Epistola, quam

Dominus sua manu scripserat, ad eum mitteretur. Et promittebat se contra eis daturum in permutatione Sarraenos numero ducentos, et argenti duodecim millia. Edesseni autem dicebant sibi non conducere, suæ civitatis custodem et conservatricem argento et hominibus mortalibus permutare. Cum autem ille sæpe petendo instaret, illi vero preces rejicerent; tandem sexies millesimo quadringentesimo quinquagesimo secundo anno ab origine mundi, misit amiras Edessenus, rogans, ut scripta cautione per aureum signaculum, quod haberet firmitatem, fide juberet imperator, non esse Romanorum exercitus hostiliter invasuros quatuor civitates, dico autem Rhocam, quam vox barbara vocat Edessam, Charram, Sarotze et Samosatam, neque ex eorum agris prædas esse acturos, aut eos, qui in illis habitant, redacturos in captivitatem; tradendos autem esse sibi ducentos Sarraenos ex contribulibus cum ea, quæ prius fuit promissa, quantitate pecuniæ. Quod si faceret, sciret se ad eum esse missurum illam, quæ quærebatur, imaginem et Christi Epistolam.

8. «Imperator vero ejus boni desiderio concedens omnia, quæ fuerant proposita, cum dedisset ea, quæ petebantur, misit Abramium Deo charum Samosatæ episcopum, qui illo tempore hic agebat, ad divinam illam suscipiendam imaginem, et Christi Dei nostri Epistolam olim ad Abagarum missam. Advertens autem et qui misit, et qui erat minister, ne in ea tradenda callide deciperetur, et ne descripta et non vera traderetur pro ea, quæ tunc fuit descripta propter Persicum casum, has ambas cum alia quæ celebratur in Ecclesia Nestorianorum, quæ ipsa quoque (ut est verisimile) sumpta fuerat ex prima, quæsilas accepit ad fidem faciendum, quæ rursus sunt redditæ, retenta sola principali et vera. Sed hoc quidem postea. Tunc autem excitabatur magnus tumultus a fidelibus, qui erant Edessæ, aliis quidem persuasis, aliis vero coactis, aliis etiam minis mortis territis, effecit ut ea traderetur.

9. «Cum autem tonitrua et fulgura eum pluvia vehementissima divina providentia subito erupissent, dum Edessa esset exitura imago et Christi Epistola, rursus movebantur ii, qui ea prius retinebant, et affirmabant, Deum iis, quæ fiebant, significare, divina voluntate non fieri rerum sanctissimarum ex eo loco translationem. Sed cum præfectus Sarraenorum, penes quem erat universa potestas, statuisset, standum esse conventis, et implendum esse promissum, egreditur e civitate effigies pretiosissima, et Epistola a Deo scripta, et huc afferebatur. Et viam quidem conficientes ii, qui ea ferebant, pervenerant ad Euphratem, et rursus tumultus excitatur nullo priorum minor, Edessenis dicentibus, quod nisi divinitus ostensum fuerit signum aliquod, nullo modo dimittent id, quo continetur omnium securitas. Datur ergo eis signum, cum essent infideles et tentarent: navis enim, cum qua erat iis propositum transmittere

¹ Idem l. v. c. 7. — ² 4. Reg. XIII. 2. Paral. XVI. — ³ Extat apud Metaph. die XVI. Aug.

Euphratem, cum adhuc esset in portu a partibus Mesopotamiæ, ubi eam solum ingressi sunt episcopi divinam imaginem afferentes et Epistolam, cum seditiosi tempestate adhuc retinerentur : repente sine remigibus, sine eo, qui gubernaret, aut traheret, appulit ad terram quæ erat ex adverso, gubernata sola divina potestate. Quod quidem omnes, qui convenerant, stupore implevit et admiratione, et persuasit, ut non inviti concederent emissionem.

10. « Hinc perveniunt Samosatam ministri eorum quæ ferebantur. Erant autem Samosatorum, et Edessæ pontifex et ejus primus presbyter, et alii quidam religiosi Christiani, cum quibus una erat etiam minister amiræ, qui Roma revertebatur. Hic cum aliquot dies morati essent, multis illic factis miraculis, rursus iter sunt ingressi. Et rursus in via innumerabilia fiebant miracula a sacra imagine et Christi Epistola : cæci enim ex improvise adspiciebant, et claudi reddebantur sani membris integris : saltabant qui longo tempore in lecto decubuerant, et sani fiebant quibus erat manus arida, et (ut semel dicam) fugabatur omnis morbus et infirmitas. Et qui sani erant Deum glorificabant, et laudabant ejus admirabilia.

11. « Cum autem multum jam viæ confecissent, veniunt etiam ad sanctissimæ Deiparæ monasterium, quod vocatur Eusebii monasterium, quod quidem est in loco, qui dicitur, Optimatum. In templo vero hujus monasterii, quo par fuit honore, reponitur capsula, quæ miraculorum effectricem tangebatur imaginem, et multi, qui accesserunt pura et sincera affectione, curati sunt a suis morbis. Quo etiam venit quidam vexatus a dæmone, quo tanquam instrumento utens malus spiritus, et multa per ipsum eloquens quæ pertinebant ad laudem imaginis et Epistolæ (nam olim quoque¹ : Novimus quod sis sanctus Israel, dicebant qui erant earundem cum illo partium) tandem hæc quoque est vaticinatus : Accipe, inquit, o Constantinopolis, gloriam et lætitiā, et tu, Constantine Porphyrogenite, tuum imperium. His dictis, fuit homo curatus, et statim liberatus a dæmonis vexatione. Horum autem verborum fuerunt multi testes. Nam cum imperator misisset obviam ei quod desiderabat, magistratus et primos totius senatus, et multi ex satellitibus simul cum eis exivissent, accidit ut magistri et patricii cum inferioribus ordinibus ea audirent, et de his ferrent testimonium. Et quoniam quæ prædicta fuerant, cito evenerunt, jure est dubitandum, undenam præscientia accesserit ad dæmones : non enim creduntur eam ex se habere, cum a divina gloria exciderunt, et pro luce dicti fuerunt tenebræ. Sed clarum est, quod quomodo divina virtus usa est² Balaamo ministro ejus quæ tunc fuit prædictionis, et alias aliis sæpe ea re indignis sapienti quodam et solerti consilio : ita nunc quoque virtus quæ erat in divina effigie usa est dæmone, et ideo per eum præsignificavit,

quæ mox erant ventura. Sed cum hoc quidem sic evenisset, ejus meminisse interim non fuit fortasse alienum. Pergimus autem ad ea quæ sequuntur narranda.

12. « Decimo quinto mensis Augusti, imperatoribus de more festum celebrantibus semper Virginis et Dei Matris Mariæ in venerabili templo, quod est in Blachernis, circa crepusculum illuc pervenerunt ministri harum rerum pretiosarum, et reposita est in superiori oratorio hujus templi arca, quæ intus habebat imaginem et Epistolam. Quo venientes imperatores, eam extra reverenter adoraverunt; deinde cum honorifice magno comitatu et multis lampadibus ad regiam eam portassent triremem, cum ea venerunt in regiam, et in templo, quod illic est, et nominatur Pharos, propterea fortasse, quod sicut vestis splendida id sit egregie ornatum, eam reposuerunt die sequenti, qui erat mensis decimus sextus : et pie et reverenter salutantes eam rursus et adorantes. Illinc sacerdotes, et juvenes imperatores (senex enim domi manserat propter corporis infirmitatem cum psalmis et hymnis et copioso lumine, per descensum ad mare, ea in triremi regia rursus imposita, prope urbem remigantes, ut quodammodo urbem conservaret, per ipsum maris ingressum appulerunt extra muros civitatis, qui sunt ad Occidentem. Quo in loco egressi e navi, pedibus ingredientiē imperatores, et totus senatus, et sacrorum antistes cum tota Ecclesiæ congregatione, eo quo par fuit, comitatu prosequuti, tanquam aliam arcam, vel potius super eam vas conducebant, quod illa sanctissima et pretiosa custodiebat. Et cum qui erant extra muros transmisissent usque ad portam Auream, deinde ingressi civitatem cum psalmodiis et hymnis sublimibus et canticis spiritualibus et infinito lumine lampadum publicam celebrantes deductionem, iter faciebant per mediam civitatem, sanctificationis et roboris per hoc esse participem civitatem credentes, illæsamque et inexpugnabilem esse in æternum conservandam.

13. « Otiosa autem turba concurrente ad spectaculum, homo quidam paralyticus et imbecillus, et qui jam longo tempore suis innitebatur famulis, surrexit, ut videret divinam imaginem transeuntem, qui simul atque eam adspexit, præter opinionem sanus effectus, cum cognovisset esse confirmatas et corroboratas bases suorum pedum, accurrit ambulans ipsis pedibus, et exosculatus est capsam imaginis, et Deum magnificavit, narrans quod in se factum fuerat miraculum. Quem cum vidissent omnes qui simul aderant, et verba ejus audivissent, emiserunt gloriam Deo universorum; qui semper facit mirabilia. Tam multæ autem lacrymæ præ gaudio sunt profusæ, et tam multæ ad Deum preces et gratiarum actiones factæ sunt ab universa civitate, divina imagine et veneranda Epistola transeunte per mediam civitatem, ut verbis explicari nequeant, utpote quod vidit oculus, non possit consequi oratio. Res enim quæ sunt excellentes,

¹ Marc. I. Luc. IV. — ² Num. XXI. et XXIX.

pulchrius est videre, quam audire, solentque talia a tergo relinquere.

14. « Cum ergo ad forum, quod est ante Augusteum, venissent duces celebritatis, et a via recta parum declinassent ad sinistram, veniunt ad clarissimum templum sanctæ Sophiæ. Et intra adytorum propitiatorium reponunt pretiosam imaginem et Epistolam. Cum hic autem adorasset tota Ecclesiæ congregatio, et (ut par erat) honorasset, illinc rursus egressi sunt cum sancto onere qui peragebant processionem, et cum venissent in regiam, in atrio quod cognominatur Triclinion, super thronum imperatorium, in quo consueverunt respondere de rebus magnis, tunc divinam collocant imaginem; cathedram omnino sanctificari imperatoriam, et simul iustitiam et benignitatem eis plane largiri qui in ea sedebant, non immerito credentes. Intensa aulem de more facta oratione, post eam impletam, hinc sublata fuit divina imago, et in prædicto Phari templo, in dextera parte quæ vergit ad Orientem, conservata fuit et reposita ad gloriam fidelium et custodiam imperatorum, et ad tutelam totius civitatis, et status Christianorum. Sed, o divina similitudo ejus, quæ mutari non potest Patris similitudinis! o character characteris divinæ substantiæ! o venerandum et omni honore dignum signaculum primariæ pulchritudinis Christi Dei nostri (tecum enim loquor tanquam cum re animata) conserva et custodi semper eum, qui pie et moderate nobis imperat, et tui adventus memoriam luculenter celebrat. Quem cum tua benignitate ad avitam et paternam sedem extulisti, conserva ejus germen et generis successionem et sceptrorum perpetuitatem, statum pacificum præbe Reipublicæ: concede, ut hæc regina civitatum maneat inexpugnabilis, et ut nos placentes archetypo tuo Christo Deo nostro, admittamur in ejus regnum cæleste, cum glorificantes et celebrantes. Quoniam eum decet gloria et adoratio in sæcula sæculorum. Amen ». Cæterum hæc oratio, quæ nomine Constantini Porphyrogeniti imp. habetur inscripta, non patris, sed filii ejusdem nominis imperatoris fuisse apparet. Filius enim quoque Porphyrogenitus Constantinus est dictus; omnes enim qui nati purpura inducebantur, vel in Porphyro palatio nascebantur, Porphyrogeniti dicebantur. Porro ipsa dies decima sexta Augusti, qua eadem sacrosancta imago Constantinop. delata est, ex eo tempore fuit perpetua memoria consecrata, annisque singulis ritibus solemnibus celebrata. In Menologio enim ipsorum dicta die hæc scripta leguntur:

15. « Commemoratio imaginis non manufactæ Domini Dei et Salvatoris nostri Jesu Christi ex urbe Edessa egressæ, in hanc a Deo servatam et regiam urbem deportatæ ».

At vero postea bellis ingruentibus, ipsa Constantinopolitana civitate sæpe capta et ab hostibus direpta, atque a Catholica primum communione sæpe discissa, Dei providentia factum est, ut eadem

imago veneranda fuerit Romam perlata, ubi hactenus colitur in titulo S. Silvestri.

16. *Paulus anachoreta sanctitate celebris imperatoribus charus.* — Quod rursus ad hanc eandem imaginem spectat, non tacendum est, quod contigit sub eodem Constantino Porphyrogenito, describiturque fidelissime in Vita sancti Pauli in Latro, a loco ita nominali anachoretæ, qui hoc tempore miranda claruit sanctitate, his verbis: « Photium illum, qui patricialus honore clarus, moribus etiam clarior fuit, eoque nomine Constantino imperatori inter præcipuos ministros lectissimus, hanc ad sanctum miserat cum litteris. Qui cum ad eum pervenisset, datisque et receptis jam litteris, ad reditum accingeretur, unum ab eo sanctus petiit, ut non manufactæ Christi imagini, quam mantile sanctum appellare mos est, lineum æquale velum applicaret, idque sibi mittere ne gravaretur. Factum est quod postulabat, missumque velum ex animi sententia: quod cum expandisset, Christi effigiem in eo adamussim expressam, et figuræ figuram exactissimam vidit, aliis autem nihil tale apparebat ». Hæc auctor, qui subdit de eodem Photio ista:

17. « Patricio huic Photio, dum apud divinum patrem versatur, curæ fuit externa etiam hæc observare, qualis ejus facies esset, quales oculi, vox, gressus et alia, tum in primis, quales oculi et adspectus. Etenim hoc etiam illi in mandatis dederat Constantinus imperator: conatus itaque est jussa exsequi, sed nulla ratione potuit. Discedens enim deducendo se Simeoni arcanum prodens, fassus est: Conatus, inquit, persæpe in ejus faciem oculos defigere, nunquam potui. Nam ex ea tanquam radius quidam solis emissus oculos meos perstringebat et claudere cogebat ».

18. Porro egregia ejus sanctitas conspicuum eum fecit non Orientali tantum orbi, sed etiam Occidentali: frequentatus enim est undique principum legationibus, quod sciretur in primis fide esse Catholicus, et communicatione junctus Apostolicæ Sedi. Nam ibidem auctor ejus temporis: « Notus fit omnibus, adeo ut Petrus Bulgariæ princeps perhumanis illum Epistolis modestissimisque crebro salutaret: et ut pro salute sua Deum deprecaretur, orabat. Papa etiam Romanus (sic enim appellari solet) cum ejus aures tanti viri fama impleisset, monachum quemdam proVectum ad eum misit, non alia de causa, quam ut eum salutaret, vitamque ipsius et formam penitus agnosceret; reversusque postea omnia ipsi ut se haberent, explicaret ».

19. In primis autem coluit eum Constantinus, quem diximus, imperator, ejus complures Epistolæ adhuc integras conservari ad eum missas, idem testatur auctor, in Laura, ejus idem sanctus curam aliquando gessit. Omnia quidem dextere eidem contingebant imperatori, quæ ex Pauli ejusdem sententia ageret, infelicitè vero si contra; nam audi quid idem ibi auctor enarret: « Parabat,

inquit, ille classem, quam instruxerat, sane numerosissimam adversus Cretenses mittere (Sarracenos scilicet), qui jamdiu insulam illam occupatam adhuc detinebant. Scripsit autem ad magnum hunc patrem, ut de illo consuleret, bello scilicet. Rescripsit is, nullo modo ex sententia Dei expeditionem illam videri. Et hoc quidem ipse.

20. « Imperator autem immensarum opum sumptus, quos in paranda classe fecerat, causatus, consilio non paruit. Quos vero neglecti consilii fructus acceperit, et quomodo missæ copiae a Cretensibus habitæ sint, norunt omnes, et imperatorem ipsum haud leviter pœnituit. Sed haudquam in hoc uno pœnitentia stetit; sed quo etiam tempore ad celeberrimum illum inter Sarracenos, Chaundam dico, nomine ipso notissimum pro captivorum Christianorum permutatione Basilium Rhodium misit: tunc etiam monnerat idem sanctus, ne mitteret, inutilemque et sine fructu suum conatum fore. Ex his vero, quæ legato adversa obtigerunt, didicit ille, quam inconsulto fecerit, non obtemperando ». Cæterum cultu et obedientia et observantia erga sanctum virum, quam cuncta alia illi prospera cesserint, quamque liberatus tyrannide suorum ad plurimos annos imperium propagaverit, quæ a Curopalate et aliis scripta sunt, fidem exploratam faciunt. De eodem autem Paulo rursus alia occasione dicendum inferius.

21. *Romanus et filii ejus imperio privati.* — « Eodem anno, decima sexta Decembris, inchoata jam tertia Indictione, Romanus imperator, qui cum in honore esset, non intellixit; ex collega, in quem a Constantino assumptus erat, jam in dominum mutatus, sibi filiisque suis assumens et tribuens primatum imperii, nomen tantum inane Constantino legitimo hæredi Leonis Augusti relinquens, a Stephano suo filio, imperatore ab ipso pariter declarato capitur, exiit imperio, et attonsus in monachum relegatur in insulam, cum vicesimum sextum annum in imperio degisset. Sed et post mensem elapsam et dies quinque, nempe vicesima prima Januarii ejusdem tertiæ Indictionis, idem Romani filius Stephanus et Constantinus fratres inter se mutuo de imperii primatu certantes, ambo in mensa tenti, et in insulas deportati sunt; sicque (ut prius erat) uni Constantino Leonis filio est relictum imperium. Præstitit hoc illi in imaginis suæ adventu Constantinopolim Jesus Christus, qui semper exaltavit humiles, superbos e sede deponens ». Ilæc pluribus Curopalates aliique Græcorum historici, et ex Latinis ¹ Luitprandus profusius. Sed ad res Occidentalis Ecclesiæ.

22. *Admiranda in Germania.* — De rebus Germanicis valde mirandum, quod hoc quidem contigisse anno Frodoardus sic narrat: « In Transrhœnensibus Germaniæ regionibus quidam homo erat, cujus manus abscissa fuerat, et post annos quatuordecim (sicut asserunt qui eum noverunt) solito

dum noctu dormiret, ei ex integro restaurata est. In iisdem partibus per quosdam pagos ignei globi ferri videbantur in aere, quanquam nullas illic circumvolantes incenderent domos et villas. A quibusdam vero locis, crucibus oppositis cum benedictione episcopali et aqua benedicta, repellebantur ». Ilæc Frodoardus sui temporis res gestas posteris fidelissime tradens. Witichindus ¹ et ipse sui temporis scriptor, de manu homini restituta rem paulo diversam sic narrat: « Homini etiam cujusdam manus sinistra ferro amputata, post annum fere integrum restituta est ei dormienti, quæ pro signo miraculi sanguinea linea loco conjunctionis notabatur ». Ilæc ipse. Sed liberat fidem suam Frodoardus diversa scribens, dum aliorum relatu se ea accepisse testatur.

23. *Diploma Marini papæ ad monasterium S. Vincentii prope Vulturum.* — Illic ad finem anni hujus describemus unicum quod extat monumentum Marini papæ, nempe Diploma hoc anno datum, continens Privilegium concessum monasterio sancti Vincentii super Vulturni fontes, recitatum in suo Chronico a Joanne monacho ejusdem monasterii, qui claruit et scripsit tempore Paschalis secundi, quod scriptum caractere Longobardo, accepimus ab ejusdem monasterii abbate et patriarcha Alexandrino Camillo Cajetano viro dignissimo, meique amantissimo: sic enim se habet:

24. « Marinus episcopus, servus servorum Dei, Leoni venerabili abbati in monasterio Christi martyris Vincentii, quod situm est in partibus Samnii territorio Beneventano super fontes Vulturni fluminis, et per te cunctis successoribus tuis in eodem venerabili monasterio regulariter promovendis in perpetuum.

25. « Quoniam pia sollicitudine convenit nos pro universis Dei Ecclesiis semper invigilare, et tota mentis intentione venerabilium locorum integritates procurare: ideo utilitati illorum, et maxime pro quiete monachorum optamus subsidia conferre, ut divinæ misericordiæ remunerationem in sidereis arcibus consequamur. Igitur quia petistis a nobis, ut monasterium beati Vincentii martyris una cum omnibus sibi pertinentibus monasteriis, cellis, capellis, terris et castellis, servis et ancillis, cum universis redditionibus suis sub jurisdictione sanctæ Romanæ Ecclesiæ, cui Deo auctore deservimus, nostri privilegii auctoritate muniremus: idcirco vobis, tuisque successoribus legitimis abbatibus illud concedimus detinendum, ut nullius alterius Ecclesiæ ditionibus submittatur, sed cum omnibus sibi subjectis monasteriis et cellis, hoc est, monasterium beati Petri Apostoli, positi juxta fluvium Sab..... territorii jam dicti Beneventani monasterii sanctæ Dei Genitricis Mariæ in Locosano, monasterium Domini Salvatoris, quod positum est in Alifo, monasterium sanctæ Mariæ in loco Api-niaci territorii Marsicani, monasterium sanctæ Ma-

¹ Luitp. l. v. c. 9. 10. 11.

¹ Witich. l. II.

riæ ad Duas Basilicas, monasterium sanctæ Mariæ in Castaneto, monasterium sanctæ Mariæ in Polive territorii domo... monasterium sanctæ Mariæ in Planisi, monasterium sancti Petri in Vipera in ipso casale Leonis, monasterium sancti Petri in Concola, monasterium sancti Petri in Trita, monasterium sanctæ Mariæ in Musano, monasterium sanctæ Mariæ in Arola, monasterium S. Georgii in Salerno, monasterium sancti Vincentii in Capua, monasterium S. Martini, et monasterium sanctæ Crucis in monte Marsico, monasterium sanctæ Columbæ in Sora, monasterium sancti Donati cum incluta valle Sorana. Hæc omnia cum omnibus sibi pertinentibus rebus sub tutela Sedis Apostolicæ permanent.

26. « Conceditur etiam vobis vestrisque successoribus abbatibus licentia Apostolicæ Sedis nostræ, ut quamlibet Christianitatem indigentibus in prædicto venerabili monasterio quemvis episcopum ad invitandum ire volueritis, habeatis omnimodo potestatem; similiter ad sanctas Ecclesias consecrandas, et ordinationes de sacerdotibus et diaconibus per tempora faciendas, et de omni gradu ibidem adimplendo. Protestamur etiam, ut nullus episcopus debeat exinde sacerdotem vel diaconum ad suam Synodum provocare, nisi suæ fuerit propriæ voluntatis, aut abbates vel monachos quomodo judicare vel excommunicare. Volumus etiam, et Apostolica injungimus auctoritate vobis et vestris futuris abbatibus, ut de qualicumque Ecclesia sacerdotes vel clerici si venerint ad habitandum in congregatione fratrum, sive ad monasticum suscipiendum habitum se contulerint, statim recipiantur. Chrisma vero et formatas a quolibet episcopo vobis voluntas fuerit impetrandi, liceat semper secundum quod diximus, sub Apostolica nostra potestate. Et omnem ejuslibet Ecclesiæ sacerdotem in præfato venerabili monasterio quamlibet ditionem habere potest Sedes Apostolica prohibemus, ita ut nisi ab abbate monasterii fuerit invitatus, nec missarum solemnias ibi celebrare præsumat. Statuentes Apostolica insuper censura, sub divini judicii obtestatione, sed et validis atque atrocibus anathematis interdictionibus prohibemus, ut nullus unquam præsumat ejuscumque dignitatis præditus et potestatis, vel in eodem monasterio vel ejus causis incumbere, aut de rebus et possessionibus, vel Ecclesiis subjectis, vel quidquid de his juris ejus esse videatur, aut quomodo au-

ferre, aut alienare, sed nec quamlibet malitiam, aut jacturæ molestiam ibidem, sive pacis, sive barbarici belli tempore aliquo modo inferre.

27. « Item præfatum, sicut dictum est, monasterium, perpetua stabilitate decernimus sub jurisdictione sanctæ Romanæ Ecclesiæ permanentum. Promulgantes vero et hoc auctoritate beati Petri Apostolorum principis coram Deo et ejus terribili examine, per hujus nostri privilegii Constitutiones sancimus ac decernimus, ut loca quæ a quolibet episcopo vel abbate coempta sunt, necnon diversorum locorum possessiones, quæ a regibus, ducibus, principibus, castaldæis et a cæteris Christianis concessa eidem venerabili loco, vel postmodum concessa vel oblata fuerint, ipsius jure monasterii in perpetuum permanenda statuimus. Nec liceat (sicut dictum est) ex eis vel omnibus ejusdem monasterii pertinentibus, cuilibet magnæ vel parvæ personæ auferre, ut perfecte juxta id, quod dictum est, subjectum idem venerabile monasterium Apostolicis constitutis aut privilegiis consistat, et inconcusse permaneat. Et liceat eosdem monachos de sua congregatione abbatem semper eligere, et liceat ipsi abbati suos monachos judicare, et non solum virile, sed et muliebre monasterium sibi subjectum.

28. « Si quis autem (quod non optamus) nefario ausu præsumserit, quæ a nobis ad laudem Dei nostri pro stabilitate jam dicti venerabilis monasterii statuta sunt, refragari, aut in quoquam transilire voluerit, anathematis vinculo innodatus, et cum diabolo et angelis ejus atque Juda traditore Domini nostri Jesu Christi æterno incendio concremandus deputetur. At vero qui pio intuitu observator in omnibus extiterit, custodiens hujus nostri privilegii constitutum, ad cultum Dei respiciens: benedictionis gratiam a Domino Deo nostro misericordissimo multipliciter consequatur, et vitæ æternæ particeps fieri mereatur. Bene vale.

29. « Scriptum per manum Hadriani scriniarii sanctæ Romanæ Eccl., in mense Martio, Indictione secunda. Dat. per manum Stephani primicerii defensorum hujus Apostolicæ Sedis, anno Pontificatus domni Marini summi Pontificis secundo, in sacratissima Sede beati Petri Apostoli ». Hactenus Diploma Marini, ex quo si non aliud, certe exactam temporis ejus Sedis quisque in tanta obscuritate inveniet rationem.

Anno periodi Græco-Romanæ 6437. — Anno Æræ Hispan. 982. — Anno Hegiræ 333, inchoato die 24 Augusti, Fer. 7. — Jesu Christi 944.

— Marini II papæ 3. — Constantini VIII solius imp. 33.

1. *S. Tryphon patriarchatu Constantinop. depositus.* — Ad num. 1 et seq. Quo anno *S. Tryphon* patriarcha Constantinop. depositus fuerit, anno DCXXXIII declaravimus, et Curopalatem hic a Baronio citatum, aliosque scriptores Byzantinos emendavimus. Quare quæ hoc anno ex eodem Baronius habet, ad illum retrahenda.

2. *Hugo rex Italiæ cum Saracenis pacem init.* — Ad num. 3 et seq. Quod narrat hic Baronius ex Luitprando lib. 5, cap. 7, pertinet ad annum nonagesimum quadragesimum secundum, licet Sigonius lib. 6 de Regn. Ital. illud anno DCXXII consignarit. Cum enim *Hugo* Italiæ rex anno DCXXII naves a Romano Lacapeno postulaverit, isque continuo, ut ait Luitprandus, miserit, hæc adan. DCXXII referenda: « Rex Hugo », inquit Luitprandus, « congregato exercitu, classibus per Tyrrenum mare directis ad Fraxinetum, terrestri ipse eo itinere pergit. Quo dum Græci pervenirent, igne projecto Saracenorum naves mox omnes exurunt. Sed et rex Fraxinetum ingressus, Saracenos omnes in montem Maurum fugere compulit. In quo eos circumsedendo capere posset, si res hæc, quam prompturus sum, non impediret. Rex Hugo Berengarius, ne collectis et ex Suevia et ex Francia super se irrueret, sibi regnum auferret, maxime timuit. Unde non bono consilio accepto, ad propria Græcos mox remisit, ipseque eum Saracenis hac ratione iniit fœdus, ut in montibus, qui Sueviam atque Italiam dividunt, starent: ut si forte Berengarius exercitum per eos ducere vellet, transire eum omni modo prohiberent. Eo vero loco constituti, quam multorum Christianorum ad beatorum Apostolorum Petri et Pauli limina transeuntium sanguinem funderint, ille scit solus numerum, qui eorum nomina tenet scripta in libro viventium ». Ad quæ respiciebat Flodoardus in Chronico, quando ad annum DCXXII scripsit: « Rex Hugo Saracenos de Fraxinido, eorum munitiones disperdere conabatur ».

3. *Conjugium Romani junioris cum filia Hugonis regis.* — Quoad conjugium filiæ ejusdem Hugonis cum Romano Constantini Porphyrogenetæ filio, recte illud a Baronio hoc anno recitatum. Incertus enim continuator Theophanis in Romano Lacapeno num. 46 ait: « Porro secunda Indictione,

Romanus imperator Paschaliū protospatharium ac Longobardiæ ducem, ad Hugonem regem Franciæ misit, ejus filiam Romano Constantini generi sui filio sponsam exquirens: quam et assumens, quem dixi, Paschalius eum multa supelleetile atque opibus in urbem induxit. Celebratæ nuptiæ mense Septembri, Indictione tertia (ideoque hoc Christi anno), vixit eum viro annos quinque: tumque vivis exempta est, eum Constantinus illius socer ipse summus imperator esset, solusque rerum poliretur ». Idem habent alii scriptores Byzantini, qui Hugonem Francorum regem perperam etiam appellant. Loquitur de hoc conjugio Constantinus Porphyrogeneta lib. de Administr. imp. cap. 26, ubi ait, *Bertam* de nomine magnæ Bertæ aviæ appellatam fuisse, Eudociam vero *de nomine aviæ* (uxoris sc. Basilii Macedonis) et sororis Constantini, ipsiusmet sc. Porphyrogenetæ, qui hæc scribit, qui sororem habuit nomine Eudociam. Cætera quæ ibidem de Berta Romani uxore dicuntur, hic explicare locus non est.

4. *Imago Christi Edessena Constantinopolitani a Saracenis tradita.* — A num. 5 ad 46. Incertus continuator Theophanis, narrato præfato conjugio, num. 48 scribit: « Edessa urbe, in qua veneranda Christi effigies posita erat, a Romano exercitu obsessa, et ad extremas angustias redacta, oppidani oratores ad Romanum imperatorem mittunt, rogantes solvi obsidionem, ejus muneris gratia, se Christi sacram effigiem in linteo expressam daturos polliciti; hujusque ipsius muneris vicem, ex suis vinctos recipere petebant, qui nobiliores essent, bullaque aurea eam ipsis præstari fidem », ut nunquam Romanæ copiæ Edessenam regionem devastarent. « Quod sic utique factum. Missa itaque sacra effigie seu sudario, jamque haud procul Byzantio, Theophanes patricius et accubitor ad Sagarim fluvium cum splendido cereorum apparatu, congruoque cultu et canticis illi obviam processit; mensisque Aug. quinta decima cum illo in urbem intravit, imp. in Blæhernis constituto, ubi etiam effigiem illam adoravit. In crastinum exierunt ad portam auream, tum imperatoris duo filii Stephanus et Constantinus, tum Constantinus illius gener eum Theophylacto patriarcha; debitoque honore susceptum sacrum pignus, universo

senatu præeunte, maximaque cereorum atque lampadum segete prælucente, ad usque sanctæ Sophiæ templum pedibus detulerunt, atque illic adoratione mysticoque cultu exceptum, in palatium intulerunt». Eadem narrant Simeon Logotheta ac Leo Grammaticus. Combefisius in originum rerumque Constantinopolitanarum Manipulo, pag. 75, exhibet narrationem «diversis ex Historiis collectam de Christi imagine non manufacta ad Augurum missa et ex urbe Edessena Constantinopolim translata, Romano Lacapeno imperante».

5. *Porphyrogenneta auctor Historiæ hac de re scriptæ.* — Baronius hoc anno num. 14 de illa oratione, ejus fragmentum recitat, ait: «Hæc oratio, quæ nomine Constantini Porphyrogeniti imp. habetur inscripta, non patris, sed filii ejusdem nominis imperatoris fuisse apparet. Filius enim quoque Porphyrogenitus Constantinus dictus est, etc.» Verum, ut Combefisius citatus notavit, filius Constantini Porphyrogennetæ ac imperii hæres nunquam Constantinus appellatus fuit, sed *Romanus junior*. Lipomanus ante Baronium crediderat, Constantinum Porphyrogennetam hujus orationis auctorem esse Constantinum Romani Lacapeni filium. Sed nunquam Constantinus Romani filius Porphyrogenneta appellatus, licet Augustali corona donatus. Neque enim in purpura exceptus aut in porphyra natus, sed adoptione Constantini Porphyrogennetæ adscitilius tantum fuit.

6. *Orationem de ea habuit.* — Denique demonstrari potest orationem, ejus Baronius fragmentum recitat, auctorem habere Constantinum Porphyrogenitam Leonis philosophi filium. In ea enim apud Baronium num. 14 diserite dicitur, hominem quemdam a cacodæmone vexatum tempore illationis non manufactæ imaginis in urbem Constantinop. inter alia varia etiam hoc prædixisse: «Accipe, o Constantinopolis, gloriam et lætitiā; et tu, Constantine Porphyrogenite, tuum imperium», hancque prædictionem paulo post impletam esse, quod mense Decembri currentis anni contigit, ut statim videbimus. Verosimillimum est, inquit Lambecius tom. viii Biblioth. Cæs. pag. 196, ubi de hac oratione disserit, Porphyrogenitum eam publice habuisse die xvi mensis Augusti sequentis Christi anni, quo introitum sacræ imaginis Edessenæ in urbem Constantinop. qui sub Romano Lacapeno hoc anno acciderat, tunc solus imperans, prima vice anniversariis ritibus solemniter celebravit. Loquitur et de hac Romanorum victoria de Saracenis Edessam incolentibus, et de sacro velo alias ad Abgarum regem misso, et hoc anno Romanis concesso, Elmacinus lib. 3 Hist. Sarac. ad annum Hegiræ cccxxxi, sed quoad annum rei gestæ falli videtur. Prætermiseram monere eam narrationem græce et latine editam esse a Combefisio in Orig. rerum Constantinopolitanarum Manipulo pag. 75, ac Notis illustratam. Num vero imago Edessena Romæ extet, uti scribit Baronius, velut scissa et erroribus laborante civitate eo translata sit, uti de

aliis quibusdam factum, quo tempore in sacras imagines sævitum Constantinopoli est, an Genuæ, quod Bzovius in suis Annalibus tradit, aliis discutendum relinquo.

7. *Porphyrogenneta solus regnare incipit.* — Ad num. 21. Simeon Logotheta in Constantino Porphyrogenneta num. 53: «Stephanus, inquit, Romani filius in patrem insurgens, adhibitisque in consilium Mariano exmonacho, et Basilio cognomento Petino, necnon Manuele Curtice, consiliis etiam reliquis Augustis, quod gravi morbo ac senio detritum eum videret, ac qui testamenti tabulis res imperii ordinasset, primumque imperatorem Constantinum Porphyrogennetum statuisset, tumque deinceps filios suos secundo ac tertio ordine imperatores fore decrevisset; expressisque ad eos verbis sanxisset atque firmasset, si quid adversus primum imperatorem offenderint, ac majestatem violaverint, confestim imperio abdicandos esse, male aula detrusum, inque Proten insulam relegatum, monachi ritu cæsarie muletavit. Imperator igitur ejus gener Constantinus relictus est, mensis Decembris vicesimo, Indictione tertia, anno 6454. Is statim Bardam Phocam magistrum et scholarum domesticum creat; Constantinum vero navalium copiarum ducem, necnon tribunos, viros quosdam strenuos ac industrios. Petinum patricium ac comitem stabuli fecit, Curticem patricium et excubiarum drungarium; quos brevi divina insecuta ultio est, ut qui se in christum Domini scelerate gessissent. Majestatis namque rei deprehensi, misera morte vitam ambo abruperunt.

8. *Filios Romani Lacapeni in exilium mittit.* — «Quadragesimo vero dierum exacto spatio, Constantinus Porphyrogennetus suspectos habens Stephanum et Constantinum fratres, ne in se quoque, uti par est, talia molirentur; ut qui patri non pepercissent, nec sibi essent parcituri. Aiunt enim, *Corrumpunt bonos mores, colloquia prava*. Quid igitur germanis fit? Convivio acceptos lauteque epulantes, cum adhuc cibos non deglutissent, qui in hoc parati erant, abreptos et clericali militiæ adscriptos in insulas haud longe positas deportaverunt. Brevique post patrem suum, qui monachus esset, visere petierunt, intolerabili luctu ex adspectu affecti. Similiter etiam pater ejulans ad eos ait: *Filios genui et exaltavi, ipsi autem spreverunt me*. Exinde relegati sunt, Stephanus quidem in Præconesum, deinde Rhodum, postea in Mitylene, Constantinus vero in Tenedum, inde in Samothraciam: ubi etiam tyrannidem moliens, a custodibus necatur. Michael Christophori imperatoris filius, ablatis imperialibus calceis, a Theophylacto patriarcha clericus efficitur. Similiter quoque Theophanem patricium et accubitorem in exilium misit; Georgium item protospatharium et pincernam, necnon Thomam primicerium; quos ambos verberibus subactos atque detonsos, infamique triumpho per mediam urbem traductos, in exilium amandavit. Sicque in eos animadversum,

quod deprehensi occasionem captare, ut Romanum denuo in aulam reducerent ». Idem scribunt alii auctores Byzantini.

9. *Translatio SS. Wandregisili, Ansberti et Wlfranni.* — Hoc anno corpora *sanctorum Wandregisili* abbatis Fontanellensis, *Ansberti* et *Wlfranni* archipræsulum, ex urbe Bononiensi in ora maris Gallici posita, ad monasterium Blandiniense in urbe Gandavensi situm translata sunt, ut videre est in Historia hujus translationis a monacho anonymo scripta, et Sæc. v Benedict. recitata. Normannis circa litus Oceani Gallici debacchantibus, ad eorum furorem declinandum, sacræ reliquiæ Bononiam deportatæ fuerant, ut sæculo præcedenti retulimus; sed cum *Arnulphus Magnus* Flandriæ comes a sancto Arnulpho avo sancti Wandregisili et nomen et genus traheret, ea sacra pignora procuravit. « Tractante autem eo », inquit anonymus, « et consilium super hoc placito a Deo quaerente, non est fraudatus a desiderio suo. Ecce enim huic aptus negotio inventus est vir vitæ laudabilis, sanctitate clarus et genere, Gerardus nomine (est is sanctus Gerardus, qui postea Bronniensis abbas renunciatus fuit), qui monachus proposito, abbas autem extitit officio et apostolicus merito. Huic inclytus marchio (id est, marchio, quo nomine sæpe Arnulphus appellatur in Vita ejusdem sancti Gerardi) de ejusdem monasterii ordinatione et pristina monasticæ conversationis restauratione, conceptum in anima sua de Spiritu sancto aperiens desiderium, consilium prudenter utile, atque utiliter prudens adinvenit: a quo etiam perductus anno humanati Verbi *MDXLI*, hanc aulam Apostolicam devota monachorum cohorte comitante ingressus est. Ubi eliminato imprimis clericorum grege, Dominici scholam servitii a beato olim Amando (monasterii Blandiniensis conditore) constitutam restituit, et normam monasticæ regulæ, ut doctus a Deo, sapienter intendere curavit. Quamplures vero tanti exemplo magistri excitati, cœperunt voto monasticæ disciplinæ hic confluere, cervicem cordis edomare, jugum Domini suave suscipere ».

10. *Ad monasterium Blandiniense.* — Post aliqua interposita quanto honore sanctorum reliquiæ Blandinium exceptæ, his verbis anonymus memorat: « Omnis patria occurrit, quique pagenses honore mortalibus possibili obviam ruunt: confluit regalis militia et omnis plebs urbana. Horum omnium concentu, vocibus quidem dissono, affectibus autem consono, ad aures Domini Sabaoth perveniente, monasterio principis Apostolorum, de quo diximus, altisona appropinquant modulatione. Et ecce prodit quasi de sinu matris religiosus monachorum chorus Ecclesiasticis infulis admodum honeste redimitus, præeunte toto mentis affectu cum gaudio spiritali venerabili Transmaro episcopo, et comitante cum suis præfato glorioso marchiso, super his omnibus singulariter tripudiantes, et Deo gratias omnigenas referentes. Hac tali et

tanta, tam nitida scilicet atque præfulgida fidelium chorea, cum hymnis cælestibus et organis angelicis, cum thymiamatibus aromaticum vaporem spirantibus, sancti hinc ambiuntur et inde: his sanctæ Crucis stigmata cum vexillis micantibus, illis cereoferaria claritatem diei argentia honorifice gestantibus. Cum hac ergo speciali honoris prærogativa sancti in hanc apostolicam introducti Basilicam, in aulam eis scilicet divina ordinatione et præparatione dedicatam, deponuntur juxta virtutiferum paradoxæ virginis Christi Amalbergæ mausoleum, sublata in cælum voce jucunda ac dulci modulatione: Sacerdos Dei inclyte Wandregisile, ora pro nobis, ut tuis semper precibus piis protegi mereamur, et quandoque digni apparere conspectui divinæ claritatis. Acta sunt anno Incarnati Verbi nongentesimo quadragésimo quarto, Indictione secunda, Martino papa (ita Marinus etiam appellatus) vices Apostolicas in Sede Romana agente, Ludovico Francis imperante, Transmaro Noviomensi episcopo præsidente, et domno Gerardo abbate hoc cœnobium regente tertio nonarum Septembrium die ».

11. *Translationes SS. diebus Dominicis non semper factæ.* — Is tamen dies, qui etiam notatur in Chronico Blandiniensi apud Sanderum in suo Gandavo, et a Meyero in suis Annalibus Flandriæ, hoc anno in feriam tertiam incidit, non vero in Dominicam, quo die sanctorum translationes de more peractæ. Quare mos ille non ita semper servatus, quin ab illo aliquando discessum fuerit; quod hic notare juvat, ne similia exempla viros doctos irretitos teneant. Quoad *S. Amalbergam* virginem, ejus reliquiæ sæculo decimo sexto ab hæreticis igni traditæ sunt, floruitque sæculo octavo exeunte, ut videre est Sæc. III Benedict. part. 2.

12. *Edmundus Angliæ rex in monasterium Glastoniense munificus.* — Malmesburiensis in Edmundo Angliæ rege refert, inter varia beneficia diversis Ecclesiis collata, eum miro affectu *Glastoniensem* Ecclesiam, magnis prædiis et honoribus sublimasse. Quam in rem ejusdem Edmundi chartam exhibet, continentem quæ Ecclesiæ Glastoniensi dedit, cum Dunstanus (*quem ibidem ait, abbatem constituit*) eidem Ecclesiæ abbas præesset. Tum in fine legitur: « Acta est præfata donatio anno ab incarnatione Domini Jesu Christi nongentesimo quadragésimo quarto, Indictione prima ». Sed loco, *Indictione prima*, legendum, *Indictione secunda*. Osbernus in Vita S. Dunstani Cantuariensis archiepiscopi, num. 49, ad hanc regis liberalitatem respicit, cum ait: « Igitur Dunstanus, accepta potestate super regiam mansionem, quæ Glestonia vocabatur, post paucos dies augustioris Ecclesiæ fundamenta jacere, officinas secundum exemplar olim sibi ostensum construere, et consummatis omnibus magnum pariter atque egregium monachorum agmen ibidem coadunare; quibus ipse primus abbas effectus, ad tantam perfectionem justitiæ omnes cohabitantes adduxit, ut quasi cæli

luminaria ad effugandas totius erroris nebulas et peccatorum tenebras viderentur. Tunc ad omnes circumquaque Ecclesias ex eisdem monachis pontifices eligi, tunc abbates assumi, tunc denique diversorum officiorum præpositi institui : propterea quod essent et religionis merito præcipui, et doctrinæ sapientia clarissimi, et ad Catholicæ fidei defensionem præstantissimi ».

13. *S. Dunstanus abbas Glastoniensis vitam monasticam restituit.* — « Dunstanus », inquit idem Malmesburiensis lib. 2 de Reg. cap. 8, « prius abbas Glastoniæ, postea episcopus Wigornix, mox archiepiscopus Cantuariæ, multæ in sæculo potentix, magnæ apud Deum gratiæ, illic Martham, illic exhibebat Mariam. Ipse artium liberalium in tota insula post regem Alfredum excitator mirificus; ipse regalium locorum reparator munificus; in reges et delinquentes duces intonare terribile; pauperes, et mediocres iuste sustentare ». Non solum autem rem monasticam, sed etiam litterariam in Anglia restituit, testibus Malmesburiensi, et Ælfrico

apud Spelmannum in tom. I Concil. pag. 618, ubi legitur a tempore Ælfredi regis usque adeo litterarum studium defecisse, « ut sacerdos nullus Anglicus Epistolam nosset vel latine edere, vel e latino interpretari, usque dum archiepiscopus Cantuariæ Dunstanus et episcopus Æthelwoldus hanc in monasteriis resuscitarent cognitionem ».

14. *Mustacfis califa deponitur.* — Anno Hegiræ cccxxxiii imperio depositus fuit *Mustacfis* califa Babylonensis a *Buzuno* Turca, cui regni administrationem commiserat, eumque imperatorem imperatorum nominarat, idque die sabbati vicesimo Safari, id est, die xii Octobris nostri currentis Christi anni. Ei successit *Mustacfis Billa*, inauguratus eo die, quo decessor dignitate motus fuit, annoque Hegiræ cccxxxiv, die xxii Jomadæ posterioris, id est, die vicesima nona Januarii nostri anni Christi mcdxvi, dignitate etiam depositus est. Ei successit in califatum *Almoti*, seu *Mutius Lilla*. Hæc Elmacinus.

MARINI II ANNUS 3. — CHRISTI 945.

1. *Hugo regnum Italiæ cedit filio Lothario et fit monachus.* — Sequitur annus Redemptoris nonagesimus quadragesimus quintus, tertia Indictione, quo (inquit Frodoardus) « Hugo rex Italiæ regno depulsus a suis, et filius ipsius in regnum susceptus est ». Hæc pauca satis ad temporis notam consignandam, atque significandum a Deo fuisse rejectum regem, simul ac fœdus iniit cum Sarracenis. Sed qui Manassi affini suo plures (ut diximus) dedit episcopatus, ut eo modo (quod putabat) regnum sibi stabiliret : justo Dei iudicio eum primum rebellem sensit, cupiditate illectum potiundi archiepiscopatu Ecclesiæ Mediolanensis a Berengario sibi pollicito : sicque eidem Berengario Italiam repetenti aperuit ostium, et ut alii principes Italiæ ab Hugone deficerent, procuravit. Sic igitur secundum illud Davidicum ¹ : « In operibus manuum suarum comprehensus est peccator », tunc accidit. Porro rem gestam pluribus prosequitur Luitprandus, qui et quomodo Hugonis filius Lo-

tharius sit receptus in regnum, ita describit ¹ : « Eo namque Mediolani degenle, ac Italicis dignitates sibi adhærentibus dispensante, rex Hugo Lotharium filium suum non ad Berengarium solum, verum ad totius populi præsentiam dirigit, petens, quia se eis non morigerum abdicarunt, filium qui nihil in eos deliquerat, saltem pro Dei amore suscipiant, ac voluntatibus eorum morigerum reddant. Lothario itaque Mediolanum pelente, rex Hugo Papia omni cum pecunia egressus, Italiam deserere, atque in Burgundiam ire cogitavit. Sed res ista eum retinuit, quoniam dum misericordia inclinati Lotharium in Ecclesia beatorum confessoris et martyrum Ambrosii, Gervasii et Protasii ante crucem prostratum erigerent, et regem sibi constituerent, quamprimum ad Hugonem dirigunt nuntium, per quem illum iterum super se regnare promittunt ». Porro hæc omnia dolo acta esse, ut Hugonem regem cum thesauris suis Berengarius in potestatem acciperet, idem Luit-

¹ Psal. ix.

¹ Luitp. l. v. c. 43.

prandus affirmat. Verum Hugo nihil sibi tutum videns, tandem in Provinciam, unde venerat Arelatensis comes, reversus est, nec diu post vixit. Leo¹ Ostiensis in Chronico Cassinate hæc amplius de eodem Hugone rege habet : « Ipse Hugo cum omni thesauro suo in Burgundiam properans, monasterium illic permagnificum construxit sumptibus propriis, quod sub titulo S. Petri appellari voluit : ibique omnibus traditis, ipse monachus effectus est ». Hæc Leo Ostiensis.

2. *Diploma datum canonicis Vercellensibus.* — Porro hoc eodem anno datum habetur Diploma ab eodem Hugone rege et filio ejus Lothario de concessione facta canonicis Vercellensibus, quod acceptum ex archivo ejusdem Ecclesiæ, hic tibi putavimus describendum. Sic se habet :

3. « In nomine sanctæ et individue Trinitatis. Hugo et Lotharius divina clementia reges.

« Quæ sanctis et venerabilibus locis divino cultui mancipatis, more bonorum Christianorum, devotissime contulerimus nostri muneris suffragio, certissime credimus, nos nostrumque regnum intercessionibus sanctorum cælesti juvamine semper sublevari, atque divinis beneficiis sublimari. Quocirca noverit omnium sanctæ Dei Ecclesiæ fidelium..... dilectum illustremque marchionem nostram monuisse clementiam, ut pro amore Dei omnipotentis sanctique Eusebii, qui prædicando fidem Catholicam palmam martyrii est decentissime consecutus, canonicis Vercellensis Ecclesiæ, cui venerabilis Atto præesse videtur episcopus, alveos fluminum Servi et Sicidæ largiremur : hanc petitionem satis omnibus pæne principibus hujus regni ratam suscipientibus, per præceptum nostræ auctoritatis alveos prædictorum fluminum canonicorum Vercellensium dominio, prout juste et integraliter possumus, præsentialiter concedimus et elargimur, sicut posita sunt compita a Briulle usque ad ripam, quæ est juxta capellam S. Columbani intra hos fines decurrentium flumina cum insulis et eorum ripis nobis pertinentibus, prædictis canonicis S. Eusebii, ut dictum est, largimur, perinde ut piscatores, navium redhibitores atque riparum eorum usui famulentur. Vercellinos vero portus per hoc præceptum, veluti prædecessores nostri pio amore ordinarunt, ad usum luminarii Ecclesiæ S. Eusebii, in qua sanctissimum ejus corpus requiescit, et ad indumenta clericorum ibi jugiter famulantium concedimus. Si quis hujus igitur nostri præcepti statutum aliquando, quomodo-
cumque, instigante diabolo, infringere conatus fuerit, sciat se compositurum auri optimi libras mille, medietatem cameræ, et medietatem Ecclesiæ prædictæ sancti Eusebii, suisque clericis, qui ibi pro tempore fuerint. Et ut verius credatur, diligentiusque ab omnibus observetur, manibus propriis roborantes, annulo nostro insigniri jussimus. Dat. et act. Papiæ idus Augusti, anno Incarnatio-

nis Domini DCXLV, regni vero dom. Hugonis XX, Lotharii XV, Indict. III ». Sed non tanti meriti pauca ista apud Deum fuerunt, ut justam Dei vindictam de facinoribus perpetratis potuerint avertere. Quæ tamen et dici misericordia potuit, quæ animæ ipsius profutura esset, secundum illud Davidicum : « Contra brachium peccatoris et maligni quæretur peccatum et non invenietur.

« Giseprandus episcopus et cancellarius ad vicem Bosonis episcopi et archicancellarii recognovi ». Hactenus Diploma datum, haud dubium antequam Hugo et Lotharius in molestias enarratas incidissent.

4. *Theotili episcopi Turonensis obitus.* — Eodem anno rursum recrudescunt bellis in Galliis inter Ludovicum regem atque Hugonem Francorum ducem : cum vir sanctissimus Theotilo archiepiscopus Turonensis, ut inter eos pacem componeret, laborasset, re imperfecta, ex hac vita migravit, de quo Frodoardus hoc anno his verbis : « Dominus Theotilo venerandus urbis Turonensis præsul obiit. Qui dum de pace inter regem et principes componenda certaret, hisque studiis occupatus a Lauduno rediret, ægritudine corporis in ipso deprimitur itinere. Cumque ultimum exhalasset spiritum, apparuit signum quoddam luminis per aera discurrens cubitum longitudinis habere visum, cujus lumine ad depellendas noctis tenebras sufficienter perfuncti sunt, qui funus ejus deducebant, talique potiti solamine, per millia fere (ceu fertur) ducenta, Turonicam usque corpus ejus perferunt urbem. Quodque in monasterio sancti Juliani, quod idem vir sanctus summa instituerat religione, juxta sepulcrum domini Odonis reverenter humatur. Et exinde ipsum templum divinis illustrari miraculis declaratur ». Hæc Frodoardus. Qui et eodem anno hæc inferius de clade immissa cælitus et curata divinitus habet :

5. *Lues Parisiis.* — « In pago Parisiensi, necnon etiam per diversos pagos hominum diversa membra ignis plaga pervaduntur, quæque sensim exusta consumeantur, donec mors tandem finiret supplicia. Quorum quidam nonnulla sanctorum loca petentes, evasere tormenta. Plures tamen Parisiis in Ecclesia S. Dei Genitricis Mariæ sanati sunt. Adeo ut quotquot illo pervenire potuerint, asserantur ab hac peste salvati : quos Hugo quoque dux stipendiis aluit quotidianis. Horum dum quidam vellent ad propria redire, extincto referrescunt incendio, regressique ad Ecclesiam liberantur ». Hæc Frodoardus.

6. *Ludovicus rex Francorum a Northmannis captus.* — Eodem anno Ludovicus rex Francorum dolo Hugonis principis comprehensus est a Northmannis, quos putabat sibi fideles, et per annum integrum in custodia detinetur, nec solutus nisi dato Hugoni quod petierat castro Laudunensi. Hæc Frodoardus anno præsentis, ac sequenti. Quomodo autem ad firmandum Ludovico regnum Francorum, oportuerit successorem Marini Agapitum

¹ Leo Ost. Chr. Cassin. l. IV. c. 64. In fin.

papam in Gallias legatum a latere mittere, suo loco dicetur. Non destiterunt Romani Pontifices, oblata occasione, occurrere semper periclitantibus Francorum regibus, eisque pro viribus Apostolica auctoritate suppetias ferre, atque frequentioribus legationibus e latere missis, eosdem adversus hostes reddere tutos, ipsumque regnum a tyrannis liberum stabile, id præstantes ex animo, utpote

grati, memores beneficiorum antiquitus acceptorum, cum scilicet Christianissimi reges tam prompto animo toties descenderint in Italiam, ad liberandam Romanam Ecclesiam, oppressam multiplicitate hostium invasione, atque vindicandam subactam in pristinam libertatem, et restituendam spoliata in bonorum possessionem.

Anno periodi Græco-Romanæ 6438. — Anno Eræ Hispan. 983. — Anno Hegiræ 334, inchoato die 13 Augusti, Fer. 4. — Jesu Christi 945.

— Marini II papæ 4. — Constantini VIII solius imp. 34.

1. *Hugo rex Italiæ regnum deponere coactus.* — A num. 1 ad 4. Flodoardus in Chronico ad hunc Christi annum ait : « Hugo rex Italiæ regno depulsus a suis, et filius ipsius in regnum susceptus est », quod nonnisi sub hujus anni finem contigit; cum Baronius num. 3 quamdam concessionem canonicis Vercellensibus ab eodem factam referat, in cuius fine habetur : « Dat. et act. Papiæ idus Augusti, anno Incarn. Domini MCDXLV, regni vero D. Hugonis xx, Lotharii xv, Indict. iii ». Hugo Italiæ regnum tot laboribus adeptum fortunam modo secundam, modo adversam expertus, derelinquere coactus fuit. *Berengarius*, qui ab Italia in Germaniam fugerat, Amedeum quemdam militem astutum, ut narrat Luitprandus lib. 5, cap. 8, in Italiam misit, ut secreto inquireret, quid unusquisque cordi haberet. Præterea, ut refert idem Luitprandus cap. 12, desideratus interea *Berengarius*, paucis ipsum comitantibus, Italiam petiit, et munitionem quæ curæ *Adelhardi* clerici *Manasses* sedis Arelatensis archiepiscopi, tuncque Tridentinæ, Veronensis atque Mantuanæ sedium invasoris commendata erat, ab eodem Manasse obtinuit, promisso illi archiepiscopatu Mediolanensi. Quare cœperunt mox nonnulli *Hugone* deserto, adhærere *Berengario*. Tandem omnes Italiæ primates omine non bono *Hugonem* deseruere, et *Berengario* adhæsere. Rex Hugo *Lotharium* filium suum non ad Berengarium solum, verum ad totius populi præsentiam dirigit : petens quia se eis non morigerum abdicaverunt, filium qui nil in eos deliquerat, saltem pro Dei amore suscipiant, ac voluntatibus eorum morigerum reddant. Lothario denique Mediolanum petente, « rex Hugo Papiam omni cum pecunia egressus, Italiam deserere, atque in Burgundiam ire cogitavit », ait Luitprandus cap. 13.

2. *Vitam monasticam amplectitur.* — Tum cap. sequenti subdit : « Rex Hugo, cum divinam animadversionem declinare, ac Berengario præesse non posset, relicto Lothario et simulata pace Berengarii fidei tradito, in Provinciam omni cum pecunia properavit, etc. Hugo rex brevi est viam universæ carnis ingressus, Berthæ nepti suæ Bosonis Arelatensis comitis viduæ pecunia derelicta ». Flodoardus tamen ad annum MCDXLVI scribit : « Hugo rex Italiæ a suis in regnum recipitur. Marinus papa decessit, cui successit Agapitus, et pax inter Albericum patricium et Hugonem regem Italiæ depaciscitur ». Quare Hugo ex Italia rursus in Provinciam rediit sequenti Christi anno, ubi, uti refert Baronius ex Leone Ostiensi lib. 4, cap. 64, monachus effectus est, in monasterio sancti Petri a se ædificato. In eo hoc Epitaphium legitur : « Hic requiescit celebrandæ memoriæ, magnusquæ sæculi contemptor Hugo, olim monachus hujus sanctæ Ecclesiæ Cluniacensis. Anima ejus requiescat in pace. Amen ». Cum vero idem Leo Ostiensis lib. 4, cap. 64, asserat, Lotharium *post annos ferme quatuor*, ab anno nempe MCDXLVI deductos, diem clausisse extremum, quod anno MCDL contigit, manifestum est, *Hugonis* regis monachatum, ultimumque ejus ex Italia discessum ad annum MCDXLVI pertinere. Boucheus in Hist. Provinciæ lib. 6, sect. II, laudatum *Hugonis* exregis Epitaphium refert, aitque eum in monasterio *Montis-Majoris* juxta Arelatem sito, et in honorem sancti Petri ædificato sepultum esse. Verum præterquam quod non constet, illud Epitaphium antiquitus positum fuisse, et *Hugo* non Arelatis, sed Viennæ monasterium condiderit, monasterium Montis-Majoris nondum hoc tempore constructum fuerat, sed ibi tantum erat Ecclesia in honorem sancti Petri constructa.

Nec illius monasterii Basilica ante annum *MXVI* ædificata, ut anno *MXVIII* videbimus. Porro *Hugonem* ante adeptum regnum Italicum, non vero postquam illud amisit, ut perperam tradit Leo Ostiensis, sancti Petri monasterium ædificasse, anno *DCXXXVI* ostendimus.

3. *Lotharius filius ejus solus postea regnavit.* — Postea rerum summa penes *Berengarium* fuit, quamvis is non nisi post Lotharii mortem rex dictus fuerit: « Quamquam iterato reges Hugonem atque Lotharium Italicum susceperent, Berengarium tamen nomine solum marchionem, potestate vero regem: illos vocabulo reges, actu autem neque pro comitibus habebant », inquit Luitprandus lib. 5, cap. 14, qui paulo post de eodem Berengario habet: « Hic superstitibus Hugone et Lothario, magnus voraxque struthio non bonus, sed bono similis est visus. Eis autem decedentibus, et ad regni fastigia omnibus illum promoventibus, quantum alas erexerit, quantisque diludiis nos omnes irriserit, non tam verbis quam suspiriis ac gemitibus narro ». Luitprandus vero Berengario, dum Lotharius solus regnaret, a secretis fuit. Porro Lotharium in annis suis numerandis Hugonis patris mentionem non fecisse, ostendunt tabulæ Ravennenses, ex quibus Rubens in *Hist. Ravenn.* lib. 5 dicit, quasdam confectas esse « sexto non. Octob., Indict. vi, regnante domino Lothario excellentissimo rege anno xvii », nullo de Hugone patre verbo addito. Ex quibus et confirmatur quod supra innuimus, *Lotharium* anno *DCXXX* post initium mensis Octob. in consortium regni Italicum a patre vocatum esse. Denique *Hugo*, ut ait Sigonius lib. 6 de Regn. Ital. vir, si amari quam metui ab Italis meruisset, et eorum usque ad extremum retinere studia didicisset, inter primores Italiæ reges propter eximias virtutes ejus merito numerandus. Quod si pacem cum Saracenis Fraxinetum incolentibus pepigit, ad id adductus fuit, quod timeret, ne *Berengarius* exul contractis ex Suevia et Francia copiis in se irrueret.

4. *Moritur S. Lucas junior Thaumaturgus dictus.* — Hoc circiter anno sanctus *Lucas junior Thaumaturgus* appellatus, *Sterii* in Attica, ubi septem annis vixerat, beatam animam emisit: nomen ejus Menæis Græcorum ad diem vii mensis Februarii inscriptum, et ejus Vita ab auctore cœvo anonymo edita, quam Combefisius e græco in latinum vertit, et Henschenius ad eundem diem in Actis SS. Bollandianis publicavit. Parentes ejus perpetuas Agarenorum incursiones non ferentes, in Helladem se contulere, ubi *beatus Lucas* natus, progressu temporis vitam monasticam professus est. Per annos septem solitarius vixit in monte Joannitza prope Corinthum posito, quo in loco dici non potest quanta abstinentia et afflictione corpus suum macerarit. Inde postea migrare coactus fuit. Simeon enim Bulgarorum princeps antiquato cum Romanis fœdere, universam continentem pervasit, « cuncta mancipans atque populans, ac alios qui-

dem vita, libertate alios privans, vectigalesque faciens; adeoque alii quidem velut carcere ac præsidii urbium ambitu clausi tenebantur, alii in Eubœam et Peloponnesum fugientes, saluti consulebant ». Exin varia peragravit loca, « quodque apud Patras Achaïæ sublimius vitæ genus consecrans monachus quis stylites audiretur, illuc cogitavit transire, atque illius se obsequiis addicere ». Quare per decennium servitio monachi stylitæ sese mancipavit. Sed cum ille, cui littorum cura commissa erat, navigiis ad Helladis fines propter hostium incursiones transire vetuisset, privatim Lucas vivere decrevit. « Haud longiori interjecta mora miser Simeon ac qui fusi magna copia Christiani sanguinis auctor fuerat, ab humanis excedit (anno nempe *DCXXXVII*), Petrusque ejus filius rerum summam capessit; sic quidem filius, ut tamen nequaquam, uti gloriæ ac substantiæ, ita quoque crudelitatis et immanitatis hæres visus sit, sed plane ab ea longe alienus. Sane vero quod ad ipsum spectat, nihil illius sanguinis habens ac affinitatis, is statim sanguines ac bella valere jubens, pacem cum Romanis amplexus est », et Lucas ad desideratam Joannitza solitudinem rediit. Tandem inde *Soterium* migravit, ubi post septennium monasticæ exercitationi impensum, mortemque suam præscitam ad cælestem vitam transiit. Non abhorruisse *Lucam* a Romanæ Ecclesiæ ac Latinorum communionem indicat illa passim in his Actis expressa ipsius necessitudo cum monachis, qui et legati Romam pelerent, vel inde redirent, inquit Combefisius laudatus.

5. *Cumbriæ regnum Edmundus Angliæ rex vastat.* — *Edmundus* Angliæ rex Cumbriæ provinciam ab antiquis Britannis inhabitatam, factionibusque semper obnoxiam, vi cepit; et erutis duorum regum oculis, qui tyrannidem præsumpserant, « regi Scotorum Malcolmio sub fidelitate jusjurandi commendavit », inquit Malmesburiensis lib. 2 de Reg. cap. 7, quod hoc anno contigisse Wigorniensis testatur. *Cumbri* continua temporum serie reges inter se habuerunt, Saxones aversantes, et quoties opportunitas sese offerret, aut Hibernis, aut Scotis aut perduellibus Saxonibus adjungebantur. Quare cum *Edmundus* paulo prius Northumbriam subjugasset, ferro flammaque provinciam vexavit, ut ex Huntindoniensi lib. 5, pag. 355, narrat Alfordus hoc anno, et de terris, quas tenere, disserit.

6. *Moritur Caiimus Bianrilla Africæ califa.* — Anno Hegiræ *cccxxxiv*, obiit *Caiimus Bianrilla*, princeps Cairawani, cum Saracenis Africæ imperasset annos xii et aliquot menses. Ei successit *Almansor Billa* filius ejus, qui cum regnasset annos septem in Africa, successorem habuit *Muazzum Lidinillam* filium anno Hegiræ *cccxli*. Hic porro primus fuit califa Ægypti. Hæc Elmacinus lib. 3 *Hist. Sarac.* Anno *DCDLIX*, de Ægypto ab eo occupata verba faciemus.

AGAPITI II ANNUS 1. — CHRISTI 946.

1. *Obitus Marini papæ, Agapiti successio; eorumque de monasteriis statuta.* — Christi annus sequitur nongentesimus quadragesimus sextus, Indictione quarta inchoatus, « quo », inquit Frodoardus, « Marinus papa decessit, cui successit Agapitus ». Quoto autem mense vel die, apud veteres ubique silentium : sedisse autem Marinum annos tres, menses sex, dies tredecim, habet vetus Codex Vaticanus de Romanis Pontificibus. De rebus gestis ejusdem Pontificis, quæ habet Leo Ostiensis in Chronico Cassinate, tantum nota habentur, reliquis obscuritate temporis obvolutis. Leo igitur agens de Balduino Franco abbate Cassinate, hæc ait¹ : « Illic privilegium sumpsit a domno Marino papa secundo de consuetudine hujus monasterii.

2. « His temporibus Sico episcopus Capuanus contra instituta divina et humana agens, Ecclesiam sancti Angeli, quæ tunc ad Arcum Dianæ dicebatur, quia illic Dianæ fuerat templum, nunc autem dicitur ad Formam, quam prædecessor suus monacho nostro, ut ibi monasterium construeret, dudum concesserat, violenter eripiens, cuidam suo diacono in beneficium dedit. Quod cum eidem sancto viro papæ ab ipso monacho fuisset indicatum : mox Apostolicæ auctoritatis litteras eidem episcopo scripsit, acriter in illum invectus, ignorantiam canonum, litterarum incitiam, familiaritatem sæcularium, temerariamque transgressionem illi exprobrans, mandansque ut eandem Ecclesiam monacho sine dilatione restituat, ut in ea monasterium, sicuti ab antecessore suo illi sub anathematis obligatione constitutum fuerat, construere posset. Quod scilicet monasterium, tam ab ipsius episcopi, quam ab omnium successorum suorum inquietudine ac molestia liberum, ex tunc sub custodia et potestate S. Benedicti monasterii, quod tunc Capuæ erat, perpetuo esse constituit. Diaconum vero illum, cui Ecclesiam eandem episcopus ipse concesserat, præterquam in officio allaris ab omni ipsius episcopi consortio alienum esse mandavit, quibus in rebus nisi obtemperasset episcopus, sacerdotali se honore privatum et excommunicationis nodis adstrictum sciret ». Et inferius :

3. « Quo tempore venerabilis papa Marinus

eandem Ecclesiam sanctæ Mariæ de Capua cum omnibus juribus suis Cassinensi cœnobio per privilegium ex integro confirmavit : quod ilidem confirmaverunt Joannes decimus quintus, Benedictus octavus, Benedictus nonus, Leo ac Stephanus nonus, abbatibus nostris Balduino, Aldigerio, Manson, Athenulpho, Theobaldo ac Friderico. Per idem tempus cum monasterium sanctæ Sophiæ de Benevento principum vi per annos aliquot fuisset cœnobio nostro subtractum, hicidem abbas ostensis Romanorum Pontificum regumque præceptis, qui prædictum monasterium huic loco firmaverant, recuperatum iterum sub nostri monasterii ditionem redegit. Post hæc a memorato Pont. Marino Romanam evocatus, quoniam vir magnæ prudentiæ multumque potens visus est : monasterium sancti Pauli sibi (ipsi) Marinus papa commisit », defuncto, ut puto, Joanne illo, qui ipsi monasterio ab Odone Cluniacensi, Leone Pontifice (ut dictum est) jubente, præfectus fuerat. Hæc sunt quæ de Marino papa scripta reperiri potuerunt. Pergit vero Leo Ostiensis :

4. « Rursus autem cum sanctæ Sophiæ monasterium a principibus pervasum, monasterioque subductum esset, et sub his ferme diebus defuncto Marino Agapitus ei in Sede Apostolica successisset, abbasque inde coram illo questus esset, scripsit idem Apostolicus principibus dictis, acriter arguens, cur talia tentare præsumerent. Quod si secus facerent, scirent se anathematis mucrone feriendos ». Et paulo inferius : « Ille etiam diebus cum monasterium quoque nostrum, quod erat Capuæ sub ditione sua, cupiditalis seu lucri gratia, principes memorati redegerant, et per hanc occasionem fratres ibi morantes sæculariter viverent, comperto hoc memoratus Pontifex, conquerente abbate nostro, scripsit continuo præfatis principibus Apostolicæ auctoritatis acres nimium litteras, illorum nequitiam vehementer increpans, cur tantum scelus perpetrare ausi essent; præcipiens quod nullam ulterius dominationem in eodem monasterio exercere præsumerent : omnes autem monachi ad suum Cassinense cœnobium, relictis ibi duobus aut tribus tantum senibus fratribus, cum omnibus monasterii rebus, protinus redirent, ibidem sub abbate proprio Domino servituri. Sin autem vel principes, vel monachi secus agerent,

¹ Leo Ost. l. 1. c. 60. 61. 62.

seu quispiam ex ejus monasterii rebus aliquid invadere auderent, nisi resipiscerent, auctoritate Apostolica communione privandos. Aliud quoque privilegium ab ipso tandem Pontifice memoratus abbas accepit de monasterio S. Stephani juxta Tarracinam, quod beatus Benedictus, ut in Vita ejus legitur, per visum apparens mirabiliter construi jusserat, et loca singula ibi, quid ædificandum esset, subtiliter designaverat ». Hæc in ingressu Agapiti Leo.

5. *Guibertus monasterium Gemblacense erigit privilegiis insigne.* — Florebat hoc tempore sanctitate clarus Guibertus, cujus præclaras res gestas Sigebertus scriptis mandavit, Incerna plane inter tot tenebras ardens et lucens, a quo inter alia egregia sanctitatis monumenta, hoc eodem anno est erectum in Gallia nobile monasterium Gemblacense, quod tum Ottonis regis, cum ipse apud eum nonnihil pressuræ passus fuit ab invidis, tum etiam Agapiti Romani Pontificis privilegiis communitur. De his enim ista habet Sigebertus ejusdem cœnobii monachus in Guiberto¹: « De rebus Ecclesiæ traditis, et de libertate ejus loci Charta conscripta imperiali est edicto confirmata, et annuli impressione imperialis auctorisata, quæ auctorisatio facta est solemniter Leodii duodecimo kal. Octob. anno Dominicæ Incarnationis nongentesimo quadregesimo sexto, Indictione quarta, regni domini Ottonis primi anno undecimo, cathedram Trajectensis Ecclesiæ regente Uhogone.

6. « Ad hanc confirmationem imperialis potestatis accessit etiam Apostolicæ Sedis auctoritas, dum a Benedicto septimo hujus nominis papa decretum est, ut rata esset in perpetuum Gemblacensis cœnobii prærogata immunitas. Decretum est etiam, ut de alio monasterio abbas ibi non constitutur, sed ipsi servi Dei secundum S. Benedicti regulam viventes, ex sua propria congregatione abbatem eligendi potestatem habeant, et ut abbas ipse privilegiis Sedis Apostolicæ, infulis decoretur, et ut ipsum monasterium sub jurisdictione sanctæ Romanæ Apostolicæ Sedis constitutum, nullius alterius Ecclesiæ jurisdictionibus submittatur, interminantes ex auctoritate beati Petri Apostolorum principis, sub divini obtestatione judicii, ac validis anathematis interdictionibus, ut nulla aliquando vel magna vel parva persona aliquid de rebus et possessionibus ad idem monasterium pertinentibus auferre, vel alienare præsumat. Hoc scriptum per manum Bonifacii notarii regionarii atque scriiniarii sanctæ Romanæ Ecclesiæ datum est VIII kalend. Aprilis per manus Stephani episcopi et bibliothecarii sanctæ Sedis Apostolicæ, anno Pontificatus domini Benedicti septimi papæ nono, imperante Ottone a Deo coronato magno et pacifico imperatore anno decimo sexto, qui est annus Domini nongentesimus quinquagesimus tertius ». Hæc ibi. Sed corrige quæ de nomine imperatoris habentur, nondum enim Otto imperator erat, sed rex tantum,

cum ista fierent. Verum et si reliqua ad annum decimum sextum ejusdem Ottonis (ut habet) referre velis, sic opus est corrigas: Agapiti papæ secundi anno sexto, Christi vero nongentesimo quinquagesimo primo. Sed de his satis.

7. *Edredus rex Angliæ.* — Hoc eodem anno Anglicana Ecclesia, novo rege Edredo subrogato fratri suo Edmundo, bene disponitur, dum S. Dunstano tantum regnum gubernandum committit, quod tenuit annos novem. Sub quo etiam claruit S. Ælfegus Wintoniensis episcopus, de quo anno sequenti.

8. *Corpus S. Hunegundis virginis repertum et elevatum.* — Eodem anno apud Noviomum in Gallia reperitur et elevatur venerandum corpus S. Hunegundis virginis, quæ egregia claruerat sanctitate sub S. Eligio ejusdem civitatis episcopo. Rei gestæ admirandæ satis historiam ejus temporis auctor scriptis mandavit verbis istis¹: « Cum diu sacrum corpus ejus sub terra conditum jacuisset, quædam sanctimonialis, Berta nomine, miræ abstinentiæ, multæ patientiæ, paupertatis valde studiosa, eximiæ humilitatis, misericordiæ operibus dedita, jejuniis et vigiliis et precibus intenta, ex divina revelatione locum sepulturæ ejus cognovit, anno salutis nongentesimo quadregesimo sexto, Ludovico regnante. Cumque immenso affecta gaudio tantum thesaurum subito elevare vellet, venerandus presbyter Gito, sanctorum pignorum Quintini et Victorici martyrum custos, casu superveniens eam objurgavit, dicens fas non esse sine auctoritate episcopi sacrum corpus levare. Ita ad dies triginta duos intactus mansit sarcophagus jam apertus, apud quem diu noctuque sacris vigiliis incumbentes, episcopi adventum sustinebant. Quo spatio multa illic divinitus sunt declarata miracula, atque ingens splendor perpetuo ad sacrum corpus permansit, ita ut a pectore virginis et sursum, pro sordibus pulveris nitentia relucere fragmina margaritarum, et quibusdam clarissimis erumpentibus scintillis, adspicientium reverberarentur obtutus. Tanta etiam ibidem sentiebatur odoris fragrantia, ut omnium nares ineffabili satietate complerentur. Quicumque autem ad sacrum illud corpus intueri poterant, quocumque essent affecti morbo, illico curabantur. Porro odoris illius semper crescebat suavitas.

9. « Inter cætera autem miracula ipso die elevationis sanctissimæ virginis, cum sævissimus morbus totum illum pagum adeo occuparet, ut vix esset domus, in qua non jaceret ægrotus, omnes illi cum elevato sacro corpore simul e suis lectulis sani surrexere. Tandem accersito Rodulpho Noviomensis Ecclesiæ archidiacono, postea ejusdem urbis religioso episcopo, et ex collegio beatissimi martyris Quintini a certis patribus, Gitone, Roberto, aliisque pluribus magnæ pietatis viris, peractis missarum solemnibus, itum est ad tumulum, ibidem etiamnum circa caput et pectus san-

¹ Apud Sur. die XXIII Maii tom. III.

¹ Apud Sur. die XXV. Aug. tom. IV.

etæ virginis, illo, quod diximus, cælesti lumine adeo coruscante, ut nemo posset ad plenum intueri. Levatum est sanctum corpus e sepulcro septimo id. Novembris, etc. » Subjicit hic auctor complura alia miracula Dei operatione, virtute tantæ virginis edita; sed ista ad institutum satis.

10. *Legatio Constantini imp. ad Berengarium.* — Quod ad res pertinet Orientales, « eodem tempore », Luitprandus¹ inquit, « Constantinus imperator, qui dejectis Romano filiisque ejus, Constantinopoleos regebat imperium, audito Berengarium potentia præstare Lothario, per Andream, qui ab officio comes curiæ dicebatur, litteras Berengario dirigit, in quibus continebatur, vehementer se

Berengarii nuntium velle videre, cujus in reditu cognosceret, quanta eum charitate diligeret. Scripsit etiam ei commendatitias litteras pro Lothario, ut fidelis ei esset administrator, cui Deo largiente, extiterat gubernator. Constantinus nunquam sollicitudinem non parvam Lotharii pro salute habebat, religiose ob amorem nurus suæ cogitans, quæ Lotharii soror extiterat ». Hæc de legatione Constantini Augusti Luitprandus. Ab ipso vero Berengario ad Constantinum mittitur idem ipse Luitprandus historicus, qui suam ipsius legationem describit¹, multaque admiratione digna narrat, quæ ut curiosa, ad institutum nostrum nihil spectantia, prætermittimus recitare.

¹ Luitp. l. vi. c. 1.

¹ Luitp. l. vi. c. 1. 2. 3.

Anno periodi Græco-Romanæ 6439. — Anno Æræ Hisp. 984. — Anno Hegiræ 335, inchoato die 2 Augusti, Fer. 4. — Jesu Christi 946.
— Agapiti II papæ 1. — Constantini VIII solius imp. 35.

1. *Marino II PP. succedit Agapitus II.* — A num. 1 ad 5. Flodoardus in Chronico hoc anno scribit: « Marinus papa decessit, cui successit Agapitus, et pax inter Albericum patricium et Hugonem regem Italiæ depaciscitur ». Cum verò Marinus anno dcdxlii, ineunte circiter Decembri, ad summum Pontificatum evectus fuerit, et, uti habet Baronius ex veteri Codice Vaticano, cui plerique Catalogi consentiunt, sederit annos tres, menses sex et dies tredecim, paulo ante medium mensem Junium currentis anni supremum diem obiit. Marianus Scotus et Martinus Polonus in Chronicis Marino tribuunt annos iii, menses vi, dies xiv, quia scilicet diem ejus emortualem includunt. Ma-

rino successit Agapitus II, quem Papebrocius in Conatu Chronico-Historico putavit, die nona mensis Augusti ordinatum esse Pontificem Rom. Verum die decima quinta mensis Junii jam Pontificatum gerebat. Rubeus enim in Hist. Ravenn. lib. 5, meminit litterarum, quæ « nono kal. Jul. Indict. vii, anno quarto Agapiti Pont. Max., Hlotharii autem regis decimo nono », scriptæ asseruntur, die scilicet xxiii mensis Junii anni dcdxlix, aliarumque, in quibus annus octavus ejusdem Pontificis cum XVII kal. Julii ac Indictione xi connectitur, qui character est anni dcdlii. Quare currenti die xv mensis Junii jam Eccl. Romanæ præsidebat (1) (2) Agapitus statim ac rerum administrationem suscepit,

(1) Catalogus Romanorum Pontificum in Cod. Vat. 1340: « Marinus sedit annos iii, menses vi, dies xiv ». Deinde sequitur: « Agapitus sedit annos x, menses vii, dies x ». De *Agapito II* chartæ Regesti Sublacensis pag. 137, col. 2: « Anno primo domini Agapiti junioris PP., Indict. v, mense Februario, die iii, Johannes subdiaconus scholæ cantorum locat Leoni » abbati Sublacensi terram sationalem extra muros Urbis juxta portam majorem. Ex *Indictione* v quæ incidit in A. D. dcdxlvii apparet, mense *Februario* adhuc in cursu fuisse *annum primum* Pontificatus *Agapiti II*. Ibid. pag. 161, col. 2, alia charta data: « Anno Deo propitio Pontificatus domni Agapiti summi Pontificis et universalis junioris papæ in sacratissima Sede B. Petri Apostoli secundo in mense et Indict. suprascripta v ». Supra locatio incipere dicitur « a die kalendarum Apriliarum, præsentis quinta Indictione, et usque in pridie kalendas easdem post annos xxix ». Ex quibus *annus secundus* Pontificatus, mense *Aprilis* jam inchoatus fuisse videtur. A. D. dcdxlix, mense *Januario*, et *Martio* adhuc *tertius* Pontificatus annus in cursu erat. Charta in Tabulario S. Mariæ in via lata: « In nomine etc. Anno Deo propitio domni nostri Agapiti summi Pontificis et universalis junioris PP. anno tertio, mense Januarii, Indictione septima ». Regestum Sublaceuse pag. 150: « Anno iii Pontificatus domni Agapiti summi Pontif. II PP. in sacratissima Sede B. Petri Apostoli, Indict. vii, mense Martio, die xxvi ». A. D. dcdli, mense *Novembri*, Pontificatus *annus quintus* signabatur. Charta in Tabulario S. Mariæ in via lata: « Anno Deo propitio Pontificatus domni nostri Agapiti summi Pontificis et universalis secundi papæ in sacratissima Sede B. Petri Apostoli, Indict. x, mense Martio, die v. Maroza ancilla Dei et Constantinus » presbyter donant et offerunt *Leoni* abbati Sublacensi pro redemptione animarum suarum, et pro redemptione animæ « bonæ memoriæ quondam Flori sanctæ Manturanensis Ecclesiæ episcopi oratorium S. Theodori ad portam majorem ». Mense vero *Mai*o hujus anni *septimus* Pontificatus annus in cursu erat. Charta ibidem pag. 201: « Anno Deo propitio Pontificatus domni Agapiti summi Pontif. et universalis junioris PP. in sacratissima Sede B. Petri Apostoli vii, Indict. x, mense Maio, die xxiv ». Mense *Januario* anni dcdlii, adhuc *annus septimus* Pontificatus enumerabatur. Charta ibidem pag. 141, col. 2: « Anno septimo domni Agapiti summi Pontif. junioris PP., Indict. xi, mense Januar., die xxv ». Mense *Octobris* anni dcdlii, *annus* Pontificatus *octavus* signabatur. Charta in Regesto Sublacensi pag. 100: « Anno Deo propitio Pontificatus domni Agapiti summi Pontificis et universalis junioris PP. in sacratissima Sede B. Petri Apostoli viii, Indict. xii, mense Octobris », die xxix. Indictio ex more initium sumit a kalendis Septembris anni dcdlii. Ex his colligimus initia Pontificatus *Agapiti II* mensi *Aprilis* an. dcdxlvii ligenda esse; nam si mense Aprilis an. dcdxlvii *annus* Pontificatus *secundus* jam inceptus erat; et mense *Martio* an. dcdxlix adhuc *annus tertius* signabatur, sequitur, ut anni Pontificatus a mense Aprilis enumerarentur. GEORGIUS.

(2) Agapitus II Pontifex, isto quidem anno, sed citius aliquanto, quam hic constituatur a Pagio, cœpit, ut constat ex litteris donationis

conatus est *Albericum* consulem seu patricium veteri libidine dominandi Urbisque potiundæ incensum, cum Hugone Italiæ rege in concordiam adducere; sed cum *Hugo* hoc anno Italiam reliquerit, uti anno superiori ostendimus, incertum quem illa pacis tractatio effectum habuerit; illud certum, *Albericum* post Agapiti II mortem filium suum Octavianum sub Joannis XII nomine Pontificem Romanum creandum curasse.

2. *Prima confirmatio monasterii Gemblacensis ab Ottone emissæ.* — Ad num. 5 et seq. Sigebertus initio sæculi XII demortuus scripsit Vitam S. Guiberti monachi Gorziensis et cœnobii Gemblacensis conditoris, a Surio ad diem XXIII Maii editam, sed quam Lambecius tom. II Biblioth. Cæs. pag. 898 et seqq. cum Ms. Cæsareo contulit, et aliquot in locis emendavit. Ait itaque Sigebertus num. 41: « De rebus Ecclesiæ traditis, et de libertate ipsius loci (nempe monasterii Gemblacensis) charta conscripta imperiali erat dicto confirmata, et tam auctoris impressione imperiali auctoritata, quæ auctoris facta est solemniter Leodii XII kalend. Octob. anno Dominicæ Incarnat. nongentesimo quadagesimo sexto, Indictione IV, regni domini Ottonis primi anno undecimo, cathedram Trajectensis Ecclesiæ regente Uhogone », id est, Ogone seu Hugone. Gemblacum, vulgo *Gemblours*, olim in diœcesi Leodiensi, nunc vero in Namurensi situm, et hæc prima est confirmatio monasterii Gemblacensis hoc anno ab Ottone rege facta. Miræus in Diplomatis Belgicis *Ottonis* primi Diploma recitat, perperamque scribit anno DCDXLVIII editum esse; cum in Ms. Cæsareo annus DCDXLVI diserte legatur; cumque *Henricus Auceps* anno DCDXXXVI, die secunda mensis Julii vita functus sit, apparet, *Ottonem* ejus filium ac in regno Germanico successorem a morte patris annos regni sui, non vero a coronatione sua, ut putavit Baronius, deduxisse. Nec refert quod Sigebertus in Chronico confirmationem Ottonis cum anno Christi DCDXLVIII conjungat, Sigebertus enim de aliqua alia confirmatione tunc facta loquitur, vel hac in re peccat.

3. *Secunda ab Ottone II imp. obtenta a Benedicto VII.* — Ut monasterium Gemblacense primam sui confirmationem debet *Ottoni* primo; sic secundam filio ipsius, *Ottoni* nempe secundo, cum jam imperator esset, utpote ejus studio et cura impetrata fuit a Benedicto papa hujus nominis septimo, idque anno DCDLXXXIII. Hoc secundum Diploma in laudato Codice Ms. primum immediate

sequitur, quod, quia nec apud Surium, nec apud Miræum extabat, Lambecius illud ex Codice Ms. integrum retulit. In hujus fine legitur: « Scriptum per manum Bonitacii notarii regionarii ac scriniarii sanctæ Romanæ Ecclesiæ in mense Martio, Indictione undecima. Bene valete. Datum VIII kal. Aprilis per manus Stephani episcopi ac bibliothecarii sanctæ Sedis Apostolicæ anno Pontificatus domini nostri Benedicti sanctissimi septimi papæ nono, imperante domino nostro Ottone a Deo coronato, magno ac pacifico imperatore, anno decimo sexto, in mense ac Indictione, quibus supra ». Ubi notæ omnes chronologicæ accurate descriptæ, hoc Diploma ab Ottone II anno DCDLXXXIII obtentum fuisse certo evineunt. Præterea demonstrant, *Benedictum VII* anno DCDLXXV, ante diem XXV mensis Martii ad supremum Pontificatum evectum fuisse, alioquin anno DCDLXXXIII, eo die annum nonum nondum auspicatus esset: qua de re suo loco. Præfatam subscriptionem refert Sigebertus in Vita sancti Guiberti, sed eam hac interpolatione corrumpit, « imperante Ottone a Deo coronato, magno ac pacifico imperatore, anno decimo sexto, qui est annus Domini nongentesimus quinquagesimus tertius ». Surius laudatus non solum interpolationem illam exhibet; sed etiam falsa emendatione marginali totam subscriptionem depravat. Ut enim observat Lambecius loco laudato, Surius male credidit, per *Ottonem imp.* ejus annus XVI cum papæ Benedicti VII anno nono hic conjungitur, intelligendum esse eundem imp. Ottonem primum, qui in principio ejusdem capitis traditur monasterium Gemblacense confirmasse *anno regni sui unde cimo*, hoc est currenti, ideoque pro papæ *Benedicti VII anno nono*, legendum esse censuit, *papæ Agapeti secundi anno sexto*, et pro anno Domini DCDLIII, ut in fine ejusdem capitis Vitæ sancti Guiberti perperam legitur, substituendum esse an. Domini DCDLI. At nec nomen papæ *Benedicti VII*, nec annus Pontificatus ejus IX mutandus, sed per imp. *Ottonem*, ejus annus imperii decimus sextus tanquam synchronus ibidem additur, intelligendus sine dubio imp. *Otto secundus*, et in fine totius capitis pro, *qui est annus Domini DCDLIII*, absque ulla controversia scribendum, *qui est an. Domini DCDLXXXIII*, sive nongentesimus octogesimus tertius. Surius Baronium et Papebrocium ad diem XXIII Maii et in Notis ad cap. 2 Vitæ sancti Guiberti in errorem impulit.

4. *Corrigitur editio Sigeberti.* — Mabillonius

cujusdam factæ Leoni abbati Sublacensi, vulgatis a Muratorio antiquit. Ital. tom. I, col. 163. Sic enim charta illa exorditur: « Anno Pontificatus domini Agapiti summi Pontificis et universalis junioris papæ in sanctissima Sede B. Petri Apostoli septimo, Indict. X, mense Madio, die XXIV ». Hic est annus DCDLII, quo Agapitus annum septimum cœperat ductum ab anno DCDXLVI, ante diem illam Maii. Insuper apud eundem Muratorium in Dissertationibus de antiquitatibus Italiæ mediæ ævi tom. III, col. 146, extat Charta quadam Ravenne signata « anno Pontificatus domini Agapiti etc. decimo, sicque regnantibus domino Berengario et Alberto ejus filio anno quarto, die XIV mensis Martii, Indictione decima tertia ». His characteribus exprimitur annus DCDLV, ejus mense Martio Agapitus annum decimum jam cœperat; ex quo conficitur epocham pontificatus ejus ante diem XIV Martii anni DCDXLVI ducendam esse. Quin et si genuina probetur Charta a Georgio in Nota quam hic exhibet prodacta; certiora quoad diem initii ab Agapito Pontificatus eruiamus. Cum enim ex Charta illa Georgii constet die V Martii novum pontificatus annum nondum cepisse, ex nostra vero die ejusdem mensis XIV novus vicissim jam fluere, recta inde consecutione deducimus exordia pontificatus Agapeti II intra spatium illud a die V ad XIV Martii contineri. Porro spatium illud non nisi unam Dominicam diem ferebat cum die VIII ejusdem mensis concurrentem, adeoque pro more ejus ætatis, quo Romani Pontifices die Dominica institui solebant, epocha Pontificatus Agapiti II eadem die VIII Martii figenda est.

vero Sæc. v Benedict. ubi Vitam sancti *Guiberti* exhibet, in Notula ad caput 11 fatetur, hanc emendationem necessariam esse, « sed haud scio, inquit, an sit ad mentem Sigeberti, qui in Chronico hanc Benedicti papæ immunitatem revocat ad annum DCDLIV. *Immunitas nostræ, Gemmelacensis scilicet, Ecclesiæ, etiam Apostolica auctoritate a Benedicto septimo corroboratur anno septimo Pontificii ejus* ». Verum non animadvertit vir doctissimus, hunc locum, qui non legitur in editione Chronici Sigeberti a Pistorio curata, intrusum esse a Miræo in suam ejusdem Chronici editionem, ut Sigeberti auctoritate errorem suum de anno confirmationis monasterii Gemblacensis, de quo mox egimus, stabiliret et confirmaret. Præterea magnopere fallitur Miræus, dum credit Benedictum VII papam per hæc tempora sedisse. Quare, ut scite notavit Lambecius tom. II Bibl. Cæs. pag. 901, corrigendum est Sigeberti Chronicon a Miræo promulgatum, et hac in re standum Pistoriano. Verum quidem est *Miræum* asserere se juxta quatuor Exemplaria Mss. editionem Chronici Sigeberti curasse et addidisse cum hac admonitione: « Cæterum semel id monuisse satis sit, quæ minori caractere excudenda curavimus, ea aut Gemblacensi in Codice domestico non reperiri, aut si quæ erant, recenti manu esse agglutinata », et verba de quibus quæstio magno caractere exarata esse. Sed cum in Codice Ms. Gemblacensi variæ additiones reperiebantur, potuit Miræus quæ secunda manu descripta erant, ea a prima prodiisse credere. Quæ solutio mihi verosimilior videtur.

5. *Moritur Edmundus Angliæ rex.* — Ad n. 7. *Edmundum* Angliæ regem hoc anno a sicario impie trucidatum, inter omnes Rerum Britannicarum scriptores convenit, ex quibus audiendus Hovedenus pagina 423: « Anno ab Incarnatione Domini nongentesimo quadragesimo sexto, magnificus rex Anglorum Eadmundus, die festivitatis sancti Augustini doctoris Anglorum: dum in villa (quæ anglice Puclecirch dicitur) suum dapiferum Leonem (rectius alii habent Leoven, vel Leof) e manibus pessimi cleptoris, ne occideretur, vellet eripere, quinque annis septemque mensibus regni sui peractis, Indictione quarta, septimo kalendas Junii, feria tertia ab eodem interficitur: et Glastoniam delatus, a B. Dunstano abbate sepelitur ». Edmundus regnum pie et fortiter moderatus est; insulam enim ab hostibus strenue defendit, et pluribus in locis Ecclesias, monasteria, ædesque sacras construxit. Liberos duos ex *Elfgiva* conjuge suscepit; sed quia neuter ad coronam maturuerat, *Edredus*, Edmundi frater, procerum populique suffragio regnare jubetur. Tum sub Augustum mensem, uti narrat Florilegus, « in Kingstona villa regia regni diadema a beato Odone archiepiscopo Cantuariensi suscepit, decimo septimo kalendas Septembris », qui hoc anno in Dominicam incidebat. Sublit Florilegus: « Edredus, ut suus germanus prius egerat rex Eadmundus, Northanumbriam

totam in sui dominium redactam a rege Scotorum fidelitatem accepit, et insuper Eboracensi Ecclesiæ metropolitanæ duo signa (nempe militaria) non modica devotus donavit. Denique cum a rege Cumbriorum juramentum fidelitatis accepisset, et partes illas in securitate posuisset, versus Austrum cum suis contendit ».

6. *Elevatio corporis S. Hunegundis virginis.* — Ad num. 8 et seq. Corpus sanctæ *Hunegundis* virginis Humolariensis hoc anno e terra elevatum, uti narrat Bernerus Humolariensis abbas, auctor cœvus, Sæc. v Benedict. Est autem Humolariense monasterium, vulgo *Humblieres*, prope muros Augustæ Veromanduorum ad Suminam. *Berta* Humolariensis abbatissa hujus translationis auctor fuit. Cum enim amore sanctæ Hunegundis quædam moniales aliqua commentatæ essent figmenta, de ejus corpore reperiendo sollicita fuit. « Igitur anno Incarnat. Dominicæ nongentesimo quadragesimo sexto, Ludovico regnante, quinto die nonarum Octobris, post plurima jejunia » ei sanctæ virginis corpus revelatum fuit. Mox advenit Giso presbyter, qui monuit rationabile non videri, ut sine auctoritate et consensu episcopi diœcesani corpus beatissimæ virginis levaretur. Per triginta et duos dies, quibus seputerum apertum remansit, multi infirmi curati, variaque miracula facta, tandemque accersito *Rodulfo* Noviomensis Ecclesiæ archidiacono, postea ejusdem Ecclesiæ episcopo, « levatur sanctissimum corpus de sepulcro, septimo idus Novembris ». Hoc quidem anno dies septima mensis Novembris in diem sabbati convenit, sed per hæc tempora translationes sanctorum reliquiarum sæpe alio die quam Dominica peractæ.

7. *S. Hunegundis sæculo septimo floruit.* — Vixit sancta *Hunegundis* tempore sancti *Eligii* episcopi Noviomensis ac Vermandensis, et in pago Vermandensi in lucem prodiit. Ab incunabulis fertur desponsata fuisse, sponsoque demortuo rursus cuidam *Eudaldo* viro nobilissimo cogenitibus parentibus sponsa data; sed cum animo meditaretur, qualiter se sponso Christo traderet, virum demulcendo subtilitate ingenii ab amplexibus omnino divulsit, utque Romam secum pergeret, induxit. Ibi velum a Pontifice Romano, qui erat Martinus primus, accepit; quod cum *Eudaldus* accepisset, eam sprexit solamque dereliquit, subtractis omnibus ad tantum iter necessariis. In Gallias tamen Hunegundis remeavit, ubi sponsus respiciens veniam petit, multaue ei largitus est. Post hujus decessum « arctiori se submisit vitæ et Christi servitio, puniens atque detlens cogitata seu nociva jam peracta opera, crebrisque jejuniis ac vigiliis tundeat corpus fatigatum, memorans quia non qui cœperit, sed qui perseveraverit, salvus erit », inquit Bernerus laudatus in ejus Vita, qui subdit, eam *VIII kalend. Septemb.* migrasse ad Dominum, sed annum ejus emortualem tacet. Mabillonius tamen Sæc. II Benedict. pag. 1025,

existimat eam circa annum sexcentimum nonagesimum vivendi finem fecisse, refertque Diploma Ludovici Transmarini Francorum regis, « actum Rhemis civitate in monasterio sancti Remigii kal. Octobris, Indict. vi, an. xiv, anno Incarnat. Domini DCXLVIII » : in eo Ludovicus ait, a se petitum fuisse, « quatenus quibusdam sanctimonialibus inibi (id est, apud Humolarias) non satis honeste viventibus, et regulari districtioni subijci nolitibus, inde remotis substituerentur monachi. Quare favente regina, Artaldo Rhemensi archiepiscopo, aliisque consulentibus, eandem abbatiam abbati regulari in perpetuum concessit.

8. *Legatio Luitprandi ad Constantinum imp.* — Ad num. 10. Luitprandus lib. 6, cap. 4, refert *Constantinum* Porphyrogenetam, audito *Berengarium* potentia præstare *Lothario* Italiæ regi, ad illum litteras amoris plenas scripsisse, eique *Lotharium* commendasse ob amorem nurus suæ, *Berthæ* scilicet, quæ *Lotharii* soror erat : *Berengarium* vero se ad imperatorem legatum misisse, seque *octavo kalend. Septemb. die Veneris* egressum, *XV kal. Octob.* Constantinopolim venisse. Tum cap. 5 refert erogationem numismatum, et aliorum donorum pro veteri imperatorum Græcorum more ante diem Palmarum in magistratus et clientes imperatorios, dum Constantinopoli esset, factam. Porro *Codinus* in lib. de Officiis Constantinop. cap. 10, loquitur de hebdomade Palmarum, quam Græci a feria secunda post *Dominicam* et nos hebdomadam *Passionis* vocamus, inchoant, docetque *Balsamon* die Palmarum imperatores olim ac patriarchas distribuisse subdilis *πόδας*, hoc est, *munera et Baia* ; et hunc usum usque ad Constantiniani Monomachi tempora durasse, sed postea desiisse. Sunt autem *rogæ* stipendia militaria, itemque largitiones, et dona, a principibus liberaliter distribui solita, ut *Gretzerus* in caput 10 *Codini* explicat. Huiusmodi *rogam* a se visam scribit *Luitprandus*, quia ejus legationis tempore mos ille adhuc durabat. Sed fons iste liberalitatis exaruerat in palatio, et ferme etiam in patriarchio tempore *Balsamonis*, ut ipsemet conqueritur in Epistola « de incensis, quæ a patriarcha dari solent, eo die

quo Catechesis habetur », quæ extat lib. 7 *Juris Græco-Rom.* pag. 471. Patriarcha tamen ne prorsus immunificens videretur, festo Catecheseos thymiamata dividebat, festo autem Baiorum seu Palmarum cereos et cruces. Magna quarta feria, hoc est, die Mercurii majoris septimanæ cereos et thymiamata, ac die Paschatis osculo et amplexu excipiebat populum, dans unicuique *tricephalum*, quod exiguæ monetæ genus est, a tribus capitibus nomen ducens.

9. *S. Mathildis a filiis tribulationem patitur.* — Dum *sancta Mathildis* regis Ottonis et Henrici fratris mater, Ecclesias et monasteria construit, præsertim cœnobium Quindelinburgense appellatum, in quo « non viles personas, sed summæ ingenuitatis tyrunculas canonicæ institutioni deservituras colligit », utriusque filii calumnias tulit : « Nam ad aures eorum pervagatum erat », inquit chronographus Magdeburgensis adhuc ineditus, « quod innumerales pecunias regalium censuum consumpsisset, reposebantur a rege quæ pauperibus distribuere ; mittebantur exploratores spoliare et contumeliis afficere nuntios ejus, qui munera indigentibus portabant. Compellebant eam dotales regiones relinquere, et sacro velamine se consecrare. Ferret vero minus moleste injurias, si *Heinricus*, quem unice amaverat, fratri non concordasset. Videns autem molestias eorum non minui, sed in dies plus augeri, relinquens quidquid *Heinricus* rex in dotem ei dederat, in occidentali regione Angarinensem (*Angria* dicitur vulgo *Engerhen* in Ravenspergensi Westphaliæ comitatu, ubi conditum postea a Mathilde cœnobium) parcens filiis et non minus quam consueverat bona opera exercens. Regi vero supervenere Dei flagella, retroversis victoriæ triumphis aliisque rebus secundis : *Heinricum* vero gravis morbus invasit ». Idem refert auctor Vitæ beatæ Mathildis, jussu S. Henrici imp. scriptæ, et uterque addit, intercedente *Editha* Ottonis regis uxore, Mathildem in regnum ab eodem Ottone revocatam fuisse et Henrico filio reconciliatam, pacemque usque ad mortem perdurasse. De monasteriis a Mathilde ædificatis, legendus *Maillonius* Sæc. v *Benedict.* in Elogio S. Mathildis.

AGAPITI II ANNUS 2. — CHRISTI 947.

1. *Synodus Virdunensis in causa episcopatus Rhemensis, de qua Hugo subdole Agapitum papam consulit.* — Christi annus sequitur nongentesimus quadragesimus septimus, Indictione quinta, quo habita est Synodus Virduni, cujus celebrandæ causa extitit lis inveterata inter Hugonem, olim puerum ordinatum archiepiscopum Rhemensem, et Artaldum contra eum postea ordinatum; quem pulsum anno superiori a Ludovico rege, in sedem illam fuisse restitutum Frodoardus affirmat, annitente illo contra eum, et aliis pro eo proceribus laborantibus. « Cum vero, inquit, horum causa tam Ludovicus rex quam Hugo dux magnopere turbarentur, ad has sedandas turbas, Synodus hoc anno (inquit Frodoardus) circa medium mensis Novembris habenda denuntiatur. Interim vero sedes Rhemensis Artaldo conceditur ». Et inferius: « Eodem anno Synodus Virduni habita est, præside Rotberto Trevirensi episcopo cum Artaldo Rhemensi, Adelrico Aquensi, Adelberone Metensi, Goslino Tullensi, Hildebaldo Transrhenensi, Mirnegardo Vurdensi, Israele Britone, præsentem Brunone abbate fratre regis Ottonis, Agenoldo quoque et Odilone cum aliis quibusdam venerandis abbatibus ». Hi sunt quos potuit temporis importunitas episcopos in unum colligere: quid autem in ea actum sit, hæc ipse:

2. « Ad quam Hugo episcopus evocatus, missis etiam duobus ad eum deducendum episcopis, Adelberone et Goslino, venire noluit. Universa vero Synodus domino Artaldo Rhemensi tenendum iudicavit episcopium. Indicitur etiam Synodus idibus Januarii habenda ». Hæc de his Frodoardus hoc anno. At quoniam negotium perarduum laud videbatur posse per provinciales episcopos terminari, et causa valde implicita definiri: placuit ut plenum Concilium convocari deberet ex episcopis videlicet Galliæ atque Germaniæ, quod factum est anno sequenti coram Apostolicæ Sedis legato.

3. Sed quid inter hæc Hugo? probe sciens quanti ponderis esset Romani Pontificis auctoritas in ejusmodi definiendis controversiis, Sigeboldum clericum suum legat Romam ad Agapitum papam, tradens ei litteras falsas, quas finxit conscriptas

esse ab episcopis Rhemensis diocesis, quibus petebatur, ut episcopatus ejusdem Rhemensis Ecclesiæ eidem ab Apostolica Sede confirmaretur Hugoni. His nuntius acceptis litteris, Romam ad Pontificem proficiscens, eas ipsi obtulit, quarum fide ab eodem Agapito papa surripuit dolose litteras ad episcopos Galliæ atque Germaniæ, quibus significabatur, ut Hugo Rhemensis Ecclesiæ sedere deberet episcopus. Quomodo autem eadem litteræ ab ipsa Synodo anno sequenti celebrata præsentem Apostolicæ Sedis legato ostensæ sint falsæ, suo loco dicetur.

4. *S. Ælfegi in Anglia episcopi obitus et sanctitas.* — Moritur hoc anno sanctus Ælfegus¹ Wintoniensis in Anglia episcopus, sanctitate clarus et spiritu prophetiæ imbutus, de quo ista scripta reperimus hoc anno quo fuit ejus transitus: « De beato quoque Ælfego legitur, quod in die Cinerum, cum de more pœnitentes de Ecclesiæ liminibus removeret, hortatus est eos, ut tempore Quadragesimali jejuniis et castitati vacantes, diebus illis uxorum etiam deliciis abstinerent. Quorum unus, cæteris episcopi jussionibus reverenter obtemperantibus, jaculari cœpit, dicens se abstinere non posse a venere, a cibo pariter et conjugio. Cui episcopus: Contristas me, miser, oppido, nesciens quod tibi pariat dies ventura. Et sic homo ille recedens duram B. Ælfegi prophetiam nebulo experitur, dum postera luce in cubiculo sit reperi- tus exanimis, incertum utrum a diabolo suffocatus. Altero quoque tempore, dum sacros ordines celebrasset, tres monachos ad ordinem promovit presbyteratus. Completis itaque ordinibus, præsul sanctæ recordationis adstantibus dixit: Hodie tribus monachis manus imposui, quorum duo pontificalis ordinis gratiam obtinebunt, unus in civitate Wigorniae, ac deinde in Cantia, alter meam sedem quandoque implebit. Tertius voluptatum petulantia accensus exitum miserabilem sortietur. Quam utique sancti præsulis prophetiam, ut prædixerat, rerum exitus comprobavit ». Qui enim Wigornii, et deinde Cantiae antistes extitit, fuit S. Dunstanus;

¹ Flod. hist.

qui autem sedem Wintoniensem post eum accepit, fuit Aelffinus, ut ex Osberto patet, tertius autem nobis incognitus.

5. *Ædite reginæ obitus.* — Hoc eodem anno, qui undecimus regis Ottonis numeratur, septimo kalend. Februarii, moritur ejus conjux Ædita regina, sanctitate præclara; quam et post obitum miraculis claruisse, Ditmarus¹ ejus temporis scriptor testatur.

¹ Dilm. Chr. l. II.

Celebrata est hoc¹ pariter anno nongentesimo quadragesimo septimo, Asturiæ in Hispania sub Salomone ejus civitatis episcopo Synodus, in qua nonnulla de rebus ad Christianam disciplinam bene disponendam et conservandam tractata feruntur. At desiderantur ejus Acta, quibus hæc possint sigillatim fieri notiora.

¹ Ambr. Mo. Chr. Hisp. l. XVI. c. 18.

Anno periodi Græco-Romanæ 6440. — Anno Æræ Hispan. 985. — Anno Hegiræ 336, inchoato die 23 Julii, Fer. 6. — Jesu Christi 947.

— Agapiti II papæ 2. — Constantini VIII solius imp. 36.

1. *Obitus S. Elfegi episc. Wintoniensis.* — Ad num. 4. Florilegus, quem Baronius sequitur, mortem S. *Elphegi* seu *Elfegi* cognomento *Calvi*, episcopi Wintoniensis in Anglia, cum præsentis anno connectit. Verum non tantum Simeon Dunelmensis in Hist. de Gestis Regum Anglorum, uterque chronographus Saxo, aliique Elfegi mortem usque ad annum DCCLII differunt; sed etiam ipsemet reperitur subscriptus in Charta ab *Edredo* Angliæ rege data, anno nongentesimo quadragesimo nono, in qua legitur: « Ego Allech Wintoniensis episcopus consigno ». Et demum anno DCCLII, aliis ejusdem regis *Edredi* donationibus, ut observat Bollandus ad diem XII Martii, subscripsit his verbis: † « Ego Elpheah Wintoniensis Ecclesiæ episcopus triumphalem trophæum hagiæ † crucis impressi ». Elfegus Ecclesiam sibi commissam sancte administravit, provinciamque verbo et exemplo currere viam mandatorum Dei docuit. Sancti Elfegi nomen inscriptum est variis Martyrologiis Mss. ad diem XII mensis Martii, quo eum obiisse constat, ut videre est apud Bollandum citatum. De S. *Elfego* Cantuariensi archiepiscopo sæculo sequenti agemus.

2. *Moritur Editha Germaniæ regina.* — Ad num. 5. Moritur hoc anno *Edgitha* seu *Editha* Ottonis Germaniæ regis uxor, uti Lambertus Schafnaburgensis, continuator Reginonis et Hermannus Contractus, juxta editionem Canisianam tradunt. Fuit Athelstani Angliæ regis soror, de qua Witichindus in fine lib. 2 Annalium hæc habet: « Ille annus notabilis casu calamitoso totius populi, de morte scilicet beatæ memoriæ Edidis reginæ, cujus extrema septimo kal. Febr. celebrata est cum

gemitu et lacrymis omnium Saxonum. Hæc nata ex gente Anglorum, non minus sancta religione quam regali potentia pollentium stirpe claruit. Decem annorum regni consortia tenuit, undecimo obiit. Saxoniam vero decem et novem annis inhabitavit. Reliquit filium nomine Ludolfum, omni virtute animi et corporis ea ætate nulli mortalium secundum. Filiam quoque Liudgardam nomine, quæ nupserat Chionado duci », scilicet Lotharingiæ, ex qua originem duxere *Gregorius V* papa, et *Conradus Salicus* imp. ut suo loco probabimus.

3. *Moritur et Bertolfus Bojoariorum dux.* — « Bertolfo duce Bajoariæ defuncto, Henricus frater Ottonis regis, ducatum illius accepit », inquit Hermannus Contractus, juxta editionem Canisianam. Witichindus lib. 2 Annal. de Ottone Germaniæ rege verba faciens, ait: « Cum omnia regna coram eo silerent, et potestati ipsius omnes hostes cederent, monitu et intercessionem sanctæ matris ejus (nempe Mathildis) recordatus est multis laboribus fatigati fratris, præfecitque eum regno Bajoariorum, Bertoldo jam defuncto, pacem et concordiam cum eo faciens, qua usque in finem fideliter permansit. Erat autem ipse dominus Henricus copulatus matrimonio filiæ ducis Arnulfi, feminae egregiæ formæ, miserabilisque prudentiæ. Fratrum vero pax atque concordia Deo acceptabilis, hominibusque amabilis, toto orbe fit jam celebris, dum unanimes res publicas augent, hostes debellant, civibus paterna potestate præsunt. Ducatu igitur Bojoariorum accepto, nequaquam desidia torpuit, sed abiens Aquileiam cepit, Ungaros duabus vicibus armis superavit. Ticinum transnavit et prædia magna intra regionem hostium capta exer-

citum incolumem in patriam reduxit ». Hoc tamen bellum anno sequenti gestum, cum Bertoldus seu Bertolfus *nono kalendas Decembris*, teste Aventino in fine lib. 4 Annal. Boiorum, ex hac vita migravit: idemque auctor initio libri insequentis tradat, *Henricum* et ducem copiarum ejus *Rathonem*, in monumentum tantæ victoriæ armatos equis insidentes a gypso fictos et expressos induratosque igne, in templo Deiparæ Virginis apud Maurkirchen pagum Bojoriæ Noricorum dedicatos positosque, anno Æræ Christianæ *MDXLVIII* adhuc videri, servari ac monstrari. Ea itaque Christianorum de Hungaris victoria a Sigonio lib. 6 de Regn. Ital. cum sequenti Christi anno recte copulata.

4. *Floret S. Odo archiep. Cantuariensis.* — Florebat hoc tempore *sanctus Odo* Cantuariensis archiepiscopus, « qui cum esset in habitu clericali cum eligeretur, constanter cœpit reniti, ne morem majorum qui eum in eadem sede præcesserant, ambitione sua turbare videretur. Nullum enim viderat ad id tempus Cantuariensis Ecclesiæ archiepiscopum nisi monachii scemate indutum fuisse », inquit Gervasius monachus Cantuariensis in Act. Pontificum Cantuar., qui addit vocatum fuisse e monasterio Floriacensi abbatem in Angliam, qui eum habitu monachico induit, sicque gaudentibus cunctis Odonem factum archiepiscopum Cantuariæ, et ab Agapito papa pallium suscepisse. Fusius hoc refertur in ejus Vita a Mabillonio Sæc. v Benedict. ex Ms. Codice publicata. In ea num. 40 narrata Eadmundi regis morte dicitur: « Hoc ferme tempore quidam clerici, maligno errore seducti, asseverare conabantur, panem et vinum quæ in altari ponuntur, post consecrationem in priori substantia permanere, et figuram tantummodo esse corporis et sanguinis Christi, non verum Christi corpus et sanguinem. Quorum enormem perfidiam beatus Odo destruere cupiens, dum quadam die in conspectu totius populi sacrosanctis missarum sollemniis devotus intenderet, expressis lacrymis Dei Omnipotentis clementiam in suo ministerio affore postulavit, quæ ad depellendos hominum errores substantivam divinorum Mysteriorum declararet proprietatem. Cumque ad confractionem vivifici panis ventum fuisset, o ineffabilem Dei miserationem, o præsentem æternæ Majestatis ostensionem! confestim namque inter manus Pontificis fragmenta corporis Christi tenentis, sanguis guttatim defluere cœpit: stans itaque Pontifex, et præ gaudio uberes lacrymas fundens, innuit adstantibus ministris, ut illi potissimum propius accedant, qui nuper in fide titubaverant. Vocati igitur celeriter adsunt, atque in tantarum rerum consideratione perterrefacti pavitanti voce exclamant:

O te inter homines felicissimum hodie, cui filius Dei semetipsum in carne dignatus est revelare! Et rursum: Exora, inquit, paululum, pater, exora Domini majestatem, ut in pristinam formam præsens sanguis commutetur, ne nos propter infidelitatis errorem divina ultio sequatur.

5. *Eucharistiæ fidem miraculo adstruit.* — « Oravit ergo sacerdos; post orationem ad aram respexit; et ubi dimiserat sanguinem, consuetam vini reperit speciem. Sumptis autem cælestibus sacramentis, lætantibus cunctis qui tantis interfuere spectaculis, præcepit pontifex pro testimonio tantæ virtutis omnes undecumque pauperes aggregari, et solemne convivium eisdem præparari. Ipse autem cum suis in magna gratiarum actione lætitiæ agebat, proptereaque quod omnis error de Dominico corpore in pectore suorum abolitus fuisset, nec ultra panem in altari positum verum Christi corpus esse diffiderent, qui verum sanguinem inde manare conspexissent ». Heterodoxi aliqui inquit, hoc fuisse transubstantiationis initium, sed non dubium quin manifeste errent, cum scriptor ille vacillantium illorum clericorum errorem *enormem perfidiam* appellet, et superiori sæculo Paschasius Ratbertus lib. de Corpore et Sanguine cap. 14 scripserit: « Nemo qui sanctorum Vitas et exempla legerit potest ignorare, quod sæpe hæc mystica corporis et sanguinis sacramenta, aut propter dubios, aut certe propter ardentius amantes Christum, visibili specie, in agni forma, aut carnis et sanguinis colore monstrata sint: quatenus de se Christus clementer adhuc non credentibus fidem faceret. Ita ut dum oblata frangitur vel offertur hostia, videretur agnus in manibus, et cruor in calice quasi ex immolatione profluere, ut quod latebat in mysterio, pateretur adhuc dubitantibus in miraculo ». Male etiam inde deducunt creditum non esse omni tempore, nec in omni Anglia, transubstantiationis mysterium, alioquin infideles vel impii Dei existentiam negantes, asserere possent contrariam sententiam novam esse, cum a tot sæculis Propheta scripserit: « Dixit insipiens in corde suo: Non est Deus ». Cæterum hoc sæculo contra hæresim illam scripsere *Adrevaldus* Floriacensis monachus qui ad hujus sæculi initium pervenit, cujus extat opusculum *de Corpore et Sanguine Domini contra Joannis Scoti ineptias* tom. xii Spicilegii Dacheriani recitatum, et *Ratherius* monachus Laubiensis et dein Veronensis in Italia episcopus, qui hoc ipso tempore vivebat, cujusque extat Epistola *ad patricium de Corpore et Sanguine Domini*, ibidem evulgata cum responsione ejusdem de Corpore et Sanguine Domini.

AGAPITI II ANNUS 3. — CHRISTI 948

1. *Legatio Pontificis et Synodus in Gallia, in qua Rhemensis Ecclesia adjudicatur Artaldo contra Hugonem illegitimum episcopum.* — Sequitur Christi annus nongentesimus quadragesimus octavus, Indictione sexta, quo Agapitus papa legatum a latere Marinum misit in Galliam tum ad stabilendum Ludovici regnum, quod factione Hugonis principis variis notabat tumultibus; tum etiam ad cognoscendam cum illarum partium episcopis causam Rhemensis Ecclesiæ, quisnam ejus legitimus esset episcopus, Artaldus vel Hugo. De his omnibus abunde Frodoardus ejusdem Ecclesiæ Rhemensis presbyter, omnia ista ob oculos habens, ab his incipit:

2. « Anno nongentesimo quadragesimo octavo, Synodus prædicta, quæ scilicet indicta fuerat celebranda hoc anno idibus Januarii, celebratur in Ecclesia sancti Petri ante conspectum castri Mosomi a domno Rotberto, cæterisque Trevirensis dioceseos episcopis, et aliquibus Rhemensis. Veniens illuc Hugo, et locutus cum Rotberto Trevirensi archiepiscopo, Synodum noluit ingredi; litteras vero quasdam ex nomine Agapiti papæ misit ad episcopos per clericum suum, qui eas Roma detulerat, nihil auctoritatis canonicæ continentes, hoc tantum præcipientes, ut Hugoni Rhemense redderetur episcopium. Quibus lectis, ineuntes episcopi consilium cum abbatibus et cæteris sapientibus qui aderant, responderunt, non esse dignum vel congruum, ut mandatum legationis Apostolicæ, quam dudum Rotbertus archiepiscopus, deferente Friderico præsule Moguntinensi, coram regibus et episcopis tam Galliæ quam Germaniæ susceperat, et partem jam petitionis ipsius exegerat, propter illas litteras intermitterent quas insidiator Artaldi præsulis exhibebat: imo quod regulariter cœptum fuerat, canonice pertractaretur. Sicque præceptum est ut recitaretur capitulum decimum nonum Carthaginensis Concilii, de accusato et accusatore. Quo recitato, judicatum est, secundum definitionem ipsius capituli, ut Artaldo præsule retinente communionem et parochiam Rhemensem, Hugo, qui ad duas Synodos evocatus venire contempserat, a communione et regimine

Rhemensis episcopii abstineret, donec ad universalem Synodum, quæ indicebatur ad kalendas Augusti, sese purgaturus occurreret. Ipsumque capitulum mox in charta describi fecerunt episcopi coram se, subnectentes hanc etiam definitionem suam, et eidem Hugoni miserunt. Qui post alteram diem eandem chartam Rotberto præsuli remisit, hoc verbis remandans, quod ipsorum judicio nequaquam obediturus sit.

3. « Interea proclamationis litteræ a domno Artaldo diriguntur ad Sedem Romanam. Dominus igitur Agapitus papa vicarium suum Marinum episcopum mittit ad Ottonem propter evocandam et congregandam generalem Synodum, litteræque ipsius papæ mittuntur ab Urbe Romana speciatim quibusdam episcopis Galliæ Germaniæque, vocantes eos ad Synodum. Quæ Synodus congregata est ex præcepto præfati papæ in Engleheim (Engelenheim), palatio regali, in Ecclesia beati Remigii honore dicata, septimo idus Junii, causa videlicet maximarum dissensionum quæ agitabantur inter regem Ludovicum et Hugonem principem, inter Artaldum quoque Rhemensem episcopum et Hugonem illicite substitutum ejusdem urbis præsullem, quæ dissensiones omne perturbaverant regnum Francorum. Ad quam Synodum celebrandam, adveniente prædicto Marino Sedis Apostolicæ vicario, convenerunt etiam Germaniæ præsules cum quibusdam Galliarum episcopis.

« Rotbertus videlicet Trevirensis archiepiscopus.

« Artaldus Rhemensis.

« Fridericus Moguntinensis.

« Uvifridus Coloniensis.

« Adaldagus Hamaburgensis.

« Hildebaldus Mitnegardonurdensis.

« Gostenus Tullensis.

« Adalbero (Adelbero) Metensis.

« Berengarius Virdunensis.

« Fulbertus Cameracensis.

« Rodulphus Litudunensis (Laudunensis).

« Ricco Warmacensis.

« Raimbaldus (Reimbaldus) Spirensis.

« Roppo Wirzeburgensis.

- « Conradus Constantiacensis.
- « Odelricus Augustensis.
- « Zethardus Hildesheimensis.
- « Bernardus Halberstadensis.
- « Dudo Paderbornensis.
- « Michael Ratisponensis.
- « Farabertus Tungrens.
- « Lioptacus Ribunensis.
- « Dodo Osnaburgensis.
- « Everis Mindensis.
- « Baldricus Trajectensis.
- « Heroldus Salsburgensis.
- « Adelbertus Bazsoensis.
- « Starcandus Cistadiensis (Cistinensis).
- « Hotat Leovicensis.
- « Vicardus Basiliensis.
- « Lidac Ribunensis.

4. « Residentibus his præsulibus in Ecclesia dicti loci, post præmissas preces, secundum ordinem celebrandi Concilii, et post lectiones sacræ auctoritatis, ingressis gloriosis regibus Ottone ac Ludovico, et simul residentibus, post allocutionem præfati Marini Sedis Apostolicæ legati, exsurgens Ludovicus rex e latere et consensu domini regis Ottonis, proclamationis suæ querimoniam propagavit coram præmisso Romanæ Sedis vicario cæterisque consentientibus episcopis, referens, qualiter accersitus fuerit a transmarinis regionibus per legatos Hugonis cæterorumque Franciæ principum, ad suscipiendum suæ paternæ hæreditatis regnum, cunctorumque votis et acclamationibus procerum militiæque Francorum, sublimatus et consecratus sit ad apicem regalis moderaminis obtinendum, postea vero ejectus sit a præfato Hugone, et dolis appetitus ac comprehensus per annum integrum sub custodia fuerit ab eo detentus, nec aliter ejus absolutio potuerit obtineri, nisi Landunum castrum, quod solum tunc regina Gerberga cum fidelibus suis regiis sedibus retinebat, Hugone id occupante, dimitteret. De his omnibus malis quæ post regni susceptionem passus fuerat, si quis objiceret, quod sui facinoris causa eidem fuissent illata, inde se juxta synodale judicium et regis Ottonis præceptionem purgaret, vel certamine singulari defenderet.

« Deinde surgens Artaldus archiepiscopus, protulit secundum jussionem papæ Romani quam ei delegaverat, litis initium atque tenorem, quæ versabatur inter ipsum et Hugonem subrogatum sibi Ecclesiæ Rhemensis antistitem.

5. « Postquam litterarum recitationem, et eorum propter reges juxta Teotiscam linguam interpretationem, ingressus Synodum quidam Sigeboldus præmissi Hugonis, clericus attulit litteras quas Roma detulerat, quasque jam in alia Synodo Mosomi propalaverat, asserens easdem litteras sibi Romæ ab ipso qui aderat Marino vicario datas. Qui Marinus proferens litteras quas idem Sigeboldus Romam tulerat, præcepit eas coram Synodo recitari. In quarum recitatione repertum est (prout

ipsæ litteræ fatebantur) quod Wido episcopus Suesion., Hildegarius quoque Bellovacensis, Rodolphus Laudunensis cæterique cuncti Rhemensis dioceseos episcopi, easdem litteras ad Sedem delegaverant Apostolicam, pro restauratione Hugonis in sede Rhemensi et expulsionem Artaldi. Postquam lectionem, exsurgentes Artaldus et præfatus Rodolphus qui in iisdem litteris memorabatur, Fulbertus quoque Cameracensis antistes, easdem litteras refutarunt, adstruentes quod eas antea nunquam viderint vel audierint, neque in earum delegatione consensum præbuerint: quibus cum idem clericus contraire non posset, licet in eos calumniis obstrepens, præcepit dominus Marinus, suggerens universæ Synodo, ut sibi consilium et rectum judicium proferrent super hujusmodi calumniatore, et calumniarum in episcopos delatore. At illi, postquam delator publice confutatus est falsa detulisse, lectis capitulis de hujusmodi calumniatoribus, judicant et unanimiter censent, eum quo fruebatur honore privari debere, ac secundum capitulorum tenorem in exilium detrudi. Diaconatus igitur quo fungebatur ministerio multatus, a conspectu Synodi reprobatus abscessit. Artaldo vero præsuli qui omnibus se Synodis præsentabilem fecerat, non refugiens synodale judicium, episcopium Rhemense juxta canonum constituta et sanctorum Patrum decreta, omnino retinendum atque disponendum decernunt, laudant atque corroborant.

6. « Secunda confessionis die, post recitatas divinæ auctoritatis lectiones, et Marini vicarii allocutionem, suggessit dominus Rotherthus Trevirensis archiepiscopus, ut quoniam juxta sacræ legis instituta restauratum atque restitutum fuerat Rhemense Artaldo præsuli episcopium, in ejusdem sedis invasorem synodale perageretur judicium. Præcepit itaque Marinus vicarius, ut canonicam super hac præsumptione Synodus proferret sententiam. Jubentur ergo sanctæ legis Catholicæ recitari capitula. Quibus recitatis, secundum sacerorum canonum et sanctorum decreta Patrum Sixti, Alexandri, Innocentii, Zozimi, Bonifacii, Cælestini, Leonis, Symmachi, cæterorumque sanctorum Ecclesiæ doctorum, excommunicaverunt, atque ab Ecclesiæ Dei gremio repulerunt prædictum Hugonem Rhemensis Ecclesiæ pervasorem, donec ad pœnitentiam et dignam satisfactionem venire procuraret.

7. « Cæteris quoque diebus tractata sunt quædam necessaria de incestis conjugiiis, et Ecclesiis quæ presbyteris in partibus Germaniæ dabantur, imo venundabantur indebite, et auferbantur a laicis illicite: prohibitum igitur atque statutum est, ne id omnino præsumeretur ab aliquo. Sed et de aliis Ecclesiæ Dei utilitatibus tractata sunt, et definita nonnulla ». Hucusque de Synodo Frodoardus, in qua, ut audisti, definita fuit causa Rhemensis Ecclesiæ. Quæ autem reliqua erat causa definienda inter Ludovicum regem atque

Hugonem principem, delata ipsa fuit ad Synodum Treviris hoc eodem anno celebrandam, ad quam interim idem Hugo princeps vocari deberet litteris Marini Apostolicæ sedis legati, de qua idem Frodoardus hoc eodem anno post enarrata nonnulla de militariis copiis hinc inde deductis adversus alterutrum per Ludovicum et Hugonem, ista narrare incipit :

8. *Synodus Trevirensis in causa Ludovici regis et Hugonis principis.* — « Post hæc Artaldus archiepiscopus Rhemensis Treviros proficiscitur ad Synodum, cum episcopis Widone Suessionico, Rodulpho Laudunensi, et Evicredo Morinensi. Quo pervenientes, Marinum sese præstolantem reppererunt cum Rothberto archiepiscopo Trevirensi. Cæterorum vero Lothariensium atque Germanorum præsulum illuc invenere neminem. Considerantibus igitur illis, sciscitari cœpit Marinus vicarius, quid egisset post præmissam Synodum Hugo princeps erga ipsos et regem Ludovicum. At illi referunt supra memorata quæ ipsis et Ecclesiis eorum intulerat mala. Requirit ergo de vocatione ipsius principis Marinus: Utrum perlata ei fuissent litteræ vocationis, quas ei perferendas delegaverat? Cui respondetur ab Artaldo archiepiscopo, quod quædam eorum perlata sunt, quædam vero perferri non potuerunt, earum gerulo ab ipsis grassatoribus intercepto: vocatus tamen fuerit tam litteris quam internuntiis. Requiritur itaque si adsit aliquis ex parte ipsius legatus. Ubi cum nullus fuisset inventus, decernitur expectandum si forte adventurus esset in crastinum.

9. « Quod cum minime contigisset, et omnes qui aderant tam clerici quam illustres laici excommunicandum esse acclamarent, definitur ab episcopis, hanc excommunicationem differendam usque ad diem tertiam. Tractatur autem de episcopis qui vocati fuerant, et venire distulerant, vel his qui ordinationis Hugonis participes extiterant. Et Wido quidem Suessionicus se culpabilem prostratus coram Marino vicario et Artaldo archiepiscopo

confitetur. Intercedentibus autem pro eo apud Marinum Roberto et Artaldo archiepiscopis, absolvi ab hac noxa meretur. Wicfredus Morinensis immunis ab hac ordinatione reperitur. Adest Transmarini Noviomensis episcopi legatus quidam presbyter, adstruens eundem præsulem ita gravi languore detentum, ut ad eandem Synodum venire non valuerit. Id quoque nostrates qui aderant testabantur episcopi.

10. « Tertia tandem die, insistente præcipue Liudolpho legato et capellano regis Ottonis, quoniam idem rex id omnino fieri præcipiebat, excommunicatur Hugo comes inimicus Ludovici regis pro supra memoratis malis ab ipso perpetratis, eo tamen modo donec respiscat, et ad satisfactionem coram Marino vicario vel episcopis quibus injuriam fecit, deveniat. Quod si facere contempserit, Romam pro absolutione sui proficiscatur. Excommunicantur et duo pseudoepiscopi ab Hugone damnato ordinati, Thebaldus et Ivo, prior post expulsionem ipsius in Ambianensi urbe, alter post damnationem ejusdem Hugonis in Silvanectensi ab eo constituti. Excommunicatur etiam clericus Laudunensis, nomine Adelomus, quem accusavit Rodulphus episcopus suus, eo quod Teutbaldum excommunicatum in Ecclesiam introduxerit. Vocatur Hildegarius Bellovacensis episcopus litteris præfati Marini, ut veniat coram eo, vel eat Romam rationem redditurus coram domno papa pro illicita ordinatione prædictorum pseudoepiscoporum, cui interfuerat. Vocatur et Heribertus, Heriberti comitis filius, ad satisfactionem venire, pro malis quæ contra episcopos agebat. His gestis, episcopi revertuntur ad sua. Liudolphus autem, capellanus Ottonis, Marinum vicarium deducit ad regem suum in Saxoniâ, ubi consecraturus fuerat Ecclesiam Fuldensis monasterii: post cujus consecrationem idem Marinus, exacta hieme, Romam revertitur ». Hactenus de Synodis hoc anno celebratis, et rebus gestis a Marino legato Frodoardus.

Anno periodi Græco-Romane 6441. — Anno Æræ Hispan. 936. — Anno Hegiræ 337, inchoato die 11 Julii, Fer. 3. — Jesu Christi 948.

— Agapiti II papæ 3. — Constantini VIII imp. solius 37.

1. *Concilium Engilnheimense.* — A num. 1 ad 8. Tom. ix Concil. pag. 623, refertur Concilium Engilnheimense, in quo Artaldus in sedem Rhemensem restitutus est, et Hugo comes Ludovico

Transmarino Francorum regi perduellis excommunicatus, præside Marino Sedis Apostolicæ legato. In Præfatione legitur: « Anno ab Incarn. Domini DCDXLVIII, Indictione vi, septimo idus Ju-

nias, anno serenissimi regis Ottonis xiii», sed loco xiii, legendum xii, etiam in sententia Baronii Ottonis annos ab an. dcdxxxvii deducuntis « ipso quoque cum illustrissimo rege Ludovico in præsentia manente, sancta ac generalis Synodus apud Engilenheim, etc. » Goldastus tom. iii Constitut. Imp. pag. 305, idem Concilium recitat, sed loco, *septimo idus Junias*, habet *VII idus Januarii*, quia, ut sæpius monui, librarii mensem Januarium in Julium vel Junium, et e contra prono errore transmutant. Sed cum *Otto* die secunda mensis Julii anni dcdxxxvi Henrico patri in regnum Germaniæ successerit, liquet, utramque lectionem a nobis rejectam retineri non posse. Multæ Ottonis regis Charle in subscriptionibus corruptæ, præsertim quia cum die secunda Julii regnare cœperit, exscriptores Julium vel in Junium vel in Januarium, et kalendas Januarias in kalendas Junias vel Julias sæpe verterint (1).

2. *Decreta in eo condita.* — In hac Synodo *Engilenheimensi* decem canones conditi fuere, quorum sexto statuitur, « ut Paschalis hebdomada festive tota celebretur, et in Pentecoste secunda, tertia, quarta feria, non minus quam dies Dominicus, solemniter honorentur ». Septimo, ut in Litanía Majore, septimo scilicet kalendas Maii, qui dies S. Marco Evangelistæ sacer est, jejunium sicuti in Rogationibus ante Ascensionem Domini observetur. Octavo, ut laici oblationes altaris sibi non vindicent. Nono, ut decimarum causæ non apud sæculares judices, sed in Synodo discutiantur. Decimo, incestæ nuptiæ prohibita. Laudato tomo Conciliorum prolixiora hujus Synodi Acta ex Flodoardo lib. 4, cap. 35, exhibentur. Eam Agapetus II anno sequenti confirmavit, ut testatur Flodoardus in Chronico.

3. *Romanus junior a Patre in consortium imperii adscitus.* — « Mense Julio sextæ Indictionis », inquit Cedrenus, « Romanus eorum pater (nempe Stephani et Constantini) debitum naturæ persolvit, et in Myrelæo sepultus. Proinde Constantinus Porphyrogenitus omnibus quæ suspecta erant submotis, et solus jam imperans, festo Paschatis die Romano filio suo diadema imponit, vota faciente Theophylacto patriarcha ». Myrelæum monasterium sanctimonialium fuit. Incertus enim continuator Theophanis in Romano juniore num. 3, refert eum « Annam sororem ad monasterium a Romano tum imperatore avoque pridem conditum atque exstructum » misisse. Constantinus Porphyrogenitus Romano filio suo jam imperatori coronato Librum *de administrando imperio* dicavit, ut eum edoceret, quomodo imperii gubernacula tractanda essent. Quare Liber ille post præsentem annum in lucem emissus. In eo opere, capite 26

loquitur Constantinus de Romano Lecapeno tanquam de imperatore jam vita functo, et de Lothario Berengarii filio, tanquam de rege tunc Italiam administrante. Quare cum *Lotharius* mense Novembri anni dcdl supremum diem obierit, ante tempus illud liber ille in lucem editus (2).

4. *Turketulus cancellarius Angliæ fit monachus.* — Cum *Northumbri* perniciose Anglis consilia agitent, et secessionem meditarentur, *Edredus* Angliæ rex *Turketulum* regni cancellarium, notæ fidei ac integritatis virum, hoc anno in Northumbriam legavit, uti narrat Ingulphus in sua Historia qui ait, eam legationem peractam anno secundo regni Edredi. *Turketulus* per Merciorum provinciam transivit, et Croylandensis cœnobii rudera cernens, ad ejus restitutionem incensus est. Panci enim monachi qui supererant, quique antiquam pietatem redolebant, officiosissime eum exceperant. De hac restitutione cum rege familiariter collocutus, eique prædecessorum suorum, quibus Deus victoriam de inimicis, quod favissent Ecclesiæ, dederat, exemplo proposito, omnem opem ei rex promisit. Tum *Turketulus* se monachum ibi futurum palam promisit, neque ab eo proposito rex eum dimovere potuit. Quare « voce præconaria, venerabilis cancellarius *Turketulus*, per medias Londonias fecit proclamari, ut si cui aliquo debito teneretur obnoxius, paratus erat certo loco, et die designato, ad plenum persolvere : et si cui aliquam injuriam aliquando irrogasset, promisit in triplo, tanquam aller *Zachæus*, satisfacere ». Solutis itaque omnibus debitis suis, ex bonis suis aliqua regi dedit, aliaque pro monasterio Croylandensi reservavit, et in illud ingressus, et a quinque senibus qui ibi erant receptus, abbas creatus est. Tandem « anno ætatis suæ lxxviii, et monachatus sui xxvii », animam Deo reddidit anno sc. Christi dcdlxxv. Verum in anno ejus ætatis vel hallucinatur Ingulphus, vel male pag. 36 novæ editionis ait Eduardum regem, *defuncto Dinevulpho episcopo*, ei obtulisse episcopatum Vintoniæ, et *Turketulum* eum supplicasse ut *Fridestanus* huic Sedi præficeretur, quod factum fuisse dicit. Subdit : « Eodem etiam momento Dorcestrensis episcopatus ei a rege oblatus est », quem cum « refutaret, *Ceowlfus* episcopus est factus », et *Turketulus* a rege cancellarius constitutus. Sanctus autem *Fridestanus* an. dcdv episcopus Vintoniæ a rege renuntiatus, eodemque *Ceowlfus* Dorcestrensi episcopatu donatus. Quare *Turketulus* longe ante annum dcd natus erat, et hoc in loco, sicuti non raro alibi, ut mihi examinantem constitit, Ingulphus in Chronologiam peccavit; quod lectoribus observandum, ne eos in errorem abripiat.

(1) Recte Pagius contra Mansium hoc Concilium Indictione vii septimo idus Junias celebratum fuisse annuit. Vide canones hujus Conc. apud Hartzheim Conc. Germaniæ tom. ii, pag. 610, 618.

THEINER.

(2) Annus certus quo Liber de administrando imperio a Porphyrogenito scriptus fuit, ab ipsomet Porphyrogenito proditur in cap. ejusdem Lib. 27. Aduolat enim, quo tempore hæc scribebat, cucurrisse annum Mundi 6457 et septimam Indictionem, qui temporum characteres indicant annum dcdxlx. Animadvertendum est tamen toti Operi absolveudo annos plures impensos fuisse, cum dein cap. 45, ubi de Iberibus agit,

AGAPITI II ANNUS 4. — CHRISTI 949

1. *Synodus Romana confirmans Acta in utrisque Synodis.* — Sequitur annus Redemptoris non-gentesimus quadagesimus nonus, Indictione septima, quo ab Agapito papa Romæ est Synodus celebrata, de qua pauca ista habet Frodoardus hoc anno: « Agapitus papa Synodum habuit apud sanctum Petrum, in qua damnationem Hugonis episcopi apud Ingelenheim factam confirmavit, excommunicans etiam Hugonem principem, donec Ludovico regi satisfaciat ». Hæc ipse.

2. *Dania ab Ottone victa ad Christi fidem convertitur, intercedentibus etiam miraculis.* — Eodem anno debellatis ab Ottone rege magna victoria Danis, iisdemque in Christianam religionem acceptis, et Ecclesiis in Dania ordinatis, Agapitus papa eorum metropoli Hamurgensi Ecclesiæ gratulatus, eidem privilegia a prædecessoribus data innovavit, quæ facta esse hoc anno, qui numeratur duodecimus sedis Adaldagi archiepiscopi, testatur ¹ Adam vetus chronographus, qui summam ista complexus hæc habet: « Otto igitur rex divino fultus auxilio, quamprimum ab insidiis fratrum suorum ereptus est, iudicium et justitiam populis fecit. Deinde postquam omnia ferme regna, quæ post mortem Caroli defecerant, suo imperio subjugarat, in Danos arma corripuit, quos antea pater ejus bello compressit. Enimvero tunc rebellare moliti, apud Hedaby legatos Ottonis cum marchione trucidarunt, omnem Saxonum coloniam funditus extinguentes. Ad quam rem ulciscendam rex cum exercitu statim invasit Daniam, transgressusque terminos Danorum, apud Sliaswigh otim positos, ferro et igne vastavit totam regionem usque ad mare novissimum, quod Northmannos a Danis dirimit, et usque in præsentem diem, a victoria regis Ottesfund dicitur. Cui egredienti Haraldus apud Sliaswigh occurrens, bellum intulit, in quo utrisque viriliter certantibus, Saxones victoria potiti sunt. Dani victi ad naves cesserunt, tandemque

conditionibus ad pacem inclinatis, Haraldus Ottoni subjicitur, et ab eo regnum suscipiens, Christianitatem in Dania recipere spopondit. Nec mora, baptizatus est ipse Haraldus cum uxore Gunild et filio parvulo, quem rex noster a sacro fonte susceptum, Sven Otto vocavit.

3. « Eo tempore Dania Cismarina, quam Jutland incolæ appellant, in tres divisa episcopatus, Hamburgensi episcopatu subjecta est. Servantur in Bremensi Ecclesia præcepta regis, quæ signant Ottonem regem in sua ditione regnum Danicum tenuisse, adeo ut etiam episcopatus illi donarit. In privilegiis autem Romanæ Sedis videri potest, quod Agapitus papa Hamburgensi Ecclesiæ de salute Gentium congratulatus, omnia quæ a decessoribus suis Gregorio, Nicolao, Sergio, et cæteris Bremensi archiepiscopatu concessa sunt, et ipse concessit Adaldago. Cui etiam sua vice jus ordinandi episcopos tam in Dania quam in Septentrionis populis Apostolica auctoritate concessit. Igitur beatissimus archiepiscopus noster primus ordinavit in Dania, Haroldum ad Slesvich, Liasdagum ad Ripam, Regiubrundum ad Arhusiam. Quibus etiam commendavit illas Ecclesias quæ trans mare sunt, in Fionia, Seland, et Scane, ac in Sveonia. Anno archiepiscopi factum hoc est duodecimo. Et hæc quidem initia cælestis misericordiæ secutum est tale incrementum, Deo cooperante, ut ab illo tempore usque in hodiernum diem Ecclesiæ Danorum multiplex Borealiū gentium fructu redundare videantur ».

4. Quod autem intercesserit ingens miraculum, ut Haraldus Danorum rex fieret Christianus, accipe a ¹ Witichindo temporis hujus scriptore, qui ait: « Dani antiquitus erant Christiani, sed nihilominus idolis ritu Gentili servientes. Contigit autem contentionem super cultura deorum fieri in quodam convivio, rege præsentem, Danis affirmantibus Christum quidem esse Deum, sed alios fore eo majores deos,

¹ Adam. l. II. c. 2.

¹ Witic. l. III.

quippe qui potiora mortalibus signa, et prodigia per se ostenderent. Contra hæc clericus quidam, nunc vero religiosam vitam ducens, episcopus nomine Poppo, unum verum Deum Patrem cum Filio unigenito Domino nostro JESU Christo et Spiritu sancto, simulacra vero dæmonia esse, testatus est. Haraldus autem rex, qui velox traditur fuisse ad audiendum, tardus ad loquendum, interrogat si hanc fidem per semetipsum declarare velit. Ille incunctanter velle respondit. Rex vero custodiri clericumque in crastinum jubet. Mane autem facti, ingentis ponderis ferrum igne succendi jubet, clericumque ob fidem Catholicam candens ferrum portare jussit. Confessor Christi indubitanter ferrum rapit, tandiuque deportat, quo ipse rex decernit. Manum incolumem cunctis ostendit, fidem Catholicam omnibus probabilem reddit. Ad hæc rex conversus, Christum Deum solum colendum decernit, idola respuenda subjectis gentibus imperat, Dei sacerdotibus et ministris honorem debitum deinde præstitit. Sed hæc virtutibus merito patris sui, Ottonis regis scilicet, adscribuntur, cujus industria in illis regionibus Ecclesiæ sacerdotumque ordines in tantum fulsere». Illicusque Witi-chindus. Huic miraculo adstipulatur etiam præter alios ¹ Ditmarus, qui hoc ipso sæculo claruit atque scripsit. Adam ² etiam de his agens, ista subjicit quæ sequuntur :

5. « Ferunt etiam eo ipso tempore eundem fortissimum regem Ottonem universos Slavorum populos suo imperio subjecisse : quosque pater ejus uno grandi prælio domuerat, ipse Otto tanto

deinceps Dei adjutorio constrinxit, ut tributum et Christianitatem pro vita simul et patria libenter offerrent victori. Baptizatusque est totus Gentilium populus. Ecclesiæ in Slavonia tunc primum constructæ, de quibus rebus circa finem, ut gestæ sunt, opportunius summus aliquid dicturi ». Hæc Adam Bremensis Ecclesiæ canonicus. Addit Ditmarus his temporibus accidisse plurimas animarum sensibiles apparitiones, ad indicandam, inquit, earum immortalitatem, quam Slavi negabant. Hæc ipse hujus temporis scriptor, sui Chronici libro primo. Sed ad res Italiæ.

6. *Ungarorum nova incursio in Italiam pecunia redimitur.* — Hoc eodem anno Ungari invasuri rursus Italiam, ingenti oblata pecunia a Berengario, continentur. Quomodo autem ejusmodi opportuna usus occasione idem Berengarius a clericis tributum exegit ¹, Luitprandus ita recenset : « Per idem tempus Taxis Ungarorum rex magno cum exercitu in Italiam venit. Cui Berengarius non ex propria pecunia, sed ex Ecclesiarum ac pauperum collectione decem modios nummorum dedit. Fecit autem hoc, non ut populi curam haberet, sed ut hac occasione magnam pecuniam congregaret, quod et fecit. In omni enim ætate omnisque sexus, tamque ablactatus quam lactens pro se nummum dedit. Quibus æs commiscens, ex paucis decem modios fecit. Cæteram vero partem, et quidquid ex Ecclesiis tulit, sibi retinuit ». Hæc ipse. Quomodo autem iidem Ungari ex Italia in Aquitaniam transiere, post sequentem annum Frodoardus narrat.

¹ Ditm. Chr. l. II. — ² Adam. l. II. c. 3.

¹ Luitp. l. v. c. 15. in fin.

Anno periodi Græco-Romanæ 6442. — Anno Æræ Hispan. 987. — Anno Hegiræ 338, inchoato die 30 Junii, Fer. 7. — Jesu Christi 949.

— Agapiti II papæ 4. — Constantini VIII imp. solius 38.

1. *Otto Germaniæ rex Danos subigit.* — A n. 2 ad 6. Otto Germaniæ rex, « ubi primum de insidiis fratrum suorum liberatus est, fecit judicium et justitiam populo suo, deinde postquam omnia pæne regna quæ post mortem Caroli defecerant, suo subjugavit imperio, in Danos arma corripuit. Transgressus ergo cum exercitu fines Danorum, qui olim fuerant apud Slewich, ferro et igne vastavit omnem regionem usque ad mare novissimum, quod Nortmannos dirimit a Danis, et usque in

præsentem diem a victoria regis, Ottensund dicitur. Cui ingredienti Haraldus rex, apud Slewich bellum intulit, in quo utrisque viriliter concertantibus, Saxones (id est milites Oltonis regis) victoria potiti sunt, et Dani terga vertentes ad naves cesserunt. Tandem conditionibus ad pacem inclinatis, Haraldus Ottoni subicitur, et ab eo regnum suscipiens, Christianitatem in Dania recipere spopondit. Nec mora, baptizatus est ipse Haraldus cum uxore sua Gunnild, et filio parvulo, quem rex noster a

sacro fonte susceptum, Suein Otto appellavit », inquit Helmoldus lib. 1 Chronici Slavorum c. 9. Quæ Baronius ex Adamo eisdem verbis descripsit Krantzius lib. 3 Metrop. cap. 17.

2. *Tres episc. in Dania instituti.* — Verum hæc ad annum præcedentem referenda, ut patet ex verbis Adamii lib. 2, cap. 2, a Baron. num. 3 recitatis : « Dania Cismarina, » inquit Adamus, « quam Jutlant incolæ appellant, in tres divisa episcopatus, Hammaburgensi archiepiscopatu est subjecta ». Paulo post : « Igitur beatissimus archiepiscopus noster (nempe Adaldagus) omnium primus ordinavit in Dania episcopos, Haroldum ad Sliawich, Liafdegum ad Ripam (quæ etiamnum Juttie seu Jutlandiæ oppidum est) Reinbrandum ad Arhusam, quibus etiam illas commendavit Ecclesias, quæ trans mare in Finne, Seland, ac Scone, ac in Sueonia. Hoc factum est anno archiepiscopatus duodecimo ». Quare cum *Umone* archiepiscopo Hamburgensi *Adaldagus* successerit anno nongentesimo trigesimo sexto, uti recte eo anno Baronius num. 8 et seq. annotavit, annus sedis ejus duodecimus anno superiori absolutus est, et currenti annus xiii in finem vergebat. *Normannorum* nomine, tam Helmoldus numero superiori citatus, quam Adamus, *Norwegos* intelligunt, quia Dani olim Normanni dicti sunt. Legendus etiam Pontanus lib. 5 Rerum Danicarum in Haraldo rege, uti eum appellat. Et hoc initium fidei in Dania propagatæ. Porro tres hi episcopatus Hamburgensi archiepiscopo subditi fuere.

3. *Otto Danicum regnum tenuit.* — Chronographus Saxonicus Ms. cujus verba recitat Mabillonius Sæc. iv Benedict. part. 2, in Observat. præviis ad Vitam sancti Anscharii, num 8, hanc trium episcopatum Danicæ institutionem circiter annum dcdlii factam dicit, sed signantius Adamus annum rei gestæ notavit. Subdit idem chronographus : « Servantur in Bremensi Ecclesia præcepta regis, quæ signant Oltonem regem in sua ditione regnum Danicum tenuisse, adeo ut episcopatus etiam ipse donaverit. Aldenburgh civitas magna Slavorum qui Waigri dicuntur, sita est juxta mare quod Balticum vel Barbarum dicitur, itinere diei ab Hammaburg, in qua rex Otto fecit episcopatum, subjiciens illum Hammaburgensi metropoli, eo quod vicinior illi Ecclesiæ esset, quam Magadaburgensi ». Idem tradit Adamus loco citato. Hammaburgensi metropoli postea duo episcopatus adjecti, *Meklimburgensis* scilicet et *Raceburgensis*.

4. *Hungarorum in Italiam ac dein in Aquitaniam irruptio.* — Ad num. 6. Cum Hungari in Italiam irrupissent, *Berengarius* legatos de compositione ad eos misit, et hoc prætextu infinitam pecuniæ viam ab Italis extorsit, ut narrat Baronius ex Luitprando lib. 5, cap. 15. Ex quo intelligimus quam ineptus esset regimini *Lotharius* Italiæ rex, qui hujus rei administrationem sibi non sumpsit. Huc referendum quod Flodoardus in Chronico ad annum dcdlii habet : « Hungari ab Italia transcensis

Alpibus egressi, Aquilaniam ingressi sunt, ibique tota pæne demorati æstate, multis hanc regionem rapinis et interminationibus (seu internecionibus) attriverunt : sicque per Italiam reversi sunt in terram suam », eo scilicet Christi anno.

5. *Edredus rex Northumbriam devastat.* — « Northumbri fidelitatem tenere nescientes, Eyricum quemdam de stirpe Danorum super se regem levaverunt », inquit annalista Mailrosensis ad hunc Christi annum. Tum anno sequenti : « Rex Anglorum Edredus Northumbriam devastat, in qua vastatione combustum est monasterium quod sanctus Wilfridus construxerat in Ripum. Northumbrenses timore coacti, regem quem sibi fecerant abjecerunt, Eyricum filium Haroldi, qui fuit ultimus rex illorum, nam ei successerunt comites ». Vigorniensis tamen hæc omnia ad annum dcdlii, Hovedenus vero et Florilegus ad annum dcdxlviii revocant. Huc referendum quod Eadmerus in Vita sancti Wilfridi episcopi Eboracensis num. 65 tradit : « Accidit ut hostilis incursus ipsam provinc. (nempe Northumbriam) occuparet occupans, inibi multa hominum millia necaret, ac omnia loca monasterio beati Wilfridi circumjacentia ad instar solitudinis devastaret. Monasterium ipsum pervasum et dirutum, quod prius extiterat hymnis et canticis gloriosum, modo erat ferarum et inimicorum sordibus ignominiosum. Corpus interea ipsius antistitis Christi omni honore privatum, inter ipsas sordes primo sepulturæ suæ loco mansit immotum. Sed Omnipotens Deus, qui sua pietate et justitia nequit privari, quorundam bene religiosorum mentes in considerationem tantæ rei excitat, atque ad demutationem illius affectum evectumque ministrat. Regebat ea tempestate Christianitatem in Anglia vir bonus et sanctus, Odo Cantuariensis Ecclesiæ archiepiscopus, utpote totius Britanniae primas : qui cum sua sollicitudine dispositionibus omnium Ecclesiarum invigilabat, ipsas Ecclesias, prout ratio postulabat, visitare solebat. Qua sollicitudine actus, cum quodam tempore Eboracensem provinciam adisset, et ea pro quibus venerat strenue peregisset, ad Ripum pergit, monasterium beati Wilfridi consecraturus. Aderat, et horrida solitudine visa, lacrymis manat. Quo illis in partibus demorante, ii quorum corda (ut dixi) Deus ad demutationem cælestis thesauri tetigerat, rati se opportunitatem ad expletionem suæ voluntatis accepisse, præmissa supplicatione ad Dominum, quod diu mente tractaverant, opere implere satagebant : sicque factum est ».

6. *Corpus S. Wilfridi Cantuariam transfertur.* — Subdit Eadmerus eos, statuto die, terram ubi corpus beati Wilfridi sepultum jacebat aperuisse, omnia ossa reverenter cum pulvere levasse, et ea Odoni præsentasse, quatenus ipse ea Cantuariam secum deferret. « Arbitrati sunt, nusquam tutius aut justius ea servatum iri posse aut debere, quam in Ecclesia Cantuariensi, ea videlicet causa, quod et illo tempore Cantia magna pace vigeat,

et quia ipse beatus vir olim fraude quorundam supplantatus, cum conversari non posset in Ecclesia Eboracensi, eidem Ecclesiae Cantuariensi per sacerdotale officium curam impenderet. Justum siquidem illis visum fuit, ut illic mortuus in pace quiesceret, ubi vivens in pace quievit ». His adde quod Malmesburiensis lib. 2 de Pontif. cap. 200, ubi de hac translatione loquitur, de Odone scribit : « Ut clarissimum patriæ jubar produceret in speculum, heroico metro Vitam illius texi mandavit. Executus est id munus Fridegodus quidam, versibus non ita improbandis ». Vilam illam sancti Wil-

fridi Mabillonius Sæc. III Benedict. part. 4 publicavit, et Sæc. IV, part. 1, supplementum Carminis Fridegodi ex Ms. Biblioth. Cottonianæ exhibuit. Hoc itaque tempore Fridegodus natione Anglus ac diaconus floruit. Alfordus hanc translationem cum anno DCXLI et die XII mensis Octobris connectit, ut ibidem videre est num. 4. Verum aliquot post illum annos monasterium sancti Wilfridi eversum, et dies XII mensis Octob. dicatus translationi postea a B. Lanfranco archiepiscopo Cantuariensi, qui sacrum corpus loco decentiori reposuit, peractæ, teste Eadmero citato num. 66.

AGAPITI II ANNUS 5. — CHRISTI 950.

1. *Otto rex vocatus in Italiam ad Berengarii tyrannidem compescendam, mortuo Lothario.* — Salutis annus agitur quinquagesimus post nongentesimum, Indictione octava, quo Lothario rege Italiæ veneno sublato e medio, Berengarius vindicat sibi Italiæ regnum : hæc Frodoardus hoc anno. Porro uxor Lotharii Adelais filia Rodulphi regis intra munitionem Canusinam se continens, litteris Ottonem regem ad sui liberationem vocare non desistit : qui comparato exercitu, anno sequenti (ut suo loco dicetur) in Italiam descendit. Leo autem Ostiensis de Lotharii morte agens ¹, sic ait : « Lotharius post annos ferme quatuor in phrenesim subitam incidens, diem clausit extremum, ipseque deinceps in Italia regnandi Francorum regibus terminum dedit. Eo defuncto, uxor ejus Adelais ad Attonem propinquum suum sese in Canusinam munitissimam arcem contulit ». Ubi mansit quousque Otto rex veniens, Berengarium ab Italia fugavit.

2. At non litteris Adelaidis tantum, sed et Agapiti Romani Pontificis vocatum Epistola Ottonem regem, ut liberaret Italiam a tyrannide Berengarii, testatur anonymus, qui olim scripsit Vitas Romanorum Pontificum. Equidem cum sanctissimus Pontifex vidisset tyrannum manus misisse in personas Ecclesiasticas, ab eis tributum exigentem, haud diutius id tolerandum ratus, auxilium a rege

maxime pio expetendum putavit, quod et feliciter consecutus est, ut dicetur anno sequenti.

3. *Ramirus rex in Hispania, victis Arabibus, hic moritur.* — Quo pariter ¹ anno, quinto Januarii, Ramirus rex Legionensis in Hispania post multas insignes de Arabibus victorias consecutas, ac novissime paulo ante obitum iisdem in prælio apud Talavera ad internecionem usque deletis, Deo gratias redditurus, Ovetum profectus est, ubi plurimorum sanctorum sacræ reliquiæ asservabantur; illicque ægrotare incipiens, Legionem delatus, in Vigilia Epiphaniæ (ut omnes veteres scriptores rerum Hispanarum æque consentiunt) moritur. « Facta, inquit, confessione episcopis et abbatibus qui secum aderant, devote suscepit sacramentum corporis et sanguinis Domini JESU Christi. Quo facto, se a regno quod a patre susceperat abdicavit, proclamans cum lacrymis : Nudus egressus sum de utero matris meæ : nudus revertar illuc. Dominus mihi adjutor, non timebo quid faciat mihi homo. His ita peractis, vitam finivit, et in monasterio sancti Salvatoris quod filiæ suæ construxerat, tumulatur », cum regnasset annos viginti duos, menses duos, et dies viginti quinque. Cui mox successit Ordonius ejus filius hujus nominis tertius. Laudatissimus plane Ramirus habetur tum religione, tum bellica fortitudine, quibus simul junctis, semper accidere consuevit ut hostes cedant,

¹ Leo Ost. l. I. c. 64.

¹ Ambr. moral. l. XVI. c. 19. et alibi.

cunctaque alia bene succedant. Tenuit Ordonius regnum annos quinque et menses septem, quibus civili bello magis, quam externo eum contigit fati-

gari, rebellantibus adversus eum Sancio fratre, et cum eo Castellæ comite. Sed de his pluribus quæ prosecuti sunt res Hispanas.

Anno periodi Græco-Romanæ 6443. — Anno Æræ Hispan. 988. — Anno Regiæ 339, inchoato die 20 Junii, Fer. 5. — Jesu Christi 950.

— Agapiti II papa: 5. — Constantini VIII imp. solius 39.

1. *Moritur Lotharius Italiæ rex.* — Ad num. 1. Lotharium Italiæ regem hoc anno vivendi finem fecisse, præter Flodoardum in Chronico et Leonem Ostiensem a Baronio citatos, testatur chronographus Novaliciensis monasterii, cujus fragmentum Duchesnius tom. III edidit: «Ejus (nempe Hugonis) filius succedens in regnum tenuit Italiam. Putrida igitur radix ortus ex spinis, lædens omnia, et quæ lædere non valens conculcabat pedibus, per viam nocentiæ pertulit passus. Hic dum aliquando de Papia veniret Taurinum cum uxore sua, feria IV, quæ est XIII mensis Novembris (ideoque hoc Christi anno) Præceptum dedit Arduino marchioni abbatiae Bremensis, qui non post multum tempus mortuus est, transacto vix spatio unius mensis, feria VI, quæ est X kal. Decembris, et Mediolanum vectus: ibique tumulatur in sepulchro sui genitoris. Post mortem horum regum regnavit Berengarius cum filio suo Adelberto, die Dominica, quæ est quinta decima die mensis (sc. Decembris) in civitate Papiæ ad absidam sancti Michaelis: sic electi sunt reges, ut præessent Italiæ, qui inde exientes laureati, cum Willa uxore ipsius Berengarii Ind. IX». Ubi omnes notæ temporariæ præsentem annum certo designant; sed quod ait chronographus, Lotharium Mediolani in tumultu patris sepultum, subsistere non potest, cum Hugo pater in monasterio a se in Burgundia ædificato tumulatus fuerit, uti supra ostendi.

2. *Ei succedit Berengarius nepos Berengarii Aug.* — Berengario Augusto filia fuit ex Bertila uxore, quæ ut scribit Luitprandus lib. 4, cap. 10, Adelberto Eporediæ marchioni Anseharii marchionis filio homini Franco nupsit, Berengariumque juniorem genuit, qui cum Adelberto filio hoc anno in Italia regnare cæpit. Leo Ostiensis lib. 4, cap. ult. e duobus Berengariis unum tantummodo facit, et avum nepotemque confundit. Scribit enim «post mortem Ludovici Lotharii filii (Caroli Crassi dicere debuit) invasisse Italiæ regnum Berengarium Forojuliensem, verum in ipso regni initio a Guidone

duobus præliis superatum aufugisse»; Guidoni Lambertum filium successisse, Lamberto Ludovicum Bosonis regis Provinciæ filium, «adversus quem Rodolphum regis Burgundiæ filium in Italiam venisse»; Rodolpho expulso, «Hugonem una cum Lothario filio Italiæ regnum aliquot possedisse annis», tum Lotharium solum: post quem, «deinceps in Italia regnandi Francorum regibus terminum dederit, Italiæ regno a Francis ad Teutonicos (sc. Ottonem Saxonem) translato, interea Berengarium prædictum cum filio Alberto denuo regnum invadere» gestiisse. At Berengarius iste Alberti seu Adelberti pater, Berengarii Majoris e Gisila filia Adelberto Eporediæ marchioni nupta nepos fuit. Verissime tamen Leo, non Berengarium modo, vel potius ambos Berengarios, sed etiam Widonem seu Guidonem cum Lamberto filio, et Ludovicum, Rodulfum (Burgundiæ regem), Hugonem ac Lotharium Hugonis filium, Francos natione facit, *Francisque* (quales omnes fuere) *seu Francorum regibus* annumerat. Fallitur enim Sigonius lib. 6 de regn. Ital. qui utrumque Berengarium, ut et Widonem ac Lambertum Italos, hoc est, Longobardos facit, atque a Francis distinguit his verbis: *Francos inde reges Italici exceperere*, mortuo nimirum Carolo Crasso. Causa erroris Sigonio fuit, inquit Hadrianus Valesius in Præfatione ad Carmen Panegyricum *de Laudibus Berengarii Aug.*, quod a Luitprando in cap. 6 lib. 4, Widonem et Berengarium *duos ex Italia præpotentes principes*, et a Sigeberto quoque *Berengarium Italicum* vocari videbat. Sicut poeta anonymus, qui panegyricum illum composuit, lib. 1 initio *Berengarium Italum principem* vocat, licet eum regio Francorum genere ortum asserat, ita Luitprandus, Sigebertus et alii antiqui principes illos appellavere Italos. *Berengarius* enim et Wido in Italia nati, sed non magis pro Italis aut Longobardis habendi, quam Francorum imperatores aut Germani qui in Italia late regnaverunt.

3. *Vexat S. Adelhaidem Lotharii viduam.* —

Ad num. 2. « Lothario », inquit sanetus Odilo abbas Cluniacensis in Vita sanctæ Adelhaidis, « ante annum circiter tertium postquam dominam Adelheidam duxerat, defuncto, remansit ipsa viduata viro, privata regno, destituta maritali solatio ». Paulo post : « Postquam enim mortuus est Lotharius vir ejus, honorem regni Italici adeptus est quidam vir nomine Berengarius, qui habebat conjugem nomine Willam. A quibus indecenter innocens capta, diversis angustia cruciatibus, capillis cæsarie deductis, pugnis frequenter agitata et calcibus, una tantum comite famula, ad ultimum tetrus inclusa carceribus, liberata divinitus, postmodum ordinante Deo, imperialibus est sublimata culminibus ». Berengarium cupido incessit Papiensis reginæ potiundæ, quam Adelhaida possidebat. Eam ob rem, ejus conjugium Adelberto filio regis poposcit, et repulsa accepta, adeo ira inflammatus est, ut id per vim sibi extorquendum esse censuerit. Papiam itaque expugnavit, ac reginam in potestatem adductam diligenti custodiæ tradidit, veritus scilicet, ne si libera esset, per externas nuptias aliquid adversi in Italia tumultus excitaret, atque ita regnum a se ad alium transferret. Rem varie narrant historici, Leo Ostiensis lib. 4, cap. ult., chronographus Novaliciensis monasterii pag. 637, alique. Certum tamen reginam custodiæ mancipatam fuisse, et valde a *Berengario* coangustatam. Broverus lib. 9 Annal. Trevirensium refert, Adelheidis in bene meritorum albo metropolitane domus sancti Petri extare perhonorificam memoriam his verbis consignatam : XII KALEND. MAII CAPTA EST ADELHEIDIS IMPERATRIX CUMIS A BERENGARIO REGE, XIII KALEND. SEPTEMBRIS LIBERAVIT DOMINUS

ADELHEIDAM REGINAM A VINCULIS. Quod utrumque anno sequenti peractum. Falluntur enim Leo Ostiensis et chronographus Novaliciensis citati, qui tradunt eam per triennium in Canusino castro obsessam fuisse, ut ex dicendis anno sequenti constabit.

4. *Obitus Ramiri regis Legionis.* — Ad num. 3. *Ramirus* secundus rex Legionensis hoc anno mortuus est, cum regnasset annos xxii, menses duos et dies xxv, cui successit *Ordonius* hujus nominis III ejus filius, ut videre est apud Baronium.

5. *Otto Boleslaum Bohemorum regem sibi subjicit.* — « Illo tempore », inquit Witichindus lib. 2, postquam de persecutione Adelhaidis reginæ locutus est, « rex (nempe Otto) proficiscitur in militiam contra Bolislalum regem Bohemorum, et cum capienda esset urbs quæ nuncupabatur Nova, in qua clausus obsidebatur Bolislavi filius, prudenti rex consilio diremit prælium, ne miles in rapiendis hostium spoliis aliquod periculum incideret. Considerata itaque virtute regis ac innumera multitudine exercitus, Bolislaf urbe egressus maluit tantæ majestati subjici, quam ultimam perniciem pati. Subque signis stans, et regem audiens, responsaque reddens, veniam tandem promernit. Inde plena victoria gloriosus factus rex Saxoniam regressus est ». Quod currenti anno contigisse testantur Sigebertus in Chron. et continuator Regimonis. Et hic finis fuit belli, quod per annos quatuordecim adversus *Ottonem* Germaniæ regem *Boleslaus* sancti Wenceslai fratris parricida gessit, et « ex eo regi fidelis servus et utilis permansit », ait Witichindus de initio regni Ottonis loquens.

AGAPITI II ANNUS 6. — CHRISTI 951.

1. *Conjugium Ottonis cum Adelaide vidua Lotharii.* — Redemptoris annus sequitur nongentesimus quinquagesimus primus, Indictione nona, quo Otto rex in Italiam veniens, fugatis Berengario regem agente et ejus filio Adelberto, duabusque ejus filiabus captis et in Germaniam missis, Adelaidem reginam Lotharii olim conjugem accepit uxorem. Hæc ¹ Leo Ostiensis. Eadem ² Frodoardus hoc

anno, qui et addit : « Sarraceni meatum Alpium obsidentes a viatoribus Romani petentibus tributum accipiunt, et sic eos transire permittunt ».

2. Porro ista non esse facta ante mensem Octobris videri possunt ex Berengarii Diplomate privilegii concessi monasterio S. Vincentii ad fontes Vulturini, in ejus fine ista leguntur : « Hubertus cancellarius ad vicem Bruningi episcopi et archicancellarii, recognovi et subscripsi. Dat. kal. Octob. anno Dominicæ Incarnationis nongentesimo quin-

¹ Leo Ost. l. 1. c. ult. — ² Frod. in Chron. hoc anno.

quagesimo primo, regni vero domui Berengarii atque Adelberti piissimorum regum primo, Indictione decima. Actum in Plebe S. Marini, in Dei nomine feliciter. Amen ».

3. *Eadredus universæ Angliæ rex.* — Quo pariter anno, Amalaphus tyrannus in Anglia cum adeo invaluisset, ut ejus regni partem dimidiam possideret, alteram Eadredus legitimus rex teneret; ubi aggressus est incendio tradere Ecclesiam sancti Balteri, mox numine vindice, repentina morte percutitur: sicque absque armis factum, ut universa¹ Angliæ monarchia idem pius rex potiretur Eadredus.

4. *De commentario S. Ildefonsi in laudem virginittis Dei Genitricis Mariæ.* — Consignatur hic pariter annus Æræ nota Gomesani Hispani presbyteri Præfatio in commentarium S. Ildefonsi de laude perpetuæ Virginitatis Dei Genitricis Mariæ, quam exscripsit petente Gotiscalco episcopo in Aquitania. Accepimus eam una cum aliis antiquitatis monumentis a Nicolao Fabro Parisiis missis, quæ ne pereant suis quibusque locis intexenda curavimus; sic enim ipsa se habet:

5. « Ad Gotiscalcum episcopum Gomesanus.

« Ego quidem Gomesanus, licet indignus, presbyterii tamen ordine functus in finibus Pampiloniæ, abba Hyldensis architerii in atrio sacro ferente reliquias sancti ac beatissimi Martini episcopi, regulariter degens sub regimine patris almi, videlicet Dulquitti abbatis inter agmina Christi servorum ducentorum fere monachorum, compulsus a Gotiscalco episcopo, qui gratia orandi egressus a partibus Aquitaniæ devotione promptissima, magno comitatu fultus ad finem Galliciæ pergebat, concitus Dei misericordiam sanctique Jacobi Apostoli suffragium humiliter imploraturus, libellum libenter conscripsi a B. Ildefonso Toletanæ sedis episcopo

dudum luculentissime editum, in quo continetur de laude Virginitatis S. Mariæ perpetuæ Virginis Jesu Christi Domini nostri Genitricis; ubi prædictus Ildefonsus episcopus divino spiramine afflatus, oraculis prophetarum imbutus, Evangeliorum testimoniis roboratus, Apostolorum documentis instructus, cælesti simul et terrenorum contestatione firmatus, gladio verbi Dei armatus, Joviniani perfidiam vulneravit, et pugione verissimæ rationis Helvidii errorem destruxit, Judæorum quoque duritiam non solum adstipulatione angelorum et hominum, sed etiam dæmonum prolata confessione jugulavit. Jam vero quam dulcia, quamque, divino munere compta prompserit eloquia, quisquis in hoc libello solerter legerit, facile prævidebit. Ex quo et credulus hauriet suavitatem, et anceps reperiet unde a se procul repellat erroris pravitatem. Unde æstimo incunctanter, ut pari gloria ditetur a Christo pontifex Gotiscalcus, qui hanc laudem Genitricis Domini nunc Aquitaniæ sanctæ Mariæ Anitio in propriam sedem specialiter advexit, sicut Ildefonsus episcopus, qui eam universæ Ecclesiæ Catholicæ dudum generaliter tradit: quia etsi materia defuit laboris, tamen sacra devotio retributio mercedis. Mihi autem exiguo atque miserrimo Gomesano concedat Christus gloriosæ Genitricis suæ interventu placatus, hic emundari a sorde facinorum, et post expletum vitæ hujus cursum, cum sanctis omnibus in regno cælorum perfrui gaudio feliciter sine fine mansuro. Transtulit hunc libellum sanctissimus Gotiscalcus episcopus ex Hispania ad Aquitaniam, tempore hiemis, diebus cœptis Januarii mensis, currente feliciter Æræ nongentesima octogesima nona, regnante Domino nostro Jesu Christo, qui cum Deo Patre et Spiritu sancto unus Deus gloriatur in sæcula sæculorum. Amen ». Hactenus ibi: ex quibus etiam peregrinationis antiquus usus ad corpus S. Jacobi in Gallæciam innotescit.

¹ Flor. hist. Matth. Westmonast. hoc anno.

1. *Otto Italia potitus Adelhaidem uxorem duxit.* — Ad num. 4 et seq. « Rex Otto », inquit hoc anno continuator Reginonis, « in Italiam ire volens multo se ad hoc iter apparatu præstruxit, quomodo Adalhaidam, viduam Lotharii regis Italici, filiam Rudolphi regis (sc. Burgundiæ, hujus nominis se-

cundi), a vinculis et custodia, quia a Berengario tenebatur, liberare, sibi que eam in matrimonium assumere, regnumque cum ea simul Italicum acquirere posset, deliberavit. Quod inter filios ejus Luidolphus cum Atemannis anticipans, patrique si quid ibi ad ingressum suum fortiter ageretur,

placere desiderans, nihil tale quod speraverat per-egit; sed potius inconsultum patrem offendens, totius inde rebellionis et discordiæ seminarium sumpsit. Patruus enim ejus Heinricus dux (sc. Bagoariæ) omnium ejus honorum et prosperitatum invidus, de Bavaria per triennium legatos suos præmisit in Italiam, omniumque quorum potuit mentes Italicorum ab eo avertit, in tantum, ut nec civitas nec castellum quæ subsequenter regis pistolibus cocisque patuerant, filio regis aperiretur, omniaque ibi incommoda et plena molestiæ pateretur. Mox subsequenter rex regnum Italicum ingreditur, Deoque sibi assistente, totius Italiæ possessor efficitur. Sed et domina Adelheid, Deo amabilis regina, sua ipsius prudentia a custodia est (Deo propitio) liberata, et Ottoni regi felici, Deo auspicante, copula conjuncta. Tunc Luidolphus dux hæc quæ præscripsimus ægre ferens, inconsulto patre, archiepiscopo (nempe Moguntino) Friderico comite, in patriam revertitur». Idem habent Lambertus Schafnaburgensis, et chronographus Hildensheimensis, quibus adstipulatur Flodoardus in Chronico.

2. *Conjugium illud mense circiter Augusto peractum.* — Ex his apparet, Leonem Ostiensem lib. 1, cap. 64, magno errore scripsisse Canusinam arcem in quam *Adelhais* sese receperat, *ferme triennio* a Berengario obsessam fuisse; cum ea hoc anno in *Ottonis* regis potestatem venerit, et superiori *Lotharius* rex vita functus sit. Loco itaque trium mensium, *annos tres* Leo scripsit. Is refert Epistolam ab Ottone ad Adelheidem missam, postquam ejusdem reginæ nuntium accepit; tenor litterarum hic erat: «Ducem (nempe Ottonem) cum exercitu jam superatis Alpibus Veronam venisse, filiumque Litulfum ante se Mediolanum processisse proxime illis affuturos auxilio. Viriliter agerent, se de conjugio et regno voluntati illorum pariturnum. Igitur duce e vestigio adveniente, Berengario et Alberto fugatis, soluta obsidio est», die nempe vicesima mensis Augusti, ut ex inscriptione Trevirensi anno superiori diximus. Berengarius quidem et Adelbertus monasterii sancti Vincentii de Vulturno Privilegia confirmarunt charta data «VI kal. Octob. anno Dominicæ Incarnat. DCCLII, Indict. x», ut videre est apud Baronium, eaque integra recitatur a Duchesnio tom. III, pag. 699; sed inde non sequitur, ut putavit Baronius, præfata post eum diem gesta esse, cum post liberationem Adelheidis ejusque cum Ottone conjugium, bellum in annum sequentem productum fuerit.

3. *Dani in Anglia per comites gubernati.* — Ad num. 3. *Anlafus* seu *Anlafus* Danorum in Anglia rex ante presentem annum demortuus, et

Dani non amplius per reges, sed per *comites* gubernati, ut supra ostendimus.

4. *Floret Berengarius episc. Virdunensis.* — Berengarius episcopus Virdunensis «anno episcopatus sui duodecimo, ab Incarnatione DCCLII, videns filios suos ut terram fecundam sincero tritici grano seminatam, et puriorem et uberiorem messem promittentem, multiplicatum reddere quod acceperant, et dolens quosdam eorum, perfectioris vitæ desiderio et altioris propositi amore ferventissimo, ad vicinas dioceses commigrare, et monasticum ordinem, quia in ipsa Virdunensi urbe non inveniebatur, alibi expetere, communicato cleri procerumque consilio, in Ecclesia sanctorum Apostolorum Petri et Pauli honore dicata, ubi pretiosus Domini confessor Vitonus cum suis quiescit et veneratur prædecessoribus et successoribus, monachorum delegit turmulam aggregare, qui et propensius divinis deservirent cultibus, et omnibus Christo adhærere volentibus formam darent humilitatis et patientiæ, ut et sic non cogerentur ad alia secedere, qui haberent paratum præ oculis specimen religionis. Et factum est divina cooperante gratia, et sui sacerdotis cordis intima perlustrante, ut desiderium sanctum quod diurna meditatione conceptum dilatione creverat, felix consequeretur et celer effectus et desiderii sui quot testes, tot inveniret cooperatores et adjutores. Expulsis ergo clericis, monachos introduxit, quibus et ex sua proprietate et de rebus matris Ecclesiæ annuos proventus reddituum, et victus vestitusque necessaria præordinavit, et congrua officinarum habitacula præparavit, magistros operis conducendo, et expensas tribuendo, ut inveniret animæ suæ requiem post laborem in atriis Jerusalem», inquit Hugo Flaviniacensis in Chronico Virdunensi pag. 132, qui postea Chartam foundationis exhibet, et pag. 134 addit: «Rejecta prælationis sarcina, ut justus justificaretur adhuc, monasticum habitum suscepit in eodem cœnobio, serviens Deo in incorruptione modesti et quieti spiritus, et nihilominus invigilans salutis commissarum sibi animarum, etc.» Obiit anno nongentesimo septuagesimo primo, ut ibidem legitur. Initio sæculi undecimi cum ædificaretur nova Ecclesia, necesse fuit aliqua quorundam sanctorum episcoporum Virdunensium corpora alio transmutari, tuncque corpus Berengarii episcopi et monachi incorruptum repertum est, inquit idem chronographus pag. 163. Monasterium Virdunense caput est hodie florentissimæ Congregationis Benedictinæ, quæ dicitur sancti Vitoni.

Mortuus est *S. Elphegus* Vintoniensis episcopus, ut videre est anno DCXLVII, num. 1.

AGAPITI II ANNUS 7. — CHRISTI 952.

1. *Otto Romam venire per Albericum prohibetur, Berengario in gratiam recepto Italiæ regnum reddit.* — Sequitur Christi annus nongentesimus quinquagesimus secundus, Indictione decima, quo Otto rex cum invitatus fuisset ab Agapito papa venire Romam, prohibente Alberico principe, qui (ut dictum est) Urbi dominabatur, venire non potuit; et licet id ipse rex missa legatione petiisset, non impetravit. Hæc Frodoardus hoc anno.

2. Quo etiam, Augusti mense, Augustæ Rhætiæ provinciæ publicus habetur conventus episcoporum, necnon principum Francorum, Saxonum, Bavarorum, Alemannorum et Longobardorum, ubi Berengarius cum filio Adelberto sese subiciens Ottoni, ab eo, ut subditus, recipit regendam Italiam. Sed quibus infectus erat pravis moribus, et in iisdem ab adolescentia enutritus et auctus, in senectute non caruit: nam ab iisdem ut inancipium vile possessus, ubi rediit in Italiam, episco-

pos et principes male habuit, quorum omnium odium et inimicitiam in se convertit. Hæc apud Reginonem hoc anno. Porro ista de subiectione Berengarii et ejus filii Adelberti, per visum ostensa diu ante fuisse S. Udalrico Augustano episcopo, qui ejus res gestas est prosecutus, ejus temporis scriptor affirmat. Otto autem rex haud ingratus pro acceptis a Deo beneficiis, gratias ipsi rependens, inter alia hoc ipso anno multa donavit Ecclesiis, præcipue vero ¹ Osnaburgensi, quæ omnia qui prosecuti sunt res Saxonum numerant. Porro post hæc, editum liquet istud ipsum quod diximus celebratum Concilium Augustanum ab episcopis Italiæ, Galliæ, atque Germaniæ, cui et Otto rex interfuit, rogatus ab episcopis; ejusdemque canones undecim invenies cum tomo quinto antiquæ lectionis Canisianæ collectionis.

¹ Crant. Metrop. Sax. l. III. c. 25.

Anno periodi Græco-Romanæ 6445. — Anno Æræ Hispan. 990. — Anno Hegiræ 341, inchoato die 28 Maii, Fer. 6. — Jesu Christi 952.

— Agapiti II papæ 7. — Constantini VIII imp. solius 41.

4. *Berengarius rex Ottoni regi sese submittit.* — Ad num. 4 et seq. Flodoardus in Chronico hoc anno scribit: « Otto rex (Germaniæ) legationem pro susceptione sui Romam dirigit, qua non obtenta, cum uxore in sua regreditur, dimissis ad custodiam Papiæ quibusdam ex suis. Berengarius rex (sc. Italiæ) ad Conradum ducem, qui Papiæ remanserat, venit, a quo in fide ipsius susceptus, ad Ottonem perducitur: quem ille be-

nigne suscipiens, concessis eidem rebus prout sibi visum fuit, quibusdam in Italiam pacifice redire permisit. Ipse quoque Otto post celebrationem Paschæ Papiam regreditur ». Quæ magis explicat continuator Reginonis his verbis: « Rex, expulso Berengario, cum suis fidelibus hyemans in Italia, Papiæ Natalem Domini celebravit. Sicque dispositis regni negotiis, verno tempore in patriam rediit, ducem autem Chunradum ad persequendum

Berengarium in Italia reliquit. Luidolfus dux de Italia revertens, regio ambitu Natalem Domini in Salefelt celebravit, ubi Fridericum archiepiscopum (nempe Moguntinum), omnesque qui in promptu erant regni majores, secum detinuit. Quod convivium jam multis suspiciosum cœpit haberi, et plus ibi destructionis quam utilitatis ferebatur tractari. Chunrado duce ad persequendum Berengarium relicto, Berengarius ejusdem ducis consilio sponte sua in Saxoniam ad regem venit, nihil tamen de his quæ voluit, obtinuit : sed machinatione Heinrici ducis (nempe Bajoariæ) fratris vix vita et patria indulta, in Italiam rediit : unde etiam Chunradus dux multum offensus a debita regis fidelitate defecit. Tunc Fridericus archiepiscopus et Chunradus dux (nempe Lotharingiæ) amici facti sunt : nam antea inimici erant ad invicem.

2. *Italia rursum per Berengarium turbata.* — « Eodem anno, mediante Augusto mense, conventus Francorum, Saxonum, Bavarorum, Alamannorum et Longobardorum publicus, apud Augustanam urbem Rhetiæ provinciæ agitur : ubi præscriptus Berengarius cum filio suo Adelberto regiæ se per omnia in vassalitiū dedit dominationi, et Italiam iterum cum gratia et dono regis accepit regendam. Marca tantum Veronensis et Aquileiensis excipitur, quæ Heinrico fratri regis committitur. Berengarius tamen in Italiam revertens, omnia hæc in episcopos et comites, cæterosque Italiæ principes retorsit : omnes eos odiis et inimicitiiis insequens, inimicissimos sibi fecit ».

3. *Synodus Augustana.* — Refertur illud Concilium tomo ix Concil. pag. 633, in cujus Præfatione dicitur : « Anno Incarnationis dcdlii, Indictione decima, anno vero regni ejus xvi (sed loco xvi, legendum xvii : Otto enim anno dcdxxxvi, die secunda Julii, regnum Germaniæ iniit), sub die vii idus Augusti, placitum conventumque Synodalem Augustæ fieri decrevit (nempe Otto), quatenus concordie diligentia tam sancti cleri, quam populi Ecclesiæ stabilitatis profectus, et totius Christianitatis utilitates tractarentur ». Huic Synodo præsules ex Germania, Gallia et Italia viginti quatuor adfuere, eique præfuit *Frithuricus* Moguntinus archiepiscopus, Ottonis Germaniæ regis decreto. In ea undecim canones conditi ad Ecclesiasticæ disciplinæ restaurationem.

4. *Profectio Germanica Berengarii ab hoc anno removeri non potest.* — In Vita S. Udalrici episcopi Augustensis, qui huic Concilio interfuit, a Gerardo presbytero ejus familiari scripta, mentio est tam accessus Berengarii Italiæ regis ad Ottonem Germaniæ regem, quam hujus Concilii, diciturque cap. 3, S. *Afram* Udalrico apparuisse, eumque quadam nocte spiritu eduxisse in campum, ubi magna erat episcoporum et aliorum sanctorum multitudo, subditurque : « Finita Synodo præfata Dei martyr monstravit illi loca castrorum, ubi postea Otto rex adhuc manens regalem locutionem

cum populis diversarum provinciarum habuit, ubi rex Berengarius de Longobardia, et filius ejus Adalbertus, cum multis episcopis se præsentaverunt, et suo dominio subdiderunt. Indicavitque ei venturam supergressionem Ungarorum, et loca belli, et quamvis laboriose, tamen victoriam Christianis concessam esse nuntiavit ». Mabillonius Sæc. v Benedict. pag. 423, dicit, Hermannum Contractum docere Berengarium anno dcdli subjectionem illam Ottoni regi promississe; eo enim Christi anno Hermannus juxta editionem Canisianam scribit : « Synodus xv episcoporum, magnusque totius regni principum conventus apud Augustam Vindelicam coadunatur, ibique Berengarius Ottoni regi ad deditionem venit, eique subjectionem promittit ». Verum temporariæ notæ in Concilio Augustano expressæ Hermannum hac in re falli manifeste demonstrant. Is error ei natus, quod Berengarii et Adalberti initium cum an. dcdxlix male conjunxerit; inde enim factum, ut quæ ad res Italicas spectant, anno uno citius postea consignarit. *Lotharium* autem anno dcdl e vivis excessisse, eique *Berengarium* cum filio successisse, certum et indubitatum; licet Sigonius in regno Ital. lib. 6, et Rubeus in Hist. Ravenn. lib. 3, Hermannum errantem secuti fuerint. Quoad victoriam de *Hungaris* ab Ottone rege reportatam, de ea an. dcdlv sermo erit. Denique Hermannus Contractus episcopos xv Concilio Augustano adfuisse tradit; cum tamen in Præfatione nomina omnium num. xxiv legantur; sed is error librariis videtur attribuendus.

5. *Dissensio inter archiepiscopos Laureacensem et Salisburgensem exorta.* — Inter episcopos ejusdem Concilii fuit *Geroldus* archiepiscopus Juvaensis seu Salisburgensis. Extat Epistola Agapiti papæ data ad Gerardum archiepiscopum Laureacensem, qua dissidium Ecclesiarum Laureacensis et Salisburgensis componit; ea legitur tomo ix Concil. pag. 618, ubi Geroldus dicitur semper *Heroldus*. Dissidium erat inter archiepiscopum Salisburgensem et Laureacensem ob susceptum in una provincia ab utroque pallium. Ecclesia Laureacensis antiquitus metropolitana fuerat, et ab ea in superioris atque inferioris Pannoniæ provincias fidei gratia emanarat. Sed Hunnis illas provincias depopulantibus « contigit, ut episcopi hac necessitate compulsi, sede illa deserta atque alio translata, simul etiam archiepiscopalem ipsius sedis desererent honorem. Modernis autem, nec multum retro elapsis temporibus, vacante ab Apostolico vicario Bauvariorum regno, Arno primus sanctæ Saltzburgensis Ecclesiæ subrogatur archiepiscopus », inquit Agapitus papa, qui subdit, nunc « ab hostibus sanctæ Laureacensis Ecclesiæ quiete et inhabitandi securitate concessa », non alibi quam ibidem Gerardum Laureacensem archiepiscopum cathedram habere oportere. Quare se sanctam illam Laureacensem Ecclesiam in culmen metropolitanum sublimare, denuoque Gerardo pallium concedere.

Illa Hungarorum irruptio sexto sæculo contigit, et Arno, exeunte sæculo viii, primus Salisburgensis archiepiscopus creatus, ut suis locis ostendi.

6. *Archiepiscopus Laureacensis in pristinum statum restituitur.* — Utque omnis dissensio tollatur, « distribuere, inquit, atque determinare ita vobis parochias, bonum et pacificum æstimamus, ut divisis duabus Noricæ regionis provinciis, Heroldo archiepiscopo (sc. Salisburgensi) Occidentalis Pannoniæ cura committatur et custodia; tibi autem successoribusque tuis, propter emeritam antiquitatem sanctæ Laureacensis Ecclesiæ, cui jure juniorum reverentia assurgit, in benedictionis et sedis ordine prælatus atque præpositus, providentiam Orientalis Pannoniæ, regionemque Avarorum atque Maharorum (hoc est, Moravorum); sed et Schlavorum, qui modo Christiani, vel adhuc per baptismum Christo lucrandi sunt, circumquaque manentium, credimus, nostramque Apostolicam vicem in illis partibus prædicandi, et pro arbitrio vestro, ubi opus est, episcopos constituendi, omniaque disponere atque ordinare tali auctoritate atque potestate delegamus, ac si ipsi præsentibus affuissemus ». Sed hæc dissensio inter utrumque archiepiscopum post aliquot annos recrudit, ut suis locis videbimus.

7. *Moritur S. Basilii junior.* — Hoc circiter anno mortuus est sanctus *Basilii junior* vitæ sanctitate et miraculorum virtute eximius, in urbe Constantinopolitana, ubi anachoreta vixit. Ejus Vitam a Gregorio discipulo scriptam Combefisius in linguam latinam vertit, et Bollandus communicavit, qui eam ad diem xxvi mensis Martii publici juris fecit. « Quis », inquit Gregorius, « sufficiet explicare lacrymarum copiam quam fundebat jugiter in oratione pernoctans: quis genuflexiones innumeras, quis continuas vigilias enarrare? Etenim insomnia sidera prius domuisset sopor, quam palpebras ejus dormiendi necessitas. Iracundiam autem sic exuerat, ut non aliud quam immobilis et vitæ expertus columna videretur. Mansuetudine Moyses et David alter, simplex ut Jacobus, innocens ut Job, et plusquam Abraham de sua paupertate beneficus ». Ita ille num. 9, qui postea num. 33 et seqq. narrat varia miracula in seipso et in sua præsentia a sancto anachoreta perpetrata. Ex ea Vita, inquit Combefisius, plurima lux historica accedit Basilio Macedoni imp. ejusque posteris ac successoribus, Leoni, Alexandro, Constantino Porphyrogenito, ac hujus socero Romano Lacapeno cum suis filiis.

AGAPITI II ANNUS 8. — CHRISTI 953.

1. *Per Arnolphum Ottoni rebellem Augustæ deprædatio.* — Annus Redemptoris sequitur nonagesimus quinquagesimus tertius, Indictione undecima, quo Otto rex in gratiam Adelaidis conjugis ejus matri Bertæ contra jus fasque abbatiam dedit Merenstein appellatam: sed suo gravi damno; tunc enim in eum conspirationes ejus filii Lindulphi (Luitulphi) et Chunradi ducis sunt cæptæ, omniaque turbata. De his pluribus apud Reginonis appendicem, et Witichindum et alios res gestas Ottonis prosecutos. Inter has turbas cum sanctus Udalricus Augustanus episcopus una cum suis pro rege staret, Arnolphus comes palatinus filius Arnolphi ducis Bavarie, qui adversus Ottonem partes ejus filii Luitulphi sectabatur, Augustanam civitatem cum suis ingressus, eam est deprædatus. Quæ autem divina hos secuta sit ultio, auctor ejus temporis, fidei, licet rudi stylo, prosecutus res gestas S. Uldarici sic narrat:

2. « Nullus enim eorum, qui antea sibi spolia Augustæ civitatis in contrarietatem sanctæ Dei Genitricis Mariæ vindicaverunt, impunitus evasit, nisi qui se suis propriis rebus cum indulgentia reverendi episcopi redimere non distulerunt. Manus proprias unus ex his lacerando, vicinis suis in veritate dicentibus, perditio sensu, spiritum exhalavit. Alius autem cum ablato de Augusta civitate libro caballum sibi bene placentem comparavit, et secum adduxit in domum suam; quem uxori suæ monstravit et dixit: Melius mihi placet istum formosum caballum habere quam librum, cum quo hunc comparavi, in Augusta relinquere. Cujus verbis respondit uxor ejus dicens: Utile tibi forte fuisset, si manus tua hunc librum injuste non tetigisset. Interim vero ille levigando manu in posteriora tangebatur caballum. Et statim ab eo percussus, mortuus est. Novis et improvisis his cladibus, et aliis multis formidolosis rebus in eis per-

actis, a multitudine populi compertis, timor magnus invasit eos, qui se esse reos cognoverunt de prædicta prædatione Augustæ civitatis: non solum in eos, qui illuc pervenerunt, sed et qui aliquid de injuste acquisitis ab eis acceperunt, et ideo ad pœnitentiam et lamentationem conversi, digna emendatione, et restitutione abstractarum rerum, et cum efflagitatione indulgentiæ episcopi, studuerunt se cum Christo, et cum sancta Maria matre ejus pacificare. Non post multum vero temporis præfatus Arnolphus, qui se præsumpsit res sanctæ Mariæ hostiliter invadere, et incorrigibilis sine pœnitentia perduravit, obsessa Ratispona civitate, paratus ad prælium, exivit, et statim in articulo tumultus occisus est. Quidam etiam homo de episcopatu, qui dicitur Eichstetten, partem vilissimi mensalis ad suam proprietatem portavit, et statim a dæmonio occupatus, nullum abscondendi locum ab eo invenire potuit, neque in Ecclesia, neque extra Ecclesiam, neque aspersus aqua benedicta, quin juxta eum semper videretur manere, donec Augustam regrediens, injuste inde rapta reportavit, et episcopum cum scopis ei flagella imponere pro Christi nomine postulavit, et insuper indulgentiam præfati delicti condonare, sicque liberatus a dæmonio, salvatus recessit». Hæc ibi. Quod autem ad Arnolphum malorum omnium architectum spectat, jam ante plures annos idem S. Udalricus de ejus damnatione visum acceperat, quod accusaretur in sanctorum concilio de multorum monasteriorum ab eo facta destructione, et quod eorum bona laicis in beneficia contulisset, quæ omnia idem auctor accurate describit.

3. *Pallium per legationem missum ab Agapito papa ad Brunonem archiepiscopum Coloniensem.* — Legatio inter hæc mittitur pro pallio accipiendi Romam a Brunone archiepiscopo Coloniensi, qui hoc eodem anno (ut auctor est Frodoardus et alii) defuncto Wicfredo archiepiscopo Coloniensi, in locum ejus legitima electione subrogatus est. Erat idem Bruno frater Ottonis regis, qui ab ineunte ætate usus magistro Israele, sic dicto Scotorum episcopo, multum profecit doctrina et pietate. Porro res ab eo præclare gestæ scriptæ sunt a Rotgero monacho, qui proximus his temporibus vixit. Qui de pallio ad eum ab Agapito papa misso¹, ejusmodi texuit historiam: « Servus Domini Bruno secun-

dum dignitatem sedis suæ, Romanæ quoque Sedis et Apostolicæ benedictionis privilegiis debuit insigniri, et cum eis pariter, qui traditam a beato Petro Apostolo sanam servavere doctrinam, Catholicæ fidei integritate in vera confessione et inviolabili veritate prædicationis uniri. Synodicam suam Epistolam per Itadamarum venerabilem Fuldensis monasterii abbatem Romam ad Agapitum miræ sanctitatis papam direxit, in qua cujus spiritus esset, et quia pastor ab ovibus electus, a Domino missus esset, innotuit; appellatusque est ibi concors et concivis Apostolorum, princeps et propagator Domini præceptorum. Legatus inde cum magna mentis alacritate reversus, pio pastori, cui antehac gratia Dei collatum est (secundum¹ Prophetam) oleum gaudii pro luctu, tum attulit pallium laudis pro spiritu mœroris. Spiritus namque Dei cordato homini, et sacramento hujus magnificæ virtutis magis quam bis quæ visibiliter gerebantur, intento divinitus inspiravit, ut erigeret cor suum in spem per gaudium spirituale, ne tristaretur in eo, quem sensit imminere, labore: Cor enim quod novit amaritudinem animæ suæ, in gaudio ejus non miscebitur extraneus. Sapientiæ² hæc verba sunt.

4. « Legatus ergo (ut loqui cœpimus) Roma rediens, bonum nuntium Coloniæ ferre accelevit, portans sacrum habitum ab universali papa missum, prætendentem jugum Domini suave et onus leve, et ipsum quod sub eo dispensatur, humile ministerium, quod verba Domini testantur dicentis³: Qui major est vestrum, erit minister vester. Ferens simul reliquias de proprio corpore sancti Pantaleonis martyris, et privilegium Apostolicæ sublimitatis auctoritate traditum. Quo et eodem pallio, præter consuetudinem sacerdos Domini, quoties vellet, indui permissus, et concessis omnibus quæ petebantur, ipse præ magnitudine virtutis et sapientiæ, in participatum ejus operis et prope in concessum tantæ dignitatis admissus est. Properavit in occursum ejus læta civitas, undique jubilans accurrit multitudo. Convenerunt in suburbio prope antiquum locum, ubi Ecclesia ejusdem pretiosi martyris erat inculta adhuc et ruinæ proxima: ibi deportata sunt grata onera, deinque suo quæque loco reposita ». Hæc de his Rotgerus.

¹ Isa. LXI. — ² Prov. XIV. — ³ Matth. XX.

¹ Rotger. in Vita S. Brun. c. 23. apud Sur. Iom. v. die XI Octob.

Anno periodi Græco-Romanæ 6446. — Anno Æræ Hispan. 991. — Anno Hegiræ 342, inchoato die 18 Maii, Fer. 4. — Jesu Christi 953.

— Agapiti II papæ 8. — Constantini VIII imp. solius 42.

1. *Germania per biennium civili bello turbata.* — Ad num. 1 et seq. Annalista Hildensheimensis hoc anno scribit : « Satis acerba et nimium crudelis dissensio exorta est inter Liudulfum filium regis (nempe Ottonis) et patrum ejus Heinricum (qui dux Bajoariæ erat), ipso rege partes fratris sui adjuvante. Mansitque per duos annos in incendiis, cædibus et depopulationibus, multique non solum de populo, sed etiam de optimatibus occubuerunt. Hoc etiam anno Moguntia obsessa est (ab Ottone nempe rege) et castellum quod Rossadal nominatur : factumque est magum bellum in illo loco ». Pluribus tumultus illos narrant Witichindus ac continuator Reginonis ad hunc Christi annum, et Baronius ex Vita S. Udalrici eosdem tangit. His adde Hermannum Contractum in Chronico juxta editionem Canisianam : « Otto rex, inquit, fratri Heinrico favens filium contra se incitavit Luitolfum. magnaue totius regni turbatio diversarum partium studiis facta est. Arnolfus filius Arnolphi quondam dux Noricorum (seu Bajoariorum) partibus se Luitolphi contra regem jungens, Augustensem urbem episcopatumque deprædatur, et beatum Udalricum episcopum regi fidum in castello Mandichinda obsessum capere vel occidere nititur. Sed superveniente cum copiis militum Adalperto de Marthale comite et Theodpaldo episcopi fratre item comite, pugna victus, turpiter repulsus est, divinaque ultione cum cunctis fautoribus non multo post digne punitus. In ea congressione Adalpertus comes parum vulneratus moritur et a S. episcopo Augustæ honorifice sepelitur. Secuto tempore cum invalescente discordia Otto rex et filius ejus Luitolfus dux, collectis contra se invicem exercitibus, juxta fluvium Hilaram et villam vocabulo Tussam, jamque pugna conflicturi consedisent, intercurrentibus sanctis episcopis Udalrico Augustensi et Alperto Curiensi, Deo donante, pacificati et confederati sunt ». Porro pacem illam Ottonem inter et filium ejus anno sequenti constitutam fuisse ostendit ibidem Baronius num. 3. Illius discordiæ aliam causam affert Flodoardus in Chronico hoc anno : « Nato siquidem, inquit, regi filio ex moderna conjuge (sc. Adelhaide) ferebatur eidem puero rex regnum suum promittere, quod olim

priusquam Italiam peteret, Liudulfo delegaverat, et magnates suos eidem promittere fidelitatem jurejurando fecerat. Rex igitur Conradum a ducatu Lothariensium removet, et Conradus quærebat, ut regem caperet, etc. » verum Otto filius anno tantum decem regi natus, ut infra dicetur.

2. *S. Bruno fit archiepisc. Coloniae.* — Ad num. 3 et seq. Ibidem Flodoardus hoc anno habet : « Wicfredus Coloniensis antistes defungitur, et Bruno frater regis Ottonis inibi pontifex ordinatur. Cui etiam rex Otto regnum Lothariense committit ». Hic aliqua de sancto hoc præsule in medium afferenda, ut status decimi hujus sæculi magis innotescat : « Annos circiter quatuor habens », inquit Rotgerus in ejus Vita apud Surium ad diem xi Octobris, « liberalibus litterarum studiis imbuendus, Baldrico venerabili episcopo, qui adhuc superest, Trajectum missus est, etc. Deinde ubi prima grammaticæ artis rudimenta percepit, sicut ab ipso in Dei omnipotentis gloriam hoc sæpius nominare didicimus. Prudentium poetam, tradente magistro, legere cœpit, etc. Postea nullum penitus erat studiorum liberalium genus in omni græca vel latina eloquentia, quod ingenii sui vivacitatem aufugeret, etc. Otto germanum suum Brunonem, Deo dicatum, adhuc adolescentulum, honorabiliter, ut par fuit, e scholis in palatium evocavit, locum videlicet tam lucidissimo aptum speculo, ubi quidquid deforme per totum pæne mundum esset in studiis, liquidius appareret. Huc enim ex omnibus ejus finibus confluebat totum, quod sibi aliquid esse videbatur. Nihilominus ab omnibus calumnia qualibet oppressis hoc azylum unicuique petebatur. Exemplar ibi sapientiæ, pietatis et justitiæ, supra hominum memoriam eminebat. Inde reversi, qui sibi paulo ante domi videbantur doctissimi, rubore notati, rudimenta artium, quasi nunc cœpi, dicentes, aggressi sunt, etc. Quidquid historici, oratores, poetæ et philosophi novum et grande perstrepuunt, diligentissime cum doctoribus ejuscumque linguæ perscrutatus est, et ubi magister excelluit ingenii velocitate, ibi se discipulum præbuit humilitate. Sæpe inter Græcorum et Latinorum doctissimos de philosophiæ sublimitate, aut de cujuslibet in illa florentis disciplinæ subti-

litate disputantes, doctus interpres medius ipse consedit, et disputantibus ad plausum omnium, quo nihil minus amaverat, satisfecit, etc. »

3. *Ejus virtutes.* — « Prima dispensatio credita est illi adhuc adolescenti in quibusdam monasteriis, in quibus degentes cum idoneo Ecclesiæ testimonio, partim voluntate, partim vi ad regularem vitam constrinxit, sciens quod et invitis bona præstantur. Ipsaque post paululum Deo sacrata loca, annuente regia liberalitate, privilegiis et immunitatibus pristinis reformavit, nihil sibi suisve exinde beneficii jure reservans, nisi quantum cœnobiorum patres causa charitatis obtulerant. In his extat Loresham, locus regum munificentia nobilis, adhuc in memoriam tanti viri retinens et prærogativam libertatis, et monumenta religionis ». Tum narrata Wicfridi archipræsulis Coloniensis morte, ait : « Conspirantibus omnibus, et idem in Christo sentientibus, cum adhuc inhumatum et ad oculos positum, secundum consuetudinem loci, corpus bonæ memoriæ decessoris ejus adspicerent, electi sunt a senatu sanctissimo quatuor summi viri et eodem numero laici, omnes apprimè eruditi, qui omnia hæc perferrent ad palatium, et patefacta post defletam destitutionem electionis unanimitate, memoratum desolationis flagitare solatium. Quid multa ! Complacuit (Deo gratias) imperatoriæ auctoritati sic et tempori et loco consulere, ut petitem tanta constantia visitatorem, festinanter ad destituti gregis custodiam mitteret ». Refert postea quid egerit Bruno post acceptum archiepiscopatum, ut Luidolfum nepotem, qui cum aliis contra Ottonem patrem conspirarat, in viam revocaret, et quomodo pace inter Ottonem et Luidolfum conciliata regni Lotharingici negotia sapientissime pertractarit.

4. *Anno dcdlv pallium recipit.* — Cæterum quod hic narrat Baronius de pallio ab *Agapito* papa ad sanctum *Brunonem* misso, pertinet ad annum nonagesimum quinquagesimum quintum. Rotgerus enim monachus in Vita sancti Brunonis, antequam referat *Brunonem* Romam ad Agapitum

papam direxisse *Hadamarum* abbatem Fuldensem, qui ei attulit pallium, cap. 21, de Galliarum vastatione per Hungaros verba facit, et capite antecedenti de pace per Brunonem conciliata. Hungari autem anno sequenti in Gallias irrupere, eodemque anno die decima septima mensis Decembris *Ottonem* inter et *Luidolfum* filium pax sancita, uti anno sequenti videbimus.

5. *Adelbertus Italiæ rex Ravennam invasit.* — *Adelbertus*, qui cum Berengario patre in Italia hoc tempore regnabat, *Ravennam* sedem regni præcipuam constituit, et multa violenter egit, ut videre est apud Rubenum lib. 5 Hist. Ravenn. pag. 237 et seqq. ubi aliquas tabulas memorat Ravennæ scriptas regnante *Berengario* et *Adelberto* ejus filio, anno quarto et quinto regni ipsorum, Indict. xii et xiii; mentionem etiam facit conventus aliquot episcoporum utrique subjunctorum Ravennæ habitum, in quo episcopi Ferrariensis precibus, de multis prædiis, quæ occupari ab aliis dicebantur, a Patribus tractatum est. Verum cum exarchatus Ravennatensis ad Romanum Pontificem spectaret, Joannes XII Pontifex Max. *Ottonem* Germaniæ regem in Italiam evocavit, qui cum ab ea tyrannide exempt, ut infra videbimus. Imperatores quidem quia a Pontificibus Romanis omnem auctoritatem accipiebant, Romæ, ducatum Romano et exarchatui Ravennensi dominabantur, sed Italiæ reges nonnisi tyrannice ditionibus Romanæ Ecclesiæ subiectis sese immiscere poterant. Hinc Constantinus Porphyrogenneta, qui opus suum de Thematibus imperii Orientalis scripsit, quo tempore Italia propriis regibus parebat, lib. 2, Themate x, de Urbe Romana scribit : « Roma regium deposuit principatum (subjectionem nempe ab imperatoribus Græcorum) et propriam administrationem ac jurisdictionem obtinuit, eique proprie dominatur quidam suo tempore papa ». Distinguendum itaque imperium Italiæ a regno Italiæ, et quod de uno dicitur ad aliud non extendendum, ut jam supra insinuavi.

AGAPITI II ANNUS 9. — CHRISTI 954.

1. *Alberici obitus et successio Octaviani in Urbis tyrannide.* — Sequitur annus Christi nongentesimus quinquagesimus quartus, Indictione duodecima, « quo », inquit Frodoardus, « Alberico patricio Romanorum defuncto, filius ejus Octavianus, cum esset clericus, principatum adeptus est. Quique postea, defuncto Agapito, suggerentibusque sibi Romanis, papa Urbis efficitur ». Sic Frodoardus ista intuitus scriptor temporis hujus, quique post annos duodecim ex hac vita migravit. Ex quo jure mendacii arguas omnes, qui dixerunt per patrem Albericum ejus filium Octavianum esse promotum ad Pontificatum: nam jam ante ille decesserat, quam ejus filius Pontificatum invaderet, quod contigit anno sequenti. Remansit ergo clericus princeps, qui de arripiendo sibi Pontificatu, statim agere cepit, quod (ut dictum est) sequenti anno perfecit.

2. *Corpus S. Matthæi Salernum translatus.* — Eodem anno corpus S. Matthæi Apostoli Salernum esse translatus, Leo¹ Ostiensis in Chronico Cassinate sic narrat: « Quinto hujus abbatis, nempe Aligerni, anno, qui est a Nativitate Domini nongentesimus quinquagesimus quartus, beatissimi Apostoli et Evangelistæ Matthæi corpus, quod primo apud Æthiopiam, ubi passus est, postmodum vero apud Britanniam (Bithyniam) per multa tempora quieverat, ejusdem sancti Evangelistæ revelatione repertum atque Salernum translatus est ». Hæc Leo.

3. *Pax inter Ottonem et filium per S. Udalricum episcopum.* — Accidit hoc item anno, ut S. Udalricus Augustanus episcopus ad Ottonem regem ac filium ejus Luitulphum habentes exercitus ad pugnam paratos, sequester pacis accedens, eos inter se mutuo conciliaverit, ut de eo illud elogium² Ecclesiasticum jure occini potuisset: « Ecce sacerdos magnus, qui in diebus suis placuit Deo, et inventus est justus, et in tempore iracundiæ factus est reconciliatio ». De his enim ita rebus ab eo gestis: « Cum rex Otto in Alemannia propter

eos, qui cum Luitulpho filio ejus ditioni suæ regalis potestatis contradicere voluerunt, cum exercitu conversaretur juxta flumen, quod Hilara vocatur, in campo oppidi, quod dicitur Tussa, et ibi sæpe dictus filius ejus Luitulphus cum alio exercitu obvius ad pugnandum contra eum deveniret, et cum tanta vicinitate conjuncti essent, ut nulla ambiguitatis spe detenti manerent in utrarumque partium multitudine, ni bellum ab eis committeretur: tunc amabilis Deo Udalricus episcopus in Deum tota fiducia confidens, assumpto Curiensis Ecclesiæ Hartberto religioso episcopo, legationes inter eos facere cepit, et ad pacis concordiam exorare, et ne populus, qui a Deo illis commendatus est ad regendum, pro eorum reatu duceretur ad perditionem, Deo autem annuente duræ eorum mentes, patris scilicet Ottonis et filii ejus Luitulphi de proficua admonitione et doctrina venerandorum episcoporum in mollitiâ versæ, pactum pacis inter se placitaverunt, et turbine belli mitigato, in sua cum pace redierunt ». Hæc ipse, eademque ex eo Berno abbas: quod factum hoc anno, decimo septimo kal. Januarii, Marianus affirmat. Opera insuper Brunonis Coloniensis archiepiscopi factum esse, ut pater filio reconciliatus ei Italiæ regnum delegarit, scribit Rotgerus¹ monachus in Brunone.

4. *Lotharius in regnum Francorum, Willelmus in sedem Moguntinam legitime adsciti.* — « Quo pariter anno », ut Frodoardus testatur, « moritur Ludovicus rex Francorum, cujus filius Lotharius puer apud sanctum Remigium rex consecratur ab Artaldo Rhemensi archiepiscopo, favente Hugone principe et Brunone archiepiscopo Coloniensi, cæterisque præsulibus et proceribus Franciæ, Burgundiæ et Aquitaniciæ ». Sed et eodem anno defuncto Friderico archiepiscopo Moguntino, subrogatus est in locum ejus Willelmus filius Ottonis, cujus magna est laus ex sacerdotali constantia apud Petrum Damianum: agemus de eo suo loco. Firmavit ipse suo chirographo tempus, quo

¹ Leo Ost. l. II. c. 5. — ² Eccl. XLIV.

¹ Rotger. in Vit. S. Brun. c. 35.

sedere cœpit, quod sic recitatum invenies apud Marianum Scotum : « Eodem vero anno ego Guillelmus tantæ successionis indignus, loco ejus cum consensu cleri et populi ejusdem tantæ sedis, decimo sexto kalend. Januarii (ipsoque die pace inter regem Ottonem et filium ejus Luitulphum facta) in loco Aranstedii sum electus, et die nono kal. Januarii Moguntiae ordinatus ».

5. *Synodus Noviomensis, et de diebus festis servandis monita.* — Eodem anno celebrata est a Rodolpho Noviomensi episcopo Synodus, et inter alia in ea stabilitum de feriando die sanctæ Hunegundis virginis, cujus corpus haud pridem inventum fuerat. In non servantes autem sanctæ Synodi decretum, divina sunt ostensa prodigia, ut illud inter alia, quod post decennium accidit, quod sic recitatur in ¹ Appendice ad Vitam ejus :

6. « Anno Dominicæ Incarnationis nongentesimo sexagesimo quarto, in ipsis feriis beatæ Hunegundis, in villa quæ dicitur Sasnolphi, messores frumenta secabant. Eos presbyter illorum crebro reprehenderat, dicens, se interfuisse Synodo, in qua Rodolphus Noviomensis episcopus jussisset sanctæ Hunegundis festum devotissime celebrari. At illi se excusabant, quod vicinos suos cernerent laboribus insudare. Itaque Rotgildis puella, presbyteri hujus (sicut ipse nobis retulit) ex sorore neptis, colligebat spicas, quas illi messores relinquebant. Ecce autem dum se inclinat ad eas colligendas, eam, quam primum sustulit, recenti sanguine madentem conspicit. Admirans unde ille esset sanguis, rejicit spicam : tollit alteram, tollit tertiam, quartam, quintam, et multas alias, et omnes videt sanguinolentas. Territa valde currit ad patrem suum, qui tum forte in agrum exierat, indicat quid sibi acciderit. Pater cum puellari levitate ductam reprehendit, jubet redire ad cœptum opus. Illa vero trepidante, sequitur eam pater, simulque plurimas colligunt spicas cruore madidas. Inquirunt, num quis ex messoribus digito saucio sit. Illis obstupescantibus et sancte affirmantibus nullius læsam esse manum, quasdam spicas ad Ecclesiam ferunt, offerunt presbytero, remque ei omnem exponunt. Ille ait, nisi certiora afferant documenta, se hominibus incredulis non ausum esse pro concione id indicare. Illo hoc dicente, quasi crassæ quædam lacrymæ ex spicis sanguineæ prorumpentes, guttæ in terram decidunt. Tunc ille pæne exanimis effectus præ timore, sicut prius timuerat indicare illud populo, ita nunc multo etiam magis celare timet, ne sua negligentia tardius ad populi notitiam perfeatur.

7. « Dato igitur signo, populum ad Ecclesiam convocat, ejus inobedientiam reprehendit, divinum exponit miraculum. Illi, audito tam insolito miraculo, animis consternantur : ad agendam pœnitentiam se promptissimos exhibent. Denique ab Ecclesia egressi, circumquaque vicinis suis denuntiant,

ne deinceps vacent operi, sed ad Ecclesiam se conferant, rem stupendam visuri. Exterrentur omnes, missa faciunt opera, haud aliter quam si imminentes hostes fugerent. Orant supplices, ne cælesti ultione plectantur. Interea rusticus quidam, Robertus nomine, in eadem villa frumentum excutens, dum hæc ad ipsum perferuntur, projicit e manibus flagellum, promittit se ab opere cessaturum. Sed homo ineptus, quasi id levius esset, scopas arripit, convertit in area frumentum. Mox vero brachium ejus obrigescit, humique prostratus clamat se reum, et illico e vita abiturum. Ea res superiorem timorem auxit.

8. « Presbyter vero circumquaque discurrens, sanguinolentas spicas vicinarum Ecclesiarum episcopis ostendit. Turbantur omnes, convocatisque suarum parochiarum hominibus, cum crucibus et cereis simul omnes nudis pedibus cum votis supplicibus, comitante etiam illo, cujus brachium obriguerat, et puella spicas sanguinolentas ferente, ad monasterium perpetuæ Virginis Mariæ et sanctæ Hunegundis propere contendunt : ibique prostrati fatentur culpam suam, petant humiliter, ut fratres pro ipsis Dominum deprecetur : quod etiam factum est. Erant jam qui non credunt huic signo, et calumniantur pariter cum eo, quod item in sanguine patratum est sub Pharaone in ¹ Ægypto. Nos vero benedicamus Deum, qui mirabilis ² est in sanctis suis, qui dat virtutem et fortitudinem plebi suæ. Benedictus Deus in sæcula. Amen ».

9. *Ratherii Veronensis episcopi abjectio, restitutio, virtutes et scripta.* — Hoc eodem anno ³ Ratherius vir illustris inter scriptores hujus temporis, idemque episcopus Veronensis, invidorum persecutione pulsus ab ea Ecclesia, a Brunone Coloniensi archiepiscopo susceptus in patrocinium, ab eodem præficitur Ecclesiæ Leodiensi : de quo ista Rotgerus in Brunone : « Ratherius Veronæ, quæ civitas est Italiæ, ordinatus præsul, cum ex quadam levi suspitione, ut mos est gentis illius, ab honore sedis illius esset expulsus, Leodiensi cathedræ vacanti magna ejus industria secundum statuta canonum incardinatus est. Quod quidem propter abundantem doctrinam et eloquentiam copiosam, qua inter sapientissimos florere visus est, non eidem Ecclesiæ solum, cui præfuit, sed et multis aliis circumquaque valde proficuum fore putatum est. Simul, quia in illis partibus per zelum et contentionem, unde fieri solet ⁴ inconstantia et omne opus pravum, quidam etiam sacerdotes Domini plerumque (quod dictu nefas est) terrenæ plus justo confisi potentiæ populum imperitum scandalizabant : sæpeditus, sæpeditendus dominus Bruno Coloniensis archiepiscopus, cui jam totius regni dispensandi cura imminabat, ratus id quod verum fuit, hunc ejectum, antehac et neglectum, hoc tanto beneficio ad illud fidei et veritatis fœdus adduci,

¹ Exod. VII. — ² Psal. LXVII. — ³ Rotger. in Vit. S. Brun. Episc. Colon. c. 38. apud Sur. lom. v. die XI Octob. — ⁴ Jac. III.

¹ Apud Sur. die XXV Jun. l. IV.

ut a nemine posset reduci, ita demum os loquentium inimica (iniqua) obstruere posse credidit, si nulla occasio scandali posset in eorum episcopo reperiri. Sed ad suam perniciem pars sinistra prevailuit. Quidquid pro eorum salute gestum est, hoc sibi pestiferum aestimabant. Quid multa? erratum est, sævitum est, nec cessatum est, donec expulsionem ejus crudelitati suæ et nequitiae satisfacerent. Ablata est omnis spes restitutionis ejus; conspiratio enim gravissima facta est; quæ, nisi et hic penitus amoveretur, et eundem locum Baldricus, qui erat de magnatum terræ illius prosapia oriundus, subrogaretur, sedari non posse visa est. Ad hanc sentinam tempestates undique et innumeræ confluxerunt. Navis Ecclesiæ, laberante remige, fluctuavit; gubernator ipse procellosæ tempestatis impetum ferre non potuit. Cessit igitur, cessit ne vinceretur a malo, sed vinceret in bono malum. Cessit adversantium voluntati, ut suo eos gladio jugularet. Sibi obstricti sunt sacramentorum fide spontanei, ut si accipere mererentur episcopum quem pelebant, invicta exinde firmitate auctoritatem Ecclesiæ et jus imperatorum tuerentur. At ne quid in hujusmodi negotio imperfectum restaret, quod curiosis alienarum rerum investigatoribus scrupulum commoveret, cum imperatore germano suo id effecit, ut Ratherio episcopo bis jam destituto antiqua sedes Veronensis Ecclesiæ redderetur». Hæc de Ratherio Brunonis opera dato episcopo Leodiensibus, et restitulo in sedem pristinam Veronensem.

10. Porro abjectionem potius, quam canonicam depositionem fuisse Ratherii ab Ecclesia Veronensi, sicut et Petri ab Ecclesia Ravennate, testantur¹ Acta Rhemensia sub Gerberto, his verbis: «Item quæ circa Ratherium Veronensem episcopum usu vel consuetudine provenerunt, ab omnibus abrogata sunt. Uterque enim nec abdicationis porrecto libello, nec sacerdotalibus depositis insignibus, successorem acceperat, Ratherius quidem Milonem, Petrus Honestum monasterii beati Apollinaris abbatem, quem Honestum dominus Joannes papa, cognomento Bonus, ad consecrandum prius sibi allatum vidit, quam de Petri deiectione vel fama nuntiante cognoverat». Hæc ibi.

11. At non hic finis ejus angustiarum; siquidem itidem Verona pulsus est, qui pulsus jam antea fuerat ab Hugone in Italia regnante, cujus expulsionem eam afferunt causam, quod in ejus pravos mores invecus est: prius vero ejectionis ea prætexta fuit causa, quod in suspicionem adductus esset, quod

in Italiam contra eundem Hugonem Arnoldum vocasset: ob idque de triplici sua eiectione ipse lusit hoc versu:

Veronæ præsul, sed ter Ratherius exul.

12. Reversum autem post tertium exilium in suum monasterium Lobicense, unde progressus erat, obiisseque ibi diem extremum anno primo Ottonis secundi, qui numeratur nongentesimus septuagesimus tertius, Sigebertus affirmat, in suo autem tumulo, humilitatis ergo hæc scribi voluisse, Henricus testatur: CONULCATE, PEDES HOMINUM, SAL INFATUATUM.

13. Ejus autem ingenii lucubrationes istæ relicte fuerunt, liber scriptus in primo exilio de suis ærumnis: alius in secundo exilio, inscriptus Phrenesis: tertius in tertio, Inefficax titulo prænotatus. Insuper ab eo constat scriptum librum de corpore et sanguine Domini. Rursum alium contra Anthropomorphitas, quorum error in Gallia Cisalpina eo tempore valde coaluerat. Alium Antagonisten nominatum, Confessionum quoque librum unum, insuper et Vitam S. Ursuarii episcopi, ex cujus Præfatione, sicut ex unguibus leo, cognoscitur vir fuisse eximie virtutis, dum (quod est in sacris¹ sententiis): «Justus in principio sermonis accusator est sui», Dei providentiæ et justo ejus judicio cuncta tribuens, hæc habet, cum meminil de suo exilio: «Apud venerabilem nuper S. Romanæ Ecclesiæ justo Dei judicio exulans episcopum, reperi libellum, etc.» Et in fine: «Precor interea inter hujus mundi miserrime fluctuantem naufragia orationum vestrarum contineat anchora; id ipsum ab exiguitate licet postuletis mea, modo tanti peccatoris non dedignetur Dei pietas intendere suffragia, etc.» Hæc ipse. Hicque status luctuosus nobilissimæ Ecclesiæ Veronensis, cui hoc tyrannorum tempore frui non licuit episcopo suo Ratherio hujus temporis magni nominis viro, quæ alias sæpe digna fuit quamplurimos sanctissimos habere pastores, quibus Tabulæ Ecclesiasticæ decorantur; illustratur vero adhuc amplius hoc nostro sæculo integerrimo viro Augustino Valerio digno ejus episcopo, antiqua probitate antiquioribus prædecessoribus merito comparando, doctrinam autem pluribus præferendo, nostri quidem sacri cardinalium collegii ornamento.

«Eodem anno (Ditmarus² ait) cruces in vestibus apparuerunt, quod signum digne accipientibus profuit, irridentibus autem obfuit».

¹ Acta Rhem. c. 44.

² Prov. XVIII. — ² Dilm. I. II. Chron.

ANNO PERIODI GRÆCO-ROMANÆ 6447. — ANNO ÆRÆ HISPAN. 992. — ANNO HEGIRÆ 343, INCHOATO DIE 7 MAII, FER. 1. — JESU CHRISTI 954.

— AGAPITI II PAPÆ 9. — CONSTANTINI VIII IMP. SOLIUS 43.

1. *Bellum civile in Germania continuatum.* — Ad num. 3. Bellum civile in Germania continuatum, sed sub hujus anni finem extinctum. Nam præter ea quæ hac de re refert Baronius ex auctore Vitæ sancti Udalrici Augustani episcopi, continuator Reginonis hoc anno scribit: «Rex (nempe Otto) omissa obsidione (nempe Moguntiæ) in Saxonia Natalem Domini celebravit (annum ab ea die, quemadmodum Regino, anonymus iste inchoat), iterumque appropinquante Quadragesima in Bavariam remeavit. Ibi Heroldus archiepiscopus (nempe Salisburgensis) a fratre regis cæcatus, Deo propitio, viribusque imminutis inimicorum, in brevi tota Baviaræ virtus ad eum et Alemanniæ in tantum convertitur, ut Ratispona civitas regi redderetur, ipsique rebellatores nihil se contra eum velle vel posse profiterentur. Fridericus etiam sacramento se expurgaturus nihil contra regiam se fidelitatem egisse, accessit: sed rex omni pietate plenus, eum sacramento absolvit. In eodem anno Chunradus dux cum Lothariensibus, duce Brunone archiepiscopo (sc. Coloniae) in Belensi pago apud villam Rimilinga congressurus erat. Sed in ultimo quia contra regem erat, Deo volente ne fieret, remanebat. Hungari, ducentibus inimicis regis, in Quadragesima, Rheno transito, pervadentes Galliam, inaudita mala in Ecclesia Dei fecerunt, et per Italiam redierunt». Postea loquitur de pace quæ hoc anno peracta est, quam etiam narrat Witichindus lib. 3, qui subdit: «Moguntia post annum et dimidium regi tradita cum omni Francia (nempe Lotharingia): filius (nempe Luidolfus) ac gener (nempe Conradus, qui anno MCDXLVII Liutgardam Ottonis filiam in matrimonium sumpsit, ut habet continuator Reginonis ad eum Christi annum) in gratiam suscepti, qua et in finem usi sunt fideliter».

2. *Hungari a filio ac genero Ottonis in Germaniam evocati.* — Hanc Hungarorum in Galliam irruptionem Fulcuinus abbas Laubiensis qui, ut inquit continuator ejus Chronici, obiit anno Domini cæ Incarn. MCDXC, egregie descripsit, libr. miraculorum S. Ursuari abbatis Laubiensis, recitato a Mabillonio Sæc. III Benedict. part. 1, et a Bollando ad diem XVII Aprilis S. Ursuari sacram: «Erat, inquit, in ea conjuratione princeps, ipsius regis

filius Luidolfus, spectabilis adolescens et unice carus, si seductoribus non credidisset, et hæres esse non proditor voluisset: atque cum eo, quasi quidam stimulus, Cono dux paulo ante fortissimus, quibus, (ut ita dicam) omnia erant in manibus, sed agendo ut plus haberent, omnimode effecerunt ut nihil haberent. Hi Hungros, antiquam quam prædiximus pestem, sollicitaverunt ut regnum in seipsum divisum invaderent: arbitantes hoc modo sollicitudinem qua premebantur, aut penitus adimi, aut aliquatenus posse minui. Hac, ut dicere instituimus, occasione, sæva Hungrorum gens, et qualem nunquam terra nostra sensit barbariem, a perversis civibus illecta, transitis Germaniæ et plerisque provinciis Galliæ, cui jam nobilis ille Francorum populus insederat, omnia ferro et ignibus vastatura se totam infudit. In hac acie, Cono quem prædiximus, cum suis sequacibus militavit. Sed ubi Trajectum ventum est, quam Mosa alluit, incertum qua factione ab eis dissidium fecit. Hungri Hasbaniam igne et rapina aggressi, Carbonariam petunt. Fama ad nos perlata, mittitur e collegio nostro (e monasterio nempe Laubiensi) Huibertus, frater patiens laboris et fugitans quietis, et semet impendere paratus ob amorem loci et sanctæ religionis, pacisci cum illis. Facta pactione de solidis ducentis, revertitur post hæc, obsidibus ab eis acceptis». Cononis nomine, Folcuinus, uti et multi alii, intelligit Conradum Ottonis regis generum. Pergit Folcuinus.

3. *Lotharingiam aggrediuntur.* — «Sed nostri non satis creduli (quæ enim fides est infideli?) munire Tudinium (castrum vulgo *Tuin* dictum, ad Sambram fluvium) tentant, quod Raginerus (hujus nominis II, Hannoniæ comes) suspectam habens Leodiensem militiam, jampridem destruxerat: sed misso rursus milite, prohibiti sunt munitionem firmare; Deo, ut postea compertum est, maxime id agente, ut ostenderet, non in homine, sed in se et in sanctorum suorum patrocinio defensionem illos sperare debere. Sublata itaque spe Tudinium potiundi, et crebrescente fama deprædationis et incendii, nullaque extante fiducia in re militari (siquidem laudata illa et cunctis sæculis prædicata Lothariensium militia, justo Dei judicio in Hungrorum adventu hebetata, suis passim munitionibus

erat inclusa) nostra quæ residua erat Deo dilecta monachorum turma, et sibi satis fida Ecclesiæ nostræ familia, id quod verum est rata, quod nunquam videlicet desit divinum. ubi humanum cessat auxilium, montem ubi sanctorum Ursmari et Ermini corpora venerantur, diu deliberans scandit, et de Dei fisa adjutorio, cum plaustorum vel quorumcumque surculorum vel sepium impedimentis in modum munitionis cingit. Jamque advenerat Paschalium dierum sancta celebritas, in completionem Octavarum ipsius quæ erant quarto nonas Aprilis (quia scilicet hoc anno Pascha in diem xxvi Martii incidit): ecce subito in exordio matutino densaverat aerem equorum nebula, et quasi ex abditis terræ finibus, emergebant loricarum et galearum millia. Expavescere nostri, et mortem sibi præmeditari. Qui agiliores erant, non dico munitionem, sed simulacrum munitionis scandunt, inno veram munitionem per sanctorum Dei intercessionem. Reliqui, qui impeditiores erant ætate aut gravitate, infra monasterii claustra subsistere.

4. *Laubienses monachi miraculo ab eorum obsidione eripiuntur.* — « Qui substiterant capiuntur: obsidentur alii: nulla inter captos et obsessos distantia, nisi quod, secundum quemdam, gravior est expectata quam illata mors. Obtruncantur in adpectu adspicientium Theodulphus et Thentmarus, qui inter captos visi sunt excellentiores, reliqui flagellati captivitati reservantur. Interea urgentur obsessi, nec ulli telorum aut tormentorum parciunt generi; nostri e contra pro viribus resistere, et conglomerato plebium et clericorum ipso etiam monachorum agmine (quamvis illicitum sit huic ordini arma tractare), quoniam pro anima illis erat res, eniti obnixi. Ubi eo ventum est ut desperaretur omnino, tantum audiebatur Kyrie eleison, et sancte Ursmare adjuva, more gentis usitato. Jam irruptionem timentibus, jam in mutuis oculis hærentibus, jam plerisque deditionem pangentibus, ecce ex respectu miserationis Dei duæ ex adytis templi columbæ evolant. Subsecuta est illico pluvia prægrandis, quæ gentiliciam illis sagittandi artem cordarum distentione frustravit. Pavor quoque ac timor tantus in eos irruit, ut maturarent fugam, et principes ipsi uterentur flagris in eos qui volebant subsistere ». Paulo post subjungit: « Et hæc est celebritas quæ ita inscribitur in nostris Martyrologiis: Quarto nonas Aprilis commemoratio meritorum Ursmari et Ermini, qui meruerunt Laubienses ab Hungrorum obsidione eripi ». Porro Heroldus, de quo supra continuator Reginonis, archiepiscopus erat Salisburgensis, qui injuriam sibi illatam ratus, quod Otto rex favisset Gerardo archiepiscopo Laureacensi, de quo anno superiori, cum factiosis fœdus inierat, quem ideo, ut anno dclxvii magis videbitur, Henricus Bajoariæ rex perfidiæ damnavit, eique oculos exculpi jussit. Illis addo quæ Sigebertus chronographus, in Vita S. Guiberti fundatoris monasterii Gemblacensis de hac Hungarorum, irruptione cap. 13 memo-

riæ mandavit: « Hæc gens, inquit, etiam tempore primi Ottonis aggressa Lotharingiam, deducta est a duce Conrado usque ad silvam Carbonariam, et virtute Dei apud Laubiense cœnobium ostensa, prohibita ultra prodire, rediit impune ».

5. *Pax Ottonem inter et filium ejus constituta.* — Guillelmus Ottonis regis filius, in Chronico a se scripto et a Trithemio in Chronico Hirsaugiensi citato, hæc verba scripsit, quæ ad hunc annum Marianus Scotus in suum Chronicon transtulit: « Anno Dominicæ Incarnationis dcliv, Indict. xii, beatæ memoriæ dominus Fridericus, sanctæ Moguntiacensis Ecclesiæ archiepiscopus, VIII kalend. Novemb. obiit. Eodem vero anno, ego Willelmus tantæ successionis indignus, loco ejus, cum consensu cleri et populi ejusdem sanctæ sedis, XVI kalendis Januarii, ipsoque die pacem inter regem Ottonem et filium ejus Luttolfum facta, in loco Aranstedii sum electus, et in die IX kalendis Januarii Moguntiae ordinatus », die nempe xxiv mensis Decembris, in quam Dominica cadebat. Quibus verbis intelligimus, pacem Ottonem inter et filium ejus sub hujus tantum anni finem compositam esse. Porro Willelmus princeps fuit magnis virtutibus præditus, Ottoni regi ex Editha priori conjugæ natus. Ejus meminit Baronius hoc anno num. 4, et laudata verba refert.

6. *Moritur Ludovicus IV rex Francor.* — Ad num. 4. *Ludovicum Transmarinum*, Francorum regem hujus nominis IV, hoc anno naturæ debitum solvisse, Flodoardus in Chronico alique passim docent. Dies ejus emortualis, nempe IV idus Septembris notatur in Ms. Psalterio Hemmæ reginæ apud Rhemos asservato; quod confirmat Mabillonius lib. 2 de Re Diplom. cap. 26, § 3, ex Necrologio Autissiodorensi, ubi IV id. Septemb. laudatur *Ludovicus serenissimus rex filius Karoli*, scilicet Simplicis; tum ex ejus Epitaphio ex Ms. Codice descripto, quod in medium adducit, in quo habetur cum IV idus Septemb. decessisse, regnasse annis octodecim, et sceptro donatum, id est, coronatum fuisse in Ecclesia sancti Remigii apud Rhemos. At argumentum ab eo Epitaphio deductum nullius est roboris, cum Marlotus lib. 4 Metropolis Rhemensis pag. 583 testetur, versus illos in appensa tabula descriptos, esse recentioris auctoris. Præterea Mabillonius his duobus versibus:

Remigius regum sanxit consulta priorum:

Huic dederat sceptrum; præstat et huic tumulum.

colligit *Ludovicum* coronatum fuisse in Ecclesia B. Remigii apud Rhemos; sed cum certum sit ex Flodoardo in Chronico ad an. dclxxxvi, continuatore Aimoini lib. 5, cap. 43, et Chronicis Virdunensi et sancti Petri Vivi ad annum dclxxxvi, Ludovicum Lauduni ab Artaldo archiepiscopo Rhemensis unctum fuisse, versus illi tantum significant, Ludovicum a sancti Remigii successore sceptro donatum esse.

7. *Ei successit Lotharius filius.* — Reliquit ex *Gerberga uxore* Ottonis Germaniæ regis sorore, *Lotharium*, qui, ut scribit idem Flodoardus ad annum DCDLXVI, conjugem accepit Emmam filiam Lotharii, Italiæ quondam regis, ac Adelhaidis hoc tempore Ottoni Germaniæ regi nuptæ. Chiffletius in *Historia Trenorensi* pag. 287, observavit, *Lotharium* Ludovici patris, triennio antequam moreretur, consortem in regno fuisse. Ibi enim refert Instrumenta duo data « feria vii, nonodecimo kal. Februar., anno xx regnante Lothario rege », anno scilicet Christi DCDLXXI, littera Dominicali A notato. Fuit *Lotharius* penultimus regum Francorum ex familia Caroli M.

8. *Varia Ratherii episcopi Veronensis fortuna et mors.* — Ad num. 9 et seq. *Ratherius*, de quo supra, ex Veronensi episcopatu pulsus, rediit ad partes episcopatus Leodiensis, et in verbis et scriptis clarus habebatur. Interea Faraberto Leodiensium episcopo mortuo, bis ab episcopatu Veronensium depulsus, per *Brunonem* Coloniensem archiepiscopum, an. Dom. DCDLIII, ordinatus est episcopus Leodiensis, inquit *Ægidius Aureæ vallis monachus*, in *Additionibus ad Historiam Anselmi canonici Leodiensis*, cap. 45. Sed nondum turbarum finis, nam, ut ait auctor anonymus libelli de *Gestis abbatum Gemblacensium* pag. 514, tom. vi *Spicilegii Dacheriani* « ab A. D. DCCCLXIII, odibilis Deo Hubertus, frater reginæ Tietbergæ, fugato Hartreto

abbate, abbatiam Lobiensem invasit usque ad annum Domini nongentesimum quinquagesimum sextum, quo Baldricus, expulso Ratherio, cathedrali Ecclesiæ Leodiensis accepit ». His adde quæ Folcuinus lib. de *Gestis abbatum Gemblacensium* in eodem tomo Dacheriano cap. 24 scribit : « Exacto in hac destitutione sua Ratherius ferme biennio, deficiente ab eo militari copia, Italiam revertitur ». Addit Folcuinus : « Cum imperatore germano suo prædictus Bruno (episcopus Coloniensis, cujus Ratherius præceptor fuerat) id effecit, ut eidem jam bis destituto, antiqua sedes Veronensis Ecclesiæ restitueretur », ideoque anno DCDLVII aut insequenti ; sed iterum a suis clericis male habitus est, ut ipsemet in libello de sua discordia pag. 217, et in suo Romano Itinerario pag. 265 tom. vi Dacheriani exponit. Quare in monasterium Lobienense, cui præerat Folcuinus auctor *Chronici Lobiensis*, reversus est. Tandem anno nongentesimo septuagesimo quarto obiit Ratherius, sed non apud *Lobias*, ut eo anno Sigebertus in *Chron.* habet, verum apud *Namucum* (seu Namurcum), cum ibi forte cum comite moraretur, ex eodem Folcuino citato. *Ratherii* vexationes fuse declarat Mabillonius *Sæculo v Benedictino* in ejus *Elogio historico*, ubi et de variis ejus operibus agit, quorum aliqua edita sunt tom. II et XII *Spicilegii Dacherii*, qui tom. II enumerat ea quæ nondum lucem viderunt.

AGAPITI II ANNUS 10. — CHRISTI 955.

1. *Octavianus juvenculus, mortuo Agapito, Romanum Pontificatum occupat.* — Annus Redemptoris sequitur nongentesimus quinquagesimus quintus, Indictione decima tertia, quo ingens perturbatio Ecclesiam Romæ invasit : quo sanctissimo Agapito bene functo munere pastoralis, ex hac vita migrante, cum annos novem, menses septem, et dies decem sedisset (quonam autem mense vel die decesserit, antiquorum nemo prodit, recentiores vero suo id arbitrato divinant) ipse quem diximus anno superiori, Octavianus Alberici filius Urbis princeps, Apostolicam Sedem invadit. Cui etsi omnia quæ conveniunt ad legitimam electionem suppetissent, ex ætate tamen longe dispari, ut legitime

ordinari potuisset episcopus, redarguitur illegitime electus, qui (ut ostendetur) juvenculus erat vix pubertatis annos excedens. De invasione vero ejus Sedis acturis nobis, repetenda sunt hic recitata anno superiori verba Frodoardi temporis hujus scriptoris fidelissimi, hæc dicentis : « Albericio patricio Romanorum defuncto, filius ejus Octavianus, cum esset clericus, principatum adeptus est : quique postea, defuncto Agapito, suggerentibusque sibi Romanis, papa Urbis efficitur ». Hæc anno superiori.

2. Albericus autem pater ejus munitionem Sancti Angeli, quæ dominabatur Romæ, Hugone rege pulso (uti dictum est) occupaverat, et Romanæ

Urbis principatum sibi pariter vindicaverat; ejus successor filius et ipse tyranni hæres, tyrannus duplex efficitur malorum consilio, dum etiam in Ecclesia ambiens principatum, summum Pontificatum usurpat, quo totius orbis Christiani principibus spirituali regimine præsit. Addunt faces homines factiosi insano puero, ut quæ ejus ætatem superant, audcat atque perficiat. An autem ipse hoc tempore plenam pubertatem expleverit, ex his quæ Luitprandus, qui cuncta habebat præ oculis, scribit, possumus dubitare, dum recitat Ottonis imperatoris verba de ipso dicentis: Puer est, facile bonorum mutabitur exemplo virorum. Hæc Otto, dum excusat in adolescentulo audita scelera, plane significans ejus ætatem, quæ plenam ephæbiam non exccsserat.

3. Verum et illud magnopere considerandum est ad rei veritatem investigandam, quod quando Otto imp. dicebat ista, octavum ipse agebat in Pontificatu annum, ut quæ suo loco inferius dicturi sumus declarabunt. At quot annorum Octavianus hoc tempore esse potuit, qui puer et puerilia gerens, nominatus fuit ab imperatore post annos octo, erit et hoc adeo difficile reperire, si nuptiarum patris et matris ejus recta ratio certi temporis habeatur. Constat quidem, Luitprando auctore et aliis, quod pater ejus duxit uxorem Aldam Hugonis regis filiam (ut dictum est) anno nongentesimo trigesimo sexto circa finem ejus: adeo ut ipse etiam si primogenitus fuit, non potuerit nasci ante annum trigesimum septimum: qua ratione dicendum esset, ipsum ad summum nonnisi annos decem et octo habere potuisse, cum invasit Pontificatum.

4. Verum ipsum non fuisse primogenitum, ex eo possumus intelligere, quod cum constet ante hæc vitam clericalem amplexum esse, alium cui principatus deberetur natum esse ante ipsum oportuisse. Sed demus primogenitum ipsum fuisse primoque anno conjugii natum, certe (ut dictum est) nonnisi agentem decimum octavum creatum Pontificem oportuit. Abortivum istum tunc parturit Romæ tyrannis vi pollens, armis omnia miscens, omnia audens atque subvertens, ut nullo pacto dicendus tunc fuerit legitimus iste Pontifex, in cujus electione lex nulla sit suffragata, sed omnia vis et metus impleverint: cum qui nec ætate diaconus esse potuit, ostensus sit tanquam in scena minus Pontificem agens. Attamen accedens consensus, hunc tolerandum utcumque perditissima illa tempora suaserunt magis, quam Ecclesiam schismate scindere, ejus vitandi causa, utpote mali omnium pessimi, universa Catholica Ecclesia cum est venerata Pontificem, minoris sciens esse mali monstruosum quantumlibet caput ferre, quam duobus capitibus infamari, et secari corpus unum in duo. Ille autem revera primus inventus qui mutavit sibi nomen, ut qui ex Octaviano, voluerit nominari Joannes, pro mutata, non exulta tyrannide: nam qui dictus est a patre ob

temporale Urbis dominium Octavianus, ob spirituale nomen Joannes appellari ideirco voluit, vel quod eo nomine ejus patruus, Joannes XI papa sit appellatus, vel ut in nomine saltem bene posset audire in adulatoriis acclamationibus, quibus male usurpatum proferri soleret sacrum illud elogium¹: « Fuit homo missus a Deo, cui nomen erat Joannes ».

5. *Ungari in Germaniam irrumpentes tum precibus S. Udalrici, tum Ottonis armis penitus funduntur.* — Hoc eodem anno, magno Dei beneficio contigit, ut Otto rex Germaniæ infestissimos barbaros Hunnos in Germaniam se concertissimo exercitu infundentes deleverit. Testatur id Frodoardus hoc anno. Quam quidem victoriam longe ante fuisse a sancto Udalrico divina revelatione præcognitam, qui res ab eo gestas fideliter est prosecutus, affirmat: « Indicavit ei, inquit, venturam supergressionem Ungarorum, et loca belli, et quamvis laboriose, tamen victoriam Christianis concessam esse nuntiavit ». Et inferius: « Altero pro certo statim anno, quod est annus Incarnationis Domini nostri Jesu Christi nongentesimus quinquagesimus quintus, tanta multitudo Ungarorum erupit, quantam tunc temporis viventium hominum nemo se antea vidisse in ulla regione profitebatur: et Noricorum regionem a Danubio flumine, usque ad Nigram-Silvam quæ pertinet ad montana, simul devastando occupavit; et cum Licum transcenderet et Alemanniam occuparet, Ecclesiam sanctæ Afræ concremavit, et totam provinciam a Danubio usque ad silvam deprædavit, et maximam partem usque ad Hilaram fluvium igne combussit: Augustam autem civitatem obsessit, quæ tunc inis sine turribus circumdata muris, firma ex seipsa non fuit. Sanctus autem antistes magnam valde multitudinem optimorum militum secum intra septa civitatis collocatam habebat, ex quorum agilitate et audacia civitas fortiter firmata, Deo juvante, consistebat ». Subjicit auctor de diligenti studio ab ipso sancto episcopo tunc exhibito, quando stola tantum sacerdotali munitus, non galea, non clypeo lectus, huc et illuc equo vectus discurrens inter arma perseveravit illæsus. Hæc die: nocte autem quid ageret, sic subdit:

6. « Ille autem totum spatium noctis in oratione pernoctans, religiosas mulieres in civitate congregatas concitabat, ut una pars earum cum crucibus ad Dominum devote clamando intra circumirent, et altera pars clementiam sanctæ Dei Genitricis Mariæ pro defensione populi, et pro liberatione civitatis studiosissimo pavimento prostrata flagilaret. Ipse autem minimam particulam noctis ante matutinam horam corpus requiei soporis indulsit, ut matutinis laudibus expletis, aurora primum irrumpente, salutaris sacrificii hostiam Deo libare licuisset. Ministerio sacro peracto, viatico sacro omnes recreavit, humilique adino-

¹ Joan. 1.

nitioe persuasit, ut in fide recta persistentes, spem suam in Domino componere non dubitarent, indicens eis omnigenam sponsonem consolationis, et annuntians psalmographi David verba dicentis¹: Si ambulavero in medio umbræ mortis, non timebo mala, quoniam tu mecum es, etc. » Sic plane accidit secundum illud² Apostoli: « Sancti per fidem castra etiam verterunt exterorum », ut plane non minori virtute ipse Augustanam defenderit civitatem, quam Otto rex eos pugnando deleverit: de quo mox subjicit ista:

7. « Rex igitur cum tantum exercitum Ungarorum perspexisset, æstimavit non posse ab hominibus superari, ni Deus omnipotens eos occidere dignaretur, in cujus adiutorium confidens, suorumque consolationibus principum roboratus, bellum viriliter cum eis agere cœpit, et cum mutua cæde utrobique cecidissent, et his interfectis qui ad occisionem a Deo prædestinati erant, gloriosa victoria Ottoni regi a Deo cui nihil est impossibile data est, ita ut exercitus Ungarorum in fugam versus, virtutem præliandi ultra non haberet. Et quamvis incredibilis numerus illorum occisus fuisset, tantus tamen adhuc exercitus eorum remanebat, ut hi, qui de propugnaculis Augustæ civitatis eos venire conspexerunt, non pugna lacessitos eos redire existimaverunt, donec prætereuntes civitatem, ulteriora Lici fluminis littora festinando repetere cognoverunt. Rex autem cum suis eos sequens, et quibus se conjungere potuit occidens, vespertina hora diei pervenit ad Augustam ». Sed et sequenti die eodem in sequendo delevisse testatur, eorumque reges Ratisponam perductos in ipsorum ignominiam laqueo suspendisse. Celebrata est omnium ore tanta victoria, quam obtentam tradunt die S. Laurentii, ex qua vix septem vel sex fugientes evasissent. Nunquam autem apud nostrates talem esse auditam victoriam, apud Reginonem testatur auctor qui auctarium ad ejus historiam apposuit. De hac victoria Ottonis adversus Ungaros meminit etiam Ditmarus hujus temporis scriptor, aitque: « Quod pugnaturus Otto adversus eos in die S. Laurentii martyris, vovit eidem sancto dedicare episcopatum Merseburgensem, quando et exurgens post celebratam missam a sancto Udalrico confessore episcopo Augustano, post sacram acceptam ab eo communionem, hastam sacram accepit, et pugnavit et vicit ». Hæc quidem ipse, libro secundo sui Chronici. His quoque addimus de eadem perinsigni victoria tunc adversus Ungaros oblata, quæ et ipse ultimus scriptor³ Rotgerus in Vita Brunonis archiepiscopi Coloniensis ait his verbis: « Imperator indici sanxit jejunium ipsa die, quæ tunc erat in Vigilia sancti Laurentii martyris, pro cuius interventu sibi populoque suo ipsum Deum poposcit esse refugium ». Hæc fuit Christiani principis

ad victoriam strata via, nempe jejunium, per quod sanctorum sibi conciliaret auxilium.

8. Porro ingentes gratiarum actiones repensas Deo, Deique Genitrici Mariæ, omnibusque sanctis, pro tam gloriosa consecuta victoria, qui res Saxonum persecutus est⁴ Crantius tradit. Qui vero suis præsto fuit propugnantibus civitatem, præsul sanctissimus Udalricus, eosdem post bellum quos liberavit aluit cives, clericisque inopia laborantibus necessaria ministravit, locaque sancta incensa restituit, S. Afræ Ecclesiam in loco ipsi divinitus ostenso ædificavit, aliaque addidit pia opera tanto antistite digna.

9. *Eduinus rex Angliæ S. Dunstanum ejus impudicitis aversantem in exilium pellit.* — Hoc pariter anno, Anglicana Ecclesia, defuncto optimo rege Edredo, sive Eadredo, succedente Eduino Edmundi regis filio, voluptuoso viro, sacrarum legum contemptore, nonnihil est perturbata, S. Dunstano ipso regni exordio in exilium relegato, eo quod ipse eum e sinu impudentissimæ feminae violenter abstraxisset. Quomodo autem ista se habuerint, narrat² Osbertus his verbis: « Erat in illis diebus mulier quædam ex magna et alta progenie filiam adultam secum habens. Utramque, quantum ad corpus spectat, formosa species decorabat. Sed quod pudicis mentibus non parvæ offensionis erat, libidinosus animus et habitus, qui juxta in eis operabantur, eandem speciem valde decolorabant. Hæ præfato regi Eduino assidue adhærebant suis blanditiis et nutibus illecebrosis, pro viribus operam dantes, quatenus unam earum sibi in conjugium copularet. Ad quas ille, impudico illiciti amoris desiderio fervens, indecenti amplexu, nunc hanc, nunc illam, neutrius ad aspectum in hoc erubescens, dstringebat. Præterea, die quo ipse Eduinus in regem est consecratus, a loco convivii in quo cum archiepiscopis, episcopis, abbatibus, totiusque regni principibus sedebat, jam pransus exiit, et relictis omnibus, in cameram ubi præfatæ feminae erant, solus secedit, capitique corona sublata, se inter illas medium jecit. Quod optimates cognoscentes, oppido indignati sunt, et rem tractantes inter se, Odonem archiepiscopum Cantuariensem, qui dignitate cæteris eminebat, unanimiter hortari cœperunt, quatenus viros mitteret, qui regem sive volentem sive nolentem festine reducerent.

10. « Ad quod agendum cum hi et illi regiam iram metucentes se excusarent, tandem super Dunstanum et ejus consanguineum Kinsinum, episcoporum sententia versata est. Qui ex præcepto summi Pontificis et aliorum omnium, ingressi ad regem, eum (ut dixi) in medio duarum illarum decubantem repperunt. Tunc Dunstanus primum in ignominiosas mulieres aspera increpationis verba

¹ Psal. xxii. — ² Hebr. xi. — ³ Apud Sur. tom. v die xi Octobr.

⁴ Cran. hist. Sax. l. iv, c. 6, 7. — ² Osbert. in vit. S. Dunstan S. Tim. c. 22. apud Sur. die xix Maii tom. iii. et Floriac. hist. Mat. Westmonaster. hoc anno.

vultu et voce contorquens, lascivias earum, sicut verum castitatis amatorem decuit, detestatus est. Deinde regem ut se tanti opprobrii exortem faceret monens, ad proceres eum redire eosque sua præsencia exhilarare summissa voce precatus est. Qui animi sui furore similiter et vultus sui rubore perfusus, dum se rediturum omnino negaret, Dunstanus manum illius arripuit, et a loco violentè abstractum, imposito capiti ejusdem diademate, ad convivantes introduxit. Quod mulieris ignominia nullatenus æquanimiter ferens, sævis verborum invectionibus in virum surrexit, et secum confusione perpeluæ tradituram, garrula contestatione devovit. Et hoc quidem detestabile volum, non tepescente malitia ejus, facto exercere sollicita postmodum fuit. Effecit namque apud regem, ut cuncta quæ in Dunstani monasterio habebantur, diripi ac devastari, et ipsum e regno elimina-

tum in exilium pelli juberet ». Hæc Osbertus ejus temporis auctor. Quomodo autem, vindice Deo, rex ob scelus in virum sanctum commissum pellendo eum e regno, ipse e regno sit expulsus, et quæ causa ejus exilii fuerat femina scelestissima, ab iisdem regis persecutoribus necata sit, idem auctor inferius narrat. Sed hæc nobis satis ad instilum.

41. *Veremundus regnat in Hispania.* — Eodem anno defuncto Ordonio rege Legionensi, relicto filio Veremundo adhuc impubere, regni habenas moderandas suscepit Sancius Crassus ipsius Ordonii frater. Quod fertur de ingenti victoria monitu Pelagii Eremitæ hoc tempore obtenta per Ferdinandum Gundisalum, an veritate subsistat, consule Ambrosium, cæteris a nobis historicis rerum Hispanarum præferendum.

ALLO periodi Græco-Romanæ 6448. — Anno Æræ Hispan. 993. — Anno Hegiræ 344, inchoato die 27 April., Fer. 7. — Jesu Christi 911.

— Agapiti II papæ 10. — Constantini VIII imp. solius 44.

1. *Agapitus II anno sequenti demortuus.* — A num. 1 ad 5. *Agapiti II* Pontificis Romani obitum, hoc anno a Baronio male collocatum, Papebrocius in conatu Chronico-Historico in annum sequentem recte differt, sed quod ait, eum sedisse annos ix, menses vii, dies x, mortuum die xviii Martii, et xxii ejusdem mensis *Joannem XII*, antea *Octavianum* appellatum, consecratum fuisse, vetera Monumenta refellunt. Rubeus enim in Hist. Ravennatensi lib. 5, pag. 238 et seqq. mentionem facit Chartæ datæ « anno quarto Joannis Pontificis, regnante Berengario et Adelberto ejus filio anno x, quarto idus Maii, Indict. iii, Ravennæ », anno scilicet Christi dcdlx. Quare Joannes XII post diem duodecimam mensis Maii sequentis Christi anni Pontificatum suscepit. Præterea ejusdem archiepiscopi tabulas memorat « nono ka-

lend. Sextil. anno septimo Joannis Pontificis, imperante Ottone in Italia anno secundo » confectas, ideoque die vicesima quarta mensis Julii an. dcdlx iii. Ex quo consequens est, Joannem XII anno dcdlvi post eundem diem ordinalum esse Pontificem Romanum. Denique refertur ibidem quædam donatio Petro archiep. Ravennatensi et ejus successoribus facta XIII kal. Septemb. Indict. vi, Ravennæ, anno Joannis Pont. Max. septimo », anno scilicet Christi dcdlxiii, ac die vicesima mensis Augusti. Quare eo die ac mense, Joannes XII anno dcdlvi nondum Pontificatum gerebat, ideoque quæcumque de duratione et fine Pontificatus Agapiti II Joannis decessoris Papebrocius in medium profert, stare non possunt, constatque Agapitum II decimum Pontificatum annum prætergressum esse (1) (2). Quamobrem apud Marianum Scotum, Martinum Polonum, ac quin-

(1) Quæ a Rubeo afferuntur litteræ Joannis XII, cum iis temporis characteribus, de quibus hic apud Pagium suspicionis merito arguerentur, nam aliæ ejusdem Pontificis litteræ alias temporum notas exhibent. Extant apud Ughellium in Beneventanis tom. viii, pag. 57, novæ edit., litteræ ejusdem Pontificis datæ XVIII kal. Januarii, anno Pontificatus ejus secundo, Indict. xv, nempe anno dcdlvi, e cujus Septembri Indictio xv more Romano ejus ætatis constanti cœperat. Ex his ergo constat optime a Baronio Joannis initium, et Agapiti exitum cum anno dcdlv illigatum fuisse; alias enim anno dcdlxvi, Joannes non secundum, sed primum adhuc Pontificatus annum egisset. Id etiam confirmat ejusdem Joannis constitutio pro erectione archiepiscopatus Magdeburgensis, et episcopatus Merseburgensis, vulgata in amplissima collectione Monumentorum t. i, col. 317. Signatur hæc « die V id. Februarii anno Pontificatus domini Joannis septimo, imperii domini piissimi Augusti a Deo coronati magni imperatoris anno primo, Indict. v », nempe anno dcdlxii, quo annum septimum Joanne agente constat ntique initium ejusdem, non quidem ab anno dcdlvi, post mensem Augusti, sed ab anno dcdlv, vel saltem a Januario anni dcdlvi duci oportere. Ex his postremis Joannis XII litteris, ne credas Magdeburgensis archiepiscopatus initia ab anno dcdlxvii cui illigantur, revocanda esse ad hunc annum, cum Joannes quidem illas hoc anno dederit, sed eo deinceps ab imperatore sese abalienante, nonnisi sub Joanne XIII ejus successore id executioni mandatum fuit, ut docet annalista Saxo Eccardi ad A. dcdlxii. Denique in Chronico Vulturneo, in tom. i, part. 2 rerum Italicarum, extat bulla ejusdem Joannis anni dcdlxii, cum his temporis characteribus: « Scriptum etc. mense Julio, Indict. v, in sacratissima Sede B. Petri Apostoli, vii anno pontificatus Domini Joannis ». Ex his constat Joannem Pontificatum cepisse ante Julium anni dcdlvi, et post Julium anni dcdlv. Accedit demum bulla hujus Pontificis, quam Pagius A. dcdlvii, 12 commemorat, data IV nonas Januarii, anno primo Pontificatus Joannis, Indictione xiv. Pertinet hæc ad annum dcdlvi, ac saltem probat Joannem vel exeunte anno dcdlv, vel ipso statim iocunte an. dcdlvi cepisse. Nec est cur mendosam Indictionis notam cum Pagio ibidem commiscamur; nam bullæ hujus cum reliquis ejusdem Pontificis, a nobis hic indicatis, consensus ab omni mendii suspitione illam liberat.

MANSI.

(2) Mense Novembri an. dcdlvi, adhuc in cursu erat annus *primus Joannis XII*. Regestum Sublacense pag. 75: « Anno Deo pro-

que ex nostris Catalogis supra menses et dies menses descriptos, Agapito II anni decem accurate assignantur. Pontificatum inierat anno nongentesimo quadragesimo sexto, ante diem decimum quintum mensis Junii, annoque DCDLVI, post diem xx mensis Augusti e vivis excessit, mense et die incertis, postquam sedisset annos decem, et aliquot menses. Joannes XII primus ex Pontificibus Romanis fuit, qui nomen mutaverit, uti Baronius observavit. Quam pravis moribus *Joannes XII* imbutus fuerit, liquet ex iis quæ Baronius an. DCDLXII, num. 5 et seqq. de eo refert.

2. *Bellum Hungaricum.* — A num. 3 ad 9. Otto Germaniæ rex, celebrem hoc anno, die decima mensis Augusti, sancto Laurentio sacra, insignem victoriam *de Hungaris* reportavit, de qua Witichindus lib. 3, Dilmarius, auctores Vi-tarum sanctorum Udalrici episcopi Augustani,

ac Brunonis archiepiscopi Coloniensis, aliique mentionem fecere. Hanc his verbis Witichindus, qui hoc tempore vivebat, narrat: « Otto Germaniæ rex ingressus Saxoniam circa kal. Jul. obvios habet legatos Ungarorum tanquam ob antiquam fidem et gratiam eum visitantes, re autem vera, ut quibusdam videbatur, eventum belli civilis (quod exeunte Decembri superioris Christi anni finem accepit) considerantes. Quos cum secum aliquot diebus retinisset, et aliquibus munusculis donatos remisisset in pace, audivit a nuntiis fratris, ducis scilicet Bajoariorum, quia ecce Ungari diffusi invadunt terminos tuos, statuuntque tecum inire certamen. His auditis, rex quasi laboris oblitus, quem præterito bello toleravisset, cepit ire contra hostes, sumptis secum paucis admodum ex Saxonibus, eo quod jam bellum Sclavonicum urgeret. Castris positis in confiniis Augustanæ urbis,

pitio Pontificatus domni Joannis summi Pontificis et universalis XII papæ in sacratissima Sede B. Petri Apostoli primo, Indict. xv, mense Novembri, die xiv ». *Indictio* inchoatur ex more a *kalendis Septembris* an. DCDLVI: « Gratianus in Dei nomine consul et dux, pro remedio animæ suæ donat Leoni abbati Sublacensi, ejusque monasterio terram sementariam ad modiorum plus minus tres, positam foris portam majorem non longe a muro ipsius civitatis Romanæ ». Jurant « per Deum omnipotentem, sanctæ Sedis Apostolicæ, seu salutem Johannis XII papæ ». Ibid. pag. 27 ejusdem Diploma eidem *Leoni* abbati pro eodem monasterio. In fine legitur: « Scriptum per manum Leonis scriniarii et notarii sanctæ summæ Sedis Apostolicæ, in mense Maio, Indictione supra jam dicta prima. Bene valete.

« Datum VI idus Maii per manum Martini episcopi sanctæ Polimartiensis Ecclesiæ et bibliothecarii summæ Apostolicæ Sedis, anno Deo propitio Pontificatus domni Johannis summi Pontificis et universalis X. (Hic visitur litura, ubi aliquis numerus abrasus est) papæ in sacratissima Sede B. Petri Apostoli tertio, in mense et Indictione suprascripta prima ». Annus tertius Pontificatus et Indictio prima nulli alii quam *Johanni XII* accommodari possunt. Ibid. pag. 54, habetur *Judicatum*, seu *Breve memoratorium* ejusdem *Joannis XII*, cujus exordium, licet alia manu, ut ex atramento nigriore appareat, suppletum est, tale est: « Anno Deo propitio Pontificatus domni Johannis summi Pontificis et universalis XII, in sacratissima Sede B. Petri Apostoli, Indictione prima, mense Maio, die... » Librarius omisit annum Pontificatus et diem mensis. Ceterum ex Indictione prima est annus DCDLVIII. Ibi *Leo* abbas S. Benedicti Sublacensis narrat, dominum papam venisse Sublacum ibique cognovisse de injuriis quas monachi perpessi fuerant, postquam *domnus Albericus* (Johannis XII pater) ex hac vita migravit. Hinc residente eodem Pontifice « cum venerabilibus episcopis, videlicet Marino Polimartiensis Ecclesiæ et bibliothecario sanctæ Sedis Apostolicæ, Constantino Portuensis, Johanne Tiburtiniensis, seu Romanis judicibus Georgius secundicerio, Leo protoscriniario, et novilibus etc. » Audite sunt utraq; partes a Pontifice, episcopis et cæteris judicibus; prolata sunt Privilegia, quibus visis et auditis, pœnas parti adversæ remisit Pontifex, deinde monasterio loca quædam confirmat et iterum concedit. Subscribunt.

✠ Marinus episcopus et bibliothecarius S. R. E. in hac breve recordationis, ut supra legitur, interfui et manu propria subscripsi.
✠ Johannes humilis episcopus S. Tiburtinæ Ecclesiæ.

✠ Benedictus exiguus sanctæ Sedis Apostolicæ diaconus, huic breve memoratorio interfui et subscripsi.
✠ Georgius Dei providentia secundicerius S. Sedis Apostolicæ, in hac breve memoratoria interfui et subscripsi.
✠ Stephanus nobili viro.
✠ Theophilactus.

Ego Leo scriniarius et tabellio Urbis Romæ, scriptor hujus Chartulæ, et post testium subscriptione et traditione facta, complevi et absolvi. Alia Charta in eodem Regesto pag. 74 ita incipit: « Anno Deo propitio Pontificatus domni Joannis summi Pontificis et universalis XII PP. in sacratissima Sede B. Petri Apostoli quarto, Indictione II, mense Februario, die IX. Ex Indictione secunda est annus DCDLIX. Ibid. pag. 99, col. 2: « Anno Deo propitio Pontificatus domni Joannis summi Pontificis et universalis XII PP. in sacratissima Sede B. Petri Apostoli quarto, Indictione II, mense Novembri, die... » Et hic Indictio inchoata a kal. Septembris an. DCDLIX denotat. Ibi *Marozza senatrix omnium Romanorum* pro remedio animæ suæ donat *Leoni* abbati Sublacensi filium Salinæ positum in *Serpentaria*. Jurat per salutem domni *Johannis XII PP.*

✠ Signum manus suprascripta Marozza senatrix, quæ hanc Chartam offertionis in suprascripto monasterio S. Benedicti de filia Salinæ posito in *Serpentaria* fieri rogavi.

Benedictus Scriniarius et tabellio Urbis Romæ.
In eodem Regesto pag. 148, habetur Chartula donationis et oblationis, quæ incipit: « Anno Deo propitio Pontificat. domni Johannis XII PP. in sacratissima Sede B. Petri Apostoli VI, Indict. IV, mense Aug. die VIII » quod est: A. D. DCDLXI. Ibi « Johannes gratia Spiritus sancti humilis episcopus sanctæ Narniensis Ecclesiæ et bibliothecarius sanctæ Sedis Apostolicæ hunc parvum munusculum studio offerre libi, B. Benedicte, confessor Christi ». Donat et offert monasterio S. Benedicti Sublacensi petias duas vineæ *bobaricæ*, positas *via Appia*, milliaro ab Urbe plus minus xv, in fundo *nobule*. Jurat per salutem *Johannis XII PP.* Subscribit:

✠ Johannes gratia Dei episcopus S. Narniensis Ecclesiæ. Ita alia ibidem, pag. 160, Chartula die IX Augusti data cum iisdem chronologicis notis.

Chartula donationis ibidem pag. 147: « Anno Deo propitio Pontificat. domni Johannis summi Pontif. et universalis XII PP. in sacratissima Sede B. Petri Apostoli VIII, imperii domni et perpetui Augusti Ottonis a Deo coronati anno II, Indict. VI, mense Maio, die XIX, Marozza venerabilis diacona » pro remedio animæ suæ, et de *Leone et Jorga*, quondam bonæ memoriæ genero et filia sua, monasterio Sublacensi et S. *Erasmii*, nempe *Johanni* ejusdem monasterii abbati, tres petias vineæ *bobaricæ* positas in territorio Ariceni. in fundo qui vocatur *Lalerani et Aginti*. Jurat per salutem *Johannis XII papæ*.

SUBSCRIPTIONES.

✠ Marozza ven. diac.

Andreas Scriniarius S. Sedis Apostolicæ testis.

Theophylactus eminentissimus consil testis.

Adrianus nobilis vir testis.

Ex his chronologicis notis, et præsertim ex ea, in qua die IX Februarii, Indictione secunda, annus Pontificatus quartus prænotatur, apparet exordia Pontificatus alliganda esse A. D. DCDLVI, circa mensem Februarium.

GEORGIUS.

occurrit ei exercitus Francorum Bajoariorumque. Cum valido quoque equitatu venit in Castra Cunradus dux (sc. Franconiae, antea Lotharingae:) cujus adventu erecti milites jam optabant non differre certamen. Nam erat natura audacis animi, et quod rarum est audacibus, bono consilio, et dum eques et dum pedes iret in hostem, bellator intolerabilis, domi militiaeque sociis charus. Igitur ab utriusque exercitus latrocinantibus agminibus notificabatur, non longe exercitus ab altero fore. Jejunio in castro indicto, iussum est omnes in crastinum paratos esse ad bellum.

3. *Acies Ottonis.* — « Primo diluculo surgentes, pace data et accepta, operaque sua primum duci, deinde unusquisque alteri cum sacramento promissa, erectis signis procedunt e castris numero quasi octo legionum. Ducitur exercitus per aspera et difficilia loca, ne daretur hostibus copia turbandi sagittis agmina, quibus utuntur acerrime, arbustis ea protegentibus. Primam et secundam tertiamque legionem direxerunt Bajoarii, quibus praefuerunt praefecti ducis Henrici: nam ipse bello interim aberat, eo quod valetudine corporis laboraret, qua et mortuus est. Quartam vero ordinavere Franci, quorum procurator et rector erat dux Cunradus. In quinta quae erat maxima, quae et dicebatur Regia, ipse princeps vallatus, lectis ex multis militum millibus alacrique juventute, coramque eo Angelus penes quem victoria, denso agmine circumseptus. Sextam et septimam construxerunt Suevi, quibus praefuit Burchardus, cui nupserat filia fratris regis. In octava erant Bohemi electi milites mille, armis potius instructi quam fortuna: in qua et sarcinae omnes et impedimenta quaeque, quasi ipsa esset tutissima quae esset novissima.

4. *Prælium.* — « Sed aliter res acta est ac arbitrabatur; nam Ungari nihil cunctantes Lech fluvium transierunt, circumeuntesque exercitum extremam legionem sagittis lacessere coeperunt, et impetu cum ingenti vociferatione facto, aliis caesis, aliis captis sarcinis omnibus potiti, cæteros legionis illius armatos fugere compulerunt. Similiter septimam ac sextam aggressi plurimis ex eis fuis, in fugam verterunt. Rex autem cum intellexisset bellum ex adverso esse, et post tergum novissima agmina periclitari, misso duce cum quarta legione, captivos eripuit, prædam excussit, latrocinantiaque hostium agmina perturbavit. Fuis latrocinantibus undique adversariorum agminibus, signis victricibus dux Cunradus ad regem revertitur: mirumque in modum cunctantibus veteranis militibus gloriae victoriae assuetis, cum novo milite et fere bellandi ignaro triumphum peregit ». Paulo post: « Totum pondus prælii ex adverso jam adesse conspiciens rex, exhortandi gratia allocutus est socios suos hoc modo etc. Et bis dictis, arrepto gladio et clypeo ac sacra lancea, ipse primus equum in hostes vertit, fortissimi militis ac optimi imperatoris officium gerens. Hostium audaciores primum restitere,

deinde ut socios viderunt terga vertere, obstupfacti, nostrisque intermixti exstinguntur. Cæterorum vero alii equis fatigatis, villas proximas intrant, circumfusique armatis cum mœniis pariter concremantur: alii flumen contiguum transnantes, dum ripa ulterior ascendentes non sustinet, obvolvuntur et pereunt.

5. *Victoria Ottonis.* — « Eo die castra invasa, captivique omnes erepti: secundo die ac tertio a vicinis urbibus reliqua multitudo in tantum consumpta est, ut nullus aut rarus evaderet. Sed non adeo incruenta victoria fuit de tam sæva gente; Cunradus quippe dux fortiter pugnans animi fervore solisque ardore, qui eo die nimius erat, accensus æstuans, vinculisque loricae solutis, dum auram captat, vulnere sagittae adverso gutturis defixae cadit: cujus corpus juxta regis imperium honorifice collectum transportatur Wormatiam, ibique sepelitur vir omni virtute animi ac corporis magnus atque famosus, cum fletu et planctu omnium Francorum. Tres duces gentis Ungariae capti, ducique Henrico praesentati, mala morte, ut digni erant, multaculi sunt suspendio, namque crepuerunt. Triumpho celebri rex factus gloriosus, ab exercitu Pater Patriae, imperatorque appellatus est. Decretis proinde honoribus et dignis laudibus summæ divinitati per singulas Ecclesias, et hoc idem sanctæ Matri ejus per nuntios demandans, eum tripudio et summa lætitia Saxoniam victor reversus, a populo libentissime suscipitur: neque enim tanta victoria quisquam regum intra ducentos annos ante eum lætatus est ». Pugnatum fuisse in die sancti Laurentii martyris, Ditmarus alique affirmant.

6. *Moritur Edredus rex Angliæ.* — Ad num. 9 et seq. Edredum Angliæ regem piissimum hoc anno ad Deum migrasse, unanimi consensu scriptores Anglici tradunt. Ei successit Edwius Edmundi regis, qui ante Edredum regnavit, filius, qui propter ætatis defectum patri non successerat. « Cum rex Edredus », inquit auctor Vitæ sancti Odonis archiepiscopi Cantuariensis, num. 12, « transitoriam vitam vita perenni permutasset, Edwius filius supra memorati regis Eadmundi in regem electus est: qui moribus et ætate juvenculus, juvenum quos sibi comites atque satellites associaverat, mox coepit consiliis uti, spretis senibus, quos vita, moribus et ætate magna, præditos industria et auctoritate constabat. Unde correptus a fortissimo milite Christi Odone, aliquantisper se temperabat, verens ne si illum omnimodis non audiret, regiae dignitatis benedictionem ultra votum suum sibi dare differret. At ubi eadem benedictione potitus est, illico quasi effrenus effectus, omnes cordis sui sequebatur affectus. Factus est igitur voluptatum magis quam Dei, luxuriæ quam sobrietatis, libidinum quam castitatis amator. Ibat itaque juxta desideria cordis sui, et iniqua gerens a suis benedicebatur. Super hæc, ea die qua regni coronam in conspectu totius Ecclesiæ in capite gessit, gravis

infamiae notam tantae gloriae et sibi injectit. Cum enim post Officium Ecclesiasticum una cum archiepiscopis, episcopis, abbatibus, caeterisque principibus regni jam pransus sederet, subito exilivit, et relicto consortio omnium in secretiorem sese cameram contulit, duarum feminarum illic cum operientium stupri ardore accensus infandum consortium expetens: quae res confidentium mentis magni pudoris mœrore dejecit. Habito autem consilio inter eos quid facto opus esset, missus est ab archiepiscopo et primoribus his, cujus superius mentio facta est, venerabilis abbas Dunstanus, regem ab illicitis amplexibus abstrahere, et ad regiam sedem inter principes revocare: quod et factum est. Quapropter rex vehementi furore turbatus, Dunstanum suis omnibus spoliatum exilio damnavit, et extra Angliam trans mare fugavit. Fecit et alia innumera mala, quae quoniam alias latius, licet non omnia, digesta sunt, hic tantummodo paucis ea tetigisse sufficere ratus sum». Nec aliter de Edwio scriptores Anglici loquuntur. Porro Dunstani exilium, quod Baronius ex ejus Vita hoc anno narrat, pertinet ad annum sequentem, ut ibi monstrabimus. Chronographus Saxo nuper editus Edredum seu Eadredum mortuum dicit *festo sancti Clementis*, nempe die xxiii Novembris.

7. *Obitus Ordonii Legionis regis.* — Ad num. 41. Mortuo hoc anno *Ordonio* Legionis rege, et *Veremundo* ejus filio adhuc impubere, *Sancius Crassus* Ordonii frater regni regimen suscepit, uti Baronius narrat.

8. *Moritur Henricus Bajoariae dux.* — Henricus Ottonis Germaniae regis frater ac Bajoariae dux hoc anno vivere desit. Fuit princeps summi animi ac dignus imperio, nisi illud impotentius olim fratri extorquere conatus esset. Ei *Henricus* filius, Ottonis regis voluntate suffectus est. Henricum autem hoc anno mortuum esse, continuator Reginonis, Hermannus Contractus secundum editionem Canisianam, alique testantur. Quanto dolore ex Henrici ducis morte *sancta Mathildis* ejus mater affecta fuerit, pluribus narrat auctor anonymus ejus Vitae jussu sancti Henrici imperatoris scriptae, cap. 4: « Post obitum, inquit, memorandi regis

Henrici (nempe Aueupis) assidue induit coccinum unius coloris, non in publico, sed sub lineo vestimento, et pro decore ornamenti, ante se gessit parum auri. Hoc totum (id est, mortuo Henrico filio) tunc deposuit, et postmodum lugubri veste induta decessit. Posthac neminem voluit audire carmina saecularia cantantem, nec quemquam videre ludum exercentem; sed tantum audivit sancta carmina de Evangeliiis vel aliis sacris Scripturis scripta. Necnon in hoc sedulo delectabatur, ut de Vita vel passione sanctorum sibi cantaretur. Caetera mundi delectamenta respuit, et tuta intentione divino famulatui tantum intendit ».

9. *Fides et disciplina Ecclesiast. ab antiquis Britannis conservatae.* — Licet antiqui *Britanni* a Saxonibus undique oppressi gement, Ecclesiasticae tamen disciplinae rigor, auctoritas episcopalis et templorum reverentia apud eos vigeant. *Patre* enim (id nomen ejus erat) *episcopo* Landavensem Ecclesiam administrante, *Nougui* rex Ecclesiam expilavit, ejusque libertatem laesit. Is tamen, ut videre est apud Spelmannum pag. 429, de his in Synodo Landavensi anno dcdxlii habita reprehensus, non solum omnia Ecclesiae reddidit, sed etiam cum lacrymarum effusione veniam petiit, et villam quandam cum toto suo territorio in elemosynam dedit. Tum hoc anno congregata alia *Synodus Landavensis* propter diaconum a rustico quodam vulneratum, quem cum diaconus jugulasset, et in templum fugisset, ibidem a quibusdam viris de familia regis *Nougui* ante altare occisus est. In ea autem Synodo viri sex, qui crimen illud patrant, postquam menses sex in ferreis carceribus detenti fuissent, definitum est, ut unusquisque eorum suum agrum, suamque totam substantiam, insuper et pretium animae suae, hoc est, septem libras argenti, redderet Ecclesiae quam maculaverat, ut in eadem Synodo hoc anno coacta legitur. Quare inter tot rerum regnorumque vicissitudines antiqui *Britanni* fidem Orthodoxam conservarunt. Utraque Synodus *Landavensis* in tomum ix Concil. inserta est.

Sanctus Bruno archiepiscopus Coloniensis palatium ab Agapito II accipit ex dictis anno dcdlii.

JOANNIS XII ANNUS 4. — CHRISTI 956.

1. *Lues in provinciis Borealibus.* — Sequitur annus Christi nongentesimus quinquagesimus sextus, Indictione decima quarta, quo gravissima pestilentia vexavit Boreales provincias, prodigiosis antea in vestibis crucibus apparentibus. Ea¹ autem et ipse Otto tactus, sancti Viti martyris intercessionem liberatur. De eo enim ita Witichindus²: «Eo tempore imperator (ita per anticipationem appellat, qui tantum rex erat) et ipse ægrotare coepit, sed meritis sanctorum, quibus fidele iugiter obsequium præbet, maximeque patrocínio inelucti martyris Viti, cui aperuit os suum, de infirmitate convalescit, et mundo, ut sol lucidissimus, post tenebras ad omnem decorem et delicias condonatur». Hæc ipse.

2. *Defuncto Theophylacto patriarchæ Constantinopolitano succedit Polyenctus.* — Hoc eodem anno moritur Theophylactus Constantinopolitanus patriarcha, homo omni ex parte turpissimus, de quo ista Curopalates: «Mensis Februarii vicesima septima, Indictione decima quarta, decessit e vita Theophylactus patriarcha, sacerdotio functus annis viginti tribus, diebus viginti quinque, sexdecim annos natus, quando contra canones Ecclesiæ accepit gubernacula, et sub pædagogis, henl usque ad aliquod tempus vitam transegit: atque utinam id semper ille fecisset! Videbatur enim gravis et moderatus; sed cum jam ad maturiorem pervenisset ætatem, permissus suo modo vivere, nihil ex iis, quæ turpissima essent, aut omnino interdicta prætermisit, venales proponens Ecclesiasticos ordines et creationes episcoporum, et alia faciens, quæ veris episcopis indecora sunt, equorum cupidine insaniens, et venationibus deditus, aliaque turpia patrans facinora, quæ sigillatim enarrare, præterquam quod haud decet, etiam nefas est. Sed unius tantum facienda est mentio, ut illius mens a disciplina abhorrens ostendatur. Amore intolerabili tenebatur equos possidendi, et supra duo millia sibi comparasse dicitur, quibus alendis semper plurimum studebat, non tænum aut hordea illis apponens, sed pinorum fructus, et amygdala, et pistacia,

itemque dactylos et caricas et uvas passas molliores odoratissimo vino miscens, et crocum cinnamomumque et balsamum, atque alia aromata cum iis quæ diximus singulis equis apponebat ad alios cibos.

3. «Aiunt etiam sacra peragenti, magna illa quinta sacræ Cœnæ die, et preces mysteriorum legenti, ministrum illum, cui fuerat equorum commissa cura, hoc bonum nuntium attulisse, maxime insignem illam phorbantem equam, addito nomine, peperisse. Et illum præ nimio gaudio, quod reliquum erat sacrificii utcumque peracto, cursu ad stabulum contendisse, conspectoque nato pullo, absurdo spectaculo expleto, ad magnum templum rediisse, ut absolveret sanctæ Dei et Salvatoris nostri Passionis hymnum. Illius item opus fuit, mos qui etiamnum viget, in sacris et publicis populi celebritatibus contumelia afficiendi Deum, et sanctorum memoriam per quædam indecora cantica ac risus, et temerariis exclamationibus, dum matutino tempore hymni perficiuntur, quos oportuit afflicto atque contrito corde pro nostra salute Deo adhiberi. Coacta enim frequentia hominum infamium, ipsisque præfecto Euthymio quodam cognomento Cæsne, quem ipse Ecclesiæ domesticum creaverat, satanicas saltationes et indecoros clamores, et cantica ex triviis atque fornicibus percepta, eos celebrare docuit. Et ita vivens, vitam finit, dum temere equitans ad quemdam maritimum murum illisus, sanguinem ex ore expuit, et biennium morbo laborans, cum in hydropisim incidisset, mortuus est.

4. «Ac tertia Aprilis mensis, eadem Indictione, in locum ipsius patriarchæ eligitur Polyenctus monachus, Constantini alumnus atque discipulus, a parentibus exsectus, diutiusque in monastica vita laudabiliter versatus, quem imperator ob excellentem sapientiam et simplicitatem morum et inopiam delegit patriarcham, non Heracleæ episcopo (ut mos erat) sed Basilio Cæsareæ manus impo-nente. Nicephorus enim Heracleæ præses imperatori quadam de causa invisus, haud permissus est manus imponere. Ex quo non mediocris infamia inusta est, non modo qui delegit et manum imposuit, verum etiam ipsi electo, ut qui manus sibi

¹ Apud Regiu. hoc anno. — ² Witich. de reb. Sax. l. III.

imponi non secundum canones consensisset : attamen delectus, et veritatem libere professus, multum studii adhibebat, ut insolentia propinquorum senis Romani in iudicium vocaretur; et magno Sabbato imperatorem in magnum templum ingressus adduxit ad ulescenda patrata facinora, quod ipse haud libenter fecit : quin etiam Basilius, qui postea regii cubiculi praeffectus fuit, e serva natus seni Romano, quique Helenam sororem suam imperatori traditam nuptui reginam effecerat, ita effecit Constantinum, atque ei persuasit, ut non solum patriarchæ condemnaret creationem, sed etiam causam quæreret et occasionem, qua eum de sede dejiceret, multum etiam Theodoro Cyzico in ipsum hunc instigante ». His de Theophylacto et successore narratis, ad recens emersum Joannem Romanum pseudopontificem idem Curopalates stylum convertit, sic dicens :

5. « Quasi vero tempus ambitiose decertaret, ut simul consentientes et concordēs ostenderentur patriarchæ : etiam Romanorum Occidentis Ecclesiam gubernandam sortitus est Joannes Alberici filius ad omnem lasciviam et vitium propensus. Quem Otto Francorum imperator cum eiecisset, in ejus locum alterum pastorem praecepit Ecclesiae ». Sed id postea. At paulo post : « Adducta est, inquit, eodem tempore ex Antiochia in urbem regiam veneranda Præcursoris manus, a quodam diacono, Job nomine, furto rapta : quæcum ad Chalcedonem pervenisset, imperator missa regia trireme, et senatorii ordinis principibus, egresso quoque obviam patriarcha Polyucto cum omni clero, cum facibus et lampadibus et thure eam in regiam perduxit ». Hæc Curopalates, et alii recentiores ex eo.

6. *Pauli anachoretæ obitus et laudes.* — Hoc eodem anno, qui supputatione Græcorum a mundi origine numeratur sex millesimus quadringentesimus sexagesimus quartus, decima quarta corrente Indictione, ex hac vita in cælum migravit magnus ille Paulus anachoreta, de quo superius mentio facta est. Prænovit suum exitum fore decima quinta mensis Decembris, cujus rei causa lætior effectus, sanctorum natales dies hilarior celebravit ; præcipue vero quam alacrius colere consuevit S. Æcaterinæ, de cujus festa die hæc in ejus Vita auctor fidelis : « Et aliorum quidem sanctorum memoriæ hilaritatis ansam Paulo dabant : martyris vero Æcaterinæ non solum voluptate sanctum replebat, sed propemodum exultatione et tripudio. Etenim celebrabat illam non corporis tantum sensu, sed admixta simul spirituali lætitia : aut potius præcipuum id erat, quod spiritui dabat. Feriant igitur et sub dio epulanti cum fratribus

largus imber imminabat, monachosque surgere parantes ipse inhibuit, et pluvia cursum tanquam jussa repressit, ne gutta quidem vel tenui lapsa, quoad sublata sunt mensæ. Idem vero surgendi initium fuit et pluviae cadendæ : mox enim magno impetu et copia ferri, quasi tessera data, cœpit ». Demum vero sancti Nicolai die, spirituali tantum epulo celebrata mystagogia, cum suis refici voluit, ubi febre correptus, quod reliquum fuit vilæ temporis usque ad obitum in Dei laudibus perseverans et hortationibus ad suos, versum illum Davidicum insonans : « In manus tuas, Domine, commendo spiritum meum », ex hac vita ad Deum recessit, cujus in cælum migrationis visiones haud dubiæ factæ sunt pluribus, quos auctor recenset, simulque miracula post obitum etiam edita, quæ brevitalis causa prætermittimus.

7. Illud tantum summatim de eo sic habeto, quod patria fuit Elæa civitate Pergamo vicina, patre Antiocho comite navalis exercitus, matre Eudocia, eademque sanguine propinqua S. Joannicio anachoretæ, de quo plura tomo superiori : secutus est fratrem Basilium vitam anachoreticam agentem in Brachianis montibus, quo defuncto, ipse Paulus verticem montis Latrî nominati conscendit, in cujus vertice saxum attollitur columnæ instar, in quo vitam angelis parem exercuit annis pluribus : locus haud ignotus, quem antea incoluerat sanctus Athanasius anachoreta tempore Michaelis imp. Iconoclastæ, de quo ista breviter auctor : « Athanasius, qui Michaelis temporibus vixit, ejus qui insanam Iconomachorum hæresim complexus est. Ea ergo hæresi sæviante, reginam urbium deserens, Latrum montem petiit, et columnam hanc nullius manu laboratam conscendit. Saxum id præcelsum erat, nubes ipsas pæne attingens, in cujus vertice nativa spelunca visebatur, quam subiens, duos et viginti annos inclusus in ea mansit. Postea hinc exiens, monasterio exceptus est, quod Phrygiæ adjacet nomine Aphapsis, ubi vitam clausit maximis et pluribus miraculis illustris ».

8. Porro et illustrem fuisse montem illum Latrum dictum habitatione monachorum Sinaitarum, qui ob Sarracenorum incursus inde profecti Dei monitu illuc migrarunt, ipse testatur, habitasseque in eo Acacium, de quo Joannes Climax scribit, idem testatur. At vero admirandam Pauli vitam hactenus Latinis incognitam, ex antiquo græco Codice Sfortianæ Bibliothecæ Romæ existentis acceptam Jacobus Sirmundus Arvernus Ricomagensis societatis Jesu professor, vir sane doctissimus, primus latinitate donavit.

Anno periodi Græco-Romanæ 6449. — Anno Æræ Hispan. 994. — Anno Hegiræ 345, inchoato die 15 April., Fer. 3. — Jesu Christi 956.
— Joannis XII papæ 1. — Constantini VIII solius imp. 45.

1. *Moritur Theophylactus patriarcha Constantinop.* — A num. 2 ad 5. «Annum imperante Constantino duodecimum (a Romano nempe Lacapeno in ordinem redacto), die Februarii xxvii, Indictione xiv, Theophylactus patriarcha diem suum obiit, cum ei pontificatui præfuisset annos xxiii, dies xxv. Cum enim iniret, id quod contra leges Ecclesiasticas fiebat, annos erat natus xvi, et patriarcha sub pædagogis (pro indignam rem!) aliquandiu egit», inquit Cedrenus. Idem narrant alii historici Byzantini, nisi quod quidam numero rotundo loquentes, annos ei xxiv attribuunt. Ordinatus itaque fuerat die Purificationi beatæ Virginis sacra anni dcmxxxiii, ut suo loco vidimus. «Theophylactus», ait incertus continuator Theophanis in imperio Constantini Porphyrogenetæ num. 11, «patriarcha ægra affectus valetudine, jamque morti vicinus, cum paululum convalesceret, nihil de priori morositate remisit, animique pravitate, et ut muneribus episcopos ordinaret, curandisque equis et mollitie ac luxuriæ studium omne operamque insumeret, inque eum modum morbo rursus invalescente, illo oppressus, vivendi finem facit, patriarchatu functus annos quatuor supra viginti».

2. *S. Polyeuctus in ejus locum subrogatur.* — Pergit idem anonymus: «Ejus loco suffectus Polyeuctus monachus, monasticæ exercitationis palæstra clarus, ac qui sanctioris vitæ institutum a teneris unguiculis consecutus, omni virtute sanæque doctrina excellisset, quem velut alterum Joannem Chrysostomum plerique nossent ac dicerent, neque id nomine tenus, sed ita ut vere talis videretur. Hujus conspectu honesti amans Constantinus gaudebat, animoque gestiebat, ut qui virum talem in diebus suis nactus esset». Cedrenus diem ejus ordinationis, feriam nempe quintam in Cœna Domini, quæ cum tertia die Aprilis hoc anno concurrat, notavit: «Eadem, inquit, Indictione (nempe xiv), tertia Aprilis die, in ejus locum sufficitur Polyeuctus monachus Constantinopoli natus et educatus, etc. Huic non Heracleæ, ut mos ferebat, sed Cæsareæ episcopus Basilus manus imposuit: quod Nicephorus (hoc enim nomen Heracleæ præsul erat), quia in quadam re animum imperatoris offenderat, non sinebatur manus imponere». Quæ narrat etiam Baronius ex Curopalate. Cur vero ab He-

racleæ metropolita consecrari patriarcha Constantinopolitanus deberet, docet Balsamon Scholiis in ii canonem Concilii secundi Nicæni: «Ipsa quidem urbs Byzantina archiepiscopi honorem non habebat; sed ab Heracleæ metropolitano episcopus aliquando in ipsa ordinabatur. Scribitur enim quod etiamsi esset Byzantium civitas, quæ per se regeretur, sed a Severo tamen Romanorum imperatore obsessa est et Perinthiis subjecta: est autem Perinthus Heraclea». Paulo post: «Quod autem hodie ordinetur sanctissimus patriarcha Constantinopolitanus, ab eo qui est illo tempore Heracleæ metropolitane, non est aliunde quam ex eo quod subjecta fuerit, ut superius dictum est, Perinthiis sive Heracleæ, Byzantina civitas. Invenitur autem in Chronico Scilitzæ, quod ordinatus est patriarcha Stephanus syncellus, frater imperatoris domini Leonis Sapientis a Cæsareæ archiepiscopo, quod esset præmorulus Heracleæ archiepiscopus». Nam, ut videre est in Notitia Ecclesiarum apud Carolum a sancto Paulo, ordo sedium metropolitanorum et antiocephalorum sub apostolico throno urbis regiæ is fuit, ut primus sederet *metropolita Cæsareæ, provincie Cappadociæ*, qui ideo protothronus dicebatur.

3. *Manus S. Joannis Baptistæ Constantinopolim delata.* — Ad num. 5. Cedrenus, quæ primo patriarchatus sancti Polyeucti anno contigere narrans, inter alia hoc habet: «Sub idem tempus veneranda Præcursoris manus Antiochia Constantinopolim allata est, subrepta a Jobo quodam diacono. Ea cum appulisset Chalcedonem, imperator suam emisit triremem: et illustriores senatores procedentes obviam cum patriarcha et universo clero, cum cereis, facibus et suffitibus eam in palatium deduxerunt». Inventionis Historiam scripsit Simeon Metaphrastes, qui hoc tempore Constantinopoli vivebat, quam Surius ad diem xxix mensis Augusti recitat. Eam vero genuinum et germanum foetum esse Metaphrastæ docet Allatus in Diatriba de Simeonum Scriptis pag. 77, ubi eam eidem vindicat: «Cum ergo appropinquaret Chalcedonem», inquit auctor citatus a Bollando, «navis quidem emissa est imperatoria, et pontifex cum sacerdotibus, et quicumque ex senatu erant clari et illustres simul, ut sacrum illum thesaurum inferrent in regiam:

cum quibus fidelium quoque multitudo urbe egressa, mari ei navigarunt obviam, ut eum deducerent. Postquam autem fuit susceptus in manus pontificis, et ejus ferebatur ulnis, et in mare ascendit, licebat videre ipsam quoque aquæ naturam placidam et tranquillam, mollibus fluctibus ante navem exilienlem, et ad imperatores (nempe Constantinum et Romanum juniorem filium ejus) usque cursum dirigenlem». Die vii Januarii, inquit Bollandus ad diem v mensis Februarii, quo sanctus Polyeuctus colitur, cap. 3: «Synaxis celebratur sancti prophetæ Præcursoris et Baptistæ Joannis, simulque commemoratio venerabilis et sanctæ ejus manus in regiam urbem translatae». Ad eum diem referunt Græcorum Menæa sacram manum primum in regia depositam ab imperatore, anniversariam tamen celebritatem in Phoratii æde haberi tradunt.

4. *S. Dunstani exilium.* — Anno nongentesimo quinquagesimo sexto, beatus Dunstanus abbas, a rege Anglorum Edwino pro justitia proscriptus, mare transit, et ab Arnulfo regis stirpis viro, honorifice susceptus, in monasterio, quod Blandinium dicitur, sub exilii sui tempore, mansionem excepit», inquit Hovedenus pag. 425, cui Wigorniensis suffragatur. Idem habent annalista Mailrosensis, alique. Erat *Arnulphus* Flandriæ comes, et Alfredi Occidentalium Saxonum regis ex Elhelswida filia nepos, qui exulem regibus Athelstano, Edmundo, Edredo, consanguineis suis charissimum non poluit non benigne fovere. De Dunstani exilio hæc habet Westmonasteriensis: «Anno gratiæ nongentesimo quinquagesimo sexto, Albiga mulierum nequissima, ex Eadwii regis consensu, omnem substantiam monasterii viri Dei Dunstani diripiens, urgente etiam regis imperio, tandem ipsum a regno proscripsit. Qui Gallicanas secedens in partes, exilium coactus petivit. Sed mulier virum Dei desiderans prævenire, misit lictores qui ipsum, si inveniretur, lumine oculorum privarent. Sed eo non invento, confusi ad propria remearunt». Amoto Dunstano, non ideo detumuit

Edwii regis ira; sed in alios etiam monachos illam effudit: nam illis e monasteriis ejectis, clericos ad suos mores factos substituit: «Ea tempestate facies monachorum fœda», inquit Malmesburiensis lib. 2 de Reg. cap. 7, «et miserabilis erat. Nam et Malmesburiense cœnobium, plus quam ducentis septuaginta annis a monachis inhabitatum, Edwius clericorum stabulum fecit». Quod postea regulares monachos et irregularem clerum inter se commisit, inquit Alfordus hoc anno num. 9.

5. *Italia a Luidolpho magna ex parte subacta.* — «Luidolphus (Otlonis Germaniæ regis filius) in Italiam ad deprinendam Berengarii tyrannidem dirigitur, et in brevi expulso Berengario, totius pæne Italiæ possessor efficitur», inquit continuator Reginonis, cui annalista Hildensheimensis et Heppidannus in brevibus Annalibus suffragantur, qui etiam addunt eum anno sequenti in Italia mortuum esse, quod et Flodoardus in Chronico habet (1).

6. *Familia Caroli M. ad finem vergit.* — Hoc anno *Hugo princeps obiit*, inquit Flodoardus in Chronico. Hunc vulgo *Hugonem Magnum* a rerum gestarum magnitudine, alias Hugonem Album appellaverunt Franci. Abbas laicus fuit monasteriorum S. Dionysii et sancti Germani a Pratis, huicque fuere filii ex Hadwige Ottonis regis Germaniæ sorore, *Otto* Burgundiæ dux, *Hugo Capetus*, qui postea rex Francorum fuit, et post mortem patris comes Parisiorum, duxque Franciæ, sicuti pater extiterat, et *Henricus*, Odo etiam vocalus, qui paulo post fratre Ottone sublato (2) Burgundiæ ducatum accepit. Duces et comites, qui antea ad nutum regum Francorum provinciarum civitatumque præfecti erant, easdem hoc sæculo suo regebant arbitrio, et filiis tanquam hæreditatem relinquebant. Quare Carolinis seu Caroli Magni stirpi nihil fere præter nomen relictum erat, eaque ad finem vergebat.

Joannes XII fit papa, ut anno superiori num. 4 ostensum.

(1) Luidolphum hunc Italiæ regem coronatum fuisse Parmæ mense Maio hujus anni, silentibus omnibus vetustis scriptoribus, legitur in Codice Ms. Estensi, in quo continentur gesta comitissæ Mathildis in Epitomen solutamque orationem ex Bonifazio contracta. Ita enim ibi: «Et venit predictus Litulfus cum predictis militibus quadam die mensis Maji ejusdem anni a civitate Veronæ usque ad arcem Canussiam per unum diem. Et alia die sequenti ivit Parmam, et accepit coronam Langobardiæ». Hæc ibi; non vero in Bonifazio, qualis modo superest; sed forte mutilus ad nos devenit, ait Muratorius in Nota LX ad eundem Bonifazium Rer. Italic. tom. v, pag. 349, a quo fragmentum illud Ms. Codicis accepimus.

MANSI.

(2) Qui paulo post fratre Ottone sublato, etc. nempe anno DCCLXIII, VII kalendis Martii; hæc enim dies et annus Ottonis hujus emortualis assignatur in Additionibus ad vetus Martyrologium Antissiodorense vulgatum Vet. Monum. tom. vi, col. 692.

MANSI.

JOANNIS XII ANNUS 2. — CHRISTI 957.

1. *Joannis papæ conatus in principem Capuanum.* — Nongentesimus quinquagesimus septimus Redemptoris annus Indictione decima quinta ordine sequitur, quo Joannes, qui agebat Romanum Pontificem, invasa potius Sede, juvenili ardore spirans minarum et cædis, exercitum colligit, auxiliares copias ex Spoletano ducatu conducit, ducitque adversus principem Capuanum Pandulphum, qui auxilio fultus Gilulfi principis Salernitani, Joanni restitit, atque ad propria remeare coegit. Ad quem postea ipse Joannes pacis legationem misit, quam benigno princeps accipiens animo, eidem foedere junctus est. Hæc ex historia Longobardorum principum Beneventanorum et aliorum, quæ antiquitus scripta asservatur Romæ in Columuensi bibliotheca.

2. *Presbyter apostata junctus Sarracenis.* — Accidit his diebus in Oriente, ut nimia severitate episcopi presbyter a fide factus apostata, innumera mala adversus imperium perpetrarit. Rem gestam sic breviter prosequitur Curopalates: «Cum autem Ameras Tarsi, dux Sarracenorum contra Romanos cum exercitu profectus esset, atque in Herculis vicum milites prædatum misisset, quidam presbyter Themel nomine, sacrificium incruentum peragens, ut agnovit Sarracenorum irruptionem: relicto sacrificandi munere, ita ut erat indutus, manibus gestans Ecclesiæ mysterium, sic eos, qui invaserant, propulsavit et multos vulneravit, haud paucos interfecit, reliquis in fugam versis, et ab episcopo interdicto ei sacrificandi munere, postquam non impetravit veniam, ad Agarenos se contulit, et Christianam fidem ejuravit, atque cum

ipsis egressus, non solum Cappadociam et finitima loca vexabat, sed etiam usque ad Asiam quæ Minor dicitur, pervenit: et quanta detrimenta intulerit, nec scribere quidem nobis fas est». Hactenus ipse. Sed ad res Occidentales.

3. *Edgarus regnat in Anglia, qui revocat Dunstanum mox episcopum Cantuariensem.* — Hoc eodem anno Anglia depressa ob regimen Edwini regis, eo pulso, et substituto ex parte Edgari, respirare cœpit: nam statim revocavit ab exilio S. Dunstanum, invitumque præfecit episcopum Ecclesiæ Wigorniensis, in cujus consecratione accidit illud mirandum, ut S. Odo Cantuariensis archiepiscopus expressis verbis consecraverit eum in Cantuariensem archiepiscopum, prophetice quod esset futurum præsignans, sicque Apostolico more secundum præcedentes prophetias ad summum illum thronum, suo tempore, ut dicturi sumus, ascendit: «Erat plane idem Odo», inquit rem narrans Osbertus in Dunstano, «vir quidem sanctus, et magnarum virtutum prærogativis ornatus. Hic Dunstanum in pontificem Wineiorum (Wigorniensis) consecraturus, administrantibus qui adstabant, omisso ipsius Ecclesiæ titulo, ad archiepiscopatum Cantuariensem titulavit, et quasi successorem seu consortem sibimet consecravit. Unde a præsentibus, cur hoc faceret rogatus, respondit: Non constringitur lege donum et vocatio Dei. Utique vir iste scio quis sit, et ex dono gratiæ video, quod eum Spiritus sanctus elegerit. Ex quibus verbis meritum utriusque turba, quæ circumstabat, præclarum esse coram Deo animadvertit». Hæc Osbertus de magno Anglicanæ Ecclesiæ lumine.

Anno periodi Græco-Romanæ 6450. — Anno Æræ Hispan. 995. — Anno Hegiræ 346, inchoato die 4 April., Fer. 7. — Jesu Christi 957.

— Joannis XII papæ 2. — Constantini VIII solius imp. 46.

1. *S. Dunstanus ab Edgardo rege ab exilio revocatur.* — Ad num. 3. Annalista Mailrosensis hoc anno scribit : « Mercenses et Northumbri contemnentes Edwium regem, elegerunt fratrem ejus Edgarum, qui mox beatum Dunstanum de exilio revocavit, et defuncto Kinewaldo Wigornensem ei episcopatum dedit, et ab Odone archiepiscopo (sc. Cantuariæ) consecratur ». Rem fusius narrat auctor Vitæ S. Dunstani, non ejus quæ a Surio edita, et a Baronio aliisque sub Osberni nomine laudata, sed quæ a Mabillonio Sec. v Benedict. publicata fuit : « Respiciens Christi clementia », inquit num. 28, « Anglorum populum tanto patrono (sc. Dunstano) destitutum, suscitavit corda virorum ab Humbre fluvio usque ad flumen Tamisium, supra quod urbs Lundonia est fundata, adversus impium regem Edwium : qui omnes quasi in unum hominem translati, non modo regnum ipsius abjicere, verum etiam ipsum regno expellere moliti sunt, propterea quod in commisso regimine insipienter egisset, sapientes disperderet, ignaros boni suis consiliis adscisceret, prorsus libidine atque arrogantia præceps abiret. Coacti itaque in turbam, regem cum adultera fugitantem atque in viis sese occultantem armis persequi non desistunt. Et ipsam quidem juxta Cladium civitatem (legendum *Claudiam*, hodie, *Glocester*) repertam subnervavere. Deinde qua digna fuerat morte multavere. Porro regem per diversa locorum semetra vibrantem ultra fluvium Tamisium compulere. Deinde accito fratre illius optimæ indolis adulescente nomine Edgardo, quem futurum regem cælesti quondam oraculo designatum fuisse prædiximus, dum pacem regni saluti suis ac Dunstani temporibus angeli prædicarent, statuunt illum regem super omnes provincias ab Humbre magno flumine usque ad flumen Tamisium : quo flumine amborum regnum ab invicem dirimebatur. Ita regnum quod unum fuerat, in duos reges divisum gravibus aliquantisper conflictibus bellorum sudabat, impleta tunc veridica illa Salvatoris sententia, qua omne regnum in seipsum divisum asserit destruendum, et domum super domum esse casuram. Edgarus quotidie erat proficiens, ut David, pietate ac fortitudine, atque, ut Salomon, sapientia, divitiis

et gloria : domus autem Edwii in dies decrescere, cum ipse in flagitiis crescere non desiverit.

2. *Fit episcopus Wigorniensis.* — « Post paucos autem electionis suæ dies præcepit Edgarus diarcha totius regni sui Concilium celebrari, in quo annihilatis omnibus, quæ a fratre ejus iniquis fuerant legibus decreta, ac restitutis omnibus, quæ violenta illius fuerant damnatione ablata, Dunstanum quoque venerabilem abbatem de exilio revocavit, et majore, quam ab omnibus ante regibus honoratus fuisset, gloria sublimavit. Cui etiam ut pontificale decus susciperet, vehementi petitione innuit : nec antea precibus quiescere voluit, quam illum a sententia ad consentiendum retraheret, et Ecclesiæ Wigorniensis, quæ sub honore beatæ Virginis Mariæ pollebat, pontificem præficeret : qui dum Doroberniam sacrandus adveniret, et recitata petitione cleri ac populi summus Dei sacerdos Odo gaudenter annuisset, mirabile dictu ! cæterum consecrationis ministerium, non quasi super antistitem Wicciorum, sed sicut super archiepiscopum Cantuariorum mirabiliter atque hilariter absolvit.

3. *Ordinatur sub titulo archiepisc. Cantuariæ.* — « Qua de re a circumstante clero reprehensus, quod contra Patrum decreta ageret, qui unius Ecclesiæ duos prohibent esse sacerdotes, nec per jus hæreditatis fieri electionem successionis ; tale fertur responsum dedisse : Si divinis humana non cederent, jure mihi hominum auctoritas prætendi posset. Nunc vero quoniam auctor omnium Deus est, non possum illud non facere quod faciendum Spiritus Dei dignatus est præcipere. Erit namque beatus iste proximus post mortem meam hujus sedis archiepiscopus, et adversus mundi principem fortissimus proelior. Ille ille summi pontificis ratione defensum procedit ad populum, summus et ille pontifex Cantuariorum prætitulatus, gestans insignia Aaron, non legis velamine adumbrata, sed divinæ propitiationis munere per gratiam Christi insignita. Inde ad Ecclesiam quæ sibi fuerat consignata reversus, atque in cathedra pontificali sublimatus, recordatus est quid olim exultanti diabolo promisisset, cum illum regalis impietas exilio adscripsisset. Itaque obviis in illum manibus insurgere, membra ejus Evangelico gladio dividere, et

oves quæ circumquaque errabundæ ferebantur, ad Dominicum ovile revocare ». Idem legitur quoad Dunstani ordinationem sub titulo archiepisc. Cantuariæ, in Vita sancti Odonis archiepiscopi Cantuariensis. Porro cum Cantuaria in Cantio ad Sturam fluvium posita ad *Edwium* regem pertineret, et tamen *Edgarus* rex Dunstanum ad *Odonem* Cantuariensem archiepiscopum, ut consecraretur, miserit, apparet *Edwium* post divisionem regni, aut in concordiam cum *Edgaro* fratre adductum fuisse, aut illum tam ab *Edgaro*, quam a propriis subditis non magni habitum; sed prior conjectura videtur verisimilior.

4. *Mutua legatio califæ Hispaniæ et Ottonis regis.* — Sanctus Joannes Gorziensis cœnobii monachus hoc anno legatus in Hispaniam missus est, ut indicant hæc verba Witichindi, qui Liudulfum Ottonis filium eodem tempore, quo Otto « plurimos legatos suscepit, Romanorum scilicet, Græcorum Saracenorumque », Italiam adiisse scribit: « quo agente annum fere totum, diem extremum obiit ». Liudulfum autem currenti anno demortuum mox ostendemus. Quare legatio Ottonis Germaniæ regis ad Hispaniarum califam, quæ fuse describitur in Vita sancti Joannis Gorziæ cœnobii abbatis num. 115 et seqq. ad hunc annum pertinet. Joannes abbas Metensis, S. Joannis discipulus, refert ibidem legatos regis Maurorum ad Ottonem, quibus episcopus quidam præerat, dignitate solemniter pro tanta maiestate exceptos, dique retentos fuisse. Inter moras episcopus, qui legatis præerat, mortem obiit. « Dum a nostris qui item eo remittantur disquirunt, post nonnulla aliquandiu tracta consilia, id demum convenit, ut quia idem rex (nempe Abderramen, qui in Hispania regnabat) sacrilegus et profanus, utpote Sarracenus, et a vera fide prorsus esset alienus; quique, quamvis amicitiam expeteret principis Christiani, in litteris tamen quas miserat, blasphemam nonnulla in Christum evomuerat, cum scriptis imperialibus quæ terrent, vocem quoque suam ipsi aperire, et si quo pacto divinitus daretur, immutare possent perfidiam ».

5. *S. Joannes legatus in Hispaniam destinatus Cordubam venit.* — Forte sub ipsos dies Adalbero episcopus Metensis aderat, et Bruno archiepiscopus Coloniensis, Ottonis frater, qui asseruit nulli episcopo aptius id negotii injungi posse, quam Adalberoni. « Convenitur continuo episcopus, et ut duos suorum idoneos legationi Hispaniarum paret, imperatur ». Lecti primum Angilramnus et Wido monachi, sed cum prior non acquiesceret, jussit imperator alium pro eo adscribi. « Cum diu is quaereretur, omnesque prorsus refugerent, nec in tanta congregatione quisquam inveniri posset, qui se id aggredi ullo modo posse fateretur; Joannes repente nihil cunctabundus se ultroneus offert ». Imperator mandata cum litteris seu muneribus tradi jubet, et Ermenhardum Virdunensem socium ob locorum regionumque notitiam facit, cui munera tradi Joannes expostulat: ipse litterarum tantum

bajulus fit. Assignantur ei socii et sumptus omnis ex monasterio ei factus. « Insequitur hinc Lingonas, Belnam, Divionem, Lugdunum (et Viennam) versus intendunt: ubi sarcinis navi impositis, Rhodanoque usque ad certum locum vehendis, dispendium perpassi non modicum (nam navibus invasis plura suorum amiserant) post quædam recepta, Hispaniam tendit. Barcinonam venientes, quindecim diebus morantur, donec nuntius Tortosæ missus est. Ea prima regio Saracenorum erat. Dux continuo eos properare resignat, exceptosque mense integro detinet, atque ad omnem copiam procurat, donec velocius regi Cordubæ nuntiati de exceptione eorum per singulas civitates vel loca, digne regia mandatum est honorificentia. Tandem Cordubam urbem regiam deducti, a palatio domus quædam duobus fere millibus distans eis est delegata: ubi regifico luxu, omnibus etiam præter usum exhibitis per nonnullos dies coacti sunt remorari.

6. *Non statim ad califæ colloquium admittitur.* — « Cum jam morarum tæderet, curque præsentia regis tamdiu retinerentur, ab his qui se procurabant, disquirerent, dictum est, quia nuntii prius missi a rege nostro, triennio erant detenti, se ter tantum, id est, novem annos conductum esse adspectu regio abstinere. Interea quidam ex palatio illuc viros visum venientes, causamque adventus eorum percontantes, dum callide cuncta explorant, nihilque ab eis certi acciperent, qui sibi, nisi præsentia regi mandata cuiquam edicere fas nullo modo esse dicebant. Illi jam cuncta se percepisse jactabant, et quia contra leges ipsorum litteras regi afferrent, ultimumque eis sine dubio instare periculum, quia et ipsæ jam litteræ in notitiam principum devenissent: et revera quanquam dolo contigerit, ita erat. Nama civitate Tullo nostræ provinciæ, comitem episcopi legati defuncti, de quo dictum est, quemdam secum presbyterum assumpserant, qui toto deinceps itinere eis in omnibus communicans, cum Tortosam, quæ prima erat regni Sarracenorum, venissent, metuens vitæ, sic eum comes legati defuncti..... fido sibi poscens monstrari citius excip..... Augustæ et reliquis civitatibus, ubi ter... remorantibus, ipse Cordubam præcedit cum litteris.... notuerint parum cognitum fuit. Cæterum rumor optima... cumque commovit.

7. *Saracenorum leges califam et populum obligant.* — « Itaque primates inter se consilio habito, et utrum in notitiam regis ea jam venerint disquirentes, ubi parum id compertum habent, per se regem statuunt super hoc perquirendum. Lex enim tam improvocabilis eos constringit, ut quod semel antiquitus omni ei genti præfixum est, nullo unquam liceat modo dissolvi, parique modo rex populusque tenentur innexi, omnisque transgressio gladio feritur. Si quid ab inferioribus, rex; si quid rex ipse commiserit, cunctus in eum populus animadvertit. Eis in legibus primum dirumque est, ne quis in religionem eorum quid unquam

audeat loqui : ejus, si sit extraneus, nulla intercedente redemptione, capite plectitur. Si rex ipse audierit, et in crastinum gladium retinuerit ; ipse morti addicitur, nec ulla intervenire potest clementia. Primoribus ergo illis palatium petentibus, cum regi super hoc per nuntios suggessissent (nam accessus ad eum ipsum rarissimus, et nisi maximum quid ingruerit, nullus : tantum litteris per Sclavos cubicularios omnia perferuntur) ille nihil eorum ad se perlatum rescribit : amici legatos sibi missos, eosque filium suum in domo propria percepisse, necdumque, si quid afferrent, rescivisse : ita tumultus illorum sedatus est. Nam pro certo jam rumor ad eum venerat, et missis clam nuntiis vera esse compererat : sed timore suorum taliter rem omnem suppresserat.

8. *Quæ apud Saracenos cavenda.* — « Rex undique meliculosus ancepsque, periculum sibi posse imminere considerans, artibus omnis generis quæ evadat pertentat, et primo quidem Judæum quemdam, cui nomen Hasdeu, quo..... si vidisse et audisse nostri testa..... qui de omnibus ab eis ipsis penitus exploraret. Is..... dispersum fuerat, regii eum bajulum esse mandati..... rimo, quo sollicitabantur metu eum erigit, nihilque mali quemquam eorum ibi passurum, sed cum honore patriæ remittendos edicil. Multa de ritu gentis, et qualiter se coram eis observare deberent, commouit. Ipsi juniores a quibuscumque vanis lascivis motibus, locutionibusque compescerent, nihil tam parvum fore, quod non mox regiæ notitiæ perferretur. Si copia sibi egrediendi pateret, ne qua scurrilitate feminis, saltem nulu, se applicarent : nullam sibi pestem truculentiorum futuram : legem sibi propositam nullatenus excederent, quo nullo observatus notarentur, reprehensique nihili penderentur. Joanne ad ea, prout competeat, respondente, atque acceptissime monitorem ferente, suosque ex contrariæ partis homine suffundente post plura invicem conserta, pedtentium Judæus causam ingreditur : quid missi ferant, sollicite disquiril ».

9. *Honorifice ad regem Joannes deducitur.* — Mansit Joannes annos fere tres antequam a califa Cordubensi audiretur, pluribusque quæ Joannes abbas Metensis ibi tunc gesta fuisse narrat prætermisissis, ad finem legationis sancti Joannis venio : « Post hæc, die præfixa, quæ præsentandus erat, apparatus omni genere exquisitus ad pompam regiam demonstrandam exeritur. Viam totam ab hospitio ipsorum usque ad civitatem, et inde usque ad palatium regium, varii hinc inde ordines constipabant. Hic pedites hastis humo stantes defixis, longe inde hastilia quædam et missilia vibrantes, manuque crispantes, ictusque mutuos simulantes. Præter hos mulis quidam cum levi quadam armatura insidentes ; deinde equites catcaribus equos in fremitu et subsultatione varia concitantes. Mauri præterea in forma insolita nostros exterrentes, ita variis proludiis, quæ nostris miraculo arbitraban-

tur, itinere nimium pulverulento, quem per se ipsam quoque temporis siccitas (nam solstitium erat æstivum) sola concitaret, ad palatium perducentur. Obvii procures quique procedunt. In ipso limine exteriori, pavementum omne tapetibus pretiosissimis aut palliis stratum erat. Ubi ad cubiculum, quo rex solitarius, quasi numen quoddam, nullis aut raris accessibus residebat, perventum est, undique insolitis cuncta velaminibus oblecta, æqua parietibus pavimenta reddebant. Rex ipse thoro, luxu quam polerat magnifico, accumbebat. Neque enim more gentium cæterarum solis aut sellis utuntur, sed lectis, sive thoris colloquentes vel edentes cruribus uno alteri impositis incumbunt. Ut igitur Joannes coram advenit, manum interne osculandam protendit, osculo nulli vel suorum vel extraneorum admissio, minoribus quibusque ac mediocribus nun.... foris summis, et quos præstantiori excipit pompa, palmam mediam aperit osculandam.

10. *Offert munera.* — « Inde sella parata, manu ut sedeat innuit. Longa deinde utrique silentia : tunc rex prior : Tuum, inquit, cor mihi, plurimum diu cognosco fuisse infensum, quandiu te demum ad aspectu meo suspendi. Sed tu ipse penitus nostri, quod aliter fieri non potuit..... tes sapientia..... distulerunt, sed quod nunc..... id faciunt, volo cognoscas..... verum de quibuscumque postulaveris impetrabis. Joannes ad hæc, sicut nobis referebat, aliquid fellis tam diutino angore contracti in regem..... tam placidus repente effectus est, ut nihil animo ipsius unquam æquabilis esse potuisset. Inde ad singula respondit, si quidem negare non posse primo tot acerbitate nuntiorum fuisse permotum : inter ipsa tamen facitum crebrius cogitasse, simulatis potius quam veris minarum intentionibus hæc erga se agitari. Postremo quoque cuncta dilationum obstacula ex superioribus lotius triennii actis vel dictis rescisse ; nec esse quidquam reliqui, quod merito odio sui factum suspicari deberet ; unde si quæ ea essent, se penitus animo depulisse : gratiæ tantum, quam tam clementi magnificentia obtulisset, gratulari, et quod regii pectoris in hoc, et robur constantiæ et moderatoni mediæ pervidisset temperamentum satis egregium. Rege his in multam gratiam delinito, pluribusque eum compellendi parante, munera imperatoria primum excipi postulavit : quo facto, reditus indulgentiam e vestigio obsecravit. Rex admirans : Quomodo, inquit, hæc tam repentina fieri possit divulsio, tanto temporis spatio alterutrum expectati ? modo vix visi, ita abrupemur ignoti ? nunc interim mutuo semel conspectu positi, parum quoddam cognitio mentium se utrumque aperuit, iterum visi jam amplius, tertio tota jam plenitudo notionis vel amicitiae confirmabitur. Inde domino tuo remittendus, digno eo teque deducere honore. His Joanne assentiente, secundi legati jubentur intromitti, eoque præsentem munera quæ deferebant oblata.

11. *Ejus cum califa colloquium.* — « Tunc demum utrisque ad hospitium remissis, post aliquantum tempus Joannes a rege revocatus, familiaria multa cum eo conseruit de nostri imperatoris potentia atque prudentia, de robore et copia militum vel exercitus, de gloria et divitiis, de bellorum industria et successibus, multaque id generis; sua e contra jactare, quanto..... reges excelleret..... posset civitates..... Illud vere fateor regentem hoc..... nosse qui nostro imperatori terra, armis aut equis possit æquari. Rex autem..... Merito, inquit, regem tuum celebras, verane an falsa sint. Illa, inquit, licet experiri. Rex autem: Cætera utrumque approbaverim: unum est in quo illum non satis providum esse constiterit. Quid, inquit, illud est? Quod potestatem virtutis suæ non sibi soli retinet, sed pass.... ubere, quemquam suorum propria potestate, ita ut partes regni sui inter eos dividat, quasi inde eos sibi fideiiores habeat et subjectione: quod longe est. Exinde enim superbia et rebellio contra eum nutritur atque paratur, ut nunc in genere ipsius (Conrado nempe Lotharingiæ duce) actum est, qui filio ei per perfidiam subducto, publicam tyrannidem contra eum exercuit, ad hoc ut gentem externam Ungarorum per media quæque regnorum suorum depopulandam transduxerit »..... Cætera desiderantur et Vita in quibusdam locis exesa. S. Joannes, qui per annos tres in Hispania detentus fuit, vix ante annum dcdxlx reversus, aut ante annum illum abbas creatus. Hinc in Catalogo abbatum Gorziensium a Bollando ad diem xxvii mensis Februarii, quo S. Joannes colitur, in Commentario prævio num. 14 publicato, *Einoldi* abbatis Gorziensis mors et *Joannis* successio eo Christi anno consignatur, et Bollando suffragatur Mabillonius in *Observat. præviis ad Vitam S. Joannis* num. 4.

12. *Rescriptum Joannis XII pro monasterio Humolariensi.* — *Ludovicum Transmarinum* Francorum regem removisse moniales e monasterio Humolariensi, in quo sancta *Hunegundis* colitur, quod regulari districtioni subjici nollent, an. dcdxlvii ostendimus. Quare *Lotharius* ejus filius postulavit a Joanne papa XII, ut quod a patre factum fuerat, Apostolica auctoritate fulciret, obtinuitque ab eo litteras Sæc. II Benedict. pag. 1025 recitatas, in quarum fine legitur: « Scriptum per manum Leonis sacri scrinii (deest aliquid) sanctæ Sedis Apostolicæ in mense Januar. pro Indict. xiv (sed legendum, Indict. xv). Datum IV non. Januar. per manum Georgii secundi episc. sanctæ Sedis Apostolicæ, anno primo Domino propitio Pontificatus D. Joannis S. P. et universalis papæ ». Cum enim Joannes XII anno superiori post diem xx mensis Augusti Pontifex ordinatus sit, et mense Januario

hujus anni primus Pontificatus ejus annus in cursu fuerit, manifestum est, Indictionem illam corruptam, et ejus loco *Indictionem* xv subrogandam.

13. *Obitus Luidolphi filii Ottonis M.* — Hoc anno *Luidolphus* Ottonis M. et *Edithæ* prioris ejus conjugis filius, in Italia obiit, ut Regino, Hermannus Contractus, alique chronographi habent. Addit Hermannus Contractus *Ottonem* filium adhuc parvulum reliquisse, et tunc *Burchardum* Alamanniæ ducatum accepisse. Nam, ut scribit idem Hermannus, *Herimannus* dux Alamanniæ anno dcdxlviii mortuus est, et eo tempore *Luidolphus* noster *Idam* ejus filiam, et quidem unicam, uxorem accepit, Alemanniæque seu Sueviæ ducatum et defuncti hæreditatem obtinuit. De his inter omnes convenit, sed plures scriptores in Historia Germanica versatissimi perperam credidere, hunc *Ottonem* patrem fuisse *Henrici*, avumque *Conradi Salici* imperatoris, et *Brunonis*, in Pontificatu Romano *Gregorii V* appellati. Hunc enim errorem anno mxxiv profligabimus, et utrumque quidem *Ottonis* filium fuisse ostendimus, sed alterius *Ottonis*, filii Luidgardæ Ottonis M. filiæ et Luidolphi sororis, Conrado Lotharingiæ duci nuptæ. Hic tamen nobis aliquid de *Ottone* Luidolphi filio dicendum. Hermannus Contractus tradit, anno dcdlxxiii Burchardo Alamanniæ duce defuncto, eum paternum pro eo ducatum recepisse, annoque dcdlxxviii, cum Henricus Bajoariæ dux adversus Ottonem secundum imp. rebellasset, *Ottonem* Alemanniæ seu Sueviæ ducem Bajoariam accepisse. Quamobrem Otto Luidolphi filius a Ditmaro lib. 3, *Bavariorum dux* diserte appellatur. Denique idem Hermannus ad annum dcdlxxxii ait: « Ipso anno Otto dux Suevorum et Noricorum (seu Bajoariæ) obiit, et post eum Conradus dux Alamanniæ (seu Sueviæ) factus est, Henricusque ducatum Bajoariæ recepit ». Non dicit Hermannus Conradum istum Ottonis filium fuisse. Quare non immerito Aventinus lib. 5 de Ottone Luidolphi filio scribit: Liberosne reliquerit, ubinam sepultus sit, nemo, quod equidem sciam, tradit. Verum sive nullos reliquerit, quod magis existimo, sive aliquos reliquerit, certum est, eos ante annum mii, quo Otto III imperator improles obiit, sublato esse; cum Arnulphus historicus Mediolanensis lib. 1 de ejusdem imperatoris morte verba faciens prodatur: « In quo (nempe Ottone III) omnium est Ottonum consumpta propago ». Linea itaque masculina *Luidolphi* ante annum mii extincta, ex qua ideo Gregorius papa, et Conradus Salicus imp. procedere non potuerunt, ut loco citato plane constabit, sicuti et *Ottonem* Conradi Salici avum, non Alemanniæ, uti *Otto* Luidolphi filius, sed Franconiæ ducem extitisse.

JOANNIS XII ANNUS 3. — CHRISTI 958.

1. *Berengarii tyrannis invalescit.* — Nongentesimus quinquagesimus octavus Christi annus Indictione prima incipit, quo defuncto anno superiori Luitholpho Ottonis regis filio a patre misso ad coercendam tyrannidem Berengarii : tyrannus solutus timore impune grassatur, absque delectu profana sacraque devastans ; sub cuius duro iugo usque ad Ottonis ipsius adventum Italia gemuit. Quo pariter anno Otto ipse in Slavos ducit exercitum, eosque debellat, occiso eorum regulo ¹. Hic in memoriam revocandum, quod de eodem Ottone scribit Curopalates hoc tempore, nempe Turcarum regem sive ducem, fidei Christianæ desertorem ab Ottone captum, suspensum fuisse in patibulo. Totius autem rei gestæ seriem sic narrat :

2. *De Turcis conversis ad fidem et apostatis.* — « Non desistebant etiam Turcæ in Romanorum regionem irrumperere, eamque depopulari, quoad Bolesodes ipsorum dux, cum decrevisset fidem Christianorum amplectari, venit Constantinop., et baptizatus, a Constantino imp. suscipitur. Patricius dignitate donatus, ac multæ pecuniæ compos effectus, deinde domum reversus est. Paulo post etiam Gylas ipse quoque Turcarum dux Constantinopolim ingressus baptizatur, paribusque et ipse affectus muneribus et honoribus discessit. Assumpsit autem et secum monachum quemdam Hierotheum nomine, qui habebatur religiosus et pius, Turciæ episcopum a Theophylacto delectum. Qui eo profectus, multos a barbaro errore in religionem Christianorum traduxit. Verum Gylas in fide permansit, neque ipse Romanos invadens, neque captos Christianos negligens, sed redemptos pretio curans, in libertatem vindicabat. Bolesodes autem violato fœdere divino, sæpe omnem exercitum in Romanos adduxit. Quod cum in Francos quoque facere decrevisset, captus ab Ottone ipsorum rege in crucem actus est. Et ea, quæ fuerat uxor ducis Rhos, qui contra Romanos classem adduxerat, Elga nomine, mortuo ipso viro, Constantinopolim se contulit, et baptizata, cum sinceræ fidei cultum se suspicere instituisse ostendisset, et pro sui pro-

positi dignitate ornata domum rediit ». De ista est mentio apud Reginonem anno sequenti, quam nominat Helenam his verbis : « Legati reginæ Rugorum, sive Russorum, quæ sub Romano imperatore Constantinopoli baptizata est, fide (ut postea clauit) ad regem Ottonem venientes episcopos et presbyteros eidem genti petebant ». Cæterum de dicto duce Turcarum ab Ottone capto, et morte mulctato, apud Latinos nusquam mentio.

Moritur hoc anno ¹ sanctus Gerardus abbas Bromiensis monasticæ disciplinæ restitutor et propagator, die tertia Octobris, cuius res gestæ ad Gontium abbatem scriptæ fideliter adhuc extant.

3. *S. Odoni in sede Cantuariensi succedit simoniace Ealsfinus, qui misere perit.* — Insuper hoc anno moritur S. Odo Cantuariensis episcopus, successoremque habuit Ealsfinum nequissimum hominem, qui malis artibus in eam sedem irrumpens Romam venturus accipere pallium, infelici exitu in via exstinctus est. Res gesta ita narratur ab auctore, qui ante annos prope trecentos clauit, Mathæo Westmonasteriensi monacho : « Eodem anno sanctus Odo Cantuariensis archiepiscopus regem Eadrum, sive Eduinum, et Ælginam ab invicem separavit, vel causa consanguinitatis, vel quia illam ut adulteram adamavit. Quo etiam anno idem Odo vir ingenio clarus, virtute laudabilis, et spiritu prophetiæ pollens, humanis rebus exemptus, in paradisum est angelorum manibus deportatus. Quo ad cælestia translato, Ealsfinus (Edelfinnum hunc nominat Osbertus in Duustano) Wentanæ urbis episcopus, datis muneribus profusis, per internuntios regem Eadgarum circumvenire studens, cum Simone Mago thronum Cantuariensis Ecclesiæ, pecuniæ interventu, conscendit, qui primo introitus die abstinere non potuit, quin furias mente diu conceptas evomeret : ad tumultum sancti Odonis accedens, illudque pede conculcans, dixit : Pessime senex, nunc animam licet sero emisisti, et meliori locum faciens, recessisti. Nunc vero quod diu concupieram teneo, te invito, et inde tibi malas gratias ago. Et sic fatus, cum rabidus

¹ Siegb. hoc anno.

¹ Siegb. hoc anno Mol. de S. Belg.

ille sopori membra dedisset sequenti nocte, vidit beati Odonis effigiem sibi adstare, atque improperare convivium, atque velox illi exitium comminari. Sed Ealsinus somnii vanitatem esse quod viderat existimans, non minus ad obtinendum pallium Romam properabat (ita enim antiquo more Cantuarienses archiepiscopi non per alium, sed per se ipsos Romam adire, et pallium petere consueverunt) ubi cum per Alpes viam expediret inceptam, nihil

aliud remedii habere poluit, dum nivali tempore esset congelatus, nisi ut exenteratorum equorum adhuc calentibus extis pedes immergeret, quibus sanctissimi viri conculcaverat sepulturam. Sed nec sic algore deficiente, sed potius invalescente, vitam flagitiosam morte misera terminavit. Hæc ipse. Porro eidem sedi paulo post, cedente Bixtelino, sanctus Dunstanus est præfectus antistes, de quo suo loco inferius dicturi sumus.

Anno periodi Græco-Romanæ 6451. — Anno Æræ Hispan. 996. — Anno Hegiræ 347, inchoato die 25 Martii, Fer. 5. — Jesu Christi 958.

— Joannis XII papæ 3. — Constantini VIII solius imp. 47.

1. *Slavi debellati, et aliqui Hungari ad fidem conversi.* — Ad num. 1 et seq. Continuator Reginonis refert *Otonem*, antequam imperator renunciaretur, quater *Slavos* aggressum esse, annis nempe DCDLV, DCDLVII, DCDLIX et DCDLX. Quare aggressionem anno superiori ab eo factam Sigebertus in annum præsentem perperam distulit. Quoad *Turcas*, quos Baronius ex Curopalate ait, baptismum Constantino- poli accepisse, alii non sunt, quam *Hungari*, quos Curopalates, Cedrenus, Constantinus Porphyrogeneta, alique rerum Byzantarum scriptores eo nomine passim appellant, quia sc. illi origine Hunni sunt. « Locus quem primitus Turcæ tenebant », inquit Porphyrogeneta lib. de Administr. imp. cap. 40, « a fluvio interlabente nuncupatur Etel et Cuzu, in quo nunc Patzinacitæ (Transylvani hodie appellati) commorantur, a quibus pulsi Turcæ, et profugientes sedes posuerunt illic, ubi nunc habitant (nempe in Hungaria hodierna, ubi anno DCDLVIII aut insequenti, quo Porphyrogeneta librum suum scribebat, Turcæ seu Hungari habitabant); suntque ibi loci antiqua quædam monumenta, inter quæ pons Trajani ad initia Turciæ, et Belegrada (urbs etiamnum celebris), quæ triduo inde distat, turrisque sancti ac magni Constantini, et rursum ad ostium fluminis Sirinium, quod Belegrada abest itinere bidui: inde magna Moravia baptismo carens, quam Turcæ deseruerunt, ejusque princeps olim Sfendonoplocus », seu Zventibaldus, de quo et ejus regno sæculo superiori non semel verba fecimus.

2. *Moritur S. Gerardus abbas Broniensis.* — Sanctus Gerardus abbas Broniensis, monasterii nempe inter Mosam et Sabin, pari duarum horarum utrinque intervallo, tribus a Namurco siti, non hoc anno, ut putavit Baronius, sed sequenti

ad Deum migravit. Sæc. enim Benedict. v recitatur ejus Vita a monacho anonymo, hoc vel sequenti sæculo scripta, in qua refertur Epitaphium primitus illic positum, et in fine ejus legitur :

Ad fontem vivum sitiens, plenusque dierum,
Deposito fragilis tandem velamine carnis,
Christi lucifluam Jesu transmigrat in aulam,
Prænitet Octobris quando lux tertia mensis.

« Anno ab Incarnatione Domini DCDLIX, Indictione secunda, concurrente v, Epacta xx, feria ii », ubi Indictio ii a kalendis Januariis, ut passim alibi in Francia, incœpta. Quando postea Gerardi corpus in mausoleum reconditum est, præsentem Godefrido comite Namurensi, ubi etiamnum religiose asservatur, aliud Epitaphium tumulo ejus appositum, in cujus fine legitur : « Obiit anno DCDLIX. Sublevatus in feretrum MCCCXII ». Ea porro elevatio, ut inquit Mabillonius in Observat. præviis ad Vitam sancti Gerardi num. 9, tunc temporis canonizationis loco habebatur. Vide quæ anno DCDXXXIX de hoc sancto vitæ monasticæ in Belgio restitutore diximus.

3. *Moritur S. Odo archiepisc. Cantuariæ.* — Ad num. 3. Non tantum Westmonasteriensis, ejus verba recitat Baronius; sed etiam Wigorniensis, Hovedenus, novus chronologus Saxo, annalista Mailrosensis, et Simeon Dunelmensis auctores sunt, sanctum Odonem archiepiscopum Cantuariensem, hoc anno vivendi finem fecisse. Mabillonius quidem Sæc. v Benedict. in Observat. ad ejus Vitam pag. 295 dicit præferendam esse veterem Saxonice Chronologiam, in qua *Odo archiepiscopus obiisse* dicitur anno DCDLXI. Verum præterquam quod verba illa in chronologo illo Saxonico inter duos uncas posita, quæ ideo in uno tantum exem-

plari Ms. leguntur, perperam ibi dicitur, post eum *Dunstanum* archiepiscopatum capessisse, cum certum sit, *Elfsinum* Ventanum episcopum, virum simoniacum, ejus locum accepisse, eumque dum Romam pergeret, misere interiisse : eo vero mortuo *Birhtelmum* Dorsetensis provinciae praesulem ad eam cathedram evectum esse ; sed eum in exercendis Ecclesiasticis disciplinis minus quam oportebat, vigeret, ad suum ovile rediisse, et *S. Dunstanum* jam tunc Londoniensem episcopum totius Britanniae primatem creatum esse, ut non tantum auctor Vitae sancti Dunstani, sed etiam alii scriptores Anglici docent. *Birhtelmum* vero anno sequenti Dorobernensi seu Cantuariensi Ecclesiae praefuisse, ideoque jam illo Christi anno *Odonem* mortuum, indubitatum reddit Privilegium ab Edwio Angliae rege Wintoniensi monasterio concessum, et ab Alfordo anno DCLIX, num. 3 et seqq. recitatum, in cujus fine legitur : « Acta est haec praefata donatio, anno ab Incarnat. Domini nostri Jesu Christi nongentesimo quinquagesimo nono, Indictione secunda. † Ego Eadvid rex Anglorum. † Ego Byrthelm Dorobernensis Ecclesiae episcopus, etc. », Mabillonius ibidem existimat, auctorem,

qui Vitam sancti Odonis in litteras misit, esse *Osbernium* Cantuariensem monachum, qui tempore Lanfranci archiepiscopi Cantuariensis vixit, qui-que Vitam sancti Dunstani archiepiscopi Cantuariensis edidit. Verum auctor ille anonymus ab *Osberno* diversus ; cum hic in Vita sancti Dunstani scribat, *Edwio* regnante, *Dunstanum* ab *Edgaro* rege Wigornien- sem episcopum ordinatum esse, et *Edwio* demortuo, *Edgarum* *Dunstanum* etiam episcopum Londoniensem creasse ; et tamen auctor Vitae sancti Odonis referat *Dunstanum* utrumque episcopatum, mortuo *Edwio* rege ab *Edgaro* ejus fratre accepisse ; quod ab uno eodemque auctore scriptum credi non potest. Certe Mabillonius, qui Vitam illam ex Codice Thuano Colbertino se eruisse asserit, fatetur in eo, nec auctoris nomen, nec aetatem signari. His scriptis ad manus meas pervenit Anglia sacra ab Henrico Wartono Londini anno MDXCI in lucem edita, in cujus Praefatione ad partem 2, num. 7, observat in antiquo Ms. Collegii Corporis Christi Cantabrigiensis eam Vitam inter alia *Eadmeri* opera eidem inscribi, huicque restitui debere.

JOANNIS XII ANNUS 4. — CHRISTI 959.

1. *Adalbertus Russorum episcopus.* — Anno Redemptoris nongentesimo quinquagesimo nono, Indictione secunda, legati Helenae reginae Rugorum, quae sub Romano imp. Constantinopolitano Constantinopoli est baptizata, fiete (ut post claruit) ad regem Ottonem venientes, episcopum et presbyterum eidem genti petebant ». Haec apud Reginonem hoc anno ; sequenti vero ait, Sibutium ex caenobitis S. Albani ab Adaldago Hamburgensi episcopo Rugorum episcopum ordinatum ; eum vero anno sequenti diem obiisse, in locumque ejus subrogatum fuisse Adalbertum monachum ex caenobitis S. Maximini in Rugorum sive Russorum episcopum, qui anno sequenti a sua ordinatione male a populis illis acceptus, vix fuga lapsus evasit, occisis nonnullis ex suis, ipse vero benigne ab Ottone susceptus, apud Willelmum Moguntinum episcopum honorifice retinetur, donec defuncto Vutitz-Burgensi abbate, ab eodem Ottone eidem

monasterio praeficitur abbas. Haec omnia apud Reginonem.

2. *Arnulphi marchionis Flandriae pia largitio et mira sanatio per preces Gerardi abbatis.* — Quo pariter anno Frodoardus temperis hujus scriptor recitat Arnulphi marchionis Flandriae Rhemos adventum, cum sacris oblationibus, ut religiosum principem decet ; ait enim : « Arnulphus comes Rhemos venit, et Ecclesiam sanctae Mariae non modico argenti pondere muneravit. Unde arcae, in quibus sancti Callisti, S. Nicasii, et sanctae Eutropiae membra, caeterorumque sanctorum quondam pignora continentur, ornatae et coopertae sunt : sed et quemdam Evangeliorum librum auro argentoque decoravit. Monasterio quoque S. Remigii dona contulit ». Haec ipse. Quomodo autem iste per sanctum Gerardum abbatem Bromiensem, de quo anno superiori dictum est, occasione morbi calculi ab eo jam antea curati ad meliorem frugem con-

versus fuerit, haud erit otiosum hic enarrare ex fideli ejusdem temporis scriptore ¹, rem gestam ita persequente :

3. « Per hoc tempus Arnulphus marchio Flandriæ dominabatur, vir valde opulentus quovis genere divitiarum, uti hodieque claret in ditiori ejus sobole. Is morbo gravissimo vexatus, nullam ex tantis opibus ei potuit adhibere curationem : recte enim quadrabat versus ille :

Æger dives habet nummos, se non habet ipsum.

« Perpetuis enim cruciamentis conficiebat eum calculus, morbus intolerabilis, urinæ meatus obstruens. Multi quidem ad eum advolabant medici, suam peritiam egregie jactantes, ut scilicet a pecunioso homine nummos, et lautas epulas emungerent. Aiebant illi, incisione opus esse, et sine ea nullam posse ei fieri medicinam : sed princeps veritus, ne dum remedia vitæ caplat, vitam prorsus amittat, non patitur se ulla ratione incidi. Porro medici ei animum addere volentes, illo inspectante, octodecim eodem affectos morbo inciderunt, eosque omnes, dempto uno, qui mortuus est, brevi curarunt. Sed ille unus e vita ablatus facile confirmavit comitis animum, ne se pateretur incidi. Tandem Deo illi suam gratiam aspirante, ad se reversus, spem, quam inconsulte in hominum arte posuerat, in eo collocat, qui omnia curat solo sermone.

4. « Hausto enim bono odore famæ beati Gerardi, præsertim ex illuminatione cæcæ mulieris, submisit admodum per celerem nuntium eum rogat, ut ad ipsum venire minime gravetur. Venit ille, et princeps honorifice occurrit venienti, eumque, ut par erat, officiosissime excipit : indicat cum lacrymis morbi acerbiter; orat, ut pro ipso Deum omnipotentem deprecetur. At vir Dei : Crede mihi, inquit, mi frater, non ego tantæ mihi virtutis ac meriti conscius sum, ut tu quidquam hujusmodi me homine vilissimo debeas expectare; perfectorum istud est, eorum maxime, qui jam corpore exuti Domino semper assistunt. Ego vero quisnam sum, ut a me homine vilissimo rem tam difficilem exigas ? Si vis perfectam, Domino committe medelam. At comes e diverso : Sentio, inquit, mi pater, quid velis : occasionem quæris, ne id mihi præstes beneficii. Sed quæso te, præpotentis Dei benignitate fretus, ne mihi differas afferre remedium, quod ego certissime mihi in tanta doloris acerbitate per tuas preces affuturum polliceor. Noli, obsecro, inhumanum te mihi exhibere, sed miserere mei hominis moribundi, ut tui quoque Deus misereatur.

5. « Beatus vir sic respondit lacrymanti : Ne videaris frustra a me petisse remedium, indicabo tibi quod facias : Jacta semper in Dominum cogitatum tuum; et quia multis auctus es divitiis, aliquid

ex eis erogato in pauperes, et poteris abolere enormitatem scelerum tuorum : propter peccata enim interdum hujusmodi mala accidunt. Ubi vero hac ratione tibi Christum propitium reddideris, etiam optatam licebit recuperare salutem. Ad hæc comes : Gratissimum est, inquit, quod hortaris, serve Dei, modo possim Christi experiri clementiam. Ecce instar Zachæi illius Evangelici ¹, dimidium bonorum meorum do pauperibus, si tamen sopiri queat morbus gravissimus, me misere depascens. Deinde præcipit domesticis suis, ut fideliter sancti viri consilium exsequantur.

6. « Porro autem indicit ei vir Dei triduanum jejunium, ipse pariter cum eo jejunans, ut ea victus parcimonia purificati, imo spirituali refectione recreati, digni ad percipienda Christi mysteria ambo accederent. Eo jejunio religiose, ut res exigebat, expleto, sanctorumque suffragiis lacrymose imploratis, vir Dei divinis accingitur armis, missamque suo more lacrymabundus celebrat. Cumque jam sacram sumpsisset Eucharistiam, et marchioni quoque inbianter expectanti eam imperliisset : confestim reddendi lotii appetitu marchio corripitur. Itaque secedens cum urina nullo negotio calculum ejicit, et pristinae sanitati mirabiliter restitutum se gratulatur. Quæ illius animum tum exultatio obtinuerit, quas Dei laudes omnes illi faventes deprompserint, quanta erga virum Dei extiterit veneratio, nemo, ni fallor, requirit, cum nulla id possit a nobis oratione explicari ». Subdit auctor de ejusdem S. Gerardi contemptu divitiarum, cum ab offerente Arnulpho ingentem pecuniæ thesaurum accipere noluit. Suscepit vero laborem, nempe oblatam curam monasteriorum totius Flandriæ, quæ reviviscere fecit monastica disciplina. Ipse vero comes curatus corpore, et anima pariter convaluit pristinae vitæ renuntians.

7. *Eduinus rex Angliæ pœnitens moritur.* — Hoc eodem anno perfectam pacem obtinet Ecclesia Anglicana, defuncto Eduino rege, et succedente in monarchiam regni totius Edgari. Hæc Osbertus, et alii qui persecuti sunt res Anglicanas. Porro precibus sancti Dunstani, quem afflixerat, ne penitus ad inferos damnaretur, animam ejus ereptam, ita idem narrat Osbertus : « Interea Eduinus e vita præsentis subtractus est, et anima ipsius Dunstano in orationibus occupato a quibusdam teterrimis hominibus cursim e vestigio est præsentata. Cujus miseriam miseratus suarum injuriarum immemor, pro liberatione ejus immensos omnipotenti Deo lacrymarum imbres effudit, nec ab eis destitit, donec se pro eo exauditum agnovit. Facto igilur non grandi intervallo, Mauri illi ad Dunstanum sua præda vacui redeunt. Et quia suas injurias ulcisci supervacue venerant, calumniosa voce depromunt; quorum ille furores nihili pensans, Deo super ineffabili misericordia ejus gratias egit ». Hæc ipse. Porro miser Eduinus magis procacis

¹ Apud Sur. die 111 Octob. tom. v.

¹ Luc. xix.

meretricis impulsu, quam sua voluntate peccaverat, haud omnino malus, natus ex regina sancta,

cujus precibus factum, ut in fine suorum scelerum pœnitens ex hac vita discesserit.

Anno periodi Græco-Romanæ 6452. — Anno Æræ Hispan. 997. — Anno Hegiræ 348, inchoato die 14 Martii, Fer. 2. — Jesu Christi 959.

— Joannis XII papæ 4. — Romani jun. imp. 1.

1. *S. Adalbertus in Russiam mittitur.* — Ad num. 1. In Chronico Hildensheimensi ad hunc christi annum legitur: « Venerunt legati Ruscie gentis ad regem Ottonem, et deprecati sunt eum, ut aliquem suorum episcoporum transmitteret, qui eis ostenderet viam veritatis: et professi sunt se velle recedere a paganico ritu et accipere religionem Christianitatis. Et ille consensit deprecationi eorum, et transmisit Adalbertum episcopum fide Catholicum: illique per omnia mentiti sunt, sicut postea eventus rei probavit ». Continuator vero Reginonis ait: « Legati Helenæ reginæ Rugorum quæ sub Romano imperatore Constantinopolitano Constantinopoli baptizata est, fide (ut post claruit) ad regem venientes episcopum et presbyteros eidem genti petebant ». Idem habet Lambertus Schafnaburgensis ad annum DCDLX, de Adelberto addens: « Qui etiam vix evasit manus eorum ». Ex prædictis locis duæ difficultates, quarum solutio Historiæ Ecclesiasticæ elucidandæ non parum conducit, exortæ, de quibus nempe Rugis aut Russis, et de quo Adalberto seu Adelberto auctores isti loquantur. Baronius anno DCDLXXI, n. 43, tres *Adelbertos* distinguit, quorum alter episcopus Pragensis in Bohemia, alter Magdeburgensis archiepiscopus, tertiusque Rugorum antistes extiterit. Contra vero Cromerus lib. 3 de rebus Polonorum pag. 46, unicum *Adelbertum* admittit, qui nunquam Russiam adierit, sed qui ad prædicandum Evangelium in Hungariam et Poloniam profectus sit.

2. *Duo Adalberti distinguendi.* — Verum sanctum *Adalbertum* in Russiam seu in Tauro-Scythiam, vel, ut nunc loquimur, in Moscoviam ad prædicandum Evangelium missum, postea Magdeburgensem episcopum fuisse, duos tantum Adalbertos hoc sæculo floruisse, et Helenam Moscoviæ Christianam extitisse reginam, ex dicendis constabit. Hæc quidem expeditio Apostolica effectu caruit, quia, ut scribit Ditmarus lib. 2, pag. 20, *Adalbertus* a gentilibus expulsus fuit; at hic indignus agendi modus *Helenæ* reginæ piissimæ non attribuendus, sed vel Sphendostlabo ejus filio regi adhuc mino-

renni, vel Russis, qui a religione Christiana abhorrebant. De hujus reginæ pietate anno DCDLXI mentionem fecimus. Scriptores latini mediæ et infimæ ætatis *Russiam* plerumque *Rugiam* appellarunt, indeque error enatus, quod *sanctus Adalbertus* in Rugiam maris Baltici insulam prædicandi Evangelii causa directus fuerit, que nihil magis a veritate alienum. Helmoldus in Chronico, de conversione Slavorum, inter quos Rugi seu Rugiani in mari Baltico siti, verba facit, de qua cum hactenus mentionem non fecerimus, hic ex occasione agemus. Is itaque lib. 1, cap. 6, de Rugis hæc notatu digna habet: « Tradit veterum antiqua relatio, quod temporibus Ludovici secundi (filii Ludovici Pii et Germaniæ regis) egressi fuerint de Corveia (seu Corbia) monachi sanctitate insignes, qui Slavorum salutem sitientes, impenderunt seipsos ad subeunda pericula et mortes pro legatione verbi Dei. Peragratissime multis Slavorum provinciis, pervenerunt ad eos, qui dicuntur Rani, sive Rugiani, et habitant in corde maris. Ibi fomes est errorum, et sedes idololatriæ. Prædicantes itaque verbum Dei cum omni fiducia, omnem illam insulam lucrati sunt, ubi etiam oratorium fundaverunt in honorem Domini ac Salvatoris nostri Jesu Christi, et in commemorationem sancti Viti, qui est patronus Corveiæ.

3. *Populi Rugiam insulam incolentes fidem acceperunt sub Ludovico Germaniæ rege.* — « Postquam autem, permittente Deo, mutatis rebus Rani a fide defecerunt, statim pulsus sacerdotibus atque Christicolis, religionem verterunt in superstitionem. Nam sanctum Vitum, quem nos martyrem ac servum Christi confitemur, ipsi pro Deo venerantur, creaturam anteposcentes Creatori. Nec est aliqua barbaries sub cælo, quæ Christicolas ac sacerdotes magis exhorreat. Solo nomine S. Viti gloriantur, cui etiam templum ac simulacrum amplissimo cultu dedicaverunt, illi primatum deitatis specialiter attribuentes. De omnibus quoque provinciis Slavorum illic responsa petuntur, et sacrificiorum exhibentur annuæ solutiones. Sed nec mercatoribus, qui forte ad illas sedes appulerint,

patet ulla facultas vendendi et emendi, nisi prius de mercibus suis Deo ipsorum pretiosa quæque libaverint, et tunc demum mercimonia foro publicantur. Flaminem suum non minus quam regem venerantur. Ab eo ergo tempore, quo primo fidei renuntiaverunt, hæc superstitio apud Rános perseverat usque in hodiernum diem », annum scilicet millesimum centesimum sexagesimum octavum, quo Helmoldus Chronicon suum, ab Arnolfo abbate Lubecensi postea continuatum, absolvit. Is deinde cap. 11 refert, *sanctum Adelbertum* primum Magdeburgensem archiepiscopum ordinatum esse, et multos Slavorum populos ad fidem convertisse, sed de Russis mentionem non facit, quia Slavi non erant, sed iis finitimi, ut cap. 1 ipse insinuat. De Russis autem sequentia nobis dicenda restant.

4. *S. Adalbertus a Russis expellitur.* — Ad annum DCCLX continuator Reginonis scribit : « Rex Natalem Domini Franconofurd celebravit, ubi Libutius ex cœnobitis sancti Albani (quod monasterium Moguntiae situm) a venerabili episcopo Adalberto genti Rugorum episcopus ordinatur ». Tum ad annum DCCLXI : Libutius priori anno quibusdam dilationibus ab itinere suspensus, XV kalend. Martii anni præsentis obiit, cui Adalbertus ex cœnobitis sancti Maximini (quod monasterium apud Treveros positum) machinatione et consilio Willelmi archiepiscopi (sc. Moguntini) licet meliora in eum confusus fuerit, et nihil unquam in eum deliquerit, peregre mittendus in ordinatione successit. Quem piissimus rex solita sibi misericordia, omnibus quibus indigebat copiis instructum genti Rugorum honorifice destinavit ». Denique idem continuator ad annum DCCLXII : « Adalbertus Rugis ordinatus episcopus, nihil in his, propter quæ missus fuerat, proficere valens, et inaniter se fatigatum videns revertitur : et quibusdam ex suis in redeundo occisis, ipse cum magno labore vix evasit ». Ditmarus vero, qui hoc tempore vivebat, lib. 2, pag. 20, de Ottone scribit : « Adelbertum Treverensem, professione monachum, sed Russiae prius ordinatum præsulem, et hinc a Gentilibus expulsum, ad archiepiscopatus apicem, inclytum patrem, et per omnia probatum, anno Dominicæ Incarnat. DCCLXX, XV kal. Novemb. Apostolica auctoritate promovit ». Ex quibus omnibus inter se collatis evidenter deducitur, Baronium loco laudato *Adalbertum* ad *Russiam* missum ab *Adalberto* Magdeburgensi archiepiscopo male distinxisse, et Mabillonium Sæc. v, pag. 576, *Rugiam* seu *Russiam* (utrumque enim dicitur) bene interpretatum esse de *Russia*, nunc *Moscovia* appellata. Nec refert quod *Helena* regina Constantinopoli baptizata dicatur ; cum ea in urbe propter causas nobis ignotas tunc fuerit, et baptismum tam ibi, quam alibi accipere potuerit.

5. *S. Gerardus Arnulphum M. Flandriæ comitem calculi morbo sanat.* — A num. 2 ad 7. *Sanctus Gerardus* Broniensis in Belgio abbas *Ar-*

nulphum marchionem Flandriæ morbo calculi liberavit, isque hac occasione melior effectus, ut narrat Baronius ex auctore anonymo Vitæ sancti hujus abbatis. Verum Arnulphus Magnus, ita enim cognominabatur, a Gerardo anno nongentesimo quadragésimo octavo sanatus. Postquam enim hæc anonymus narravit, ait, « Arnulphum spectata viri Dei virilitifera probitate », ei commendasse procurationem abbatiarum, « quotquot habebat sua sub potestate », et Gerardum imprimis *Blandiniense* monasterium adisse, in illudque ejectis clericis monachos introduxisse, atque postea corpora sanctorum Wandregisili, Ansberti atque Wlframni ex urbe Bononiensi, ad quam Normanorum metu alias delata fuerant, Gandavum reduxisse. Quod utrumque anno DCCLXIV contigisse, testatur Meyerus lib. 2 Annal. Flandriæ ad eum Christi annum. De ea translatione supra verba fecimus.

6. *Moritur Edwius Angliæ rex.* — Ad num. 7. Licet antiquior chronologus Saxonicus *Edwium* Angliæ regem anno nongentesimo quinquagesimo septimo vivere desiisse scripserit, indubitatum tamen ejus mortem currenti accidisse, quo Hovedenus pag. 423, annalista Mailrosensis, aliique eam consignant. Id etiam colligitur ex annis, quibus regnasse dicitur. Hunlindoniensis enim pag. 356 ait eum *anno regni sui quinto* immatura morte præreptum, et Hovedenus citatus, ac Ethelwerdus in fine egregii sui operis annos quatuor ei attribuunt, quia nempe annum ultimum, qui incompletus fuit, negligunt. Denique *Edgarus* ejus frater ac successor Chartam dedit Wigornienti Ecclesiæ de ejiciendis clericis uxoris et introducendis monachis, a Spelmanno pag. 432 e duplici Mss. extractam, in cujus fine legitur : « Facta sunt hæc anno Dominicæ Incarnationis nongentesimo sexagesimo quarto, Indictione octava, regni vero *Edgari* Anglorum regis sexto, in regia verba, quæ ab incolis +++ nominatur : in Natali Domini, festivitate sanctorum Innocentium, feria quarta. Ego Eadgar basileus Anglorum, et imperator regum gentium, cum consensu et principum et archiepiscoporum meorum hanc munificentiam signo Crucis corrobore ». Quibus ex temporariis notis inter se accurate collatis manifestum fit, *Edgarum* a præsentī anno monarchiam suam deduxisse, ideoque et fratrem ejus *Edwium*, qui partem regni oblinebat, hoc etiam anno demortuum esse. Obiter autem notabis, ex eadem clausula colligi Anglos hoc tempore Indictionem a Septembri, quo Indictio viii eo Christi anno cepit, et annum Incarnationis a kalendis Januariis sæpe inchoasse, alioquin *Edgarus* jam numerasset annum DCCLXV. Vide quæ dicam anno MLXV.

7. *S. Dunstanus fit. episc. Londinensis.* — « *Edgarus* totius imperii monarcha effectus », inquit Osbernus in Vita S. Dunstani archiepiscopi Cantuariensis, num. 31, « cogitabat beatum virum (nempe Dunstanum) super omne regnum consti-

tuere, nolens in regno sine illo crescere, quem ante regnum præ cæteris studuerat familiarius diligere. Unde appposito patribus suis Londoniensis episcopo, rogatu regis ac principum Dunstanus successione donatur, annuentibus quoque omnibus ejusdem urbis habitatoribus, et importunis vocibus illius nomen acclamantibus. Audierant namque quam fuerat a primæva ætate Deo acceptissimus, quam in illa cui præerat Ecclesia (nempe Wigorniensis) sollicitus, quam denique in omni re bona et optima probatissimus : et ea re noluerunt habere alium cum possint habere lectissimum. Neque illum juvit excusatio canonum auctoritate prætensa, qui sicut Ecclesiam unam duobus esse episcopis contradicunt, ita duas Ecclesias uni episcopo fieri posse non permittant : « Cum Joannes, inquiunt, dilectus Domini, septem Ecclesiis atque episcopis earum præfuerit, et beatus Paulus omnium Ecclesiarum sollicitudinem simul et magisterium habuerit : talibus B. pontifex rationum testimoniis victus, Lundanæ urbis (seu Londinii, ut hodie loquimur) antistes inthronizatur, non relinquens eam quam ante habuerat Ecclesiam, sed utrique præsidens, utramque regens, utriusque verus ac proprius pontifex existens ».

8. *Sed nonnisi post Edwii regis mortem.* — Malmesburiensis, lib. 2 de Reg. cap. 8, non tantum ait *Edgarum* Edwii fratrem ætate minorem, hoc anno Angliæ monarchiam adeptum, sed etiam juveniculum *annorum sedecim* fuisse, quam ætatem ei etiam Hovedenus, Ethelwerdus, aliique assignant, eumque eodem numero ferme annorum monarchiam tenuisse docent. *Edgarum* illi a justitia, benignitate, fortitudine, prudentia, aliisque virtutibus regiis plurimum laudant. Sed quantus fuerit, vel sola evectio *Dunstani* ad episcopatum Londoniensem et sedem Metropolitanam Cantuariensem, quando cætera decessent, satis ostendit. Ingulphus loco citato, scriptor anonymus Vitæ

S. Odonis archiepiscopi Cantuariensis, et B. presbyter coævus in Vita S. Dunstani, in Actis sanctorum Bollandianis ad diem xix Maii recitata, cap. 5, scribunt *Edgarum*, post Edwii fratris mortem, *Sanctum Dunstanum* Ecclesiis Wigorniensis et Londinensi episcopum præposuisse. Sed quoad tempus episcopatus Wigorniensis Dunstano concessi, non dubium quin hallucinentur, quod de auctore illo coævo mirum videri non debet, quia, ut non semel indicavimus, auctores res suo tempore gestas scribentes in errorem quandoque labuntur. Quod maxime advertendum, ut, quando necesse fuerit, ab illis discedamus. Mabillonius Sæc. v Benedict., in Observat. præviis ad Vitam sancti Dunstani ab Osberno monacho scriptam, Vitam in Actis SS. Bollandianis editam testatur se legisse in Ms. Codice monasterii Vedastini apud Attrebatas, ex quo illam postea eruit Henschenius, seque existimare littera illa B designari *Brithfertum* cænobii Ramesiensis monachum, quem Pitseus ait sub annum cmlxxx vixisse. Anonymum vero illum Dunstano æqualem fuisse, ex eo inter alia intelligitur, quod eam inscripserit *Alfrico* archiepiscopo Cantuariensi, anno post obitum sancti Dunstani octavo ad eam sedem promoti. Aliqua singularia habet idem anonymus, sed non dubium quin cap. 5 etiam hallucinetur, quando ait *Dunstanum* Wigorniensem et Londinensem Ecclesias *per multa annorum transeuntium tempora* rexisse ; cum ipsemet fateatur utrumque episcopatum Dunstano post *Edwii* regis mortem collatum fuisse, certumque sit, *Dunstanum* anno sequenti metropolitane Ecclesiæ Cantuariensi præfuisse.

9. *Mors S. Gerardi abbatis et Constantini imp.* — *Sanctus Gerardus* abbas Broniensis anno currenti demortuus, ut anno superiori diximus, et *Constantinus Porphyrogenneta* hoc anno denatus, ut anno sequenti ostendimus.

JOANNIS XII ANNUS 5. — CHRISTI 960.

1. *Legatio Joannis papæ et aliorum ad Ottonem contra Berengarii tyrannidem, cum jramento ab eodem præstando.* — Sequitur annus Redemptoris nongentesimus sexagesimus, tertia

Indictione, quo Joannes assertus papa, tyrannidem Berengarii haud amplius ferens, adversus eum legationem misit ad Ottonem regem, de qua hoc anno apud Reginonem agitur, deque aliis aliunde

ab Italia eadem ex causa ad eum concurrentibus legationibus : quas omnes recenset Luitprandus¹ his verbis de singulis agens :

2. « Pugnantibus, imo sævientibus in Italia, et ut verius fateamur, tyrannidem exercentibus Berengario atque Adelberto, Joannes summus Pontifex et universalis papa, cujus tunc Ecclesia supradictorum Berengarii atque Adelberti sævitiam erat experta, legatos sanctæ Romanæ Ecclesiæ, Joannem videlicet diaconum cardinalem, et Azonem scriniarium, serenissimo atque piissimo tunc regi, nunc Augusto Cæsari, destinavit Ottoni, suppliciter litteris et regum signis orans, quatenus pro Dei amore, sanctorumque Apostolorum Petri et Pauli, quos delictorum suorum cuperet esse remissores, se sibi commissam sanctam Romanam Ecclesiam ex suorum inimicorum faucibus liberaret, ac salutem et pristinam libertatem restitueret ». Hæc continentur in ista legatione, cum eodem tempore, eodem motu sancti Spiritus, alii aliunde (ut dictum est) ad eundem regem confluxere ex eadem causa legati, de quibus subdit :

3. « Hæc dum Romani legati conquererentur, vir venerabilis Walbertus, sanctæ Mediolanensis Ecclesiæ archiepiscopus, semivivus ex supradictorum rabie Berengarii atque Adelberti liberatus, superius memorati Ottonis potentiam adiit, indicans se non posse pati Berengarii, Adelbertique, necnon Willæ sævitiam, quæ Manassem Arelatensem episcopum contra jus fasque Mediolanensis Ecclesiæ sedi præfecerat. Aiebat sane hanc Ecclesiæ suæ calamitatem, quæ quod se suosque capere oporteret, interciperet. Sed Waldo Cumanus (Comanus vel Comensis) episcopus hunc pone est secutus, non disparem a Berengario atque Adelberto et Willa, quam Walbertum contumeliam se esse perpassum clamitans. Venerant et nonnulli alterius ordinis ex Italia viri, quos inter illustris marchio Othbertus cum Apostolicis concurrerat nuntiis, a sanctissimo Ottone tunc rege (ut dixi) nunc Augusto Cæsare, auxilium exoptans ». Hæc Luitprandus ; his subiiciens ejus in Italiam expeditionem, quæ contigit anno sequenti. Quod ad Willam pertinet, de qua sunt allatæ ad Ottonem querelæ, filia fuit Bosonis marchionis Tusciæ fratris Hugonis, uxor Berengarii, impudiciæ, sævitæ atque omnium denique vitiorum laborans infamia ; quam jure omnium feminarum nequissimam fuisse, idem² Luitprandus affirmat.

4. Porro sic vocavit Joannes papa Ottonem in Urbem, ut tamen ante legatis Apostolicæ Sedis ille juramento promitteret, sibi Romanæque Ecclesiæ fore bene consulturum, omniaque Romanæ Ecclesiæ bona a tyrannis sublata restituere. Quibus etiam juramento dato, Otto consensit. Forma ipsa tunc juramenti concepta et legatis exhibita, recitatur a Gratiano verbis istis³ :

5. « Tibi domino Joanni papæ ego rex Otto promittere et jurare facio per Patrem, et Filium, et Spiritum sanctum, et per lignum hoc vivificæ Crucis, et per has reliquias sanctorum, quod si, permittente Domino, Romam venero, sanctam Romanam Ecclesiam et te rectorem ipsius exaltabo secundum posse meum, et nunquam vitam, aut membra, et ipsum honorem quem habes, mea voluntate, aut meo consilio, aut meo consensu, aut mea exhortatione perdes. Et in Romana Urbe nullum placitum aut ordinationem faciam, de omnibus quæ ad te aut ad Romanos pertinent, sine tuo consilio. Et quidquid in nostram potestatem de terra S. Petri pervenerit, tibi reddam. Et cuicumque regnum Italicum commiserit, jurare faciam illum, ut adjutor tui sit, ad defendendam terram sancti Petri, secundum suum posse. Sic me Deus adjuvet, et hæc sancta Dei Evangelia ». Illucque ibi. Eadem habentur in Vaticana bibliotheca, in Codice a Cencio camerario scripto, in quo Romanæ Ecclesiæ factæ donationes, et multiplices juramentorum formæ inter alia expressa leguntur. Meminit ejusdem Ottonis promissionis istius Joannes ipse, cum per legatos ad eum missos quereretur non fuisse sibi servata promissa : ut ex appendice ad¹ Luitprandum sumus inferius suo loco reddituri. Joannes igitur male conscius de sua in Sedem Apostolicam intrusione, sic liberationem Romanæ Ecclesiæ ab Ottone quem vocat, exoptat, ut tamen antea voluerit sibi esse consultum, ne sui Pontificatus quoquo modo jacturam pateretur. Innatum est a natura latronibus, ut omnes semper timeant, etiam socios, atque adjutoribus non se credant.

6. Cæterum vice versa ipse Joannes per legatos suos promisit Ottoni regi, imperii titulum ex more exhibendum, simulque ea omnia tum ipsum, tum successores ejus præstatueros imperatori, quæ Eugenius papa et Leo promississent sponte imperatoribus : quænam ista fuerint, intexta habentur in ipsius Ottonis Diplomate donationis factæ eidem Joanni Pontifici, quod inferius suo loco ponetur.

7. *Dunstanus Romam veniens recipit pallium.* — Eodem quoque anno venit Romam S. Dunstanus Cantuariensis creatus episcopus ad Joannem Pontificem, ut ab eo pallium acciperet ; de eo enim ista Osbertus in Dunstano² : « Post hoc temporis, opportunitate accepta, beatissimorum Petri et Pauli Limina petiit, et eum summæ Sedis Pontifex magno sinceræ dilectionis affectu illo venientem excepit ; secumque postea familiariter agens, et agendo, templum sancti Spiritus esse cognoscens, magnifice illum honoravit, ac stola sui Apostolatus, pro qua venerat, decentissime decoravit. Sicque delegata ei legatione Apostolicæ Sedis, genti Anglorum pastorem ac salutis eorum provisorem destinavit. Itaque vir Dei Roma reversus, et in patriarchatum primæ sedis Britanniarum receptus,

¹ Luitp. I. VI. c. 6. — ² Idem. I. III. c. 6. — ³ Dist. LXIII. c. 33. Tibi Domino.

¹ Luitp. I. VI. c. 6. — ² Apud Sur. die XIX Maii tom. III.

in ipsum mundi principem quasi gigas surrexit, et armaturam Dei verbi a dextris et a sinistris constanti virtute in eum vibrare, et membra ejus circumquaque debellare, et prosternere cœpit ac enervare, etc. » Forma autem concessionis sic Apostolicis litteris expressa est¹:

8. « Joannes Episcopus, servus servorum Dei, confratri Dunstano Dorobernensis (Cantuariensis) Ecclesiæ archiepiscopo, vitæ perpetuæ permanentiam in Christo salutem.

« Si pastores ovium, solem geluque pro gregis sui custodia die ac nocte ferre contenti sunt, et oculis conspiciant vigilantibus, ne aliqua ex ovibus aut errando pereat, aut laniata morsibus rapiatur: quanta cura quantoque sudore debemus esse pervigiles ob salutem animarum, qui dicimur pastores esse earum? Attendamus igitur, nos officium exhibere erga custodiam ovium Dominicarum, ne, quasi lupo veniente, territi fugiamus: ne in die divini examinis, pro desidia nostra ante summum Pastorem et negligentia vestra exerceamur, unde modo honoris reverentia in sublimiore arce cæteris dijudicamur. Primatum itaque tuum, in quo tibi ex more antecessorum tuorum vices Apostolicæ Sedis exercere convenit, ita tibi ad plenum confirmamus, sicut B. Augustinum ejusque successores, præfatæ Ecclesiæ pontifices, habuisse dignoscitur.

9. « Pallium vero fraternitati tuæ ex more ad missarum solemniam celebranda commendamus: quo tibi non aliter uti concedimus, quam eo usu quo antecessores nostri prodiderunt, Ecclesiæ tuæ privilegiis in suo statu manentibus. Neque tua prudentia hoc incognitum habet, vel quicumque, quantum indumenti honor moderatione actuum tremendus erit. Honestati morum tuorum hæc ornamenta conveniunt, quatenus, Deo auctore, posses esse conspicuus, ita ut vita tua filiis tuis sit regula, et in illa, si qua fortitudo illis inest, dirigantur, dum in ea quæ imitentur adspiciant ». Et in fine Epistolæ:

10. « Sancta Trinitas fraternitatem vestram gratiæ suæ protectione circumdet, atque ita in timoris sui viam te dirigat, ut post vitæ hujus amaritudinem, ad æternam pervenire simul mereamur dulcedinem. Et hoc scriptum est per manum Leonis scriniarii Sedis Apostolicæ in mense Octobris, Indictione quarta, die primo kalend. Octobris, anno duodecimo (sexto) summi Pontificis Joannis ». Vidisti extrema duo, episcopum sanctissimum, Pontificem vero moribus perditissimum, attamen illum hunc revereri colereque observantissime, recognoscens in illo personam Petri. At de his hæcenus. Jam vero ad ea quæ spectant ad Orientale imperium, convertamus orationem.

11. *Constantini imperatoris Orientalis veneno sublata vitia, virtutes, scripta, cui succedit filius Romanus.* — Hoc eodem anno, die nona Novem-

bris, Constantinus imperat. veneno moritur: quæ autem causa præcesserit de veneno a filio ipsi propinato, hæc habet Curopalates: « Romanus autem Constantini imper. filius, cum jam ad maturiorem pervenisset ætatem, neque sustinere posset a parente suo res administrari, consilium cepit de eo e medio tollendo, conscia etiam sua uxore Caupone. Cum enim Constantinus poculum ad sese expurgandum sumpturus esset, illi clam venenum miscuerunt, et Nicetæ mensæ præfecto permiserunt ut illud imperatori porrigeret. Quod ille sumpturus positum ante venerandas imagines, sive casu quodam, sive etiam sponte lapsus, majorem partem effudit, reliquum autem a Constantino epotum, quod nimis exiguum esset, otiosum et inutile fuit, amissa propria vi. Verum etiam sic Constantinus vix potuit superesse, grassante in illius latere veneno et male ipsum afficiente.

12. « Anno autem sui imperii post Romanum quintodecimo, Septembri mense, Indictione tertia, anno mundi sex millesimo quadringentesimo octavo, exit Constantinus imp. in Olympum montem, specie quidem ut Patrum qui illic degebant precibus armaretur, revera autem ut cum Theodoro Cyzici præsule conjungeretur, qui tum ibi commorabatur, eumque eo de abdicando Polyucto patriarcha Constantinopolitano consultaret. Illuc igitur profectus, sive corporis morbo, sive rursus a filio veneno infectus dolens, recessit, et ad extremum Septembris mensis in lecto decumbens ad regiam urbem pervenit, nonaque Novembris mensis vita functus est, infectis rebus de quibus consuluerat relictis, cum vixisset omne vitæ tempus annos quinquaginta quatuor et menses duos, regnasset autem cum patre et Alexandro puero atque matre annos tredecim, deinde cum Romano, qui tyrannidem occupavit, annos viginti sex, et postquam ille imperio excidit, solus rerum potitus, annos quindecim ». Ab Alexandri autem obitu, annos quadraginta novem inchoatos. Mortuusque sepelitur cum suo parente, usque ad extremum spiritum Polyucto infestus, ac de eo deiciendo cogitans.

13. « Quibusdam diebus ante ipsius obitum, ad quoddam tempus continenter appetente vespera, lapides superne emissi, et intra illius domos multo impetu dilapsi, eximios strepitus edebant: cum vero existimaret a superioribus locis magna vi eos deferri, custodes ad multas noctes instituit, si quem deprehenderent id ausum, sed frustra se laborare nescius erat, quippe cum non ab hominibus ea res accideret, sed a superiori potentia fieret ». Hæc Curopalates de obitu Constantini: qui et de ejus vitæ moribus superius agit, cum vino deditum reprehendit, et oscitantiam in rebus publicis administrandis, sævitiam in puniendo, et in deligendis magistratibus neglectum maximum. De his autem quæ in eo laudem meruerunt subjicit ista:

14. « Non omnino laudabilium actionum expers fuit Constantinus: quæ enim sumus in præ-

¹ Vuitelm. de Gest. Pont. Angl. in Dunstano.

senti commemoraturi, et laude et administratione digna, obscurare, et veluti umbra quadam tegere potuere multa illius vitia. Etenim doctrinas, arithmeticam, astronomiam, geometriam, et omnium præstantissimam philosophiam, quæ jamdiu negligentia et superiorum principum insectia defece- rant, proprio studio recuperavit, perquisitis in unaquaque ipsarum peritissimis ac probatissimis viris inventis, magistrisque constitutis; et probos homines approbans et apud se retinens, expulsa temeritate auctor fuit, ut brevi reipublicæ administratio ad probabiliorem rationem traduceretur. Curam item earum suscepit artium, quæ cum manu tractentur, mechanicæ dicuntur, et ad magnum incrementum eas perduxit. Fuit etiam erga Deum pius, religiosus et liberalis, neque unquam cum supplicationes fierent ad sacra templa accessit inanis, neque sine fructu coram Deo conspectus est; verum magnifica dona, qualia deceret amatorem Christi imperatorem, afferebat ».

15. « Ad postremum autem, hic reddamus ejusdem Constantini imperatoris admonitionem ad Romanum filium suum, pariter imperatorem, de non ineundo connubio eum externis gentibus, quod fragmentum esse videtur excerptum ex prolixiori ejusdem Constantini ad filium scriptione. Aceepimus autem id Parisiis delatum ex bibliotheca Catharinæ Medicæ reginæ Franciæ græce scriptum, latinitate autem donatum a nostro Petro Morino Parisiensi his verbis :

16. « Agedum vero inde transi : et ad aliud postulati genus a ratione alieni et indecori, decentes et convenientes rationes exquire ac edisce, si qua enim unquam natio ex infidelibus his Borealibus gentibus postulaverit, ut cum Romanorum imperatore affinitatem jungat, ac vel filiam ejus sponsam accipiat, vel propriam dedat filiam ut uxor sit imperatoris vel filii ejus : utere his verbis, et ejusmodi illorum irrationabilem petitionem repelle, ac dicito : De hoc negotio atque argumento præceptum esse, ac formidabilem Constitutionem atque indepreceabilem magni et sancti Constantini, in sacra mensa Catholicæ Christianorum Ecclesiæ S. Sophiæ descriptam : Ne unquam Romanorum imperator affinitatem cum natione contrahat, diversis moribus ac peregrinis a Romanorum statu utente, maxime vero quæ alterius fidei sit, nec sacro initiata baptismo, præterquam cum solis Francis. Hos enim solos magnus ille vir Constantinus sanetus excepit, quod et ipse habuit a partibus illis ortum, ita ut cognatio, multumque commercium sit Francis ac Romanis. Et cur imperatores hortatus est, ut cum illis solis connubia inirent? propter antiquam partium illarum ac gentis claritudinem atque nobilitatem ; conjunctionem autem eum aliis interdicens saneivit, ut qui id ausus esset, tanquam transgressor paternarum institutionum ac sanctionum imperatoriarum, alienus judicaretur a Christianorum cœlibus, et anathemati traderetur.

17. « At memoratus ille imp. Leo, qui et coronam (ut ante dictum est) ab Ecclesia sumpsit, ac sibi imposuit, absque ejus sententia qui tum patriarcha erat, ac brevi improbi sui conatus dignas pœnas exolvit : ausus est sancti illius imperatoris præceptum, quod jam expositum est in sancta mensa descriptum spernere et pro nihilo habere ; ac postquam semel a Dei mandatorumque ejus timore descivit, instituit eum Chagano Chazariæ fœdus nuptiale, ejusque filiam uxorem duxit, magnumque ex eo probum et sibi inflixit et Romanorum imperio, ut qui majorum violaverit præcepta, ac nihili fecerit. Verumtamen ne ille quidem Christianus orthodoxus erat, sed hæreticus atque leonomachus. Quamobrem hujusmodi scelorum causa, in Ecclesia Dei assidue abdicatur et anathematizatur, ut et Dei et sancti magnique imp. Constantini Constitutionis transgressor ac evorsor. Nequaquam enim capit, Christianos cum infidelibus nuptialem societatem facere, et inire affinitatem, canone id prohibente, atque ab universa Ecclesia statuque Christianorum talem alienum existimante, qui sapientum imperatorum Romanorum sanctiones infregerit.

18. « Quod si objiciatur : Quomodo igitur dominus Romanus imp. cum Bulgaris affinitate se junxit, ac domino Petro Bulgaro propriam neptem dedit uxorem? Defendendum est, domnum Romanum idiotam et illitteratum hominem fuisse, nec ex iis qui antea in regia educati erant moresque Romanos a principio secuti, neque a genere regio ac nobili, ideoque arrogantius licentiusque multa fecisse ; nec in eo tunc Ecclesiæ vetanti paruisse, neque mandatum ac edictum magni Constantini sequi voluisse ; ideoque mente sententiaque audaci ac arrogante, suumque sequente consilium, ac omnis ignara honestatis, recusanteque quod decorum est atque pulehrum amplecti, et a majoribus traditas Constitutiones tenere, id facere esse ausum : cum hanc solam prætexeret rationabilem causam, ut tantam multitudinem captivorum Christianorum tali facto liberaret, Bulgarique Christiani essent, ac nobiscum fide sociati ; sed nec alioqui imperatoris et legitimi regis filia erat, quæ dabatur nuptum, sed tertii et ultimi, ac etiam alienæ subditi manui, nec in negotiis imperii ullam habentis potestatem. Et verisimile id fuit, ac si aliqua ex consanguineis imperatoris cognatione longinquior, nec proxima regiæ nobilitati, collocaretur ad nuptias propter aliquod publicæ utile obsequium ejusdam postremi hominis, et nihil ferme pollentis.

19. « Postquam autem id domnus Romanus perpetravit contra regulam et traditionem Ecclesiasticam, magnique et S. Constantini edictum ac præceptum : tum vivo illi hoc exprobratum est criminique datum, ac exosus fuit senatui populoque universo atque ipsi Ecclesiæ, quod odium exitu ejus declaratum est : tum post mortem similiter contemnitur, et incusatur, et damnationi sub-

jacet, quippe qui novo exemplo rem designavit indecoram, ac nobilitate reip. Romanæ indignam. Unaquæque enim gens suos mores habet, ac leges, et jura quæ ab aliis differunt; debetque sua tenere, ac ex eadem quisque defectu habito vitæ inire ac exercere societatem. Quemadmodum enim singula animalia cum suo genere consociantur, ita justum est, singulas nationes non ex alienæ gentis, et alia lingua utentibus, sed ex generis ac linguæ suæ hominibus contubernia nuptiarum contrahere; nam inde concordia et consuetudo, amabilisque congressus et societas vitæ, naturæ vioritur. Alieni vero mores ac dissimiles leges, offensionem gignere ac odium et seditionem solent; ex quo non amicitia et communio, sed inimicitiae dissidiaque nascuntur. Propterea non oportet eos qui ex legibus imperare volunt, ea imitari ac sequi quæ a non-

nullis male per imperitiam vel per temeritatem gesta sint, verum eorum qui convenienter legibus ac juste regnarunt, præclara facta habere, tanquam bonas imagines, ad imitationis exemplum, et quæcumque agunt, ad eorum æmulationem conari dirigere. Exitus demum quem is habuit ob facinora ex consiliis suis nata, dominus nempe Romanus idoneum exemplum est ad respiscendum, ei, qui velit quæ ab eo male gesta sunt æmulari». Hactenus ibi.

20. Defuncto Constantino, Romanus ejus filius succedit imperator, qui eodem anno Basilium filium suum per Polyeuctum patriarcham voluit coronari.

Claruit hoc tempore in Oriente S. Lazarus monachus in Galesio monte juxta Ephesum, cujus Vitam scripsit Georgius patriarcha.

Anno periodi Græco-Romanæ 6453. — Anno Æræ Hispan. 998. — Anno Hegiræ 349, inchoato die 2 Martii, Fer. 6. — Jesu Christi 960.

— Joannis XII papæ 5. — Romani jun. imp. 2.

1. *Otto rex adversus Berengarium a Joanne PP. evocatur.* — A num. 1 ad 7. « Legati ab Apostolica Sede veniunt », inquit continuator Reginonis ad annum DCCLX, « Joannes diaconus et Azo scriniarius, vocantes regem (nempe Ottonem) ad defendendam Italiam et Romanam rempublicam, a tyrannide Berengarii (Italiæ regis); Walbertus etiam archiepiscopus Mediolanensis et Waldo Cumanus episcopus, et Opertus marchio, Berengarium fugientes, in Saxonia regem adeunt. Sed et reliqui pæne omnes Italiæ comites et episcopi, litteris eum, aut legatis, ut ad se liberandos veniat, exposcunt ». Idem narrat Baronius ex Luitprando, lib. 6, c. 6, qui addit, *Ottonem* collectis copiis in Italiam sese contulisse, quo tamen nonnisi anno sequenti profectus est. *Cumæ*, urbs episcopalis in ora littorali Campaniæ posita, initio Sæculi xiii prorsus eversa. De ea pluribus agit Cluverius lib. 4 Ital. Antiq., pag. 1101 et seqq. Fallitur enim Sigonius lib. 6 de Regn. Ital. qui *Waldonem* Comensem episcopum facit. *Joannes* itaque XII, Pontifex Romanus, postquam multa indigna passus est, legatos illos misit, et Ottonem rogavit, ut *Caroli Magni* exemplo Ecclesiam Romanam Italiamque, a sæva Berengarii et Adelberti ejus filii tyrannide vindicaret. Id si faceret, se illum Augustalibus insignibus ornaturum, ac imperatorem Romanorum appella-

turum, quæ dignitas tum vacabat, a morte nempe Berengarii Senioris. *Otto* sese venturum promisit, interimque juramentum a Baronio recitatum ad Joannem papam misit.

2. *S. Dunstanus anno superiori Cantuariæ archiep. creatus.* — A num. 7 ad 11. Hovedenus. pag. 423 narrat, anno superiori *Elffinum* archiepiscopum Cantuariensem, dum Romam ad petendum pallium tenderet, in Alpibus montibus mortuum esse, eodemque anno *Brithelmum*, qui e Dorsetensium sede ad primatum Cantuariæ evectus fuerat, cum minus idoneus judicaretur, ad relictam Ecclesiam suam rediisse, ac dein *Dunstanum* primæ metropolis Anglorum primatem ab Edgardo rege constitutum esse. Quare *Dunstani* ad Ecclesiam Cantuariensem promotio anno superiori peracta. Brithelmum eodem anno Ecclesiæ Cantuariensi præfuisse, de sancti Odonis morte loquentes monstravimus. Pergit Hovedenus: « Anno DCCLX, sanctus Dunstanus ad Romuleam Urbem profectus, Indictione tertia, pallium a Joanne papa suscepit, sique per pacis itinera ad patriam remeavit. Paucis exinde mensibus interjectis, regalia petit limina, januam regiæ pietatis suggestionem preceque pulsat humillima, ut religiosum, mitem humilemque monachum sui prædecessoris Odonis fratruelem, beatum Oswaldum, quem in timore

divino sanctisque virtutum operibus verissime probaverat excrevisse, promoveret ad pontificale decus Wigorniensis Ecclesiæ. Annuit rex Eadgarus quod sanctus petebat Dunstanus, et ab ipso inthronizatus est ad summum sacerdotium beatus Oswaldus». Ante Hovedenum idem iisdem verbis narravit Simeon Dunelmensis.

3. *Hoc anno pallium a Joanne PP. obtinet.* — Epistolam a Joanne XII *Dunstano* pro pallio concessam, quæ mutila est apud Malmesburiensem, lib. 1 de Gest. Pontif. pag. 212, integram invenit Mabillonius, recitatque Sæc. v Benedict. in Observat. præviis ad Vitam S. Dunstani. Ea apud Malmesburiensem et Baronium his verbis clauditur: « Et hoc scriptum est per manum Leonis scrinialis Sedis Apostolicæ, in mense Octobri, Indictione iv, die primo kal. Octob., anno xii Summi Pontificis Joannis ». Idem habetur in exemplari Mabilloniano, nisi quod loco, *die primo kal. Octob.*, scriptum est, *die xii kalendarum Octobris*. Verum, uti Baronius et Mabillonius notant, mendum est in anno Pontificis. Uterque legendum putat. *anno vi Joannis duodecimi*. Sed cum Joannes XII anno mcdxvi post diem vicesimum mensis Augusti Pontificatum inierit, legendum, *anno v duodecimi summi Pontificis Joannis*. Eadem Epistola extat etiam apud Eadmerum, lib. 5 Hist. Novorum, sed subscriptio pariter corrupta, et ubique, ut videtur, addititia. Eadmerus enim habet Indictionem iii, uti et Hovedenus. Præterea Pontifices Romani nondum Summi Pontificis, sed universalis papæ nomine in rescriptis appellabantur. Quare hæc subscriptio nihili facienda.

4. *Floret S. Oswaldus episc. Wigorniensis.* — Quoad sanctum *Oswaldum*, is sequenti anno episcopus *Wigoniensis* creatus, ut ex mox dictis perspicuum fit, et in morte ejus magis confirmabitur. Quando ad Eboracensem archiepiscopatum translatus fuerit, infra aperiemus. Ejus Vita ab auctore anonymo incertæ ætatis scripta, et tam Sæc. v Benedict. quam in Actis SS. Bollandianis ad diem xxix Februarii recitata. In ea dicitur, *Oswaldum* duodecim monachos in villa *Westbiri* dicta congregasse ac frequenter visitasse, vigiliis et orationibus operam dedisse. Extruxit et illustre monasterium sanctæ Mariæ apud Wigorniam prope Ecclesiam cathedralem, de quo Malmesburiensis in lib. 2 de Reg. cap. 8: « Sedem episcopalem Wigornia, clericis non vi expulsis, sed arte sancta circumventis, replevit monachis regularibus. Expulerat ante regali jussione Ethelwoldus episcopus clericos de Wintonia, qui cum data sibi a rege jussione, ut aut regulariter viverent, aut loco cederent, magis vitam mollem elegissent, tunc tota insula incertis vagabantur sedibus ». De sancto Ethelwoldo episcopo Wintoniensi infra verba faciemus.

5. *PorphYROGENNETA devotionis causa ad Olympum se confert.* — Ad num. 12 et seqq. Constantini Porphyrogennetæ mors ad annum præcedentem pertinet. Incertus continuator Theophanis in

Constantini imperio, num. 49, eam narraturus ait: « Incesserat imperatorem cupido ingensque desiderium petendi Olympum montem, et ut sanctos Patres illic degentes inviseret, seque venerabilium precum illorum amplo commeatu communiret, necnon ut locorum mutatione curaque leniore ægræ valetudini remedium quæreretur. Mussitabat enim in eo occulta quædam ægritudo, cujus etiam curandæ causa, medicorum se curæ addixerat, ac ad Olympum exire maxime opus habebat. Hoc desiderio ac amore captus, confestim prætoriam minorem celocem conscendit, venitque ad Bithynorum fines et ad Prietum (Prænctus locus vocatus est ab indigenis, eam nactus appellationem a quodam Bithynorum tutelari Deo). Inde Niceam applicat, urbem olim opulentam ac incolis confertam. Tum ad monasterium venit quod ad montis ascensum situm est, ac Athenogeni martyri illic cultum habenti sacrum est. Ibi loci præpositus, illius patris diploma, rubrica consignatum imperatori ostendit. Aiunt enim, piæ recordationis Leonem imperatorem illac transeuntem, atque ad Olympi verticem iter habentem, ut a Deo filium imperii hæredem votis impetraret, a monasterii tunc præfecto, Petro nomine, audivisse, fore ut filium imperii successorem susciperet, et ut is idem sub vitæ exitum Olympum pariter peteret. Itaque Porphyrogennetus propria patris sui agnita scriptura, veram esse ait monachi vaticinationem.

6. *Moritur.* — « Inde ad Olympi montosa transit, Olympi, inquam, quem et Mysorum censui (nempe Mysis olim in eo sedem habentibus) pridem adscripsere. Indeque vix tortuosis, anfractuosis, præruptis, ac quam difficillimis ad ascensum collibus superatis, ad sacrorum Patrum cellas imperator evasit. Quibus visis ac salutatis, eorumque salutarium precum commeatu munitus, Prusam commigrat, quam olim vir Bithynus imperans, fortitudinis rerumque bello præclare gestarum nobilioribus gentis regibus, monumentum condiderat. In hujus pæne promeriis ac suburbanis cum Thermae occurrissent, iis lavit: quo loco ferunt fabulæ. Herculem quærendo Hylam circumquaque palantem et Hylæ necem cruore absterxisse. Interim admonent sacri Patres, esse in Olympi summo vertice seniore ascetam in spelunca signis effulgentem: quo ille nuntio, hinc ejus visendi desiderio excitatur. At vero senior divina collustratus apparitione, quasi ad eum imperator venisset, relicta cella sua, facta reverentia (prone scilicet salutato), Benedic, ait. Quærit imperator, quisnam tandem, et unde, et quomodo, ac quo venerit? Respondit ille, cum majestatem tuam ad me venire cognoverim, ego potius ad te venio. Tum imp. Dei nutu seniore ad se missum suspicatus, ejusque precibus communitus, cum vitæ terminum sibi proximum adesse didicisset, ad sanctorum Patrum cellas reversus est: ciboque cum illis recreatus, cito ad mare descendit». Paulo post: « Vixit ab ortu suo annos quinquaginta

quinque, menses duos, dies.....; mortuus est mensis Novembris die quinta decima, Indictione tertia; anno a mundo condito sexcies millesimo quadringentesimo sexagesimo nono (sed legendum, sexagesimo octavo), relicto Romano imperatore, atque Helena Augusta Romani matre ».

7. *Ea profectio et mors ad annum præcedentem pertinent.* — Ex his liquet primo, *Porphyrogenetam* anno superiori, quo Indictio III kalendis Septemb. incæpit, vivendi finem fecisse, iisdem enim mense ac Indictione eum vita functum tradunt etiam Curopalates ac Cedrenus. Quare annus mundi 6469 loco laudato corruptus est; is enim per quindecim partitus quatuor Indictiones relinquit, et tamen ipsemet auctor diserte prodit *Porphyrogenetam Indictione tertia* e vivis excessisse. Quapropter loco 6469, legendum 6468. Idem annus mundi depravatus est apud Curopalatem, cujus verba Baronius num. 42 refert. Ibi enim dicitur, *Porphyrogenetam anno mundi 6408* in Olympum montem perrexisse, cum scribendum fuisset, *anno mundi 6468*, ut recte Cedrenus habet. Liquet secundo, diem emortualem Constantini incertum esse, cum Curopalates apud Baronium ac Cedrenus asserant, eum *die nona Novembris* demortuum, et tam incertus continuator Theophanis citatus, quam Simeon Logotheta ejus mortem mensis Novembris die xv accidisse affirmant. Curopalatis tamen et Cedreni opinionem præferendam esse, ex dicendis in morte Romani Junioris constabit. Liquet tertio, *Constantini* nativitatem eum anno nongentesimo quinto exacte a nobis copulatam esse, cum tam Zonaras quam Curopalates ac Cedrenus scribant, eum vixisse annos quinquaginta quatuor ac menses duos; quod idem sine dubio incertus continuator Theophanis prodiderat, sed locus ejus a librariis corruptus. Liquet quarto, eum anno DCIV mense Septembri in lucem prodiisse, cum vivere desierit, die nona, vel quinta decima Novembris, postquam menses duos supra annos LIV vixisset. Idem incertus continuator *Porphyrogenetam* principem fuisse prudentem, pium, ac justum, ac probitate neminem illi parem enituisse, sed epularum vique amantiorem tradit. Eum scientias, quæ ob incuriam et inscitiam imperatorum perierant, sua industria instaurasse, artibusque magnum incrementum attulisse, jam supra narravimus.

8. *Romanus Jun. eodem anno patri successit.* — Ei anno superiori successit *Romanus Junior* filius, qui vicesimum primum ætatis annum attigerat quando pater obiit, ut habet incertus continuator Theophanis in ejus Vita. Leo enim Grammaticus, Simeon Logotheta et Georgius monachus Historias suas in Constantino Porphyrogeneto absolvunt. Bis nuptias iniit, primum cum *Bertha*, Hugonis Italiæ regis filia, cum qua per annos quinque vixit, obiitque intacta ac virgo, ut tradit Curopalates. Exinde alia Constantino patre eidem data uxor *Anastasia*, plebeis ac cauponibus orta parentibus, quam *Theophanonem* appellavit. Hæc post Romani

excessum, imperium per aliquot annos rexit, ut infra videbimus. Uxoris instinctu, Helenam matrem et sorores suas aula amovit: « Sorores Zoem », inquit citatus continuator, « Theodoram, Agatham, Theophanonem, Annamque aula detrusas ad Caniclii ædes, ubi Sophia Augusta Christophori imperatoris uxor tonsis crinibus monacham agebat, ipsas quoque sanctimonialium ritu capillis mutavit, ac quanquam multis Helena matre sororibusque rei facinus deplorantibus largeque queritantibus, cum se illæ mutuo adstringerent, et collo aliis aliæ prope hæerent, nihil amplius tragico illo spectaculo consecutæ sunt, quam ut mutis ac inanibus lacrymis defungerentur ». Corrigendus itaque Dncangius in familiis Augustis Byzantinis ac Familia XIX, qui duos tantum liberos, *Romanum* nempe juniorem, et *Theodoram* Joanni Tzimiscæ imperatori postea nuptam, *Porphyrogenetæ* perperam attribuit, quique secutus Zonaram scribit illum *Helenæ* uxori superstitem fuisse, contra fidem omnium aliorum scriptorum Byzantinorum. Quando Romanus junior suscepit imperium, natus jam ei erat *Basilus Porphyrogenetus*, unius anni puer. Post patris excessum alium genuit, cui *Constantini* nomen inditum. Ille brevi post a *Polyeneto* patriarcha in sanctæ Sophiæ ambone Augustali corona donatus est, inquit idem continuator. Accuratus Cedrenus de utroque Romani Jun. filio ait, « eadem tertia Indictione, festo Paschalis die (die sc. XXII mensis Aprilis, in quem hoc anno Pascha incidit) filio suo (nempe Basilio) coronam imperatoriam opera Polyeneti imponit in magno templo. Insequenti anno, rursus ei filius in fontano palatio nascitur, quem a patre Constantinum nominavit ». Uterque postea imperavit, ut suo loco videbimus.

9. *Expeditio adversus urbem Cretensem decreta.* — Leo Diaconus, qui ab obitu Constantini *Porphyrogenetæ* ad mortem usque Joannis imperatoris cognomento Tzimiscis Historiam continuavit, expeditionem a Romano Jun. adversus Agarenos Cretam insulam occupantes susceptam refert. Is auctor hactenus ineditus, ea a Combefisio in latinam linguam versus, opera viri clarissimi Bernardi Montfauconi monachi Benedictini Congregationis S. Mauri, a nobis lectus, et quoad præcipua capita descriptus est, ad sequentium annorum historiam certius illustrandam. Leo itaque initio sui Operis ait, se scripturum quæ vel oculis usurpavit vel quæ ab iis qui noverant, diligenter didicit. « Huic Romano imperatori, inquit, in mentem venit, ut Arabum Cretensium potentiam ferocientem, inque Romanos cædes spirantem Dei nutu penitus profligaret. Etenim infortunio quod Romanis nuper acciderat, immensum superbiens, Romanæ ditionis littora locaque maritima prædationibus maxime infestabat. Qua vero ratione Romanorum illa clades contigerit, cursim narrabo.

10. *Nicephoro Phocæ committitur.* — « Constantinus imperator cum Cretensium injuriam occultasque grassationes ferre non posset, justo con-

scripto exercitu, multaque longe navium incendiariarum instructa classe, adversus Cretam misit, quasi primo statim assultu, præliique incipientis clamore ea potiturus; ducis tamen ac prætoris ignavia imperitiæque (viri scilicet exsecti, cubiculariique in umbra educati, Paphlagonum regione oriundi; Constantinus ei nomen, Gonzyles cognomen erat, tametsi patriciorum illustri dignitate fulgebat) omnis hic exercitus, paucis duntaxat exceptis, a Barbaris concisus, internecioneque deletus est. Hanc cladem sua manu resarcire imperator ex animo cupiens, Nicephorum Phocam magistrorum dignitate clarum, Orientalibus cum imperio præfectum (domesticum scholarum hunc Romani magistratum nuncupant) virum strenuum acrisque ingenii, rebusque bellicis exercitatum, ducem prætoremque Cretensis ejus expeditionis creavit. Illic itaque Nicephorus imperatoris jussu Asiaticis collectis copiis et in naves expositis, brevique expedita navigatione, plurimis item ignariis convectis triremibus (dromones Romani vocant, ac si dicas celoces) ad Cretam appulit; quodque opportunum excensus tempus videbatur, qua præditus esset bellicæ rei peritia, ipso experimento manifeste ostendit. Scalas enim in rates impositis, littorique admotis ac in eo explicatis, pedites atque equites ab æquore in aridam devexit. Quo novo inaudiloque spectaculo attoniti Barbari turmatim per campum coibant, phalangem suam atque aciem indivulsam servantes, Romanorumque in ipsos impetum sustinentes. Tunc Romanorum dux Nicephorus triplici agmine distributa acie, clypeisque ac hastis longe constipata, bellicum canens, cum Crucis trophæum præire jussisset, obversa fronte in Barbaros irruit: gravique conserto prælio, instarque grandinis devolantibus telis, haud fieri poterat ut Barbari Romanorum imbrem sagittarum diutius ferrent: quinimo terga vertentes solutæque phalange, quam effuse licuit cursum expedites, in suum se prædium recepere. Romani vero pone sequentes immensam eorum stragem dederunt. Talem nimirum prima aggressio pugnaque faustum Romanis nacta finem est.

41. *Nicephorus Phocas Cretam obsidet.* — « Quia vero, uti a me dictum est, Barbari intra muros sese incluserant, convocatis prætor copiis, Cretensium urbem vallo cingit. Triremes vero ac reliquias onerarias, tranquillo in portu ac navali confortas stationem habere jubet, marisque potiri, ac si aliquas Barbarorum classes navesque aliquas oberrantes conspicerent, mox insequi, ignique humido concremare ». Post multa adversus Saracenos ab eo in Creta insula patrata, urbis obsidionem his verbis enarrat: « Undique igitur lustrato oppido, cum omnino aggressu difficile ac pæne inaccessum videret, cujus alterum latus tuto mare præsidio cingeret, ab altero autem, æquali pæne

planitie lateque expansa rupe niteretur, supra quam positum ac fundatum esset: ipsa vero structura novum quid ac inauditum præferebat. Ex aggesta enim humo pilisque caprinis ac suum setis coactis prorsus compactis confecta mœnia erant, tantæ latitudinis, ut duo currus facile in eis junctim obeundo percurrerent. Assurgebant altitudine quanta par erat. Accedebant et duæ in latum quam maxime ductæ fossæ atque profundæ, qua undique munimentum præstarent. Cum sic igitur munitum oppidum prorsusque ejus arduam expugnationem novisset, tale quid contra machinatur. A littore ad austrum spectante cœpta structura, ad alteram usque littoris partem quod terræ interjectum erat, septo intercludit, ne scilicet Barbari pro libito in agrum facile effundi possent; liberumque ipsi erat pugnam conserere aut non conserere, cum et luberet ». Narrat postea Leo Diaconus nova stratagemata a Nicephoro adinventæ, urbisque expugnationem, quæ cum anno sequenti contigerit, eam ad illum annum differimus. Porro incertus continuator Theophanis in Romano Jun. num 40, ubi fuse de expeditione Cretensi agit, ait eam inchoatam *mense Julio, Indictione quinta*. Sed jam non semel monuimus, Indictiones in eo auctore variis in locis corruptas esse, quod in ista omnino dicendum, cum urbs anno sequenti, Indictione quarta, notato mense Martio capta fuerit. Quare loco, *Indictione quinta*, legendum, *Indictione tertia*.

42. *Slavorum conversio.* — Postquam Otto Germaniæ rex Slavos variis impressionibus attrivit, demum currenti anno « universos Slavorum populos suo imperio subjecit, et quos pater ejus (Henricus nempe Auceps) uno grandi bello domuerat, ipse tanta deinceps virtute constrinxit, ut tributum et Christianitatem pro vita simul et patria gratanter susciperent: baptizatusque est totus gentiliū populus, Ecclesiæ in Slavonia ædificatæ, monasteria etiam virorum ac mulierum Deo servientium plurima constructa. Tunc Slavonia in duodeviginti pagos dispertita est, qui dicuntur ad Christianam fidem omnes, exceptis tribus, fuisse conversi », inquit chronographus Magdeburgensis hactenus ineditus, Sæc. v Benedict. pag. 574.

43. *Floret Atto episc. Vercellensis.* — Ad hunc usque annum et ultra vixisse Attonem seu Haitonem nomine *secundum*, ostendit Dacherius in Prologo ad tomum viii Spicilegii, ubi aliqua ejus opera hactenus inedita publicavit, nempe *Capitulare seu Capitula Attonis episcopi* librum de *pressuris Ecclesiasticis*, atque Epistolas varias. « Episcopus Vercellensis fuit », inquit Ughellus in Italia sacra, « ab an. dcdxlv, doctissimus theologus et canonista ». De aliis ejus operibus adhuc ineditis legendi Oudinus in Supplem. Script. Ecclesiast. et Natalis Alexander part. 1, Sæc. ix et x, pag. 304.

JOANNIS XII ANNUS 6. — CHRISTI 961.

1. *Otto in Italiam venit, regno potitur.* — Annus sequitur Redemptoris nongentesimus sexagesimus primus, Indictione quarta, quo Otto rex Germaniæ vocatus in Italiam legationibus Joannis papæ et aliorum, antequam recederet e Germania, Wormatiæ comitia habuit, in quibus filium suum Ottonem ex Adelaide genitum creavit regem, quem Willelmo Moguntino archiepiscopo ejus ex alia matre filio nutriendum commisit. Quibus peractis, nullo obice in Italiam venit, atque Papiæ constitit. Inde vero Romam anno sequenti profecturus præmisit Attonem abbatem Fuldensem ad habitacula statuenda. Hæc apud Reginonem hoc anno. De his agens Luitprandus hæc ait¹: « Horum, inquit, rex piissimus lacrymosis questibus inclinatus, non quæ sua sunt, sed quæ Jesu Christi cogitans, filium suum sibi cognominem, contra morem puerilibus in annis, regem constitutum in Saxonia dereliquit: ipse collectis copiis in Italiam percitus venit: qui tanto Berengarium atque Adelbertum celerius expulit, quanto evidentius constat, quod commilitones Petrum et Paulum sanctissimos Apostolos habuit. Bonus itaque rex dispersa colligens, et conflata consolidans, quod cuique proprium fuit, restituit ». Hæc ipse. Qui bene principibus Apostolorum tantam sine sanguine partem victoriam tribuit. Etenim bellici apparatus Berengarii ad resistendum laud mediocres erant, sed eos Deus cito dissolvit. Quomodo id acciderit, historia Longobardorum ducum Beneventanorum aperit his verbis:

2. « Adelbertus Berengarii filius venit cum magno apparatu, populusque nimis valde ad Clusas venit fauces (istæ sunt Alpium ora, per quæ Transalpini se consueverunt immillere in Italiam) qualiter cum Ottone certamen inirent; feruntque plurimi, sexaginta millia pugnatorum fuisse cum Adelberto; sed cum una die unaque nocte ibi morarentur, et Ottonis exercitus non appropinquaret, comites ad Adelbertum dixerunt: Vellemus, domine, ut Papiam cum paucis pergas, et tuo genitori dicas, quatenus Longobardorum regnum sub

vestra ditione committat, quia nos minime sub illius potestate amplius jam durabimus. Si vobis committit regnum, nos lotis viribus pugnabimus; sin autem, Italiæ regnum extero regi commitemus; quia sævitiam illius ejusque conjugis omnimode sustinere nequimus. Sed dum patri et matri quod dictum ei fuerat intimasset, et pater dictis obtemperasset, mater vero Willa dictis ejus nullo modo assensum dedit. Quapropter ad Clusas reversus est, et suis comitibus omnia propalavit. At illi omnes exinde irati sunt, protinusque illum reliquerunt, et unusquisque in suas urbes remeavit. Sicque Otto rex sine impedimento in Italiam introivit, atque Italiæ regnum obtinuit ». Hæc ibi. Quæ desiderantur in aliis, sicque (quod ait Luitprandus) auxilio Apostolorum Petri et Pauli, difficillimum bellum Otto magna gloria absque ullo labore confecit. Quomodo vero his magna felicitate confectis, est profectus in Urbem, suo loco anno sequenti dicturi sumus.

3. *S. Mauritii corporis translatio.* — Hoc eodem anno ab Ottone rege translatum fuisse Magdeburgum corpus S. Mauritii ducis Thebæorum legionis, et aliorum quorundam suorum sociorum, illicque decenti honore eosdem martyres cultos esse, testatur Ditmarus hujus temporis scriptor libro secundo sui Chronici.

4. *Creta insula a Sarracenis per Nicephorum liberata, ad Christianam fidem revertitur ope Niconis Armeni sanctitate celebris.* — Quod ad res pertinet Orientis, hoc anno, Indictione quarta, tradit Curopalates, Cretam insulam, postquam annis ferme quadraginta a Sarracenis fuerat occupata, a Nicephoro Phoca ejusque germano Leone recuperatam, Sarracenis inde dejectis, ac penitus victis et profligatis. Cum autem longa possessione Sarracenorum propemodum jam in ea Christianitas defecisset, aliis metu, blanditiis aliis ad Mahometanum cultum abductis, dirutisque Ecclesiis omnibus, iis exceptis, quas ipsi in sacrilegum usum suæ impietatis converterant: consilium Dei fuit, ut ad tantam Cretensis Ecclesiæ desolationem instaurandam, virum sanctissimum Niconem mitteret Armenum genere, cujus res præclare gestas græce

¹ Luitp. l. vi. c. 6.

conscriptas, ex Sfortiana bibliotheca acceptas Jacobus Sirmundus Arvernus Ricomagensis (quem aliqui errore Parisiensem nominavi), Societatis Jesu professor, in latinum convertit. Hic quippe non a Græcis tantum, sed a Latinis honore sanctorum cultus invenitur: die enim vicesima sexta Novembris a Græcis in Menologio, et a Latinis in Romano Martyrologio ejus nomen inter sanctos relatum habetur, annis singulis publice in Ecclesia recolendum. Cujus primordia (ut res summas summam perstringam) sic breviter accipe:

5. « Ortus iste in Ponto Polemoniaco parentibus honestissimis, iisdem insciis, ubi adolevit, fugam arripiens, ad monasterium Auræ Petræ dictum, situm in finibus Ponti et Paphlagoniæ, religione sanctissimum sese contulit: ibique sub ejus monasterii abbate viro religiosissimo, ad duodecimum annum monasticam vitam omnibus numeris perfectionis excoluit. Cum vero divinitus admonitus ejus abbas, ipsum ad plurimarum gentium conversionem vocatum e monasterio abire cogit ad Apostolatus sui munus implendum: ut plane de eo illud Joannis elogium haud incongrue usurpari possit¹: Fuit homo missus a Deo ». Quippe qui ut alter Joannes, vox clamantis in deserto, et illud ubique jugiter inclamantis, *PŒNITENTIAM AGITE*, ab iisdem vocibus cognomentum acceperit, ut dictus sit *μετανοείτε*, id est, pœnitentiam agite. Qui primum Orientis ubi peragrasset regiones, apostolatus sui primitias in conversione Armenorum ab innumeris, quibus detinebantur erroribus, Deo dicitur consecrasse. Ista tamen ab auctore non recensentur, eo quod ipse res ab eo gestas in Græcia tantum, ubi et defunctus est, ut sibi notiores, scribendas suscepit. Ubi vero Dei omnipotentis misericordia, Creta insula est recuperata a Christianis, ad ejus culturam idem Nicon ab Oriente evocatus, a Deo mittitur. Quæ autem ibi operatus sit, sic accipe ab auctore narrata:

6. « Cum igitur regiones non paucas Orientalium partium peragrasset, et publica pœnitentiæ prædicatione innumeras gentes ad salutis portum per pœnitentiam, meliorisque vitæ mutationem perduxisset, ad Cretam insulam navigandum sibi esse intellexit. Illuc enim divino quodam nutu vocabatur. Etenim simul atque insulam ingressus est ab Agarenorum jugo nuperrime liberatam, Romanoque imperio restitutam per Niephorum, fœdis autem detestandæ Agarenorum superstitionis vestigiis adhuc plenam et refertam, cujus scilicet incolæ diuturna atque assidua cum Sarracenis consuetudine, ad illorum mores, prohi odor! abrepti, nefanda etiam et profana eorum orgia fuerant amplexi. Ut igitur eo delatus, solemne illud suum: Pœnitentiam agite, inclamare cœpit; attoniti peregrino et inaudito prædicationis genere insulani, animisque incensi, vehementer in eum commoti sunt, adeo quidem, ut manus etiam inferre cogita-

rent: manifestum enim ad furorem illos adegerat res nova et inusitata, præoccupatos nimirum, deditosque (ut diximus) superstitionis Sarracenorum cæremoniis.

7. « Videns ergo immitis alque intractabilis gentis ingenium, sentiensque tantam durtiem, nisi prudenti quadam arte perdomari non posse: secundam (quod aiunt) navigationem, priore omitta, instituit, sapientumque medicorum exemplo, eorum curationem apposite simul ac solerter aggressus est. Habebat enim Paulum in ea re ducem ac magistrum. Itaque missam faciens insolitam illam prædicandi rationem: quod ex usu futurum in eo jam elucens perspicax futurorum gratia præmonebat; seorsum aliquos abducens, quos reliquis intelligentiores, et ad bonum excipiendum paratior norat, blandis primum verbis illorum ferocitatem lenire, durtiemque animi emollire cœpit; deinde sensim cor permovere, occulta cujusque facta (ut meus Jesus olim Samaritanæ) vitæque flagitia redarguens. Quo factum est, ut eximiam ejus virtutem agnoscentes, confestim iras ponerent, animorumque impetus revocarent; et quem malo nunc affecerant, eundem magno suo bono venerarentur, propositamque ab eo rectam fidem amplectentes, odii modum ad benevolentiae profectusque sui cumulum converterent. Consuetudo enim (ut ait ille) ad majora et perfectiora viam munit. Itaque sapiens, si minus verborum copia, at veritatis facultate piscator erat, hominum animas venari sciens, easque ad immortalitatem divinis eloquiis et non humanæ sapientiæ, sed Spiritus sancti doctrina traducere. Ex illo igitur tempore Cretenses Niconem tanquam a Deo missum Apostolum habuerunt, totamque insulam ejus fama compleverunt. Confluebant ad eum universi, et sicut Deo, illi adhærebant, ita ut vim legis quidquid præceperat, obtineret.

8. « Quare cum securo jam animo ad solitam prædicationem rediisset, ad baptismum omnes, veræque fidei disciplinam pertulit. Tum errore omni e medio sublato, Ecclesiis per totam insulam ædificatis, sacerdotibus, diaconis, æditisque designatis, reliquis etiam ritibus et cæremoniis apte distributis, vivendi legibus descriptis, omnibus denique quæ in animo erant, ne quem Cretensium boni expertem relinqueret, ordine constitutis, Gortyna discessit, triumque dierum iter progressus, quodam in loco sub noctem constitit, ubi antiquissimi templi, quantum ex ruderibus conjicere erat, vestigia cernebantur. Hoc in loco cum nocturno hymno rite decantato, et crueigero baculo humi defixo, somno se dedisset, lucernarium quasi lumen ante baculum in aere libratum videre visus est. At somno decusso cum surrexisset, non jam somnium, sed vera visio objecta est. Divina quædam lampas haud materialis a cruce irradians, ad diluculum usque astanti et oranti, Deoque gratias pro tanto munere agenti lumen exhibuit.

9. « Cumque iterum, Deo (ut patuit) sic vo-

¹ Joan. 1.

lente, somno indulsisset, ornatæ mulieris species apparuit, quæ dirutum templum instaurari jubebat, omnium Domino sic placere confirmans. Illo autem interrogante, quænam esset, quæ talia pro imperio juberet : Photina sum, inquit, martyr et famula Christi. Quod nisi reipsa quod volo expleveris, pedem ex insula non efferes. Experrectus ad hæc sanctus, propter visionis varietatem, ambiguo animo erat, ut inane potius insomnium fuisse crederet, quam divinæ gratiæ illustratio-nem. Quare quæ audierat contemnens, cœptum iter tenebat. Cum repente ademptam sibi oculorum aciem sensit, eoque tandem indicio divini numinis imperium id fuisse cognovit : quod ubi jussa exsequi constituit, visum mox recepit. Sed quoniam nec ligo in promptu erat, nec pala, nec adjutor ullus, o mira, Domine, et arcana opera tua ! nocte insecuta, finitimis loci accolis ignea ibi columna per tenebras lucens apparuit ; prodigioque exciti, subito accurrerunt, et cum ex Nicone quæ viderat didicissent, suam quisque ope-

ram conferre jussi, communi omnes consensu imperio paruerunt. Itaque sedula ejus sollicitudine, vigilantia, alacritate, opus exactum, templumque Martyris biennii spatio perfectum est. In qua postea aram erigendam ac rite consecrandam curavit, sacerdotesque in ea institui, siraulque omnia juxta Ecclesiasticos ritus peragi præscripsit. Omnibusque posthæc valere jussis, navigium conscendit, ac secundo cursu provectus Epidaurum, quod Damalam incolæ cognominant, die quinto pervenit, etc. » At de rebus Cretensibus hactenus.

10. Quomodo autem universam Græciam pœnitentiam prædicando peragravit, pluraque miracula operatus sit, atque uberes fructus ex sua prædicatione collegerit : idem auctor pluribus narrat abbas monasterii ejusdem sancti Niconis nomine nuncupati, qui patria Lacedæmonius ejus Vitam scripsit anno Domini millesimo centesimo quinquagesimo, ut ex ipsius scriptis apparet.

Anno periodi Græco-Romanæ 6454. — Anno Æræ Hispan. 999. — Anno Hegiræ 350, inchoato die 20 Feb., Fer. 4. — Jesu Christi 961.

— Joannis XII papæ 6. — Romani jun. imp. 3.

1. *Otto M. Ottonem filium regem Germaniæ creat.* — Ad num. 1 et seq. Continuator Reginonis de Ottone Germaniæ rege verba faciens ait : « Rex in Italiam ire disponens (quo a Joanne XII papa vocabatur) maximam suorum fidelium multitudinem Wormatiæ coadunavit : ubi consensu et unanimitate regni procerum totiusque populi, filius ejus Otto rex eligitur. Indeque progrediens convenientia quoque et electione omnium Lothariensium Aquis rex ordinatur. Ordinato vero filio, pater in Saxoniam rediens, dispositis regni negotiis, filium Willelmo archiepiscopo (Moguntino scilicet) tuendum et nutriendum commisit, sicque per Bavariam et Tridentum in Italiam se admisit : ubi omnes pæne Italiæ comites et episcopos obvios habuit, et (ut decuit) ab eis honorifice susceptus, potestative et absque ulla resistentia Papiam intravit, et palatium a Berengario destructum reædificare præcepit. Berengarius vero et Willa (uxor ejus) filiique eorum, quibus poterant munitionibus aut castellis includebantur, et nusquam forinsecus contra regem quid audentes progrediebantur ». Sigebertus in Chronico ad hunc Christi annum habet : « Filium suum Ottonem, puerum septen-

nem, Aquisgrani die sancto Pentecostes in regem inungi fecit : eoque commendato archiepiscopis fratri Brunoni et filio Willelmo ad Italiam tendit ». Quare initium Ottonis II in Germania regnantis a die vicesima sexta mensis Maii, in quam hoc anno festum Pentecostes incidit, deducitur.

2. *Creta a Nicephoro Phoca capta.* — Ad n. 4 et seqq. Leo diaconus *Cretæ* obsidionem anno superiori a Nicephoro Phoca Romani exercitus duce inchoatam pluribus describit, et narrationem suam his verbis claudit. *Nicephorus Phocas* cum admotis ad Cretensem urbem castris illic hyberna duceret, ac exercitum militaribus studiis exercebat, obsidionalesque machinas fabricaret, verna paulatim tempestate ex hyberna mutante, ac apparente qui præsto erat, armato exercitu, inque altam phalangem instructa acie, clangentibus tubis, tympanisque perstreperantibus contra oppidum proficiscitur. Acri conserta pugna restiterunt per tempus aliquod Cretenses, strenue fortique animo e muris dimicantes, ac Romanorum non paucos vulnerantes. Qua re perspecta, prætor petrarias quantocius adduxit, illisque lapidum imbre Barbaros peti jussit. Ad hæc etiam obsidionalem peculiaris machinam

(arietem Romani vocant) adhibuit : petrariis autem crebra saxorum pondera rotantibus, facili negotio Barbari repressi sunt. Interimque ariete muris admoto majore impetu quatiente, viri non pauci fossam subiere. *Cretenses* breve aliquod tempus pugnam declinarunt, prodigii immanitate attoniti. Tum rursus captivitatis periculum ac servitutis animo recolentes, constipato agmine aciem coegerunt, perque murorum rudera pervadentem Romanorum phalangem fortissime excipientes, quam pro humana virtute, majoribus animis dimicantur. Tandem multis illorum cæsis in fugam vertuntur per angusta viarum cedentes. Romani vero eos insecuti, dire trucidabant; qui vero hactenus superstites erant, ac quotquot prælii ardor non demessuerat, projectis armis in præceps vertebantur. Quo viso, prætor militum impetum inhibuit : non esse trucidandos suadens, qui arma abjecissent; sed vix exercitus impetum inhibuit ac sedavit.

3. *Constantinopoli triumphat.* — Urbe itaque penitus in potestatem redacta, subtractis prætor manubiarum primitiis, reliqua militibus diripienda objecit. Aiunt plurimas ac inexhaustas opes Cretensium illo oppido congestas esse; quippe quod diu rebus prosperis usum esset, maxime vero quod piraticis excursionibus ac latrociniiis usum, utriusque continentis populando littora, malisque ejusmodi eruditum artibus divitias quantas animus cogitaverit, thesauro repositas habebat. Evecto omni suppellectili, murorum ambitum perfodi atque disjici *Nicephorus* jussit, cunctisque hostibus in potestatem redactis, in sublimi arduoque tumulo, haud procul ab excisa urbe extante murum extrui jussit. Tutus enim locus videbatur, et ad arcem forti præsidio futurus. Septo itaque ac munimento tutissime ac firmissime structo, iustoque arci imposito militari præsidio, urbem græca voce Temenos (ac si dicas fanum seu delubrum) vocavit, et igniariis triremibus ad ejus custodiam relictis, ipse assumpta præda ac captivis Byzantium adnavigavit. Magnifice a Romano imperatore susceptus triumphum in theatrum invexit congregato omni populo, cunctisque copiam ac multitudinem spoliis admirantibus. Cernebatur enim immensa auri vis ac argenti; nummique Barbarici ex auro iuccto, vestes auro contextæ, purpureique tapetes, atque omnis generis pretiosa supellex subtilissima arte elaborata, auro et margaritis atque lapillis micantia, iisque interstincta; arma quoque et galeæ, et enses et thoraces, auro convestita atque illita. Diceret qui tunc præsens spectaculo foret, Barbaricas opes omnes in theatrum fuisse comportatas. Post hæc sequebantur et Barbari captivi numerosa multitudo collecti. Hæc summarie ex Leone diacono, phrasi ejus servata, a quo accipere Curopalates, Cedrenus et Zonaras. Nam continuator incertus Theophanis, qui idem narrat, coævus videtur fuisse eidem Leoni.

4. *Annus expugnatæ Cretæ.* — Tempus rei gestæ Cedrenus his verbis notavit : « Septima die

Martii mensis. Indictione decima quarta (legendum cum Curopalate, *Indictione quarta*, quæ hoc anno obtinebat) Chandacem ab insularibus vocatam, omnium Cretæ urbium munitissimam expugnat », nempe Nicephorus. Ad hæc Lupus Protospatha : « Anno dclxi capta est insula Cretes a Græcis sub Romano, mense Martii ». Paulo post : « Obscuratus est sol », seu, ut continuator Regionis habet : « Eclipsis solis XVI kalendas Junii », quæ juxta Catvسيوم accidit die xvii Maii, feria sexta, horis lere quinque ante meridiem. Incertus continuator Theophanis citatus, in Romano jun. num. 16 scribit, *Nicephorum* Cretam obsedissemenses fere octodecim. Verum in græco, loco, ἐπὶ μὲν ἐπὶ δεκά δεκά, legendum, ἐπὶ, rejecto numero denario. Ipsemet enim ait expeditionem a Nicephoro susceptam esse *mense Julio*, sed perperam errore librariorum ibidem dicitur, id contigisse *Indictione v*, et urbem *Indictione vi* captam. Quare recte Zonaras habet, *Nicephorum septem mensibus* in ea expeditione cum Saracenis sæpissime congressum esse. Capta fuerat *Creta* a Saracenis Hispaniensibus anno dcccxxiii, uti anno dcccxxii ostendimus, et post ejus recuperationem Christianis subjacuit usque ad nostram ætatem, qua magno Christiani orbis damno a Turcis expugnata fuit. Per annos cxxxviii, quibus Saracenis paruerat, insulares detestandam Agarenorum superstitionem amplexi fuerant, sed *sanctus Nicon* Armenus, monachus sanctitate illustris ac Cretensium Apostolus « ad baptismum omnes veræque fidei disciplinam perpulit », inquit auctor Vitæ ejus, ex qua plura refert Baronius. Obiter observabis triumphigenus, quod hoc tempore Constantinopoli in usu erat.

5. *Moritur Abderamen Hispaniæ califa.* — *Abderamen*, quo in Hispaniis califatum gerente Crete expugnata, « per viginti annorum spatium a bellis et exercitiis non cessavit, donec totam terram sub suo dominio complanavit, et omnes ei unanimiter subfuerunt », inquit Rodericus in Hist. Arabum cap. 30, qui addit, mortuum esse anno « regni quinquagesimo, anno Arabum trecentesimo quinquagesimo ». Ei successit Albacam filius, qui « invenit terram a patre suo pacifice complanatam, nec necesse habuit bellis vel exercitiis exerceri », inquit Rodericus.

6. *Saraceni in Asia a Leone Phoca victi.* — Nicephoro Cretam obsidente *Leo Phocas* ejus frater magisterii honore ornatus missus est a Romano imperatore in Asiam, si quo modo tum alias Barbarorum grassationes cohibere posset, tum et quæ mala impudenter inferre non verebantur, reprimere. Porro prætor, inquit Leo diaconus, ubi ex Europa profectus in Asiam venisset, *Chambdanique* audaciam ac duritiem auditu accepisset, templaque et oppida succensa vidisset, dirutaque præsidia, desolatam incolis regionem, iis violenter in captivitatem abductis, operæ pretium duxit, ne in apertum periculum, quas ducebat, copias con-

jiceret, neve aperto Marte cum tanta Barbarorum multitudine aciem componeret, quæ multas jam victorias retulisset, felicitque quam experta erat præter expectationem fortuna superbiret; cum præsertim innumera pæne multitudine hominum probe armatorum, confertas turmas ac manipulos inferret, ipseque levem manum nec justum satis exercitum ducaret, *Agarenorum* faustis adeo successibus pavidum, iisque tropæis, quæ quotidie erigebant: sed ut potius opportunissima præruptaque loca occuparet, inque locatis insidiis hinc inde transeuntes hostes observaret, atque illis in lubricis ac utrinque libratissimis viarum angustiis occurrens in transitu cum eis fortiter dimicaret. *Chambdanus* vero stipantium multitudine, turmisque militum ac cohortibus superbe tumens atque glorians, necnon spoliis ingenti copia captivorumque abacta præda tollens animos fastique insolescens, crebros hinc inde excursus progressusque faciebat. Tandem prætor suos ex insidiis suscitans in Barbaros irruit; parumque abfuit, quin et ipse *Chambdanus* in Romanorum potestatem veniret. Aiunt vero tantam Barbarorum per Romanos eo prælio editam stragem, ut multis ejus regionis locis in hanc usque diem ossium humanorum aggesti cumuli cernantur.

7. *Triumphus Leonis Phocæ.* — Cum vero tropæis hujusmodi ac stratagematis sic numerosam Barbarorum multitudine *Leo* profligasset, superbumque *Chambdanum* ad degenerem imbellemque formidinem ac fugam compulisset, partem prædæ exercitui distribuit, captivosque viatico instructos ad suas quosque sedes remisit. Quos vero *Agarenos* in prælio ceperat, posteaquam compedibus vinxerat, ad imperatorem triumpho Byzantii politurus iter maturavit: quo cum venisset, ducto in theatro triumpho, captivorum multitudine ac spoliis copia spectatores in stuporem egit. Ille *Leo* diaconus, cui incertus con-

tinuator *Theophanis*, *Cedrenus* alique suffragantur. Erat *Chambdanus* seu *Chambdas* Alepi ameras, id est, præfectus. *Elmacinus* vero lib. 3 Hist. Sarac. cap. 4, testatur, Romanos anno Hegiræ cccxi *Halebum* expugnasse, atque incolas omnes occidisse. Quod, inquit, a domestico, ideoque a *Nicephoro Phoca* patratum.

8. *Libutius et S. Adalbertus in Russiam missi.* — *Libutius* post *S. Adalberti* e Russia reditum, illuc anno superiori ab *Oltone* rege missus fuit; sed quid contigerit, narrat his verbis *Reginonis* continuator ad hunc Christi annum: « *Libutius* priori anno quibusdam dilationibus ab itinere suspensus, XV kal. Martii anni præsentis obiit, cui *Adalbertus* (mox memoratus) ex cœnobitis *S. Maximini* machinatione et consilio *Willelmi* archiepiscopi (nempe *Moguntini*), licet meliora in eum confisus fuerit, et nihil unquam in eum deliquerit, peregre mittendus in ordinatione successit. Quem piissimus rex solita sibi misericordia, omnibus quibus indigebat copiis instructum genti *Rugorum* (id est, *Russorum*) honorifice destinavit ». Tum ad annum *DCCLXII*: « Eodem anno *Adalbertus* *Rugis* ordinatus episcopus, nihil in his, propter quæ missus fuerat, proficere valens, et inaniter se fatigatum videns, revertitur: et quibusdam ex suis in redeundo occisis, ipse cum magno labore vix evasit, et ad regem veniens, charitative suscipitur, et a Deo amabili *Willelmo* archiepiscopo, pro retributione tam incommode ab eo sibi machinatæ peregrinationis, bonis omnibus et commodis quasi frater amplectitur et sustentatur ». Denique ad annum *DCCLXVI*: « *Erkanbertus* *Wirtzburgensis* cœnobii (legendum, *Vicenburgensis* cœnobii, quod in episcopatu *Spirensi* situm est) abbas obiit, et imperator electione monachorum *Adelbertum* *Rugis* ordinatum episcopum eidem monasterio præfecit ».

1. *Otto Romam venit, coronatur imperator, ablata restituit: Romanæ Ecclesiæ jura dato diplomate confirmat.* — Sequitur annus Redemptoris nongentesimus sexagesimus secundus, Indictione

quinta, « quo (inquit *Frodoardus* sui temporis res gestas per annos singulos digerens) *Otto* rex Romanam pacifice adiit, et amabiliter exceptus, atque honore illic imperiali sublimatus est ». Hæc ipse

multa paucis constringens. Quæ sic distincte magis apud Reginonem invenies, cum ait: « Eodem anno nongentesimo sexagesimo secundo rex Natalem Domini celebravit (Papiæ scilicet), indeque progrediens, Romæ favorabiliter susceptus acclamatione totius Romani populi et cleri ab Apostolico Joanne filio Alberici, imperator et Augustus vocatur et ordinatur. Papa quoque multa illum secum charitate detinuit, et diebus vitæ suæ nunquam ab eo se defecturum promisit ». Hæc ibi, reliqua postea. Addit his Luitprandus, qui præsens iisdem esse poterat, restituta fuisse omnia ab Ottone quæ essent Romanæ Ecclesiæ per tyrannos ablata, aliaque addita munera: Ait enim de Ottone cum in Italiam venit: « Quod cuique proprium fuit, restituit: dehinc Romam similia facturum adiit, ubi miro ornato miroque apparatu susceptus, ab eodem summo Pontifice et universali papa Joanne unctionem suscepit imperii. Cui non solum propria restituit, verum etiam ingentibus gemmarum auri et argenti muneribus ipsum honoravit. Jusjurandum vero ab eodem papa Joanne supra pretiosissimum corpus Petri, atque omnibus civitatis proceribus, se nunquam Berengario atque Adelberto auxiliaturum, accepit. Post hæc in patriam properanter repedavit ». Sed hic corrige textum, atque loco, « patriam », « Papiam » restitue; sic enim apud Reginonem, ubi dicitur: « Otto postquam vocatus est imperator, Papiam rediit, illicque Pascha Domini cum celebravit ».

2. Sic igitur qui vocatus est Pontificia per Joannem legatione in Italiam Otto, ut liberaret in primis Romanam Ecclesiam a tyrannis: rependere minime prætermisit quod acceperat beneficium, cum a Joanne creatus est imperator, idque exemplo priorum prædecessorum imp. Quidni Romanæ præstaret Ecclesiæ, quod unicuique suis in Italia spoliato, pius imperator, justitiæ cultor, sponte atque libenter exhibuit? et cumulate redderet ipsi, a qua Occidentalis orbis auctus esset imperio, bona, quæ nec ipsi absque tyrannide, et infamiæ nota, et anathemate possidere ullo pacto liceret? Quidni observaret, quod (ut audisti) fuerat juramento antea ad Joannem misso Romam pollicitus? Sic igitur rerum potitus, sua Petro, cujus ope nec gutta sanguinis fusa, vel gladius saltem exsertus, pulsus tyrannis, jure restituenda constituit. De quibus quod hactenus integrum conservatur Diploma hic describendum putavimus. Extat autographum aureis exaratum litteris, asservaturque Romæ in Castello sancti Angeli, duo vero exscripta exemplaria habentur in Vaticana bibliotheca; ex quibus ista:

3. « In nomine Domini Dei omnipotentis Patris et Filii et Spiritus sancti. Ego Otto Dei gratia imperator Augustus una cum Ottone glorioso rege filio nostro, divina ordinante providentia spondemus atque promittimus per hoc pactum confirmationis nostræ tibi beato Petro principi Apostolorum et clavigero regni cælorum, et per te vicario tuo domno Joanni summo Pontifici et universali XII

papæ, sicut a prædecessoribus vestris usque nunc in vestra potestate atque ditione tenuistis et disposuistis civitatem Romanam cum ducatu suo et suburbanis suis, atque viculis omnibus et territoriis ejus, montanis et maritimis, littoribus atque portibus, seu cunctis civitatibus, castellis, oppidis, ac viculis Tusciæ partibus, id est, Portum, Centumcellas, Cerem, Bledam, Marturianum, Sutrium, Nepem, Castellum Gallisem, Ortem, Polimartium, Ameriam, Tudam, Perusiam cum tribus insulis suis, id est, Majore, Minore, Pulvensim, Narniam, et Utriculum cum omnibus finibus ac territoriis ad superscriptas civitates pertinentibus. Necnon exarchatum Ravennatem sub integritate, cum urbibus, civitatibus, oppidis et castellis, quæ piæ recordationis domnus Pipinus et domnus Karolus excellentissimus imperator prædecessores videlicet nostri B. Petro Apostolo, et prædecessoribus vestris jamdudum per donationis paginam contulerunt, hoc est civitatem Ravennam, et Æmiliam, Bobium, Cesenam, Forumpopuli (Forum Pompilii), Forum Livii, Faventiam, Imolam, Bononiam, Ferrariam, Comiacum, et Hadrianis atque Gabellum, cum omnibus finibus, territoriis atque insulis, terrarique ad superscriptas civitates pertinentibus, simul et Pentapolim, videlicet Ariminum, Pisaurum, Fanum, Senogalliam, Anconam, Ausimum, Humanam, Hesium, Forum Sempronii, Montem Feltri, Urbinum, et territorium Balnense, Calles, Luciolis, et Engubium cum omnibus finibus et territoriis ad easdem civitates pertinentibus.

4. « Eodem modo, territorium Sabinense, sicut a domno Karolo imperatore antecessore nostro beato Petro Apostolo per donationis scriptum concessum est sub integritate. Item in partibus Tusciæ Longobardorum castellum Felicitatis, Urbem veterem, Balneum Regis, Ferentum, Viterbium, Ortem, Martam, Tuscanam, Suanam, Populonium, Rosellas cum suburbanis, atque viculis omnibus, et territoriis ac maritimis, oppidis ac viculis seu finibus omnibus. Itemque Almus cum insula Corsica, deinde in Suriano, deinde in monte Bardonis, deinde in Berceto, exinde in Parma, deinde in Regio, exinde in Mantua atque in monte Silicis, atque provincia Venetiarum et Istria, necnon et cunctum ducatum Spoletanum, seu Beneventanum una cum Ecclesia sanctæ Christinæ posita prope Papiam (Paduam) juxta Padum, quarto milliaro.

5. « Item in partibus Campaniæ Soram, Arces, Aquinum, Arpinum, Theanum, et Capuam, necnon patrimonia ad potestatem et ditionem vestram pertinentia, sicuti est patrimonium Beneventanum, et patrimonium Neapolitanum, et patrimonium Calabriæ superioris et inferioris. De civitate autem Neapolitana cum castellis et territoriis et finibus et insulis suis sibi pertinentibus, sicut ad easdem respicere videntur, necnon patrimonium Siciliæ, si Deus nostris illud tradiderit manibus. Simili modo civitatem Cajetam et Fundum cum omnibus earum pertinentiis.

6. « Insuper offerimus tibi, B. Petre Apostole, vicarioque tuo domno Joanni papæ et successoribus ejus, pro nostræ animæ remedio nostrique filii et nostrorum parentum de proprio nostro regno civitates et oppida cum piscariis suis, id est, Reatem, Amitemum, Furconem, Nursiam, Balvam et Marsim, et alibi civitatem Interamnem cum pertinentiis suis.

« Has omnes supradictas provincias, urbes, civitates, oppida et castella, viculos et territoria, simulque et patrimonia pro remedio animæ nostræ et filii nostri, sive parentum nostrorum ac successorum nostrorum, et pro cuncto a Deo conservato atque conservando Francorum populo, jam dictæ Ecclesiæ tuæ, B. Petre Apostole, et per te vicario tuo spiritali Patri nostro domno Joanni summo Pontifici et universali papæ ejusque successoribus usque ad finem sæculi, eo modo confirmamus, ut in suo detineat jure, principatu atque ditione.

7. « Simili modo per hoc nostræ delegationis pactum confirmamus donationes, quas piæ recordationis domnus Pipinus rex, et postea domnus Carolus excellentissimus imperator beato Petro Apostolo spontanea voluntate contulerunt: necnon et censum vel pensionem, seu cæteras dationes, quæ annuatim in palatium regis Longobardorum inferri solebant sive de Tuscia, sive de ducatu Spoletano, sicut et in suprascriptis donationibus continetur, et inter sanctæ memoriæ Hadrianum papam et domnum Carolum imperatorem convenit, quando idem Pontifex eidem de suprascriptis ducatibus, id est, Tuscano et Spoletano, suæ auctoritatis præceptum confirmavit, eo scilicet modo, ut annis singulis prædictus census ad partem Ecclesiæ beati Petri Apostoli persolvatur, salva super eosdem ducatus nostra in omnibus dominatione, et illorum ad nostram partem et filii nostri subjectionem. Cæterum, sicut diximus, omnia superius nominata ita ad vestram partem per hoc nostræ confirmationis pactum roboramus, ut in vestro permaneant jure, principatu atque ditione, et neque a nobis neque a successoribus nostris per quodlibet argumentum, sive machinationem in quacunque parte vestra potestas imminuatur, aut a vobis inde aliquid subtrahatur de suprascriptis videlicet provinciis, urbibus, civitatibus, oppidis, castris, viculis, insulis, territoriis atque patrimoniis, necnon et pensionibus atque censibus, ita ut neque nos ea facturi simus, neque quibuslibet ea facere volentibus, consentiamus. Sed potius omnium quæ superius leguntur, id est, provinciæ, civitates, urbes, oppida, castella, territoria et patrimonia, atque insule, censusque et pensiones ad partem Ecclesiæ beati Petri Apostoli atque Pontificum in sacratissima illius Sede residentium, nos in quantum possumus defensores esse testamur, ad hoc, ut ea in illius ditione, ad utendum et fruendum, atque disponendum firmiter valeant obtineri, salva in omnibus potestate nostra, et filii nostri posterorumque nostrorum, secundum quod in pacto et constitutione ac promissionis firmitate Eu-

genii Pontificis, successorumque illius continetur, id est:

8. « Ut omnis clerus et universa populi Romani nobilitas propter diversas necessitates, Pontificum irrationabiles erga populum sibi subjectum asperitates retundendas, sacramento se obligent, quatenus futura Pontificum electio (quantum uniuscujusque intellectus fuerit) canonice et juste fiat; et ut ille qui ad hoc sanctum atque Apostolicum regimen eligitur, nemine consentiente, consecratus fiat Pontifex, priusquam talem in præsentia missorum nostrorum, vel filii nostri, seu universæ generalitatis faciat promissionem pro omnium satisfactione atque futura conservatione, qualem dominus et venerandus spiritalis pater noster Leo sponte fecisse dignoscitur.

9. « Præterea alia minora huic operi inserenda prævidimus, videlicet, ut in electione Pontificum, neque liber neque servus ad hoc venire præsumat, ut illis Romanis, quos ad hanc electionem per constitutionem sanctorum Patrum antiqua admisit consuetudo, aliquod faciat impedimentum. Quod si quis contra hanc nostram institutionem ire præsumperit, exilio tradatur.

10. « Insuper ut nullus missorum nostrorum cujuscunque impeditionis argumentum componere in præfatam electionem audeat, prohibemus: nam et hoc omnimodis instituere placuit, ut qui semel sub speciali defensione domni Apostolici, sive nostra fuerint suscepti, impetrata juste utantur defensione. Quod si quis quemquam illorum, qui hoc promeruerunt, violare præsumperit, sciat se periculum vitæ suæ esse incursum.

11. « Illud etiam confirmamus, ut domno Apostolico justam in omnibus servant obedientiam, sive ducibus ac judicibus suis ad justitiam faciendam. Huic enim institutioni hoc necessario annexendum esse perspeximus, ut missi domni Apostolici seu nostri semper sint constituti, qui annuatim nobis, vel filio nostro renuntiare valeant, qualiter singuli duces ac judices populo justitiam faciant. Hanc imperialem constitutionem quomodo observent, qui missi, decernimus, ut primum cunctos clamores qui per negligentiam ducum seu judicum fuerint inventi, ad notitiam domni Apostolici deferant. Et ipse unum e duobus eligat, aut statim per eosdem missos fiant ipsæ necessitates emendatæ, aut misso nostro nobis renuntiante per nostros missos a nobis directos emendentur. Hoc ut ab omnibus fidelibus sanctæ Dei Ecclesiæ et nostris firmum esse credatur, propriæ manus signaculo, et nobilium optimatum nostrorum subscriptionibus hoc pactum confirmationis nostræ roboravimus et bullæ nostræ impressione, obsignari jussimus.

† Signum domni Ottonis serenissimi imperatoris, ac suorum episcoporum, abbatum et comitum.

† Signum Adaldagi Hamaburgensis Ecclesiæ archiepiscopi.

- † Signum Hartberti Curiensis Ecclesiæ episcopi.
- † Signum Druogonis Osnaburgensis Ecclesiæ episcopi.
- † Signum Votonis Argentinensis Ecclesiæ episcopi.
- † Signum Otuvini Hilsensheimensis Ecclesiæ episcopi.
- † Signum Landuvarti Mindonensis Ecclesiæ episcopi.
- † Signum Olgeri Nemetinensis Ecclesiæ episcopi.
- † Signum Gesonis Tortlonensis Ecclesiæ episcopi.
- † Signum Hucherti Parmanensis Ecclesiæ episcopi.
- † Signum Widonis Mulinensis Ecclesiæ episcopi.
- † Signum Attonis Fuldensis monasterii abbatis.
- † Signum Guntharii Ilerolfesteldensis monasterii abbatis.
- † Signum Eberarti comitis.
- † Signum Guntharii comitis.
- † Signum Burgharti comitis.
- † Signum Utonis comitis.
- † Signum Cronratis comitis.
- † Signum Ernustes.
- † Signum Thietheris, Riedages, Liupen, Hartuviges, Arnolves, Ingilthies, Burchartes, Retinges.

12. « Anno Dominicæ Incarnationis nongentesimo sexagesimo secundo, Indictione quinta, mense Februarii, decimo tertio die ejusdem mensis, anno vero domni Ottonis imperii invictissimi imp. vicesimo septimo, facta est hæc pactio feliciter ». Ita numerans a tempore adepti regni, eosdem annos jungens cum imperio, cujus hic primus est annus numerandus, reliquos autem annos præteritos proprios esse regni, ejusdem Ottonis diplomata docent, atque Acta synodalia cuncta, quibus nihil constanter. Ut appareat, improprie a tempore regni numerari æque annos imperii, quod hoc anno (ut vidisti) accepit initium, a quo tempore et nos annos Ottonis imperii incipimus numerare. Porro ista de electione Romani Pontificis, ut decernerentur, jus tyrannorum effecit, ut alias sæpe superius dictum est, adversus quos imperatoris opus fuit auxilium implorare.

13. *Papiam veniens persequitur hostes: Novariensi Ecclesiæ ablata restituit.* — Quæ autem hoc anno ab eodem Ottone imperatore sint gesta, ubi Papiam rediit, apud Reginonem ita narrantur: « Imperatore Augusto ab Urbe recedente, et Papie Pascha celebrante, Berengarius in quodam monte, qui dicitur, Ad sanctum Leonem (est in Umbria locus, tanquam Ulyssis Ithaca, ut nidus in vertice montis altissimi undequaque prærupti positus) plurimis undique secum copiis attractis se munivit. Et Willa in lacu majori in quadam insula, quæ dicitur Ad sanctum Julium, se inclusit, filii vero

Adelbertus et Guido huc illucque incerti vagabantur, quasdam tamen munitiones cum suis sequacibus adhuc possidebant, hoc est, Grad Castellum, et Travalium, et insulam in lacu Comano. Tunc Willa in primis hostiliter aditur, et redempto omni de lacu exitu, quotidianis fundibulariorum et sagittariorum, aliorumque belli instrumentorum impugnationibus fatigatur, et non plenis duobus mensibus obsessa capitur, et ad ultimum clementia imperatoris dimissa, quo vellet, ire permittitur; quæ quanta potuit celeritate Berengarium adiit, et ne se imperatori dederet, omnibus modis persuasit. Hæc ibi. Reliqua anno sequenti.

14. Tunc Otto pius imperator recuperatam insulam sancti Julii in diœcesi Novariensi positam restituit Ecclesiæ Novariensi, cujus Diploma in archivo ejus Ecclesiæ hactenus custoditum sic se habet:

« In nomine sanctæ individueque Trinitatis, Otto divinæ dispositione providentiæ imperator et rex, etc.

« Divino cultui locis mancipatis viscera nostræ largitatis, seu donationis, si patefecerimus, plurimum nobis ad imperii nostri stabilitatem animæque nostræ remedium, atque æternæ remunerationis emolumentum proficere minime titubamus. Quapropter notum sit omnium sanctæ Dei Ecclesiæ fidelium nostrorumque præsentium scilicet ac futurorum universitati. Nos non immemores beneficiorum trinæ inscrutabilisque majestatis, quæ semper circa nostræ imbecillitatis fragilitatem operatur; specialiter tamen ideo quod misericorditer nobis victoriam tribuens, quoddam castellum, videlicet insulam sancti Julii, jamdudum per Berengarium regem ab episcopatu Novariensi sublatam, et sibi usurpatam, necnon contra nos in rebellionem positam, nostræ subdiderit ditioni; per nostræ imperialis auctoritatis paginam tribuisse, et omnino concessisse Ecclesiæ in prædicto castro sitæ; in honorem vero sancti Julii confessoris Christi, cujus corpus humatum requiescit, quasdam res nostro juri et dominationi hactenus subjectas infra comitatum Plumbientem jacentes, hoc est, curtes duas, Barazolam et Agredade; quarum una, quæ dicitur Barazola, habens mansos viginti et tres; et altera, quæ dicitur Agredade, habens mansos decem et septem: in sumptum et usum canonicorum ibidem Deo et sancto Julio confessori Christi famulantium una cum terris, campis, vineis, pratis, silvis, aquis, aquarum decursibus, piscationibus, molendinis, cullis et incultis, servis et ancillis, aldionibus et aldiabus, omnibusque in integrum ad prædictas res penitus pertinentibus, cum accessibus et ingressibus eorum superioribus et inferioribus. Hoc autem sancimus, et omnino per nostrum imperiale præceptum statuimus, ut nullus episcopus præfatæ Novariensis Ecclesiæ, qui pro tempore fuerit, præsumat jam prædictas res de victu cum stipendio canonicorum subtrahere et sibi vindicare. Sed de

nostro jure et dominio in usum et sumptus canonicorum atque providentiam, qui pro tempore fuerint, transfundimus atque delegamus, ut habeant, teneant, et fruantur in perpetuum, omnium hominum inquietudine vel controversia remota; et pro criminum ablutione nostrorum cunctis diebus, quibus Deus eundem locum perseverare tribuerit, precationibus misericordem Dominum placare satagerint, quatenus in die districti examinis repudiato setigero, lanceo hæreamus consortio.

15. « Si quis igitur hujus nostræ concessionis præcepti violator extiterit culpabilis, solve cogatur centum libras auri optimi, medietatem cameræ nostræ, et medietatem canonicis S. Julii, quibus illata injuria. Quod ut verius credatur, diligentique cura ab omnibus observetur, manu propria roborantes, annuli nostri impressionem inferius affigi jussimus.

« Signum domni Ottonis † invictissimi imperatoris. Dat. IV kalend. Augusti, anno Dominicæ Incarnat. DCCLXII, anno vero imperii domini Ottonis serenissimi Augusti primo, Indictione quinta, actum in villa, quæ dicitur Horta, prope lacum ejusdem sancti Julii feliciter. D. G. C. »

16. Vidisti, lector, quam male consulant novatores Politici regibus suis bona Ecclesiarum subjicientes ipsi? Berengarius abstulit quæ erant sancti Julii dono piorum principum collata bona, et perdidit imperium; Otto qui restituit, illud acquisitum propagavit ad posteros. Inhient, inhient (ut volunt) in damnum suum rebus juribusque Ecclesiarum. Quid erit? utique (juxta Sapientem) id quod fuit. Ut nisi desistant ab hujusmodi sacrilegiis, ipsi a Christo ultore sint omnino suis ipsorum bonis juste privandi. Si enim nec pretio licuit absque immenso damno suo Achab¹ regi accipere vineam Naboth parentum suorum antiquam hæreditatem: licebit impune principi Christiano Ecclesiarum antiquitus possessa bona quibusvis coloribus rapere, et excogitatis artibus quibuscumque (ut sæpe vidimus factum) auferre? Nequaquam ista relinquentur inulta. Vindex exsurget Deus.

17. *Synodus Meldensis in causa Rhemensis episcopi.* — Eodem anno celebrata est in Gallia Synodus Meldensis, occasione vacantis sedis Rhemensis, defuncto anno superiori Arlaldo, in qua favore Lotharii regis cum a quibusdam episcopis electus esset Hugo, qui (ut dictum est) jam puer quinquennis in eam intrusus fuerat, sed per Agapitum papam ejectus, rescripto Joannis pap. XII a cœplis cessatur, et alius eligitur. De his omnibus Frodoardus ista habet, hoc anno: « Synodus tredecim episcoporum in pago Meldensi supra Maternam fluvium ex Rhemensi videlicet ac Senonensi diocesi celebratur, præsidente Senonensi præsule, satagentibus quibusdam episcopis, ut Hugoni sæpedito redderetur Rhemense episcopium. Renitentibus autem præcipue Roricone Laudunensi et Gibuino Catalaunensi præsulibus, et asserentibus quod a tot episcopis excommunicatus, a minori numero absolvi non poterat. Ita relinquitur usque ad interrogationem papæ Romani ». Et inferius eodem anno: « Legatio veniens ab Joanne papa insinuat, præfatum Hugonem tam ab ipso papa, quam ab omni Romana Synodo excommunicatum, sed et ab alia Synodo apud Papiam celebrata. Cujus legationis redditi certiores per Bruonem archiepiscopum, elegimus ad episcopium Rhemense Odalricum illustrem clericum Hugonis cujusdam comitis filium, favente Lothario rege cum regina matre prælatoque Brunone ». Hæc ibi. Ex quibus intelligis (quod sæpius inculcandum est) qua reverentia episcopi colerent Apostolicæ Sedis antistitem, licet sedentem in ea juveniculum, et pravis moribus depravatum Pontificem: quem ipsum sic observant et venerantur, ut omnis ille conventus inter se dissidens ex ejus responsione quiesceret.

18. *Obitus S. Guiberti abbatis.* — Eodem anno decimo kal. Junii moritur S. Guibertus abbas fundator monasterii Gemblacensis, cujus res præclare gestas Sigebertus scriptis est prosecutus. Extant ipsa¹.

¹ Apud Sur. tot. III. die XXIII Mai.

¹ 3. Reg. XXI.

Anno periodi Græco-Romanæ 6455. — Anno Æræ Hispan. 1000. — Anno Hegiræ 351, inchoato die 9 Febr., Fer. 1. — Jesu Christi 962.

— Joannis XII papæ 7. — Ottonis imp. 1. Romani juo. imp. 4.

1. *Otto M. fit imperator.* — A num. 1 ad 13. *Otto* post solemne Christi Natalitium anno superiori ab eo Papæ celebratum, cum lectissimo exercitu Romam perrexit, ut coronam imperii a Joanne XII papa promissam acciperet. Vacabat illud a morte Berengarii Aug. quæ anno MCDXXIV contigit. Rem narrat Baronius ex continuatore Reginonis et Luitprando, et Lambertus Schafnaburgensis his verbis perstringit: « Otto rex perrexit Romam, eumque Joannes papa gratanter suscipiens honorifice super cathedram Augustalem posuit, et benedictione atque consecratione sua imperatorem fecit ». Otto primus ex Germanis fuit sacris imperii insignibus et infulis exornatus, qui statim Joanni papæ oppida Ecclesiæ ad id tempus recuperata restituit, ut patet ex ejus Diplomate a Baronio recitato, cujus autographum Romæ in castello Sancti-Angeli asservatur. In ejus fine legitur: « Anno Dominicæ Incarnationis nongentesimo sexagesimo secundo, Indictione quinta, mense Februarii, decimo tertio die ejusdem mensis, anno vero domini Ottonis imperii invictissimi imp. vicesimo septimo, facta est hæc pactio feliciter ». Quare Otto ante diem xiii mensis Februarii Romæ coronatus fuit. Est quidem hic annus ejus regni xxvi usque ad diem secundam Julii, sed in hoc Diplomate annus primus imperii cum anno xxvi regni ejus conjungitur, cujus rei simile exemplum anno MCDCLIII, numero 12 exhibuimus. Neque enim existimandum, Ottonem, qui in aliis suis Diplomatis annos imperii sui expressit, in isto epocham illam prætermisisse. Est hæc prima profectio Romana Ottonis M. qui ter postea in eandem urbem rediit, ut ex dicendis patebit (1).

2. *Refellitur Goldastus.* — Goldastus tom. II Constitut. imperial. pag. 44, Diploma illud exhibet, et pag. 393 supposititium esse contendit, præsertim ob prætermissum in eo primum imperii Ottonis annum, quo illud datum esse constat. Verum vana illa ratio, aliæque quæ ab eo adducuntur, contra

certissimum illud antiquitatis monumentum. Otto in illo Diplomate num. 7 apud Baronium ait: « Per hoc nostræ delegationis pactum confirmamus donationes, quas piæ recordationis dominus Pippinus rex, et postea dominus Carolus excellentissimus imperator B. Petro Apostolo spontanea voluntate contulerunt, etc. » Quibus verbis supposititia demonstratur donatio Ludovici Pii, cum ejus nulla fiat mentio, ubi facienda erat, ut recte ex illis verbis Goldastus deducit. Paulo post Otto inquit: « Salva super eosdem ducatus (nempe Tusciæ et Spoleti) nostra in omnibus dominatione, et illorum ad nostram partem et filii nostri subjectione ». Et deinde: « Ut ea in illius ditione ad utendum et fruendum atque disponendum firmiter valeant obtineri, salva in omnibus potestate nostra ». Deinde num. 11 subjungit imperator: « Huic institutioni hoc necessarium annectendum esse perspeximus, ut missi domini Apostolici seu nostri semper sint constituti, qui annuatim nobis, vel filio nostro renuntiare valeant, qualiter singuli duces ac judices populo justitiam faciant ». Quare sicut post renovationem imperii Pontifices Romani supremum dominium Urbis, ducatus Romani, et aliarum ditionum Ecclesiasticarum in imperatorem transtulerunt, reservato sibi dominio utili; ita et Joannes XII imperium Romanum iterum renovans eodem sese modo gessit. Goldastus ait, ex illis clausulis elucescere Pontificem Romanum non magis ab obedientia imperii et contributionibus eximi, quam archiepiscopum Moguntinum aliosque, quibus territoria ab imperatoribus donantur. Verum vir Romanæ Ecclesiæ parum æquus imperium Romanum, quale a Pontificibus Romanis renovatum, male passim designavit, ipsosque Germaniæ reges a papa nunquam coronatos pro libitu imperatores fecit. Supremum itaque Urbis et ditionum a Pippino et Carolo magno Ecclesiæ Romanæ concessarum dominium penes Pontifices fuit, donec a proceribus Romanis

(1) Hoc anno Romæ Ottone præsentē Synodus celebrata fuit a Joanne XII, cujus mentio in Præfatione Legum Ottonis II apud Muratorium Rer. Italic. t. I, par. 2, fol. 169. De hac Synodo nihil actum in Collectionibus. Quanquam autem mendum aliquod in eandem Præfationem irrepsit, cum Synodum hanc celebratam a Joanne XII ferat (scribendum enim fuerat Joannes XII), ejus tamen veritati id nequaquam officere colligo ex more in coronatione Imperatorum solemnī; ea enim occasione Synodum celebrari consuevisse et unum huic fuisse ex ritibus coronationis imperialis notat Benzo episcopus Albensis in libello de gestis Henrici III imperatoris, vulgato a Ludewig. Reliquiarum tom. IX, pag. 233.

indigne habiti, quieti et tranquillitati tam suæ quam Ecclesiæ consulere volentes, et eorum temeritatem freno aliquo coercere supremum Urbis, ducatus Romani, et exarchatus Ravennensis dominium in imperatores transtulerunt, salva quam sibi Romani promiserant fide, aliisque quibusdam juribus sibi reservatis. Quare vanæ sunt omnes ratiunculæ a Goldasto in medium adductæ, nec ampliori confutatione indigent.

3. *Decernitur ut Pontif. Rom. coram legatis Cæsareis ordinentur.* — Pergit Otto in suo Diplomate: « Salva in omnibus potestate nostra, et filii nostri, posterorumque nostrorum, secundum quod in pacto et constitutione ac promissionis firmitate Eugenii Pontificis, successorumque illius continetur, id est: Ut omnis clerus et universa populi Romani nobilitas propter diversas necessitates, Pontificum irrationabiles erga populum sibi subjectum asperitates retundendas, sacramento se obligent, quatenus futura Pontificum electio (quantum uniuscujusque intellectus fuerit) canonice et juste fiat; et ut ille qui ad hoc sanctum atque Apostolicum regimen eligitur, nemine consentiente, consecratus fiat pontifex, priusquam talem in præsentia missorum nostrorum, vel filii nostri, seu universæ generalitatis faciat promissionem pro omnium satisfactione atque futura conservatione, qualem (scilicet promissionem) dominus et venerandus spiritalis pater noster Leo sponte fecisse dignoscitur ». Idem prorsus legitur in Privilegio a sancto Henrico hujus nominis primo imperatore, in gratiam Ecclesiæ Romanæ emissio, quod extat apud Baronium anno *mxiv*, num. 7. Decretum Eugenii II anno *dcccxxv* datum ad nos non pervenit, sed in utroque Privilegio laudato ejus summarium habemus.

4. *Id antea a Leone IV PP. statutum fuerat.* — Nomine Leonis Pontificis Romani ab utroque imp. memorati Papebrocius in Conatu Chronico-Historico de alio Leone, quam de septimo hujus nominis intelligi non posse scribit, cum de eodem verba facit. Verum toto hujus Pontificatus tempore imperium Occidentale vacavit, ideoque ad alium Leonem recurrendum. Goldastus loco citato ait, vel hanc unam rationem falsimonie convincere hanc constitutionem, ubi electionis suæ confirmationem ab imperatore impetrare Pontifices mandantur, « qualem dominus et venerandus spiritalis pater noster Leo sponte fecisse dignoscitur ». Atqui Leo VIII, inquit, anno tantum sequenti in Synodo Pontifex ordinatus fuit. Verum Otto in Diplomate hoc anno dato non loquitur de Leone VIII anno sequenti in Sedem Romanam intruso, sed de Leone IV, qui ut anno *dcccxlvi*, num. 9 et seq. vidimus, decrevit ut Romani Pontificis electio juste fieret, ac secundum mores antiquos, scilicet ut electus Pontifex non consecratur, nisi coram missis imperatoriis, ut Eugenius II jam decreto suo statuerat. Legenda quæ ibidem diximus, quæ lucem ex his Ottonis verbis accipiunt, et allatam ibi expli-

cationem magis confirmant. Neque enim ea hujus imperatoris verba de alio Leone, quam de quarto hujus nominis intelligi possunt, neque Leonis IV decretum aliter ac a nobis factum exponi.

5. *Quale a tempore Ottonis M. regimen Italiæ fuerit.* — Porro qualis post Ottonem M. status Italiæ fuerit, quæve regiminis forma, his verbis Sigonius lib. 7 de Reg. Italiæ exponit: « Quanquam Italia a rege, eodemque imperatore, et a Romano Pontifice tenebatur, non eadem tamen erat in utroque auctoritas. Pontifex Romam Ravennamque, et ditiones reliquas tenebat auctoritate magis, quam imperio, quod civitates Pontificem, ut Reipublicæ principem, regem vero, ut summum dominum intuerentur, atque ei tributa obsequiaque, quæ dixi, præberent: et Pontificis vires in sacris detestationibus versabantur, quas Christiani reges tum maxime exhorruerunt, imperatoris in armis et expeditionibus, quibus ipsi etiam Pontifices cedere sæpe compulsi sunt. Pontifex tamen ab hoc tempore majores in dies opes habuit, eximiis studiis faventis Italiæ sublevatus. Utraque vero potestas sacra erat, et ad Christianam conservandam Reipublicam instituta. Pontifice autem et imperatore excepto, trium antistitum summa adhuc erat auctoritas, *Aquileiensis, Ravennatis et Mediolanensis* ». De tributis vero paulo ante scripserat Sigonius: « Tributa, quæ ille a Francis instituta retinuit, fuere foderum, parata et mansionaticum. *Foderum* summa quædam frumenti fuit, quam advenienti in Italiam regi populi solvere tenebantur, pro quo sæpe etiam æstimata pecunia pendebatur. *Parata*, sumptus quem iidem in vias, pontesque fluminum, qua transiturus, aut quo aditurus rex erat, reficiendos impendere. *Mansionaticum*, sumptus in tecta, et cætera, quæ regio exercitui in agro hospitanti necessaria præbere jubebantur; siquidem tantum regibus jus terræ tributum est, ut ex omnibus, quæ ipsa terre ad usum hominum necessaria solet, exceptis bobus et seminibus ad colendam terram idoneis, quantum opus militibus fuerit, ad regios usus suppeditatum sit ». Ita Sigonius de Ottonem magno loquens.

6. *Jus Cæsarum Italiam ingredientium.* — Otto Frisingensis, qui anno *mcxviii* vitam cum morte commutavit, quæ Sigonius a variis auctoribus a se non citatis in medium producit, his verbis exprimit lib. 2 de Gestis Friderici I imp. cap. 12: « Mos antiquus, ex quo imperium Romanum ad Francos derivatum est, ad nostra usque deductus est tempora, ut quotiescunque reges Italiam ingredi destinaverint, gnaros quoslibet de familiaribus suis præmittant, qui singulas civitates seu oppida peragrando, ea quæ ad fiscum regalem spectant, quæ ab accolis fodrum dicuntur, exquirant. Ex quo fit, ut principe adveniente, plurimæ civitates, oppida, castella, quæ huic justitiæ vel omnino contradicendo, vel integraliter non persolvendo, reniti conantur, ad solum usque prostrata, proterviæ suæ documentum posteris ostendant.

Alia itidem ex antiqua consuetudine manasse traditur justitia, ut principe Italiam intraente, cunctæ vacare debeant dignitates et magistratus, ac ad ipsius nutum secundum scita legum, jurisque peritorum judicium, universa tractari. Tantam ei quoque judices terræ recognoscere dicuntur jurisdictionem, ut ex omnibus, quæ terra producere solet, usui necessariis, exceptis vix bobus et seminibus, ad excolendam terram idoneis, de cæteris quantum necesse fuerit milili profuturis, ad regios usus suppeditare æquum arbitrentur». Baronius anno MCLIX, num. 14, refert ex Radevico lib. 2, cap. 30, responsum *Hadriani IV* ad postulata *Friderici I*, qui durissima capitula, quando actum fuit de pace inter regnum et sacerdotium, proposuit, inter quæ unum fuit de *fodro*, ad quod a nuntiis Pontificis responsum: «De Dominicalibus Apostolici fodrum non esse colligendum, nisi tempore suscipiendæ coronæ». Baronius in margine dicit *fodri* nomine intelligi *fœnum et paleam*; verum in Glossario Ducangii variis exemplis ostenditur, fodrum passim usurpari pro quavis exactione, atque adeo non pro equorum duntaxat, sed et pro ipsorum militum annonis vel etiam victu, seu, ut tum loquebantur, *procuracionibus* ac prandiis, de quibus duabus ultimis vocibus idem Glossarium legendum.

7. *Moritur S. Guibertus fundator monasterii Gemblacensis.* — Ad num. 18. *Sanctus Guibertus* cœnobii Gemblacensis conditor, postquam prævidit mortem sibi imminere, «ultimum vale dicens fratribus et amicis, et optabilem pacis et dilectionis memoriam relinquens eis, maturavit viam ad amicam sibi quietem Gorziensis solitudinis», inquit Sigebertus chronographus in ejus Vita Sæculo v Benedictino recitata, qui paulo post subdit, eum *X kal. Junii* spiritum Deo reddidisse, et corpus ejus ad monasterium Gemblacense relatum esse. Paulo post: «Obiit autem hic sanctus Dei anno Dominicæ Incarnationis nongentesimo sexagesimo secundo, decimo kalendas Junii». Idem Sigebertus in Chronico ad annum MCX elevationem corporis ejus his verbis narrat: «Sanctus Wigbertus fundator Gemmelacensis cœnobii, ubi et sepultus requiescit, quem Deus multis et magnis miraculorum signis per annos XII longe lateque clarificaverat, auctoritate venerabilis Friderici Coloniensium archiepiscopi, et assensu generalis Synodi a domno Otberto Legiensi episcopo elevatur: quæ elevatio innumerabili concursu et mirabili gaudio populorum celebrata est IX kal. Octob.» Sæculo v Benedict. recitatur etiam relatio hujus elevationis, in eaque dicitur ejus partem maximam fuisse Sigebertum sancti Guiberti Vitæ scriptorem. Porro anno MCX, dies XXIII mensis Septembris in eadem Relatione etiam memoratus in feriam sextam incidebat, ideoque hoc et sequentibus sæculis translationes et elevationes sanctorum aliis diebus, quam Dominicis non raro peractæ.

8. *Nicephori Phocæ de Saracenis victoriae.* —

Triumphii honore accepto, *Nicephoro* Romanus imperator, inquit Leo diaconus in Romano juniore, munifica ambitiosaque tribuit munera, atque Asiæ ei præfecturam credit. Is vero *domestici* rursus auctus dignitate, trajectoque Bosphoro, atque copiis congregatis, *Agarenorum* terras peragrabat. Qui audita *Nicephori* irruptione ad præsidia profugerunt, exque locis munitis pro facultate velitando ac procul jaculando incursiones avertere tentabant. Ille vero instar fulminis omnem circum regionem depopulabatur, oppidaque hominum multitudine longe frequentia direpta in potestatem redigebat. Ubi autem quæ erant obvia cuncta igni ferroque vastasset, præsiis atque arcibus manum adjicit, quorum pleraque primo statim assultu cepit. Quæcumque vero muris obsepta necnon præsidiariorum multitudine freta erant, iis machinas contra adhibebat, bellumque implacabile inferebat. Captis igitur eversisque brevi satis tempore *Agarenorum* supra sexaginta præsiis, prædaque longe maxima reportata, resumens copias ad suas quemque sedes remisit, cum immensam divitiarum vim conguessissent. Ipse vero ad imperatorem laborum ex illo præmia accepturus comævul. Jam vero in medio itinere constituto *Nicephoro*, famâ quædam pervasit *Romanum* imperatorem humanis excessisse. Quo ille inexpectato rumore perterritus iter inhibuit, inque regione substitit. Quare cum Romanus imp. die XV Martii sequentis anni e vivis excesserit, hæ victoriæ currenti a *Nicephoro* reportatæ. Porro *domestici* nomine recentiores Græci duceim exercitus supremum exprimebant, qui militares copias sub imperatore duceret, communiumque rerum administrationem ab eo sibi commendatam teneret, ut variis exemplis demonstrat Goarus in Notis ad cap. 2 Codini de Officiis Constantinop.

9. *Obitus Salvi abbatis Albaidensis.* — Floruit hoc sæculo in regno Navarræ *Salvus* abbas Albaidensis monasterii, qui «scripsit sacris virginibus regularem libellum, et eloquio nitidum, et rei veritate perspicuum», inquit auctor anonymus in brevi ejus Vita, subjuncta a Miræo libro Ildefonsi Toletani episcopi de Scriptoribus Ecclesiasticis pag. 102: «Obiit temporibus Garseani Christianissimi regis (nempe Navarræ, patris Sanctii regis Abarcæ cognominati), et Theudemiri pontificis (seu Tudomiri episcopi Naxarensis) quarto idus Februarii, Era millesima (hoc nempe anno) sana doctrina præstantior cunctis, et copiosior operibus charitatis». Extat adhuc libellus ille, sed ineditus, cujus Labbens in nova Bibliotheca Mss. pag. 35 mentionem facit, atque continere capita LXXVII, qui cum in eo Ms. *S. Salvo* abbati Alveldensi, quod idem est ac Albaidensi, tribuatur, jure merito Nicolaus Antonius locum ei dedit in Bibliotheca veteri Hispana lib. 6, cap. 14, et Balæus et Joannes Ptsæus in suis Catalogis hunc libellum male adscripsere beato Ælredo Rievallensi in Anglia abbati; cum Vitæ *Salvi* præfatum Ms. suffragetur. Compo-

suit præterea Salvus libellum de missis et hymnis sacris in ejus Vita memoratum, sed ille ad nos non

pervenit. Landatam Vitam recitat etiam Mabillonius Sæc. v Benedict.

JOANNIS XII ANNUS 8. — CHRISTI 963.

1. *Synodus Romæ coram Ottone imperatore et singula ejus Acta in causa Joannis papæ damnati et depositi, subrogato Leone.* — Nongentesimus sexagesimus tertius Christi annus, Indictione sexta sequitur, quo Joannes papa, deficiens ab imperatore, ab eodem Synodo convocata in ordinem redigitur. Hæc omnia magni momenti; quomodo se habuerint, per scriptores ejus temporis accurate sunt depromenda. Sed primum accipe quæ apud Regionem descripta leguntur:

2. « Hoc anno Otto iterum Papiæ Natalem Domini et Pascha celebravit. Interim Adelbertus huc illucque discurrens, quoscumque poterat, sibi undique attraxit, sed et Corsicam, ibi se tueri nitens, intravit, Romanum etiam Pontificem in suum adjutorium sollicitavit ». Quæ autem post hæc secuta sint, auctor ¹ Luitprandus assertus, licet diversus ab eo, quisquis ille fuerit, ea cuncta ob oculos habens descripsit.

3. Sed antequam quæ ab eo sunt tradita hic reddamus, de ipso auctore jure disserendum videtur: num revera capita illa a sexto usque ad undecimum sexti libri sint Luitprandi, cujus superiores libri esse noscuntur. Scimus ita censi, nec eam rem hactenus in controversiam esse deductam. Verum existimo capita illa esse potius Appendicem ad Luitprandum ab auctore adhuc incerto elaboratam, quam Luitprandi continuatum opus. Styli in primis id opinari facit diversitas. Sed illud magis persuadet, quod eadem capita extra terminos certos operi suo ab ipso Luitprando præscriptos posita esse inveniuntur, sicque ejus assertionem et auctoritatem suam esse negari penitus. Ipse enim in Præfatione præposita libro tertio, ubi de nomine operis Antidosis, et de termino, quo clauditur opus, nempe legatione sua Constantinopolim agit, asserit scriptioni illi se finem imposuisse in Paxo insula, jam legatione, de qua ipso agit in fine, ad Constan-

tinum imperatorem functus, cum regnaret adhuc Berengarius. At illa, quæ scribuntur postremis capitulis illis de Joanne duodecimo Romano Pontifice, longe postea contigisse noscuntur; adeo ut si esset istud ejusdem auctoris opus, illud plane aliud a priori ab eo elucubratum esse diversum, necesse sit affirmare. Insuper alterius potius esse auctoris, ex ea etiam conjectura concipio, quod cum auctor illorum capitum in illis mentionem habeat Luitprandi jam non amplius diaconi Ticinensis, sed episcopi Cremonensis, alium diversumque ab eo se esse auctor ostendit, cum alioqui Luitprando moris fuisse noscatur, nomen suum in scriptis suis non quasi alterius obiter præterire, sed gloriæ titulis bene exornatum relinquere. Fuisse autem eundem Luitprandum diaconum Ticinensem, et Luitprandum postea creatum episcopum Cremonensem, tum nomen, tum munus iteratum, repetita nempe legatio, ut ipse de se fatetur, satis ostendit. Sed de legatione posteriori suo erit loco dicendum. His si jungantur Græcarum litterarum par eruditio et poeticæ cæterarumque litterarum facultas eadem hoc sæculo haud adeo inventu facilis, plane tanquam ex multis lineamentis, eundem esse senties hominem; auctorem autem Appendicis capitulorum illorum esse diversum, eumque additissimum Ottoni imperatori, et privato studio ea scripsisse in ipsius gratiam, odium vero Joannis. Qui rem gestam sic aggreditur enarrare:

4. « Interea præfatus papa juramenti et promissionis oblitus, quam fecerat sancto imperatori, ad Adelbertum, ut se adeat, mittit, jurejurando ei affirmans, se illum contra sanctissimi imperatoris potentiam adjuturum. Adeo enim eundem Adelbertum Ecclesiarum Dei, ejusdemque papæ Joannis persecutorem imperator factus terruerat, ut omnem Italiam deserens, Fraxinetum adiret, seque Sarracenorum fidei commendaret. Imperator autem justus, qui, cur Adelbertum Joannes papa, quem prius vehementi odio insequabatur, nunc

¹ Luitp. l. vi. c. 6.

diligeret, satis mirari non potuit, accersitis quibusdam familiaribus, an hoc verum esset, Romam dirigit percontatum. Cumque illo iidem nuntii pervenissent, huiusmodi non a quibuslibet, aut paucis, sed ab omnibus Romanis civibus responsa suscipiunt ». Quæ autem Romam adeuntes nuntii a Romanis acceperint, idem auctor sic narrat :

5. « Non dispar videtur ratio, cur Joannes papa sanctissimum imperatorem, suum scilicet ex Adelberti manibus liberatorem, et diabolus oderit Creatorem. Imperator, quemadmodum re ipsa experti sumus, ea quæ Dei sunt, sapit, operatur, diligit, Ecclesiastica et sæcularia negotia armis tutatur, moribus ornat, et legibus emendat : Joannes papa his omnibus adversatur. Non clam est, quod fatemur. Testis est Reineria (Rainerii) sui ipsius militis vidua, quam cæco captus igne, multis præfectam urbibus, sacrosanctis B. Petri donavit aureis crucibus atque calicibus. Testis est Stephana ejus amica, quæ in effusione ejus quem ex eo conceperat recens hominem e vita exivit. Quod si cuncta taceant, Lateranense palatium, sanctorum quondam hospitium, nunc prostibulum meretricum, non silebit amicam conjugem, Stephanæ patris concubinæ sororem. Testis omnium gentium, præterquam Romanorum, absentia mulierum, quæ SS. Apostolorum limina orandi gratia timent visere; cum nonnullas ante dies paucos hunc audierint conjugatas, viduas, virgines vi oppressisse. Testes sunt sanctæ Apostolorum Ecclesiæ, quæ non stillatim pluviam, sed totum intrinsecus supra ipsa etiam sacrosancta altaria imbrem admitterent. Quanto nos terrore tigna afficiunt, cum divinam opem ibidem deposcimus ? mors in tectis regnat, quæ nos orare multa volentes impedit, atque domum Domini mox relinquere cogit. Testes sunt non solum ¹ juncearum curatura, sed et quotidianarum formarum mulieres, cui eadem sunt, et silices pedibus quæ conterunt, et quæ magnorum subeuntur adjutorio jumentorum. Atque hoc rei est, quod tanta ei cum imperatore sancto discordia est, lupis et agnis quanta sortito obtigit. Illi hoc ut impune liceat, Adelbertum sibi tutorem et defensorem parat ». Hæc sunt quæ Romæ nuntii acceperunt. Quibus auditis, Ottonem ista respondisse, idem auctor affirmat, cum ait :

6. « Hæc dum a redeuntibus nuntiis imperator audisset : Puer, inquit, est, facile bonorum immutabitur exemplo virorum : spero eum objurgatione honesta, suasionem liberali facile ex illis sese emer- surum malis, dicemusque tunc cum ² Propheta : Hæc est mutatio dexteræ Excelsi; et adjecit : Quod prius rerum ordo deposcit, Berengarium in Fere- tro-Monte resistentem propulsemus; dein paterna abdicatione (admonitione) dominum papam conveniamus : si non voluntate, verecundia saltem in virum perfectum sese mutet; sicque forsitan de- victus, bene consuescere studebit his desuescere.

His expletis, Papiæ navim conscendit, ac per Eri- dani alveum Ravennam usque pervenit, indeque progrediens, Montem-Feretrum (quod oppidum sancti Leonis dicitur), in quo Berengarius et Willa erant, obsedit.

7. « Quo et præfatus papa Leonem venerabilem sanctæ Romanæ Ecclesiæ protoscriniarium, nunc in eadem Sede Petri Apostolorum principis vicarium, necnon Demetrium optimate Romanorum illustrissimum sancto imperatori nuntios dirigit, mandans, haud mirum esse si hactenus juventutis igne devictus quid puerile gesserit, jam tempus instare, cum alieno cuperet vivere more. Mandavit etiam dolere se, quod quemdam Leonem episcopum et Joannem diaconum cardinalem suos infideles suscepisset, et quod sanctus imperator promissionis suæ fidem violaret, dum eos, qui eo loci manebant, juramento non ipsi, sed sibi adstringeret ». Hactenus quæ suggerenda per legatos suos Joannes imperatori mandavit. Quæ autem Otto ad ista responderit, mox idem subjicit auctor istis verbis :

8. « Quibus imperator : Pro correctione, inquit, ac morum immutatione quam promittit, gratias ago : de promissis verò fidem mutare, cujus me arguit, an verum sit, ipsi perpendite : omnem terram sancti Petri, quæ nostræ potestati subjecta est, Ecclesiæ promissimus reddere. Atque id rei est, quod ex munitione Berengarium cum omni familia pellere laboramus. Quo enim pacto terram hanc ei reddere possumus, si non prius eam ex violentorum manibus ereptam potestati nostræ subdamus ? Leonem episcopum et Joannem cardinalem diaconum suos infideles, quos nos suscepisse accusat, his temporibus non vidimus, nedum suscepimus. Constantinopolim domino papa eos ad injuriam nostram proficiscentes dirigente, Capuæ sunt (ut audivimus) capti. Quibuscum etiam Saleccum natione Bulgarum, educatione Ungarum, domini papæ familiarissimum, et Zachariam virum reprobatum, divinarum atque humanarum litterarum inscium, a domino papa episcopum noviter consecratum, et Ungaris ad prædicandum, ut super nos irruant, destinatum, eodem captos esse loco audivimus. Hæc dominum papam nullis narrantibus fecisse crederemus, nisi litteræ fidem admitterent, quæ plumbo signatæ ejus nominis characteres monstrant ». Respondit ista legatis Joannis Otto, nec his contentus, alios rursus sibi visum legatos mittere pro sua excusatione ad ipsum Pontificem. Quinam isti fuerint, et quæ nuntianda præceperit, idem auctor sic narrat :

9. « His expletis, Landoardum a Saxonia Nummendensem (Mindensem) et Luitprandum ab Italia Cremonensem episcopos, cum præfatis nuntiis Romam dirigit, domino papæ, se inculpabilem esse, satisfacturos. Quorum etiam militibus hoc imperator justus imposuit, ut si secus dominus papa non crederet, duello verum esse approbarent. Præfati igitur Landoardus et Luitprandus episcopi

¹ Ex Terentio in Eunuchis. — ² Psal. LXXVI.

Romam ad domini papæ præsentiam venientes, tanto sunt in honore suscepti, ut non eos lateret, quanto sanctum imperatorem tædio fastidirent. Ordinatum tamen, prout eis injunctum fuerat, enarrantes non jurejurando, non duello satisfactionem papa recipere voluit, sed in eadem, qua fuerat, duritie permansit ». Quomodo autem aliam ad eundem imperatorem misit Joannes legationem, ita declarat :

10. « Subdole tamen Joannes papa post dies octo Joannem episcopum Narniensem et Benedictum cardinalem diaconum, cum istis domino imperatori destinavit, putans hunc suis posse deludere versutiis, cui nimis est verba dare difficile. Ante quorum reditum, Adelbertus, invitante papa, a Fraxineto rediens, Centumcellas advenit, deinde Romam profectus, non ut debuit, repudiat, sed a papa honorifice est susceptus. Hæc dum aguntur, Phœbi radiis grave Cancris sidus inæstuans imperatorem Romanis arcibus propellebat. Sed cum virginalis sidus gratam rediens temperiem ferret, collectis copiis, clam Romanis invitantibus, Romam advenit; quid clam dixerim, cum major Romanorum pars optimatum sancti Pauli castellum invaserit, sanctumque imperatorem, obsidibus etiam datis, invitaverit? Quid nullis morer? juxta Urbem imperator castrametatus est. Roma papa simul atque Adelbertus aufugiunt ». Quæ autem per cives Romanos, quæve ab imperatore Romæ dum esset, gesta sint, idem auctor narrare sic pergit :

11. « Cives vero sanctum imperatorem cum suis omnibus in Urbem suscipiunt, fidelitatemque promittunt, hæc addentes et firmiter jurantes, nunquam se papam electuros aut ordinaturos præter consensum atque electionem domini imperatoris Ottonis Cæsaris Augusti, filiique ipsius regis Ottonis ». Jurasse aliquos ex cardinalibus, et inter alios Benedictum archidiaconum, quæ ultimo loco dicuntur ab eodem auctore, significant. Cæterum, ut expressum est, non omnibus Ottonis imperatoris successoribus Augustis id a populo cleroque juratum est, sed ipsi duntaxat Ottoni, unico ejus filio Ottoni juniore.

12. At cujus ponderis esse potuit ista promissio sive a Romanis laicis, sive a cardinalibus facta absque consensu tum existentis Romani Pontificis? certe nondum damnatus atque cessare jussus Joannes erat, ut ipso inconsulto et non consentiente aliquid decerni potuerit in re præsertim tanti momenti; ut plane fatendum sit, nullius eam fuisse firmitatis, quæ tunc fuit de electione Pontificis Ottoni et filio ejus facta promissio. Quæ autem post promissionem a Romanis factam Ottoni secula sint, sic accipe ab eodem auctore, dum pergit: « Post triduum rogantibus tam Romanis episcopis, quam plebe, magnus in sancti Petri Ecclesia fit conventus, sederuntque cum imperatore archiepiscopi. Ab Italia pro Angelfrido Aquileiensi patriarcha, quem in eadem urbe languor repente (ut fit) ortus arripuerat.

« Rodolphus diaconus.
« Walbertus Mediolanensis.
« Petrus Ravennas.

A SAXONIA.

« Adeltac (Adaldagus) archiepiscopus, et Landoldardus episcopus Numedensis.

A FRANCIA.

« Olgerius episcopus Spirensis.
« Buptus Parmensis (Bremensis.)

AB ITALIA.

« Luitprandus Cremonensis.
« Hermelandus Regensis.

A TUSCIA.

« Conradus Lucensis.
« Everarius Ariciensis.
« Pisanus Senensis (Saonensis.)
« Florentius Pistoriensis.

EX ALIIS ITALIÆ LOCIS.

« Petrus Camerinensis.
« Romanus Spoletinus.
« Gregorius Albanensis.
« Sico Ostiensis.
« Benedictus Portuensis.
« Lucidus Cannensis.
« Theophylactus Prænestinus.
« Wido Silvæ Candidæ.
« Leo Velitrensis.
« Sico Blerensis.
« Stephanus Senensis.
« Joannes Nepesinus.
« Joannes Tiburtinus.
« Joannes Foro juliensis.
« Romanus Ferenlinensis.
« Joannes Hormensis (Normensis.)
« Joannes Verulensis.
« Martinus Sutrinus.
« Joannes Narniensis.
« Joannes Sabinensis.
« Joannes Gallacensis.
« Phalarensis.
« Alatrensis.
« Hortanus.
« Joannes Anagniniensis.
« Trebensis.
« Salibatinus Tarraconensis ».
Ilicusque episcopi, sequuntur cardinales :
« Stephanus cardinalis archipresbyter tit. Balbinæ.
« Dominicus tit. Anastasiæ.

« Petrus tit. Damasi.
 « Theophylactus tit. Chrysogoni.
 « Joannes tit. Equitii.
 « Joannes tit. Susannæ.
 « Petrus tit. Pammachii.
 « Adrianus tit. Callisti.
 « Joannes tit. Cæciliæ.
 « Adrianus tit. Lucinæ.
 « Benedictus tit. Sixti.
 « tit. Quatuor Coronatorum.
 « Stephanus til. Sabinæ.
 « Benedictus cardinalis archidiaconus.
 « Joannes diaconus.
 « Bonfilius cardinalis diaconus primicerius.
 « Georgius secundicerius.
 « Stephanus adminiculator.
 « Andreas arcarius.
 « Sergius primicerius defensorum.
 « Joannes sacellarius.
 « Stephanus.
 « Theophylactus.
 « Adrianus.
 « Stephanus.
 « Benedictus.
 « Azo.
 « Adrianus.
 « Romanus.
 « Leo.
 « Benedictus.
 « Item Leo, et
 « Leo scriniarii.
 « Leo primicerius scholæ cantorum.
 « Benedictus subdiaconus et oblationarius.
 « Azo.
 « Benedictus.
 « Demetrius.
 « Joannes.
 « Amicus.
 « Sergius.
 « Benedictus.
 « Urso.
 « Joannes.
 « Benedictus subdiaconus subpulmentarius.
 « Stephanus archidiaconus cum omnibus acolythis et regionariis ».

13. Hucusque ex clero Romano. Interfuerunt et procures Romanorum ab eodem Luitprando sic recensiti. Ex primatibus Romanæ civitatis :

« Stephanus filius Joannis Superista.
 « Demetrius Meliosi.
 « Crescentius Caballi marmorei.
 « Joannes cognomento Nuzina.
 « Stephanus de Muza.
 « Theodorus de Rusina.
 « Joannes de Primicerio.
 « Leo de Carmizuli.
 « Richardus.....
 « Petrus de Canaparia.
 « Benedictus cum Bulgamino filio suo ex

plebe.

« Petrus qui et Imperiola est dictus, cum omni Romanorum militia ».

14. Hic scripta episcoporum nomina legi admodum depravata et mutilata, non est dubium, quod senties ex his, quæ apud Reginonem auctor temporis hujus scripsit dicens : « Cui Synodo interfuerunt omnes prope Romani et Italiæ episcopi, Angelfridus etiam Aquileiensis patriarcha, qui tunc temporis etiam ibi obiit ; sed et de nostratibus interfuerunt Adaldagus, Henricus, Landoardus, et Otgerus episcopi. Fuit Adaldagus archiepiscopus Hamaburgensis, Henricus Trevirensis, Landoardus Mindensis, et Otgerus Spirensis ». Hæc ibi. Pergit vero ¹ idem auctor hoc modo :

15. « His ita residentibus silentiumque summum tenentibus, ita sanctus est imperator exorsus : Quoniam decorum esset, tam claro sanctoque papam Joannem interesse Concilio : cur tantum declinaverit cœtum, vos, o sancti Patres, consulimus, quibus communis labor Ecclesiasticus ac commune negotium existit.

16. « Tunc Romani Pontifices, episcopi scilicet suffraganei, et cardinales presbyteri ac diaconi cum universa plebe dixerunt : Miramur sanctissimam prudentiam vestram nos hoc velle percontari, quod nec Babylonicos, nec Ibericos, nec Indicos incolas latet : ita aperte diabolica pertractat negotia, ut nihil circuitionis utatur. Imperator respondit : Justum nobis videtur, ut accusationes nominatim exprimantur. Deinde quod agendum est, communi consilio pertractetur.

17. « Tunc consurgens Petrus cardinalis presbyter, se vidisse illum missam celebrasse, et non communicasse, testatus est. Joannes episcopus Narnicensis, et Joannes cardinalis diaconus, se vidisse illum, diaconum ordinasse in equorum stabulo non certis temporibus, sunt professi. Benedictus cum cæteris condiaconis et presbyteris dixit, se scire, quod ordinationes episcoporum faceret pretio, et quod annorum decem episcopum in Tuderina civitate ordinavit. De sacrilegio non est necesse percontari, quia plus videndo, quam audiendo scire potuissemus. De adulterio dixerunt, quod oculis non viderant, sed pro certo scirent, viduam Rainarii, et Stephanam patris concubinam, et Annam viduam cum nepte sua abusum esse, et sanctum palatium lupanar et prostibulum fecisse : venationem dixerunt publice exercuisse, Benedictum spiritualementem suum lumine privasse, et mox mortuum esse. Joannem cardinalem subdiaconum virilibus amputatis occidisse, incendia fecisse, ense accinctum, galea et lorica indutum fuisse, leslati sunt. Diaboli in amorem vinum bibisse, omnes tam clerici, quam laici acclamarunt. In ludo aleæ, Jovis, Veneris, cæterorumque dæmonum auxilium poposcisse dixerunt. Matutinas et canonicas horas eum non celebrasse, nec signo Crucis se munisse professi sunt ». Hactenus accusationes.

¹ Luitp. l. vi. c. 7.

18. Sed mirum, quod de ejus intrusione in Sedem Apostolicam cum adolescens esset deceni et octo annorum, nullum sit factum illi negotium. At scias id illi non humanitatis gratia esse donatum, et indultum miserationis ergo, sed magno artificio prætermissum : etenim si fuisset Joannis electio ostensa nulla, æque Ottonis imperium, quod acceperat a Joanne, fuisset illegitimum declaratum, utpole collatum ab eo qui Pontifex non fuisset. Sic igitur abstinuit ab his Otto, ne sui abrogationem imperii ejus damnatione, procuraret. Pergunt Acta :

19. « Ilis auditis imperator, quia Romani ejus loquelam propriam, id est, Saxonicam, intelligere nequibant, Luitprando Cremonensi episcopo præcepit, ut latino sermone hæc Romanis omnibus quæ sequuntur exprimeret. Surgens itaque sic cœpit :

20. « Persæpe ¹ contigit, et nobis expertis credimus, ut in dignitatibus constituti invidorum infamia maculentur : displicet bonus malis, quemadmodum et malus bonis. Atque hoc rei est, quod hanc in papam accusationem, quam modo Benedictus cardinalis diaconus legit et vobiscum fecit, amphibolam retinemus, incerti utrum e zelo justitiæ, an impietatis livore proruperit.

21. « Unde mihi indigno secundum concessæ dignitatis auctoritatem omnes obtestor per Deum, quem fallere, etsi vult nemo potest, sanctamque ejus Genitricem intemeratam Virginem Mariam, perque pretiosissimum Apostolorum principis corpus, in cujus hæc recitantur Ecclesia, ut nulla in dominum papam jaculentur convicia, quæ non sint ab ipso patrata, atque a viris probatissimis visa.

22. « Tunc episcopi, diaconi, clerus, et cunctus Romanorum populus, quasi vir unus dixerunt : Si non et quæ per Benedictum diaconum lecta sunt, hisque turpiora et ampliora Joannes papa indigna commisit facinora, non vos a peccatorum vinculis absolvat Apostolorum princeps beatus Petrus, qui verbo cælum indignis claudit, justis aperit : simus anathematis vinculo innodati, atque in die novissima in sinistra parte positi cum eis qui dixerunt ² Domino Deo : Recede a nobis, scientiam viarum tuarum nolumus. Quod si fidem nobis non adhibetis, exercitui domini imperatoris saltem debetis credere, cui ante quinque dies ense accinctus, clypeo, galea, lorica indutus occurrit. Solus Tiberis qui interfluxit, ne sic ornatus ab exercitu caperetur, impedivit. Mox sanctus imperator dixit : Tot sunt hujus rei testes, quot sunt nostro in exercitu bellatores. Sancta Synodus dixit : Si placet domino imperatori, mittantur litteræ domino papæ, ut adveniat, seque ex his omnibus purget. Tunc eidem sunt litteræ destinatae, quæ sic se habent :

« Summo Pontifici et universali papæ domino

Joanni, Otto divinæ respectu clementiæ imperator Augustus, cum archiepiscopis Liguria, Tusciæ, Saxonie, Franciæ, in Domino salutem.

23. « Romam ob servitium Dei venientes, dum filios vestros, Romanos scilicet episcopos, cardinales, presbyteros, diaconos, et universam plebem de vestra absentia percontaremur, et quid causæ esset quod nos Ecclesiæ vestræ vestrique defensores videre nolueritis : talia de vobis tamque obscœna protulerunt, ut si de histrionibus dicerentur, nobis verecundiam ingererent. Quæ ne magnitudinem vestram lateant omnia, quædam vobis sub brevitate describimus, quoniam si cuncta nominatim exprimere cuperemus, dies nobis non sufficeret unus. Noveritis itaque, non a paucis, sed ab omnibus tam vestri quam alterius ordinis, vos homicidii, perjurii, sacrilegii, et ex propria cognatione atque ex duabus sororibus incesti crimine esse accusatos. Dicunt et aliud auditu ipso horridum, diaboli vos in amorem vinum bibisse : in ludo alexæ, Jovis, Veneris cæterorumque dæmonum auxilium poposcisse. Oramus itaque paternitatem vestram obnixè venire, atque ex his vos omnibus purgare non dissimuletis. Si forte vim temerariæ multitudinis formidatis, juramento vobis affirmamus, nihil fieri præter sanctorum canonum sanctionem. Dat. viii id. Novembris ».

Pergit auctor : « Hanc Epistolam cum legisset, hujusmodi Apologeticum scripsit :

24. « Joannes episcopus, servus servorum Dei, omnibus episcopis. Nos audivimus dicere, quod vos vultis alium papam facere. Si hæc feceritis, excommunico vos de Deo omnipotenti, ut non habeatis licentiam ullum ordinare et missam celebrare.

« Cum hæc Epistola in sancta Synodo legere-tur, advenerunt qui prius defuerant religiosi a Lotharingia, Henricus Trevirensis archiepiscopus, ab Æmilia et Liguria Wido Mutiensis, (Mutinensis), Gezo Tortonensis, Sigulphus Placentinus ; quorum consilio domino papæ ita rescribunt :

« Summo Pontifici ei universali papæ domino Joanni, Otto divinæ respectu clementiæ imperator Augustus, sed et sancta Synodus Romæ ob servitium Dei congregata, in Domino salutem.

25. « Præterita Synodo, quæ celebrata est octavo idus Novembris, litteras vobis direximus, in quibus accusatorum vestrorum verba atque accusationis causæ continebantur. Rogavimus etiam iisdem litteris magnitudinem vestram, quemadmodum justum est. A vobis, non quales temporis qualitas, sed inconsultorum vanitas exposcit hominum, litteras accepimus. Non veniendi ad Synodum rationabilis esse excusatio debuit : sed et præsentis magnitudinis vestræ debuerunt nuntii interesse, qui aut ægritudinis, aut certe difficultatis causa satisfacerent sanctam vos Synodum declinasse. Est et aliud vestris in litteris scriptum, quod non episcopum, sed puerilem ineptiam scribere deceret : excommunicastis enim

¹ Lulp. l. vi. c. 8. — ² Job. xxi.

omnes, ut non habeamus licentiam cauendi missam, ordinandi Ecclesiasticas dispositiones, si alium Romanæ Sedis constitueremus episcopum. Ita enim scriptum erat: Non habeatis licentiam nullum ordinare. Nunc usque putavimus, imo credimus, duo negativa unum facere dedicativum, nisi vestra auctoritas priscorum sententias infirmaret auctorum. Nos vero intentioni vestræ non verbis respondeamus: si ad Synodum venire et objecta purgare non differtis, auctoritati vestræ proculdubio obediemus. Sed si (quod absit) venire et objecta vobis capitalia crimina purgare dissimulatis, cum præsertim vos venire nihil impediat, non maris navigatio, non corporis ægrotudo, non itineris longitudo; tunc excommunicationem vestram parvipendimus: eam potius in vos retorquebimus, quoniam quidem juste facere possumus. Judas Domini nostri Jesu Christi proditor, imo venditor, cum cæteris prius ligandi atque solvendi potestatem a Magistro in hæc verba accepit¹: Amen dico vobis, quæcumque ligaveritis super terram, etc. Quandiu enim bonus inter discipulos fuit, ligare atque solvere valuit: postquam vero cupiditatis veneno homicida factus, vitam occidere voluit, quem postea ligatum solvere, solum ligare potuit, nisi seipsum, quem infelicissimo laqueo strangulavit? Data decimo kal. Decembris, et missa per Hadrianum cardinalem presbyterum et Benedictum cardinalem diaconum.

26. « Qui cum ad Tiberim pervenissent, eum non invenerunt; pharetratus enim in campestris jam abierat, nec quisquam erat, qui ubi ipse erat indicare posset. Cumque eum invenire non possent, cum iisdem litteris ad sanctam Synodum, quæ nunc tertio est habita, sunt reversi.

27. « Mox imperator ait: « Expectavimus adventum ejus, ut præsentem eo quod nobis egerit quereremur. Verum quoniam eum non affuturum certo scimus: quam perfide nobiscum egerit, ut diligenter agnoscatis etiam flagitamus. Notum itaque vobis facimus archiepiscopis, episcopis, presbyteris, diaconis reliquoque clero, necnon et comitibus, et iudicibus, omnique plebi, quod idem Joannes papa oppressus a Berengario atque Adelberto rebellibus nostris, misit in Saxoniam nuntios, rogans, ut pro amore Dei in Italiam veniremus, et Ecclesiam sancti Petri et seipsum ex faucibus eorum liberaremus. Nos vero, Deo adjuvante, quantum fecerimus non est necesse dicere, ut in præsentiarum videtis. Ereptus vero mea opera ex eorum manibus, et honori debito restitutus, oblitus juramenti et fidelitatis quam mihi supra corpus sancti Petri promisit, eundem Adelbertum Romanum venire fecit et contra me defendit, seditiones fecit, et videntibus nostris militibus dux belli factus, lorica et galea est indutus. Quid super hoc sancta Synodus decernat, edicat.

28. « Ad hæc Romani pontifices, suffraganei

scilicet episcopi, reliquusque clerus et cunctus populus dixerunt: Inauditum vulnus inaudito est cauterio exurendum: si corruptis moribus sibi soli et non cunctis obesset, quoquo modo tolerandus esset. Quot prius casti, hujus facti sunt imitatione incesti? quot prohi hujus exemplo conversationis sunt reprobi? petimus itaque magnitudinem imperii vestri, monstrum illud nulla virtute redemptum a vitiis, a sancta Romana Ecclesia pelli, aliumque loco ejus constitui, qui nobis exemplo bonæ conversationis præesse valeat et prodesse sibi, recte vivat, et bene vivendi nobis exemplum præbeat.

« Tunc imperator: Placet, inquit, quod dicitis; nihilque gratius nobis, quam ut talis, qui huic sanctæ et universali Sedi præponatur, inveniri possit.

29. « His dictis, omnes una voce dixerunt: Leonem venerabilem sanctæ Romanæ Ecclesiæ protoscriniarium, virum approbatum, ad summum sacerdotii gradum nobis in pastorem eligimus, ut sit summus et universalis papa Romanæ Ecclesiæ, reprobato ob mores improbos Joanne apostata. Cum hoc omnes tertio dixissent, annuente imperatore, nominatum Leonem ad Lateranense palatium, secundum consuetudinem, cum cardinalibus ducunt, et certo tempore in Ecclesia sancti Petri ad summum sacerdotium sancta consecratione attollunt, et fideles se ei affuturos jurejurando promittunt.

30. « His ita gestis, sperans sanctissimus imperator cum paucis Romæ se degere posse, ne consumeretur Romanus populus ob multitudinem exercitus, multis ut redirent licentiam dedit». Hucusque anni hujus res gestæ; quæ sequuntur, anno sequenti facta noscuntur, nosque suo loco dicturi sumus. Addit his Sigebertus, Leonem ipsum laicum adhuc fuisse, cum electus est Pontifex, contra decreta¹ Nicolai, Hadriani et Stephani Romanorum Pontificum, superius recitata.

31. *Hujus pseudosynodi judicium et Acta reprobatione digna.* — Audisti, lector, ipsam Synodum, integra ejus Acta, judicium de abdicatione Joannis papæ et subrogatione Leonis. In qua gravissima actione, sed levissime ac perfunclorie pertractata, quam multipliciter peccatum sit, quamquam enormiter erratum, nec puto pro dignitate me consequi verbis posse. Unum loco omnium hoc satis habeto, nunquam me legisse orthodoxorum conventum synodalem aliquando habitum, in quo magis Ecclesiasticum jus offensum, magis canones violati, vulnerata traditio, conculcata, oppressa, atque majore dedecore prostrata justitia. Mentiar, nisi tu ipse ista cuncta cum videris, manibus tetigeris (si cultor es justitiæ) præ animi indignatione exclamare cogaris, o indignum facinus, audax et insolens! nisi tamen te cohibeant tum turpis vita Joannis, tum zelus imperatoris, de quo illud Apostoli congrue dici potest²: « Testimonium ipsi

¹ Matth. XVIII.

² Apud Grat. d. LXXIX. — ² Rom. X.

perhibeo quod zelum habet, sed non secundum scientiam ». Qua carentes episcopi illi, in quibus esse debebat, sibi aliisque paravere ruinam, sicut ¹ « si cæcus cæcum ducat, ambo in foveam cadunt ». Quo nomine, ea divina sententia, ipsi primum privandi fuerant sacerdotio, sic apud ² Oseam prophetam Domino contestante : « Quia tu scientiam repulisti, repellam te ne sacerdotio fungaris mihi ».

32. Ex quo enim, ut ipsi fassi sunt, habitus est ab eis Joannes vere summus Pontifex (quod etiam suis litteris sunt professi) unde ipsis cogendi Concilii facultas contra Pontificem absque ipsius consensu? Id quidem contestati sunt omnes episcopi in Romano Concilio sub Symmacho papa, cum ipse Pontifex adversariorum accusationibus obrueretur, non licere dicentes ab alio aliquo nisi ab ipso, Synodum convocari in causa sua; cum Theodoricus rex hoc non negans, excusavit tamen se, dicens de cogenda ea Synodo litteras ab ipso Symmacho accepisse, prout suo loco superius est demonstratum. Insuper ubi sufficiens testium numerus? quem septuaginta duorum esse debere contestati sunt sanctissimi illi Patres, qui ad iudicandum Marcellinum papam sunt convocati. Rursus in quam Synodo, licet contra aliquem hæresiarcham convocata, non præcessit citatio trina, antequam in eum esset lata sententia? At Joannem papam bis vocatum duntaxat, synodalia ipsa Acta declarant. Sed et cui reorum, quamvis vili hominioni, non ante sententiam aliqua data a jure perendina dilatio? Sed nulla Joanni : bis vocatus, statim damnatus eadem qua secunda citatus est die, ut eadem Acta significant. Audi monstruosiora : In quam Synodo petatum est ab episcoporum consensu, imperatorem condemnare episcopum vel clericum aliquem, et non potius ab imperatore postulatum est, ut sancta Synodus hominem Ecclesiasticum damnet? At secus in hoc conventiculo factum videmus; nam universa Synodus rogasse dicitur imperatorem, Joannem expelli, et alium in locum ipsius subrogari.

33. At quis aliquando accusatus hæresiarcha, vel infamissima quæque persona convicta in Synodo, absque sententia lata, omniumque subscriptione firmata, publiceque recitata legitur e throno deposita, in ordinem redacta, et alia in ejus locum suffecta? At hic una brevique interlocutione imperatoris, imo nec interlocutoria sententia, sed rogatione ipsius imperatoris, successor est datus Joanni, nulla in eum prorsus sententia lata. « Nam rogante Synodo imperatorem (ut habent Acta verbatim quam fidelissime ab eodem auctore conscripta) ob immania flagitia Joannem pelli, et alium aliquem virum frugi subrogari, hæc ad eos imperator : Placet quod dicitis, nihilque gratius nobis, quam ut talis qui huic sanctæ et universali Sedi præponatur, invenire possit. His dictis, omnes una

voce dixerunt : Leonem venerabilem nobis in pastorem eligimus, etc. »

34. Vidisti monstrum, suffectum caput priori capite nulla præciso sententia? Attendisti prodigium, executionem absque sententia, cum omnis executio sententiæ dicatur executio? relative enim se habet ipsa executio ad sententiam. Sed ubi ista? nusquam nec prolata verbis, nec scriptis edita reperitur.

35. Sed etsi omnia rite rectoque ordine judiciario peracta fuissent, nonne sua sponte omnia statim corruunt, cum ab excommunicatis ab ipso Pontifice omnia constet esse peracta? ubi unquam visa tanta ignorantia canonum, iudicium tam absurdum auditum in re tam gravi tantique momenti? tanta temeritas, ex quo Christi Ecclesia esse cepit, in Orthodoxis episcopis ubi inventa? Cum plurima contigerint adversus Romanos Pontifices ab ipsis convocata cogi Concilia, in quibus licet sæpe audacissimi adstiterint accusatores accusationibus nefandissimis, nunquam tamen permoveri potuerunt Patres, nisi hæretici ipsi fuerint vel schismatici, ut in Romanum Pontificem sententiam ferrent, quod non licere omnes constantissime affirmarent. Ita Patres sanctæ Synodi in causa Marcellini thurificationis exhibitæ aræ deorum convicti : « Tuo ore judica causam tuam, dicebant, non nostro ». Ac rursus : « Noli audiri a nostro iudicio, sed collige in sinu tuo causam tuam : quoniam ex te justificaberis, ex ore tuo condemnaberis, testimonio nostro excusaberis ». Et illud : « Nostorum nemo unquam judicavit Pontificem, nec sacerdos præsulem suum; quoniam prima Sedes non iudicatur a quoquam ». Id ipsum repetitum in Concilio Romano in causa Symmachi, cum adversus eum horrendæ fuissent prolatae calumniæ, « assertumque quod nunquam antistes Romanæ Sedis subjacuit minorum iudicio ». Namque in his quæ ad mores spectant, totam causam Deo reservandam esse, in Damasi papæ iudicio comprobatum; fuisseque remissos ejus accusatores a Gratiano imp., suo loco est superius demonstratum.

36. Quid demum (ut alia prætermittamus iudicia) cum causa Leonis III tractaretur in Romano Concilio, cui interfuit Carolus Magnus? hæc una vox omnium episcoporum tam Francorum quam Italicorum : « Nos Sedem Apostolicam, quæ est caput omnium Ecclesiarum, iudicare non audemus. Nam ab ipsa nos omnes, et a vicario ejus iudicamur : ipsa autem a nemine iudicatur, quemadmodum antiquitus mos fuit. Sed sicut ipse summus Pontifex consuevit, jubeat; et canonice obediemus ». Hæc illi sanctissimi atque doctissimi Patres ab his longe dispares scientia et probitate; siquidem quam isti scientia rudes et leves, quamque fuerint moribus protervi, ex rebus gestis apparet.

37. Audi adhuc deformiora : Quam insuper ille intolerabilis in his error, et inter hæreses numerandus, dum illud erroneum et hæreticum as-

¹ Matth. xv. — ² Ose. iv.

serunt episcopi isti, quod exemplo Judæ confirmant, nimirum propter peccata auferri a Pontificibus clavium potestatem, ligandi atque solvendi a Deo traditam facultatem? Professi sunt hæc ipsi suis scriptis, Epistola tunc ad Joannem Pontificem data: quod esse hæreticum Catholicus quis negabit? Sed quanta in illis episcopis inscitia cum novitate? Quæ illa nova phrasis ab Ecclesiastica consuetudine abhorrens, qua Romanos vocant episcopos, sive Romanos pontifices, ipsos Romanæ Sedis suffraganeos? Quæ illa latinæ vocis ignorantia, dum stulte reprehendunt Joannem, quod in sua responsione dixisset: Non habeatis licentiam ullum ordinare, redarguentes quod duabus negationibus affirmarit, quod prohibere voluisset: putantes isti idem esse ullum, quod nullum; cum (nisi episcopalis dignitas prohiberet) dupliciter fuissent ad ferulam revocandi ac feriendi, eo quod Pontificem recte loquentem ita petulanter arguisent, atque ipsi vocis illius ignari, eam in significationem contrariam convertissent. At sinamus puerilia ista. Sed non tacendum de præpostera nomenclatura illa, atque inverso penitus loquendi usu qui in Actis illis esse reperitur, in quibus sanctissimus nominatur imperator, et Romanus Pontifex magnus, cum toties repellantur verba illa, « Magnitudo vestra », et non more majorum, « Sanctitas vestra ». Puto abstinuisse illos a nomine sanctitatis, quod tot cum tantisque sceleribus cumulatam assererent, nescientes ante sententiam non debere reum consuetis honoris titulis minui, huncque esse antiquum Ecclesiæ morem, prout in Actis magnæ Synodi Chalcedonensis in Nestorio factum apparet, qui quamvis hæresiarcha accusatus et convictus, nunquam eum nisi post prolatam in eum sententiam desciverunt Patres reverendissimum sive sanctissimum nominare. Hæc quæ ad pseudosynodum spectant.

38. Ex quibus omnibus probe, puto, intelligis, lector, nulla ex parte subsistere potuisse de condemnatione Joannis ejusmodi spurium et sacrilegum judicium synodale, omni ex parte illud invalidum reddi ac penitus nullum, simulque subrogationem Leonis factam in locum ipsius eodem jure censi, quem tamen, non quia, sicut plerique alii male asserti, inter Romanos Pontifices numeratus reperitur, idcirco vere legitimum dixerimus fuisse Pontificem. Scriptorum error nullum afferre potest veritati præjudicium, nec numerata Leonum ita nominatorum Pontificum series esse faciet quod non est: sicut nec canem aliquem Leonis nomine insignitum, vere esse leonem ipsa nominatio vel numeratio tantum facta constituet. Hæc, ut scias e numero Leonum Pontificum hunc pseudoleonem explodere.

39. Qui vero ista adeo vera adeoque aperta minime considerarunt, cæco errore ducti, in odium Joannis impurissimi quem jure detestantur omnes boni, eo prolapsi sunt, ut ejusdem Joannis condemnatione probata, æque eandem

pseudosynodum ut legitimam acceperint; insuper et Leonem VIII dictum ab ea Pontificem creatum, ut canonice electum receperint, Benedictum vero post Joannis obitum creatum ejecerint. Sicque ignorantia tenebris obvoluti in tam graves impigerunt errores, quorum numerus adeo excrevit, ut vix pauci, quibus inquirendæ veritatis amor fuerit, et studium ejus perscrutandæ majus inhæserit, inventi sint, qui obrutam veritatem vindicarint in lucem. Ex antiquis Otto Frisingensis episcopus, et ipse Germanus et in Germania scribens, cum factum non probet, redarguere tamen non ausus, hæc de his¹ ait, ubi summam rem gestam recenset: « Quæ omnia utrum licet aut secus acta sint dicere, præsentis non est operis: res enim gestas scribere, non rerum gestarum rationem reddere proposuimus. Inveni tamen in quibusdam Chronicis, sed Teutonicorum, præfatum Joannem reprehensibiliter vixisse, sed frequenter super hoc ab episcopis aliisque subditis suis conventum fuisse. Cui rei durum videtur fidem accommodare, quia Romana Ecclesia hoc speciale privilegium sacerdotibus suis adscribere solet, quod meritis Petri super firmam petram fundati, nulla eos porta inferorum, vel turbo tempestatum ad exitialem ruinam involvat ». Hæc sanctus episcopus, adeo magnifice sentiens de successoribus Petri. At non tanta nos vindicamus, ut esse non possit, quin fœdus turpisque moribus irrepit vel irrumpat in Sedem illam, fide autem impius nullo modo.

40. Cæterum, admonendus est lector, quod scriptores hujus temporis, ut auctor qui Appendicem ad Luitprandum affixit, nonnihil visi sunt adulari Ottoni imperatori, ut ex eorum scriptis haud obscure perspicitur, favissequae electioni ab ipso Ottone factæ Leonis; quodque æque omnes detestati fuerint Joannis papæ nefanda scelera, juste ipsum abrogatum putaverunt et scripserunt, re tamen haud funditus perscrutata: ut non mireris si eos legeris favere una cum imperatore Leoni, in Joannem vero et ejus successorem Benedictum, ut in pseudopontifices declamaret. At de his modo satis.

41. *Privilegium monasterio S. Vincentii datum.* — Hoc eodem anno datum reperitur ab Ottone imperatore privilegium monasterio sancti Vincentii ad fontes Vulturii; extat integrum una cum sigillo descriptum a Joanne monacho in Chronico, caractere Longobardo, ubi in fine ista leguntur, quæ ad tempus consignandum spectant: « Arnulphus presbyter, ad vicem Widonis episcopi archicancellarii recognovi et probavi. Data XI kalendas Septembris, Ottonis imperatoris anno II, Indictione sexta. Actum in Capuana civitate ».

42. *Nicephorus Phocas succedit Romano imperatori Orientali: in patriarcham ob suum ma-*

¹ Otto Frising. l. VI, c. 23.

trimonium offendit ; in Sarracenos copias mittit.
 — Quod ad rerum Orientalium statum pertinet : « Hoc anno (inquit Curopalates) quintadecima Martii mensis, Indictione sexta, anno sex millesimo quadringentesimo septuagesimo primo ab orbe condito, mortuus est Romanus imperator viginti quatuor natus annos, cum annos tredecim regnasset, menses quatuor, dies quinque (computatis annis quibus cum patre regnavit) ut aliqui asserunt, exhausto corpore turpissimis et voluptuariis rebus; ut autem alii auctores sunt, veneno peremptus; cui licet filii successissent Basilius et Constantinus pueri, tamen affectantibus aliis imperium, Nicephorus Phocas clarus victoriis ab exercitu imperator acclamatus et Constantinopolim convocatus, hoc eodem anno, decima sexta mensis Augusti, imperator a Polyucto patriarcha coronatur ». At quæ inter eundem patriarcham et imperatorem sint obortæ contentiones, ex eodem auctore sic accipe, ab ipsa coronatione incipiente his verbis :

43. « Hunc igitur coronat Polyuctus in magni templi edito loco, dies erat Dominica decima sexta Augusti mensis, Indictione sexta. Missoque monacho et syncello studii Antonio, a regia Theophanem dejecit (erat ista Romani uxor) et ad Petri palatia transmittit ». Quam postea hoc eodem anno, vicesima mensis Septembris in uxorem accepit. Cujus occasione simultates cum Polyucto sunt exortæ, duplici ratione apud ipsum eodem Nicephoro reo constituto; prima quidem, quod cum aliam habuisset uxorem, secundam ducere non liceret absque pœnitentia quadam; alia vero, quod assereretur ipsum Nicephorum in baptismo suscepisse Theophanes filium. Quomodo autem Polyuctus his de causis ipsi restiterit, sic idem narrat Curopalates :

44. « Perfectis nuptiis in novo ad palatium templo, cum ingressurus esset ad altare, manu ipsum detinens Polyuctus, et sacris cancellis appropinquans, ingreditur ipse in adyta, illum vero retro expulit, asserens non prius ipsum concessum iri ut ad altare ingrediatur, quam pœnas solveret eorum qui alteram ducunt uxorem. Offendit hac re Nicephorum, neque destitit ei usque ad obitum irasci. Divulgata etiam erat ubique fama, haud mediocriter illum Ecclesiam perturbasse, quia Nicephorus a sancto baptismo unum ex filiis Theo-

phanes suscepit. Hanc famam ut probabilem causam nactus Polyuctus, vel separandum ipsum ab uxore contendebat secundum Ecclesiæ canonem, vel ab Ecclesia ei recedendum, quod fecit retinens Theophanem ». Exprobat et Luitprandus, in relatione suæ legationis, ejusmodi Nicephori cum commatre sua Theophane matrimonium, eaque de causa cum silvestri asino comparat. Pergit autem idem qui supra Curopalates :

45. « Convocatis autem peregrinis episcopis qui erant in urbe, et præstantioribus senatus, consultandam rem proposuit. Omnes hi legem Copronymi esse dixerunt, et statuerunt non esse servandam. Et idcirco scriptum repudii libellum ipsius arbitrio permiserunt. Et diu recusantem Polyuctum cum imperatore loqui, ipse Cæsar certo firmavit se cum non suscepisse puerum. Quinetiam Stylianus protopapa magni palatii, ex quo primum talis fama cœperat divulgari coram senatu et synodo, neque vidisse se, neque alicui dixisse aiebat, Bardam vel Nicephorum suscepisse puerum. Polyuctus autem quamvis aperte nosset Stylianum pejerare. crimen synlerniæ, id est, eum qui e baptismo filium suum vel alterius suscepit, condonavit. Et quidem institerat ut ei secundarum nuptiarum pœnæ imponerentur, hoc quoque peccatum deinde ei remisit ». Hæc de his Curopalates, in quibus illud mirum, quomodo adulantes imperatori ausi sunt dicere, « impedimentum ex cognatione spirituali procedens legem fuisse Copronymi, cum veterum canonum censura id constet esse veritum ».

46. Quod ad reliquas res gestas anni hujus Nicephori imperatoris hæc, habet Curopalates : « Nicephorus autem primo imperii sui anno, contra Sarracenos qui in Sicilia erant, patricium Manuelem misit nothum filium patris sui Leonis, qui declaratus fuerat domesticus scholarum etiam sub Romano ». Hoc factum tradit a Nicephoro, ut Orientale imperium eximeret a pensatione tributi, quod solvebat Sarracenis a tempore Basilii Macedonis imperatoris. Sed ob imperitiam ducis male pugnatum est, et dux ipse cum exercitu interemptus, animatis Sarracenis adversus Græcos, quod legissent in vaticiniis Hippolyti episcopi in Sicilia Sarracenos non vincendos et conterendos a Græcis, sed a Francis. Hæc Luitprandus in relatione suæ legationis, de qua inferius dicendum.

Anno periodi Græco-Romanæ 6456. — Anno Æræ Hispan. 1001. — Anno Hegiræ 352, inchoato die 20 Januar., Fer. 6. — Jesu Christi 963.

— Joannis XII papæ 8. — Ottonis imp. 2. Nicephori Phocæ imp. 1.

1. *Conciliabulum Rom. adversus Joan. XII.*

— A num. 1 ad 31. Continuator Reginonis hoc anno scribit : « Rex (nempe Otto) iterum Papiæ Natalem Domini et Pascha celebravit. Interim Adalbertus (Italiæ rex) huc illucque discurrens, quoscumque poterat sibi undique attraxit, sed et Corsicam ibi se tueri nitens intravit. Romanum etiam Pontificem multipliciter in suum adjutorium sollicitavit. Dum hæc igitur aguntur, imperator a Papiæ movens iter, Berengarium (Italiæ regem) in monte sancti Leonis obsedit, totamque ibi æstatem sedens, sæpe montem undique circumdedit, et ne aliquatenus pateret exitus vel introitus prohibuit. Interim Joannes papa promissiones imperatori factas oblivioni tradens, ab eo deficit, et Berengarii seu Adalberti partibus favens, Adalbertum Romam intromittit. Quas dolositatis ejus fraudes imperator audiens, relicta circa montem obsidione, Romam versus cum hoste (id est, exercitu) pergit : cujus ipsi metuentes adventum plurimum thesaurum S. Petri rapientes, fugæ subsidia petunt. Tunc Roma in plura divisa, partim imperatori faventes (multi enim a prædicto papa injuriis se opprimi conquerebantur) partim Apostolico blandientes, licet diversa sentirent, imperatorem tamen cum honore debito Urbem intromittunt, seque per omnia, datis obsidibus, illius ditioni subjungunt. Imperator vero, plurimorum episcoporum collecta multitudo, Synodum coadunavit, et consilio eorum missa legatione, canonica auctoritate, profugum Apostolicum ad Sedem Pontificalem et Apostolicam revocavit. Illo tamen hoc omnibus modis renuente, plebs Romana Leonem protoscriniarium virum strenuum et industrium, communi consensu in locum ejus elegit et ordinavit : cui Synodo interfuerunt omnes prope Romani et Italiæ episcopi : Angelfredus etiam Aquileiensis patriarcha, qui tunc temporis etiam obiit. Sed et de nostratibus interfuerunt Adaldagus (Hamburgensis) et Heinricus (Trevirensis) archiepiscopi, Landuvarus (Mindensis) et Otgerus (Spirensis) episcopi. Postea Joannes, qui et Octavianus, videns se esse depositum, sera poenitentia ductus, Adalberto disjungitur, Adalbertus vero in Corsicam revertitur ». Est hæc secunda Ottonis M. Romana profectio.

Continuator enim Luitprandi lib. 6, cap. 6, narrata ejusdem imperatoris unctione a Joanne XII peracta, subdit : « Post hæc ad patriam quantocius repedavit ». De secunda profectioe Heppidannus in *Annual.* ad annum *mcclxxiii* habet : « Otto rex secundam profectionem in Italiam fecerat cum magno exercitu in mense Augusto ». Sed fallitur hic auctor, quia Otto M. anno superiori mense Julio adhuc in Italia agebat, ut liquet ex ejus Diplomate ibidem dato, et a Baronio num. 14, et seq. recitato. Quare cum eo an. Otto M. Natalem Domini Papiæ celebrarit, teste continuatore Reginonis citato qui annos Christi ab eodem die auspicatur, manifestum est hunc imperatorem post mensem Julium anni superioris in Germaniam rediisse, eodemque anno in Italiam reversum Natalem Domini Papiæ celebrasse.

2. *Leo VIII fit antipapa.* — Fusius hæc narrat Luitprandus seu ejus Continuator lib. 6, cap. 6, cujus verba recitat Baronius. Concilium illud, seu verius Conciliabulum Romanum, *octavo idus Novembris* habitum, ut liquet ex ejus Epistola Synodica apud Baronium num. 25, *data decimo kalend. Decembris*, ut in fine ejus legitur. Quoad Leonem in Joannis XII locum Pontificem subrogatum, Papebrocius in *Conatu Chronico-Historico* existimat, eum die sexta mensis Decembris ordinatum fuisse, et refert hæc verba ex Vita Joannis XII adhuc inedita, a Petro Bibliothecario scripta : « Consecraverunt eum Romanum Pontificem mense Decembri in Lateranensi palatio : qui fecit ordinationem in eodem mense, presbyteros vii, diaconos ii. Et sedit annum i, menses iii ». Privilegium Rodoaldo sanctæ Aquileiensis Ecclesiæ patriarchæ « datum in sacratissima æde beati Petri Apostoli Idibus Decembris anno Pontificatus Leonis primo, imperante Ottone anno ii », hanc sententiam extra omne dubium ponit. Illud enim die xiii mensis Decembris emissum, ante quam nulla illius mensis Dominicalis est præter diem sextam. Sedit itaque Joannes ante Leonis ordinationem annos septem, et unum aut alterum mensem, ut ex iis quæ in morte Agapiti II ejus decessoris diximus, manifestum sit. Porro exactionem Joannis XII ab Ottone imp. et Synodo Romana tenta-

tam, nullam fuisse et illegitimam, pluribus ostendit Baronius num. 31 et seqq.

3. *Luitprandi Historia*. — Quoad *Luitprandum* Ecclesiæ Ticinensis diaconum, et postea episcopum Cremonensem, de cuius Historia Baronius num. 3 verba facit, ille rerum suo præsertim tempore gestarum narrationem inter annos DCDLVII et DCDLX in lucem edidit. Libro enim 4, cap. 7, *Luitolfi* Ottonis M. filii mortem deplorat, et lib. 3, cap. 7, de *Constantino Porphyrogenneta*, tanquam de imperatore vivente loquitur. Quare cum *Luitolfus* anno DCDLVII vivere desierit, *Constantinus* vero die IX Novembris anni DCDLIX, ut anno DCDLX vidimus, ea Historia, libris sex comprehensa, intermedio illo tempore publicata, eique caput sextum et quinque sequentia adjecta, ut ex variis conjecturis deducit Baronius. In iis enim de gestis anno DCDLX et quatuor sequentibus sermo est. Incertum tamen an ipsemet *Luitprandus*, vel quispiam anonymus illa capita addiderit. Scripsit etiam *Luitprandus* legationem, quam ad *Nicephorum Phocam* imperatorem pro Ottonibus Augustis suscepit; sed *Chronicon* et *Adversaria*, quæ ab aliquot annis sub ejus nomine prodire, supposititia esse fuscè demonstrat Nicolaus Antonius in Bibliotheca Hispana veteri, lib. 6, cap. 16 et seqq.

4. *Obitus Romani Junioris imp.* — A num. 42 ad 46. Curopalates et Cedrenus tradunt, Romanum Juniorem « xv die Martii Mensis, Indictione VI, annos natum viginti quatuor » e vivis excessisse: imperasse vero « annos tres, menses quatuor, dies quinque ». Ex quo apparet, verum esse quod an. DCDLX diximus, *Constantinum* nempe *Porphyrogenneta* anno DCDLIX, die nona mensis Novemb., ut Cedrenus et Curopalates habent, vivere desiisse, et utrumque scriptorem de duratione imperii Romani junioris loquentem, excludere diem emortualem tam Constantini quam Romani filii. Subdit Cedrenus: « Imperium ejus morte ad Basilium et Constantinum ipsius filios, et eorum matrem Theophanonem rediit: quæ biduo ante mortem mariti, filiam quoque peperit, cui Annæ nomen fecerunt ». Hæc postea Ulodomiros Russorum principi matrimonio conjuncta, et hac ratione fides Christiana in Moscoviam illata, ut infra videbimus. *Theophanon* vero fuit obscuro genere nata, cum tamen venustate ac forma corporis per hoc tempus cunctis ejus sexus præstaret, inquit Leo Diaconus, qui subdit:

5. *Nicephori Phocæ de Saracenis triumphus*. — *Nicephorus* maximi imperii mutatione audita, animo suspensus, inque omnem partem anxius erat, aliæque subinde cogitationes eum exterrebant. Rerum enim negotiorumque infida lubricitas fortunæque vicissitudo ac instabilitas, tranquillo in statu virum agere non sinebant, quod maxime *Josephi* potentiam suspectam habebat. Is nimirum cum spado esset, atque in aula imperatoria cum primis auctoritate polleret, quippe qui accubitoris (ac si sacri cubiculi summum præfectum dicas)

auctus dignitate esset, infenso in *Nicephorum* animo, eique hostis erat. Visum itaque mox res novas moliri; sed cum minores copias quam par esset in promptu erat, (cohortes enim in suam quamque patriam remiserat) tantum hactenus certamen suscipere formidabat. Operæ prelium igitur putavit ut res novas moliri tantisper differret, Byzantinum vero invectus, ductoque triumpho, si modo imperatores ipsius fidei exercitum regendum committerent, (noverat enim quandiu vita superstes esset, alium neminem fore qui Barbarorum impetum sustinere posset, iisque aciem opponere) copias resumeret, tutoque consilio aliorum causa decertaret. Hoc igitur consilio secum animo constituto ac deliberato, Byzantinum venit: placidissime quæ a populo senatuque susceptus, prædaque quantam induxerat triumpho traducta, ac in ærarium illata Barbarica opulentia, domi privatus agebat. Cedrenus refert illum VI Indict. mense Aprili, jussu Augustæ » Constantinopolim venisse, et duxisse triumphum in Circo inferentem in eo Cretensia et Berrhoensia spolia.

6. *De imperio arripiendo cogitat*. — Sed redeo ad Leonem Diaconum, cujus narrationem de verbo ad verbum reddam: « Josephus (metuebat enim Nicephori Byzantini moras, ne quid novarum rerum adversus imperatores moliretur, cum præsertim militares ordines impense virum amarent, populusque admirationi haberet ob erecta tropæa et fortissimi roboris pugnando edita facinora) in palatium evocabat, si forte copiis atque milite nudum offendens, oculis privare posset, hincque in exilium mitteret. At prætor, Josephi vaferrimo malignissimoque intellectu consilio, (acerrimi quippe vir ingenii erat, ut ei fraus suboleret) in magnam Ecclesiam venit, collatoque cum patriarcha Polyeucto sermone (viro scilicet divina humanaque Philosophia longe exulto, ut qui a puero monasticam vitam ac religiosam paupertatem consecratus, majore quam pro hominis ratione fultus fiducia esset, quam non indoles præstaret, quippe qui spado esset et ad extremam senectutem devenisset, sed bonorum abdicatio, omnisque expers criminis simplexque nec quidquam superflua vitæ ratio;) cum hoc itaque Polyeucto in colloquium veniens Nicephorus: Egregias sane, ait, tot tantorumque certaminum atque laborum vices percipio, ab eo qui aulæ præest. Is nimirum quem nil latet, magnum oculum fore ut lateat ipse arbitratus, machinandæ mihi mortis nullum finem facit, qui Deo propitio ejusque numine, Romani imperii fines produxerim, cum nihil hactenus in Reipublicam deliquerim, sed in eam potius, quanta nemo hujus ætatis virorum, contulerim: qui tantam denique Agarenorum regionem igni ferroque desolaverim, tamque multa oppida urbesque a fundamentis diruerim. Ad me sane quod attinet, oplabam ordinis senatorii virum, placidum, modestum esse ac moderatum, non sic infensum, atque id frustra nullo fine iras agitare ac moliri interitum ».

7. *S. Polyeucti episc. Constant. studium in bonum publicum.* — His patriarcha ex Nicephori ore auditis, animique ardore succensus, in palatium venit, una comitem adducens Nicephorum. Convocatoque senatu: « Haud æquum, inquit, ut qui pro Romana felicitate nulla sui ratione habita, labores ac pericula sustinuerunt, quique erga suæ gentis homines ac cives suos, viros se probos ac moderatos exhibent, probro ignominiaque afficere, sed honori potius habere ac coronare. Ergo, si mihi creditis quæ meliora sunt consulenti, meam statim dicam sententiam. Operæ pretium existimo, ut nos, qui Romanis sumus ac divinis legibus instituti, tenellos Romani imperatoris liberos, quandoquidem nostræ universique populi suffragio imperatores renuntiati sunt, in honore a majoribus accepto conservemus, eundemque eis cultum quem majoribus ipsorum tribuamus. Quia vero Barbaræ gentes Romanam ditionem diripere non cessant eamque incessere, auctor vobis sum ut virum hunc (ostenso Nicephoro) qui solertis ingenii sit, rei que militaris apprime gnarus ac bello fortis, quique plurimas victorias (quod et vos ipsi agnoscitis) retulerit, ac quem præ reliquis maxime suspicitis, jurejurando obstricta fide, nihil inconsultum adversus majestatem ac senatum moliturum, imperatorem ducem creemus, atque ei Asiæ copias concedamus, qua is fide rem Romanam ulciscatur, inhibeatque alienigenarum insultum ac grassationem. Nam et Romanus imperator cum in humanis adhuc ageret, hanc ei dignitatem commiserat, ac ne vir probis moribus ejus imperii munere moveretur, scriptis testamenti tabulis caverat ».

8. *Nicephorus Phocas fit dux totius Asiæ.* — Ubi patriarcha in hæc verba sententiam dixerat, etiam senatus calculum adjecit. Assensus est et *Joseph accubitor*, non quidem sponte, sed quod ita senatus ipse annuens cogeret, ac sane tremendissimis juramentis obstricto Nicephoro, « quandiu tenellæ ætatis pueri ac imperatores superstites essent, ne quid infausti malique adversus eorum imperium moliretur, ipsis quoque jurejurando firmantibus, neminem procerum ac magistratum citra ejus sententiam se moturos esse, aut ad majores infulas provecturos, sed et communi cum eis consilio Republicam recturos; totius Asiæ imperatorem ducem promulgarunt.

9. *Nicephorus Phocas et Josephus accubitor inter se dissident.* — « Jam vero media ferme verna tempestate, luciferoque ad Arcticum polum paulatim cursum flectente ac circa Taurum currum agitante, Byzantio profectus Nicephorus, ad objectam ex adverso maris littore Asianam regionem commeat. Cumque venisset in Cappadociam (Trogloditas ante eam gentem vocabant, quod in terræ meatibus et cavernis ac labyrinthis, velut lustris antrisque tecta subeant) ibique fixo tentorio, missis in omnem late regionem edictis, omnem ad se exercitum congregat. Interimque dum exercitum cogeret, quos secum habebat bellicis institutis

exercebat, nec quidquam omittebat eorum quæ ad pugnae bellicæ artem inventa sunt. Interim vero dum prætor militem exercet, (secum enim ipse statuerat ut adversus Chabdam ac Tarsenses polissimum educeret) Josephus accubitor, Nicephori solertem animum consultumque reputans, prætereaque viri fortitudinem infractumque pectus secum ipse cogitans, veritusque ne collecto circa eum exercitu novarum aliquid rerum perperam moliretur, intus pavore animi palpitabat, suamque vituperabat consilii mentisque absentiam, quod cum prædam velut intra casses inclusam teneret, haud neci dedisset, sed imprudenti consilio tantis eum copiis armisque muniisset: totus igitur cogitabundus atque animi anxius, vitam sibi infelicem minimeque vitalem ducebat. Consideranti igitur multasque rationes versanti, quo tandem modo tanto prætoris imperio movere liceret, cujusdam fraudis in mentem venit, qua illi us præfecturam haud secus ac securim quamdam cervici suæ imminentem a se depulsum iri putabat ».

10. *Nicephorus Phocas acclamatur imperator.* — Refert postea Leo Diaconus quæ Josephus ut Nicephorum perderet excogitarit, et quomodo *Joannes Tzimisces* Nicephori ex materna stirpe consobrinus huic rebellionem suaserit, et *inveniente mense Julio* Nicephorus ab exercitu imperator acclamatus fuerit. Is itaque « projecta privati veste, sago militari, imperatorio regioque paludamento infibulatus, ad regiam se majestatem magis composuit, equoque consensu per auream portam invectus est, omni populo senatuque cum plausu exipiente, ac ei acclamante. Augusti mensis dies sextus decimus agebatur, Indiæ sexta, cum hæc gererentur. Jam vero ubi celeberrimum Dei delubrum ingressus erat, atque a sacerdotum cœtu debitos honores susceperat, a Polyeucto patriarchæ munus obeunte imperiali caput cingitur diademate: cum unum supra quinquaginta ætatis annum ageret ». Postquam summam rerum inierat, tutoque ac secure imperii gubernacula regebat, *Bardum* patrem Cæsaris dignitate ornavit; *Joannem* cognomento *Tzimiscem* Orientis domesticum creavit; *Leonem* vero germanum suum europalitam magistrumque.

11. *Ejus virtutes.* — Ipse vero quam sibi indixerat, inviolabilem se castitate servaturum præferebat, quippe qui et uxoris conjugium vitaret et carniū esum repudiaret. Verum monasticæ vitæ cultores et qui ejus animum sanctis moribus componebant, (præclare enim hujus instituti viros colebat) in his quæ sibi ipse constituisset manere non sinebant, sed hortabantur ut et conjugium amplecteretur, nec carniū esu ut re nefasta sibi prorsus interdictum vellet. Metuebant enim, ne prono in delicias ac comessiones animo, in turpes sensum voluptates delaberetur. Monachorum igitur admonitionibus animum accommodans, familiarem oīum ac consuetam vitæ rationem ab se ablegavit; *Romani* vero uxorem, venustam admodum mulie-

rem sibi conjugem copulavit. Rumor autem murmurque erat, haud legitimas esse nuptias, propeque abhorrere a ratione conjugium, quippe cum Nicephorus Romani imperatoris ac *Theophanonis* liberorum ex sacro lavacro susceptor exlisset. Quod cum accepisset *Polyeuctus* patriarcha, omni conatu imperatorem a sacris cœptis arcere conabatur; cum enim vir esset divina plenus æmulatione, omnisque generis scientia atque virtute incomparabilis, non desinebat etiam ipsos imperatores arguere. Imperator autem negabat se susceptorem *Theophanonis* liberorum ex sacro baptismale fuisse, sed *Bardam* patrem hoc munus obisse. In eum modum patriarchæ flexus animus valdeque delinitus, adeo ut lætus atque hilaris conjugium ejus cum *Theophanone* admiserit ac dispensarit. Hæc summarie ex Leone diacono scriptore adhuc in edilo.

42. *Græci a Saracenis in Sicilia devicti.* — Ad num. 46. Luitprandus in sua legatione ad Nicephorum imp. anno DCCLXVIII obita, eodemque anno num. 55 integra a Baronio recitata, de Manuele patricio a Nicephoro imp. adversus Saracenos Siciliæ misso habet: «Scribit præfatus Hippolytus, Græcos non debere Saracenos, sed Francos contemere; qua lectione Saraceni animati, ante triennium cum Manuele patricio, Nicephori nepote, juxta Scyllam et Charibdim in mari Siculo bellum parant; cujus immensas copias cum prostravissent, ipsum comprehenderunt, capiteque truncum (legendum, truncatum) suspenderunt: cujus socinum et commilitonem (sc. Nicetam eunuchum) cum caperent, qui neutrius erat generis, occidere sunt dedignati; sed vinctum ac longa custodia maceratum tanti vendiderunt, quanti nec ullum hujusmodi mortales sani capitis emerent». Quare cum hæc triennio ante Luitprandi legationem contigerint, manifestum est errasse Curopalatem, Cedrenum et Zonaram, qui ea ad primum Nicephori Phocæ annum referunt, et bellum istud pertinere ad annum DCCLXV, ut ibidem magis probabitur.

43. *Reliquiæ S. Epiphanii Hildesheimium translatae.* — Hoc anno *Thangwardo* presbyter sancti Epiphanii episcopi Ticinensis sepulcrum clanculum refodit, et hujus sancti præsulis reliquias ad episcopum suum *Otwinum*, nempe antistitem Hildesheimiensem, qui tunc in Italia erat, detulit, isque in Germaniam misit. «Translatum est autem corpus beati ejusdem patris a fratre nostro, decima kalendarum Decembrium die (sc. anno superiori), ad nos vero, Dei gratia comitante

domino nostro sanctæ memoriæ Otwinio episcopo, octavo kalendarum Martiarum die perductum», inquit auctor Hildesheimiensis anonymus et cœtaneus in Historia translationis sancti Epiphanii Ticino Hildesheimium, recitata a Bollando ad diem XXI mensis Januarii, et primum a Christophoro Browero promulgata. Die XXII Februarii, qui hoc anno in Dominicam incidit, sacræ reliquiæ Hildesheimium translatae.

44. *An ea translatio justa.* — Quia vero Pontificum edictis cautum, ne quis divorum pignora sublegere ea ratione audeat, quod veteribus quibusdam minori fuisse religioni, plurima quæ passim extant, demonstrant exempla, de jure translationis hujus hæc habet Browerus, quæ ad Annales Ecclesiasticos illustrandos faciunt: «Si quis translationem hanc ex jure sacrorum æstimet æquus judex, vel de ea judicium accipiat, reliquiarum hanc deductionem, nec lege, nec moribus factam illico censebit; sed eos qui manum fecere, et sacras exuvias nativa quasi gleba et fundo abstraxere, interdico *Unde vi*, ut levissime dicam, obnoxios fuisse, et repetundarum actione conveniri potuisse pronuntiabit. Valere interim hujus et superioris ætatis exempla, eamque sibi licentiam immodica pietas et religio fecit, ut callide pii furti et religiosæ rapinæ titulis, non stricta æquitatis lege has actiones rei dijudicarent, cognitores plerumque litem dissimularent, magistratus hic plurimum conniverent. Jam quod caput, felicitas eventus, et religionis ex prodigiis et miraculis secutis opinio, fas sæpe et licentiam his evectionibus non solum constituit, sed furti an sacrilegii probum in gloriam vertit: quod Franci et Germani, afflicta a Barbaris vel tyrannis Romanæ Sedis libertate, cum in novo vel precario imperio, quod Pontifices dabant, nobilitate sua et gente majores sæpe spiritus caperent, non civilibus contenti, sacris etiam potentiam admoverent et religionem licentius, quam vel ipsis expediret, vel jus fasque permetterent, haberent. Hinc omnia prope Latii jura una cum Ecclesiis et populis sibi subdere, et qui fide vel armis apud reges valebant, non honore tantum, sed præmiis quoque læti, contra fas plurimum sibi licere volebant, sive episcopi essent, sive militiæ cingulo clari. Aliquid tamen hic Otwinio præsuli, et Thangwardoni ejus presbytero veniæ scriptor conciliasse videtur, cum post preces et jejunia de transferendo sancto Epiphanio per quietem divinitus admonitum sacerdotem, commemorat». Ita scite Browerus.

JOANNIS XII ANNUS 9. — CHRISTI 964.

1. *Romanorum insurrectione Otto discedit, Joannes papa in Urbem recipitur.* — Sequitur annus Redemptoris nongentesimus sexagesimus quartus, Indictione septima, quo Romani in Ottonem atque in Leonem ab eo jussu creati Pontificem arma convertunt, ubi viderunt ipsum imperatorem parte magna exercitus diminutum. Rem gestam auctor qui asseritur Luitprandus, euncta sigillatim recensens, sic narrat ³ : « His rebus gestis (quæ spectabant scilicet ad Leonis successionem) sperans sanctissimus imp. cum paucis Romæ posse degere, ne consumeretur populus Romanus ob multitudinem exercitus, multis, ut redirent, licentiam dedit. Cumque hoc Joannes, qui dejectus est papa, cognosceret, non ignorans quam facile Romanorum mentes pecunia posset corrumpere, clam Romam mittit nuntios, beati Petri omniumque Ecclesiarum pecuniam repromittens, si super pium imperatorem et dominum Leonem papam irruerent, eosque impiissime trucidarent. Quid multis morer? Romani quam mox exercitus paucitate confisi, imo decepti et pecuniæ promissione animati, buccina concrepante, super imperatorem, ut eum occidant, festinare contendunt.

2. « Quibus imperator super pontem Tiberis, quem Romani plaustris impeditum habebant, occurrit. Cujus fortes milites assuefacti bello, pectore et armis intrepidi, eos inter prosiliunt, et quasi accipitres avium multitudinem, nullo resistente, proterunt: non latibula, non corbes, non concaua ligna, non eryptæ sordium receptacula fugientibus tutelæ esse possunt. Occiduntur itaque, et (ut asolet contingere viris fugientibus) passim a tergo vulnerantur. Quis tunc Romanorum cladis hujus superstes fieret, si non imperator sanctus misericordia, quæ eis nulla debebatur, inclinatus, suos adhuc interficere sitientes retraheret et revocaret? Itaque devictis omnibus, atque iis qui supererant, obsidibus acceptis, venerabilis papa Leo pedibus imperatoris provolutus, orat, ut Romanis obsides reddat, seque eorum fidei commendet. Rogatu denique venerabilis papæ Leonis imperator sanctus Romanis obsides reddit, non incertus, quod prosecuturus sum incepturos ». Hæc auctor, cui tamen

repugnat ejusdem temporis scriptor apud Reginonem, ubi ait: « Non Romanos aggressos esse Ottonem, sed tantum de aggrediendo molitos insidias, quibus detectis, in eos Otto ipse sævierit ». Pergit vero idem apud Luitprandum auctor:

3. « Igitur Romanorum fidei eundem papam, quemadmodum lupis agnum commisit. Deinde Roma exiens, Camerinum Spoletumque versus, ubi Adelbertum esse audierat, properavit. Interea mulieres, quibuscum Joannes, qui dictus est papa, voluntatis suæ ludibrium exercebat, non ignobiles et plures concitaverunt Romanos, ut Leonem summum Pontificem et universalem papam a Deo et ipsis electum perderent, et Joannem in Urbem susciperent. Quod cum fecissent, Deo miserante, ex eorum manibus est venerabilis papa Leo liberatus, paucisque ipsum comitantibus, ad piissimi imperatoris misericordiam est profectus. Imperator denique sanctus tantum dedecus ægre ferens, tum ex domini papæ Leonis ejectione, tum ex Joanne cardinale diacono et Azone protoscriniario, quorum alterum manu dextera, alterum lingua, duobus digitis naribusque abscissis Joannes abdicatus defœdaverat, reparato exercitu Romam redire disposuit, etc. »

4. Antequam autem rem gestam ulterius prosequamur, sciendum, quod apud Reginonem non præsens annus tantum, sed dies quoque describuntur, quibus ejusmodi res gestæ sunt, nempe tertio nonas Januarii ingentem stragem de Romanis insidias imperatori parantibus ab imperatore Ottone patratam; sequenti vero die pridie nonas ejusdem, centum obsides a Romanis datos imperatori, et super corpus Petri ab iisdem Romanis fidelitatem eidem imperatori juratam, dies octo adhuc eundem Romæ mansisse, inde Spoletum profectum et Camerinum. Interea a Romanis revocatum Joannem papam in Urbem, ab eoque non solum quos diximus male habitos, sed Otgerum Spirensem episcopum comprehensum et flagellatum, dimissumque tandem, quo per eum posset ab imperatore consequi veniam. Prætermittant autem tum ipse, tum etiam auctor apud Luitprandum alias res gestas a Joanne papa, cum

est regressus in Urbem, quæ a Sigeberto ita in Chronico narratur :

5. *Synodus Romana, in qua Leo pseudopapa deponitur, fautores damnantur.* — « Joannes, Synodo collecta, Leonem deposuit et ejus gesta cassavit : statutum quoque est publico omnium judicio, Synodum a Leone habitam nec nominandam Synodum, sed prostibulum favens adulteris, (nimirum quod adulter Leo dicendus esset, qui alterius sponsam ipsam Romanam Ecclesiam invasisset). Quicumque eo ordinante, erant damnati, jussi sunt suam ipsorum proscriptionem præsentare in charta hæc continente verba : Pater meus nihil sibi habuit, nihil mihi dedit ; et sic depositi remanserunt in illis gradibus, quos habuerant non a Leone ordinati. Si qui autem digni judicantur, ut non accepta prius consecratione, ordinentur, indicto illis eodem decreto, quod et damnatis a Constantino Neophyto ». Hucusque Sigebertus, qui ipsius Acta Synodi legisse visus est, cum illa ita summatim collecta exacte recensuit. At præslat hic ipsa Acta integra recitare, quæ nobis adhuc servantur legitima atque sincera. Siquidem vetera nobis exhibent monumenta illud ipsum Concilium, quod celebratum est hoc anno ab ipso Joanne papa, quod etiam ¹ novatores non negant, sed ipsum integrum inter alias hoc centenario celebratas Synodos describere ; sic enim se habet :

6. « Anno ² Domini nongentesimo sexagesimo quarto, domini Ottonis imperatoris tertio, Indictione septima, habitum est Concilium in Ecclesia beati Petri Apostolorum principis, quinto kalend. Martii, hoc est mense Februarii die vicesima sexta, Indict. vii. Positis in medio sacrosanctis Christi quatuor Evangeliiis, præsidente piissimo et coangelico domno Joanne summo Pontifice, S. R. E. duodecimo papa, in venerabili Basilica ejusdem, præsidentibus etiam cum eo reverentissimis episcopis, videlicet Joanne Gallesianæ Ecclesiæ episcopo ; item Joanne Ecclesiæ Anagninæ episcopo ; Joanne item Narniensis Ecclesiæ episcopo, Joanne Numentanæ Ecclesiæ episcopo. Item Joanne Ecclesiæ Verulensis episcopo, Widone S. Silvæ-Candidæ Ecclesiæ episcopo, Gregorio S. Albanensis Ecclesiæ episcopo, Lunisso sanctæ Ecclesiæ Lavicanensis episcopo, Romano sanctæ Ecclesiæ Ferentinatis episcopo, Sabbatino sanctæ Ecclesiæ Ferrariensis episcopo, Zachæo sanctæ Ecclesiæ Gentianæ episcopo, Joanne Marluranensis (Mantuanensis) Ecclesiæ episcopo. Item Joanne S. Sabinensis Ecclesiæ episcopo. Item Joanne sanctæ Nepesinæ Ecclesiæ episcopo, Benedicto S. Trevisensis, Joanne sanctæ Salernitanæ Ecclesiæ episcopo, seu venerabilibus presbyteris, Stephano archipresbytero tituli SS. Nerei et Achillei, Leone presbytero tit. S. Balbinæ, Domino presbytero tituli S. Anastasiæ, Petro presbytero tituli S. Laurentii, Hadriano presbytero tituli S. Mariæ, Theophylacto presbytero tituli

S. Chrysogoni. Item Theophylacto presbytero tituli SS. Quatuor Coronatorum, Joanne presbytero tituli SS. Silvestri et Martini, Stephano presbytero tituli S. Sabinæ, Benedicto presbytero tituli S. Sixti, Joanne presbytero tituli S. Cæciliæ, Hadriano presbytero tituli sancti Laurentii in Lucina. Adstantibus diaconis, videlicet Benedicto archidiacono, item Benedicto diacono, Bonfilio diacono, seu reliquis adstantibus.

7. « ACTIO PRIMA. Joannes piissimus ac sanctissimus sanctæ Romanæ Ecclesiæ papa dixit : Scitis, dilectissimi fratres, me fuisse expulsum imperiali vi a propria Sede per duos menses. Quapropter vos plurimum rogo, si dici potest regulariter Synodus illa, quæ habita est, me absente, in Ecclesia mea, quarto videlicet Decembris, ab Otone imp. suisque archiepiscopis atque episcopis, an non ? Sanctum Concilium respondit : Prostibulum favens adultero, invasori scilicet alienæ sponsæ (nempe Leoni intruso). Piissimus ac sanctissimus papa dixit : Ergo damnanda est a nobis ? Sanctum Concilium respondit : Auctoritate sanctorum Patrum damnanda. Tunc piissimus ac sanctissimus papa damnavit eam in perpetuum, cum eorundem episcoporum consona responsione.

8. « Post hæc autem interrogavit idem papa sanctum Concilium, dicens : Dicite, dilectissimi fratres, si episcopi a nobis ordinati, in nostro patriarchio ordinationem facere potuerunt, an non ? Sanctum Concilium respondit : Minime. Piissimus ac sanctissimus papa dixit : Quid censetis de Sicone episcopo a nobis dudum consecrato, qui in nostro patriarchio Leonem curialem et neophytum atque perjurum nostrum, jam ostiarium, lectorem, acolythum, subdiaconum, diaconum, atque subito presbyterum ordinavit : eumque sine aliqua probatione, contra cuncta sanctorum Patrum statuta in nostra Apostolica Sede consecrare non formidavit ? Sanctum Concilium respondit : Deponatur ipse, qui ordinavit, et qui ab eo est ordinatus. Piissimus atque sanctissimus papa dixit : Nescitur ubi latet. Sanctum Concilium respondit : Requiritur diligenter, si placet, usque ad tertium conventum. Quod si minime repertus fuerit, canonica feriatur sententia. Piissimus ac sanctissimus papa dixit : Placet.

9. « Tunc serenissimus papa consuluit Concilium, dicens : Quid igitur, reverentissimi fratres, sancitis de istis duobus episcopis a nobis ordinatis, Benedicto scilicet Portuensi, et Gregorio Albanensi, qui super præfatum curialem et neophytum atque perjurum nostrum orationes dederunt ? Sanctum Concilium respondit : « Simili pœna mulcentur, sed vestræ interim relinquuntur potestati usque ad tertium conventum. Piissimus ac sanctissimus papa dixit : Quid ergo de illo curiali et neophyto, perjuro atque invasore nostræ Sedis censetis ? Sanctum Concilium respondit : Omnino damnetur, ut nullus deinceps curialium, aut neophyto-

¹ Cent. x. col. 444. — ² Ex scripto cod. Vat.

rum, aut iudicium, aut publice pœnitentium ad summum Ecclesiæ gradum adspirare præsumat. Tunc piissimus ac sanctissimus papa dixit : Sit Leo curialis ac neophytus ac perjurus noster Domini omnipotentis ac BB. Apostolorum principum Petri et Pauli, et omnium simul sanctorum, atque venerandorum et universalium Conciliorum auctoritate, necnon et Spiritus sancti per nos iudicio, omni sacerdotali honore et nomine alienus, et omni clericatus officio prorsus exutus : ita ut si post hanc Constitutionem divina inspiratione depromptam, et unanimitate atque concordia sancti Concilii promulgatam, tentaverit in Apostolico throno residere, aut si ulterius ausus fuerit aliquid de sacro ministerio more sacerdotis contingere, juxta præcedentem consuetudinem, nullo modo liceat ei communionis spem aut locum habere satisfactionis ; sed anathematis vinculis innotatus maneat una cum sociis suis atque fautoribus perpetuo, Dei per nostram mediocritatem iudicio ac sententia, et sacrum corpus et sanguinem Domini nostri Jesu Christi, nonnisi vicino mortis periculo, omnino percipiat. Quicumque autem prædicto curiali et neophyto, atque invasori S. Catholicæ et Apostolicæ Ecclesiæ consilium aut adiutorium dederit ad percipiendum Ecclesiasticum honorem, quo regulariter expoliatus est, anathema sit. Piissimus atque sanctissimus papa dixit : Quid sentitis de iis, qui ab eo ordinati sunt ? S. Concilium respondit : Priventur honore, quem ab ipso acceperunt. Tunc idem benignissimus papa præcepit ingredi eos in Concilium cum vestimentis, planetis atque stolis, et unumquemque eorum in chartula scribere fecit hujusmodi verba : Pater meus nihil sibi habuit, nihil mihi dedit. Et sic eos exutos privavit honore, quem dederat eis ipse invasor et neophytus atque curialis, et revocavit eos in pristinum gradum.

10. « ACTIO SECUNDA. Joannes piissimus atque benignissimus papa dixit : Recordari credimus vestram dilectionem, qualiter de Sicone refuga episcopo hesterno die definitum est in præsentia vestra, ut diligenter inquireretur. Sed plurimum quæsitus inveniri non potuit. Nunc vero decernite quid agendum sit de eo. Sanctum Concilium respondit : Suspendatur ejus damnatio, si placet, usque in tertium Concilium. Piissimus ac mitissimus papa dixit : Fiat secundum vestram sanctionem.

11. « Tunc convocavit episcopos Benedictum Portuensem et Gregorium Albanensem, qui super ipsum neophytum orationes dederant. Et fecit tenere eos chartulas in manibus, continentes hæc verba : Ego Benedictus episcopus S. Portuensis Ecclesiæ, vivente patre meo, consecravi in loco ejus Leonem curialem et neophytum atque perjurum illius contra statuta SS. Patrum. Ego Gregorius episcopus sanctæ Albanensis Ecclesiæ, vivente patre meo, consecravi in loco ejus Leonem curialem et neophytum atque perjurum illius contra statuta SS. Patrum. Post hæc autem piissimus atque san-

ctissimus papa consuluit Concilium, dicens : Quid agendum sit de his, dicite. Sanctum Concilium respondit, dicens : Suspendantur et isti, si placet, usque ad tertium Concilium.

12. « Tunc idem piissimus ac sanctissimus papa consuluit iterum Concilium, dicens : Quid censetis, dilectissimi fratres, de his qui præfato neophyto pretium accommodaverunt ad tuendam (obtinendam) gratiam Dei, quæ vendi non potest ? S. Concilium respondit : Si episcopus fuerit, aut presbyter, aut diaconus, proprii gradus periculo subiaceat. Si vero monachus aut laicus, anathematizetur. Benignissimus atque sanctissimus papa dixit : Recte judicastis. Idem sanctissimus papa dixit : Dicite, quæso, quid agendum sit de abbatibus nostris, qui supradictæ damnatæ Synodo interfuerunt. S. Concilium respondit : Illi autem vestro relinquuntur iudicio, in cujus potestate consistunt. Piissimus atque sanctissimus papa dixit : Potest aliquis vendere suum Ecclesiasticum gradum cuiquam, an non ? Sanctum Concilium respondit : Minime, quoniam neque vendi neque emi ab aliquo potest. Benignissimus atque sanctissimus papa dixit : Hoc etiam statuere, ut nunquam minor majori suo gradum tollere præsumat : si autem fecerit, communione privetur usque ad emendationem. Simili modo statuere, ut monachi in locis, quibus sæculo renuntiaverunt, habitent ; sin alias fecerint, revocentur ad loca quæ dimiserint, aut communione priventur, donec resipuerint. Sanctum Concilium dixit : Statutum atque confirmatum hoc nobis maneat.

13. « ACTIO TERTIA. Joannes piissimus atque sanctissimus papa dixit : Reverentissimi fratres, Domino protegente, jam ad tertium venimus Concilium : modo finite de Sicone episcopo ordinatore ipsius neophyti, quid agendum sit ; nam a nostris diu quæsitus, sed minime inventus est. S. Concilium respondit : Canonico mucrone feriat. Tunc benignissimus atque sanctissimus papa dixit : Siconem, qui S. Ostiensi Ecclesiæ irregulariter atque Deo contempto præfuit, et Leonem curialem et laicum, necnon et perjurum nostrum subito consecrare in Pontificali honore non formidavit, sancimus, et juxta canonicam deliberationem Apostolica auctoritate definimus atque statuimus, omni sacerdotali carcere atque privato fore ministerio ; ita ut nullo modo liceat ei in qualibet Synodo restitutionis spem aut locum habere satisfactionis. Quod si de reliquo præsumpserit in sacro officio more sacerdotis, quovis tempore ministrare, anathema sit. Et omnes communicantes ei ab Ecclesia abjiciantur, sed et ipsi anathema sunt. Eos vero, quos ipse Leo neophytus et invasor sanctæ Catholicæ et Apostolicæ Romanæ Ecclesiæ in quolibet Ecclesiastico ordine provexit, Apostolica atque canonica auctoritate et synodali decreto in pristinum revocamus gradum, quia ordinator eorum nihil sibi habuit, nihil illis dedit. Sicuti olim noster prædecessor piæ memoriæ papa Stephanus sententiam tulit de iis,

qui ordinati fuerant a Constantino quodam neophyto et invasore sanctæ Sedis Apostolicæ, et postmodum quosdam eorum sibi placabiles presbyteros aut diaconos consecravît, statuens, ut hi qui ab eo consecrati erant, nunquam ad superiorem honorem ascenderent, nec ad Pontificatus culmen promoverentur, ne talis impiæ novitatis error in Ecclesia pullularet.

14. « Piissimus atque sanctissimus papa dixit : Et hoc nefarium est : statuite, si placet, dilectissimi fratres, ut in circuitu altaris, aut in presbyterio nullus laicorum stare præsumat, quoties missarum solemnias celebrantur : quod si fecerit quis, communionem privalus maneat usque ad emendationem. Sanctum Concilium respondit : Hoc quoque omnibus placet. Secuta subscriptio. Joannes S. Catholicæ et Apostolicæ Romanæ Ecclesiæ episcopus huic decreto a nobis, ut supra legitur, promulgato subscripsit, et sic cæleri præfati episcopi fecerunt, et finis impositus est præsentî Concilio ». Ilucusque in scripto Codice de Synodo Romana sub Joanne Pontifice hoc anno habita, eademque legitima. Ita quidem in enervato lasciviis homine nervos Ecclesiasticæ disciplinæ Deus, cui ipsa Petri cathedra curæ est, servans, eos in schismaticos tetendit, et secundum illud Davidicum ¹ : « Percussit inimicos suos in posteriora, opprobrium sempiternum dedit illos » ; quos voluit, ab Apostolica Sede emissis sua potentia fulmine (cujuscunque manu non interest) jacere prostratos.

15. Facessat igitur eorum qui post tempora ista vixerunt inscitia, qui schismaticum antipapam inter legitimos S. Romanæ Ecclesiæ Pontifices numerarunt ; damnatur vero illorum, qui ista tunc perpetrarunt occasionemque posteris ita errandi dedere, temeritas, et in sacerdotibus non toleranda vel excusanda sacrorum canonum ignorantia, et antiquarum traditionum Ecclesiæ imperitia. Imperatoris vero factum excusetur Apostoli verbis, dicentis ² : « Testimonium illis perhibeo, quod zelum habent, sed non secundum scientiam », leviter nimis existimantis, una cum moribus depravatis minui atque penitus tolli Romani Pontificis auctoritatem, quod erroneum, imo vero et hæreticum dictum nullus unquam Catholicorum reperitur hactenus protulisse, sed e contra æque omnes pariter Ecclesiasticos tractatores, præcipue vero sanctum Augustinum pluribus in locis pugnantes contra Donatistas ea caligine obvolutos, esse tantam hæresim detestatos, utpote quæ omnem simul perdat Ecclesiasticam œconomiam, quo errore cum Donatistis involvi unumquemque necesse est, qui sciens volensque abrogatum velit per conciliabulum Ottonis auctoritate collectum Pontificatu Joannem, et subrogatum ab eo illi Leonem legitimum dici debere Pontificem.

16. *Joanni papæ misere mortuo subrogatur Benedictus, qui in Pseudo-Synodo per Leonem anti-*

papam exauctoratur. — Sed jam videamus quæ de infausto ejusdem Joannis exitu posteris tradiderit auctor, qui asseritur Luitprandus (quisquis ille fuerit, adversarium fuisse liquet atque schismaticorum complicem.) Quæ an vera sint, non deducimus in controversiam ; sed esto ita se habere, uti narrantur ab adversario homine : nullum tamen ob ea pati dispendium fidem Catholicam, nec periclitari in Petri cathedra Apostolicam auctoritatem cum sanctis Patribus omnibus cunctaque Ecclesia Catholica certo certius affirmamus, atque ingenue profiteamur. Habet hæc ipse ¹ :

17. « Priusquam autem sancti imperatoris copiæ essent congregatæ, volens cunctis sæculis innotescere Dominus, quam juste esset Joannes papa a suis episcopis et omni plebe repudiatus quamque postmodum injuste receptus ; quadam nocte extra Romam dum se cujusdam viri uxore oblectaret, in temporibus adeo a diabolo est percussus, ut intra dierum octo spatium eodem sit vulnere mortuus ». At non quia juste damnatus, et injuste receptus, sed quia tot tantisque vexationibus a Deo admonitus, nec a peccatis consuetis abstinuit, juste meruit a Deo tandem puniri. Contigisse autem Joannis obitum pridie idus Maii, apud Reginonem asseritur, ubi et de successoris ejus ordinatione hæc habet : « Tunc Romani non modice metuentes imperatoris adventum, Benedictum quemdam Romanæ Ecclesiæ diaconum, fidei et electionis domini imperatoris immemores, eligunt, et ordinatum Sedi Apostolicæ imponunt.

18. « Quo audito, imperator, collecta undique secum fidelium suorum multitudine, Romam adiit, et firma eam omni parte obsidione, ne quis pateret exitus, munivit. Sed prædictus Benedictus falso nomine Apostolicus, diutius ut imperatori resisterent, Romanos animavit ; ipseque imperatori suisque fidelibus excommunicationem comminans, muros Urbis ascendit, et elatiori se fastu quam Apostolicum decuerat, ostendit. Ad ultimum Romani fame et obsidione constricti, se errasse contraque imperatorem injuste deliquisse poenitentes, in Vigilia Præcursoris, id est, nono kalendas Julii, portas Urbis aperiunt, et imperatore cum honorificentia debita intromisso, Benedictum sacrilegum et perjurum imperatoriæ ditioni reddunt, et dominum Leonem in Sedem Apostolicam restituant ». De coacta vero tunc statim Romæ Pseudo-Synodo a Leone intruso Pontifice, hæc Luitprandus ² :

19. « Residentibus itaque domino Leone summo et universali papa in Ecclesia Lateranensi, necnon et imperatore sanctissimo Ottone, et episcopis Romanis, Italicis, a Lotharingia et Saxonia archiepiscopis, presbyteris, diaconis, omnique Romanorum plebe, quorum nomina superius adscribuntur, advenit Benedictus Apostolicæ Sedis invasor, eorum qui se elegerant manibus adductus, Pontificalibus vestibus indutus. Quem Benedictus cardi-

¹ Psal. LXXVII. — ² Rom. X.

¹ Luitpr. l. VI. c. 11. — ² Ibid.

nalis archidiaconus tali est sermone aggressus: Qua tibi auctoritate, quave lege, o invasor, hæc Pontificalia indumenta usurpasti, superstite hoc præsentem domino nostro venerabili papa Leone, quem tu nobiscum, accusato et reprobato Joanne, ad Apostolatus culmen elegisti? Num inficiari potes, præsentem domino imperatori juramento promississe, nunquam te cum cæteris Romanis papam electurum aut ordinaturum absque illius filiique sui regis Ottonis consensu?

20. « Benedictus respondit: Si quid peccavi, miseremini mei. Tunc imperator, effusus lacrymis, quam misericors esset, ostendens, rogavit Synodum, ne Benedicto præjudicium fieret: si vellet et posset, ad interrogata responderet; quod si non posset aut nollet ac se culpabilem redderet: tamen pro timore Dei misericordiam aliquam inveniret. Quo audito, ad domini Leonis papæ pedes, ipsiusque imperatoris idem Benedictus concite procidens, se peccasse seque S. Romanæ Sedis invasorem esse acclamavit. Post hæc pallium sibi abstulit, quod simul cum Pontificali ferula, quam manu gestabat, domino papæ Leoni reddidit, quam ferulam idem papa fregit, et fractam populo ostendit. Deinde Benedictum in terra sedere præcepit. Cui casulam, quam planetam vocant, cum stola pariter abstulit. Post autem omnibus episcopis dixit: Benedictum sanctæ et Apostolicæ Sedis Romanæ invasorem omni pontificatus et presbyteratus honore privamus: ob eleemosynam vero domini imperatoris Ottonis, cujus sumus opera in Sedem debitam restituti, diaconatus eum ordinem habere permittimus, et non jam Romæ, sed in exilium destinamus ». Hucusque auctor male inscriptus Luitprandus finem suæ imponens historiæ, nisi mutilata remanserit. Porro sicut in Joannem, ita et multo magis in Benedictum se ostendit iniquum, favens plus satis Ottoni, quem et Germaniæ scriptores integerrimi hoc nomine (ut dicetur inferius) reprehendunt. Erravit valde ipse auctor assertus Luitprandus, et aliis errandi amplam satis aperuit viam, vivificans (ut ait ¹ Propheta) qui non vivunt, et interficiens qui non moriuntur: dum quos judicare non potuit Synodus, condemnatos abiecit, et quem alio vivente ipse eligere nec potuit nec debuit, uti legitimum colendum exhibuit papam Leonem VIII. Quomodo vero scelus statim vindicaverit Deus, apud Reginonem ista subjiciuntur:

21. *Pestis in exercitu imperatoris.* — « Celebrata vero B. Joannis nativitate et SS. Apostolorum festivitate, imperator ab Urbe Romana revertitur, et infeliciori quam speraverat omine in redeundo fruitur. Nam tanta exercitum ejus pestis et mortalitas invasit, ut vix sanus quis a mane usque ad vesperam, et a vespera usque ad mane se victurum speraret. Ex qua pestilentia obierunt Henricus archiepiscopus Trevirensis, et Gericus abbas Wirtzburgensis, et Godefridus dux Lothariensis, alio-

rumque innumera multitudo tam nobilium quam ignobilium: tandem miseratione divina pestilentia cessante, imperator in Liguriam pervenit, etc. » Sane quidem eam cladem passum imp. ob injurias illatas Benedicto papæ, testatur Ditmarus hujus temporis scriptor nobilissimus, de quo inferius suo loco dicendum pluribus.

Fertur autem apud Gratianum ¹ inconsiderate nimis ista tractantem, Synodi hujus sub Leone pseudo-pontifice celebratæ ejusmodi canon de concessionem ab ipso facta Ottoni imp. de ordinatione Apostolicæ Sedis, et Ecclesiarum investituris his verbis:

22. *Leonis nomine constitutiones editæ falsitatis et imposturæ arguuntur.* — « In Synodo congregata Romæ in Ecclesia S. Salvatoris. Ad exemplum B. Hadriani Apostolicæ Sedis antistitis, qui domino Carolo victoriosissimo regi Francorum et Longobardorum patriciatus dignitatem, et ordinationem Apostolicæ Sedis, et investituram episcoporum concessit: ego quoque Leo episcopus, servus servorum Dei cum toto clero et Romano populo constituimus et confirmamus et roboramus, et per nostram Apostolicam auctoritatem concedimus atque largimur domno Ottoni primo, regi Teutonicorum, ejusque successoribus hujus regni Italiæ in perpetuum facultatem eligendi successorem, atque summæ Sedis Apostolicæ Pontificem ordinandi, ac per hoc archiepiscopos seu episcopos, ut ipsi ab eo investituram accipiant, et consecrationem unde debent, exceptis his quos imp. pontificibus et archiepiscopis concessit, ut nemo princeps cujusque dignitatis vel religiositatis eligendi vel patricium, vel Pontificem summæ Sedis Apostolicæ, aut quemcumque episcopum ordinandi habeat facultatem absque consensu ipsius imperatoris, quod tamen fiat absque omni pecunia, et ut sit patricius et rex. Quod si a clero et populo quis eligatur episcopus, nisi a supra dicto rege laudetur et investiat, non consecratur. Si quis contra hanc regulam et Apostolicam auctoritatem aliquid molietur, hunc excommunicationi subjacere decernimus, et nisi resipuerit, irrevocabili exilio puniri, vel ultimis suppliciis affici ». Hæc ibi. Quam quidem Constitutionem etsi vere fieri contigit, nullius esse roboris constat, quod a non legitimo papa sit promulgata. Cæterum hanc ipsam adscititiam esse et imposturam, multis argumentis probatum est superiori tomo, ubi egimus de falsa concessionem composita a Sigeberto Hadriani papæ nomine facta Carolo Magno, de qua hic mentio habetur, ostendimusque quod sicut falsa est illa, quæ hic citatur, ita et falsa ista quæ illum citat.

23. Provoco te, lector, ad ea quæ ibi sunt dicta ¹ anno Redemptoris septingentesimo septuagesimo quarto, ubi tamen sic corrige illapsum errorem, cum dicitur: « Ut quid hujusmodi », dicas:

¹ Ezech. XIII.

¹ Dist. LXIII. c. 23. — ² Annal. tom. XIII. an. 774. Edit. Barr. pag. 95. num. 15.

« In quo quid hujusmodi », quæ si non sufficiant, addimus alia adhuc esse, quibus eadem Constitutio arguatur manifestæ falsitatis. Atque primum, si (ut superius dictum est) Otto a Joanne papa (quod omnes testantur) consecratus est imp. quid opus fuit, ut hic a Leone eidem concedatur, ut sit patricius atque rex? Annon cum imperio et dignitas patriciatus concessa fuit, et magis est dici rex quam imperator? Præterea quod illic in fine legitur, ut ultimo afficiatur supplicio, si quis ejus Constitutionis inveniatur esse transgressor: quam illud abhorret a Romanorum Pontificum Constitutionibus, ut violatoribus pœna mortis etiam irrogetur? Ut ex his plane impostura noscatur, sed ab insipiente fictore inepte composita. Sed cujus roboris (etiam si vera esset Leonis ipsius hæc Constitutio) esse potuit, quæ ab eo edita est, qui nec est dignus, qui Pontifex nominetur, sed (ut pluribus superius dictum est) intrusus et occupator sit potius nominandus?

24. Sed adhuc insuper ex falsitate manifesta alterius ejusdem Leonis nomine editæ Constitutionis, evidentius hoc commentum intelliges: sic enim fraus fraudem aperit, et mendacium mendacio declaratur. Hic igitur ad finem ponendam duximus Constitutionem quandam, nomine Leonis VIII confictam, qua profitetur ipse Pontifex restituere Ottoni imp. quæcumque ipsum Romanum Occidentale imperium possedisset atque donasset Ecclesiæ Romanæ. Inventum haud dubium eorundem, qui tempore schismaticorum imp. favebant eisdem schismaticis imperatoribus. Sed Deo gratias, quod impostor insulsus, ineptus, stolidus talis extiterit, qui adeo affectata mendacia vestire nescivit, sed opprobrio sempiterno nudata deridenda reliquit. Reddimus eam, uti se habet apud Crantzium ¹ recitata:

25. « Leo episcopus, servus servorum Dei, Ottoni spirituali in Christo filio nostro imperatore Augusto, et omnibus successoribus ejus imperatoribus ac Italiæ regibus.

« Quæ dominus Carolus rex Francorum et Longobardorum et patricius Romanus, necnon Pippinus pater ejus de regalibus rebus hujus regni Italiæ tribuerunt in S. Romana Ecclesia B. Petro Apostolo, sive per instrumenta fuerunt per Ethe-rium notarium, sive per sacramenta vel donationes, sive per alios modos obvenerunt a Justiniano imperatore et Ariperto rege: hæc omnia largimur et definimus vobis Ottoni imp. et Adelaidæ conjugis tuæ, regniq. consorti, vestrisque consortibus hujus regni Italiæ successoribus in perpetuum, præsentibus sacrosanctis Evangeliiis et patrociniis pluribus sanctorum, videlicet de Cruce Domini, et de caligis pedum suorum, de vestimento inconsutili, et super corpus B. Petri. Et infra: Ut hæc omnia habeatis et possideatis in perpetuum ad usus curiæ militiarum vestrarum ad bellandum et ex-

pugnandum paganos, et contra rebelles Romano imperio. Ideoque per hujus nostri auctoritatem instrumenti confirmamus et corroboramus in omnibus progeniebus vestris a generatione in generationem in perpetuum. Nam si quisquam hanc nostram auctoritatem destruxerit, et hujus violator repertus fuerit, sive contra hoc agens, sciat se in iram B. Petri principis Apostolorum, et nostram, nostrorumque prædecessorum casurum. Insuper nisi a malo resipuerit, subiaceat legi Juliæ reus regiæ majestatis et reip. ut hi, qui contra remp. vel contra imperatoris majestatem aliquid moliti fuerint, animæ amissionem sustineant, et bona eorum publicentur. In his actis interfuere archiepiscopi et episcopi de vicinis comitatibus.

« Archiepiscopus Calaritanus.

« Episcopus Citonatus.

« Eustachius Albanensis episcopus.

« Gratosus Prænестinus episcopus.

« Martinus Narniensis.

« Benedictus Tiburtinus.

« Beardus Castrensis.

« Joannes Perusinus.

« Georgius Ottonensis.

« Georgius Tudertinus.

« Valentinus Merenensis.

« Andreas Nomentanensis.

« Theodosius Milecensis.

« Sanianus Feranensis.

« Albertus Lucerinus.

« Damianus Alanus, episcopi ».

SUBJICIUNTUR HIS CARDINALES PRESBYTERI.

« Georgius ad Vincula.

« Benedictus S. Mariæ Ad præsepe.

« Leo sanctæ Jerusalem.

« Januarius S. Cæcilie.

« Andreas patriarchatus Lateranensis.

« Julianus item Lateranensis presbyter.

« Faustinus S. Petri, cardinales omnes presbyteri.

SEQUITUR SUBSCRIPTIO ROMANORUM CIVIUM.

« Faustinus caput senatus exconsul.

« Probinus exconsul de palatio Luciano.

« Romanus de Forma Trajana.

« Paulus de templo Palatino.

« Joannes de via Claudia.

« Leo de via Salaria.

« Remigius de via Aurelia.

« Stephanus de via Mamertina.

« Romulus de via Ardeatina.

« Gardus de via Flaminia.

« Marcus de via Portuensi.

« Gorbis de via Latina.

« Savinus de via Appia.

« Mecianus de via Tiburtina.

« Gardus de macello Lydiæ ».

¹ Crantz. Metr. Sax. l. IV. c. 10.

HIS ITA ACTIS ETIAM INTERFUERE DE OMNIBUS HIS
REGIONIBUS.

- « Regio Vicopatrii.
- « Regio Via Lata.
- « Regio Caput Tauri.
- « Regio Cælimontis.
- « Regio Rivi argentarii.
- « Regio prima Aventini.
- « Regio Ad duos montes.
- « Regio urbis Ravennæ.
- « Regio octava, sub Capitolio.
- « Regio ad Gallinas albas.
- « Regio Lybantica.
- « Regio Horea.
- « Regio Sictim.
- « Regio secunda Mamertini.
- « Regio secus portam Metroni.
- « Januarius ex Neta Græcorum.
- « Trajanus de Ponte Molbis.
- « Joannes consul de palatio Sesaritano.
- « Amacius consul de palatio Vaticano.
- « Jobianus de Monte aureo.
- « Petrocius de Cirto.
- « Gregorius de Cella nova.

« Scripta per manum Gregorii archinotarii nostri. Datum in patriarchio Lateranensi tertio kalendas Maii, anno Sedis nostræ secundo, et dicti Ottonis secundo feliciter ».

26. Hæc autem ejusmodi esse reperiuntur, ut vere dici possit, plures errores continere quam verba, præter styli diversitatem, quo temporibus his Romana Ecclesia uti consuevit, de quo parum aut nihil est ut negotium faciamus, cum ad falsitatem patentem arguendam, alia quamplura attendenda sint majoris momenti.

Ac primum de his quæ ad rationem temporis spectant, data habetur III kal. Maii in Lateranensi palatio. At ex auctore temporis hujus constat, imperatorem Ottonem una cum Leone papa non esse Urbem ingressum hoc anno ante nonum kal. Julii, in ipsa vigilia Nativitatis Joannis Baptistæ : ita disertis verbis apud Reginonem notatum invenies. Qui annus non secundus Ottonis, ut commentitia Constitutione dicitur, fuit, sed tertius.

27. In subscriptione autem episcoporum quanta falsitas ! nam omnino omnes diversi sunt nomine ab illis, qui anno superiori itidem Romano Concilio interfuerunt in exauratione Joannis papæ earundem Ecclesiarum episcopi, quæ recensentur ab auctore qui interfuit, adeo ut ne unus quidem in his inveniatur, qui concordet cum illis. Etenim anno superiori in Concilio Romano subscriptus reperitur Gregorius Albanensis, hic vero Eustachius Albanensis; illic Theophylactus Prænестinus, hic Gratosus Prænестinus; illic Joannes Tiburtinus, hic vero Benedictus Tiburtinus; illic Joannes Narniensis, hic vero Martinus Narniensis, et sic de aliis, adeo ut opus esset dicere omnes episcopos, qui interfuerunt anno superiori Concilio Romano, esse

defunctos, et alios aliis nominibus in locum ipsorum subrogatos hujus anni Concilio interfuisse. Sed nec hoc fingi potest, siquidem Joannes Narniensis episcopus, qui interfuit Concilio anni superioris, non potuit diem obiisse, et suffectum Martinum, qui huic anni hujus Concilio interfuit: nam supervixit Joannes ipse Narniensis episcopus, qui postea ex episcopo Narniensi creatus est Rom. Pont. et dictus Joannes XIII. Annon ex his manifesta colligitur impostura?

28. His insuper adde, quod eandem diversitatem invenies in nominibus cardinalium, insuper et in nominibus Romanorum civium optimatum, ut ne unus quidem sit invenire, qui cum illis concordet, cum tamen iidem esse debuissent, qui in utraque Synodo sederunt ejusdem Leonis fautores. Adde rursum: Quid est quod dicitur restitui ab ipso Leone papa inter alia, quæ Justinianus Romanæ donavit Ecclesiæ? At quis reperire potuit, Justinianum unam tantum terræ glebam Ecclesiæ Romanæ donasse, semper in ipsam Ecclesiam parum æquum? ejusque Pontificum Silverii et Vigili persequitorem? Præterea quomodo inter titulares cardinales nominati reperiuntur presbyter tituli Lateranensis, et tituli S. Petri, necnon et presbyter tituli S. Mariæ Ad præseppe? quando unquam ejusmodi primariæ patriarchales Ecclesiæ reperiri poterunt, vel antea, vel post in titulos annumeratæ? prætermittimus alias verrere quisquillas, cum totum quod est, quisquillas et sordes esse, satis perspicue intelliget lector; imposturamque sed ineptissimi compositoris, schismaticorum tamen defensoris esse cognoscet.

29. Sed quod in his sumus, ut face veritatis admota, quæ sunt falsa, manifesti arguantur erroris: apud Gratianum distinctione sexagesima tertia inferius recitatur hujus Ottonis constitutio, hoc apposito titulo: « Constitutio primi Henrici, et primi Ottonis cum Romanis Pontificibus ». Ex qua ibidem recitatur fragmentum hic a nobis subjiciendum. Sed antea admonendus est lector, quod ex verbis tituli hujus vane collegit Nauclerus, Henricum æque dictum fuisse primum ejus nominis imperatorem, cui repugnant Diplomata Henricorum imperatorum, quod in eis non secundus aut tertius ab hoc, sed primus et secundus reperiuntur esse nominati ab iisdem ipsis in suis eorum scriptis. Adde quod ex eo etiam evanescit penitus inanis ejus argumentatio: nam titulus iste ibi errore positus esse convincitur. Siquidem omnia illa sub dicto titulo recitata, accepta noscuntur ex Constitutione ipsius Ottonis imp. superius scripta, facta ab ipso de restitutione provinciarum ac civitatum, aliorumque jurium adeptorum, adeo ut nihil penitus sit, quod pertineat ad Henricum regem Ottonis patrem. Sunt autem hæc:

30. « Ut nullus missorum nostrorum cujuscunque impeditio argumentum in electione Romani Pontificis componere audeat, omnino prohibemus ». Item: « In electione Romanorum Pontificum,

neque liber neque servus ad hoc venire præsumat, ut illis Romanis, quos ad hanc electionem per Constitutionem SS. Patrum antiqua admisit consuetudo, faciat aliquod impedimentum. Quod si quis contra hanc nostram Constitutionem facere præsumpserit: exilio tradatur». Hæc ibi accepta (ut dictum est) totidem verbis a dicta ipsius Ottonis Constitutione. Sed de his hactenus. Inter hæc autem idem Otto imp. (quod ad res bellicas pertinet) victo Berengario expugnatoque Castello S. Leonis, ipsum una cum Willa ejus conjuge exulatum in Bajoariam mittit, ibique usque ad obitum permanserunt: Adelbertus interim fuga lapsus, manus evasit imperatoris.

31. *Privilegia concessa ab Ottone monasterio Cassinati.* — Hoc item anno ab eodem Ottone concessa sunt privilegia monasterio Cassinati, de quibus Leo Ostiensis his verbis agit¹: « Per idem tempus primus ac magnus Otto, tertio imperii sui anno, interventu conjugis suæ Adelaidis imperatricis, generale præceptum huic monasterio fecit, confirmans omnia, quæ hactenus per diversa loca huic fuerant attributa. Item post quatuor circiter annos Paulus abbas S. Vincentii eum adiens, atque ex parte dicti nostri abbatis efflagitans, aliud ab eo præceptum plenius de confirmatione totius monasterii ad priorum imp. instar obtinuit. Nec multo post per aliud præceptum idem imp. abbati nostro monasterium S. Angeli de Barregio cum omnibus cellis suis pertinentiisque concessit, quod videlicet monasterium, eo tempore Albericus Marsorum episcopus quoad viveret, per scriptum ab eodem imp. impetraverat. Eidemque monasterio S. Angeli imperator de confirmatione omnium ipsius rerum privilegium jam ante quinquennium fecerat». Hæc Leo.

32. *Nicephori imperatoris victoriæ in Sarracenos, ejusdemque vitia quibus populo infensus evasit.* — Quod spectat ad res Orientalis imperii, hoc anno secundo suæ dominationis Nicephorus imp. e manibus Sarracenorum vindicat insulam Cyprum, eodemque obsidet Tarsi ac Mopsuestiæ, quas civitates expugnat, cruces a Christianis ablatas recuperat, atque anno sequenti Constantinopolim rediens secum tulit templo offerens, de hostium manubiis decimam Deo persolvens. Hæc omnia pluribus hoc anno et sequenti Curopalates; qui addit amplius quam centum urbes ab eodem imperatore sublatis armis, possessas a Sarracenis: sacra vero apud eos inventa, venerandam Christi imaginem, et reliquias sanctorum, præcipue vero Joannis Baptistæ detulisse magna reverentia Constantinopolim. Sed et Antiochia Syriæ diu possessa ab iisdem Sarracenis per suos duces est capta, cum ipse imperator degeret Constantinopoli. Magna sunt ista, quibus Nicephorus imperii sui primordia immortalitati feliciter consecravit. Sed cum desertor factus est pietatis, desertus et ipse a Deo, longe imparibus progressibus ad finem inglorius perve-

nit imperii. Quænam ista fuerint, qui res Græcorum sunt prosecuti scriptores enumerant, quorum antiquior Curopalates causas recensens, cur adeo de Rep. bene meritus, tot civitatibus et provinciis e Sarracenorum jugo deductis, et in libertatem vindicatis, omnibus tamen esset invisus, sic ait:

33. « Primum enim quando initio delatum ad ipsum est imperium, infinitis injuriis lacessentibus populum ipsius militibus, nullam rationem habebat, quod diceret, nihil mirum si in tanta populi frequentia aliqui indignantur; et rursus urbem ingressus, multis tum nobilibus, tum privatis correptis, nullam sentibus infligebat pœnam, sed absurda et turpia despiciebat, triumphans lasciviis, quibus intemperantes homines addicti, male cives afficiebant, præsertim quorum haud mediocri opera fuerat usus ad res recuperandas. Deinde quoque crebro ad exigenda tributa, male subjectum sibi populum vexabat, non solum nova imperando tributa, et ex omnibus rebus exactiones, verum etiam haud tolerandis prædis præter ea quæ diximus, adempta etiam eorum munerum, quæ convocato senatui præberi consueverant, parte, quod se ad bella pecunia indigere assereret». Hujus prætextus causa etiam injecit manus in sacra ac imp. penitus inconcessa. Quænam autem ista fuerint, idem auctor sic subdit:

34. « Insuper, quæ consueta præberi dona sacris domibus et templis, quæ moveri nefas erat, usurpabat, male asserens ab episcopis pauperum pecuniam consumi, milites inopes esse. Et quod omnium gravissimum est, legem quoque tulit, cui quidem instabiles episcopi et adulatores subscribere, statuentes non esse aut decernendum aut eligendum episcopum sine illius consilio et jussu. Mortuoque episcopo, regium hominem missum jussit in funere præfinitos sumptus facere, at ea quæ superfuere accepit; et alia quædam statuit omnem necessitatis formam exsuperantia, quæ ut sigillatim percurrantur, et magnam mentem et eloquentem linguam requirunt». Hæc de his Curopalates, eademque ex ipso totidem verbis Cedrenus, Zonaras, Glycas, et reliqui recentiores omnes sacrilegium detestantes. Est querela episcopi Leucatenensis, quod annis singulis Ecclesia sua penderet pro tributo Nicephoro supra centum aureos: sic et aliæ plus minusve secundum vires suas. Ista habet in relatione Luitprandus Cremonensis episcopus. Decernebantur ista in Synodo Constantinopoli collecta ab ipso, in qua ei faverunt adulantibus episcopi. Quod autem omnia ad militum utilitatem, libertatem gloriamque referret, quid insuper et in Synodo decernendum proposuerit, ab eodem Curopalate sic accipe:

35. « Curavit quoque legem sancientiam, ut milites, qui in bello occubuissent, digni censerentur præmiis, perinde ac martyres; solo bello, non alia re cæsis salutem animarum contineri. Instituitque ut patriarcha et episcopi dogmati consentirent. Verum quidam admodum resistentes, eum ab

¹ Leo Ost. l. II. c. 4.

incepto coercuere proposito, in medium Magni Basilii canone adducto, jubente ad triennium communionis expertes esse, qui hostem in bello occidissent ». Est iste canon decimus tertius ex Epistola sancti Basilii ad Amphilochem, ubi Theodorus Balsamo historiam istam totam de Nicephori rogatione ad Synodum facta recenset, cui subijcit et ista: « Cum autem multi sacerdotes, et unus quidem ex eis episcopus se jussu imperatorio synodaliter stitissent, et cum hostibus se manus consequuisse fassi essent, divina et sancta Synodus consequenter huic canoni et quadragesimo quinto ejusdem sancti, et aliis divinis Constitutionibus volebant ipsos non amplius sacra celebrare. Complures autem, et qui erant paulo magis militares, eos etiam præmiis dignos esse contendebant ». Hæc ipse. His igitur (ut dictum est) Nicephorus non solum egregie sibi partam gloriam obscuravit, verum etiam summam superinduxit ignominie notam, divinamque vindictam in se maxime concitavit.

36. Sed quæ de tributorum gravi indictione idem his addit Curopalates, sic accipe: « Et nummum imminuit, excogitato eo qui quadrans dicitur. Et ex eò tempore, duplicato numismate, exactio publicorum tributorum gravius postulabat: cum vero erogandum aliquid esset, levius distribuebatur ». Hæc ipse. Eadem Cedrenus, Zonaras et alii; ex quibus intelligi potest (quod obiter considerandum occurrit) veterem adhuc viguisse Romanorum imperatorum consuetudinem, ut pro tributi pensatione certum præscriptum esset numisma sive gravius sive levius pro imp. arbitrio, quod cum primo Annalium tomo certa Lampridii assertionem docuerimus, non placere sibi asserit ille, qui de census Cæsaris numismate Christo ostenso sermonem votivum edidit. Sed cum nauseans stomachus cibum male dijudicet, sanioris palatus consulendus est gustus. Certe quidem non est re-

spuendus ob id, quod non de illo, de quo agitur tempore Tiberii Cæsaris, sit locus ille Lampridii: neque enim mea illa assertio ad Tiberii tantum tempora restricta proponitur, sed generatim ad Romanos imperatores; unde locus Lampridii non ob id fuerat contemnendus, eo quod non loqueretur de Tiberii imp. temporibus, sicut nec rejiciendus citatus et recitatus hic præsens locus Nicephori Phocæ: quibus duobus locis intelligat lector eundem usum in Romano imperio perdurasse, cum alia loca alioqui non desint id comprobandi. Sed de his nunc obiter.

37. Revertamur ad Curopalatem, qui adhuc aliam affert causam odii civium in Nicephorum imp. « Offendit eum, inquit, præter alia superius numerata, muri palatiorum constructio. Multis enim circa palatium magnificis et pulcherrima arte elaboratis ædificiis eversis arcem tyrannicam contra miseros cives condidit, officinis intus ac horreis et equorum stabulis et fornacibus extructis cibariisque completis. Ei enim prædictum fuerat, intra palatium ipsi moriendum esse; ignorabatque miser, nisi Dominus custodiat civitatem, frustra vigilare qui custodit eam. Nam perfecto muro, ipse eadem die interiit, quando claves is, cui hæc cura commissa fuerat, ei allatas tradidit ». Sed hæc postea. Addit his ista Cedrenus: « Quo tempore murus palatii condebatur, nocte quadam per mare subvectus aliquis ita vociferatus est: O imperator, erigis muros! Et tamen si vel ad cælos eos educas, intus cum sit malum, urbs captu facilis est. Qui hæc dixit, diu multumque quæsitus, non tamen inventus ». Hæc ipse. Sunt et alia plura, quibus Nicephorus animos omnium a se alienavit, quæ iidem recensent historici. Sed de his ad institutum satis.

¹ Psal. xxvi.

Anno periodi Græco-Romanæ 6457. — Anno Aetæ Hispan. 1002. — Anno Hegiræ 353, inchoato die 18 Januar., Fer. 3. — Jesu Christi 964.

— Benedicti V papæ 1. — Ottonis imp. 3. Nicephori Phocæ imp. 2.

1. *Joannes XII PP. Romam a Berengarianis intromissus.* — A num. 1 ad 22. « Imperator », inquit continuator Reginonis, « Romæ Natalem Domini celebravit. Berengarius (Italæ rex) cum suis in Monte S. Leonis obsessus vincitur, et id ipsum castellum imperatoris ditioni subditur, et

Berengarius cum Willa (ejus uxore) in Bavariam mittitur. Romani iterum ab imperatore solito more deficientes, pluribus aliis castellanis sibi per conjunctionem extrinsecus adjunctis, eum occidere nitebantur: sed insidiis eorum patefactis, eodem die quo eum extinguere moliebantur, necem sibi

paratam anticipans, III nonas Januarii cum paucissimis suorum ees invasit, et non modicam illorum multitudinem intra muros Urbis prostravit. Die vero sequenti Romam iterum venientes, centum obsides dederunt, et supra corpus S. Petri sub iurejurando fidelitatem imperatori et papæ promiserunt. Tunc imperator plena adhuc hebdomada apud illos manens, Spoletinum ducatum et Camerinum ordinaturus exivit, et ad preces papæ Leonis obsides Romanis dimisit: quibus ipsi beneficiis ingrati, non longe illo ab Urbe posito, Joannem qui et Octavianus Urbi intromittunt, et fidem imperatori et papæ promissam annihilare non metunt. Leo vero papa vix cum paucis facultatum omnium nudus evasil, et imperatorem in Camerino ducatu positum adiit, ibique Pascha celebravit. Joannes autem qui et Octavianus, Joannem diaconum et Azonem scriniarium crudeliter detruncavit, et Otgerum Spirensis episcopum comprehensum et flagellatum, aliquandiu licet incommode secum detinuit: sed postea statim tum spe impetrandæ ab imperatore veniæ remisit: quæ spes eum divina ordinatione fefellit. Nam II idus Maii rebus humanis excessit ».

2. *Moritur Joannes XII PP. — Berengarius* itaque, qui in Italia a mense Decembri anni DCCL regnabat, currenti regnum amisit, postquam oppidum vulgari vocabulo *S. Leo* vel *Mons Leonis* dictum ultra Maceratam, versus Ravennam, inter Concham atque Marechiam flumina positum, cujus ager vulgo appellatur *Monte-Feltro*, ut videre est apud Cluverium lib. 2 Ital. Antiq. pag. 622, in manus Ottonis imp. pervenit. *Joannes* vero XII papa, qui anno DCCLVI, post diem xx mensis Augusti Pontificatum inierat, die decima quarta mensis Maji vitam cum morte commutavit, postquam sedisset annos septem et aliquot menses. Marianus Scotus et auctores Catalogorum ei omne tempus, quod ab ejus ordinatione ad mortem usque fluxit, attribuunt, sed in iis numeri in annis, mensibus ac diebus corrupti. Fuit quidem *Joannes XII* vir flagitiosus, sed Pontificem Romanum a nemine judicari posse, Baronius anno superiori et Marca lib. 4 de Concordia cap. 11 pluribus demonstrant, ideoque Joannis exauctoratio defendi non potest.

3. *Benedicti V papæ electio et depositio.* — Pergit continuator Reginonis: « Tunc Romani non modice metuentes imperatoris adventum, Benedictum quemdam Romanæ Ecclesiæ diaconum, fidei et electionis domini Leonis immemores eligunt, et ordinatum Sedi Apostolicæ imponunt. Quo audito, imperator collecta secus undique fidelium suorum multitudine, Romam adiit, et firma eam omni parte obsidione, ne quis pateret exitus, munivit. Sed prædictus Benedictus falso nomine Apostolicus, diutius ut imperatori resisterent, Romanos animavit, ipseque imperatori suisque fidelibus excommunicationem comminans, muros Urbis ascendit, et elatiori se fastu, quam Apostolicum decuerat, ostendit. Ad ultimum Romani fame et

obsidione constricti, se errasse, contraque imperatorem injuste deliquisse, pœnitentes in Vigilia Præcursoris, id est, IX kalendas Julii portas Urbis aperiunt, et imperatore cum honorificentia debita intromisso, Benedictum sacrilegum et perjurum imperatoriæ ditioni reddunt, et dominum Leonem in Sedem Apostolicam restituant. Tunc Leo Apostolicus coadunata multorum episcoporum Synodo, eundem Benedictum Romanæ Sedis invasorem judicio omnium ab invaso gradu deposuit, et Pontificale pallium quod sibi imposuerat, absceidit, ferulamque pastorem manu ejus arreptam coram omnibus in frusta confregit, et ad preces imperatoris, diaconatus ei tantum gradu uti concessit. Celebrata vero beati Joannis Nativitate, et sanctorum Apostolorum festivitate, imperator ab Urbe Romana revertitur, et infelicior quam speraverat omine in redeundo fruitur. Nam tanta exercitus ejus pestis et mortalitas invasit, ut vix vel sanus quis a mane usque ad vesperam, vel a vespera usque mane se victurum speraverit ». Tertia est hæc profectio Romana Ottonis M. cujus mentionem facit continuator Luitprandi lib. 6, cap. 11.

4. *Infelix status Ecclesiæ Romanæ.* — Hæc continuator Reginonis, qui hoc tempore vivebat, in gratiam Ottonis imp. *Benedictus* hujus nominis Quintus ordinatus videtur die xv mensis Maii, in quam Dominica cadebat; cumque ab Ottone imp. die vicesima tertia mensis Junii Vigiliæ sancti Joannis Baptistæ sacra depositus fuerit, sedit mensem unum et dies novem. Marianus quidem Scotus et auctores Catalogorum ei menses duos et dies quinque passim assignant, sed non video, quo die ejus Pontificatum absolvant, aut quomodo hoc coherere possit. Ejus ordinationem contra decretum ab *Ottone* imp. anno DCCLXII renovatum, quo jubetur ut nullus consecratur Pontifex Romanus præterquam in præsentia missorum Cæsareorum, annullavit Leo VIII in sua Pseudo-Synodo Lateranensi a Baronio num. 49 et seq. recitata. Verum Romanos in ordinatione Benedicti V non peccasse, ex iis, quæ anno DCXCIX in medium afferam, liquet. De infelici hoc tempore Ecclesiæ Romanæ statu Gerbertus Rhemensis archiepiscopus invasor, in Actis Rhemensis Synodi, ait: « Vidimus Joannem, cognomento Octavianum, in volutabro libidinum, etiam contra eum Ottonem, quem Augustum creaverat, conspirasse: quo fugato, Leo neophytus (dicitur laicus a Sigeberto in Chronico) in Pontificem creatur: sed Ottone Cæsare Roma discedente, Octavianus Romam redit, Leonem fugat, multaque cæde primorum in Urbe debacchatus cito moritur. Cui Benedictum diaconum, cognomento Grammaticum, Romani substituunt. Eum quoque Leo neophytus cum suo Cæsare non multo post aggreditur, obsidet, capit, deponit, perpetuoque exilio in Germaniam dirigit ».

5. *Nomen Salomonis loco nominis papæ usurpatum.* — Hinc scite observavit Joannes Beslius in Historia Pictaviensium comitum et ducum Aquita-

niæ pag. 136, et cum eo Papebrocius in Leone VIII, *Aquitano* in hac temporum caligine, cum vellent annum Pontificatus cum anno regis Francorum conjungere, et duo vel tres papæ simul viverent, loco nominis Pontificis, *Salomonis* nomen scripsisse, sive, ut significarent Deum esse, cujus suprema sapientia Ecclesiam regat et Apostolicam Sedem conservet, sive ob aliam quancumque causam eos ad hujusmodi formulam usurpandam inducentem. Hinc reperitur Diploma, « Datum mense Martio, feria III, luna XXIV, Lothario rege, Salomone regnante, anno DCDLXIV ». Post hæc autem cum *Benedictus* et *Bonifacius*, uterque VII, unitatem Ecclesiæ iterum distraxissent, aliud scriptum in quo legitur : « Datum mense Junio, regnante Lothario rege, anno D. N. Jesu Christi DCDLXIV, Salomone papa ». Ac denique tertium scriptum contententibus de papatu *Gregorio V* et *Joanne XVI*, in quo habetur : « Datum mense Februario, regnante Hugone rege, anno ab Incarnatione Domini Jesu Christi DCDXCVI, Salomone papa » ; ubi tertium hoc Diploma spectat ad annum DCDXCVII a Januario incipiendum, quia *Aquitani*, qui primum sæculo X sub duce Guillelmo III cœperunt annos Aëræ Christianæ in publicis instrumentis adhibere, a Paschate eorundem desumpserunt exordium, ut liquet ex hoc instrumento ab eodem Beslio pag. 248 exhibito : « Datum mense Januarii, regnante Lothario rege anno DCDLXIX,

Indictione XIII », quo tempore, qui annum a Januario vel a Nativitate Christi auspicabantur, numerabant annum DCDLXX.

6. *Constitutio Leonis VIII attributa.* — A num. 22 ad 31. In *Leonis* octavi Pseudo-Synodo Romana fertur edita Constitutio, qua *Ottoni* imperatori ejusque successoribus concesserit in perpetuum facultatem eligendi Romanum Pontificem, et investituras episcopis tribuendi. Hanc Constitutionem Goldastus tom. I Constitut. imperial. pag. 29 et seqq. ex Gratiano Dist. LXII, cap. 23, Theodorico Niemo et ex aliis refert, pluribusque defendit. Imo Marca lib. 8 de Concordia cap. 12 et cap. 29 a Leone VIII datam fuisse contendit. Verum vir doctissimus Baronii argumentis non respondet, quorum primum petitur a falsitate similis concessionis ab Hadriano I Carolo Magno factæ, et in Constitutione Leonis VIII attributa ab eodem Leone memorata, quasi vere eam Hadrianus I emisit. Quare cum anno DCDLXXIV hujus concessionis Hadriano primo suppositæ falsitatem ostenderimus, Baronii argumenta adversus Leoniam nobis non possunt non probari. Porro cum Decretum *Hadriani* mox laudatum circa finem sæculi decimi confectum fuerit, et in prætenso Leonis VIII rescripto citetur, apparet, illud Leonis VIII rescriptum ante ejusdem sæculi decimi finem auditum non fuisse (1).

7. *Mere commentitia est.* — Refert ibidem

(1) Hujus commentitiæ Constitutionis *Leonis VIII* pseudopontificis exemplar nacti sumus in Codice Vaticano 1984, pag. 192, col. 2, post initia sæculi XII scripto ; quare eam contulimus cum editione Goldasti, *Constitutionum imperialium* tom. I, pag. 221, qui ex Theodorico Niemo eam transcripsit. Ad imam partem paginæ variantes lectiones Codicis Vaticani apposuimus. Ex variis lectionibus, quid impostorū licentia additum sit, vel immutatum, conicies. Cod. hunc titulum exhibent : PRIVILEGIUM SCI LEONI PAPÆ VIII.

Convenit Apostolico moderamini¹ petentibus² beuervola compassione succurrere, et poscentium animis alacri devotione præbere assensum. Ex hoc enim³ lucri potissimum præmium apud conditorem omnium reperitur⁴. Deinde quoque et cunctum clerum, et omnem populum asserimus esse concordem, et ad meliorem statum⁵ (fore productum). Atque idem quia juste et rationabiliter vestra humilitas⁶, a nostro Apostolatu humiliter postulat⁷, quatenus gratulanter peragentes sanctam Synodum vestro⁸ consilio congregatam in patriarchio Lateranensi, in Ecclesia S. Salvatoris constitutam a pluribus⁹ viris catholicis episcopis et abbatibus, insuper iudiciis, et legis doctoribus promulgantes¹⁰ qualiter quiete et pacifice stare et vivere valeamus, presentibus omnibus et singulis regionibus alme¹¹ Urbis Romæ et ex omnibus ordinibus cleri et populi asserentibus et confirmantibus per omnia¹² ut hæresi et altercatione ac omni errore expulso quoniam¹³ his temporibus error ex hoc accrescere cernitur, discernatur tam de Romano (crescebat. Decernimus tam de Romano) imperio quam de Apostolica Sede ac dignitate patriciatu, et de investituris episcopatum¹⁴. Idcirco ad exemplum beati Adriani, Sedis Apostolicæ hujusmodi episcopi, cujus vitam et actionem satis discretam audivimus et rationabilem¹⁵ admodum in suis spiritualibus sanctionibus recognovimus¹⁶. Idem enim sanctus vir Synodum congregavit, et in presentia omnium, eorumque auctoritate domino Carolo invictissimo regi Francorum et Longobardorum ac patricio Romano¹⁷ suisque successoribus, regnum Italiæ, patriciatu dignitatem ac ordinationem Sedis Apostolicæ concessit insuper et episcopatum : investituras velut ipsi cum discretionem et reverentiam libitum fuerit præter quos tam Pontifici summæ Sedis, quam archiepiscopis ipse Carolus reliquit.

Igitur nos Leo servus servorum Dei, episcopus, ad idem exemplum Adriani, cum cuncto similiter clero et universo populo Romano omnibusque ordinibus hujus alme Urbis, sicut in suis¹⁸ scripturis apparet, constitutimus, confirmamus, et corroboramus, et per nostram Apostolicam auctoritatem concedimus¹⁹ atque largimur domino Ottoni primo Augusto, Teutonicorum regi prudentissimo spirituali²⁰ in Christo filio nostro, ejusque successoribus hujus regni Italiæ in perpetuum tam sibi facultatem eligendi successorem, quam summæ Sedis Apostolicæ Pontificem ordinandi : ac per hoc archiepiscopos, seu episcopos, ut ipsi tantum ab eo investituram accipiant, etc. consecrationem ubicumque²¹ perlinuerit, exceptis his, quos imperator Pontifici et archiepiscopis concessit. Ita demum asserimus, quod²² nemo deinceps cujuscumque gradus vel conditionis aut dignitatis seu religionis²³ eligendi regem vel patricium sive Pontificem summæ Sedis Apostolicæ aut quemcumque episcopum²⁴ vel ordinandi habeat facultatem, sed soli regi Romani imperii hanc reverendam²⁵ tribuimus facultatem, quam absque omnia pecunia²⁶ disponet, ac reget, utpote rex et patricius Romanus. Quod si a cuncto clero et universo populo quis eligatur episcopus, nisi a dicto rege laudetur et investatur²⁷ non consecratur. Si quis contra hanc²⁸ regulam et auctoritatem Apostolicam et traditionem aliquid molitus, aut temerator in aliquo repertus fuerit, sive contra hoc nostrum concilium agens, sciat se in iram sancti Petri principis Apostolorum, et filii nostri domini Othonis ejusque successorum, et omnium prædecessorum nostrorum censuram, et anathematis vinculum incursum²⁹, ac per hoc excommunicationi universalis Ecclesiæ, omnisque populi Christiani, eum subiacere decernimus. Insuper nisi a malo resipuerit, irrevocabili exilio puniatur, vel ultimis suppliciis feriat. Qui vero pio intuitu custos et observator in omnibus extiterit benedictionis gratiam vitamque æternam cum omnibus sanctis sine fine mereatur habere in sæcula sæculorum. Amen. H³⁰.

In his actis interfuere senatores, proconsules, exarchatus vicem tenentes, regionarii scholæ Græcorum, Arabum, Judæorum, et paganorum,

¹ Moderamio. — ² Pollentibus. — ³ Deest : lucri. — ⁴ Deprimatur, dum quoque omne clerum, et omne. — ⁵ Fuerit siue dubio statum productus. — ⁶ Nostra humilitate. — ⁷ Postulatis. — ⁸ Nostro. — ⁹ Compluribus. — ¹⁰ Promulgantibus. — ¹¹ Hujus alme. — ¹² Deest : ut. — ¹³ Quoniam almis. — ¹⁴ Investitura episcopatum. — ¹⁵ Rationabiliter. — ¹⁶ Recognovimus qui ejusmodi S. Synodum constituit et domo Karolo victoriosissimo regi Francorum. — ¹⁷ Patricio Romanorum patriciatu dignitatem ac ordinationem Apostolicæ Sedis episcopatum concessit. Nos quoque Leo, servus servorum Dei, episcopus simul cum cuncto clero, populo. — ¹⁸ Ipsis. — ¹⁹ Concessimus. — ²⁰ Teutonicis regi dilectissimo spirituali. — ²¹ Consecrationem recipiat undecumque. — ²² Ut. — ²³ Religiosis. — ²⁴ Episcoporum. — ²⁵ Reverentia. — ²⁶ Absque omni pecunia. Hæc disponet. — ²⁷ A nemine. — ²⁸ Deest : regulam. — ²⁹ Et successorum et nostram casuram, et sub anathematis vinculo remansuram ac per hoc. — ³⁰ H. hic explicit Privilegium in codice. Quæ sequuntur, desiderantur in eodem codice.

Goldastus pag. 36 aliud exemplar Bullæ Leonis VIII ex Theodorico Niemo, qui circa annum mcdx vixit, in quo continentur quæ Romanæ Ecclesiæ a variis principibus data dicuntur, et a Leone VIII confirmata. Verum Diploma illud ab aliquo imperito schismatico excogitatum. Ait in eo Leo VIII se donare Ottoni, quæ sibi obvenerunt a *Justiniano imp. et Ariperto rege*, et tamen Justinianus imp. et Aripertus Longobardorum rex nihil Ecclesiæ Romanæ dedere. Tum addit se tradere *Corsicæ regnum*, quod tamen *Ottonis* tempore nondum institutum erat. Dat etiam *insulam Venetiarum*, qui loquendi modus ab antiquis non usurpatus, nec Venetiæ a Pontificibus Romanis unquam possesse; *ducatum Ferrariæ*, cum tamen nonnisi diu post hæc tempora a Pontificibus Romanis institutus fuerit; *ducatum Istriæ, Dalmatiæ*, in quibus Pontifices nihil unquam possidere; *Capitenatam Apuliam*, sed hoc nomen ducentos post Ottonem annos inventum; *Calabriam*, et hæc hoc tempore Græcorum erat. Sic regnum *Trinacriæ* ibidem designatum nonnisi sub sæculi xiii finem institutum. Sed pudet in his immorari. Hoc tantum dicam, Marcam lib. 8 de Concordia cap. 12, ubi Leonis VIII rescriptum genuinum putat, illud juxta leges criticæ non examinasse, indeque Hadriani papæ I Decretum de Investituris, quo Diploma istud innuitur, ut legitimum admisisse, licet merum schismaticorum commentum sit.

8. *Victoria Nicephori Phocæ August. de Saracenis.* — Ad num. 32 et seqq. Gesta in Oriente a *Nicephoro* imp. adversus *Saracenos* Leo diaconus refert, quæ ex eo in summam contraho. Postquam tristem hyemis faciem verna tempestas in serenioram oram mutaverat ac serenitatem, indicta adversus *Agarenos* expeditione Byzantio *Nicephorus* proficiscitur; moratusque in Cappadocia, justisque collectis copiis, Tarsensem urbem in Cilicia sitam petit, tunc civium virtute numeroque ac bellicæ rei exercitamentis ferocientem, nimiumque superbientem, cinctoque undique oppido obsidioni instabat. *Agareni* vero in eo præsidarii urbis munitione firmissima freti imperatorem subsannabant, urbeque effusi, factaque impressione, Romanorum plurimos trucidabant. Ubi itaque *Nicephorus* imp. inconcessa a se aggredi cognovit, inde movens circumposita *Tarso* præsidia castraque hostili acie invadit, primoque statim assultu *Adanam* et *Abarzam*, aliaque supra viginti ejusmodi præsidia capit.

9. *Mopsuestiam capit.* — Inde *Mopsuestiam* aggressus, ductoque vallo fortiter oppugnabat, perituri atque sagittis quotidie velitando, hostem fatigans, præsidarii ipsi quoque strenue obsistebant, ignitaque tela et saxorum pondera in Romanos mittentes, seseque ex turribus omni conatu

defendentes. Tandem cuniculis dejectæ turres ac murus. Imperator quoniam collapsa muri rudera aditum volentibus præbere videbat, omni confirmatum exercitui mens *Mopsuestiam* subjugavit, ac qui residui Barbarorum erant, servituti mancipavit: ipseque subductis manubiarum primitiis, imperatorioque ærario addietis, atque milite ab oppidi direptione revocato, quia sol Sagittarium prætergressus ad Capricornum transibat, rigorque increbrescebat, inde motis castris ad Romanæ se ditionis loca recepit: hincque Cappadociam ingressus, domum quemquam reverti jussit, rursus meminisse monens, ut ineunte vere ad se redirent. Ipse vero cum residuis ibi hyberna ducebat. Anno sequenti, de Tarsensis oppidi expugnatione sermo erit. Hanc Nicephori expeditionem « anno imperii ejus secundo, mense Julio, Indictione septima » susceptam esse, recte refert Cedrenus, et loco *Abarzæ* vocis apud Leonem diaconum corruptæ, habet *Anabarzam*, seu *Anazarbam* Ciliciæ oppidum. Verum perperam scribit, Nicephorum ad Tarsum et Mopsuestiam ducere ausum non esse, *quod jam hyems appeteret*; hoc enim Leo diaconus ignorare non potuit. In eundem errorem Zonaras ac Cedrenus labitur, recte tamen ait, Nicephorum imp. *secundo imperii sui anno* Ciliciam invasisse.

10. *Translatio reliquiarum S. Agnetis.* — Reliquiæ *S. Agnetis* virginis, quæ sæculo tertio Romæ martyrium fecit, et *S. Benigni* Carnotensis episcopi martyrio etiam coronati, quæ sæculo superiori Normannis Franciam devastantibus occultatæ fuerant, anno primo imperii Ottonis divinitus revelatæ sunt, et currenti a Thiadboldo comite Ultrajectensi impetratæ per Baldricum Trajectensem ad Rhenum episcopum, qui « præsul voti compos, gratiarum actiones Deo cum laudibus extollens choro clericorum conjuncto, populique frequentia, decuit ut sanctos, occurrit in obviam, quos honore condigno susceptos infra Trajectensem episcopalis sedis aulam pridie kalendarum Aprilium loco locavit in uno, sed singulis semotim in loculis, anno scilicet Incarnationis Domini nostri Jesu Christi nongentesimo sexagesimo quarto, Indictione septima, sabbatorum quinta », inquit auctor anonymus Historiæ Inventionis et Translationis SS. Agnetis et Benigni episc. e Gallia Ultrajectum apud Bollandum ad diem xxi Januarii. Præcipua quidem *S. Agnetis* Romanæ pignora Urbs ipsa asservat, sed quædam eorum partes ab aliis urbibus possidentur. Sæculo elapso furentibus in Francia hæreticis hæ reliquiæ Lutetiam Parisiorum translatae et in Ecclesia *S. Eustachii*, quæ primum sub ejusdem sanctissimæ virginis nuncupatione constructa clarnit, magna solemnitate collocatæ, ut apud Bollandum ibidem videre est.

et de majoribus omnium platearum, insuper cardinales, archiepiscopi, omnes presbyteri et episcopi de finitimis civitatibus: processarii, notarii, cancellarii, et ex omni plebe Romani imperii. Datum in patriarchio Lateranensi Indict. vi, anno..... dicti domni Ottonis secundo feliciter.

BENEDICTI V ANNUS 1. — CHRISTI 965.

1. *Otto imperator in Saxoniam pergit, Benedictum papam custodiendum secum ducens, qui ibidem moritur.* — Annus Redemptoris nongentesimus sexagesimus quintus, Indictione octava inchoatur, quo (ut est apud Reginonem ab auctore hujus temporis additum) imperator Papiæ Natalem Domini celebravit; peractaque festivitate statim in patriam, dispositis in Italia regni negotiis, rediit. Cui filii sui Otto et Wilhelmus archiepiscopus in confinio Franciæ et Alemanniæ in villa Heimbodesheim occurrerunt, et cum magna ibi eum alacritate susceperunt. Inde Wormatiam progressus, fratrem suum Brunensem, alias Brunonem archiepiscopum in Purificatione sanctissimæ Mariæ Virginis sibi obvium habuit, sicque tota Quadragesima in Francia commorans, in Ingelsheim Pascha cum magno gaudio celebravit; inde navigio Coloniam attingens matrem suam dominam Mathildem et sororem suam Gerbergam reginam, filiumque ejus Lolharium sibi obvios condigno amore et honore tractavit, sicque in Saxoniam iter suum direxit. Hæc auctor, qui fortasse præsens, quam exactissime itinera relegit.

2. Testatur Ditmarus, Ottonem imperatorem ex Italia redeuntem multa corpora sanctorum secum detulisse, collocasseque ea in Ecclesia Magdeburgensi recens erecta, atque in singulis columnarum capitibus eorundem sanctorum collocasse reliquias. Hæc ipse secundo sui Chronici libro, additque secum Benedictum etiam illum depositum papam ab Urbe Roma in Saxoniam advexisse, quem Adaldago archiepiscopo Hamburgensi custodiendum commisit: de quo ista Adamus velus chronographus habet¹: « Reversus ergo in patriam archiepiscopus, sicut audivimus et cognovimus, et patres nostri narraverunt nobis, duxit in comitatu suo Benedictum papam ordinatum, sed item ab Ottone depositum, quem ille Hamburg custodiæ mandari præcepit. Archiepiscopus vero eum magno honore detinuit usque ad obitum ejus. Nam vir sanctus litteratusque dicitur fuisse, et qui dignus Apostolica Sede videretur a populo Romano, nisi quod

per tumultum electus est, expulso eo, quem ordinari jussit imperator. Igitur apud nos in sancta conversatione vivens, aliosque sancte vivere docens, cum jam Romanis poscentibus a Cæsare restitui deberet, apud Hamburg in pace quievit. Transitus ejus quarto nonas Julii contigisse scribitur». Hæc ipse ejus regionis auctor. Quoto autem anno Benedictus obierit, non scribit. Paulo post autem de eodem episcopo ista: « Archiepiscopus autem reliquias sanctorum martyrum, quas ab Urbe Roma portavit, magna per parochias suas diligentia distribuit: nempe ex corporibus sanctorum martyrum Cyriaci, Cæsarii, Victoris, Coronæ, Felicis et Felicianæ, Cosmæ et Damiani». Porro¹ exploditur jure fabula de Benedicto isto, quod a Ludovico imperatore ad prædicandum Evangelium ductus sit in Germaniam, inde vero Wandalorum incursu fuerit trucidatus una cum sexaginta presbyteris. At vero alia ratione dicendus martyr, nempe quod a Leone, quem ostendimus pseudopontificem, tam dira tamque contumeliosa sit passus, et exul ipse legitimus Romanæ Ecclesiæ Pontifex sit defunctus, ut sancti martyres iidemque Pontifices Pontianus alque Martinus in exilio vita functi. Quod autem ul martyr coleretur Benedictus: ne ob id Ottonis nomini nota inureretur, fingendi aliam causam martyrii occasionem dalem esse existimamus.

3. Subjiciendus hic alius insignis locus de innocentia Benedicti ex scriptore ejusdem ferme temporis. Extat Chronicon Ditmari episcopi Merseburgii, quod incipiens ab Ottone imperatore perduxit ad annum usque millesimum decimum octavum, quo tempore se vixisse testatur. Ubi hæc de Benedicto isto libro secundo: « Romanorum, inquit, præpolens imperator Otto secundus (sic enim appellat Ottonem Magnum, habito respectu ad ejus avum patrem Friderici, Ottonem pariter nominatum) valentior sibi in Christo, dominum Apostolicum Benedictum nomine, quem nullus absque Deo judicare potuit, injuste (ut spero) accusatum deponi consensit. Et (quod utinam non fecisset!) exilio ad Hamaburg relegari præcepit».

¹ Adam. l. II. c. 6.¹ Craut. in Metr. Sax. l. III. c. 20. 21. 22. 23.

Eodemque libro secundo pestem immissam ob exilium Benedicti testatur, utpote injuste depositum ostendens. Et de eodem libro quarto: «Obiit, inquit, in exilio Benedictus Pontifex, ossaque ejus Romam sunt relata». Hæc ex Ditmari Chronico, quod citat, et eadem recitat¹ Papirius Maso in Benedicto septimo, quem errore putat fuisse Benedictum, qui exulavit Hamaburgi, quem constat ejus nominis Benedictum quintum fuisse. De translatione autem corporis Benedicti papæ Romam facta, suo loco dicturi sumus.

4. *Leoni antipapæ mortuo subrogatur Joannes dictus XIII.* — Leo autem pseudopapa hoc anno obiit diem, ut auctor apud Reginonem affirmat, qui de subrogato Joanne decimo tertio papa in locum ejus sic enarrat historiam: «Eodem etiam anno dominus Leo papa obiit. Tunc legati Romanorum, Azo videlicet protoscriniarius et Marinus Satriensis Ecclesiæ episcopus imperatorem pro instituendo quem vellet Romano Pontifice, in Saxoniæ adeuntes, honorifice suscipiuntur et remittuntur, et Otgerus Spirensis episcopus, et Linzo (Luitprandus) Cremonensis episcopus cum iisdem Romam ab imperatore diriguntur. Tunc ab omni plebe Romana Joannes Narniensis episcopus eligitur, Sedique Apostolicæ Pontifex inthronizatur. Qui statim majores Romanorum elatiore animo quam oporteret, insequitur, quos in brevi inimicissimos et infestos patitur. Nam ab Urbis præfecto, Rotfredo comprehenditur, et Urbe expulsus in Campania custodiæ mancipatur». Hæc ibi.

5. De eodem etiam hæc² Leo Ostiensis: «Hujus abbatis, Aligerni scilicet anno decimo nono, Joannes papa Roma pulsus exilio, Capuam venit, et a memorato principe Pandulpho rogatus, tunc primum in eadem civitate archiepiscopatum constituit, consecrato fratre ipsius principis Joanne in archiepiscopum». Hæc Leo. Cæterum quandiu vixit Benedictus (nescitur tamen certus ejus obitus annus) nullus alius potuit dici legitimus Romanus Pontifex, cum ejus damnatio nullius potuerit esse momenti.

6. *Poloni ad Christi fidem conversi legatos obtinent ab Joanne.* — Hic ipse notatur annus, quo accolæ antiquæ Sarmatiæ, Slavorum propago, recentiori nomine Poloni nuncupati, Christo nomen feliciter dantes, Christiano sunt nomine insigniti. Cum alioqui ad Sarmatas antiquitus Christi Evangelium penetrasse, veteres scriptores testati sint. Id namque tradit Tertullianus contra Judæos; quamobrem vinea deserta repastinanda fuit. Quonam autem Evangelium prædicante isti crediderint, haud satis exploratum haberi potest: sed illud tantum indubitatum per mulierem fidelem principem conversum infidelem, et principe ipso ad fidem Christi converso, eodem satagente, fides Christiana ubique locorum sui do-

minii propagatur, et quasi momento subditi omnes ad religionem sunt Christianam perducti. Etenim commercio propinquorum Christianorum Boemorum, et aliorum Miezislaus ad meliorem frugem conversus, abdicatis a se concubinis septem, e quibus nullam prolem consequi potuisset, duxit legitimam uxorem Boleslai primi Boemorum ducis filiam virginem eandemque Christianam nomine Dambrouuucham, ea lege ut ipse fieret Christianus, quod et perfecit, et alios sibi subditos idipsum præstare curavit. Cujus rei gratia opus habuit de his omnibus certiore reddere Romanum Pontificem, petens ab eo aliquem mitti, qui eam provinciam Christiano ritu cultam, feracem redderet ad salutem in ea habitantium animarum.

7. Ubi ista tam læta accepit Joannes Pontifex, stupore simul et gaudio affectus secundum illud¹ Isaïæ: «Dices in corde tuo: Quis mihi genuit istos? Ego sterilis et non pariens, transmigratus et captivus, et istos quis enutrivit? Ego destitutus et solus, et isti ubi erant?» continuo ad ipsos decernens legationem a latere, misit Ægidium Tusculanum episcopum, qui credentem regem cum populo stabiliret in fide, et episcopatus diversos erigeret, sacerdotesque et ministros reliquos in iisdem ad omnes erudiendos constitueret. Quot autem tunc erectæ fuerint sedes episcopales in Polonia, Chromerus et alii, qui res Polonorum sunt prosecuti, diffuse narrant; quos tu consulas. Illud vero non prætermittendum, edicto regio cautum, omnia idola et reliqua ad ipsorum cultum spectantia monumenta confringi atque cremari. Quod magna animositate ab omnibus factum atque perfectum est septima die mensis Martii, posteris tam egregio opere memorabili. Sic igitur Polonorum regnum hactenus obscurum nec nominatum divinæ lucis radiis illustratum, Christiana religione suscepta, mox cœpit esse toto orbe Christiano conspicuum, de quo sæpe dicendum, ut plane quasi novus fluvius se immittat in latum alveum Ecclesiasticorum Annalium tractatio rerum ad eam Ecclesiam pertinentium.

8. *Alia ejusdem Pontificis legatio in Wandaliæ.* — De alia legatione per eundem Pontificem in Wandaliæ missa hæc apud Stanislaum² Orichovium Roxolanum: «Admonitu piorum virorum quorundam, Meiscone monarcha, cum audissemus esse civitatem quamdam Dei, cujus antistes esset Romanus Petrus, penes quem auctoritas esset summa, ex servitute diaboli in libertatem Christi homines vindicandi, ab hoc ipso istius civilatis antistite Meiscone monarcha opem adversus diaboli vim imploravimus. Itaque Joannes decimus tertius vicarius Jesu Christi, Simonis autem Petri successor exoratus a monarcha, senatu ac populo, doctissimos viros Italos, videlicet Willibaldum, Prochorium, Jordanum, Goffridum, Lucidum, Angelotum, Octavianum, Julinum ad nos

¹ Maso de Episc. Urb. l. iv. in Bened. VII. — ² Leo Ost. Chron. Cass. l. II. c. 9.

¹ Isa. XLIX. — ² Apud Sand. de visib. Monarch. n. 695.

Wandalos ac Lechilas doctum misit. Qui et Meisconem monarcham et genus nostrum illi subjectum sacri baptismatis undis ab originali culpa abluerent, et ex civitate diaboli ablutos ac mundalos in civitatem Dei transferrent, in Christique Ecclesiam dicarent, quod etiam est factum. Nam illi viri sanctissimi Wandali (sive tu malis Poloniam dici) ingressi, prædicabant nobis Christum et gratiam ejus qua nos in communionem suorum Deus convocaverat, celebrabant : homines turmatim ad flumina confluentes baptizabant, idola ex Wandalia exterminabant ». Hæc ipse.

9. Quomodo autem sit cooperatus Otto imp. ad confirmationem Ecclesiæ Wandalarum, inferius suo loco dicturi sumus. Diversam hanc fuisse legationem ab ea, quæ in Poloniam missa est, diversitas plane legatorum ostendit, et alia plura. Quod audis Wandalos nomine Slavorum esse comprehensos : scias in plures amplissimasque provincias Slavoniam esse partitam, et inter alias Wandali esse comprehensam : omnes vero ad fidem Christi

conversas esse, quæ de iisdem provinciis dicturi sumus, inferius declarabunt.

10. *Obitus Brunonis archiepiscopi Coloniensis.* — « Eodem anno Bruno archiepiscopus Coloniensis germanus Ottonis imp. vir ducatu pariter et episcopatu dignissimus, quinto idus Octobris obiit ». Hæc apud Reginonem. Extat ejus Vita conscripta a ¹ Rotgero monacho. Laudatur Bruno iste magnopere a ² Ditmaro, quem intercessionem sancti Pauli Apostoli receptum tradit inter beatos in cælum. Ab eodem citatur liber scriptus de Vita ipsius, eique successisse tradit fratrem suum, cui nomen Gero, in cujus consecratione visos S. Petrum Apostolum et sanctum Ambrosium fundentes oleum, testatur; regem vero detrectantem adhibere consensum, ab Angelo minis exterritum tradit. Cujus et mater Hidda peregrinata Hierusalem, illic clara virtutibus, sancto fine quievit.

¹ Extat apud Sur. lom. v die XI Octob. — ² Ditm l. II. Chron.

Anno periodi Græco-Romanæ 6458. — Anno Æræ Hispan. 1003. — Anno Hegiræ 354, inchoato die 7 Januar., Fer. 7. — Anno Hegiræ 355, inchoato die 28 Decemb., Fer. 5. — Jesu Christi 965. — Joannis XIII papæ 1. — Ottonis imp. 4. Niephori Phocæ imp. 3.

1. *Moritur Benedict. V.* — A num. 1 ad 4. Rediit hoc anno Roma in Germaniam Otto imperator, postquam Benedictum V Adaldegæ archiepiscopo Hamburgensi custodiendum tradidisset. « Reversus autem archiepiscopus in patriam duxit in comitatu suo Benedictum papam ordinatum, sed ab imperatore Ottone depulsum, quem ille in Hammaburg custodiæ mancipari præcepit : archiepiscopus vero magno cum honore usque ad obitum ejus detinuit », inquit Adamus Bremensis lib. 2, cap. 6, qui addit : « Igitur apud nos in sancta conversatione vivens aliosque sancte vivere docens, cum jam, Romanis poscentibus a Cæsare restitui debuisset (mortuo sc. Leone VIII) apud Hammaburg in pace quievit. Cujus transitus III nonas Julii configisse describitur ». Lambecius lib. 1 de Originibus Hamburgensibus pag. 37, ait videri hodieque cenotaphium ejus in medio chori Ecclesiæ beatæ Virginis Mariæ, cui inscripta sunt hæc verba : BENEDICTUS PAPA, QUI DE SEDE APOSTOLICA PER VIOLENTIAM AMOTUS, ET POST, CUM REVOCARETUR, OBIT HAMBURGI ANNO DOMINI DCD QUADRAGESIMO PRIMO, QUINTO NONAS JULII, ET SEPULTUS EST IHC. Verisimile est, subdit Lambecius, ab illis, qui trecentis vel

quadringentis abhinc annis Benedicti illud cenotaphium vel exstruxerunt vel renovarunt, errorem hunc in numero commissum esse. Verum non tantum illud verisimile, sed etiam certum, cum Epitaphium neque diem, neque annum, neque sæculum ex vero referat. Papebrocius in Paralipomenis ad Conatum Chronico-Hist. refert, *Othtonem Sperlingum* nuper Kilonii eruditam dissertationem sub hoc titulo typis mandasse : « Monumentum Hamburgense Benedictinum, seu de inscriptione et tumulo Benedicti V Pontificis Rom. qui in choro majoris Ecclesiæ B. V. Mariæ apud Hamburgenses olim fuit, et hodie dum spectatur », in qua docet, post *Benedicti* adventum sæpius incendio conflagrasse, et urbem et Ecclesiam, ut illius, si quod fuerit, monumentum, debuerit funditus periisse : et si *Ottonis III* ætate, quo ejus corpus Romam translatus, in paupertina tunc Ecclesia fuissent inscriptiones, apud Bremenses Hamburgensesque, Adamum Bremensem eas omnino tacitas præteritum non fuisse in suo opere, quo ætatem et sepulturas episcoporum, ex aliis monumentis librisque donationum tam anxie conquisivit. Denique concludit Sperlingus vix ante annum MCC Ham-

burgi conspici cœpisse cenotaphium illud, quod vidit descripsitque Krantzins, multo amplius altiusque, et litteris longioribus multo quam nunc videantur, insculptum. Ita Sperlingus, vic in Critica versatissimus. Post mortem ejus interpontificium mensium aliquot fuit, ut statim ostendam.

2. *Joannes XIII fit papa.* — Ad num. 4. Hoc anno, ut habet continuator Reginonis, *Leo papa obiit*. Marianus Scotus et auctores Catalogorum ei annum unum et menses tres adscribunt, ideoque cum anno DCLXIII die sexta Decembris consecratus fuerit, mors ejus incunte circiter Martio accidit. Etsi vero verus Pontifex non fuerit, dicendus est tamen Leo ordine VIII, ut antiqui et sequentes ejusdem nominis Pontifices nos dubitare non sinunt. *Joannes* natione Romanus, episcopus Narrensis ei successit, non die secunda Octobris, ut scribit citatus Lambecius, sed die prima ejusdem mensis, in quam Dominica hoc anno incidit, ut ex dicendis in morte ejus certum fiet. Hujus Pontificis initium a Papebrocio in Conat. Chron. bene collocatum.

3. *Capua a Joanne XIII metropolis fit.* — Ad num. 5. Refert Baronius hæc Leonis Ostiensis verba : « Hujus abbatis, Aligerini scilicet, anno XIX, Joannes papa Roma pulsus exilio, Capuam venit, et a memorato principe Pandulpho rogatus, tunc primum in eadem civitate archiepiscopatum constituit ». At verum quidem est, Joannem hoc anno Roma pulsum Capuam venisse, annoque sequenti eum Romam rediisse, ut habet Baronius ex continuatore Reginonis ; sed Aligerthus abbas Cassinensis anno DCLXIX ad hanc præfecturam evectus, sequenti annum tantum XVIII ejusdem numerabat. Quare in Leone loco *an. XIX* legendum *anno XVIII*. Hermannus, Contractus Joannis papæ Romam reditum differt usque ad annum DCLXIX, sed recte scribit Joannem *per decem et amplius menses* in Campania afflictum fuisse, qui ideo circa finem anni DCLXVI Romam reversus est ; tuncque Capua ab eo metropolitana dignitate exornata. Vide quæ dicam anno DCLXVIII, numero 14.

4. *Erat antea tantum metropolis civilis.* — Capuam jam inde a Constantini imp. temporibus fuisse metropolim, Sirmondo in *Adventoria* visum est, auctoritate Synodi Sardicensis et Athanasii ad *Solitarios*, ubi Campania, Calabria, Apulia ab Italia dividitur. Deinde refert subscriptiones Conciliorum et Sardicensis et Arelatensis, in quorum primo ita subscriptum est : « Lucillus ab Italia, Vincentius a Campania de Capua, Januarius a Campania de Benevento ; Stercorius ab Apulia de Canusio ». In altero vero : « De provincia Italiæ civitate Mediolanensi Mirocles episcopus ; ex provincia Campaniæ de civitate Capuensi Proterius episcopus ; de provincia Apuliæ de civitate Arpiensi Pardus episcopus ». Denique adhibet verba Athanasii ex Epistola ad Solitarios : « Vincentium quidem a Capua ; illa vero est metropolis ». Verum, uti Cantelius in Historia metropolitanarum urbium

part. 3, Dissert. 2, aliique observant, ex his tantum sequitur *Campaniam* ab Italia utroque jure, et civili et Ecclesiastico, sejunctam fuisse, non vero a Romana provincia. Fuit enim *Campania* jure civili diversa a Romana provincia, sed non jure Ecclesiastico ; cum utraque diversis magistratibus, sed uni metropolitæ Romano paruerit. In laudatis vero sive Epistolis sive subscriptionibus, juris plerumque civilis, non vero Ecclesiastici habita ratio est ; tuncque urbes diversis vulgo provinciis adscriptæ sunt ; sic aliis aliis, sive præses sive proconsul præfuit. Nec alia mens fuit Athanasii, dum Capuam Campaniæ *Metropolim* appellat : Metropolis quidem fuit, non Ecclesiastica tamen, sed civilis ; eoque respexisse videtur *Athanasius*, qui non vocat Vincentium metropolitanum, sed Capuam *Metropolim* : hæc enim prærogativa urbis fuit, non episcopi.

5. *Tempore Gregorii M. non erat metropolis Ecclesiastica.* — Præterea, subdit Cantelius, si *Campania* solida provincia Ecclesiastica fuit, annon et Apulia et Calabria solidæ itidem provinciæ fuerunt ? Eadem enim omnium ratio est. Quænam vero in his provinciis metropoles, an Hydruntum ? an Tarentum ? Barium ? At eas multo post sanctum Athanasium hac dignitate ornatas in confesso est. Eo accedit, quod si *Capua* Campaniæ erat metropolis, an illi contributa *Neapolis* ? At subditam Capuæ fuisse nullum extat vestigium. Si vero *Neapolis* metropolis etiam erat, fuerunt in una Campania provinciæ multæ. Et tamen vel ex unius Gregorii Magni Epistolis cuius intelligere licet, *Capuam* præ cæteris nihil habuisse præcipui. *Festus*, Capuæ episcopus, a Gregorio commendatur Petro Campaniæ subdiacono : moritur paulo post Romæ. *Gregorius* Gaudentium Nolanum Capuam visitatorem mittit. *Basilius* Festo suffectus, apud Siciliæ præfectum hærebat diutius ; illum *Gregorius* per Romanum defensorem ad suam sedem intra quinque dies redire jubet, eumque Romam ad Synodum evocat. Quid hic est, ex quo elici possit, Capuanum episcopum fuisse metropolitanum ? Annon potius inde planum sit, ut cæteros Campaniæ præsules, ita Capuanum fuisse Romano metropolitæ contributum ? Id certe nemo negaverit, qui *Gregorii* Epistolas vel leviter perlegerit ; longe enim alia illius est cum Mediolanensi et Ravennate metropolitanis agendi ratio.

6. *Polonia a S. Andrea Apostolo fidei lumen accepit.* — A num. 6 ad 10. Stanislaus Lubienskius, episcopus Plocensis, in *Vitis et Serie episcoporum Plocensium*, de initiis fidei in *Poloniam* introductæ disserit, atque fundamenta Christianæ religionis in Polonia, sive ea Vandalia aut Gothia, quo titulo regni principes Poloniæ usque ad Boleslamm Audacem usi sunt, appelletur ; sive universum Septentrionem Rheno et Tanai magnis Europæ fluminibus circumfusum, sub magnæ Sarmatiæ nomine comprehendendum censueris ; sive denique totum hunc tractum, Scythiam Europeam, quam

veteres historici longe latius quam omnes alias regiones patere scripserunt, existimaveris; non primum, ut plerique opinantur, sub *Miescone* duce e Piastorum familia exordium habuisse. Nam *sanctus Andreas* Apostolus, Scythiam Europæam, cujus appellatione universus Septentrio continetur, primus ex Achaia Istro transmissis ingressus, revelatæ a Christo veritatis lumen in Poloniam intulit. Nec deinceps per annos fere a Christo nato mille deerant viri pii, qui partim ex Græcia, partim ex Italia et Gallia ac ipsam Angliam progressi, foverent sementem Evangelii in agro Sarmatico, suaque prædicatione Poloniam, Russiam Magnam, Bohemiam, Daniam, Sueviam, Saxoniam, Pomeraniam, Vandaliam, præceptis et mysteriis Evangelicis imbuerent, maxime posteaquam Gregorius M., missis in Angliam doctrinæ Evangelicæ sanctissimis magistris, Anglos veterum Saxonum (quos Sarmatiæ partem fuisse nemo dubitaverit) prolem, ad obsequium Romanæ fidei reduxit.

7. *Miecislaus Poloniæ rex fit Christianus.* — Nec a temporibus Apostolorum defuisse putandum est viros zelo Evangelico accensos, qui ipsa penetrantia Vandalia (ita appellata est ea pars Sarmatiæ quam nobilissimus fluvius *Wandalus* mediam secat, quæ nunc Polonia dicitur) penetrarint, quorum, etsi labor non infructuosus fuit, memoria tamen obscurior, et nisi soli Deo nota nomina. Ad præsentem usque Christi annum, nullus erat qui publico nomine religionem Christianam palam profiteretur, non quod ea res principum edictis vetaretur, sed quod nullus esset qui statum religionis ad normam Ecclesiæ Catholicæ formaret, regibus ipsis nondum sacramentis cælestibus imbutis. Primus fuit *Miecislaus*, qui a Christianis subditis suis (qui jam tum frequentes etiam ex primoribus fidem Christianam colebant) ut, damnato cultu falsorum deorum, Christianus et ipse fieret, ac uxorem Christianam *Dambroucam* Boleslai Bohemiæ regis sive ducis filiam duceret, persuasus, primus se Christianum principem esse palam professus est.

8. *Vandalia a Polonia minime distinguenda.* — Nec hoc tempore ullum alium fuisse *Miesconem*, qui in alia Vandalia quam in Polonia regnaret, ostendi ac probari potest, et *Vandalos* a fluvio *Vandalo*, qui ex montibus Carpatiis Hungariam a Polonis dirimentibus ortus, mediam secat Poloniam, dictos fuisse manifestum est. Antiquioribus quidem temporibus, latius patuit Vandalorum imperium, priusquam patriis sedibus exuti, ad occupandum imperium Romanum ingenti facto agmine, præter complura Europæ regna, Africam etiam ipsam armis occupassent; multa illorum præclara facta leguntur ab historicis illorum temporum scripta. Eisdem non diversos fuisse a *Lechitis* seu Polono-Vandalis, ejusdem linguæ commercium luculentissimum est argumentum; quidquid modo Bohemia, Moravia, Bojoaria, nunc Bavaria dicta, Saxonia, quidquid Brandeburgica ditione, Pomerania cum adjunctis provinciis, Lusatia, Silesia,

quidquid denique Moschovitico, Ruthenico et amplissimo Poloniæ regno, ac ipsis etiam Daniæ et Sueciæ coronis continetur, Vandalorum sedes et patria fuit, prout id sermo ipse et lingua, cujus etiam in iis regionibus quas Germani vel Nemetes potius postea occuparunt, non obscura extant vestigia, abunde testantur. Quæ ut Lubienskius probet, refert quæ Cromerus, lib. 2 Historiæ suæ de successoribus et liberis *Lesci*, tertii monarchæ Poloniæ sive Vandalia, memoriæ prodidit. Verum neque hæc, neque Grotii, de qua statim, opinio antiquos suffragatores habet.

9. *Polonia primæva Vandalorum sedes non fuit.* — *Vandalos* aut *Wandalos*, Grotius in Prolegomenis ad Historiam Gothorum editioni Procopii præfixam, non existimat gentis alicujus nomen extitisse, sed sic vocatos fuisse Germanos quosdam ab iis qui primi eorum vim sensere, cum Germani hac voce eos designent, qui non sese certis sedibus tenent, sed nunc huc nunc illuc vagantur. Verum quantum ex antiquis inter se collatis colligi potest, *Vandalorum* nomen *uni* et *soli* Germaniæ populo primitus datum, et quidem postquam per aliqua tempora, huc illuc excurrendo prædas egisset. Quare Vandalorum rapinæ et excursionses post annum Christi quadringentesimum ab eis factæ, nihil cum eorum nomine commune habent, sicut nec omnes Septentrionales populi, qui protixas barbas aluere, Longobardi vocati sunt, sed istud nomen peculiari populo datum. Sic quicumque enses a Germanis *Sachs* denominatos tulere, *Sachs*, seu *Saxones* dicti non sunt, sed gens quædam peculiaris. Quare licet *Vandalorum* nomen vagari significet, et varii Barbari huc illuc vagando vitam traduxerint, Vandalorum tamen voce peculiaris gens denominata. Ad hæc hi Vandali diversi omnino fuere ab *Slavis*, seu *Sclavis*, *Venedis*, *Vinidis*, aut *Vindilis*, qui Vandali dicti sunt, quod eadem loca postea occupassent, et utrorumque nomina magnam inter se affinitatem haberent. Hi enim populi lingua et moribus prorsus inter se discrepabant; nec ulli magis inter se oppositi quam *Germani* et *Sclavi*. Poloni communiter persuasum habent, *Vandalos* a *Vistula* fluvio, qui universam Poloniam irrigat, nomen traxisse, et fluvium illum *Vandalum* olim fuisse appellatum. Verum nullum hactenus ad id probandum argumentum in medium attingere, et conjecturæ nullis fundamentis innixæ, qualis illa reputanda, ad rem tam densis tenebris sepultam nihil conducere possunt.

10. *Cæteri Barbari a Saracenis primum Vandalii appellati.* — Verum quidem est, *Vandalorum* nomen Barbaris omnibus, qui Europam vagando deprædati sunt post annum Christi quadringentesimum, adscriptum fuisse, sed id non contigit, nisi diu postquam veri *Vandali* excursionses suas fecere. Vandalorum ergo nomen omnibus Barbaris a *Saracenis* primum inditum, quia cum Africam sibi subdidissent, notiores illis fuere Vandali, qui eam incolebant, quam *Gothi* et *Suevi*:

præterquam quod cum *Vandalis* præcipuam Hispaniarum partem alias obtinuerint, inde factum, ut alias, sicut etiamnum, Hispaniam omnem *Vandalous*, et corruptione *Andalos* Mauri appellarint. Neque enim ea sola provincia, quæ ab Hispanis Christianis hodie *Andalusia* dicitur, sed universus Hispaniarum ambitus ab eis *Andalos* nuncupatus. Denique infinitis auctorum, qui octavo, nono, et decimo sæculo vivere, testimoniis probari posset, *Mauros* Hispaniam inhabitantes *Vandalos* dictos fuisse; quod mirum videri non debet, cum ipsimet sese *Andalos* dicerent. Legenda quæ an. cxxvii, num. 16 hanc in rem in medium adduxi. Ex quibus tandem omnibus sequitur, neque *Vandaliam* hoc tempore communiter *Poloniam* dictam esse, nec ab hac varios populos *Vandalos* appellatos. Willichindus et Ditmarus, qui sub finem hujus sæculi florere, et antiqui qui res hoc sæculo gestas in litteras misere, quos nunc Polonos, ipsi *Sclavos*, et *Poloniam*, *Slaviam* de more vocant, non vero *Vandaliam*. Quare Lubienskii opinio non admittenda.

41. *Nullus archiepiscopatus ante annum M in Polonia erectus.* — Lubienskii laudatus, passimque rerum Polonicarum historici nullo fundamento innixi asserunt, tunc *archiepiscopatus* in Polonia institutos, et *Vandaliam* alias tantam latitudinem habuisse. Nam, ut infra videbimus, *Polonia* quidem anno millesimo, quo ad sancti *Adalberti* reliquias venerandas *Otto III imp.* illuc accessit, episcopos habebat, sed tunc primum *Guesna*, quæ sedes regia erat, in metropolim erecta. Neque enim usus ferebat, ut in regionibus noviter lumine fidei illustratis statim *archiepiscopatus* conderetur. Anno Christi millesimo, sanctus *Stephanus Hungariæ* rex e suis præsulibus unum ad *Silvestrum II* papam misit, « ut recens conversæ *Pannoniæ* largam benedictionem impertiret, *Strigoniensem Ecclesiam* sua auctoritate metropolim constitueret, reliquos episcopatus sua benedictione firmaret », inquit *Cartulius* in *Vita* hujus sancti regis; et tamen *Pannonia* seu *Hungaria* jam ab aliquot annis fidem Christianam amplexa fuerat. Imo *Bohemia* *Moguntino archiepiscopo* subjecta fuit, isque *Bohemiæ* reges coronavit, licet in ea sedes episcopales essent, usque ad an. mcccxliv, quo *Clemens V* *Pragam archiepiscopali cathedra* decoravit, ut eo anno num. 8 apud *Spondanum*, fusiusque apud *Baluzium*, in *Vitis paparum Avenionensium*, tom. 1, in *Notis ad tertiam Vitam Clementis V a Bernardo Guidonis scriptam*, legere est. Cum itaque non solum nullus antiquus auctor referat *Poloniam* hoc sæculo *archiepiscopali sede* insignitam fuisse, imo contrarium aliqui asserant, et id tantum anno millesimo contigisse diserte tradant; non video communem illam historicorum *Polonorum* traditionem sustineri posse. Quod enim *Lubienskii* in *Martiali secundo episcopo Plocensi* habet, seriem sc. ipsam *archiepiscoporum Guesnensium* et *Cracoviensium*, eorumque catalogos

illorum opinionem refellere, qui *Poloniam* per aliquot annos *archiepiscopo* caruisse existimarunt, levissimi est momenti adversus auctores coetaneos, et ad rem tanti momenti adstruendam. *Hundius* in metropoli *Salitzburgensi*, et *Henricus Canisius* in *Antiquis Lectionibus archiepiscoporum Salisburgensium*, varios Catalogos, eosque antiquissimos exhibent, in quibus nomina *archiepiscoporum*, qui ab initio sæculi septimi usque ad initium octavi *Salisburgensi metropoli* præfuere, descripta sunt; et tamen eam *Ecclesiam* ante octavi sæculi exordium sedem metropolitani non fuisse certis argumentis me demonstrasse existimo. Hujusmodi itaque Catalogi, si alia desint, aut certa documenta contraria habeant, fidem facere non possunt: neque dubilo, quin *Guesna*, *Cracoviaque*, et aliæ sedes episcopales in *Polonia* hoc tempore erectæ, *archipræsuli Moguntino* usque ad annum millesimum subjectæ remanserint.

42. *Moritur S. Bruno archiep. Coloniensis.* — Ad num. 10. *Rotgerus monachus* in *Vita sancti Brunonis Coloniensis archiep.* a *Surio* ad diem xi Octobris recitata, cap. 41, de ejus morte locuturus ait: « Cum imperator trigesimum regni sui (ab anno scilicet dcccxxvi, non a sequenti, ut putavit *Baronius*, deductum) germanus ejus duodecimum Pontificatus sui ageret annum (quem anno dcdlii inierat) nondum nisi vix prælapsus ætatis quadragessimum, sanctam Pentecostem simul *Coloniæ* celebrantes, qua major mortalibus gloria concessa non est, sese invicem inter sancta solemnium dierum officia, una cum diva matre, sorore regina, nepolibus, filiisque regibus, totaque illa Deo dilecta familia, et cunctis regni senatoribus adfuerunt. Constat enim nullum aliquando locum tanta celebritate, tanto splendore omnis generis hominum, ætatum, ordinum floruisse. Hanc itaque gloriosissimi *Cæsaris Augusti*, et germani ejus, summi et incomparabilis viri *Brunonis archiepiscopi*, fidam Deoque placitam in omni voluntate et opere conjunctionem, hanc conspersionem in omni utilitate et honestate administranda et bene gerenda, hanc jucundissimam vite officiorumque omnium societatem, mors sæva, mors horrenda, mors, inquam, sola diremit ». *Rhemi* obiit quinto idus Octob. in reditu e conventu *Compendiensi*, ubi nepotes suos, id est, *Lotharium Francorum regem*, et *Hugonis Magni filios ab invicem dissidentes, ad concordiam* revocavit. Ejus corpus *Coloniam* relatum, sepultum est « in monasterio monachorum, quod in honore sanctorum *Pantaleonis, Cosmæ et Damiani*, atque *Quirini* extra urbis muros construxit », quod monasterium *Ordinis sancti Benedicti* adhuc perstat. Hoc etiam anno, continuator *Reginonis*, auctor *Chronici Hildesheimiensi*, aliique, mortem ejus consignant. Porro *Rotgerus* annum xxx *Ottonis regis*, non ad celebrationem festi *Pentecostes*, quæ hoc anno die xiv Maii celebrata, sed ad *Brunonis* mortis diem refert. Is *Lothariensis regni* ducalium et episcopatum simul rexit. « Nemo autem super

hac re illum culpabilem dicat », inquit chronographus Magdeburgensis ineditus ; « cum Samuelem sanctum et alios plures, sacerdotes pariter legamus et iudices ».

13. *Moritur Adalbero episc. Metensis.* — *Adalberone*, hujus nominis primo, episcopo Metensi anno superiori demortuo, ut legitur in ejus Epitaphio a Meurissio, lib. 3. Episc. Metensium recitato, idque VI kalendas Maii, ut ex Necrologio Ecclesiae Metensis et Chronico sancti Trudonis part. 2, lib. 3, constat, *Theodoricus* seu *Deodericus* in locum ejus successus est praesenti anno, non vero superiori, ut perperam ibidem habet Meurissius. Continuator enim Reginonis ad annum DCXLV ait, eo anno *imperatore ab Italia redeunte*, Adalberoni Metensi episcopo *Thiedericum* consobrinum imperatoris successorem institutum esse. In Vita ejus versibus a Sigeberto chronographo descripta, et a Meurissio ibidem relata, inter alia dicitur :

A rege clarebat secundus,
Vix alicui sub eo secundus,
Hic consobrinus Caesaris inelyti
Haerebat illi militiae et domi,
Regni ferens partes secundas,
Caesaris alleviansque curas.
Regni per illum cuncta negotia,
Et jura stabant Ecclesiastica.

14. *Nicephorus Phoca Aug. Tarsum obsidet.* — Gesta hoc anno in Oriente Leo Diaconus narrat, ex quo haec in summam contraxi. Imperator *Nicephorus* in Cappadocia hyberna ducens animo discruciabatur, quod *Tarsum* prima statim aggressionem capere non potuisset, sed ab ea haud secus leve telum fortiori impactum repulsus esset ; inviolabiliterque dolebat, quod *Tarsenses*, vicinis undique bello confectis, ipsi soli reliquorum abierint, ejus fortitudinem subsannantes. Moxque « vere illucescente, hyemisque asperitate transacta », pro eo ac jussae erant copiae, ad eum confluebant. Is igitur firmiter armato exercitu ad quater centena millia supraque collecto, sublatoque signo, versus *Tarsum* ibat. Porro *Tarsenses* urbe egressi, firma acie ex adverso constipati stabant : imperator vero ipse quoque robustam fortemque manum sensim e castris educens, mediusque inter cohortes stetit : « cornu dextrum cum confertissima equitum turma ipse tenuit ; in secunda Joannes, cognomento Tzimiscecs, ducis decoratus honore pugnavit : vir irae impatiens nimiaeque audaciae, ac si quis alius calentis animi, quanquam supra modum brevi statura erat, velut qui in fabulis haberetur, vir bellicosus Tydeus. Verum inerat minusculo corpori heroica vis quaedam, ardorque ac impetus, generosusque spiritus ».

15. *Et capit.* — *Nicephorus* vero imperator quod paene inaccessam aggressuque prorsus difficilem urbem noverat, operae pretium duxit eam fami tradere, castraque communire. Quoniam igitur *Tarsenses* cum insuperabili famis necessitate tantisque copiis depugnare haud potis erant, pa-

ciscuntur cum imperatore et urbem certis pactis dedunt. Sic nimirum urbs a *Nicephoro* capta, spoliiorumque parte in milites distributa, assumptisque crucibus ex auro fabrefactis ac margaritis, quas *Tarsenses* variis proeliis fuis fugatisque Romanis ceperant, ad urbem regiam reversus est. Cedrenus narrata Tarsi deditione, ait imperatorem, *Octobri mense, Indictione nona*, Constantinopolim rediisse, additque : « Attulit et Deo donum sui exercitus decimam, venerandas cruces captas, quando scholarum domesticus *Stypeiotes* Tarsum obsidens, imprudentia sua cum omni exercitu funditus deletus : quas etiam sacrosancto templo Dei Verbi *Sophiae* dedicavit ». De clade illa *Stypeiolae*, quae *Basilio* Macedone imperante accidit, Cedrenus, *Porphyrogenneta*, alique agunt.

16. *Ejus expeditio in Bulgaros.* — Imperator, subdit *Leo Diaconus*, justo conscripto exercitu, adversus *Mysos* processit, ac quidem praesidia atque castella Romanis finitima quotquot erant excursionem unoque quasi impetu subegit ; regionem vero considerans eamque saltuosam atque praecipitiis asperam, praeruptamque videns : est enim ora plurimum aquosa valdeque saltuosa, ac undique inaccessis montibus ambientibus clausa, ad *Aemum* atque *Rhodopen* sita, maximisque fluviis circumquaque irrigua, cavendum esse duxit ne Romanas copias incomposito ordine per lubrica parumque tuta loca educens, velut pecora *Mysorum* gladio caedenda praeberet. Aiunt enim haud raro Romanos ibi internecione deletos esse. Itaque Byzantium regressus est, ac quem *Calocyrum* vocant, patricia dignitate auctum (hominem sane audentis omnino ac calentis ingenii) ad *Tauroscythas*, quos vulgo *Rossos* nominant, misit, data quindecim centenariorum auri summa, ejusque fidei commissa ; qua illi accepta, *Mysorum* fines invaderent. Ac quidem ille ad *Tauroscythas* iter contendebat : imperator vero equestres ludos editurus in circo consedit, inter quae jubet intra se posita cohorti, ut in stadium descendentes inque simulatos adversarios strictis gladiis irruentes ad bellum exercerentur. Byzantini vero militum collidentium impetu ac fragore conterriti, atque spectaculi novitate in pavorem acti, domum quisque currebant. Cumque alii alios comprimerent, plurimi miserabilem in modum conculcati ac suffocati sunt : ea res Byzantinorum in imperatorem odii scintilla fuit. Huic comes accessit ejus germani ac *Curopolatae Leonis* scelus : is nimirum virili ac militari pristina indole valere jussa, penuriam tritici rerumque necessariorum inimicam charitatem invexerat, et imperator ipse tributa nunquam hactenus exacta imponebat. Aiunt autem, sive astrologorum quopiam divinate, sive monachorum caelibemque vitam profitentium cujusdam vaticinio praemouente, in imperatoris aurem venisse : « Vitam illi in regia ac palatio explendam, parricidiali civium necato manu. Eo itaque formidolosus pavidusque effectus oraculo, ab altera parte vergente in mare

ad alteram maris partem ducto cœptoque aggere ac terminato, murum qui et nunc cernitur exstruxit, sublimem sane atque validum, eoque regiam ac palatii ædes, ut augurabatur, communiens, ab omni tutas injuria fecit.

17. *Expeditio Sicula Græcorum.* — « Rursus vero incendiarias tuto staburratas ac stabilitas, onerariasque magna armorum militumque copia impletas, in Siciliam misit : ac classi quidem Nicetam patricia dignitate fulgentem (virum religiosum ac venerabilem, tametsi eunuchus erat), ducem præfecit, equestri vero militiæ Manuelem consobrinum suum, vir nimirum calentis ingenii præfractæque audaciæ, propeque furentis animi. Superato itaque mari Adriatico, Siciliamque apulsi cum navibus excendissent, aciem instruxerunt. Tanta vero a principio felicitate, sicque rebus secundis usi sunt, ut ipso clamore atque impetu, clausas urbes longe celebres Syracusam atque Himeram ceperint, præterea quoque Tauromenium et Leontinos in potestatem redegerint. Haud enim vero futurum erat, ut invida fortuna in finem usque plenis eis velis aspiraret, sed ut valido sævoque flatu adverse spirans res naufragio mergeret ; id quomodo evenerit jam oratio palam declarabit.

18. *Infelix fuit.* — « Siculi, cum tantæ vi insuperabilique Romanorum audaciæ atque animis non possent resistere, relictis urbibus atque oppidis, angustias montium subierunt, locisque opportunis in manipulos atque cohortes coierunt ». Manuel igitur, cum par esset acceptas urbes præsidio tenere, omnemque agrum pascuum ac campestria sibi addicere, necnon fugaces a pabulatu, ac quibus reliquis sustentari vita posset, arcere. Sic enim fame exhaustis duorum alterum necessario evenisset, ut vel ipsis Romanis deditionem facerent, vel necessariorum penuria interirent : is vero superioribus jam victoriis ultra modum elatus, per salebrosa præruptaque loca fugaces scrutans insequabatur. Jam vero per eas locorum angustias dissoluta phalange, ac per scopulos scissasque valles et lustra rimasque incomposite effusa, qui priores insidias posuerunt Barbari, strepitu inconditisque vocibus e latebris exiti in eos repente irruerunt. Hi porro inopinato eventu stupefacti prorsusque exterriti, in fugam declinarunt. Barbari vero irruentes, pecudum more Romanos dire jugulabant. « Sublatus ipse quoque Manuel : quotquot vero Romanorum gladii aciem effugere, vivi ab Agarenis capti sunt ac sub jugum missi. Jam autem terrestri exercitu in potestatem redacto ad littus festine accurrentes, quo loco Ro-

mana classis in anchoris stabat, ejus partis plurimæ impetu compotes evaserunt. Captus est et patricius Nicetas, Afrorumque duci missus captivus. Ex tanto itaque exercitu, paucis quodam exiguoque numero fuga lapsi, ad Nicephorum imp. venerunt. Is porro tantarum copiarum audita strage, contristatus quidem est, animoque indoluit, tanto scilicet operæ negotio eventusque sic inauspicato ». Hæc Leo Diaconus.

19. *Hoc anno suscepta.* — Infelicitis hujus expeditionis meminit Leo protospata in suo Chronico ad annum DCCLXV : « Introivit Manuyci patricius in Siciliam, et ibi moratus est ». Ubi Codex Ms. ducis Andriæ recte habet, *Manuel*. Noweirius in Historia Siciliae, quem sequitur Inveges, in suo Chronico prodit, *Manuelem patricium* in Siciliam excensionem fecisse *medio mense Shawal*, anni Hegiræ CCCLII, ideoque die quinta mensis Novemb. superioris Christi anni, subditque *post aliquod tempus* ventum esse ad prælium decretorium, in quo Christiani, postquam diu et fortiter pugnassent, victi, eorum præfectus occisus, paucique fuga salutis suæ consulere potuerunt. Domesticus imperatoris Constantinop. qui cum aliis copiis urbem *Mæsisam* obsidione cingebat, ab eadem destitit, et non multo post, *Rametha*, munitissimum oppidum a Christianis possessum, in Musulmannorum potestatem venit. Siciliae tunc præerat *Ahmedestan* illuc a *Muazzo Lidinilla* Africae califa missus. Tandem pax Domesticum inter et Musulmannos anno Hegiræ CCCLVI (Christi sc. DCCLXVII), composita, et duobus consequentibus annis *Tauromenium* et *Rametha*, urbes a Musulmannis Christianis ereptæ *Muazzi* califæ jussu eversæ ac incensæ, annoque Hegiræ CCCLXV, Christi sc. DCCLXXVI, *Rametha* a Saracenis reædificata, quo anno Christianos inter et eosdem Saracenos bellum in Sicilia renovatum. *Abulcasem* Siciliae amera tribus præliis Christianos superavit, et in quinto ipsemet occisus anno Hegiræ CCCLXXII, Christi scilicet DCCLXXXII. Denique Consentia, vulgo *Consenza*, Calabriae urbs, Ptolemæo, Straboni, aliisque memorata, hoc anno a Saracenis capta flammisque tradita. Ughellus quidem, tomo x Italiae Sacrae, scribit id factum anno DCCLXXV, sed is error typographis attribuentus videtur. Hieronymus enim Marafiniotus, Franciscanus Calaber, in Chronicis et Antiquitatibus Calabriae, in quibus de civitatibus et castris ejusdem provinciae diligenter disserit, dicit id eo tempore contigisse quo *Otto* in Germania erat, et Joannes XIII papa Capuæ exul agebat, ideoque hoc Christi anno.

JOANNIS XIII ANNUS 1. — CHRISTI 966.

1. *Joannes papa revocatur in Urbem, Ottone imperatore in rebelles sæviante.* — Annus sequitur Redemptoris nongentesimus sexagesimus sextus, Indictione nona, cujus autumnali tempore Otto imp. in Italiam rediit, non propter Adelbertum solum adhuc regium nomen gerentem et omnia perturbantem, sed propter Joannem Pontificem, quem a Romanis ejectum accepit : « Tunc Romani (inquit auctor qui apud Reginonem Auctarium junxit) imperatoris metuentes adventum, Rotfredo Urbis præfecto, qui ab Urbe Joannem ejecerat, mortuo, a custodia qua tenebatur, Joannem Apostolicum absolvunt, et veniam pro malis quæ ei ingesserant poscentes, in locum et Sedem suam illum restituunt ». Et paulo post : « Eodem anno, quondam Italiæ rex Berengarius exul moritur, et in Bamberge regio more sepelitur. Cujus vidua Willa antequam sepeliretur, sibi velum sanctimoniale assumpsit ». Hæc ibi.

2. Cæterum, de his quæ spectant ad Ottonis vindictam, qua prosecutus est hostes ipsius Joannis

Romani Pontificis, hæc insuper accipe ex Auctario ad Anastasium : « Præter pulsos consules ex Italia, et tribunos necatos suspendio, præfectum ipsum qui successerat Rotfredo, fuisse nudatum et asino impositum utroque redimitum, ad ludibrium circumductum fuisse, virgis cæsum, carceri demum traditum. Cadaver vero Rotfredi præfecti e sepulchro extractum in diversa loca distractum ac dissipatum. Talia sunt passi Romani in Pontificem perduelles. Exprobravit autem postea Nicephorus imp. Ottoni hanc quam exercuit in Romanos sævitiam, dicens : Romanorum alios gladio, alios suspendio interemit, oculis alios privavit, exilio alios relegavit, et imperii nostri insuper civitates homicidio aut incendio sibi subdere tentavit ». Hæc Nicephorus : quem tamen redarguit legatus Ottonis Luitprandus, ut auditurus eris in ejus relatione ad Ottonem imp. scripta. Porro adventus Ottonis in Urbem in fine anni hujus contigit, cum et diem Natalis Domini ibi celebravit.

Anno period. Græco-Romanæ 6459. — Anno Æræ Hispan. 1004. — Anno Hegiræ 356, inchoato die 17 Decemb., Fer. 2. — Jesu Christi 966.

— Joannis XIII papæ 2. — Ottonis imp. 5. Nicephori Phocæ imp. 4.

1. *Quarta profectio Romana Ottonis M.* — Ad num. 1 et seq. *Ottonem* imp. hoc anno iterum Romam profectum esse testantur continuator Reginonis, Lambertus Schafnaburgensis et chronographus Hildeshemiensis. Est hæc quarta ejusdem imperatoris profectio Romana, non vero tertia ejus profectio Italica, ut perperam tradit idem

chronographus Hildesheimensis. *Otto* enim anno DCCLII Adelhaidem Papiæ sibi matrimonio copulavit, in prima scilicet profectioe sua Italica, cujus respectu hæc quarta fuit. Anno DCCLII *Otto magnus* Romam non venit, ut ibidem diximus. De quarta profectioe Romana hæc continuator laudatus : « Imperator Coloniae Natalem Domini cele-

bravit, cunctaque ibi regni Lothariensis negotia, prout sibi videbatur, disposuit. Erkanbertus Wirtzburgensis cœnobii abbas obiit, et imperator electione monachorum Adelfbertum Rugis ordinatum episcopum eidem monasterio præfecit ». Mabillonius Sæc. v Benedict. in sancto Adalberto archiepiscopo Magdeburgensi primo, ex Chronico Magdeburgensi Mss. recte observat, in isto continuatore pro *Witzburgensi*, legendum esse *Ficemburgensis cœnobii*. Insigne est istud in diœcesi Spirensi monasterium, cujus originem ad Dagobertum regem plerique referunt. *Adalbertum* autem non in insulam Rugiam, sed in Russiam Albam, hodie Moscoviam appellatam, missum fuisse jam suo loco demonstravimus.

2. *Otto M. Longobardorum aulaciam reprimi.* — Pergit idem continuator : « Udo comes conjurationem cum Adelberto Berengarii filio habens, et in Italiam ad excæcandum Waldonem Cumanum episcopum ire disponens, imperatoriæ majestatis reus esse convincitur, et sacramento, ne aliquatenus ullas partes regni præsumat ingredi, regno expellitur... Imperator in Italiam iterum ire disponens, Assumptionem beatæ Mariæ Virginis Wormatiæ celebravit, ibique habito cum omnibus regni majoribus consilio, inde per Alsatiâ et Curiam Alpes transcendens, Italiam intravit, et Sigovulfum Placentinum episcopum, quosdamque ex comitibus Italicis propter Adalbertum priori anno a se deficientes, in Transalpinas partes Franciæ vel Saxoniæ custodiendos direxit... Eodem anno Berengarius quondam Italiæ rex exul moritur, et in Badenberg regio more sepelitur : cujus vidua Willa antequam sepeliretur, sibi velum sanctimoniale assumpsit ». Nulla post hæc mentio occurrit *Adelberti*, qui cum Berengario patre per aliquot annos in Italia regnavit. Sic *Otto* his severitatis exemplis Longobardorum audaciam coercuit, et postea Romam profectus est, ibique Natale Domini celebravit, ut habet continuator Reginonis, qui annum sequentem ab eo die incipit.

3. *Lotharius Francorum rex Emmam ducit.* — Frodoardus antequam Chronicon suum absolvat, ait : « Anno dclxvi, Lotharius rex (nempe Francorum) uxorem accipit, Emmam filiam regis quondam Italici », Lotharii scilicet, qui ante Berengarium II, de cujus morte mox egimus, in Italia regnavit. Ex hoc matrimonio natus *Ludovicus*, dictus *Iners*, qui ultimus regum Francorum secundæ familiæ fuit, ut infra videbimus.

4. *Moritur Frodoardus.* — In fine Chronici *Frodoardi* antiqua manu scriptum legitur, hoc anno Frodoardum Rhemensis Ecclesiæ presbyterum, honore sanctitatis venerandum, quinto kalendas Aprilis terrenæ peregrinationis reliquisset exilia. In Necrologio Ecclesiæ Rhemensis, eadem die, mentio est *Frodoardi*, sed sine tituli gradusve adjectione, teste Sirmondo. Composuit *Rhemensem Historiam* quatuor libris, ex vetustis illius Ecclesiæ Archivis, Conciliorum Actis, Gestis Martyrum,

aliorumque sanctorum Epistolis Pontificum, aliisque Monumentis erutam. Scripsit etiam versibus libros 15 *de Triumphis Italicis martyrum et confessorum* : item libros tres *de Triumpho Christi et rebus sanctorum Palæstinæ* : libros duos *de Triumphis Christi et rebus Antiochiæ gestis*, et ut ipsemet testatur lib. 3 Hist. cap. 6, *miracula* suo tempore facta in Ecclesia B. Mariæ ab Hincmaro ædificata. Sed libri isti nondum editi, præter ultimam partem libri 12 *de Triumphis martyrum et confessorum* a Gregorio II usque ad Leonem VII a Mabillonio Sæc. iii Benedict. part. 2 publicatam, ex Codice Ms. qui extabat Parisiis in Bibliotheca Patrum Carmelitarum Discalceatorum, postea in Arveniam translato in Bibliothecam cœnobii ejusdem ordinis.

5. *Edgari Anglorum régis pietas.* — *Turketulus*, c cancellario Angliæ monachus et abbas Crulandensis creatus, multos litteratos traxit, quorum decem secum schema monachicum susceperunt, cæteri rigorem religionis abhorrentes, adhuc in sæculari habitu permanebant : at nihilominus secum in monasterio habitabant, quia præsentia ejus nullo modo carere poterant, inquit Ingulphus in Historia Crulandensi, qui addit, obtinuisse eum ab Edgardo Angliæ rege, octavo anno regni sui, Dunstano archiepiscopo Cantuariensi sibi familiarissimo et Osketulo cognato suo intercedentibus, Chartam regiam de confirmatione Croylandensis monasterii, quam recitat, et Diploma aliud ab Edgardo rege adversus violatores præfatæ Chartæ, datum anno Dominicæ Incarnationis nongentesimo sexagesimo sexto. Tandem *Turketulus* anno Dominicæ Incarnationis dclxxv. qui erat Edgari regis decimus sextus et ultimus, die undecima mensis Julii spiritum Deo reddidit, inquit idem Ingulphus.

6. *Concordia de uniforme ritu servando in monasteriis Angliæ.* — *S. Dunstani* archiepiscopi Cantuariensis, aliorumque episcoporum, qui pro monachis et monasteriis excubabant, muneris erat, ita fundare monasteria omnia legibusque munire, ut unanimes omnes et unius moris, in domo habitare et Deo servire possent. Is igitur e variis quæ domi forisque didicerat religiosæ vitæ exercitiis Regulam composuit, ad quam omnium Regularium loca componeret, et utrumque sexum Benedictinæ sectæ perfectionem profitentem, cogeret ; non obstante locorum personarumque differentia. Quoniam vero omnium provinciarum intererat, monachorum mores et vitam contemplari ; voluit etiam omnium episcoporum suffragio probari, quod ipse pro monasticæ conversationis sanctitate digesserat. Wintoniam itaque prælati conveniunt, Edgardo rege jubente, ut indicat rei gestæ Proœmium, quod Alfordus hoc anno ex Seldeno, qui illud ex vetustissimo exemplari scripsit, representat. Quod vero in Proœmio Dunstanus scribat de Edgardo : Regali functus officio, veluti pastorem pastor sollicitus, a rabidis perfidorum retibus, uti

hyantibus luporum faucibus, oves quas Domini largiente gratia studiosus collegerat, muniendo eripuit. Casaubonus in Epistola dedicatoria contra Baronium, adversus Ecclesiasticos argumentum sumit, quia ibidem Edgarus a viro Ecclesiastico dicitur pastor pastorum. Verum, ut recte ibidem Alfordus, non dicit Dunstanus Edgarum esse pastorum Pastorem, sed tantum Pastorum veluti Pastorem, quod longe aliud est, cum si pastori similis, simpliciter pastor dici non debuit. Sic Eusebius in Vita Constantini, lib. 4, cap. 22. Ad hunc igitur

modum ille Deo suo, quasi sacerdos quidam, sacra faciebat, et iterum lib. 4, cap. 36, Constantinus Ecclesiæ Dei eximiam et peculiarem curam adhibens: cum quidam inter se in diversis locis dissensione discordarent, tanquam communis episcopus a Deo constitutus, ministrorum Dei coegit Concilium. Constantinum itaque Edgarus imitatus, Concilium illud coegit, et sanctionem publicavit, qua regularis concordia monachorum et sanctimonialium in Anglia viventium stabilitur, quæ legenda tom. ix Concil. pag. 667 et seqq.

JOANNIS XIII ANNUS 2. — CHRISTI 967.

1. *Concilium Ravennæ celebratum.* — Anno Redemptoris nongentesimo sexagesimo septimo, Indictione decima, « Otto imp. (ut apud Reginonem legitur) ubi Natalem diem Domini Romæ celebrasset, Ravennam profectus est una cum Joanne Romano Pontifice, ubi celebrato Paschate plurimos ex Italia et Romania episcopos coadunavit, et habita Synodo, nulla ad utilitatem sanctæ Ecclesiæ adinvenit. Et Apostolico Joanni urbem et terram Ravennatum, aliaque complura multis retro temporibus Romanis Pontificibus ablata reddidit, eumque inde Romam cum magna lætitia remisit. Ipse vero in partes Tusciæ secedit ». Hæc de his apud Reginonem. Verum ista de restitutione ablatorum facta jam fuerant, ubi Otto a Joanne duodecimo coronatus est Romæ scriptoque Diplomate insinuata, atque ipsius imperatoris et episcoporum ac comitum subscriptione firmata. Quamobrem quæ hic in Concilio Ravennate hac de re facta dicuntur, nihil præterea quam confirmatio præteritæ concessionis fuisse videntur, cum aliquo additamento, nimirum ejus quæ a Leone papa concessa fuerat ipsi Ottoni imp. promissionis, ut apparet ex eodem Diplomate superius recitato.

2. *De coronatione Ottonis filii.* — Quæ autem post hæc ab eodem imperatore gesta sint, sic accipe ex dicta ad Reginonem Appendice: nimirum papam Joannem invitasse Ottonem imp. ad celebrandum Natale Domini Romam. Misisse autem hoc anno Ottonem legatos ad Willelmum archiepiscopum Moguntinum et ad alios Germaniæ principes, ut filium suum Ottonem in Italiam mitterent ad im-

periales infulas suscipiendas, Lambertus testatur; anno vero sequenti Romæ coronatum, Sigebertus affirmat. Sed anno superiori id factum docet antiquum Diploma monasterii S. Felicitatis Florentiæ sub Sirhelmo episcopo Florentino, cujus exordio numeratur annus Magni Ottonis imp. undecimus, Ottonis filii vero imperii quintus. Datum mense Septembri, inchoante Indictione prima. Ita ut anno superiori id factum appareat in fine ipsius, die Natali Domini, si annos numerare incipias a kalendis Januariis (ut nos facimus), sin vero a Natali Christi die, hoc anno, primo ejus die ipsum coronatum opus est affirmare. Quo anno aliud Diploma ejusdem Ottonis senioris datum reperitur monasterio S. Vincentii ad fontes Vulturni, in cujus fine (quod ad certa cognoscenda tempora spectat) hæc leguntur: « Ambrosius cancellarius ad vicem Huberti episcopi, et archicancellarii recognovi et probavi. Datum pridie kalend. Jul., anno Dominicæ Incarnationis nongentesimo sexagesimo septimo, imperii vero domini Ottonis serenissimi Caesaris sexto, Indictione decima. Actum in monasterio, ubi Stabulum-Regis dicitur, in Dei nomine feliciter. Amen ».

3. *Obitus Sancii regis in Hispania.* — Quod pertinet ad rerum Hispanarum statum, luctuosus quidem ille fuit. Moritur enim hoc anno ¹ Sancius, cognomento Crassus, rex Legionensis in Hispania, cum regnasset annos duodecim, qui urgentibus bellis civilibus, Ordonio, cognomento Malo, ad-

¹ Ambr. Moral. Chron. Hisp. l. xvi. c. 30.

versus eum erecto, et aliis ab eodem in illum excitatis, ad Arabum opem implorandam confugit ad regem Abraham Cordubæ regnantem, a quo impetravit translationem Pelagii martyris, de quo dictum est supra. Sicque Christianorum discordia, potentia Arabum sub prædecessoribus regib. inclinata, in damnum ipsorum magis ac magis inva-

lescit. Successit autem ipsi ejus filius Ramirus, ejus nominis tertius, quinque annorum puer sub tutela matris Teresiæ. Cæterum quod ad rationem temporum spectat, exacte redditam habes ab Ambrosio, quem veritate constantiorem in his sequimur.

Anno periodi Græco-Romanæ 6460. — Anno Æræ Hispan. 1005. — Anno Hegiræ 337, inchoato die 6 Decemb., Fer. 6. — Jesu Christi 967.

— Joannis XIII papæ 3. — Ottonis imp. 6. Nicephori Phocæ imp. 5.

1. *Concilium Ravennense.* — Ad num. 4. Concilium Ravennense hoc anno celebratum juxta continuatorem Reginonis, qui ait: « Otto imperator Romæ Natalem Domini celebravit, et excepto præfecto Urbis, qui aufugerat, tredecim ex majoribus Romanorum qui auctores expulsionis Domini Joannis papæ fuerant, suspensio interire jussit. (Vides Ottonem, sicuti ante eum Carolum M. et alios, supremo jure in Romanos a Joanne XII donatum fuisse). Inde progrediens per Spoletum, Ravennam adiit, ibique Pascha celebrans cum domino Joanne papa, plurimos ex Italia et Romania episcopos coadunavit, et habita Synodo multa ad utilitatem S. Ecclesiæ adinvenit. Et Apostolico Joanni urbem et terram Ravennatium, aliaque complura multis retro temporibus Romanis Pontificibus erepta (quæ scilicet Berengarii occupaverant. ut recte Rubeus in Hist. Ravenn. lib. 5, pag. 261) reddidit (seu data anno DCCLXII confirmavit), eumque inde Romanam cum magna lætitia remisit ». Ex his verbis etiam liquet, quod jam supra insinuavimus, reges sc. Italiæ nullum jus, neque in urbem, neque in ducatum Romanum, neque in exarchatum Ravennensem habuisse, ideoque quæ ipsi usurpaverant, Ecclesiæ Romanæ restituta, et donationes a Pipino et Carolo M. factas ab Ottone confirmatas fuisse.

2. *Institutio archiepiscopi Magdeburgensis.* — Tom. IX Concil. pag. 675, refertur ex Chronico Magdeburgensi Ms. archiepiscopatus Magdeburgensis institutio in hoc Concilio peracta: « Serenissimus imperator Augustus Otto », inquit chronographus, « qui eandem S. Synodum ob communem imperii sui salutem congregaverat, plurimas Sclavorum nationes ultra flumen Albiæ in confinio Saxonie, multo se labore et maximis sæpe periculis ad Christum convertisse, coram omnibus retulit :

rogans, ut quod ipse summo studio Deo mancipaverat, pastoris negligentia ad vomitum redire non sineret. Hujus dignam relationem et tantam fidei confessionem sancta Synodus benigna aure suscipiens, Deoque in his omnibus gralias agens, tot Sclavorum populos ad Deum noviter conversos, nonnisi per episcopos in convenientibus locis in unaquaque eorum provincia, secundum populi quantitatem, in rationabilem terræ divisionem constituendos, ad hoc animari atque erudiri posse censuit ». Paulo post: « Est civitas in parochia Halberstadensis episcopii, Magdeburg dicta, in confinio Saxonum et Sclavorum, in ripa fluminis Albiæ, in qua isdem serenissimus Cæsar populi multitudinem adunavit, Ecclesias construxit, plurimorumque martyrum, beati scilicet Mauricii et Innocentii, aliorumque innumerabilia corpora sanctorum illuc transferens, canonicosque inibi Deo famulantes constituens, ad eorundem victum et Ecclesiæ utilitatem, castra, villas, prædia, decimasque cum universis adjacentiis affluenter ex proprio concessit. Placuit igitur omnibus apud prædictam civitatem Magdeburg archiepiscopalem fieri cathedram, eo quod hæc in confinio Sclavorum, ut prædiximus, loco videretur opportunior, et in ejus propagatione voluntas imperatoris esset amplior, etc. »

3. *Heroldus archiepiscopatu Saltzburgensi depositus excommunicatur.* — Præterea in Concilio Ravennensi Heroldus Salisburgensis archiepiscopus depositus et excommunicatus; Fredericus vero ejus loco archiepiscopus creatus, ut docet Epistola Joannis papæ XIII Patribus Ravennensibus data, in cujus fine legitur: « Actum Ravennæ, VII kal. Maii, per manum Stephani scriniarii S. Romanæ Ecclesiæ, in mense Aprili, et Indictione x, in præsentia omnium sanctorum episcoporum ».

Anno DCDLIV, ut ibidem num. 1 ostendimus, Heroldus ob rebellionem excæcatus fuerat, et tamen non desistebat « contra canonicam et Apostolicam auctoritatem, nefaria præsumptione, post suorum oculorum amissionem sacrum celebrare mysterium, et quod ridiculum est, pallium gestare solemniter. Hoc namque, » inquit Pontifex in laudata Epist., « non ad modicam hæreseos vesaniam attinet, et nobis omniumque fratrum orthodoxorum prudentiæ debet videri execrabile, præsertim cum ipse pro sua culpa et perfidiæ temeritate exculatus sit, eo quod Ecclesias Dei expoliaverit, thesaurum paganis erogaverit, seque eis junxerit in Christianorum necem et deprædationem, contra dominum imperatorem suum seniore[m] rebellis et infidelis extiterit, et proinde a decessoribus nostris sanctæ memoriæ Pontificibus omne sacerdotale officium sæpe ei sit interdictum, atque electione et postulatione omnium pæne nobilium, Bavariorum scilicet clericorum et laicorum, sancta Romana mater Ecclesia, suæ auctoritatis privilegio, Fridericum, virum venerabilem et cunctis laudabilem, loco ejusdem Heroldi fieri, esseque archiepiscopum omnino decreverit ». Quapropter idem Pontifex decessorum suorum auctoritatem sequens, et Patrum Ravennensium assensione roboratus, ipsius *Heroldi* hæreticam et temerariam pravitatem damnat, eique communicantes excommunicat, ac jam dicto Friderico dignitatem Saltzburgensis archiepiscopatus confirmat. Porro ex ea Epistola die xxv mensis Aprilis data, Ravennensis Concilii epocha constituenda. Extat ea tom. ix Concil. pag. 674. Præterquam quod eandem Regino citatus accurate notat.

4. *Duo Concilia Ravennensia distinguenda.* — Verum duo Concilia Ravennensia distinguenda, quorum alterum hoc anno, alterum insequenti indictum. De priori tantum loquitur Baronius, et ex eo collectores Conciliorum, in eoque institutio archiepiscopatus Magdeburgensis rata habita. In secundo, anno DCDLXVIII celebrato, ad finem perductum quod hoc anno circa Magdeburgensis archiepiscop. institutionem inchoatum fuerat. Utriusque Concilii diserta mentio in Instrumento de institutione hujus archiepiscopatus, relato a Labbeo tom. ix Concil., et a Meibomio in fine suarum ad Witichindum Notarum pag. 408, sed Instrumento a Labbeo recitato a quopiam interpolatore male additus est annus Incarnationis DCDLXVII, qui rectius abest ab exemplari quo usus est Meibomius; certum enim illud anno tantum sequenti exaratum fuisse, ut ex ejus lectione manifeste liquet. In eo de prima Synodo dicitur: « Habita est Synodus Ravennæ in suburbio, in Ecclesia beati confessoris episcopi Severi, residentibus domno Joanne Summo universali Pontifice, et pluribus Italiæ, Germaniæ et Galliæ præsulibus, et de statu Ecclesiæ tractantibus, adstante etiam innumerabili clero et populo ». Otto Augustus sanctam Synodum consuluit, rogans, ut quod ipse summo studio Deo mancipave-

rat, pastoris negligentia ad vomitum redire non sineret. Synodus judicavit, tot Sclavorum populos ad Deum noviter conversos, ab archiepiscopo regi et erudiri oportere. « Placuit igitur omnibus apud prædictam civitatem Magdeburg archiepiscopalem fieri cathedram, eo quod hæc in confinio Sclavorum loco videretur opportunior, et in ejus propagatione voluntas imperatoris esset amplior. Ad hæc imperator precibus et Dei voluntate commotus, sanctæ congregationis decreto paruit, et hoc privilegio Apostolicæ Sedis corroborari dignum duxit: quod et actum est, et a Summo Pontifice omnibusque præsulibus Italiæ, Galliæ et Germaniæ qui aderant, propriis manibus corroboratum. Cæterum, quia præsul Halberstadensis Synodo huic non affuit, causæ clausulam in ejus adventum differre placuit, ut civitatem ipse a debito subjectionis absolveret, et tunc demum privilegium et subscriptio illibata fierent ». Hæc de priori Synodo Ravennensi hoc anno congregata, quæ etiam a chronographo Magdeburgensi laudato pag. 272, iisdem fere verbis narrantur.

5. *Quid actum sit in II Conc. Raven.* — De secunda Synodo Ravennensi, in præfato Instrumento, post recitata ex eo verba statim subjicitur: « Eo ergo revoluto anno (nempe DCDLXVII), et altero dimidio transacto, cum Hattonem archiepiscopum Moguntiacensem et Hildiwaldum episcopum Halberstadensem Ravennam convenire contingeret, sanctissimus imperator, si bona voluntate commutationem parochiæ Halberstadensis Ecclesiæ ad Magdeburgensem fieri vel coram archiepiscopo Ravennate et episc. comprovincialibus, eos omni dilectione convenit. Tunc venerabilis Hildewardus episc., in præsentia omnium et prædicti præsulis Hattonis, hoc se pro Deo nullo modo negare et contradicere posse ». Deinde narratur concambium inter Ecclesiam Magdeburgensem et Halberstadensem in Synodo factum, idque anno sequenti, post annum nempe et dimidium a priori Synodo, quæ ideo post Pascha habita fuerat. Idem legitur in citato Chronico Magdeburgensi, in quo etiam dicitur: « Huic etiam concambio confirmando Petrus Ravennæ archiepiscopus, et plurimi episcoporum Italiæ et Germaniæ subscripsere. anno Dominicæ Incarnat. DCDLXVIII, Indictione duodecima, imperii autem ipsius domini Ottonis VII, regni vero XXXIV », sed loco *regni* XXXIV, legendum *regni* XXXIII: certum enim Ottonem annos regni ab anno DCDXXXVI deduxisse. Porro ex Indictione XII kal. Septembris in Italia an. DCDLXVIII incæpta, apparet secundum Concilium Ravennense post illum diem celebratum.

6. *Adelbertus post Conc. Raven. II pallium Romæ accipit.* — Paulo post, chronographus Magdeburgensis ait, Ottonem imp. Adelbertum, « qui dudum Treviris de cœnobiosancti Maximini monachus, abstractus et episcopus consecratus ad prædicandum Rugis (id est Rufiis) fuerat destinatus, Romam pro pallio et privilegio ab Apostolica Sede susci-

piendo, cum litteris suæ auctoritatis direxisse. Sedit eo tempore in clavigeri cælestis Petri cathedra, gratia et nomine Joannes papa nominis illius XIII, in ordine vero Rom. Pontif. cxxxvi. Ille igitur benignissime illum suscipiens, proprio studio gloriosissimi imperatoris, quod in amplificatione divini cultus habebat gaudens, ideoque justis ejus petitionibus annuens, illum Apostolica auctoritate archiepiscopum fore ejusque successores decrevit. Cui et pallium ad missarum solemniam celebranda dedit, et ipse nimia dilectione commonitus, XV kal. Novemb. id est, in festo sancti Lucæ Evangelistæ ordinavit (id est pallium concessit) et Privilegio Apostolicæ auctoritatis sanxit, ac confirmavit, eum in ordine Ecclesiastico primatum habere omnium Ecclesiarum archiepiscoporum qui in Germania sunt ordinati, in Gallia quoque, Coloniensi, Trevirensi archiepiscopis, per omnia honore similem esse, etc. Præterea statuit eum esse metropolitani totius ultra Salm et Albiam Slavorum gentis tunc ad Deum conversæ vel convertendæ, et ut secundum desiderium imperatoris in his civitatibus, in quibus olim barbari ritus maxima viguit superstitio, id est Cizi, (sen Zitiae vulgo *Heitz*, in Misnia provincia sitæ, quæ sedes postea Neoburgum, vulgo Naumburg, in eadem provincia positum translata) Misni, (sen Misnæ, vulgo Meissem, in Misnia regione sitæ) Merseburg, (quæ urbs est ejusdem provinciæ) Brandenburg, Havelberg, Pornam, legendum, *Poznam*, (quæ urbs Poloniæ inferioris Posnania nunc appellata, vulgo Posnam) in honorem Domini episcopia fundarentur, quorum, pastores secundum canonicam auctoritatem Magdeburgensi episcopo fidem et subjectionem debendo sociarentur ».

7. *Episcopatus Brandenburgensis et Posnaniensis ante hoc tempus fundati.* — Quibus tamen ex verbis male quis colligeret, omnes illos episcopatus post annum dcdlxviii fundatos fuisse. Idem enim chronographus pag. 271, de conditu urbis Magdeburgensis, quem ad initium regni Ottonis M. refert, verba faciens, ait : « Non longo post tempore, ipse (sc. Otto) in terra Slavorum Brandenburg beato Petro Apostolorum principi, et Havelberg Dei Genitrici episcopatus duos construxit, et Moguntiae metropolis suffraganeos esse constituit ». Ad hæc Ditmarus lib. 3, pag. 32, tradit, « Brandenburgensem episcopatum xxx annos ante Magdeburgensem constitutum ». Quare cum Magdeburgum hoc anno sede archiepiscopali exornatum fuerit, Brandenburgum episcopali sede donatum circa annum dcdxxxvii. Denique idem Ditmarus lib. 2, pag. 20, loquens de episcopis hoc anno consecratis, de quibus mox : « Additus est, inquit, his confratribus Brandenburgensis Ecclesiæ pastor Ditmarus ante hos unctus, et Jordan episcopus Posnaniensis », de quo an. dcdlxv sermonem habuimus.

8. *Adelbertus anno dcdlxviii inthronizatus.* — Sed redeo ad chronographum Magdeburgensem, qui pergit : « His et aliis, quæ privilegia adhuc inibi

consecrata (legendum conservata) testantur Synodali decreto (in secunda Synodo Ravennensi anno sequenti indicta) ordinatis, et interminatione Dei et Apostolici nominis confirmatis, præfatus archiepiscopus, cum legatis Romanæ Ecclesiæ, Widone scilicet episcopo bibliothecario (episcopo cardinali Sylvæ candidæ, ejus mentionem facit Luitprand. lib. 6, c. 6, de quo etiam Ciampinius in Catalogo Bibliothec. Sedis Apostolicæ pag. 21 et seq.) et Benedicto cardinali (archidiacono Ecclesiæ Romanæ, qui subscripsit Privilegio a Joanne XIII Ecclesiæ Beneventanæ concesso, de quo Ughellus in episc. Beneventanis tom. viii), qui illum cum Hildewardo Halberstadensi episcopo sedi suæ inthronizarent, dimissus ad imperatorem remeavit lætus, quem imperator nihilominus gaudens, utpote beati desiderii sui compos, cum litteris commendatitiis Magdeburgum destinavit. Ille ergo ex præcepto imperatoris, episcopi, marchiones et reliqui Saxonie principes convenientes, ipsum honorifice susceperunt, et vocum acclamatione manuumque elevatione electum cum præfatis Apostolicæ Sedis legatis celebri ritu inthronizaverunt. Adfuit omnis sexus et ætas gaudentium, fuit prorsus generale tripudium, ubi ad confirmationem sui idem archiepiscopus in præsentia eorundem, Nativitatem Domini secum celebrantium, Bosonem monachum Merseburgensi, Burchardum Misnensi, Hugonem Cizensi Ecclesiis primos episcopos ordinavit, et Aldagum, primum Ecclesiæ præpositum Magdeburgensem instituit. Dudo quoque Havelbergensis, et Dudellinus Brandenburg episcopi, prius quidem Moguntino archiepiscopo subjecti, sed tunc agente imperatore a debita sui obedientia absoluti, Magdeburgensi Ecclesiæ et ejus archiepiscopo, cum præfatis confratribus fidem et subjectionem promiserunt ».

9. *Ab eo anno ejus inthronizatio non potest removeri.* — Adalbertum anno dcdlxviii Magdeburgensi archiepiscopatu præpositum fuisse, indicat non tantum chronographus Magdeburgensis a Meibomio editus, sed etiam alter chronographus Magdeburgensis ineditus disertis verbis prodit. Hæc ejus verba : « Quem (nempe Adalbertum) et Romam pro pallio a domno papa suscipiendo direxit (sc. Otto). Dominus autem papa Joannes, illius nominis XIII, et prius Narniensis episcopus, justis petitionibus annuens, nihilque tarditatis impendens, privilegio Apostolicæ auctoritatis eum dignum archiepiscopum decernens, pro amore beati Maritii et Innocentii, et sanctorum qui in Magadaburg requiescunt, et prædicti imperatoris pallium ad missarum solemniam celebranda dedit, anno Dominicæ Incarnat. dcdlxviii, Indictione xii, (a mense Septembr. inchoata) XV kal. Novembris, hoc est, in festivitate sancti Lucæ Evangelistæ, anno Pontificatus ipsius domini Joannis universalis papæ quarto. Tunc imp. misit eum ad sedem suam cum magno honore, præcipiens universis Saxonie principibus, ut proximum Natale Domini cum eo essent ». Ad hæc, cum eodem Christi anno archiepiscopatus

Adalberti initium chronographus Hildesheimensis connectit. Denique Paulus Langius in Chron. Citi- zensi, ipso initio operis et iterum infra, asserit Hugonem primum Citizensem episcopum consecratum fuisse anno Incarnationis Dominicæ DCCLXVIII, et postea semel et iterum Ditmarum laudat, ex quo ideo id accepit. Ditmarus quidem lib. 2, pag. 20, scribit Adalbertum « anno Dominicæ Incarnat. DCCLXX. XV kal. Novemb. ad archiepiscopatus apicem » promotum esse, sed error est in numeris. Ditmarus quippe hoc ignorare non potuit, qui acta publica viderat, ex quibus quæ ipse, et uterque chronographus Magdeburgensis habent de archiepiscopatus Magdeburgensis initiis, descripta sunt. Errat etiam Adamus Bremensis, cujus verba recitat Baronius anno DCCLXXI, num. 11, qui arbitratus est, *Adalbertum*, anno Ottonis xxxv, archiepiscopum Magdeburgensem renuntiatum; quem Ottonis annum Baronius ab anno DCCLXXVII deducens, ex eo infert, *Adalbertum* anno DCCLXXI dictum archiepiscopum; Adamus enim corruptum Ditmari Chronicon hac in re secutus est, ut et passim alii, quia usque ad nostra tempora utrumque Chronicon Magdeburgense latuit.

10. *Otto rex Germaniæ Romam petit.* — Ad num. 2. Continuator Reginonis Concilii Ravennensis mentione facta, subdit: « Interim papa Joannes et imperator regi Ottoni (eiusdem imperatoris filio) litteras invitatorias miserunt, et ut cum ipsis ad Natalem Domini Romæ celebrandum festinaret, jusserunt. Tunc rex pro disponendis regni negotiis ante suum in Italiam iter, Wormatiam venit, ibique in primo suo Placito, Deo propitio, plurima futuræ prudentiæ simul et clementiæ indicia præmonstravit..... Domino imperatore in Italia commorante, legati Nicephori Græcorum imperatoris Ravennæ ad eum venerunt, honorifica secum munera ferentes, et pacem ab eo vel amicitiam poscentes. Quibus honorabiliter susceptis decenterque remissis, dominus imperator nuntium suum eidem Græcorum imperatori, pro conjungenda in matrimonium suo filio regi Ottoni privigna ipsius Nicephori, filia scilicet Romani imperatoris (sc. Junioris, mariti Theophanonis, quam post illius mortem Nicephorus duxerat) Constantinopolim dirigit: qui iterum eodem anno ante Natalem Domini ad imperatorem revertitur. Eodem anno, intrante Septembri mense, Otto rex (Ottonis imp. filius) Romam iturus, decenti se comitatu egressus, memoriam sancti Michaelis in Augusta civitate celebravit ». Quibus verbis auctor iste anonymus, qui sicuti Regino, annum a Nativitate Domini auspiciatur, continuationem suam absolvit, ideoque de Ottone in consortium imperii a patre adscito verba non facit.

11. *Coronatur imperator.* — Eum enim in Nataliis Christi a Joanne XIII coronatum esse imperat. ipsemet Otto Senior asserit apud Baronium anno sequenti, num. 3. Currenti vero, ut testatur chronographus Hildesheimensis, « transmisit impera-

tor legatos suos ad Willelmum archiepiscopum, et ad alios principes ejus, ut Ottonem filium suum æquivocumque ejus, cum omni regali dignitate proveberent ad Italiam. Illicque ipse Otto Senior suscepit eum, et secum deduxit Romam, commendavitque illum Apostolico Joanni Posteriori, ut ab eo Augustalem benedictionem reciperet, et imperator Augustus foret appellatus a cunctis, qui eum agnovissent veluti pater ejus ». Ottonem II hoc anno imperatorem dictum, scribunt etiam Lambertus Schalnaburgensis, et Sigebertus in Chronicis. Sigebertus enim qui hanc coronationem cum anno sequenti copulat, annos Christi a die Nativitatis ejus exorditur, ut non semel supra observavimus. Baronius eam in annum superiorem confert, innixus subscriptione cujusdam Diplomatis, in quo mense Septemb. annus xi Ottonis M. cum anno v imperii Ottonis et Indictione prima jungitur. Verum fallitur cardinalis eruditissimus; cum annus v Ottonis II, a præsentis anno deductus, adhuc in cursu fuerit anno DCCLXXII, quo Indictio prima mense Septembri cæpit.

12. *Moritur Sancius Legionis rex.* — Ad num. 3. *Sancius Crassus* Galliciæ seu Legionensis rex, qui anno DCCLV regnum inierat, illudque annos duodecim tenuit, hoc anno mortuus est, quo Saracenis Hispaniæ præerat *Athacam*, at non vero *Abraham*, ut errore librariorum apud Baronium legitur. Mentio mortis Sancii regis in Vita sancti Rudolfi episcopi Dumiensis a Stephano Cellæ Novæ sæculo xii monacho scripta, et Sæculo v Benedict., ac in Actis SS. Bollandianis ad diem primam mensis Martii recitata. In ea num. 4 legitur: « Ecclesia Apostolica Compostellana per Sisnandum Rudesindi consanguineum regebatur. Hic Sisnandus Indis, excessibus et vanitatibus attendens, officii sui curam parvipendebat: imo flagitiosus populo, clero et proceribus et regi Sancio infensus erat. Rex post admonitionem Sisnandum incarcerationavit, et annuente clero et populo Rudesindum, substituit, ut consanguinei sui defectus suppleret. Ille novum episcopatum accipere nolebat: sed rex cum magnatibus contendit, quousque consensit et accepit. Hoc tempore, absente rege (Sancio sc.) Gallæcia a Normannis invadebatur, et Portugallia a Mauris devastabatur. Rudesindus, exercitu congregato, confidens in misericordia divina magis, quam in illo, repetensque versiculum Psalmi (xix, 8): *Hic in curribus, et hic in equis; nos autem in nomine Domini nostri invocabimus*, Normannis et Mauris obiavit; Nortmannos, favente Deo, ex Gallæcia expulit; Mauros sic repressit, ut intra terminos suos contineri coegerit. Victor ab Compostellæ civibus communi gratulatione receptus est. Post pauca Sancius rex moritur ». Quid postea contigerit, anno DCCLXX narrabimus. *Sancio* successit *Ramirus III* ejus filius, annos tantum quinque natus.

13. *Boleslaus Pius Boleslao Sævo patri in ducatum Bohemæ succedit.* — In Ms. Chronico Magdeburgensi habetur: « Anno Dominicæ In-

carnat. DCCLXVII, idus Julii, dux Bohemiæ, cui agnomen Sævus Bolizlaus, male mercatum fraterno sanguine, scilicet beati martyris Wenezlai, (seu Wincelai) Bohemiæ ducatum cum vita amisit. Cui filius ejus æquivocus suus in principatu successit, multum dissimilis patri moribus bonis, et conversatione spirituali. Erat enim vir Christianissimus, fide catholicus, pater orphanorum, defensor viduarum et clericorum et peregrinorum, præcipuusque Ecclesiarum fundator. Nam, ut in Privilegio Ecclesiæ sancti Gregorii in Praga legitur, xx Ecclesias erexit, et eas omni Ecclesiastica utilitate ampliavit». Idem narrant Æneas Sylvius in Hist. Bohem. cap. 13 et seq. Dubravius in Hist. Bohem. lib. 3 et initio seq. et Cosmas Pragensis decanus in Chron. Bohem. totidem fere verbis ac chronographus Magdeburgensis, qui pergit scribens :

14. *Institutio episcopatus Pragensis.* — « Hujus fuit soror, nomine Mlada, virgo sacra, litteris erudita, quæ cum orationis gratia Romam venisset, et a papa Joanne XIII hujus nominis benigne suscipitur, ibique aliquandiu degens, monasticis disciplinis imbuitur. Dehinc papa consilio cardinalium, imo volens novæ Ecclesiæ subvenire, consecrat eam abbatissam, mutato nomine MARIAM, dans ei sancti Benedicti regulam et abbatialem virgam. Quæ Pragam rediens, et a fratre suscepta, ei obtulit litteras Apostolici. » Recitantur eæ Sæc. v Benedicti. pag. 833, ex eodem chronographo, datæque sunt, *Bolezlao Catholicæ fidei alumno.* « Annuiamus et collaudamus », inquit Pontifex, atque inanonizamus, ut ad Ecclesiam sancti Viti, et sancti Wenezlai martyrum fiat sedes episcopalis : ad Ecclesiam vero sancti Georgii martyris sub regula sancti

Benedicti, et obedientia filiæ nostræ MARIÆ sororis tuæ, constituatur Congregatio monialium. Verumtamen non secundum ritum, aut sectam Bulgaricæ gentis, vel Ruziæ aut Slavonicæ linguæ : sed magis sequens constituta et decreta Apostolica, unum potioem, ad placitum Ecclesiæ totius, eligas in hoc opus clericum, latinis apprime litteris eruditum.

15. *Dietmarus primus ep. Pragensis.* — « Statim, ut jussum fuerat », inquit chronographus Magdeburgensis, « consilio ducis et abbatissæ Ecclesia sancti Viti decernitur futuro episcopo, et Ecclesia sancti Georgii martyris ad præsens datur abbatissæ, sorori ducis, Mariæ. Igitur quidam de Saxonia, vir eloquens ac litteratus, ordine presbyter ac professione monachus, nomine DIETMARUS, olim causa orationis venerat Pragam : qui duci cognitus, et amicitiam ejus adeptus, præsertim quia Slavonicam linguam perfecte sciebat. Hunc per legatos evocat. Tunc clerum et primates terræ ac populum convocans, precibus et monitis efficit, ut eum sibi in episcopum eligant. Qua re, postera die peracta, ad imperatorem Ottonem eum direxit, orans per litteras, ut in episcopum Bohemis ordinaretur. Quod imperator consilio principum et præsulum, consulens Christianæ novitati, fieri jussit. Qui a Moguntino archiepiscopo (Willelmo nempe ejusdem imperatoris filio) consecratus, in civitate Praga, modulante clero et duce, populoque concinente susceptus, Ecclesias a fidelibus in multis locis constructas consecravit, et multos Gentiles baptizavit ». Porro Bohemos sæculo præterito a *sancto Methodio* fidem Christianam accepisse ibidem ostendimus.

JOANNIS XIII ANNUS 3. — CHRISTI 968.

1. *Otto imperator in Apulia legatos Nicephori imperatoris recipit.* — Annus Redemptoris sequitur nongentesimus sexagesimus octavus, Iudictione xi, quo Otto imper., coronato filio Ottone Juniore, in Campaniam proficiscens, apud Capuam legatos Nicephori imp. audit. Quæ autem cum illis transacta essent, his litteris ad suos, præcipue Germanos datis¹ significavit :

2. « Otto, divino nutu imperator Augustus, Hermannō et Theodorico ducibus, cæterisque publicæ rei nostræ præfectis omnia amabilia.

« Deo volente, salus omniaque prospere succedunt. Cæterum nuntii Constantinopolitani regis dignitate satis insignes nos advenit, pacem, ut intelleximus, admodum quærentes. Quoquo modo res geratur bello, Deo volente, nos nullo modo tentare audebunt. Apuliam et Calabriam provincias, quas hactenus tenere, nisi convenia-

¹ Apud Vitic. l. 111. in fin.

mus, dabunt: si vero voluntati nostræ paruerint, præsentī æstate conjugem cum æquivoco nostro, Oltone scilicet Juniore, in Franciam dirigentes, per Fraxinetum, ad destruendos Sarracenos, Deo commite, iter arripiemus, et sic ad vos disponemus.

3. « Præterea volumus, si Redares (sicut audivimus) tantam stragem passi sunt, scitis enim quam sæpe fidem fregerint, quas injurias attulerint ut nullam nobiscum pacem habeant. Unde hæc cum Hermanno duce ventilantes totis viribus instate, ut in destructione eorum finem operi imponatis. Ipsi, si necesse fuerit, ad eos ibimus. Filius noster in Nativitate Domini coronam a Domino Apostolico in imperii dignitatem suscepit. Scripta decimo quinto kal. Februar. in Campania, juxta Capuam ». De rebus ab Oltone gestis adversus Græcos Apuliam et Calabriam occupantes, antiquus auctor, qui res Longobardorum principum est prosecutus, Rencpertus nomine, quem Erchempertum¹ Leo Ostiensis appellat, pluribus narrat.

4. *Ingens penuria Constantinopoli, unde certum tempus legationis Luitprandi episcopi Cremonensis.* — Porro principes Beneventanum et Capuanum recepit Otto imperator in tutelam suam, cum defecissent illi a Nicephoro imp., cujus rei causa idem Nicephorus valde commotus est in Ottonem, ut in sua relatione affirmat Luitprandus, de quo dicturi, primum omnium, quis status esset rerum Orientalium anni hujus, aperiendum. Inter alia mala quibus obruebatur, hoc anno ingenti exorta penuria, quam Nicephorus imperator in suum lucrum convertens, auctum est civium in eum immensum odium.

5. De causa autem penuriæ hujus ista Curopalates: « Flarunt etiam venti mense Maio, eadem undecima Indictione, sævi et æstnosi, qui fruges una cum ipsis vitibus atque arboribus corrumpere, ita ut inde usque ad duodecimam Indictionem ingenti fame laboratum sit. Cumque habenda esset ratio imperatori salutis eorum qui sibi subjecti erant, ille vero regium frumentum sordide et illiberaliter vendens, studensque civium suorum calamitati, gloriabatur quasi aliquid præclare egisset, quod cum modius numismate venderetur, ipse duobus vendi imperasset, haud imitatus Basilium Macedonem imperatorem qui nova Dominica ingressus in magnum sanctorum Apostolorum templum, conspicatusque quosdam cives decoris vestibus indutos et graves, alios autem tristes et mæstos ad se accedere jussos: cur non etiam ipsi die festo splendoras vestes gestarent, interrogabat, sed velut in urbis magna calamitate lugerent? Cui unus ex illis respondit: Te, o domine, eosque qui tibi proximi sunt, decet splendidis vestibus indutos gaudere; quibus vero jam mors imminet, eos talia decet. An ignoras, duos frumenti medimnos numismate venire propter ventorum asperitatem? Ad hæc alte suspirans imperator, misericordia mo-

tus, collacrymavit; eosque multis verbis consolatus in regiam rediit, ibique accersitos ad se qui civilia negotia et regia munera obibant infinitis probris ac maledictis affecit, quod sibi nihil de frumenti inopia indicassent; statimque exposito regio et publico frumento, duodecim medimnos numismate vendi jussit. Cujus bonam mentem Deus approbans, impertitus est multam hominibus abundantiam. Verum ad illius laudem hæc dicta sint. Nicephorus autem magis gaudebat quam opitulabatur, cum cives videret oppressos. Neque ipse solus, sed et Leo frater ejus, cibarium mercaturæ addictus, multis variisque calamitatibus orbem terrarum vexavit, etc. » Hæc de penuria dicta sunt.

6. Ex penuriæ hujus tempore, annus certus definiri potest legationis Luitprandi Cremonensis episcopi, cum ab Oltone imperatore missus est Constantinop. causa nuptiarum, inter ipsius Ottonis filium et Annam Romani filiam imp., privignam vero Nicephori, cum in Relatione suæ legationis testetur ingentem reperisse Constantinopoli penuriam. At non ex his tantum præsentem annum ejus legationis definire licet, nempe ex penuria; sed etiam ex solis deliquio, quod hoc anno accidisse cum Curopalates testetur, idem etiam in eadem sua Relatione factum Luitprandus affirmat: sed et adhuc illud certius argumentum declarat, quod cum idem testetur, eo anno, quo ea est functus legatione, incidisse diem sanctum Pentecostes septima mensis Junii, ex revolutione Astronomicarum tabularum et Ecclesiastico computu non nisi hoc anno eam oportuit contigisse, quo cucurrit aureus numerus xix, et littera Dominicalis E. D, ipsumque sacrum Pentecostes festum dicta die septima Junii. Magno sane Dei beneficio factum puto, ut hactenus ea Luitprandi Relatio conservata sit, paucis quæ desunt exceptis, tanquam fax quædam ad obscuritatem hujus temporis illustrandam: quam repertam in Trevirensis civitatis primariæ ædis bibliotheca, a Christophoro Brouvero Societatis JESU professore, missam vero Augustam ad nostrum Marcum Velsorum, typis excudendam curavit Henricus Canisius in Academia Ingolstadiensis ordinarius professor, quibus omnibus de antiquitate Ecclesiastica adeo bene merentibus bene precamur.

7. Constat etiam ex eadem Relatione, hoc pariter anno a Joanne Pontifice Romano missos esse legatos Constantinopolim ad eundem Nicephorum imperatorem, pro iisdem nuptiis contrahendis quas diximus, inter imperatoris privignam, et Ottonem Juniozem imperatorem; sed causam, cur eos perfidus Nicephorus spreverit et suum in Romanam Ecclesiam odium patefecerit, eadem Relatio notam facit. Sed et cur in Ottonem, sicut in Romanum Pontificem, idem Nicephorus se valde infensum ostenderit, ex ipsa Relatione cognoscitur, nimirum quod ipse Otto se imperatorem nominaret, et Romanus antistes Occidentalibus regibus supremam

¹ Leo Ost. hist. Cass. l. III. c. 62.

imperii dignitatem et nomen contulerit, proxime vero Juniorem Ottonem iisdem imperatoriis decoravit insignibus; magis autem in Ottonem Seniores commotus, quod principes Beneventanum et Capuanum, necnon etiam Salernitanum, ab ipso Nicephoro imperatore divulsos, in suam tutelam receperat: quæ cuncta fusius ex ipsa Relatione audita audietur eris: sed antequam eam hic describamus, quæ sunt reliqua anni hujus rerum Occidentalium prosequamur.

8. *Northmanni Gallæciam invadunt.* — Hoc eodem anno, qui secundus nominatur Ordonii tertii, regis Legionensis in Hispania (ut veteres omnes atque recentiores¹ chronographi testantur) Northmanni sub Gunderedo duce, classe centum navium comparata, invasere Gallæciam, cunctaque ferro igneque miscentes, biennali prælio eam provinciam affligere; Compostellamque tentantes, Sisenandum ejus episcopum arma potius quam sacra tractantem, et militum ducem agentem, primaque acie resistantem peremerunt, civitatemque ipsam destruxerunt. Dedit poenas vir factiosus, qui antea sede ejectus, eam invadendo, pellens subrogatum sanctum Rodesindum, violenter recepit, sicque ulciscente numine, sede simul atque vita privatus interit. Verum quod nihil magis quam vita nefaria sacerdotum, flagella in populum provocat: eo divina vindicta sublato de medio, in Northmannos tanquam ob id immissos, expiato ejus nece delicto, Deus ultionem convertit. Siquidem vicinarum provinciarum exeuntes armati fideles sub duce Guñdisalvo Sancio, Castellæ comite, prævio sancto Christi Apostolo Jacobo, cujus devastarant civitatem, eosdem Northmannos præda onustos, prosperis eventis elatos, redditosque securos invadentes, omnes vel peremere cum ipsorum duce Gunderedo, vel duxere captivos, aut profugos cum paucis relictis ab incendio navibus ad propria remeare cogerunt.

9. *Legatio Luitprandi ad Nicephorum imperatorem ab eodem Luitprando descripta.* — Illis enarratis jam ad res Orientis convertamus orationem, et quæ gesta sint per legatos tum a Joanne Pontifice, tum ab Ottone ad Nicephorum imperatorem Constantinopolim missos videamus ex legatione Luitprandi, cujus hic titulus:

« Legatio Luitprandi Cremonensis episcopi ad Nicephorum Phocam imperatorem Constantinopolitanum, pro Ottonibus Augustis et Adelhaida, ad illorum temporum usum, et Græcorum cum fastum, tum insolentiam plusquam barbaricam intelligendam. Nunc primum in lucem edita studio et opera Henrici Canisii Noviomagi I. C. et SS. Canonum in Academia Ingolstadiensi professoris ordinarii ». Subjicitur Præfatio ad lectorem, cum judicio de auctore qui scripsit, quæ sic se habet:

10. « Legationem hanc Luitprandi Cremonensis episcopi, descripsit ex Codice manuscripto Bi-

bliothecæ primariæ ædis Trevirensis, R. P. Christophorus Bronverus Societatis JESU sacerdos, antiquitatis illustrandæ studiosissimus, eamque ad communem illum omnium eruditorum amicum Marcum Velserum VII, virum Augustanum misit; inde huc perlata, nunc tandem post tot sæcula ex tenebris in publicum exit. Quis Luitprandus hic fuerit, certo affirmare non ausim. Fuisse Ticinensis Ecclesiæ levitam et diaconum (cujus extant libri sex rerum ab Europæ imperatoribus et regibus gestarum) suadent cum alia, tum idem prorsus dicendi genus. Deinde, quod opinionem hanc verisimillimam reddit, Luitprandus noster bis se Constantinopoli legationem obiisse asserit: primam, cum adhuc diaconus esset, auctoritate Berengarii, tempore Constantini Græcorum imperatoris. Postea altera, mandato Ottonis Magni, et filii ejus, et uxoris Adelheidæ, ad Nicephorum Phocam, qui mortuo Romano filio prædicti Constantini, imperium Constantinopolitanum invaserat. At Luitprandus Ticinensis diaconus et historicus, ab eodem Berengario Italiæ tyranno potius quam rege, se Constantinopolim ad Constantinum imperatorem legati nomine missum testatur lib. 6 Hist. cap. 1 et seq., ubi fuse describit quomodo a Constantino Constantinopoli exceptus fuerit, et quæ spectacula ibidem viderit. Unde conjicere licet, unum et eundem esse, hunc nostrum, et qui historiam concipit: cum et historicus sub Ottonibus claruerit, et temporis diversitas non obstat. Et forte si Luitprandi libri integri extarent, inveniremus non minus posteriorem sub Ottone legationem, quam illam priorem sub Berengario, nec dubitare pro certo et explorato affirmare, nisi ipse Luitprandus scrupulum injiceret, qui cap. 6, lib. 6, mentionem facit Luitprandi Cremonensis episcopi, eumque ait cum Landoardo Saxone, Episcopo Numedensi, ab Ottone Magno Romam missum esse, ad Joannem Pont. Et in Concilio Romæ in causa ejusdem Joannis celebrato, cum Otto Romam occupasset, fugato Joanne et Adelberto, inter episcopos Italiæ qui Concilio interfuerunt, numeratur Luitprandus episc. Cremonensis, qui et ejusdem Ottonis in eodem conventu interpretis fuit. Nam quæ Otto Saxonica lingua loquebatur, hæc Luitprandus Cremonensis episcopus latine reddebat cæteris episcopis: adeo ut vix credibile videatur Luitprandum historicum de se quasi de alio locutum fuisse, si ipsemet fuisset; cum longe minutiora de se rebusque a se gestis, absque ambagibus commemorare soleat ». Sed evacuatur ista, per ea quæ a nobis superius demonstrata sunt de Appendice illa, eam scilicet ipsius Luitprandi non esse, sed alterius prorsusque ab eo diversi auctoris. At ipsam jam audi Relationem, quæ præmisso titulo superius recitata, sic se habet:

11. « Ottiones Romanorum invictissimos imperatores Augustos, gloriosissimamque Adelheidem imperatricem Augustam, Luitprandus sanctæ Cremonensis Ecclesiæ episcopus semper valere, pro-

¹ Sap. Fundensis, Rudericus Tol. Ambr. Mor. l. xvi, c. 32, et alii.

sperari, triumphare, anhelat, desiderat, optat.

12. « Quid causæ fuerit, quod prius litteras sive nuntium meum non susceperitis, ratio subsequens declarabit. Pridie nonas Junii Constantinopoli venimus, et ad contumeliam vestram turpiter suscepti, graviter turpiterque sumus tractati; palatio quidem satis magno et aperto, quod nec frigus arceret sicut nec calorem repelleret, inclusi sumus: armati milites appositum sunt custodes, qui meis omnibus exitum (exitum), cæteris prohiberent ingressum. Domus ipsa solis nobis inclusis pervia; a palatio adeo sequestrata, ut eo nobis non equitantibus, sed ambulantis anhelitus truncaretur. Accessit ad calamitatem nostram, quod Græcorum vinum, ob picis, tædæ, gypsi commixtionem nobis impotabile fuit. Domus ipsa erat inaquosa, nec sitim saltem aqua exstinguere quivimus, quam data pecunia emeremus. Huic magno vae, vae aliud appositum est, homo, Sciliorum (Siciliorum) custos, qui quotidianos sumptus præberet, similem si requiras, non terra, sed infernus forsitan dabit; is enim quidquid calamitatis, quidquid rapinæ, quidquid dispendii, quidquid luctus, quidquid miseriæ excogitare potuit, quasi torrens inundans, in nos effudit. Nec in centum viginti diebus una sallem præteriiit, quæ non gemitus nobis præberet et luctus.

13. « Pridie nonas Junii, ut superius scripsimus, Constantinopolim ante portam Caream (Auream) venimus, et usque ad undecimam horam cum equis, non modica pluvia, expectavimus. Undecima vero hora, non ratus Nicephorus nos dignos esse tam ornatos vestra misericordia equitare, venire jussit et usque in præfatam domum marmoream, invisam, inaquosam, patulam sumus deducti. Octavo autem, id est (idus), sabbato primodierum Pentecostes ante fratris ejus Leonis Coroplatis (Curopalata) et Logothetæ præsentiam suam deductus, ubi de imperiali vestro nomine magna sumus contentione fatigati. Ipse enim vos, non imperatorem, id est, βασιλέα sua lingua; sed ob indignationem ῥήγν, id est, regem, nostra vocabat. Cui cum dicerem, quod significabatur idem esse, quamvis quod significat diversum; me, ait, non pacis, sed contentionis causa venisse; sicque iratus surgens, vestras litteras, vere indignans, non per se, sed per interpretem suscepit, homo ipse ad personam satis procerus, falso humilis, cui si ininus homo fuerit, manum ejus perforabit.

14. « Septimo autem, id est (idus), ipso videlicet sancto die Pentecostes, in domo quæ dicitur Στεφανία, id est, Coronaria, ante Nicephorum sum deductus, hominem satis monstruosum, pygmæum, capite pinguem, atque oculorum parvitate talpinum, barba curta, lata, spissa, et seminaca fœdatum, cervice dignitati turpatum, prolixitate et densitate comarum satis jopam (hirtum), colore Æthiopem, cui per mediam nolis occurrere noctem, ventre extensum, natibus siccum, coxis ad mensuram ipsam brevem longissimum, cruribus

parvum, calcaneis pedibusque æqualem villino (byssino), sed nimis veterioso, vel diuturnitate ipsa fœtido et pallido ornamento indutum, Sicyoniis calceamentis calceatum, lingua procacem, ingenio vulpem, perjurio seu mendacio Ulyssem. Semper mihi domini mei impp. Augusti formosi, quanto hinc formosiores visi estis? Semper ornati, quanto hinc ornatiores? Semper potentes, quanto hinc potentiores? Semper mites, quanto hinc mitiores? Semper virtutibus pleni, quanto hinc pleniores? Sedebant ad sinistram, non in eadem linea, sed longe deorsum duo parvuli imperatores, ejus quondam domini, nunc subjecti; cujus narrationis initium hoc fuit:

15. « Debueramus, imo volueramus te benigne magnificeque suscipere, sed domini tui impietas non permittit, qui tam inimica invasione Romam sibi vindicavit, Berengario et Adelberto contra jus fasque vitam abstulit, Romanorum alios gladio, alios suspendio interemit, oculis alios privavit, exilio alios relegavit, et imperii nostri insuper civitates homicidio aut incendio sibi subdere tentavit: et quia effectus ejus pravus effectum habere non potuit, nunc te malitiæ hujus suggestorem atque impulsorem, simulata pace, quasi ἀσχετον κατ'ἀσχετον id est, exploratorem, ad nos direxit.

16. « Cui, inquam ego, Romanam civitatem dominus meus non vi aut tyrannice invasit, sed a tyranni, imo tyrannorum jugo liberavit. Nonne effeminati dominabantur ejus? et quod gravius sive turpius, nonne meretrices? Dormiebat, ut puto, tunc potestas tua, imo decessorum tuorum, qui nomine solo, non autem re ipsa imperatores Romanorum vocantur.

17. « Si potentes, si imperatores Romanorum erant, cur Romam in meretricum potestate sinebant? Nonne sanctissimorum paparum alii sunt relegati, alii a te afflicti, ut neque quotidianos sumptus, nec eleemosynam habere quirent? Nonne Adelbertus contumeliosas litteras Romano et Constantino, decessoribus tuis imperatoribus, misit? Nonne sanctissimorum Apostolorum Ecclesias rapinis expoliavit? Quis ex vobis imperatoribus, zelo Dei ductus, tam indignum facinus vindicare, et sanctam Ecclesiam in statum proprium reformare curavit? Neglexistis vos, non neglexit dominus meus: qui a finibus terræ surgens Romamque veniens, impios abstulit, et sanctorum Apostolorum vicariis potestatem et honorem omnem contradidit. Postmodum vero insurgentes contra se et dominum Apostolicum, quasi jurisjurandi violatores, sacrilegos dominorum suorum Apostolicorum fortiores, raptiores, secundum decreta imperatorum Romanorum, Justiniani, Valentiniani, Theodosii et cæterorum, cæcidit, jugulavit, suspendit, et exilio relegavit: quæ si non faceret, impius, injustus, crudelis, tyrannus esset. Palam est, quod Berengarius et Adelbertus sui milites effecti, regnum Italicum sceptro aureo ex ejus manu susceperunt, et præsentibus servis tuis, qui nunc usque

supersunt, et hac in civitate degunt, jurejurando fidem promiserunt. Et quia, suggerente diabolo, hanc perfide violarunt, juste illos quasi desertores sibi que rebelles regno privavit: quod ita subditis tibi et postmodum rebellibus faceres.

18. « Sed non, ait, Adelberti hoc profiteatur miles. Cui inquam: Si secus dixerit, meorum aliquis militum, si jubes, cras ita rem esse duello declarabit.

« Esto, inquit, fecerit hæc, ut ais, juste. Nunc cur imperii nostri terminos (terram) bello incendioque aggressus sit, expedi. Amici eramus, societatemque indissolubilem, nuptiis interpositis, facere cogitabamus.

19. « Terram, inquam, quam imperii tui esse narras, gens, incola, et lingua, Italici regni esse declarat. Tenueruntque illam potestative Langobardi; quam et Ludovicus Langobardorum seu Francorum imperator de manu Sarracenorum, multitudine prostrata, liberavit. Sed et Landulphus Beneventanorum et Capuanorum princeps septennio potestative eam sibi subjugavit. Nec a servitutis ejus seu successorum suorum jugo usque ad præsens exiret, si non, immensa data pecunia, Romanus imperator nostri regis Hugonis amicitiam emeret. Et hæc causa fuit, quod nepoti suo, et æquivoeco regis nostri, ejusdem Hugonis spuriam conjugio copulavit. Et ut considero, domino meo non gratiam, sed impotentiam adscribis, quod post Italiæ seu Romæ acquisitionem, tot annis eam tibi dimiserit. Societatem vero amicitiae, quam te parentela voluisse facere dicis, fraudem nos dolumque lenemus, pausas (inducias) exigis, quas nec te exigere, neque nos concedere ratio ipsa compellit. Verum ut fallacia exsculpatur, veritas non reticeatur, misit me dominus meus ad te, ut si filiam ¹ Romani imperatoris et Theophanæ imperatricis, domino meo, filio suo Ottoni imperatori Augusto, in conjugium tradere volueris, juramento mihi affirmes, et ego pro gratiarum recompensatione, hæc et hæc dominum meum tibi facturum, et observatum jurejurando affirmabo. ² Sed et optimam amicitiae arabonam (optimum arrhabonem) fraternitati tuæ nunc dominus meus contulit, cum Apuliam omnem potestati subditam, meo interventu, cujus hoc suggestionem malum factum esse dicis. Cujus rei tot sunt testes, quot sunt totius Apuliæ habitatores.

« Secunda, inquit Nicephorus, hora jam transit: *προέλευσις*, id est, processio nobis est celebranda. Quod nunc instat agamus. Contra hæc, cum opportunum fuerit, respondebimus.

20. « Non pigcat me *προέλευσιν* ipsam describere, et dominos meos audire. Negotiatorum multitudo copiosa ignobiliumque personarum, ea solemnitate collecta, ad susceptionem et laudem Nicephori, a palatio usque ad sanctam Sophiam,

quasi pro muris, viæ margines tenuit, clypeolis tenuibus satis et spiculis vilibus dedecorata. Accessit et ad dedecoris hujus augmentum, quod vulgi ipsius potior pars, ad laudem ipsius, nudis processerat pedibus. Credo sic eos putasse, sanctam ipsam potius exornare *προέλευσιν*. Sed et optimates sui, qui cum ipso per plebeiam et discalceatam multitudinem ipsam transierunt, magnis et nimia vetustate rimatis tunicis erant induti. Satis decentius quotidiana veste induti procederent. Nullus est cujus atavus hanc novam haberet. Nemo ibi auro, nemo gemmis ornatus erat, nisi ipse solus Nicephorus, quem imperialia ornamenta ad majorum personas sumpta et composita, foediorem reddiderant. Per salutem vestram, quæ mihi mea charior extat, una vestrorum pretiosa vestis procerum, centum horum et eo amplius pretiosior est. Ductus ergo ad *προέλευσιν* ipsam in eminentiori loco, juxta psallas, id est, cantores, sum constitutus.

21. « Cumque quasi reptans monstrum illud procederet, clamabant adulatores psaltæ: Ecce venit stella matutina, surgit Eous, reverberat oblutu solis radios: pallida Sarracenorum mors, Nicephorus *μέδων*, id est, princeps. Unde et cantabatur: *Μέδωντι*, id est, principi Nicephoro, *πολλὰ ἔτη*, id est, plures anni sint. Gentes, hunc adorate, hunc colite, huic tanto colla subdite. Quanto tunc verius canerent: Carbo extincte, veni, *μέλλας*, anus incesso, Silvanns vultu, rustice, lustrivage, capripes, cornule, bimembris, setiger, indocilis, agrestis, barbæ, dure, villose, rebellis, Cappadox. Igitur falsidicis illis inllatus nœnisi S. Sophiam ingreditur, dominis suis imperatoribus se a longe sequentibus, et in pacis osculo ad terram usque adorantibus. Armiger hujus sagitta calamo inmissa Aeram (aram) in Ecclesia ponit, quæ prosequitur, quo nimirum tempore imperare cœperit, et sic Aeram, qui id non viderunt, intelligunt ¹.

22. « Ilac eadem die convivam me sibi esse jussit. Non ratus autem me dignum esse cuiquam suorum præponi procerum, quintus decimus ab eo absque gausape sedi; meorum nemo comitum non dico solum mensæ non assedit, sed neque domum, in qua conviva eram, vidit. Qua in cœna temporis satis, et obscœna, ebriorum more, oleo delibuta, alioque quodam deterrimo piscium liquore aspersa, multa super potentia vestra, multa super regnis et militibus me rogavit. Cui cum consequenter et vere responderem: Mentiris, ait: domini tui milites equitandi ignari, pedestris pugnae sunt inscii, scutorum magnitudo, loricarum gravitudo, ensium longitudo, gelearumque pondus neutra parte eos pugnare sinit; æ subridens: Impedit, inquit, eos et gastrimargia, hoc est, ventris ingluvies; quorum Deus venter est;

¹ Codinus Coropal. lib. De offic. aulae Constantinopol. Αμα οὖν πρὸς τὸν βασιλέα γυμνῆσαι, οἱ ψάλλται ἀντικατέβλυσαι τὴν πολυχρόνιον: Simul atque apparet imperator, cantores statim canunt: Ad multos annos. Quod Europalata vocat *πολυχρονίζουσι*, et ipsam actionem seu cantionem multos annos precandi, *πολυχρονίσμα*.

¹ Filia hæc fuit Anna. Vide Cedrenum. Alii vocant Theophaniam.

— ² Illic deest aliquid.

quorum audacia, crapula; fortitudo, ebrietas; jejunium, dissolutio; pavor, sobrietas. Nec est in mari domino tuo classium numerus. Navigantium fortitudo mihi soli inest, qui eum classibus aggrediar, bello maritimas ejus civitates demoliar, et quæ fluminibus sunt vicina, redigam in favillam. Quis, cedo, mihi etiam in terra copiarum paucitate resistere poterit? filius non affuit; uxor non defuit; Saxones, Suevi, Bajoarii, Italici omnes cum eo affuerunt, et cum civitatulam unam sibi resistantem capere nescirent, imo nequirent, quomodo mihi resistent venienti? quem tot copiarum prosequantur, Gargara quot segetes, quot habet Methymna racemos, quot cælum stellas, quot mare in flatibus undas.

23. « Cui cum respondere, et Apologeticum dignum inflatione hac evomere vellem, non permisit; sed adjecit quasi ad contumeliam: Vos non Romani, sed Langobardi estis. Cui adhuc dicere volenti, et manu, ut tacerem innuente, commotus inquam: Romulum fratrieidam, ex quo et Romani dicti sunt, porniogenitum, hoc est, ex adulterio natum, chronographia innotuit; asylumque sibi fecisse, in quo alieni æris debitores, fugitivos, servos, homicidas, ac pro reatibus suis morte dignos suscepit, multitudinemque quamdam talium sibi adseivit, quos Romanos appellavit: ex qua nobilitate propagati sunt ipsi, quos vos kosmocratores, id est, imperatores appellatis: quos nos, Langobardi scilicet, Saxones, Franci, Lotharingii, Bajoarii, Suevi, Burgundiones tanto dedignamur, ut inimicos nostros commoti, nil aliud contumeliarum, nisi, Romane, dicamus, hoc solo, id est, Romanorum nomine, quidquid ignobilitatis, quidquid timiditatis, quidquid avaritiæ, quidquid luxuriæ, quidquid mendacii, imo quidquid vitiorum est, comprehendentes.

« Inbelles vero nos et equitandi insecios quia dicis, si Christianorum peccata promerentur, ut in hac austeritate perdures, quales vos estis, quamve pugnaces nos sinus, bella proxima demonstrabunt.

24. « Talibus Nicephorus exacerbatus dictis, manu silentium indixit, mensamque sine latitudine longam auferri, meque in invisam domum, seu ut verius fatear, carcerem reverti præcepit. Ubi post biduum cum indignatione, tum æstu et siti, magno sum languore affectus. Sed et assecularum meorum nemo extitit, qui non eodem ebriatus poculo, diem sibi ultimum imminere formidaret. Cur, quæso, non ægrotarent, quibus erat potius pro optimo vino salsugo; pro culcitra, non fœnum, non stramen, non saltem terra, sed durum marmor, pro cervicali lapis? quibus patula domus non calorem, non imbrem, non frigus arcebat. Ipsa si vellet Salus his circumfusa, ut vulgo

loquimur, eos salvare non posset. Proprio ergo atque meorum debilitatus angore, convocato ad me custode, imo persecutore meo, non precibus solum, sed pretio obtinui, ut Epistolam meam hunc modum continentem Nicephoro fratri deferret:

25. « Leoni coroplatis¹ et logothetæ τοῦ δρόμου Luitprandus episcopus. Si imperator serenissimus petitionem, ob quam veni, perficere cogitat, non fatigant me, quas hic sustineo, passiones: litteris solummodo meis et nuntio, ut instruatur dominus meus, me hic moram ab re non facere. Quod si secus res sese habet, navis et hic Veneticorum, onerariaque proficisci festinat, hanc me ægrotum ingredi sinat, ut si dissolutionis meæ tempus advenit, cadaver meum genitale saltem solum suscipiat. Quas cum legisset, se post quadriduum me jussit adire. Sederunt cum eo ad disceptationem vestram secundum eorum traditionem, sapientissimi viri, Attico pollentes eloquio, Basilii parakimomenos², Proto a secretis, protovestiarius, et duo magistri, quorum hoc fuit narrationis initium:

26. « Quid causæ sit, quare te huc fatigasti, frater, edisere. Quibus cum parentelæ gratia, quæ esset occasio infinitæ pacis, edicerem, inquit: Inaudita res est, ut Porphyrogeneriti Porphyrogenerita, hoc est, in purpura nati filia, in purpura nata, gentibus misceatur. Verum quia tam excellentem rem petitis, si datis quod decet, accipietis quod libet; Ravennam scilicet et Romam cum his omnibus continuatis, quæ ab his sunt usque ad nos. Si vero amicitiam abque parentela desideratis, Romam liberam esse dominus tuus permittat: principes autem, Capuanum scilicet et Beneventanum, sancti nostri imperii olim servos, nunc rebelles, servituti pristinae tradat.

27. « Quibus, dominum meum, inquam, potentiores habere Schlavos Petro Bulgarorum rege, qui Christophori imperatoris filiam in conjugium duxit, etiam ipsi non ignoratis. Sed Christophorus, aiunt, non Porphyrogenitus fuit.

« Roma vero, inquam, quam vos liberam esse velle pershrepitis, cui servit? cui tributa persolvit? Nonne prius meretricibus serviebat? et vobis dormientibus, imo non valentibus, dominus meus imp. Augustus a tam turpi servitute liberavit? Constantinus imp. Augustus, qui hanc ex suo nomine condidit civitatem, sanctæ Apostolicæ Romanæ Ecclesiæ, ut erat kosmocrator, multa donaria contulit, non in Italia solum, sed in omnibus præne Occidentalibus regnis, necnon de Orientalibus atque Meridianis, Græcia scilicet, Judæa, Perside, Mesopotamia, Babylonia, Ægypto, Libya, ut ipsius testantur Privilegia, quæ penes nos sunt. Sane quidquid in Italia, sed in Saxonia, Bajoaria, omnibus domini mei regnis est, quod ad Apostolorum beatorum Ecclesiam respicit, sanctissimo-

¹ Ex Niceta Chroniate, Curopalata et aliis notum est, Græcos nomen Romanorum sibi proprium fecisse. Hinc factum, ut Græcorum hostibus nomen Romanorum tam hostile fuerit: quippe cum Græci se solos Romanos, reliquos vero Latinos vocarent.

¹ Logotheta δρόμου Joannes Zimisca fuit Nicephori successor, de quo Zonaras: τῆς στρατιωτικῆς ἀρχῆς πάντας αὐτὸν (Nicephorus) εἰς πολιτικὴν μετατίθηται λογιθέτην τοῦ δρόμου. — ² Παράκοιμώμενος, id est, cubicularius.

rum Apostolorum vicario contulit. Et si est, ut dominus meus ex his omnibus civitates, villas, milites aut familiam oblineat, Deum negavi. Cur imperator vero non itidem facit, ut ea, quæ suis insunt regnis, Apostolorum Ecclesiæ reddat, et per laborem atque munificentiam domini mei ditem et liberam, ditiores ipse ac liberiores reddat?

28. « Sed hoc, ait Basilius parakimomenos, faciet, cum ad nutum suum Roma et Romana Ecclesia ordinabitur. Tum homo, inquam, quidam, multam ab alio passus injuriam, his Deum aggressus est verbis: Domine, vindica me de adversario meo. Cui Dominus: Faciam, inquit, in die, cum reddam unicuique secundum opera sua. At ille: Quam tarde, inquit.

29. « Tunc omnes præter fratrem, cachinno commoti, discepcionem dimiserunt, meque in invisam domum reduci præceperunt, magnaque custodiri cautela usque in sanctorum Apostolorum religiosis cunctis celebrem diem. Qua celebritate me satis ægrotum, necnon et Bulgarorum nuntios, qui pridie venerant, ad sanctos Apostolos sibi obviare præcepit. Cumque post næniarum garrulitatem, et missarum celebrationem, ad mensam invitaremur, in citeriori mensæ margine, quæ erat sine latitudine longa, Bulgarorum nuntium, Ungarico more tonsum, ænea catena cinctum, et ut mens mihi suggerit, catechumenum, mihi præponit; ad vestram plane, domini mei Augusti, contumeliam. In vobis contemptus, in vobis spretus, in vobis abjeclus. Sed gratias ago Domino Jesu Christo, cui vos servitis omni spiritu vestro, quod habitus sum pro nomine vestro dignus contumelias pati. Verum, domini mei, meam non considerans, sed vestram injuriam, mensam reliqui. Cumque indignans abire vellem, Leo coroplales, imperatoris frater, et Proto a secretis Simcon, pone me sequuntur, hæc latrantes: Cum Christophori filiam Petrus Bulgarorum vasileus conjugem duceret, symphona, id est, consonantia scripta juramento firmata sunt, ut omnium gentium apostolis, id est, nuntiis, penes nos Bulgarorum apostoli præponantur, honorentur, diligentur. Bulgarorum ille apostolus, quanquam ut dicis, et verum est, tonsus, illotus, et catena ænea cinctus sit, patricius tamen est, cui episcopum præponere, Francorum præsertim, nefas decernimus, judicamus. Et quoniam te id indigne ferre cognoscimus, non te nunc, ut putas, ad hospitium redire sinimus, sed in diversorio quodam cum imperatoris servis cibum gustare compellimus.

30. « Quibus ob incomparabilem cordis dolorem nil respondi, sed quæ jusserant, feci; indignum judicans mensam (indignam judicans causam), qua non dico mihi, id est, Luitprando episcopo, sed Bulgarorum nuntius vestro præponitur nuntio. Sed lenivit dolorem meum imperator sanctus munere magno, mittens mihi ex delicatissimis cibis suis, hædum pinguem, ex quo ipse comederat, allio, cæpe, porris laute suffarcinatum, garo deli-

butum, quem vestræ tunc mensæ inesse optavi, ut qui delicias sancti imperatoris faustas esse non creditis, saltem his perspectis crederetis.

31. « Transactis ergo octo diebus, cum Bulgari jam abessent, putans me mensam magnificere suam, in eodem loco me satis ægrotum secum convivare coegit. Affuit cum pluribus episcopis et patriarcha, quibus præsentibus, plures mihi quæstiones de Scripturis sacris proposuit, quas cum Spiritu sancto afflante eleganter exposui, novissime autem, ut de vobis ludum haberet, quas Synodos haberemus rogavit. Cui cum Nicænam, Chalcedonensem, Ephesinam, Antiochenam, Carthagenensem, Ancyranam, Constantinopolitanam edicerem: Ha, ha, he, ait, Saxoniam dicere es oblitus, quam si rogas, cur nostri Codices non habent, rudem esse, et ad nos necdum venire posse respondeo.

32. « Cui inquam: In quo membro regnat infirmitas, illud est cauterio exurendum: hæreses omnes a vobis emanarunt, penes vos viguerunt: a nobis, id est, Occidentalibus hic sunt jugulatæ, hic sunt occisæ. Romanam sive Papiensem Synodum, quanquam essent sæpe, his non connumeramus. Romanus enim clericus, postmodum universalis papa, Gregorius, quia a vobis appellatus est Dialogus, Eutychium Constantinopolitanum patriarcham hæreticum ab ejusmodi hæresi liberavit. Aiebat idem Eutychius, nec solum aiebat, sed etiam docebat, clamabat, scriptitabat, nos in resurrectione non veram, quam hic habemus, sed phantasticam quamdam carnem assumpturos, cujus erroris liber a Gregorio orthodoxe est combustus. Sed Evodius Papiensis episcopus, propter aliam quamdam hæresim huc, id est, Constantinop. a Romano est patriarcha directus, quam compressam, in Catholicam atque orthodoxam reformavit. Saxonum genus, ex quo sanctum lavacrum et Dei accepit notitiam, nulla est hæresi maculatum, ut ibi Synodus fieret, qua errorem, cum nullus esset, corrigeret. Rudem quia dicis Saxonibus esse fidem, idipsum et ego affirmo: semper enim apud eos Christi fides rudis est, et non vetus, ubi fidem opera sequuntur. Hic fides non rudis, sed vetus est, ubi fidem opera non comitantur, sed quasi præ vetustate, ut vestis contempta contemnitur. Sed hanc Synodum factam esse in Saxonia certo scio, in qua tractatum est et firmatum, decentius ensibus pugnare, quam calamis; et prius mortem obire, quam hostibus terga dare: quod vel tuus exercitus experitur; in corde meo dixi, et quam sint pugnaces, re ipsa experiatur.

33. « Verum hac eadem die post meridiem, adeo impotentem et transfiguratum me revertenti ad palatium sibi præcepit occurrere, ut obviantes mihi, quæ prius in stuporem mentis mulieres versæ, Mana, mana¹ clamabant; miseriam meam pugnis pectora tunsæ dicerent, *τῆς πένθους καὶ τῆς λύπης*. Cui, Nicephoro scilicet venienti, et vobis absenti-

¹ Id est, mater, mater.

bus, quid tunc manibus in cælum erectis optaverim, proveniat utinam. Sed mihi velim credatis, ad risum me non parum illexit. Impatienti enim atque effreni insidens equo, satis parvus, satis magno, puppam ipsum mens sibi depinxit mea, quam Schilavi vestri equino colligantes pulso matrem præcedentem sequi effrenate dimittunt.

34. « His expletis ad concives et cohabitatores meos, quinque leones, in prænominatam invisam domum sum deductus, ubi post hebdomadarum spatium trium, nullius nisi meorum sum colloquio visitatus. Qua ex re Nicephorum nunquam me velle dimittere mens sibi depinxit mea, ac tristitia immodica languorem languori adeo superimposuit, ut vita excederem, nisi mihi hanc Dei Genitrix a Creatore et Filio suo precibus obtineret; quemadmodum non phantastica, sed vera est mihi visione monstratum.

35. « His ergo tribus hebdomadibus habuit Nicephorus extra Constantinopolim metastasim, id est, stationem, in loco qui dicitur *Εἰς πηγῆς*, id est, Ad fontes, eodemque me venire præcepit. Et cum tamen languidus essem, ut non solum statio, sed ipsa etiam sessio gravis mihi moræ videretur, discooperto capite, quod malæ valetudini meæ nimis contrarium erat, ante se me stare coegit; cui et ait: Domini tui regis Ottonis nuntii, qui præterito te præcesserunt anno, juramento mihi promiserunt, et jusjurandi litteræ in præsentiarum sunt, nunquam illum in aliquo nostrum scandalizare imperium. Vis majus scandalum, quam quod se imperatorem vocat, imperii nostri themata sibi usurpat? Utraque non sunt ferenda; etsi utraque importabilia, istud est non ferendum, imo nec audiendum, quod se imperatorem nominat. Sed si confirmas eadem, quæ ipsi fecerunt, fortunatum te atque locupletem imperii nostri majestas cito dimittet. Id autem eo non dixit, ut vos, si mea hoc stultitia faceret, conservatos sperarem (servaturos speraret), sed voluit habere præ manibus, quod in laudem suam et contumeliam nostram ostenderet futuris temporibus.

36. « Cui inquam: Nuper sanctissimus dominus meus, ut est sapientissimus et spiritu Dei plenus, hæc prænoscens, quæ asseris, ne terminos quos constituit mihi, transenderem, *ἐντελέην*, id est, præceptum conscripsit, quod et sigillo signavit suo, ne secus facerem. Seis, domine mi Auguste, qua id fiducia dixerim? *ἐντελέην* istud in medium proferatur, et quidquid jusserit, juramento a me tibi firmetur. Sed præteriti nuntii præterjussionem domini mei promiserunt, juraverunt, conscripserunt, ita est, ut Plato ait: Causa penes optantem, Deus extra culpam.

37. « His expletis, ventum est ad nobilissimos principes Capuanum et Beneventanum, quos ipse servos nominat, et ob quos intestinus ipsum agitatur dolor. Servos, inquit, meos dominus tuus in tutelam recipit suam, quos si non dimiserit et in pristinam servitutem redegerit, nostra amicitia care-

bit; ipsi in imperium nostrum ut recipiantur, flagitant; sed recusat eos nostrum imperium, ut cognoscant et experiantur, quam periculosum sit, servos a dominis declinasse, servitutem effugere. Et est decentius domino tuo, ut mihi eos tradat amicus, quam mihi dimittat invitus. Experientur plane, vita comite, quid sit herum fallere, quid sit servitutem deserere: et, ut puto, sentiunt nunc, quod dico, operantibus hoc nostris, qui sunt ultra mare, militibus.

38. « Quibus respondere me non permisit, sed abire cupientem, ad mensam suam redire præcepit. Cui pater assedit, homo, ut mihi videbatur, natus centum quinquaginta annis¹. Cui itidem, ut filio, Græci in laudibus, imo inventis suis, Deus annos ut multiplicet, conclamant. Qua in re, quam sint Græci stulti, quamve hujus gloriæ amatores, quamve adutores, quam cupidi, hinc colligere possumus: optant soli non sola, sed silicernio, quod naturam ipsam non pati certo sciunt. Gaudet et silicernium ea sibi optari, quæ nec Deum facere, nec tibi (sibi) prodesse, sed obesse, etiamsi faceret, novit. Quod quæso Nicephorum gaudere pacis.... illum et phosphorum clamabant. Impotentem, virilem; stultum, sapientem; brevem, magnum; nigrum, album; peccatorem, sanctum dicere, mihi credite, non laus, sed contumelia est. Et qui aliena magis gaudet sibi acclamari, quam propria, avibus omnino est similis, quarum intuitum nox illuminat, dies cæcat.

39. « Sed redeamus ad rem. Hac in cæna, quod prius non fecerat, voce latina² beati Joannis Chrysostomi homiliam in Apostolorum actibus legere jussit. Post cujus lectionis terminum, cum ad vos redeundi licentiam quærerem, capite se ita facturum innuens, recipi me ad concives et cohabitatores meos leones persecutori meo indixit. Quod cum fieret, non sum ab eo visus usque in tertium decimum kalend. Augusti, sed diligenter custoditus, ne cujuspiam fruerer sermone, qui suos mihi actus indicaret. Interea Grimizonem Adelberti nuntium se adire jussit, quem cum navali suo exercitu redire præcepit. Fuerunt chelandia viginti quatuor, Russorum naves duæ, Gallicæ duæ; si plus miserit, quas non viderim, nescio. Vestrorum, domini mei imperatores Augusti, militum fortitudo non eget, ut adversariorum impotentia animetur, quod in his sæpe expertum est gentibus, quarum etiam ultimi, et cæterorum comparatione, impotentes, græcam fortitudinem straverunt, tributariam fecerunt. Sicut enim vos non terrerem, si fortissimos illos et Alexandro Macedoni similes prædicarem, sic et vos instigo, cum impotentiam eorum, quæ vera est, narro. Mihi credatis velim, et credetis scio, omnem ipsum exercitum a quadringentis vestris, si fossa murive non impediunt, posse occidere (occidi), cui exercitui, ut puto, ad

¹ Fuit is Bardas, quem Nicephorus imperium adeptus Cæsarem salutavit. — ² Voseclatus, ex quo corrigo, voce elata.

contumeliam vestram, hominem quamdam (sed quamdam eo dixi, quia mas esse desiit, mulier fieri nequit) præposuit. Adelbertus octo millia loricorum se habere Nicephoro mandavit, quibus cum Argivo adminiculante exercitu, vos fugare aut sternere dicit, rogavitque æmulum vestrum, ut pecunia illi mitteretur, quia illos avidius ad pugnam instigaret.

40. « Sed nunc, domini mei, accipite insidias Danaum, et crimine ab uno discite omnes : Nicephorus mancipio illi, cui collectitium atque conductitium commendavit exercitum, pecuniam satis magnam hac ratione dedit, ut si Adelbertus cum septem millibus loricorum, et eo amplius, sicut mandavit, se adierit, tunc donativum eis illud distribuatur. Cona frater suus cum ipso et Argolico exercitu vos impugnet, Adelbertus vero Bareis diligenter custodiatur, donec potitus victoria frater redeat. Quod si veniens tot hominum millia non duxerit, ut capiatur, vinciatur, vobisque eo venientibus tradatur. Insuper et pecunia, quæ ei debebatur, vestras in manus conferatur, edixit. O bellatorem, o fidelem ! prodere cupit, cui (qui) defensorem parat; defensorem parat, quem perdere cupit : in neutro fides, in utroque infidelitas : fecit, quo non eguit; eguit, quod non fecerat. Sed esto, fecerit, ut Græcos decuit; nos ad propositum redeamus.

41. « Quarto decimo kal. Augusti collectitium ipsum navalem exercitum, me ab invisa domo spectante, dimisit. Decimo tertio autem, quo die leves Græci raptionem Eliæ prophetæ ad cælos ludis scenicis celebrant, me se adire præcepit, cui et ait : Imperium nostrum copias in Assyrios ducere cogitat, non super Christicolas, quemadmodum dominus tuus : præterito quippe anno idipsum facere volui, sed audito, quod dominus tuus imperii nostri terram invadere vellet, dimissis Assyriis, illum versus habenas retorsimus, obviavitque nobis in Macedonia Dominicus Venedicus nuntius suus, qui multo labore et sudore nos, ut reverteremur, delusit, jurejurando nobis affirmans, nunquam dominum tuum esse id cogitaturum, nedum facturum; revertere ergo (quod cum audissem, tacitus Deo gratias dixi) et hæc atque hæc tuo domino nuntiatio; si me compotem fecerit, ipse redito.

42. « Cui, jubeat, inquam, sanctissimum imperatorem (imperium) tuum me in Italiam cito advolare, certa ratione, quod dominus meus, quæ vult imperium tuum, compleat, et lætus ego ad te redeam. Quod qua mente dixerim, nec ipsum, prohi dolor, latuit. Nam subridens, simul capite innuit, meque contra tenus se adorantem, atque abeuntem extra, foris manere, atque ad cœnam allio et cæpa bene olentem, oleo et garo sordidam venire præcepit, magnisque die illa effeci precibus, ut munus meum, quod sæpe adspersum erat, dignaretur accipere.

43. « Residentibus itaque nobis ad mensam

sine latitudine longam pallingi (pallii, vel palmi) latitudine tectam, longitudine seminndam, ex Francis, quo nomine tam Latinos, quam Teutones comprehendit, ludum habuit : rogavitque me, ut, quo in loco episcopatus mei civitas esset, quove nomine frueretur, edicerem. Cui, Cremona, inquam, Eridano fluviorum Italiæ regi satis vicina, et quia imperium tuum chelandia eo mittere properat, prosit mihi te vidisse, prosit agnovisse, da pacem loco, ut per te saltem possit subsistere, qui tibi non potest resistere. Sed vafer ille hæc εἰρωνικάς me dixisse cognovit, submissoque vultu se ita facturum promisit, juravitque mihi per sancti sui virtutem imperii, nil me mali passurum, sed prospere suis cum chelandiis usque in Anconitanum portum cito perventurum; et mihi id tunso digitis pectore juravit.

44. « Verum quam impie pejeraverit, animadvertite. Hæc acta, hæc dicta sunt decimo tertio kalendas Augusti, secunda feria, quo ex die usque in nonum stipendiorum nihil ab eo recepi, cum tanta esset Constantinopoli fames, ut viginti quinque assecas meos, et quatuor custodes Græcos tribus aureis una cœna nequirem reficere. Quarta feria ipsius hebdomadæ, Nicephorus Constantinopolim egreditur, in Assyrios profecturus.

45. « Quinta feria frater suus me accersivit, quem ita convenit : Sancto imperatore præmisso, domi hodie dispositionis ejusdem causa substiti; nunc si te sanctum imperatorem visendi desiderium obtinet, et si quidquam, quod necdum prodideris habes, edissere. Cui inquam : Nec sanctum imperatorem videndi, nec rei novæ narrandæ habeo causam. Unum hoc peto, secundum sancti imperii promissionem, ut chelandiis in Anconitanum portum usque deducar. Quo audito (ut sunt Græci per caput alterius semper jurare parati) per imperatorium caput, per vitam propriam, per liberos, quos Deus ita, ut verum dixit, conservet, se id completurum jurare cœpit. Cui cum, quando? dicerem; mox discedente, inquit, imperatore : Delongaris enim, sub cujus manu navium est omnis potestas, recedente sancto imperatore, curam tui aget. Hac spe ludificatus, lætus ab eo recessi.

46. « Post sequentem vero diem, Sabbato scilicet, in Umbriam, qui est locus decem et octo milliaribus Constantinopoli distans, Nicephorus me accersiri jubet, cui et ait : Putabam te quidem virum magnum et honestum ea gratia huc venisse, ut completa omnimodo voluntate mea, perpetuam inter me et dominum tuum constitueres amicitiam. Et quoniam ob cordis tui duritiem id facere nolis, unum saltem, quod facere justa ratione possis, effcito; scilicet dominum tuum principibus Capuano et Beneventano, servis meis, quos oppugnare dispo, nullum consilium collaturum. Sua qui non largitur, nostra saltem dimittat. Nova res est, quod eorum patres et avi nostro imperio tributa dederunt : at id istos brevi tempore facturos, imperii nostri exercitus laborabit.

47. « Cui inquam : Principes isti apprime nobiles, et domini mei sunt milites ; qui si senserint exercitum tuum super eos irruere, eis copias mittel, quibuscum tuos conlerere, et duo illa themata, quæ ultra mare habes, tibi prævalebunt auferre.

« Tunc bufonis in modum tumefactus et commotus : Discede, inquit. Per me, per qui me talem genuere parentes, faciam, ut aliud dominus tuus, quam desertores servos defendere cogitet. Cumque abirem, jussit interpreti, me sibi convivam fieri : accitisque eorundem principum fratre et Byzantio Barisiano, magnas in vos genlemque Latinam et Teutonicam contumelias evomere jussit. Verum cum a sordida cœna ipse discederem, nuntiiis interpositis, clam mihi mandaverunt et juraverunt, se quæ latraverant, non sponte, sed imperatore volente et comminante dixisse.

48. « Sed et idem Nicephorus in eadem cœna me interrogavit, si vos perivolla, περιβολια, id est, brolia, vel si in perivoliis onagros, vel cætera animalia haberetis. Cui cum vos brolia, et in broliis animalia, onagris exceptis, habere affirmarem : Ducam te, inquit, in nostrum perivolum, cujus magnitudinem, et onagros, id est, silvestres asinos, te vidisse miraberis. Ductus itaque in perivolum satis magnum, montuosum, fructuosum, minime amœnum, cum pileatus equitarem, meque Coroplastes a longe prospiceret, filio celeriter directo, mihi mandavit fas non esse quempiam, ubi imperator esset, pileatum, sed teristratum incedere. Cui : Mulieres, inquam, nostræ tiaratae et teristratae, viri equitant pileati. Nec decet vos compellere patrium me hic mutare morem : cum vestros nos adeuntes, patrium morem tenere sinamus : manicati enim, fasciati, fibulati (vipolati), criniti, talari tunica induti penes nos equitant, incedunt, mensæ assident : et, quod nostris omnibus nimis turpe videtur, ipsi soli capite operto imperatores nostros deesculantur. Quod non amplius fieri Deus permittat, tacitus dixi.

49. « Revertere ergo, inquit. Quod cum facerem, occurrunt mihi commixti capreis, quos ipsi dicunt, onagri. Sed, quæso, quales onagri ? Quales sunt Cremonæ domestici : color idem, forma eadem, auriti itidem, vocales similiter, cum rudere incipiunt, magnitudo non dispar, velocitas una, dulces lupis æque. Quos cum viderem, coequitanti Græco inquam : Hujusmodi nunquam in Saxonia vidi. Si, inquit, dominus tuus sancto imperatori morigeratus fuerit, multos illi hujusmodi dabit, eritque illi non parva gloria, cum ipse possidebit, quod nemo dominorum decessorum suorum vidit. Sed mihi credite, domini mei Augusti, confrater et coepiscopus meus dominus Antonius potest non inferiores dare, ut commercia testantur, quæ fiunt Cremonæ, atque ipsi non onagri, sed domestici ; non vacui, sed onerati procedunt. Sed cum ea superius scripta verba idem Nicephoro nuntiasset, transmissis mihi duabus capreis, ut abirem, licen-

tiam dedit. In crastinum autem Syriam versus profectus.

50. « Sed cur exercitum nunc in Assyrios duxerit, quæso advertite. Habent Græci et Sarraceni libros, quos *ὀράσεις*, sive visiones Danielis vocant ; ego autem Sibyllinos : in quibus scriptum reperitur, quot annis imperator quisque vivat : quæ sint futura, eo imperitante, tempora ; pax, an simultas ; secundæ Sarracenorum res, an adversæ. Legitur itaque, hujus Nicephori temporibus Assyrios Græcis non posse resistere, huncque septennio tantum vivere : post cujus obitum imperatorem isto deteriorem (sed timeo quod inveniri non possit) et magis imbellem debere surgere : cujus temporibus prævalere debent adeo Assyrii, ut in Chalcedoniam usque, quæ distat Constantinopoli hand longe, potestative cuncta debeant obtinere. Considerant enim utrique tempora, una eademque re Græci animati insequuntur, Sarraceni desperati non resistunt, tempus expectantes, cum et ipsi insequuntur, Græci iterum non resistunt (interim non resistent).

51. « Sed Hippolytus quidam Siciliensis episcopus eadem scripsit, et de imperio vestro et gente nostra, nostram nunc dico omnem, quæ sub vestro imperio est, gentem : atque utinam verum sit, quod de præsentibus scripsit iste temporibus. Cætera, ut scripsit, sunt usque huc completa, quemadmodum per ipsos, qui horum librorum scientiam habent, andivi ; et ex multis ejus dictis unum id proferamus in medium. Ait enim nunc completum iri scripturam, quæ dicit : Λέων σκύμνος ἐμπεδωξουσιν ὄναγρον, græce ita. Latinum autem sic : Leo et catulus simul exterminabunt onagram. Cujus interpretatio secundum Græcos : Leo, id est, Romanorum sive Græcorum imperator, et catulus, Francorum scilicet rex, simul his præsentibus temporibus exterminabunt onagram, id est, Sarracenorum regem Africanum. Quæ interpretatio eo mihi vera non videtur, quoniam leo et catulus, quamvis disparis magnitudinis, unius tamen sunt naturæ et speciei seu moris, atque ut mihi mea scientia suggerit, si leo Græcorum imperator, inconveniens est ut catulus sit Francorum rex ; quamvis enim utrique homines sint, sicut leo et catulus uterque animalia, distant tamen moribus tantum, non dico solum quantum species speciebus, sed quantum sensibilia insensibilibus. Catulus a leone nil nisi tempore distat, forma eadem, rabies una, rugitus idem. Græcorum rex crinitus, tunicatus, manicatus, teristratus, mendax, dolosus, immisericors, vulpinus, superbus, falso humilis, parcus, cupidus, alio, capre et porris vescens, balnea bibens ; Francorum rex contra pulchre tonsus, a muliebri vestitu veste diversus, pileatus, verax, nil doli habens, satis ubi competit misericors, severus ubi oportet : semper vere humilis, nunquam parcus, non alio, cæpis, porris vescens, ut possit animalibus eo parcere, quatenus non manducatis, sed venundatis pecuniam congreget. Audistis differentiam,

nolite hanc interpretationem suscipere : aut enim futura est, aut hæc vera non est : impossibile est enim, ut Nicephorus, sicut ipsi mentiuntur, sit leo, et Otto sit catulus, qui simul exterminet aliquem. Ante enim pererratis amborum finibus, exul aut Ararim Parthus bibet, aut Germania Tigrim, quam Nicephorus et Otto amicitia coeant et fœdera jungant.

52. « Audistis Græcorum, audite nunc Luitprandi Cremonensis episcopi interpretationem : Dico autem, et non solum dico, sed affirmo, si scriptura hæc præsentibus est implenda temporibus, leo et catulus, pater et filius, Otto et Otto in nullo dispare, tempore distantes tantum, simul hoc præsentis tempore exterminabunt onagrum, id est, silvestrem asinum Nicephorum : qui non incongrue silvestri asino comparatur, ob vanam et inanem gloriam, incestumque dominæ¹ et com-matris suæ conjugium. Si onager iste nunc a leone et catulo nostro, Ottone et Ottone, patre scilicet et filio Augustis Romanorum imperatoribus exterminatus non fuerit, nec quod Hippolytus scripsit verum erit : Græcorum enim illa superior abjicienda interpretatio est.

53. « Sed, o Jesu bone, Deus æterne, Verbum Patris, qui nobis indignis loqueris non voce, sed inspiratione, nullam aliam interpretationem quam meam in hac sententia velis. Jube, ut leo et catulus isti hunc exterminet et humilient onagrum corpore, quatenus in se reversus, dominisque suis Basilio et Constantino imperatoribus subditus, in die Domini spiritus sit salvus.

54. « Sed astronomi hoc idem de vobis et Nicephoro pronuntiant. Res, inquam, mira. Cum quodam sum locutus astronomo, qui vestram, domini mei Augusti, æquivocique vestri Augusti, formam, mores, ut sunt, vere dixit, cunctaque mea præterita, quasi præsentia dixit. Nec præterit quisquam amicorum vel inimicorum, de quibus mens mihi suggessit, ut interrogarem, cujus habitum, formam et mores non diceret. Quidquid calamitatis mihi hoc in itinere accidit, futurum esse prædixit. Sit mendacium omen (omne) quod dixit ; unum, quæso, solummodo sit verum, quod vos esse facturos Nicephoro prædixit, fiat utinam, utinam fiat, et tum nil me mali passum esse intelligam.

55. « Scribit etiam præfatus Hippolytus, Græcos non debere Sarracenos, sed Francos conterere, qua lectione Sarraceni animati, ante triennium cum Manuele patricio, Nicephori nepote, juxta Scyllam et Charybdim in mari Siculo, bellum parant ; cujus immensas copias cum prostravissent, ipsum comprehenderunt, capiteque truncum (truncatum) suspenderunt : cujus socium et com-militonem² cum caperent, qui neutrius erat gene-

ris, occidere sunt dedignati, sed vinetum ac longa custodia maceratum tanti vendiderunt, quanti nec ullum hujusmodi mortales sani capitis emerent.

« Nec infirmiori animo, eadem confirmati lectione, haud multo post magistro Exarchontæ occurrunt, quem dum in fugam verterent, ejus copias omnibus modis contriverunt.

56. « Est et aliud, quod nunc Nicephorum compulit copias in Assyrios ducere : Argorum enim omnem regionem, instans tempus, Deo jubente, eo usque fames attrivit, ut neque tritici duo Papienses sextarii aureo comparentur, hocque ubi ubertas quasi regnat. Hanc pestem, muribus cooperantibus, ita dilatavit, ut messiosis tempore, quidquid ubique terrarum annonæ erat, minimo dato pretio, possessoribus ejulantibus, congregarit. Quod cum juxta Mesopotamiam faceret, ubi frugum copia muribus absentibus creverat, arenæ maris multitudini annonæ multitudinem coæquavit. Igitur cum vili hoc commercio turpiter fames ubi ubi desæviret, octoginta millia mortalium, obtentu militiæ, secum congregavit ; quibus per continuum mensem, quod uno emerat aureo, duobus vendidit. Hæ sunt, domine mi, res, quæ Nicephorum copias in Assyrios nunc ducere compulerunt. Sed quales, quæso, copias ? vere, inquam, non homines, sed hominibus similes, quibus lingua tantum procax, sed frigida bello dextera. Non inspicit in his Nicephorus qualitatem, sed solam quantitatem : quod quam periculosum illi sit, tum sero pœnitebit eum, cum imbelles plurimi, multitudine animati, a nostris perpauca bella scientibus, imo sitientibus conterentur.

57. « Cum obsideretis Bareas, trecenti tantummodo Ungari juxta Thessalonicam quingentos Græcos comprehenderunt, et in Ungariam duxerunt. Quæ res, quia prospere successit, compulit ducentos Ungariorum haud longe Constantinopoli in Macedonia similiter facere : ex quibus, cum incaute per angustam redirent viam, quadraginta sunt capti, quos nunc Nicephorus de custodia eductos, pretiosissimisque vestibus ornatos, patronos sibi et defensores paravit, secum in Assyrios ducens. Verum qualis sit ejus exercitus, hinc potestis conjicere, quoniam qui cæteris præstant, Venetici sunt et Amalphitani.

58. « Nunc his omissis, quid mihi acciderit, animadvertite. Sexto kalend. Augusti extra Constantinopolim in Umbria a Nicephoro licentiam accepi ad vos redeundi ; cumque Constantinopolim venirem, Christophorus patricius eunuchus, qui Nicephori vicem eodem gerit, mihi mandavit, non posse me tunc recedere, quia Sarraceni tunc occupaverunt mare, et Ungarii terram : expectandum mihi esse, donec ipsi discederent : sed utrumque, prohi dolor, fuit mendacium. Tunc appositum sunt custodes, qui mihi et meis a domo mea exitum prohiberent. Latine lingue pauperes, qui me elemosynarum gratia adierunt, comprehendentes ceciderunt, custodiæ tradiderunt. Græcolonon

¹ Theophanoni namque Romanus affinitate a baptismo junctus, eam denique in thalamum rapuit, invito quoque patriarcha. Compatriatus ergo et tunc impedimentum matrimonii. — ² Fuit is Nicetas eunuchus τοῦ πάλαιου βουλευμένου.

meum, id est, græcæ linguæ gnarum, non permittebant egredi, saltem ut sumptus emeret, sed cum solum græcæ linguæ ignarum, qui non signorum signis, sed digitorum, seu capitis nutibus cum venditore emptor loquebatur, tantique nummis emebat quatuor, quanti Græcolonus obsonium uno.

59. « Et cum amicorum quidam aromata, panes, vinum, poma mitteret, solo cuncta fundentes, nuntios colaphis satis oneratos dimiserunt. Et nisi divina pietas parasset in conspectu meo mensam adversus eos, qui tribulant me, una mihi parata mors foret accepta. Sed qui permisit tentari, dedit tunc misericorditer pati. Hujuscemodi me periculum secundo nonarum Junii usque ad sextum nonas Octobris, Constantinopoli diebus scilicet centum viginti maceravit.

60. « Verum ut angerebant calamitates meæ, in Assumptione sanctæ Dei Genitricis et Virginis Mariæ, meo omine non bono venerunt domini Apostolici et universalis papæ Joannis nuntii cum litteris, quibus rogabant Nicephorum imperatorem Græcorum, ut parentelam firmamque amicitiam faceret cum dilecto spiritualique filio suo Ottone Romanorum imperatore Aug. Quæ vox, quæ inscriptio secundum Græcos peccatrix et temeraria, quomodo latorem non occiderit; cur, priusquam læderetur, non oppresserit, qui in aliis rebus sæpe videor spermologus et multisonus, in hac, ut piscis, videor insonus. Objurgabant Græci mare, imprecabantur æquori, plus justo mirantes, cur peccatum illud portare potuerit, cur fretum dehiscens navim non absorbuerit.

61. « Imperatorem, inquiunt, universalem Romanorum, Augustum, magnum, solum Nicephorum scripsisse Græcorum hominem quemdam barbarum, pauperem Romanorum non piguit. O cælum, o terra, o mare! Sed quid, inquiunt, faciemus hominibus istis sceleratis, criminosis? Pauperes sunt, et si eos occidimus, manus nostras sanguine vili polluimus; pannosi sunt, servi sunt, rustici sunt, si eos flagellamus, non ipsos, sed nos dedecoramus, qui nec Romana scutica deaurata, nec hujusmodi sunt crucibus digni. O utinam alter episcopus, alter marchio esset, culeis enim suti post acerbos virgarum ictus, post barbæ seu capillorum distractionem, in mare demergerentur. Sed servantur, inquiunt, et quousque sanctissimus imperator Romanorum Nicephorus hæc resciscat mala, gravi custodia macerentur.

62. « Dum hæc resciscerem, felices eos, quoniam pauperes, me infelicem, quia divitem judicavi. Cum domi essem, mea me voluntas pauperem excusabat; Constantinopoli vero positus, Cresi me habere divitias timor ipse dicebat. Semper mihi pauperies gravis, tunc visa est levis, tunc accepta, tunc amplectenda. Amplectenda utique, quæ suos perimi, subjectos sibi flagellari non patitur. Et quia hæc paupertas Constantinopoli solum suos ita defendit, eodem sit solummodo diligenda.

63. « Igitur Apostolicis nuntiis in carcerem traditis, publicana illa Epistola Nicephoro in Mesopotamiam mittitur, unde usque ad quintum idus Septembris non est reversus, qui asferret apologeticum nuntium. Qua die cum rediret, et me lateret, post biduum, decimo octavo scilicet kalendas Octobris, precibus muueribusque effeci, ut vivificum atque saluterum adorarem lignum: ubi tanto in tumultu populi clam custodibus quidam me adierunt, qui mentem meam lugubrem, furlivis sermonibus hilarem reddiderunt.

64. « Decimo quinto autem kalendas Octobris, mortis vitæque medius, ad patatium sum convocatus. Cumque ad Christophori patricii eunuchi præsentiam venirem, benigne me suscipiens, mihi cum tribus aliis assurrexit: quorum hujusmodi fuit narrationis initium:

65. « Ostendunt pallor in ore sedens, macies in corpore toto, crinitum caput, proluxa contra morem barba, immensum cordi tuo inesse dolorem, eo quod redeundi ad dominum tuum terminus est dilatalus. Verum ne sancto imperatori, neve nobis succenseas, oramus. Reddimus autem tarditatis tuæ causam. Papa Romanus (si tamen papa est vocandus, qui Alberici filio apostatæ, adultero, sacrilego, communicavit, comministravit) litteras nostro sanctissimo imperatori se dignas, illoque indignas misit. Græcorum illum et non Romanorum imperatorem vocans: quod tui domini consilio actum esse non est ἀπορίστητον.

66. « Quod, inquam, mecum, verbum audio? perii: haud dubium est, quin in prætorium recta proficiscar via. Sed papa, audi, aiunt, omnium hominum stolidior, scimus dicere, dicere vis, nosque id profiteremur. At ego non id aio. Audi ergo. Sed papa fatuus, insulsus, ignorat Constantinum sanctum imperialia sceptræ huc transvexisse, senatum omnem, cunctamque Romanam militiam. Romæ vero vilia mancipia, piscatores scilicet, cupediarios, aucupes, nothos, plebeios, servos tantummodo dimisisse. Nunquam ille hoc nisi tui suggestionem scriberet regis; quod quam periculosum a nobis fuerit, nisi resipuerint, proxima tempora declarabunt.

67. « Sed papa, inquam, simplicitate clarus, ad laudem hoc imperatoris, non ad contumeliam scribere putavit. Constantinum Romanum imperatorem cum Romana militia huc venisse, ac civitatem istam suo ex nomine condidisse certo scimus; sed quia linguam, mores, vestesque mutastis, putavit sanctissimus papa, illa vobis displicere Romanorum nomen, sicut et vestem: quod in futuris, vita comite, ostendetur Epistolis, quarum superscriptio hæc erit: Joannes papa Romanus Nicephoro, Constantino, Basilio magnis Romanorum imperatoribus atque Augustis, quod quanam dixerim, quæso, advertite.

68. « Nicephorus perjurio atque adulterio regni apicem est adeptus. Et quoniam Christianorum omnium salus ad Romani papæ pertinet sollicitu-

dinem, mittat Nicephoro dominus papa Epistolam sepulcris omnino similem, quæ foris sunt dealbata, intus plena sunt ossibus mortuorum: impropere illi intrinsecus, qualiter perjurio et adulterio acceperit super dominos suos monarchiam, invitet eum ad Synodum, et si non venerit, anathemate feriat. Si superscriptio hujusmodi non fuerit, nec ad ipsum usque feretur.

69. « Nunc ad propositum redeamus. Superscriptam ex superscriptione promissionem a me memorati principes cum audissent, nihil inesse doli putantes: Grates tibi persolvimus, aiunt, o episcopo: decet enim sapientiam tuam tantis mediaticem intercedere rebus. Solus es ex Francis, quem nunc diligamus; sed cum depravata, te hortante, correxerint, et ipsi diligenter: inque iterum ad nos cum veneris, non indonatus abibis. Corona aurea sceptroque, cum huc ultra rediero, me Nicephorus donabit, tacitus dixi.

70. « Sed dic, inquiunt: vult dominus tuus sanctissimus cum imperatore firmare amicitiam fœdere nuptiarum? Cum huc venirem, voluit, inquam; sed quia me diu hic morante litteras non recepit, σφάλμα, id est, vitium a vobis, meque captum putat et vinctum, æstuatque animus ejus totus, ut lædæ, catulis raptis, donec vindictam justa faciat acerbitate, et nuptias abhorreat, atque iram in vos evomat.

71. « Si ceperit, inquiunt, non dicimus Italiam, sed nec ipsa capiet eum, in qua ortus est, pauper et gunnata, id est, pellicea Saxonia: pecunia, qua pollemus, omnes nationes super ipsum invitabimus, et quasi keramicum (κεραμικόν), id est, vas fictile, quod confractum reformari nequit, confringemus. Et quoniam te in decorem suum quædam pallia emissemus, ut in medium proferantur, edicimus: quæ sunt vobis digna, plumbea notentur bulla vobisque sinantur; quæ vero κολυμένα, id est, nationibus omnibus; præ nobis Romanis, prohibita, pretio reddito auferantur. Quod cum fieret, quique mihi pretiosissimas purpuras abstulerunt: indignos vos, omnesque Italos, Saxones, Francos, Bagoarios (Bajoarios), Suevos, imo cunctas nationes hujusmodi veste ornatos incedere indicantes. Quod quam indecorum quamque contumeliosum sit, molles, effeminatos, manicatos, tiaratos, teristratos, mendaces, neutros¹, desides, purpuratos incedere; heroas vero, viros scilicet fortes, scientes bellum, fidei charitatisque plenos, Deo subditos, virtutibus plenos non: quid est, si non hæc contumelia est?

72. « Sed ubi est, inquam, imperatorius sermo? ubi imperialis promissio? cum enim illi valedicerem, rogavi, ut in Ecclesiæ honorem quantivis pretii me permitteret pallia emere. Qui ait: Qualia vis et quanta? ποιότητα καὶ ποσότητα, id est, qualitatem et quantitatem ponens, differentiam plane non posuit, ut diceret his et illis exceptis. Testis

est Leo Coroplastes frater ejus; testis est et interpres Evodisius, Joannes, Romanus; testis sum ipse, qui quod imperator diceret, etiamsi interpres abesset, intellexi. Sed κολυμένα, id est, prohibita sunt hæc, inquiunt. Et cum, quæ asseris, imperator diceret, de talibus saltem, ut somniales, non potuit cogitare: ut enim divitiis, sapientia, ita et cæteris nationibus præstare veste debemus, ut quibus est singularis in virtutibus gratia, sit singularis et in pulchritudine vestis.

73. « Haudquaquam singularis, inquam, hæc vestis fieri potest, cum penes nos obolarie mulieres, et mandrogerontes his utantur. Unde, inquiunt, vobis? A Veneticis et Amalphitanis institutis, inquam, qui nostris ex victualibus, hæc ferendo nobis, vitam nutriunt suam. Sed non amplius hoc facient, aiunt. Scrutabuntur plane, et si quid hujusmodi inventum fuerit, verberibus cæsus, crine tonsus, pœnas dabit.

74. « Temporibus, inquam, beatæ memoriæ Constantini imp. huc veneram, non episcopus, sed diaconus; nec ab imperatore aut rege, sed a Berengario marchione missus, et multo plura ac pretiosiora pallia emi: quæ neque scrutata, nec a Græcis visa, nec plumbo sunt signata. Nunc, Deo miserante, episcopus, et a magnificis impp. Ottone et Ottone patre et filio missus, tanto inhonestior, ut Veneticorum more pallia mea notentur, et quæ, quantivis pretii videntur, auferantur, cum in Ecclesiæ mihi commissæ usus ferantur. Non tædet vos contumeliarum mearum, imo dominorum meorum, in quibus contemnor? quod sum custodiæ traditus, quod fame sitique cruciatus, quod non ad ipsos redirem hucusque relentus, nisi etiam ad cumulum dedecoris eorum propriis exspolier rebus? Auferte saltem, quæ sunt empta, dimittite, quæ sunt dono ab amicis donata.

75. « Constantinus, inquiunt, imperator, homo lenis, in palatio manens perpetuo, hujusmodi rebus amicas sibi nationes effecerat: Nicephorus vero Basileus homo ταχύχρησ¹, id est, militiæ deditus, palatium ceu pestem abhorret; et vocatur a nobis prope simultatis amator, atque argumentosus, qui non pretio sibi gentes amicas, sed terrore et gladio sibi subditas facit. Atque, ut cognoscas, quanti dominos tuos reges habeamus, quæ data sunt coloris hujusmodi, et quæ empta, via eadem ad nos revertentur.

76. « His dietis atque completis, χρυσόβουλιν, id est, Epistolam auro scriptam et signatam mihi dederunt, vobis deferendam; sed non vobis dignam, ut mens credit mea. Tulerunt autem et alias litteras argento signatas, atque dixerunt: Papam vestrum imperiales recipere litteras, indignum esse dijudicamus. Mittit autem illi Coroplastes, imperatoris frater non per suos pauperes nuntios, sed per te Epistolam, se satis dignam, ut nisi resipuerit, funditus se perisse cognoverit.

¹ Eunuchos intelligit.

¹ Unde et Zonaras: Τῇ στρατιωτικῇ μεταχειρίσει ἐπιγραφόμενος.

77. « Hanc cum accepissem, vale mihi dicentes, dimiserunt, oscula præbentes satis jucunda, satis amabilia. Sed dum recederem, legationem mihi non me, sed illis satis dirigunt dignam; scilicet quod mihi soli, meisque equos darent, sarcinis nullum, sicque nimis, ut res poscebat, turbatus. *διζωόστυν*, id est, ductori meo quinquaginta aureorum res pretio dedi. Et cum non haberem, quod pro malefactis Nicephoro tunc redderem, hos in pariete invisæ domus meæ, et in mensa lignea versiculos scripsi:

Argolicum non tuta fides: procul esto, Latine.
Credere, nec mentem verbis adhibere memento.
Vincere dum possit, quam sancte pejerat Argos!
Marmore quæ vario magnis patet alta fenestris
Hæc inaquosa domus, concluso pervia soli,
Frigora suscipiens, æstum nec sava repellens.
Præsul ab Ausonia Luitprandus in urbe Cremona,
Constantinopolim pacis profectus amore,
Quatuor æstivis concludor mensibus istic:
Induperator enim Bareas (Barim, sive Barium) conscenderat Otto,
Cæde simul flammisque sibi loca subdere tentans,
Sed precibus remeat Romanus victor ad urbes
Inde meis. Nurum promisit Græcia mendax,
Quæ nec nata foret, nec me venisse doleret,
Nec rabiem, Nicephore, tuam pendere quirem,
Privignam prohibes qui nato jungere herili.
Immuet ecce dies furis cum pulsus acerbis,
Ni Deus averlat, toto Mars sæviet orbe,
Crimine paxque tuo cunctis optanda silebit.

78. « His conscriptis versibus sexto nonas Octobris hora decima, ex illa quondam opulentissima et florentissima, nunc lamelica, perjura, mendace, dolosa, rapace, cupida, avara, cenodoxa civitate, cum diasoste meo lintre egressus, diebus quadraginta et novem, asinando, ambulando, equitando, jejunando, sitiendo, suspirando, flendo, gemen-do Naupactum veni, quæ est Nicopoleos civitas, in qua diasostes meus me deserens, duabus parvis impositum navibus, duobus me mandatoribus, qui Hydruntem me per mare conducerent, commendavit.

79. « Verum cum entolin, id est, præceptum jus captionis a Græcorum principibus non haberent, ubi ubi spernabantur: nec jam nos ab ipsis, sed ipsi a nobis alebantur. Quam sæpe illud Terentianum mecum stomachabar: Tutore opus est, quos defensores paras.

80. « Igitur nonis kalendis Decembris Naupactum egressus, biduo ad Offidarim (Ophidarin) fluvium usque perveni¹, ut meis comitibus non in naviculis, quæ eos capere non poterant, residenti-bus, sed secus litus pergentibus. Positi itaque in Offidaro flumine, Patras alio maris in litore decem et octo miliaribus distare prospeximus: quem Apostolicæ passionis locum, quia Constantinopolim ascendendo visitavimus, adoravimus: nunc cum visitare et adorare (confiteor peccatum meum) distulimus. Fecit hoc, domini mei Augusti, rever-tendi ad vos et videndi ineffabile desiderium, et ni hoc solum esset, perpetuo, ut puto, perierim.

¹ Locus imperfectus.

81. « Pugnavit contra me insensatum Auster, mare flatibus ab imis turbans sedibus. Cumque hoc continuis diebus ac noctibus faceret, pridie kalend. Decembris, ipso scilicet passionis die, intellexi meo mihi hoc accidisse delicto. Sola vexatio intellectum dedit auditui. Fames quippe nos vehe-menter oppresserat. Terræ incolæ, ut nostra nobis auferrent, interficere nos cogitabant: mare ne ef-fugeremus, fluctibus æstuabat. Tum conversus ad Ecclesiam, quam videbam, flens et ejulans in-quam: Sancte Andrea Apostole, compiscatoris, confratris et coapostoli tui Simonis Petri sum ser-vus. Passionis tuæ locum non abhorruui, nec su-perbia declinavi: urit me domum redeundi Au-gustalis visio, Augustalis amor. Si te ad indigna-tionem commovit peccatum meum, eliciat ad misericordiam meorum meritum Augustorum. Non habes, fratri quod conferas; confer diligen-tibus fratrem Augustis, inhærendo ei qui omnia novit. Nosti tu quanto labore et sudore, quantisque vigiliis et impensis Romanam fratris tui Petri Apostoli Ecclesiam, ex impiorum manibus ereptam ditaverint, honoraverint, exaltaverint, et in statum proprium reformaverint. Si mea me præcipitant opera, ipsorum saltem liberent merita. Quosque vult prædictus, fide et sanguine frater tuus, Apo-stolorum princeps Apostolus Petrus, in aliis rebus gaudere et prosperari, in hac, id est, in me, quem ipsi direxerant, minime contristari.

82. « Non est, domini mei Augusti imperato-res, verum dico, non est adulatio hæc, nec consue-nunc pulvillos sub cubito manus; res, inquam, vera est, post biduum vestris meritis tanta est fre-tum tranquillitate sedatum, ut, cum nautæ a nobis aufugerent, ipsi Leucatem usque navigaremus, mil-liaribus scilicet centum et quadraginta, nihil dis-criminis aut tristitiæ patientes, nisi parum in faucibus fluminis Acheloi; ubi discurrentes velo-citer fluctus ejus maris unda reverberat.

83. « Quid ergo, præpotentes Augusti, retri-buetis Domino pro omnibus quæ retribuit in me vobis? Dicam quid. Hoc Deus vult, hoc petit; et quamvis sine vobis hoc facere possit, vult tamen hujus rei esse hypurgos, id est, ministros: ipse enim quod ei offeratur dat; custodit quod exigit, ut possit coronare quod præstat. Advertite igitur, quæso.

84. « Nicephorus cum omnibus Ecclesiis homo sit impius, livore, quo in vos abundat, Con-stantinopolitano patriarchæ præcepit, ut Hydrun-tinam Ecclesiam in archiepiscopatus honorem di-latet, nec permittat in omni Apulia seu Calabria latine amplius, sed græce divina mysteria cele-brari. Mercatores dicit fuisse præteritos papas, et Spiritum sanctum vendidisse, quo vivificantur et reguntur omnia, qui replet orbem terrarum, qui scientiam habet vocis, qui est cum Deo Patre et Filio ejus Jesu Christo coæternus et consubstantia-liter, sine initio, sine fine, permanens verus, qui pretio non æstimatur, sed a mundis corde tanti

emitur, quanti habetur. Scripsit itaque Polyenctus Constantinopolitanus patriarcha privilegium Hydruntino episcopo, quatenus sua auctoritate habeat licentiam episcopos consecrandi in Acirentila, Turcico, Gravina, Maceria, Tricario, qui ad consecrationem domini Apostolici pertinere videntur.

85. « Sed quid hoc memorem, cum ipsa Constantinopolitana Ecclesia nostræ sanctæ Catholicæ atque Apostolicæ Ecclesiæ Romanæ merito sit subiecta? Scimus, imo videmus, Constantinopolitanum episcopum pallio non uti, nisi sancti Patris nostri permissu. Verum cum impiissimus Albericus, quem non stillatim cupiditas, sed velut torrens impleverat, Romanam civitatem sibi usurparet, dominiumque Apostolicum, quasi servum proprium in conclavi teneret, Romanus imperator filium suum Theophylactum eunuchum, patriarcham constituit; cumque eum Alberici cupiditas non lateret, missis ei muneribus satis magnis, effecit, ut ex papæ nomine Theophylacto patriarchæ litteræ mitterentur, qua (quarum) auctoritate cum ipse, tum successores ejus absque paparum permissu palliis uterentur. Ex quo turpi commercio vituperandus mos inolevit, ut non solum patriarchæ, sed etiam episcopi totius Græciæ palliis utantur. Quod quam absurdum sit, censore opus non est.

86. « Est ergo meum consilium, sanctam fieri Synodum, et ad eandem vocari Polyenctum; quod si venire, et *σφάλματα* sua, id est, vitia superius scripta, canonice emendare noluerit, quod sanctissimi canones decreverint, fiat.

« Vos interim, præpotentes Augusti, ut cœpistis, laborate; efficite, ut si nolit vobis Nicephorus, quem canonice arguere disponimus, obedire, audiat vos, quorum copiis non audet cadaverosus occurrere. Hoc, inquam, est, quod nos apostoli domini et commilitones nostri facere volunt. Non est a Græcis Romanus vilis tenendus locus, quia recessit inde imperator Constantinus; verum eo magis colendus, venerandus, adorandus, quia venerunt illuc Apostoli doctores sancti Petrus et Paulus. Ac de his satis me scripsisse sufficiat, donec Deo largiente, sanctissimorumque Apostolorum orationibus ex Græcorum ereptus manibus, vos adeam. Et tunc non tædeat dicere, quod hic nunc pignit scribere. Nunc ad propositum redeamus.

87. « Octavo idus Decembris Leucatem venimus, ubi ab episcopo ipsius loci eunuchō, sicut et ubique ab aliis, inhumanissime suscepti et tractati sumus. In omni Græcia, veritatem dico, non mentior, non reperi hospitales episcopos. Divites sunt, pauperes sunt: divites, aureis quibus plena luditur arca: pauperes ministris seu utensilibus. Soli mensulæ assident nudæ, paximacium (panem nauticum) sibi apponentes, balneaque tunc vitro permodico non bibentes, sed sorbillantes. Ipsi vendunt, ipsi emunt; ostia ipsi claudunt, ipsi aperiunt; ipsi dapiferi, ipsi agasones, ipsi capones; sed, ha, caupones volui scribere; verum res ipsa, quæ vera est, veritatem etiam nolentem compulsit scri-

bere; dicimus enim, quia capones sunt, id est, eunuchi, quod canonicum non est: sunt et caupones, id est, tabernarii, quod contra canones est: quorum incipit et claudit cœnam lactuca tenacem, claudere quæ cœnas lactuca solebat avorum. Felices eos, si paupertatem Christi hæc imitaretur, pauperes judicarem. Facit hoc asper nummus et auri sacra fames. Verum parcat illis Deus. Hoc eo illos puto facere, quoniam eorum Ecclesiæ sunt tributariæ. Leucatensis mihi juravit episcopus, quotannis Ecclesiam suam debere Nicephoro aureos centum persolvere, similiter et cæteras plus minusve secundum vires suas. Quod quam iniquum sit, sanctissimi patris nostri Josephi acta demonstrant, quia cum Ægyptum totam famis tempore tributariam Pharaonis faceret, sacerdotum terram a tributo liberam esse permisit.

88. « Igitur decimo nono kalendas Decembris, Leucate exeuntes, ipsique quoniam, ut superius scripsimus, nautæ effugerant, navigantes, decimo quinto ad Coriphum pervenimus, ubi ante navis egressionem occurrit nobis strategos quidam Michael nomine, Chersionitis, a loco scilicet Chersona, homo ipse canus capite, facie hilaris, sermone bonus, risu semper jucundus, sed, ut post patuit, mente diabolus: quod et Deus apertis mihi monstravit indicibus, si mea tunc mens hoc potuisset conjicere. Mox enim, ut pacem, quam corde non ferebat, mihi osculo dedit, tota Coriphus, magna scilicet insula tremuit: nec solum semel, sed ter eadem die pertremuit. Postque triduum autem, decimo quinto scilicet kalendas Decembris, dum in mensa positus panem comederem, qui ampliabat super me calcaneum suum, verecundatus sol facinus tam indignum, Incis suæ radios abscondit, et eclipsim¹ passus, Michaellem illum terruit, sed non immutavit.

89. « Dicam ergo, quid illi causa amicitiae fecerim, quidnam ab eo pro recompensatione perceperim. Dum Constantinopolim ascenderem, illud vestrum pretiosissimum scutum miro opere deauratum et fabricatum, quod mihi domini mei Augusti dedistis, cæteris cum muneribus, ut amicis meis Græcis darem, filio ipsius contuli. Nunc Constantinopolim rediens patrem pallio donavi pretiosissimo; pro quibus omnibus gratias distribuit ejusmodi: scripsit Nicephorus, ut quacumque hora se adirem, absque mora chelandio impositum Leoni Kitonitæ dirigeret: quod ipse non fecit: verum diebus viginti me retentum non suis, sed propriis me stipendiis aluit, donec a præfato Leone Kitonita nuntius venit, qui illum cur me moraretur, objurgavit. Verum cum objurgationes meas, lamenta, et suspiria mea ferre non posset, recessit, meque homini tam iniquo et pessimo commendavit, ut sumptus saltem me emere non permitteret, donec a me cortinam, libræ argenti pretio dignam, acciperet, et cum post viginti dies inde discedere-

¹ Fuisse hoc anno solis eclipsim XXII Decemb. Curopalates testatur.

rem, nuntius ipse, cui cortinam dederam, naucloero jussit, ut post acroteria, id est, promontorium quoddam me positum fame perire permetteret. Hoc autem eo fecit, quoniam ne purpuras haberem absconditas, mea pallia regyrait; ex quibus dum unum vellet accipere, non accepit.

90. « O Michaelēs, Michaelēs, ubi vos tot simul talesque reperi! Custos meus ille Constantinopolitanus Michaeli suo rivali me commendavit, malus pessimo, pessimus iniquo. Michael vocatus est et diasotes meus, homo quidem simplex, cujus sancta simplicitas tantum mihi pæne nocuit, quantum et istorum perversitas. Sed ab his parvulis Michaelibus impegī in te Michaelē magnum, semieremitam, semimonachum. Dico, et verum dico: non proderit tibi balneum, quo te assidue potas in amore beati Joannis Præcursoris. Qui enim fiete Deum quærunt, nunquam invenire merentur ¹.... » Quæ autem hæc secuta sint, dicentur anno sequenti.

91. *Capuana Ecclesia in archiepiscopatum erecta.* — Hoc eodem anno, cum Otto imperator Capuæ moraretur, et una cum eo esset Joannes papa, contigit ut (quod ex Leone Ostiensi superius meminimus) ipsa Capuana Ecclesia ab eodem Pontifice archiepiscopatus dignitate, gratitudinis ergo, insigniretur. Ibi siquidem fugatus ab Urbe, honorifice susceptus, digneque habitus, et ab adversariorum insidiis custoditus est a Pandulpho principe Capuano. Quod autem in primis ad rationem temporis spectat, id hoc anno contigisse, ex ipso Leone Ostiensi ² satis redditur exploratum, dum ait, factum esse anno decimo nono Aligerni Cassinensis abbatis, quem ex eodem ³ Leone liquet, anno Redemptoris nongentesimo quadragesimo nono abbatem fuisse creatum, a quo tempore si numeres annos decem et novem, plane hoc anno nongentesimo sexagesimo octavo opus est fatearis id contigisse. Et quidem prima omnium (quod invenerim) Ecclesia Capuana ea archiepiscopatus dignitate in regno Neapolitano fuit illustrata, cum ipse Joannes papa eidem Ecclesiæ præfecit archiepiscopum Joannem ejusdem principis fratrem. De his enim ita Leo Ostiensis ⁴: « Hujus abbatis, Aligerni videlicet, anno decimo nono, Joannes papa Roma pulsus exilio, Capuam venit, et a memorato principe rogatus, tunc primum in eadem civitate archiepiscopatum constituit, consecrato fratre ipsius principis Joanne in archiepiscopum ». Hæc ipse.

92. Porro consignatum tempus non ad Joannis exilium, quod longe antea contigit, sed ad collatam illi Ecclesiæ archiepiscopatus dignitatem, referri necessario debet. Subjicit vero idem Leo successores archiepiscopos, dicens: « Post quem dominus Leo hujus monasterii Cassinensis videlicet monachus in eadem civitate quatuor annis et sex

mensibus archiepiscopatu functus, Gerberto nihilominus hujus cœnobii monacho sedem pontificalem reliquit ». Hæc Leo Ostiensis. His vero diebus, quibus hæc scribimus (quod non tacendum) maximum accessit eidem Ecclesiæ ornamentum, dum vacante eadem sede obitu Cæsaris Costæ archiepiscopi, mei in jure civili publice interpretando olim in Urbe præceptoris, delectus est a sanctissimo domino nostro Clemente papa VIII ad nobilissimæ Ecclesiæ regimen vir doctissimus ac religiosissimus Robertus Bellarminus S. R. E. cardinalis, virtutum meritis toti Christiano orbi conspicuus, exoptatus votis, collaudatus suffragiis, atque exceptus plausu, illud sacro Collegio conclamante: Dignus dignæ.

93. *Campanæ benedictio et elevatio in Lateranensi Ecclesia.* — Sed ad Joannem Pontificem revertamur, qui Capuæ his peractis, in Urbem rediens, cum imperator ibi adhuc moraretur, contigit primariam Lateranensis Ecclesiæ campanam miræ magnitudinis recens ære fusam super campanile elevari, quam prius idem Pontifex sacris ritibus Deo consecravit, atque Joannis nomine, puto Baptistæ, ejus Ecclesiæ esset usui, nuncupavit. Qui sacer ritus in Ecclesia perseveravit, ut eo modo, quo ipse usus, campanæ in Ecclesiis collocandæ, Deo primum, imposito eis nomine, dicarentur. Quod testantur veteres Codices Rituales; licet errore vulgi pro arbitrio utentis vocibus, dicantur baptizari campanæ, cum ita ab episcopis benedicuntur, non aliunde baptismi in re longe dispari mutuati nomen, nisi quod sicut in baptismo nomen imponitur baptizato, ita in ea consecratione nomen campanæ daretur, idque sive ea ratione, ut distingui posset a cæteris, vel quod magis conduceret ad pietatem, si voce sancti alienjus diceretur populus ad Ecclesiam convocari: cum alioqui nihil commune cum sacramento baptismatis habeant cæremoniæ illæ, sed magis cum aliis sacerorum vasorum benedictionibus in sancta Catholica Ecclesia antiquo usu receptis.

94. *De donatione Gerbergæ reginæ.* — Hoc pariter anno datum reperitur Diploma donationis Gerbergæ reginæ Ecclesiæ sancti Remigii. Fuit ista (ut testatur Frodoardus) soror Ottonis Magni imperatoris, relicta Gisleberti ducis Lothariensium, nupta Ludovico Francorum regi. « In cujus fine ad temporis rationem cognoscendam (quod nobis satis) datum habetur IV id. Februarii anno Incarnationis Dominicæ DCCLXVIII, in præfato comitatu in villa, quæ dicitur Hartra, anno Ottonis septimo ».

95. Apposita sunt signa, atque primum ipsius reginæ, his verbis: « Signum dominæ Gerbergæ gloriosæ reginæ, quæ regiæ auctoritatis manu hoc scriptum, quod fieri jussit, dignanter corroboravit, et aliis confirmari mandavit, etc. » Subjiciuntur plurimum procerum subscriptiones ac signa. Sed hæc satis.

¹ Cætera desunt in Ms. — ² Leo Ost. l. II. — ³ Ibid. c. 1. et 5. —

⁴ Ibid. c. 9.

Anno periodi Græco-Romanæ 6461. — Anno Æræ Hispan. 1006. — Anno Hegiræ 358, inchoato die 25 Novemb., Fer. 4. — Iesu Christi 968.

— Joannis XIII papæ 4. — Ottonis imp. 7. Nicephori Phocæ imp. 6.

1. *Gesta ab Ottone M.* — A num. 1 ad 5. *Otto Magnus* ad proceres Germaniæ litteras die xviii mensis Januarii datas misit, quibus significavit æstate hujus anni cum Ottone filio, *per Frazinetum ad destruendos Saracenos* sese iter arripiturum, si Græci in conditiones pacis consenserint, alias Saracenos Apuliam et Calabriam daturus. Addit, Ottonem filium *in Nativitate Domini* a Joanne XIII coronatum imperatorem. Recitat eas litteras Baronius ex Witichindo lib. 3, in fine. Ipsemet tamen Witichindus ibidem p. 35 dicit, Ottonem M. postea judicasse *ab expeditione Frazineti abstinere*. Quoad Calabriam et Apuliam, utraque hoc anno ab Ottone M. recepta, juris tandem Occidentalis imperii facta. Ilac de re queritur Nicephorus imp., ut videre est in legatione Luitprandi anno sequenti obita, et ibidem a Baronio num. 9 et seq. recitata, ubi num. 37 de principibus Capuano et Beneventano sermo est. Principes autem Capuani, qui per multos annos a Beneventanis diversi fuere, hoc tempore iidem erant, nisi quod *Pandolphus* Beneventanæ et Capuanæ urbium princeps *Landolphum* filium in societatem principatus adsciverat, uti anno sequenti videbimus.

2. *In Apulia manet Otto usque ad annum sequentem.* — Loquitur de hac profectione Ottonis M. in Apuliam Joannes Berardus in Chron. Casauriensi, atque : « Gloriosissimus imperator Otto cum de Urbe Roma, ubi eodem tempore, id est, anno Dom. Incarnat. nongentesimo sexagesimo octavo filium suum Ottonem in imperatorem Augustum excellentissime coronaverat, in Apuliam et Calabriam, ut eam sub suo subjugaret imperio tetendisset, dominus Adam abbas, etc. in eisdem Apuliæ finibus apud Bivinum secundo impetravit Privilegium de libertate monasterii, etc. Datum kalendas Maias, anno Dom. Incarnat. dcdlxix, imperii vere domni Ottonis Augusti octavo. Actum in Apulia in suburbio Bivino in Dei nomine feliciter. Amen ». Otto itaque hoc anno, et sequentis initio in Apulia fuit.

3. *Terræ motus.* — Ad num. 5. Narrat Baronius ex Curopalate, *mense Maio, xi Indictione*, fluisse ventos, qui fruges corrumpere, *ita ut deinde usque ad xii Indictionem, ingenti fame laboratum*

sit, scilicet in Oriente. Cedrenus vero ait, Indict. xi, die secunda mensis Septemb. terræ motum horrendum fuisse, *mense Maio ejusdem anni* ventos illos spirasse, subditque Cedrenus : *Itaque anno proxime insecuto, penuria extitit gravissima*, ideoque post kalendas Septembris hujus anni, a quo die Græci annum auspicantur. Denique Luitprandus, ut videre est apud Baronium num. 44, asserit, mense Julio hujus anni magnam famem Constantinopoli fuisse. Gesta hoc anno fusius Leo Diaconus narrat : « Cum jam æstas autumnio appetente excederet, ingens adeo terræ motus fuit, ut ædes et urbes everterentur, contigitque, ut Claudopolis Galatiæ ditissimum oppidum, opimoque solo ex importabili motu ac quassatione diruta excisaque, in civium tumultum subito verteretur, multique advenarum momento temporis, cum ibi reperti essent, interimerentur » ; quæ præsentī anno contigisse subsequētia verba demonstrant.

4. *Imber solito copiosior.* — « Præterea hoc anno media circiter æstate, jam sole Cancrum ineunte imber Byzantii, locisque finitimis erupit, qualis nunquam superioribus temporibus extitit. Vergente namque die (erat hæc parasceve, sexta scilicet feria) cœptum malum in horam nonam vix desiit ». Trium itaque horarum spatio tantus ille imber duravit, eratque videre per urbis vias et compita ac angustias fluvios stagnantes, ac quidquid anima præditum raptarent extinguentes. Contigit vero, ut et rursus imber turbidus favillaque mixtus ac cinere plueret, velut in fornacis fuligine, isque adeo his qui tangebant, caloris aliquid atque teporem injiciebat.

5. *Tegula Christi effigie impressa Constantinopolim defertur.* — Nicephorus imp. assumptis Romanis copiis ac cohortibus, *Antiochiam* Syriæ versus iter direxit : ibique castris positus, cum urbs necessario commeatu abunde instructa, haud statim pacisci suslineret, ipseque eam obsidionibus machinis diruere nollit, brevi tempore eam obsidere voluit : indeque profectus mediterraneam regionem, quam et Palestinam vocant, populabatur ac incessebat. Veniens itaque *Edessam*, ibi exercitum reficiebat : audierat enim in tegula Salvatoris expressam formam hac in urbe ac muni-

tione asservari. Tuuc vero *Nicephorus* imp. eruto oppido venerabilem eam tegulam inde abstulit, auroque ac lapillis capsam inde fabricatus, eaque oblecta reverenter ejusmodi tegula in sanctæ Dei Genitricis templo, quod est in palatio, munus obtulit. Postquam vero *Mempze* oppidum ceperat, ex obliquo Libano monte superato *Tripolim* admovit: quam munitam præque reliquis urbibus præcipue expugnatu difficilem videns, quod et classe adversorum ventorum flatu detinente destitueretur, *Arca* oppidum obsidendum duxit, penes quod reposita erat immensa divitiarum vis. Eam per novem totos dies expugnavit, atque alia complura præsidia castraque ipso clamore atque impetu cepit. Hæc de tentata Antiochia, de tegula Christi, et de Tripoli Curopalates cum anno tertio imperii Nicephori perperam conjungit, ut solis defectio, quam mox Leo Diaconus narrat, manifestissimum facit.

6. *Magna solis defectio.* — Pergit enim Leo Diaconus: « Interim vero, dum hæc imperator in Syria ageret, solis defectio contigit circa solstitium hibernum, qualis nunquam prius extiterat, una illa duntaxat excepta, quæ in Dominica venit Passione, defectionis genus istiusmodi accidit. Vicesima secunda mensis Decembris agebatur, diei vero hora tertia cælo prorsus sereno tenebræ terræ offusæ, stellæque omnes ejusdem magnitudinis, quæ a nobis cerni possint, collucebant ». Erat videre solis orbem sine splendore ac lucis expertem, quemdam vero obscurum tenuemque fulgorem in modum vitæ tenuis extremis partibus circum orbem collustrantem. Paulatim vero sol lunam præteriens (apparebat enim illa soli supposita, illius intercipientis lucem) pristinos radios immittebat, ac rursus lucis fulgoribus terram adimplebat. Novo igitur ac insolito spectaculo territi homines, Deum, ut par est, supplicibus votis propitium sibi deposcebant. Addit Leo Diaconus, se tunc Byzantii liberalibus disciplinis operam dedisse. Hanc vero eclipsim, cujus etiam meminere Curopalates, Cedrenus et Luitprandus in sua ad Nicephorum legatione, hoc Christi anno contigisse, hora diei iii, die xxii Decemb. ex calculo mathematico demonstrat Calvisius in opere Chron.

7. *Antiochia a Græcis circumsepta.* — Imperator, ait idem Leo, cum hostium castella ac præsidia nullo labore cepisset, *Antiochiam* cum omnibus copiis properat, eamque statim muro cinxit, et in eo equitum turmam peditumque agmen atque cohortem reliquit, ut quotidianis incursionibus atque grassationibus Antiochiam affligerent, ac vel invitam Romanis fœderari, manusque dare cogerent: nolebat enim illam destruere atque igni tradere. Postea « inde profectus in urbem regiam reversus est, magnificeque a civibus susceptus ibi moras trahebat ».

8. *Nicetus dux Græcorum eis ab Afris redditur.* — Imperator *Syriam* ejusque maritima populus *Byzantium* reversus est. Inde apud Carthaginienses de pace belloque actum, impiissimi Maho-

medis gladio dono misso, quem ex quodam ex captis in Palæstina oppidis tulerat, patricium *Nicetam* sibi reddi poscebat, hunc nempe qui in Sicilia captus fuerat. Tyrannus Carthaginensium terrefactus *Nicetam* et quotquot Romanorum ex diversis locis tenebat in carcere, dono misit imperatori; eum enim gentes omnes etiam atque etiam formidabant, et amicum habere ambiebant.

9. *Calocyri rebellio.* — Interim dum in Syria ac Byzantii hæc agerentur, qui regio nutu ad *Taurascythas* Calocyri, patricius missus fuerat, cum in Syria versans *Taurorum* amicitia junctus esset, ac muneribus eum corrupisset, auctor fuit, ut grandi conscripto exercitu *Mysos* invaderet: iisque expugnatis regionem sibi obnoxiam faceret, inque sedium propriarum usum ad habitandum retineret: opem quoque adversus Romanos ferret, ut imperium ipsi consequi rerumque summa potiri liceret. Id si præstaret, magna ac quæ nec verbis exprimi possint, ex ærario regio, reque privata in eum munera exportaturum. His Splendosthlæus (hoc enim illi a *Tauris* nomen) animi impetum cohibere non poterat; sed divitiarum spe suspensus arrectusque, terræ *Mysorum* possessionem somnians, ac cum alioqui vir ferventis animi esset, *Taurorum* pubem omnem ad eam expeditionem adegit. Sexaginta igitur millium fortium virorum collecto exercitu, exceptis calonibus ac impedimentis, una cum Calocyri patricio, quem et germanum amicitiae legibus admiserat, adversus *Mysos* movet. Jamque eo Istrum adnavigante, et in continentem excessum maturante, intelligentes Mysi quod in eos ille moliretur, triginta millium virorum constipata cohorte, se illis objecerunt. Verum *Tauri* validissimo impetu ratibus excedentes, scutaque obtendentes, ac strictis gladiis, hinc inde Mysorum stragem dabant. Porro *Mysi* ne primum quidem impetum sustinentes in fugam versi fusique *Dorystili* munito ejus gentis oppido præ ignavia degenerique proposito sese incluserunt. Tunc autem ferunt et Petrum Mysorum ducem, virum religiosum ac venerabilem, inopinato fugæ eventu nimio dolore percitum in santicum morbum incidisse, paucosque dies superstitem humanis excessisse. Verum hæc in Mysia postea gesta sunt. Romanorum vero imperator *Taurorum* motionem consiliaque non nesciens, cum alioquin in omnem vitam curis sollicitus, animique pervigilis fuisset, haud e re sua existimavit, ut adversus utramque gentem bellum susciperet. Commodum ergo visum est, si ex illis unam sibi gentem conciliaret: sic enim facile brevique alterius compitem fore. Ita Leo Diaconus.

10. *Sfendosthlæus a Moscis Swatoslawus dictus.* — Qui ab auctoribus Byzantinis Σφενδοστόλας, ab auctoribus qui de rebus Polonicis aut Moscoviticis scripsere, *Swatoslawus* appellatur: « Swatoslawum autem filium ad baptismum nequaquam perducere potuit », inquit Helberstainus comes in Commentariis Rerum Moscoviticarum pagin. 3, loquens de

Helena regina Russorum, qui hodie Moscovitæ vocantur, qui addit eum post *Helenæ* matris obitum in Russia regnasse, et ex concubina *Wolodimerum* suscepisse, quo regnante Russia seu Moscovia Christiana effecta, ut suo loco ostendimus. Porro *Svatoslaus*, ab aliis *Stoslaus*, ab aliis *Sphendostlaus* vocatur propter rationem a nobis anno dcccxc, n. 2 assignatam.

44. *Legatio Luitprandi ad Nicephorum Phocam imp.* — A num. 6 ad 91. Otto Magnus *Luitprandum* Cremonensem episcopum Constantinop. ad *Nicephorum* Augustum misit nuptiarum causa inter ipsius Ottonis filium et Theophaniam Romani junioris et Theophanonis filiam, non vero inter Annam Theophaniæ sororem natu minorem, et eundem *Ottonem* juniorem, ut creditur Baronijs, qui tamen recte ostendit hanc legationem ad præsentem annum pertinere, et confirmatur ex *Luitprando* num. 44, apud Baronium, qui scribit eo anno diem xx Julii in secundam feriam incidisse, quod præsentem contigit. Mirum autem videri non debet, quod *Luitprandus* *Nicephorum* tantis dotibus præditum plurimis vitiis laborasse scribat; cum *Zonaras*, *Cedrenus* et *Curopolates* eum avaritiæ, crudelitatis, et aliorum morum perversorum insimulent.

42. *Simeon Metaphrastes protosecretarius.* — Ex hac legatione constat, *Simeonem protosecretarium*, vulgo *Metaphrastem* appellatum, hoc tempore adhuc in vivis fuisse, sed nondum ad dignitatem logothetæ pervenisse. *Luitprandus* enim apud Baronium num. 29 ait: « *Leo Curopolates imperatoris frater, et Proto a Secretis Simeon pone me sequuntur, hæc latrantes, etc.* » Is enim *Simeon* alius non est a *Metaphraste*, quem infra videbimus, anno dcdlxxv logothetam fuisse. *Allatus* et *Bollandus*, qui, ut anno dcdii, num. 5 vidimus, eum circa annum dcdlx demortuum credidere, ad hunc locum animum non adverterant. Liquec secundo, *Hydruntum*, oppidum regni Neapolitani hodierni permunitum, a *Polyeucto* patriarcha Constantino-politano hoc tempore sede archiepiscopali exornatum fuisse. Id enim diserte asserit *Luitprandus* apud Baronium num. 84. Tertio intelligimus, imperatores Constantinopolitanos nomen *imperatoris* Occidentalibus imperatoribus nunquam tribuere voluisse, quod jam ostendimus anno dcccxxiv, quibus addi potest quod in gestis *Ludovici VII* Francorum regis cap. 8 dicitur, dum sermo fit de iis, quæ anno mclxvi in bello sacro contigere. Ait etiam auctor anonymus illius Historiæ: « *Invident Alemannis (nempe Græci), nec vellent quod potestas eorum et dominium cresceret. Deditantur valde, eo quod imperator Alemanniæ imperatorem se nominat Romanorum. Volunt enim dicere, quod suus imperator solus de jure debet totius mundi monarchiam obtinere.* » Idem habent *Helmodus* lib. 2, cap. 15 et *Willelmus Tyrius*. Nec dubitandum, quin inde græcæ et latinæ Ecclesiæ deploranda divisio vires acceperit.

43. *Roma et Ravenna imperatoribus subditæ.* — Intelligimus denique *Ottonem* cæterosque imperatores Occidentis Romæ et Ravennæ dominos fuisse, ac coram eorum legatis Romanos Pontifices de more ordinatos. *Luitprandus* enim, ut videre est apud Baronium num. 26 et seqq. ait, cum filiam *Nicephori imp.* *Ottonis imp.* filio conjugem postularet, Græcorum proceres, ut utramque civitatem Græcis redderet, poposcisse: « *Si datis quod decet, accipietis quod libet; Ravennam scilicet et Romam, cum his omnibus continuatis, quæ ab his sunt usque ad nos. Si vero amicitiam absque parentela desideratis, Romam liberam esse dominus tuus permittat, etc.* » Res mira, satis erat Græcis Romam relinquere liberam et a cujuscunque laici principis dominio independentem; *Otto* vero, quamvis eam tributis et servitute immunem vellet, jus tamen in eandem cedere recusabat. Cum vero *Luitprandus* dixit *Ottonem* Ecclesiam ditiores ac liberiores reddidisse, e proceribus unus respondit, idem facturum suum imperatorem, cum Urbi dominaretur, et coram ejus legatis Pontifices Romani ordinarentur: « *Sed hoc, ait Basilius Parakimomenos, faciet, cum ad nutum suum Roma, et Romana Ecclesia ordinabitur.* » Hæc *cana et prisca* consuetudo, de qua loquitur *Anastasius* in *Leone IV*, quæ quidem *Leonis* papæ *IV* tempore nova erat, cum sub *Ludovico Pio* cœpisset, sed vetus respectu Græcorum, qui a *Justiniani Magni* tempore illo jure potiti fuerant, et quod rursus sibi asserere volebant. Is itaque mos a plerisque recentibus scriptoribus negatus certis antiquorum testimoniis innititur.

44. *Joannes XIII Capuam non venit.* — Ad num. 91 et seq. Non invenio Joannem papam XIII hoc tempore Capuam venisse; imo continuator *Reginonis*, ut videre est apud Baronium an. dcdlxv, num. 4, ait eum eo anno Urbe expulsum in Campania custodiæ mancipatum esse. Et idem continuator anno dcdlxvi, apud Baronium num. 4 narrat, eo anno eundem Pontificem a custodia, qua tenebatur, liberatum esse. Joannem tamen papam hoc anno Capuæ fuisse elicit *Baronius* ex his *Leonis Ostiensis* verbis: « *Hujus abbatis, Aligerni videlicet, anno xix, Joannes papa Roma pulsus exilio Capuam venit.... et tunc primum in eadem civitate archiepiscopatum constituit.* » Verum anno dcdlxv, num. 3, locum illum emendavimus, et Capuam anno dcdlxvi metropolim effectam diximus.

45. *Fundatio archiepiscopatus Magdeburgensis.* — *Joannes* papa hujus nominis XII anno dcdlxii rogatus ab *Ottone M.* a se imperatore coronato, ut archiepiscopalem sedem *Magdeburgi* constitueret, jussit, « *ut Magdeburgense monasterium in regno Saxonum juxta Albim constructum, quod prælibatus Christianissimus imperator ob novam Christianitatem construxit, qui vicinius id locorum gentibus est, in archiepiscopalem transferatur sedem, quæ per subditos suffraganeos totum Dei gregem regere et gubernare valeat,* » ut ipsemet *Joannes*

in litteris suis scribit, in quarum fine legitur : « Scriptum per manum Leonis scriniarii S. Sedis Apostolicæ in mense Februar. Indict. v. Data II id. Febr. per manum Georgii secundicerii sanctæ Sedis Apostolicæ, anno Deo propitio Pontificatus domni Joannis summi Pontificis et universalis papæ vii, imperii domni piissimi Augusti Ottonis a Deo coronati magni imperatoris anno 1, in mense et Indictione prædictis », ut videre est Sæc. v Benedict. pag. 575. Verum loco, *anno Pontificatus vii*, legendum, *anno Pontificatus vi*, uti supra demonstravimus, quia Joannes XII an. DCDLVI in finem

vergente Pontificatum suscepit. Hæ tamen itteræ effectu tunc caruere, rursumque anno præcedenti in Concilio Ravennensi primo urbs Magdeburgensis metropolis declarata a Joanne XIII, ut ibidem vidimus, sicuti et Adalbertum hoc anno post secundum Concilium Ravennense dictum esse archiepisc. Magdeburgensem.

Hoc anno S. *Mathildis* mater Ottonis M. et *Guillelmus* archiepisc. Moguntinus ejusdem imperatoris filius vita functi sunt, ut anno DCDLXXIII ostendemus.

JOANNIS XIII ANNUS 4. — CHRISTI 969.

1. *Græcorum dolo Latini victi de iisdem Græcis ulciscuntur : unde obitus Nicephori imperatoris et nuptiæ Ottonis cum Theophane.* — Sequitur annus Redemptoris nongentesimus sexagesimus nonus, Indictione duodecima, quo Nicephorus imp. legationem ad Ottonem imp. græca fraude misit, sub falso prætextu nuptiarum, quarum occasione anno superiori (ut audisti) ab ipso Ottone et a Joanne Pontifice legati missi fuerant ad ipsum Constantinopolim, revera tamen, ut eum nuptiis occupatum imparatum offendens bello superaret. Sic igitur Græci imperatoris legati fraudulenter et proditorie rem agentes, effecerunt, ut Latini, dum nuptias imperiales pararent, a Græcis improvisi offensi, neci traditi sint. Sed audi Witichindum ista narrantem his verbis :

2. « Legatis itaque Græcorum imperator satis credens, misit partem exercitus cum plerisque principalibus viris ad condictum locum, quo eis secus sponsonem legatorum puella traderetur, et cum honore filio adduceretur. Græci vero ad artes paternas conversi (nam erant ab exordio fere mundi plurimarum gentium domini, et quos virtute nequibant, arte superabant) subito super improvisos et nihil adversi suspicantes irruunt, castra diripiunt, plures occidunt, plures capiunt, quos Constantinopoli imperatori suo præsentant. Qui vero effugere poterant, reversi ad imperatorem, quæ acta sunt, nuntiabant. At ille super his commotus, ad hoc dedecus diluendum, cum gravi manu viros eminentes domesticis et externis rebus jam sæpe

claros factos, Guntharium et Sigefridum mittit in Calabriam.

3. « Græci autem præterita victoria elati et minus cauti ceciderunt in manus eorum. Ex quibus innumera multitudo cæsa, qui supererant, capientes, obtruncatis naribus novam Romam remeare permiserunt, tributum in Calabria et Apulia retorserunt, talique victoria illustres facti, et spoliis hostium ditati, ad imperatorem reversi sunt.

4. « Populus autem Constantinopolitanus a suis audiens mate pugnatum, consurrexerunt adversus imperatorem suum, et machinatione conjugis propriæ ejusdam militis insidiis occiderunt : loco autem domini militem designantes : fuit iste Joannes, cognomento Zemises. Constitutus autem rex continuo captivos absolvit, puellam cum magno exercitu et claris muneribus ad imperatorem Ottonem destinavit. Quam ipse statim filio tradidit, celebratisque magnifice nuptiis, omnem Italiam super hoc et Germaniam lætiores reddidit ». Hanc Theophanem, sive Theophaniam appellatam, a Joanne papa coronatam imperatricem, Sigebertus testatur, ab eodemque Pontifice sacris ritibus Ottoni conjunctam. Hucusque de his ipse. Cuiusmodi pluribus prosecutus necem Nicephori, eum interfectum ait hoc anno, undecima mensis Decembris, qua ratione non ante annum sequentem dictæ nuptiæ cum Ottone juniore contigisse potuerunt.

5. *Rerum Ecclesiasticarum invasores divinitus afflicti.* — Hic finis Nicephori rerum Ecclesiasticarum invasoris, qui antequam ejusmodi se sacri-

legiis inquinaret, credi vix potest quot et quantas paucis diebus fuerit de Sarracenis memorandas in perpetuum victorias consecutus; sed ubi in bona Ecclesiae manus injecit, omnibus se exuit bonis et malis obvolvit, atque Deum severum expertus est vindicem. Eadem de eo sentiunt Graeci omnes historici, nimirum ipsum ob ejusmodi sacrilegia male periisse, suo exemplo relinquens sancitam principibus disciplinam.

6. Quod autem exempla regum perfacile propagantur in magistratus, post Nicephori quoque obitum, adversus sacra loca Deoque dicatos viros, saepe insiliit regiorum ministrorum tyrannis; sed sicut Nicephorus ulciscente numine poenas dedit, ita in eos divinam invigilasse vindictam invenimus. Sunt de his exempla in rebus gestis S. Niconis, qui sub eodem Nicephoro Phoca claruit, quæ post ejus obitum contigerunt, hic autem opportune, quod in his versetur oratio, describenda, sic enim se habent: « Venit cubicularius quidam ab imperatore aurei tributis causa missus: qui ut pecuniæ turpisque lucri percupidus erat, magnas, cum cæteris civibus, tum sancto in primis cœnobio, molestias exhibebat. Solent enim civitatum imperia et exactiones non æquis et benignis, sed durioribus, ut plurimum, et inhumanioribus delegari. Frustra autem monachi, quibus auri nihil erat, immitem ferumque linire precibus studebant, qui aurum sitiens, velut aspis ad incantantium voces obsurdescebat, et tanquam spinarum sonum sub lebe (quod scriptum est) omnia illorum verba contemnebat: quin et ferocius insolescens, post atroces minas in carcerem eos detrusit, ac monasterium ipsum expilare deprædarique vecors meditabatur. Quod cæteri audientes qui in eo exercebantur, ad sanctum precibus exorandum se convertunt, præsentemque ejus opem sine mora experti sunt.

7. « Etenim proxima nocte, minaci atque indignabundo vultu ad cubicularium veniens S. Nicon, multis cum verberibus exiecit: Eo quod, inquit (ejus enim verbis utendum est) monasterii curatores, cum ipsi nihil deliquissent, vinculis mancipati: quod nisi eos statim exemeris, acerbus præterea te vitæ exitus manet. Profuit palatino ad sanio rem mentem hæc afflictio. Mane igitur et victos eduxit, et ad templum properans, sacræ thecæ advolutus cum lacrymis audaciæ suæ veniam a S. petiit, discessurum ex templo Lacedæmone promittens, et civibus aurum quod exegerat relicturum, quod reipsa præstitit. Nam aureis septuaginta (septingentis) duobus ad beati loculum abjectis, conscenso equo, protinus abcessit. Aurum ergo qui monasterio tum præerat, Constantinopolim misit ad præpositum. Is vero coemptis hoc pretio sacris pyxidibus aliisque pretiosis vasculis non paucis, ad monasterium omnia detulit, quæ ad hunc usque diem templi usibus percommoda cernuntur, et splendorem illi non parvum addunt, variis aliisque et egregiis omnium generum orna-

mentis referto, cura in primis studioque ejusdem præpositi. Hic enim vir optimus et magnificentissimus divino zelo succensus, omnem operam posuit, ut templi velustatem abstergeret, ejusque speciem penitus renovaret, quod et donariis deinde quamplurimis auxit, columnarum fulgore, pilitorum lapidum coloribus variis, picturarumque præstantissimarum varietate condecoravit, porticibus etiam et vestibulis gradibusque circumcinxit; ad eam denique dignitatem extulit, quæ hodie spectatur, et præclarum divini viri consilium pietatemque tacito præconio declarat ». Subjicit autem auctor mox ista:

8. « Sed ad impium Antiochum convertenda est oratio. Præerat is ducis potestate ethnicorum regioni. Eo autem inter cætera flagitia processerat amentiae, ut ipsum beati testamentum violare non dubitaret. Itaque finitimum ethnicorum oræ prædium invadens, sedem in eo, reclamantibus monachis, tentoriumque fixit. Et ne quid sceleri deesset, cum locum perluso circumcirca cruore contaminasset, impuro in libidinum cœno nefandisque flagitiis suo illic more volutabatur, quoad dignos temeritatis suæ fructus a sancto percepit. Is ergo per noctem formidabili truciue ore illi adstans, post horribiles incussos terrores, crucigero demum baculo latus lethali plaga percussit. Qua excitus, cum exeuntem e tentorio percussorem notasset: famulis quidem, ut eum comprehenderent, cruda et lamentabili voce imperabat: verum illi neminem videbant. Ex quo demum mali fontem miser agnoscens, sanctum fuisse intelligebat qui vulnus inflixerat, invasoremque suum ex suis sedibus pellere satagebat. Quare conscenso mox equo, Lacedæmonem contendit. Sed stadia haud amplius triginta processerat, cum doloris acerbitate victus, ex equo descendens, media in via turpiter in suorum manibus examinatus interiit, reque in eo, quod in Proverbiis legitur, expletum est¹: Animæ iniquorum immaturæ peribunt, et perversi in morte repentina. Miserum porro illius cadaver Spartam delatum sequenti nocte (ut constans fama est) ignis, incertum unde, in loculum irrumpens, utrumque simul consumpsit et in cinerem redegit ». Hucusque de vindicta in Antiochum divinitus per sanctum Niconem illata, sed et adhuc audi quæ his haud minora subjicit:

9. « Non minus, inquit, pavendum est quod sequitur. Michael ille Chærosphaetes, vir scilicet illustris, nullique inter Lacedæmonios nostros honore, gloria, opibus secundus; ad hæc facundia, indole, forma, suavitate morum, sapientiâ, aliaque omni laude præstans erat, adeo ut in ore omnium cum suavissimo sensu versaretur. Sed quam difficile est humanæ naturæ hostis insidiis nunquam succumbere, recteque iter usque ad finem inoffens opede decurrere! Deflexit vir incomparabilis et invidiæ face accensus, contra monasterium impu-

¹ Prov. III.

denter exarsit, levissimo cujusdam agri prætectu, quem lædere monasterii pecora dicebantur. Ergo collecta facinorosorum hominum manu, cum ad locum venisset, primum quidem Zozinum monachum annis gravem, qui monasterii res procurabat, nihil ejus canos nec virtutem veritus, veste sua spoliatum atque in terram prostratum, pugnis fustibusque ila vexavit, ut tantum non exanimatum reliquerit; deinde Syracusanum illum Dionysium imitari volens, in agresles etiam operas famulosque sævire parabat, nisi fuga salutis suæ consulissent. Tum vero monasterii res omnes Mysiorum prædæ exposuit, non caulis ipsis pecorumque septis parcens, quibus etiam flammis subiecit, ne quid esset quo tegi capræ ovesque, et a furum ferarumque insidiis defendi possent. Ita demum, quasi parta victoria ovans, in equo miser exultabat, cum subitam illatæ sancto injuriæ vindictam expertus est.

10. « Nocte insecuta, terribili ut in his solebat adpectu, dormienti S. Nicon se objicit, gravissimisque et acerrimis verbis increpans: Quid tibi mecum, ait, ut tantum audaciæ furorisque concipere, et contra nos Deumque ipsum insurgere non formidares? Sed diuturni arrogantia hujus conatus non erunt, sentiesque tandem haud optabilem exitum fore, ac docebit experientia quantum mali sit temeritas, et projecta in Deum ejusque servos arrogantia; atque his dictis recessit. Michaelen vero ardentissima illico febris invasit, et cum febre paralyxis. Ita domum relatus, mortem expectabat, cum iterum ipsi tanquam in mentis excessu oblatus Nicon, succensebat porro, eademque cum minis exprobrabat. Unde ad consanguineos qui aderant conversus: Non videtis, ait, monachum istum, qui mihi dira omnia minatur? Tum expelli ei abigi eum rogabat atque jubebat.

11. « Verum illi, quia neminem videbant, amplius morabantur. Paulo post, cum ad se quodammodo rediisset, ex utriusque visi argumentis mali sui causam conjectans, stultitiam suam reprehendere, calamitatemque tamentari cœpit: Heu, heu, inquit, quia mihi nunc contra quam¹ Job contigit: Timor enim quem non timebam evenit mihi, et quod non verebar accidit. Deinde sceleris emendationem pœnitentia promittens, et quod tum cætera, quæ inconsulto egerat, corrigeret, tum caularum cancellos ferreis repagulis obvallaret: morbi finem unice deprecabatur. Cæterum ejus preces a Deo exaudite non sunt: Dominus enim, qui fluxit sigillatim corda nostra, pravum fictumque hominis animum intuens, qualis in plerisque solet esse mortalium: qui tempore quidem afflictionis Dei recordantur, aspernantur autem cum exempti malis fuerint: irritam atque inanem abire ejus orationem passus est. Quare, ingravescente vi morbi, in luctuosis illis vocibus oppressus est; gravi ferocibus superbisque documento, ut ira sua moderate uti discant, Deique judicia reformi-

dent». Hucusque de his ibi. Hic vero ad impietatis auctoris exornandum tumulum, Nicephori, inquam, imperatoris, paria divinæ vindictæ exempla perpetuo affixa permaneant, tanquam publica documenta iræ cælestis adversus eos, qui nec Deum timent, nec Dei servos, neque Deo dicata loca, et quæ ad ea spectant, qua par est reverentia prosequuntur, ut sciant se non mortalibus, sed Deo ipsi horum ultori bellum inferre.

12. *Duorum patriarcharum neces.* — Hoc eodem anno, duorum patriarcharum necem illatam ob Sarracenos a Nicephoro prælio victos, sic narrat his verbis Curopalates: « Sarraceni autem post expugnatas in Syria et Cilicia urbes, archiepiscopum Hierosolymitanum Joannem vivum combusserunt, quod videlicet ejus monitis putabant fore ut ipsos Nicephorus invaderet. Incenderunt etiam pulcherrimum Dominicæ sepulturæ templum. Hoc idem fecerunt Antiochenses, interfecto suo archiepiscopo Christophoro». Hæc ipse, cum de Joannis novi imperatoris progressibus agens, subjicit inter alia de revocatione episcoporum ab exilio, quos Nicephorus ea de causa damnarat, quod subscribere illius decreto impio noluisent, moxque subdit:

13. *Patriarcha Constantinopolitanus resistit Joanni imperatori quem resipiscentem coronat.* — « Atque ita constitutis rebus, eadem nocte, ab omni suspicione liberatus, confert se cum paucis imperator ad magnum templum, ut a patriarchæ manibus diadema susceperet. Quem venientem ad se ingredi non permisit Polyeuctus patriarcha, indignum asserens, qui ad sacrum templum accederet illud, cujus manus adhuc recenti ac cognato sanguine stillarent. Cum autem Joannes æquo animo reprehensionem tulisset, omniaque se libenter et obedienter facturum pollicitus esset, excusans et purgans se, quod non propriis manibus interfecisset Nicephorum, verum Balantes et Azipo Theodorus reginæ Theophanæ jussu: hanc patriarcha jussit e palatio ejectam in aliquam insulam relegari, atque in exilium mitti Nicephori interfectores, et decretum illud abscindi quod ad confundendas res Ecclesiæ Nicephorus proposuerat. Statim igitur et illos Joannes imp. e civitate ejecit, et Theophanam in Proconesum relegavit. Quæ postea inde clam effugiens, cum ad magnum templum confugisset, per Basilium excubiarum præfectum ejecta, in regionem Armenorum relegata est in monasterium ab imperatore recens constructum, Damidæam nomine, cum prius illa multa probra in imperatorem conjecisset et in Basilium, Scytham eum vocans et barbarum, cujus etiam maxillam pugno percussit. Cum ipsa quoque relegata est mater ejus in Montineum. Allalumque decretum conscissum est, et Ecclesiæ pristina red-dita libertas.

14. « His igitur ita gestis, cum pollicitus esset Joannes ad placandum Deum, ob admissum facinus, pauperibus facultates quas privatus possidebat, di-

¹ Job. 111.

tribu turum, Polyenctus ei concedit ingressum, et die festo quo Christi Domini nostri Natalis celebratur, ipsum imperii diademate coronat ». Ilucusque Curopalates de his quæ præcesserunt coronationem Joannis imperatoris, quam nonnisi prævia pœnitentia et obedientia a patriarcha potuit impetrasse.

15. *Miraculum de catena S. Petri, et SS. reliquiarum translationes.* — Jam vero ad ea quæ hoc anno Romæ contigisse Siebertus narrat, convertamus orationem : « Quidam, inquit, comes Ottonis imperatoris, ejus familiaris, Romæ ante oculos omnium a diabolo arreptus, ita ut seipsum dentibus discerneret, jussu imperatoris ad Joannem papam adductus, ut catena sancti Petri collo ejus circumdaretur. Dum a fallacibus clericis semel et bis sed alia catena furenti adhiberetur, nec quidquam remedii proveniretubi nihil virtutis inerat, tandem vera sancti Petri catena allata et collo furentis circumdata, diabolus spumans multum et clamans abscessit. Qua catena Theodoricus Metensis episcopus arrepta, cum diceret se eam nisi manu ejus abscissa non dimissurum, tandem imperator, sedato litigio, a papa Joanne obtinuit, ut annulum hujus catenæ exsectum episcopus mereretur ». Et inferius, eodem anno, idem de eodem Metensi episcopo subjicit ista :

16. « Theodoricus Metensium episcopus, imperatori, sanguine, dilectione ac familiaritate cæteris devinctior, dum in Italica expeditione per triennium sub eo militaret, multa capita et pignora

sanctorum de diversis Italiæ locis, quocumque modo potuit, collegit. Primum e Marsia S. Elpidium confessorem, cujus socium Eutychium episcopum ipse imperatoriam sustulerat; ab Amiternis Eutychetem martyrem cum reliquiis Maronis et Victorini sociorum ejus; a Fulgineo Felicianum episcopum et martyrem; a Perusio Ascepiodotum martyrem; a Spoleto Serenam martyrem, cum Gregorio Spoletano martyre; a Carduno pignora Vincentii martyris et levitæ, ab Hispania olim a duobus monachis Capuain, a Capua vero illuc deportata; a Metavia alterum Vincentium episcopum et martyrem; a Florentia Miniatem martyrem; ab urbe Tudertina Fortunatum episcopum et confessorem; a Corfinio Luciam Syracusanam virginem et martyrem, a Foroaldo duce Spoletanorum olim a Syracusis illuc translata; a Sabinis partes corporum Proti et Hyacinthi martyrum. Hæc omnia cum parte catenæ sancti Petri Apostoli, cum capillis ejusdem et sanguine sancti Stephani protomartyris, et parte craticulæ sancti Laurentii martyris, a papa Joanne sibi donata cum aliis multis sanctorum pignoribus, præsul Theodoricus in Galliam hoc anno transtulit, et in Ecclesia sancti Vincentii martyris a se in insula urbis constructa locavit ». Hæc Siebertus. Porro cum audis translata corpora, ita accipias, ut partem ex illis acceperint, non ipsa integra, ut in dictis locis quæ adhuc visuntur atque coluntur, dictorum martyrum reliquiæ fidem faciunt haud dubiam.

Anno periodi Græco-Romanæ 6462. — Anno Æræ Hispan. 1007. — Anno Hegiræ 339, inchoato die 14 Nov., Fer. 4. — Jesu Christi 969.

— Joannis XIII papæ 5. — Ottonis imp. 8. Joannis Tzimiscæ imp. 4.

1. *Legatio Nicephori imper. ad Bulgaros.* — A num. 1 ad 12. Leo Diaconus postquam retulit quæ anno superiori de Calocyri rebellione narravimus, statim subdit : « Hinc adeo Nicephorus, quod nulla spes erat Tauros (sic Russos appellat) missa legatione conciliatum iri : noverat enim patricium Calocyrum, qui a recta via semel declinasset ipsiusque dominatum jugumque excussisset, ac magnæ auctoritatis apud Sphendosthlabum (Russorum regem) esset, non facile illius cessurum voluntati, pacemque initurum, ad Mysos potius, qui eodem Christiano cultu tenerentur, maluit legationem mittere. Ac sane ad eos legatos mittit, Nice-

phorum cognomento Hereticam, et Philoteum Eucharitarum episcopum, eosque meminisse rogabat quod Christiani essent, (Mysi enim fidem Christianam dubio procul profitentur) exposcebatque regii sanguinis puellas virgines, quas Romani imperatoris liberis uxores locaret, ut ex cuncta affinitate inviolabilis firmaque Romanos inter Mysosque confœderatio amicitiaque consisteret. Mysi vero placidissime legatione suscepta, puellas ex semine regio plaustis impositas (sic enim comparatum Mysorum feminis, ut plaustis vehantur) Nicephoro imperat. miserunt, orantes cum lacrymis ac supplicantes, ut quam citius ulcisceretur, eorumque cervicibus im-

minentem Taurorum (id est, Russorum) securim averteret: ac si modo tuendos susciperet, tropæa adversus Tauros constituturum, quippe qui etiam adversus omnes quibus Romana signa intulisset, iis splendide constitutis claretur.

2. *Mors Nicephoro Phocæ imper. prædicta.* — Sane *Mysi* quidem supplices extendebant manus, obsecrantes imperatorem ut ipsorum hostes ulcisceretur, dumque is in adornanda esset expeditione, rumor increbuit, allatusque nuntius est captam urbem Antiochiæ. Capta ea astu ac stratagemate et direpta. « Contigit vero tunc sanctorum spirituum synaxim occurrere, in qua et monachum dicunt, ex iis qui vitam solitariam agunt et quos græca voce Eremitas vocant, cum brevem Epistolam imperatori dedisset, confestim se subduxisse; Nicephorum vero eam evolvisse, ejusque sensum omnem sibi collegisse, illius autem vim ejusmodi fuisse: Mihi, etsi vermis sum, o imperator, Dei providentia atque numine detectum est ac indicatum ex humanis te ereptum iri, tertio post Septembrem mense. Multa igitur imperator in regni indagine, nullo modo monachum potuit offendere. Exinde in mœstitia tristisque animi agebat, nec ex illo tempore in animum induxit ut in lecto quiesceret, sed humi strata sibi pelle, pannoque ex lana constipato cocco tincto, in eis dormiebat; Michaelis monachi ejus avunculi, cognomento Maleini, brevi pallio monachi ritu ab humeris sursum operiendo corpusculum, in quibus illi dormire moris erat, cum aliqua Dominicarum solemnitas advenisset, ac intemerata Christi mysteria sumere constituisset ».

3. *Occiditur.* — Post aliquot dies, arrepta Augusta opportunitate, eum seorsum aggreditur: *Joannem* Magistrum cognomento *Tzimiscem* exposcendi nullum faciebat finem, petens, ut juberet eum ad se venire, et cum nobili aliqua puella conjugium inire: is vero cum in urbem Augustam veniret, mox regressus est, postea vero iterum atque iterum redeundi nullum faciebat finem. Quodque calentis vir ingenii erat, machinam invenit, ut per oculos quosdam meatus ab Augusta paratos subiret. Inde viros fortes ad eam mittebat, quos illa suscipiens in tenebricoso cubiculo, penes se servabat. « Mensis tunc Decembris dies decima agebatur. Aiunt vero ad vesperam, circa tempus quo divinæ celebrantur laudes, Palantium quemdam clericum libellum tradidisse imperatori, in quo hæc conscripta erant: Notum tibi sit, imperator, hac tibi nocte dirum parari ac præsto esse interitum, quodque hæc vera sint, jubeto scrutari Gynaconitidem, ubi deprehendes armatos viros qui eam sint patraturi cædem ». Imperator sacri cubuli præfectum jussit diligentius viros indagare: is autem dira sua stoliditate cubiculum, quod sicariorum agmen consederat, imperscrutatum reliquit. Conjurati vero Joannis servi ab Augusta suscepti cladisque instructi, ex cubiculo exilientes, illius sustinebant adventum. Postquam Joannes

advenit, tum expergefacto imperatori, ac capite nixo cubilo, ictum ense *Leo*, *Valens* dictus, fortiter impingit, et Joannes imperatorem ad se trahi jussit, cui exprobravit quod ei militare abrogasset imperium, et illius arrepta barba immaniter a vellebat. Tum pectus calce pulsat, intentoque gladio medium cranium transverberat, jubens ut alii virum cædant.

4. *Virtutes Nicephori Phocæ.* — « Hujusmodi Nicephorus nactus est vitæ exitum, cum vitæ omne tempus annos septem supra quinquaginta vixisset, sexque duntaxat ac menses quatuor (a die nona mensis Augusti anni MCDLXIII deductus) imperii habenas moderatus esset; vir fortitudine ac corporis robore suæ ætatis cunctos pæne mortales superaus, militari scientia solertissimus, agendique vi acerrimus, atque ad omne laborum genus rigidus, voluptatum sensu durus, omnique earum superior illecebra: civili administratione magnanimus ac magnificus, justissime judicans, certaue rectitudine jura decernens, nec ulli eorum qui in iis versati sunt, secundus. Orationi precumque instauratæ et in vigiliis seu stationibus inflexus erat ac adamantinus, divinis canticis atque laudibus mentem indistractam servans, nec in ea quæ vana sunt, prorsus evagari sinens. Ad me quod attinet, dico, nisi rebus sic secundo cursu fluentibus per invidiam indignata fortuna virum hunc citius humanis exstruxisset, dubio procul imperium Romanum maximam et qualem nusquam antea gloriam consecutum esset.

5. *Joannes Tzimisces fit imperator.* — « Joannes vero, sic Deo exoso improboque patrato facinore, ad magnificas palatii aedes veniens, rubros calceos pedibus aptavit, et in imperatorio throno consedit, et Nicephori caput afferri jussit, ejusque satellitibus per rimam ostendi. Veniensque unus quis Arzypotheodorus nomine, caput truncum tumultuantibus ostendit. Quo sic inaudito incredibilique spectaculo, Joannem imperatorem Romanorum proclamarunt. Porro Nicephori cadaver, quod tota die sub dio in nive jacuerat, (erat mensis Decembris dies undecima, sabbato) Joannes alto jam vespere efferri jussit tumuloque mandari ». Hoc vero anno sabbatum in diem XI mensis Decembris incidit.

6. *Cur Tzimisces dictus.* — Haud enim vero dormitavit divina justitia super scelestissimorum capitum illorum cruenta cæde, sed cunctos postmodum pœnis ulta est, bonisque publicatis, alius aliter vitam male finierunt. « Joannes porro dictus Tzimisces est lingua Armeniaca cognomento, quod græce Muzacitem sonat; inde nimirum adeptus ut sic cognominaretur, quod perbrevis staturæ erat.

7. *Ejus virtutes.* « Jam vero quarta noctis vigilia ineunte, die septima dilucescente, ipsa mensis Decembris undecima, tertiadecima Indictione anni sexies millesimi quadringentesimi septuagesimi octavi, lectorum virorum cuneus per urbis compila vicosque circumeursans, adjunctis

Romani haud ita pridem imperatoris liberis, Joannem imperatorem proclamabat ». Cum vero Joannes tum sibi ipse, tum rebus satis prospexisset, ac quidquid suspectum videbatur, e civitate procul amolitus esset, in regia morabatur, « annum tum ætatis agens quintum supra quadragesimum, cum rerum summam capessivit ». Statura admodum brevis erat, gigantea tamen illi vis inerat, manuumque agilitas ac robur insuperabile. Heroicus enim illi concretus erat animus, omnis expers timoris ac impercussus, eximiamque prodens audaciam in brevi adeo corpore. Donis magnificus ac supra omnes munificus erat. Quisquis enim ab eo petiisset, spe sua nunquam frustratus abibat, cunctis nimirum benigne ac hilariter humanitatis officia præstabat: ac nisi Basilius accubitor insatiabilem illam proclivem vim cives demerendi inhibuisset, ipsos quoque thesauros regio erogatione in egenos quantocius exhausisset. Hoc Joanni vitium hærebat, quod nimirum potibus vinoque ac comessionibus quandoque plus æquo indulgebat, corporisque voluptatibus avide inhiabat. Verum sic quidem septem dierum spatio composita illi Respublica est, assertumque ac roboratum imperium, qua nemo ratione unquam putaverit. Cum enim in maximis rerum mutationibus magna plerumque coitio et turbatio suscitetur, tunc nescio qua fortuna ac providentia, ordinis quædam honestas altumque silentium populum tenebat.

8. *Coronatur a S. Polyucto episcopo Constantinop.* — Tum subdit Leo: « Sublato itaque Nicephoro imp., cum præterea nemo alius satellitum vel in genam pugnum acceperat, ad divinum magnumque Dei sapientiæ delubrum venit, ut a patriarcha ex more diademate caput cingeretur. Ita enim moribus receptum, ut qui Romanum imperium adeat, in templi ambonem ascendat, et ab eo qui pro tempore sacris præest summumque agit antisitem, bene ipsi apprecato diadema capiti impositum accipiat. Porro Polyuctus id temporis sedem patriarchalem tenebat, vir sane divinus et spiritu fervens, etsi ætate effectus erat. Is imperatori denuntiat, non ei licere in templum ingredi, nisi ante Augustam aula expulerit, ac eum qui Nicephorum imp. parricidio sustulisset, quisnam ille sit, ostenderit. Ad hoc etiam Tomum Synodo redderet, quem præter fas Nicephorus novasset; is namque sive eo animo ut divina a nonnullis sacerdotibus convulsa (ut sibi videbatur) corrigeret; sive etiam quod sacerdotes (quod nefas) sibi subicere vellet, episcopos ex tempore Tomum edere coegerat, ne quid rerum Ecclesiasticarum, nisi ejus nutu, sibi permitterent. Hæc quidem Polyuctus imperatori ut faceret injunxit, alioquin non licere in Basilicam ad sacram aedem intrare. At ille, ea accepta sententia, tum Augustam aula amovit, et in insulam quam Proten vocant relegavit, tum Nicephori Tomum Synodo reddidit, tum denique Leonem Valentem ostendit, sancte affirmans illum unum Nicephoro manus

intulisse, et eum, nec alium quemquam ejus necis auctorem.

9. *Ejus liberalitas et pietas.* — « In hunc igitur modum Joannes in divinum templum admissus, et a Polyucto corona insignitus, in palatium revertitur, faustis eum vocibus prosequente omnium militari, tum populi civiumque multitudine. Inde exiguum aliquid induciarum ac remissionis nactus, quam olim possederat substantiam, duplici portione divisit. Nempe multa illi et copiosa erat substantia, partim a majoribus relicta (quippe cum clarissima ortus prosapia esset et paterna stirpe nobilis, si quis usquam Orientalium, materna vero Nicephori imp. consobrinus) partim imperatorum munificentia aucta, effusa in ipsum largitate ab eis contributa, ob tanta illius bello tropæa ac facinora. Hujus itaque partem alteram in finitimos ac vicinos agricolas distribuendam dimisit, alteram nosocomio leprosororum ad alterum littus ex adverso Byzantii sito assignavit; alias tum novas ædes vetustis adjiciens, eorum qui sacro morbo laborarent, tum ipsorum numerum multis partibus adaugens, atque ad eos ascendens veniensque aurum erogabat, ulcerosaque membra atque morbo confecta, quoad licebat, fovere non recusabat. Idque adeo cum maxime delicatus, cultusque mundioris studiosus esset, tanta nimirum miseratione ducebatur, sicque laboranti naturæ condolebat, floccipendens ipsam majestatis amplitudinem, et quem purpura fastum parit, si quandoque ullo modo istis incommodaret ». Ita Leo Diaconus.

10. *Conjugium Theophaniæ cum filio Ottonis M.* — Quoad conjugium *Theophanonis* seu *Theophaniæ*, Romani Junioris imp. filiæ, ab Ottone M. pro Ottone filio expetitum, licet Otto M. a Phoca repulsam passus esset, hanc tandem impetravit a Joanne Tzimisce imperat.; missique ex Occidente legati, ut dicitur in Chronico Flaviniacensi pag. 166, qui novam sponsam deducerent, Coloniae scilicet archiepiscopus ac episcopi duo, quorum alter fuit *Theodoricus* Metensis, ducesque complures ac comites. Baronius num. 4 de hoc matrimonio verba facit ex Witichindo lib. 2, et quam anno DCDLXVIII, num. 6, Annam, recte hic Theophaniam appellat. Subdit Baronius has nuptias ante annum sequentem contingere non potuisse; quod verum est, cum chronographus Hildesheimensis ad annum DCDLXXII scribat: « Ottoni imperatori Juniori venit imperatrix Romam de Constantinopoli XVIII kal. Maii, Octob. Paschæ ». Ditmarus lib. 2 de Tzimisce imp. ait: « Qui mox magnificis muneribus comitatuque egregio, non virginem desideratam, sed neptem suam Theophaniam vocatam, imperatori nostro trans mare mittens, suos absolvit, amicitiamque optatam Cæsaris Augusti promeruit ». Verum videtur Ditmarus ignorasse affinitatis gradum qui Theophanonem inter et Tzimiscem erat, et Theodoram Theophanonis amitam uxorem duxisse Tzimiscem imperatorem, ut inquit Ducangius in Familiis Augustis Byzantinis, Familia XIX.

11. *Beneventum fit sedes archiepiscopalis.* — Joannes Papa XIII Concilium Romæ hoc anno *septimo kal. Junias* celebravit, præsentem Ottone M., Ottone secundo hujus filio, necnon religiosis quamplurimis totius ordinis viris; et hortatu Ottonis M. cum consensu multorum præsulum, Beneventanam cathedram in metropolim crexit, « intervenientibus Pandulpho Beneventanæ et Capuanæ urbium principe, seu Spoleti et Camerini ducatus marchione et duce, simulque Landulpho excellentissimo principe, filio ejus », ejusque ditioni subjecit episcopos « S. Agathæ, Abellini, Quintodecimi, Ariani, Asculi, Bibinii, Vulturariæ, Carini, Thelesæ, Alisæ ». In fine legitur: « Scriptum per manum Stephani scriniarii S. R. E. in mense Maii, Indict. xii », et post subscriptiones episcoporum: « Datum VII kalend. Junii per manum Guidonis episcopi sanctæ Sylvæcandidæ Ecclesiæ, et Biblioth. sanctæ Sedis Apostolicæ, anno Pontific. domini nostri Joannis XIII papæ quarto, imperatoris Ottonis majoris vii, et minoris ii, Indictione supradicta duodecima, anno Dominicæ Incarnationis DCCLXIX ». Legitur hæc Epistola a Joanne XIII Landolpho Beneventanensi archiepiscopo data, tom. ix Concil.

pag. 4238. Postea metropolis Beneventana modo plures, modo pauciores suffraganeos habuit. Ex hac porro Epistola liquet, *Beneventum* et Capuam hoc tempore eidem principi paruisse.

12. *Ægyptus in califæ Africani potestatem venit.* — Anno Hegiræ cccxviii, teste Elmacino lib. 3 Hist. Sarac. cap. 4, *Muazzus Lidinilla* califa Africæ misit cum exercitu, qui *Ægyptum* occuparet; quod cum factum esset, dominium califarum Abbassarum in *Ægypto* cessavit. Tunc *Alcahira* seu *Cairus*, urbs *Ægypti* præcipua et amplissima ad Nilum fluvium posita, ædificata, ut in ea milites habitarent, et arx imperialis in ea constructa. Quam urbem anno Hegiræ cccxviii conditam testatur etiam Guillelmus Tyrius. Plurimum crevit civitas illa, cum sultanos seu reges habuit proprios, sed postquam sæculo xvi in potestatem Turcarum venit, sensim defecit, licet etiamnum amplissima sit. *Muazzus Lidinilla*, *Ægypti* califa, dominio Africæ Josephum Bolquinum et Familiam Ziridum minorem Africam obtinentium investivit, sicque reges isti potentissimi evasere.

Concilium Anglicanum, de quo anno sequenti num. 7, huc retrahendum.

JOANNIS XIII ANNUS 5. — CHRISTI 970.

1. *Constantinopolis et Antiochiæ patriarchæ eliguntur.* — Sequitur annus Redemptoris nonagesimus septuagesimus, Indictione decima tertia, quo Polyuctus Constantinopolitanus episcopus, cum sedisset annos quatuordecim, ex hac vita migravit post dies triginta quinque ex quo Joannem imp. coronaverat, in cujus locum Basilius monachus Scamandrenus boni nominis vir subrogatus est. Ita Curopalates et alii. Cedrenus addit eundem imp. Antiochenæ Ecclesiæ diu viduatæ pastorem præficiendum curasse Theodorum, de quo ista:

2. « Cum autem Antiochia ad Orontem fluvium sita aliquandiu summo pontifice caruisset, ad id munus provehit imp. Theodorum quemdam monachum omnibus florentem bonis, qui ei etiam prædixerat imperio potiturum, Deo ipsum ad hoc culmen etaturo: hortatusque fuerat ne præcipitanter ageret, alioqui si monitus suos sperneret,

sua ipsius vitæ se insidiatum fuisse intellecturum. Contenderat etiam ab eo, ut Manichæos per totum Orientem serpentes, et contagione suæ imposturæ religionis omnia corrumpentes, in Occidentem, in desertam aliquam solitudinem deportaret ». Horum scriptorum quoque testificatione traditur, Joannem imperatorem Sarracenos suis omnibus undique comparatis viribus obsidentes Antiochiam profligasse, et Roxolanos seu Russos aliorum Barbarorum copiis annitentes, exercituque trecentorum et octo militum pollentes pariter superasse. Hæc de rebus Orientis. Videamus res Occidentalis Ecclesiæ.

3. *Concil. generale in Anglia contra cleri et magnatorum incontinentiam, Dunstano archiepiscopo adstante.* — Celebratur¹ hoc idem anno a sancto Dunstano Cantuariensi archiepiscopo, au-

¹ Mat. Westmonast. Flor. hist. hoc anno.

ctoritate Joannis Romani Pontificis, generale Concilium adversus incontinentiam clericorum, de quo ista in Actis S. Oswaldi Wigorniensis habentur¹: « Per idem tempus, auctoritate Joannis papæ, Dunstanus archiepiscopus coacto generali Concilio, statuit et decreto firmavit, ut canonici omnes, presbyteri, diaconi, subdiaconi aut caste viverent, aut Ecclesias quas tenebant dimitterent. Habebat autem regem Edgarum hac in re fidelem adiutorem et egregium defensorem.

4. « Porro hujus decreti executio demandata est Oswaldo Wigornienti, et Ethelwoldo Wintoniensi episcopis. Itaque beatus Oswaldus in sua diœcesi septem monasteria, ejectis clericis insolenter viventibus, construxit, abbatesque eis præfecit. In iis abbas Persorensis Fulbertus, bene moratus et religionis monasticæ fervens zelator, sed tamen in subditos sæviens nimium, quod in eo valde reprehendebatur, cum esset ad extrema perductus, et post obitum in feretro repositus, redeunte spiritu erexit se, cunctis trementibus, aitque se a beato Benedicto ad conspectum Dei perductum fuisse; Deumque ipsi peccata sua ob merita dilecti sui Oswaldi remisisse, ejusque sanctitatis declarandæ causa se revixisse. His dictis, conticuit, et percepto Dominici corporis viatico, dimidium supervixit diem rursumque defunctus est.

5. « In aliis etiam Angliæ locis, insignes Ecclesias B. Oswaldus ob eandem causam ejectis clericis, monasticæ institutionis viris tradidit, puta Ecclesiam sancti Albani, sanctæ Ethelredæ virginis in Eli, et eam quæ apud Beamfledam honorabilis habebatur. In Ecclesia sancti Albani Elfricum abbatem Brithnotum, in Beamfledensi Gotmannum. Quæ vero monasteria constituit, ea invisere solebat, et tum sermone, tum opere, ea quæ ad animarum salutem pertinerent, illis paterno affectu ministrare. Porro in monasterio Ramesciæ Abbo Floriacensem monachum degere voluit, morum sanctitate præclarum et litteris egregie eruditum, ut monachos doceret, scholis præset, et tum regularem sive monasticam disciplinam, tum litterarum scientiam promoveret. Is Abbo, Dunstani hortatu, beati Edmundi regis et martyris passionem accurate conscripsit. Tandem Floriacum reversus, et abbas effectus a suis monachis occisus est ». Hæc in Actis sancti Oswaldi habentur.

6. Porro ista de clericorum incontinentium ex licentia Joannis Romani Pontificis expulsionem, pluribus persecutus est Osbertus monachus, qui hoc tempore vivebat, in rebus gestis sancti Dunstani a se conscriptis. Sed primum de correctione incontinentiæ regis Edgari ista his præmittit verbis²: « Quadam enim vice rex in monasterium virginum, quod Wiltoniæ (Mulsiniæ) situm est, venit; ibique captus specie cujusdam puellæ, quæ de nobilibus Anglorum nata, inter non velatas nutrie-

batur et custodiebatur, eam in suum colloquium adduci secretius jussit. Illa cum duceretur, timens pudori suo, raptum ab una sanctimonialium capiti suo velum imposuit, eo modo se protegi sperans, si forte rex quid inhonesti a se exigere vellet. Quam ipse velatam intuens: Quam subito, inquit, sanctimonialis effecta es? arreptumque velum detraxit capiti ejus, illa conatu quo poterat frustra obnitente. Abusus siquidem ipsa est, et gravi scandalo quoque per Angliam religiosi ex hoc mente vulnerati sunt. Quod scandalum eo vehementius fuit, quod rex idem legitimam uxorem habebat, Elfredam videlicet, cognomine Candidam, Ordineri præpotentis Orientalium Anglorum ducis filiam, de qua et S. Eduardum genuerat.

7. « Ubi vero res Dunstano innotuit, acerbo mœrore percussus est. Igitur cum in re non segnis ad regem veniret, et ille venienti pro more occurreret, eumque per manum ad solium suum perducere vellet: manum Dunstanus turbato vultu retraxit, nec eam ab homine contingi passus est. Ad quod ille attonitus (non enim illum scire putabat, quod clanculum a se factum existimabat) cur manum sibi non dimitteret inquisivit. Ait: Tu, postposito omni pudore, adulterium commisisti; tu despecto Deo, et signum castitatis non veritus, virgini suam integritatem præripuisti: et cur manum summo Patri Virginis filium immolantem impuris manibus non tradam quæris? Lava prius per pœnitentiam manus tuas a sordibus suis, et tunc demum, quo gratiæ Dei reconcilieris, honora et amplectere manum pontificis. Territus ille ad hæc, terræ procumbit, pedes antistitis petit, se peccasse, gemitu verba interrumpente, contestatus. Quod Dunstanus videns tantum in rege humilitatis exemplum, vehementer complectitur. Velocius ergo illum erexit, et pacato vultu cum eo familiariter quæ salutem animæ ejus operarentur loquens, septuennem ei pœnitentiam injunxit. At ille pontificali absolutione potitus, omni studio injectæ sibi pœnitentiæ operam dare, et multa quibus Deum placaret pietatis opera, ipsi pœnitentiæ, instinctu et consilio Patris sui, sollicitus cœpit superaddere.

8. « Ipse præterea omni ordini hominum in suo regno consistentium, legibus sibi in Christiana religione sancitis uti, præcipiebat, ipse secus agentes, indicta vindicta, corripiebat: ipse in pravitate persistentes condigno examine percutiebat. Exempli causa: Ordo clericalis plurimum ea tempestate erat corruptus, et canonici cum presbyteris plebium voluptatibus carnis plus æquo inserviebant. Quod malum Dunstanus corrigere cupiens, auctoritate Joannis Apostolicæ Sedis antistitis apud regem obtinuit, quatenus canonici qui caste vivere nollent, Ecclesiis quas tenebant depellerentur, et monachi loco eorum intromitterentur ». Ad hæc exequenda in Concilio statuta delectos fuisse duos sanctissimos episcopos, Oswaldum et Ethelwoldum, jam dictum est, et quid alter eorum egerit

¹ Apud Sur. die XV Oct. tom. V. — ² Apud Sur. die XIX Maii. tom. III. c. 38.

Oswaldus pariter patefactum; modo reliquum est, ut quæ memoria digna gesta fuerint ab Ethelwoldo, ex eodem auctore Osberto hic describamus; pergunt enim:

9. « Præsidebat ea tempestate Wentanæ Ecclesiæ Ethelwoldus, vir eximiæ sanctitatis, et educatione patris Dunstani non parum insignis. Illic cognita de canonicis Ecclesiæ suæ, quod nimium sæculares existebant, voluntate Dunstani, monuit eos semel et sæpius, mores et actus mutare, correctionis vitæ semitas, relictis feminis, arripere. At in præsentiarum quidem id sibi possibile esse negantes, voce corvina semper in crastinum correctionem sui pollicebantur. Quod ipse gnarus, non diu sustinuit. Paratis namque quamplurimis monachorum cucullis, die quo communio (Servite Domino in timore) cantabatur, chorum intravit, vestes quas paraverat secum deferri faciens. Et projectis illis in medium, canonicis ait:

10. Animadvertistis quid modo cantaveritis? Animadvertimus, inquit. Igitur, inquit, si¹ servire Domino in timore et ei vultis exultare cum tremore, apprehendite disciplinam, vestem scilicet monachalem, ne pereatis (sicut cantastis) de via justa. Ad quod illi obstupefacti, more solito inducias petunt, id se facturos in futuro promittunt. Tunc ille: mihi credite, amplius non credam huic vestræ responsioni corvinæ. Sed aut disciplinam in præsentia apprehenditis, aut loci istius beneficiis et conversationi hinc eliminati, jamjam cedetis. Itaque nonnulli ex illis, statim abjecto clericali habitu, monachi facti sunt, cæteris verbo pontificis de Ecclesia eliminatis. Cæterum, quia isti qui noviter fuere conversi, regularis disciplinæ normam sine aliorum magisterio docte servare nequibant: monachi de Abendoniam illuc ab eodem pontifice adducti sunt, qui monasticæ institutionis tramitem ibi docerent». Quæ autem post hæc secuta sint de duobus Conciliis eadem de causa celebratis, Wintoniense et Calense, inferius suis locis opportune dicetur.

11. Ad idem Concilium Generale (ita ab eis nominatum, quod omnes Angliæ episcopi in idem convenissent) spectat, quod de publica comitis incestuosi pœnitentia ibi facta idem Osbertus scribit his verbis²: « Comes quidam præpotens cognatam suam illicito sibi matrimonio copulaverat, et a Dunstano semel, secundo et tertio redargutus, incestum suum divortio expiare volebat. Quapropter gladio Spiritus sancti a viro Dei percussus, a liminibus sanctæ Ecclesiæ separatus. Qui typo tactus superbiæ, regem adit, Dunstanum impiæ et immoderate severitatis accusat, regia sanctione se ab ejus tyrannide liberum constituit, querula voce precatur et obsecrat. Cujus verbis rex acquiescens Dunstano mandat, ut hominem cum ea quam duxerat in pace manere sinat, et a quibus ipsum suspenderat liminibus sacris restituat. Miratur ille ad audita, et dolet religiosum regem per menda-

cem hominis linguam, ante rei inquisitionem et examinationem esse seductum. Ponit tamen hominem ad rationem, et tam pro commisso crimine, quam et propter injustam sui criminationem apud principem terræ factam, paulo durius increpat, cupiens eo modo ad pœnitentiam et correctionem cor illius emollire. At ubi vidit ipsum non solum verbis suis non consentire, sed insuper contumaci spiritu contra se furere minarique: supra id quod ab ingressu domus Dei suspenderat, ut dixi, omnem ei communionem fidelium, donec a sua pravitate discederet, interdixit. Tunc ille seipso deterior effectus, immani est furore correptus, et nihil eorum quæ possidebat, alicujus esse momenti reputans, ad hoc solum se totum studebat impendere, ut Dunstano excitaret scandalum, et Christianæ legis jugum, quo a sua libidine coercebatur, sibi faceret alienum. Legatos itaque suos Romam destinat, et talibus assueta quorundam Romanorum corda et ora, in suam causam largo munere largiori sponsione permutat. Quid inde? Præsul Apostolicæ Sedis Dunstano, peccatori homini condescendere, verbis ac litteris mandat, et eum Ecclesiæ gremio integre conciliare monet, hortatur, imperat». Sed si pœnitens peccatum relinqueret, voluit mandatum intelligi: nec enim aliter potuit intellexisse. Pergit enim:

12. « Ad quæ Dunstanus ita respondet: Equidem cum illum, de quo agitur, sui delicti pœnitentiam gerere videro, præceptis domini papæ libens parebo. Sed ut ipse in peccato suo jaceat, et immunis ab Ecclesiastica disciplina nobis insultet et exinde gaudeat: nolit Deus. Avertat etiam Deus a me, ut ego causa alicujus mortalis hominis, vel pro redemptione capitis mei, postponam legem quam servandam statuit in sua Ecclesia idem Dominus meus Jesus Christus Filius Dei. Hæc ille relata sibi audiens, et Dunstanus ex his quæ certo diceret, inflexibilem esse certissime sciens, et excommunicationis suæ pœna cum pudore hominum constrictus, tum timore periculorum quæ talibus nonnunquam accidere solent perterritus, obstinationem suæ mentis deposuit, et abdicato illicito conjugio pœnitentiæ sibi cultum imposuit. Dunstano itaque generale totius regni Concilium de observantia Christianitatis celebrante, ipse suimet oblitus, nudis pedibus, laneis indumentis corpus amictus, virgas manu ferens, Concilio sese medium ingressit, et ante pedes Dunstani gemebundus et ejulans corruit. Quo viso, moti sunt omnes qui aderant ad pietatem; et ipse pater omnium, majori præ cæteris pietate motus est. In vultu tamen servato disciplinæ rigore, utpote hominem Deo conciliare desiderans, lacrymas ejus ad horam severus sustinuit; ac demum a toto Concilio postulatus, lacrymans et ipse culpam indulsit. Ita ab excommunicationis vinculo absolutum, communioni fidelium, gaudentibus cunctis, eum restituit». Illicusque de his, quæ ad dictum generale in Anglia celebratum Concilium spectant.

¹ Psal. II. — ² Osbert. in Dunst. c. 31. apud Sur. die XIX Maii. t. III.

Anno periodi Græco-Romanæ 6463. — Anno Æræ Hispan. 1008. — Anno Hegiræ 360, inchoata die 3 Nov., Fer. 5. — Jesu Christi 970.

— Joannis XIII papæ 6. — Ottonis imp. 9. Joannis Tzimiscæ imp. 2.

1. *Theodorus cremita fit episc. Antiochiæ.* — Ad num. 1 et seq. Leo Diaconus res hoc anno in Oriente gestas his verbis narrat: « Jam magna Antiochia ad Orontem sita Nicephori imp. armis capta, ac antistite destituta; qui enim prius ejus urbis compos extiterat, Agarenus, patriarcham Christophorum, virum Apostolicum divinumque sustulerat, adacto in ejus pectus spiculo, eo scilicet crimine, quod Christiana fulgeret pietate (qua de re Baronius anno superiori num. 12). Hujus frequentiam civium maxime rem frugis Joannes imp. existimans, diligenter curabat, sollicitioreque agebat opera, ut ejus sedis dignum præsulem inveniret. Sic igitur animo æstuanti remque sategenti, venit in mentem Coloniensis Theodori, viri a teneris inguibus eremiticam atque a negotiis remotam vitam consecrati, multisque asceticis sudoribus edomiti corporis. Cilicinam enim vestem, qua indulus erat, ac qua contegebat ferrum, quod gestabat, ut affligeret corpusculum, non ante deposuit, quam tota diffunderet et in nihilum cederet. Aiunt istiusmodi monachum tum primum Nicephoro, tum rursus Joanni divino oraculo vaticinatum esse, ad imperii infulas fore assumendos. Hunc itaque cum in urbe tunc versaretur Joannes, adducit Polyucto, Polyuctus vero cum episcoporum in urbe præsentium Synodo, habito de illo examine, ubi sæculari quidem eruditione haud admodum exultum, divina vero et Christiana magnificentissime instructum comperisset, patriarcham consecrat Antiochenum.

2. *Obitus S. Polyucti episc. Constantinop.* — « Porro Polyuctus cum dies haud plures a Theodori ordinatione superstes fuisset, ex humanis migrat, relictis Ecclesiæ monumentis, virtutum scilicet simulacris, divinæque et humanæ sapientiæ, scientiæque notitia, qua ad summum exultus fuit. Polyucto autem annos tredecim patriarchatus gubernacula moderato atque ad beatam vitam translato, diligentem adhibuit Joannes operam, ut in sacerdotali throno virum virtutibus atque moribus præstantem collocaret. Postridie igitur convocatis in palatium episcopis et senatu, dixit: Ego ejus vitæ a longo tempore indubitatum periculum feci hunc in Ecclesiasticam sedem proveho, ne

lateat in angulo vitam tolerans, vir omnis generis virtutum excellentiis clarus, cui et prænoscenti futura Deus donum concessit: multa enim mihi ejus generis divino edidit oraculo, quæ temporibus suis evenerunt. Dixerat imperator, et Basilium monachum in medium produxit, qui a teneris unguibus arrepta vita monastica crebros agones religiosæ palæstræ ludorum in Olympi montis arduis clivis ostenderat. Hunc videlicet in patriarchales ædes jussit ascendere, postridieque (ea scilicet Dominica, qua sancti Patres orthodoxam fidem de cultu venerabilium imaginum sanxerunt) Basilium summi sacerdotii unctionem accipit, ac œcumenicus patriarcha acclamatur ». Cedrenus testatur, Polyuctum post Tzimiscæ designationem, tantum triginta quinque dies vixisse, Curopalates vero triginta solum dies habet; sed cum Zonaras Cedreno suffragetur, mors ejus contigit circa diem xvi mensis Januarii. Illius nomen Menæis adscriptum ad diem v mensis Februarii. Porro festum *Orthodoxiæ* incidit hoc anno in diem xiii Februarii, quæ Quadragesimæ Dominica prima fuit, quo die illud celebrabatur.

3. *Tzimiscæ imp. legatos ad Rossos mittit.* — Pergit Leo Diaconus: « Joanni vero imp. multis curis anceps pendebat animus, cuinam prius momentum daret in trivio constitutus, ne ab officio aberraret. Tum enim annonæ penuria, atque jam triennium fames, Romanum depascebatur imperium, ingruensque Rossica motio, nihil ipsa fausti sperandum ingerebat, ac nec Carthaginensium Arabumque adversus Antiochiam Syriæ incursio, quæ Romanæ ditioni nuper accesserat. Enimvero fames quidem insuperabile malum, frumentationem ex omnibus ubique emporiis prompta diligentia dissolvit, gravis adeo mati grassante vi inhibita. Agarenorum vero motus repressus, objecta illis Orientalium copiarum acie, Nicolao patricio exercitus duce. Fuerat is imperatoris spado, multaque exercitatione magnam rei bellicæ peritiam nactus erat. Cum Sphendosthlabo autem Rossici exercitus duce gentisque principe ineunda pacis fœdera missis ad eum fecialibus putavit. Missis itaque ad eum legatis denuntiat, ut pacta cum Nicephoro imp. mercede recepta, ea ratione quod Mysos invaserat, ad suas sedes ac Cimmerium

Bosphorum se recipiant; Romanis vero Mysiam utpote ad ipsos affinentem, ac quæ olim Macedoniæ portio existat, relinquunt ».

4. *Bellum adversus eos decretum.* — *Sphendosthlabus* autem victoriis adversus Mysos (sic Leo Diaconus Bulgaros vocat) elatus barbarica insania ac dementia respondit legatis se brevi Byzantium forti vallo cincturum. Imperator nihil cunctandum esse existimavit, indeque magistrum *Bardam*, cognomento *Sclerum* (nos *Durum* dicamus) defunctæ *Mariæ* hujusce imperatoris conjugis fratrem, necnon Petrum patricium, a Nicephoro imp. stratopedarcham creatum, circum se esse præcepit, hisce duobus præcepit imperator, ut assumptis copiis, ad loca Mysis vicina, iisque contermina transirent, atque ibi hyberna ducerent. His ab imperatore in mandato acceptis in Europam veniunt. *Tauroscythæ* vero (hodie Moscovitæ appellati) suorum partes segregantes, eique sociam adjungentes *Unnorum*, *Mysorumque* manum in eos immiserunt. Adversariorum copię longe majores erant, ac triginta millia virorum excedebant; cum *Bardæ* magistri acies non plures decem millibus haberet. Conserto prælio utrinque cadebant, qui animosiores atque impetu incitatiores erant. Tandem Scythæ in fugam versi sunt, quorum Romani ad profundam usque vesperam eos insecuti multam stragem fecerunt. Aiunt in eo prælio Scythas supra viginti millia periisse. *Joannes* vero imp. Asiaticas copias in Europam per Hellespontum trajicere satagebat, ut in Thracia et Macedonia hyberna agerent, et vernam tempestatem expectarent.

5. *Bardas tyrannus in exilium missus.* — Dum hæc sic Joanni imp. in *Rossos* expedirentur, *Bardas* dux Leonis europalatæ filius, ac Nicephori imp. ex fratre nepos, ad res novandas *Amasea*, ubi relegatus fuerat, fuga evasit, *Theodoro* Barda ac *Nicephoro* patricio fratribus eam in rem illi adiutoribus. Eo res processit, ut Bardas dux « repudiatis nigri coloris calceis, rubros statim induit, palamque Romanorum imperator a militibus salutatus est ». Leo quoque europalates rebellionem conflabat, Barda pater in Lesbo insula, ipse quidem sub custodia habitus. Sed detecta conjuratione *Leo* europalata ac *Nicephorus* ejus filius jussu imperatoris oculis orbatii sunt. *Bardas* vero, cum ad tyrannidem animum semel advertisset, mordicus hærebat proposito, et Asiam populatus, eorum incendit domos, qui ipsius partes non sequerentur. Imperator, cum, scripta ad eum Epistola, *Bardas Phocas* respondisset sibi potius rerum summam ac imperium deberi, qui avo Cæsare gloriaretur, quem, inquit, in strato humi jacens, pecudis in morem jugulasti, imperator, inquam, *Bardam* cognomento *Sclerum*, cujus sororem antea *Mariam* nomine thori consortem habuerat, magistri dignitate fulgentem in Asiam adversus rebelles misit. Tandem *Phocas* postquam in extremas redactus fuit angustias, cum uxore et liberis se *Sclero* dedit, quos imperator in Chio insula exilio relegandos jussit.

6. *Tzimisces imp. Theodoram uxorem ducit.* — Interim dum paratur bellum adversus Russos, *Theodoram* Constantini Porphyrogenniti imperatoris filiam uxorem duxit imperator, haud quidem eximia pulchritudine aut corporis forma gratisque præditam, sed quæ castitate omnisque generis virtutibus cunctis procul dubio ejus sexus præstaret. « Mensis Novembris tempus erat altero Joannis imperii anno, cum nuptiale ageretur convivium ». Tunc imperator propinationibus, ludisque equestribus ac muneribus accipiendo populum, hyemem Byzantii agebat, ac vernum tempus expectabat. Idem ac Leo Diaconus de *Theodoræ* matrimonio Cedrenus habet, qui cum annos imperatorum a mense Septembri auspicietur, illud ad præsentem annum pertinere arbitror.

7. *Concilium Anglicanum anno superiori coactum.* — Ad num. 3 et seqq. Concilium Anglicanum anno superiori celebratum. Hovedenus enim parl. 1 Annal. pag. 426, scribit: « Anno mcdlxi, rex Anglorum pacificus Eadgarus sancto Dunstano Dorobornensis, et beato Oswaldo Wigorniensis, et S. Ethelwaldo Wintoniensis Ecclesiæ episcopis præcepit, ut expulsis clericis in majoribus monasteriis per Merciam constructis, monachos collocarent. Unde S. Oswaldus sui voti compos effectus, clericos Wigorniensis Ecclesiæ monachalem habitum suscipere renuentes de monasterio expulit; consentientes vero huic ipse antistes monachizavit, eisque Wlsinum magnæ religionis virum loco decani præfecit ». Idem narrant ad illum Christi annum Westmonasteriensis et annalista Mailrosensis. Et auctor anonymus Vitæ sancti Oswaldi episcopi Wigorniensis, et postea archiepiscopi Eboracensis, cujus verba recitat Baronius num. 3 et seqq. testatur, Decreti in Concilio generali pro cleri reformatione conditi executionem tribus præfatis præsulibus commissam fuisse.

8. *Contra incontinentiam clericorum, non contra eorum nuptias.* — Spelmannus hoc quidem Concilium accurate cum anno superiori illigat, sed male illud his verbis inscripsit: « Concilium generale a S. Dunstano archiepiscopo Cantuariæ adversus clericos conjugatos celebratum ». Nec enim auctores, quos ipse citat, aliquid habent de conjugio clericorum, et quæstio tantum erat de iis, qui conjugari non poterant, quique eum gradum ascenderant, cui continentia volum annexum erat. Superest adhuc fragmentum Orationis ab Eadgaro rege habitæ ad episcopos et ad cœnobiorum præfectos, quod in Bibliotheca Patrum recitatur. In ea Edgarus sic episcopos alloquitur: « Dicam, dicam, quod boni lugent, mali rident: dicam dolens (si tamen dici potest) quomodo distillant in comensationibus et ebrietatibus, in cubiculis et impudiciis; ut jam domus clericorum putentur prostibula meretricum, conciliabulum histrionum. Ibi aleæ, ibi saltus et cantus; ibi usque ad medium noctis spatium protractæ in clamore et horrore vigiliæ. Sic, sic patrimonia

regum, eleemosynæ pauperum, imo (quod magis est) illius pretiosi sanguinis pretium prodigatur? Ad hoc ergo exhaurerunt patres nostri thesauros suos? Ad hoc fiscus regius, detractis redditibus multis, detumuit? Ad hoc Ecclesiis Christi agros et possessiones regalis munificentia contulit, ut deliciis clericorum meretrices ornentur? etc. » Decretum itaque in hoc Concilio, ut antiqui canones de continentia clericorum, qui temporum injuria contemnebantur, servarentur.

9. *Pœnitentia septennalis Edgari regis Angliæ.*

— Quod vero narrat Baronius num. 6 et seqq. de pœnitentia *Edgari* regi ob incontinentiam imposita, serius non contigit, quam anno *mcclxiv*, ut ex *Hovedeno* et annalista *Mailrosensi* citatis colligere est. De ea pœnitentia *Malmesburiensis* lib. 2 de reg. cap. 8 ait : « Virginis Deo dicatæ audiens pulchritudinem, violenter eam a monasterio abstraxit, abstractæ pudorem, et non semel thoro suo collocavit. Quod cum aures B. *Dunslani* offendisset, vehementer ab eo increpatus, septennem pœnitentiam non fastidivit, dignatus rex affligi jejunio, simulque diademate carere septennio ». Sed ne quis putaret hanc virginem Deo sacram fuisse, sed tantum Deo a parentibus dicatam, subjungit *Malmesburiensis* : « De *Egelsleda*, cognomento *Candida*, filia *Ordmeri* ducis potentissimi *Edwardum* genuit, et sanctam *Editham* de *Wlfrida*, quam certum est non tunc sanctimonialem fuisse, sed timore regis puellam laicam se velavisse, moxque eandem, arrepto velo, lecto imperiali subactam. Unde offensum beatum *Dunstanum* quod illam concupisset, quæ vel umbratice sanctimonialis fuisset, vigorem pontificalem in eum egisse ». Sed hac de re legendus *Alfordus* in *Annal. Ecclesiæ Anglicanæ*, ubi plura habet adversus *Heterodoxos*, *Osbernium* scriptorem Vitæ sancti *Dunstani*, cujus verba refert *Baronius*, in pravam sensum interpretantes.

10. *Translatio S. Swithuni episc. Wintoniensis.*

— *Hovedenus* laudatus hoc anno habet : « Anno *mcclxx*. Sancti ac venerabilis antistitis *Swithuni* reliquiæ (peractis a sepultura ejus centum et decem annis) *Indictione xiv*, idus *Julii*, feria *vi*, sublatae sunt, et de monumento a *S. Ethelwaldo* venerabili præsule (nempe *Ecclesiæ Wintoniensis*) et ab *Elstano* *Glastoniensis*, *Ethelgaro* novi monasterii abbatibus, et in *Basilica Apostolorum Petri et Pauli* sunt reconditæ ». Idem habent *Wigorniensis*, *Florilegus*, et annalista *Mailrosensis*, ad hunc Christi annum. Patrata tunc plurima miracula, ut videre est apud *Malmesburiensem* lib. 2 de Pontif. p. 244. Ad illa respicit auctor Vitæ sancti *Ethelwoldi* episcopi *Wintoniensis* a *Worstano* monacho ejus discipulo scriptæ, qui num. 26 ait : « Cujus prædicationem maxime juvit sanctus antistes *Swithunus*, et eodem tempore cælestibus signis declaratus, et infra Templi Regiam gloriosissime translatus ac decentissime collocatus. Ideoque gemina simul in domo Dei fulsere luminaria candelabris aureis su-

perposita ; quia quod *Adelwoldus* salubri verborum exhortatione prædicavit, hoc *Swithunus* gloriosa miraculorum exhibitione ad laudem nominis Christi mirifice decoravit. Sicque factum, consentiente rege, ut partim *Dunstani* consilio et actione, partim *Adelvoldi* sedula cooperatione, monasteria ubique in gente Anglorum, quædam monachis, quædam sanctimonialibus constituerentur sub abbatibus et abbatissis regulariter viventibus. Circumivitque famulus Christi *Adelvoldus* singula monasteria, mores instituens, obedientes ut in bono proficerent, verbis admonendo, et stultos ut a malo discederent, verberibus acriter corrigendo ». De sancto *Swithuno* seu *Suvithuno* *Wintoniensi* episcopo suo loco verba fecimus.

11. *S. Rudesindus fit monachus et postea abbas.*

— Redacto in ordinem *Sisnando* *Compostellano* episcopo, quod officii sui curam parvipenderet, et *Sancio* regi *Legionensi* infensus esset, suffectus est *Rudesindus* episcopus *Dumiensis*, ut incarcerationi *Sisnandi* munia obiret, sicuti supra ex *Stephano Cellæ-Novæ* monacho illius Vitæ auctore diximus. Verum, ut inquit idem *Stephanus*, « post pauca *Sancius* rex moritur (anno nempe *mcclxvii*) ; quo cognito, *Sisnandus* vincula confringens e carcere fugit, et ipsa nocte *Nativitatis Domini* nostri *Jesu Christi* *Rudesindum* cum canonicis pausantem aggressus est. Gladium strictum manu portabat, quo mortem minabatur, nisi episcopatum relinqueret et civitatem desereret. *Rudesindus* ponderosis verbis temeritatem arguit, prophetans mortem violentam *Sisnando* cito eventuram ; quæ ita contigit, sicut ei fuerat a *Rudesindo* prædicta ». Quod hoc anno contigisse eodem anno testatur *Sampirus* his verbis : « *Normanni* rege (id est, duce) *Gunderodo* *Gallæciam* ingressi, strages multas fecerunt, et in gyro sancti *Jacobi* Apostoli episcopum loci ipsius gladio peremerunt, nomine *Sisnandum* ». Subdit *Stephanus* *Rudesindum* lætum confugisse ad monasterium *S. Joannis de Cabero*, quod ædificaverat, et postea mundo renuntiasse, ac condidisse monasterium *Villare prope Limiam*, in quod non multo post ingressus est, illudque *Cellam-Novam* appellavit. Mortuo abbate, quem ibi constituerat sanctus episcopus *Rudesindus*, a monachis abbas eligitur, episcopales vices non amittens. Ad cujus mirabile exemplum episcopi, abbates, nobiles et ignobiles *Cellam-Novam* veniebant, « omnia sua seque dentes ». inquit *Stephanus* citatus.

12. *Sanctius II, Abarca dictus, succedit Garsia II in regnum Navarræ.* — Hoc anno mortuus est *Garsia* rex *Navarræ* hujus nominis II, Æra nempe *mcviii*, ut *Moretus* in suis *Investigationibus* regni *Navarræ* pag. 418 demonstrat. Primo, tomo *Conciliorum Aveldæ*, cujus autographum in *Escoriali* conservatur, a *Vigila* monacho Æra *mcxiv* descripto, anno scilicet Christi *mcclxxvi*, Secundo, tomo *S. Emiliani*, qui ejusdem fere est antiquitatis ; et denique donatione quadam a Sanctio II *Garsia* successore abbati *S. Andrea* facta idus *No-*

vemb. anno tertio regni Sanctii Æra MX, in qua ait: « Gratia Dei Saneius rex et Ranimirus rex seu cum clara Urraca regina ». Idem Moretus lib. 2 Investigat. adversus Zuritam, aliosque scriptores Hispanos invictis argumentis probat, sæc. decimo in regno Navarræ regnasse Garsias duos, et Sanctios duos. Uxor Garsiae Sanctionis primi vocabatur *Onneca Terasia Endregotto*; primum est nomen, secundum cognomen, tertium patronimicum. *Terasia* appellatur in Chartis omnibus in favorem monasterii S. Emiliani datis usque ad Æram DCCLXXXV, eæque adhuc in archivis ejusdem monasterii existunt. In quibusdam aliis modo *Onneca*, modo *Endregotto* vocata. Ea ultimo nomine patronimico nuncupata, quia pater ejus in duabus Chartis

Æra MX datis Endregotto vocatur: « Ego Endregotto Galindonis, inquit, et prolem ejus (id est, e filia nepos) Sancio Garceanis rex et uxor ejus Urraca Ferdinandi ». Recte autem Moretus movet, *Ferdinandi* nomine intelligendum non esse *Ferdinandum* comitem Castellæ. Suspiciatur vir eruditus pag. 431, nomen *Fortunii* loco *Ferdinandi* substituendum; sed exemplaria ei adversantur. Fatendum tamen librariorum hoc nomen corrupisse; cum sæculo decimo non *Ferdinandi*, sed *Fredelandi* nomen usurparetur. *Garsiae* itaque *II* successit *Sanctius* hujus nominis *II*, *Abarca* cognominatus, Sanctii primi nepos, cujus uxor *Urraca*, ut anno DCXXVI videbimus.

JOANNIS XIII ANNUS 6. — CHRISTI 974.

1. *Synodus Romana in qua firmanur privilegia ab Edgardo Angliæ rege data monachis.* — Annus Redemptoris nongentesimus septuagesimus primus, Indictione decima quarta sequitur, quo habita est Romæ a Joanne Pontifice Synodus generalis, ad quam inter alia missa est legatio ab Edgardo Anglorum rege, et a sancto Dunstano archiepiscopo Dorovernensi sive Cantuariensi (utroque enim nomine eadem sedes est nominata), ut ab eodem Joanne Pontifice confirmarentur privilegia concessa ab eodem rege monasterio sanctæ Mariæ Glastingebiri. De quo ista in Willelmo¹ Malmesburiensi: « Recogitans vero rex Edgarus, quam multa temeritas humanæ levitatis quibusque solet subrepere; verensque ne forte quis in posterum vel hæc privilegia loco illi auferre, vel monachos inde moliretur ejicere: inclyto domino Joanni papæ, qui Octaviano in regiminis honore successerat, direxit idem chirographum regiæ liberalitatis, orans ut et ipse hoc roboraret scripto Apostolicæ auctoritatis. Qui benigne directam suscipiens legationem, concordii assensu Romani Concilii sancita ab eis firmavit, scribendo Apostolicæ auctoritatis præceptionem, terribiliter intorquens in violatores, si qui forte emergerint, perpetui anathematis ultionem. Igitur domini prædicti Apostolici eidem loco directum

testamentum venustæ recordationis rex Edgæus super aram beatissimæ Dei Genitricis Mariæ ibidem ad perpetuale posuit monumentum, jubens diligenter asservari in posterum ad notitiam quorumcumque sequentium. Ea etiam utraque, ne videamur talia commentari, his gratum habuimus subdere adversus eos, qui non ut pastores per ostium intrare, sed ut fures et latrones in idem ovile sanctæ Mariæ aliunde quærunt irrumpere ». Diploma Joannis papæ sic se habet:

2. « Noverit cunctorum notitia fidelium, quod ego Joannes XII (XIII) Conditoris clementia sanctæ Romanæ Sedis existens indignus papa, gloriosi Anglorum regis Edgari, necnon et sanctæ Dorovernensis Ecclesiæ archipræsulis Dunstani submisso pulsatus rogatu pro monasterio sanctæ Mariæ videlicet Glastingebiri, quod ipsi acti amore suppremi regis in multis et magnis possessionibus ditaverant, monachorum inibi multiplicantes normani, præceptoque regali firmaverant, quod et ipse facere non differam. Quorum assentiens benignæ petitioni, in sinu Romanæ Ecclesiæ et beatorum Apostolorum protectione eundem locum suscipio, et privilegiis adstruo et corroboro; quo finetenus in eo quocumque pollet, permaneat monachali ordine, ipsi quoque monachi de suis sibi adhibeant pastorem. Ordinatio vero tam monachorum quam clericorum in arbitrio abbatis et conventus sit. Decer-

¹ Wil. de Gest. reg. Angl. l. II. c. 8.

ninus etiam, ut nulli omnino hominum eandem insulam causa placitandi, vel aliquid aliud perscrutandi aut corrigendi intrare liceat. Si quis autem id molitus fuerit contraire, aut possessiones ejusdem Ecclesiæ auferre, retinere, minuere, vel temerariis vexationibus fatigare, ex auctoritate Dei patris et Filii et Spiritus sancti, sanctæque Dei Genitricis Mariæ, ac sanctorum Apostolorum Petri et Pauli omniumque sanctorum, perpetuæ sit addictus maledictioni, nisi resipuerit. Omnibus vero eidem loco justa servantibus sit pax Domini nostri Jesu Christi. Amen. Nostraque stipulatio inconvulsa permaneat. Actum tempore Ælfardi (Elvufardi) ejusdem monasterii abbatis. Prædicti regis Edgari duodecimo anno, qui est Dominicæ Incarn. DCCLXV (DCCLXXI), quo præfatus papa Romæ in generali Synodo auctorizavit, cunctosque potioris dignitatis, qui præfuerunt eidem Concilio generali, ea corroborare imperavit. Subjicit vero his ista idem auctor:

3. « Perpendant ergo contemptores tantæ comminationis, quantæ subjaceant sententiæ excommunicationis. Equidem beato Petro Apostolo principi Apostolorum Christus ligandi solvendique præsulatum, clavesque simul tradidit regni cælorum. Cuique autem fidei constat perspicuum atque evidens, quod hujus Apostoli vicarius, potestatisque potissimum sit hæres, Romanæ Ecclesiæ præsidens. Huic sanctæ memoriæ Joannes laudabiliter præfuit suo tempore, ut hodie quoque viget gloriosa recordatione, promotus ad id Dei totiusque populi electione. Si ergo decretum beati Petri Apostoli ratum: consequenter et Joannis Apostolici ratum. Sed nemo vel demens ratum esse Petri Apostolici (Apostoli) decretum denegat. Nemo igitur sanæ mentis dissimile fore Joannis Apostolici decretum repugnat. Aut igitur isti concedentes beato Petro, suisque successoribus collatam a Christo potestatem, transgredi cessabunt tanti interdicti auctoritatem, aut floccipendentes, cum diabolo suisque complicitibus præscriptæ maledictionis sibi acquirant perpetuitatem, etc. » Ista Willelmus scribebat anno millesimo centesimo quadagesimo, inter scriptores rerum Anglicanarum post Bedam præcipuus.

4. *Udalricus Roma rediens convenit Ravennæ Ottonem, per quem Adalberoni nepoti suo in Augustana sede successionem obtinet.* — Eodem anno imperator Otto firmato fœdere cum Joanne Græcorum imperatore, et Pandulfo¹ Beneventano principe restituto, qui captivus a Nicephoro delinebatur, recessurus ab Italia, una cum conjugē Ravennam pervenit, ubi eum S. Udalricus Augustanus episcopus, cum visitasset limina Apostolorum, ab Urbe rediens, convenit. Quid autem cum imperatore transegerit de Adalberone suo nepote, auctor, qui primus res ab eo gestas est prosecutus², enarrat, ac primum de ejus in Urbem adventu:

« Animo, inquit, decrevit, quamvis vires corporis de die in diem decrescere sentiret, ut limina Apostolorum Petri et Pauli devota intentione laborasset visitare ». Jam bis antea magno ardore fidei visitaverat, et modo senectute confectus antequam moreretur, rursum visitare magno licet labore conatus. Pergit enim:

5. « Cumque aliquantulum itineris peregisset in carpento, et ad difficiliore vias perveniret, non potuit ultra iter peragere, antequam in lecto collocatus equis superpositus pergere cœpit, sicque pergendo, quamvis comitibus ejus ubique periculosum videretur, Deo juvante, et S. Petro Apostolo, sine periculo pervenit ad Romam, votorumque ibi antea dispositorum et promissionibus devotissime expletis, et gratissimorum emolumentorum et indulgentiarum donis acceptis, permissoque salubri a sancto Petro et vicario ejus Pontifice, cæterisque Deo ibi et sancto Petro militantibus honorabiliter accepto, felicem reditum iniit, et Ravennam visitare disposuit.

6. « Illucque cum appropinquaret, imperatorem gloriosum Ottonem cum imperatrice Adelaïda ibi manere comperit, et ante se misso nuntio, adventum ejus illi indicavit. Et ille statim nuntium sequendo, ad ostium cubiculi imperatoris pervenit. Imperator vero cum eum in tanta vicinitate manere agnovisset, uno pede calceato, et alio adhuc incalceato, causa humilitatis et flagrantia divini amoris eum ad suscipiendum amabiliter festinavit. Cumque in cubiculo accersita imperatrice, suavi colloquio fruerentur, et alternis locutionibus diversarum rerum proventus terminarent, vir sanctus imperatorem cum auxilio imperatricis flagitare cœpit, ut filio sororis suæ Adalberoni procurationem sui episcopatus, regimenque super familiam et omnia negotia sæcularia ad eum pertinentia, fideliter et firmiter commendaret, et ut a celsitudine ejus imperialis potentiæ promissum consolationis accipere mereretur, ut post ejus discessum cathedram episcopalis potestatis ei donaret, ut sibi majoris otii ad studium orationis et Ecclesiastici regiminis et Christianitatis stabilitatem facultas concederetur. Cujus petitioni gloriosus et benevolus imp. assensum præbens, sæcularium negotiorum commercia Adalberoni commendavit, et episcopalis honorem cathedræ, post vitam episcopi, si Deus vellet, ei donare permisit, et insuper multis libris auri episcopum donatum amabiliter abire permisit, et ejus mansiones cum alio servitio necessario cum suis fidelibus usque ad finem illius provinciæ caute disposuit.

7. « Episcopus autem et præfatus Adalbero cum lætabundi ad Augustam reverterentur civitatem, honorifice sicut decuit suscepti sunt, et omnes qui ibi inventi sunt, comperta eorum prospera reversione et honorificatione ab imperatore eis facta, valde lætificati sunt. Tunc vero præfatus Adalbero, congregatis militibus episcopi, desideravit, ut ei sacramenta fidelitatis jurarent. Quod et fecerunt in

¹ Chron. Benevent. Long. — ² Vita Udalrici c. 21. 22.

præsentia episcopi, similiter et familia per totum episcopatum fecit. Episcopus autem indumento more monachorum formato induebatur, quorum antea regulam multimodis virtutibus sequi consueverat. Cumque hæc ita agerentur, propter quorundam clericorum æmulationem, qui se æstimabant post obitum sancti episcopi, imperiali celsitudine concedente, episcopatum posse acquirere, ferulam episcopalem publice portare præsumpsit.

8. *Nimia erga nepotem dilectione aliquid humani passus Udalricus.* — Hæc autem Udalrici viri sanctissimi erga suum nepotem in successorem promovendi fuere studia, quæ nec Deo placuisse, nec Ecclesiæ, declaraverunt eventa. Sed ipse et in seipso jam proxime moriturus factum est de testatus, cum ad supremum iudicium raptus per visum, accepit ea se de causa pœnis mancipandum purgatoriis. Idem enim auctor ita rem gestam¹ enarrat: « Altera vero vice, quadam die, quasi de quodam gravi somno expergefactus, ei assidentibus et hæc audientibus ait: Heu! heu! quod illum nepotem meum Adalberonem unquam vidi, quia pro eo quod ei secundum suum desiderium consentiebam, nolunt me impunitum in suum recipere consortium. Et his dictis, statim tacuit. Virtus vero corporis de die in diem decrescens, etc. » Plane unius duntaxat Jesu Christi Filii Dei fuisse in divinis Scripturis legitur gloriatio: Venit² princeps mundi hujus, et in me non habet quidquam. Reliquorum nemo omnino (ejusdem Jesu Christi Dei Genitricis Maria excepta). Est ipsorum quoque Apostolorum vera confessio³: « Si dixerimus, quoniam peccatum non habemus, ipsi nos seducimus, et veritas in nobis non est ». Et illud: Non est homo, quamvis sanctissimus⁴, qui non peccet, licet adversus peccata bellum juraverit sempiternum, ea detestans, damnans, cavens, fugiens, abominans, insectans ac puniens.

9. Fallax diabolus, antiquus hostis, decipiendi arte versutus, quos aperto Marte frustra se aggredi posse cognoscit, de longe, specie ostensa recti, fallere sanctos non frustra laborat. Ecce tibi sanctissimus Udalricus (ne a longe exempla petamus) annos natus octoginta et unum, et proxime moriturus, ablegare cupiens sæcularia (ut audisti) a se negotia, quibus semper carere debere rebus divinis mancipatum, monet Apostolus, dicens⁵: « Nemo militans Deo implicat se negotiis sæcularibus »: tantumque sibi et Ecclesiæ vacaturus, quærens cui illa refundat; nepos in mentem venit: nec putat absque instinctu divino factum, quod post laboriosam illam peregrinationem, assiduis precibus ad Confessiones Apostolorum Romæ faciendum petiisset. His accedebant nepotis ipsius virtutes, quibus ipse suum alumnum imbuerat. De eo namque idem auctor hæc testatur, fuisse⁶ doctum, in servitio Dei studiosum, in bonis operibus strenuum,

in dicendo eloquentem, in donando largum, compatiens aliorum molestiis, ad miseros sublevandos festinum, atque multis virtutibus cumulatam. Annon tot tantisque pollens virtutibus, etiamsi fuisset extraneus, erat ab eo successor optandus, et dum viveret cooptandus? eoque magis, quod cum reges manus injecissent in episcopatus, sæpe contingeret e militia sæculari, militantes, inquam, in palatina militia sese obtrudentes, in episcopos eligi. At laudaverit ista homo, atque juste probavit: a Deo autem improbata, imo et punita admodum severe fuisse scimus, in primis Adalberone (ut dicimus anno sequenti) morte repentina ex hac vita subducto, ipso vero episcopo, nonnisi expiato peccato, digno sanctorum consortio iudicato.

10. At ubi culpa, dices, quam necesse est præcedere pœnam? Novit eam ipse, cum ante divinum illud terrificumque tribunal vocatus, audivit eam, quam et ipse in se reversus, adstantibus patefecit, dicens: « Quia secundum desiderium suum consentiebam ei, nolunt me impunitum in suum recipere consortium ». Quibus indicatum est, non spiritus, sed fuisse carnis illum impulsus, ut nepotem deligeret successorem, illo suadente, obnixæque petente, et a viro sanctissimo tandem assiduis precibus extorquente; quem vel ex hoc æstimare debuisset indignum, dum illud peteret, quod refugit omnis dignus. Potentissimum diaboli telum est amor affinium, quo etiam sanctos appetit, quod secundum¹ Apostolum nemo carnem suam odio habet, sed nutrit et fovet eam. Porro eam pie odisse debere, monuit² Dominus fideles suos, sequæ ad bellum gerendum adversus eos gladium³ ministrasse æque testatus est: adeo ut evadat nemo, nisi qui eos non sibi propinquos, sed esse inimicos intelligat: et in eos, ut in hostes arma spiritualia comparet, quibus non obsit, sed prosit, eoque remediose suosque lucretur; perdat vero se cum suis, quibus indulgeat.

11. *Magdeburgensis civitas constructa, cujus primus episcopus Adelbertus.* — Hoc eodem anno Otto imperator Magdeburgensem civitatem condidit, eidemque primum episcopum auctoritate Joannis Pontificis sanctum Adelbertum dedit, de quo ista Adam vetus chronographus habet⁴: « Ipso tempore magnus Otto, subjugatis Christianæque fidei copulatis Slavorum gentibus, inclytam urbem Medenburg super ripam Albæ fluminis condidit, quam Slavis metropolim statuens, Adelbertum summæ sanctitatis virum ibidem consecrari fecit archiepiscopum. Is primus in Magdeburg ordinatus, duodecim annis strenue pontificatum administravit, multosque Slavorum populos prædicando convertit. Cujus ordinatio facta est anno imperatoris et archiepiscopi trigesimo quinto, et sunt anni post ordinationem S. Ansgarii centum triginta septem. Magdeburgensi archiepiscopatu

¹ Idem in Vit. Udalric. c. 26. — ² Joan. x v. — ³ 1. Joan. i. — ⁴ 3. Reg. viii. — ⁵ 2. Tim. ii. — ⁶ In eadem Vit. c. 24. in fine.

¹ Ephes. v. — ² Luc. xiv. — ³ Matth. xvi — ⁴ Adam. l. ii. c. 7. s. 10, 11.

subiecta est tota Slavonia usque ad Penem fluvium: episcopatus suffraganei quinque, quorum Morsiburg Tysca super Salam flumen condita, Misna super Albiam, Brandenburg et Hevelberg interius vadunt. Sextus episcopatus Slavoniæ est Aldinburg. Eum, quod vicinior est nobis, imperator Hamaburgensi archiepiscopatu subiecit: ibique archiepiscopus noster primum ordinavit episcopum Curaccum vel Eduardum, quem Latini dicunt Evagrium». Et inferius de ipsa Slavonia hic idem auctor: « Slavonia igitur amplissima Germaniæ provincia a Vinulis incolitur, qui olim dicti sunt Vandali: decies major esse quam nostra Saxonia fertur, præsertim si Bohemiam et eos, qui trans Odderam sunt Polonos, quia nec habitu nec lingua discrepant, in partem adjeceris Slavoniæ. Hæc autem regio cum sit armis, viris, et frugibus opulentissima, firmis undique saltuum et fluminum terminis clauditur. Ejus latitudo est a Meridie in Boream, hoc est, ab Albia fluvio usque ad mare Scythicum; longitudo autem illa videtur, quæ initium habet a nostra Hamburgensi parochia, et porrigitur in Orientem, infinitis aucta spaliis usque ad Benguariam, Ungriam et Græciam. Populi Slavorum multi, quorum primi sunt ab Occidente confines Transalbanis, Vagri, eorum civitas Aldenburg maritima, deinde sequuntur Obotriti, qui numero (nomine) Keregi vocantur, et civitas eorum Magnopolis.

12. «Item versus nos Polabingi, quorum civitas Razisburg: ultra illos sunt Lingones et Varnalii. Mox habitant Chyzini et Circipani, quos a Tolosantibus et Rheleris separant fluvius Panis et civitas Dymin, ibi est terminus Hamburgensis parochiæ. Sunt et alii Slavorum populi, qui inter Albiam et Odderam degunt, sicut Helveldi, qui juxta Haloam sive Hailam fluvium, et Doxani, Leubuzi, Vilini et Stoderani cum multis aliis. Inter quos medii et potentissimi omnium sunt Rhelarii. Civitas eorum vulgatissima Rethre, sedes idololatriæ. Templum ibi magnum constructum est demonibus, quorum princeps Redigast, simulacrum ejus auro, lectus ostro paratus (civitas ipsa novem partes habet, undique lacu profundo inclusa) pons ligneus transitum præbet, per quem tantum sacrificantibus, aut responsa petentibus via conceditur, hæc eo significante causam, quod perditas animas eorum, qui idolis serviunt, congrue novies Styx interfusa coeret. Ad templum ferunt a civitate Hamburg iter esse quatuor dierum». Pergit de civitate Junne admiranda scribere, ac demum ista periodo claudit orationem: «Ihec de Slavis et patria eorum, quoniam virtute Magni Ottonis ad Christianitatem eo tempore omnes conversi sunt, dicta sufficiant».

13. Porro ut Magdeburgum redeamus totius provinciæ metropolim, Otto imperator in ea inter alia præclara monumenta¹ fundavit monasterium

sub regula sancti Benedicti in honorem Petri et Pauli et Innocentii martyris, cujus ibi reliquias collocavit, beati autem Maurilii patrocinio præcipuo locum illum subiecit. Ditmarus¹ quoque, qui hoc sæculo vixit, meminit de præfectura Adelberti Ecclesiæ Magdeburgensis, atque enim illi Ecclesiæ primum episcopum datum auctoritate Romani Pontificis. Hic autem opportune monendus lector, Adelbertum alium diversum ab isto paulo juniori hoc sæculo claruisse, præfectum episcopum Pragensem in Boemia, ac demum martyrio vita functum, quem nonnulli confundunt et conflant in unum cum Adelberto archiepiscopo Magdeburgensi, de quo est sermo, sed nihil inter eos commune, nisi nomen. His junge et tertium Adelbertum Rugorum ordinatum episcopum, de quo suo loco superius dictum est.

14. *Cedente Petro archiepiscopo Ravennate, succedit Honestus.* — Eodem anno Petrus archiepiscopus Ravennas sponte abdicavit se ab onere pastoralis curæ, in cujus locum suffectus est Honestus ex abbate Classensis monasterii. De Petri abdicatione meminit Petrus Damiani ad Nicolaum secundum, scribens de renuntiatione. Testatur Rubeus extare publica monumenta Ecclesiæ Ravennatis, quibus præsens annus his consignatus habetur notis: «Nonis Aprilis, Indictione decima quarta, anno sexto Joannis Pontificis, Ottonis patris imperatoris decimo, Ottonis filii anno quarto». Quæ ad firmendam nostram chronographiam de Joannis papæ annis volumus hic in testimonium adduxisse. Hic fuit Honestus, qui sanctum Romualdum monastico habitu induit, de quo plura inferius.

15. *Joannis imperatoris expeditio in Barbaros, divinitus relatæ victoriæ; et inde triumphus.* — Quod ad res pertinet Orientalis imperii, teste Joanne Curopalate et aliis, qui ex eo quæ narrant describere, ope martyrum Georgii et Theodori Joannes imperator ingenti gloria Rossos et Bulgaros, Scythas, Turcas, et alios Barbaros adversus Romanos simul fœdere junctos numero trecentorum triginta millium militum, iteratis summo labore atque periculis sæpe præliis, superavit, atque summa religione qua vicerat, triumphum paravit. Bellum accurate descriptum habetur ab eodem auctore sigillatim cuncta quæ facta sunt ordine prosequente, quem qui ea cupit, adeat: nobis ad institutum hæc satis scisse, nimirum expugnatam primariam civitatem Bulgarorum, ubi regia erat, Parasthlabam nominatam, et mutato postea nomine ab imperatore Joannopolim nuncupatam, captumque regem Bulgarorum Borisem cum uxore et liberis, et Bulgarorum regnum extinctum, superatos ingenti prælio postea Barbaros die sancti Georgii martyris, cui tanta victoria accepta lata fuit. Converso post hæc bello adversus reliquos, qui se Dorcostoli munierant, ancipiti periculo et

¹ Grant, in Sax. I. III. c. 24.

¹ Ditm. Chron. I. II.

certamine diu multumque pugnatum, donec divinum auxilium certis signis Romanis affuit, quibus adjuti vicere penitus Barbaros. Quænam autem fuerint ista divina subsidia opportuno allata tempore, audi a Cuiropalate :

16. « Fertur, inquit, divinam opem tum Romanos esse consecutos : turbo enim quidam a Noto vento in ora Scytharum constitit, haud permittens eos captis uti in bello consiliis. Et quidam vir conspectus est ab omni Romanorum exercitu equo albo vectus in antesignanis pugnare, hostiumque commovere ac perturbare phalanges, nulli prius aut postea cognitus, quem aiebant unum esse ex gloriosis martyribus, Theodorum videlicet, quibus tutoribus ac propugnatoribus contra hostes utebatur semper imperator. Etenim forte accidit, ut hoc prælium ea die committeretur, qua celebrare memoriam militis consuevimus. Cum et mulier quædam nobilis Byzantii, supremæ potestatis, per visum illud ita esse confirmabat una ante congressum die, in somnis sibi visa Dei Genitrici præsto esse, et cuidam militi dicentem audire : Domine Theodore, meus ac tuus Joannes in periculo versatur : ad ejus auxilium propera. Orlo sote eadem mulier vicinis rem patefacit. Et quæ visa sunt, hæc fuere. Funduntur rursus Scythæ, qui clausas urbis portas comperientes, a Sclero duce per plantiem dissipati mutuoque conculcati interfecti sunt, et a Romanis cæsi numero infiniti, vulnerati autem fere omnes. Martyri autem debitum reddens honorem imperator, et auxilii præmia rependens, templum illud ubi sanctum ejus corpus conditum est, a fundamentis eversum, majus, pulcherrimumque ædificavit, attributis ei magnificis possessionibus, quod etiam pro Enchanen, Theodoropolim appellavit ». De triumpho autem, qui paratus

est ipsi Constantinopolim redeunti, sic inferius idem Cuiropalates :

17. « Urbis archiepiscopus cum Synodo, et omnes, qui magistratum gerebant, cum pæanibus et victoriæ laudibus Joannem imperatorem exceperunt, coronas afferentes, parato quadrijugo curru admodum decoro, in quem eum conscendere volebant, et ita triumphum agere imperatorem. Ipse vero nihil quod magnificum esset, approbans, seque moderatum cupiens ostendere, allatas coronas accepit, et equo albo vectus triumphavit.

18. « In curru vero, impositis Bulgarorum vestibus, et super ipsis Dei Genitricis imagine, ut civitatis patronæ, ipsum præire jussit. Cumque ad locum, quod Forum dicitur, pervenisset, satis celebratus, Deo Patri et ejus Filio, Spirituique sancto actis gratiis ob victoriam consecutam, insignia Bulgarici imperii in conspectu civium Borisem regem Bulgarorum exuens (hæc autem erant, aurea corona et tiara ex byssino filo contexta et purpurea calceamenta) inde ad magnum templum profectus, ibique Bulgarica corona pro munere Deo dedicata, promotoque Borisi ad magistrorum dignitatem, in regiam se recepit ». Et paulo post : « Imperator autem actis gratiis Salvatori Christo ob parta trophæa templum super æream apsidem novum construxit, nulli sumptui parcens aut ornameto. Remisit etiam iis qui tributa pendebant, illud quod capnicum appellaretur. Imperavit item in numismate, aureo scilicet solido, atque in obolo sculpi Salvatoris imaginem, quod antea factum non fuerat, in ejus altera parte hæc litteræ inscribebantur, CHRISTUS REX REGUM, et hoc subsequentes observaverunt imperatores ». Ilucusque Cuiropalates, et ex eo alii.

Anno periodi Græco-Romanæ 6461. — Anno Æræ Hispan. 1009. — Anno Hegiræ 361, inchoato die 24 Octob., Fer. 3. — Jesu Christi 971.

— Joannis XIII papæ 7. — Ottonis imp. 10. Joannis Tzimisæ imp. 3.

1. *Concilium Londinense a Concilio Romano confirmatum.* — A num. 1 ad 4. Duo hoc anno Concilia celebrata, alterum *Londinii*, alterumque *Romæ*. De priori agunt Spelmannus pag. 488, Alfordus hoc anno et Labbeus tom. ix Concil. pag. 702 et seqq. In eo *Edgarus* Angliæ rex confirmavit celeberrima Privilegia monasterio Glastoniensi concessa, reservata sibi et hæredibus potestate baculum conferendi abbati, qui a monachis eligere-

tur, et fuse narrat Malmesburiensis lib. 1 de Reg. cap. 8, qui addit : « Inclito domno Joanni papæ, qui Octaviano in regiminis honore successerat, direxit idem chirographum regiæ liberalitatis, orans ut et ipse hæc roboraret scriptæ Apostolicæ auctoritatis : qui benigne directam suscipiens legationem, concordi assensu Romani Concilii sancita ab iis firmavit ». Recitat Baronius num. 2 ex eodem Malmesburiensi Epistolam Joannis papæ XIII, qua

peracta Londini in Anglia confirmat ad petitionem Edgari regis, et Dunstani Cantuariæ archipræsulis (1).

2. *Edgarus Angliæ rex favet monasteriis.* — Spelmannus et auctores citati Chartam ab *Edgaro* rege datam ex Antiquitatibus Mss. Glastoniensis monasterii referunt, qua Privilegia a suis prædecessoribus eidem monasterio concessa confirmat: « Dunstano, inquit, Dorobernensi atque Oswaldo Eboracensi archiepiscopo adhortantibus, consentiente etiam et annuente Brithelmo Fontanensi episcopo cæterisque episcopis, abbatibus et primatibus ». In fine legitur: « Acta est hæc Privilegii pagina, et confirmata apud Londoniam communi consilio omnium primatum meorum anno ab Incarnat. Domini nostri J. C. DCDLXXI, Indict. XIV ». Post subscriptiones legitur: « Hanc Privilegii paginam rex Edgarus XII anno regni sui, sacro scripto apud Londoniam consilio optimatum suorum confirmavit. Eodemque anno Joannes papa XIII hanc ipsam paginam Romæ in generali Synodo autorisavit ». Inter subscriptiones leguntur nomina *Eilfginæ* regis matris, *Dunstani* Dorobernensis archiepiscopi, et *Oswaldi* Eboracensis Ecclesiæ primatis, ac postea nomina aliquot episcoporum et quorundam regni primatum.

3. *S. Oswaldus fit archiepisc. Eboracensis.* — Wigorniensis, Hovedenus, Ingulphus, Symeon Dunelmensis, et alii ingressum Oswaldi episcopi Wigorniensis in Eboracensem sedem cum sequenti anno copulant. Verum ex Charta laudata quæ sincera et genuina est, et meo judicio in dubium vocari non potest, liquet eos hac in re deceptos esse. Præterea in antiquo et accurato Catalogo præsulum Eboracensium a Labbeo tom. I Biblioth. publicato legitur: « Oswaldus suscepit Ecclesiæ regimen anno Incarnat. DCDLXXI. Sequenti autem anno Romam veniens a papa Benedicto pallium accepit ». His adde Thomam Stubbs in Actis archiepiscoporum Eboracensium in eadem ac auctorem præfati catalogi versari sententia, et Catalogum illum legi in Epistola edita sub nomine Symeonis Dunelmensis « ad Hugonem decanum Eboracensem, de archiepiscopis Eboraci ». Non audiendus itaque Warthonius part. 2 Angliæ Sacræ pag. 203, qui *Oswaldi* archiepiscopatum cum anno DCDLXXII connectit. « Rex consilio Dunstani », inquit Malmesburiensis lib. 3 de Pont. pag. 270, « vacuatum episcopo Eboracum, viro implevit; qui barbariem gentis (nempe Northumbriæ) moderari, pro antiquo convictu, probe nosset. Nec tamen Wigorniensis sedi

renuntiare permissus est; ne monachorum recens habitatio, altoris sui destitueretur fomento. Optimates submissi viro esse, certatim possessiones ad monasteria, quæ non extabant, fundanda: ad ea quæ deciderant sublevanda offerre. Præterea litteris excellentes viros in Angliam evocatos, munificenter curare; ne illo bono fraudaret patriam, sine quo cætera bona pæne videntur inania. Quorum unus fuit Abbo, Floriacensis monachus, qui multam scientiæ frugem Angliæ invexit ». Quam sollicitè Oswaldus Eboracensem provinciam rexit, quam caute prudenterque ovibus prospexerit, declarat auctor anonymus, qui ejus Vitam scripsit.

4. *Floret S. Abbo abbas Floriacensis.* — Quoad sanctum Abbonem martyrem, is, non a monachis suis occisus, ut credit idem anonymus, sed a monasterii servis, ut sæculo sequenti videbimus. Ejus meminit Baronius anno superiori num. 5. Reliquit is varia opuscula partim edita, partim nondum vulgata. Composuit enim Epitomen de Vitis Romanorum Pontificum xci, Vitam sancti Eadmundi Anglorum regis et martyris, Epitomen canonum, a Mabillonio tom. II Analect. in lucem editam, ac quasdam Epistolas et opuscula. Scripsit etiam Apologeticum contra obtrectatores, cum præsules, tum monachos, ad Hugonem et ejus filium Robertum Francorum reges, in quo non alia de causa ab æmulis se impeti significat, quam quod monachorum salutem et Reipublicæ suæ augmentum quærat. Etsi vero Roberto regi summo opere acceptus esset Abbo, eum tamen ob illicitam cum Berta copulam increpare non dubitavit, teste Helgardo monacho in libro de Vita Roberti, et ea libertas, quæ piissimi principis animum ad iracundiam provocavit, monachorum ejus temporis osoribus Abbonem traducendi vexandique occasionem præbuit. Vide quæ dicam anno MIII, num. 4.

5. *Pax inter utrumque imperium firmatur.* — A num. 4 ad 11. Cum foedus inter Ottonem M. et Joannem Tzimiscem Græcorum imperatorem hoc anno firmatum sit, ut ostendit Baronius num. 4, apparet Theophaniam hoc tantum anno ab eodem Tzimisce uxorem datam esse Ottoni II Ottonis Magni filio; recte scripsisse chronographum Hildensheimensem, ejus verba anno superiori retulimus, eam sequenti tantum anno Romæ receptam esse; Sigoniumque lib. 7 de Reg. Ital. accurate tradidisse Arnulphum archiepiscopum Mediolanensem currenti anno Constantinopolim allegatum esse, ut Theophaniam neptem Tzimiscis ab eodem

(1) Hujus Romani Concilii mentio occurrit in Chronico Mosomensi apud Dacherium Spicileg. tom. II, p. 570 novæ editionis; ex quo etiam discimus cœnobii illius Constitutionem ab Adalberone Rhemensi decretam Apostolica et Synodi Romanæ auctoritate confirmatam fuisse. Ideo vero adnotationem hanc retuli ne deinceps sola Malmesburiensis auctoritate Concilium hoc, alias ignotum, stare credatur. Sed et ex Privilegio Joannis XIII in eodem Chronico recitato, datoque a Pontifice postquam recepisset Adalberonis legatos Romam missos post Natale Domini anno DCDLXXI, discimus Concilium istud ad sequentem annum DCDLXXII revocandum esse; datum est enim Privilegium IX kalendas Maii, anno Pontificatus domini nostri Joannis sanctissimi, et tertii decimi papæ VII, imperii Ottonis undecimo, Junioris quinto, Indict. quinta decima. Hæc omnia cum anno DCDLXXII congruunt. Vix autem credo Concilium Romanum, de quo in Charta apud Spelmannum, et illud de quo in Chronico Mosomensi diversa esse inter se, ut unum præcedenti anno DCDLXXI, alterum sequenti DCDLXXII assignandum sit. Forte autem in Charta Edgari, de qua Pagius hic, nihil aliud designatur, nisi quod intra unius anni spatium duo Concilia Londoniense et Romanum celebrata fuerint; quamvis ex iis unum ad annum DCDLXXI, alterum ad sequentem pertinet. Ex data etiam ejus Privilegii in Synodo Romana recitati habemus certam diem, qua Synodus illa cœpit, nempe dies XXIII Aprilis, quæ anno DCDLXXII in Dominicam incidit.

MANST.

imperatore iterum in matrimonium postulet, eamque a Joanne papa XIII Romæ coronatam atque Angustæ titulo decoratam anno DCDLXXII.

6. *Otto M. Magdeburgum, et in eo monasterium condit.* — A num. 14 ad 44. *Otto Magnus* devictis Slavis, Saxonie ad Albim populis, ut religionem Christianam illis persuaderet, cogitavit de erigendo præsidio, simulque Benedictinorum monasterio, quod fidei Christianæ seminarium esset et asylum. Itaque anno nongentesimo trigésimo septimo, Edithæ piissimæ conjugis suæ *instinctu*, ut ex Chronico Magdeburgensi Ms. Sæc. v Benedict. pagina 573 refertur, « Magdeburgensem ædificare cœpit civitatem, ad quam reliquias Christi martyris Innocentii cum magno adduxit honore. Nam urbem hanc ob æternæ remunerationis gratiam, patriæque communem salutem, et acquisivit et construxit. Juvit eum ad hoc beatæ memoriæ Edith quibus potuit: quæ innumera virtute prædita, ut signis post obitum claruit, inducias vitæ istius sibi concessas, Deo hominibusque acceptæ perduxit. Decevitque idem rex eodem anno, IX kal. Octobris, hoc est, in proximo die post festum sancti Mauritii, congregationem monachorum fieri in eadem urbe ob amorem Dei, et patris suæque animæ, et sanctissimæ confectalis suæ, et Rodolphi Regis (nempe Burgundiæ Transjurane) qui ad eum sanctum transmisit Innocentium, omniumque delictorum suorum remedium, construens monasterium in honore sancti Petri Apostolorum principis, et sancti Mauritii atque Innocentii: tradens ad eundem locum prædia multa in diversis locis, et ipsum locum Romano subiciens mundiburbio, fratribus concedens liberam electionem abbatibus ». Hæc fusius memorantur in ipsius Ottonis litteris apud Meibomium post Witichindi Annales, in Privilegio secundo Magdeburgensis Ecclesiæ, ab eodem imperatore dato « XI kalend. (deest mensis) anno Dominicæ Incarnat. DCDXXXVII, Indict. XI, (ideoque post kalendas Septemb. quo die ea Indictio cœpta), anno vero Ottonis piissimi regis II. Actum in civitate Magdeburg ». In tertio Privilegio ejusdem Ottonis traduntur ab eodem multa prædia *ad nutrimentum monachorum*. In fine legitur: « Dat. IX kalend. Maii, anno Dominicæ Incarnat. DCDXLI, (legendum DCDXL), Indictione XIV, anno Ottonis V. Actum in Magdeburg ». Denique chronographus Magdeburgensis editus idem habet ac Ms., ut videre est tom. II Collect. Meibomii.

7. *Annales Ecclesiastici emendantur.* — Baronius num. 13, qui Chronicon illud Ms. et duo laudata Diplomata non viderat, foundationem hujus monasterii in præsentem annum confert. Præterea ibidem tres Adelbertos distinguit, quorum unus Magdeburgensis archiepiscopus fuerit, alter episcopus Pragensis, tertiusque Rugorum ordinatus episcopus. Verum, ut supra indicavimus, sanctus *Adelbertus* primus Magdeburgensis archiepiscopus, Russiæ prius præsul ordinatus fuerat, ideoque unus Adelbertus in duos non dividendus. Hunc autem

anno DCDLXVIII, non vero currenti, archiepiscopum Magdeburgensem renuntiatum fuisse, eo anno demonstravimus.

8. *Expeditio Tzimiscis imp. adversus Russos.* — Ad num. 45 et seqq. Hyberno squalore in vernam mutato serenitatem, inquit Leo Diaconus in Vita Tzimiscis imp. sumpto statim imperator Crucis vexillo, adversus *Tauroscythas* (ita hic auctor Russos, hodie Moscovitas vocat) iter contendit. Postea devotionibus propitiato numine classem ad Istrum mittit, amnis meatum servaturos, ne qua Scythis (id est, Russis) ad patriam ac Cimmericum Bosphorum enavigandi facultas esset, si quando illos in fugam verti contingeret. Ipse vero Byzantio profectus Adrianopolim cum omni exercitu venit. Ad eam cum pervenisset, didicissetque ab exploratoribus, difficiles, angustasque semitas ac calles (clysuras vocant, quo velut claudantur) a Scythis non custodiri, consultissime se facturum arbitratus est, si statim occasionem arriperet, ac quanta liceret celeritate, angusta viarum transiret, priusquam *Tauroscythæ* ad ardua tuenda loca inualescerent.

9. *Aggreditur regiam Bulgarorum.* — Cum imperator iter aggressus est præeuntem habens Immortalium (quos vocant egregie armis protectam cohortem), pone sequebantur fortissimorum armatorum peditum decem millia supra quingentos, equitum vero tredecim millia: reliquus exercitus cum impedimentis et calonibus obsidionales ac reliquas omnis generis machinas convehens, lento gressu retro sequebantur, cum Basilio præside, cui imperator omnem horum curam commiserat. Ubi præter omnem opinionem lubrica, præruptaque loca transivit, *Præsthlabam* urbem, quæ Mysorum regia est, invasit, crebro tubas jubens bellicum insonare, cymbala ululare ac tympana strepere. *Tauroscythas* vero, ubi militari ordine peritiaque se invadentes Romanos conspexere, anxietas timorque cepit, firma tamen constipata acie, in campo agrique planitie ante oppidum Romanis obviam processerunt, bestiarum more frementes. Romani, conserta cum illis manu, strenue pugnabant belloque digna facinora edebant, ancipiti neutramque in partem nutante victoria. Porro Scythæ, qui fere pedites essent (nec enim equites dimicare solent, quod neque equestri disciplina exerceantur) Romanorum jacula non sustinuerunt, sed in fugam versi intra murorum ambitum sese concluserunt: quos pone insecuti Romani, dire trucidarunt. Aiunt enim eo prælio desiderata supra quingentos octo Scytharum millia. Romanos interim oborta nox ab ulteriore pugna inhibuit.

10. *Eam capit cum rege ejusque filiis.* — Postridie imperator firma acie constipata phalange muros aggreditur, quasi assultu urbis potiturus. « Dies erat, quam magnam quintam feriam vocant, qua Dominus ad Crucem sponte properans, salutaria discipulis documenta dedit ». Russi quoque e propugnaculis ordinati Romanos invadentes arce-

bant, in quos desuper jacula plenisque manibus saxa jaciebant. Tandem scalis ad muros admotis urbs capta, immensa Scytharum strage. Tunc etiam *Borem* Mysorum regem cum uxore et duobus infantibus captum esse dicunt, cum sic genæ rutila lanugine florescerent, oblatumque imperatori esse. Quo ille suscepto, virum coluit, Bulgarorum regem appellans, in eam rem venire dicens, ut Mysos ulcisceretur, qui dira a Scythiis perpessi essent.

11. *Petit a Russorum rege, ut e Bulgaria discedat.* — Tunc et in regiam aulam facta irruptio, in quam *Russorum* fortissimi contrusi erant. Ili fortiter restiterunt, et per portulam desilientes multam stragem Romanorum fecere. Tandem capta a Romanis *Præsthlaba* est intra duos dies. *Joannes* vero imp. exercitu liberalius accepto atque refecto, divinam Salvatoris Resurrectionem celebravit : et ex Tauroscythis nonnullos seponens ad *Sphendosthlabum* direxit, qui ei injungerent, ut aut arma pueret et a Mysorum ditione abscederet : sin id nollet, omnibus viribus invadentes Romanos exciperet. Imperator paucos dies in urbe moratus, præsidioque relicto, quod ipsi tutandæ sufficeret, exque suo nomine *Joannopoli* nuncupata, cum omnibus copiis Dorostolum movet : quam urbem inclytæ memoriæ *Constantinus imp.* a fundamentis erexit, et in eam pulchritudinem ac magnitudinem, qua nunc visitur, provexit, tunc nimirum quando Crucis signo stellis radiantibus in cælo conspecte, Scythas in ipsum irruentes profligavit.

12. *Russi ab imperatore prælio victi.* — In itinere autem cepit imperator *Pliscubam*, *Diniam*, compluraque alia oppida. *Sphendosthlabus* intellecta quam ad *Præsthlabam* sui cladem acceperant, Tauroscytharum omni exercitu collecto ad septuaginta hominum millia in Romanos aciem instruxit. Utroque exercitu in Dorostoli agro (Dextram vocare sueverunt) constituto, castrisque e regione positis, magna conserta pugna, in qua æquo Marte primis congressibus utrinque certatum est, idque ad profundam vesperam, alternante victoria, at cum jam stella Veneris in occasum vergeret, Scythæ non sustinentes Romanorum impetum in fugam declinarunt, intraque muros contrusi sunt, multis suorum eo prælio desideratis. Jam vero die elucescente imperator firmo vallo castra communivit. Scythæ vero e turribus prospectantes, tela saxaque, machinasque petraras in Romanos laxarunt. Tunc vero ipsæ quoque Romanorum incendiariæ triremes, cum navigiis annonariis per Istrum adrepentes apparuere. Hinc Scythæ lembos suos lintresque colligentes pro urbis mœnibus subdu-

xere, qua parte fster præterfluens alterum *Dorostoli* altus alluit. Postridie valida utrinque conserta pugna, in qua *Sphancelus*, cui tertiæ a *Sphendosthlabo* honoris partes Tauroscythæ tribuerant, occisus est, cujus interitu turbati *Tauroscythæ* sensim sese in urbem receperunt. Imperator vero receptui canere jubens, Romanos ad castra revocavit.

13. *Rebellio adversus imperatorem repressa.* — Sic suspensa rerum expectatione, ac cum adhuc subsisteret bellum, *Leo Curopalata* Nicephori imp. frater *Methymna*, quæ Lesbi insula est, cum Nicephoro filio, ubi sub custodia tenebatur, corruptis auro custodibus ad rebellionem animum advertit. Cui enim injunctum erat, ut eum excæcaret, palpebras quidem ejus adduxit, pupillas vero illæsas integrasque reliquit. Tunc ilaque *Curopolata* lintrem conscendens, ad litus ex adverso Byzantii occulte appulit, suumque amicis adventum nuntiavit. Ili vero spem fecere se palatii claves subluros, per quas in ædes regias facile admitterentur. Quod cuncta ex voto illis cedere videbantur, *Curopolatam* Byzantium vocant, qui intempesta nocte in urbem receptus est. Sed cum in ejusdam servorum suorum ædibus esset, quidam sequentium furtim domo excedens, accessit ad imperatorii textrini curatorem, adventum ei *Curopolatæ* nuntians. Is vero ad *Leonem* patricium ac navalem drungarium venit, cui tunc Byzantii cura ab imperatore concredita erat, cunctaque narrat. *Leo patricius*, urbana ac domestica cohorte assumpta, domum, in qua *Curopolata* diverlisset, confertim irrumpit : *Curopolata* per quemdam angulum cum *Nicephoro* filio dilabitur, et ad magnum delubrum confugit ; sed inde avulsum drungarii homines cum in insulam *Calonymum* nomine deportant. Rursumque imperatoris mandato ex Mysia delato amborum effodiuntur oculi, ac substantia publicatur. Interim *Russi* conferta acie Romanorum machinas incendere tentabant : non enim stridentes illarum ictus ejaculationesque ferebant. Ita *Leo Diaconus*, et post eum *Curopolates* ac *Zonaras*. *Durostolon* seu *Durostolus* urbs est Mæsiæ inferioris ad Istrum fluvium, nunc *Durosto* appellata, hancque *Zonaras* *Dristram* vocari testatur. Porro expeditionem istam *Baronius* omisit, et de ea hic sermonem habet, quæ ad annum DCCLXXIII perlinet, ut ibidem videbimus. Quare quæ de illa narrat, ad eum Christi annum revocanda. Quoad *Præsthlabam* et *Pliscobam*, *Cedrenus* in *Basilio Porphyrogenneta* pag. 704 ait hæc oppida trans Hæmum montem posita esse, et *Præsthlabam* in majorem et minorem dividit.

DONI ANNUS 1. — CHRISTI 972.

1. *Joanni papæ mortuo succedit Domus, cui item mortuo Benedictus.* — Sequitur annus Redemptoris nongentesimus septuagesimus secundus, Indict. xv, quo Joannes papa, cum sedisset annos sex et menses undecim et dies quinque, moritur octavo idus Septemb., sepeliturque in Basilica S. Pauli a dextris ingressus Basilicæ, ubi adhuc positum ejusmodi legitur Epitaphium :

Pontificis summi hic clauduntur membra Joannis,
Qui prudens Pastor persolvens debita mortis,
Ista præmonuit moriens sua membra locari,
Quo pietate Dei resolutus nexibus atris,
Egregii Pauli meritis conscendat in æthra,
Inter Apostolicos cælorum gaudia metat,
Gandeat, exsulet sociatus cœtibus almīs.
Dicite, corde pio relegentes caimīna cuncti :
Christe, tui famuli misertus, scelera purga,
Sanguine qui sancto redemisti crimine mundum.

2. « Hic vero summus Pontifex Joannes in Apostolica Sede sedit annos septem. Depositionis ejus dies VIII id. Septembris ab Incarnatione Domini anno nongentesimo septuagesimo secundo ». Hactenus sepulchralis inscriptio, qua admonemur pariter de tempore successoris Pontificis. Fuit iste Domus, sive Domnus, aliter Domnio (apud diversos enim diverse scriptus reperitur), patria Romanus, qui creatus XII kal. Octobris sedit tantum menses tres, obiitque decimo quarto kal. Jannarii. Cætera de ipso remanserunt obscura. Sequenti autem die post Doni obitum in locum ejus subrogatus Benedictus Romanus, filius Hildebrandi, de quo anno sequenti dicturi sumus.

3. *In Synodo Ingelheimensi causa successionis Adelberonis discussa, qui præmoritur S. Udalrico patruo.* — Eodem anno Otto imperator una cum filio item imperatore reversus in Germaniam ad componendas res Ecclesiarum, Synodum per episcopos congregavit in Ingelheim. Quæ autem illic gesta sint, nos præterit præter judicium episcoporum exhibitum in causa S. Udalrici episcopi Augustani, quod exacte describitur ab eo, qui tunc Vitam ejus scribens, rastro ferreo veritatis aurifo-

dinam reliquit apertam, sic enim ¹ narrat : « Postea vero, revertentibus de Italia imperatoribus, patre scilicet et ejus prole, ad Franciam, facta est Synodus in loco, qui dicitur Ingilunheim (Ingelheim), ad quam archiepiscopi cum cæteris suis suffraganeis sanctum Udalricum cum suis legatis honorifice invitaverunt, Adalberonemque ejus nepotem cum eo venire decreverunt. Illuc cum pervenirent, et antistites ibidem congregati Adalberonem baculum episcopalem publice portare cognovissent, irati sunt contra eum et dicebant, ut contra canonicæ rectitudinis regulam in hæresim lapsus fuisset, et quod pontificalis honorem sublimitatis, vivente episcopo, sibi plus justo vindicaret, et ideo ultra eum episcopum ordinari non deceret.

4. « Quibus ille auditis, prima die synodale colloquium intrare devitavit, et in alia domo cum cæteris clericis episcopi remanebat. Antistes autem Udalricus cum paucis suis capellanis Synodum intravit. Cumque inter se pontifices colloquia habere cœpissent, uniuscujusque rationem per latinitatis locutionem voluerunt terminari. Cumque causa S. Udalrici fuisset ventilanda, et ille pro infirmitate, tam sonora voce, ut tota Synodus audire potuisset, rationem proferre non posset, advocabatur unus suus clericus nomine Gerardus, qui extra Synodum cum Adalberone remanebat, ut pro eo desiderii sui rationem per latinitatis locutionem manifestaret. Cumque vix pro densitate multitudinis in præsentia imperatorum et episcoporum præsens stetisset, interrogabatur quid desideraret dominus suus. Quibus interrogationibus multiplicatis, dixit : Non debeo interrogationibus vestris respondere pro domino meo, nisi illo præcipiente. Cui dixit episcopus : Frater, bene tibi notum est desiderium meum : enarra hoc, et obsecra, ut eorum consiliis et permissionibus, Deo juvante, expletum fiat. Tunc præfatus clericus Gerardus in præsentia omnium dixit :

¹ Vit. sancti Udal. c. 23.

5. « Excellentissimi imperatores, et religiosissimi antistites, desiderium domini mei est relinquere sæculum, et secundum regulam S. Benedicti sanctam inire vitam, et in contemplativa vita diem expectare obitus sui. In indumento pro certo habitus exterioris potestis cognoscere voluntatem animi interioris. Istis et aliis rationibus in voluntate domini sui in finem deductis, terratenus cecidit ante pedes imperatorum et antistitum, obsecrans, ut petitionem domini sui secundum Dei voluntatem implere non dedignarentur. Qui simul respondendi inducias usque ad crastinum diem postulaverunt, et postea inter se æstimaverunt, qualiter causa Adalberonis terminaretur. Quidam vero episcoporum adjutores Adalberonis fuerunt, ne prorsus a spe episcopalis ordinationis post vitam avunculi sui excluderetur. Hæc cum inter se prolixè sermocinarentur, ultima in unum ratione coadunati, omnes simul firmaverunt: nisi Adalbero se sacramento excusaret, quod non sciret hæresim manere, quia episcopalem potentiam cum baculo arripuit, nullo modo ulterius legaliter episcopus fieri potuisset.

6. « Altera vero die, cum episcopo etiam Adalbero synodali interfuit colloquio. Et cum ei prædictum crimen imputaretur, multis objectionibus diversorum colloquiorum, cum suis adjutoribus a prædicto crimine se defendere statuit. Hoc cum ei adunatio omnium episcoporum non consentiret, secundum prædictam destinationem episcoporum sacramentum perfecit per nomen Patris, et Filii, et spiritus sancti super quatuor Evangelia. Tunc iterum episcopus Udalricus petitionis suæ responsa, quæ pridie procrastinata fuerant, per prædictum suum clericum expetivit, quia desideravit, ut prædictus suus nepos episcopus ordinaretur, et ille secundum regulam sancti Benedicti in monasterio cum eorum consensu deservire mereretur. Episcopi autem quamvis eis ex toto non placeret, aperte ei in Synodo contradicere noluere petitionem suam. Sed sapientissimi ex ipsis cum consilio aliorum extra Synodum eum ambulare cum illis postulaverunt, ibique cum eo et cum suis clericis sapientissimis secretam locutionem habuere, dicentes: Reverende pater, cui nota est omnium Ecclesiasticorum librorum norma, qui semper callem rectitudinis ambulasti, non deviando, non decet ut nunc istam viam, quam semper tenuisti, omitteas: seminarium ex te sumat talis error, ut alius in loco tuo, te vivente, ordinetur: quia si ex te talis consuetudo incipit perpetrari, in posterum multis reverendis et bonis episcopis ab eorum nepotibus et clericis talia desiderantibus, multa concrescunt adversa. Melius tibi est, ut in eo ministerio, in quo cœpisti Deo servire, permanearis, quam tuam voluntatem sequens, aliis plurimis scandalum facias: quia ex te canonici et monachi et sanctimoniales, et cæteri Christiani ad rectitudinis statum debent constringi, qui ex semetipsis per climata cadere festinant: qui autem incaute ambulando

ceciderunt, ex te, Deo adjuvante, erigi posse sperandi sunt. De nepote autem tuo Adalberone, tuæ voluntati satisfaciendo, in commune firmamus, ut nullus alius a nobis post tuum discessum ad illum locum, in quo tu pastor existis, eo vivente, ordinetur, nisi ipse.

7. Illis consiliis consentiens sanctus episcopus Udalricus, cum eis in Synodum regrediebatur, et tunc cum consensu aliorum antistitum fecit ab imperatore Adalberoni commendari in eorum præsentia procuracionem sui habere, et sub ipso totius episcopatus causam dispositionem in omnibus adimplere. Taliter vero istis terminatis, finita Synodo, episcopus et Adalbero cum suis ad Augustam revertebantur. Judicavit ista Synodus, sed præjudicavit Deus, ne Adalbero succederet ipsi Udalrico in episcopatu, quem tanta animi anxietate petebat; effecitque, ut antea nepos quam patruus moreretur, nec moratus sententiam justus iudex et terribilis in consiliis super filios hominum: siquidem antequam volveretur anni illius curriculum, Deo vocante, repentino exitu efflavit animam. Rem gestam idem auctor sic refert¹:

8. « Prædicta vero Synodus in autumnali tempore peracta est, et in antea, Paschali tempore adveniente, et sancta hebdomada finita, episcopus et Adalbero, amabiliter vocante Rinuvino comite Dietpoldi fratris episcopi filio, ad castellum Dilinga nominatum venerunt, ut ibi aliquantos dies charitative cum eo et cum femina ejus Hillegart nominata manerent. Paucis itaque diebus transactis, Adalbero ibi cum phlebotomo sibi phlebotomando sanguinem minui fecit, et postea cum episcopo ad cœnam consedit, et de cœna surgens in lectum se ad requiescendum deposuit, cumque unusquisque ad suas divertisset mansiones, eadem nocte subita morte Adalbero defunctus est. Hereuvinus ejus presbyter cum ad nuntiandum hoc episcopo, cubiculum ejus intraret, episcopus sermonem ejus præveniens dixit illi: Ecce Adalbero defunctus est. Cui ille respondit: Ideo ego huc intravi, ut tibi hoc nuntiarem. Nullus alius me præibat ad te, et quomodo hoc scire potuisti? Cui ille respondit: Vade et suscita Rinuvinum et omnes qui nobiscum sunt, ut cito præparent vehiculum, ut corpus ejus ad Augustam ducamus civitatem, etc. » Illic finis Adalberonis. Porro ipse sanctus Udalricus anno sequenti quarto nonas Julii, ætatis suæ octoginta trium annorum moritur, jam vivens et post mortem clarens miraculis.

9. Quomodo autem Joannes papa XV retulit eum in sanctorum numerum, publicoque Diplomate decretum Pontificium bene testatum posteris tradidit, suo loco dicturi sumus. Res ab eo gestas scripsit primum ejus discipulus, cujus nomen nescitur, post eum, sed ex eo iidem scripsit Gebehardus episcopus Augustanus, demum Berno Augien-

¹ Vit. S. Udalrici c. 24.

sis abbas, nos autem e fonte primario deduximus aquas. Habes omnia ad eundem sanctum spectantia in unum redacta volumen, lucubratum et no-

tulis illustratum a diserto viro Marco Velsero nobili Augustano, de quo superius mentio facta est. At de rebus anni hujus hæc satis.

Anno periodi Græco-Romanæ 6465. — Anno Æræ Hispan. 1010. — Anno Hegiræ 362, inchoato die 12 Octob., Fer. 7. — Jesu Christi 972.

— Benedicti VI papæ 1. — Ottonis imp. 11. Joannis Tzimiscæ imp. 4.

1. *Benedictus VI succedit Joanni XIII.* — Ad num. 4 et seq. In fine Epitaphii Joanni XIII papæ positi, et a Baronio recitati legitur: « Sedit annos septem: depositionis ejus dies VIII idus Septembris, ab Incarnatione Domini anno DCDLXXII ». Quare cum die prima mensis Octobris anni DCDLXV Sedem Romanam adeptus sit, sedit annos sex, menses undecim, dies quinque, ut passim in Catalogis habetur. Platina ait, Sedem vacasse *dies xiii*, sed ex mera conjectura, quæ sustineri non potest; alioquin ejus successor in die Dominica consecratus non fuisset. Præterea Pontificatum diutius cessasse, ostendit Privilegium Benedicti VI Eldrado abbati Vizeliacensi concessum, et tom. III Spicilegii Dacheriani pag. 465 relatum, scriptum « per manum Stephani Nolani episc. et scriniarii S. R. E. in mense Novembri, Indict. II, datum IV kalend. Decemb. per manum Joannis episcopi (adde Bibliothecarii) sanctæ Sedis Apostolicæ, anno I Pontificatus domni Benedicti sanctissimi VI papæ, imperante domno Ottone a Deo coronato M. imperatore, anno VI, Indict. II », anno sc. Christi sequenti. Quod si die xxviii mensis Novemb. anni DCDLXXIII primum Pontificatus annum adhuc numerabat, hoc anno post eum diem consecratus fuerat Pontifex Rom. ideoque mensibus amplius duobus Sedes vacavit. Ex quo etiam refellitur Papebrocius, qui Benedicti VI consecrationem cum die xxii mensis Septembris connectit. Baronius et ante eum Onuphrius in Chronico Ecclesiastico, ordinem Pontificum corrumpit. Post Joannem enim XIII collocat *Donum, Benedictum VI, et Bonifacium VII* antipapam, contra auctoritatem Sigeberti in Chronico, et antiquiorum Catalogorum, qui post Joannem XIII exhibent Benedictum VI. Hermannus quidem Contractus, et quidam alii *Donum* prætermittunt, sed nullo fundamento. Quare ad restituendam Chronotaxim Pontificiam locandus *Benedictus VI* post Joannem XIII, et post Interpontificium mensium circiter trium a veteribus non memoratorum.

2. *Synodus Ingelheimensis.* — A num. 3 ad 9.

Chronographus Hildensheimensis ad hunc Christi annum scribit: « Otto junior cum seniore venit de Italia », Lambertus Schafnaburgensis addit, *in Franciam*, id est, in Franciam Orientalem. Hermannus vero Contractus juxta editionem Canisianam: « Synodus apud Ingelheim ab episcopis collecta est, ibique B. episcopus Udalricus et Adalbero sororis ejus filius, transgressionis canonum accusati, causa sua dicta et excusata, absoluti revertuntur ». Erat Adalbero filius Liutgardæ sororis sancti Udalrici episcopi Augustensis in Vindelicia, cui Otto Magnus episcopalis honorem cathedræ post vitam Udalrici donare promisit, sed cum uterque imperator, pater scilicet et filius in Franciam reversi essent, celebrata est Synodus Ingelheimensis, ubi cum antistitem vidissent *Adalberonem* baculum episcopalem publice portare, irati sunt contra eum, uti refert Baronius ex Vita sancti Udalrici a Gerardo presbytero ejus familiari scripta, et Sæc. V Benedicti. recitata. Porro cum in ea Synodus dicatur *in autumnali tempore peracta*, et præterea, *revertentibus de Italia imperatoribus in Franciam*, apparet eos Romæ non fuisse, quando Benedictus VI electus est, et coram legatis ab iisdem missis ordinatus, ideoque interpontificium longius fuisse, quam diurnum xiii, cum monendi fuerint de morte Joannis XIII, et Romæ legati eorum expectandi.

3. *Obitus S. Udalrici episc. Augustensis.* — Ad num. 9. Baronius post Synodum Ingelheimensem mortem S. Udalrici, quam anno sequenti contigisse insinuat, uno tenore recitat. Gerardus citatus n. 73 eam his verbis narrat: « Clericis letaniam devote canentibus animam Deo commendans anno Incarnat. Domini nostri Jesu Christi DCDLXXIII, ætatis LXXXIII, ordinationis autem L, quarto die Julii IV non. ejusdem mensis, die Veneris, felici obitu quasi somno suavi soporatus, ergastulo corporis exemptus, migravit ad requiem ». Anno autem sequenti dies quartus Julii in feriam sextam incidit. Mabillonius ad illum locum scribit, in Necrologio S. Galli VI non. Junii notari obitum S. Udalrici epi-

scopi Augustani, sicuti et in variis Kalendaris atque Necrologiis, ac in lib. 3 Dilmari. Verum is dies anno sequenti non concurrit cum feria sexta, et certum est sanctos aliis sæpe diebus, quam quibus mortui sunt, Necrologiis et Martyrologiis inscriptos fuisse. De ejus canonizatione suo loco agemus.

4. *Saraceni e Frazinetu ejecti.* — Hoc anno vel sequentis initio Saraceni, qui *Frazinetum* inhabitabant, et Italiæ partem ac Provinciam jam ab anno circiter MCCXC laniabant, « circumacti ab exercitu Willelmi Arelatensis ducis, omnes in brevi perierunt, ut ne unus quidem rediret in patriam. Ipso igitur in tempore mortuus est prædictus Otto imp. », inquit Glaber Rodolphus monachus Cluniacensis lib. 1, pag. 6. Quare cum Otto Magnus initio mensis Maii insequentis anni e vivis excesserit, *Frazinetum* hoc tempore a Willelmo comite Provinciæ beneficiario Conradi Burgundiæ Transjurane ac regni Arelatensis regis, expugnatum. Hujus Christianorum victoriæ mentio est in Vita S. Maioli abbatis quarti Cluniacensis, a sancto Odilone ejus in eandem abbatiam successore edita : « Inter cætera mala », inquit Odilo, « quæ populus nefandissimus gessit, beatissimum patrem Maiolum, a liminibus Apostolorum redeuntem, fraude et insidiis cepit, rebus omnibus exspoliatum alligavit, fame et siti afflixit. Ille vero divinitus absolutus, ac postremum monasterii sui pecuniis redemptus, de manibus illorum domino protegente evasit illæsus; et ejus injusta captio expulsionis illorum et perpetuæ perdicionis fuit occasio. Sicut vero post Passionem Christi Judæi sunt a suis exulati, ita post captionem servi illius et fidelissimi ejus famuli Maioli, Saraceni a finibus Christianorum sunt expulsi, et sicut per Titum et Vespasianum Romanorum principes Dominus de Judæis vindictam exercuit, ita per Willelmum illustrissimum virum et Christianissimum principem, meritis B. Maioli, jugum Saracenorum ab humeris Christianorum deposuit, et multa terrarum spatia ab eis injuste possessa, ab eorum tyrannica dominatione potenti virtute eripuit ».

5. *Magna strages eorum facta.* — In alia Vita a Syro monacho auctore coætaneo scripta num. 6, Saracenorum clades ita narratur : « A Christianis itinere eorum explorato, iter securi per Alpes dum more tenerent solito, super se cum impetu venientium auribus a longe exceperunt sonitum, a clamoribus venientium et clangore tubarum consonat omne nemus, strepitu collesque resultant. Exemplo Barbaris gelidus per dura cucurrit ossa tremor, qui divina percussi formidine, nullum senserunt auxilium præter fugæ præsidium. Certamen tunc magnum erat Christianis cum Barbaris fugientibus, et ideo resistendi mente divinitus absente secedentibus, post principia certabant nuda prætereunda terga. Fugam tamen dum facerent, multi capti, per plures vero sunt neci mandati. Illi vero qui effugerunt ad tempus dilatam mortem, cujusdam promontorii supercilium tutaminis sibi

elegerunt præsidium, sed decentius occumberent, si hostium inter tela ruerent. Illud itaque promontorium ita vastis rupibus circummeis videtur subductum, ut præter unam partem lateris devexi, undique facultatem deneget commendi. Hanc denique partem Christianis obsidentibus, cum nullus adesset eis fugiendi aditus, nulloque nostrates munere a sui obsidione quivissent avertere, humilem locum explorant, quo ad ima se saltibus depellant ».

6. *S. Bobo adversus eos pugnavit.* — Subdit Syrus monachus, adveniente nocte *Saracenos* ab eminenti rupis vertice in imum profundum sese præcipitasse, dieque lucescente, Christianos, quosdam eorum qui demersioni se subtraxerunt, in remotiori quodam montis latere offendentes, comprehendisse. « Qui salutari se ablui deposcentes lavacro (hos enim vir Dei de Christo verbis edocuit salutaribus), corpori matris uniti Ecclesiæ, quanta inter Barbaros gratia servum suum omnipotens illustravit, soliti erant referre ». In Vita sancti Bobonis seu Bobi aut Bovi, qui *Viqueria*, quod oppidum est Dertonam inter et Papiam situm, vulgo *Voghera*, die secunda Maii colitur, dicitur hunc sanctum in Provincia nobilibus parentibus natum, virtutem cum armis conjunxisse, et monitum fuisse ab eo, qui *insulæ* introitum custodiebat, irato quod ejus uxorem rex adamaret, ut multos congregaret, quibus ipse *Frazinetum* tradere posset. Quare *Bobo* cum non modica multitudine equitum et peditum ad introitum *insulæ* venit, in *Saracenos* irruit, et regem, qui cum Christianis vivere quam cum Paganis mori maluit, baptizavit cum non paucis Saracenis. Verum ea Vita ex Mombritio, aliisque in Actis SS. Bollandianis recitata serius litteris mandata fuit, indeque quæ in ea leguntur, quæque a nullo alio auctore traduntur, non sunt fidei indubiæ. Videtur anonymus loco *Promontorii* scripsisse *insulam* et in aliquo antiquo monumento reperisse *S. Bobonem* huic expeditioni interfuisse, ac cætera incertis rumoribus accepisse. *Willelmum* enim Provinciæ comitem hujus expeditionis ducem fuisse, præter ea quæ in medium adduximus, alia monumenta demonstrant.

7. *S. Wolfgangus fit episcopus Ratisponæ.* — « Ratisbonæ S. Wolfgangus episcopus factus est », inquit Hermannus Contractus juxta editionem Canisii ad annum MCDLXXII. Hujus sancti præsulis vitam a scriptore anonymo ejus familiari elucubratam exhibet Mabillonius Sæc. v Benedict. et in Observat. præviis, num. 4, ejus episcopatus initium in annum sequentem differt, fretus Brevibus Annalibus Einsidlensibus, a se tom. IV Analect. publicatis, in quibus legitur : « Anno MCDLXXII, Wolfgangus monachus ad Hungaros missus est, qui secundo anno Radasponensis episcopus ordinatus est ». Verum ex dicendis in morte sancti hujus antistitis liquebit, hunc annalistam, qui opusculum suum usque ad annum MXXV perduxit, hac in

re hallucinatum esse. *Wolfangus* Suevus fuit, qui a parentibus cœnobio Augiensi traditus doctissimus evasit, habitumque monasticum induit; sed majora charismata æmulans, « per Atemanniam devenit exul in Noricum, ad cujus orientalem plagam cum humili comitatu pergens, prædicandi gratia Pannoniæ petit confinia. Ubi cum veterum frutices errorum exstirparet, et steriles squalentium cordium agros Evangelico ligone proscindere, semenque fidei inseminare frustra laboraret, a Pilgrino Pataviense pontifice ab incepto revocatus est opere; dolebat enim idem pontifex tantum colonum in sulcis sterilibus expendere laborem. Cumque ab eo revocaretur, omnique humanitatis studio susciperetur, apud illum rogatus commorabatur aliquot dies », inquit idem anonymus cap. 13, qui cap. insequenti de ejus ad Ratisponensis Ecclesiæ præsulatum evectione verba facit. Litteras et Christianos mores variis in locis restituit, nempe apud Trevirenses et in Ecclesia sua Ratisponensi,

ubi canonicos ad communem vivendi normam, monachos et sanctimoniales ad severius institutum revocavit.

8. *Obitus S. Elgivæ reginæ Angliæ.* — *S. Ælgyfa*, sive *Elgiva*, quæ anno superiori subscripsit Privilegio ab *Edgaro* Anglorum rege filio suo monachis Glastoniensibus concesso, ut ibidem diximus, non diu superstes fuit, annus tamen mortis ejus incertus. Suscepit ex *Edmundo* Angliæ rege *Edvium* et *Edgarum*, qui uterque in Anglia regnavit. « *Edwinus* », inquit Osbertus in *Vita S. Dunstani*, « matrem totius regni Anglici auctricem et nobilitatricem, Ecclesiarum consolatricem, et sustentatricem oppressorum et inopum : *Edgivam* dico reginam, in immensum afflixit », quod nempe, ut suo loco diximus, moribus depravatis imbutus esset. Inscripta est aliquibus Martyrologiis, ut videre est in *Actis SS. Bollandianis* ad diem xviii mensis Maii. Plurimum illam laudat *Malmesburiensis* lib. 2 de Pontif. pag. 251.

BENEDICTI VII ANNUS 1. — CHRISTI 973.

1. *Moriuntur Willelmus archiepiscopus Moguntinus et S. Mathildis, ille filius, hæc mater Ottonis.* — Christi annus nongentesimus septuagesimus tertius Indictione prima incipit, quo Otto magnus imperator moritur in Saxonia, loco, qui dicitur *Mimelieba*. Quæ autem præcesserunt Ottonis obitum funera filii atque matris, ex *Witichindo* sunt petenda, qui ait¹ : « Eodem tempore quo hæc in Italia geruntur, summus pontifex Willelmus archiepiscopus Moguntinus Ottonis filius ex priori conjuge, vir sapiens et prudens, pius et cunctis affabilis, a patre sibi commendatum regebat Francorum imperium, cujus mater licet peregrina, nimirum Anglicana, Edmundi regis Anglorum filia, nomine *Edgitha*, nobili tamen genere erat procreata. Hic cum audisset ægrotare matrem imperatoris, miræ sanctitalis feminam, nomine *Mathildem*, dumque ejus expectat funus, proprio funere ipsius funus præcedit. De cujus laude, nempe *Mathildis*, si aliquid dicere cupimus, deticimus : quia omne argumentum ingenioli nostri

superat virtus tantæ feminæ. Quis enim digne posset explicare ejus vigilantiam erga cultum divinum? omni nocte, omnibus modis et omni genere cellulam suam divinorum carminum melodia implebat. Erat enim ei cellula Ecclesiæ proxima, in qua modice requiescebat. De qua omnibus noctibus consurgens intrat Ecclesiam, nihilominus cantoribus et cantatricibus intra cellulam, et proforibus, et in via triformiter constitutis, qui divinam clementiam laudarent et benedicerent. Ipsa intra Ecclesiam in vigiliis et orationibus perseverans, Missarum solemniam exspectabat : deinde infirmos ubique adjuvit, in vicino visitavit, necessaria præbuit, deinde pauperibus manum porrexit. Hospites, qui semper aderant, cum omni targitate suscepit : neminem sine affatu blando dimisit, nullum sine munusculis fere, vel necessariis adjumentis vacuum reliquit. Sæpe viatoribus, quos longius de cella prospexit, necessaria transmisit.

2. « Talia opera licet valde humiliter diebus ac noctibus exerceret; nihil tamen de honore regio minuebat; et sicut scriptum est, quamvis sederet tanquam regina, circumstante populo, semper et

¹ *Witich.* l. iii. in fin.

ubique tamen erat mœrentium consolatrix. Domesticos omnes famulos et ancillas variis artibus, litteris quoque instituit. Igitor plena dierum, plena omni honore, plena operibus bonis et elemosynis, cunctis divitiis regalibus distributis servis Dei et ancillis ac pauperibus, pridie idus Martias animam Christo reddidit ». Porro relata reperitur in numerum sanctorum dicta die natalis sui, hoc elogio : « Halberstadti in Germania, dormitio beatæ Mathildis reginæ, matris Ottonis Primi imperat. humilitate et patientia celebris ». Subjicit his Witichindus de obitu Bernardi episcopi Halberstatensis vita sancta conspicui.

3. *Ottonis obitus et de eo iudicium.* — De obitu autem Ottonis ista Witichindus : « Tertia feria ante Pentecosten, loco devenit qui dicitur Milevu; proxima nocte juxta morem diluculo de lecto consurgens, nocturnis et matutinis laudibus intererat, post hæc paululum requievit. Missarum deinde officiis celebratis, pauperibus juxta morem manum porrexit, paululum gustavit, iterumque in lecto requievit. Cum autem hora esset, processit lætus, et hilaris ad mensam resedit : peracto ministerio, vespertinis laudibus interfuit, peracto cantico Evangelii, æstuari et fatigari jam cepit. Quod cum intellexissent principes circumstantes, sedili eum imposuerunt. Inclinantem autem caput quasi jam defecisset, refocillaverunt. Expetitoque sacramento divini corporis et sanguinis et accepto, sine gemitu cum magna tranquillitate ultimum spiritum cum divinis officiis pietatis Creatori omnium tradidit ». Et inferius : « Itaque defunctus est nonis Maii, quarta feria ante Pentecosten, imper. Romanorum, rex gentium, divinarum, humanarumque rerum multa religiosa sæculis relinquens monumenta ». Hactenus de eo Witichindus, eadem Ditmarus de die obitus, itemque Eucharistiam sumpsisse tradit. De eodem quoque illud laude dignum affert, ipsum nimirum in prosperis illud Davidicum occinere consuevisse : « Non nobis, Domine, non nobis, sed nomini tuo da gloriam ». Addit ad laudem, quod nullus post Carolum Magnum sit inventus dignus imperator, nisi ipse Otto Magnus. Porro relictam ejus conjugem Adelaidem Augustam summis pietatis officiis jngiter esse prosecutam Ottonis animam, idem affirmat.

4. At quæ de obitu Ottonis Petrus Damianus ad Desiderium abbatem scribit, verane sint, magno sunt examine disquirenda, sed primum quæ dicat audiamus; ait enim : « Otto rex Teutonorum, qui postmodum imperator creatus est Romanorum, Adelaidem Italiæ reginam, quæ sibi commater extiterat, suscepit in conjugem, quem filius ejus ahnificus Willelmus, qui Moguntinæ præsidebat pastor Ecclesiæ, cœpit constanter arguere, et scelestum luridumque confugium publice condemnare. Pater autem vehementer iratus, eum comprehendi præcepit, et carcerali mox custodia mancipavit, quem per annale circiter spatium carcer inclusit, sed a correctione linguam

terroris vinculum non ligavit. Cum vero pater eum Quadragesimali decurrente jejunio, de custodia decrevisset educere; antequam Psalterium exple-ret, quod aureis extabat apicibus, recusavit exire. Veruntamen cum exivit, zelo sacerdotalis accensus auctoritatis non quievit, sed mox in patrem publicæ excommunicationis jaculam intorsit. O vere dignum regio genere sacerdotem, qui in causa Dei non imperiale fastigium, ob paternum recognovit affectum, sed dum paternam ac regiam auctoritatem in solo Deo constituit, hunc hominem ejus legibus resistentem a se prorsus extraneum deputavit ! Dixit autem patri : Tu arbitraris me adversum te insolenter agere, te vero præjudiciu sustinere scito prænoscas, quia die sancto Pentecostes uterque simul adstabimus ante Deum, ibique ventilabitur inter nos librata justitiæ lance litigium, ibique luce clarius apparebit, quis nostrum æquitatis lineam teneat, quis Dei legibus contradicat. Factumque est, ipso qui dictus est sacrosanctæ solemnitatis die, dum præfatus Augustus imperialibus infulis redimitus, multorumque Pontificum choris sive procerum vallatus agminibus, missarum solemnibus interesset, ut repentino super eum veniente iudicio, repertus est mortuus. Episcopus autem in Domino jam quieverat. Sic qui de incesto conjugio contempsit judicari inter homines, ad tribunal æterni judicis coactus est pertrahi; et qui subjectum sibi dedignatus est audire pontificem, terribilem super se non potuit evadere majestatem ». Hæc de his ipse.

5. Visa quidem non sunt hujusmodi, licet a viro integerrimo scripta sint, quæ revocari non possint in dubium, cum nec ipsemet ut indubitata prodat, sed hærens ista mox subjiciat : « Hæc ego, venerabilis pater, et alia quamplurima non sine magnæ formidinis angore conscribo, ne videlicet vel relatores mei meram veritatis semitam non tenuerint, vel ipse quoque relationum in quolibet immemor, oblivione deliquerim. Verum tamen teste conscientia, non hæc mentiendi voto, sed ædificationis affectu, prout melius possum narrata recolor, satago schedulis annotare. Si quid tamen in his oblivionis obrepsit, imo quidquid humanæ conditionis infirmitate deliqui, antequam nexibus hujus carnis absolvar, divina mihi pietas tuis orationibus in memoriam revocet ac digne lugere permittat, ne viventi mihi poenitendum aliquod manere possit occultum, quod morientis sit oculis ingerendum ». Hæc ipse, veritus ne in aliquo mentitus sit, cum tamen mentiendi voluntas semper procul abfuerit.

6. Saue quidem, quod ad enarratam historiam spectat, illud omnino procul abhorret a veritate, ut Otto ipso die Pentecostes et in Ecclesia diem obierit; reliqua vero verisimilitudine carent multiplici ratione : nemo, quod sciam, prodit Adelaidem fuisse commatrem Ottonis imperatoris; sed etsi fuisset, debuissent ista ipso initio objci, cum eam Otto duxit uxorem, et non post annos viginti

duos, cum jam quatuor suscepisset ex ea filios, et cum eadem consenuisset. Accedit insuper, quod ipse Willelmus archiepiscopus Moguntinus natum ex Adelaide Ottonem filium Ottonis imp. educavit, fovit, et ad imperium custodivit, tantum abest ut ex incestuoso ortum conjugio ipsum putarit. Deum vero, si tanta ista de excommunicato a filio suo Willelmo Ottone imperatore vera fuissent, ut omnibus nota, haud licuisset tegi silentio, quin ab aliquo ejus temporis auctore scriptis prodita essent, et in excusationem Ottonis aliqua allata fuissent. Sed hæc de his satis.

7. *Otto junior solus imperator.* — Defuncto Ottone, ejus filius Otto junior solus incæpit imperare, qui jam cum patre inchoaverat annum sextum: nam ipse in diplomatibus hunc annum

numerat sui imperii (ut apparebit inferius) sextum eundemque ab obitu patris primum.

8. *Synodus Mutinensis.* — Hoc anno mense Septembris, ab Honesto archiep. Ravennate habita Synodus apud Mutinam reperitur, in qua composita legitur controversia inter dissidentes inter se germanos proceres Petrum atque Lambertum: cujus apud Rubeum¹ Acta leges in historia Ravennate, ex quibus disces ad lucem temporum nomina saltem subscribentium episcoporum et principum, et inter alios Leonem episcopum Ferrariensem, et ejusdem civitatis Marinum comitem, ex quibus certis monumentis errores corrigas recentiorum historicorum.

¹ Rub. hist. Raven. l. v. hoc anno.

ANNO PERIODI GRÆCO-ROMANÆ 6466. — ANNO ÆRÆ HISPAN. 1011. — ANNO HEGIRÆ 353, inchoato die 2 Octob., Fer. 4. — JESU CHRISTI 954.
— BENEDICTI VI PAPÆ 2. — OTTONIS IMP. 4 ET 7. JOANNIS TZIMISCA IMP. 5.

1. *Moritur Guillelmus archiep. Moguntinus.* — Ad num. 1 et 2. *Willelmum* archiepiscopum Moguntinum anno nongentesimo sexagesimo octavo e vivis abiisse, non tantum chronographus Hildesheimensis et Lambertus Schafnaburgensis testantur, sed etiam sequitur ex morte S. Mathildis quæ paucos post dies accidit, ut mox ostendamus. « Wilhelmus sanctus præsul Moguntiae, cui cura ab imperatore domino suimet et parente commissa fuit, Parthenopolim (hoc nomine Magdeburgum appellabatur) disponendi, cæteraque regni necessaria regendi, cum ægrotantis reginae finem Mechthildis (post dies XII a morte Wilhelmi vita functæ) expectaret in Reducnærothe, VI non. Martii moritur », inquit Ditmarus lib. 2. Quantus vir fuerit *Willelmus*, insinuat Rotgerus monachus in Vita S. Brunonis archiep. Coloniensis: « archiepiscopum Trevirensis Henricum, magni meriti et summæ probitatis virum; Willelmum quoque præclaræ et gravissimæ excellentiæ archimandritam, nepotem suum, Friderici Moguntini antistitis successorem, ambos egregios, ambos in lege Domini perfecte instructos, imperatori alterum consanguinitate, alterum probitate, utrumque familiaritate conjunctissimos, ipse quoque S. Bruno imprimis summa veneratione colebat. Hos igitur tales, tam illustres, tam certe sapientes et religiosos et in omnibus bonis artibus eruditos viros ad consilium ne forte ipse per se, ut sunt humana, a tramite

veritatis uspiam exorbitaret, frequenter adhibuit: hos cum ipso simul non solum in lectione, consilio et disputatione, sed etiam in acie vidimus, providentes bona non tantum coram Deo, sed etiam coram hominibus ». Plurimis etiam laudibus Willelmum exornat Witichindus lib. 3, cujus verba recitat Baronius num. 4. Sed typographi errore hujus historici verba, quæ a Baronii verbis parenthesi separanda erant, commiscuntur. Ad hæc enim Witichindi verba, « ejus mater licet peregrina », ait Baronius, « nimirum Anglicana Edmundi regis Anglorum filia nomine Edgitha, nobili tamen genere erat procreata ». Cum tamen Witichindus tantum habeat, « ejus mater licet peregrina, nobili tamen genere erat procreata ». Neque enim Willelmus Edgithæ prioris uxoris Ottonis M. filius fuit, ut putarunt Baronius, Alfordus an. dcccxi num. 3, Serarius in Hist. Moguntiae, aliique, sed filius fuit naturalis Ottonis, ut observat Henricus Meibomius in Notis ad illum locum, ex Ditmaro lib. 2 scribente: « Wilhelmus de matre quamvis captiva, nobili et Slavonica genitus ».

2. *Moritur S. Mathildis regina.* — In Vita S. Mathildis, Henrici Aucupis regis Germaniæ uxoris, et Ottonis M. matris, jussu S. Henrici imp. scripta, et ad diem 14 mensis Martii in Actis SS. Bollandianis publicata, cap. 6 legitur, Willelmum archiepiscopum Moguntinum Mathildem ægrotantem visitasse: « Venit Willelmus », inquit anony-

mus, « Moguntinæ sedis archiepiscopus, et quamvis Deo jubente, prior mortem esset subiturus, tamen aggreditur sanctam Dei, verba consolationis ministraturus; obiturus visitavit obituram, et suæ mortis nescius, consolabatur modicum post se licturam ». Subdil hic auctor eam Willelmo peccata sua confessam esse, ab eo perunctam sacro oleo, et recreatam sacrosancto Corporis et Sanguinis Christi mysterio, ac paulo post dixisse: Ubi sunt pallia quæ nostræ sepulturæ iussimus abscondenda, illa nobis præsententur, ut nostro nepoti in pignus amoris donentur: nam ipse prior nobis his indiget, ut putamus, quia iter difficillimum est incepturus ». Tum narrata Willelmi morte de Mathilde subiungit: « Post hæc duodecim dies mortalis vitæ spiritum duxit ». Ac denique scribit, famulam Christi *sancto Sabbato* a sæculo recessisse, et cum pace obdormivisse in Domino *II idus Martii*, die scilicet xiv ejusdem mensis, qui anno *DCDLXVIII* in Sabbatum incidit. Mathildis et Henricus Auceps ejus conjux, majorum suorum pietatem in construendis variis monasteriis continuarunt, de quibus legendus Mabillonius Sæc. v Benedict. in Elogio S. Mathildis reginæ, qui et ex chronographo Magdeburgensi Ms. mortem ejus etiam conjungit cum anno *DCDLXVIII*, quod extra controversiam esse debet.

3. *Moritur Otto M.* — Ad num. 3. Ottonem *M. nonis Maii, quarta feria ante Pentecostem* vitam cum morte commutasse docent, non tantum Witichindus et Ditmarus a Baronio citati, sed etiam chronographus Hildesheimensis, Lambertus Schafnaburgensis, alique. Fuit *Otto* post Carolum Magnum imperatorum Occidentalium maximus, atque ut ejus scepro, ita cognomine dignissimus, Hungarorum ac Sclavorum terror, et magnus fidei Christianæ defensor ac propagator. « Nati sunt regi (nempe Ottoni imper.) filii ex serenissima regina (sc. Adelhaida) primogenitus Henriens, secundus Bruno (in pueritia demortui) tertius Otto (imperator hujus nominis II,) paterni nominis majestate designatus, quem jam post patrem dominum ac imperatorem universus sperat orbis. Filiam quoque sanctæ matris ejus (Mathildis nempe) vocabulo insignitam », inquit Witichindus initio libri 3. Mathildis seu Mathilda abbatissa Quidilimburgensis fuit, ut anno *DCDXXVII* ostendimus.

4. *Ob incestum excommunicatus falso asseritur.* — Ad num. 4 et seq. Quod scripsit Petrus Damianus ad Desiderium abbatem, *Willelmum* sc. episcopum Moguntinum Ottonem patrem excommunicasse, quod *Adelhaidem*, quæ sibi commater extiterat, conjugem accepisset, nullo prorsus argumento ratione nititur, ut recte ostendit Baronius; et quæ hoc ac superioribus annis de eodem Willelmo in medium adduximus illud plane convellunt. Decepere itaque virum sanctissimum rumores a viris otiosis aut malignis ejus tempore dissipati.

5. *Anni imp. Ottonis II ab anno DCDLXVII*

deducti. — Ad num. 7. *Ottonis Secundi* Ottonis M. filii ac successoris duæ sunt epochæ, altera a die Natali Christi anni *DCDLXVII*, quo in consortium imperii adscitus est, altera a die septima Maii præsentis anni, quo patri successit, deducta. Juxta priorem, annus septimus imperii ejus die Natali Christi currentis anni inchoatus, ut ex ejus Diplomatis eruitur. Sed Baronius, qui Ottonem II anno *DCDLXVIII* coronatum putabat, annum vi imperii post patris mortem eum inchoasse credidit, quod ex dictis stare non potest.

6. *Moritur S. Joannes Gorziensis abbas.* — *Sanctus Joannes* abbas *Gorziensis* monasterii, in territorio Metensi a Chrodegango piissimo illius urbis antistite fundati, usque ad præsentem Christi annum vitam propagavit. Ejus Vita a Labbeo tom. i Biblioth. primum publicata, et postea in Acta SS. Bollandiana ad diem xxvii Febr. ac in Sæculum v Benedict. inserta, et Notis illustrata. Ea jussu *Deoderici* eo nomine primi episcopi Metensis scripta: ideoque ante annum *DCDLXXXIV*, quo is vivere desiit. Ejus auctor fuit *Joannes* abbas Metensis, sancti Joannis discipulus, qui eam imperfectam reliquit. Cum tamen S. abbas ad annum *DCDLXXXIII* vitam et regimen produxerit, ut ex ejus Vita uum. 3 perspicuum est, annoque *DCDXXXIII* Gorziam cum sociis accesserit, ut in eadem num. 43 legitur, Mabillonius in Observat. præviis ad eandem Vitam scite inde colligit, eum usque ad præsentem annum, qui quadragesimus vitæ ejus monasticæ erat, vixisse. De hoc sancto semel et iterum supra verba fecimus.

7. *Edgarus Angliæ rex coronatur.* — « Rex Anglorum », inquit Wigorniensis ad hunc Christi annum, « pacificus Edgarus, ætatis suæ anno trigesimo, Indictione prima, quinto idus Maii, die Pentecosles a beatis præsulibus Dunstano et Oswaldo, et a cæteris totius Angliæ antistitibus in civitate Acamanni (hodie Bathonia appellata) benedicitur: et cum maximo honore et gloria consecratur, et in regem ungitur ». Nam, ut ait Malmesburiensis lib. 2 de Reg. cap. 8, « Illud constat quod a decimo sexto ætatis suæ anno, quo rex constitutus est, usque ad trigesimum, sine regio insigni regnaverit ». Natus autem erat Edgarus anno *DCDXXIII*; coronatus rex, publica negotia studiosius tractare, terra marique hostem excludere, ubique provinciarum quieti consulere, laboravit; ut qui sacram Remp. præclare auxerat, etiam alteram illustraret. Quid illi hoc anno in maritima expeditione contigerit, et quomodo vicinos principes qui antiquis Britannis præerant, in sui obsequium traxerit, referunt his verbis Wigorniensis et Hovedenus, postquam de regia ejus mentione locuti sunt: « Interjecto deinde tempore, Edgarus cum ingenti classe, Septentrionali Britannia circumnavigata, ad Legionum civitatem appulit. Cui subreguli ejus octo, Kynatus scilicet rex Scotorum, Malcolmus rex Cumbriorum, Maccus plurimarum rex insularum, et alii quinque, Dus-

nallus, Sifertus, Huvallus, Jacobus, Inchillus, ut mandarat, occurrerunt, et quod sibi fideles et terra et mari cooperatores esse vellent, juraverunt ». Plura de Edgardo ejusque virtutibus Alfordus hoc anno. Hæc omnia iisdem fere verbis habet Simeon Dunelmensis, sed apud eum, loco *Indictione v, idus Maii, die Pentecostes*, legendum, *Indictione prima, V idus Maii, die Pentecostes*.

8. *Continuatio belli Græcos inter et Russos.* — Continuatum hoc anno in Oriente Græcos inter et Russos, Moscovitas hodie appellatos, bellum, de quo Leo Diaconus hæc scribit: Scythæ (ita Russos appellat) Sphendosthlabi (qui Russorum rex erat) sermonibus excitati, periculum se pro sua adituros salute, fortique pectore adversus Romanam aciem pugnatos consentire. « Postridie igitur, sexta scilicet hebdomade, die, mensisque Julii vicesima quarta (legendum *vicesima quinta*, qui dies hoc anno iu feriam sextam incidit. Neque enim quæ hic narrantur alio quam currenti anno contingere potuere, ut ex dicendis duobus sequentibus annis constabit) sub ipso solis ortu atque ardoribus egressi ex urbe Tauroscythæ » (id est Russi) tentandam sibi pugnae aleam statuerunt, commissoque prælio forti impetu Scythæ in Romanos impressionem fecerunt. Romanus quidam, *Anamas* vocatus, totis equo laxatis habenis ad *Sphendosthlabum* venit, atque ad humeri juncturam gladio ferit, eumque prouum dejecit, non tamen interimit. Ipse vero denso Scytharum agmine circumfusus necatur. Cujus nece aucti fiducia Rossi Romanos pepulere. Imperator videns inclinare aciem, in adversarios irrumpit, ejusque exemplo Romani. Confestimque exorta procella pluviae guttis commixta, hostium faciem verberabat, pulvisque excitatus illorum oculos lædebat.

9. *Russi a Græcis devicti.* — « Aiunt vero etiam virum quemdam equo albo invectum apparuisse, qui Romanis ductor esset, et ad irruendum in Scythas hortaretur, qui postea inventus non est, licet magna quærendo diligentia habita esset. Inde indubia pervasit existimatio magnum martyrem Theodorum fuisse, quem imperator in præliis sibi adiutorem solebat deposcere. Aiunt etiam ejusmodi aliquid accidisse ad vesperam, pridie quam pugna committeretur. Byzantii virgo Deo dicata videre sibi in visione videbatur Deiparam viris flammeis eam stipantibus, quæ et diceret: Vocate mihi Theodorum martyrem. Moxque adductum esse virum armatum cui dictum sit a Deipara: Joannes tuus, domne Theodore, apud Dorystolum Seythis pugnans, infesta hostium acie gravius premitur: sed vade cito, ut illi opem feras; nisi enim quamprimum veneris, res illi in grave periculum vertetur. Cui ille rursus: Paratus, inquit, sum, ut Dei ac Domini matri obsequar: quo dicto statim ivisse, et in eum modum equum ex virginis oculis evolasse ». Romani vero præeuntem divinum virum secuti hostibus congregiuntur, qui in fugam declinaverunt, atque ad muros

usque alii super alios irruentes, dire ceciderunt. Aiunt, in hoc prælio ad quindecim millia quingentos Scythas fuisse desideratos, capta scuta viginti millia, enses plurimos; Romanorum vero occisos trecentos quinquaginta, multos esse vulneratos.

10. *Pax Græcos inter et Russos constituta.* — *Sphendosthlabus*, uissis mane ad *Joannem imp.* legatis, paciscendi fidem exposcit, ea nimirum conditione, ut *Tauroscythæ* Romanis tunc oppidum traderent, captivos dimitterent, atque Mysia recedentes patriam laresque suos repeterent; Romani vero liberam eis enavigandi facultatem facerent, nec abeuntes cum igniariis navibus invaderent. Ad hæc etiam imperator commeatum annonamque subministraret, ac dum ii Byzantium mercaturæ causa proficiscerentur, sicut antea consueverant, licentia daretur. Imperator, quia pace exercitus incolumis foret, bello contra interitu periret, foedus percussit, et singulis tritici medimnos duos mensus est. Qui frumentum acceperunt, numeratos dicunt ad viginti duo millia, qui ex sexaginta exercitus Rossi millibus interitum evasere; triginta enim et octo millia Romana acies confoderat.

11. *Tzimiscees imp. Constantinopoli triumphat.* — « Joannes vero imp. totos quatuor menses expugnato Rossorum exercitu, Mysiaque recepta ac Dorytolo ex nomine Theodori magistri militiæ atque martyris, Theodoropolis novo titulo nuncupato: justo item relicto præsidio, cum maximis tropæis Byzantium venit, ubi cives pro mœnibus effusos ostendit, coronis sceptrisque ex auro lapillisque pretiosis ipsum accepturos. Ducebant et currum auro compactum, quem equi albi trahebant. In eum ut ascenderet rogabant, ac consuetum duceret triumphum. Ipse vero coronas quidem ac sceptrâ suscepit, majoraque his munera rependit; ut autem in currum ascenderet induci non potuit, sed Dei matris imagine Deum hominem Verbum sinu amplexante, quam ex Mysia attulerat, in currus sella collocata, eique substratis purpureis Mysorum paludamentis atque coronis ac stemmatibus, ipse singulari equo cinvectus pone sequebatur, caput diademate cinctus, ac coronas sceptraque gestans in manibus. Hac triumphique specie per mediam civitatem, purpureis vestibus undique ornatam, instarque thalami, lauri ramis auroque textis peplis contextam, ad magnum Dei Sapientiæ delubrum processit, gratiarumque actionis exsolutis precibus, ac Mysorum præmagnifica corona velut manubiarum primitiis Deo dicata atque appensa, in regias sese aedes recepit: adductumque Borem Mysorum regem regii cultus insignia ei ademit, thiam scilicet purpura prætextam, auro ac margaritis interstinctam, vestemque purpuream ac rubros calceos: ipsum vero Magistrorum dignitate ornavit. Tantis porro Joannes imp. brevi admodum tempore præter omnem opinionem peractis tropæis, atque Mysia Romanæ ditionis effecta, Byzantii hyberna ducebat », inquit

Leo Diaconus, qui hoc tempore vivebat, et ex quo Cedrenus, Curopalates et alii, quæ de hac expeditione habent, desumpsere.

12. *Regnum Bulgaricum postea instauratum.* — Erat *Borise* seu *Bores* filius *Petri* Bulgariæ regis, cujus suo loco mentionem fecimus; sed Petrus ante hoc tempus mortuus erat, duosque filios reliquerat. Curopalates pag. 694, tradit *Romanum* *Borise* fratrem a Josepho cubiculario virilibus postea privatum. Verum mortuo *Tzimisce imp.*, Bulgari a Græcis defecere, evocato *Borise*, qui Constantinopoli clam cum fratre digressus quodam Bulgaro interfectus est: *Romanus* vero frater incolomis evasit, et aliquando post in Urbem rediit. Deficiente igitur *Petri* regis stirpe, rerum summam quatuor ejus fratribus detulere *Bulgari*, ut videre est apud Ducangium in Constantinopoli Christiana,

in Familiis Dalmaticis, cap. 6, et *Samuel* unus ex illis, Basilio Porphyrogenito imperante, durante rebellione *Duri*, Thraciam, Macedoniam, aliasque imperii provincias incursionibus vexavit, ut prodit Cedrenus pag. 694, qui jam pag. 683, narrato *Tzimiscae* triumpho de quo mox egimus, ait *Sphendosthlabum* Russorum regem, dum patriam hoc Christi anno repeteret, et per *Pateinazilas* transiret, insidiis peremptum esse. Post *Sphendosthlabum* invenio in Russia regnasse *Wolodomirum*, quem Cedrenus pag. 699, scribit conjugem fuisse *Annæ* *Basilii* Porphyrogeniti sororis, de qua infra sermo erit occasione fidei Christianæ in Russia disseminatæ, eumque *Balimerum* appellat.

S. Udalricus Augustensis episc. hoc anno mortuus est, ut superiori vidimus.

BENEDICTI VI ANNUS 2. — CHRISTI 974.

1. *Benedictus papa strangulatus a Bonifacio.* — Sequitur Christi Redemptoris annus nongentesimus septuagesimus quartus, Indictione secunda, quo Benedictus papa Sextus, ubi sedisset annum unum, menses tres, et dies aliquot, a Bonifacio, cognomento Francone Romano, Ferrutii filio, diacono cardinale, scelestissimo viro, violenta manu capitur, in carcerem detruditur ubi et strangulatur. Ipse vero Bonifacius, Sedem Apostolicam violentè invasit, quam tenuit annum unum ac mensem, dictusque Bonifacius Septimus, verum uti tyrannus ab antiquioribus non numeratur inter Romanos Pontifices. Nam Leo Ostiensis¹: « Eodem, inquit, tempore, Benedicto papa Sexto vita funelo, Benedictus papa Septimus, propinquus memorati Alberici Romanorum consulis, in Sede Apostolica elevatur ».

2. *S. Romualdus Eremitarum institutor clarè.* — Eodem anno Honestus Ravennas archiepiscopus cum jam tertium suæ sedis annum expleisset, sanctorum reliquias in Ursianam Basilicam augustissime fabricatam et ornatam transtulit, corpus videlicet S. Probi, et reliquias sancti martyris Ursicini, ut constat ex Diplomate do-

nationis ejusdem Honesti, de bonis eidem Basilicæ hoc anno collatis: de quo locupletius apud Rubeum in historia Ravennate hoc anno. Rursum vero ejusdem Honesti tertio expleto, et inchoato quarto anno ipsius episcopatus, Deus in tanta peccatorum caligine Ægypti pæne tenebras superante, sua immensa misericordia facem accendit. Quidnam aliud dixerim virum justum, sanctum, undique divinæ lucis fulgore coruscum in medio peccantium populorum, quam lucentem in tenebris facem? quem etiam si dixeris solem, haud procul a scopo veritatis errabis, dicente ad suos discipulos Domino¹: « Vos estis lux mundi ». Utpote, qui multiplicibus undique micantes radiis, sive ex prædicatione verbi, aut operatione virtutum, vel editione signorum, orbem terræ totum offusum tenebris illustrarent. Talis plane exstitit vir sanctissimus Romualdus, prodiens ut alter Joannes Baptista ex cremo, lucerna ardens et lucens, qui claras Ægypti Nitrias atque Thebaidas anachoretis fertiles transtulerit in Italiam, inter quos ipse, ut alter Antonius, forma factus sit omnibus ejusmodi vitæ arduum institutum arripiendus. Fuit isle Ravennas nobilissima ducum oriundus stirpe, qui nun-

¹ Leo I. II. c. 4.

¹ Matth. v.

tium remittens sæculo, in Classensi cœnobio famosissimo prope Ravennam primo monasticum induit indumentum. Ex quo factum est, ut admirandis progressoribus sanctitatis ex cœnobio ad vilam transiens anachoreticam, ita fecundus in prole sanctorum fuerit, ut Occidentalem Ecclesiam

sanctis repleverit anachoretis, quorum aliqui apostolatum ad Gentes mernere, et insigni corona martyrii decorari. Res ab eo præclare gestæ scriptæ sunt a Petro Damiano Ravennate, et ipso sanctitate et doctrina notissimo, qui his temporibus proximus vixit.

Anno periodi Græco-Romanæ 6467. — Anno Æræ Hispan. 1012. — Anno Hegiræ 364, inchoato die 21 Sept., Fer. 2. — Jesu Christi 974.

— Doni II papæ 1. — Ottonis imp. 2 et 3. Joannis Tzimiscæ imp. 6.

1. *Benedicto VI occiso Bonifacius VII et Donus II succedunt.* — Ad num. 1. Hermannus Contractus, juxta editionem Canisianam, ad hunc Christi annum scribit: « Romæ Benedictus papa criminatus a Romanis et Crescentio Theodoræ filio, in castello sancti Angeli custodia mancipatus, ibique strangulatus est; et ea juventute (legendum, eo vivente) Bonifacius Ferrutii filius papa ordinatus, et post unum mensem expulsus, Constantinopolim postea petiit, et Benedictus VII, Sutriæ prius episc. papa cxxxviii ordinatus, sedit annis novem ». Marianus Scotus qui recte *Doni* papæ hujus nominis II initium hoc anno consignat, Benedicto VI annum unum et menses sex, uti Martinus Polonus et Catalogi, perperam attribuit. Cum enim tam ipse quam iidem Catalogi annum etiam unum et menses sex *Dono II* adscribant, et certum sit *Benedictum VII* mense Aprili sequentis Christi anni jam Ecclesiam Romanam rexisse, nec Benedictus VI nec Donus II tandiu sedere potuere. Hinc Onuphrius in Chron. Ecclesiast. et Baronius, Benedicto VI annum tantum unum et menses tres, et Dono II, rejecto anno, solum menses tres adscribunt. At Benedicti VII initium hanc chronotaxim plane evertit. Benedictus itaque VI currenti anno mense incerto crudeliter necatus, et hoc pariter anno, ut habet Sigebertus in Chronico, *Bonifacius*, qui ante *Franco* appellabatur, Sedem Romanam invasit, eamque per mensem unum tenuit, uti recte Hermannus Contractus habet. Verum eo expulso, non *Benedictus VII*, ut ipse habet, sed *Donus II* Sedem Romanam obtinuit, uti scribunt Marianus Scotus, Sigebertus, et auctores veterum Catalogorum. Ipsemet Hermannus manifeste errorem suum prodit, cum *Benedicto VII* annos ix assignant, et mortem ejus in annum DCCLXXXIV, quo revera ea contigit, confert; a currenti enim anno ad DCCLXXXIV anni decem integri intercurrunt, non vero novem.

2. *Ottonis II auctoritas Romæ vilesceat.* — *Ottone II* Germanicis et Francicis bellis, inquit Sigonius lib. 7 de Reg. Ital., quæ alienissimo tempore exarserunt, implicito, ac regionum armorum terrore procul amoto, Italici integræ parandæ libertatis avidi, palam grandiores atque alacriores sibi spiritus adsciverunt. Nam et varias in populis seditiones exire, et multiplices in provinciis tumultus conflare, et passim consulatus in civitatibus instituere, et privatas turres in urbibus ædificare cœperunt. Imprimis autem Romæ aperte de antiqua recuperanda libertate tumultuatum. Hunc tumultum *Cincius* civis Romanus exivit. Ille quod tenere, Joanne XIII sedente, Ottonis Senis metu nequiverat, id se evicturum *Benedicto* Ecclesiam, *Ottone* adolescente regnum obtinente ratus, negotium ingens majore animo quam consilio iniit: ac currenti anno *Benedictum VI* jura imperii atque Ecclesiæ retinentem nactus arripuit, atque in vincla traditum misere mori cœgit. Renovata inde veteri in Pontificiis comitiis ambitione, Romani, neglecto *Leonis IV* papæ decreto, quod *Otto M.* observari jusserat, Pontifices quos libido tulit, rursus sine imperatoris auctoritate crearunt.

3. *Expeditio Tzimiscis imp. adversus Saracenos.* — « Verna jam adulta tempestate », inquit Leo Diaconus, Joannes Tzimiscas imp. Byzantio profectus, adversus Agarenos superiorem Syriam incolentes cum exercitu occurrit, ac Mediterraneis partibus peragratis *Euphratem* transmisit. Cum omni exercitu Syriam incursavit, nullo ei hostium obtinente, cunctis nimirum ejus irruptionis fama attonitis, intraque præidia latebrasque sese abdentibus. Porro « Emeta (urbs est munita atque illustis) capta, et ad deditionem coacta » redemptionisque pretiis exportalis quanta nec numerari possint, inde « profectus Mycetarsim properabat. Est vero ea urbs clara atque conspicua, opibusque

et pecore reliquis ejus provinciæ urbibus atque oppidis longe præstans ». Hac quoque deditionem faciente, plurimisque ac pulcherrimis donis auri argentique, ac vestium auro intextarum eoque interstinctarum ab oppidanis acceptis, *Nisibim* venit, quam incolis vacuum invenit, quod hi qui incolebant, Romanæ metu expeditionis solum verterant, atque ad interiora se fuga receperant. Incursans ergo circumvicinam regionem, atque Romanis data fide obnoxiam faciens, animo incitabatur, ut et *Ecbatana* pergeret, Agarenorumque regiam everteret, quæ infinitam argenti auri-que vim omnisque generis divitias in se continebat, hanc quoque assultu se capturum sperans.

4. *Felix ac fausta.* — Aiunt enim urbium quæ usquam sunt, ac toto orbe existunt, felicissimam esse auroque ditissimam, causam vero esse quod ex multis locis in eam opes confluant, nec ullam hactenus experta sit hostium grassationem ac injuriam: « Enimvero inhibuit illius impetum, cum aquæ defectus, tum necessarii comineatus penuria. Quam enim Carmanitem eremum vocant, per ea panditur loca asperum arduumque iter obtendens, ac neque aquarum scaturigines habens,

nec fœnum herbamque producens, sed squa lida horrensque ac inaquosa existens. Idcirco convasatis, quæ ab Agarenis oblata acceperat muneribus, trecentarum argenti auri-que myriadam summa, Byzantium rediit, ac aurum quidem atque argentum, sericasque vestes ac aromata quæcumque ab Agarenis dono sustulerat, per forum triumpho egit, spectantibus civibus, eorumque copiam admirantibus, atque ipsum magnifice susipientibus, faustisque acclamationibus ac volis talibus clarum tropæis in regiam deducuntibus ». Quam expeditionem ad præsentem annum pertinere, ostendunt et depositio Basiliæ patriarchatu Constantinopolitano, quam Baronius male in annum sequentem differt, alteraque expeditio verno tempore sequenti ab imperatore suscepta, quæ ab anno DCCLXXV removeri non potest.

5. *Califa Babylonis abdicat.* — *Mutius Lilla* Saracenorum Babyloniensium califa dignitatem deposuit, transtulitque in Taium Lillam filium, *idque decimo tertio Dulkade, anni cccclxiii Hegiræ*, nempe ideoque die quinta mensis nostri Augusti currentis Christi anni.

BENEDICTI VII ANNUS I. — CHRISTI 975.

1. *Benedictus papa VII.* — Annus Redemptoris sequitur nongentesimus septuagesimus quintus, tertia Indictione, quo Benedictus Romanus ex Albericis proveniens, exagitans urgensque Bonifacium tyrannum invasorem Apostolicæ Sedis, eum abire coegit. Qui nefandissimus homo, truculentus prædo, antequam ab Urbe recederet, Basilicam Vaticanam invadit, eamque expilans, ornamentis omnibus spoliavit, et sacrilega onustus præda navigavit Constantinopolim: quo factum est, ut ita Romana Ecclesia liberata, omnium suffragio idem Benedictus ex Sntrino episcopo crearetur Romanus Pontifex. Quod quidem hoc anno contigisse, ex ipsius sepulchri inscriptione redditur manifestum, quam inferius in ejus obitu reddituri sumus: ex qua redarguas eos qui aliam rationem in numerandis hujus Benedicti annis inierunt.

2. *Martyres in Hispania ex Diplomate Veremundi regis.* — Hoc eodem anno, Hispania Ecclesia

martyrum hoc sæculo prole secunda, certaminibus iteratis, rursus coronis martyrum decoratur. Quotquot enim sub impio Sarracenorum rege Cordubensi longo tempore carcer arcebat inclusos, vinculis et inedia maceratos, foras exhibitos gladius vindex obruncat, nullam capientes redemptionem (quod ait Apostolus¹) ut meliorem invenirent resurrectionem. Erant isti, qui capta et diruta ab iisdem Sarracenis civitate Septimacensi, immani civium cædi superfuere, ductique captivi Cordubam, biennali custodia sunt afflicti, quo fidei fierent desertores. Sed qui mundum vicit, victor extitit in his Christus, cum superata impietate, minis pœnisque contemptis, summa hilaritate fuso sanguine, de Sarracenorum perfidia triumpharunt. Quos pæne oblivione sepultos, ex Archivo Compostellano, Ambrosius Morales in lucem edi-

¹ Hebr. xi.

dit, ex autographo descripto Diplomate regis Veremundi, quod confecit de restitutione bonorum unius ex illis martyribus per Ranimirum regem occupatis. Porro ipsum Diploma ad suum Eulogium idem Ambrosius posuit Appendicem, quod hic totidem verbis describendum putavimus, nobile antiquitatis monumentum, hactenus vulgatis historicis incompertum; sic enim se habet:

3. « Regis Veremundi Secundi Diploma:

« In nomine sanctæ et individue Trinitatis. Dicendum est, quod cunctis notum manet, quomodo Domino permittente, et peccatis exigentibus, mucro hostilis et crudelitas iniquorum, sæviens scilicet Ismaelitica gens, promovit se ex Hispaniæ partibus adversus Christianos, et pergens armata venit usque ad Septimacensem civitatem, et catervatim eam circumvallans, atque in arcu et sagitta eam obsidens, diruptis muris, et aperta janua, irruit in ipsam civitatem. Et sicut scriptum est¹: Qui conterit multos et innumerabiles, et facit stare alios pro eis, et: Nec alio modo moritur homo, præter id quod positum est: gladio vindice, et hominum scelere prævalente, quos ibi Christianos invenit, in ore gladii interemit. Et diruta civitate, pauci qui remanserunt, ad Spaniam in Cordubensium urbem ducti in captivitatem, onere catenarum onusti, atque ferro vincti et in carcere trusi, duos annos et dimidium ibi peregerunt, laudantes et benedicientes Deum unum et trinum semper vivum et verum.

4. « Et quoniam Deo cura est de omnibus, maxime de eis qui positi in tribulatione, cum spe et fiducia Deo animas suas simul et corpora in benefactis commendant: voluit pietas divina, quomodo jam prædestinatione ordinaverat, illorum ærumnis et laboribus, et etiam temporalibus malis finem imponere. Et ut ad eum, cui famulatum exhibuerant, cum palma martyrii tripudiantes venirent, permisit ipsum tyrannum, qui eos captivos duxerat, de squalore carceris ipsos ejicere, et gladio interfectos, sanguine proprio laureatos ad regna cælorum et præmia atque æterna munera a Deo illis præparata, coronandos et remunerandos dirigere. Inter quos fuit vir felicissimus, nomine Sarracenus, proles Joannis vocitatus, qui dimisit hæreditatem et cortes in civitate Numantia, quæ modo Zamora nuncupatur. Cum nullum superstitem vel hæreditarium aut propinquum relinqueret, qui ipsam hæreditatem possideret, sed remanserit sine hærede et sine alicujus serie testamenti, dum starent hæc omnia intestata, accepit ea sævissimus princeps domnus Ranimirus indecenter, et tenuit ipsa usque ad obitum suum.

5. « His expletis, ego Deo meo trino et uno humillimus princeps Veremundus, in regno parentum et avorum meorum nutu divino præelectus, et solio regni collocatus, antequam ipsi sancti et electi Dei martyrium acciperent, et adhuc trusi in

carcere essent, visum mihi fuit moto pietate in redemptionem animæ meæ eos inde redimere. Et jam nuntii mei in via erant quos pro illis miseram, quando ipsum martyrium consummatum est. Quando tale nuntium ad aures meas pervenit, quod ipsi sancti jam in regno cælorum essent: placuit serenitati nostræ, ut hæreditatis ipsius supradicti martyris Sarraceni, qui in baptismo Dominicus vocitatus est, Ecclesiam facere hæredem: quia inutile et inconveniens erat, ut ille esset in regno cælorum, et hæreditatem ejus possideret rustica et laicalis conventio. Ob hoc ego jam sæpeditus princeps Veremundus, propter bonum testimonium in amore Dei et in memoria ipsius supradicti martyris Dominici, partem aliquam donare decerno, atque in perpetuum ad habendum concedere mihi visum et conveniens est, loco Apostolico in veneratione ipsius patroni nostri Apostoli, ubi tunc dilectus Dei Petrus episcopus præsulatum tenebat.

6. « Sic do et concedo cortem intus in civitate nova, prope Ecclesiam sanctæ Leocadiæ in omni gyro, sicut eam ipse sanctus Dominicus obtinuit, cum omnibus suis utensilibus cupis, torcularibus et tendis, in mercatello et vineis, quæ servierunt ipsi corti, ubicumque sunt, ab integro eas concedimus. Et azeniam integram in vado quem dicunt domini Garsia, et medietatem in alia, in Teliareis, et ibi in Teliareis quartam portionem in alia azenia, et omnes suos hortos, unum in Arvali, et alium in ripa fluminis Durii, et suos ferraginales, ubicumque illos habuit. Et alium hortum in Parales, et etiam cuncta quæ ipsi domui deservierunt, tam ex illa parte fluminis Durii terras et vineas, et omne suum debitum, quam quæ ipsi corti deserviunt. Adhuc dando et donando adjicimus quod ipsi corti pertinuit, villam quam vocitant Alcopam, in ripa rivuli Arosoi cum omnibus suis præstationibus, quæ intus et foris sunt, cupis et torcularibus terris, vineis per suos certissimos terminos, et omnia quæ ad ipsam villam pertinent, sicut ille eam obtinuit cum suis jugariis et porcariis quæ ibi servierunt, sive et peculiare de omnibus ubicumque sunt, quæ ipsi corti deservierunt. Omnia supra taxata, quæ resonant jam scripta, in supradicto Apostolico loco donare atque concedere curavimus in memoria et veneratione sancti illius jam dicti Dominici, ut habeant inde habitantes et Deo servientes, atque per singulos dies et annos memoriam illius facientes, et sacrificia et orationes Deo offerentes, temporale subsidium, et illi cum sancto Dei Apostolo Jacobo etiam in perpetua remuneratione a Deo recipiant collatum præmium inconvulsum». Hactenus de donatione facta de rebus sancti Dominici martyris Ecclesiæ sancti Jacobi. Ad quæ roboranda ejusmodi imprecatio dira subjicitur auctoritate assistentium et subscribentium episcoporum, his verbis:

7. « Si quis tamen (quod esse non potest nec oportet, et fieri minime credimus) adversus hanc testamenti seriem, ad irrumpendum vel diruen-

¹ Job. XXXIV.

dum venire tentaverit, sive ex progenie et stirpe nostra, sive etiam quilibet comes aut pontifex, aut quælibet potestas hanc factionem infringere tentaverit, quisquis fuerit, in primis a corpore Christi sit extraneus, et amborum careat luminibus oculorum, et cum Juda Domini traditore in inferno sit damnatus. Facta a serenissimo et pio principe domino Veremundo serie testamenti..... idus Februarii, *Æra post millenam tertia scilicet et decima* ». Est annus Domini nongentesimus septuagesimus quintus. Subjicitur demum subscriptio ista :

- « Veremundus rex confirmat.
- « Sebastianus episcopus confirmat.
- « Gundisalvus episcopus confirmat.
- « Armenarius episcopus confirmat.
- « Pelagius episcopus confirmat.
- « Petrus episcopus confirmat.
- « Ferdinandus testis.
- « Suvaricus testis.
- « Gudesteus testis.
- « Felix testis.
- « Ulmara testis.
- « Munius testis ».

Hucusque Diploma de sanctis martyribus, et bonis Dominici martyris.

8. *Imperium Orientale, mortuo Joanne, ad Basilium et Constantinum transfertur.* — Quod ad res pertinet Orientalis imperii, hoc eodem anno, ingenti damno Reipublicæ, Joannes Tzimisceus imperator cum in Syriaca esset occupatus expeditione, jamque victor pervenisset Damascum usque, veneno potatus moritur Constantinopoli, quarta die mensis Decembris, cum imperasset annos quinque; vel si sex, (ut alii volunt) in sequentem annum rejiciendus ejus est obitus : menses totidem et dies aliquot, eademque die succedunt filii Romani junioris Basilus et Constantinus, quorum Basilus natu major vicesimum agebat annum, Constantinus vero decimum septimum, revocata eorum matre Theophane in solium, e quo fuerat exturbata. Hæc Curopalates et alii. Horum imperatorum eusum numisma cum imagine Salvatoris, ut a Joanne imperatore nuper decretum fuerat, extat, licet crassa Minerva et a cusore litterarum latinarum haud satis perito, ut ex eo intelligere potes. Habet Lalius Pasqualinus in suo Musæo.

9. *Sergius episcop. Damascenus Romam venit.* — Eodem anno, cum qui tenerent Sarraceni Damascum, diffiderent omnino Christianis qui ibi erant, ne Joannem imperatorem admitterent : eorum episcopum Sergium inter alios foras ejiciunt. Qui Romam veniens a Benedicto Romano Pontifice benigne exceptus est. De quo Petrus Damianus ad Nicolaum papam hæc habet, ignorans tamen causam migrationis quam credidit voluntariam, quæ fuerat necessaria : « Sergius metropolita Damasci non inconvenienter poscit annecti, qui Ecclesiam suam pro Christi amore deseruit, et Romam advenit. Reperiensque Bonifacii et Alexii Basilicam sacerdotilibus pæne officiis destitutam, Benedictum

Romanæ Sedis antistitem adiit, atque ut se monasterialem ibi permitteret regulam constituere precibus impetravit. Ubi nimirum congruo post tempore religiose degens vitam finivit ». Hæc ipse, sed quando id factum, suo loco dicetur.

10. *Antoninus Studites patriarcha Constantinopolitanus.* — Eodem anno et Indictione tertia, Constantinopoli Synodus celebratur, in qua Basilus patriarcha criminis accusatus, deponitur, et in locum ejus substituitur Antonius Studites. Hæc Curopalates, ex quo et alii recentiores.

11. *Regum successio in Anglia per episcopos judicata, et clericorum jurgia composita.* — Hoc eodem anno, Ecclesia Anglicana, defuncto rege Edgardo, cum regnasset a tempore monarchiæ adeptæ annos sexdecim, clericorum in monachos insurgentium factione nonnihil est perturbata. Sed primum illa de successore regis controversia est excitata, aliis filium ejus Eduardum, aliis Ethelredum ex secunda uxore genitum expetentibus. Quomodo autem res redacta sit ad episcopale judicium, sic narratur ¹ : « Edgardo defuncto, de rege eligendo magna inter regni principes dissensio orta est. Quidam enim filium regis primogenitum Eduardum, quidam vero fratrem suum de secunda uxore generatum unanimiter elegerunt. Quam ob causam duo archipræsules Dunstanus Cantuariensis et Oswaldus Eboracensis, cum episcopis, abbatibus et ducibus in unum convenientes, Eduardum (ut pater ejus moriens dictaverat) elegerunt, electum consecraverunt, et in regem, quibusdam murmurantibus, inunxerunt. Nam noverca ejus Elfdriþa filium Ethelredum vix septennem puerulum promovere conabatur, ut potius sub ejus nomine regnare videretur. Sicque post discessum regis pacifici, regni status perturbatus est, et in execrationem commutatus. Nam principes plurimi et optimates, abbates cum monachis de monasteriis in quibus rex Edgarus eos locaverat expulerunt, et clericos, ut prius, loco eorum cum uxoribus induxerunt. Nam unus eorum Aelferius nomine, omnia pæne monasteria quæ reverendissimus Ethelwoldus in provincia Merciorum construxerat, magna usus insolentia subvertit.

12. « Sed super his quæstionibus ad beatum Dunstanum delatis, Synodum apud Wintoniam congregavit, et in medio partium conflictu disputationis, imago Dominica, quæ altercantibus adstabat, in Ecclesia expresse locuta ita allegat ²..... quod clericos omnes et eorum fautores confusos reddidit et elingues ». Hæc ipse. Eadem recitantur in Historia de gestis Anglorum apud Bedam. Sed hæc paulo expressius ab Osberto narrantur in Dunstano his verbis : « Igitur ex præcepto regis et archiepiscopi, coit Wintonium nobilitas totius regni, et rex cum sua conjuge adest ad determinandas querelas negotii hujus. Surgunt hinc inde lites, quas Dunstanus propositis rationibus destruit omnes. Rationa-

¹ Matt. Westmonast. in Flor. hist. hoc anno. — ² Locus depravatus.

biliter quippe cunctis ostendit, clericos, qui sorte Dei incorrigibiliter per pravitatem vitæ suæ dissiliunt, nihil per rectitudinem sibi vindicare posse ex iis quæ Ecclesiis data sunt in subsidium eorum qui in clericatu pura conversatione se custodiunt. Quibus auditis, ommissa omnis controversia est. Et rex atque ex pontificibus plerique, clericorum precibus ad pietatem usque permoti, Dunstanum interpellant, quatenus hac sola vice parcat, et clericos jam quod amodo si se non correxerint, incursum sint, reipsa doctos de Ecclesia sua revestiat. Silet ille ad ista, quidque potissimum de negotio agendum sit, demisso capite, mente pertractat: silentium ingens occupat omnes, et suspensi ad responsum pontificis erigunt aures. Tunc subito Crucifixi Dei imago signo Crucis in edito affixa, au-

dientibus cunctis dixit: NON FIET. NON FIET. JUDICASTIS BENE, MUTARETIS NON BENE. Tremefacto in his simul universo conventu, intulit pater Dunstanus, et ait: Quid amplius vultis, fratres mei? Divina sententia audistis definitum negotium præsens. Aiunt: Audivimus vere. Resederunt ergo monachi Wintoniæ securi, et quoad clericos ipsi vixerunt, qui eos super ista causa inquietaret nemo fuit». Hæc Osbertus, qui tamen potius sub dicto Edgardo rege ista referre videtur. Verum hoc ipso anno celebratum esse dictum Concilium, etiam vetustiora de rebus gestis Anglorum ad Bedam addita fidem faciunt. De Synodo autem alia quæ facta est Calnæ eadem ex causa sub Ethelredo Eduardi successore, suo loco dicemus.

Anno period Græco-Romanæ 6468. — Anno Æræ Hispan. 1013. — Anno Hegiræ 353, inchoato die 10 Sept., Fer. 6. — Jesu Christi 975.

— Benedicti VII papæ 1. — Ottonis II imp. 3 et 9. Joannis Tzimiscæ imp. 7.

1. *S. Maiolus recusat Pont. Rom.* — Ad num. 1. *Bonifacius* hujus nominis VII, antipapa, non hoc anno, sed præcedenti a Tusculanis comitibus sacerdotio pulsus est, et Constantinopolim confugit, neque Romam rediit ante an. DCCLXXXIV, ut ibi ostendimus. Nec denique annum unum ac mensem Romanam Sedem tenuit, ut habet Baronius anno præcedenti num. 4. Factio enim Tusculanorum comitum cum æquo animo ferre non valens, cum ad resistendum par non esset, post mensem Basilica Vaticana pretiosis rebus omnibus spoliata profugit. Quod cum accepisset Otto II factione comitum Tusculanorum fultus, mortuo *Dono II*, de alio Pontifice in ejus locum substituendo cogitavit, præsertim cum a Romanis de electionis libertate ipsis conservanda interPELLARETUR. Syrus monachus in Vita sancti Maioli abbatis Cluniacensis, lib. 3, cap. 8, ait Ottonem II voluisse hunc sanctum abbatem ad Pontificatum evehere. Narrata enim Saracenorum e Fraxineto expulsionem scribit: « Non longo post tempore Romana Sede proprio viduata pastore (nempe *Dono* hujus nominis II,) idem Dei famulus, Ottonis Secundi juncta cum matre prece, Italiam repetere a partibus est coactus Galliæ. A matre tunc et filio honore susceptus dignissimo, ac culmen Apostolicæ dignitatis precibus impelli cepit continuatis. Sed cui magis abjectio quam exspectaretur exaltatio, nullatenus ad se promovere potuit sublimitatis ambitio, etc. Imperatoris et sanctæ

matris iterum precibus alternis ad ipsum flagitatur successibus: cum nobilibus qui aderant antistites insistebant; imperialis quo fieret petitio, supplicabant. At ille divina illustratus gratia, solerti se studuit excusare prudentia etc. » Erant hoc tempore Otto et Adelhais ejus mater in Germania, neque ille ante annum DCCLXXX post patris mortem in Italiam se contulit.

2. *Verba ejus Vitæ explicantur.* — Hæc itaque Syri monachi verba benigne interpretanda. Insinuat enim *Maiolum*, dum in Gallia esset, sollicitatum fuisse ab Ottone II et ejus matre ut Italiam repeteret, sed ipsum utrumque in Germaniam existentem adiisse, et solerti se prudentia excusasse, seseque a culmine Apostolico summopere aversum ostendisse. Quando igitur Syrus ait, *Italiam repetere a partibus est coactus Galliæ*, non significat eum reapse in Italiam profectum, sed tantum etiam atque etiam excitatum, ut iter illud aggrediretur. Mabillonius Sæc. v Benedict. in Elogio Historico S. Maioli num. 43, existimat, *Syrum* in citato loco memoria lapsum, pro *Germania* posuisse *Italiam*. Verum textus non est sollicitandus, cum antea *Syrus* de profectione Italica Maioli verba fecerit, non vero aliqua Germanica, et ibidem ejusdem verbi in ea quam mox protulimus significatione utatur. Ait enim: « Ab utraque cum COGERETUR, potestate (Ottone sc. II et ejus matre) excogitandi dilationem studuit postulare ». Sicut itaque

Maiolus ad Pontificatum suscipiendum coactus non fuit, sed tantum precibus impulsus; sic neque Italiam repetere, sed tantum enixe instigatus. Verum *Maiolus*, et protectione Italica et a Pontificatu ineundis sese excusavit.

3. *Benedict. VII fit Pontif. Rom.* — Cum consilium illud non successisset, *Otto II* missos suos, coram quibus novi Pontificis ordinatio peragenda erat, Romam direxit, eisque mandavit ut comitum Tusculanorum partibus faverent; indeque *Benedictus* huius nominis VII, qui jam episcopus Sutrinus erat, inthronizatus est Pontifex Romanus, et quidem ante diem vicesimum quintum mensis Martii currentis Christi anni, ut ex Diplomatis subscriptione recitata anno DCDXLVI, num. 3 evidenter patet (1). Secundo, Sæculo v Benedictino pag. 560, memoratur Diploma a Benedicto papa VII emissum quo conceditur monasterii S. Walarici abbati ut sub jurisdictione Ecclesiæ Romanæ jugiter permaneat. Datum illud anno VII Pontificatus, Indict. IX kal. Aprilis, anno sc. Christi DCDLXXXI, quod dici non potest, nisi currenti ante diem primum Aprilis Pontifex Romanus consecratus fuisset. Ad hæc Boucheus in Historia Provinciæ, lib. 9, pag. 44, recitat Benedicti huius nominis VII Rescriptum, quo insulam Lirinensem cum Arluco monasterio concedit Maiolo abbati Cluniacensi, in cuius fine legitur: « Scripta per manum Stephani notarii regionarii archiscrinii S. R. E. in mense Maio, Indic. VI.

Bene valete. Datum X kal. Maii per manum Joannis episc. Salernitanæ Ecclesiæ, anno IV Pontificatus domini nostri Benedicti sanctissimi PP. VII, imperante domino nostro Ottone, a Deo coronato magno et pacifico imperatore, anno XI, in mense Maii, Indict. VI », anno scilicet Christi DCDLXXVIII. Si enim Benedictus VII eo Christi anno, die XXII mensis Aprilis jam annum Pontificatus, IV inierat, profecto hoc anno ante eundem diem ad illum exelus fuerat. Ex quo liquet primo, Rubeum in Hist. Ravenn. lib. 5 valde deceptum, cum existimavit, *Benedictum VI* usque ad annum DCDLXXXIV Ecclesiam Romanam rexisse, unumque *Benedictum* in duos a lectoribus, scilicet VI et VII, divisum fuisse, quod in Tabulis Ecclesiæ Ravennensis, plures Tabulæ caractere Longobardico scriptæ, dicantur datæ « anno Benedicti Pontificis Max. quinto, Ottonis imp. decimo, Indict. V, mense Maio », qui characteres annum DCDLXXVII certo indicant. Huiusmodi enim exemplaria caractere Longobardico scripta non sunt ante annum millesimum, et exscriptores in numeris errasse certissimum, cum variæ *Benedicti VII* Chartæ supersint, in quibus is diserte dicitur *Benedictus VII*. Unam mox memoravimus, alteramque anno DCDLXXXIII in medium adducemus. Quare in laudatis exemplis, loco anno III, librarii perperam scripsere anno V, et Chartas a Benedicto VII datas, *Benedicto VI* magno errore attribuerunt.

(1) Epochas annorum *Benedicti VII*, ex variis stipulationibus Regesti Sublacensis et Tabularii sanctæ Mariæ in Via Lata recensebimus, ex quibus Sedis tempus illustrabitur. Anno DCDLXXVI, die X Januarii, ita exorditur stipulatio in Regesto pagina 106: « Anno Deo propitio Pontificatus domini Benedicti summi Pontificis et universalis VII PP., in sacratissima Sede beati Petri Apostoli II, imperii domini Ottonis, piissimi et perpetuo Augusti a Deo coronati anno nono, Indictione IV, mense Januario, die X ». Eodem modo ibidem pag. 3, mense Januario, et pag. 151, mense Apr. anno DCDLXXVII. Mense Aprilis, annus Pontificatus tertius, Ottonis decimus, Indictione V, in Charta Sublacensi pag. 85, col. 2, signatur, ut et pag. 144, die IV Junii. In Accessionibus ad Historiam Casinensem Erasmi Gattulæ P. I, tom. II, pag. 84, ex Petro Diacono refertur Privilegium *Benedicti* papæ VII: « Scriptum per manum Stephani notarii regionarii et scriniarii S. R. E. in mense Maio, Indictione V. Bene Valete. Datum III kal. Jun. per manum Stephani nomenclatoris sanctæ Sedis Apostolicæ, anno Pontificatus domini nostri Benedicti sanctissimi VII papæ III, imperante domino nostro Ottone a Deo coronato magno et pacifico imperatore anno X, in mense et Indictione (supple suprascripta) V ». An. DCDLXXVIII, mense Martio annus Pontificatus quartus, Ottonis XI notatur. An. DCDLXXXIX mense Februario annus quartus pontificatus designatur, mense Maio et Augusto annus quintus; Ottonis XII. Anno DCDLXXX, mense Octobris annus quintus. An. DCDLXXXI, mense Februario annus septimus et Ottonis XIII. Item annus septimus hoc anno die XII Januarii. An. DCDLXXXII, mense Februario et Martio annus octavus, et XIV Ottonis. An. DCDLXXXIII, mense Aprilis annus nonus, Ottonis decimus quintus. Est autem *Benedicti VII* Judicatum pro monasterio Sublacensi, cujus summam ex eodem Regesto pag. 191, exhibemus quod ad res Ecclesiasticas illius temporis illustrandas pertineat. Incipit: « Anno Pontificatus domini Benedicti summi Pontificis et universalis VII papæ in sacratissima Sede beati Petri Apostoli anno IX, sive domino Ottone magno imperatore suæ coronationis quintodecimo anno; id est, huius Aprilis mensis, id est Indictione XI ». Petitione *Benedicti* abbatis Sublacensis contra Leonem abbatem monasterii SS. Cosmæ et Damiani qui ponitur in Cave, qui res monasterii Sublacensis Privilegio Romanorum Pontificum surripere tentabat. *Benedictus VII* inspectis iisdem Privilegiis coram iudicibus Lateranensis palatii, in possessionem restituit Sublacensem abbatem.

SUBSCRIPTIONES.

Ego Benedictus sanctæ Catholicæ et Apostolicæ Ecclesiæ præsul.

† Ego Geribertus sanctæ Turonensis (pro Terdonensis) Ecclesiæ episcopus huic, Judicato perpetuali Charta interlui et subscripsi.

† Petrus Papiensis Ecclesiæ episcopus.

† Ego Johannes indignus diac. S. R. E.

Gregorius episcopus sanctæ Albanensis Ecclesiæ.

Leo Ostiensis episcopus.

Stephanus natus Dei Narniensis Ecclesiæ episcopus.

Stephanus Dei providentia primicerius.

Leo Domini gratia vocatus arcarius sanctæ Apostolicæ Sedis.

Azzo Dei pietate protoscriniarius missus et apocrisiarius Rom. Ecclesiæ.

In Chartis Tabularii S. Mariæ in Via Lata, anni Pontificatus *Benedicti VII* his formulis prænotantur: An. DCDLXXVIII, mense Martio, annus Pont. quartus, Ottonis undecimus, Indictione VI; mense Decemb. VII, a kal. Septembris inchoata, est annus quintus, Ottonis XI. si igitur an. DCDLXXVI, mensis Januarii initio annus secundus Pontificatus *Benedicti VII* decurrebat, annus primus initio saltem Januarii mensis an. DCDLXXV inchoatus erat; idcirco *Benedictus VII* creatus est Pontifex, non mense Martio an. DCDLXXV, ut censet Pagius, sed mense Januario.

GEORGIUS.

4. *Diuturnior Pont. Benedict. VI et Dono II perperam assignatus.* — Liquec secundo, Papebrocius in Paralipomenis ad Conatum Chronico-Ilist. perperam scripsisse, *Benedictum VII* die xxv April. vel ii Maii præsentis Christi anni verosimiliter inthronizatum fuisse; *Benedictum* vero VI die xxii Septemb. anni dcdLxxii ordinatum, ac *Donum* initio mensis April. anni dcdLxxiv renuntiatum Pontificem, ac utrumque sedisse annum 1, menses vi, ut passim Catalogi habent; nam inter omnes nunc convenire debet, sciri non posse quibus diebus ac mensibus tam isti duo, quam plerique, qui hoc sæculo Romanæ Ecclesiæ præfuerunt Pontifices, ordinati aut renuntiati fuerint, antiquis monumentis deficientibus, et auctores Catalogorum ac alios scriptores, qui Benedicto VI et Dono II annum unum et menses sex adscribere, manifeste errasse; cum constet *Joannem XIII* Benedicti VI decessorem die sexta Septemb. anni dcdLxxii vivere desiisse, et *Benedictum VII* die vicesima quinta mensis Martii hujus Christi anni jam Ecclesiam Romanam gubernasse. Licet enim a die vii Septemb. anni dcdLxxii ad diem xxv mensis Martii currentis anni fluxerint anni duo, menses sex, et dies xix, certum *Bonifacium VII* antipapam post Benedicti VI mortem Sedem Romanam per mensem occupasse, quod et Papebrocius fatetur; et post *Doni II* obitum fuisse interpontificium duorum circiter mensium, quod idem vir doctissimus etiam asserit, quia nempe petendi fuere legati ab Ottone II, qui electioni faciendæ præsentis, turbas quæ futuræ timebantur, impedirent. Quæ cum ita sint, *Benedictus VI* et *Donus II* tandiu in Pontificatu vivere non potuerunt. Quod fusius explicandum fuit, quia hæc chronologiæ Pontificiæ pars hactenus valde depravata extitit.

5. *Bonifac. VII antipapa a Benedicto VII excommunicatur.* — *Benedictus VII*, ubi Apostolicam Sedem adeptus est, Synodum celebravit, in qua *Bonifacium VII* antipapam excommunicationis sententia perculit, uti discimus ex Epistola Adalberonis Rhemensis archiepiscopi et Stephani Romani diaconi ad Theobaldum episcopum Ambianensem, quæ extat tom. ix Concil. pag. 721, in qua Stephanus et Adalbero in Concil. Rhemensi congregati VIII kal. Octob. eundem Theobaldum excommunicant, quod alias ab Hugone pseudo-archiepiscopo Rhemensi ordinatus fuisset, et præsentì Synodo interesse recusasset: « Et quoniam, inquit, iudicio domini Benedicti VII papæ, in synodo qua Bonifacius damnatus est, incurabilis reperi- tus es, nec ejus filius Stephanus sanctæ Romanæ Ecclesiæ diaconus mederi tibi prævalet: velut morbidum et morbosum hircum separamus te a grege Dominico, etc. » Ex hac excommunicatione Bonifacio VII inflicta, Hermannus Contractus, Marianus Scotus, et Sigebertus in Chronicis ansam sumpsisse videntur, eundem antipapam immediate ante Benedictum VII collocandi; cum tamen certum esse debeat, *Bonifacium VII* Benedicti VI

tempore tyrannidem arripuisse, rursumque anno dcdLxxxv ad vomitum rediisse: cujus tamen ultimæ invasionis tres laudati chronographi non meminere; adeo historia et chronotaxis Pontificia per hæc tempora perturbata. Porro hujus Synodi adversus *Bonifacium VII* meminit etiam Gerbertus Rhemensis archiepiscopatus invasor, in Actis Rhemensis Synodi, a se vel suo jussu scriptis: « Succedit Romæ, inquit, in Pontificatum horrendum monstrum (nempe Benedicto papæ VI) Malefacius (ita Bonifacium VII appellat), cunctos mortales nequitia superans, et jam prioris Pontificis sanguine cruentus. Sed etiam hic fugatus, et in magna Synodo damnatus est ». Denique ejusdem Synodi mentio in Epitaphio Benedicti VI a Baronio anno dcdLxxxiv, num. 4 recitato, ubi eum *Franconem* vocat.

6. *Alhaca califa Cordubensis Christianos vexat et moritur.* — A num. 2 ad 8. Memorat Baronius ex Diplomate *Veremundi* regis Legionensis martyrium quorundam Christianorum sub impio Saracenorum rege Cordubensi, vinculis et inedia per biennium maceratorum tandemque occisorum. Erat is rex Cordubensis *Alhaca*, qui anno regni decimo sexto, Hegiræ vero trecentesimo sexagesimo sexto mortuus est, uti habet Rodericus in Historia Arabum cap. 30., et seq. cui *Iseu* filius in regnum successit. Eo califatum gerente, datus est ei, quod adhuc puer esset, coadjutor, vir *Almanzor* appellatus, qui toto præfecturæ suæ tempore, quæ multorum annorum fuit, Christianos graviter afflixit.

7. *Victoriæ Tzimiscæ imp. de Saracenis Syriæ.* — A num. 8 ad 10. Joannes Tzimiscas imp. « vere rursus illacescente », inquit Leo Diaconus loquens de ultima expeditione ab eodem imperatore suscepta, urbe regia profectus, per Palæstinam iter habebat. Ibi positus castrum aggreditur, Syrorum lingua *Mempetze* nuncupatum, quo et belli vi omnique machinarum genere in potestatem redacto, Salvatoris Christi sandalia illic reperit, inventaque quasi cæleste quoddam donum sustulit, venerandi quoque præcursoris ac præconis crines: ac illa quidem rursus in celeberrimo Dei Genitricis templo, quod in palatio exstructum est, tanquam uberrimum quemdam thesaurum deposuit: hos vero in Salvatoris æde sacra, quam a fundamentis ipse exstruxerat. Inde profectus, *Apmeam* adortus est. Est autem illa munitissimum oppidum ac quod ægre expugnari possit; verum hæc quoque intra non multos dies capta atque eversa, *Damascum* cum exercitu signisque infensis petit. Porro oppidani, magni pretii muneribus in manus acceptis, ante emporium imperatori in occursum venerunt, ejus tum iram amolientes, tum et donis ipsum placabilem reddentes.

8. *Aliæ ejusdem de iisdem Saracenis victoriæ.* — Is, certis illis imperatis tributis et in fidem receptis, inde per Libanum iter aggressus properabat, ipsumque præruptum altumque jugum assecutus,

Borzo munitissimam urbem assultu cepit; inde profectus in Phœnicem descendit, ac tum *Balaneas* castrum munitum in potestatem redigit, tum *Berytum* expugnat: ubi etiam cum Salvatoris imaginem, qua cruci confixus erat, reperisset, inde sublatam ad sacram Salvatoris ædem, quam a fundamentis extruxerat, mittit. Postea *Tripolim* aggreditur: quam cum primo impetu, subitaque irruptione expugnare non posset (quippe forti murorum ambitu cinctam, qua parte continentem spectat, ac quæ in prærupto colle ac tumulo se late exporrigat, alteraque parte mari altuatur, navale protendens sinumque placidum ac tutum a ventis), inde movens, maritima oppida ac villulas iter faciendo subigebat.

9. *Cometes fere trium mensium.* — Per hoc utique tempus, ineunte Augusto, cometes stella apparuit, « divinum certe quidpiam ac novum, resque huiusmodi, quæ omnem humanam rationem excedant portendens. Neque enim huiusmodi aliquid per has visum erat ætates, nec unquam prius per tot dies lucere cometem ullum contigerat. Nempe ab Oriente paulo ad Aquilonem vergens oriebatur, ac quam maxime celso axe proVectus, radios longe splendidos ac micantes vibrabat: res terroris horroisque plenissima quisquis hoc tueretur. Ab ineunte itaque Augusto exortus, totos dies octoginta, a media nocte ad statam usque diem, cunctis conspicuo jubare lucebat. Conspectoque imperator sic inaudito portento, eos qui in astrorum scientia versati essent rogabat, observato sidere ut edicerent, quidnam etiam stupendum istiusmodi obtentum vellet. Hi porro, non quod ars conjectandum præberet, sed quod gratum imperatori foret, cometem portendere falso exponebant, nempe victoriam de hostibus, longosque imperatori annos illius quasi indicatione felici eventu augurabantur. Erant autem pravi vates, Symeones logotheta atque magister, necnon Stephanus Nicomediensis præsul, viri ea ætate inter sapientes eruditione clari. Haud enim vero cometes ille indicabat quæ illi interpretabantur in gratiam imp., sed graves defectiones, gentiumque grassationes et domesticos tumultus, urbiumque ac oppidorum desolationes, nec non fames et pestes, horrendosque terræ motus: prope denique Romani imperii universale exitium; quæ nos ipsi ex rerum eventu vidimus ».

10. *Symeon Metaphraste usque ad hunc annum pervenit.* — Meminit huius cometæ Cedrenus pag. 683, atque visum *Augusto mense, Indictione tertia*, hoc scilicet anno, et addit *usque ad octavum mensem Indictionis quartæ*. Qua in re ex Leone Diacono emendandus. Illius cometæ meminere etiam Malmesburiensis, Hovedenus, et quidam alii historici Latini. Quantum peccatum sit superiori ac præsentī sæculo, a plerisque qui de ætate, qua *Symeon Metaphraste* floruit, scripsere, anno DCXV iusinuavimus, eumque circa annum DCCCLXXXI in lucem prodiisse statuimus, quod anno DCXV

legatio ei concredita sit cum annos circiter viginti quatuor natus esset, et præsentī Christi anno adhuc vixerit. Quare cum tria illa chronologiæ capita locus Leonis Diaconi mox a nobis memoratus certo evincat, nulla amplius difficultas esse potest de tempore quo *Symeon* floruit, quove in vivis esse desiit. Constat enim eum hoc anno nonagenario majorem fuisse: cumque ante legationem Cretensem nihil in lucem emiseric, manifestum est omnia opera quæ litterarum monumentis mandavit, ante huius sæculi finem ab eo confecta. Horum omnium notitiam uni Leoni Diacono hactenus inedito debemus, sicuti et quisnam *Michael Psellus* ejus laudator extiterit, an scilicet, qui superiori, vel qui sequenti sæculo floruit, cum de iis nonnisi incerta fere cognitio et divinatio antea esse posset. *Symeonem* varia opera posteritati reliquisse, diserte insinuat *Michael Psellus* in ejus Encomio apud Allatium in *Diatriba de Symeonum Scriptis*, cum *Psellus* loquens de Vitis sanctorum ab eo summa cura et studio elaboratis, dicat: « Etiam si nihil aliud viro illi fuisset elaboratum, et non alia omnia, quæ nobis singula sufficiunt ad laudem conciliandam, opus tamen tale incœpisse et id tam pulchre effectum reddidisse, viro cuivis ad laudem sufficiat ». Allatius ibidem, pag. 130 et seqq. egregie discurret de ejus Operibus, tam editis, quam adhuc manuscriptis, ostenditque eum composuisse Orationes in festivitates Christi, Deiparæ et aliorum sanctorum, Orationes de moribus, Epistolas, pluresque preces quarum nonnullæ inter Rituales Græcorum libros reponuntur, ac varia Carmina lambica et Politica. Colitur *Symeon Metaphraste* a Græcis die xxviii mensis Novembris, cujus Officium a Psello Juniori compositum, ejusdemque auctoris Encomium in *Metaphrastem* idem Allatius in linguam latinam vertit. De *Michaele Psello* Symeonis laudatore, sæculo sequenti sermo erit.

11. *Venenum Tzimiscæ imp. propinatur.* — Redeo ad Leonem Diaconum, qui Joannis Tzimiscis imp. mortem his verbis narrat: « Joannes imp. e Syria profectus, inde Byzantium petebat. Videns vero in itinere positus Longiadem Drixemque, opimas plane atque feraces regiones, multis sudoribus atque cædibus a Romano pridem exercitu receptas, jurisque pristini Romanorum ac ditionis factas, tunc vero a Basilio præfecto ac accubitore possessas indigne, merito ferebat, atque viro insatiabilem habendi cupiditatem avarumque animum improperabat. Is vero quid palam reponeret habebat nihil, cum imperatoris indignationem timeret. Clam vero illius verba subsannabat, jamque sibi durum effectum horum amoliri cogitabat. Veniens itaque imperator ad Atroæ vallem ad Olympi radices sitam, ad Romani patricii ac Sebastophori dignitate fulgentis ædes diverlit. Ibi ferunt spadonem quemdam imperatoriæ aulae ejusque ministrorum, sive ipse a se infenso in eum erat animo, sive ab aliquo eorum qui bonis

invident, rerumque mutationes vel maxime avent, sollicitatum, atque numerum pollicitationibus illectum (quod plane fama vulgatus veriusque habetur) temperato veneno inter procula propinasse imperatori; imperatorem vero nihil ejusmodi cogitantem velut salubrem potum venenum ebibisse. Prostridie itaque membrorum torpor totiusque corporis defectio invasit. Medica omnis sagacitas ac solertia repentina vi morbi vana comprobata et inefficax, cum ejus symptomatis ratio per illius regulas haud certo dignosci potuisset.

12. *Tzimisces imp. Byzantium petit.* — « Porro imperator, quo prius pollebat gyganteum robur repente collapsum sentiens, Byzantium venire properabat. Ut ibidem urna, quæ in Salvatoris templo ab eo exstructo illius corpusculo parabatur, quam citius perficeretur, omnem diligentiam adhibebat. Contento itaque itinere ad urbem Augustam venit, amanterque a civibus acceptus, sed qui jam fractis viribus esset ac languescens, aliumque pectore ac difficilem halitum trahens perspiraret. Jam vero in palatium devectus, lecto decumbebat, veneni vi fatiscens, longèque attritis viribus.

13. *Moritur.* — « Intelligens vero fore, ut ex tali labe haud emergeret, (veneni namque vis dire intus viscera despasebatur) apertis rei privatae thesauris, large ex eis pauperibus erogabat, maxime leprosis, et qui corpora sacro morbo exesa circumferrent, in quos supra reliquos pauperes humaniore affectu ducebatur. Vocatoque Nicolao Adriano-politano episcopo, viro divino ac venerabili, suas per vitam ignorantias ei detegebat, lacrymarum rivos oculis deducens, harumque lavacro turpia sua sordesque delictorum abstergens. Nec non sanctam Deiparam propense adjutricem in die iudicii inclamans, tunc nimirum cum mortalium actus coram ejus Filio Deoque justa trutina inviolabilique iudicio appendentur. Tali nimirum sincera mente ac corde contrito imperator, exhomologesi peracta, ex humanis migrat, et ad vitæ futuræ requiem transit, Januarii mensis die decima, Indictione quarta, anno sexcies millesimo quadringentesimo octogesimo quinto (sed loco *quinto* legendum *quarto*; est enim hic annus mundi secundum Constantinopolitanos) sepultus in Salvatoris ad Chalcem templo, quod is magnifice a fundamentis exstruxerat. Talem vitæ finem nactus est Joannes imp., vir scilicet brevi corporis statura, sed qui heroicam fortitudinem ac robur circumferret; bello plane strenuus et insuperabilis, atque in periculis magni fortisque animi. Vixit omnes vitæ suæ annos quinquaginta unum: rexit vero imperii gubernacula annos sex, dies triginta ».

14. *Ope Historiæ Ms. Leonis Diaconi varii errores correcti.* — Quibus verbis *Leo Diaconus*, vir Asiaticus ut ipsemet asserit, Historiam suam ab obitu Constantini Porphyrogenetæ imp. ad mortem usque *Tzimiscae imp.* perductam absolvit, quam notam summarie in haec Criticam inseruimus, ejusque ope varios errores correximus. Is

enim auctor coævus fuit, alique historici Byzantini qui tardius scripsere, non raro peccarunt; quod vel ex laudatis verbis perspicuum fit. Hactenus *Tzimiscae imp.* obitum cum mense Decembri currentis anni recentiores omnes auctore Cedreno copularunt, cum tamen *Tzimisces* usque ad diem decimam mensis Januarii insequentis anni vitam protraxerit. Ait Cedrenus *Basilium* et *Constantinum* Romani Junioris filios, mense Decembri imperium inivisse, quod et ex Curopalate Baronius habet; sed ex mox dictis liquet, id nonnisi anno sequenti contigisse. Quot vero annos *Basilius Porphyrogennitus* cognominatus, et *Constantinus* frater tunc nati fuerint, liquet ex dictis anno MCDLX, num. 8.

15. *Basilius patriarchatu Constantinop. dejectur.* — Ad num. 10. Basilium patriarchatu Constantinopolitano anno superiori dejectum ostendunt, Zonaras, qui ait eum *post quadriennium suæ designationis* loco motum esse, et Leo Diaconus, qui ea de re agit, cum de iis quæ anno superiori gesta sunt loquitur: « Tunc et patriarcha Basilus », inquit Leo Diaconus, « episcoporum invidia apud imp. calumniam passus, quasi in aliquem procerum moliretur transferre imperium, nec Ecclesiam regeat ex præscripto sacrorum canonum, ad imp. tribunal vocatur. Quoniam vero canuebat, ac OEcumenicam Synodum cogendam asserebat, in eaque diluenda esse crimina aiebat; hoc enim etiam velle divina Patrum constituta cogendam universalem Synodum cum patriarcha deponendus sit: in monasterium ad Scamandrum situm, ac quod ipse exstruxerat, imperatoris jussu relegatur. Vir scilicet nullo pæne cibo utens ac carnis expers, qui a teneris jam unguibus religiosæ palæstræ laboribus ultra humanum modum exercitatus esset, vir uno amietu æstate hyemeque utens, nec ante exuens quam diffunderet nulliusque jam operæ factus esset. Alius ei nullus cibus aut potus quem gustaret, præterquam aquam nuceque ac poma. Aiunt præterea nec in lecto quidem cubavisse, sed humi per omne tempus, quo religiosa palæstra certavit. Hoc unum viro vitio datum ferunt, quod longe plurimi haberet, ut hominum instituta moresque ac actus cognosceret, atque iis rimandis curiosiusque scrutandis quam pro officii ratione, majorem operam poneret.

16. *Antonius Studites in ejus locum subrogatur.* — « Basilio itaque exilio damnato, patriarchalia gubernacula Antonius regenda suscipit; vir in Studii monasterio a juventute asceticam professus disciplinam, vitamque ducens Apostolicam; præter enim necessaria indumenta ac quibus caro tegatur, ferebat nihil; tametsi a viris principibus, ipsisque imperatoribus plurimum coleretur. Neque vero id solum, sed et quos sumptus habebat ex ea dignitate qua fulgebat, (prius enim Syncelli dignitate ornatus fuerat) omnes in pauperes erogabat, divinaque et humana scientia, si quis alius, pollebat. Vultu totaque corporis compositione, mirabi-

lem quamdam gratiam in profundissima canitie lucentem exhibebat. Nec enim ullus eorum qui deliciis diffundunt, altumque vanorum tabernaculorum sapiunt, ad eum divertebat, qui non statim castigatior abiret. Nec contra, funestissimis malis arummosam quisquam trahens vitam, qui non æquo animo discederet.

17. *Moritur Edgarus Angliæ rex.*— Ad num. 11 et seq. « Anno nongentesimo septuagesimo quinto, Anglici orbis Basilæus, flos et decus antecessorum regum, pacificus rex Edgarus : non minus memorabilis Anglis, quam Romulus Romanis, Cyrus Persis, Alexander Macedonibus, Arsaxes Parthis, Carolus Magnus Francis, Arthurus Britannis, postquam cuncta regaliter consummavit, anno ætatis suæ trigesimo secundo, regni autem illius in Mercia et Northymbria decimo nono, ex quo vero per totam Angliam regnavit, decimo sexto, Indictione tertia, octavo idus Julii, feria quinta, ex hac vita transivit : filiumque suum Eadwardum et regni et morum reliquit hæredem », inquit Hovedenus pag. 426. « Post mortem Edgari, res et spes Anglorum retro sublapsæ sunt », inquit Malmesburiensis lib. 1 de Reg. cap. 8, quia scilicet duplex factio utramque Rempublicam vexavit, et æque pro corona ac pro Ecclesia certatum, uti narrat Baroni-
 nus. Susceperat *Edgarus Edoardum* ex Ethelfleda priori uxore, et *Ethelredum* ex Elfrida secunda uxore, indeque quidam post Edgari mortem filium ejus primogenitum, quidam vero fratrem ejus regem volebant, et istis noverca Edoardi favebat. Præterea optimates plurimi, abbates cum mona-

chis de monasteriis in quibus rex Edgarus eos collocarat, expulerunt : et clericos, ut prius, loco eorum, cum uxoribus induxerunt. Sed *Edgaro* mortuo, longe acrius quam antea secunda quæstio ventilata est, et auctior clericorum spes monasteria repetendi ; cum reginam a se stare, et ex optimatibus aliquos dudum persensissent. Hinc bis terve Synodus coacta est, ut passim auctores Anglici notarunt. « Archipræsules Dunstanus et Oswaldus cum coepiscopis, abbatibus, ducibusque quamplurimis in unum convenerunt, et Eadwardum, ut pater suus præceperat, elegerunt, electum consecraverunt et in regem unxerunt », inquit Hovedenus citatus, qui narrat etiam optimales aliquos, congregato exercitu, monasteria Orientalium Anglorum defendisse, et a monachis fortiter stetisse. Plura de his Alfordus hoc anno.

18. *Obitus primi califæ Egypti.*— *Muazzus Lidinilla*, qui primus fuit califa Egypti, postquam regnasset annos tres et viginti, anno Hegiræ cccclxv obiit, eique successit *Azizus Billa* filius, ut videre est apud Elmacinum lib. 3 Hist. Sarac. cap. 4. *Muazzus* vero ante captam Egyptum in Africa regnarat.

19. *Floret Suidas.*— Hoc tempore floruisse videtur *Suidas* arte Grammaticus ; voce enim Ἀδύα diversas annorum summas colligens computationem suam terminat in obitu Joannis Tzimiscis imp. hoc anno morte sublato. Condidit Lexicon prolixum, in quo non pauca habet ad Historiam Ecclesiasticam spectantia, et varia veterum fragmenta sæpe auctoris nomine non memorato.

BENEDICTI VII ANNUS 2. — CHRISTI 976.

1. *Bardæ rebellio.*— Redemptoris annus nongentesimus septuagesimus sextus Indictione quarta sequitur, quos ubi imperatoribus junioribus, moderante habenas imperii Basilio præfecto Vigilum, qui e medio Joannem imperatorem sustulerat, eodemque Bardam cognomento Sclerum, Orientis ducem quem susceptum haberet, in ordinem reducere conante : ipse Bardas snorum consilio militum imperatoris nomen usurpat, et insignia sibi vindicat, « confisus (inquit Cuiropalates) cujusdam monachi hujusmodi vaticinio, quod per quietem

ita fuerat patefactum. Videbatur enim sibi videre homines igneos, qui Bardam assumptum in quamdam celsissimam speculam adducerent, ibique occurrere se mulieri humana specie insigniori quæ sibi regium flagellum traderet. Hoc flagellum Bardas symbolum existimabat imperii, sed revera contra Romanos erat divina ira ». Ita quidem : nam magna affecit calamitate Orientale imperium. Quo pariter anno ob Bardæ rebellionem Antonium Studitam patriarcham sponte se abdicasse, vacasseque sedem illam annis quatuor, idem tradit Cuiro-

palates. Non enim datus est ei successor, quousque idem Antonius vixit. Qui numerant ejus sedis annos ad ipsius obitum, quo successor est datus, sex annos ipsius patriarchatui tribuunt.

2. *S. Nili res gestæ mirabiles, inter quas conversio Eupraxii præfecti.* — Iidem qui habenas imperii moderandas susceperunt Basilius et Constantinus, ad regendas oras Occidentales, Calabriae videlicet regionem, misere Leonem domesticum comitem, et Nicolaum protospatharium, de quibus est mentio in Vita sanctissimi patris Nili, cujus familiaritatis usu iidem ad meliorem frugem conversi sunt. Fuit Nilus iste ab origine græca Rossani in Calabria civitate natus, doctrina atque pietate insignis, ab infantia Dei cultor eximius, et post matrimonium vitam monasticam sectatus, brevi omnes ejus instituti professores facile antecelluit, notus ubique tam in Oriente quam in Occidente, conspicuus fulgore virtutum. Cujus res gestas græce conscriptas ab ejus discipulo latinitas hactenus nunquam vidit, qui prius ex antiquo Codice monasterii Cryptæ-Ferratæ tradidit latinitati, noster Federicus Metius, episcopus Thermularum, a quo ego primus accepi, et nonnulla ex eis pro ratione temporis nostris Annalibus opportuna occasione contexui. Et quod ad præsentem pertinet annum, qui res ab eo gestas scripsit, primum cum eis habitum congressum, magni ponderis ita narrat : « Venit metropolita Calabriae Theophylactus, et cum eo domesticus Leo viri litteratissimi et doctissimi. Sed beatus pater noster Nilus fugiens populi tumultum, et dilectum sibi silentium semper complectens, exivit a civitate ad templum sancti Joannis Baptistæ eremi cultoris, cujus etiam vitam imitabatur, et ibi cum Deo conversabatur, et meditationi operam dabat. Ingressi autem sunt ad eum alloquendum metropolita et domesticus, et principes civitatis et multi sacerdotum, et populi magna pars. Inierunt autem consilium in via, quisnam ipsorum interrogare deberet, quodve ex arcanis Scripturæ, non tam cognoscendi causa quam periculum faciendi cupidi.

3. « Cum vero ex adversa parte sederet beatus Nilus, et vidisset eos ad se venientes, dicit intra se : Cur nunc isti accedentes ad vana colloquia nos conjicient ? Sed o Domine JESU Christe, libera nos a laqueis alienis et concede nobis intelligere et loqui quæ oportet, et facere quæ tibi sunt placita. Et cum orasset, aperit quem præ manu habebat librum, et forte fortuna invenit revelationem factam sancto Symeoni in admirabili monte. Cum igitur illi appropinquassent, et post salutationem sedissent, beatus Nilus tradit librum domestico, ut legeret ubi erat signum. Ille vero aperiens os suum, cœpit valde diligenter et attente legere. Cum vero venisset ad locum illum, ubi dicit quod ex decem millibus vix reperitur una anima his temporibus, quæ ad manum sanctorum Angelorum perveniat : cœperunt omnes quasi uno ore dicere : Absit, hoc non est verum : hæreticus est,

qui hoc dicit. Nos igitur frustra baptizati sumus, et Crucem adoramus, et communicamus, et Christiani dicimur ? Hæc et his similia cum omnes objicerent : cum videret beatus Nilus quod metropolita et domesticus nihil illis dicunt, humaniter ipse respondit, et dicit : Si vero demonstravero vobis, magnum Basilium, et Chrysostomum, et Ephrem beatissimum, et Theodorum Studitam, sed et Apostolum ipsum, necnon sanctum Evangelium eadem sentientes et dicentes, quid patiemini vos, qui inconsulte aperientes ora loquimini, et Spiritui sancto adversamini, et sanctorum Patrum metuenda verba hæreticis tribuitis propter vitæ vestræ iniquitatem ? Dico autem vobis, fratres, quod ex omnibus quæ fecistis, nulla erit vobis gratia apud Deum. Quæ enim idola, aut quam hæresim vos reliquistis, et Christo adhæsisistis ? audetne aliquis vestrum dicere quod hæreticus sum, et ingressus civitatem non ab omnibus lapidibus obrutus interficietur ? Intelligentes, quod nisi virtute præditi fueritis et magna etiam virtute præditi, nullus vos liberabit a pœnis inferni. Hæc cum omnes audissent, valde perterriti cœperunt suspirare et dicere : Væ nobis peccatoribus et miseris. Dicit autem illi Nicolaus protospatharius : Pater, quare dicit Evangelium, quod cuicumque parvum calicem aquæ frigidæ dederit, non amittet mercedem suam ? Respondit illi : Propter hoc dictum est illis qui nihil habent, ut nullus excusetur quod nec habeo ligna, quibus calefaciam aquam. Quid vero facietis vos, qui pauperibus frigidum calicem aufertis ?

4. « Illo vero tacente, surgit alius, et ait : Scire vellem, sancte pater, an salvus sit admirabilis ille Salomon necne ? Cum vero spiritu cognovisset pater, adulterii vitio illum detentum, respondit ipsi : Scire ego etiam vellem de te, an salvus sis necne ? Quæ enim utilitas mihi vel tibi ex salute vel damnatione Salomonis ? Non enim illi, sed nobis præceptum fuit illud¹ : Quicumque respexerit mulierem ad concupiscendam eam, jam mœchatus est cum ea. Et illud² : Si quis templum Dei corruperit, corrumpet illum Deus. De Salomone autem nihil usquam reperimus in sacra Scriptura, quod pœnitentiam egerit post peccatum, sicut de Manasse. Quis igitur de illo dicere poterit quod salvus sit ? » Pergit auctor dicere curiosas aliorum interrogationes, et sapientes beati Nili responsiones, quas brevitatis causa prætermittimus : illud tantum subjicientes, quod in derisorem terribile manifestatum est Dei judicium in ira sua ex prædictione ejusdem sancti senis. Ait enim :

5. « Non multo post, accedunt ad eum Nicolaus protospatharius et domesticus Leo, cupientes audire utilem ejus doctrinam et admonitiones ab eo, et cum satis confabulati essent, et illos admonuisset Nilus, ingressus est ad cellulam suam, ut

¹ Matth. v. — ² Cor. iiii.

iterum Deo incumbere. Illi vero extra in quodam loco cum super herbam reclinassent, et parvum caputium cujusdam fratris cum invenissent, ponebant illud super capita sua domesticus ille et protospatharius, ridentes simul et ludentes. Quod cum vidisset Nilus per fenestram, et vehementer increpasset illorum scurrilitatem, graviter illos reprehendit, dicens : Hoc quod nunc vos irridetis, ecce veniet hora, in qua cupietis vehementer illo indui, et non eritis digni. Hæc ille. Cum et una cum prophetico sermone hoc rigor et capitis dolor domesticum occupavit, qui domum suam quamprimum reversus, ad cubile se dejiciens, præcepit vocari ad se aliquem ex religiosis sacerdotibus, qui cum venisset, et ad cubile appropinquasset, ut diceret, quam de causa ab eo vocatus esset, invenit illum jam mortuum. Qua re cognita, timor occupavit eos, qui cum ipso venerant a monasterio, et omnes admirati sunt S. Nili prædictionem ».

6. Missus est autem post eum Constantinopoli ab imperatoribus Eupraxius præfectus, qui eandem provinciam administraret, qui alias ante eadem perfunctus erat præfectura, quocum fuit beato Nilo haud leve certamen ; sed gratia Dei summa gloria victor evasit. Sunt hujusmodi : « Cum itaque reversus esset Eupraxius cum multa elatione et fastu, cum ab imperatoribus constitutus ipse esset iudex Italiæ et Calabriæ : omnes quidem præpositi monasteriorum regionis illius accedebant ad eum cum muneribus et adulationibus, orantes eum singuli, ut ipsos protegeret et sibi opem ferret. Beatus vero pater Nilus, ne videretur vel comminationes hominum metuere, vel confidere principibus, quos præ contumelia, filios hominum Propheta ¹ vocavit, in quibus non est salus : neque accessit adulaturus, neque donis comminationes superbix illius et audaciæ lenire quæsit, sed in suo manens monasterio, et quieti incumbens, Deum rogabat pro totius mundi salute, et pro anima Eupraxii præfecti. Quod quidem ad majorem furorem et insaniam accendit cor superbi illius : quia cum ab omnibus honoraretur et coleretur, a beato Nilo aperte contemni videbatur. Quapropter non destitit quærere iniquitatis occasionem adversus justum illum, cum non inveniret. Non enim cognosci potest vestigium colubri super petram, quemadmodum nec principis iniquitatem in homine coronato est facile reperire. Interea dum ille animo conflictaretur, multa mala adversus Nilum meditatur. Repentina imminabat illi mors, sed beati Nili oratio illam præoccupavit.

7. « Morbus quidam, qui cancrena dicitur, circa glandem virilis membri cum illi ortus esset, medicorum inutilem artem esse arguebat : pœnas autem dabat luxuriæ instrumentum, propterea quod incontinentia sua naturæ legem afficiebat injuria. Ad hæc itaque conversus, et temeritatem suam, qua adversus sanctum usus fuerat, dete-

status (erat enim satis prudens vir ille, licet potestatis magnitudine satis fuerat elatus) supplex efficitur, qui antea comminationibus obstrepebat, si quo pacto fieri posset, ut ejus aspectum tantum intueri obtineret, et benedictionem et absolutionem ab eo accipere mereretur. Beatus vero Nilus in præsentia quidem procrastinabatur coram cum illo agere, cum nec eum ipse reciperet venientem ad monasterium, nec vellet illum adire, et ejus preces perficere et adimplere, hoc pacto salutem illi procurando. Sciebat enim congruo tempore gravitate et severitate uti, ut par est, adversus eos, qui sensu rationis carent. Cum igitur tribus annis morbus ille a Deo immissus paulatim assumpsisset occultas partes, accessit tandem principi membro, et mortem illi comminabatur ejus corruptione. Tunc accessit ad eum spiritualis medicus, precibus, adventu et epistolis humanissimis. Cum igitur vidisset Eupraxius beatum Nilum, et reverendos ejus pedes amplexus esset, tantam lacrymarum abundantiam effudit, illos deosculando, ut et ipse sanctus pater, et omnes qui aderant, collacrymarentur cum eo vehementer. Nihil enim aliud licebat videre in ipsis, vel alicui comparare, quam peccatrici illi Evangelicæ in contritione tenenti pedes Domini, et remissionem ab eo petenti delictorum suorum. Cum itaque beatus Nilus vidisset ipsum lacrymis satiatum, quasi infantem proprio ubere, extendens manum, eum suscepit et sublevavit. Ille vero cum omnibus præcepisset, ut egrederentur, cœpit denudare ei morbum animæ per corporis morbos, et lacrymans dicebat : Ecce, venerande pater, tribus annis, noctu diuque torqueor hoc morbo gravissimo, doloribus maximis et ineffabili fœtore afflictus, quem neque multis unguentis adhibitis, neque vestium frequenti mutatione (septies enim in die mutor) vitare potui. Erat enim morbus (ut beatus dicebat) ¹.....

8. « Iterum igitur manus beati Nili Eupraxius tenens, lacrymis illas ablundo, aiebat : Miserere mei per Dominum, o imitator Christi Domini, et dignare venerandis hisce manibus tuis me tondere, licet omnibus vitiis plenum et inquinatum. Vovi enim Deo fieri monachus. Dixit autem illi beatus Nilus : Non licet tibi viro prudenti et valde perito vulgarium hominum verba sapere atque proferre : omnes enim qui sacro baptismo sunt insigniti, et illud immaculatum ab omni peccato non custodierint, debent absque voto aliquo iterum suscipere pœnitentiæ baptismum, quem pro magna sua misericordia et bonitate Deus hominibus largitus est, divitibus, pauperibus, regibus et principibus, sacerdotibus et pontificibus, et omni animæ quæ voluerit in temporis momento regenerari, sicut aquilæ juvena, et liberari ab omnibus præteritis peccatis. Quod autem dixisti ut te tonderem : humilis monachus ego sum, nullum sacerdotalem gradum adeptus. Hic autem est metropolita (ade-

¹ Psal. CLV.¹ Desunt aliqua.

rat enim ibi tunc temporis metropolita sanctæ Severinæ), sunt etiam hic episcopi et archimandritæ, ipsi desiderium tuum impleant. Ego enim quid sum ut hoc mihi sumam? Ille vero iterum manus deosculando beati patris Nili orabat, illum obtestando, ut hoc opus non demandaret alteri, sed per eum sanctum et Apostolicum habitum susceperet, et mediator et protector sibi esset coram Deo. Victus igitur beatus Nilus lacrymis et precibus ejus, suis manibus ipsum totondit, et induit eum vestibus venerandæ humilitati statutis, cum videlicet qui mollibus et latis vestibus paulo ante induebatur. præsentem metropolita Stephano cum episcopo castri, et præpositis monasteriorum non paucis et aliis sacerdotibus.

9. « Aderat et Judæus ille Domnolus medicus, cujus antea mentionem fecimus, spectator omnium quæ fiebant. Qui egressus inde, et quod gestum erat admiratus, dixit illis qui aderant: Vidi hodie mirabilia, quæ olim facta audivi. Nunc vidi prophetam Danielem cicurantem leones. Quis enim unquam potuit huic leoni manus imponere? iste vero junior Daniel et comam totondit illi, et caputium injecit. Et hæc quidem dicebat Hebræus. Eu-

praxius vero, postquam totum angelicum officium peractum fuit in seipso, hortatus omnes ad prandium, cum seipsum composuisset, et accinxisset instar famuli, illis servire satagebat, qui ante multos dies e cubili surgere non poterat, confirmatus virtute sancti Spiritus, et gratia manuum beati Nili. Cum vero imperatum illi esset ut sederet prope ipsum: petiit iterum, ut sibi liceret instar famuli ministrare mensæ, et hoc facto, omnes stupebant præ vigore et promptitudine viri illius, et Deum glorificabant. Post hæc autem cum omnia bona sua pauperibus dedisset et Ecclesiis, et omnibus egenis et domesticis cum aliquid legasset, et servos libertate donasset: tertia die ad Dominum profectus est cum omni contritione et gratiarum actione, fide et spe secunda ad illum properans, qui per prophetam dixit: Nolo mortem peccatoris, sed magis ut convertatur et vivat ». Illic finis Eupraxii, qui precibus Nili ex Saulo Paulus, ex spirante minas et cædes, factus est fundens lacrymas atque preces, et ex hoste, quem habuit antea Nilum, cupiit habere pro salute suæ animæ protectorem et ducem ad Deum, quod est feliciter consecutus.

Anno periodi Græco-Romanæ 6469. — Anno Æræ Hispan. 1014. — Anno Hegiræ 366, inchoato die 30 Aug., Fer. 4. — Jesu Christi 976.

— Benedicti VII papæ 2. — Ottonis II imp. 4 et 10. Basil. et Const. imp. 1.

1. *Bardæ Scleri defectio repressa.* — Ad num. 1. Leo Diaconus, postquam verba fecit de comete anno superiori in Oriente et Occidente viso, ait illum graves defectiones variæque mala portendisse, subditque: Posteaquam *Joannes imp.* humanis migraverat, *magister Bardas* cognomento *Sclerus* imperii simul pecuniarumque amore laborans, necnon ingenti turba, plebeque facili errore seducta ac dementata, gravem adversus imperatores molitur defectionem, annosque quatuor Asiam infestavit, agros succendens, urbesque evergens, necnon Romanos conserta acie, apertoque Marte fundens et fugans, direque interimens, partim quidem *Petro patricio* ac stratopedarcha legionibus præfecto, quando ad campum *Lypparam* (est hæc confinium Armeniorum provinciæ) pugna conserta est: quando et ipse *Petrus* jaculo vulneratus ac equo excussus, in ipso conflictu efflavit animam, plurimis stipantium ejus satellitum pari nece sublati: partim vero *Barda magistro Phoca* imperatore duce. Is nimirum ab imperatoribus

domestici scholarum auctus dignitate, cum adversa *Sclero* ad *Panealiam* opposita acie (lata hæc planities et campus haud procul Amorio) obit ordines, interque medias acies fuste capiti illiso, ejusque gravi ictu, equo dejectus, ac humi prostratus est; captusque esset ab hostibus, turpique ac ingloria morte sublati, nisi per ignorantiam inter gregarios, ac quasi unus ex illis neglectus fuisset: cui nox superveniens parandæ causa salutis fuit. Porro *Sclerus* victoriis hujuscemodi elatus, animoque tumens, importabilis quidem, nec ulla subigi posse virtute videbatur. Inde Nicæa atque Abydo ac Athalia bello potitus, Asianas copias ac legiones sibi ipse addixerat, marisque jam dominator effectus, gravi mercatores damno afficiebat, ipsamque adeo urbem Augustam, non sinens annonarias ad eam more solito adnavigare, donec incendiariæ naves occulte imperatorum solertia Byzantio missæ sunt. Harum *Bardas magister Parsacutinus*, ductor derepente Abydo impulsus tyranni classem succendit, militumque agmen

confodit, ac præsidiū recepit : rursusque *Phocas* ingenti sibi adjuncto exercitu *Sclerum* aggreditur, prælioque fusum *Ecbatana* ad *Agarenos* fugam inire cogit.

2. *Phocæ rebellio repressa.* — Præterea *Bardas* magister *Phocas* adversus imperatores cervicem erexit, Asiaticasque sibi copias addixit. Portus omnes et ad mare sita oppida, una *Abydo* excepta, cepit, subductisque compluribus triremibus atque ratibus, *Hellesponti* fauces tenebat, non sinens onerarias naves in regiam urbem appellere. Ad hæc militum gravem manum, *Melisenō magistro* duce, et *Abydi* continentem, quæ et classem tutaretur et urbem expugnaret, locavit. Rursusque validum pro ipso *Byzantio* ad *Chrysopolis* tumulum, vallum fixit, ingentibus eam in rem equestribus ac pedestribus submissis copiis. Exercitui præfecti duces, ejus tum germanus *Nicephorus patricius*, tum *Calocyrys* item patricius, cognomento *Delphinus*. Hos itidem imperator *Basilius*, quantis par erat copiis, superato *Bosphoro*, conserta pugna fudit, vivosque comprehensos, *Nicephorum* quidem ac *Phocæ* germanum vinctum in carcerem compegit. *Calocyrum* vero *Delphinum* ibidem ad *Chrysopolis* tumulum, quo loco fixum tentorium erat, in crucem egit. Hæc summarie ex *Leone Diacono*, quæ cometem anno superiori visum protendisse existimat.

3. *Imperium Orientis per quadriennium bellis civilibus afflictum.* — Hæc bella civilia pluribus verbis *Cedrenus* et *Zonaras* referunt, et *Sclerum* magistrum *Bardam Sclerum* vel *Bardam Durum*, *Phocam* vero *Phocam Bardam* appellant, et *Cedrenus* de utroque perduelli addit : « Ditionem imperatoris infestando usque ad Indictionem viii perseverarunt », quæ kalendis Septemb. anni Christi DCCLXXIX auspiciata est. Tum ait : « Cæterum *Antonius* patriarcha, cum sacerdotio renuntiasset *Duro* rebellionem movente, tum temporis mortuus est : creatusque patriarcha *Nicolaus Chrysobergius*, cum per annos quatuor et dimidio *Ecclesia* pastore caruisset ». *Zonaras* vero : « *Antonius* porro patriarcha, cum sacerdotio renuntiasset, quod per sex annos tenuerat, ac paulo post obiisset, et *Ecclesia* annis iv cum dimidio vacasset, *Nicolaus Chrysoberges* est designatus ». Quare *Antonius Studita*, qui ipso initio anni DCCLXXIV patriarcha *Constantinop.* constitutus fuerat, anno nongentesimo septuagesimo nono ineunte abdicavit, et paulo post medium annum nongentesimum octogesimum tertium *Nicolaus Chrysoberges* patriarcha *Constantinop.* ordinatus est. Anni enim sex

Antonio attributi non potuere non esse incompleti, si vera sint quæ *Cedrenus* et *Zonaras* de duratione pontificatus *Nicolai* litteris prodiderunt. Ex quibus liquet, perperam *Baronium* scripsisse *Antonium Studitam* præsentī anno abdicasse, et quoad vixit, ei successorem non datum.

4. *In eo omnis auctoritas penes Basilium præsidem.* — Hoc itaque anno *Tzemisce* imp. die decima mensis *Januarii* morte sublato, ei *Basilius* et *Constantinus* *Romani Junioris* filii succedere, et, ut habet *Zonaras*, « omnis penes *Basilium* præsidem erat auctoritas : idque *Basilius* (nempe imperator) nondum sibi ipsi fidens tolerabat, etc. ut et ipse cum tempus postularet, in militaribus catalogis, et civili æquitate tuenda rationem eandem sequeretur. Erat enim alacri et excitato ingenio, non dissolutus et ignaviæ mancipatus ut frater ». Narrat postea *Zonaras* magistri *Bardæ Scleri* et *Phocæ Bardæ* defectiones, de quibus mox locuti sumus.

5. *Michael Psellus Historiam Byzantinam continuat.* — *Michael Psellus*, vir ob rerum humanarum et divinarum scientiam sequenti sæculo insignis, imperatorum *Byzantinorum* Historiam post *Leonem Diaconum* usque ad inaugurationem *Constantini Ducæ* continuavit. Ejus Historia Ms. a *Combeffisio* in linguam Latinam versa extat in Bibliotheca regia. Ex ea ad majorem *Annalium Ecclesiasticorum* illustrationem varia decerpsi. Ait *Psellus* tom. 1, cap. 1 : « *Joannis Tzemiscis* excessu rerum summa in *Basilium* et *Constantinum* *Romani* filios plane devoluta est. Erant vero ambo jam ephebis majores, diversissimis moribus. Nam *Basilius* quidem qui et ætate senior erat, pervigilis erat animi, ac cogitabundus curisque sollicitus : *Constantinus* vero cunctis remissus, laxiorque videbatur ; quique vitam segnitie duceret, ac vitæ luxuriosæ operam daret. Et ipsis quidem laudquaquam visum est, ut ambo simul imperatores essent ; sed quoniam *Basilius* major natus erat, omni ad se potestate translata, nomine tenus fratrem imperii collegam allegit. Nam neque aliter imperii gubernatio e re satis cessura erat, nisi illi qui major erat, ac solertia præstaret, *Reipublicæ* administratio pleno jure attributa esset ». Spreto a *Basilio* imp. viros eruditos *Psellus* cap. 46 affirmat : « Quamobrem, inquit, etiam mirari subit, quod cum imperator sic humaniores litteras, omnemque in eas diligentiam flocci penderet, laud exiguis per illius tempora philosophorum ac oratorum extiterit proventus (1) ».

(1) Hoc circiter anno celebrata fuit Synodus quædam *Ravennatensis*, de qua hæc auctor cœvus Vitæ S. Joannis abbatis *Parmensis* vulgata a PP. *Bollandianis* ad diem XXII Maii pag. 179 : « *Ravennam* perrexit (S. Joannes), atque ibi in sancta Synodo subter confirmante archiepiscopo cum cæteris coepiscopis decretum in prænominato monasterio (S. Joannis Evangelistæ in suburbis *Parmæ*) tali ordine conscripsit, ut si quis unquam ex successoribus suis per pecuniam aut aliunde abbatem constitueret, anathematis jaculo feriretur ». Hæc auctor de Joanne in abbatem jam consecrato a *Sigefrido II*, qui *Parmensem* episcopum non citius quam anno DCCLXXIII adire potuit. Cum autem Joannes iste post administratam abbatiam septennio, anno DCCLXXXII obierit, ut correcto errore qui in Acta irrepsit, probant *Bollandiani* ; hinc liquet Synodum *Ravennatensem* non citius anno DCCLXXV, nec serius anno DCCLXXXII celebrari potuisse. De hac Synodo nihil apud collectores.

BENEDICTI VII ANNUS 3. — CHRISTI 977.

1. *Benedictus papa dat Sergio Ecclesiam S. Bonifacii.* — Annus Redemptoris nongentesimus septuagesimus septimus, Indictione quinta incipit, quo Benedictus papa Sergio Damasci episcopo, de quo superius dictum est, Ecclesiam S. Bonifacii, sive Alexii (utroque nomine appellata reperitur), tradidit colendam, in qua ipse collegit monachos, et observantia monastica restituta, ubi annis quatuor illic degisset, sancto fine quievit. Est de his testis inscriptio ad ejus sepulcrum incisa istis versibus in dicta Ecclesia exarata, licet satis pan-nosa Musa :

Sergius hic recubat metropolita sepultus,
Qui quondam fuerat Damasci tempore longo.
Numivæ perductus ad sacra limina Petri,
Temporibus pii Benedicti Præsulis almi,
Martyris hinc templum cessit, monachosque vocavit,
Cœnobium sancti Benedicti condidit ipse.
Primo qui statuit nostræ ceramina vitæ,
Quatuor hic annos vixit sub tramite recto.

2. « Anno Incarnationis Domini nongentesimo octogesimo primo, tertio idus Novembris, Indict. nona, vixit annis septuaginta quatuor ». Illicusque ibi. Porro tanto auctore et institutore, factus est locus ille domicilium sanctorum virorum illuc accedentium et proficientium : de quibus inferius acturi sumus.

3. *Petrus Urseolus dux Venetiarum cum sociis vitam eremiticam amplexus Romualdum sectatur.* — Eodem anno sanctus Romualdus, ubi triennium exegisset in Classensi cœnobio, vitam æmulatus anachoreticam, Marimum virum sanctissimum idem vitæ genus magna excolentem observantia adiit : apud quem adeo profecit, ut suo exemplo viros nobilissimos ac potentissimos ad idem vitæ institutum sectandum attraxerit, et inter alios Petrum Urseolum ducem Venetiarum, et Joannem Gradenicum æque nobilem Venetum : de quibus ista habet Petrus¹ Damiani, quæ desiderantur apud eos, qui res Venetas stylo sunt prosecuti, rem gestam sic ab exordio petens :

4. « Eodem tempore Petrus cognomento Ur-

seolus Dalmatici ducatus gubernabat habenas. Qui videlicet ad hujus fastigium dignitatis idcirco pervenerat, quia decessoris sui, Vitalis scilicet Candiani peremptoribus fautor extiterat. Cur autem ille a suis exstinctus sit, non ab re esse arbitror, si servatæ compendio brevitatis exponam. In conjugium germanam Hugonis, magni illius marchionis acceperat, et æmulatione leviri suadente, multos ex Longobardiæ et Tusciarum partibus milites, profligatis pecuniarum stipendiis acquirebat. Hoc autem Venetiarum incolæ non ferentes, clam iniere consilium, ut repentino impetu ducis palatium armati violenter irrumperent, eumque cum omni domo sua in ore gladii absque ulla retractatione necarent. Hujus vero conventiculi conjuratione comperta, Vitalis dux nocturnis diurnisque vallatus excubiis hostiles insidias ad nihilum redigebat. Illis autem hæc et illa tentantibus, sed ad inceptæ factionis effectum attingere non valentibus, tandem visum est, ut domum Petri, quæ ducis palatio adjacebat contigua, prius incenderent, istoque modo et ducem caperent, et universa ejus domestica concremarent. Istius vero rei experiendæ consensum a Petro, qui tunc eorum consilii particeps fuerat, flagitantes, ita inter se pacti sunt, ut pro una ejus domo, quam igne consumerent, totam illius ditioni Venetiam subderent, et dejecto illo quem exosum habebant ducem, hunc loco ejus protinus subrogarent. Illoc igitur modo Petrus Dalmatici regni adeptus est principatum ». Qui persecutus est res Venetorum Sabellicus, de his agens, non Vitalem Candianum, sed Petrum id fecisse testatur ; Vitalem vero ejus filium fuisse, incendiumque adeo vehemens excrevisse, ut non solum ducis palatium, sed et sancti Marci Basilicam atque Theodori Ecclesiam simul et trecentas privatas domos combusserit.

5. Porro ipsam S. Marci Basilicam fuisse ab eodem Petro Urseolo privato sumptu et majore quam antea apparatu restitutam tradit. Quibus peractis, se sponte ab ea abdicavit dignitate, atque secreto cum paucis sui consilii conscis in Gallias profectus, illic usque ad obitum magno nomine sanctitatis vitam transegerit : idem vero vitæ insti-

¹ Apud Sur. tom. III, die XIX Jun. c. 6. 7. 8. 9.

tutum una cum ipso arripuisse Joannem Gradenicum nobilem Venetum, Petrus Damiani æque testatur, qui eo nomine commendatur, quod corpora tyranni atque filii ejus ad macellum allata et canibus projecta, ab oculis populi furentis subtracta, sepulturæ tradenda curavit. Idem vero Petrus cœptam semel de his orationem sic prosequitur, atque de Petro Urseolo duce creato hæc ait: « Ille postmodum ambitionis suæ voluptate potitus, respectu divinæ gratiæ demum corde compunctus est.

6. « Quidam tunc venerabilis abbas, Guarinus nomine, ex ulterioris Galliæ finibus orationis gratia per diversas mundi regiones peregrinari solitus erat. Hic igitur ad ducem veniens, ab eo protinus, ut sibi ad evadendi tanti reatus periculum consilium præberet, rogatus est. Itaque accersitis Marino et Romualdo in illis partibus vitam eremiticam excolentibus, hoc sibi communi jubetur sententia, ut sæculum simul cum ipso, quem per nefas invaserat, ducatum relinqueret, quia alienæ potestatis dominium subjugaverat. Ille homo, Petrus nimirum, in potestate positus, quia conversionem suam manifeste facere ausus non est, tutum putavit hoc ulendum esse consilio. Imminente igitur festività sancti cujusdam martyris, et cujus vocabulo Basilicam in propria possessione adhuc privatus habuerat, illuc pridie uxorem suam præmisit, ipse quasi mox secuturus, hoc ei præcipiens, ut ornatum Ecclesiæ accuratissimum provideret, et secum venientibus sumptuosas epularum delicias in crastinum præpararet. Ipse autem post conjugem remanens, iis de suis thesauris, quæ videbantur, ablatis, cum quodam suo familiari, Joanne scilicet Gradenico, qui prædictæ conjurationis conscius fuerat, et cum tribus illis beatis viris, quos præmisimus, Guarino, Marino et Romualdo, navem ascendit, deinde in Galliam ad monasterium abbatis Guarini magnus conversus aufugit ». At cum vir potestatem non habeat (ut docet ¹ Apostolus) sui corporis, donec vixerit conjux ejus; quod adeo in Ecclesia vulgatum, haud est verisimile ignorasse tres illos sanctissimos viros, qui hoc ipsi faciendum suaserunt, nec qui eorum consilio paruit Petrus Urseolus: ideo dicendum videtur ad excusationem aliquid intercessisse ex causis illis, quibus præviis, quod fecit, jure facere potuisset.

7. Quomodo autem profecti simul in Gallias secuti Guarinum, haud longe ab ejus monasterio vitam egerint anachoreticam quatuor isti, Petrus Urseolus, Joannes Gradenicus, Romualdus atque Marinus, victumque sibi labore manuum comparantes magna austeritate carnem domuerint, illicque peregrint plura annorum curricula, atque demum jam vita bene perfuncta Petrus Urseolus migravit in cælum; Guarinus vero atque Joannes, Marinus et Romualdus sint reversi in Italiam, eodem, a quo impulsus fuerant in desertum, mo-

nente Spiritu: fusius narrat idem Petrus Damiani in Romualdo, quem consulat, qui ista copiosius cupit. Illud vero non tacendum, quod Urseolus filio ad invisendum in Gallias venienti futura prædixit; ait enim ¹: « Hunc Petrum Urseolum filius ejus sibi æquivocus, vir valde secundum sæculum prudens aliquando visitavit: cui pater, nescio utrum prophetiæ spiritu, seu revelatione aliqua quæcumque sibi essent eventura prædixit: Novi, inquit, fili mi, proculdubio, quia ducem te constituit, et prosperaberis. Tu tantummodo satage, ut et Ecclesiis sua jura conserves, et erga subditos alicujus amore vel odio a justitia non declines ». Hæc Petrus Damiani.

8. Quæ autem, dum in Galliis viri isti sanctissimi morarentur, contigerint de admiranda Olibani comitis conversione, sic accipe ab eodem auctore ²: « Alius quidam comes, Olibanus nomine, in iis Galliarum Aquitaniæ partibus, sub ejus jure monasterium prædicti Guarini abbatis fuerat positum, qui sublimi quidem culmine terrenæ potestatis erectus, sed multis erat peccatorum molibus aggravatus. Hic aliquando Romualdum gratia visitationis adiit, et cæteris extra cellulam manentibus, solus cum solo gestorum suorum seriem narrare, quasi per confessionem cœpit. Cui vir venerabilis, his quæ ab eo referebantur auditis, respondit, eum aliter salvari non posse, nisi mundum relinquens, ad monasterium convolare. Comes autem mox mente turbatus, ait, quia sui spirituales viri, qui ejus acta cognoscerent, nequaquam ita sentirent, neque tam intolerabilem rem sibi aliquando suaderent.

9. « Adscitis itaque episcopis et abbatibus qui secum venerant, cœpit in commune perquirere, si ita res, sicut Dei servus testabatur, se haberet. Illi autem beati Romualdi sententiam omnes unanimi voce confirmant; se vera comiti eatenus non dixisse terrore constrictos excusant. Tunc comes semolis omnibus hoc cum beato Romualdo secreto valde consilio pepigit, ut ad Cassinum montem sub prætextu orationis pergeret, et in monasterio sancti Benedicti divino se servitio irrevocabiliter manciparet ». Et inferius: « Olibanus autem comes sua relinquens filio, cum multa divitiarum copia, quindecim scilicet onustis thesauro sagmariis, comitantibus eum Guarino et Joanne atque etiam Marino, ad beati Benedicti se monasterium contulit, et valedicens his qui secum venerant, nihil tale de eo usque tunc suspicantes, multis gemitibus et amaris fletibus se affligentes, ad propria remeare coegit, etc. » Hæc eadem de Olibano comite habetur in Chronico ³ Cassinate a Leone Ostiensi episcopo scripto.

10. *S. Rudesindi episcopi Compostellani obitus.* — Hoc eodem anno, die prima Martii ex hac vita in cælum migravit S. Rudesindus Compostel-

¹ Apud Sur. tom. III. d.e XIX Jun. c. 9. — ² Ibid. c. 13. et 16. —

³ Leo Ost. Chr. Cass. I. II. c. 19.

lanus episcopus, cujus res præclare gestæ ab Ordonio scriptæ extant, ex quo ¹ Ambrosius Morales, pleraque de ipso, sed summatim perstricta, in Chronicis habet, et ex condito ab eo pio valde ante obitum testamento pauca ista ejus principii ita reddidit, ex quibus cætera mediteris :

11. « Suscipe, quæso, Domine, humillimam precem tui licet indigni famuli Rudesindi, prolis Gulerris et Ilduardæ, et da in corde meo vota quæ

suscipias, et da in ore verba quæ compleas, et da in manibus meis opera quæ complenda approbes, atque operata justifies, etc. » Relatus est autem inter sanctos, publicæque venerationi omnium Christianorum expositus ab Apostolicæ Sedis legato Hyacintho S. R. E. cardinali, anno Redemptoris millesimo centesimo quinquagesimo sexto, sub Alexandro papa tertio, quæ cuncta factus ipse postea Pontifex nominatusque Cælestinus tertius confirmavit, atque ea, quæ ad solemniores ritus defuissent, explevit.

¹ Amb. I. XVI. c. 36.

Anno periodi Græco-Romanæ 6470. — Anno Æræ Hispan. 1015. — Anno Hegiræ 367, inchoato die 19 Aug., Fer. 1. — Jesu Christi 977.

— Benedicti VII papæ 3. — Ottonis II imp. 5 et 11. Basil. et Const. imp. 2.

1. *S. Romualdus vitæ eremiticæ tyrocinium ponit.* — A num. 3 ad 10. Florebat hoc tempore sanctus Romualdus, qui postea eremiticæ vitæ in Italia restitutor et propagator ac ordinis Camaldulensis fundator fuit. Ejus Vita a Petro Damiani S. R. Ecclesiæ cardinali sanctitate vitæ conspicuo, cum *tria jam fere lustra transacta essent* a morte sancti Romualdi, scripta, ut ipsemet in Prologo testatur. Tum rursus ab Hieronymo eremita Camaldulensi, Hieronymo Pragensi appellato, Apostolicis laboribus in fide Barbaris prædicanda clarissimo, annoque millesimo quadringentesimo quadragésimo demortuo, etiam elucubrata. Utamque refert Bollandus ad diem VII Februarii. *Romualdus* Ravennæ ex illustrissima progenie natus, quod pater inimicum occidisset, tanti reatus pœnitentiam, quia ipse interfuisset, accepit, et monachum induit in monasterio sancti Apollinaris. In eo triennium fere transegit; sed cum cerneret, nonnullos remissius vivere, et perfectionis amor in ejus animo magis ac magis in dies cresceret, venit in Venetiarum partes ad *Marinum* eremitam magnæ sanctitatis ac simplicitatis virum. « Eodem vero tempore Petrus cognomine Urseolus, Dalmatici ducatus gubernabat habenas. Qui videlicet ad hujus fastigium dignitatis ascendere idcirco meruerat, quia decessoris sui, Vitalis scilicet Candidiani peremptoribus fautor extiterat ». Hæc omnia Petrus Damiani, cujus reliqua verba recitat Baronius.

2. *B. Petrus Urscolus dux Venetiarum fit monachus.* — Mabillonius Sæc. V Benedict. refert vitam beati *Petri Urseoli* ducis Venetiarum et Dalmatarum, ac monachi sancti Michaelis de Coxano

in Catalonia, quæ scripta fuit ab anonymo incertæ ætatis, ac saltem sæculo integro post Urseoli mortem. In ea nonnulla sunt, ut observat vir doctissimus, quæ a Petri Damiani sensu discrepant, multa etiam prætermissa, quæ ab illo commemorantur : ut Petri Urseoli famæ consulturum se putaverit auctor iste anonymus, si prava quædam ejus opera dissimularet : qua tamen in re rerum Veneticarum scriptores nonnullos sectatores habuit. Illud autem imprimis movet, quod Petri Urseoli decessorem Vitalem Candidianum vocet Petrus Damiani præter receptam aliorum omnium sententiam, qui communi ore, non *Vitalem*, sed *Petrum Candidianum* eum appellant : Vitalem vero Petri Candidiani filium Urseolo substituunt. Qua in re, sicut et in quibusdam aliis, anonymus a Petro Damiano dissentit; anonymus enim asserit *Urseolum* fugam meditantem ambobus filiis, Joanni ac Petro, Venetiarum et Dalmatiæ principatum asseruisse, quod stare minime potest. « Petro et Joanne Gradenico monachis in sancti Michaelis cœnobio factis, Marius et Romualdus non longe a monasterio degentes, ad singularem vitam, cui assueti fuerant, revertuntur », inquit Petrus Damiani. Positum illud monasterium sancti Michaelis, vulgo *de Coxano, seu Cuxano*, et *Coxanense* appellatum, in Catalaunia juxta fluvium Tethim, vulgo *Le Ter*. Sed, ut hic tantum de Petro Urseolo verba faciam, « educus a cella novitiorum, monachizatur, et cucullato capite incedens, videbatur omnibus esse justitiæ speculum. Fit mortuus vivens inter vivos, fitque mortuus ad exemplum vivificator, fitque Ianigeris cilinista », inquit idem anonymus, qui

fuse de ejus virtutibus disserit, atque mortuum *IVidus Januarii, jam reddito fructu XIX (annorum)*, anno nempe incerto, sed circiter anno *DCXCVII*. Petrus Urseolus miraculis illustris prædicatur a quibusdam, et a nonnullis sanctus vel beatus dicitur.

3. *Moritur S. Rudesindus episc. Dumiensis.* — Ad num. 40 et seq. Stephanus Cellæ-Novæ monachus in Vita sancti Rudesindi episcopi Dumiensis, de quo supra mentionem fecimus, num. 11 ait : « Quadragesimo secundo anno ab initio, quo cœnobium cœpit ædificare, septuagesimo autem post ejus sanctam in monte Corduba promissionem, ex quibus decem in episcopatu, viginti vero in abbacia exegit, die kalendarum Martii, quinta videlicet feria (ideoque hoc Christi anno, quo feria quinta in diem primum Martii cadebat) existente Completorii hora, adstantibus omnibus de ejus absentia valde plorantibus, sed de ipsius felici gloria lætantibus, rege Ramiro, Sancii regis filio imperante, cum sanctorum agmine immarcescibili trabea, et indeficienti corona a remuneratore omnium bonorum feliciter in gloria est coronatus ». Refertur ejus Vita ab Henschenio ad diem primum Martii, et a Mabillonio Sæc. v Benedict. et ille legendum monet ex Hispanico, *septuagesimo anno post ejus nativitatem*. Præterea pro *decem in episcopatu*, restituit *triginta duo*. Sedes Dumiensis prope Bracaram sita erat, ubi sanctus Martinus quondam episcopus fuit; sed vastato Dumiensi loco alio confugere successores ejus, et *Rudesindus* in Cellam-Novam ab se conditam se recepit; ubi monasticis

addictus disciplinis post Franquillæ mortem abbatibus munus episcopali conjunxit. Ejus genere nihil illustrius, patrem enim habuit a regia stirpe progenitum, et matrem Ilduaram, vulgo *Aldaram*, non minus pietate, quam natalium splendore illustrem.

4. *Inter sanctos relatus.* — Baronius Ambrosium Moralem secutus, *Ordonium* monachum Rudesindi Vitæ auctorem appellat, et quidam viri docti librum de Vita ejus conscriptum Ordonio, alterum de miraculis Stephano monacho, qui sæculo XII vixit, attribuunt. Verum Henschenius laudatus unum eundemque auctorem Vitam et miraculorum saltem priorem partem scripsisse existimat, idque Mabillonius ex Prologo ostendit, ubi auctor quædam ait, se tum ex scriptis aliorum, tum ex alieno relatu accepta in litteras retulisse. *Rudesindum* ob vitæ innocentiam, res præclare gestas, ac miraculorum frequentiam sanctorum Catalogo adscripsit Cælestinus papa III, anno Christi *MCXCV*. In Bulla Canonizationis meminit Pontifex libri de rebus a Rudesindo gestis : quem asserit se legisse, « cum in inferioribus constitutus negotiis, Sedis Apostolicæ in Hispaniarum regnis legati titulo frueretur », tunc cardinalis Hyacinthus nomine, missus ab Alexandro III Pontifice, anno Christi *MCLXXI*, ad sopiendas quasdam controversias. *Rudesindum* celebrant Martyrologia, non solum Benedictina, quia is Regulam S. Benedicti professus est; sed etiam Hispanica. De hoc sancto antistite plura apud Henschenium et Mabillonium laudatos.

BENEDICTI VII ANNUS 4. — CHRISTI 978.

1. *S. Wolfgangi episcopi Ratisponensis miraculum.* — Annus sequitur Redemptoris nongentesimus septuagesimus octavus, Indictione sexta, quo Otto imperator offensionem passus a Lothario Francorum rege, cum persequitur usque¹ Parisios. Quid autem tum accidit insequentes hostes pati, cum S. Wolfgangi episcopi Ratisponensis precibus transissent sui exundans flumen illæsi, ab auctore accipe, qui tunc vivebat, et ejusdem san-

cti intimus erat : « Cum, inquit, Otto secundus imperator ob illatam ipsi injuriam Franciam hostili animo et manu ingressus Lutetiam usque pervenisset, in reditu ad fluvium quemdam pervenire, cujus aquæ intumuerant, ita ut multi illic mergerentur. Ubi autem beatus antistes cum suis eo pervenit, tum præsentī periculo commotus suspexit in cælum, et tum sibi, tum suis bene precatus atque benedicens, jussit suos incunctanter transire flumen. Sed illis adhuc cunctantibus, et Francis interim a tergo acriter instantibus, ille

¹ Lamb. Chron. hoc. anno, et Sigeb. cod. anno.

prius in nomine Domini (quod semper in ejus versabatur ore) fluvium ingressus suos animavit. Nec quisquam eorum ullum expertus est periculum. Tunc vero omnes id admirantes, præ gaudio in Dei laudes eruperunt. Sed vir humillimus, ne id in publicum efferrent, obnixè eos rogavit». Hæc auctor. Porro eam partem exercitus, quæ insequeretur Ottonem, male periisse apud flumen, Aimoinus¹ habet.

2. *Eduardus rex Angliæ per scelus occisus coruscet miraculis.* — Eodem² anno, ut antiqua Anglicanæ Ecclesiæ monumenta docent, Eduardus rex Angliæ insidiis sceleratæ novercæ occiditur, ut ejus filius Ethelredus puer annorum decem regnum consequi posset. Porro ita innocentissimus rex necatus, miraculis coruscans cultus est ab Anglis ut martyr. Extant³ Acta necis et miraculorum ejus ab incerto auctore conscripta, in quibus tamen diversa afferuntur de tempore necis ejus; nam asserentibus aliis, eum hoc anno cæsum, ille ponit necatum esse anno Domini DCCLXXXI. Porro tragædiam tantam, quomodo se habuerit, sic accipe brevitale restrictam: « Cum rex Eduardus die quadam in venatione lassus, et siti nimis affectus potum solus quæreret, commilitonibus suis et ministris carens, quocumque casus duceret insequentibus, audito quod noverca ejus et frater in villa quadam, quæ Cornesgate dicitur, habitarent: concito equitatu illuc pertendit, nihil sinistrum propter innocentiam suspicatus, sed aliorum corda ex sui pectoris moderamine ponderans. At noverca ejus blandis eum sermonibus advenientem alliciens, sibi fecit intendere. Et post oscula sibi porrecto poculo, regem illud avidè haurientem per lictoris manus sica transfodit. Rex vero cum se vulneratum lethaliter cognovit, equum calcaribus urgere cœpit, ut rediret ad suos, exundante jugiter cruore, unde suæ mortis indicium se quærentibus dedit, in terram cecidit. Tunc Elfdrietha mulier illa nequissima ejusque filius Ethelredus corpus sancti Eduardi regis et martyris sine honore apud Marham sepeliri jusserunt, publicam lætitiā

agentes et festivā, ac si cum corpore pariter et memoriā sepelissent. Invidebant enim mortuo Ecclesiasticā concedere sepulturā, cui viventi decus regum auferebant.

3. « Sed affuit divinæ commiserationis consensus, qui innocenter cæsum miraculorum gratia sublimavit. Nam adeo cælestia ibidem visa sunt delapsa fuisse luminaria, ut etiam cum ipsis luminum radiis, claudis restituerentur gressus, cæcis visus, mutis loquela, et cujuscumque infirmitatis livore detenti, optatæ sanitatis præmia consequerentur. Fit concursus populorum totius regni ad martyris sepulturā, et inter alia, interfectrix illuc iter arripuit. Jamque equum ascensum cum stimulis urgeret, quæ antea ventis promptius auras ipsas præcurrerat, et dominam urgenter quasi affrenis portare assueverat: tunc Dei nutu stabat immobilis, præcipue cum ministri hinc verberibus, illinc clamoribus equum undique et stimulis agitant. Inanis labor assumitur, dum equo mutato, casus idem subsequitur. Tunc Elfdrietha, viso Dei miraculo, mire pœnituit, adeo ut multis annis carnem suā in deliciis enutritā apud Wareuvelam cilicio domaret, solo prostrata somnum caperet, et cruciatus quoscumque potuit corpori applicaret. Aelterius quoque ille de quo supra meminimus, quod monachorum monasteria destruxisset, de culpa anxie pœnitens sacrum regis corpus de loco ignobili transferens, apud Scephtoniam digno honore locavit; sed nec sic dignam ultionem effugiens, post annum corpus ejus totum vermibus dicitur esse consumptum ». Hæc ibi. Reliqua anno sequenti.

4. *De corpore S. Gudilæ virginis.* — Eodem tempore Carolus dux Lotharingiæ frater Lotharii regis pugnans adversus Hermenfredum occupatorem rerum Ecclesiasticarum, accepit ab eo corpus sanctæ Gudilæ virginis et Bruxellas intulit: invasores autem possessionum illius et descendentes hæredes divina vindicta jugiter est prosecuta, ut omnes miserando vitam finirent interitu. Hæc ex Appendice¹ ad res gestas ejusdem sancti.

¹ Aim. l. v. c. 44. — ² Append. ad Bed. de gest. Angl. l. II. c. 42. Flores hist. Malth. Westmonast. hoc anno. — ³ Apud Sur. tom. II. die XVIII Mart.

¹ Apud Sur. die VIII Jan. tom. I.

Anno perindi Græco-Romanæ 6471. — Anno Æræ Hispan. 1016. — Anno Hegiræ 368, inchoato die 8 Aug., Fer. 5. — Jesu Christi 978.

— Benedicti VII papæ 4. — Ottonis II imp. 6 et 12. Basil. et Const. imp. 3.

1. *Dissidium inter Ottonem II et Lotharium regem Franciæ occasione Lotharingiæ.* — Ad n. 1. Anno DCDLVII, cum Bruno Coloniæ archiepiscopus et Lotharingiæ dux, « bonis Ragenarii comitis », ut narrat Sigebertus in Chronico, « publicatis, Raginarii et Lambertum ejus filios ad Lotharium regem fugere » compulisset, et post aliquot annos Otto Magnus vivendi finem fecisset, Raginarius et Lambertus « paulatim resumptis viribus a Francia redierunt cum Garnerio (Valentinianensi) et Rainardo (Rhemensi), bello apud Peronam confluentes, (eosdem) peremerunt, castello Buxudæ (quod anno DCDLXXIV ab Ottone II dirutum fuit) super Ilagna fluvium munito, Lotharingiam infestarent »; Hadewidem Hugonis Capeti Francorum ducis, ac exinde regis filiam, et Gerbergam Carolo Lotharii regis Francorum fratre natam duxerunt, annoque DCDLXXVI, teste continuatore Flodoardi « in ipso Quadragesimæ (sc. tempore) majoris hebdomadæ feria quarta, XIII kal. Maii, Indictione IV, circa mediam diem, adversus Godefridum et Arnulfum (comites) ad Montem castrum irruerunt ». Novorum turbinum metu anno DCDLXXVII, teste eodem Sigeberto, « ducatus Lotharingiæ Carolo fratri Lotharii regis, multis insuper beneficiis conducto ab Ottone secundo, ut ipse ab insolentiis desisteret et fratris sui motibus obsisteret, datus est; ipsique Raginarii filii, Raginarius et Lambertus in terra patrum suorum relocati sunt ». Quod etiam Nangius ex Baldrico lib. 1, cap. 108, tradit.

2. *Bellum inter Ottonem II et Lotharium regem.* — Veritus Lotharius rex, ne quid Francica Respublica detrimenti ex fratris cum Ottone conjuratione caperet, Ludovicum filium duodecennem, regem salutare jussit, quod vel ex Gerberti Epistolis et Chartis annum Ludovici primum, cum Lotharii patris XXIV, Christi DCDLXXVIII, Indictione VI componentibus, evincitur; ac exinde injuriæ obviam ire paratus, Lotharingiam armatus invasit, Aquisgranum per triduum diripuit (Hermannino Contracto, Lamberto, Sigeberto, Nangio, Hepidanno et chronographo Hildensheimensi testibus), Ottonem consobrinum et sororium fuga sibi consulere coegit. Is autem « ad vindictam properans, post recessum Lotharii cum copioso exercitu, per Lotharingiam

Francicam ingressus, et Rhemensem, Laudunensem, Suessionensemque provincias omnia devastando pertransiens, usque Parisius venit, et suburbium civitatis incendit, in Francia a kal. Octobris usque ad kal. Decembris fines ejus diversa clade vastavit », inquit idem Nangius. At Lotharius « congregato ingenti exercitu super hostes irruens, eos fugere compulit (in Axonæ transitu), maximo detrimento affecit, eosdemque tribus diebus et tribus noctibus persequens usque ad flumen, quod fluit inter Ardennam (nempe Mosam), interfecta ex iis maxima multitudine cum triumpho reversus est in Franciam: Otto autem imperator cum his, qui evaserant, confuse repatrians, non opposuit ultra redire in Franciam », ait idem Nangius. Tunc autem contigit illud miraculum, quod Baronius in hac expeditione in gratiam Ottonis factum fuisse a S. Wolfango episcopo Ralisponensi, ex auctore ejus Vitæ narrat.

3. *Lotharingia Ottoni II in beneficium data.* — Anno tandem DCDLXXX, « Ottonem imp. et Lotharium regem super Carum fluvium convenientes, datis invicem sacramentis pacificatos, Lotharingiamque a Lothario abjuratam » refert Sigebertus. Nangius vero ex Hugone Floriacensi, non super Carum, sed Rhemis pacificatum, non abjurasse, sed in beneficium Lotharingiæ ducatum Ottoni dedisse Lotharium, id contra principum regni voluntatem factum, magis eorum corda contristavisse scribit.

4. *Francorum odia in Carolum Lotharingiæ ducem ardent.* — Porro ab hoc Christi anno Franci a Carolo Lotharingiæ duce, ejusque posteris valde alienati sunt, eosque magis, quo pervicaci per annos decem contumacia eos fatigavit; indeque Ludovico Francorum rege, hujus nominis V, demortuo, universos a se alienos sensit, et illatæ injuriæ severos judices expertus est. « Nam Franci primates eo relicto, ad Hugonem, qui ducatum Franciæ strenue tunc gubernabat, magni illius Hugonis filium, cujus ante mentio facta est, se conferentes, eum Noviomio civitate solio sublimant regio », inquit chronographus sancti Benigni. Hoc ipso anno, quo Otto II Franciam invasit, Gerbertus Dederici Metensium episcopi nomine Epistolam or-

dine xxxi adversus Carolum scripsit, in qua ait : « Cruenta manu et ad omne scelus semper promptissima, cum latronum grege et furum manipulo, dum fratri tuo nobili Francorum regi (Lothario nempe) Laudunum civitatem suam, inquam suam, nunquam utique tuam, dolo malo subriperes, eumque regno fraudares, et imperatoriam sororem regniue sui consortem infamares, tuisque mendaciis commaculares ». Paulo post : « Abhinc nisi resipiscas Spiritus sancti gladio, qui mihi commissus est, cum tibi computribilibus membris rescindam, atque igni tradam inexstinguibili ». Plura alia hanc in rem Blondellus in Pleniori assertionione Genealogiæ Francicæ, pag. 265 et seqq., quæ ad maiorem sequentibus annis dicendorum evidentiam narranda nobis fuere.

5. *S. Eduardus Angliæ rex occiditur.* — Ad num. 2 et seq. Sanctum *Eduardum* Angliæ regem jussu novercæ suæ hoc anno a suis injuste peremptum, non solum uterque chronographus Saxonicus tradit, sed etiam Simeon Dunelmensis, Hovedenus, Wigorniensis, annalista Mailrosensis, et Thomas Rudbornus in Historia majori Wintoniæ, characteribus ex Actis publicis, ut videtur, desumptis, iisdem fere verbis confirmant. Sufficiet hic referre verba Simeonis de *Ethelredo* Eduardi fratris successore loquentis : « Indictione vi, die Dominica, XVIII kalendas Maii, post Paschalem festivitatem a sanctis archipræsulibus Dunstano et Oswaldo, et decem episcopis in Kyngestune ad regni fastigium est consecratus », ideoque hoc Christi anno, in quem notæ illæ temporariæ competunt. Subdit annalista Mailrosensis, « xxx et viii annis in multis calamitatibus regnavit, pro fratre sui nece ». Quare cum *Ethelredus* anno mxxvi perierit, regni ejus initium a præsentis anno repetendum, non vero a sequenti, in quem Alfordus Malmesburiensem errantem secutus, sancti *Eduardi* martyrium differt. Martyrii ejus dies, nempe XV kal. Aprilis, in variis Martyrologiis a Bollandò ad eum diem in ejus Vita laudatis legitur, sicuti in Chronico Saxonico nuper Oxoniæ edito, ac in Chronico Bromptoni pag. 874. Sanctus Eduardus vulgo *martyr* cognominatus, inter Angliæ reges hujus nominis secundus numeratur.

6. *Ei succedit Ethelredus frater.* — Narrat autem Malmesburiensis citatus novercam Eduardi ei insidias struxisse, et dum lassus venatione reverteretur, eam *post libata basia* poculum porrectum avide haurientem per satellitem sica transfodisse, ac sine honore sepeliri jussisse. « Sed adfuit divinæ serenitatis assensus », subdit Malmesburiensis, « qui innocenter cæsum miraculorum sublimaret gloria ». Paulo post : « Creditumque et celebriter

vulgatum, quod propter ejus in Edwardum insolentiam, multo post tempore tota patria servitutem infremuisset barbaricam », quod scilicet a *Danis*, ut infra videbimus, devastata fuerit. Porro sanctus Eduardus *martyr* appellatur, etiamsi pro Christianæ religionis fide non obierit, sicut et sanctus *Eduardus* rex, ejus ex fratre Ethelredo nepos, *confessor* dicitur, licet coram fidei hostibus fidem Christi professus non sit, quod usus ita tunc ferret. Idem Malmesburiensis lib. 2 de Gest. Reg. c. 10, scribit : « Ethelredus filius Edgari et Elfredæ regnum adeptus, obsedit potius quam rexit annis xxxvii. Ejus vitæ cursus sævus in principio, miser in medio, turpis in exitu asseritur. Ita parricidio, cui conniventiam adhibuerat, immanis, ita fuga et mollitie infamis, ita morte miserabilis fuit ».

7. *Miser status Angliæ per annos amplius lx.* — Ingulphus juxta novissimam Historiæ ejus editionem Oxoniæ factam pag. 84, quam miserandus status Angliæ fuerit sub S. Eduardi proximis successoribus, his verbis exponit : « Rex Ethelredus, filius Edgari regis, post S. Eduardum regem, et tandem Dei martyrem, germanum suum, miserrime regnavit annis xxxviii; tempore cujus Danorum exercitus totam Angliam plurimum tribulabant, et Ecclesias ac cænobia in immensum opprimebant. Perdurabatque tanta tribulatio per plures annos sequentes, scilicet per tempora quatuor regum, id est, ipsius Ethelredi, Knuti, Haroldi et Hardekni », qui mortuus anno mxxli S. Eduardum confessorem habuit successorem.

8. *Translatio S. Gudilæ.* — Ad num. 4. Cum locus sepulturæ S. Gudilæ virginis, quæ anno circiter dccxii in Belgio vixit et mortua est, crebris miraculis eniteret, reliquiæ ejus Morzelam, Brabantiae vicum, ut tradit Miræus, et Morzela vastata Bruxellam translatae sunt, uti docet Hubertus, qui ejus Vitam post annum mxxvii scripsit, a Bollandò ad diem vii Januarii recitatam. In ea cap. 10 dicitur, Carolum *filium Lotharii* regis Francorum, cum auctor dicere debuisset, *Lotharii fratrem*, Bruxellam venisse, et corpus S. Gudilæ in Ecclesiam *S. Gaugerici*, quæ Bruxellæ etiamnum extat, intulisse. In alia Vita hujus sanctæ ab auctore anonymo elucubrata, et a *Surio* ad eandem diem relata, quam solam viderat Baronius, legitur, *Carolus* voluisse Ecclesiæ Morzelensi ablata restitui, sed id consequi non potuisse, impeditum ab iis, qui *Hermenfrido* favebant. Cum tamen Hermenfridus, ejusque complices retinuissent, quas invaserant terras, et corpus S. Gudilæ Carolo dedissent, illud in Ecclesiam S. Gaugerici Bruxellas deferri jussit. Quo anno hæc translatio peracta fuerit, incomptum.

BENEDICTI VII ANNUS 5. — CHRISTI 979.

1. *S. Dunstanus in Anglia regi Ethelredo dira prænuntiat, mira operatur.* — Annus Redemptoris nongentesimus septuagesimus nonus, Indictione septima sequitur, cum kalend. Maii die Dominica a sanctis archiepiscopis Dunstano Cantuariensi et Oswaldo Eboracensi et aliis Ecclesiae episcopis Ethelredus puer decennis rex coronatur. In qua coronatione S. Dunstanus prophetiae afflatus spiritu hæc ad regem : « Quoniam aspirasti ad regnum per mortem fratris tui, quem occidit mater tua, propterea audi verbum Domini. Hæc dicit Dominus : Non deficiet gladius de domo tua, sæviens in te omnibus diebus vitæ tuæ, interficiens de semine tuo, quousque regnum tuum transferatur in regem alienum, cujus ritum et linguam gens, cui præsidet, non novit : nec expiabitur nisi longa vindicta peccatum tuum et peccatum matris tuæ, et peccatum virorum illorum, qui interfuere consilio ejus nequam. Post hanc Dunstani viri Dei prophetiam nubes per totam Angliam nunc sanguinea, nunc ignea visa est, etc. » Hæc Matthæus Westmonasteriensis hoc anno. Eadem de S. Dunstani prophetia habet, aliis licet verbis, Osbertus in Dunstano, et qui martyrium ejus descripsit.

2. Porro cum adhuc idem rex puer esset, collectum est Concilium Calnæ, cum clerici adversus

sanctum Dunstanum reclamarent ob pulsos ipsos et subrogatos loco ipsorum monachos. De hoc conventu ista apud eundem Matthæum Westmonasteriensem : « Alia Synodus Calnæ constituitur, ubi cum in cœnaculo, absente rege propter imbecillem ætatem, considentibus totius regni senatoribus, magno conflictu hinc inde allegantium res ageretur, et Dunstanum quasi Ecclesiae murum multorum jacula conviciorum impeterent, nec vincebant : solarium subito totum, quo considebant, cum axibus dissolvitur et trabibus; omnibusque interim truculenter elisis, solus Dunstanus stans super unam quæ superstes erat trabem, absque læsione evasit. Cæterum omnes partis adversæ, vel exanimati sunt, vel languore perpetuo sunt detenti. Hoc miraculum contulit pacem beato Dunstano et monachis ab impetu clericorum et aliorum, gratia hæc et similia operante divina ». Hæc ipse recenset anno nongentesimo septuagesimo quinto, cuncta in unum jungens. Eadem ¹ auctor in Appendice ad Bedam. Et Osbertus in Vita Dunstani, ubi non solum ipsum Dunstanum salvum factum, sed et omnes qui suarum essent partium tradit.

¹ Dunst. de gestis Angl. l. II. c. 11.

1. *S. Eduardus Angliæ rex anno superiori occisus.* — Ad num. 1 et seq. *S. Eduardus* Angliæ rex nefarie occisus est anno superiori, ut ibidem vidimus. Baronius, qui ejus martyrium in annum

præcedentem contulit, ait *Ethelredum* fratrem ejus puerum decennem *kal. Maii, die Dominica* a sanctis archiepiscopis Dunstano Cantuariensi et Oswaldo Eboracensi coronatum fuisse. Verum kalendæ

Maii hoc anno in feriam quintam inciderunt. Simeon Dunelmensis Eduardi martyrium cum superiori Christi anno etiam alligat, sed Ethelredum eodem anno XVIII kal. Maii coronatum tradit, quod melius procedit; cum is dies anno superiori dominicalis fuerit. Eundem diem Vigorniensis exhibet, ideoque numerus XVIII ante kal. Maii apud Westmonasteriensem a Baronio citatum a librario omissus.

2. *Concilium de causa clericorum et monachorum Angliæ.* — Ante et post mortem *Edgari* regis magna inter proceres Anglorum contentio fuit de ejiciendis monachis ex Ecclesiis, in quas introducti fuerant, et de reducendis in easdem presbyteris sæcularibus, quos clericos vocant. In Synodo Calnensi (erat Calne vicus regius) *Dunstanus* a monachis fortiter stetit, alique in ejus sententiam concessere, ut narrat Baronius ex Westmonasteriensi, et refert etiam Malmesburiensis lib. 2 de Reg. cap. 9, qui tamen hoc Concilium, sicut et Hovedenus vivente adhuc *Edgardo* rege congregatum credidit.

3. *Pilgrinus archiepisc. Laureacensis Hungarorum conversioni incumbit.* — Ecclesiam Laureacensem regebat hoc tempore Pilgrinus et Pilgrinus, electus anno Christi DCCLXXI. Is pallium a Benedicto papa petiit, litteris a Lambecio lib. 2 Biblioth. Cæsareæ pag. 641 et seqq. recitatis, seseque excusavit a personali accessu ad SS. Petri et Pauli limina, quia, inquit, «a neophyta Ungrorum gente huc ire prohibeor, apud quam fœdere pacto, sub occasione pacis fiduciam sumpsimus operam exercere prædicationis. Cujus enim terror gentis ex longo tempore etiam aliarum provinciarum prædicatoribus meæ diœcesis hactenus aditum clausit, ad quas nihilominus præsentis opportunitas temporis ire me vocavit. Quibus Deus omnipotens, qui solita sua pietate semper dispersa congregat, aperire dignatus est januam cordis sui diu clausam, ut discisso velamine duritiæ suæ depositaque ferina crudelitate, leni jugo Domini colla submittant. A qua ergo præfata Ungrorum gente multis precibus ipse invitabar venire, aut missos meos in opus Evangelii illuc dirigere; ad hos dum transmitterem satis idoneos viros ex monachis canonicisque presbyteros, atque de singulis Ecclesiasticis gradibus clericos, et vita et omni conversatione illorum sic ordinata, quemadmodum in Gestis Anglorum didici, tantum divina gratia suis institutionibus fructum statim ministravit, ut ex iisdem nobilioribus Ungris utriusque sexus Catholica fide imbulos, atque sacro lavacro ablutos, circiter quinque millia lucrarentur.

4. *Hungari ad fidem Christianam suscipiendam dispositi.* — «Christiani autem, quorum major pars populi est, qui ex omni parte mundi illuc tracti sunt captivi, quibus nunquam soboles suas lieuit nisi furtive Domino consecrare, modo certatim nullo obstante timore offerunt eas baptizare, et gratulantur omnes tanquam de peregrinatione sua in patriam reducti, quod Christiano modo ora-

toria audent construere, et licentia percepta linguam ligatam in laudem Salvatoris præsumunt solvere. Ipsi enim Barbari, mira omnipotentis Dei operante elementia, quorum licet adhuc Gentilitate sint quidam detenti, nullum tamen ex illorum subditis vetant baptizari, nec sacerdotibus invident quocumque libet proficisci, sed ita concordēs sunt pagani cum Christianis, tantamque adinvicem habent familiaritatem, ut illic Isaïæ videatur impleri Prophetia: *Lupus et agnus pascentur simul, leo et bos comedent paleas.* Factum est ergo, ut pæne cuncta Ungrorum natio sit prona ad percipiendam fidem sanctam. Sed et aliæ Sclavorum provinciæ ad credendum promptæ, et est ibi messis quidem multa, operarii autem pauci.

5. *Petit Pilgrinus ut mittantur prædicatores.* — «Unde quoque visum est jam necessarium esse, quatenus sanctitas vestra illic aliquos jubeat ordinari episcopos, quia et quondam Romanorum, Gepidarumque tempore proprios septem antistites eadem Orientalis Pannonia habuit et Mœsia, meæ sanctæ Laureacensis, cui ego indignus ministro, Ecclesiæ subjectos, quorum etiam quatuor, usque dum Ungri regnum Bavaricum invaserunt (quod anno DCII contigit) sicut præsentī cognitum est ætati, in Moravia manserunt. Quod nimium grave ac valde onerosum est mihi, ut tot pontificii parochias solus prædicando circumeam, quibus necessitate et adjutorii inopia cogor nunquam meam subtrahere præsentiam. Ecce, dominorum amantissime, hujusmodi Ecclesiasticis mancipatus officiis detineor, et, ni fecissem moram sæpe dictæ gentis conversioni, ire et prosterni ad vestræ sanctitatis vestigia non distulissem». Petit postea Pilgrinus, ut sibi pallium, quod sui prædecessores accipere soliti erant, dirigere dignetur, et confirmari sibi commissam populi gubernationem.

6. *Litteræ Benedicti VII ad episc. Germaniæ.* — Benedictus VII his litteris acceptis alias dedit, inscriptas «Hroberto S. Moguntinæ Ecclesiæ, et Dioterico S. Trevirensis Ecclesiæ, atque Adalberto S. Magdaburgensis Ecclesiæ, parique modo Gereoni S. Coloniensis Ecclesiæ atque Friderico S. Juvavensis Ecclesiæ, sed et Adaldago S. Bremensis Ecclesiæ archiepiscopis, pariterque domino nostro Ottoni gloriosissimo imperatori Augusto, atque nepoti suo Heinricho præcellentissimo duci Bavariorum, cæterisque omnibus episcopis et abbatibus, ducibus atque comitibus Galliæ atque Germaniæ». In iis asserit Pontifex Pilgrinum duos ad se misisse presbyteros, et Laureacensis Ecclesiæ Privilegia, in quibus continebatur, «quod ælate Pontificatus B. Symmachi (anno DCIV demortui) hujus almæ Sedis Apostolici præsulis, præfata sancta Lauriacensis haberetur Ecclesia metropolis: et in quantum tam exinde, quam etiam de passionibus beatorum martyrum, qui illic plures in tempore persecutionis pro fide Christi variis sunt tormentis mactati, colligere possumus, ex omnibus Ecclesiarum diœcesibus Pannoniæ, hæc antiquitate et

archiepiscopi dignitate esse primitiva creditur ; quæ jam multis retroactis temporibus ex vicinorum frequenti populatione Barbarorum deserta et in solitudinem redacta, nullum Christianæ professionis habitorem meminit, usque dum invictissimus Augustus et pater patriæ, genitor quippe pii (scil. Ottonis II) imperatoris nostri (quem adhuc superesse et diu dominari mundus exoptat), bellico trophæo eorum vires retudit », anno nempe DCDLV.

7. *Dilatatio fidei Christianæ in Hungaria.* — « Nunc autem, quamobrem vocibus exsultantibus in laudem omnipotentis Dei erumpimus, non solum sancta Dei Lauriacensis Ecclesia, hostium cessante terrore cum accolis suis pace et tranquillitate politur ; verum etiam ipsi dudum inimici, illum, quem persecuti sunt more gentili, jamjam Christum baptizati profitentur, et sacerdotes modo haberi desiderant, ac, prout scire rudes potuere, venerantur, et Ecclesias quasdam in sua terra, quas patres incendio delerunt, posterius restaurare videntur. Hac ergo suadente ratione, quod prænominati sanctæ Lauriacensis Ecclesiæ archiepiscopi postulatio antiqua Apostolica auctoritate commendatur, et præterea quod, cum justum esset, pariterque utile etiam visum est, ut ad fructificandas Deo gentes ex novitiis cultoribus fidei Ungarorum atque Maravorum, sive etiam aliis multis Sclavorum suæ parochiæ finitimis, illic ordinatis episcopis, secundum quod antiquitus dispositi erant, eis hunc constitueremus archiepiscopum. Quoniam autem Salzburgensis Ecclesia metropolis abusa est subjectione sanctæ Lauriacensis Ecclesiæ pontifici (pro pontificatu) oblitterata et attenuata sua dignitate ex devastatione Barbarorum, quam propterea perceptis Apostolicis privilegiis nequaquam patimur privari, cum et priora sint Saltzburgeris, et ideo auctoritativa, quæ conditio testimonii etiam apud sæcularia judicia viget et prævalet ».

8. *Divisio Salisburg. et Laureacensis metropoleon confirmatur.* — Paucis interpositis, ait Benedictus VII : « Sicut modernis temporibus sanctæ memoriæ Agapitus papa (hujus nominis II, cujus litteras suo loco retulimus) terminos earundem parochiarum abinvicem distinxit ; sic et ipsi diffinimus, ita quoque ut sancta Saltzburgeris Ecclesia superioris Pannoniæ episcopos habeat suffraganeos, quibus usque huc sui pontifices præesse videbantur cum tanta talique diœcesi, quali hactenus in inferiori usi sunt Pannonia. Sancta autem Lauriacensis Ecclesia in inferioris Pannoniæ atque Mœsiæ regiones, quarum provinciæ sunt Avaria atque Maravia, in quibus septem episcoporum

parochiæ antiquis temporibus continebantur, sique antistites archiepiscopalem deinceps potestatem cum tanta talique diœcesi, quali hactenus in superiori usi sunt Pannonia (1).

9. *Metropolis Laureacensis duravit usque ad annum DCDXCII.* — Utraque Epistola tom. IX Concil. pagina 749 recitatur, sed ex editione parum correctâ. Lambecius, qui eas refert, ait in correctis exemplaribus legi *Lauriacum*, et *Lauriaceusem Ecclesiam*, non vero Laureacum aut Laureacensem Ecclesiam, observatque has litteras inter annum DCDLXXV, quo Benedictus VII creatus Pontifex, et DCDLXXVII exeuntem, scriptas esse ; cum *Robertus* Moguntinus archiepisc. et *Diotericus*, seu *Theodericus* archiepisc. Trevirensis anno DCDLXXVII. teste Trithemio in Chronico Hirsaugiensi, vivendi finem fecerint. Imo eæ an. DCDLXXVII scriptæ ; cum ibidem referat Lambecius epitomen Diplomatis ab Ottone II emissi, quo is metropolitane Ecclesiæ Lauriacensis dignitatem confirmavit litteris, in quibus dicitur : « Dat. III nonas Octob. an. Domini DCDLXXVII, Indict. VI, anno regni Dn. Ottonis imp. Augusti XVII. Actum in civitate Ratisbona », quod effectus fuit commendationis Benedicti VII, cui detulit Otto II. Has autem Pilgrini et Benedicti VII litteras huc usque distulimus, quod memoriæ lapsu illas tunc prætermiserimus. Porro *Pilgrinus* ultimus fuit Lauriacensium archiepiscoporum, qui enim ei anno DCDXCI secundum antiquum Ms. Bibliothecæ Cæsareæ, non vero DCDXCI, secundum Hundium, in metropoli Salisburgensi successit, non jam amplius *Lauriacensis* fuit *archiepiscopus*, sed solum *episcopus Passaviensis*, et tam ipse, quam omnes ejus successores deinceps caruerunt *archiepiscopali pallio*, inquit idem Lambecius. *Geisa* porro, qui hoc tempore apud *Hungaros* regnabat, mite ingenium sortitus erat, cujus filium *Stephanum* ac postea in regno successorem baptizavit *sanctus Adalbertus* Pragensis episcopus, de quo secundus auctor Vitæ hujus antistitis loquens asserit, illum, postquam in episcopatum Pragensem restitutus fuit, quod anno DCDXCIV contigit, Hungaros a religione Christiana alienos non invenisse : « Non facendum, inquit, quod juxta positos Ungaris nunc nuntios suos misit, nunc seipsum obtulit : quibus etiam ab errore suo parum mutatis umbram Christianitatis impressit ». Sed de plena Hungarorum conversione, quorum barbaries nunc mansuescere incipiebat, suo loco sermo erit. Juvabit etiam observare hanc gentem, postquam anno DCDLV ab Ottone M. acie victa fuit, valde imminutam ac debilitatam fuisse, ideoque et innatam ferociam sensim deposuisse.

(1) Has litteras Pilgrini archiepiscopi Laureacensis Epistolæ responsivas magno errore Benedicto VII tribui censeo, cum revera a Benedicto VI scriptæ fuerint, quod nullo negotio demonstro. Directæ sunt enim ad varios per Germaniam episcopos, ac inter cæteros ad Geroneum episcopum Coloniensem ; Gero autem decessit anno DCDLXXIV, die III kal. Julii, ut asserit annalista Saxo Eccardi ad eundem annum. Suo igitur auctori Benedicto VI, qui anno DCDLXXIII et deinceps sacris præfuit tribuendæ suæ, et a Benedicto VII, cui lucusque adscriptæ fuerunt adjudicandæ. Quamquam enim Benedictum VII anno DCDLXXIV cœpisse supra in Nota ad A. DCDLXXV, 3, ostendimus, ab exitu tamen anni illius exordium ejus duci oportet ; Gero autem dimidio ejus anni decesserat.

BENEDICTI VII ANNUS 6. — CHRISTI 980.

1. *S. Adalberti primordia, et ad sedem Pragensem assumptio.* — Annus Redemptoris nongentesimus octogesimus, Indict. vii sequitur, quo ¹ Otto imperator in Italiam venit, et cum Veronæ esset, electo sancto Adalberto Pragensi in Bohemia episcopo, per virgam pastorem tradidit possessionem ejus, quam vocabant investituram. De tanto vero Ungarorum et Prussiorum apostolo, martyrio insignito, hujus perditissimi sæculi decore maximo, haud perfunctorie mentio facta transeat, sed hæc ut sunt gesta, Annalibus inserantur. Atque primum illud non ignorandum, eundem primo vocatum Voicechum, inunctum vero sacro chrismate a sancto Adalberto primo archiepiscopo Magdeburgensi, ab ipso suo nomine vocatum Adalbertum. Hæc omnia pluribus, qui res ab eo gestas præclare conscripsit auctor ejusdem temporis. Alia ejusdem vitæ Acta extant antiquitus scripta in Codice pervetusto monasterii sanctæ Cæcilie in Urbe, in quo plura quæ desiderantur in aliis, habentur : ubi non Voicechus, sed Wentius in baptismo vocatus asseritur. Horum igitur geminorum Actorum subsidio, quæ de ipso dicenda erunt, omni fide promentur. In prioribus autem Actis, quæ apud Surium extant, promotio ejus ad episcopatum ita narratur ² :

2. « Moritur interea episcopus Bohemiæ provincie, et sic est (ut audivimus) coram adstantibus desperata voce testatus, quod ab nigris spiritibus immundis ad tartareum chaos deportaretur. Præsens erat tunc Adalbertus, unus extrema videntium, et verba morientis ante audientium. Quem (ut ipse post abbati in monasterio dixit) visionis illius magnus horror invasit, et ad primam salutem direxit, exinde emendare mores, frena ponere animis, desideria carnis æstu divini amoris excoquere cœpit ». Quomodo autem post hæc, comitia pro successoris electione fuerint celebrata, et ipse ab omnibus sanctus electus, idem auctor narrare sic pergit :

3. « Conveniunt dux terræ et major populus,

et pro eligendo pastore varias sententias dicunt. Omnes tamen ad ultimum manus levant, aera clamoribus implent, non haberi meliorem, nec alium oportere suum esse episcopum, quam indigenam Adalbertum, cujus nobilitas, divitiæ, alta scientia, placabiles mores cum tanto honore concordarent. Ergo ad hæc verba levatur terra episcopus, mutata veste pius Adalbertus. Hæc ipsa die, ubi erat episcopium, audientibus multis, locutum est dæmonium, cum presbyteri imprecationibus urgeretur, ut exiens de homine possesso daret honorem Deo vivo : Quid molesti mihi estis, inquit. Væ satis est mihi ; amplius hic stare non possum, quia electus est hodie populo terræ episcopus, quem valde timeo, Christicola Adalbertus. Sic ait, et quasi citius dicto cessit dæmon impius Spiritui sancto, et ut flagello fugatus exivit, homine sano ». Et inferius : « Igitur electus episcopus auricomam Italiam petit, quem obsessæ Clusæ arctas vias egressum prima civitas Verona suscepit, quæ in fauce regni pulchre levat caput. Ibi eum pastoralis virga investivit Otto secundus ». Et inferius de archiepiscopo, qui eum consecravit : « Ergo archimandrita Moguntinus gravis homo Wilegisus Adalberto, cui Deus interiore gratia benedixit, venerabile caput oleo unxit, et in præsentia imperatoris ad sacerdotii altitudinem provexit ». Quomodo autem reversus in Bohemiam munus episcopale omnibus numeris (ut decet sanctos) absolvit, idem auctor pluribus narrat.

4. At hæc omnia locupletius in Actis, quæ extant in Codice sanctæ Cæcilie superius citato, in quibus et illud inter alia habetur, consecrationem ipsius contigisse in festa die sanctorum Apostolorum Petri et Pauli : nam audi et de ejus reditu Pragam : « Consecratus est festo amicorum Domini Jesu Petri et Pauli : multo equitatu equitat in dulcem patriam. Equus autem ejus, cujus tergo insederat, non more frementium equorum, nec properis cursibus gradiebatur, nec auro et argento portabat fulgentia frena, sed in rusticum morem torta canapa ore strictus, incessit ad arbitrium sedentis ». Et paulo post : « Novus ille pontifex vincula pedum solvens, nudo pede intrat in

¹ Lamb. et Sigeib. in Chron. hoc anno, et alii. — ² Apud Sur. die xxiii Apr. tom. II.

urbem, etc. » Sed et quemadmodum ob morum correctionem tam clericos quam principes passus est adversarios et persecutores, ut inde recedere sit coactus, suo loco dicturi sumus. Triennio enim apud suos in episcopali functione mansisse, exacta ratio temporis pervestigata declarat.

5. *Nilus Cassinum montem petit, inter cetera de jejuniis in sabbato mira dat documenta.* — Eodem anno magnus ille Nilus, de quo superius mentio facta est, prævidens venturos in Calabriam Sarracenos a Græcis adversus Latinos vocatos, eosdemque ut hostes eandem provinciam mire vastaturos, una cum suis recedens, in Campaniam veniens atque Cassinum, a Cassinatibus honorifice exceptus, ab eisdem incolendum accepit monasterium, Vallem Lucis nominatum: id Leo¹ Ostiensis, idemque fusius ejusdem patris discipulus, qui res ab eo præclare gestas accurate atque fideliter scripsit, enarrat, atque: « Hoc cum jam cognovisset beatus Nilus oculo suo prophetico, Sarracenos scilicet Calabria potituros, divinæ indignationi locum dare volens, ad Orientales partes se conferre noluit, veritus opinionem, quam de ipso habebant Orientales (ad ipsos enim etiam imperatores Christo dilectos fama pervenit virtutis Nili) et honorem fugiens, eligit inter Latinos agere, ut ignotus apud eos. Quo vero magis ille hominum gloriam fugere studebat, tanto magis cælestis gloria ipsum exornabat, et omnes ut unum ex Apostolis illum excipiebant, et parem venerationem illi tribuebant. Cum enim Capuam venisset (ut alia omittam propter copiam) et maximo honore affectus esset tum a principe ipso Pandulpho, tum ab aliis nobilibus civitatis, adeo ut decreverint ipsum sibi episcopum instituere, et res jam secuta fuisset, nisi mors principem præoccupasset. Tunc vero cum vocassent præpositum monasterii Montis Cassini (Aligernus erat iste, ille beatus) illi significarunt, ut daret beato Nilo monasterium aliquod sancti patris nostri Benedicti, quodcumque ipse vellet.

6. « Beatus itaque Nilus cum ad inclitum illud monasterium accessisset, obviam illi venit universa monachorum turba usque ad montis radices, sacerdotes et diaconi sacris vestibus, ut in die festo induti, cereos et thuribula præ manibus habentes, et ita beatum Nilum ad monasterium deduxerunt, nec aliud quidpiam videbantur audire et videre, quam si magnus Antonius Alexandria ad ipsos venisset, vel e mortuis magnus Benedictus surrexisset, divinus ille ipsorum legislator et magister. Et recte quidem judicabant, et a scopo non aberrabant. Omnes enim qui ex ipsis vel corporis vel animæ aliquo delinebantur morbo, curati sunt, et utilia ab ipso sunt lucrati; et qui speculationi incumbabant, doctrinam adepti sunt; qui in bonis erant operibus, ducatum; qui in peccatis, correctionem; qui in virtutibus, exhortationem;

qui bene valebant, abstinentiam; qui male, salutem. Et unico verbo: quemadmodum olim Israelitis singulis ipsum manna, ad eorum gustum convertebatur et commodum, quapropter non erat in tribus eorum infirmus: talem se etiam istis monachis miraculis Nilus præbuit, cum ipsos curasset præsentia sua a Deo missa, et omnes spirituali lætitia cumulasset. Valde etiam ipse gavisus est bono ordine, et eorum statu magna disciplina exornato. Et cum res ipsorum supra quam res nostras, Græcorum scilicet, esset admiratus, deducebatur iterum ab ipso abbate, et ab insignioribus ejus fratribus ad monasterium, in quo una cum filiis suis permanere deberet. Illud autem erat S. Michaelis archangeli Vallis-Lucis nuncupatum.

7. « Precati sunt autem ipsum tum abbas, tum fratres universi, ut ad maximum monasterium descenderet, et græca lingua in eorum Ecclesia divinum officium perageret, ut hoc pacto fieret, ut inquit Apostolus, Deus omnia omnibus; quod etiam¹ Propheta prænuntiavit, inquit, quod leo et bos simul pascentur, et simul stabunt eorum filii ». Id ob eam causam, quod ob exorta, ut vidimus, schismata, a Græcis Latini se subdlexerant. Pergit autem: « Beatus vero Nilus initio quidem abnuvit, præ humilitate dicens: Quomodo cantabimus canticum Domini in terra aliena, qui hodie humiles sumus et abjecti in universa terra propter peccata nostra? nihilominus ut consolemur invicem nostra fide, et magnum Christi nomen glorificetur, contentus fuit hoc facere. Et cum hymnum condidisset proprio ore, in sanctum patrem nostrum Benedictum, qui complectebatur omnia miracula, quæ in ejus habentur vita, cumque omnes fratres supra sexaginta suscepisset, ascendit ad Cassini monasterium, et vigilias peregerunt in hymnis et canticis, etc. » Subjicit his auctor diversas diversorum monachorum interrogationes eidem ab ipsis propositas, beatique Nili responsiones divino Spiritu plenas, inter quas illam hic intexam, quæ ab illis facta est compellatio de veteri et quam sæpissime agitata controversia de Sabbati jejuniis, quam Græci contentiosi Latinis exprobrare, atque etiam damnare consueverunt: ut intelligas quam dispari studio eadem controversia tractetur a piis pacisque studiosis, quam a contentiosis zeloque inflammatis invidiæ, et stimulis æmulationis exagitatis; ait enim:

8. « Quæsierunt etiam de jejuniis sabbati. Ille vero brevem responsionem cum dedisset, ita se explicuit dicens²: Qui comedit, non comedentem non spernat: et qui non comedit, comedentem non judicet: Deus enim utrosque suscepit. Tu vero, quare judicas fratrem tuum? Sive igitur comedamus nos, sive vos jejunetis, omnia ad Dei gloriam faciamus. Si vero accusatis nos, quod sabbato non jejunemus, videte ne contraria sanctis Patribus et columnis Ecclesiæ facere inveniamini, Athanasio

¹ Leo Ost. l. II. c. 17.

¹ Isai. XI. — ² Rom. XIV.

videlicet, et Basilio, et Gregorio, et Joanni Chrysostomo et sexcentis aliis sanctis, sanctis etiam Synodis, qui quod non fecerunt, illud ipsum neque lege sanxerunt; Ambrosio præterea doctore vestro, de quo scriptum est in ejus Vita, quod per totam hebdomadam jejunabat, præter Sabbatum et Dominicum diem. Ego vero neque sanctum Silvestrum puto adversatum sanctis Patribus sanxisse hoc jejunium: neque potestis afferre rationem vel canones de hac re, præter auctores ejus vitæ, cui nullus ita facile credet, cum nulla ejus rei aperta appareat demonstratio. Nos nihilominus, omittentes verborum vanitatem (non enim malum est jejunium) dicamus illud¹ Apostoli, quod cibus non commendat nos Deo, et quæ sequuntur.

9. « Utinam vero etiam miseri Judæi Dominum nostrum Cruci affixum adorarent! et si jejunarent vel ipsos Dominicos dies, non esset mihi cura de hoc. Tunc illi respondent: Et non est peccatum jejunare Dominico die? Respondet Nilus: Quomodo S. Benedictus jejunans Dominicis et festis diebus vel ipsum Pascha ignorabat, quando esset? Quapropter sciendum, quod omnia, quæ fiunt propter Deum, bona sunt, et non contemnenda, nec ipsum homicidium, Phinees et Samuel reipsa ostenderunt. Nos igitur benefacimus non jejunantes Sabbato, ut Manichæis execrandis adversemur, qui eo die plorant, et vetus Testamentum accusant, quasi non sit a Deo traditum; non abstinemus vero ab operibus, ne similes simus impiis Judæis Dei interfectoribus. Vos merito jejunatis, expiantes vos ipsos pro sancto Resurrectionis die recte celebrando ». Hæc cum illis tunc S. Nilus disseruit de jejuniis secundum ritum diversarum Ecclesiarum diverso modo celebrandis, custodita inter eos perpetua charitate in vinculo pacis. Ac de his modo hactenus. De eodem Nilo enim rursus aliis exigentibus occasionibus inferius sermo erit. Jam vero longe positas regiones invisamus.

10. *Haraldo regi Danorum mors per scelus illata a Sueno filio, qui post multa inique acta pœnitens prosperatur, Eduardi necem punit.* — Eodem anno S. Haraldus rex Danorum et martyr, factione filii ipsius Christianorum hostis necatus, gloriam martyrum est consecutus. Quod ad tempus spectat, hoc id anno accidisse, Epitaphium ad ejus sepulcrum appositum his ultimis duobus versibus indicat:

Post Natale Dei, dum scripsimus octuaginta
Nongentos, meruit scandere celsa poli.

11. At quomodo ista se habuerint², Adam sincerus chronographus illis temporibus proximus ita narrat: « Novissimis archiepiscopi temporibus res nostræ inter Barbaros fractæ, Christianitas in Dania turbata est, pulchrisque divinæ religionis initiis invidens inimicus homo superseminare zi-

zania conatus est. Nam tunc Suen Otto filius Magni Haraldis regis Danorum multas in patrem molitus insidias, quomodo eum jam longævum et minus validum regno privaret; et consilium habuit cum his, quos pater ejus ad Christianitatem invitos coegit. Subito igitur facta conspiratione, Dani Christianitatem abdicantes Suen regem constituunt, et Haraldo bellum indicunt. At ille ab initio regni sui totam spem in Deo posuerat, tum vero et maxime Christo commendans eventum rei, cum bellum execraretur, armis se tueri decrevit, et quasi alter David procedens ad bellum, filium lugebat Absalon, magis dolens illius scelus, quam sua pericula. In quo miserabili et plus quam civili bello, victa est pars Haraldis. Ipse autem vulneratus ex acie fugiens, ascensa navi elapsus est ad civitatem Slavorum, quæ Jumne dicitur. A quibus contra spem, quia pagani erant, receptus, post dies aliquot ex eodem vulnere deficiens, in confessione Christi migravit. Corpus ejus in patriam reportatum ab exercitu apud Roschild civitatem sepultum est in Ecclesia, quam ipse primus construxit in honorem sanctæ Trinitatis. De cujus fine cum istum pronepotem suum, qui nunc in Dania regnat, Suen interrogare maluerim, velut alter Tydeus, crimen avi reticuit. Me vero parricidium exaggerante: Hoc est, ait, quod posteri nos luimus, quod et ipse parricida suo piavit exilio.

12. « At ille noster Haraldus, qui populo Danorum primus Christianitatem indixit, qui totum Septentrionem prædicatoribus et Ecclesiis replevit, ille, inquam, innocens vulneratus, et pro Christo expulsus, martyrii gloria (ut spero) non carebit. Regnavit autem annos quinquaginta; obitus ejus contigit in festivitate Omnium Sanctorum. Memoria ejus et uxoris Gunild apud nos perpetua manebit ». Et post multa hæc de persecutione excitata in Dania post obitum Haraldis ab ejus filio¹ Sueno:

13. « Quo tempore cum magnam Suen rex persecutionem Christianorum exercuisset in Dania, fertur archiepiscopus supplicibus legatis et crebris muneribus laborasse, ut ferocis animum regis Christianis redderet mansuetum. Quibus ille relictis, in sua crudelitate ac perfidia sævire cœpit. Secuta est ultio divina regem Deo rebellem. Nam cum bellum susciperet contra Slavos, bis captus et in Slaviam ductus, toties a Danis ingenti pondere auri redemptus est; nec tamen adhuc reverti voluit ad Deum, quem primo in morte patris offendit, et deinde in nece fidelium irritavit; et iratus est furere Dominus, et tradidit eum in manus inimicorum suorum, ut disceret non blasphemare. Tunc potentissimus rex Suconum Hericus, exercitu innumerabili sicut arena maris collecto, Daniam invadit: et occurrit ei Suen derelictus a Deo, frustra sperans in idolis suis. Multa utrinque bella navalia (sic enim ea gens configere solet). Copiæ

¹ 1. Cor. VIII. — ² Adam. I. II. c. 18.

¹ Adam. I. II. c. 24.

Danorum omnes obtrita. Hericus rex victor obtinuit Daniam. Suen a regno depulsus, dignam factis suis a Deo zelote recepit mercedem. Et hæc nobis junior Suen recitavit in avo suo contigisse justo Dei iudicio, quoniam illum dereliquit, quem pater ejus bonum defensorem habuit ». Et inferius de eodem infelici, facto sicut vago et profugo super terram¹:

14. « Post vindictam ergo scelerum, quæ in Ecclesias Dei et Christianos commiserat, Suen rex victus et a suis desertus, quippe quem Deus deseruit, errabundus et inops consilii venit ad Northmannos, ubi tunc filius Haconis Thrucco regnavit. Is quoniam paganus erat, nulla super exulem misericordia motus est. At ille infelix et a toto orbe dejectus, in Angliam transfretavit, frustra solatium quærens ab inimicis. Quo tempore Britannis Adalraad filius Edgari imperavit. Is non immemor injuriarum, quas Dani ex antiquo Anglis inflixerant, exulem repulit, quem tandem miseratus infortunii rex Scotorum benigne suscepit. Ibique Suen bis septem annos exulavit usque ad mortem Herici. Hæc parricidæ avi pericula Suen rex nobis attonitis exposuit ». At quem tandem finem iste consecutus sit, unde ingentem Dei misericordiam quis annuntiet, ex eodem auctore sic accipe²:

15. « Post mortem diu optatam Herici Suen ab exilio regressus obtinuit regnum patrum suorum, anno depulsionis suæ et peregrinationis decimo quarto, et accepit uxorem Herici relictam, matrem Olaph, sive Olavi, quæ peperit ei Chnut. Sed nihil profuit ei affinitas connubii, cui Deus iratus est. Olaph rex Sueonum Christianissimus erat, filiamque Slavorum Estred nomine, de Obotritis accepit uxorem, ex qua genitus est ei filius Jacobus, et filia Ingrid, quam rex sanctus Gersleff de Russia duxit in conjugem. Olaph sane, qui post obitum patris Herici regnum super Suecos accepit, cum exercitu superveniens infelicem Suen regno expulit, et ipse obtinuit Daniam. Cognovit autem Suen, quod Dominus ipse est Deus, et reversus in semetipsum peccata sua præ oculis habuit, pœnitensque oravit ad Dominum, qui exaudivit eum, et dedit illi gratiam in conspectu inimicorum. Et restituit eum Olaph in regnum suum, eo quod matrem suam habuerit, feceruntque pactum firmissimum, ut Christianitatem in regno suo plantatam retinerent, et in exteris effunderent nationes ». Sed quomodo ubi omissam Christianitatem recepit, et peccatorum pœnituit, ei omnia dextere

successere, audi adhuc ab eodem auctore¹ pauca ista, quæ reliqua sunt :

16. « Audiens autem rex Northmannorum Olaph filius Trucis de conjunctione regum, iratus est contra Suen : ratus eum quasi derelictum a Deo, totiensque depulsum, a sua etiam multitudine facile posse depelli. Collecta igitur classe innumera, bellum intulit regi Danorum. Hoc factum est inter Scaniam et Seland, ubi solent reges navali bello confligere (est autem brevis trajectus Baltici maris Helsingburgh, in quo loco Seland et Scania videri potest, familiare latibulum piratis) ibi ergo congressi, Northmanni a Danis victi et fusi sunt. Olaph rex, qui forte solus remansit, in mare se præcipitans, dignum vitæ finem invenit. Uxor ejus post mortem mariti fame inediaque miserabiliter vitam consumpsit, ut dignum fuit. Narrant eum aliqui Christianum fuisse, quidam Christianitatis desertorem, omnes autem affirmant peritum auguriorum, servatorem sortium, et in avium prognosticis omnem suam spem posuisse. Quare etiam cognomen accepit, ut Olaph diceretur : nam et artis magicæ (ut aiunt) studio deditus, omnes, quibus illa redundat patria, maleficos habuit domesticos, eorumque deceptus errore periiit. Quo interfecto, Suen duo regna possedit. Ipse igitur, mox destructo ritu idololatriæ, Christianitatem in Norvegia per edictum suscipi jussit. Tunc etiam Gotebaldum quemdam ab Anglia venientem episcopum in Scania posuit doctorem, qui aliquando in Suedia sæpe dicitur evangelizasse, etiam in Norvegia ». At non hic finis. Usus enim est ipso Dominus ultore ad puniendam sancti Eduardi martyris necem, sicut audisti haud pridem fuisse vaticinatum a sancto Dunstano Cantuariensi episcopo : nam audi eundem² auctorem multa paucis complectentem his verbis :

17. « Suen rex Danorum atque Northmannorum veteres injurias tam occisi fratris, quam suæ repulsionis ulturus, classe magna transfretavit in Angliam, ducens secum filium Chnut, et Olaph filium Cracabem, de quo supra dictum est. Itaque multo tempore multis præliis adversus Anglos exactis, Suen veteranorum regem depulit Ethelredum, et insulam tenuit sua ditione, verum brevi tempore : nam tertio mense postquam victoriam adeptus est, ibidem morte præventus occubuit ». Hic tandem finis Suen Haraldi filii, quæ multis annis confecta hic in unum volumus congesse, quo exemplo unius hominis, quam Deus sit justus et misericors atque longanimis, intelligatur.

¹ Adam, l. II. c. 25. — ² Ibid. c. 28.

³ Adam, l. II. c. 29. — ² Ibid. l. II. c. 36.

Anno periodi Græco-Romanæ 6473. — Anno Æræ Hispan. 1018. — Anno Hegiræ 370, inchoato die 5 Julii, Fer. 7. — Jesu Christi 980.

— Benedicti VII papæ 6. — Ottonis II imp. 8 et 14. Basil. et Const. imp. 5.

1. *S. Adalbertus post triennium episc. Pragensis dictus.* — A num. 4 ad 5. *Sanctus Adalbertus* episcopus Pragensis et martyr, cujus episcopatus initium in præsentem annum confert Baronius, eam tantum dignitatem adeptus est anno DCDLXXXIII. Hujus sancti antistitis, a Leone Ostiensi Bohemorum et Prussorum apostoli appellati, vitam primum scripsit anonymus cœnobii Romani sanctorum Bonifacii atque Alexii monachus, imperante Ottone III, ut ipsemet testatur num. 16. Hunc anonymum proxime secutus est alter monachus, qui aliam ejusdem sancti vitam, regnante sancto Henrico, postmodum imperatore, elucubravit, ut ipsemet indicat num. 4. Utramque viderat Baronius et utramque refert Henschenius ad diem XXIII Aprilis; priorem vero Mabillonius Sæc. v Benedict. pag. 846. Sed antequam de ejus episcopatu verba faciamus, aliqua nobis necessario præmittenda sunt.

2. *Profectio Romana Ottonis II.* — *Ottonem II* hoc anno Romam profectum esse recte scripsit Baronius, docetque chronographus Hildensheimensis, qui ad hunc annum scribit: « Lotharius rex (nempe Francorum) cum magnis muneribus ad imperatorem veniens, sese cum filio suo (nempe Ludovico V cum patre regnante) subjecit voluntati imperatoris: et eodem anno firmata pace imperator Italiam penetravit ». De hac pace loquitur Sigebertus in Chronico hoc anno, referens « Ottonem imp. et Lotharium regem super Carum fluvium convenientes, datis invicem sacramentis pacificatos, Lotharingiamque a Lothario abjuratam ». Nangius vero ex Hugone Floriacensi, non *super Carum*, sed *Rhemis pacificatum*, non *abjurasse*, sed *in beneficium Lotharingiæ ducatum Ottoni dedisse* Lotharium, *id contra principum regni voluntatem factum, magis eorum corda contristavisse* scribit: verum cum Otto usque ad mortem in Italia manserit, et per eam mortem *Adalbertus* Pragensis episcopus dictus fuerit, non sequitur Adalbertum ante annum DCDLXXXIII ad infulas promotum fuisse.

3. *Floret S. Adalbertus postea episc. Pragensis.* — Natus est hic sanctus in Bohemia maxima tunc ex parte *infidelitatis errore præventa*, sed in illis finibus, ubi Christiana religio florebat, et quidem

ex nobilissimis ac piissimis parentibus. In sacri baptismatis lavacro datum est illi nomen *Vuoytiech*, ut narrat antiquior ejus Vitæ auctor. In Codice quo usus Baronius, num. 4 dicitur *Wentius*, sed errore, ut videtur, librarii; pro discendis liberalibus studiis missus est a patre ad *Adalbertum* archiepiscopum Magdeburgensem, qui ei in confirmatione sacrosancti chrismatis Adalberti nomen dedit. Postea in patriam rediit, ubi mortuo episcopo in ejus locum Adalbertus noster substitutus est, quo tempore *Boleslaus Pius*, Sævi filius, Bohemiæ dux principatum gerebat. « Rediens interea de Saracenico bello, adiit Veronam imperatorius apex, scilicet Otto secundus, etc. Ad hunc ergo Sclavonica manus perrexit, ferens legationem de parte ducis et obtulit electum episcopum, etc. Consecratus ille festo amicorum Domini Jesu Petri et Pauli, multo comitatu equitat in dulcem patriam ». Otto vero II anno DCDLXXXIII *Veronæ placitum habuit*, ut diserte notat chronographus Hildensheimensis. Quare eo Christi anno in festo Apostolorum Petri et Pauli Adalbertus consecratus est episcopus Pragensis. Baronius num. 4 tradit, eum *triennio apud suos in episcopali functione mansisse*. Sed ex infra dicendis constabit eum episcopatum non reliquisse ante annum DCDLXXXIX, et anno solum DCDLXXXIII eam dignitatem consecutum esse.

4. *Haraldus Daniæ rex occiditur.* — Ad num. 10 et seqq. *Haraldus* anno circiter DCDXXXI in Dania regnare cœpit, annoque DCDXLVIII cum filio *Suenone* fidem Christianam suscepit, quæ latius tunc per Daniam propagari cœpit, uti anno DCDXLIX, num. 4 et seq. narravimus. Verum post aliquot annos *Sueno* ejurata, quam suis sciebat esse exosam, Christiana religione, arma adversus patrem capessit, eaque profligata illum fugere compulsi, qui hoc anno sagitta vulneratus moritur, uti ostendit ejus Epitaphium a Baronio num. 10 recitatum, et ibidem Adamus lib. 2, cap. 18, pergit persecutionem exponere, quæ Danorum Ecclesias læsit, et post multa *Suenonem* Daniæ regem a Deo castigatum, regno privatum, et in Angliam pulsum, indeque repulsum tradit. Quæ omnia, aliisque uno tenore Baronius recitat, et nos ad majorem claritatem in suos annos distribuemus.

5. *Eo mortuo gravis persecutio in Christianos Daniæ excitata.* — Fusius Haroldi mortem et eandem narrat Helmoldus lib. 1 Chron. Slavorum cap. 13, aitque : « Apud Danos Sueinotto, filius Christianissimi regis Haroldi, diabolico spiritu inflammatus, multas adversus patrem molitus est insidias, cupiens eum quasi longævum et minus validum regno privare, et opus divinæ plantationis de finibus Danorum penitus exterminare. Haroldus autem primum quidem Gentilis, deinde magni patris Umni (archiepiscopi Hamburgensis) doctrina ad fidem Christi conversus, tanta se erga Dominum devotione exercuit, ut non surrexerit similis ei inter omnes reges Danorum, qui tantam Aquilonis latitudinem, ad fidem divinæ cognitionis traxerit, ut omnem terram Ecclesiis et sacerdotibus fecerit esse insignem. Hujus viri industria, in divinis quidem rebus fuit eximia, nihilominus tamen in mundana sapientia, in his videlicet, quæ ad regni gubernationem pertinere videntur, adeo claruit, ut leges et jura statuerit, quæ pro auctoritate viri, non solum Dani; sed et Saxones adhuc hodie servare contendunt. Concitantibus ergo his, qui Deo servire et pacem regis detrectabant, Dani unanimi conspiratione Christianitatem abdicant, et statuantes impium Suein in regnum, patri ejus Haroldo bellum indicunt ». Paulo post : « Ventum est ergo ad bellum, in quo conflictu victa est pars Haroldi, cecideruntque vulnerati multi. Ipse vero Haroldus graviter sauciatus fugit ex acie, ascensaque navi elapsus est ad civitatem opinatissimam Slavorum, nomine Winneptam. Ubi præter spem, quia Barbari erant, humane receptus, post aliquos dies ex eodem vulnere deficiens, in Christi confessione migravit, adscribendus non solum inter Deo dignos reges; sed etiam inter gloriosos martyres. Regnavit autem annis quinquaginta. Quo defuncto Suein regno potitus, in sua crudelitate sævire cepit, gravissimam in Christianos persecutionem exercens. Consurrexeruntque omnes iniqui in finibus Aquilonis, gaudentes vel tunc patere locum malitiæ suæ, bellis scilicet et perturbationibus, cœperuntque finitima regna vexare terra marique ».

6. *Sueno ejus filius in Angliam irrumpit.* — Auctores Anglici, uti notat Alfordus hoc anno num. 4, *Suenonis* mentionem primum faciunt anno dcccxciv, indeque sequentis sæculi initio, quando Angliam semel iterumque ingressus, ea tandem potitus est, eundem nominant. Omnes tamen incursum aliquem *Danorum* ad Ethelredi regis exordia referunt. *Suenonem* vero cum illis fuisse, docet Adamus apud Baronium num. 44, cum ait post annos quatuordecim, anno scilicet dcccxciv, e Scotia solvisse, ut repulsam, quam hoc anno tulit, ulcisceretur. De Suenonis itaque adventu in Angliam intelligendi sunt Wigorniensis, Florilegus, Hovedenus et alii, qui aiunt : « Anno nongentesimo octogesimo Suthamptonia a Danicis piratis devastatur, et ejus cives omnes fere vel occisi, vel captivi abducti sunt : nec multo post Te-

nedland insulam idem devastavit exercitus. Quo etiam anno civitatis Legionum provincia, a Norwegensibus piratis devastatur ». Tanctum igitur insula in Cantio, et urbs Legionum hoc anno a Danis devastatæ, et uti ex Adamo Bremensi citato colligitur, a Suenone expeditionis hujus principe, qui regno expulsus, sedem quærebat. Sed quia Christianorum juratus hostis, ab Anglis rejectus est. Nam, ut habet Adamus Bremensis, Illeicus potentissimus rex Sueonum Daniam invasit, et Suenonem a regno depulit.

7. *Jurgium inter Ottonem II et S. Adelheidem ejus matrem.* — Otto II quorundam adulatione deceptus recessit corde a matre Adelhaida, uti narrat S. Odilo in ejus Vita in Bibliotheca Cluniacensi relata. Illa « filium diligens, auctores discordiæ ferre non valens, secundum Apostoli præceptum, dans ad modicum iræ locum, paternum decrevit expetere regnum. Ubi a fratre rege scilicet Chounrado, et nobilissima Mathilde ejus conjugē benigne et honorabiliter est suscepta. Tristabatur de absentia ejus Germania, lætabatur in adventu ejus tota Burgundia, exultabat Lugdunus philosophiæ quondam matrix et nutrix, urbs inclita, necnon Vienna nobilis sedes regia (nempe regum Burgundiæ) postmodum vero Cæsar Otto ductus pœnitentia, direxit legationem regi avunculo, et sanctæ recordationis patri Maiolo, sub celerissima festinatione obnixius deprecans, ut gratiam matris, quam suis exigentibus culpis perdidit, eorum interventibus promereri posset, orans iterum eos et obsecrans, ut quantocius possent, una cum Augusta matre Papiam eis studerent occurrere. Tantorum enim virorum usa consilio, apud Papiam tempore statuto occurrit mater filio, quo cum mutuo se cernerent, flendo et lacrymando toto corpore solo prostrati, humiliter se salutare cœperunt. Affuit in filio humilis pœnitudo, erat in matre liberalis remissio, permansit in utrisque de cætero perpetuæ pacis indivisa connexio ».

8. *A S. Maiolo aufertur.* — Idem narrat Syrus monachus in Vita S. Maioli abbatis Cluniacensis lib. 3, qui ait : « Imperator matrem zelabatur, quia apud se falso crimine deferebatur; in eamque tunc quasi Reipublicæ dilapidatricem, et sui ab ea expulsatricem, per falsos delatores tali stimulabatur jurgio, ut eam versa vice propellere minaretur regno, etc. » Chronographus Magdeburgensis ad annum dcdlxxviii scribit : « Adelheidis imperatrix cum filia Athelheide abbatisa in Italiam profecta est propter quasdam discordias inter se et filium factas ». At non in Italiam, ut recte Mabillonius tom. v Benedict. pag. 380, sed in Provinciam, ubi Conradus cognomento Pacificus ejus frater regnabat, secessit Adelhaida; cumque reconciliatio facta sit Papiæ, ad hunc Christi annum, quo Otto II in Italiam abiit, ea revocanda est. Et quidem anno insequenti Pascha Romæ Otto celebravit præsentē matre, ex eodem chronographo.

BENEDICTI VII ANNUS 7. — CHRISTI 981.

1. *Bulgari Græciam invadunt, S. Niconis opera propulsantur.* — Annus Redemptoris non-gentesimus octogesimus primus, Indictione nona sequitur, quo Antonius Studites patriarcha Constantinopolitanus, qui timore percitus Bardæ Scleri tyranni imperium invadentis, sponte se abdicarat, moritur. Suffectus est itaque in locum ejus Nicolaus cognomento Chrysoberges, qui tenuit sedem annos duodecim et menses octo. Ita Curopalates, qui et post hæc recenset Bulgarorum eruptionem in Græciam sub Samuele ipsorum rege bellicosissimo, de quo ista habet: « Samuel Bulgarorum rex cum bellicosus esset, neque quiescere ulla ratione sciret, occupatis in prælio contra Sclerum tyrannum exercitibus imperatorum, securitatem nactus, omnem Occidentem excurrerebat, non solum Thraciam et Macedoniam et Thessalonicæ finitima loca, sed etiam Thessaliam et Græciam et Peloponnesum, atque multa oppida in suam ditionem redegit, quorum caput erat Larissa, cujus incolæ in interiores Bulgariæ partes cum totis domibus colonos deduxit, quibus in numero suorum militum conscriptis, contra Romanos sociis utebatur. Transtulit etiam sancti Achillei reliquias, qui Larissæ episcopus fuerat, et in Septa, ubi regiam habebat, reposuit ». Erat enim Samuel rex Christianus sanctorum maxime cultor, quorum patrociniis pluribus noscitur potitus esse victoriis.

2. Adsunt alia de Bulgaris Græciam invadentibus, quæ in rebus gestis sancti Niconis, de quo superius, ita leguntur: « Non longo post tempore Basilius cognomento Apocaucus, prætoris munere nuper auctus, Corinthi versabatur, isthmumque illum præsidio contra Bulgaricos incursus tuebatur. Graviter autem illum angebat non solum molestus ac difficilis morbus, quo tenebatur, sed multo magis urgens metus et pavor Bulgaricæ incursionis, fama gliscente, gentem illam toto Epiro grassatam, in Helladam atque in Peloponnesum copias convertere. Proinde missis Spartam nuntiis Apocaucus Niconem avocarat. Enimvero compleverant ejus aures, quæ de illo passim narrabantur, præcipue quæ de summa illius in Deum fiducia et libertate acceperat. Ex quo autem virtutis ejus illecebris

capi cœperat, beatum ejus vultum cernere, vocemque audire, votis omnibus gestiebat. Semper enim apud omnes gentes in pretio et veneratione fuit vera philosophia. Divinus quidem vir charitate præstans, Apocauci petitionem propenso animo accipiens, antiquius nihil habuit, quam ut Corinthum celerrime contenderet. Quo appellens, non solum morbo ægrum sua præsentia liberavit, sed metu etiam et terrore Bulgarorum, illos alio cursum suum flexisse significans. Ita omni ex parte facta est jucunda Basilio Niconis oratio. Cum ergo dies septem illic posuisset, malorumque impendentium illius per eum discussa et sublata formido esset, domum revertit ». Hucusque de his auctor abbas monasterii sancti Niconis, qui et inferius, quod post sancti viri obitum idem prætor est expertus ex unguento e corpore ejus manante, miraculum ita narrat:

3. « Prætoris munere præcipua cum laude perfunctus Basilius Apocaucus, quem supra memoravimus, priusquam rediret in patriam, Lacedæmonem venit, ut sacram beati thecam adoraret, suumque in illum amorem et studium testaretur. Discedens autem, collectum vasculo sacrum unguentum, quod sanctificationi matisque et morbis omnibus depellendis proficuum esset, domum tulit. Domi ergo quemdam ex famulis, quem in intimis habebat, gravi lethalique morbo decumbentem, ac desperata per medicum vatitudine, deploratum nactus, divino quod gerebat unguento Gregorium (id enim servo nomen erat) certa fide spem fulciens inunxit. Res mira! sub mediam noctem e lecto repente desiliens æger, suisque pedibus gradiens, sonora voce, qui modo elinguis erat, uxorem vocat. Apocaucus ad vocis sonum excitus, accurrit, et sanitati, aut vitæ potius restitutum cernens, modum causasque interrogat. Tum ille: monachum sibi quemdam affuisse ait, insignem cruce virgam manu gerentem, cultuque corporis eremitico, et lethalem morbum protinus depulisse. Adstans enim mihi, aiebat, monachus ille (cujus etiam vultus lineamenta signabat, ex quibus Apocaucus sanctum fuisse didicit) manuque prehendens: Deus, inquit, propter Apocauci fidem vitam

tibi Metanōitæ precibus largitur, et cum hoc dicto statim abiit. Ego vero integram valetudinem adeptus sum ». Hucusque de rebus gestis cum Basilio prætor S. Niconis Bulgarorum propulsatoris, quæ unica fax, hoc tenebroso tempore, Orientem illustrasse reperitur.

4. *Diplomata Ottonis secundi imperatoris.* — Extat hoc eodem anno datum Diploma Ottonis secundi imp. idemque ab ipso impertitum monasterio S. Vincentii ad fontes Vulturii posito. Incipit : « Si Ecclesiarum Dei curam habere studuerimus, proculdubio imperium nostrum stabile erit, insuper et vitam æternam promereri credimus, etc. » In fine autem : « Joannes cancellarius ad vicem Petri Papiensis episcopi archicancellarii recognovi et subscripsi. Datum quinto idus Aug. anno Dominicæ Incarnationis nongentesimo octogesimo primo, regni vero domini Ottonis secundi XXI, imperii vero VIII, Indictione nona ». Inest sigillum ejusdem, aliaque Diplomata ejusdem generis privilegia continentia ibidem extant, ut illud datum

sexto idus Octobris hoc eodem anno Redemptoris nongentesimo octogesimo primo, Indictione decima inchoata, imperii a tempore coronationis quarto decimo, per manus ejusdem Joannis cancellarii, et alia id genus privilegiorum Diplomata. Ex quibus illud saltem non levis momenti declaratum apparet, eosdem Ottones nominis regis et imperatoris diversam habuisse rationem, nec se inscribere solitos imperatores, nisi postquam Romæ ab ipso Romano Pontifice fuissent coronati. Extant ipsa Diplomata in Codice scripto antiquitus caractere Longobardo, quo Chronicon continetur Joannis monachi, qui scripsit temporibus Paschalis secundi, de quo ipse in Præfatione ad Benedictum abbatem, cum venisset Capuam : « Me intuitus, cum sæpe huc respexisset : Bene, inquit, o fili, magnum opus cœpisti ; sed bene cœpta, melius proseguere stude ». Accepi ipsum Codicem (ut alias dictum est superius) ab Alexandrino patriarcha Camillo Cajetano ejusdem monasterii abbate commendatario.

Anno periodi Græco-Romanæ 6474. — Anno Æræ Hispan. 1019. — Anno Hegiræ 371, inchoato die 6 Jul., Fer. 4. — Jesu Christi 981.

— Benedicti VII papæ 7. — Ottonis II imp. 9 et 13. Basil. et Const. imp. 6.

1. *Nicolaus Chrysoberges fit patriarcha Constantinop.* — Ad num. 1. *Antonius Studita* patriarcha Constantinop. ineunte anno nongentesimo septuagesimo nono abdicavit ; et paulo post medium anni nongentesimi octogesimi tertii *Nicolaus Chrysoberges* patriarcha Constantinopolitanus constitutus est, uti an. DCCLXXVI, num. 3 ostendimus. Neque Chrysobergis initium cum præsentis anno illigari potest, etiam in Baronii anno DCXCV mortem ejus recte narrantis sententia ; cum ipsemet fateatur, cum sedem tenuisse annos XII et menses VIII. Quantis virtutibus *Antonius* exornatus fuerit, anno DCCLXXV insinuavimus.

2. *Bellum Bulgaricum.* — Eruptio vero *Samuelis* Bulgarorum regis bellicosissimi ad annum præcedentem retrahenda. Cedrenus enim pag. 693, ait : « Samuelus homo bellicosus, ac quietis impatiens, nactus licentiam, Romanis exercitibus bello adversus Durum occupatis, totum Occidentem incursionibus vexavit » et cætera a Baronio ex Curopalate hic recitata. Quare cum bellum illud civile initio imperii Basillii ortum quadriennale tantum fuerit, ut suo loco vidimus, sub finem an. DCCLXXIX, aut saltem insequenti extinctum est. Ad hunc an-

num referendum quod ibidem de Basillii imperatoris in Bulgariam expeditione narrat Cedrenus. « Basilius imperator, inquit, ut primum Duri negotio se expediit, ulcisci Samueli maleficia cupiens, collectis Romanis exercitibus, in Bulgariam ipse ducere statuit ». Verum hæc expeditio infelix fuit ; cum imperator ægre per fauces Philippopolim pervenerit, deceptus a Stephano scholarum Occidentium domestico, quem ob staturæ humilitatem *Contostephanum appellabant*, Leoni Melisseno, quo imperator utebatur, inimicissimo.

3. *Initium belli inter Ottonem II et Græcos gesti.* — Otto II hoc anno *Natalem Domini Romæ celebravit*, inquit Lambertus Schafnaburgensis. Chronographus vero Hildensheimensis notat, eum Pascha in eadem Urbe celebrasse. Denique Hermannus Contractus juxta editionem Canisianam : « Otto imperator, inquit, peragrata Italia, Campaniam Calabrosque fines cum exercitu ingreditur ». Sigbertus vero : « Otto imp. Apuliam et Calabriam Italiæ provincias ad jus regni Græcorum appendentes transferre ad imperium Rom. conatur, maxime propter affinitatem, quam per uxorem suam Theophaniam cum imperatore Græcorum habebat.

4. *Anglia iterum a Danis vexata.* — « Anno nongentesimo octogesimo primo S. Petroci confessoris martyrium in Cornubia devastatur a piratis; qui anno præterito Suthantoniam vastaverunt. Qui deinde in Domnania, et in ipsa Cornubia circa ripas maris frequenter prædas agebant », inquit Hovedenus, quod et alii historici Anglici habent. Quare Dani iterum Angliæ maritima invasere, verumque est quod scribit Huntindoniensis pag. 357, postquam S. Eduardi regis martyrium narravit. « Inde Dominus iterum ad iram promotus, et plus solito irritatus, genti pessimæ malum inextricabile conferre cogitavit ». Floruit sanctus Petrocus monachus sæculo sexto, quo Romani et Hierosolimam

visitavit, et in Indiam ac Orientalem oceanum penetrauit, qui postquam sanctissime vixisset, mortuus est in Cornubiensi monasterio circa an. DLXIV, ut videre est apud Usserium in Indice chronologico Historiæ Britannicæ et apud Alfordum in suis Annalibus. Testantur autem historici Anglici episcopalem sedem erectam fuisse in oppido, ubi sepultus fuerat. Incensa autem hoc anno Ecclesia cathedrali S. Petroci, episcopatus alio translatus fuit, hodieque, ut testatur Cambdenus in Cornuallia, *Exonia* illo potitur.

Hoc anno S. *Adelbertus* primus Magdeburgensis archiepisc. mortuus est, ut anno DCCLXXXIII ostendam.

BENEDICTI VII ANNUS 8. — CHRISTI 982.

1. *S. Niconis Lacedæmone propulsantis pestem egregia facta.* — Redemptoris annus nongentesimus octogesimus secundus, Indictione decima sequitur, quo tempore præter bella civilia et externa, aliaque mala quibus Oriens afflictabatur, peste etiam laboravit, cum ad eam curandam Lacedæmonii destituti humano auxilio, ad opem divinam implorandam assurgunt, legationemque decernunt ad Niconem virum sanctissimum, de quo sæpe superius dictum est, de qua in rebus ab ipso præclare gestis ista narrantur: « Transactis in ea spelunca diebus octo, a morbo recreatus, Spartam venire abnuens, Amyclas contendit. Quod ut sensere Lacedæmonii, festine ad illum primarii cives, et alii e plebe certatim convolarunt enixe orantes, ut Spartam usque venire velit: invaserat enim civitatem pestifera lues, et plurimos incolas absumebat: propterea venire illum cupiebant, quod se divinis ejus precibus liberandos confiderent; ille vero, et cætera misericors, et in eos maxime, qui ejus populus et sors futuri essent, tanquam futura præsagens, eoque in illos propensior, et legationem benigne excepit, annuitque petitioni, et ingruentis mali propulsionem spopondit, si modo ipsi Judaicam gentem ex urbe sua pellerent: ne execrandis eorum (ut aiebat) moribus piaculisque religionis suæ diutius eam contaminarent. In his, ait, si me audieritis, et pestis a vobis recedet, et ego quod superest

vitæ, ducam vobiscum. Quibus verbis monita alia adjiciens, sacras etiam Jeremiæ voces subinde aspergebat¹: Viæ tuæ fecerunt hæc tibi, et iniquitates tuæ prævaluerunt, et duro ludo percussa es. Cumque illi ejus oratione commoti, seipsos condemnarent, atque omnia quæ jusserat, facturos promitterent: nihil amplius cunctatus, cum legatis illis profectus est, non cantherio, aut lectica vectus, nec multo comitatu stipatus, sed solo virtutum choro circumseptus. Ad ejus porro adventum lues cessavit, et Judæi urbe pulsati sunt. Nec vero Lacedæmone amplius excedendum, sed in ea perpetuo manendum constituit: ita ut non facile pedem alio efferret, nisi cum necessaria res quæpiam aliquo vocaret, et tunc quoque gradum citius referebat. Videres igitur accurrentes quotidie ex universa Peloponneso ægrorum omnis generis catervas: quibus ille non minus animæ quam corporis curam impendebat: mellitis enim adhortationibus ad pietatis zelum eos accendebat, ad salutem cuique suam pœnitentiæ ope disponebat. Fortunata vero Lacedæmon, quæ talem medicum civemque sortita es, ejus divinis præceptis ac disciplinis ad omnem virtutis formam multo certius rectiusque quam inanibus otium Lycurgi legibus effingebare! » Subjicit his de structura templi, tum ejus hortatu elaborata, cui adversatus Joannes quidam cogno-

¹ Jerem. IV.

mento Aratus, Judæorum patronus, quæ sit passus, ab eodem auctore hanc subjiciente orationem sic accipe :

2. « Hic, inquit, solus invidiæ stimulis concitatus, aut dæmonis potius scelere ac fraude impulsus, ira et odio adversus Niconem insaniebat, divini operis argumentum ad probrum et injuriam suam rapiens : proclivior siquidem est malitia, ut ad pejora feratur, quam ut melioribus inhæreat. Non cessabat egregius ille Sancto in os obloqui, cœptoque operi, ne colophonem adderet, omni ope prohibebat. Prorsus enim cum reliquis Laconibus illi non conveniebat, unde et Judæorum fugam injuria et immerito factam affirmabat, eamque civibus vitio vertere, atque illos hoc nomine suggillare et traducere non verebatur ».

3. « Cumque opificii cujusdam obtentu, quo poliri et illustrari textilia solent, Judæorum unum in urbem introduxisset : intercessit illico Nicon, bellatorque juxta Prophetam factus, consueta lenitate paululum intermissa, leoninum animum induit, et fuste qui propter jacebat arrepto, Judæum male acceptum toras extrusit, formidabiliorque hostibus quam Hercules ille sua clava visus est. Judæorum enim gentem usque adeo aversabatur, ut nec lingua, nec auribus usurpare illorum nomen vellet, ut jure in illum Davidis verba convenirent¹ : Qui oderunt te, Domine, oderam, et super inimicos tuos tabescebam : perfecto odio oderam illos, et inimici facti sunt mihi,² propterea nomina eorum labiis meis non commemorabo.

4. « Hæc vero cum audisset a furore nomen trahens Aratus, rabie tumens (ut semper litium amans et impudens atque ad immania præceps est improbitas) in sanctum anhelans irruere cœpit, conviciis onerare, proscindere, minis deterrere, quanquam inanis hæc illi strepitus erant, et pro larvæ terliculis habebantur. Qui leni ad eum voce (nec enim contendere prorsus, nec altercari norat) : Abi, inquit, et ad te redi, infelix. Desce scelera tua : brevi enim senties, quis arrogantiae fructus, et qualia nequitiae sint præmia. His dictis et tanquam in mortui (quod aiunt) aures effusis, ad monasterium regressus est : hominis enim animum verba non penetrarant. Quare non destitit amens ab in-

cœpto, quin adversus sanctum de more fremeret, proscindens illum, figensque tota urbe dignis furore et insania sua probris et contumeliis, quin etiam minas intentabat, nesciens stupidus et vecors, quod non gloriatur malitia adversus virtutem, nec proficiat inimicus contra electos Dei, ut scriptum est³ : Et filius iniquitatis non apponet nocere ei. Quid tum autem consecutum est ? Tantum abfuit, ut ejus minis ac maledictis avocaretur ; ut in his potius, Domini exemplo, tanquam laudibus triumpharet. Dominus autem de caelo auditum fecit judicium, et malitiæ justissimas pœnas dedit. Verba in rem misero abierunt : nam dignos amentiae suæ fructus tristi et miserabili vitæ exitu percepit. Nec tarda fuit vindicta, qualis sæpenumero divina bonitate conversionem præstolante, contingere solet ; sed e vestigio, de repente, nec opinantem, ut mox dicam, oppressit.

5. « Nocte proxima objecti sunt infelici duo senes in somnis, quos alii duo sequebantur, forma quidem eunuchi, sed longe quam humana præstantiore. Ab his vero flagris cædi sibi videbatur, et sic verbis increpari : Quomodo tu eo es provectus audaciæ, ut servum Dei contemnere, et conviciis appetere non dubitares ? deinde in obscurum post verbera carcerem detrudi. Et cum veniam multis orasset, vix tandem cædendi finem fecisse, nec tamen e custodia dimisisse. Experrectus igitur, gravem statim in febrem incidit : accitoque Nicone, ad ejus pedes advolutus, misericordiam imploravit. Cui beatus : Quæ in me perpetrasti, ait, ea tibi, frater, quantum in me est, condonabuntur. Sed quoniam vitæ finis tibi cælesti decreto præstitutus est : nemo erit de cætero, quemadmodum ait² Prophetæ, qui Dei consilium dissipare possit. Et his dictis ad monasterium reversus est. Illi vero tercia post dies infelici morte vitam eripuit. Ex quo metus ingens ac trepidatio Lacedæmonios invasit : nec repertus est quisquam e minimis et maximis, qui ad Niconem non advolaret, ejusque jussis pareret. Fidem enim fecerat omnibus exemplum, qui Christi servos ludibrio habent³ : quoniam utique est fructus justo, et Deus judicans eos in terra ». Hactenus de his quæ occasione pestis ingruentis a sancto viro propulsatæ dicenda fuerunt.

¹ Psal. CXXXVIII.

² Psal. LXXXVIII. — ³ Psal. XXXII. — ³ Psal. LVII.

Anno periodi Græco-Romanæ 6475. — Anno Æræ Hispan. 1020. — Anno Hegiræ 372, inchoato die 26 Junii, Fer. 2. — Jesu Christi 983.
— Benedicti VII papæ 8. — Ottonis II imp. 10 et 16. Basil. et Const. imp. 7.

1. *Anglia a Danis vexata.* — Hovedenus parl. 1 Annal. pag. 427, Danos ab Anglis vexandis non destitisse, his verbis narrat : « Anno nongentesimo octogesimo secundo ad provincias Dorotensium [legendum, *Dorcetensium*, ut ex Wigorniensis et Florilego recte emendat Alfordus] tres naves piratarum applicuerunt, et Portland devastaverunt. Civitas Lundonia igne cremata est ». Idem habent annalista Mailrosensis, et quidam alii historici Anglici.

2. *Translatio S. Eduardi martyris.* — Hoc anno corpus *sancti Eduardi* martyris, quod in loco non longe ab eo in quo necatus fuit, jacuerat, crebrescentibus miraculis, alio cum pompa translatum est, uti narrat Malmesburiensis lib. 2 de Gest. Pont. pag. 251. Jacuit ergo ibi triennio, invidentibus inimicis mortuo cespitem Ecclesiasticum, cui vivo inviderant decus regium. Sed affuit divina potentia, qui insontem signorum levaret gloria. Ibi ostensa de cælo lumina, ibi claudus gressum composuit, ibi mutus organum resumpsit, ibi prorsus omnis invaletudo sanitati locum fecit ». Cum enim

S. Eduardus anno DCCLXXVIII occisus fuerit, triennium illud anno superiori absolutum fuit. Subdit postea Malmesburiensis, *Elfridam* reginam sancti interfectricem pœnitentiæ causa duo monasteria condidisse, et jam lib. 2 de Gest. Reg. pag. 61, hæc de eadem regina dixerat : « Quoniam animus indisciplinatus ipse sibi tormentum est, patiturque suos etiam hic mens anxia manes, Elfrida de illo regali supercilio inclinata dire pœnituit, adeo ut multis annis apud Walewellam (ubi monasterium fundarat) carnem in deliciis nutritam, cilicio convolveret, noctibus solo strata sine cervicali somnum hauriret, cruce præterea quascumque posset corpori comminiscens ; speciosa mulier et pulchre viro sobria ; sed quod tantum nefas commisit, pœna digna ». Sancti Eduardi corpus in Septoniensi monasterio repositum, annoque M1 a Septentoniensi Ecclesia ad Glastoniensem translatum.

Hoc anno magnum prælium inter Ottonem II et Græcos in Calabria habitum, ut legere est anno insequenti.

BENEDICTI VII ANNUS 9. — CHRISTI 983.

1. *Expediit Ottonis II in Calabriam contra Sarracenos ; ubi multa de Vesuvio narrata a Petro Damiani.* — Sequitur annus Redemptoris nongentesimus octogesimus tertius, Indictione undecima, quo Otto junior imperator expeditione parata adversus Græcos et Sarracenos pugnaturus, in Cala-

briam venit. Leo Ostiensis duplicem ejusdem Ottonis in Campaniam atque Calabriam ponit adventum, pacificum alterum, alterum cum exercitu pugnaturi adversus eosdem Græcos et Sarracenos. De primo adventu his verbis : « Secundus Otto ejus filius cognomento Rufus, Capuam venit, inde Ta-

rentum, ac Melapontum adiit, deinde Calabriam». De secundo autem sic: «Inde prospere ad suos rediens anno Domini nongentesimo octogesimo terlio, magno conflato exercitu iterum in Calabriam dimicaturus cum Sarracenis advenit». Hæc ex antiquis Chronicis Cassinatibus. Porro ad hunc secundum adventum spectare certum est, quod Petrus¹ Damiani in Epistola ad Dominicum Loricatum narrat memoratu dignum, quod se accepisse testatur a Desiderio Cassinensi abbate, qui fuit postea Romanus Pontifex, Urbanus secundus: ait enim:

2. «Porro dum styli hujus exaro dictator articulum; ecce Desiderius religiosus Cassinensis monasterii abbas accedit: qui nimirum sicut beato Danieli cognatione jungitur nominis (appellatus est enim² Daniel a Domino, vir desideriorum), sic eum ab illo non separat assertio veritatis. Illic itaque mihi aliquando narravit, quod ipsa ratio persuadet, ut scribam: Servus, inquit, Dei Neapolitanæ regionis in prærupta rupe juxta viam publicam habitabat solitarius, qui nimirum dum nocturno tempore psalleret, et fenestram cellulæ horarum explorator aperiret; ecce vidit multos nigros homines tanquam Æthiopes iler carpere, et longo tractu sarcinarios comminare. Cumque eos inquireret, qui essent, cujusve rei gratia hæc jumentorum pabula devecarent: Maligni, inquiunt, spiritus sumus: hæc paramus non pabula pecoribus alendis, sed fomenta potius ignium hominibus comburendis». Ita plane secundum similitudinem illam³ Apostoli: «Supra fundamentum hoc alii ædificant fœnum et stipulam, quale cujuscumque opus sit, ignis probabit». Per fœnum et stipulam peccata significans, quæ gehennæ accensa incendio perpetuo peccatores incendunt. Pergunt illi: «Præstolamur enim in proximo principem Capuæ Pandulphum, qui jam decumbit, et Joannem magistrum militum Neapolitanæ civitatis, qui adhuc vivit incolumis. Illico vir Dei præfatum Joannem impiger adiit: quæ viderat, quæque audierat, fideliter cuncta narravit.

3. «Per idem tempus Otto imperator secundus adversus Sarracenos præliaturus, in Calabriam festinabat. His igitur auditis, Joannes ait: Modo necesse est nos imperatori occurrere, et cum eo simul de hujus terræ statu provida consideratione tractare. Porro post imperatoris abscessum spondeo, quia et sæculum deseram, et monachicum habitum sumam. Ut autem probaret, utrum verum esset, quod ille narrabat, nuntium protinus ad mœnia Capuana direxit. Qui veniens, Pandulphum jam mortuum reperit. Ipse quoque magister militum Joannes antequam istas partes imperator attingeret, vix diebus quindecim supervixit. Quo mortuo, mons Vesuvius, unde videlicet gehenna frequenter eructat, in flammam erupit, ut liquido probaretur, quia fœnum, quod a dæmonibus por-

tabatur, nihil aliud fuit, nisi ignis trucidis incendii, qui pravis et reprobis hominibus debebatur. Nam quandocumque in illis partibus reprobis dives moritur, ignis erumpere de prædicto monte videtur, tanquamque sulphureæ resinæ congeries ex ipso Vesuvio protinus fluit, ut torrentem faciat, atque decurrente impetu in mare descendat. Ubi videlicet corporaliter videri potest, quod in Apocalypsi⁴ Joannis de reprobis dicitur, quia pars illorum erit in stagno ardenti igne et sulphure, quod est mors secunda.

4. «Enimvero et Salernitanus princeps, hujus videlicet Guaimarii æque principis, qui ante non plures annos pro multis violentiis atque tyrannicis oppressionibus suorum gladiis peremptus est, avus, cum procul adspexisset quadam die de prædicto monte Vesuvio piceas atque sulphureas repente flammam erumpere, protinus ait: Proculdubio sceleratus aliquis dives in proximo moriturus est, atque in infernum descensurus. Sed o cæca mens reprobi hominis, imo super nos terribile iudicium Conditoris! superveniente siquidem proxima nocte, dum securus cum meretrice concumberet, expiravit, quem illa (ut postmodum referebat) quid contigisset, ignorans, diutius pertulit, et vix tandem a se non hominem sed cadaver exanime protastuta dejecit». Quibus cognitum est, non reprobos tantum divites, sed carnis putredine inquinatos, ac denique peccantes omnes quovis genere mortalium peccatorum, ac sine pœnitentia morientes, gehennæ subituros fore supplicium. Nam quomodo eandem pœnam passus sit presbyter arrogans, ejusmodi idem Petrus mox historiam subjicit, dicens:

5. «Quidam præterea in Neapolitanis partibus presbyter, volens certius quam non licebat, addiscere, illuc ubi gehennale barathrum ferventius eructabat, præsumptoria decrevit audacia propinquare. Missarum igitur solemniam celebravit, sicque infulatus, velut armatus iter arripuit: sed dum ultra quam solebant homines, temerarius scrutator accessit, redire non valens, postmodum non apparuit. Alius vero presbyter matrem suam Beneventi reliquerat ægrotantem. Cumque per Neapolitanos fines domino suo comitatum præberet, exundantibus flammis intendens, clamorem lugentis audivit, quem suæ matris esse, proculdubio cognovit. Notavit horam, et tunc evidentissime comperit matrem fuisse defunctam». Hucusque Petrus Damiani vocatus, ut Eusebius Pamphili.

6. Licet autem poetice magis quam theologicè credita sint ejusmodi ora terræ evomentia jugiter flammarum globos esse inferni portas, et quod idem ignis sit ille inferni peccantibus præparatus, atque id scripsisse reperiantur antiqui theologi non vulgares, ut alias superius meminisse recolimus; tamen certum, ista potius similitudinem gerere illius gehennæ, mortalibusque in exemplum vel in-

¹ Petr. Dam. Ep. v. c. 13. 14. — ² Dan. ix. x. — ³ 1. Cor. iii.

⁴ Apoc. xxi.

dicium posita gehennalis ignis illius, qui sine luce ardens animas simul comburit et corpora, cui tantum peccata fomenta ministrent. Cæterum externis signis his ob oculos positis, Deum per visum quam sæpissime damnationem peccantium et impœnitentium ostendere consuevisse, non ista tantum, quæ recitavimus, sed alia innumera exempla declarant.

7. *Ottonis bellum infaustum et causæ.* — Sed jam prosequamur Ottonem cum exercitu in Calabriam adversus Sarracenos junctos Græcis proficiscentem, quem quidem præcesserunt vaticinia satis infausta, cum ostensum est, offenso numine in sanctis ejus, ingentem ejus exercitui parari cladem. Deplorarunt scriptores ejus temporis ejusdem Ottonis mores, utpote nonnihil degeneres a parentis vita, cui successerat, Ottonis Magni. Inter alios auctor ejus temporis, qui res gestas S. Adalberti fidei prosecutus est stylo, de ipso Ottone valde conquestus, hæc habet¹: « In tantis adversis illum circumfluentibus non respiscit: quid contrarium ministro æterni imperatoris egerit, quid pio Laurentio peccaverit, non recognoscit. Episcopatum, quem pater in sacrum honorem pretiosissimo martyri erexit, ambitione suorum, in peccatum ductus filius destruxit non faciens ordinem: quasi qui aquam in mare fundit, episcopatum dejecit, ut plenum deliciis archiepiscopatum ditaret. Tulit episcopum optimo Laurentio, posuit Parthenopoli archipræsulem nostro Mauritio. Factum est contra jus in Ecclesia Dei, donec adveniens novus rex et religiosissimus veterem errorem correxerat. Post tres Ottones Henricus Christianissimus ecce venit, qui malefacta correxerat ». Sed antequam ulterius progrediatur oratio, hic quæ obscura ab auctore ponuntur, et in Ottonem adeo exaggerantur, quorum causa talia passum affirmat, hic primum pervestiganda putamus.

8. Per sanctum Laurentium martyrem scias intelligi Ecclesiam Mersburgensem, in qua S. Laurentius patronus colitur. Per Parthenopolim autem intelligi Magdeburgum, quam in metropolim ingentem satis (ut suo loco dictum est) Otto Magnus hujus pater erexerat sub titulo sancti Mauricii præcipui ejus patroni. Quid accidit? Defuncto hoc ipso anno sancto Adalberto primo ejus archiepiscopo, cum sedisset (ut dictum est) annis duodecim, in locum ejus subrogatus est Othricus vir valde insignis, quo post electionem hoc pariter anno dum Romam iret, jam mortuo, idem Otto imperator alienæ sedis episcopum, nempe Giselerum Mersburgensem, Magdeburgensi præficit, virum valde insignem. Qui adversus hujusmodi negotium declamatum fuisse, scandalumque illatum esse scivit Adam chronographus, putavit in eo esse peccatum, quod qui translatus est ad Magdeburgensem Ecclesiam, idem retineret priorem episcopatum, sique duarum Ecclesiarum unus esset episcopus,

duarum conjugum unus sponsus. Verum quæ dicta sunt ex gestis S. Adalberti, rem aliter se habuisse significarunt, nimirum extinctum et transfusum episcopatum S. Laurentii in archiepiscopatum Magdeburgensem, cujus rei gratia idem Otto imperator sanctum Laurentium sit passus ultorem. Cæterum Adalberti Magdeburgensis episcopi obitum, et successionem Giseleri Lambertus refert anno superiori. Qui etiam quod dictum est de episcopatu Mersburgensi comprobatur, dum anno superiori ista ait¹: « Destructus est episcopatus in Mersburg, miræ magnitudinis ædificium cecidit, sive cessit in Magdeburg ». Sed et Ditmarus testatur sedem Mersburgensem fuisse his diebus expoliatam episcopatu, penitusque destructam. Pergit vero auctor:

9. « Propter hoc peccatum (veluti patet) pugnante Laurentio, victoriam Otto perdidit, et diebus suis omnem confusionem recepit. Avertente faciem Deo, quæ sit virtus tua, o homo, specta nunc in homine uno. Quid prodest bellicus ardor? Quid valet virtus sine suo loco? Age tunc cuncta cum consilio. Quorsum venis sapiens invito Deo? sicut scriptum est²: Non est consilium, non est ratio contra Deum. Quapropter audiamus bonum consilium, quo dicitur³: Omnes curas et cogitatum tuum jacta in Dominum, et ipse te enutriet: Spera⁴ in Domino, et ipse faciet. Inspiciamus magnæ indolis virum, ex multo merito imperatorem Augustum: ecce dum peccat, flagellatur, plenus adversis media vita moritur, jacet nunc inglorius, o utinam et non reprobis, pulchræ virtutis alumnus. Prius vero quam moreretur, ut ad penitentiam hominem stimularet, sicut est solus semper clemens Deus, talem visionem cuidam sapienti ostendit, quam ut auditam recolimus, infra annotare non absurdum putamus.

10. « Nocte intempesta, quando altus sopor solet occupare homines, vidit visum de quo agimus, regem Ottonem aureo solio sedentem, sub pedibus ejus argenteum scabellum, episcoporum et adstantium procerum circa ipsum prospexit seriem longam. Intravit autem decora facie, instar ignis, juvenis, quem nivea vestis vestivit, et purpurea stola in pectore cinxit. Nec stat. Via vadit, argenteum scabellum sub pedibus Cæsaris cum indignatione subtrahit, et averso vultu januam petit. Quod ægre ferens, post illum cucurrit, tale somnium cernere qui meruit: Quæso, inquit, domine mi, dedecus ne facias, suppedaneum reddas, quisquis qui tanta audes, obsecro, regem coram populo ne confundas, (hæc magna potentis Laurentii vera persona erat, sicut illi episcopo post agnoscere Deus concesserat). Imo, inquit, si meum dedecus non emendat, majora faciam, subtracto scabello, ipso solio deponam.

11. « Hujus visionis terrores, minasque exitia-

¹ Apud Sur. die XXIII April. tom. II.

¹ Crant. in Metrop. Sax. I. II. c. 26. — Prov. XXI. — ² Psal. LIV. — ³ Psal. XXXVI.

les cum cognovisset rex puer, facinus non correxit, sive amor hominis suavit, sive ira Dei ita jussit. Huic in parvo corpore melior virtus, magnus amor, et fides suis, larga manus sine querela cunctis, sapientia major annis, pia humanitas erga Dei servos, confessio et oratio bona regnum tenuerunt; sed hæc pecunia de statuendis episcopis (ut est humanum peccare, in plurimis periculose exercuit jocum juventutis, cum esset in pulchro usu super doctrina librorum. Sola infelicitas bellorum victoriam tulit. In medio cursu, cum dulcissima vita et gratissima lux juvenibus hæc est (non adjuvat honor regis) sit victima mortis, pulvis in pulverem redit. Videte quantum gloriæ Cæsar reliquit». Hæc auctor de amissa victoria, et morte Ottonis imp. ulciscente martyre Laurentio illatam Ecclesiæ suæ per ipsum principem ignominiam: verum parum fuisset, amisisse victoriam, nisi et totum suum perdidisset exercitum. Unde perpendant reges, quam periculose, quanta cum jactura, corporis, rerum, animæque dispendio Ecclesiasticis se rebus immisceant, etiam cum quid recte, Deoque gratum facere se existimant.

12. At vero de clade accepta hæc breviter Marianus Scotus temporis ejus scriptor: «Otto imperator, apud Calabriam occiso a Græcis exercitu ejus, de navi exiliens natando fugit». Sed apud Sigebertum hæc paulo prolixius verbis istis: «Græci infensi, quod imperator Otto provincias Græcorum invaderet, conducto sibi Sarracenorum auxilio, imperatori in Calabria bello congregiuntur. In quo bello omnes Romanorum copiæ usque ad internecionem pæne deletæ sunt. Imperator natando nitens evadere, a nautis ignorantibus eum capitur, et a quodam eorum qui negotiator Sclavorum erat, agnitus nec proditus per illum re delata ad imperatricem, et ad Theodoricum Metensium episcopum, qui in civitate Rhosana rei eventum præstolabantur, difficulter per Sclavum et episcopum liberatur: nautis quippe ad pecunias pro eo redimendo allatas inhiantibus, imperator ascenso equo, vix evasit. Omnibus pro infortunio Reipublicæ animo consternatis, sola imperatrix feminea et Græca levitate insultabat eis, quod ab exercitu suæ nationis victi essent Romani. Ac per hoc cœpit primatibus exosa haberi». Hæc ipse. Porro accessit ad culpam, quod præter jus fasque episcopi Germaniæ in eodem prælio militarunt, quorum aliqui sunt interfecti: de quibus et aliis in eodem prælio desideratis proceribus Lambertus hæc ait: «In quo prælio occisus est Henricus Augustensis Ecclesiæ episcopus. In quo etiam prælio idibus Julii occisi sunt milites fortissimi, hi scilicet, Udo, Gebhardus, Gantherus, Bertoldus cum aliis multis, et Otto dux, atque Wernher abbas Fuldensis». Hæc Lambertus.

13. Verum quod pertinet ad Henricum episcopum Augustanum, in rebus gestis sancti Udalrici manifesta est assertio, ipsum ad eum episcopatum per ostium non intrasse, sed aliunde, et de ejus

obitu hæc ait: «Anno itaque Incarnationis Domini nostri Jesu Christi nongentesimo octogesimo tertio, imperator cum exercitu Calabriam provinciam adiit: illuc etiam episcopus Henricus cum eo pervenit; cumque ibi pugna cum Sarracenis ageretur, plurimis ibi ex utraque parte occisis: heu dolor! sive captus, sive occisus etiam ibi remansit, etc.» Deplorat auctor exitum ejus, quo cum corpore pariter anima periclitata est. Leo Ostiensis eadem nota annorum numeri consignans hanc cladem, de aliis ibi necatis hæc addit: «In eo prælio Landolphus princeps Capuanus Pandulphi filius cum fratre Arenulpho et aliis plurimis corruit». Addit vero Sigebertus anno sequenti: «Theodoricus Metensium episcopus obiit, et secundum prophetiam viri Dei vix aliquis principum, qui in bello Calabrico evasit, diu supervixit». Porro de bello isto, et adepta primum victoria, et a victis quomodo sint superati, et Otto quonam modo hostium navigio subtractus sit a periculo, et quemadmodum ab his se eripuerit: hæc omnia sigillatim describit Dithmarus², cujus avunculus Udo (ut ipse testatur) in eodem bello peremptus est.

14. *Ottonis imperatoris obitus et sepulcrum.* — Rediens Romam Otto, mœrore confectus moritur, atque ut Leo Ostiensis³ testatur, «in labro porphyretico sepultus in atrio Ecclesiæ B. Petri Apostoli, introeuntibus in Ecclesiæ ipsius paradisum ad lævam». Contigisse obitum ejus circa finem anni hujus, possumus intelligere, quem superstitem fuisse adhuc mense Novembris, datum ab eo Diploma pridie idus Novembris, de quo inferius, aperte significat: septimo autem idus Decembris esse defunctum, Dithmarus⁴ docet, qui ista de morte Ottonis imp. locupletius sicut et sincerius prosecutus est, atque post cladem acceptam, Ottonem de eligendo filio suo Ottone tertio successore comitia habuisse Veronæ, inde vero Romam venisse, ubi et mortuus est. Sed quæ præcesserunt, sic narrat: «Imperator cum Romam veniret, relicta matre sua venerabili in Papia civitate, graviter infirmatus est, et ut extrema persensit adesse, omnem suam pecuniam partes dividit in quatuor, unam Ecclesiis, secundam pauperibus, tertiam dilectæ sorori Mathildæ, quartam suis ministris ac militibus. Factaque latialiter confessione coram Apostolico atque presbyteris, accepta ab eis optata remissione, septimo idus Decembris ex hac luce subtractus est, terræque commendatus, ad introitum Orientalis paradisi domus S. Petri, cunctis patet fidelibus. Et imago Dominica honorabiliter formata venientes quosque stans benedicit».

15. Ita quidem cernitur adhuc labrum porphyrelicum, in quo requiescit corpus ejusdem Ottonis, perseverat adhuc imago illa veneranda Salvatoris stantis, et introeuntes benedicens, habens a dextro latere imaginem sancti Pauli, a sinistris imaginem

¹ Leo Ost. l. II. c. 9. — ² Dithm. Chron. I. III. — ³ Leo Ost. l. II. c. 9. — ⁴ Dithm. Chron. I. III.

sancti Petri, omnes ex musivo antiquitus efformatas. Perseverat adhuc usus ille antiquus, ut qui ingreditur dictum atrium, quod (ut audisti) paradisus antea vocabatur, genuflectens Orientem versus oret, non ut solem adoret orientem, sed ut ab eo qui repræsentatur in imagine benedicente, ab ipso, inquam, Salvatore benedictionem accipiat.

16. *Otto III coronatur.* — Ubi autem Diltmarus hæc de Ottonis obitu est locutus, quod ipse ab eo in suo episcopatu Merespurgensi maximum accepisset detrimentum, eadem Ecclesia de episcopatu privata (ut superius audisti), has ad postremum pro ipso offert ad Deum preces: « Equidem sortis memor humanæ, multumque indigens indulgentiæ, cæli terræque Deum et Dominum supplex efflagito, ut quidquid hic unquam in mea peccavit Ecclesia, clemens remittat, pro beneficiis autem centuplum largiatur, potestateque immerito mihi concessa indulgeo, te obnixè successorem postulans, ut huic veniam nemini in ultimis denegandam, semper ex corde tribuas ». Hæc Diltmarus, qui de filio hoc anno electo rege Veronæ, et coronato itidem ante obitum patris Aquisgrani die Natalis, subjicit ista: « Otto tertius die Natalis Domini a Wilegiso Moguntino archiepiscopo, et Joanne archiepiscopo Ravennate coronatur in regem, eodem anno nongentesimo octogesimo tertio. Quo officio completo, venit nuntium de obitu patris Ottonis imp. Imperavit autem post obitum patris annis decem ». Illeusque Diltmarus.

17. *Concilium Romæ in causa Giseleri ad sedem Magdeburgensem evecti.* — Hoc eodem anno a Benedicto papa celebratum est Romæ Concilium, in quo inter alia agitata est causa Giseleri Magdeburgensis episcopi: defuncto enim S. Adalberto primo ejus sedis episcopo, ipse eandem Ecclesiam ab Ottone imp. obtinuit. Rem gestam scribit¹ Diltmarus. De his dicturi, quæ ad rationem temporis spectant, primum elucidemus. Hoc namque anno defunctum esse Adalbertum primum Magdeburgensem episcopum, ex Adami² sæpe citato antiquo Chronico satis perspectum habetur, dum testatur, eum sedis suæ anno duodecimo, qui præsens est, diem obiisse, eique successisse tradit Geshilarium. Porro hunc Geshilarium, sive Giselerum, malis artibus ab imperatore eam sedem obtinuisse, Diltmarus tradit, qui et de judicio synodali ista subiungit: « Corruptis, inquit, deinde pecunia cunctis primatibus, maximeque Romanis (quibus cuncta sunt semper venalia) iudiciis, qualiter ad archiepiscopatum aliqua ratione veniret, primum secreto revolvit: moxque palam domini papæ Benedicti septimi (qui sic vocatur ex numero præcedentium æquivocorum) obnixè petit auxilium. Quod cum totius consilio senatus si posset impendi, ex sua parte sibi paratum fore et hic promisit. Positum est Romæ Concilium generale, sapientissimi conveniunt. Impletaque illa Jeremiæ prophetia³: Quo-

modo obscuratum est aurum, mutatus est color optimus, etc. Nam cum iudices ab Apostolico interrogarentur, si liceret Giselerum jam episcopum Merseburgensem promoveri ad archiepiscopatum, qui certam non haberet tunc sedem, sed ab episcopo injuste (ut semper sit questus) absorptum, Hildebrando commissum hactenus possideret, hi hoc auctoritate canonica præcipue, jure meritoque affirmabant, exemplis Davidica transgredientes monita⁴: Recte judicate, filii hominum. Et illud: Corruptus judex nequit discernere verum. Lector, mihi crede, quod piget atque pudet me his longe inferiorem hoc verbis exponere, etc. » Subjicit autem in eundem Giselerum plura, ipsum nimirum sæpe citatum ad Synodum, sæpe diversis occasionibus synodalia judicia elusisse. Verum longe ab his diversa de Giselero a Diltmaro tradit Adam probatæ fidei vetus chronographus; de eo enim sic ait²: « Apud Magdeburgum quoque defuncto pontifice Adalberto, Geshilarius (quod est idem quod Giselerus) successit in cathedram, vir sanctus, qui novos Winulorum populos doctrina et virtutibus illustravit ». Hæc ipse.

18. *S. Adalbertus Bohemos deserens Romam venit, monasticam vitam proficitur.* — Eodem anno sanctus Adalbertus Pragensis episcopus, cum adversos admodum et sibi contrarios experlus esset Bohemos suos, quibus episcopali præfectura præerat, eos deserens, secundum Evangelicam sententiam³: « Si vos non acceperint, excutite pulverem de pedibus vestris in testimonium contra illos », Romam venit, inde Hierosolymam profecturus. Sed audiamus ista ab ejus æquali ita narrata⁴: « Populus duræ cervicis, servus libidinum factus miscebatur cum cognatis, et sine lege cum uxoribus multis: mancipia Christiana perfidis Judæis vendebant, et dies festos eorum confusa religione observabant, dies vero jejuniorum voluptatibus vacantes omnino non curant: ipsi clerici palam uxores ducunt. Contradicientem episcopum odio iniquo oderunt, et sub quorum tutela, quique fuerunt contra ipsum majores terræ concitaverunt. Erat autem labor plurimus, contradictio crescens. Et cum emergentia mala emendare non posset, ubi piscatio sua nihil cepit, sanctus episcopus locum dare necessarium duxit. Itaque ad sanctam civitatem, ubi memoriale sanctum, ubi sepulcrum Domini est, pedester venire affectans, matrem martyrum, Apostolorum domicilium, auream Romam intravit. Ibi tum pulchrum lutum, græca imperatrix Augusta, quæ jam longos dies flevit sepulti conjugis memoriam, reperit (reparat), dulcem Ottonem eleemosynis et orationibus cælo commendat ». Et inferius enarrata, quæ ejus mortem præcessit, Ottonis culpa, hæc de eadem Augusta:

19. « Sed peccatum, quod vivens Otto neglexit, mortuo marito, emendare uxor superstes instabat,

¹ Diltmar. Chron. l. III. — ² Adam. lib. II. c. 7. — ³ Thren. IV.

⁴ Psal. LVII. — ² Adam. l. II. c. 14. — ³ Matth. X. — ⁴ Apud Sur. die XXIII April. tom. II.

legatos mittit et eleemosynas, orationes multorum quærens, per quos propitium Redemptorem appellaret, et peccatorem regem ab incendio liberaret. Hæc tum ubi sanctum virum adesse cognovit Adalbertum nominatissimum episcopum, et Hierosolymam properare audivit, clam ad se vocat, oransque ut pro anima senioris rogaret, massam argenteam obtulit ingentem. Ubi accepit vir Dei onus argenti, suo itineri aut necessitati parum providens, omnia sequenti nocte pauperibus expendit ».

20. Porro dum esset Romæ, a Romano Pontifice licentiam dimittendi episcopatum obtinuisse, et peregrinandi ad loca sancta, habent etiam alia Adalberti Acta citata superius. Hæc ipsa item testatur Leo ¹ Ostiensis, qui consentientia scribit auctoribus res ab eo gestas fideliter enarrantibus; qui et cæpta recensere sic pergit: « Nec mora, magnam Romam egressus, ad sanctam civitatem Hierusalem, præter spem imperfectum iter suscepit. Nam ea via ductus ad montem Cassinum usque pervenit, ubi beatus Benedictus postremo charam sedem posuit. Ibi abbatis et fratrum piis monitis castigatus, ne inutili vagatione vitam expenderet, sed loco staret. Ita melius virtutum fructus congregaret: Deum vero propitium bene vivens in omni loco inveniret, ut dicitur in Psalmo ²: In omni loco dominationis ejus, benedic, anima mea, Domino. Et rursus S. Hieronymi sententia bona ³: Non Hierosolymis fuisse, sed Hierosolymis bene vixisse, laudandum est.

21. « Animadvertit divinum animal ⁴ habens oculos ante et retro, ita esse ut dicunt, nec stetit in suis distinctionibus, dans locum salubribus consiliis: legerat enim in hoc periculosum esse homini, si non majorum spiritualium acquiesceret consiliis. Nec mora, montem festinus descendit, et quem in philosophia Christi perfectiorem discipulum invenit patrem Nilum, calida spe petiit, sub quo parvulus factus, jugum Christi ferre, et obedientiæ aureas litteras parare satagebat. Amplexusque genua senis, in hæc firmus hærebat. Non negat pater Nilus: Ast, inquit, homo ego sum græcus, melius conveniunt, cum quibus hoc agas, monachi latini. Red eas Romam nutricem sanctorum filiorum. Quære nobilem abbatem amicum nostrum Leonem. Dic me misisse te rudem discipulum ad talem magistrum. Hoc duce itineris, ad prælia Dei securus accede, sub hoc patrono contra adversantia cuncta animæ ad Deum progrediens, salvus eva-tabis, et majori flamma, qui nunc in te ardet accensus, excreseat quotidie in te Deus tuus et Dei focus. Fecit ut homo Dei bonus dixit.

22. « Ad S. Bonifacium monachalem vestem accepit, sub abbate, regula duce, militavit, pedem junxit obedientiæ imperio, et tanquam ad epulas, ita ad complenda jussa festinus. Et si quis quid præcipit, adeo lætus quo plus vile erat servitium omne

libens facit. Cuncta humilia diligenti studio in se format, ut ad Dei similitudinem prorsus scandat. Obliviscitur seipsum, factus parvulus in medio fratrum. Coquinas purgat, hebdomadas nitidissime procurat, scutellas lavat, et ad coquorum necessaria cuncta cursu pervolat, manibus fratrum aquam de puteo ministrat. Mane ad claustra, vespere et meridie ad mensam aquam humero portat. Ut enim vespere, mane et meridie integræ congregationi serviret, talem obedientiam de abbate, rogans, accepit. Cogitationem tacitam in se regnare nunquam permisit, quidquid accedens ad animum, diabolus dixit, statim senioribus palam fecit. Acutissime autem interrogavit de Scripturis sanctis, sedulo percontatus de vitiorum vel virtutum naturis. Sed ad hoc quod ante nescivit, quærenti illi abbas respondit, ut ipse non semel ad nos dixit: Unde luce clarius constat, quod inspiratio Dei erat, et gratia discipuli hæcerat ». Hæc et alia plura de monasticis institutis ab eo quam diligentissime omnibus numeris absolutis. Quæ pluribus narrantur etiam in alio ejus vitæ Codice sanctæ Cæcilie superius citato, et inter alia, non prius acceptatum a Leone abbate Adalbertum et indutum monastico habitu, quam consultus Joannes papa, hoc faciendum respondisset. Ac nec ipsum Adalbertum solum, sed ejus germanum Gaudentium idem vitæ institutum cum eo esse in eodem monasterio consecratum habet.

23. Ita plane dicebat granum frumenti humilibus exercitationibus mortificari, quo Hungarici serendi ab eo agri fructum redderent centuplum. Ita, inquam, Apostolum suum Deus tanta voluit schola virtutum perfici, et excoli martyrem designatum Christianæ vitæ summa perfectione. Ubi cum totum quinquennium degisse idem auctor affirmet, plane constat, non ante annum nongentesimum octogesimum nonum ab Urbe discessisse, in eodemque sancto monasterio, tanquam in palæstra, Christi pugilem se exercuisse. At de ipso quæ postea contigerunt tanto Apostolo digna, pro temporum ratione inferius suis locis dicturi sumus. Quæ vero hic sunt recitata ex auctore, qui (ut intellexisti) tunc vivebat, confirmantur etiam auctoritate antiqui Chronici ¹ Cassinatis, quo tantum hospitem perbreve licet tempore permanentem, perpetuo in Chartis suis Patres retinere notatum. Verum causam cur non remansit cum monachis Cassinatibus, eam intercessisse, Leo Ostiensis affirmat, quod scilicet illic non tanquam monachus, sed tanquam episcopus se a monachis loci illius coli videret. Ait enim:

24. « Eodem tempore beatus Adalbertus Slavorum episcopus relicto episcopatu ex sententia Romani Pontificis, ad hoc monasterium venit, cupiens Hierosolymam pergere. Verum ab abbate monasterii, et a senioribus quibusdam ne id ageret, hortatus, quasi divinitus datum consilium

¹ Leo Ost. l. II. c. 17. — ² Psal. CII. — ³ Hier. ad Paulin. Ep XIII.
 ⁴ Ezech. II.

¹ Leo Ost. l. II. c. 17.

amplexus, hic vitam degere instituit, neque usquam ulterius progredi. Sed cum die quadam seniores illi monasterii dicerent: Bonum est, pater, ut hic nobiscum maneat, hic monasticam suscipias vestem, hic Deo placitam exigas vitam; quoniam cum sis episcopus, et Ecclesias nostras dedicare, et nostros clericos ad sacros promovere ordines decentissime poteris: moleste hoc tulit. Descendensque ad virum sanctissimum Nilum, quem tunc ad Vallem-Lucis cum Græcis aliquibus fratribus religiosissime conversari didicerat, devote se contulit. A quo dum ejus provolutus genibus opportuna consilia quæreretur, seque illic recipi non posse cognovisset (quia enim sic de monasterio nostro discesserat, asserebat prædictus pater, non audere illum retinere, ne ideo ipse cum suis inde pellere-tur) consilio tamen ipsius Romam revertitur, atque in sancti Bonifacii martyris monasterio aliquandiu commoratus, a Romano Pontifice ad episcopatum denuo directus est. Sed id postea, ut dictum est.

25. *Ethelredus rex in Anglia res Ecclesiasticas invadit suo damno.* — Eodem anno perturbante Ethelredo rege Anglorum Roffensem Ecclesiam, suo maximo damno pro redemptione pacis ab ejus episcopo argentum accepit, comminante illi et præ-

dicente S. Dunstano ventura mala. Quomodo res se habet, ita ex antiquis chronographis descripta legitur¹: « Anno gratiæ nongentesimo octogesimo tertio surrexit inter regem Ethelredum et Roffensem episcopum contentio, sed qua causa, habetur incertum. Quocirca contra Roffensium civitatem obsidionem componens, eam debellare disposuit. Mandavit regi beatus Dunstanus archiepiscopus Cantuariensis, ut desisteret ab inceptis, ne S. Andream illius civitatis patronum irritaret. Sed nec propter beati viri admonitionem rex discedere voluit, priusquam ab episcopo centum libras accepit. Miratus S. Dunstanus regis cupiditatem, hæc per suos regi nuntiavit: Quia prætulisti argentum Deo, pecuniam Apostolo, cupiditatem mihi, violenter venient super te mala, quæ locutus est Dominus, sed hæc me vivente non fient. Jam vero post beati viri obitum, ut ipse prædixerat, Danis omnes portus regni infestantibus, dum nesciretur ubi ei occurrere deberet, decretum est a viris prudentibus, ut vincerentur argento, qui non poterant ferro. Illaque decem millia librarum soluta Danorum avaritiam expleverunt, ut beati Dunstani vaticinium impleretur ». Reliqua postmodum.

¹ Matt. Westmonast. in Flor. hist. hoc anno.

Anno periodi Græco-Romanæ 6476. — Anno Aëræ Hispan. 1021. — Anno Hegiræ 373, inchoato die 15 Junii, Fer. 6. — Jesu Christi 983.

— Benedicti VII papæ 9. — Ottonis III reg. 1. Basil. et Const. imp. 8.

1. *Prælium inter Ottonem II et Græcos.* — A num. 1 ad 17. Baronius num. 1 ait, Leonem Ostiensem lib. 2, cap. 9, duplicem Ottonis II in Campaniam et Calabriam adventum ponere, pacificum alterum, alterum cum exercitu. De primo adventu his verbis: « Capuam venit, inde Tarentum, ac Metapontum adiit, deinde Calabriam ». De secundo: « Inde prospere ad suos rediens anno Domini DCCLXXXIII, magno conflato exercitu iterum in Calabriam dimicaturus cum Saracenis advenit ». Verum Leonem Ostiensem prælium illud male in præsentem annum distulisse, et Ottonem II anno DCCLXXXI cum exercitu venisse in Calabriam, annoque DCCLXXXII cum hostibus dimicasse, certum esse debet. De priori ejus in Calabriam adventu an. DCCLXXXI egimus. Anno vero DCCLXXXII, Ottonem II cum Saracenis infeliciter pugnasse, testantur Hermannus Contractus juxta editionem Canisianam, Lambertus Schafnaburgensis, Sige-

bertus in Chronicis, et cum illis chronographus Hildensheimensis, nec ullus ex antiquis Leoni Ostiensi suffragatur.

2. *Ottoni II infaustissimum fuit.* — Rem gestam his verbis narrat Hermannus: « Græci cum magnis copiis, conductis etiam pretio Saracenis, Calabriam contra Ottonem imperatorem. Defendere aggressi, magnis utrinque viribus conferta (legendum, conserta pugna) primo victi, et deinde nova manu succurrentibus Agarenis exercitum nostrum privant vel capiunt. Ipseque imperator in mari natando fugiens, ab hostibus captus, cum non agnosceretur ab eis, ad quoddam castrum maritimum pro pretio, ut rogabat, adductus, a suis redemptus est. In eo conflictu nostris infaustissimo, inter alios innumeros Henricus etiam Augustensis interseptus disparuit, eique Elich in episcopatu successit ». Mortis hujus Henrici sancti Udalrici in episcopatum Augustensem successoris

mentio est in hujus sancti Vita a Gerardo presbytero ejus familiari scripta, cujus verba Baronius num. 13 recitat, animum tamen non advertens ad errorem, vel Gerardi, vel librarii. Ait enim Gerardus: « Anno Incarnationis Domini nostri J. C. DCDLXXXIII, imperator cum exercitu Calabriam provinciam adiit, etc. » loco *anno Incarnat. Domini nostri J. C. DCDLXXXII*. Mabillonio etiam Sæc. v Benedict. pag. 460 fucum fecit locus iste notanti ex eo corrigendum esse Hermannum Contractum. Præterea Baronius ibidem ait, Sigebertum anno sequenti consignare mortem *Theodori* Metensium episcopi, cum tamen Sigebertus prælium istud cum superiori Christi anno conjunxerit, annoque DCDLXXXIV *Theoderici*, seu *Dioderici* episc. Metensis obitum narrarit.

3. *Accurata ejus narratio.* — Nullus melius Hepidanno S. Galli monacho hanc expeditionem exposuit, qui tamen in anno, ut passim in aliis hoc tempore peccavit. Ait is: DCDLXXXVIII (scribere debuit DCDLXXXII) Otto imperator non contentus finibus patris sui, dum esset Romæ, egressus est occupare Campaniam, Lucaniam, Calabriam, Apuliam et omnes ultiores partes Italiæ, usque ad mare Siculum et portum Trapidem. Qua causa imperator Constantinopolitanus, sub cujus hoc erat omnis terra imperio, primo per nuntios nequicquam eum tentat revocare ab incepto. Dein Saracenos ex Sicilia, et aliis insulis maris, et finibus Africæ vel Ægypti, adversus eum conduxit in prælium, cum quibus ille infelice dimicavit. Nam ad prandendum eos venire æstimans, dum paucos in littore maris quasi latrunculos conspexit, parva manu aggressus est eos opprimere, et circumfusus infinita multitudine, quæ se noctu in montibus occuluit, omnibus in exercitu suo fugatis, vel occisis, vel captis, ipse navigio vix ad castellum quoddam suorum evasit. Ex captivis autem multos postea reversos vidimus tam clericos quam laicos, quorum unus erat Vercellensis episcopus carcere diu maceratus apud Alexandriam ».

4. *Otto II sese ad novam parat expeditionem.* — Tum narrans quæ pertinent ad an. DCDLXXXIII, ait: « DCDLXXXIV. Hoc anno imperator cogitans se vindicare in eos, qui in Sicilia habitant, Saracenos, voluit arte Darii quondam regis Persarum, ponte navibus juncto, quemadmodum ille Græciam, ita et iste Siciliam intrare. Sed immatura morte præventus est, et Romæ sepultus ». Huc referendum quod prior auctor anonymus Vitæ sancti Adalberti episcopi Pragensis cap. 2 in eandem rem tradit: « Rediens de Saracenico bello, adiit Veronam imperatorius apex, scilicet Otto II, cui fuit manus in prælio fortis. Idem tunc victor et victus, pro recolligendo milite huc venerat, volens ultum ire damna victoriæ, sed nesciens, quia mors eum proxima pulsât ». Ubi obiter notabis, certum esse Adalbertum anno DCDLXXXIII renuntiatum esse episcopum Pragensem, cum electionem *Adalberti* Otto II confirmarit, quando Veronæ esset. Sed hac de re po-

stea. Porro anno superiori magnum illud prælium, ut prodit Lambertus Schafnaburgensis, *idus Julii* commissum, de quo historici Byzantini mentionem non fecere, forte quod Græci Saracenorum auxilio usi sint. Sed suspicor librarium in mense Julio exprimendo ternarium numerum omisisse. Ditmarus enim lib. 3, pag. 33, illud cum *III idus Julii* connectit.

5. *Moritur Otto II.* — Anno autem DCDLXXXIII, Hermannus Contractus habet: « Otto imp. Romæ infirmatus, VI idus Decemb. moritur, ibique honorifice in porticu sancti Petri tumulatur ». Idem scribit Marianus Scotus, sed Ditmarus habet *VII idus Decemb.* Chronographus Hildensheimensis *post VIII idus Decemb.* Ita ut Otto nocte inter VI et VII idus Decembris obierit, dieque VIII idus ejusdem mensis sepulcro mandatus fuerit. Sic enim explicandos auctores, qui in alicujus principis aut viri illustris morte narranda uno tantum die inter se dissentiunt, sæpius insinuavi.

6. *Otto III ei succedit.* — Ottonem II demortuum VII idus Decemb. etiam habet chronographus Magdeburgensis editus. Eum excepit filius Otto III in regno Germaniæ, non vero in imperio, quod nonnisi post aliquot annos adeptus est, quando scilicet a Gregorio V papa coronatus fuit. Eum autem die Natali Christi regem acclamatum, testatur chronographus Hildensheimensis. « DCDLXXXIV. Filiolus imperatoris », inquit chronographus, « tertius videlicet Otto per unctionem Joannis Ravennatis archiepiscopi in die Natali Domini unctus est in regem. Sed postea comperta nece imperatoris, Heinricus quondam dux (nempe Bajoariæ) de exilio regressus, cum sibi faventibus Agrippinam civitatem intravit ac regem retinuit: regnumque ejus iuvadendo, plurimos sibi de Saxonibus associavit, qui eum in proximo Pascha (die xxii Martii anno sequenti celebrato) Quindelingaburg ad regem elegerunt. Unde quidam de optimatibus huic electioni non consentientes, sed regis vicem magis dolentes, e contra haud modicum disceplaverunt, et regem in regnum suum restituerunt, et Heinricum ducem Bajowariorum denuo effecerunt ». Ubi chronographus Hildesheimensis annum DCDLXXXIV a die Natali Christi currentis anni exorditur. Hoc enim anno Ottonem III regem Germaniæ dictum, ejus Diplomata evincunt. Ad hæc Ditmarus lib. 3, narrata Ottonis III electione, de Ottone II ejus patre ait: « VII idus Decemb. ex hac luce subtractus est: in die proximi Natalis Domini filius ab Joanne archiepiscopo Ravennate, et a Willegiso Moguntiacense in regem Aquisgrani consecratus est, et completo officio, mox legatus tristi (paternæ scilicet mortis) nuntio tanta perturbans gaudia advenit ». Ubi Ditmarus, sicuti chronographus Hildesheimensis citatus et Lambertus Schafnaburgensis annum Christi DCDLXXXIV ab illo die Natali Christi exordiantur, ut Hildesheimensis et Lambertus diserte asserunt, et de Ditmaro demonstrabimus anno DCDXCI. Vidi-

mus alibi Sigebertum, Hermannum Contractum et Marianum Scotum in Chron. principium anni a Nativitate Christi etiam repetere, et passim recentiorum, qui hoc non animadverterunt, errores confutavimus. Otto itaque initia regni turbulenta nactus est, ut anno sequenti magis videbatur, tuncque *quartum ætatis annum* agebat, ut prodit Heppidannus in Annal. ad an. DCDLXXXVIII.

7. *Obitus S. Adalberti archiepisc. Magdeburgi.* — Ad num. 17. S. Adalbertus Magdeburgensis archiepiscopus primus, non hoc anno, ut perperam tradidit Adamus Bremensis, quem Baronius secutus est, sed anno DCDLXXXI ad Deum migravit. Chronographus enim Magdeburgensis Ms. in Biblioth. regia asservatus hæc scribit: « Anno Domini Incarnationis DCDLXXXI, Athelbertus Magdeburgensis primus archiepiscopus, imperatore Romæ commorante, xiii suæ ordinationis anno (non xii, ut habet Adamus a Baronio citatus) suos docendo et confirmando, et Gisileri præsulis (nempe Merseburgensis ab anno DCDLXX, quo consecratus est a S. Adalberto, ut eo anno idem chronographus habet), quia tunc cum Cæsare fuit, diœcesim per-lustrans, XIII kal. Julii in Messeburh missam celebravit, etc. Is vero tapeto superpositus, completisque omnibus, quæ a clericis dicenda erant, fideliter migravit ad Christum XII kal. Julii, etc. Quanta sollicitudine idem archiepiscopus sibi commissis invigilaverit gregibus, lector, attende. Scæpenumero ad ovile S. Joannis Baptistæ (monasterium erat monachorum in suburbio urbis positum) sanctique Mauritii noctis silentio venit, duobus tantum comitantibus, qualiterque confratres ad matutinas convenirent, vel qui in dormitorio remanerent, ex improvise prospexit: et si bene fiat, Deo gratias egit: sin autem culpabiles, digna castigatione redarguit ». Nomen tamen inclyti hujus præsulis a Baronio *sancti* appellati Fastis SS. non inscriptum. Pergit chronographus:

8. *Gisilerus ei in archiepiscopatum succedit.* — « Sed clerus et populus tanti patris funere turbatus, Ochtricum confratrem et tunc imperatori fideliter servientem, communiter elegerunt in dominum et archipræsulem: quamvis hoc nullo modo posse fieri, dum adhuc viveret, beneque valeret, multis ex eorum numero publice prædiceret », scilicet Adalbertus. Aliquibus interpositis, subdit chronographus: « Universus autem clerus et populus, ut supra memoravi, completa electione miserunt Ekkihardum, qui dicebatur Rufus, cum consilio aliorum fratrum et militum, qui hanc imperatori nuntiarent et de promissis admonerent, qui cum Italiæ partes, ubi tunc imperator erat (anno nempe DCDLXXXI) itinere attingerent, Gisileri Merseburgensis episcopi suffragium, qui apud imperatorem tunc plurimum valebat, implorantes, legationis suæ secretum ei aperiunt. Promissa est his ab eo fidelis intercessio, completurque proxima sibi in omnibus benevolentia. Namque ut audita Cæsaris auribus instillavit, pedibus supplex

advolvitur, promissa et diu exspectata longi laboris præmia postulans, Deo hoc consentiente, protinus impetrat. Egressus autem interrogatur a nuntiis et maxime ab Ochtrico, qui se fidei ejus firmiter commendaverat, si quid in sibi creditis proficeret: respondit quod vix suis necessitatibus in hoc subveniret.

9. *Venit ad Concilium Romanum.* — « Corruptis pecunia cunctis optimatibus, maximeque Romanis iudicibus, quibus omnia venalia sunt, qualiter ad archiepiscopatum aliqua ratione veniret, primum secreto revolvit; deindeque palam domni papæ Benedicti VII, qui sic vocabatur ex numero præcedentium æquivocorum, obnixè petit auxilium: quod cum totius concilio senatus, si posset impendi, paratum se fore et hic promisit. Positum est Romæ Concilium generale: sapientissimi conveniunt, impleturque illa Jeremiæ prophetia: *Quomodo obscuratum est aurum*, etc. Nam cum iudices ab Apostolico interrogarentur, si liceret Gisilerum promoveri ad archiepiscopatum, qui certam non haberet tunc sedem, sed ab episcopo Hildiwardo injuste, ut semper questus sit, ablata caruisset hactenus quam possederat: tunc auctoritate canonica jure meritoque hoc percipere verbis affirmabant et exemplis Davidica transgredientes monita: *Recte judicate filii hominum*; et illud:

Corruptus iudex nescit discernere verum.

Piget atque pudet hoc verbis exponere, quod hi ad præsentem futurumque pudorem noluerunt amittere. Merseburgh, quæ usque huc libera dominabatur, episcopali sede destructa Halberstadensi Ecclesiæ subditur, et Gisilerus ejus non pastor, sed mercenarius, ad majora semper tendens, desiderata IV idus Aprilis percepit ». Ditmarus, qui in lib. 3 eadem iisdem verbis commemorat, habet *Septembris*. Paulo post chronographus subdit: « Gisilerus autem, accepta ab imperatore licentia, Magadaburh II kal. Decembris Theodorico Metensis Eccl. episc. comitante venit ». Ochtricus monachus erat ac scholasticus Magdeburgensis. Chronographus vero Magdeburgensis a Meibomio publicatus asserit, *Gisilerium* hoc anno, *suscepto a Benedicto papa pallio*, archiepiscopatum Magdeburgensem ab Ottone imp. III idus Septembris, ut mox exegit, accepisse, et I kal. Decemb. solemni ritu Magdeburgi a clero ac populo susceptum fuisse.

10. *In eo lecti canones adversus Simoniacos conditi.* — Verum falsum de *Gisilero* rumorem fuisse insinuant non tantum quæ de eo Baronius ex Adamo Bremensi hoc anno habet; sed etiam Epistola Benedicti VII in laudato Concilio Romano data, et tom. ix Conc. pag. 1244 ex Baluzio recitata. Ea enim adversus ordinationes Simoniacas, præsentem Ottone II, qui eidem interfuit, emissa, demonstratque tantum abesse, ut Synodus Romana, ad quam Gisilerus venit, Simoniacis fave-

rit, ut in ea lecta fuerint capitula de sacris canonibus adversus Simoniacos edita: « Notum esse volumus omnibus », inquit Benedictus VII, « Catholicis et orthodoxis archiepiscopis, etc. qualiter Synodum aggregatum est in Ecclesia B. Petri Apostolorum principis, ante sacratissimum ejus corpus una cum domino Ottone serenissimo imperatore Augusto, spirituali filio nostro, etc. et ibidem perfecta sunt capitula de sacris canonibus, qualiter liceret episcopo de sacris ordinibus aliquod sumere præmium, etc. » Paulo post: « Unde nos, charissimi fratres et dilectissimi filii, sollicitè vigilare oportet, qui pastorem curam in nostris ovibus exercendam suscepimus, ne eas lupinis dentibus lacerandas tradamus, etc. Is autem qui ordinatus fuerit, si non ex placito, neque exactus aut petitus, post acceptas chartas et pallium, offerre aliquid cuilibet ex clero gratiæ tantummodo causa voluerit, hoc accipi nullo modo prohibemus: quia ejus oblatio nullam culpæ maculam ingerit, quæ ex accipientis ambitu non processit ». Quod ex divo Gregorio lib. 4, Epist. XLIV desumptum. Porro Concilium istud Romanum, non anno DCDLXXXIII, ut in citato tomo Concil. habetur, sed anno DCDLXXXI proculdubio congregatum, ad quem ideo in alia Conciliorum editione omnino referendum erit cum iis, quæ de eodem memorantur in Chronico Magdeburgensi a Meibomio tom. II Collect. publicato, in quo eadem prorsus de morte Adalberti et de successione Otrici narrantur.

11. *Mors Adalberti et Concilium Rom. anno DCDLXXXI contigere.* — Sed quia annus emortualis Adalberti, quo Synodus illa Romana habita, in controversiam vertitur, valide hic confirmandus, eo magis quo Dithmarus Merseburgensis episcopus archiepiscopi Magdeburgensis suffraganeus, qui hoc tempore vivebat, exordium archiepiscopatus Adalberti cum die XVIII mensis Octob. anni DCDLXX, ejusque mortem cum die XX Junii, et cum tertio decimo ejus ordinationis anno alligare videatur lib. 3, cap. 30. Ex eo enim sequeretur, Adalbertum die XX Junii anni DCDLXXXIII spiritum Deo reddidisse. Verum licet error ille antiquus, non dubito tamen, quin in librariorum refundi debeat, qui ubi Dithmarus scripserat, Adalbertum ordinationem, id est, pallio donatum anno DCDLXVIII, scribere anno DCDLXX. Hoc nostræ conjecturæ fundamentum; quia Dithmarus, Adalberti morte iisque quæ eodem anno contigere narratis, refert expeditionem Ottonis II adversus Græcos Calabriam obtinentes, et prælium initio mensis Julii anni DCDLXXXII ab eo infelicitè commissum; quare supponit Adalbertum, non die XX mensis Junii anni DCDLXXXIII, sed die XX Junii anni DCDLXXXI vita functum, ideoque anno DCDLXVIII, non vero anno DCDLXX ordinatum, seu pallio fuisse donatum. Verbum enim ordinari, et vox ordinatio non semper significant sacram ordinationem, sed sæpe electionem, renuntiationem, destinationem, aut quid simile, ut sæculo VII de sancti Wilfridi episcopi Eboracensis

ordinatione verba faciens variis exemplis demonstravi; quod animadvertissem, ex hujus vocis, quæ non exponitur in Glossario Ducangii, perversa explicatione, varios errores exortos esse.

12. *Hoc magis probatur.* — Adalbertus itaque anno DCDLXXXI vivendi finem fecit, uti præter utrumque chronographum Magdeburgensem diserte habet Lambertus Schafnaburgensis in Chron., licet memoriæ lapsu Baronius num. 8 asserat, Lambertum Adalberti obitum consignare anno DCDLXXXII. Idem tradit Langius in Chron. Citizen. Nec contrarius est Dithmarus, sed locus, in quo dicitur Adalbertus ordinatus anno DCDLXX, depravatus, ut ex iis quæ mox dixi manifeste deducitur. Corruptus est et locus Chronici Magdeburgensis a Meibomio publicati, in quo pag. 274 legitur: « Adalbertus primus Magdeburgensis Ecclesiæ archiepiscopus præcessit (id est, præfuit) annis tredecim, menses octo ». Loco enim, annis tredecim, legendum, annis duodecim; cum ipsemet postea pag. 277 testetur, eum demortuum XIII pontificatus sui anno, XII kalend. Julii, et tumulatum Dominicæ Incarnat. anno DCDLXXXI. De ejus illustribus virtutibus plura habet idem chronographus, sicuti et Mabillonius Sæc. V Benedict.

13. *S. Adalbertus fit episc. Pragensis.* — A num. 18 ad 25. Alter Adalbertus, mortuo hoc anno Dithmaro vel Diethmaro primo Pragensi episcopo, in ejus locum subrogatus est, uti anno DCDLXXX, num. 4 diximus, et mox indicavimus. Post annos septem, ubi vidit subditos « obdurato corde in Deum grandia quæque et nova scelera adimplere, cogitat melius esse relinquere, quam in cæco et sponte pereunte populo operam deperdere, quod maxime de tribus causis esse dicunt, cujus rei ordinem ipso narrante compererunt. Prima et velut principalis causa, propter plures uxores unius viri; secunda, propter detestanda conjugia clericorum; tertia, propter captivos et mancipia Christianorum, quos mercator Judæus infelici auro emerat, emptosque tot episcopus redimere non potuit », inquit primus auctor Vitæ ejus, eidem cœvus.

14. *Deserit episcopatum.* — Relicto itaque episcopatu Romam venit. « Erat ipsis diebus Romæ imperatrix Augusta Theophania, mater ejus, qui modo regnat, tertius, et Deo juvante maximus Otto », subdit idem anonymus. Quare cum Theophania an. DCDXC Romæ fuerit, ut infra ostendemus, chronographus Magdeburgensis adhuc ineditus recte scripsit: « Anno DCDXC, sanctus Adalbertus Romæ ad sanctum Alexium, inscio abbate quis esset, factus est monachus. Nam videns quod grex sibi commissus semper in præcipitium iret, nec eum ad rectam viam convertere quiret, timens ne et ipse cum pereunte plebe periret, non ausus est cum eis amplius stare, nec passus est suam ulterius incassum prædicationis operam perdere. Sed cum jam Romam iter arripere vellet, forte ipso tempore Zirahquaz (qui monachus erat) filius Boleslai, qui sanctum Wenezlaum (seu Wenceslaum) fratrem

suum interemerat, atque ad placandum hunc, de quo loquimur, abbati sancti Emmerammi martyris Ratisponæ imbuendum voverat et contradiderat, qui veniebat cum sui abbatis licentia de Ratispona post multos annos visere patriam, et cognatos, et fratrem suum Bohemiæ ducem. Cum quo vir Dei præsul Adalbertus secretum petiit, et multa conquestus est de infidelitate et nequitia populi, de incesta copula et illicito discidio inconstantis conjugii, de inobedientia et negligentia cleri, de arrogautia et intolerabili potentia comitum. Ad ultimum intentionem sui cordis aperit, quod vellet Romam Apostolicum consultum ire, et ad gentem apostatricem nunquam redire. Inter hæc et ad hæc addidit: Et bene est, inquit, quod tu frater nosceris esse ducis. Te plebs ista mavult dominari, et tibi magis obedire, quam mihi. Tu consilio et auxilio fratris superbos comprimere, negligentes arguere, infideles increpare, inobedientes corripere poteris. Tua dignitas et scientia, tui habitus sanctimonia multum concordant ad hæc regimina. Quod ut fiat, ego tibi cum Dei voluntate et mea potestate concedo, et ut liceat, me vivente, ut sis episcopus, apud Apostolicum votis omnibus intercedam. Et quem manu forte tenebat, episcopalem baculum ponit ei in sinum. Quem ille quasi furibundus in terram projecit, et hæc insuper verba adjecit: Nolo dignitatem in mundo, episcopatu me indignum judico, pastoralis curæ non sufficio. Monachus sum, mortuus sum, mortuos sepelire non possum. Ad hæc præsul respondit: Scias, frater, scias, quod modo non facis cum bono, facies postea, sed cum malo tuo. Post hæc præsul, ut proposuerat, Romam iter arripuit, et gentem suis præceptis inobedientem reliquit». Idem de Stratiquate, ut eum vocant, habent Æneas Sylvius in Hist. Bohem. cap. 46 et Dubravius lib. 6.

15. *Fit monachus Benedictinus.* — Post relictum episcopatum *Adalbertus* cum Cassini aliquandiu vixisset, Romæ consedit ad monasterium sancti Bonifacii et sancti Alexii, ibique saltem integro quinquennio monachum professus est, ut asserit auctor posterioris ejus Vitæ in Actis SS. Bollandianis ad diem xxiii Aprilis, numero 14: *Quinquennio pleno miles in monasterio erat*, ab anno scilicet Christi dccc ad an. dccciv, quo in episcopatum suum rediit. Ex quo etiam liquet, verum esse quod mox affirmavimus, *Adalbertum* scilicet anno tantum dccc episcopatum deseruisse, et monachum induisse. Mabillonius Sæculo v Benedict. pag. 847, *Adalbertum* in Bonifaciano cœnobio, ubi latinis permixti erant græci ritus, monachi Benedictinæ regulæ nomen dedisse, colligit ex posteriori auctore ejus Vitæ, ubi num. 13 dicitur: « Melius conveniunt tibi cum quibus agas, monachi latini. Redeas Romam, etc. Fecit ut homo Dei (nempe sanctus Nilus junior magni nominis hegumenus): ad sanctum Bonifacium monachalem vestem accepit, sub abbate (nempe Leone), regula duce, militavit; pedem junxit obedientiæ imperio », et cætera a Baronio num. 22 recitata. Porro in illo SS. Bonifacii et Alexii monasterio Romano, *Sergius* metropolita Damascenus sedem habuit ex concessione Benedicti VII, in eoque monachos collegit, ut legitur in ipsius Epitaphio apud Baronium anno dcdlxxvii, num. 4; sed, quod mirere, non Græcos homo græcus, sed Latinos ibidem instituit monachos, aut certe quicumque illi fuerint, regulæ Benedictinæ servantes, ut eruitur ex eodem Epitaphio. Non mirum proinde, inquit Mabillonius, si *Adalbertus*, latinus idem, ibidem institutum sectatus est. Et hoc quidem antequam ad episcopatum redire cogeretur.

JOANNIS XIV ANNUS 4. — CHRISTI 984.

1. *Benedicti papæ obitus, Epitaphium et gesta.*
— Annus sequitur Redemptoris nongentesimus octogesimus quartus, Indictione duodecima, quo Benedictus papa ubi sedisset annos novem, die de-

cima Julii ex hac vita migravit, ut docet sepulcralis inscriptio, quæ extat in Basilica S. Crucis in Hierusalem dicta, quam hic describendam curavimus, licet vitio ejus, qui eam incidit in marmore,

multa desint, et duo versus præterminissi. Utcumque sit, accipe libenter, qui es cultor venerandæ antiquitatis :

- * Hoc Benedicti papæ quiescunt membra sepulcro,
Septimus existens ordine quippe Patrum.
Hic primus repulit Franconis spurca superbi
Culmina, qui invasit Sedes Apostolicæ.
Qui domicumque suum captum in castro habebat
.....
* Carceris interea vinclis constrictus in imo
Strangulatus ubi exuerat hominem.
* Cumque pater multum certaret dogmate sancto,
Expulit a Sede iniquus namque invasor.
Hic quoque prædones sanctorum falce subegit
Romanæ Ecclesiæ, iudicisque Patrum.
.....
Gaudet pastor amans agmina cuncta simul,
Hicce monasterium statuit, monachosque locavit,
Qui laudes Domino nocte dieque canunt.
Confovens (consolans) viduas, necnon inopesque pupillos,
Ut malos proprios assidue refovens.
* Inspector tumuli compuncto dicitur corde,
Cum Christo regoes, o Benedicte Deo.

« D. X. M. Jul. in Apost. Sede residens ix an. obiit ad Christum Indict. xii ». Hæc ibi.

2. Sub eodem Pontifice, tradit ² Leo Ostiensis, S. Bartholomæi Apostoli corpus translatum ab Oriente Beneventum, inde tempore Ottonis tertii delatum in Urbem, sed de his suo loco dicturi sumus. Idemque Leo Ostiensis de eodem Benedicto papa ait ³ : « Ab ipso donatas quasdam suas possessiones, quas habebat in comitatu Aprutii, monasterio Cassinensi, eidemque Privilegium concessum, quando (subiicit) Hildebrandus comes Soranus una cum fratribus obtulit S. Benedicto medietatem lacuum Taurini et Juliani, cum omnibus quæ ad eandem medietatem attinebant ». Quam donationem confirmatam tradit a Pandulpho et Landulpho principibus Capuanis. Porro inopia scriptorum complura de hoc Benedicto remansisse obscura, possumus existimare.

3. *Joannes papa XIV.* — Eo autem defuncto, in locum ipsius subrogatus est Petrus episcopus Papiensis, qui nominatus est Joannes ejus nominis decimus quartus. Erat hic archicancellarius Ottonis imperatoris, ut ex Diplomate dato anno superiori ab Ottone imperatore concedente privilegium monasterio sancti Vincentii ad fontes Vulturii posito constat, in cujus fine ista leguntur :

4. « Adalbertus cancellarius ad vicem Petri episcopi Papiensis archicancellarii, recognovi et subscripsi. Datum pridie idus Novembris anno Dominicæ Incarnationis nongentesimo octogesimo tertio, Indictione xi (xii), anno regni domni Ottonis secundi xxiii, imperii xvi. Actum Capuæ feliciter ». Hæc ibi ; atque satis ad rationem temporis declarandam. In quibus observandum, quod non numerantur anni ejus imperii ab obitu patris, sed

a tempore, quo Romæ est coronatus imperator, anno nongentesimo sexagesimo septimo.

5. *Sodalitium sacerdotum Romæ pro suffragandis consodalibus defunctis.* — Hoc eodem anno Romæ contractum est sodalitium plurimorum sacerdotum, inter quos et episcopi nonnulli sunt adscripti ad hoc, ut post obitum singuli consodalium sacrificiis juvantur. Cujus instituti adhuc extat in diaconia SS. martyrum Cosmæ et Damiani ejusmodi monumentum in tabula marmorea incisum :

CONSTAT NIMIRVM DILECTISSIMI FRATRES DE PROMISSIONE QVAM EX CORDE FECIMYS CORAM DEO ET SANCTIS EIVS VT VNVSQVISQVE NOSTRVM FRATRES SACERDOTES ET EPISCOPI ET POSTERI NOSTRI SACERDOTES IN PERPETVVM QVALISCVMQVE EX HAC LVCE MIGRAVERIT XL. MISSAS PRO EIVS ANIMA PER VNVMQVEMQVE SACERDOTVM QVI SVPERSTITES SVNT CANERE PROMISIMYS. SI TAMEN INFIRMITATE FVERIT OCCVPATVS NON REPVETVR EI IN PECCATVM ET SI RECEPTVS FVERIT IN PRISTINAM SANITATEM HOC OMNE QVOD SVpra DICTVM EST ADIMPLEAT. QVI VERO CVSTOS ET OBSERVATOR FVERIT HABEAT BENEDICTIONEM DEI PATRIS OMNIPOTENTIS ET FILII ET SPIRITVS SANCTI ET CÆLESTE REGNVM POSSIDEAT CVM OMNIBVS SANCTIS. ET QVI HOC NON OBSERVAVERIT SIT ANATHEMATIS VINCVLO INNODATVS ET A REGNO DEI SEPARATVS.

ISTA VERO PROMISSIO FACTA FVIT ANTE SACR. SANCTVM DOMINICVM ALTARE HVIVS AVLAE TEMP. DOM. IOAN. XIII PAP. MENSE FEBR. DIE XXII. INDICT. XII. ANNO DOM. INCARN. DCCCCLXXXIII. BENED. SACR. EXARAV. ORT. ME PECCAT.

Hæc ibi ; sed mendose nonnihil, ut manifeste appareat loco anni octogesimi quarti, legendum octogesimi quinti, et loco Indictionis duodecimæ, legendum, decimæ tertiæ, ut convenire Joannis papæ sedis tempori possit.

6. *Ottonis imperatoris et sororum pietas.* — Eodem anno, Otto imp. simul ac (ut dictum est in fine anni superioris) imperii habenas moderandas suscepit, suasu piæ matris, corrigendum curavit quod pater deliquerat, ob quod divinam expertus fuerat ultionem, de sublato ab Ecclesia Marsepurgensi dedicata S. Laurentio episcopatu. Dittmarus ¹ enim dum de his agit, ejus matrem Augustam Theophanem græcam mulierem plurimum commendat, quodque tres filias pie valde educatas, contemprices carnalium nuptiarum effecerit, cælestium vero cupidas, earumque duas, alteram Adelaidem nomine, Sophiam vero alteram nominatam, in duobus monasteriis monasticam vitam professas.

7. *Obitus SS. Wintoniensis et Roffensis episcoporum.* — Hoc eodem pariter anno, ipsis kalendis Augusti (ut testatur qui res ab eo sanete pieque gestas conscripsit ² Wolstanus ejus discipulus) ex

¹ Versus asterisco notati ob illorum temporum talinæ linguæ inopiam partim ex Stephani VII, partim vero Benedicti IV Epitaphio corras videntur. — ² Leo Ost. l. 1. c. 2. in fin. — ³ Ibid. c. 6.

¹ Dittm. Chron. l. iv. — ² Apud Sur. die 1 Aug. Flor. hist. Matt. Westmon. hoc anno.

hac vita migrat in cælum S. Ethelwoldus Wintoniensis Ecclesiae episcopus, necnon Roffensis episcopus aequae pietate insignis, quorum praevidens exitum S. Dunstanus, doluit in tot discriminibus laborantem Angliam his viris orbari, quod et lacrymis testatus est: de his enim Osbertus ista¹: «Quodam tempore venit Cantuariam supra memoratus Ethelwoldus Wentanus episcopus, et aliquot diebus ibi detentus est. Detentus est etiam Roffensis episcopus, qui illo simul venerat, detinente utrumque patre Dunstano charitativa affectione, dulcissima vitae perennis contemplatione, divini verbi collatione, et sacrorum morum exhortatione et instructione. Cum autem ipse pontificum pater comitatus ipsos duos episcopos Cantuaria decederet, et pariter longius remotos quemque ab altero destinati hospitii via dirimeret, ambo pontifices a Dunstano benedicti petentes, ab eo divertere et suum iter cupiebant accelerare. Verum ipso manum extendente ad benedicendum, subito in lacrymas acerbis erupit, ceptaeque benedictionis verba singultus subsequens interruptit. Illis vero grandi ad rem stupore perterritis, quidnam haberet, quod tam anxie fleret, sciscitanti sunt. Respondit: Fleo, quia vos, quos modo sanos et alacres video, in hac vita non amplius me visurum doleo: nam in proximo estis morituri, et ad gaudia regni caelestis transeuntes me in istius vitae miseriis relicturi. Cui cum ipsi dicerent: Ne, pater, (oramus) de nostra morte ita loquaris: Fixum (ait) quod dixi, tenete, quoniam sic est, et non est mutabile. In his dato altrinsecus osculo pacis, ab invicem divisi sunt.

8. «Igitur antistes Roffensis, mox ubi sui pontificatus civitatem ingressus est, elanguit, et volutis in infirmitate diebus paucis, defunctus est. Wintoniensis vero, priusquam ad sedem suam venire

posset, languore corripitur, et juxta verbum viri Dei, non longa mora interveniente, finitur. Ex cujus viri obitu gravis moeror Dunstanum corripuit, tum quia tanti viri ingens solatium amiserat, tum quia cui potissimum tenerae adhuc statum Ecclesiae gerendum committeret, dubius fluctuabat. Quos fluctus ingerebant animo ejus hinc monachi nuper intromissi, hinc clerici ab Ecclesia illa ejecti. Monachi quidem suae professionis virum habere episcopum peroptabant, clerici vero sui ordinis hominem sibi praefici desiderabant. Illi videlicet per monachum in Ecclesia sibi collata cupientes solidari: isti per clericum Ecclesiae sibi ablatae sperantes reformari. Sed haec providens sapientia, et sapiens providentia Dei citius determinavit. Nam per beatum Andream Apostolum, cui speciali quodam devotionis affectu Dunstanum inhærere, Deus concesserat; Dunstano mandavit, qualenus nihil hæsitaus, Elphegum abbatem Bothoniensem constitueret Wentanae Ecclesiae summum sacerdotem. Lætatus est Dunstanus in istis, et reddita Deo gratiarum actione pro suis beneficiis, in Elphego perfecit quod ei per Apostolum suum Deus ipse praecepit». Hucusque Osbertus. Sic igitur Deus bene consuluit Ecclesiae Anglicanae, ut duobus luminibus subductis, penitus non remaneret obscura, sanctissimum episcopum martyrii candidatum subrogans antistitem in Ecclesia Wintoniensi.

9. *Obitus S. Edithae virginis.* — Eodem quoque anno decimo sexto kalend. Octobris pariter in cælum ex hac vita abiit sanctissima virgo Editha soror sancti Eduardi regis, quam et S. Dunstanus sepelivit in Ecclesia sancti Dionysii. Alumna ista fuit, et exulta institutione ejusdem sancti Ethelwoldi Wintoniensis episcopi, ut in ejus Vita¹ legitur. Claruit hæc insignibus post obitum miraculis.

¹ Osbert. in Vit. S. Dunstan. apud Sur. die xix Maii. tom. III.

¹ Apud Sur. die xvi Sept. tom. v.

Anno periodi Græco-Romanæ 6477. — Anno Æræ Hispan. 1022. — Anno Hegiræ 374, inchoato die 4 Junii, Fer. 4. — Jesu Christi 984.

— Joannis XIV papæ 1. — Ottonis III reg. 2. Basil. et Const. imp. 9.

4. *Moritur Benedictus VII PP.* — A num. 1 ad 6. *Benedicti VII* papæ Epitaphium a Baronio ex lapide corroso representatum, annum ejus mortualem, Sedisque durationem his verbis designat: «D. X. M. Jul. (id est, die x mensis Julii) in Apost. Sede residens ix an., abiit ad Christum, Ind. xii», ideoque hoc Christi anno Indictione xii insignito.

Novem etiam annos ei adscribunt Catalogi, nisi quod Catalogus viii et Marianus addunt *menses sex*, Catalogus vero vii, *menses v*. Neque dubium esse potest, quin præter annos ix, menses vel v vel vi Ecclesiam Romanam rexit; cum ex dictis constet die xxv Martii anni dclxxv, eum jam Pontificem fuisse, et die decima Julii hujus anni vivendi finem

fecerit. Addit Marianus cessasse sedem *dies xx*, octavus vero Catalogus *dies quinque*. Verum cum neuter numerus ad Dominicam ducat, dies mendose descriptos esse oportet. Illud certum, breve fuisse interpontificium; cum vacante hoc tempore imperio expectandi non fuerint legati, qui novi Pontificis consecrationi assisterent, quia imperium vacabat. *Benedicto VII* successit *Petrus episc. Papiensis* Ottonis II archicancellarius, ut ostendit Baronius, qui in Pontificatu vocatus est Joannes hujus nominis XIV.

2. *Tumultus adversus Ottonem III excitati.* — Ad num. 6. Mortuo anno superiori Ottone II, licet Otto III ejus filius rex Germaniæ die Natali Christi coronatus fuerit, orta tamen inter primates de rege substituendo dissensio, « aliis filio ipsius Ottonis imperium deberi certantibus, aliis odio imperatricis (sc. Theophaniæ) a filio ejus imperium transferre volentibus ad Henricum ducem (nempe Bavaricæ) filium Henrici, qui fuit frater primi Ottonis. Hic Henricus ipsum Ottonem puerum factiose raptum in custodiam tenet, sed principes puerum de manu Henrici extorquentes, in regno sublimant », inquit Sigebertus in Chron., cui adstipulantur chronographus Hildensheimensis, cujus verba anno superiori num. 6 exhibuimus, et fusiùs Ditmarus lib. 4, qui addit, *Misecam* Poloniæ principem, et Bolislaum Bohemiæ ducem, et complures alios *Henrico* favisse, sed hunc *future timore belli* coactum fuisse puerum reddere matri ejus *III kal. Julii*.

3. *Franci stant a partibus Ottonis III.* — Subdit Sigebertus: « Lotharius rex Francorum ad invadendam Lotharingiam rursum laborans, urbem Virdunum et Godefridum ipsius urbis comitem capit ». Tum anno *DCCLXXXV*: « Lotharius rex videns Ottonem imperatorem virtute militum suorum proficere, urbem Virdunum et Godefridum comitem reddit ». Verum hæc a Sigeberto contra veritatem scripta, et post eum a Nangio, ut demonstrat Blondellus in Pleniori assertionione Genealogiæ Franciæ pag. 266. *Lotharius* enim Henrici molitionibus obsistendi, Ottonis III pueri patrocinium suscipiendi, summamque ejus potestatem asserendi animo Virdunum et Godefridum comitem cepit. Sic enim Epistola *xxii* ad *Imixam* data Gerbertus: « Reges Francorum filio (Theophaniæ Ottoni III) favori dicite, nihilque eos aliud conari, nisi tyrannidem Henrici, regem se facere volentis, sub nomine advocacionis velte destruere ». Epistola *xxxii* Caroli ducis Lotharingiæ nomine ad Diedericum Metensium episcopum scripta: « Non solus, nec in angulo fidem integerrimam filio nostri Cæsaris adstruo, ut tu nocturno mero eructas; adsunt mecum Galliæ principes, reges Francorum (velis nolis) præclarissimi (nempe Lotharius cum Ludovico filio jam in consortium regni adscito): Lotharienses fide denoti, his est curæ filius Cæsaris, hi nec regnum quærunt eripere, ut tu, nec conregnantem instituere ». Idem eruitur ex Epistolis *xxxv* et *lviii*

ejusdem Gerberli. Quæ ex mox dicendis magis confirmabuntur.

4. *Ottoni III Virdunum restituitur.* — Extorto de manu *Henrici* Ottonis pueri, et Germanici regni pace anno sequenti firmata, Virdunum sponte reddidit *Lotharius*, tractatumque concordiæ, ut inquit Nangius, cum Ottonis II jam pactum, cum filio stabilivit, et Virdunensem civitatem restituit, teste Gerberto Epist. c ad Ecbertum Trevirorum archiepisc. data; sed Godefridum Virduni comitem nec reddidit, nec liberavit unquam, quidquid dicat Sigebertus; cum Epistola *LXXII*, anno *DCCLXXXVI*, *sexto non. Martias*, quo animam efflavit Lotharius, ad *Stephanum* Romanæ Ecclesiæ *diaconum* data, hæc Gerbertus habeat: « Exequiis domini Lotharii regis occupati, multa tibi quærenti pauca rescrinimus; Lotharienses dudum capti omnes elasi sunt, præter comitem Godefridum, de quo meliora sperantur ». Tum Epistola *cx* Adalberonis archiepisc. nomine ad Theophaniam imperatricem scripta, Maii die *xvii* Godefridum libertati restitutum fuisse docet.

5. *Lotharingiam Otto III acquirit.* — Post pacem sancitam universa Lotharingici regni possessio penes *Ottonem III* illibata mansit; nec *Hugoni Capeto*, posterisque regibus de ea item armis dirimere vacavit. Imperatores vero (ne quando ad Francos Occidentales Lotharingorum animus inclinaret) Ecclesiarum præsulibus *regalia* sua per dioceses transcripserunt, unde factum, ut in hanc usque diem *imperii principes* abusive dicantur, qui regni illius (cujus præcipua membra sunt et fuerunt) *principes* proprie dici debuerant. Non tamen existimandum, *Ottonem III* Lotharingiam tunc abdicasse; is enim ac successores tot sibi jura privilegiaque in urbes Ecclesiasticis datas retinere, ut eadem fere qua antea auctoritate in iis potiti fuerint. Porro post Lotharingorum rebellionem, sub sancto *Brunone* Ottonis M. fratre ac Coloniensi archiepiscopo, eodem procurante, et *archiducalem* titulum retinente, creati duo *duces*, qui *Lothariense* regnum æquali potestate regerent, sc. *Mosellanicum* et inferioris Lotharingiæ ducem, priorisque sedes *Metæ*, posterioris vero *Aquisgranum*. Cum enim *Lotharingia* universa ab anno *ccccxxxviii*, quo Burgundiæ Transjuraniæ regnum institutum, eique regni Lothariensis portio adjuncta, decem dioceses complexa esset, quinque a sancto *Brunone* superiori Lotharingiæ, quæ *Mosellanica*, a Mosella intersecante dicta est, Trevirensis nimirum, Argentinensis, Metensis, Virdunensis, Tullensis, assignatæ sunt; reliquas Coloniensem, Ultrajectinam, Leodiensem, Cameracensem, Tornacensem trans Scaldis Orientalem ripam sitam, *inferiori* ejusdem *duci* assignari placuit. Sed procedente tempore accisis ducum rebus, translataque maxima ex parte in episcopos comitum in urbibus constitutorum potestate, Mosellanici ducatus ne nomen quidem mansit, ut observat Blondellus laudatus pag. 270. Quando ducatus

Lotharingæ hodiernus constitutus fuerit, ibidem legendum.

6. *Moritur S. Ethelwoldus episc. Wintoniensis.* — Ad num. 7 et seq. Mabillonius Sæc. v Benedict. Vitam *sancti Ethelwoldi* episcopi Wintoniensis a Worstano monacho, ejus discipulo, ut videtur, scriptam publicavit, in qua cap. 44 mors ejus his verbis narratur : « Sacra olei liquore perunctus, Dominici Corporis et Sanguinis perceptione exitum suum munivit. Sieque vafaciens, et dans pacem filiis suis, inter verba orationis spiritum cælo reddidit in kalendis Augusti, anno Dominicæ Incarnat. DCDLXXXIV, episcopatus autem sui xxii, regni moderamina gubernante Ædelredo rege Anglorum. Testati vero nobis sunt, qui ibi præsentés aderant, exanime corpus sancti viri subita immutatione fuisse renovatum, lacteo candore perfusum, roseoque rubore venustum, etc. » Ecclesia Anglicana Ethelwoldo, Oswaldo, et Dunstano episcopis pietate, cæterisque virtutibus illustribus debet Ecclesiasticæ ac monasticæ rei restitutionem, cooperante imprimis Eadgaro rege, teste Malmesburiensi lib. 2 de Reg. cap. 8, qui de Ethelwoldo subdit : « Tot et tanta monasteria fecit, quot vix modo credibile videatur, ut talia fecerit episcopus urbis unius, qualia vix posset rex Angliæ totius. Fallor, et præcipiti sententia pecco, si non palam sit, quod dico ».

7. *Obitus S. Edithæ sanctimonialis.* — Ad num. 9. *Eadgithæ* seu *Edithæ* Eadgari Anglorum regis filiæ et sanctimonialis Wiltoniensis Vitam auctore, ut videtur, Gotselino monacho Cantuariensi, in lucem edidit Surius ad diem xvi Septemb., sed cum stylum nonnihil immutasset, Mabillonius Sæc. v Benedict., prout ab auctore scripta fuerat, eandem vulgavit. *Eadgitha* monacharum habitum apud Wiltoniam e manibus sancti Ethelwoldi episcopi accepit, et inter multa sanctorum hominum exempla, cognatorum præsertim et propinquorum suorum vehementius accensa est « virginæ integritatis palma sanctissimæ amicæ suæ Edithæ, quæ Eadgari regis et patris ejus germana soror erat », et in alio monasterio clarebat. Abbatissæ dignitatem recusavit, « et anno xxiii ætatis suæ, XVI kalend. Octobris, migravit ad Christum circa annum Domini nongentesimum octogesimum quartum : sepelivitque eam beatus Dunstanus in Ecclesia sancti Dionysii, quam ipsa extruxerat ». Hæc Gotselinus. Eodem ævo tres aliæ *Edithæ* regię virginés in Anglia vixisse dicuntur præter Editham Ottonis M. uxorem, ut ibidem observat Mabillonius. Una Ethelwlf regis filia, Alfredi regis soror, quæ sanctæ Motwennæ abbatissæ tradita est : altera Editha, Eduardi senioris filia, Æthelstani soror : tertia Edmundi regis filia Eadgari soror ; omnes sanctæ et sanctimoniales, de quibus ibidem Mabillonius.

8. *Moritur Deodericus episc. Metensis.* — « Theodoricus Metensium episcopus obiit, et secundum prophetiam viri Dei vix aliquis principum,

qui in bello Calabrico evasit, diu supervixit. Episcopatum Metensem suscepit Adelbero, vir sanctus et nobilis, filius Friderici ducis », inquit Sigebertus in Chron. ad hunc Christi annum. San-Marthani quidem et Menrissius in episcopis Metensibus Theodoricus seu Diederici obitum in annum præcedentem retrahunt ; verum auctor anonymus et cœvus, qui se ab eodem beato Adalberone abbate benedictum asserit, in Vita ejusdem præsulis tom. I Biblioth. Labbeanæ recitata, ostendit eos hallucinatos, et annum *Deoderici* emortualem a Sigeberto recte consignatum fuisse. *Adelbero*, inquit, patre Friderico Galliæ Medianæ duce et Beatrice, quæ magni Hugonis filia fuit, progenitus est, et mortuo Oltone II, *defuncto* etiam *memorandæ vitæ viro Deoderico pontifice*, procurante matre Beatrice, et favente Adelleide Augusta « Meti præsul elevatur et constituitur die xvii kal. Novemb., anno Dominicæ Incarnat. DCDLXXXIV, Indictione xii ».

9. *Beatricis opera pax in Germaniâ conciliata.* — « Mira vero Dei », subjungit anonymus, « et Domini nostri gratia et potentie antiqua virtute, quod est dictu mirabile, principum illa discordia (de qua hoc anno locuti sumus), quam putabant non sine magnis periculis, nec sine sanguinis multa effusione unquam evadendam, sic sedata, sic ad nihil redacta est, ut res jam in armis constituta ad unitatem electi principis et ad diuturnitatem veræ pacis, quæ quandiu vixit princeps idem duravit, perfectissima rediit, dum votis fidelium Adelbero in hunc dignitatis pontificalis gradum felix ascendit. Acta sunt hæc felicibus auspiciis Wormatiæ quondam Wangio dictæ, quo exercitus Galliarum, Germaniæque pars ad favendum puero principi, pars ut resisteret, concesserat. Sed Adalberone baculi pastoralis donato honore, regi quem Deus elegerat (nempe Ottoni III), ut erat videre, qui paulo ante resisterant, magis hujus beati meritis post plus pronos ad serviendum sese impingere festinabant, et fideles fore abhinc imposterum devovebant. Quid amplius ? Pacatis rebus regiis, et tranquillatis cunctis regis novi negotiis, Beatrix, quæ hujus pacis propagatrix Deo annuente extiterat, et ejus industria ea subita militum et principum in regem confederatio facta fuerat, cum sua felicissima prole felix et ipsa, et cum nobili illo Metensium exercitu ad urbem filio datam ire properat ».

10. *B. Adalbero fit episc. Metensis.* — Paucis interpositis : « Interim benedictio sacerdotalis usque in Christi Domini Natalem differtur : et quia Dominicus dies ad hoc sacramentum peragendum a Patribus est institutus, V kalend. Januar. quo Natalis Innocentium celebris veneratur, Dominicalis (hoc enim anno in illum diem Dominica incidit) Resurrectione Domini sacratus ac sanctus dies affuit, et ecce antistites vicinarum civitatum Trevirim, quæ est metropolis antiqua, confluentes, cui dominus Ecbertus venerabilis archiepisc. præerat,

paribus votis, parique assensu domnum Adelberonem in sedem Metensis urbis præsulem consecrant atque benedicunt ». Ex quibus multa nobis innotescunt, primo, cum juxta Necrologium Metense a Meurissio laudatum *Deodericus* septima die mensis Septembris obierit, mortem ejus ab hoc anno removeri non posse. Secundo, *Deodericum* piissimum antistitem fuisse; cum teste eodem Meurissio annis ab ejus morte trecentis corpus ejus vestibus pontificalibus indutum, ac terra coopertum detectum fuerit, eademque indumenta integra inventa, cujus casula adhuc Metis asservata, eamque singulis annis presbyter, qui ejus anniversarium die vii Septemb. celebrat, induere solet. Tertio, sequenti sæculo, quo ea Vita scripta, epi-

scopos diebus Dominicalibus consecrari solitos fuisse. Quarto, ducatum Mosellanicum, cui certum est præsuisse Fridericum patrem Adalberonis, *Galliam Medianam* appellatum fuisse. Quinto, tumultus in Germania *Ottonis II* mortis occasione exortos sedatos non fuisse ante diem xvi mensis Octobris, quo *Adellbero* episcopus Metensis dictus. Denique verum esse quod supra diximus, *Lotharium* Francorum regem *Ottonis III* jura defendisse, et *Sigebertum* ac *Willelmum Nangium* citatos male contrarium scripsisse; cum *Beatrix* Hugonis Capeti post triennium Galliarum regis futuri soror pacis conciliatrix fuerit, et Gallicus exercitus in armis pro *Ottone III* extiterit.

JOANNIS XV ANNUS 1. — CHRISTI 985.

1. *Joannes papa impie necatus a Bonifacio invasore.* — Redemptoris annus nongentesimus octogesimus quintus, Indictione decima tertia incipit, quo nefandus Bonifacius Apostolicæ Sedis invasor, qui (ut dictum est) necato Pontifice, et expilata Basilica Vaticana fugerat Constantinopolim: ubi res innovatas accepisset, decessisse nimirum Benedictum septimum, qui eum Sede expulerat, et Ottonem imp. esse defunctum, cujus patrociniò fovebatur, qui Benedicto successerat Joannes papa, Romam Sedem iterum invasurus, rediit suorum studiis roboratus, ut quam reliquerat Petri cathedram occuparet. Venit sceleratus atque sacrilegus, suorumque factione potens, quem sedentem in Pontificio throno Joannem invenit, inde violentus exturbavit, vinculisque alligatum detrussit in S. Angeli munitionem, quæ detinebatur a suis: ubi quatuor detentum mensibus fame perire miserum tandem truculentus prædo coegit, duorum Pontificum crudelissimus interfector, invasamque iterum Petri cathedram, prohi nefas! tenuit tyrannus mensibus quatuor, qui nec pilum habuisse dici potest Romani Pontificis, sive spectes ingressum, sive progressum, resque ab eo gestas consideres. Unde parum consulunt veritati, minusque pietati, et S. R. E. dignitati, qui hunc inter Romanos Pontifices referunt, annumerandum potius inter famosos latrones, et potentissimos gras-

satores atque patriæ perditores Syllas et Catilinas, horumque similes, quos omnes superavit sacrilegus iste turpissima nece duorum Pontificum.

2. Joannes igitur necatus proditor, ne quid sperarent amplius qui erant partium imperatoris; exponiturque extinctus spectandus omnibus proforibus munitionis. Mirandum plane, lugendum omnibus spectaculum tunc exhibitum intuentibus Romanis civibus, cadaveris ipsa macie conclamante, fame extinctum ipsum Joannem Pontificem. Hæc ex veteri Codice Romanorum Pontificum accepta, quibus consentiunt scriptores omnes. Porro Joannis venerandum corpus delatum in Basilicam S. Petri, ubi sepultum est juxta Joannem octavum, cujus sepulcro sequens est inditum Epitaphium:

Præsulis eximii hic requiescent membra Joannis,
Extiterat dictus qui antea quippe Petrus.
Sedem papæ blando moderamine rexit;
Imperatori Ottoni dulcis fuit atque præclarus.
Commissum populum Romanum moribus ornans
.....
Eloquio cunctis præsertim dulcis amicis,
Subjectis placidus, pauperibusque pius.

Defunctus est Joannes papa mense Augusti, die xx ». Hactenus ibi.

3. *Bonifacius antipapa moritur; legitimus papa Joannes XV creatur.* — At quid post hæc

accidit? Idem nefandus parricida, cum vix menses quatuor tenuisset violentus quam occuparat Apostolicam Sedem, dimittere cogitur invitus ac nolens: siquidem Deo ultore punitus, morte repentina percussus est, de quo ista in veteri Pontificum Vaticano Codice: « Bonifacius post mortem Joannis sedit menses quatuor, repentina morte interijt, et in tantum eum odio habuerunt sui, ut post mortem cæderent eum et lanceis vulnerarent, atque per pedes traherent, nudato corpore, usque ad campum, qui est ante caballum Constantini (ita tempore illo antiquitatum Romanarum rudes, equestrem statuam æneam Marci Aurelii Antonini imp. Constantini esse vulgo dicebant) ibi projecere eum atque dimiserunt. Tunc mane venientes clerici, et videntes eum ita turpiter et cum dedecore jacentem casum et lanceatum, collegerunt et sepelierunt. Quo tyranno sublato de medio, licuit legitimum creare Pontificem, electusque est Joannes ejus nominis XV, natione Romanus, ex patre Leone, postea presbytero, ex regione dicta, Ad Galinas-Albas »; quem non nisi ad finem anni hujus creatum putamus.

4. *Quomodo pax Romæ reddita post Crescentii tyrannidem.* — Quo tempore etsi sectatores Bonifacii quieverunt, novus tyrannus exurgit in Urbe, quæ hactenus fuerat Albericorum violentia conculcata atque depressa. Fuit hic Crescentius Numontanus, qui titulo consulatus munitionem sancti Angeli possidere aggressus est, quam adeptus, inde infestare nonnihil cœpit ipsum Joannem Pontificem, qui timore perterritus eorum, quæ passum viderat prædecessorem, secedit in Tuscaniam: unde cum legationes ad Ottonem mittere frequentaret, memores Romani, quæ ea de causa, ob injurias nimirum illatas Pontificibus, passi erant majores ipsorum, tum ab Ottone primo, tum etiam a secundo: e vestigio honorifica legatione eundem Joannem accersunt, redire rogant, omnique securitate adhibita, revocant tandem in Urbem: cui venienti occurrunt omnes, et piis officiis et obsequiis Christi vicarium Petri successorem honorant, seque illi subjiciunt. Sicque aliquandiu Romana Ecclesia tranquilla pace potita est.

5. *Sub Ramiro et Veremundo regibus res His-*

panicæ. — Hoc¹ anno, secundum exactam temporis pervestigatam rationem, Ramirum regem Legionensem, ejus nominis tertium esse defunctum, Ambrosius Morales affirmat; cujus ea ex parte memoria condemnatur, quod iniens lœdus cum Arabum rege, totius belli vis conversa est adversus Castellæ comites, et Veremundum in Gallia regnantem, sicque plura loca munita ab infidelibus capta sunt, quorum Ecclesiæ desolatæ, cæsique Christiani. Sed et inter alia funestissimum illud accidit, ut a Ruderico comite vocati Arabes Compostellam, usquequaque omnia cæde miscentes, eandem civitatem captam diruerint, mœnibusque nudaverint, abstinentes, magno miraculo, ab Apostoli Jacobi sepulcro, ipsomet Apostolo non alio ipsum illæsum servante, sed et hostes gravi morbo puniente, quo omnes interiisse, Sampyrus episcopus sui temporis res gestas prosecutus, tradit, et alii omnes post eum.

6. Ramiro autem rege e medio hoc ipso anno sublato, Veremundus in Legionensem regnum succedit hujus nominis secundus, filius Ordonii tertii, cujus primordia fuerunt laude dignissima, ut qui leges pristinas pæne usu contrario abolitas in observantiam revocavit, nec civiles tantum, sed Ecclesiasticas, atque Romanorum Pontificum decreta ut custodirentur omnino, lege cavil; præter hæc suis privilegiis Ecclesias munivit, primumque omnium Compostellanam Ecclesiam, cujus privilegii Diploma² extat, Catholico rege dignum. Postea vero ob persecutionem illatam Athaulpho Composlellano episcopo infamatus, inter malos principes a majoribus numeratur. Siquidem accusationi servorum contra dominum præter jus fasque fidem adhibens, in episcopum dolo accitum taurum immisit, qui mox redditus mansuetus in episcopi manibus arma deposuit a natura concessa, cornua scilicet. Res plane admiranda a tribus antiquioribus historicis enarratur, a Pelagio episcopo Ovetensi, Luca Tudensi item episcopo, et Roderico archiepiscopo Toletano. Sed quomodo tam falsi accusatores, quam rex persecutor a Deo diram vindictam perpassi justissime fuerint, iidem pluribus narrant.

¹ Ambr. Moral. Chron. Hist. . xvi. c. 46. — ² Ibid. l. xvii. c. 1. 2.

Anno periodi Græco-Romanæ 6478. — Anno Æræ Hispan. 1023. — Anno Hegiræ 375, inchoato die 24 Maii, Fer. 1. — Jesu Christi 985.

— Joannis XV papæ 1. — Ottonis III reg. 3. Basil. et Const. imp. 10.

1. *Mortuo Joanne XIV Bonifacius VII Sedem invadit.* — A num. 1 ad 5. *Joannes XIV*, cui Marianus Scotus, Herimannus Contractus juxta editionem Canisianam, Martinus Polonus, passim Catalogi menses octo attribuunt, usque ad finem circiter mensis Febr. currentis anni Ecclesiæ Romanæ præfuit. Baronius enim anno superiori, num. 5, Monumentum exhibet scriptum tempore Joannis XIV, *mensis Febr. die xxii, Indict. xii*, ubi recte monet, legendum esse *Indict. xiii*, quæ mense Februario hujus anni obtinuit. Hermannus laudatus ad annum DCCLXXXIV ait: « sedit mensibus viii, eumque Bonifacius, Verrucii filius prius (anno nempe DCCLXXIV) relegato Benedicto male ordinatus, de Constantinopoli quo fugerat reversus (hoc scilicet anno, exeunte Februario) comprehendit, et in castellum S. Angeli relegatum, fame, et ut perhibent, veneno enecuit, ejusque Sedem cxi Papa invasit ». (1) Factum id fuisse exeunte Februario vel ineunte Martio, non tantum laudatum Monumentum, sed etiam Chartæ quarum mentionem facit Rubeus lib. 5 llist. Ravenn. pag. 269, demonstrant. Ait enim Rubeus in Archivio Eccl. Ravennens. reperiri multas Tabulas datas « anno nongentesimo octuogesimo quinto a partu Virginis, qui annus ibi primus Bonifacii Pontificis Max., Indict. xiii scribitur, idibus Martii ». Quare non admittendæ Papebrocii conjecturæ in Conatu Chronico-Hist. et in Paralipomenis ad idem opus, existimantis Joannem XIV mense Novembri superioris

Christi anni, vel hujus initio in castro Sancti-Angeli inclusum fuisse, et *Bonifacium VII* die xix Martii sacrilege ordinatum.

2. *Joannes filius Roberti Bonifacio VII succedit.* — In Ms. Codice a Baronio num. 3 citato legitur, *Joannem XV Bonifacio VII* successisse; et Hermannus Contractus, qui eidem *Bonifacio* menses xi perperam attribuit, eundem illi successorem assignat. Verum *Joannem filium Roberti* ante Joannem Decimum Quintum Romanum Pontificatum gessisse, nos dubitare non sinunt Marianus Scotus, Gotfridus Viterbiensis, et varii antiqui Catalogi, qui inter Benedictum VII et Joannem XV, duos alios Pontifices nomine Joannis appellatos exhibent, et *Joanni Roberti filio*, sicuti et Marianus Scotus, *menses quatuor* assignant. Ad hæc, in Chronico Malleacensi seu S. Maxentii ad annum usque MCXXXIV perducto, et a Labbeo tom. II Biblioth. ex Codice Ms. descripto, postquam actum de iis quæ an. DCCLXXXII contigere, subdit chronographus: « Sequenti anno tres Apostolici apud Romanos mortui sunt ». Et deinde agit de iis quæ ad annum DCCLXXXV pertinent. Quare tanquam rem notatu dignam, mortem trium Pontificum Rom. quæ eodem anno acciderit, in medium adducit. Fallitur quidem in anno; cum certum sit, superiori Christi anno alium Pontificem non obiisse, quam Benedictum VII. Sed *Joannem XIV, Bonifacium VII, et Joannem filium Roberti* hoc anno demortuos ambigi non debet; cum certum sit,

(1) Ex quo Bonifacius VII in Apostolicam Sedem iterum irrepsit, duæ a notariis Urbis Pontificatus ejus Epochæ sunt usurpata: altera a primordiis Pontificatus invasi A. D. DCCLXXIV; altera ab hoc anno DCCLXXXV, quo, *Joanne XIV* fame et veneno perempto, Romanam Sedem iterum invasit, et quidem ante mensem Martium, nam in Tabulario S. Mariæ in Via-Lata habetur stipulatio confecta a Petro tabellione Urbis Romæ, cujus exordium: « Anno, Deo propitio, Pontificatus domni Bonifacii summi Pontificis et universalis septimi papæ in sacratissima Sede B. Petri Apostoli undecimo, Indictione tertiadecima, mense Januario, die nona ». Ex Indictione XIII est A. D. DCCLXXXV. Anni Pontificatus hic numerantur a prima invasione Pontificatus, quæ initium habet ante diem IX Januarii mensis an. DCCLXXIV. Alia stipulatio ibidem pro monasterio monialium S. Ciriaci a Theophylacto scribario S. R. E. et tabellione Urbis Romæ scripta initio habet: « Anno, Deo propitio, domini Bonifacii summi Pontificis et universalis septimi papæ in sacratissima Sede beati Petri Apostoli, Indict. tertiadecima, mense Maio, die tertia ». Est hic etiam A. D. DCCLXXXV, et annus primus Pontificatus *Bonifacii* indicatur; quandoque enim a notariis annus generatim sine ulla adjectione numerali, quia annus primus in cursu erat, prænotatus, annum primum Pontificatus designabat. Ex prima stipulatione apparet, mense Januario anni DCCLXXXV Apostolicæ Sedis cathedram jam occupatam fuisse. His adde Chartas in Regesto Sublacensi, pag. 168 col. 2, quæ incipit: « Anno, Deo propitio, Pontificatus domni Bonifacii VII PP. X, mense Maii, Indict. XIII ». Alia ibidem, pag. 159 col. 2: « Anno, Deo propitio, Pontificatus domni Bonifacii summi Pontif. et universalis VII PP. in sacratissima Sede B. Petri Apostoli XIII, mense Junii, Indictione XIII ». In notis numeralibus annorum Pontificatus mendii aliquid subesse suspicor. Indictio XII annum DCCLXXXV designat; itaque quum ea utroque loco sit, fieri non potest, ut mense Maio annus X, et mense Junio annus XII enumeraretur. Illud veri elicimus, *Bonifacium VII* occupasse Apostolicam Sedem, etiam mense Junio hujus anni. In Catalogo Romanorum Pontificum Cod. Vat. MCCCXL, post intrusionem *Bonifacii VII*, tres Pontifices *Johannis* nomine recensentur, hoc modo: « Johannes menses viii, Johannes menses xiv, Johannes sedit annos X, menses vi, dies x ». Utrouque non sine mendis.

Joannem XV hoc anno Pontificatum iniisse, et quidem, ut mox videbimus, ante finem mensis Decembris.

3. *Duratio Sedis Bonifacii VII.* — Sed antequam ad *Joannis XV* Pontificatum veniam, observandum Epitaphium Joannis XIV, quod Baronius ait extare in Basilica S. Petri, et in cujus fine legitur: « Subjectis placidus, pauperibusque pius. Defunctus est Joannes papa mense Augusti die xx », positum fuisse vel saltem e terra effossum, postquam Romanus canonicus opus suum scripsit, si enim ejus tempore extitisset, illud ab eo prætermisum non esset. Quod si illud Monumentum genuinum sit, Joannes XIV per menses quinque et amplius, *squallore carceris affectus* peremptus est a Bonifacio, ut verbis utar Gerberti, sedis Rhemensis invasoris, insua Synodo Rhemensi; aut, ut loquitur Hermannus, a Bonifacio, *fame, aut, ut perhibent, veneno* necatus est. Præterea *Bonifacius VII* non menses quatuor, ut habet Codex Ms. a Baronio citatus, sed menses sex inchoatos sedit, idque ut in eodem Codice legitur, non post mortem Joannis, sed eo in carcere detento; quo pacto Gotfridus Viterbiensis, Joannes Stella, et quidam alii menses sex ei recte tribuerunt, magno vero errore Hermannus Contractus menses xi; adeo Historia Pontificia hujus temporis confusa.

4. *Joannes filius Roberti non dicendus Joannes XV.* — Quoad *Joannem Roberti filium*, ab Hermanno Contracto, Joanne Stella, Baronio aliisque quibusdam prætermisum, ita appellatus est ab Onuphrio in Chronico Ecclesiast. et ab aliis qui post eum scripsere, et in variis Catalogis vocatur *Joannes XV*. Verum cum ex pluribus Chartis alterius *Joannis* qui ei successit, constet hunc sese in eis *Joannem XV* appellasse, apparet, *Joannem Roberti* filium non solum verum Pontificem non fuisse, sed etiam *Joannem XV*, ne turbetur Chronologia, non appellandum, quod recte vidit Papebrocius in Conatu Chronico-Historico, cui tamen in

eo assentiri non possum quod scribit, ideo non appellatum *Joannem XV*, quod electus tantum, sed non ordinatus fuerit. Incredibile enim eum per menses quatuor Sedem Romanam occupasse, seseque nunquam consecrandum curasse. Auctores itaque aut qui nomen ejus prætermisere, aut qui illud sine numerali nota extulere, ad id moti videntur, quod Joannes ejus successor *Joannis XV* nomen sibi sumpserit.

5. *Joannes XV hoc anno Pontificatum iniit.* — Hunc vero mense Decembri hujus Christi anni, quod jam indicavimus, Pontificatum adeptum esse, demonstrat ejus Epistola de confirmatione bonorum et possessionum monasterii Cuxanensis in Catalaunia siti, quam ex Chartulario ejusdem monasterii eruit Baluzius in Appendice Marce Hispanice pag. 934, quæ his verbis definit: « Scriptum per manum Stephani notarii regionarii et scriiniarii sanctæ Sedis Apostolicæ, in mense Decembrio, Indictione xiv », a kalendis Septemb. inchoata. Insuper Rubeus in Hist. Ravenn. lib. 5, pag. 269, Joannem archiepiscopum Ravennensem « anno secundo Pontificatus Joannis Quintidecimi, mense Decembri, Indict. xv », quædam prædia jure emphyteutico locasse asserit, anno sc. Christi DCCLXXXVI. Quod si mense Decembri illius Christi anni secundum Pontificatus annum Joannes XV exorsus fuerat, anno currenti eodem mense jam eum suscepserat. Ex quibus patet, Papebrocium laudatum perperam scripsisse *Bonifacium VII* Sedem Romanam menses xi occupasse, et *Joannem XV* die xxv Aprilis anni DCCLXXXVI Pontificem coronatum esse. Neutrum enim ex dictis subsistere potest, et præter laudatas Joannis Chartas, infra alias referemus, ex quibus liquebit, *Joannem XV* saltem mense Februario sequentis Christi anni Ecclesiam Romanam administrasse. Sed eum mense Decembri hujus anni jam Pontificatum consecutum, in dubium revocari non potest (t).

6. *Obitus Raimiri III Legionis regis.* — Ad

(1) Anni Pontificatus *Johannis XV* ex Actis illius temporis in Tabulario S. Mariæ in Via-Lata, et in Regesto Sublacensi ita digeruntur. An. DCCLXXXVII, mense *Februario*, adhuc in cursu erat annus *secundus* Pontificatus. Charta in Regesto Sublacensi pag. 178, quæ incipit: « Anno II, Deo propitio, Pontificat. domni Johannis XV PP. mense Februario, Indict. xv ». Ibid. pag. 177: « Anno II, Deo propitio, Pontificat. domni Johannis XV PP. in Sede B. Petri Apostoli, mense Julio, Indict. xv ». Ex Indictione xv est annus DCCLXXXVII. Mense *Octobris* et *Novembris* hujus anni numerabatur annus *tertius* Pontificatus. Charta in Tabulario S. Mariæ in Via-Lata: « Anno, Deo propitio, Pontificatus domni Johannis summi Pontificis et universalis quintidecimi papæ in sacratissima Sede B. Petri Apostoli tertio, Indictione prima, mense Octobris, die quinta ». Alia Charta in Regesto Sublacensi pag. 175: « Anno III, Deo propitio, Pontificatus domni Johannis XV PP. in Sede B. Petri Apostoli, mense Novembrio, Indictione prima ». Utroque *Indictio prima a kal. Septemb.* an. DCCLXXXVII inchoatur. Mense *Aprilis* an. DCCLXXXVIII, adhuc *tertius* annus *Johannis XV* signabatur. Charta in Regesto Sublacensi pag. 186: « Anno, Deo propitio, Pontificat. domni Johannis summi Pontif. XV PP. in Sede B. Petri Apostoli III, Indict. prima, mense Aprilis, die xxiv ». Hoc eodem anno mense *Octobris*, annus *quartus* in cursu erat. Tabularium S. Mariæ in Via-Lata: « Anno, Deo propitio, Pontificatus domni Joannis summi Pontificis et universalis quintidecimi papæ in sacratissima Sede B. Petri Apostoli quarto, Indictione secunda, mense Octobris, die nonadecima ». Indictio *secunda* hic incipit ex more a kal. *Septembris*. An. DCCLXXXIX, mense *Januario* et *Februario* annus *quartus* designabatur. Regestum Sublacense pag. 176, col. 2: « Anno quarto, Deo propitio, Pontificatus Domni Johannis XV PP. in Sede B. Petri Apostoli, in mense Januario, die prima, Indict. II ». Ibid. pag. 172: « Anno quarto Pontificat. domni Joannis summi Pontif. et universalis XV PP. in mense Februario, die xxviii, Indict. II ». Alia Charta in Tabulario S. Mariæ in Via-Lata: « Anno, Deo propitio, Pontificatus domni Joannis summi Pontificis et universalis quintidecimi papæ in sacratissima Sede B. Petri Apostoli quarto, Indictione secunda, mense Februario, die sexta ». Mense *Junio* anno DCXC decurrebat annus *quintus*. Ibidem: « Tempore domni Joannis sanctissimi XV papæ anno quinto, mense Junio, Indictione tertia ». Mense *Januario* et *Martio* an. DCXCI erat annus *sextus*. Ibidem: « Anno, Deo propitio, Pontificatus domni Joannis summi Pontificis et universalis quintidecimi papæ in sacratissima Sede Beati Petri Apostoli sexto, Indictione quarta, mense Januario, die vicesima secunda ». Eodem modo in alia, die xxvii *Martii* hujus anni, mense *Februario*, et *Mai*o an. DCXCII annus *septimus* decurrebat. Charta in Regesto Sublacensi pag. 92: « Anno, Deo propitio, Pontific. domni Johannis summi Pontificis et universalis XV PP. in sacratissima Sede B. Petri Apostoli septimo, Indict. v mense Februario, die tertia ». Tabularium S. Mariæ in Via-Lata: « Tempore domni Joannis sanctissimi quintodecimo papæ anno, septimo, mense *Mai*o, Indictione quinta ». Anno DCXCIII, mense *Junio*, *Julio* et *Septembri* notabatur annus *octavus*. Regestum Sublacense pag. 109, col. 2: « Anno, Deo propitio, Pontificatus domni Johannis summi Pontificis et universalis XV PP. in sacratissima Sede B. Petri

num 5 et seq. *Ranimirus* Legionensis rex, hujus nominis III, hoc anno ante mensem Maium Legione vivendi finem fecit, juxta accuratum Ambrosii Morales calculum lib. 16, pag. 263, non vero anno DCDLXXXII, ut habet Mariana lib. 2, cap. 8. Annus enim *Æræ* mxx, qui cum eo Christi anno concurrat, infartus fuit in Chronicon Sampiri, cum in correcto exemplari, de quo mox, ab emendatore rejiciatur. Eo regnante, « Normanni rege Gundredo Gallæciam ingressi, strages multas fecerunt, et in gyro sancti Jacobi Apostoli episcopum loci ipsius gladio peremerunt, nomine Sisanandum », inquit laudatus Sampirus, loquens de *Sisnando* episcopo Compostellano, de quo verba fecimus de sancto Rudelindo episcopo Dumiensi loquentes. *Veremundus* hujus nominis II, filius Ordini III, post *Ranimirum* Gallæciæ regno præfuit. Porro *Sampirus*, Asturicensis episcopus, Chronicum suum in morte Ranimiri III absolvit, quod *Pelagius* episcopus Ovetensis usque ad mortem Adefhonsi VI annumque mxcix continuavit; quibus ex chronographis fere coætaneis rerum Hispanicarum narratio petenda; sed quia eorum opera variis interpolationibus corrupta fuere, usi sumus exemplari, quod doctissimus anonymus cum variis Mss. contulit, e bibliotheca Mazarina in regiam translato.

7. *Barcino a Saracenis capta.* — Anno superioriori, ut docet Zurita lib. 4, cum *Borrellus* Barci-

nonensis comes Saracenos Hispaniæ insultantes coercere conaretur, coacto exercitu in Vallensi regione, in patenti *Mathabovio* campo prælio decertavit, magnaue accepta clade fusus est. Cum vero *Barcinonem* comes ex prælio sese reciperet eandem Saraceni obsidione cinxere. Tum hoc anno *Almansor*, cui summam rerum *Isem* Hispaniarum califa commiserat, eandem urbem obsedit *kalendaris Julii, feria iv, Indict. xiii*, eamque die sexta Julii cepit ac depopulatus est, ut habent rerum Hispanicarum scriptores, qui his notis chronicis præsentem annum certo designant. Tum omnes Ecclesiarum privatorumque chartæ, aut consumptæ a Barbaris, aut in Hispaniam asportatæ, quæ res immensum eam urbem afflixit. Porro civitatem paulo post *Borrellus* comes recuperavit. Dubium autem non est, inquit Baluzius lib. 4 *Marcæ Hisp.* ad hunc Christi annum, quin tum comes imploraverit auxilium Francorum, quibus a Caroli Magni temporibus civitas illa parebat. Inde *Almansor* ad *Legionem* urbem transiit, quam post fere annum obsidionem expugnavit. Urbs direpta, eversa que mœnia, eodemque belli impetu quædam alia oppida, qua incensa, qua vi capta atque direpta, ut narrat Mariana lib. 8 de Reb. Hisp. Legendus Diagus in Hist. comit. Barcinon. lib. 2, cap. 22 et seqq.

Apostoli VIII, Indict. vi, mense Julio, die VIII ». Ibidem pag. 13f, col. 2, alia ejusmodi die xv Junii. Tabularium S. Mariæ in Via-Lala : « Tempore domni Joannis quintidecimi papæ in sacratissima Sede beati Petri Apostoli anno octavo, mense Septembris, Indictione sexta ». Mense Martio an. DCDXCIV, annus nonus Pontificatus dicebatur. Regestum Sublacense pag. 179, col. 2 : Anno IX, Deo propitio, Pontificatus domni Johannis XV PP. in Sede B. Petri Apostoli, mense Martio, die xii, Indict. vii ». Si mense Februario et Julio anni DCDLXXXVII, annus secundus Johannis XV in cursu erat, si mense Octobris et Novembris tertius jam erat inchoatus, mense Aprilis an. DCDLXXXVIII adhuc tertius numerabatur; si die prima Januarii an. DCDLXXXIX quartus, si mense Junio an. DCDXC, quintus, mense Januario an. DCDXCI, sextus sequitur, non eodem modo a notariis hujusmodi annos enumeratos fuisse, quod forte Johannem XIV nonnulli notarii præterierint. Si enim Johannes XIV mense Februarii an. DCDLXXXVI, ut vidimus, adhuc vivebat, post eundem mensem annus primus Johannis XV figendus esset. Quum vero mense Octobris an. DCDLXXXVII, annus tertius, et mense Februario, Julio secundus esset; hæ epochæ nullo pacto inter se conciliari possent. A Februario mense anni DCDLXXXVI ad Februarium DCDLXXXVII, annus primus completur, et incipit secundus qui non completur nisi ad Februarium anni DCDLXXXVIII. Cur ergo mense Octobris an. DCDLXXXVII tertius dicitur? Item, si die prima Januarii an. DCDLXXXIX, quartus enumeratur, si in alia Charta ejusdem anni, mense Martio annus tertius designatur, varie a notariis hujusmodi annos fuisse recensitos apparet, nisi librorum mendo, quod verosimilius est, numeri sint corrupti. Qui ergo habent, mense Julio an. DCDLXXXVII adhuc in cursu fuisse annum secundum Pontificatus, exordium anni primi ab an. DCDLXXXVI ducunt; qui mense Januario an. DCDXCI sextum Pontificatus annum referunt, ultimum anni primi ante kalendas Januarias an. DCDLXXXVI auspiciantur, idcirco Johannem XIV prætereunt.

GEORGIUS.

JOANNIS XV ANNUS 2. — CHRISTI 986.

1. *Lothario regi Francorum defuncto filius Ludovicus succedit.* — Sequitur Christi annus non-
 gesimus octuagesimus sextus, decima quarta
 Indictione, quo obiit Lotharius rex Francorum,
 cum regnasset annos triginta et unum, relin-
 quens regni hæredem Ludovicum filium, quem commen-
 davit Hugoni duci. Hæc Odorannus, qui hoc tem-
 pore vixit. Lotharii vero conjux Emma filia, Oltonis
 Senioris et Adelaidis Augustæ, hæc tunc ad malrem
 scripsit :

2. « Dominæ Adelaidi imperatrici semper Au-
 gustæ Emma, quondam regina, nunc lumine Fran-
 corum orbata.

« Elapsa sunt tempora deliciarum mearum,
 tempora decoris mei, o mi domina, o dulcissima
 mater : dum is quo florente florebam, quo regnante
 regnabam, me hactenus conjugem, in perpetuum
 viduam fecit. O amara dies VI non. Martias, quæ
 mihi virum eripuit, quæ me in has miseras præ-
 cipitavit ! Intelligat pia mater gemitum et angus-
 tias filiæ doloribus plenæ. Non esse me penitus
 præoptarem, nisi divinitas solatio reliquisset mihi
 matrem. O quando videbo ? quando alloquar ? No-
 stri quidem vestræ præsentiae me ac filium meum
 occurrere volunt XV kalend. Junii. Sed hæc mora
 mille annorum mihi est. Noveritis interim, Fran-
 corum principes mihi ac filio meo sacramento fir-
 masse. In hoc et in reliquis, quæ sunt sequenda,
 quæ vitanda sunt, vestro iudicio utemur, ut non
 solum Emmæ reginæ, sed omnium dicamini mater
 regnorum. Recordamini præterea verborum vestro-
 rum, quod virum meum propter me dilexeritis,
 quodque ipse propter me vos amaverit. Prosint hi
 dulces affectus, et quod temporaliter non valetis,
 spiritualiter exhibeatis per episcopos, abbates et
 monachos ». Hactenus Emmæ reginæ ad Adelaidem
 imperatricem viduatæ marito Epistola, quam intex-
 tam inter Epistolas Gerberti edidit Papirius Maso.
 At majores angustiae presserunt reginam, cum
 anno sequenti orbata est filio, atque penitus exci-
 sum vidit ex Carolinis Francorum regnum, ut di-
 cemus anno sequenti.

3. *Manso abbas Cassinensis indignus.* — Hoc

eodem anno ¹ Aligernus, vicesimus septimus abbas
 Cassinensis monasterii, ubi eidem præfuisset annis
 triginta septem, præclarus meritis ex rebus probe
 gestis migravit ad Dominum. Laudatus hic inter
 alia summo opere reperitur in Vita S. Nili ab illius
 temporis auctore conscripta. Cui successit Manso
 longe dispar, homo voluptuosissimus, quem ut
 indignum tanto honore, ut S. Benedicti diceretur
 esse successor, expunxerunt posteri ex abbatum
 Catalogo, quem Leo Ostiensis ordine temporum
 texuit, subducto ex Chronicis Cassinatibus libro
 secundo, capite duodecimo, in quo de ejus ingressu
 agebatur, cujus nec nomen quidem sciretur, nisi
 obiter ab eodem Leone ² alibi inferius mentio habe-
 retur. Ita quidem in cuso Codice; in antiquitus
 autem scripto Cassinensis monasterii, ista leguntur
 eodem libro secundo, capite duodecimo : « Manso
 vicesimus octavus abbas sedit annos undecim. Iste
 fuit consobrinus Pandulphi principis, qui cum eo
 tempore, quo Aligernus abbas defunctus est, mo-
 nasterio sancti Magni juxta Fundanam civitatem
 posito præesset, propinquorum principum fretus
 auxilio, abbas Cassinensis a pluribus fratribus
 subrogatur : non enim omnium hujus loci mona-
 chorum consensu cœnobii hujus abbatiam adeptus
 est. Unde factum est, ut nonnulli de prioribus
 hujus monasterii fratribus potius hinc egredi,
 quam manere sub illo eligerent. E quibus Joannes
 Beneventanus, qui postmodum abbas existit, unus
 fuit, alter vero Theobaldus nihilominus postea
 abbas effectus. Dominus etiam Lutus de religiosis
 hujus loci monachis ac prioribus unus : necnon et
 quinque alii, quorum nomina non recoluntur. Ex
 quibus omnibus, tres priores Hierosolymam, quin-
 que vero alii in Lombardiam profecti sunt. Quos
 cum ob maximam hujus loci reverentiam Hugo
 marchio nimis honorifice suscepisset; ex cujus lar-
 gitione et concessione quinque monasteria in illis
 partibus construxerunt; ibique juxta traditionem
 hujus monachicum ordinem instituerunt. Ex cujus
 etiam marchionis dono, duæ hic argenteæ coronæ

¹ Leo Ost. l. II. c. 1 et 2. — ² Ibid. c. 22 et 30.

habentur». Porro de Hugone isto inferius ejus obitus tempore plura dicturi sumus. Manso autem quas dederit pœnas suæ nequitiae, suo loco inferius dicemus. Tenuit iste annis decem eam præfecturam indignus, numerandusque abbas ordine non meritis vicesimus octavus.

4. *Terræ-motus Constantinopoli.* — Quod pertinet ad res Orientis, «Hoc anno mense Octobris, inchoata Indictione decima quinta, ingens terræ-motus concussit civitatem Constantinopolitanam, ex quo plura templa corruerunt, et magni templi pars globi». Ista Curopalates habet. Ejusdem terræ-motus mentio habetur in rebus gestis S. Niconis, quo non Constantinopolitana tantum civitas, sed Græcia mirum in modum quassata est. Obiter enim hæc de his ibi, dum agitur de ipsius sanctissimi viri imagine saxo divinitus impressa: «De sancti vero imagine non hominis arte vel manufacta, quæ olim quidem lapideæ tabulæ impressa medio in templo visebatur; postea autem in templi vestibulo

juxta sacrarium defixa est, in qua crucigeræ etiam virgæ species ad vivum reddita cernitur, longum esset commemorare, cum miraculum id omnium linguis ad hanc diem celebretur, et tabula ipsa fulgentem sine coloribus effigiem gerens, omni voce clarius rem exprimat. Quemadmodum scilicet in ea stante sancto Deumque precibus placante, quo tempore Lacedæmoniorum regio universa terræ-motu propemodum deleta est, Deo civium intemperantiæ flagitiisque irato, ut piis quibusdam viris tunc temporis significatum est, relicta in saxo orantis imago fuerit, quæ argumento esset summi illius erga Deum fiduciæ et gratiæ, et quid sperare per eum possint, qui intus afflicti, tanti patroni opem advocarint». Ita veluti voce sublimi clamante lapide egregiam viri sanctitatem, ut non ipsi tribueretur si non fuerit exauditus, sed peccatis populi Dei vindictam absque remissione aliqua promerentis.

Anno periodi Græco-Romanæ 6479. — Anno Æræ Hispan. 1024. — Anno Hegiræ 376, inchoato die 13 Maii, Fer. 5. — Jesu Christi 986.

— Joannis XV papæ 2. — Ottonis III rex. 4. Basil. et Const. imp. 11.

1. *Obitus Lotharii regis Franc.* — Ad num. 1 et seq. «Anno DCCLXXXVI, obiit Lotharius senex plenus dierum», inquit continuator Aimoini lib. 3, cap. 45. Verum cum ex Chronico Flodoardi viri docti collegerint *Lotharium* Francorum regem anno DCXLI in lucem prodixisse, adeoque anno ætatis suæ XLV extinctum, necesse est existimare, inquit Baluzius nuper citatus, illum senem et plenum dierum ab isto auctore dictum, non propter multos ætatis annos; sed propter diuturnum imperium. Regnavit enim annos duos supra triginta. Obiit autem *Lotharius* VI nonas Martii, ut habetur in Epistola LXXII Gerberti ad Adelhaidem imperatricem nomine Emmæ data, et a Baronio recitata. Erat *Emma* seu *Hemma* Lotharii regis uxor, filia non Ottonis Senioris, ut perperam habet Baronius, sed Lotharii Italiæ regis et Adelhaidis, ut prodit S. Odilo in Vita S. Adelhaidis imperatricis, quæ primum Lothario Italiæ regi et postea Ottoni Seniori nupsit. Moriens Lotharius *Ludovicum* filium jam secum conregnantem, quem ex *Emma* conjugē suscepit, *Hugoni Capeto* commendavit. Reliquit et filium naturalem nomine *Arnulphum*, postea archiepiscopum Rhemensem de quo infra.

2. *Ludovicus rex ejus filius Emmam matrem*

male habet. — Mortuo Lothario, *Emma* regina a Carolo Lotharingiæ duce, et ab aliis quibusdam apud Ludovicum regem filium rea fit adulterii cum *Ascelino*, seu *Adalberone* episcopo Laudunensi, cujus ipsa etiam vivente Lothario insimulata fuerat. Unde illa omnino se a filio male haberi scribit ad Adelhaidem matrem opera Gerberti, qui in Epistola xcvi ait: «Aggravatus est dolor meus, o mi Domina, o dulce matris nomen, dum conjugem perdidi: spes in filio fuit, is hostis factus est. A me recesserunt dulcissimi quondam mei amici ad ignominiam meam ac totius generis mei. Nefandissima in Laudunensem confluxerunt episcopum: persequuntur eum, proprioque contendunt spoliare honore, ut inuratur mihi ignominia sempiterna, etc.» Epistola vero cxix ad Theophaniam Ottonis III matrem: «Nunc quasi sine genere, sine dignitate, omnibus afficior contumeliis, ancilla captiva crudelissimorum hostium facta. Et quomodo ille impius Carolus (Lotharingiæ dux et Ludovici regis patruus) vocem meam audiret, qui vestram audire contempsit?» Erat *Adalbero* natione Lotharingus, Lotharii favore creatus episcopus Laudunensis anno DCCLXXVII, valde adhuc juvenis, vir doctus, eloquentiæ et arti poeticæ deditus. Sed

de eo, ejusque Carmine ad Robertum Francorum regem, nuper ab Hadriano Valesio e tenebris eruto, infra sermo erit. Porro *Ludovicus* Francorum rex hujus nominis V vulgo dicitur, *qui nihil fecit*, seu *Ludovicus Iners*, de cujus morte anno sequenti.

3. *Moritur Aligernus abbas Casinensis.* — Ad num. 3. Inter viros illustres, qui hoc sæculo in Italia floruerunt, jure merito connumerandus *Aligernus* Casinensis abbas, qui post monasterii sui devastationem a Saracenis factam ejus bona vindicavit, ædesque resarcivit. Pluribus de eo agit Leo Ostiensis, ex quo Baronius aliqua in Annales transtulit. *Aligerno* monasterio Casinensi præsidente, sanctus *Nilus* Junior eximie sanctitatis hegumenus, quanquam Græcanicis addictus ritibus, *Casinum* venit; ubi perhumaniter acceptus et vicino Vallis-Lucis donatus monasterio, ibi quindecim exegit annos, ut testantur ejus Acta a contubernali ejus discipulo græce scripta, quæ Joannes Matthæus Caryophilus archiepiscopus Iconiensis latinitate donavit, et Baronius magna ex parte in Annales inseruit. « Depositus est autem prædictus abbas nono kal. Decemb. » inquit Leo Ostiensis, idque currenti anno, ut probat Camillus Peregrinus. *Aligerno* successit *Manso* abbas longe dissimilis animi, ut infra videbimus.

4. *Origo belli civilis in imperio Orientis.* — Ad num. 4. « Indictione xv, anno mundi 6494, (legendum 6495; est enim annus mundi Æræ Constantinop. kalendis Septemb. hujus Christi anni inchoatus) mense Octobri, terra vehementer concussa, multæ domus atque templa corruerunt »,

inquit Cedrenus, qui multo post subdit, imperii procures imperatori succensusse, Phocam Bardam, et quosdam cum ipso, « quod Bulgaricam instituens expeditionem ipsos sprevisset, nulloque numero habuisset » alios ob alias contumelias. De seditione inde secula anno sequenti verba faciemus, ut initium conversionis Russorum ad fidem Christianam melius innolescat.

5. *Angli censum solvunt Danis.* — Hovedenus part. Annal. pag. 427, de Ethelredo Angliæ rege hoc anno scribit : « Anno dcdlxxxvi, rex Anglorum Egelredus propter quasdam dissensiones civitatem Hrofi (id est, Roffi, hodie Rochester) obsedit, et visa capiendi illam difficultate iratus discessit, et terras sancti Andreæ Apostoli devastavit ». Verum avari principis cupiditas justissime expiata fuit. Florilegus enim ait : « Anno gratiæ dcdlxxxvi, rex Anglorum Æthelredus, qui prohibente B. Dunstano centum libras ab episcopo Roffensi extorserat, pro pace brevissima (cum Danis ineunda) pensionem sedecim millium librarum persolvere compulsus est ». Primus is census Danis datus, qui postea in immensum crevit, ut infra dicetur.

6. *Calabria a Saracenis vastata.* — Lupus Protospata in Chronico scribit : « Anno dcdlxxxvi, comprehenderunt Sarraceni sanctam Chiriachi civitatem, et dissipaverunt Calabriam totam ». Porphyrogennetus vero, lib. 2 de Them. cap. 10, de Calabria verba faciens ait : « In qua regium est, et oppidulum sanctæ Cyriacæ, et sanctæ Severinæ, et Croto ». Quare de sanctæ Cyriacæ oppidulo Protospata loquitur.

JOANNIS XV ANNUS 3. — CHRISTI 987

1. *Hugo Capetus, cujus genus vindicatur, ad regnum Francorum evehitur, extincto Ludovico Carolinorum postremo.* — Annus sequitur Redemptoris nongentesimus octogesimus septimus, Indictione decima quinta, quo *Ludovicus* Francorum rex novissimus Carolinorum moritur, anno vix uno regno potitus. Cumque sine liberis decessisset, regnum Francorum non collatum est Carolo Lotharii regis defuncti fratri, sed magis eo contempto, ad extraneos est delatum, nempe ad Hugonem ducem Parisiensem. De tempore obitus

Ludovici hæc Odorannus ejus temporis scriptor : « Anno nongentesimo octogesimo septimo obiit *Ludovicus* rex juvenis, qui nihil fecit; donato regno Hugoni duci, qui eodem anno rex est factus a Francis, et eodem anno Rotbertus ejus filius regum piissimus rex est ordinatus ». Hæc ipse. Eadem et Glaber monachus Cluniacensis ejusdem quoque temporis scriptor. Cur autem a Francorum proceribus repudiatus Carolus fuerit, Lotharii frater, ea potissimum ratio affertur, quod ipse nimis esset principibus Germanorum addictus; Francos

autem haud facile passos exteris esse subjectos. Cæterum ipsum Carolum male audisse apud Francos, litteræ, quas extare ad ipsum apud Gerbertum tradit Maso, satis significant.

2. De genere Hugonis cognomento Capeti sive Cuputii, ex ejus temporis scriptoribus Odoranno et Glabro et aliis recentioribus patet, ipsum nimirum ex patre natum Hugone Magno, avo Roberto, principibus; ex materno vero stemmate, ex sorore Ottonis Senioris genitum tradunt: adeo ut vanitati poeticæ nullus sit locus fingendi eum vilissimo patre natum. Cæterum progeniem Carolinam non defecisse in Ludovico, nec in Caroli fratris Lotharii filio, sed Hugonem hunc ipsum Magni Hugonis filium ex eadem esse progenie, demonstrat Chronicon Willelmi Mangii monachi sancti Dionysii, quod in lucem Pitheus edidit; quin et auctor qui texuit genealogiam S. Arnulphi ex quo Carolinum manavit genus, idipsum affirmat atque demonstrat. Habet et hunc ipsum auctorem idem volumen editum a Pitheo; profitetur hoc etiam Innocentius papa in Epistola ad Ludovicum regem ejus nominis Sextum, qua asserit genus suum, quod derivatur ab Hugone Capeto, processisse ex progenie Caroli Magni.

3. Addit etiam Mangius ex repromissione sanctorum accepisse Francorum regnum Hugonem hunc, citatque Acta translationis sanctorum Ricarii et Valerici, atque: « Hugo Magnus, comes Parisiensis, pater istius Hugonis, ipsorum sanctorum corpora, quæ translata ab Ecclesiis suis in Flandriam fuerant, et reposita in Ecclesia sancti Bertini apud sanctum Audomarum, terrore Northmannorum qui tunc Franciam devastabant, per visionem admonitus ad suas fecit Ecclesias reportari. Ipsi vero Hugoni Magno post hoc factum per visionem a S. Valerico dictum fuit: Propter hoc quod fecerat, ejus generatio post ipsum in regno Francorum usque in septimam generationem et in perpetuum regnaret. Sic Hugo iste rex Francorum factus videtur per Domini voluntatem ». Hæc ipse. Porro ex Chronicis Bertinensis monasterii reductionem eorumdem sanctorum corporum factam esse ab hoc ipso Hugone Capeto, traditur a Molano in natalibus sanctorum Belgii, vigesima sexta mensis Aprilis. Ubi autem Hugo est unctus in regem, ad evertenda quæ exoriri potuissent bella civilia, Carolum Lotharii fratrem conjecit in carcerem Aurelianis, sed id post annum tertium bellorum civilium. Porro filium Caroli Ludovicum patri successisse idem tradit in ducatum Lotharingiæ; alii vero affirmant Oltoni ejusdem Caroli filio eundem ducatum esse traditum.

4. *Niconis circa res Orientales prophetiæ et ejusdem acta cum Gregorio prætore.* — Quod ad res pertinet Orientis, invalescente bello civili, Sclerus Bardas cognomento Phocas tyrannus, imperator acclamatur ac coronatur. De his autem civilibus bellis, quibus diutius afflictatum fuit Romanum imperium in Oriente, pluribus Curopalates

et alii, qui ab ipso accepere quæ scripserunt. Nos autem ea prætermittimus enarrare, quæ magis politici sint status quam historiæ Ecclesiasticæ. Si quis autem ea cupit, habet quem consulat citatum nuper auctorem. Cum tamen ea minime prætermittamus quæ ad pietatem spectare noscuntur, atque instituto congrua esse videntur, ut quæ narrantur in rebus gestis sanctissimi viri Niconis, qui hæc omnia licet longe absens, novit, et quæ essent ventura prædixit Gregorio prætori: in Vita enim ipsius ista leguntur: « Illic ipsi Gregorio prætori et de Scleri Bardæ rebus, et post ejus e Babylone reditum, audire cupienti (nec enim abdita intuendi gratiæ exortem illum esse prætor arbitrabatur) narravit Nicon, Sclerum quidem ad imperatorem reconciliatum festinasse, ejus vero cognominem alterum ipsius audaciæ ac rebellionis successisse. Attamen nec illi profuturam tyrannidem, nec imperatoribus superiorem fore. Illis ergo prædictionibus consentaneus fuit eventus, et eum qui prædixerat, admirabilem declaravit. At prætoris quidem Gregorii sanctique res hoc modo se habent ». Hæc abbas monasterii sancti Niconis. Porro Gregorius iste, quo sanctus familiarissime usus est, et ipse sanctum reverentissime coluit, haud pridem idem Nicon senserat adversantem ac plane inimicum; sed Dei vindicta eruditus, conversus, eundem, ut par erat, plurimum dilexit et observavit. Ista vero quomodo se habuerint, ab eodem auctore sic accipe memoria dignam historiam:

5. « Peragebantur (inquit) aliquando vespertinæ laudes; prima autem hebdomadis dies erat, cum sphaeristarum aperto gymnasio, juvenum frequens manus infra sacram ædem constitit, atque inter alios prætor Gregorius, pars ipse certaminis, cum indigenis ludens: ludi enim amans erat, ludicrisque supra modum capiebatur. Et quoniam incondita clamantium voces, tam ludentium quam spectantium exaudiebantur, adeoque perstrepebant, ut a sacris hymnis avocarent et mentem in illis figere non sinerent: zelo Dei percitus Nicon celeriter appropinquat, belluinamque hominum barbariem libera voce, qua justos decet, libertate castigat. At prætor, vir amari alias ingenii et tum maxime ludo intentus, ut qui a paribus se vinci doteret, impotenti adversus sanctum actus rabie, proscindere maledictis manusque ad vindictam ausus attollere, urbe denique expelli jussit. Jamque ducebatur hilari pacatoque vultu, Domini sui exemplo, leviusque injuriam quam cæteri maximos honores ferebat.

6. « Cæterum nec sera, nec pedibus (ut poeta dixit) tarda fuit ultio: quin velocius junctisque vestigiis contumeliosum secuta est. Nam cum primum ad excipiendam sphaeram manum sustulit: paralysi repente icta est. Idem porro membris omnibus statim solutus et enervatus, ad Catholicam Ecclesiam aliorum manibus delatus est. Ubi acutissimis et gravissimis doloribus excruciat, mortempræ illis in lucro ponens, lamentabiles

questus edebat. Cumque magna medicorum sedulitate curaretur, et remedia omnia infra malum essent, ita ut inanis et vana omnis ab illorum arte spes esset; causam exquiri episcopus, cur eum repentinus morbus invasisset: erat enim et ipse medicæ artis peritissimus. At ille, quæ in Niconem admiserat vel invitus exposuit: hunc mali sui fontem et caput esse non dissimulans. Quo cognito, episcopus objurgavit ille quidem hominis temeritatem non leviter. Tum opportuno consilio auctor fuit, ut fastum poneret, et a Nicone supplex illatæ injuriæ veniam peteret. Norat enim, unde certa medicinæ spes esset.

7. « Parnit ille, abjectoque fastu ac prætoris potestatis supercilio, Niconem multis precibus per nuntios accersit. Qui quidem acceptæ injuriæ oblitus, dicto citius affuit: didicerat enim ut contumelias pati, sic easdem ultro remittere, aut potius benefactis et officiis compensare. Prætor autem, ut illum vidit, ad ejus pedes se abiecit, et qui modo

turgidus animisque ferox iras tantum et injurias spirare videbatur: supplex factus, erroris veniam lugubri voce rogat, ejusque preces unicum salutis suæ pharmacum implorat. Semper nimirum imbecilla res est vitium, fortis autem et stabilis virtus. Quid ergo ad hæc divina mens? An exprobravit homini amentiam, effrænatamque audaciam? aut aspernari orantem, et tantisper abnuere visus est? minime gentium. Quid enim faceret, qui discipulus aut acerrimus potius mitis illius et pacifici imitator erat, ad benefaciendum magis quam ad plectendum natura comparati? Itaque non solum veniam dedit, sed sanitatem etiam precibus suis, admota manu restituit. Ita ut statim cibum sumeret, incolumis, et libere atque expedite loqueretur, miraculo vel oculis ipsis qui spectabant fidem vix faciente ». Hucusque de his auctor, subjiciens quæ dicta, sunt de intima inter utrumque conciliata ob ea quæ acciderant, amoris necessitudine. Atque de his satis.

Anno periodi Græco-Romanæ 3450. — Anno Æræ Hispan. 1025. — Anno Hegiræ 377, inchoato die 3 Maii, Fer. 3. — Jesu Christi 987.

— Joannis XV papæ 3. — Ottonis III reg. 5. Basil. et Const. imp. 12.

1. *Moritur Ludovicus V rex Franc.* — A num. 1 ad 4. *Ludovicum V* Francorum regem hoc anno demortuum esse, Sigebertus in Chronico, aliique antiqui apud Blondellum in Pleniori Assert. Geneal. Franc. pag. 283, produnt. Ibidem Vitæ sancti Genulfi auctor anonymus ejusdem fere ætatis, et auctor fragmenti Historiæ Aquitanicæ tom. II Duchesnii aiunt, eum patri uno tantum supervivisse anno. Auctor vero Vitæ Garnerii præpositi sancti Stephani Divionensis, circa annum ML mortuum, *biennio fere transacto* a morte patris: quod unum et idem est, licet in loquendi modo alter historicus ab altero differat. Eum vero an. IX regnasse, tradit Aimoini continuator, lib. 5 cap. 45, ex quo scilicet cum Lothario patre regnum regere cœpit. Ejus coronationem aliqui conjiciunt in annum MCDLXXVIII, aliqui cum chronographo Floriacensi apud Duchesnium tom. III, in annum insequentem differunt, quod Chartæ ejus et *Lotharii* patris annis notatæ de utroque Christi anno explicari possint. Mabillonius lib. 2 de Re Diplom. pag. 201 observat, in multis Necrologiis, puta in Sangermanensi, in Autissiodorensi S. Stephani, et in Remigiano, obitum ejus reponi *XI kal. Junii*; in Psallerio vero Hemmæ reginæ aureis litteris

consignari *XII kal. Junii*, additque hanc ultimam auctoritatem præferendam esse. Verum juxta regulam nostram innumeris exemplis confirmatam, dicendum *Ludovicum V*, die XXI Maii denatum, dicque insequenti, seu *XI kal. Junii* exequias ejus peractas. « Eo mortuo », subjungit Mabillonius, « Fulchramnus Lutevensis episcopus testamentum suum condidit sub hac Chronica nota: *Factum Breve eleemosynarum istud, et completum prid. nonas Februarii, Christo imperante, ac regem sperante.* Quod si eo tempore necdum rex erat *Hugo*, dicendum est *Ludovicum* anno MCDLXXVI decessisse, *Hugonem* vero ei successum mense Julio anni insequentis ». Hæc ille. At subscriptio illa ostendit tantum Hugonem in ea urbe nondum regem anni insequentis initio agnitum, et verum esse quod in Chronico Adhemari, narrata Hugonis Capeti inauguratione, legitur: « Sane dux Aquitanorum Wilhelmus reprobens nequitiam Francorum, Ugoni subditus esse noluit, unde factum est ut Ugo, exercitu Francorum admo, urbem Pictavis obsidione fatigaret, etc. » Nec denique Ludovici V obitus a præsentis anno removeri potest, quia mors Lotharii patris ab anno MCDXXXVI removeatur, et in antecedentem rejiciatur contra antiquorum et

Chartarum fidem. Ipsemet Mabillonius Sæc. v Benedict. in Elogio sancti Maioli abbatis Cluniacensis num. 29, mentionem facit cujusdam instrumenti, quo canonicus quidam Aniciensis ædes suas donat Maiolo et Cluniacensibus, « anno quo Ludovicus rex in adolescentia vitam finivit. Datum v feria, III id. Augusti », ideoque hoc Christi anno, quo feria v in diem undecimum mensis Augusti cadit. Annus emortualis Ludovici V valide confirmandus fuit, quia is postremus rex est Francorum stirpis Carolingicæ, quæ per annos tantum ccxxxv propagata est.

2. *Hugo Capetus fit rex Francorum.* — Cum enim Ludovicus improlis obierit, regnique primates a Carolo Lotharingiæ duce ejus patruo, præsertim quod Teutonicas partes secutus esset, aversum gererent animum, *Hugo Capetus*, qui tunc ducatum Franciæ gubernabat, post decem dies a morte Ludovici regis in regnum erectus est: « Eodem anno », inquit vetus Charta Floriacensis, « quo Ludovicus adolescens obiit, et unctus est Hugo Rhemis, V nonas Julii », qui dies in Dominicam hoc anno incidebat, postquam *Noviomo* sublimatus fuisset *regio solio*, ut ibidem legitur. Gerbertus in Epistola cxi ex persona regis *Hugonis*, *Sigüino archiepiscopo Senonensi* data, scribit: « Honestè ac benigno affectu vos monemus, uti ante kalendas Novembris, eam fidem, quam cæteri nobis firmaverunt, confirmetis, ob pacem et concordiam sanctæ Domini Ecclesiæ, totiusque populi Christiani; ne si forte (quod non optamus) persuasione quorundam pravorum diligenter vobis exsequenda minus audiat, sententiam Domini papæ et comprovincialium episcoporum duriores perferatis ».

3. *Regnum ei prænuntiatum.* — Divino oraculo prænuntiatum fuisse *Hugoni Capeto* regnum Francicum testantur duo scriptores anonymi, qui sæculo sequenti vixere. Prior in Historia Relationis sancti Walarici abbatis Leucanoensis primi in pago Picardiæ Wimacensi, qui ait, « anno nongentesimo octogesimo primo Incarnationis filii Dei » corpus sancti Walarici, quod occasione bellorum delatum fuerat ad monasterium sancti Bertini, ab *Hugone Capeto* Francorum duce receptum esse ad proprium monasterium, postquam ad id faciendum a Walarico apparente admonitus fuisset Hugo: « Accelera petitionem nostram », inquit Walaricus, « per nostras enim orationes rex efficiaris Galliæ, et postea hæredes tui, usque ad septimam generationem, possidebunt gubernacula totius regni ». Secundus est poeta anonymus apud quem hæc verba sunt Walarici ad *Hugonem* ducem:

Et nihil intrices, nos nostras denique sedes
Cum suscepimus, per nostros scito precatus
Suscipies regnum, rex dictus Francigenarum,
Hæredesque tui, simul unus, his quoque terni.

Idem fusius refert Baronius ex Guillelmo Nangio ibidem errore typographi *Mangio* appellato, sed is serius quam duo isti vixit. De sancto Walarico sæ-

culo septimo egimus, et hujus Relationis historia legenda in Actis SS. Bollandianis ad diem primam Aprilis, vel Sæc. v Benedict. pag. 556 et seqq.

4. *Originem ducit a Childebrando Caroli Martelli fratre.* — Baronius num. 2 eorum opinioni adhæret, qui *Hugonem Capetum* fuisse de genere Caroli Magni litteris mandarunt; sed hæc opinio, quomodocumque explicetur, invictis argumentis confutata fuit a Blondello in *genealogiæ Francicæ Pleniori assertionem*, et a quibusdam aliis viris eruditissimis, qui ostendunt, cum ex linea collateralis ejusdem gentis, et ex Childebrando Caroli Martelli fratre originem ducere. *Childebrandum* enim Caroli Martelli fratrem fuisse ac Nibelungi comitis patrem, hunc vero Theodeberti comitis patrem extitisse, certis rationibus constat. Sed Francici genealogistæ inter se non conveniunt de Theodeberti comitis filio, nec de Roberti cognomento *Fortis* Francorum regis patre, et tam Dubouchetus et Speronius dux quam alii Chartas referunt, aut falsas, aut corruptas, aut saltem male lectas, aut non bene applicatas.

5. *Basilii imp. Russorum auxilio adversus rebelles utitur.* — Ad num. 4 et seqq. Hoc anno *Bardas Phocas* perduellis imperator a perduellis renuntiatus est *die Augusti xv, Indictione xv*, inquit Cedrenus, qui pag. 696 et seqq. fusc de hac rebellionem agit, refertque Phocam partem exercitus Calocyro Delphinæ patricio tradidisse ac ad Chrysopolin, quæ ab altera freti parte contra Constantinopolim sita est, misisse. « Imperator multis frustra hortatus Delphinam, ut a Chrysopoli discederet, nocte navibus adornatis Rossos imponit, (nam ab iis suppetias impetraverat, quod sororem suam Annam Bladimero eorum principi matrimonio conjunxisset), cumque his non sentiente, hoste freta trajecto, eos adortus nullo negotio opprimit: Delphinam in palo suffigit eo ipso loco, ubi tabernaculum is defixerat: fratrem Phocæ Nicephorum cæcum in custodiam dat, et reliquis captivis suo arbitratu punitis Constantinopolim redit ». *Bardas Phoca* incerto mortis genere interiiit. « Phoca Aprili mense mortuo, Indictione secunda, anno ab origine rerum 6497, hujusque rebellionem compressa; Durus libertatem consecutus se ipsum recollegit, et pristinum conatum persequi cæpit ». Subjungit Cedrenus *Durum* cum imperatore in gratiam rediisse, postquam euro-palatæ dignitatem ab eo accepit.

6. *Russi anno sequenti primum Christiani facti.* — Fusc hoc bellum civile narravit Elmacinus lib. 3 Hist. Sarac. cap. 6, ex cujus collatione cum Cedreno et Sigismundo Herbesteino in rerum Moscovit. Commentariis pag. 33, annum, quo Russi seu Moscovitæ hodierni fidem Christianam susceperunt, eruimus. « Bardas Phocas rebellionem suam prodidit, seque imperatorem nuncupavit in Ginnada posteriori, anno cccclxxvii (Hegiræ sc., tertio die mensis Maii currentis anni inchoato); et possedit omnes eas regiones quæ sunt ad litus

maris. Cumque negotia ejus feliciter succederent, timere sibi vehementer ab eo coepit imperator Basilii, quem et pecunia jam deficiebat. Unde coactus fuit mittere ad regem Russorum, qui inimici ejus erant, auxilium ab eo implorans. Is autem id ei promisit, petita ab eo affinitate: duxitque rex Russorum sororem Basilii imperatoris Romanorum, postquam hic ab eo obtinuit, ut religionem Christianam amplecteretur. Misitque ad eum Basilii episcopus, qui religione Christiana imbuerent tum ipsum, tum omnem populum ejus. Atque ante illud tempus nulla eis fuerat religio, nec professi erant quidquam. Sunt autem populus magnus, et ab eo tempore ad hoc usque omnes sunt Christiani. Hinc contendit Russorum rex cum omnibus copiis suis ad imperatorem Basilium: cumque eum jam convenisset, constituerunt occurrere Bardæ Phocæ, et terra marique ad eum contenderunt, et in fugam eum verterunt: potitusque est Basilii toto suo regno, et vicit Phocam eumque occidit tertio Muharrami, anno cccclxxix, et portatum fuit caput ejus Constantinopolim, atque ibidem affixum. Rebellerat autem annum unum, et menses septem». Paucis interpositis: « Sclerus imperio suo renuntiavit, initio mensis Regiebi anni cccclxxix, etc. Et compositum fuit totum negotium, idque eo modo ut Sclerus esset cyropalates ». Ita Elmacinus, qui licet in aliquibus a Cedreno discrepet, egregie tamen confirmat quod Herbesteinus Ferdinandi archiducis Austriae ad principem Moscovitarum legatus, loco citato ex Annalibus gentis tradit, *Wolodomirum* scilicet Russorum regem mysteriis vivifici lavacri, anno 6496, (kalendis Septemb. hujus Christi anni incepto) initiatum. Cumque foedus inter utramque gentem et *Wolodomiri* conjugium cum *Anna* Basilii et Constantini imperatorum sorore ante sequentis anni initium sortiri effectum non potuerint, apparet, Russorum conversionem ad eum Christi annum pertinere. Porro cum annus Hegiræ cccclxxix die decima mensis Apritis anni Christi dcdlxxxix exordiat, et *Bardas Phocas* occisus fuerit *tertio Muharrami, anni Hegiræ cccclxxix*, die nempe duodecima Aprilis nostri anni Christi dcdlxxxix, ac denique bellum seu rebellio *annum unum et menses septem* durarit, apparet, *Bardam Phocam* currenti anno, tam juxta Elmacinum, quam juxta Cedrenum rebellasse.

7. *Wolodomirus Russorum rex Basilii imp. sororem uxorem accipit.* — « *Wolodimerus* », ut jam pag. 5 assernerat Herbesteinus, « cum sine impedimento totius Russiae esset monarcha factus, venerant ad eum ex diversis locis oratores, hortantes ut se eorum sectæ adjungeret. Varias autem cum videret sectas, misit et ipse oratores suos, qui perquirerent conditiones et ritus singularum sectarum. Tandem cum aliis omnibus fidem Christianam græco ritu prætulisset elegissetque, missis oratoribus Constantinopolim ad Basilium et Constantinum reges, Annam sororem uxorem sibi si

darent, se fidem Christi cum omnibus subditis suis suscepturum, et restitutum illis Corsun et alia omnia quæ in Græcia possideret, pollicetur. Re impetrata constituitur tempus, eligiturque locus Corsun: quo cum venissent reges, baptizatus est *Wolodimerus*, commutatoque nomine *Wolodimeri*, Basilii illi nomen imponitur. Nuptiis celebratis, Corsun una cum aliis, sicuti promiserat, restituit. Hæc acta sunt anno mundi 6469 (legendum, 6496, juxta laudatum ejusdem auctoris locum), a quo tempore Russia in fide Christi permansit. Anna moritur xiiii an. post nuptias: *Wolodimerus* vero anno post obitum uxoris quarto decessit. Is civitatem intra Wolham et Occam fluvios sitam condidit, quam a suo nomine *Wolodimeriam* nominavit, eamque Russiae metropolim constituit. Inter sanctos tanquam apostolus solemniter die, videlicet xv Julii, quotannis veneratur ».

8. *Cum duobus filiis a Moscis ut sanctus colitur.* — Baronius in Monumento de *Ruthenis ad communionem Sedis Apostolicæ receptis*, ad calcem tomi vii Annal. subjuncto num. 8 ait, Matthiam Michovium aliosque, qui tradunt Ruthenos, sen Russos, Christianam religionem amplexos esse anno Domini dcdxc vel dcdlxxx, sub Basilio atque Constantino imp. errasse, et *Russos* sub seniore Basilio, Macedone dicto, sacro baptismo tinctos. Verum ut suo loco ostendimus, Russi qui imperante Basilio Macedone idola abjecere, paulo post ad vomitum rediere, uti suo loco monstravi, ubi et insinuavi *Russorum* nomen variis Septentrionis populis attributum fuisse. Papebrocius tomo i SS. mensis Maii præfixit Ephemerides Græcorum et Moscorum, in quibus ad diem xv mensis Julii legitur nomen *Bladimeri*, alias *Wlodomiri*, et ad diem xxiv ejusdem mensis habetur: « Boryssus Glebus, principes martyres ». Sunt vero hi filii *Wlodomiri*, Christianis nominibus *Romanus* et *David* appellati, a *Jaroslao* fratre post victum fratricidam *Svatopolcum*, contumulati Wissegradi. Eorum princeps Ruthenica lingua *Czar* vocatus, quod nomen regem significat, *Wlodomiræ* primum sedem habuit, et postea *Kiovæ*, donec ea urbs sæculo xiii a Tartaris penitus eversa fuit, et a duobus tantum sæculis sedes principis *Moscuam* translata, a quo tempore *Moscovitarum* nomen celebre fuit. Metropolita autem Russiae seu *Moscoviæ* sedem cum principe mutavit.

9. *Russi fidem Christi a Græcis tunc Catholicis acceperunt.* — Antonius Possevinus in primo suo de Rebus Moscoviticis ad religionem spectantibus Commentario, cum pluribus aliis existimavit, *Russos* a schismaticis, et quidem hæreticis, fidem Christianam accepisse, et *Rutheni* in Lithuania Catholici verentur eorum sanctorum memoriam facere, quos Græcorum Calendariis inscriptos non inveniunt, ne forte in aliquos non sanctos, sed schismaticos impingant. Sed recte Papebrocius in Præfatione ad præfatas Ephemerides num. 11, opinionem illam refellit, ostenditque hunc *Ruthenorum*

metum ex opinione pro majori saltem parte erronea procedere. Græci enim, a quibus *Russi* fidem Christi acceperunt, tunc vere Catholici erant, et ex libris de Rebus Moscoviticis scriptis apparet, extra schismatis hæreseosque suspicionem haberi posse, quos gens illa primis quatuor a sua conversione sæculis habuit *sanctos*; non solum quia eorum sanctitas divinis miraculis fuisse probata creditur, sed etiam probatur multitudine et antiquitate templorum, sub alicujus nomine erectorum. *S. Alexius* metropolita Russorum, qui circa annum mccccxxx floruit, *Kioviæ* sedit, contra quem cum missus fuisset in Russiam a patriarcha Constantino-politano schismatico *Dionysius Græcus*, is intra non multos captus conjectusque in carcerem, schisma quod invexerat, plene stabilire non potuit. Idem deinde facere conatus *Phociej*, homo simili-

ter græcus, a Synodo Novogradensi depositus est anno mcdxv, et in ejus locum suffectus *Gregorius Bulgarus*, qui sicuti ejus successor *Isidorus* Concilio Florentino, interfuit Constantiensi. Quamvis autem contra hunc schismatici nova coacta Synodo prævaluerint, Albertus tamen Cojalowicz in Miscellaneis Historiæ Lithuanicæ asserit, Isidori successores fuisse Catholicos usque ad an. mcdxx, quo excisum pæne schisma resuscilavit *Jonas Moscus*, tantumque non stabilivit, uti probat Epistola ejusdem Joannis metropolitæ, ad Romanæ Sedis episcopum apud Herbestinum. Et licet metropolitæ Moscorum usque ad medium sæculum xvi a patriarcha Constantinopolitano confirmati fuerint, non inde tamen sequitur, eos fidem semper cum Græcis mutasse, ut fusius ibidem Papebrocius.

JOANNIS XV ANNUS 4. — CHRISTI 988.

1. *Adaldago succedit Libentius in sede Hamburgensi, et ipse laudatissimus.* — Redemptoris annus nongentesimus octogesimus octavus sequitur, Indictione prima inchoatus, quo reliquis rebus gestis in obscuro latentibus, illud unum (quod ad res Ecclesiasticas pertinet) tantum innotuit, hoc scilicet anno, a Joanne Romano Pontifice, præcipua, qua universæ Catholicæ Ecclesiæ præsidet, auctoritate, pallium datum Libentio archiepiscopo Hamburgensi, qui eodem ipso anno successit Adaldago, qui ubi ei sedi præfuisset annis quinquaginta tribus, hoc anno, quarto kal. Maii moritur ab omnibus collaudatus. De successore autem Libentio hæc ¹ Adam ejus Ecclesiæ exactam texens Chronologiam: « Vir litteratissimus, et omni morum probitate decoratus ab Italia quondam pontificem secutus est Adaldagum, cujus vitam æmulatus et magisterium, solus ex dispositione tanti patris dignus inventus est, cui Hamburgensis cura parochiæ crederetur. Dicunt aliqui, vicedominum Ottonem, licet avunculo gloriatum sit pontifice Adaldago, cessisse tamen hujus electioni Libentium, in quo nihil reprehensibile vel inimicus possit objicere. Dicunt eum tantæ castitatis, ut raro se

mulieribus videndum præbuerit; tantæ abstinentiæ, ut pallida jejuniis ora portaverit; tantæque humilitatis et charitatis, ut in claustro sicut unus fratrum vixerit. Multæ virtutes ejus, quippe contentus acquisitis, raro curiam adiit pro acquirendis: domi sedens quietus, parochiæ suæ curam egit diligentissimam, totumque studium vertens ad lucra animarum, districtissima (ut aiunt) regula custodivit omnes congregationes suas. Archiepiscopus etiam per se curam hospitalis egit, fratribus infirmis quotidiano ministrans obsequio, ipse quoque vice sua xenodochium nepoti commendavit Libentio. Dum adhuc pax esset in Slavia, Transalbianos populos frequenter visitavit, et matrem Hamburg, Ecclesiam videlicet, paterno fovit amore, legationem suam ad gentes magno, ut decessores ejus, studio executus, licet obstaret dierum malitia ». Sic auctor. Idemque de eo eidem Ecclesiæ præfuisse annis viginti quinque tradit, sedisse nimirum usque ad annum Redemptoris millesimum decimum tertium.

2. *Adaldagus junior episcopus Ripensis.* — Porro (ne error in nomine oboriri possit) ex eodem ¹ auctore sciendum, « claruisse sub Libentio alium

¹ Adam. l. ii. c. 19. 20.¹ Adam. l. ii. c. 26.

Adaldagum virtutibus clarum, sed Ripensem episcopum. Is enim nepos Olinear senioris, qui in Suedia, Seland, Scane, et Fionia prædicans, multos ad Christum convertit, cumque nomine ipsius dicebatur Olinear junior, baptizatus ab Adaldago, ejus nomine placuit nuncupari : qui ex suo patrimonio fundans episcopatum Ripensem, eidem ab eodem Libentio est præfectus antistes, qui illustri vita sanctæ conversationis Deo et hominibus acceptus erat, et Christianitatem fortissime in Dania defendit ». Hæc ipse.

3. *Dunstani Cantuariensis obitus.* — Moritur

hoc pariter anno mirificus ille Dunstanus archiepiscopus Cantuariensis, quem egregia vitæ sanctitas, sacerdotalis immota constantia, claritudo miraculorum, et omnia Spiritus sancti charismata illustrarunt, ut hac ex parte Anglia non habuerit, quod invideret aliis nobilissimis civitatibus. Res ab eo præclare gestæ, ex quibus nonnullæ ad Annales spectantes diversis locis superius pro ratione temporum collocavimus, ab Osberto monacho diligenter fuere conscriptæ. Plane accidit, quod et vaticinatus est, ut post mortem ejus multa mala Angliam occuparent.

Anno periodi Græco-Romanæ 6481. — Anno Æræ Hispan. 1026. — Anno Hegiræ 378, inchoato die 21 April., Fer. 7. — Jesu Christi 988.

— Joannis XV papæ 4. — Ottonis III reg. 6. Basil. et Const. imp. 13.

1. *Obitus Adaldagi archiepisc. Hamburgensis.* — Ad num. 1 et 2. *Adaldagus* Hamburgensis episcopus hoc anno vitam cum morte commulavit, cui successit *Libentius*, natione Italus, qui ipsum ex Italia redeuntem comitatus erat, sicuti scribit Adamus Bremensis lib. 2, cap. 19 et seq. *Adaldagi*, uti habet Lambecius lib. 1 Rerum Hamburgensium pag. 31, et sequentibus temporibus nimia imperatorum liberalitate archiepiscopi Hamburgenses urbes et arces, atque adeo integros comitatus et regiones pleni dominii jure possidere cœperunt. Quæ res illa demum potentes illos reddidit, ut nonnunquam maximos etiam principes armis lacessere ausi fuerint. Ad quod archiepiscopalis potentiae incrementum digitum intendit Adamus lib. 2, cap. 1, dum Adaldagi Vitam his verbis inchoat : « Iste est, qui nobis Rempublicam restituit ». Et aliquanto post : « Adaldagus primo ut ingressus est episcopatum, Bremam longe prius tempore potestate ac judiciaria manu oppressam, præcepto regis absolvi, et instar reliquarum urbium immunitate simulque libertate fecit donari » : id est, jurisdictio civilis oppidi *Bremæ*, quam antea legati et comites vice imperatoris obtinuerant, *Adaldago* archiepiscopo ab Ottone M. concessa fuit, una cum omni proventu monetæ, telonei, banni aliarumque fisci imperatorii rerum et jurium, ut liquet ex ipsis Tabulis donationis, quæ extant in Syntagmate Rerum German. Septentrion. Sic idem imperator, ut patet ex Wittekindo lib. 1 et auctore Chron. Belgici Magni, *Brunoni* fratri suo Coloniensi archiepiscopo *Coloniam*, *Willelmo* filio Moguntino archiepiscopo *Moguntiam*, episcopo

Spirensi *Spiram*, Mindensi *Mindam*, cum mero et mixto imperio et omnibus fisci imperatorii juribus concessit. Primum ostendit Diploma Ottonis III, quo illam donationem confirmavit, et secundum continetur in Diplomate Ottonis M. donationis hujus mentionem faciente. Extat illud in Chronico Mindensi. Atque ideo Adamus ait, Bremam « instar reliquarum urbium (scilicet episcopalium et archiepiscopalium), libertate donatam fuisse ».

2. *Jurisdictio civilis antistitibus concessa limites suos habebat.* — Libertas autem tunc vocabatur, episcoporum subiectum esse imperio : nempe quia comites et legati urbibus et provinciis ab imperatore præfecti, nimis plerumque avari et insolenter populum tractare consueverant. Qua de re in antiquis monumentis passim multæ extant querelæ. Quamvis autem *Bremæ* aliarumve aliquot urbium jurisdictio civilis episcopis et archiepiscopis eesset, non tamen fas erat civilibus ipsos præsidere judiciis, sed ad hæc nomine suo exercenda *advocatos* habebant, homines profanos, vel, ut vulgo aiunt, *laicos* : qui quidem etsi ad imp. *Friderici II* tempora ut plurimum ab imperatoribus ipsis constituti fuerint, nonnullis tamen episcopis et archiepiscopis speciali quodam permissu libera eos eligendi potestas concessa est, et in his *Adaldago*, ut constat ex supradictis fragmentis Diplomatum Ottonis M. *Hamburgum* non itidem ac *Brema* in archiepiscopi potestatem venit, sed sub imperatorum eorumque, qui Saxoniam deinceps administrarunt, remansit imperio, ut videre est apud Adamum lib. 2, cap. 4 et seq. Goldastus tom. III Constitut. imper. pag. 311, refert Diploma Ottonis III Adal-

dago archiepisc. Bremensis Ecclesiae concessum, quo quidquid proprietatis in regno Danorum ad Ecclesias *Slevicensem*, *Ripensem*, *Arusensem* et *Ottonevingensem* pertinebit, ab omni censu juris sui absolvit. Datum illud « Wildeshusen XV kal. April. anno Dom. Incarnat. DCDLXXXVIII, Indict. I, anno autem regni nostri V ». Qua subscriptione perspicuum fit, Ottonem III in die Natali Christi anni DCDLXXXIII, non vero insequentis Christi anni, Germaniae regem coronatum fuisse. Goldastus quidem loco citato duas alias ejusdem regis Chartas eodem anno datas profert, in quibus licet Otto sese regem diserte appellet, non vero imperatorem, Goldastus tamen in titulo, quem eis praefigit, Ottonem III, *mirabilem imperatorem Augustum* vocat, reclamantibus quae ipsemet producit ejusdem Ottonis Diplomatis, in quibus Otto III se tantum regem dicit.

3. *Moritur S. Dunstanus archiepisc. Cantuariæ.* — Ad n. 3. *Sanctum Dunstanum* Cantuariensem archiepiscopum hoc anno ad Deum migrasse, disertis verbis asserit Osbernus Cantuariensis monachus in ejus Vita num. 4t, Sæc. V Benedict. recitata, qui addit : Dies ergo Ascensione Christi festivus diem clarificationis beati Dunstani præcessit tertius ». Hoc autem anno festum illud in diem XVII mensis Maii incidit, et in legibus Ecclesiasticis Canuti regis anno MXXXII editis, *Dunstani* festum XIV kal. Junii celebrari sapientes præcepisse dicitur. Accurate itaque Simeon Dunelmensis ad hunc Christi annum scripsit : « B. Dunstanus archiepisc. Indict. prima, XIV kal. Junii, sabbato, ex hac vita transivit ». Ante biennium prædixerat vir sanctus mala super *Ethelredum* regem ventura, quod iram Dei provocaret in exigenda pecunia ab Ecclesia sancti Andreae Apostoli. « Jam vero post obitum sancti viri », inquit Ingulphus in sua Historia, « dictæ prophetiæ in dies adimpleri, et mala innumera totam terram tribulare. Scilicet Danici piratæ primo nostra littora in omni terræ latere crebris assultibus infestare; postmodum magna classe advecti, exercitus eorum invicti, urbes et castella licenter expugnare; eodem etiam tempore fames valida indigenas maxime vexare et vastare; morbus deinde, qui dysenteria dicitur, tam in jumenta quam homines desævire; pestilentia cum his multa millia tam divitum quam pauperum percutere; ac omnes hostes in capite super Anglos semper vincere, et in omni certamine semper prævalere ».

4. *Synodus Landavensis.* — Interim inter antiquos *Britannos*, licet ad summas miseras adactos Ecclesiastica disciplina vigeat. Cum enim inter eos rex quidam *Guentia* cum fratre inimicitias fovens eum occidisset, Britannorum Ecclesia hoc facinus detestata, illum a fidelium communione tamdiu separavit, donec reus de facto pœnitens, crimen expiaret. Factum id in Synodo, cui *Landavensis* episcopus præfuit, et in qua res gesta plenius narratur. Spelmannus pagina 502 hanc Synodum *Landavensem* cum hoc anno illigavit, eaque nunc legitur tom. IX Concil.

5. *Robertus in consortium regni Francici assumptus.* — *Hugo Capetus*, qui anno superiori Francorum rex renuntiatus fuit, currenti *Robertum* filium in regni societatem adscivit. Labbeus tom. I Biblioth. pag. 272, mentionem facit Chartæ, quæ dicitur « data die XVIII kal. April. anno MIV, regni Roberti XVII », sed loco XVIII kal. April. legendum, XVII kal. April., tot enim dies ante kalendas mensis Aprilis non habet. Quare ea inauguratio hoc anno ante diem XVI mensis Martii acta. Imo in Fragmento Hist. Francicæ a Roberto ad mortem Philippi I regis apud Duchesnium tom. II, pag. 631, de Hugone Capeto dicitur : « Is Robertum filium suum sibi consortem legit regni, et benedici fecit Rhemis kal. Jan. » Idem habetur in Charta Lemovicensi, sed ea a me non visa. Cum vero *Robertus* dicatur a Glabro, auctore æquali, in lib. 2, cap. 1 : « Rex tunc juvenis prudens, atque eruditus, dulcisque eloquio ac pietate insignis », cum patrem anno DCDXCVIII amisit, in adolescentia nunc versabatur. Interim cum hoc anno *Adalbero* Rhemensis archiepisc. mortuus fuisset, suffectus ei ab Hugone et Roberto regibus *Arnulphus* Lotharii regis filius spurius, quem *Adalbero* Laudunensis episcopus cum illis reconciliaverat. Verum *Arnulphus*, sacramenti regi dicti immemor, sexto post ordinationem mense (Rhemos ejus jussu prodente *Adalbero* presbytero) *Laudunum* se perducendum permisit : ibidemque *Rhemensis urbis prædatores*, qui nihil nisi eo conscio et probante aggressi fuerant, *excommunicavit*; et Synodus *Silvanectensis* anathema illud confirmavit. De ea Synodo anno DCDXC verba faciemus, quia Baronius eam in istum Christi annum distulit. Sexto vero mense post suam ordinationem *Arnulphum* in crimen illud lapsum esse, anno DCDXCI, num. 1 ostendam.

JOANNIS XV ANNUS 5. — CHRISTI 989.

1. *S. Adalberti reditus Roma in suum episcopatum Pragensem, et ejus apostolatus in Ungaria, ubi baptizat Stephanum regem.* — Sequitur annus Redemptoris nongentesimus octogesimus nonus, Indictione secunda, quo Romæ Synodus celebratur in causa Adalberti Pragensis in Bohemia episcopi. Ille enim (ut superius suo loco dictum est) ubi licentia summi Pontificis reliquisset episcopatum, et monasticum Romæ esset institutum amplexus in monasterio sancti Bonifacii, ibique quinquennium trauserat, requisitus a suis ut ad derelictam reverteretur Ecclesiam, interpellatusque ea in re Romani Pontificis auctoritate: ipse Pontifex ad hæc decernenda synodalem conventum collegit. Quomodo autem ista se habuerint, et quid decretum in Synodo fuerit, qui tunc temporis res ejusdem Adalberti collegit, sic narrat¹: « Quinquennio pleno miles Christi in monasterio erat, dulcedine morum cunctis placens, altitudine virtutum longe antecellens. Si cui forte venit invidia suæ sanctitatis, hunc humilitate cito placabat. Proficiebat de die in diem, de virtute in virtutem. In hospitio suo hospes Christi tanquam in gradibus eburneis rex coronatus procedens processit, et usque ad perfectum diem crescere fecit. Postea populus terræ episcopum suum revocat, sancti viri pappatem Radlam qui frater carnis suo duci erat: et Christianum monachum, virum eloquentem in hoc opus eligunt. Hi duo cum litteris metropolitani Romam veniunt, ac de reditu pastoris papam appellant, populo pœnitenti matrem suam requirunt: promittunt ex ore populi errata corrigere, quæ deliquerunt solvere, desinere a malis, studium dare bonis. Abscessus viri contrarius erat domino papæ, talem margaritam a suo corpore avellere, durum erat magnæ Romæ. Sed facta Synodo, ratio obtinuit, quia gens sua plenam satisfactionem pollicens vocat, dimissum gregem contra voluntatem repetat ».

2. Porro decretum Pontificis extat in Actis aliis sancti Adalberti conscriptis in Codice sanctæ Cæcilie, his verbis in eadem Synodo promulgatum:

« Tunc Apostolicus non tam voluntate, quam jure Dei permotus talia respondit: Reddimus quod juste quærent male merentes filii. Sed dabitur eis hac lege: si audierint eum, teneant cum benedictione Dei, et faciant sub eo fructum centuplum. Si autem a consueta iniquitate recedere nolunt, hoc est, si ad voluptates suas et desideria luxuriante malitia redirent, absque periculo sui capitis malorum consortia declinet. Hæc ubi dicta dedit, finita est Synodus, etc. » Duos autem episcopos missos ab archiepiscopo Moguntino Romam ad sanctum Adalbertum repelendum, eadem Acta significant. Pergunt priora Acta recitari cœpta:

3. « Amborum papæ et abbatis imperio, fracto suo libitu, flens episcopus ad episcopatum rediit, pro cuius regimine virgam, pro pignore annulum, dante Apostolico, accepit. Dominica die veniens venit domum ad unam civitatem, ubi ipsa die mercatus erat magnus: quæ visio non parum adduxit tristitiæ sancto viro. Ad eos vero, qui se reduxerant, increpando sic ait: Ecce vestra promissio bona; pœnitentes vestri nec feriantur hac die sacra. Stetit tamen in episcopio suo pascens macrum populum divino pabulo, et si mallet, potans salutari poculo. Primo novo adventu pastorem verentur, quasi vivi fideles matrem Ecclesiam petunt et patrem, repressa mala consuetudine, quasi cum Christianis actibus Christum adorant. Verum nova religio cito deorsum venit, antiqua consuetudo superiorem manum tenuit. Spreto Deo carnalem populum caro traxit, delecta iniquitas desideriorum vias currere præcepit, voluptas pro lege erat. Verum Dominum, cui servire regnare est, nolunt, ad ignominiam suam, ut multis dominis servitia agant. Nectunt sibi funes peccatorum, quibus trahi valeant ad aeternum exitium: quia discere nolunt, ubi sit sapientia, ubi sit vita, lumen oculorum et pax ». Sed quoniam postea recenti percussus eorum facinore, rursum ipsos reliquerit, sic auctor fideliter narrare pergit:

4. « Accidit, ut solet humanis erroribus, ut quædam matrona ingentem nobilitatem oblita,

¹ Apud Sur. die XXIII April. lom. II.

¹ Baruch III.

seortum se faceret, et palam peccato facto, maritus vitam mulieris quæreretur. Ipsa vero ad episcopum concita ala pedum confugit, quam ille in Oratorio S. Georgii retro altare abscondit, ut satisfactionem suaderet et vitam servaret. Ecce adest ex improvise armata manus, et si non redderet mœcham, ambobus, et episcopo et feminæ minantur gladium. Audivit sonitus armorum, et minas verborum procaces audivit episcopus lætus; et si forte martyrium semper optatum, nunc miserante Deo, inveniat, tacita cogitatione ruminat, dubio gladio exultat. Alii mala mens et pejor vox! index venit, secretum prodidit; ubi lateret mulier, digilo monstravit. Quid prodest refugium ad sancta Sanctorum? Quis curat, regnante barbarismo, fas Christianum? Frangunt templum: mulierem tremulam prehensis adductam crinibus, capite truncant. Unde cogitans episcopus, quod nec illis, nec sibi cassus labor prodesset, animæ vero suæ talis statio obsesset, pappati suo ait: Scias certum, aut ubi ego sum venias, aut amplius me nunquam videbis. Interim tamen ipsi erat labor magnus, non prætermittere, quo minus admoneret clerum et populum, secundum quod ætas, discretio gradus, et qualitas criminis postulavit; nec dabat somnum oculis suis, qua arte, qua virtute compe-scere posset nascentes errores, inquirens.

5. « Non tacendum, quod juxta positus Ungaris nunc nuntios suos misit, nunc seipsum obtulit. Quibus et ab errore parum mutatis, umbram Christianitatis impressit ». Hæc lantum de apostolatu ejus ad Ungaros auctor, intentus magis ejusdem sancti monasticos recensere progressus, cum ad suos quos reliquerat monachos Romam rediens, est iterum restitutus. At quantum S. Adalbertus suo apostolatu profuerit Ungaris, et illa umbra Christianitatis, quam ibi (ut auctor ait) impressit, in immensum creverit, translata jam in veritatem, aliunde petamus, nempe a Cartuio episcopo ad Colonanum regem, qui cunabula Ungaricæ Ecclesiæ stylo fidelissimo prosecutus, hæc ait¹: « Ea quidem tempestate, qua Ungarorum gens Dei Ecclesiam populabatur, fuit in ea princeps quidam, quartus ab eo qui Ungaris in Pannoniam ingressuris ducem se præbuit. Is Geisca dicebatur, severus sane et crudelis homo in suos, potenter eis imperans, erga alios vero, præsertim Christianos, humanus, misericors et liberalis. Etsi autem paganismi sui erroribus esset implicatus, affamen cælestis gratiæ luce spirituali appropinquante, cum omnibus vicinis circumquaque provinciis de pace cœpit accurate tractare, ut jam in illo liceret animadverti, cujus optaret esse filius, dicente in Evangelio Domino Salvatore²: Beati pacifici, quoniam filii Dei vocabuntur. Edicto namque proposito, jussit Christianis omnibus in ipsius ditionem sive ducatum ingredi volentibus,

hospitalitatis et publicæ fidei studium et curam impendi. Porro clericis et monachis fecit potestatem in ipsius quoque conspectum veniendi, eosque propenso animo audivit. Atque ita factum est, ut Orthodoxæ fidei semen in pectoris ejus horto satum, in fruges erumpere gestiret.

6. « Quid multa? Adest tempus cælitus dispositum. Credidit ipse cum familiaribus suis. Undis salutaribus expiatus, omnes ditionis suæ homines pollicetur se ad Christianissimum (Christianismum) perducturum. Cum autem multum esset sollicitus de edomandis rebellibus, ritibus sacrilegis abolendis, ad sanctæ Ecclesiæ profectum pro sua æstimatione statuendis episcopatibus; mira quadam prævisione, nocte eum Dominus consolatus est. Misit enim ad eum juvenem speciosissimum, qui diceret ei: Pax tibi, Christi electe, facessal cura hæc et sollicitudo. Non fiat per te id quod meditaris. Habes enim manus humano sanguine pollutas. Nascetur autem tibi filius, qui divinæ providentiæ consilio id efficiet, quod tu animo concepisti. Erit is rex, et ex eorum regum numero, quos Dominus elegit, coronam regni temporarii in æterna commutaturus. Tu vero hominem spiritali legatione apud te functurum, honorifice excipito, exceptum reverenter habeto, ejus cohortationibus sincerum pii pectoris affectum adhibeto. Expergefactus princeps, stupens ad visionem, prius secum, deinde cum Christianis et suis hominibus pertractans, humi totus prostratus, expansis manibus, humiliter gratias egit Deo; seque principatumque suum cum filio nascituro curæ illius, qui non dormit neque dormitat, lacrymabundus commendat.

7. « Admirante autem eo de viro divinitus ipsi prædicto, nuntiatur illi, beatum Adalbertum Bohemensis Ecclesiæ antistitem ad ipsum venire, ad Christianam religionem, fidemque non fictam eum traducere, et ob fidei profectum Domino laudis hostiam immolare cupientem. Is nuntius novis Christi tyronibus ineffabilem affulit lætitiā. Dux procedit obviam servo Christi cum fidelibus quibusque, honorifice eum excipit, et ut in visione erat admonitus, modis omnibus se obedientiæ filium fore demonstrat. Deinde jubente ipso, fit ubique congregatio indomitæ gentis. Per sanctum episcopum fiunt conciones, et ejus exhortationibus mox illi convertantur et baptizantur, multis in locis Ecclesiæ conduntur. Luce enim illa, quæ illuminat omnem hominem venientem in mundum, profligatis tenebris, cœpit Ungaria enitere. Et completum est in ea, quod Propheta¹ ait: Populus qui ambulabat in tenebris, vidit lucem magnam. Lux lucis invisibilis Christus est, quem tunc Gentiles videre meruerunt, quando e tenebris revocati, illum esse et verum Deum et hominem verum, perfecte crediderunt.

8. « Non est autem silentio prætereundum, ut

¹ Cartuio. in Vita Steph. Ungar. reg. c. 1. 2. 3. Apud Sur. die xxv Aug. 10m. iv. — = Matth. v.

² Isai. ix.

omnis ambiguitas tolleretur de medio, et ne parum fidei habere videretur visio duci oblata, etiam uxorem ejus jam partui propinquam ejusmodi divinitus consolatione affectam. Apparuit illi beatus levita et protomartyr Stephanus, levitici habitus insignibus ornatus, ita eam compellens: Confide, mulier, in Domino, et certa esto, te filium parituram, cui primo hujus gentis et regnum et corona debetur. Tu vero illi nomen imponas meum. Cum autem femina non sine admiratione seiscitaretur ab eo, quisnam esset, aut quomodo vocaretur, sic respondit: Ego sum Stephanus protomartyr, qui primus pro Christi nomine martyrium obiit. His dictis, disparuit. Nascitur itaque (ut prædictum erat) filius principi, notus Domino, secundum Prophetam¹, priusquam in utero conciperetur, et per Stephanum protomartyrem a Domino appellatus antequam natus. Eum vero beatus et Deo dilectus episcopus Adalbertus baptizavit, et nomen Stephani ei impositum est, et non sine nutu et consilio Dei, ut nos quidem persuasum habemus». Hucusque ibi de rebus gestis, quæ pertinent ad Adalbertum Ungarorum apostolum. At ipse sciens apostolatus munus non sponte sua a quoquam, sed Dei nutu ab eo, qui primariam in Ecclesia Catholica retinet a Deo concessam auctoritatem, suscipiendum, Romam rursus statuit proficisci, ubi si Deus id vellet (ut fecit) a Romano Pontifice acciperet ipsum ad Gentes apostolatum. Quando autem id contigerit, suo loco dicemus. Porro ista omnia hoc anno expleta de reditu Roma in Bohemiam, et de Bohemia in Ungariam protectione, haud unius anni spatio perfici potuisse putamus.

Hec item anno, quo quartus absolvitur et quintus inchoatur annus Joannis papæ, Indictione secunda, contigit S. Gebehardum² Constantiensem venisse Romam ad ipsum Pontificem, cujus ad-

ventus ea causa fuit, ut cum ædificasset monasterium celebre satis ad ripam Rheni fluminis in honorem S. Gregorii papæ, ejusdem sancti Pontificis reliquias in eo collocandas acciperet a Pontifice, a quo et privilegium pro eodem monasterio impetraret. Acciderant sancto viro cuncta ex sententia, et inter alia, ut privilegium pro eodem monasterio obtineret, quod hactenus integrum extat cusum in Vita ipsius, in cujus fine ista leguntur, de tempore quo datum fuit, videlicet: « Scriptum per manum Joannis notarii regionarii, et scriniarii sacri Lateranensis palatii, in mense Aprilis, et Indictione secunda. Datum vero septimo kal. Maias per manum Gregorii episcopi sacre Portuensis Ecclesiæ, et bibliothecarii Sedis Apostolicæ, anno Pontificatus domini nostri Joannis sanctissimi papæ quarto ». Pergit auctor: « Inter cæteras vero, quas idem Pontifex beato viro sanctorum dederat reliquias, caput quoque sanctissimi papæ ipsi condonavit Gregorii, etc. » Quomodo autem persequentibus eum Romanis pro sublato ab Urbe sancti Gregorii capite, Deus eundem sanctum episcopum miraculo liberavit, idem auctor narrare pergit, quem tu consulas. Pervenit autem ætate idem sanctus usque ad annum Salutis nongentesimum nonagesimum sextum. Porro sciendum, hunc Gebehardum dici debere seniore, respectu alterius Gebehardi ejusdem civitatis episcopi, qui claruit sub Gregorio papa septimo, cujus partes contra Henricum est secutus summa cum laude.

9. *Theophane imperatrix Romam venit.* — Hoc anno Theophane imperatrix Ottonis regis mater Romam venit, ut Italiæ principes in officio contineret, filioque fideles perseverarent, rebellesque comprimeret, mansitque ibi triennio, usque ad annum Redemptoris nongentesimum nonagesimum primum, quo ex hac vita migravit. Ista Lambertus in Chronico: cujus tempore res Urbanæ tranquillo statu quieverunt. Ditmarus eam obiisse tradit anno septimo Ottonis regni, decimo septimo kal. Julii.

¹ Luc. II. — ² Extant Acta ipsius apud Canis. Antiq. lect. tom. VI. pag. 468.

Anno periodi Græco-Romanæ 6482. — Anno Æræ Hispan. 1027. — Anno Hegiræ 379, inchoato die 10 April., Fer. 4. — Jesu Christi 989.

— Joannis XV papæ 5. — Ottonis III reg. 7. Basil. et Const. imp. 14.

1. *S. Adalbertus jussu papæ Pragæ anno dcdxciv redit.* — A num. 1 ad 8. Baronius, qui quinquennium monachus *sancti Adalberti* Pragæ episcopi ab anno dcdlxxxiii auspicatus est,

icet illud anno dcdxc inchoetur, uti supra monstravimus, ideoque et in annum dcdxciv desinat, refert hoc anno quæ anno dcdxciv narranda fuerant. Anno itaque nongentesimo nonagesimo

quarto contingere quæ primus auctor Vitæ hujus sancti cap. 25, his verbis memorat : « Archiepiscopus Maguntinus (qui eo Christi anno Willigisus erat) beati præsulis gregem sine pastore ire conspiciens, misit legatos cum litteris, per quos dominum Apostolicum de sancti viri reditu interpellat. Facta est Romæ Synodus (anno dcccxciv, ut habet chronographus Magdeburgensis) pro hac causa, et oritur utrinque litigium grande, ex una parte eorum, qui monachum perdere timerunt; ex alia eorum, qui pastorem suum cum auctoritate quæsierunt. Cumque invicem diu pugnantibus sententiis utraque pars diu decertarent, tandem dubiam nuntiorum primas (qui in alia Vita appellatur *Radla* ac frater ducis Boleslai) vix promeruit victoriam. Hic ipse primas frater erat ducis (nempe Bohemie) cujus terræ, qui exigebatur episcopus, præfuit. Tum Apostolicus (nempe Joannes XV) non tam volunlate, quam jure Dei permotus, talia respondit : Reddimus, quod juste quærunt; quamvis de bono patre jam degenerassent filii, et dabimus cum hac lege : Si audierint eum, teneant cum Dei benedictione, faciantque sub ipso fructum centuplum. Si autem a consueta iniquitate sua recedere nolunt, hic noster absque periculo sui capitis malorum consortia declinet ». Subdit postea anonymus, *Adalbertum* Pragam venisse, et omnem ætatem ac sexum ei obviam processisse. Sed cum Pragenses in carnalem partem relaberentur, Adalbertus, « dulcis Romæ mœnia revisit, et novi monasterii mutat pastoralia frena ». Est hic secundus reditus Adalberti in Urbem Romanam, quem Baronius juxta sua principia in annum dcccxc confert, cum tamen ad annum dcccxcv pertineat, ut ibidem videbimus. Porro quæ hic narrat Baronius de baptismo S. *Stephani* postea Hungariæ regis, et quæ supersunt de gestis S. Adalberti, ad suos annos remittimus, confusionis vitandæ causa.

2. *Floret S. Gebhardus episc. Constantiensis.* — Ad num. 8. Hermannus Contractus juxta editionem Canisianam ad annum dcdlxxix scribit : « Constantiæ Gamenolfus episcopus obiit, ei que Gebhardus nobilis et venerabilis præsul succedens, xvi annis Ecclesiam rexit : qui Basilicam S. Gregorii in ripa Rheni, abbatiamque suis ex prædiis construxit. Jam dicitur Petri-domus ». In S. Gebhardi Vita, in Chronico Constantiensi a Joanne Pistorio recusa, inter alia de eo dicitur : « Decimo anno Ecclesiam in honore S. Gregorii dedicavit, eamque multiplicibus et magnificis sanctorum reliquiis

cumulavit ». Monasterium illud Petershusense, vulgo *Petershausen*, dicitur possidere caput S. Gregorii papæ a Joanne papa XV S. Gebhardo concessum. Verum Clarius in Chronico S. Petri Vivi refert caput illud uno ante sæculo *Ansegisum* archiepiscopum Senonensem a Joanne VIII accepisse. « Obiit S. Gebhardus », inquit chronographus Constantiensis, « VI kal. Septembris anno dcccxcvi, sepultus in Basilica S. Gregorii a se constructa »; quod et Hermannus Contractus laudatus etiam habet. Plura de hoc sancto antistite Sæculo v Benedict.

3. *Theophania imperatrix Roman venit.* — Ad num. 9. In Chronico Hildensheimensi hoc anno legitur : « Theophanu (ita etiam Theophania appellabatur) imperatrix, mater regis (nempe Ottonis III) Romam perrexit, ibique Natalem Domini celebravit, et omnem regionem regi subdidit ». Tum anno dcccxc, « Theophanu imperatrix obiit », quod et Lambertus Schafnaburgensis et Hermannus Contractus ex editione Canisiana habent. Diem notavit Ditmarus, nempe *XVII kal. Julii*, qui dies erat decimus quintus mensis Junii. Ejus erga pauperes liberalitatem laudibus effert secundus auctor Vitæ S. Adalberti episcopi Pragensis. De ea S. Odilo abbas Cluniacensis in Vita S. Adelheidæ imperatricis scribit : « Licet illa imperatrix Græca sibi et aliis fuisset satis utilis et optima, socru tamen Augustæ (nempe Adelheidæ) fuit ex parte contraria. Ad postremum vero cujusdam Græci aliorumque adulantium consilio fruens, minabatur ei quasi manu designando dicens : Si integrum annum supervixero, non dominabitur Adelheidæ in toto mundo, quod non possit circumdari palmo uno. Quam sententiam inconsulte prolatam, divina censura fecit esse veracem. Ante quatuor hebdomadas Græca imperatrix ab hac luce discessit ». Porro error irrepsit in numeros apud Ditmarum, in quo legitur : *An. Dom. Incarnationis dcdlxxxix* (legendum dcccxc, ut ostendunt verba sequentia), *Sol defecit X kal. Novemb. v diei hora*. Hanc enim eclipsim die xxi mensis Octob. an. dcccxc contigisse demonstrat Calvisius in opere Chronol. et chronologus abbatie Quilindburgensis in Saxonia, qui Ditmarum excersipit, legit, *anno dcccxc*, additque verba hæc, quæ in eodem Ditmaro habentur : « Insequenti anno (id est, anno dcccxc) in Nymagen Theophano imperatrix infirmatur, atque ab hac vita XII kal. Julii discedit, etc. »

JOANNIS XV ANNUS 6. — CHRISTI 990.

1. *Per legationem Joannis papæ in Angliam pax conciliata.* — Sequitur Redemptoris annus nongentesimus nonagesimus, Indictione tertia, quo a Joanne Romano Pontifice decernitur legatio ad Angliæ regem atque ducem Northmannorum inter se invicem dissidentes. Eo functus est munere Leo viceepiscopus Trevirensis, qui eos in concordiam revocavit¹.

De legatione hac Leonis a Joanne papa in Angliam missi, et de concordia inter principes inita, extat Diploma ejusdem Pontificis apud² Willelmum Malmesburiensem datum anno sequenti, hoc titulo :

2. « Epistola Joannis papæ decimi quinti.

« Joannes quintus decimus sanctæ Romanæ Ecclesiæ papa omnibus fidelibus salutem.

« Noverint omnes sanctæ matris Ecclesiæ fideles, et nostri utriusque ordinis per climata sæculi dilatati, qualiter nobis relatum est a compluribus de inimicitia Ethelredi Saxonum Occidentaliū regis, necnon et Richardi marchionis : unde nimium tristis effectus, utpote de filiis nostris spiritualibus, tandem inito salubri consilio, accersivi quemdam apocrisarium nostrum Leonem, viceepiscopum sanctæ Trevirensis Ecclesiæ, et misi eum illuc cum litteris nostris exhortatoriis, ut resipiscerent ab hac superstitione (dissensione). Qui transiens vastas intercapedines terrarum, tandem marinos transmeavit fines, et in die Nativitatis Domini pervenit ante conspectum regis præfati ; moxque ex parte nostra salutato obtulit litteras, quas illi miseramus. Qui accersitis cunctis sui regni fidelibus utriusque ordinis sapientioribus, ob amorem et timorem Dei omnipotentis, necnon et sancti Petri Apostolorum principis, et per nostram admonitionem paternam, firmissimam concessit pacem cum omnibus filiis et filiabus suis, præsentibus et futuris, et cum omnibus fidelibus suis sine dolo.

3. « Qua de re misit Edelsinum sanctæ Schireburnensis Ecclesiæ præsulem, necnon Leolfstanum filium Alfuvoldi, et Vulstani filium Ederel-

nolhum, qui transierunt marinos fines, et pervenerunt usque ad Richardum præfatum marchionem. Qui et monita nostra pacifice suscipiens, simulque audiens decretum suprafati regis, libenti animo pacem firmavit eandem cum filiis suis et filiabus præsentibus et futuris, et cum omnibus fidelibus suis eo rationis tenore, ut si aliquis eorum, vel ipsi injuste aliquid contra alium perpetraverint, digna emendatione purgentur ; paxque maneat perpetua-liter et inconvulsa, sacramentorum utriusque partis stigmate stipulata. Ex parte scilicet regis Ethelredi Edelsinus præsul sanctæ Schireburnensis Ecclesiæ, Leolfstanus Alfuvoldi filius, et Ederelnothus Vulstani filius. Ex parte Richardi Rogerius episcopus, Rodolphus Hugonis filius, Trutheno filius Thurgis. Actum Rothomagi, kalendis Martii, anno ab Incarnatione Domini nongentesimo nonagesimo primo, Indictione quarta ». Additum : « Et de hominibus regis, vel de inimicis suis nullum Richardus recipiat, nec rex de suis sine sigillo eorum ».

4. *S. Adalbertus Romam repetens monasterium S. Bonifacii incolit sanctis viris celebre.* — Hoc ipso anno S. Adalbertus Pragensis episcopus Romam veniens, sancti Bonifacii monasterium, ubi quinquennio manserat, iterum adiit ; ibique totidem annos explevit. Erat plane in Urbe locus ille sanctorum colonia, ubi qui his temporibus florere sanctitate viri celebres habitarunt. Ut non mirum, si adhuc iterum ad locum hunc beatorum, quasi in terrestre cælum, Adalbertus posthabitis tot tantisque aliis in Germania et Gallia et in Italia monasteriis, tantummodo convolaverit, quod pervavide requisierit. Sed audiamus eum, qui ista ob oculos habuit, hujus temporis auctorem, qui rerum inspector exacte cuncta conscripsit ; ait enim¹ : « Ergo divinus heros ascendit equos, dulcem Romam revisit, et quasi post pericula maris quassa navis occupat optatum portum. Sic secretos monasterii sinus, charam requiem intrat, amplexus pulehram Rachel, obliviscitur laboriosam Liam ». Et paulo post de præstantibus

¹ Mat. Westmonast. in Flor. hist. hoc anno. — ² Willel. de gestis reg. Angl. l. II. c. 10.

¹ Vit. S. Adalber. apud Sur. die XXIII Apr. tom. II.

sanctitate viris, qui illic erant, hæc subjicit : « Usus vero illi maximus erat, colloquia quærere spiritualium et seniorum, qui porro illuc pro claritate abbatis plures confluerunt. Græci, inquam, optimi venerunt, Latini similes militaverunt. Superioribus quatuor pius Basilius, inferioribus quatuor magnus Benedictus dux, sive rex erat. Inter quos medius incedens, Deum sitiens Adalbertus, verba vitæ sumit et glutit, raptus in altum, cum fratribus dulcius contemplatur Deum. O quoties obortis lacrymis memini dicentem, cum causa ædificationis accessissem ad Joannem abbatem : Ubi sunt, inquit, margaritæ meæ? Ubi sunt dulces cibi animæ meæ? Ubi conveniunt sancti viri, pluebant ibi sermones Dei, accensæ sententiæ mutuo cursant : arsit ignis super terram cordis : testatur præsentem Deum unda compunctionis ». Quinam fuerint octo insignes abbates, quatuor Græci, et totidem Latini sanctitate celebres, istis idem aperit verbis :

5. « Hoc, inquit, faciebat scilicet Gregorius abbas, hoc Nilus pater, hoc Joannes bonus et infirmus, hoc simplex Stratus, et super terram angelus unus ». Erant isti abbates Græci, qui perturbatum statum Orientalis Ecclesiæ relinquentes, tanquam columba Noe, olivam uberem et speciosam, ubi consisterent, quæsiwere. Latini autem qui fuerint, docens mox subdit : « Hoc ex ratione majori Dei sapiens Joannes, hoc similis Theodorus, hoc Joannes innocens, hoc simplex Leo Psalmorum amicus et semper prædicare paratus ». Hæc de illis, qui videbantur esse columnæ, de quorum novissimo, nempe Leone, quæ scribat ¹ Petrus Damiani, in medium afferemus, ut ex uno eodemque novissimo reliquos perdiscamus ; ait enim :

6. « Leo quoque Nonantulanus abbas ad memoriam redit, qui dum clericalem adhuc speciem gereret, tandem devotione peracta, cum Hierosolymis remeasset, sic vitam suam instituit, ut nihil aliud præter unum duntaxat asinum possideret. Et hoc quotidie satus et pascua circumquaque perlustrans, materias congregabat, quibus ad requisita naturæ necessaria fratribus acutergia ministraret; peractoque glorioso hujusmodi opere manuum, psalterioque cum ipsa simul exercitatione decurso; protinus ad offerenda Domino sacra mysteria non sine multis lacrymis sanctus presbyter accedebat. Postmodum vero ad monasterii requiem violenter attractus aiebat (quod infelix frequenter et ipse deploro) JESUM, inquit, per pedes tenui, et nunc miser et cæcus, ut Sampson, sæculi moles volvo. Vixque peracto biennio, in manu Ottonis, qui tunc imperii sceptrum regebat, pastoralem baculum reddidit, deinde apud S. Bonifacium intra Romana mœnia perseverans, ex omni quod sibi vitæ hujus residuum fuit, nihil aliud quam æternæ vitæ sibi compendia procuravit. Ad cuius postmodum sepulturam cæcus

veniens, luci pristinae asseritur restitutus ». Hæc Petrus de Leone. Porro hic iste Leo, qui jam abbas ejusdem monasterii S. Bonifacii, scriptus postea reperitur in synodalibus Actis, cum legatione functus est, in Gallias missus ab eodem Joanne Pontifice, ut inferius suo loco patebit.

7. *Concilium Silvanectense in Gallia contra invasores Rhemensis civitatis.* — Eodem anno celebratur in Gallia Concilium Silvanectense. Quam autem occasione celebrari contigerit, et quid in eo gestum, ex Actis Rhemensis Synodi post annum sequentem celebratæ, de qua suo loco dicendum, hic reddemus historiam. Arnulphus Rhemensis archiepiscopus Hugonis regis Francorum favore promotus ad eam dignitatem fuit, ita visum Hugoni, ut hunc licet non legitimum, regio tamen stemmate ortum, utpote Lotharii regis filium, et Caroli adhuc regnantis nepotem, ætate juniorem his beneficiis in suas partes adduceret et contineret. Accidit autem, ut cum vix sex menses ea sede potitus esset, proditione cujusdam Adalgerii Rhemensis presbyteri ea civitate Carolus potiretur, cum et ipse Arnulphus captivus deductus est. Quod vero suspicio non levis de ipso esset Arnulpho, quod ejus jussu civitas Carolo patruo prodita esset : ipse adversus omnes, qui tam nefaria perpetrassent, excommunicationis sententiam in hunc modum intorsit ¹ :

8. « Arnulphus gratia Dei archiepiscopus commonitorium prædonibus Rhemorum.

« Quid tibi vis, prædonum Rhemensium scelerata manus? Nihilne te movent pupilli et viduæ lacrymæ, nec advocatus eorum? Velis, nolis, ipse Dominus tuus, ipse testis est et iudex, et gravis ultor, cujus judicium non effugies. Vide quid ante oculos ipsius egeris : sanctam pudicitiam virginum non erubuisti, matronas etiam Barbaris verendas, nudas reliquisti, orphanum et pupillum non respexisti. Parum tibi hoc : accessisti ad templum Matris Dei cunctis mortalibus reverendum, ejus atrium perfregisti, polluisti, violasti : quod oculi ibi viderunt, concupivisti : quod manus attrectare potuerunt, rapuisti. Et nos quidem contra divinum et humanum jus misericordia abutentes, quod cibi et potus abstulisti non indulgemus, sed propter impia tempora non exigimus ; exigimus autem reliqua omnia, quæ pollutis manibus pervasisti ac retines. Redde ergo, aut sententiam damnationis in pervasores rerum Ecclesiasticarum a sacris canonibus promulgatam, eam in te latam multotiesque ferendam accipe ».

9. « Anathema in prædones.

« Auctoritate omnipotentis Dei Patris et Filii et Spiritus sancti, interveniente et adjuvante beata Maria semper Virgine, auctoritate quoque et potestate Apostolis tradita nobisque relicta, excommunicamus, anathematizamus, maledicimus, damnamus, et a liminibus sanctæ matris Ecclesiæ

¹ Petr. Dam. Ep. ad Nicol. papam de dimittendo episcopatu.

¹ Gerb. in Conc. Rhemens. c. 12.

separamus vos, Rhemensium prædonum auctores, factores, cooperatores, fautores, et a propriis dominis rerum suarum sub nomine emptionis abalienatores. Obtenebrescant oculi qui concupierunt, arescant manus quæ rapuerunt, debilitentur omnia membra quæ adjuverunt. Semper laboretis, nec requiem inveniatis, fructuque laboris vestri privemini : formidetis et paveatis a facie persequentis et non persequentis hostis, ut tabescendo deficiatis. Sit portio vestra cum Juda traditore Domini in terra mortis et tenebrarum, donec corda vestra ad plenam satisfactionem convertantur. Hic autem sit modus plenæ satisfactionis, ut omnia injuste ablata præter cibum et potum propriis dominis ex integro restituantis, coramque Rhemensi Ecclesia pœnitendo humiliemini, qui sanctam Rhemensem Ecclesiam reveriti non estis. Ne cessent a vobis maledictiones scelerum vestrorum persecutrices, quandiu permanebitis in peccato pervasionis. Amen. Fiat, fiat ». Illicusque sententia anathematis per Arnulphum illata, de qua Gerbertus¹ : « Post hæc Arnulphus suos prædones sub anathemate posuit, atque ut idem facerent, Galliarum episcopis imperavit » : quod et egregie præstiterunt collecti in unum in Synodo Silvanectensi.

10. Collectis igitur in unum episcopis, expositaque ob oculos omnium lugubri tragœdia Rhemensis cladis, paribus animis, zeto offensi numinis æstuantibus adversus eos, qui adeo nefaria perpetrasse ausi fuissent, oratione primum invectiva acriter agentes, eos demum sententia anathematis damnare. Recitata sunt ista omnia postea in Rhemensi Concilio, atque inde in suum commentarium a Gerberto² translata in hunc scilicet modum :

11. « Oratio invectiva episcoporum Rhemensis diœceseos vice decreti habita Silvanectis.

« Quousque se extendet effrenata licentia vestra, alterius proditores, Judæ satellites ? Ad quem finem progreditur incepta audacia vestri ducis, ducis dicimus Adalgeri presbyteri, qui nomen sacerdotalis dignitatis suo nomine polluit ? Te igitur interpellamus, funeste presbyter. Quid tibi visum est, post illa cruenta arma, quibus te Lauduni exercuisti, ut iterum vilis apostata factus, Arnulphum Rhemorum archiepiscopum traderes, cum ante, velut fidissimus custos, cubares, conviva assiduus esses, consilia disponderes, sacrosancta administrares ? Num rigorem Ecclesiasticæ severitatis, vel iudicium omnipotentis Dei effugere te putasti ? Urbis portas aperuisti, hostes introduxisti, venerabile templum Matris Dei, atque ipsis Barbaris reverendum, velut hostium castra oppugnasti. Nunc etiam vos, prædonum maxima portio, qui Ecclesiæ ingentibus beneficiis eratis obligati, qui dicitis : Hæreditate possideamus sanctuarium Dei : qui signa militaria loricati, galeati, cum scutis et

lanceis ante aram beatæ Dei Genitricis intulistis : qui pollutis manibus pastorem cum clero et populo inter sancta Sanctorum comprehendistis, custodiæ distribuistis, carceri mancipastis et adhuc retinetis. Num, inquam, vos divina jura effugietis ? Vos quoque, quorum dolo et fraude, consilio et auxilio tantum scelus factum est, cum his qui principes tanti facinoris fuerunt, consociandi estis, ut pœnam peccati simul feratis, qui causa peccati simul conspirastis, bonaque civium Rhemensium prædones impiissimi velut sub hasta distraxistis. Nec etiam vos abesse debetis, qui in Adalberonem Laudunensem episcopum non minus levia perfecistis. Et ut pullulantem hæresim rescindamus, quæ dictital, omnia licere Carolo, etiam in locis sacris : Rhemensem simul et Laudunensem Ecclesiam, utramque sacrilegio, quamvis dissimili, pollutam a sacris removemus officiis, donec legitime reconcilietur utraque. Et ne quis nos talibus monstris hominum favere, talibus negotiis assensum præbituros putet, sed pro fide qua vivimus, omnibus expositis periculis, sententiam nostram ita confirmamus, stabilimus, corroboramus.

12. « Anathema in eos.

« Auctoritate omnipotentis Dei Patris et Filii et Spiritus sancti, interveniente et adjuvante beata Maria semper Virgine cum omnibus sanctis ; auctoritate quoque et potestate Apostolis tradita, nobisque relicta, excommunicamus, anathematizamus, damnamus, et a liminibus sanctæ matris Ecclesiæ separamus Adalgerum presbyterum, diaboli membrum, episcopi, cleri et totius populi Rhemensis traditorem. Eos quoque qui hujus traditionis extiterunt inventores, auctores, factores, cooperatores, fautores, civiumque depopulatores, et a propriis dominis rerum suarum sub nomine emptionis abalienatores. Illis adjungimus Laudunensis episcopii pervasores, ac ipsius episcopi gravissimos tortores. Fiat sicut¹ Scriptura dicit : Qui dixerunt, hæreditate possideamus sanctuarium Dei, Deus meus, pone illos ut rotam, et sicut stipulam ante faciem venti. Sicut ignis qui comburit silvam, et sicut flamma comburens montes, ita persequeris illos in tempestate tua, et in ira tua turbabis eos. Imple facies eorum ignominia, et quærant nomen tuum, Domine ; erubescant et conturbentur in sæculum sæculi, et confundantur et pereant : et cognosceant, quia nomen tibi Dominus, tu solus altissimus in omni terra. Et quia pupillum et viduam non miserati sunt, neque templum Dei reveriti, dominiumque Ecclesiarum sibi usurparunt : fiant filii eorum orphani et uxores viduæ. Scrutetur fœnerator omnem substantiam eorum, et diripiant alieni labores illorum : nutantes transferantur filii eorum et mendicent, et ejiciantur de habitationibus suis. Fiant dies eorum pauci, et episcopatum principatumque eorum accipiat alius : et duplici contritione conterere eos, Domine Deus noster, nisi

¹ Gerb. Epist. ad Wilderod. episc. — ² Mem de Conc. Rhemens. c. 14.

¹ Psal. LXXXII.

resipiscant, et Ecclesiæ Catholicæ fructuosa pœnitentia satisfaciant. Amen. Fiat, fiat ».

43. Et plane factum est, quod diro anathemate imprecati sunt Patres. Siquidem anno sequenti captus est ab Hugone Carolus, et penitus ex stemmatis ejus rano cessavit regnum Francorum, tunc penitus excisum, cum (ut audisti nuper a Patribus) hæresis pullulare cœpit, qua dicerent Caroli studiosi, omnia licere Carolo etiam in Ecclesiis. Sicque eos usque sunt a Deo tolerata peccata regum illius stemmatis, quandiu ea peccata non sunt

defensa ul jure facta; uti vero cœperunt obstinate defendi, ut error sit repulata justitia, et inde hæresis oriri cœperit: tunc ira Dei effusa est super principes, et præcisum est regnum ab eo, et datum ipsius æmulo, et de Saul translatum in David. Videant ergo quam male consulant principibus novatores nostri temporis, hæretici, inquam, dicti politici, eadem quæ hoc tempore sunt cœpta doceri, penitus profitentes. Quæ autem hæc sint secula, dicemus anno sequenti.

Anno periodi Græco-Romanæ 6483. — Anno Æræ Hispan. 1028. — Anno Hegiræ 380, inchoato die 31 Martii, Fer. 4. — Jesu Christi 990.

— Joannis XV papæ 6. — Ottonis III reg. 8. Basil. et Const. iupp. 15.

1. *Opera Joannis XV pax inter regem Angliæ et ducem Normanniæ facta.* — A num. 1 ad 4. Incluta erat per hæc tempora virtus *Leonis episcopi*, qui Egberti archiepiscopi Trevirensis vicarius, Apostolicæ Sedis apocrisiarius creatus est. Quippe *Joannes papa*, oborta inter Angliæ regem *Ethelredum*, et Richardum Normannorum ducem controversia, *Leonem* in insulam Britannia legatum de pace misit, ejusque solertia optatæ pacis fructum retulit. Refert Malmesburiensis lib. 2 de Reg. cap. 10, Epistolæ Joannis exemplar, cui *Leonis* inscripta memoria, quem ipsemet Malmesburiensis episcopum Trevirensis perperam nuncupat; ipse enim Pontifex profitetur, accersitum a se apocrisarium suum *Leonem*, *vice episcopum sanctæ Trevirensis Ecclesiæ*, eumque cum exhortatoriis ex Urbe magnis viarum intervallis missum ad oram maritimam, in die Nativitatis Domini pervenisse ante spectum regis præfati, consilioque cum rege habito de pace, legatos ex Anglia datos, trajecisse in Galliam, et pervenisse Rothomagum usque ad Richardum marchionem, ita Normanniæ ducem Pontifex appellat, ac denique Rothomagi Ethelredum inter et Richardum pacem sanxisse, « kalend. Martii, anno ab Incarnat. Domini MDCXCI, Indict. IV ».

2. *S. Adalbertus episc. Pragensis fit monachus.* — Ad num. 4. Sanctus Adalbertus, relicto episcopatu Pragensi, hoc anno Romam venit, ibique monachum induit in monasterio SS. Bonifacii et Alexii, ubi quinquennio mansit, nempe usque ad annum MDCXCIV, ut anno superiori ostendimus. Verum Baronius, qui quinquennium hoc ab anno MCDLXXXIII auspiciatur, et illud anno superiori ab-

solvit, hoc anno scribit: « Monasterium, ubi quinquennio manserat, iterum adiit: ibique totidem annos explevit », licet secundus auctor Vitæ sancti Adalberti, qui solus de quinquennio monachus sancti hujus anlistitis verba facit, unci quinquennii mentionem faciat, ideoque ostendat, Adalbertum nonnisi præsentis anno ad monasterium SS. Bonifacii et Alexii venisse, et monachum induisse. Quæ narrat itaque hoc anno Baronius gesta fuisse Romæ ab Adalberto jam monacho, ad hunc annum reapse pertinent. Præterea ad hunc etiam annum revocanda quæ ipse existimavit contigisse priori quinquennio; cum illud fictitium sit, et hujus sancti antistitis Actis adversetur, ex quibus constat, eum usque ad præsentem annum Ecclesiam Pragensem rexisse, et primum Romam venisse.

3. *Leo ex-abbas Nonantulanus cum Leone abbate Bonifaciano non confundendus.* — Ad num. 5 et seq. Florebant hoc tempore Romæ in monasterio sanctorum Bonifacii et Alexii, in quo sanctus Adalbertus monachus factus est, Leo abbas ejusdem monasterii, qui anno MDCXCV tanquam legatus Joannis papæ XV præfuit Conciliis Moscomensi et Rhemensis adversus Gerbertum celebratis, et alter Leo, qui post peregrinationem Hierosolymitanam Nonantulani monasterii abbatiam abdicarat, « et deinde apud sanctum Bonifacium intra Romana mœnia perseverans, ex omni quod sibi vitæ hujus residuum fuit, nihil aliud, quam æternæ vitæ sibi stipendia procuravit », inquit Petrus Damiani in Epistola ad Nicolaum papam II, cap. 11, cujus locum integrum recitat Baronius, qui tamen, ut recte observavit Mabillonius Sæc. V Benedict. in Elogio Leonis abbatis Nonantulani, utrumque

Leonem in unum confundit; quæ enim Petrus Damiani narrat, nonnisi de *Leone exabbate* intelligi possunt, cum *Leonem* ob abdicatum munus abbatis et initam privatæ vitæ rationem laudibus efferat, quod de Leone abbate monasterii Bonifaciani, et postea Summi Pontificis legato Petrus Damiani non dixisset. Præterea auctor anonymus posterioris Vitæ sancti Adalberti episcopi Pragensis eos enumerans, qui in monasterio Bonifaciano Leonis abbatis congressum expetebant, ait: « Hoc Gregorius abbas, hoc erat pater Nilus, hoc Joannes bonus infirmus, etc. hoc simplex Leo, Psalmorum amicus et semper prædicare paratus ». Hunc vero ultimum Leonem pro loci abbate male etiam usurpat Baronius, ut advertit Mabillonius, quia iste anonymus non ipsum, sed convenientes ad abbatem enumerat, et inter eos nonnisi Gregorio *abbatis* nomen tribuit; quod etiam Leoni ultimo loco memorato non negasset, si tum quoque hæc dignitate præditus fuisset. Est itaque simplex ille Leo *Psalmorum amicus*, Leo exabbas Nonantulanus, non vero Leo abbas monasterii Bonifaciani, qui longe alia, quam *simplicitatis* et Psalmorum amoris opinione inclaruit.

4. *Arnulphus filius Lotharii regis deficit ab Hugone rege.* — Ad num. 7 et seqq. Cum *Arnulphus* Lotharii quondam Francorum regis filius spurius et Caroli Lotharingi nepos eveetus fuisset ad archiepiscopatum Rhemensem anno dcdlxxxviii, ita volente et annulente *Hugone* rege, ut eum sibi demeretur et a *Carolo* averteret, postquam *menses sex* archiepiscopatum illum rexit, *Carolus* civitate Rhemensi et pluribus oppidis potitus est, ipseque *Arnulphus* cum *Carolo* anno superiori arma sociavit. Quare hoc Christi anno *Hugo* rex et Rhemensis dioceseos suffraganei ad Joannem papam contra *Arnulphum* legatos misere, eumque infidelitatis et insignis prodicionis reum fecere, postulantes ut sibi liceret ei archiepiscopatum abrogare: non tantum quia *Carolo* urbem tradiderat contra fidei sacramentum; sed etiam quod contra jus gentium et captivitatis, in qua ipse videri volebat detineri, sub signis Caroli milites collegisset, et vocatus ab episcopis venire contempsisset, ut patet ex litteris ipsius Hugonis regis et episcoporum ad Joannem XV, quas Baronius anno dcdxci, a num. 2 ad 3, loco scilicet non suo, recitat; ad annum enim superiorem exeuntem revocandæ. Gerbertus quippe in Oratione quam habuit in Concilio Mosomensi anno dcdxcv ait: « Certe nihil actum vel agendum fuit, quod Apostolicæ Sedi relatum non fuerit: ejusdem per decem et octo menses expectata sententia », nempe usque ad diem xvii Junii anni dcdxci, quo *Arnulphus* in Concilio Rhemensi depositus est, a quo die si per decem et octo menses retrocedas, pervenies ad medium circiter Decembrem anni dcdlxxxix, quo ideo litteræ Hugonis regis et episcoporum datæ sunt.

5. *Synodus Silvanectensis.* — Episcopi jam

anno dcdlxxxviii, ut ibidem retulimus, Synodum *Silvanecti* habuerant, *Adalgerum* presbyterum proditorem citaverant, atque in eum et alios prodicionis reos anathema dixerant, simulque in pervasores Rhemensis et Laudunensis diocesis. Ad eam quoque videtur citatus fuisse *Arnulfus*: sed, seu quia sese captivum fingeat, seu quia judicium episcoporum reformidabat, conventui non adfuit. Synodum quidem Silvanectensem Baronius hoc anno recitat, sed ex antecedentibus et consequentibus apparet, eam ad annum nongentesimum octogesimum octavum, ut ibidem insinuavimus, retrahendam esse.

6. *Carolus Lotharingus in potestatem Hugonis regis venit.* — Hoc vero anno *Arnulphus* post menses xviii, ut anno sequenti num. 4 videbitur, Hugoni regi reconciliatus, imo *regiæ mensæ particeps factus*, fidem sefellit, et *Guidonem* Suessionum episcopum, qui eum medio inter Suessiones et Laudunum intervallo *apud Cavinionem convenerat* ludificatus, eundem Hugonem regem et provincie Rhemensis episcopos ad *causam* Romanam Julio mense per legatos *perferendam* compulit; quod tamen, contra facientibus Heriberti comitis ac patris Agnetis Caroli ducis uxoris legatis, frustra fuit. Præterea, ut habet Nangius hoc anno in Continuatione Flodoardi, « Hugo rex Francorum, collecto exercitu valde copioso, Laudunum urbem, ubi manebat Carolus dux Lotharingie eum uxore sua filia Herberti comitis Trecurum, obsidere decrevit. Sed cernens quod civitas vi assaultum inexpugnabilis esset, consilium habuit cum Anselino (Adalberone etiam appellato) traditore vetulo Laudunensium episcopo, qui erat consiliarius Caroli principalis. Is enim Anselinus episcopus nocte quadam cunctis quiescentibus, Hugoni regi portas aperuit: et tunc captus et vinctus Carolus cum uxore sua positus fuit a rege Hugone Aurelianis in carcere, ubi et tandem mortuus est ». Ademarum in Chron. ait, *hebdomada ante Pascha* Carolum ab Anselino episc. proditum, sed annum non determinat. Verum Carolus anno tantum sequenti captus, et urbs Laudunensis expugnata ab Hugone rege, ut infra videbimus. Quare Nangius hæc uno tenore narravit, vel forte hallucinatus est. Sed redeo ad Ademarum.

7. *Moritur in carcere, et liberos relinquit.* — *Ademarum* monachus S. Eparchii Engolismensis, auctor coelaneus, in suo Chronico tom. II Biblioth. Labbei relato, qui magnam fidem hæc in re meretur, subdit: « Carolus in carcere usque ad mortem retentus est Aurelianis, ubi genuit filios Carolum et Ludovicum et expulsi sunt filii ejus a Francis, profectique ad imp. Romanorum habitaverunt cum eo. Sane dux Aquitanorum Willelmus reprobans nequitiam Francorum, Hugoni subditus esse noluit, unde factum est ut Hugo, exercitu Francorum admoto, urbem Pictavis obsidione fatigaret, etc. pacem postmodum Willelmus cum Hugone et Rotberto filio ejus fecit, et rex Hugo co-

gitans erga se Dei gratiam, quasi vicem rependens, defensor elementissimus Ecclesiæ Dei extitit. Nam ob hanc causam creditur progenies Caroli reprobata, quia jamdiu negligens Dei gratiam, et Ecclesiarum potius neglectrix, quam auctrix videbatur ». Filios tamen Caroli ducis, non simul ac abdicatus est pater, sed post annos circiter xx, cum infelicium partium Guillelmum ducem tædere cœpisset, Heribertusque Trecentium comes maternus avus, qui Arnulphi archiepiscopi Rhemensis patrocinium palam susceperat, vivere desiisset, expulsos fateri necesse est, inquit Blondellus in Pleniori Assertionem Genealogiæ Franciæ pag. 37. Cum enim ex

sancti Petri Uzarchiensis in Lemovicibus ad Guillelmi Hugonis regis rebellis ditionem pertinentibus Chartulario, Ludovicum et Carolum anno mvm, quo jam Otto dux eorum frater natu major decesserat, regium nomen affectasse constet, utrumque ad illa usque tempora sub Guillelmi auspiciis de regno cum Roberto rege contendisse oportet. Hac enim nota Charta consignata reperitur : « Actum anno Incarnat. Domini mvm, regnante Roberto, et Ludovico et Carolino ». Duravit illa stirps Carolina usque ad annum mxcxlviii in posteris Ludovici, qui Ottonis ex alia matre frater fuit, et Thuringiæ landgraviorum parens.

JOANNIS XV ANNUS 7. — CHRISTI 991.

1. *Contra Arnulphum Rhemensem episcopum agunt per legationes rex et episcopi cum Romano Pontifice : ubi de Gerberti malis artibus.* — Sequitur annus Redemptoris nongentesimus nonagesimus primus, Indictione quarta, quo increbescente adversus Arnulphum Rhemensem archiepiscopum sparso rumore de prodicione Rhemensis civitatis, Hugo rex eum subijcere synodali iudicio cogitavit. Reluctabatur ipse audiri ab aliis quam a Romano Pontifice, quem solum sciret habere superiorem, apud ipsum vero experiri paratum. Quod autem id quod justissimum esset negari non posset, adversus eum scribuntur litteræ ad Joannem Romanum Pontificem tum ab Hugone rege, tum ab episcopis Rhemensis provinciæ; ab iisdemque duæ ad eundem legationes decernuntur; ita tamen, ut specie tenus rem agerent, cum omnibus illis in proposito esset, eandem causam tractari inter episcopos Rhemensis provinciæ et aliarum Ecclesiarum Galliæ sacerdotes : quod exitus declaravit, ut inferius dicturi sumus. Præcessit autem pro Arnulpho Heribertus comes ad eundem Joannem Pontificem legatus. Hæc autem omnia hujus anni exordio facta esse, Gerbertus ¹ qui interfuit, docet, dum decem et octo menses tradit intercessisse ab eo tempore usque ad Synodum Rhemensem habitam anno sequenti, mense Junii. Porro regis ad Joannem papam Epistola sic se habet ² :

2. « Bealissimo papæ Joanni, Hugo gratia Dei Francorum rex.

« Novis atque inusitatis rebus summo studio summaque cura vestra consilia expetenda decrevimus. Quippe cum sciamus, vos omne tempus in humanis ac divinis studiis exegisse. Considerate ergo quæ sunt facta, et facienda præscribite, ut et sacris legibus suis honor reddatur, et regalis potestas non annuletur. Arnulphus regis Lotharii (ut dicunt) filius post graves inimicitias ac scelera, quæ in regnum nostrum exercuit, loco parentis adoptatus est a nobis, ac metropoli Rhemorum gratis donatus, iusjurandum præbuit, quod contra præterita et futura valeret sacramenta; libellum fidelitatis sub nomine chirographi conscripsit, recitavit, corroboravit, corroborarique fecit : milites ac omnes eives jurare coegit, ut in nostra persistere fide, si ipse aliquando in potestatem hostium deveniret. Contra hæc omnia (ut certissimi testes sunt) ipse portas hostibus patefecit; clerum ac populum suæ fidei creditum captivitati, et prædæ distribuit. Sed esto, enim esse addictum alienæ potestati (ut ipse videri vult); cur eives et milites pejorare coegit? Cur arma contra nos comparat? Cur urbem et castra contra nos munit? Si captus est, cur non patitur liberari? Si vi hostium oppressus, quare non vult sibi subveniri? et si liberatus est, cur ad nos non redit? Vocatur ad palatium, et venire contemnit. Invitatur ab archiepiscopis : nihil se eis debere respondet. Ergo qui vices Apostolo-

¹ Gerb. de Conc. Rhem. et Ep. ad Wilderodum. — ² Ibid. c. 25.

rum tenetis : statuite, quid de altero Juda fieri debeat, ne nomen Dei per nos blasphemetur, et ne forte justo dolore permoti, ac vestra taciturnitate urbis (Rhemensis scilicet) excidium totiusque provinciae moliamur incendium; nec Judici Deo excusationem prætendetis, si nobis quærentibus atque rogantibus formam iudicii dare nolueritis ». Hæc ad Joannem Romanum Pontificem Hugo rex Francorum, qui et commovit adversus eundem Arnulphum Rhemensem archiepiscopum, omnes comprovinciales episcopos, ut contra eum litteras scriberent ad eundem Joannem papam, quem rogarent, ut ipsum Arnulphum episcopatu privaret, et alium in locum ipsius subrogaret. Ipsæ autem litteræ sic se habent ¹ :

3. « Domino ac reverendissimo papæ Joanni, episcopi Rhemorum diœceseos.

« Non sumus nescii, beatissime pater, jamdudum oportuisse nos expetere consulta S. R. E. pro ruina atque occasu sacerdotalis ordinis; sed multitudine tyrannorum pressi, longitudine terrarum semoti, desideria nostra bactenus implere nequivimus. Nunc itaque vestro examini non sine magno dolore perferimus novum atque inusitatum crimen Arnulphi Rhemorum archiepiscopi, qui famosus apostata factus, locum Judæ traditoris olim in Ecclesia tenet. Qui filius quondam Ecclesiæ Laudunensis, cum episcopum suum dolo et fraude ceperit, Ecclesiam ejus pervaserit, ad cumulum suæ damnationis Rhemensem sibi creditam cum clero et populo captivavit. Nec movet eum nostra vocatio, vel potius saluberrima exhortatio, non archiepiscoporum comprovincialium multoties repetita canonice facta coram Deo et angelis ejus professio, non chirographi in conspectu Ecclesiæ recitata descriptio, non numerosa sacramenta miris excoGITATA consiliis. Stant suo vitio quamplures Ecclesiæ pastoribus viduatae. Pereunt innumerabiles populi sine sacerdotali benedictione et confirmatione. Ipse factione tyrannica, divina humanaque jura contemnens, tyrannidem exercet, regibus nostris, Hugoni videlicet et Roberto ejus filio, a quibus tantam gloriam gratis consecutus est, interitum meditatur.

4. « Ergo tandem ad monstra perditissimi hominis expegefacti, ivimus in sententiam Domini dicentis ² : Si peccaverit in te frater tuus : vade et corripe eum inter te et ipsum solum. Si te audierit, lucratus eris fratrem tuum : si autem te non audierit, adhibe tecum adhuc unum vel duos, ut in ore testium duorum, vel trium stet omne verbum. Quod si non audierit eos, dic Ecclesiæ ; si autem Ecclesiam non audierit, sit tibi sicut ethnicus et publicanus. Adesto, pater, ruenti Ecclesiæ, et sententiam ex sacris canonibus promulgatam, vel potius ab ipsa veritate prolata profer in reum. Sentiamus in vobis alterum Petrum defensorem et corroboratorem Christianæ fidei. Ferat sancta Ro-

mana Ecclesia sententiam damnationis in reum, quem universalis damnat Ecclesia. Suffragetur nobis vestra auctoritas, et in hujus apostatæ dejectione, et in ejus qui domui Dei præesse possit archiepiscopi nova ordinatione, simulque invocatis episcopis nostris fratribus, necessaria promotione : ut sciamus et intelligamus, cur inter cæteros Apostolatum vestrum præferre debeamus ». Hucusque ad Joannem Pontificem episcopi Rhemensis provinciae. Sicque duæ legationes, a rege una, allera vero ab episcopis, tunc simul eadem ex causa missæ sunt Romam.

5. At sicut adversus Arnulphum ab Hugone rege et episcopis (ut vidisti) missæ sunt Romam litteræ : ita e contra pro Arnulpho ab Heriberto comite (hic erat socer ¹ Caroli regis Francorum) missi sunt legati ad eundem Pontificem. Si in causa propria credendum est Gerberto de Actis, quæ scripsit Rhemensis Concilii, cum ait ² de his duabus legationibus Romam ad Joannem Pontificem missis, tradit pervenisse legatos Heriberti comitis, eosdemque muneribus præoccupasse Joannem Romanum Pontificem. Ita quidem ipse, qui ejusdem Pontificis auctoritate jussus ab occupata a se Rhemensi sede ignominiose deponi, in eundem commotus, nihil remisit injuriarum; et non ob aliam causam post suam degradationem ejusdem argumenti diversa scriptorum genera elaboravit atque edidit, quam ut in eundem Romanum Pontificem, ipsamque Apostolicam Sedem contumeliarum plaustra componeret.

6. Ille qui monachus quondam Auriacensis cœnobii, liberalibus artibus potius, quam theologicis litteris excultus, sub specie instituendi filium Hugonis regis Robertum, cum monasterio monasticam quoque verecundiam missam fecit, curialis inter curiales (secundum illud propheticum ³ : Conversati sunt inter gentes, et didicerunt opera eorum) sic profiteri cœpit, ut garrulitate, dicacitate, oblocutione, detractatione, adulatione, animi duplicitate ad simulandum atque fallendum summa dexteritate compositus omnes facile antecelleret, prout quæ inferius non aliunde, quam ex ejus scriptis intelliges, fidem sicut apertissimam, ita et certissimam faciunt : cum alioqui ab hujus temporis scriptoribus non ab his diversis coloribus representetur, cum hominem ingenio acerrimum, in suis ad altiora progressibus valde providum (ut docuerunt eventa) fuisse demonstrent, dum homo ignobilis, ut ⁴ Glaber testatur, primo ad regiam aulam, inde ad Rhemensem archiepiscopatum sibi aditum præparavit, postea ad Ravennatis Ecclesiæ præsulatum aperuit viam : atque demum ut imperatoria manu ad Apostolicam Sedem, cæteris eminentiorem Petri thronum extolleretur, præparavit tanquam summus summæ gloriæ suæ artifex et architectus idonea ad id perficiendum instru-

¹ Gerbert. de Conc. Rhem. cap. 26. — ² Matth. XVIII.

³ Aim. I. v. c. 44. in fin. — ⁴ Gerb. de Conc. Rhemens. c. 27. — ⁵ Psal. CV. — ⁶ Glab. I. I. c. 4.

menta, composita inventione dædalica, quamvis plerique dixerint, diabolica, nempe vetita magia, quæ per dæmonum invocationem perfici consuevit.

7. Verum non sic comparati sumus, ut quæcumque de malo homine scripta feruntur, absque disquisitione diligenter exhibita admittamus, sed illa duntaxat, quæ veris certisque testificationibus proferantur. Imo (quod tu mireris) cum de isto agemus Romanæ Ecclesiæ perduelli, non alterius cujusque magis quam sui ipsius, ad significandum qualis fuerit, scriptis utemur; ut ipsius calamitas sit penicillus, quo ejus naturalis effigies efformata, qualis ipse fuerit, tanquam in tabula expressus picturæ vultus, omnibus innotescat.

8. Extant siquidem ejusdem Gerberti eadem scriptorum monumenta, ab ipso in hac causa Arnulphi, multiplici genere edita, sed uno argumento, non tam historico more, quam (ut ipse profitetur) rhetorico, dum versatur totus in acerrimis invectivis, tuncque temporis ab eo concinnata, cum exæstualet vehementi iræ calore, quod ipso ab adepta malis artibus sede rejecto, in eam a Joanne summo Pontifice Arnulphus fuerat restitutus. Porro istiusmodi scripta Gerberti, tanquam ingens thesaurus inventus, a novatoribus in odium Romanæ Ecclesiæ sunt in lucem prodita, duplicique editione vulgata, altera¹ cum aliis intextis blasphemis et annexis mendaciis, altera seorsum anno superiori millesimo sexcentesimo Francofurti apud hæredes Andreæ Wechelii hoc titulo cusa :

9. « Synodus Ecclesiæ Gallicanæ habita Durōcortori Rhemorum sub Hugone A. et Roberto Francorum rege cum Apologia ejusdem Synodi scripta a Gerberto tum quidem archiepiscopo Rhemensi, postea Romano Pontifice, ex vetusto Codice Miriacensis quondam monasterii ». At si a titulo incipias controversiam, plane consenties in eo magnopere erratum esse, cum non Synodus, sed Pseudo-Synodus dicenda fuisset. Quomodo enim nominanda Synodus illa, quam in posteriori Concilio legitime congregato, cui cum Gallicanis episcopis legato interfuit Apostolica, abrogatam fuisse constat, nemine discrepante, nisi misero Gerberto, qui in ea depositus fuit, consentientibus cum episcopis ipsis etiam Francorum regibus Hugone atque Roberto, recipientibus iisdem restitutum Arnulphum? Sed de his fusius suo loco agendum erit inferius: modo autem rerum gestarum inchoatam historiam prosequamur, quæ prodantur ab eodem ipso Gerberto in Romanam Ecclesiam, a qua sede privatus fuerat, tunc infensissimo, cui nonnisi eadem quæ hosti fides debeat adhiberi. Cum enim de legationibus his hoc anno Romam contra Arnulphum missis agit, hæc ait² : « Legatos tantum scripta porrexisse Romano Pontifici, primoque se blande acceptos esse. Postea vero quam Heriberti comitis legati equam corpore præstantem, niveo colore insignem cum aliis muneribus Pontifici obtulerunt, se per triduum

ante januas palatii defatigatos, nec admissos, infecto negotio rediisse ». O longanimes legatos, qui expectatione trium dierum fessi, ulterius expectare noluerunt in tanta undique ex toto Christiano orbe cum multiplicibus negotiis adventantium, velut imbre, frequentia! Pergit Gerbertus, alio ex capite notam inurere Ecclesiæ Romanæ laborans :

10. « Adstipulantur, inquit, etiam huic rationi, de causa scilicet, cur re infecta legati inauditi recesserint, Brunonis episcopi præsentis clerici, qui se pro ejus captione Romanum Pontificem adisse dicebant, a quo maledicta in reos, nempe anathema ex auctoritate Apostolica expeterent : cujus ministri summam solidorum decem dari censebant. Quibus derisis, eo quod si pecunia redimi posset, nec mille talenta moras inferrent : hoc tandem in responsis ab ipso Pontifice acceperunt, ut is pro quo captus esset, bene illi prospiceret ». Hæc Gerbertus, plane significans, pecuniam a ministris petitam, non a Pontifice acceptam, qui alia via captivo episcopo consulendum esse respondit, non excommunicatione quam venerant accepturi. Inferius vero ipsius etiam Gerberti testificatione probatur, ejusmodi exactionem fieri solitam a Crescentio tyranno ipsam Urbem, atque cum ea Pontificem occupante.

11. Sed antequam ulterius progrediamur, detegam opus est, adversariorum in depositione Arnulphi Rhemensis archiepiscopi vafrum consilium, quod ex iisdem Actis accurate pervesligatis detegitur; illud nimirum, quod cum rex ipse Hugo nihil magis optaret, quam eundem Arnulphum e throno deponere, in ordinemque redigere, et ad hoc plurimum sibi faventium induxisset episcopos : cum id perficere ipsis nullo modo daretur, Sede Apostolica inconsulta, penes quam essent judicia episcoporum et archiepiscoporum deferenda, omnesque majores causas spectare scirent ad ipsum Romanum Pontificem, cumque vererentur ob iniquam quam agerent causam, ipsum Rom. Pontificem adversantem se fore passuros : illud quod audisti sunt meditati perficere, nempe cum quod juberent leges Ecclesiasticæ de adeundo Romano Pontifice, ipsi videri volebant explesse; quod tamen minus perfici vellent, pro excusatione tantummodo ipsis esse deberet; sicque ipsis legalis dederint in mandatis, ut redditis litteris Apostolico, post triduum ab Urbe, re infecta recederent, unde ipsi ansam arriperent, ut Arnulphi causam tractarent et judicarent, eo quod Apostolica Sedes duplici legatione conventa, inauditos sivisset abire legatos; satis sufficere existimantes, eo modo Sedem Apostolicam pro Arnulphi causa interpellasse. Id autem illis fuisse in consilio, hocque meditato esse, declararunt eventa, cum in ipsis Actis nihil frequentius inculcarint et vehementius exaggerarint, quam quod jure agerent in Arnulphum, cum de ipso consultus Romanus Pontifex, rem silentio præterire voluisset, nec refragatus vel in minimo esset, sicque ex eo silentio intelligi debere, judicandi fa-

¹ Cent. x. cap. 9. col. 457. — ² Gerb. de Synod. Rhem. c. 27.

cultatem in Francorum episcopos devolutam. Qui eo modo iudicium inchoantes, eundem Arnulphum vocarunt ad Synodum, ubi reus assisteret iudicandus. Cum vero ipse Arnulphus existeret apud Carolum, excusaretque se ab illo haberi captivum, nec alio proficiscendi posse impetrare licentiam: tunc Hugo rex Francorum illud omni studio agere cepit, ut Arnulphum vi captum constitueret in Synodo condemnandum, quod ex sententia evenit; factumque id anno sequenti, ut suo loco dicturi sumus. Hæc satis de ejusmodi controversia in his, quæ ad anni hujus res gestas spectare noscuntur, reliqua suo loco anno sequenti dicturi sumus.

12. *Dux Polonorum per uxorem ad Christum conversus.* — Hoc ipso anno, qui numeratur Ottonis regni octavus, moritur Miseco, alias dictus Miesco, primus dux Polonorum Christianus. Ditmarus enim hujus temporis auctor id testatur, et quomodo per conjugem ad fidem Christi sit perductus describit; primumque narrat ipsum uxorem accepisse sororem Boleslai ducis Bohemiæ, feminam Christianam, Dabravam (Dobberam) nomine dictam (quæ vox Sclavonica interpretatur latine Bona); quomodo autem per mulierem fidelem conversus est vir infidelis, ita describit¹: « Hæc, inquit, Christo fidelis dum conjugem suum gentilitatis errore detentum sedula revolvit angustæ mentis deliberatione, qualiter hunc sibi sociaret in fide, ei omnimode placere ostendit, non propter triformem mundi hujus noceivi appetitum, quin potius propter futuræ mercedis laudabilem, ac universitati fidelium nimis desiderabilem fructum, qui conjunctionem prædictam proxime sequebatur.

13. « Hæc sponte sua fecit ad tempus male, ut postea diu operari valuisset bene. Nam in Quadragesima, cum ex se abstinentia carnis et afflictione corporis sui decimationem Domino acceptam offerre conaretur, dulei promissione a viro suimet propositum frangere rogatur. Illa autem ea ratione consentit, ut alia vice ab eodem exaudiri facilius potuisset. Quidam dicunt eam in una carnem manducasse Quadragesima, alii vero tres. Audisti, lector, delictum ejus, modo considera fructum elegantem piæ voluntatis illius: laboravit enim pro conversione conjugis sui, ac exaudita est a benignitate Conditoris sui, cujus infinita bonitate persecutor suimet studiosius resipuit, cum crebro dilectæ uxoris hortatu innatæ infidelitatis toxicum evomuit, et in sacro baptismo nævum originale deterisit. Et protinus caput suum et senioremi dilectum membra populi hactenus debilia subsequuntur, et nuptiali veste recepta, inter cæteros Christianos adoptivos numerantur. Jordan primus eorum antistes multum cum eis sudavit, dum eos ad supernæ cultum vineæ sedulo, vel verbo vel opere invitavit. Tunc gratulabantur legitime conjugati, prædictus mas et nobilis femina, illisque

subdita omnis familia gaudebat se in Christo nupsisse. Post hæc peperit bona mater longe sibi degenerem filium, multarumque perniciem genitricum, quem nomine fratris sui Boleslaum appellavit». Hæc omnia Ditmarus, subditque de ejusdem obitu piæ feminae; post quam idem dux junxit sibi monialem, Odam nomine, ex qua tres filios generasse tradit, ita rudis in fide, æque opere incultus adhuc permanens inconcessa tentavit, quem defunctum hoc anno (ut dictum est) tradit octavo tertii Ottonis regnantis.

14. *Capuæ principatum filii Pandulphi amittunt.* — Hoc anno defuncta Aloara (Aruara) Pandulphi Capuani principis relicta vidua uxore, deficit ex ea stirpe Capuæ principatus, Deo justum sanguinem ulciscente, sicut sanctus Nilus illi prædixerat. Hæc autem memoriæ digna ut exacte noscantur, sciendum est ex Leonis¹ Ostiensis testificatione, ipsum Pandulphum principem occisum esse in clade illa postrema Ottonis secundi imperatoris, cujus munificentia datus est principatus tam uxori Aloaræ, quam duobus ejus filiis. Tenuit vero ipsa annos octo, quem accepit principatum anno Redemptoris nongentesimo octuagesimo tertio. Quomodo vero crudelis femina propagare satagens principatum in filios, et ipsum perdidit principatum atque filios, in Vita sanctissimi Nili ab ejus conscripta discipulo enarratur his verbis:

15. « Mortuo prædicto Pandulpho, qui erat princeps Capuæ, ejus uxor Aloara dicta, non secus ac si maritus viveret, universæ illi regioni præerat et dominabatur. Hæc dominii zelo, vel potius satanica invidia occupata instigat duos filios suos qui remanserant, ut interficerent unum ex comitibus nepotem illius existentem quasi potentia præstantem et ab omnibus honoratum. Quod illi effecerunt: ipsa enim illius consanguinea cum illum allocutura ad se vocasset, et ipse absque malitia ad eam intrasset, occasionem opportunam ejus rei nacti ejus filii prosilierunt in ipsum, et gladio interfecerunt. Horum mater pœnitentiam simulando, accersit supplex B. Nilum ad se tanquam acceptura ab eo peccati dignam pœnitentiam. Beatus vero Nilus ejus precibus annuens, cum ad civitatem venisset, currebant omnes ad vias publicas, ut viderent reverendum ejus adspectum, et obtinerent ejus benedictionem. In quibus diaconissa quædam monasterii præposita cum sno sacerdote juvene existenle et ætate florente ac robusta, cum collegisset etiam alias virgines suas, quibus ipsa præerat, exiit ut obviam iret beato Nilo. Ille vero cum prophetico spiritu conspexisset eorum gesta, occursum ipsarum non curavit, sed potius ut gladius ignitus austeram voce et terribili vultu seipsis objecit, inquit: Quid vobis et juveni isti, ut vos quæ videmini virgines, cum ipso simul habitetis? An ignoratis quod hic est vir, et ipse ignorat quod vos estis mulieres? Si Deum non timetis, homines cur

¹ Dilm. l. iv. Chron.

¹ Leo Ost. l. ii. c. 9 et 15.

non reveremini? Revera in vobis non video justitiæ fructum. Illis illæ auditis, cum oporteret vereri et horrere beati Nili ingenuitatem, recesserunt dicentes: Non est hic servus Dei, sed diabolus. Et statim sequenti die inventus fuit presbyter ille cubans cum diaconissa illa sua consanguinea, et hoc auditum est per universam civitatem illam.

16. « Venit itaque beatus Nilus ad palatium Aloaræ. Quæ cum illum vidisset, tremens facta, procidit ad pedes ejus, errorem suum confitendo, ut veniam obtineret. Ille vero cum ipsam sublevasset: Ne facias hoc, dixit, quoniam ego etiam homo sum peccator, nec habeo facultatem ligandi et solvendi: vade ad episcopos, qui hæc judicare possint, et quodcumque tibi dixerint illi, facito. Illa vero respondit: Episcopis peccatum meum confessa sum, et illi præceperunt mihi, ut psalterium legerem ter in hebdomada, et eleemosynas facerem indigentibus. Precor etiam sanctitatem tuam, serve Dei, ut a te audiam, quod utile est, et veniam oblineam peccati mei. Beatus Nilus respondit: Psalterium percurrere, et dare eleemosynam, tibi et indigentibus utilitatem affert; illi vero, qui occisus est, salutem non confert, neque mœrorem eorum, qui plorant interitum ejus, solvet: quidenim tantum das, quantum offendisti? Si vero omnino vulneris etiam a me humili consilium accipere, et facere voluntatem Dei: ecce dico tibi: Trade unum ex filiis tuis propinquis defuncti, ut de eo faciant quodcumque voluerint: et ita a peccatis eris absoluta. Dixit enim Deus, quod ex manu hominis fratris ejus requiram animam, ipsius videlicet hominis. Et ¹: Quicumque fuderit sanguinem hominis, pro illius sanguine sanguis ipsius fundetur. Et iterum ²: Quicumque gladium apprehenderit, gladio morietur. Non enim tu es impotentiôr Saul rege, nec judice Jephthe, qui propria voluntate filios suos morti tradiderunt ». Hæc sanctus ille prophetico afflatus spiritu (ut patefecit eventus) bene consuluit feminæ illi, præstare nimirum alterum filiorum adversariorum manu necari,

quam fratris, ut accidit. Ad quæ illa respondit: « Non possum hoc facere, vereor enim ne aliquo pacto ipsum occidant. Tunc beatus Nilus zelo divino plenus respondit: Hoc dicit Spiritus sanctus: Sanguis filii tui effundetur pro illo sanguine, quem tu injuste effudisti, et peccatum hoc non delebitur e domo tua in sæculum: nec ullus amplius ex semine tuo imperabit huic civitati. Sed ejicietur et conculecabitur ab hostibus suis, eo quod confisa es potentiæ tuæ, et non didicisti, quod Dominus pauperes facit et ditat, humiliat et subleval.

17. « Quibus illa auditis cœpit flere et lamentari, et cum impleisset manus suas auro, offerebat illud beato Nilo, putans se illum ita placaturam. Ille vero ab omni affectu alienus revera, neque lacrymis mulieris fractus, neque captus auri copia, neque potentiam ejus veritus, cum dirupisset cubiculi velum, ut cervus prosiliens, abiit, hoc secum cogitans (ut ipse dixit) quod diabolus ita affirmavit: Isle monachus pulvis est, irrigabo illum aqua lacrymarum mulieris, et jam efficiam ipsum lutum, ut eum effingere et formare possim ut volo. Et hoc pacto Nilus opere perficiebat illud ¹: Estote prudentes sicut serpentes, et simplices sicut columbæ. Similiter implens Apostolicum præceptum, quod ait ²: Ne communices peccatis alienis. Et tunc beatus Nilus secessit in monasterium suum. Nec multum temporis intercessit, et ejus prædictio effectum est consecuta: filius enim junior prædictæ Aloaræ principatus zelo majorem fratrem in Ecclesia orantem gladio interfecit. Ille vero e contra a rege Francorum hac de causa vincetus agebatur. Et tandem brevi tempore tota illorum superbia defecit, et eorum potentia periit ». Hæc de his verax auctor: consentientia his etiam habet ³ Leo Ostiensis, addens, quod his deficientibus, principatus Capuæ datus est tunc ab Olfone tertio imperatore cuidam Ademario Balsami clerici filio secum a puero educato, quem unice diligebat. Sed de his hæcenus.

¹ Matth. x. — ² 1. Tim. v. — ³ Leo Ost. l. ii. c. 10. 15.

¹ Num. xxiv. — ² Matth. xxvi.

Anno periodi Græco-Romanæ 6484. — Anno Æræ Hispan. 1029. — Anno Hegiræ 381, inchoato die 20 Martii, Fer. 6. — Jesu Christi 991.

— Joannis XV papæ 7. — Ottonis III reg. 9. Basil. et Const. imp. 16.

1. *Litteræ Hugonis regis et episcoporum adversus Arnulphum archiepisc. anno superiori datæ.* — A num. 1 ad 12. Non hoc anno, sed mense Decembri anni nongentesimi octogesimi noni *Hugo* Francorum rex et episcopi dioceseos Rhemensis ad *Joannem XV* summum Pontificem adversus *Arnulphum* regis Lotharii filium spurium ac Rhemensem archiepiscopum litteras dedere, ut ibidem diximus. Nunc Baronii fundamentum evertendum. Ait cardinalis doctissimus : « Hæc omnia hujus anni exordio facta esse, Gerbertus qui interfuit, docet, dum decem et octo menses tradit intercessisse ab eo tempore usque ad Synodum Rhemensem habitam anno sequenti mense Junii ». Ita Baronius. Verum *Gerbertus* in fragmento Epistolæ ad *Wilderodum* Argentinensem episcopum, quæ continet apologiam ejusdem Synodi Rhemensis, quam Epistolam ipsemet Baronius an. *dcpxii*, n. 39 et seq. recitat, non refert menses illos *xviii* ad Synodum Rhemensem, sed ad Arnulphi cum Hugone rege reconciliationem. Hæc Gerberti verba : « Conjuratorum manum contra suum regem ejusque exercitum in aciem sub signis Caroli (Lotharingæ ducis) produxit. Interea legatis et litteris synodicis Romanus Pontifex, ut Ecclesiæ turbatæ subveniat, admonetur. Sed neque legatis neque litteris consulentibus consulit. Itaque gravium episcoporum facto consultu legatis et litteris synodicis ac mihi admonitione Arnulphus conventus, DECIM ET OCTO CONTINUIS MENSIBUS, ut a cæpto furore desisteret, seque a scelere proditionis et rebellionis, quo impetebatur, regulariter purgaret, noluit. Sed cum a se fautores maximos nequitiae suæ discedere sensit, territus regem adiit, novisque sacramentis ac novis rerum conditionibus REGLE MENSÆ PARTICIPES FACTUS EST; atque ita ira regis sedata, omni crimine se exutum credidit ». Quare menses illi *xviii* ad ea quæ anno anteriori gesta fuerant, non vero ad ea quæ post eam Epistolam ad episcopum Argentinensem datam contigere, omnino pertinent. Arnulphus itaque anno *dcclxxxviii* archiepiscopus Rhemensis creatus est. « Necdum a sua ordinatione sextus mensis elapsus erat, et ecce quasi tempestas urbem ab eo proditam hostis invasit, sanctuarium Dei polluit, spolia diripuit, clerum et

populum captivavit. Post hæc vero Arnulphus suos prædones sub anathemate posuit, atque ut idem facerent, Galliarum episcopis imperavit », ut scripserat antea Gerbertus in eadem ad episcopum Argentinensem Epistola respiciens ad Synodum Silvanectensem. Quare *Arnulphi* proditio, et Silvanectensis Synodi celebratio an. *dcclxxxviii*, sexto nempe mense ab ordinatione Arnulphi, acciderant; ac menses præfati *xviii* ab eodem Christi anno inchoati, annique *dcxc* prioribus mensibus absoluti fuere.

2. *Arnulphus iterum adversus Hugonem regem rebellis.* — Præterea Baronius num. 1 in margine citat Gerbertum de Concilio Rhemensi loquentem, et querelam Romani Pontificis commemorantem : « Sed neque », inquit Gerbertus, « primati Romano injuriam illatam, cum per octodecim menses litteris et legatis commonitus respondere noluerit. Non enim ejus silentium aut dissimulatio, vel nova constitutio jam constitutis præjudicat legibus ». At hi menses *xviii* referuntur quidem ad Synodum Rhemensem, quæ Arnulphum ab archiepiscopatu Rhemensi deposuit, sed ea non anno *dcpxii*, ut arbitratus est Baronius, sed anno *dcpxi* congregata. Quare cum die *xvii* mensis Junii illius anni habita fuerit, hi menses *xviii* eo die absoluti, et circa medium mensis Decembris anni nongentesimi octogesimi noni incepti, ideoque et eo tempore *Arnulphus* cum Hugone rege reconciliatus, vel saltem sub initium anni *dcxc*; an enim Gerbertus menses illos integros vel incompletos numeret, divinare non possumus. Intra hos ultimos menses *xviii* contigere, quæ ipsemet Gerbertus in Epistola ad Wilderodum post laudata superiori numero verba statim subjungit : « Atque ita ira regis sedata, omni crimine se exutum credidit. Indeque mox rediens fidem sacramentorum rupit (nempe circa initium anni *dcxc*), conditionibus non servatis. At ii quorum intererat, totiens se decipi, totiens bonis suis privari non ferentes, Lauduni arcem occupant (anno nempe *dcpxi*), Arnulphus inter hostes regis invenitur, Synodo (Rhemi eodem anno coactæ) repræsentatur, pro tot tantisque flagitiis rationem reddere deposcitur, etc. » Utraque itaque Arnulphi rebellio per menses *xviii*

duravit, et in universum annos tres, ab anno DCDLXXXVIII, sexto archiepiscopatus ejus mense inchoandos.

3. *Moritur Miesco dux primus Poloniæ Christianus.* — Ad num. 12 et seq. *Miesco* seu *Misicho* vel *Michovio* vel *Miezulaus* seu *Miezislaus* primus Polonorum dux, qui Christianam religionem in eam gentem intulit, anno tantum sequenti e vivis excessit, ut diserte docet chronographus Hildensheimensis ad annum DCDXCI, ubi ait: « Misaco obiit, successitque ei filius illius Bolislavo », seu Boleslaus cognomento *Chrobry*. Baronius ex Dittmaro lib. 4, pag. 46, *Misiconis* ducis mortem in præsentem annum confert. At Dittmarus contrarium asserit, ait enim: « Anno Dominicæ Incarnat. DCDXCI, regni autem tertii Ottonis octavo, hic præfatus dux jam senex et febricitans ab exilio hoc ad patriam transit. Ubi loco, *regni autem tertii Ottonis octavo*, legendum, *regni autem tertii Ottonis nono*, cum is die Natali Christi anni DCDLXXXIII Ottoni II patri successerit. Sequendus itaque Dittmarus non in anno regis Ottonis, sed in anno Incarnationis. Suscepit paternum principatum *Boleslaus* primus, quem Dittmarus crudelitatis insinuat, Chromerus vero laudat.

4. *Miesco dux pietate insignis.* — « Hic princeps », inquit Chromerus lib. 3 de Boleslao loquens, « Polonorum nomen regia dignitate externorum principum necessitudinibus et clarissimis rebus gestis vehementer illustravit; militarem disciplinam auxit, regni fines longe lateque propagavit; religionem stabilivit, et augustiorem reddidit, denique feros ac agrestes homines ad civiliorem aliquanto vitæ cultum redegit ». Sed quoad *Misichonem*, de eo dicitur in libro de miraculis sancti Udalrici Augustensis episcopi, Vitæ ejus a Gerardo presbytero sancti antistitis familiari scriptæ, subjuncto, capite 22, quod cum *sagitta toxicata* in brachio vulneratus fuisset, votum vovisse, ut brachium argenteum cum manu ad *sanctum Udalricum* mitteret, et continuo per merita sancti episcopi de mortis periculo illum liberatum fuisse. *Misichonem* hic auctor, qui hoc sæculo vixit, *Wandalorum* ducem appellat, et cosmographus Hildensheimensis *Sclavorum* ducem. Ili loquendi modi observandi, ut hujus temporis auctores melius intelligantur. *Misicho* itaque princeps fuit pietate insignis.

5. *Anglia Danis vectigalis redditur.* — *Danis* littora Angliæ infestantibus, eodemque tempore, ut Anglorum vires distraherent, varias urbes oppugnantibus et barbara crudelitate deprædantibus, *Ethelredus* rex, uti narrat Hovedenus part. 1 Annal. pag. 428, malo remedium quæsiturus senatum vocat; ubi pauci erant, qui vim viribus opponere censerent, plures vero quibus nota regis ignavia, et inter hos princeps ponitur *Siricinus* Cantuariensis archiepisc., ducebant Danorum animos pecunia, non ferro placandos; horum « consilio », inquit Hovedenus, « *Danis* tributum, quod erat decem librarum (legendum, *decem millium librarum*, ut Huntindoniensis pag. 357 et novus chronographus Saxo habent) primitus datum est: ut a crebris rapinis, incendiis, et hominum occisionibus, quas circa maris ripas frequenter agebant, desisterent, pacemque firmam cum eis tenerent ». Nunc ergo primum in singula civium capita decretus census, de quo in Eduardi confessoris legibus, apud Hovedenum pag. 603 legitur: « *Danegildi* (ita census iste vocabatur) redditio, propter piratas primitus statuta est. Patriam enim infestantes, vastationi ejus pro posse insistebant. Ad eorum insolentiam reprimendam statutum est *Danegeldum* annuatim reddi: scilicet duodecim denarios de unaquaque hida (quæ erat certa terræ portio) totius patriæ, ad conducendos eos, qui piratarum irruptioni resistendo obviarent ». Duravit hæc servitus ad decimum Eduardi regis annum, seu ad annum MLI, et aliquando hoc servitutis genus auctum fuit, ut hoc anno apud Alfordum videre est. Quoad Ecclesiam, ita lex cavebat: « De *Danegeldo* omnis Ecclesia libera est et quieta, et omnis terra, quæ in proprio dominio Ecclesiæ erat, ubicumque jacebat, nihil prorsus in tali redemptione persolvens: quia magis in Ecclesiæ confidebant orationibus, quam in armorum defensionibus, usque ad tempora Guillielmi junioris, qui Rufus vocabatur ». Hæc in legibus Eduardi regis, num. 41.

6. *Deponitur califa Bagadensis.* — *Taius Lilla* califa Babylo-niensis depositus fuit anno Hegiræ cccclxxxi, die xix Schabani, qui respondet diei trigesimo mensis nostri Octobris. Ei eadem die succedit *Cadirus Billa* califa XLVI Bagadensis, quæ fuse Elmacinus lib. 3 narrat.

JOANNIS XV ANNUS 8. — CHRISTI 992.

1. *Pseudo-Synodus Rhemensis, in qua Arnulphus inique depositus.* — Annus Christi nongentesimus nonagesimus secundus sequitur, quinta Indictione inchoatus, quo apud Rhemos in Galliis celebrata est Pseudo-Synodus adversus Arnulphum Rhemensem archiepiscopum, in qua ipse est exactoratus Arnulphus, et in ejus locum subrogatus Gerbertus, de quo anno superiori. De ipsa acturi, primum omnium de tempore elucidanda obscuritas, quæ vitio scriptorum irrepsisse videtur, cum uno eodemque contextu diversa ponantur, nimirum cum primum ponitur hoc ipso anno Redemptoris nongentesimo nonagesimo secundo celebrata, sed tamen quarta ponitur habita Indictione, quæ potius quinta ponenda fuisset. Verum cum statutæ dictæ Chronologiæ annorum Christi alia cohæreant, dicendum omnino in numerum Indictionis mendum irrepsisse, ut loco quartæ, quinta restituenda sit. Nam dum in priori¹ editione id factum ponitur anno Ottonis imp. nono, præsentem quidem annum demonstrat; dumque etiam in posteriori editione id pariter gestum scribitur anno quinto Hugonis regis Francorum, id ipsum firmiter adstruit, cum hic ipse annus ejusdem regis numeretur. Ita enim in priori editione: « Anno ab Incarnatione Domini nostri Jesu Christi nongentesimo nonagesimo secundo, Indictione quarta (quinta), anno regni domini Ottonis Augusti nono, et excellentissimi regis Hugonis quarto, congregata est Synodus in territorio Rhemensi, etc. » Et in posteriori editione sic: « Anno ab Incarnatione Domini nongentesimo nonagesimo primo, Indictione quarta, anno quinto Hugonis, etc. » Hæc de his, quæ ad tempus spectant. Jam vero reliqua videamus, quæ congesti Gerbertus in Romanum Pontificem.

2. Quod autem ad ipsius conciliabuli acta pertinet: ipsa quidem (quod optandum fuisset) pura, simplicia, sincera sicut ab exceptoribus, notariis, vel aliis scripta fuere, absque aliquo additamento, vel interpretatione paraphrastica addita, mutatione aliqua facta minime extant, sed ea tantum, quæ ab adversario in sui defensionem contra Ro-

manum Pontificem scripta sunt ad ejusdem conciliabuli roborandam auctoritatem, ex quo ipse exactoratus Arnulphus, consecutus est Rhemensis Ecclesiæ archiepiscopatum. Ita plane esse reddita a Gerberto eadem Acta Rhemensia, ejusdem testificatione scriptis prodita, proxime auditurus eris. His igitur quanta sit fides adhibenda, quæ adversarius exæstuans furore ob ademptam sibi a Romano Pontifice cathedram tam sublimis Ecclesiæ scripsit, pro qua obtinenda sæpe certasse principes constat, quisque animo liber, nulla privata præpeditus affectione consideret. Par erat, si qua apud ipsum de justa causa fuisset parta fiducia, ipsa synodalia Acta, ut se habuerint, sincerissime absque vel unius apicis mutatione descripta, recognita, obsignataque testificatione Patrum, omni fide munita edere, ut docuere majores, præcipue Augustinus de Gestis cum Donatistis.

3. At nec ita quidem ab eo in omnibus, quibus jure tenebatur adstrictus, plene, omninoque satisfactum fuisset, ea tantum edendo, quæ contra adversarium in sui favorem transacta esse scirentur, relinquendo obvoluta, imo penitus sepulta silentio, quæ duabus sequentibus Synodis contra se scirentur synodali judicio actitata, quibus fuit e sede ignominiose dejectus, et qui fuerat inde depositus, restitutus. Hæc exiguntur ab homine libero, justæ causæ fidente, veritate pollente, ut ob oculos omnium cuncta penitus quæ sunt gesta, intucunda proponat, consideranda relinquat, securus conscientia, justitia tutus, secundum illud Proverborum¹: « Justus ut leo confidens absque terrore erit ». Contra vero quærat diverticula, recessus, anfractus, latibula captet, cui ex conscientia nulla fiducia, ex veritate nulla securitas, et ex justitia munimen abest, prout plane fecisse Gerbertus videtur, sese uti serpens spiris involvens, et abdens; sed tunc capite prodiens, cum linguis micans ore trisulcis, blasphematur. At liberaliter donemus ei cuncta, quæ de hac Synodo gesta refert, vere tunc inter ejus Synodi episcopos esse transacta: nihil est tamen quod de his lucrum capiant novatores,

¹ Cent. x. cap. 9. col. 460.¹ Prov. XXVIII.

qui ea cuncta ad suggillandam Romanam Ecclesiam e latebris eruentes tanquam e sepulcro cadaver grave olens, iterum edidere : utpote quod ea esse constet abolita tanquam iniqua atque blasphema a posteriori Synodo Rhemensi, de qua inferius suo loco erit agendum.

4. Sed etsi ista ad eludendum omnes Gerberti et recentium novatorum conatus satis superque esse cuique prudenti videri possint, cum nemo posteriori eidem Synodo, nisi unus Gerbertus fuerit refragatus, qui ejus sententia a Rhemensi sede male occupata exulare sit jussus, reliqui vero episcopi, et ipsi Francorum reges Hugo atque Robertus, nullo resistente, nemine discrepante, in Apostolicæ Sedis legati sententiam sponte omnes abierint : tamen ad cuncta, quæ idem Gerbertus in Ecclesiam Romanam oblatrat, suis ipsius scriptis sive invectivis sive apologeticis, respondeamus, et quam in cunctis amens et furens insanierit ac deliraverit, aperiemus. Jam vero rei gestæ seriem aggreduamur.

5. Ubi, sicut audisti, reversi sunt missi legali ad Romanum Pontificem, atque se ab eo non fuisse auditos retulerunt, tam rex quam episcopi ipsi morem gerentes, celebrandæ adversus Arnulphum Synodi consilium inierunt. Cum vero sæpe vocatus Arnulphus non affuerit, excusans, quod a Carolo rege (ut asserebat) Lauduni detineretur in vinculis : actum ut prodicione ejusdem Laudunensis civitatis episcopi, ab Hugone rege eadem civitas, et qui in ea erat Arnulphus pariter caperetur, quem ita captivum deduci jussit ad hanc tunc collectam Synodum judicandum. Cujus si ingressum scire cupis atque progressum, et totam usque ad finem summam comprehensam historiam, feliciter ex legitimis Actis id præstitit Eginaldus, cujus est adjectum ad Aimoinum Auctarium, in quo ista ipsa leguntur ¹ :

6. « In illis diebus in Rhemensium civitate erat archiepiscopus vir bonus et modestus frater (filius) Lotharii regis ex concubina, nomine Arnulphus. Hugo autem rex invidebat ei, volens exterminare progeniem Lotharii regis. Congregansque in urbe Rhemensi Synodum, in eum locum idem Hugo rex invitavit archiepiscopum Senonicæ urbis nomine Seguinum cum suffraganeis suis. In quo Concilio fecit degradari dominum Arnulphum archiepiscopum Rhemorum dolo nepotis sui, quem tenebat in carcere, dicens, non debere esse episcopum natum ex concubina ; in loco autem ejus consecrari fecit dominum Gerbertum monachum philosophum, qui Gerbertus magister fuit Roberti regis filii istius Hugonis et domini Leutherici archiepiscopi, successoris venerabilis Seguini : Arnulphum autem mancipari custodiæ in Aureliana civitate.

7. « Venerabilis autem Seguinus archiepiscopus non consensit in degradationem Arnulphi,

neque in ordinationem Gerberti : jussio autem regis urgebat. Alii vero episcopi licet inviti, tamen propter timorem regis degradaverunt Arnulphum, et ordinaverunt Gerbertum. Seguinus autem plus timens Deum, quam terrenum regem, noluit consentire nequitiae regis, sed magis quantum potuit redarguit ipsum regem, propter quam causam ira regis contra eum efferbuit.

8. « Cum magno itaque dedecore expelli jussit Arnulphum de Ecclesia beatæ Genitricis Mariæ Rhemensis, et sic alligatum retrudi in carcerem. Alligatus autem in carcere Aurelianæ civilatis, ubi detinebatur nepos ejus Carolus, mansit ibi annis tribus. Nuntiantur hæc omnia præsul Romano, qui valde indignatus super hoc facto, interdixit sacris omnibus episcopis, qui Arnulphum deiecerant et Gerbertum ordinaverant. Misit quoque Leonem abbatem a Sede Apostolica ad dominum Seguinum archiepiscopum urbis Senonicæ, qui vice sua in urbem Rhemensem Synodum congregaret, mandans illi, ut sine dilatione revocaret de carcere Arnulphum, et degradaret Gerbertum. Collecto igitur Concilio iterum in urbe Rhemensi, ex jussione Apostolica revocatus est Arnulphus de custodia, et cum honore magno receptus est in propria sede. Gerbertus autem intelligens quod injuste pontificalem suscepisset dignitatem, pœnitentia ductus est. Altercationem autem Gerberti pontificis et Leonis abbatis valde utilem plenius invenies in Gestis pontificum Rhemorum ». Hucusque de his auctor ex scriptis quæ citat, iisdemque publicis publice conservatis, in compendiumque a se redactis, quibus longe major sit fides adhibenda, quam illis Actis Synodi hoc anno habitæ a Gerberto descriptis, et in sui defensionem tunc editis.

9. *Assertiones Gerberti narrantis Acta Pseudo-Synodi refutantur.* — Quæ quidem sola, omissis cæteris, cum edita esse reperiantur a fidei Catholicæ ¹ perduellibus, ad infamandum Romanum Pontificem, in quem multa falsissima congesse-
runt : provocandi iidem essent ad scriptam postea altercationem illam habitam inter Gerbertum ipsum et Leonem Apostolicæ Sedis legatum, si extaret, ex qua causa evicta, ipse Gerbertus condemnatus turpiter loco cedere jussus est, atque restitutus Arnulphus ; vel si non extat, ex certa tamen ejus definitione et lata sententia contra Gerbertum, cui omnes episcopi et ipse Hugo rex acquieverunt, omnis illa Gerberti consarcinatio penitus evanescet. De qua nobis agendum proponimus, ne causæ justæ diffusi eam hac tergiversatione eludere potius, quam confutare videri posimus versipellis hominis totam confertam mendaciis scriptionem. In qua dum ipse præfatur, sui affert rationem instituti : eandem præfationem tibi legendam proponimus, ut quæ multos annos fatigavit episcopos, regem, atque Romanum Pontificem, causam magni momenti, satis notam atque

¹ Aim. l. v. c. 45.

¹ Cent. x. cap. 1. de Synod. col. 457.

perspectam habeas, quo cuncta, quæ ab Apostolica Sedis adversariis ingeruntur, noscas quam facillime confutata. Ipsa autem Gerberti Præfatio sic se habet :

10. « Licet æmuli mei dentes in me exacuant, dictaque et facta proscindere parent : plus tamen amicorum obsequio, quam invidorum odio permoveor ». Ita ipse, quod Hugonem regem, et omnes qui ab ipso dependerent, et cum ipso agerent, haberet obsequentes. Præstabat dicere fiduciam sibi partam ex justa causa, patrocinante veritate, cui Deus assistere teneatur. Sed non est in animo singula ab ipso dicta perperam factave refellere, prolixiore enim opus esset tractatione; satis obiter aliqua annotare, ex quibus cuncta, tu, prudens lector, poteris judicare. Pergit ipse :

11. « Non enim ubi non erat timor, timere didici, nec amicorum infecta relinquere negotia. Accingar igitur, et summarum quidem genera causarum in Rhemensi Concilio exposita, brevi attingam, ut et gestorum veritas innotescat, et quæ a summis viris retractata sunt agnoscantur. Peto autem ab hujus sacri conventus prælatis, si quid minus grave, vel parum comptum expressero : non suæ injuriæ, sed meæ adscribi ignorantia; ab auditoribus quoque, ne me aliena, vel parum dixisse denotent. Siquidem triplici genere interpretationis utendum fore censeo, scilicet : ut quædam ad verbum ex alia in aliam transferantur linguam : in quibusdam autem sententiarum gravitas et eloquii dignitas dicendi genere confirmetur. Porro in aliis una dictio occasionem faciat, et abdita investigare, et in lucem istos affectus manifeste proferre. Quæ si ad plenum assequi non potuero, his tamen modis doctissimorum hominum sententias conabor interpretari. Sed earum amplificationes, digressiones, et si quæ ejusmodi sunt, quodam studio refringam, ne odio quarumdam personarum, potissimumque Arnulphi proditoris moveri videar, quasi ex ejus legitima depositione Rhemense episcopium legitime sortitus videri appetam. Alterius hoc erit operis, aliisque implicitum quæstionibus, cum de propriis, communibus et differentiis episcoporum, archiepiscoporum, vel metropolitanorum, patriarcharum, sive primatum, vel etiam Romani episcopi potestate (ut animo concepi) prolixius disputabo ». Hucusque Gerberti Præfatio, ex qua (ut profitetur) apparet, non ab ipso edi Acta illa Rhemensis Synodi pura atque sincera absque aliquo (ut par erat) additamento vel unius apicis, sed ab ipso pro arbitrio, ut audisti, diversimode posita et exposita, interpretata atque paraphrastice recitata, vel in aliquibus mutilata. Ut nequaquam ea sint dicenda synodalia Acta Rhemensia, sed potius opus Gerberti in Acta ipsa Rhemensia. In quo quid præstiterit, quanta possum brevitate perstringam.

12. Primum omnium ubi celebratæ Synodi certus descriptus est annus, etiam dies notatur, qua ipsa Synodus est inchoata, et locus pariter,

ubi convocati convenerunt episcopi. Nam ita ibi ¹ : « Igitur XV kalendas Julii collecti sunt in Basilica domni Bassoli confessoris Rhemorum quidam diæcesani, etc. » Nominantur diæcesani episcopi sex, præter archiepiscopos aliarum provinciarum, ut Lugdunensis, Aquitaniæ et Senonensis. Episcoporum omnium qui interfuerunt, certus numerus non describitur, decem vero episcopi delecti ad judicandum leguntur, professi omnes se voluntate Hugonis Francorum regis esse collectos; de consensu Sedis Apostolicæ verbum nullum, cum absque voluntate ipsius nec debuit vel potuit ea Synodus congregari, nec de metropolitano episcopo ullatenus iudicium terminari, cum præsertim inter privilegia Rhemensis Ecclesiæ archiepiscopis concessa, speciatim illud præsitum scitur, ne ab alio aliquo, quam ab Apostolica Sede iudicari possent, licet communi jure id deberetur. Porro sicut certi ad causam terminandam delecti sunt iudices; ita admissi sunt, qui Arnulphi causam defenderent, ne reus indefensus existeret. Defensores autem ipsius hi nominati apud Gerbertum inveniuntur : Joannes ² scholasticus Antisiodorensis, Rhanulphus abbas Senonensis, atque Ebbo rector cœnobii Floriacensis.

13. Porro ex defensoribus licet interdum causæ merita æstimare, cum viris optimis dedecori adscribatur, si turpissimum quemdam defendendum susceperint : certe quidem qui ultimo loco hic nominatur Ebbo, sive Abo ab aliis dictus, abbas Floriacensis, vir plane sanctissimus ab omnibus prædicatur, qui etiam (quod ad summam laudem accedit) meruit postremo martyrio coronari, ut testatur hujus temporis scriptor Glaber Rodulphus, necnon Sigebertus, qui et eum in utraque scientia tam profana quam sacra doctissimum prædicat. De collegis autem defensoribus aliis duobus, haud ita clara est memoria scriptorum inopia. Qui omnes non tam pro Arnulpho adstitisse noscuntur, quam etiam pro Apostolica Sede, siue cujus auctoritate tantum sibi sumpsissent iudicium episcopi Gallicani. De his enim ita Gerbertus in Epistola ad Widerodum episcopum Argentiniæ : « Defensorum studia bifariam se scindunt; alii quippe regem sacerdoti Arnulpho omnium peccatorum veniam tribuisse dicunt, alii Romano Pontifici injuriam factam videri volunt, quia sine ejus auctoritate, et sine suis juribus resumptis deponi non debuerit ». Hæc ipse, qui de iisdem agens hæc ait : « Aderant, inquit, acerrimi defensores, scientia et eloquentia insignes, superius nominati ».

14. Porro iidem ipsi ad Arnulphi defensionem eo potissimum nisi sunt argumento, quod scilicet episcoporum et aliæ majores causæ Ecclesiasticorum negotiorum deferendæ essent ad Romanum Pontificem, idque comprobarent pluribus auctoritatibus in iisdem Actis recitatis, quæ brevitatis

¹ Gerb. de Conc. Rhem. c. 1. — ² Gerb. Act. Rhem. c. 19.

causa omittimus recensere, illa tantum hic reddi-
turi, quæ ab ipso vel aliis in Romanam Ecclesiam
dicta esse noscuntur. Cum autem hoc agerent, ut
ejus causa cognosci deberet ab eodem Romano
Pontifice : hæc adversus ista ab Arnulpho alio Au-
relianensi episcopo dicta fuisse, Gerbertus prodens
in medium, primum ait ¹ : « Multa super his
pater Arnulphus publice locutus est, multa cum
tantum sibi assidentibus contulit, quæ ne forte
minus suavitatis habeant, ita sparsim posita ut
sunt ab eo prolata, ea in unum colligere malui-
mus, ut continuata oratio plus utilitatis studioso
lectori conferat.

15. « Nos vero, inquit, reverendissimi Patres,
Romanam Ecclesiam propter beati Petri memoriam
semper honorandam decrevimus, nec decretis Ro-
manorum Pontificum obviare contendimus, salva
tamen auctoritate Nicæni Concilii, quod eadem Ro-
mana Ecclesia semper venerata est ; statuta etiam
sacrorum canonum, diversis locis, diversis tempo-
ribus sub eodem Dei Spiritu conditorum, in æter-
num valere præcipimus, ab omnibus servanda
censemus. Duo autem sunt quæ magnopere a
nobis prævideri debent, id est, si Romani Ponti-
ficis silentium, aut nova constitutio promulgatis
legibus canonum præjudicare potest. Si enim si-
lentium præjudicat omnes leges, omnia priorum
decreta eo silente, silere necesse est. Si autem
nova constitutio, quid prosunt leges conditæ, cum
ad unius arbitrium omnia dirigantur ? Videtis
quia his duabus causis admissis, Ecclesiarum Dei
status periclitatur ».

16. Quod silentium dicit Romani Pont. ad
illud spectat, quod eorum legatione Pontifex in-
terpellatus nihil responderit, ut suo loco anno
superiori demonstratum est. Porro ea cuncta ista
tendunt ut nolint Romanum Pontificem posse ali-
quid supra canones, sed illis sit ipse subiectus. Sed
quomodo ista, si ejus decreto indicuntur Synodi,
et sanciti in iis canones confirmantur, ut robur in
Ecclesia consequantur ; alioqui nullus stat canon,
nisi vim subsistendi ab eodem Romano Pontifice
accipiat ? supra canones ergo ille censi debet,
qui vim et auctoritatem canonibus impartitur. Sed
pergit ille, his deteriora et absurdiora subjungens :

17. « Quid ergo, inquit, num privilegio Ro-
mani Pontificis derogavimus ? Minime. Sed si Ro-
manus episcopus est quem scientia et vitæ meritum
commendet, nec silentium, nec nova Constitutio
metuenda sunt. Quod si vel ignorantia, vel metu,
vel cupiditate abalienatur, vel conditio invidiam
facit (quod fere sub hoc tempore vidimus Romæ
tyrannide prævalente) tunc multo minus idem si-
lentium et nova constitutio formidanda sunt. Non
enim is qui quolibet modo contra leges est, legi-
bus præjudicare potest ». O fatua ac deridenda
prorsus quam confutanda inanis assertio, dum
vult in vitæ moribus et in scientia inesse auctori-

tatem Pontificis, quibus si careat, pariter cadat ab
omni pontificia auctoritate ! Et ubi illud Domini ¹ :
« Facite quæ vobis dicunt, et non quæ faciunt ? »
quasi potestas sit ab homine et non a Deo. Et ubi
illud Apostoli ² : « Non qui plantat, non qui rigat
est aliquid, sed qui incrementum dat Deus ? »
Perstans vero in eadem falsissima opinione, eo de-
ducit orationem, ut velit auctoritatem Apostolicæ
Sedis, ob prave qui in ea sederunt Pontifices,
defecisse, ista subjungens :

18. « Sed, o lugenda Roma, quæ nostris ma-
joribus clara, Patrum lumina præbuiisti, nostris
temporibus monstruosas tenebras futuro sæculo
famosas offudisti. Olim accepimus claros Leones,
magnum Gregorios, quid dicam de Gelasio et Inno-
centio, qui omnem mundanam philosophiam sua
sapientia et eloquentia superant ? Longa series
eorum est, qui sua doctrina mundum repleverunt.
Eorum itaque dispositioni, qui vitæ merito et
scientia cunctos mortales anteirent, recte univer-
salis Ecclesia credita est, quamvis et in hac ipsa
felicitate hoc privilegium tibi ab Africanis episco-
pis contradicendum sit, has credo quas patimur mi-
serias magis quam typum dominationis formidan-
tibus. Nam quid sub hæc tempora non vidimus ? »
Tu de his quæ spectant ad Africanos episcopos,
quos in exemplum ingerit, consule quæ suo loco
sub Bonifacio Pontifice dicta sunt, et invenies ex
sancti Augustini testificatione quid sentias. Subji-
cit Gerbertus, sive Arnulphus Aurelianensis, quos
hoc sæculo passa est Romana Ecclesia pontifices
tanto fastigio prorsus indignos, atque :

19. « Vidimus Joannem, cognomento Octavia-
num, in volutabro libidinum, etiam contra eum
Ottonem quem Augustum creaverat conjurasse.
Quo fugato, Leo neophytus in Pontificem creatur,
sed Ottone Cæsare Roma discedente, Octavianus
Romam redit, Leonem fugat, Joannem diaconum,
naso dextrisque digilis ac lingua mutilat, multa-
que cæde primorum in Urbe debacchatus, in brevi
moritur. Cui Benedictum diaconum, cognomento
Grammaticum, Romani substitunt. Eum quoque
Leo neophytus cum suo Cæsare non longe post
aggreditur, obsidet, capit, deponit, perpetuoque
exilio in Germaniam dirigit.

20. « Succedit Ottoni Cæsari Cæsar Otto, na-
tura, ætate, cunctos principes armis, consilio et
scientia superans. Succedit Romæ in Pontificatu
horrendum monstrum Malefacius ³, cunctos mor-
tales nequitia superans, etiam prioris Pontificis
sanguine cruentus. Sed hic etiam fugatus, et in
magna Synodo damnatus est. Post obitum divi
Ottonis Romam redit, insignem virum Apostolicum
Petrum Papiensis Ecclesiæ prius antistitem, data
sacramentorum fide, ab arce Urbis dejicit, depo-
nit, squalore carceris affectum perimit. Num ta-
libus monstris hominum ignominia plenis, scientia

¹ Ead. Act. c. 23.

¹ Math. xxiii. — ² 1. Cor. iii. — ³ Ita pro Bonifacio, quem nec
numerandum inter Pontifices diximus.

humanarum et divinarum rerum vacuis, innumeros sacerdotes Dei per orbem terrarum scientiæ et vitæ merito conspicuos subjici decretum est? » Utique. Nam si pravos dixeris, Apostolus hoc indixit, dicens¹: « Obedite præpositis vestris, etiam discolis ». Addit Petrus²: « Eo quod omnis potestas a Domino Deo est », et ut doctus subjiçatur indoctis, ille qui dixit³: « Discite a me, quia mitis sum et humilis corde », exemplo monstravit, quippe qui cum esset ipsa Sapientia increata et æterna, subditus fabro erat, atque Virgini matri, qui, ut testatur Evangelista paulo ante⁴: « Non intellexerunt ejus verbum quod locutus est ad eos ». De his breviter velut transiens ago, cum possem ipsum innumeris obruere sanctorum Patrum sententiis hæc ipsa testantium. Sed his furore ebrius funestiora conjungit Gerbertus, dum miserandum Romanæ Ecclesiæ statum deplorans, mox hanc addit apostrophen Arnulphi ore ita depromptam, dicens:

21. « Quid est hoc, reverendissimi Patres, vel quonam vitio fieri credendum est, ut caput Ecclesiarum Dei, quod in sublime erectum, gloria et honore coronatum est, ita in infima dejectum, ignominia et dedecore deturpatum sit? nostrum, nostrum hoc est peccatum, nostra impietas, qui quærimus quæ nostra sunt, non quæ JESU Christi ». Sapere hic cœpisti, utpote memor, quod sæpe pro meritis subditorum a Deo præsules dentur, qui propter⁵ peccata ipsorum regnare permittit hypocritas, et populo devio comminatur, dicens⁶: « Dabo vobis regem in furore meo ». Subjicit vero ista: « Si enim in quovis ad episcopatum electo, morum gravitas, vitæ meritum, divinarum ac humanarum rerum scientia subtiliter investigatur: quid in eo qui omnium episcoporum magister videri appetit, investigandum non est? Cur ergo in summa Sede sic infimus constituitur, ut etiam in clero nullum habere locum dignus inveniat? » At quid insultas in miseram? perinde ac si ipsa esse velit quod invita interdum patitur omni ex parte lugubris, et non potius ipsa reluctantante sit coacta ferre tyrannos, principes sæculi hujus, qui eadem quæ tu dicis monstra in Romanam ipsam Ecclesiam intruserunt; laude tamen etiam hæc ex parte ipsa dignissima, quæ ejusmodi conjuncta monstis, cum amatoribus non sit fornicata, nihil impium ex hæreticorum doctrina suscipiens, « sed uni viro », secundum Apostolum⁷, « virgo castissima desponsata Christo, semper remanserit incorrupta ». Sed quæ monstruosa subjiçiat, tu, lector, attende, cum ait:

22. « Quid hunc, reverendi Patres, in sublimi solio residentem, veste purpurea et auro radiantem; quid hunc, inquam, esse censetis? Nimirum si charitate destituitur, solaque scientia inflatur et extollitur, Antichristus est in templo Dei⁸ sedens

et se ostendens tamquam sit Deus; si autem nec charitate fundatur, nec scientia erigitur, in templo Dei tamquam statua, tamquam idolum est: a quo responsa petere, marmora consulere est ». Quid facis ista ita definiens, ut dicendus non sit episcopus, sed Antichristus, si destituitur charitate, et non pastor, sed idolum, cum et scientia caret? plane ista definiendo, tu definiris esse schismaticus et hæreticus, teque ipsum in Donatistarum classem conjiciens, atque intra Pelagianorum ergastula claudens, Orthodoxos omnes tam Orientales, quam Occidentales scriptores Ecclesiasticos tibi constituis adversarios, Concilia omnia, cunctaque decreta Pontificum, ipsam traditionem, usum Ecclesiæ, ac denique (ut una sententia perstringam) omnia quæ sunt aut fuerunt unquam Ecclesiæ Catholice membra in te conceitas, quæ necesse est patiaris infesta, in omnibusque contraria, dum tam absurda proponis, ut defectu charitatis legitime ordinatus episcopus mox transformetur in Antichristum, et scientia vacuus, sit idolum; cum plane tu ipse ex his scientia vacuus dum appares, tua sententia esse convincaris idolum, ex satana responsa depromens, ipsissimus Antichristus sentiens et prædicans contra Christum, qui detestabiles¹ Phariseos et Scribas, quorum prava essent opera, vitare admonens utpote mortifera, eorum tamen præceptis parere jussit; qui et suos elegit discipulos piscatores humanis plane litteris destitutos. Sed reliqua prosequamur:

23. « Quo ergo, inquit, consultum ibimus? Evangelium docet², quemdam in ficulnea ter fructum quæsisse, et quia non reperit, succidere voluisse, sed admonitum expectasse. Expectemus ergo primates nostros, quoad possumus: atque interim divini verbi pabula, ubinam reperiri valeant, investigemus. Certe in Belgia et Germania, quæ vicinæ nobis sunt, summos sacerdotes Dei in religione admodum præstantes inveniri, in hoc sacro conventu testes quidam sunt. Proinde, si regum dissidentium animositas non prohibeat, inde magis episcoporum judicium petendum fore videtur, quam ab ea Urbe, quæ nunc temporis venalis exposita ad nummorum quantitatem judicia trutinat ». Unde tibi tanta faenitas, homo inanis, ut pro arbitrio, quos velis, archiepiscoporum judices deligas; et quis te docuit, pro ratione scientiæ judicandi potestatem in Ecclesia esse collatam, ut (secundum tuam sententiam) ille sit super omnes judex habendus, qui scientia cæteros antecellit? O stoliditas quæ omnem stultitiam et amentiam superet, sui deformitate monstra omnia vincat quæ unquam portæ inferi parturierint!

24. Quod autem subjiçit de Urbe venali, antiqua ista querela est, et magis tunc temporis frequentata, cum Paulus viveret, qui non ob id refugit judicium Urbis, sed illud appellans, magis expetiit³. Sed illud tu cautius, dum de venalitate

¹ Heb. XIII. — ² Pet. II. Rom. XIII. — ³ Matth. XI. — ⁴ Luc. II. — ⁵ Job. XIV. — ⁶ Ose. XIII. — ⁷ 2. Cor. XI. — ⁸ 2. The. II.

¹ Matth. XXIII. — ² Luc. XIII. — ³ Act. XXV.

agens, non ipsum Pontificem nominatim in crimen adducis, quod scires venalitatem istam ex ipso summo sanctissimoque Pontifice non prodire, sed a tyranno Urbem tunc occupante Crescentio, testantibus id vestris episcopis in plena Synodo (de quo suo loco dicetur inferius) ita locutis : « Regii ac nostri legati Romam profecti, et Epistolas Pontifici porrexerunt, et ab eo indigne suscepti sunt. Sed (ut credimus) quia Crescentio nulla munuscula obtulerunt, per triduum a palatio seclusi, nullo accepto responso redierunt. Quod peccatis nostris exigentibus provenire non dubium est, ut Romana Ecclesia, quæ Mater et caput Ecclesiarum omnium est, per tyrannidem oppressa debilitetur ». Querela igitur de venalitate hic inculcata, et inferius repetita vestra sententia, non in Pontificem ipsum, sed in Crescentium tyrannum redundare manifeste cognoscitur. Ita ut quidquid in Joannem Pontificem labis simoniacæ irrogatur, in ipsum in Urbe papæ dominantem Crescentium tyrannum sit convertendum. Querela enim ista pariter fuisse legitur hæc nescientis Abbonis abbatis Floriacensis, de quo ista in Vita ipsius : « Interea eximius Abbo condigno apparatu Romam proficiscitur, privilegia Ecclesiæ sibi commissæ corroboraturus, imo renovaturus. Sane non qualem voluit, aut qualem debuit Sedis Apostolicæ Pontificem nomine Joannem invenit, nempe turpis lucri cupidum, atque in omnibus suis actibus venalem reperit. Quem execratus, perlustratis orationis gratia sanctorum locis, ad sua rediit, emptis optimæ speciei aliquantis holosericis palliis, ornatui Ecclesiastico congruis ». Hæc Aimoinus in Vita Abbonis, quam tunc ejus discipulus scripsit ¹. Crescentius igitur ista curans, ex omnibus Pontificiis actibus pecuniam corraderet, fecit nomen Joannis Pontificis apud omnes ad Urbem accedentes peregrinos istiusmodi infamia laborare. Sed quid post ista Gerbertus accipe :

23. « Sed cum hoc tempore Romæ nullus pæne sit (ut fama est) qui litteras didicerit, sine quibus (ut scriptum est) vix ostiarius efficitur : qua fronte aliquis docere audebit quod minime didicit? Ad comparisonem quippe Romani Pontificis in aliis sacerdotibus ignorantia utcumque tolerabilis est, in Romano autem, cui de fide, vita, moribus, disciplina sacerdotum, deque universali Ecclesia Catholica judicandum est, intolerabilis videri potest. Is enim est (ut quibusdam placet) qui secundum Ezechielem ² prophetam, moratur in gazo-phylacio quod respicit viam meridianam, et excubabat in custodiis templi. Cur autem loco prior, scientia inferior, non æquo animo ferat judicium loco inferioris, scientia prioris? Certe ipse Apostolorum princeps non abnuit judicium, quamvis loco minoris Pauli scientia prioris in faciem sibi resistentis, quoniam non sana videbatur doctrina magistri ». Sed id quam fit perperam dictum,

consulat quæ superius a nobis suo loco sunt disputata.

26. At quod indoctus Pontifex consulere doctos debeat, non eo se fastu erigere Romani Pontifices soliti sunt, ut minores audire spreverint, imo sic comparati esse consuevere, ut quamvis doctissimi, consulere tamen non recusaverint doctos viros absentes, et præsentibus secum adhibere in consultationibus, quæ ex toto orbe illuc influerent Ecclesiasticis ; ut fecisse scitur sanctus Damasus de sancto Hieronymo, sanctus Leo Magnus de sancto Prospero, quos scientia eminentissimos Pontifices in exemplum adduxisse sit satis, cum cæteroque omnes reperiantur æque in rebus arduis adhibuisse consultores, non solum ejus lateri inhærentes sanctæ Romanæ Ecclesiæ cardinales, sed et episcopos quos a munere nominare consuevere assistentes vel suffraganeos.

27. Sed et quod blaterans addit, nullum ferme hoc tempore Romæ fuisse qui didicerit litteras : de hoc teipsum appello, Gerberte, quod velis, nolis, fateri conaberis id quod publica habita disputatione in Synodo posteriore Rhemensi transactum est, ubi Leo Apostolicæ Sedis legatus abbas monasterii sancti Bonifacii in Urbe tecum disserens, quantumlibet propriam causam agente archiepiscopatus Rhemensis, quem possidebas injuste, ferventissimus disputator existens, te reddidit prorsus elinguem, et vinculis fortissimorum enthyematum vinctum, etiam te sacerdotalibus vestibus quas male indueras spoliavit. Tuo didicisti tunc damno, si qui sunt Romæ litteras scirent. Quanta illum oportuit imbutum fuisse scientia, cum non adversus te solum dimicans, sed adversum omnes episcopos, qui huic priori Rhemensi Synodo interfuerunt, et canonum plastra in eandem Synodum invexerunt, disputans, ut omnes potentissime confutaret? qua dicendi cum oportuit esse præditum arte, qui tot episcopos palinodiam cogeret recantare, a sententia regis divelleret, et in suam volentes atque consentientes adduceret? Sane quidem laud erat viri non doctissimi tanta præstare. Sed quid post hæc ingeris alio te convertens, videamus :

28. « Sed esto, inquit, ponamus nunc Romæ esse Damasum, quid contra ejus decretum actum est? nempe si bene recorder, primum capitulum fuit quod episcoporum et summorum negotiorum Ecclesiasticorum causæ semper ad Sedem Apostolicam sint referendæ. Utique relatæ non solum ab episcopis, sed etiam a principe nostro serenissimo, Hugone scilicet rege, liberaque potestas Sedi data est Apostolicæ, et vera investigandi et cognoscendi, et dijudicandi per temporum intervalla nimis prolixa. Nec prius ad causam accessimus, quam desperatione iudicii ejus protraheremur. Consultus est ergo Romanus episcopus, ut oportuit, et de hujus Arnulphi depositione, et de ejus qui domui Dei digne præesse posset, substitutione. Sed cur nihil responderis, quorum interest ipsi viderint ».

29. Sed quid inani tergiversatione cansaris, et

¹ Edit. nuper Jo. a Bosco Cælest. in Floriac. vet. Bibl. c. 11. p. 327.
² Ezech. XL.

in crimen adducis silentium Romani Pontificis? nonne tua sunt verba recensita superius, non amplius quam triduo responsionem expectare voluisse legatos, cum in causa tam ardua, tanti archiepiscopi, tantæ civitatis, ex regio stemmate perbrevis videri debuisset mensium trium expectatio. Sed apparuit, nihil magis legatos timuisse, quam ab eodem Pontifice responsum accipere, quo haud dubium, inchoatum iudicium de tanto episcopo suspenderetur, et in Urbem causa evocaretur, vel legatus aliquis (ut postea factum est) ad iudicandam causam e latere mitteretur, ob idque iidem quam citissime ab Urbe discedere prævenirent. Verum ea celeritate abeuntes, ac si non venissent habendi, cum prudentum responsis liqueat, quod non dicitur venisse qui non stetit. Ac post nonnulla de episcopis damnatis, sed tyrannice absque scientia Apostolicæ Sedis, hanc infert instantiam :

30. « Quid ergo, si Barbarorum gladiis circum sævientibus licentia commeandi Romam includatur, vel si Roma Barbaro cuilibet serviens, motu libidinis ejus in aliquod regnum auferatur : num interim aut nulla Concilia erunt, aut orbis terrarum episcopi ad suorum regum damna vel interitus, ab hostibus disponendarum rerum consilia et Concilia expectabunt ? » Fuerunt ista semper in mundo, prælia, hostes, tumultus, et Pontifices interdum exilio relegati, male mulctati, carceribus mancipati ; sed nunquam legitur siluisse penitus ipsos, quod verbum Dei non est alligatum, nec ad longum temporis spatium ejusdem Sedis Apostolicæ iudicia intercepta. Regnabat in Urbe Theodoricus rex Arianus et post ipsum successores ejus omnes iidem Ariani principes, sed nunquam apparuit Ecclesiæ Romanæ tribunal vacuum sine Pontifice iudicante, ad consulationes etiam transmarinas respondente, et reliqua velut in summa libertate tractante. Tenebatur obsessa Urbs tempore S. Gregorii a Longobardis, sed ipse liber ad quatuor orbis partes decretales scribebat Epistolas. Vidimus hoc ipso sæculo et superiori obsessas a Sarracenis custodiri Alpium fores, sed nihilominus et remotissimis orbis partibus cum maximo vitæ discrimine ad Limina sanctorum Apostolorum accurrere peregrinos, ut non possis tot fingere casus, et majores ipsis, quos non superaverit fervens in cordibus fidelium pietas Christiana, cui insitum sit a Spiritu sancto sinum matris quærere, et vocem patris audire. Sed inspicimus quid ad postremum ipse declamans adjiciat :

31. « Sed o, inquit, infelicia tempora, quibus patrocinio tantæ frustrantur Ecclesiæ ! Ad quam deinceps urbium fugiemus, cum omnium gentium dominam humanis et divinis destitutam subsidiis videamus ? Ut enim planius dicamus, palamque fateamur, post imperii occasum, hæc urbs Alexandrinam Ecclesiam perdidit, Antiochenam amisit, et ut de Africa taceamus et Asia, ipsa jam Europa discedit. Nam Constantinopolitana Ecclesia se subduxit.

Interiora Hispaniæ ejus iudicia nesciunt. Fit ergo discessio, secundum Apostolum ¹, non solummodo gentium, sed etiam Ecclesiarum. Quoniam cujus (ejus) ministri Gallias occuparunt, nos quoque totis viribus premunt, Antichristus instare videtur, et ut idem Apostolus ait ² : Jam mysterium operatur tantum, ut qui nunc tenet, teneat, donec de medio fiat, ut ille perditionis filius reveletur, qui adversatur et extollitur supra Dei nomen Deique culturam. Quod jam in aperto fit, ut Romana potentia conquassata, religione profligata, nomen Dei frequentibus perjuriis impune humilietur, ipsius diviniæ religionis cultus etiam a summis sacerdotibus contemnatur. Ipsa insuper Roma jam pæne sola a seipsa discedit, dum neque sibi, neque aliis consulit ». Ita ipse his prætextibus subterfugiens Ecclesiæ Romanæ iudicium, persuadere conatur quod maxime cupit, nullum jam in ea iudicantis esse tribunal.

32. Quid si etiam (quod impossibile est) vel ad tempus defecissent ab ipsa illi omnes ? audi quid dicat Apostolus ³ : « Quid enim si quidam illorum non crediderunt : numquid incredulitas illorum fidem Dei evacuabit ? absit ». Numquid inanis evanescet promissio Dei, qua suam in Petro Ecclesiam stabilivit, dicens ⁴ : « Tu es Petrus, et super hanc petram ædificabo Ecclesiam meam, et portæ inferi non prævalebunt adversus eam ? » Qui pereunt, sibi pereunt, qui deficiunt, sibi deficiunt. Ipsa namque semper permanens eadem subsistet Ecclesia, sicut luna non ita deliquium patitur ut deficiat, quæ eadem semper manet suo orbe perfecta.

33. Sed quod in primis ait, ipsam Romanam Ecclesiam jam penitus destitutam, nihil esse, ut ad ipsam confugere quis possit : ignorassene valuit ipse, quæ ante biennium (ut res tantum sub eodem Pontifice proxime gestas attingamus) facta sunt ? potuit, inquam, nescisse relationem ante biennium ex Anglia, toto (ut dicebant) orbe divisa, ad eundem Pontificem perlatam, de bellis civilibus inter principes componendis, quibus insula illa flagrabat ; quorum sopiendorum causa ab eodem Pontifice legatio missa est, et ex sententia re bene gesta, sublati tanti Pontificis opera civilibus bellis tranquilla pax reddita est, de qua recitata sunt ejusdem Pontificis tunc data Diplomata ? sed Gerbertus etiam sui oblitus, rem tantam ubique publicis litteris decantatam cum ignorasse non potuerit, silentio obvolutam reliquit.

34. Sed in eo gravius deliquit, cum turpiter mentitus est, dicens attenuando Apostolicæ Sedis vires : *Interiora Hispaniæ ejus iudicia nesciunt*. Annon superius, anno primo scilicet ejusdem Joan. Pontificis, regium edictum de legibus Ecclesiasticis, ipsisque speciatim decretis Romanorum Pontificum custodiendis promulgatum fuisse in Gallæcia demonstravimus ? qua igitur fronte ita

¹ 2. Thes. II. — ² Ibid. — ³ Rom. III. — ⁴ Matth. XVI.

mentiri potuit? Sed quas pæne dicit extinctas Sedis Apostolicæ vires tempore isto Joannis Pontificis: quam vigerent illæ, etiamsi ipsa esset domestica depressa tyrannide Crescentii pro libito Romæ cuncta miscentis, expertus est suo damno ipse Gerbertus, senseruntque illi faventes episcopi Galliani, et ipse rex potentissimus Hugo, cum quæ ejus jussu gesta essent Rhemis, cuncta Acta Synodalia adversus Arnulphum sunt jussa deleri, abrogarique pontificatum male collatum ipsi Gerberto Rhemensis Ecclesiæ, in eumque ipsis invitis et contradicentibus restitutum Arnulphum; eumque non solum episcopi sunt coacti silere, atque parere Decreto Pontificis, sed ipse rex eidem consensit laudabiliter obedire; ex quo non dedecus quod cesserit tantæ Sedis auctoritati, sed summam fuit gloriam consecutus, quod cum omnibus se sciret armorum potentia magna præesse, uni se subditum esse noverit Romano Pontifici, cujus jussa capesseret. Sed de his inferius? O si non in tanta obscuritate temporum versaremur, quot quantaque his similia essent tibi de eodem Pontifice ostendenda? Sed ex paucis his disce reliqua, et ex ungue cognosce leonem.

35. Quod autem calamitatem hanc Ecclesiæ Romanæ quam describis et tot mendaciis ornas, discessionem appellas, et utique illam ab Apostolo descriptam¹, quæ Antichristi adventum præcedat: præter id quod falsus inventus sis vates, non ex Deo, sed a seipso futura prænuntians, parum est quod tibi debeant qui hæc tua ostendant recentiores hæretici, qui rabido ore latrantes, ipsos Romanos Pontifices (proh scelus!) esse prædicant Antichristum, quem post discessionem quam ponis venturum affirmas, et nondum venisse dicas quem illi jam venisse in singulis Pontificibus fabulantur. Sed quam proprius, si illos, per quos fit discessio, esse dixeris Antichristos, impios inquam hæreticos atque schismaticos, de quibus illa viget sententia Salvatoris²: Qui non colligit mecum, dispergit: et qui non est mecum, contra me est; at contra Christum esse, hoc est fieri Antichristum.

36. Cæterum sive Gerbertum, sive recentiores hæreticos dicas, insaniisse prorsus intelliges ex eventis. Nam quomodo discessionem illam postremam per Paulum descriptam jam adesse, Gerbertus ipse et novatores cum eo delirant, si hoc ipso tempore (ut jam vidisti et proxime visurus es) Danos, Slavos, Northmannos in Galliis degentes, Boemos, Polonos, Hungaros, constat ad Christum esse conversos, et Romanæ Ecclesiæ compagine sacramenti esse conjunctos? sed et hoc ipso sæculo nostro, non provinciarum tantum, sed novi orbis ad Romanam Ecclesiam accessionem esse factam quis nescit? Unde non ab illo, neque ab istis ignominiosa discessio fuerat exprobranda, sed accessio numerosa pariter et gloriosa potius prædicanda. Audisti Arnulphum Aurelianensem, tot blasphemias eructantem, sive Gerbertum easdem evomen-

tem: scito adversus eundem Arnulphum, cujus titulo quæ audisti sunt recitata, tunc scriptum fuisse librum ab Abbate abbate Floriacensi. Testatur id Trithemius, qui si extaret, hoc nos puto labore levasset.

37. His ita in detestationem Sanctæ Romanæ Ecclesiæ a Gerberto turpiter inculcatis ea tandem sententia atque conclusione, universæ¹ argumentationi finem imponit qui primus fuerat in intentione, nimirum quod cum ipsorum Romam legati missi non fuerint auditi, liceret ipsis Arnulphi causam tractare, atque prolata sententia definire. Quibus pro arbitrio comprobatis, ait Arnulphum in Synodum reum inductum, ipsumque negantem, redargutum testimonio presbyteri jam confessi se civitatis portas aperuisse hostibus, sed Arnulphi mandato. Demum Gerbertus Acta synodalia prosecutus, nunquam ex eis probare potuit, Arnulphum aperiendi portas mandatum Adalgero presbytero dedisse confessum esse, sed seorsum a Synodo petiisse audiri se a tunc nominatis quatuor episcopis, quibus secreto (ait) multa crimina confessum esse, eundemque petiisse alium in sui locum episcopum subrogari. Porro ejus confessionem fuisse ab his qui audierunt juramento exceptam, ne penitus confessa crimina revelarent. Revocatum autem ad Synodum coram regibus Hugone ac Roberto filio ipsius, nihil publice confessum, nisi tantum ista dixisse: « Palam dico et profiteor me errasse, a fidelitate regia deviasse: reliqua autem et generalitate ipsum involvisse, et secreto confessum esse, atque damnationis sententiam accepisse ». Hucusque Gerbertus, qui reliqua mala fide silentio obsignata reliquit, nempe de sui facta in Arnulphi locum subrogatione, et reclamatione interposita a primario iudice Seguino archiepiscopo Senonensi, quam superius recitatam audisti, hic autem opportunius repelendam, quæ sic se habet²:

38. « Venerabilis autem Seguinus archiepiscopus non consensit in degradationem Arnulphi, neque in ordinationem Gerberti, jussio autem regis urgebat. Alii vero episcopi, licet inviti, tamen propter timorem regis degradaverunt Arnulphum, et ordinaverunt Gerbertum. Seguinus tamen plus timens Deum quam terrenum regem, noluit consentire nequitie regis, sed magis, quantum potuit, redarguit ipsum regem: propter quam causam ira regis contra eum efferbuit. Cum magno itaque dedecore jussit expelli Arnulphum de Ecclesia beatæ Dei Genitricis Mariæ Rhemensis, et sic alligatum detrudi in carcerem alligatus; autem in carcere Aurelianæ civitatis, ubi detinebatur nepos ejus Carolus, mansit ibi annis tribus »: donec scilicet per eundem Joannem Romanum Pontificem in Gallias legato misso, omnis ista textura Rhemensis Synodi contra Arnulphum est ejus auctoritate penitus dissipata, ut suo loco inferius dicturi sumus.

¹ 2. The. II. — ² Luc. XI.

¹ Acta Rhe. Syn. c. 31. 41. usque ad fin. — ² Aim. I. v. c. 45.

Scriptis præterea de his omnibus idem Gerbertus Epistolam ad Ottonem imperatorem, qua damnationem Arnulphi proclamans, eam omnibus voluit prius suis litteris innotescere quam aliorum, auresque præoccupare imperatoris, antequam his diversa ab aliquo alio fortasse perciperet. Ex qua quidem Epistola recitat ista Papirius Maso¹:

39. « Arnulphus regis Lotharii (ut fama est) filius, propterea quod suum episcopum dolo et fraude circumventum cum propria urbe Laudunensi scilicet, captivavit, post multum cruorem humani sanguinis a se effusi, post prædas et incendia, in conventu episcoporum totius Galliæ damnatus est: ac deinde post obitum beatæ memoriæ Adalberonis, a solo Adalberone episcopo Laudunensi reconciliatus, spe obtinendæ pacis, metropoli Rhemorum donatus est, acceptis ab eo terribilibus sacramentis, et libellari professione pro fide suis regibus conservanda, quam et viva voce in conventu Ecclesiæ recitavit, propria manu subscribendo corroboravit: necdum a sua ordinatione sextus mensis elapsus erat, et ecce quasi tempestas urbem ab eo proditam hostis invasit, sanctuarium Dei polluit, spolia diripuit, clerum et populum captivit.

40. « Post hæc vero Arnulphus suos prædones sub anathemate posuit, atque ut idem facerent Galliarum episcopi imperavit. Prædia Ecclesiæ, quæ per sacramentum suis militibus dederat, abstulit, hostibus contulit. Conjuratorum manum contra suum regem ejusque exercitum in aciem sub signis Caroli produxit. Interea legatis et litteris synodicis Romanus Pontifex, ut Ecclesiæ turbatæ subveniat, admonetur; sed neque legatis, neque litteris consulentibus consulit. Itaque gravium episcoporum facto consulto, litteris synodicis, aut miti admonitione Arnulphus conventus, decem et octo continuis mensibus, ut a cæpto furore desisteret, seque a sceleribus proditoris et rebellionis, quibus impetebatur, regulariter purgaret, noluit. Sed cum a se maximos fautores nequitie suæ discedere sensit, territus regem adiit, novisque sacramentis ac novis rerum conditionibus regiæ mensæ particeps factus est, atque ita regis ira sedata, omni se crimine exutum credidit; indeque mox rediens, fidem sacramento rupit conditionibus non servatis, atque ii quorum intererat, toties se decipi, toties bonis suis privari non ferentes, Lauduni arcem occupant. Arnulphus inter hostes regis invenitur, Synodo præsentatur, pro tot tantisque flagitiis rationem reddere deprecatur. Qui diu secum atque cum suis familiaribus multum deliberans, sua sponte in confessionem suorum peccatorum erupit, suisque confessoribus alios testes adhibuit, crimina sua in libellum retulit, eique a se viva voce coram Ecclesia recitata subscripsit, insignia sacerdotii deposuit, eoque se abdicavit, confessoribus atque testibus attestantibus et respon-

dentibus: Secundum professionem tuam cessa ab officio ». Hucusque ex dicta Epistola Maso. Porro libellus ille Arnulphi (ne quid desideres) sic reperitur ab eodem Gerberto recitatus in Actis iisdem Rhemensis Synodi¹:

41. « Ego Arnulphus, quondam Rhemorum archiepiscopus, recognoscens fragilitatem meam et pondera peccatorum meorum, testes confessores meos Seguinum archiepiscopum, Daibertum archiepiscopum, Arnulphum episcopum, Gothemannum episcopum, Gualterum episcopum, Brunonem episcopum, Milonem episcopum, Adalbertum episcopum, Odonem episcopum, Guidonem episcopum, Heribertum episcopum constitui mihi iudices delictorum meorum, et puram ipsis confessionem dedi, quærens remedium pœnitendi et salutem animæ meæ, ut recederem ab officio et ministerio pontificali, quo me recognosco esse indignum, et alienum me reddens pro reatibus meis, in quibus peccasse me secreto ipsis confessus sum, et de quibus publice arguebar, eo scilicet modo ut illi sint testes alii succedendi et consecrandi in loco meo, qui digne præesse et prodesse possit Ecclesiæ, cui hactenus indignus præfui. Et ut inde ultra nullam repetitionem aut interpellationem auctoritate canonica facere valeam, manu propria mea subscribens firmavi. Quo perlecto ita subscripsi. Ego Arnulphus archiepiscopus quondam subscripsi etc. »

42. *Episcopos schismaticos excommunicat Joannes papa, in quem proinde Gerbertus acriter blaterat.* — Sed quid post iudicium absolutum et sententiam promulgatam? apud Aimoinum ita: « Nuntiantur hæc omnia præsuli Romano, qui valde indignatus super hoc facto, interdixit sacris omnibus episcopis, qui Arnulphum dejecerant, et Gerbertum ordinaverant ». Hæc ibi. Sic igitur tantum abfuit ut Joannes Romanus Pontifex quæ gesta sunt in Arnulphum probaret, ut ea omnia penitus abolenda conscripserit: interdixit vero sacris (ut audisti) et excommunicaverit omnes illos episcopos, qui in eadem Synodo adversus Arnulphum sententiam tulissent. Apostolicis autem hisce litteris exacerbatus valde Gerbertus, in ipsum Romanum Pontificem ad Seguinum archiepiscopum Senonensem litteras dedit equidem virulentas, ex animo exacerbato admodum proditas, Catholico homine prorsus indignas. Nam totus in eo versatur, ut excommunicationem latam adversus omnes episcopos qui judicaverunt causam Arnulphi, ab ipso Joanne Romano Pontifice contemnendam esse demonstret. Epistola autem ipsa sic se habet:

43. « Gerbertus Seguino Senonensi archiepiscopo.

« Oportuerat quidem prudentiam vestram calidorum hominum versutias evitasse, et vocem Domini audire dicentis²: Si dixerint vobis, ecce hic est Christus, aut ecce illic, nolite sectari. Romæ

¹ Maso Annal. Franc. l. III.

² Act. Syn. Rhem. c. 54. — ² Matth. xxiv.

dicatur esse, qui ea quæ damnatis justificet, et quæ justa putatis damnet. Et nos dicimus, quia Dei tantum et non hominis est, ea quæ videntur justa damnare, et quæ mala putantur justificare ». Quid insanit Gerbertus, ut dicat Dei esse damnatio justa, et justificare mala? Numquid injustus est Deus, et ut ista faciat, peccatis obnoxius? putavi Codicem depravatum, sed in utraque editione hæc eadem syllabatim plane leguntur. Pergit ipse :

44. « Deus (inquit Apostolus¹) est qui justificat : quis est qui condemnet? consequitur ergo : Si Deus condemnet, ut non sit qui justificet. Deus dicit² : Si peccaverit in te frater tuus, vade et corripe eum, etc. Quomodo igitur vestri æmuli dicunt, quia in Arnulphi dejectione Romani episcopi iudicium expectandum fuit? Poteruntne docere, Romani episcopi iudicium Dei iudicio majus esse? sed primus Romanorum episcoporum, imo ipsorum Apostolorum princeps clamat³ : Oportet obedire Deo magis quam hominibus. Clamat et ipse orbis terrarum magister Paulus⁴ : Si quis vobis annuntiaverit præter quod accepistis, etiamsi Angelus de cælo, anathema sit. Num quia Marcellinus papa Jovi thura incendit, ideo cunctis episcopis thurificandum fuit? Constanter dico : quod si ipse Romanus episcopus in fratrem peccaverit, sæpiusque admonitus, Ecclesiam non audierit; hic, inquam, Romanus episcopus præcepto Dei est habendus sicut ethnicus et publicanus : quanto enim gradus alior, tanto ruina gravior ».

45. Audisti hominis constantiam profitentis, summam inconstantiam, ingentem procaciam atque temeritatem? Sed et (si tamen verba furentis digna sunt ut examinentur, et non potius contemnuntur) attende audaciam et arrogantiam, et obstepesce superbiam : qui lapsus Marcellini in exemplum adducit ad exprobandum, ipsum synodalia Acta Marcellini redarguunt. Professa est enim tunc Synodus, super Romanum Pontificem maximi criminis accusatum, legitimo testium numero convictum, atque propria confessione reum criminis comprobatum, nullum se eum damnandi jus habere, illud proferens atque sæpius iterans et inculcans : « Prima sedes a nemine judicatur ». Et : « Ex ore tuo te judica, tuæque sententia damna, vel convictum absolve atque justifica, quod scilicet prima Sedes a nemine judicari debeat ». Et illud : « Nemo enim unquam judicavit Pontificem, neque præsul sacerdotem suum, quoniam prima Sedes non judicabitur a quoquam ». Cum igitur universa Synodus sanctorum episcoporum, eorundemque tempore persecutionis acerbissimæ confessorum, super unum legitime convictum sponte confessum Romanum Pontificem ferre sententiam recusavit : unus Gerbertus intrusus episcopus non in unum Joannem tantum, sed in omnes generatim Romanos Pontifices peccantes, et ab Ecclesia tantum admonitos, nec convictos neque damnatos, senten-

tiam audacissime profert, dicens : « Constanter dico : quia si ipse Romanus Pontifex in fratrem peccaverit, sæpiusque admonitus Ecclesiam non audierit, is Romanus episcopus præcepto Dei habendus est ethnicus et publicanus ». O sententiam homine tantum sive magno aliquo hæretico, sive impudenti valde schismatico dignam, qua sacra simul Concilia abrogantur, canones jugulantur, traditiones suffocantur, et cuncta denique jura Ecclesiastica pessumdantur ! ut impossibile videatur a Catholico homine somnari ista, nedum adeo procaciter effutiri. Sed amor privans seipsum nimis amantis hominis furore prorsus ebrii fecit talia delirare. At prosequamur reliqua, pergunt enim eadem percitus phrenesi :

46. « Quod si propterea sua communione nos indignos ducit, quia contra Evangelium sentienti nullus nostrum consensit, non ideo a communione Christi nos separare poterit. Cum etiam presbyter nisi confessus aut convictus ab officio removeri non debeat, præsertim cum Apostolus dicat¹ : Quis nos separabit a charitate Christi? Et iterum : Certus sum, quia neque mors neque vita, etc. Et quænam major separatio, quam a Filii Dei corpore et sanguine, qui quotidie pro nostra immolatur salute, quemlibet fidelium remove? Quod si hic qui vitam admittit corporalem, vel sibi, vel alteri homicida est : hic qui sibi vel alteri vitam admittit sempiternam, quo nomine appellandus est? Neque vero Gregorii sententia in populum relata in episcopos referri potest : Sive, inquit, juste, sive injuste obliget pastor, sententia pastoris gregi timenda est : non enim episcopi grex dicitur, sed populus dicitur ».

47. At contra te, Gerberte, omnes ferme sacræ Legis interpretes provocas, qui locum Joannis de Christo dicente Petro² : Pæce agnos meos, pæce oves meas, pascendo, datos Petro episcopos omnes cum populo intelligunt : neque S. Gregorium aliud sensisse constat, quem patet plures excommunicasse peccantes episcopos. Quod ergo Seguinus archiepiscopus paruiisset Pontificis excommunicationi, mox indignans, eos omnes redarguens, ista subjicit : « Non igitur a sacra communione, quasi criminosi confessi vel convicti, suspendi debuistis : neque vero veluti rebelles et refugæ, qui sacrosancta Concilia nunquam devitastis, maxime cum actus et conscientia sit pura, nec legalis sententia damnationis in vos adhuc sit lata, nec legibus inferri possit. Legalis ideo notata est, quia Gregoria dicit : Sententia sine scripto perlata, nec nomen sententiæ habere meretur ». At scriptis Apostolicis inserta ex more sententia, quomodo sine scriptis lata asseri potest? Pergit vero :

48. « Non est ergo danda occasio nostris æmulis, ut sacerdotium, quod ubicumque unum est, sicut Ecclesia Catholica una est, ita uni subijci videatur, ut ea pecunia, gratia, metu, vel ignoran-

¹ Rom. VIII. — ² Matth. XXIII. — ³ Act. V. — ⁴ Gal. I.

¹ Rom. VIII. — ² Joan. XXI.

tia corrupto, nemo sacerdos esse possit, nisi quem sibi hæ virtutes commendaverint. Sit lex communis Ecclesiæ Catholicæ, Evangelium, Apostoli, Prophetæ, canones spiritu Dei conditi, et totius mundi reverentia observati, decreta Sedis Apostolicæ ab his non discordantia. Et qui per contemptum ab his defecerit, per hæc judicetur, per hæc abjiciatur. Porro hæc servanti, et pro viribus exequenti sit pax continua et continuo sempiterna. Vos enim valere optamus ». Subjicitur statim ista numeri nota, sed depravate *xxccv*, atque mox ista: « Iterum valet, et a sacrosanctis et mysticis suspendere vos nolite. Qui enim accusatus ante judicem tacet, confitetur; et qui iudice judicante pœnæ se addicit, confitetur. Confessio autem fit, aut salutis, aut proditionis causa: salutis, cum quis confitetur de se vera, proditionis, cum falsa de se confingit, vel in se patitur confingi. Tacere ergo ante judicem, confiteri est; confiteri porro falsa et mortalia crimina, homicidæ est: Quia omnis qui sibi causa mortis fuerit, major homicida est; et Dominus dicit¹: Ex ore tuo te iudico. Repellenda igitur est falsa accusatio, et contemnenda illegalis judicatio: nedum volumus videri innocentes, coram Ecclesia efficiamur nocentes ». Hucusque Gerbertus convincendus plane ex Epistola ista schismaticus, nisi tandem in sequenti, quod celebratum est Rhemensi Concilio, longa disputatione convictus a Leone abbate, Sedis Apostolicæ legato, eidem licet invitatus acquievisset, ut inferius suo loco dicitur.

49. Vidisti, lector, quænam isti, qui talia ediderunt, Attalica suspendant aulæ ad ornandam impietatem, ter miseri novatores, hostes implacabiles Romanæ Ecclesiæ, quæ tantum abest ut horum perfidia obscuretur, quod potius illustretur, dum summa veritatis potentia de omnibus istis triumphet, sicut de aliis, qui ad hanc usque diem Catholicam Ecclesiam infestarunt, hæreticis, trophæa semper erexit.

50. *Cætera commenta Gerberti exploduntur adversus Romanos Pontifices eorumque litteras decretales prolata.* — At satis ista adversus Gerbertum insanientem, licet per transitum, obiter dicta nobis sunt visa; verum ubi nacti sumus posteriorem quam diximus ejusdem operis editionem, eamque auctam Epistola apologetica, ab eodem Gerberto tunc scriptam ad Wilderodum Argentinæ civitatis episcopum: additum oneri, ut quæ potissimum in ea adversum Romanum Pontificem ipsamque Romanam Ecclesiam dicta reperiuntur, diligenter examinemus. Non enim ista ab instituto sunt aliena, sed maxime congrua, utpote his quæ accedunt ad historiam Ecclesiasticam controversiis quam utilissima disquisitio, atque prorsus necessaria disceptatio, cum non sine magno præjudicio veritatis falsa atque calumniosa pro veris a novatoribus venditentur, et de Gerberti nugis nundinationem

ad miseros decipiendos, exerceant. Nugatum quidem se litteris illis, idem ipse Gerbertus profitemur in fine, dum ait: « Hæc sunt, dulcissime frater, quæ rhetorum nugis complexus sum, amicitiarum pariendæ societatis, retinendæ benevolentiae causa, insuper vobis et vestris, me meaque impensurus. Proinde vestrum diligens exspecto iudicium, cum in his, tum in Rhemensi Concilio a me utcumque interpretato. In quo opere res genusque dicendi doctis auribus si placuerit, erit mihi tutissima merces id effecisse, quod summis viris potuerit placuisse ». Hæc ibi ipse. Quibus intelligas vanissimi hominis scopum, et in re tam seria ludum. Prolixa satis Epistola est et plane opus illud, de quo ad finem Præfationis in Synodum Rhemensem est pollicitus ista, dum ait: « Alterius erit hoc operis, aliisque implicitum quæstionibus, cum de propriis, communibus, et differentiis episcoporum, archiepiscoporum vel metropolitanorum, patriarcharum seu primatum, vel etiam Romani episcopi potestate, ut animo concepi, prolixius disputabo ». Hæc ipse de totius Epistolæ argumento.

51. Nos vero, omissis quæ diffuse satis de Arnulphi causa disputat jam superius in tractatione de Rhemensi Concilio propalata, aliisque ad ipsius iudicium pertinentibus, ea tantummodo prosequemur, quæ spectant ad Romanum Pontificem. Et quod in primis ipso ferme inculcat exordio, cum adversus pontificiam potestatem disputationem instituit, multus in eo est, ut decretalium Epistolarum Romanorum Pontificum auctoritatem minuat. Sed quibus verbis quove argumento, sic accipe: « Et ne, inquit, fortasse ad placitum loqui videar, injuriamque decretis Pontificum Romanæ inferre Ecclesiæ: Gelasium Romanæ Sedis Pontificem sententiæ meæ primum afferam testem. Ille quippe in Catalogo divinorum librorum, authenticis præmissis scripturis, etc. » a Conciliis Oecumenicis incipiens: « deinde (subjicit ipse) qualiter ipsius Sedis decreta accipienda sint, hoc modo distinguit: Item decretales Epistolas, quas beatissimi papæ, diversis temporibus ab Urbe Roma pro diversorum Patrum consolatione dederunt, venerabiliter suscipiendas ». At quid excogitari potest Gerberto impudentius, cum hæc ipsa quæ a sanctissimo pariterque doctissimo papa Gelasio, in auctoritatem ac munimentum decretalium Epistolarum Romanorum Pontificum, adeo clara atque expressa, pontificia potestate voluit reliquisse: ipse sit ausus convertere in destructionem earundem Epistolarum? At quibusnam rationibus, ab ipso sic accipe, cum mox ista subjungit: « Et sic nominatim quædam specialia determinans legenda, solertissime ac discretissime tam de Epistolis, quam de specialibus opusculis quid foret sentiendum expressit: Sed cum hæc, inquit, in manus Catholicorum devenerint, Pauli Apostoli præcedat sententia¹: Omnia probate, quod bonum est tenete ».

¹ Luc. xix.

¹ 1. Thess. v.

Et inferius ex Hincmaro quem citat: Suscipiendas igitur illas Epistolas venerabiliter cum beato Gelasio dico, ut cum leguntur (sicut ipse præcepit Gelasius) Apostolica illa præcedat sententia, quæ dicit: Omnia probare, quod bonum est tenere ».

52. Illic tu attende fraudem, considera dolum, et obstupesce versutiam horum hominum adversantium Romanorum Pontificum Epistolis decretalibus, et imposturam exclama, atque in ipsos impostores declama, cum primum Gelasii textum sumens, ac perlegens diligenter videris, quæ, qualia, quanta interposita maneant a recitata illa ipsius sententia de Epistolarum decretalium, firmata solida auctoritate usque ad citatam ac recitatam illam Pauli sententiam: « Omnia probate, quod bonum est tenere ». Post enim illa de Epistolis decretalibus dicta, subinferitur de Gestis sanctorum martyrum in genere quid sentiendum, specialim vero de Quirici, et Juditæ atque Georgii martyrum Actis, quæ ab hæreticis esse scripta scirentur, ob idque in Ecclesia Romana minime legerentur. His subjicitur tractatio de Vitis sanctorum Patrum, et eis quæ essent scriptæ a S. Hieronymo. Quibus adjicit mentionem de Actibus S. Silvestri Romani Pontificis, probanda ipsa sint necne; mox de Crucis inventione historiam, necnon aliam illi similem de Inventione capitis Joannis Baptistæ, haud adeo certam. Et tunc de his ista Gelasius ita perorat: « Sed cum hæc ad Catholicorum manus adveniunt, beati Pauli Apostoli præcedat sententia: Omnia probate, quod bonum est tenere.

53. Vidisti, lector, de quibus sit dicta illa a Gelasio sententia Pauli, et ad quæ referant illam mali consarcinatores, commissuram alterius panni male consuantes cum altero, doli fabricatores, linientes (ut Propheta ait ¹) parietem absque temperamento, fraudum opifices, quæque obvia pro arbitrio adulterantes? Cum si bona fide rem egissent, ulique considerare debuissent, singula quæque scriptorum genera ab eodem Gelasio sua quaque speciali sententia definita concludi, et consignata relinqui; ut plane pro monstro habendum sit, si quod privatim de aliquo est statutum, alteri tribuatur, non secus ac si quod Apostolus ibi tradit de novis prophetiis dicens: ² Prophetias nolite spernere, omnia probate, quod bonum est tenere; quis referendum esse velit etiam ad Evangelium Christi, de quo ipse Apostolus eadem Epistola ante meminit, iisdem Thessalonicensibus scribens, ut sub arbitrio cujuscunque recipiendum vel non recipiendum constituat Evangelium?

54. Quod et si volunt isti, ut ea Pauli sententia ad ea etiam quæ superius dicta sunt referatur, cur non etiam Concilia Œcumenica superius recensita ipsi subicias, vel proxime junctam Leonis papæ Catholicam Epistolam contra Eutychen promulgatam? dicens quod scilicet, eandem absque ambiguitate ulla esse recipiendam, idem Gelasius

declararit. Bene quidem, sed, quæso te, quæ ambiguitas est relicta, cum decretales Epistolas venerabiliter esse recipiendas sanctissime definivit, ut opus sit ad illam Apostoli revocare sententiam: « Omnia probate, quod bonum est tenere? » Facessant ista deliria non solum quolibet viro Catholico indignissima, sed a quovis homine rationis compote alienissima. Sic igitur ejusmodi adulterino commento humiliare, atque prorsus humi pedibus omnium transeuntium conculcanda prosternere conatus est Gerbertus, post Hincmarum, ipsasacrosancta decreta Romanorum Pontificum, dum quemque, ea adhibita sententia Pauli, vult posse pro arbitrio probare et non probare, quæ ab illis hactenus reperirentur fuisse decreta, quam tantam blasphemiam ab ullo ne unquam hæreticorum vel schismaticorum in hanc diem prolata fuisse, memoria non tenemus: adeo ut auctores erroris Hincmarus atque Gerbertus summo dedecore dici debeant, sive potius Hincmarus auctor, Gerbertus autem propagator sit appellandus; siquidem super fundamenta quæ posuit Hincmarus, Gerbertus superædificavit, qui eundem citans auctorem in hac eadem Epistola, nonnulla in eadem suam sententiam recitat ex illa proluxa Hincmari Epistola, quam scripsisse vidimus contra nepotem suum æque Hincmarum dictum, Laudunensem episcopum, dum iste adversus ipsum pro Epistolis decretalibus defendendis insurrexisset; atque de dicta a se prolata et male interpretata Gelasii de Epistolis decretalibus ejus sententia: « Hunc locum differentiarum etiam Hincmarus Rhemorum venerabilis antistes, nepoti suo æquivoco scribens interpretatus est, etc. »

55. Idem vero cum ex eo recitet alia plura, quibus Hincmarus eo stultitiæ venit, ut eatenus dicat esse recipiendas decretales Epistolas, sive decreta Romanorum Pontificum, quousque Concilia ab eis diversos canones non statuerint: plane demonstrat quod eis longe præferat canones Conciliorum, utpote quod velit eos esse perpetuos, decreta autem Romanorum Pontificum temporaria, ita male accipiens illa verba Gelasii, quibus dixit: « Item decretales Epistolas, quas beatissimi papæ, diversis temporibus, ab Urbe Roma pro diversorum Patrum consolatione dederunt, venerabiliter suscipiendas ». Nam ad hæc Hincmarus, quem recitat, habet ista: « Quantum enim distet inter illa scilicet Concilia, quæ custodienda et recipienda decrevit, et inconvisa firmaque deinceps Patres Catholici manere voluerunt, et illas Epistolas, quæ diversis temporibus pro diversorum consolatione datæ fuerunt, quas venerabiliter suscipiendas dicunt: nemo dogmatibus exercitatus ignorat. Si enim quædam ex his, quæ in quibusdam illis Epistolis continentur, tenere et custodire velle inceperimus: adversus ea, quæ ante servare voluimus, faciemus; et a Conciliis sacris, quæ perpetuo nobis recipienda, tenenda, custodienda, atque sequenda sunt, deviamus: nam et beatus

¹ Ezech. XIII. — ² 1. Thes. III.

Gelasius easdem Epistolas, non solum sacris canonibus in quibusdam adversas, sed etiam sibi ipsi diversas ostendit, cum dicit illas diversis temporibus pro diversorum consolatione datas. Et hinc forte adversum me dices: ergo calumniaris Apostolicam Sedem in sanctis ejus Pontificibus, eo quod male senserint, et non tenenda decreverint. Inde tibi respondebo, quod de lege non Judaice servanda, contradicentibus sibi atque dicentibus: Lex ergo adversus promissa Dei, respondens Apostolus¹ ait: Absit, lex quidem sancta et mandatum sanctum et iustum et bonum, sed personis et temporibus congrua, quæ propter transgressiones posita est». Et paulo post: «Decretales Epistolas cum Gelasio Apostolico viro venerabiliter suscipiendas dico, quæ suis temporibus congruentes fuerunt, donec per sacra Concilia Patres nostri in unum convenientes (sicut ejusdem Apostolicæ Sedis Pontifices protestantur, suggerente sibi metsancto Spiritu, quoniam aliter credendum non est) mansuras usque ad finem sæculi leges condiderunt. Et sicut dicit de lege Apostolus²: Si enim esset, quæ posset vivificare, vere ex lege esset justitia. Ita salva reverentia Sedis Apostolicæ dico, quia illa, quæ in iisdem Epistolis continentur et suis temporibus congrua fuerunt, subsequentibus temporibus, ita ut in iis temporibus continentur omnia, et simul custodiri valerent et servari et teneri congruerent: Patres nostri Catholici, doctique Pontifices in Conciliis sacras leges mansuras usque in sæculi finem non conderent. Suscipiendas igitur illas Epistolas venerabiliter cum beato Gelasio dico, et cum leguntur, sicut ipse præcepit Gelasius, Apostolica illa præcedat sententia, quæ dicit³: Omnia probate, quod bonum est tenete. Et hæc dico, non ut in eis dicam quædam non esse bona, sed non per omnia sacris canonibus Patrumque Conciliis consona. Sicut et Apostolus dicit⁴: Lex quidem bona et sancta, et mandatum sanctum, iustum et bonum, sed temporibus suis». Hucusque ibi Gerbertus ex Hincmaro.

56. At quantum hallucinatus sit Hincmarus ista delirans, jam paucis ostendamus. Ex his omnibus recitatis a Gerberto ex Hincmaro, tres haud leves numerantur errores, atque primus ille, ex quo reliqui, dum videlicet subjicit decreta Romanorum Pontificum quibuscumque canonibus Conciliorum; dum enim illa temporaria, perpelui isti ab eodem asseruntur, et illa per istos abrogari tradit: plane significat, majoris esse auctoritatis in Ecclesia Dei canones Conciliorum decretis Pontificum. Ilæc quam sint absurda, et ab omni ratione penitus aliena, quæ sæpe superius sunt allata, demonstrant, hic breviter repetenda. Si enim (quod sæpe pariter est demonstratum) quidquid virum canones habent, hoc totum ab eis est, id scilicet concedente Romano Pontifice suis litteris decretalibus; quomodo non majoris auctoritatis sunt illæ cano-

nibus? Sine illis quippe nec Synodum congregare (quod plurimis exemplis et auctoritatibus superius contigit demonstrari) nec sancita licet promulgare, nec robur habere canones, vel edi possunt vel recipi, et in auctoritatem assumi. Si igitur nonnisi suo interposito decreto per scriptas ad Synodos Epistolas decretales, condi canones, et conditi probari edique possunt: quomodo non majoris auctoritatis decretales Epistolæ censi debeant, a quibus, ut sint, nominentur, citentur, vim omnem accipiunt? Quam ista sint vera (ut taceamus de reliquis) exemplum de OEcumenicis Synodis afferamus, earumque omnium ex episcoporum numero maxima, nempe Chalcedonensi, deque ea non quid reliqui, sed Gelasius ipse scriptum reliquerit, cujus assertam sententiam adco Hincmarus cavillatur, ut plane contrarium ab eo quod sensit ac scripsit, ipsum sensisse atque scripsisse testetur. Ipse, inquam, Gelasius, quomodo Romani Pontifices suis decretalibus litteris vim et auctoritatem dent vel adimant Synodis OEcumenicis, dum agit de Concilio Chalcedonensi sic ait¹: «Ita quod firmavit in Synodo Sedes Apostolica, hoc robur obtinuit: quod refutavit, hoc habere non potuit firmitatem; et sola rescidit, quod præter ordinem congregatio synodica putaverat usurpandum». At quomodo factum istud, nisi sancti Leonis Magni litteris decretalibus, quæ extant adhuc, ad Anatolium Constantinopolitanum episcopum datæ et alios?

57. At ne tu putes OEcumenicas tantum Synodos a Romano Pontifice confirmari, cæteras, ut minores negligi, rursum eundem audi Gelasium, cujus et sententiam quoque Gerbertus ex Hincmaro in dicta sua recitavit Epistola. Sunt hæc Gelasii verba: «Confidimus, quod nullus jam Christianus veraciter ignoret, uniuscujusque Synodi institutum, quod universalis Ecclesiæ probavit assensus, nullam magis exequi sedem, quam primam, quæ unamquamque Synodum et sua auctoritate confirmat, et continuata moderatione custodit, pro suo scilicet principatu, quem B. Petrus Apostolus Domini voce præceptum, Ecclesia nihilominus subsequente, et tenuit semper et retinet». Litteris suis igitur decretalibus Pontifices, sicut confirmant, ita etiam custodiunt canonum observantiam, nec contra has ipsi canones quidquam virum habent; sed veluti quodam gratitudinis jure, totum Sedi Apostolicæ rependerunt, quod se ab ea accepisse ut essent, intellexerunt, cum decreta Apostolicæ Sedis ante omnia et præ omnibus esse servanda docuerunt: nam quid in hanc sententiam idem Gelasius, qui ita male traducitur ab Hincmaro, scribat ad Faustum, diligenter attende: «Nobis opponunt canones, dum nesciunt quid loquantur: contra quos hoc ipso venire se produnt, quod primæ Sedi sana rectaque suadenti parere fugiunt. Ipsi sunt canones, qui appellationes totius Ecclesiæ ad hujus Sedis examen

¹ Rom. VII. — ² Gal. III. — ³ 1. Thes. v. — ⁴ Rom. VII.

¹ Gelas. de vincul. Anathem.

voluere deferri, ab ipsa vero nusquam prorsus appellari debere sanxerunt, ac per hoc illam de tota Ecclesia judicare, ipsam ad nullius commeare iudicium, nec de ejus unquam præceperunt iudicio judicari, sententiamque illius constituerunt, non oportere dissolvi, cujus potius decreta sequenda mandarunt ». Hæc Gelasius. Plurima alia in hanc essent sententiam afferenda, sed parcimus, ne molestiam inferamus lectori, quem rogamus, ut reliqua ad eandem Gerberti Epistolam perlinentia patienter attendat.

58. Secundus Hincmari error, qui elicitur ex scriptis ipsius a Gerberto nuper recitalis, ille est, quod cum Gelasius dixerit, venerabiliter suscipiendas Epistolas Romanorum Pontificum, diversis temporibus a diversis Pontificibus datas : eas non perpetuo duraturas, sed temporarias fuisse dixerit, legique veteri assimilatas, nempe ad tempus datas, donec quod perfectius est, per canones sanciretur. Redarguit in primis errorem hunc ipse usus totius Ecclesiæ, dum in hanc diem quæ ante mille annos per Epistolas decretales constituta fuere, ab omnibus ad causarum definitiones citari consuevere, quod et ipse Hincmarus fecisse de antiquioribus, sua ipsius scripta significant. Si autem posterius sancti canones aliqua decreta Romanorum Pontificum (quod nec est nominatim reperiri) abrogasse inveniuntur, utpote temporibus illis incongrua : tunc dicendum per posteriores decretales Epistolas, quibus Pontifices illa Concilia et canones confirmavere, priora abrogata, ut accidere consuevit pro ratione diversarum personarum, locorum et temporum, ut idem princeps priora posterioribus mutet, sine quibus posterioribus datis litteris, id nullo liquet licere Concilio, ut jam est demonstratum. Præterea in his adstruendis, quam longe dispari et incongrua sit Hincmarus usus de lege veteri similitudine, nemo non videt. Siquidem lex usque ad præfinitum tempus novi Legislatoris Christi statuta est : decreta autem Romanorum Pontificum perpetuo valitura, donec per aliquem successorum Pontificum abrogentur, Ecclesia suscipit observanda ; nisi qui sancivit decretum Pontifex, noluisse illud esse perpetuum, vel commune cunctis in exemplum trahi, ut interdum de privatis rescryptis, in dispensationibus fieri contigit, licet eas litteras quibus ista perficit, haud proprie esse dixerimus litteras decretales.

59. Tertius Hincmari error ille, quod calumniose interpretatur Gelasium, dum ait, ipsum ostendisse Epistolas decretales, non solum sacris canonibus in quibusdam adversas, sed etiam sibi ipsis diversas, dum dicit Gelasius, illas diversis temporibus prodiversorum consolatione datas. At calumnia ista confutatione non indigens, plane redarguit ipsum suum auctorem Hincmarum, dum nihil est, quod ex Gelasii verbis quovis modo interpretatis quidquam hujusmodi deduci possit. Numquid enim, quia illæ diversis sunt temporibus datæ pro diversis occasionibus, mox necesse sit dicere ad-

versas esse canonibus, licet ostenderentur inter se esse diversas? Sed audi quid ipse inferius, cum hæc ipsa sententia totam claudit Hincmarus orationem, adjiciat : « Et hæc dico, non ut in eis dicam quædam non esse bona, sed non per omnia sacris canonibus Patrumque Conciliis consona. Sicut et Apostolus dicit : Lex quidem bona et sancta, et mandatum sanctum et justum et bonum, sed in temporibus suis ». Ista ipse, in illud ipsum relapsus, ut velit decretales Epistolas pro tempore editas, pro tempore tantum validas. Sed hæc sunt confutata superius. Quas enim ipsi voluere Pontifices suas decretales Epistolas robur perpetuo obtinere, certum est in Ecclesia perpetuo vigore nitescere ; quas autem edidere, non ut sancirent legem, sed ut exposcente causa dispensarent in lege, eas ipsi proculdubio noluerunt esse perpetuas, nec dici leges, sed dispensationes, quæ tamen non abrogent leges, sed dispensent in eis ad tempus ; illud semper caventes, ne sancitis legibus leges contrarias edant, secundum illud Apostoli¹ : Si quæ destruxi hæc ædifico, prævaricatorem me constituo. Neve quid contra fidem et bonos mores vel minimum quidem quavis occasione præsumant, scientes adversus hujusmodi non esse legem, eodem Apostolo ita dicente² : « Non enim possumus aliquid adversus veritatem, sed pro veritate ». At de erroribus Hincmari hætenus : qui sane ista delirans, fuisset inter hæreticos recensendus atque schismaticos, nisi sæpe suis scriptis reperiretur protestatus esse, nullo se pacto contra Romanam Ecclesiam aliquid sentire velle, nec pati ullo pacto ab eadem separari, ut suis locis superius est demonstratum.

60. Post hæc autem ex eodem Hincmaro multa Gerbertus ingerit, sanctorum Patrum abutente auctoritate, nempe Augustini primum, dum ille agit de litterarum episcoporum auctoritate, cum non de Romani Pontificis litteris decretalibus ipse tunc agat ; sive cum citat Hieronymi sententiam, in excusationem ad postremum hæc dicens : « Et ne quis nos in invidiam adducat, quasi privilegiis Romanæ ecclesiæ derogantes, audiat Hieronymum dicentem : Si auctoritas quaeritur, orbis major est Urbe ». At nihil improprius. Non enim ipse sanctus Hieronymus³, ea Epistola ad Evagrium, agit de alio decreto Romani Pontificis abrogando, sed de abusu qui irrepserat, cum diaconi adversus totius Catholicæ Ecclesiæ consuetudinem in presbyteros plus juris sibi vindicarent, quam par esset. At quis neget in Urbe Roma, in tanta omnium gentium confluentium multitudine, semper posse pravi aliquid in moribus latenter irrepere, quod sit falce Apostolica succidendum ? Cæterum cum casus accidit, ut quid de sacris dogmatibus a Romano Pontifice fuerit statuendum, illudque ipsum decretalibus suis litteris promulgandum, tunc plane tantæ Sedis auctoritate, toto orbe Urbem

¹ Gal. II. — ² 2. Cor. XIII. — ³ Hier. Ep. LXXXV.

esse majorem inventam. Cujus rei tanti momenti exempla si quæras, consule quæ dicta sunt superius tomo secundo Annalium, in Stephano papa et martyre, in famosissima controversia illa de baptismo hæreticorum.

61. Post hæc Gerbertus ad causam Arnulphi recurrit, quem vult justè in Synodo Rhemensi esse depositum, injustè vero per Romanam Ecclesiam restitutum, adversus quam latrans, hac apostrophe claudit Epistolam : « Sed una salus hominis, o Christe, tu es : ipsa Roma, omnium Ecclesiarum hactenus habita mater, bonis maledicere, malis benedicere fertur, et quibus nec Ave dicendum est communicare, tuamque legem zelantes damnare, abutens ligandi et solvendi potestate a te accepta, cum apud te non sententia sacerdotum, sed reorum vita quærat, nec possit hominis esse impium justificare, justumque damnare ». Ista Gerbertus, cui satis objicere non unius tantum Joannis papæ sententiam, sed omnium illorum Francorum episcoporum, qui duabus Synodis post hæc celebratis interfuerunt, quibus et reges pariter consenserunt. Sed et ipsa relata in publica monumenta disputatio illa, quam cum ipso Gerberto, in ultimo Rhemensi Concilio, Leo abbas ab Apostolica Sede legatus missus habuit, quam ipsam redarguerit et penitus confutarit, qui ad Aimoinum Auctarium adjecit, ostendit. Quæ si extaret, et a Novatoribus ista cariosa prodeuntibus bona fide edita esset, non adeo nobis in his laborandum fuisset. Sed quæ sunt anni hujus jam reliqua prosequamur.

62. *S. Oswaldi obitus.* — Hoc eodem anno magnus ille Oswaldus, Wigorniensis in Anglia episcopus, ex hac vita migravit in cælum, ubi sedisset annis triginta, quippe qui creatus fuit episcopus anno Christi nongentesimo sexagesimo secundo : cujus cum vita fuerit admiranda, obitus quoque talis extitit, qui digne Annalibus intextatur ; ejusmodi enim fuit : « Die quadam », ait fide-

lissimus scriptor Vitæ illius¹, « egressus cum suis ex oratorio, sub dio stans, in cælum intentissime oculorum aciem defixit, Christum quem suspirabat pio corde et ore attentius orans. Nec vero oculos, ut sui, cito retraxit ; sed perinde ac si novi quidpiam cum summa animi voluptate contempleretur, diutissime in eo quod intuebatur, defixus fuit ; rogatus æquidnam videret, ita respondit : Contemplor id quo tendo, idque crastino die, etiam me tacente, res ipsa vobis declarabit. Æterna namque beatitudo, cujus causa in terris lucusque laboravi, nunc instat. Nec ante crastina occumbet lux quam me in eam Dominus meus, sicuti est pollicitus, introducat. Reversusque in oratorium, convocatis fratribus, hortatur eos, ut impendant ipsi ministerium sacræ unctionis cum viatico Domini corporis. Nocte sequente, oblitus adversæ valetudinis suæ, in templum se contulit, officium divinum explevit, et reliqua noctis spatia in Dei laudibus expendit. Mane solito more linleo præcinctus, pedes pauperum lavit, atque extergens, quindecim Psalmis quos in illo ministerio dicere solebat persolutis, subjunxit GLORIA PATRI ET FILIO. Cumque pauperes pro more gratias agentes surgerent, ille autem diceret SPIRITUI SANCTO, ante illorum pedes in manus Christi spiritum reddidit. Cum autem corpus ejus ad Ecclesiam, quam construxerat, deferretur, nivea columba e cælo descendens, expansis alis, lento volatu illud protegere visa est. Ignea quoque sphaera cælitus lapsa, super feretrum apparuit, depositoque ante altare sacro corpore, visio illa tanquam locum sepulturæ ejus designatura, ad australem Ecclesiæ plagam juxta altare divertit, sicque ab oculis intuentium subducta est, etc. » Secula sunt ista admiranda signa, quibusque virum sanctissimum cum Christo in cælo regnare, quam certissime docuere. At hæc ad institutum satis.

¹ Exstat apud Sur. die XV Octob. c. 15. tom. v.

1. *Epocha Synodi Rhemensis.* — A num. 2 ad 13. Diem congregatæ Synodi Rhemensis, in qua Arnulfus archiep. Rhemensis depositus, et Gerbertus in ejus locum substitutus, recte notat Baronius num. 12, ex ipsomet Gerberlo, nempe XV kalend.

Julii, seu diem XVII mensis Junii, non item annum. Eam enim anno superiori habitam fuisse, docet accurata editio Actorum, quæ Duchesnius tom. iv, pag. 101, recitat, et quorum initium est : « Anno ab Incarnat. Domini nostri Jesu Chri-

sti DCXCI, Indictione IV, anno V regni domni Hugonis Augusti, et excellentissimi regis Roberti, congregata est Synodus in Rhemensi territorio », ubi Hugo pro rege *Augustus* dicitur, ut etiam in quibusdam Diplomatibus, Lotharius rex ejus decessor *Augustus*, et Angliæ reges *Basilei* appellantur. Ex hac epocha, quæ certa est, liquet *Arnulfi* archiep. Rhemensis historiam, quæ non parvis tenebris obducta, recte a nobis in suos annos digestam fuisse.

2. *Arnulfo deposito Gerbertus fit archiep. Rhemensis.* — Legati *Hugonis* regis, qui Romam ad Joannem XV missi fuerant, ut in dejectione *Arnulfi*, et novi archiepiscopi ordinatione, ei et episcopis Galliarum suffragaretur, re infecta, Roma redire, tum quia moræ impatientes; tum quia Romæ causam audiri ac finire volebant. Verosimile enim est, regem eis in mandatis dedisse, ut traditis Pontifici litteris, statim reverterentur, nec audientiam pleniorē expectarent. Sic enim reverentiæ Sedi Apostolicæ debitæ rex et episcopi non videbantur defuisse, et Romæ *Arnulfi* causa, quam in regno judicari malebant, non judicabatur. Reversis itaque anno DCXCI legatis, Synodum Rhemensem rex convocavit, ad eamque captivus ductus est *Arnulfus*, quia *Laudunum* eodem anno majori hebdomada ab *Ascelino*, Adalberone etiam appellato, episcopo Laudunensi, traditum est *Hugoni* regi, et *Arnulfus*, qui ibi cum Carolo Lotharingæ duce agebat captus, ut ex dictis liquet. Brevi spatio, duabus sessionibus Concilium peractum. Priori consensu in utramque partem causa *Arnulfi* discussa, et posteriori, cui *Hugo* et *Robertus* Galliarum reges interfuere, extortus est ab *Arnulfo* libellus abdicationis, juxta exemplar abdicationis *Ebbonis* quondam sub Ludovico Pio archiep. Rhemensis, de cujus conjuratione in Ludovicum Pium suo loco egimus. Post latam in *Arnulfum* sententiam, successorem illi substitui *Gerbertum* Hugo postulavit, quod ejus opera multis in rebus utiliter usus fuisset, ipseque *Roberti* filii præceptor extitisset. *Gerbertus* itaque in archiepiscopum Rhemensem inauguratus est, reclamante *Seguino* Senonensi archiepiscopo, quem aliqui in ejus depositionem consensisse perperam scripsere; cum *Seguino* eidem restitisse, optime Baronius probavit.

3. *Gerberti illegitime ordinati dotes.* — A num. 42 ad 62. *Arnulfi* depositionem absque auctoritate Sedis Apostolicæ decretam, nullam fuisse pluribus probat Baronius, ideoque actum non agam. Ad supplendos vero Annales, hic tantum quomodo se eo in munere gesserit *Gerbertus*, tempore quo in illo fuit, narrabo. Imprimis bonorum Ecclesiasticorum pervasores, collecta suffraganeorum Synodo fulminibus Ecclesiasticis terruit, et ad satisfaciendum Ecclesiæ compulit. Recitatur Synodus illa tom. IX Concil. pag. 740. *Fulconem* quoque Ambianensem episcopum admonuit increpavitque, quod bona Ecclesiastica pervaderet, monuitque errata corrigere sibi satisfacere: « ut horum

excessuum recognitio, multorum peccatorum possit esse abolitio », ut inquit in Epistola ad eum data, et ibidem recitata. Neque a docendo saltem privatim destitit, ut patet ex Epistola ejus XLII ad *Hervæum* Bellovacensem episcopum data. Quos vero præsens docere non poterat, litteris suis docere satagebat, imprimis autem Ottonem III imperatorem, discipulum olim suum, a quo nonnunquam de certis quæstionibus consulebatur. Extat ipsius Epistola sub hoc titulo: « Gerberto philosophorum peritissimo, atque tribus philosophiæ partibus laureato ». De Gerberto plura infra.

4. *Moritur Oswaldus archiep. Eborac.* — Ad num. 62. Ex tribus antistitibus, qui hoc sæculo tanquam sidera per Angliam inicuere, *Dunstano* scilicet, *Ethelwoldo* et *Oswaldo*, duobus prioribus superstes fuit *Oswaldus*, qui, ut inquit *Malmesburiensis*, lib. 3. de Pont., solus eos exhibuisse videtur, « auctoritate illum, efficacia istum, ambos sanctionia ». Ejus Vita ab auctore anonymo, qui incerta ætate vixit, scripta, et a *Bollando* ad diem XXIX Februarii, a *Mabillonio* vero Sæc. V nativo stylo repræsentata; *Surius* enim, dum eam expolire voluit, aliquibus in locis corripuit. *Wartonus*, in parte 2 Angliæ Sacræ, aliam *sancti Oswaldi* Vitam ab *Eadmero* monacho Cantuariensi elucubratam, pag. 491 et seqq. publicavit. *Wigorniensis* et passim scriptores Anglici mortem ejus in præsentem annum conferunt, et in priori ejus Vita diserte dicitur: « Obiit S. *Oswaldus* anno gratiæ nongentesimo nonagesimo secundo, et episcopatus sui trigesimo, pridie kal. Martii ». Ex verbis illis *Baronius* infert, *Oswaldum* anno DCCLXII episcopum *Wigornensem* nuncupatum fuisse: *Bollandus* vero binarium numerum a librario omissum, quod ab anno DCCLX ad currentem anni XXXII intercurrent, et historici Anglici *Oswaldum* anno DCCLX creatum episcopum referant. Denique *Mabillonius* *Dunstanum*, cui *Oswaldus* in episcopatum illum successit, arbitratur anno tantum DCCLXII ad archiepiscopatum Cantuariensem evectum esse, tuncque episcopatum *Wigornensem* dimisisse, et ideo locum purum esse. Verum hanc ultimam sententiam loco suo consulavimus, et ex dictis anno DCCLX, liquet, *Dunstanum*, exeunte Septembri, Romæ a Joanne Papa XII pallium suscepisse; *paucis exinde mensibus interjectis*, postquam Roma rediit, ad *Edgarum* regem profectum esse, et ab eo obtinuisse, ut *Oswaldus* ad sedem *Wigornensem* promoveretur; quod post annum DCCLXI contingere non potuit. Quo pacto recte scriptor ejus Vitæ tradit, eum *annos triginta* sedem illam gubernasse, neglectis scilicet mensibus, quod passim etiam ab aliis scriptoribus præstitum. *Baronius* ejus archiepiscopatus *Eboracensis* non meminit, quo cum exornatus fuerit anno DCCLXXI, ut eo anno ostendimus, manifestum est, per annos XXI *Oswaldum* archiepiscopatum illum administrasse.

5. *Floret B. Adalbero Metensis episcop.* — Florebat hoc tempore in Galliis *beatus Adalbero* Me-

tensis episcopus, qui omnia monasteria olim a suis decessoribus constructa, et postea vel eversa, vel derelicta, reædificavit, monachos qui ea habitarent collegit, et maxima bona in eadem contulit. Meurissius in lib. 3 de Episcopis Metensibus, refert Chartam Ottonis III, qua ad petitionem Adelhaidis Augustæ aviæ suæ, monasterio S. Symphoriani extra muros civitatis sito, bona eidem tam a suis decessoribus quam ab Adalberone episcopo concessa confirmat. Data illa « octavo kal. Februarii anno Dominicæ Incarnationis MCCCXII, Indict. v, anno autem tertii Ottonis regnantis nono ». Auctor anonymus et cœvus qui ejus Vitam scripsit, de hoc monasterio ait : « Primordia ac primitiæ actuum ipsius ad divinos usus, et ad exercendos animos in his quæ pietatis sunt, S. Symphoriani locus extitit, etc. Postquam vero locum hunc Deo stabilitum reddiderat, et monachorum copia pulcherrima, quos undecumque collegerat, honestissimum fecerat, id deliberans, ut semper suus non solum spiri-

tus, sed et anima et corpus Deo et Christo ejus serviens, nulla sui pars vel ad momentum quidem a divino pietatis opere otiosa consisteret, etc. Romanum iter aggreditur, limina Apostolorum adit, et suos subditorumque excessus fletibus, quibus supra mortales abundabat, deplorans deponit. Papa Joannes sanctæ Sedi præsidebat, et vices B. Petri dignissime administrabat, qui domnum Adelberonem tanto honore suscepit, tantaque reverentia habuit, ut hominem hujusmodi generis et nobilitatis decebat, et quod magis est, tantæ sanctitatis et pietatis viro competere novit, ac sanctorum reliquiis honestissime muneravit ». Subdit Adalberonem xenodochium tunc pauperrimum ædificiis pulcherrimis exornasse, plurimis divitiis ditasse, ac constituisse « ibidem ancillas Dei ad laudes perpetuo Creatori omnium celebrandas ». De monasterio Spinalensi ab eodem constructo pro sanctimonialibus, alteroque pro clericis, anno MCDXII verba fecimus.

JOANNIS XV ANNUS 9. — CHRISTI 993.

1. *Synodus Romana in canonizatione S. Udalrici.* — Sequitur Redemptoris annus nongentesimus nonagesimus tertius, Indictione sexta, quo a Joanne papa relatus est in numerum sanctorum Udalricus, Augustanus episcopus, de quo plura superius dicta sunt. Extant ipsa Acta in Diplomate ejusdem Pontificis, ea in re confecto Romæ in synodali conventu, a nostro Velsero in lucem vindicata, quæ sic se habent :

« Joannes episcopus, servus servorum Dei, omnibus archiepiscopis, episcopis et abbatibus in Gallia et Germania commorantibus, salutem in Domino ac Apostolicam benedictionem ». Ita inscriptio Actis imposita quæ sequuntur :

2. « Cum conventus esset factus in palatio Lateranensi, pridie kalendas Februarias, residente Joanne sanctissimo papa cum episcopis et presbyteris, adstantibus diaconibus et cuncto clero, surgens reverendissimus Luitolphus, Augustæ episcopus, inquit : Domine sanctissime præsul, si vobis placet, et omnibus episcopis et presbyteris hic residentibus, libellus quem præ manibus habeo, coram vobis legatur de Vita et miraculis venerabilis Udalrici

sanctæ Augustanæ Ecclesiæ dudum episcopi, et quid libitum vobis fuerit decernatur. Quia Spiritus sancti testatur præsentia et congregatio sacerdotum, certum esse quod legimus, quia nec potest veritas nostra mentiri, cujus in Evangelio ista est sententia¹ : Ubi duo vel tres congregati fuerint in nomine meo, ibi et ego sum in medio eorum. Quod cum ita sit, nec huic tam brevi numero Spiritus sanctus deest : quanto magis eum nunc interesse credamus, quando in unum convenit turba sanctorum : sanctum namque est pro debita veneratione collegium.

3. « Cumque perfecta esset Vita prædicti sanctissimi episcopi, ventum est ad miracula, quæ sive in corpore, sive extra corpus gesta sunt, videlicet, cæcos illuminasse, daemones ab obsessis corporibus effugasse, paralyticos curasse, et quam signa alia plurima gessisse, quæ nequaquam calamo et atramento illustrata sunt.

4. « Quæ omnia lepida satis urbanitate exposita recepimus, et communi consilio decrevimus memoriam illius, id est, sancti Udalrici episcopi,

¹ Matth. XVIII.

affectu piissimo et devotione fidelissima venerandam; quoniam sic adoramus et colimus reliquias martyrum et confessorum, ut eum, cujus martyres et confessores sunt, adoremus: honoramus servos, ut honor redundet in Dominum, qui dixit ¹: Qui vos recipit, me recipit. Ac proinde nos, qui fiduciam nostræ justitiæ non habemus, illorum precibus et meritis apud clementissimum Deum jugiter adjuvemur, quia divina saluberrima præcepta, et sanctorum canonum ac venerabilium Patrum instabant efficaciter documenta, omnium Ecclesiarum pio considerationis intuitu, imo Apostolici moderaminis annisu, utilitatum commoditatem, atque firmitatis perficere integritatem, quatenus memoria Udalrici jam præfati venerabilis episcopi, divino cultui dicata existat, et in laudibus Dei devotissime persolvendis semper valeat proficere. Si quis interea (quod non credimus) temerario ausu contra ea, quæ hac nostra auctoritate pie ac firmiter per hoc Privilegium constituta sunt, contraire tentaverit, vel hæc, quæ a nobis in laudem Dei et pro reverentia jam dicti episcopi statuta sunt, refragari aut in quoquam transgredi: sciat se auctoritate beati Petri principis Apostolorum, cujus vel immeriti vices agimus, anathematis vinculo innodatum. At vero, qui pio intuitu observator extiterit, benedictionis gratiam a misericordissimo Domino Deo nostro multipliciter consequatur, et æternæ vitæ particeps efficiatur. Scriptum est per manum Stephani, notarii regionarii et scriniarii sanctæ Romanæ Ecclesiæ, in mense Februario, Indictione sexta, anno nongentesimo nonagesimo tertio.

5. « Ego Joannes, sanctæ Romanæ Catholicæ et Apostolicæ Ecclesiæ episcopus huic decreto a nobis promulgato consensi et subscripsi.

« Joannes episcopus, sanctæ Anagninæ Ecclesiæ consensi.

« Benedictus episcopus sanctæ Pipernensis Ecclesiæ consensi.

« Dominicus episcopus sanctæ Ferentinæ Ecclesiæ consensi.

« Crescentius episcopus sanctæ Silvæcandidæ Ecclesiæ consensi.

« Anniso episcopus sanctæ Cerensis Ecclesiæ consensi.

« Bonizo archipresbyter et cardinalis sanctæ Lucie consensi.

« Benedictus presbyter et cardinalis S. Stephani consensi.

« Leo presbyter et cardinalis sancti Nerei consensi.

« Joannes presbyter et cardinalis sancti Damasci consensi.

« Leo presbyter et cardinalis S. Sixti consensi.

« Joannes presbyter et cardinalis sanctorum Apostolorum consensi.

« Joannes presbyter et cardinalis sanctorum quatuor Coronatorum consensi.

« Joannes presbyter et cardinalis sancti Clementis consensi.

« Crescentius presbyter et cardinalis S. Callisti consensi.

« Benedictus archidiaconus.

« Joannes diaconus et oblationarius.

« Benedictus diaconus.

« Joannes diaconus.

« Ili omnes consenserunt et subscripserunt.

6. « Data tertio kalendas (nonas) Februarii, per manum Joannis episcopi sanctæ Nephesinæ Ecclesiæ, et bibliothecarii sanctæ sedis Apostolicæ, anno pontificatus domini nostri Joannis sanctissimi XV papæ octavo, mense dicto et Indictione sexta ». Ita ptane hoc anno octavus annus Joannis papæ absolvitur, et nonus inchoatur. Sic igitur solemniter relato in Album sanctorum sancto Udalrico, ejus dies natalis publice cœpta coli, quod nonnisi Dei voluntate peractum evidens illud miraculum comprobavit, quod inter alia multa post Vitam ipsius descripta, sic legitur ¹:

7. « Quidam vero homo juxta Danubium, cum cunctus populus sua sponte natalitium S. Udalrici solemniter celebraret, fœnum cum rastellis congregavit in cumulos, diem sanctum spernendo: qui cum altera die cum plaustis veniret, ut hoc in fœnarium suum duceret, exterius formosum invenit; cum autem bidenti ligno interius tangeret, totum in favilla immutatum invenit, et diem sanctum quem antea celebrare non voluit, postea præ timore contemnere non audebat ». Hæc ibi et alia multa sanctitatem viri sanctissimi declarantia miracula subjicit, quæ brevitatis causa omittimus.

8. Non est autem prætermittendum, canonizationis sanctorum usum hoc tempore in Ecclesia frequentem reperiri. Nam Petrus Damiani, in Epistola ad Henricum Ravennatem episcopum, hæc habet de pluribus, qui tunc florere sanctis episcopis ²: « Nostra quippe ætate, inquit, beati viri videlicet Romualdus Camerinensis, Amicus Ramibonensis, Guido Pompesianus, Firmanus Firmensis et quam plures alii, sanctæ conversationis studio floruerunt, super quorum videlicet veneranda cadavera, ex sacerdotalis Concilii auctoritate, sacra sunt altaria erecta, ubi nimirum divina mysteria, miraculis exigentibus offeruntur ». Et paulo post meminit de beato Arduino presbytero huius temporibus miraculis claro. Concedere autem licentiam ex synodali decreto, ut supra corpus defuncti erigeretur altare, hoc ipsum erat inter sanctos annumerare, ut anniversaria memoria de eis agi posset, quod idem narrat de sancto Romualdo Ravennate. in fine Vitæ ipsius, Quod rursum ad sanctum Udalricum in Album sanctorum pontificia auctoritate relatum pertinet, hic ad postremum per brevem subjiciemus Epistolam Gregorii papæ Septimi ³, qua humiliti voto petenti patriarchæ Aquileiensi concedit, ut in die natalis

¹ Matth. x.

² Mirac. S. Udalrici c. 27. — ³ Pet. Dam. Ep. xvi. c. 29. — Greg. I. vi. Ep. xxxviii.

sancti Udalrici, et sanctæ Afræ ejusdem Augustanæ Ecclesiæ patronæ, pallio uti posset, ut innotescat quam celebris esset cultus ejusdem sancti. Sic enim se habet :

« Gregorius episcopus, servus servorum Dei, Henrico charissimo in Christo fratri et coepiscopo Aquileiensi, salutem et Apostolicam benedictionem.

9. « Tuæ dilectio fraternitatis per legatum suum humiliter exoravit, quatenus sibi præter eas solemnitates, quæ in Privilegio Ecclesiæ vestræ continentur, in beati Udalrici confessoris Christi atque pontificis, sed et in beatæ Afræ martyris festivitibus, usum pallii concederemus. Cujus Ecclesiastici honoris excellentia, sicut pravis et inobedientibus juste denegatur, ita bonis et honestate præditis Apostolica moderatione pro meritis quandoque supereroganda fore videtur. Proinde quia te sinceræ dilectionis erga nos affectum habere confidimus, quia legatos nostros, Albanensem videlicet episcopum et Paduensem, benigne tractasse et fideliter (sicut oportuit) adjuvisse dignosceris, postremo quia pro componenda pace multum desudasse probaris, petitionem tuam libenter accepimus. Hujus igitur tibi præcepti auctoritate concedimus, ut in solemnibus beati Udalrici confessoris atque pontificis, et beatæ Afræ martyris, in missarum celebritate pallio utendi licentiam habeas; quod tamen tibi in tua vita, non loco tuo concessum esse cognoscas. Datum Romæ, decimo sexto kal. Julii, Indictione secunda ».

10. Hoc eodem anno (ut Glaber Rodolphus est auctor) cum admirandæ flammæ eruptiones e monte Vesuvio contigissent, crebra quoque per diversas provincias civitatum incendia prodigiosaque configere, cum et Romana conflagrante Urbe, Basilica Vaticana incendi cœpta divinitus est liberata. Sed audi Glabrum ipsum hujus temporis scriptorem : « Contigit, inquit, interea pæne universas Italiæ et Galliæ civitates ignium incendiis devastari, ipsamque Urbem Romanam ex parte maxima igne cremari : quod dum fieret, B. Petri Ecclesiæ tigna idem ignis arripuit, cœpitque sub

æreo tabulatu consumendo lambere ligna : quod cernens universa hominum multitudo quæ aderat, nullam omnino compescendæ cladis artem repiciens, conversi unanimi voce clamantes terribili, ad ipsius Apostolorum principis cucurrere Confessionem, eum imprecantes, si non pervigil propriæ foret ad præsens defensor Ecclesiæ, multos in orbe terrarum a suæ fidei professione decedere. Statim vero vorax flamma abiernas deserens trabes, disparuit ». Hæc Glaber, septimo ante millesimum anno.

11. *Obitus Maioli abbatis Cluniacensis.* — Quo etiam anno (ut mox subjicit) sanctus Maiolus abbas Cluniacensis, admirandæ sanctitatis vir, ex hac vita migravit. Testatur hoc ipsum Sigebertus in Chronico et alii plerique; contigit aulem tunc, cum idem sanctus Maiolus ¹ vocatus esset ab Ilugone rege Francorum Parisios; qua autem occasione Odilo ejus successor sic narrat² : « Hugo quoque Gallorum rex, quoties illum vidit, humiliter ac devote suscepit eum, et valde honorifice tractavit, idemque quodam tempore rogavit eum, ut ad ipsum veniret, idque eo animo, ut sancti Dionysii monasterium ejus consilio et ope rectius posset constitui; non recusavit vir sanctus, iterque lætus suscepit, regiæ obsecundans voluntati; sed cum Silviniacum pervenisset, Deo vocante, plenus dierum et sanctitatis ex hac vita migravit, quinto idus Maii, sexta feria illucescente post sacratissimam solemnitatem, qua Christus ascendit in cælum, et fidei servo suo Maiolo post se scandendi viam ostendit ». Hæc ipse, qui plurima narrat quibus egregia viri sanctitas innotescit; sed et crebra miracula ad seputchrum ejus fieri solita, revera in cælum scandisse monstrarunt. In locum autem ejus, communi consensu Cluniacensium monachorum, subrogatus est idem qui supra S. Odilo ejus discipulus, quem idem sanctus vivens successorem sibi delegerat. Tenuit ejus regimen annos quinquaginta sex, ut Petrus Damiani testatur, qui Vitam ejus conscripsit. Sed de Odilone alias.

¹ Sigeb. in Chron. — ² Extat apud Sur. die 11 Maii tom. III.

Anno periodi Græco-Romanæ 6486. — Anno Æræ Hispan. 1031. — Anno Hæziræ 383, inchoato die 26 Febr., Fer. 7. — Jesu Christi 993.

— Joannis XV papæ 9. — Ottonis III reg. 11. Basil. et Const. impp. 18.

1. *S. Udalricus a Joanne XV canonizatur.* —

A num. 1 ad 18. Joannes XV *S. Udalricum* episcopum Augustensem hoc anno canonizavit, ut patet ex ejus Diplomate a Baronio recitato, in cujus fine habetur : « Data tertio kal. Februarias (legendum tertio nonas Februar.) per manum Joannis episcopi sanctæ Nephessinæ Ecclesiæ, et bibliothecarii sanctæ Sedis Apostolicæ, anno Pontificatus domini nostri Joannis sanctissimi XV papæ octavo, mense dicto, et Indictione sexta », quæ hoc anno usque ad kal. Septemb. Romæ in cursu fuit. Ratio cur *III nonas* legendum sit, ex ipsomet Rescripto Apostolico deducitur, in quo habetur *pridie kal. Februarias* Pontificem Synodum Romæ congregasse, ut libellus de Vita et miraculis Udalrici recitaretur. Si enim Synodus mensis Januarii die ultima congregata fuit, die antecedenti canonizatio fieri non potuit. Ex hac subscriptione intelligimus primo, hunc Pontificem semetipsum *Joannem* ordine XV appellasse, ideoque *Joannem*, *Roberti* filium, qui eum præcessit, pro vero Pontifice non agnovisse. Secundo, eum an. DCCLXXXV ante finem mensis Januarii Pontificatum adeptum esse, et annum illum Pontificatus octavum ab anno antecedenti, juxta ea quæ ibidem in medium adduximus, proficisci.

2. *Forma canonizationis.* — Existimavit Baronius jam tempore *Leonis papæ III* solemnes sanctorum canonizationes in usu fuisse, quam opinionem vulgarem nostra tandem ætate viri eruditi sustinere non posse ostenderunt, ut suo loco vidimus. Primum itaque exemplum, de quo controversia esse non possit, hoc anno tantum nobis occurrit; cumque Mabillonius in Præfatione Sæc. v Benedict. num. 99 et seqq. quæstionem hanc enodaverit, quæ de ea in medium adduxit hic referam : « Primum, inquit, indubitata fidei monumentum de solemni per Romanum Pontificem canonizatione, invenimus Diploma Joannis XV, qui in frequenti episcoporum conventu, ad preces *Litulfi* episcopi Augustani, *Udalricum* ejusdem Ecclesiæ episcopum in sanctorum Album retulit an. DCCLXXXV » (legendum, DCCLXXXIII, isque error typographo attributus, cum ipsemet Mabillonius Bullam integram Joannis XV in eo sæculo exhibuerit). Joannis litteras damus integras in fine Vitæ sancti Udalrici :

sed fragmentum hoc adducere juvat ad probandam canonizationis formam : « Cum conventus esset factus in palatio Lateranensi, pridie kalendas Februarias, residente Joanne sanctissimo papa cum episcopis, presbyteris, et adstantibus diaconibus et cuncto clero, surgens reverentissimus Liutolfus Augustæ episcopus, inquit : Domine sanctissime præsul, si vobis placet, et omnibus episcopis et presbyteris hic residentibus, libellus, quem præ manibus habeo, coram vobis legatur de Vita et miraculis venerabilis Udalrici, sanctæ Augustanæ Ecclesiæ dudum episcopi, et quid libitum fuerit vobis, decernatur. Iis perfectis, sanxit Pontifex, quatenus memoria Udalrici jam præfati venerabilis episcopi, divino cultui dicata existat, et in laudibus Dei diutissime persolvendis semper valeat proficere. Id vero a Liutolfo ea ratione factum existimamus, ut *S. Udalrici* cultus, quem ipse in sola Augustensi Ecclesia instituere poterat, latius propagaretur auctoritate Romani Pontificis : quod alii postea in religionem verterunt.

3. *Canonizationes insigniores ante Alexandrum III factæ.* — In Gallia quidem Richardus Corbeix abbas, *missis ad Joannem XX legatis*, ut scribit Gerardus, Adalhardi abbatis elevationem fieri impetravit anno MXX, quod etiam de Paschasio Radberto concessum est anno MLXXXIII. In Alamania vero, Nortpertus abbas ad Sanctum-Gallum, adminiculante Henrico imp. et conjuge ejus Agnete, hoc obtinuit pud dominum Apostolicum Clementem Secundum, recitata vita beatæ Wiboradæ ejusque miraculis, de tandiu neglecta re ab ipso papa redargutus, quatenus ipsam, præeunte Theodorico Constantiensi episcopo canonizaret, et pro sancta haberi præciperet, et anniversarium ipsius diei solemnizandum institueret, ut scribit Burchardus monachus in cap. 6. Sub hæc Leo IX, anno MLIII, Gerardum Tulli Leucorum episcopum, sanctis adnumerari præcepit, *annuente ac laudante Synodo Lateranensi*, decernens ut ex hoc sanctus haberetur, colereturque IX kal. Maias tam Tulli Leucorum, quam ubique terrarum, sicut cæteri sancti. Litteras Pontificias habes ad calcem hujus libri. *Wolfgangum* item, Ratisponensem antistitem, eodem honore decoravit idem Pontifex, cujus item

permissu elevatum est corpus sancti Bertini; tametsi inter sanctos jam honorati, ut in Sæculo III Benedictino legitur (1).

4. *Aliæ canonizationes.* — « Successit canonizatio *Petri Anagninensis episc.* per Paschalem II, qui compertis ejus pie factis atque miraculis per Brunonem Signiensem episcopum, ejusdem Natali tertio nonas Augusti sanctorum Catalogo congrue celebrem recoli mandavit, anno mcv. (Baronius ad illum annum.) Post quindecim annos *Udalricus* Constantiensis episcopus Vitam cum miraculis sancti Conradi, ejusdem sedis episcopi, litteris mandavit, præmissa Epistola ad Callistum II, in qua dicit se *pro ejusdem Conradi gloria, ut moris est Ecclesiarum, canonizanda*, Sedem Apostolicam crebris interpellasse litteris, idque tandem responsi accepisse: Vitam ejus in Concilio generali recitandam et comprobendam; testes insuper signorum, quæ per eum fiebant seu facta sunt, adhibendos: quod ipse hoc libro præstiterit; ubi observandum quod dicit de more jam recepto consulendi Sedem Apostolicam super sanctorum canonizatione; et de examine quod hac de re in Conciliis generalibus fieri deberet: quod totidem verbis repetit Eugenius III infra. Postea Innocentius II, an. mxxxiv, Ilugonem Gratianopolitanum, cognita vita ejus, et auditis quæ per eum fiebant miraculis, archiepiscoporum, episcoporum et cardinalium, atque aliorum communicato consilio, ipsum inter sanctos et electos honorari præcepit, et diem assumptionis ejus solemniter celebrari (Bollandus, tom. I April. pag. 37). Idem Pontifex audita Vita laudabili beati Sturmii abbatis Fuldenensis, cognitis etiam ex parte miraculis ejus, attestatione episcoporum qui de partibus Teutonicis advenierant, in plenaria Synodo apud Lateranum congregata, communicato consilio patriarcharum, archiepiscoporum, episcoporum, atque abbatum, eundem beatum virum inter sanctos et electos honorari præcepit, et diem depositionis ejus cum gaudio solemniter celebrari (Sæc. III Benedict. part. 2, pag. 285.) de Henrico I imperatore extant apud Gretzerum (de divis Bamberg. pag. 63) Eu-

genii III litteræ, qui canonicorum Bambergensium petitionibus (tametsi hujusmodi petitio, nisi in GENERALIBUS CONCILIIS admitti non solet) auctoritati tamen S. R. E. acquiescens, archiepiscoporum et episcoporum, qui præsentibus aderant, communicato consilio, Henrici memoriam inter sanctos de cætero fieri, et anniversarium ipsius diem solemniter celebrari constituit an. mclm. Hæ sunt insigniores canonizationes a Romanis Pontificibus factæ ante Alexandrum III, qui earum potestatem sibi suisque successoribus reservavit primus, et post eum Innocentius III, quo ex tempore ab episcopis nulla celebrata legitur.

5. *Antiquus mos a metropolitanis retentus usque ad Alexandrum III.* — « Per illud autem intervallum temporis, nempe a sæculo x, quo Pontifices Romani suam in sanctis canonizandis auctoritatem interposuere, ad *Alexandrum III* nihilominus metropolitani antiquum morem quodammodo retinuerunt, tum annuendo simul cum papa sanctorum elevationi et canonizationi, tum etiam sola sua auctoritate utrumque pro sua Ecclesia præstando. Unde invento corpore sancti Bertini (Sæc. III Benedict. part. 1, pag. 154) cum *Bozo* abbas Sithiensis, consulto proprio episcopo, de hac inventione et de scribendo super ea libello certorem fecisset *Widonem* Rhemensem antistitem, is mandavit, ut cum hæc descripta essent, sibi referrentur; iisque relatis præcepit, ut *sancti Bertini* corpus levaretur, uti *Leo IX* annuerat (ibidem pag. 163.) Idem contigisse puto erga sanctum *Angilbertum*, cujus Vita et miracula ab *Anshero* abbate ad *Radulfum* Rhemorum antistitem directæ sunt (Sæc. IV Benedict. part. 1, pag. 123 et 130). Quid actum sit in elevatione corporis *S. Guiberti* fundatoris Gemblacensis, docet relatio a nobis edita suo loco (Sæc. V Benedict. p. 311) nempe an. mxcix. *Sigebertus* monachus, obtenta abbatis sui facultate, rem ad *Othbertum* Leodiensem episcopum refert. Deinde ab *Henrico* archidiacono causa defertur *Frederico*, Coloniensium archiepiscopo, qui in Synodo generali negotio discusso, tandem postulatis annuit: ubi *Synodi generalis* nomine intelligitur

(1) Inter canonizationes sanctorum antiquissimas, merito referenda est consecratio Simeonis cujusdam viri sancti et reclusi, qui e Jerosolyma Trevirum migraverat, qua de re auctor Gestorum archiepiscoporum Trevirensium, vulgatus a P. Martene Vet. monum. tom. IV, col. 165, etc. Exhibet ille litteras Popponis archiepiscopi Trevirensis, scriptas altero anno ab obitu Joannis XIX ad Benedictum IX, nempe anno mxxxiv, quibus subditorum suorum nomine rogat Pontificem, ut dato *sui Apostolatus decreto*, nomen Simeonis liceat cum sanctorum nominibus scribi, cujus rei gratia mittit ad illum *sancti viri Vitam et miracula*. Rescripsit statim Pontifex se *auctoritate Apostolica et complurium fratrum suorum assensu* decrevisse, ut Simeon ille *posthac semper et ubique sanctus deberet* nominari, ejusque natalem diem singulis annis celebrari.

Sed et hoc de adscriptis in Ecclesiæ Albo per hæc tempora argumentum, maxime illustrat Historia sollemnis translationis corporis S. Adalberti primi Pragensium episcopi e Gnesna Pragæ, cujus et Pagius ad A. mxxxvi, 4, ex Cusma Pragensi memorat. Porro sollemnem sanctorum lipsanum (λεψάνων) translationem, unicum esse ritum, quo sancti per hæc tempora canonizabantur, ex Mabillonio et Pagio certum est. Igitur Cosmas Pragensis, qui cum ad annum usque mxxv vitam produxerit (qua de re in Nota ad A. mxxxvi 4 agemus), res ab ætate sua non plane remotas compertas habere poterat, narrat sollemnem illam translationem habitam fuisse vel kal. Septembris, ut habent Codices editi, vel VIII kal. Septembris, ut legit Ms. Codex, cujus varias lectiones dedit Meuschenius Ber. German. Script. tom. III, col. 1790. Hujus vero rei fama, ait Cosmas, cum ad Pontificem Romanum (Benedictum scilicet) pervenisset, tulit moleste, pessimum id exemplum præberi ratus *jura Apostolicæ Sedis violandi*. Quod cur timeret Benedictus, nulla alia succurrit ratio, nisi quod sollemni illa translatione cultus publicus, qualis sanctis exhibetur, S. Adalberto decretis videretur; id vero nulli episcopo injussu Romani Pontificis licuit. Ideo, ait Cosmas Concilium a Pontifice indictum fuit, in quo de pœna censurarum episcopo et duci indigenda deliberatum fuisset, nisi missi a Bohemis legati interessissent. Cum enim illi factum excusarent, ignorantiam et doli minime consciam voluntatem prætendentes, culpam, si quæ fuisset, agnoscentes ac deprecantes, Pontifex salubri quadam penitentia injuncta absolvendos censuit. Concilium istud Romanum, quod in collectionibus adhuc desideratur, celebratum credo anno mxxl, cum enim circa Septembrem anni mxxxix, S. Adalberti lipsana Pragæ translata fuerint, ejus rei fama et ex ea Concilium, nisi eo anno exeunte vel sequenti iuente, Romæ L. fieri potuit.

conventus præcipuorum Ecclesiæ Coloniensis sacerdotum aut ejus suffraganeorum. Insignes vero præ cæteris sunt litteræ *Hugonis*, archiepiscopi Rothomagensis, de elevatione *S. Gualterii* abbatis Pontifarensis anno mclm datæ, in quibus archiepiscopus commemorat, invitantibus, imo et cogentibus miraculis, missa super hoc legatione et assensu magnifici Rhemorum archiepiscopi Samsonis, et aliquorum Galliæ Pontificum, Theobaldo Parisiensi, ejusque æquivoco Silvanectensi præsentibus, *S. Gualterii* reliquias a se levatas et translatas fuisse, concessis insuper indulgentiis in eorum gratiam, qui ipsius *B. Gualterii* beneficia implorarent. Apposite ad hunc locum Gerardus, episcopus Camera-censis, in Synodo Attrebatensi ad annum mxxv, cap. 2, ubi relato sancti Martini facto in falsum martyrem, hæc subdit: In talibus igitur locis, si quid huic simile evenierit, de quo majorum memoria nihil certum ferat, interdiciant sanctificationes, ne ritu (sic legendus hic locus mendosus in editis) Gentilium fana idolorum antiquitus constructa pro sacris venerentur; neve sepultis temere divina solvantur, nisi per provincialem episcopum vita sepulti examinetur, si secundum Evangelium fuit.

6. *Alexander III canonizationes SS. Sedi Apostolicæ reservavit.* — « Itaque a sæculo x, inquisitio de piorum meritis et miraculis facta est tum per Romanos Pontifices, tum per episcopos et archiepiscopos: et visis scriptis, datum Diploma Pontificium ad eorum sanctitatem solemniter declarandam. Jam vero *Alexander III* id, tanquam unam ex majoribus causis ad Romanum Pontificem pertinere edixit. Is pios complures vita functos hoc honoris titulo affectit, *Eduardum* Angliæ regem anno mclxi, itemque *Theobaldum* eremitam Vicentinum, *Thomam* Cantuariensem archiepiscopum anno mclxxii, et post biennium, *Bernardum* abbatem Claravallensem, qui primus Cisterciensium solemniter hoc more in sanctorum Album relatus est.

7. *In ea adhibiti certi ritus.* — « Ab eo tempore certi ritus ad eam celebritatem adhibiti sunt: quorum specimen in canonizatione *Bernwardi*, episcopi Hildensheimensis, legere licet (Brouverus Sydera German. pag. 57 et seqq.) alia formula recentior extat apud Spelmannum in tomo ii Angliæ Conciliorum (pag. 713, et apud Jacob de Graffis Decis. aur. part. 2, l. 2, cap. 13.) Varias varii postea tradiderunt auctores, Jacobus Castellanus, Angelus Rocca, et alii, quos omnes uno volumine majori Carolus Felix de Matta suo modo complexus est anno mdcclxxviii. Gravissime Gregorius IX in Bulla pro canonizatione sancti Antonii de Padua. « Ad hoc ut sanctus habeatur apud homines in Ecclesia militante, duo sunt necessaria, virtus morum, et veritas signorum, merita videlicet et miracula, ut hæc et illa sibi invicem contestentur: cum nec merita sine miraculis, nec miracula sine meritis pæne sufficiant ad perhibendum inter homines testimo-

nium sanctitatis ». Hæc Mabillonius. Legenda etiam Dissertatio xx Papebrocii in Conatu Chronico-Historico de solemnium canonizationum initiis atque progressibus.

8. *Moritur S. Maiolus abbas Cluniaci.* — Ad num. 10 et seq. Glaber lib. 2, cap. 7, refert, « septimo de millesimo anno » Vesuvium montem evomuisse » igne permixtam sulphureo, grandium saxorum multitudinem », et contigisse « interea pæne universas Italiæ et Galliæ civitates ignium incendiis devastari, ipsamque urbem Romam ex parte maxima igne cremari ». Per idem tempus obisse in Italia et in Galliis præcipuos pontifices et duces, inter quos numerat *Joannem papam* et *sanctum Maiolum* Cluniacensem abbatem. Verum cum Joannes XV papa anno tantum dcccxcvi vivere desierit, præter id quod habet de Vesuvio Glaber, cætera circa hæc tempora contigere. Maiolum vero anno tantum sequenti spiritum Deo reddidisse, certis temporum notis demonstrat sanctus Odilo in ejus Vita: « Plenus dierum et sanctitatis ex hac vita obiit V idus Maii, illucescente feria sexta, post celebrationem ipsius sacratissimæ solemnitalis, qua Christus Jesus Dominus noster, subacto mortis principe, ad dexteram Patris ascendit, ideoque anno dcccxciv, quo feria sexta post Ascensionem Domini in diem xi Maii incidit, qui sancto Maiolo sacer est. Hunc diem et annum Nalgodus monachus, qui etiam sancti Maioli vitam scripsit, diserte exprimit, eique annos xli adseribit, ab anno suæ ordinationis. Maiolus cum senectute jam grandævus obitum suum præsentisceret, *Odilonem* sibi substituendum curavit. Electionis instrumentum editum tom. vi Spicilegii, eaque anno nongentesimo nongesimo secundo aut tertio peracta, non vero anno dcccxc, ut perperam Mabillonius Sæc. v Benedict. in Elôgio Historico sancti Maioli, num. 51, quod ex dicendis in morte *S. Odilonis* manifestum fiet. Recte autem notat vir eruditissimus, ideo Cluniacenses abbates sibi successorem eligere solitos fuisse, ut hoc pacto extraneis intrudendi abbatis via præcluderetur. Præcipui *Maioli* discipuli videre *Odilo* ejus successor, et *Wilhelmus* abbas Divionensis, qui multa monasteria ad meliorem frugem revocavit. Priores Vitæ ejus scriptores Syrus et Aldebal-dus, qui conjunctis studiis eam condidere, eique cœvi fuere; tum *sanctus Odilo*; et postremus omnium *Nalgodus*, Cluniacensis monachus, ut videre est apud Mabillonium laudatum. De his etiam et *sancti Maioli* Vita legenda Acta SS. Bollandiana ad diem xi mensis Maii.

9. *Moritur Conradus rex Burgundiæ.* — Hermannus Contractus ex editione Canisiana ad annum dcccxciv, ait: « Conrado rege Burgundiæ mortuo et apud sanctum Mauritium sepulto, Rodolfus filius licet ignavus, regium ibi nomen per annos circiter xxxviii occupavit: sub quo cessante jure, violentia et rapinæ in illo regno, ut non facile propelli possint, adolevere, ibique, ut hodie apparet, cum suis complicibus regnum obtinuerunt », scilicet illarum

rapinarum auctores. Verum Conradum Burgundiæ Transjuranæ regem hoc anno obiisse, et *Rodulfum III* ejus filium eodem anno illi successisse, demonstrat Charta, a Chiffletio in Probationibus Historiæ Trenorciensis pag. 297 relata. Ea enim hac subscriptione munita : « Ego Rothaldus monachus scripsi, datavi die sabbati, VIII kalendas Decembris, anno II regnante Rodulfo rege ». Quare hoc anno Conradus Rodulfi pater obierat; cum Charta illa anno sequenti, quo sabbatum incidit, in diem XXIV mensis Novembris data sit, ut optime Chiffletius explicat. Guichenonus in Bibliotheca Sebusiana cap. 5, refert donationem factam monasterio Agaunensi a Rodolfo Burgundiæ rege, scriptam « anno Incarnat. Domini DCXCII, regni vero domini regis I, prid. kal. April. » Quare Rodulfus III jam mense Aprili currentis anni patri successerat.

10. *Dani Angliam deprædantur.* — *Dani*, qui

superioribus annis maritima *Angliæ* loca tantum deprædati fuerant, et festini discesserant, nunc *Northumbriam* ingressi Angliæ mediterranea ferro et flamma vastarunt : « Contra quos », inquit Hovedenus ad hunc Christi annum, « Provinciales quamplures conglobati, properanter ascenderunt : sed cum prælium essent commissuri, duces exercitus Frana videlicet, Fitegistus, et Godwinus, quia ex paterno genere Dani fuerunt, suis insidiantes, auctores fugæ primitus extiterunt ». Hæc certissima, ait Alfordus ad hunc Christi annum, captivitatis Anglicæ et Danicæ dominationis causa ; nimia Anglici sanguinis cum Danico mixtio : unde mixtos mores, dubiamque in publicam rem fidem nasci necessum fuit. Danorum incursu territi fideles de sanctorum reliquiis ubique solliciti fuere, liquetque ex Ingulpho pag. 890, corpus *sancti Neoti* alio tunc fuisse translatum.

JOANNIS XV ANNUS 10. — CHRISTI 994.

1. *Legatio Hugonis regis Francorum ad papam pro rebus Rhemensibus.* — Sequitur annus nongentesimus nonagesimus quartus, Indictione septima, quo Hugo rex Francorum legationem iterum misit ad Joannem Pontificem : quem cum alia ad eum antea missa minime placare valuisset, præsentī iterata, invilat eum in Gallias ad componendas discordias Rhemensis Ecclesiæ. Cum enim audisset idem Hugo ipsum Pontificem vehementer esse commotum ob ejectionem et carcerem Arnulphi Rhemensis episcopi, quod legatione et litteris synodalibus, ut dictum est, significaverat, eum ut placaret, legationem hanc adjecit ; atque ad ipsum has litteras dedit :

2. « Hugo rex papæ Joanni ¹.

« Beatitudini vestræ ego et episcopi mei per Joannem, archidiaconum Rhemensis Ecclesiæ, scripta direximus, in quibus Arnulphi rationes vobis explanavimus. Sed nunc obsecrando superaddimus, ut mihi meisque justa decernatis, nec dubia pro certis recipiatis. Nihil nos contra Apostolatum vestrum

gessisse scimus : quod si absenlibus non satis creditis, præsentibus vera cognoscite. Gratianopolis civitas in confinio Italiæ et Galliæ sita est, ad quam Romani Pontifices Francorum regibus occurrere soliti fuerunt. Hoc si vobis placet iterare, possibile est. At si nos et nostra invisere libet, summo cum honore descendente de Alpibus excipiemus, morantem hac redeuntem debitis obsequiis prosequemur. Hoc ex integro effectu dicimus, ut intelligatis et cognoscatis, nos et nostros vestra nolle declinare judicia. Petimus itaque ut Joannis archidiaconi legationem benigne suscipiatis ; et dum quod petit obtinuerit, nos in suo adventu efficiat lætos, et in vestro obsequio ferventissimos ». Hactenus novi regis Francorum ad Pontificem Romanum Epistola, qua erga Apostolicam Sedem consuetam Francorum regum propensionem significat, cujus se suosque judicio subjicit, quod non solum verbis, sed rebus præstitit, passus quæcumque in causa Arnulphi fuissent synodalia decreta definita, irrita ab eo reddi atque penitus aboleri, ut ea quæ anno sequenti dicentur ostendent.

¹ Apud Mason. l. III. Annal. Franc.

His acceptis Joannes papa a rege Francorum litteris, quid rescripserit, ignoratur: certum tamen est ipsum in Gallias non esse profectum, misisse autem anno sequenti legatum delectum ad munus,

virum sanctissimum, abbatem monasterii sancti Bonifacii in Urbe, Leonem nomine. Quæ autem per eum gesta sint, anno sequenti suo loco dicentur.

Anno periodi Græco-Romanæ 6487. — Anno Æræ Hispan. 1032. — Anno Hegiræ 384, inchoato die 15 Febr., Fer. 5. — Jesu Christi 994.

— Joannis XV papæ 10. — Ottonis III reg. 12, Basil. et Const. imp. 19.

1. *Legatus ad Joan. XV missus in favorem Gerberti.* — Ad num. 1 et 2. Cum episcopos, qui anno dcccxi in Arnulfi archiep. Rhemensis causa iudices sederant, Joannes papa XV a sacris abstinendos jussisset, Rhemensis Ecclesiæ archidiaconus Hugonis regis et episcoporum nomine missus est, qui scripta Apologetica pro Synodo, et Hugonis regis Pontificem ad colloquium Gratianopoli habendum invitantis Epistolam secum detulit. Regis Epistolam sine temporis caractere datam recitat Baronius, et Pontifex anno sequenti legatum in Gallias misit, ut ibi videbimus. Inter Epistolas Gerberti, a Duchesnio ex exemplari Sirmondi editas, trigesima octava ad Joannem papam data, cujus tenor est: « Sanctissimo vestro Apostolatu potuisse subripi me cujuspian pervasionis reum videri, dolore vehementi afficio, et totis visceribus ingemisco. Eo quippe animo in Ecclesia Dei hactenus versatus sum, ut multis profuerim, neminem læserim. Non ergo Arnulfi peccata prodidi, sed publice peccantem reliqui; non spe, ut mei æmuli dicunt, cape-scendi ejus honoris, testis est Deus et qui me noverunt, sed ne communicarem peccatis alienis ».

2. *Moritur S. Wolfgangus episc. Ratisponensis.* — Sanctus Wolfgangus, vulgo Wolfgangus appellatus, episcopus Ratisponensis, die trigesima prima mensis Octobris currentis Christi anni in pace quievit. Diem notavit auctor anonymus, qui ei familiaris fuit, ejusque Vitam sæc. v Benedict. recitatam elucubravit. Annum vero Lambertus Schafnaburgensis et auctor brevium Annalium Einsidlensium a Mabillonio tom. iv Analect. publicatus, Baronius in Notis ad Martyrologium Romanum ad diem xxxi Octob., usque in annum dcccxcix ejus mortem perperam distulit. Fuit in ordine Pontificum Ratisponensium duodecimus, ut in eadem Vita cap. 39 legitur, ideoque Hundius male eum tertiumdecimum facit. Ex eo vero quod hic auctor coætaneus testetur, Wolfgangum Ratisponensis Ecclesiæ episcopum ordine duodecimum fuisse, perspicuum sit, incertum poetam, qui ver-

sus composuit de Ordine Comprovincialium Pontificum archiepiscopo Saltzburgensi subditorum, a Mabillonio tom. iv Analect. pag. 523 editos, recte Wicterpum nominasse primum episcopum Ratisponensem, et in successione episcoporum enarranda accuratissimum fuisse. Sanctus Otmarus Wolfango per visum apparens ei episcopatum prædixit, ut in ejus Vita cap. 12 legitur, atque Otmarus: « Cujus in administratione, si fidelem te exhibueris, expletis viginti duobus annis, vitam transitoriam eris exiturus et æternam ingressurus ». Quare ejus episcopatus initium cum an. dcdlxxii exacte a nobis copulatum. « Per multa tempora consuetudo fuit in Ratisponensi Ecclesia, ut qui antistites, iidem essent et abbates ». Quo pacto monasterii bona distrahebantur, nec monachis necessaria providebantur. Quæ sanctus Præsul emendare volens, « quemdam in regulari disciplina strenuum, nomine Romualdum » advocavit, et abbatem in sancti Emmerammi cœnobio ordinavit, inquit auctor Vitæ ejus, apud quem plura de ejus laboribus ac virtutibus.

3. *Moritur S. Gerardus episc. Tullensis.* — Mortuus est hoc anno sanctus Gerardus episcopus Tullensis ad Mosellam, die nono kalendas Maias, paulo ante sanctum Maiolum abbatem Cluniacensem, postquam annos triginta et unum, hebdomadas tres et dies tres, Ecclesiam illam gloriose rexisset, ut tradit Vindricus abbas monasterii sancti Apri, qui medio sæculo sequenti vixit, in ejus Vita ab Henschenio ad diem xxiii Aprilis primum edita. Ecclesia Tullensis pastore orbata, sanctus Bruno Coloniensis archiepiscopus, « qui in tota Germania sibi que finitimis partibus imperiales agebat vices, utpote magni Ottonis Augusti germanus frater », eum invitum ad episcopatum Tullensem assumpsit, ideoque « dum annus Incarnat. Dominicæ nongentesimus sexagesimus tertius curreret », præ-sulari sedi inthronizatus est. Summum ei fuit studium in sanctarum reparatione Ecclesiarum et sacrarum reliquiarum indagatione. Præcipue pau-

perum curam gessit, eisque semper farge subvenit; cumque duo ex potentioribus in plebe multa perpetrare cœpissent gravia ac pessima, rapinas scilicet injustitiasque in pauperes exercendo, postquam eos diutissime patienti sustinuit animo, tandem more legali, terribilis anathematis coarctavit vinculo. Hi armata manu eum invasere, sed « non modo a beato præsule denuo excommunicantur, imo a cunctis Gallicanis Pontificibus, ab ipso quoque domno Apostolico, de sorte Ecclesiæ eliminantur », inquit auctor Vitæ ejus. Leo IX anno ML eum in numerum sanctorum retulit, ut ibidem dicemus.

4. *Sveno Daniæ rex vastata Anglia redit in Daniam.* — Est hic annus decimus quartus a primo *Svenonis* Danorum principis in Angliam adventu, ab anno DCCLXX deductus, quo is Scotiam relinquens quo secesserat, ut eo Christi anno docuimus, in Angliam rediit, postquam in Scotia annos quatuordecim exul mansisset. Intellecto enim *Ericum* qui Daniam occuparat obiisse, in eam regressus est, ulta tamen antea hoc an. injuria, quam an. DCCLXXX ab Anglis se accepisse credebatur: « Anno gratiæ », inquit Florilegus, « non-gentesimo nonagesimo quarto, Swanus rex Danorum, et Aulafus rex Norwegensium, in die Nativitatis beatæ Mariæ cum cognobus (navigii genus sunt) nonaginta quatuor, Londonias advebuntur: quam mox acriter invadentes, eam subjugare disponent. Sed a civibus cum magno suorum detrimento repulsi, ad East-Sexiæ, Cantia Suthsexiæ, Suthamtoniæ provincias, furorem suum convertentes, eas spoliaverunt, et cæsis populis graviter contriverunt ». Cum intermes provincias *Aulafus* seu *Anlafus*, vel *Anlafus* et *Sveno* misere vexarent, Ethelredus Angliæ rex civium saluti consulturus, pacem iterum a Danis emere coactus est, et inter pacis fœdera Anlafus Christianam fidem suscipit? « Tunc rex », inquit Hovedennus ad hunc Christi annum, « procerum suorum consilio, ad eos legatos misit, promittens tributum et stipendium ea conditione illis se daturum, ut a crudelitatem omnino desisterent. Qui petitioni regis acquiescentes ad suas reversi sunt naves: et sic ad Suthantum totus congregatus exercitus ibidem hiemarunt. Quibus de tota West-Saxonia stipendium dabatur: de tota vero Auglia tributum, quod erat sexdecim librarum (melius annalista Mailrosensis XVI M. librarum) dependebatur. Interea jussu regis Egelredi, Wintoniensis episcopus Elfegus, nobilisque dux Ethelwaldus, regem Anlafum adierunt: obsidibusque datis, illum ad Regiam villam Andea-faran,

ubi rex manebat, cum honore deduxerunt. Quem rex honorifice suscepit et confirmari ab episcopo fecit, sibi in filium adoptavit, et regio munere donavit. Ille vero, se non amplius ad Angliam cum exercitu venturum, regi Egelredo promisit; et post hæc ad naves rediit. Æstate quoque imminente, ad patriam devectus sua promissa bene custodivit ».

5. *Relicta idololatria fit Christianus.* — Interim *Sveno* præda onustus et provinciarum spoliis, in patriam reversus, mortuo *Erico*, Daniæ regnum hoc anno, qui exilii ejus decimus quartus numerat, accepit: « Post mortem diu optatam Herici », inquit Adamus lib 2, cap. 28, « Sven ab exilio regressus, obtinuit regnum patrum suorum, anno depulsionis suæ et peregrinationis decimo quarto: et accepit uxorem Herici relictam, matrem Olaph sive Olavi (qui erat rex Sueonum Christianissimus) quæ peperit ei Chnut (est is Canutus, qui postea rex Angliæ fuit). « Sed nihil profuit ei affinitas connubii, cui Deus iratus est. Olaph rex Sueonum Christianissimus erat, filiamque Slavorum Estred accepit uxorem. Hic qui post obitum patris Herici regnum super Suecos accepit, cum exercitu superveniens, infelicem Sven regno expulit, et ipse obtinuit Daniam. Cognovit autem Sven, quod Dominus ipse est Deus, et reversus in semetipsum peccata sua præ oculis habuit: pœnitensque oravit ad Dominum, qui exaudivit eum, et dedit illi gratiam in conspectu inimicorum: et restituit eum Olaph in regnum suum: feceruntque pactum firmissimum, ut Christianitatem in regno suo plantatam retinerent, et in exteras effunderent nationes ». Quæ Baronius anno DCCLXXX, num. 15 recitat, et *Sveoni* omnia prospere postea successisse ostendit.

6. *Synodus Romana.* — *Sanctus Adalbertus* Pragensis episcopus, relictæ Roma, hoc anno iterum Pragam rediit, uti anno DCCLXXXIX Baronii ordinem sequentes ostendimus. Quare quæ ibidem de hoc reditu et de Synodo Romæ celebrata diximus, huc revocanda, tom. IX Concil. pagina. 732, idem Concilium Romanum male cum anno DCCLXXXIX etiam copulatur, qui error in altera Conciliorum editione emendandus erit.

7. *Matera a Saracenis capta.* — Lupus protospata in Chronico habet: « Anno DCXCIV, obsessa est Matera a Saracenis tribus mensibus, et quarto capta ab eis ». Matera, S. Polyeucto patriarchatum Constantinop. adminislrante, facta fuerat episcopalis, tandemque Acheruntia sedi archiepiscopali unita fuit. Utraque autem deficit in dies, priorque nunc in provincia Hidruntina continetur, posterior in Basilicata.

JOANNIS XV ANNUS 15. — CHRISTI 995.

1. *Concilium Rhemense, præsentē Leone legato pontificio, in quo restituitur Arnulphus, expulso Gerberto.* — Annus sequitur Redemptoris nongentesimus nonagesimus quintus, Indictione octava, quo a Joanne papa misso legato Leone abbate in Gallias, duabus habitis Synodis, restituit Arnulphum Rhemensem episcopum in sedem suam. Quomodo autem ista se habuerint, ex auctoribus illius temporis, qua exploratior veritas habeatur, petenda sunt, atque primum ex scriptis Gerberti, qui eam ex ipsis historiam texuit Papirius Maso¹, ipsique immerito favet; hæc ait: « Joannes papa in Galliam non venit, ac illi satis fuit, legatum mittere Leonem Romæ in monasterio Sancti-Bonifacii abbatem, a quo Synodus Mosomi habita est, anno nongentesimo nonagesimo quinto, Indictione octava, quarto nonas Junii. Mosomum est oppidum Belgicæ, Rhemensi metropoli subjectum, hodieque priscum nomen retinens. Gerbertus, qui exauctorato Arnulpho suffectus in ejus locum fuerat, patientissime auditus est. Inter cætera dixit, Arnulphum conventum et commonitum litteris a legatis episcoporum Gallicæ, ut a cæpto furore desisteret, et si valeret, quoquo modo se a proditiōis scelere purgaret: dum monita salubria contempsit, habitum esse tanquam publicanum, exclusumque a Rhemensi Ecclesia, sibi vero reluctanti onus sacerdotii sub divini nominis obtestatione impositum. Cum orationem suam Leoni scriptam porrexisset, ipse Leo aliam Synodum kal. Julii Rhemis habendam denuntiat. Interim monachum suum idem legatus ad reges Francorum duci jubet, et per episcopos Gerberto mandat, ut a divino officio usque ad denuntiatam Synodum abstineat ». Hucusque ipse. Extat autem ipsa oratio apologetica in hac Synodo a Gerberto habita, quæ sic se habet:

2. « Oratio Gerberti archiepiscopi, habita in Concilio Mosomensi.

« Semper quidem, reverendissimi Patres, hunc diem præ oculis habui, spe ac voto ad eum intendi, ex quo a fratribus meis admonitus, onus hoc sacerdotii non sine periculo capitis mei subit.

Tanta erat apud me pereuntis populi salus, tanta vestra auctoritas, qua me tutum fore existimabam. Recordabar præteritorum beneficiorum, dulcis atque benevolentiae affabilis vestrae, qua præstantium sæpenumero cum multa laude usus fueram: cum ecce subito contrarius rumor vos offensos insinuat, vitioque dare laborat quod magna paratum virtute inter alios constabat. Horrui, fateor, et quos antea formidabam gladios, præ indignatione vestra posthabui. Nunc quia propitia divinitas coram contulit, quibus salutem meam semper commisi, pauca super innocentia mea referam, et quonam consilio urbi Rhemorum prælatus sim edisseram.

3. « Ego quidem, post obitum divi Ottonis Aug., cum statuissem non discedere a clientela patris mei Adalberonis, ab eodem ignorans ad sacerdotium præelectus sum, atque in ejus discessu ad Dominum, coram illustribus viris futurus pastor Ecclesiæ designatus. Sed simoniaca hæresis in me petrae soliditatem inveniens repulit, Arnulphum prætulit. Cui autem plusquam oportuit, fidele obsequium exhibui, donec eum per multos et per me apostatare palam intelligens, dato repudii libello, cum omnibus suis apostaticis dereliqui, non spe, non pactione capessendi ejus honoris, ut mei æmuli dicunt, sed monstruosis operibus diaboli virtutis, in effigie hominis latitantis; non ideo, inquam, illum dereliqui, sed ne illud propheticum incurrerem¹: Impio præbes auxilium, et his qui oderunt me amicitia jungeris, et idcirco quidem iram Domini mereberis. Deinde sanctionibus Ecclesiasticis per longa temporum spatia in eum peractis, legeque peremptoria consummata, cum nihil aliud restaret nisi judiciaria potestate principis coerceretur, et tanquam seditiosus et rebellis a principali cathedra removeretur lege Africani Concilii.

4. « Iterum a fratribus meis et regni primoribus conventus et commonitus sum, ut, excluso apostata, curam discissi et dilaniati susciperem populi: quod quidem diu distuli, et postea non satis sponte acquievi, quoniam quæ tormentorum

¹ Maso Annal. Franc. I. 127.

¹ 2. Par. XIX.

genera me comitarentur, omnimodis intellexi. Hæc est viarum mearum simplicitas, hæc innocentiae puritas, et coram Domino et vobis sacerdotibus in his omnibus munda conscientia. Sed ecce ex adverso occurrit calumniator; vocum novitatibus, ut major fiat invidia, obloquitur: Dominum tuum tradidisti, carceri mancipasti, sponsam ejus rapuisti, sedem pervasisti. Itane ego dominum tradidi, cujus nunquam fueram servus, cui etiam nullum sacramenti genus unquam præstitissem? Sed si illi ad tempus famulatus sum, fecit hoc imperium patris mei Adalberonis, qui me in Rhemensi Ecclesia commorari præcepit, quoadusque pontificis mei sacriati mores actusque dignoscerem. Quod dum opperiri, hostium præda factus sum, et quæ vestra munificentia magnorumque ducum largitas clara et præcipua contulerat, violenta prædonum manus abstulit, meque pæne nudum gladios evasisse doluit. Denique postquam illum apostatam dereliqui, vias et itinera illius non observavi, nec quolibet modo ei communicavi: quomodo ergo eum tradidi, qui ubi tunc temporis fuit nescivi? Sed neque eum carceri mancipavi, qui nunc nuper sub præsentia filiorum (fidelium) testium seniorem meum conveni, ut propter me nec ad momentum ulla detineretur custodia.

5. « Si enim auctoritas vestra per me stare, tantum Arnulphus vilesceret, ut mihi obesse minimum valeret. Quod si contraria mihi (quod absit) sententia vestra decerneret, quid mea interesset utrum Arnulphus an alius Rhemorum constitueretur episcopus? Jam de rapta sponsa, sedeque pervasa quod dicitur, ridiculum est. Dico enim primum nunquam illius fuisse sponsam, quam, pro legitima donatione spiritualis dotis, collatis ante beneficiis expoliavit, proscidit, ditaniavit. Necdum sacerdotali annulo insignitus erat, et jam omnia quæ notatæ sponsæ fuisse videbantur, satellites Simonis vastaverant. Dico, etiamsi concedatur quolibet modo illius sponsam fuisse, utique esse desiit, postquam pollutam et violatam, et (ut ita dicam) adulteratam suis prædonibus prostituit. Num igitur eam, aut quam non habuit, vel quam suo scelere perdidit, illius sponsam rapui? Sedem autem multitudine populorum refertam, advena et peregrinus, nullius fretus opibus, pervadere qui potui? Sed forte Apostolica Sedes nobis opponitur, tanquam ea inconsulta summum hoc negotium discussum sit, vel ignorantia, vel contumacia. Certe nihil actum est vel agendum fuit, quod Apostolicæ Sedi relatum non fuerit, ejusdem per decem et octo menses expectata sententia. Sed dum ab hominibus consilium non capitur, ad Filii Dei supereminens eloquium recurritur¹: Si oculus, inquit, tuus scandalizat te, erue eum et projice illum abs te. Et fratrem peccantem, coram testibus, coram Ecclesia commonitum, et non obtemperantem, decernit² habendum tanquam ethn-

cum et publicanum. Conventus ergo Arnulphus, commonitus litteris et legatis episcoporum Galliæ, ut a cæpto furore desisteret, et, si valeret, quoquo modo de proditoris scelere purgaret; dum monita salubria contemnit, habitus est tanquam ethnicus et publicanus. Nec tamen idcirco dijudicatur ut ethnicus et publicanus, ob Sedis Apostolicæ reverentiam sacrique sacerdotii privilegia; sed a seipso in seipsum sententia damnationis prolata, hoc solum in omni vita sua præclare egisse judicatum est. Quia nimirum seipso damnante, episcopi absolverent, pœnam sceleris ejus incurrerent. Si, inquit, magnus Leo papa, omnes sacerdotes et mundus assentiat damnandis, damnatio consentientes involvit, non prævaricationem consensus absolvit. Hoc enim Deus omnium indicavit, qui peccantem mundum generali diluvio interemit. Et papa Gelasius: Error qui semel est cum suo auctore damnatus, in particeps quolibet pravæ communionis effecto execrationem sui gestat et pœnam.

6. « Excluso itaque illo ab Rhemensi Ecclesia, mihi reluctanti multumque ea quæ passus sum et adhuc patior formidanti, a fratribus meis Galliarum episcopis hoc onus sacerdotii sub divini nominis obtestatione impositum est. Quod si forte quidpiam a sacris legibus deviatum est, non id malitia, sed temporis importavit necessitas. Alioquin, tempore hostili omne jus omneque licitum cavere, quid est aliud quam patriam perdere, et necem inferre? Silent equidem leges inter arma, quibus ille Otto (Odo) feralis bestia ita hoc tempore abusus est, ut reverendissimos sacerdotes Dei quasi vilia mancipia caperet, nec ab ipsis sacris altaribus temperaret, commeatus publicos intercluderet.

7. « Redeo ad me, reverendissimi Patres, cui specialiter ob salutem pereuntis populi totiusque Reipublicæ curam, mors furibunda cum suis incubuit copiis. Hinc dira egestas, horrea et apothecas armata manus sibi vindicat, illic foris gladius, intus pavor, dies ac noctes reddiderunt insomnes. Sola vestra auctoritas, ut tantorum malorum levamen fieret, expectata est, quæ tantam vim habere creditur, ut non solum Rhemensi, sed etiam omni Ecclesiæ Gallorum desolatæ, et pæne ad nihilum redactæ subsidio esse valeat. Quod divinitate propitia expectamus, et ut fiat, omnes in commune oramus». Ita Gerbertus peroravit, appellans Gallorum episcopos, ut non obscure apparet, adversus sibi adversantem, et per Leonem legatum urgentem Apostolicam Sedem. At quam mala fide gestum est, ut omnia quæ scripserit atque dixerit pro se Gerbertus, sint reddita a novatoribus, quæ autem contra ipsum objecta sint, sepulta silentio; cur non edita pariter, quæ contra ipsum in eadem Synodo Leo Apostolicæ Sedis legatus copiosissime disputavit, quæ inter Acta Rhemensium episcoporum fuisse recondita, idem qui supra apud Aimoium auctor affirmat¹. Nos vero eadem ipsa ver-

¹ Mat h. v. — ² Matth. xviii.

¹ Aim. l. v. c. 45.

batim, quæ contra Apostolicam Sedem fuere per Gerbertum illata, et per novatores adversus eandem edita, hic descripsisse volumus, ne quid lectorem prætereat, sed intelligat rem nos agere sincere absque dolo et fallacia; utpote qui certo scimus veritatis luce filios lucis gaudere fideles, tenebras vero, noctem et latibula filios tenebrarum amare.

8. Quæ autem sint ista secuta, etsi ipsa Synodalia deficiant Acta, satis tamen expressa dilucidatque ex ejus temporis scriptoribus remansere: nempe (ut audisti) Gerbertum patientissime auditum esse, ipsumque eandem orationem quam dixit, scriptam Leoni legato Sedis Apostolicæ porrexisse, a quo plenior fuit Synodus Rhemis indicta, ut ubi male Arnulphus fuisset ab episcopatus gradu depositus, et pessime in eum elevatus Gerbertus, ibidem jam in suam auctoritatem sacris legibus vindicatis, suo vigore pollentes sternerent quem magis regia potentia quam Ecclesiastica jura in cathedram invexissent, et restituerent quem præter jus fasque, urgente rege et episcopis illi faventibus, se abdicare coegissent.

9. Sic igitur hoc eodem anno, cum summa diligentia vocati episcopi ad proxime celebrandam Rhemis Synodum se contulissent, ibidem kalend. Juliis, episcopi, qui Arnulphum sede sua dejecerunt, Rhemis sunt a Leone auditi. Dicebant in totius regni discrimine nihil melius et utilius fieri potuisse, quam ut tyranno excluso, utilis populo et regno pastor constitueretur.

10. Quod vero arguebantur sine Sedis Apostolicæ auctoritate id factum, respondebant his verbis: « Regii ac nostri legati Romam profecti, et Epistolas Pontifici porrexerunt, et ab eo indigne suscepti sunt. Sed, ut credimus (Gerbertus ista insinuat) quia Crescentio nulla munuscula obtulerunt, per triduum a palatio seclusi, nullo accepto responso, redierunt. Quod peccatis nostris exigentibus provenire non dubium est, ut Romana Ecclesia, quæ mater et caput omnium Ecclesiarum est, per tyrannidem oppressa, omnia membra debilitentur ». Deinde nihil sine præsentia legati Apostolicæ Sedis in causa Arnulphi factum esse, docuerunt his verbis: « Certe Seguinus, venerabilis vitæ Senonensium archiepiscopus, domini papæ Joannis vices per Gallias sibi creditas Romæ innovavit, et ita a latere Apostolici cum decreto privilegii veniens, ejus vices usque ad præsens, omnium episcoporum Galliæ consensu prosecutus est. In hujus ergo præsentia Arnulphus seipsum sacerdotio exuit, atque juxta decreta Apostolicorum virorum Zozimi, Leonis, atque Gregorii, petitorio et confessionis, seu ita placet dici, abdicationis accepto libello, sacerdotalia deposuit signa. Pro qua re ad judicium advocamur, quasi innocentem oppresserimus. Nos vero illum non solum non oppressimus, sed etiam per decem et octo menses, bella, seditiones, regni dissidia molientem toleravimus ». Hæc ex Gerberto, sed causam propriam agente. Verum aliter rem se habuisse de Seguinto archi-

episcopo Senonensi, quæ superius sunt dicta declarant, nempe ipsum nunquam consensisse adversariis depositionem Arnulphi machinantibus.

11. Sed videamus, quæ ex Appendicæ ad Aimoinum addita, superius cæpta recitari sunt reliqua¹: « Nuntiavit (inquit auctor) hæc omnia præsuli Romano, qui valde indignatus super hoc facto, interdixit sacris omnibus episcopis qui Arnulphum dejecerant et Gerbertum ordinaverant. Misit quoque Leonem abbatem a Sede Apostolica, ad dominum Seguinum, archiepiscopum urbis Senonicæ, qui vice sua in urbe Rhemensi Synodum congregaret: mandans illi, ut sine dilatione revocaret de carcere Arnulphum, et degradaret Gerbertum. Collecto igitur Concilio iterum in urbe Rhemensi, ex jussione Apostolica revocatus est Arnulphus de custodia, et cum honore magno receptus in propria sede. Gerbertus autem, intelligens quod injuste pontificalem suscepisset dignitatem, pœnitentia ductus est. Altercationem vero Gerberti pontificis et Leonis abbatis valde utilem, plenius invenies in Gestis pontificum Rhemorum ». Hucusque de his ibi. Quæ ex legitimis Actis, quæ citat, sumpta videntur, et magis vera, quam quæ ex Epistolis Gerberti suam ipsius causam agentis, sunt prodita.

12. *Gerbertus ad Ottonem se confert, dat Epistolam reginæ.* — Hic spectare licet, quanta coluerit observantia Hugo, rex Francorum, Joannem Pontificem, ut nulla habita ratione eorum quæ in Arnulphum Synodus decrevisset, neque (quod plurimum apud reges etiam Christianos valere solet) juris regnandi, ut obsequatur ipsi Romano Pontifici, in Ecclesiam Rhemensem restitui Arnulphum eductum de carcere patitur, quem semper ut germen Carolinæ regnantis hactenus stirpis sibi adversantem expertus esset. Est plane in hoc et illud amplius mirandum, quod hoc præsertim tempore tanti fecerit Hugo Romanum Pontificem, quando esset contemptui apud suos, et a Crescentio veluti vinculus, vel saltem obsessus (ut audisti) detineretur in palatio, ut nonnisi quem Crescentius vellet, aditum ad illum habere posset, et qui Romæ contemnitur a tyranno, in Gallia adeo colatur a rege. Porro Gerbertus, e throno Rhemensi depositus, ex hoc ipso furore percitus, relicto Hugone Francorum rege, se totum addixit Ottoni, eundemque comitatus est in Italiam venientem, sed in anno sequenti, ut proxime dicturi sumus. At hic recitanda est ejusdem Gerberti Epistola, quæ hoc ipso tempore esse scripta cognoscitur, nempe post adjudicatam a Leone Apostolicæ Sedis legato Rhemensem sedem Arnulpho. Accepimus eam Parisiis missam a nostri amantissimo Nicolao Fabro; ex qua etiam colligitur ejus testificatio, eundem Gerbertum post Leonis sententiam, ad Synodum provocasse, cujus adhuc judicium sibi expectandum esset. Ex eadem quoque intelliges, quibus se artibus insinaret Ottoni imp. et Adelaidi Augg.

¹ Aim. l. v. c. 45.

soceris Roberti regis Francorum, ejus magister ipse fuisset. Scripta est Epistola ad Adelaidem imperatricem, his verbis: « Dominae et gloriosae Adelaidi reginae semper Augustae, Gerbertus, Dei gratia Rhemensis episcopus, et (cum) omnibus suis coepiscopis Rhemorum diocesanos, bene valete in Christo.

« Epistola vestri nominis læta principia prætulit, monita salubria habuit, sed tristi fine conclusa: suavem quippe animi vestri affectum circa me ostendit; ut ad propriam sedem reditum maturarem, admonuit. Sed quid sibi voluit tam acerba conclusio? Ita enim se habet: Cognoscite, quia si modo hujusce monita parvipendimus, utemur nostrorum et rebus et consiliis absque crimine nostri. Me urbi Rhemorum præsidente, quando non licuit, licet, et licet uti et consiliis et rebus mihi commissis? An melius licuit Arnulpho eam obtinente? Sed ille eam nobis dolo et fraude abstulit: ego contra multorum dolos et fraudes vobis eam multis vigiliis multoque labore conservavi. Mirum nimis est, vos vestrorum hostium non sentire insidias. Qui enim Arnulphum ad regni vestri confusionem restituere quærunt, nec sibi hoc tutum fore putant, nisi prius me qualibet occasione perdant. Quod multum verisimile esse, duplici capimus argumento: et quia et me Rhemis nuper posito, eum absolvere decrevistis, et quia Leo Romanus abbas, ut absolvatur oblinuit, ad confirmandum Senioris mei Roberti regis conjugium, ut mihi a Rhemensibus per litteras significatum est. Accedit ad hoc discrimen, sedes a præsentibus, certe a Gebuino pervasa. Infinitus, credo, villarum numerus erat, nec ad possidendum sufficere poterant Rhemenses, nisi ad colonias obtinendas invitarentur Catalaunenses. Quid ergo, si Arnulphus absolvendus est, vel si G. aut alius quilibet in mea sede inthronizandus est, reditum sine capitis mei periculo non est intelligere? Quod ita esse, si vos minus, advertere non debeo? Novi enim studia vestra omnibus mortalibus prædicanda. Novi animi vestri dulcissimos affectus circa me, quibus si respondere nequeo meritis, respondebo votis. Quocirca ut mea vobis minus ingeram, deque me omnino taceam, quem divina gratia periculorum immensitate liberat, et in quantum ad me solum attinet, omni felicitate disponit, et conservat: per terribile nomen omnipotentis Dei oro et deprecor, ut Rhemensi Ecclesiae desolatæ et attritæ, si quolibet modo valetis, subveniatis. Quæ quoniam regni Francorum est caput, si deperierit, ut membra sequantur necesse est. At quomodo non deperierit, quæ sub nomine duorum quasi inter malleum et incudem disposita, dum eorum neutrum rectorem approbat, velut inter undas maris sine remige fluctuat? Quid porro fieri putatis, si tertius sine judicio Ecclesiae ad numerum accesserit? Neque vero hæc loquor quasi augur, aut divinus. Memini etiam meos conspirasse non solum milites, sed etiam clericos, ut nemo mecum comederet, neque

sacris interesset. Taceo de vilitate atque contemptu: nihil dico de gravissimis injuriis sæpe mihi a pluribus illatis: ad hæc ut redeam provocatis, et ut graviora patiar, minas superaddit Epistola. Quid divina majestas, adeo me infatuatum et a te abalienatum putant, ut gladios minitantes non videam, et Ecclesiam tuam schismate confundam? Ego vero improborum versutias acute conspicio, et contra omnia schismata unitatem Ecclesiae, si sic decretum est, morte mea defendo. Peto ergo, o domina semper Augusta, item a fratribus meis, qui pro causa traditoris Arnulphi sive juste, sive injuste sub anathemate positi sunt, ut me judicium Ecclesiae expectantem patienter ferant. Neque enim Ecclesiam quam episcoporum judicio regendam accepi, sine episcoporum judicio relinquere volo. Nec rursus contra episcoporum judicium, ubi major auctoritas adsit, eam quasi per vim retinere dispono. Quæ judicia dum exspecto, exilium quod a multis felix putatur, non sine multo dolore tolero. Occurrit enim Senioris mei regis Roberti clara facies, lætus adspectus, usitata colloquia, sermones vestri sapientia et gravitate pleni; tum principum et episcoporum grata affabilitas: quæ dum mihi eripiuntur, ipsa quodammodo vita onerosa. Sola mihi solatio est clarissimi Cæsaris Ottonis pietas, benevolentia, liberalitas, qui tanto amore vos vestraque diligit, ut dies noctesque mecum sermonem conserat, ubi et quando vos familiariter videre possit, coævum sibi et studiis consimilem Seniore meum regem Robertum alloqui et amplexari. Si ergo Romanum iter, quod causa plurium Synodi me detinet, hoc tempore ibi lapsum fuerit, circa Novembris kalendas me expectabitis, et harum rerum interpretem fidissimum, et per omnia vobis obedientem ». Hucusque Gerberli Epistola, in Italiam cum Ottone iter meditantis, ille quidem, ut a Joanne papa imperii coronam acciperet. Porro ex ipsis synodalibus Actis, et scriptis Epistolis ab hujus temporis scriptoribus, liquido constat Joannem Pontificem, ejus nominis Decimum Quintum, hoc anno adhuc fuisse superstitem: ex quibus redarguas eos, qui ante biennium decessisse tradunt. Sed reliquas anni hujus res gestas videamus.

13. *In Mansonem abbatem divina vindicta.* — Qui autem in hoc mundo ulciscens Dominus, fecit semitam iræ suæ¹, relinquens divinæ vindictæ ubique impressa vestigia mortalibus intuenda, quo iidem caveant, ne peccando in se provocent iram ejus, qua cogantur ultorem Dominum experiri; idem in fine anni hujus memorandum exercuit judicium contra quemdam voluptuosum Cassinensem abbatem Mansonem nomine, atque adversus eum, qui ipsum, ut invaderet sancti Benedicti hæreditatem, excæcandum curavit. Quod igitur ad ipsum Mansonem, quem successorem Aligerni vicesimum octavum ordine abbatem diximus, perti-

¹ Psal. LXXVII.

net, hæc habentur in Vita viri sanctissimi Nili abbatis, ab auctore hujus temporis græce scripta : « Cum igitur mortuus esset æternæ memoriæ Aligernus, qui recte et religiose monasterium Sancti Benedicti administravit, ejus loco præfectus fuit quidam, qui ignorabat beatum Nilum qualis esset, vel ut verius dicam, nec ipsum Deum cognoscebat, quod declarabit id quod breviter dicam : Cum aliquando ad ipsum beatus Nilus accessisset, invenit casu ipsum in monasterio inferiori, in quo est pulcherrimum sacellum S. Germani, aquarum pulchritudine circumdatum. Invenit autem præpositum ipsum cum insignioribus monachis magni monasterii locum, et in cœnaeulo comedentem. Cum itaque expectaret ipsum beatus Nitus in Ecclesia cum suis fratribus, audit quod citharædus quidam ingressus erat in cœnaeulum citharam pulsans. Tunc beatus Nilus dixit ad eos qui secum erant : Memoria tenete, fratres, verbum hoc, quod brevi tempore veniet ira Dei super homines istos. Surgite, et hinc discedamus. Et hoc cum dixisset, recessit. Nec annus transivit, et præpositus ipse captus defectionis sive seditionis causa, eruti sunt oculi, et monachi gravi morbo oppressi, alii quidem usque ad mortem afflicti sunt, alii perierunt. Citharædus ille profectus ut raperet, et captus est, et post multa tormenta eruti sunt illi oculi. Et sic omnes biberunt calicem iræ Domini, juxta S. Patris Nili prædictionem. Beatus itaque Nitus cum in monasterio, quod dicitur Vallis-Lucis, stetisset quindecim annos, recessit inde, etc. » Hæc ejus discipulus. Sed audiamus Leonem Ostiensem, quæ de ipso Mansone scribat ¹ :

14. « Præter alia multa, inquit, illius strenue et (ut pressius de tanti loci Patre loquar) sæculariter gesta, cum sibi equites plurimos et plurimos serico inductos famulos parasset, et ultramontani imperatoris curiam haud segniter frequentaret, ob memoratæ maxime arcis constructionem ingentis odii fomentem in toto principatu contra se accendit ; adeo ut non multo post a Capuanis captus cæcatusque sit, quod non modo abbatiam, sed et principatum omnem sibi vindicare velle videretur. Inflamavit eam invidiam Alberici nequitia Marsorum episcopi, qui dum filio suo ex meretrice procreato episcopatum tradidisset, ad hujus monasterii dominatum adipiscendi, si quo posset pacto, animum exacuebat. Comperto igitur abbatem memoratum Capuanis incensum esse, alloquitur primo quosdam nequissimos monachos, ac postmodum aliquos Deum ignorantes Capuanos, pecuniam se daturum spondens, si cæcato prius abbate monasterium sibi Cassinense contradherent, quod deinceps tali fultus auxilio, absque ullius contradictionis obstaculo possideret ; ita videlicet, ut dimidium pecuniæ ad præsens illis per suos necessarios mitteret, dimidium reliquum tum eis traderet, cum abbas oculos teneret in manibus. Quod cum inter

eos firmatum esset, utrique pollicitationem suam implere satagebant.

15. « Congesta igitur pseudoepiscopus ille undecumque pecunia, misit quod pollicitus fuerat. Ea namque illi suscepta, eos quidem qui detulerant, in abbatis (ædibus) quibusdam abscondant. Abbatem vero adeuntes, in dolo erant, ut Capuam proficiscatur, ubi si quam adversus aliquem habet querelam, possit exponere, et legitimam inde justitiam sumeret. Abbas quoniam illorum invidiam jamdudum compertam habebat, negat se illuc ulla ratione venturum. Tunc illi Dei timore contempto, minimeque vitato perjurio, mox adhibitis Evangelis jurant, se illum et incolumem Capuam ducturos, atque inde nihilominus incolumem ad Sanctum Benedictum reducturos : hoc in mente sua statuentes, ut Capuam deductum ad Sancti Benedicti monasterium, quod intra Capuam est conditum, ducerent. Seductus hujusmodi promissionibus abbas, egreditur, et bona cum illis fide Capuam usque contendit. Illi qui jamdudum dolorem conceperant, iniquitatem tandem peperere ¹. Mox enim ut illum in monasterium Capuanum induxerunt, vincientes, oculos illi eruerunt, involutosque linteo clam episcopo deferendos, his qui pecunias tulerant nuntiis, tradunt. His illi susceptis, hilares effecti, ad dominum suum, a quo missi fuerant, protinus remeant.

16. « Sed (o divinæ justitiæ nunquam dormiens oculus, semperque pavenda sententia !) jam illi prope Marsiam in campo Mezio pervenerant, ibique securi subsidentes, labore itineris fatigati, cibos sumpsere. Cum ecce subito peregrinus quidam superveniens, requisitus ab eis (ut vianibus mos est) an quidpiam haberet novi : episcopus, ait, civitatis defunctus est. Ilac illi voce vehementer attoniti, fallacem eum et impostorem mordaci cum irrisione dicentes, credere omnino renuebant. Sed cum ille majore constantia id asseveraret, diemque et horam illius obitus diligenter exponeret : illi continuo ibidem defossis oculis, quos jam frustra ferebant, ad domum episcopi, quæ non longius aberat, conscensis equis perneciter advolant, et eadem hora vita privatum episcopum discunt, quæ prædictus abbas lumine fuerat orbatus oculorum : die videlicet xvm kal. Decembris. Ex iis autem nuntiis, quos ad tantum scelus jam dictus episcopus destinaverat, unum ego, Andream nomine, presbyterum adhuc parvulus vidi, vix se in lecto movere valentem, qui centenariam supergressus ætatem, hæc omnia avunculo meo sanctæ memoriæ Joanni, Sorano episcopo, quoties rogatus esset, cum lacrymis referre solebat ». Porro hunc ita cæcatum supervixisse ad octavum idus Martii idem testatur ; eique substitutum tradit Joannem, vicesimum nonum ordinis Cassinensis abbatem, qui uno tantum tenuit anno, atque postea anno sequenti, qui est Domini nonagesimus nonagesimus septimus, alter Joan-

¹ Leo Ost. l. II. c. 16.

¹ Psal. VII.

nes est creatus abbas, ut ex eodem Leone appareat.

17. *Sub Nicolao et Sisinnio patriarchis Constantinopolitanis quæ tractata fuerint.* — Quod spectat ad res Orientis Ecclesiæ, « hoc anno, Indictione octava (ut affirmat Curopalates) Nicolaus Chrysoberges, patriarcha Constantinopolitanus, cum sedisset annos duodecim et menses octo, moritur: in cuius locum substituitur Sisinnius, qui tenuit annos tres, qui (idem inquit Curopalates) dissensiones ob quartum matrimonium in concordiam redegit ». At non Sisinnio, sed ejus prædecessori Nicolao tribuuntur ista in synodalibus Actis tunc confectis; ut de his nulla dubitatio esse possit. Cujus in ita concordia monumentum exat post edictum de unione ante annos octoginta promulgatum, in Codice Juris Græcorum his verbis ¹:

18. « Nunc vero, ex Patris et Filii et Spiritus sancti benevolentia et gratia, sacerdotes, atque monachos jam ante nonaginta annos ob prædictam causam et occasionem a se invicem divulsos, serenissima majestas imperatorum nostrorum a Deo coronatorum, Basilii et Constantini, conjunxit et univit, unamque generalem et Apostolicam Ecclesiam effecit. Quamobrem prædicandi, magnique faciendi veniunt, qui opus tam gratum Deo, tamque magni momenti ad exitum perduxere ». Hæc ex Actis synodalibus, quæ mox istæ sunt secutæ acclamationes:

19. « Multi anni imperatorum Basilii et Constantini. Orthodoxorum imperatorum nostrorum multi sint anni. Religiosissimæ Augustæ Theophanonis multi anni. Nicolai sanctissimi et universalis Patriarchæ multi anni. Basilii et Constantini et Romani, Christophori, Romani, Nicephori, et Joannis, qui regnum cæleste cum terreno commutarunt, æterna sit memoria. Eudoxiæ et Theophanonis, Theodoræ et Helenæ, piissimarum Augustarum, æterna sit memoria. Germani, Tarasii, Nicephori, et Methodii, celebrium beatorumque patriarcharum, æterna sit memoria. Ignatii, Photii, Stephani et Antonii, Nicolai et Euthymii, Stephani, Tryphonis, Theophylacti, Polyucti, et Antonii, orthodoxorum patriarcharum, æterna sit memoria.

20. « Universa quæ contra sanctos patriarchas Germanum, Tarasium, Nicephorum et Methodium scripta vel dicta sunt, anathema ». Addit Marcus Ephesius in Concilio Florentino (quod et superius dictum est) pari anathemate proscripta fuisse scripta omnia, quæ adversus Ignatium vel Photium promulgata fuissent. Posthæc autem ista: « Universa quæ præter Ecclesiasticam traditionem et doctrinam, et dispositionem sanctorum Patrum innovata gesta sunt, vel in posterum agentur, anathema. » Item:

21. « Calumniantibus sanctam Ecclesiam, quod quartas nuptias admiserit ob dispensationem Dei benignitate factam, atque propter assumptionem unionemque fratrum nostrorum, quos præcedentium scandalorum causa sejunxerat, anathema ». Itemque:

« Audentibus dicere quod Ecclesia illibatam puritatem sanctimonie suæ non retineat, sed inquinamento quodam affecta sit propter eam filiorum ipsius junctionem, quæ per Dei gratiam facta est, divisorum quidem a se invicem per scandalum jam olim admissum, ut per abolitionem et abdicationem ejusdem denuo copulatorum, anathema ». Atque demum ista:

22. « Contemptui sacros, divinosque canones sanctorum Patrum nostrorum habentibus, qui et sacrosanctam Ecclesiam fulciunt, et universam Rempublicam Christianam ornantes, ad divinam pietatem redigunt, anathema ». Illicque ibi. Hic plane videre est versutum satanæ consilium, in his controversiis detinentis Orientales, ne quod longe majoris momenti erat attenderent, nempe se manere discissos a communione Catholice Ecclesiæ, et Apostolicæ Sedis, quod tanti fecere majores ipsorum, et universi qui Catholici dici voluerunt filii Dei et sanctæ Matris Ecclesiæ: ut ita diuturnitate temporis oblivioni traderent quod esse deberent, Phariseis persimiles redditi ¹, qui decimantes mentham, anethum, et cuminum, quæ præcipua legis divinæ essent omitterent.

¹ Matth. XVIII.

¹ Juris Græc. I. II.

Anno periodi Græco-Romanæ 6488. — Anno Æræ Hispan. 1033. — Anno Hegiræ 385, inchoato die 5 Febr., Fer. 3. — Jesu Christi 995.

— Joannis XV papæ 11. — Ottonis III reg. 13. Basil. et Const. imp. 20.

1. *Gerbertus scribit ad Adelhaidem Aug. et ad episcopos Galliæ.* — A numero 1 ad 13. Dum *Gerbertus* in spem metumque positus, archiepiscopi Rhemensis munera obit, et clerici ac populi mutantur animi, iis *Gibuino*, qui archiepiscopatum Rhemensem ambiebat, aliis *Arnulfo* faventibus, multas injurias patitur, sedem relinquit. Ea de re ab *Adelhaide* imperatrice vehementer increpatus est, quia hujus mens erat, ut quandiu res integra esset, sedem teneret, aut derelictam repeteret. At *Gerbertus*, quam illud difficile esset, demonstrat Epistola ad eam et ad suffraganeos data, inscriptaque: *Adelhaidi reginæ semper Augustæ, et omnibus suis confratribus et coepiscopis Rhemorum diœceseos.* Recitat eam *Baronius* num. 12, existimalque scriptam, postquam *Leo*, Apostolicæ Sedis legatus, Rhemensem sedem *Arnulpho* adjudicavit. Verum eam ante *Gerberti* destitutionem, et verosimiliter anno superiori datam, ejus lectio manifesto declarat. Ait enim *Gerbertus*: « Quid ergo, si *Arnulfus* absolvendus est, vel si *Gibuinus*, vel alius quilibet in sede mea inthronizandus est, reditum meum sine capitis mei periculo intelligere non est? » Paulo post: « Peto ergo, o domina mea *Augusta*, item a fratribus meis coepiscopis, qui pro causa traditoris *Arnulfi*, sive juste sive injuste sub anathemate positi sunt, ut me judicium Ecclesiæ expectantem patienter ferant, etc. quæ judicia dum exspecto, exilium quod a multis felix putatur, non sine multo dolore tolero ». Arbitratur *Cossartius*, tom. ix Concil., pag. 747, eam Epistolam, cum jam Rhemensis Synodus cogenda esset, eo scilicet tempore, quo abstinere a divinis Officiis jussus est in Mosomensi Concilio *Gerbertus*, scriptam fuisse. Verum hic in ea Epistola diserte asserit se ob vilitatem et contemptum, gravissimasque injurias sæpe sibi a pluribus illatas, sedem dereliquisse, et tam *Adelhaidem* quam episcopos, se ut rediret provocare, minis etiam superadditis. Denique *Hugo Flaviniacensis* in Chronico, postquam retulit, *Gerbertum*, dejecto *Arnulfo*, creatum fuisse archiep. Rhemensem, subdit: « Verum aliquanto tempore exacto, ubi sensit quod *Arnulfus* sedem episcopii sibi præripere, et populum ad se reducere nitebatur, nocte fugiens ad *Ottonem* ivit ». Quare *Cossartii* conjectura non admittenda.

2. *Synodus Mosomensis.* — Missus a *Joanne XV* in Gallias legatus *Leo*, monasterii sanctorum *Alexii* et *Bonifacii* abbas, IV nonas Junii, Mosomi, (urbs est ad Mosam in Campania sita vulgo *Mouson*), Concilium habuit, in quo lectis Joannis XV litteris, *Gerbertus* auditus causam suam magno animo prosecutus est, sed is a sacris abstinere jussus usque ad Synodum Rhemensem, ut videre est in Actis ejusdem Concilii tom. ix Concil. recitati. *Gerbertus* in sua Oratione inter alia dixit: « Certe nihil actum vel agendum fuit, quod Apostolicæ Sedi relatum non fuerit: ejusdem per decem et octo menses expectata sententia ». Cum tamen, ut ait *Baronius* anno DCXCII, num. 29, ipsemet *Gerbertus* alibi fateatur, non amplius quam triduo responsionem legatos regis et episcoporum expectare voluisse, et in causa tam ardua perbrevis videri debuisset mensium trium expectatio. Interim ex illis *Gerberti* verbis evidenter apparet, litteras *Hugonis* regis et episcoporum ad Joannem XV adversus *Arnulfum* scriptas, et a *Baronio* anno DCXCII, num. 2 et seqq. relatas, pertinere ad mensem Decembrem anni nongentesimi octogesimi noni; cum *Arnulfus* die decima septima mensis Junii anni DCXCII dignitate motus fuerit, et a fine Decembris anni DCCLXXXIX ad medium mensem Junium anni DCXCII, menses octodecim intercurrant. Quare eæ litteræ anno suo a nobis supra certo redditæ.

3. *Synodus Rhemensis.* — Episcopi in Synodo Mosomensi congregati, « kalendis Juliis Rhemis habendam Synodum denuntiant », ut in Actis ejusdem Concilii legitur. « Collecto igitur Concilio », inquit continuator *Aimoini*, cap. 46, « iterum in urbe Rhemensi, ex jussione Apostolici, revocatus est *Arnulfus* de custodia, et cum magno honore receptus in propria sede », ubi *Aimoinus* uno tenore refert quæ ad diversos annos pertinent, quod *Baronio* errandi causa fuit. Inde enim deduxit, *Arnulfum* currenti anno in sedem Rhemensem restitutum fuisse, cum tamen nonnisi annis post Leonis legationem ac Synodum Rhemensem tribus, jam demortuo *Hugone* rege, *Roberto* ejus filio solo regnante, et *Gregorio V* Ecclesiam Romanam regente, *Arnulfus* e custodia liberatus et absolutus fuerit, uti anno DCXCVIII videbimus.

4. *Moritur Manso abbas Casinensis.* — A

num. 13 ad 17. *Aligerno* abbate Casinensi demortuo, in ejus locum subrogatus est *Manso*, quem Nili Junioris encomiastes non parum carpit, ut ex eo refert Baronius. Quæ tamen Nilus profert, inquit Mabillonius, Sæc. v Benedict., in Elogio Aligerni abbatis, nonnullis acriori calamo perstricta videbuntur, imo deteriore in partem detorta, quatenus *Mansonis* orationem afficiunt, quæ ex invidorum ejus non proprio scelere patrata est, ut in Chronico Leonis Ostiensis lib. 2, cap. 16 videre est, ubi facinus istud describit. Cum autem cap. 12, tradat Leo Mansonem *annis undecim* sedisse, et Aligernus ejus decessor die xxxiii mensis Novembris anni dcdlxxxvi obierit, manifestum est Mansonem, qui, ut scribit Leo cap. 19, *depositus est VIII idus Martii*, pervenisse saltem ad annum nongentesimum nonagesimum septimum, etiamsi anni illi undecim incompleti fuerint.

5. *Obitus Nicolai Chrysobergii patriarchæ Constantinop.* — Ad num. 17 et seq. Cedrenus pag. 702, *Chrysobergii* patriarchæ Constantinop. mortem et *Sisinnii* ejus successoris initium his verbis narrat : « Nicolao Chrysobergio, post administratum per annos duodecim cum mensibus viii patriarchatum, vita functo, substituitur Sisinnius magister, vir insignis et medicæ artis peritissimus, anno mundi supra sexciesmillesimum ciii, Indict. octava. Is dissidium propter quartas nuptias dudum ortum sustulit, concordia facta ». Incipit is annus mundi, secundum Constantinopolitanos, kalendis Septemb. superioris Christi anni, quo pacto Chrysobergius hoc anno ante kalendas Septembres mortuus fuerit. At is post medium annum nongentesimum octogesimum tertium sedem iniit, ut anno cmlxxxi ostendi, et post Basilii depositionem, quam Leo Diaconus auctor cœvus anno cmlxxiv factam fuisse testatur. Cedrenus, Zonaras, et auctor Seriei episcoporum Byzantii, qui lib. 4 Juris Græco-Romani legitur, inter se conveniunt de annis et mensibus, quibus quilibet patriarcha post Basilium sedit. Quare non dubito, quin Cedrenus in anno emortuali *Chrysobergii* memorando erraverit, et Chrysobergius usque ad annum sequentem in vivis fuerit cum iidem auctores unanimi consensu ei annos xii et menses viii adscribant. Præterea ipsemet Cedrenus annos tres *Sisinnio*, annos vero xx *Sergio* ejus successoris attribuit, huncque *Indictione secunda, mense Julio*, anno scilicet Christi mxix vita functum asserit. Quare *Sisinnius* ante annum sequentem *Chrysobergio* non successit, et Cedrenus ex ipsomet Cedreno corrigendus, vel potius Curopalates, ex quo sua Cedrenus depromere solet.

6. *Bulgari a Basilio imp. coerciti.* — Cedrenus *Chrysobergii* morte narrata, ait, *Basilium* imp. *Samuelis* Bulgarorum regis excursions coercedas esse censuisse, ac Nicephorum Uranum misisse, qui Samuelem jam Thessalica Tempe et Peneum amnem transgressum, per isthmum Corinthiacum in Peloponnesum grassantem, ad Sperchium flu-

vium incautum oppressit, profligato omni ejus exercitu.

7. *S. Henricus postea imp. fit dux Bajoariæ.* — Hermannus Contractus ex editione Canisiana hoc anno scribit : « Henricus dux Bajoariæ obiit, et filius ejus ex Gisela Conradi regis Burgundiæ filia, itidem Henricus, imperator postea futurus, ducatum interim obtinuit : hujus soror Gisela Stephano regi Ungarorum, cum se ad fidem Christi converteret, quasi vere juxta nomen suum fidei obeses, in conjugium data, elemosynis cæterisque bonis operibus inibi intenta consenuit ». Chronographus Hildesheimensis ait, cum magno omnium dolore Henricum obiisse *V kalend. Septemb.* Henricus III ejus filius, postea Romanorum imperator, cognomento *Sanctus* ob vitæ innocentiam et res bello et pace præclare gestas, eas virtutes tenero adhuc animo imbibit, quæ ejus nomen immortalitati consecrarunt, ut infra videbimus. Porro *Henricus* hoc anno mortuus nepos erat Ottonis Magni ex fratre.

8. *S. Adalbertus iterum abdicat episcopatum Pragensem.* — « Sanctus Adalbertus », qui anno superiori Pragam redierat, « in morbo grege signa salutis nulla esse prospexit. Hinc pro spectandis sequentibus malis oculos claudere volens, dulcis Romæ mœnia revisit », inquit prior auctor anonymus qui ejus Vitam scripsit, capite 4. Addit secundus anonymus, qui ejus etiam Vitam edidit, post discessum ejus quatuor fratres ejus nefarie occisos fuisse; quæ cædes cum currenti anno patrata fuerit, ut fidem facit chronographus Magdeburgensis, Sæc. v Benedict. pag. 870, apparet sanctum Adalbertum currenti etiam anno iterum Romam rediisse. Hæc chronographi Magdeburgensis verba : « Anno cmxcv, post discessum beati Adalberti a Bohemia, quia dux Bohemiæ non erat suæ potestati, ducis comites versi in Dei odium, patrum iniquorum pessimi filii, valde iniquum facinus operabantur. Nam quodam die festivo irrumpunt urbem Lubie, in qua fratres sancti Adalberti et milites urbis universi, velut oves innocentes, assistebant sacris missarum solemnibus. Et veluti lupi immanes, masculum et feminam usque ad usum interficientes, quatuor fratribus sancti Adalberti ante ipsum altare decollatis, urbem incendunt, plateas sanguine perfundunt, et præda onerati hilares recedunt. Interfecti sunt autem quinque fratres sancti Adalberti, quorum nomina sunt hæc : Sobebor, Spitimur, Dobraizlau, Poreikastau ». Dubravius, lib. 6, quintum nominat *Gzaslaum*. In posteriori Vita sancti Adalberti cap. 5 dicitur, sanctos viros in *Vigilia pretiosi martyris Wenceslai* peremptos, ideoque die vicesima septima mensis Septembris, in quam Vigilia illa cadit. Henschenius in Notis ad illum locum ait : « Ms. Pragense addit, *feria vi*; Surius, *sexta die*; neutrum recte », quia scilicet existimat hæc an. cmxcvi contigisse. Verum cum hoc martyrium ad præsentem annum pertineat, apparet utrumque interpolatorem feriam

illam et diem ex aliquo probro monumento accepisse; cum hoc anno littera Dominic. F. notato, dies xxvii Septemb. et feria sexta concurrant. Pergit chronographus Magdeburgensis.

9. *Ejus prædictio adimpletur.* — « Illis ita peractis, dux (nempe Bohemiæ) Borislaus inito consilio cum clericis, Moguntinum archiepiscopum his sollicitat verbis: Aut nostrum pastorem Adalbertum ad nos revoces, quod magis volumus; aut alium nobis ordina. Tunc archiepiscopus sollicitus, ne populus nuper Christo acquisitus, in antiquum relaberetur ritum, mandat Apostolico, ut aut Pragensi Ecclesiæ suum antistitem remitteret, aut alium ordinari sineret. Et quia in cœnobio Sancti Alexii vir sanctus manebat (positum illud monasterium Romæ, et cædes fratrum Adalberti patrata die xxvii Septemb. in Vigilia sancti Venceslai Poloniæ ducis, ideoque jam ante mensem Septembrem Adalbertus Romam pervenerat), hunc dominus papa et suus abbas sic alloquuntur: Frater amanissime, per caritatem Dei te deprecamur, ut ovium tuarum regimen dignanter recipias. Si te audierint, Deo gratias: si non fugientes te fugias, ne cum pereuntibus pereas, et ad exterarum nationes prædicandi licentiam habeas. Exhilaratus præsul de data sibi docendi exterarum gentes licentia, non sine magna fratrum mœstitia discessit; et cum viro summæ discretionis, nomine Nothario (præ-

sule) adiens archiepiscopum in palatio, rogat experiri si suus eum grex recipere vellet. Quo facto quid ille grex responderit, aut quam ob causam eum non receperit, vel ad quas gentes inde transierit, quantæ frugalitatis omnibus diebus episcopii sui fuerit, quanta morum honestate nituerit, scire poterit, qui ejus Vitam legerit. Tunc Ztrahquaz, frater ducis, de quo supra meminimus (Boleslai nempe cognomento Sævi, qui S. Wenceslaum occidit), videns hunc quasi regulariter repudiari, tumido fastu exarsit in episcopatum: quem populus nequam statim in episcopalem levat cathedram, mente tumidum, veste compositum, oculis vagum, verbis vanum, moribus hypocritam, totius erroris mandritam, atque in operibus malis iniquorum archigerontam. Ventum erat ad Moguntinum archiepiscopum, ubi peractis omnibus quæ agenda erant, dum choro melodiam modulante archipræsul insulatus procumbit ante Altare, et post hunc inter duos suffraganeos Ztrahquaz prosternitur in medio, atroci arripitur dæmonio, et quod illi vir sanctus clam prædixerat, palam fit coram clero et omni populo ». Idem habent Aeneas Sylvius in Hist. Bohemiæ cap. 16, qui Strahquaz *Stratiquatem*, et Dubravius lib. 6, qui eum *Stratiquatum* appellat, et quintum S. Adalberti fratrem occisum nomine suo appellat.

GREGORII V ANNUS 1. — CHRISTI 996.

1. *Gregorius succedit Joanni.* — Nongentesimus nonagesimus sextus annus, Indictione nona incipit, quo defunctus est Joannes papa Decimus Quintus nonis Maii, ubi sedisset annos decem, menses.... dies duodecim. Sepultus est autem in Basilica sancti Petri in Oratorio sanctæ Mariæ, ad cujus sepulchrum hoc fuisse exaratum Epitaphium, Manlius qui descripsit affirmat:

Clauditor hoc tumulo venerabilis ille Joannes,
Qui legis sacre diffundere noverat omnes.
Egregius doctor verbo quæcumque docebat,
Moribus et vita tribuens exempla gerebat.
Hunc a canonici descripto jure rigoris,
Non timor aut lucrum, non gratia flexit amoris.
Del Deus æternus cœlorum lumine pasci.
Cui dat Roma mori, dederat bene gaudia nasci.

Quando vir iste obiit, si vis cognoscere verum,
Septima lux Maii fuit illi meta dierum.

2. Ab ejus aule obitu, post mensem unum et dies sex, in locum ipsius mense Junii subrogatur Gregorius Quintus. Quomodo autem ista se habuerint, ut intelligamus, quæ præcesserunt sunt in medium adducenda prius. Cum Crescentii tyrannis, de qua superius mentio facta est, magis magisque invalesceret et omnino intolerabilis esset, ad tantam propulsandam calamitatem, Otto rex Germaniæ Romam venire rogatur. Quod quidem naviter præstitit, descendensque in Italiam cum exercitu, Ravennæ aliquantisper constitit.

3. *Gerbertus creatus episcopus Ravennæ.* — Ubi inventum ejus civitatis archiepiscopum ex hac vita

migrasse, in locum ejus subrogandum curavit Gerbertum, quem diximus anno superiore coactum fuisse a Joanne papa deserere Rhemensem cathedram, quam contra canones contradicente ipso Rom. Pontif. possedisset. Ut autem Gerbertus (ut audisti sæpe superius) de Romana Ecclesia pessime quidem meritis, et sententia Apostolicæ Sedis legati Rhemensi privatus episcopatu, Ravennæ ordinaretur episcopus: dicere opus est, eum pœnitentem recantasse palinodiam, et ad meliorem frugem conversum, talem extitisse, qui non ab Ottone imperatore solum, sed a populo in Ravennatis Ecclesiæ episcopum peteretur, ut hujus temporis auctor apud Aimoinum tradit¹, et sic ab ipso Gregorio Romano Pontifice ordinaretur. Cæterum non abrogasse Gregorium quæ a prædecessore Joanne XV Romano Pontifice constituta essent, sed ipsius instituisse vestigiis, inde certum deducitur argumentum, quod Arnulpho archiepiscopo Rhemensi per eundem Joannem papam deposito, Gerberto jam restituto pallium misit: quod, inquit Maso² qui vidit, « ex Epistola Abbonis Floriacensis didicimus ad Gregorium scripta, quæ est prima totius operis Epistolarum ejus, quod nondum in Incem prodiit ». Hæc ipse. Sic igitur qui restitutionem Arnulphi ralam habuit, et pallii ornamento firmavit, idem electionem Gerberti, judicio contra se lato a Sede Apostolica acquiescentis, pariter comprobavit. Sed reliquas Ravennæ res gestas prosequamur.

4. *Otto imp. S. Romualdum Classensi cœnobio præficiendum curat.* — Tunc cum ibi esset adhuc Otto imp. accidit, quod Petrus Damiani scriptis prodidit, nimirum præfectum ab eodem Ottone rege sanctum Romualdum Classensi cœnobio; sic enim ab eo res gesta narratur³: « Eodem tempore, Otto Junior imp. Classensem abbatiam ordinare desiderans, optionem fratribus dedit, ut quem ipsi vellent indubitanter eligerent. At illi continuo unanimiter expetunt Romualdum, qui tunc habitabat insulam Peretum dictam, duodecim miliaribus Ravenna distantem. Imperator autem dissidens beatum virum ad regiam evocari posse per nuntium, ire ad eum per semetipsum voluit, et ad cellam ejus, sole jam occidente, pervenit. Cui Romualdus, quia magnum hospitem in parva domo susceperat, lectulum suum ad requiescendum dare dignatus est. Coopertorium autem rex noluit, quia asperissimum judicavit. Mane autem facto, rex eum secum ad palatium duxit, tandemque et instare ut abbatiam susceperet multis precibus cœpit. Qui cum reluctaretur, et regis petitioni assensum penitus denegaret, rex autem e contrario excommunicationem et anathema ab omnibus episcopis et archiepiscopis et tota Synodo minaretur: tandem imminente necessitate succubuit, et animarum regimen coactus accepit. Referebat tamen

hoc sibi non videri novum, sed ante quinquennium ei fuisse revelatum ».

5. *Otto Romæ electum Pontificem tuetur, Crescentium post obsidionem de medio tollit.* — Illis peractis, Romam se contulit Otto ad expugnandum tyrannum Urbem occupantem, Crescentium, qui audito Ottonis adventu, in S. Angeli munitione inexpugnabili se cum suis clausit. Adveniens autem Otto politur Urbe; munitionem autem, in qua ille se continebat, nequaquam valuit expugnare. Tunc autem dum ista agerentur in Urbe, contigit mori Joannem Decimum Quintum Romanum Pontificem (ut dictum est) ut ibi mense et sex tantum diebus Sedes vacasset, pridie idus Junii in locum ejus ope imperatoris successus est vir Germanus, Bruno appellatus, et Gregorius Quintus dictus; de quo Ditmarus¹: « Otto, inquit, Romam veniens, gloriose nepotem suum Brunonem, Ottonis filium ducis, in loco Joannis papæ nuper defuncti, cum omnium laude præsentium constituit ». Hæc ipse.

6. *Commendatur Bruno iste a Ruperto² se abbatem Tuiliensi, in Vita quam scripsit Heriberti archiepiscopi Coloniensis, hujus Brunonis æqualis, quod vix vi adduci potuit, ut presbyter ordinaretur. Hæc autem de creatione Gregorii V, quod scilicet ubi Otto Romam venerit, creatus fuerit Pontifex, quamvis Ditmari, sed depravata lectione, fulciantur auctoritate, tamen assertionem plurium impugnantur, qui tradunt, antequam Romam se Otto conferret, jam creatum fuisse Brunonem, vocatum Gregorium Quintum papam, et post hæc contra eum fuisse elevatum in Sedem Joannem alium episcopum Placentinum, natione Calabram, per Crescentium, appellatum Joannem Decimum Sextum, sicque duobus simul crealis Pontificibus, esse schisma conflatum. Quid autem de his scriptum reliquerit Glaber Rodolphus³ monachus Cluniacensis, his temporibus proximus, utpote qui sub Henrico Primo Francorum rege claruit, et horum temporum historiam scripsit, videamus. Ilæc enim habet:*

7. « Contigit, inquit, initio imperii Ottonis (hoc namque anno quo Romæ creatus est imperator, a quo sunt anni ejus imperii numerandi legitime, et non a parentis obitu) ut Sedes Apostolica Urbis Romæ proprio viduaretur Pontifice. Ipse vero, illico imperiali usus præcepto, quemdam suum consanguineum, cujusdam ducis filium delegit, atque ex more in Sede Apostolica sublimari mandavit. Quod utique dum sine mora peractum esset, prægrandis calamitatis occasio exililit. Erat enim quidam Crescentius, Romanorum civis præpotens, qui ut illorum mos est quantum onerosior pecunia, tantum pronius servit avaritiæ. Ille autem non plane parli favebat Ottonis: nam ipsum Pontificem, quem, ut diximus, ordinari Otto jussit, idem Crescentius destitutum honore a Sede

¹ Aimoin. lib. v. cap. 45. — ² Papir. Maso Annal. Francor. l. III. — ³ Petr. Dam. in Romual. cap. 22. apud Sur. tom. III. die XIX Junii.

¹ Ditm. l. IV. — ² Rupert. Abbas in Heribert c. 5. apud Sur. tom. II. die XVI Mart. — ³ Glaber l. II. c. 4.

expulit, alterumque procaciter in ejus locum subrogavit. Sed mox ut Otto hoc factum comperit, ira accensus, cum permaximo exercitu Romam properavit. Quod cum cognovisset Crescentius, illum scilicet appropinquare Urbi, conscendens cum suis turrim, quæ est extra civitatem trans Tiberim, ob altitudinem sui Inter-Cælos vocatam, vallavit, eam defensurus pro vita. Tandem cum pervenisset imperator ad Urbem, primitus jussit comprehendere illum male securum Pontificem, videlicet Crescentii arrogantia constitutum; comprehensumque præcepit ejus manus quasi sacrilegas amputari, deinde aures abscindi atque oculos evelli.

8. « Post hæc comperiens Crescentium turri vallatum, quæ scilicet post illum crudeli erat redilura neci, præcepit eandem circumduci densa obsidione sui exercitus, ne videlicet Crescentio quoquo modo locus daretur confugii. Interea jubente imperatore, construuntur in gyro machinæ ex lignis celsarum abietum, nimirum artificiose compositæ. Cernens quoque Crescentius nullam se posse evadendi viam aperire, licet tardius pœnitudinis advenerit consilium, non tamen ei præstitit miserandi aditum. Quadam igitur die, quibusdam de imperatoris exercitu consentientibus, egrediens latenter Crescentius de turre, scilicet birro indutus, et operto capite, veniensque improvisus, corruit ad imperatoris pedes, orans se ab imperatoris pietate vitæ servari. Quem cum respexisset imperator, conversus ad suos, ut erat, amaro animo dixit: Cur, inquires, Romanorum principem, imperatorum decretorem datoremque legum, ordinatorem Pontificum, intrare sivistis mapalia Saxonum? Nunc quoque reducite eum ad thronum suæ sublimitatis, donec ejus honori condignam videlicet præparemus susceptionem. Qui suscipientes illum scilicet, ut justum fuerat, illæsum reduxerunt ad turris introitum. Ingressusque nuntiavit secum pariter reclusis, quoniam solummodo tantum contingeret illis vivere, quandiu ipsa turris tueri valeret ab hostium caplione, nec ullam prorsus salutem ultra sperare debere.

9. « At imperatoris exercitus a foris urgendo impulit machinas, paulatimque euntes applicitæ sunt turri, sicque pugnæ inito certamine, dumque alii desuper contententes intrare, alii prorumpere ad ostium turris, illudque concidentes evellunt, sursumque certatim gradientes ad turris superiora pervenerunt. Respicens quoque Crescentius, cernit se teneri ab his quos putabat pugnando longius arcere se posse. Capto namque ipso ac graviter vulnerato, cæteris qui cum eo inventi sunt trucidatis, miserunt ad imperatorem, quid de eo præciperet. Qui ait: Per superiora propugnacula illum dejecite, ne dicant Romani, suum principem vos furatos fuisse. Quem ut jussum fuerat projicientes, deinde post terga boum reliatum, per paludes marum plurimum devolventes, ad ultimum in conspectu civitatis in trabe

excelsa pendere dimiserunt ». Hæc de fine Crescentii Glaber. Quibus tamen vehementer repugnant quæ scripta sunt a Petro Damiani, temporis hujus et ipso scriptore, nimirum Crescentium in munitione inexpugnabili se continentem, inde non nisi dolo et juramento firmata promissione deduci potuisse ab Ottone imperatore, et ita deceptum de ipso capitis obtruncatione fuisse captum supplicium: quod et testatur Leo Ostiensis¹.

10. Porro sublatum Crescentii corpus clandestino funere est sepultum extra Urbem juxta portam Aureliam, in cœmeterio Calepodii, ubi antiquitus erecta permanet Ecclesia S. Pancratii, in cujus pavimento hodie legitur sequens inscriptio:

Vermis homo, putredo, cinis, laquearia quæris,
His aptandus eris, sed brevibus gyris.
Qui tenuit totam feliciter ordine Romam,
His latebris legitur pauper et exiguus.
Pulcher in aspectu dominus Crescentius et dux,
Iaclyta progenies quem peperit jubolem.
Tempore sub cuius valuit, Tyberinaque tellus
Jus ad Apostolici valde quæta stetit.
Nam fortuna suos convertit lusibus annos,
Et dedit extremum finis habere tetrum.
Sorte sub ac quisquis vitæ spiramina carpis,
Da vel huic gemitum, te recolens socium.

11. At hujus occasione Crescentii, alterius ejus nominis ducis, qui hoc pariter sæculo in Urbe claruit, et honesto sanctoque fine diem clausit extremum, hic describendum putavimus Epitaphium, quod in Ecclesia Sancti Bonifacii in Aventino monte posita, dicta alio nomine S. Alexii ex abbazia conversa in titulum cardinalium, ita in pavimento descriptum legitur, jam pæne attritum vestigiis et vetustate consumptum:

Corpore hic recubat Crescentius iaclytus ecce,
Eximius civis Romanus, dux quoque magnus.
Ex magnis magna proles generatur et alta,
Joanne patre, Theodora matre nitescens.
Quem Christus animorum amans, medicusque peritus,
Corripuit languore pio, longævo, ut ab omni
Spe mundi lapsus, prostratus limina sancti
Martyris invicti Bonifacii amplexus, et illic
Se domino tradidit, habitum monachorum adeptus.
Quod templum donis amplis ditavit, et agris.
Hinc omnis, quicumque legis, rogitare memento,
Ut tandem scelerum veniam mereatur habere.

12. Et obiit DIE VII. MENS. IVL. ANNO DOMINIC. INCARN. DCDLXXXIV. C. R. M. Jam ante annos duodecim.

Quod autem iste Joannis et Theodoræ asseritur filius, in mentem veniunt Joannes et Theodora illi, de quibus Luitprandus agit², et nos suo loco scriptissimus: nomina consentiunt atque tempora, nec non potentia, qua in Urbe pollebant.

Sed et tertium his adjicimus de alio Crescentio, qui hoc etiam vixit tempore Epitaphium, quod scriptum extat in diaconia Sanctorum Cosmæ et Damiani his versibus:

¹ Leo Ost. Chron. Cass. l. II. c. 8. — ² Luitp. l. II. c. 13.

Quisquis ab occasu properas huc, quisquis ab ortu,
 Axe vel a gelido, sive calente polo.
 Flecte precor geminos carmen lectorus ocellos,
 Sortis et humanae flebilis esto memor.
 Es quod amice fuit tumulto qui clauditur isto,
 Nunc cuius et pulvis, quodque futurus eris.
 Ei (Hi) non vero Crescentius omine dictus.
 Stamina cum nessel sors breviora sibi,
 Ungue sed a tenero pietatis vomere sulcos
 Excoluit mentis semina grata sereus.
 Hospitibus lectum, nudis largitus amictum,
 Esuriem dapibus expulit, anne sitim.
 Sed cum ter denis subiit sex qui alter aristis,
 Quod terræ est liquit sumere certus idem.
 Sic tibi sic cuncti post mortem talia reddant,
 Carmen in hoc tumulto quisquis amice legis.
 Dic rogo dic lacrymis pietatis clausula, JESU.

Parce tuo famulo ipsiuremeta ¹ pie. OBIT M.
 APRIL. D. XXVI. INDICT. VIII. AN. DOMIN. INCARN. MIL. X.

13. *Quomodo habitus fuerit pseudopapa, et quid B. Nilus in hoc negotio egerit Romam veniens.* — Quatuordecim post annos, hæc de Crescentiis, viris clarissimis hujus temporis. Factum vero creditur, ut nomina Crescentiorum transierint in eam nobilem familiam, quæ dicitur Crescentiorum, et hactenus Romæ viget. Sed ad reliquas anni hujus res gestas convertamus orationem, nempe ad schisma quo sancta Romana Ecclesia laboravit.

Hoc siquidem anno, dirum schisma inter Gregorium Quintum et Joannem ex Placentino episcopo electum a Crescentio papam ingentis collatione pecuniæ, conflatum est. Petrus Damiani in secunda Epistola ad Cadaloum pseudopapam hæc de his habet, in exemplum ponens illi, quæ Joannes Placentinus supplicia pati meruit ab Ottone imperatore. Ait enim :

14. « Sed ut noveris quia molimen hoc nequam faustum concedat in exitum, de propria tibi atque contigua regione præbemus exemplum. Convicanea autem tibi regio Placentia est, cujus episcopus non diu ante nostram ætalem subdolæ calliditatis arlifex extitit, et ad instar tui, subtilitatis et gloriæ satis superque ambitione flagravat. Adeo ut prius ante se gestandam, sicut et tu nunc agere diceris, crucem argenteam imperarit. Quin etiam cum imperatrice, quæ tunc erat, obsceni negotii dicebatur habere mysterium. Deinde sensim ad majora prosiliens, ut tandem Apostolicam Sedem familiaris sibi pecuniæ patrocínio violenter invaderet. Ejecto itaque Gregorio imperatoris Ottonis utique consanguineo, Romanæ Ecclesiæ cathedram non ut sacerdos magnus, sed ut fur et tyrannus obtinuit. Sed paulo post, resipiscente Quiritum populo, atque in zelum dignæ ultionis unanimiter exardescente, irruentes in eum manus injiciunt, oculos erunt, aures naresque præcidunt. Expertus est itaque quod et tunc tibi, sed et nunc tibi per Ezechielem prophetam Deus comminatur, dicens ² : Venient super te instructi currus et nota multitudo populorum, lorica et clypeo et

galea armabuntur contra te undique, et dabo coram eis judicium, et judicabunt te in judiciis suis. Et ponam zelum meum in te, quem exercebunt tecum in furore : nasum tuum et nares tuas præcedent, et quæ remanserunt gladio concident. Et ut attentione tua condignam usque ad finem prosequamur historiam : Postquam Romani (ut dictum) respondissent (repndissent) Pontifici, mox ante retro conversum in asello gloriosum equitem posuerunt, tenentemque sui vectoris caudam in manibus, per publicam totius Urbis viam, hæc ut caneret impulerunt : TALE SUPPLICIUM PATITUR QUI ROMANVM PAPAM DE SUA SEDE PELLERE NITITUR ». Hactenus de his Petrus.

15. Hic vero monendum putamus esse lectorem, Joannem hunc, appellatum Decimum Sextum Romanum Pontificem, natione Calabrum, patria Rossanensem, proprio nomine ante arreptum Pontificatum nominatum fuisse Philigatum, reperiri in Actis sancti Nili abbatis ejus concivis, ab auctore hujus temporis exacte conscriptis, omnia ista ob oculos habente, cujus de his narratio hic est intexenda, quæ incipit ab eo tempore, cum eum futura prænoscentis vir sanctissimus admonuit, ut quam male occupaverat Sedem, dimitteret. Ait enim :

16. « Ita etiam fecit cum concive suo Philagatho archiepiscopo, scribendo scilicet ad eum litteras, quando prædictus Philagathus Romanam Sedem occupavit insatiabili quodam desiderio, non contentus mundi gloria, qua Deus ipsum mirabiliter exaltavit : in utroque enim imperio gloriam fuerat assecutus. Beatus vero Nilus futura prænoscentis, scripsit illi, eum orans ut valediceret mundi gloriæ, cum jam hac ad satietatem potitus fuisset, et in quiete ad monasticam vitam declinaret. Ille vero non destitit ab instituto suo, quousque egressus est imperator cum priore præsule jam ejecto, et eorum indignationis opus factus est Philagathus ; orbatus enim ab ipsis membris suis maxime necessariis, oculis, inquam, et lingua et naso, in carcerem conjectus est, miserabilis factus et omni ope destitutus. Hæc cum audisset B. Nilus, corde afflictus, coactus fuit, senio et morbo confectus licet (nonagenariam enim, ut alibi idem auctor testatur, excedebat ætatem) et non satis tempore congruo, Quadragesima enim erat, Romam venire, et imperatorem adire pro gratia impetranda.

17. « Imperator igitur et summus Pontifex cum ejus adventum intellexissent, iverunt illi obviam, magna siquidem erat ejus ubique spectata tam Orientalibus quam Occidentalibus fama, et cum illum tenuissent hinc inde manibus, duxerunt illum ad patriarchium, et cum illum medium collocassent et salutassent, alter a dextris, alter a sinistris ejus manus deosculabantur. Sed B. Nilus, licet hæc omnia obsequia ægre ferebat et moleste, tolerabat tamen omnia, si quo pacto obtinere posset quod petebat. Et inquit illis : Ignoscite mihi peccatori

¹ Id est Altitonans. — ² Ezech. XXIII.

(per Dominum) super omnes homines, et semimortuo seni: indignus enim sum tanto honore, quin potius meum est adorare venerandos pedes vestros, et venerari dignitates vestras. Veni tamen ad gloriam vestram, non honorem cupiens, vel munera, vel proventus magnos, sed gratiam pro eo qui vobis nullum inservivit, et male a vobis tractatus fuit: qui utrumque vestrum ex fonte baptismatis suscepit, et a vobis oculi illi sunt eruti. Precor pietatem vestram, ut illum mihi dono detis, ut mecum in posterum sedens, ambo peccata nostra depleamus.

48. « Tunc imperator modicum lacrymalus (neque enim revera tota res ejus consilio peracta est) respondit beato Nilo: Praesto sumus, ut omnia quae videntur sanctitati tuae perficiamus, si etiam tu exaudies petitionem nostram et dignaberis accipere monasterium in hac civitate, quodcumque volueris, et esse nobiscum sempiterno tempore. Cum vero B. Nilus renueret in Urbe morari, proposuerunt illi S. Anastasium extra turbas existentem, et semper nostro generi, Graecis scilicet, attinentem. Et jam accepisset B. Nilus conditionem, studens ut quam petebat gratiam obtineret. Sed durus ille papa non contentus malis quae adversus praedictum Philagathum patraverat, eum illum adduxisset, et sacerdotales vestes ei dilaniasset, per totam Urbem circumduxit », et alia omnia, quae dicta sunt superius, pati coegit; « quod cum sanctus senex audisset, et magnopere tristatus esset, non amplius petiit ab imperatore archiepiscopum Philagathum. Quod cum animadvertisset imperator, misit unum ex suis archiepiscopis valde loquacem, ut senem Nilum placaret. Cui dixit beatus Nilus: Vade et dic imperatori et papae: Haec dixit senex ille..... Donastis mihi caecum istum non mei timore, nec magna mei potentia, sed tantum Dei amore. Nunc igitur quaecumque insuper fecistis, non illi, sed mihi fecistis, vel potius Deum ipsum contumelia affecistis. Scitote igitur, quod quemadmodum vos non pepercistis illi, neque misericordiam ostendistis erga illum qui a Deo manibus vestris traditus est; ita neque Pater vester caelestis parcat peccatis vestris. Sed archiepiscopus ille loquax non desinebat excusare imperatorem et papam. Tum B. Nilus, inclinato capite, dormitari simulabat. Ubi vero ille vidit B. Nilum suis verbis mentem non adhibere, surgens abiit. Beatus autem Nilus quamprimum cum fratribus, quos secum habebat, consensu equis, tota illa nocte ad suum pervenit monasterium, juxta Cajetam in loco arduo constructum, orationi et sibi incumbens, et Deum indesinenter placans precibus. Non multos post dies, papa quasi tyrannus quidam inde vi ejectus fuit (ut a quibusdam audiui, qui haec dicebant) et oculis orbatus, sepulturae traditus fuit. Imperator vero poenitentiam pollicitus, pedes ab Urbe ad Garganum montem ivit ad Sanctum Michaellem Archangelum, etc. » Sed de peregrinatione ista agemus postea.

19. Quod autem de successore Philagathi

dictum est, eum scilicet paucos post dies vi pulsum, et excæcatum, mortuumque etiam ac sepulturae mandatum: cum ista quidem de Gregorio V dici aliquo modo non possint, necesse est ut dicamus, vel duos successive ista tunc passos esse Pontifices, vel quod haud adeo secure aliorum testificatione auditum, ut asserit, liberans fidem suam, minime verum fuerit; cum nullus alius auctor invenialur, qui de alio aliquo ista testetur. Sed jam reliqua prosequamur.

20. *Ecclesia in Gallia consecrata per legatum pseudopapae corruit.* — Ad hunc ipsum Joannem pseudopontificem spectat, dum Romae adversus Gregorium in schismate sedit, quod Glaber Rodolphus scribit de legatione ab ipso in Gallias missa. Cum enim Fulco comes Andegavensis egregiam erexisset Ecclesiam, nec inducere potuisset archiepiscopum Turonensem, in cujus diocesi erat erecta, ut eam consecraret, Romam ad Joannem Romanum Pontificem se contulit, a quo et impetravit, ut aliquem mitteret, qui eam ipsius Pontificis nomine consecraret. Qui autem a summo Pontifice missus fuit, Petrus cardinalis sanctae Romanae Ecclesiae extitit. Rem gestam observatione dignam idem qui supra Rodolphus, hujus temporis scriptor, ita narrat¹:

21. « Expleto denique quantocius Basilicæ opere, prolinus misit ad Ilugonem Turonensem archipræsulem, in cujus scilicet constituta erat diocesi, ut illam sacraturus, quemadmodum decreverat, adveniret. Qui venire distulit, dicens, se minime posse illius votum, dicendo Domino, committere, qui videlicet Matri Ecclesiae sedis sibi commissæ prædia et mancipia subripuerat non pauca. Hocque potius illi videbatur competere, ut primitus, si quid injuste diripuerat alicui, restitueret, sicque deinceps justo judici Deo propria quæ voverat offerre deberet. Cumque igitur ista Fulconi a suis perlata fuissent, diutina feritate resumpta, nimium indigne ferens episcopi responsa, insuper comminatus illum valde, ac sublimius inde quod valuit adegit consilium. Mox denique copiosa auri et argenti assumpta pecunia, Romam pergens, Joanni papae causam suae protectionis exposuit. Ac deinde poscens quod ab illo oplaverat, plura ei munerum dona obtulit.

22. « Qui protinus misit cum eodem Fulcone ad praedictam Basilicam sacrandam, unum ex illis, quos in beati Petri Apostolorum principis Ecclesia cardinales vocant, nomine Petrum. Cui etiam præcepit, veluti Romani Pontificis auctoritate assumpta, quidquid agendum Fulconi videbatur intrepidus expleret. Quod utique audientes Galliarum quique præsules, præsumptionem sacrilegam cognoverunt ex caeca cupiditate processisse, dum videlicet unus rapiens, alter raptum suscipiens, recens in Romana Ecclesia schisma creavissent. Universi etiam pariter detestantes, quoniam nimium indecens videba-

¹ Glab. hist. l. II. c. 4.

tur, ut is qui Apostolicam regebat Sedem, Apostolicum primitus ac canonicum transgrediebatur tenorem; cum insuper multiplex sit antiquitus auctoritate roboratum, ut non quisquam episcoporum in alterius diœcesi id præsumat exercere, nisi præsule cujus fuerit compellente seu permitte.

23. « Igitur die quadam mensis Maii, congregata est innumerabilis populi multitudo ad dedicationem scilicet prædictæ Ecclesiæ. Ex quibus multo etiam plures illuc Fulconis terror, ob suæ elationis pompam convenire compulit. Episcopi tantum qui ejus dilione premebantur, coacti interfuere. Cœpta igitur die constituto satis pompaticæ hujusmodi dedicatione atque peracta, missarumque ex more sollemnibus celebratis, postmodum quique ad propria rediere. Denique imminente ipsius diei hora nona, cum flabris iombus serenum undique consisteret cælum: repente supervenit a plaga australi vehementissimus turbo, ipsam repellens seculam ac replens eam turbido aere, diu multumque concitans; deinde vero solutis laquearibus, universæ ejusdem Ecclesiæ trabes, simulque totas teges per pignam templi ejusdem occidentalem in terram corruentes, eversum ierant.

24. « Quod cum multi per regionem factum comperissent, nulli venit in dubium, quoniam insolens præsumptionis audacia irritum constituisset votum, simulque præsentibus ac futuris quibusque, ne huic simile agerent, evidens indicium fuit. Licet namque Pontifex Romanæ Ecclesiæ, ob dignitatem Apostolicæ Sedis, cæteris in orbe constitutis reverentior habeatur, non tamen ei licet transgredi in aliquo canonici moderaminis tenorem. Sicut enim unusquisque orthodoxæ Ecclesiæ pontifex ac sponsus propriæ sedis uniformiter speciem gerit Salvatoris: ita generaliter nulli convenit quidpiam in alterius procaciter patrare episcopi diœcesi ». Hæc Glaber.

25. Sed sicut in recensenda historia fidelis, ita in pervestiganda atque definienda causa ruinæ templi valde hallucinatus erravit: dum nihil vult in aliena diœcesi posse præsumere Romanum Pontificem plusquam cæteros episcopos, quibus certis limitibus est definita diœcesis, et extra ipsam nihil penitus agere posse, vane existimavit, contra omnes Ecclesiasticas leges, usumque ipsum, atque antiquam traditionem. Annon jure, sancte, pieque Joannes papa et martyr consecravat Constantino-
poli Ecclesias, quæ erant Arianorum, in usum Catholicorum? Annon verior illa causa, quod ostenderit eo signo Deus, oblationes impiorum sibi non esse gratas, ut demonstratum olim fuit in Ecclesia ædificari cœpta ab impio Juliano Apostata cognominato? Nam scriptum est in Ecclesiastico¹: « Dona iniquorum non probat Altissimus, nec respicit in oblationes iniquorum, nec in multitudine sacrificiorum eorum propitiabitur peccatis. Et:

Qui offert sacrificium ex substantia pauperum, quasi qui victimat filium ante conspectum patris sui ». Quanto magis execrabilis Deo sacrilegus, qui ex bonis Ecclesiarum sublatis aliquid Deo offerat? Tunc plane iratus Deus fecit quod minatur in Malachia¹: « Maledicam benedictionibus vestris ».

26. Quis igitur aliam quærat causam de diruto divino miraculo templo, quam exprobrata antea per antistitem illi homini sacrilegia, quorum causa, se illud consecrare templum sanctus episcopus juste religioseque renuit? cum præsertim, etsi ista cuncta ex Fulconis parte cessassent, satis ad culpam, quod non per legitimum, sed schismaticum Pontificem, Sedis invasorem, ista mandata fuissent. Quod autem idem qui supra Glaber hæc accidisse demonstret in Joanne, qui adversus alium sedit in schismate, plane non ad prædecessorem Joannem Decimum Quintum aptari possunt, qui pacifice absque aliquo adversante schismatico papa sedit, sed ad hunc referas opus est, qui contra Gregorium sedit. At de his satis.

27. *Otto coronatur imperator; S. Romualdum excipit apud Tibur, ejusque consiliis ipse et alii in melius convertuntur.* — Conciliata Ecclesiæ pace post male mulctatum Joannem, hoc ipso anno, Otto imperator coronatur ab eodem Gregorio papa. Hoc quidem anno, ejus coronationem referunt Lambertus, Odorannus, et alii veteres chronographi. Nec enim temporis ratio patitur, ut ante præsentem facta fuerit annum, cum omnium testificatione constet, eam a Gregorio Quinto factam esse. De qua ea quæ ab auctore qui interfuit, vel interesse potuit, in Gestis sancti Adalberti Pragensis episcopi scripta sunt, hic sunt in lucem in tanta obscuritate promenda; sic enim ait: « In purpura natus Otto rex Tertius, causa scandendi imperii culmen (ut mos est a Carolo Magno regum Francorum) multo comitatu Romam venit, optatum diu caput Latine terræ. Ostendit se, quasi post Deum altera iustitia veniat: iniqui omnes tremunt, boni magno gaudio gaudent. Fecit propter quod venit. Quem ipse in sacellum suum tractum posuit papa Gregorius Cæsarem, benedixitque: et populus *Kyrie eleison* celsa voce cantavit. Ascendit ille unctus cum corona imperii imperator Augustus, gerens sidereos vultus, et bonæ voluntatis plena præcordia ferens ». Hæc ipse de coronatione Ottonis imperatoris. Subjicit de Synodo tunc ab eodem papa Romæ collecta, sed de ipsa inferius dicturi sumus. Modo autem reliqua Ottonis imp. anni hujus gesta prosequamur, qui ut pacificum Urbis statum Pontifici relinqueret, discessurus ex Urbe, laboravit ut omnes qui favissent Crescentio tyranno comprimeret, inter quos fuit populus Tiburtinus, cui, ne penitus deleteretur, præsto fuit S. Romualdus, quem opportune Deus hoc tempore misit ad eundem imperatorem, occasione dimittendi Classense monasterium ab eodem acceptum, ut ad meliorem

¹ Eccl. xxxiv.¹ Malac. ii.

frugem monachos illos reduceret. Sed hæc quomodo se habuerint, sic accipe ex Petro Damiani in Romualdo :

28. « Regebat itaque monachos sub districta regula disciplinæ, neque alieni ab ea declinare licebat, nemo ex illis per actus illicitos in dextram levamque partem deflectere, aut rectæ conversationis audebat rectitudine deviare. Vir namque sanctus cordis oculos in cælum figens, ut Deo in omnibus obtemperaret, non timebat hominibus displicere. Hoc autem fratres serio considerantes semetipsos prius accusant, quia hunc sibi præesse poposcerant. Deinde multis cum detractionum susurrationibus lacerant, et duris scandalorum equuleis vexant. Romualdus itaque videns, et suam perfectionem aliquatenus minui, et illorum mores proclivius ad deteriora converti, regem impiger adiit, et eo non leviter reluctantem, una cum archiepiscopo Ravennate, in utriusque conspectu virgam projicit, monasterium dimisit.

29. « Porro autem rex Tiburtinam tunc civitatem obsidebat : cives enim inclytum ejus ducem, Matholinum nomine, interfecerant, ipsum quoque regem correptis armis, a suis mœnibus exturbaverant. Unde non dubium est, beatum Romualdum illuc ex divina providentia missum, qui imminens tot animarum periculum sequestra pace delevit. Hoc etenim inter eos pactus est ut Tiburtes in honorem regis partem murorum diruerent, ac obsidem darent, ducis vero interfectorem ad ejus matrem catenatum dirigerent. Quæ sancti viri fusis ad eam precibus mitigata, crudeli homicidæ crimen indulsit, et incolumem ad propria redire permisit ». Et inferius, post narrationem de Venerio viro sancto ista subjicit :

30. « Apud prædictam quoque civitatem convertit beatissimus vir Thammum quemdam Teutonicum, qui (sicut dicitur) in tantum regi familiaris et charus exlitterat, ut utriusque vestes utrumque protegerent, et amborum manus una paropsis communi sæpe convivio satiare. Crescentius namque, senator Romanus, indignationem regis incurrens, in montem qui dicitur Sancti Angeli confugium petiit. Et quia munitio inexpugnabilis est, obsidente rege, ad defendendum se fiducialiter præparavit. Ei vero Thammus ex præcepto regis jusjurandum securitatis præstitit. Et ita ille deceptus, annitente papa, qui sibi inimicus erat, quasi reus majestatis capitalem sententiam subiit. Cujus uxorem postea imperator in concubinam accepit. Quia igitur Thammus et fraudis conscius et perjurio tenebatur obnoxius, idcirco a beato Romualdo jussus est relinquere sæculum. Qui mox a rege licentiam expetens, non modo facilem reperit, sed nimis etiam alacrem fecit. Erat autem prædictus imperator monastico ordini valde benevolus, et nimia circa Dei famulos affectione devotus. Ipse quoque imperator ex eodem crimine beato viro confessus, pœnitentiæ causa nudis pedibus de Romana Urbe egrediens, sic usque in Gar-

ganum montem, ad S. Michaelis perrexit Ecclesiam ». Sed id postea, ut suo loco dicetur. Pergit autem :

31. « Per totam vero Quadragesimam in Classensi monasterio B. Apollinaris, paucis sibi adhaerentibus mansit, ubi jejunio et psalmodiæ prout valebat intentus, cilicio ad carnem indutus, aurata desuper purpura tegebatur. Lecto insuper fulgentibus palliis strato ipse in storcea de papyris confecta tenera delicati corporis membra tenebat. Promisit denique B. Romualdo, quod imperium relinquens, monachicum susciperet habitum. Et cui innumeri mortales erant obnoxii, jam ipse pauperculo fratri cœpit esse subjectus ». Ita plane Dei imperium exigit ab imperantibus, ut sint subditi sanctis viris, a quo nec obstinatus Pharaon nec scelestus Herodes exsortes fuere. De illo dictum ad Moysen ¹ : « Faciam te Deum Pharaonis ». De isto ab Evangelista narratum ² : « Metuebat autem Herodes Joannem, et audito eo multa faciebat ». Ut non adeo mirum sit, si Romualdo viro sanctissimo Otto pareret imperator maxime pius. Porro de accessu ejusdem imp. ad montem Garganum pœnitentiæ causa, quam S. Romualdus indixerat, testis est etiam Leo Ostiensis in Chronico Cassinate ³.

32. *S. Romualdus petit monasterium Cassinense cum sociis, inter quos Bonifacius.* — Sed videamus quæ de eodem Romualdo idem subjicit Petrus Damiani, cum ex Urbe cum suis, quos abriperat e sæculari palatina militia, profectus est in nobile monasterium Cassinense; pergit enim : « Romualdus autem cum eo de quo jam diximus Thammo, et cum Bonifacio viro clarissimo, quem nunc felicissimum martyrem se habere Russiana gloriatur Ecclesia, et cum aliis conversis Teutonibus, a Tiburis oppido ad monasterium S. Benedicti quod in Cassino constitutum est monte devenit. Ibi vero graviter infirmatus est, sed cito ex divina misericordia convaluit. Habebat autem equum satis egregium, quem sibi Busclavinus, Sclavonici regis filius, dono dederat, factus ab eo monachus. Hunc vir sanctus humilitatis studio permutavit, et pro eo asinum laudabilis negotiator accepit. Nimio quippe Redemptoris nostri desiderio, qui asellæ tergo insederat, vir venerabilis hoc ipsum animal libentius equitabat. Cum his igitur omnibus superius nominatis Romualdus ad Peruviam (Piretum), ubi diu habitaverat, rediit. Ibique his et aliis multis fratribus aggregatis et per cellulas singulas constitutis, tanto fervore Dominicæ conversationis rigorem in se et in aliis tenuit, ut illorum vita omnibus ad quos fama eorundem pervenire poterat, mirabilis haberetur, etc. » De hujusmodi autem Romualdi cum suis accessu ad Cassinense monasterium, Annales hujus cœnobii memoriam conservant ⁴.

33. Sed quonam modo idem, de quo supra

¹ Exod. VII. — ² Mar. VI. — ³ Leo Ost. l. II. c. 24. — ⁴ Ibid. cap. 18.

mentio facta est, Bonifacius vir illustris ad Christum conversus sit, Petrus Damiani ibidem mox subiecit ista : « Hic regis fuerat consanguineus, et ita charus, ut rex illum non alio vocaret nomine, nisi Anima mea. Erat autem apprime liberalium artium doctrinis instructus, maximeque in modulationis musicæ studiis approbatus. Is itaque cum in cappella regia moraretur, videns Ecclesiam antiqui martyris Bonifacii, quæ est Romæ in Aventino, mox exemplo sui æquivoci ad martyrii desiderium provocatus, ait : Cur ergo etiam ipse martyr esse non debeo ? Post hæc igitur monachus factus, tanta se abstinentiæ frugalitate constrinxit, ut sæpe Dominicis diebus tantum et Feria quinta per hebdomadam manducaret. Nonnunquam autem, ubi urticarum vel etiam veprium cerneret densitatem, illuc se projiciens volubabat, etc. » Quando autem accepta licentia a Sede Apostolica ad prædicandum Evangelium Russis profectus est, suo loco dicturi sumus.

34. Sciendum præterea petiisse eundem Ottonem imp. monasterium Cassinense, eidemque Privilegium contulisse et oblationes. Testatur id Leo Ostiensis in Chronico Cassinate¹. At hoc an primo vel secundo adventu Ottonis in Italiam factum sit, ignoratur, sicut et alia nonnulla, quæ anni hujus periodo sunt collocata.

35. Quid autem acciderit Ottoni, Romæ dum moraretur, cogitanti expellere monachos, et introducere canonicos in Basilicam S. Pauli, sic accipe a Glabro Rodulpho² : « Contigit igitur ipso in tempore, ut idem imperator, suggerente tam ipso Pontifice, quam aliis quibuscumque cælum profectus (zelum perfectum) religionis domus Dei gerentibus, quosque in beati Pauli Ecclesia nomine tenus monachos, cæterum prave degentes, inde expellere deberet, ac alterius instituti (quos videlicet canonicos dicimus) in eodem loco servituros, ut ei suggestum fuerat, substiturus esset. Cumque hoc appeteret implere decretum, apparuit ei noctu per visum beatissimus Apostolus Paulus, atque eundem imperatorem hujusmodi monere curavit : Si vere (inquiens) zelus divinæ servitutis optimi operis te adurit : vide ne hujus propositi institutum præsumas in monachis immutare expellendis. Non enim omnino expedit, cujusque Ecclesiastici ordinis, quamvis ex parte depravati, propositum unquam abjici seu immutari. In eo namque unusquisque judicandus est ordine, in quo se primitus vovit Deo servire : reemendari tantum licet corrupto cuique in eadem propriæ vocationis sorte. Taliter quippe monitus imperator retulit suis quæ audierat ab Apostolo, curamque agens, qualiter eorum institutum scilicet monachorum quivisset in melius reformare, non expellere a loco, licet immutare ». Hucusque Glaber.

36. *Synodus Romæ in causa episcopi Pragensis.* — Porro hoc ipso anno compositis rebus, red-

ditaque pace Ecclesiæ, Gregorius papa consilio Ottonis ad stabiliendum statum Ecclesiæ adjiciens animum, necnon ad electionem imperatorum pacifice absque tumultu in posterum faciendam, Concilium Romæ collegit episcoporum. Quod licet ipsum exciderit, ejusque Acta omnino perierint, fragmenta tamen quæ in hoc usque tempus sunt conservata prodemus : sic per pauca quæ supersunt, ea quæ perierunt et obscura penitus remanserunt, revocabuntur in lucem, ut liceat saltem per transennam adspicere quæ antea celabantur. Mentio in primis hujus Concilii Romæ habiti, sub Gregorio Quinto Romano Pontifice, extat in rebus Gestis sancti Adalberti, a scriptore hujus temporis (ut sæpe dictum est) scriptis, quibus significatur, in hac Synodo etiam agitatam esse causam S. Adalberti Pragensis episcopi, judicio postulati ab archiepiscopo Moguntino de facienda in sua Ecclesia, quam reliquerat, residentia. Qui enim ea tunc temporis scriptis mandavit, sic narrat :

37. « Post hæc facta est Synodus, et zelo juris ductus Moguntinus archiepiscopus antiquam cantilenam cantat, et episcopum sanctum a quiete monasterii ad relictos greges revocare instituit. Assensit papa Gregorius, et semel susceptum gregem non posse impune eum dimittere, Scripturæ sententiis affirmat. Velit nolit vir Dei, errat, iniquiunt episcopi sedentes : aliter vinculis neclatur anathematis. At ille secretum petens, ad papam ait : Hostis quieti meæ invidet, qui vos suo stimulo instigat, ut eo me redire compellatis, ubi animarum fructum non faciam, detrimenta autem capiam animæ meæ immania : mitiga ærumnam meam, defectui meo remedium oppone, tristi recessui meo da vel unum solatium. Si audiunt oves meæ quam clamo vocem, vivens moriar cum eis : sin minus, pietas tua mihi succurrat, ut verba vitæ eis spernentibus, cum licentia tua vadam ad exteras et incultas gentes, quæ nesciunt nomen Domini. Acquievit libens voluntati hominis Dei papa Gregorius, ut erat satis bonus, quantum permisit vaga juvenus. Reliquit sanctus Adalbertus monasterium non sine magno planctu suo et fratrum, moleste ferens ruptam quietem, sed habens de illo martyrio spem vivam, cujus in suo pectore ardebat longum desiderium, etc. » Ista tunc in Synodo. At hujus quoque Concilii mentio habetur in Vita sancti Burchardi, Wormatiensis episcopi, ubi pariter dicitur interfuisse eidem Concilio Franco tunc episcopus Wormatiensis, accepisseque ab eo tunc abbatiam, cujus investituram in eadem Synodo recitatam tradit, eumque hoc anno esse defunctum.

38. *Elucidata quæstio de jure electorum Germaniæ quoad Romanum imperium.* — Quod autem majoris momenti est, ad hoc ipsum Concilium a Gregorio Quinto celebratum referri debere videtur, quod de imperatoris electoribus ab eodem Pontifice multorum assertionem traditur constitutum : Siquidem res magni momenti, nonnisi consullis Patribus, collectis episcopis, in Synodo fieri consueve-

¹ Leo Ost. c. 22. in fin. — ² Glabr. hist. l. 1.

runt. At quod nos sciamus rem tantam magna esse controversia agitatum, refragantibus novatoribus, ac negantibus jus eligendi accepisse electores a Romano Pontifice, sed ab Ottone imp. III illud eis esse concessum; aliis vero asserentibus, id non eos accepisse a Gregorio Quinto, sed Decimo ejus nominis Romano Pontifice; de his accuratissime nobis agendum erit. Quod pertinet ad novatores cuncta hæc tribuentes imperatori, nihil concedentes Romano Pontifici, cum liberioris essent affectus, et non hominum gratia ducerentur, his verbis veritatem libere sunt professi¹: « Gregorius suam patriam insigni aliqua dignitate ornaturus, sanxit, ut penes solos Germanos esset jus eligendi regem, qui post diadema a Romano Pontifice acceptum imperator et Augustus appellaretur ». Hæc tota illa schola novantium communi consensu, pari sententia, perpetua memoria reliquere testata, suisque chirographis consignata, palamque edita eadem legenda cunctis tradita; sicque veritatem aliquando profitentes, in eandemque persalantes, ad calcem ejusdem tomi, ut tandem quæ disseruerant de edita per Romanos Pontifices sanctione de electoribus, stabilirent, auctoritate nitentes Blondi, verbatim quæ ab eo de ea re scripta essent, recitant: Blondi verba, inquit, hic inseremus²: « Paulo enim post quam redierat, Gregorius papa scilicet, eam fecit de imperatoris electione sanctionem, quam hucusque super annos quadragintos servatam videmus, solis licere Germanis, qui inde electores dicti sunt, principem deligere, qui Cæsar tunc et Romanorum rex dictus, si a Romano Pontifice coronabitur, imperator Augustus appelletur. Suntque hi electores, etc. » Quibus recensitis subjicitur: « Annum, in quo hæc sanctio a Pontifice Gregorio facta est, secundum supra millesimum Christianæ salutis fuisse invenimus ». Hucusque ex Blondo ipsi in rebus gestis Ottonis Tertii, ibique asserunt istud ipsum de electoribus deligendis ex Germanis, fuisse primum consilium ejusdem imperatoris, generali sententia et auctoritate ejusdem Gregorii Romani Pontificis confirmatum ac promulgatum. Alios præterea recitantes auctores studuerunt idipsum plurimorum assertionem relinquere bene testatum, roboratum, atque penitus stabilitum.

39. At illorum antesignanus primus desertor factus, ab asserta et professa multoties veritate recedens, de translatione imperii seorsum edidit commentarium, in quo inter alia impugnât impudenter eam quam una cum cæteris collegis defenderat, et sartam tectam bene confirmatam statuerat veritatem, nec nisi affectatis pudendisque mendaciis: quæ foris spectanda aperta luce exposuit, ac potenter valideque confutavit fortis Ecclesiæ Catholice antagonista, doctissimus Bellarminus, eodem titulo scripto contradictorio Commentario, in cujus tertio libro eundem de electoribus multipliciter

mentientem sic redarguit, ut fortissimorum enthyematum laqueis miserum strangulet, ut non modo ipse intercepto spiritu respondendi amiserit facultatem, sed nec ex sectariis ejus quis inventus, qui singulis respondere sit ausus, et cum plurimos reliquerit impii dogmatis sectatores, nullum tamen habuerit qui singula singulis redargueret responsionibus defensorem. Adversos quos omnes (licet videri posset esse superfluum, pro ratione tamen tenemur instituti, cum historicæ id esse facultatis omnes norunt) adeo liberaliter in hac concertatione nobis agendum proponimus, ut omissis innumeris testibus historiarum scriptoribus, quorum aliquibus et ipsi in eadem veritate adstruenda sunt usi, nonnisi sanctissimorum Romanorum Pontificum publicis asserta litteris testimonia afferamus. Et ne dicatur domesticis nos uli testibus, eorundem ipsorum electorum testificationes ab ipsismet scriptis proditas, atque subscriptas et obsignatas, in medium adducemus: quin et addeamus litteras imperatorias, quas præ dignitatis excellentia, sacras nuncupare consuevit antiquitas, ut nec invenire possit, qui flagrat contradicendi libidine, quæ respondeat, nisi qui multa febre phrenetici, linguæ vertigine tantum usi, absque ulla mentis ratione ad quæque insana promenda veloces existunt, ne se superatos atque convictos humili confessione fateri cogantur. Rem vero aggrediamur.

40. Est firma et in omnibus constans assertio, sicut imperium auctoritati Romani Pontificis ex Oriente in Occidentem translatum est, ita jus eligendi imperatorem Germanis concessum, vel dixerimus, regem in imperatorem promovendum ab eorundem Romanorum Pontificum auctoritate et concessione manasse. Accipe quæ de his Innocentius Tertius papa scripserit ad ducem Caringiæ sive Thuringiæ¹: « Illis principibus jus et potestatem eligendi regem in imperatorem postmodum promovendum recognoscimus, ut debemus, ad quos de jure antiqua consuetudine noscitur pertinere: præsertim cum ad eos jus et potestas hujusmodi ab Apostolica Sede pervenerit, quæ Romanum imperium in personam magnifici Caroli a Græcis transtulit in Germanos ». Hæc Innocentius. In Concilio Viennensi eadem Clemens Quintus his verbis²: « Romani principes, Orthodoxæ fidei professores, sacrosanctam Romanam Ecclesiam, cujus caput est Christus Redemptor noster, ad Romanum Pontificem ejusdem Redemptoris vicarium fervore fidei et claræ devotionis promptitudine venerantes, eidem Romano Pontifici, a quo approbationem personæ ad imperialis promptitudinis apicem assumendæ, necnon unctionem, consecrationem, et imperii coronam accipiunt, ut sua submitterent capita non reputarunt indignum, seque illi et eidem Ecclesiæ, quæ a Græcis imperium transtulit in Germanos, et a qua ad cerlos eorum

¹ Cent. x. c. 10. pag. 346. 3. — ² Cent. x. c. 16. p. 720. 47.

¹ Ext. de elect. c. venerabilem 34. — ² Clement. de jurejur. c. 1.

principes jus et potestas eligendi regem, in imperatorem promovendum pervenit, adstringere vinculo juramenti, etc.» Id quidem adeo sine contradictione a majoribus receptum est, ut semper ipsi electores et imperatores ab eis electi ingenue hoc ipsum professi sint, intellexerintque pariter, ejus esse facultatis qui dedit, et auferre pariter, cum viderit expediens esse Reipublicæ Christianæ : quod et cætera exempla demonstrant.

41. Cum vero ante ipsam collatam a Romano Pontifice concessiōnem eligendi imperatorem electoribus ipsis, eo jure carerent etiam imperatores, ut successorem sibi deligerent, Magno Ottoni id primum a Romano Pontifice reperitur esse concessum. Exstat de his Leonis papæ Octavi decretum ad Ottonem Primum imperatorem datum, quod et recitant ipsi novatores¹, cum inter alia ipse Pontifex, quo pertrahat ipsum imperatorem ad liberandam Romanam Ecclesiam a tyrannis oppressam, concedit ipsi facultatem eligendi sibi successorem. Sunt hæc verba ab iisdem pariter recitata : « Nos quoque Leo, servus servorum Dei, episcopi similiter, cum euncto clero et universo populo Romano, omnibus ordinibus hujus almæ Urbis (sicut in ijs conscriptis apparet) constituimus, confirmamus, corroboramus, et per nostram Apostolicam auctoritatem concedimus atque largimur domino Ottoni Primo Teutonico regi, dilectissimo spirituali in Christo nostro filio, ejusque successoribus hujus regni Italici in perpetuum, tam sibi facultatem successorem eligendi, etc. » Idque factum, ut auctoritate Diplomatis hujus ipse sibi filium elegerit successorem in regnum primo, inde in imperium promovendum. Ex præscripto igitur Romani Pontificis factum videmus, ut non rex eligeretur ab electoribus, sed ipsi imperatores Primus et Secundus Otto successores regni in imperium promovendos filios nominaverint. Olo autem Tertius, quod prole caruerit, per Pontificem Gregorium aliter imperio consulendam putavit, nempe ut electoribus principibus id concederetur ab ipso.

42. Audisti Romanorum Pontificum facultate imperatoribus primo concessum jus eligendi regem promovendum in imperatorem. Audisti insuper et testificatione Romanorum Pontificum id ipsum concessum certis principibus electoribus : reliquum est modo (quod polliciti sumus) ut et ipsorum electorum testificatione, necnon imperatorum assertione id ipsum firmemus.

43. Non unius ex eis est ista assertio, sed omnium id suis litteris ad Romanum Pontificem datis significantium, publicis atque patentibus monumentis testantium, quæ licet diversis locis sicut et diebus datæ reperiantur, non solum unum idemque earum argumentum est, sed eadem quoque sunt verba, ut appareat certam quamdam præscriptam formam ab eis, qua id ipsum universo

Christiano orbi voluerint innotescere, et relinquere posteris bene testatum. Extant, inquam, litteræ marchionis Brandenburgensis unius ex electoribus, quarum hic est titulus? « Otto marchio Brandenburgensis, universis præsentem paginam inspecturis.

44. « Datæ autem », ut in fine habetur, « anno millesimo ducentesimo septuagesimo nono, pridie id. Septemb., anno sexto Rodulphi imperatoris ». Aliæ Joannis et Adalberti ducum Saxonie, eodem titulo, datæque eodem anno, die vero et mense diverso, nempe decimo quarto kalendas Aprilis. Aliæ Ludovici comitis Palatini Rheni, eadem die datæ et anno, juxta quam præscriptam ab ipsis formam et reliqui electores scripsere. Quibus omnes pariter confirmant donationes factas vel innovatas a Rodulpho Romanorum rege et aliis prædecessoribus imperatoribus Romanæ Ecclesie. Extant ipsæ in scripto Codice eodem tempore, una cum aliis monumentis, de donationibus et privilegiis a diversis Eccl. Romanæ collatis, quæ asservantur seorsum a Vaticana Bibliotheca Romæ in Castello S. Angeli, loco tutiori, ubi selecta majoris momenti monumenta recondita habentur, ne pereant. Porro satis erit ex omnibus recitare unas, cum (ut diximus) unum idemque sit argumentum omnium, atque totidem verba. Comitis Palatini sunt istæ :

45. « Ludovicus Dei gratia comes Palatinus Rheni, dux Bavarie, universis præsentem paginam inspecturis salutem in Auctore salutis.

« Complectens ab olim sibi Romana mater Ecclesia quadam quasi germana charitate Germaniam, illam eo terrenæ dignitatis nomine decoravit, quod est super omne nomen temporaliter tantum præsidentium super terram, plantans in ea principes tanquam arbores præelectas, et rigans illas gratia singulari : illud eis dedit incrementum mirandæ potentiæ, ut ipsius Ecclesie auctoritate suffulti, velut germen electum per ipsorum electionem, illum qui fræna Romani imperii teneret, germinarent. Hic est illud luminare minus in firmamento militantis Ecclesie, per luminare majus Christi vicarium illustratum. Hic est, qui materialem gladium ad ipsius nutum exuit et convertit, ut ejus præsidio pastorum pastor adjutus, oves sibi creditas spirituali gladio protegendo communiat, temporali refrænet et corrigat, ad vindictam malefactorum, laudem vero credentium et bonorum. Ut igitur omnis materia dissensionis et scandalii, seu etiam rancoris occasio inter ipsam Ecclesiam et imperium auferantur, et duo gladii in domo Domini constituti, debito fœdere copulati, seipsos exerceant in utilem reformationem regiminis universi, et nos in actu voluntatis et operis inveniamur filii devotionis et pacis, qui tam Ecclesiam quam imperium confovere tenemur : quidquid per dominum nostrum Rodulphum, Dei gratia Romanorum semper Augustum, sanctissimo patri et domino nostro Nicolao papæ Tertio, ejusdemque successoribus, et ipsi Romanæ Ecclesie

¹ Cent. x. c. 16. pag. 7. 20. vers. 9.

recognitum, confirmatum, ratificatum, innovatum, denuo donatum, declaratum sive concessum, juratum, et actum, seu factum est per privilegia, vel quæcumque alia scripta quorumcumque tenorum super recognitionibus, ratificationibus, approbationibus, innovationibus, confirmationibus, donationibus, concessionibus, et factis seu gestis tam aliorum imperatorum et regum Romanorum prædecessorum regis ejusdem, quam ipsius regis super fidelitate, obedientia, honorificentia per Romanos imperatores et reges Romanis Pontificibus et ipsi Ecclesiæ impendendis, ac possessionibus, honoribus et juribus ejusdem Ecclesiæ, et nominatim super totam terram, quæ est a Radicofano usque Ceperanum, marchia Anconitana, ducatu Spoletano, terra comitissæ Mathildis, civitate Ravennæ, et Æmilia, Bobio, Cesena, Foropopuli, Forolivii, Faventia, Imola, Bononia, Ferraria, Comaclo, Adrianis atque Gabello, Arimino, Urbino, Monteferetro, territorio Balnensi, comitatu Bretonorii, exarchatu Ravennæ, Pentapoli, Massa Trabaria cum adjacentibus terris suis, et omnibus aliis ad prædictam Ecclesiam pertinentibus, cum omnibus finibus, territoriis atque insulis in terra marique provinciis, civitatibus, territoriis ad loca prædicta quoquo modo spectantibus, necnon super civitate Romana, et regno Siciliæ cum omnibus ad eam spectantibus tam citra Pharum, quam ultra, Corsica quoque atque Sardinia, et cæteris terris ac juribus ad ipsam Ecclesiam pertinentibus, nos nostri nomine principatus in omnibus et per omnia approbamus et ratificamus, ac iisdem omnibus et singulis et quibuscumque aliis super iisdem per eundem regem quoquo modo factis, et in posterum faciendis, voluntatem nostram, assensum atque consensum unanimiter atque concorditer exhibemus, et promittimus, quod contra promissa vel aliquod promissorum nullo unquam tempore veniemus. Sed ea omnia et singula pro posse nostro procurabimus inviolabiliter observari. Et ut hæc nostra voluntas, approbatio, ratificatio, assensus, consensus atque promissio a nobis eisdem Romanis Pontificibus et Ecclesiæ in perpetuum observentur, hoc præsens scriptum inde fieri fecimus, nostrorumque sigillorum munimine roboratum. Actum et datum anno Domini M. CC. LXXIX, decimo quarto kal. Aprilis, Indictione septima, regnante prædicto domino nostro Rodolpho Romanorum rege glorioso, regni ejus anno sexto. Hæc ipse. Eadem seorsum reliqui litteris singulis. Ex quibus omnibus novatores suggilles, qui non ab Apostolica Sede id eos consecutos electores affirmant, sed ab ipso Ottone imperatore, cum electores iidem profiteantur suo dicto recitato Diplomate, se ab Apostolica Sede tanto honore nobilitatos. At quomodo id præstitisse jus eligendi Otto imp. potuit, qui nec idipsum habuit, et cum voluit, a Romano Pontifice (ut vidisti) illud expetiit et impetravit?

46. Sed et eadem hæc ipsa adeo perspicua et solida firmitate constantia adhuc roborentur lit-

teris imperatoris, quæ eodem scripto Codice continentur. Sunt istæ post annos viginti quatuor datæ ab Alberto imperatore, quibus describitur juramentum fidelitatis ab eo exhibitum Bonifacio octavo Romano Pontifici, et continetur confirmatio et ratificatio privilegiorum omnium per alios prædecessores imperatores Ecclesiæ Romanæ concessorum. Quod cum sit valde prolixum, hic sit satis summatim describere, atque ea quæ ad rem de qua agimus spectant, totidem verbis et syllabis reddere.

47. Recognoscit in primis, ut gratus, Romanum imperium per Sedem Apostolicam e Græcis in Germanos translatum, ac ab eadem jus eligendi electoribus esse concessum. His subjicit juramentum fidelitatis solitis formulis exhiberi consuetum. Addit his confirmationem juramenti pariter fidelitatis exhibiti a patre suo Rodolpho, et alia omnia ab aliis omnibus imperatoribus præstita. Confirmat itidem privilegia ab eodem Rodolpho et aliis imperatoribus eidem Ecclesiæ Romanæ concessa. Ratificat quæ statuta et jurata fuerant per Ludovicum imp. Paschali papæ, et per Ottonem Joanni Pontifici. Et post reverentiam patri exhibitam, et filialem amorem insinuatam, Ecclesiæ jura defendit, primatum et libertatem ejusdem Ecclesiæ proficitur defensurum adversus quoscumque ejusdem perturbatores, adversus quos bella movere, si opus sit, pollicetur, spondens suum cum exercitu in Italiam adventum, si placeat. Datum vero habetur apud Noremberg anno Domini M. CCC. III, Indictione prima, decimo sexto kal. Augusti, regni vero anno quinto; sed quæ ad rem spectant (ut promissimus) sic verbatim accipe ab ejus exordio, cum isto titulo præfixo diplomati:

48. « Sanctissimo in Christo patri, et domino nostro, domino Bonifacio, divina providentia sacrosanctæ Romanæ ac universalis Ecclesiæ summo Pontifici, Albertus Dei gratia Romanorum imperator semper Augustus, devota pedum oscula beatorum.

« Profileor, beatissime pater, me honorum omnium largitori, ac vobis et sanctæ Ecclesiæ tuæ fore pro innumeris misericordiis et immensis beneficiis obligatum. Profileor, quod desiderii mei recepi desideratum effectum, et diffiteri non audeo, quod et plus quam desiderasse sciverim, adinveni: mirans sic in præteritis esse provisum, quod de iis, quæ circa talia in futuro peti poterant, spes miserationis habetur. Assurgens itaque Deo et sanctitati vestræ, ac eidem Ecclesiæ matri meæ ad gratiarum devotissimas et humillimas actiones, totum me devoveo, totum me offero et expono ad gratificationis debitum per omnia, in quantum humanæ imbecillitatis conditio patitur, exsolvendum. Ad hæc, licet pridem, antequam circa negotium electionis de me ad Romanum regnum et imperium celebratæ, ac alia quæ in hac parte incumbabant, esset per sanctitatis vestræ beneficentiam mei status essentia solidata, fecerim infra-

scripta, et super his meas beatitudini vestrae litteras duxerim destinandas, ac in soliditate hujusmodi procuratores mei ad hoc specialiter constituti, et in vestra praesentia renovarint : ecce nunc tamen, ut gratus reddar, et ipsa in majori firmitate procedant, illa duxi praesentibus innovanda.

49. « Recognoscens igitur, quod Romanum imperium per Sedem Apostolicam de Graecis translatum est in persona magnifici Caroli in Germanos, et quod jus eligendi Romanorum regem in imperatorem postmodum promovendum, certis principibus Ecclesiasticis et saecularibus est ab eadem Sede concessum, a qua reges et imperatores qui fuerunt et erunt pro tempore, recipiunt temporalis gladii potestatem ad vindictam male factorum, laudem vero honorum : pia devotione et sincero corde profiteor, quod Romanorum reges in imperatores postmodum promovendi per Sedem eandem, ad hoc potissime et specialiter assumantur, ut sint S. R. E. advocati, Catholicae fidei ac ejusdem Ecclesiae praecipui defensores, etc. » Habes igitur, lector, rem tantam publicis monumentis Romanorum Pontificum, ipsorum principum electorum atque imperatoris adeo egregie testatam et patefactam, ut rubore suffundi necesse esset, qui contraria his scripsit, si viveret, etiam quod perfricta fronte, et mendaciorum obducto calle didicisset non erubescere, profligato indito a natura ipsa pudore virtutum custode. Quod si de his quis dubitet, ostendi locum, ubi asservantur autographa; petant ipsa, et ego curabo, quo bene consultum sit veritati, ut liberaliter ostendantur.

50. *Quid in dicta Synodo contulerit electoribus Gregorius V, et quando septenarius eorum numerus constitutus.* — His inspectis atque perspecte cognitis, quae spectant ad auctoritatem concessam a Romanis Pontificibus electoribus eligendi in regem, qui esset in imperium assumendus, jam agamus de concessa ab ipso Gregorio quinto electoribus facultate id ipsum praestandi. Sane quidem dum Otlo Romae fuit, tractasse inter alia, quae ad regni jura pertinent, Sigebertus ¹ affirmat. Si Concilii Romani, de quo agimus, monumenta extarent, nobis haud laborandum esset in perquirendo qualis fuerit isla ab ipso Pontifice iisdem electoribus tributa concessio : num scilicet ipsa fuerit omnibus Germaniae principibus generatim collata, an tantum sex vel septem certis nominatisque expressis principibus (ut nunc sunt) Ecclesiasticis atque laicis exhibita. Certe quidem revocandum non est in dubitationem, generalem saltem concessam Germaniae principibus omnibus eandem facultatem eligendi regem in imperium promovendum. Et enim id omnino asserere, etiam si alia quaeque testimonia deessent, facta ipsa non modo suadent, sed cogunt. Cum enim (ut audisti) concessum fuerit a Leone octavo Ottoni primo ejusque successoribus successores eligere reges in imperium promoven-

dos, et ab eis factum usque ad tertium Oltonem constat, et post ipsum nunquam id tentatum ab ipsis fuisse invenitur : plane dicendum est, eam facultatem demptam fuisse imperatoribus ipsis penitus, et Germaniae collatam principibus, nec ab alio, quam a Romano Pontifice, cujus duntaxat id esset auctoritatis, quod (ut nuper audisti) electores et electi imperatores publicis scriptis ingenuae sunt professi.

51. Ut autem non ab alio, quam ab ipso Gregorio id factum sit, multa sunt, quae nos id affirmare cogunt. Atque in primis quem diximus, ipse rei usus, cum post ipsum Gregorium Olone imp. defuncto, non amplius per imperatores, sed per electores principes constet fuisse successores electos, quod scriptores omnes affirmant, et quaevis vetera monumenta testantur, speciatim vero complures auctores, qui suorum temporum res scripserunt, id absque controversia aliqua asserunt, quod et ipsi etiam refractarii novatores (ut dictum est) profitentur.

52. *Ista autem decernendi Gregorio ipse Otto imp. fuisse auctor videri potest.* Cum enim absque liberis esset, et spes omnis dempta, ut in filium (quod fecerunt praedecessores) transferret imperium : ne post ejus obitum inter omnes sibi consanguinitate et affinitate conjunctos, et alios aemulos ejusdem honoris principes exoriri possent bella civilia, quibus idem conflagrans perderetur imperium, in electores eam refundendam potestatem auctoritate pontificia, consultius existimavit. Et quod videret aemulos gloriae Germanorum Francos, explosis Carolinis, ignominiae nomine saggillatos, novos eosdemque pugnacissimos habere coepisse ex alia linea reges, ne illis imperium pariter affectandi, et ad Francos, e quibus in Germanos fluxerat, revocandi aliqua quaerentibus pateret occasio : bene consultum de rebus Germanorum putavit, si Apostolica auctoritate firmaret, ut iidem tantum essent Germani, quibus facultas esset creandi regem, quem idem Romanus Pontifex promoveret in imperatorem : ita tamen, quod si causa aliqua esset id negandi, libere facere posset, nec aliquo necessitatis nexu, quem ipsi elegissent in regem, compelleretur probare atque ungere imperatorem. Nam audi ¹ Innocentium tertium id ipsum electoribus his verbis insinuantem : « Sed et principes recognoscere debent, et utique recognoscunt (sicut iidem in nostra recognovere praesentia) quod jus et auctoritas examinandi personam electam in regem, et promovendam ad imperium, ad nos spectat, qui eum inungimus et coronamus. Est enim regulariter et generaliter observatum, ut ad eum examinatio personae pertineat, ad quem impositio manus spectat. Numquid enim si principes non solum in discordia, sed etiam in concordia sacrilegum quemcumque, vel excommunicatum in regem, tyrannum, vel futurum haereticum eligerent, aut

¹ Sigeb. an. 1000.

¹ Estat de elect. c. Venerabilem.

paganum ; nos inungere, consecrare ac coronare hominem hujusmodi deberemus? Absit omnino ». Hæc Innocentius. Porro quis non intelligat, quod si personam electam in imperatorem assumendam ex causa ipse potest rejicere Pontifex ; multo magis ipsos electores ab electione repellere potest ex causa, præsertim vero si inquinatus sit hæresi, in qua nec recipiendus, sed spernendus ab eo esset imperator electus ?

53. Porro non sic jus eligendi in alios transtulit Romanus Pontifex, ut illud apud se noluerit remansisse, et cum opus fuerit, et necessitas exegerit, eo pro arbitrio uti posset, hunc recipiendo, abjiciendo autem illum, prout opportunitas postularet. Nam audi quid dicat ¹ Glaber Rodolphus horum temporum probatus scriptor, ut qui ab hoc tempore usque ad millesimum quadragesimum quintum historiam scripserit ad S. Odilonem abbatem suum : « Illud, inquit, nihilominus nimium condecens et perhonestum videtur, atque ad pacis tutelam optimum decretum scilicet, ut ne quisquam audacter Romani imperii sceptrum præperus gestare princeps appetat, seu imperator dici aut esse valeat, nisi quem papa Sedis Romanæ morum probitate delegerit aptum Reipublicæ, eique commiserit insigne imperiale ». Hæc ipse, haud ignorans quæ assidue ante ejus oculos versabantur, per principes imperii feudatarios eligi qui esset in imperium promovendus, probe noscens summam rerum penes Pontificem esse, ut probaret vel non probaret quem elegissent, qui jus haberant eligendi.

54. Hæc igitur et alia quæ superius de electoribus auctoritate pontificia munus obeuntibus dicta sunt, cum a nemine jure revocari possint in dubium ; illud reperitur magnopere controversum, et proluxa disceptatione agitatum, num septem tantum electorum selectio et electio, qui Romanorum regem crearent, fuerit ejusdem Gregorii papæ V institutio, vel alterius Rom. Pontificum. Hujus rei occasione, scimus Panvinum commentarium de comitiis imperatoriis elaborasse, quo nihil aliud probare nititur, quam septem electores non a Gregorio V institutos fuisse, sed a Gregorio ejusdem nominis X, nullum alium habens suæ sententiæ quem sequatur auctorem, nisi infectam hæresis scabie bestiam ², quem indigne nimis ipse homo Catholicus pectine scalpat eburneo, dum eum prædicat virum esse disertum ; quem si cominus inspexisset lucerna Cleantis, eum potius, sicut pietate, ita et doctrina intellexisset omnino desertum, nullo autem modo disertum, ut cum ex multis aliis, tum ex ipso in quo sequitur eum quem laudat et in quo laudat errantem, intelliges, quos ambos turpiter errantes egregie corrigit, quem jure laudavimus Bellarminus ³, vere doctissimus, ostendens (quod ipsos latuit) complures eosdemque fide

integros scripsisse ante Gregorium X auctores de septem electoribus jam antea constitutis, adeo ut nequaquam vel fingi potuerit, eosdem ab ipso Gregorio X originem ducere, quorum ante ejus Pontificatum fieret mentio a diversis ejusdem temporis claris auctoribus.

55. Explosis igitur novatorum falsis opinionibus repudiatisque novitatibus eorundem, nec sic definita remanet quæstio, ut factum a Gregorio quinto affirmare possimus, quod a Gregorio decimo institui potuisse negatur. Siquidem etsi in controversiam revocari non potest (ut dictum est) id quod tributum fuerat a Rom. Pontifice Ottonibus imperatoribus eligere successores, per Gregorium V transfusum ad Germaniæ principes : haud tamen adeo liquet, per ipsum fuisse electores ipsos numero senario vel septenario definitos ; sed et si factum fuerit, constare tamen nequaquam id fuisse usu receptum. De his ergo modo nobis agendum, ac demum a quo potissimum Romano Pontifice id primum invenerimus institutum, in medium adducendum.

56. Sane quidem nemo jure incicias ire poterit, post tertii Ottonis imp. obitum, ducentis et amplius annis, quotquot electi fuerunt Romanorum reges, imperatores designati, eosdem non septem duntaxat electorum, sed omnium principum Germanorum, qui ad comitia convenissent, suffragiis fuisse ad regium culmen electos : quod præterquam singulorum promotiones, perspicue satis edocent, ut dubitationi nullus possit locus esse relictus, quæ adhuc extant de ipsis promovendis litteræ diversorum Pontificum Romanorum ad Germaniæ principes datæ : et inter alias, quas ¹ Gregorius scribit ad omnes episcopos, duces atque comites Teutonicos de novi regis electione facienda, si Henricus in Synodo excommunicatus non resipisceret, ostendens illorum omnium jus esse par in eligendo rege in imperium promovendo. Ita etiam perseverasse tempore Innocentii papæ tertii, anno Redemptoris millesimo ducentesimo, cum mortuo Henrico sexto imperatore, principes Germaniæ scissi sunt inter se, eligentibus aliis Ottonem quartum, aliis vero Philippum, litteræ ambarum partium ad Innocentium papam datæ significant, quibus manifeste apparet, non penes septem tantum fuisse jus eligendi, sed penes omnes tam Ecclesiasticos quam laicos feudatarios imperatoris in utraque Germania principes. Extat scriptus tunc Codex omnium illarum Epistolarum, quæ in ea causa ultro citroque datæ fuere, asservaturque in Archivo Apostolicæ Sedis in Castello sancti Angeli in Urbe, nimirum litteræ Balduini ² comitis Flandriæ, unius ex electoribus, aliæ ³ comitis Daburgensis et Metensis eodem munere perfungentis, Adolphi ⁴ archiepiscopi Coloniensis, et aliorum ⁵ qui elegerunt

¹ Glab. hist. l. 1. c. 5. — ² Aventinum auctor intelligit, qui libro v. A. val. Botor. id asserit. — ³ Bellarm. de transl. Rom. imp. l. 1. tit.

¹ Greg. VII. l. iv. Ep. III. — ² Eod. Cod. Ep. Innocentii papæ Ep. VII. — ³ Eod. Cod. Ep. VIII. — ⁴ Eod. Cod. Ep. IX. — ⁵ Eod. Cod. Ep. X.

runt Ottonem : quæ cum non sint adeo prolixæ, hic exempli causa recitandas esse haud duximus otiosum. Sic se habent :

57. « Sanctissimo patri ac domino Innocentio sacrosanctæ Romanæ Sedis summo Pontifici principes et barones Alemanniæ, clerici et laici debitam in Christo reverentiam et sinceritatem obsequii.

« Cum placuisset ei qui aufert spiritum principum, et magnus et terribilis est super reges terræ, dominum Henricum imp. de medio auferre : necessarium nobis fuit visum, de substituendo rege tractatum et colloquium habere. Convenimus ergo sæpius, et miseras et oppressiones, quas hactenus sustinueramus, recensentes, per universos regni... animos nostros ereximus, et quid honori Ecclesiæ Dei, et paci ac quieti subjectorum expediret, deliberantes, nunc unum, nunc alium quasi finaliter eligere putabamus. Verum quia non est prudentia, non est potentia, non est consilium, nisi per Deum : placuit ei qui Abrahæ filium immolare volenti victimam providit, et David fratribus juniorem de post fœtantes accepit, atque Matthiam ex discipulorum numero ad sortem Apostolatus elegit : serenissimum dominum nostrum Ottonem quondam Henrici ducis Saxonie filium ad regimen Romani imperii de terra peregrinationis suæ ex inopinato offerre nobis. Invocata itaque sancti Spiritus gratia, prædictum dominum Ottonem, Christianæ fidei cultorem devotissimum, atque sanctæ Romanæ Ecclesiæ advocatum et defensorem fidelissimum, et judicariæ potestatis observatorem justissimum, de longa et antiqua regum prosapia ex utraque linea specialiter editum, ad Romani regni fastigium juste et rationabiliter elegimus ; et sicut debuimus, ipsius electioni consensimus, ipsumque in Augustorum sede a Carolo Magno apud Aquisgranum huic dignitati deputata locavimus, et corona et regni diademate per manum domini Adolphi Coloniensis archiepiscopi, ea, qua decuit solemnitate, feliciter coronavimus.

58. « Nos autem principes, qui jam dictum dominum in regem elegimus, feuda nostra quæ ab imperio tenemus, a manu ipsius recipientes, hominum sibi fecimus et fidelitatem juravimus. Tantæ igitur dignitatis munus excellentissimus princeps divinæ potius gratiæ quam suis meritis adscribens, primitias hujus honoris afferens Domino, propria voluntate juramento firmavit in primis sacrosanctæ Romanæ Ecclesiæ, deinde omnia Ecclesiarum jura bona fide servare et manutenere, et subjectos imperii, exheredatos maxime et a suis possessionibus violenter ejectos, in sua justitia, pro posse, juvare et conservare. Pravam illam consuetudinem insuper, quam imperatores antecessores sui in occupandis rebus mobilibus vel se moventibus decedentium episcoporum vel abbatum principum hucusque servaverunt, penitus extirpans, nos Ecclesiasticos principes ex hac indebita vexatione regali benevolentia liberos di-

misit, et decedentium bona suis successoribus servanda liberaliter statuit.

59. « Paternitati ergo vestræ dignum supplicare duximus, quatenus fidem et devotionem domini nostri regis attendentes, merita quoque illustrissimi patris sui Henrici ducis Saxonie, qui ab obsequio sanctæ Romanæ Ecclesiæ nunquam recessit, memoriter tenentes, paci et quieti nostræ et vestræ, intuitu Dei ac nostri obsequii providentes, ipsius electionem et consecrationem auctoritate vestra confirmare et imperiali coronatione armare, paterna pietate dignemini. Sanctitatem insuper vestram obnixè rogamus, quatenus principes et barones a tam rationabili electione discordes Ecclesiastica censura ad concordiam revocetis, et ab illicita fidelitate partis adversæ clave sancti Petri resolutos, ad præstandam regi domino nostro fidelitatem et subjectionem, auctoritate vestra compellatis. Ut autem a domino rege nostro jura Romanæ Ecclesiæ (ut prædictum est) integra et illibata serventur, nos in bona fide spondemus, et pro domino rege nostro fide jubemus.

« † Ego Adolphus Coloniensis archiepiscopus elegi et subscripsi.

« † Ego Berardus Paderbornensis episcopus elegi et subscripsi.

« † Ego Thietmarus Mindensis episcopus elegi et subscripsi.

« † Ego Widichindus Condeiensis abbas elegi et subscripsi.

« † Ego Gerardus Tudensis abbas elegi et subscripsi.

« † Ego Eribertus Werdensis abbas elegi et subscripsi.

« † Ego Henricus dux Lotharingæ, qui et Brabantie, marchio Romani imperii elegi et subscripsi.

« † Ego Henricus comes de Kuke consensi et subscripsi ».

60. Porro hos omnes legitimos fuisse electores, ipse Innocentius papa suis est sæpe litteris testatus ad Germaniæ episcopos et principes datis, eodem Codice comprehensis. Sed neque adversarii ipsi negarunt hos legitimos fuisse imperii electores, sed tantum fuisse numero pauciores objecere, eosdemque auro corruptos ab Anglorum rege eidem nepoti suo Ottoni favente.

61. Sed ut scias reliquos electores Philippo Sueviæ duci studuisse, quem in regem elegerunt, ex titulo litterarum earundem ad Innocentium papam tunc scriptarum sic accipe :

« Reverendo in Christo patri domino Innocentio sanctæ Romanæ Ecclesiæ Pontifici, Germaniarum principes et magnates in Christo filii, Magdeburgensis archiepiscopus, Trevirensis archiepiscopus, Bisuntinæ sedis archiepiscopus, Ratisponensis episcopus, Frisingensis episcopus, Augustanus episcopus, Constantiensis episcopus, Eistetensis episcopus, Wormatiensis episcopus, Spirensis episcopus, Brixinensis electus, Hildesheimensis episcopus imper-

riales aulæ cancellarius, abbas Fuldensis, abbas Hleswoldensis, abbas de Tergente, abbas Ebuacensis; item rex Bohemiæ, dux Saxonie, dux Bavarie, dux Austrie, dux Moravie, marchio de Ruvesperg, alique Alemannie nobiles. Et infra :

62. « Magnitudini vestræ duximus declarandum, quod mortuo inclyto domino nostro Henrico Romano imperatore Augusto, collecta multitudine principum, illustrem dominum nostrum Philippum in imperatorem Romani solii rite et solemniter elegimus, etc. » In fine autem numerantur et alii principes absentes, qui per litteras consensum præstiterunt. Incipit Epistola : Existimare non valet ratio, etc. Et ista est, ad quam respondet Innocentius illa, quæ habentur descripta in capitulo Venerabilem. Ex quibus redarguas Ostiensem, dum interpretans ¹ Decretalem illam, hos, quos ipse papa redarguit, existimavit fuisse illos septem vulgatos ore omnium electores : nam ex his perspicue intelligimus, quam procul absit, ut temporibus Innocentii papæ III septem tantummodo fuerint electores, cum liqueat ex dictis Epistolis omnes imperii feudatarios Ecclesiasticos, archiepiscopos, episcopos et abbates et sæculares principes, duces, marchiones, comites et barones legitimos esse habitos electores Romanorum regis designati imperatoris, sed neque id mutatum reperitur, cum anno millesimo ducentesimo duodevicesimo post Ottonem Fridericus secundus creatus est Cæsar, ut apparet ex comitiis tunc ea de causa habitis. Hæc cum ita luce meridiana perspicua habeantur, attamen non usque ad Gregorium decimum fuit septem electorum dilata creatio; quæ a quonam Romano Pontifice fuerit primitus decreta, et ubi locorum, et qui electi fuerint, certo certius ex synodalibus Actis in promptu est demonstrare, ut ea tuto affirmare possimus. Et ne de impostura vel levis suspicio possit oriri, ipsos etiam S. Ecclesie Romanæ hostes acerrimos et implacabiles, suis libris asserentes et in medium afferentes, et aliud licet agentes, id tamen ingenue profitentes, adhibebimus testes, quorum alter suis temporibus res gestas conscripsit, et ex Epistolis Romanorum Pontificum, imperatorum, regum aliorumque principum, necnon ex Conciliorum Actis, aliisque publicis monumentis ex integro recitatis historiam texuit; alter vero ex recentioribus hujus temporis novatoribus, qui in odium quo flagraret adversus Romanam Ecclesiam, illum a latebris erutum edidit Commentarium. Hæc autem ut exacte percipias, attende.

63. Vixit temporibus illis Matthæus Parisiensis, monachus S. Albani in Anglia, qui Anglicanam historiam aggressus est scribere ab anno Redemptoris millesimo sexagesimo sexto, perduxitque eam usque ad annum millesimum ducentesimum quinquagesimum, ut in fine ipse testatur his verbis : « Hic terminantur fratris Matthæi Parisiensis, monachi S. Albani Chronica, quæ pro utilitate

posteritatis subsecuturæ, Dei pro amore, et B. Albani Anglorum protomartyris honore, ne memoriam eventuum modernorum vetustas aut oblivio deleat, litteris commendavit ». Illis vero mox subjicit versus istos :

Virginis a partu jam mille volumina Phœbus
Cum his centenis et quinquaginta peregit
Annuæ : sed visum non est sub tempore tanto,
Aprilis sexto fuerit quod Pascha kalendas
Dum quinquagenus orbem percurreret annus.
Hoc tamen evenit anno, cui terminus hic est.

Addit vero : « Fluxerunt utique ab Incarnatione Domini viginti et quinque annorum quinquagenæ, etc. » Hæc ad tempora auctoris cognoscenda, quibus vixit et scripsit, dicta sunt. Qui suis scriptis quam fuerit animo infensissimo in Apostolicam Sedem (juxta illud ¹ : Loquela tua manifestum te facit) quivis facile poterit intelligere (nisi probra illa fuerint additamenta potius ejus, qui edidit, novatoris, hæretici hominis, cum peculiare sit illis libros quos potuerint depravare), dum nulla in eo libro prætermittitur occasio carpendi Romanos Pontifices, imo et sine occasione, omnia ipsorum facta in deteriorem accipiens partem, cordis secreta rimans, et in malum sensum semper interpretans, in eos eorumque ministros acerbissime invehitur semper, nec parcat unquam : ut plane de illo sit jure meritoque dicendum : « Malus homo de thesauro suo profert mala ». Cum et secundum illud dictum Salvatoris acciderit ipsi ² : « Si oculus tuus nequam fuerit, totum corpus tenebrosum erit ». Dum etiam quæque sancta, quæque justa ac pia in pravum sensum accipiens, suggillat pariter et infamat. Sed quid accidit? cum liber iste indignus luce a majoribus judicatus, occultatus lateret in angulo : his ipsis temporibus nostris, magno præconio tanquam prævia face, emersit in lucem, novatoris opera editus Londini in Anglia anno Redemptoris millesimo quingentesimo septuagesimo primo. A quo libro si quis demat calumnias, invectivas, dicacitates et blasphemias in Apostolicam Sedem frequenter iteratas, aureum sane dixerit commentarium, utpote quod ex publicis monumentis, totidem verbis redditus (ut dictum est) egregie contextum et coagmentatum inveniat.

64. In quo quidem inter alia nobilia monumenta habentur Acta Concilii Lugdunensis OEcumenici, cui interfuerunt in primis ipse qui indixit, Innocentius papa IV, anno Redemptoris millesimo ducentesimo quadagesimo quinto, simulque duo patriarchæ Orientales, Constantinopolitanus videlicet et Antiochenus, suarumque præsentiam eidem exhibuit imp. Constantinopolitanus, præter alios principes, regumque legatos, post præsides diversarum Ecclesiarum. In eo autem post excommunicationis sententiam promulgatam ab ipso Pontifice in Fridericum imp. post tralationem eorum,

¹ Cap. Venerabilem ext. de elect.

¹ Matth. xxvi. — ² Matth. xxii.

quæ spectant ad expeditionem in subsidium Terræ sanctæ, complura alia ad statum Ecclesiæ bene disponendum constituta sunt, et inter alia titulus est additus de electionibus, ob litium decisionem, in eoque simul septem definiti ab eodem Pontifice electores imperatorum leguntur his verbis :

65. ELECTORES IMPERATORUM.

LAICI.

- « Dux Austriæ.
- « Dux Baviaræ.
- « Dux Saxonum.
- « Dux Brabantiae qui et Lovaniæ ».

PRÆLATI. PRINCIPALES.

- « Archiepiscopus Coloniensis.
- « Archiepiscopus Moguntinus.
- « Salsburgensis ».

Sequuntur hæc :

66. Isti ducentur in insulam quamdam Rheni, et dimittentur soli in ea, et amovebuntur omnes naviculæ, et ibi tractabunt de electione imperatoris. Nec adveniat aliquis ad eos, donec sint concordēs. Huic negotio prærit archiepiscopus Coloniensis, secundus Moguntinus, tertius Salsburgensis ». Hæc de electoribus septenario numero definitis. Stetit numerus conscriptus, perseveravitque in futurum; personæ autem quatuor mutatae, nempe ut pro Salsburgensi positus fuerit archiepiscopus Trevirensis, proque tribus illis ducibus, Austriæ, Baviaræ atque Brabantiae fuerint subrogati comes Palatinus Rheni, marchio Brandeburgensis, rex Bohemiæ, qui potius locum teneret definitoris, si discrepent electores, quam unius ex electoribus ipsis.

67. A quonam autem, retento electorum septenario numero, facta fuerit ista mutatio, num ab eodem Innocentio, vel alio aliquo ex successoribus ejus: hoc (fatemur) nos latere. Ex conventionem autem Germaniæ principum id esse sancitum, qui sui temporis Chronicon scripsit, perduxitque usque ad annum ducentesimum quinquagesimum sextum, post dictum sub Innocentio IV Concilium Lugdunense annos undecim, Albertus abbas Stadensis, quod haud pridem Helmistadii cusum est, anno Domini MDLXXXVII, hæc habet : « Ex prætaxatione principum et consensu eligunt imperatorem, Trevirensis, Moguntinus et Coloniensis ». Et de sæcularibus : palatinus eligit, inquit, quia dapifer est, dux Saxoniae, quia marescallus, et margravius de Brandenburg, quia camerarius; rex Bohemiæ, qui pincerna est, non eligit, quia non est teutonicus ». Hæc ipse. Ex quibus illud in primis intelligere possumus, id ipsis exposcentibus principibus simul consentientibus (nam hoc est illud, quod ait ex prætaxatione principum et consensu) vel ab ipso Innocentio IV

post Lugdunense Concilium factum esse, vel sub ejus successore Alexandro IV, cujus annus secundus incidit in an. Redemptoris MCLVI, ad quem dictus auctor suum perduxit Chronicon, et non ab ipsis principibus sua sponte : nam cujus fuit de septem electoribus legem condere, non alterius, quam ipsius esse potuit eam aliquo modo mutare, vel quomodolibet moderari.

68. Elicitur etiam ex dicta Alberti assertionem, ipsum regem Bohemiæ nondum in electorem vel definitorem inter electores ad numerum septenarium cooptatum fuisse, ante scilicet dictum annum quinquagesimum sextum post millesimum ducentesimum, quo ea ipse scribebat. Quod vero qui ab Innocentio electi principes electores dux Austriæ, dux Baviaræ et dux Brabantiae cesserint aliis : inde provenisse videri potest, quod magis cuperent eligi, quam eligere imperatores, sicque inter eligendos potius, quam inter electores locum habere maluerint.

69. Porro ante hæc tempora nullum historicorum invenire est, qui vel nominatenus septem electorum meminerit. Qui primus horum meminisse reperitur Martinus Polonus, qui claruit sub eodem Innocentio papa IV, in Ottone tertio de istis agit his verbis :

« Et licet isti tres Ottones per successionem generis regnaverint, tamen postea fuit institutum, ut per officiales imperii imperator eligeretur, qui sunt septem, videlicet primi tres cancellarii, Moguntinus Germaniæ, Trevirensis Galliæ, Coloniensis Italiæ, marchio Brandenburgensis camerarius est, palatinus dapifer, dux Saxoniae ensen portat, rex Bohemus pincernam agit. Unde versus :

Moguntinensis, Trevirensis, Coloniensis,
Quilibet imperii fit cancellarius horum,
Et palatinus dapifer, dux portitor ensis,
Marchio præpositus cameræ, pincerna Bohemus.
Hi statuunt dominum cunctis per sæcula summum.

70. Hæc Martinus primus omnium auctor, qui septem meminit electorum, in Ottone III referens quæ postea suo tempore facta essent. Unde irrepsit error, ut sub Ottone III, sub quo id ab eo scriptum invenerunt, multi putaverint septem fuisse creatos electores, scripserintque a Gregorio factum, quod scriptum repererunt sub eodem Gregorio papa V, nimirum ab ipso eosdem septem constitutos fuisse electores. Cum tamen illud quod Martinus ait : « Tamen postea fuit institutum, ut per officiales imperii, etc. » ad sua ipsius Martini tempora (ut audisti) sit referendum. Et cum non alius, quam Martinus (ut dictum est), primus auctor hujus assertionis habeatur (nullus enim, quod repetendum est, ante eum repertus est auctor, qui vel nomine tenus septem electorum meminerit), ad ipsum alluisse oportuit sanctum¹ Thomam, dum de regimine principum scribens hæc obiter ait : « Otto

¹ Thom. de reg. princ. l. III. c. 19.

imperium tenuit usque ad tertiam generationem, quorum quilibet vocatus est Otto. Ex tunc (ut historici tradunt) per Gregorium V genere similiter Teutonicum provisa est electio, ut videlicet per septem principes Alemanniæ fiat, quæ usque ad ista tempora perseverat, quod est spatium ducentorum septuaginta annorum vel circiter, et tantum durabit, quantum Romana Ecclesia, quæ supremum gradum in principatu tenet, Christi fidelibus expediens judicaverit». Hæc sanctus Thomas, qui cum numeret ducentos septuaginta vel circiter annos a Gregorio V, utique ad ultima tempora ejusdem sancti doctoris ea est inscriptio referenda, cum ipse obiisse dicatur anno septuagesimo quinto post millesimum atque ducentesimum annum.

71. Cæterum etsi Martini historia hæc excedat tempora, ut quæ perveniat usque ad annos Redemptoris mille ducentos septuaginta sex, eam prius editam, annuis accessionibus, dum vixit, auctam possumus existimare. Cum igitur sanctus doctor his, quæ asserit de septem electoribus citet historias, nec aliæ usquam sint inventæ, quæ septem electorum meminerint, nisi Martini in Ottone III, ipse eum secutus, quod ipsum sensisse putavit, bona fide conscripsit, sicut et cæteri postea eadem scribentes fecisse noscuntur. Verum non dixit Martinus: «Post Ottonem id fuit observatum», sed sic: «Postea fuit institutum, ut per officiales imperii, etc.» Quando autem acciderit illud, «Postea,» certe non ante Innocentium IV, ut est demonstratum. Verum amphibologia Martini scriptores illos omnes fecit errare, qui constitutionem septem electorum Gregorio V tribuerunt, qui tantum auctor reperitur fuisse, ut electio regis in imperatorem promovendi (ut superius dictum est) ad omnes Germaniæ principes et prælatos imperii feudatarios pertineret. At hæc his satis, qui puram diligunt veritatem.

72. *Ottonis imperatoris reditus in Germaniam.* His peractis, absoluta Synodo, Otto imp. in Germaniam revertitur, et cum eo S. Adalbertus Pragensis episcopus, qui antequam rediret in Bohemiam, perrexit in Gallias ad visitandum corpus S. Martini,

inde vero Floriacum veniens, S. Benedicti venerandas reliquias coluit, ut testatur auctor, qui tunc præsens adesse poterat in ejusdem Adalberti Vita.

73. Hic vero, quod ad reditum Ottonis in Germaniam spectat, opportune admonendum lectorem putamus, confundere et invertere omnia eos, qui unum tantum adventum Ottonis in Italiam fuisse putarunt, cum bis saltem ex Ruperto Tui-tiensi abbate eum venisse, sit exploratum in Vita quam scripsit Heriberti Coloniensis episcopi. Imo antiquiores chronographi, ter in Italiam venisse ipsum Ottonem III tradunt, ut Adam¹ in Chronico, cui Ditmarus etiam consentire videtur. Nos autem pro virili tres ab invicem diversos adventus in Italiam Ottonis distinguentes, quæ in unoquoque gessit, hic describenda curavimus. Ditmarus temporis hujus historicus, ubi agit de hoc primo adventu Ottonis in Italiam, et ejus reditu in Germaniam, ista tunc accidisse tradit: «Reversus, inquit, Aquisgranum, Caroli Cæsaris ossa ubi requiescerent, cum dubitaret, rupto clam pavimento, ubi ea esse putavit, fodere, quousque hæc in solio inventa regio, jussit. Crucem auream quæ in collo ejus pependit cum vestimentorum adhuc imputribilium parte sumens, cætera cum magna veneratione reposuit». Hæc Ditmarus.

Hoc eodem anno migravit ex hac vita in cælum S. Gebehardus Constantiensis episcopus, miraculis a Deo mirifice illustratus, de quo superius mentio facta est: in cujus Vitæ fine ista leguntur: «Sedit autem in episcopatu annis sexdecim, sexto decimo defunctus, die sexto kal. Sept. anno ab Incar., Dom. nongentesimo nonagesimo sexto, etc.» Legitur et ibidem ejusmodi Epitaphium tunc scriptum in templo quod condidit:

Debita pars terræ fallentia tempora sperne,
Et memorare viæ, quam testatur cinis iste.
Gentis honor nostræ jacet hic, gentis dolor atque:
Præfuit huic urbi, cuncto sed profuit orbi,
Hancque Deo sedem templi fundavit et ædem.
Parti terrenæ Deus ignoscens miserere,
Redde vicem juste, quia te dilexerat iste.

¹ Adam. l. II. c. 29, 30.

Anno periodi Græco-Romanæ 6489. — Anno Æræ Hispan. 1034. — Anno Hegiræ 386, inchoato die 24 Januar., Fer. 7 — Jesu Christi 996.

— Gregorii V papæ 1. — Ottonis III reg. 14. imp. 1. Basil. et Const. imp. 21.

1. *Joannes XV PP. moritur.* — A num. 1 ad 13. Chronographus Hildensheimensis, seu potius aller anonymus, qui a præcedenti anno ad MCCCXVII opusejus continuavit, hoc anno scribit: « Indict. IX, Joannes papa obiit. Unde imperator in Italia positus, rumore incitatus, præmissis quibusdam principibus, publico consensu et electione fecit in Apostolicam Sedem ordinari suum nepotem dominum Brunonem Ottonis filium, qui marcham Veronensem servabat, imposito nomine Gregorii, a quo et ipse proximo solemniter Pentecostes imperator et patricius consecratur. Habitoque cum Romanis placito, quemdam Crescentium, quia priorem papam injuriis sæpe laceravit, exilio statuit deportari. Sed ad preces novi Apostolici imperator omnino remisit: sed non multo post imperatore Urbe excedente, idem Crescentius dominum Apostolicum nudum omnium Romana Urbe expulit. Imperator in Francia hyemavit », in Francia nempe Orientali. Hæc distinctius explicanda.

2. *Dies ejus emortualis incertus.* — Marianus Scotus, Martinus Polonus et auctores Catalogorum unanimi fere consensu docent, *Joannem XV* papam undecimum Sedis annum inchoasse, sed cum dies ejus emortualis incertus sit, quot menses ac dies supra annos decem Pontificatum gesserit, divinare potis non est. Baronius quidem refert ex Manlio Epitaphium, in quo dicitur *Joannem* septima Maii die demortuum. Sed « fidelior atque antiquior *Manlio* », inquit Papebrocius in conatu Chronico-Hist. « *testis Romanus Canonicus* in illius oratorii (nempe S. Mariæ, quod extat in Ecclesia S. Petri) descriptione nos docet, in oratorio isto sepultum jacere non *Joannem Pontificem*, sed *Joannem cardinalem* presbyterum Tit. S. Anastasiæ: qui integro post hunc Pontificem sæculo floruit. Hoc, ut cætera tacerem, probaret stylus Epitaphii rhythmicus, hoc sæculo necdum ad talia usurpari coepit, paulo ante post secutis temporibus fere ordinarius. Idem inibi expressa probaret *Burgundia* patria, quæ Joanni pontifici Roma fuit. Sed Manlius pro *Burgundia* legit *bene gaudia*, absque ullo sensu: quod, ut Baronium decipit, ita nos docet, Manlio isti, in iis ubi a canonico Romano differt, nihil aut parum credere, utpote

conjecturis suis nimium indulgenti cum antiquitatis injuria ». Ita scite Papebrocius. Cum tamen stylus rhythmicus jam medio sæculo nono in usu esset, ut liquet ex libro 2 de Miraculis S. Germani, ab Aimoino monacho Pratensi an. DCCCLXIII, aut paulo post composito, et Sæc. III Benedict. part. 2, ad annum DCCCLV recitato, ubi versus rhythmicos in laudem hujus sancti episcopi Parisiensis tunc editos, exhibet, vatde suspicor, id Epitaphii genus longe ante hæc tempora usurpatum fuisse. Sed Joannem XV die septima Maii demortuum, qui error vulgaris hactenus fuit, post hæc dici non potest.

3. *Joanni XV succedit Gregorius V.* — Post *Joannis XV* mortem Sedem diebus VI cessasse tradit Marianus Scotus: ac diuturnius interpontificium fuisse indicat prior auctor anonymus Vitæ sancti Adalberti Pragensis episcopi, qui hoc tempore vivebat: « Hoc ipso tempore », inquit num. 30, « iter agit Romam rex Francorum (ita Germaniæ reges sæpe vocati) Otto tertius, etc. Summus ipsis diebus Pontifex acerrima febre correptus, corpus terræ, animam carlo, utraque in sua dimisit exordia. Rex autem Otto Alpium nives multo milite transmeans, juxta sacram urbem Ravennam regalia castra metatus est. Ibi in ejus occursum veniunt Epistolæ cum nuntiis, quas mittunt Romani proceres et senatorius ordo; primo illius adventum, velut toto tempore paternæ mortis non visum, totis visceribus desiderare, ac debita fidelitate pollicitantur expectare. Deinde in morte domini Apostolici, tam sibi quam illis non minimam invectam esse partem incommodorum, annuntiant, et quem pro eo ponerent, regalem exquirunt sententiam. Erat tum in capella regis quidam clericus Bruno, sæcularibus litteris egregie eruditus, et ipse regio sanguine genus ferens, magnæ indolis; sed (quod minus bonum) multum fervidæ juventutis. Hunc quia regi placuit, a majoribus electum, Maguntinus archipræsul Willigisus et suus collega Adalbalduſ episcopus adduxerunt Romam. Proinde a Romanis honorifice acceptum, ad hoc ordinati episcopi Apostolico honore promulgarunt. Superveniens etiam rex Romano more egregie accipitur. Deinde magno gaudio omnium imperatorum atti-

git apicem. Lætantur cum primoribus minores civitatis, cum afflicto paupere exultant agmina viduarum, quia novus imperator dat jura populis, dat jura novus papa ».

4. *Post diem xxviii mensis Aprilis.* — Ex quibus patet primo, *Brunonem*, qui in Pontificatu *Gregorius V* dictus est, Romæ Pontificem ordinatum, antequam illuc *Otto* imp. perveniret. Secundo, cum *Otto III* die xxxi mensis Maii imperator acclamatus fuerit, *Gregorium V* ineunte circiter mense Maio Pontificem renuntiatum. Certe eum post diem xxviii mensis Aprilis ordinatum, demonstrat Diploma, quo ipsemet Privilegium abbatiæ S. Ambrosii an. Christi dcdxcviii confirmavit, quod tom. ix Concil. pag. 755 refertur. Hæc ejus subscriptio : « Datum IV kal. Maias per manus Joannis episcopi S. Albanensis Ecclesiæ et bibliothecarii S. Apostolicæ Sedis, anno, Deo propitio, Pontificatus domni Gregorii summi Pontificis et universalis quinti papæ, in sacratissima Sede beati Petri Apostoli secundo : imperante domno Ottone tertio, a Deo coronato, magno et pacifico imperatore, anno ii, in mense et Indict. supra scripta xi. Scriptum per manus Petri notarii et scriniarii S. R. E. in mense Aprili, et Indictione undecima ». Si enim eo Christi anno, die xxviii mensis Aprilis, adhuc annum ii Pontificatus sui numeravit, hoc anno post eundem diem exorsus est primum. *Gregorium* autem V, non ab *Ottone M.* sed a *Liudgarda* ejus filia, *Conrado Lotharingiæ et Wormatiæ duci* nupta, recta linea originem ducere, anno mxxiv, cum de *Conrado Salico* imp. *Gregorii V* ex fratre nepote sermo erit, demonstrabimus, et nodum istum difficilem, uti spero, solvemus (1), (2), (3).

5. *Crescentius jam a multis annis Romæ ty-*

rannus. — *Baronius* interitum *Crescentii* et *Gerberti* promotionem ad archiepiscopatum Ravennensem hic recitat; sed cum ille anno tantum cmxcviii mortis traditus sit, et *Gerbertus* eodem anno sede Ravennensi decoratus, ad majorem claritatem hæc ad suos annos remittimus. *Sigonius* lib. 7 Hist. de Reg. Ital. existimavit, *Crescentem Nomentanum* anno cmxciii ingenti favore populi consulatum adeptum, Urbem turbare cœpisse, et de imperii titulo sibi adsciscendo cogitasse. Verum exeunte anno cmlxxxix aut sequentis initio, quo legati *Hugonis* regis et Galliarum episcoporum adversus *Arnulfum* ad Joannem XV missi Romam pervenerunt, jam *Crescentius* tyrannidem exercebat, uti dixerunt episcopi in Synodo Rhemensi anno cmxc i adversus *Gerbertum* congregata : « Regii ac nostri legati Romam profecti, et Epistolas Pontifici porrexerunt, et ab eo indigne suscepti sunt. Sed (ut credimus) quia *Crescentio* nulla munuscula obtulerunt, per triduum a palatio seclusi, nullo accepto responso redierunt, quod peccatis nostris exigentibus provenire, non est dubium, ut Romana Ecclesia, quæ mater et caput Ecclesiarum omnium est, per tyrannidem oppressa debilitetur ». De *Crescentii* cæde infra.

6. *Schisma inter Gregorium V et Joannem.* —

A num. 13 ad 27. Narrat hic *Baronius* schisma inter *Gregorium V* et *Joannem* ex *Placentino* episcopo antipapam electum, quod et hoc anno compressum credidit. Sed cum illud tantum anno sequenti exortum sit, annoque cmxcviii extinctum, hanc Historiam in suos annos distribuemus. Refert præterea quæ occasione monasterii Bellicensis Joannis papæ tempore, contigere, quia sc. *Joannem* illum Joannem pseudo-pontificem inter-

(1) *Muratorius* in erudito opere *Antichita Estensi* part. 1, cap. 20, pag. 187, edidit autographum quoddam instrumentum, e quo nonnulla ad Aonaliū illustrationem eruere licet. Primo igitur in eo legitur *Ottonem III* resedis ad iudicium « foras porta sancti Laurentii, infra palatium domini nostri regis Ravennæ, die prima Maii, Indictione nona, anno regni pietatis ejus in Italia secundo ». Ex quo intelligimus, hoc anno Indictione nona signato, *Ottonem* eo die Ravennæ fuisse ac recte scripsisse chronographum *Hildesheimensem*, quæ die electio *Gregorii V* fuit, *Ottonem* Romæ non fuisse; nam circa eos dies accidit. Secundo notanda est in instrumento illo nova epocha regni Italici *Ottonis*, cujus huc usque nullibi mentio mihi occurrit, nisi forte huc spectare arbitremur Diploma quoddam ejusdem *Ottonis* apud *Puccinellum* in *Chronico* abbatie Florentinæ, pag. 214, quod sic enuntiat : « Otto Dei gratia III imperator Augustus, anno imperii ejus i, mensis Januarii, Indict. ix ». Cum enim constet *Ottonem* coronatum imperatorem non fuisse, nisi anno quidem dcdxcvi Indict. nona signato, sed mense Maio exeunte; certe quidem ejusdem anni initio annum imperii primum agere non potuit; adeoque epocha in eo Diplomate signata exordium facile ducet ab incepto anno precedenti ante Maium regno Italico. Quæ statula supputatione Otto in exordio anni dcdxcvi annum primum agebat, ut in Diplomate *Puccinelli*; et in exordio Maii annum secundum inceperat, ut in *Muratorii* iustumento. Nec suspicio nulla in Diploma *Puccinelli* ingerere debet nomen imperatoris, quod Otto nondum coronatus imperator sibi vindicat, nam id interdum ab eo factum constat ex aliis ejus Diplomatum apud *Ughellum*. Denique in eodem *Muratorii* iustumento episcopi quamplures imperatori assistentes referuntur, inter quos cum *Willigisus* et *Adelbaldus* qui imperatorem in ea Italica protectione comitati fuerunt, non recenseantur, hinc non futili conjectura deducimus, electionem *Gregorii* jam tunc Romæ peractam fuisse, electumque ambos illos episcopos Romam jam deduxisse. MANSI.

(2) In Tabulario S. Mariæ in Via-Lata habetur *Breve recordationis*, seu iudicatum litis inter *Theodoram* abbatissam monasterii S. Blasii civilitatis Nepesinæ, quod quidem monasterium subjectum erat monasterio monialium S. Ciriaci in Urbe, et alios colligatores, cui ipsemet *Gregorius* Pontifex subscribit, sed præ vetustate membrana corrupta est et vitiose a librario descripta. Initio habet : « Anno Deo propitio Pontificatus *Gregorii* summi Pontificis et universalis quinti papæ in sacratissima Sede beati Petri Apostoli septimo, et imperii piissimo et perpetuo Augusto domno Oddone a Deo coronato magno pacifico imperatore anno primo, mense Julio, Indict. Mendose exscriptum est anno Pontificatus septimo pro primo, recte vero anno primo imperii *Ottonis III*, ut hic habet *Pagius*. Audacter porro *Pagius* nunc iterum ingerit de supremo dominio Urbis per *Ottonem* imp. quæ de re nos sæpe superius. Mendose item in *Regesto Sublacensi* pag. 31, Diploma ejusdem *Gregorii V* pro monasterio Sublacensi descriptum est. Loc. n. 600 : « Dat. IV kal. Julii per manus *Johannis* episcopi sanctæ Albanensis Ecclesiæ et bibliothecarii summæ et Apostolicæ Sedis anno Deo propitio Pontificatus domni *Gregorio* (manni recenti scriptum est IV,) summo Pontifice et universali papæ in sacratissima Sede B. Petri Apostoli anno primo, Indictione superscripta decima ». Indictio x congruit A. D. dcdxcvii, quo mense *Junio* annus secundus Pontificatus decurrebat; itaque legendum est : Anno secundo. Alia Charta ibidem pag. 162 incipit : « Anno ii Pontific. domni *Gregorii* summi Pontif. et universali V. PP. in sacratissima Sede B. Petri Apostoli, imperii domni *Ottoni* anno ii, Indict. xi, mense Decembris, die ii ». Indictio xi a kalendis Septembris A. D. dcdxcvii inchoatur, quare est annus dcdxcvii. GEORGIUS.

(3) *Gregorium V* die III Maii hujus anni consecratum Pontificem fuisse, penes me certum est. Cum enim ex iis, quæ *Pagius* hic affert, die xxviii Aprilis hujus anni Pontificatum nondum adisset; illudque vicissim die ix Maii jam incepisset, ut ex documento a nobis allato in Nota ad A. dcdxcviii, 1, constat; superest ut unica, quæ intra hoc spatium incidit Dominica, die III Maii ordinatus fuerit. MANSI.

prefatur. Verum cum Glaber, quem laudat, de Joanne papa hujus nominis XVIII verba faciat, quæ hic a num. 20 ad n. 27 habentur, ad annum MIX remittenda duximus, eo magis, quo *Sergius IV* Joannis XVIII successor, quod hic cœpit, absolverit.

7. *Otto III imperator dictus.* — A num. 27 ad 36. *Ottonem III* solemni Pentecostes die a Gregorio V coronatum fuisse imperatorem, jam num. 4 ex chronographo Hildensheimensi post Baronii mortem publicato diximus. Papebrocius quidem in Paralipomenis ad Conatum Chronico-Historicum, dum de Gregorio V verba facit, ait in Chronologo Saxone Ms. legi *Ottonem III XII kalend. Junii, in ipsa Ascensionis Christi festivitate* a Gregorio V imperatorem consecratum. Sed major fides hac in re chronographo Hildensheimensi adhibenda; præsertim cum chronographus Magdeburgensis referat, *Ottonem* Romæ fuisse, quando *Gregorius V* dictus est Pontifex, et chronographus Hildensheimensis, qui eum absentem fuisse tradit, auctorem anonymum Vitæ S. Adalberli contestem habeat. Dubium hoc ex Diplomatis ab Ottone inter diem XXI mensis Maii et XXXI ejusdem mensis datis certo solvi potest; sed nulla hactenus eo temporis intervallo data mihi occurrerunt. Hic obiter observandum, duo extare Chronica Magdeburgensia, alterum a Meibomio tom. II suæ Collectionis editum, alterumque cujus Mabillonius Sæc. V Benedict. et Papebrocius citatus aliqua fragmenta referunt. Istud nondum typis editum et a Germanis neglectum, quod ejus auctor anonymus in non paucis erraverit. Unum ejus exemplar in Bibliotheca regia reperitur. Porro laudata verba scriptoris anonymi Vitæ S. Adalberti manifeste ostendunt, *Ottonem III*, sicuti et decessores, supremum dominium in Urbe exercuisse, quod usque ad nosra tempora obscurum fuit. Denique *Otto III* nondum hoc anno adversus *Crescentium* bellum movit, ideoque obsidio *Tiburtinæ* civitatis ab eodem imperatore facta, et a Baronio hic recitata, ad secundam vel tertiam projectionem Romanam Ottonis III referenda.

8. *Synodus Romana.* — Ad num. 36 et seqq. Narrat Baronius ex secundo scriptore Vitæ S. Adalberti Pragensis episcopi, Synodum Romæ coactam, qua huic sancto injunctum, ut ad episcopatum suum rediret, sed cum vix adduci posset, ut locum peteret, ubi *animarum fructum* non faciebat, obtinuit a Gregorio V, ut ad exteras et incultas gentes sese conferret. « Igitur cum puero imperatore Alpium nubila tranans, causa orationis Turoniam pedester petit », inquit idem anonymus, qui subdit eum inde Parisios et Floriacum venisse, indeque ad aulam imperatoris rediisse, ubi visione in somnis facta, se martyrem futurum intellexit. Postea Polonis, Bohemis et Hungaris fidem annuntiavit, et intra brevissimum tempus multa peregit. In Hungaria *Geisam* Hungarorum regem quartum, a tempore sc. quo in Pannoniam ingressi sunt, baptizavit, et postea ejus filium, cui *Stephani* nomen

imposuit, quique post eum in Hungaria regnavit, et religionem Christianam mirifice propagavit, ut refert Baronius anno CMLXXXIX, num. 5 et seqq. ex Cartulio episcopo, qui hujus S. Stephani Hungarorum regis Vitam scripsit, et *Colomano* octavo Hungarorum regi dicavit. Quare quæ ibi habet Baronius, ad præsentem annum pertinent.

9. *Querelæ ad eam Herluini episc. Camerac.* — Referenda et ad Concilium Romanum hoc anno habitum Epistola Gregorii V *Herluino* Cameracensi antistiti et ejus successoribus data, in qua narrat Pontifex se Herluinum episcopum consecrasse. « Quoniam vero, inquit, sicut omnibus pæne notum est, interveniente hac re, quæ inter Arnulfum Rhemensis Ecclesiæ archipræsulem, et Gerbertum invasorem ejus exerevit, idem prædictus Herluinus præsul, illorum odiis, Rhemis, canonico more consecrari nequivit: ejus consecratio ad Apostolicam Sedem usque ad nos haud injuste pervenit ». Subjungit Gregorius V se sancire, ut nullus « prænominata Ecclesiæ loca invadere seu deprædare præsumat », neve « amplius obeunte episcopo vel cæteris sacerdotibus » eorum bona diripere ac devastare audeat. « Scriptum per manus Petri regionis notarii et scriptoris S. R. E. in mense Maio, et Indict. nona. Anno I Pontificatus domni Gregorii summi Pontificis et universalis Ecclesiæ papæ, imperii vero domni Ottonis tertii imperatoris anno undecimo ». Legitur Epistola illa tom. IX Concil. pag. 1245. Verum subscriptio illa mendose descripta. Cum enim Otto III die XXXI mensis Maii currentis anni imperator dictus fuerit, eodem die Synodus Romana congregari non potuit. Eam vero in Synodo datam, ac præsentem imperatore, docet Baldrici episcopi Noviomensis Chronicon lib. 4, cap. 3, quod si Otto III die Ascensionis Augustus renuntiatus sit, quod non existimo, in ea subscriptione non solum ejus imperii annus male assignatus; sed etiam annus regni omissus fuit. Eæ tamen litteræ, dum *Arnulfus* in urbe Aurelianensi adhuc detinebatur, ideoque ante annum CMLXXVIII scriptæ.

10. *In ea non instituti electores VII.* — Baronius, Conciliorum collectores, et multi viri doctissimi *electoralis collegii*, seu septemvirorum, penes quos solos esset imperatoris eligendi potestas, institutionem ad Gregorium V et ad hanc Synodum Romanam retulere. Verum veterum scriptorum, qui de rebus Germaniæ hoc et duobus sequentibus sæculis scripsere, silentium demonstrat, audiendos non esse, qui sæculo XIII et sequentibus illud nullo antiquo monumento fulti litteris mandarunt. Citatur quidem hanc in rem sanctus *Thomas* lib. 3 de Regimine principum, sed ei perperam opus illud attribuitur. Augustinus Triumphus ordinis S. Augustini, qui adhuc junior anno MCLXXIV Lugdunensi Concilio interfuit, Ptolemæus Lucensis ei coævus, a Platina in Gregorio V et a Joanne Villani anno MCCCXLVIII, lib. 4 Hist. cap. 3 laudatus, et Lupoldus episcopus Bambergensis, qui initio sæculi XIV floruit, hanc institutionem ad Gregorium V re-

ferunt; ideoque hæc fabula eodem quo Joanna passia tempore exorta, nec ea antiquior.

11. *Electorum jus a Pontifice Rom. emanat.* — Certum tamen esse debet, jus eligendi imperatores a Romanis Pontificibus imperii institutoribus, ut de Carolo Magno loquentes vidimus, emanasse. Diserte illud scribit Innocentius III in Epistola ad Bertholdum Zaringiæ ducem post Ottonis IV imperatoris electionem initio sæculi XIII peractam. Ibi enim cap. *Venerabilem, de electione*, Innocentius ait: « Illis principibus jus et potestatem eligendi regem, in imperatorem postmodum promovendum recognoscimus, ut debemus, ad quos de jure et antiqua consuetudine noscitur pertinere; præsertim cum ad eos jus et potestas hujusmodi ab Apostolica Sede pervenerit, quæ Romanum imperium in persona Magnifici Caroli a Græcis transtulit in Germanos. Sed et principes recognoscere debent, et utique recognoscunt (sicut iidem in nostra recognovere præsentia), quod jus et auctoritas examinandi personam electam in regem, et promovendam ad imperium, ad nos spectat, qui eum inungimus et coronamus. Est enim regulariter et generaliter observatum, ut ad eum examinatio personæ pertineat, ad quem impositio manus spectat. Numquid enim si principes non solum in discordia, sed etiam in concordia, sacrilegum quemcumque, vel excommunicatum, tyrannum, fatuum, vel hæreticum eligerent, aut paganum nos inungere, consecrare, ac coronare hominem hujusmodi deberemus? Absit omnino ». Germaniæ itaque reges electi jus habent, ut *imperatores* appellentur, utque primum inter principes Christianos locum obtineant, idque a Romanis Pontificibus, qui se ad eos imperatores confirmandos et coronandos obstrinxere, modo nullus occurreret in electione defectus, quod examinandum ad eosdem Pontifices spectat, ut ait Innocentius III.

12. *Regnum Germaniæ successivum simul et hæreditarium.* — Porro Germaniæ regnum successivum fuit, sed non absolute hæreditarium; populi enim regem eligendi quem mallent ex regia familia jus habebant, et de more defuncti regis filium natu majorem cæteris anteponebant. In hac electione principes, primates seu primores omnia poterant, et populorum consensum secum trahebant. Id diserte docent scriptores Germanici, cum de *Henrico Aucupe* et tribus Ottonibus loquuntur, ut suis locis insinuavimus. Quare in Germania regnum quidem hæreditarium erat in eadem familia, sed procerum populi que consensus necessarius; quod in singulis fere Germaniæ regibus indicavimus, præsertim in electione *Couradi Salici* egregie a Wippone auctore cœvo descripta. Duravit hæc consuetudo usque ad Gregorium VII papam, quo Ecclesiam Romanam regente, in regni comitiis decretum, ut regis Germaniæ electio intra regiam familiam non restringeretur, sed quilibet in regem eligi posset, ideoque tunc, anno sc. millesimo septuagesimo septimo, quo *Rodolphus Ger-*

maniæ rex creatus, successio in regnum antiquata fuit, ut ibi videbimus.

13. *Septem electores imperante Friderico II instituti.* — Sed, ut ad institutionem septem electorum veniamus, Fridericus II in publicis comitiis anno MCCX electus fuit, ut ad eum Christi annum his verbis docet abbas Urspergensis: « Tunc principes Alemanniæ, rex videlicet Bohemiæ, dux Austriæ, dux Baviaræ, et landgravius Thuringiæ, et alii quamplures convenientes Fridericum regem Siciliæ elegerunt in imperatorem coronandum ». Principes tamen illi et officiales hodiernis, ut videre est apud Leibnitzium in Præfatione Codicis diplomatici, ubi fuse de electorum origine agit, asseritque ante Fridericum II nullum exhiberi posse antiquum ac sincerum monumentum, in quo de certo electorum numero sermo sit, de quo etiam nec in Decretali Innocentii III *Venerabilem* aliquod verbum habetur. « Quæ omnia consideranti », subdit vir eruditissimus, « apparet sub *Friderico II* formam aliquam accepisse electorale munus; forte studio ipsius imperatoris, filiorum electionem semel atque iterum procurantis; facilius utique per pauciores. Sed tamen jam ante lineamenta aliqua imperfecta fuisse ducta crediderim; alioquin novitati manifestæ utique pontifices et principes reclamassent. Hoc partim Friderici artibus tribuerim, cum *Henricum VI* filium Cæsarem fecit, aut Henrici ipsius, cum filium infantem successorem designari obtinuit ». Observat ibidem Leibnitzius primam verorum electorum disertam mentionem legi in Brevi Alexandri IV Gerardo Moguntino directo, ut prohibeat electionem Conradi junioris. In eo quidem septem electorum numerus non notatur, sed expressis verbis legitur in litteris Urbani IV *Richardo electo regi Romanorum*, datis *apud Urbem veterem II kal. Septemb.* sine ulla alia Chronologica nota. Refertur hoc rescriptum in Prodomo novi Codicis diplomatici Sect. IV, et in eo hæc verba habentur: « Proponere curaverunt quasdam consuetudines circa electionem novi regis Romanorum in imperatorem postea promovendi, apud principes vocem in hujusmodi electione habentes, qui sunt septem numero, pro jure servari: et fuisse hactenus observata a tempore cujus memoria non existit ».

14. *Sed non sine contradictione.* — Quæ verba de numero septem electorum non intelligenda, sed de electoribus generatim, cum eo tempore numerus ille difficultatem adhuc pateretur, ut liquet ex Alberto Stadeni et Erkone de Repkavio in Speculo Saxónico, qui uterque scriptor circa annum MCCX floruit. Eo in rescripto nihil inter Alphonsum et Richardum de regno contententes dirimit, sed judicium in aliud tempus differens, refert processum verbalem eorum, quæ utrinque hactenus acta essent, et sect. VIII *electores* diserte dicuntur archiepiscopus *Treverensis*, archiepiscopus *Coloniensis*, *Bohemiæ rex*, *comes Palatinus*, *Saxonie dux*, et

marchio Brandeburgicus, narraturque archiepiscopum Coloniensem procuratorio nomine agere pro archiepiscopo Moguntino, ad quem pertinet electionis diem præfigere, et ejus defectu ad comitem Palatinum. Egregium hoc monumentum ostendit electioni Alphonsi et Richardi septem principes electores interfuisse; sed Matthæi Parisiensis auctoris cœvi testimonium demonstrat numerum septem electorum rem tunc novam fuisse, et sine contradictione non admissam. Hæc ejus verba ad annum MCLVIII: « Hi sunt maximi principes in Alamannia ad quorum nutum pendet electio ipsius regni quod est quasi arrha imperii Romanorum. Archiepiscopus Coloniensis, archiepisc. Moguntinus, archiepisc. Treverensis, rex Bohemiæ, comes Palatinus de Rheno, dux Austriæ, dux Sueviæ, dux Poloniæ, marchisus Brendeberg (hæc prima mentio marchionis Brandeburgensis in electione regis Germanici futuri imperatoris), dux de Meran, dux Brabantiae qui et Lovanii, landgravius Thuringiæ, marchio Misniæ ». Quare anno MCLVIII septem electorum possessio nondum plene stabilita erat; cum alii principes adhuc electi onis jure potirentur.

15. *Numerus ille septenarius circa medium sæculum XII prævaluit.* — Certe aliorum principum ad hanc electionem jus invicte probatur auctoritate Arnoldi Lubecensis in Chronico ad annum MCCVIII, ubi de Ottonis electione loquens ait: « Indicta est curia in Alberstad, ubi convenerat maxima pars prælatorum et principum Saxoniae et Thuringiæ, nec defuit Herbipolensis Conradus. Omnes igitur principes, qui convenerant unanimi consensu Ottonem Romanum principem et semper Augustum elegerunt. Archiepiscopo, qui primam vocem habere videbatur, inchoante, prosequente vero Bernhardo duce cum marchione Misnensi, et landgravio Thuringiæ, ad quos electio regis pertinere videbatur ». Arnoldus autem anno MCCIX Chronico suo finem imposuit. Ex quibus omnibus liquet primo, institutionem septemviro- rum, seu septem imperii electorum Gregorio V papæ male adscriptam fuisse. Secundo, in medio circiter sæculo decimo tertio, et non antea, istum electorum numerum, post varia quæ præcesserant bella et dissidia, in electione regis Germaniæ prævaluisse, deceptumque Blondellum in Pleniori Assert. Genealogiæ Francicæ pag. 246, qui ait, vix a trecentis annis, qui nunc inter Germanos obtinet ordo, invaluisse. Tertio, parvum hunc electorum numerum potentiorum usurpationi attribuendum videri; cum antea omnes procures jus in electione Germanorum regis habuerint, eoque usque ad medium circiter sæculum XII potiti fuerint, nec eos ei renuntiassent antiqui prodant. Denique certum esse, tam ante quam post septenarium illum electorum numerum in usum vocatum, Pontifices Romanos, a quibus renovatum imperium Occidentale, jus suum illesum conservasse, et electiones aut approbasse aut reprobasse.

16. *In Concilio Lugdunensi nulla VII ele-*

ctorum mentio. — Baronius num. 53 ait constare jus eligendi imperatorem per *Gregorium V* ad Germaniæ principes transfusum esse; haud tamen adeo liquere, per ipsum fuisse electores ipsos numero septenario vel senario defuitos, sed certam fidem de tempore, quo septem electores creati, haberi ex Actis Concilii Lugdunensis Innocentio IV sedente celebrati, quod num. 63 et seqq. probat ex Matthæo Parisiensi, in cujus Historia ait legi Acta Concilii Lugdunensis OEcumenici, in quibus disertam mentio septem imperii electorum. Verum Matthæi Parisiensis digressionem pro Concilii Actis cardinalis doctissimus laudat; certumque eum communem illam de antiquitate septem imperii electorum sententiam improbatum fuisse, si quæ post ejus mortem adversus eandem scripta vidisset.

17. *Moritur Richardus I Normanniæ dux.* — Richardus hujus nominis primus Normannorum dux « obiit apud Fiscamnum nongentesimo nongesimo sexto anno ab Incarnatione Domini », inquit Gemmeticensis monachus lib. 4 Hist. Normann. cap. ult. qui antea cap. 17 scripserat: « Paganorum plurimos ad fidem Christi sacris monitis convertit, alios in paganismo permanere disponentes ad Hispanias transmisit, ubi plurima bella perpetrantes, decem et octo diruerunt urbes ». Tum cap. 19: « Apud Fiscamnum (locus ad mare, ubi est monasterium et oppidum) miræ magnitudinis et pulchritudinis in honore Deificæ Trinitatis templum construxit, mirificisque ornatibus multimode adornavit: abbatias quoque quasdam restauravit ». Ei successit *Richardus* filius hujus nominis II, de quo idem historicus initio libri sequentis: « Intra sui ducatus limites plurimis bonorum operum incrementis Normannicam pæne patriam unam Christi insignivit Ecclesiam. Hic in armis admodum strenuus, ubique armatas militum legiones nobiliter rexit; de inimicis victoriam semper capere assuetus. Et quamvis sæculari actui foret deditus, totus tamen fuit fide catholicus, et erga Dei cultores benevolus ac devotus. Sub ejus moderamine plurima monachorum adolere ovilia, qui velut apes ex multis sanctorum actuum canistris erumpentes, lucidissima in cælestes thesauros intulerunt mella ». Hæc mutatio dexteræ Excelsi, ut Normanni, qui adeo in monachos sævierant et tot monasteria everterant, nunc eorum patrocinium suscipiant novaque cœnobiaz ædificent.

18. *Obitus Sancti II Abarcæ dicti regis Navarrae.* — Hoc anno jam mortuus erat *Sanctus II Abarca* dictus, Navarrae rex, illustribus victoriis de Saracenis reportatis, et arcibus adversus eos ædificatis celebris, ut videre est apud Garibaium lib. 22, cap. 15 et seqq., ubi ostendit eum anno MCCCXII adhuc in vivis fuisse, et currenti *Garsiam Sanctionis* hujus nominis III jam regnasse. Doctissimus hic historicus Navarreorum regum seriem antea valde perturbatam accurate digessit;

sed in eo valde peccavit, quod *Sancio Garseani* hujus nominis primo *Abarcæ* nomen attribuerit; cum illud nepoti ejus ex filio tantum pertineat, ut Moretus ostendit in Investigationibus regni Navarræ, præsertim ex donatione pagi Alastruci monasterio sancti Joannis Pennatensis facta: « Proinde ego Sancius rex, cognomento Abarca, et Urraca regina, Æra MXXXV », Christi scilicet DCCLXXXVII. In alia donatione Æra MXXXVII, kalend. April. facta: « Ego Sancius rex Abarca, gratia Dei Aragonensium rex sive Pampilonensium, cum conjugē mea Urraca regina ». Garibaius laudatus cap. 18 recitat integram donationem a Garzia hujus nominis III factam Ferruccio abbati sancti Æmiliani, scriptam « Æra millesima trigesima quarta, regnante me rege Garsea, sub imperio Dei in Pampilona, una cum conjugē mea Eximina regina, et regnantibus matre mea Urraca regina et fratre meo Gundisalvo in Aragonē ». Quæ Charta præsentī anno data.

19. *Initium regni Sancti III Navarræ regis.*

— *Garsias III* jam mortuus erat anno millesimo primo, quo *Sancius* ejus filius hujus nominis III regnabat, ut demonstrat Charla e libro censuali monasterii sancti Æmiliani descripta, in qua legitur: « Ego Sancius rex simul cum matre mea Eximina regina, et uxore mea domna regina, etc. Facta scriptura sub Æra MXXXIX, sexta feria, quarto nouas Julias ». Charta hæc, aliaque eodem anno data, anno nempe Christi M, a Moreto in suis Investigationibus recitata. Porro *Garsias III* Abarcæ filius, *Tremulus* appellatus fuit, et ejus filius ac successor *Sanctius* hujus nominis III *Major* dictus, ob res ab eo præclare gestas, ut Garibaius et alii habent.

20. *Mors califæ Ægypti.* — « Anno trecentesimo octuagesimo sexto (nempe Hegiræ) obiit Azizus Billa dominus Ægypti », inquit Elmacinus lib. 3 Hist. Sarac. cap. 6, qui addit, cum imperasse annos XXI et aliquot menses; ac eo præmortuo imperium Ægypti cessisse filio ejus *Hakemo Biamville*.

GREGORII V ANNUS 2. — CHRISTI 997.

1. *S. Adalberti martyrium in Prussia.* — Sequitur Christi annus nongentesimus nonagesimus septimus, Indictione X, quo S. Adalbertus Pragensis episc., dum accepti muneris apostolatus numeros explet, martyrium est in præmium consecutus. Quod ad tempus spectat, testatur id Cartutius episcopus in Vita sancti Stephani regis Hungariæ, necnon Lambertus in Chronico, et alii his recentiores. Quomodo¹ ista se habuerint, qui res ab eo præclare gestas est prosecutus, auctor ejus temporis exacte describit; nempe primum de futuro hoc anno martyrio suo, et suorum fratrum cæde per Boleslaum regem Bohemiæ facta, præcognita per eam quam Deus ostendit antea visionem; inde vero de prohibitione quam accepit ab eodem rege, ne penitus ad suam rediret Ecclesiam: cum ipse compedibus, quibus tenebatur residendi in Ecclesia Pragensi, solutus, ad Prussios profectionem instituit. Prima autem statio in ea peregrinatione fuit Gnesna civitas, in qua missam celebrasse sanctum et quamplurimos baptizasse testatur. In

Prussiam vero venientem derisione et verberibus exceptum et abire jussum cum suis, idem auctor enarrat. Ubi repulsi, cum ad vicinos Luiticos populos profectionem arriperent, reversuri rursum opportunius ad Prussios: ab iisdem vinculis vincuntur, atque ducuntur ad supercilium montis, ubi sanctissimus Adalbertus septem confossus lanceis, martyr migravit in cælum.

2. Porro ejusdem S. Adalberti martyrium tanquam præsentēs per visum spectarunt Romæ monachi monasterii S. Bonifacii, magnus ille Nilus abbas, de quo superius, et Joannes abbas, et alius presbyter, qui, ut idem auctor ait, « dum missam faceret et sacram hostiam juxta ritum religionis offerret, revelans spiritus ad aures dixit, ut beati Adalberti martyris suffragia laboranti mundo imploraret. Paret ille libens monitis divinis, et intra memoriam SS. martyrum Adalbertum vocat, ut pro nostris erroribus apud divinam misericordiam mactata hostia intercedat ». Passus est vicesima tertia mensis Aprilis, et post mortem miraculis coruscans illud fecit in gentium conversione, quod vivens facere concupivit. Quod testatur Petrus Da-

¹ Apud Sur. die XXIII April. tom. II.

miani in Romualdo ¹, dum tradit Barbaros illos pepercisse S. Bonifacio prædicanti in Russia, quod timerent, ne si martyr fieret, sicut sanctus Adalbertus, miraculis cælitus illustratus ad fidem Christianam populos illos converteret. Qui persecuti sunt res ² Polonorum, tradunt corpus sancti Adalberti redemptum fuisse æquali auri pondere a Prussis, illudque translatum in Gnesnensem Ecclesiam, ubi immensis claruit miraculis, quorum fama permotus Otto imp. ab Italia Gnesnam usque fuerit peregrinatus, ut suo loco dicetur.

3. *S. Bonifacii apostolatus ad Russios.* — Quod autem martyr martyrem pariat, accidit eodem tempore, ut S. Bonifacius cognatus Ottonis imp., de quo superius, relinquens florens sæculum, sequens Romualdum, vitam monasticam sit amplexus; qua bene institutus valeret ad martyrii coronam pertingere. Qui audiens Adalbertum jam coronatum, impatiens moræ illud ipsum vitæ stadium sibi currendum proposuit. At quomodo istud, a Petro Damiani sic accipe: « Cum igitur post diuturnum eremiticæ disciplinæ cursum, ad prædicandum jam ire diserneret: Romam primum pergere studuit, et ab Apostolica Sede consecrationem archiepiscopatus accepit. Retulit autem mihi quidam senex monachus, qui cum illuc de Ravennæ finibus comitatus fuerat, quia in toto illo itinere vir venerabilis, cum omnibus quidem, qui eum sequerentur, pedestes ibant, sed ipse jugiter psallens, et cæteros longe præcedens, nudis semper pedibus incedebat. Pro labore quidem itineris quotidie comedebat, per singulos dies de medio pane et aqua vivens. In diebus festis, ignoto videlicet omni liquamine, quotidiano victui poma quælibet, vel herbarum radices addebat. Postquam autem consecratus est, quotidie observabat et monasticum pariter et canonicum in celebrandis horarum officii ordinem.

4. « Cum vero jam Ultramontanos peteret fines, equo quidem vehebatur, sed venerabilis pontifex (sicut dicitur) nudis cruribus semper et plantis adeo intolerabilem frigidissimæ regionis sufferebat algorem, ut volens descendere, non pedem a subhærente ferro disjungeret, nisi aqua calida subveniret. Ad Gentiles autem postremo perveniens, cum tanta cœpit fervidi pectoris constantia prædicare, ut jam nullus ambigeret, quia vir sanctus martyrium flagitaret. Illi vero timentes, ne sicut post martyrium beati Adalberti coruscantibus miraculorum signis, Sclavonicæ gentis plerique conversi sunt, ipsis quoque similiter eveniret, longo tempore a beato viro manus artificiosa malitia reprimunt, et cupidissimo mori, nolentes occidere, crudeliter parent. Jam ante diu Evangelium in Russia (ut dictum est superius) fuerat prædicatum, et quamplurimi eorum Christiani effecti erant, sed ingruentibus jugiter bellis vix aliqua Christianitatis memoria residua erat, cum

provincia illa Bonifacii prædicatione atque miraculis bene culta, rursus virere atque florescere cœpit; aucta vero magno frugum proventu, cum meruit ipsius Bonifacii martyris sanguine irrigari. Quando autem id contigerit, et qua occasione, suo loco dicturi sumus.

5. Iluc provoco novatores, ut discant (si quæ tamen scintilla innati omnibus cognoscendæ veritatis luminis in eis reliqua est) quales sint veri Apostolici viri, et a quo Apostolatam ad Gentes accipere consueverint, ut legitimi vocarentur, et non adulterini Christi Dei ministri: ut veri apostolatus intuentes signa, quæ vel ante præcesserunt, vel quæ comitata sunt eos, et quæ sunt postea subsecuta: in seipsos miseri convertentes oculos, stigmata sibi inusta arte diaboli superbæ character, apostasiam non apostolatam significantia, videant et expaveant. Cætera autem de Bonifacio inferius.

6. *Stephanus in Hungariæ regno succedit.* — Hoc eodem anno (ut auctor est ¹ Cartnitiis) Geisa primus dux Christianus Hungariæ, de quo plura superius, ex hac vita migravit in cælum, cui succedit S. Stephanus ejus filius, qui ætate licet adolescens, tamen sapientia canus erat, atque in primis religione præstans, quod simul ac pater decessit, civile bellum causa Christianæ fidei est exortum, exstinxit. Res digna memoria, quam his verbis idem auctor est prosecutus ²: « Diaboli instinctu populus Gentilis Christianæ fidei jugo colla supponere noluit, et cum principibus domini sui imperio subducere se moliebatur. Itaque depopulabantur ejus urbes, prædia vastabant, possessiones diripiebant, ministros cædebant, et ut cætera lateam, etiam ipsi insultabant. Cumque ab hujusmodi improbitate revocare se nollent, nec suo furori et amentię modum statuerent, dux ipse divinæ virtuti confidens, ad edomandam illorum rabiem cum sui exercitus copiis sub signis Dei dilecti pontificis Martini, et clarissimi martyris Georgii movit in hostes, qui tum forte urbem obsidebant, quem vulgo Vesprinum vocant. Quod quidem illi in ejus fecere contumeliam, ut quem ad locum ille familiaris consuevisset accedere, ibi ipsi considerent, essetque ex eo loco facilius ipsis aditus ad alia præsidia occupanda. At ille divina fretus ope et clementia illos aggressus est, et illis quidem suis armis confidentibus, ipso vero fide armato, utrinque congressi sunt.

7. « Victis tandem hostibus, et partim cæsis, partim captis, dux victor abcessit, et sapienter quidem de illorum villis et agris sive possessionibus statuens, non quemadmodum olim Saul, qui superatis Amalecitis, contra quam Dominus jussit, ex eorum spoliis optima quæque servaverat, sed quia Pannonia beatissimum Martinum apud se natum gloriatur, ejus etiam meritis vir Christi fidelis (ut jam dictum est) ex hostibus victoriam

¹ Pet. Dam. in Romualdo c. 89. — ² Idem Petr. ibid. c. 88.

¹ Carl. in Vita S. Steph. reg. Hung. apud Sm. die xx Aug. tom. IV. c. 4. — ² Ibid. c. 5.

reportavit, nihil de rebus eorum in suos usus convertit, sed ex Dei amantium consilio, juxta ejusdem sancti præsulis fundum, eo loco, qui Sacer-Mons dicitur, ubi S. Martinus, cum in Pannonia degeret, precari solitus erat, sub ejus nomine monasterium construxit, possessiones et redditus sufficientes ei tribuens. Idem vero de episcopis constituit, ex illorum captivorum facultatibus decimas persolvi

volens, idque adeo exacte, ut si quis decem haberet proles, decimam prolem S. Martini cœnobio daret. Ita igitur hostibus sub jugum missis, Christi miles gaudio spirituali perfusus, omnem ingenii sui vim contulit ad consecrandam doctrinam Evangelicam, etc.» Reliqua enim de ipso, et de Hungarica Ecclesia bene disposita, dicturi sumus inferius suo loco.

Anno periodi Græco-Romanæ 6490. — Anno Æræ Hispan. 1035. — Anno Hegiræ 387, inchoato die 13 Januar., Fer. 4. — Jesu Christi 997.

— Gregorii V papæ 2. — Ottonis III reg. 15. imp. 2. Basil. et Const. imp. 22.

1. *S. Adalbertus episc. Pragensis martyrio coronatur.* — Ad num. 1 et seq. Prior auctor anonymus Vitæ sancti Adalberti episc. Pragensis narrat hujus sancti profectionem in Prussiam ejusque martyrium, his verbis: « Tandem alternanti potior sententia successit animo, ut quia hæc regio proxima, et nota fuerat duci prædicto (Boleslao nempe Bohemorum duci) Prussiæ deos et idola iret debellaturus. Dux vero cognita voluntate ejus dat ei navem, et ipsam pro pace itineris ter deno milite armat. Ipse vero primo adiit urbem Gidanic (scilicet Gedanum, aliis Dantiscum, vulgo Dantzich) quam ducis latissima regna dirimentem maris confinia tangunt. Ibi divina misericordia adventum ejus prosperante, baptizabantur hominum multæ catervæ ». Narrat postea anonymus, postera die, dum ipse cum Benedicto presbytero et Gaudentio fratre suo versaretur, paganos venisse, eumque dire fustibus exceptum percussisse. « Passus est autem sanctus et gloriosissimus martyr Christi Adalbertus nono kalendas Maii, imperante rerum domino Olfone tertio, pio et clarissimo Cæsare, feria sexta », ideoque hoc Christi anno, quo feria vi incidit in diem xxiii mensis Aprilis. Baronius sancti Adalberti martyrium ex altera ejus Vita recitat, in qua cap. 6 dicitur, eum a Boleslao Poloniae duce adjutum fuisse. Tum: « Est in parte regni civitas magna Gnezdem, ubi nunc sacro corpori requiescere placuit, etc. » Missam celebrat. Inde navigat in Prussiam et morti traditur. Henschenius in Notis ad posteriorem Vitam sancti Adalberti ait, ejus auctorem utrumque locum confudisse, et quæ prior dixit *Guesnæ*, ipsum Gedani peracta esse asserere. At posterior supplet quæ prior omisit, atque eum *Guesnam* venisse, et multos baptizasse, postea navem conscendisse, et in Prussiam (qua in regione Gedanum situm), ubi cum martyrium complisset, corpus ejus Boleslao Polonorum duci ven-

ditum fuit. Hæc posterior auctor, qui duas circumstantias a priori omissas refert, recteque notat suo tempore sacrum *Adalberti* corpus Guesnæ requiescisse. Colitur *S. Adalbertus* tam a Polonis quam a Bohemis, et utrique sacrum ejus corpus sese habere gloriantur. Henschenius ad diem xxiii Aprilis, quo sanctus martyr colitur, exhibet dissertationem Bohuslai Balbini e Societate Jesu, de relatione corporis sancti Adalberti Pragæ, quam factam fuisse pluribus probare conatur. Poloni e contra se sacras exuvias possidere contendunt, eique superstructum insigne mausoleum ostentant.

2. *S. Bonifacius Russis Evangelium annuntiat.* — Ad num. 3 et seq. Refert Baronius ex Petro Damiani in Vita S. Romualdi abbatis cap. 8, *sanctum Bonifacium* Russorum apostolum fuisse unum ex præcipuis S. Romualdi discipulis, qui cum Romæ ab *Apostolica Sede consecrationem archiepiscopatus* accepisset, post beati Adalberti martyrium Russis Evangelium prædicavit. Quibus ex verbis deducit Baronius, provinciam illam *Bonifaci* prædicatione rursus virere atque florescere cœpisse, quia vix aliqua Christianitatis memoria ibi residua erat. Existimavit enim *Russiam* Basilio Macedone imperante factam fuisse Christianam, et jamdiu ibidem fidem extinctam. Verum jam ostendimus, Russorum gentem in multos populos divisam fuisse, et *Russiam* Albam, seu Moscoviam, ut nunc vocamus, anno tantum dcdlxxxviii, regnante *Wolodomi*ro, fidem Christianam suscepisse. *Bonifacius* itaque non ad Russos, qui *Wolodomi*ro parebant, sed ad aliam gentem Seytharum sive Russorum prædicationis causa profectus est, ut jam suspicatus est Bollandus in notis ad cap. 8 Vitæ S. Romualdi abbatis, a Petro Damiani scriptæ, quam ad diem vii Februarii recitat. Quam conjecturam sequentia certam reddunt.

3. *Moritur Geisa primus rex Christianus*

Hungariæ. — Ad num. 6 et seq. Auctor Vitæ S. Stephani Hungarorum regis, postquam narravit sanctum Adalbertum Pragensem episcopum, tam Geisam patrem, quam Stephanum filium baptizasse, de Geisa scribit: « Deinde jam grandævus, anno a Christo nato noningentesimo nonagesimo septimo vitæ hujus ærumnas cum cælestibus gaudiis commutavit ». Ademarum tamen auctor cœvus in suo Chronico aliter rem narrat, aitque: « Sanctus Brunus convertit ad fidem Ungriam provinciam, et aliam quæ vocatur Russia; regem Ungriæ baptizavit, qui vocabatur Geitz, et mutato nomine in baptismo Stephanum vocavit, quem Otto imperator in natali protomartyris Stephani a baptismo excepit et regnum ei liberrime habere permisit, dans ei licentiam ferre lanceam sanctam ubique, sicut ipsi imperatori mos est, et reliquias ex clavis Domini et de lancea S. Mauriti ei concessit in propria lancea. Rex quoque supradictus filium suum baptizare jussit, et S. Bruno imposuit ipsi nomen, sicut sibi, Stephanum. Postea vero ipsi filio ejus Stephano Otto imperator sororem Henrici postea imperatoris in conjugio dedit ». Quare quod auctor Vitæ S. Stephani *Adalberto*, Ademarum *Brunoni* attribuit, et ex illis alteruter decipitur.

4. *S. Bruno Russis Prussiæ vicinis Evangelium annuntiat.* — Sed quod subdit idem Ademarum, confirmat quod mox diximus de Russis a S. Bonifacio ad fidem Christi conversis: « At vero S. Brunus cum ad Pincenatos (id est, Prussos) properavisset, et Christum prædicare cœpisset illis, passus est ab eis, sicut passus fuerat S. Adalbertus, etc. Corpus ejus Russorum gens magno pretio redemit, et in Russia monasterium ejus nomini construxerunt ». Idem narrat Ditmarus lib. 6 Chronici: « Duodecimo anno suæ inclytæ conversionis ad Prussiam pergens, steriles ejus agros semine divino fœcundare studebat. Sed spinis pullulantibus horrida non poterant facile mollire. Cum itaque in prædictæ regionis confinio et ruscæ, primo ab incolis prohiberetur, et plus evangelizans capitur », et decollatur. Quare *Russia* illa ad quam tam *S. Brunus*, quam *S. Bonifacius*, de quo mox actum est, perrexerunt, non erat Russia Alba, sed provincia quædam Prussiæ et Poloniæ vicina, verumque est quod ibi diximus, Bonifacium in loco a Prussia non dissito Evangelium disseminasse. Sed tam de Brunone, quam de Bonifacio rursus infra sermo erit.

5. *Joannes Placentinus Sedem Romanam invadit.* — Anno superiori, quo Baronius num. 14 et seqq. narrat Sedis Romanæ invasionem a Joanne

Placentino episcopo factam, diximus ad præsentem pertinere, et nos hic de illa acturos. Lambertus itaque Schafnaburgensis in Chronico de ea habet: « DCXCVII. Joannes Placentinus episcopus Sedem Apostolicam invasit consilio Crescentii », licet, ut ibidem num. 4 ex chronographo Hildensheimensi ostendimus, tyrannus iste Gregorio V plurimum deberet. Fusius rem narrat idem chronographus Hildensheimensis: « DCXCVII. Papa Ticini adunato plurium episcoporum Concilio, præfatum Crescentium anathemate perculit. Interea Joannes Placentinus episcopus Constantinopoli remeans, Romam intromissus, Apostolicam Sedem factione Crescentii invaserat. Unde ab universis episcopis Italiæ, Germaniæ, Franciæ et Galliæ excommunicatur. Imperator quoque ut Romanorum sentinam purgaret, Italiam perrexerat, summa rerum dominæ Mathildæ amitæ suæ Quidilimbürgensi abbatissæ delegata: in qua ultra sexum mira prudentia enituit (1) ».

6. *Vir fuit corruptis moribus imbutus.* — Chronographus vero Magdeburgensis ineditus de isto pseudo-pontifice scribit: « Hoc etiam anno Crescentius quidam, diabolica fraude deceptus, Romam, absente papa Gregorio, invasit; Joannemque quemdam Calabrilanum (quem dominus imperator Otto III pro Græci imperatoris filia, sibi matrimonio acquirenda, cum Bernwardo episcopo, Constantinopolim miserat, et inde revertentem cum Græcorum legatis, se indigno suscepit honore), eumque non tam papam Apostolicum quam apostatam constituens, legatos imperatoris sub ejus custodia Romæ retinuit. Hic ergo Joannes, natione Græcus, conditione servus, astu callidissimus, imperatorem Augustum Ottonem II sub paupere adiens habitu, ob interventum suæ dilectæ contectalis Theophanu Augustæ, regia primum est alitus stipe, dein percurrente tempore, vulpina qua nimium callebat versutia, præfatum eotenus circumvenit Augustum, ut pro loco ac tempore, satis clementi ab eo gratia donatus, pæne inter primos usque ad defunctionem suam, carus haberetur. Post dormitionem vero II Ottonis, regnante jam III Ottone filio suo, quem ab ipso matris utero divina sequebatur miseratio, præfatus Joannes ingenua sibi circa eos calluit securius astutia, quod regis infantia et primatum ejus permittebatur incuria. Ad hæc defuncto Placentinæ urbis episcopo, vir bonæ indolis ei subeligitur: quo indecenter ejecto, præfatus Joannes non pastor, sed mercenarius, eandem non regendam, sed devastandam suscepit Ecclesiam: quam cum aliquot annis teneret, avaritiæ diabolicæ inebriatus veneno, tantum se extulit supra se, ut

(1) Joannes iste in Pontificatu quod per tyrannidem usurpavit, Sergii nomen sibi assumpsit, quod cum a nullo nunquam animadversum deprehenderim, ideo hic adnotandum duxi ex Benzone Albensi episcopo, qui medio ferme sæculo undecimo florebat, et rerum ab Henrico III gestarum selecta quædam vulgavit. Nisi tamen memoriæ lapsu auctor iste Sergium pro Joanne scripserit (quod contingere facile potuit); existimandum est Pontificem hunc, etiam post Romanæ Sedis invasionem, utrumque sibi nomen Joannis et Sergii retinuisse, quemadmodum non post multos annos Guibertus antipapa modo se Guibertum, modo Clementem in Bullis unncupavit. Alioqui successor ejus Joannes, non Joannes XVII, sed Joannes XVI numeratus fuisset. Animadversione pariter dignum ceuseo, ea quæ invaso a Joanne isto Placentino episcopatu, eodemque in archiepiscopatum per injuriam erecto ab historicis apud Pagium hic narratur, illustrari ex placito Ravennatensi anni DCXC vulgato a Muratorio Antiquit. Ital. tom. II, col. 939. Unic enim judicio *Johannes archiepiscopus sanctæ Placentinæ Ecclesiæ* præsedit.

etiam Romæ ipsam B. Petri Apostoli Sedem, uti prædictum est, Antichristi membrum vere effectus, fornicando potius pollueret, quam venerando insederet ».

7. *Legatio Ottonis III Constantinopolim pro petenda uxore.* — Non leguntur ista in Chronico Magdeburgensi, a Meibomio tom. II Collectionis Hist. Germaniæ nuper publicatæ. Quæ tamen ex optimo aliquo scriptore desumpta, cum chronographus Hildesheimensis nonnisi in anno ab eo differat. Ad annum enim cxcv ait: « Joannes Placentinus et Bernwardus Wireburgensis episcopi, Constantinopolim ex latere regis, ut sponsam illi inde peterent, directi sunt. Legati etiam Apostolicæ Sedis cum unanimitate Romanorum atque Longobardorum regem (nempe Ottonem III) Romam invitant ». Paulo post: « Bernwardus quoque Wireburgensis episcopus, morbo gravi affectus, inter maris pericula obiit ». Quare laudatus chronographus Magdeburgensis ineditus multa quæ diversis annis contingere uno tenore refert.

8. *Altera legatio ob eandem causam obita.* — Arnulphus historicus Mediolanensis, lib. 4, meminit alterius legationis, ob idem matrimonium *Ottonis III* cum filia imperatoris Orientalis, ab *Arnulpho* hujus nominis II, archiepiscopo Mediolanensi, paulo ante mortem Ottonis III obitæ; ait enim: « Decenter absolutus reversionem accelerat. Interea imperator primo juventutis flore defungitur Otto: in quo omniū est Ottonum consumpta propago ». Hæc ultima verba ut obiter dicam, notatu digna, quia ex eis sequitur, *Conradum Salicum*, ideoque et *Gregorium V*, Summum Pontificem, non fuisse ex propagine Ottonum, perperamque viros doctissimos autumasse, utrumque recta linea procedere a *Ludolfo* Ottonis M. filio. Quæ observatio eo majoris momenti, quo Arnulphus historicus eodem Conrado Salico et duobus Henricis imperantibus floruit. Sed stemma Gregorii V papæ et Conradi Salici, invictis argumentis sæculo sequenti a nobis probandum.

9. *Quo tempore vixerit Arnulphus historicus.* — Notandum etiam Arnulphi Mediolanensis Historiam nunquam in lucem emissam esse, ut testatur Puricellus in Monum. Basilicæ Ambrosianæ, qui pag. 303 de eo habet: « Historiæ Mediolanensis ab anno Christi nongentesimo vicesimo tertio scriptor Arnulphus, alter archiepiscopi hujus (nempe Mediolanensis) Arnulphi Primi consanguineus, etc. Manuscripta etiamnum extat nunquam typis adhuc impressa illius Historia, tribus comprehensa capitibus tam prolixis, ut librorum potius appellatio ipsis debeatur ». Sunt qui Arnulphum historicum cum Arnulpho archiepiscopo confundere, sed ipsos ipsemet historicus his verbis refellit: « Eodem tempore (quo captivus in Suevia Berengarius obierat) obeunte Walperto (ideoque anno Christi dcdlxvi, non vero dcdlxix, ut Papebrocius in Exegesi de episcopis Mediolanensibus perperam credidit) cathedram suscepit Arnulphus, vere declinans a malo

et faciens bonum. Cujus æquivocus existo gestorum scriptorego præsentium, fratris vero illius pronepos verus ». Asserit Arnulphus se usque ad annum millesimum duodecesimum referre quæ a testibus oculatis ac fide dignis accepit, et postea quæ propriis oculis ipsemet observavit. Sed redeo ad legationem qua Arnulphus II archiep. Mediolanensis functus est, quam diversam esse a priori, ostendit initium archiepiscopatus ejusdem Arnulphi, quod juxta Papebrocium citatum, incidit in annum nongentesimum nonagesimum septimum, et tamen prior legatio ad annum nongentesimum nonagesimum quintum pertinet. Expetebat etiam uxorem filiam Constantini imp. (Basilus enim Porphyrogenneta frater nullam habuit) *Hugo* Francorum rex, pro filio *Roberto*, jam a se in consortium regni assumpto, ut patet ex Epistola cxi Gerberti, Hugonis regis nomine scripta. Sed cum *Constantino* imp. tres filiæ fuerint, *Eudocia*, *Zoe* et *Theodora*, ut in morte ejusdem imperatoris videbimus, incertum de qua ex illis chronographus Hildesheimensis, chronographus Ms. Magdeburgensis, Gerbertus et Arnulphus intelligendi sint. Ducangius in Familiis Augustis Byzantinis, qui nec *Arnulphum*, nec chronographi Magdeburgensis exemplar Ms. viderat, de *Roberti* matrimonio tantum loquitur, eumque *Eudociam* uxorem postulasse arbitratus est, sed levi conjectura innixus, ut apud eum legere est. Sed revertemur ad schisma, cujus Joannes Placentinus episcopus nefarius auctor extitit.

10. *Schisma circa mensem Maium coeptum.* — Coeptum schisma mense circiter Maio, cum antipapa menses decem Sedem Romanam occupavit, et mense Martio sequentis Christi anni ex ea depulsus fuerit, ut ibidem monstrabimus. Baronius loco mox laudato, ubi eum *Philagatum* appellat cum auctore Vitæ sancti Nili hegumeni, ex eodem ostendit, eum tam Ottonem III quam Gregorium V ex fonte baptismatis suscepisse, Nilumque nihil prætermisisse ne male iste antipapa haberetur, cum jam tempore Quadragesimæ depositus esset, et *Gregorius V* in Sedem restitutus. Porro in hac secunda protectione Romana Ottonis III, cujus meminit citatus chronographus, contigit quod anno superiori num. 27, et seqq. narrat Baronius ex Petro Damiani, quod nempe *sanctus Romualdus* ab imperatore obtinuerit, ne Tiburtini, qui a *Crescentii* tyranni partibus steterant, penitus delerentur; quare ea ad præsentem annum revocanda. Concilii Ticinensis alibi mentio habetur quam in eodem chronographo. Ex eo autem intelligimus, *Gregorium V* in Longobardiam secessisse, dum Roma in tyranni potestate erat. Prædictus antipapa ad episcopatum Ecclesiæ Placentinæ promotus fuerat, et a Joanne XV hæc Ecclesia in ejus favorem metropolitana declarata. Verum tom. IX Concil., pag. 752, recitatur Epistola Gregorii V ad Joannem Ravennatensem archiepiscopum, qua ei Placentinam Ecclesiam restituit, atque: « Placen-

tinam Ecclesiam injuste tibi a meo antecessore ablatam, et contra canones sub nomine archiepiscopatus locatam, tibi tuisque successoribus refutantes in perpetuum ». Ubi *refutandi* verbo, Gregorius V significat se Ecclesiam ei ablatam dimittere et in ejus jus transferre, ut pluribus exemplis ostendit Ducangius in voce *refuso*. In fine Epistolæ legitur : « Scriptum manu Petri scriniarii, notarii et regionarii S. R. E. in mense Julio, Indictione supradicta x, dat. nonis Jul. etc. » anno scilicet currenti, quo ideo Gerbertus mense Julio nondum Ravennatensis archiepiscopus erat.

11. *Floret Mathilda abbatissa Quidilemburgensis*. — Porro de Mathilda amita imperatoris, in Ms. chronographo Magdeburgensi ad annum DCCLXXI legitur : « Antequam rex (nempe Otto M.) iret in Italiam Machtild unica filia ejus, decus sanctimonialium, communi consensu cleri et populi, religiosissimæ Congregationis Sancti Servatii in abbatissam electa est, ac presentibus patre Ottone imperatore, et matre imperatrice Atheleida, aviaque sua Machtilde regina (Henrici Aucupis vidua) necnon Ottone fratre suo cunctisque optimatibus regionis illius, benedicta est ». Ditmarus lib. 4 Mathildam abbatissam filiam Adelhaidis fuisse etiam asserit. Quare deceptus fuit Baronius in Notis a l Martyrologium Rom. ad diem xiv Martii, ubi eam filiam fuisse Henrici Aucupis, et anno DCXXX floruisse cum Trithemio asserit. Ditmaro enim suffragatur chronographus Magdeburgensis a Meibomio editus, qui eam sororem Ottonis II fuisse testatur. Vixit usque ad annum nongentesimum nonagesimum nonum, et ad VIII idus Februarii juxta Ditmarum, non vero usque ad annum millesimum septimum, ut scribit Mabillonius Sæc v. Ad eum diem Bollandus eam inter sanctos præfermissos memorat.

12. *Concil. San-Dionysianum*. — Concilium San-Dionysianum, in quo de decimis Ecclesiæ restituendis actum, hoc vel superiori anno habitum. Certe non serius, cum sanctus Abbo apud Hugonem et Robertum, Galliarum reges, Apologetico sese purgare coactus fuerit, et Hugo mense Octobri presentis anni, uti anno sequenti videbitur, e vivis excesserit. Refert illud Aimoinus in Vita sancti Abbonis Floriacensis abbatis, cap. 9, ubi ait : « In illis sane diebus, in monasterio S. Dionysii, haud procul a Parisiis Concilium aggregatum est quamplurium episcoporum. Qui cum de fidei puritate, de corrigendis tam suis quam subditorum pravis moribus sermocinari dehuissent, juxta vulgare proverbium, cunctum suum sermonem ad deci-

mas verterunt Ecclesiarum. Quas laicis ac Deo servientibus monachis auferre moliti, resistente eis in hac re hoc venerabili Dei cultore Abbone, promiscuam in se vulgi concitavere manum. Ortaque subito seditione, tantus in episcopos timor irruit, ut publica statione relicta, passim quisquam diffugeret, inter quos Seguinus Senonum archiepiscopus, primum Galliarum in ea Synodo sibi usurpans, primum quoque fugæ arripuit. Et inter fugiendum, securi inter scapulas ictus, lutoque a popularibus oblitus, ægre evasit. Uni quoque episcoporum timor fugienti tam veloces addidit alas, ut affluentissimo prandii apparatu quem sibi exstruxerat relicto, vicinæ urbis Parisiorum mœnia fugitabundus expeteret. Totam ergo tantæ calumniam injuriæ, tam a præfato Arnulpho (Aurelianensi episcopo, de quo idem Aimoinus cap. 8 jam locutus fuerat) quam a reliquis pontificibus sub semet devolvi perpendens, hic Deo devotus Abbo, in eodem Apologetico non solum ab hoc, verum et a quibusdam aliis, hoc modo se purgat objectis :

13. *Accusatus Abbo quod in eo tumultus excitavit*. — « Nec me vestro », ait regibus (nempe Hugoni et Roberto) « aliorumque sapientum examini subduco, qui contra canones sensisse suspicor. In episcopos manum monachorum movisse accusor, vestram benevolentiam proprio episcopo tulisse blasphemor, quibusdam excommunicatis participasse criminor. Sed esto : cui sententiæ canonum contradixi, qui in illo Concilio vix apertum librum videre potui? Aut si Concilium illud fuit, ubi conciliati venerunt et disconciliati recesserunt? cum ibi discordes reconciliari debuerint, aut canonica districtione muletari. Quid in me singulariter commiserunt episcopi, ut eis saltem cogitatione obesse voluerim? præsertim cum non inimicum, sed fide et opere amicissimum, graviora pericula pertulisse contigerit. Ecce coram Deo in Christo non mentior, quia audita insequentium conclamatione, ultra quam dici possit indolui, recordatus pristinæ amicitiae et beneficiorum tanti viri, cujux nix venerandum caput ostendit, excepta primatis prærogativa et sacerdotali infula. Qua suggestione vos decepi, ut vestram benevolentiam optimis auferretis, male meritis conferretis? num ego Deus sum, qui mutat mentes, mutat corda, mutat regna et tempora? Vere fateor me magicam ignorare, nec aliquid malarum artium didicisse ». Recitat hoc Concilium Baronius in Appendice ad tomum xi ad annum mii, num. 3, quod in locum suum restituendum duxi.

GREGORII V ANNUS 3. — CHRISTI 993.

1. *Robertus rex Francorum, qui a conjugio illicito recedit.* — Sequitur annus Redemptoris nongentesimus nonagesimus octavus, Indictione undecima, quo mortuo Hugone Francorum rege, ejus filius, qui cum patre regnare cœperat, solus summa rerum potitur. Hic autem ob illicitum contractum cum affine atque commatre conjugium coercitus est. Cum enim ea de causa celebrata esset in Galliis Synodus, in qua, adulatione episcoporum, concessum eidem fuit tale conjugium; reclamante Gregorio Romano Pontifice est dissolutum, et delinquentes episcopi pœnitentia castigati. Est de his Epistola Leonis papæ Noni ad Henricum Roberti filium, in qua inter alia habet hæc verba: «Pater tuus Robertus, laude et consullu episcoporum regni tui, Bertam matrem Odonis comitis sibi duxit uxorem: ob quam rem, quoniam sibi erat affinitate conjuncta, ab antecessore nostro Gregorio Quinto, cum episcopis qui Placito interfuerunt, reprehensi sunt. Postea ad Sedem Apostolicam venientes, cum satisfactione sumpta pœnitentia, redierunt ad propria». Hæc ipse, quæ recitat Ivo episcopus Carnotensis in Panormia.

2. Porro suasionem Abbonis Floriacensis abbatis, magni nominis viri, Robertum regem dimisisse eandem commatrem suam, vinculo etiam affinitatis conjunctam, testatur Helgaldus monachus in Vita ipsius Abbonis. Sic igitur illa dimissa, uxorem duxit Constantiam, filiam Willelmi comitis Arelensis. Petrus Damiani, in Epistola ad Desiderium abbatem Cassinensem de ejusdem Roberti regis agens conjugio, ostendit episcopos Galliarum ita coercitos a summo Pontifice, postea sub anathemate cohibuisse regem ab ejusmodi conjugio, ex quo non dulcis et chara soboles orta est, sed monstrum horrendum, ita tali signo factum execrandum Deum detestari ostensum fuit. Sed audi jam Petrum:

3. «Sæpe Deus omnipotens terribile exhibet etiam in hac vila judicium, nec tamen miseri homines desinunt iterare peccandum: nam Robertus Gallorum rex, avus istius Philippi, qui in paterni juris sceptrâ successit, propinquam sibi copulavit uxorem, ex qua suscepit filium, anserinum per

omnia collum et caput habentem. Quos etiam virum et uxorem, omnes fere Galliarum episcopi comuni simul excommunicare sententia. Cujus sacerdotalis edicti tantus omnem ubique populum terror invasit, ut ab ejus societate universi recederent, nec præter duos servulos ad necessarij victus obsequium illi remanerent; qui tamen et ipsi omnia vasa, in quibus rex edebat et bibe-
bat, percepto cibo, abominabilia judicantes, pabula ignis exhibebant. His autem rex coarctatus angustiis, ad sanum consilium rediens, divorlium fecit, iniitque legale connubium». Eadem de monstro genito habentur in historiæ Aquitanicæ fragmentis ex Pithœi collectione editis, ubi hæc verba:

4. «Dum enim de eodem rege eadem mulier concepisset: credens se parituram filium, peperit monstrum. Quæ res regem perterruit, et librum repudii eidem mulieri dare compulit. Quo facto, absolvi cum toto suo meruit regno». Hæc ibi. Helgaldus monachus, qui Vitam ejus fidelissime scriptam habet, dum comparat eum Davidi peccanti, sicut illum per Nathan, ita hunc per Abbonem sanctum abbatem revocatum ad pœnitentiam tradit, dum ait «istum æque per dominum et venerabilem Abbonem, Floriacensium a Deo præelectum abbatem, nunc Christi favente gratia, miraculis coruscum, sprete mortis formidine, dure increpatum privatim et publice: cujus sancti viri increpatio tam diu perstitit, donec rex mitissimus reatum suum agnosceret, et quam male sibi copulaverat mulierem, prorsus dereliqueret, et peccati maculam grata Deo satisfactione dilueret». Hæc Helgaldus Floriacensis monachus. Porro quam pius, quam sanctus idem rex usque ad obitum perseveraverit, idem auctor texens res ab eo præclare gestas enarrat.

5. *Abbonis Floriacensis abbatis ad Pontificem Romanum legatio.* — Quod rursus ad Abbonem spectat Floriacensem abbatem, constat ex Aimoino¹, qui ejus Vitam conscripsit monacho Floriacensi tunc vivente, ipsum a Roberto rege Francorum ad Gregorium papam esse missum; quid autem per

¹ Bibl. Flor. edit. a Joan. a Bosco Caesl. c. 41. p. 227.

ipsum gestum sit, ab eodem auctore sic accipe : « Porro paucis labentibus annis occasio se præbuit, ut rogatu ac precibus gloriosi regis Roberti, Romuleam repedaret ad Urbem. Præcipua vero earum pro quibus directus est causarum, hæc fuit : Quia Arnulphus Rhemorum archiepiscopus, absque justa audientia sede sua privatus custodiæque fuerat mancipatus. Ob hoc Gregorius, qui Joanni in Apostolica successerat Sede, non solum nobilitate generis, verum etiam probitate clarus mentis, toti regno Francorum anathema se invecuturum comminatus est. Hæc igitur ex re Italiam repetere servus Christi Dei cogitur. Et quamvis mole corporis gravaretur (nam in transmarinis regionibus, peregrinorum ciborum inusitata qualitas, decoctæque potionis haustus corpus ejus pingue reddiderat) nequaquam tamen labore fatigabatur. Nec vero ipsa ejus pinguedo ullam ei ingerebat debonestationis maculam. Et cupidus pacis cum foret, leve ducebat omne genus defatigationis, dummodo eum reperiret virum, per quem fama vulgante, audierat ad pristinam posse statum religionis resurgere normam. Profectus ergo, Romana iterato revisit mœnia, ubi eo quem quærebat nequaquam reperto, per concava vallium, per prærupta montium investigans, tandem in finibus Spoletanorum invenit. Cumque se invicem duo Ecclesiæ lumina conspexissent; gaudio ultra quam credi possit gavisus magno, in mutuos ruunt amplexus. Et prior vere humilitatis custos Abbo, saluatoria a parte regis depromit verba. Tum sacerdos vere Apostolicus, reddita benedictionis recompensatione, ait beato viro : Bene te advenisse gaudeo, fili Ecclesiæ, veritatisque, ut comperi, custos ardentissime. Et enim surdus de te rumor meas repleverat aures, te tam divina quam humana pollere sapientia, nec qualibet amicitia a jure æquitatis abduci posse. Vere fateor, me jamdudum desideravisse tuum intueri vultum, tuo concupivisse amicabilem perfrui alloquio. Fruamur ergo cupitis sermocinationibus, alternisque divinarum atque mundanarum lectionum aliquandiu mentem relevemus studiis. Porro unum te volo nosse, legationem tuam me benigne suscipere, et quæque suaseris me facturum fore. Tuum autem erit petere, meum vero petitis pro posse assensum præbere. Novi namque nihil te contra jus fasque postulaturum, ac ideo me tibi contraire scio non esse æquum. Post hæc verba, omnibus ei collatis victui necessariis, ad hospitium sivit abire. Sicque octo ferme diebus eum delinens, et frequenter convivio suo eum adisciscens, cunctis pro quibus ierat libens annuit.

« Tunc vere sollicitus pastor Abbo, memor utilitatis loci quem regebat, privilegium illi Apostolicæ utilitatis fieri rogavit. Quod Deo dignus papa tam favorabiliter largitus est, ut non solum nullum pecuniæ quæreretur lucrum, verum thymiamate ac planeta qua inter missarum uteretur solemnia donatum, eundem Dei famulum gaudentem ad proprium remisit solum. In eo sane privi-

legio, et inter alia continetur, ut episcopus Aurelianensis, nisi invitatus, Floriacum nequaquam adeat cœnobium. Neve unquam quilibet pontificum eidem monasterio divinum interdicat officium, etiamsi tota Gallia ob populi peccata, anathematis feriatur vindicta a Sede Apostolica. Sed ne quis eos (domnum dico Apostolicum et Abbonem sanctum) existimet in hoc facto contraria regulis sanctorum sensitisse Patrum : necessarium nobis visum est, ex Epistolis magni papæ Gregorii pauca de pluribus hic exempla inserere, in quibus exquirendis pia huic beato viro semper fuit intentio. Sciebat namque illum nunquam vel sensitisse, vel scripsisse contra canonum decreta ». Addit his complura ex Gregorii Registro exempla, quibus confirmarentur quæ a Rom. Pont. obtinuisset. Istis vero recitatis hæc subjicit :

« Verum de his satis dictum, nunc cœptæ narrationis ordo repetatur. Regressus itaque honorabilis Abbo ad regem, a quo missus fuerat, cuncta pro quibus ierat perfecta nuntiat, Arnulphum Rhemensem custodia exemptum pontificatui restituit, pallium illi a domno papa directum reddidit. Post hæc, per internuntios ipsi venerabili Apostolico domno Gregorio amicales plenasque reverentiæ dirigit litteras, in quibus innotescit, se cuncta uti jusserat perfecisse. Quarum istud est exordium : Domino semper in Christo venerabili sanctæ Romanæ et Apostolicæ Sedis præsuli, ac ideo universalis Ecclesiæ doctori, suus illius Abbo Floriacensium rector in Christo salutem. Sæpius contingit, ut puritas integræ veritatis vacillet sententia malefidi interpretis. Quod ego, venerabilis Pater, cavens, vestri animi sensa fideliter simpliciterque, ut præcepistis, deprompsi : nec animositatem regis perhorruï, dum fidem quam vobis promiseram ex asse servavi. Quandoquidem nihil addidi, nihil minui, nihil immutavi, nihil reliqui. Illorum omnium ipse Arnulphus e custodia liberatus et absolutus, testis est, cui vestrum pallium coopertum obtuli, quomodo illud acceperam ex sanctis manibus vestris. Meminit et in fine earum, planetæ ab ipso sibi datæ, ita inquit : Nam liberalitatis vestræ memor, ut servus Domino gratias refero, qui inter missarum solemnia, munere vestro usus planeta, vestri nullo modo oblivisci valeo in meis oblationibus. Cæterum vobis semper parere decrevi, ejus Apostolatam Deus custodiat in æterna pace ». Hæc Abbo, qui ea perfunctus legatione Robertum regem reddidit religioni obsequentissimum.

6. S. Odilonis virtus innotescit. — Insuper hoc eodem anno, scilicet duodemillesimo (ut a Glabro ponitur ¹) novis motibus contigit Galliam agitari cum S. Odilonis virtus innotuit. Quinam isti fuerint, ab eodem auctore sic accipe : « Sequenti, inquit, denique anno, ascendit Robertus rex in Burgundiam cum magno exercitu pugna-

¹ Glab. l. i. c. 8.

lorum, ducens etiam secum Richardum, Rothomagorum comitem, cum triginta millibus Normanorum, quoniam Burgundiones ei fuere rebelles, nolentes eum suscipere in civitatibus et castris, quæ fuerant ducis Henrici, ejus videlicet avunculi, quin potius sibi in proprias dividere partes. Deveniens quoque rex primitus cum omni exercitu civitatem Antissiodorum, eam obsidione circumdedit. Qui diu ibi crebris assultibus fatigatus recedens, non adversus eam prævaluit, quæ fertur nunquam fraude vel hoste fuisse decepta (capta). Relicta namque civitate, rex cum universo bellico apparatu convertit se ad castrum beati præsulis Germani expugnandum, quod munito aggere præpollens, hæret civitati: vallaverat enim illud Landrici comitis exercitus, necnon ejusdem loci familiares viri, hostium siquidem metuentes sacri gregis diremptionem. Occurrit interea furenti regi Odilo, venerabilis abbas Cluniacensis monasterii, cupiens intervenire inter partes utrasque, sic quidem ut regi exhiberetur honorificentia, solidaretur concordia principum, pax patriæ firmaretur. Qui minus posse fieri cernens quod decreverat, hortabatur fratres oculo tantummodo, qui ad confessoris custodiam relictæ fuerant (nam cæteros cum suo abbate, Hilderico nomine, jussio regis inde exire compulerat) ut orationi instarent assidue, si forte Domini pietas eos pariterque locum, a tanta obsidione dignaretur eripere.

« Sexto igitur obsidionis die illucescente, nimio rex arreptus furore, indutus lorica simul et galea, omnemque exercitum dictis acuens, habens etiam secum Hugonem ejusdem urbis pontificem, solum ex omni Burgundia parti regis faventem; eidem namque regi in procinctu jam constituto occurrit supradictus abbas Odilo, illum increpans, ejusque primates redarguens, cur adversus tantum Dei pontificem, scilicet Germanum, hostili manu insurrexissent, cui specialiter (ut in Gestis illius invenitur) usui fuit, Dei auxilio, et bella compescere plurima, et regum ferocitati resistere. Cujus verbis minus auditum præbentes, quo tendebant pervenerunt, cingentesque supradictum castrum in coronæ modum, certatim illud expugnaturi prælium inierunt. Alternis quoque partibus diu multumque decertantibus, domus suæ parti Dei subito affuit præsens auxilium. Nam ejusdem castri universa capacitas ita repleta est hora prælii teterrima nebula, ut nemini hostium a foris pervius foret jaculandi aditus, cum ab intro repugnantibus cernerent se gravi cæde prosterni; sicque cum suorum maxime Northmannorum concisione dimiserunt castrum incolume: quos licet tarde, pœnituit adversus magni meriti locum arma sumpsisse. Contigit etiam ut hora, qua regis exercitus adversus locum sacrum certamen inire cœpisset, vir religiosus Gislebertus, ejusdem loci monachus, super altare beatæ Mariæ semper virginis, quod decentius cæteris in vertice ejusdem constat Ecclesiæ (quemadmodum hora diei tertia quotidie consueve-

rat) missarum sacramenta celebrare inciperet: quod scilicet factum satis cælis præstitæ congruit victoriæ. Sequenti igitur die egrediens rex inde processit, igne cremando res hominum, præter civitates et castra tutissima, usque ad superiores Burgundiæ partes: qui Franciam rediens, post hæc tamen licet tardius ad se reversis Burgundionibus, prospere universam oblinuit regionem ». Illicque Glaber.

7. *De statu Ecclesiæ Northmannorum.* — Quod aulem Richardi comitis Rothomagensis, ac principis Northmannorum, Robertum regem sequentis, mentio facta est, primum ejus nominis ducis: hic opportune de hujus temporis statu Ecclesiæ Northmannorum eorumque principum religione Christiana, ex eodem auctore dicendum est, qui ait¹: « Indeque orti Northmannorum duces excellentissimi, Guillelmus videlicet, atque post ipsum quinque denominati paterno seu avito jure, Richardi. Illorum quippe ducaminis principatus fuit metropolis civitas Rothomagorum. Cum igitur prædicti duces ultra cæteros viguerint militiæ armis: tum perinde præ cæteris gratia communis pacis ac virtute liberalitatis. Nam omnis provincia, quam illorum dictioni subijci contigerat, ac si unius consanguinitatis domus vel familia inviolatæ fidei concors degebat: nempe furi ac prædoni apud illos comparabatur, quicumque hominum in aliquo negotio plus justo vel falsum quidpiam venundandum mentiens subtrahebat alteri. Egenorum quoque et pauperum, omniumque peregrinorum, tanquam parentes filiorum, curam gerebant assiduam. Dona etiam amplissima sacris Ecclesiis pæne in toto orbe mittebant, ita ut etiam ab Oriente, monte scilicet denominatissimo Sina, per singulos annos monachi Rothomagini (Rothomagum) venientes, qui a prædictis principibus plurima redeuntes auri et argenti suis deferrent xenia. Hierosolymam vero ad sepulchrum Salvatoris centum auri libras Secundus misit Richardus; ac quosque cupientes illuc devote peragraré, donis juvabat immensis ». Hæc de primitiva Northmannorum in Galliis consistentium Ecclesia Glaber.

8. *Hispanorum victoria in Arabes.* — Quod vero ad statum pertinet rerum Hispaniarum, in hunc usque diem sub Veremundo rege magis ac magis labefactatæ, miserando interitu ita sunt attritæ atque prostratæ, ut amisso Legionensi regno, et Gallæciæ civitate Compostella excisa, et Ecclesiis dirutis, vix sepulchro sancti Apostoli Dei virtute illæso servato, in ultimum discrimen essent adductæ: cum exiguæ vires Christianorum principum in unum collectæ, quæ bellis civilibus non disjunctæ tantum, sed mutuis confectæ cædibus debilitatæ admodum fuerant, adversus Almanzorem regem Arabum, numero-issimo pollentem exercitu, non restitere tantum, sed et superavere quam felicissime, desideratis ex peditibus ejus (ut ipsæ Maurorum produnt historiæ)

¹ Glab. l. i. c. 5.

septuaginta millibus, equitum vero quadraginta millibus; cum et ipse exercitus dux ex desperatione abstinens cibo, noluit tantæ acceptæ cladi esse superstes. Nulla hac victoria gloriosior, vel cessit utilior, vel opportuniori tempore a Deo concessa est, ut tum veteres, tum recentiores affirmant. Porro ipse rex Veremundus anno sequenti decessit, multis bonis operibus pro suis expiandis delictis ante præmissis, quod et ejus sepulchri inscriptio, licet perbrevis, dicere non prætermisit, quæ sic se habet:

H. R. REX VEREMUNDVS ORDONII. ISTE IN FINE VITÆ SVÆ DIGNAM DEO PŒNITENTIAM OBTVLIT, ET IN PACE QVIEVIT. ÆRA M. XXXVII.

9. Successit autem Veremundo, anno item sequenti, ejus filius Adelphonsus ejus nominis V, per annos quinque. Quæ autem post hæc contigerint, sequens tomus suis locis significabit.

10. Porro autem vix credi potest, quantum contulerit semper pietas ad hostes fidei profligandos, in quo genere cum plura sint superius exempla narrata, illud quod his temporibus sub Garsia Fernando, Castellæ comite, adversus item Arabes pugnante accidit, est dicendum. Etenim cum ejus principatus initio, adversus hostes confingeret apud Gormatiuni oppidum, pietate ac fide nobilis viri Ferdinandi Autolini, exercitus hostium est profligatus, pugnante sub ejus specie Angelo. Nam cum ille moraretur in Ecclesia illic posita, ut precibus suis victoriam impetraret, ignaviæ illi ab æmulis tributum est, quod timore percitus, securitatis causa templum adiisset. Sed Deus manifestis voluit signis ostendere, pietate potius quam armis parari victoriam. Siquidem sub specie ejus visus est Angelus ante alios fortiter præliari, hostes sternere, in fugam adigere, adeo ut ea victoria ipsi tributa fuerit, cujus equus et arma invenirentur divino miraculo sanguine esse conspersa, jaculatus tamen cum ipse esset non missilibus, sed precibus in hostes. Porro ipse Garsias Fernandus pervenisse reperitur usque ad annum Redemptoris millesimum quintum, uti veteres rerum Hispaniarum scriptores produnt.

11. « Hoc eodem anno (Ditmarus ait) decimo quarto kal. Januarii, Tertii Ottonis imp. avia, Primi vero Ottonis uxor gaudens moritur, ædificata civitate Olsa, collectis ibidem monachis. Cujus fidei servitio justa recompensans præmia Dominus, ad tumbam ejus plurima hodie operatur miracula ». Hæc Ditmarus hujus temporis scriptor.

12. *Tragicum sed justum judicium Ottonis imperatoris.* — Inter hæc autem imperator Romam cogitans cum Mutinam pervenisset, juxta ipsam, in villa Anula dicta hospitio susceptus est. Accidisse autem tunc ipsi ea tradunt quæ magna admiratione digna metro scripsit Gotefridus Viterbiensis¹, nempe coactum fuisse, id justitia ab eo exigente, Augustam uxorem suam, Mariam nomine,

filiam regis Aragonum, necis comitis innocentissimi ream, publice cremandam judicare. Conjecit enim femina procax oculos in dictum comitem virum integerrimum, forma pulcherrimum: quæ a viro castissimo passa repulsam, illum de pertentata pudicitia calumniose accusavit apud imperatorem, qui facile nimis adbibens finem ipsi, comitem morte damnavit. Quem cum capite amputatum audisset ejus uxor, magna audacia, quam pudoris nescius dolor ministravit abunde, Ottonem convenit pro tribunali sedentem, clamans de nece justissimi viri vindictam, projectoque capite viri in medium, ipsum imperatorem reum sanguinis innocentissimi apud ipsum jura reddentem accusat. Probationem per contrectationem ferri candentis, veritatis indicem offert; consentit ille, paratur ignis, ferrum candens exhibetur, mulier conscia innocentiae viri sui, arripit illud illæsa, contrectat inustata quia justa, stringit ut flores ignitum metallum, quo solum exuruntur præcordia ipsius imperatoris. Cui tunc insultans victrix femina, vindictam in imperatorem a gladio exigit imperantis. Fatetur ille culpam, nec refugit poenam, spondens jugulum, sed poscit inducias. Interim procures accurrunt, pro vita feminam exorant imperatoris, sed frustra diu laboratum; at tandem ea est condicione transactum, ut auctrix sceleris Augusta, ex qua causa processerat viri necis, flammis comburenda daretur. Quo facto, suam redemit vita justissimus imperator, qui eandem donatam tribus castris, solutus ipse ac liber subeundi supplicii, eam abire rogavit. Hoc tantæ tragiæ est argumentum, quod (ut dictum est) Viterbiensis Gotefridus carmine cecinit, alii vero soluta oratione scripsere.

13. *Otto imperator montem Cassinum et Beneventum petit.* — Inde ad Samnites se contulit, ut principes Longobardos in officio contineret. Tunc accidit, ut religionis ergo ad Cassinense monasterium se conferret, cui tunc præerat Joannes vir egregiæ sanctitatis, cujus præfecturæ divinitus ipsi creditæ hic erat annus primus, et incipiebat secundus. De quo Leo Ostiensis: « Illic primo ordinationis suæ anno, Præceptum confirmationis ab Ottone III imperat. suscepit aureo sigillo bullatum. Quo etiam tempore, idem imp. hic per dies aliquos remoratus, duas argenteas coronas obtulit beato Benedicto ». Hæc Leo.

14. Eodem quoque tempore idem imperator Beneventi cum esset, venit ad eum Herebertus vir sanctissimus, electus archiepiscopus Coloniensis, ut ex more investituram acciperet, ratione leudorum, quæ idem antistes ex fisco regio possideret: qua accepta, idem Romam se contulit, et pallium a Gregorio papa suscepit. Testatur hæc Rupertus abbas Tuitiensis in Vita ipsius²: qui cum dicat id factum triennio ante Ottonis obitum, utique ad hunc vel potius sequentem annum sunt referenda.

¹ Grant. in Sax. l. iv. c. 26. Gotefrid. Chron. p. 47. in Ott. III.

² Rup. in Vita S. Hereberti c. 10. apud Sur. xvi Mart. tom. II.

15. *Malacenus Constantinopoli injuste accusatus, dein liberatus et honoribus auctus.* — Quod ad res spectat Orientis, sub hoc anno Curopalates¹ Joannis Malaceni accusati apud Basilium imperatorem, quod Bulgarorum partibus favisset, narrat historiam, cumque ab eodem vocatum tradit Constantinopolim : quæ autem secuta fuerint, absolutusne an condemnatus, silentio obvoluta reliquit; sed in rebus gestis S. Niconis, de quo plura superius, egregia de his narratur historia, his scilicet verbis : « Lacedæmonem vix redierat sanctus Nikon, et veræ philosophiæ monasterium suis redditus tenebat, cum paucis post diebus, quoniam invidia quiescere nescit, ab improbis quibusdam malevolisque hominibus per calumniam accusatus est Joannes ille Malacenus, nobilitate generis ac splendore, necnon summæ sapientiæ laude non inter Lacedæmonios modo, verum etiam tota Hellade ac Peloponeso facile princeps : accusatus autem apud eum, qui tum imperii sceptris potiebatur, Basilium scilicet, Romani Minoris filium, regum omnium fortunatissimum, cujus et vita illustris et imperii spatium longissimum fuit, et victoriæ et trophæa de hostibus quamplurima, per quem et Bulgaricæ gentis princeps (ut memorant historiæ) Samuel ille, viribus et robore inexpugnabilis, in Creta cum innumerabili multitudine Bulgarorum fractus et subactus est.

16. « Mittuntur itaque ab imperatore satrapæ duo, militum legionem trahentes, ut Malacenum ex improviso comprehendant, vinctumque ad reginam urbium ducant : defectionis enim et perduellionis in eum crimen concinnantes æmuli, imperatoris aures falsæ accusationis calumnia oppleverant. Ut ergo in Lacedæmonia pervenerunt, et virum cujus causa missi fuerant comprehenderunt, evocat ille confestim virum Dei Niconem, quem ob egregia facinora præcipuo in honore habebat; gravique dolore anxius : Ora, inquit, ora pro me misero, serve Dei, ne imperatoris ira male peream. Quem sanctus confirmare animum jussit nihilque tristius formidare. Tum eximia quadam vi charitatis mensæ simul accubans, et lætitiæ poculum, ceu poeticum illum Gygeona, malorum omnium oblivionem mœrenti propinans, oraculum adjecit : regiam potius benevolentiam adepturum, vitam anteacta beatiorum acturum, altiores ad honorem gradus conscensurum, de omni denique molestia et calamitate triumphaturum : Et me, inquit, videbis, et in patriam sub vitæ finem reverteris. Nam et hac quoque Nikon (ut supra dictum est) a Patre luminum gratia ornatus erat, ut futura æque ac præsentia prævideret. Atque omnia sane, ut prædixerat, evenerunt.

17. « Malacenus ergo tanquam a prophetica et divinitus agitata lingua hæc audiens, nihilque penitus ambigens, vehementer exhilaratus est; navi-

gationemque, salutato Nicone, securo animo exorsus est. Postquam ad imperatorem pervenit, et conficta ab æmulis criminatio veritatis luce, sed Niconis maxime precibus discussa est, majorem deinceps apud imperatorem gratiam, ampliores honores, gloriam et famam adeptus est, adeo ut principem in senatu locum obtineret. Quem tunc cum profectus est Constantinopolim, protospatharium tantum fuisse, virum alioqui prudentem et eloquentia insignem, narrat idem qui supra Curopalates. Sed quæ post hæc secuta sunt, ubi Nikon ex hac vila migrasset, ab eodem scriptore Vitæ Niconis, memoratu digna sic accipe :

18. *De S. Niconis effigie mirabiliter picta.* — « Transacto post hæc tempore non brevi, cum Malacenus Constantinopoli adhuc esset, Nikon ad immortalem beatamque sortem transit. Quod ille cum accepisset, et dulcem illam spem, quam futuram ex ejus verbis non dubitarat, ut optabilem ejus vultum adspiceret, sibi quodammodo ereptam sentiret, vehementer angi animo variisque cogitationibus æstuaræ cœpit, gravem præterea vitam ducere, nisi quod ille promiserat perfici videret.

19. « Fide igitur confirmatus (neque enim illius expers erat scientiæ, qua cognosci Dei mysteria solent) quid agit? quo se convertit? Pictorem advocat arte manuque insignem, et qualis habitu, veste, capillis sanctus fuisset, verbis designat : tum aptis coloribus, in tabula totam ejus imaginem exprimi jubet. Reversus domum pictor, operæpretiumque ratus, quod jussus fuerat quam accuratissime posset exequi, post varios conatus, frustra tandem se laborare animadvertit : nec enim ex sola narratione poterat, quamvis peritissimus artis et exercitatissimus esset, quem nunquam viderat, ad veram similitudinem exprimere. In hac igitur cura versanti vehementerque dolenti, quod oris lineamenta effingere non posset, ante oculos repente exstitit monachus quidam qui in ædes clam penetrarat, statura procerus, habitu eremitico, obsoleta veste amictus, coma squalens, capillitio barbaque niger, in omnibus denique beato viro simillimus : nam et virgam manu gerebat cujus apex in crucem desinebat. Qui pictore comiter salutato, mœroris sollicitudinisque causam sciscitatus est. Ille vero et causam mox aperuit, et operis difficultatem demonstravit. Tum leni ad eum voce monachus : Me, inquit, adspice, frater, mihi per omnia similis est quem depingis. Ut ergo acrius in illum oculos intendit pictor penitusque circumspexit, illum ipsum esse agnovit quem Malacenus verbis designarat. Quare ad tabulam reflexus, ut conspectam formam imitaretur, o rem admirandam ! sacram ter beati effigiem in tabula suis lineamentis suapte expressam sponte videt. Cumque miraculo obstupefactus, ad sanctum subito, Kyrie eleison cum horrore inclamans, se vertisset, illum amplius non vidit. Jam enim avolaverat. Itaque ad delineatam divinitus formam, reliqua colorum nigmenta adjiciens, perfectam imaginem, qualis

¹ Curop. in Basil. et Const.

hodieque in sacro beati templo suspensa visitur, omnibus numeris absolvit, statimque ad spectabilem Malacenum cum illa properans, omnia illi, ut acciderant, ordine percensuit. Quibus ille auditis, cum ex oblata pictori Niconis specie, ne in hac quidem parte inanem fuisse ejus prædictionem animadverteret: ingenti gaudio perfusus, mirabilium Dei operum laudes, et quantam a Spiritu sancto gratiam sortitus Nicon esset, prædicare nunquam destitit. Sed Malaceni quidem, et sacrae imaginis historia sic se habet ». Hucusque de his auctor.

20. *Uxor ducis Venetorum nimis molliter vivens turpiter moritur.* — Subjicit autem his quæ de Malaceno narravit mox Curopalates, eundem Basilium imperatorem, quo sibi Venetos conciliaret, eorum duci in matrimonium junxisse Argyri filiam, Romani postea imperatoris sororem. Porro istam putamus illam, de qua Petrus Damianus sic scribit ad Blancam comitissam: « Sed ad id, inquit, quod asserimus roborandum, congruum est, ut etiam de viva carne exempla proferamus. Veracis itaque et honesti viri didici relatione, quod narro: Dux Venetiarum Constantinopolitanæ urbis civem habebat uxorem, quæ nimirum tam tenere et delicate vivebat, et non modo superstitiosa, sed et artificiosa (ut ila loquar) jucunditate se mulce-

bat, ut etiam communibus se aquis dedignaretur abluere: sed ejus servi rorem cæli satagebant undecumque colligere, ex quo laboriosum illi balneum procurarent. Cibos quoque suos non tangebant, sed ab eunuchis ejus alimenta quæque minutius concidebantur in frusta, quæ mox illa quibusdam fuscinulis aureis atque bidentibus ori suo liguriens adhibebat. Ejus porro cubiculum tot thymiamatum aromatatumque generibus redolebat, ut et nobis narrare tantum dedecus fœteat, et auditor forte non credat. Sed omnipotenti Deo quantum hujus feminæ fuerit exosa superbia, manifesta docuit ulciscendo censura. Vibrato itaque super eam mucrone divini judicii, corpus ejus omne computruit, ita ut membra corporis undique cuncta marcescerent, totumque cubiculum intolerabili prorsus fœtore complerent, nec quisquam tantam perferre narium injuriam potuit, non consueta servitia, non servulus, vix una duntaxat ancilla non sine speciei redolentis auxilio in ejus obsequii sedulitate permansit. Eadem tamen raptim accedebat, et protinus fugiens abscedebat. Diutius ergo hoc languore decocta, et miserabiliter cruciata, amicis quoque lætantibus, diem clausit extremum. Quid ergo sit caro doceat ipsa caro, quodque perhibet mortua, testetur et viva ». Hucusque Petrus.

Anno periodi Græco-Romanæ 6491. — Anno Æræ Hispan. 1036. — Anno Hegiræ 389, inchoato die 23 Decemb., Fer. 6. — Jesu Christi 998.

— Gregorii V papæ 3. — Ottonis III reg. 16. imp. 3. Basil. et Const. imp. 23.

1. *Moritur Hugo Gallia rex.* — Annum. 1 ad 4. *Hugonem* Galliarum regem, e tertia stirpe primum, hoc anno obiisse Odorannus in Chronico et quidam alii habent; anno vero nongentesimo nonagesimo sexto Sigebertus in Chronico, hujusque opinioni adhæret Mabillonius lib. 2 de Re. Diplom. cap. 26, num. 25. Verum ejus mortem ad annum nongentesimum nonagesimum septimum pertinere, variæ Roberti regis filii ac successoris Chartæ demonstrant. Baluzius lib. 4 Marce Hispan. ad annum dcccxcvii, ubi difficultatem istam examinavit, observat Acta electionis Borelli episcopi Rhotensis scripta esse « VIII kal. Decembr. anno Christi mxxvii, Æra mlv, Indictione xv, anno xxi, regnante rege Roberto ». Quare cum Hugonis regis mors ad IX kal. Novembris, seu ad diem xxiv mensis Octobris pertineat, annus ille xxi Roberti regis, cum anno mxxvii conjunctus, ab alio anno proficisci non

potest, quam ab anno dcccxcvii. Ad hæc Charta institutionis vitæ canonicæ in Ecclesia Gerundensi data dicitur « anno Incarnat. Dominicæ xix post millesimum, xii die kalendarum Decembrium, anno xxiii regni Roberti regis », quod etiam rem evincit, ut numeranti patet. Mabillonius laudatus affert locum Aimoini de Miraculis S. Benedicti, lib. 1, cap. 9, qui « annum Incarnationis Domini millesimum tertium » conjungit cum « anno Roberti regis quo cum patre regnare cœpit sexto decimo, monarchiæ septimo »; ex quo infert, Roberti regni cum patre exordium ab anno dcdlxxxviii monarchiæ ab anno dcccxcvi rependendum esse. At annus ille septimus monarchiæ Roberti regis, deductus a die xxiv mensis Octobris anni Christi dcccxcvii, inchoatur anno mxi, non vero in eo absolvitur, ut ex laudatis Chartis liquet. Porro Hugonem regem die xxiv mensis Octob. vitam cum morte

commutasse, diserte scribit Odo, monachus Fossatensis, in Vita Burchardi comitis, anno Incarn. Verbi **MLVIII**. Loquens enim de donatione ab Hugone rege monasterio Fossatensi facta, *anno Incarnati Verbi DCDXCVIII, sub die XII kal. Juliarum*, inquit : « hoc etiam dies obitus ipsius regis IX kal. Novembris usque hodie in ipso monasterio solemniter celebratur ». Ea Vita extat tom. iv Duchesnii.

2. *Adelhaidis ejus uxoris pietas et genus.* — *Adelhais*, Hugonis Capeti uxor et Roberti regis mater, conjuncta filio in religionis officio suffragabatur, et seorsum aliquando suo nomine monasteria exstruebat, aut novis redditibus et ædificiis amplificabat, ut ex Chartis quæ supersunt innotescit. Cujus ea filia fuerit, hactenus frustra quæsitum, cum Helgaldus in Vita Roberti regis tantum dicat genus ejus inclytum ex Italia ortum esse, nec patrem matremve ejus nominet. Hæc ejus verba : « Ejus (sc. Adelhaidis) inclyta progenies, sicut ipse (sc. Robertus) suis sanctis et humillimis asserebat verbis ab Ausoniæ partibus descenderat ». Hadrianus Valesius, in Notis ad Carmen Adalberonis pag. 261, ait difficile esse scire unde ea originem duxerit, et San-Marthani, quibus in hac Historiæ Gallicæ parte explicanda nullus accuratior fuit, tom. i Historiæ Genealogiæ Francicæ, lib. 12, cap. 1, ultimæ editionis, eam quidem *origine Italiam* fuisse concludunt, sed de cætero nihil definiunt. Blondellus tam in Diatribe *de formula* REGNANTE CHRISTO, sect. II, § 7, quam in Pleniori assert. Geneal. Franc. putavit eam filiam fuisse Guillelmi II Aquitanicæ ducis, ac sororem Guillelmi III *Caput stupæ* cognominati, Aquitanicæ etiam ducis, quod auctor anonymus apud Duchesnium tom. III, pag. 344, scribat : « Cum sua venerabili conjuge, Adelhaide nomine, filia Pictavorum comitis, etc. » Verum anonym. iste, annis centum junior quam Helgaldus, ideoque minoris auctoritatis, nec patrem aut fratrem hujus reginæ nominat. Guillelmus vero Tertius, Aquitanicæ dux, hostis Hugonis Capeti fuit, et solus ex proceribus qui ejus coronationi repugnaret, uti jam diximus; quod tamen vix credi potest de *Adelhaidis* fratre, Hugonis Capeti sororio, et Roberti avunculo, qui ideo non contra Hugonem Capetum arma sumere, sed pro eo pugnare debebat. Quare non dubito quin Helgaldus standum sit; anonymus ille rejiciendus; et Blondelli sententia parum facienda, donec major hac in re lux affulgeat.

3. *Dotes Roberti filii et successoris.* — Defuncto itaque anno superiori Hugone rege, *Robertus* filius, qui jam cum eo regnaverat, cœpit habenas regni tractare solus, princeps natus tunc annos xxviii, eloquentia et dicendi ubertate copiosus, subditi dilectissimus, « ornamentum clericorum, nutritor monachorum, pater pauperum, assiduus verbi Dei cultor », inquit Adhemarus in suo Chronico. Hadrianus Valesius anno MDCLXIII Parisiis vulgavit *Adalberonis episcopi Laudunensis ad Robertum regem Franc. Carmen*, et notis illustravit, in quo Adalberto ait :

Mundus adhuc puero dominum metatur, et omnis
Congaudet, plaudit, manibus lætatur, et optat
In regem sibi, mox concordī voce coronat.
Præstolatur in hoc, veniant ut tempora pacis
Lubrica tunc adolescentis transivit et ætas :
Flore juventutis tua jam resplendet imago.
Forma super cunctos nobis speciosa videtur.

Quo in carmine cum Adalbero Laudunensis episcopus, *Azelinus* etiam appellatus, Hugonis nullam usquam mentionem faciat, apparet illud post *Hugonis* regis mortem compositum fuisse. Natus tunc erat *Robertus* annos xxvii aut xxviii ut mox diximus, et adolescentiam emensus erat, sed antiqui *pueri* nomine etiam qui ætatem illam supergressi erant appellabant; quod non semel insinuavi, quia viros doctissimos iis similibusve loquendi modis in errorem inductos fuisse subindeprehendo. In eo carmine totus est Adalbero in carpendis moribus sui temporis.

4. *Gregorius V ejus cum Berta nuptias reprobat.* — Odone Campaniæ comite, anno circiter DCDXCVI demortuo, Robertus rex Bertam hujus viduam, Conradi Burgundiæ regis ac Mathildis filiam, uxorem duxit. « Illa autem commater ejusdem fuerat regis. Idem namque rex filium ipsius de sacro susceperat lavacro », ut dicitur in veteri Ms. Floriacensi, a Duchesnio tom. IV, pag. 83 publicato. Gallicani præsules hujusmodi affinitatis et cognationis rationem non habentes, illas nuptias probarant : imo Erchembaldus, Turonensis archiepiscopus, alique plures episcopi conjugium illud præsentia sua cohonestarunt. Verum Gregorius V nuptias illas incestas reputavit, currentique anno celebrato Romæ Concilio condemnavit. Extat illud Concilium tom. IX Concil. octo canonibus constans, in cujus tertio legitur illud celebratum esse « præsidente D. Ottone III Augusto Cæsare et D. Gregorio V papa ». Canon primus : « Ut rex Robertus consanguineam suam Bertam, quam contra leges in uxorem duxit, derelinquat, et septem annorum pœnitentiam agat, secundum præfixos Ecclesiasticos gradus, judicatum est. Quod si non fecerit, anathema sit. Idemque de eadem Berta fieri præceptum est » Canon II : « Erchembaldum Turonensem archiepiscopum, talis conjugii consecratorem, cum omnibus episcopis qui consentientes interfuerunt his incestis nuptiis regis et Bertæ consanguineæ suæ, a sacrosancta communione suspendimus, donec ad hanc sanctam Sedem Apostolicam veniant satisfacturi ». Baronius, cujus tempore hoc Romanum Concilium nondum lucem viderat, refert fragmentum Epistolæ Leonis papæ IX ad Henricum regem Roberti filium, in quo Pontifex de episcopis Gallicanis scribit : « post ad Sedem Apostolicam venientes cum satisfactione, suscepta pœnitentia, redierunt ad propria ».

5. *Robertus rex Constantiam uxorem ducit.* — Robertus postea *Constantiam* uxorem duxit, ut legitur in laudato fragmento cœnobii Floriacensis : « Hic in suum adscivit conjugium filiam Willelmi Tolosani comitis, nomine Constantiam, cognomento

Candidam, strenuam sane puellam et suo nomine dignam ». In alio fragmento veteris Chronici, ibidem a Duchesnio pag. 96 relato, de Roberto rege dicitur : « Ducit uxorem Constantiam, filiam Willelmi comitis Arelatensis, natam de Blanca sorore Gaufridi comitis Andegavensis ». Demum Glaber auctor coævus, lib. 3, cap. 2, inquit : « Accepit supradictus rex illius cognatam nomine et animo Constantiam, inclytam reginam, filiam videlicet Willelmi prioris Aquitaniæ ducis ». Quare cum scriptores isti, non tantum verbis, sed reapse inter se discrepent, lis inde inter eruditos exorta, an *Constantia regina*, Willelmi comitis Tolosani vel Willelmi comitis Provinciæ sen Arelatensis filia extiterit; quæ cum adhuc sub iudice pendeat, nobis hic dirimenda. Eam Willelmo hujus nominis primo comite Provinciæ progeneratam, ex solo Glabro, qui patrem ejus *Willelmum priorem* appellat, quod de ducibus seu comitibus Tolosanis per hæc tempora florentibus nullo pacto intelligi potest, certo constaret, si *Willelmum* illum primum Aquitaniæ ducem non appellasset, quod tamen negotium facessere non debere statim ostendo.

6. *Constantia filia Guillelmi I Provinciæ comitis*. — *Willelmus* igitur, primus Provinciæ comes, gestis adversus Saracenos Fraxinetum occupantes celeberrimus, *Adalaidem* cognomento *Blancam* sibi copulavit, annoque *dcxcii* cum conjugis sua *Adalax*, et filio suo nomine *Willelmo*, bona quædam restituit monasterio Sancti Cæsarii Arelatensis, ut demonstrat Charta a Bouchæo lib. 9 Hist. Provinciæ cap. 5 recitata. Eodem anno *Willelmus I* in gravem infirmitatem incidit, et sumpto habitu monachali e *S. Maioli* abbatis Cluniacensis manibus, ut horum temporum mos erat, vitam cum morte commutavit. Eum enim illo Christi anno demortuum eruo ex Adebaldo et Syro auctoribus coætaneis, in Vita sancti hujus abbatis, quæ extat apud Bollandum ad diem xi mensis Maii; ubi auctores isti, lib. 2, postquam de morbo qui *Willelmum* comitem sustulit sermonem habuere, asserunt Maiolum biennio postea vixisse. Maiolus autem die xi mensis Maii anno *dcxciv* ad Deum migravit, ideoque *Willelmi Primi* mors in annum *dcxcii* incidit. Ei successit *Willelmus II* in citata Charta memoratus, et de eo ac *Adelaide* matre in alia Charta, cujus Bouchæus ibidem mentionem facit, legitur : « Ego Adalax comitissa, et filius meus *Willelmus* (comes Provinciæ, hujus nominis III), et filia mea *Constantia*, donamus, etc. Facta est ista donatio in mense Augusto, regnante Rodolpho rege, etc. » *Constantia* itaque filia fuit *Willelmi I* et *Adalidis*, ac soror *Willelmi II*, qui patrem in principatu exceperit. Et ne quis cavilletur in nomine *Adalidis* vel *Constantiæ* ejus filiæ, anno *mxviii* referam verba *Benedicti VIII* papæ ad episcopos *Aquitaniæ*, *Burgundiæ* et *Provinciæ* scribentis, et suæ benedictionis munus mittentis, « omni reverentia et veneratione dignissimæ domnæ *Adalidis* comitissæ, cognomenlo *Blanchæ*, nurnique

ejus domnæ *Gerbergæ* comitissæ », quam *Gerbergam* *Willelmi II* comitis Provinciæ conjugem fuisse *Acla* publica docent. *Constantia* ergo, non *Willelmi* comitis *Tolosani*, sed *Willelmi* comitis *Arelatensis* seu Provinciæ filia fuit. Hinc *Ivo Carnolensis*, qui sequenti sæculo vixit, in Epist. ccxi meminit cujusdam genealogiæ, occasione graduum consanguinitatis, sedente *Urbano II* facæ, in qua dicitur : « *Blanca Arelatensis* comitissa, *Constantia* regina (id est, *Blancæ* filia) *Adera* *Flandrensis* comitissa », *Constantiæ* nempe filia et *Balduini V* *Flandriæ* comitis uxor, uti apud *San-Marthanos* in *Geneal. Franc.* videre est. Sed loco *Adera*, legendum *Adela*. Id confirmat *Albericus* in *Chron.* ad annum *mxiii* de Roberto rege scribens : « Hujus uxor regina *Constantia* (sicut habetur in Epistolis *Ivonis*) filia fuit *Blanchæ* comitissæ *Arelatensis*, quæ *Blancha* fuit soror *Gaufridi* *Grisagonelli*, patris *Fulconis* comitis *Andegavorum* ».

7. *Non vero cujuspiam alterius Guillelmi*. — Neque quis dicat cum *Catello*, lib. 1. *Comit. Tolosæ*, cap. 17, *Constantiam* reg. filiam extitisse *Willelmi III* *Tolosani* comitis, qui *Aquitaniæ* dux appellatus reperitur; quam sententiam *San-Marthani* laudati lib. 12. cap. 2, probabilem censent, in eamque *Glabrum* citatum trahunt. *Beslius* vero in *Hist. comit. Pictaviensium* cap. 16. autumat, *Constantiam* patrem habuisse *Willelmum IV* comitem *Tolosanum* et simul comitem *Arelatensem*, hujus nominis II, huncque uxorem duxisse *Blancam Andegavensem*. At *Willelmus III*, *Tolosanus* comes, non *Blancæ* *Constantiæ* matri, sed *Emmæ* Provinciæ Occidentalis seu comitatus *Forcalquerii* comitissæ nupsit, eaque sine liberis demortua, comitatus Provinciæ Occidentalis ad eum pertinuit, qui inde comes vel marchio Provinciæ aliquando dicitur, sed nunquam comes *Arelatensis*, ut male scripsit *Bouchæus* loco citato pag. 839. Magno etiam errore *Beslius* *Willelmum* comitem Provinciæ, hujus nominis II, cum *Willelmo IV* comite *Tolosano* confudit; cum eos diversis ditio-nibus dominatos certissimum sit. Graviori errore *Adalaidem Blancam* *Willelmi II* matrem, hujus uxorem facit; utramque enim opinionem variæ Chartæ in *Historia Provinciæ* recitatae plane ever-tunt.

8. *Provincia aliquando Aquitania vocata*. — Sed non solum Chartæ, verum etiam ipsemet *Glaber*, cui innituntur, contrarium habent; cum enim *Constantiam* reginam filiam fuisse *Willelmi prioris Aquitaniæ ducis* affirmet, qua ratione *Catellus* *Willelmum III*, et *Beslius* *Willelmum II* Provinciæ comitem et *IV* *Tolosanum*, in locum *Willelmi prioris* seu *primi* subrogare potuere? *Glaber* itaque *Aquitaniæ* nomine eo loco *Provinciam* intelligit, ipsemet enim *Beslius* nos docet, eam ab urbe *Aquensi* ejus metropoli, tam a *Glabro*, quam a *Leone Oslensi* lib. 1, cap. 64, et a quibusdam aliis antiquis *Aquitaniam* nuncupatam esse. Ibi *Hugo* nem sæculo x *Italiæ* regem *Leo* asserit, fuisse antea

Aquitaniæ ducem, quem Provinciæ comitem extitisse ex Luitprando jam diximus. Malmesburiensis vero, lib. 2 de Reg. cap. 5, fidem facit Edgivam, filiam Eduardi, filii Alfredi Anglorum regis, matrimonio conjunctam fuisse *Ludovico Aquitanorum principi*, sc. Ludovico Orbo Provinciæ regi. Sic Beslius recte notavit, Bosonem Provinciæ comitem, et postea regem Arelatensem, a quibusdam Veteribus ducem Aquitaniæ dictum. Glaber laudatus cap. ult. Aquitaniam se in eo sensu sumere satis his verbis insinuat: « Olim, circa millesimum incarnati Verbi annum, cum rex Robertus accepisset sibi reginam Constantiam a partibus Aquitaniæ in conjugium, cœperunt confluere gratia ejusdem reginæ in Franciam atque Burgundiam ab Arvernia et Aquitania homines omni levitate vanissimi, moribus et veste distorti, etc. » Paulo post, addit sanctum Willelmum abbatem Divionensem, *acerime* increpasse regem *pariter ac reginam, cur talia in suo regno permitterent fieri*. Ubi *Aquitaniæ* nomine Glaber Provinciæ designat. *Hermen-garda* enim Roberti II Arverniæ comitis conjux, filia erat Willelmi Primi, comitis Provinciæ, sororque Constantiæ reginæ, et utriusque sororis obtentu, tam *Provinciales* quam *Arverni* in aulam Gallicam veniebant, eosque in eam pravos mores inducere constans fama ferebat.

9. *Id invicta ratione demonstratur*. — Denique cum nemo melior Glabri interpretis quam ipsemet Glaber, isque lib. 3, cap. 2, Willelmum III Provinciæ comitem, et Willelmi Primi ex Willelmo II patre nepotem, ac utriusque successorem, *Arelatensem comitem* appellet, et Willelmus III aliis ditionibus non præfuerit, quam quibus antea Willelmus I et Willelmus II, luce meridiana clarius est, Glabrum ducis *Aquitaniæ* nomine, quo Willelmum Primum indigitat, aliud non intelligere, quam comitem Provinciæ, seu Arelatensem. Glaber, texens genealogiam *Willelmi*, *cognomento Ottonis*, Burgundiæ ducis et comitis, affirmat eum habuisse in matrimonio sororem Brunonis episcopi Lingonensis, quam aliunde constat Ermentrudem appellatam esse; ex qua, inquit Glaber, « suscepit filios et filias, de quibus prius natam Landricus (comes Nivernensis et stirps principum qui diu comitatum illum rexere), reliquas uterque Willelmus, scilicet Pictaviensis et Arelatensis, duxere uxores ». Ex quibus certo intelligimus: primo apud Glabrum, comitem seu ducem Aquitaniæ, idem esse ac comitem Arelatensem seu Provinciæ. Secundo, hunc historicum peculiariter quandoque nomina provinciis attribuere, uti lib. 4, cap. 8, ubi *Lotharii regnum*, seu, ut nunc loquimur, Lotharingiam, *primam Rhœtiam* appellat, nomine a Rheno flumine deducto, quo eam ab aliquo alio vetere historico denotatam non meminisse me legisse. Demum intelligimus anonymum supra laudatum, qui dicit Constantiam filiam fuisse *Willelmi comitis Tolosani* manifeste hallucinatum esse, indeque errandi aulam summisisse, quod aliqui comites Tolosani, Wil-

elmi nomine insigniti, fuerint etiam comites Provinciæ Occidentalis, seu comitatus Forcalquerii. Sed undecumque error ille processerit, *Constantiam* reginam Willelmum Primum Provinciæ comitem patrem habuisse, et matrem *Adelaidem*, cognomento *Blancam*, extra controversiam impostum esse debet.

10. *Robertus post annum \mathbf{x} nupsit Constantiæ*. — Cæterum *Robertum* regem ante annum millesimum primum *Bertam* non dimisisse, demonstrat Labbeus in *Miscellaneous curiosis*, ubi ex antiquo Chartulario monasterii Fossatensis prope Parisios siti Chartam refert, in qua dicitur: « Suggestentibus dulcissima genitrice nostra Adelaide, atque conjuge nostra Berta. Acta publice Parisiaca urbe ann. Inc. Verbi millesimo ». Præterea Odo monachus Fossatensis, in Vita Burchardi comitis, ab anno \mathbf{MLVIII} scripta, ut ex eadem elicitur, et a Duchesno tom. iv, pag. 115 recitata, de Roberto rege scribit: « Ipse quoque suæ matris Adelaidis uxorisque Bertæ suggestionibus, etc. Franco tunc cancellarius, postea vero episcopus Parisii factus, imaginem regis imposuit. Factum est autem hoc in prædicta urbe anno Incarnat. Christi millesimo, Indictione decima tertia, anno vero inclyti regis Roberti duodecimo feliciter ». Tertio, exstat alia Charta in gratiam monasterii Burguliensis in diocesi Andegavensi positi, et ab Emma Theobaldi comitis Carnotensis filia in fundo dotis suæ anno \mathbf{DCXC} conditi, ut habet chronographus Malleacensis, quæ *Bertam* mense Septembri anni millesimi primi nondum a Roberto rege repudiatam fuisse ostendit. In fine enim ejus legitur: « S. Bertæ reginæ S. Tetbaldi comitis. S. Ottonis comitis. S. Agnetis sororis eorum. Data mense Septembri Bleso castro, anno Inc. Dom. millesimo primo, sive anno decimo (iv) regnante Roberto rege ». Fatetur Labbeus numerum 4. deletum esse. Sed ex anno Incarnationis evincitur Robertum regem cum *Berta* divortium non fecisse ante finem mensis Septembris anni millesimi primi. Denique Glaber lib. 3, cap. ult., annum quidem non determinat, sed asserit illud contigisse, « circa millesimum Incarnati Verbi annum, cum rex Robertus accepisset sibi reginam Constantiam a partibus Aquitaniæ in conjugium ». Et paulo post, vitia tunc in Gallias hujus matrimonio occasione inducta versibus exprimens canit:

Anno post dominum terris de Virgine natum
Milleno, gravibus homines erroribus acti, etc.

Quare hoc Roberti cum Constantia conjugium anno \mathbf{MI} peractum (poeta enim perfectum numerum adhibet), omnesque filii ex eo prognati post eum Christi annum in lucem prodire. Suspicio tamen laudatam Chartam anno \mathbf{MI} scriptam, cui *Berta* regina subscripsit, matrimonium Constantiæ non præcedere sed subsequi, et *Bertam* post divortium se semper *reginam* appellasse, quo ta-

men eam titulo regem in Actis publicis cohonestasse prorsus incredibile, licet id Beslius in Hist. comit. Pictaviensium pag. 297, persuasum habuerit, non advertens errorem cubare in Epitaphio Hugonis regis Roberti filii, quem anno mxxviii emendabimus.

11. *Prima profectio Romana S. Abbonis abbatis Floriac.* — A num. 4 ad 8. Aimoinus Floriacensis monachus, in Vita sancti Abbonis Floriacensis abbatis et martyris, cujus magna pars extat apud Duchesium tom. iv, duas *Abbonis* profectiones Romanas memorat, quarum prior anno dcccxcv post Synodum Rhemensem celebratam ab eo suscepta: « Eximius abbas Abbo », inquit Aimoinus, « condigno apparatu Romam proficiscitur, Privilegia Ecclesiæ sibi commissæ corroboraturus, imo renovaturus. Sane non qualem voluit, aut qualem debuit Sedis Apostolicæ Pontificem nomine Joannem (XV sc.) invenit; nempe turpis lucri cupidum, atque in omnibus suis actibus venalem reperit. Quem execratus, perlustratis orationis gratia Sanctorum locis, ad sua rediit ». Meminit hujus profectionis ipsemet Abbo, in Epistola a se ad Leonem S. Bonifacii abbatem, quem Rhemis Sedis Apostolicæ legatum viderat, scripta. In ea *Leonis* eloquentiam summe extollit, atque eum sibi suam operam obtulisse, ut Privilegiorum Floriacensi monasterio concessorum, confirmationem a Joanne XV impetraret: « Charitas », inquit Abbo, « quæ est vinculum perfectionis, dum nos ambos Rhemis positos conglutinet labiis privatæ colloquutionis, tot oratorios rivos, tantos sanctæ Scripturæ favos bono zelo fulminea lingua vestra eructavit coram et secreto, ut exclamans compellar dicere: *Diffusa est gratia in labiis tuis: propterea benedixit te Deus in æternum.* Dum ergo ad talia rutilantium verborum fulgura stupui, coactus sum deinceps ubique confiteri vos tonitruum esse Spiritus sancti, qui super Apostolos in igneis linguis descendit. Qui etiam vos ardentem romphæam, ad secandos improbos de templo suo, septem donis gratiarum decenter eliminavit. Inter hæc tandem, erectis animi luminibus, solares vestræ eloquentiæ radios aquilinis oculis conspiciere volui; et sicut ait Ecclesiastes, frater fratrem adjuvans, quasi civitas munita et fortis, baculum robusti adjutorii et columnam inseparabilis amicitiae, vos in æternum, si placet, habere decrevi.

12. *Hujus profectionis ipsemet meminit in Epistola ad Leonem abb. S. Bonifacii.* — Paulo post subdit: « Adjecit insuper vestra incomparabilis bonitas, quod si nos urgeret super re domestica, aliqua voluntas corroborare nostra Privilegia per Romanæ auctoritalis styli Apostolicum, vos in omnibus et per omnia nostri fore fidelissimum collaboratorem. Hæc autem omnia perficere voti erant, quando magnifica principis Apostolorum membra supplex adi; sed Romanam Ecclesiam digno viduatam pastore, heu, prohi dolor! offendi. Vestra autem absentia, profiteor, ita affectus

sum, sicut solet affici fœtus gallinæ conquerens rauce vocibus abstractum esse unicum matri suæ præsidium ». Roma itaque aberat Leo abbas Sancti Bonifacii, quando illuc Abbo pervenit. Edidit eam Epistolam Baluzius tom. i Miscell., et in Præfatione refert se eam reperisse in veteri Codice Ms. Bibliothecæ regiæ, ad *L. abbatem Fuldensem* inscriptam, cum qua inscriptione eandem ipsemet etiam publicavit. Verum ex ejus lectione manifeste apparet, Epistolam ad abbatem monasterii Sancti Bonifacii Romæ positi, non vero ad abbatem monasterii Sancti Bonifacii in Germania siti, cui hoc tempore nullus Leo præerat, missam fuisse. Sed librarii inscriptiones litterarum non raro augent, minuunt vel corrumpunt. Porro Baluzius recte laudata Abbonis verba explicat, aitque Abbonem non ita intelligendum esse ac si Sedem Apostolicam Pontifice vacantem reperisset, cum certum sit, Joannem XV sedisse tum in Cathedra beati Petri. Itaque scripsit Abbo se Romanam Ecclesiam digno viduatam Pontifice offendisse, quia non putabat Joannem dignum esse tanta Sede. Quam viri doctissimi interpretationem certam esse ostendit Aimoinus citatus. Baronius, qui hanc Epistolam non vidit, anno cmxcii, num. 24 citata Aimoini verba refert, aitque Abbonem ignorasse *Crescentium* tunc Urbis tyrannum ex omnibus Pontificiis actibus pecuniam corrasisse, idque fecisse nomen Joannis Pontificis, apud omnes ad Urbem accedentes peregrinos, istiusmodi infamia laborare.

13. *Secunda profectio Romana Abbonis Arnulfi causa suscepta.* — Secunda profectio Romana Abbonis recte hoc anno a Baronio consignata; ex verbis enim Aimoini quæ refert, innotescit Hugonem Galliarum regem tunc mortuum fuisse, et Robertum filium solum regnasse; Hugonis vero mors die xxiv Octob. superioris Christi anni contigit. Hujus posterioris profectionis causam nos edocet ipsemet Aimoinus, quia, inquit, « Arnulfus Rhemorum archiepiscopus absque justa sua audientia sede sua privatus, custodiæque fuerat mancipatus. Ob hoc Gregorius, qui Joanni in Apostolica successerat Sede, non solum claritate generis, verum etiam probitate clarus mentis, toti regno Francorum anathema se invecturum comminatus est ». Paulo post Aimoinus scribit: « Regressus itaque honorabilis Abbo ad regem (nempe Robertum) a quo missus fuerat, cuncta pro quibus ierat, perfecta nuntiat, Arnulfum Rheinensem custodia exemptum Pontificatui restituit, pallium illi a domno papa directum reddidit (nempe Arnulfo). Post hæc, per internuntios ipsi venerabili Apostolico domno Gregorio amicales plenasque reverentiæ dirigit litteras, in quibus innotescit, se cuncta uti jusserat perfecisse ». Recitat eas Abbonis ad Gregorium papam litteras Baronius ex Aimoino, cumque an. cmxcv, num. 12, Hugonem regem Arnulfum de carcere eductum in Ecclesiam Rhemensem restituisse jam scripserit, vel credidit *Arnulfum* in carcerem a Roberto rege post patris

mortem rursus conjectum fuisse, vel hoc anno non meminit eorum quæ ibidem scripserat. Parte altera, Cossartius, tom. II Concil. pag. 751, cum solum legisset quæ Baronius de Arnulfo e carcere ab Hugone rege educto scribit, hunc errorem ex eo refellit, quod Aimoinus et Abbo, quorum verba recitat, testentur *Arnulfum* nonnisi triennio post Concilium Rhemense e carcere solutum esse. Verum hoc ullimum non solum non negavit Baronius, sed etiam ex Aimoino et Abbone probavit, ideoque si Baronius memoria lapsus non sit, in eo tantum peccavit, quod *Arnulfum* bis e carcere eductum fuisse existimavit.

14. *In Epistola ad Leonem abbatem prioris tantum professionis mentionem facit.* — Papebrocius in Paralipomenis ad Conatum Chronico-Historicum, ubi de *Joanne XV* papasermonem habet, scite advertit Epistolam Abbonis, a Baluzio publicatam, datam non esse ad Leonem abbatem Fuldensensem, sed ad Leonem abbatem Sancti Bonifacii. Verum perperam tradit, *Abbonem* in ea Epistola indicare se, vacante per Joannis XV mortem Sede, Romam pervenisse, et hujus professionis præcipuam causam videri Arnulfi restitutionem, ideoque Baluzii explicationem non esse admittendam. Nam duas professiones Romanas *Abbonis* in unam confundit, neque animadvertit ipsummet Aimoinum diserte asserere Abbonem a Joanne XV petiisse confirmationem Privilegiorum monasterii Floriacensis, et Abbonem in sua ad Leonem abbatem Epistola indicare Gregorium V nuper Pontificem Romanum renuntiatum sese accepisse: « Nuper audiui, inquit, nuntium quod me lætificavit super aurum et topazium, erectum esse Apostolicum decus per quemdam imperialis sanguinis virum (ut erat Gregorius V), totum virtutibus et sapientia compositum ». Quare hæc Abbonis Epistola ante secundam ejus professionem data ad Leonem abbatem, ideoque ea nihil commune habet cum restitutione Arnulphi et cum secunda professione Abbonis.

15. *Victoria Veremundi regis Hisp. ejusque mors.* — Ad num. 8 et seq. Victoria a Veremundo Legionis rege, Garsia Navarræ rege hujus nominis III, *Tremulo* appellato, et Garsia Fernandi comite Castellæ, de Almanzore prorege Ileni Hispaniarum califfæ, anno incerto reportata. Rodericus, l. 5 de Reb. Hisp. cap. 46, eam his verbis refert: « Rex Veremundus coactus hostibus, legationem misit Garsie Fernandi comiti Castellano, et Garsie Tremulo regi Navarrorum, ut obliti injuriarum ad agenda prælia fidei fœderati insimul convenirent. Quod audientes, rex Garsias misit exercitum, comes Garsias Fernandi personaliter cum sua multitudo, et rex Veremundus, licet podagricus, gestatus humeris bajulorum, collecta potentia regni sui, omnes insimul convenerunt, et in loco quodam qui arabice Calacanazor, latine autem dicitur Vulturum altitudo, Almanzor venienti cum suis Arabibus ut Castellam invaderet occurrerunt, eumque sese mu-

tuis cædibus invasissent, maxima pars cecidit de exercitu Agareno; tamen noctis tenebris intercepti neuter neutri cessit campum, et tanta strage compta suorum, bellum in crasino timuit restaurare. Unde de nocte fugiens, cum venisset ad vallem Borgecorexi, dolore vexatus animam exhalavit, et ad Medinam, quæ Cælum dicitur, est delatus. Cumque dies crastina illuxisset, exercitus Christianus putavit Arabes ad prælium reversuros, sed cum tentoria vacua hominibus conspexissent, ipsa tentoria et suppellectilem et spolia varia occuparunt. Comes autem Garsias Fernandi viriliter insecutus eos qui cædem evaserant, fere usque ad internecionem delevit. Almanzor autem, qui semper invictus fuerat, tanto dolore prosternitur, ut a die prælii neque cibum neque potum sumpserit, donec diem conclusit extremum ». Veremundus anno sequenti obiit, *Æra* mxxxvii, ut refert Baronius ex ejus Epitaphio, relicto filio quinquenni, *Adelphonso* hujus nominis V appellato. Et tamen idem Rodericus in Hist. Arabum cap. 31 ait, Almanzorem mortuum esse *an. Arabum* cccxcii, anno Christi mii inchoato. Quare numeros in Historia Arabum corruptos esse oportet.

16. *Mors Adelhaidæ imp.* — Ad num. 11. Baronius memoriæ lapsu recitat hic *S. Adelhaidis* imperatricis mortem, quam postea fuse narrat anno millesimo, de qua ideo ibi agemus, licet ea anno cxcix contigerit.

17. *Otto III nunquam uxorem duxit.* — Ad num. 12. Otto III imperator anno superiori secunda vice Romam venit, nec ante initium anni millesimi inde digressus est. Krantzius, lib. 4 Hist. Sax. cap. 26, et Gotheфридus Viterbiensis narrant de *Maria* imperatrice Aragoniæ principis filia, quod cum per urbem Mutinensem imperator transiret, eaque a comite quodam forma pulcherrimo repulsam passa esset, eundem de pertentata pudicitia apud imperatorem accusavit, hieque comitem morti damnavit. Quem cum capite truncatum audisset ejus uxor, *Ottonem* pro tribunali sedentem convenit, virique projecto in medium capite ipsum imp. apud eundem ipsum jura reddentem accusavit, et probationem per ferri candentis contractationem obtulit, quod cum prorsus illæsa contractasset, vindictam in ipsummet imperatorem ab eodem exegit. Passus ille culpam, tandem ea conditione transactum est, ut Augusta flammis combureretur. Quo facto vilam suam redemit imperator, qui insuper viduam tribus comitis castris donavit. Quæ Historia si vera, alliganda esset cum anno cxcvi, quo Otto primum in Italiam venit. At is anno cxcv uxorem quærebat. Quare matrimonium ejus cum Maria Aragoniæ eo magis commentitium, quo omnibus antiquis ignotum.

18. *Finis schismatis.* — Chronographus Magdeburgensis Ms., postquam anno superiori de invasione Sedis Apostolicæ per Joannem Placentinum facta sermonem habuit, subdit: « Anno Domini dcxcviii, imperator tantis præsumptionibus com-

peritis, secundam profectionem paravit in Italiam. Cui venerabilis papa Gregorius Papiæ obviam factus, dum ei pessima Joannis et Crescentii narrasset gesta, ille diu divino commotus zelo Romam quantocius perrexit cum Apostolico. Quod audientes præfati ministri Satanæ, Joannes quidem fugam iniit, Crescentius vero præsidio, quod veterem Romam et Leonnum attingit castellum, se cum suis inclusit. Hunc quidam, non tantum imperatoris, quantum Christi amici, insequentes Joannem comprehenderunt eum: sed timentes, ne si eum ad Augustum destinarent, impunitus abiret, linguam ei et nares ampularunt oculosque pariter eruerunt. Hoc itaque mulcato divinitus, dominus papa Gregorius Sedem Apostolicam honorifice recepit, eamque usque ab obitum suum libere insedit. Imperator igitur Romam adveniens, sanctissimam illic Christi Resurrectionem celebravit, statimque post Albas, scalis et machinis arcem quam Crescentius insederat, hactenus omnibus inexpugnabilem, fortiter expugnat: illumque captum decollari et e summo præcipitatum in patibulo pedibus jussit suspendi. Verum in hoc fallitur hic auctor, quod imperatorem hoc anno secundam in Italiam profectionem suscepisse tradat; cum ab anno superiori, quo in Urbem se contulit, illinc nonnisi post triennium discesserit, et ter tantum Romæ fuerit.

19. *Joannes antipapa deponitur et Crescentius decollatur.* — Finem vero schismatis a Joanne pseudo-papa excitati his verbis narrat chronographus Hildesheimensis ad hunc Christi annum: « Prædictus invasor Joannes ab imperatore cæcatus et truncatus deponitur, et Crescentius decollatus cum XII suis ante Urbem suspenditur ». Idem habet Lambertus Schafnaburgensis in Chron. ad hunc Christi annum. Quod cum in Quādragesima, die secunda Martii hoc anno inchoata, acciderit, ut tradit auctor Vitæ sancti Nili begumeni, cujus verba recitat Baronius anno DCXCVI, ubi a num. 13 ad 16 de hoc schismate verba facit, apparet ejus initium mense circiter Maio superioris Christi anni recte a nobis collocatum fuisse, cum in Catalogis huic Joanni menses decem attribuantur. In Catalogis in quibus hic Joannes cum numero exprimitur, Joannes XVII vocatur, Joanne scilicet Roberti filio in censum relato, et Joanne XVI appellato. Verum cum Joannes, Gregorii V decessor, seipsum Joannem XV in suis rescriptis nominarit, eumque ita vocandum esse suo loco dixerimus, Joannes iste, licet antipapa, Joannes XVI appellandus, quod duo subsequentes Pontifices ejusdem nominis ejus aliqualem rationem habuerint, alterque Joannem XVII, et alter Joannem XVIII in suis rescriptis se nuncuparit. Papebrocius in Conatu Chronico-Historico, id optima ratione ab utroque factum recte existimat. Licet enim, inquit, non fuerit unquam verus Pontifex hic Joannes XVI, tamen extabant sub eo nominis numero sparsæ toto orbe, pro occasionum diversitate, Epistolæ ac Bullæ: quæ ne cum veri deinde Pontificis actis

confunderentur, si hic quoque diceretur XVI, necesse habuit Silvestri II successor permittere, ut vocaretur Joannes XVII. Quod nos etiam faciemus, ne si cum Baronio et recentioribus passim velimus, expuncto hoc pseudo-papa, sequentium Pontificum numerum imminuere, publicis ac privatis eorumdem ac sequentium temporum actis adversemur.

20. *S. Heribertus anno sequenti creatus archiep. Colonie.* — Ad num. 14. Otto III tam in secunda sua profectione Romana, quam in tertia, sæpius Beneventum venit, ut ex Leone Ostiensi lib. 2, cap. 22 et seqq. aliisque colligitur. In ea urbe fuit sequenti Christi anno, quo sanctus Heribertus ejus cancellarius electus et consecratus est archiepiscopus Coloniensis, ut anno MI demonstra- bimus, et ut ait Rupertus abbas Tuitiensis in hujus sancti antistitis Vita a Bollando ad diem XVI Martii recitata, cap. 2: « Beneventi Pontificalis ei honor datus est VII idus Junii (legendum VII idus Jul. ut recte Bollandus monet.) Et exinde Romam profectus, pallium ab Apostolicæ Sedis præsule (Silvestro nempe II, non vero Gregorio V, ut Baronius interpretatur) accepit ».

21. *Gerbertus fit arch. Ravennensis.* — Gerbertus, qui in aula Ottonis III versabatur, archiepiscopus Ravennensis ejus favore hoc anno renuntiatus est, uti ex his ejus Epitaphii verbis elicitur, ubi postquam de ejus ad Rhemensem et postea ad Ravennensem archiepiscopatum mentio facta fuit, dicitur:

Post annum Romam mutato nomine sumpsit
Ut toto Pastor fieret orbe novus.

Anno autem sequenti idem Gerbertus Pontifex Romanus creatus. Erravit ilaque Rubeus in Hist. Ravenn. lib. 5, qui hanc promotionem ad annum superiorem retrahit. Non bene etiam Baronius anno DCXCVI, num. 3 eamdem recitat. Tom. IX Concil. pag. 752, recitatur Epistola Gregorii papæ V ad eum data, qua mittit pallium, et Ravennensem Ecclesiam non modo multis Privilegiis ornat, sed etiam variis donationibus auget. In ejus fine legitur: « Scrip. per manus Petri notarii et scriniarii S. R. E. in mense April. Indict. XI, Bene valete. Dat. IV kal. Maii, per manum Joannis episcopi S. Albanens. Ecclesiæ et Bibliothecarii S. Apostolicæ Sedis, anno Pontificatus domni Gregorii summi Pontificis et universalis papæ in sacratissima Sede B. Petri Apostoli II, imperante domno Ottone III a Deo coronato, magno et pacifico imperatore, anno II, in mense et Indict. suprascripta », hoc scilicet Christi anno. Qua ex subscriptione etiam patet, Gregorium V anno DCXCVI post diem XXVIII mensis Aprilis primum Pontificatus annum exorsum esse. Non dubium autem, quin Pontifex paucis diebus a Gerberti ad Ecclesiam Ravennensem promotione rescriptum illud emisit.

22. *Celebrat Conc. Ravennæ.* — Eodem fere

tempore, *Gerbertus* Concilium habuit episcoporum omnium qui Ravennati Ecclesiæ subjiuntur, in quo tres canones conditi ad disciplinam Ecclesiasticam spectantes. Refertur illud Concilium tom. ix Concil. pag. 769, sed ibidem, uti et apud Rubeum citatum, cum anno *dcxcvii* male conjungitur, ut ex ipsius Concilii Præfatione liquet : « Perpetuo regnante Domino nostro Jesu Christo, tempore pii Cæsaris Ottonis III, in anno secundo imperii ejus, undecima Indictione, etc. », ideoque hoc Christi anno, quo Otto III usque ad xxxi mensis Maii secundum imperii annum numerabat, et Indictio xi in cursu erat. Verum est infra post canones legi : « Promulgata sunt hæc anno *dcxcvii* Incarnat. Dominicæ, die kalend. Maiarum, Indict. xi »; at annus Christi manifestissime ibidem corruptus, legendumque, anno *dcxcviii*, ut ipsamet Indictio xi cum kalendis Maii conjuncta ostendit. Præterquam quod anno superiori, eo die, Joannes Gerberti decessor adhuc in vivis erat, ut ibidem vidimus. Denique anno superiori *Otto III* kalendis Maii non secundum, sed primum imperii annum numerabat.

23. *Publicat constitutionem Ottonis III.* — Eodem tomo ix Concil. pag. 774, refertur *Constitutio Decretalis sacræ legis D. Ottonis III piissimi imperatoris*, quam Holstenius in Collectione Romana ex Chronico Farfensi Ms. eruit. In ea Otto utilitati Ecclesiarum et imperii consulens decernit, ut Ecclesiastici, qui se scripto obligarunt ad aliquid solvendum, adstringere non possint eum, qui eis in regimine successerit. In fine legitur : « Actum XII kalend. Octob. Indictione xii, anno tertio domini Gregorii V papæ Pontificatus, promulgata per manus Gerberti sanctæ Ravennatis Ecclesiæ archiepi-

scopi, in ea Synodo, in qua Mediolanensi episcopo, Arnulfo nomine, papatum ablatum est, in Basilica Sancti Petri, quæ vocatur Ad cælum aureum ». Imperitus chronographus, ut varia in ejus Chronico, tom. iii Duchesniano ex parte publicato contenta perspicuum faciunt, subscriptioni postrema verba de suo addidit, et *Arnulfum* archiepiscopum Mediolanensem, loco Joannis archiepiscopi Placentini posuit. Videatur Papebrocius in Paralipomenis ad Conatum Chronico-Ilistoricum, ubi eam conjecturam magis applicat.

24. *Scribit libellum adversus Simoniacos.* — Grassabatur per hæc tempora simoniæ labe, ut videre est apud Aimoinum in Vita sancti Abbonis cap. 10, ubi refert Epistolam ejusdem Abbonis ad Bernardum abbatem Bellilocensem, apud Glabrum, lib. 2, cap. 6, aliosque horum temporum auctores. Quare *Gerbertus*, ubi archiepiscopatum Ravennensem iniit, libellum hac de re ad suos suffraganeos misit, in quo testatur quanto dolore afficiatur, quod malum hoc invaluisset. Libellum illum e tenebris eduxit Mabillonius tom. ii Analect. pag. 216 et seqq., cui hic est titulus : « Sermo Gerberti philosophi, papæ Urbis Romæ, qui cognominatus est Silvester, de informatione episcoporum ». Neque dubium esse potest, quin proprius Gerberti fœtus sit, cum is *Philosophus* appellaretur, ut eum etiam appellat Otto III, ex dictis anno *dcxcii*, num. 3. De hoc libello ipsemet Gerbertus in ejus circiter medio ait : « Coarctet nos licet libelli prolixitas properare ad finem, sollicitudo tamen fraterni retardat amoris ». Ita nihil omisit *Gerbertus*, ut munere sibi imposito præclare fungeretur.

SILVESTRI II ANNUS 1. — CHRISTI 999.

1. *Mortuo Gregorio Silvester papa creatur, de cujus ingenio et moribus multa asseruntur, multa refutantur.* — Annus Redemptoris nongentesimus nonagesimus nonus Indictione duodecima sequitur, quo pridie nonas Februarii, ut Ditmarus ait, moritur Gregorius papa, cum sedisset annos duos, menses octo et dies quatuor : sed verius quod mortuus sepultusque est in Basilica principis Apostolorum duodecimo kal. Martii, ut apparet ex ejus

Epitaphio, quod exstat ad sepulchrum ejus exaratum his versibus :

Ille quem legit humus, oculis vultuque decorum,
Papa fuit Quintus nomine Gregorius.
Ante lamen Bruno, Francoque regia proles,
Filius Ottonis de genitrice Judith.
Lingua Teutonicus, Wangia doctus in urbe,
Sed juvenis cathedram sedit Apostolicam.
Ad binos annos et menses circiter octo,
Ter senos Februæ connumerante dies.

Pauperibus dives, per singula sabbata vestes
 Divisit, numero cautus Apostolico.
 Usus Francigena, vulgari, voce latina
 Instituit populo eloquio triplici.
 Tertius Otto sibi Petri commisit ovile,
 Cognatis manibus unctus in imperium.
 Exiit, et postquam terrenæ vincula carnis,
 Æquivoci dextro substituit lateri.

DECESSIT XII KAL. MARTII.

2. « Ditmarus vero ex his corrigendus, dum ait : Papa quoque Gregorius, bene dispositis Romæ omnibus, pridie nonas Februarii obiit, Gerberto mox sibi succedente », archiepiscopo Ravennate, qui mutato nomine dictus est Silvester II. Hæc eadem testantur æque Hermannus, Lambertus, Marianus ejusdem sæculi scriptores, ac cæteri omnes. Ravennatis Ecclesiæ ex Rhemensi (ut dictum est) hic tunc erat archiepiscopus, secutusque imperatorem Romam venientem. Ne autem Pontificatus, quo perfunctus fuerat Germanus homo Gregorius, in aliquem relaberetur Romanum (suspectam et nusquam tutam fidem Otto expertus fuerat Romanorum) ipsum Gerbertum mox summum Pontificem eligendum curavit, hominem alioqui astutum, et in gratiam se principum insinuandi maximum artificem, tanta Sede (ut libere fatear) indignissimum, cujus et hostis extiterit infensissimus, utpote qui adversus eam tempore Joannis Decimi Quinti papæ, cum ab eo exturbaretur ab archiepiscopatu Rhemensi, quem male occupaverat, quæcumque potuit impropria calumniose collegit, scriptisque mandavit, quæ suo loco superius sunt confutata. Cujus e stomacho atrabile æstuante emissum olim turpiter vomitum sorbentes nostri temporis Novatores (ut vidisti) in eandem sanctam Ecclesiam rursus effundunt, quem refusum vidisti in ipsos. Quem igitur ante negavit non timore compulsus, sed amore primatus illectus, plane redditus est indignus thronum Apostolicæ confessionis ascendere, nisi idem ipse qui cum Petro negavit, et cum Petro antea flevisset amare, cui et Christus diceret sicut Petro : « Diligis me plus his? Pasce oves meas ». Illud autem omnino possumus affirmare, nullum hactenus in Petri Sedem fuisse promotum, qui eandem Sedem suis scriptis ita prosciderit, ut Gerbertus. Ista adeo indigna pati coacta est Romana Ecclesia, cum per principes sæculi electiones Romanorum Pontificum factæ sunt. Sic per Ottonem Primum homo laicus Leo intrusus est, sic et modo Gerbertus, quem adulatus eidem imperatori Romanus populus dicitur postulasse ¹.

3. Porro ejus tam cita tamque inopinata promotio et continuata prosperitas magnis aucta progressibus, viri præsertim, qui in conventu episcoporum, judicio Apostolicæ Sedis depositus et throno Rhemensis Ecclesiæ, redactus antea in ordinem fuerat, insueta atque adeo miranda de ipso

opinandi atque scribendi tribuit occasionem : ipsum nimirum magicis incantationibus ad Apostolicæ Sedis culmen provectum esse, pacta pro mercede diabolo anima, quam statulo loco, Hierosolymis (sic nuncupata in Urbe S. Crucis Ecclesia) exactor violentus extorserit. Ad ingerenda autem ista simplicium auribus, additum est argumentum non leve, quod in tam rudi sæculo, mathematicæ scientiæ præcipue vero Astrologiæ hic scientissimus esset. Isti fuere colores, quibus ad tam absurda ac monstruosa fingenda, schismaticus homo, qui sequenti hominum ætate vixit, est usus ad eum adeo deformem præsentandum illis qui non novere Silvestrum.

4. Fuit iste Benno, qui se cardinalem archipresbyterum nominat, quique ex schismaticorum scissione sibi nomen tantæ dignitatis abripuit post annos octuaginta, cum Romanæ Ecclesiæ Hildebrandus, qui et Gregorius VII Pontifex præsideret, et adversus eum Henricus imp. schismaticus bellum gereret : iste, inquam, fuit primus fingendæ fabulæ architectus, cujus auctorem prodidisse solum, sit confutasse.

5. Extare dicuntur ipsius scripta, quæ non legi, sed ab eo qui legit omnia accipe argumentum, a Papirio, inquam, Masone, qui in Gregorio VII habet ista primum : « Si quis Bennonem legit, qui se archipresbyterum cardinalem vocat, isque odium ejus in omnes retro Pontifices usque ad Gregorium V et maxime in Hildebrandum exacte considerat, nullam ei fidem habendam existimabit : odii enim natura est, ut nec dormire cum veritate, nec vigilare possit. Ergo librum illum plenum maledictis, et a Cæsarianæ factionis homine (ut apparet) dictatum, facile respuo, etc. » Et in Silvestro, Bennonem hunc ejus primum auctorem fabulæ asserit, et quidem certe, eo quod nullus ante eum de Silvestro ea scripsisse reperiatur. Ipse enim primus eam de Silvestro fabulam narrat, qui et alios Gregorii VII prædecessores magiæ accusat, et ut maleficos damnat. Nemo penitus scriptorum, qui ante Bennonem scripserunt, ejus commenti vel levissimam mentionem fecisse reperiunt, dum de ejus Pontificatu scripserunt. Contra vero, qui sub ejus Pontificatu vixerunt, honorificam de eo mentionem habuerunt, ut Ditmarus scriptor gravissimus, dum ait ¹ :

6. « Superius de universali papa Brunone disputans, cum successorem ejus Gerbertum tantum nominarem, ut de eo latius aliquid scribam non incongruum est. Erat is natus de occiduæ regionibus, a puero liberali arte nutritus, et ad ultimum Rhemensem urbem ad regendum juste promotus. Optime callebat astrorum cursus discernere, et contemporales suos variæ artis notitia superare. Illic tandem a finibus suis expulsus, Ottonem petiit imperatorem, et cum eo diu conversatus, in Magdeburg horologium fecit, illud

¹ Aim. l. v. c. 43.

¹ Dilm. l. vi.

recte constiluens, considerata per fistulam quadam stella nautarum duce». Hæc ipse; sed illud male, dum ait eum ad Rheinensem Ecclesiam juse promotum. Affirmat idem qui supra Papirius, extare Codicem ejusdem Epistolarum ad Robertum regem Francorum, et Ottonem III imp. et alios ejus temporis præstantissimos viros, quæ dignæ essent viro disertio et dicendi perito. Quibus hactenus frui non licuit.

7. At quod vanam prorsus illam fabulam arguit falsitatis, est Epitaphium ejus sepulchro insculptum in Basilica Lateranensi, auctore Sergio successore Romano Pontifice, plane dignum quovis magni nominis Romano Pontifice, ut prorsus impossibile videatur, ut tam probroso exitu palam extinctus Pontifex, potuerit tali elogio commendari, eo præsertim in loco, ubi talia fieri contigissent. Reddemus illud in obitu ejus tomo sequenti.

Ad postremum, quæ de ipso habet hujus temporis auctor, Helgaldus monachus Floriacensis, qui summa fide scripsit Vitam Roberti Francorum regis, filii Hugonis, de quo superius, cujus Gerbertum hunc fuisse magistrum affirmat, professione vero monachum Benedictinum, deque ejus promotionibus ad sedem Rhemensem, Ravennatem, et Romanam, sic accipe: «Is quoque Gerbertus pro maximo suæ sapientiæ merito, qua toto radiabat in mundo, donativo regis Hugonis munere pontificium adeptus Rhemense, non multis annis illud ordinavit splendide, in his quæ forent necessaria Ecclesiæ sanctæ. Eo namque derelicto, Ravennatum factus est rector ab Ottone III, de quo ad Apostolatam Petri Apostoli sanctissimi festinus conscendens, multa in eo virtutum operatus est insignia, et præcipue in eleemosyna sancta, quam fortiter tenuit dum fideliter vixit. Inter cætera de se lætus et hilaris ita in R littera lusit:

Scandit ab R Gerbertus in R, post papa viget R.

«Hoc aperte demonstrans, quod hi tres episcopatus honores, quos professione regularis vitæ patris Benedicti monachus factus, suscepit, rexit et tenuit, hujus R litteræ signo in capite sunt declarati». Hæc Helgaldus.

Rerum ignari recentiores, qui post præsentem ætatem claruere scriptores, adeo Bennonis perculsi sunt testimonio, ut revocarint in controversiam, num Silvester iste esset inter Pontifices annumerandus, quem crederent a diabolo fuisse promotum, ut apparet ex¹ Sieberto, qui post annos ducentos suum Chronicon scripsit. At non ista qui præsentem sæculo claruere scriptores, Ditmarus, Glaber, Helgaldus, Lambertus, Hermannus, et Marianus Scotus, qui res suæ ætatis, quas cominus sunt intuiti, scripsere: qui omnes absque controversia, nulla vel levi dubitatione, Silvestrum post Gregorium V legitimum recensent Romanum Pontificem. Extat præterea fragmentum veteris Chro-

nici Floriacensis, a Pithæo editum, in quo hæc verba: «Illic Otto Tertius Gerbertum archiepiscopum Ravennæ propter summam philosophiam summo amore excolens, ordinavit eum papam, vocavitque nomen ejus Silvestrum.» Sed etsi tot manifestæ probationes deessent, nonne satis ex seipsa fabula ipsa convincitur falsitatis, dum de thesauro abdito in campo Martio narrationem adjicit, qualem vetula rotans fusum solet simplicibus narrare puellis ad lucernæ lumen, ne dormiant? Prudens igitur lector uno fasce constringat, eademque lance ejusdem ponderis appendat fabulam hanc cum illa de Joanne papissa, nisi quod illam levitas excogitavit, istam autem (ut audisti) nequitia.

9. *Franco episc. Wormatiensis pie obit Romæ.* — Eodem anno, ubi Otto imp. jam annum in Italia commemoratus esset, Franco Wormatiensis episcopus, egregiæ sanctitatis vir, Romæ (uti antea ipsi revelatum fuit) diem clausit extremum. De rebus tunc ab eo gestis Romæ cum eodem imperatore, hæc memoria digna narrantur in Vita Burchardi ejusdem Ecclesiæ episcopi, ab auctore ejus temporis, qui ait: «Franco episcopus Wormatiensis, rebus Ecclesiasticis rationabiliter ordinatis, in expeditionem Italicam cum imperatore profectus est. Ibi que plusquam anni spatio in servitio imperatoris vigilantissimo animo studebat, ejusque secretis semper intererat, et quando de rebus majoribus tractandum aliquid erat, tanta familiaritate et auctoritate, quamvis juvenis esset, apud imperatorem habebatur, ut sine ejus consilio raro aliquid statueretur. Cunctis affabilis erat, cunctis benignus extitit, et plurima donando gloriam non modicam apud cunctos quæsivit, unde et omnes maximo honore ac dilectione illum habebant, et quasi sanctum jam divinabant, et idcirco ab imperatore multum honoratus et charus præ aliis habitus, illius consilio et malos coercerebat, et remp. in pace regebat. Unde contigit, ut imperator abbatiam Saurissatensem Wormatiensi ecclesiæ concederet, et Charta et Privilegio perpetuo stabiliret, et in conventu ac Concilio Romanorum hanc traditionem recitari ac pronuntiari præcepisset.

10. Eodem tempore imperator et prædictus episcopus induti ciliciis, et pedibus penitus nudatis, quamdam speluncam juxta S. Clementis Ecclesiam clam cunctis intraverunt, ibique in orationibus ac jejuniis, necnon in vigiliis qualuordecim dies latuerunt. Ferunt quidam, visionibus et allocutionibus divinis fuisse consolatos. Nos autem hanc rem parum nobis compertam, existimationi vulgi ruminandam relinquimus: sed tamen hoc pro certo scimus, quod episcopo dies et hora obitus sui divinitus prænotata est. Et hoc ipse, postquam domum reversi sunt, imperatori pronuntiavit. Quare imperator multum contristatus, quem in locum ipsius habere, vel cui episcopatum ejus committere debuisset, multum lacrymando ab eo exquisivit. Tunc tandem quasi coactus, sic respondit: Fratrem unum habeo, si Deo placuisset,

¹ Siegb. an. Dom. 998.

hunc mihi successorem rogassem. Super hæc autem omnia Deus provideat, in quo sibi bene complaceat». Certe quidem hand carnalis affectio viri Dei ista fuit de promovendo fratre doctrina atque sanctitate conspicuo, lucido ejus temporis Germaniæ sole. Pergit auctor :

11. « Tunc imperator sub testamento Dei juravit, antedictum episcopatum fratri illius se daturum : et ut melius ac facilius recordari potuisset, Epistolam deprecatoriam pro hac re ab episcopo accipit, quam in sacculum suum ad testamentum posuit. Quid plura? Eadem die et hora, qua ipse prædixit, morte succubuit, corpusque suum Romæ cum magno honore in pace sepultum est ». Hæc auctor, qui narrare pergit, quomodo certo divinæ voluntatis judicio germanus illius Burchardus, ubi reversus est imperator in Germaniam, Wormatiensis est creatus episcopus; cæteris morte e medio sublatis, qui seipsos tantæ dignitati avide nimis ingesserant.

12. *Otto imperator post Synodum Romanam in Germaniam redit, res varias Ecclesiasticas statuit.* — Quod autem de Concilio hoc anno Romæ habito nuper mentio facta est, in quo recitari voluit imperator concessum Ecclesiæ Wormatiensi Privilegium : meminit ejusdem Concilii paucis his Ditmarus, ubi agit de rebus gestis in hoc secundo ejus in Urbem adventu : « Synodus Romæ tunc, in qua accusatus Giselernus archiepiscopus Magdeburgensis, quod duas parochias teneret, percussus ille paralysi venire non potuit, res reposita ad Concilium provinciale Germaniæ ». Subdit mox ista : « Cæsar, auditis mirabilibus quæ per dilectum sibi martyrem Dominus fecit Adalbertum, orationis gratia eo pergere festinavit ». Et infra : « Nullus imperator majori unquam gloria a Roma egreditur, neque revertitur ». Et post iter ipsius descriptum : « Videns, inquit, a longe Gnesnam urbem desideratam, nudis pedibus suppliciter advenit, et ab episcopo ejusdem Ungero venerabiliter susceptus, in Ecclesiam introducitur, et ad Christi gratiam sibi impetrandam, martyris intercessio profusis lacrymis invitatur. Nec mora, fecit ibi archiepiscopatum, ut spero, legitime, sine consensu tamen præfati præsulis, cujus diœcesi omnis hæc regio subjecta est, committens eundem prædicti martyris fratri Kadimo, eique subjiciens Reimbernum sanctæ Cholbergensis Ecclesiæ episcopum, Popponem Cracuensem, Joannem Wiotislanensem, Ungero Posaniensi excepto. Factoque ibi altari, sanctas in eo honorifice reliquias condidit ». Hæc et alia Ditmarus, describens quam digne exceptus fuerit a Boleslao Poloniæ duce, et magnis muneribus donatus.

13. Porro cum audis tot sacra munia exhibita ab imperatore, scias male ipsi ut auctori esse tributa, quæ legatus a latere cum eo missus, archidiaconus cardinalis S. R. E., sua auctoritate facienda curavit; legati namque auctoritate factum oportuit, quod narrat de archiepiscopatu ibidem tunc

erecto. Verum an ista a Romano Pontifice probata fuerint, veheementer dubito, siquidem assertione Gregorii VII Romani pontificis¹ apparet usque ad sua tempora nondum fuisse institutam sedem archiepiscopalem in Polonia. Nam ipse scribens ad Boleslaum ducem Poloniæ, cum legatos illuc mittit ad hoc ipsum agendum, hæc ait : « Illud nobis primo attendendum est, quod episcopi terræ vestræ non habentes certum metropolitanæ sedis locum, nec sub aliquo positi magisterio, huc atque illuc pro sua quique ordinatione vagantes, ultra regulas et decreta SS. Patrum, liberi sunt et absoluti. Deinde vero quod inter tantam hominum multitudinem adeo pauci sunt episcopi, et amplæ singulorum parochiæ, ut in subjectis plebibus curam episcopalis officii nullatenus exequi, aut rite administrare valeant : pro his igitur, etc. » Data est Epistola VII kal. Maii, Indictione xii, anno Christi millesimo septuagesimo quarto. Hactenus de rebus gestis ab Ottone in hoc secundo reditu in Italiam, et ejusdem in Germaniam regressu. Contingit vero ipsum adhuc tertio in Italiam venire, nec amplius in Germaniam redire præventum morte. Sed de his suo loco dicendum. Hic vero quæ Ditmarus subjicit describenda :

14. « Nec sileo, inquit, quoddam miraculum temporibus præfati Cæsaris Ottonis Tertii Romæ cælitus exortum. Nam cum ducis Hermannii milites monachorum S. Pauli prata vi sua comprehenderent, suppliciter ab eis sæpe rogati, discedere noluerunt. Et continuo nubes variæ ascendunt, fulmina micant, terrorem Dominicum monstrantes. Tonitru terribile protinus subsequitur, et ex eorum numero optimos quatuor occidens, cæterosque fugans, pauperes Christi in hoc mundo non esse contemptibiles ostendit. Protector enim talium misericors Dominus, et hos honorantes, et in necessitate sua exaudientes digna retributione provehit; eorumque persecutores, aut hic (quod levius habetur) aut in futuro (quod gravius) punit ». Hæc Ditmarus.

15. *Benedicti papæ V corpus Romam translationem.* — Eodem quoque tempore factam esse translationem venerandi corporis Benedicti papæ V ex Hamburgo, sive Hamaburgo, ubi exulans relegatus ab Ottone Primo diem clausit extremum, idem Ditmarus narrat; ut plane, licet sero, cognitus fuerit Benedictus legitimus Ecclesiæ Romanæ Pontifex. Nam schismatico digne punito et in exilio mortuo, qui tantus post mortem honor, ut ejus venerandæ reliquiæ ab extremis Germaniæ finibus transferrentur in Urbem imperatoris auctoritate per episcopale ministerium? Quod si vel sero saltem emendavit Otto nepos, quod deliquisset avus Otto, ut restituerit (ut licuit) Benedictum in suam a qua fuerat exturbatus Ecclesiam : Leo sane qui eam tunc occupavit, inter spurios et schismaticos pseudo-pontifices est numerandus. Sed Ditmarum

¹ Greg. VII. l. III. Ep. LXXIII.

audi, ait enim : « Raco (electus Bremensis episcopus), jussu dilecti senioris sui, (nempe Ottonis Tertii imperatoris), ossa supradicti papæ Benedicti (sicut ipse prælocutus est) de Hamburg Romam reduxit. Namque pater venerabilis, dominus, inquam, Apostolicus, dum in exilio esset in Christi servitio studiosus, et adhuc Aquilonaris hæc pars optata pace gauderet : Hic, inquit, fragile corpus meum debet resolvi, et post hæc omnis ista regio Gentili gladio desolanda ferisque inhabitanda relinquetur, et ante translationem meam non videbit indigena pacem firmam : quandocumque vero domi resideo, Apostolica intercessione paganos quiescere spero ». Hæc Ditmarus. Quæ omnia, ut prædixit sanctus Pontifex, sunt secuta. Scribit enim idem ipse superius de ejusdem Ecclesiæ Hamburgensis desolatione per Slavos facta, his verbis¹ :

16. « Slavi, qui susceperant fidem, superbia Theodorici ducis aggravati rebellant. Ita primo Brandeburgensis Ecclesia a bellis invasa devastatur, clerici casi, omnia expilata, a Boemis Ecclesia Cicensis devastata, item Ilamaburg sedes episcopalis eversa. Tum conflagrante Ecclesia, visa est etiam ab hostibus manus expansis digitis, quæ plena, cunctis videntibus, rediit. Creditum reliquias sanctorum inde sublatas, quæ incendio perituræ essent ». Quomodo autem iidem hostes victi fuerint, idem subdit, « nimirum quod collecti milites, audita sabbato missa et Eucharistia accepta, in hostes irrumpentes, eos vicerunt, ingente strage peracta ». Pluribus ista Ditmarus.

17. *Donatio facta Ecclesiæ Vercellensi.* — Dum autem adhuc Romæ Otto moraretur hoc anno, agente apud eum Silvestro papa, erga Vercellensem Ecclesiam se munificentissimum præbuit, donans ei ipsam Vercellensem civitatem cum comitatu, necnon comitatum S. Agathæ. Est de his adhuc integrum ejusdem imperatoris Diploma in Archivo ejusdem Ecclesiæ Vercellensis, quod acceptum una cum aliis ab ejus episcopo Joanne Stephano Ferrario exemplar, hic tibi ipsum, ut nobile tanti principis monumentum, edendum curavimus. Sic enim se habet :

18. « In nomine sanctæ et individue Trinitatis, Otto, divina favente clementia, Romanorum invictissimus imperator Augustus.

19. « Notum sit omnibus Dei culloribus, et nostri imperii fidelibus, quoniam respectu divini amoris, et pro petitione optimi Hugonis nostri illustrissimi marchionis, supplicante domno papa Silvestro, et interveniente Heriperto nostro dilectissimo cancellario, concedimus Leoni fidei nostro episcopo, suæque sanctæ Vercellensi Ecclesiæ, ubi sanctus Eusebius requiescit, totam civitatem Vercellensem in integrum cum omni publica potestate in perpetuum, more prædecessorum nostrorum, ut constantiam fidelis nostri constan-

ter remuneremus. Et ut cæteri promptiores ad obsequium nostrum consurgant, liberalitas nostri imperii pro Dei et sancti Eusebii amore donavit prædicto Leoni, omnibusque suis successoribus in perpetuum, totum comitatum Vercellensem in integrum cum omnibus publicis pertinentiis, et totum comitatum, quem dicunt sanctæ Agathæ, in perpetuum cum omnibus castellis, villis, piscationibus, venationibus, silvis, pratis, pascuis, aquis, aquarumve decursibus, et cum omnibus publicis pertinentiis, cum mercatis, cum omnibus teloniis, cum omnibus publicis functionibus, ut demota omnium hominum omni contrarietate, tam Leo sanctæ Vercellensis sedis episcopus, quam et successores ad honorem Dei omnipotentis, et ad reverentiam S. Eusebii magnifici episcopi, invicti contra hæresiarchas militis, et in civitate Vercellensi intus et foris, et in toto comitatu Vercellensi intus et foris, et in toto comitatu S. Agathæ et in omnibus eorum pertinentiis, liberam habeant potestatem placitum tenendi, legem novam faciendi, omnem publicum honorem, omnem publicam potestatem, omnem publicam actionem, et omnem publicam reditionem habendi, exigendi, secundum propriam voluntatem et potestatem judicandi, quia omnem potestatem et omne dominium publicum, quod ad nos inde pertinuit, in potestatem et dominium sanctæ Vercellensis Ecclesiæ et Leonis nostri episcopi et omnium sibi successorum dedimus, largiti sumus, et omnino concessimus in perpetuum. Nostra igitur imperiali majestate præcipimus, ut nullus dux, marchio, nec etiam Iporensis marchio, nullus comes, nullus vicecomes, nullus archiepiscopus, nullus episcopus, nullaque nostri imperii magna aut parva persona, nullus Italicus, nullus Teutonicus audeat sanctam Vercellensem Ecclesiam, aut prædictum Leonem episcopum, aut aliquem ejus successorem de comitatu Vercellense, aut de comitatu Sanctæ Agathæ, aut de aliqua eorum pertinentia inquietare, molestare, disvestire, aut ullum placitum tenere, aut ullum districtum ibi habere, aut ullam publicam exactionem ullo ingenio ibi exigere, aut mercatum, aut telonium ibi quærere : et si aliquis aliquod scriptum de mercatis aut teloniis, ad comitatum Vercellensem et ad comitatum Sanctæ Agathæ pertinentibus ostenderit, sit inane, sit vacuum, nullius unquam auctoritatis habendum aut firmitatis. Sed liceat tam Leoni episcopo quam successoribus ejus, ad honorem Dei et sancti Eusebii, omnem liberam potestatem habere in perpetuum in civitate et in toto comitatu Vercellense, et in toto comitatu Sanctæ Agathæ, et in omnibus eorum pertinentiis, ut libere et secure permanentes Dei Ecclesiæ, prosperetur imperium nostrum, triumphet nostræ corona militiæ, propagetur potentia populi Romani, et restituatur respublica, ut in hujus mundi hospitio honeste vivere, et de hujus vitæ carcere honestius avolare, et cum Domino honestissime mereamur regnare. Si quis autem contra hoc

¹ Dalm. Chron. I. III.

nostrum praeceptum per aliquod ingenium ire præsumpserit : componat mille libras auri, cameræ nostræ medietatem, et sanctæ Vercellensi Ecclesiæ alteram. Quod ut omnino credatur et in æternum conservetur, manu nostra firmavimus in æternum Deo auctore victura, et tribus sigillis præcepimus insigniri : quia amor sanctæ Trinitatis, pro qua pugnavit S. Eusebius, ad hoc nos traxit, ut suam Ecclesiam suumque successorem tali et tanto honore donaremus. Qui hoc praeceptum servaverit, sancta Trinitas eum benedicat : qui autem fuerit transgressor, sancta Trinitas eum maledicet, et inter hæreticos damnabitur.

« Signum D. Ottonis gloriosissimi Romanorum imperatoris Augusti.

« Heribertus cancellarius vice Petri comani et archicancellarii recognovit. Dat. non. Maii, anno Dominicæ Incarnationis DCXCIX, Indictione XII. Anno Tertii Ottonis regis XXI, imperii IV (III). Actum

Romæ feliciter. Amen ». Hucusque Diploma, in quo, sicut in aliis omnibus ab eo datis publicis monumentis, apparet, annos imperii ab eo incipi numerari, non a tempore, quo parenti successit imperatori, sed ab eo potius anno, quo est coronatus a Romano Pontifice, antea vero non imperatorem, sed regem duntaxat nominari voluisse.

20. *Sergius patriarcha Constantinopolitanus.* — Quod ad res Orientales pertinet, hoc anno defuncto Sisinnio patriarcha Constantinopolitano, cum sedisset annos tres, subrogatus est in locum ejus Sergius abbas, ex progenie Photii schismatis auctoris, cujus secutus vestigia eo amplius obfuit, quo diutius præfuit, propagato sedis tempore ultra vicesimum annum. Hujus nomine contra Occidentales invenitur alicubi scripta Epistola, quam Photii vere esse, et ejus titulo restitutam superius recitavimus.

Anno periodi Græco-Romanæ 6492. — Anno Æræ Hispan. 1037. — Anno Hegiræ 390, inchoato die 12 Dec., Fer. 3. — Jesu Christi 999

— Silvestri II papæ 1. — Ottonis III reg. 17. imp. 4. Basil. et Const. impp. 24.

1. *Silvester II succedit Gregorio V.* — A num. 1 ad 9. Cum ex dictis constet *Gregorium V.*, anno cxcvi, post diem xxviii mensis Aprilis Pontificatum iniisse, et ex ejus Epitaphio cum *XII kal. Martii* decessisse, tam in Catalogis quam in eodem Epitaphio, menses, quibus supra annos duos sedit, male computari necesse est. Hæc Epitaphii verba : Ibi tamen adverbium *circiter*, paulo amplius quam menses octo supra annos ii sedisse significat. Adverbium enim illud et similia, modo excessum, modo defectum denotant, ut innumeris exemplis ostendi potest. In Catalogis menses illi et dies mendose descripti, ut ibidem videre est. *Gerbertus*, *Silvester II* in Pontificatu appellatus, die secunda mensis Aprilis, in quam Dominica Palmarum incidebat, inthronizatus fuit, ut ex dicendis in morte ejus liquebit. Quæ de ejus magia a variis scriptoribus tradita, fictilia et ridicula esse demonstrat vel solum ejus Epitaphium a Sergio IV successore conditum, indeque fabula nata quod mathematicas disciplinas cum liberalibus artibus ita calluerit, ut eas pænemortuas in Gallia resuscitarit. *Gerbertus* monachus primum Aureliacensis in Aquitania, Robiensis abbas in Italia fuit. De eo in brevi Chronico Aureliacensis abbatis, a Mabillonio tom. II Analect. publicato, in Raimundo Caturensi ejus-

dem monasterii abbate dicitur : « Qui curat erudiendum Gerlantium (ita ibi Gerbertus appellatur) adolescentem obscuro loco natum : sed quia ingenio erat vafer, præclarus in litteris evasit. Hic impetrata licentia, propter aviditatem sapientiæ multa circumibat regna, et ad notitiam imperatoris pervenit : qui eum Rhemis statuit episcopum, deinde Ravennæ postea in summum Pontificem exivit ». Gerbertus in Epistola xvi Raimundum magistrum suum appellat, quem Mabillonius ibidem Raimundum abbatem fuisse probat.

2. *Varia fortuna Gerberti in Pontificatum Silvestri II dicti.* — Adhemarus vero monachus qui hoc tempore vivebat, de eo in Chronico habet : « Gerbertus natione Aquitanus, ex infimo genere procreatus, monachus a pueritia S. Gerardi Aureliacensi cœnobio, causa sophiæ primo Franciam, dein Cordubam lustrans, cognitus a rege Hugone, Rhemis archiepiscopatu donatus est, et iterum cognitus ab imperatore Ottone, archiepiscopus Ravennæ factus est ». Idem legitur in Chronico Malleacensi. In aula Gallica Hugonis nondum regis Robertum filium erudiit, deinde Rhemos ad Adalberonem archiep. Rhemensem se contulit, quocum arctam necessitudinem contraxit. Italiam quoque lustravit, ubi ab Ottone II abbatia Sancti Co-

lumbani seu Bobiensi donatus est. Huic imperatori adeo charus fuit, ut illi filium suum Ottonem III litteris imbuendum tradiderit simul cum Roberto Hugonis Capeti filio; indeque Epist. clx de utroque discipulo suo loquens, scribit ad Robertum, sibi sæpe Oltonem illius videndi desiderium inculcare: « Dies noctesque, inquit, mecum sermones confert ubi et quando vos familiariter videre possit cœvum sibi et studiis consimilem seniore meum regem Robertum, alloqui et complexari ». Ingravescente Itolorum contra Oltonem III odio, abbatiam Bobiensem deserere coactus fuit, et in ejus aulam venire. De ea persecutione loquitur in Epistola v, et in Epistola xi ad Cæsarem testatur, eum ab Italis vocari *Asinum*, se vero *Equum admissarium* uxorem et filios habentem, quod partem familiæ suæ de Francia recollegisset. Denique in Epistola xii ad Hugonem suum data, inimicorum rabiem magis depingit. Ordericus ad an. cmlxxxvii aliquos ex ejus discipulis in *divinis et sæcularibus libris* claros memorat, sed perperam inter eos *Remigium* præsulem Autissiodorensem reponit, loco *Joannis* ejusdem sedis antistitis, qui, ut habet auctor anonymus Historiæ episcoporum Autissiodorensium part. 4, a Labbeo tom. 1 Biblioth. publicæ, *Gerberti* discipulus fuit, et litteris apprime imbutus.

3. *Silvestrum II ab Ottone III papam creatum, commentum sunt schismatici.* — Goldastus tom. 1 Constitut. imperial. pag. 40, Oltonis III Constitutionem exhibet nulla nota chronica insignitam, et quam ipse cum anno cmxviii copulavit. In ea Oltonem his verbis alloquentem inducit: « Sicut pro amore S. Petri dominum Silvestrum magistrum nostrum papam elegimus, et Deo volente ipsum serenissimum ordinavimus et creavimus, ita pro amore ipsius D. Silvestri papæ S. Petro de publico nostro dona conferimus ». Putidum hoc commentum tot fere mendacia quot verba complectitur. Antea enim in ea Constitutione legitur, Oltonem III nullum dominium Ecclesiæ Romanæ dedisse, ac Pontifices Romanos « ipsa quoque Altaria spoliasse, et quasi culpam suam in imperium nostrum retorquentes, ad aliena, id est, nostra et nostri imperii maxime migravisse ». Quo nihil absurdius, præsertim tempore Ottonis III dici potuit. Dein subjungit Pontifices fluxisse donationem Magni Constantini. Tum: « Hæc sunt etiam commenta, quibus dicunt, quemdam Carolum S. Petro nostra publica tribuisse. Sed ad hæc respondemus, ipsum Carolum nihil dare jure potuisse, utpote jam a Carolo meliore fugatum, jam imperio privatum, jam destitutum et annullatum ». Loquitur impostor de Carolo Calvo imp., asseritque ejus donationem Constantiniana non minus falsam. Et cum ait, *sed ad hæc respondemus*, indicat quod, licet hæc vere facta fuisset, ejus nullam rationem habendam, quod Carolus Calvus tunc expulsus et imperio privatus fuisset a Carolo ipso meliori; cum tamen non *Carolus Crassus* Calvi successor, sed *Carolomanus*

Bavariæ rex Carolum Calvum expulerit, et imperio privarit. Vidit errorem impostoris Goldastus, et in margine ait, *Carolus integre appellabatur Carolomanus*. Sed ubi invenit Caroli nomen Carolomanni diminutivum esse? Ad hæc quis unquam prætensam illam Caroli Calvi donationem vidit, qui ut suo loco ostendimus, jura imperii in Italia semper tutatus est, ne minimum quidem læsit. Paulo post de publico nostro dona conferimus, etc. Octo igitur comitatus, pro amore magistri domini Silvestri papæ, sancto Petro offerimus ». Ubi qui Diploma illud fabricavit, manifeste supponit, hactenus imperatores, saltem quoad supremum dominium, nihil Pontificibus dedisse, et donationes tam Pippini quam Caroli Magni et Ottonis I, quas falsarius aliquot tantum comitatum fuisse dicit, mera commenta esse. Et tamen ipse Goldastus paulo antea, pag. 36, præsum Leonis VIII papæ decretum exhibet, quo non solum donationis a Carolo M. et a Pippino, sed etiam donationes a Justiniano imp. et Ariperto Longobardorum rege factas confirmat. Falsus ille Otto Ecclesiæ Romanæ civitates oculo, a se comitatus appellatas, largitur, et ab ea donatione excludit ducatum Romanum, ducatum Spoleti, ac urbem Ravennensem, totumque exarchatum, quia scilicet schismatici imperatori Teutonico potiora membra status Ecclesiastici attribueri volebant, et aliqua tantum oppida Romanis Pontificibus relinquere, asserentes antiquos imperatores nullum unquam jus Pontificibus adscripsisse in magna illa dominia. Quæ et similia referre, refellere est, cum nihil falsius in medium adduci possit. Tam verum itaque *Ottonem III* in aliqua sua Constitutione sese *Silvestrum II* papam fecisse affirmasse, quam vera sunt, quæ in eadem Constitutione ab Ottone III prolata et constituta fuisse dicuntur. Porro figmentum illud post sæculum xi excogitatum, eo sc. tempore, quo et quædam alia.

4. *Synodus Romana anno superiori habita.* —

Ad num. 42 et seq. Concilium Romanum in causa Giseleri Magdeburgensis archiepiscopi, cujus meminit Ditmarus his verbis: « Synodus Romæ tunc, in qua accusatus Giselerus archiep. Magdeburgensis, quod duas parochias teneret », anno superiori celebratum, cum jam Gerbertus, qui eidem subscripsit, Ravennensis archiepiscopus esset. Publicatum illud post Baronii mortem, legiturque t. ix Concil. Hæc verba quarti canonis: « Si Gisilarius, S. Magdeburgensis Ecclesiæ episcopus, potuerit canonice comprobare, quod per ambitionem de minori sede Marzeburgensi ad majorem Magdeburgensem non migraverit: ut non deponatur judicatum est. Sed si populi et cleri invitatione migravit, in eadem permaneat metropoli. Quod si absque eorum invitatione et electione migravit, non tamen per ambitionem et avaritiam factum esse constiterit, ad priorem redeat sedem. At si ambitionem et avaritiam negare non potuerit, definitum est, amittat utramque ». Docet autem Dilmarus hanc rem repositam fuisse ad *Concilium provinciale*

Germaniæ, ut scilicet examinaret, an *Gisilarius* per ambitionem ad Magdeburgensem Ecclesiam migrasset. Istud Concilium Germanicum sæculo sequenti habitum, ut ibi dicitur. Tom. ix Concil. præfatum Concilium Romanum in duo perperam dividitur, primumque dicitur sub Gregorio V, alterumque sub Silvestro II coactum; quod in altera Conciliorum editione emendandum erit. De hoc Concilio Romano Ottone III et Gregorio V præsentibus celebrato, anno superiori egimus, ideoque hæc ad annum illum retrahenda.

5. *Otto III corpus S. Adalberti in Polonia veneratur.* — Otto III nonnisi anno Christi millesimo devotionis causa in Poloniam profectus est, corpus *S. Adalberti* episcopi Pragensis et martyris veneraturus. Rem Baronius ex Ditmaro lib. 4, et ex eodem chronographus Magdeburgensis ad annum Christi millesimum iisdem pæne verbis recitat. In Chronico vero Lamberti Scasnaburgensis ad annum M habetur: « Gaudentius frater Adalberti martyris Pragæ archiepiscopus constituitur », ab Ottone nempe III, quando orationis gratia ad S. Adalbertum profectus est. Verum loco *Pragæ* legendum *Guesnæ*. Quispiam enim sciolus, sciens Pragenses non minus quam Guesnenses se corpus S. Adalberti habere gloriari, locum illum depravavit, quemadmodum et quispiam alius ejusdem farinae Chronicon Hildesheimense ad annum Christi M, ubi illa Ottonis III profectio etiam narratur, corripit. Ejusdem chronographi verba anno sequenti in medium afferemus. Neque enim Lambertus, qui sæculo sequenti e vivis excessit, aut chronographus Hildesheimensis, qui ante annum MCC opus suum absolvit, similes nugas scribere potuere; cum certum sit, *Pragam* anno tantum MCCCXLIV archiepiscopali sede cohonestatam fuisse. Præterquam quod Polonos inter et Bohemos convenit *S. Adalberti* corpus usque ad annum M *Guesnæ* quievisse, et sola inter eos lis est, an eo anno sacrum illud corpus Pragam translatum sit, quod contendunt Bohemi, et Poloni negant.

6. *Guesnam metropol. declarat.* — Anno itaque sequenti Otto III profectionem illam suscepit: « Bolislaus », inquiunt Ditmarus et chronographus Magdeburgensis, « dux Poloniæ, ad Diedesi pagum venienti imperatori parato in loco qui Ilua dicitur, suo hospitio multum hilaris occurrit. Qualiter autem ab eo honoraretur, et per sua usque ad Guesin (id est, *Guesnam*) deduceretur, dictu incredibile est. Videns autem a longe civitatem desideralam, nudis pedibus suppliciter advenit, et ab episcopo civitatis Ungero venerabiliter susceptus, Ecclesiam introducit, et ad Christi gratiam sibi impetrandam, martyris intercessio profusis lacrymis invitatur. Nec mora, fecit ibi archiepiscopatum, ut spero legitime, sine consensu tamen præfati præsulis et sui metropolitani (nempe Moguntini) cujus diœcesi omnis hæc regio subjecta est, committens eundem prædicti martyris fratri Kadimo (rectius dixisset Ditmarus, *Radzino*, quo nomine Poloni et

Bohemi, qui eadem lingua utuntur, Gaudentium significant) eique subjiciens Reinbernum S. Cholbergiensis Ecclesiæ episcopum, Popponem Cracuensensem (id est. Cracoviensem), Joannem Wiotislaniensem (Uladislaviensem intelligit) Ungere Posnaniensi excepto ». Anno itaque CMLXV, ut ibidem diximus, episcopatus in Polonia instituti, et Moguntino archipræsuli subjecti, anno vero M, iidem episcopatus subditi fuere novæ sedi metropolitanæ, nempe Guesnensi, in gratiam S. Gaudentii Adalberti fratris, ab Ottone III erectæ. Chronographus Hildesheimensis, ad annum M, de Ottone III scribit: « Episcopia VII disposuit, et Gaudentium fratrem B. Adalberti in principati urbe Sclavorum Praga (legendum, *Guesna*) ordinari fecit archiepiscopum licentia Romani Pontificis, causa petitionis Bolizlaviensis Boemiorum (legendum *Polonorum*) ducis, ob amorem potius et honorem sui venerandi fratris digni pontificis et martyris », sed chronographus verbo *disposuit*, intelligit tantum, *in meliorem ordinem reduxit*. Septem enim episcopatus illos jam ab anno CMLXV institutos, ex dictis ibidem liquet, et tam Ditmarus quam chronographus Magdeburgensis clare innuunt, quando aliquorum nomina designant.

7. *Ante an. M nulla metropolis in Polonia erecta.* — Scriptores tamen Poloni volunt, *Guesnam* anno CMLXV metropolim declaratam fuisse, et Adalbertum eidem Ecclesiæ ante hunc annum præsedisse. Scribit enim Joannes Longinus in Historia Polonica: « Anno Dom. CMLXVI, Robertum archiepiscopum Guesnensem obiisse, eique Adalbertum Pragensem episcopum successisse ». Longinum passim sequuntur historici Poloni cum Stephano Damalevicio, in Serie archiepiscoporum Guesnensium ante annos quadraginta Varsoviæ in lucem edita. Verum *archiepiscopatus Guesnensis* sancti Adalberti antiquiora Acta silent, ut inquit Henschenius in Commentario prævio ad Vitam sancti Adalberti ad diem XXIII Aprilis; quod proculdubio non omisissent, cum uterque auctor præfatorum Actorum profectionis Polonicæ sancti Adalberti disertam mentionem faciat, et posterior tradat, *Adalbertum Guesnæ* missam celebrasse, et baptizasse *populum grandem nimis*. Sed non solum uterque scriptor Vitæ S. Adalberti rem hanc loco, ubi memoranda erat, silentio prætermittit, verum etiam Ditmarus historicus pietate et doctrina clarus, qui paucos post hunc annos mortuus est, quique ideo narrat quæ ipsemet videre potuit, expressis verbis contrarium asserit, idemque postea alii scripsere, ut jam loco citato diximus. Verum est, eum in urbium nominibus designandis parum accuratum esse; sed vitium illud omnibus fere qui de rebus externis scribunt commune.

8. *S. Gaudentius primus archiep. Guesnen.* — Baronius recte vidit, quæ narrat Ditmarus auctoritate Apostolica facta esse; id enim chronographus Hildesheimensis citatus, qui post Baronii mortem Lucem vidit, diserte tradit. Subdit Baro-

nus vehementer se dubitare, an ea a Romano Pontifice probata fuerint; cum *Gregorius VII* anno *MLXXV ad Boleslaum Polonorum ducem* scribens dicat, episcopos terræ ejus non habere certum *metropolitanæ sedis locum*, et huc atque illuc pro sua ordinatione vagari, ideoque apparere usque ad *Gregorii VII* tempora nondum institutam fuisse sedem archiepiscopalem in Polonia. Verum ex *Gregorii VII* verbis illud tantum sequitur, quo tempore ipse litteras illas dedit, sedem metropolitanam vacasse propter gravissima quæ præcesse- rant bella, aut alias rationes nobis ignotas, non vero ante illum Christi annum nullum in Poloniæ regno metropolitam institutum. Sedem enim *Guesnensem* in protectione Polonica *Ottonis III* metropolim effectam, et sanctum *Gaudentium* archipræsulem renuntiatum, non video cum fundamento negari posse.

9. *Ossa Benedicti V PP. Hamburgo Romam transferuntur.* — Ad num. 45 et seq. *Ditmarus* lib. 3 refert, *Raconem*, electum Bremensem episcopum, *Ottonis III* jussu *Benedicti papæ V* ossa Hamburgo Romam reduxisse. In quam vero Ecclesiam sacra pignora delata fuerint, hactenus incompertum. *Adamus Bremensis* lib. 3, cap. 6, postquam dixit, *Benedictum V per tumultum* electum fuisse, manifeste insinuat ejus electionem fuisse legitimam; subdit enim: « Cum jam, Romanis poscentibus, a Cæsare restitui deberet, apud Hamburg in pace quievit ». Cumque Joannem XII ejus decessorem contra sacros canones depositum, et Leonem VIII antipapam in ejus locum subrogatum constet, electionis *Benedicti* validitas in dubium non revocanda. Nec refert quod coram legatis Cæsareis, ut *Ottonis M.* constitutio ferebat, consecratos non fuerit; Romani enim, mortuo Joanne XII, antequam ad novi Pontificis electionem procederent, de electione a se facienda *Ottonem M.* monuere. « Romanorum nuntii », inquit *chronographus Farfensis*, tom. III apud *Duchesnium*, « ad eum in civitate Reatina venerunt, mortemque Joannis intimantes *Benedictum* ei diaconum petierunt, sed minime obtinere valuerunt. Revertentes autem legati, eundem elegerunt *Benedictum* sine consensu imperatoris. Unde imperator magis in iram exarsit, et civitatem undique gravavit, et in tantam penuriam adduxit, ut modius furfuris venderetur triginta denariis. Coangustati vero Romani innocentem *Benedictum* imperatori tradiderunt, et dominum Leonem papam coacti receperunt, spondentes ei et domino imperatori, super corpus B. Apostoli Petri. Dimisit autem eis quanta et qualia mala perpessus est illis ». Fundamentum Constitutionis ab *Otione M.* datæ, fuit libertas electionis in creatione novi Pontificis. Quare cum ipsemet imperator libertatem illam tolleret, et antipapam palam foveret, *Benedictum V* eligere eumque consecrare, eo etiam dissentiente, potuere Romani, ut recte *Ditmarus* qui hoc tempore vivebat sensit, et ipsemet *Otto M.* innuit,

quando mortuo *Leone VIII*, ut *Benedictus V* restitueretur consensit, quod tamen ejus mors impedivit; *Otto vero III* etiam insinuat, cum ejus corpus Romam Hamburgo transferri jussit.

12. *Obitus Sisinnii patriarchæ Constantinop.* — Ad num. 20. *Cedrenus* de *Sisinnio* patriarcha Constantinop. loquens ait: « Cum tres tantum annos Ecclesiæ præfuisset, vitam cum morte commutavit. Ei successit *Sergius Manuelici* monasterii præsul, genus a *Photio* patriarcha ducens ». Tum pag. 747: « *Sergius*, cum per annos xx Ecclesiam Dei moderatus esset, Indictione secunda, mense Julio, anno mundi 6527, (Æræ nempe Constantinopolitanæ) ad Dominum emigravit », ideoque anno Christi millesimo decimo nono, annoque Christi currenti *Sisinnio* successerat, seditque annos viginti completos, vel fere completos. Quomodo itaque *Cedrenus* scribere potuit, *Nicolaum Chrysobergium*, *Sisinnii* decessorem, anno Christi *DCXCV* ante mensem Septembrem vivere desiisse? Quare eum ea in re hallucinatum fuisse non dubitandum; alioquin *Sisinnius* non annos tres, sed quatuor Ecclesiam Constantinopolitanam rexisset. Ad hunc *Cedreni* errorem nec *Baronius*, nec ullus alius, quem viderim, animum advertit.

11. *Arnulphus a Gregorio V in archiepiscopatum Rhemensem restitutus.* — *Silvestri II* nomine tom. IX Conc. refertur Epistola, ex Codice Ms. S. Remigii Rhemensis eruta, in qua legitur: « *Silvester* episcopus, servus servorum Dei, dilecto in Christo filio *Arnulpho* S. Rhemensis Ecclesiæ archiepiscopo. Apostolici culminis est non solum peccantibus consulere, verum etiam lapsos erigere, et propriis privatos gradibus reparatæ dignitatis insinibus informare: ut et Petro solvendi libera sit potestas, et Romanæ gloriæ ubique fulgeat dignitas. Quapropter tibi *Arnulpho* Rhemensi archiepiscopo, quibusdam excessibus Pontificali honore privato, subvenire dignum duximus, ut quia tua abdicatio Romano assensu caruit, Romanæ pietatis munere credaris posse reparari ». Postea *Arnulfum* restituit in omnia Rhemensis archiepiscopatus jura. At cum *Arnulfus* a *Gregorio V* in pristinum statum restitutus fuerit, uti jam ostendimus, non dubium quin librariorum oscitantia, quod non raro fit, Epistola illa a *Gregorio V* data *Silvestro* ejus successori adscripta fuerit. *Cossartius* in notula ad eam Epistolam, istam conjecturam aliamque proferit. Verum cum hæc certa sit, opus non est ad alias recurrere.

12. *Varia fortuna Adalberonis episc. Laudunensis.* — In eodem tom. IX Concil. recitatur alia Epistola *Silvestri II ad Azolinum Laudunensem episcopum*, in qua Pontifex ait, sibi oblatam esse Epistolam *Roberti* regis et episcoporum Galliæ, qua eum accusat, quod ad Synodum Compendio habitam tandem venerit. Verum subdit Pontifex: « Legimus te non posse objectis respondere manifeste, dominum regem tuum offendisse te non negasti, indulgentiam tantummodo postulans per

universam Synodum, regis gratiam innovatis perjuriis obtinuisti, datis obsidibus, archidiacono scilicet tuo et altero milite. Turres Lauduni te redditurum promisisti. Magistrum tuum Rhemensem archiepiscopum, pro accipiendis turribus sub Judæ specie tecum ducens, capere voluisti, etc.» Quare eum Romam ad Synodum proxima Paschali hebdomada celebrandam venire præcipit. *Ascelinus* seu *Ascelinus*, dictus etiam *Adalbero*, Ecclesiæ Laudunensis episcopus, dum adhuc juvenis esset, renuntiatus fuit; et ut erat homo pecuniosus, Ecclesiæ suæ multa bona largitus est: sed liberalitatem ejus, doctrinam cæterasque dotes suas insigni perfidia fœdavit. *Carolus* enim Lotharingum ducem, cujus consiliarius erat et in cujus verba juraverat, *Hugoni* Francorum regi portis Lauduni nocte patefactis tradidit, et ea ratione eum regni compotem fecit. Tum anno DCDXCI Synodo Rhe-

mensi interfuit, in qua *Arnulfum* Rhemensem archiepiscopum, quem antea ipse solus reconciliaverat, cum consacerdotibus suis damnavit (1). Denique in laudata *Silvestri* Epistola, publicis criminibus insimulatus, Romam ad dicendam causam evocatur. Sed has omnes veluti tempestates feliciter elusit, ac gratiam *Roberti regis* recuperavit, ut Carmen ejus ad Rotbertum regem Franc., ab Hadriano Valesio aliquot ante mortem suam annis e veteri Ms. erutum, fidem facit. Ex eo enim apparet, eum *Roberto regi* amicum atque etiam familiarem, ac doctum pro illorum temporum captivum. Quoad *Arnulfum* Rhemensem archiep., Albericus et auctor Chronici Cameracensis lib. 3. cap. 22, eum anno MXXXIII e vivis abiisse testantur. Jacet in Choro S. Remigii, ubi in suo Epitaphio laudatur a pietate, ab eleemosynis, et ab aliis magnis dotibus.

(1) Ascelinus iste, seu Adalbero Laudunensis, vivebat adhuc anno MXVIII, quo Arnulphus Rhemensis dedit Privilegium suum pro immunitate monasterii Mosomensis in diœcesi Rhemensi. Datum est illud Lauduni A. MXVIII, Ind. I, ac subscribitur ab archiepiscopo, et ab episcopis quatuor, inter quos nomen Adalberonis sanctæ Laudunensis Ecclesiæ legitur. Ex hac pariter Charta confirmatur, quod Pagius hic per conjecturam tantummodo assecutus fuit, nempe Arnulphum in gratiam Roberti regis tandem rediisse, cum ibi asserat se, ut eam immunitatem largiretur permolum fuisse *consilio Roberti regis Francorum*. Tandem ibidem narrat se ante multos annos Romam petiisse cum Bosone ejusdem monasterii abbate, quam peregrinationem tunc facile obivit, cum ejus abdicationis causa maxime ferveret, nempe inter annos DCDXC et DCDXCIX.

Quin et anno MXXV Adalbero adhuc in vivis erat, cum signet Diploma Ebali Rhemensis archiepiscopi, datum anno Roberti XXVIII, episcopus Ebali II, Indict. VIII. Martene Anecdol. tom. I, col. 144. Ex quo Diplomate patet Arnulphum, Ebali antecessorem, anno MXXXIII diem claudere potuisse, ut optime auctores apud Pagium hic.

MANSI.

SILVESTRI II ANNUS 2. — CHRISTI 1000.

1. *Anacephalæosis annorum mille decursum*. — Millesimus Christianæ religionis numeratur annus, decima tertia inchoatus Indictione, ubi tu, lector, aliquantisper, rogo, subsistens, illud propheticum mente volve¹: « Mille anni ante oculos tuos, tanquam dies hesternæ quæ præterit ». Et quod ait Petrus²: « Unus dies apud Dominum sicut mille anni, et mille anni sicut dies unus ». Ac meditare universum istum decursum status Ecclesiæ, millenarium hoc ipsum tempus annorum, tanquam diem unum, in quo licet sol nocte non luxerit, et die obice nubium sæpe latuerit, atque ventorum turbine, tonitribus ac fulminibus, grandine, pluvia, apparuerit permole-

slus; nunquam tamen dixeris perditum esse solem, et diem, non Dei, sed de certa veritate securus, cum Propheta cantabis¹: « Tuus est dies, et tua est nox »: eo quod² « sicut tenebræ ejus, ita et lumen ejus ». Ita plane contemplari licet Dei Ecclesiam hujus millenarii curriculo circumductam unius instar diei, in quo nec ad momentum quidem reliquerit eam sol justitiæ Christus, qui sicut ille sol ad hoc creatus est, ut præsit diei³, ad hoc factum est Verbum caro, ut præsit Ecclesiæ; sed fortius istud, siquidem dicat⁴: « Cælum et terra transibunt, verba autem mea non præteribunt ». Sive igitur Ecclesiam vidisti luce clarescere, sive tenebris obscurari, nunquam tamen eandem (si

¹ Psal. LXXXIX. — ² 2. Pet. III.

¹ Psal. LXXIII. — ² Psal. XXXVIII. — ³ Gen. I. — ⁴ Matth. XXIV.

sapis) fuisse dixeris sine Christo, aut sine Ecclesia Christum, sed quod sit in Christo semper Ecclesia, et in Ecclesia « Jesus Christus heri et hodie ipse et in sæcula¹ ». Hæc pro anæcephalæosi annorum mille dicta sunt : jam quæ sunt anni hujus res gestas videamus.

2. *Quorundam hæreticorum conatus et infelix exitus.* — Nitidus illuxit præsens millenarius annus, quem divina luce coruscum, ad vesperam arte diabolica obscurare nubeculæ visæ sunt, sed statim evanuerunt. De his enim Glaber, temporis hujus auctor, testisque fidelis, agens de stultis hominibus hæreses disseminare conantibus, hæc habet² : « Exiit circa finem millesimi anni homo plebeius in Galliis, apud vicum Virtutis vocabulo, in pago Catalonico, Leutardus nomine, qui (ut finis rei probavit) satanæ legatus credi potuit, ejus etiam vesaniæ pervicacia hoc exordium habuit. Morabatur enim aliquando solus in agro, quidpiam ruralis operis peracturus, qui ex labore somno depressus, visum est ei, ut grande examen apum in ejus corpus per secreta ingrederetur naturæ, quod etiam per illius os nimio cum strepitu erumpens, crebris illum punctionibus agitabat. Ac diu multumque agitato stimulis, loqui ei videbantur, et multa hominibus impossibilia præcipere ut faceret. Tandem fatigatus exurgens, venit domum, dimittensque uxorem quasi ex præcepto Evangelico, fecit divortium. Egressus autem velut oraturus, intrans Ecclesiam, arripiensque crucem et Salvatoris imaginem contrivit. Quod cernentes quique territi pavore, credentes illum (ut erat) insanum fore. Quibus etiam ipse persuasit, sicut sunt rustici mente labiles, universa hæc patrare ex mirabili Dei revelatione.

3. « Affluebat igitur nimium sermonibus utilitate et veritate vacuis, doctorque cupiens apparere, dedocebat magistrum doctrinæ. Nam decimas dare dicebat esse omnimodis superfluum et inane. Et sicut hæreses cæteræ, ut cautius decipiant, Scripturis se divinis quibus etiam contrariæ sunt palliant, ita et iste dicebat profana ex parte narrasse, utilia ex parte non credenda. Cujus etiam fama, quasi alicujus mente sani ac religiosi, in brevi ad se traxit partem non modicam vulgi. Quod comperiens vir eruditissimus Lebuinus senex episcopus, in cujus scilicet erat diœcesi, accersiri illum (ad se jussit. Quem cum interrogasset de universis quæ dixisse vel fecisse compererat, cœpit venenum suæ nequitiae occultare, cupiensque quod non didicerat, de Scripturis sanctis testimonia sibi assumere. Audiens vero sagacissimus episcopus non esse convenientia, imo non magis turpia quam damnabilia, ostendens hominem insanientem hæreticum factum, revocavit ab insania populum ex parte deceptum, Catholicæ plenius restituit fidei. At ille cernens se devictum, atque ambitione vulgi destitutum, semet

poteo periturus immersit ». Illic finis pseudo-apostoli a satana missi, sui apostolatus signa prima proferens Iconoclastiam crucisque contemptum, ut scias pariter a quonam missi sint reliqui omnes, qui eadem præsentī sæculo factitarunt. De alio autem æque insano a diabolo cluso hæresiarcha subdit mox ista :

4. « Ipso quoque tempore non impar apud Ravennam exortum est malum. Quidam igitur Vilgardus dictus, studio artis grammaticæ magis assiduus quam frequens, sicut Italis semper mos fuit artes negligere cæteras, illam sectari. Is enim cum ex scientia suæ artis cœpisset inflatus superbia stultior apparere, quadam nocte assumpsere dæmones poetarum species, Virgili et Horatii atque Juvenalis : apparentesque illi, fallaces retulerunt grates, quoniam suorum dicta voluminum charius amplectens exerceret; seque illorum posteritatis felicem esse præconem, promiserunt ei insuper suæ gloriæ postmodum fore participem. Hisque dæmonum fallaciis depravatus, cœpil multa turgide docere fidei sacræ contraria, dictaque poetarum per omnia esse credenda asserebat. Ad ultimum vero hæreticus est repertus, atque a pontifice ipsius urbis Petro damnatus. Plures etiam per Italiam tempore hujus pestiferi dogmatis reperti, quique ipsi aut gladiis aut incendiis perierunt. Ex Sardinia quoque insula, quæ his plurimum abundare solet, ipso tempore aliqui egressi, partem populi in Hispania corrumpentes, et ipsi a viris Catholicis exterminati sunt. Quod præsagium Joannis prophetiæ congruit, qua dixit satanam solvendum expletis mille annis³. Ita quidem quid de se ista esse scripta diabolus non ignoravit, pristinas tentans experiri vires, in crucem Christi, qua senserat se fuisse prostratum, primum impetum fecit, inde vero idolatriam, qua olim orbem triumphaverat universum, conatus est per suum pseudo-apostolum arte grammaticum, restituere. Sed prosequamur cætera.

5. *Otto imperator corpus S. Adalberti Romam deferret, Ecclesiam illi ædificat, in qua præter alia S. Bartholomæi corpus condit Benevento translaturum.* — Hoc eodem anno Otto imperator, ex Polonia quo pietatis ergo (ut audisti) fuerat peregrinatus ad visitanda sacra pignora S. Adalberti martyris, Romam rediens, sacras reliquias secum detulit ejusdem martyris, quibus ubi collocarentur, erigendam curavit Ecclesiam in insula Tyberina, loco Urbis notissimo, sui que antiquitate omnium rerum Romanarum scriptorum memoria famosissimo. De qua quidem translatione Appendix ad Vitam ejus inscripto Codice habet ista : « Quo audito », nempe post martyrium, « fama miraculorum ejus, Otto Tertius imp. ardorem tanti martyris non ferens, cum senatu Romano et episcopis et clericis extra montes in Slavoniam pergit, ad educandas Romam reliquias beati martyris Adalberti :

¹ Heb. XIII. — ² Glab. hist. l. II c. 11. 12.

³ Apoc. XX.

qui manus ejus auferens, auro et gemmis mire exornavit, et Ecclesiam nomini ejus inter duos pontes fabricavit, et magnæ dignitati tradidit. Tunc incepit inquirere corpora sanctorum martyrum, et præcepit, ut ubicumque inventa fuissent, ad Ecclesiam beati Adalberti deportarent. Et nuntiatum est illi, quod in Ecclesia beatorum Abundii et Abundantii martyrum, quæ est juxta montem Soractem, erant plura sanctorum martyrum corpora: qui misit suos nuntios episcopos, clericos et monachos, ut cum omni honore et diligentia cum hymnis ad Ecclesiam S. Adalberti ea deferrent. Qui prolinus abierunt, et cœperunt inquirere ubi essent tumuli eorum. Et invenerunt in uno tumulo corpora sanctorum Abundii et Abundantii posita, et in alio tumulo corpus S. Theodoræ, quæ illos in prædio suo sepelierat. Invenerunt etiam inter eos sanctos martyres, qui habebant inauratas vestes et mire exornatas, et super altare eorum mensam sculptam et nimis decoratam, et deportata sunt omnia, secundum jussum imperatoris, ad Ecclesiam S. Adalberti martyris ». Hæc ibi. Verum cum haud multum intercederet temporis, ex quo idem Otto ex hac vita migraret, dicti martyres alio translati sunt: nam S. Abundii et Abundantii veneranda corpora delata inde sunt ad diaconiam SS. martyrum Cosmæ et Damiani, unde etiam paucos ante annos solemnī pompa delata sunt in Basilicam Societatis JESU.

6. Otto vero, quo inchoatam a se Romæ Ecclesiam quamplurimis posset sacris sanctorum reliquiis exornare, consilium iniit, ut corpus S. Bartholomæi Apostoli, Beneventi consistens, illinc Romam; deduceret necnon famosissimi confessoris Paulini, Nolani episcopi, corpus pariter inde Romam transferret. Cujus rei explendæ ea occasione Beneventum veniendi uti opportune voluit, ut Deo debitam ex promissione ad Memoriam S. Michaelis Archangeli ad montem Garganum in Apulia situm pedestri itinere peregrinationem exsolveret. Quod hoc anno factum ab ipso, Leo Ostiensis ex antiquis Cassinatis monasterii monumentis affirmat, licet ipsi plurimum contradicatur, dum ait a Beneventanis aliud corpus loco S. Bartholomæi tunc fuisse suppositum. Sed audi ipsum, qui sic ait¹: « Ilujus abbatis anno tertio, qui est millenarius ab Incarnatione Domini, memoratus imperator Beneventum venit, ut pœnitentiæ gratia, quam illi vir Dei Romualdus indixerat, montem Garganum adiit, reversusque Beneventum, S. Bartholomæi corpus ab eis postulavit. Qui cum illi negare nihil audent, callide pro corpore Apostoli, beati episcopi Paulini Nolani corpus, quod erat in majori Ecclesia civitatis honorifice conditum, ostendere. Ille nihil fraudis suspicans, eo sublato, recessit. Sed hoc ubi ille rescivit, nimis indignans, corpus quidem confessoris Christi Romam ad insulam honore congruo condidit, sequenti vero tempore Beneventum rur-

sum advenit, eamque diebus multis undique obsidens, cum nihil ex obsidione proficeret, Romam iterum redit, etc. » Hæc Leo, cui (ut dictum est) a pluribus contradicatur, asserentibus omnino ejusdem Apostoli corpus in Ecclesia in honorem S. Adalberli exstructa, certo certius asservari. « Cujus veritatis in testimonium adducuntur Romanorum Pontificum sacra Diplomata, atque Friderici imperatoris litteræ Constitutionis vim habentes, datæ anno millesimo centesimo sexagesimo septimo ». Accedunt his Acta Synodalia sub Alexandro Tertio, de quibus suo loco inferius dicendum.

7. Porro coegit necessitas, ut post multum temporis eadem Apostoli sacræ reliquiæ detegerentur et veritas innotesceret; quod Robertus, qui ad Sigebertum adjecit Appendicem, anno Domini millesimo centesimo quinquagesimo septimo sic enarrat: « Circa hoc tempus, inundatione Tyberis facta non modica, Romæ in quadam insula ejusdem fluminis, in Ecclesia antiqua, inventum est in quodam sarcophago corpus B. Bartholomæi Apostoli totum integrum, excepto corio quod remansit Beneventi, quando Otto imp., capta eadem civitate, corpus prædicti Apostoli transtulit Romam, sicut tabulæ ærææ demonstrant scriptæ litteris græcis et latinis, quæ repertæ fuerunt in corpore Apostoli. Repertum est in eadem Ecclesia corpus beati Paulini Nolani episcopi ». Hæc ipse.

8. Factum est autem, ut illatione corporis S. Bartholomæi in Ecclesiam sub titulo Adalberti martyris inchoatam, transierit ipsa in nomen et cultum ejusdem Apostoli Bartholomæi, memoriaque Adalberti hoc modo fuerit paulatim oblivione deleta. Nam qui restituit eandem Ecclesiam Paschalis II, post centum et tredecim annos, hos versus in superliminari portæ majoris ejusdem Ecclesiæ inscribendos curavit, qui hodie quoque ita leguntur:

Tertius istorum rex transtulit Otto piorum
Corpora, quæ domus hæc sic redimita viget.
Quæ domus ista gerit, si pignora noscere quæris,
Corpora Paulini sint credas, Bartholomæi.

Et post hæc in fine:

« Tempore Paschalis II Papæ, anno Dominicæ Incarnationis m.c.xiii., Indictione septima, mense Aprili, die quarta ». Hæc ibi. Ex quibus manifesti erroris redarguuntur illi, qui sub Ottone Secundo id factum esse scripsere.

9. At si quæras, cur tanti Apostoli corpus non in aliqua amplissimarum Basilicarum sit reconditum, sed in Ecclesia nullo modo patriarchalibus Basilicis comparanda: plures possunt afferri causæ, vel quod (ut plerique aiunt) delaturus illud Otto in Germaniam, illic ad tempus duntaxat voluit collocasse: vel quod quam extruere inchoavit Eccl., eam, (ut audisti) quamplurimis quærens nobilitare reliquiis, et Apostolico pignore reddere celeberrimam, si vixisset, in longe augustiorem formam extruxisset.

¹ Leo Ost. l. II, c. 24.

10. *Otto imperator congregitur cum S. Nilo: Adelaidem aviam exstinctam deflet.* — Quod vero translationem hanc ab Ottone III factam audisti, cum ad Garganum montem peregrinationem illam indictam a Romualdo suscepisset: congressum ejusdem imperatoris tunc temporis habitum cum viro sanctissimo Nilo abbate (de quo plura superius) in volumine rerum ab eo gestarum conscriptum hic reddere, dignum existimamus. Quem recitat ejusdem temporis auctor, idemque ejusdem Nili discipulus:

11. « Imperator vero pœnitentiam pollicitus, pedes ab Urbe ad Garganum montem ivit, ad S. Michaelē archangelum. Et inde reversus, per beati Nili hospitium transivit. Cum igitur venisset ad monasterium, et vidisset fratrum tuguria circa oratorium constructa dixit: ecce tabernacula Israel in deserto: Ecce habitores regni cœlorum. Isti non ut habitatores, sed ut peregrini manent hic. Beatus vero Nilus, cum percepisset thuribulum suum (quod moris erat) obviam illi ivit cum universis fratribus, et cum omni humilitate et veneratione ipsum excepit honorifice. Imperator autem supposita manu, Nilum sublevans et sustentans, ingressus est cum eo in oratorium. Deinde facta oratione, dixit imperator S. Nilo: Dominus noster Iesus Christus, dum erat cum Apostolis, præcepit illis, ne peram, aut baculum, aut duas vestes possiderent¹. Cum vero accederet passioni, iterum dixit illis²: Sed nunc qui habet sacculum, tollat simul et peram. Tu igitur quoque cum jam senueris, et debeas proficisci ad regnum cœlorum, sit tibi curæ de tuis alumnis, ne post te angustiati loci difficultate, recedentes dissipentur. Nos dabimus tibi monasterium et proventus, ubicumque volueris in universa provincia nostra. Cui beatus ita respondit: Davidem audiui dicenlem³: Salva me, Domine, quoniam defecit sanctus, quoniam defecit veritas a filiis hominum. Et iterum⁴: Non est qui faciat bonum, non est usque ad unum. Si omnino sunt monachi fratres mei, et custodient pro virili Christi mandata: ipse qui usque adhuc mecum curam gessit de ipsis, multo majorem geret absque me de iis qui sperant in ejus misericordia. Hæc et alia multa cum dicta essent, surrexit imperator, ut discederet. Et iterum conversus ad senem, dixit illi: Pete a me tanquam a filio tuo quodcumque volueris, et cum omni alacritate perficiam tibi. Beatus vero Nilus cum extendisset manus ad pectus imperatoris, dixit illi: Nihil aliud peto ab imperio tuo, præter salutem animæ tuæ. Licet enim imperator existas, tanquam unus de hominibus debes mori, et ad iudicium venire, et rationem reddere eorum quæ fecisti, bonorum sive malorum operum. Hæc cum audisset imperator, guttas lacrymarum profunde ex oculis suis. Deinde coronam suam in manibus S. Nili deponens, ab ipso benedictionem adeptus cum omnibus qui cum illo erant, iter

suum prosecutus, etc. » Ita plane S. Nilus se suosque ad monasticam vitam composuit, ut nusquam firmas fixerit sedes, sed peregrinantium more, ubi aliquo in loco aliquandiu mansisset, aliqua occasione captata, una cum suis alio transmigraret; ita expedire iudicans ad omnes numeros perfectissimæ monasticæ observantiæ exsolvendos, ut affectus liberos ab omnibus terrenarum rerum compedibus conservaret.

Hoc item anno, Ottonis imperatoris III proavia Adelais, Primi Ottonis conjux, ex hac vita migravit die decima sexta Decembris. Res ab ea præclare gestas scriptas fuisse a S. Odilone abbate Cluniacensi, valde asseveranter testatur Molanus in Notis ad Martyrologium Usuardi, easque in præsentiarum reperiri in quibusdam Germaniæ et Burgundiæ Ecclesiis. Porro Vitam ipsius editam a Canisio¹ tomo quinto Antiquæ lectionis, eam esse quam citat Molanus scriptam ab Odilone, nulla apud me dubitatio est: concordant siquidem tempora. Et dum frequenter incidit mentio de S. Maiolo abbate itidem Cluniacensi, ipsum summa veneratione suum patrem appellat: sane quidem se ejus successorem esse S. Odilonem profiteri, videri potest cuique recte intuenti. Ab eodem auctore Adelais titulo sanctitatis insignitur, quod certe vir sanctus non fecisset, nisi prævia canonizatione Apostolicæ Sedis. Nam antequam id acciderit, audi ipsum, quam sobrie de cultu et veneratione sanctorum eidem tribuenda pertractet, dum ait: « Et quia illius merita sine Apostolici decreto clerique consensu celebrari non licuit, prædicto in loco beatæ Mariæ oratorium se constructurum promisit, etc. » Hæc ipse ibi. Qui cum in fine Vitæ ipsius apponat publicas preces dicendas in Missa ipsius et Horis canonicis, plane auctoritate, quam exigebat, Apostolici, nempe Romani Pontificis atque Romani cleri id esse factum ostendit. Quod ad ejus obitum pertinet, prævenisse eam suis precibus Deum, ne videret obitum Ottonis imp. sui nepotis, certum est. Audita enim morte Franconis episcopi, quem anno superiori ex hac vita excessisse vidimus, magni meriti sanctum virum, hoc expetisse testatur Odilo, cum hæc ait²: « Cum enim esset ab illo sacro loco egressura, (nempe a martyribus Agauensibus), et secum staret (starem) in angulo Ecclesiæ orationis gratia, quidam nuntius venit ad eam de Italia, qui Franconem Wangionensem episcopum nuntiavit Romæ fuisse defunctum. Et quia vir boni testimonii erat, domina Augusta valde illum diligebat, sicut et omnes bonos diligere solita erat. Et statim ut ejus obitum audivit, ex familiaribus qui aderant unum vocavit, et ut pro eo Domino preces effunderet, humiliter rogavit ». Hunc ipsum fuisse auctorem Odilonem, qui modestiæ causa suum reticuit nomen, quæ ab eo sunt dicta superius persuadent. Pergit vero: « Et

¹ Luc. X. — ² Luc. XXII. — ³ Psal. XI. — ⁴ Psal. XIII.

¹ Tom. v Antiq. lect. pag. 399. — ² Lib. I. c. 12. tom. v Antiq. lect. p. 407.

quasi in excessu mentis ita exorsa est, dicens : Quid faciam, Domine : vel quid dicam de illo seniore nostro, et nepote meo ? Peribunt (ut credo) in Italia multi cum eo ; peribit post ipsos, ut timeo, heu misera ! Augustæ indolis Otto. Remanebo omni humano destituta solatio. Absit, o Domine rex sæculorum, ut videam superstes tam lugubre dispendium. Tunc videres Augustam toto corpore solo prostratam. Non minus videres eam toto mentis annisu cælo intentam, et quasi jam martyris Mauriti vestigia invenisse, ac lymphatico ore prolingere. Post paululum vero ab oratione surrexit, munera martyribus, eleemosynam dedit pauperibus. De hinc Genevensium adiit urbem, desiderans videre victoriosissimi Victoris martyris aulam, etc. » Consule, si libet, dignas ipsius laudes digne conscriptas, nempe candore sinceræ veritatis ab Odilone.

12. *S. Stephanus titulo regis Hungarorum insignitur a Sede Apostolica.* — Quartus hic numeratur annus S. Stephani Ungarorum regis, cum legatos misit ad Romanum Pontificem, a quo et regni coronam accepit, ut qui hactenus dux dictus fuerit Ungarorum, ex hoc anno rex cœperit appellari ; ipse vero regnum ipsum eidem Ecclesiæ Romanæ donavit. Rem gestam a Cartuitio episcopo, in Vita ejusdem sancti regis quam scripsit ad Colomannum regem, sic accipe ¹ : « Deinde quarto a patris obitu anno divinitus permotus, eundem Africum præsulem, qui etiam Anastasius dictus est, ad sanctorum Apostolorum Limina misit, a Petri Apostolorum principis successore petitum, ut recens conversæ Pannoniæ largam benedictionem impertiret, Strigoniensem Ecclesiam sua auctoritate metropolim constitueret, reliquos episcopatus sua benedictione firmaret, et ipsum ducem regio diademate cohonestaret, ut eo fultus honore, quæ divinæ gratiæ adiutorio cœpisset, ea magis magisque promovere ac stabilire posset. Per idem tempus etiam, Meisca ² Polonorum dux Christianam complexus fidem, legatos suos Romam miserat, ut Pontificis benedictionem et regium ipsi titulum impetrarent. Assenserat quidem Pontifex, et jam coronam egregio opere confici curaverat quam ei mitteret, sua benedictione adjuncta. Sed quia novit Dominus qui sunt ejus, qui etiam duobus Apostolis propositis Matthiam socio suo prætulit, et cum Apostolis annumerandum curavit : illa corona Stephanum ornari voluit, postea feliciter gloria sempiterna coronandum.

13. « Nocte enim ejus diei, quo statuerat Pontifex coronam Polonorum principi dare perferendam, apparuit ei angelus Domini, aitque ad eum : Noveris, cras hora diei prima, ignotæ gentis nuntios ad te venturos, suo duci coronam regiam et Apostolicæ benedictionis munus abs te expetituros.

Eam ergo coronam quam parari jussisti, illis incunctanter tribue ad ipsorum ducem eam asportaturis, nec dubites illi eam cum regni gloria provitæ ejus meritis deberi. Itaque crastina luce, ea hora qua prædictum erat, præsul Astricus ad Pontificem venit, demandatumque sibi officium prudenter exequens, sanctique ducis res gestas ordine referens, a Sede Apostolica regni coronam petiit, ostendens dignum esse ducem eo honore et dignitate, quippe qui divina fretus ope multos sibi populos subjugasset, multosque infideles sua potentia ad Christum convertisset. Iis auditis mire exhilaratus Pontifex, precibus illius libenter annuit : crucemque ante regem, ceu Apostolatus insigne gestandam adjunxit. Ego, inquit, sum Apostolicus, at ille merito Christi Apostolus dici potest, cujus opera tantum populum sibi Christus requisivit. Atque ea causa, quemadmodum divina gratia ipsum docebit, Ecclesias Dei una cum populo nostra vice ei ordinandas relinquimus. Omnibus impetratis quæ postularat, Antistes Africus lætus ad suos revertitur, illud secum ferens, cujus causa iter illud emensus erat. Allatis vero Apostolicæ benedictionis litteris cum corona et cruce, præsules cum clero, comites cum populo in laudes Dei prorumpunt, et Deo dilectus Stephanus princeps ungitur in regem, et diademate regio feliciter coronatur ». Hæc Cartuitius.

14. *In Polonia occasione coronæ regiæ martyrium subeunt monachi.* — At indigne hæc ferentes rerum Polonarum scriptores ¹, coronam scilicet paratam duci Poloniæ, Dei monitu datam duci Ungarorum, tradunt regium nomen atque regium diadema duci Poloniæ datum ab Ottone imp. tunc cum in Poloniam ipse (ut prædictum est) ad S. Adalberti recentis martyris visendum corpus profectus est. At in his minime ipsis assentiri possumus : si enim accepissent ab Ottone imperatore, cur opus fuit postea quærere ab ipso Romano Pontifice post Ottonis obitum, imperante Henrico imperatore ? non igitur id factum per Ottonem putamus, magis persuasi auctoritate sæculi hujus scriptoris laudatissimi Petri Damiani episcopi Ostiensis, S. R. E. cardinalis, veritatis in omnibus amantissimi : ipse enim in rebus gestis S. Romualdi, opportuna occasione divertens ad res Polonorum sub Sclavorum nomine recensendas, ait discipulos sancti Romualdi petitos ab Ottone, illuc esse missos ad prædicandum, quorum causam martyrii cum enarrat, meminit de legatione ab eodem duce Boleslao (quem corrupto vocabulo, vel depravato textu, Busclavum legimus) ad Romanum Pontificem missa pro corona regia consequenda, elegantemque ejusmodi contextit historiam ² :

15. « Busclavus (Boleslaus) autem volens coronam sui regni ex Romana auctoritate suscipere :

¹ Cart. in vit. S. Steph. reg. c. 7. apud Sur. tom. IV, die XX Aug.
— ² Meisca filius Boleslaus.

¹ Chron. I. III. in Bolesao. — ² Habet apud Sur. tom. III, die XIX Jun. ibid. c. 32.

prædictos venerabiles fratres obnixa cœpit supplicatione deposcere, ut ipsi plurima ejus dona papæ deferrent, et coronam sibi a Sede Apostolica reportarent. Qui regiae petitioni assensum penitus denegantes, dixerunt: Nos in sacro ordine positi sumus, tractare nobis sæcularia negotia minime licet. Et ita relinquentes regem ad cellam reversi sunt. Quidam vero regis familiares agnoscentes ejus desiderium, sed quid sancti viri respondissent ignorantes, copiosum auri pondus, quod mittendum papæ fuerat, secum eos detulisse ad cellulam falso opinati sunt. Deinde intra se conditione pacta condicunt, ut noctu eremum latenter ingressi, et monachos interficerent et pecuniam asportarent. Quos cum beati viri tentantes irrumpere persensissent, adventus eorum causam protinus agnoscentes, confessionem inter se fecere, et sanctæ crucis se cœpere vexillo communire. Erant autem ibi duo pueri, eorum obsequio ex aula regia deputati, qui prout vires dabant, stare pro sanctis, et furibus resistere nixi sunt.

16. « Fures reperto tandem aditu irruentes, extractis gladiis, omnes pariter occidere. Tunc thesaurum anxie perquirentes, sed eversis omnibus et nihil inventientes, ut tanti reatus crimen obtegerent, et humana suspicio non armis, sed flammis potius quod fuerat deputeret, cellam incendere et ipsa martyrum conati sunt cadavera conflagrare. Sed admoti ignes amissis naturæ viribus, nil omnino consumere, ullis hominum studiis potuere. Ita enim eos ipsa etiam parietum materia repellebat, ac si pro lignis durissimi silices essent. Frustrati itaque fures in fugam se conferre nituntur. Sed et hoc illis ex divina providentia denegatur, tota siquidem nocte per fruteta nemorum, per latitudinem saltuum, per opaca silvarum viam anxii sunt quærere, quam nullatenus valere errantibus vestigiis invenire. Sed neque pugiones in vaginas arefactis brachiis recondere potuerunt. Ubi vero sanctorum jacebant corpora, copiosum lumen usque ad diem splendescere, et dulcissima angelicæ cantilenæ non desiit suavitas resonare.

17. « Adveniente autem die, quod factum fuit regem latere non potuit. Qui illico ad eremum cum copiosa populi multitudine festinavit, et ne fures evaderent, facta corona hominum, totam silvam undique circumcinxit. Qui tandem reperti sunt manifesti criminis rei, et ad gladios suos adhuc ultione divina ligati. Rex autem quid de eis faceret habita consideratione deliberans, hoc postremo decrevit, ut nequaquam eos sicut merebantur occidi præiperet, sed ferreis catenis vinctos ad sepulchra martyrum destinaret, quatenus aut ibi usque ad obitum in vinculis viverent miserabiliter, aut si sanctis martyribus aliter videretur, ipsi eos sua misericordia liberarent. Qui cum ad sanctorum tumultum fuissent ex præcepto regis attracti, mox ineffabili divinitatis omnipotentia fractis sunt nexibus absoluti. Deinde facta super sanctorum corpora Basilica, innumerabilia non solum

tunc, sed et nunc, ibi fiunt ex divina virtute prodigia ». Ilæc de martyribus Petrus, quorum nomina sunt superius recitata, nempe Joannes et Benedictus, S. Romualdi discipuli. Ex quibus et illud apparet, ista facta esse non sub Meisca (ut Cartuitius ponit) non sub Boleslao filio transacta; nec sub Ottone tantum, sed sub ejus successore Henrico imp. talia petere a Romano Pontifice perseverasse, ex his quæ subjicit idem Petrus possumus intelligere; ait enim ¹:

18. « Imperator autem Henricus, Busclavi (Boleslai) consilium non ignorans, undique vias custodiri præceperat: ut si Busclavus Romam nuntios mitteret, in ejus illico manus devenirent. Monachus igitur, qui nuper missus a sanctis martyribus fuerat, demum captus est, et mox carcerati custodiæ mancipatus. Nocte vero illum angelus Domini in carcere visitavit, et consummatos eos esse quorum legatione fungebatur admonuit, statimque aperto divinitus carcere, præparatum sibi esse navigium in fluvio quem transiturus erat, asseruit. Quo festinans monachus, angelicæ promissionis fidem veram esse probavit ». Hactenus de his Petrus non tam rebus Polonicis quam Romualdi intentus: eas enim obiter per digressionem attingit. Quibus apparet nullatenus ab Ottone imp. ut tradunt, regis titulum Boleslaum obtinuisse, quem constat esse quæsitum tempore Henrici imp. ejus successoris, non ab imperatore, quem (ut audisti) sibi expertus fuerat adversantem, sed a Romano Pontifice, a quo id petere primum cœpit.

19. *De regno Ungariæ oblato Sedi Apostolicæ, et inde animadversiones.* — Sed ut ad S. Stephanum regem Ungarorum revertatur oratio, cur ipse tantam divinitus revelatam gratiam promeruerit ut alteri paratam coronam acceperit: ex Epistolis Gregorii papæ Septimi causam possumus intelligere eam fuisse, quod scilicet ipsum regnum Ungaricum Romanæ Ecclesiæ donarit. Sunt de his haud obscura testimonia pluribus, ejusdem Pontificis litteris ² comprobata, ex quibus vel unas hic describere necessarium duximus; sic se habet ³:

20. « Gregorius servus servorum Dei, Salomoni regi Ungarorum salutem et Apostolicam benedictionem.

« Litteræ tuæ ad nos tarde propter moram nuntii tui allatæ sunt: quas quidem multo benignius manus nostra suscepisset, si tua in causa conditio non adeo beatum Petrum offendisset. Nam sicut a majoribus patriæ tuæ cognoscere potes, regnum Ungariæ sanctæ Romanæ Ecclesiæ proprium est, a rege Stephano olim B. Petro cum omni jure et potestate sua oblatum et devote traditum. Propterea Henricus, piæ memoriæ imp., ad honorem S. Petri regnum illud expugnans, victo rege et facta victoria, ad corpus B. Petri lanceam, coronamque transmisit, et pro gloria triumphi sui

¹ Pet. Dam. ibid. c. 34. — ² Greg. I. II. Ep. XIII. LXIII. LXX. et I. III. Ep. XXV. — ³ Ibid. I. II. Ep. XIII.

illuc regni direxit insignia, quo principatum dignitatis ejus attinere cognovit. Quæ cum ita sint, tu tamen in cæteris a regia virtute et moribus longe discedens, jus et honorem S. Petri, quantum ad te, imminuisti et alienasti, dum ejus regnum a rege Tentonicorum, in beneficium (sicut audivimus) suscepisti. Quod si verum est, qualiter gratiam B. Petri et nostram benevolentiam sperare debeas, tu ipse, si justitiam vis attendere, non ignoras videlicet te non aliter eam habiturum, nec sine Apostolica animadversione diu regnaturum, nisi sceptrum regni quod tenes, correcto errore tuo, Apostolicæ, non regię majestatis beneficium recognoscas. Neque enim nos timore vel amore, aut aliqua personali acceptione (quantum Deo adjuvante poterimus) debitum honorem ejus, ejus servi sumus, jure quæsitum relinquemus. Verum si hæc emendare, et vitam tuam (ut decet regem) instituere, et Deo miserante adornare volueris, proculdubio dilectionem sanctæ Romanæ Ecclesiæ, sicut matris dilectus filius, et nostram in Christo amicitiam plene habere poteris. Datum Romæ quinto kal. Novemb. Indictione decima tertia ». Est annus Redemptoris millesimus septuagesimus tertius. Jure igitur illa de Ungaris Glaber, hujus temporis scriptor¹: « Ipsa denique Ungarorum gens post tot patrata flagitia, post tot flagella Gentibus illata cum suo rege ad Catholicam fidem conversa, quæ prius consueverat crudeliter rapere aliena, libens impertitur pro Christo propria. A quibus etiam jamdudum diripiendo captivabantur, undecumque in miserrima mancipia distrahendi, qui reperiebantur Christiani: ab iisdem quoque foveantur nunc ceu fratres vel liberi ». Matri vero omnium Ecclesiarum Apostolicæ Sedi, Patrique omnium Vicario Christi, summæ pietatis ergo seipsos cum suis penitus devovere.

21. Quis ista considerans non miretur, et obstupescat, dum quo tempore (secundum humanam prudentiam, quæ tantum terrena sapit, et quæ ea solum quæ ante oculos habet considerat, nec ad divinam providentiam oculos fingit.) ipsa Romana Ecclesia casura, et interitura penitus videri potuisset, tot improbis, sceleratis, impudicis, prædonibus, invasoribus, sanguinariis et grassatoribus hoc sæculo (ut audisti) Sedem Apostolicam invadentibus, eamque depravatis moribus conspurcantibus, tam vitioso in primis ingressu, quam detestando pravorum morum exemplo, qua etiam occasione ejus dominium sibi imperatores vindicantes, pro arbitrio statuerent in Sede Petri quem vellent, sic reddita jam prorsus vili et contemptibili, effecta ancilla regum domina Gentium, et conculcata pedibus filiorum, et præsentium attrita vestigiis, expositaque ludibrio transeuntium: eodem tempore externi longe positi veniant reges ad Apostolicam Sedem, quam recognoscant, et venerentur

unicum orbis templum, asyllum pietatis, columnam et firmamentum veritatis, petram immobilem innixam super Christi Dei vivi solidam firmamque promissionem. Ecce, inquam, reges, non ut olim ad Christi cunabula duce stella ab Oriente veniant, sed a Septentrione, unde (quod scriptum est¹) consuevit progredi omne malum in Italiæ damnum, quod ab iisdem (ut audisti) haud pridem pavendis exercitibus irrumpentibus sæpe passa fuerat: modo accedant humiles, prævia fide, ad tugurium piscatoris, ipsam Romanam Ecclesiam, non munera tantum ex suis thesauris accepta, sed ipsa regna afferentes ad eam, et regna petentes ab ea? « Quis sapiens et custodiet hæc, et intelliget misericordias Domini²? » Quis, inquam, ista prudens expendens, non cognoscat Romanam Ecclesiam, non hominum arbitrio regi, qui eam sæpius perdere laborarint, sed imperio Christi disponi, et divinis promissionibus custodiri?

22. « Adhuc in his considera mirandum illud, non alterius quam Dei inventum, quod eo tempore, quo imperatores sibi electiones Romanorum Pontificum usurparunt, tunc versa vice regnorum ab Ecclesia Romana titulos principes peterent, sicut fecisse noscuntur duces eximii Hunnorum ac Polonorum, qui non ab imperatoribus, sed a Romanis Pontificibus coronam regiam postularunt, quorum alter illud præstitit amplius, ut quod accepit regnum dono offerret S. Petro, eidemque subiceret gentem illam, quæ jugum ferre nescia, sub jugo gemere ubique populos et sub gladio ut (audisti) omnes contremiscere fecerat nationes: adeo ut in hoc locum habere possit illud Samsoris ænigma³: « De comedente exivit cibus, et de forti egressa est dulcedo ». Dum comminuens dentibus ferreis, et vorans fera gens populos, se offerat cibum illi cui dictum est a Deo⁴: « Macta et manduca ». Et rabie ora illa spumantia olim, nunc mella fundant dulcedine charitatis. Sunt ista miracula Christi, opera Dei. Nam quis alius vel sperare potuit ista, nisi qui de gloria Ecclesiæ venturæ prædixerat⁵: « Ecce isti de longe venient: et ecce illi ab Aquilone ». Et: « Erunt reges nutricii tui, et reginæ nutrices tuæ: vultu in terram demisso adorabunt te, et pulverem pedum tuorum lingent ». Et⁶: « Erit corona gloriæ de manu Domini, et diadema regni in manu Dei tui, et non vocaberis ultra Derelicta, sed vocaberis Voluntas mea in ea ». Quæ ipsa S. Ecclesia hodie millesimum ortus sui annum festivè celebrans, illud propheticum hilaris occinat⁷: « Gaudens gandebo in Domino, et exultabit anima mea in Deo meo, quia induit me vestimentis salutis, et indumentis justitiæ circumdedit me, quasi sponsum decoratum corona, et quasi sponsam ornatam monilibus suis. Cui semper sit honor et gloria in sæcula. Amen ».

¹ Glab. l. I. c. 5.

¹ Jerem. I. — ² Psal. CVI. — ³ Judic. XIV. — ⁴ Act. X. — ⁵ Isa. XLIX. — ⁶ Isa. LXII. — ⁷ Isa. LXI.

Peroratio cum gratiarum actione. Divini auxilii imploratio. — Quod ad millenarium annum Christianæ religionis, Deo favente, stylo nostro pervenimus, sit nobis pro Sæculari carmine illud Apostoli¹: « Regi sæculorum immortalis et invisibili, soli Deo honor et gloria in sæcula sæculorum. Amen ». Et pro sæcularibus ludis, jugis gratiarum actio perseveret. Iste sit nobis cum divina Sapientia ludus, ut reciproca largitione certantes, magis tamen vinci, quam vincere gaudeamus. Ludere ipsa quidem fertur² in orbe terrarum cum hominibus Sapientia, dum sic dat ut recipiat, sicque recipit ut abundantius reddat, sed inde ut uberiorem mensuram in gratiarum actione suscipiat, unde præstantiora dona retribuat; atque sic ista jugiter iterans, velut maris Euripo, fluxu atque refluxu festive cum mortalibus ludat; cum tamen æque totum sit ejus quod in nos influit, et

refluit per gratiarum actionem in ipsam, licet pro imbecillitate naturæ longe impares in retribuendo inveniamur. Quenam autem tibi dignæ, Domine, referri possunt a nobis gratiarum actiones, quod nos incolumes (quod vix spe concepissemus) ad annum hunc millenarium perduxisti? Quod cymbam tenuem oceano vastissimo creditam ad talem deduxisti stationem, ex qua ad portum haud adeo difficilis navigatio sit? Rependam quid digne? Hoc ipsum quod præstitisti pro gratiarum actione offero Millenarium, nostro labore decursum. Tu vero, qui sic accipis minima, ut maxima reddas: adjice jam illud tuum indesinens Millenarium¹ per infinita sæcula revolvendum in regno cælorum, interveniente pro nobis apud te Dei Genitrice Maria, ut quæ est in labore semper adiutrix, eadem conciliatrix sit præmii sempiterni in gloria beatorum. Amen.

¹ 1. Tim. I. — ² Prov. VIII.

¹ Apoc. XX.

Anno periodi Græco-Romanæ 6493. — Anno .Eræ Hispan. 1038. — Anno Hegiræ 391, inchoato die 1 Decemb., Fer. 1. — Jesu Christi 1000.

— Silvestri II papæ 2. — Ottonis III reg. 18. imp. 5. Basil. et Const. imp. 25.

1. *Annus Ecclesiæ millesimus nullis solemnibus frequentatus.* — Ad num. 1. « Mirum silentium de millesimo Christi anno, nulla solemnitate (quod sit scriptum) peracto, ut ad exemplum saltem veterum Romanorum, sæculares ludi, qui in centesimo quoquo Urbis anno exhibebantur, tam solemniter leguntur peracti. Nam millesimus Urbis annus sub Philippis imperatoribus multiplici pompa est celebratus. Millesimus autem christianæ salutis annus toto silentio dilabitur sub Pontificio Silvestri II et imperio Ottonis III, Jubilæus autem annus necdum venerat in mentem Pontificibus, ut eo instituto (quo præsens quingentesimus post mille peragitur) celebraretur. Bonifacius VIII anno trecentesimo post millesimum primus illum instituit », inquit Krantzius lib. 4 Hist. Saxon. cap. 26, ubi et tempus quo Historiam illam elucubravat designat.

2. *Otto orationis gratia in Poloniam pergit.* — Ad num. 5. Iluc revocandum quod anno superiori Baronius num. 12 et seq. de profectione Ottonis III in Poloniam habet, et nos ibidem explicavimus. Hoc enim anno Ottonem III in Poloniam perrexisse, docet chronographus Hildesheimensis his verbis: « Imper. Otto causa orationis ad S. Adalbertum

episcopum, et martyrem Quadragesimæ tempore Selaviam (id est, Poloniam) intravit. Ibi coadunata Synodo, episcopia vii disposuit, et Gaudentium fratrem, B. Adalberti. in principali urbe Selavorum Praga (legendum *Guesna*, ut anno præfato demonstravimus) ordinari fecit archiepiscopum licentia Romani Pontificis causa petitionis Bolyzlonis Bohemiorum ducis (legendum, *Polonorum ducis*) ob amorem potius et honorem sui venerandi fratris, digni pontificis et martyris. Inde reveniens, Palmarum solemnitatem Parthenopoli festive peregit, Paschalia vero tempora votive Quidilinganburg celebravit; Pentecostes autem celebritatem digna devotione Aquisgrani feriavit. Quo tunc admirationis causa Magni imperatoris Karoli ossa contra divinæ religionis Ecclesiastica effodere præcepit. Quo tunc in abdito sepulturæ mirificas rerum varietates invenit. Sed de hoc, ut postea claruit, ultionem æterni vindicis incurrit. Nam prædictus ei imperator post tantæ commissionis facinus comparuit, et ei prædixit obitum suum celerius affuturum. m, Indict. xiv, imperator Natalem Christi Romæ celebravit ». Romæ itaque die Natali Christi, quo chronographus annum exorditur, Otto fuit. Anno vero superiori, per De-

cembrem, Ravennæ erat, ubi Leoni antistiti Ravennatis veteres Ecclesiæ possessiones confirmavit, ac novas addidit, ut habent Sigonius lib. 7 de Regn. Ital., et Rubeus in Hist. Ravenn. lib. 5. Quare nonnisi currentis anni initio, Roma in Germaniam rediit, et post aliquot menses tertiam protectionem suam Romanam, quæ ultima fuit, suscepit. Porro Ottonem tunc vii episcopia non disposuisse, superiori anno monstravimus.

3. *Corpus Caroli M. ab Ottone incorruptum reperitur.* — Gesta Aquisgrani ab Ottone III his verbis narrat Adhemarus monachus in Chronico : « Otto. imp. per somnium monitus est, ut levaret corpus Caroli M. imp. qui Aquis humatus fuerat, sed vetustate oblitterante ignorabatur locus certus ubi quiescebat, et peracto triduo jejunio, inventus est eo loco, quem per visum cognoverat imp., sedens in aurea cathedra intra arcuatam speluncam intra Basilicam B. Mariæ, coronatus corona ex auro et gemmis, tenens sceptrum et ense ex auro purissimo, et ipsius corpus incorruptum inventum est, quod levatum populis demonstratum est. Quidam vero canonicorum ejusdem loci, Adalbertus, cum enormi et procero corpore esset, coronam Caroli quasi pro mensura capiti suo circumponens, inventus est strictiori vertice, corona amplitudine sua vincente circum capitis : crus proprium vero ad cruris mensuram regis dimeliens, inventus est brevior, et ipsum ejus crus prolinus divina virtute confractum est, qui supervivens annis XL semper debilis permansit. Corpus vero Caroli conditum in dextro membro Basilicæ ipsius retro altare sancti Joannis-Baptistæ, et crypta aurea super illud mirifica est fabricata, multisque signis et miraculis clarescere cœpit. Non tamen solemnitas de ipso agitur, nisi communi more anniversarium defunctorum. Solium ejus aureum imp. Otto direxit Botislano (id est, Boleslao, Poloniæ duci,) pro reliquiis S. Adalberti martyris. Rex autem Botislavus, accepto dono misit imperatori brachium de corpore ejusdem sancti, et imperator gaudens illud excepit, et in honore S. Adalberti martyris Basilicam Aquisgrani construxit mirificam, et ancillarum Dei congregationem ibi disposuit; aliud quoque monasterium Romæ construxit in honore ipsius martyris ». Carolum M. divum habitum fuisse, templa illi dicata, et Officii Ecclesiastici impensam celebritatem, ostendit Bollandus ad diem xxviii Januarii in Vita sancti Caroli Magni ab Eginhardo scripta, et addit, *antea fortassis*, et saltem post canonizationem a Guidone Cremensi antipapa Paschale III dicto factam. Verum hic Adhemari locus a Bollandis non citatus dubium solvit, indicatque nonnisi post illam canonizationem divinos honores Carolo M. delatos, conniventibus nempe summis Pontificibus. Ad hæc ex iisdem verbis sequi videtur Adhemarum Chronicon suum scripsisse ante annum MCL. Verum numeri corrupti, et loco annis XL, reponendum, annis XI, uti ex dicendis de fine Chronici Adhemari colligitur. Porro hanc in-

ventionem ossium Caroli M. cum hoc Christi anno Lambertus in Chron. recte alligat, et Ditmarus lib. 4, ad eundem annum memorat.

4. *Moritur S. Adelhaida imperatrix.* — Ad num. 11. Vitam S. *Adelaidis* Ottonis I imperatoris conjungis, repertam in monasterio S. Magni ad pedem pontis Ratisponensis, primum edidit Canisius, quam Baronius recte judicavit eam aliam non esse, quam quæ a S. Odilone Cluniacensi abbate scripta dicitur. Postea rursus edita fuit in Bibliotheca Cluniacensi inter Odilonis Opuscula ex Mss. Codd. eruta. In ea Vita Odilo scribit : « Anno instante ab Incarnatione domini millesimo, desiderans videre diem unum nescientem occasum in atriis domini super millia, dicebat sæpe cum Apostolo, *Cupio dissolvi et esse cum Christo*. Præstolans etiam in præsentiarum cum spirituali lætitia, ejusdem Domini nostri Jesu Christi festum, cum sextumdecimum diem solveret December felix, et ipsa feliciter deposito carnis onere, evolavit ad purum purissimi ætheris fulgorem ». Quare non dubium, quin sanctissima imperatrix, die xvi mensis Decembris superioris Christi anni, animam Deo reddiderit, uti Lambertus Schafnaburgensis, chronographus Hildesheimensis, et aliqui alii veteres etiam tradiderunt. Baronius anno MDCXVIII, num. 11, recitat mortem aviæ Ottonis III imperatoris ex Ditmaro, cujus verba recitat; sed avia illa alia non est quam *Adelhais*, cujus mortem, non cum eo Christi anno, sed cum anno MDCXCIX historicus ille alligat; cum asserat, Mathildem Quindlinburgensem abbatissam VIII id. Februarii e vivis excessisse, et Adelhaidem in eodem anno XVI kal. Januar. Papa quoque Gregorius II nonas Februarii. Certum autem Gregorium V anno MDCXCIX naturæ debitum solvisse, in cujus tamen emortuali die Ditmarus hallucinatur, ut ex dictis suo loco constat. Fuit *Adelhais* Rodulphi hujus nominis II Burgundiæ et Italiæ regis, ac *Bertæ* reginæ filia, et, uti docet Charta foundationis monasterii Paterniaci in pago Bernensi positi, ac ab eadem regina conditi, a Guichenono in Bibliotheca Sebusiana pagin. 4 recitata, fratres habuit *Conradum* Burgundiæ regem, *Burchardum* episcopum Lausanensem, deinde Lugdunensem archiepiscopum, et *Rodolphum* Burgundiæ Transjuranæ ducem, cujus alibi mentio non occurrit. Jam suis locis ostendimus, eam primum *Lothario* Italiæ regi, et postea *Ottoni* primo Germanorum tunc regi, ac dein imperatori nupsisse, ac matrem extitisse Ottonis II imp. et Mathildæ abbatissæ Quidlinburgensis, pietate et sapientia conspicuæ. *Adelhais Mater regnorum* vulgo appellata fuit, quod dissidentes regum animos mira suavitate et peritia conciliaret; indeque Epistola Gerberti, cxxviii *Adelhaidi Matri regnorum* inscripta est, et in ea legitur : « Certe clarissimam dominam et matrem regnorum vos hactenus fuisse manifestum est ». Huc refer quæ Baronius anno MDCXVIII, num. 11 de hujus imperatricis morte habet.

5. *Regis nomen Boleslao Poloniae duci ab Ottone III non datum.* — A num. 14 ad 19. Wippo in Vita Conradi Salici imperatoris ad annum primum regni ejus ait: « Eodem anno Borislaus Sclavigena, dux Bolanorum (id est, Polonorum) insignia regalia et regium nomen in injuriam regis Cluonradi sibi aptavit, cujus temeritatem cito mors exinanivit. Filius autem ejus Misico similiter rebellis fratrem suum Oltonem, quoniam regis (nempe Conradi nondum coronati imperatoris) partibus favebat, in *Rukhiam provinciam pepulit*, id est, in Russiam. Quare licet Baronius Wipponis Historiam non legerit, recte tamen censuit, Boleslaum ab Ottone III imperatore regio nomine donatum non fuisse. Stanislaus Lubinskius in serie episcoporum Plocensium, dum de Martiali secundo episcopo Plocensi verba facit, opinionem Baronii refellit ex vetusto Epitaphio Boleslai Chobrii cognominati, in quo legitur:

Tu possedisti velut athleta Christi
Regnum Slavorum, Gothorum seu Polonorum,
Cæsar præcellens, a te ducalia pellens.
Plurima dona sibi quæ placuere tibi
Huic detulisti, quia divitias habuisti.

Verum Epitaphium illud longe post *Boleslai* mortem positum fuisse, laudatum Wipponis testimonium demonstrat. Ille enim auctor coetaneus, ac rerum Conrado Salico imperante gestarum spectator. Ejus Historia extat in Collectione Pistoriana. Cæterum pleraque Epitaphia, quæ putantur antiqua, pluribus sæculis a morte eorum, in quorum gratiam condita, fuisse composita, et sepulcris inculpta, tanquam principium Chronologicum haberi in posterum debet. Cum illud subinde variis exemplis confirmetur. Certe præfatum Boleslai Epitaphium Longini, Michovii et Chromeri ætate ignotum fuit.

6. *Moritur Sequinus archiepisc. Senonensis.* — Anno superiori *Sevinus* seu *Sequinus* archiepiscopus Senonensis e vivis excessit, ut Odorannus in Chronico prodit. Is primatum Galliae, quijam a tempore Ansegisi archiepisc. Senonensis, in cujus gratiam primum institutus fuerat, aut archiepiscoporum incuria, aut desuetudine abrogatus videbatur, restituit, huncque ejus successor confirmari curavit: « Anno millesimo », ut legitur in Chronico S. Petri Vivi Senonensis, « acclamante clero et populo electus est in episcopatu dominus Leothericus ipsius Ecclesiae archidiaconus, cui resistebant plurimi clericorum cupientes episcopium. Qua de re Roman adiit Gerbertum papam, qui et Sylvester dictus est, cujusque discipulus in Rhemensium urbe fuerat juvenis. Quem ille gratanter recepit, cum benedictione Apostolica remittit, et totius Galliae primatum dedit. Unde rediens Senones cum pace susceptus est a clero et populo honorifice. Volentibus autem eum inthronizare prohibuit Frotmundus comes natus ex mala progenie: habebat enim filium clericum nomine Brunonem, quem volebat

episcopum facere. Quare dominus Leothericus iterum papam adiit, qui mittens litteras suas ad suffraganeos Ecclesiae Senonensis jussit, ut congregati in unum Apostolica auctoritate eum ordinarent; qui jussa complentes ordinaverunt cum apud S. Faræ monasterium ». Hugo tamen Floriacensis apud Duchesnium tom. iv, Seguini mortem cum *XIII kal. Novemb.* hujus Christi anni illigat; et quæ narrat chronographus S. Petri Vivi, ad annum sequentem rejicit. Ad Leothericum variæ extant Fulberti Carnotensis episcopi Epistolæ. Primatum Galliae postea Gregorius VII ad archiepiscopum Lugdunensem transtulit, ut suo loco dicitur.

7. *Dani Angliam vexant.* — « Anno ab Incarnatione Domini », inquit Simeon Dunelmensis in Hist. de Gest. Reg. Angl., « millesimo, Danorum classis hoc anno Normanniam petiit, et sequenti anno ad Angliam reversa pejora prioribus egit. Rex Ethetredus (hoc scilicet anno, ut etiam alii historici tradunt) terram Cumborum fere totam depopulatus est. Ille suæ classi mandavit, ut circumnavigata septentrionali Britannia, in loco constituto sibi occurreret. Sed vi ventorum præpedita, non potuit. Insulam tamen, quæ Monege (id est, Mona Hiberniam inter et Angliam sita) dicitur, devastavit ». Fusius hæc narrat Huntindoniensis in fine lib. 3, subditque: « Daci vero semper bellis exercitati belli fortuna potiti sunt ».

8. *Ut Britones ab Anglis, ita a Danis et Normannis subacti.* — Tum librum 6 his verbis exorditur: « Anno millesimo ab Incarnatione Domini, Richardi consulis Nortmannorum (id est, ducis; vox enim hæc hoc tempore in eo sensu usurpata) filiam rex prædictus (nempe Anglorum) Edelred in conjugem assumere præcogitavit ad tuitionem regni sui. Ille enim fortissimus erat, et omni regno Francorum formidabilis. Ipse autem se suosque valde debilitatos videbat, futuramque cladem non mediocriter horrebat. Hoc autem Dei nutu factum esse constat, ut veniret contra improbos malum. Genti enim Anglorum, quam sceleribus suis exigentibus disternare proposuerat, sicut et ipsi Brittones peccatis accusantibus humiliaverant, Dominus omnipotens duplicem contritionem proposuit, et quasi militares insidias adhibuit. Scilicet ut hinc Dacorum persecutione sevient, illinc Nortmannorum conjunctione accrescente, si ab Dacorum manifesta fulminatione evaderent, Nortmannorum improviam cum fortitudine cantelam non evaderent. Quod in sequentibus apparuit, cum ex hac conjunctione regis Anglorum et filiae ducis Nortmannorum Angliam juste secundum jus gentium Nortmanni et calumniati sunt et adepti sunt. Prædixit etiam eis quidam vir Dei, quod ex scelerum suorum immanitate non solum quia semper cædi et proditiōni studebant; verum etiam quia semper ebrietati et negligentiae domus Domini dediti erant, eis insperatum a Francia adventurum dominium, quod et eorum excellentiam in æternum deprimeret, et honorem sine termino restitutionis eventilaret. Præ-

dixit etiam, quod non ea gens solum, verum et Scotorum, quos vilissimos habebant, eis ad emeritam confusionem dominaretur. Prædixit nihilominus varium adeo sæculum creandum; ut varietas, quæ in mentibus hominum latebat, et in acilibus patebat, multimoda variatione vestium et indumentorum designaretur ». Hæc Huntindo-

niensis, qui sæculo duodecimo floruit. De occupatione Angliæ a Danis et Nortmannis sequentibus annis agemus. Notare hic sulficial, Emmæ a Danis et Nortmannis oriundæ cum *Ethelredo* rege conjugium, quod cum utrisque commercium intulit, cum tandem corona imperioque exuisse.

HIC BARONIUS DECIMUM ANNALIUM TOMUM ABSOLVIT.

SILVESTRI II ANNUS 3. — CHRISTI 1001.

Subtilissem libenter, jam lassus, in millenario, sed qui dixit¹: « Si quis te angariaverit mille passus, vade cum illo alia duo », urget opus, hisque verbis tanquam stimulis excitat renitentem, atque cunctantem impellit. Pareo, sed exactus ipse exigo ab exactore, agensque jure meo, ipsum convenio suis verbis adstrictum: nam quod jubens: Vade cum illo, dixit, ut adsit ipse quocum pergam, efflagito. Sit igitur ipse in itinere comes et ductor, ut quod reliquum est viæ, securus lætusque conficiam. Sic et pater credentium Abraham diuturna peregrinatione lassatus, dicente ipsi Domino²: « Ambula coram me », de inhærente tuto sibi comite tutus, sumptis viribus, reliquum vitæ cursum majori alacritate confecit. Quo et monitus³ Jacob non antea susceptum iter est prosecutus, quam nuncupato volo, ritu solemniori, Deum pariter

sibi in via comitem sociarit. Expelo hoc ipsum ego majori fiducia ab eo, quem jam commercio humanæ naturæ factum esse scimus¹ viatorem in terris, et ejusmodi quidem, qui etiam non petitus conjungat se socium² iter agentibus: quibus et in via exhibeat se doctorem, atque mœroris animi depulsorem. Adsit igitur multo magis ipse rogatus, atque sua promissione conventus, qui nos simul ducat et doceat. Accurrat festina et ipsa Dei genitrix Virgo Maria, nobis in omnibus assistere atque prospicere consueta; atque in via ista nos præcedens nostra benedicta columba, pullum desidem diu cunctantem et renitentem suo volatu e nido provocet ad volandum: deque ipso ex more sollicita, opem alura semper vel circumvolitet laborantem, vel alis foveat quiescentem. Amen.

¹ Jer. XIV. — ² Luc. XXIV.

¹ Matth. v. — ² Gen. XVII. — ³ Gen. XXVIII.

1. *Opinio de fine mundi inducta, ejusque origo et causæ.* — Novum sæculum inchoatur. Incipit annus primus post millesimum, Indictione decima quarta notatus, idemque nonnullorum vana assertionem prænuntiatus mundi postremus, vel ipsi propinquus, quo nimirum revelandus esset ille homo¹ peccati, filius perditionis, dictus cognomine Antichristus. Fuerant ista in Galliis promulgata, ac primum prædicata Parisiis, jamque vulgata per orbem, credita a compluribus, accepta nimirum a simplicioribus cum timore, a doctiori-

bus vero improbata. Inter alios enim ad redarguendum errorem ex divinis Scripturis sibi laborandum fuisse, Abbo Floriacensis abbas, vir doctrina et sanctitate insignis testatur in libro Apologetico, quem ad reges Francorum Hugonem atque Robertum, patrem et filium scripsit. Cujus fragmentum inter schedas ad nos Parisiis a Nicolao Fabro amico fidelissimo missas inventum hic describere, haud fore inutile duximus: nam præter ista de interitu mundi, alia habet notatu digna. Est hujusmodi:

2. « Dominos meos cum familiariter alloquens bona suadeo, multorum animos, scio, contra me

¹ 2. Thess. II.

concito, de quorum animositate non multum moveor (dulce decus meum, Roberte, quem atavis regibus editum, divina pietas perduxit ad regni fastigium) si post Deum et sanctos ejus vestro specialiter sustentet auxilio et consilio, ejus mentionem in quotidianis orationibus meis nunquam prætereo. Tandem capitulatim subtexam huic Indiculo, quæ maxime sunt corrigenda in vestro imperio; nec tam hæc verbis meis, sed authenticis scriptorum dictis, ut postmodum episcopos moneatis hæc canonice emendare in suis Conciliis ». Sed antequam ulterius progrediamur, ne inconsideratum abire sinas, lector, quod auctor Robertum alloquens regem, cum atavis regibus editum prædicat: redarguit enim plane levitatem dicentium, Hugonem Roberti parentem ignobili ortum genere. Sed de his actum suo loco tomo superiori. Pergit Abbo, primum inculcans ea, quæ spectant ad sana dogmata retinenda, dicens:

3. « Primitus de fide dicendum credidi, quam alternantibus choris et in Francia, et apud Anglorum Ecclesiam variari audiavi. Alii enim dicunt (ut arbitror) secundum Athanasium: Spiritus sanctus a Patre et Filio, non factus, non creatus, sed procedens: qui dum id quod est, *Nec genitus*, subtrahunt, Synodicam domini Gregorii se sequi credunt, ubi ita est scriptum: Spiritus sanctus nec genitus est, nec ingenuitus, sed procedens.... » Vides in his, lector, jam ante sexcentos annos absque ulla dubitatione Athanasii Symbolum vere ejus esse absque dubitatione creditum et prædicatum. Pergit auctor:

4. « De fine quoque mundi coram populo sermonem in Ecclesia Parisiorum adolescentulus audiavi, quod statim, finito mille annorum numero, Antichristus adveniret, et non longo post tempore, universale judicium succederet. Cui prædicationi ex Evangelio et Apocalypsi, et libro Danielis, qua potui virtute, restiti. Denique et errorem, qui de fine mundi inolevit, abbas meus beatæ memoriæ Richardus sagaci animo propulit, postquam litteras a Lothariensibus accepit, quibus me respondere jussit. Nam fama per totum mundum impleverat, quod quando Annuntiatio Dominica in Parasceve contigisset, absque ullo scrupulo finis sæculi esset.

5. « De initio etiam Adventus, qui ante Nativitatem Domini per singulos annos agitur, aliquando error gravissimus extitit, aliis inchoantibus post V kal. Decemb. aliis ante, cum nunquam plus quatuor hebdomadis saltem unum diem Adventus habeat. Cumque de hujusmodi diversitate soleant contentiones in Ecclesia crescere, Concilio determinandum est, ut omnes qui in ea vivimus, unum sapiamus. Quod vestræ industriæ concedat, qui nos unanimis vult habere in domo sua ». Hucusque ex scheda de Abbonis Apologetico.

6. At quod ad mundi casum prænuntiatum pertinet, quæ proxime accidissent anno superiori, tantæ cladis videri poterant esse prænuntia: nam de his Sigebertus anno millesimo: « Multa, inquit,

prodigia visa sunt: terræmotus factus est permaximus, cometes apparuit kal. Januar. circa horam nonam aperto cælo, quasi facula ardens cum longo tractu, fulguris instar, illabitur terris tanto splendore, ut non modo qui in agris erant, sed etiam in lectis, irrupto lumine ferirentur. Qua cæli scissura sensim evanescente, interim visa est figura quasi serpentis, capite quidem crescere cum cæruleis pedibus ». Hæc Sigebertus.

7. Erant ad hæc credenda de fine mundi et adventu proximo Antichristi, Romanæ Ecclesiæ tot sæpe iterata naufragia, ex quibus (ut superiori tomo vidimus) Gerbertus æque adventare Antichristi tempora jactitabat. Sed et corruptio morum, quam magnam valde hoc tempore fuisse in hominibus, præsertim Ecclesiasticis, Glaber¹ ea videns scriptis deplorat, idipsum poterat suadere. Insuper et quod ferreum hoc sæculum ob malorum excrescentiam, auctore Ditmaro, diceretur, utique et esse pariter ultimum crederetur. Ad quod alluisse visus est Glaber, ista deplorans, ad postremum dicens: « Quandocumque enim deficit religiositas pontificum, et marcescit districtio regularis abbatum, simulque monasterialis disciplinæ vigor tepescit, ac per illorum exempla cætera plebs mandatorum Dei prævaricatrix existit; quid aliud quam totum simul humanum genus rursus in antiquum præcipitii chaos perditionis spontanea voluntate illabitur? » Et in fine: « Quæ retulimus visa circa millesimum post nati Salvatoris annum ».

8. At quodnam, dicces, in his vane disseminandis captare lucrum hostis humani generis potest, dum potius damnum sentire debeat ex pœnitentia plurimorum, qui ea de proximo interitu mundi credentes, ad expectandum venturum Dominum se præparent? Sed licet ex his accipiat detrimentum, alia tamen ex parte inde sibi comparat locupletius emolumentum subdolus artifex, dum ita deludens humanum genus, serens ista mendacia, colligit fructus impietatis, ut, cum viderint homines hæc sæpe prædicta semper evanuisse, facile leviores sibi persuadeant humana esse commenta, quæ divinitus de futuro judicio in sacris libris inveniuntur esse conscripta. Quod plane² mysterium jam ipse diabolus eadem occasione operatus est in filios diffidentiae, qui (ut suo loco proxime dicturi sumus) isthæc omnia de mundi fine evanuisse videntes, in transversum acti, in eam erroris foveam præcipientes se dedere et alios adegere, ut dicerent mundum hunc æternum esse, et vana esse cuncta, quæ in divinis Scripturis tradita esse leguntur. Quod summum malum callida arte ab hoste humani generis miseris mortalibus præparandum divinitus prænoscentis Petrus Apostolus, tanquam ab alta specula universo orbi Christiano in salutem omnium illud, omnes monens, intonuit³: « Hoc primum scientes, quod venient in novissimis diebus in deceptione illusores, juxta proprias concu-

¹ Glab. l. II. c. C. — ² 2. Thess. II. — ³ 2. Pet. III.

piscentias ambulantes, dicentes : Ubi est promissio, aut adventus ejus? Ex quo enim patres dormierunt, omnia sic perseverant ab initio creaturæ». Parat et his antidotum, quo tantæ impietatis veneno resistent. At de ejusmodi hoc tempore oborta hæresi, suo loco agemus inferius : hæc modo satis occasione vulgatæ vane de præsentaneo mundi interitu prophetiæ. Jam vero auni hujus res gestas enarrare aggrediamur.

9. *Temporis ratio dilucidata ex Diplomate Ottonis imperatoris.* — Atque in primis de temporis ratione diverso modo disposita a diversis, habenda accurata discussio atque exactissima disquisitio, qua prætermittenda, sit necesse tanquam in obscuro labi pedibus, et in plures errores invitum ferri. Quod igitur sciamus quamplurimos non mediocris æstimationis auctores hoc anno ponere obitum Ottonis tertii imperatoris, atque subrogationem in locum ejus in regno Germaniæ Henrici Bavarie ducis : an hæc ita subsistant, ut eos secure sequi possimus, jam hic in limine subsistentes, de semitis rectis, per quas gradiamur, prius interrogemus. Qui hoc anno Ottonem tertium diem obiisse scripsere, fuere in primis Germaniæ scriptores, Otto Frisingensis, abbas Urspergensis, Hermannus Contractus, quos secuti recentiores, et inter alios Panvinus. At veriore esse eorum assertionem, qui dixerunt anno sequenti illum obiisse, et hunc subrogatum esse, quæ dicturi sumus apertissime demonstrabunt. Qui autem ita sensere atque scripsere, fuerunt Marianus Scotus, Lambertus, Sigebertus : id ipsum sensisse Rupertum abbatem Tuitensem in Heriberto, ex ejus scriptis colligimus. Sed quod cæteris præstat, hoc ipsum manifeste probatur ex antiquis ejusdem Ottonis imperatoris Diplomatum hoc ipso anno datis, atque in primis ex Privilegio concessio Ecclesiæ Novariensi : quod acceptum ex Archivo ejusdem Ecclesiæ hic tibi describendum putavimus, ad confirmandam chronologiam ejusdem Ottonis imperii, quem male aliqui hoc anno, mense Januarii, ponunt exstinctum. Sic enim se habet :

10. « In nomine sanctæ et individue Trinitatis. Otto Dei gratia Romanorum imperator Augustus.

« Si erga loca divinis cultibus mancipata beneficia opportuna largimur, præmium nobis a Deo æternæ retributionis rependi, non ambigimus. Idcirco omnium fidelium sanctæ Dei Ecclesiæ, nostrorumque præsentium scilicet et futurorum solertia noverit, quia adiens serenitatem nostram Petrus sanctæ Novariensis Ecclesiæ episcopus, nosterque dilectus fidelis retulit, quosdam nostrorum antecessorum, nostri avi scilicet et patris imperatorum, omnem liberorum hominum prædictæ Novariæ civitatis, et ad tria millia circum pro tempore cohabitatorum districtum, publicæ parti olim pertinens, juri et potestati suæ Ecclesiæ subdidisse; præfatamque sedem, in honorem sanctæ Dei genitricis et Virginis Mariæ, necnon et beati Gaudenii confessoris Christi dicatam, cum rebus

et omnibus hominibus ad eam legaliter pertinentibus sub sua recepisse tuitione. Ideoque jam dictus pontifex nostram suppliciter exoravit clementiam, ut secundum nostrorum prædecessorum auctoritates nostram addere dignaremur confirmationem.

11. « Nos denique pro Dei amore, nostræque remedio animæ, dignæ memorati præsulis petitioni assentientes : hoc nostræ auctoritatis munimine fieri decrevimus. Per quod decernimus, statuimus atque jubemus, ut nullus marchio, comes, aut vicecomes, sculdasi, vel quilibet ex judicaria potestate, nec aliquis nostri imperii magnæ parvæque personæ intra præfatam civitatem, ac prædictum spatium circum ingredi sine ipsius licentia episcopi ad placita tenenda, aut liberos ipsius civitatis terminique supradicti homines, vel famulos alicubi distringere audeat; nec aliquis ejusdem civitatis quandoque habitator murum ipsius civitatis, ad portas vel posterulas faciendas sine ipsius episcopi licentia frangere præsumat. Nec quisquam nostri imperii, ut diximus, præpotens, mediocris, aut parva persona in Ecclesias, castra, vel loca, aut agros, seu reliquas possessiones, quas in quibuslibet pagis et territoriis intra ditionem nostri imperii juste et legaliter prædicta tenet et possidet Ecclesia, sive quæ deinceps in jure ipsius sancti loci voluerit divina pietas augeri, ad causas judiciario more audiendas, vel freda exigenda, aut mansionaticum, vel paratus faciendos, aut fidejussores tollendos, aut homines ipsius Ecclesiæ distringendos, nec ullas redhibitiones, vel illicitas occasiones requirendas, nostris et futuris temporibus ingredi audeat; nec ea quæ supra memorata sunt, exigere penitus præsumat : sed liceat ad augmentum et honorem præscriptæ sanctæ Ecclesiæ episcopo, suisque successoribus, jam fatæ civitatis liberos, et totius episcopii intus et de foris habitantes distringere, et cæteros, qui ante se vel suos missos legaliter distringi voluerint, distringat; et quidquid contentionis inter eos emerit, definiat, sicut definiendum esset ante nos, vel nostrum missum, seu palatinum comitem; cunctasque res jam dictæ Ecclesiæ cum omnibus hominibus ad eam pertinentibus vel adspicientibus sub tuitionis nostræ defensione, remota totius judicariæ potestatis omniumque hominum inquietudine, quieto ordine possideat, et nostro fideliter imperio pareat. Et quidquid in præfatæ Ecclesiæ rebus de illicitis conditionibus, aut servitiis requirendis exigi poterat, in integrum eidem concedimus Ecclesiæ, quantum id perpetualiter pro nostræ animæ remedio ad peragendum in eadem Dei Ecclesia servitium, augmentum et supplementum fiat.

« Si quis igitur hanc nostram auctoritatem quandoque violare tentaverit, centum libras auri componere cogatur, medietatem cameræ nostræ, et medietatem prætaxato episcopo suisque successoribus. Et ut hoc verius credatur, diligentiusque observetur, manu propria confirmavimus et sigillo nostro subitus jussimus insigniri.

« Signum domini Ottonis Cæsaris invicti.

« Heribertus cancellarius vice Petri Cumani episcopi recognovit.

« Datum X kalend. Julii, anno Dominicæ Incarnationis millesimo primo, Indictione decima quarta, anno tertii Ottonis regni decimo septimo, imperii v (vi). Actum Papiæ feliciter. Amen ». Hucusque Ottonis imperatoris Diploma, ad rationem temporis haud dubiam constituendam, hic ipso exordio novi sæculi collocatum adversus eos, qui asserunt hoc anno, quinto kalend. Februarii esse defunctum. Sunt et alia vetera monumenta, quæ hoc ipsum indicant, de quibus in successoris electione dicendum. Jam vero ipsius res gestas hoc anno, recto tramite prosequamur.

12. *Congressus Ottonis cum S. Romualdo.* — Recedens Papia, Ravennam se contulit imperator, ubi monitu S. Romualdi egregiæ sanctitatis viri, quem idem Otto plurimum coluit, ut quæ superiori tomo dicta sunt demonstrant, monasterium in honorem sancti Adalberti construxit. Cum idem sanctus memor promissionis ejus, qua in expiationem patrati delicti ob necem Crescentianam, eidem Romualdo, cui peccata confessus sua, pollicitus fuerat, abdicato se ab imperio vitam monasticam amplexurum, accessit exactor, eoque magis importunus, quo divino afflatus Spiritu intellexisset, instare jam obitum ejus: ut sponte faceret, quod necessitate urgente pati cogeretur invitus, et Deo in odorem suavitatis offerret, quod retinere non posset; et præstaret amore Dei, quod quietis duntaxat amore exhibuisse ethnici legerentur imperatores, iidemque Christianorum acerbissimi persecutores Diocletianus atque Maximianus Augusti. At quod, cum divino tantum intuitu quid agi decernitur, adversarias quisque mox experiri consuevit inferas potestates: talia prælia passus infelix Otto succubuit, non tamen renuens, sed differens, et ex causa quidem, ut videbatur ipsi, legitima. Sic plane homines versutus decipit assidue cacodæmon, quos a bono non potest avertere ne facere meditentur, ut differant saltem, prætextus ingerit varios, necessitatis colore fucatos; et sic distineat miseros, donec improvisa mors irrepât, quam ipsi mox sequantur sævissimi peccatorum ultores.

13. Scribit ista paucis Petrus Damiani sæculi hujus auctor in Romualdo, his verbis¹: « Regem Romualdus protinus adiit, et acceptæ promissionis exactor, ut rex monachus fieret, insistere vehementius cœpit. At ille facturum se quidem quod exigebatur, asseruit, si tamen prius Romam, quæ sibi rebellabat, impeteret, et ea devicta, Ravennam cum victoria remearet. Cui Romualdus: Si Romam, inquit, ieris, Ravennam ulterius non videbis: et apertissime illi mortem propinquam esse denuntians; quia cum revocare non potuit, proculdubio de ejus certus interitum, ab eo recessit.

Dum vero rex Romam properat, Romualdus navim ascendens, ad civitatem Parentium transfretat. Rex itaque secundum beati viri prophetiam vix e Roma reverti incipiens, mox languore correptus, apud Paternum defunctus est ». Sed id accidit anno sequenti, quo de ejus obitu agendum pluribus.

14. *Otto imperator Romam veniens rebelles compescit, Ecclesiam S. Adalberti ornat reliquiis et aliis piis operibus vacat.* — Quænam autem fuerint turbæ illæ, Romæ adversus imperatorem concitatæ, quibus sedandis, ipse eo profectus est, licet nobis exploratæ non sint; ex his tamen, quæ postea acciderunt, intelligere possumus, nimirum Romanorum potentiores infenso tulisse animo imperium Germanorum; ob idque tumultuosos esse in eos, qui tutarentur partes ipsius. Quid enim facere in eos prætermitterent, absente longeque remoto imperatore, qui in eum præsentem insurgere non sunt veriti? Quæ autem in eum hoc anno, cum ipse Romam pervenit, sunt ausi Romani, duce Gregorio tunc Romæ reliquis potentiore, ex Ditmaro hujus temporis auctore accipe: qui, dum agit de novissimo hoc Ottonis imperatoris Romam adventu sub Silvestro, hæc habet¹:

15. « Cunctis apud Transalpinos bene dispositis, Romanum visitabat imperium, Romuleas quoque pervenit ad arces: ubi ab Apostolico cæterisque coepiscopis magnis laudibus suscipitur. Post hæc Gregorius, qui Cæsari valde charus erat, dolo eum capere nisus, occultas tendebat insidias. Quibus collectis et ex improvise adversus eum jam insurgentibus, imperator de porta cum paucis evasit, maxima suorum caterva sociorum inclusa: et vulgus nunquam suis contentum dominis, malum huic pro ineffabili pietate restituit. Dehinc nuntio suimet omnes Cæsar familiares convenire illuc rogat, et præcipit, demandans singulis quibusque, si unquam de honore sui vel incolumitate curarent, ad ulciscendum eum ac amplius tuendum armato ad se milite properarent. Romani autem manifestati tunc sceleris culpa erubescens, seque invicem supra modum redarguentes, omnes inclusos emisere securos, gratiam imperatoris et pacem modis omnibus suppliciter expetentes. Quos ubicumque vel in ipsis, vel in rebus suis Cæsar lædere potuit, verbis eorum mendacibus diffidens, nocere non tardavit. Omnes regiones, quæ Romanos et Longobardos respiciebant, suæ dominationi fideliter subditas, Roma solum, quam præ cæteris diligebat ac per se excolebat, excepta, habebat. Conveniente tunc cum Heriberto sanctæ sedis Agrippinæ archiepiscopo plurima fidelium turba, imperator lætatur: et quamvis exterius vultu semper hilari se simularet; tamen conscientiae secreto plurima ingemiscens facinora, noctis silentio, vigiliis et orationibus intentus, lacrymarum quoque rivis abluere non destitit. Sæpenumero omnem hebdomadam, excepta quinta feria, jejunos producens,

¹ Petr. Dam. in Romuald. apud Sur. die xix Jun. in Vit. ejus c. 34.

¹ Ditm. l. iv.

in eleemosynis valde largus extitit ». Hæc Dilmarius, male a nobis sub anno nongentesimo nonagesimo octavo in priori editione relata, errore deceptis Scholiastis, qui hunc Gregorium imperii perduellem Gregorium papam fuisse notavit in margine: cum re accurate perspecta, hæc omnia defuncto Gregorio, et jam sedente Silvestro accidisse, ex eodem Ditmaro luce perspicua evidenter apparet. Subjicit idem Ditmarus, eodem tempore Germanos complures principes una cum episcopis adversus eundem imperatorem in Germania rebellasse, quorum causa coactus fuit, relicta Urbe, illuc versus iler quam cito capessere, cum in via constitutus est defunctus. Sed de obitu est dicendum inferius: modo quæ sunt reliquæ Ottonis in Urbe hoc anno res gestæ, in medium deducamus.

16. Constat etiam eundem Ottonem hoc anno Romæ agentem navasse operam, ut quam erigeret Ecclesiam sancti Adalberti in Tiberina insula, eandem sanctorum reliquiis locupletaret; et inter alia ejus opera veneranda corpora sanctorum martyrum Abundii, Abundantii et Theodoræ in eorum Memoriis apud montem Soractem positis Romam fuisse translata, atque in eadem Ecclesia S. Adalberti martyris collocata, Scholiastes in Vita et translatione eorundem sanctorum ex antiquioribus monumentis affirmat.

17. Habebat una secum Otto imperator sanctum Heribertum archiepiscopum Coloniensem monitorem et consultorem in rebus agendis, cujus consilio pro gratiarum actione de prosperis rerum eventis monasterium erigendum instituit, sed ne perficeret, morte præventus est. De his enim hæc Rupertus abbas Tuitiensis in Vita ejusdem Heriberti, quam scripsit¹: « Denique cum novissima profectione Italiam ingrederetur, Rempublicam dispositurus, beatum virum Otto habens in comitatu, cunctis prospere succedentibus, tractans cum viro Dei de salute animæ suæ, et quodammodo dicens: Quid retribuam Domino pro omnibus quæ retribuit mihi? consilium hoc accepit, qualiter ob salutem suam cœnobium construeret monachorum, in honorem sanctæ Dei Genitricis omniumque sanctorum. Hoc inito salubri consilio, necessaria protinus ad hanc rem prædia Christo delegavit, quæ et beato viro in manum dedit, cum pollicitatione et sponsione hujusmodi, ut quoniam vita mortalium incerta est, si quem ex ipsis necessitas mortis præoccuparet, alter, quicumque sit superstes, votum perficeret ». Hæc Rupertus.

18. At felix quidem Otto, si in omnibus ejusdem sancti viri monitis parvisset: contra ipsius enim consilia junxit sibi conjugem nobilem Romanam feminam, quæ fuerat Crescentii uxor, in quem (ut dictum est suo loco) dire sævierat. Deceptus namque pulchritudine, haud consideravit, implacabile esse solere genus femineum, ut vindi-

ctam expetat; et dolosum, ut dissimulare sciat; et quod, dum blanditur, venenum paret. Cæca mens illecebris feminæ semel capta, ut¹ Samsoni accidit, cum lumine privatur et viribus, enervata languescens in tenebris, ferreis vineta compedibus jacet, donec ipse, ut bos ad victimam, ducatur infelix ad necem, de qua anno sequenti dicturi sumus. Porro de uxore Crescentii Joanna dicta, quam domum introduxit, est diversorum assertio quoque diversa. Glaber ait², eam, cum leviter in uxorem accepisset, paulo post dimisisse divortio. Leo Ostiensis non in uxorem, sed in concubinam ab Ottone acceptam, illis verbis significare videtur, quibus ait³: « Qua ille impudice abutebatur ». Sed et Rupertus abbas idem sentire videtur, cum de his agens, nullam penitus habet de conjugio mentionem. In quam sententiam jure pedibus abiisse recentiores visi sunt plures.

19. *Miraculum de chlamyde Ottonis imperatoris donata S. Alexio.* — Demum vero, quid his diebus Romæ acciderit memoria dignum de primario iudice, qui chlamydem Ottonis imp. oblatam ab ipso monasterio SS. Bonifacii et Alexii, ponendam super altare sibi vindicavit, hic describendum putamus ex Codice Cassinate, in quo post homiliam S. Adalberti in eorum Ecclesia dictam, plura subscripta ab auctore ejus temporis narrantur miracula, et inter alia id quod sequitur:

« Divæ memoriæ tertius Otto Romanorum imperator locum hunc toto mentis diligebat affectu, cui dona multa largitus est, non dubitans se recepturum recompensationem a justissimo iudice Deo, suffragantibus meritis sanctorum Christi martyris Bonifacii et confessoris Alexii: inter quæ mantum, quo tegebatur coronatus, in quo omnis Apocalypsis opere Phrygio erat auro insignita, eis supplex obtulit, et altari S. Alexii decentissime coaptavit, perpetuo ibi mansurum optans. Cujus votum floccipendens Adelbertus abbas (de quo multa dicere dignum modo non arbitror), ut erat impudens, vestem ipsam non causa utilitatis monasterii, sed nequitia sua cogente, aliquibus dedit in pignus, apud quos mansit, quousque scelere suo petente, vita privari meruit. Quæ denique vestis deinde venit ad manus cujusdam primicerii judicum nobilissimi et prudentissimi, qui sæculari prudentia potius fervens eam agnitam non reddidit sanctis, sed quasi proprium thesaurum servandum in capsam retrusit. Cujus clarissimi confessoris nuditatis et expoliationis Deus miseratus, sicut postea rei probavit eventus, nequissimo ministro flagellandi eum potestatem tribuit. Qui sciens pœnitentiam regis pro uxore⁴ Abrahæ per flagella rerum designatam: non a possessis rebus, sed ab ipso possessore cœpit flagellum; malens illum ex improviso extinguere, quam post flagellatum ad pœnitentiam reverti. Namque obviavit ipsi juxta

¹ Rupert. Abb. Tuit. in Vita S. Herib. c. 12. apud Sur. die xvi Mart. tom. II.

¹ Judic. xvi. — ² Glab. l. I. c. 4. prope fin. — ³ Leo Ost. Chron. Cass. l. II. c. 24. — ⁴ Gen. xii.

propriam domum, et inter catervas comitantium equitum, de equo aspero deposuit, ac elisum paralytica infirmitate attrivit. Fit exsanguis, fit pæne exanimis: currit anxia uxor, currunt fratres, et tota flebilis domus mirantur et deflent miserum cadaver: fit strepitus concurrentium, fit luctus maximus. Tandem manibus eorum introducitur domum, non ut ei mederentur, sed ut defunctus debilis potiretur.

20. « Mox pietas Dei affuit immensa, volens ei, cur evenerit illud, clarius ostendere: et vitam ipsi servavit, et oscitare cœpit. Fiunt alta silentia, imponitur modus gemitibus; quærantur medici, nec inveniuntur qui proficere valeant. Expectabatur itaque sola medela Dei per aliquot dies. Cum ecce intempestæ noctis silentio, ut infirmus liberaretur, non uxori, seu filiis, non propinquis, sed ipsi paralytico, ipsi muto, ipsi omnem cibum fastidienti visi sunt sancti Bonifacius et Alexius (sicut idem retulit) torve in eum adspicientes, et agitantés capita ac dicentes: Putasne te sanum nostra veste uti, nobis exspoliatis? Quos cum requireret tremula voce qui essent, vel unde, aiunt: Ego Bonifacius sum, iste vero est homo Dei Alexius, quem tu exspoliatum habes. Et conversus, sustentans pallium auro gemmisque insigne quo tegebatur, ostendit humerum sancti Alexii confidentis verecundiam rubore nudum; quem cum vidisset vitro puriorem, lacte candidiorem, cœpit plus ex ipsa visione, quam languore deficere. Iterum audivit: E lecto isto valens non surges, priusquam veste mea, pro qua percussus es, induar. Qui miti voce lætus evigilans, balbutiendo conjugem, qui hæcenus nec os aperire poterat, appellat suam: Chara conjux, compatrem meum Leonem, et patrem spirituales meum Benedictum episcopum Portuensem ad me venire citissime facito. Erat enim Benedictus in divinis et humanis disertissimus. Quibus accersitis, quæ audierat seriatim exposuit. Tunc episcopus pia lætitia perfusus, talia cum lacrymis cœpit: Gloria tibi, Christe, gloria tibi, Domine, qui iraseeris ut placheris, flagellas ut indulgeas, percutis ut sanes. Gloria tibi, bone JESU, qui loquentem me audire facis, quem mortuum pæne dimisi: procurator animarum et corporum, tua medicamina non curant criticos dies, non petunt Indica pigmenta. Et conversus ad ægrotum lacrymis madefactum, dixit: Fili, redde vestem, ut reddaris sanitati, credens quod infectum non remanebit, quod amici Dei tibi interminatisunt. Cui ægrotus: Pater, jam vellem, ut supra corpus domini mei Alexii vestis jaceret: nam et ipsum tempus, quo fiat, longius mihi videtur. Statimque allata est vestis, quam tollentes venerunt ad monasterium gallicinio ejusdem noctis, et supra venerabile corpus S. Alexiæam posuerunt. Sicque revertentes, quem jacentem reliquerant, sedentem et glorificantem Deum viva voce invenerunt. Ilucque auctor, qui et quæ scripsit, se testatur vidisse. Porro Benedictus ipse cardinalis episcopus Portuensis, ut suo loco

dicetur, ex Portuensi episcopatu translatus est ad Cathedram Petri post Sergium papam, qui secundus post Silvestrum sedit.

21. *Romanorum civium florens religio.* — His vero, cum de rebus urbanis sit sermo, attexenda putamus ea, quæ de statu ipsius Urbis in iis quæ ad religionis cultum pertinent, habet hujus quoque temporis scriptor fidelissimus Arnolphus comes, quem hæcenus delitescens vindicavit in lucem Henricus Canisius, collocatum suo tomo secundo lectionum antiquarum. Hic enim inter alia, quæ prosecutus est stylo, ubi agit de ejusdem tertii Ottonis hoc novissimo in Urbem adventu, ea oblata occasione, de eadem Romana Urbe plura disserens, quæ scilicet cum coleret idola, jure dicta Babylonia inveniretur; postea autem ob sacræ religionis cultum in Dei civitatem conversa, non amplius, Babylon, profano sit nomine appellanda, quæ Babylonis per veritatis cultum abstersisset infame nomen, sed dicenda esset jure civitas sancta, itemque de cultu religionis, qui tunc in eadem ipsa Urbe vigeret, hoc ipso, inquam, Ottonis tertii tempore, hæc habet post alia:

22. « In tantum crevit in divino cultu, ut pro ruinis murorum et veterum fanorum surgant quotidie innumera ædificia Ecclesiarum, sive monasteriorum, e quorum incredibili numero (ut audivi a quodam sene, qui se dixit nutritum in eadem civitate) viginti possidentur a sanctimonialibus, quadraginta a monachis, sexaginta a canonicis, exceptis iis, quæ extra civitatem sunt, et in aliis Ecclesiis, sive capellis, quæ in eadem Urbe abundant ». Et paulo post: « Hanc siquidem Urbem quasi intuentes undique collectæ plurimæ gentes, assunt verba sacræ Scripturæ, et dicunt: Omnipotens Roma, gloriosa ¹ dicta sunt de te, quia civitas Dei es facta ». Hæc et alia Arnolphus de statu Urbis hujus temporis omnium deploratissimi, quo nescientibus ista videri potuisset cultus Christianæ religionis illic penitus friguisse, imo inundantibus malis, extinctus pæne fuisse; cum tamen ita virens ac florens existeret, ut quod de ea, quæ typum tenebat Ecclesiæ, Arca Noe scriptum in divinis litteris reperitur ²: Multiplicatæ sunt aquæ, et elevaverunt Arcam in sublime »; in Romana Ecclesia re ipsa appareret expressum, ut in divino cultu existeret eminentior, cum existimari potuisset excrementum malorum obruta fluctibus. Ita plane peculiari Dei privilegio eidem civitati in more positum, ut tunc degentes in ea fideles cives promptiores exsurgant ad pietatis opera exercenda, cum magis pulsantur persecutionum diversarum flagellis. Cui illud Cantici canticorum conveniat ³: « Aquæ multæ non poterunt extinguere charitatem, nec flumina obruent illam ». Et elogium doctoris Gentium verax et loquens jugiter perseveret ⁴: Fides vestra annuntiatur in universo mundo ».

¹ Psal. LXXXVI. — ² Gen. VII. — ³ Cant. VIII. — ⁴ Rom. I.

Anno periodi Græco-Romanæ 6494. — Anno Æræ Hispan. 1039. — Anno Hegiræ 392, inchoato die 20 Nov., Fer. 5. — Jesu Christi 1001.

— Silvestri II papæ 3. — Ottonis III reg. 19 et 6. Basil. et Const. imp. 26.

1. *S. Heribertus an. DCXCIX Coloniensis archiepisc. creatus.* — A num. 16 ad 19. Quia *S. Heribertus* Ottonis III cancellarius, aliquo tempore Romæ hoc anno substilit cum eodem imperatore, a quo anno nongentesimo nonagesimo nono archiepiscopus Coloniensis dictus fuerat, hic nobis de illo agendum. Bollandus ad diem xvi mensis Martii profert primævam ejus Vitam a Lamberto monacho Tuitiensi post *Heriberti* mortem viginti circiter annis scriptam, quæ cum Baronii tempore non extaret, sed tantum altera Vita a Ruperto Tuitiensi abbate initio sæculi duodecimi elucubrata, non potuit cardinalis doctissimus primum ordinationis ejus annum a tenebris eruere. Anno enim MXXI, num. 1, ubi de ejus morte agit, cum cum anno Christi nongentesimo nonagesimo octavo copulat, quod Rupertus cap. 1 scribat: « Anno ab Incarnat. D. N. J. C. DCXCIX, Romanorum regente imperium Ottone tertio », Coloniæ Agrippinæ pontifex datus est *S. Heribertus*, « vixitque in eadem sede laudabiliter annos viginti tres, menses duos, dies ferme viginti duos ». Obiit enim die xvi mensis Martii. Baronius ex duratione sedis a Ruperto memorata annum Christi corrigit, putatque legendum, anno DCXCVIII.

2. *Refellitur opinio contraria.* — At non in anno Incarnationis, sed in annis sedis error cubat, et loco annorum viginti trium, substituendi anni *viginti et unus*, non vero xxii, ut habet Bollandus. Ipsemet Baronius an. DCXCIX, num. 17 et seqq. Ottonis III Diploma recitat, quo is se erga Vercellensem Ecclesiam munificentissimum præbuit, donans ei ipsam Vercellensem civitatem cum comitatu, necnon comitatum *S. Agathæ*: quæ donatio hanc subscriptionem habet: « *Heribertus* cancellarius vice *Petri Comani* et archicancellarius recognovi. Dat. non. Maii anno Dominicæ Incarnat. DCXCIX, Indict. xii, anno tertii Ottonis xvi, Imperii iv, (legendum, iii, ut recte Baronius ibidem). Actum Romæ feliciter. Amen ». Quare sanctus *Heribertus* mense Maio anni DCXCIX nondum archiepiscopus Coloniensis erat; cumque Lambertus in ejus Vita tradat, eum episcopum a Coloniensibus designatum, Ravenna, ubi ad discordes reconciliandos ab imperatore

missus fuerat, Romam advolasse, ut episcopatum detrectaret, et cum non posset, mansisse paulo plus duobus mensibus apud Cæsarem, subdatque: « Accepto dein a *Silvestro II* papa pallio, explevit brevi prolixum viæ spatium, et in Vigilia Natalis Christi Coloniæ in cathedra sua sublimatur, et inungitur a suffraganeis chrismate principalis olei », manifestum est, ejus ordinationem spectare ad ann. DCXCIX, et accurate Rupertum scripsisse, cum vixisse in ea sede annos xxi, ut locum ejus correximus, menses ii, dies ferme (id est circiter) viginti duos, ac vita functum anno MXXI; qua de re suo loco rursus agetur.

3. *Otto III Romam relinquere cogitur.* — Leo Oslensis lib. 2, cap. 24, postquam de gestis anno superiori ab imperatore locutus est, subjungit: « Sequenti tempore Beneventum rursus advenit: eamque diebus multis undique obsidens, cum nihil ea obsidione proficeret, Romam iterum rediit ». Verum Romani novam adversus eum conjurationem tecerunt, atque armis arreptis aliquot ex militibus ejus occisis, ipsum in prætorio obsiderunt. Lambertus in Vita sancti *Heriberti* archiepisc. Coloniensis cap. 2, hanc obsidionem his verbis indicat, loquens de tertia ultimaque Romana protectione hujus imperatoris: « Novissime Augustus Italiam non rediturus ingreditur (an. nempe DCXCIX) et undique valida collecta manu iterum insurgentes in se irrumpere et conterere nititur. Virum Dei ad eundem comitatum secum invitat, quod, ut dictum est, de salute sua in eum cunctis uberius confidat: ut si quando armis deficeret, consultu hujus et prece proficeret. Inter viandum uterque de communi animæ commodo adinvicem pertractat, quid memorabile secundum Deum post se posteris relinquat; placet ambobus, ut quilibet amborum sospes reverteretur, quocumque casu alter detineretur, de rebus hæreditariis ædificaretur decens cœnobium, titulatum Dei Genitrici, Matri et Virgini virginum. Protinus ad id operis eidem archipræsuli contradit Cæsar optima majorum suorum prædia, legibus rem charta et attramento roborans sub assignatis testibus. Deinde Romæ proximans, et diviso exercitu adversantes sternens et populans, non multo post in Patyrna castro (quod alii

vocant paternum) per mulierem veneno perit », anni scilicet sequentis initio.

4. *Victoriæ de Bulgaris a Basilio imp. reportatæ.* — Curopalates et Cedrenus varias victorias a *Basilio* imp. de *Bulgaris* reportatas narrat, ex quibus illustre *Bulgaroctoni* cognomen adeptus est, ut prodit *Nicetas* in *Isaacio* lib. 1, num. 6. Anno superiori *Indict.* xiii notato, ingentem exercitum in *Samuelem* *Bulgarie* regem misit, ducibus *Theodorocano* patricio et *Nicephoro Xiphia* protospathario, qui capta maiore et minore *Presthlaba* atque *Phliscoba* victores *Cpolim* rediere. Hoc vero anno ipsemet per *Thessalonicensem* agrum copias in

Bulgariam traduxit, captisque *Berrhœa*, *Serviis* et *Vodena*, *Thessalonicam* rediit. Anno deinde mii, *Indict.* xv, *Vidynum* oppidum per octo menses oppugnatione tracta, vi capit: cumque ad urbem *Scopias* accederet, *Samuelem* trans *Azium*, seu *Bardarium* fluvium incautius agentem, circumventum in fugam conjicit, *Scopia Romano* Petri *Bulgarorum* regis filio ac *Borisæ* fratre urbem imperatori tradente, a quo patricii et præpositi dignitate et *Abydensis* oppidi præfectura donatur. Nullus exinde annus effluxit, quin aliquid in *Bulgaros* *Basilius* tentaret, ut fuse *Historici Byzantini* narrant.

SILVESTRI II ANNUS 4. — CHRISTI 1002.

1. *Ottonis III imp. obitus.* — Sequitur annus Redemptoris secundus post millesimum, Indictione decima quinta cœptus, quo Otto imperator quinto kalend. Februarii ex hac vita decessit, et in Germania ejus in regnum Henricus *Bavariæ* dux a principibus Germaniæ rex successor eligitur. De his acturi, primum omnium more nostro, errantibus pluribus in his quæ ad certam rationem temporis spectant, qui anno superiori defunctum Ottonem et subrogatum ponunt Henricum, veriolem ac certiolem de tempore firmemus assertionem. Atque in primis, cum ex recitato anno superiori *Diplomate* constet, illud datum *Papiæ* x kal. Julii, et absque controversia asseratur Otto defunctus quinto kalend. Februarii, utique in sequentem annum, hunc ipsum scilicet, sit necesse referre. His accedit, quod cum in *Diplomate* ejusdem *Henrici* regis, successoris *Ottonis*, quo *Privilegium* continetur datum ab eo monasterio *Sancti Vincentii* ad fontes *Vulturini* posito, annus Redemptoris millesimus decimus quartus, ejusdem *Henrici* regis ponatur annus duodecimus: plane asserere necesse est ipsum hoc anno regnare cœpisse. In fine enim ipsius ista leguntur: « Henricus cancellarius vice *Euphardi* (*Everardi*) episcopi et archicancellarii recognovit. Datum anno *Dominicæ Incarnationis* millesimo decimo quarto, Indictione duodecima, anno domini *Henrici* imperatoris regni duodecimo, imperii ejus primo. Actum *Romæ* feliciter. Amen ». Ex quibus pariter intelligis, annos imperii ejus non

ab hoc anno, ut faciunt multi, sed ab eo quo a Romano Pontifice *Romæ* coronatus est imperator, numerari cœptos. His adde, quod cum *Rupertus* abbas, ejusdem sæculi scriptor, affirmet *Henricum* ipsum creatum regem fuisse, cum *Heribertus Coloniensis* archiepiscopus tertium ageret annum in pontificatu, de quo dictum suo loco superius: plane non superiori, sed præsentii oportuit esse defunctum Ottonem, atque subrogatum Henricum. Cui veritati adstipulantur *Marianus Scotus*, *Lambertus* ac *Sigebertus*, qui hoc pariter anno collocant egressum Ottonis, et ingressum Henrici.

2. De loco etiam, ubi defunctus sit Otto, haud est antiquorum eadem assertio, *Ruperto* abbate *Tuitiensi* asserente *Romæ* mortuum: *Petrus* autem *Damiani* in *Romualdo*, eum ab Urbe digressum in itinere apud Paternum defunctum affirmat; item et *Ditmarus*. Sed et de obitus die nec par est scriptorum assertio. Nam *Marianus Scotus* quinto kalend. Februarias eum ex hac vita decessisse tradit; *Hermannus* ponit extinctum decimo kalend. ejusdem, duodecimo vero plures; *Ditmarus* nono kalend. affirmat. Discessisse ab Urbe una cum *Silvestro* Pontifice Ottonem imperatorem, auctor est *Sigebertus*. Quod enim sibi sensisset infestum, ab Urbe deducere, et secum ducere habuit in consilio. Necis illatæ veneno eam afferunt causam, quod ejus ab Urbe recessu spe frustrata *Crescentii* quondam uxor, quæ conceperat animo ex amatoriis pollicitationibus se ab eo in uxorem ducendam ac

dicendam imperatricem : sic deceptam se videns, ultionis stimulis agitata, molitur necem, venenum parat, chirothecis infundit, quas ei quasi pignus amoris dedit; quibus ille incautus usus morbo lethali confectus exstinguitur. Ditmarus, qui his diebus vixit, scripsitque per dies ferme singulos quæ tunc acciderunt, nihil prorsus de commixtione Ottonis cum uxore Crescentii habet, nec veneno esse defunctum; sed quo fuerit morbo confectus sic narrat, primum ista præmittens¹ : « Appropinquante ejus obitu, multa prævenere importuna; nam nostri duces et comites non sine conscientia episcoporum multa contra eum conspirare nituntur, Henrici ducis Bavarie postea successoris sui ad hoc auxilium postulantes. Hic ultima patris suimet et æquivoci monita, qui in Gandersheim obiit ac requiescit, memori servans in pectore, et sibi hactenus in cunctis fidelis, nullum his præbuit assensum. Imperator hoc statim comperiens, et patienti ferens animo, in Paterna urbe pustellis interiora prementibus et interdum paulatim erumpentibus infirmatur, qui facie clarus ac fide præcipuus IX kal. Febr. Romani corona imperii, exivit ab hoc sæculo, suis insuperabilem relinquens mœrorem, quia tempore eo non fuit ullus largior, ac per omnia clementior illo etc. » Hæc Ditmarus, vir sanctitate præstans, qui vel leve quodvis mendacium non secus ac capitale piaculum, ut profitetur, exhorruit. Cæterum quid certum verumque, quidve vulgo sparsum, creditum atque scriptum fuerit, in tanta auctorum discrepantia laud ausim sententiam ferre, ac reliquos omnes mendacii redarguere : quisque sibi arbiter lector esto.

3. *Hugo marchio Hebruriae dux Romæ, ejusque memoria vindicata.* — Aderat comes itineris Hugo Hebruriae marchio, dux Urbis, (præcipuus hic erat magistratus) qui in illis Urbis tumultibus eidem Ottoni præsto fuerat, liberans eum a conjuratione factiosorum perduellium Romanorum : potens quippe erat, et summæ in Urbe ipsa auctoritatis ducatum gerens, favens semper imperatori. Testatur id Sigebertus. Quod autem non amplius viri hujus inferius mentio haberi contingat, jam hic cuncta quæ de eo reperimus digna memoria, describamus. At primum scias, ex iis quæ ex Petro Damiani dicturi sumus, quod ista quæ modo ex Sigeberto sunt narrata, fide minuuntur, siquidem ante Ottonis obitum Hugonem esse defunctum, ab eodem Petro qui hoc ipso sæculo vixit asseritur. Quod et perspicue ex antiqua inscriptione ad ejus sepulchrum posita demonstratur, dum non hoc anno quo posuimus, secuti Sigebertum, eundem Hugonem mori contigit, sed superiori, qui est Redemptoris millesimus primus. Sicque ex Petri scriptis, quæ post hæc cusa ad nos pervenerunt, ista corrigimus. Sed et ex eodem probatæ fidei auctore, quæ de hoc ipso Hugone memorie

prodidit, hic describamus. Ipse quidem in Epistola quam scripsit ad Godefridum Tuscie marchionem, ejusdem Hugonis postea successorem, hæc de eodem Hugone habet, dum ad ejus sequenda vestigia sic cohortatus est eum :

4. « Ut autem domesticum tibi, vel (ut ita loquar) vernaculum præbeamus exemplum, nemo melius occurrit, quam gloriosæ memoriæ Hugo dux et marchio, qui eum, quo tu fungeris, obtinuit principatum; obtinuit, inquam, utramque Marchiam, et quam Thyrrhenum videlicet, et quam mare Adriaticum alluit. Sed cum perpenderet, quia propter improbitatem injuste viventium strenue regere utramque non posset, cessit imp. marchiam Camerini cum Spoletano ducatu; juri vero proprio Tusciam reservavit. Hujus tempore, Capuanus princeps (si rite rem teneo) dum manibus chirothecas vellet abducere, hi qui adversum eum conspiraverant, ei protinus quasi subvenientes occurrunt, manus ejus utrasque complodunt, et mox evaginatis gladiis eum confodientes interimunt. Quod mox ut incomparabilium virtutum viro, Hugoni videlicet marchioni, delictum istud patenter innotuit; nihil moratus Capuanam urbem numerosis exercituum legionibus circumscedit, eamque tamdiu bellicis armatorum copiis oppugnare non destitit, donec ex ea victoriam caperet, et interfectores domini sui digno necis supplicio trucidaret ». Consentiant his quæ habet Leo Ostiensis in Chronicis Cassinatis¹. Pergit vero Petrus : « De quo nimirum et alia tot virtutum insignia referuntur, ut prolixitate temporum splendida nominis ejus fama aboleri nullatenus valeat, sed quasi virens semper et florens in ore hominum solemniter vivat. E quibus et nos scribere nonnulla possemus, quæ forent ædificationi procerum profutura; sed quia dum nobis dicerentur, singula gestorum verba notare negleximus : ne, quod absit, aliquo fallamur in verbo, describenda hæc aliis delegamus. Breve tamen quod andivi de pueri ejus ætate non taceo. Obertus² marchio pater ejus, Hugonis regis naturalis filius extitit, qui nimirum Willam (Guillam) Bonifacii marchionis filiam, conjugali sibi fœdere copulavit ». Habes hic, lector, genus Hugonis exacte declaratum, nempe filium fuisse Alberti, Hugonis Italiæ regis filii, de quo superiori tomo ex Luitprando Ticinensi est dictum. Pergit vero Petrus :

5. « Hic pater scilicet Hugonis non multo post indignationem primi Ottonis incurrit, ac subinde relicta nesciens conjuge gravida, in Pannoniæ profugus exulavit. Qui longo post tempore resumptus in gratiam rediit : matrem autem grandiuscula cum prole reperiens, admiratus expavit. Negat homo se genuisse quem conspicit, et zelotypiæ permotus invidia, fetæ mulieri obscenum crimen intendit : nequaquam se tam insperatæ rei perhibet

¹ Ditm. l. iv.

¹ Leo Ost. l. ii. c. 10. — ² Adalbertus aut Albertus vel Ubertus dictus invenitur.

conscium ; diffitetur se conceptionis hujus nosse mysterium, nec posse fieri ut se asserat patrem, qui pręgnantem non reliquit uxorem. Ad hoc tandem res diutius ventilata pertrahitur, ut non aliter quam peractę purificationis indicio tam gravis objectio sopiatur. Hoc igitur ex utraque parte convenit, ut in vasta quadam amplissimę domus area conventus religiosarum fieret personarum, quibus nimirum in subselliis suis undique consistentibus, puer solus in medio poneretur, ut si patrem quem nunquam antea viderat adiens peteret, ab omni proculdubio matrem suspicione purgaret.

6. « Quid plura ? Conveniunt pontifices, ad sunt cum monachis et abbatibus inferioris etiam ordinis sacerdotes ; fletur, gemitur, suspiratur. Ad cęlos oculos erigunt, pugnis pectora męsta contundunt, profluentibus lacrymis tristia ora perfundunt. Dimissus itaque puer in medio sine pappate vel gerula, cępit ire. Et cum pater sederet inter vulgus, nec ab aliis videretur ulla subsellii varietate distinctus, contemptis omnibus, puer ad eum signanter accessit, eique tanquam notissima familiaritate blanditus adhęsit. Sic itaque liberavit matrem, dum divino provocatus instinctu petiit genitorem. Hoc igitur modo matris confusio tollitur, et patri filius redditur ; et utriusque parentis affectus erga se invicem in communi sobole reformatur. Omnes ergo qui aderant, tanto stupefacti miraculo, votiva mentis jubilatione et dignas auctori Deo gratias referentes exultant.

7. « Hic persępe dum equitaret, comitum cuneos post se dimittere consueverat, et vel solus, vel uno contentus assecla, longius pręcedebat. Et tunc agricolas vel opiliones his compellabat affatibus : Quid vobis, inquit, videtur de marchione isto, quem dicunt ? Numquid non crudelis et impius, pauperes opprimit, terram dissipat, et cuncta ditionis suę bona profligat ? Ad quę ipsi : Absit, aiunt, absit. Falsum est penitus, o homo, quod loqueris. Non est enim potestas talis super terram, quę scilicet violentiis et rapiis absteineat, quę in tanta pace et securitate populum sibi subditum regat. Vivat optamus, vivat ista potestas ad refugium pauperum, et prospere floreat ad omnem custodiam subditorum. Quod ille audiens, exultabat in Domino. Unde sępe dicebat : In tanta volo semper erga subditos et pręcipue erga rusticos mansuetudine vivere, ut annona quę caballi mei rodentis ore dilabitur, a rusticorum porcellis e vestigio colligatur. Porro autem, cum de se quid diceretur inquireret, quid aliud quam nostri Redemptoris imitabatur exemplum ? Qui nimirum cum omnia proculdubio nosset, illud tamen veluti nescius a discipulis inquirebat : Quem dicunt homines esse Filium hominis ¹ ? Cui cum illi diversas hominum opiniones exprimerent, addidit : Vos autem quem me esse dicitis ? Scilicet ut rex

Angelorum formam daret rectoribus hominum, non quid per os assentatorum suorum dicatur attendant, sed quod testimonium apud absentes habeatur inquirant, sicque quod reprehensibile ex eorum fama deprehenderint, corrigant ; ad exequenda vero bona quę de se dici cognoverint, avidius invalescant.

8. « Ut autem pręfati marchionis etiam finem breviter perstringamus : cum in extremę valetudinis languore decumberet, et totius regni lucem exstingui non parva diversorum hominum multitudo defleret, venerabilis quidam episcopus, cujus me ad pręsens vocabulum fugit, hoc in ligno, quod in igne tunc ardebat, expressum per quędam litterarum vestigia deprehendit : HUGO MARCHIO QUINQUAGINTA ANNIS VIXIT. Cumque hoc quasi faustum omen hi qui aderant crederent, signumque hoc esse recuperandę valetudinis, erectis in spem cordibus, autumarent, paulo post ipse defunctus est. Hic pręterea septem (sex) monasteria in sui juris possessione construxit, quę non modo prędiis ac mancipiis, sed aureis et argenteis vasis, diversis etiam Ecclesiasticis ornamentis copiosa liberalitate ditavit. In quorum uno, venerabili videlicet ac religioso, quod in honorem Dei Genitricis in Florentina civitate constructum, jacet cadaver ejus humatum.

9. « Cujus obitum cum Augustus, qui tum habenas regebat imperii, Otto videlicet Tertius agnovisset, quia quodam adversus eum stimulo mordebatur invidię, proflus in hanc vocem gratulabundus erupit : Laqueus contritus est, et nos liberati sumus. Sed paulo post, eodem scilicet anno, et ipse defunctus est. Sic itaque suam improvidus pertulit, qui de morte alterius nequiter exultavit, non attendens id quod vir sapiens ait ¹ : Noli de mortuo inimico gaudere, sciens quoniam omnes morimur ». Hucusque Petrus Damiani de rebus Hugonis usque ad obitum ejus. Quem esse defunctum in fine anni superioris, indicat nota temporis tunc sepulchro ejus incisa his verbis : OBIT ANNO SALUTIS MILLESIMO PRIMO. XII. KAL. JANUAR. in quo etiam litterę istę habentur incisę n. m. ii. n. s. Quę nihil pręterea quam hęc significare putamus, HUGONIS MARCHIONIS HUGONIS NEPOTIS SEPULCHRUM. Hęcque ex recitatis Petri Damiani scriptis, quibus asseritur, Hugonem huic nepotem fuisse Hugonis regis Italię, magni nominis viri, cujus nomen potius quam patris positum est in sepulchro, tum ob claritudinem avi, tum etiam ob patris obscuritatem, quod non legitimus Hugonis regis filius esset, sed nothus. Erat sarcophagum ejus porphyreticum, quod hodie cernitur in atrio ejusdem monasterii (ut accepit) ad ministerium aquę nimis ingrate redactum. Sic infelix mortalium conditio fert, ut nec sedes sepulchri sit stabilis, sed diversis occasionibus pareat, vel mutetur et minuat, ut huic de quo est sermo Hu-

¹ Matth. xvi.¹ Eccl. viii.

goni accidit, dum mutatione sepulchri, insigniori parte ejus, labro diminutus fuerit porphyretico, et nobili tunc scripto (ut ea ferebat conditio sæculi) Epitaphio sepulturæ privatus omnino, quod Dei beneficio contigit reperiri. Siccine didicerunt æditi de benefactore adeo insigni benemereri? et quod deterius, ejusdem Hugonis vitam locupletatam mendaciis edere? quæ piget enumerare. Et in primis deforme illud, quod vestibulum ingredienti lectori fit obviam, non invitans ipsum, sed verberans et expellens; dum ibi asseritur Hugo iste fuisse princeps Magdeburgensis, Etruriæ vero ab Ottone Tertio imp. præfectus: quibus adversantur Petrus Damiani, Luitprandus, Glaber, et alii ejusdem temporis scriptores, dum ostendunt hunc

non Germanum, sed Italum, avitaque hæreditate possedisse principatum Etruriæ. At non est nostri instituti hic errores reliquos numerare, ac confutare fabulas ibi inani studio concinnatas. Præstat tanti principis vitam e purioribus deducere fontibus, nempe a Petro Damiani et aliis, ex quibus nobilissima Florentinorum ingenia panegyricas orationes dici solitas, dum eidem parentatur, annis singulis, die anniversaria obitus ejus, feliciori minerva depromant. Jam vero inditum veteri sepulturæ, sed perditum et repertum, hic ejus velut sepulpi describamus Epitaphium memoria dignum, utpote acrosticis novi generis versibus mira concinnatione descriptum, ista desuper inscriptione signatum¹:

EPITAPHIUM HUGONIS DVCIS, TVSCIÆ MARCHIONIS.

F	LVCIVAT IN TERRI	S
L	VMINIS ET STABIL	I
E	NEGO DIVES VGO D	V
R	EXI IVRA PI	E
E	T DOCVI MITE	M
M	E RAPTOR FVRT	A
A	FRVM ME COLVIT RE	G
R	OMA MIHI PARV	I
I	STE TAMEN TVMVLV	S
T	VSCA MANVS PLORE	T
V	T ME PŒNÆ ARDO	R
M	VNDO CORDE DE	V
		M

QVI SEMPER VIVERE QVÆRI	T
NON MANET ILLE GRAD	V
X FVLSI NOMINE CLARV	S
TEGMINE CARNIS IN IIO	C
PRAVVM SVB FASCE COEG	I
PAVIT AMARE MAL	A
NVM ET QVI REXERAT ILLV	D
T VT PATER HANC DOMV	I
ME CLAVDIT MARMORE PARVV	S
MORTIS HONORE SVB IIO	C
NON VRAT LECTOR ADOR	A
M QVI BONA CVNCTA REGI	T
ORE BENIGNO.	

Hæc de Hugone, quem Glaber vocat marchionum optimum cum agit de ejus obitu¹.

10. Legimus ejusdem duo donaliorum Diplomata nobis ostensa a domino Constantino Cajetano monacho congregationis Cassinensis, Archivorum pervestigatore diligentissimo: alterum datum anno Redemptoris nongentesimo nonagesimo quinto, Indictione octava; alterum vero anno nongentesimo nonagesimo septimo, Indictione decima. Quibus apparet eundem Hugonem filium fuisse Uberti, sive potius Alberti (uti in altero eorum legitur) marchionis Tuscæ, et Willæ filiæ Bonifacii marchionis, quæ exstruxit Florentiæ a fundamentis Ecclesiam S. Mariæ una cum monasterio eidem conjuncto, quam idem Hugo duabus illis donationibus redditibus amplissimis locupletavit. Porro eodem Hugone defuncto, successit in locum ipsius Bonifacius marchio Alberti comitis filius, germanus ejus, ut apparet ex alio Diplomate donationis eidem Ecclesiæ factæ, dato anno Redemptoris millesimo nono, Indictione septima, pridie idus Augusti, in quo ipse Bonifacius se nominat filium Alberti. At de Hugone hæcenus, in quem obiter incidimus occasione Ottonis imperatoris; ad quem revocemus orationem.

11. *Judicium de Ottone et ejus stemmatis extinctio.* — De ipso rursum Ottone, ejus deplorans exitium, ista habet Rupertus abbas Tuitiensis, in Heriberto ejusdem Ottonis tunc comite in itinere, et in rebus agendis consiliario, ab aliis diversa nonnihil sic narrans²: « Qui nimirum imperator, si ut in cæteris, ita et in causa per quam mortem incurrit, consilium beati viri attendisset, mullo melius sapientiæ appropinquasset, et non pœnituisset eum, quemadmodum ipsa Sapientia dicit³: Omnia fac cum consilio, et post factum non pœnitebis. Quod quia non fecit, incidit in insidias mulieris male, videlicet ejus, cujus virum Crescentium sibi rebellantem captum jusserat capitalem subire sententiam, et ab illa non præcavens, quamvis a sancto viro sæpe esset commonitus, veneno intra cubiculum dormiens infectus est. Obiit itaque Romæ anno post ordinationem beati viri tertio. Erat autem nunc quoque sanctus idem cum illo, utpote ad disponenda pernecessarius maxima regni negotia. Cui cum die sequenti confessus fuisset pestem quam perceperat, seque mori persen-tiret, id quoque supremum ab eo postulavit,

¹ Glab. l. II. c. 7.

² Rupertus abbas, c. 10. apud Sur. tom. II. die XVI Mart. — ³ Eccl. XXXII.

quatenus corpus ejus Aquisgrani sepeliendum transferret ».

12. Hæc ipse de obitu Ottonis III imperatoris, in quo extinctum penitus stemma regnantium Ottonum, nonnisi in nepotem Magni Ottonis, secundum hæredem imperii propagatum : ita divinitate ulciscente delicta quæ in Sedem Apostolicam perpetrarunt, pro arbitrio amovendo atque subrogando Pontifices, quamvis nonnisi pietatis intuitu id facere præ se ferrent. Sed nec alium prætextum legitur habuisse Saul, quando non expectato Samuele obtulit sacrificium¹, sibi male vindicans quæ essent tantummodo sacerdotum, ob idque regni atque vitæ privatione mulctatus. Neque alius fuit quam pietatis obtentus, cum calcitrantibus hominibus arcam Dei gestantibus, eam ad casum inclinatam, ne corrueret, tetigit Oza² : cujus rei causa statim a Deo percussus interiit, qui videri poterat dignus magna mercede, quod festinus arcæ cadentis periculo subvenisset. Magno quidem damno quovis prætextu pietatis a laicis quibuscumque etiam regibus sacra tentari, non his tantum, sed plurimis aliis exemplis sæpe superius contigit demonstrari, quorum causa eos male periisse, et ad extraneos translata vidimus regna ; ut non immerito Samuel ad Saul dixerit, causam aperiens regni jacturæ³ : « Quod si non fecisses, jam nunc præparasset Dominus regnum tuum super Israel in sempiternum, sed nequaquam regnum tuum ultra consurget, etc. » Sed de subrogato in regnum Germaniæ Henrico duce Bavarie, quæ prosequatur idem Tuitiensis abbas videamus. Pergit enim :

13. « Hoc agere insistens vir Dei, nempe ut corpus imperatoris Aquisgranum deferret, regalia quoque ornamenta, regis scilicet, penes se habuit, et electioni non interfuit novi principis Henrici tunc Bavariorum ducis, quem secundum sæculi dignitatem locupletissimum, et litterarum studiis non tenuiter instructum principes regni regem sibi elegerunt. Hæc fuit occasio quam adversus illum rapere potuerunt adversarii, quales in Ecclesia nunquam defuerunt, ex quo sacrificia Deo primi obtulerunt Abel et Cain, scilicet falsi fratres, quibus Scriptura dicit : Abierunt in viam Cain⁴; quorum pressuram Apostolus inter cætera pericula sua maxime gemit⁵. At hæc quidem regalia repetita cito reddidit. Sed quia novi (ut jam dictum est) principis electioni non interfuit, ex tunc illi suspectus erat; unde et idem rex obtrectatoribus sancti pronius aurem præbebat. Deinde impacato semper cum odio persecutus est, donec a Domino redargui meruit paulo ante obitum sancti, quod in loco suo præsens narratio non præteribit ». Ille Rupertus abbas. Quod insuper ad sepulturam Ottonis spectat, intestina ejus Augustæ Vindelicorum sepulta affirmant e corpore exsecta, ne ipsis corruptis reliqua pars corporis tabo inficeretur. Sed

quod ad longius ductum funus Ottonis ejusque sepulturam pertinet, cæteris omnibus locupletius atque sincerius Ditmarus narrat.

14. *Henricus in regno Germaniæ succedit Ottoni.* — Idem vero agens de Henrico successore in regnum ejus cunabula repetens et vitæ bene institutæ primordia, ipsum educatum fuisse a sancto Wolfango Ratisponensi episcopo tradit his verbis :

Nutrit præclarum Wolfgangus alumnum,
Qui sequitur Dominum toto conamine Christum.

15. Qui quidem sanctus inter cætera charismatum dona cum polleret spiritu prophetiæ, hæc de regno consequendo ipsi prædixit, ut ejus temporis auctor, qui res ab eo præclare gestas conscripsit, testatur his verbis : « Cum enim ad eum ob impertiendam benedictionem (ut crebro solebat) adductus esset, speciosissimam ejus prolem Henricum, qui postea Dei nutu factus est imperator, regem appellavit; fratrem ejus Brunonem vocavit antistitem, sororem ejus natu majorem reginam, minorem, quam ipse baptizavit et de sacro fonte suscepit, abbatissam nominavit ». Quæ quidem omnia ut prædixit et patuit, evenere. Sed et quomodo idem sanctus Wolfgangus, cum jam ex hac vita ad Deum migrasset, de imperio adipiscendo, apparens eidem Henrico prædixit, suo loco dicturi sumus.

16. Porro ipse Henricus Moguntie inauguratur rex ab archiepiscopo Moguntino Willigiso, tertio id. Junii; quæ autem tunc acciderint, et quos deinde passus sit adversarios, idem Ditmarus pluribus narrat, adeo ut non solum quæ annis singulis, sed quæ mensibus et diebus quibuscumque suis acciderint, exacte descripserit; quem consulat qui ea cupit.

17. *Ecclesia Hungarica Stephano rege mire aucta florescit.* — Quo tempore, Hungarica Ecclesia sub rege Stephano et Gisela sive Gisla regina, quam filiam Henrici regis in uxorem accepit, mirifice culta floruit, et longe lateque propagata et illustrata est; cujus sicut ortum et cunabula recensuimus tomo superiori, ita progressus felicissimos describere minime prætermitemus, hic red dentes, quæ in rebus gestis ejusdem sanctissimi regis Chartultius episcopus scripsit, nec aliis quam ejus verbis. Subdit enim hæc post ipsius coronationem enarratam¹ : « Porro consortem regni præcipue prolis propagandæ causa sibi adscivit Henrici imperatoris filiam Gisela; qui imperator ob morum comitatem et mansuetudinem, Pius est appellatus. Ea autem Gisela chrismate uncta, et corona regia insignita, qualem se præbuerit erga Dei cultum ornandum, quam frequens et benigna ac liberalis erga Christo servientium congregationes fuerit, multarum Ecclesiarum cruces, vasa

¹ 1. Reg. XIII. — ² 2. Reg. VI. — ³ 1. Reg. XIII. — ⁴ Jud. Ep. — ⁵ 2. Cor. XI.

¹ Charl. in Vita S. Steph. regis Hung. c. 9. 10. 11. 12.

sacra et utensilia, miro opere effecta vel contexta in hunc usque diem testantur; præcipue tamen Ecclesia Vespriniensis, quam illa a fundamentis constructam, rebus omnibus quæ ad Dei ministerium sufficiant, in auro, argento, multigenisque vestibus præclare ornavit.

18. « Ipse vero rex nuper inchoatos episcopatus, id est, tam metropolitani quam cæteras cathedrales Ecclesias, amplissima singulis assignata diœcesi, et idoneo præfecto antistite, abbatias quoque prædiis, chortibus, familiis et redditibus, regia plane munificentia instruxit, crucibus, vasis sacris, aliaque suppellectile ad Dei ministerium spectante, pro cujusque necessitate vel indigentia satis exornavit, annisque singulis, quoad vixit, munera et oblationes semper auxit, ne aliquid extrinsecens conquirere cogerentur, qui rebus divinis peragendis præerant. Monachorum quoque vitam et conversationem modo per seipsum, modo per alios accurate investigans, desides arguebat, alacres et vigiles charos habebat. Canonicorum ministerium episcoporum moderationi et circumspectioni sub Christi Ecclesiæ testificatione commendabat, cum Apostoto omnibus omnia factus, ut omnes lucrificeret ¹.

19. « Ea tempestate in monasterio S. Martini erat monachus quidam, Sebastianus nomine, cujus vita probabilis et in Dei cultu religiosa devotio habebatur. Eum venerabilis rex miro cœpit amore complecti (quanto enim quisque esset religiosior, tanto illi quoque charior erat) atque ob vitæ ejus merita dignum eum censens qui episcopi dignitate polleret, Strigoniensis Ecclesiæ archiepiscopum eum esse voluit. Sed quia flagellat Deus omnem filium quem recipit, Sebastianum illum, ut ejus patientia probaretur, ad tempus utriusque luminis orbitate afflixit. Ne vero novellus grex pastoris gubernatione destitutus a recto itinere deflecteret et aberraret, Romano Pontifice assentiente, Astricum Colocensem episcopum, cujus jam crebro est habita mentio, in ejus locum rex substituit. Triennio inde evoluta, Sebastianus ex Dei benignitate recuperavit visum, et Pontifice Romano approbante, Astricens cum pallio rediit ad suam Colocensem Ecclesiam, Sebastianus Strigoniensem gubernandam recepit.

20. « Erat sane rex ille fidelis et integer in omnibus factis suis, Deo toto pectore deditus et addictus; seipsum quoque et regnum suum per votum et oblationem in perpetuæ Virginis Mariæ tutelam assiduis precibus contulit. Cujus sacratissimæ Virginis honor et gloria tam est celebris apud Hungaros, ut festum Assumptionis ejus tacito proprio nomine, sua lingua, diem Dominae appellent. Atque ut rex piissimus propensorem tantæ Virginis defensionem et patrocinium posset promereri, in ipsa regiæ sedis civitate, quam Albam vocant, in ejusdem perpetuæ Virginis laudem et

honorem grandem et insignem, atque in primis celebrem Basilicam condidit, opere sane mirifico, cælatis chori parietibus, et pavimento marmore strato. Quam Basilicam qui vidit, testimonium perhibet dictis nostris, innumera illic haberi palliorum, et eorum quæ paramenta vocant genera; tabulas altarium non paucas ex auro purissimo, pretiosissimorum lapidum ordinibus conspicuas; Eucharistiæ ædiculam, quam ciborium dicunt, arte mirabili supra Christi mensam exstructam; conclave omni genere vasorum crystallinorum, onychinorum, aureorum et argenteorum abunde retertum. Tantæ vero elegantiae Ecclesiam usque adeo rex sibi uni vindicavit, adeoque immunem esse voluit, ut nullus episcopus quidquam in ea juris haberet. Quibus autem diebus absolutio esset pœnitentibus impendenda, aut sacrum chrisma conficiendum, eum episcopum voluit in ea et absolvere pœnitentes, et chrisma conficere, quem ipse vel præsens id facere juberet, vel quem absens committeret. Divina quoque missarum solemnia, rege illic præsente, eum duntaxat episcopum celebrare, cui rex, consentiente cum fratribus præposito, id demandaret: absente autem rege, absque præposito et fratrum bona venia, nullum episcopum illic sibi vel missas celebrandi vel cujuslibet pontificalis ministerii exercendi licentiam usurpare. Præterea ejus Ecclesiæ populum tanta libertate et immunitate gaudere voluit, ut nulli omnino episcopo decimas penderet, sed soli præposito et fratribus, prout ipse instituisset, servitium exhiberet». Porro ista omnia et alia ex Privilegio Apostolicæ Sedis obtinuisse, reliqua innumera exempla de regibus et aliis, qui eadem nonnisi ab Apostolica Sede obtinuisse sciuntur, aperte declarant. Pergit vero:

21. « Quæcumque autem servus Dei per id tempus acquirere potuit, ea in Christum refundere studuit, a quo illa profecta non ignoraret; ut qui eum hujus mundi gloria et honore dignum fecerat, etiam cælestis patriæ civibus clementer adscribere dignaretur. Et in Prophetis quidem de Apostolis scriptum legimus ¹: In omnem terram exivit sonus eorum, et in fines orbis terræ verba eorum. Non debet autem hoc de solis illis duodecim accipi, sed de omnibus a Deo ad evangelizandum missis, quorum fide, verbis et moribus Ecclesia suis augescit incrementis. Ex eorum autem numero ille, de quo agimus, Christianissimus rex non minimus fuisse putandus est, ut qui bonæ voluntatis, et piorum operum famam, quam Ecclesiis in propriæ ditionis amplitudine construendis sibi peperit, in longinquas regiones et urbes celeberrimas diffuderit ac propagarit. Extruxit enim in ipsa Hierosolyma, ubi Dominus noster Jesus Christus in carne versatus est, monachorum cœnobium, idemque prædiis et vineis, unde eis quotidiani victus copia suppetat, ditavit.

22. « Romæ quoque, quæ est mundi caput,

¹ 1 Cor. IX.

¹ Psal. XVIII.

sub protomartyris Stephani titulo, duodecim canonicorum collegium condidit, rebus necessariis et ad ejusmodi collegium attinentibus abundans; domos quoque et hospitia Hungarorum, qui orationis causa Romam ad beati Petri Apostolorum principis limina venirent, exædificavit, muro ea lapideo circumdans. Tum quoque urbem regiam Constantinopolim noluit suæ liberalitatis esse expertem, mirifici operis in ea condens Ecclesiam, rebus omnibus necessariis ei adjunctis. Itaque non immerito suæ dilationis Apostolus appellatus est. Etsi vero ille sibi evangelizandi munus non sumpsit, atamen ceu quidam concionatorum dux et magister, defensionis et sustentationis solatia eis suppeditavit ». Hucusque Chartuitius de felici rerum Christianarum progressu in Hungarorum regno sub sancto Stephano primo rege.

23. Qui quidem adeo pietate insignis, haud inferior militari fortitudine perhibetur. Hoc siquidem anno lacessitus a Giulia Transilvaniæ principe avunculo suo, ob disparem cultum religionis, ægro illo animo ferente Stephanum adeo addictum Christiano cultui; licet coactui adversus avunculum traheretur, ad bellum invitatus tamen et necessitate compulsus cum armis impeteretur, comparato exercitu Transilvaniam petiit, profligatoque hoste, eoque una cum suis captivo ducto, eam sibi provinciam subjugavit atque regno Hungarico junxit, quam et reddidit Christianam. Simulque ipse Giulia princeps cum uxore et filiis exemptus vinculis, Christi fidem amplexatus licet invitatus, ut asseritur ¹, omni excussa contumelia servitutis, ab eodem rege fuit regio more tractatus. Ista pluribus Annales Hungarici. Post hæc autem eidem regi certandum fuit cum Bulgaris Hungariam invadentibus, quos non sine magno labore, Deo impendente auxilium, superavit.

24. *Nortmannorum in Italiam primus adven-*

tus. — Hoc eodem anno (ut ex Leone Ostiense colligimus ¹) Nortmanni, licet pauci numero, magna tamen virtute Italiæ innotuere, specimen edentes insignis pietatis, cum ingenti animi robore ac fortitudine militari. Rem autem præclare gestam, ab eodem fideliter scriptam sic accipe: « Ante annos ferme sexdecim (scribebat tunc res gestas anni Redemptoris decimi octavi supra millesimum) Nortmanni quadraginta numero, peregrino habitu, quippe qui ab Hierosolymis, quo orationis causa perrexerant, redeuntes, Salernum applicuerunt, viri et statura proceri, et specie venusti, et armis præcipui. Quam civitatem cum a Sarracenis obsessam reperissent, accensis nutu Dei animis, a Guaimario majore, qui tunc princeps erat, equos armæque poscentes, subito in illos irruerunt; plurimisque peremptis, et reliquis in fugam versis, mirabili victoria Deo largiente potiti sunt. Efferuntur miris omnium laudibus, magnisque a principe illustrati muneribus, ut manere secum debeant multis precibus invitantur. Illi amore tantum Dei et Christianæ fidei assertionem hoc se fecisse asserentes, et dona respuunt et manere ibi posse se denegant. Prædictus itaque princeps, consilio habito, cum eis legatos suos in Nortmanniam dirigit, et veluti Narses alter, citrina per eos poma, amygdala quoque et inauratas nuces, ac pallia regia, et equorum phaleras auro argenteoque distinctas illuc dirigens, ad hujusmodi gignentem humum illos non modo invitabat, verum attrahebat ». Hæc Leo de primo in Italiam Nortmannorum adventu, et missa ad eos legatione: quæ penitus effectu non caruit, cum illis alia occasione aditus patuit in Italiam veniendi, vincendique tandem ac dominandi. Quod autem ad peregrinationem Hierosolymitanam spectat, his quidem temporibus fuisse frequentissimam ex partibus potissimum borealibus, auctor est Glaber et alii qui res gestas temporis hujus scripsere.

¹ Bouif. dec. II. l. 1. hoc an.

¹ Leo Ost. l. II. c. 38.

1. *Moritur Otto III imp.* — Ad num. 1 et seq. Chronographus Hildesheimensis, qui annum Christi et Indictionem a die Natali Christi exorditur, mortem Ottonis III his verbis narrat: « αμ, Ind. xv, imperator Otto Natalem Tudertinæ cum domino

Apostolico celebravit. Inde Romam tendens, Salernum (legendum, Paternum) oppidum adiit; sed febre et Italico morbo graviter correptus, cum generali omnium contristatione X kal. Februarii, proli dolor! ex hac vita morte immatura discessit;

cui Henricus dux Noricorum, vir in omni Ecclesiastica perfectione præcipuus, Willigiso Moguntiacensi archiepiscopo, et Bernwardo episcopo (nempe Hildesheimensi) ordinante successit ». Idem fere habet Hermannus Contractus ex editione Canisiana. Sed Ditmarus loco *X kalend. Februarii*, habet, *IX kalend. Februarii*, et aliqui *V kalend. Februarii*; sed hos ultimos errasse non dubito. Alii enim vel ad diem mortis, vel ad diem depositionis seu sepulturæ respiciunt, ideoque inter se minime discrepant. Idem Ditmarus lib. 5, pag. 52, testatur, *Ottone III* sine liberis demortuo, sanctum *Henricum* ei juxta veterem consuetudinem et jure hæreditario et jure electionis successisse, regnique primales in comitiis dixisse: « Henricum Christi adjutorio et jure hæreditario regnaturum ». Quoad annum emortualem hujus imperatoris, is apud antiquos certus et indubitatus. Adhemarus in Chronico, qui hoc tempore vixit, ait « Ottonem III, haustu veneni in partibus Beneventi » periisse; indeque liquet, *Patyrnam*, seu *Paternum* situm fuisse circa Fucinum lacum apud Marsos in ulteriore Aprutio, tunc in partibus ducatus Beneventi posito. Porro ex laudatis Chronici Hildesheimensis verbis apparet, verum esse quod scribit Sigebertus, imperatorem ab Urbe discessisse una cum *Silvestro* Romano Pontifice, non quod eum sibi sensisset infestum, ut Sigebertum Baronius interpretatur, sed quod eidem plurimum confideret.

2. *Ejus virtutes*. — Fuit *Otto III* bellica virtute Ottoni Magno avo inferior, religione vero ac eruditione, et Ottone II patre et avo multo superior. Appellatus est vulgo *Mirabilia mundi*, quia rebus præclare gestis omnes in admirationem rapiebat. Obiit improlis, et ut ex dictis liquet, valde juvenis. « Cernens exercitus », inquit Glaber lib. 1, cap. 4, « quem secum duxerat, se suo domino destitutum, coegerunt se pariter in unum agmen, ne ab iis quos in Italia præcesserant trucidarentur, imposito ante se in equo defuncti imperatoris corpore; sicque in patriam tuti pervenientes, in monasterio Beatæ semper Virginis Mariæ Aquisgrani decenter sepelierunt ».

3. *Laudatur Hugo Hetruriæ marchio*. — Ad num. 3 et seq. *Hugo* Hetruriæ marchio nominatissimus, qui semper Ottoni III fidelis fuit, donationem magnificam abbatiæ a *Willæ* matre Florentiæ conditæ fecit, in eaque sepeliri voluit. Grati erga conditorem suum Benedictini monachi cineres ejus marmoreo insigni monumento cohonestarunt, apposis insignibus et encomio, inscriptoque titulo. In Martyrologio Ms. canonicorum Lucensium et in Annal. Einsidelensibus a Mabillonio tom. IV Analect. pag. 479 publicatis, *Hugo* dicitur mortuus anno M, quod videtur confirmare Diploma Ottonis III hujus anni initio datum, quo bona attributa eidem abbatiæ pro salute animarum *Hugonis* ac *Willæ* ejus matris confirmat. Nam in fine ejus legitur: « Datum VI idus Januar., anno Dominicæ Incarnat. MII, Indict. XV, anno III Ottonis regni XVIII,

anno imperii VI. Actum in Paterno ». Non multo post ejus mortem erectum est illi sepulchrum porphyrogenelicum, eique Epitaphium affixum, ut narrat Ughellus in Italia Sacra tom. III.

4. *Ejus genealogia elucidatur*. — Baronius existimavit *Hugonem* Tusciæ ducem fratrem fuisse *Bonifacii*, hunc ei in ducatum successisse, et utrumque non *Ubertum* uti communiter creditur, sed *Albertum* patrem habuisse; at certa antiquitatis documenta hæc tria refellunt, quod, ut evidenter paleat et ducum Hetruriæ series in bono lumine collocetur, observandum *Ubertum* sive *Hubertum*, vel *Obertum* ut a Luitprando appellatur, filium *Hugonis* Italiæ regis ex *Wandelmoda* concubina, uxorem duxisse *Villam*, filiam *Bonifacii Majoris* cognominati, Spoletinorum et Camerinorum marchionis, ac ab eisdem genitos *Hugonem* Tusciæ marchionem anno superiori demortuum, et *Villam*, cum *Thealdo* seu *Theobaldo* conjugio postea conjunctam. Cum vero *Hugo* sine liberis obierit, successit ei, non *Bonifacius*, ut putavit Baronius, sed idem *Thealdus*, Villæ sororis *Hugonis* maritus. Id præter alios ipsemet *Theobaldus* docet in Constitutione LXXIII, tomo II Bullarii Casinensis recitata, quæ continet dotationem monasterii Sancti Benedicti de Padolryone a se nuper ædificati, et scripta est « anno IV regni Henrici, mense Junii, Indictione quinta », anno scilicet Christi MVII. In ea ait *Thealdus*: « Ego in Dei nomine *Theudaldus* marchio, filius quondam *Adelberti*, itemque marchio », meminitque in ea *Willæ* seu Villæ quondam conjugis suæ. Hinc etiam habemus *Thealdum*, avum *Mathildæ* comitissæ in Historia Ecclesiastica passim laudatæ, et nunquam satis laudandæ, filium extitisse *Adelberti* Tusciæ marchionis, qui in Constitutione LXI ibidem relata, dataque a *Guilhelmo* episcopo Mantuæ et ab ipso *Adelberto* comite, « sexto die mensis Novembris, Indictione decima », anno nempe MCDLXXXI, semel et iterum testatur se *Adelbertum* et *Attonem* comitem appellari, et suum quondam patrem fuisse *Sigifredum*. Sigonius, lib. 8 de Reg. Ital. et cum eo Fiorentinus in Comment. de *Rebus ad Mathildem comitissam spectantibus*, lib. 1 et 3, tradunt, *Thealdum* anno MVII demortuum; sed *Bonifacium* filium, *Mathildis* comitissæ patrem, ei in Tusciæ ducatum successisse male affirmat Sigonius; longe enim serius *Bonifacium* Hetruriæ præfuisse recte ibidem vidit Fiorentinus, ubi scribit nullum sibi occurrisse Diploma ante annum MXXXIV scriptum, in quo *Bonifacius marchio* appelletur. In eodem tamen Bullario Constitutio LXXXIII continet donationem *Richildæ* comitissæ et ipsius *Bonifacii* factam anno MXXV, VI kalendas Maii, Indict. VIII, in eaque *Richilda*, quæ prima ejus uxor fuit, se comitissam, et *Bonifacius* se marchionem nuncupat.

5. *Proximi ejus successores in ducatu Tusciæ*. — Mortuo *Theobaldo*, Tusciam aliquo tempore rexit alius *Bonifacius*, qui se in Diplomate a Baronio memorato, annoque MIX exarato, marchionem et

filium *Alberti comitis* vocat. Quod non solum ipsimet Baronio, sed etiam Beslio in Tractatu *de vera origine Hugonis Italiae regis*, causa errandi fuit; ex eo enim deduxit Baronius Hugonis Tusciae ducis patrem, non *Hubertum*, sed *Albertum* dictum; Beslius vero illud supposititium esse, quod certo, inquit, constet, Bonifacium non *Alberti*, sed *Thealdaldi* filium fuisse. Verum *Albertus* iste diversus ab *Huberto*, et *Bonifacius Alberti* filius, alius a *Bonifacio Mathildis* comitissae patre et *Thealdaldi* ejus avi filio; neutrumque in dubium revocari potest, cum certissimis documentis innitatur. Porro *Thealdaldum* marchionem *avum* fuisse *Mathildis*, ipsamet prodit in Const. LXXVIII, tom. II Bull. Casinensis, data anno MCIV.

6. *Dies coronationis S. Henrici Germaniae regis.* — A num. 5 ad 9. Nescio a quo Baronius num. 8 acceperit, *sanctum Henricum*, Bajoariae ducem hoc anno in locum *Otonis III* electum Germaniae regem, *III idus Junii* coronatum fuisse; *Ditmarus* enim lib. 5 refert eum die *VIII idus Junii* in regem electum esse, et *Adelboldus* episcopus *Ultrajectensis*, scriptor coevus, in *Vita sancti hujus imperatoris*, a *Gretzero* in sanctis *Bambergensibus* publicata, diem ejus inaugurationis his verbis diserte notavit: «*S. Henricus VIII idus Junii* (is dies ad ejus electionem referendus, et coronatio facta *VII idus Junii*, in quem *Dominica* cadebat) in regem *Moguntiae* eligitur, acclamatur, benedicitur et coronatur. Celebratis diebus ordinationis suae, et quibuscumque venientibus in militia susceptis, rex *Rhenum* iterum transiit cum maxima multitudine per *Orientalem Franciam* in *Alemanniam*, ut *Herimannus* (qui *Alemanniae* dux erat, et *Henrico* sese subdere nolebat ut caeteri), regiae majestati subderet, etc. Ab *Alemannia* in *Franciam* terram unice sibi dilectam recessit. et non multis diebus in *Francia* moratus, in *Thuringiam* ivit. Inde procedens in *Saxoniam* pervenit, etc. His strenue peractis, regi a *Saxonia* in regnum *Lothariense* prope-ranti, *Cruonae* occurrit uxor sua, domina *Cunigunda* nomine jam exlans, sed re cito regina futura. Inde enim *Paderbronam* veniens in festo *S. Laurentii* (die scilicet x Augusti) acclamatur, benedicitur et coronatur, et fit *Kunigunda Kuninga*, quod latine interpretari potest regia regina». Auctor anonymus *Vite S. Cunigundis* apud *Bollandum* ad diem in Martii de ea scribit: «*Eadem beata et Deo dilecta Chunegundis* terreno imperatori corporaliter, non carnaliter conjuncta, caelesti regi suam virginitatem consecravit, quam usque in finem, casti conjugis consensu, Deo teste, conservavit».

7. *Ardoinus fit rex Italiae.* — Post *Otonis III* mortem, *Ardoinus* *Dodonis* filius, *Eporcediensis* marchio, existimans regiae dignitatis atque imperatoriae titulum denuo ad *Italos* antiquo haereditatis

jure recidere, *Italiae* principibus auctor fuit, ut velus decus recuperarent. Itaque conventu super ea re *Papae*, antiquo *Longobardorum* more indicto, frequenti Concilio rex *Italiae* creatur. Supersunt varia *Diplomata* ab eodem *Ardoino* sequentibus annis data. Unum recitat *Guichenonus* in *Biblioth. Sebus.* cap. 10, quo continetur donatio ab *Ardoino* *Italiae* rege *Ecclesiae S. Syri Papiensis* facta, pro anima patris sui *Dodonis*; in cujus fine legitur: «*Datum anno Dominicae Incarnat. Mxi, kalend. Aprilis, Indict. ix. Actum Bobii* in episcopali palatio feliciter». *Ardoinum* vero hoc anno ante diem xx mensis *Februarii* dictum esse *Italiae* regem, ostendit ejus *Constitutio* in *Bullario Casinensi* recitata, qua omnia jura monasterii *S. Salvatoris Papiensis* confirmat, «*data X kal. Martii anno Dominicae Incarn. Mxi, anno domini Ardoini regis regni 1. Actum in Papiensi palatio feliciter. Amen* (1)». De bellis inter eum et *Henricum Germaniae* regem gestis, legendus *Sigonius* lib. 8 de *Reg. Ital.*

8. *Religio Christiana in Hungaria floret.* — A num. 9 ad 16. *Ecclesia Hungarica* sub *S. Stephano* rege et *Gisela*, quae *S. Henrici Germaniae* regis soror erat, non vero filia, uti perperam ex *Chartuitio* in *Vita S. Stephani* Baronius habet, maxime florebat. Quod tamen idem Baronius num. 15, de *Giula Transylvanicae* principe habet, ad annum sequentem pertinet. *Chronographus* enim *Hildesheimensis* ad eum *Christi* annum ait: «*Stephanus rex Hungariae* super avunculum suum regem *Julum* cum exercitu venit; quem cum comprehendisset cum uxore et filiis duobus, regnum ejus vi ad *Christianitatem* compulit».

9. *Annus adventus Normannorum in Italiam.* — Ad num. 16. Primum *Normannorum* in *Italiam* adventum, qui in annum millesimum decimum sextum convenit, ut ibidem videbimus, recentes scriptores cum *Baronio* huic passim anno alligant, sicque *Historiam* a *Veteribus* non paucis fabulosis narrationibus obscuratam magis implicant. Quare satius erit quod de *Normannis* in *Annalibus* refertur, ad eum *Christi* annum differre, ut facilius e tenebris veritas educi possit.

10. *Translatio S. Oswaldi archiep. Eboracensis.* — Hoc anno *Adulphus*, *Eboracensis* archiepiscopus, *S. Oswaldi* sui decessoris corpus e terra levavit: «*Ipse*», inquit *Thomas Stubius*, «*duodecimo episcopatus sui anno, congregatis coepiscopis, abbatibus, multisque religiosis viris, S. Oswaldi archiepiscopi ossa, anno regis Adelredi xxv, Indict. xv, VII kal. Maii* (legendum *VII kal. Maii*) feria iv, e tumulo levavit, et in scrinio quod paraverat, honorifice collocavit». Idem habet *Vigorniensis*, et ante utrumque, *Simeon Dunelmensis* in lib. de *Gestis reg. Angl.* Sed cum *Oswaldus* anno dcccxcii spiritum Deo reddiderit, nonnisi magno errore scribunt, id factum esse anno duodecimo

(1) *Ardoinum* acclamatum fuisse *Italiae* regem die *Dominica, xv Februarii*, docet *Chron. regum Ital.* a *Muratorio* vulgatum, tom. iv *Rer. Ital.* pag. 149; ait enim post *Otonis III* mortem regnum 24 diebus vacasse, et die xv Februarii *Ardoinum* regnum capessivisse. MANSI.

Adulfi ejus successoris. Ex his intelligimus, per hæc tempora sanctarum reliquiarum translationes diebus Dominicis semper peractas non fuisse.

11. *Dani in Anglia uno die nefarie trucidati.* — « Millesimo secundo anno », inquit Huntindoniensis lib. 6, « Emma Normannorum gemma venit in Angliam, et diadema nomenque reginæ suscepit. Quo proventu rex Adelred in superbiam elatus, et perfidiam prolatus, omnes Danos, qui cum pace erant in Anglia, clandestina prodicione fecit mactari una eademque die, scilicet in festivitate S. Brilii (quæ in die xiii mensis Novembris incidit); de quo scelere in pueritia nostra quosdam vetustissimos loqui audivimus, quod in unamquamque urbem rex præfatus occultas miserit Epistolas, secundum quas Angli Danos omnes eadem die et eadem hora, vel gladiis truncaverunt impræmeditados, vel igne simul cremaverunt subito comprehensos ». Baronius Westmonasteriensem secutus, anno mxi, num. 13, de hac carnificina agit; sed Westmonasteriensis in Chronologia parum accuratus, et Huntindoniensis sequentis sæculi initio floruit, eique alii suffragantur.

12. *Ea carnificina magis explicata.* — Impio illo facto, quo divina simul et humana jura temerata sunt, Ethelredus *Ignavi* cognomentum sortitus est. In ea carnificina nec obsidibus parcitum, nec alteri sexui, qui recens in insulam firmandæ pacis causa venerat. Ita periit *Gunildis* Swani regis soror, et morte sua *Danis* Angliæ regnum asseruit; nam atroci homicidio excitus frater, justissima ira in vindictam surrexit, filioque *Canuto* propterea insulæ principatum reliquit. « Erat *Gunildis* », inquit Florilegus, « Palingo comiti, nobili viro, lege conjugali copulata; quæ prioribus annis cum viro Angliam ingressa fidem Christi et sacramentum

baptismatis suscepit. Hæc virago prudentissima pacis inter Anglos et Danos mediatrix existens, sese obsidem cum viro, et unico filio quem habebat, regi Ethelredo ad pacis securitatem dedit. Hæc a rege cum esset Eadrico duci nequissimo ad custodiendum commissa, post dies paucos, in ejus præsentia, virum suum cum filio suo quatuor fecit lanceis proditor ille Eadricus jugulari, qui et illam novissime decapitari præcepit. Mulier vero mortem forti animo perferens, nec moritura expalluit, nec mortua consumpto sanguine vultus sui serenitatem amisit. Verumtamen moriens fiducialiter pronuntiavit, quod sui sanguinis effusio magno toti Angliæ fieret detrimento ». Eadem fere habet Malmesburiensis. Prædictioni respondit eventus; nam Dani et Danorum rex *Swanus*, *Gunildis* frater, multorum morte regnique excidio hoc facinus castigarunt. Et qui hactenus fortim et privato solum impetu insulam infestarunt, prædonum tantum modo et piratarum more, nunc justissimo Danorum imperio conscriptus miles, missusque in vindictam, acrius pugnavit; et pugnantibus adfuit qui innocentes tueri solet Deus. Fusius hanc carnificinam Alfordus hoc anno narrat.

13. *Barium frustra a Sarraценis obsessum.* — Lupus Protospata in Chronico scribit: « Anno mii obsidet Saphi-Caytus, (id est, dux Arabum), Barium (seu Barium, munitum Apuliæ oppidum) secundo Maii usque ad sanctum Lucam mense Octobris; tunc liberata est per Petrum ducem Venetiarum ». Quod a chronologo Bari apud Peregrinium confirmatur. Dux porro ille alius non est, quam *Petrus Urseolus* anno mvi post multa inclyta facinora patrata demortuus. Hujus tamen, nec Justinianus, nec alii historici Veneti, quod meminerim, mentionem fecere.

SILVESTRI II ANNUS 5. — CHRISTI 1003.

1. *Silvester II papa moritur, de cujus doctrina, moribus rebusque gestis accurata inquisitio.* — Millesimus tertius sequitur annus, prima Indictione notatus, quo Silvester papa, ubi Sedis suæ annum jam quintum inchoasset, moritur die

duodecima mensis Maii, ut ex Epitaphio ejus sepulchro, a Sergio papa apposito satis apparet quod hactenus in Basilica Lateranensi servatur integrum. Nos vero ipsum hic tibi describendum curavimus; sic enim se habet:

SILVESTRI PAPE II.

✠ ISTE LOCVS MVNDI SILVESTRI MEMBRA SEPVLTI
 VENTVRO DOMINO CONFERET AD SONITVM.
 QVEM DEDERAT MVNDO CELEBREM DOCTISSIMA VIRGO
 ATQVE CAPVT MVNDI CVLMINA ROMVLEA.
 PRIMVM GERBERTVS MERVIT FRANCIGENA SEDE
 RHEMENSIS POPVLI METROPOLIM PATRIE.
 INDE RAVENNATIS MERVIT CONSCENDERE SVMMVM
 ECCLESIE REGIMEN NOBILE SITQ. POTENS.
 POST ANNVN ROMAM MVNTO NOMINE SVMPST,
 VT TOTO PASTOR FIERET ORBE NOVVS.
 CVI NIMIVM PLACVIT SOCIALI MENTE FIDELIS
 OBTVLIT HOC CÆSAR TERTIVS OTTO SIBI.
 TEMPVS VTERQVE COMIT CLARA VIRTUTE SOPHIE.
 GAVDET ET OMNE SECLVM TBANGITVR OMNE REVM.
 CLAVIGERI INSTAR ERAT COELORVM SEDE POTITVS,
 TERNA SVFPECTVS CVI VICE PASTOR ERAT.
 ISTE VICEM PETRI POSTQVAM SVSCEPIT ABEGIT
 LVSTRALI SPACIO SECVLA MORTE SVI.
 OBRIGVIT MVDVS DISCVSSA PACE TRIVMPHVS
 ECCLESIAE NVTANS DEDIDICIT REQVIEM.
 SERGIVS HVNC LOCVLVM MITI PIETATE SACERDOS
 SVCCESORQ. SVVS COMPSIT AMORE SVI.
 QVISQVIS AD HVNC TYNVLVM DEVEXA LVMINA VERTIS :
 OMNIPOTENS DOMINE DIC MISERERE SVI.
 OBIT ANNO DOMINICE INCARNATIONIS M. III. IND. I. M. MAIL. D. XII.

2. Porro nugas illas de obitu Silvestri, ab homine schismatico Benuone primum excogitatas, mendacique stylo vulgatas, superiori tomo in ipsius Silvestri ingressu apertissime confutavimus, adeo ut nonnisi inter vecordes levesque atque penitus ineruditos se constituat opus sit, qui iisdem fidem aliquam adhibendam putarit. Sicut etiam erroris ex ipso quoque ejus Epitaphio redarguitur Sigebertus, dum (quo nescimus auctore) in dubitationem revocat, num hic Silvester annumerandus sit inter Romanos Pontifices, an quem alii (nescimus quos) numerant Agapetum, de quo nusquam mentio penes scriptores temporis hujus, quod his temporibus sederit.

3. Optassemus ejus res gestas in Pontificatu sui ipsius Epistolis notas fieri, sicut volumine centum quinquaginta novem Epistolarum ab ipso scriptarum ante Rhemensem adeptum archiepiscopatum, quas legimus ad nos Parisiis missas ab amico Nicolao Fabro, quibus ejus actiones innotescunt; esset profecto, ut ex eis nonnulla hauriret lector, quæ de ejus Pontificia in Romana Ecclesia functione laude digna perciperet. Etenim etsi ipsum ad conciliandos sibi in Ecclesia gradus superiores semper vidimus inhiasse: potitus tamen illis, munus explere quod esset consecutus, omnibus numeris conatus esse videtur, ita ut nec levissima prætermitteret in his quæ spectarent ad defensionem Ecclesiæ jurium. Adducimus in exemplum, quod cum abbas esset monasterii S. Columbani, ad Bosonem comitem breviter istam scripsit

ob fœnum ab ejus famulis inde sublatum Epistolam¹:

4. « Recedant multa verba, et sequamur facta. Sanctuarium Domini nec pecunia nec amicitia vobis damus, nec si datum est ab aliquo, consentimus. Fœnum quod vestri tulerunt, beato Columbano restituite, si experiri non vultis quid possimus cum gratia domini nostri Cæsaris, amicorum consilio et auxilio. His conditionibus leges amicitiae non refutamus ». Hæc ad Bosonem generum imperatoris. Alias etiam graviore de his dedit litteras ad Petrum Papiensem episcopum, dum ejusdem abbatiæ bona surriperet².

5. Cæterum monumentorum ejus præter dictas Epistolas et alias superius recitatas, vel seorsum scriptas, ad res Rhemensis archiepiscopatus spectantes, nihil vidimus; cum alioqui constet, plures reliquisse sui ingenii indices lucubrationes, partas illas prioribus vitæ temporibus. Nam hæc ipse de se testatur scribens ad Bernardum monachum³: « Interdum nobilissimis scholasticis disciplinarum liberalium suaves fructus ad vescendum offero. Quorum ob amorem et jam exacto autumno quamdam figuram edidi artis Rhetoricæ, dispositam in sex et viginti membranarum sibi invicem connexis et concatenatis, in modum ante longioris numeri, qui sit ex his tredecim. Opus sane expertibus mirabile, studiosis utile ad res rhetorum fugaces et caliginosissimas comprehendendas, atque in animo

¹ Gerb. Ep. 101. — ² Ibid. c. 1. — ³ Ibid. Ep. LXXXVIII.

collocandas ». Scripsit et librum de numeris ad Constantinum Floriacensem monachum, et si quæ alia hujusmodi curiosa. Quorum causa ingentem sibi comparare undique Bibliothecam indefesso studio laboravit, ut apparet ex diversis Epistolis ad diversos scriptis. Nam ad Adalberonem Rheimorum archiepiscopum ista de his¹: « Historiam Julii Cæsaris a domino Azone abbate Dornensi ad rescribendum nobis acquirite, ut vos penes, quos habemus, libros scilicet, habeatis; et quod reperimus, speretis item octo volumina Boetii de Astrologia, præclarissima quoque figurarum Geometriæ, aliaque non minus admiranda ». Et rursus de aliis libris ad eandem facultatem spectantibus hæc ad Rainardum monachum²: « Nosti quanto studio librorum exemplaria undique conquiram: nosti quia scriptores in urbibus aut in agris Italis passim habeantur. Age ergo, et te solo conscio, ex tuis sumptibus fac ut me scribantur (rescribantur) M. Manlius de Astrologia, Victorius de Rhetorica, Demosthenis Ophthalmicus etc. » Et ad abbatem Turonensem³: « Cui rei præparandæ Bibliothecam assidue comparo. Et sicut Romæ dudum ac in aliis partibus Italiæ, in Germania quoque et Belgica scriptores auctorumque exemplaria multitudine nummorum redemi etc. » Porro ob Geometricas atque Astrologicas figuras, quibus incumbere consuevit, quas rude seculum adeo mirabatur, et his conjunctam viri felicitatem admirandam simul obstupescerentibus multis, de vulgo præsertim: illam de magicæ artis exercitio (quam diximus) calumniam subiit. Unde et illa commentandi Bennoni schismatico occasio est oblata, quæ omnia abunde satis confutata in ejusdem papæ lectione vidisti.

6. Sed quod unicum extat inter Epistolas ejus pietatis monumentum, nimirum Hierosolymorum Ecclesiæ nomine ad Universalem Catholici orbis Ecclesiam Romanam ad ferendum aliquod subsidium, exhortationem per Epistolam brevem (dicendi enim laconice arripuit institutum) sed gravem sententiis, hic tibi ex eodem Codice describere non pigeat. Sic se habet hoc præmisso titulo: « Ex persona Hierusalem devastatæ Universali Ecclesiæ⁴.

« Ea quæ est Hierosolymis, universali Ecclesiæ, sceptris regnorum imperanti.

« Cum bene vigeas, immaculata sponsa Domini, cujus membrum me esse fateor, spes mihi maxima per te caput attollendi jam pæne attritum. An quidquam dididisse in te, rerum domina, si me recognoscis tuam? Quisquamne tuorum famosam cladem illatam mihi putare debebit ad se minime pertinere? utque rerum intimam abhorre-re? En quamvis nunc dejecta, tamen habet me orbis terrarum optimam sui partem. Penes me prophetarum oracula, patriarcharum insignia.

Hinc clara lumina mundi Apostoli prodierunt. Hic Christi fidem reperit orbis terrarum, apud me Redemptorem suum invenit. Etenim quamvis ubique sit divinitate, tamen hic humanitate natus, passus, sepultus; hinc ad cælos elatus. Sed cum Propheta dixerit¹: Erit sepulchrum ejus gloriosum, paganis loca sancta subvertentibus, tentat diabolus reddere inglorium. Enitere ergo, miles Christi esto, signifer et compugnator; et quod armis nequis, consilio et opum auxilio subveni. Quid est quod das? aut cui das? nempe ex multo modicum, et ei, qui omne quod habet gratis dedit, nec tamen ingratus recipit; et hic enim multiplicat, et in futuro remunerat. Per me benedicit tibi ut largiendo crescas, et peccata relaxat ut secum regnando vivas ». Ilucusque ipse, ut plane primus inveniatur, qui sanctæ militiæ classicum occinuerit, commodiori tempore promovendæ. Ejus quoque Silvestri papæ nomine scriptam vidimus sancti Adalberti martyris Pragensis episcopi Vitam, cujus est exordium: « Est locus in partibus Germaniæ etc. » Habetur ea in Bibliotheca Cassinensi.

7. Ad postremum nec sileatur de ipso, quod ex ejusdem Epistolis consequi licuit ejusque laudi cedit, cultorem fuisse sanctorum virorum tunc viventium, nimirum S. Maioli Cluniacensis abbatis, Eberardi æque magnæ sanctitatis viri, et aliorum tunc eodem nomine florentium; cupidumque fuisse monasticæ observantiæ, malorum vero acerrimum correctorem. Et ne quid de ipso prætereamus, legimus apud breve Chronicon rerum Venetarum Andreæ Danduli, ab eodem Silvestro papa, supplicante Vitale Veneto patriarcha, renovatum privilegium et confirmatum de juribus Gradensis sedis super episcopos Istriæ atque Venetiæ provinciarum.

8. Quid autem ejusdem Silvestri papæ tempore, increbrescente tyrannide impiorum, contigerit pati Petrum, venerandum abbatem monasterii Sublacensis, in ejusdem monasterii Chronico ita narratur: « Petrus tertius hujus nominis, sed vicesimus secundus abbas Sublacensis, temporibus domini Silvestri papæ Secundi. Hic abbas sanctus fecit in monasterio libros, paraturas optimas et hæreditates multas acquisivit. Postea captus, et in castrum quod dicitur Monticellus ductus, in vinculis alligatus est. In quibus cum jaceret, meruit a beato Nicolao visitari in suæ sanctæ festivitatis die, a quo omnia vincula ejus disrupta sunt; nam idem abbas devotissime beato obsequebatur Nicolao. Cumque custodibus ab eodem abbate acceptum beneficium nuntiatum esset, duplicata sunt vincula super eum, et sustentatus est ibi pane tribulationis et aqua angustiae per aliquod tempus. Hoc autem patiebatur, quod castrum, Arsule dictum, noluit dare senioribus illis. Post hæc autem (ut a majoribus nostris audivi) jussu dominorum illorum phlebotomati sunt oculi ejus, et cæcus factus, non

¹ Gerb. Ep. vii. — ² Ibid. Ep. cxxvi. — ³ Ibid. Ep. xlv. — ⁴ Ibid. Ep. xxviii.

¹ Is. ii.

multo post migravit ad Christum : sepultus est juxta idem castrum in Ecclesia S. Vincentii, ubi operatus est Deus quædam beneficia meritis ejus, ad laudem et gloriam nominis sui ». Hæc ibi. At de rebus Silvestri papæ, et aliis ejus Sedis temporibus gestis jam satis.

9. *Qui duo Joannis nomine summum Pontificatum tenuerint.* — Cæterum defuncto Silvestro, subrogatum in locum ejus fuisse Joannem cognomento Siccum, patria Romanum, ejus nominis Pontificem Decimum sextum, dictum Decimum octavum, sedisseque tantum menses quinque et dies aliquot, habent Indices veteres Vaticani : in ejusque locum subrogatum esse Joannem Decimum septimum ejus nominis, dictum frequentius XIX. At Marianus Scotus hujus sæculi scriptor, priorem Joannem appellat Decimum septimum, hunc vero Decimum octavum ; tamen frequentior usus obtinuit, ut hic posterior numeretur Decimus nonus, sed præter omnem rationem, dum hoc numero schismatici indigni Pontificis nomine includuntur.

10. Quod autem ex recitatis versibus Sergii papæ, liqueat post obitum Silvestri papæ turbatam fuisse Ecclesiæ pacem, atque invaluisse discordias : turbam harum eam intelligimus extitisse causam, quod defuncto Ottone imperatore, qui duos jam promovisset ad Pontificatum ultramontanos homines, Gregorium atque Silvestrum, quos æque imperatoria auctoritate atque potentia in eadem Sede continuisset ; jam res relapsa est ad comites Tusculanos, præcipuos, ut vidimus, in Urbe proceres, quorum factio cum prævaluisset, duos hos Joannes in Sedem Apostolicam collocandos elaboravit, quos et nomine prædecessorum ejus factionis Pontificum voluerit nominari et eo pariter numero consignari, quo omnes ipsorum studiis promoti, et eo nomine insigniti etiam pseudopontifices includerentur, ut nefarius ille qui sedit in schismate contra Gregorium, Joannes Placentinus, indignus penitus qui Pontificis nomine censeatur. Nos tamen ad evitandam in numero ejusdem nominis Pontificum confusionem atque perplexitatem, quæ lectoribus molestiam posset afferre, non pro meritis singulorum, sed pro communi assertionem, nullum interim præjudicium inferentes veritati, numeravimus duos Joannes hoc anno Pontifices, priorem Decimum octavum, posteriorem Decimum nonum, quem tradunt cognomento dictum esse Fasanum, creatumque hoc anno XII kal. Decemb. Sed rectius quidem Hermannus illum Decimum sextum, hunc vero Decimum septimum, prætermisso Placentino illo, papam appellat.

11. *Episcopi Magdeburgensis per legatum Apostolicum consecratio.* — Ab eodem autem Joanne missus est legatus ad consecrationem novi archiepiscopi Magdeburgensis, cui Ecclesiæ ab Ottone Magno erectæ concessum fuerat a Romano Pontifice privilegium, ut nonnisi per Romanum Ponti-

ficem ejus consecratio fieri deberet. Sed cum ob tumultus Urbis ipse interesse non posset, nec electus se Romam conferre, missus est legatus Apostolicus ad munus explendum. Hæc omnia apud Ditmarum, cujus relatione habetur, hoc anno, octavo kal. Februarii esse defunctum Gisilerum ipsum archiepiscopum Magdeburgensem, atque in locum ejus subrogatum ab Henrico rege fuisse Tagmonem præstanti vita virum, omniaque facta Apostolico more secundum præcedentem prophetiam, ante decennium a sancto Wolfgango Ratisponensi episcopo prænuntiatam. Rem gestam sic idem Ditmarus narrat sub anni hujus rebus gestis¹ : « Fuit hic, Tagmo scilicet, egregii clericus Wolfgangi, qui Ratisponensem pius pastor habitu et conversatione monachus rexerat Ecclesiam. Huic tam charus erat iste, ut in vicem filii a pucro nutriens, eundem jam adultum bonis suis omnibus præfecisset. Insuper ducis et imperatoris gratiam in tantum ei acquisivit, ut si quando se de hac luce divina jussione subtraheret, hunc sibi successurum non dubitaret. Consummato tunc hujus exilii cursu, Vulpo (Wolfgangus) sanctitate admirabili venerabilis antistes, cum jam usque ad mortem ægrotare cœpisset, accersito ad se dilecto Tagmone : Pone, inquit, fili, os tuum super os meum, accipiens a Domino insufflationem spiritus mei, ut ubicumque ardore juventutis incalescente, in genuina charitate sis frigidus, a summa potestate meique benevolentia temperamentum accipias. Et si meis honoribus forsitan privaberis, post binos quinos solares annos, cum mea apud Dominum luce (vice) commissa, majoribus pro certo lætaberis. Post hæc vir sanctus, cum finem suum in spiritu præsciret, jussit se in Ecclesiam portari, expletisque ab eo orationibus, cæterisque quæ a fratribus facienda erant, se cum sibi commissis Domino commendans, pridie kal. Octobris, (Novembris) sanctum emisit in pace spiritum ». Anno videlicet nongentesimo nonagesimo tertio, decennio nimirum ante promotionem Tagmonis, factam hoc anno secundum prophetiam, ut a Ditmaro accepisti, qui multa laude digna de eodem Tagmone locutus, cui et familiaritate junctus erat, hæc de ejus consecratione evoluto jam anno facta describit : « Ibi tunc Tagmo venerandus quarto non. Febr., id est, 6^{to} post Idus Domini, id est, obviacione justii Simeonis, accepta ab Hilderico antistite licentia, qui primus horum in ordine fuit confratrum, a Willigiso archipræsule Moguntino consecratus est, præsentem rege ac Romano nuntio, omnibusque coepiscopis ad hæc faventibus, et quia is (ut scriptum ejus testatur) a solo ordinandus Apostolico, huc venire per instantem necessitatem non potuit, ibidem sacri chrismatis delubatione tunc civium implevit numerum, Walterdo post se committens omnem episcopatum ». Hæc Ditmarus, sed ex satis depravato Codice scripta.

¹ Vita l. v. prop. fin.

12. *Frequens ubique Ecclesiarum ædificatio.* —

Ad hæc tempora spectant, quæ Glaber narrat de facta in orbe Christiano ubique innovatione Ecclesiarum; ait enim¹: « Igitur infra supradictum millesimum, tertio jam fere imminente anno, contigit in universo pæne terrarum orbe, præcipue tamen in Italia et in Galliis innovari Ecclesiarum Basilicas, licet pleræque decenter locatæ minime indiguissent; æmulabatur tamen quæque gens Christicolarum adversus alteram decentiore frui. Erat enim instar ac si mundus ipse excutiendo semet, rejecta vetustate, passim candidam Ecclesiarum vestem indueret. Tunc denique episcopaliū sedium Ecclesias pæne universas, ac cætera quæque diversorum sanctorum monasteria, seu minora villarum oratoria, in meliora quique permutavere fideles ». Hæc Glaber. Sed unde ista? non aliunde puto, quam ex eo quod cum viderent fideles jam lapso tempore evanuisse quæ de mundi interitu luerant constanti assertione prædicta, et passim credita, quasi tanto discrimine liberati, mundoque proxime ruituro jam stabilito, desuper ipsum ædificari posse visum est tutum. Qui igitur percussi timore homines, ad ædificanda etiam pia loca remissi fuissent, quod essent illa cum mundi casu proxime desolanda: transacto prædicto tempore, alacres ad Ecclesias jam permansuras erigendas vel innovandas, restituendas ac dilatandas insurrexere. Quod enim anno primo post millesimum Antichristum adventurum prædictum esset, ejusque sciretur esse regni tempus annos duos et semis, secundum illud ita interpretatum, quod regnaturus esset² « tempus, et tempora, et dimidium temporis »: plane hoc anno jam elapsū esse prænuntiatum tempus fideles intellexere. Subjicit istis Glaber de restitutione Ecclesiæ Sancti Martini Turonensis³, facta per Henricum sive Herineum dictum, ejus præpositum, cujus egregias narrat virtutes et eximiam sanctitatem. Subinfert etiam de Willermo abbate, quem in restitutione sacrorum locorum multum fuisse tradit; cujus occasione Cluniacensis familiæ monastici instituti observantissima originem prodit atque successionem, usque ad dictum Willermum sic numerando, a Bernone fundatore incipiens, qui ope Willerini Aquitanie ducis in pago Matisconensi illud cœnobium ædificavit: post Bernonem, successorem ponit Odonem, post hunc, Heimardum, inde Maiolum quem secutus est Odilo, omnesque egregia sanctitate conspicuos, atque adeo, ut extiterit horum opera Cluniacense cœnobium veluti alveare, e quo in diversa loca ad monasteriorum regimen progredierentur colonie monachorum, non tantum in Gallias, sed etiam in Italiam et Hispanias.

13. *Abbonis Floriacensis abbatis martyrium; et de ejus vita multa.* — Hoc anno (ut auctor est Sigebertus) insignis ille vita sanctissimus atque doctissimus Abbo, Floriacensis abbas, ex hac vita

accitus ad Deum migrat, martyrio coronatus. Quomodo id acciderit, Glaber sic narrat¹: « His ila gestis, contigit ut venerabilis Abbo, pater monasterii S. Benedicti Floriacensis cognominati, gratia propagandæ religionis monasticæ in provinciam transiret meridianorum Wasconum. Cumque illuc deveniens in quodam moraretur cœnobio, ibique more solito ea quæ Dei sunt sedulo exerceret, nimio a cunctis venerabatur affectu. Accidit igitur die quadam, ut in atrio ejusdem cœnobii exardescens quorundam litigiosorum irarum stimulis, nimium acer oriretur tumultus; dumque vir reverendissimus, prædictus videlicet Abbo comperiens, ad eundem tumultum sedandum, pugillares gerens in manibus tabellas cum stylo processisset, unus e vulgo afflatus spiritu diabolico irruens in eum, ejusque latus lancea perforans, Christi martyrem fecit. Qui etiam, ut fertur, paulo post arreptus a dæmone, miserabiliter vitam finivit. Corpus vero prædicti Patris tam sui, quam cæteri quique fideles ejusdem provincie, honorifice ibi sepelierunt; ubi etiam ad laudem sui nominis perplura postmodum Dominus largitus est hominibus beneficia ». Hæc Glaber.

At his diebus e pulvere bibliothecæ Floriacensis emersit in lucem Vita ejusdem Abbonis, industria Joannis a Bosco Cælestini, cujus et diligentia cusa in tomo, quem inscripsit, *Floriacensis vetus Bibliotheca*, eademque scripta ab auctore dignissimo, nempe Aimoino monacho, ejusdem Abbonis discipulo, scriptione Rerum Francorum notissimo. Qui etsi dicat ipsum Abbonem consummasse martyrium anno quarto Redemptoris supra millesimum, Indictione secunda, nihil est contrarium nuper assertis; siquidem numerando ab Incarnatione Domini, dici debet hic quartus annus et Indictio secunda, inchoata hoc anno mense Sept., sub qua idem sanctus est interfectus. Non prætermittendum de Abbone, quod idem Aimoinus recenset, magnam conflasse sibi invidiam ab episcopis, præsertim vero ab Aurelianensi, dum videlicet steterit in Concilio apud Parisios habito, adversus eos decimas a monachis vindicantes; cum et impetiti ab eisdem laici, in ipsos commoti impressionem fecere. Rem gestam ita idem Aimoinus conscribit: « In illis sane diebus, in monasterio Sancti Dionysii haud procul a Parisiis, Concilium aggregatum est quamplurimorum episcoporum. Qui cum de fidei puritate, de corrigendis tam suis quam subditorum pravis moribus sermocinari debuissent; juxta vulgare proverbium, cunctum suum sermonem ad decimas verterunt Ecclesiarum, quas laicis ac Deo servientibus monachis auferre moliti, resistente eis in hac re hoc videlicet Dei cultore Abbone, promiscuam in se vulgi concitavere manum. Ortaque subito seditione, tantus in episcopos timor irruit, ut publica statione relicta, passim quisque diffugeret, inter quos Seguinus

¹ Glab. l. III. c. 4. — ² Dan. VII; Apoc. XII. — ³ Glab. l. III. c. 4.¹ Glab. l. III. c. 3.

Senonum archiepiscopus, primum Galliae in ea Synodo sibi usurpans : primum quoque fugae arripuit. El inter fugiendum, securi inter scapulas ictus, lutoque a popularibus oblitus, ægre evasit. Uni quoque episcoporum timor fugienti tam veloces addidit alas, ut affluentissimo prandii apparatu, quem sibi extruxerat, relicto, vicinæ urbis Parisiorum mœnia fugitabundus expeteret. Totam ergo tantæ calumniam injuriæ, tam a præfato Arnulpho quam a reliquis pontificibus sub semet devolvi : perpendens hic Deo devotus Abbo, in eodem Apologetico non solum ab hoc, verum et a quibusdam aliis hoc modo se purgat objectis. Nec me vestro, ait regibus, aliorumque sapientum examini subduco, qui contra canones sensisse suspicor. In episcopos manum monachorum movisse accensor; vestram benevolentiam proprio episcopo tulisse blasphemor; quibusdam excommunicatis participasse criminor. Sed esto: cui sententiæ canonum contradixi, qui in illo Concilio vix apertum librum videre potui? Aut Concilium illud fuit, ubi conciliati venerunt, et disconciliati recesserunt? cum ibi discordes reconciliari debuerint, aut canonica districtione mulctari. Quid in me singulariter commiserunt episcopi, ut eis saltem cogitatione obesse voluerim, præsertim cum non inimicum, sed fide et opere amicissimum, graviora pericula pertulisse contigerit? Ecce coram Deo in Christo non mentior, quia audita insequentium conclamatione, ultra quam dici possit indolui, recordatus pristinæ amicitiae et beneficiorum tanti viri, cujus nix venerandum caput ostendit, excepta primatus prærogativa et sacerdotali infula. Qua suggestionem vos decepi, ut vestram benevolentiam optimis auferretis, male meritis conferretis? Num ego Deus sum, qui mutat mentes, mutat corda, mutat regna et tempora? Vere fateor me magicam ignorare, nec aliquid malorum artium didicisse, etc. »

14. Neque id prætermittendum, quod extat ad eundem Abbonem Fulberti postea episcopi Carnotensis Epistola, cujus est iste titulus et exordium: « Pleno virtutis et gratiæ charissimo Patri Abboni Fulbertus suus ¹. Quanam te resalutatione digner, o sacer Abba, o magne philosophæ? etc. » Agit autem ea Epistola Fulbertus pro monachis Carnotensibus, quos tyrannice Theobaldus comes Carnotensis, cognomento Fallax, habebat: quæ cum idem deploret miserandum statum Ecclesiæ Gallicanæ, cui dominarentur principes sæculares, par est ut ea quæ tunc acciderunt, ex eadem Epistola hic describamus, sic enim se habent: « Abbate Sancti Petri graviter ægrotante, sed adhuc mentis et sermonis compote, Megenardus monachus, ante mihi non medioeriter charus, noctu sese de claustro surripuit, et ad Theobaldum comitem, qui Blesis tunc morabatur, abbatiae petendæ gratia properavit. Comes illum postridie remisit ad nos

cum legalis, qui denuntiarent recipiendum magnifice, sicut abbatem monachis et canonicis: at vero nobis fere omnibus ea res æque nova et horribilis fuit. Respondimus itaque, longe nobis aliter videri; nec enim legitime fieri abbatem, nec debere recipi, qui abbatiam alterius, ipso vivente, per ambitionem quærit, qui a fratribus non eligitur, et super illos nititur dominari: postremo, qui noster neque monachus sit, neque clericus, et plures habeat testes curialiter agitandi quam monastice vivendi. Hæc ille non gratanter accipiens, ad comitem redequit, iramque juvenis adversum nos vehementer inflammat.

15. « Sed die quinto, postquam suum ambitum publicavit, prædictus abbas ægritudinem suam morte limitat. Conveniunt ad Capitulum monachi nostri, et quidam canonici, quos ratio postulabat admitti. Interrogamus, an aliqui fratrum incepto Megenardi faveant: negant singuli, negant omnes. Decrevimus ergo quosdam eorum esse mittendos ad comitem, nobis videlicet designatum episcopum, ut Patris obitum nuntiarent, et alterius eligendi regularem precarentur licentiam. Quibus missis, ecce alii duo, Vivianus scilicet et Durandus, alter illitteratus, alter litterarum male sanus interpres, ambo præpositi, simulantes causa communis commodi ad obedientias suas se velle exire, ac ne aliorum pergerent sibi interdicente decano monasterii, Megenardum tamen secuti sunt, cui ceptam præsumptionem occulte persuaserant, et Blesis in præsentia domini Theobaldi ipsum Megenardum a fratribus peti ac eligi perfide mentiti sunt. Horum suffragio lætus comes, statim eum baculo pastoralis publice donat.

16. « Quo audito, fratres qui in claustro remanserant, contra hanc fraudulentiam zelo divinæ legis accincti, libellum reprobationis fecerunt, atque subscripserunt hujusmodi:

« Sciat omnis Ecclesia, quia Megenardum monachum, nostrum abbatem fieri non eligimus, non laudamus, non volumus, non consentimus, sed reprobamus, refutamus et omnino contradicimus. Nos vero de cænobio S. Petri, quorum nomina scripta sunt, Durandus decanus, Gaudricus, Genesius, Robertus, Isembertus, Marcuinus, Alveus, Guarnerus, Richerus, Warinus, Herbertus, Eurardus, Benedictus, Gualterus, Beringerus, Herbertus, Benardus. Isti itaque omnes sua nomina aut subscripserunt, aut subscribi fecerunt me vidente.

« Die proxima comes Theobaldus redit, se in monasterium recipi cum processione præmandat: monachi respondent, se libenter hoc agere, si præsumptorem illum non adduxerit secum. Ille denuo iratus, ipso die tamen sustinuit, sed in sequenti cum strepitu comitantium in S. Petri monasterium suum Megenardum obtrusit. Ad cujus violentum ingressum, sancti fratres contaminari ipsius communicatione timentes, sanctuario Domini salutato, cum lacrymis exierunt, atque refu-

¹ Fulb. Ep. 1.

gium aliud nescientes, ad limina principalis Ecclesiæ confugerunt. Ibi quoque non invento pastore, utrinque desertæ oves mœstis sese vocibus consolabantur. Sed recipit sancta Mater Domini solita pietate, recipit Rudolphus tuus dulci benignitate. Inde transierunt ad cœnobium sancti Patris Herberti, ejus dives charitas de paupere censu quæque potest illis necessaria subministrat ». Dignum plane exemplum, cum sancti monachi potius elegerint extorres fieri, quam pati intrusum a principe præesse ipsis abbatem; de quo mox idem pergit Fulbertus: « Cæterum ille, ab Herviso quodam (ut addunt) Britannicæ religionis (regionis) episcopo, quarto non. Febr. abbas simulatus est in suburbio Carnotensi, absente clero, indignante populo, legato archipræsulis palam contradicente ne id fieret, reclamantibus etiam quibusdam monachis, qui in loco remanserant vero cultu, viva voce, atque regulari auctoritate. Sed quid inter furentes ratio? Sed et nunc ille primas in abbatiae suggestu sæculari potentia fretus, de peracta victoria gloriosus, factores ejus abbates, episcopos, atque ipsum papam ambiendo, ne quid gravius statuatur in illum modis omnibus elaborat.

17. « Jacet interim victa confusaque fratrum expulsum humilitas, nec est præsul in Galliis ejus viscera tangat affectio pietatis, aut zelus sacræ legis inflammel, ut consurgat ad frangendos

impetus eorum, ad relevandas spes dolore tabescentium. Defuncta etenim est Dionysii fortitudo, non comparet pietas Martini: tu quoque derelequisti nos, sancte pater Hilari, qui olim unitatem Ecclesiæ Spiritus sancti gladio tuebaris. O derelicta, o mœsta, o desolata Galliarum Ecclesia! Quæ jam erit spes salutis ulterior? ubi amplius afflicta Christiani anima respirabit? Hoc nempe solum vel maxime nos confortare videbatur, quod si contingeret ruinas mœnium tuorum resarciri non posse, liceret saltem ad firmum adhuc Capitolium monasticæ vitæ confugere. Quod etiam si furibus irreptare, aut impune quibuslibet ambitiosis invadere licet: prohi dolor! funditus cecidisti ». Hæc Fulbertus Abboni, ab eo quod posset implorans auxilium. Qui factus postea episcopus Carnotensis, ut suo loco dicetur, libertatem Ecclesiasticam, asylumque ipsum sanctæ Ecclesiæ pro viribus tueri non destitit. Sed agendum de his suo loco. Cæterum etsi Fulbertum contempsit Theobaldus comes, coluit autem eum mirifice Willelmus comes Pictaviensis, de quo hæc in Fragmentis historiæ Aquitanicæ apud Glabrum: « Fulberto quoque, sapientia valde ornato episcopo Carnotensi, pro reverentia philosophiæ ejus a Francia ad se evocato, thesaurariam S. Hilarii gratis tribuit, et summo honore eum excoluit ». Sed hæc de thesauraria S. Hilarii ante episcopatum contigerunt.

Anno periodi Græco-Romanæ 6496. — Anno Æræ Hispan. 1041. — Anno Hegiræ 394, inchoato die 30 Octob., Fer. 7. — Jesu Christi 1003.

— Joannis XVIII papæ 1. — Henrici II reg. 2. Basil. et Const. imp. 28.

4. *Moritur Silvester II PP.* — A num. 4 ad 9. In Epitaphio Silvestri II papæ a Baronio num. 4 recitato, dicitur Sedis ejus *lustrale spatium* fuisse, et in fine: « Obiit anno Dominicæ Incarnationis miii, Indict. 1, m. Maii d. xii; ab an. enim cxcix ad currentem, anni quinque utrinque incompleti intereurrunt. Quare cum juxta Catalogos, annos quatuor, mensem unum et dies novem Silvester Ecclesiam Romanam rexit: ordinatus fuerat die secunda mensis Aprilis supradicti Christi anni, die undecima mensis Maii mortuus est, postridieque sepultus. Calumniam huic Pontifici a *Bernone* schismatico impactam, quod scilicet magus et necromanticus fuerit, Epitaphium illud, quod adhuc in Vaticana Basilica legitur everteret, quando silentium antiquorum historicorum deesset. Joannes diaconus Junior, in suo libello de Ecclesia Latera-

nensi ait retro sub absida esse sepulluras aliquorum Apostolicorum quos nominat, additque: « In eadem quoque porticu jacet Gerbertus Rhemorum archiepiscopus, qui papa effectus Silvester est appellatus; cujus sæpe sepulchrum, etiam in serenissimo aere, cum non sit in humido loco, aquarum guttas (quod satis est hominibus admirandum) visibiliter emanat ».

2. *Non est auctor primæ vitæ S. Adalberti.* — Baronius num. 6 ait a se visam *S. Adalberti* Pragensis episcopi et martyris Vitam, *Silvestri papæ* nomine scriptam, cujus est exordium: *Est locus*, etc. Eandem Vitam ex Bibliotheca Casinensi erutam Romæ postea Bzovius publicavit, et *Silvestro Secundo*, ut ait, suo auctori vindicavit. Ad hæc Henricus Canisius, tom. vi Antiq. lect., et Freherus, ad calcem Chronici Bohemorum, eandem Vitam, quæ

prior est inter Adalberti Vitas, ediderunt, hancque Frcherus Cosmæ Pragensis Ecclesiæ decano attribuit. Verum has opiniones Henschenius ad diem xxiii mensis Aprilis, quo *S. Adalbertus* colitur, et Mabillonius Sæc. v Benedict. vanas esse ostendunt, eamque monachi anonymi fœtum esse docent. Hujusmodi suppositionum innumera exempla habemus.

3. *Silvestro II succedit Joannes XVII, et huic Joannes XVIII.* — Ad num. 9 et seq. In Catalogo Pontificum Rom. ordine viii dicitur, post Silvestri II mortem cessasse Sedem *dies triginta tres*, qui accurate descripti videntur; cum dies xiii mensis Junii in Dominicam incidat, quo ideo die *Joannes*, qui dicebatur *Sicco*, natione Romanus, ordinatus fuit. *Joanni XVII* passim scriptores et Catalogi *mensis quinque* adscribunt, et in sex Catalogis adduntur dies viginti quinque. Quare obiit die septima mensis Decembris, et *Joannes* hujus nominis XVIII, natione Romanus, qui dicebatur *Fasanus*, ordinatus est die vicesima sexta ejusdem mensis, in quam Dominica et Festum S. Stephani protomartyris incidunt; cum tam in laudato Catalogo viii, quam in magno Chronico Belgico pag. 93, legatur, post mortem Joannis XVII cessasse sedem *dies novendecim* (1). Gerardus du Bois in lib. 10 Hist. Ecclesiæ Parisiensis cap. 3, refert donationem a Raynaldo Parisiorum episcopo canonicis Ecclesiæ Parisiensis factam, quam Joannes XVIII Rescripto suo confirmavit, quod in hæc verba desinit: « Datum IV non. Decemb. per manus Petri abbatis et cancellarii sacri Lateranensis palatii anno iii Pontificatus domini Joannis octavi decimi, et universalis papæ in sacratissima Sede B. Petri Apostoli, Indictione v », anno scilicet Christi mvi. Quare cum die secunda mensis Decembris illius anni tertium Pontificatus

annum adhuc numerarit, perspicuum est, cum hoc anno post eundem diem Pontificem Romanum consecratum fuisse. Qua etiam ex subscriptione constat, hunc Pontificem se ipsum *decimum octavum* appellasse, ideoque et decessorem suum Joannem XVII dictum fuisse. Pontifices autem Romanos eodem modo ab historicis appellandos, quo ipsimet sese in suis rescriptis vocarunt, jam supra insinuavimus; perperamque Platina et Baronius ordinem illum immutarunt; cum sine perturbatione Historiæ et lectorum incommodo id fieri non potuerit. Certe si quis Martinum papam, qui se *quintum* appellavit, *tertium* nominaret, audiendus non esset; et tamen non est major ratio de Martino, quam de duobus mox memoratis, nec inde minor perplexitas oritur. Papebrocius refert subscriptionem ejusdam Privilegii a Joanne XVIII concessi, ex qua etiam liquet, cum *Joannem XVIII*, non vero Joannem XIX, ut eum appellavit Baronius, semel ipsum nuncupasse, quod ante eum Onuphrius docnerat, eumque Joannem XVIII recte appellarat. Porro Joannes diaconus junior in libello de Ecclesia Lateranensi testatur Joannem XVII in ea Ecclesia sepultum esse cum hoc Epitaphio:

Cernitur hic tumulus, qui præsul dicitur esse,
Summi Joannis, sic quoque dictus erat.

« Iste Joannes XVII papa », inquit idem Joannes diaconus.

4. *Martyrium S. Abbonis abbatis Floriacensis.* — Ad num. 13 et seqq. Baronius a Sigeberto in Chronico deceptus mortem *S. Abbonis* Floriacensis abbatis cum præsentis anno copulavit; verum Aimoinus Floriacensis monachus hujus sancti Vitam elucubravît, annoque xv libros Miraculorum sancti

(1) Apud Ughellium in Ostiensibus num. 24, habentur Chronologica notæ Diplomatis *Joannis XVIII* pro monasterio SS. *Cosmæ et Damiani ad viciniam auream*: « Datum IV kal. Aprilis per manus Gregorii episcopi et bibliothecarii S. R. E. atque episcopi sanctæ Ostiensis Ecclesiæ, anno, Deo propitio, Pontificatus domini Joannis summi Pontificis et (sic) universi septimi papæ. In sacratissima Sede beati Petri Apostoli secundo, in mense Novembrio, Indictione supradicta tertia ». In Regesto Sublacensi pag. 19 aliud ejusdem *Joannis XVIII* Diploma pro monasterio Sublacensi SS. Benedicti et Scholasticæ recensetur, quavis mendose exscriptum, in cujus calce habetur: « Scriptum per manuum Benedicti regionarii notarii, et scriniarii S. R. E. in mense, et Indictione suprascripta iii. Bene valete ».

« Data XII kal. Augustas per manum Gregorii episcopi sanctæ Ostiensis Ecclesiæ et bibliothecarii Sedis Apostolicæ, anno, Deo propitio, Pontificatus domini Joannis summi Pontificis et (sic) universi septimi papæ. In sacratissima Sede beati Petri Apostoli secundo, in mense Novembrio, Indictione suprascripta tertia ». Verba illa *septimi papæ*, oscitanter transcripta esse patet; nam in eo Diplomate *Johannes* Pontifex confirmat privilegia *Caroli, Lotharii* atque *Ottonis* imperatorum, quæ a *Johanne* hujus nominis VII confirmari non poterant, longe autem eos vita functo; quare legendum *decimi septimi*, aut *decimi octavi*, ut infra patebit. In eodem Regesto pag. 136, col. 2, habetur chartula locationis ad tertiam generationem facta a *Stephano* abbate S. Benedicti de Sublaco, cujus initio legitur: « Anno, Deo propitio, Pontificatus domini Joannis summi Pontificis et universalis XVIII PP. in sacratissima Sede B. Petri Apostoli III, Indictione IV, mense Januarii, die vii ». Stipulatores jurant per salutem *Johannis XVIII papæ*. Ibid. pag. 116, alia stipulatio ejusdem *Stephani* abbatis S. Benedicti et Scholasticæ, qua concedit vineam *ad pastinandum positam foris portum Metrobi in loco vocato Calcatorio*. Initio legitur: « Anno, Deo propitio, Pontificatus domini Joannis summi Pontificis et universalis XVIII PP. in sacratissima Sede B. Petri Apostoli v, Indict. vi, mense Junii, die vi ». Ibid. pag. 199: Initio ejusdem chartulæ habetur: « Anno, Deo propitio, Pontificatus domini Joannis summi Pontif. et universalis XVII PP. (suprascriptum et additum est XVIII), in sacratissima Sede B. Petri Apostoli anno II, mense Aprilis, die IX, Indict. iii. Johannes abbas monasterii S. Salvatoris, qui ponitur ad commune aque in territorio Trebense donat Stephano abbati Sublacen. cisternam antiquam cum pavimento positam in Afle ». Ibidem jurat per *Joannem XVII papam*. His addæ alia monumenta. In Tabulario Diaconie S. Martini in Via Lata habetur donatio « Joannis illustrissimi et clarissimi domini Meliosi consulis et ducis », cujus initium est: « In nomine Domini Dei Salvatoris nostri Jesu Christi. Anno, Deo propitio, Pontificatus domini Joannis summi Pontificis et universalis septimi decimi papæ in sacra issi na Sede B. Petri Apostoli, mense Aprilis, Indictione quinta ». Alia Charta venditionis in eodem Tabulario, cujus initium: « In nomine Domini Dei Salvatoris nostri Jesu Christi, tempore domini Joannis summi Pontificis et universalis octavi decimi papæ in sacratissima Sede B. Petri Apostoli, quinto mensis Decembris, Indictione septima ». Alia ibidem quæ data est mense Julio: « Anno, Deo propitio, Pontificatus domini Joannis summi Pontificis et universalis octavi decimi papæ in sacratissima Sede B. Petri Apostoli, quinto mense, et Indictione supradicta sexta ». Vides in his monumentis unum eundemque *Johannem* modo appellari XVII, modo XVIII, quia *Johannes* cognomento *Sicco*, qui ordine XVI, interdum XVII, interdum XVIII dicitur. Qui ergo *Johanni Sicco* successit, quum XVII dici deberet, identidem XVIII dicitur, et quandoque XVII. Si ergo omnes, quæ retulimus, Chronologicæ notæ expendatur, recte exordia Pontificatus ad extremum mensis Decembris signentur; nam si anno mvi, mense *Decembris*, Indictione *septima* *Septembri* inchoata, adhuc annus ejus *quintus* in cursu erat; *annus* ejus *sextus* ab extremis mensis Decembris diebus initium sumebat.

Benedicti abbatis. In lib. 3, cujus fragmentum recitat Duchesnius tom. iv, ait Aimoinus : « Oylboldo abbate in Christo quiescente, Abbo Deo et hominibus vir amabilis, a fratribus, Hugone annuente rege electus, in gradum successit monastici regiminis. Qui præcedente hunc, quo hæc scribimus anno (nempe mv), qui fuit ab Incarnatione Domini miv, in Vasconia partibus, a perfidis illius nationis hominibus, nobis præsentibus, innocenter occisus, martyrii sanguine laureatus ad regna est æterna a Christo vocatus ». Ad hæc in Fragmento Historiæ Franciæ a Ludovico Pio imp. usque ad Robertum Francorum regem apud Duchesnium tom. iii, pag. 345, de S. Abbone habetur : « Qui demum Incarnat. Dominicæ anno miv a perfidis Wasconibus in quadam præfati monasterii (nempe Floriacensis) cella martyrizatus occubuit. Et nunc usque ad ejus sacrum tumulum divina gratia magna fiunt miracula ». Baluzius lib. 1 Miscell. pag. 411, refert Epistolam Encyclicam monachorum Floriacensium de cæde Abbonis abbatis, in qua aiunt : « Wasconum gladiis felix promeruit feliciter beatorum martyrum socius fieri ». Paulo post : « Obiit idibus Novemb. die natalis S. Britii », qui fuit archiepisc. Turonensis. Denique illo etiam anno Abbonis martyrium collocatur in Chronic. Floriacensi apud Baluzium lib. 2 Miscell. Varia Abbo scripsit opuscula, ex quibus pauca ad nos pervenere, ut videre est apud Natalem Alexandrum sæc. ix et x, part. 1. Mabillonius tom. ii Analect. pag. 248 e tenebris eruit canones ejus ad Hugonem et Robertum ejus filium Francorum reges, qui sunt numero iii, et ad restituendas veterum canonum lectiones et lacunas non parum conducunt, et quo in statu Francica Respublica eo tempore esset, ostendunt. In ea Collectione nullas Abbo ex supposititiis Romanorum Pontificum Epistolis adducit, licet per id tempus ejusmodi subditiæ litteræ cæca religione admitterentur, indeque eum præclara eruditione exornatum fuisse nobis innotescit. Vide dicta anno DCCLXXI, num. 4.

5. *Anglia a Danis devastatur.* — Svenus Danorum rex cum accepisset crudelitatem ab Eldredo Anglorum rege in Danos exercitam, Danos exterosque ad vindictam vocavit, et termino statuto adveniente *ad naves immensus illico cucurrit exercitus*. Ipse rex pacis gratia Rothomagum ad Richardum Normannorum ducem hujus nominis II venit, et « pacem continuam inter se firmaverunt. Ea videlicet lege, ut persuccedentia Danorum regum,

Normannorumque ducum ac eorum hæredum tempora, firma perpetualiter inter eos maneret », inquit Gemmeticensis lib. 5, cap. 7, qui subdit, Svenum continuo Anglorum regnum ultricibus flammis tradidisse, et tam Eboracenses, quam Cantuarios et Londonienses, cum viderent se a nullo juvari, ejus potestate subdidisse. Huntindoniensis vero lib. 6, pag. 360 : « Millesimo tertio anno, inquit, ira Daci exarserunt digna, sicut ignis, quem sanguine velit aliquis exstinguere. Advolantes igitur, quasi multitudo locustarum, quidam Exacestriam venerunt : et urbem totam funditus destruxerunt, et omnia spolia secum, cineribus tantum relictis, deportaverunt ». His addit Hovedenus : « Anno millesimo tertio rex Danorum Swein, per incuriam et prodilionem Normannici comitis Hugonis, quem regina Emma Dommonia præfecit, civitatem Exestram infregit, spoliavit, murum ab Orientali usque ad occidentalem portam destruxit : et cum ingenti præda naves repetiit ». Narrat postea Svanum seu Sveonem Wiltoniensem provinciam ingressum, *Aelfrici* ducis, qui Anglis tunc præerat, proditione, devastasse et incendisse, et simili modo *Serbiriam* præcipuum oppidum consumpsisse, ac postea suas naves repetisse.

6. *Germania bello civili turbata.* — In Germania *Henricus* rex validas copias *Hermann* Sueviæ duci, qui ad Germanicum regnum aspirabat, objecit. Is tamen *Argentiniæ* Wicerino episcopo infestus, proditione cepit. Urbs fœde direpta, beatæ Virginis ædes expilata et incensa, in scio licet aut invito Hermann. Eandem prædandi licentiam *Henrici* exercitus sibi deposcebat, quod facinus rex aversatus, copias in Franconiam abduxit, tandemque *Hermannus* viribus suis diffusus regi sese submisit. Quæ fusius a Germanicis scriptoribus narrantur. Hic tantum afferam chronographi Hildeusheimensis verba ad hunc Christi annum : « *Herrmannus* Alemannorum dux regis electioni aliquandiu resistens, regiæ se potestati subdidit, et interventu reginæ et principum in suo honore permansit. *Heinricus* Berthaldi comitis filius, et Bruno frater regis, et ambo Bolizlavones (id est, Boleslai) Poliniacus videlicet ac Boemicus, a rege infideliter majestatis rei deficiunt. Sed *Heinricus* ad regem veniens, et refugiens in Givekanstein custodiæ mancipatur ». Bruno tamen anno sequenti *Gislæ* matris opera regi reconciliatus est, ut habet idem chronographus.

JOANNIS XIX ANNUS 2. — CHRISTI 1004.

1. *Synodi in Italia et in Galliis.* — Sequitur annus Christi millesimus quartus, Indictione secunda inchoatus, quo, ut ex Glabro¹ colligitur, frequentes Synodi in Italia atque in Galliis sunt celebratæ. De his enim hæc ipse: «Tunc igitur temporis in Italia atque in Galliis plerique episcoporum nonnulla inter se de diversis quæstionibus habuere Synodorum conciliabula. Nam de jejuniis, quæ plerique fidelium, scilicet inter Ascensionem Salvatoris et Pentecosten observant, ita decreverunt, ut ne per imperium sacerdotum fierent, excepto sabbato Pentecostes, et a quibus fieri vellent, prohiberentur fieri. Simulque incidit quæstio, cur monachi per tres vel quatuor Dominicas dies antè diem Nativitatis Dominicæ, seu Quadragesimalis observationis tempore hymnum scilicet Te Deum laudamus decantarent contra morem Romanæ Ecclesiæ. Qua videlicet quæstione aggressi tam abbates quam monachi, responderunt se pro nulla re illud agere, nisi ex B. Benedicti nominatissimi atque excellentissimi Patris præceptione: cujus etiam actus simulque dicta a summo Romanorum Pontifice, videlicet Gregorio, haberentur descripta ac laudabiliter roborata. His denique comperti episcopi usus monachorum, authentico (antiquo) ex more viguit. Necnon etiam de die Annuntiationis Dominicæ, quæ celebratur VIII kal. April. si forte quolibet alio tempore præter Quadragesimam excoli congruentius potuisset, ab iisdem pontificibus non parva illata est quæstio. Ferebatur enim a quibusdam, eamdem videlicet Annuntiationem Dominicam more Hispanorum, quinto decimo kal. Jan. die irreprehensibiliter posse celebrari. Nam cum ego postmodum in monasterio Cluniacensi cum cæteris fratribus degerem, conveniunt illuc ab Hispanis, quam partes honestæ commiserationis jamdudum more viventes propriæ regionis monachi. Propinquante vero die Nativitatis Dominicæ, petierunt prædicti monachi venerabilem Odilonem ejusdem loci abbatem, ut more suorum liceret eis celebrare Annuntiationem. Quod cum fecissent, segregati a cæteris, visum est nocte eadem duobus

senioribus loci, quod unus de Hispanis fuscina focaria arriperet desuper altare puerum, mitteretque illum in sartagine[m] prunis plenam, ita clamantem: Pater, Pater, quod tu dedisti, isti auferunt. Quid plura? apud nos antiqua consuetudo, uti decebat, prævaluit». Hæc Glaber. Porro in Hispaniis etiam exolevit usus ille, quo ex præscripto¹ decimi Toletani Concilii, Annuntiatio celebrabatur decimo quinto kalendas Januarii.

2. *Roberti regis mira erga episcopos devotio.* — Quod pertinet ad Concilia Gallicana his temporibus celebrata sub rege vere Christianissimo Roberto: admiratione dignum est, quanta animi demissione consueverit idem rex cum episcopis interesse publicis hisce conventibus, et quidem tanquam famulus illis inserviturus. De quo memoria dignum Helgaldus illius temporis auctor, qui ejus Vitam conscripsit, ejusmodi factum narrat: «Colloquium cum episcopis regni sui habens rex humilis, inter colloquium unumquemque adspiciens, vidit quemdam eorum mole carnis gravatum, pedes suos dependere ab alto: pietate ductus, a longe quærens suppedaneum reperit unum, quod manibus, Deo et hominibus charus, apprehendens, illud tanto pontifici offerre non recusavit, et sub pedibus ejus ponere non est dedignatus. Erat autem hic episcopus Lingoniensis, Lambertus nomine dictus, scientia, religione et bonitate pollens. In magna etenim ex hoc admiratione pro tali facto omnes episcopi et principes habuere sæpefatum Robertum humillimum et inclytum regem. Is quippe rex Deo dilectus Robertus semper meminit sanctæ legis, quia memor fuit operis Dei in omnibus viis suis. Sciebat etenim scriptum: Scientia virtus, custos virtutis humilitas sancta. Et illud beati papæ Gregorii: Qui sine humilitate virtutes congregat, quasi in ventum pulverem portal. Legerat quid dixerit quidam ex Patribus: Omnis labor sine humilitate vanus est: humilitatis signum dat regnum cælorum. Nos ergo oremus omnipotentem Deum, ut hic Dei electus, qui deposito omni tumore superbix conjunctus est Christo Deo

¹ Glab. l. III. c. 3.¹ Conc. Tol. x. c. 1.

sanctæ humilitatis virtute, ita illi jungatur in sæculo venturo, etc. »

3. At qui humili obsequio inservire paralus erat episcopis; eodem tamen, cum opus esset, id exigente zelo Catholicæ fidei, quo jugiter æstuabat, a fide Catholica devios redarguere, imo et comminari minime prætermisit. Est de his præclarum illud exemplum, quod idem Helgaldus itidem in Vita ipsius ita describit : « Præsuli cuidam, Leuthero Senonensi archiepiscopo scilicet, de Domino non bene sentienti, et quærenti pro quibusdam causis probationem in corpore Domini nostri Jesu Christi, indigne tulit rex amator bonitatis, et scripsit ei in his verbis : Cum sit tibi nomen scientiæ, et non luceat in te lumen sapientiæ; miror qua ratione quæseris pro tuis iniquissimis imperiis, et pro infesto odio quod erga Dei servos habes, examinationem in corpore et sanguine Domini. Et cum hoc sit, quod a dante sacerdote dicitur, CORPUS DOMINI NOSTRI JESU CHRISTI SIT TIBI SALUS ANIMÆ ET CORPORIS : cur tu temerario ore et polluto dicas : Si dignus es, accipe, cum sit nullus qui habeatur dignus ? Cur divinitati attribuis ærumnas corporis, et infirmum doloris humani divinæ connectis naturæ ? Jurans Domini fidem princeps Dei : Privaberis, inquit, honore pontificis, nisi ab his respiceris, et damnaberis cum his qui dixerunt Domino ¹ : Recede a nobis : et non communicabis his quibus dicitur : Appropinquate ² Deo et appropinquabit vobis.

4. « His verbis præsul bene correctus, a rege pio et bono sapienter instructus, quievit, obmutuit, et siluit a dogmate perverso, quod erat contrarium omni bono, et jam crescebat in sæculo. In sinu matris Ecclesiæ collocatus iste Dei servus, scilicet Robertus rex, factus est Dominici corporis et sanguinis vasorumque ejus custos fortissimus, ad unguem ita perordinans cuncta, quasi videretur Deus suscipi, non ut in alterius, sed in propria sanctæ majestatis gloria. Hæc ejus devotio, hæc erat fortis provisio, ut corde mundo et vestitu cándido Deus immolaretur pro totius mundi piaculo ». Subjicit de vasis aureis et argenteis, ad ministerium missæ ab eodem pio rege Deo offerri solitis.

5. *Primordia hæresis Berengarii.* — Audisti, lector, simul cum pietate regis etiam sibilos venenosi serpentis in Leuthero archiepiscopo Senonensi : ad hunc extant complures Fulberti episcopi Carnotensis Epistolæ, quibus cum sæpe contigerit diversis ex causis redargui. Jam viperini foetus e portis inferi, tanquam e matris utero enixi, in damnum Ecclesiæ emittebantur, qui se spiris sinuosis inferebant in sancta, ut sanctum sanctorum, sacramentum sacramentorum, si possent, auferrent ab ea. Quod enim Leuthericus legitur insusurrare cœpisse, jam (ut audisti) rumor ille tantæ blasphemiae increbrescebat in sæculo : etsi tacuit ipse, repressus a rege, timore pœnæ, ne ira regis ca-

deret ab amplissima dignitate et careret cathedra ; haud serpens rumor ille est omnino repressus, sed paulatim in dies crescens, in manifestam tandem erupit hæresim sub patrocinio infelicissimi Berengarii, qui hoc tempore adolescens auditor extitit Fulberti post biennium Carnotensis episcopi, viri sanctissimi omniumque doctissimi : a quo, ne disputationis obtentu extra limites Catholicæ veritatis pedem auderet efferre, sæpe Berengarius monitus fuit et redargutus.

6. Revocavit in memoriam Berengario istiusmodi sub Fulberto tyrocinium suum, ejusdem sub eodem doctore condiscipulus Andelmanus episcopus Brixiensis, cum postea adversus eum disertam valde scripsit Epistolam; in qua habet inter alia ista quidem memoria digna ¹ : « Collactaneum te meum vocavi propter dulcissimum illud contubernium, quod tecum adolescentulo ipse ego majusculus in Academia Carnotensi, sub nostro illo venerabili Socrate, nempe Fulberto, jucundissime duxi. Cujus de convictu gloriari nobis dignius licet, quam gloriabatur Plato, gratias agens naturæ, eo quod in diebus Socratis sui hominem se, non pecudem peperisset. Nos enim sanctiorem vitam, salubrioremque doctrinam Catholici et Christianissimi hominis experti sumus, et nunc ejus ad Deum precibus adjuvari sperare debemus. Neque enim putandus est memoriam, in qua nos tanquam in sinu materno semper ferebat, amisisse : haud vera charitas Christi, qua sicut filios amplectebatur, in eo extincta est; sed absque dubio memor nostri, diligens plenius quam cum in corpore mortis hujus peregrinaretur, invitat ad se votis, et tacitis precibus obtestans, per secreta illa et respersiva colloquia, quæ nobiscum in hortulo juxta capellam de civitate illa, quam, Deo volente, Senator nunc possidet, sæpius habebat, et obsecrans per lacrymas, quas interdum in medio sermone prorumpens, exundante sancti amoris impetu, emanabat, ut illuc omni studio properaremus, viam regiam directim gradientes, sanctorum Patrum vestigiis observantissime inhaerentes, ut nullum prorsus diverticulum, nullam in novam et fallacem semitam desiliamus, ne forte in laqueos et scandala incidamus. Quia sicut ait Psalmista : ² Juxta iter scandalum posuerunt mihi. Nam quod est juxta iter, hoc est extra iter. De via autem quid dicit ³ ? Pax multa diligentibus legem tuam, et non est illis scandalum. Et quid est lex Domini, nisi via Domini? sicut in alio versu Psalmi cantatur ⁴ : Viam mandatorum tuorum cucurri, cum dilatasti cor meum. Ergo in via pax, extra viam scandalum. Hoc scandalum incurrunt, qui per hæreses et schismata deviantes, pacem Catholicam impiis contentionibus rescindunt : quos nihilominus in Psalmo decimo tertio ita annotatos advertimus : Contritio et infelicitas in viis eorum ; viam pacis non cognoverunt.

¹ Job. XXI. — ² Jac. IV.

¹ Extat Rom. III. Bibl. SS. PP. — ² Psal. CXXXIX. — ³ Psal. CXVIII. — ⁴ Ps. eod.

Ece scandalum, vel potius scandala, nempe contritio et infelicitas æterna, quæ occurrunt in semitis hæreticorum, viam pacis Catholicæ recusantium.

7. « Avertat Dominus a te, sancte frater, semitas tales, et convertat pedes tuos in testimonia sua, et mendaces ostendat, qui famam tuam tam fœda labe maculare nituntur, spargentes usquequaque, ut non solum Latinas, verum etiam Teutonicas aures, inter quas diu peregrinor, repleverint, quasi te ab unitate sanctæ matris Ecclesiæ divulseris, et de corpore et sanguine Domini, quod quotidie in universa terra super sanctum altare immolatur, aliter quam fides Catholica teneat, sentire videaris : hoc est (ut illorum de te dictis utar) non esse verum corpus Christi, neque verum sanguinem, vel figuram quamdam et similitudinem. Hæc ante hoc biennium cum audissem, fraternitatem tuam per Epistolam convenire, idque ex te ipso certius sciscitandum esse decrevi. Sciens porro familiarem tuum dominum Paulinum Metensem primicerium tibi propiorem, tibi que aliquanto viciniorem esse, et mea petitione, et sua pollicitatione delegavi sibi hujus negotii executionem. At ille (non enim in hac re laudare eum possum) negligens sive alterutrum, sive utrumque nostrum, usque adhuc reliquit me suspensum; sed divina gratia nos nunquam negligens, inopinato mihi obtulit melius quam optabam. Optabam autem invenire hominem peregrinandi usu exercitatum, regionis et linguæ Francorum non ignarum : et ecce stetit mihi e latere G. ex tuo nomine me salutans. Obstupui præ gaudio, et tamen non potui tam repentino eventui fidem integram habere, quia frater idem nullum abs te signum litterarium, uti mos est inter amicos longe remotos, tamque diu non visos, afferebat : quod tamen ipsum multis de causis facile persuasibilibus excusabat. Sive ergo vere, sive aliter hoc agebat, ego eum a Domino præparatum mihi esse non diffidens, nolui diutius dissimulare, quin ipse mente ac spiritu meo, præsentibus litteris, tanquam pennis indutus per tanta terrarum spatia transvolarem, obsecrans per misericordiam Dei, per suavissimam memoriam Fulberti, ut pacem Catholicam diligas, neque conturbes Rempublicam Christianæ civitatis bene compositam a majoribus nostris, pro qua tot millia martyrum, contra idololatriam et regnum diaboli fortiter certantes triumpharunt, subindeque sancti doctores bella civilia ab hæreticis commota, salutaris eloquentiæ fluminibus restinxerunt, atque eam circumquaque munierunt, ut jam novus hostis nullus oboriri queat, qui adversus eam aliquid nitens, non continuo mille jaculis desuper ruentibus obruatur ». Hæc Adelmannus, a nobis hic posita ad insinuandum tyrocinium Berengarii, postea infandam hæresim promulgantis, quam primum audisti a rege Christianissimo condemnatam in perditissimo Leutherico archiepiscopo Senonensi.

8. *Lues in Urbe.* — Hoc eodem anno Urbe

morbo vexata, plurimi interierunt : catarrhus enim descendens in fauces, meatus obstruens, suffocatos miseros homines confestim mori cogebat. Quid autem mirandum tunc viderit Urbs in peccatoris conversione, dicendum. Fideliter descripta reperitur historia in Codice Cassinate post sancti Adalberti homiliam Romæ dictam in Ecclesia SS. Bonifacii et Alexii, quæ sic se habet : « Non solum qui assiduitate Romam plus solius Petri potestate, quam regum judicio urbium dominam incolunt, verum etiam qui a diversis mundi partibus eam expelunt, pretiosissimum sciunt templum corporibus sanctorum Christi martyris Bonifacii et confessoris Alexii decoratum. In quo dum fama sacræ religionis cresceret, quidam nobilitate carnis pollens, et divitiis affluens, monachicum habitum, abrenuntians quæ sæculi sunt, suscepit, nomine Joannes Canaparius. Qui dum in sæculo esset, multos sibi amicos, propinquos et fideles sincera charitate devinxerat eundem locum secum petere, eundemque habitum suscipere. Sed (ut est hominum mutabilitas) omnes pæne declinaverunt retrorsum; et quem colentem mundum diligebant, tollentem crucem suam et sequentem Jesum sequi neglexerunt.

9. « E quorum numero extitit (de quo dicere volo) convicaneus et compater ejus Franco, cognomento Maringus, homo non ignobilis, nec adeo pauper, et sæculari scientia plus justo refertus. Hic autem ea tempestate, qua Joannes papa præsulabat, residens ante Ecclesiam venerabilium martyrum Cosmæ et Damiani, Via sacra; turgente gutture, vicina morte se premi omnino suspicatus est. Nam innumera multitudo hominum illa clade Romæ perierat, quæ sibi vivendi spem penitus abstulerat. Mox itaque data dextera euidam adstanti, ad monasterium prædictorum sanctorum Bonifacii et Alexii citissime deduci se petiit, immemor parentum et horum, quæ paulo ante se præpedierant. Ubi illuc adveniens deficientibus viribus et anhelitu, compatri suo velle loqui significavit. Qui, ubi ex more nuntiatum est, data licentia ab abbate Leone, qui tunc eidem monasterio præerat, introductus est, et inductus est ad Ecclesiam Sanctorum, ubi præstolabatur eum prænominatus Joannes Canaparius, volvens animo ad hoc illum venire vespertino tempore, ut impleret quod promiserat : nam eidem Franconi vespertinus erat. Quem videns agrotus, genibus ejus advolutus, rauca voce cepit : Eia compater, eia domine, recipe me fallacem, recipe me infidelem, et consigna me tuis dominis Bonifacio et Alexio : fac me servum eorum, quia scio, et veraciter scio, quod nisi eorum patrocinio non liberabor a potestate iniquorum spirituum, quibus ab ipsis servivi eunabulis. Quare moram patior, benignissime? Vitas me, despicias me, quod invitus tuos requiro dominos? Ubi est quod mihi sæpe dicebas; quia et invitis salus præstatur? Sancte Bonifaci, adjuva me : sancte Alexi, succurre mihi.

10. « Talibus denique percussus prælibatus Joannes Canaparius, abbatem convocavit et fratres, quibus rei veritatem ordine narrans, monachum illum fieri rogavit sine intermissione clamantem: S. Bonifaci, S. Alexi, servus vester sum et etiam servus servorum vestrorum. Cujus desiderium cognoscentes, ante venerandam Crucem cum stauerunt, monachumque multis cum lacrymis effecerunt. Postquam igitur hæc acta sunt in monasterio, volens Deus ostendere, quantum intercessione horum sanctorum flectatur ad misericordiam, et quam misericorditer liberet peccatores ad eos confugientes: permisit cuneum equestrium armorum malignorum spirituum per supradictam Viam sacram visibiliter descendere, prædictum Franconem requirentem, quem judiciaria definitione servum se vicisse glorianter jactabat. Taliter enim altercando, ablatum perquirendo, visi sunt venisse ad portam monasterii. Ubi non inveniunt eum, reversi sunt tristes, multa nefaria jactantes in sanctos. Qui dum requisiti fuissent a vicinis monasterii, quid hoc esset, responsum: Franconem servum eorum ablatum a Bonifacio et Alexio, et mussitando adjiciebant, remansisse per quod eum vincere putabant. Quod ubi abbati et fratribus ab audientibus nuntiatum est: subtiliter perquirentes, professionem regularem non illum fecisse invenerunt. Qua studiose facta, anima illa carne soluta est. Ex quo datur intelligi, quod misericordissimus Deus, quem cuncta monastici ordinis implere permisit, meritis sanctorum Bonifacii et Alexii, quorum suffragium toto corde petierat, ab omnibus insidiis inimicorum eripuit ad laudem et gloriam nominis sui. Amen ». Illicusque de his ibi.

11. Quo pariter anno memoratus Joannes vir

nobilissimus vita functus, ibidemque sepultus est, cujus Epitaphium, quod hacenus in eorundem sanctorum Ecclesia conservatur, haud longe abaltari primario, dignum existimavi hic describere. Sic se habet:

CHRISTE DEVS RERV PVLCHERRIME FACTOR ET AVCTOR
SYSCIBE ME INDIGNVM SALVS ET OMNE BONVM.
OBSECO, FLAGITO, SERVVS, POSTVLO, QVÆRO IOHANNES
CONFITEOR CVLPAM, DA CLEMENS VENIAM.
OMNE MALVM MERV, CVMVLVMQ. REATIBVS AVXI
TARDVS AD OMNE BONVM, PROMPTVS AD OMNE MALVM
A CAPITE VSQVE PEDES MACVLANT MEMBRA OMNIA SORDES
SED TV SANCTE DEVS REX MISERERE PIVS
DA IN REGIONE DOMVM SVNT VBI CASTRA VIRORVM
AVRICOMVS REGNAT VBI AVREA SÆCVLA CHRISTVS.

PROSA † PRECOR VOS OMNES, QVI HVC POST ME
VENTVRI ESTIS, VT PRO ME PRECES FVNDATIS ET PROPTER
CHARITATEM, QVAM VIOLARE NON LICET, NEMO SVVM NEC
ALIENVM CADAVER SUPER ME MITTAT. QVOD SI HOC PRÆ-
SVMPSERIT SIT MALEDICTVS ATQVE IN PERPETVVM ANA-
THEMATE CONSTRUCTVS.

CREDO QVOD REDEMPTOR MEVS VIVIT ET IN CARNE
MEA VIDERO DEVVM SALVATOREM MEVM. AB INCARNATIONE
DOMINI NOSTRI IESV CHRISTI ANNI SVNT MILLE IV. OBIT
MENSE OCTOB. DIE XII. INDICT. III.

Quæ videlicet tertia Indictio hoc ipso anno incipit mense Septembris. At quam dispare ejusmodi antiquæ sepulcrorum inscriptiones a recentioribus! In illis enim magna animi submissione fideles peccata sua maluerunt inscribi: in istis vero magno fastu virtutes vane atque mendaciter, ut plurimum, ambiunt vani homines prædicari.

Anno periodi Græco-Romanæ 6497. — Anno Æræ Hispan. 1042. — Anno Hegiræ 395, inchoato die 18 Oct., Fer. 4. — Jesu Christi 1004.

— Joannis XVIII papæ 2. — Henrici II reg. 3, Basil. et Const. imp. 29.

1. *Leuthericus Senonensis archiepiscopus. ob motam de Eucharistia quæstionem increpatur.* — Anum. 3 ad 8. Refert Baronius ex Helgaldi in Vita Roberti Franciæ regis, *Leuthericum* Senonensem archiepiscopum, qui olim *Gerberti* postea Summi Pontificis discipulus fuerat, de veritate corporis et sanguinis Domini in Eucharistia dubitantem a *Roberto* rege acriter increpitum fuisse, hincque increbrescere cœpisse rumorem illius blasphemici, quam

postea *Berengarius* Turonensis aperte professus est. Ex verbis tamen Helgaldi clare evinci non potest, *Leuthericum* de veritate corporis Christi dubitasse, sed hoc tantum, quod dignos putarit, accipere corpus Christi, non vero indignos. Ut ut sit, hinc hæreseos de Eucharistiæ mysterio sumi potest exordium. Nam postquam *Leuthericus*, inquit Bulaus Sæc. in Hist. Universitatis Parisiensis, qui ab omnibus vir doctissimus habebatur, quæstionem illam

movere cœpit, licet eo increpito et tacere jusso, non destilare tamen curiosi novitatis eandem in scholis agitare. Tumque *Fulbertus* Gerberti quoque discipulus, qui scholas Carnotenses regebat, a discipulis rogatus ut quid sentiret, quidve sentendum foret, explanaret, eandem in scriptis tradidit, et veram orthodoxamque sententiam propugnavit. Admonuit autem *Leothericum*, ut caute circumspiceret quid rei moliretur : « Præceta navis regie, inquit, cautus et circumspectus esto. Terreni spiritus insolenter assibulant. Fluctus hujus sæculi intumescunt : promontoria mundanæ potestatis pericula minantur, et mortes more piratarum insidiantur hypocritæ ».

2. *Floret Fulbertus postea episc. Carnotensis.* — *Fulbertus* ex magistro scholarum Ecclesiæ Carnotensis cancellarius creatus, et non multo post præsentem annum ejusdem urbis antistes renunciatus, omnium sui temporis doctorum doctissimus habebatur, et ab omnibus propter ingentia merita suspiciebatur. Familiarissimus et amicissimus fuit *S. Abboni* Floriacensi abbati præsentis anno martyrii gloria coronato, ut superiori diximus, ibique dicta ad præsentem annum retrahenda. Extat enim Epistola *Fulberti* ordine xxi ad *Abbonem*, quæ his verbis inchoatur : « Pleno virtutis et gratiæ circumfuso charissimo patri *Abboni* *Fulbertus* suus. Quanam terræ salutatione digner, o sacer abba ! o magne philosophæ, quod rependam muneris sanctæ amicitiae, quam promiserunt signa gemmatæ facundiæ, vix æstimare sufficio ».

3. *Eucharistiæ mysterium defendit.* — Postquam quæstio de corpore Christi in Eucharistia mota fuit, eam sibi *Fulbertus* in schola scriptisque tractandam suscepit, eamque etiam tractatam et validis munitam rationibus publicavit, ut patet ex Epistola i ad *Adeodatum*, qua tria ad salutem necessaria esse docet, nempe mysterium Trinitatis, baptismi rationem et causam, veritatem denique corporis et sanguinis Christi in Eucharistia : « In his tribus, inquit, multi nimis carnaliter intuentes, dum plus carnalem sensum, quam fidei arcana mysteria contemplantur, in abruptum perniciosi erroris præcipitium devoluti, nec rerum veritatem, nec sacramentorum virtutem percipiunt, et ideo ab unitate Ecclesiæ divisi, dum fieri nolunt discipuli veritatis, magistri fiunt erroris. Prætermissa itaque luce veritatis, tenebrosas proponunt calumnias, et sacras Scripturas verbis sacrilegis nituntur adulterare, aut furtivis erasionibus recidere ». Descendit postea ad quæstionem de mysterio Eucharistiæ propositam, eamque pluribus ac docte solvit.

4. *Moritur Joannes Canaparius monachus.* — Ad num. 8 et seqq. Mortuus est hoc anno *Joannes Canaparius*, insignis monachus monasterii sanctorum *Alexii* et *Bonifacii* Romæ positi, ejus cum laude mentio in priori Vita *S. Adalberti* episcopi Pragensis et martyris. Baronius num. 11 ejus Epitaphium recitat, in quo dicitur : « Obiit mense Oct. die xii, Indict. iii », quæ a kalendis Septembris hoc

anno Romæ obtinebat; Romæ autem ac in Italia Indictiones a Septembri inchoatas fuisse, innumeris exemplis liquet.

5. *Henricus Germaniæ rex coronatur rex Italiæ.* — *Henricus* Germaniæ rex *Ardoïno* Italiæ regi, antequam eo in regno sese confirmare posset, occurrendum existimavit. Chronographus Hildensheimensis ad hunc Christi annum hæc refert de *Henrico* Palidi non longe a Merseburgo commorante : « Illo ad eum episcopus Veronensis ac alii quidam primores Italici regni venerunt cum regiis muneribus ». *Hermannus* vero Contractus ex editione Canisiana : « *Henricus* rex per Veronam Italiam eis Padum petens, omnes sibi partium illarum civitates subiecit. Papiam ipsa qua coronatus est die irrumpens, gladio et igne perdomuit. Inde acceptis obsidibus in Saxoniam reversus, post paucos dies in Slavos arma convertit. Bohemansique ad pristinam servitutem tributumque redactis, *Bolizlaum* etiam ducem Slavorum Bolanorum (id est, Polonorum) cum tota gente sua subjugavit, et in Saxoniam victor rediit ». Erravit itaque *Sigonius* lib. 8 de Reg. Ital., ubi non solum hanc *Henrici* regis expeditionem cum anno superiori connectit; sed etiam scribit exercitum *Henrici* in fugam conjectum esse, huncque *Arduinum* atque Italiam in præsens omittere coactum. *Henrici* tamen expeditionem Italicam in annum sequentem differt *Ditmarus* lib. 6, et pluribus narrat, eique standum existimo.

6. *Initium trium rerum publicarum in Italia.* — Refert ibidem *Sigonius* per hoc tempus tres populos parum adhuc in Italia aut rebus gestis, aut principum beneficiis ad memoriam hominum celebratos, præclaris rebus gerendis universos Italiæ oculos in se convertisse, nempe *Genuenses*, *Pisanos* et *Florentinos*. *Genuenses* et *Pisani* ad inferum mare locati, exemplo Venetorum, qui superum incolebant, rem tractare navalem, non mercaturæ solum, ut antea, sed etiam rei militaris causa cœperunt. Occasionem dedere *Saraceni*, qui piraticam exercendo navigationem Italiæ prope omnem ademerant. *Florentini* vero cum se terrestribus quærendis opibus dedidissent, deinde cum vicinis bella serere nunquam destitere. Harum tamen rerum publicarum initium tenebris plenum.

7. *Dani Angliam vexare non desinunt.* — *Iluntindoniensis* lib. 6, ad hunc Christi annum scribit : « *Svain* rex Dacorum fortissimus, cui Deus regnum Angliæ destinaverat, cum navibus multis venit ad *Norwic*, et eam prædatus est et combussit. Quod *Usketel* (legendum, *Wlsketel*) dux illius provinciae videns, fecit pacem cum exercitu, improvisum ejus adventum sustinere non sufficiens. Infra pacem vero exercitus post tres hebdomadas furtim perrexit ad *Tedford* (seu, ut alii habent, *Theodfordam*) et eam prædatam combussit. Quod comperiens dux *Utketel* mane ex improvviso cum parva manu revertenti ad puppes occurrit exercitui, quibus

graviter et diu resistere, sed non suffecit persistere ». Idem habent Hovedenus et Wigorniensis; qui ultimus addit, emicuisse in hac pugna Anglorum ducis virtutem, et penes Danos cum multo eorum sanguine victoriam stetisse. Malmesburiensis vero lib. 2 de Reg. cap. 10, ait: « Ita ut

quamvis nomen victoriae ad hostes concessisset, multo plus afflicti qui vicerant, quam qui victi fuerant, aestimarentur. Nec sane piguit Barbaros veritatem confiteri, cum multoties illam victoriam deplorarent.

JOANNIS XIX ANNUS 3. — CHRISTI 1005.

1. *Henricus contra Longobardos in Italiam descendit, Papiæ coronatur.* — Annus post millesimum quintus, Indictione tertia inchoatus. ordine temporum sequitur, quo Henricus Germaniæ rex adversus Harduigum, qui Longobardiam regis titulo occuparat, in Italiam descendens, Clusas ope Carentanorum fuis hostibus expugnavit; Papiamque victor accedens, ibidem honorifice susceptus rex coronatur. De his pluribus Ditmarus, deque coronatione hæc habet¹: « Post hæc Papiam visitans urbem, ab archiantistite hoc, nempe Mediolanensi, et a primis illius regionis susceptus, cum admirabili laude ad Ecclesiam ducitur, et communi electione sublimatus in solium regale collocatur ». Pergit autem dicere Ditmarus, quomodo eadem die, oborta contentione inter cives et milites, illi adversus regem rebellantes. palatium sunt aggressi: sed defenso illo a domesticis regis, cum nec precibus sancti Heriberti Coloniensis archiepiscopi, qui aderat cum Henrico, coerceri possent; qui foris erant regis milites expugnantes civitatem introgressi, eam cæde incendioque vastarunt, cum rex eos cohibere minime potuisset. Inde vero idem rex Mediolanum amore S. Ambrosii (ut idem Ditmarus ait) accessit, cum interea tumultuantibus hostibus in Germania, ab Italia revocatur, celebrata jam Pentecoste.

2. *Henricus misericors erga rebelles.* — Sed quomodo, Deo propitio, hoste debellato Boleslao Poloniæ duce, idem Henricus rex diem Nativitatis S. Mariæ Pragæ solempni ritu celebrans, ibi persuasus concione sancti episcopi Frisingensis, perduellum Henricum, quem vinctum tenebat in carcere, liberum dimittens, recepit in gratiam, ex eodem auctore sic accipe:

« Cum ibi sanctæ Domini Genitricis ortum omni celebrem mundo rex veneraretur, Godescalcus sanctæ Frisingensis Ecclesiæ venerabilis pastor, nomen cum re possidens, missam canere, ac populos instituere ab eo præcipitur, et ab episcopo sedis illius permittitur. Perlecto tum Evangelio, præsentibus idem admonet de timore divino, et de conservando geminæ dilectionis vinculo, de obedientia Domini, sublimiorumque honore potestatum. Et ad ultimum regem suaviter aggreditur, ut semet agnoscere, et omnia quæ a primis vitæ hujus cunabulis, usque ad hoc tempus honoris alicujus aut commoditatis unquam percepit, largitati divinæ potius quam suis meritis adscribere voluisset. Insuper misericordiæ mentionem fecit, quæ unicuique salutis præsidium, venerabile fidei ornamentum et magnorum remissio peccatorum. In cuius opere servando unicuique Christo fidelium tria sunt semper optanda, posse, et velle, ac perficere. Quæ cum a cunctis sint adimplenda, ab his maxime, qui nullum lædentes, sibi avent similia ad non recompensare, et ut acceptabile ab his Domino votum fiat, ex corde debet unumquodque largiri, et cunctis debitoribus remitti, ne mali vice servi diris adstringantur tormentis.

3. « Et his concludens: Te, inquires, obtestor per nomen et amorem ejus, qui suo debitori decem millia talentorum, id est, Judæis recutitis suorum transgressionem præceptorum indulgit, Henrici quondam marchionis, nunc autem, ut spero, vere pœnitentis, senior charissime, miserearis, vincula solvas et gratiam dones, ut eo liberiori animo hodie Dominum interpelles: Dimitte nobis debita nostra, etc. Hæc rex exhortatione lacrymabiliter profusa placatus, sic se facturum firmiter esponedit: et post hæc domum veniens, misericorditer adimplevit ». Hæc Ditmarus de rege maxime pio,

¹ Ditm. l. vi.

atque episcopo tanto munere digno. Qui et inferius eundem Henricum, pro quo episcopus intercesserat, jam vinculis absolutum, et ad propria redire jussum affirmat. Erat is, qui primum cum rege militans, jam ab ipso defecerat, et in eum arma moverat.

4. *Synodus Tremoniensis.* — Hoc eodem anno, ut idem Ditmarus testatur ¹, celebrata est in Germania magna Synodus Tremoniensis, in qua idem Henricus rex questus de ejus temporis sanctæ Ecclesiæ deformatione, egit magna instantia apud episcopos pro ejusdem reformatione. Quod ab eisdem pro viribus præstitum est diligenter, statutis

in ea communi consensu sacris canonibus, quibus in pristinum usum revocarentur sanctissimæ Ecclesiasticæ leges, et exularent qui irrepsissent in clerum ac populum pravi mores. Quibus statutis conciliavit sibi rex Deum propitium, aperuitque sibi viam ad victorias consequendas et Romanum imperium obtinendum. Periere ejusdem Concilii adeo celebris Acta, quorum tantum exordium ita descriptum apud eundem Ditmarum invenitur :

« Anno Dominicæ Incarnationis millesimo quinto, anno autem domini Henrici Secundi regnantis quarto », inchoato scilicet, « in die non. Julii..... »

Desunt reliqua.

¹ Ditm. l. vi.

Anno periodi Græco-Romanæ 6498. — Anno Æræ Hispan. 1043. — Anno Hegiræ 396, inchoato die 8 Octob., Fer. 1. — Jesu Christi 1005.

— Joannis XVIII papæ 3. — Henrici II reg. 4. Basil. et Const. imp. 30.

1. *Synodus Tremoniensis.* — Ad num. 4. Ditmarus lib. 6 mentionem facit magnæ Synodi in Germania *Tremonie*, quæ urbs est Westphaliæ, hoc anno in *die non. Julii* celebratæ, cujus Acta desiderantur, indeque quilibet de Decretis in ea habitis suo modo discurret. Verum tom. 1 Bibliothecæ Labbeanæ recitatur *Vita B. Adalberonis* Metensis episcopi, a monacho anonymo eique cœvo scripta, qui hæc de illa Synodo narrat, quæ, quia tom. ix Concil. non memorantur, hic referenda duxi : « Dominus Henricus rex », inquit anonymus, « qui Tertio Ottoni divo imperatori, ad regnandum quidem, necdum autem ad imperandum in tota Germania quæ citra Rhenum est, et in Lotharii regno quod eis Rhenum est successerat, colloquium Synodumque concevit. Ubi omnes pæne regni sui summos sacerdotes coadunans, et ex diversis diversa disputans, inter disputandum ipsos ejusdem sacerdotes acerrime congregit, cur videlicet in suis diœcesibus et diœcesans, ea quæ Synodali ac per hoc spirituali falce secanda erant non rescerent, ac gladio Spiritus sancti putrida et male sana a membris fidelium abscindere supersederent. Mirantibus omnibus quid sibi verba regis tam districtissima vellent quove tenderent, rex admiratione eos absolvere curavit, quidve prætenderet palam fecit.

2. *Celebrata ob nuptias in gradu prohibito patas.* — « Inter multa, inquit, quæ in regno nostro suisque parochiis corrigenda sunt, parentes sic sibi

proxime conjugio copulantur, ut Deum non timentes et Deum non reverentes, etiam tertii loci consanguinitatem, quod nefas dictu est, ad copulam adseiscere non refugiant, et lineam quæ ad septimam usque generationem sacris canonum institutionibus illibata conservari jubetur, Judæis paganisque infeliciores, in ipsis sui exordiis abrumperere non formidant. Episcopis hinc inde sedentibus diuque silentibus, pars de quo diceretur nesciens, pars personam de qua dicebatur multum vel amans vel timens, quid dictis regalibus responderet prorsus ignorabat. Mens enim male sibi conscia, dum ea quæ non vult audire computatur, fit stupida, vox refugit, verba dilabuntur, sapienti coram positus honestius ei videre silere quam loqui. Rex quem fallere nemo poterat, quia erat homo litteris apprime imbutus, eloquentia facundissimus, ad regendum Dei timore vivacissime adstrictus, motum cordis patientiæ frenis restringens, sacræ Scripturæ exemplis eos aggredi honestius esse judicans : Ecce, inquit, ecce vos estis loca quidem sanctorum sacerdotum tenentes, et in meliori cathedra quam sedisset Moyses sedentes, utpote vices Domini possidentes, qui et boni canes et sancti arietes pro vitæ merito dici debueratis, contraria vice inversoque ordine canes multi non valentes latrare estis effecti, ipsique cæcitate mulctati dum subditis ducatum præbere cogimini, et ductor et sequens ambo in foveam præcipitami. Ecce, inquit, Conradus dux Austrasiorum consanguinitate nobis,

et quicumque in tota patria nobiliores sunt cunctis affinitate conjunctus, uxorem duxit sic sibi propinquam, sic proximam, ut sicut timemus, non modo ipsi, verumetiam omni patriæ offensa Deicitissime, et ut dicitur, pro foris adesse videatur. Parumque minus crimen malos tacentibus judicatur, quam ei qui idem scelus audacter et sine peccati æstimatione perpetrare cernitur.

3. *In particulari propter nuptias Conradi Austrasiorum ducis et Mathildæ.* — « Domnus Adelbero, Metensium venerabilis præsul, sanguinitate et affinitate regi adsidenti, et cunctis qui ex magni Henrici (Aucupis dicti, Germaniæ regis) linea descenderant apprime conjunctus, huic sacræ Synodo intersedebatur; et ut erat cunctis consacerdotibus nobilior excelsiorque, sic nobiliori celsiorque sella inter suos proeminebat. Hic regis objurgationem ultra ferre non valens, et tacere amplius inhonestum judicans: Interim, inquit, ætatis sane titulis et scientiæ prærogativa locum quidem loquendi cum fratribus nostris dantes, et honorem canis senectutisque divino præcepto exhibentes, quo dicitur, coram cano capite consurgas, quia majestatis vestræ potentiam, domine mi rex, ad dedecus nostri Ordinis objurgationi et invectioni plus plusque videmus verba augere, tacere ultra vere falemur; et quæ recta sunt non dicere, non solum stultitiam, sed quod majus est magnæ verecundiæ deputamus. Domnus Otto dux, pater istius venerabilis Conradi ducis, nobis considens, natus ex filia magni Ottonis est, cujus soror Girbergia dedit filiam suam Conrado Burgundionum regi. Ex Conradi autem filia nata est domina Mathildis, hujus Conradi assidentis uxor. Hoc ergo Genealogiæ ordine quia fratres sororque in supputationem non admittuntur, consanguinitas horum non plusquam secundo loco elongari prævalet ». Conradus itaque dux Austrasiorum, cujus occasione hæc Synodus congregata, filius fuit Ottonis, hic vero Conradi Lotharingiæ ducis, qui *Liutgardam*, filiam Ottonis M. ex Editha priori conjuge, sibi matrimonio junxerat. Witichindus enim in fine lib. 2, de Edithæ reginæ morte loquens, ait: « Reliquit filium nomine Ludolfum, filiam quoque, Liutgardam nomine, quæ nupsit Chuonrado duci », nempe Lotharingiæ, de quo suo loco egimus. *Gerberga* vero, Ottonis M. soror, Ludovico Transmarino Francorum regi nupsit; ex quo matrimonio prognata *Mathildis*, conjugio copulata cum *Conrado*, Burgundiæ Transjuraniæ rege. Conradus ex Mathilde filias quatuor suscepit, scilicet Gisela, Gerbergam, Bertam et Mathildem, et ex *Gerberga* seu *Girberga*, Herimanni ducis Alemanniæ uxore, progenita *Mathildis*, Conradi Austrasiorum seu Carentanorum ducis uxor, de cujus matrimonio hic agitur. Hermannus Contractus in auctiori Chronico, ubi Conradum Carentanorum ducem seu Austrasiorum semper appellat, ad annum MXII mortem ejus recitat, atque fratrem fuisse Gregorii V papæ, et patrem alterius Conradi, qui cum Conrado Salico ejus patruele pro

Germaniæ rege propositus est. Porro ex laudatis Adalberonis verbis in hac Synodo prolatis, detegitur error Blondelli in *Pleniori Assertionem Genealogiæ Francicæ*, pag 35 et seq., ac aliorum qui *Ottomem* Francorum ducem filium faciunt *Ludolfi* primogeniti Ottonis Magni; cum tamen non ex Ludolfo, sed ex Liutgarda ejus sorore natus fuerit, ut magis infra videbitur. Hæc enim difficultas nondum hactenus soluta fuit, et utraque opinio suos habet sectatores.

4. *Plures episcopi illicitis Conradi nuptiis favent.* — Pergit anonymus: « Hæc beato viro retextente, tantæ iræ tantæque simultates in ipsa Synodo exsurgere cœpere, ut nisi esset ea nobilitas, qua cælo, terra marique, ultraque inclitus effulgebat Conradus dux, de quo res agebatur, et quicumque suæ parlis erant, neque Deum, neque majestatem regiam reverentes, neque sacerdotibus, quorum maxima et honestissima multitudo præsens aderat, aliquid honoris exhibentes, arma furoremque corripuissent, et ad insaniam exsatiandum quidquid mali manus roburque inferre posset, non omisissent. Aderat huic magis seditioni quam Synodo, dominus Theodoricus, frater quidem hujus domni nostri Adalberonis Pontificis, dux eorum qui cis citraque Mosam Mosellamque resident, et hæc quæ agebantur quæque juste respondebantur sua auctoritate firmabat alque corroborebat, nuptiasque illicitas cum reliquis ducibus comitibusque, et quod majus est, sacerdotibus Deo et rectitudini ac regiæ justitiæ faventibus damnans, et humanas iras non formidans, æquitatis lance, quæ Dei erant liberrime decernebat. Aderant etiam in hac venerabili Synodo primi et præcipui sacerdotes, Willigisus Moguntinus præsul, Heribertus Coloniensis itidem præsul, Wormacensis, etc. Argentensis, Walterus Spirensis, Notgerus Leodiensis, Hezel Wiziburgensis, Haimo Viridunensis, Bertaldus Leucensis, aliique quamplures, non solum ex Lotharii regno, verum ex omni Germania, quorum pars favore, pars timore nobilis personæ hinc inde agitati, hinc inde defluentes, pauci admodum, at ipsi inter suos præcipui Deo dilectissimi, Adelberoni et dictis ejus justissimis testimonium veritatis exhibentes, egerunt ut inter verum falsumque dissidii et discordiæ non modica disceptatio fieret, quam etiam ipse rex omnino sedare non potuit. Verum nisi esset domni et Pontificis nostri Adelberonis incomparabilis nobilitas, furor cæcus et insania misera arma etiam telaque corripuisset, et ad homicidium usque iræ commotione pertinere contigisset.

5. *Adalberonis episc. Metensis magnanimitas.* — « Hæc igitur simultatione, bis odiis infestissimis discessum est, et unusquisque ad propria redire festinabat. Sed domnus Pontifex, dum ex patria propria recedens, ad regale colloquium perrexerat, nihil horum metuens, nihil horum æstimans, quia erat omnium sui temporis mitissimus atque pacificus, non multa militari manu, sed clericorum

et honestissimorum laicorum dulcissimo comitatu nsus est, et propter id in redeundo, verens ne forte in via hostis insidias pateretur, abstinere parum quid declinare dignum duxit, et cedere magis ad horam, quam vesaniæ furentis principis locum cædis aut alicujus alterius malignitatis dare voluit. Dei autem omnipotentis et Christi ejus ineffabilis pietas et æterna clementia aliter quam dominus Pontifex crediderat, rei eventum miserando disposuit et disponendo præordinavit, dum spiritum furoris et malignitatis, dum vim latrantis et turbulenti vertigine in eum pavorem in eumque timorem commutavit, ut eo impetu eaque virtute qua Dei servum ante persequi moliebatur, nunc fugere ac retro ire viribus quibus poterat aggrediretur, ac magis capi timeret quam corpore elaboraret. Duabus igitur diebus fugæ fidem committens, donec in tuto se esse credidit, semper se a domno Pontifice et fratre ejus duce Theoderico insequi existimabat memoratus Conradus; nostri vero nihil aliud quam patriam repetere, et ad id summa festinatione conabantur: et quia et tempus poscebat, præter pacem et ea quæ pacis sunt videlicet metere, charis domesticis utilia administrare». Ita auctor ille anonymus, quod nullus ante eum nos docuerat. Gestorum in hac *Tremoniensi* Synodo narratio in proximam Conciliorum editionem inserenda erit. Antequam Vita beati *Adalberonis* Metensis episcopi e tenebris ferueretur, hujus Synodi causa ignota erat.

6. *Moritur B. Adalbero episc. Metensis.* — *Adalbero*, cujus eximiae virtutes in ejus Vita fuse referuntur, sub hujus anni finem ad superos evolavit. Scribit enim laudatus anonymus: «Suscepit episcopale officium anno ab Incarn. Domini

nostri Jesu Christi *DCCLXXXIV*, XVII kal. Novembris. Ordinatus est eodem anno V kal. Januar. Transit ex hac luce ad beatam vitam et veram lucem anno Dominicæ Incarnat. millesimo quinto, Indictione tertia (a Natali nempe Christi deducta), regnante Henrico rege, anno regni sui VI». Verum loco VI, legendum IV, ut manifestum est. In principio ejusdem Vitæ dicitur, *Adalberonem* decessisse *XIX kalendas Januarii*. Menrissius in Historia episcoporum Metensium, cum laudatam Vitam non vidisset, initium et finem episcopatus *Adalberonis* detegere non potuit, atque mortem ejus in Necrologio Ecclesiæ Cathedralis inscribi ad diem XIV mensis Decemb., in Codicibus vero Mss. ad diem XV ejusdem mensis. Sed ex his diebus alter ad mortem, alter ad sepulturam referendus, juxta regulam a nobis toties inculcatam. Quid post *Adalberonis* hujus nominis II mortem contigerit, summarie refert *Sigebertus* ad annum MXX: «Henricus imperator Metis urbem obsidet propter *Deodericum* fratrem uxoris suæ (nempe sanctæ *Cunigundæ*) contra se rebellantem, qui episcopatum ipsius urbis usurpaverat. Dux enim *Mosellanorum* *Deodericus* post fratrem suum *Adalberonem*, dato *Metensium* episcopatu filio suo adhuc puero (de consensu nempe ejusdem *Henrici* regis, a *Sigeberto* imperatoris nominati) tutorem ei substituit ipsum *Deodericum*, qui puero urbe excluso, et episcopatu usurpato, ipsum etiam *Deodericum* ducem (nempe *Mosellanorum*) bello capit. Urbe ergo per obsidionem desolata, tandem pax convenit». Puero illo demortuo, *Deodericus*, hujus nominis II, pacifice Ecclesiam Metensem rexit, inter celebres hujus Ecclesiæ præsules connumeratus.

JOANNIS XIX ANNUS 4. — CHRISTI 1006.

1. *Synodus Francofordiensis in qua Bambergensis cathedra erigitur.* — Anno Christi Redemptoris millesimo sexto, Indictione quarta, celebratur in Germania Synodus Francofordiensis, in qua inter alia ibi tractatum est de Ecclesia *Bambergensis* erigenda in Cathedram episcopalem. Agit de ea pluribus *Ditmarus*¹, et refert inter alia illud

de Henrico rege admiratione et commendatione dignum, nimirum, quod cum allocuturus esset episcopos, antea se humi prosterneret, nec elevarer se, nisi qui Synodo præesset archiepiscopus eum suis manibus elevarer. Cur autem eam civitatem in episcopatum erigere concupierit, hanc affert idem *Ditmarus* rationem: «Pacificatis tunc partibus his, generale Concilium in Francofort a rege ponitur, et hoc ab omnibus Cisalpinis antistitibus

¹ Ditm. l. VI.

visitatur; causam vero præcedentem. lector, auri-
bus accipe. Rex a puero quamdam suimet civita-
tem Bavenberg nomine in Orientali Francia sitam,
unice dilectam præ cæteris excoluit, et uxore
ducta, eandem in dotem dedit. Postquam au-
tem ad regni curam divina miseratione promotus,
semper tacita mente ibidem episcopatum con-
struere gestis, etc.» Agit de Ecclesia ibidem ædi-
ficata, deque Henrico Wirceburgensis Ecclesiæ
episcopo, qui quod nollet consentire in unione
facienda unius parochiæ suæ cum Ecclesia Bam-
bergensi, nisi ipse fieret archiepiscopus, ad Syno-
dum venire noluit. At quomodo petitionem suam
ipso exordio rex, considentibus episcopis, patefe-
cerit, ab eodem Ditmaro qui præcens erat sic
accipe:

2. « Considentibus ibidem ordine archiepis-
copis cum omnibus suimet suffragensis (suffraga-
neis), rex humotenus prosternitur, et a Willegiso
antistite Moguntino, in cujus diœcesi Synodus
habebatur, elevatus, cunctis præsentibus talia
fatur: Ob recompensationem futuram Christum
hæredem elegi, quia in sobole acquirenda nulla
spes remanet mihi. Et quod præcipuum habui,
meipsum cum modo acquisitis seu acquirendis, in
sacrificium Patri ingenito jamdudum secreto men-
tis obtuli, episcopatum in Bavenberga cum licentia
antistitis mei facere hactenus concupivi, et hodie
justum hoc perficere volo desiderium. Ob hoc
serenissimam vestrimet interpello pietatem, ne
absentia ejus, qui per me voluit obtinere quod
mihi non licuit huic concedere, propositum volun-
tatis meæ queat impedire, cum in baculo ejus
mutuæ confirmationis signo clarescat, hunc non
propter Dominum, sed ob dignitatem nullatenus
adipiscendæ dolorem fugisse. Moveat omnium
corda præsentium, quod per ambitionem suam
sanctæ matris Ecclesiæ augmentum annullare cum
nugigerula legatione præsumpsit. Ad hæc firmiter
constituenda, contectalis meæ præsentia et unici
fratris et cohæredis mei larga benignitas aspirat,
et sibi placita adimptione his me eadem resti-
tuere, utique pro certo sciat. Si quando autem
episcopus venire, et promissa dignatur suscipere,
paratam me ad omne quod vobis bonum videtur
proculdubio inveniet.

3. « Finitis talibus alloquiis, Bernigerus anti-
stitis Henrici Wirceburgensis capellanus surrexit:
propter timorem regis seniore suum huc non
venisse, et detrimentum Ecclesiæ sibi a Domino
commissæ in aliquo fieri nunquam laudasse tes-
tatur, et obsecrat cunctos præsentibus per Christi
amorem, ne talia fieri, absente eo, futurum sibi in
exemplum paterentur. Privilegia ejusdem ibi alta
voce recitantur. Inter hæc quotiens rex anxiam
judicium sententiam nutare perspexit, totiens pro-
stratus humiliatur.

« Tandem archiantistiti Willegiso, quid de his
faciendum foret judicio perscrutanti, Tagmo pri-
mus respondit, hæc tunc secundum regis eloquium

legaliter fieri posse. Cunctis præsentibus ejus ser-
monem tunc affirmantibus et subscribentibus,
Eberardo tunc cancellario cura pastoralis a rege
committitur, et hic a præfato archipræsule eodem
die consecratur. Post hæc autem Henricus antistes,
auxilio confratris Heriberti archiepiscopi Colonien-
sis, regis gratiam et adimptionem sibi placitam
acquisivit». Hucusque de Actis ibi in Synodo:
reliqua desunt. Subjicit autem his Ditmarus de sua
electione in episcopatum Merseburgensem, deque
fame valida quæ tunc Germaniam affligebat.
Porro de novo episcopatu Bambergæ erecto Sige-
bertus agit anno millesimo quarto, Hermannus
anno millesimo septimo, Marianus Scotus hoc ipso
anno; quod et verius esse, quæ scribuntur a Dit-
maro tunc præsentibus manifestant.

4. *Fames et pestis.* — Quod autem spectat ad
famem hoc anno, ut idem testatur, Germaniam
infestantem, de eadem agit hoc anno Sigebertus,
quam una cum peste universum orbem afflixisse
testatur. Nam ait: « Fames et mortalitas tam gra-
viter per totum orbem invaluit, ut sepelientium
tædio, vivi adhuc spiritum trahentes obruerentur
cum mortuis». Quo tempore accidisse videntur
quæ de S. Odilone Cluniacensi abbate Petrus Da-
miani in ipsius Vita sic narrat¹: « In erogandis
præterea eleemosynis ita largus erat, ut nonnulli,
dum eum omnia dispergentem sine cunctatione
conspicerent, non dispensatorem, sed prodigum
judicarent; præsertim quodam tempore, dum
fames valida Aquitanie fines vehementer afflige-
ret, ac plurimas Galliarum provincias pestilenter
arctaret, exhaustis jam in pauperum usus ærariis,
et horreis quorumcumque proventuum non me-
diocriter profligatis, mox etiam plurima sacra vasa
confregit, insignia Ecclesiæ ornamenta distraxit;
coronæ quoque, quam sibi imperator Henricus ob
sui memoriam destinaverat, non pepercit. Ut igitur
tam acerbæ famis, in quibus valuit, tempera-
ret inopiam, quidquid hinc inde corrådere potuit
facultatum, in sustentationes et alimenta tradidit
egenorum. Quadam sane die, dum per publicum
pius equitator incedit, duos in itinere pueros fame
peremptos reperit. Mox equo desiliens, laneam,
qua indutus erat ad carnem, subduxit sibi interu-
lam, eaque prout velaminis quantitas permittebat,
utrumque cadaver obvolvens, exhibet mortuis
sepulturam. Nam et vespillones mercede conduxit,
et funeris usque ad tumulum prosecutus exequiis,
defunctis fratribus debitum humanæ pietatis exsol-
vit». Hæc de S. Odilone Petrus hoc tempore.

5. *S. Elphegus episcopus Cantuariensis Ro-
mam venit, pallium accipit.* — Eodem anno S. El-
phegus translatus in Cantuariensem Ecclesiam ex
Wintoniensi, Romam se contulit ad Joannem pa-
pam, ab eo pallium accepturus. Hæc Osbertus in Vita
ipsius, et Willelmus Malmesburiensis. Quæ autem
ei in itinere contigerint, quibus ejus sanctitas est de-

¹ Apud Sor. die 1 Jan.

clarata, ab eodem Osberto sic accipe¹: « Anno autem Domini millesimo sexto, ab adventu Anglorum in Britanniam quingentesimo septuagesimo octavo, anno suæ ætatis quinquagesimo secundo, Elphegus archiepiscopus Cantuariensis effectus est. Cumque iter versus Romam pro pallio habendo arriperet et quoddam oppidum hospitandi gratia intraret, oppidiani hominem incognitum videntes, et avaritiæ suæ consulentes, in domum irruunt, res ejus diripiunt, eumque omni suppellectili privatum verbis et verberibus exire compellunt. At ille injurias suas leniter ferens, suorum vero mediocriter dolens, via qua venit regreditur. Needum ab oppido longe recesserat, et ecce horrendæ voces mœnia corripuiunt, quæ civibus et ædificiis celerem mi-

nantur ruinam. Nec mora, vorax flamma oppidum consumere cœpit; eumque ignis vehementer excreceret, nec evadendi spes aliqua fuisset, virum sanctum adeunt, fatentur delictum, veniam petunt. Mox sanctus ille compatiens, preces ad Dominum fudit, et ignis molestia protinus extincta cessavit. Restitutis ergo episcopo rebus suis, acceptoque a papa pallio, domum prospere regreditur ». Ilucque Osbertus. Addit Willelmus¹: « Romæ cum esset Elphegus, excessum successoris sui, nemine (ut alias dictum est) asserente vidit et enuntiavit ». Erat iste Kenulphus Burgensis abbas, qui episcopatum Wentanum, quem tenuerat Elphegus, pessima nundinatione malisque artibus fuerat consecutus.

¹ Osbert. in Vita S. Elphégi apud Sur. tom. II. die XIX Apr.

¹ Willel. de gest. Angl. l. II.

Anno periodi Græco-Romanæ 6499. — Anno Æræ Hispan. 1044. — Anno Hegiræ 397, inchoato die 27 Sept., Fer. 6. — Jesu Christi 1006.

— Joannis XVIII papæ 4. — Henrici II reg. 5. Basil. et Const. imp. 31.

1. *Bamberga fit civitas episcopalis.* — A num. 1 ad 4. Henricus Germaniæ rex *Bambergam* Franconiæ oppidum a puero dilexerat, et uxori in dotem assignarat. Cum itaque *in sobole acquirenda nulla spes* remaneret ei, ut ipsemet in Synodo Francofurdiensi dixit, episcopatum in eadem civitate instituit, litterasque obtinuit a Joanne papa, tom. IX Concil. recitatas, in quarum fine legitur: « Scriptum per manus Petri notarii et scriniarii S. R. E. in mense Junio, Indict. V, id est, anno Christi MVI. Quod Privilegium magnus episcoporum numerus in Synodo Franconofurt habita unanimiter laudarunt, et suis subscriptionibus corroborarunt, ut in fine laudati rescripti Apostolici legere est. Quare Concilium illud non hoc anno, ut Baronius putavit, sed sequenti congregatum, et quidem die prima Novembris, quo *Joannis papæ* litteræ ab omnibus subscriptæ. In Tabulario enim Ecclesiæ Bambergensis, ut tom IX Concil. pag. 784 videre est, legitur: « Anno Dominicæ Incarnat. MVI, Indict. V, kal. Novembris, regnante piissimo ac serenissimo Henrico Secundo, anno regni sui VI, pro statu et augmento sanctæ matris Ecclesiæ, in loco Francofurt dicto, magna Synodus habita est et celebrata ». Quare tam Hermannus Contractus ex editione Canisiana, quam chronographus Wirzburgensis, a Baluzio tom. I Miscell. editus, hanc institutionem cum anno sequenti accurate illiga-

runt. Præfata autem Indictio V, vel a Natali Christi, vel a kalendis Januarii inchoata.

2. *Moritur S. Fulcran. episc. Lodovensis.* — « Sanctus Fulcranus (Lodovensis in Gallia Narbonensi prima episcopus) migravit ad Dominum anno generationis Christi MVI, idus Febr., IV feria, VII fere diei hora transacta, lætantibus cælis pro suo concive, terris plorantibus pro amisso pastore. Mansit autem in episcopatu annis LXII et diebus IX », inquit Bernardus Guido episcopus Lodovensis, qui paulo post initium sæculi XIV eam Ecclesiam rexit, in ejus Vita a Bollandi ad diem XII Februarii recitata. Quare sanctus *Fulcranus* die quarta mensis Februarii anni MXXIV, in quam Dominica incidebat, ordinatus fuerat episcopus, et nonnisi librariorum errore cap. I ejusdem Vitæ legitur, eum Narbonæ ab *Imerico* archipræsule consecratum fuisse « pridie non. Februar. anno generationis Christi MXXIX ». Legendum enim MXXIV. Librarii sæpe V in X mutant ». Quia vero bonarum mentium est, ibi culpam timere vel agnoscere non est », inquit Guido cap. 4, remordebat Fulcranum multum conscientia sua, quod cum simpliciter quidam fabularentur coram eo de quodam præsule, « quod apostata a cultu Christianitatis et fidei, ac nequiter judaizando, grande in populo scandalum suscitasset », non insinuando, sed simpliciter loquendo, dixisset: comburi debe-

ret homo ille » ; ac non longe post audisset apostatam illum a populo combustum . « Ob hoc igitur veniens Romani, cum appropinquaret portæ civitatis, exutus proprio indumento spinisque circumdatus, in utroque latere verberari acriter ac duci verberando se fecit, publice spectante populo in Ecclesia B. Petri Apostoli », facta ibi confessione lacrymabili, et post hæc semel et iterum ob eandem causam Romam profectus est, cœpitque Dei gratia se in eo per signa ac miracula ulterius declarare.

3. *Anglia a Danis afflictæ*. — Dani iterum in Angliam ad eam deprædandam reversi sunt : « Anno sexto (post millesimum, inquit Huntindoniensis pag. 360), cum Svain (Danorum rex) vir audacissimus cum magna classe rediisset ad Sanvic ; quem semper comitabantur tres sociæ, prædatio, combustio, occisio, frenduit omnis Anglia et commota est, velut arundinetum zephiro vibrante collisum.

Quocumque autem pergebant, quæ parata erant, hilariter comedentes, cum discederent, in retributionem procurationis reddebant hospiti cædem, hospitio flammam ». Auxit miseriarum cumulum intestina discordia, cum quasi non sufficeret *Danus* ad fundendum sanguinem, *Anglus* in Anglorum jugulum arma convertit : « Dux perfidus Edricus », inquit Florilegus ad hunc Christi annum, « ducem nobilem Æthelstanum, apud Salosbesheriam, ad magnum quod præparaverat convivium invitavit : ad quod cum invitatus venisset, quarta convivii die ipsum in sylvam venatum duxit, ubi, cunctis circa venationem occupatis, quidam carnifex, nomine Codwinus, quem Eadricus antea donariis corruerat, ex insidiis subito prosi-liens, ducem Æthelstanum nefarie nimis peremit. In cuius rei ultionem, duo filii ejus jussu regis Æthelredi excæcati sunt.

JOANNIS XIX ANNUS 5. — CHRISTI 1007.

1. *Henrico regi oraculum de imperio*. — Sequitur annus Redemptoris millesimus septimus, Indictione quinta inchoatus, quo Henricus rex de futuro imperio prædictionem accipiens subobscuram, ipse mortis responsum se accepisse putans, cum impletum fuit postea vaticinium, tunc sensit quod antea non percepisset. Res gesta in Vita S. Wolfgangi, de quo superius, ita describitur¹ : « Henrico regi, antequam esset imperator, sanctus Wolfgangus apparuit dormienti. Videbatur ille sibi in Sancti Emmeranni Ecclesia esse, atque orandi causa beati Wolfgangi adire sepulchrum : ibi vero Deum et S. Wolfgangum orans, visus est sibi videre eum adstare, et hunc in modum ipsum appellare. Adspice diligenter characteres in muro, qui est apud tumulum meum, exaratos. Vidit ille, nec aliud legit quam POST SEX. Expergefactus vero, summopere incumberebat ad earum dictionum apprehendendum significationem. Primum igitur suspicatus, se post sex dies moriturum, multa largitus est pauperibus. At sex evolutis diebus, cum nihil in corpore sentiret molestiæ, ad sex menses

attinere arbitrabatur, tumque se obiturum credebatur. Sed neque tum male se valere sentiens, ad sex annos earum dictionum significationem retulit. Porro sex annis jam expletis, septimo anno a Pontifice Maximo imperator unctus est. Atque tum demum animadvertens quid sibi ea verba vellent, gratias egit Deo et beato Wolfgango, quod sibi revelare dignatus esset, ea se dignitate potiturum ». Hæc ibi.

2. *Fulbertus creatur episcopus Carnotensis, jurium et bonorum vindex acerrimus*. — Est hic item annus, quo in Galliis super candelabrum extulit Deus lucernam ardentem atque lucentem, cum virum sanctitate atque doctrina insignem Fulbertum, ex monacho monasterii S. Petri apud Carnutum, assumpsit in episcopum Ecclesiæ Carnotensis. Licet autem Demochares id factum affirmet anno salutis millesimo decimo septimo, tamen Epistola ejusdem Fulberti², quam scripsit ad Leuthericum archiepiscopum Senonensem, anno sequenti, de inventione sacrarum reliquiarum, jam proxime ipsum fuisse ab eo consecratum episcopum

¹ Vit. S. Wulf. c. 29, apud Sur. die XXXI Octob. tom. v.

² Fulb. Ep. III.

tradit. Porro eas reliquias inventas esse anno Christi millesimo octavo, Glaber affirmat¹; nosque de iis suo loco agemus. Prædicat idem Glaber² hujus temporis scriptor, Fulbertum virum sapientissimum, præsulem incomparabilem. Fuisse quidem ipsum vita sanctissimum, atque prophetiæ spiritu imbutum, testatus est Gullerinus, ex quo Vincentius Bellovacensis descripsit³. Quod enim omnium sui temporis doctorum doctissimus prædicaretur, ad illum confluere consueverunt omnes, qui eum de rebus dubiis interrogarent episcopi, atque etiam ipse Robertus rex Francorum, quod scriptæ ab eo ad diversos Epistolæ docent.

3. Hic igitur ubi est creatus episcopus, et pericula imminuentia experiri cœpisset, anceps totus quid sibi agendum esset, cedere an manere: cecinit Christo Deo hymnum, quem in Codice Vaticano inter ejusdem Fulberti Epistolas latitantem, nempe post Epistolam trigesimam octavam, hic tibi in commendationem pietatis ipsius describendum putavimus. Sic se habet:

Angele consilii magni, te consulo, Christe,
Mi factor, mea vita, salus, fiducia sola,
Da mihi consilium, et votum viresque sequeodi,
Ambiguo quid agam; quo tandem line quiescam.
Nunc vereor, temere suscepto pontificatu,
Servandis ovibus mage quam prodesse, nocere,
Atque ideo puto cedendum melioribus esse.
Nunc recolens quia non opibus, neque sanguine fretus
Conscendi cathedram pauper de sorde levatus:
Arbitror hoc a te factum, sicut tuus est mos:
Nec mutare locum, nisi significaveris, ausim,
Quamvis hoc læsæ moneat mens conscia vitæ.
Tu scis, sancte Pater, quid sit tibi gratius horum
Utiliusque mihi. Precor unde tuam pietatem,
Ut mihi digneris hoc inspirare labanti
Consilium, præsensque juves ad perficiendum.

Hæc Fulbertus, cum a suscepto munere se abdicare magis in votis haberet, sed manere Dei vocatione sibi esse videretur adstrictus.

Inter grandia mala, quæ Dei Ecclesiam infestarent, illud plane fuit quod molestius vir sanctus accepit, nimirum, quod passim sibi laici occupassent Ecclesiastica beneficia. Ad quem extirpandum alta radice jam fixum pravum usum, plurimum laboravit. Egit de his primum cum Francone episcopo Parisiensi, ad quem scribens habet hæc inter alia⁴: « Usumfructum vero altarium, quem tui antecessores laicis tradiderunt, te alendis debilibus publica voce destinare suadeo; tum ne quis illis inde fraudet aliquid, interminari, et si qui in hanc fraudem irruerunt, sicut fures sacrorum et occisores pauperum anathemate condemnari. Ne reverearis, quæso, homines innocenter offendi (offendere) propter Dominum etc. » Ad quod fortiter præstandum absque timore potentium pluribus cohortatur. Quam vero exclamaverit in eundem, cum jam creatus Parisiensis episcopus, ad eum scribens, ut beneficia laicis etiam

concederet, suaderet, accipe ex brevi Epistola ad eum reddita, quæ sic se habet¹:

5. « Venerabili Parisiorum episcopo Franconi, Fulbertus humilis sacerdos. Doleo super te, charissime, cum te a pristina virtute apostatare video. Olim apud me conquerebaris de tuo antecessore, qui sacrilega temeritate altaria laicis in beneficium dederat: nunc mihi suades, ut ego similiter faciam. O cælum! o terra! Quid clamem? aut quid tuis meritis digno modo te objurgare possim? Sed compesco nunc ferventes animi mei fluctus, donec te præsentialiter exquisitis increpationum tormentis excruciem. Vale interim ». Audisti Dei sacerdotis exæstantem zelum in remissum et timoris algore torpentem episcopum? At primaria eo verborum suorum tonitru episcopum primariæ civitatis perterruit: quid in potentissimum principem, comitem nimirum Andegavensem, ut Joannes alter, libero ore promat, audi. Extat hæc ad eum rerum Ecclesiasticarum invasorem Epistola, inter alias ad eum data².

6. « Fulbertus, Carnotensium humilis episcopus, Fulconi comiti salutem. Doleo super te, nobilis homo, cum te audio errare et periclitari. Errare dico, quia cum debeas Deum timere, sanctos honorare, Ecclesiam defendere; contemnis Deum, sanctos inhonoras, res Ecclesiæ invadis et auferis, periclitari, quoniam qui talia agunt, non habent partem in regno Dei. Propter hæc peccata monuit archiepiscopus Turonensis omnes episcopos nostros, et inter alios me pusillum ut te excommunicarem. Sed ego censui pius esse, ut te prius monerem et deprecarer, ut habeas misericordiam de anima tua, placans Deum; jam enim prope est tuus finis. Festina igitur, quæso, reconciliari Christo Salvatori nostro: quia non est salus homini nisi per ipsum. Tene in memoria verbum hoc: Qui confitendo et pœnitendo finem facit peccatis suis antequam moriatur, finem habebit in altero sæculo pœna ipsius. Et qui peccatis mortalibus pœnitendo non facit finem, pœna ipsius erit sine fine. Evigila igitur propter teipsum, sicut homo in proximo moriturus, et reconciliare Christo, ne moriaris Apostolica auctoritate damnatus. Vale, et remanda mihi velociter atque veraciter voluntatem tuam ». Hactenus ad Fulconem comitem ipse, nec frustra: nam de Fulcone isto, homine perinfecto archiepiscopo Turonensi, quod ab ipso redargueretur ob Ecclesiæ bona violenter ablata³, Glaber agens, deque eodem plura narrans, ipsum post scelera pœnitentem post tertiam professionem Hierosolymam, diem obiisse tradit. Cujus hæc sunt verba⁴: « Fulco Andegavorum comes, de quo superius quædam retulimus, ter Hierosolymam perrexerat, veniensque Melensem urbem, ibidem obiit. Cujus corpus Lucanense ad monasterium quod ipse construxerat delatum est, atque

¹ Glab. l. III. c. 6. — ² Ibid. l. IV. c. 14. — ³ Vincent. hist. l. XXV. c. 15. — ⁴ Fulb. Ep. XXII. Cod. Vat. 56.

¹ Fulb. Ep. XLII. Vat. 38. — ² Ibid. Ep. LXXXIII. Cod. Vat. 23. — ³ Glab. l. II. c. 4. — ⁴ Ibid. l. IV. c. et superi l. II. c. 4.

in eodem sepultum honorifice ». Fulberto igitur muralis jure corona debetur, qui hoc sæculo primus reperitur superasse muros Babylonicæ civitatis, cujus principes tyrannica violentia jura Ecclesiastica occupassent.

7. Accidit insuper inter hæc, ut cum idem Fulbertus, acerrimus propugnator Ecclesiæ jurium, Rudolphum comitem sacrilegum invasorem, ob necem illatam clerico suo, anathemate condemnasset, et illum pro absolutione Romam profecturum audisset, ad Joannem Pontificem has litteras daret ¹ :

« Domino sancto et universali papæ Joanni, Fulbertus Carnotensium humilis episcopus orationum fidelia. Gratias omnipotenti Deo, qui more benignitatis suæ tuam, pater, humilitatem respexit, et summo, ut decebat, dignitatis apice sublimavit. Proinde totus mundus ad te convertit oculos, teque unum omnes beatissimum prædicant. Contemplantur altitudinem tuam sancti viri et gaudent quod eis similitudine omnium virtutum alludis. Respiciunt persecutores Ecclesiæ, districtiōis tuæ baculum formidantes : suspiciunt ii qui flagellantur ab impiis et respirant, sperantes adhuc restare sibi consolationis remedium. De quorum numero sum ego, magnæ et præclaræ Ecclesiæ pusillus episcopus, qui tibi, pater, de angustiis meis querimoniam scribens, auxilium tuæ pietatis imploro.

¹ Fulb. Ep. II. in Cod. Vat. 5. ex quo aliqua sunt emendata.

8. « Est enim quidam comes malefactor, nomine Rudolphus, nimium vicinus nobis, qui res Ecclesiæ nostræ per injustam occasionem invasit, unum de clericis nostris suis manibus interfecit, duos alios captos sacramentis illigavit. Et de his omnibus appellatus in curia regis, et coram plena Ecclesia sæpe vocatus, nec propter hominem nec propter Deum ad justitiam venire dignatus, a nobis tandem excommunicatus est. Nunc vero ad Limina S. Petri contendit, tanquam ibi possit accipere de peccatis absolutionem. Unde rogamus te, dilectissime pater, cui totius Ecclesiæ cura commissa est, ut eum de sanguine atque injuria filiorum tuorum ita arguere et castigare memineris, sicut meritum esse tua providentia novit. Nec tua sanctitas injuste in communionem recipiat, quem divina auctoritas sicut ethnicum alienat. Vale, bone pastor, evigila super nos, ne per incuriam tuam grex Domini detrimentum sustineat ». Hucusque Fulbertus ad Joannem Pontificem : quæ hæc secuta sint ignoramus.

Hoc eodem anno, qui numeratur quintus ab obitu Ottonis imperatoris, moritur Ratisponæ in Bavaria sanctus Romualdus, abbas S. Emmeranni, cujus feretro Henricus supposuit humerum ad portandum, qui postea, ut dicetur, creatus est imperator. Hæc pluribus Arnolphus comes, libro posteriori miraculorum S. Emmeranni ¹.

¹ Extat tom. II. ant. lect. a Canisio collect.

Anno periodi Græco-Romanæ 6500. — Anno Æræ Hispan. 1043. — Anno Hegiræ 398, inchoato die 16 Sept., Fer. 3. — Jesu Christi 1007.

— Joannis XVIII papæ 5. — Henrici II reg. 6. Basil. et Const. imp. 32.

1. *Fulbertus fit episc. Carnotensis.* — Ad num. 2. Fulbertus, ut communiter recenter historici tradunt, hoc anno consecratus fuit episcopus Carnotensis, et quidem a Leotherico Senonensi archiep. ut ipsemet Epist. xxiii indicat : « Multum amoris atque fidelitatis tibi, pater, me debere censeo, per cujus manum a Deo benedictionem et sacram unctionem accepi : unde animus meus ita pendet ex tuo, ut quidquid te justa ratione aut contristat, aut hilarat, idem me, si resciscam, simili modo afficiat ». Factus episcopus, a docendo non destitit, scholamque habuit discipulorum undequaue confluentium frequentia pernotabilem : quamobrem Adehmannus in Epistola ad Berenga-

rium, eam vocat *Academiā*. Hujusce viri complures insignesque, tum clerici tum monachi discipuli fuisse perhibentur : imprimis *Olbertus* in Lobienſi cœnobio educatus, deinde Trecis, Parisiis et postremo Carnuti litteris imbutus, postea Burchardi episcopi Wormatiensis magister. His adde *Angelramnum* Picardum, Centulensis monasterii monachum, de quo in Chronico Centulensi lib. 4, cap. 1, dicitur « quia in discendo multum gliscebatur, recepta a patre, nomine Ingebardo, non minima reverentia digno licentia. Longe seposita scrutatus est scholarum magisteria, more scilicet prudentissimæ apīs, quæ circuit diversorum florum arbusla, ut mellis dulcore sua repleat rece-

placula. Denique multorum experientia probatum et liberalibus studiis ornatum, civitatis Carnotensæ venerabilem episcopum ac multo honore vocitandum FULBERTUM, præceptorem adeptus est atque didascalum. Ille ei monitor, hic tam morum quam litterarum fuit institutor. Gaudebat venerabilis præsul de tanti discipuli solatio, relevabatur tam idonei auditoris industria atque ingenio. Tandem igitur Grammatica, Musica atque Dialectica optime instructum Centulum remittit tyronem amicissimum, jam tunc sacerdotio ornatum, quem velut grandem thesaurum recipit pia congregatio Centulensium ». Eundem Fulbertum sub extrema episcopatus sui tempora audire *Adelmannus* clericus Leodiensis, et *Berengarius* Turonensis, multique alii per celebres: adeo ut quandiu Fulbertus vixit, nulla in Francia schola celebrior fuisse videatur quam Carnotensis, ut inquit Buleus in Hist. Universit. Parisiensis Sæc. II.

2. *Moritur Harigerus abbas Laubiensis.* — Hoc anno *Harigerus* Laubiensis abbas, postquam monasterium illud pie prudenterque per annos septemdecim rexisset, e vivis excessit: « Obiit Fulcwinus abbas », inquit continuator Chronici Laubiensis, « anno Dominicæ Incarnat. DCXc. Post hunc *Harigerus* substitutus est, cujus virtutum doles describere superfluum puto; cum apud exteros etiam, et vita et scientia clarus extiterit. Scripsit gesta Pontificum Leodiensium, etc. Congessit etiam contra Radbertum multa Catholicorum Patrum scripta de Corpore et Sanguine Domini. Obiit in senectute bona anno Incarnat. Dominicæ Mvii, pridie kalendas Novembris ». *Harigeri* Leodiensium episcoporum Historia, in sancto Remaclo finita, ab Anselmo canonico Leodiensi, illo annis quinquaginta juniore, continuata fuit. Liber vero de *Corpore et Sanguine Domini*, primum a Ludovico Cellotio ad calcem Historiæ Gottescalci sub

anonymi nomine publicatus, tandemque a Mabillonio in Præfatione ad partem II Sæc. IV Benedict. § 2, *Herigero* genuino ejus parenti certis argumentis restitutus, qui et docte explicat, qua in re versaretur controversia *Paschasium* inter et *Harigerum* exorta, ac utrumque in reali Christi corporis in Sacramento præsentia inter se convenisse, et contentionem illam in vocum pugna sitam fuisse docet. De libris ab *Harigero* seu *Herigero* editis legendus etiam Oudinus in Supplem. de Script. Ecclesiast.

3. *Angli Danorum tributarii fiunt.* — « Anno millesimo septimo », inquit Hovedenus part. 2 Annal. pag. 430, « rex Anglorum Egelredus primatum suorum consilio nuntios ad Danos legans, iis mandavit, quod sumptus et tributum eo tenore illis dare vellet, ut a rapinis desisterent, et pacem cum eo firmam tenerent; cujus postulationi consenserunt, et ex eo tempore de tota Anglia sumptus illis dabatur, et tributum, quod erat 36000 librarum, illis persolvebatur. Quo etiam anno rex Egelredus Edricum quemdam (de quo anno superiori locuti sumus) cognomento Streone, Merciorum constituit ducem, qui licet regis filiam Edgitam in conjugium habuisset, tamen multimoda versutia perfidus, et patriæ proditor et publicus hostis ut in sequentibus apparebit, frequenter expertus, dignum quandoque sub rege Cnuto fraudum suarum finem sortitus est ». His accedit Malmesburiensis lib. 2 de Gest. Reg. Angl. cap. 10: « Rex interea strenuus et pulchre ad dormiendum factus, tanta negotia postponens oscitabatur, et exagitabant illum umbræ fraternæ (nempe sancti Eduardi ab eo trucidati) diras exigentes inferias. Quis possit enumerare quoties exercitum congregaverit? quoties naves fabricari jusserit? quoties duces undecumque vocaverit, et nihil horum unquam proccesserit? »

1. *Reliquiæ SS. pluribus in locis inventæ: de quo et de aliis Fulberti Epistolæ.* — Annus salutis octavus post millesimum incipit Indictione sexta, quo pluribus in locis contigit sacras inveniri reliquias. Testatur id rerum sui temporis scriptor

Glaber, qui ait ¹: « Candidato, ut diximus, innovatis Ecclesiarum Basilicis universo mundo, subsequenti tempore, id est, anno octavo infra prædi-

¹ Glab. I. III. c. 6.

etum millesimum humanati Salvatoris annum, revelata sunt diversorum argumentorum indiciis, quorsum diu latuerant, plurimorum sanctorum pignora. Nam veluti quoddam resurrectionis decoramen præstolantes, Dei nulu fidelium obtutibus patuere, quorum etiam mentibus plurimum intulere solamen. Hæc enim revelatio primitus in Senonica Galliarum urbe, apud Ecclesiam beati martyris Stephani dignoscitur cœpisse, cui etiam præeratarchipræsul Leuthericus, a quo scilicet admiranda relatu reperta sunt ibi antiquorum sacrorum insignia. Quippe inter cætera perplura quæ latebant, dicitur virgæ Moysi invenisse partem. Ad cujus rei famam convenerunt quique fideles, non solum ex Gallicanis provinciis, verum etiam ex universa pæne Italia ac de transmariis regionibus: simulque ægrotantes non pauci sanctorum interventu exinde redierunt incolumes». Hæc de his Glaber.

Extat de his Fulberti episcopi Carnotensis Epistola ad eundem archiepiscopum Senonensem, quæ sic se habet ¹:

2. «Dilectissimo patri et archiepiscopo suo Leuthero Fulbertus, Dei gratia Carnotensium episcopus, orationis suffragium. Multum amoris atque fidelitatis tibi, pater, me debere censeo, per cujus manum a Deo benedictionem et sacram unctionem accepi. Unde animus meus ita pendet ex tuo, ut quidquid te justa ratione aut contristat aut hilarat, idem me, si resciscam, simili modo afficiat. Congratulor itaque tibi super inventis sacris, et Deo, qui ea tempore tuo revelare maluit, pronus gratias ago». Subjicit de quibusdam adversis, quibus tristatus fuerat. Extant ejusdem Fulberti ad ipsum aliæ plures Epistolæ, sed illa brevior respersa salibus, qua eum non incedentem recto pede redarguit. Sic se habet ²:

3. «Charissimo patri et archiepiscopo suo Leuthero Fulbertus episcopus. Proreta navis regiæ cautus et circumspectus esto: terreni spiritus insolenter assibulant: fluctus hujus sæculi intumescunt: promuntoria mundanæ potestatis pericula minantur et mortes: more piratarum insidiantur hypocritæ. Inter hæc omnia tendendum ad portum cælestis patriæ. Noli ergo tute ipse tibi bithalassum dubietatis ac duplicitatis in corde tuo miscere: simplex est enim via Domini, et qui ambulat simpliciter, ambulat confidenter. Si de via legis divinæ qualibet occasione seductus aberraveris, in tartaream charybdim naufragus demergeris. Regat te manus valida omnipotentis Domini. Vale». Hic ille Leuthericus, quem repressum a Roberto rege ob pravas ab eo cœptas disseminari opiniones, dictum est superius. Cæterum consuevisse ipsum Leuthericum consulere Fulbertum, plures ejusdem Fulberti Epistolæ docent, quibus ad ejus consultationes ipse respondit: ut appareat, non tam ex ingenii acumine, quam ex vana præsumptione

ipsum aliquando de Catholica fide male sensisse.

4. *S. Brunonis episcopi et sociorum martyrium in Russia*. — Hoc eodem anno S. Bruno apostolus Prussorum martyrium est consecutus. Quomodo autem ista se habuerint, Ditmarus consanguineus ejus et condiscipulus ita describit ¹: «Fuit quidam, Bruno nomine, contemporalis et conscholasticus meus, ex genere clarissimo editus, sed divina miseratione, præ cæteris parentibus inter filios Domini electus. Illic ab Ida venerabili matre sua unice dilectus, magisterio Giddonis philosophi traditur, et omne quod habere debuit, cum abundantia suggeritur. Hujus pater erat Bruno, senior egregius et per cuncta laudabilis amicus, mihi consanguinitate, et omnibus erat proximus familiaritate. Filius autem ejus et æquivocus cum mane ad scholam ire debuisset, antequam ab hospitio exiret, veniam petiit, et laudantibus nobis, in oratione his fuit: otio negotium præposuit, et sic fructificans ad maturitatem pervenit. A Tertio desideratur Ottone et suscipitur, quem non longe post deferens, solitariam quæsivit vitam.

5. «Is vero post mortem gloriosissimi imperatoris, regnante tunc Secundo, Domini gratia, Henrico, ad Merseburg veniens, benedictionem cum licentia domini papæ episcopalem ab eo petiit, et ejus jussione ab archiepiscopo Tagmone consecrationem, et quod ipse detulit huc, pallium ibidem suscepit. Dehinc ob lucrum animæ laborem subiit diversæ ac grandis viæ, castigans corpus inedia et crucians vigilia. Multa a Bolizlavo cæterisque divitibus bona suscepit, quæ mox Ecclesiis ac familiaribus suis et pauperibus, nihil sibi retinendo divisit. In duodecimo conversionis ac inclytæ conversationis suæ anno ad Prussiam pergens, steriles hos agros semine divino studuit fœcundare; sed spinis pullulantibus, horrida non potuit facile emollire. Tunc in confinio prædictæ regionis et Russiæ cum prædicaret, primo ab incolis prohibetur, et plus evangelizans, capitur, deindeque amore Christi qui Ecclesiæ caput est, decimo sexto kal. Martii, mitis ut agnus decollatur cum suis decem et octo. Corpora tot martyrum insepulta jacuerunt, quoad Bolizlavus id comperiens, eadem mercatur, ac domui suæ futurum acquisivit solatium. Facta sunt autem hæc in tempore serenissimi regis Henrici, quem Dominus omnipotens triumpho tanti præsulis honorificavit, et ut multum spero, salvavit. Pater autem prædicti antistitis longe post infirmatus (ut ipse mihi narravit) præcepto filii monachicum suscepit habitum, et XIV kal. Novembris in pace quievit». Illicque Ditmarus. Marianus Scotus, qui hoc sæculo vixit, ilidem affirmat, hoc anno eum esse martyrio coronatum, passum nimirum abscissionem manuum ac pedum, postremo capite plexum. Sigebertus vero ponit anno sequenti martyrium ejus, sed Urspergensis Mariano consentit. Agitur de eodem martyre in

¹ Fulbert. Ep. III. — ² Ep. VII.

¹ Ditm. I. VI.

Romano Martyrologio decima quinta Octob. (puto tempore quo facta est translatio) hoc elogio : « In Prussia, sancti Brunonis episcopi Ruthenorum et martyris, qui Evangelium in ea regione prædicans, ab impiis tentus, manibus pedibusque præcisis, capite truncatus est ». Hæc ibi : ut nulla sit dubitatio, hunc eundem esse cum illo quem in Prussia passum vidimus. Porro usurpatam vocem Prussiam pro Russia frequenter invenimus.

6. *S. Bonifacii prædicatio et martyrium ibidem.* — Non longe ab hoc tempore et forsitan eodem anno contigisse apparet martyrium S. Bonifacii, qui et ipse Russis Evangelium prædicavit, accepto, sicut Bruno, apostolatu a Romano Pontifice. Hoc inveniet, qui res gestas S. Romualdi scriptas a Petro Damiani perlegerit, tempusque observaverit, quo ad eum nuntium de ipsius martyrio est perlalum. Hujus apostolatus exordia cum scripserimus ex Petro Damiani, tomo superiori, hic jam quæ reliqua sunt usque ad consummatum martyrium prosequamur ex eodem auctore, qui ait¹ : « Cumque ad regem Russorum vir venerabilis pervenisset, et constanti animo prædicationi vehementer insisteret, videns ejus rex squalidis vestimentis indutum ac nudis pedibus incedentem, opinatus est, quia vir sanctus talia non religionis causa perferret, sed ideirco potius ut pecunias congregaret. Promisit igitur ei, ut si ab ista vanitate recederet, ipse paupertatem ejus largissima divitiarum liberalitate ditaret. Verum Bonifacius mox ad hospitium sine mora revertitur, pretiosis-
simis pontificalibus ornamentis decenter induitur, et sic ad regis palatium denuo præsentatur. Rex autem, videns eum tam decoris vestibus adornatum, ait : Nunc scimus, quia te ad vanam doctrinam non paupertatis inopia, sed veritatis impulit ignorantia. Verumtamen si vis vera credi quæ asseris, erigantur duæ excelsæ lignorum catastæ brevissimo a se interstitio separatæ, et igne supposito, cum vaporatæ fuerint, ita ut utriusque struis unus esse ignis videatur, tu transi per medium. Quo si læsus ex aliqua parte fueris, ipsis te penitus consumendum ignibus trademus; sin autem (quod credi non potest) sanus evaseris, omnes nos Deo tuo absque difficultate credemus. Cumque hoc fœdus non solum Bonifacio, sed et cunctis qui aderant gentibus placuisset : Bonifacius ita vestitus ut missarum solemnia celebraturus, prius cum sanctificata aqua et incenso thure undique perlustrans ignem, dein stridentes flammarum globos ingressus, ita exivit illæsus, ut nec minimus capitis ejus capillus videretur exustus. Tunc rex et cæteri qui huic spectaculo interfuerant, catervatim se ad pedes beati viri projiciunt, indulgentiam lacrymabiliter petunt, et baptizari se instantissima supplicatione deposcunt. Cœpit itaque tanta gentium multitudo ad baptismum confluere, ut vir sanctus ad spatiosum quemdam locum pergeret, et in ipsa

aquarum abundantia populum baptizaret. Decevit autem rex, ut regnum relinquens filio, ipse quoadiu viveret a Bonifacio nullatenus separaretur.

7. « Frater autem regis cum ipso pariter habitans, dum nollet credere, absente Bonifacio, ab ipso rege interemptus est. Alius vero frater, qui jam a rege erat cohabitatione divisus, cum ad eum vir venerabilis venit, audire verbum ejus noluit : sed de conversione fratris nimia adversus eum ira succensus, continuo comprehendit. Deinde timens ne si vivum teneret, rex eum de manu ejus eriperet, in sua præsentia, circumstante non parva hominum multitudine, decollari præcepit. Statim vero et ipse cæcatus est, et tantus eum cum omnibus qui adstant, stupor oppressit, ut nec loqui, nec audire, nec aliquod humanitatis officium agere aliquatenus possent, sed cuncti veluti lapides, rigidi et immobiles permanerent. Rex autem hoc audiens, nimio dolore perculsus, omnino deliberat non solum fratrem occidere, sed et cunctos qui tanti reatus fautores extiterant, gladiis trucidare. Sed cum illuc protinus advenisset, et corpore martyris adhuc in medio posito, fratrem simul cum reliquis hominibus sine sensu et motu stupefactos adstare conspiceret, hoc sibi cum suis omnibus placuit, ut prius pro eis oratio fieret, si forsitan illis divina misericordia sensum quem amiserant reformaret; deinde si acquiescerent credere, indulto crimine viverent : sin autem, omnes ultoribus gladiis interirent. Cum igitur et ab ipso rege, et a cæteris Christianis diutius esset oratum, non solum prior sensus stupefactis hominibus redditur, sed insuper consilium flagitandæ veræ salutis immittitur. Nam continuo pœnitentiam sui criminis flebiliter expetunt, baptismi sacramentum magna alacritate suscipiunt, super corpus quoque beatissimi martyris Ecclesiam construunt ». Hæc Petrus Damiani (ut ipse testatur) ex multis pauca. Porro dies natalis ejus celebratur a Romana Ecclesia die decima nona Junii.

8. *S. Romualdus martyrii cupidissimus.* — Quomodo autem S. Romualdus, percepto nuntio de sancti Bonifacii martyrio, æmulatus excellentissimum Dei donum, ipse cum nonnullis ex suis accepta licentia a Romano Pontifice, ad prædicandum verbum Dei Gentibus iter capessit, sed morbo impeditus reverti coactus est, idem Petrus Damiani sic narrat¹ : « Interea Romualdus audiens quia beatissimus vir Bonifacius martyrium suscepisset, nimio desiderii igne succensus, ut pro Christo sanguinem funderet, in Hungariam mox ire disposuit. Interim tamen dum in ipsa intentione persisteret, brevi tempore tria constituit monasteria, unum videlicet in Valledecastro, ubi nunc sanctissimum ejus corpus reconditum est, aliud prope Isium fluvium, tertium juxta oppidum condidit Esculanum. Deinde licentia ab Apostolica Sede suscepta, et duobus e suis discipulis in archiepiscopos consecratis, cum viginti quatuor fratribus

¹ Petr. Dam. in Vita Romualdi c. 29 et 30.

¹ Petr. Dam. in Romual. c. 45.

iter arripuit. Tantus enim ardor moriendi pro proximo in omnibus æstuabat, quod vir sanctus ad tale negotium cum paucis ire difficile poterat. Euntibus ergo cum jam ipsis Pannoniæ finibus interessent, repente Romualdus languore correptus, ulterius ire non potuit: cumque diutius pateretur, si quando redire disponderet, protinus ex ægritudine convalescebat; sin autem ire ultra tentaret, tota ejus facies protinus intumescerebat, cibos quoque jam retinere stomacho languescente non poterat. Advocatis itaque fratribus, ait: Perpendo nequam divinæ voluntatis esse iudicium ut ultra progrediar, verumtamen quia intentionis vestræ desiderium non ignoro, neminem vestrum redire compello. Multi nempe etiam ante nos totis viribus studuerunt ad martyrii culmen pertingere; sed quia divina providentia aliter sensit, in suo gradu coacti sunt manere. Licet ergo vobis omnibus martyrium defuturum non ambigam, qui tamen ire, qui mecum redire voluerit, uniuscujusque relinquatur arbitrio. Quindecim igitur in Hungariam prodeuntibus, duobus alio jam dimissis, vix septem cum magistro discipuli remanserunt. Euntium autem quidam flagellantur, venduntur plures ac servitutem pro Domino subeunt: ad martyrium tamen (sicut vir sanctus prædixerat) non pertinent. Ut plane appareat, quod neque volentis, neque currentis, sed miserentis est Dei martyrii donum. Sed ut sanctos jungamus sanctis, persequamur quod remanet funus innocentissimi viri sancti Everardi.

9. *S. Everardi innocentissimi cædes.* — Sicut Abel innocentissimus, livoris causa trucidatus hoc eodem tempore fuit Carnoti in Gallia vir sanctissimus Everardus, qui percussus, in percussores, dum suis artibus inhæsit spiritus, illud Stephani protomartyris inclamavit: Domine, ne statuas illis hoc peccatum. De cujus interitu extant plures Epistolæ ejus civitatis episcopi Fulberti, de quo sæpe superius, qui de his scribens, de causa necis ejus ad episcopum Laudunensem hæc habet¹: « Causa hujusmodi est: Quodam Ecclesiæ nostræ subdecano defuncto, petiit a nobis Rudolphus Silvanectensis episcopus, dari sibi aut fratri suo ministerium ejus. Nos autem respondimus non convenire sibi, eo quod episcopus esset, neque fratri, ætate adhuc et moribus immaturo. Tunc legimus de numero sacerdotum nostrorum ad illud officium faciendum quemdam scientem ac religiosum virum. Quod factum prædictus Rudolphus materque fratri ipsius adeo inviderunt, ut sancto viro coram pluribus, qui testes inde sunt, terribilia minarentur: et dictum facto non caruit. Venerunt enim de civitate Silvanectis ad nostram quidam ex domesticis eorum sic necessarii, ut absentia illo-

rum nec per unum diem ignorari potuerit: qui interdiu quidem latuerunt, sed profunda nocte egressi, sanctum illum presbyterum more solito venientem ad Ecclesiam, quasi lupum rabidum lanceis falcatis et gladiis in ipso atrio principalis Ecclesiæ trucidaverunt. Clerici autem ejus, qui expeditum dominum tarde secuti sunt, invenerunt eum adhuc extrema verba protomartyris replicantem. Porro carnifices præsidio noctis incogniti jam diffugerant etc. » Hactenus de cæde Everardi, quem merito idem auctor appellat virum sanctissimum. Sed redeamus ad eam quam reliquimus martyrum sanguine cruentalam Russorum Ecclesiam.

10. *Reinbernus apostolus in Russia.* — Quod igitur ad ipsam Russorum Ecclesiam spectat, de qua actum est, quæ adhuc alia ipsius exordia ponantur a Ditnaro hic describamus; ait enim¹: « Amplius progrediar disputando, regisque Russorum Uludomiri actionem iniquam perstringendo. Illic a Græcia ducens uxorem Helenam nomine, Tertio Ottoni desponsatam, sed ei fraudulenta caliditate subtractam, Christianitatis sanctæ fidem ejus hortatu suscepit, quam justis operibus non ornavit. Erat enim fornicator immensus et crudelis, magnamque vim Danaïs mollibus ingessit. Hic tres habens filios, uni eorum Bolizlavi ducis nostrique persecutoris filiam in matrimonium dedit, cum qua missus est a Polonis Reinbernus præsul salsæ Cholbergensis. Ille in pago Hassegund dicto natus, liberalique scientia a prudentibus magistris educatus, gradum episcopalem ascendit, ut spero, dignus. Quantum autem in cura sibi commissa laboraverit idem, non mea sufficit scientia nec etiam facundia enarrare. Fana idolorum destruens incendit; et mare dæmonibus cultum, immissis quatuor lapidibus sacro chrismate perunctis, et aqua purgans benedicta, novam Domini omnipotenti propaginem in infructuosa arbore, id est, in populo nimis insulso sanctæ prædicationis plantationem eduxit. Vigiliarum et abstinentiæ et silentii assiduitate corpus suum affligens, cor ad speculum divinæ contemplationis infixit. Quem prædictus rex, audiens filium suimet, hortatu Bolizlavi tacito, reluctaturum sibi, cepit eum eodem et uxore, et in singulari custodia claudit. In qua pater venerabilis, quod in aperto fieri non potuit, in secreto studiosus in divina laude peregit. Hic cum se lacrymis, assidueque orationis ex corde contrito prolatae hostia summo sacerdoti reconciliaret: exacto corporis carcere solutus, ad libertatem perennis gloriæ gaudens transit. » Hæc de sanctissimo episcopo, in carcere e carcere, ut ait, corporis liberato.

¹ Ditm. I. VII. c. 101.

¹ Fulbert Ep. XXVI. XXXI. XXXIV.

Anno periedi Græco-Romanæ 6501. — Anno Æræ Hispan. 1016. — Anno Hegiræ 399, inchoato die 5 Sept., Fer. 1. — Jesu Christi 1008.

— Joannis XVIII papæ 6. — Henrici II reg. 7. Basil. et Const. imp. 33.

1. *S. Bruno Russorum apostolus.* — Ad num. 4 et seq. Refert Baronius ex Ditmaro episcopo Merseburgensi post decennium demortuo, martyrium *sancti Brunonis* archiepiscopi et xvii sociorum in Prussia. Ait Ditmarus, *Brunonem* conscholarem suum ab Ottone III, postquam liberaliter educatus fuit, optime exceptum esse, sed non multo post solitariam vitam quæsisisse. Regnante vero Secundo Henrico, a *Tagmone* archiepiscopo Magdeburgensi consecratus fuit episcopus. Dein ad lucrum animarum, laborem grandis et diversæ viæ subiit. « Duodecimo anno conversionis suæ ad Prussiam pervexit. Cum itaque in prædictæ regionis (nempe Prusiæ) confinio et Russiæ, primo ab incolis prohiberetur, et plus evangelizans capitur, et XVI kalend. Martii decollatur, cum decem et octo suis sociis. Quorum corpora insepulta jacuerunt, quoadusque Bolizlavus ipsa mercatus est ». Hæc summarie ex Ditmaro excerpta. Hic autem Prussos et Russos vicinos esse dicit, quod confirmat Helmoldus in Chronico Sclavorum lib. 1, qui *Pruzorum* nomine etiam Livoniam ac Samogitiam complectitur; et cis mare Scythicum, primos ab Oriente *Ruzos* locat, dein Polonos, « qui a Septentrione Pruzos habeant, ab Austro Boiemos ». Prussi circa annum mclxx, quo Helmoldus Chronicon suum absolvit, *ne dum lumen fidei cognoverant*, inquit Helmoldus cap. 4. Legendus Bollandus ad diem xiv mensis Februarii, ubi de sancto Brunone et sociis disserit.

2. *In Prussia martyrio coronatur.* — Bollandus in mentem non venit legere quæ Adhemarus, qui hoc tempore floruit, in Chronico de sancto Brunone scripsit, quæ ideo resectis non necessariis hic referam. « Erant, inquit, Ottoni III duo reverentissimi episcopi, sanctus videlicet Adalbertus, et sanctus Brunus episcopus de civitate Osburg (id est, Augustæ) quæ est in provincia Bojoariæ, consanguineus ejusdem imperatoris. Adalbertus parvus statura, sanctus Brunus procerus corpore erat. Ille abiit in Pollianam provinciam, et prædicare cœpit Evangelium. Quod exemplum ejus secutus Brunus episcopus petiit imperatorem, ut pro eo juberet consecrari in sede sua episcopum, quem elegerat, nomine Odolricum. Quo facto et ipse

humiliter abiit in provinciam Ungriam (id est Hungariam), quæ dicitur Alba-Ungria, ad differentiam alterius Ungriæ nigrae, pro eo quod populus est colore fusco velut Æthyopes. Sanctus Brunus convertit ad fidem Ungriam provinciam, et aliam quæ vocatur Russia; regem Ungriæ baptizavit (ut suo loco diximus). At sanctus Brunus cum ad Pincenatos (id est Prussos) properavisset, et Christum prædicare cœpisset illis, passus est ab eis, sicut passus fuerat S. Adalbertus. Nam Pincenati diabolico furore sævientes, viscera omnia ventris per exiguum foramen lateris ei extraxerunt, et fortissimum Dei martyrem perfecerunt. Corpus ejus Russorum gens (non vero *gener*, ut tom. II Biblioth. Labbeanæ pag. 168, mendose legitur) magno pretio redemit, et in Russia monasterium ejus nomini construxerunt, magnisque miraculis coruscare cœpit. Post paucos dies quidam Græcus episcopus in Russiam venit, et medietatem ipsius provinciæ, quæ adhuc idolis dedita erat, convertit, et morem Græcum in barba crescenda et cæteris exemplis eos suscipere fecit ». Ubi Adhemarus de partibus Russiæ quæ Prussis vicinæ erant intelligendus videtur, et in hoc differt a Ditmaro, quod hic sacras reliquias a Boleslao, ille vero a Russis emptas tradat.

3. *S. Bonifacius in Russia martyrium facit.* — A num. 6 ad 9. Petrus Damiani in Vita sancti Romualdi, cap. 8, juxta editionem Bollandi, ad diem vii Februarii, quo sanctus abbas colitur, recitat martyrium *sancti Bonifacii* unius ex sancti Romualdi discipulis, Russorum apostoli, atque Bonifacium habuisse equum egregium, « quem sibi Busclavi Sclavonici regis filius dederat, factus ab eo monachus; ubi *Busclavi* nomine *Boleslaum* cognomento *Chabri*, secundum Poloniæ regem seu potius ducem Christianum sine dubio intelligit. Hæsit ad hæc verba Bollandus, quod scriptores Poloni *Boleslao* alium filium tribuere non videantur quam *Miesconem* seu *Misconem* hujus nominis II, qui post patrem regnavit. Verum mirum videri non debet, quod scriptores Poloni non meminerint alterius filii Boleslai regis, cum is longe a Polonia in monasterio Casinensi vitam traduxerit. Præterquam quod omnes rerum Polonicarum historici recentes

sunt, eosque antiqua plerumque latuerunt, ut mox iterum patebit. Loquitur ibi Petrus Damiani de iis quæ contigere, cum sanctus Romualdus ad montem Casinum venit « una cum sancto Bonifacio imperatoris consanguineo », ut inquit Leo Ostiensis lib. 2, cap. 18. Subdit Petrus Damiani sanctum Bonifacium ad regem Russorum missum, eam gentem cum rege convertisse; sed cum frater regis nollet credere, ab ipso rege peremptus est. Alter vero regis frater, qui cum eo non habitabat, sanctum *Bonifacium* nefarie peremit. Hæc ille. Regnabat autem hoc tempore in Russia *Ulodomirus*, qui ab annis viginti fidem Christianam amplexus erat. Sed cum *Russia* latissime pateret, variisque principibus subderetur, de quo eorum Petrus Damiani intelligendus sit incompertum.

4. *Reinbernus episc. Colbergensis in Russiam missus.* — Ad num. 10. *Boleslaus* hujus nominis primus, secundus dux aut rex Christianus Poloniæ, multis virtutibus claruit, omnemque operam adhibuit, ut superstitiones ritusque idololatriæ, si qui adhuc usquam extarent, penitus extirparet; *Volodomirus* vero primus rex Christianus Russiæ, cujus filius Boleslai filiam uxorem accepit, a Russis uti sanctus colitur, sicuti suo loco diximus. Verum ob perpetua bella quæ Germanos inter et Russos ac Polonos exorta confectaque, horum populi mutuo sæpius abalienati fuere. Quare non mirum, si Ditmarus Merseburgensis in Germania episcopus, *Volodomirum* et *Boleslaum* invidiam vocet, cum id nostris temporibus ab historicis non raro fieri constet; præterquam quod videtur Ditmarus de iis quæ extra Germaniam gesta, non bene edoctus fuisse. Notabile tamen, quod narrat de *Reinberno* Colbergæ in Pomerania ulteriori episcopo, qui Boleslai filiam in Russiam comitatus est. Pomerania enim ulterior ultra Oderam Fl. posita, et marchiæ Brandeburgicæ pars Polonis diu parvire, ibique anno MCDLXV fundatus episcopatus Cholbergensis, qui anno millesimo Guesnensi archiep. subjectus fuit, ut suis locis ostendi, cujus *Reinbernus* primus antistes fuit, quem successores habuisse incompertum, quia *Pomerani*, superstitionum suarum tenacissimi, adversus Poloniæ duces sæpe rebellaverunt.

5. *Reliquias idololatriæ extirpare conatur.* — Reinbernus hujus legationis occasione usus est ad idololatrias, qui in Russia supererant, convertendos, ut refert Ditmarus in fine lib. 6, ubi de Volodomiros Russiæ rege ait: « Ille tres habens filios, uni eorum Bolizlavi ducis nostrique persecutoris filiam in matrimonium duxit, cum qua missus est a Polonis Reinbernus, præsul salsæ Cholbergensis (sed loco *salsæ*, legendum *sacræ*, ut ipsemet Ditmarus pag. 43 habet, qui ideo ex ipsomet corrigendus). Quantum autem in cura sibi commissa laboraverit idem, non mea sufficit scientia, nec etiam facundia. Fana idolorum destruens incendit ». Scribit postea Ulodomirum, tam filium quam ejus conjugem ac Reinbernus custodiæ tradidisse, huncque e

carcere ad libertatem perennis gloriæ transisse. Sæculo sequenti *sanctus Otto*, episcopus Bambergensis et Pomeranorum apostolus, *Adalbertum* in Pomerania constituit episcopum, ut testatur auctor anonymus synchronus in ejus Vita, hicque sedem episcopalem posuit *Julini* seu *Vollini*, in insula Pomeraniæ Ulterioris Julino dicta. Ex ea urbe episcopatus anno MCLXXV *Caminum* translatus fuit a Casimiro Pomeraniæ duce, quod postea Clemens III confirmavit, ut scribit David Chytræus in Supplemento Krantzii. Situm autem *Caminum* in Pomerania Ulteriori e regione insulæ Vollinæ. Tandem tam episcopatus Caminensis, quam collegium canonicorum pace Monasteriensi an. MDCXLVIII suppressa sunt. Quæ hic indicare præstat, quia scriptores Poloni in Ecclesiarum suarum originibus ita cæcunt, ut Michovius, lib. 2 cap. 1, de Miescone, qui sæculo præterito sacro baptismo initiatus est, et de episcopatibus tunc, ut ipse existimat, fundatis verba faciens, tradat: *Caminensis primus Julinus*, licet tam Julinum, quam Caminum urbium nomina sint, non vero alicujus præsulis, cæque nonnisi sæculo Ecclesiæ duodecimo sede episcopali exornatæ fuerint, idque diverso tempore, una scilicet post alteram.

6. *Floret Burchardus episc. Vormatiensis.* — *Burchardus* dictus est hoc anno episcopus *Vormatiensis*, ut habet Sigebertus de Viris Illustribus cap. 142. Vir cum episcopali onere non indignus, ut legitur in libello de Gestis abbatum Gemblacensium, tum pro juvenili ætatis fervore litterarum studiis opportune intentus. Mandavit *Balderico* Juniorii Leodiensum episcopo, cujus contubernalis et amicus in Palatio Ottonis III fuerat, ut sibi virum aliquem *litterali scientia* prædictum dirigeret, cujus ope et doctriina ipse in Scripturarum divinarum eruditione proficere valeret. Missus vero a Balderico *Olbertus* monachus Laubiensis, Parisiensis, et postea Carnotensis scholæ alumnus, quo adjutore Burchardus veteres Ecclesiæ canones in unum volumen viginti libris distinctum digessit. « Quantum autem vir tantæ auctoritatis (nempe Burchardus, ut in eodem libello subjungitur) ex Olberti doctrina profecerit, ex actibus ejus æstimandum erit, de quo satis constabit, quod illa ætate in Scripturarum eruditione unice claruerit; quod vel in hoc satis probare poterit, quod opus S. Ecclesiæ nimis utile elaboravit, et dum Olberto dictante et magistrante magnum illud canonum volumen centonizavit, et quasi collectis floribus omniformis generis de prato Scripturarum coronam pretiosiore auro et topazio in edito Ecclesiæ collocavit ». Magnam suæ Collectionis partem eum ex Reginone accepisse ostendit Baluzius in Præfatione ad Reginonis librum de *disciplina ecclesiastica*, ipsumque Antonius Augustinus reprehendit, « quod non ex fontibus ipsis hausit singula, sed ex rivulis et stagnis aliorum ». Hinc aliqui disciplinæ Juris canonici primordia deducunt, quam sæculo XII Gratianus in scholas invexit, redactis in

Epitomen canonibus, quos *Burchardus* et *Ivo Carnotensis* collegerant.

7. *Moritur Notgerus episc. Leodiensis.* — Mortuus est hoc anno Notgerus episcopus Leodiensis, ut anno DCCCXLXII num. 48 jam ostendimus, non vero præcedenti, ut scribit Ægidius in episc. Leodiensibus, qui diem tamen ejus emortualem, scilicet quartum idus Aprilis recte notavit. Chapea-

villus enim, tom. I de episcopis Leodiensibus cap. 58, refert id consonare libro Ecclesiæ Leodiensis, ex quo leguntur commemorationes fratrum et omnium fidelium defunctorum ad Primam. Palatium episcopale instauravit, et canonicorum collegium in Ecclesia sancti Joannis Evangelistæ instituit. Vide quæ de eo et ejus scriptis loco citato dixi.

SERGII IV ANNUS 1. — CHRISTI 1009.

1. *Joanni XIX mortuo, sub quo Constantinopolitana Ecclesia Romanæ fuit conjuncta, succedit Sergius IV.* — Sequitur Christi Redemptoris annus nonus supra millesimum, septima Indictione, quo defunctus est decimo quinto kal. Aug. Joannes papa, cujus tempore Constantinopolitanam Ecclesiam cum Romana fuisse Catholica communione conjunctam, testatur Petrus episcopus Antiochenus, in Epistola ad Michaellem Cærularium scripta ab ipso anno Christi millesimo quinquagesimo quarto (ut suo loco dicetur) in qua verba ista leguntur: « Cum Constantinopolim quadraginta quinque abhinc annis venissem, inveni tempore beatæ memoriæ patriarchæ domini Sergii prædictum papam Joannem in sacra Missa una cum aliis patriarchis sanctissimis relatum. Quomodo vero deinceps ejus relatio et commemoratio e medio sublata sit, et quam de causa, ignoro ». Hæc Petrus de rebus gestis suo tempore.

2. Porro de causa iterati rursum schismatis dicetur suo loco inferius in Joanne Vicesimo. At non solum ex nuper citatis litteris Petri liquet, hujus Joannis papæ tempore conjunctam pace et communione fuisse Constantinopolitanam Ecclesiam cum Romana; verum etiam ex ejusdem Pontificis Epitaphio sepulturæ constat, ejus concordie fuisse eundem Joannem auctorem: quod principio carens, ut recitatur à Vegio ex collectis antiquis monumentis Basilicæ Vaticanæ, hic tibi describimus. Sic enim se habet;

.....

 QVAM SOLENS DOMINO PLACUIT. QVAM MENTE MODESTA
 PRÆSVL APOSTOLICVS ORBIS ET OMNE DECVS.

HIC STATVIT TVMVLO CLAVDI SYA MEMBRA SVI ISTO,
 HÆC EADEM SPERANS VT SIBI REDDAT HVIVS.
 ARDVA QVI FVLSIT CYNCTIS PER SIDERA COELI,
 AVGVSTIS CHARVS, GENTIVS ET TRIBVTVS.
 DOCTRINIS COMPTVS SACRIS ET DOGMATE CLARO
 PER PATRIAS SANCTA SEMINA FVDIT OVANS.
 NAM GRAIOS SVPERANS, EOIS PARTIVS VNAM
 SCHISMATA PELLENDQ REDDIDIT ECCLESIAM.
 PRINCIPIS HVNC PETRI SED QVISQVIS TENDIS AD AVLAM,
 DIC SVPPLEX ISDEM REGNET VT ARCE POLI.

3. Quod autem ibi dicitur, Graios superans, utique docet, rem tantam haud perfunctorie actam, sed multa prævia disceptatione, Græcis resistentibus haud adeo facile acquiescere assuetis. Demum vero perspicuis adeo eisdem convictos rationibus tomo superiori abunde narratis, cessisse veritati, recessisse ab insolita discordia, amplexatos oblatam pacem, et Romanæ sanctæ Ecclesiæ Catholicæ communionis glutino compaginos apparet.

Cum igitur (ut dictum est) Joannes Pontifex obiisset, vacassetque Romana Sedes mensem unum et dies tredecim, pridie kal. Septemb. creatur papa Sergius ex episcopo Albanensi, tunc Petrus nomine nuncupatus. Cui ob reverentiam Apostolici culminis nomen mutare placuit, et Sergius voluit nominari. Id quidem sepulchrali inscriptione constat, inferius in ejus obitu describenda. Factum vero ab eo quod Buccaporci diceretur, fuit aliorum assertio. De tali haud honesto nomine est testis Ditmarus, dum recensens successores Silvestri papæ, hæc ait¹: « In cujus vice Joannes Phasan positus, Sedem Apostolicam dies sibi commis-

¹ Ditm. I. VI. prope fin.

sos regebat. Huic succedebant Sergius, qui vocabatur Buccaporci, atque Benedictus, ambo præclari et consolidatores nostri». Erant hi e partibus Henrici regis, quem ut Romam se conferret, plurimum expetebant.

4. *Templum Hierosolymorum Judæorum fraude destructum.* — Hoc eodem anno contigit sacrosanctum Hierosolymorum templum per Babylonis principem sterni; cujus occasione ingens in Occidente facta est Judæorum strages, cum eorum id perpetratum opera cognitum esset. Deo autem operante, rursum majori decore templum ibidem excitatur, quod miro ex Catholico orbe concursu frequentari cœptum. Hæc omnia temporis hujus fidelis historicus Glaber testata reliquit his verbis¹: «Eo quoque tempore, id est, anno nono post præfatum millesimum, Ecclesia quæ apud Hierosolymam sepulchrum continebat Domini ac Salvatoris nostri, eversa est funditus jussu principis Babylonis: cujus videlicet eversionis occasio tale quod dicturi sumus cognoscitur exordium habuisse.

5. «Cum enim de loto terrarum orbe ob insigne Dominicum memoriale plurima fidelium multitudo Hierosolymam visitaturi pergerent, rursus cœpit invidus diabolus per assuetam sibi Judæorum gentem veræ fidei cultoribus venenum suæ nequitiae propinare. Erat igitur hujus generis apud Aurelianensem Galliarum regiam urbem non modica multitudo, qui cæteris suæ gentis tumidiores et mundi, atque audaciores sunt reperti. Hi denique nequam consilio inito, corruperunt quemdam data pecunia, videlicet gyrovagum sub peregrino habitu, nomine Robertum, fugitivum utique servum beatæ Mariæ Melerensis cœnobii. Quem accipientes caute miserunt ad principem Babylonis cum Hebraicis characteribus scriptis Epistolis, pictaculis ferri baculo insertis, ne quo casu potuissent ab eo divelli. Qui egressus delulil litteras prædicto principi refertas dolo et nequitia, et quoniam, nisi celerius domum Christianorum venerabilem subverteret, sciret se in proximum, Christianis regnum illius occupantibus, omni penitus dignitate carere. His vero princeps auditis, protinus furore arreptus, misit Hierosolymam de suis, qui prædictum funditus subverterent templum: qui venientes fecerunt, ut eis fuerat imperatum. Ipsum quoque concavum sepulchri tumulum ferri tudibus quassare tentantes, minime valuerunt. Tunc etiam beati martyris Georgii Ecclesiam in Ramulo pariter subverlerunt, cujus olim virtus Sarracenorum nimium gentem terruerat. Fertur enim, crebro illuc eos ingredi cupientes ratum (raptim) cœcitatem pertulisse.

6. «Everso igitur, ut diximus, templo, post paululum manifeste claruit, quoniam Judæorum nequitia tantum nefas sit patratum; ut et divulgatum est per orbem universum, communi omnium

Christianorum consensu decretum est, ut omnes Judæi ab illorum terris vel civitatibus funditus pellerentur. Sicque universi odio habiti, expulsi de civitatibus, alii gladiis trucidati, alii fluminibus necati, diversisque mortium generibus interempti, nonnulli etiam sese diversa cæde interemerunt. Ita scilicet, ut digna de eis ultione peracta vix pauci illorum in orbe reperirentur Romano.

7. «Tunc quoque decretum est ab episcopis atque interdictum, ut nullus Christianorum illis se in quocumque sociaret negotio. Si qui tamen de illis ad baptismi gratiam converti voluissent, omnemque Judaicam respuere consuetudinem vel morem, illos tantum suscipere decreverunt. Quod et fecerunt plurimi illorum, magis amore præsentis vitæ coacti metu mortis, quam vitæ sempiternæ gaudiis. Nam quicumque illorum sese tales mentiendo fieri poposcerant, paulo post ad morem pristinum sunt impudenter reversi.

8. «Præterea his ita gestis, prædictus litterarum bajulus ad nativum male securus repedavit solum. Cœpit itaque sedulo perquirere, si forte quempiam gentis suæ fraudis conscia reperiret. Inventis vero perpaucis in civitate Aurelianorum prave admodum degentibus, rursus cœpit illorum familiaris uti consortio. Accidit igitur, ut quidam peregrinus ejus in transmarino socius itinere, atque certissime illius itineris conscius negotii illuc deveniret, rursusque illum Judæorum amicitiiis nimis hærare cerneret: palam universis indicare curavit, quanti mali gerulus ille esset homuncio, ex cujus rei causa Judæorum poliretur opibus. Qui illico comprehensus, acribusque agitatus verberibus, propriæ delationis confitetur crimen. Moxque a ministris regis in conspectu totius plebis extra civitatem igni est traditus atque consumptus. Judæi tamen profugi ac vagabundi, qui in locis abditis delitescerent prædictæ superfuerant cladi, post quinquennium eversionis templi cœperunt in urbibus apparere perpauci. Et quoniam oportet, quamvis ad illorum confusionem, ut ex illis aliqui in futurum supersint, vel ad confirmandum proprium nefas, seu ad testimonium fusi sanguinis Christi: idcirco vero credimus Christianorum animositatem, divina dispensante providentia, in eis ad tempus mansuervisse.

9. «Eodem nihilominus anno, divina propitiante clementia, cœpit mater ipsius principis, videlicet ammirati Babylonis, mulier Christianissima, nomine Maria, reædificare Christi templum, jussu ejus filii eversum, politis et quadris lapidibus. Nam et vir ipsius, quasi alter Nicodemus, pater hujus scilicet, de quo præsens est sermo, habitus occulte Christianus dicitur fuisse. Tunc quoque de universo terrarum orbe incredibilis hominum multitudo exultanter Hierosolymam pergentes, domui Dei restaurandæ plurima detulerunt munera». Hucusque Glaber.

10. Meminerunt et Græci de ejusmodi templi

¹ Glab. l. III. c. 7.

Hierosolymorum eversione, sed anno sequenti, nempe octava Indict.; nam Curopalata de his agens hæc ait: « Ind. viii, anno mundi 139 Clj 13 XXIII, Ægypti princeps Azizius ob levem causam, et offensas ne relatu quidem dignas, fœdere quod ei erat cum Romanis rupto, et templum Hierosolymis ad sepulchrum Christi sumptuosissime conditum evertit, et religiosa perdidit monasteria, et qui in iis piæ vitæ exercitationibus erant dediti, eos per omnem terram extorres egit ». Eadem et Cedrenus. Gulielmus Tyrius agens de bello sacro ¹, recen-

set destructionem templi Hierosolymorum, et Christianis in Oriente illatam ab Homar principe Sarracenorum persecutionem, anno salutis millesimo decimo octavo, postquam annos triginta septem factam ejusdem templi reedificationem a Christianis sub Constantino Monomacho imp.; sedisse autem tunc Hierosolymis Orestem episcopum asseverat. Sed antiquioribus, suorum præsertim temporum scriptoribus, tutior inest fides.

¹ Guill. Tyr. l. i. c. 2. 3. 4. 5.

Anno periodi Græco-Romanæ 6502. — Anno Æræ Ilisp. 1047. — Anno Hegiræ 400, inchoato die 25 Aug., Fer. 5. — Jesu Christi 1009.

— Sergii IV papæ 1. — Henrici II reg. 8. Basil. et Const. imp. 34.

1. *Sergius IV PP. succedit Joanni XVIII.* — A num. 1 ad 4. Hoc anno *Joannes XVIII* papa die et mense incertis e vita migravit, cui successit *Sergius* hujus nominis IV, qui ad Sedem Apostolicam post diem decimum septimum mensis Junii erectus fuit, ut liquet ex ejus Diplomate ab Ughello tom. vii Italiæ pag. 528 recitato, quod his verbis absolvitur: « Scriptum per manus Joannis scriniarii S. R. E. in mense Junio, Indictione x.... Datum XV kalendas Julii per manum Gregorii episcopi et bibliothecarii sanctæ Sedis Apostolicæ, anno, Domino propitio, Pontificatus domini Sergii Quarti papæ in sacratissima B. Petri Apostoli tertio, Indictione decima », anno nempe Christi mxi, quo Baronius num. 3 hanc subscriptionem etiam refert. Quod si eo Christi anno die xv mensis Junii, annus tertius Pontificatus Sergii adhuc in cursu erat, post eundem diem currenti Pontificatum suscepit, et *Joannes XVIII* adhuc in vivis erat. Is Pontifex creatus fuerat anno mii, die xxvi mensis Decembris, ideoque sedit annos quinque integros, ut in variis Catalogis legitur, et menses saltem sex in Catalogis vel omissos vel male expressos. *Sergius IV* ante Pontificatum vocabatur *Os porci*, ut videre est in laudatis Catalogis, vel *Bucca porci*, ut ait Diltmarus lib. 6. Quare posteriores historici, qui hoc nomen Sergio III adscripsere, hallucinati sunt. Hæc verba Diltmari: « Huic (nempe Joanni) succedebant Sergius, qui vocabatur Bucca-Porci, atque Benedictus, ambo præclari et consolidatores nostri ». Diltmarus autem hoc ipso tempore vivebat.

2. *Consecratio monasterii Bellilocensis.* — Baronius anno dcdxvi, a num. 20 ad 27, agit de legatione *Petri cardinalis* in Franciam a Joanne papa missi, ut Ecclesiam monasterii *Bellilocensis* in diœcesi Turonensi siti consecraret, quia Joannem illum papam de Joanne Placentino Pseudo-Pontifice interpretatus est. Verum Marca lib. 4 de Concordia cap. 8, num. 2, et San-Marthani in abbatibus Bellilocensibus pag. 149, demonstrant id contigisse *Joannis papæ* hujus nominis XVIII temporibus, et tam ipsum quam *Sergium IV* ejus successorem, hujus monasterii exemptionem constituisse. Qua de re cum eo anno nos hic acturos polliciti fuimus, nunc fides nostra liberanda. *Fulco Nerra* comes Andegavensis Hierosolymis reversus, ultra Augerem fluvium Belloloco prope castrum Lochiarum sanctissimæ Trinitati monasterium construxit, cujus consecrationis ritum cum Hugo Turonensis archiepiscopus in cujus diœcesi monasterium illud positum erat, celebrare recusasset, quia Fulconis votum Deo gratum esse non posse contestabatur, nisi prædia et mancipia Ecclesiæ Turonicæ surrepta prius restitueret, Joannes XVIII ipsum locum « sud tuitione et defensione SS. Apostolorum Petri et Pauli, successorumque nostrorum, inquit, hujus sanctæ Sedis Pontificum, humiliter deprecando et commendando posuit, ut nullius dominatio regis et principis, seu archiepiscopi, episcopi aut cujuscumque dignitatis personæ. præfatum monasterium inquietare, vel disturbare, seu minuire audeat, etc. Quod si aliquis rebellis contra hanc nostram auctoritatem, scilicet archiepiscopus vel episcopus

quicumque ipsum locum excommunicare voluerit, ipse sit excommunicatus, et locus iste absolutus in æternum et in sæculum sæculi. »

3. *Non Joannis Placentini Pseudo-Pontificis, sed Joan. XVIII mandato facta.* — Privilegii illius insoliti rescriptum *Hugonem* Turonensem archiepiscopum commovit, qui statim Romam accedens, summissis precibus a *Sergio IV*, qui nuper Joanni XVIII successerat, contendit, ut monasterii consecrationem sibi juxta canones et Justiniani legem permitteret. Verum repulsus fuit *Hugo*, hac exceptione, quod *Fulconi* liberum fuerit in fundo suo propriaque hæreditate monasterium construendi, ipsum ejusque consecrationem Romanæ Ecclesiæ conferre, quia *cujus est hæreditas, ipsius et consecratio*. Hugo itaque accepta e manibus Gregorii Silvæ-Candidæ episcopi virgula, jus omne quod sibi competeat in Romanam Ecclesiam transtulit. *Sergius* vero IV in Gallias *Petrum* Viperensis Ecclesiæ episcopum direxit, monasterium illud vice sua consecraturum, uti narrat *Marca* ex ejusdem Sergii rescripto. Rem refert *Baronius* loco laudato ex *Glabro* libro 2, capite 4, sed hic male asserit Pontificem aliquid tentasse contra canones, et Turonensi archiepiscopo repugnante, factam esse *Bellilocensis* Ecclesiæ consecrationem.

4. *Sepulchrum Hierosolymitanum a Saracenis eversum.* — Ad num. 4 et seqq. Sacrum Hierosolymorum Templum anno tantum sequenti eversum juxta *Ademarum* in *Chronico*, qui hoc tempore vivebat, qui tamen, uti et *Glaber*, cujus verba *Baronius* refert, in eo peccat quod id jussu califæ *Babyloniensis* factum fuisse affirmet, cum tamen *Syriæ* et *Ægypto* non califa *Babyloniensis*, sed calipha *Ægypti*, qui hoc tempore erat *Hakemus*, præsideret. *Curopolates*, cujus verba *Baronius* num. 10 recitat, recte quidem hanc cladem *Ægypti* principi adscribit, sed illum male *Azizium* appellat. Hic enim *Hakemi* pater fuit, jamque ab anno Christi MCDXCVI fato functus fuerat, ut suo loco ostendimus. Sed historici de iis, quæ in longinquis regionibus gesta, verba facientes, non raro veris falsa miscent. Hæc porro *Ademari* verba : « Ipso anno Sepulchrum Domini Hierosolymis confractum est a Judæis et Saracenis III, kalendas Octobris, M ab Incarnatione ejus. Nam Judæi Occidentales et Saraceni Hispaniæ miserunt Epistolas in Orientem, accusantes Christianos, et mandantes exercitus Francorum super Saracenos Orientales commotos esse. Tunc *Nabuchodonosor* *Babyloniæ*, quem vocant *Admiratum*, concitatus suasu paganorum in iram, afflictionem non parvam in Christianos exercuit, deditque legem, ut quicumque de sua potestate nollent fieri Saraceni, aut confiscarentur, aut interficerentur. Unde factum est, ut innumerales Christianorum converterentur ad legem Saracenam ; et nemo pro Christo morte dignus fuit præter patriarcham Hierosolymorum, qui variis suppliciis occisus est, et duos adolescentes ger-

manos in *Ægypto*, qui decollati sunt et multis clauerunt miraculis.

5. *Aliæ crudelitates a Saracenis in Christianos exercitæ.* — « Nam Ecclesia Sancti Gregorii (*Glaber* rectius habet *Georgii*) quæ hactenus a nullo Saracenorum potuit violari, tunc destructa est cum aliis multis Ecclesiis sanctorum, et peccatis nostris promerentibus, Basilica Sepulchri Domini usque ad solum diruta. Lapidem vero monummenti cum nullatenus possent comminuere, ignem copiosum super adjiciunt, sed quasi adamas immobilis mansit et solidus. *Bethleemeticam* Ecclesiam, ubi Christus natus est, cum miterentur destruere, subito apparuit eis lux fulgurans, et omnis multitudo paganorum corruens expiravit confestim, et sic Ecclesia Dei Genitricis intacta remansit. Ad monasterium quoque montis *Sinai*, ubi quingenti et eo amplius monachi sub imperio abbatis manebant, habentes ibidem proprium episcopum, venerunt Saracenorum x millia armatorum, ut monachos perimentes habitacula eorum cum Ecclesiis diruerent. Propinquantibus autem, a iv fere millibus conspiciunt totum montem ardentem et fumantem, flammisque in cælum ferri, et cuncta ibi posita cum hominibus manere inlæsa. Quod cum renuntiassent regi *Babylonio*, pœnitentia ductus tam ipse quam populus Saracenus, valde doluerunt de his quæ contra Christianos egissent, et data præceptione jussit reædificare Basilicam Sepulchri gloriosi ; tamen redincepta Basilica, non fuit amplius similis priori pulchritudine vel magnitudine, quam *Helena* mater *Constantini* regali sumptu perfecerat. Moxque e vestigio super omnem terram Saracenorum fames incanduit per tres annos, et innumerales eorum multitudo fame necata est, ita ut plateæ et deserta cadaveribus omnino replerentur, et fierent homines cibus et sepultura feris et avibus. Secuta est eos gladii vastitas ; nam gentes *Arabie* super terram eorum diffusæ sunt, et qui remanserant, fame et gladiis interierunt.

6. *Ab historicis Saracenis etiam narratæ.* — « Captus est ab eis rex *Babyloniæ*, qui se contra Dominum erexerat in superbiam, et vivus, ventre dissecto visceribusque extractis, impiam animam ad barathrum projecit. Venter ejus lapidibus oppletus, consutus est, et cadaver, ligato plumbo ad collum, in mare demersum est. Eo anno *Radulfus* *Petragoricæ* episcopus, Hierosolymis rediens, retulit quæ viderat ibi infanda, et obiit *Petragoricæ* ». Illis fidem adstruit *Elmacinus* lib. 3. *Hist. Sarac.* cap. 6, qui postquam anno Christi MXX cædem *Hakemi* *Biamrillæ* califæ *Ægypti*, sororis ejus jussu peractam narravit, de ejus insania et crudelitate loquitur, atque : « Afflixit quoque Christianos et Judæos, et templa eorum diruit, eosque vexavit. Unde multi ex iis Islamismum (id est, religionem Saracenicam) sunt amplexi. Sed mutata deinde sententia, dedit eis, qui ad Islamismum defecerant, eidem renuntiare, et permisit eis restaurare templa sua ». Quod vero ait *Glaber*

apud Baronium num. 9, matrem amirati Babylonis fuisse mulierem christianissimam, nomine *Mariam*, eamque reedificasse Christi templum, confirmatur ex Elmacino lib. 3, cap. 5, pag. 247, ubi inquit: «Azizius Billa (qui pater erat Hakemi hoc tempore in Ægypto regnantis) dominus Ægypti uxorem duxerat Christianam Melchiticam, ex qua et filiam suscepit. Erant autem ei mulieri duo fratres, quorum alterum nomine Jeremiam constituit patriarcham Hierosolymitanum, alterum autem Arsenium nomine, patriarcham Melchitarum Alchiræ, et Mitsræ », id est, Alexandrinum. Is porro Jeremias alius non est ab Oreste, ut diserte asserit Tyrius l. 1. c. 4, isque in Florario Sanctorum Ms. ad diem xv Maii dicitur *martyr*. Historici itaque Latini qui de hac persecutione verba habuere, in eo ut videtur peccarunt, quod eam califfæ Babylonico attribuerint, quia sæculo elapso Ægyptus ei subdita fuerat, neque adverterant Ægyptios proprium sibi regem eodem sæculo præfecisse. Tyrius tamen laudatus hunc errorem vitavit, sed hanc persecutionem in an. mxi perperam distulit. Ademarus enim hoc tempore vivebat.

7. *Cosentia a Saracenis capta*. — Lupus Prolospata in Chronico de Taracenis habet: «Anno mxx, mense Augusti, apprehenderunt Saraceni civitatem Cosentiam (Calabriæ metropolim) rupto fœdere nomine Cayti». Ughellus tom. ix Italiæ Sacræ asserit, Saracenos Cosentiam incendisse anno dcdlxxv, sed unde id hauserit non indicat, et Lupus laudatus diserte asserit, eo anno Saracenos *Butuntum* seu Bitontum Apuliæ oppidum sub suam potestatem redegissem, quod et Sumontus tom. i, pag. 439 affirmat. Porro ex Ughelli lectione apparet Calabriæ Ecclesias *Tarentum* usque sub præcedentis sæculi

finem et currentis initio, pastoribus viduas fuisse; nullius enim nomen in publicis Monumentis extat.

8. *Synodus Einshamensis*. — Hoc anno *Dan* turmatim et varia classe in Angliæ provincias irrumpere; cumque Cantuariensem urbem oppugnassent, cives pactis trium librarum millibus, exoraverunt hostem ut discederet. Inde ad *Vectam* insulam flexere, et postea ad *Soutsaxoniam*. Tunc *Ethelredus* rex, veluti excitus e veterno, aut avertere a civium cervicibus communem hostem, aut cum laude mori decrevit, sed proditus ab *Edrico* duce, qui ejus filiam in conjugio habebat, ejus industria frustra fuit, ut fusius narrat Alfordus ad hunc Christi annum ex Vigorniensis. In his rerum angustiis censuit *Elphegus* Cantuariensis antistes generalem Ordinum conventum indicendum, ubi prius Ecclesiasticorum mores ad sancte vivendi normam, et sacram canonum observantiam traherentur, ac præterea de navibus fabricandis, tuendoque cive decerneretur. Id a rege facile obtinuit, vocatusque senatus in villam regiam *Einshamum* appellatam, et in Oxoniensi provincia positam. Lecti in ea Synodo canones ac decreta Elphego Cantuariensi et Vulstano Eboracensi archiepiscopis auctoribus edita, quæ, ut notat Malmesburiensis lib. 2 de reg. pag. 75, *Canutus* Rex in suas leges postea transcripsit. Quare Ethelredi regis statuta ab Elphego et Vulstano in hoc Concilio decreta, posteriorum legum prototypum fuerunt. Licet enim communiter sub *S. Eduardi* regis et *confessoris* nomine jurarentur, originem tamen ab hac Synodo trahebant, ut ibidem insinuat Malmesburiensis. Conventus itaque *Einshamensis* Politicus fuit et Ecclesiasticus, referturque tom. ix Concil.

SERGII IV ANNUS 2. — CHRISTI 1010.

1. *Legatio episcopi Hamburgensis ad papam*. — Millesimo decimo anno Redemptoris, Indictione oclava, a Libentio archiepiscopo Hamburgensi missus est Oddo legatus ad Sergium papam, pro definienda lite et componenda discordia inter ipsum atque Bernarium episcopum Verdensensem exortam, de parochia, Ramsola dicta, quæ intra terminos

sue esse diocesis ab hoc diceretur: contra vero eam vindicare conabatur sibi Libentius archiepiscopus, eo quod S. Ansgarius, primus provinciæ illius apostolus, fugiens incendium urbis Hamburgi, illic erexerit oratorium, collocaverit reliquias et monachorum conventum. Prævaluit apud Pontificem tanti memoria præsulis, ob idque archiepi-

scopo Hamburgensi Libentio causam papa Sergius adjudicavit. De his Adam et recentiores, qui res Saxonum sunt persecuti¹.

2. *De oleo Romæ mire scaturlente.* — Quo tempore Romæ magno prodigio in una Ecclesiarum (non describitur quænam fuerit) oleum scaturiit, ex quo vas implelum missum est ad Henricum regem. Rem gestam describamus verbis Dilmari, sincerissimi hujus temporis scriptoris; hæc enim habet²: « Alteram quoque rem quamvis multo laudabiliorem, tamen mirabilem memoriaque dignam describo. In arce Romulea, quæ omnium caput est urbium ob diversarum qualitatem causarum, in una Ecclesia, et in dextera parte altaris, ab uno pavimenti foramine per integrum diem, nullis hoc cernentibus atque stupentibus, oleum emanavit. Hujus partem Joannes Crescentii filius in ampulla quadam Henrico seniori suo et tunc regi nostro transmisit. Et quia oleum nunc pro misericordia ponitur, ut illud³: Oleum de capite tuo non deficiet; nunc pro adulatione, ut hoc⁴: Oleum peccatoris non impinguet caput meum; in hoc signo clementiam rectoris nostri abundantem, et illius patricii lasciviam latentem perpendo. Namque is Apostolicæ Sedis destructor, muneribus suis et promissionibus phaleratis, regem a Domino constitutum palam sæpe honorificavit, sed imperatoriæ dignitatis fastigium hunc ascendere multum timuit, omnimodisque id prohibere clam tentavit, quia sicut S. Gregorius asserit: Terrena altitudo confunditur, cum celsitudo cælestis aperitur. Rex etenim noster quamvis homo esset, zelum Domini habuit, et sanclarum violentas prædationes Ecclesiarum fortis armatus vindicavit; hancque benignitatem nisi cælis sibi præstitam non habuit iste terrenus, et natura et actibus voragine cænulenta traxit in prædam, quod multorum devota manus ad aram Apostolorum pro peccatis congegessit in hostiam. Qui cum non longe post obiret, duplici ultione, ut vereor, confunditur, et domino papæ securitas, regique nostro amplior potestas aperitur », nempe ad capessendum imperium. Quod cum non contigisse dicat nisi post mortem ejusdem Joannis, plane intra biennium eum ex hac vita sublatum possumus intelligere.

Eodem tempore Diltmarus, episcopus Merseburgensis in Saxonia, petit a Sergio papa et impetravit privilegia suæ Ecclesiæ, quæ in eadem Ecclesia conservari tradit, qui Diltmari res gestas conscripsit ejusdem temporis auctor: impetrasse hoc ipsum a Sergii etiam successore, Benedicto papa, idem auctor affirmat.

3. *Episcoporum bellantium pravus usus.* — Quod ad res Hispanicarum Ecclesiarum pertinet, cum in eas quoque ille pravus usus ac plane execrandus illapsus esset⁵, ut episcopi armati

certarent in acie, et quod nefas est amplius, pro Arabibus contra Arabes, ita secum bello civili pugnantibus Cordubæ principibus: certantes, Deo vindice, in prælio hoc anno gesto inter Zelumam et Almahadium principes Arabes, qui stabant pro Zeluma episcopi in ipso conflictu sunt occisi, Arnolphus Ausæ, Aetius Barcinonis et Otto Gerundæ, victorque existens Almahadius Cordubæ rex, hoc anno regnare cœpit.

4. *De Theresiæ nuptiæ regi Arabum sanctis factis.* — Eo insuper detestando amicitiae usu Christiani Sarracenis conjuncti mulua inter se fœdera nuptiarum inibant, quod et principes id facere non erubescerent. Nam qui regnabat Toleti Haddalla filius ejusdem Almahadii, in uxorem accepit Theresiam virginem a fratre Adelfonso Legionis rege invitam. Quæ femina Christiana virgineque maxime pia specimen dignum exhibuit, dum non nisi ea conditione se jungi paratam viro diceret, nisi ille, ut ipsa, ejusdem religionis consors Christianus efficeretur, aliter non consensuram. Sic falsa simplex virgo promissione decepta, quod vir fieret Christianus, duci se passa est. Ubi autem tempus advenit, promissionem illa exigens, sero tandem se delusam obnitente viro cognovit; cum illa comminata eidem divinam ultionem, si quid præter fas in invitam ac renitentem tentare præsumeret. Sed deridens libidinis æstro percitus impius ille, puellæ vim intulit: moxque offensi numinis expertus est ultionem, affectus morbo gravissimo; cujus salutem desperans, nisi causam protinus dimoveret, eandem Theresiam cum amplis muneribus ad fratrem regem sponle remisit. Quæ veste mutata, monasticam vitam professa, in Ecclesia S. Pelagii Oveti reliquum vitæ tempus summa cum laude transegit, Deo serviens summo studio. Erat autem id temporis regnum Arabum in Hispania in Toparchias plures conscissum, adeo ut si Christiani principes unanimis in eorum principes conspirassent, parvo ferme negotio eosdem penitus delevisent: sed mutuae eorum dissensionis hostes licet debiles roborarunt. Hæc omnia omnes qui res Hispaniarum sunt persecuti confirmant. Ambrosius Morales descriptum habet ejus sepulchri dignum Epitaphium, quo declaratur, pervenisse eam ad annum Redemptoris millesimum trigesimum nonum, sanctoque fine in Domino quievisse. Quod sic se habet, rudi minerva, ut ætas illa ferebat, scriptum ab homine plane imperito:

EN QUEM CERNIS CAVEA SAXA TEGET COMPACO SACRA.
HIC DILECTA DEO RECVBANS TARASIA CHRISTO DICATA
PROLES BEREMVNDI REGIS ET GELOYRAE REGINAE GENERE
ORTA CLARO PARENTATV CLARIOR ET MERITO. VITAM
DVXIT PRAECLARAM VT CONTINET NORMA. HANC IMITARE
VELIS SI BONVS ESSE CVPIIS. VEL SI OBIIT SVB DIE VII.
KALEND. MAGH FERIA IV. HORA MEDIA NOCTIS POST PER-
ACTA AETATE SAECVLI PORRECTA PER ORDINEM MVNDI
SEXTAM DA CHRISTE QVAESO VENIAM. PARCE PRECOR.
AMEN.

¹ Adam. hist. Eccl. l. II. c. 23. et l. II. c. 32. Crant. in Metrop. l. III. c. 48. — ² Dilm. l. VII. — ³ Eccl. IX. — ⁴ Psal. CXL. —

⁵ Maria. l. VIII. rerum Hisp. hoc anno.

Porro, non ut imperitus auctor scripsit, THARASIA, sed THERESIA dicta erat, cujus nomen egregia virtute ejus illustre redditum in Hispania, est propagatum in posteros, et hoc ipso sæculo vixit Theresia comitissa, quæ vitæ sanctitate, et miraculis quoque prædicata illustris, obiit anno millesimo quinquagesimo septimo, ut docet tumuli ejus inscriptio, ita ab eodem auctore descripta, quæ sic se habet luculentiori stylo:

FOEMINA CHARA DEO IACET HOC TUMVLATA SEPVLCRO
QVAE COMITISSA FVIT NOMINE THERESIA.

HAEC MENSIS IVNII SVB QVINTO TRANSIT IDVS :
OMNIS EAM MERITO PLANGERE DEBET HOMO.
ECCLESIAM, PONTEM, PEREGRINIS OPTIMA TECTA,
PARCA SIBI STRVXIT, LARGAQVE PAVPERIBVS.
DONET EI REGNVM QVOD PERMANET OMNE PER AEVVM,
QVI MANENS TRINVS REGNAT VBIQVE DEVS.
OBIIT ERA M. XCV.

Extare scribitur in Ecclesia S. Zoili, monasterii Carionensis.

Anno periodi Græco-Romanæ 6503. — Anno Æræ Hispan. 1048. — Anno Hegiræ 401, iachoato die 4 Aug., Fer. 2. — Jesu Christi 1010.

— Sergii IV papæ 2. — Henrici II reg. 9. Basil. et Const. imp. 35.

1. *Pugna ad Cordubam Christianos inter et Saracenos.* — Ad num. 3. Hoc anno *Ermengaudus* comes Urgellensis, profecturus adversus Mauros ad Cordubam, testamentum condidit *V kalend. Augusti* ad pias causas, quo magnam bonorum suorum partem Ecclesias inter et monasteria Marcæ Hispanicæ distribuit. Tum etiam varia dona fecit Ecclesiæ Aniciensi in Aquitania prima, cœnobio Conchensi in diœcesi Ruthenensi, et cœnobio Sancti Ægidii in Septimania, ut videre est in Appendice Baluzii ad Marcam Hispanicam Act. 162. Ex quo lib. 4 Marcæ Hispanicæ recte deducit, pugnam Cordubensem, ut vulgo vocatur, ante mensem Augustum pugnatum non fuisse. Quod confirmat Epitaphium *Ottonis* episcopi Gerundensis, in ea pugna cæsi, cujus mors ibi refertur ad diem primam Septembris currentis anni. Ille itaque anno *Ermen-gaudus* Urgellensis comes, suetus pugnare cum Saracenis, quos diversis præliis fatigarat, *Cordubam*, ubi regia eorum erat, profectus cum *Raimundo* comite Barcinonensi fratre suo, *Arnulfo* episcopo Ausonensi, *Aethio* Barcinonensi, et *Ottone* Gerundensi, ac pluribus aliis potentibus viris, profectus, inquam, Cordubam mense Augusto, ad eam ita infeliceiter pugnavit *kalendis Septembris*, ut et ipse et episcopi mox nominati in ea pugna ceciderint. Episcopis istis dedecori vertit Mariana lib. 8, capite 10, quod pro Barbaris, quales erant Saraceni, bellum gerent adversus Christianos. At bellum istud sacrum, uti vulgo putant, non erat tantum ea de causa susceptum, inquit Baluzius citatus, ut *Almahadium* Saracenum juvarent ad-

versus *Zulumam* imperium Hispaniæ affectantem, qui copiis auxiliaribus Sancti Castellæ comitis attol-lebatur; sed etiam ut Ecclesiam eo quo poterant modo defenderent. Superest adhuc in monasterio Sancti Cucuphatis Epitaphium *Ottonis* episcopi Gerundensis in hoc prælio cæsi, in quo a justitia, sapientia, aliisque virtutibus plurimum laudatur. Hæc ultima Epitaphii carmina:

Nam in bello Cordubensi cum pluribus aliis
Morte ruit datus ensi, cœli dignus gaudiis.
Cujus ossa sunt sepulta in hoc parvo tumulo,
Spiritusque laude multa summo vivil seculo.
Erant anni mille decem post Christi præsepia,
Quando dedit isti lucem prima lux Septembria.

2. *Floret Richardus abbas S. Vitoni.* — Ille circiter tempore, *Richardus*, natione Francus, in schola Rhemensi enutritus, et in cœnobio Vitoniensi apud Virdunum, celebrem scholam instituit, ut docet Hugo abbas Flaviniacensis in Chronico Virdunensi. Paulo post, monasticum habitum apud sanctum Vitonum tum abbate Fingenio sumpsit, et post *Fingenium* magnæ sanctitatis virum, an. miv, ut legitur in Chronico Hildesheimensi deimortuum, ad abbatiae regimen assumptus est. Ab eo tempore tam longe lateque fama ejus propagata est, ut ex omni Neustria, Austrasia, Francia et Burgundia ad eum concursus fieret, atque ad ejus scholas omni doctrinæ et virtutis frugibus refer-tas. Uno verbo hujusce viri fama tantopere incla-ruit, ut a multis magnatibus et proceribus Eccle-siasticis advocatus sit ad regenda et reformanda

cænobia, quæ a pristina virtute et regula deflexerant. *Baldricus* episcopus Leodiensis cænobium Lobienſe, *Rogerus* Catalaunensis monasterium Sancti-Petri, *Robertus* Francorum rex abbatiam Corbiensem, *Baldwinus* comes Flandrenſis quamplures abbatias ei regendas et reformandas commisit, Sancti-Petri Gandensis, Sancti-Amandi, Sancti-Bertini, Sancti-Richarii, Sancti-Jodoci, *Gerardus* denique Attrebatensis cænobium Sancti-Vedasti. « Alii filios suos ei offerebant erudiendos, ut videretur jam monasterium ejus monasteriis Nitriæ vel Ægypti conferendum pro numerositate fidelium illo confluentium, qui velut apes ad alvearia undique advolabant, diversis virtutum speciebus onusti mentes, ut illæ mellis et ceræ indiscretas cruribus et pedibus subvehunt qualitates », inquit idem Hugo Flaviniacensis. De Richardo rursus infra.

3. *Ecclesia Anglicana a Danis ad summas angustias redacta.* — Hic annus Ecclesiæ Anglicanæ luctuosissimus fuit, cum tot regum opes tot annis congestæ *Danorum* libidini servierint; et sacram virginum ædes, ubi animæ salutis corporisque puritati consulebant, perierint. Dani, ut narrat *Alfordus* ex *Huntindoniensi*, *Vigornienſi* aliisque historicis Anglicis, cum terrorem Anglis et provinciis plurimis incussissent, distraxere vires, et exercitum divisere. Hi altius flumen *Tamesim* ingressi ad *Stanam*, oppidum in *Trinobantibus*, anchoras jaciunt; inde in vicinos agros profecti per australes Saxones, ditissimam ad naves prædam advexerunt. Illi in *Eanſtangliam* navigantes, *Suffolciensem* provinciam, et *Ipswicum*, urbem nobi-

lem graviter premunt. Convenere eo e vicinis regionibus provincialium aliqui *Ulfketello* duce, parati Danos excipere. Quamobrem *tertio nonas Maii*, cum uterque exercitus egregie concurrisset, fortissime utrinque pugnatum est, donec *Turketillo* quodam, e Danis oriundo (cum Anglis tamen in Danos pugnabat) fugam arripiente, *Eſtangli* terga verterunt. Majorem paulo laudem *Icenî* meruerunt, qui venerunt e Cantabrigensi agro: nam diu viriliter præliantes, inimicum impetum fortissime sustinuerunt. Sed et ipsi tandem, multis in prælio desideratis, cedere compulsi, victoriam hosti permiserunt: « In eo prælio », inquit *Vigornienſis* ad hunc Christi annum, « gener regis *Æthelstanus*, nobilis minister *Oswius* cum filio, *Wulfrius*, *Leofwini* filius, *Eadwinus* *Alfrici* germanus, et multi alii nobiles ministri populusque innumeralis corruerunt. Dani vero loco funeris dominati, *Eastangliam* obtinuerunt. Et equites effecti tribus mensibus per totam provinciam discurrere, prædas agere, villas cremare, homines et animalia non cessabant trucidare. In paludibus etiam idem per omnia fecerunt. Exin *Theotfordam* et *Grantebriege* devastantes, cremarunt ». In illis paludibus nobilissimæ Ecclesiæ structæ erant, et regum pietate aucta monasteria, quæ quamvis ante plures annos a Danis eversa, et solo passim æquata fuissent, sequentes tamen principes, *Alfredus*, *Æthelstanus*, *Edoardus*, et præcipue *Edgarus*, rursus nobilissime erexerant atque ditarant. Quæ vero fuerint in illa palude monasteria, quæ hoc anno injuriam passa, *Danorum* impetum tulere, *Huntindoniensis* lib. 5, pag. 356, enumerat.

SERGII IV ANNUS 3. — CHRISTI 1011.

1. *Consecratio Ecclesiæ Bambergensis et Synodus.* — Annus Redemptoris millesimus undecimus Indictione incipit nona, quo ab *Henrico* rege ad dedicationem Basilicæ *Bambergensis* a se constructæ convocatur cœtus plusquam triginta episcoporum; inter quos adstitit *Joannes* patriarcha *Aquileiensis*, etiam sacra obiens; sed et qui ista scripsit etiam *Ditmarus* episcopus *Merseburgensis*, ut ipse testatur, interfuit. Hujus occasione conventus, fuit ab iisdem tunc Synodus celebrata, in qua

sedatæ sunt controversiæ illæ inter episcopos, de quibus idem auctor his verbis¹: « Post hæc Synodus hic fuit magna, in qua *Gebhardus* *Ratisponensis* Ecclesiæ præsul ab archiepiscopo suimet arguitur, et *Metensis* Ecclesiæ præsul *Theodoricus*, a rege increpatur, eo quod *Epistola* suimet hunc injuste apud papam accusaret. Hæc omnia et multa alia consilio prudenti finita sunt, et restitu-

¹ Ditm. l. VI. p. 74.

tio parochiæ tunc promissa est mihi ». Hæc Ditmarus, qui et huic Synodo libellum dedit pro recuperandis suæ parochiæ bonis; idemque subiicit in fine anni huius: « Illic, (nempe Henricus rex), magnam Synodum ob damnationem Theodorici Metensis episcopi posuit, huic ab omnibus episcopis ibi convenientibus interdictum, ut ante purgationem missam non caneret ».

2. *Tagmonis Magdeburgensis episcopi laudatissimi obitus.* — Addit etiam hoc anno Tagmonem archiepiscopum Magdeburgensem, virum sanctitate perspicuum ex hac vita migrasse, cuius virtutum catalogum simplici stylo rexit his verbis: « Quinto idus Junii non obiit, sed ad Christum, quem semper amavit, lætus abiit ». Et post multa de funere et successore subiicit ista: « Sed quia beati omnes virtutibus suis cum Christo vivunt et in hoc sæculo scriptis, non est bonum tanti Patris inclytam conversationem silentio tegere, sed veritatis luce omnibus proficue innotescere. Erat hic justus, timoratus, ac miræ charitatis, largus et fidelis, castus ac mitis, prudens et stabilis, canonicus habitu, sed monachus in omni conversatione sua: vitia in cunctis ob meliorationem aspere carpebat, bona quæque laudans. Non fuit apud modernos ullus pastor, qui confratribus suis familiarior esset: hos amavit atque coram populis laudavit. In primo ordinationis suæ anno templum Domino ædificare cœpit, presbyteris et diaconis suimet vestitum octo siclis, subdiaconis autem et inferioribus quatuor adauxit. Nisi infirmitas obsisteret, omni die missam et psalterium cantavit. Et quia jejunare ob lassitudinem non potuit, eleemosynarum multitudine redemit. In vigiliis supra modum laboravit, et quia parum manducare ob infirmitatem dentium potuit, potu quamvis mediocri facile satiabatur. Nobiles genere et moribus amavit, ignobiles autem non contempsit, sed in sua familiaritate habuit. Cultores Christi dilexit, contemptores autem ejus justo persequitur odio. Omnia sibi divina commissa excoluit, et lucrari contendit. Antequam divinum perageret mysterium, severus fuit, et post omnibus hilaris arrisit, et persæpe cum suis Kyrie eleison cantavit, etc. » Hæc et alia de viro sanctissimo, in quem tantum Patrem, sæculi huius decus et ornamentum, utinam adspicerent filii desertores. Habuit successorem Walterdum, sed qui cito, nempe hoc eodem anno, pridie idus Augusti ex hac vitia transiit, sacerdos Dei pariter laudatissimus.

3. *Supplicium sacrilegi militis.* — Inter alia autem, quæ hoc anno evenisse tradit præsens ipse cum pluribus, hæc admiranda de sacrilego milite Ditmarus ita subiicit: « Quidam vero miles cum bona Sancti Clementis vi tolleret, et inde tectum facere voluisset, in una dierum a muribus intra cubiculum impugnatur ineffabilibus. Qui primo fuste arrepto eos prohibere tentans, posteaque evaginato eos aggressus gladio, et sic nil proficiens, arca quadam (ut ipse rogavit) includitur, ac in medium

fune suspenditur; et cum exterius hæc plaga sedaret (cessaret), hic qui liber solvi debuisset, ab aliis usque ad mortem corrosus invenitur. Tunc cunctis præsentibus et postea venientibus manifestum fit, quod hunc ira Domini vindex prædicti facinoris sola consumpsit ». Præstiterunt hoc mures in corpore, quod vermis in conscientia, inevitabiles ultores immissi divinitus, quousque culpa horum nutrix pœnitentia expiaretur. Subiicit vero de obitu sanctissimæ feminae Luidgardis, ejus consanguineæ, quam migraturam ad Deum oleo sancto ex antiquo Ecclesiæ ritu perunxit: quæ idib. Novembr. vitæ accepto responso, ad Deum migravit. Plura alia subinfert auctor de suffragiis adhiberi solitis pro fidelibus defunctis, nunquam cessuris vacuis.

4. *Danorum persecutio in Ecclesia Anglicana et inde virtutum prodigia.* — Adsunt vero jam tempora illa infestissima Ecclesiæ Anglicanæ, quæ prædicta fuere a S. Dunstano¹. Etenim hoc anno Dani, qui anno superiori invaserunt Angliam, potiuntur Cantuariensi civitate, atque diram stragem, sævientes in Christianos, exercuerunt. Petamus ista a Rogerio, fidelissimo antiquorum historicorum, qui in priori Annalium parte habet ista: « Eodem anno millesimo undecimo, Danorum exercitus, vastata magna parte Angliæ, ad ultimum inter Nativitatem S. Mariæ et S. Michaelis festivitatem, urbem Cantuariam circumvallantes obsederunt. Vicesimo autem obsidionis, die per insidias Elmerici archidiaconi, quem S. Elphegus, ne morti traderetur, prius eripuit, pars civitatis incenditur, exercitus ingreditur, urbs capitur. Alii ferro jugulantur, alii flammis consumuntur, plures quoque de muris præcipites dantur, nonnulli per verenda suspensi deficiunt; matronæ criminibus per plateas civitatis distractæ, demum flammis injectæ moriuntur; parvuli a matrum uberibus avulsi, aut lanceis excipiuntur, aut superacto caro minutatim conteruntur. Interea archipræsul Elphegus capitur, vincitur, tenetur, et variis modis affligitur. Hilmarus abbas monasterii S. Augustini abire permittitur, capiuntur Goddvinus Rhoffensis episcopus, Leonfrana abbatisa monasterii S. Mildrinæ, Estregus regis præpositus, monachi quoque et clerici, populusque innumeralis utriusque sexus. Exin Ecclesia Christi spoliata comburitur, grex monachalis, et turba virilis, sed et muliebris, necnon infantilis decimatur, novem trucidantur, decimus vitæ reservatur: quatuor monachis et octingentis viris decimatorum summa perficitur.

5. « Populo cæso, urbe spoliata et tota cremata, archipræsul Elphegus vinctus extrahitur, vi impellitur, graviter sauciatur. Hinc ad classem ducitur, post in carcerem truditur, ibique septem mensibus affligitur. Interim ira Dei in homicidam populum desævians, ex his duo millia per diros internorum cruciatus prostravit. Cæteri quoque simili modo percussi, a fidelibus commonentur, ut pontifici

¹ Osb. in Dunstan. apud Sur. tom. II. die XIX Mar.

satisfaciant, sed differunt. Prævalebat interim clades, et nunc denos, nunc vicanos, nunc plures similiter absumebat ». Quomodo autem contigerit S. Elphegum post carcerem septem mensium gloriosum consummare martyrium, suo loco dicturi sumus anno sequenti quo evenit.

6. Hic modo quæ Osbertus monachus Cantuariensis de curatis pane benedicto Danis, terminibus viscerum laborantibus, refert, sic accipe¹: « Lætati igitur consilio, mox ad episcopum currunt, et de perpetrato facinore cum lacrymis veniam petunt, et de carcere eum extrahentes, ad publicos populi conspectus cum honore deducunt. Et ait illis episcopus: Etsi vestra insatiabilis crudelitas veniam non promeretur, tamen quod non facere deceat, exemplo Domini edocemur, qui cum suorum dignatus esset lavare pedes discipulorum, non illum exclusit a quo se tradendum esse præscivit, imo ipsum sanctissimo pane cibavit; Pharisæorum ministros potentiæ suæ verbo elisit, sed confestim eosdem erigendo sanavit: et quod magnæ bonitatis insigne est, quos quotidie mandatis cælestibus pertinaci animo cernit resistere, eos in cælo sedens adhuc patitur vivere, imo humanis rebus plusquam cæteros præstare. Quapropter, quoniam exemplorum illius devotus cupio imitator existere, oblitus incendia civitatis, innocentium cædes, oblitus, inquam, quæ in me facta est præteritæ impietatis, sicut ipse Patrem pro suis crucifixoribus, ita ego pro meis tortoribus ipsum interpellabo. Afferte ergo panem statim vobis reddendum salutarem, quatenus ex hoc refecti, et cupitæ salutis benefi-

cium adepti, aut gratias Salvatori reddatis, aut sceleratiores blasphemi remaneatis. Et dato omnibus pane a se benedicto, omnes ab exitiali liberavit clade ». Hucusque de sanatis hostibus Danis per S. Elphegum Osbertus. Cætera anno sequenti.

7. *Terræmotus Constantinopoli.* — Quod ad res pertinet Orientales; hoc eodem anno, Indictione nona, mense Januario, inquit Curopalata, « Constantinopoli fuit maxime horribilis terræmotus, et concussa fuit terra usque ad nonam Martii mensis diem, qua circiter decimam diei horam fuit concussio adeo horribilis, et motus adeo horrendus, et in ipsa regia urbe et in agris, ut ceciderint spheræ templi Sanctorum-Quadräginta, et Sanctorum-Omnium, quas imperator statim instauravit. Hæc autem significabant mox in Italia futuram seditionem. Princeps enim quidam Bari, nomine Meles, concitato in Longobardia exercitu, adversus Romanos arma sumit, etc. » Hic est ille quem Leo Ostiensis Melum appellat¹, ejus rebellionem adversus Græcos, et progressus ejus postea, cum auxiliares copias Northmannorum adscivit, idem narrat, asseritque ea occasione eosdem Northmannos sibi Apuliam vindicasse, atque diu tenuisse, tyranniceque dominatos, ut quæ dicturi sumus in Leone Nono declarabunt. Reliquas autem res gestas Græcorum imperatorum adversus Bulgaros et alios Barbaros, per annos singulos, quod institutum nostrum non attingant, describere prætermitimus: consulat eundem Curopalatam, vel Cedrenum qui ex eo descripsit, qui hæc cupit.

¹ Leo Ost. l. II. c. 38. 40. 42.

¹ Osber. in Vita S. Elphegi die XIX Apr. apud Sur. tom. II.

Anno periodi Græco-Romanæ 6504. — Anno Æræ Hispan. 1049. — Anno Hegiræ 402, inchoato die 4 Aug., Fer. 7. — Jesu Christi 1011.

— Sergii IV papæ 3. — Henrici II reg. 10. Basil. et Const. mpp. 36.

1. *Ecclesia Bambergensis die natali imp. dedicatur.* — A num. 1 ad 4. Ditmarus lib. 6, pag. 74, dedicationem Ecclesiæ Bambergensis ab Henrico imp. ante aliquot annos sede episcopali decoratæ his verbis narrat: « Peracta in civitate Babenbergensi Ecclesia majore, cum natalitius regis dies esset, et xxxv jam inciperet annus, II non. Maii, omnis primatus ad dedicationem istius aulæ ibidem congregatur, et sponsa hæc Christi per manus Joannis, patriarchæ de Aquileia, et aliorum plus-

quam xxx episcoporum dedicatur. Illis ego peccator interfui ». Ubi Ditmarum de rebus hoc anno gestis verba facere indicant Marianus Scotus in Chron. et chronographus Wirzburgensis, qui hanc dedicationem cum præsentī anno alligant, quibus major hæc in re fides, quam Lamberto Schafnaburgensi, annalistæ Einsidlensi et chronographo Hildesheimensi, qui eam in sequentem differunt. Dies quidem secundus nonas Maii hoc anno in Dominicam incidit, quibus diebus dedicationes hoc tempore

plerumque factæ; verum ex hoc caractere nihil certi erui potest, cum dies ille eligi potuerit, quod cum die natali imperatoris concurreret. Ait enim Ditmarus dedicationis illius diem natalitium regis fuisse. Cumque subdat eum tunc ingressum esse annum ætatis xxxv, si ea dedicatio hoc anno facta, natus erat *Henricus* imperator anno nongentesimo septuagesimo septimo, deceptusque est Aventinus, qui lib. 5, pag. 309, scribit eum anno dclxxii in lucem prodiisse, quod ante eum Siffridus in sua Epitome jam litteris mandarât, cum dicat eum mortuum esse anno ætatis lii.

2. *Hæc dedicatio diversa ab altera an. mxiix facta.* — His tamen obstare videtur quod scribit Wippo in Vita Conradi Salici imp., qui pag. 423, relata sancti Henrici imperat. morte, subdit: «Cujus corpus de Saxonia ad sepeliendum ducitur ad locum, qui dicitur Padenberg, ubi ipse bono zelo ac studio fundavit episcopatum omni Ecclesiastico apparatus insignem. Ad ejus dedicationem dominum Apostolicum nomine Benedictum (hujus nominis VIII) adseivit, ejus auctoritate ad tutandum locum Privilegia publica stipulatione confirmavit». Benedictus enim anno mxi post mensem Maium Pontifex Romanus renuntiatus fuit, ut eo anno videbimus. Verum Wippo, non de dedicatione Majoris Ecclesiæ Bambergensis a Joanne archiep. Aquileiensi facta, sed de consecratione Ecclesiæ Sancti Stephani, quam Henrici imp. efflagitatu *Benedictus VIII* anno mxi Bambergæ peregit, sermonem habet. Subobscurius tamen Wippo loquitur, cum *sanctus Henricus* non in Basilica Sancti Stephani a se exstructa, et a Benedicto VIII consecrata, sed in Basilica Sancti Petri a se pariter ædificata, et a Joanne archiep. Aquileiensi dedicata sepultus fuerit, ut ex Vita sanctæ Cunegundæ, Hermanno Contracto, aliisque liquet.

3. *Dani Cantuariam obsident et devastant.* — Ad num. 4 et seq. Danorum in Angliam irruptiones, anno miii inchoatas et sequentibus continuatas, Baronius a præsentī tantum exorditur, narratque ex Hovedeno ad hunc Christi annum, obsidionem urbis Cantuariensis ejusque devastationem, quæ «inter Nativitatem sanctæ Mariæ et sancti Michaelis festivitatem» contigit: quo tempore *sanctus Elphegus* archiepiscopus Cantuariensis a Danis captus est, annoque sequenti ab iisdem interfectus. Viderat Baronius apud Surium ad diem xix mensis Aprilis, quo sanctus præsul colitur, ejus Vitæ et Passionis Compendium sub Osberni Ecclesiæ Cantuariensis monachi nomine editum. Verum post Baronii mortem, Bollandus ad diem xix Aprilis ex Codice Ms. Vitam sancti Elphegi, ex qua Synopsis illa collecta, publicavit. Scripta ea ab Osberno monacho, jubente Lanfranco, anno MLXX archiepiscopo Cantuariensi creato. Præfatur autem Osbernus se tradere, «quæ de glorioso Christi martyre Elphego ipse agnovit, et accepit ab his qui videntur, aut a videntibus habuerunt». Elphegus itaque splendidis natalibus exortus religionis mo-

nasticæ habitum induit, et cum habitu vitam composuit. «Culpabat non modicum», inquit Osbernus, «qui sæcularem habitum mutarent, vitam non mutarent». Post sancti Ethelwoldi Vintoniensis episcopi mortem, agente sancto Dunstano Cantuariensi archiepiscopo, in illius locum subrogatus est, annoque «incarnatæ divinitatis millesimo sexto, Indictione quarta», de sede Vintoniensi ad Cantuariensem translatus, paucis diebus evolutis Romam profectus est, Joanne XVIII Ecclesiam Romanam regente: «Perveniens Romam», inquit Osbertus, «Romano Pontifici præsentiam exhibuit, colloquia quæsit. Qui dum omnem loquendi opportunitatem tribuisset, tanto inter loquendum sibi fœderati sunt amore, ut eum idem Apostolicus propria Apostolatus sui stola circumdaret, et ad Memoriam cælestis clavigeri coram omni Romano senatu honoraret». Reversus est in Angliam quo tempore Danus per eam spargitur, «et quidquid obstaret, tum cæde, tum incendio comminuit». In tanto rerum discrimine «Elphegus, id quod factu difficillimum erat, hostes adire solebat, verbum eis vitæ prædicare, captivos dato pretio redimere, et eos quos fames opprimebat alere». Tandem hoc anno Cantuaria ab eisdem obsessa, et *vicesimo obsidionis die* occupata.

4. *S. Elphegus Cantuariæ archiep. a Danis captus et male habitus.* — Capta urbe, super omnia in minorem ætatem crudelitas desævit, parvuli a matrum uberibus avelluntur, aut lanceis excipiuntur, aut superacto plastro minutatim conteruntur. Innumeris manibus fortissimus athleta capitur, dum petit ut innocenti ætati parcatur, et in se ira desæviat, qui eos multo milite spoliavit. «Igitur ex omni numero», inquit Osbernus, «qui ad octo millia hominum prætendebatur, quatuor solummodo monasticæ professionis, octingentos autem inferioris ordinis viros remansisse accepimus, quos primum beneficii gratia pro decimis computatos, deinde Dani verberibus acriter exaratos, aut pecuniaria redemptione dignos judicaverunt, aut servilibus mancipandos operibus secum obduxerunt. Quibus ea solum re Danos existimo pepercisse, ut nullis temporibus deessent, qui cruentam illorum victoriam prædicare possent». Paucis interpositis: «Ducitur hostia Christi (nempe Elphegus) de urbe ad classem, de classe ad carcerem, de carcere ad iniquitatis judicem. Carcerem pronuntio, quem horror tenebrarum cæcavit, quem angustia parietum arctavit, quem ranarum importunitas fœdavit. Ibi virum menses septem duodeno militum septum servavere, rati illum Ecclesiæ patrimonia spoliaturum, ac pro sui liberatione eis daturum».

5. *Miraculum ab eo anno sequenti patratum.* — Ad num. 6. «Interea cœpit ira Omnipotentis Dei in homicidam populum (id est Danos) adeo desævire, ut parvo temporis intervallo, duobus eorum millibus per diros internorum cruciatus prostratis, cætera quoque multitudo, simili morbo percussa, simile experiretur exitium». Commoniti

Dani a fideli populo, ut reos se in Christum agnoscant, et Pontifici satisfaciunt, tandem Concilium convocant. «Erat autem sollemnis ille consiliationis dies, in quo sanctissimum Corporis et Sanguinis sui mysterium Salvator discipulis commendavit », nempe dies decima Aprilis; cum anno sequenti, quo hæc contingere et ad quem revocanda sunt, in diem XIII Aprilis Pascha inciderit. *Elphegus*, explicata mansuetudine erga Judam proditorem aliosque, qui eum comprehenderant, oblitus incendia civitatis, et quæ in se acta fuissent, jussit afferri panem, eoque benedicto ac inter omnes distributo, « omnes de exitiali liberavit clade. Qui et liberati ab homine confortati, nihilominus perstiterunt, in quo cæpto constituerunt », inquit Osbernus; sed hæc anno sequenti, ut mox dixi, peracta.

S. Macarius archiep. Antiochenus Gandavi floret. — Vitam sancti Macarii archiepiscopi Antiocheni, de cujus morte anno sequenti cum Baronio agemus, scripsit monachus anonymus Gandensis, jussu *Eremboldi* abbatis Gandensis, qui Otwinio XVI kalend. Julii anno DCXCVIII demortuo successit. Eam eruit e vetusto Ms. Henschenius ad diem x Aprilis, quo et alteram ejusdem sancti Vitam jussu *Sigeri* abbatis Gandensis post elevationem corporis ejus a monacho Gandensi elucubratam etiam exhibet. *Eremboldus* autem anno MXIX successit *Orthoboldus* ut docet *Chronicon* Ms. ejusdem cœnobii. Existimat Henschenius *Macarium* e Hierosolymitana urbe, ubi male a Saracenis habitus fuerat, hoc anno *Gandavum* venisse. Verum cum sepulchrum Hierosolymitanum Domini nostri J. C. anno MX, tertio kalendas Octob. eversum fuerit, et sanctus hic peregrinus, uti in secunda ejus Vita dicitur, Hierosolymis in Bavariam venerit, ibique anno integro manserit, postea Moguntiam, Colo-

niam, Mechliniam, Cameracum, Torcanum, tandem que Gandavum perrexerit, ubi post aliquam moram die decima mensis Aprilis anni sequentis e vivis excessit, manifestum est *Macarium* annos aliquot ante empli Hierosolymitani eversionem, Gandavum adventasse. Præterea in posteriori Vita dicitur, famam sancti viri pervenisse usque ad sanctum patriarcham Joannem, dum ille per Palæstinam peregrinaretur, et loca sacra inviseret, subditurque : « A sancto patriarcha honorifice detentus, aliquandiu ibi est demoratus. Delectabat enim dormitorium Salvatoris et locus Calvariae ». Addit idem anonymus *Macarium*, cum disputaret cum Saracenis, carceri inclusum fuisse, ac postea e Palestina discessisse. Ex quo intelligimus primo, sanctum antistitem Hierosolymis fuisse ante sepulchri Hierosolymitani eversionem, et ante mortem Jereniæ patriarchæ Hierosolymitani tunc occisi, ut supra diximus. Secundo, *Joannem* istum, omissum a Papebrocio in *Hist. Chronol. patriarcharum Hierosol. sedisse ante Jeremiam*, non vero post eum, ut putavit Henschenius in *Notis* ad posteriorem Vitam sancti Macarii. In priori Vita, ubi paucissima de eo habentur, legitur, *Macarium* fuisse Antiochiæ archiepiscopum, quæ urbs Armeniæ flos est, inquit anonymus. Quare cum vicinæ provinciæ subinde sub Armenia comprehensæ fuerint, et ibi Antiochia Pisidiæ Metropolitæ extiterit, non videtur dubitandum, quin in ea *Macarius* sederit. Nam si patriarcha Antiochenus extitisset, neque *Eremboldus* abbatem Gandensem, qui eum viderat, neque monachum qui priorem Vitam ejus scripsit, quemque *Eremboldus* de iis quæ ad sanctum præsulem spectabant edocuerat, id latuisset, vel ab eodem tacitum esset.

BENEDICTI VIII ANNUS 1. — CHRISTI 1012.

1. *Sergio IV succedit Benedictus VIII papa.* — Anno Christi millesimo duodecimo, Indictione decima, die decima tertia mensis Maii moritur *Sergius* papa, cum sedisset annos duos, menses octo,

et dies tredecim ut, apparet ex ejus sepulchri inscriptione, quæ habetur in Lateranensi Basilica istis versibus :

QVISQVIS AD HAEC TENDIS SYBLIMIA LIMINA LECTOR,
ET CAPERIS TANTAE NOBILITATE DONVS,

INTENTIS OCULIS AVLAE PERCVIRERE RARAS
 DESINE MATERIAS, ARTE IUVANTE MANVS.
 LVMINA CVM GRESSV PRVDENTE SECVTA COERCENS
 RESPICE SOLLICITVS QVID VELIT HIC TITVLVS.
 HIC TVMVLATA IACENT PASTORIS MEMBRA SERENI,
 QUEM DECVS ECCLESIAE CONTVLIT OMNIPOTENS.
 PAVPERIBVS PANIS, NYDORVM VESTIS OPIMA,
 DOCTOR ET EGREGIVS QVI FVIT IN POPVLO.
 IVRA SACERDOTI LAETAS DVM VIDIT ARISTAS
 COETIBVS AEQUAVIT NAVIGER ANGELICIS.
 ALBANVM REGIMEN LVSTRO VENERABILIS VNO
 REXIT, POST SVMMVM DVCITVR AD SOLIVM.
 IN QVO MVTATO PERMANSIT NOMINE PRAESVL,
 SERGIVS EX PETRO SIC VOCITATVS ERAT.
 DVCTVS MENTE PIA IESV, DIC PARCE REDEMPTOR,
 VTQ. VICEM CAPIAS, DIC, DEVS HVNC HABEAS.
 QVI SEDIT ANNOS II ET MENSES VIII ET DIES XIII. INDICION. X.
 ANNO DOMINICAE INCARNATIONIS MILLESIMO DECIMO III.

2. Sic incipiens annum ab Incarnatione Domini, hoc anno, xxv Martii. Hoc etiam anno Marianus Scotus, Hermannus et Sigebertus ponunt Benedicti episcopi Portuensis ingressum, sicut nos posuimus. Caeterum inspectis diplomatibus Sergii et ipsius successoris Benedicti, alia die et mense, et sequenti potius anno, qui et notatus habetur in fine Epitaphii, Sergium papam oportuit mortuum esse. Extat enim ejusdem Sergii Diploma de pallio concessio Michaeli archiepiscopo Salernitano, datum hac Indictione, decima sexta mensis Junii. Nam in fine Diplomatis ista leguntur:

3. « Scriptum per manus Joannis seriniarii sanctae Romanae Ecclesiae, in mense Junio, Indictione decima ». Et paulo post ita: « Datum decimo quinto kalendas Julii per manum Gregorii episcopi et bibliothecarii sanctae Sedis Apostolicae, anno, Domino propitio, Pontificatus domini Sergii Quarti papae in sacratissima Sede beati Petri Apostoli tertio, Indictione decima ». Ita ibi Diploma inter vetera monimenta Vaticanae Bibliothecae extat. In quibus et duo alia item reperiuntur Diplomata ejus successoris Benedicti Octavi papae, data ad Michaelis successorem Benedictum archiepiscopum Salernitanum, cum eidem pallium tribuit: quorum primum cum datum habeatur, anno quarto ejusdem papae Benedicti, Indictione decima quarta, die septima mensis Aprilis; sequens vero datum ad Amatam Juniozem ejusdem Ecclesiae archiepiscopum anno octavo ejusdem Benedicti, Indictione tertia, die xxvi mensis Decembris: necessario inferitur non hoc anno, sed sequenti eundem Benedictum sedere coepisse. At non pigeat hic describere eorumdem Diplomatum tempus, quo data reperiuntur. Illud ad Benedictum in fine sic habet:

4. « Scriptum per manum Benedicti notarii regionarii et seriniarii S. Romanae Ecclesiae mense April., Indictione decima quarta ». Et paulo post sic, ut sequitur:

« Datum VII kalendas Maji per manus Petri

episcopi Ecclesiae Praenestinae et bibliothecarii sanctae Romanae Ecclesiae, Indictione decima quarta, anno, Deo propitio, Pontificatus domini nostri Benedicti summi Pontificis et universalis Octavi papae in sacratissima Sede beati Petri Apostoli quarto, imperii domini Henrici imperatoris Augusti anno tertio, Indictione decima quarta, mense jam dicto Aprilis, die septima ». Qua ratione (ut dictum est) non nisi anno sequenti oportuit Benedictum creatum esse Pontificem. Concordat pariter aliud ejusdem Pontificis Diploma ad Amatam archiepiscopum datum, in cujus fine legitur ista:

5. « Scriptum per manus Stephani notarii regionarii et seriniarii sanctae Romanae Ecclesiae mense Decembri, Indictione tertia ». Et infra:

« Datum sexto kalendas Januarii per manus Benedicti episcopi Portuensis et bibliothecarii sanctae Apostolicae Sedis, anno, Deo propitio, Pontificatus domini Benedicti sanctissimi Octavi papae, octavo, imperante domino piissimo imperatore Augusto Henrico anno sexto, Indictione tertia, mense Decembris, die xxvi ». Ex quibus pariter intelligis, anno sequenti potius Benedicti papae Octavi Sedis initium collocandum fore, quo numerari coeptos esse annos Pontificatus ipsius apparet, quibus pacifice sedere coepit. Attamen quod in recitato Epitaphio sedisse tantum ponitur annos duos et menses octo, hic cum caeteris ponimus ejus obitum et Benedicti successoris ingressum, absque aliquo tamen praedjudicio veritatis, cujus in primis et in omnibus habendam esse rationem, duxerimus semper.

6. *Schisma Gregorii adversus Benedictum, qui adit Henricum regem.* — Fuit autem schisma in Ecclesia Romana in Benedicti hujus creatione, cum adversus eum contra sacros canones crearetur Gregorius, qui pollens potentia Romanorum, expulit ab Urbe Benedictum; qui ad Henricum regem se contulit, cum tunc esset Palthi, seu Palithi, ubi Natalem diem Redemptoris ipsum regem

celebrasse, auctor est Ditmarus¹. Locus hic erat in Saxonia, haud longe a Merseburg, ut ex eodem auctore percipitur. De his enim hæc idem Ditmarus his præsens habet²: « Ab omnibus sacerdotibus summis adventus regis, (in Urbem scilicet), admodum desideratur, sed diversorum reluctatione hostium diu tardatur. Benedictus sit in cunctis operibus suis omnipotens Dominus, qui Romanam a multis temporibus depressam, tali pastore consolari et pacificare dignatus est. Namque papa Benedictus Gregorio cuidam in electione prævaluit; ob hoc iste ad Nativitatem Dominicam ad regem in palatii venit, cum omni paratu Apostolico, expulsionem suam omnibus lamentando innotescens. Hujus crucem rex in suam suscepit custodiam, et a cæteris abstinere præcepit, promittens sibi, cum ipse illuc veniret, hæc secundum morem Romanum diligenter finire ». Hæc de schismate, et adventu Benedicti ad Henricum Germaniæ regem Ditmarus, qui præsens cuncta intuebatur. Quomodo autem ad restituendum ipsum papam Benedictum in Sedem suam idem rex Romanam se contulerit, dicemus anno sequenti.

7. *Slavorum defectio a fide Christiana et multorum martyria.* — Illo anno, qui et decimus numeratur regni Henrici, contigit Ecclesiam Saxonie fluctibus agitari, et coepisse Slavorum gentem a Christiana fide deficere. Quomodo id acciderit, ex Helmoldo hujus temporis scriptore rerum Slavorum sic accipe³:

8. « Anno regni ejus decimo mortuus est dux Saxonie Benno, vir omni probitate conspicuus, et strenuus Ecclesiarum defensator: cujus principatus hæres factus est Bernardus filius ejus, licet a paterna felicitate divertit. Ex illo enim tempore, quo dux constitutus est in hac regione, nunquam cessavit discordia et perturbatio: quoniam dux Henrico imperatori rebellare ausus, totam secum ad rebellandum Cæsari movit Saxoniam. Deinde insurgens in Christum, omnes Ecclesias Saxonie terruit atque turbavit, illas præcipue, quæ in memorata rebellione ipsius malitiæ noluerunt applicari.

9. « Accessit his malis, quod idem dux, tam paternæ quam avitæ devotionis quam erga Slavos habebant penitus immemor, gentem Winutorum per avaritiam crudeliter opprimens, ad necessitatem paganismi coegit. Sane eo tempore Slavorum dominio potiti sunt Theodoricus marchio, et dux Bernardus, illo quidem Orientalem, isto Occidentalem possidente provinciam, quorum ignavia Slavos coegit fieri desertores. Rudes enim adhuc in fide gentilium populos, quos optimi quondam principes cum magna lenitate fovierant, temperantes rigorem his quorum propensius insistebant salutis, isti tanta crudelitate insectati sunt, ut excusso tandem servitutis iugo, libertatem suam

armis defendere cogerentur ». Porro de his agens Adam ejus temporis scriptor, Bennonis ducis Saxonie obitum contigisse cum dicat anno vicesimo secundo Libentii archiepiscopi Hamburgensis¹, utique anno decimo post millesimum Redemptoris oportuit contigisse. At quod magis dolendum, non solum a fide defecerunt tunc Slavi, sed redditi sunt more apostatarum adversus fideles sævissimi. Nam quam ingentem ac plane acerbissimam de Christianis exercuerint carnificinam, sic accipe ab Adamo ipso; qui jam ab obitu Tertii Ottonis ceptam eorum defectionem ita describit:

10. « Post mortem ejus regnum in contentione remansit. Tunc vero et Slavi a Christianis iudiciis plus justo compressi, excusso tandem iugo servitutis, libertatem suam armis defendere coacti sunt. Principes Winutorum erant Mizzidrog, et Mistrowoi, quorum ductu seditio inflammata est. His ducibus Slavi rebellantes, totam primo Nordalbingiam ferro et igne depopulati sunt: deinde reliquam peragrantes Slavoniam, omnes Ecclesias incenderunt, et ad solum usque diruerunt: sacerdotes autem et reliquos Ecclesiarum ministros variis suppliciis enecantes, nullum Christianitatis vestigium trans Albiam reliquerunt. Apud Hamaburg, eo tempore et deinceps multi ex clero et civibus in captivitatem abducti, plures etiam interfecti propter odium Christianitatis. Narravit nobis diu memorandus rex Danorum, ut qui omnes Barbarorum gestas res in memoria tenuit, ac si scriptæ essent, Aldingurg civitatem populosissimam de Christianis inventam esse: Sexaginta, inquit, presbyteri, cæteris more pecudum obtruncatis, ibi ad ludibrium servati sunt, quorum major loci præpositus Oddor nomen habuit, noster consanguineus. Ille igitur cum cæteris tali martyrio consummatus est, ut cute capitis in modum crucis incisa, ferro cerebrum singulis aperiretur: deinde ligatis post tergum manibus, professores Dei per singulas civitates Slavorum tracti sunt, aut verberare, aut alio modo vexati, usque dum deficerent. Ita illi spectaculum facti et angelis et hominibus, in stadii medio exhalaverunt victorem spiritum. Nulla enim in hunc modum per diversas Nordalbingorum provincias tunc facta memorantur, quæ scriptorum penuria habentur pro fabulis. De quibus cum amplius regem interrogarem: Cessa, inquit, fili, tantos habemus in Dania vel Slavonia martyres, ut vix possint libro comprehendere. Omnes igitur Slavi, qui inter Albiam et Odoram habitant, per annos septuaginta et amplius Christianitatem coluerunt, omni tempore Ottonum, talique modo se abcederunt a corpore Christi et Ecclesiæ, cui ante conjuncti fuerant. O vere occulta super homines Dei judicia, qui miseretur cui vult et quem vult indurat²! Cujus omnipotentiam mirantes, videmus eos ad Paganismum esse relapsos, qui primi crediderunt, illis conversis ad Christum, qui no-

¹ Ditm. I. vi. p. 80. — ² Ibid. in fine. — ³ Helm. Chron. Slav. I. 1. c. 16.

¹ Adam. I. II. c. 32. — ² Rom. ix.

vissimi videbantur etc. Hæc facta sunt addit ultimo tempore senioris Libentii, sub duce Bernardo filio Hermanni, qui populum Slavorum graviter afflixit¹. » Habet eadem Helmoldus in Slavorum Chronico totidem ferme verbis².

11. *S. Elphegi martyrium per Danos, qui proinde pœnas luunt.* — Locupletata est etiam et illustrata hoc anno Anglia sanguine martyrum, quo sanctus Elphegus Cantuariensis archiepiscopus plurima passus tandem martyrium consummavit: de quo ista Rogerius in priori Annalium parte: « Anno millesimo duodecimo, perfidus dux Danorum Edricus Streona et omnes Angliæ primates ante Pascha Lundoniæ congregati sunt, et ibi tamdiu morati sunt, quousque tributum Danis promissum, quod erat quadraginta octo librarum, persolveretur. Interea sacrosancto Dominicæ requiei sabbato, archipræsuli Elphego a Danis proponitur conditio, ut si vita et libertate velit potiri, tria millia librarum persolvat. Illo nolente, necem ejus usque ad aliud sabbatum protelant, quo adveniente, adversus illum exarserunt ira magna: et quia nimis vino inebriati fuerant, et quia prohibuerat ne quis pro sua redemptione quidquam daret eis: proinde carcere educitur, et ad eorum concilium protrahitur. Quo viso, mox illi de sedibus prosiliunt, aversis securibus illum dejiciunt, lapidibus, ossibus, bovinis capedinibus obruunt. Ad ultimum quidam Thrum nomine, quem confirmarat pridie, impia motus pietate, securim capiti illius infixit: qui statim in Domino decimo tertio kal. Maii obdormivit, et victorem spiritum cum triumpho martyrii direxit ad cœlos: cujus corpus die sequenti Lundoniam defertur, a civibus honorifice suscipitur, et ab episcopis Ednotho Lincolnensi, et Albuno Lundeniensi in Ecclesia Sancti Pauli sepelitur ». Illicusque Rogerius de S. Elphegi martyrio. Addit his miracula Matthæus Westmonasteriensis, cæteris autem locupletius Osbertus in Vita ipsius, quos consulant qui uberiora cupiunt: ista summam perstricta modo satis ex Rogerio enarrasse. Sed jam diram cœlitus immissam vindictam in eos, qui in sanctissimum virum peccarunt, ex Osberto reddamus, qui ait:

12. « In ejus autem mortis auctores in tantum ira Dei desœvit, ut quidam dux propria se manu interimeret, alius gutturi suo stylum infigeret, presbyter pertinaciter crucem abscondens martyris, gladio occideretur, alius ejusdem ordinis sandalia episcopi temere portans, a dæmone coram omni populo vexaretur. Et factum est ut tam vehementens cunctos Danos principes formido invaserit, ut vix eos terra teneret, sed maritimis se tempestatibus dantes, existimarent in pelago martyris iram effugere posse, quos ab ejus ira tellus tueri non posset. Sed mox ut in altum perducti fuere, centum sexaginta naves adversis ventorum flatibus actæ, in profundum maris demersæ sunt: porro

sexaginta quinque ad ignotas appulsæ regiones, quasi qui insidiarum causa venissent, ab incolis miserabiliter interfecti sunt. Remansit autem in Anglia pessimus Turkillus malorum princeps, paucotempore prædo futurus, sed in æternum damnati spiritus præda mansurus ». Hæc Osbertus usque ad Canuti in Angliam adventum. At quæ insuper hoc anno post necem martyris perpetrata ait Matthæus Westmonasteriensis, de inmani ultione quæ consecuta est Danos, sic accipe:

13. « Hoc quoque anno, Huna quidam regis Angliæ Ethelredi militiæ princeps, vir strenuus et bellicosus, qui sub rege regni negotia disponenda susceperat, videns Danorum insolentiam, qui jam post pacem factam per totam Angliam adeo superbiendo invaluerant, quod uxores virorum nobilium et filias vi opprimere, et ubique ludibrio tradere præsumperant, accessit perturbatus ad regem, et querelam super his disposuit luctuosam. Tunc rex non mediocriter commotus, ejusdem Hunæ consilio misit litteras ad omnes regni fines, mandans nationibus singulis et universis, ut sub una die, in festo scilicet S. Britii episcopi, omnes Dani per Angliam constituti furtivo impetu morti traderentur, ut simul et semel de oppressione Danica omne genus liberaretur Anglorum. Sicque Dani, qui firmo fœdere paulo ante utrimque jurato, cum Anglis pacifice habitare debuerant, opprobriose nimis sunt perempti, mulieres cum liberis ad domorum postes allisæ miserabiliter animas effuderunt. Cum igitur hujus decreti sententia apud urbem Lundoniensem absque misericordia exsequeretur, fugerunt multi Danorum ad quamdam Ecclesiam in civitate; ubi omnes sine pietate ipsis adstantes altaribus sunt perempti ». Hæc de internecione Danorum. Subjicit vero de aliis, qui fugientes ad naves, et in Daniam redeuntes provocarunt alios, qui in Angliam venirent, quod et factum est sub Suano tyranno. Vindicta autem, quæ secuta est Turgillum ducem interfectorem Elphegi, suo loco dicetur.

14. *Lievizo archiepiscopus Bremensis et S. Macharius patriarcha Antiochenus vita functi.* — Hoc eodem anno pridie non. Febr., ex hac vita ad Deum migravit Bremensis archiepiscopus Lievizo nomine, vir sanctitate præclarus, multiplici nomine commendatus, sed ex eo potissimum, quod Benedictum Romanum Pontificem sub Ottone Primo imperatore exulem in Germania conveniens, tantum abfuit ut erubuerit catenam ejus, quod etiam ipsi usque ad obitum fidelissime tanquam Christi vicario, summa fide ac diligentia famulatus sit, ut ex verbis ipsius testatus est Ditmarus¹, de quo post multa: « Fuerat enim unus ex numero eorum, quos ut nubes et quasi columbas Propheta miratur suas volare ad fenestras. Ille enim ob vigiliarum et jejunii assiduitatem dum adhuc vale-ret, quasi mortuus ignotis videbatur. Ad altare

¹ Bennonis, habet Helm. — ² Helm. Chron. Slav. l. i. c. 26.

¹ Ditm. l. vi. p. 81.

Dominicum nunquam sine oblationibus accessit, assiduus populi monitor, et hilaris omnibus arrisitor. Is ergo Dominum promeruit, quod inter continuas piratæ furentis incursiones, sedes sua hactenus permansit intacta». Hæc Ditmarus.

15. Hoc anno, quarto idus Aprilis moritur S. Macarius patriarcha Antiochenus, cujus res gestas ejusdem sæculi¹ auctor conscripsit post annos ab ejus obitu quinquaginta quinque. « Fuit hic genere Armenus, educatus a seniori Macario ejusdem sedis antistite; cui electione totius cleri et populi in sede successit: qui post multa in cura pastoralis egregie præstita, atque miracula edita, peregrinaturus Hierosolymam, abdicans se, Eleutherio viro probitate insigni reliquit Ecclesiam. Venit Hierosolymam, cum ejus Ecclesiæ Joannes patriarcha esset, ubi multa passus legitur ab infidelibus, a quibus detrusus in carcerem, divinitus liberatus, ex iis nonnullos ad fidem convertit. Inde vero fama celebris, ignotus latere cupiens, migrans in Occidentem, boreales lustrans Ecclesias, redditus jam virtute miraculorum ubique conspicuus, substitit in monasterio Sancti Bavonis in Flandria, quam comes Balduinus administrabat, ibique in hunc usque annum perseverans, in editione signorum, et operatione virtutum sancto fine dicta die in pace quievit ».

16. *Concil. Legionense.* — Eodem anno Legionem in Hispania celebratum est Concilium, de quo ista invenimus in scripto Codice Antonii Augustini.

« Concilium Legionense Æra millesima quinquagesima, id est, anno Christi millesimo duodecimo, sub Adelfonso Quinto rege Legionensi ex Codice vetusto Ecclesiæ Cordubensis, ubi est ad finem libri, qui inscribitur Forum judicum.

« Decreta Adelfonsi regis et Geloiræ reginæ.

« Sub Æra millesima quinquagesima, VIII kal. Augusti, in præsentia regis domini Adelfonsi et uxoris ejus Geloiræ reginæ convenimus apud Legionem in ipsa sede beatæ Mariæ omnes pontifices et abbates, et optimates regni Hispaniæ, et jussu ipsius regis talia decreta decrevimus, quæ firmiter teneantur futuris temporibus.

« In primis censuimus, ut in omnibus Conciliis quæ deinceps celebrabuntur, causæ Ecclesiæ prius judicentur, judiciumque rectum absque falsitate consequantur.

17. « Præcipimus etiam, ut quidquid testamenti concessum, et roboratum aliquo tempore Ecclesia tenuerit, firmiter possideat: si vero aliquis inquietare voluerit illud quod concessum est testamentis (quidquid fuerit) testamentum in Concilio adducatur, et a veridicis hominibus, utrum verum sit exquiratur: et si verum inventum fuerit testamentum, nullum super eum (illud) agatur judicium, sed quod in eo continetur scriptum, quiete possideat Ecclesia in perpetuum. Si vero Ecclesia

aliquid jure tenuerit, et inde testamentum non habuerit, firment ipsum jus cultores Ecclesiæ jramento, ac deinde possideat perenni ævo: nec pareat (præjudicet) triennium juri habito, seu testamento. Duo etenim fraudem facit, qui per (post) triennium rem Ecclesiæ rescindit.

18. « Decrevimus etiam, ut nullus contineat seu contendat episcopus abbates suarum dioceseon, sive monachos, abbatissas, sanctimoniales, refuganos, sed omnes permaneant sub ditione sui episcopi.

« Mandavimus adhuc, ut nullus audeat rapere ab Ecclesia. Verum si aliquid infra (intra) cœmeterium per rapinam sumpserit, sacrilegium solvat; et si quid inde abstulerit, ut rapinam reddat. Si autem extra cœmeterium abstulerit, ut rapinam reddat eam, et calumniam ipsius Ecclesiæ, more terræ.

« Item decrevimus, ut si forte aliquis hominem Ecclesiæ occiderit, et per seipsam Ecclesia justitiam adipisci non potuerit, concedat..... vocem judicii, dividant per medium calumniam homicidii.

« Judicato ergo Ecclesiæ judicio adeptaque justitia, agatur causa regis, deinde populorum.

« Illic multa decreta sequebantur in Codice ad civilem potius, quam Ecclesiasticam regni gubernationem pertinentia, quæ ideo omisimus ». Hucusque descripta invenimus ibi.

Meminit hujus Concilii Rodericus Toletanus his verbis¹: « Rex autem Adelfonsus Concilium celebravit, et reedificavit Legionem, quam Almanzor et Habelmaticus filius ejus destruxerant, et leges Gothicas reparavit, et alias addidit quæ in regno Legionis etiam hodie observantur ».

19. *S. Colomanni martyrium.* — Hoc eodem anno data Formata juxta antiquum usum Ecclesiæ a Nicæno Concilio statuta reperitur a Burchardo Wormatiensi episcopo, ad Walterium Spirensis episcopum, pro commendatione Hermanni, ejusdem Wormatiensis Ecclesiæ clerici. Recitat eandem Gratianus, in cujus fine hæc de tempore: « Data Wormatiæ idibus Martii, anno Dominicæ Incarnationis millesimo duodecimo, Indictione decima ». Quibus intelligas, nostram chronologiam in omnibus ac semper publicis respondere monimentis.

Hoc eodem anno, S. Colomannus natione Scotus, ex progenie regum Scotiæ ortus, postquam iterum atque iterum peregrinatus esset Hierosolymam pietatis ergo, ubi in Austria pervenisset², ab impiis in arbore suspensus occiditur, cultus ut martyr, quamplurimis miraculis illustratus. Sed de eo Ditmarus in fine anni post millesimum xvii, ubi ista³: « Ipsa arbor diu arida, in qua suspensus fuerat, floruit, et hunc Christi martyrem esse monstravit ».

¹ Apud Sur. die x April. tom. 11.

¹ Rod. l. v. c. 19. — ² Cusp. in Aust. — ³ Ditm. l. vii. in fin.

Anno periodi Græco-Romanæ 6505. — Anno Æræ Hispan. 1050. — Anno Hegiræ 403, inchoato die 33 Julii, Fer. 4. — Jesu Christi 1012.

— Benedicti VIII papæ 1. — Henrici II reg. 11. Basil. et Const. imp. 37.

1. *Benedictus VIII PP. succedit Sergio IV.* — A num. 1 ad 7. Sergius IV die decima septima mensis Junii [adhuc in vivis erat, ut subscriptio a Baronio num. 3 recitata demonstrat: « Datum XV kalendas Julii per manum Gregorii episcopi et bibliothecarii S. Sedis Apostolicæ, anno, Domino propitio, Pontificatus domini Sergii Quarti papæ in sacratissima Sede B. Petri Apostoli tertio, Indictione decima »]. Die vero vicesima tertia mensis Novembris *Benedictus VIII*, natione Tusculanus, antea dictus Joannes, episcopus Portuensis, jam Ecclesiam Romanam administrabat, ut liquet ex altera Charta a Baronio anno *MXIX*, num. 6 recitata, et his verbis inchoata: « In nomine Domini D. S. N. Jesu Christi, anno, Deo propitio, Pontificatus domini Benedicti summi Pontificis et universalis octavi papæ in sacratissima Sede B. Petri Apostoli octavo, imperante domino piissimo perpetuo, Augusto Henrico a Deo coronato magno imperatore anno sexto, Indictione tertia, mensis Novembr. die *XXIII* ». Hanc confirmat subscriptio hoc anno a Baronio num. 5 in hæc verba relata: « Datum VI kalend. Januarii per manus Benedicti episcopi Portuensis et bibliothecarii S. Apostolicæ Sedis, anno, Deo propitio, Pontificatus domini Benedicti sanctissimi Octavi papæ, octavo, imperante domino piissimo imperatore Augusto Henrico anno sexto, Indictione tertia, mense Decembris die *XXVI* », legendum, die *XXVII*, qui idem est cum VI kalend. Januar. Quare cum anno *MXIX*, die *XXIII* Novembris, jam annum Pontificatus *VIII* inchoarit, currenti annum primum eodem die jam exorsus erat. Baronius ex prima et tertia subscriptione infert *Benedicti VIII* initium anno sequenti potius, quam præsentī collocandum esset (1).

Sed eum calculos male posuisse ipsæ subscriptiones demonstrant. Decepit cardinalem doctissimum Sergii IV Epitaphium ab eo recitatum, in quo dicitur: « Qui sedit annos *II* et menses *VIII* et dies *XIII*, Ind. *X*, anno Dominicæ Incarnationis millesimo decimo *III* ». Verum hæc verba ostendunt Baronii tempore clausulam illam ex parte jam fuisse erasam, et residua tantum variarum litterarum vestigia. Quam ob causam dies et mensis tunc non apparebant. Præterea, quia Indictio *X* cum anno Christi *MXIII* copulari non potest, manifestum est, in duratione Sedis *Sergii IV* dimetienda, et *Benedicti VIII* Pontificatus initio consignando, illius Epitaphii nullam rationem habendam esse; cum ex duabus subscriptionibus mox relatis constet *Benedicti VIII* initium in annum sequentem differri non posse. In Catalogis *Sergio IV* tribuuntur anni tres, et in quibusdam an. *II*, menses *IX*, et dies *XII*. Sed cum dies et mensis emortuales ejus ignorentur, potius non est menses et dies quibus supra annos duos sedit divinare, frustra quæ id hætenus tentatum. *Sergium* tamen ante mensem Augustum obiisse, et *Benedictum VIII* statim ei successisse, ex dicendis in hujus mortem perspicuum fiet.

2. *Vandali a Saxoniarum duce vexati sese in libertatem asserunt.* — A num. 7 ad 11. Lambecius in Originibus Hamburgensis pag. 41, de *Libentio* archiepiscopo Hamburgensi, qui *Adaldago* successerat, verba faciens, eadem per hæc tempora Saxoniarum Ecclesiis illatam accurate explicat. Anno vicesimo secundo *Libentii*, ut habet Adamus lib. 2, cap. 32, anno scilicet Christi *MX*, *Benno* dux Saxoniarum vitam [cum morte commutavit; « vir », ut ait Helmoldus lib. 1, cap. 16, « omni probitate con-

(1) En alteram subscriptionem Bullæ Pontificæ vulgatæ a Muratorio in notis ad Chronic. Farfense Rer. Ital. tom. II, part. 2, col. 509, ex qua liquet *Benedictum* hoc anno die *XXII* Augusti jam regnasse: « Pontificatus domini nostri Benedicti summi et universalis Octavi papæ in sacratissima Sede B. Petri Apostoli primo, Indict. *X*, mense Augusto, die *XXII* ». Annus iste est Æræ vulgaris *MXII*, quo proinde ea Augusti die, *Benedictus* Petri Cathedram jam tenebat. Quin et die *II* Augusti jam sacris præfuisse docet subscriptio altera Chartæ Ilugonis abbatis Farfensis a Mabillonio primum in *Annalibus Benedictinis*, dein a Muratorio in *Notis ad idem Chronic.* col. 518 vulgatæ; inscribitur illa. « Benedicti Octavi anno tertio, Henrici primo, Indict. *XII*, Augusti die secundo »; quæ indicant annum Æræ *MXIV*, demonstrantque *Benedictum* anno *MXII*, ante diem *II* Augusti crepisse. Denique ex altera ejusdem Benedicti Bulla, edita in Appendice Actorum veterum libri Romæ anno *MCCCIX* editi sub titulo: *Dominio temporale della S. Sede sopra la Città di Comacchio, impressione terza*; ex hac, inquam, Bulla erudimur Pontificem illum die sexta Julii sacris jam præfuisse. En subscriptionem: « Datum pridie nonas Julii per manum Benedicti episcopi S. Silve Candidæ Ecclesiæ et bibliothecarii sanctæ Apostolicæ Sedis, anno, Deo propitio, Pontificatus B. N. Benedicti SS. VIII PP. anno secundo, Indictione prædicta *XI*, mense Julio, die sexto ». Igitor si Julio mense anni *MXIII* qui in eo Diplomate exprimitur, annum secundum jam coeperat *Benedictus*, constat illum anno *MXII* ante diem illam Julii Pontificatum iniisse.

spicuus et strenuus Ecclesiarum defensator». In ejus locum *Bernhardus* dux filius successit; avarus æque atque ferox et superbus. Simul enim ac rerum potitus est, Vandalos Saxonum tributarios, quos pater atque avus ejus, quia recenter Christiana religione imbuti erant, leniter tractarant, iniquis pecuniarum exactionibus, aliisque molestiis adeo gravavit, ut abjecta demum Christiana religione, armis sese in libertatem asseruerint: hac præsertim opportunitate frefi, quod dux *Bernhardus* bello in *sanctum Henricum* Germaniæ regem suscepto intentus esset.

3. *Abjecta Christianitate Ecclesias devastant.* Itaque ultimo *Libentii* archiepiscopi Hamburgensis anno, ut habet idem *Adamus* lib. 2, cap. 32, sequenti scilicet Christi anno, ducibus *Mistiwoio* et *Mizudrac*, Transalbinam invasere Saxoniam, atque totam per omne crudelitatis genus penitus devastarunt. Tota urbs Hamburgensis cum Ecclesia beatæ Mariæ, solo adæquata est: cives partim occisi, alii in servitutem abducti sunt omni morte graviolem. Narrat hæc pluribus *Baronius* num. 8, ex *Helmoldo* lib. 1, cap. 16. Nam quæ apud *Adamum* Historiæ Ecclesiæ Hamburgensis libri secundi capite trigesimo primo, secundo et tertio leguntur, adeo turbata et corrupta sunt, ut nihil inde sani atque veri colligi possit, nisi instar decimi sexti capitis libri primi Chronicorum *Helmoldi* reformatur. Cæterum *Adamus* a *Baronio* num. 40 citatus habet: «Hæc facta sunt ultimo tempore senioris *Libentii* archiepiscopi, sub duce *Bernhardo*, filio *Hermanni*», et *Baronius* in margine ex *Helmoldo*, loco *Hermanni*, *Adamum* *Bennonem* ponere debuisse docet.

4. *S. Elphegus archiep. Cantuariæ a Danis occisus.* — Ad num. 11 et seq. *Osbernus* monachus in Vita sancti *Elphégi* archiep. Cantuariæ cap. 6, refert *Danos sacrosancto Dominicæ requiei sabbato*, duodecimo nempe mensis Aprilis, cum Pascha, de qua die ibi sermo est, hoc anno in diem xiii Aprilis inciderit, principes legionum quatuor ad *Elphegum* misisse, qui «primo quidem pro impenso beneficio (de quo anno superiori) gratias exhibeant, deinde hujus conditionis alloquium proponant: ut si vita ac libertate vellet potiri, sexaginta argenti talenta persolvat, singulis talentis quinquaginta librarum pondere appensis. Præter hæc spondeat se suasurum regi, ut quoniam impossibile sit absque grandi pecunia Anglis *Danos* conciliari, ducenta superioris ponderis talenta solvantur, sicque fœdus inter utrosque populos firmum constituatur. Quo ille accepto nuntio, tale fertur responsum dedisse: Legatio, inquit, legitima non est, cum id petitur quod petenti jure denegari potest. Jure autem denegari potest, quod ratione haberi non potest. Ratione vero haberi non potest, quod aut ignis devoravit, aut prædo asportavit. Quod si ad explendam animi vestri dominatricem cupiditatem, ea vos ratione ducimini, ut existimetis me aut Ecclesiasticas pos-

siones expoliaturum, aut contra patriæ decus regi suasurum, fallimini: propterea quod Christiani hominis non sit, Christianorum carnes paganis dentibus conterendas dare». Tandem *Elphegus* a principibus *Danis* morti adjudicatur, et satellites diaboli «alii atque alii eum lapidibus obruunt», (anno patriarchatus ejus septimo), natiuitatis quinquagesimo nono, Jesu Christi mii, Indict. x, advesperascente sabbato Paschalis hebdomadæ, et inchoante Dominica die oclavarum Paschæ, xiii kalendas Maii, inquit *Osbernus*. Celebris alias fuit memoria hujus sancti præsulis, miraculis clarissimi, cujus corpus adhuc anno mcv repertum est incorruptum. Legendus *Bollandus* ad diem xix mensis Aprilis.

5. *Indigna Anglorum cum Danis pax.* — Ad num. 13. Refert *Baronius* ex *Westmonasteriensi*, *Danos* in Anglia una die furtivo impetu omnes occisos fuisse. Verum jam anno mii monuimus, *Westmonasteriensem* summo opere in anno illius carnificinæ consignando errasse, et quæ postea singulis fere annis de rebus in Anglia gestis in medium adduximus, errorem illum refellunt. Hoc itaque anno non *Dani* occisi, sed dum *Elphegus* in vinculis detinetur, *Ethelredus* Angliæ rex et procures ejus pecunias colligunt, et blande *Danos* muneribus onerant: «Anno mii», inquit *Hovedenus* ad hunc Christi annum, «perfidus dux *Edricus Streona*, et omnes Angliæ primates ante Pascha *Lundoniæ* congregati sunt, et ibi tamdiu morati sunt, quousque tributum *Danis* promissum, quod erat quadraginta octo millia librarum, persolveretur». Non potuit tributi pensio sanctum *Elphegum* a morte liberare, quia tarde, ut cætera omnia, et importune collecta. Itum tunc iterum in fœdera: «Tunc», inquit *Huntindonius*, «rex nimis sero pacem fecit cum *Danorum* exercitu, dans ei 8000, (legendum, 4800) librarum. Nunquam enim tempore opportuno pax fiebat, donec nimia contritione terra langueret. Subdiderunt autem se regi quadraginta quinque pupes *Danorum*, promittentes quod Angliam tuerentur; rex vero inveniret eis victum et vestitum». Ita *Ethelredus* rex sanctissimi præsulis mortem vindicavit. Sed *Svanus*, qui in Angliam rediit, ad imperium insulæ anno sequenti revertetur.

6. *Moritur Libentius Bremensis seu Hamburgensis archiep.* — Ad num. 14. Beatus *Libentius* archiepiscopus *Bremensis* «anno Domini miii, Indictione xi obiit, et sepultus est in medio chori, ante gradus sanctuarii, pridie nonas Januar.», inquit *Adamus Bremensis* lib. 2, cap. 29; quare quæ de eo *Baronius* ex *Ditmaro* lib. 6 refert, pertinent ad annum sequentem. Sedit annos xxv, fuitque vir liberalissimus. Dum adhuc pax esset in *Scalavonia* *Transalbianos* populos frequenter visitabat. Quando *Svein* a regno *Sueviæ* depulsus cum *Danis* et *Suecis* inferiorem Saxoniam vastavit, omnes Saxonie civitates grandi metu percussæ sunt: «Tunc et *Brema* muro muniri cœpit firmissimo. Sed et Li-

benius archiepiscopus thesaurum Ecclesiæ, omniaque Ecclesiastica fecit ad Buccensem deportari præposituram. Tanta itaque timor in finibus hujus parochiæ omnibus erat. Nam et ipse pontifex piratas, qui episcopatum vastabant, anathemate damnavit ». Hæc omnia Adamus. Bollandus ad diem iv Januarii refert nomen *Libentii* in aliquibus Calendariis legi, eique nomen *Beati* attribuit.

7. *Moritur S. Macarius archiep. Antioch.* — Ad numero 15. In priori Vita sancti Macarii Antiocheni archiepiscopi, jussu Eremboldi abbatis Gandensis scripta, mors ejus his verbis consignatur : « Anno Dominicæ Incarnation. millesimo duodecimo, concurrentibus duobus (hic enim est bissextilis duplici littera Dominicali notatus) quarto idus Aprilis, obiit hic sanctus ». Et postea narratur ejus miracula intra biennium post obitum patrata. *Sigerius*, cujus jussu posterior Vita elucubrata, factus abbas Gandensis anno MLXVI, regiminis sui anno secundo, elapsis ab obitu sancti Macarii annis quinque et quinquaginta, « cum præclaris miraculorum insignibus B. Macarii elareret sepulchralis locus », ut in ea secunda Vita dicitur, corpus ejus elevari jussit, VII idus Maii anno MLXVII, et postea eam secundam Vitam scribi. Quare non mirum, si post tot annos is auctor anonymus contra fidem prioris anonymi scripserit, *Macarium* in civitate Antiochiæ Syrorum metropoli natum et baptizatum fuisse, et *Macarii* post Deum creatorem Armeniam exstitisse procreatricem. Armenia enim longe a Syria posita, et tamen hic auctor Antiochiam Pisidiæ cum Antiochia Syriæ perperam confundit. Vide dicta anno superiori. *Macarius* Gandavi in magna veneratione habetur, et sæculo

elapso, cum, Caroli V imperatoris jussu, ad urbis custodiam monasterium sancti Bavonis eversum fuisset, ejus reliquiæ in parochialem Sancti Joannis Baptistæ Basilicam Gandensem, nunc cathedralem translatae sunt.

8. *Concilium Legionense.* — Ad num. 16 et seqq. *Concilium Legionense* Æra ML, præsentibus *Alfonso V* rege Legionis et *Geloira* ejus uxore celebratum, edidit Em. card. d'Aguirre in Concil. Hispaniæ cum variis decretis in eo conditis, quæ ex Codicibus Mss. eruit. Quare in ejus Conciliorum Collectione legenda.

9. *S. Colomanni martyrium.* — Lambecius tom. II Bibl. Cæsareæ, pag. 611 et seqq. refert Historiam martyrii et miraculorum *S. Colomanni*, natione Scoti, qui in oppidulo Austriæ *Stokerau*, olim *Asturis* vocato, et in vicinia Norici Ripensis et Pannoniæ posito passus est, compositam ab *Erchmfrido* tertio monasterii Melicensis abbate, qui eodem tempore vixit in Austria inferiori. Imperante itaque S. Henrico, *Colomannus* cupiit cum aliis quibus eadem mens erat Jerusalem petere. Venit ob id in Orientalem Noricæ regionem, ubi contra eum orta est falsa suspicio, tanquam veniret missus *causa explorationis ac prodendæ patriæ*. Licet itineris sui causam veraciter judici exponeret, horrendis tamen cæsus est verberibus, et tandem cum duobus latronibus suspensus. In morte et post mortem miraculis claruit : eum autem hoc anno martyrium passum esse ostendit ibidem Lambecius ex duobus Chronicis Mss. Nomen ejus inscriptum est Martyrologio Romano ad diem XII Octobris.

BENEDICTI VIII ANNUS 2. — CHRISTI 1013.

1. *Henricus rex Germaniæ Romam venit.* — Annus sequitur Redemptoris decimus tertius supra millesimum, Indictione undecima, quo Henricus in Italiam descendens, Romam cum exercitu venit circa anni hujus finem : nam ad undecimum kal. Octob. ex Germania superiori recessisse Romam venturum, testatur qui tunc aderat Dilmarus, quem in primis præstat audire; ait enim ¹ : « Rex autem

ad Occidentales pergens regiones, iter suum ad Longobardum (Longobardiam) disposuit, et iterum ad nos, (nempe in Saxoniam), repedavit : et inde XI kal. Octob. discedens, per Bavariorum fines, atque Suevorum, usque ad locum qui dicitur..... properavit, et inde usque ad Romam rex sine omni scrupulo, regina comitante, venit.

2. « Ad supplementum hujus itineris Bolizlavus antea invitatus nil aspiravit, et in bene promissis more solito mendax apparuit. Insuper antea

¹ Dilm. I. vi.

domino papæ questus est per Epistolæ portitorem, quod non liceret sibi propter latentes regis insidias promissum principi Apostolorum Petro persolvere censum. Tunc vero missis illi nuntiis, tacitus rimatur, qualiter rex in his partibus haberetur, quoscumque potuit, ab ejus gratia per hos amovere conatus ». Ilæc ut intelligantur, monendus lector, quod præter alios Henricus rex infestiores hos passus est, principes, ducem Poloniæ Boleslaum, et Harduigum in Italia regem Longobardorum : adeo ut cum sæpius idem Henricus cogitaverit Romam, et se ad iter accinxerit, per eundem Boleslaum, infestantem regiones finitimas regi subjectas, cogeretur a cæpto desistere, atque redire in Germaniam. Erant igitur fœdere simul juncti hi quos diximus, dux Poloniæ rexque Longobardorum, adversus eundem regem maxime pium. Porro rex Longobardorum, alias expertus Henrici vires (quod superius suo loco est demonstratum) non ausus est modo eidem regi Romam venienti obsistere, sed magis cum studuit obsequiis demereri. De quo Ditmarius subjicit ista : « Hujus, (nempe Boleslai), compar atque collega Harduigus a Longobardis falso rex appellatus, adventum magni regis et potentiam exercitus doluit : et quia suis viribus huic ad nocendum diffidit, in castelli munitionem se protinus recepit, hoc solum ingemiscens, quod rex ad majorem tunc vocatus accessit honorem », nempe ad capessendum imperium vocatus a Benedicto Pontifice. Pergit : « Post longam animi exsultantis deliberationem, legatos ad regem misit, qui comitatum quemdam sibi dari peterent, et coronam suimet cum filiis ei redditurum veraciter promitterent. Hoc cum consilio quorundam acquiescens facere rex noluisse, ut in sequentibus enucleabo, ad magnum suis familiaribus provenire damnum id postea persensit ». Ilæc Ditmarius.

3. *Dux Poloniæ consuetus solvere censum Rom. Ecclesiæ.* — Quod autem audisti a Ditmaro, excensasse Boleslaum ducem Poloniæ se, quod non miserit censum promissum Apostolicæ Sedi propter Henrici regis insidias : erat census iste ab exordio (ut apparet) conversionis Polonorum gentis pietatis ergo promissus annis singulis principi Apostolorum, et ejus loco persolvi ipsius successori Romano Pontifici : qui etiam hoc ipso sæculo reperitur exactus a Gregorio papa septimo, anno salutis millesimo septuagesimo quinto, prout habetur in Epistola ejusdem Gregorii scripta ad Uratislaum Bohemiæ ducem, in qua ista ejus exordio leguntur¹ : « Pervenit ad nos nuntius vester, qui magnæ devotionis et fidelitatis vestræ exhibitionem nobis retulit, et quæ beato Petro sub nomine census misistis, videlicet centum marchas argenti ad mensuram vestri ponderis, fideliter præsentavit. Quod quidem gratanter acceperimus; sed charitatem vestram multo ardentius ampliusque, quasi quibusdam animi brachiis ad vos usque porrectis,

amplectimur, qui mentem vestram et desiderium magis ac magis erga reverentiam Apostolicæ Sedis accendi perpendimus. Beatus autem Petrus quem vos diligitis, et cui celsitudinem potentiæ vestræ humiliatis, copiosa vobis proculdubio retributionis munera præparabit, et suo vos munimine tam in præsentem, quam futuro sæculo lætificabit ». Ilæc de persoluto censu.

4. *Benedictus papa præmissus occurrit Henrico venienti in Urbem.* — Sed redeamus ad regem, quem Romam venientem primum omnium exulem Benedictum Pontificem in suam restituisse Sedem, a quo esset ad imperium promovendus, certum est. Tanto regi, cui omnes jam cessissent principes, quoniam pacto invasor Gregorius restitisset ? Compositis igitur rebus Urbanis, peracta sunt quæ spectant ad coronationem ipsius : quæ cum certum sit tum Ditmari, tum aliorum antiquorum testificatione, contigisse anno sequenti, mense Febuario, agemus de iis suo loco.

5. Cæterum ex his quæ Glaber et ipse hujus temporis scriptor narrat, non secum duxisse, sed præmississe Henricum regem papam Benedictum in Urbem, possumus intelligere, cum ait¹, venienti Henrico in Urbem ipsum Benedictum ei obviam processisse; imo et hujusmodi tradit præcessisse decretum his verbis : « Illud nihilominus nimium condecens ac perhonestum videtur, atque ad pacis tutelam optimum decretum, scilicet :

« Ut ne quisquam audacter imperii Romani sceptrum præproperus gestare princeps appetat, seu imperator dici aut esse valeat, nisi quem papa Sedis Romanæ morum probitate delegerit aptum Reipublicæ, eique commiserit insigne imperiale ». Ilæc sanctio. Pergit autem Glaber, hujus decreti afferens rationem, dicens : « Cum videlicet olim ubique terrarum quilibet tyranni sese procaciter impellentes, sæpissime sint imperatores creati, atque eo minus apti Reipublicæ, quo constat eos tyrannide potius quam pietatis auctoritate processisse. Anno igitur Dominicæ Incarnationis millesimo decimo tertio (ita enim necessario restituendum esse ex eo quod in depravato Codice legitur, anno septingentesimo decimo, tempus Henrici, et ejus adventus in Urbem, itemque tempus Sedis Benedicti papæ, et tempus Cluniacensium monachorum, quorum omnium inferius meminit, non solum suadent, sed cogunt) millesimo, inquam, decimo tertio, licet insigne illud imperiale diversis speciebus prius figuratum fuisset, venerabili tamen papæ Benedicto Sedis Apostolicæ jussu (visum) est admodum intellectuali specie. Qui idem insigne præcepit fabricari quasi aureum pomum, atque circumdari per quadrum pretiosissimis quibusque gemmis, ac desuper auream crucem inseri. Erat autem instar speciei hujus mundanæ molis, quæ videlicet in quadam rotunditate circumstare perhibetur. Ut dum, siquidem illud

¹ Greg. I. II. Ep. VII.

¹ Glab. I. I. in fin.

respiceret princeps terreni imperii, foret ei documentum, non aliter debere imperare vel militare in mundo, quam ut dignus haberetur vivificæ Crucis tueri vexillo. In ipso etiam diversarum gemmarum decoramine videlicet imperii culmen plurimarum virtutum speciebus exornari oportere.

6. « Cumque postmodum prædictus papa imperatori, videlicet Henrico, hujus rei gratia, (nempe ut crearetur imperator), Romam venienti obviam cum maxima virorum et sacrorum ordinum multitudine processisset ex more, eique hujusmodi insignie, scilicet imperii, in conspectu totius Romanæ plebis tradidisset, suscipiens illud hilariter, circumspectoque eo (ut erat vir sagacissimus) dixit: Optime pater, (inquiens ad papam) istud facere decrevistis nostræ portendendo juvenis (regimen) monarchiæ, qualiter sese moderari debuerat cautius perdocuisti. Deinde manu gerens illud auri pomum subjunxit: Nullis, inquit, melius hoc præsens donum possidere, ac cernere congruit, quam illis, qui pompis mundi caleatis, Crucem expeditis sequuntur Salvatoris. Qui protinus misit illud ad Cluniacense monasterium Galliarum, quod etiam tunc temporis habebatur religiosissimum cæterorum: cui et alia dona plurima contulerat ornamentorum ». Hucusque Glaber de occurso Benedicti Pontificis imperatori: reliqua in annum sequentem, quo eum contigit coronari.

7. *Unvanus archiepiscopus Hamburgensis pallio decoratus virtutibus episcopalibus insignis.* — Eodem anno ¹ Benedictus papa pallium dedit Unvano archiepiscopo Hamburgensi, quæ metropolis erat Danorum, Sveonum, Slavorum, et aliorum circumstantium populorum. Hoc namque anno Domini millesimo decimo tertio, Indictione undecima, defunctum, tradit Adam ² mense Januarii prædecessorem ejus Libentium laudatissimum episcopum, utpote qui amplissimam Ecclesiam illam inter immensos tribulationum fluctus sanctissime gubernavit; demum vero visitata diœcesi, et ordinatis episcopis vacantibus Ecclesiis, rebus bene compositis, migravit ad Dominum, pridie nonas Januarii. Hæc ipse pluribus, deque ejus agens successore, sic ait: « Unvanus archiepiscopus sedit annos sexdecim, ferulam suscepit ab Henrico, pallium a papa Majore Benedicto ». Sic dictus respectu Junioris Benedicti, de quo suo loco dicendum. De hujus autem rebus præclare gestis hæc inferius: « Unvanus primus omnium congregationes ad canonicam regulam traxit, quæ ante quidem mixta ex monachis et canonicis conversatione debebant. Omnes ritus paganicos quorum superstilio vixit in hac regione, præcepit funditus amoveri, ita ut ex lucis, quos nostri paludicolæ stulta frequentabant reverentia, faceret Ecclesias

duodecim renovari; ex quibus etiam Basilicam S. Viti extra oppidum construi, et capellam S. Willehadi combustam jussit renovari ». Illis subjiciens quæ mala per Bernardum ducem Saxonie rebellantem Henrico regi, inferri contigerit Ecclesiis illis, quæ nos superius suo loco narravimus: quomodo tantummodo per hunc unum antistitem potuit ejus superbia frangi, idem Adam ita paulo inferius docet: « Ejus impetum viri dicitur nosler archiepiscopus Unvanus sua magnitudine taliter fregisse, ut præ pondere sapientiæ ac libertatis episcopi, egeretur ipse dux Ecclesiæ, cui antea adversatus est, deinceps hilaris et benignus esse in omnibus. Igitur habito nostri pontificis consilio, rebellis princeps eodem flexus, apud Scalchisburg Cæsari Henrico supplex dedit manus: moxque favente Unvano, Slavos tributo subjiciens, pacem reddidit Nordalbingis, et matri Hamaburg.

8. « Ad cujus instaurationem venerabilis metropolitanus asseruit post Slavonicam cladem, civitatem et Ecclesiam fecisse novam, simul ex singulis congregationibus suis quæ vivorum essent tres eligens fratres, ita ut duodecim fierint, qui in Hamaburg canonica degerent conversatione, vel qui populum converterent ab errore idololatriæ. Ordinavit in Slavoniam, mortuo Rengiberto, Benno-nem, virum prudentem, qui de fratribus Hamaburgensis Ecclesiæ electus, in populo Slavorum multum in prædicando fructum attulit, etc. » Ipse igitur, tanquam pastor in medio ovium suarum dissipatarum, collegit et congregavit quas Slavonica persecutio (ut audisti superius) ingenti crudelitate disperserat. Unde apud Deum et homines magnam peperit sibi laudem. Quod vero non solum erga pauperes, verumetiam in principes erogavit thesaurum Ecclesiæ, accipe ab eodem excusationem, dum ait: « Unvanus igitur cum esset vir nobilissimus, æque nobilem ac sufficientem libertati (liberalitati) suæ sortitus est episcopatum, in quo et magnitudinem suam posset ostendere, et necessitati simul Ecclesiæ prodesse. Quare thesaurum Ecclesiæ diu sollicitè collectum, et quasi minus necessarium, si intra parietes clauderetur, ipse ad commodum suæ legationis curavit ita expendi, ut ferocissimos reges Aquilonis hilaritate suorum munerum ad omnia quæ voluit, benignos obedientesque haberet. In qua re non multum peccavit, ut arbitror, seminans carnalia, ut metaret spiritualia. Quinimo largitio ejus novella Gentium conversione utilissima videbatur, neque adeo nocuit Ecclesiæ, quæ præcedentium patrum diligentia erat opulentissima. Credo etiam, secutus est exemplum sancti Ausgarii, et cujusdam in Ecclesiastica historia Theotimi Seytharum episcopi, quorum alter legitur incredulos reges donis placasse; alter vero Barbaros natura feroces Epistolis muneribusque mansuefecisse laudatur ». Hæc Adam.

¹ Adam. l. II. c. 31. d. l. I. c. 17. — ² Ibid. l. II. c. 33. 34. 35.

Anno periodi Græco-Romanæ 6506. — Anno Æræ Hispan. 1051. — Anno Hegiræ 404, inchoato die 12 Julii, Fer. 2. — Jesu Christi 1013.

— Benedicti VIII papæ 2. — Henrici II reg. 12. — Basil. et Const. imp. 38.

1. *Libentio archiep. Bremensi succedit Unwanus.* — Ad num. 7 et seq. Baronius non animadvertens sedem Bremensem et Hamburgensem unitas fuisse, et archiepiscopos modo Bremenses, modo Hamburgenses ab historicis appellari, anno superiori de morte *Libentii* archiepiscopi Bremensis, currenti vero de morte *Libentii* archiepiscopi Hamburgensis verba facit. *Libentius* itaque Bremensis et Hamburgensis archiep. hoc anno ad Deum migravit, ut superiori monstravimus, eique, ut docet Adamus lib. 2, cap. 33, successus est *Unwanus* canonicus Paderbornensis, qui toto pectore ad hanc curam incubuit, ut *Bernhardus* Saxonie dux Henrico Germanie regi reconciliaretur. Quod cum factum fuisset, simul et Vandali ad pristinam obedientiam retracti sunt, et Transalbinæ Saxonie pax restituta. Hinc chronographus Hildensheimensis ad annum *MXIX* scribit: « Imperator (Henricus nempe, qui anno sequenti imperator coronatus est) cum exercitu contra *Bernhardum* ducem ad castellum Scalzburg. perrexit, ibique, Deo gratias, omnia in pace constituit ». Qua etiam de re *Krantzius* lib. 4 Saxonie cap. 30, ait: « Hujus impetum viri (sc. *Bernhardi*) *Unwanus* taliter sua animi magnitudine fregit, ut præ pudore sapientie et libertatis episcopi, dux cui ante adversatus est, deinceps cogeretur benevolus esse ad omnia. Ergo audito *Unwani* pontificis consilio, rebellis tandem est flexus princeps. Scaldinborg supplex Henrico Cæsari dedit manus, *Unwano* interveniente: Vandalis tribulo subactis, pacem reddidit Transalbinis et Ecclesie Hamburgensi ».

2. *Unwanus Hamburgum reparat.* — Deinde ad restorationem Hamburgi dux atque archiepiscopus animum appulere, et supra ruinas antiquæ urbis nova e ligno extruxerunt ædificia, et Ecclesiam et claustrum. Dispersos etiam recollecterunt cives, et novos insuper in urbem receperunt incolas. Quare brevi, in eum statum urbs restituta est, ut ipse dux cum archiepiscopo frequenter ibi commorari, et Danie regem Wandalorumque principes eo ad colloquium invitare dedignatus non fuerit. Tum primum quoque archiepiscopus collegium duodecim canonicorum ibi instituit, ut Adamus lib. 2, cap. 52, et *Helmodus* lib. 1, cap. 17, fidem

faciunt. Nunc *Bremensis* Ecclesia a Lutheranis occupata, licet urbi Calvinistæ dominantur.

3. *Swanus Danorum rex Angliam invadit.* — Anno superiori *Danorum* exercitus in varia distractus; pars *Ethelredo* regi servivit, pars major in patriam, præda, spoliisque onusta, recessit. Nunc vero *Swanus*, visa regis inertia, decrevit omnino non quiescere, donec ejecto aul prostrato rege coronam ipse induisset. Cum itaque hoc anno e Dania solvisset, et Angliam ingressus esset, provincias fere omnes sui nominis terrore implevit primo: deinde sibi fecit obsequentes: ac demum qua minis, qua suppliciis hominum, qua multis victoriis auctus, rex appellatus est. Sensit primum impetum Septentrio: ubi populus servitutis impatiens, ideo ad nova imperia promptus, quia omne imperium fugiebat. *Swanus* obtenta Northumbria, Merciorum etiam provinciam aggressus, Lincolnensem agrum in suam potestatem redegit: « His impletis », inquit *Hovedenus* ad hunc Christi annum, « et classe cum obsidibus *Cnuto* filio suo commendata, sibi lectos auxilios de deditis sumens, adversus Australes Mercios expeditionem movit: et pertransita Watlingstreete, suis edictum posuit; videlicet, ut agros devastarent, villas crementarent, Ecclesias spoliarent; quidquid masculini sexus in manus veniret, sine respectu misericordie jugularent: feminas ad suam libidinem explendam reservarent: et omnia quæ possent mala peragerent. Quibus ita facientibus, et rabie ferina debacchantibus, venit *Oxenfordam*, et illam citius quam prius putavit obtinuit: obsidibusque acceptis, festinato *Wintoniam* properavit. Quo cum venisset, crudelitatis ejus magnitudine, cives *Wintonienses* perterriti, pacem cum eo sine mora fecerunt, et obsides quos vel quot expetiit dederunt. Quibus acceptis versus *Lundoniam* movit exercitum; de quo multi, in *Tamesi* fluvio submersi, interierunt: quia nunquam pontem, neque vadum quærere voluerunt.

4. *Rex Angliæ appellatur.* — « Cumque *Lundoniam* venisset, multis modis illam, vel dolo capere, vel vi expugnare conatus est. Sed rex Anglorum *Egelredus*, civibus et juvenibus Danici comitis *Turkilli* sæpe memorati, qui secum tunc temporis

intus erat, muros urbis viriliter defendit, et illum abegit. Qui repulsus primo Walingfordam, deinde Batham; omnia quæque more solito rapiendo et demoliendo adiit: ibique exercitum suum recreando constituit. Tunc venit ad eum Athelmarus Domnanæ comes, et cum eo occidentales ministri: et pace cum illo facta, obsides illi dederunt. Quibus in omnibus ad velle peractis, ad suam classem reversus, ab omni populo Anglorum rex appellabatur et habebatur, licet tyrannice faceret. Cives etiam Londonienses obsides illi miserunt, et pacem cum eo fecerunt: metuebant enim furorem illius in tantum super se inardescere, ut omnibus suis rebus ablatis, vel oculos illorum erui, vel manus vel pedes detruncari juberet ».

5. *Ethelredus rex in Galliam fugit.* — His addit Westmonasteriensis: « Inter hæc omnia rex Anglorum Ethelredus jacebat in urbe Londoniarum inertia torpens, timidus et suspiciosus; nulli se committere ausus. De morte fratris sui Eadwaldi (id est, S. Eduardi Martyris) conscientiam habens cauteriatam, ne citius divinam sentiat ultionem, exercitum congregare, vel contra hostes ducere non audebat: metuens ne nobiles regni, quos injuste exhaeredaverat, in campo eum relinquentes, hostibus traderent ad damnandum. Hæc misera conditio misero

regi fuit. Tandem rex tot perturbationibus confossus recessit clanculum a civitate Londoniarum et prius ad Suthamptoniam, ac postea ad Vectam insulam enavigavit. Et inde reginam suam Emmam in Normanniam ad ducem Richardum fratrem suum, cum filiis suis Aelfredo et Edoardo, et eorum magistris Aelfhuno Dunelmensi et abbate Mideshamensi Aelfsio dirigens, cum honore et reverentia ab ipso duce sunt recepti. Eadricus quoque regis Ethelredi consanguineus, cum militibus sexcies viginti, cum regina, ut custos ejus transfretavit: ubi cum ipsa duobus annis residens, ei magnifice ministravit. Sicque illis mense Augusti mare transeuntibus, Ethelredus cum classe sua in insula Vecta remansit usque ad Natalem Domini; si bona de eis nuntia audiverit, reginam et filios secuturus. Unde mox ut a partibus transmarinis audivit, Richardum ducem, sororem et filios ejus cum magna hilaritate suscepisse, rex Ethelredus mense Januario in Normanniam transiens, miseras suas sedulitate et consolatione ducis magnifici sublevavit ». Tunc didicit Ethelredus nunquam bene firmari coronam fraterno sanguine ac nullo jure acquisitam, et quia Abel justum occiderat, voluisse Deum justa sententia, ut profugus esset super terram, ut fusius narrat Alfordus hoc anno.

BENEDICTI VIII ANNUS 3. — CHRISTI 1014.

1. *Henricus a Benedicto PP. coronatur imperator.* — Anno Redemptoris decimo quarto post millesimum, Indictione duodecima, sexto kal. Martii, Henricus Germaniæ rex Romæ coronatur imperator a Benedicto summo Pontifice, simulque ejus conjux, mulier sanctissima Chunegundis ab eodem corona insignita Augustæ nomine decoratur. Hæc omnia absque controversia scriptores omnes ejus temporis. Rem gestam Ditmarus, qui ab iis qui interfuissent accepit, sic narrat¹: « Decursus a Dominica Incarnatione post millenarii plenitudinem numeri annis tredecim, et in subsequentis anni secundo mense, ac hebdomada tertia, anno autem regni ejus terdecimo, et die Dominica, ac sexto kal. Martii, Henricus Dei gratia rex

inclytus a senatoribus duodecim vallatus, quorum sex rasi barba, alii proluxa mystice incedebant cum baculis, cum dilecta suimet conjuge Chunegunde ad Ecclesiam Sancti Petri, papa exspectante, venit. Et antequam introduceretur, ab eodem interrogatus, si fidelis vellet Romanæ patronus esse et defensor Ecclesiæ, sibi autem suisque successoribus per omnia fidelis: devota professione respondit. Et tunc ab eodem inunctionem et coronam cum contactali sua suscepit. Priorem autem coronam super altare principis Apostolorum suspendi præcepit ». Hæc de coronatione. Pergit autem: « Eodem die papa eis cœnam ad Lateranum fecit copiosam.

2. *Tumultus Romæ, et egregia imperatoris acta.* — « In octavo vero die, inter Romanos et nostrates magna oritur commotio in ponte Tibe-

¹ Ditm. l. vii. in prin.

rino, et utrimque multi corruerunt, nocte eos ad ultimum dirimente. Hujus rei auctores Germani tres extitere, Hug, Hecit, Ecilin, qui postea capti sunt et in custodia detenti. Ex quibus unus in his partibus evasit, secundus autem ad Fuldā deductus est; in Vitkansteine autem castello tertius diu servatur. Arnulphum fratrem suum, quem Raven-nati antea præfecit Ecclesiæ Cæsar, denuo inthroni-zatum ab Apostolico ibidem consecrari præcepit. Supplantatorem autem ejus Etbertum injuste ibi diu sedentem primo voluit degradari, sed assidua piorum devictus intercessionem, alteri præficitur Ecclesiæ, nomine Aritiæ. In Ravenna duos, et Romæ totidem synodali judicio papa deposuit, ab archiepiscopo Leone jam muto (mortuo) conse-cratos.

3. « Dominicam Resurrectionem imperator in Papia civitate celebrans, instabilem Longobardorum mentem charitate cunctis exhibita firmavit. Dehinc sedatis tumultibus universis, reversus est ab Italia. Et Harduicus ob hoc admodum gavisus, Vercellen-sem invasit civitatem, Leone ejusdem episcopo vix effugiente. Omnem quoque hanc civitatem com-prehendens, iterum superbire cœpit : quem (ut in sequentibus expono) divina Majestas nimis humilia-tum, se culpabilem cognoscere coegit.

4. « In his partibus Cæsar episcopatum (quod erat tertium devoti operis sui ornamentum) in Bobia civitate, ubi Christicolæ sancti et confessores inclyti Columbanus et Attala corporaliter requies-cunt, communi consilio et licentia comprovincia-lium episcoporum construxit, quia summa necessi-tas, et quæ cum percellit Christi charitas ad hoc instigavit ». His rebus gestis, Henricum imp. re-versum in Germaniam idem Dithmarus tradit, qui in exprobrationem eorum qui his contraria fuerant de eodem Henrico vaticinati, hos addidit versus, quorum exordium :

Quem laudant superi.

Et inferius :

Verus mendaces confuderat hic modo testes, .
Henricum regem dicentes imperialem
Curam non suscepturum, nec denique longo
Tempore reguandum, sed sæva morte premendum.
Nunc sunt bissemi, quod regno præfuit, anni,
Scandens Cæsaream post rector clarus in aula,
Illo mense meam quo solverat iste cathedram,
Ista dies pulchro signatur clara lapillo,
Qua regi nostro se subdit Roma benigno,
Atque liquore sacro perfusus gaudet, et almo
Fert grates Domino, qui se visitavit ab alto,
Et Chunigundam conlectalem sibi claram.
Summus pastor ovat, chorus atque suus quoque cantat,
Quod sunt securi tanto rectore potiti, etc.

5. *De Symbolo cantari Romæ cæpto.* — Quod ad aliquas res Henrici imp. dum Romæ stetit, per-tinet, Berno Augiensis libro de rebus ad missam spectantibus hæc habet : « Cum Romanorum pre-sbyteri ab Henrico imperatore interrogarentur,

cum post Evangelium (ut in aliis Ecclesiis fiebat) Symbolum non canerent, me (inquit Berno) assi-stente audiui eos ejusmodi responsum reddere, videlicet : Quod Romana Ecclesia non fuisset aliquando ulla hæreseos fæce infecta, sed secun-dum S. Petri doctrinam in soliditate Catholicæ fidei permaneret inconcussa : et ideo magis iis necessa-rium esse illud Symbolum sæpius cantando fre-quentare, qui aliquando ulla hæresi potuerunt maculari. At imperator domino Benedicto persua-sit, ut ad publicam missam illud decantarent ». Placent ista, sed nobis gratius, si venerandæ anti-quitati annorum mille magis delatum fuisset, quam novitati.

6. *Privilegium ab imperatore Ecclesiæ Ro-manæ collatum, et donatio Ecclesiæ Novariensi facta.* — Ad principium etiam Henrici imperii referendum arbitramur Privilegium, quo patri-monia Romanæ Ecclesiæ ab antecessoribus piis imperatoribus quondam collata, Benedicto Pontifici gratitudinis ergo, et pietatis in principem Aposto-lorum amore confirmavit. Quod etsi nec diem nec annum quo confectum sit adscriptum habeat, nihilominus tamen ex consuetudine prædecesso-rum imperatorum, qui similia privilegia statim post imperialem a Pontifice susceptam coronam eidem tradiderunt, facile possumus colligere, hisce iisdem diebus quibus Romæ degebat, illud ab eo factum, subscriptum et roboratum esse. Ita in-cipit :

7. « Exemplum Privilegii Henrici imperatoris de regalibus beato Petro concessis.

« In nomine Domini Dei omnipotentis Patris et Filii et Spiritus sancti (Amen). Ego Henricus Dei gratia imperator Augustus spondeo atque promitto per hoc pactum confirmationis nostræ, tibi beato Petro principi Apostolorum et (seu) clavigero regni cælorum, et per te vicario tuo domno Benedicto summo Pontifici et universali papæ, sicut et præ-decessoribus vestris usque nunc in potestate vestra, ac ditione tennistis et disposuistis, civitatem Ro-manam cum ducatu suo, et suburbanis atque viculis omnibus et territoriis ejus, montanis ac maritimis, littoribus ac portibus, seu cunctis ci-vitatibus, castellis, oppidis, ac viculis Tusciæ parti-bus, id est Portum, Centumcellas, Coram (Catani), Bledam, Maturianum (Marturiam, Maturanum), Sutrium, Nepem castellum Gallicense (Galisense), Orthem, Pollimartium, Ameriam (Ameliam), Tudam (Tudertum), Perusiam cum tribus insulis suis, id est majorem et minorem (majore et mi-nore), Pulvensim et lacu, Narniam et Utriculum, omnibus cum finibus et territoriis ad supradictas civitates pertinentibus; necnon et exarchatum Ravenatē sub integritate, cum (omnibus) urbi-bus, civitatibus (pertinentibus, necnon et) oppidis et castellis, quæ piæ recordationis dominus Pipinus, et dominus Carolus, et dominus Ludovicus, et Otto, et itidem Otto filius ejus, prædecessores vide-licet nostri, beato Petro Apostolo, et prædecessori-

bus vestris jamdudum per donationis paginam (gratiam) contulerunt, hoc est civitatem Ravennam, et Æmiliam, Bobium, Cesenam, Forum populi (Pompilii), Forum Livii, Faventiam, Imolam, Bononiam, Ferrariam, Comiacum (Comacum), Adrianis, atque Gabellum cum omnibus finibus, territoriis atque insulis, terra marique ad supradictas civitates pertinentibus: simul et Pentapolim, videlicet Ariminum, Pensaurum, (Pisaurum) Fanum, Senogalliam, Ancouam, Ausimum, (Auximum) Humanam, Esim (Esiun), Forum Sempronii, Montem Feltri, Urbinum, et territorium Balvense, (Balnense, Balvensem), Callem, Luciolis Callis (Tuceollos), et Eugubium cum omnibus finibus ac territoriis ad easdem civitates pertinentibus. Eodem modo territorium Sabinese, sicut a prædictis imperatoribus antecessoribus nostris beato Petro Apostolo per donationis scriptum concessum est sub integritate, et est in partibus Tusciæ Longobardorum, castellum Felicitatis, Urbem veterem, Balneum Regis, Ferenti (Ferenti castrum) Viterbium, Orthem, Martam, Bledam (Pledam), Tuscanam, Suanam, Populonium, Roselles (Roscellas), cum suburbanis atque viculis, et omnibus territoriis ac maritimis oppidis, seu finibus omnibus. Itemque Almus (Alunis) cum insula Corsica in Suriano, deinde in montem Bardonis deinde in Berceto, exinde in Parma, deinde in Regium, exinde in Mantua, atque in monte Silicis, atque provincia Venetiarum et Istria, necnon et cunctum Spoletanum ducatum, seu Beneventanum, una cum Ecclesia sanctæ Christianæ posita prope Papiam juxta Padum iv milliariorum. Item in partibus Campaniæ, Soro, Arces, Aquinum, Arpinum, Theanum, Capuam, necnon et patrimonium, ad potestatem (nostram) et ditionem vestram pertinentia, sicut est patrimonium Beneventanum, et Neapolitanum, atque patrimonia Calabriæ superioris et inferioris. De civitate autem Neapolitana cum castellis et territoriis ac finibus et insulis, sibi pertinentibus, sicuti, ad easdem (Ecclesiam) adspicere videntur (et tenentur): necnon patrimonium Siciliæ (in Sicilia), si Deus nostris illud tradiderit manibus. Simili modo civitatem Gajetanam, et Fundum, cum omnibus earum pertinentiis. Super hoc confirmamus vobis Fuldense (Fundense) monasterium, et abbatis ejus consecrationem, atque omnia monasteria, Curtes et villas, quas in ultramontanis (ultranarinis) partibus sanctus Petrus habere dignoscitur, atque Alerna, (Amensua) Vumiteringa, (Vmixringa) sive Wilmbach, quæ a sancti Petri Ecclesia per conventionis paginam episcopo nostro Babenbergensi collatæ sunt: pro quibus sæpeditæ Ecclesiæ Sancti Petri transcribimus, concedimus, et confirmamus omnem illam terram, quæ (quam) inter Narniam Teramnem, vel (inter amnem et) Spoletum ex regni nostri parte habuimus. Sub tuitione præterea sancti Petri et vestra vestrorumque successorum prætaxatum episcopum (episcopium) Babenbergensem offe-

rimus, unde sub pensionis nostræ (debito) equum unum album phaleratum ex ejusdem loci episcopo vos (nos) annualiter suscepturos sancimus (sanximus). Offerimus insuper, firnamus et corroboramus tibi B. Petro ac vicario tuo domno Benedicto et successoribus ejus, prout bonæ memoriæ pap. Joanni suisque successoribus a prædecessoribus nostris Ottonibus factum (est), civitates et oppida cum piscariis suis, Reatem, Amilernum, Furconem (Furconium), Nursiam, Balvum et Marsiam, et alibi civitatem Terannem cum pertinentiis suis. Has omnes supradictas provincias, urbes et civitates, oppida, atque castella, viculos ac territoria, simulque patrimonia pro statu regni nostri, cunctoque Christianorum populo conservando jam dictæ Ecclesiæ, tuæ, beate Petre, vicarioq. tuo Benedicto ac successoribus ejus, usque in finem sæculi eo modo confirmamus, ut in suo defineant jure, principatu, atque ditione. Simili modo per hoc nostræ delegationis pactum confirmamus donationes, quas piæ recordationis Pipinus rex, et postea dominus Carolus excellentissimus imper. ac deinceps Ottones piissimi B. Petro Christi Apostolo spontanea voluntate contulerunt, necnon et censum (vel pensionem), seu cæteras donationes (dationes), quæ annuatim in palatio (palatium) regis Longobardorum inferri solebant, sive de Tuscia, sive de ducatu Spoletano, sicut in superscriptis donationibus continetur, et inter sanctæ memoriæ Hadrianum papam, et dominum Carolum imperatorem convenit, quando idem Pontifex (pro tempore) eidem de supradictis (superscriptis) ducatibus, id est, Tuscano, et Spoletano suæ auctoritatis præceptum confirmavit, eo scilicet modo, ut annis singulis prædictus census ad partem Ecclesiæ Sancti Petri persolvatur, salva super eisdem ducatus nostra in omnibus dominatione, et illorum ad nostram partem subjectione. Cæterum sicut diximus, omnia superscripta nomina ita ad vestram partem per hoc nostræ Confirmationis pactum corroboravimus (corroboramus), ut in vestro permaneant jure, principatu, atque ditione, et neque a nobis, neque a successoribus nostris per quodlibet argumentum, sive machinationem in quacumque parte vestra potestas imminuatur, aut vobis (nobis) inde aliquid subtrahatur. De supradictis vero provinciis, urbibus, civitatibus, oppidis, castris, viculis territoriis, ac patrimoniis, necnon et pensionibus, atque censibus, ita ut nec nos facturi simus, neque quibuslibet ea facere volentibus consentiamus, sed potius omnia, quæ superius leguntur, id est provincie, civitates, urbes, castella, oppida, terræ, patrimonia atque insulæ, censusque et pensiones ad partem Ecclesiæ beati Petri Apostoli, atque Pontificum, in sacratissima Sede illius residentium, nos in quantum possumus, defensores esse teneamur (tenemur, testamur), ad hoc ut eam illi ditionem ad utendum, atque disponendum firmiter valeant obtinere, salva in omnibus potestate nostra posterorumque nostrorum, secundum quod in pacto

et constitutione, ac promissionis firmitate Eugenii Pontificis successorumque illius continetur, ut omnis clerus et universi populi Romani nobilitas, propter diversas necessitates, et Pontificum irrationabiles erga populum sibi subjectum asperitates retundendas sacramento se obliget, quatenus futura Pontificum electio, quantum uniuscujusque intellectus fuerit, canonice et juste fiat, et ut ille, qui ad hoc sanctum regimen (Apostolicum) eligetur, nemine consentiente (contrariante), consecratus fiat Pontifex, priusquam talem in præsentia missorum nostrorum, seu universæ generalitatis faciat promissionem pro omnium satisfactione, ac futura conservatione, qualem dominus et venerandus spiritualis pater noster Leo sponte fecisse dignoscitur. Præterea alia minora huic operi inserendum (inserenda) prævidimus videlicet, ut in electione Pontificum neque liber, neque servus ad hoc venire præsumat, ut illis Romanis, quos ad hanc electionem per Constitutionem sanctorum Patrum antiqua (aliqua) admisit consuetudo, aliquid faciat impedimentum. Quod si quis contra hanc nostram institutionem (Constitutionem) venire præsumperit, exilio tradatur. Insuper etiam ut nullus missorum nostrorum cujuscunque impeditionis argumentum componere audeat in præfatam electionem, prohibemus: nam et hoc omnimodo instituere placuit, ut qui semel spirituali (speciali) defensione domni Apostolici, sive nostra fuerint suscepti, impetrata juste utantur defensione. Quod si quis in quemquam illorum, qui hoc promeruerunt, violare præsumperit, sciat se periculum vitæ suæ esse incursum (incursum). Illud etiam confirmamus, ut domino (in dominio) Apostolico justam in omnibus servant obedientiam, seu ducibus, et iudicibus suis, ad faciendam justitiam. Huic enim institutioni hoc necessario annexendum esse perspeximus, ut missi domni Apostolici, seu nostri semper sint constituti, qui annuatim nobis renuntiare valeant, qualiter singuli duces ac iudices populo justitiam faciant. Hanc imperialem Constitutionem quomodo observent, qui missi, decernimus ut primum cunctos clamores, qui per negligentiam ducum vel iudicum fuerint inventi, ad notitiam domni Apostolici deferant, et ipse unus e duobus eligat, aut statim per eosdem missos (nuntios) fiant necessitates emendatæ, aut misso nostro nobis renuntiante per nostros nuntios a nobis directos emendentur. Hoc ut ab omnibus fidelibus sanctæ Dei Ecclesiæ, et vestris (nostris) firmum esse credatur, propriæ manus signaculo (et nobilium optimatum nostrorum subscriptionibus), hoc pactum Confirmationis nostræ roboravimus, et sigilli (nostri) impressione assignari iussimus.

8. † « Signum domni Henrici gloriosissimi Romanorum (Romani) imperatoris Augusti.

« Signum Erchandildi Maguntini (Erkinbaldi Maguntinensis) archiepiscopi.

« Signum Heriberti Coloniensis archiepiscopi.

« Signum Bobonis Trevirensis archiepiscopi.

« Signum Thiederici Metensis episcopi.

« Ego Eberhardus Bambergensis Ecclesiæ (Apostolicæ) episcopus Romanæ Sedis subditus (servus) subscripsi.

« Ego Mazelinus Wirceburgensis episcopus (Matelinus Wirtembergensis episcopus servus) subscripsi.

« Ego Walterius Spirensis episcopus subscripsi.

« Ego Ricodardus (Rodonardus) Constantiensis episcopus subscripsi.

« Ego Zodalricus (Toldaricus) Curiensis episcopus subscripsi.

« Ego Adalbertus (Adelbertus) Basiliensis episcopus subscripsi.

« Ego Hemmo Werdunensis (Verdunensis) episcopus subscripsi.

« Ego Walter Heichstedensis episcopus subscripsi.

« Signum Richardi Fuldensis (Richaldi Faldensis) abbatis.

« Signum Arnoldi Herfendensis abbatis.

« Signum Bruardi (Brucardi) abbatis.

« Signum Gottfridi ducis.

« Signum Beringardi ducis.

« Signum Thiederici ducis.

« Signum Simonis comitis.

« Signum Velphonis (Vulponis) comitis.

« Signum Cunonis comitis.

« Signum Kunzadi (Conradi) comitis.

« Signum Ottonis comitis.

« Signum Adilbrahtis comitis.

« Bobonis (Boybonis) comitis.

« Signum Frederici comitis.

« Signum Bezelini comitis.

« Signum Ezonis comitis Palatini.

« Signum Frederici camerarii.

« Signum Exonis in Fercore (Mczonis, Inferorum).

« Signum Heunzonis (Heimo) pincernarii.

« Signum Huzis (Eunponis).

« Alimunbereger (Alumnun Roriger).

« Adilman.

« Adilbero.

« Ego Wicelinus Astrazburgensis episcopus.

« Signum Ryodhois Fluvanensis abbatis ».

10. Hactenus Henrici Privilegium imperatoris maxime pii, qui hisce dignis oblationibus sui imperii primordia Domino consecravat. At qui sua munificentia primum omnium Romanam Ecclesiam pie sancteque est prosecutus, alias minores Ecclesias non despexit, sed æque de omnibus, ut facultas est data, bene mereri non destitit. Sit in exemplum alia donatio, facta hoc item anno Ecclesiæ Novariensi, cui tunc præsidebat Petrus: cujus exemplar acceptum ab ejus, qui nunc eidem Ecclesiæ bene præest, episcopo Carolo, hic tibi reddendum curavimus. Sic enim se habet:

11. « In nomine sanctæ et individue Trinitatis. Henricus, divina ordinante clementia, Romanorum imperator Augustus.

« Dum fidelium petitionibus nostræ imperialis celsitudinis assensum præbuerimus, eos nostro servitio promptiores ac devotiores esse minime dubitamus. Quapropter eunctorum Ecclesiæ Catholice fidelium, nostrorumque tam præsentium quam futurorum solertia recognoscat, Petrum venerabilem virum, sanctæ Novariensis Ecclesiæ episcopum, nostrumque fidelem, qui nostræ fidelitatis causa multa sustinuit, famem videlicet, sitim, æstus et frigus, et insuper et glaciosas rupes, collesque satis asperos, nudis pedibus, persequentibus inimicis, fugiendo superavit : qui etiam nunc præsentialiter multa damna, Harduico devastante, recepit : nam Ecclesiæ illius sunt deprædatæ, castra disrupta, domus eversæ, vineæ incisæ, arbores decorticatæ : insuper plebes ipsius et curtes ab Harduico pro beneficio suisque inimicis datæ sunt : nostram imperialem adiisse excellentiam, quatenus pro sui laboris recompensatione et suorum damnorum restituratione, quemdam comitatulum, qui in valle Auxula infra ipsius episcopatus parochiam adjacere dignoscitur, prædictæ Ecclesiæ Novariensi cum omnibus functionibus, quæ de ipso comitatulo publicæ parti pertinent, concederemus. Necnon etiam deprecatus est nos, ut quamdam plebem, quam olim malo ordine et in justa ratione sua perdidit Ecclesia, quæ sita est in villa quæ nominatur Trecate, non adeo procul a civitate ; curtem quoque quæ Gravalona dicitur, quondam ipsius episcopi continentem, sed nunc injuste pervasa esse dignoscitur, suæ Ecclesiæ restitueremus. Itaque dignum est, ut sui laboris prænominatus præsul retributionem a nobis suscipiat. Et quoniam justum est, ut supra nominata plebs atque curs jam dicta suo restituatur episcopatu, et ut alii nostri fideles hoc cognoscentes, nostræ fidelitati amplius stabiliantur, ejus precibus annuentes, jam dictum comitatulum a nostro jure in ejus Ecclesiæ potestatem omnino transfundimus et perdonamus ; et præfatam plebem atque curtem per hoc nostræ auctoritatis Præceptum jam supradictæ Novariensi Ecclesiæ reddimus et concedimus cum omni districtu, et teloneis, piscationibus, quæ in flumine Toxo, in illis scilicet locis, ubi ipsa Ecclesia ex utraque fluminis tenet parte : et cum venationibus, seu omnibus rebus, quæ ad publicam partem ex eodem comitatulo exigi possunt, cum capellis, domo cultili, massaritiis, casis, sediminibus, campis, pratis, vineis, pascuis, silvis, stallariis, salicetis, paludibus, aquis, aquarum decursibus, molendinis, piscationibus, cultis et incultis, divisis et indivisis, terminis, concessionibus, piscariis, compariciis, aliisque universis retributionibus, cum servis et ancillis, et aldianibus et aldianis utriusque sexus, cum omnibus quæ dici aut vocari possunt, ad jam dictam plebem vel curtem pertinentibus vel respicientibus. Necnon et portum de Bestagno eidem plebi pertinentem, quem gloriosissimus avunculus noster Otto Major supradictæ sedi per præceptum concessit, illa ut nullus marchio, comes, viceco-

mes, sculdasius ejus seu quælibet magna parvaque persona, homines jam dicti comitatus seu plebis vel curtis audeat distringere, aut intra ipsum comitatum aliquid præsumant exigere, vel paratos fecere, nec ullas retributiones acquirere ; sed liceat memorato præsuli suisque successoribus jam sapredictum comitatum cum supradicta plebe vel curte tenere, et omnes homines ipsius comitatus sive ipsius plebis seu curtis per se vel suum legatum distringere, sicut per nos vel nostrum missum distringendi essent, et omnia quæ de ipso comitatu ad publicam partem pertinent, vel inde exigi possunt, et prætaxatam plebem de Trecate, atque curtem de Gravalona cum omnibus suis appendiciis vel pertinentiis habeat, teneat, firmiterque possideat tam ipse quam successores illius, qui illam, Deo favente et disponente, ipsius sedis cathedram susceperunt sunt, omni nostra nostrorumque successorum regum et imperatorum, et omni hominum contradictione vel diminutione remota. Si quis igitur hoc nostræ concessionis Præceptum nefarie ausu temerario violare præsumpserit, centum libras auri optimi componere cogatur ; medietatem palatii nostro, et medietatem Novariensi Ecclesiæ ejusque rectori, qui pro tempore inibi habebitur. At hoc, ut verius credatur diligentiusque ab omnibus observetur, manu propria subter confirmantes, sigillique nostri impressione jussimus insigniri. Signum domini Henrici, serenissimi invictissimi imperatoris Augusti. Datum anno Incarnationis Dominicæ MXXIV (MXIV), Indictione duodecima ; anno vero regni domini Henrici imperatoris Augusti XII, imperii anno primo. Actum Trucujanæ feliciter. Amen ». Hactenus Privilegium Novariensi Ecclesiæ concessum.

12. Leo Ostiensis agens de eadem Henrici coronatione Romæ facta, ista adjicit ¹ : « Ipse quoque Henricus imperator ab eodem abbate Atenulpho et omni congregatione rogatus, per Præceptum aureo sigillo munitum universas monasterii provincias confirmavit, specialiter autem ac nominatim, res comitatus Thermulensis cum finibus suis, castra, Ecclesias, curtes cum omnibus pertinentiis ; duo etiam castella Cominensis territorii, scilicet Vicum-Album, et Sanctum-Urbani alio præcepto, postquam in patriam rediit, huic monasterio confirmavit : de quibus jamdudum Pandulphus, Capuanus princeps, post patris mortem eidem abbati fratri suo præceptum fecerat. etc. » Subjicit vero ista ² :

13. « His diebus monachi quidam ab Hierosolymis venientes, particulam lintei, cum quo pedes discipulorum Salvator extersit, secum detulerunt et ob reverentiam sacri hujus loci hic devotissime obtulerunt sexto idus Decembris. Verum cum plurimi fidem derogarent, illi fide præditi particulam istam ardentibus imponunt prunis, quæ mox in colorem ignis versa est. Amotis tamen carbonibus, ad pristinam speciem admirabiliter rediit. Cumque

¹ Leo Ost. Chr. Cass. l. II. c. 31. — ² Ibid. l. II. c. 24.

cogitarent, quomodo vel ubi pignora tanta locarent, dispositione Dei contigit, ut eodem die mitteretur huc locus ille mirificus, ubi nunc condita est linteipsum particula, argento et auro, gemmisque opere Anglico subtiliter et pulcherrime decoratus. Ibi ergo amoto crystallo, cum omni veneratione tocata est: morisque est, annis singulis ipso die Cœnæ Dominicæ ad mandatum fratrum a mansionariis eam deferri, et in medium poni, duoque ante illam accendi candelabra, et jugiter, donec impleatur mandatum, ab acolytho incensari: denum juxta finem mandati, a singulis per ordinem fratribus flexis genibus devotissime adorari, et reverenter exoculari». Hucusque Leo.

14. *SS. Popponem et Odilonem maxime colit Henricus imperator.* — Sed ad Henricum ex rege jam imperatorem revertatur oratio. Ilunc redeuntem in Germaniam excipiunt sui magno triumpho; convenit etiam eum S. Poppo abbas Stabulensis, ipsi ob egregia vitæ merita familiaritate conjunctus. Siquidem idem Henricus secundum illud Davidicum¹: «Timentes autem Dominum glorificat». Quoscumque potuit scire justos, eosdem audire cupiebat, atque colere satagebat, eorumque capessere consilia, et monitis parere non neglegebat: ut accidit, cum eundem ad se venientem Popponem excepit; de quo Everhelmus in Vita ipsius²: «Ab illo vero tam magnificentia quam honorificentia regia Poppo est susceptus, utpote qui primum amicitiae locum inter cæteros jam apud eum fuerat adeptus: cujus etiam sanctitas humilitatem, mansuetudinemque imperatoris in amorem sui ita accendit, ut etiam reverentia dictante, magis parere, quasi ad jussa ab eo visus fuerit, quam rogata ab alio implere voluerit. Contigit etiam ludis histrionum imperiales tunc fores occupari, atque eo spectaculi genere regem cum suis delectari. Ursis enim nudus quidam, membra melle perunctus exhibetur: illo plurimum pro periculo sui timente, ne forte ab iisdem ursis ad ossa sua melle consumpto perveniretur. Porro rex ejusdem spectaculi amore in oculis suis ita captus tenebatur, ut male providus, pro periculo viri parum esset sollicitus. Unde super tam iniqua in Christianum illusionem regem beatus Poppo redarguit, eumque ab hoc spectaculo suis cum optimatibus mox compescuit; tum etiam a periculo ursum virum liberavit: et ne id ultra fieret, arguendo et obsecrando obtinuit. Henricus enim imperator tam obsecrationi quam correptioni ejus humiliter paruit: et quem honorifice ad se venientem suscepit, honorifice etiam a se disgreduentem dimisit». At nec id satis, sed magna sollicitudine imperator curavit, ut idem vir sanctus abbas Stabulensis³ crearetur, qui non adulatione, sed correctione eam nesciens sibi paravit dignitatem.

15. Qui igitur sanctum Popponem (ut audisti)

ita coluit, S. quoque Odilonem abbatem Cluniacensem, hujus temporis fulgens sidus in Ecclesia, omni officio est prosecutus, usque adeo, ut coronam suam illi dono miserit, quam famis tempore, pro alendis pauperibus, una cum aliis Ecclesiæ ornamentis ipse distraxit. Testatur id Petrus Damiani in Vita ipsius¹, qui et paulo post ista de eodem subicit memorata digna: «Aliquando imperator Henricus, dum apposita mensa discumberet, vas illi holovitream valde pretiosum, et Alexandrini operis arte compositum cum tritis est pigmentis allatum. Mox advocat duos aulae regiae capellanos, Albericum videlicet et Landolphum, quorum alter Cenomanæ, alter vero Taurinensis Ecclesiæ postmodum episcopi facti sunt. Quod profecto vasculum capellani sancto viro, prout decebat, humiliter offerunt, ac pro eo postmodum reditura, ad regis interim convivium revertuntur. Paulo vero post, sicut humanæ curiositatis mos est, ut nova quælibet et insueta inhiante adspiciat, cœperunt monachi præfatum vas sub admirationis intuitu contrectare, et de manu in manum solerter inspicendo transponere; cum ecce de manibus incaute tenentium labitur, et ut fragilis est naturæ, continuo frangitur. Quod mox ut vir sanctus accidisse cognovit, graviter tulit, et præsertim clericis qui reliquerant, paterna pietate condoluit, ne videlicet Augustum innocentes offenderent, et non modo jacturam gratiæ, sed et regii motus periculum sustinerent. Mox ergo cum fratribus in Ecclesiam pius pater ingreditur, et ne hi qui immunes essent a culpa, motum regiae indignationis incurrant, orationibus et Psalmis incumbens, clementiam divinitatis implorant. Jam igitur oratione completa, vir Dei fractum sibi vas jubet afferri: manibus contrectat, oculis undique subtiliter inspicit; et ecce nulla prorsus in eo fracturæ vestigia deprehendit. Tunc indignatus in fratres, eos cum austeritate redarguit, cur vas conquererentur contractum, quod omnino remanserat illibatum. Illi vero vehementer attoniti tam evidentis ostensione miraculi, et austeritatem corripientis libenter accipiunt, et ad referendas omnipotenti Deo gratias ferventius accenduntur». Hæc Petrus. Qui et inferius tradit eundem S. Odilonem, sicut ab imperatore Henrico, ita etiam ab ipso Benedicto papa magnopere cultum. Nam ait:

16. «Apostolicus igitur iste, quem diximus, Benedictus, dum adhuc viveret, beatum virum affectuose dilexit, reverenter excoluit, et Apostolorum limina frequentanti necessariis sumptibus opima sæpe subsidia ministravit». Porro hospitium ejus, dum Romæ esset, fuisse in Aventino monte, in monasterio sanctæ Dei Genitricis Mariæ, idem affirmat, ibique vinum multiplicasse narrat. Est id monasterium, quod alio nomine Sancti Bonifacii, sive Sancti Alexii dici consuevit. At vero Benedictus papa, qui, ut audisti, adeo coluit sanctum

¹ Psal. xiv. — ² Everh. in Vita Popp. c. 9. apud Sur. die xxv Januar. — ³ Ibid. auctor c. 12.

¹ Habet eam Sur. tom. I. die 1 Januar.

Odilonem, peregrinum abbatem, nostratem Romualdum mirifice observavit, quem diu extra Italiam moras nectentem, Apostolicis litteris in Italiam revocavit, Romamque venire præcepit, prout idem Petrus in ipso Romualdo testatur ¹.

17. *Suenus rex Danorum divinitus dat poenas.* — Hoc eodem anno Suvan, vel Suvenus rex Danorum, qui anno superiori ingenti comparata classe invaserat Angliam, S. Eadmundo rege martyre ultore, diro perimitur vulnere. Memoranda res ab antiquioribus ex libello miraculorum ejusdem sancti exscripta, digna quæ intextatur Annalibus. A Rogerio sic describitur :

18. « Anno millesimo decimo quarto, Suvan tyrannus post innumerabilia et crudelia mala, quæ vel in Anglia, vel in aliis terris gesserat, ad cumulum suæ damnationis, ex oppido ubi corpus pretiosi martyris et regis Eadmundi incorruptum requiescit (quod nemo prius audebat facere, ex quo id oppidum datum fuerat memoratæ sancti Ecclesiæ) grande tributum ausus est exigere: quod si

cito non penderetur, se proculdubio ipsum oppidum cum oppidanis crematurum, ipsius martyris Ecclesiam funditus eversurum, clericos variis modis cruciaturum sæpissime minatus est. Insuper et ipsi martyri multis modis frequenter delrahare, et illum nil sanctitatis habere fuit ausus dicere. Denique cum imminente vespere dici, qua in generali placito quod apud Ghcagneshurt tenn erat, hæc eadem minitans iteraret, atque Danorum cuneis circumvallatus esset densissimis, S. Eadmundum ex adverso venientem solus vidit armatum: quem cum vidisset expavit, et nimio cum clamore vociferari cœpit: Succurrite, commilitones, inquiens, succurrite, ecce S. Eadmundus me venit occidere. Et cum hæc diceret, acriter a sancto confossus cuspidem, de emissario cui insederat decidit, et usque ad noctis crepusculum, magno cruciatus tormento, tertio non. Februarii miserabiliter morte vitam finivit. Quo mortuo filium ejus Canutum (quem alii Cnutum vocant) sibi regem constituit classica manus Danorum ». Hæc de tyranni interitu Rogerius. Eadem Westmonasteriensis hoc anno ex libello (ut dictum est) miraculorum ejusdem sancti.

¹ Petr. Dam. in Rom. c. 48. apud Sur. tom. III. die XIX Jun.

Anno periodi Græco-Romanæ 6507. — Anno Æræ Hispan. 1052. — Anno Hegiræ 405, inchoato die 13 Julii, Fer. 2. — Jesu Christi 1014.

— Benedicti VIII papæ 3. — Henrici II reg. 13, imp. 1. Basil. et Const. imp. 39.

1. *S. Henricus imp. coronatur.* — A num. 1 ad 6. Chronographus Hildensheimensis, qui annum a Natali Christi exorditur, de coronatione sancti Henrici hoc anno habet: « Natalem Domini rex Papiæ celebravit (quo sese anno superiori contulerat). Inde comitatu regali Romam pergens, imperialis coronæ diadema a sancti Petri vicario Benedicto sexto, kal. Martias (legendum, *decimo sexto kal. Martias* qui hoc anno in Dominicam incidit; cum Ditmarus, cujus verba recitat Baronius, asserat eum *die Dominica* coronatum) cum generali electione suscepit. Ejusque contectalis donna Cunigunda idem, Deo annuente, promeruit. Sic imperator Dei gratia factus Papiæ rediit. Ibi sanctum Pascha feriavit. Inde namque regrediens Pentecosten Babenberg (id est, Bambergæ) festive peregit ». Hæc itaque imperii Henrici epocha a decima quarta mensis Februarii proficiscitur, et in fronte singulorum annorum imposterum notabitur. *Ardoimus*, qui jam ab anno mii in Italia regnaverat, post Henrici imper. ex Italia discessum ejectus,

anno sequenti, novum bellum molitus est, tandemque Mediolanum ipsum hostilibus incursionibus pressit. Verum cum *Arnulphus* Mediolanensis archiepiscopus exercitum promovisset, *Ardoimus* regno se abdicavit, atque ultro in monasterium *Fructeriæ*, situm in agro Taurinatum, sese abdidit, uti refert Sigonius lib. 8 Hist. de Reg. Ital.

2. *Privilegium in favorem Ecclesiæ Rom. dat.* — A num. 6 ad 10. *Henricus* imp. decessorum suorum exemplo, Diplomate suo a Baronio recitato, patrimonia Romanæ Ecclesiæ confirmavit. Baronius ait, se Diploma cum quatuor exemplaribus contulisse, quod varia menda in illud irrepserint, sed reliquit nomen *Ludovici* Pii, quia scilicet non existimabat, donationem Ecclesiæ Romanæ factam, quæ ejus nomine circumfertur, supposititiam esse ac spuriam. Hæc Henrici imp. verba: « Exarchatum Ravennatem cum integritate, cum urbibus, civitatibus, oppidis et castellis, quæ piæ recordationis dominus Carolus, et dominus Pippinus, et dominus Carolus, et dominus Ludovicus, et Otto,

et itidem Otto filius ejus, prædecessores videlicet nostri, B. Petro Apostolo et prædecessoribus vestris jamdudum per donationis paginam contulerunt ». Verum ex iis, quæ in medium attuli, constat donationem Ludovicianam figmentum esse. Quamobrem in Diplomate ab Ottone M. anno DCLXII dato, et ibidem a Baronio recitato, nulla ejus prorsus mentio; quæ tamen faciendi fuisset, si *Ludovicus*, uti *Pippinus* et *Carolus*, aliquam donationem Ecclesiæ Romanæ fecisset. Ad hæc, sequentia ejusdem Diplomatis verba *Ludovici* nomen addititium esse demonstrant: « Per hoc nostræ delegationis pactum confirmamus donationes, quas pie recordationis Pippinus rex, et postea dominus Carolus excellentissimus imperator, ac deinceps Ottones piissimi, B. Petro Christi Apostolo spontanea voluntate contulerunt »; ubi *Ludovici* nomen taceatur, quia in præcedentibus mox memorialis tacitum etiam fuerat. Denique *Henricus* expressis verbis confirmat Constitutiones *Eugenii II* et *Leonis IV* Pontificum Rom. quibus præcipitur, ut Pontifex qui electus fuerit, non consecratur, nisi in præsentia missorum suorum, ejus tamen contrarium in Donatione Ludovici Pii diserte dicitur. Quare eodem Diplomate *Henricus* eandem donationem confirmaret et rescinderet, si donationem illam ratam haberet.

3. *Decernit ut Romani Pontificis ordinatio coram legatis Cæsareis fiat.* — *Leonis* autem nomine imperatorem intelligere *Leonem* papam hujus nominis IV. jam ostendimus anno DCLXII, Privilegium Ottonis M. explicantes. Neuter confirmat Decretum anno DCCXCVIII in Concilio Romano coram *Lamberto* imperatore factum, quo jubetur, ut Pontifex Romanus coram legatis Cæsareis consecratur, juxta id quod antea a Romanis Pontificibus statutum fuerat, quia tam *Otto* quam *Henricus* non habuere *Lambertum* pro imperatore, sed *Arnulphum* Germaniæ regem, quem ipse imperio dejecerat. Ex hoc etiam Diplomate apparet, verum esse quod sæculi noni initio asseruimus, nempe *Carolum M.* ejusque successores obtinuisse a Leone papa hujus nominis III, supremum dominium in Urbem, ducatum Romanum, et exarchatum Ravennensem. Nullus enim sibi persuaserit, Ottonem M. et Henricum majorem auctoritatem in ditiones Ecclesiasticas exercuisse, quam *Carolum M.* atque ex ejus familia imperatores. Ait autem *Henricus* se confirmare censum ex ducatu tam Tusciæ, quam Spoletani provenientem, « eo scilicet modo, ut annis singulis prædictus census ad partem Ecclesiæ S. Petri persolvatur, salva super eodem ducatu nostra in omnibus dominatione, et illorum ad nostram partem subjectione ». Et paulo post de aliis provinciis, urbibus et patrimoniis ad partem Ecclesiæ B. Petri Apostoli, atque Pontificum in sacratissima Sede illius residentium, verba faciens, ait: Nos in quantum possumus defensores esse teneamur, adhuc ad eam illi ditionem ad utendum atque disponendum firmiter valeant obtinere, salva in omni-

bus potestate nostra posterorumque nostrorum ». Porro Decretum *Henrici* imp. de consecratione Pontificis Romani coram legatis Cæsareis facienda, locum habuisse indicat *Petrus Damiani*, qui *Alexandro II* papa sedente, ait in lib. I, Epist. xx, electionem Pontificiam « per episcoporum cardinalium fieri debere principale judicium, ita ut secundo loco jure præbeat clerus assensum; tertio popularis favor attollat applausum: sicque suspendendam esse causam, usque dum regis celsitudinis consulatur auctoritas, nisi periculum fortassis immineat, quod rem quantocius accelerare compellat ». Sed hic mos tandem hoc sæculo per Romanorum Pontificum cum imperatoribus dissidia penitus exolevit, ut suo loco insinuabimus.

4. *Henricus imp. viros sanctos coluit.* — A num. 14 ad 17. Ait *Baronius* S. *Henricum Poppo-* nem abbatem Cluniacensem summo opere coluisse. « Erat enim vere Catholicus », inquit *Hugo* abbas Flaviniacensis in Chronico Virdunensi, « et religionis amator præcipuus. Adhærebat moralibus suorum consiliis, quorum puritate et nitore florebat Lotharingia, illuminabatur Saxonia, dirigebatur Suevia et Alemannia. Quamobrem sub ejus imperio salus fuit mundo et gloria. Inter quos habebat gratissimos *Odilonem* Cluniacensis Ecclesiæ patrem piissimum, *Willelmum* Divionensis Ecclesiæ rectorem strenuum, religione præstantissimum, qui etsi non erant de regno ejus, tamen in amicitia ei jungebantur, et eorum orationibus regni negotia in pace tractabantur. Nec deerat familiaritati ejus *Pandolphus* Agaunensis (abbas) vir vita, moribus, religione, sanctitate celeberrimus; cum eum faceret commendabilem regi et optimatibus fama virtutis ejus. At vero de regno ejus quotquot erant pontifices, et primi Ecclesiarum, tot ei erant incitamenta virtutum; cum ipse eisdem muniretur, et ipsi vice versa ejus auctoritate ab illicitis reprimerentur, et ad perfectiora provocarentur. Inter quos hunc patrem nostrum (nempe *Ricardum* Virdunensem abbatem) habebat charissimum inter præcipuos egregium pietate prædicabilem, religione commendabilem; quem tanta Deus donaverat omnium gratia, ut a plerisque pro inolita sibi benignitate, vitæque et sermonis acceptione, et non affectata elegantia sed impensa gratia, hoc vocaretur agnomine videlicet *Richardus gratia Dei*, sicut et S. *Odilo* ab ingenita pietate *Pius*, et *Willelmus* a rigore ferventioris propositi *Supra regula dictus est* ». De S. *Poppone* Stabulensi abbate infra sermo erit. San-Marthani in Catalogo abbatum Agaunensium *Pandulfi* nomen solummodo exhibent, nec quidquam aliud de eo habent.

5. *Moritur Sveno Angliæ invasor.* — Ad num. 18. *Huntindonius* pag. 461, *Swani* anno superiori Angliæ regis appellati casum paucis perstringit: « Anno, inquit, decimo quarto (post millesimum) *Swain* jam rex Anglorum in exordio regni sui subita morte periit. Exercitus autem ejus elegit *Cnut* filium suum

n regem.» Quomodo sese brevissimo quo in Anglia regnavit tempore gesserit Swanus, his verbis narrat Malmesburiensis lib. 2 de Reg. pag. 70: «Invasam Angliam cædibus et rapinis urgebat: provincialium substantiæ prius abrasæ, mox proscriptiones factæ. Hæsitabatur totis urbibus, quid eret: si pararetur rebellio, assertorem non haberent: si eligeretur subjectio, placido rectore carerent. Ita privatae et publicæ opes, ad naves cum obsidibus deportabantur: quod non esset dominus ille legilimus, sed tyrannus atrocissimus. Sed non diu propitia divinitas in tanta miseria sivit fluctuare Angliam. Siquidem pervasor continuo ad Purificationem S. Mariæ, ambiguum qua morte, vitam effudit. Dicitur quod terram sancti Edmundi regis et martyris depopulanti, idem martyr per visum apparuerit, leviterque de miseria suorum conventum insolentiusque respondentem, in capite perculerit. Quo dolore tactum, in proximo, ut prædictum est, obiisse.» Idem narrat Joannes Salisburiensis, Carnotensis episcopus, qui sequenti sæculo floruit, in Polycratice lib. 8, ubi caput vicesimum primum ita inscribit: «Omnium tyrannorum finem esse miseriam, et quod in eos Deus vindictam exercet, si manus cesset humana». Cæterum *Swanum* Christianum fuisse, docet Encomiastes Emmæ Anglorum reginæ lib. 1: Præsciens dissolutionem sui corporis imminere, filium suum Cuultonem quem secum habuit advocat; sese viam universæ carnis ingrediendum indicat. Cui dum multa de regni gubernaculo, multaque hortaretur de Christianitatis studio, Deo gratias, illis virorum dignissimo sceptrum commisit regale. Hujus rei facto maxime Dani, quibus legitime præesse debuit, favent; eumque patre adhuc vivente regem super se constitui gaudent». Hic autem Encomiastes patri et filio æqualis fuit.

6. *Ethelredus in regnum Angliæ restitutus.* — «Swano mortuo», ait Vigorniensis, «filium ejus Canutum sibi regem constituit classica manus Danorum. At majores natu totius Angliæ ad regem Anglorum Ethelredum pari consensu nuntios festinanter miserunt, dicentes se nullum plus amare vel amatuos esse quam suum naturalem dominum, si ipse vel rectius gubernare, vel mitius eos

tractare vellet quam prius tractarat. Quibus auditis, Eadvardum filium suum cum legatis suis ad eos dirigens, majores minoresque gentis suæ amicaliter salutavit: promittens se illis mitem devotumque dominum futurum, in omnibus eorum voluntati consensurum, consiliis acquieturum, et quidquid sibi vel suis ab illis probrose et decorose dictum vel contrarie factum fuerat, placido animo condonaturum: si omnes unanimiter et sine perfidia illum recipere vellent in regnum. Ad hæc cuncti benigne responderunt. Deinde amicitia plenaria, ex utraque parte, et verbis et pactis confirmatur. Ad hæc principes se non amplius Danicum regem admissuros in Angliam, unanimiter spoponderunt. His gestis ab Anglis in Normanniam mittitur. Rex festinato Quadragesimali tempore reducit, et ab omnibus honorabiliter excipitur». His addit Malmesburiensis citatus, *Ethelredum* contra Canutum exercitum collegisse, huncque dolum meditantem dolo præventum terga verlisce et postquam obsides quos habebat, magnæ nobilitatis et elegantiae pueros, naribus et auribus truncasset, patriam petisse.

7. *Moritur Samuelus Bulgarie rex.* — «Basilus imperator (nempe Orientis) quotannis in Bulgariam expeditionem faciebat, et obvia quæque postulabatur ac vastabat», inquit Cedrenus pag. 707, qui narrat postea expeditionem ab eo hoc anno, *Indict. duodecima* susceptam, cujus percepto nuntio *Samuelus* Bulgarie rex aditus Bulgariæ omnes munivit atque intercept, quos cum expugnare desperaret Basilus, *Nicephorus Xiphias* Philippopolis tunc præfectus, eo consentiente, cum exercitus parte per quemdam montem, *sub xxix Julii*, de superiori loco subito Bulgaros a tergo adoritur, ex quibus multi occisi, multo plures capti. Ipse *Samuel* filii opera ægre evasit. «Captivus Bulgaris, qui fuisse ad xv millia feruntur, oculos imperator eruit, singulisque centuriis unoculum præficit, atque his ductoribus eos ad Samuelum mittit. Quos Samuelus isto numero atque ordine venire videns, animi ad calamitatem eam fortiter ferendam non habuit satis, sed biduo post obiit», inquit Cedrenus. Ei successit filius *Gabrielus*, qui et *Romanus* dicebatur, de quo anno sequenti.

BENEDICTI VIII ANNUS 4. — CHRISTI 1015.

1. *Erigendis Ecclesiis et monasteriis Henricus imp. cum conjuge dant operam.* — Millesimus decimus quintus annus agitur, Indict. decima tertia inchoatus, quo Henricus imperator Cluniaco recedens, Corbeiam se conferens, solutum nimis ejus abbatem, Walonem nomine, nec disciplinam regularem observandam suscipientem, sed repudiantem, per Menuvercum Paderborneusem episcopum privandum curavit. Hæc Ditmarus hoc anno ¹, et alii recentiores, ut Crantzius, qui his ista subjicit ²: « Cum post hæc idem Menuvercus vellet sacrum peragere missæ officium, sacrista sacras illi vestes subduxit; iterum atque iterum monitus tradere recusavit. Tunc episcopus: Reddes, inquit, rationem Altissimo pro omisso hodierno officio. Monachus ille floccipendens, etiam risit episcopum. Sed apparuit in morte ipsius episcopi, quam non frustra esset minatus: nam nihil ante mali sentiens monachus, in ipsa hora mortis episcopi expiravit. Multa in hunc modum mirabilia leguntur de hoc viro, sanctitatem ejus testantia ». Porro quod ad imperatorem pertinet, eduxisse recedens secum tredecim monachos Paderbornam, illicque erexisse monasterium, quod eis administrandum et in regulari disciplina instituendum tradidit: ipse cum sua conjuge sanctissima femina (dederat enim Deus ipsi adjutorium simile sibi) in erigendis et Ecclesiis et monasteriis totus erat. De quo monasterio Paderbornæ hoc tempore erecto hæc habentur in Vita Chunegundis Augustæ, ejus uxoris ³: « Denique post novellam fœcundissimæ plantationis suæ Ecclesiam, quam cum illo suo studiosissimo cooperatore Henrico imperatore in loco Bambergensi venustissime, sicut hæcenus cernitur, fabricavit, sub patrocinio principis Apostolorum beati Petri et sancti Georgii martyris, monasterium sub regula sancti Benedicti ad aquilonarem plagam in honorem sancti Michaelis archangeli exstruxit, non minori studio, prædiorum quoque ac diversorum donariis ornamentorum. Tertiam demum versus meridiem sub ordine canonicorum, sub titulo

beati protomartyris Stephani, parvo quidem schemate, sed majori opera de suo patrimonio Ecclesiam fabricavit: ad quam dedicandam Benedictum papam, quem præfatus imperator Henricus ad confirmandum Bambergensem episcopatum advocaverat, venire rogavit, etc. » At de adventu Benedicti alias. Sic igitur Henricus imperator cum conjuge Augusta piis his intentus operibus semper erat, cum præsertim contingeret a bellis (quod raro accidit) cessare et in pace quiescere.

2. *Ecclesia Merseburgii erigitur et donis augegetur imperator.* — Erexit hoc eodem anno idem imperator Ecclesiam Merseburgii episcopatus Ditmari, de qua in Appendice ad ipsum Ditmarum hæc leguntur: « Postquam sedem sibi commissam tam factis quam dictis exaltavit, anno Dominicæ Incarnationis millesimo decimo quinto, Indictione decima tertia, XV kal. Junii, ipsius dulcisono hortatu et efficaci rogatu imperator hanc nostram fundari præcepit Ecclesiam, antistite præsentis, ac quatuor lapides in monte Sanctæ Crucis in fundamento primus jacens: Superædificantibus inquit, spes æternæ retributionis optabilis, detrahentibus ultio divina formidabilis repensabitur. Et quia templum nostræ Ecclesiæ jussu imperatoris ædificatum diximus, quantum nostram Ecclesiam multiplici ornatu decoravit, veluti scriptis reperimus, quam brevissime perstringamus.

3. « Dedit hic imperator nobis plurima divino officio convenientia, scilicet tria plenaria, unum de auro, eburnea tabula ornatum, quod minimum est: secundum auro, gemmis, et eburnea tabula variatum, quod pretiosius est, tertium auro, et electro, et pretiosissimis gemmis artificiose decoratum, quod optimum est. Præter hæc tres auratas (aureas) cruces, et duas argenteas; et duas ampullas ejusdem metalli, et tres calices, unum argenteum magni ponderis; secundum aureum et gemmatum; tertium arge, omnigenisque gemmis elaboratum, quod pretium redemptionis animæ suæ fuisse adhuc vulgatur. Item tabulam altaris auro et gemmis honorifice distinctam, ad quam præsul Ditmarus quinque libras auri de priori altari se dedisse testatur; pyxidem auream et gem-

¹ Ditm. l. vii. — ² Crant. Hist. Eccl. Sax. l. iv. c. 4. — ³ Apud Sur. die III Mart. tom. II.

matam; thuribula argentea tria; dorsalia serica plurima, campanas, cappas sericas multas, plurimaeque alia quæ enarrare perlongum esset». Subiicit his civitates et villas ab eodem eidem Ecclesiæ collatas, quæ brevitatis causa prætermittimus recensere: consulat auctorem qui plura cupit. Sed et ipse etiam ¹ Ditmarus horum meminit quæ ab imperatore eidem Ecclesiæ sunt donata, recolique ejusdem adventum Merseburgum hoc anno.

4. *Ernesti ducis Alemanniæ publica peccatorum confessio et obitus.* — Subiicit post nonnulla Ditmarus obitum Ernesti Alemanniæ ducis, filii Luitpoldi, dum casu in venatione sagitta emissa vulneratus interiit, summæ pietatis specimen exhibens fidelibus cunctis, quod memoratu dignum verbis istis ipse descripsit: « Ille, quia mortem sibi imminere perspexit, socios vocat, et ut reo parcerent supplicat. Et quia hic tunc presbyterum cui sua confiteretur peccata non habuit, unum ex militibus hujus vice propius accedere jussit. Quem cum adesse perspiceret, per eum vocavit alios: Omnes, inquit, accedite, et commortalis vestri peccatoris facta aure cordis percipite, et qualiter curentur unanimiter succurrite, absentibusque

cunctis fidelibus peccatricem meinet animam, quæso, commendate, et uxorem meam, ut honorem suum servet et mei non obliviscatur, adnotele. Hæc dicens, in quoscumque unquam se aliquid deliquisse recordari potuit, cunctis presentibus innotuit, et mox de hac luce XI kal. Junii discessit, sepultus Vuirceburg juxta patrem suum marchionem Luitpoldum, ut ipse rogavit. Ille juvenis, ut spero, felicem habet animam, cui (sicut ipse vivens testatus est) plus placuit coram multis hic erubescere, quam coram omnipotenti Deo latere, etc. » Hæc Ditmarus, atque plane mirandum exemplum contriti hominis corde, ut peccata sua cunctis propalare non veritus sit hominibus, cum, cui secreto confiteretur, presbyterum non invenisset. Ejusmodi erubescantiam sponte pati hominem velle ob delictorum suorum pœnitentiam, gratum esse Deo sacrificium, per quod ipse perpetrata delicta dimittat, in commentario illo, qui inscribitur, « Vitas Patrum », et alibi sunt exempla, cum tamen ne id fieri debeat, decreto S. Leonis fuisse vetitum, suo loco superius dictum est. Porro eundem Ernestum, memoria dignum principem, hoc anno esse defunctum, Germanicarum rerum chronographi Hermannus et Marianus Scotus affirmant.

¹ Ditm. l. vii.

Anno periodi Græco-Romanæ 6503. — Anno Æræ Hispan. 1053. — Anno Hegiræ 406, inchoato die 21 Junii, Fer. 3. — Jesu Christi 1015.

— Benedicti VIII papæ 4. — Henrici II reg. 14, imp. 2. Basil. et Const. imp. 40.

1. *Canutus Daniæ rex in Angliam irrumpit.* — Quia in Annalibus Ecclesiasticis facta tantum quædam peculiaria hoc anno narrantur, iis quæ ad Historiam generalem faciunt prætermittimus, ii nobis hic supplendi. Contendebant in Anglia de regno *Ethelredus* et *Canutus*, priorque ab Edrico, apud quem summa rerum erat, proditus, belli mole non potuit non obrui. « Sequenti anno », inquit Malmesburiensis lib. 2 de Reg. pag. 71, narrans quæ præsentis gesta sunt, « apud Oxenford magnum Concilium est congregatum Danorum et Anglorum; ubi rex (sc. Ethelredus) nobilissimos Danorum Sigeferdum et Mercardum interfici jussit, delatione proditoris Edrici perfidiæ apud se insimulatos. Is illos favorabilibus assentionibus deceptos, in triclinium pellexit, largiterque potatos satellitibus ad hoc præparatis anima exiit. Causa cædis ferebatur, quod in bona eorum inhiaverat ».

Paucis interpositis: « Eadem æstate Cnuto, compositis rebus in Danemarchia, fœderata cum finitimis regibus amicitia, venit Angliam, eo animo ut aut moriendum sibi proponeret. Itaque a Sandwicho Cantiam, inde in West-Saxoniam progrediens, omnia incendiis cædibusque fœdabat, rege (scilicet Ethelredo) apud Cosham morbo decumbente. Tentavit quidem Edmundus (Ethelredi filius) occurrere, sed ab Edrico præpeditus, copias interim tuto loco continuit. At Edricus non ultra dissimulandum ratus, quin artes suas aperta fronte nudaret, ad Cnutonem cum XL navibus defeoit: omnis quoque West-Saxonia datis obsidibus et armis idem fecit. Mercii vero numero et spe congregati, se ad resistendum offerebant; veniret modo rex, et quo progrediendum esset, præciperet; duceret secum proceres Londoniæ, paratos esse sanguinem suum patriæ impendere. Ille solitus salutem suam muris

committere, non in hostem excurrere, Londoniæ debebat propter proditores, ut aiebat, nusquam procedens.

2. *Edmundus filius Angliæ regis se ei frustra opponit.* — Rex interea (nempe Canutus Daniæ rex) partibus suis urbes et vicos applicare, nullo tempore feriari, noctibus consultare, diebus pugnare. Edmundus diu deliberato consilio in tanta rerum angustia optimum factu arbitratus, si urbes quæ defecerant pugnando reciperet, in eundem sensum Uthredum quemdam Translumbraunum comitem adduxit. Cæteras enim quæ adhuc dubio favore pendebant, confirmandas putabant, si de rebellantibus graves pœnas sumerent. Sed Cnuto non minori præditus astutia, simili eos ingenio circumvenit. Nam commendatis West-Saxonibus et Merciorum parte, quam subjecerat ducibus suis, ipse in Northanymbros profectus, depopulatione locorum Uthredum ad sua defensanda redire coegit. Itaque licet se dedisset, Barbarica levitate jussus est jugulari. Comitatus ejus datus est Iricio, quem postea æquales partes sibi vindicantem, Cnuto ab Anglia expulit. Ita subjectis omnibus, Edmundum per semetra fugitantem non prius persequi destitit, quam Londoniam ad patrem pervenisse cognosceret. Tunc usque post Pascha quievit, ut cum omnibus copiis urbem adoriretur. Sed prævenit conatum ejus mors Ethelredi », de qua anno sequenti.

3. *Impietas Rainardi comitis Senonensis.* — Ex Anglia in Franciam transeamus. In Chronico S. Petri-Vivi Senonensis legitur : « Anno mxi, obiit Frotmundus comes (nempe Senonensis) bonæ memoriæ. Anno mxv facta est traditio Senonicæ urbis ». Paulo post : « Mortuo Frotmundo Senonum comite, et sepulto in capitulo S. Eraclii, successit ei Reinardus filius ejus nequissimus, qui persecutionem intulit Ecclesiis Christi, et Leoterico archiepiscopo (sc. Senonensi), in tantum ut etiam (quod dicere et audire horribile est) quando ille divinum Officium celebrans, vultumque dans populo salutabat, ille vultum avertens in posterioribus suis ei pacem offerebat : nonnunquam in faciem ejus spuebat, homines ejus interficiebat, eumque modis omnibus injuriabat. Ob propter consilio Romani Pontificis, et abbatis Ecclesiæ Cluniacensis (nempe S. Odilonis) necnon suffraganeorum episcoporum et optimorum procerum, præcipueque Rainaldi Parisiensis episcopi, anno ab Incarnatione Christi mxvi, (legendum, mxv, ut ex mox dictis intelligitur), X kalendas Maii civitatem regi Roberto reddidit. Ipse vero comes fugiens nudus evasit. Frater autem ejus Frotmundus et quidam milites urbis turrim defenderunt multis diebus. Quos tandem rex cepit, et victus pietate vivos abire sinit. Frotmundum autem Aurelianis in carcere trusit, ubi obiit ». Idem legitur in alio veteri Chronico S. Petri-Vivi adhuc inedito, ejus hæc verba refert Mathoudus in Catalogo archiep. Senonensium : « Anno Domini mxv, Leothericus archiep. tradidit

Senonum urbem Roberto regi, consilio domini papæ Benedicti VIII qui adhuc vivebat, etc. Nam Rainardus quotidie lædebat archiepiscopum, etc., sed ad regem adiit (nempe Leothericus) et sibi temporale suum supposuit, ut ipso rege pace gauderet Ecclesia Senonensis ». Legendum etiam fragmentum Chronici Hugonis monachi Floriacensis apud Duchesnium tom. iv, pag. 143, ubi de Rainardo comite ait : « Talem persecutionem Christianis intulerat, qualis non fuerat audita a tempore paganorum ». Denique Glaber lib. 3, cap. 4, hujus Rainardi impietates fuse narrat.

4. *Fulberti episc. Carnotensis suasu punita.* — Res hæc plurimis, flagitia Rainardi comitis ignorantibus, visa est admodum tyrannica et crudelis, multosque Franciæ proceres adversus Robertum Galliæ regem commovit, et præsertim adversus episcopos qui consilium hujusmodi regi et Leoterico archiepiscopo suggesserant, in quibus etiam fuit Fulbertus episcopus Carnotensis, ut patet ex ejus Epistola ordine x ad Gualeranum et Gualterium comites data : « Sciatis, fratres », inquit Fulbertus, « quia rex Robertus benefacit, cum Christianos adjuvat et hæreticos damnat. Et ad hoc debent eum adjuvare, et confortare mecum omnes sui fideles : quia hoc ministerium ejus est, per quod salvus esse debet. Sciatis iterum quod archiepiscopus Senonensis (sc. Leotericus) requisivit a me consilium, quid deberet facere de Raginaldo hæretico, qui persequabatur Ecclesiam Dei. Et ego ei dedi tale consilium, quale ad suum ordinem pertinebat. Et ecce ego mitto vobis utrumque scriptum, et complantum suum et consilium meum, quod dedi ei secundum ordinem suum. Si quis autem falsarius dicat, quod ego alterum ei consilium deinceps vel scripserim, vel dixerim, vel mandaverim, rogo ut me sicut patrem vestrum spirituales defendatis, quia fiducialiter hoc facere potestis ».

5. *Moritur S. Adelheidis abbatissa Vilicensis.* — Hoc circiter anno mortua est sancta Adelheidis Vilicensis monasterii in Germania inferiori abbatissa. Vitam ejus a Berta sanctimoniali scriptam stylo passim immutato ediderat Surius ad diem v Februarii, sed primævam ad eundem diem Bollandus publicavit. Est Vilica, vulgo *Villich*, locus in diocesi Coloniensi e regione Bonnæ urbis situs, ubi sunt hodie duo Collegia, unum canonicorum, alterum nobilium virginum canonicarum, a parentibus sanctæ Adelheidis ampliter dotata, ut ibidem habet Bollandus. Hæc clarissima virgo, illustribus parentibus nata, jugum religionis subit secundum regularem institutionem S. Hieronymi, fratreque in militia occiso, parentes bona ejus Deo consecrarunt, Vilicense cœnobium construxere, et deinceps continenter vivere. Mortua matre suscepit Adelheidis S. Benedicti regulam, cum antea per annum in vietu et vestitu vires suas explorasset, tandemque mortuo patre, S. Heribertus Coloniensis archipræsul voluit, ut præset Capitolino monas-

sterio in urbe Coloniensi posito (quod *B. Mariæ Virginis in Capitolio* appellatur, et ubi etiamnum sunt canonicæ): « Venerandus antistes », inquit Berta in ejus Vita, de S. Heriberto verba faciens, « tanto amore est illi colligatus, ut ejus consiliis pareret in quacumque divinarum rerum ordinatione, eamque summa excoletet veneratione. Erat enim inter eos tam mira charitas, Deoque grata familiaritas, ut in omnibus operibus bonis uniti viderentur esse moris ». In Vita et post mortem miraculis claruit. Sunt Vilicenses canonicæ plerumque XII præter abbatissam, omnes genere illustres. Cum vero *S. Heribertus* anno MXXI decesserit, funusque sanctæ Virginis curarit, ac *Vilicam* reveli corpus ejus fas esse decreverit, ejus mortem circa hunc annum accidisse oportet.

6. *Sedes episcopalis Sabiona Brixinam transfertur.* — Hoc etiam circiter anno mortuus est *S. Albinus*, sive *Albinus*, Sabionensis Ecclesiæ vicesimus octavus episcopus, postquam sedem episcopalem *Sabiona Brixinam* in Tirolum transtulisset, omnesque optimi pastoris partes explevisset, ut ex Fastis Brixinensibus ostendit Bollandus ad diem V mensis Februarii.

7. *Moritur Gabriel Bulgarie rex.* — « Samueli (Bulgarie regi anno superiori vita functo) successit filius Gabrielus, qui et Romanus dicebatur, patre robustior ille, sed prudentia longe inferior, natus captiva quadam Larissæa, iniiit decima quinta Septembris, Indictione decima tertia », inquit Cedrenus. Statim ac rerum summam capessivit *Gabriel*, Thessalonicam aggressus, a Theophylacto Botoniata ejusdem urbis præfecto fusus est. Cum vero postea Theophylactus a Gabriele prorsus deletus cæsusque fuisset, hac clade nuntiata, *Basilus* imp. Constantinopolim reversus est. Sub initium veris in Bulgariam rursus *Basilus* copias edu-

xit, et ducum suorum opera *Thessalonicam* suæ potestati subdidit. Nec multo post ei nuntiatur, *Gabrielem* a *Joanne* qui et *Uladislaus* dicebatur, *Aaronis* filio, quem ipse neci aliquando subtraxerat, cum venatum exiisset, interfectum fuisse die XXIV Octobris currentis anni, postquam regnasset annum unum, mensem unum et dies novem, ut refert Cedrenus laudatus. Is *Joannes* ultimus fuit regum Bulgarie; neque enim *Basilus* imp. destitit a bello, quin totam Bulgariam Græcorum imperio subdidit.

8. *Moritur S. Wolodomirus Russiæ rex.* — Herbesteinus in Rerum Moscovitarum Commentariis pag. 3, postquam retulit *Volodemirum* primum regem Christianum Russiæ baptizatum fuisse, et *Annam* sororem Basilii et Constantini imperatorum Orientalium sibi copulasse anno mundi 6496, Æræ nempe Constantinopolitanæ, kal. Septemb. an. Christi DCCLXXXVII inchoato, subdit: « Anna moritur XXIII anno post nuptias: Wolodomirus vero anno post obitum uxoris quarto decessit ». Cedrenus pag. 749, ubi nullum annum memorat, ait mortuam Annam fuisse « in Rossia, defuncto jam ante Bladimero marito ». Verum Dithmarus lib. 7 diserte affirmat, *Wolodemirum* Kioviæ obiisse, et *juxta conjugem suam sepultum* esse. Is civitatem, quam *Wolodimeriam* a suo nomine vocavit, condidit, eamque Russiæ metropolim constituit. « Inter sanctos tanquam Apostolus solemniter, videlicet XV Junii quotannis veneratur ». Reliquit plures filios, qui post mortem ejus inter se de regno decertarunt. *Svatopolchus* unus ex eis fratres suos *Boris* et *Cleph* per sicarios interfecit, hique in Russorum Calendariis inter sanctos connumerantur ad diem XXIV mensis Julii, ut monstravimus anno CMLXXXVII.

BENEDICTI VIII ANNUS 5. — CHRISTI 1016.

1. *Sarraceni Romana littora invadentes rebellantur.* — Annus Redemptoris millesimus decimus sextus, Indictione decima quarta sequitur, quo Benedictus papa adversus Sarracenos Ecclesiæ littora invadentes paravit exercitum, milites movit, quibus expugnati sunt ac feliciter debellati.

Quomodo autem ista acciderint, ex Dithmaro sic accipias, dum res gestas sub anno decimo sexto post millesimum narrat¹: « In Longobardiam²

¹ Dithm. I. VII. — ² Longobardia etiam dici consuevit omnis provincia quam incolerent Longobardi.

Sarraceni navigio venientes, Lunam civitatem fugato pastore invadunt, et cum potentia ac securitate fines illius regionis inhabitant, et uxoribus incolarum abutuntur. Quod cum domino Apostolico nomine Benedicto fama deferret, omnes sanctæ matris Ecclesiæ tam rectores quam defensores congregans, rogat ac præcipit, ut in inimicos Christi talia præsumentes, viriliter secum irruerent, et adjuvante Domino occiderent. Insuper ineffabilem navium multitudinem tacite præmisit, quæ eis redeundi possibilitatem interciperet. Hoc rex Sarracenus animadvertens, primo indignatur, et tandem paucis comitatus navicula periculum imminens evasit: sui vero omnes conveniunt, et in adventantes prius irruunt hostes, cosque mox fugientes (miserabile dictu) tres dies et noctes prosternunt. Respexit tandem Deus, gemitu piorum placatus, et odientes se fugavit, et in tantum devicit, ut nec uno de his relicto, interfectorum et eorundem spoliis multitudinem victores numerare nequirent. Tunc regina eorum capta, ob audaciam jure capite plectitur. Aureum capitale ejusdem ornamentum invicem gemmatum papa sibi præ cæteris vindicavit, postque imperatori suam transmisit partem, quæ mille libris computabatur. Divisa omni præda, victrix turba læta mente ad propria revertitur, ut triumphanti Christo dignas persolveret odas. Rex autem prædictus morte conjugis et sociorum admodum turbatus, summo Pontifici saccum castaneis refertum misit, et per hujus portitorem tot se in proxima æstate milites esse laturum intimavit. Percepta hac legatione, papa marsupium eidem milio plenum internuntio talibus dictis reddidit: Si non sufficiat sibi Apostolicam satis læsisse dotem, secundo veniat, et tot loricatedos vel plures se hic inventurum pro certo sciat. Homo cogitat et loquitur, Dominus judicat: quem suppliciter fidelis quisque oret, ut talem plagam misericorditer amoveat, et necessariam optatæ pacis securitatem pius indulgeat. Hucusque Dilmarus, qui res gestas hujus temporis scribens, usque ad biennium supervixit.

2. *Canutus regnat in Anglia, ad quem scribit Fulbertus episcopus.* — Hic pariter est annus, quo Ethelredo Anglorum rege defuncto, nono kalend. Maii, feria secunda, mala innumera experto, quæ ei obventura prædixerat S. Dunstanus, ob necem illatam fratri, communi Anglorum consilio externus rex eligitur Canutus, sive Knutus Danus, qui post patrem insulam illam armis possederat occupatam, jam debellatis iis qui post Ethelredum regnare tentassent. Christianus fuit ac pius valde: quomodo autem Romam summa cum religione contulit ad Limina Apostolorum, suo loco dicturi sumus. Hæc et alia de eo veteres, qui persecuti sunt res Anglorum, Rogerius, Matthæus, et alii recentiores, necnon qui scripsere res Danorum. Ad hunc apparet ex Willelmo Malmesburiensi scriptam esse a Fulberto episcopo Carnotensi Episto-

lam, cum accepit ab eo missum munus: quæ sic se habet¹:

3. « Nobilissimo regi Danomarchiæ² Cluelo, Fulbertus Dei gratia Carnotensis episcopus cum suis clericis et monachis, orationis suffragium. Quando munus tuum allatum vidimus, sagacitatem tuam et religionem pariter admirati sumus. Sagacitatem quidem, quod homo nostræ linguæ ignarus, longoque a nobis terræ marisque intervallo dissitus, non solum ea quæ circa te sunt, strenue capessas, sed etiam ea quæ circa nos, diligenter inquiras. Religionem vero, cum te, quem paganorum principem audieramus, non modo Christianum, verum etiam erga Ecclesias ac Dei servos benignissimum largitorem agnoscimus. Unde gratias agentes regi regum, ex cujus dispositione talia descendunt, rogamus, ut ipse regnum tuum in nobis prosperari faciat, et animam tuam a peccatis absolvat per æternum et consubstantiallem sibi unigenitum Christum Dominum nostrum, in unitate Spiritus sancti. Amen. Vale, memor nostri, non immemor tui ». Hæc ad regem Canutum Fulbertus. Hæc omnia de Canuto, quem Cnutum appellat, habet rerum Danorum scriptor Adam, additque utrobique regnasse ipsum, in Anglia atque Dania, et magnum ob id cognomento nuncupatum, aitque³: « Victor Cnut ab Anglia rediens, in ditione sua per multos annos regnum Daniæ possedit et Angliæ. Quo tempore episcopos ab Anglia multos adduxit in Daniam, de quibus Bernardum posuit in Scania, Gerbrandum in Zelandia, Reginerum in Flavia. Zelatus est hoc noster archiepiscopus Hamburgensis Wanus, et dicitur Gerbrandum redeuntem ab Anglia cepisse, quem ab Eltrodo Anglorum archiepiscopo cognovisset esse ordinatum. Ille quod necessitas persuasit satisfaciens, fidelitatem Hamaburgensi cathedræ cum subjectione debitam spondens, familiarissimus deinceps archiepiscopo effectus est: per quem ille suos etiam legatos ad Cnut regem transmittens cum muneribus, congratulatus est ei de rebus bene gestis in Anglia, sed corripuit eum de præsumptione episcoporum quos transtulit ex Anglia. Quod rex gratanter accipiens, ita postmodum conjunctus est archiepiscopo, ut ex sententia ejus omnia deinceps facere maluerit. Hæc nobis de avunculo suo rex Danorum innotuit, et de captione Gerbrandi non tacuit ». Hæc Adam.

4. *S. Simeon Armenus crimine hæresis infamatus, sanctitate conspicuus innotescit.* — Hoc anno moritur vir sanctitate insignis, genere Armenus, nomine Simeon, qui vitæ anachoreticæ cunabula exercuit in Pæstina, inde divino monitu in Occidentem migravit, ubi plurimis miraculis illustratur. Qui autem res ab eo præclare gestas conscripsit, etsi nomine incognitus nobis sit, tamen eodem vixisse tempore certum est. Porro de ejus

¹ Fulb. Ep. LXXXI. — ² Cnuto restituendus ex Willelm. Malmesb. de reg. Angl. l. II. c. 11. in fin. — ³ Adam l. II. c. 38.

vita primordiis se per Epistolas admonitum ab Arsenio patriarcha Hierosolymorum, idem auctor in ejus Vita testatur. Sed quæ ipsi contigerint, dum habitu peregrino se in Urbem contulit, visitandi gratia sanctorum memorias sub eodem Benedicto Pontifice, cum hæresis accusatus, periclitatus esset, nisi divinitus liberatus fuisset; ab eodem auctore sic accipe:

5. « Non multo post tempore, Dei servus Simeon, exacto jam eremiticæ conversationis prælioso tyrocinio, secundum quod alibi divinitus revelatum est, solitudinis antra deseruit, et orationis studio Romam peregrinus expetiit. Cumque multa sanctorum corpora circumeundo visitaret, quem nullus in orando labor vix aliquando superaret, tandem ad oratorium S. Joannis Baptistæ Lateranensis Ecclesiæ applicuit. Ubi sanctæ Romanæ Eccl. Pontificem, Benedictum nomine, cum multis religiosis episcopis Orthodoxis viris in congregata Synodo residere invenit. In quo cum devotæ orationis moram, ut ei semper consuetudo fuerat, diu in longum protraheret, unus ex clero nequitiae ac superbiae furore plenus, Simeonem virum sanctum et catholicum, omnibus in Synodo residentibus, ore polluto infamavit hæreticum ». Viguit enim super omnes in clero Romano odium in hæreticos, adeo ut vel ex suspitione impetu ferrentur in eos. Sed ut contigit sæpe pecuniis canibus in amicos ferri, quos cum extraneo indutos habitu viderint, existiment inimicos: ita huic, de quo est sermo, contigit clerico, de quo pergit auctor dicens: « Et ut eum morti traderet, et ad necandum eum populum concitaret, talia adversus virum Dei verba ore polluto delatrabat, dicens: Nonne, inquit, omnes videtis, in visu et in incessu, et totius corporis gestu hominem hunc pravam et impostorem hæretice agere? »

6. Ne mireris, lector: nam ob diuturnum tempus, quo Manichæi (ut audisti tomis superioribus) incoluerunt Armeniam, et alii hæretici eandem provinciam pluribus erroribus infecerunt, factum fuit, ut Armenum nomen ab Occidentalibus male audiret, utpote hæresum plurimarum erroribus infamatum, et novisse quemquam Armenum dici, detexisse hæreticum esset. Accedebat vero, quod his quoque temporibus (ut ex dicendis perdisces) Manichæi in Occidente, et anno sequenti in Galliis deprehensi sint et igni traditi. Quod enim esse consueverit in eis affectata sanctitas, ne impii detegerent, plane evenit, ut ex iisdem notis magis solerent inquiri. Nam accidit quod de suis temporibus conquerens, ita narrat sanctus Hieronymus, ad Eustochium scribens¹: « Quam, inquit, viderint pallentem atque tristem, miseram ac Manichæam vocant », adeo ut ex iis notis viri etiam sanctissimi infamarentur. Sed secundum illud Domini²: « Nolite secundum faciem judicare, sed justum iudicium judicate », Dei sententia mendacem postea

ostendit accusatorem, cum eum digna pœna corripuit. « Percitus igitur ille clericus zelo (ut præ se ferebat) Catholicæ fidei, in eum exclamans: Insurgamus ergo, inquit, in eum, et ut cæteri contremiscant, aut lapidibus obruamus, aut vivum igne comburamus. Hæc flagitiosus aiebat, et ejus flagitio plures adjecti sunt, unanimiter conspirantes, qui instigante diabolo, virum sanctum, justum et pium toto conamine occidere moliebantur. Qua de re Romanus Pontifex cum universo episcoporum collegio turbabatur, et quibus indicis hoc vere cognosci potuisset seiscitabatur.

7. « Aderat tunc ibi quidam religiosus et reverendus episcopus, qui ab Armenia finibus peregre Romam petens, consilio et sapientia præditus, reverentia sanctitatis habebatur egregius. Qui domnum papam humiliter adiens, his dulcedinis verbis illum exhortabatur, dicens: Tua, beate pater, jubente auctoritate furor populi conquiescat, et quis vir ille sit, vel ejus professionis, sed qualiter Catholicam fidem excolat, me percontante, tua paternitas recognoscat. Cujus sapienti consilio reverendus papa credidit, eoque jubente, seditio populi conquievit. Tum vero supra memoratus episcopus virum Dei Simeonem aggreditur, et lingua qua utebatur ita eum alloquitur: Quis es? unde es? dic ergo, frater monache, et si Catholicæ fidei cultum tenes, per me his omnibus innotescat. Ad hanc vocem servus Dei Simeon, qui erat Deo plenus, nusquam vero sapientia vacuus, denuo quoque interroganti prudenter respondens, Catholicæ et Apostolicæ fidei perfectionem ita confitendo perdocuit, qualiter per universum orbem Apostolorum Symbolum in Nicæna Synodo peroratum clara voce personuit. Quod cum peregrinus episcopus audisset, famulum videlicet Dei Simeonem plenum fide et sanctitate veraciter agnosceret, magno repletus gaudio, pro reverentia sanctitatis, ejus pedibus se prostravit humilitatis obsequio ». His signis ostendere volens populo quam enormiter errassent in eumque peccassent, cum eum crimine hæresis infamassent, et ut hæreticum puniendum insana rabie conclamassent.

8. « Postquam igitur plura inter se Armenica lingua contulerunt ad invicem, ad extremum peregrino episcopo totum de servo Dei quod quærebat innotuit. Quod protinus papæ ac omnibus qui aderant, virum Dei scilicet Simeonem veræ fidei esse professorem, sanctum et justum, æternæ Trinitatis cultorem, Dei omnipotentis adorantem, palam omnibus declaravit. Sed quia Deus omnipotens Deus ultionum Dominus est, qui nihil quod injuste culpatur inultum abire permittit, et impiorum nequitiam ulciscendo consumit, clericum, qui ad necandum servum Dei populum concitaverat, eadem hora spiritus malignus arripuit, ac pro illata servo Dei contumelia diutissime volutando vexavit. Videntes autem Romanus Pontifex ac totus clerus, universusque populus tanta Dei magnalia et mirifica opera, elevatis in cælum manibus simul cum

¹ Hier. Ep. xxii — ² Joan. vii.

clamoribus, omnipotenti Deo laudes et gratias referebant, qui non permisisset suum servum innocentem perimi sub iniquorum præjudicio, nec accusatorem ejus abire sine vindictæ præmio. Tunc Christi servus Simeon, cernens pervasum clericum ab ultore spiritu crudeliter tormentari, memor Evangelici dicti quo dicitur ² : Diligite inimicos vestros, benefacite his qui oderunt vos, et orate pro persequentibus et calumniantibus vos : compatitur miserrimo clerico. Elevata itaque super eum manu, signum Crucis, increpando dæmonem, edidit : moxque malignus spiritus per os vexati turpiter exclamans, ululando evanuit. Eadem vero hora liberatus ab hoste clericus, pedibus viri Dei Simeonis provolutus corruit, ac ingenti gemitu diutissime plorans, se reum, se culpabilem multum accusans, de perpetrato scelere veniam postu-

lavit, etc. » Subjicit vero auctor, quod cum Simeon ab ipso Pontifice honorifice exciperetur, et sparsa de ejus sanctitate fama plurimi ad eum convenirent ut sanarentur iidemque curarentur, cum nimio populi totius plausu coleretur ab omnibus, ab Urbe discessit, et peragrans Italiæ, et Galliæ, et Hispaniæ regiones, visitans loca sancta, demum Mantuæ substitit, ibique a Bonifacio duce et Richelda ejus conjuge digne habitus, demum in pace quievit, illustratus a Deo tam vivens quam mortuus multis miraculis. Signat vero auctor obitus tempus, ejusmodi chronologia : « Septimo kalend. Augusti diem clausit extremam, anno Dominicæ Incarnationis millesimo decimo sexto, Indictione decima quarta, imperii monarchiam obtinente Henrico Augusto ». Longe autem diversus Simeon iste ab illo, qui in Galliis post annos viginti diem obiit : de quo suo loco dicendum.

¹ Matth. v.

ANNO PERIODI GRÆCO-ROMANÆ 6509. — ANNO ÆRÆ HISPAN. 1054. — ANNO HEGIRÆ 407, INCHOATO DIE 10 JUNII, FER. 4. — JESU CHRISTI 1016.

— BENEDICTI VIII PAPÆ 5. — HENRICI II REG. 15, IMP. 3. BASIL. ET CONST. IMPP. 41.

1. *Mortuo Ethelredo Anglorum pars Canutum eligit.* — Ad num. 2 et seq. « Rex Anglorum Egelredus », inquit Hovedenus part. 4 Annal. pag. 434, « decima quarta Indictione, nono kal. Maii, feria secunda (ideoque hoc anno quo feria secunda in diem xxiii Aprilis incidit) Lundoniæ defunctus est post magnos labores, et multas vitæ suæ tribulationes, quas pro sui fratris Eduardi nece super eum esse venturas B. Dunstanus ei prædixerat. Corpus vero illius in Ecclesia S. Pauli Apostoli honorifice sepultum est. Post mortem cujus, episcopi, abbates, duces, et quique nobiliores Angliæ in unum congregati, pari consensu in dominum et regem sibi Canutum elegere, et ad eum in Suthamptoniam venientes, omnemque progeniem regis Egelredi coram illo abnegando repudiantes, pacem cum eo composuere, et fidelitatem ei jurare. Quibus et ille juravit, quod et secundum Deum, et secundum sæculum fidelis esse vellet eis dominus.

2. *Pars altera Eadmundum regem.* — « At cives Lundonienses, et pars nobilium qui in eo tempore consistebant Lundoniæ, Clitonem Eadmundum unanimi consensu in regem levavere, qui solii regalis sublimatus culmine, intrepidus Westsaxoniam adiit, et ab omni populo, magna

susceptus gratulatione, suæ ditioni subegit eam citissime; quibus auditis, multi Anglorum populi magna cum festinatione illi se dederunt voluntarie. Canutus autem interim cum sua tota classe circa Rogationes Lundoniam devehitur, quo cum venisset, in Australi parte Tamesis magnam scrobem foderunt, et naves suas in Occidentalem plagam pontis traxerunt, deinde urbem alta, lataque fossa et obsidione cingentes, ingressum et egressum cunctis intercluserunt, ac eam frequenter expugnare moliti sunt, sed a civibus illis viriliter resistentibus procul a mænibus repelluntur : quapropter obsidione ad tempus dimissa, exercitusque parte ad naves custodiendas relictæ, in Westsaxoniam abierunt propere, et regi Eadmundo Ferreo Lateri spatium congregandi exercitum non dedere : quibus tamen ille cum exercitu, quem in tantillo spatio congregarat, Dei fretus auxilio audacter in Dorsetania occurrit, et in loco, qui Peomum vocatur, juxta Sillingham cum eis congressus, vicit, et eos in fugam vertit ».

3. *Reges duo regnum inter se partiuntur.* — Narrat postea Hovedenus varia prælia hoc anno Canutum inter et Eadmundum habita, tandemque subdit : « Cum rex Eadmundus Ferreum Latus (ita vocabatur) adhuc cum Canuto congredi vellet, dum

nequissimus et dolo plenus Edricus et quidam alii id nullo modo sinebant fieri, sed illi consilium dabant ut pace facta cum Canuto regnum divideretur, quorum suggestionibus, licet invitatus, ad postremum cum consentiret, recurrentibus ad invicem nuntiis, et obsidibus utrinque datis, ambo reges ad locum qui Deorhirst nominatur, in unum convenerunt: Eadmundus cum suis in occidentali plaga Sabrinæ, Canutus vero in orientali cum suis consedit. Dein uterque rex in insulam, quæ Dlanoge appellatur, et est in ipsius fluminis medio sita, trabariis advehitur; ubi pace, amicitia, fraternitate, pacto et sacramentis confirmata, regnum, dividitur. Dein armis et vestibus mutatis, tributoque, quod classicæ manui penderetur, statuto, ab invicem discesserunt; Dani tamen cum præda, quam diripuerant, ad suas naves redierunt, cum quibus pacem, dato pretio, cives Lundonienses fecerunt, et eos secum hyemare permiserunt.

4. *Eadmundo mortuo Canutus solus regnat.* — « Post hæc rex Eadmundus, Ferreum Latus, circa festivitatem sancti Andreæ Apostoli, xv Indictione (a Septembri deducta) decessit Lundoniæ ». Malmesburiensis lib. 2 de Reg. pag. 72, ait: « Fama Edricum infamat, quod favore alterius, mortem ei per ministros porrexerit ». Tum pag. 73, de Eadmundi filiis scribit: « Filii ejus Edwius et Edwardus, missi ad regem Suevorum ut perimerentur: sed miseratione ejus conservati, Hunnorum regem petierunt. Ubi dum benigne aliquo tempore habiti sunt, major diem obiit: minor reginæ sororem Agatham in matrimonium accepit ». Fuit Agatha Henrici Secundi imperatoris filia, quæ Edoardo peperit Edgarum filium cognomento *Etheling*, quem postea Edoardus, cognomento *Confessor*, hæredem regni scripsit.

5. *Salernum a Saracenis frustra obsessum.* — Lupus Protospata ad hunc Christi annum habet: « Civitas Salernum obsessa est a Saracenis per mare et per terram, et nihil profecerunt ». Quod confirmat anonymus Barenis apud Peregrinium: « Anno Mxvi, Indict. xiv, obsederunt Saraceni Salerno per mare et terra ». Leo Ostiensis lib. 2, cap. 38, dicit Salernum a Saracenis obsessum, quando primum Normanni in Italiam venere. Quare est hic primus annus adventus Normannorum in Italiam; sed quia Leonis locus corruptus, vel ipsemet memoria forsitan lapsus est, horum adventus, qui ad præsentem annum pertinet, a Baronio, quem alii secuti sunt, ad annum mii retractus fuit.

6. *Adventus Normannorum in Apuliam.* — Tot tantaque, quæ magnam cum Historia Ecclesiastica connexionem habent in Italia a *Normannis* hoc et sequenti sæculo gesta, ut ea suis locis explicare necesse sit. Annus eorum in eam adventus male hactenus, ut mox dixi, cum anno mii copulatus fuit, prochronismo nempe annorum quatuordecim. Neque enim dubito, quin hoc tantum anno ad illas oras accesserint. Id colligo ex Poemate Guillelmi

Apuliensis de Rebus in Italia a Normannis gestis, cum aliis historicis qui hoc sæculo vivere collato. Is lib. 4 asserit se Urbani II papæ jussu opus suum in lucem emisisse, et ipso libri primi initio, causam cur Normanni expeditionem illam susceperint, his versibus aperit:

Horum nonnulli Gargani culmina montis
Conscendere, tibi Michael Archangele voti
Debita solventes. Ibi quemdam conspicientes
More virum Græco vestitum nomine Melum,
Exulis ignotam vestem capitique ligato
Iusolitos Nilhræ mirantur adesse rotatus.
Hunc dum conspiciunt, quis et unde sit ipse requirunt,
Se Longobardum natu, cinemque (civemque) fuisse
Ingennum Bari, patriis respondit, at esse
Finibus extorrem græca feritate coactum.
Exilio ejus, dum Galli compaterentur,
Quam facilem reditum, si vos velletis, habere,
Nos aliquot vestra de gente juvantibus, inquit!
Testabatur eum cito Græcos esse fugandos
Auxiliis horum, facili comitante labore.
Illi donandum patriæ munimine gentis
Hunc celeri spoudent, ubi forte redire licebit.
Ad fines igitur postquam rediere paternos,
Cœperunt animos mox sollicitare suorum
Italiam secum peterent: narratur et illis
Appula fertilitas, ignaviaque insita genti.

7. *Copulandus cum anno Mxvi.* — *Normanni* in patriam reduces suos statim ad eam expeditionem animarunt, et turmatim *Romam* sine armis properantes (Benedictus enim hujus nominis VIII, *Meli* viri civitatis Barensis primarii, magnæque apud suos auctoritatis consilia promovebat), postquam a *Melo* arma acceperunt, in Apuliam hoc anno profecti sunt, annoque millesimo decimo septimo ut suo loco ostendemus, idque *mense Maio*, ut Guillelmus Apuliensis citatus aliique asserunt, primum cum Græcis præliati sunt. Quare cum Normanni se prompte subsidio venturos *Melo* promiserint, suos *mox* ad illam expeditionem sollicitarint, et periculum esset in mora, manifestum est eorum ad Garganum montem adventum anno currenti contigisse, eo magis, quo *Benedictus* papa VIII, ejus initium in annum Mxii convenit, tunc Romanæ Ecclesiæ præfuerit, Glabro lib. 3, c. 4; Orderico lib. 3, p. 472; Gemmeticensi lib. 7, c. 30; Fragmento Historiæ Aquitanicæ t. iv Duchesnii et Leone Ostiensi lib. 2, c. 38 testibus, ac *Henricus Primus* imperium administravit, ut asserit idem Glaber. *Henricus* enim anno tantum Mxiv imperator coronatus fuit, ideoque Normannorum in Apuliam adventus a recentibus chronologis ante annum Mxiv hactenus male collocatus. Verum quidem est plerosque ex citatis auctoribus Normannorum in Italiam adventum referre ad Pontificatum Benedicti IX et ad imperium Henrici II, sed illi nominum similitudine decepti sunt, refellendique ex Wilhelmo Apuliensi, et ex iis quæ jam narravimus, observandumque Leonem Ostiensem sibimet contradicere, ut statim videbimus. Hanc adventus Normannorum in Apuliam epocham postquam in præsentem annum contulissem, legi eidem affixam fuisse in Chronico Casauriensis, sive Piscariensis

monasterii, a Joanne Berardo ejusdem monasterii monacho summam ordine chronologico collectam ex chartis ejusdem monasterii. Magnam ejus partem exhibet Dacherius tom. v Spicilegii, ubi ad annum *MXVI* ait: « Anno ab Incarnatione Domini millesimo sextodecimo, Normanni Melo duce cœperunt expugnare Apuliam ». Hæc itaque difficultas negotium amplius facessere non debet.

8. *Vulgaris sententiæ fundamentum evertitur.* — Vulgaris erroris fons Leo Ostiensis laudatus, qui scribit: « Hujus anno *VII* (nempe Atenulphi Casinensis abbatis), cœperunt Normanni, Melo duce, incursare Apuliam ». Paulo post: « Ante annos ferme sexdecim, Normanni *XL* numero, peregrino habitu, quippe a Hierosolymis orationis causa perrexerunt redeunt, Salernum applicuerunt, etc. mirabili victoria Deo largiente potiti sunt ». Addit Leo *Vaimarium* Salerni principem tunc legatos in Normanniam direxisse, et a Roberto Normanniæ duce seu comite auxilium postulasse. *Atenulphus* autem juxta eundem Leonem anno *XI* monasterio Casinensi præfectus est, et annus ejus septimus cum anno Christi *MXVII* concurrebat. Quod si annos *XV* ante annum *MXVII* Normanni in Apuliam venere, id anno *MII* accidit. Ita Baronius, alique cum eo. Verum locus ille corruptus, et loco *ante annos ferme sexdecim*, legendum *ante menses ferme sexdecim*. Quæ emendatio ex ipsomet Leone evidens est; diserte enim ipse affirmat, *Benedictum VIII*, de quo solo loqui potest, tunc Ecclesiæ Romanæ præfuisse, quod et alii habent; postea enim *c. 40* asserit sanctum Henricum tunc imperatorem fuisse. Communis itaque hæc opinio amplius sustineri non potest, et illi sexdecim anni in totidem menses necessario mutandi, ut Guillelmus Apuliensis, qui ex professo de hac Normannorum expeditione scripsit, manifeste indicat; cum enim anno *MXVII*, quo *Atenulphus* abbas septimum regiminis sui annum inchoavit, Normanni *mense Maio* cum Græcis pugnarint, intra menses sexdecim ex Apulia in Normanniam, et ex Normannia in Apuliam facile redire potuere, nec longiori ad utramque profectionem tempore indiguere.

9. *Guillelmo Apuliensi in hujus rei narratione standum.* — Cæterum tam Leo Ostiensis quam Glaber, Gemmeticensis. et Ordericus de hac Historia satis edocti non fuere; Normanni enim in Apulia primum visi, non ex urbe Hierosolymitana, sed ex monte Gargano venere, nec adversus Saracenos arma sumpsere, cum poeta laudatus rem tam insignem non præterisset. Verum quidem est, hoc anno *Salernum* irrito conatu a Saracenis obsessum fuisse, sed fabulosum, Normannos tam parvo numero in Saracenos obsidentes irruisse, indeque congressus iste Saracenorum et Normannorum ab Orderico longe aliter refertur. Hæc fabula inde nata, quod Normanni hoc anno quo Saraceni *Salernum* obsidione cinxere, in Apuliam venerint; nam inde rumor sparsus, Normannorum opera

Salernum obsidione Saracenorum liberatum. Errat etiam Leo Ostiensis in eo quod tradit, *Robertum* tunc ducem Normanniæ fuisse. Is enim tantum anno *MXVII* Normannorum dux creatus, ut suo loco videbimus. Glaber citatus hanc *Normannorum* Historiam alio modo quam alii refert, sed cum is in Galliis vixerit, standum est Guillelmo Apuliensi qui rem ab oculatis testibus discere potuit, et tam Lupum Protospatam, quam anonymum Barenssem in Chron. consentientes habet, ut videbitur anno *MXVII*, ubi referemus quæ anno *MXVII* Normanni in Apulia egerint.

10. *Saraceni ex Hetruria et Sardinia fugati.* — Saraceni in Hetruria et in Sardinia devicti. Ditmarus enim lib. 7 scribit: « In Longobardia Saraceni navigio venientes, Lunam civitatem fugato pastore, invadunt, et cum potentia ac securitate fines illius regionis inhabitant, et uxoribus incolarum abutuntur. Quod cum domino Apostolico nomine Benedicto fama deferret, omnes S. Matris Ecclesiæ tam rectores quam defensores congregans, rogat ac præcipit ut inimicos Christi talia præsumentes viriliter secum irrumperent, et adjuvante Domino occiderent. Insuper ineffabilem navium multitudinem tacite præmisit, quæ eis redeundi possibilitatem interciperet. Hoc rex Saracenus animadvertens primo indignatus, et tandem paucis comitatus navicula imminens periculum evasit. Sui vero omnes conveniunt, et adversantes prius irruunt hostes, eosque mox fugientes, miserabile dictu, tres dies et noctes prosternunt. Respexit tandem Deus gemitu piorum placatus, et odientes se fugavit, in tantum devicit, ut nec uno de his relicto, et interfectorum et eorundem spoliis multitudinem victores numerare nequirent, tum regina eorum capta ob audaciam jure plectitur. Aureum capitale ejus ornamentum, invicem gemmatum, papa præ cæteris vindicavit, postque imperatori suam transmisit partem, quæ mille libris computabatur ». Quæ Ditmarus narrat, dum de rebus hoc anno gestis sermonem habet. *Luna* autem hodie *Luca* appellata, civitas libera, a qua aliquot loca pendent. Huc referendum quod dicitur in Chronico Pisano: « Anno Domini *MXVI*, Sardiniam Pisani et Genuenses devicerunt. Anno Domini *MXVII* rex (nempe Saracenorum) Mugietus, et Saraceni devicerunt Sardiniam, et eodem anno Pisani et Genuenses eam recuperaverunt, et quum Pisanis et Genuensibus adjudicata esset, Genuenses voluerunt Pisanos expellere; sed ipsi anno eodem a Pisanis superantur », et de tota Sardinia expelluntur. Paulo aliter rem narrat Sigonius in lib. 8 de Regn. Italiæ lib. 8, sed chronographo Pisano major fides habenda.

11. *Bella civilia inter Saracenos Siciliae.* — Anno Hegiræ *CDV*, exente mense *Ragiab*, anni nempe Christi currentis mense Januario, cum *Hali* adversus *Giafarem* fratrem, Siciliae ameram rebellasset, bella civilia inter *Musulmannos* in ea provincia renovata, ut tradit Noweirius Arabs in Hist.

Siciliæ, quæ finem non accepere, nisi cum ultimo Musulmannorum excidio. Pluribus ea Noweirius describit. Normannorum adventus in eam Italiæ

partem, quam hodie regnum Neapolitanum vocamus, cumulum miseriarum Musulmannis attulit.

BENEDICTI VIII ANNUS 6. — CHRISTI 1017.

1. *Manichæi in Galliis exsurgentes et prava dogmata disseminantes Roberti regis pietate exterminantur.* — Annus sequitur Christi millesimus decimus septimus, Indictione decima quinta, quo in Galliis detegitur hæresis Manichæa : ad quam evertendam invigilavit Roberti regis Francorum simul et episcoporum industria. Quomodo autem ista se habuerint, Glaber, qui aderat, accurate descripsit his verbis¹ : « Tertio de vicesimo infra (supra) jam dictum millesimum anno, reperta est apud præfatam Aurelianensem urbem cruda nimium atque insolens hæresis, quæ scilicet diutius occulte germinata, in perditionis segetem male pullulans, plures in suæ cæcitatæ præcipitavit laqueum. Fertur namque a muliere quadam ex Italia procedente hæc insanissima hæresis in Galliis habuisse exordium, quæ, ut erat diabolo plena, seducebat quoscunque volebat, non solum idiotas et simplices, verum etiam plerosque qui videbantur doctiores in clericorum ordine. Quæ scilicet veniens in civitatem Aurelianensem, dum moraretur ibi per aliquod spatium temporis, veneno suæ nequitie plures infecit. Quod etiam seminarium nequam in plures hi, qui susceperant, toto conamine spargere nitebantur. Fuerunt nempe hujus perversi dogmatis hæresiarches duo, (heu pro dolor!) qui in civitate putabantur genere ac scientia valentiores in clero, quorum unus Heribertus, alter Lisojus dicebatur. Hi denique, quamdiu res latuit, tam apud regem quam apud palatii procures summum obtinuerant amicitiam : nempe ideo facilius quosque decipere potuerunt, quorum mentes amor fidei universalis minus adstrinxerat. Qui non solum in prædicta urbe, sed etiam in vicinis urbibus malignum dogma spargere tentabant, dum quemdam sanæ mentis in Rothomagorum civitate presbyterum cupientes suæ consortem facere vesaniæ, missis legatis, qui ei omne secretum

hujus perversi dogmatis explanantes docerent. Dicebant nempe, fore in proximum, in illorum scilicet dogma populum cadere universum.

2. « Quibus compertis, presbyter sollicitè perrexit ad Christianissimum comitem ejusdem civitatis Richardum : exposuit ei omnem rei (ut compererat) ordinem. Qui videlicet comes protinus misit celeriter ad regem, palam ei faciens clandestinam in regno proprio Christi ovium pestem. Ut autem cognovit rex, scilicet Robertus, ut erat doctissimus ac Christianissimus, tristis ac mœrens nimium effectus est, quoniam et ruinam patriæ revera et animarum metuebat interitum. Ideo quantocius Aurelianos properans, convocatis plurimis episcopis et abbatibus, ac religiosis quibusque laicis, acerrime cœpit perscrutari, qui essent auctores hujus perversi dogmatis, vel qui parti illorum jam decepti consentirent. Facta igitur perscrutatione inter clericos, quomodo unusquisque sentiret, et crederet ea quæ fides Catholica per doctrinam Apostolicam incommutabiliter servat et prædicat : illi duo, videlicet Lisojus et Heribertus statim se aliter sentire non negantes, quales diu latuerant, manifestaverunt. Deinde plures post illos se parti istorum profitebantur hærrere, nec ulla ratione se posse affirmabant ab illorum segregare consortio. Quibus compertis, tam rex quam Pontifices tristiores effecti, interrogaverunt illos secretius, ut viros hactenus in omni morum probitate perutilissimos, quorum unus Lisojus in monasterio Sanctæ Crucis clericorum clarissimus habebatur, alter item Heribertus Sancti Petri Ecclesiæ, cognomento Puellaris, capitale scholæ tenebat dominium. Qui dum interrogati fuissent, a quo vel unde eis ista præsumptio accidisset, hujusmodi dederunt responsum : Hoc enim diu est, quod sectam, quam vos jam tarde agnoscitis, amplectimur ; sed tam vos, quam cæteros cujuscunque legis vel ordinis in eam cadere expectavimus : quod etiam adhuc fore credimus. His

¹ Glab. l. III. c. 8.

dictis continuo palam exposuerunt omnium antiquarum stultissimam ac miserrimam nempe sui deceptricem haresim. Cujus videlicet ratiocinatio tanto minus erat idoneis sermonibus obnixa, quanto constat esse illi ter veritati contrariam.

3. « Dicebant ergo deliramenta esse, quidquid in veteri ac novo canone certis signis ac prodigiis, veteribusque testatoribus de trina unaque Deitate beata confirmat auctoritas. Cælum pariter ac terram, ut conspiciuntur, absque auctore in illi semper extitisse asserebant. Et cum universarum hæresum insanientes, canum more latrantes deterima, in hoc tantum Epicureis erant hæreticis similes, quoniam voluptatum flagitiis credebant non recompensari ultionis vindictam. Omne Christianorum opus pietatis duntaxat et justitiæ, quod æstimatur pretium remunerationis æternæ, laborem superfluum judicabant esse. Interea his aliisque quamplurimis insanis impudenter ab eisdem prolatis, non defuere fideles atque idonei testes veritatis, qui illis sufficienter, si vellent tam veritati quam propriæ acquiescere saluti, respondere de suis cæcis atque erroneis assertionibus valerent. Sed et nos quoque secundum exiguitatem nostri intellectus, his quos prænotavimus, illorum erroribus vel perpauca respondere decrevimus ». Subjicit his auctor adversus eorum errores disputationem, eaque absoluta, narrare pergit quæ sunt secuta, sic dicens :

4. « Præterea cum a pluribus omni sagacitate elaboratum fuisset, qualiter deposita mentis perfidia, veram et universalem reciperent fidem, atque illi omnimodis se facere denegarent : dictum est eis, quoniam nisi celerius ad sanam fidei mentem redeant, regis jussu, et universæ plebis consensu, igne essent protinus cremandi. At illi male in sua confisi vesania, nil pertimescere se jactantes, seque evasuros ab igne illæsos promittentes, quin potius meliora sibi suadentibus spernendo illudebant. Cernens quoque rex et universi qui aderant, minus posse illos revocari ab insania : jussit accendi non longe a civitate ignem permaximum, ut vel eo forte territi, a sua malignitate desinerent. Ad quem cum ducerentur, rabida adacti dementia, se omnimodis hoc velle proclamabant, ac sese ultro ad ignem trahentibus inferrebant. Quibus ad ultimum numero tredecim igni traditis, cum jam cœpissent acrius aduri, cœperunt voce qua poterant ex eodem igne clamare, se pessime deceptos arte diabolica, nuper de universorum Deo ac Domino male sensisse, et ob hanc ab eisdem illatam ei blasphemiam illos temporalis atque æterna ultione torqueri. Illis vero plures e circumstantibus auditis, humanitatis pietate permoti accedentes, ut vel semivivos ab igne eriperent, minime valuerunt, quoniam vindice flamma consumente illos, continuo in pulverem (cinerem) luerunt redacti. Si qui vero postmodum hujus perversitatis sectatores fuerunt reperti, simili ultionis vindicta ubique fuerunt perdit. Propterea venerabilis Catholicæ

fidei cullus, extirpata insanientium pessimorum vesania, ubique terrarum clarior emicuit ». Hactenus Glaber. Quibus plane commendatur Roberti regis Christianissimi excellens pietas et industria in exurendis confestim ad messem jam perductis selectisque zizaniis, quæ si diutius sivisset illæsa servari, una cum religione perdidissent et regnum. De iisdem Manichæis in Fragmentis historiæ Francorum Roberti agitur, eorundemque pervulgati recensentur errores, eisdemque per ignem illatum supplicium.

5. De iisdem etiam in Fragmentis historiæ Aquitanicæ hæc de repertis in eadem provincia hæreticis : « E vestigio exorti sunt per Aquitaniam Manichæi, seducentes promiscuum populum a veritate ad errorem, suadebant negare baptismum, signum sanctæ Crucis, Ecclesiam, et ipsum Redemptorem sæculi, honorem sanctorum Dei, conjugia legitima, esum carni, unde et multos simplices averterunt a fide ». Et inferius, ejusdem fuisse generis Aurelianenses hæreticos, auctor docet his verbis : « Eodem tempore decem ex canonicis Sanctæ Crucis Aurelianis probati sunt esse Manichæi : quos rex Robertus, cum nollent ad Catholicam converti fidem, igne cremari jussit. Simili modo apud Toletum inventi sunt Manichæi, et ipsi igne cremati sunt. Et per diversas Occidentis partes Manichæi exorti, per latibula sese occultare cœperunt, decipientes quoscunque poterant ». Et paulo superius de his, quæ tunc etiam Romæ accidissent memoratu digna.

6. *Scelera et portenta.* — « Illis diebus in Parasceve post Crucem adoratum usque Sabbatum sanctum circa vesperam, concussa est Roma a vi ventorum, et pæne omnes Romani mortui sunt tam Christiani quam Judæi. Et quidam Judæus Christianis intimavit, quod in Parasceve in synagoga Judæorum imaginem Christi deluserunt, sicut lecerant Domino parentes eorum. Quod Benedictus Papa sollicite inquirens et probans, mox Judæos qui hoc egerant jussit decollari, quibus decollatis, cessaverunt venti ». Hæc ibi. In Fragmentis etiam Francorum historiæ post recensitos Manichæorum errores atque supplicium, subjiciuntur ista :

7. « Circa id temporis, in regione Aquitanicæ secus, maritima tale prodigium accidit ante solemnitatem S. Joannis Baptistæ : tribus diebus de cælo pluit sanguis, qui cadens super carnem hominis, aut super lapidem, non poterat lavari ; si vero super lignum caderet, lavabatur ». Perterrefecit universas Gallias ejusmodi prodigium, adeo ut Robertus rex Francorum scriptis consuleret Fulbertum episcopum Carnotensem, inter Gallicanos episcopos doctrina facile principem : cujus de his ad eundem regem tunc respondens data extat Epistola ¹, in qua quid ista portenderent, in fine ita philosophatur : « Quod autem nuper hujusmodi cruorem in quadam parte regni vestri pluisse audi-

¹ Fulb. Ep. LXXIX.

stis; et quod ille cruor, ubi supra petram vel super carnem hominis ceciderat, ablui non poterat, ubi autem super lignum ceciderat, facile abluebatur: per hæc tria genera hominum significata esse videntur, per lapidem impij, per carnem fornicarii, per lignum vero, quod neque durum est ut lapis, neque molle ut caro, illi qui neque impij sunt neque fornicarii. Cum ergo venerit super illam gentem, cui portenditur gladius, sive pestilentia designata per sanguinem: si antea duri et molles non fuerint mutati in melius, morientur perpetua-liter in sanguine suo; medij vero per angustiam mortis, vel aliter poterunt liberari pro arbitrio

secretissimi atque præstantissimi Judicis». Hæc ad Robertum regem Fulbertus. Porro consecuta esse bella gravissima in ea provincia inter Gulielmum Aquitanie ducem, et Gaufridum comitem Andegavensem, quo seipsos mutuo adversis armis confecerunt, idem auctor affirmat.

Hoc eodem anno, Juditha Poloniae regina, sanctissima femina, conjux Boleslai regis et adjuatrix ad pietatem propagandam, ex hac vita summo omnium dolore decessit, cum superis in perpetuum regnatura. Hæc de tempore Longinus, qui et res ab ea præclare gestas recenset.

Anno periodi Græco-Romanæ 6510. — Anno Æræ Hispan. 1035. — Anno Hegiræ 408, inchoato die 30 Maii, Fer. 1. — Jesu Christi 1101.

— Benedicti VIII papæ 6. — Henrici II reg. 16. imp. 4. Basil. et Const. imp. 42.

1. *Nova hæresis Manichæorum ad an. mxxii referenda.* — Ad num. 1 ad 6. Glaber lib. 3, capite 8, de hæresi Manichæorum loquens ait: «Tertio de vicesimo infra jam dictum millesimum anno, reperta est apud præfatam Aurelianensem urbem cruda nimium atque insolens hæresis, quæ scilicet diutius occulte germinata, in perditionis segetem male pullulans, plures in suæ cæcitatæ præcipitavit laqueum». Baronius in margine loco *infra*, legit *supra*, sed hæc emendatio difficultatem non tollit. Legendum itaque, *tertio et vicesimo*; hæresis enim illa anno mxxii detecta et Glaber annum unum amplius dicit, sicuti capite præcedenti de eversione sepulchri Hierosolymitani verba faciens, anno uno peccat, dicens id factum *anno nono post præfatum millesimum*, cum dicere debuisset, *anno decimo post præfatum millesimum*, uti suo loco monstravimus. Porro certum et indubitatum hæc ad an. mxxii pertinere. In brevi enim Chronico Antisiodorensi, a Labbeo tom. I Biblioth. edito, ad an. mxxii habetur: «Aurelianis igne cremantur clerici diabolica suggestionem a fide catholica exorbitantes effecti, ac si denuo Manichæi hæretici». Secundo in Fragmento Historiæ Aquitanicæ, ad eundem annum legitur: «Apud Tolosam inventi Manichæi, et ipsi destructi». Tertio, adhuc superest Privilegium a Roberto Francorum rege Alberto Miciacensi abbati concessum, in quo dicitur, sententiam in hæreticos illos prolatam fuisse an. mxxii, tunc præsule Aurelianensi Odolrico: «Aurelianis publice au. mxxii regni Roberti regis xxviii, Indict. v, quando Stephanus bæresiarches et compli-

ces ejus damnati et arsi sunt Aurelianis». Sed loco *regni Roberti regis xxviii*, legendum *regni Roberti regis xxv*, a morte scilicet Hugonis patris, quæ anno dcdxcvii accidit, deducti.

2. *Varias Galliarum urbes infecit.* — Ademarus in Chronico, qui hoc tempore floruit, apud Labbeum tom. II Biblioth. pag. 176, de hac hæresi scribit: «Paucis post tempore, per Aquitaniam exorti sunt Manichæi seducentes plebem, negantes baptismum sanctum et Crucis virtutem, et quidquid sanæ doctrinæ est, abstinentes a cibis quasi monachi, et castitatem simulantes, sed inter se ipsos luxuriam omnem exercentes, quippe ut nuntij Antichristi multos a fide exorbitare fecerunt». Tum pag. 180, postquam de Concilio Lemovicensi primo locutus est, ait: «Eo tempore, decem ex canonicis Sanctæ Crucis Aureliani, qui videbantur aliis religiosiores, probati sunt esse Manichæi. Quos rex Rotbertus, cum nollent aliquatenus ad fidem reverti, primo a gradu sacerdotii deponi, deinde ab Ecclesia eliminari, et demum igne cremari jussit. Nam ipsi decepti a quodam rustico, qui se dicebat facere virtutes, et pulverem ex mortuis pueris secum deferere, de quo si quem posset communicare, mox Manichæum faciebat, adorabant diabolum, qui primo eis in Æthiopis, deinde Angeli lucis figuratione apparebat, et eis multum quotidie argentum deferere; cujus verbis obediētes, penitus Christum latenter respuerunt, et abominaciones et crimina, quæ dici etiam flagitium est, in occulto exercebant, et in aperto Christianos veros se fallebant. Nihilominus apud Tolosam in-

venti sunt Manichæi et ipsi destructi, et per diversas Occidentis partes nuntii Antiechristi exorti per latibula sese occultare curabant, et quoscumque poterant viros et mulieres subvertebant. Quidam etiam Sanctæ Crucis Aurelianensis canonicus cantor, nomine Theodatus, mortuus erat ante triennium in illa hæresi, ut perhibebant viri religiosi et hæretici ipsi, cujus corpus, postquam probatum est, ejectum est de cœmeterio, jubente episcopo (nempe Aurelianensi) Odolrico, et projectum in invium. Qui autem flammis judicati sunt supradicti decem cum Lisoio, quem rex (scilicet Robertus) valde dilexerat propter sanctitatem quam eum habere credebatur, quasi securi, nihil ignem timebant, et flammis se inlæsos exire promittebant, etiam ridentes in medio ignis ligati sunt et sine mora penitus in cinerem redacti sunt, ut nec de ossibus residuum inveniretur eorum». Loquitur et Ademarus de Concilio Carrofolensi adversus eosdem Manichæos celebrato, de quo suo loco agemus.

3. *Synodus Aurelianensis an. MXXII celebrata.* — Hujus hæreseos occasione celebratum *Aurelianensis* Concilium, tom. IX Concil. cum præsentis Christi anno perperam illigatum, cum ex dictis ad annum MXXII revocandum sit. Recitatur ibidem ex tom. II Spicilegii Dacheriani plenior hujus hæreseos et Concilii narratio, in qua hæreticus, qui a Glabro, cujus verba recitat Baronius, *Heribertus* vocatur, dicitur *Stephanus*, uti in laudata Charta Miciacensi. Præterea de Arefalto, qui in urbe Aurelianensi hæresim illam detexit, habetur eum a Rotberto Francorum rege Aurelianum missum fuisse: «Cumque jubente rege, inquit anonymus, iter ageret, Carnotis devenit, Fulbertum venerabilem antistitem super hac re consulturus, qui forte tunc aberat: nam Romam gratia orationis abierat. Tunc causam sui itineris cuidam sapienti clerico Ebrardo nomine, Carnotensis Ecclesiæ sacriscrinio, innotuit, etc.» quibus ex verbis intelligimus, *Fulbertum* Carnotensem episcopum anno MXXII orationis causa Romam profectum esse. Huic Concilio Aurelianensi præfuit *Leothericus*, Senonensis archiepiscopus, ut habetur in Chronico S. Petri Vivi: «Sub ipso tempore exorta est magna hæresis nova et inaudita in urbe Aurelianensi. Quapropter accersiens rex (nempe Robertus) archiepiscopum, jussit congregari in ea urbe Synodum. Erant autem ipsi hæretici ex melioribus ipsius civitatis clerici. Communi vero consensu et voluntate omnium convicti omnes perpassi sunt ignis incendium». Denique Helgaldus auctor synchronus de hac hæresi habet: «Eodem tempore decem ex canonicis S. Crucis Aurelianensis probati sunt esse Manichæi. Quos rex Robertus, cum nolent ad Catholicam converti fidem, igne cremari jussit. Simili modo apud Tolosam inventi sunt Manichæi, et ipsi cremati sunt. Et per diversas Occidentis partes Manichæi exorti per latibula sese occultare cœperunt, decipientes quoscumque po-

terant». Aurelianensis episcopus tunc erat *Odolricus*, ut mox ex Ademaro vidimus. San-Marthani, in episcopis Aurelianensibus, modo scripsere hæc gesta esse sub *Theodorico*, modo sub *Odolrico* ejus successore, quia Theodoricus statim post celebratum Concilium episcopatum abdicavit, ut anno sequenti videbimus, et in episc. Bellovac. aiunt Rogerum episc. Bellovacensem, cui Guarinus successit, obiisse anno MXXIV. Verum *Guarinus*, seu *Vuarinus*, interfuit Concilio Aurelianensi, in quo memorati hæretici damnati, ut ex laudato Spicilegii Dacheriani Codice certo innotescit.

4. *Canutus in universa Anglia rex agnitus.* — *Edmundo* Angliæ rege anno superiori incerto casu extincto in festo sancti *Andree*, inquit Malmesburiensis lib. 2 de Reg. pag. 72, Canutus senatum in Londinensem urbem vocavit, «omnes episcopos et duces, necnon et principes, cunctosque optimates Angliæ», ait Wigorniensis ad annum MXXVI. In eo Conventu proceres pacis, quam juris amantiores, *Canuto* famulati sunt, isque pleno comitiorum suffragio totius insulæ rex declaratus est. «Anno Incarnationis Dominicæ», inquit Malmesburiensis citatus, «millesimo decimo septimo, Canuto regnare cœpit, et viginti annis regnavit. Injuste quidem regnum ingressus, sed magna civilitate et fortitudine vitam componens. Primis diebus regnum in quatuor partibus, sibi West-Saxones, Evrico Mercios, Turkillo Orientales Anglos, Irico Northanymbros. Ac primo interfectores Edmundi, qui ultro spe ingentis præmii rem detulerant, apud se interim celatos, magna frequentia populi produxit in medium; palamque genus insidiarum professos, supplicio affecti». Verum non diu mansit tetrarchiæ forma, illa saltem quam Edricus, Turkillus atque Iricus sibi formaverant: qui absoluti regiminis, non a Canuto pendentis potentiam præsumentes, cito in ordinem redacti sunt.

5. *Emmam reginam uxorem duxit.* — «Mense Julio, rex Canutus derelictam regis Egelredi reginam Emmam in conjugium accepit», inquit Hovedenus ad hunc Christi annum. Audiendus de hoc conjugio anonymus encomiastes Emmæ Anglorum reginæ, auctor coævus, qui extat in Scriptoribus antiquis Historiæ Normannorum: «Per regna, et per urbes discurritur, inquit, et regalis sponsa perquiritur, sed longe lateque quæsita, vix tandem digna reperitur. Inventa est vero hæc imperialis sponsa in confinitate Galliæ, et præcipue in Normandensi regione, stirpe et opibus ditissima, etc. Mittuntur proci ad dominam, mittuntur dona regalia mittuntur etiam verba precatoria. Sed abnegat illa se unquam Cnutonis sponsam fieri, nisi illi jusjurando affirmaret, quod nunquam alterius conjugis filium post se regnare faceret, nisi ejus, si forte illi Deus ex eo filium dedisset. Dicebatur enim ab alia quadam rex filios habuisse, quod jusjurando facto rex promisit. Non multo post, Salvatoris annuente gratia, filium peperit nobilissima regina. Cujus cum uterque parens

intima, atque ita dicam, singulari gauderet dilectione, alios vero liberales filios educandos direxerunt Nortmanniæ, istum hic retinentes, sibi utpote futurum hæredem regni. Itaque dilectissimum pignus, uti mos est Catholicis, sacro abluunt fonte baptismatis ».

6. *Ejus virtutes.* — Antea dixerat encomiastes : « Ergo miseratione divina monarchiam regni Cnuto vir strenuus suscepit, et nobiliter duces et comites suos disposuit, et finelenu deinceps regnum Anglorum pacifice tenuit. Erat autem adhuc primæva ætate florens, sed tamen indicibili prudentia polens. Unde contigit, ut eos, quos antea Ædmundo sine dolo fideliter militare audierat, diligeret; et eos, quos subdolos scierat, atque tempore belli in utraque parte fraudulentam tergiversatione pendentes, odio haberet : adeo ut multos principum quadam die occidere pro hujusmodi dolo juberet. Inter quos Edricus, qui a bello fugerat, cum præmia pro hoc ipso a rege postularet, ac si hoc pro ejus victoria fecisset; rex subtristis : Qui dominum, inquit, tunc decepisti fraude, mihi ne poteris fidelis esse? rependam tibi condigna præmia, sed ea ne deinceps tibi placeat fallacia. Et Erico duce suo vocato : Huic, ait, quod debemus persolvito; videlicet, ne nos decipiat occidito. Ille vero nil moratus bipennem extulit, eique ictu valido caput amputavit; ut hoc exemplo discant milites regibus suis esse fideles, non infideles ».

7. *Ecclesiis et monasteriis favit.* — Paulo post

de ejus virtutibus habet : « Amicus et familiaris factus est viris Ecclesiasticis. adeo ut episcopis videretur coepiscopus pro exhibitione totius religionis, monachis quoque non sæcularis, sed cœnobialis pro continentia humillimæ devotionis. Defensabat sedulo pupillos et viduas, sustentabat orphanos et advenas : leges oppressit iniquas, earumque sequaces : justitiam et æquitatem extulit et coluit, Ecclesias extruxit et honoravit. Sacerdotes et clerum dignitatibus ampliavit : pacem et unanimiorem omnibus suis indixit, ut de eo illud Maronicum dici posset, nisi extra Catholicam fidem hoc fuisset :

Nocte pluit tota, redeunt spectacula mane ;
Divisum imperium cum Jove Cæsar habet.

Deo omnibus modis placita studuit, ideoque quidquid boni agendum esse didicerat, non negligentia, sed operationi committebat. Quæ enim Ecclesia adhuc ejus non lætatur bonis ? Sed ut sileam quæ in suo regno positæ egerit, hujus animam quotidie benedixit Italia, bonis perfrui deprecatur Gallia, et magis omnibus hanc in cælo cum Christo gaudere orat Flandria. Has enim provincias transiens, Romam transiit, et ut multis liquet, tanta hoc in itinere misericordiarum opera exhibuit, ut si quis hæc describere omnia voluerit, licet innumera-bilia ex his fecerit volumina, tandem deficiens fatebitur, se vix etiam cucurrisse per minima.

BENEDICTI VIII ANNUS 7. — CHRISTI 1018.

1 *Clades Borealium Ecclesiarum.* — Millesimus decimus octavus Christi annus prima incipit Indictione, quem ob frequentia mala quæ peperit borealibus Christianis¹, Ditmarus terræ molim appellandum existimat, sive contritionem magnam. Recenset ipse plura infausta, quæ in Germaniæ provinciis contigere. In primis vero deplorans damna diversarum Ecclesiarum, quæ pluribus in locis a principibus passæ sunt, incendia Ecclesiarum a populis Abbotritis et Waris a fide refugis, ad impietatem relapsis : multisque de his, et aliis diversis

enarratis, agit ad finem inter alia de expugnatione Kioviæ primariæ civitatis, et ejus archiepiscopi captivitate. De ejus civitatis religione mira narrat, nimirum ereclas extitisse in ea plures quam quadragintas Ecclesias, ut mirum videri possit, adeo brevi temporis spatio in ea coaluisse Christianismum, fuisseque tanta pietate præstantem, ut tot Ecclesiæ fuerint tam cito ædificatæ. Quod autem magis mirandum, illud est quod ejusdem ultimi libri narrat exordio, de pœna qua esset plectendus adulter, dirissima quidem, ut ejus atrocitate exterriti impudici, colere discerent castitatem; simul et illa, qua gulæ vilium esset penitus coercen-

¹ Ditm. l. ult. prope fin.

dum, dum statutum fuit, ut qui post Septuagesimam carnem manducasse inveniretur, is confestim poena gravissima, nempe avulsione dentium puniretur. Hæc et alia, quæ admiranda potius quam laudanda Ditmarus esse putavit: sed plane ardens zelus animi commendandus, cum putaverit legislator atrocissimis pœnis, velut vallo, muniendam divinorum præceptorum observantiam, ne quis ea transgredi quovis modo præsumeret, pœnarum immensitate cohibitus.

2. *Ditmari obitus et scripta.* — Porro his enarratis, Ditmarus finem scribendi fecit, et vitæ tempus absolvit, multiplici nomine commendandus: in primis vero, quod in omnibus optimi pastoris specimen edidit, et cum omnibus virtutibus effulserit, potissimum vero enituit Christiana illa virtute adeo commendata, et dictis ac factis a Christo suis discipulis prædicata, humilitate videlicet, in omnibus semper sui accusator existens, aliorum vero ex virtutibus laudum commendator eximius. Qui autem anni hujus res gestas ab eo percurret, plane intelliget, eundem venturæ mortis divinitus accepisse responsum: cuius rei causa de Ecclesia sibi commissa sollicitus, ad successorem sibi futurum, quomodo se gerere debeat, convertit orationem; eundemque veluti præsentem compellans, quæ sectari quæve cavere deberet, insinuat. Moritur autem hoc anno kalendis Decembris, anno suæ ætatis quadragesimo primo, absoluto VIII kal. Aug., qua die se natum profitetur, anno salutis nongentesimo septuagesimo sexto, suæ vero sedis anno decimo, mense septimo, die septimo. Quod autem ad ejus scripta pertinet, danda venia, si adhuc rude necdum expolitum lima opus inveniat: etenim illud ipsum ab eo hoc extremo vitæ tempore fuisse elaboratum, qui Vitam ejus paulo post obitum scripsit, ostendit, dum ait: « Anno vero decimo ordinationis suæ, nativitatis vero quadragesimo primo, divertit ab oneribus hujus sæculi dorsum ejus, faciemque mentis in tranquillitatem quietudinis statuens, ac animo tribulos sollicitudinis evellens, fructus permanentes novæ plantationis germinavit. Scripsit enim Chronicon per quinque regum tempora digestum, incipiens ab Henrico Humili, qui primus hoc nomine, ut in hujus narrationis ordine imperavit, et ab Ottone Magno, Secundo et Tertio vicissim sibi succedentibus ad Henricum Pium, nostræ Ecclesiæ reparatorem, ac exaltationis auctorem progreditur, etc. » Cedit vero ipsi magnæ laudi, quod jam argumentis mille et exemplis innumeris egregie fidem Catholicam testatam reliquit adversus suos gentiles apostatas novatores, qui nostro hoc sæculo emersere.

3. *Northmanni in Italia Græcos debellant.* — Idem annus hic est, quo Northmanni hortatu Benedicti Pontificis adversus Græcos in Apulia pugnantes, pluribus eos victoriis debellarunt. Quod ad tempus spectat, hoc id accidisse, ex Leone ¹

Ostiense exploratum habemus, dum ait id factum anno septimo Atenulphi abbatis, quem constat ipsius assertionem ¹ creatum fuisse anno Domini millesimo undecimo.

4. Quomodo autem ista se habuerint, securius accepimus e Glabro, hujus temporis historiarum scriptore, qui ait ²: « Contigit autem ipso in tempore, ut quidam Northmannorum audacissimus, nomine Rudolphus, qui etiam comiti Richardo displicuerat, cujus iram metuens, cum omnibus quæ secum ducere potuit, Romam pergeret, causamque propriam summo Pontifici exponeret Benedicto. Qui cernens eum pugnae militari elegantissimum, cœpit ei querelam exponere de Græcorum invasione Romani imperii, seque multum dolere, quoniam minime talis in suis existeret, qui repelleret viros externæ nationis.

5. « Quibus auditis, spopondit se eidem Rudolphus adversus transmarinos præliaturum, si aliquod ei auxilium præberent vel illi, quibus major incumbebat genuinæ necessitudo patriæ. Tunc vero prædictus papa misit illum cum suis ad Beneventanos primates, ut eum pacifice exciperent, semperque præliaturi præ se haberent, illiusque jussioni unanimes obedirent. Egressus ad Beneventanos, qui eum, ut papa jusserat, susceperat. Illico autem illos ex Græcorum officio, qui vectigalia in populo exigebant, invadens Rudolphus, diripuit quæque illorum ac trucidavit. Illis itaque auditis, illorum socii, qui jam plures civitates et castella propriæ subjugaverant ditioni, coacto in unum suorum exercitu, inierunt prælium adversus Rudolphum, et eos qui ejus favebant parti. In quo scilicet prælio pars Græcorum occubuit maxima; insuper et castra aliqua dimisere vacua, quæ subsecutus Rudolphi exercitus victor obtinuit.

6. « Visa igitur Græci suorum cæde, miserunt Constantinopolim, ut auxiliarentur eis quantocius ab his qui eos miserant: statimque reformantes classem, multo plures quam prius præliaturos miserunt. Interea cum auditum esset ubique, quoniam paucis Northmannorum concessa fuisset de superbientibus Græcis victoria, innumerabilis multitudo etiam cum uxoribus et liberis prosecuta est a patria, de qua egressus fuerat, Rudolphum, non solum permittente, sed etiam compellente ut irent, Richardo illorum comite. Eredientes autem satis audacter venerunt ad loca Alpium, qui et Mons-Jovis dicitur, ubi etiam in angustissimis semitis præpotentes regionis illius constituerant, imperante cupiditate, seras et custodes, ad pretia transmeantium exigenda. At illi Northmannorum exercitus, confractis seris cæsisque custodibus, per vim transitum fecerunt, egressique non parvum Rodolpho contulerunt auxilium; sicque pars utraque resumptis viribus secundo inierunt prælium, in quo utrorumque exercitus graviter cæsus: Northmannorum tamen exercitui victoria provenit.

¹ Leo Ost. l. II. c. 38.

¹ Leo Ost. l. II. c. 31. — ² Glab. l. III. c. 31.

Post paululum vero teruo commisso prælio, in sese pars utraque fessa cohibuit; perspiciscensque Rodolphus suos defecisse, virosque illius patriæ minus bello aptos, cum paucis perrexit ad imperatorem Henricum, expositurus ei huius rei negotium. Qui benigne illum suscipiens, diversis muneribus ditavit, quoniam rumor quem de illo audierat, cernendi contulerat desiderium». Illeusque Glaber de rebus per Northmannos gestis usque ad

Henrici adventum in Italiam adversus Græcos. Quomodo autem et anno sequenti ipse Benedictus papa idem iter ad imperatorem capessivit, suo loco dicturi sumus. De legatione missa ad imperatorem adversus Græcos agit etiam Leo Ostiensis¹, idque munus obisse Melum ducem affirmat.

¹ Leo Ost. l. II, c. 38, in fin.

Anno periodi Græco-Romanæ 6511. — Anno Æræ Hispan. 1056. — Anno Hegiræ 409, inchoato die 19 Maii, Fer. 2. — Jesu Christi 1018.

— Benedicti VIII papæ 7. — Henrici II reg. 17, imp. 5. Basil. et Const. imp. 43.

1. *Prima expeditio Normannorum in Apuliam.* — Ad num. 3 et seq. Normannorum adventum in Apuliam Baronius cum hoc Christi anno illigavit, quod Leo Ostiensis lib. 2, cap. 38, dicat id contigisse *anno septimo Atenulphi*, anno xxi Casinensis abbatis renunciati. Verum cum anno superiori annus ille vii Atenulphi inchoatus fuerit, hæc Normannorum expeditio ad illum Christi annum retrahenda. Lupus enim Protospata ad annum mxxvii scribit: « Descendit Turnichi (seu Tro-niki) *catapanus* (id est, capitaneus; eo enim nomine, qui in Apuliam præfecti ab imperatoribus Græcis mittebantur, vocati) mense Maii, et fecit prælium cum Melo et Nortmannis Leo Patianus excubitus (id est, excubitor). Iterum mense Julii, xxii die, prælium fecit prædictus Turnichius catapanus, et vicit Melum et Nortmannos, et mortuus est Patianus ibi ». Tum: « Anno mxxviii, Indictione prima, descendit Basilius catapanus, qui et Bugianus. Anno mxxix fecit prælium supradictus Bugianus mense Octobris cum Francis, et vicit, et Melus fugit cum aliquibus Francis ad Enricum imp. » In Ms. ducis Andriæ additur, *factum est ad civitatem Cannensem*. Quæ confirmat anonymus Barensis: « mxxvii, Indict. xv, descendit Androniky (quem Lupus Turnichi vocat) Cat. et fecit prælium cum Mel. et vicit Mel. mxxviii, Indict. i, descendit Basilius catp. (id est, atcapanus) mxxix, Indict. ii, fecit prælium Bugiano catp. cum Francis in Canno, et vicit. Mel. fugit, et ivit ad Enricum imp. » Prima itaque Normannorum militaris expeditio in Italiam cum anno millesimo decimo septimo copulanda.

2. *Varia eorum cum Græcis prælia.* — Glaber auctor cœvus, lib. 3 cap. 1, paulo aliter rem narrat, et annos non exprimit, sed Leo Ostiensis, lib. 2 cap. 38, et multo magis Guillelmus Apuliensis in

Poemate de Rebus in Italia a Normannis gestis scripto, Urbano II Ecclesiam Romanam administrante, lib. 1, Lupo Protospatæ et anonymo Barensi suffragatur, quibus fides denegari non potest; cum in Apulia hoc sæculo vixerint. Postquam igitur poeta narravit, quæ an. mxxvi in medium adduximus, reditumque Normannorum ex Apulia in Normanniam, ait:

Ad fines igitur postquam rediere paternos
Cœperunt animos mox sollicitare suorum
Italiam secum peterent: narratur et illis
Appula fertilitas, ignaviaque insita genti.
Sola quibus peragi possit via ferre monentur,
Ductor ibi prudens promittitur inveniendus.

Paulo post:

Postquam gens Romam Normannica transit inermis,
Fessa labore viæ Campanis substitit oris.
Fama volat Latio Nortmannos applicuisse,
Melus ut Italiam Gallos cognovit adisse,
Ocius accessit, dedit arma carentibus armis:
Armatis secum comites properare coegit:

Paucis interpositis:

Turnicli tandem rumor pervenit ad aures
Qui catapan fuerat Græcorum missus ab urbe
Cui Constantinus nomen dedit editor urbis,
Et Constantinus, pariterque Basilius illi
Tunc dominabantur. Gallos venisse feroces
Conductu Meli, qui factus utrique rebellis
Appula Normannos loca depopulanda monebat.
His ita Turnicio fama referente relatis,
Agmina Græcorum propere direxit in hostes.

3. *Magis declarantur.* — Tum ait, mense Maio Turnicium per legatum suum pari fortuna cum Normannis pugnassee, sed postea eum victum re-

cessisse, legatumque ejus occisum. Dein *Bagianum* anno sequenti cum catapani dignitate missum, et *circiter Octobris kal.* pugnatum esse *Cannis*, ac *Melum*, cum non posset obsistere, venisse ad Henricum imperatorem, et auxilium ab eo adversus Græcos petiisse. Guillelmus porro, sicuti et historici Angli in Actis publicis, Nortmannos Gallos semper vocant. Nunc de aliorum Normannorum in Hispaniam expeditione ab Ademaro in Chronico memorata loquendum, et hujus auctoris hoc tempore viventis verba referenda. Huc enim eam revocandam esse, inventio capitis sancti Joannis Baptistæ, quam postea narrat, demonstrat :

4. *Alia Normannorum expeditio adversus Saracenos.* — « Item Normanni, duce Rotgerio ad occidendos paganos Hispaniam profecti, innumeros Saracenorum deleverunt, et civitates et castella ab eis abstulerunt multa. Et primo suo adventu Rotgerius, Saracenis captis, unumquemque eorum per dies singulos, videntibus cæteris, quasi porcum per frusta dividens, in caldariis coctum eis apponebat pro epulis, et in alia domo simulabat se comedere cum suis reliqua membra. Perculsis omnibus hoc modo, novissimum de custodia quasi negligens permittebat fugere, qui hæc monstra Saracenis nuntiaret, ita fabulam Thyestis veram adimplens. Qua de causa timore exanimati vicini Saraceni, pacem cum rege suo Museto a comilissa Barcionensi Ermensede petunt, et annum tributum persolvere spondent. Erat enim hæc vidua, et Rotgerio supradicto filiam suam in conjugio sociaverat. Tumque pace inita, cum ulteriori Hispania Rotgerius decertare cœpit, et die quadam, una cum Petro episcopo Tolosæ et XL solummodo Christianis, Saracenorum quingentos electos in insidiis latentes offendit, cum quibus confligens fratrem suum Nanzerem amisit, tertioque acies adversarias irumpens, plus centum hostium exstinxit, et cum suis propria revisit, nec ausi sunt Ismaelitæ persequi fugientem ». Hujus Normannorum expeditionis hoc anno susceptæ non meminit Baronius, quia ejus tempore Ademari Chronicon lucem non viderat. Baluzius lib. 4 Marcæ Hispanicæ suspicatur, nomen *Rotgerii* pro nomine *Ricardi* per errorem ibi positum fuisse, quia nullus hac tempestate Rogerius Normannos regebat. Verum non dicit Ademarus Rogerium Normannos rexisse ; cum antea diserle scripserit, *Ricardum* comitem tunc Normannos gubernasse. Fuit itaque *Rotgerius* vir quidam nobilis, hujus expeditionis caput et dux.

5. *Inventio capitis S. Joannis Baptistæ in urbe Angeriaca.* — Post hæc narrat statim Ademarus in Basilica Angeriaciensi inventum esse caput, « quod sanctum caput dicunt esse proprium sancti Joannis Baptistæ », subditque : « Dum inventum ostenderetur caput sancti Joannis, omnis Gallia, Italia et Hispania ad famam commota, ibi accurrere certatim festinabat. Rex quoque Francorum Rotbertus, regina, rex Navarræ Sancius (cognomento *Major*, hujus nominis III), omnesque

dignitates eorum confluerunt, ubi omnes offerebant munera pretiosa diversorum generum. Nam supradictus rex Francorum, oblata gabata seu concha ex auro purissimo, pensantes libras xxx, pretiosis vestibus holosericis et auro textis ad ornatum Ecclesiæ, a Wilhelmo duce (nempe Aquitanie) susceptus condigne, per Pictavis reversus est Franciam. Quid dicam, quod ultra omnem felicitatem et gloriam videbatur, concursus psallentium cum reliquiis sanctorum ex monachis et canonicis, qui undecumque ad Memoriam sancti Præcursoris festinabant ? Inter hæc festiva, reliquiæ corporis principis summi qui pater est Aquitanorum, et primus Galliarum spermologus, videlicet B. Apostoli Martialis simul cum reliquiis S. Stephani Lemovicæ sedis, illuc deferebantur. Protractis itaque S. Martialis in vectorio ex auro et gemmis pignoribus foris Basilicam propriam, mox omnis Aquitania, quæ jamdiu nimis pluviarum inundationibus laboraverat, adventu patris sui lætatur, serenitate reddita. Cum eisdem equidem pignoribus abbas Jofredus atque episcopus (Lemovicensis scilicet) Giraldus cum principibus numerosis, et omni populo innumerabili diverterunt, cundo in Basilicam Salvatoris S. Carofi, exieruntque eis obviam monachi cum omni plebe foris milliaro uno, et cum apparatu honorifico diem festum agentes, antiphonas denique excelsa voce intonantes, deduxerunt eos usque ad Altare Salvatoris, et missa celebrata, simili modo persecuti sunt eos ; cumque in Basilicam S. Præcursoris intrarent, celebravit ante caput sancti Joannis missam episcopus Giraldus de Nativitate ejusdem sancti Baptistæ, cum esset mensis October. At canonici Sancti Stephani cum monachis alternatim tropos ac laudes cecinerunt festivo more, et post missam Pontifex cum capite sancti Joannis benedixit populum. Sicque de miraculis S. Martialis, quæ per viam contigerant, valde lætantes, v die ante festivitatem Omnium Sanctorum reversi sunt ». Baronius anno mxxv, num. 4 hanc inventionem refert, sed hæc a præsentis anno removeri non potest, ut liquet ex iis quæ ante et post eam Ademarus, qui tunc in Aquitania vixit, habet. Cæterum Romani et Constantinopolitani hoc tempore asserebant se D. Joannis Baptistæ caput possidere, quem nodum, qui poterit, solvet.

6. *Moritur Joannes ultimus Bulgarie rex.* — Basilius imp. « iterum impressione in Bulgariam facta, longe lateque prædas egit, et Achrida urbe regia Bulgarorum expugnata, aliisque castellis per duces suos captis, Constantinopolim regreditur. Sed rursus bello illato Barbaris illis et castellis occupatis, Bulgaros complures partim interfecit, partim cepit. Quorum princeps Joannes Bladisthlabus (id est, Uladislavus) dum Dyrrachium obsidet, cadit, cum genti biennium et quinque menses præfuisset », inquit Zonaras. Cedrenus pag. 712 annos etiam duos et menses quinque *Joanni* Bulgarie regi tribuit ; qui cum antea assernerit eum successisse *Gabrielio*, die xxiv mensis Octobris anni

Christi *mxv* occiso, apparet *Joannis* mortem hoc anno contigisse mense circiter Martio. Ducangius in Constantinopoli Christiana, dum loquitur de *familiis Dalmaticis, Sclavonicis et Turcicis*, cap. 6, num. 25 *Joannis* mortem cum anno superiori perperam illigat, quod non advertisset Curopalatem et Cedrenum gesta anno superiori in Bulgaria a Basilio non memorasse, et narrato ejus Constantinopolim adventu, quem aiunt contigisse *die nona mensis Januarii*, *Indictione xv*, anno scilicet superiori, statim referre *Joannis* mortem, qui tamen integro postea anno superstes fuit.

7. *Universa Bulgaria Basilio imp. deditur.* — Pergit Zonaras: « Quo imperator intellecto (nempe obitu *Joannis* regis) statim egreditur, cui ad Adrianopolim quidam illustres Bulgari se dedunt, tradito Pernico, et aliis triginta quinque castellis. Sed et alii multi ex his Barbaris ad eum confluerunt. Maria quoque *Joannis* Bladisthlabi uxor, Davide Bulgariae archiepiscopo cum litteris ad illum misso, se illi Bulgariam cessuram pollicita, si ea quæ vellet impetrasset, paulo post ipsa cum tribus filiis et sex filiabus advenit. Sunt et tres ejus alii filii, Prusianus cum duobus fratribus, qui in montes profugerant præsidii occupatos, coacti ad imperatoris fidem se conferre: e quibus Prusianum magistrum, cæteros patricos fecit ». De Basili triumpho anno sequenti agemus.

8. *Robertus rex Franc. Romam petit.* — Hoc anno, vel aliquo ex tribus consequentibus, *Robertus* Francorum rex orationis causa Romam profectus est, ut discimus ex Epistola Benedicti papæ VIII episcopis « per Burgundiam, Aquitaniam et Provinciam constitutis, Burchardo scilicet archiepiscopo Lugdunensi », aliisque decem et octo, qua archiepiscopis, qua episcopis, quorum sedes et nomina in eadem designantur. Ait Pontifex sese « in præsentia Deo devoti domini Roberti regis Francorum, principumque ejus et optimalum, qui cum eo venerunt ad limina Apostolorum, et reclamatoria legatione » Odilonis Cluniacensis abbatis percepisse, terras et possessiones ejusdem monasterii ita a quibusdam diripi, ut monachi solitam curam supervenientium hospitum et pauperum non possint exercere. Quare eos invasores anathemate percellit, et nominatim quosdam ex illis, mandatque præfatis episcopis, ut illos similiter excommunicent, et presbyteris sibi commissis excommunicare præcipiant. Præterea omnibus principibus præfatarum provinciarum munus benedictionis et absolutionis mittit, eo fine ut prædicti loci adjuutores et defensores semper existant. Hoc munus in particulari mittit « seniori quam reverendo domno Willelmo comiti, domnoque Rainaldo comiti filio ejus, et omni reverentia et veneratione dignissimæ domnæ Adeleidi comitissæ, cognomento Blanchæ, nuruique ejus Gerbergæ comitissæ ». Aliorum magnatum nomina legi possunt in eadem Epistola, *data kal. Septemb.* et tom. iv Duchesnii recitata.

9. *Litteras obtinet a Benedicto VIII in favorem monasterii Chuniaci.* — Erat *Willelmus* cognominatus *Otto*, comes comitatus Burgundiæ ultra Ararim fl. positæ, et ut prodit Glaber lib. 3, c. 2, privignus Henrici Burgundiæ ducis, Hugonis Capeti fratris, qui cum liberos non haberet, *eum loco filii adoptavit*, ejusque mater, quam idem Henricus uxorem duxit, Gerberga appellata, ut videre est in Chronico S. Benigni pag. 448 et seq. ubi etiam dicitur *Rainaldum* filium ei successisse. Ex illo originem duxere comites, qui diu comitatui Burgundiæ dominati sunt. *Adelais* vero, *Blancha* cognominata, vidua erat Guillelmi Provinciæ comitis, hujus nominis primi, et Gerberga vidua, Guillelmi II Guillelmi Primi filii, utraque tutrix ac dominatrix Guillelmi Terti in tenera ætate constituti.

10. *Eæ ante præsentem annum non datæ.* — Hanc autem Epistolam, cujus opera varii Catalogi episcoporum Galliæ accuratius digeri possunt, hoc vel aliquo ex tribus sequentibus annis scriptam esse, eruo ex Chartulario monasterii Montismajoris apud Arelatem siti, ex quo Boucheus in Histor. Provinciæ lib. 9, pag. 53, aliique hæc verba scripsere: « Anno ab Incarnat. Domini *mxvii* (legendum *mxvi*), fuit inchoata Basilica Montismajoris in honore sanctæ Mariæ matris Domini, seu Omnium Sanctorum, *Indictione xiv*, III kal. Jun., fer. iv, (qui sunt certissimi characteres an. *mxvi*), regnante Roberto rege in tertio anno foundationis hujus Ecclesiæ, obiit *Willelmus* (hujus nominis II Gerbergæ maritus) inclitus comes, *Adelaidis* filius, et honorifice sepultus est in fundamento hujus Ecclesiæ ». Quare *Willelmus* II hoc anno vivere desiit, et *Adelais* ac Gerberga comitatum Provinciæ administrare cœpere. Idem enim Boucheus, p. 54, refert quamdam donationem monasterio Sancti-Victoris factam, in qua *Adelais* dicitur « mater *Willelmi* quondam Provinciæ comitis », nempe *Guillelmi* II, et Gerberga « ejusdem principis olim uxor ». Facta donatio hæc anno *Incarnat. Dom. mxviii*, *Indict. 1*, cui præter *Adelaidem* et Gerbergam *Willelmus filius Willelmi comitis* subscribit, *Willelmus* nempe III minorennis. Boucheus, qui animum non adverterat ad errorem numeri a novis emendati, *Willelmi* II mortem usque ad annum *mxix* differt, sed contra tenorem Chartæ ex eodem mox a nobis relatæ. Cum itaque citata *Benedicti VIII* Epistola eo tempore, quo *Adelais* et Gerberga Provinciam regebant, data sit, ea ante præsentem annum in Galliis non missa, nec citius *Robertus* rex profectionem Romanam suscepit.

11. *Neque post annum mxxi.* — Tardius vero quam anno *mxxi* eum Romam profectum non esse, demonstrat Odorannus, auctor hujus temporis in Chron. tom. ii Duchesnii, qui refert, quod dum « quodam tempore *Robertus* rex Romam peteret, Bertam » reginam dudum repudiatam eum persecutam esse, ut faventibus quibusdam aulicis, *Decreto Apostolico*, toro regio restitueretur; unde *Constantia* regina magno mœrore afficiebatur.

Nocte quadam apparuit ei per visum vir quidam in sacerdotali habitu, qui eam certam fecit de liberatione ab imminente tristitia, dicitque se esse *Savinianum episcopum*, sed cum *Constantia* ignoraret, sanctum Savinianum martyrem primum episcopum Senonensem fuisse, sollicite perquisivit: « Si illis in regionibus haberetur episcopus, qui Savinianus diceretur. Quibus ignorantiam suam profitentibus, unus ex eis, qui in monasterio S. Petri (apud Senonas) fuerat nutritus, redeunte rege, Aurelianorum futurus episc. nomine Theodoricus respondit pro omnibus », nempe eum qui eidem apparuit, esse *S. Savinianum* martyrem. Constat autem ex Catalogo episcoporum Aurelianensium *Odolricum*, sancti Theodorici in episcopatum Aurelianensem successorem, anno MXXII episcopatum gessisse. Ad hæc anno superiori ostendimus, *Robertum* regem anno MXXII Aurelianus fuisse, ibique celebratum esse Concilium adversus Manichæos recens in ea urbe detectos, de quo chronographus Sancti-Petri-Vivi, postquam verba fecit, subdit: « Post hæc Theodoricus episcopus Aurelianensis relinquens episcopatum venit Senonas in Ecclesia B. Petri, etc. » Ex quibus omnibus manifestum fit Robertum regem anno MXXI Romam jam reducem fuisse, ideoque ei Epistolam Benedicti VIII serius non datam, cum Sausaius in Annal. Eccles. Aurelianensis asserat, *Theodoricum* anno MXXI, Indict. IV, quasdam Ecclesias Aurelianensi Ecclesiæ dedisse; qui tamen nondum episcopus erat, quando *Robertus* rex Roma rediit. Colitur sanctus *Theodoricus* Aurelianensis episcopus die XXVII mensis Januarii, quo in ejus Vita, a Bollandi eo die recitata, obiisse dicitur. Beslius in Hist. Comit. Pict. pag. 55 in medium adducit verba cujusdam chronographi anonymi, qui scripsit *Robertum* regem anno MXXVI, *pridie vigiliæ Apostoli Pauli* Romæ fuisse; ipseque existimat, eundem regem hujus sæculi initio alteram profectionem Romanam, instituisse, eumque tunc *Bertam* juxta Odorannum citatum secutam esse. Verum geminata illa profectio Romana fictitia, annoque MXXVI, Benedictus VIII jam a biennio e vivis abierat.

12. De hac Roberti profectione Odorannus et

poeta anonymus loquuntur. — Mabillonius tom. III Analect. pag. 534, refert *Rithmum Satyricum* ex Ms. Codice Belvacensi erutam, cujus titulus: *De Temporibus Roberti regis*, in quo poeta præcipue invehitur in *Landricum*, Bodonis comitis Nivernensis filium, *Roberto* regi gratissimum, quem prodit, *Bertam* a Roberto rege antea separatam, in regium torum, quod antea ignorabamus reduxisse, hancque ei ob malas artes *Pravinum* Senonum castrum promississe, se eum illud nunquam obtinuisse. Mabillonius in Notis ad illam Satyram ait, diversum videri fuisse istud factum ab eo quod ex Odoranno mox relulimus: « Cum tempus, inquit, et aliæ circumstantiæ non convenient ». Verum omnia, quæ poeta habet, ad hanc Romanam Roberti regis profectionem optime quadrant, ut eam magis examinanti patebit; loquitur enim poeta de *Hugone* jam rege a Roberto patre renuntiato, quod anno MXXVII contigit; cumque asserat, *Robertum* illicitas nuptias renovasse, oportet regem in isto itinere Romano *Bertam* cognovisse, sed cum Romæ a Benedicto VIII ejus petitio rejecta fuisset, post reditum *Constantiam* in gratiam recepisse. Mathoudus in Catalogo archiep. Senonens. de Leothrico scribit: « Transtulit anno MXXIX corpus S. Saviniani in Basilica *Vivi*, rege præsentem, et *Constantia* regina cum primoribus regni, in capsam auro gemmisque prolectam (ut hactenus visitur), quæ votivum erat ejusdem reginæ donarium, in regis gratiam Saviniani beneficio restitutæ; ut præter Odorannum, qui eudendi nobilissimi illius reclinatorii curam egit, referunt omnes chronographi Mss. et editi, qui de rebus Senonicis disseruere ». Ita ille. Denique anno MCCCXVIII, num. 9 insinuavimus, a *Landrico* comites Nivernenses originem ducere, hicque non prætermittendum quod anonymus scriptor apud Labbeum tom. I Biblioth. in *Origine et Historia brevi Nivernensium comitum*, ait: « Iste Landricus, primus hujus generis comes Nivernis factus, cœpit usquequaque dilatare terminos suos, habuitque filium nomine Renaldum, qui conjunctus matrimonio sorori regis Roberti, filii Hugonis Capitonis, comitatum Antisiodori conjunxit comitatui Nivernis ».

BENEDICTI VIII ANNUS 8. — CHRISTI 1019.

1. *Benedictus papa in Germaniam proficiscitur ad confirmandum episcopatum Bambergensem, et implorandum auxilium ab imperatore.* — Sequitur ordine temporum annus Redemptoris millesimus undevicesimus, Indictione secunda, quo Benedictus papa rogatus ab Henrico imperatore, in Germaniam veniens, Bambergæ Ecclesiam Sancti-Stephani dedicavit. Id hoc anno factum Hermannus, Lambertus, Marianus Scolus, Abbas Urspergensis, et alii tradunt : Sigebertus autem anno sequenti. Porro non occasio schismatis illuc Pontificem abire compulit, ut aliquis existimavit (schisma enim exordio Pontificatus accidisce, tuncque Benedictum illuc primum abiisse, suo loco superius dictum est) sed nec ut eam duntaxat Basilicam dedicaret, verum ut confirmaret sua præsentia Bambergæ episcopatum quem erexerat, prout in Actis S. Chunegundis Augustæ legitur istis verbis, ubi auctor meminisset de Basilica Sancti-Stephani illic erecta¹ : « Ad quam, inquit, dedicandam Benedictum papam, quem præfatus Deo dignus imperator Henricus ad confirmandum Bambergensem pontificatum advocaverat, venire rogavit ».

2. Sic igitur præcipua causa fuit confirmatio Bambergensis episcopatus; nec levis quidem causa : siquidem civitatem ipsam cum juribus suis plene subiecit pius imperator Romanæ Ecclesiæ, cui ut dominæ, annum censum persolveret : quam ut liberaret Henricus Junior, vice Bambergæ, tradidit eidem Ecclesiæ Romanæ Beneventum, tempore Leonis IX Romani Pontificis. Hæc quidem ita omnino se habuisse, Cassinatis monasterii monimenta prodidere, ex quibus Leo Ostiensis ista descripsit² : « Hic idem Augustus ex sui patrimonii sumptibus construxit Ecclesiam ad honorem sancti Georgii, quam advocato Benedicto papa consecrari fecit; episcopalemque in ea sedem constituens, beato Petro ex integro obtulit, statuto per annos singulos censu, equo uno optimo albo cum ornamentis omnibus et phaleris suis, centumque marchis argenti. Postmodum Leo Nonus papa

vicariatus gratia, (loco scilicet ipsius), Beneventum ab Henrico Conradi filio accipiens, prædictum Bambergense episcopium sub ejus ditione remisit, equo tantum, quem prædiximus, sibi servato ». Hæc Leo Osliensis. Quod autem dicant alii omnes, dedicatam fuisse Bambergæ Ecclesiam S. Stephani a Benedicto Pontifice, Leo autem dicat dedicatam Ecclesiam S. Georgii, haud adeo repugnat, ut non possit esse utrumque verum. Nam liquet Bambergæ fuisse etiam erectam Basilicam S. Georgii, et ejus nomine monasterium, ut ejusdem Chunegundis acta produnt.

3. De iisdem Glaber habet ista in Præfatione tertio Historiarum libro præfixa : « *Ædificavit quoque, inquit, Henricus imperator monasterium in Saxonie (Franconie) loco, qui dicitur Baveberch, id est Bavonis mons : lingua enim Teutonica, Berch mons appellatur. Quod etiam monasterium donis innumerabilibus locupletatum, a Romano Pontifice supradicto, scilicet Benedicto, in honorem Apostolorum principis dedicari fecit, atque ejusdem Pontificis usus consilio, eandem Ecclesiam in episcopalem sublimavit sedem, constitutoque in ea episcopo, amplissimorum fundorum redditibus esse fecit locupletem* ». Hæc Glaber. At in Fragmentis historiæ Aquitanie, non Ecclesiam, sed civitatem ipsam Bambergam recens ab ipso Henrico erectam, ab eodem Benedicto Pontifice in honorem Dei Genitricis Mariæ fuisse consecratam, asseritur. Sunt hæc in ea : « In terra Theodisca a novo civitatem ædificavit, vocabulo Babenburg, quam Benedictus papa in honorem Dei Genitricis consecravit, et parochias in circuitu ex pagano, vicis, et oppidis, dum converterentur, attitulavit ad illam ». Hæc ibi.

4. Præter hæc omnia, de adventu Pontificis Bambergam ad imperatorem a nobis ex diversis auctoribus recitata, non prætermittam illud etiam et forte præcipuum fuisse consilium ejus, ut provocaret eundem ad ferendas suppetias Ecclesiæ Romanæ adversus Græcos, qui pedetentim jam sibi cuncta usque ad Romanos fines vindicaverant, vel eorum dominos fecerant sibi fideles. Nam audi

¹ Apud Sur. die III Mart. — ² Leo Ost. l. II. c. 47.

quid de Capuano principe Urbi finitimo dicat Leo Ostiensis¹ : « Capuanus princeps Constantinop. imperat. Basilio clam favebat, claves aureas ad illum misit, se et urbem Capuanam, imo totum principatum ejus per hæc imperio tradens, etc. » Jamque fore, ut fœderatorum auxilio ipse Græcorum imperator Roma absque obstaculo potiretur.

Hic postremo vetus Instrumentum, hoc anno conscriptum, quo in primis asserta a nobis chronologia anni Pontificis et imperatoris, insuper et Indictionis nota comprobetur, inde vero alia pleraque discantur, describendum curavimus, nuper acceptum a Flaminio Philonardo episcopo Aquinate, nobis amicitia conjunctissimo, una cum aliis antiquitatis monumentis, a sanctissimæ memoriæ Paulo papa Quarto collectis, antequam cardinalis esset. Continet restitutionem factam Sancti Gregorii monasterio de bonis ejus male a Silvestro abbate alienatis, quæ qui accepit Ingizo nobilis Romanus restituens, Documentum hoc per Sergium sanctæ Romanæ Ecclesiæ scriniarium conficiendum curavit, quod (ut temporis infelice conditio dabat) oblitum solœcismis, et barbarismis et superinductis ex vetustate mendis depravatum, qualecunque sit accipe: nam sciendi curiositas, quæque aspera condians, suavia reddit.

5. *Diploma de restitutione facta monasterio S. Gregorii in Urbe.* — « In nomine Domini Dei Salvatoris nostri Jesu Christi, anno, Deo propitio, Pontificatus domini Benedicti summi Pontificis et universalis Octavi papæ in sacratissima Sede B. Petri Apostoli octavo, imperante domino piissimo perpetuo Augusto Henrico a Deo coronato Magno imperatore anno sexto, Indictione tertia, mensis Novembris die xxiii.

6. « Decet autem bonæ fidei solo verbo sufficere, sed aliquando solet tempus longinquitatis extendere, et non valet quidquid conventum vel gestum fuerit, seriem memoriter retinere. Ob hoc necesse est, quæcumque inter partes conveniunt, scriptura notarii, ut quandoque, si expedit, et ostensi fuerint, omnem totius litis amoveant questionem. Et ideo quoniam constat me Ingizo nobilem virum Franco bonæ memoriæ qui dicebatur a Transiberi filium, ægroto namque corpore, sed largiente divina misericordia, mente et conscientia sana, dico autem omnibus non solum præsentibus sed etiam futuris, quia bonum est homini semper ante oculos propria adhibere delicta, secundum Psalmi sententiam² : Et peccatum meum ante me est semper. Et iterum : Graviter in Dominum delinquant, qui divitiis a Deo concessis, non in rebus salutaribus, sed in pravis utuntur; nesciunt enim impartiri pauperibus, oppressis subvenire despiciunt, et inde magis augent delicta, unde redimere debuerunt. Idcirco ac si ab hac die discessissem, et digessi, atque in omnibus deliberavi et definivi

simulque reputavi, nullo me cogente neque contradicente aut vim faciente, sed propria spontanea que mea voluntate, vobis autem, sancte Andrea Apostole ac beate confessor Christi Gregori, et per vos in sacratissimo vestro venerabili monasterio quod nuncupatur Clivus-Scauri, existente domino Joanne reverendissimo abbate, et per eum in cunctis catervis monachorum ac presbyterorum Dei, qui ibidem servituri sunt usque in perpetuum, pro vero plane amore ac dilectione, quam in vobis habeo, ut in die adventus Domini et Salvatoris nostri Jesu Christi pro me indigno intercedere dignemini apud eum qui vos elegit, quatenus de meis criminibus et peccatis veniam aliquantulum invenire merear. Recolo autem cujusdam sapientissimi verba qui dixit : Nulla scelera elemosynis posse redimi, si in peccatis quisque permanserit, tunc autem fructu elemosynarum indulgentia conceditur, quando ab scelerum opere definitur. Et iterum : Misericordia a compatiendo alienæ miseriæ vocabulum sortita est. Nullus autem in alio esse misericors potest, qui prave vivendo in se misericors non est. Qui enim sibi nequam est, cui bonus est ?

7. « Ob hoc refundo, et concedo vobis vestrisque servitoribus in perpetuum, id est, eam scilicet hæreditatem, quam hactenus per emphiteosim meis detinui manibus, quam mihi quondam Silvester nefandissimus ac sceleratissimus ejusdem monasterii abbas fecit, quæ esse videtur de terris, campis, pratis et pascuis atque silvis, montibus et collibus, plagis et planitiis, quod cultum vel incultum, exipio autem solummodo vineas, quæ sitæ sunt in loco qui vocatur Mateso, quas meis per omnia conservo (consevi) manibus, cætera vero omnia quæ prædixi, quanta nunc usque meis detinui manibus, sicuti infra subscripsi, concludunt affines : omnia in omnibus vobis, domini mei, vestrisque servitoribus refuto, sicuti juris antea fuisse decernitur, posita in fundum Mola rupta, vel quibus aliis nuncupantur vocabulis inter affines : a primo latere, incipiente a vado, quod est ab Aræ Crescentii de Arce, et exinde perfractale usque in pede de monte Sanctæ Mariæ : deinde per pedem montis, sicuti ascendit in via Pipponesca, et ab utrisque lateribus omnia de vestro venerabili monasterio jurisque vestri. Hanc namque hæreditatem, sicut hactenus meis tenere visus fui manibus, vobis Apostole et confessor Christi, vestrisque servitoribus refuto, et in propria jura revoco, ne forte in die judicii a Creatore omnium rerum, et a vobis aliquam pro ea sentiam pœnam : sacra autem Scriptura testante¹ : Beatus qui vigilat et custodit vestimenta sua, quod est opera, ne nudus ambulet, et videant alii turpitudinem ejus. Quid enim mihi prodest gloriosiore apparere apud homines, et nitidiora membra gestare, et intus apud Deum, cujus oculis nuda et aperta sunt omnia, putridio-

¹ Leo Ost. l. i. c. 39. — ² Psal. L.

¹ Apoc. xvi.

rem et foetidiorē animam meam esse captivam? Quid prodest mihi sociari hominibus, et privari ab Angelis? quid prodest mihi terrena acquirere, et caelestia non habere? Ista et alia multa similia recolui, quæ dicere longum est. Et ideo ab hodierna die et usque in perpetuum dimitto vobis vestrisque servitoribus suprascriptam totam hæreditatem, quam injuste meis hucusque detinui manibus: quam prædictus damnatus et impius iniquusque Silvester abbas pro suis facinoribus mihi dederat, excepta jam dicta vinea, quam meis detineo potestatibus: de cæteris namque omnibus ut (prædixi) emitto vobis plenariam et irrevocabilem securitatem deliberationis refutationisque Chartulam, et nullo quoque tempore, et nunquam a me neque ab hæredibus et successoribus meis, neque etiam a nulla magna parvaque persona a me submissa contra vos vestrosque servitores quamlibet moveri quæstionem aut calumniam, neque supplicando principibus, aut exorando pontifices, aut aliquam personam hujusmodi querimoniam pro eadem terra unquam in tempore facere præsumam, sed ab omni homine omni in tempore securum et quietum vestrum monasterium vestrique servitores existant usque in perpetuum. Interim nolum facio omnibus, ut nullus abbas nullusque homo hanc terram, quam vobis restitui, audeat vel præsumat de vestro monasterio per quamlibet scripturarum seriem subtrahere vel alienare, sed semper in usu monachorum constituo permanendam. Et qui ita fecerit, cum diabolo et ejus atrocissimis pompis societatem habeat, et anathematis semper sit vinculo innodatus, et suprascripta terra inconvulsa semper ibidem maneat. Unde et juratus dico per Deum omnipotentem, sanctæque Sedis Apostolicæ D. Benedicti Octavi papæ atque Henrici imperatoris salutem, hæc omnia, quæ præsens hujus Chartulæ series textus eloquitur, inviolabiliter conservare atque adimplere promitto. Nam, quod absit, si contra hanc Chartulam quam sponte et voluntarie rogavi, agere aut causare vel litigare præsumpsero, et cuncta quæ a me dicta sunt non observavero per quemvis modum, aut per quaecumque ingenium, quod sensus humanus intelligere vel capere potest, tunc non solum perjurii pœnam incurram, verum etiam daturum me esse promitto una cum hæredibus et successoribus meis vel consanguineis meis, vobis denique et servitoribus vestris ante omne lilis initium pœnæ nomine, auri purissimi libras decem, et post solutam pœnam maneat hæc

Chartula in sua nihilominus firmitate, quam scribendam rogavi Sergium scriniarium S. Rom. Ecclesiæ, in qua ego Ingizo signum sanctæ Crucis per prædictum scriniarium feci, et testes ut scriberent rogavi, et pro vobis ad suprascriptum Joannem abbatem, quasi pro vestra benignissima persona, contradidi atque refutavi in mense et Indictione suprascripta tertia.

8. « Signum † manu suprascripti Ingizo nobilis viri, qui hanc securitatis refutationisque Chartulam fieri rogavit. † Crescentius Dei gratia Urbis Romæ præfectus. † Joannes Dativus judex. † Andreas de Petro qui dicebatur de Viola de Colosseo testis. † Baldo quondam Sinoclo vocatus testis. † Gregorius fidelis prædicti Ingizo. † Andrianus a Transtiberi testis. Ego Sergius, scriniarius sanctæ Romanæ Ecclesiæ, scriptor hujus Chartulæ, post testium subscriptiones et traditionem complevi et absolvi ».

9. *Sergii patriarchæ obitus et Eustathii subrogatio.* — Quod demum pertinet ad res Orientalis Ecclesiæ, hoc anno, Indictione secunda, mense Julii, moritur Sergius patriarcha Constantinopolitanus, in cujus locum suffectus est Eustathius, primus presbyterorum qui erant in templo regiæ. Hæc Curopalata. Quod autem idem dicat, Sergium sedisse viginti annos integros, subrogatum in locum Sisinii defuncti, videtur prætermisus ab eo Joannes patriarcha, quem Petrus patriarcha Antiochenus, in Epistola quam scripsit ad Michaelē Cerularium Constantinopolitanum patriarcham, ponit sedisse ante Sergium, tenuisseque sedem illam vivente Joanne, itidem nominato Romano Pontifice, ejus nominis Decimo nono. Sunt hic recitanda ejus verba, quibus plenissima fides adstruitur. Sic se habent: « Et hac in re ego quidem testis fidus, et alii multi Ecclesiæ proceres, quod tempore beatæ memoriæ patriarchæ domini Joannis, Romanus papa Joannes etiam ipse nuncupatus, in sacris diptychis habebatur, et cum Constantinopolim quadraginta quinque abhinc annis venissem, inveni tempore beatæ memoriæ domini Sergii, prædictum Joannem in sacra missa una cum aliis sanctissimis patriarchis relatum ». Hæc Petrus Antiochenus de rebus gestis suo tempore, quas et vidit. Cum igitur hæc ita se habuisse noscantur, longe minor erit Sergii episcopatus numerus, totque annos sit necesse minui a sede Sergii, quot tenuerit eam idem ipse Joannes.

Anno periodi Græco-Romanæ 6512. — Anno Æræ Hispan. 1057. — Anno Hegiræ 410, inchoato die 9 Maii, Fer. 7. — Jesu Christi 1019.

— Benedicti VIII papæ 8. — Henrici II reg. 18. imp. 6. Basil. et Const. imp. 44.

1. *Benedictus VIII in Germaniam venit.* —

A num. 1 ad 4. Chronographus Hildensheimensis ad hunc Christi annum, de Henrico imp. scribit : « Eo anno in Pascha papam de Roma Bavenberg (id est, Bambergæ) hospitio suscepit ». Pascha autem hoc anno die xxix mensis Martii celebratum. *Benedictum VIII* hoc anno in Germaniam profectum esse, testantur etiam Lambertus Schafnaburgensis et Marianus Scotus in Chronicis. Quare aliqui viri docti hanc Benedicti papæ protectionem Germanicam Hermanni Contracti in auctiori Chronico auctoritate innixi, in annum sequentem male differunt. Is enim qui asserit se fuisse eo anno puerum octennem, per hæc tempora non raro in chronologiam peccat. Perperam itaque Hermannus, quod in priori Chronici sui editione recte scripserat, in posteriori retractavit. Ait etiam ibidem Hermannus, *Benedictum* papam Bambergæ Ecclesiam Sancti-Stephani dedicasse. Fallitur autem Glaber a Baronio citatus, qui huic dedicationi addit erectionem Bambergæ in sedem episcopalem. Jam enim anno mvi Joannes papa, hujus nominis XVIII, Bambergam in sedem episcopalem sublimarat, ut supra demonstravimus. Denique Vippon presbyter, scriptor coævus, in Vita Conradi Salici imp. de morte S. Henrici ejus decessoris, et de episcopatu Bambergensi ab eo fundato loquens, ait : « Ad cujus dedicationem domnum Apostolicum nomine *Benedictum* ascivit », cujus auctoritate ad tutandum locum Privilegia publica stipulatione confirmavit.

2. *Causa hujus protectionis.* — Ad num. 4.

Causam adventus Benedicti VIII in Germaniam aperit Leo Ostiensis, lib. 2, cap. 28, ubi postquam de infelici pugna adversus Græcos anno superiori a Normannis habita, cui Melus interfuit, verba fecit, ait : « Melus, ut se militum auxilio destitutum vidit, Normannos reliquos cum Guaimario (qui Salerni princeps erat) partim Pandulpho (Capuæ principi) commendans, ipse ad imperatorem proficiscitur, ut ad expellendos hinc Græcos, vel ipsum venire, si posset, induceret; vel saltem auxilia militum mitteret ». Quare recte censet Baronius, *Benedictum VIII* eandem ob causam Henricum imp. adiisse, et significasse eum totam Italiam amissu-

rum, nisi *Melo*, qui omnem operam adhibebat ut patriam a Græcorum tyrannide eriperet, petita auxilia præberet. Quod in causa fuit, ut « *Melo* his jam ad eum hac causa profecto, ac peregre mortuo », inquit idem Leo cap. 40, ipsemet imperator postea in Italiam adversus Græcos sese contulerit, ut suo loco dicetur.

3. *Basilii imp. de Bulgaris triumphat.* — Ad num. 9. Universa Bulgaria subacta », inquit Zonaras, « et castellis aliis eversis, aliis munitis, justisque præsiidiis impositis, Athenas ad exsolvenda Deiparæ vota est profectus (nempe Basilius imp.) ac dedicatis in æde ejus multis pretiosis donariis, in principem urbem reversus triumphum duxit, recta tiara ornatus, quam vulgus Tophum vocat, a typho nimirum et superbia quam in animis gestantium excitat; et sic usque ad Dei verbi Sapientiam pervenit, ibi quoque vota exsoluturus. Quo cum venisset patriarcha (sc. Sergius) multum eum obtestatus, ut Allelengium aboleret, nihil impetravit : quamvis pollicitus fuisset se id Bulgaris subactis facturum ». Idem habet Cedrenus pag. 717, qui addit eum triumphasse, « præeuntibus Maria (Bulgaricæ regina) Samueli filiabus, et reliquis Bulgaris ». Actum hoc Indictione secunda, anno ab origine mundi 6527, juxta Æram Constantinopolitanam, ideoque hoc Christi anno. Elmacinus lib. 2 Hist. Saracen. cap. 6 : « Potitus regno eorum, arcium præfectui constituit Romanos, idque anno xlv imperii Basili imp. qui annus erat mcccxxx Alexandri (kalendis Octob. superioris Christi anni inchoatus) : rediitque imperator Constantinopolim, et commixti sunt Romani cum Bulgaris, ac matrimonii juncti, et cessarunt quæ inter eos fuerant inimicitie ». Exinde, ut docet Nicephorus Gregoras lib. 4, *Bulgari* in Mæsiam inferiorem ultra Danubium translati fuere, eorumque, quas citra fluvium habitabant provincie, *Patzinatisis* concessæ a Constantino Monomacho imp. postquam illas in suam potestatem redeget. *Bulgaria* vero, illa scilicet quæ citra Danubium jacet, a ducibus coepit administrari usque ad Isaacium Angelum imperatorem, sub quo Bulgari rebellaverunt, et regem ex propria gente sibi præfecere.

4. *Tributum Allelengium dictum abolere recu-*

sat. — Quoad *Tuphum* seu *Tufam*, Byzantini scriptores τούφον appellant apicem, qui galeæ imminet, ut non tantum Zonaras in Basilio Porphyrogenneto prodit, sed etiam Leo Grammaticus in Theophilo imp. cum de Justiniani statua in Augustæo verba facit. Legendus Ducangius Dissert. xxiv ad Joinvillam, pag. 292. *Allelengium* vero tributum erat indictum ditioribus prædiorum possessoribus, pro his qui facultatibus erant defecti, quod ipsemet Basilius imp. anno mii Græcis præscripserat, ut asserit Cedrenus pag. 706: « Eadem Indictione (nempe decima quinta) legem tulit, ut pensionem quam pauperes perditī debebant, divites persolverent: id vocabatur Allelengium. Et patriarchæ Sergio multisque aliis pontificibus et monachis deprecantibus, ut absurdum hoc onus subditis demeret, non obtemperavit », scilicet Basilius imp. Illud abolere statuerat Constantinus ejus frater, sed morte præventus exequi non potuit, duravitque usque ad *Romanum Arggyrum*, qui inito imperio illud sustulit, ut Curopalates et Zonaras memoriæ mandarunt.

5. *Moritur Sergius patriarcha Constantinop.* — « Sergius », inquit Cedrenus, « cum per annos xx Ecclesiam Dei moderatus esset, Indictione secunda, mense Julio, anno mundi 6527 (Æræ nempe Constantinopolitanæ,) ad Dominum emigravit. Suffectus est ei Eusthatus, Palatinæ ædis presbyterorum princeps ». Baronius putavit Cedrenum et Curopalatem, qui unum et idem scribunt, longiorem sedem *Sergio* patriarchæ attribuisse, quod Petrus Antiochenus patriarcha, in Epistola ad Michaelem Cerularium patriarcham Constantinop. anno MLIV data, et eo anno a Baronio num. 28 et seqq. recitata, scribat, « quod tempore beatorum memoriæ patriarchæ (nempe Constantinop.) domini Joannis, Romanus papa, Joannes etiam ipse nuncupatus (hujus nominis XVIII), in sacris diptychis habebatur. Et cum Constantinopolim xlv abhinc annis venissem, inveni tempore B. memoriæ patriarchæ domini Sergii (hoc anno demortui) præ-

dictum papam in sacra missa una cum aliis sanctissimis patriarchis relatum ». Si enim ab anno MLIV per annos xlv retrocedas, pervenies ad annum Christi MXX, quo Joannes XVII adhuc sedebat, quove Joannes patriarcha Constantinop. Constantinopoli Joannem papam in diptychis memorabat. Quibus ex verbis deducit Baronius, anno MXX non *Sergium* sed *Joannem* Ecclesiæ Constantinopolitanæ præfuisse, ideoque illum annos viginti sedere non potuisse. Verum ex illis Petri Antiocheni verbis tantum sequitur, *Sergium* patriarcham Constantinop. binominem fuisse, et *Joannem* etiam appellatum. *Sergium* enim annos viginti Ecclesiam Constantinopolitanam administrasse, non tantum Curopalates et Cedrenus, sed etiam Zonaras et auctor Catalogi episcoporum Byzantinorum lib. 4 Juris Græco-Romani relati, fidem faciunt.

6. *Conatus est renovare schisma.* — Porro *Sergius*, qui ejusdem cum Photio generis fuit, ut eum defenderet coacta Byzantii Synodo, Photii calumnias in Ecclesiam Romanam renovavit. Niceta Nicænus dissidium commemorat, sed causam illius se nescire ingenue fatetur: « Et sub Sergio, qui sub Bulgaroctono (ita Basilius Porphyrogenitus, ut suo loco docuimus, appellabatur) patriarchatum tenuit, dicitur rursus schisma exortum fuisse: sed quam ob causam, ipse ignoro; videtur tamen propter sedes fuisse ». Hinc eum plerique existimant Pontificum Romanorum nomen e diptychis primum omnium delevisse, quod illi de Spiritus sancti processione non bene sentirent, ut videre est apud Allatium, lib. 2 de Consensione utriusque Ecclesiæ cap. 8, qui addit, cum Sergio ejus conatus extinctos, cum reliqui non obsecundarentur. Eusthatus quippe Sergii successor, Basilius imp. et alii Græci, legatos et munera Romam misisse leguntur. Porro hic *Eusthatus* diversus est ab Eusthatio Homeri interprete, qui centum fere et quinquaginta post annos vixit, sub Manuele, Alexio et Isaacio Commenis, ut ibidem Allatius demonstrat:

BENEDICTI VIII ANNUS 9. — CHRISTI 1020.

1. *Inter Henricum imp. et S. Heribertum episcopum orta dissidia mirabiliter componuntur.*

— Redemploris annus vicesimus post millesimum surgit cum Indictione tertia, quo inter S. Heribertum Coloniensem archiepiscopum et Henricum imperatorem illa contigerunt memoratu digna, quæ descripta a Ruperto abbate Tuitiensi sic se habent ¹: « Porro majores fluctus illi excitabat in imperatoris animo ventus contrarius, quia videlicet suspicionem, quam contra sanctum virum initio regni sui (sicut jam supra dictum est) mente conceperat, invidi jam dicti semper augere laborabant detractoriis susurrantibus. Denique res eo usque processit, ut jam dictus imperator nimio contra illum furore succensus, Coloniam peteret, hoc propositum habens, ut eum pontificatu amoveret; aut certe, si hoc rationabiliter fieri non posset, quolibet modo injuriose illum et indigne traclaret. At vero Deus maris et fluctuum Dominus, qui ad beatum Job mystice loquens ²: Circumdedit, inquit, mare terminis meis, posuque vectem et ostia, et dixi: hucusque venies, et hic confringes tumentes fluctus tuos; non permisit procellam hanc hucusque procedere, ut perficeret imperator quod intenderat, sed occurrens subvenit ambobus, videlicet et ei qui patiebatur immeritus, et illi qui de innocentis conscientia male sentiens peccabat errore deceptus.

2. « Causa propter quam tali cum animo imperator Coloniam properabat, hujusmodi extiterat: imperator exercitu commoto, comitem quemdam Ottonem, sæculi dignitate præpollentem, in castro quod dicitur Hamerstein, sito supra Rheni littus, obsederat. Is namque Otto, episcopatum Moguntinum multa infestatione sæpe pervagans, ferro et igne populabatur, odio magno contra ejusdem civitatis præsulem vehementer inflammatus. Fuerat namque ab illo propter illicitum connubium judicio generalis Concilii anathematizatus. Cum ergo querimonia ejusdem præsulis excitatus imperator prædicto in castro eundem obsedisset, venerabili huic

viro demandavit, quatenus et ipse cum suis ad hoc negotium festinus adveniret. At ipse tunc immensis vexabatur febribus, et idcirco adimplere non valuit quod imperabatur; quam impossibilitatem ejus et causam ut audivit imperator, non credidit, videlicet antiqua suspicione præoccupatus, et putans illum semper exosa sui habere tempora imperii. Respondens igitur cum furore, magnoque spiritu iracundiæ: Si, inquit, ad me dedignatur venire, ipse eum quia ægrotat habeo visitare; atque cum hac iracundia mox ubi hostem expugnavit, Coloniam (ut jam dictum est) properabat, imminetibus nimiumque sese ingredientibus invidiis supra memoratis, qui satis ardentem ejus furoris ignem magis ac magis flabant, linguis malevolis detrahendo innocenti viro Dei.

3. « Sed quia tempus erat jam consolandi, terminumque ponendi fluctibus illis, et tempestati diutinae adversitatis, prospiciens de cælo Dominus, statuit procellam ejus in auram, et siluerunt fluctus ejus. Nam ipsa nocte qua Coloniam ingressus, et officiosissime a viro Dei erat susceptus, cum se sopori dedisset, videt in somnis quemdam quasi venerabilem virum, pontificali veste ornatum, qui illum sic allocutus est: Cave, inquit, o imperator, ne posthac amplius pecces in conservum meum Heribertum; scito illum Deo esse acceptum. In quem si quid admiseris, tu sine dubio portabis judicium. Nimirum gratia miserentis Dei taliter præmonendo imperatorem, ignorantia ejus pepercit, quia videlicet in eo quod virum hujusmodi suspectum habebat, non malitia, sed ignorantia peccabat: siquidem ejusdem imperatoris animam timor Domini possidebat, neque scierat disponere aut judicare quidquam in regno cupiebat, per quod cælestis offenderetur Majestas. Denique cum aliquid de regno disponere aut judicare intenderet, dispositiones omnes, sive judicia sua precibus et eleemosynis præveniebat, quatenus mens ejus et actus cælesti regimine gubernaretur, ne quando exorbitaret agendo, vel judicando, quod divinis contraret legibus. Recte igitur secundum intentionem suam divino (ut jam dictum est) oraculo præventus et servatus est, ne tantorum me-

¹ Rup. abb. in Herib. c. 26. apud Sur. tom. II. die XVI Martii —
² Job. XXXVIII.

ritorum pontificem injuriando, ut proposuerat, ipse reus iudicio divinitatis existeret.

4. « Quid multa? mane facto, cum imperator mente mutatus virum Dei advocasset, et id quod cœlitus evenerat, quod superno respectu rex compunctus fuerat, vir sanctus adhuc ignoraret, ac proinde lacrymosis oculis apud illum querelam deponeret, causam inquirens propter quam tandiu imperator infestus existeret: repente, quod non sperabatur, idem imperator exsurrexit et virum Dei amplexatus est. Ille admirans hæc pariter consolationis ab eodem dicta excepit: Ex quo ad regni fastigium Deo donante conscendi, detrahentium linguis nimium, fateor credulus, venerande pater, te exosum habui, et hanc odii trabem in oculo gestans, et ideo nihil videns, iniquum de te iudicium habui, tuamque justitiam, imo Dei gratiam in te fulgentem videre non merui. Porro te tacente, cœlum clamat super te, tuamque causam defendit apud me. Nam ipse qui de sanctis suis curam habet semper et habuit (sicut scriptum est ¹) non reliquit hominem nocere eis, et corripuit pro eis reges, dicens: Nolite tangere christos meos; et in prophetis meis nolite malignari. Ipse me pro te corripuit, ut sciam quod inter electos ejus computatus sis. Indulge ergo, precor te, quod in te malignatus sum, vel quod te servum Dei tangere deliberavi, quia peccatum meum agnosco, nec amplius addam adversari tuæ sanctitati.

5. « His dictis, semel et iterum ac tertio sanctum pontificem deosculatus est, triplicem nimirum nectens dilectionis nodum, de quo Sapiens loquitur ²: Funiculus triplex difficile rumpitur ».

Et paulo inferius: « Non contentus hac satisfactione rex religiosus, adhuc de iudicio divino erat sollicitus. Etenim is in quem peccatum aliquod commissum est, præceptum quidem vel consilium habet Evangelicum, ut peccanti in se ex corde suo dimittat, sed adhuc timendus est ille, qui legem dedit, quique per prophetam dixit ³: Qui vos tangit, tangit pupillam oculi mei. De quo etiam scriptum est ⁴: Mihi vindictam, et ego retribuam, dicit Dominus. Bene ergo sollicitus, et præterita reconciliatione non contentus, nocte sequenti finitis Matutinarum solemnibus, assumpto uno ex clericis, idem imperator cubiculum sancti pontificis adiit: sed non ibi quiescentem, verum in proximo S. Joannis oratorio vigilantem, ut solebat, et orationibus insistentem reperit. Protinus abjecta chlamyde, solo stratus, ante pedes ejus in spiritu humilitatis et in animo contrito se suscipi postulat, et ea potestate quam sacerdotibus suis Dominus contulit, veniam sibi dari cunctorum quæ in ipsum admiserat. Nec moratus omnipotentis Dei famulus, imperatorem prostratum a terra sublevat, et Christo mediante, qui dixit ⁵: Quæcumque alligaveritis super terram, erunt ligata et in cælo;

et quæcumque solveritis super terram, erunt soluta et in cælo: absolutio culpæ secundum fidem regis in cælo et in terra peracta est ». At quomodo tunc idem vir sanctus instare sibi tempus jam migrandi ad Dominum patefecerit, idem auctor his verbis enarrat:

6. « Etenim hoc idem vir Domini, revelante spiritu prænosceus, ait in illo secreto inter cætera ad eundem imperatorem: Noveris certissime, quia post discessum nostrum, quo nunc separandi sumus, nostras invicem facies jam in hoc sæculo nunquam videbimus. Eo magis magisque imperator corde compunctus, iterum in amplexus et oscula ruit, flens pariter et cuncta pæne membra, manus et oculos collum quoque fixis demulcens oculis. Hoc facto, clam ad cubiculum rediit, mœstam reportans memoriam prophetiæ beati viri, quam et postmodum, transitu ejusdem subsequente, veram fuisse comperit, et ipse, ut audierat, ore proprio enarravit ». Porro transitus S. Hieriberti contigit anno sequenti, decima sexta mensis Martii, ut idem auctor testatur: nos vero de eo suo loco agemus temporisque rationem ad calculos revocabimus.

7. *Polonorum Ecclesia locupletata et stabilita.*

— Hoc eodem anno Poloniæ Ecclesias munificentia Boleslai regis locupletatas, et redditibus stabilitas narrat Joannes Longinus canonicus Cracoviensis, qui et Dlugoschus dictus: cujus operis autographum luculenter scriptum asservatur Romæ in Vallicellana bibliotheca, dono datum a Germanico Malaspina episcopo S. Severi, nuntio Apostolico in Polonia, quod Dlugoschi nomine Chromerus citare consuevit. Sed mirum quod cum auctor tam in nuncupatoria Epistola, quam in titulo totius operis, omisso barbaro cognomento, se Joannem Longinum tantum nominet, ille præter auctoris sententiam Dlugoschum appellet. Ipse igitur, qui per annos singulos res Polonorum est prosecutus, de Ecclesia Polonorum, regia munificentia illustrata ac stabilita, sub nota anni præsentis hæc habet: « Multifariis et gratuitis donis Dei, solium suum et regni sui Boleslaus Poloniæ rex videns propitia divinitate firmatum, animum ad religionem resque divinas convertit. Non ignorabat siquidem, ex universis principibus Poloniæ præcedentibus neminem tanta quanta se tulisse trophæa, tantasque divitias, successus felices et gloriam, talem insuper industriam prudentiamque habuisse, qualia et quanta in se unum collata fuerant. Videbat præterea principatus sui fulgorem ultra cæteros reges et nationes magnificatum esse. Quare volens de amplissimis beneficiis Dei gratum se ostendere, et illis aliquanta vicissitudine respondere, Ecclesiis tam cathedralibus quam inferioribus a genitore suo duce Miecslao erectis ac fundatis, oppida, villas ac prædia, ampliori illarum stabilimento et dote munificet et largiter tribuit et donavit, pluresque parochiales Ecclesias in villis vicisque, quæ sub suo et patris sui tempore erectæ

¹ Psal. civ. — ² Eccl. iv. — ³ Zach. ii. — ⁴ Rom. xii. — ⁵ Matth. xvi.

fueraut, construxit et fundavit, vasisque aureis et argenteis in ministerium et cultum divinum necessariis Ecclesias singulas, sed praesertim cathedrales adeo ornavit locupletavitque, ut liberalitatem suam in Ecclesias Dei abunde effusam multa saecula testentur. Decimarum autem manipularium, pro Ecclesiis ac ministris Dei in universis principatibus suo imperio subjectis solutionem nullatenus passus est aut varietate aliqua diminui, aut in dubium aliquatenus revocari; sed mandavit decrevitque illam esse perpetuam et perennem, varia ultionis divinae flagella, filiis,

nepotibus successoribusque suis interminans, si per quempiam illorum praefatarum decimarum contingeret redditionem intercipi, transmutari, vel rescindi ». Hactenus Longinus. Ita plane nobilissimum regnum pietate fundatum, pietate auctum, pietate pariter conservatum ac propagatum ad posteros semper invenimus; nutasse vero, cum jacta primitus sunt fundamenta convulsa. Quomodo autem resultantes principes, nolentes indicto sacro decimarum tributo teneri, idem Boleslaus compescuit, ex eodem auctore suo loco dicitur.

Anno periodi Graeco-Romanae 6513. — Anno Aerae Hispan. 1058. — Anno Hegirae 412, inchoato die 27 Apr., Fer. 2. — Jesu Christi 1020.

— Benedicti VIII papae 9. — Henrici II reg. 19. imp. 7. Basil. et Const. imp. 45.

1. *S. Heribertus Colon. archiep. Henrico imp. reconciliatur.* — A num. 1 ad 7. Quo anno simultas inter sanctos *Henricum* imp. et *Heribertum* Coloniensem archiepiscopum exorta, sublata fuerit, recte notasse videtur Sigebertus in Chronico, in quo annum a Nativitate Domini inchoans ad annum MXXI, ait: « Henricus imp. Coloniae Natale Domini celebrans (anno nempe MXX juxta vulgarem nostrum compulsum) Heribertum archiepiscopum olim a se injuriose tractatum humili satisfactione placat, cui reconciliatus archiepiscopus praedixit se propediem moriturum, et non multo post mortuus (anno nempe MXXI,) magnis cepit clarere virtutibus ». Porro tam Lambertus monachus quam Rupertus abbas, uterque in hujus sancti praesulis Vita insinuant, eum paulo post e vita migrasse. Causa simultatis erat, quod Heribertus « primo electionis suae tempore imperii insignia ei cum dilatione concesserit, et quod in alterum diadema transferre tentaverit. Mansit inter servos Dei simulatae pacis longa discordia », ait Lambertus cap. 4, qui addit, pacem Coloniae sancitam fuisse. Paulo post: « Mirum quod sancti ab alterutro aliquoties dissentiunt, sicut in Actis Apostolorum Paulus et Barnabas, et sanctorum in Scripturis quamplures faciunt. De perversis et justis nihil mirabile, si uni non inserantur concordiae: quoniam nulla conventio Christi ad Belial, nec societas luci ad tenebras, nec pars fidei cum infidei. Verum haec sunt incomprehensibilia Dei judicia et investigabiles viae ejus, et occulta consilia ». Rupertus vero cap. 7 scribit: « Imperator exercitu commoto, comitem quemdam Otto-

neum, saeculi dignitate praepollentem, in castro quod dicitur Hermanstein, sito supra Rheni littus, obsederat. Is namque Otto episcopatum Moguntinum multa infestatione saepius pervagans, ferro et igne populabatur, odio magno contra ejusdem civitatis praesulem vehementer inflammatus: fuerat namque ab illo propter illicitum connubium judicio generalis Concilii anathematizatus. Cum ergo querimonia ejusdem praesulis (nempe Erckenboldi) excitatus imperator, praedicto in castro illum obsidisset, venerabili huic viro (nempe sancto Heriberto) demandavit, quatenus et ipse cum suis ad hoc negotium adveniret ». Tum narrat, quomodo pax imperatorem inter et Heribertum Coloniae composita fuerit, ut legere est apud Baronium.

2. *Sacrae reliquiae ad Synodos deferri solitae.* — Hoc circiter anno celebratum Concilium *Airiacense* in pago Autissiodorensi, de quo tomo IX Concil. pag. 842, haec ex Chronico Sancti-Petri-Vivi referuntur, ex quibus intelligimus morem, qui hoc saeculo invaluit, deferendi sanctorum reliquias ad Concilia: « In tempore illo factus est magnus conventus in Autissiodorensi pago, in Airiaca villa, a Leotherico archiepiscopo (sc. Senonensi) ubi de singulis locis delatasunt sanctorum martyrum, confessorum, virginum pretiosa pignora in suis scriniis. Inter quae, de caenobio B. Petri-Vivi dum deferretur vel referretur beatus martyr Sanctianus, imminuentibus noctium tenebris, super duo capita scrinii emicuerunt duo praclarissima sidera, omnes totius noctis tenebras sui splendore superantia, oculis quidem deducendum visibilia, sed tactu inpalpabilia. Ibi vero praesentes fuerunt Robertus

rex, et Gauslinus Bituricensis archiepiscopus, cum aliis episcopis et abbatibus, et populo innumeralibilibi ». Morem hunc tunc primum cepisse docet monachus anonymus Dervensis in lib. 2 *De diversis casibus Dervensis cœnobii, et miraculis sancti Bercarii* jussu Brunonis abbatis Dervensis, qui tempore Leonis IX papæ floruit, scripto, et Sæc. II Benedict. recitato. In eo num. 17 legitur : « Gloriosus rex Robertus apud villam Aireyas nomine noscitur Concilium habuisse, ubi cum innumerae plebis multitudines, diversi utriusque sexus et ætatis concurrerent, ad cumulandam quoque populi proficiscentis devotionem, plurima sanctorum corpora a fidelibus viris advehi cœperunt ». In Historia episcoporum Autissiodorensium, tom. I Biblioth. Labbei, pag. 449, de hoc Concilio dicitur, « in quo rex Robertus cum episcopis ac abbatibus adfuit, simul et innumerabilia sanctorum pignora totius pæne provinciæ ». Denique Glaber, lib. 4, cap. 5, de hoc more habet : « Tunc ergo primitus cœpere in Aquitaniæ partibus, ab episcopis et abbatibus cæterisque viris sacræ religioni devotis, ex universa plebe coadunari Conciliorum conventus. Ad quos etiam multa delata sunt corpora sanctorum, atque innumerabiles sanctarum apophoretæ reliquiarum ». Hæc de Conciliis circa annum MXXXI celebratis Glaber.

3. *Pia opera Canuti Angliæ regis.* — Canutus Angliæ regnum magna laude hoc tempore rexit. « Monasteria », inquit Malmesburiensis, lib. 2 de Reg. cap. 11, « per Angliam suis et patris (sc. Svani seu Sveonis) excursionibus partim fœdata, partim eruta reparavit : loca omnia in quibus pugnaverant, et præcipue Aschendune Ecclesiis insignivit, ministros instituit, qui per succidua sæculorum volumina Deo supplicarent pro animabus ibi occisorum. Ad consecrationem illius Basilicæ et ipse adfuit, et optimates Anglorum et Danorum donaria porrexerunt. Nunc, ut fertur, modica est Ecclesia presbytero parochiano delegata (sæculo scilicet XII, quo Malmesburiensis floruit); supra corpus beatissimi Edmundi, quem antiquiores Dani interfece- rant, Basilicam animositate regia construxit, abbatem et monachos constituit, prædia multa et magna contulit. Perstat hodieque donorum ejus amplitudo integra, quod locus ille infra se adspiciat omnia pæne Anglorum cœnobio. Corpus beati Alphegi (legendum Elphei, archiep. Cantuariensis) apud Sanctum Paulum Londoniæ tumulatum, ipse suis manibus inde levavit, et ad propria remisit, dignis assentationibus veneratus est. Ita omnia quæ ipse et antecessores sui deliquerant corrigere satagens, prioris injustitiæ nævum apud Deum fortassis, apud homines certe absternit. Wintoniæ maximæ munificentiae suæ magnificentiam osten-

dit, ubi tanta inuluit, ut moles metallorum terreat advenarum, splendor gemmarum reverberet intuentium oculos; Emmæ suggestu, quæ in talibus thesauros dilapidabat sanctitate prodiga, dum ille in exteris terris dura meditaretur prœlia.

4. *Bellum movet adversus Norwegos.* — « Nam nescia virtus ejus stare loco, nec contenta Danamarchia, quam tam avito et Anglico quam bellico jure obtinebat, martem in Suevos transtulit. Sunt illi Danis contermini, pertinacioribus studiis iram Cnutonis emeriti : sed primo exceptus insidiis, multos ex suis amisit, postremo reparatis viribus resistentes in fugam vertit. Reges gentis Ulf et Eilgaf (seu Eilgalf) ad deditiones pacis adduxit, promptissimis ea pugna Anglis, hortante Godwino comite, ut pristinae gloriæ memores, robur suum oculis novi domini assererent; illud fuisse fortunæ quod ab eo quondam victi fuissent, istud virtutis quod illos premerent qui cum vicissent. Incubuerunt igitur viribus Angli, et victoriam consummantes, comitatum duci, sibi laudem paraverunt. Rediens inde, domum totum regnum Noricorum (id est Norvegiæ) subegit, effugato rege Olabo, qui posteriori anno, ut animos provincialium suorum tentaret, cum parva manu in regnum regressus infidos sibi sensit cum suis cæsus », an. nempe MXXXVIII, ut infra videbimus. Reliqua vero hoc anno vel superioribus contigisse, insinuant Westmonasteriensis et Hovedenus. *Godwini* hoc anno comitatu donati filiam *sanctus Edoardus* cognomento Confessor uxorem accepit, et cum ea in castitate vixit. Ab hoc tempore Angliæ, Daniæ et Norvegiæ titulum Canutus sumpsit.

5. *Obitus califæ Ægypti.* — *Hakemus Biamrilla* Ægypti califa, anno Hegiræ CDXI, agente sorore, cui minatus fuerat, occisus est, cui successit *Alis Abulhasenus* ejus filius, ut refert Elmacinus lib. 2. Hist. Sarac. cap. 6.

6. *Mors Meli qui Normannos in Apuliam vocavit.* — *Melus*, qui Græcorum Apuliam Calabriamque a paucis annis incolentium insolentiam ferre non valens, Normannos adversus eos vocaverat, iis prælio victis, Henrici imperat. auxilium imploravit, quod et obtinuerat; sed dum e Germania in Apuliam revertitur, in itinere hoc anno moritur, Lupo Protospata et anonymo Barensi testibus. Audiendus Guillelmus Apuliensis lib. 4 :

Et puduit victum patria tellure morari :
Samoites adiit superatus, ibique moratur.
Post Alemannorum petiit suffragia regis
Henrici, solito placidus qui more precantem
Suscipit, auxilii promittens dona propinqui.
At Melus regredi præventus morte nequivit,
Henricus sepelit rex hunc, ut regius est mos :
Funeris exequias comitalis ad usque sepulchrum.

BENEDICTI VIII ANNUS 10. — CHRISTI 1021.

1. *S. Heriberti archiep. Colon. obitus.* — Annus Redemptoris millesimus vicesimus primus cum quarta incipit Indictione, quo sanctus Heribertus, archiepiscopus Coloniensis, ex hac vita migrat in cælum XVII kalend. Aprilis, licet aliqui anno superiori eum vita defunctum ponant : quos errare vel ex eo possumus intelligere quod sanctus vir prædixit de obitu imperatoris, fratrem sic alloquens ¹ : « Noveris enim, quia post obitum meum imperator trium non peraget annorum curriculum ». Cum vero constet eundem Henricum finem vivendi fecisse anno salutis millesimo vicesimo quarto, tertio id. Julii, profecto ad hunc eum annum oportuit pervenisse; sicque post ejus obitum, imperatorem annos duos expletos, tertio vero inchoato per quatuor menses minus diebus aliquot, superstitem tantum fuisse. Quod si anno superiori eum dixerimus esse defunctum, jam illum post tres annos expletos, quartumque per totidem inchoatum menses, contra oraculum ejus dicere opus esset defunctum. Sed et quem creatum ostendimus anno Christi DCXCVIII, cum idem auctor numeret ejus sedis annos viginti tres, menses duos, et dies viginti duos, utique ad præsentem annum eum oportuit pervenisse. Sed corrigendus qui in numerum error reperitur illapsus, dum creatus legitur Christi an. DCXCIX, ut cætera, quæ ab eodem auctore de ipso, tam in ejus creatione quam in obitu sunt dicta de tempore, veritati ab ipso assertæ omnino respondeant. Quæ autem præclaræ visiones præcesserint, ejus obitum præsignantes, et quæ post obitum sint subsecuta miracula, quoniam prolixa est de his Ruperti narratio, ad ipsum auctorem rejicimus lectorem horum cupidum : nobis satis quod ad institutum pertinet attigisse.

Habuit successorem, quem idem sanctus prædixerat, Pilgrinum, quem dicemus secutum imperatorem in Italiam venientem; cujus et breve tempus sedis idem sanctus noseitur prænuntiasse.

2. *Henricus imperator sollicitus de expiando delicto.* — Ut autem imperator adhuc expiaret delictum, quo multorum annorum spatio sanctum virum (ut audisti) inglorium præterisset, infenso animo in eum existens : revelavit Deus Epponi episcopo Bambergensi, dum ostendit illi tanti pontificis gloriam, sed ipsum quidem, ut audivit et vidit, ab Henrico imp. nudatum baltheo. Quod ut cognovit ab episcopo imperator, rursus pœnitens dolensque ardentius, studuit post obitum ipsius expiare delictum, quod in eum viventem patrasse seussisset. « Igitur imperialem ¹ », Rupertus inquit, « manum largius extendens, dona Christi Ecclesiis pauperibusque distribuit, sacrisque missarum solemniis, psalmis et orationibus, transitum beati præsulis edixit celebrari, cui baltheum ipse sustulisset, id est. viventem longe minus quam decuerat honorificasset. Vere ut sapiens hoc egit, quia nullo modo melius rapinam ejus poterat restituere, quam faciendo pro semetipso fructus dignos pœnitentiæ, etc. » Quibus intelligat lector, quam severus exactor sit Deus gloriæ sanctorum suorum, secundum quod prædixerat Heli dicens ² : « Quicumque honorificaverit me, glorificabo eum ». Porro Rupertus Tuitiensis abbas, qui inter tractatores Ecclesiasticos haud vulgare sibi nomen comparasse cognoscitur, non tam ejusdem sancti Vitæ scriptor quam illustrator dici jure poterit; quippe quod (ut ipse testatur in Præfatione ipsius) eam ab antiquiore scriptam auctore styli rubigine subobscuram, expolire et cultiorem reddere laboravit.

¹ Rup. in Herib. c. 31. in fin. Id. in Herib. c. 1.

² Rup. c. 34. — ² 1. Reg. II.

Anno periodi Græco-Romanæ 6514. — Anno Æræ Hispan. 1059. — Anno Hegiræ 412, inchoato die 7 Apr., Fer. 1. — Jesu Christi 1008.

— Benedicti VIII papæ 10. — Henrici II reg. 20. imp. 8. Basil. et Const. imp. 46.

1. *Moritur S. Heribertus archiep. Coloniensis.*

— Ad num. 1 et seq. Lambertus monachus, in Vita sancti Heriberti archiep. Coloniensis, mortem ejus cap. 5 his verbis narrat: « Migravit ad Dominum XVII kal. Aprilis: ordinationis suæ anno vicesimo tertio, ab Incarnatione vero Domini anno millesimo vicesimo primo ». Eundem annum signant Hermannus Contractus in utraque sui Chronici editione, Marianus Scotus et Sigebertus. Ordinatus fuerat die Natali Christi anni nongentesimi nonagesimi noni, non vero nonagesimi octavi, ut habet Baronius: ideoque Lambertus monachus annos Julianos, ut sæpe alii, non vero annos sedis integros enumerat; sedit enim annos XXI, menses II et dies ferme viginti duos, ut inquit Rupertus, qui priorem Vitam interpolavit, licet librariorum errore in ea dicatur, eum sedisse annos XXIII, ultra menses et dies. Errarunt itaque Lambertus Schafnaburgensis in Chronico, et chronographus Hildensheimensis, qui eam mortem cum superiori Christi anno conjungunt. Baronius hanc opinionem ex hoc refellit, quod Rupertus citatus scribat, *Heribertum* febre Novesii correptum Eliam abbatem Tuitiensis monasterii a se constructi accersisse, eique dixisse: « Regem immortalem modis quibus jam dixi, stude tibi efficere propitium: de isto autem homine communis necessitas finem factura est, ut et ipse viam universæ carnis ingrediatur. Noveris enim quia post obitum meum, trium non peraget annorum curriculum ». Vixit tamen sanctus Henricus post Heriberti obitum annis tribus et mensibus fere quatuor, ideoque Heriberti mors in annum MXX non incidit. Verum verba illa, quæ præfatam opinionem evertunt, communi non favent, ut numeranti patet. Lambertus monachus nihil simile habet, existimoque Rupertum hac in re deceptum esse. Porro *Heribertum* ex pacto cum Ottone III monasterium *Tuitiense* episcopatus sui initio ædificasse, docent Lambertus monachus et Rupertus abbas. Est *Tuitium* pagus ad Rhenum ex adverso Coloniae Agrippinæ. Vide quæ anno MI, num. 1 et seq., de episcopatus Heriberti initio dixi.

2. *Conc. Gallicanum incerto loco habitum.* —

In Chronico Ademari legitur Girardo episcopo

Lemovicensi vita functo, Willelmum Aquitaniæ ducem elegisse Jordanum, *magnæ nobilitatis et simplicitatis virum*. Tum subjungitur: « Quadragesima superveniente, dux Romam adiens, filio suo prudentissimo adolescenti, Willelmo imperavit, ut revertens ordinatum reperiret episcopum; quod ille adimplere curavit, et sabbato mediæ Quadragesimæ Angeriaco ante caput sancti Joannis (quod anno MXXIII inventum fuisse diximus) diaconus et presbyter ordinatus est, et crastina Dominica consecratus est ab Islone, episcopo Sanctonensi et coadjutore archiepiscopi Burdigalensis, et Roone atque Arnaldo necnon et Isimberto episcopis. Post vero a clarissimæ indolis Willelmo comite et Arnaldo Petragoricensi episcopo Lemovicam deductus, inthronizatus est in sede S. Martialis. Archiepiscopus vero Bituricensis Gauzlenus, ad cujus diocesium Lemovica pertinet, et quia sine sua auctoritate consecratus est episcopus, facta Synodo in Francia, coram rege Rotherto, ubi VII archiepiscopi adfuerunt, die Pentecostes cum suffraganeis episcopis, totum Lemovicinum excommunicavit, præter locum Sancti Martialis, et quæ proprie ad eum pertinebant, ipsumque prohibuit ab officio suo episcopali; tamen satisfaciens, nudis pedibus, cum centum clericis et monachis, omnibus similiter discalceatis pedibus, Bituricam sedem adiit, ubi archiepiscopus cum clero eis processit obviam, et honorifice eos deducens, quod ligaverat absolvit ». Cum vero Ademarum subjungat, *eo tempore* decem ex canonicis civitatis Aurelianensis ob hæresim Manichæorum flammis addictos esse, quod anno sequenti accidisse jam docuimus, apparet istud Concilium hoc vel sequenti anno, incerto loco celebratum esse. Deest illud in ultima editione Conciliorum, quod ideo in sequentibus addendum erit. Porro *Gauzlenum* spurium Hugonis Capeti filium fuisse, antea scripserat idem Ademarum.

3. *Croatia in Græcorum potestatem redacta.*

— « Subacta Bulgaria, imperatori se dedit etiam contermina Chrobatorum (seu Croatorum) gens, et ejus principes, fratres duo, quibus imperator honores ac opes amplas tribuit. Solus adhuc imperium detrectabat Sermo, Sirmii dominus, Nestongi frater », inquit Cedrenus in Basilio Porphyroge-

nito, qui addit, *Sermonem* Sirmii dominum dolo a Constantino Diogene interfectum, et hunc recens captæ ditioni præfectum fuisse. Hoc modo *Croatia* inter Banos divisa, Orientale imperium agnovit, quemadmodum et pars maritima, ut anonymus Barensis et Lupus Protospata ad annum mxxiv tra-

dunt. Porro quos nos gubernatores et præfectos, Croatiae et Dalinatæ *Banos* vocarunt.

4. *Terræ motus.* — « Ingens terræ motus in Boariæ (seu Bajoariæ) partibus IV id. Maii, hora x diei, fer. vi post Ascensionem Domini contigit », inquit cosmographus Hildensheimensis.

BENEDICTI VIII ANNUS 11. — CHRISTI 1022.

1. *Henricus imperator veniens in Italiam contra Græcos congregitur cum S. Romualdo.* — Sequitur annus Redemptoris millesimus vicesimus secundus, Indictione quinta, quo Henricus imperator legationibus (ut vidimus) Northmannorum, atque ab ipso Benedicto Romano Pontifice cohortatus, in Italiam se contulit adversus Græcos, sua jam potentia Ecclesiæ Romanæ pavendos, tremendus ipse hostibus potenti exercitu quem ducebat. In primis autem de his acturi, quod ad tempus pertinet, id quidem hoc anno contigisse, Leo Ostiensis, Marianus Scotus, Urspergensis, et alii testantur : sed Leonem Ostiensem rem paulo fusius prosequentem audiamus. Narratis enim præliis per Northmannos in Apulia gestis, subjicit ista :

2. « Ilis compertis ¹, Henricus, augustæ memoriæ imperator, Græcorum scilicet impetu et perfidia, principis Dacti crudelissima nece (virum enim nobilitate et militia insignem Græci captum, more parricidarum insutum culleo præcipitarunt in mare) reputans secum fore ut amissa Apulia ac principatu, Romam quoque maturarent, Italiamque totam simul amitteret, Melo duce his ad eum hac de causa profecto ac peregre mortuo, minime ultra remorandum ratus, anno Dominicæ Incarnationis millesimo vicesimo secundo, congregato immenso regni totius exercitu, in Italiam venit ». Sed antequam ulterius progrediamur, quæ in via gesta sunt per eum cum sancto Romualdo, ex Petro Damiani hic describamus ² : « Interea, inquit, imperator Henricus de Ultramontanis partibus in Italiam veniens, misit beato viro deprecatoriam legationem, ut ad eum venire dignaretur ». Sytriæ enim tunc aspera montium cum suis monachis in-

colebat, de quorum vitæ instituto hæc breviter idem Petrus :

3. « Taliter tunc in Sytria vivebatur, ac si ex similitudine non solum nominis, sed etiam operis altera denuo Nitria diceretur. Omnes siquidem nudis pedibus incedentes, omnes inculti, pallidi, et nimia rerum omnium extremitate contenti erant. Nonnulli vero obseratis januis clausi, ita mortui videbantur mundo, veluti in sepulchro jam positi. Vinum ibi nemo noverat, nec etiam si gravissimam quis ægritudinem pateretur. Sed cur ego de monachis loquor, cum et ipsi monachorum famuli, ipsi quoque custodes pecorum jejunarent, silentium tenerent, disciplinas inler se invicem facerent, et de quibuslibet verbis otiosis pœnitentiam flagitarent? O aureum Romualdi sæculum! quod etsi tormenta persecutorum non noverat, spontaneo tamen martyrio non carebat : aureum, inquam, sæculum, quod inter montium et silvarum feras tot cælestis Hierusalem cives alebat ». Ita quidem, dum civitates prædonibus et sacrilegis abundarent, solitudines erant refertæ hominibus sanctis. Quid autem vocatus ab imperatore fecerit Romualdus, Petrus sic subdit :

4. « Cumque vir venerabilis prorsus abnecet silentium frangere, cœpere unanimiter discipuli ejus omnes eum obsecrare, dicentes : Magister, vide, quia nos qui te sequimur, tanti jam sumus, quod hic congruenter habitare non possumus. Quapropter, si placet, ab imperatore magnum aliquod monasterium quære, et multitudinem te sequentium ibi constitue. Quibus vir sanctus (nescio si accepta revelatione, aut subita Dei inspiratione) fidenter scripsit : Scitote quia montis Amiati monasterium ex dono regis habebitis. Considerate tantummodo, quem illic abbatem constituere de-

¹ Leo Ost. l. II. c. 40. — ² Petr. Dam. in Romuald. c. 69.

beatis. Igitur inviolato silentio perrexit ad regem, Cui rex protinus assurgens, ex magno cordis affectu in hanc vocem erupit, dicens : O utinam anima mea esset in corpore tuo ! Quem mox ut loqueretur, suppliciter obsecrans, ipso die hoc impetrare non potuit. Postera autem die Romualdo in palatium veniente, ecce Teutonicorum multitudo certatim hinc inde concurrunt, capita salutantes humiliter flectunt, villos quoque pelliceæ vestis, quæ erat indutus, anxie decerpentes, pro sacris reliquiis in patriam portaturi studiose recondunt. Quæ videlicet res venerabilem virum tanto mœrore affecit, ut nisi discipulis ostantibus acquievisset, ad cellam protinus repedasset. Ingressus igitur ad regem, non pauca ei locutus est de restituendo jure Ecclesiarum, de violentia potentum, de oppressione pauperum : et post multa unum pro discipulis suis monasterium petiit. Cui postmodum rex Amiali monasterium tradidit, et abbatem, quia multis erat malis obnoxius, foras eiecit». Hæc Petrus de congressu imperatoris cum Romualdo. Sic precibus viri sancti ad Deum, ad victoriam aperiens sibi viam, imitatus est Theodosium, qui dimicaturus adversus tyrannos, legationem primum misit ad S. Joannem anachoretam in Ægypto morantem.

5. *Progressus expeditionis Henrici in Græcos pietate illustrati.* — Qui enim in omnibus specimen dedit Christianissimi imperatoris : sanctissimi plane ducis in militibus ad bellum parandis omnes numeros pietatis absolvit, quippe qui sacratissima¹ Eucharistia ante prælium communire solet exercitum, expiatione antea facta delictorum, adhiberetque patronos sanctos martyres Laurentium, Georgium et Hadrianum, quos prævio Angelo præcedere consuevisse aliquando vidisset exercitum. At jam reliqua ejus itineris prosequamur ; pergit enim Leo Ostiensis² : « Et ipse quidem cum maxima exercitus parte per Marchias transit ; Poppum (Popponem) vero archiepiscopum cum undecim millibus militum per Marsorum regionem direxit : Pilegrinum autem Coloniensem archiepiscopum cum viginti millibus Romam ad capiendum abbatem et principem misit ». Erat hic abbas Cassinensis monasterii, Atenulphus nomine, qui favisse Græcis visus fuit contra imperatorem, idemque (quod subdit) insimulatus quod Dacti necis causa fuisset : « Hoc abbas, amicis nuntiantibus, cognito, nusquam se tutum posse consistere a facie tantæ potestatis existimans, cum Marsorum comites et Borelli filii libentissime illum apud se habituros ac tuto promitterent, consilio habito, locum iræ dare decrevit ; cupiensque se Constantinopolim ad imperatorem conferre, Hydruntum mare ingressurus proficiscitur. Ejus autem civitatis episcopo per visum beatus Benedictus apparens : Vade, ait, dic abbati, ut hac vice mare nulla ratione pertinet, sciens, si hoc fecerit, mature perituum. Huic

ille visioni minime fidem accommodans, mare audacter ingreditur. Sed ut vera prohibentis probaretur auctoritas, occulta Dei dispositione atque judicio, cum sociis omnibus naufragans perit. Quod cum imperatori fuisset nuntiatum, dixisse fertur¹ : Lacum aperuit et effodit eum, et incidit in foveam quam fecit. Inter cætera quæ idem abbas hinc profectus secum asportavit, novem præcepta imperatorum aureo sigillo bullata, præceptumque de casa Gentiana et de piscaria Cassinensi detulit : quæ omnia cum eo in maris profundo demersa sunt.

6. Pilegrinus² interea, quoniam abbatem non reperit, verens ne forte et princeps, Capuanus scilicet, fuga simili laberetur, Capuam protinus adiit, eamque mox undique armato milite cinxit. Princeps autem Pandulphus, metuens civium proditio-nem, sponte ad Pilegrinum exiit ; seque, ut dicebat, in culpa non esse significans, purgaturum se de quibus insimulabatur, in imperatoris judicio asseveravit. Lætus Pilegrinus, accepto sub custodia principe, ad imperatorem rediit, jamque Trojam Græcorum civitatem, quam eodem anno illi construere cœperant, obsidentem invenit. Ea principis captura imperator hilarior factus, aggregatis omnibus magnatibus suis, illis præsentibus adhiberi eum in judicium jussit. Præsentibus accusatoribus plurimis, et ejus nequitias illi in faciem objicientibus, decernitur uno omnium parilique judicio, mortis illum debere subire sententiam. At Pilegrinus, cujus fidei se princeps ipse commiserat, dictam sententiam graviter ferens, supplex imperatorem adiit, multorumque adminiculo fretus, precibus ac orationibus ipsius obtinuit vitam. Ferro tamen vincendum imperator, secumque adsportandum in Germaniam statuit ».

7. Quod autem de obsidione civitatis Trojæ meminit Leo : quomodo obsidione eam premente imperator in deditionem accepit, a Glabro rem gestam accurate descriptam sic accipe³ : « Interea imperator pergens ad regionem Beneventanam, expugnavit ac subdidit universas civitates et castra, quæ Græci surripuerant ejus imperio. Ad supradictam autem cum venisset Troadem, rebellantes qui intus erant, diu multumque ei restiterunt : nam sperabant, ut sibi futura æstate, sicut Græci promiserant fore, Basilius imperator succurreret ; insuper adjicientes in tantum Henricum humiliari, ut pedes Basilii territus pavore susciperet. At ille circumdans civitatem sui exercitus obsidione, instruxit machinas, ut eam per vim caperet : illique deintus noctu egressi, tulerunt secum faces pice perlitas, igneque succensus machinas a foris cremaverunt. Quod cernens imperator, accensus ira, potiores restitui fecit machinas, crudoque circumdari corio, vigilantique custodia jussit illas tueri.

8. « Exacto igitur jam tertio obsidionis mense,

¹ Bonf. de reb. Hung. Dec. II. l. I. — ² Leo Ost. l. II. c. 40.

¹ Psal. VII. — ² Id. l. II. c. 41. — ³ Glab. l. III.

alternisque cædibus utrique nimium fessi (namque exercitum imperatoris dysenteriae clades oppido vexaverat) tandem obsessi meliori usi consilio, invenerunt viam evadendi discriminis. Quadam autem die, accipientes solitarium quemdam indutum monachali habitu (quibus etiam Italia plurimum abundat) dederunt ei crucem gestare, miserumque post illum omnes civitatis pueros minoris ætatis, sicque exclamando *Kyrie eleison*, devenit ad imperatoris tentorium. Quos audiens imperator, jussit interrogari quid sibi vellent. Cumque responsum fuisset, quod misereri a se afflictæ civitati implorarent, respondit : Optime novit ipse qui agnitor est cordium, inquit, quinam magisquam ego horum parvulorum sunt homicidæ; illacrymansque, jussit ut salvi in civitatem redirent. Fecerunt autem, ut jusserat imperator. Altero quoque die, iterum primo mane processerunt a civitate ut prius, clamantes *Kyrie eleison*, usque dum sonorus vocum illorum aures pulsaret imperatoris. Qui statim egressus tentorio, respiciensque pupillorum turbam, pietate permotus, ut erat vir sapientissimus, voce Dominica usus ait ¹ : Misereor super turbam. Nam ante jam dixerat, quoniam si ei contingeret capere civitatem, quidquid masculini sexus inveniretur in ea, suspenderetur patibulis, reliqua vero igne cremari, ipsiusque civitatis mœnia ad solum pertrahi. Præterea mandavit imperator illis qui in civitate cæteris præerant, ut si indulgeri sibi ab eo vellent, iramque ejus placare, ipsimet subverterent partem murorum civitatis, quæ contra suas machinas rebellis stare videbatur. Qui audientes, certatim impleverunt quod eis mandatum fuerat. Post hæc quoque præcepit imperator eos pacifice ad se egredi, murumque civitatis ab iisdem reædificari, acceptisque pacis obsidibus ab universis regionis illius provincialibus, reversus est in Saxoniam. Nortmanni quoque cum suo duce Rudolpho reversi in suam patriam, gratanter recepti a proprio principe Richardo». Hæc Glaber.

9. *Henricus imp. in monasterio Cassinensi suæ erga S. Benedictum devotionis fructum recipit.* — At imperatoris reditus contigit anno sequenti : reliqua enim hujus anni parte se cum suis continuit in Italia. Quo tempore fieri contigerunt quæ narrantur a Leone Ostiense, qui ait ² : « Post paucos dies, Trojanis sese sponte deditibus, et ad imperatoris vestigia unanimiter omnibus procumbentibus, imperialis clementia veniam tribuit. Et quoniam ob ætulus magnitudinem gens perpetuis assueta frigoribus in his partibus diutius immorari non poterat, reditum in dies maturabat. Veniens igitur Capuam, Pandulpho Trianensi comiti tradidit principatum : Stephano autem Melo et Petro, memorati Meli nepotibus, quoniam propria illis recuperare non potuit, comitatus honorem concessit. Quibus etiam in auxilium de Nortmannis Giselbertum, Gosmannum, Stigundum, Torstanum, Bal-

tum, Geralterium de Cavosa et Hugonem cum aliis decem et octo reliquit.

10. « Imperator autem post paucos dies, ordinatis negotiis suis, ad monasterium Cassinense una cum Benedicto Romano Pontifice venit. Interea collecti in unum fratres, cœperunt juxta tenorem regulæ de eligendo sibi abbate tractare. Vivebat adhuc, et eidem Concilio aderat Joannes abbas ille, quem reliquisse monasterii curam et recessisse in eremum supra monstravimus : aderat et domnus Theobaldus, vir et genere et moribus clarus, qui et eo tempore Marchiæ præposituram, unde et ortus erat, naviter administrabat. Erant qui Joannem ipsum denuo præfici exposcerent ; sed quia jam ætatis erat fere decrepitæ, minime idoneus judicatus est. Post plurimas multorum variasque sententias, communi tandem consensu omnium Theobaldus eligitur, ipso etiam imperatore, atque summo Pontifice eam electionem valde probantibus. Sicque die altera, natali beatorum Apostolorum Petri et Pauli, ab eodem beatissimo papa honorabiliter consecratur.

11. « Acribus tunc doloribus imperator vexabatur, atque ut ipse postmodum retulit, licet monasterio nimium afficeretur, et nusquam se terribilius venerabiliusque oratorium vidisse fateretur ; sæpe tamen scrupulo non parvo movebatur, an pater Benedictus corporaliter hoc in loco quiesceret. Cum igitur præ dolore nec plene vigilans, nec integre dormiens, quemdam pateretur excessum, apparuit ei beatus Benedictus, atque ad eum quasi visitaturus accedens, ubi pateretur quæsit. Cui languorem protinus confitenti : Scio, inquit Benedictus, te an hic quiescam hactenus dubitare : sed ut nullo hujusmodi scrupulo ultra movearis, meumque corpusculum hoc in loco quiescere certius noveris, hoc tibi signum erit : Cum primo mane surrexeris, in egestionem urinae tuæ tres simul emittes grandiusculos lapides, et ex tunc dolore isto nunquam ultra detineberis. Ego autem sum frater Benedictus. His dictis evanuit. Evigilans imperator, continuo surgit, ac juxta visionis seriem sanitati pristinae redditus, Deo ac etiam patri Benedicto gratias retulit. Mane autem facto veniens in conventum fratrum, post Capituli verba sollemnia : Quid, inquit, domini mei, medico qui me curavit dare jubetis ? Cumque illi respondissent, ut quidquid vellet de monasterio, cunctis libenter annuentibus, tolleretur, ac medico daret : Non ita, inquit, fiet, sed quoniam me pater sanctus Benedictus hac nocte curavit, oportet ut de nostra substantia tanto patri fiat retributio.

12. « Et hæc dicens, mixtis gaudio lacrymis, quæ per visum audierat omnibus retulit, adjiciens : Nunc profecto cognovi, quia venerabilis est locus iste, nullique mortalium amplius dubitandum est, quia cum sorore sua Benedictus hic pater requiescat. Ad uberiorem autem fidem tres illos lapillos, quos paulo ante per urinam egresserat, palam cunctis ostendebat. Omnibus itaque tam de

¹ Matth. xvi. — ² Leo Ostl. l. II. c. 42. 43.

visione mirabili, quam de celeri imperatoris sospitate lætantibus atque stupentibus, ac Deo referentibus gratias, obtulit ipsa die regia munificentia sancto patri Benedicto munera hæc: textum Evangelii, deforis quidem ex uno latere auro purissimo ac gemmis pretiosissimis opertum, intus vero uncialibus, ut aiunt, litteris aureisque figuris mirifice decoratum: calicem aureum cum patena sua, gemmis et margaritis, et arte cælatum, pulchre insignitum: planetam diapistim, listis aureis ornata: stolam quoque, manipulum et cingulum, singula intexta auro: pluviale etiam diasprum, cum phrygiis aureis, necnon et tunicam ejusdem operis, auro exornatam, cum mappula diapistim, auro nihilominus decorata: situlam insuper patenam argenteam haud exigui ponderis, cum qua videlicet fratres in præcipuis festivitibus biberent. Redemit etiam a Judæis vestem altaris S. Benedicti, quæ quondam fuerat Caroli regis, quam illi pro quingentis aureis sub pignore tenebant: et argenteum calicem Saxonicum majorem cum patena sua, quem Theodoricus Saxonum rex dudum sancto Benedicto transmiserat. Hæc pariter omnia, præsentibus fratribus, super altare beati Benedicti obtulit, ac domnum Apostolicum, ut hæc scripti sui auctoritate firmaret, oravit, Apostolici anathematis pœna proposita, si quis unquam vel ea quæ diximus, vel quæ ipse imperator antea monasterio concesserat, violare præsumeret.

13. « Idem quoque Apostolicus imperatoris saluti valde congratulans, obtulit et ipse eo die beato Benedicto planetam, aureis phrygiis decenter ornata, et manipulum ejusdem operis. Sed et Pilegrinus archiepiscopus, ob gratiam ejusdem saninitatis, obtulit similiter sancto Benedicto planetam purpuream aureis phrygiis, mensium duodecim signa in se habentibus ornata, stolamque cum auro, et pluviale unum. Post hæc idem Christianissimus imperator parum se existimans devotioni suæ ad hunc locum satisfacisse, admonitus ab eodem Pilegrino et Theodorico cancellario suo, die altera donationem per scriptum fecit monasterio de arce, quæ Ventra dicitur, cujus incolæ latronum instar huic monasterio sæpius infesti erant, quam illis ereptam, usibus servorum Dei perpetuo tenendam tradidit. Fecit et aliud Præceptum de omnibus ubicumque terrarum loci hujus possessionibus, juxta tenorem suorum prædecessorum imperatorum, per quod et monasterium Sanctæ Mariæ in Caneto, in finibus Thermutensis civitatis, imperiali auctoritate firmavit monasterio; sicque commendans se plurimum patri Benedicto et omnibus fratribus, cum illorum benedictione remeavit in sua. At ne tanti patris beneficium oblivisci ulla ratione videretur, mox ut domum rediit, planetam diarodinam phrygiis aureis pulcherrime ornata, una cum alba et cingulo, stola atque manipulo (regium omnino munus) huc ad beatum Benedictum cum maximis gratiarum actionibus mittere studuit, tanquam postea ad hunc sanctum locum

devotionis fuit, ut si vixisset aliquanto diutius, relicto imperii culmine, Deo se in sanctæ conversationis habitu servitutum hoc in loco promitteret.

14. « Sane quoniam de corpore Benedicti, quod vere in hoc loco requiesceret, visione ac sospitato fuerat certissimus redditus: ubicumque postmodum scripturam translationis ejusdem sancti Patris invenire potuit, flammis exussit, narrans omnibus, quæ sibi Dominus hoc in loco monstraverat quæve præstiterat; ex illius falsæ translationis serie rationabiliter ostendens, hæc frivola esse atque conficta, dum, sicut ibi refertur, unus idemque Angelus et illos ad surripiendum hortaretur, et Romanum Pontificem ad insequendum instigaret, illosque admoneret ut fugerent ». His omissis, idem Leo de Henrico narrat, quomodo ab antiquiori tempore erga sanctum Benedictum fuerit animo propensiori atque vehementer addicto, hujusmodi videlicet causa ¹:

15. « Eo adhuc tempore quo dux erat, cum iter agens ad monasterium quoddam Benedicti, patris nomine dedicatum, hospitatus esset: quoniam equorum illius multitudinem stabula consueta non caperent, in ipso capitulo, quod juxta Ecclesiam erat, ejus stabularii aliquot locare equos ausi sunt. Nocte igitur eadem, Benedictus pater eidem duci torvis ac minacibus oculis apparens, eique plurima quod domum suam ita tractaret tintentans, virga quam manu gestabat illius percussit latus, et ex tunc torqueri dolore lateris vehementissime cœpit ». Hæc de his omnibus quæ spectant ad imperatorem Leo Ostiensis, subjiciens alia plura divinitus ostensa, de his quæ spectant ad fidem certam corporis ejusdem S. Benedicti ibi degentis, revelata Adamo monacho vitæ sanctissimæ, utique juranti ea esse vera quæ referret, super altare Sancti Pauli Romæ, ejusmodi verborum formula juramento concepto: « Per corpus hoc Doctoris Gentium, quod hic absque ulla hæsitazione Christiana credit universitas requiescere, hoc quod tibi modo dicturus sum, veracissime et absque ulla mendacii suspicione prosequar; etc. » Inferius vero, de his quæ spectant ad Benedictum Pontificem ista subjicit ²: « Illic igitur abbas a præfato Benedicto papa, qui eum sacraverat, consuetudinarium privilegium sumens, biennio quo supervixit idem imperator, quiete et honore functus est, etc. » Subdit vero, eodem tempore contigisse adventum sancti Odilonis in monasterium Cassinense.

16. *S. Odilo in eodem monasterio.* — Frequentare namque consuevisse Odilonem Limina Apostolorum, Romæque benigne excipi solitum a Benedicto Romano Pontifice, affirmat Petrus Damiani eodem in Odilone. Inde vero se contulisse Cassinum, ex Leone Ostiense didicimus, qui de eodem ista habet ³: « Per id tempus dominus Odilo, vir vitæ et famæ venerabilis, Cluniacensis abbas, ad hoc monasterium valde devotus advenit, et ob

¹ Leo Ost. l. II. c. 12. — ² Ibid. c. 53. — ³ Ibid. c. 54.

maximam quam sancto patri Benedicto ac per eum monasterio gerebat reverentiam, montem totum pedestris ascendit. Qui cum de more monasterii ab abbate et fratribus honorifice in Capitulum ductus fuisset, post verba solemnia¹: Sicut audivimus (inquit vir reverendissimus) ita et vidimus in civitate Domini virtutum, in civitate Dei nostri, et in monte sancto ejus; et mox nimis humiliter ad abbatem conversus: Donum, ait, a te, frater, maximum expeto, mihi ut sine contradictione aliqua concedatur, votis omnibus flagito. Volo, inquam, atque desidero omnium fratrum vestigia devotissimus osculari. Annuit Theobaldus abbas licet invitatus, nec reniti tantæ devotioni aliquatenus potuit. Post hæc autem, die ipso festivitatis ejusdem beatissimi patris nostri, ab eodem abbate Theobaldo gratia præcipuæ religionis multis precibus exoratus, ut missarum solemnia celebraret, nullo modo induci potuit, ut se præsentem, missas publicas ageret: cumque paratis ad procedendum solemniter fratribus, pastorem baculum idem abbas noster ejus manui reverenter offerret, longe humiliter ille refugit, dicens nequaquam dignum esse, illo præsentem, se hujusmodi gestare virgam, indecens nimium et contra fædas omne ducens, quempiam abbatum manu pastorem præferre virgam, ubi Benedicti vicarium, abbatum scilicet omnium abbatum, adesse contingeret. Eo igitur reverti parante, cum multis illum fratribus abbas usque ad januas monasterii prosequens, suppliciter tandem oravit, ut si posset, particulam aliquam de beati Mauri reliquiis ad monasterium istud aliquando transmitteret. Quam postulationem vir Dei lætus accipiens, et posse se confidenter aperuit, et facturum libenter, vita comite, repromisit. Septem postmodum annorum evoluto curriculo, os integrum brachii beatissimi Mauri, capsella argentea decenter inclusum, opere pulchro, turrium instar erecta, per sex sui monasterii fratres huc delegari curavit. Hactenus de Odilone hoc anno.

17. *Poloni Christo rebelles per regem Boleslaum ad bonam frugem reducti.* — Contigit hoc pariter anno concuti Polonorum Ecclesiam conspersione nobilium, decimasolvere renuentium; sed regis maxime pii auctoritate atque studio, quamprimum turbæ illæ evanuerunt. Res gestas ita describitur a Longino Cracoviensi canonico, sub hoc anno: « Catholicæ religionis fidem cultumque, satanæ invidiæ malignitas in Polonia regno et vicinis regionibus videns in brevis temporis spatio, primo quidem sub Mieszlao duce, deinde sub Boleslao primo Polonorum rege vehementer germinasse, et funiculos tentorii sui latissima propagine diffudisse, turbinem et procellam in regno eodem excivit, et res fidei extinguere, et quietem stabilitatemque civilem nisus est perturbare. Nonnulli siquidem nobiles Poloniae, satana suggerente, ob onerosam decimarum manipularium solutio-

nem, onerosos Christianos ritus dicentes, hi præsertim, qui in spurcitiis genitalibus nutriti, jugum orthodoxorum non facile tolerabant, ad ritus redire profanos, et vetustam sacrilegamque vitam resumere, et decimas non reddere tempore instituto, nec Ecclesias frequentare, ministrosque et sacerdotes de eorum Ecclesiis pellere frequenti conspersione disponebant. Id cum ad Boleslai Poloniae regis aures perductum esset, non tulit fidelissimus fidei Catholicæ propugnator gliscentem conspersionem consurgere, sed in ipso suo ortu illam mox exstinxit. Auctores enim illius, missis militibus, comprehendit, et capita conspersionis partim capitali supplicio exstinxit, partim verberibus multavit: cæteris minus reis et sola contagione fædatis, aliorumque suasionem secutis parcendum decrevit. » Hæc Longinus, idemque Dlugoschus.

18. *Concilium Salegunstadiense.* — Eodem anno, Indictione quinta, loco apud Moguntiam Salegunstat appellato, celebratum invenitur Concilium, quod Burchardus episcopus Wormatiensis, doctrina et sanctitate clarus, qui interfuit, posuit ad suos Decretorum libros Appendicem, ejusmodi exordio: « In nomine Domini. Ego Aribio, Moguntinæ Sedis archiepiscopus quamvis indignus, cum cæteris fratribus nostris et coepiscopis, Burchardo Wormatiensi, Werhenario Argentino, Brunone Augustensi, Ebehardo Bambergensi, Meginhardo Wirzburgensi, Synodum in Salegunstat condiximus, anno Dominicæ Incarnationis MXXXII (MXXXII), Indictione quinta: anno autem domini Henrici Secundi regnantis XXI, imperii vero VS (IX), etc. » Sanciti in eo canones subjiciuntur viginti, ad Ecclesiasticam œconomiam spectantes¹. Atque primum omnium in eo sacrorum jejuniorum sunt spatia dilatata, nempe ut omnes Christiani, sub eorum cura existentes, dies quatuordecim ante festivitatem sancti Joannis Baptistæ abstinerent a carnibus: et in Nativitate Domini similiter cohibita et restricta numerosior cujuslibet sacerdotis una die missarum celebratio², ne scilicet quisquam eorum in die amplius, quam tres missas celebrare præsumat³. Itemque ut impetiti aliquo delicto non liberentur per susceptam peregrinationem ad Limina Apostolorum, sed prius in loco, ubi deliquerunt, sacerdoti satisfaciant, inde si velint, cum licentia sui episcopi, acceptis ab eo litteris Romam peregrinentur. Hæc inter alia memoratu digna ibi sancita habentur. At vero non sunt recepta quæ in eo statuta sunt de tempore præfinito jejuniorum Quatuor anni temporum: adversus enim ea latius disputat ejusdem sæculi scriptor, qui auctor est Micrologi, capite ejus operis vicesimo quinto, ubi præsens Concilium, Moguntinum nominatur, quod apud Moguntiam dicto loco fuerit celebratum. Ea tu consulas.

19. *Obitus S. Borwardi.* — Hoc quoque anno,

¹ Psal. XLVII.

¹ Conc. Sal. c. 4. — ² Eod. Conc. c. 5. — ³ Ibid. c. 48.

duodecimo kalend. Decembris ex hac vita feliciter migrat S. Beruwardus Hildesemensis episcopus, cum annos triginta sedisset: in cuius locum vir æque sanctus est subrogatus Gothardus. Res gestæ a Beruwardo, breviter scriptis digestæ leguntur a Tunginaro presbytero¹, pluraque ommissa leges in ejusdem Gothardi Vita², ubi et annus ejus obitus ita legitur consignatus his verbis: « Anno a Christo nato millesimo vicesimo secundo, regni vero Henrici vicesimo primo, imperii autem nono, felicis memoriæ Beruwardus, nostræ Hildesemensis Ecclesiæ venerabilis antistes, ex hac vita migravit ».

20. *Guido Aretinus artis musicæ peritus innotescit, ejusque liber cui nomen Micrologus.* — His postremis temporibus Benedicti Octavi papæ sedis, Guido Aretinus, professione monachus, musicus insignis innotuit, vocatus ab eodem Pontifice Romanum. Ille enim maxima omnium admiratione, novam addiscendi musicam rationem invenit, adeo ut puer paucis mensibus addiceret, quod pluribus annis vix homo quilibet pollens ingenio addiscere potuisset, magnoque miraculo accidere videretur, ut pueri senum et magistrorum magistri evaderent. Delata est res ad eundem Pontificem, qui hujusmodi rei tantæ experimentum fieri videre cupiens, ipsum Romanam ad se accersendum curavit. Quæ autem cum eodem Pontifice transacta fuerint, idem ipse Guido in Epistola data ad Michaellem monachum Sanctæ-Mariæ Pomposinani cœnobii (ut præ se fert ejus titulus) narrat. Accepimus eam diligentia Constantini Cajetani, monachi congregationis Cassinensis; ex scripto Codice Gregorii Tigrini canonici Aretini, quæ sic se habet:

21. « Charissimo atque dulcissimo fratri Michaeli, Guido, per anfractus multos dejectus et auctus. Aut dura sunt tempora, aut divinæ dispositionis obscura discrimina, dum et veritatem fallacia, et charitatem persæpe conculcet invidia, quæ nostri ordinis vix deserit sanctitatem, quo Philistinorum commodio Israeliticam puniat pravitatem: ne si mox fiat quidquid ut volumus, adeo in se confidens periturus decidat animus. Tunc enim est vere bonum quod facimus, cum nostro pastori adscribimus omne quod possumus. Inde est quod me vides prolixis finibus exulatum, ac te ipsum, ne vel respirare quidem possis, invidorum laqueis suffocatum. Quare simillimos nos quidem dico artificii, qui cum Augusto Cæsari incomparabilem et cunctis inauditum sæculis thesaurum, flexibile videlicet vitrum offerret: quia aliquid supra homines potuit, ideoque aliquid super dominos promereri se credidit, pessima sorte jussus est occidi, ne si ut est mirabile vitrum, posset esse durable, regius omnis thesaurus, qui de diversis erat metallis, fieret extemplo vilis; sicque illo tempore maledicta semper invidia, sicut quondam paradisum, et hoc quoque mortalibus abstulit commodum, namque

invidia artificis nullum voluit edocere. Unde ego, inspirante Deo charitatem, non solum tibi, sed aliis quibuscumque potui, summa cum festinatione ac sollicitudine, a Deo mihi indignissimo datam contuli gratiam, ut quia ego et ante me alii summa cum difficultate Ecclesiasticos cantus didicimus, idipsum posteri summa cum facilitate discentes, mihi et tibi et reliquis adjutoribus meis æternam optent salutem; fiatque per misericordiam Dei peccatorum nostrorum remissio, vel modica tantorum ex charitate oratio. Nam si illi pro suis apud Dominum devotissime intercedant magistris, qui hactenus ab eis vix decennio cantandi imperfectam scientiam consequi potuerunt: quid putas pro nobis nostrisque adjutoribus fiet, qui annali spatio, aut si multum, biennio, cantorem effecimus? Aut si hominum consueta miseria beneficiis tantis ingrata extiterit: numquid justus Deus nostrum laborem non remunerabit? An quia Deus totum hoc facit, et nos sine illo nihil possumus: nihil habebimus? absit. Nam et Apostolus, cum gratia Dei sit id quod sit, cantat tamen¹: Bonum certamen certavi, cursum consummavi, fidem servavi: de reliquo reposita est mihi corona justitiæ. Securi igitur de spe retributionis, insistamus operi tantæ utilitatis. Et quia post multas tempestates rediit optata serenitas, navigandum feliciter est. Sed quia diffidit tua de libertate captivitas, rei ordinem pandam.

22. « Summæ Sedis Apostolicæ (antistes)... Benedictus Octavus, qui Romanam gubernat Ecclesiam, audiens famam nostræ scholæ, et quomodo per nostra Antiphonaria inauditos pueri cognoscent cantus: valde miratus, tribus me ad se nuntiis invitavit. Adii igitur Romanum cum D. G. R. M. L. Reverendissimo abbate et D. P. Aretinæ Ecclesiæ canonicorum præposito, viro pro nostri temporis qualitate sanctissimo. Multum itaque Pontifex meo gratulatus adventu, multa colloquens et diversa perquirens, nostrumque velut quoddam prodigium sæpe revolvens Antiphonarium, præfixasque ruminans regulas, non prius destitit, aut de loco in quo sedebat abcessit, donec unum versiculum inauditum sibi voti compos ediceret; et quod vix credebatur in aliis, tam subito in se cognosceret. Quid plura? infirmitate cogente, Romæ morari non poteram vel modicum, æstivo fervore in locis maritimis ac palustribus nobis minante excidium. Tandem condiximus, mox hieme redeunte, me illuc debere reverti, quatenus hoc opus prælibato Pontifici suoque clero debeat propalari. Post paucos dehinc dies, patrem vestrum ac meum D. G. PP. præpositum abbatem, virum Deo et hominibus merito virtutis et sapientiæ charum, ut patrem animæ videre cupiens, visitavi. Qui et ipse vir perspicacis ingenii, ut nostrum Antiphonarium vidit, extemplo probavit et credidit, nostrisque æmulis se quondam consensisse pœnituit: et ut PP. ve-

¹ Apud Sur. die xx Nov. tom. vi. — ² Ibid. die iv Maii, tom. iii. c. 23.

¹ 2. Tim. iv. — ² Ita in Codice.

niam postulavit, suadens mihi monacho esse monasteria episcopatibus præferenda, maximeque PP. Quod modo per dignissimi et reverendiss. G. industriam in Italia primum..... Tanti itaque patris orationibus flexus et præceptis obediens, prius, auxiliante Deo, volo hoc opere tale et tantum monasterium illustrare, meque monachum monachis præstare, cum præsertim manachresim¹ nonino prope cunctis episcopis. Interim tibi de inveniendis ignotum cantum, optimum dirigo argumentum, nuper nobis a Deo datum et utilissimum comprobatum. De reliquo, domnum Martinum priorem saluto, ejusque orationi me miserrimum plurima prece commendo. Fratrem quoque Petrum memorem memoris esse commoneo, qui nostro lacte nutritus, non sine labore maximo agresti vescitur hordeo, et post aurea pocula vini confusum bibit acetum». Hucusque ejus Epistola.

23. Quem vero edidit de musica librum, quem Micrologum nominavit, illum ipsum dedicavit Theodaldo episcopo Aretino, hanc ad eum scribens Epistolam nuncupatoriam :

« Diuturnitate moris, totiusque prudentiæ fulgore clarissimo, dulcissimo patri et reverendissimo domino Theodaldo, sacerdotum ac præsulum dignissimo, Guido suorum monachorum utinam minimus, quidquid servus et filius S.

« Dum solitariæ vitæ saltem modicam exequi cupio quantitatem : vestræ benignitatis dignatio ad sacri verbi studium meam sibi sociari voluit parvitatem ; non quod vestræ desint excellentiæ multi et maxime spectabiles viri, et virtutum effectibus abundantissime roborati, et sapientiæ studiis plenissime adornati, qui et commissam plebem una vobiscum competenter erudiant, et divinæ contemplationi assidue et ferventer inhæreant ; sed ut meæ parvitatibus et mentis et corporis imbecillitas misera vestræ pietatis et paternitatis fulciatur munita præsidio : ut si quid mihi divinitus utilitatis accesserit, vestro Deus imputet merito. Qua de re cum pro Ecclesiasticis utilitatibus exercitium musicæ artis, pro quo, favente Deo, non incassum sudasse me memini, vestra jussit auctoritas proferri in publicum ; ut sicut Ecclesiam beati episcopi Donati et martyris, cui, Deo adjutore, jure vicario præsidetis, mirabili nimium schemate peregistis : ita eidem ministros Ecclesiæ honestissimos decenfissimosque, quodam privilegio cunctis fere per orbem clericis spectabiles redderetis. Et revera satis habet miraculi et optionis, cum vestræ Ecclesiæ etiam pueri in modulandi studio perfectos aliorum

usquequaque locorum superent senes. Igitur nostri quoque meriti per hæc plurimum cumulabitur celsitudo, cum post.... patrem tantæ ac talis Ecclesiæ per vos studiorum provenerit claritudo. Itaque quia vestro tam commodo præcepto, nec volui..... nec valui : offero solertissimæ paternitati tuæ musicæ artis regulas, quanto lucidius et brevius potui explicatas, philosophorum neque eadem via ad plenum, neque eorundem insistendo vestigiis, id solum procurans, quod Ecclesiæ opportunitati, nostrisque subveniat parvulis. Ideo enim hoc studium hactenus latuit occultatum, cum revera arduum videretur, ut est a quolibet humiliter explanatum. Quod qua occasione olim aggressum, quave utilitate et intentione, per paucis absolvam.

24. « Cum me et naturalis conditio et locorum mutatio communis utilitatis diligentem faceret, cœpi jure cogitare aliam musicam pueris tradere. Tandem affuit divina gratia ; et quidam eorum imitatione choreæ et nostrarum notarum usu exercitati, ante unius mensis spatium, versus et inauditos cantus ita primo intuitu indubitanter cantabant, ut maximum plurimis spectaculum præberetur : quod tamen qui non potest facere, nescio qua fronte se musicum vel cantorem audeat dicere. Maxime itaque dolui de nostris cantoribus, qui etsi centum annis in canendi studio perseverent, nunquam tamen vel minimam artem per se valent afferre, semper discentes (ut ait Apostolus¹) et nunquam ad scientiam veritatis pervenientes. Cupiens itaque tantum nostrum studium in communem utilitatem expendere, de multis musicis argumentis, quæ, adjutore Deo, per varia tempora quæsi, quædam, quæ cantoribus proficere credidi, quanta potui brevitate perstrinxi. Quæ enim ad canendum minus prosunt, aut si quæ ex iis quæ dicuntur valent intelligi, nec memoratu digna judicavi, non curans de his, si quorundam livescat invidia, dum quorundam proficiat disciplina ». Hæc ad Theodaldum episcopum.

25. Cui subicitur ipse Micrologus eo titulo scriptus liber, in cujus fine sic perorat idem auctor : « Explicit Micrologus Guidonis, suæ ætatis anno trigesimo quarto, Joanne Vigesimo Romanam gubernante Ecclesiam ». Sub quo ejusdem Guidonis librorum editio facta est. Successit hic Benedicto, qui eundem Guidonem accersivit. Ex cujus numeratione pariter intelligimus, Joannem Benedicti successorem, Vigesium ordine nuncupatum ejus nominis Romanum Pontificem.

¹ Locus corruptus.

¹ 2. Tim. III.

Anno periodi Græco-Romanæ 6515. — Anno Æræ Hispan. 1060. — Anno Hegiræ 413, inchoato die 6 Apr., Fer. 2. — Jesu Christi 1022.

— Benedicti VIII papæ 11. — Henrici II reg. 21, imp. 9. Basil. et Const. imp. 47.

1. *Expediit Italica Henrici imp.* — A num. 1 ad 9. Narrat Baronius ex Leone Ostiensi lib. 2, cap. 40 et seqq. Henricum imp. anno MXXII in Apuliam venisse, ad tutandos imperii fines adversus Grecos, et cepisse « Troiam, Græcorum civitatem, quam eodem anno illi construere cœperant ». Quia vero propria bona *Meli* jam demortui recuperare non potuit, ejus nepotibus comitatus honorem concessit, et aliquot Normannos ad defensionem regionis reliquit. His adde ex Hepidanno in Brevibus Annal. : « Henricus imp. in gravi manu Apuliam ingressus, a Beneventanis gratulantibus honorifice ac magnifice suscipitur. Troiam, Capuam, Salernam, Neapolim, urbes imperii sui ad Græcos deficientes ad deditionem coegit : quarum Troia viribus fortissimis omnique bellico apparatu munitissima, longior mora nodusque victoriæ extitit. Tamen licet afflicta affligerit, et in sui defensionem multos sauciaverit, plurimos interfecerit, tertio mense postquam obsessa est, et imperatori manus dedit, suique incolumitatem et gratiam victoris dato fidei sacramento promeruit, rebusque compositis revertitur, Capuanum principem in custodia secum abducens. Sed circa egressum Italiæ, pestilentia exercitum ejus affecit, et ex maxima parte absumpsit, ut Romani imperii corpus tot membrorum suorum destitutionem sine miseria et dolore memorare non possit. Eodem anno æstas horrenda, tonitruis et coruscationibus plus solito mortales exterrentibus, et impetu turbinis ab occidente intonans ædificia concussit, et arbores radicitus excussit ». Hepidannus quidem hæc cum anno MXXIII copulat, sed in ejus opere aliquando numeri corrupti, et aliquando ipse parum in notatione annorum accuratus. Denique Lupus Protospata ad annum MXXII habet : « Venit Henricus imp. Beneventum mense Martii, et obsedit Troiam in Capitanata ».

2. *Normanni spe destituti Rannulfum ducem eligunt.* — Hujus Henrici imp. expeditionis Guillelmus Apuliensis mentionem nullam facit ; sed narrata *Meli* primi Normannorum ducis morte, quæ anno superiori contigit, ait Normannos, cum nullum auxilium sperarent, Rannulfum sibi præfecisse :

Egregium quemdam mox elegere suorum
Nomine Rannulfum, qui princeps agminis esset,
Cujus mandatis fas contradicere non sit.

Subdit Guillelmus eos sese Capuano principi conjunxisse, et nunc hoc vel illo principe contempto, plus tribuenti semper adhæsisse ac post annos aliquot eos urbem *Aversam* condidisse, quæ Neapolim inter et Capuam posita est. Ait denique decurso multo tempore, *Hardoinum* Longobardorum ducem Aversam venisse, et pluribus secum adductis, Apuliæ omni timorem incussisse. Qui *Hardoini* adventus in annum MXLI compellit, ut eo anno videbimus.

3. *Priores Normannorum expeditiones fabulis intermixtæ.* — Ex dictis hactenus de Normannis, annis scilicet MXVI, MXVII et currenti, liquet, Leonem Ostiensem lib. 2, cap. 38, Gemmeticensem lib. 7, cap. 30, Ordericum lib. 3, pag. 472, et Ademarus in Chron. ad annum MXVIII, pag. 178, de tempore quo Normanni primum in Italiam venere, et de rebus ab illis tunc gestis male edoctos fuisse. Aiunt v. g. plerique ex illis, *Normannos* quosdam e civitate Hierosolymitana revertentes adversus Saracenos pugnasse, eamque ob rem *Salernitanos* rogasse Normannos, ut cum ad patriam pervenisent, aliquos ex suis ad se mitterent. Verum Normanni illi non ex urbe Hierosolymitana, sed e monte Gargano, ubi orationis causa perrexerant, venere, nihilque adversus Saracenos tunc *Salernum* obsidentes egere. Secundo, Gemmeticensis et Ordericus laudati aiunt, *Normannos* primum in Apuliam venisse, quando *Robertus* Normanniæ dux erat ; cum tamen Robertus an. tantum MXXVII Richardo III in comitatum Normanniæ successerit. Tertio, Ademarus loco citato scribit, Normannos in Italiam venientes *Rodulpho* duce Romani profectos, et inde *convivente papa Benedicto* Apuliam aggressos esse, nulla *Meli* mentione facta ; cum tamen *Melus* Normannis, postquam Roma transiere, arma subministravit, et ut ait Guillelmus Apuliensis lib. 1, pag. 2 :

Emptis Normannos Campanis partibus armis,
Invadenda forens loca duxit ad Appula Melus.
Hunc habuere ducem sibi gens Normannica primum
Partibus Italiæ, Gallos tremit Appulus omnis.

Nonnisi itaque post Meli obitum *Ramulfus* Normannorum dux fuit. Denique Glaber lib. 3, cap. 4, relatis prœliis a Normannis cum Græcis habitis, et expeditione Henrici imp. adversus Græcos hoc anno suscepta, Troadis expugnatione, et Beneventanæ regionis deditione, tradit Normannos in suam patriam reversos esse, quo tamen nihil falsius. Mitto alias historicorum, qui incertis rumoribus decepti fuere, commentitias narrationes.

4. *Visitat monasterium Casinense Henricus imp.* — A num. 9 ad 15. Corpus sancti *Benedicti* existere in monasterio Floriacensi, hujus sæculi initio inter omnes convenisse insinuat sanctus Abbo Floriacensis, in Epistola ad Leonem abbatem SS. Alexii et Bonifacii data, et a Baluzio tom. I Miscell. e Codice Ms. eruta. Ait enim sanctus Abbo : « Pretiosarum reliquiarum S. patris Benedicti insignia postulastis vobis dirigi (Romam scilicet, ubi situm erat monasterium SS. Alexii et Bonifacii) eo quod indubitatum penitus esset, sanctissimam ipsius corporis præsentiam a nobis retinere, ideoque velle enixius in honore illius oratorium construere, itemque nobis de sancto Bonifacio aut de sacris artibus cæterorum sanctorum nobis eadem recompensari ». Corpus autem hujus sanctissimi patriarchæ alias e monasterio Casinensi ad Floriacense in Galliam translatum fuisse, Benedictini Galliæ solide probarunt, et conficta esse quæ Baronius ex Leone Ostiensi narrat, de sanitate reddita sancto Henrico in monte Casino, postquam sanctus Benedictus ei apparuit, summæque corpus in Monte-Casino requiescere docuit. Leoni itaque Ostiensi episcopo et monacho Casinensi hac in re fides non adhibenda.

5. *Synodus Salegunstadiensis.* — Ad num. 18. Aribio Moguntinus archiepiscopus cum quinque coepiscopis Synodum Salegunstadii ad Mœnum celebravit « anno Dominicæ Incarnat. xxxii, Indict. v, II idus Augusti, anno aulem domini Henrici Secundi regnantis xxi, imperii vero vi », ut legitur in Præfatione ejusdem Synodi, tom. ix Concil. pag. 844, sed loco *imperii vero vi*, legendum *imperii vero ix*. Hæ notæ temporariæ, in exemplari quo usus est Baronius etiam corruptæ. Inter varia Decreta in ea condita, quintum est, « ut unusquisque presbyter in die non amplius quam tres missas celebrare præsumat ». Quare in diœcesi Moguntina, presbyteris qui plures parochias regebant, plurium missarum celebratio alias permissa fuit. In Capitulo xvii legitur : « Et illud sub anathemate præceptum est, ut nullus presbyterorum cuiquam pœnitenti carrinam dividere præsumat, si infirmitas non intervenerit ». Erat carrina vel carena dierum quadraginta continuorum jejunium in pane et aqua, ut exponit Burchardus, qui huic Concilio interfuit, lib. 49, cap. 5. De hac voce plura Ducangius in suo Glossario.

6. *Moritur S. Bernwardus episc. Hildensheimensis.* — Ad num. 19. Wolfherrus discipulus sancti Godehardi, episcopi Hildensheimensis, in ejus Vita in Actis SS. Bollandianis ad diem iv Maii reci-

tata cap. 3 scribit : « Anno post Incarnati Verbi mysterium xxxii, regni vero domini Henrici xxi, imperii autem ix, felicis memoriæ Bernwardus, venerabilis nostræ Ecclesiæ (nempe Hildesheimensis) antistes, ex hac vita ad perpetuam migravit : ejus certe obitus totam regionem maxime contristavit. Erat enim, ut festinando omnem vitæ ejus historiam transeurram, in cuncto divinæ servitutis studio juste servidus, et in tota mundanæ utilitatis sagacitate sapienter providus; contra rebelles et induratos jure severus, erga obediētes et modestos rite mansuetus; in elemosynis et miseratione compatiens et largus; vigiliis, jejuniis, et orationibus convenienter intentus, etc. » Scripsit ejus Vita Tangmarus Saxo, decanus Hildensheimensis, ejus discipulus, a Browero editam, et ad exemplaria Mss. emendatam. In ea asserit, eum die xx mensis Novembris, seu XII kalend. Decemb. cælesti pace quievisse, et sedisse annos xxx. Cum venisset ad aulam Ottonis III, qui septennis adhuc puer erat, ut ei inserviret, a *Theophania* Augusta, quæ rebus præerat, benigne susceptus est, atque in brevi summæ familiaritatis locum apud illam obtinuit, adeo ut puerum imperatorem fidei illius litteris imbuendum moribusque instituendum, consensu cunctorum procerum, commendavit, imperatrice demortua. *Otto* totum se regendum in stationem fidissimi magistri contulit, mortuoque episcopo Hildensheimensi « anno noningentesimo nonagesimo tertio, Indictione sexta », a Willegiso archiepiscopo Moguntino episcopus Hildensheimensis ordinatus fuit.

7. *S. Godehardus abbas Altahensis ei succedit.* — Henricus imp., audita morte sancti Bernwardi, sanctum Godehardum abbatem monasterii Altahensis in Bajoaria positi, non longe a Danubio, « secreto soliloquio convenit, eique suæ voluntatis arcanum de episcopatu ejusdem sedis aperuit. Cui statim ille in faciem restitit », inquit Wolfherrus mox laudatus in ejus Vita. Tandem cum sese divinæ prædestinationi et imperatoris consilio devovisset, in proxima Dominica Adventus Domini ab *Aribone* metropolitano Moguntiacensi episcopus consecratus fuit. Ante episcopatum non solum cœnobio Altahensi præfuit, sed etiam commendata sunt ei tria alia monasteria: Ersfeldense, Tegerense, et Chremsense, in quibus monachicam vitam, quæ non parum collapsa fuerat, restituit. Sed non cum minori pietatis et prudentiæ laude episcopi munere perfunctus est. Porro duplex monasterium *Altahense* in Bajoaria erat, superius scilicet et inferius; Godehardus vero inferiori præfuit.

8. *Floret Gaudi Aretinus auctor Micrologi de methodo cantandi.* — Ad num. 20 et seqq. *Micrologi* voce scriptores mediæ et infimæ ætatis intellexerunt librum in epitomes speciem editum, indeque in Vita sancti Theofredi abbatis, cap. 40 dicitur : « Denique quodam tempore familiari semotus obsequio, Micrologum eudens de lapsu mundi senario, determinat eum sermone rythmico ». Bene-

dicto VIII Ecclesiam Romanam regente, *Guido Aretinus*, monachus Benedictinus, in Italia excogitavit novam cantandi methodum, quam *Salmificationem* vocant seu *Gammam*, cum notis, UT, RE, MI, FA, SOL, LA, cujus arte pueri et puellæ in manu sua cantandi peritiam facilius discere cœpere, quam voce magistri aut ullius instrumenti, inquit Trithemius. Guido autem opus suum musicum *Micrologum* inscripsit. Hinc Domnyso presbyter in Carmine de Gestis comitissæ Mathildis, agens de Theodaldo Aretino episcopo, canit:

Micrologum librum sibi dictat Guido peritus
Musicus et monachus, necnon eremita beandus.

Guido enim libellum suum de musica, quem *Micrologum* nominavit, Theodaldo episcopo suo dicavit, cujus ad eum Epistolam dedicatorem recitat Baronius, refertque verba quæ in fine Micrologi habentur: « Explicit Micrologus Guidonis, suæ ætatis anno xxxiv, Joanne XX Romanam gubernante Ecclesiam ». Quæ verba Baronium in ea in qua versabatur sententia, Joannem nempe qui Benedicto VIII successit, appellatum fuisse hujus nominis XX confirmarunt. Verum cum ex ipsismet ejusdem Joannis rescriptis, constet eum sese Joannem XIX appellasse, apparet, clausulam illam uno aut altero sæculo post *Micrologi* editionem eidem Epistolæ fuisse subjunctam. Neque enim tempore ejusdem Joannis aut proxime sequentibus annis ignorari potuit, eum *Joannem XX* dictum non fuisse.

9. *Auctor Micrologi de divinis officiis sub hujus sæculi finem vixit.* — Extat alius Micrologus, sive liber *de Ecclesiasticis observationibus*, seu *de divinis officiis* inscriptus, capitibus LXII constans,

cujus cum auctor ignoretur, libri sui nomine *Micrologus* appellatur. Auctorem vero illum anonymum Gregorii VII tempore floruisse, ex cap. 14 certum et indubitatum redditur. Quare Baronius, Bona Cardinalis, lib. 2 Rerum Liturg. cap. 20, art. 4, aliique accurate scripsere, anonymum illum sub sæculi undecimi finem vixisse. Erravit vero Possinus in Biblioth. qui Guidonem Aretinum hujus secundi Micrologi auctorem facit. Magis hallucinatus est Oudinus in Supplem. Script. Ecclesiast. in voce *Micrologus*, ubi ait auctorem secundi Micrologi, non sub hujus sæculi finem, sed anno circiter MCLXXX vixisse; quod auctor anonymus Vitæ Caroli Magni, quæ extat Ms. in variis Bibliothecis, in suo Prologo dicat: « Egregia ipsius B. Caroli gesta et triumphalem bellorum ejus Historiam aliis relinquimus, qui in Catalogo virorum fortium, et in Chronicis ejusdem multifariam reperitur, et nos officiosa sedulitate alias Micrologum conscripsimus », ut videre est apud Bollandum ad diem xxviii Januarii, quo S. Carolus Magnus colitur, ubi Prologum illum et Titulum capitulorum ejusdem operis adhuc inediti exhibet, et ex eodem Prologo ostendit, eam Vitam ab auctore anonymo *tempore Frederici Ænobardi* imperatoris post annum MCLXV compositam fuisse. Ex quibus infert Oudinus auctorem Micrologi, qui *de Officiis divinis* scripsit, post illum Christi annum floruisse. Verum, ut jam diximus, vox hæc *Micrologus* quemcumque librum in Epitomes speciem editum denotat, ideoque Micrologus post annum MCLXV de rebus gestis Caroli M. scriptus, nihil commune habet cum Micrologo *de divinis Officiis*, et cum Micrologo a Guidone Aretino publicato. Porro Micrologus *de divinis Officiis* extat in Biblioth. Patrum edil. Lugdunensis.

BENEDICTI VIII ANNUS 12. — CHRISTI 1023.

1. *Reliquiæ sanctorum donatæ monasterio Cassinensi.* — Redemptoris annus millesimus vicesimus tertius sequitur, Indictione vi, quo Benedictus papa ex Basilica Lateranensi plurimas sanctorum reliquias sumptas misit ad monasterium

Cassinense. De quibus ista Leo Ostiensis ¹: « Duc etiam argentea scrinia plurimis sanctorum referta reliquiis, intra ipsum altare honorifice sunt in

¹ Leo Ost. l. III. c. 23.

marmore superiori suspensa, quæ reverendissimus papa Benedictus ob amorem et reverentiam sanctissimi patris nostri Benedicti, de sacrario Lateranensis palatii sumpta, ad Cassinensem direxit Ecclesiam, primo abbatis nostri Theobaldi anno, Dominicæ vero Incarnationis millesimo vicesimo tertio; interdicens omnino, ne quis hinc aliquid ex iis auferre præsumat. Sunt autem istæ reliquæ: de ligno Domini, de sanguine Domini, de vestimentis Domini, de lapide sancti Sepulchri, de velo sanctæ Dei Genitricis Mariæ, Apostolorum Petri, Pauli, Andreæ, Joannis, Jacobi, Thomæ, Bartholomæi, Matthæi, Simonis, Judæ, et Matthiæ: spongia cum sanguine S. protomartyris Stephani, Laurentii, Stephani papæ, Pelagii papæ, Martini episcopi, Prudentii, Juliani, Augustini, Christophori, Æmiliani, Nicandri et Marciani, Alexii, Anastasiæ, Eugenæ, Joannis et Pauli, Quadraginta martyrum et aliorum multorum ». Hæc Leo.

2. *Congressus Henrici imperatoris cum Roberto rege.* — Hoc pariter anno, rediens in Germaniam ex Italia Henricus imperator, cum Roberto reg. Christianissimo habuit congressum, de quo ista Sigebertus hoc anno: « Henricus imperator et Robertus rex Francorum super Carum fluvium apud Evasium conveniunt, de statu Ecclesiæ regni et imperii tractaturi: et conducto, ut super his confirmandis etiam papam Romanum simul ambo Papiæ opportune convenirent, imperator regem et suos multos etiam, qui tantum ad demirandam imperatoriam majestatem convenerant, tanta liberalitate donavit, ut opibus regum Persarum, aut Arabum posset comparari imperatoris munificentia ». Hæc Sigebertus. Sed de hujusmodi congressu andiamus quid Glaber hujus temporis scriptor habeat, ex quo discent principes, multoque magis alii inferioris status homines, quam vane, quam superbe disceptent inter se usque ad internecionem de præsentia, dum alter alterum supergredi omni conatu labore. Habet enim ista ¹:

3. « Fuit etiam ei (Roberto regi) pax cum regibus in gyro regni sui positis, maxime cum supradicto imperatore Henrico. Nam cum aliquando ad invicem colloquendum super Mosam fluvium, qui limes est utriusque regni, convenissent, pluresque ex ambabus partibus insinuarent, indecens esse, ut quis illorum, tantorum scilicet regum, semet humilians, quasi in alterius transiret auxilium: hoc etiam fore potissimum, ut in fluminis medium navibus portarentur simul locuturi. Sed viri eruditissimi illud uterque in mente habens ²: Quanto magnus es, humilia te in omnibus. Primo namque mane surgens imperator transit cum paucis ad regem Francorum, nimioque (mutuoque) amplexu semet deosculantes, sacramentisque misarum decenter ab episcopis in conspectu illorum celebratis, prandere utrisque simul congruit. Expleto quoque prandio, obtulit Robertus rex im-

mensa munera auri atque argenti et pretiosarum gemmarum Henrico, centum insuper equos honestissime phaleratos, super unumquemque lorica, et galea (posita scilicet): mandans insuper tantum illorum amicitiam imminuere, quantum contingeret ex omnibus illi relinquere. At Henricus cernens amici liberalitatem, suscepit ex illis tantum librum Evangelii auro et lapidibus pretiosis insertum, ac phylacterium simile factum, continens dentem S. Vincentii levitæ et martyris. Uxor vero illius pares auri tantum naves (inaures) accepit; cætera autem egrediens in gratia dimisit.

4. « Sequenti igitur die, iterum rex Robertus cum episcopis ad imperatoris tentoria transiens: qui eum satis sublime suscipiens expletoque simul prandio centum libras ex auro puro ei obtulit. Rex quoque pares tantum naves (inaures) auri ex illo sumpsit, firmatoque uterque pacto amicitiae, redire ad propria ». Hucusque de his Glaber, « dicendus potius stylo scaber »; atque de his quæ palam. Quæ autem transacta sint inter principes secretis colloquiis, altum silentium. Illud autem omnes docuit conjectura, inter sanctissimos principes non nisi justa sancta piaque transigi potuisse: indigebat alter alterius consolatione. Et enim cum ambo principes essent maxime pii, infideles ambo ac perduelles experti sunt alios sub se positos principes, ut patet ex his, quæ Diltmarus de rebus Henrici, et quæ Glaber de rebus Roberti scripta reliquit, qui de eodem hæc inter alia post enarratos eos quos passus est in regno rebelles ¹: « Illic itaque rex, ut sapientissimus Dei cultor, semper fuit humilium amator, superborumque, ut valuit, osor. Si qua enim pontificalis sedes in suo regno proprio viduaretur præsule, cura erat maxima, ut utilis pastor, licet genere infimus, restitueretur Ecclesiæ, potius quam nobilitatis eligeretur persona sæcularis pompæ. Qua de causa etiam primates regni sensit plurimum contumaces, qui despectis humilibus, sui similes eligebant superbos ». Hactenus Glaber.

5. *Concilium Moguntinum quod illustrat S. Gothardus.* — Hoc pariter anno celebratum est generale Concilium Moguntinum ex Germaniæ episcopis, cui interfuit etiam Henricus imperator. Sed inverso ordine aliqui id ponunt celebratum anno superiori. At ex certa Indictione posita in Actis ejus, nempe sexta, error arguitur. Hujus autem Synodi exciderunt Acta, tantumque ejus mentionem reperimus in rebus gestis S. Gothardi episcopi Hildesemensis, occasione miraculi tunc ab eo editi hoc anno, qui primus (ut vidimus) censetur ejus episcopatus. Res gesta in hunc modum ab auctore ejus temporis enarratur ²: « Primum ejus miraculum, quod per eum Christi gratia effecit, eodem primo anno ad lectoris excitandam spem et exultationem hic merito referendum puto: quod tamen, teste Deo non mentior, ab ipso quoque

¹ Glab. l. III. c. 2. — ² Eccl. III.

¹ Glab. eod. c. 2. — ² Apud Sur. tom III, die IV Maii c. 24.

usque ad vitæ finem celatum, sed a clero et populo qui interfuerat, divulgatum. Aribo, archiepiscopus Moguntinus, illo anno imperatorem ad Pentecosten Moguntiam invitavit, ubi etiam Concilium generale coegit, in quo multa collapsa correxit, præcipue vero Ottonem comitem ab Hanistein et Limingardam præter fas sibi cohærentes separare constituerat, quod tamen perficere non potuit; quandoquidem comes partim imperatoris metu, partim episcopi commonitione, utcumque ad meliorem se recepit frugem: femina autem bannos vel proscriptiones negligens, jus ibi funditus perdidit, ut hodieque perspicui potest.

6. « Ad hoc Concilium etiam nosler præsul, et episcopi et imperatoris jussu evocatus, non contemnenda cleri et militum frequentia quamvis invitatus et nolens stipatus eo properabat, et in quodam qui vicinus est illi castello, ubi Dei gratia et electus et consecratus fuit, iter faciebat, ubi tum mulier quædam ab immundo vexata dæmone, a parentibus et propinquis per Ecclesias, ad sanctorum imploranda patrocinia, circumducebatur. Qui cum audirent novum illuc advenire episcopum, obviam ei cum dæmoniaca femina fidenter processerunt, sanclæ ejus existimationis fama illecti. Impurus autem spiritus illorum acceleratione pavefactus, per os feminae anxiiis cœpit percontari vocibus, quonam perduceretur. Dicentibus illis, se jam in occursum Gothardi episcopi properare, horrifico mugitu et ululatu misere se opposuit, et ipsis etiam, a quibus trahebatur, mirantibus et

formidantibus reluctatus est, ejulans et vociferans, Gothardum se nec audire nec videre posse. Sub hac colluctatione, cum misera illa a fidelibus fide et spe, ut patuit, ferventibus traheretur, et spiritus nequam omni contentione obniteretur, tandem protligato illo mulier liberata est, et ad virum Dei sub quadam arbore refrigerii causa residentem, sana corde et corpore adducta est. Is vero cognitis iis quæ facta fuerant, timore et gaudio compunctus, lacrymabundus gratias egit Deo, in faciem se prosternens. Ac deinceps feminae manus imponens, ei bene precatus est, eamque in fide confirmatam recte valentem, atque etiam gaudentem, cum exultantibus amicis a se dimisit, cœptoque perrexerat itinere. Quotquot autem comitabantur eum, viso hoc miraculo, plus eum revereri et amare cœperunt, utpote cujus tam præclara apud Deum merita cognoscerent. At ille graviter eis interdixit ne cuiquam id indicarent; sed neque ægra mulier quæ miraculum in se experta fuit, neque turba quæ ei interfuerat, id reticendum putavit ». Quod majus miraculum recte consideranti videri potest. At hæc levia esse quis dixerit, si legerit reliquas a sanctissimo viro res gestas.

7. *Obitus S. Hartuici.* — Hoc eodem anno moritur sanctus Hartuicus Salsburgensis episcopus, cujus res præclare gestas scripsit ejus discipulus æque sanctus Eberardus, quas diligentia Henrici Canisii editas habes tomo secundo *Lectio- num Antiquarum*.

Anno periodi Græco-Romanæ 6516. — Anno Æræ Hispan. 1061. — Anno Hegiræ 414, inchoato die 26 Martii, Fer. 3. — Jesu Christi 1023.

— Benedicti VIII papæ 12. — Henrici II reg. 22. imp. 10. Basil. et Const. imp. 48.

1. *Synodus Moguntina.* — Ad num. 5 et seq. Aribo archiepiscopus Moguntinus Moguntia « Concilium generale coadunavit », inquit Wollherrus in Vita sancti Godehardi episcopi Hildensheimensis, cap. 4, de rebus hoc anno gestis verba faciens, « in quo episcoporum consilio, plura quæ deviaverant correxit. Præcipue tamen Ottonem comitem de Hamerstein et Irmgardam (non vero, ut Baronius habet, et tom. ix Concil. etiam perperam legitur, comitem ab Hanistein et Limingardam) illicite commanentes, separare disposuit; quod tamen penitus perficere non potuit, quia ille partim se regali timore (qui ab eo anno MXX expugnatus fuerat, ut eo anno ostendimus) partim episcopali commonitione ut-

cumque correxit ». Porro cum ex dictis loco citato constet, hunc Ottonem *judicio generalis Concilii* ob illicitas nuptias anathematizatum fuisse ab archiepiscopo Moguntino, apparet illius Concilii Acta ad nos non pervenisse.

2. *Synodus Pictaviensis.* — Hoc circiter anno, magna Lemovicis clericos inter civitatis, et monachos Sancti-Martialis rixa exorta, cujus hæc causa fuit. In Litaniis et publicis supplicationibus, *Martialis* nomen ex antiquo ritu inter confessores habebatur, cumque *Hugo* inter Apostolos eum annumerare et *Apostoli* nomen illi dare cœpisset, quod primus Evangelii præco in illis partibus fuerit, *Jordanus* episcopus Lemovicensis, et clerici Lemo-

vicenses antiquum morem defendere instituerunt. Willelmus Aquitanorum dux, hujus nominis IV, vir litteratus et litteratorum studiosus, ad dirimendam litem, Synodum *Pictavi* congregavit, ut liquet ex his Odolrici Sancti-Martialis abbat̃is verbis, in Concilio Lemovicensi, de quo suo loco, prolatis. « Illud quoque mihi commemorandum est, quod ante hos septem annos, rex Anglorum (Canutus scilicet) duci Aquitanie (præfato scilicet Willelmo) regalia munera misit, simulque Codicem litteris aureis scriptum, in quo nomina sanctorum distincta cum imaginibus continebantur : quod volumen jam in CONCILIO PICTAVIENSI, dum hac eadem de re quæstio esset, illud dux Guillelmus litteris edoctus in testimonium antiquitatis pontificibus ostendit ; erat enim ibi Martialis in aliorum Apostolorum catalogo positus ; qui peritissimus princeps dicebat ar-

chiepiscopo Burdegalensi, et aliis qui ibidem aderant episcopis, conjicere, inquit, possumus quam egregie auctoritatis sit B. Aquitanorum patronus, de quo Gregorius in illa sui laboris gente hanc legem tradidit observandam : nimirum imperitorum est dubitare, de quo S. papa Gregorius non dubitavit. Videtis ecce, o episcopi, in hoc Codice, qui apud Anglos scriptus est, prætermisum esse Timotheum, et Cleopham, et Silam et alios, quorum nomina in Evangeliiis et Actibus Apostolicis, sive in Epistolis Pauli leguntur, quos Apostolos dicitis præter duodecim esse : non tamen prætermisum esse illum nostrum patronum, qui primus Galliarum fuit episcopus, cujus nomen in Evangeliiis reticetur ». Verum in illa Synodo nihil certi definiri potuit, aliaque anno sequenti Parisiis agenda fuit, ut ibi narrabimus.

JOANNIS XX ANNUS 1. — CHRISTI 1024.

1. *Obitus Benedicti PP. et de eo visio.* — Annus surgit Redemptoris millesimus vicesimus quartus, Indictione septima, quo Benedictus papa ex hac vita migrat tertio kal. Martii, cum sedisset, non ut Hermannus ait, annos undecim et dies duodecim, sed ut habet Marianus, annos duodecim : quem post purgatorias pœnas salvum factum narrat Petrus Damiani in Odilone verbis istis ¹ : « Si quis autem non generalitate contentus, quis specialiter per beatum Odilonem de pœnis ultricibus sit ereptus inquit ; quid de reliquis sentiat, in papa Benedicto evidenter addiscat, ut in Romanorum Pontifice, qui omnium Christianorum caput est, valeat liquido conjici, quid de cæteris merito debeat existimari. Apostolicus igitur iste, quem diximus, dum adhuc viveret, beatum virum affectuose dilexit, reverenter excoluit, et Apostolorum Limina frequentanti necessarij sumptus opima sæpe subsidia ministravit. Huic plane, mox ut obiit, germanus ejus Joannes in Apostolica dignitate successit. Jam vero postquam humanis rebus exemptus est, non parvi temporis evoluto curriculo, jam dictus papa Joanni Portuensi episcopo, et aliis duobus, quorum nomina nobis nota non sunt, per speciem

nocturnæ visionis apparuit, eisque quia pœnalibus esset constitutus in tenebris indicavit, hoc insuper addens, qualiter beati Odilonis venerabilibus meritis cum superna censura liberare decreverit a tormentis. Obsecrat itaque per eos et humiliter flagitat, ut frater ejus ad præfatum unicæ pietatis virum agilem quantocyus veredarium dirigat, eumque suppliciter obsecrans, pro se orare deponat.

2. « Protinus idem Joannes, Portuensis episcopus, auctoritatis Apostolicæ fultus Epistolis, concilio gradu Papiam usque pervenit, ubi longo et immoderate fortassis accelerato fractus itinere, per monachos cœnobii beati Maioli Apostolicæ legationis apochas dirigit, omnemque per eos sancto viro seriem a se conspectæ visionis exponit. Enimvero divino factum esse constat judicio, ut eum apud Cluniacense monasterium Apostolicæ legationis bajulus inveniret. Præcepit itaque venerabilis pater psalmodias et orationes ab omnibus privatim et publice fieri, eleemosynas indigentibus erogari, sacrificium Deo mysterii salutaris offerri. Nec in illo duntaxat loco id statuere contentus fuit, sed et per omnia ejusdem sanctionis edicta mandavit. Cum itaque hoc fratres intentissima devotione satagerent, et ex ara sanctorum pectorum fraternæ charitatis flamma prosiliens, divinæ clementiæ

¹ Estat apud Sur. die 1 Jun. tom. I.

sacrarium penetraret, jam præfixi temporis terminus propinquabat. Et ecce quidam sanctæ conversationis monachus, Heldebertus nomine, qui videlicet hoc obedientiæ fungebatur officio, ut inopes aleret, et indigentibus subsidia ministraret. Hic itaque per soporem vidit, quod quidam pulcher ac serenus adspectu, ac solempni quodam nitore conspicuus, claustrum monasterii, magno candidorum agmine constipatus, ingrederetur. In capitulum deinde, ubi pater Odilo cum fratribus residebat, intravit; ad ejus genua caput humiliter flexit, eique (sicut in gestu corporis videbatur) gratias egit. Cumque frater ille, qui hoc in visione contemplabatur inquireret, quisnam esset ille tam decorus et fulgidus, qui sancto viro salutationis officium exhiberet: responsum est ei, quia ille esset Benedictus summæ Sedis episcopus, qui nimirum ideirco viro Dei gratias ageret, quia piis ejus sanctorumque fratrum precibus, et tartarei cruciatus evasisset interitum, et cum beatis civibus quieturus, supernæ Hierusalem meruisset ingressum. In hoc valet liquido deprehendi, quæ de meritis beati Odilonis opinio jure possit haberi, cum is nimirum, qui juxta privilegium Apostolicæ dignitatis claves Ecclesiæ præ cunctis mortalibus tenuit, qui ligandi atque solvendi vires præeminenti quodam jure possedit, in illo jam invisibili examine constitutus, non aliter quam precibus istius vel a peccatis solvi, vel de pœnali potuit supplicio liberari». Hactenus de his Petrus.

3. At quoniam non uni Joanni Portuensi episcopo de pœnis quas pateretur, sed et aliis duobus divinitus revelatum idem Petrus, ut audisti, testatur, alia ab his diversa esse noscitur visio illa, quam de eodem Benedicto idem Petrus narrat factam esse episcopo Capræ, quam recenset in Epistola ad Nicolaum Secundum Pontificem scripta verbis istis: « Ut igitur illud inferam, propter quod ista præmisi, episcopus, qui tum (si recte teneo) Capuæ (Capræ) præerat, vidit Majorem Benedictum papam (ita dictus Benedictus Octavus Major respectu nepotis ejus, qui Junior est Benedictus appellatus) qui jam obierat, nigro equo quasi corporaliter insidentem. Cumque illum cœptum iter carpere cerneret: Heus, inquit, nonne tu es papa Benedictus, quem defunctum liquido novimus? Ipse, inquit, infelix ego sum. Et ille: Quomodo tibi est, pater? Gravibus, ait, tormentis afficior, spe tamen, si adjutorium præbeatur, de mea recuperatione non privor. Sed perge, quæso, ad fratrem meum Joannem, qui nunc Apostolicam occupat Sedem, eique mea functus legatione denuntia, ut illam potissimum summam, quæ in tali theca reconditur, in pauperes pro mea salute distribuat, sicque me redimendum esse, quando-cumque decreverit divina miseratio, agnoscat. Nam cætera, quæ pro me sunt indigentibus tradita, nihil mihi penitus profuerunt, quia de rapinis et injustitiis acquisita sunt. Hic igitur episcopus Roman impiger adiit, et ubi Joanni papæ defuncti

fratris Benedicti verba narravit, episcopalis mox sarcinæ pondus abjecit, monachum induit, eoque modo salutem sibi ex aliena calamitate providit». Hæc Petrus, recensens numerum illorum qui se ab episcopali munere abdicarunt. At non perfunctorie dictum putes a Benedicto de Joanne fratre, qui Romanam occupat Sedem; occupabat sane, qui non legitime vocatus a Deo sedit, sed malis artibus ascendit ad ipsam. Hæc autem ut cunctis pateant, ex antiquioribus auctoribus sunt promenda, atque primum omnium horum dicendum de genere. Fuerunt nempe Benedictus, de quo diximus, et Joannes, fratres germani, ambo filii Gregorii, comitis Tusculani, ut Leo Ostiensis affirmat¹, patria Tusculani. De Gregorii potentia jam superius dictum est. Quomodo autem iste indignus indigne atque tyrannice Sedem occupaverit Petri, dicendum.

4. *De Joannis papæ intrusione, et legatione Ecclesiæ Constantinopolitanæ præsumptis dici universalem.* — Rursum monstra nobis peperit potentia sæcularis, procul facienda semper ab electione Romanorum Pontificum, ut ne vel auditu percipi omnino valeat: tractent sacra Deo sacri, non profani, ab his procul arcendi. At quid sibi vindicaverint comites Tusculani, a Glabro sæculi hujus scriptore sic accipe, cum de Joanne hoc agit²: «Erat quippe, inquit, Joannes iste cognomento Romanus, frater illius Benedicti, cui in episcopatum successerat, largitione pecuniæ, repente ex laicali ordine neophytus constitutus præsul; sed insolentia Romanorum hujusmodi adinvenit palliatæ subdolositatis ridiculum, scilicet, ut quemcumque pro suo libitu in præsentiarum ad Pontificatus officium delegerint, mutato nomine quod illi prius fuerat, aliquo magnorum Pontificum nomine illum appellari decernunt». Hæc Glaber, insinuans non huic olim nomen fuisse Joannem, sed adscitum illud postea, cum ex laico (nefas dictu) est transformatus in papam. Ex his autem conspice quam enormiter errent, qui dicunt hunc ex episcopo Portuensi creatum Pontificem³: qui si non aliter, certe ex his quæ recitavimus nuper ex Petro Damiani, manifeste redarguuntur erroris, dum longe diversum ponit fuisse episcopum Portuensem a Joanne papa Benedicti germano. Cæterum cum ipse Petrus Damiani hujus temporis scriptor adeo constanter affirmet, Joannem papam, Benedicti Pontificis fratrem, se abdicasse a Pontificatu, asserere necesse est Joannem hunc, qui ad decennium Sedem Pontificiam propagavit, nec nisi morte ea privatus est, cum idem ipse fuerit: eundem post abdicationem, legitima facta electione, legitimum Pontificem jam sedere cœpisse, atque ita ad obitum usque perseverasse, sicque post abdicationem legitimum omnino fuisse Romanum antistitem. Interea vero,

¹ Leo Ost. l. II. c. 27. et c. 58. in fin. — ² Glab. l. IV. c. 1. —

³ Panv. et alii eum secuti.

quoniam peculiare illud, ut qui pecunia emunt sacra, pecunia pariter sacra distrahant : quid hoc ipso suæ ordinationis exordio tentatum fuerit a Græcorum Ecclesia, ab eodem Glabro sic accipe¹ :

5. « Circa annum igitur Domini millesimum vicesimum quartum, Constantinopolitanus præsul cum suo principe Basilio, alique nonnulli Græcorum consilium iniere, quatenus cum consensu Romani Pontificis liceret Ecclesiam Constantinopolitanam in suo orbe, sicut Roma in universo, universalem dici et haberi. Qui statim miserunt, qui deferrent multa ac diversa donorum xenia Romam, tam Pontifici quam cæteris quos suæ parti favere conspicerent. Ubi advenientes exposuerunt suæ profectionis querelam. Sed quid non pertentat cæcus amor habendi? estque proverbium : Aurco pugillo murum frangere ferreum. At licet pro tempore philargyria mundi regina queat appellari, in Romanis tamen inexplebile cubile locavit. Mox namque, ut videre Græcorum sibi deferri fulgidas opes, versum est cor illorum ad fraudulentiae diverticula, pertentantes an forte clanculo concedere quiverant quod petebatur. Sed nequaquam. Non enim potest falli summa Veritas, quæ spopondit² : Portæ inferi non prævalebunt adversus eam. Dum ergo adhuc leni sub murmure hujusce machinatores in conclavi sese putarent talia tractavisse; velox fama de ipsis per universam Italiam decurrit. Sed qualis tunc tumultus, quam vehemens commotio per cunctos extitit qui audierunt, dici non valet. Præcipue tamen vir prudentissimus, pater videlicet Willermus, de quo jam diximus³, ad Romanum Pontificem de hac re misit Epistolam corpore brevem, sed materia ingentem ac sermone pungentem, talia continentem :

6. « Gratia Dei, et reverentia beati Apostolorum principis Petri, sedium in orbe terrarum excellentissimo indepto papæ Joanni, Willermus crucis Christi servus, sedem judicii. Cum Apostoli et regni coronæ magistri Gentium dictis instruimur, seniores non increpandum : idem tamen alias dicit : Factus sum insipiens, vos me coegistis. Idcirco igitur filiationis diligentia hortamur communem vestram paternitatem, qualiter in uno imitemini cogitationes hominum providentem Dominum Salvatorem, ut dicatis ad aliquem vobis unanimem, quemadmodum ipse Petro⁴ : Quid dicunt homines de me? Si vero responsum illius ex fide fuerit, animadvertite qualiter sonuerit. Si autem clare, custodite ne obfuscetur; si vero obscure, lux mundi oranda est, qualiter ita fulgeatis, ut universis in gremio Ecclesiæ constitutis ad viam mandatorum Dei gradiendam lumen præbeatis. Sed est fama rei quæ nuper erga nos accidit, de qua quis audiens non scandalizatur, noverit se longe ab amore superno disparari. Quoniam licet potestas Romani imperii, quæ olim in orbis terrarum mo-

narchis viguit, nunc per diversa terrarum innumeris regatur sceptris : ligandi solvendique in terra atque in cælo potestas dono inviolabili incumbit magisterio Petri. Atque ista idcirco diximus, ut animadvertatis, non aliter Græcis quam xenodochia hujusce¹ quam audivimus, apud nos requirere, impetravisse..... De cætero quoque optamus, uti universalem decet antistitem, vos acrius in correctione ac disciplina sanctæ et Apostolicæ Ecclesiæ vigere, æterneque ac feliciter valere ». Hucusque Willermi Epistola ad Joannem creatum Pontificem, utinam integra, et non mendosa atque truncata verbis, quæ tanti ponderis fuit, ut levem hominem ne faceret quod moliebatur, omnino cohibuerit. Erat autem hic Willermus abbas, monasterio S. Benigni a sancto Maiolo Cluniacensi abbate præfectus, de quo inter alia multa Glaber hæc habet² : « Erat enim prædictus Willermus acer ingenio, et insignis prudentia, idcirco summum in palatiis regum ac cæterorum principum obtinebat locum. Quodcumque denique monasterium proprio viduabatur pastore, statim compellebatur tam a regibus vel comitibus, quam a pontificibus, ut meliorandi gratia illud ad regendum susciperet, quoniam ultra cætera divitiis et sanctitate, ipsius patrocínio assumpta cernebantur excellere monasteria, etc. »

7. Quod autem ad dictam legationem Græcorum pertinet, eos nihil penitus ab Apostolica Sede impetrare potuisse, docent Epistolæ Leonis papæ IX, post annos viginti conscriptæ ad Michaelem Constantinopolitanum patriarcham, quibus expostulat de ejusmodi titulo, OEcumenicus, quem suæ sedis episcopi præter jus fasque, reclamante semper Apostolica Sede, nimia arrogantia usurpassent. Ex quibus aperte cognoscitur, ab ea petitione legatos tandem fuisse repulsos. Quod etiam ex eo redditur manifestum, quod illa Ecclesia hactenus Ecclesiæ Romanæ nova redintegratione conjuncta, rursus schismate se divisit, ut quæ suo loco sunt dicenda, demonstrant.

8. *Henrici imperatoris obitus sanctitate fulgentis una cum uxore Chunegunde.* — Hoc eodem anno, tertio idus Julii, moritur Henricus imperator, et sepelitur Bambergæ, quam civitatem episcopali sede, pluribus Ecclesiis, monasteriis, redditibus et amplissimis donis illustraverat. « Ad mortem Henricus veniens (inquit Leo Ostiensis³) episcopis, abbatibusque præsentibus, Chunegundam conjugem suam propinquis tradidisse dicitur, ac dixisse : Recipite quam mihi tradidistis virginem vestram »; ut qui mutuo consensu castitatem servare Christi amore statuissent. Eadem et alii plerique testantur. Renovata sunt in Christianis imperat. magno miraculo, quæ in primitiva illa Ecclesia apud fideles reperiri aliquando contigisse, ex Tertulliano suo loco narravimus : unde merito auctor ejus tempo-

¹ Glab. l. iv. c. 1. — ² Matth. xvi. — ³ Supra l. iii. c. 5. — ⁴ Matth. xvi.

¹ Locus depravatus, in quo plura videntur desiderari. — ² Glab. l. iii. c. 5. — ³ Leo Ost. l. ii. c. 47.

ris in Chunegunde ¹ : « O conjugium non voluplate, sed bona voluntate copulatum ! O sanctum matrimonium, ubi una fides inviolatæ castitatis, ubi unus spiritus misericordiæ et veritatis ! Ubi idem velle in virtutibus, idem nolle in vitiis ; ubi nec primus, nec alter discernere potuit, dum alter quod primus voluit ; ubi par animus in multifariis operum effectibus pares in duobus ostendit effectus. Quales has nuptias dixerim nescio. Unum scito, quia nescit modo regio nostra tales, dum propter regnum cælorum se castrantes, nec prolem terrenæ fecunditatis expectantes, cælibem in Deo generationem reciperent, a quorum ore laus Dei nunquam deficiet. Hæc est generatio quærentium Dominum, qui viventes in Christo, et membra sua propter Christum super terram morientium, modo regnantes cum Christo, bona Domini sui vident in regione viventium ».

9. Sed sicut imperatoris castitas nulla unquam potuit suspitione pullari, ita et sanctissimæ Augustæ illibata pudicitia aliquando calumniam passa, quasi aurum examinata per ignem, illæsa permanens, majori fulgore orbi refulsit : dum (ut idem auctor et alii narrant) eadem Chunegundis apud virum delata de suspecta consuetudine militis, expetens ipsa, securitatem sibi pariente innocentia, probari per ignem, ignitos vomeres non secus ac flores illæsis manibus contrectavit. Vidit infauftum sæculum nunquam hactenus visum in continentia tantorum imperatorum miraculum : gloriatur jure Germania uno se edidisse partu Augustum et Augustam sanctos imperatores, inter sanctos relatos ambos. At de Chunegunde suo loco dicendum ; modo autem sanctissimi principis gloriosa funera prosequamur, non quæ adulatio humana persolvit, sed quæ Deus in ostensione miraculorum exhibuit, ut illud Davidicum occinuisse canticum loco næniæ liceat ² : « Scitote quia mirificavit Dominus sanctum suum ». Qui ejus Vitam scripsit Adalbero, episcopus Ultrajectensis, ut auctor est Sigebertus, ipse pariter edita ab eo miracula scriptorum memoria consignavit, quæ ab Ecclesia esse recepta, testatur auctor in Chunegunde, dum ait : « De vita et miraculis Pii Henrici imperatoris Christianissimi, et de miserationibus variis quas fecit in domo Domini : de signis quoque et miraculis quæ post transitum ejus per eum fecit Deus, satis ac digne scripta sancta recepit Ecclesia ». Hæc ipse.

10. Prosecuta est animam conjugis pia imperatrix piis officiis postrema pie persolvens. Quamvis enim obitu imperatoris omnia impleri turbis et misceri rumoribus contigerit ; ipsa animo constans, illud unum totis viribus conabatur, ut elemosynis atque precibus Deo animam conjugis commendaret. De quibus hæc idem auctor ejus temporis in Chunegunde : « Quanta vero elemosynarum largitate, quanta orationis instantia pro beati

conjugis anima desudaverit, in subscripta pagina, quam ipsa per se (nam litterarum et artium aliarum..... distinguere auro, gemmisque sacras vestes paratissima fuit) composuit et scripsit, quicumque voluerit agnoscere poterit ». Quæ sic se habet missa ad moniales monasterii, Ad Confugia dicti :

11. « Chunegundis, divina dispensatione solo nomine imperatrix, specialiter dilectæ congregationi Ad Confugia, quidquid justæ convenit dilectioni.

« Propriæ adversitatis sarcinam (velut æstimo) facilius tolerarem, si vestras res salvas incolumesque existere viderem. Quamvis enim mens procellosis curarum fluctibus undique quatitur, vestræ tamen recordationis anchora a cordis profunditate non avellitur ; et licet longe remotæ ab oculis sitis, ab animo tamen nunquam receditis. Quis nos separabit a charitate Christi ? casus doloris, an longinquitas remotionis ? Quinetiam si amissæ facultatis usus concederetur, voluntas hæc operis exhibitione comprobaretur. Ipsum tamen modicum, quod adhuc Deo volente reliquum tenemus, vestræ commotioni (communicationi). Alienum esse nolumus, ut participatione parvitatæ reveletur magnitudo devotionis ; mater namque si parum habuerit, parum filiis tribuit. Ecce hæc modici sumptus munuscula ad refectionem vobis mittuntur carnis, ut animam senioris patris vestri continua alimonia orationis reficiatis, quoniam tot justorum preces unanimiter continuatæ apud Deum multum possunt proficere, Jacobo attestante ¹ : Multum valet deprecatio justî assidua. Ille etiam atque etiam justus Dominus, qui justitias dilexit, æquitatem supplicationis audire non respuit, sed vobis indefessis intercessoribus supradicti chari memoriam facientibus, salutis dabit præmium quod ipse promittit dicens ² : Qui perseveraverit usque ad finem, hic salvus erit. Atque bonum opus in conspectu etiam Dei placitum esse cernitis, si non solum pro illis, qui in hac vita positi multa vobis bona, sed pro illis etiam qui nulla fecerunt oraveritis. Obsecro ergo, ut eum a cordibus vestris nunquam abiciatis, qui vos tanquam proprias amavit, atque hunc locum vestra servitute florere voluit. Estote quoque meæ necessitatis memores, semper in hilaritate cordis misericordes, secundum illud Apostoli ³ : Dilectio sine simulatione. Necnon vestræ mentes in quamdam mutuæ charitatis soliditatem magis ac magis conerescant, quatenus in die tribulationis clamorem vestrum ipsius aures exaudiant, qui dicit ⁴ : Ubi duo vel tres congregati fuerint in nomine meo : in medio eorum sum. Quod vos omnimode promereri horror, eodem præstante, qui cum Patre et Spiritu sancto vivit et regnat per omnia sæcula sæculorum. Amen ». Hæc Chunegundis.

Nec hic de Henrico prætereat, eum post obitum claruisse miraculis, quamobrem ab Eugenio

¹ Apud Sur. die III Martii. — ² Psal. IV.

¹ Jac. V. — ² Marc. X. — ³ Rom. XII. — ⁴ Matth. XVIII.

papa inter sanctos receptus est; cujus canonizationi qui adversus est cardinalis Romanæ Ecclesiæ, eundem est passus sanctum Henricum ultorem. Hæc in Vita ejus a Canisio edita tomo sexto Anti-quæ lectionis.

12. *Conradi in regno successoris origo et mores.* — Sed ad successorem Henrici convertamus orationem. Conradum sibi successorem designasse in regnum ipsum Henricum imperatorem, nonnulli affirmant, ut Leo Ostiensis¹: at alii post ejus obitum ab archiepiscopis et aliis Germaniæ principibus fuisse electum tradunt, non absque contradictione potentum. Longe autem errant qui hunc filium fuisse ipsius Henrici imperatoris scripsere.

13. Quod autem ad genus ipsius pertinet, ex Wormatiæ ducibus originem ducere, scriptores rerum Germanarum pariter asseverant, fuisseque filium Henrici, filii Ottonis, ex quo genitus Gregorius Quintus summus Pontifex. Cujus ætatis primordia fuere humilia atque quieta, cæteris suis consanguineis cuncta etiam Ecclesiastica conturbatione miscentibus. « Unde contigit », ait auctor Vitæ Burchardi Wormatiensis episcopi, hujus ætatis scriptor, « ut idem vir Dei Burchardus hoc genus hominum omnibus vitæ suæ diebus exosum habuisset, et quasi Ecclesiæ Dei invasores omnes respuisset, uno tantummodo juvene excepto, Conrado scilicet, quem parentes cæterique cognati, quia pacificus erat, et innocentiam vitæ diligebat, indignando respuerunt. Hunc vir Dei venerabilis Burchardus ad se vocatum, Dei timorem pariter et amorem docuit, et quasi adoptivum nutrit, et quia stabilitatem animi in eo intellexit, præ cæteris multum illum dilexit. Quem Deus postea in solium regni elementer exaltavit ». Hæc de Conradi pueritia et adolescentia invisa cognatis, Deo autem Deique servis amica, qui tantum virum habuit educatorem, instructorem et monitorem, per quem Dei timorem edoctus, per eum ad imperium aperuit sibi viam.

¹ Leo Ost. l. II. c. 59.

14. In juventutis lubrico eo tantum facto infamatus legitur, quod relictam Ernesti Suevorum ducis, ex qua duos suscepit filios, nomine Giselam, ex progenie Caroli Magni oriundam, duxit uxorem; cujus rei causa ejus electio atque unctio est retardata, ut Glaber affirmat his verbis¹: « Cum enim diu multumque de constituendo regni principe, ac præcipue inter præsules tractatum fuisset; visum est eis ipsum Conradum debere eligere, nisi quod unum intererat, propter quod Henricus etiam illum valde exosum habuerat. Habebat enim conjugem quæ illi erat affinis, quam etiam primitus quidam cognatus ipsius duxerat. Propterea innotuerunt ei pontifices, quid potissimum vellet, aut tale conjugium, quod manifeste sacræ auctoritati nimium repugnabat, tenere, seu eo dimisso, coronam imperii sumere. Qui protinus dimittendum promisit talis incesti conjugium, seque parere diligentissime illorum dictis, et obedire consiliis. Deinde vero mittunt ad papam Romanum, ut eis in hoc quod decreverant consentiret. Qui statim libentissime annuit: mandans insuper, ut quantocius suscepto Germaniæ sceptro, Romam pergeret, suscepturus totius Italiæ coronam ». Hæc de electione Conradi. Quando autem in Italiam perrexerit, suo loco dicturi sumus. Porro inaugurationem Conradi non hoc anno factam, quo ejusmodi contentiones viguerunt, sed sequenti, est nonnullorum assertio; verum ex Diplomatum ejusdem Conradi regis, liquet hunc annum primum ejus regni numeratum. Recitantur illa in Præambulis ad Burchardi decretum: tu consule quæ ab auctore Vitæ sancti Gothardi episc. Hildesemiensis, de rebus gestis ejusdem Conradi per singulos annos narrantur². Porro sequestrem pacis inter principes et Conradum regem, et inter ipsum et regem Francorum fuisse sanctum Popponem, abbatem Stabulensem, magnæ æstimationis virum³, Everhelmus affirmat.

¹ Glab. in exord. l. IV. — ² Apud Sur. tom. III. die IV Maii c. 24. — ³ Everh. in Vita Popp. c. 15. apud Sur. die XXV Jan. tom. I.

Anno periodi Græco-Romanæ 6517. — Anno Æræ Hispan. 1062. — Anno Hegiræ 415, inchoato die 15 Martij, Fer. 1. — Jesu Christi 1024.

— Joannis XIX papæ 1. — Conradi II reg. 1. — Basil. et Const. imp. 49.

1. *Joannes XIX succedit Benedicto VIII PP.* — A num. 4 ad 5. *Benedictus* papa, hujus nominis VIII, hoc anno naturæ debitum solvit, Hermannus Contracto in fusiori Chron., Mariano Scoto et Sigeberto testibus. Auctores Catalogorum plerique, et auctores Fasciculi temporum ac Chronici magni Belgici, annos undecim, menses undecim et dies XXI ei assignant, qui ideo an. MXXII mense circiter Junio Pontificatum inierat. *Joannes* enim hujus nominis XIX frater, qui ei successit, post diem sextum mensis Junii, et ante mensem Octobrem Pontificatum gessit. Primum liquet ex Rubeo, in Hist. Ravenn. lib. 5, ubi mentio fit Chartæ a Joanne papa datæ « octavo id. Jun.; quæ Pontificatus Joannis VI, imperii Conradi IX, Indict. XIII scribitur ». Quare cum an. MXXX, die sexto mensis Junii, sextum Pontificatus annum adhuc numerarit, currenti post illum diem Pontifex dictus est. Quoad secundum, Ughellus tom. V Italiæ Sacræ, pag. 48, refert Privilegium patriarchæ Aquileiensi concessum, « scriptum per manus Joannis cardinalis et cancellarii, vice Petri diaconi, mense Septembri, Indictione decima. Datum per manus Bossonis episcopi et bibliothecarii S. R. E., in mense et Indictione suprascripta, in sacratissima Sede B. Petri Apostoli anno quarto, Deo propitio, Pontificatus domini Joannis summi Pontificis et universalis Nonidecimi papæ ». Ubi loco Indictionis decimæ reponenda Indictio undecima. Ughellus enim tom. I, pag. 108, recitat aliud Privilegium Silvæ-Candidæ episcopo datum, « scriptum per manum Georgii notarii regionarii atque scriptoris S. R. E., in mense Decembri, Indictione X » : post subscriptionem vero præsulum viginti in eo nominatorum : « Datum XVI kal. Januarii per manus Benedicti, episcopi Portuensis, et vice Peregrini Coloniensis archiepiscopi bibliothecarii sanctæ Apostolicæ Sedis, anno Pontificatus domini nostri Joannis summi Pontificis et universalis XIX papæ in sacratissima Sede B. Petri Apostoli tertio, mense Decembri, Indict. X », anno scilicet Christi MXXVI. Cum itaque eo Christi anno, die XVII mensis Decemb. tertium Sedis annum attigisset, in præcedenti subscriptione loco *Indictionis* X, reponenda Indictio XI; alioquin anno MXXVI mense Septembri, annum IV Pontificatus, et mense Decembri ejusdem anni, annum III numeraret.

Doctissimus cardinalis Norisius, in Dissert. de *Synodo quinta*, cap. 10, Indictione illa X mendose descripta deceptus, existimat Baronium et Onuphrium Pontificatum Joannis XIX male in hunc annum distulisse, huncque anno superiori *pridie kalend. Martias* (qui dies ab Onuphrio notatus), Pontificem creatum esse. Verum ex dictis certo consequens est, *Joannem XIX* hoc anno post diem sextum Junii *Benedicto* successisse, huncque anno MXXII post eundem diem, imo et post diem XVII ejusdem mensis, quo *Sergius IV* adhuc in vivis erat, Pontificatum iniisse, ideoque sedisse annos XI, menses XI, et dies XXI. Rubeus pag. 278, Chartam proferit, in qua annus IV Joannis papæ conjungitur cum anno III Conradi imp., die XI Aprilis et Indict. XII, sed loco *anni* IV substituendus quintus.

2. *Laici virtutibus necessariis præditi eligi poterant.* — Hermannus Contractus in auctori Chronico, Platina, alique aiunt, *Joannem* ex laico factum esse Pontificem, additque Platina, ejus vitam mirifice laudari. Sed quia nullum exemplum præcesserat electi alicujus Pontificis Romani nullis sacris initiati, non dubitandum, quin id multis tunc mirum visum fuerit, sicuti anno superiori, quando in Galliis, *Arnulpho* Rhemensi archiepiscopo demortuo, *Ebulus* seu *Ebulo* adhuc laicus in eam sedem evectus est. Verum quod *Fulbertus* episcopus Carnotensis tunc ad *Guidonem* episcopum Silvanectensem scripsit, Joanni papæ XIX etiam applicandum : « Amor justitiæ », inquit *Fulbertus* Epist. XXXVIII, vel juxta Duchesnium XVII, « qui tuam, pater, animam imbuisti ab nativitate, fecit eam offensam et ab excessibus cautam. Cujus rei fidem cum ex aliorum dictis, tum ex litteris tuis evidenter accepi. Sed ab ordinatione Ebali Rhemensis archiepiscopi, non valde tibi metuentum puto esse, si est, ut dicitur, ab infantia Christianus, sano sensu, sacris litteris eruditus, sobrius, castus, amator pacis et dilectionis, nullo crimine, nulla infamiæ nota turbatus, tandemque a clero et populo suæ civitatis electus. Magni etenim viri, ut optime nosti, Ambrosius Mediolanensis, et Germanus Autissiodorensis, alique nonnulli, quia tales in laico habitu extiterunt, subito nobis sancti præsules exierunt. Dominus vero papa, cujus animadversionem te revereri significasti, non est quod

tibi merito debeat succensere, si te graviter collapsæ sanctæ Rhemensi Ecclesiæ aliquam spem resurrectionis audierit providisse ». Quod si tamen verum est quod scribit Baronius ex Glabro, lib. 4, cap. 1, et confirmat chronographus Virdunensis, Joannem nempe largitione pecuniæ ex laicali ordine neophytum ordinatum, hæc ei favere non possunt. Porro Joannem istum XIX dictum fuisse, laudatæ subscriptiones extra omnem dubitationem ponunt.

3. *Patriarcha CP. a Joanne PP. petiit ut universalis dici posset.* — A num. 5 ad 8. Hugo Flaviniacensis abbas in Chronico Virdunensi de Joanne papa XIX hæc habet : « A quo cum requisisset Constantinopolitanus antistes, ut sua Ecclesia, sicut et Romana universalis diceretur, et donis eum Romanosque qui curiæ præerant innumeris flecteret, ita ut clanculo tentarent concedere quod rogabatur, omnis ob hoc vehementissime commota est Italia. Sed Galliarum episcopi et abbates, his obviare conati sunt, quidam in persona sua, quidam vero litteris missis Sedem Apostolicam visitantes, et tantum opprobrium et dedecus auctoritatibus ad medium prolatis, quibus contradicere fas non esset, a Romana Ecclesia propulsantes. Nec defuit in his patris Richardi (abbatis Virdunensis) authentica præsentia, imo omnino sategit, ut Constantinopolitana præsumptio confutata quiesceret, filium se Romanæ Ecclesiæ, dum matris honori providebat, ostendens. Inter alios quoque Willelmus, abbas eximius (monasterii nempe Divionensis Sancti Benigni) Epistolam papæ misit corpore brevem, sed materia ingentem et sermone locupletem, quam hic inserere non piguit ». Eam refert Baronius num. 6 ex Glabro, doletque quod ea mendosa et verbis truncata sit. Quare locum mendose descriptum hic referam emendatum : « Quoniam licet potestas Romani imperii, quæ olim in orbe terrarum monarchis viguit, nunc per diversa terrarum loca innumeris regatur sceptris, ligandi solvendique in cælo et in terra potestas incumbit magisterio Petri. Atque idcirco ista diximus, ut animadvertatis non aliter Græcos, quam xenodoxia hoc quod audivimus apud vos requirere, impetrasse. De cætero quoque optamus etc. » Quibus ex verbis liquet, ex falso rumore qui percrebuerat, Joannem Græcis jam concessisse quod ab eo petierant, scribendi argumentum Guillelmum abbatem Sancti-Benigni sumpsisse.

4. *Moritur S. Henricus imp.* — A num. 8 ad 12. Sanctum *Henricum imp.* hoc anno animam Deo reddidisse, idque *III idus Juli*, asserunt Wippo in Vita Conradi Salici, Hermannus Contractus in auctiori Chronico, chronographus Hildensheimensis, aliique. Addit hic chronographus : « xxii annis, hebdomadis v, et unum diem regnavit ». Quare anno mii, *VII idus Junii*, non vero *III idus Junii*, ut habet Baronius, die scilicet vii mensis Junii, in quem Dominica cadebat, coronatus fuit, et anni illi xxii die sexta Junii currentis anni fi-

niuntur, post quem supersunt hebdomadæ quinque et dies unus, nempe dies xii Junii, sicque chronographus diem emortualem ejus excludit. Ejus Vitam scripsit *Adelboldus* auctor coævus, monachus Laubiensis et episcopus Ultrajectinus, anno mxxvii demortuus, de quo Vossius in Hist. Latinis lib. 2, cap. 42, et Gretserus in sanctis Bambergensibus. Eo mortuo, *sancta Chunegundis* ejus uxor, fundatrix monasterii Confugiensis, ad sanctimoniales *Confugiæ* Epistolam scripsit a Baronio recitatam, qua eis animam sancti Henrici conjugis cum quo in castitate vixit, commendavit. Dittmarus lib. 7, *Confugiam* appellat *Kapungun*, vulgo *Kaffungen*, haud procul Cassellis Hassicis positum.

5. *Ejus successor a proceribus Germaniæ non vero a vii electoribus creatur.* — Ad num. 12 et seqq. « Cum imperator sine filiis obiisset », inquit Wippo presbyter, « quilibet potentissimus sæcularium principum vi magis quam ingenio nitebatur aut fieri prius, aut quacumque pactione a primo secundus ; ex qua re discordia pæne totum regnum invasit, adeo ut in plerisque locis, cædes, incendia, rapinæ fierent, si non is impetus illustrium virorum sufflamine impediretur ». Refert postea summorum nomina quædam, sive pontificum sive sæcularium principum, « qui tunc in regnis vgebant, quorum consiliis consuevit Francia (nempe Teutonica) reges eligere ». Paulo post : « Italiam transeo, cujus principes in brevi convenire ad regiam electionem nequiverunt, qui postmodum in urbe Constantiensi cum archiep. Mediolanensi et reliquis principibus occurrentes regi, sui effecti sunt, et ei fidelitatem libenti animo juraverunt ». Tacet hic Wippo Italos voluisse Robertum Francorum regem, aut Willelmum IV Aquitanie ducem sibi præficere, et a Germanis deficere, quod anno sequenti narrabimus. Paulo post subjungit Wippo « Supra memorati episcopi et duces, cæterique potentes haud aliter periculum minitans melius aut citius evadere rati, summa ope et industria memorabili utebantur, ne respublica diutius sine regente nutaret, etc. Tandem cōdicta est dies notatusque locus, fit publicus conventus, qualem me vidisse antea non memini, etc. Inter Moguntiae confinia et Wormatiæ locus est, amplitudine planitie causa, multitudinis maxime receptabilis, etc. Ibi dum convenissent cuncti primates, et, ut ita dicam, vires et viscera regni, eis et circa Rhenum castra locabant. Qui dum Galliam a Germania dirimat, ex parte Germaniæ Saxones cum sibi adjacentibus Slavis, Franci Orientales, Norici, Alemanni convenere. De Gallia vero Franci qui supra Rhenum habitabant, Ribuarii, Lutharingi coadunati sunt ».

6. *Conradus Salicus rex Germaniæ eligitur.* — Paulo post : « Cum diu certaretur qui regnare deberet, etc. inter multos electi pauci sunt, et de paucis admodum duo sequestrati sunt, etc. Erant duo Chunones (seu Conradi) quorum unus quod majoris ætatis esset, Major Chuno vocabatur, alter au-

tem Junior Chuno dicebatur, ambo in Francia Teutonica nobilissimi ex duobus fratribus nati : quorum alter Hetzel (id est, Henricus) et alter Chuno dictus est. Ipsos vero ab Ottone duce Francorum (seu Franconiae) natos accepimus, cum duobus aliis Brunone et Willelmo ; ex quibus Bruno Apostolicae Sedis Romanae Ecclesiae papa effectus, mutato nomine, Gregorius appellatus est : Willelmus factus Argentinensis Ecclesiae episcopus, miro modo eam sublimavit, etc. In his duobus, id est, in Majori Chunone et Juniore diu pendebat reliqua nobilitas, etc. Archiepiscopus Moguntinensis, cujus sententia ante alios accipienda fuit, etc. elegit Majorem Chunonem suum in dominum et regem, etc. Hanc sententiam ceteri archiepiscopi et reliqui sacrorum ordinum viri indubitanter sequebantur, etc. Tunc singuli de singulis regnis eadem verba electionis saepissime repetebant, etc., et ut nulla mora consecrationis illius fieret postulabant, etc. Peracta electione, regem sequi Moguntiam, ubi sacratissimam unctionem acciperet, cum claritate maxima omnes properabant ». Addit Wippo consecrationem regis factam in *die Nativitatis sanctae Mariae*, cui suffragatur chronographus Hildensheimensis, qui dicit eam peractam *17 id. Septembris*. Haec fusius ex scriptore qui electioni praesens fuit narranda duxi, ut institutio septem electorum imperii, a Gregorio V facta, ab omnibus tandem explodatur; cum vel sola Conradi Salici electio, annis circiter viginti sex post Gregorii V mortem facta, eam commentitiam esse demonstret.

7. *Conradus Salicus non a filio, sed a filia Ottonis M. originem duxit.* — Conradum Salicum originem ducere a *Luidolfo* Ottonis Magni filio, a quo prognatus sit Otto dux, (quo nomine appellatus Conradi Salici avus), docuit Guillilmannus, in peculiari Tractatu *de Origine et Stemmata Conradi Salici*, Friburgi in Brisgovia anno mxcix typis edito, huncque postea Blondellus in Pleniori Assertionem Genealogiae Francicae, tom. II, pag. 33, passimque historici Germanici secuti sunt. Verum *Conradum Salicum*, non a *Luidolfo*, sed *Luitgarda* ejus sorore, Conrado Lotharingae, Franconiae, ac Wormatiiae duci nupta descendere, anno mv jam certo argumento demonstravimus, et eam item etiam dirimit auctor anonymus Conrado Salico contemporaneo, cujus breve Chronicon regum Francorum Lambecius tom. II Biblioth. Caesareae pag. 393 et seq. publicavit. Sed nec hunc scriptorem, nec auctorem Vitae Adalberonis episcopi Metensis, cujus verba loco laudato retulimus, Guillilmannus habere potuit, quia nondum tunc lucem viderant. Et licet Aventinus in Hist. Boiorum lib. 3, pag. 313, genus hujus imperatoris scite notasset, quia tamen more scriptorum suis aevi, unde illud acceperit non memoravit, solaque avorum ejus ac proavorum nomina expressit, hactenus haec controversia viros doctos in diversas opiniones divisit. Haec anonymi Lambeciani verba : « Conradus dux (scilicet Lotharingae) qui fuit ex progenie Conradi

praedicti (Conradi nempe Germaniae regis, hujus nominis primi) accepit filiam primi Ottonis imp. (videlicet Luitgardam) ex quo fuit Otto dux (scilicet Francorum aut Franconiae). Otto dux filios habuit duos : unus nomine Cono, (seu Conradus dux Austrasiorum, de cujus matrimonio cum Mathilde filia Gerbergae Conradi Burgundiae regis filiae, anno mv egimus) et alius Hezil (id est, Henricus). Ex isto Hezil natus fuit Cono, qui modo rex est ». Quare hic auctor quae vidit scripsit, floruitque tempore Conradi Salici, cujus genealogiam texuit. Conradum Salicum ex filia Ottonis M. progenitum etiam affirmat auctor anonymus Genealogiae S. Arnulphi.

8. *Sicuti etiam Gregorius V papa.* — *Conradus* itaque Salicus nepos fuit *Ottonis* ducis Francorum, ut diserte prodit Wippo citatus, sed hic Otto, non *Luidolf*, ut credidit Guillilmannus, sed *Conradi* Lotharingae ducis et *Luitgardae* Ottonis M. natae filius erat. Cumque *Otto* Franconiae dux, *Conradi* Salici avus, ex *Juditha* uxore filios quatuor suscepit, nempe *Conradum* Austrasiorum seu Carinthiae ducem, de quo anno mv, *Henricum* Conradi Salici patrem, *Brunonem*, qui sub nomine Gregorii V Pontificatum Romanum gessit, et *Willelmum*, anno mxxiv Argentinensem episcopum creatum, ut mox ex Wippone vidimus, manifestum est deceptos viros eruditos, qui *Gregorium V* papam linea masculina Ottone M. prognatum fuisse in litteras misere. Nam *genus Ottonis Magni* cum Ottone Tertio *consumptum* est, ut ex auctore coevo anno mxcvii ostendimus. His adde Ottonem *Luidolphi* filium, fuisse tantum *Bojoariae* et *Alemanniae*, ut anno mcdxvii monstravimus, ducem, sed nunquam *Francorum*.

9. *Evertitur primum fundamentum contrariae sententiae.* — Haec praecipua Guillilmanni, qui hanc difficultatem examinavit, fundamenta. Observat vir eruditissimus *Bernonem* Augiensem abbatem, Conradi Salici coetaneum, in Praefatione ad Henricum hujus nominis imperatorem II et Conradi Salici filium, scribere : « De patris vestri Chunradi prosapia non adeo est dicendum, cum pateat cunctis quatenus ex generoso Ottonis Augusti germine genus ducitis ». Verum non de paterna, sed de materna linea loquitur *Berno* ; cum in eadem Praefatione asserat, Henricum II imperatorem, Salici filium, directo sancti Arnulphi Metensis et Caroli Magni stipitis sanguine ortum esse : « De quorum numero, inquit, indubitanter existitis, qui ex avitis progenitoribus tam nobilem quam religiosam genealogiae lineam ducitis. Nam Ansgisus, filius sancti Arnolphi, etc. Ex quo (scilicet Carolo Magno) stemma pervenit ad quemdam Ludovicum regem nobilem Francorum, qui pater extitit Lotharii regis et Karoli ducis (nempe Lotharingae). Cujus Ludovici filiam Chunradus rex Burgundionum duxit uxorem, de qua genuit vestram aviam, matrem videlicet Gisilae, divae memoriae matris vestrae ». Vides *Bernonem* a Carolo Magno Gisela

Henrici Germaniæ regis hujus nominis III matris, parique methodo *Conradi Salici* ejusdem Henrici patris originem ab Ottone Magno deducere, utrobique scilicet ex linea materna.

10. *Evertitur secundum fundamentum.* — Refert etiam Guillelmus Chartam Ottonis ducis, qua monasterium *Grevenhusæ*, in diocesi Spirensi, « anno Incarn. Dom. DCCLXXVII, Indict. VI, imp. Ottone II, instituit, « suadente, inquit, Juditha conthorali mea, cum assensu trium filiorum meorum Henrici, Brunonis, Chunonis ». Quibus ex verbis Guillelmus infert, *Ottonem* nepotem ex filio Ottonis M. patrem extitisse Henrici, qui genuit *Conradum Salicum*, Brunonis seu *Gregorii V* papæ, et Chunonis seu *Conradi*, Carinthiæ et Austrasiorum ducis. Ita ille pag. 42 sui operis. At vir eruditissimus hanc Chartam Ottoni *Luidolphi* filio et Alemanniæ duci male adscribit; data enim ea ab *Ottone* Francorum, seu Franconiæ duce. Liebnitzius quippe, in erudita sua Præfatione ad Codicem Diplomaticum rerum Germanicarum, recte vidit, superiorem et inferiorem Palatinatum, ubi *Spira* posita, membra fuisse ducatus Franconiæ, et Palatinos duces usque ad *Fridericum* imper. hujus nominis Primum, nec officiales nec feudatarios immediatos imperatorum et imperii Romani extitisse, sed ducum et ducatus Franconiæ. Quare Otto filius Conradi et *Liudgardæ*, ad quem Palatinatus urbesque Wormatiæ et Spire pertinebant, dux erat Franconiæ, non vero Alemanniæ, a qua tantum utraque Alsatia pendebat, cujusque *Argentina*, quæ *Strasburg* dicitur, caput fuit, ut prodit Dithmarus lib. 5. Hinc *Conradus Junior*, Ottonis Francorum ducis ex filio nepos, a Wippone in Vita Conradi Salici, modo *dux Franconiæ*, modo *dux Wormatiensis* dicitur, et Conradus pater Ottonis Francorum ducis, ab Ottone Frisingensi aliisque *dux Wormatiensis* appellatur. Conradum vero *Salicum*, *Henricum* Germaniæ regem, hujus nominis III ejus filium, *Henricum IV* nepotem et *Henricum V* imper. *Wormatiæ* sepultos fuisse, eorumque sepulchra se ibi vidisse, diserte testatur abbas Urspergensis in Chron. ad an. MCXXV.

11. *Coronatio Gisela Salici uxoris.* — Hermannus Contractus in Chron. narrata Conradi Salici unctione subdit: « Nec multo post uxor ejus Gisela, a Pilgrino archiepiscopo Colonia regina nihilominus benedicta II kal. Octob. »; sed legendum, *V kal. Octob.*, qui dies hoc anno in Dominicam incidit, quibus diebus hujusmodi solemnia fieri solita. Baronius num. 44 causam cur *Gisela* unctio relardata fuerit refert ex Glabro, initio lib. 4. Wippo vero de *Gisela* scribit: « Hæc quorundam hominum invidia quæ sæpe ab inferioribus fumigat ad superiores, per aliquot dies a consecratione sua impediabatur. Cæterum, si illud odium juste an injuste pertulerit, adhuc in quæstione moratur: tamen virilis probitas in femina vicit, et ex consensu et petitione principum consecrata, necessaria comes regem sequebatur ».

12. *Synodus Parisiensis.* — Cum anno superiori in Concilio Pictaviensi quæstio agitata fuisset, an *sanctus Martialis* Apostoli vel confessoris nomine vocandus esset, nihilque decidi potuisset; hoc anno *Parisiis* aliud celebratum, ubi frequentior doctorum numerus adfuit. *Robertus* Francorum rex, *Gauzlenus* Bituricensis archiepiscopus et multi præsules, *Hugo* abbas Sancti Martialis, *Odolricus* ejus successor, alique cum magistris Parisiensibus eidem præsentibus fuere. Lemovicenses contendere *Martialem* vocandum esse *primum confessorem*, non *Apostolum*; Parisienses vero eum etiam *Apostoli* nomine præter cæteros XII posse appellari: tandemque a Roberto rege pro Parisiensibus conclusum, et sententia Synodi Romam ad Joannem XIX papam transmissa, ut eam ipse sua auctoritate confirmaret. Constant hæc ex Concilio Lemovicensi II, anno MXXXI habito, et tom. IX Concil. pag. 870 et seqq. recitato. In eo enim Odolricus, ut legere est pag. 872, ait: « Audiant me pontifices et seniores, qui coram adstant, quod Martialis semper ab antiquitate in pluribus doctissimorum Patrum locis pronuntiatus sit Apostolus, mihi necesse non est testificari, ne forte adulterius judicer testis pro ejus Ecclesiæ regimine, etc. Extitit post eum (nempe post Abbonem, de quo locutus fuerat) ipsius monasterii pater (nempe Hugo) tum grandævitate, tum genere, cum eloquentia et disciplinis liberalibus clarus, ac demum levatus Bituricæ sedi archiepiscopus Gauzlenus. Quod testimonium sancto Dei perhibuerit ille, multi ex nostris noverunt. Adhuc enim vivente rege Roberto, cum antecessor meus Hugo in palatio ei APUD PARISIOS adsisteret, tum multitudine nobilium et doctorum altercatio inter Francos et Lemovicenses de re hujusmodi coram rege fieri cœpit, et ego ibi tunc præsens interfui.

13. *In ea agitatum an S. Martialis dici deberet Apostolus.* — « Dicebant isti (nempe Lemovicenses): Non recte facitis, quod Martialem cum Apostolis pronuntiatis. Nos recte agimus, quia eum inter confessores recitamus. Vos ultimum Apostolorum dicitis: nos primum confessorum in Litanis dicimus. Quorum litigium archiepiscopus supradictus Gauzlenus compescuit. etc. » Et pluribus interpositis: « Nos Franci morem quem patres nostri, qui primi monasterium Sancti Benedicti suo magisterio innormarunt, plena nobis ratione subnixum tradiderunt, de hac re ratum conservamus. Quisquis nos hac in re imitari voluerit, ratam veritatis lineam tenebit. Quo perorato, archiepiscopus (nempe Gauzlenus) tacuit, et rex cum omni dignitate clericorum et principum qui sibi adsistebant, dicta archiepiscopi collaudavit ».

14. *Definitum eum Apostolum appellandum esse.* — Hujus Synodi Parisiensis meminit Adamarus, in Catalogos et Commemoratione *abbatum Lemovicensium Basilicæ Sancti Martialis Apostoli*, et sub Hugone abbate XIII habitam esse his verbis commemorat: « XIII. Abbas Hugo præfuit annis

sex. Hic in Francia collationem fecit cum rege Roberto, et archiepiscopo Bituricensi Gauzleno, et cum multis episcopis et sapientibus viris Franciæ, de apostolatu sancti Martialis; cur alii in Apostolorum, alii in confessorum numero eum tenere videbantur. Qui in numero confessorum eum tenebant, ideo hoc agebant, quia non putabant aliquos esse Apostolos præter duodecim. Alii vero hoc agebant, quia nomen ejus in IV Evangelistis non reperiebant. Qui vero saniori consilio intellecta sapiebant, affirmabant eum esse Apostolum unum præcipuum post XII, quia cum XII conversatus est, et eandem gratiam apostolatus quam et illi a Domino accipere meruit. In que Concilio ab omnibus definitum est, non eum numerari nisi in Catalogo Apostolorum, sicut Joannes Evangelista

qui in pace migravit, debere. Nam plurima testimonia reperta sunt antiquitus eum in Litanis et in aliis scriptis Apostolum fateri per Galliam et Britanniam, Italiam et Hispaniam, et illos esse Hebriontas hæreticos, qui non credunt præter XII Apostolos. Nam gesta ejus canonica, semper ab Ecclesia recepta, satis declarant privilegium apostolatus ejus, et quia sine dubitatione unus de LXXII Apostolis, quos Dominus misit velut agnos inter lupos: quos LXXII non solum Græci, verum etiam Lucas Evangelista et Paulus Apostolus in Epist. ad Corinthios I vocat Apostolos. Nam et apud Græcos sapientiores Martialis Apostolus notissimus est ». De hac controversia rursus anno sequenti sermo fiet.

JOANNIS XX ANNUS 2. — CHRISTI 1025.

1. *S. Chunegundis vitam monasticam profectur.* — Redemptoris annus agitur vicesimus quintus supra millesimum, Indictione octava, quo tertio idus Julii, ipsa anniversaria die obitus Henrici imperatoris, ejus conjux sanctissima virgo Chunegundis Augusta in monasterio a se erecto, in dedicatione ejus Basilicæ, depositis ornamentis imperatoris monasticum suscepit habitum, famulatura ejusdem loci monialibus: ubi ad obitum usque annis quindecim perseveravit. Descripta ista habentur ab auctore sequentis sæculi, verbis istis¹: « Denique Conrado sibi succedente in regno, ipsa curis secularibus sicut jamdiu desideraverat exonerata, jam in ipso anniversario die transitus sancti Henrici, archiepiscopos ad dedicationem Confugiensis Ecclesiæ convocavit. Ubi inter missarum solemniam imperiali decentissime omni ornatu culta, ante principale altare virgo Deo devota processit: ibique thesaurum incomparabilem, ligni videlicet Dominici crucem, parvam quidem in materia, sed maximam in virtute Domini obtulit. At ubi lectio Evangelii (quod dici consuevit ex præscripto sacrorum rituum in dedicatione alicujus Ecclesiæ²) in qua super arborem crucis ascendens conspicientem se Jesum suscipere, et ab eo

benedictionem Zachæus pusillus meruit accipere, lecta fuit: regalem purpuram exuens, tunicam fusciolem, quam ipsa sibi manibus suis operata fuerat, sacerdotali benedictione data, vestem religionis induit: et multis quidem pro se flentibus, pro illa autem gaudentibus, quæ jam sæculum damnasset in vestibus, capillis, qui hucusque in eodem monasterio pro veneratione servantur, præcisis, imposito sibi ab episcopo velo, annulo fidei subarrhata, gratulabunda concinuit: Posuit signum in faciem meam etc.; et: Annulo suo subarrhavit me Dominus Jesus Christus. Ita sponso Christo consecrata, dum filiarum suarum se sanctissimo contubernio applicuisset, non ut mater filiabus se præferebat, sed omnibus inserviens, servilem personam se ostendebat, ita tamen, ut cum omnia faceret, ostentationem fingeret singulorum, ne reciperet in præsentis sæculo mercedem suam ». Pergit auctor ejus in monasterio dignam conversationem Angelis parem enarrare, et miracula ab eadem edita recensere. Sed hæc modo nobis satis ad institutum.

2. *Guillelmus Aquitanicæ dux res Italiæ tentat et imperium.* — Hoc tempore, vacante adhuc imperio Romano in Occidente, ipso autem Conrado rebus Germaniarum intento, et multiplicitate hostium fatigato, Guillelmus dux Aquitanicæ potentis-

¹ Extat apud Sur. tom. II. die III Martii. — ² Luc. XIX.

simus in urbem peregrinationem instituit, tentaturus animos Italiae principum, si posset efficere, ut filium quem secum duceret, regem crearent Italiae, eidemque conciliarent imperium. Est de his perbrevis ad Fulbertum Carnotensem episcopum Epistola, in hæc verba ab Hugone conscripta¹:

« Quem jugiter in præcordiis animæ suæ fovet, domino ac patri suo Fulberto, Hugo perpetuo vigere. Dux noster Guillelmus nobis amicissimus profecturus est in Italiam die Jovis proxime venturo, sciscitatum de causa filii sui, si cum honore et incolumitate sua fieri queat, ut Italie eum eligant sibi in regem, faciant ei sacramentum, et Italiae regnum concedant, et Romanum imperium accipiant per rectam fidem, quantum possint. Hac de causa processurus est prudens pater cum filio, quem supra dixi, cum ipsis deliberaturus. Nunc ergo prudentiæ vestræ sit discernere, utrum illo absente veniatis juxta conductum. Si veneritis, victualia vobis, Deo largiente, non deerunt ». Hæc ad Fulbertum Hugo.

3. Coluit autem mirum in modum idem dux Aquitaniæ Guillelmus ipsum venerandum Fulbertum Carnotensem episcopum, eundemque litteris et muneribus frequentavit, ut docent litteræ ab eodem Fulberto ad ipsum datæ, quæ inter alias causæ jam extant². Laudatissimus sane princeps, de quo inter alia hæc in Fragmentis historiæ Aquitanicæ: « Regulares abbates et monachos maximo affectu amoris amplectebatur, et consilio eorum utilitatem regni administrare curabat. Unde et dominum Odilonem, abbatem Cluniacensis cœnobii, copiosis muneribus sibi attraxit, contemplatus in eo verum Dei habitaculum in quo Spiritus sanctus requiesceret, et cœnobium nonnulla suæ ditionis ejus magisterio commendavit. Fecit idem dux Guillelmus a novo cœnobium ingens Malliacense in territorio Pictaviensi, itemque aliud cœnobium Burgoliense in cespite Andegavensi in fundo proprio, una cum matre sua, nomine Adala Christianissima, quæ extitit soror Richardi comitis Rothomagensis. In quibus cœnobiis nunc alios regulares aggregavit plures numero, qui die et nocte Domino laudes persolverent omnipotenti, eisque constituit abbatem, ferventissimum in sancto proposito, et regularis disciplinæ firmissimam columnam, nomine Theolmum ». Et inferius: « Hac pietate semper usus est, ut quos victor vivos capere potuit, non eos interimere permisit, sed ereptos a morte et mulcatione membrorum, incolumes abire præcepit ». Cæterum quod ad res Italiae et imperium pertinet, cum videret repugnantes Longobardos, et eos qui favebant studebantque Conrado, adversarios se fore passurum, remque haud perfici posse absque ingenti strage fidelium, ut prudens maluit abstinere, reque infecta ad propria remeare.

4. *Inventio capitis S. Joannis Baptistæ.* —

Quomodo autem, ubi reversus est, Deus cum voluit consolari inopinata inventione capitis sancti Joannis Baptistæ, accipe ex iisdem Fragmentis ejusmodi narrationem³: « Temporibus ipsis, dum reversus esset a Roma post Paschales dies gloriosus supradictus dux Guillelmus, inventum est caput sancti Joannis, in ipsius Basilica, in tugurio saxeo cœnobii Angeriensis: quod sanctum caput dicunt esse proprium caput sancti Joannis Baptistæ. Tunc Guillelmus dux repletus magno gaudio, sanctum caput populorum visibus ostendendum decrevit: et non solum Aquitania, verum etiam Francia et Burgundia, Hispania et Britannia, atque Longobardia, et cætera Gentium diversitas certatim, velut amnis, devote ibi occurrit, audita fama tam præclara nostris diebus. Rex quoque Robertus honorifice advenit, et sicut decebat regiam dignitatem, obtulit in eodem loco concham de auro purissimo pensantem libras triginta, pretiosas quoque vestes, ecclesiasticum ornamentum; et magno honore a Willelmo duce exceptus est cum omnibus qui eum comitabantur. Et his expletis, reversus est Aurelianos. Quod etiam majus videtur, omnes congregationes servorum Dei ex Aquitania cum sanctorum corporibus et reliquiis et apparatu Ecclesiastico psallentes processerunt ad Memoriam sancti Præcursoris Christi: interque concursus Lemovicinorum una cum monachis et clericis, et primioribus, et episcopo Geraldo, et Joffredo abbate præcelso, cum innumerabili gloria Memoriam Aquitaniæ patroni præcipui Martialis, recto cursu per sanctum Carrofum prætereuntes, ad Memoriam Baptistæ Domini detulerunt, et magnis lætantes miraculis, quæ Apostolus Galliæ gloriosissimus Martialis patraverat, per viarum interstitia sub oculis omnium tripudiantes reversi sunt. Dux vero Guillelmus semper cogitans de Dei honore ad ipsius laudem et gloriam, dominum Odilonem Cluniacensem abbatem accersivit, et in eodem supradicto cœnobio Angeriensi disciplinam monachorum sub jugo regulari in melius restauravit ». Hæc de inventione et cultu venerandi capitis ibi.

5. *Obitus Basilii imperatoris Orientalis.* — Hoc eodem anno, jam inchoata Indictione nona, mense Decembri, Basilius imperator, cum vixisset annos septuaginta, imperasset vero quinquaginta, repentino morbo correptus exivit e vita, relinquens imperium integrum fratri suo Constantino. Paulo ante autem obiit Eustathius patriarcha Constantinopolitanus, in cujus locum Alexium monasterii præfectum (ut inquit Curopalata) collocandum curavit, quo adjutore in Republica administranda utebatur. Idemque et mores Constantini damnatos recenset, ejusque tyrannidem in opprimendo populo tributorum violenta exactione.

Obitus Boleslai Polonorum regis. — Quo pariter anno, die tertia mensis Aprilis, Christianissi-

¹ Fulb. Ep. XC. — ² Fulb. Ep. LXXXV. LXXXVI. LXXXVII. LXXXVIII.

³ Habes ea post Roberti Vitam posita Appendicem ad Glabrum.

mus princeps religione præstans, potens armis, propagator, propugnator et conservator Christianæ religionis, et regni dilatator eximius, Boleslaus Poloniae rex, cognomento Chobri, hoc est, vir altæ et heroicæ virtutis, ex hac vita decessit, anno quinquagesimo octavo ætatis suæ, cum annos viginti sex regnasset, cum jam antea (quod decuit Christianum principem) præmunisset se ad propinquum exitum, iterata sæpe peccatorum confessione, et

sumptione sacratissimæ Eucharistiæ pro viatico. Prophetice prædixisse venturam regni cladem, ejusdemque restitutionem in meliorem statum, narrant qui prosecuti sunt res Polonorum, præsertim vero Longinus canonicus Cracoviensis, qui res ab eo præclare gestas enumerat. Successit autem in locum ejus Mieczlaus ejus filius, sed parentis virtutibus longe impar.

Anno periodi Græco-Romanæ 6518. — Anno Æræ Hisp. 1063. — Anno Hegiræ 416, inchoato die 4 Martii, Fer. 5. — Jesu Christi 1025.

— Joannis XIX papæ 2. — Conradi II reg. 2. Constantini imp. 50.

1. *Italici Conrado regi sese submitunt.* — Ad num. 2 et seq. Wippo in Vita Conradi Salici ait: « Anno primo regni sui, Chuonradus rex die sanctum Pentecostes in Constantia civitate celebravit: ibi archiepiscopus Mediolanensis Heribertus cum cæteris optimatibus regni Italici occurrebat, et effectus est suus, fidemque sibi fecit per sacramentorum et obsidum pignus, ut quando veniret cum exercitu ad subjiciendum Italiam (res enim Italicæ nutabant, multique regem creare volebant) ipse eum reciperet, et cum omnibus suis ad dominum et regem publice laudaret, statimque coronaret. Similiter reliqui Longobardi fecerant, propter Ticinenses, qui et alio nomine Papienses vocantur, quorum legati aderant, cum muneribus et amicis, molientes ut regem pro offensione civium placarent, quanquam id adipisci a rege juxta votum suum nullo modo valerent ». Narrat postea qua in re regem Ticinenses offenderent, quod nempe cognito Henrici imp. obitu, statim totum palatium ab Ottone III valde adornatum usque ad imum fundamenti lapidem eruerint, ne quisquam regum ulterius infra civitatem illam palatium habere decerneret.

2. *Simonia in Germania grassatur.* — Scribit etiam Wippo Conradum regem, cum ad Basileam civitatem pervenisset, et episcopum demortuum esse reperisset, alium constituisse: « Ibi simoniaca hæresis, inquit, subito apparuit, et cito evanuit. Nam dum rex et regina quodam clerico, nobili viro, nomine Udalrico, qui ibi tunc episcopus effectus est, immensam pecuniam pro episcopatu reciperent, postea rex in pœnitentia motus, volo se obligavit pro aliquo episcopatu vel abbacia nullam pecuniam amplius accipere, in quo voto pœne

bene permansit, sed filius ejus tertius Henricus, qui postea rex et Augustus effectus est, optime et sine omni scrupulo patrum votum expiavit, quia in omni vita sua pro omnibus dignitatibus Ecclesiasticis unius oboli pretium non dicitur accepisse ». Hanc in rem scribit Glaber lib. 5, cap. 5, quod cum Henricus ad simoniam extirpandam magnam Synod. in German. congregasset, « cernentes episc. gravi sese invectione irretitos, misericordiæ operam implorabant. At ipse princeps misericordia motus, tale consolationis protulit verbum: Ite, inquit, et quod illicite accepistis, bene disponere satagite; ac pro anima patris mei, qui hac noxa reus vobiscum tenetur, attentius intercedere mentote: quatenus ei indulgentiam hujus facinoris a Deo possitis acquirere ».

3. *Itali Robertum aut Hugonem ejus filium regem petunt.* — Porro Willemus IV, Aquitanie dux potentissimus, non hoc sed superiori anno, a Langobardis ut rex eorum esset in Italiam vocatus. Rem accurate tractavit Beslius tam in Hist. comitum Pictaviensium et Aquitanie ducum cap. 20, quam in Tractatu de Vera Origine Hugonis Italie regis, eidem operi subjuncto; Wippo enim, qui Conradi Salici gloriam tantum præ oculis habebat, hæc dissimulavit, et Italie historici vel ea ignorarunt, vel nimis nationi suæ studuerunt. Mortuo itaque S. Henrico imp., in Germania comitiis creando regi et in Italia in eundem finem institutis, Germani Conradum Salicum regem salutavere Itali vero Robertum Francorum regem, etsi nolle, Hugonem ejus filium in consortium regni a patre allectum, Magnumque jam cognominatum, missis ad eos legatis, regem renuntiaverunt. Verum Robertus rex prudentissimus Italorum petitioni ac-

quiescere noluit : « Hujusmodi enim fama », inquit Glaber loquens de Hugone rege lib. 3, cap. 9, « ubique provinciarum percitus peroptabatur a multis, præcipue ab Italicis, ut sibi imperaret in imperium sublimari. Nam et ex cognomento proavi, Magnus Hugo dicebatur a cunctis ». In Chron. Floriacensi ad annum *MLX* perducto, et a Baluzio lib. 2 Miscell. recitato, ad hunc annum legitur : « Hugo rex moritur » ; et Duchesnius tom. iv, pag. 79, refert Epitaphium Hugonis Magni, Roberti regis filii, *quod fecit Girardus Aurelianensis*, in quo dicitur :

Celtiberi lacrymant, te regem Roma petebat.

Tum in eodem opere, ubi refert Epist. historicas Fulberti episc. Carnotensis, peculiari sibi ordine digestas, exhibet Epist. *LV*, a Fulcone Andegavorum comite ad Robertum regem datam, in qua Fulco ait : « Guillelmus Pictavorum comes herus meus locutus est mihi nuper, dicens quod postquam Itali discesserunt a vobis, diffusi quod vos regem haberent, petierunt filium suum ad regem. Quibus ille invitatus coactusque respondit, tandem acquiescere se voluntati eorum, etc. »

De Hugonis regis morte fuse agemus anno *MLXXIII*.

4. *Frustra etiam tentant Guillelmum IV, Aquitanie ducem.* — *Guillelmus IV*, modo dux Aquitanie, modo Pictavorum comes appellatus, a Carolo M. originem ducebat, et sicuti *Robertus*, cujus mater Adelais ex Italia oriunda fuit, onus tandem detrectavit, ut discimus ex Epistolis Fulberti *xv*, *LVII*, *LVIII*, *LIX* et *LX*. Baronius num. 2 refert tantum Epistolam *xv*, quæ juxta eum ordine est *xc*, sed in Codicem mendosum inciderat. Ita enim juxta correctæ exemplaria legenda : « Dux noster Guillelmus vobis (non vero *nobis*, ut habet Baronius) amicissimus profecturus est in Italiam die Jovis proxime venturo, sciscitari (non vero *sciscitatum*) de causa filii sui, si cum honore et incolumitate sua fieri queat. Itali enim elegerunt eum sibi ad regem (non vero *ut Itali eum eligant sibi in regem*) facientes ei (non vero *faciant ei*) sacramentum, et Italiae regnum concedendi (non *concedant*, ut habet Baronius) et Romanum imperium acquirendi (non autem *acquirant*) per rectam fidem quantum possunt (non *quantum possint*.) Hac de causa præcessurus est prudens pater filium (non *processurus est prudens pater cum filio*) quem supra dixi, cum ipsis deliberaturus ». Denique Epist. *LVIII*, a Guillelmo Aquitanie duce scripta ad *Maginfredum* clarissimum Italiae marchionem, habet : « Quod cœptum est de filio meo, non videtur mihi ratum fore, nec utile, nec honestum. Gens enim vestra infida est, insidiæ graves contra nos orientur ». Postea Maginfredum rogat ut operam det, qualiter absque utriusque dedecore *ab incœpto desistatur*. Idem fere habet Ademarus in Chronico, de Guillelmo IV Aquitanie duce verba faciens. *Con-*

radus itaque Salicus regni Italici pacificam possessionem iniit.

5. *Novi hæretici in Langobardia detecti.* — Detecti hoc tempore in Langobardia hæretici, de quibus Glaber lib. 4, cap. 2 et seq., qui « colebant idola more paganorum, ac cum Judæis inepta sacrificia litare nitebantur ». Addit de illis Glaber, innumerabilem exercitum *in nigerrimis vestibus faciebusque teterrimis*, venisse ad domum ejusdam ægroti, quorum princeps promisit ei sanitatem et longam vitam, subditque : « Et ut certissime credas quod spondeo, noveris meo auxilio meaque industria Chuonradum hoc tempore imperatorem esse creatum. Tu quippe bene nosti, quod nullus imperatorum ita velociter omnem Germaniam atque Italiam, sicuti iste, suæ subjugavit ditioni ». Ostendit postea Glaber, peccatis hominum exigentibus, Domino permittente, a nequam spiritibus aliquando fieri miracula, ex quibus aliqua narrat. Verba autem citata, quæ immundus spiritus protulit, famæ Conradi magni nominis imperatoris nihil nocent, ut omnibus notum, indicantque hanc hæresim anno *MLXXII*, quo ille Romæ imperator coronatus fuit, primum innotuisse.

6. *Inventio capitis S. Joannis Baptistæ.* — Ad num. 4. Baronius ex auctore anonymo refert inventionem capitis sancti Joannis Baptistæ, Angeriaci in Aquitania factam ; verum eam contigisse an. *MLXXII*, ex Ademaro qui in Aquitania vivebat ostendimus. Nec refert quod anonymus laudatus dicat, id accidissee anno quo *Willelmus* Aquitanie dux hujus nominis IV Romam profectus est, et hoc anno *Willelmus* Romam perrexerit ; cum anonymus de alia Willelmi profectione Romana omnino interpretandus sit.

7. *Moritur Basilius imp.* — Ad num. 5. « In Siciliam », inquit Cedrenus, « molitus expeditionem Basilius, Orestam quemdam de fidissimis suis eunuchis præmittit cum magnis copiis : ipse fato interceptus subsequi non valuit. Nam mense Decembri, Indictione nona, anno 6334, (Æræ nempe Constantinopolitanæ, kalendis Septenib. hujus Christi anni inchoato) subito correptus morbo decessit. Paucis ante mortem ejus diebus obiit Eustathius patriarcha ; in cujus locum imperator substituit Alexium monachum, Studiani Collegii magistrum, qui ad ipsum invisendi causa venerat, afferens secum caput Joannis Baptistæ (quod tamen in Aquitania per hæc tempora dicitur inventum). Eum ergo cum per Joannem protonotarium, cujus opera in administrandis publicis negotiis utebatur, in solio patriarchæ collocasset, vespere exspiravit ». Michael Psellus tom. 1, cap. 20, de ejus regni duratione scribit : « Videtur hic imperator supra reliquos omnes imperatores longissimi ævi fuisse. Ab ortu enim nativitatis ad annum vicesimum imperium cum patre, et Nicephoro Phoca, et qui ei successit Joanne Tzimisce, cum subditus esset : tum vero duos supra quinquaginta annos imperium solustenuit. Secundum ita-

que supra septuagesimum agens imperii annum ex humanis migravit ». Sed cum certum sit Basilium anno DCLXXVI imperium iniisse, cum Constantino fratre imperavit tantum annos quinquaginta, et Psellus, qui tom. II ait Basilium imperatorem mortuum esse *se adhuc infante*, in eo calculo erravit. Baronius anno DCCCLXXXVI, num. 7, narrat ex Fragmento historiæ Aquitanicæ, Basilium imp. victis Bulgaris habitum monasticum ex voto induisse. Verum auctor ille anonymus hoc de Basilio Porphyrogenneto, non vero de Basilio Macedone asserit, et ei hac in re non videtur fides adhibenda, cum historici Byzantini nihil simile referant. Præterea Baronius ibidem num. 14 ait, Menologium Basillii nomine inscriptum Basilio Macedone imperante, elucubratum esse; sed eodem loco ostendimus, illud ad Basillii Porphyrogenneti tempora revocandum.

8. *Constantini imp. pravi mores.* — Mortuo Basilio, Constantinus ejus frater solus imperium administravit: « Hic septuagesimum agens ætatis annum », inquit Psellus, « rerum summam adipiscitur: vir mollissimæ indolis, animique in omnes diffluentis delicias ac libidines: regio tandem thesauros immensa pecuniarum vi plenos nactus, iis ut abuteretur, et animi levitate et voluptatibus ipse sese addicit ». Addit Psellus eum animo pavidum fuisse, subditos omnis generis tormentis mancipasse, iræ impatientem, et cæcationis pœnam temere quibusvis irrogasse. « Quia malum quoque ad quosdam extendit, qui clero accensi erant, nec summo sacerdotio pepercit. Semel enim ira præceps, eaque abreptus, haud facile revocari poterat, ægreque audiebat quidquid admoneretur ». Subjungit Psellus, eum tamen non fuisse sicut fratrem Basilium, tenaci ira, sed cito mutari consuetum, graviusque eorum quæ fecisset illum pœnituisse erga eos qui circa ipsum erant: iis vero qui procul erant, largitatis hujus minorem vim exhibuisse; litteras haud multas didicisse, sed parum aliquid ac quantum attinet ad adolescentes, Græcicis disciplinis institutum esse; denique regias quasdam Epistolas ac Diplomata dictasse, nullamque tantam manu velocitatem, quæ illi dictanti par esset, fuisse.

9. *Mizico II Poloniæ rex Boleslao patri succedit.* — Ad num. 6. Chronerus lib. 3, alique historici Poloni Boleslai hujus nominis Primi, cognomento *Chobry* mortem hoc anno consignant, cui successit *Miezislaus*, seu Mizico filius, de quibus Wippo hoc anno habet: « Bolislaus Sclavigena, dux Bolanorum, insignia regalia et regium nomen in injuriam regis Chuonradi sibi aptavit, ejus temeritatem cita mors exinanivit. Filius autem ejus Mizico, similiter rebellis, fratrem suum Ottonem, quoniam regis (Conradi sc. Salici) partibus favebat, in Rulhiam (id est Russiam) provinciam pepulit. Qualiter vero ejusdem Miziconis protervitatem, et ejusdam Udalrici ducis Bohemiæ perfidiam rex Chuonradus postea compesceret, in loco suo di-

cam », anno nempe MXXXII. Mizico beatam *Richezam*, Erenfridi seu Ezonis comitis Palatini filiam, uxorem duxit, inquit monachus anonymus in ejus Elogio Historico in Actis SS. Bollandianis, ad diem XXI mensis Maii recitato. Ait præterea idem anonymus: « Richeza regina, facto inter se et regem suum conjugem divortio, per odium et instigationem ejusdam suæ pellicis, cum ei jam peperisset Chatimerum (sc. Casimirum, vulgo dictum monachum) ejus generosa posteritas divitiis et potestate nobiliter insignis permanet usque hodie, veste mutata, paucis se fugam clanculo agentem adjuvantibus, utpote fastus ejus intolerabiles simul et barbaros Slavorum pertæsa ritus, venit ad imperatorem Conradum in Saxoniam, a quo venerabiliter et ipsa suscepta est, et ipse nihilominus gloriosis ipsius xeniis magnifice honorificatus est. Accepit namque ab ipsa duarum, ipsius regisque sui conjugis, coronarum insignia ». Qua de causa, Richeza nomen velut a Polonis scriptoribus prætermittitur, vel fœde proscinditur, uti a Chromero laudato, qui etiam negat Boleslao fratrem fuisse *Ottonem*, aut bellum aliquod Conradum Salicum adversus Miziconem gessisse. Verum hæc in tanta Historiæ luce nunc dici non possunt. Porro *Mizico* est hujus nominis II, et tertius Poloniæ rex seu dux Christianus.

10. *S. Martialem Apostolum dici episcopus Lemovicensis non patitur.* — Ademarum præter Chronicon, scripsit Commemorationem *abbatum Lemovicensium Basilicæ S. Martialis Apostoli*, tom. II Biblioth. Labbei recitatam. In eo Libello loquens de Hugone abbate XIII, et de Synodo Parisiensi, de qua anno superiori, ait: « Illic a Francia rediens, mox sicut comperit veritatem in Concilio (nempe Parisiensi) Martialem scripsit in Litaniis inter Apostolos, non confidens disputationi propriæ, sed antiquis testimoniis, et exinde ex toto, non ex parte, Martialis acclamatus est Apostolus ab omnibus Catholicis, et confusi sunt Hebionitæ. Hujus sexto anno, obiit Rogerius frater Adalberti decani, vir clarissimus, et meus magister et patruus, sexto kalendas Maii; post eum xxxii die mortuus est idem abbas Ugo, sexto kalendas Junii: quorum animas tibi commendo Domine Jesu ». Quibus verbis opellam suam absolvit Ademar. Reversus itaque *Hugo* Sancti-Martialis abbas Lemovicum, primus omnium inter Apostolos *Martialem* scribit; sed *Jordanus* Lemovicensis episcopus eum increpat et novitatis arguit, dicens servandum esse morem antiquum, juxta quem confessoribus, non vero Apostolis annumerabatur. Et ne civitas turbaretur, scripsit ad Joannem XIX eam in rem, dicens contra id quod anno superiori ex Odolrico abbate Sancti-Martialis et Ademaro in medium attulimus, Robertum regem et omnes archiepiscopos et episcopos improbare, quod Martialis loco in Letaniis consueto servari, moveatur. Quid papa responderit, et quomodo *Martialem* Apostolum appellandum esse decreverit, infra videbimus. Hæc

autem, quæ in Concilio II Lemovicensi referuntur, tardius contingere non potuere, cum *Hugo* abbas Sancti-Martialis hoc anno vivere desierit.

11. *Synodus Cameracensis*. — Anno MXXV, Indictione viii, Gerardus Cameracensis atque Atrebatensis episc. Synodum coegit. Fidem Catholicam de Eucharistia sancivit adversus hæreticos nonnullos, « qui ab Italiæ finibus eo loci advenerant, et quamdam novam hæreseos sectam introducentes, Apostolicæ sanctionis disciplinam pervertere tentabant; et quamdam justitiam præferentes, hac sola purificari homines asserebant, nullumque in sancta Ecclesia aliud esse Sacramentum, per quod ad salutem pervenire potuissent ». Illi itaque Dominici Corporis et Sanguinis Sacramentum re-

jiciebant, et coram episcopo adducti, « referunt se esse auditores Gandulfi cujusdam ab Italiæ partibus viri, et ab eo Evangelicis mandatis et Apostolicis informatos, nullamque præter hanc Scripturam se recipere, sed hanc verbo et opere tenere ». Tum accuratius interrogati, sacri Baptismatis mysterium negant, simulque Eucharistiæ, Pœnitentiæ et Matrimonii Sacramenta. Pro erroribus singulis singula capitula condit Gerardus, primum quidem de Baptismo, secundum de Corpore et Sanguine Domini; et ipsius Sacramenti naturam clare explicat, idque ante plures annos, quam *Berengarius* hæresim suam de Eucharistiæ Sacramento publicaret. Synodus hæc Cameracensis nuper lucem vidit, tom. xiii Spicilegii Dacheriani.

JOANNIS XX ANNUS 3. — CHRISTI 1026.

1. *Conradus rex convenit S. Burchardum cujus morituri oratio et virtutes*. — Millesimus vigesimus sextus annus Christi Redemptoris Indictione nona signatus incipit, cum Conradus rex profecturus in Italiam, Wormatiam primum se confert ad S. Burchardum, ipsius nutritorem. Qui cum plurimum ægotans lecto decumberet, a Deo impetravit ut valeret, dum rege digna præstaret. Quod obtinens, ubi quem honorifice excepisset, eundem comitatus aliquantisper esset, reversus, ut præsciverat ad obitum se componens, spiritum Deo reddidit. Res digna memoria, quæ Annalibus inseratur, sic ab ejus temporis scriptore recolitur¹: « Post hinc biennium, quam rex Conradus in regni solium est sublimatus, imbecillitas virium servo Dei ultra solitum accrescere cœpit (laborabat enim paralysi, quod superius dictum est) cumque languore nimio ægotaret, intra civitatem se recepit, diem et horam futuræ redemptionis expectans. Et cum aliquanto tempore ægritudine magna detineretur, legati regis ad eum veniebant, qui in proxima hebdomada illuc regem esse venturum nuntiabant. De hac legatione servus Dei conturbatus, pro infirmitate sua multum doluit, quia neque regem digne excipere, nec servitium dignum pro infirmitate posset præbere.

2. « Inter hæc verba ad consuetam conversus consolationem, oratorium intravit et januam post se clausit, ibique diem integrum in oratione permansit. Cum sero autem factum esset, more solito discipulos convocari præcepit, laudibusque vespertinis peractis, cum lætitia est regressus, nobisque omnibus Dei gratia representatus est validus. Ita quippe omne spatium quod rex nobiscum fuerat, quasi impetratis induciis, validus erat. Discedente autem rege, Triburiam cum eo ivit, ibique tres dies mansit, deinde accepta licentia cum abiret, regem se non visurum amplius, multis audientibus, quasi joculando prædixit. Deinde aqua purissima se lavit (ideo scilicet ne mortuus lavaretur atque nudus adspiceretur, sic se componens ad sepulturam in omnibus comptus) nam et collum ac barbam, atque coronam radere jussit, indutusque vestibus puris, suos milites atque clientes, necnon et alios qui aderant, ad se intrare præcepit. Tunc universis magno fletu singultantibus, vir Dei vix qua poterat manu silentium indicens, ait, accusans seipsum secundum illud: Justus in principio sermonis accusator est sui, quod bonæ mentis sit ibi timere culpam, ubi culpa non sit:

3. « Patres venerandi, fratres amandi, filioli dilectissimi, vestro auxilio apud Deum jam indigeo, multum enim doleo, quod vos usque modo negligenter præcedebam, neque ultra modum super

¹ Vita Burch. in Præambulis ad libros Decr.

vos superbe exallabam, et non, ut justum erat, vos honorificabam nec diligebam, sed superbia illa quid mihi modo profuit? vel arrogantia quid me adjuvit? Multum mihi tunc obfuit, multaque mihi offendicula parit. Hesterno namque die unus fui ex ditissimis: sed jam exspecto quod mox futurus sim ut stercus et cinis. Talis est gloriatio nostra, talis est dominatio mundana. Nudus quippe egressus sum de utero matris meae, nudus revertar illuc, nihil præter peccata mea reportans, nisi Dei misericordia exhortante aliquid boni fecerim aliquando, hoc apud Deum me inventurum esse spero. Ecce nunc sum lotus, ecce viam longissimam ilurus, legationem durissimam exspecto paratus. Ex his miseriis facile cognoscere potestis liventes mundanarum rerum glorationes, quam fragiles et instabiles sint, quam plenae malis, quam caecae futurae, quas per speculum haud cognosco quasi in aenigmate, quamvis eisdem adhuc subjacens ex parte. Ergo cui servivi, arbitro Deo meo regi sempiterno, me meaque indubitanter committo, ut ipse me defendat, et secum illuc perducat, ubi anima terribiles occursus non timeat. Tandem apertam corporis sui dissolutionem aperte pronuntiabat. His dictis finitis, cum maxima tristitia foras exivimus, et tanti pastoris interitum omnes in commune lamentando flevimus.

4. « Tunc principes qui aderant intrantes, thesaurariam et cameram, ubi pecuniam putabant reconditam, diligenter, et angulos perscrutati sunt, et tandem scrinia librorum voluminibus plena spe pecuniae subverlentes, vano fortunae labore illusi sunt. Nam præter thesaurum Ecclesiasticum, nec aurum nec argentum ibi invenerunt, exceptis tribus tantum denariis, quos vir sanctus in vantage suo reliquit, quando alios pauperibus erogavit. Igitur soror ipsius, de qua diximus, abbatissa venerabilis, in orationibus et vigiliis perdurando ab eo non discessit: cumque dies paucos maxima infirmitate ægrotaret, nocte quadam, antequam decederet Dei servus, de lecto se erexit, et oculis ac manibus in cælum intentis diutius oravit. Illi qui aderant, labia ejus moveri videbant, sed quid oraret, quamvis caute intenderent, penitus non intelligebant. Deinde in lectum se deponens, sororem dextera tetigit et dixit: Ecce quod concupivi jam video; deinde dixit: Dominus vobiscum. Hoc cum tertio diceret, Redemptori nostro, cui servivit, quem amavit, quem quæsit, quem semper optavit, spiritum immaculatum reddidit.

5. « Habuit autem servus Dei quoddam scrinium, quod nullus nostrum aliquando apertum vidit: hujus quidem clavem sorori commisit, ut quidquid invenisset, in memoriam et dilectionem vite suae haberet. Quæ statim post obitum fratris, quibusdam convocatis ex nostris, dicta illius narravit, et tunc scrinium aperuit. Invenimus autem in eo cilicium hirsutissimum, et catenam ferream ex una parte quasi ex usu contritam. Quod ut vidimus, primum contra Dei famulum sæpe nos ne-

gligenter deliquisse, tonsis pectoribus communiter doluimus. Deinde ejus felices actus apud Deum ita rectos et absconsos digne admirantes, gratiarum actiones Deo nostro non sine lacrymis pro ejus vita retulimus ». Hæc ejus domesticus: pergitque ejusdem religiosas exequias recensere. Sed hæc satis. Reliquit autem egregia suae pietatis et ingenii monumenta, nempe libros viginti Decretorum, ex sacris Conciliis, summis Pontificibus sanctisque Patribus collectorum, quorum novissimo libros pœnitentiales, nempe Romanum, Bedæ et Theodori simul jungens, in viridem observantiam revocavit pristinam Ecclesiae disciplinam. Iusuper ad clerum suum admonitionem, in Ecclesia a diacono post lectionem sancti Evangelii recitatam, de his quæ præstanda essent ab ipsis, sexaginta sex brevibus capitibus distinctam scriptam reliquit, ut sic perseveraret apud eos in compendium redacta doctrina canonum.

6. *Conrado regi Romam venienti occurrit Joannes papa.* — Sed ut redeamus ad Conradum regem, ubi sanctum Burchardum visitavit, Italiam versus iter acceleravit, adeo ut Vercellis hoc anno sacrum Pascha celebrarit, regio habitu perlustrans provincias Longobardorum. Demum celebrato Natali Domini, Romam se contulit anno sequenti, quo et a Joanne Pontifice imperii coronam accepit, ut suo loco dicturi sumus. Hæc ex Actis sancti Gothardi Hildesemensis episcopi¹. Cæterum haud pacificus esse potuit ejus in Italiam adventus, resistentibus ex more eidem Longobardis, adeo ut armis fuerit ipsi via aperienda. Nam audi Glabrum²: « Interea, inquit, adeptus regni infulas Conradus, Italiam perrexit, secum ducens uxorem, quam (ut diximus) illicito ceperat matrimonio. Cui protinus in descensu Alpium, quem Curiam Galorum licet corrupte vocant, in oppido Cumis (Comi) occurrit cum summo apparatu papa Romanus, ut ante sponderat. Fuere tunc quidam de marchionibus Italiae, qui minus ei assensum præbuerunt: sic enim illis facere mos est, ut jam supra taxavimus in mortibus imperatorum. Namque Papienses, cæterorum superbissimi, palatium regis in sua civitate operoso sumptu constructum destruxerant usque ad solum », ne videlicet, cum illuc pergerent Germaniæ reges vel imperatores, ubi habitare possent haberent: nam loco castrorum atque munitionis illud fuerat Henrico imperatori adversus irruentes in ipsum furore percitos Papienses. Pergit Glaber: « Ille vero ut comperit, ferociter irruit, Iporegium primitus civitatem capiens, deinde cæteras cum castris universis propriae subjiciens ditioni ». In quibus rebus difficilibus peragendis reliqua hujus anni parte detentus, insequentem annum distulit ipse suum Romam adventum.

¹ Exstat apud Sur. die IV Maii lom. III. c. 24. — ² Glab. I. IV. in princ.

Anno periodi Græco-Romanæ 6519. — Anno Æræ Hispan. 1034. — Anno Hegiræ 417, inchoato die 21 Febr., Fer. 2. — Jesu Christi 1026.

— Joannis XIX papæ 3. — Conradi II reg. 3. Constantini imp. 51.

1. *Conradus rex Italiam petit.* — Ad num. 1 et seqq. Hermannus Contractus in Auctiori Chronico hoc anno habet : « Rex Conradus, sedatis ex parte rebellibus, circa tempus Quadragesimæ cum exercitu Italiam adiit, et Pascha Vercellis acto, totam, præter Luccam urbem Tusciæ, Italiam in eis Romanis partibus sibi subjugavit ». Hepidannus refert etiam solam Luccam Conrado regi restitisse. Burchardus Wormaciensis episcopus, qui Conradi regis institutor fuerat, eum discedentem secutus est Triburiam usque, et paulo post e vivis excessit, ut colligit Baronius ex ejus Vita. De ea Collectione canonum, collaborante *Olberto* magistro ejus, supra locuti sumus.

2. *Omnem Italiam eis Rom. subigit.* — Fusius hæc narrat Wippo, aitque : « Anno Incarnat. Christi MXXVI, Chunradus rex consilio et petitione principum regni filium, suum Heinricum puerum regem post se designavit, illumque Brunoni Augustensis Ecclesiæ episcopo in tutelam commendavit : et supradictis hostibus suis insidias per filium et cæteros fideles suos diligenter opponens, ipse cum exercitu copioso Italiam petere cœpit, etc. Rex ingressus Italiam per Veronam, inter Mediolanum et Papiam, Vercellas venit, ibique sanctum Pascha celebravit, etc. Rex vero jam totam pæne Italiam planam suæ ditioni subjugavit : Papiensem urbem, quoniam valde populosa fuit, subito capere non potuit : ipsos Papienses in gratiam recipere noluit, quia palatium quod destruxerant, in loco ubi prius fuerat, reædificare adhuc renuebant, etc. Ea tempestate grande malum factum est in Italia, propter contentiones Papiensium : multæ eorum Ecclesiæ in circuitu cum ipsis castellis incensæ sunt, et populus qui illuc confugerat igne et gladio periit; agri vastati sunt, vineæ truncabantur, exitum et introitum rex prohibebat, navigium abstulit, mercimonia vetuit, et ita per biennium omnes Ticinenses afflixit, donec omnia quæ præcepit, omni dilatione postposita compleverant ».

3. *In Alemanniam rediit.* — Narrat postea seditionem *Ravennæ* factam, quod Ravennates exercitum regis *de civitate expellere conati sunt*, quæ tanta fuit, ut rex Conradus, dum esset in cubiculo, hanc seditionem intelligens, arma corripuerit; sed

ut vidit « Ravennates bello victos ad Ecclesias confugere et undique latibula quarere, misertus eorum, quoniam ex utraque parte sui erant, exercitum de persecutione civium revocavit, et ita in palatium se recepit ». Subjungit Wippo Conradum ob maximos calores æstatis secessisse in montana loca, hincque discessisse tempore autumnali, additque : « Italiam planam iterum peragrans, habitis consiliis et regalibus colloquiis in opportunis locis, atque rebelles in vincula mittens, regnum pacificavit : et sic pertransiens, usque ad confinium Italiæ et Burgundiæ pervenit ».

4. *Moritur Richardus II Normanniæ dux.* — Willelmus Gemmeticensis, lib. 5 Hist. Normann. cap. 47, Richardi II Normannorum ducis mortem his verbis narrat : « Richardus dux, quamvis præcellentissimorum actuum prærogativis longe lateque claruerat perspicuus, tamen Christi cultor exiliter assiduus, adeo ut monachorum atque clericorum jure vocetur pater piissimus, et pauperum sustentator indefessus. His et hujusmodi probitatum vicens titulis, cœpit vehementer aggravari ægitudine corporis, etc., novissime autem adscitum Richardum filium suum consultu sapientum præfecit suo ducatu, et Robertum fratrem ejus comitatui Oximensi, ut inde illi persolveret debitum obsequii. Denique omnibus quæ ad Dei cultum pertinere videbantur strenue dispositis, millesimo vicesimo sexto anno ab Incarnatione Domini hominem exivit ». Postea librum sextum incipiens, ait, se imposterum narraturum, quæ partim intuitu partimque veracium relatione comperit. *Robertus*, contempto Richardi ducis hujus nominis III dominio, adversus eum rebellavit, tandemque a perfidia resipuit, et in pristinam concordiam rediit; sed Richardus, « ut plurimum retulerunt, veneno mortem obiit. Hoc millesimo vicesimo octavo ab Incarnatione Domini anno contigit », inquit Willelmus. Verum in anno emortuali *Richardi III* deceptus est; nam non tantum in Chronicis Viridunensi, in priori Sancti-Michaelis in periculo maris, et in Rothomagensi ad annum MXXVI, Richardus III *codem anno* (id est, ut existimo, ducatus) *mortuus* dicitur, sed etiam in Chronico Fontanellensi, tomo III Spicilegii relato, et ab auctore hoc tempore vivente elucubrato, qui ait :

« Nam neque annum in principatu immatura præventus morte peregit ». Vivebat enim adhuc anno sequenti initio mensis Junii, quo juxta eundem chronographum, Gerardus abbas Sancti-Wandregisili, corpus sancti Wilfranni archiep. Senonensis in Basilicam Sancti-Wandregisili magna pompa detulit : « Facta est autem », inquit idem chronographus, « hæc translatio, anno Dominicæ Incarnat. millesimo vicesimo septimo, kal Junii, Henrico rege Francorum regnum præler matris suæ voluntatem invasum tenente, principatum vero Normanniæ Tertio Richardo legali modestia disponente ». Qui locus, ut obiter notabo, egregius est ad confirmandum quod anno mxxviii dicemus, Henricum nempe die decima quarta mensis Maii anni mxxvii, reluctantem Constantia matre, a Roberto patre in regni consortium assumptum esse. Porro tam chronographus Fontanellensis quam alii, testantur Richardum III et Robertum, Normanniæ duces, magnis et insignibus virtutibus præditos fuisse, atque chronographus Virdunensis, de Richardo *Gratia Dei* cognominato verba faciens : « Hunc ter beatum Richardum inter primos habuit (scil. Robertus dux,) consilio ejus regni Normanniæ tractabantur negotia ». Denique observo hanc translationem factam fuisse feria quinta, quæ anno sequenti cum die prima Junii concurrit, indeque apparere sanctorum translationes, Ecclesiarum dedicationes, et episcoporum ordinationes hoc tempore sæpe aliis diebus quam Dominicis peractas fuisse, quod numero sequenti confirmabitur.

5. *Bruno, postea Leo IX, fit episc. Tullensis.* — Bruno, qui Pontifex Romanus creatus, dictus Leo hujus nominis IX, anno mxxv « vice pontificis Herimanni (qui erat episcopus Tullensis) in expeditione Conradi imperatoris super Longobardiam et maxime super Mediolanum tunc rebellem est profectus, Levitico officio insignitus. Namque illo suo antistite annis morbisque prægravato, ipse auxiliares militum copias imperatori venientes a Tutlo ducendas suscepit, tam ejusdem episcopi quam Augusti placito : salvo tamen per omnia proprii gradus sacramento. In illius itaque sæcularis militiæ dispositione, sic repente sagax apparuit ac providus, quasi hujusmodi negotiis tantum fuisset hactenus exercitatus », inquit Wibertus lib. 4 Vitæ S. Leonis papæ IX, qui paulo post subdit, *instante anno millesimo sexto*, Herimanno demortuo, Brunonem concordi cleri voto episcopum Tullensem electum, tandem *die Dominicæ Ascensionis tertio-decimo* (legendum quartodecimo) kal. Junii, a suo consobрино Theodorico Metensi præsule pontificaliter inthronizatum esse, et postea *quinto idus Septembris* ejus ordinationem peractam. Dixi autem loco *XIII kal. Jun.* legendum esse *XIV kal. Jun.*, quia hoc anno Ascensio Domini in eum diem incidit. Nec existimandum diem V idus Septembris meudose ibi descriptum esse, quod in feriam sextam incidat ; hoc enim et superiori sæculo, episcoporum ordinationes aliis quandoque diebus quam Dominicis factæ, uti mox insinuavi.

JOANNIS XX ANNUS 4. — CHRISTI 1027.

1. *Coronatio Conradi imperatoris.* — Surgit annus vicesimus septimus post millesimum, Indictione decima, quo Romam se contulit Conradus rex, illuc perveniens in majori Hebdomada ; atque Paschatis die a Joanne Pontifice imperator solemnibus ritibus inungitur et coronatur. De his enim hæc in Gothardo, ubi anni singuli rerum gestarum Conradi distinguuntur, habentur : « Rex autem, ubi Natalem Domini egisset, ad Limina Apostolorum tetendit, atque ita prospero itinere pridie

Cænæ Dominicæ Romam lætus pervenit, et ipso sancto Resurrectionis, die coronam imperii a Joanne Pontifice cum multa gloria accepit. Proxima Dominica inde digressus, et potenter per regionem illam iter faciens, in pace rediit in Germaniam, sanctique Joannis Baptistæ Nativitatem celebravit Herbipoli novus imperator ». Hæc de itinere. Quod autem adeo cito recesserit Conradus ab Urbe, quæ obortæ sunt rixæ Germanorum militum cum Romanis, fuisse causa pulatur ; de quibus ista apud

Ottonem Frisingensem ¹ : « Anno ab Incarnatione Domini millesimo vicesimo septimo, Conradus Roman veniens, in ipsa die Paschalis solemnitate, inter duos Anglorum et reginæ Giselæ avunculum Rudolphum Burgundiæ reges honorifice procedens, a summo Pontifice Joanne coronatur, et ab omni populo Romano imperatoris et Augusti nomen sortitur. In ipsa vero Paschali hebdomada tumultu orto inter milites imperatoris et cives, gravis pugna committitur, cæsisque multis, Romanis fugientibus, imperator victoria potitur. Post hoc facta cum civibus pace, ab Urbe regreditur ».

Glaber de his agens hæc habet ² : « Sicque Roman deveniens, coronam ex more sumpsit imperii. Cui dum episcopi suggererent, ut auctoritate Romani Pontificis qualiter illis promiserat, repudium illiciti faceret conjugii, graviter accipiens, dixit : Se imperatorem creatum nullo modo debere uxore viduari, ac sicut inepte cœperat, tenuit ». Hæc Glaber. Dispensasse cum eo summum Pontificem par est credere, cum appareat ex ea progenitos filios habiles esse legitimos, atque regni substitutum hæredem eorum primogenitum : cui et tunc nuptui traditam filiam Cnuti regis Daniæ et Angliæ, quem et Canutum appellant, nomine Chunigundem, Urspergensis affirmat.

2. *Canuti Angliæ regis piissimi Epistola.* — Quantum autem ipse Cnutus rex, cognomento Magnus, ex hac in Urbem ad Limina Apostolorum pietatis ergo peregrinatione suscepta profecerit, ex ejus litteris inspicere licet. Extant ipsæ quidem nobile antiquitatis monumentum, recitatæ tum a Willelmo Malmesburiensi, tum etiam ex parte ab Ingulpho, qui sicut cæteris antiquitate, ita et veritate cum auctoritate præstantes, res Anglorum sunt prosecuti ; quæ sic se habent ³ :

« Cuncto rex totius Angliæ et Danamarchiæ, et Norvegiæ, et (magnæ) partis Svavonum, Ailnoto (Egelnoto) metropolitano, et Africo Eboracensi, omnibusque episcopis et primatibus, et toti genti Anglorum tam nobilibus quam plebeis salutem.

« Notifico vobis noviter me fuisse Romam, oratum pro redemptione peccatorum meorum, et pro salute regnorum, quippe subjacent regimini populorum. Hanc quidem professionem Deo jam olim devoveram, sed pro negotiis regni et causis impediens lucusque non poteram perficere : nunc autem ipsi Deo meo omnipotenti valde humiliter gratias ago, quod concessit in vita mea Petrum et Paulum beatos Apostolos, et omne sanctuarium, quod intra Urbem Romam aut extra addiscere potui, expetere, et secundum desiderium meum præsentialiter venerari et adorare. Et ideo hoc maxime patravi, quia a sapientibus didici, sanctum Petrum Apostolum magnam potestatem accepisse a Domino ligandi atque solvendi, clavigerumque esse regni cælestis ; et ideo specialiter

ejus patrocinium apud Deum expetere, valde utile duxi.

3. « Sit autem vobis notum, quia magna congregatio nobilium in ipsa solemnitate Paschali ibi cum domino papa Joanne et imperatore Conrado erat, scilicet omnes principes gentium a monte Gargano usque ad istud proximum mare. Qui omnes me et honorifice susceperunt, et magnificis donis honoraverunt. Maxime autem ab imperatore donis variis et muneribus pretiosis honoratus sum, tam in vasis aureis et argenteis, quam in palliis et vestibus valde pretiosis. Locutus sum igitur cum ipso imperatore et domino papa, et principibus qui ibi erant, de necessitatibus totius populi mei tam Angli quam Dani, ut eis concederetur lex æquior et pax securior in via Romam adeundi, et ne tot clausuris per viam arcerentur, et propter injustum teloneum fatigaretur. Annuitque postulatis imperator, et Rodolphus rex, qui maximæ ipsarum clausurarum dominatur ; cunctique principes edictis firmaverunt, ut omnes mei tam mercatores, quam alii orandi gratia viatores, absque omni angaria clausurarum et teloneorum cum firma pace Romam eant et redeant.

4. « Conquestus iterum sum coram domino papa, et mihi valde displicere dixi, quod mei archiepiscopi in tantum angariabantur immensitate pecuniarum quæ ab eis expetebantur, dum pro pallio accipiendo, secundum morem, Apostolicam Sedem expeterent ; decretumque est ne id deinceps fiat. Cuncta enim, quæ a domino papa, et ab imperatore, et a rege Rodolpho cæterisque principibus, per quorum terras nobis transitus est ad Romam, pro meæ gentis utilitate postulabam, libenter annuerunt, et concessa etiam sacramento firmaverunt sub testimonio quatuor archiepiscoporum, et viginti episcoporum, et innumerae multitudinis ductum et nobilium qui aderant. Quapropter Deo omnipotenti gratias magnificas reddo, quia omnia quæ desideraveram, prout mente decreveram, prospere perfeci, votisque meis ad velle satisfeci.

5. « Nunc itaque sit notum, quia ipsi Deo supplex devovi vitam meam amodo in omnibus justificare, et regna mihi subdita populosque juste et pie regere, æquumque judicium per omnia observare : et si quid per meæ juventutis intemperantiam aut negligentiam hactenus præter quod justum erat est actum, totum, Deo auxiliante, dispono emendare. Idcirco obtestor et præcipio meis consiliariis, quibus regni consilia credidi, ne ullo modo, aut propter meum timorem, aut alicujus potentis personæ favorem, aliquam injustitiam amodo consentiant, vel faciant pullulare in omni regno meo. Præcipio omnibus etiam vicecomitibus, et præpositis universi regni mei, si meam volunt habere amicitiam aut suam salutem, ut nulli hominum, nec diviti nec pauperi, vim injustam inferant ; sed omnibus tam nobilibus quam ignobilibus sit fas justa lege potiundi, a qua nec propter favorem regum, nec propter alicujus

¹ Otto Frising. l. vi. c. 29. — ² Glab. l. iv. præf. — ³ Willel. Malmesh. de gest. Reg. Angl. l. ii. c. 11

potentis personam, nec propter mihi congerendam pecuniam ullo modo devient; quia mihi nulla necessitas est, ut iniqua exactione mihi pecunia congeratur.

6. « Ego itaque notum vobis fieri volo, quod eadem via qua exivi regrediens, Danimarchiam tendo, pacem et firmum pactum omnium Danorum consilio compositurus cum eis gentibus, quæ nos et vita et regno privare, si eis fuisset possibile, volebant, sed non potuerunt, Deo scilicet virtutem eorum destruente, qui nos sua benignitate in regno et honore conservet, omniumque inimicorum nostrorum potentiam annihilat. Composita denique pace cum gentibus quæ in circuitu nostro sunt, dispositoque et pacato omni regno nostro hic in Oriente, ita ut nulla parte bellum aut inimicitias aliquorum timere habeamus, quam citius hac æstate apparatus navigii habere potero, Angliam venire dispono. Hanc autem Epistolam jam præmisi, ut de mea prosperitate omnis populus regni mei lætificetur: quia, ut vos ipsi scitis, nunquam memetipsum nec meum laborem abstinui nec adhuc abstinebo impendere pro omnis populi mei necessaria utilitate. Nunc igitur obtestor omnes episcopos et regni mei præpositos, per fidem quam mihi debetis et Deo, quatenus faciatis, ut antequam Angliam veniam, omnia debita quæ secundum legem antiquam debemus, sint persoluta, scilicet eleemosyna pro aratris, et decimæ animalium ipso anno procreatorum, et denarii quos Romam ad sanctum Petrum debetis, sive ex urbibus, sive ex villis, et mediante Augusto decimæ frugum, et in festivitate sancti Martini primitiæ seminum ad Ecclesiam sub cujus parochia quisque degit, quæ anglice Curescet (Chireseth) nominatur. Hæc et alia si cum venero non erunt persoluta, regia exactio secundum leges, in quem culpa cadit, districtè absque venia comparabit ». Hucusque recitata litteræ Cnuti Magni. Ex quibus plane redarguuntur erroris, qui ejusdem regis Romam adventum ponunt anno Domini millesimo trigesimo secundo. Sed cum constet, tunc contigisse, cum illic esset Conradus imperator et Rudolphus Burgundiæ rex, utique hoc anno (ut vidisti) id oportuit factum esse.

7. Subjicit autem ista Willelmus: « Nec dicto deterius fuit factum: omnes enim leges ab antiquis regibus et maxime ab antecessore suo Ethelredo latas sub interminatione regis mulctæ, perpetuis temporibus observari præcepit: in quarum custodia etiam nunc tempore bonorum sub nomine regis Eduardi juratur, non quod ille statuerit, sed quod observaverit ». Et paulo post: « Domum rediens, apud Papiam brachium sancti Augustini doctoris, centum talentis argenti et talento auri comparatum, apud Conventriam misit ». Hæc ipse.

8. *De falsis reliquiis impia mundinatio et portenta.* — Cum autem reliquias sanctorum tam charo pretio distrahi quidam nebulo intelligeret, ex mentitis sanctorum reliquiis nefariam procura-

vit exercere mercaturam, de quo Glaber, qui antequam de illo agat, ejusmodi ad hoc ipsum spectantem tempus ingerit narrationem¹: « Castrum igitur erat per id tempus in gente Longobardorum, quod (ut erat) vocabatur Mons, videlicet fortis, plenum etiam ex nobilioribus ejusdem gentis. Hos nempe cunctos ita maculaverat hæretica pravitas, ut ante erat illis crudeli morte finire, quam ab illa quoquo modo possent ad saluberrimam Christi Domini fidem revocari. Colebant enim idola more paganorum, ac cum Judæis inepta sacrificia litare nitebantur. Sæpissime denique tam Mainfredus marchionum prudentissimus, quam frater ejus Alricus, Astensis urbis præsul, in cujus scilicet diœcesi locatum habebatur prædictum castrum, cæterique marchiones ac præsules circumcirca creberrimos illis assultus intulerunt, capientes ex iis nonnullos, quos dum non quivissent revocare ab insania, igne cremavere. Contigit ergo in vicinio haberi aliud castrum nostræ religionis et fidei, in quo quidam miles aliquando ægotans ad extremum pæne devenerat. Ad quem utique visitandum ex hæreticorum castello illorum præcipua juxta morem veniens mulier; revera potius, ut evidentior fieret sectæ ejusdem nequitia, protinus ut ingrediens domum in qua æger decubabat, intraret, repente prospiciens is qui languebat, vidit intrare cum eadem muliere ad se innumerabilem exercitum in nigerrimis vestibus facielusque teterimis. Qua vero ingressa, postquam languentis frontem ac pulsum pectoris, et cætera ut usus habet manu perlustravisset, pronuntiaretque illum convaliturum in proximum, domum egressa est, totaque simul familia cum illa solum relincente infirmum. Statimque affuit illi nigrorum quem viderat globus; cui ita qui videbatur illorum princeps, inquit: Agnoscis me, inquires, Hugo? hoc enim erat illius ægri vocabulum. Cumque ille respondens diceret: Tu quis es? dixit ei: Potentissimus potentum, ac ditissimus divitum. Ego qui occurro tibi, si me tantum credideris facere posse, et te a morte quæ præsens imminet eripiam, longoque vives tempore. Et ut certissime credas quod spondeo: noveris meo auxilio meaque industria Conradum hoc tempore imperatorem esse creatum. Tu quippe bene nosti, quod nullus imperatorum ita velociter omnem Germaniam atque Italiam, sicut iste, suæ subjugavit ditioni. Novi, inquit æger, et mirum diu mihi cum cæteris fuit. Deinde vero primæ fraudis auctor adjecit: Nonne etiam in transmarinis partibus regnum Græcorum post Basilium Michaeli mihi obedienti tradidi? Idcirco crede mihi, quia faciam tibi multo majora quam sperare queas, teque ipsum sanitati restituam. Erat quippe fama tunc temporis, quod idem Michael cubicularius fuisset Basilii, clamque illi venenum in potu ad necem dedisset, cujus proculdubio imperii post mortem ejus sumpsit coronam,

¹ Glab. l. iv. c. 2.

cui etiam (ut par erat) regimen imperii non satis utile fuit. Interea memoratus Hugo in se reversus, dextera signum venerabilis Crucis exprimere tentans dixit : Ego vero JESUM Dei filium testor, quem adoro, credo et confiteor ; et non alium te omnino credidero, nisi ut fuisti et es, fallacem diabolum. Tunc dæmon continuo hanc vocem edidit : Quæso, ne brachium contra me erigas ; sicque continuo omnis ille globus ut fumus evanuit. At ille exclamans voce qua potuit, accurrunt quique domestici ; narrat illis ex ordine quæ vidit, quæ audivit. Quibus dictis, ipso die ante solis occasum obiit. Nulli quippe dubium, quoniam quæ sibi visa nobis vidit ». Ilæc de his Glaber, quibus de sacrarum reliquiarum nundinatione, de qua præfati sumus, ejusmodi subjecit historiam :

9. « Fuit enim in præscripto tempore homo plebeius, mangonum callidissimus, ignoti tamen nominis et patriæ, quoniam pro diversitatibus locorum quærens latebram ne agnosceretur, fraudulentè imponebat sibi vocabula, vel de qua foret provincia. Custodiebat quoque e tumulis clanculo ossa evellens a cineribus nuperrime defunctorum hominum, sicque imposita in diversis apophoretis venditabat apud plurimos, pro sanctorum martyrum seu confessorum reliquiis. Illic vero post innumeras hujuscemodi illusiones in Galliis patratas, perfuga venit ad loca Alpium, ubi persæpe brutæ gentes inhabitant, habentes in arduis plurima domicilia. Ibi nempe se Stephanum nuncupavit, qui alias Petrus, alias Joannes dictus fuerat. Illic ergo more solito noctu colligens e loco abjectissimo ignoti hominis ossa, quæ posuit in capsella et feretro, dicebat sibi angelica ostensione revelatum fuisse, quem fingebat, esse sanctum martyrem nomine Justum. Mox quoque vulgus (ut se in talibus habere solet) ignavum, quidquid rusticane plebis fuit, totum ad hanc famam confluit ; pœnitet insuper si non est ibi morbus, cui curari deponat. Tunc ducit debiles, confert munuscula, pervigil tenet excubias, præstolans repentina fore miracula, quæ (ut diximus) aliquoties permittuntur fieri a malignis spiritibus tentatorie, peccatis hominum præcedentibus, quod tunc proculdubio evidentissime claruit. Multimodæ quippe membrorum reformationes ibidem visæ sunt extitisse, ac insignia pendere oscillorum multiformia ; nec tamen Moriannæ, vel et Coticæ seu Gratinonæ urbium præsules, in quorum diocæsis talia profanabantur, diligentiam hujus inquirendæ rei adhibuere ; quin potius conciliabula statuantes in aliquibus nihil aliud nisi inepti lucri, quæstum a plebe, simulque favorem fallaciæ exigebant.

10 « Interea Mainfredus marchionum ditissimus, hujusmodi famam comperiens, misit e suis, qui vi rapientes illud quod colebatur simulacrum, sibi deferrent quem æstimabant martyrem venerandum. Imperat idem marchio constituere monasterium in Suetiæ castro, quod est antiquissi-

imum inter Alpes, in honore Dei omnipotentis, ejusdemque genitricis Mariæ semper Virginis, in quo etiam post expletionem operis, illum cum aliis quamplurimis sanctorum pignoribus locare decreverat. Post paululum quoque, completo Ecclesiæ opere, statutoque dedicationis die, accersitis episcopis in gyro degentibus, cum quibus etiam sæpe nominatus abbas Willelmus, nonnulli et alii abbates affuerunt. Erat autem tunc prædictus ibi Mango, jam dicto marchioni percharissimus effectus, quippe quoniam spondebat se multo pretiosiora sanctorum pignora in proximo revelaturum, quorum scilicet gesta et nomina atque passionum certamina (ut cætera) fallaciter confingebat. Qui cum a doctioribus quibusque interrogaretur, qualiter talia pernosceret, minus verisimilia blaterans personabat. Namque egomet cum sæpe nominato abbate illuc deveniens, interrogans ; aiebat namque : Apparet, inquires, mihi noctu Angelus, narratque ac docet quæcumque me velle scire noverit : et tamdiu apud me manet, usque dum ego recedere compello. Cum vero ad hæc respondentes sciscitaremur, an vigil seu in somnis hoc cernebat, subjunxit : Per singulas pæne noctes eripit me Angelus e lectulo, uxore mea ignorante, qui post multa colloquia salutans me atque deosculans recedit. Nos quoque expoliatum calliditatibus intellegendis mendacium, cognovimus, virum non angelicum, quin potius fraudis ac malignitatum ministrum.

11. « Præterea pontifices rite peragentes ob quam venerant Ecclesiæ consecrationem, intro-miserunt cum cæteris reliquiarum pignoribus ossa illius profani astu adjuncta, non tamen sine magna utriusque plebis exultatione, quæ innumerabilis illuc convenerat (contigit ergo isla fieri die XVI kalendas Novembris) idcirco nempe, quoniam fautores hujus erroris asserebant esse eadem Justi martyris ossa, qui eo die in Bellovaco Galliarum passus est urbe, cujus etiam caput Antisiodorum, ubi natus et nutritus fuerat, relatum est et habetur. Sed ego qui rei novitatem noveram, frivolum quod dicebatur asserebam. Elegantiores tamen virorum personæ, cognoscentes figmenta fallaciæ, fidem dabant assertioni quam protuleram. Nocte denique insecuta, visa sunt a quibusdam monachorum seu aliorum religiosorum, monstruosa in eadem Ecclesia phantasmata, atque a locello, in quo inclusa habebantur ossa, formas nigrorum Æthiopum exisse, necnon ab Ecclesia recessisse. Sed licet plures sanæ mentis detestabile figmentum abominandum clamarent, vulgus tamen rusticane plebis injusti nomen pro justo venerans, olim in suo permansit errore. Nos autem idcirco ista retulimus, ut a multiformis dæmonum seu humanorum errorum, qui in orbe passim abundant, præcipue in fontibus seu arboribus, ab ægris incaute veneratis caveatur ». Hæc Glaber.

12. Sane quidem et temporibus Apostolorum erant in Ecclesia falsi fratres (ut testatur Aposto-

lus¹ et illi plures numero, qui quæstum pietatem putarent². Querela est pariter sancti Augustini, in libro quem scripsit De opere monachorum, in Africa quosdam pseudomonachos impostores circumsisse distrahentes lucri causa reliquias, quas dicerent ossa martyrum. Sed non defuit Deus, cum opus fuit, servis suis, monendo revelans, si quis circulatorum fraude in reliquias quas fideles colerent error irrepsisset, ut legimus factum apud Severum, in Vita sancti Martini, sive alias, vel ut modo hic accidisse cognovimus. Si quis autem divinitus factæ de his revelationi non pareat, sed obstinatus in errore permanere voluerit, excipiet illam digne sententiam³: Qui sordescit, sordescat adhuc. Sed etsi non tunc, eo modo incalescente vulgo in defensionem erroris, postea tamen emendatam constat fuisse fraudem illam, cum neque ibi, neque circumcirca alicubi locorum remanserit memoria Justi martyris, titulo falso conficta.

13. *Obitus S. Romualdi.* — Hoc anno ponitur obitus sancti Romualdi, de quo sæpe superius diversis in locis: cujus Vitam egregiam Petrus Damiani conscripsit anno decimo quinto post ejus mortem. Verum cum dicit eum vixisse annos centum viginti, fateor, numerum ejusmodi non invenio, si habenda sit ratio temporis sedis Honesti archiepiscopi Ravennatis, sub quo ipsum Romualdum monasticum habitum induisse, constans est ipsius assertio Petri Damiani. Verum eundem Honestum sedere cœpisse anno nongentesimo septuagesimo primo, sedisseque usque ad annum nongentesimum octogesimum tertium, qui prosectus est locupletius res Ravennates, Rubeus vir insignis, amicus noster, ostendit. Quod si tantum agebat suæ ætatis annum vicesimum, cum monasticum induit habitum, ut Petrus Damiani testatur, idque contigit sub Honesto: sane quidem, etiamsi velimus eum anno primo Honesti initiatum monastico ordine, usque ad annum millesimum septuagesimum primum eum oportuit pervenisse, ut asseri possit eum centum viginti annos vixisse. Verum nec Petrus ipse, qui Vitam scripsit, superstes tunc erat. Sic igitur ad certiores calculos anni Romualdi sunt revocandi. Constat autem ipsum in sanctorum numerum adscriptum quinquennio post ejus obitum eo tantum ritu, qui tunc erat in usu, nempe ut petentibus concederet Apostolica Sedes super corpus ejus altare construere, ut idem

Petrus affirmat, dum ait¹: « Post quinquennium vero sancti viri obitu, data monachis ab Apostolica Sede licentia, ut super venerabile corpus ejus altare construeretur. Sic et idem Petrus, in Epistola ad Henricum archiepiscopum Ravennatem², de aliis sanctis viris refert miraculis coruscantibus, qui hoc eodem tempore vixere, supra quorum corpora altaria sunt erecta, atque desuper sacrosancta sacrificia immolata, ut fuere Romualdus Camerinensis, Amicus Ratisponensis, Guido Pomposianus, Firmianus Firmensis et alii plures.

14. *De Alphonso V in Hispania et Garsia rege Vasconum.* — Hoc eodem anno Alphonsus quintus ejus nominis, rex Legionensis in Hispania, dum præliaretur adversus Saracenos in Lusitania apud Visæum, sagitta percussus interiit summo mœrore omnium, ob insignem ejus pietatem erga Dei Ecclesiam, et in ejus hostes impios Sarracenos immotum animi propositum: quo factum est, ut magnum sui desiderium cum dolore immenso reliquerit. Porro ex ejus sepulchri inscriptione ita tempus ejus obitus redditur exploratum, quæ sic se habet, rudi quidem stylo, ut ejus temporis ferebat iniqua conditio, silvescente inter assidua prælia latinitate:

HIC IACET REX ADEFONSVS, QVI POPVLAVIT LEGIONEM POST DESTRVCTIONE ALMANZOR, ET DEDIT EI BONOS FOROS, ET FECIT ECCLESIAM HANC DE LUTO ET LATERE. HABVIT PROELIA CVM SARRACENIS, ET INTERFECTVS EST SAGITTA APVD VESEYM IN PORTYGAL. FVIT TER FILIYS VEREMYNDI ORDONII OBIT AERA MLXV. NONIS MAIL.

Est hic ipse Christi annus millesimus vicesimus septimus: successit in regnum ejus filius Veremundus. Regebat tunc ipsam Legionensem Ecclesiam Attilianus episcopus, qui egregia claruit sanctitate, sicut et Florianus presbyter, qui sanctorum honore digni, jure catalogo ipsorum reperiuntur adscripti.

15. Quo pariter tempore (sed nescitur certus annus) Garsias rex Vasconum ad Limina sanctorum Apostolorum advenit, expiandi causa delicti in matrem commissi, cum falso illam apud patrem adulterii criminis accusasset. Hæc pluribus recentiores, res Hispaniarum prosecuti.

¹ 2. Cor. XI. — ² 1. Tim. VI. — ³ Apoc. XXII.

¹ Pet. Dam. in Ro. c. 79. apud Sur. tom. III. die XIX Jun. — ² Pet. Ep. ad Henric. c. 29. habetur tom. III. Biblioth. SS. Patrum.

Anno periodi Græco-Romanæ 6520. — Anno Æræ Hispan. 1065. — Anno Hegiræ 418, inchoato die 11 Febr., Fer. 7. — Jesu Christi 1027.

— Joannis XIX papæ 4. — Conradi II reg. 4. imp. 1. Constantini imp. 52.

1. *Conradus rex Roman venit.* — Ad num. 1. Wippo in Vita Conradi Salici, in qua annum a Nativitate Christi exorditur, gesta ab eo hoc anno accurate narrat : « Inchoante anno Nativit. Christi **XXXVII**, rex Chuonradus in Iporegia civitate (id est Eporedia, vulgo Jurea) Natalem Domini celebravit : illuc Rudolphi regis Burgundiæ legati venerant, promittentes illum Romam venturum ad electionem et consecrationem imperatoriam regis Chuonradi : quod rex gratanter accepit, et remissis legatis cum muneribus, ipse Padum transiens, ad Romam tendere cœpit. Veniens autem ad Lucam civitatem, invenit eam sibi adversam cum Reginhero marchione : ibi rex paululum moratus, post paucos dies civitatem et marchionem in deditionem acceperat, omnemque Tusciam sibi breviter subjugavit, sicque triumphando Romanam visitat arcem.

2. *Coronatur imperator.* — « Igitur rex Chuonradus, Romam ingressus eodem anno ut supra, id est, a Nativitate Salvatoris **XXXVII**, Indictione decima, a papa Joanne et universis Romanis regio honore mirifice receptus est : et in die sancto Paschæ, qui eo anno VII kal. Apriles terminabatur, a Romanis ad imperatorem electus (vides imperatores a Romanis electos fuisse), imperialem benedictionem a papa suscepit » Cæsar et Augustus Romano nomine dictus. « Quinetiam regina Gisela imperatricis consecrationem et nomen ibidem accepit. Illis ita peractis in duorum regum præsentia, Rudolphi regis Burgundiæ et Cnutonis regis Anglorum, divino officio finito, imperator duorum regum medius ad cubiculum suum honorifice ductus est ». Baronius Henrico Conradi imp. primogenito tunc nuptui traditam filiam Canuti asserit, sed anno **XXXV** eum hac in re deceptum esse ostendemus. Paucis interpositis : « Imperator in Apuliam processit, et Beneventanum et Capuam ac reliquas civitates illius regionis seu vi sive voluntaria deditione sibi subjugavit, et Nortmannis, qui de patria sua, nescio qua necessitate compulsi, in Apuliam confluerant, ibi habitare licentiam dedit, et ad defendendos terminos regni adversus Græcorum versulias, eos principibus suis coadunavit. Cunctis rebus rite et prospere sibi ce-

denlibus, imperator reversus, præteriens Romam, iterum Italiam pertransiit ».

3. *Gesta ab eo in Alemannia.* — Vides Wipponem presbyterum, in Aula Conradi viventem, hunc semper *regem* vocasse, donec a Pontifice Romano coronatus fuit, et postea eum semper *imperatorem* appellandum ostendere, qui contendunt Germaniæ reges statim ab electione dictos fuisse imperatores, nomen suum viris doctis deridendum dare; cum rem certissimam non solum in dubium vocare, sed etiam negare audeant. « Pace per totam Italiam confirmata, imperator Chuonradus prospero reditu in Alemanniam venit : et in Augusta Vindelica colloquium familiare cum suis fidelibus tenens, de proditoribus patriæ tractare cœpit ». Eo enim in Italia morante multæ factiones eruperant. « Imperator pertransiens Alemanniam, cunctos qui sibi rebelles fuerant in deditionem recepit, et munitiones eorum dejecit; et perveniens usque ad Basileam, Rodolphum regem Burgundiæ alloquitur qui illic sibi occurrebat extra urbem, juxta vicum qui Mittenha dicitur; et habito familiari colloquio, imperator regem secum duxit in urbem. Confirmata inter eos pace, Gisela imperatrice hæc omnia meditante, regnoque Burgundiæ imperatori tradito, eodem pacto quemadmodum prius antecessori suo Henrico imperatori datum fuerat, rex iterum donis ampliatus cum suis reversus est in Burgundiam; imperator vero descendens per Rhenum in Franciam venit, ibique dux Chuono (id est Conradus, Conradi et Mathildis filius) patruelis ejus, prius rebellis, se reddidit : quem imperator in liberis custodiis aliquantulum castigavit, destructisque munitionibus suis quas optimas habuit, in gratiam illum recepit, totumque in honorem suum sibi restituit. Paulo post Adelbero dux Histrianorum sive (id est, ut et passim alibi hæc particula significat) Carintanorum, reus majestatis, victus ab imperatore, cum filiis suis exulatus est, et ducatum ejus iste Chuono ab imperatore suscepit : quem ducatum pater ejusdem Chuononis dudum habuisse perhibetur. Ita dux Chuono fidus et bene militans imperatori et filio suo Henrico regi, quousque vixerat permansit.

4. *Vernheri episc. Argentinensis legatio ad*

Græcorum imperatorem. — « Eodem tempore, Wernherius Argentine civitatis episcopus, ab imperatore legatus Constantinopolim mittitur. Qui dum causa orationis Hierosolimam pergere se fingeret, ut putavimus, iudicio Domini quem fallere nemo valebit, mirabiliter prohibitus est. Nam dum magnam comitatum hominum, majorem quoque mutorum animalium, equorum, boum, ovium, porcorum, multasque delicias sæculares ultra modum secum educeret, perveniens in Ungariam, a rege Stephano contradicta est sibi via, quod eo tempore nulli oratorum accidit. Inde reversus per Bajoariam, cum omni comitatu suo pergens Italiam intravit, et multum circa fines Veronæ moratus, tandem cum maximo labore per Venetiam mare Adriaticum ingressus navigio calamitoso Constantinopolim pervenit. Cumque ab imperatore Græcorum (Constantino sc.) honorifice susceptus esset, secumque satis familiariter conversaretur, desiderare cœpit, ut imperatoris auxilio Hierosolimam adiret: quo desiderio, semper aliqua re intercedente, nunquam potiri valuit. Sequenti vero tempore obiit, et sepultus est in eadem urbe, et episcopatum ejus Willelmus Argentinensis canonicus suscepit. Legationis tamen causam postea imperator Græcorum aureis litteris imperatori Chuonrado rescripsit ». Wernherum autem Argentinensem episcopum anno mxxix mortuum esse, eique Willelmum subrogatum, testatur etiam Wolfherus scriptor hujus temporis, in Vita sancti Godehardi episcopi Hildensheimensis, cap. 4. Idem habet chronographus Hildensheimensis ad annum mxxix. Porro is Willelmus frater erat Gregorii papæ V, ut ex dictis constat.

5. *Canutus Angliæ rex orationis causa Romam profectus.* — A num. 2 ad 8. Ex recitatis Wipponis verbis apparet, Malmesburiensem, Wigornensem, Huntindoniensem, aliosque Rerum Britannicarum scriptores, profectionem Romanam Canuti Angliæ et Daniæ regis perperam aliis annis quam præsentem collocasse. Canutum præcedentium Angliæ regum exempla, et fides certa penes Apostolorum principes summam esse potestatem ligandi atque solvendi, movere ut hanc peregrinationem institueret, sicut ipsemet in suis ad episcopos Angliæ litteris a Baronio relatis indicat. Encomiastes Emmæ, Anglorum reginæ et Canuti conjugis, quid in una S. Audomari urbe a Canuto factum et a se propriis oculis visum, his verbis narrat: « Ingressus monasteria, et susceptus cum magna honorificentia, humiliter incedebat, et mira cum reverentia in terram defixus lumina, et ubertim fundens lacrymarum ut ita dicam flumina, tota intentione sanctorum expetiit suffragia. At ubi ad hoc perventum est, ut oblationibus regiis sacra vellet cumulare altaria, ohe! quotiens primum pavimento lacrymosa infixit oscula? Quotiens illud pectus venerabile propria puniebant verbera? Qualia dabat suspiria? Quotiens precabatur, ut sibi non indignaretur superna

clementia? Tandem a suis ei imminenti sua porrigebatur oblatio non mediocris, nec quæ alio elauderetur in marsupio, sed iugens allata est palliati extento in gremio, quam ipse rex suis manibus altari imposuit, largitor hilaris monitu Apostolico. Altaria autem cur dico? cum vidisse me meminerim eum omnes angulos monasteriorum circuisse, nullumque altare licet exiguum præterisse, cui non munera daret et dulcia oscula infingeret? Deinde adsunt pauperes, numerantur etiam ipsi protinus singulati omnes. Hæc et alia his mirificentiora a domino Cnutone gesta vidi ego vester vernula, sancte Audomare, sancte Bertine, cum fierent vestris in cœnobiis. Pro quibus bonis tantum regem impetrate vivere in cælestibus habitaculis, ut vestri famuli canonici et monachi sint orantes orationibus quotidianis ».

6. *Obitus S. Romualdi abbatis.* — Ad num. 13. Petrus Damiani in Vita S. Romualdi abbatis et ordinis Camaldulensis fundatoris, capite 20, narrata ejus morte ait: « Vixit vir beatissimus centum viginti annis ex quibus viginti expendit in sæculo, tres duxit in monasterio, nonaginta septem in eremitico transegit proposito ». Non probatur Baronio illud de cxx annorum ætate, putatque Vitam illam interpolatam esse, aut perperam descriptam. Bollandus ad diem vii Februarii, in Commentario prævio ad Vitam illam, existimat etiam numeros in ea vitiatos, eosque corrigere conatur. Petrus Damiani nec annum mortis, nec diem expressit. In Martyrologio Romano natalis *Romualdi* inscribitur ad diem xix mensis Junii. Tandem Clemens VIII ut ab omnibus die vii Februarii, qui dies est secundæ ejus translationis, natalis illius celebraretur decrevit.

7. *Obitus Alphonsi V regis Legionensis.* — Ad num. 14. *Alphonsus V* rex Legionensis in Hispania hoc anno adversus Saracenos pugnans occisus est, ut ostendit Baronius ex ejus Epitaphio, in quo legitur: *Obiit Æra mxxv, nonis Maii*, currenti scilicet anno. Eum excepit *Veremundus* filius, hujus nominis III. In Alphonsi morte Ademarus monachus Sancti-Eparchii Chronicon suum absolvit, licet referat Epitaphium Willelmi comitis Engolismæ, in quo legitur: « Obiit in pace viii idus April. vigilia Osanna, mxxviii anno ab Incarnatione », quod et in Hist. pontif. et comit. Engolismensium etiam habetur. Hæc porro ultima verba Chronici Ademari: « Tunc rex Navarræ Santius (cognomento Major) adhibitis secum Wascenis, super Saracenos exercitum duxit, et devastata Hispania, cum multis spoliis et magno triumpho remeavit. Ipso denique anno, rex Gallicianus Adefonsus Saracenos populatus est magna infestatione, et quadam Hispaniæ civitate per obsidionem pæne sese tradente ei, dum ipse armis depositis, furentes extrinsecus Christianos a certamine sedaret paganorum, ab adversariis, quibus parcere deliberaverat, ictu sagittæ foris muros vulneratus interiit, et sic exercitus ejus, non sine magno do-

lore gressum suum vertit, lugens principem suum fortissimum ». Immediate antea narrarat ordinationem *Gottefridi II*, Burdigalensis archiepiscopi, quem San-Marthani in archiep. Burdigal. currenti anno archiepiscopatum Burdigalensem rexisse demonstrant. Quare egregium illud opus, ad res Aquitanicas illustrandas præsertim utile, anno sequenti publicatum, licet hoc anno paucissima referat quæ sequenti gesta sunt. Illucinati sunt itaque viri doctissimi, qui autumarunt Chronicon illud perductum esse usque ad annum *mxix*. Extat illud tom. II Biblioth. Labbei sicuti et laudata Historia episc. et comit. Engolismensium.

8. *Peregrinatio Hierosol. Richardi abbatis Viridunensis.* — Richardus Viridunensis abbas *Gratia-Dei* vulgo appellatus, hoc anno peregrinationem Hierosolymitanam suscepit, quam fuse narrat chronographus Viridunensis, nosque ex eo summarie referemus. « Expensas viæ Richardus comes Nortmannorum (hujus nominis III) omnes ei attribuit. Erat enim in eleemosynis largus, charitate diffusus, honestate præclarus. Supersunt adhuc in Britannia insula et Normannia nobiles et probati viri, qui viderunt hunc patrem nostrum *Gratia-Dei*, et noverant quantum ab eodem comite diligebatur affectu. A quibus nos etiam ista audivimus, qui et referre soliti sunt, quia sic sibi individua dilectione adhierebant, ut putares unam animam duobus inesse corporibus. Optabili ergo peregrinatione suscepta, vir dominus Richardus septingentos peregrinos secum duxit, quibus ex propriis subsidia victus sufficienter administravit, etc.

9. *Antiochiæ cum S. Sym. Syracusano amicitiam contrahit.* — « Venit ergo Antiochiam, ubi cum eum itineris necessitas aliquot diebus remorari coegisset, vir Dei Symeon, qui nunc Trevirensis Ecclesiam corpore et virtutibus adornat, in amicitia ei junctus est et fratribus qui erant cum eo, adoptans sibi illum in patrem. (Ex quibus patet, Brouverum lib. 11 Annal. Trevirensium perperam scripsisse, sanctum Symeonem monachum Syracusanum sub annum *mxviii* Treviros, ubi ultimos vitæ annos egit, venisse.) In quo beati Symeonis facto hoc intueri libet, quia idem vir Dei non ejus se crederet magisterio, non committeret patrociniu, nisi divina pietas, quæ eum a sæculi actibus alienum reddiderat, cordi ejus revelasset, dignum illum esse qui subditis præesse et prodesse posset. Nitebatur autem isdem beatus Symeon a fratribus monasterii Montis Sion pro eleemosyna, quo de terra Richardi comitis Normanniæ monasterio eidem debebatur; et quanquam nosset, Spiritu sibi revelante, multa se adversa passurum, tamen pater Richardus discretionis oculis hinc inde munitus, consilium dedit ut cœptis insisteret, obedientiam impleret, usquequo rem probaret eventus. Flentem itaque et tristem eum a se dimisit, utrimque pedibus et manibus et genibus exosculatis, quia erat in eis gratia Spiritus san-

cti, etc. Probatus igitur Domini servus viam carpens, terram Saracenorum ingressus est. etc. Jam vero ubi ad urbem (sc. Antiochiam) venisset, ante murum urbis psallebat salvatori suo, et missarum solemnia ibidem celebrabat, paganis desuper saxa jacentibus, ut capiti ejus illiderent, etc. Monachorum vero et clericorum comitantium illum nullus ei coesse vel cohabitare poterat: sed quantum jactus est lapidis ad longe stantes caneant et canenti respondebant, ipse solus intendebat his quæ cœperat, donec missa perexpleta egrederetur, vel potius extraheretur, etc.

10. *Hierosol. a patriarcha honorifice suscipitur.* — « Constantinopolim veniens, cum quanto honore exceptus ab imperatore sit, dignisque muneribus et obsequiis honoratus, dicere supercedemus, quia ad alia properamus. Optatæ itaque viæ dimissus cum gratia, per multimoda pericula apprehendit Hierosolymæ loca desiderata etc. Occurrit autem ei venienti patriarcha Hierosolymitanus; (vel Arsenius qui anno *mxvi*, vel Jordanus qui an. *mxix* Hierosolymis sedebat, ut videre est apud Papebrocium in Hist. Chronolog. patriarch. Hierosolym.) audierat enim famam ejus omnium ore celebratam, et consalutati mutuo, dato pacis osculo lætati sunt in Domino etc. Introductus igitur in sanctam Sion, missarum solemnia celebravit, adstante pontifice et clero, et sic locum Sepulchri Domini cordis affectu revisens, omnemque locum sanctum pia devotione perlustrans, cum se desiderio satisfecisse crederet, iterum æstuantem devota sollicitudine satiabat animum etc. Quid multa? Venit dies S. Sabbati, quo exspectabatur ignis a Domino, et Gentiles armati, Christianis intro inclusis et beneplacitam voluntatem Domini de igne suscipiendo præstolantibus, totam observaverant Ecclesiam, ut si ignis non adveniret, omnes gladio perimerentur; cum ecce hora circiter nona, omnibus orantibus, in una lampade ignis accensus est a Domino nullius mortalium suffragante amminiculo, et Gentiles omnes stupor apprehendit et pavor, Christianos vero gaudium et exultatio, ut ab omnibus tota certatim caneretur Ecclesia: *Magnus Dominus noster, et magna virtus ejus, et sapientiæ ejus non est numerus.* Illico vir beatus sacris indutus vestibus, missa inchoata, *Kyrie eleison* solemne elata in excelsum voce, pronuntiavit, etc.

11. *Cum S. Symeone Syracusano in Galliam redit.* — « Sed jam quid moramur redeuntem? Reddamus patrem filiis, ut gratulentur in invicem, et pro absentiae tædio quod perpessi sunt, ipsi sibi sint consolatio. Non autem prætermittamus Antiochiam sancti Symeonis præsentia claram. Ibi enim invenit pater amantissimum filium, ibi recepit filius patrem charissimum, ibi socii socium, frater fratrem, comites agnoverunt comitem. Neque enim potuit, multis obstantibus, perficere quod decreverat, præcipue cum nosset divina revelatione in itinere illo plura se passurum adversa. Delectatus

igilur uterque comparis præsentia, delegerunt simul Virdunum redire, ut quod supererat temporis, simul explerent in exercitio spiritualis Philosophiæ. Venientes autem ad civitatem Bellegradam, quæ est in confinio Bulgarorum et Hungarorum, a civitatis infelicissimo principe prohibitus est cum eis transire, et ita lugens et dolens divisus est a patre et fratribus lugentibus et dolentibus. Dominus Symeon per multa pericula ivit Rothomagum pro implenda obedientia, pater Richardus Gratia Dei longo et vario itineris labore redditus est finibus Galliæ Belgicæ, etc. Reliquias ergo Hierosolymitanas, seu undecumque quæsitas, quibus onustus advenerat, in sanctuario pater Richardus deposuit ». In Chronico Ademari mentio est hujus peregrinationis Hierosolymitanæ, diciturque Willelmum Engolismensem comitem cum Richardo abbate Virdunensi et magna caterva nobilium, cœpisse iter agere *mensis Octobris primo die*, reversumque *tertia hebdomada mensis Junii ad propria*. Sed cum Labbeus in margine notet, hæc non legi in Ms. Codice Hadriani Valesii, non dubito quin a posteriori manu id in Chronicon illud male et contra veritatem insertum fuerit. De sancto Symeone Syracusano infra sermo erit.

12. *Concilium Carofense*. — Cum in Galliis *Manichæorum* hæresis reviviscere videretur, et bella inter privatos gesta magnorum malorum causa essent, *Willelmus* Aquitanie dux, hujus nominis IV, Concilium apud *Carrofum*, monasterium in marchia pagi Pictonici situm, hoc anno congregavit. In Chronici enim Ademari fine, antequam

narretur electio Goteфриdi II in archiepiscopum Burdigalensem, quam ad hunc annum pertinere constat, legitur: « His diebus Concilium aggregavit episcoporum et abbatum dux Willelmus apud Sanctum-Carrofum, propter extinguendas hæreses, quæ vulgo a Manichæis disseminabantur. Ibi adfuerunt omnes Aquitanie principes, quibus præcepit pacem firmare, et Ecclesiam Dei Catholicam venerari ». Cossartius tom. ix Concil. pag. 860, Concilium Carrofense cum anno mxxviii copulat, additque: « Libentius ad annum mxxxi rejicerem; quo tempore multis Galliarum locis haberi cœpta de firmanda pace Concilia ». Verum præterquam quod Ademarum anno mxxviii Chronicon suum absolvit, et magna eorum pars, quæ in fine habentur, ad hunc annum pertinent, ut mox insinuavimus, chronographus Malleacensis ad an. mxxviii a Paschate inchoatum ait: « Sequenti anno, post multa laudabilia facta, ipse dux Willelmus monachus factus apud Mæliacum, plenus dierum in senectute bona obiit in pace pridie kal. Februarii ». Quare Concilium *Carrofense* a Guillelmo IV indictum, hoc anno vel serius subsequentis exordium convocatum fuit. *Guillelmus IV* inter Aquitanie duces celeberrimus fuit, ejus filiam *Agneta* Henricus imperator hujus nominis II uxorem accepit, de cujus virtutibus suo loco sermo erit; ipseque e vita migravit die ultima mensis Januarii anni, mxxx juxta chronographum Malleacensem. De eo legendus Beslius in Hist. comit. Pictav. et ducum Aquitanie cap. 22.

JOANNIS XX ANNUS 5. — CHRISTI 1028.

1. *Hugone Roberti regis filio defuncto, orta dissidia*. — Christi annus millesimus et vicesimus octavus sequitur, undecima Indict. inchoatus, quo mortuo Hugone Francorum rege, Roberti regis filio, magnæ dissensiones obortæ sunt inter ipsum regem atque reginam Constantiam, decernente ipso Roberto regnum deberi secundo genito Henrico, regina vero muliebri affectione amittente, ut tertio genito illud traderetur Roberto. Cujus controversiæ occasione magnum excitatur domesticum bellum, et inter principes atque episcopos, aliis regi, reginæ aliis studentibus. De his acturi, quod in

primis ad tempus spectat, hoc anno Hugonem esse defunctum, ex Glabro, qui tunc vivens rerum Gallicarum scriptor cuncta ob oculos habuit, intelligimus. Dum enim ait ipsum Hugonem obiisse annos natum viginti octo, illa enim in iambicis flebilibus illis, quos rogatus a fratribus cecinit, habet¹:

Annis florebat mundo juvenilibus,
Terdenis minus excreverat duobus
Regnorum lumen Hugo, regum maximus.

¹ Glab. l. iii. c. 9.

Cumque constet non ante millesimum nasci potuisse Domini annum, eodem auctore Constantiæ nuptias anno millesimo referente, utique non ante hunc defunctum annum necesse est affirmare. Sed neque ut dicamus post annum præsentem diem obiisse, patitur ratio temporis Fulberti episcopi Carnotensis, quem constat unum ex illis fuisse episcopis, qui electioni favebant Henrici contra Constantiam, atque ipsum hoc anno esse defunctum, eo irrefragabili argumento, quod dedicationi solemni Aurelianensis Ecclesiæ, cui una cum pluribus episcopis rex interfuit, anno sequenti, non ipse Fulbertus, sed ejus successor Theodoricus interfuisse ponitur ab Helgaldio ejusdem temporis scriptore, in Vita Roberti. Hæc de temporis ratione.

2. Quod autem ad Hugonem regem spectat, quem jam fere decennem pater regni consortem elegit, etsi ad tempus patri molestus fuerit, ipsi rebellans, tamen petendo veniam humili reconciliatus obsequio, ita vitam instituit, ut magnum sibi nomen pepererit, atque expectationem sui maximam coaluerit; adeo ut moriens, veluti quodam abortu spes omnes parentum et subditorum abruptens, ingens sui reliquerit desiderium. Scribit pluribus ista omnia Glaber ¹, et cecinit (ut dictum est) iambicis.

3. *Discordiæ sedandæ vacat Fulbertus qui sanctitate insignis moritur.* — At quod ad Fulbertum Carnotensem episcopum pertinet, sui temporis summum decus Ecclesiæ Gallicanæ, in his turbis tam excitatis a filio in parentem, quam a conjuge in virum regem, semper, (ut par erat) Roberto favit, ut ex litteris tunc scriptis facile colligi potest. Extat enim Epistola ² de Hugone filio tunc capto, ad ipsum Robertum regem missa: alia vero ab Odelrico episcopo Aurelianensi (ut conjicitur) ad ipsum Fulbertum data, cum in electione successoris innitens regis voluntati, studeret Henrico magis quam tertio loco nato Roberto. Quæ inter Epistolas Fulberti ultimum locum tenet, atque sic se habet ³:

4. « Dilectissimo domino suo Fulberto episcopus O., cui optat juxta Domini præceptum serpentinam prudentiam columbina simplicitate præditam.

« Quod tuo, beatissime pater, aliorumque multorum relatu perceperam, id ipsum nuper domino Berardo Suessionis episcopo referente cognovi; scilicet incurrisse te gravissimum reginæ odium, faventem potius marito suo de constituendo rege majori filio, quem dicunt simulatorem esse, segnem, mollem in negligendo jure patris futurum, fratri suo minori attribuentes his contraria. Te quamplurimi episcoporum rodent clanculum. Unde quantum ex verbis supradicti præsulis adverti, seu tutum coepiscoporum tuorum Francigenarum super hoc agendum nego-

tium, intimare tibi non me pignit, ut si forte sanior est, ei me refrageris, et a periculo tibi caveas. Est autem hæc eorum ad componendam utrimque litem sententia: Patre vivente, nullum regem sibi creari; quod si acrius institerit in vita patris hoc fieri, quem meliorem senserit, ad regem debere sublimari. Videris, pater prudentissime, ne sis plus æquo justus, nec a sanctis consacerdotibus tuis perperam dissideas ». Hæc ad Fulbertum episcopus O. At quid Robertus pater? convocato Rhemis conventu (ut Glaber ait) episcoporum ac principum, filium majorem natu coronavit Henricum: cujus rei causa inter fratres est oborta discordia, quæ postea in civile bellum erupit, de quo suo loco dicendum. Ad ejus vero consecrationem una cum aliis invitatus ipse Fulbertus, ob ægritudinem corporis et reginæ Constantiæ minas non potuit præsens esse; qui has tunc litteras dedit ad Guidonem episcopum ⁴:

5. « Venerabili patri et coepiscopo suo Guidoni Fulbertus. Ad benedictionem Henrici regis prolis voto quidem raptor, sed adversa me corporis valetudo retardat. Tentarem tamen utcumque moderatis equitationibus eo pervenire, si non absterret sævitia matris ejus, cui satis creditur cum mala promittit, fidem facientibus multis et memorabilibus gestis ejus. Qua difficultate prohibitus, rogo vestram charitatem, dilectissime, ut vice mea suadeatis domno archiepiscopo Rhemensi, cæterisque primoribus, ne qua occasione differant benedictionem juvenis supradicti: spero enim illum Deo et bonis hominibus placiturum. Vale ». Hæc Fulbertus, ac plane haud falsus vates, neque vanus conjector de Henrico, ut eventa ejus significarent. Cæterum ex hac ægritudine ipsum defunctum ad Deum migrasse possumus intelligere, siquidem ipsum ante sequentem annum (ut dictum est) quo Aurelianensis Basilicæ dedicatio facta est, diem obiisse supremum, haud dubio declaratum est argumento. Cujus sanctitatem atque doctrinam commendant, si non aliud, scriptæ ab eo Epistolæ, opera Massoni Parisiis haud pridem editæ, sed quæ in multis emendentur ex Codice Vaticano, in quo illæ habentur junctæ cum Epistolis Sidonii Apollinaris. Sunt de eo præclara elogia scriptorum hujus temporis, ut Glabri, et auctoris Historiæ Aquitanicæ, et aliorum. In eodem præter scientiam et vitæ integritatem maxime commendatur, quod erga sanctissimam Dei genitricem Mariam addictissimus servus et promptissimus ejus amator fuerit, in cujus laudem librum conscripserit, Basilicamque construxerit, laudesque cecinerit: ab ea autem singulari remuneratum dono, dum ipsi ægrotanti per vicum apparens, sugenda aperuerit sacra ubera. Quod testatur Guillerimus, ex quo Vincentius; qui etiam tradunt ipsum prophetiæ imbutum fuisse spiritu.

6. Qui quidem moriens, haud dubium testi-

¹ Glab. l. III. c. 9. — ² Fulb. Ep. LXXVIII. — ³ Ibid. Ep. XCI.

⁴ Fulb. Ep. XLIII.

monium reliquit de Berengario, olim suo discipulo. Nam et ex Guillerino ista Vincentius: « Cum in extremis positum multi visitarent, et ædium capacitas vix confluentibus capiendis sufficeret, ille inter oppositas catervas oculis rimatus Berengarium, visu quo potuit expellendum censuit, quo testatus immanem dæmonem prope eum consistere, multosque ad eum sequentem blandiente manu et illicite corrumpere ». Eadem habet Wilhelmi Malmesburiensis, dum de Berengario ipso funestam texit historiam. Porro qui faciebata mala sobole et indigno tanto præceptore discipulo ad universam inficiendam Ecclesiam exitiale parari venenum, antidotum ipse voluit reliquisse bene compositum, dum in Epistola ad Adeodatum prolixius scripta¹, de veritate corporis et sanguinis Christi in sacramento Eucharistiæ, dogma statuit, atque diserte confirmat; quod et in sequenti ad Finardum Epistola præstitit². At de Fulberto hic hæc tenus.

7. *Olavi regis Norvegiæ et Ulfridi episcopi martyrium.* — Hoc anno contigisse martyrium sancti Olaph, sive Olavi regis Norvegiæ, ex Adam Chronicisque Norvegiæ accipitur. At quid de eodem sanctissimo rege idem scribat auctor sic accipe³: « Inter Cnuth et Olaph regem Northmannorum continuum fuit bellum, nec cessavit omnibus diebus vitæ eorum, Danis pro imperio certantibus, Northmannis vero repugnantibus pro libertate. In qua re justior mihi visa est causa Olaph, cui bellum necessarium magis fuit quam voluntarium. Si quando autem tempus a bellorum motibus quietum erat, idem Olaph iudicio et iustitia regnum gubernabat. Dicunt enim inter cætera virtutum opera magnum zelum Dei eum habuisse, ut maleficos de terra disperderet: quorum numero cum tota barbaries exundet, præcipue vero Norvegiæ regio talibus monstris plena est. Nam divini, et augeres, et magi, et incantatores, cæterique satellites Antichristi habitant ibi, quorum præstigiis et miraculis infelices animæ ludibrio dæmonibus habentur. Hos omnes et huiusmodi beatissimus rex Olaph persequi decrevit, ut sublatis scandalis, firmiter in regno suo claresceret Christiana religio. Habuitque secum episcopos multos et presbyteros ab Anglia, quorum monitu et doctrina ipse cor suum Deo præparavit, subjectumque populum ad regendum commisit, quorum clari doctrina et virtutibus erant Sigefrid, Gunichil, Rudolph et Bernard. Hi etiam jussu regis ad Svediam, Gothiam, et omnes insulas quæ trans Northmanniam, accesserunt, evangelizantes Barbaris verbum Dei et regnum Jesu Christi. Misit et nuntium ad archiepiscopum nostrum Wuenum cum muneribus, petens ut ejus episcopos benigne reciperet, suosque ad eum mitteret, qui rudem populum Northmannorum in Christianitate confortarent ». Subjicit

autem his de altero Olavo Adam sequentibus verbis⁴:

8. « Simili religionis amore alter Olaph in Svedia dicitur floruisse. Is subditos sibi populos ad Christianam fidem convertere volens, magno laboravit studio ut templum idolorum, quod in medio Sveoniæ situm est, Opsala, destrueretur. Cujus intentionem pagani metuentes, placitum cum rege suo tale constituisse dicuntur, ut si ipse vellet esse Christianus, optimam Svedicæ regionem quam vellet, suo jure teneret, in qua Ecclesiam et Christianitatem constituens, nemini de populo vim recedendi a cultura idolorum inferret, nisi qui sponse cuperet ad Christum converti. Huiusmodi rex placito gavisus, mox in Occidentali Gothia, quæ Danis proxima est vel Nortmannis, Ecclesiam Deo sedemque fundavit episcopalem. Hæc est civitas Scarana maxima, in qua, petente Christianissimo rege Olaph, primus ab Wuano archiepiscopo Thurgot ordinatus est. Ille vir strenue legationem suam perfecit in gentibus, duos nobiles populos Gothorum suo labore Christo lucratus: perque illum episcopum rex Olaph ingentia metropolitæ Wuano direxit munera ». Ita se habebant istis temporibus illæ a Deo benedictæ Ecclesiæ boreales. Subjicit autem de martyrio Olaph regis Norvegiæ sive Nortmanniæ ejusmodi narrationem, diversas ea de re sententias referens²:

9. « Olaph igitur, clarissimus Northmannorum rex, contra Cnuth regem Danorum, qui regnum suum impugnaverat, perpetuo decertabat prælio, tandemque ferunt beatissimum regem Olaph seditione principum, quorum mulieres ipse propter maleficia sustulit, e regno depulsum Norvegiæ, et regnavit Cnuth in Northmannia simul et Dania, et (quod nulli regum prius contingere potuit) in Anglia. Olaph vero totam spem suam in Deo ponens, ad comprimendos idololatrias denuo bellum instaurat. Olaph auxilio habuit regem Ruzlorum et Sveonum, cujus filiam habuit, et de populis insularum infinitam congregans armatorum multitudinem, patrium regnum vi et armis cepit. Rex igitur Christianissimus fortitudine in hostes et iustitia in suos celebris, ad hoc in regnum se credidit a Deo restitutum, ut jam tunc nemini parcere deberet, qui vel magis permanere vellet, aut Christianus fieri nolle. Et cum magna ex parte votum implevit, pauci qui remanserant ex magis, in ultionem eorum quos rex damnavit, et ipsum obtruncare non dubitarunt. Alii dicunt eum in bello peremptum, quidam vero in medio populi circo ad iudicium magis expositum. Scribunt alii, eum in gratiam Cnuth regis latenter occisum, quod et verum esse non diffidimus, eo quod regnum ejus invasit. Igitur Olaph rex et martyr (ut credimus) tali fine consummatus est. Corpus ejus in civitate magna regni sui Throdemis cum decenti honore tumulatum, ubi hodieque pluribus

¹ Extat tom. III. Biblioth. SS. Patrum. — ² Eod. tom. III. —

³ Adam hist. Eccl. I. II. c. 40.

⁴ Adam l. II. c. 41. — ² Ibid. c. 43.

miraculis et sanctitatibus, quæ per eum fiunt. Dominus ostendere dignatur quanti meriti sit in cælis, qui sic glorificatur in terris. Agitur festivitas passionis ejus quarto kal. Aug. omnibus Septentrionalis Oceani populis Northmannorum, Sveonum, Gothorum, Semborum, Danorum atque Slavorum æterno cultu memorabilis. His enarratis, subjicit de martyrio Ulfridi episcopi ejusmodi narrationem¹:

10. « Per idem tempus sermo est, quemdam ab Anglia, nomine Ulfridum, divini amoris instinctu Svediam ingressum, paganis verbum Dei magna fiducia prædicasse: qui dum sua prædicatione multos ad Christianam fidem convertisset, idolum gentis Torstans in consilio paganorum cœpit anathematizare, simulque accepta bipenne simulacrorum in frusta concidit. Et ille quidem

pro talibus ausis statim mille vulneribus confossus, animam laurea martyrii dignam transmisit ad cælum. Corpus ejus Barbari lauiatum post multa ludibria miserunt in paludem. Hæc veraciter comperta memoriæ tradidi, quamvis sint alia quæ adhuc scribi digna sunt. Illicque de martyribus Adam chronographus, qui mox subjicit anno sequenti, sexto kalend. Feb., anno videlicet millesimo vigesimo nono, Indictione duodecima defunctum fuisse illarum provinciarum metropolitani episcopum Hamburgensem, in locumque ejus subrogatum Libentium Juniorem, eumque accepisse pallium a Joanne Romano Pontifice.

Hoc anno, nona die Novembris, Indict. duodecima, moritur Constantinus imp. in cujus locum Romanus, repudiata conjuge ut acciperet Zoen filiam Constantini, subrogatus est eidem sanguine conjunctus. Hæc Curopalata.

¹ Adam l. II. c. 44. 45.

Anno periodi Græco-Romanæ 6521. — Anno Æræ Hispan. 1066. — Anno Hegiræ 419, inchoato die 30 Januar., Fer. 4. — Jesu Christi 1028.

— Joannis XIX papæ 5. — Conradi II reg. 5. imp. 1. Romani Argyri imp. 1.

1. *Hugo Roberti regis filius rex unctus anno mxxvii.* — Ad num. 1 et seq. Glaber lib. 3, cap. 9, de Roberti Francorum regis filiis sermonem instituit, eosque tres fuisse docet, nempe Hugonem natu majorem, Henricum, et Robertum. De Hugone ait: « Erat idem puer ferme decennis. Qui minime illorum (nempe primatum regni) acquiescens dictis, matre (sc. Constantia) præcipue instigante, regio in Compendio adscitis regni primoribus, coronam, ut decreverat, ex more a pontificibus fecit puero imponi ». Quod Helgaldus in Vita Roberti regis, pag. 69, die Pentecostes factum fuisse asserit. Annus tam in brevi Chronico Autisiodorensi, quam in Chronicis Vezeliacensi et Floriacensi notatur, nempe millesimus decimus septimus; imo et diserte exprimitur in Charta Roberti patris pro restitutione monasterii Latiniacensis ad Matronam, cujus hæc est subscriptio: « Actum Senonis civitate, anno Dominicæ Incarnationis millesimo decimo octavo, regnante serenissimo rege Roberto XXXII kal. Martii. Signum Roberti regis. Signum Hugonis regis. Signum Henrici. Signum Roberti. Signum Leirici archiepiscopi », scilicet Senonensis, communis Leotherici appellati. Quare dubium esse non debet, quin *Hugo* die Pentecostes anni mxxvii

rex unctus fuerit. Mabillonius lib. 6 de Re Diplom. pag. 581, Diploma illud recitat, aitque legendum, *anno millesimo vicesimo octavo*, et Hugonem anno mxxvii. Reg. Benedict. Verum non in iis verbis, sed in istis, *regnante serenissimo rege Roberto xxxii* mendum eubat, legendumque, *regnante serenissimo rege Roberto xxxi*. Annum enim Christi mxxvii habuit etiam exemplar quo usi sunt San-Marthani in episcopis Senonensibus, eumque retinendum esse jam ante me aliqui viri docti monuere.

2. *Ante triennium demortuus.* — Porro *Hugo* non hoc anno, ut arbitrabatur Baronius, sed anno millesimo vicesimo quinto vitam cum morte commutavit, idque, ut notat Glaber loco laudato, *die decima septima mensis Septembris*. Annum Hugonis emortuale jam anno mxxv num. 3 probavimus, quare videnda quæ ibi de Hugone rege diximus. Subjungit Glaber: « Quam humilis ac dulcis eloquio patri ac matri servis obedientior, pauperum largus dator, monachorum et clericorum consolator, necnon apud patrem cunctorum rogatum fidelissimus interventor, quam affluenter in cunctis optimis melior, quis valet exequi relator? Hujusmodi enim fama ubique provinciarum per-

citius peroptabatur a multis, præcipue ab Italicis, ut sibi imperaret, in imperium sublimari », post mortem nempe sancti Henrici imperatoris. Quo etiam tempore, ut refert Ademarus in Chronico, e Longobardia « venerunt multi nobiliores Pictavam urbem ad Willelmum ducem Aquitanorum, et eum super se regem constituere cupiebant », sed vir prudens *laudem et honorem eorum pro nihilo duxit*. Loquitur de Willelmo hujus nominis IV magni nominis principe.

3. *Anno ætatis xviii.* — Non hinc discedam, quin *Glabri* citati textum corruptum emendem. *Robertum* post annum millesimum *Constantiam* uxorem duxisse suo loco monstravimus, et tamen Glaber recitat versus iambicos, quos ait se in funere Hugonis regis cecinisse, in quibus legitur:

Annis florebat mundo juvenilibus,
Ter denis minus excreverat duobus,
Reguorum lumen Hugo, regum maximus.

Cum enim certo constet *Hugonem* post annum M in lucem prodisse anno millesimo vicesimo quinto, qui ei fatalis fuit, non potuit natus esse annos xxviii. Quare loco *ter denis minus excreverat duobus*, nempe annis, legendum, *bis denis minus excreverat duobus*. Hæc emendatio ex ipso met Glabro eruitur, qui antea de Hugone scripserat: *erat idem puer ferme decennis*, anno nempe Mxvii quando rex coronatus fuit. Jam dixerat Glaber, primates regni, quos Robertus rex consuluerat, tale ei dedisse responsum: « Sine puerum, rex, si placet, crescendo procedere in viriles annos, ne veluti de te gestum est, regni pondus infirmæ committas ætati ». Quæ omnia de Hugone dici non potuissent, si anno ætatis xviii vel xix, quod ex textu corrupto Glabri sequitur, rex inauguratus esset. Cum contra de puero ferme decenni, qui crescit in viriles annos, hæc recte asseri possunt. Infra videbimus, Epitaphium *Berengarii* hæresiarchæ versibus compositum, eodem fere modo depravatum fuisse. Licet enim certum sit eum die Epiphaniæ morte sublatum, idque asserat Malmesburiensis, in ejus tamen Epitaphio ab eodem relato habetur: *Jam quinta dies abstulit illa nefas*, nempe mors, et in quibusdam editionibus habetur, *Jani prima dies*, etc. utrobique loco, *Jani sexta dies*. Observavimus in hac Critica alia exempla, quibus manifestum fit, sciolos verba numeros in versibus experimentia immutasse. Denique ipsemet Glaber loco citato tam prosa quam versibus ait, *Robertum* Constantiam uxorem accepisse *circa annum millesimum*, uti anno cdcxviii num. 10 ostendimus, ideoque scribere non potuit, *Hugonem* regem per annos xxviii in vivis fuisse, recteque in brevi Chron. in Henrico rege Galliæ desinente, apud Duchesnium tom. iii. pag. 357, de Hugone habetur: *pube tenus erat, quando mortuus est*.

4. *Discordia inter regem et reginam de novi regis electione.* — Post Hugonis regis mortem Robertus *Henricum* filium secundo genitum « ad

regimen totius regni sibi associavit, provehens Rhemis civitate. Quam rem ægre tulit regina, volens Robertum constituere regem », inquit auctor Fragmenti a Roberto ad mortem Philippi I regis, apud Duchesnium tom. iv. Non pauci episcopi, ut odium *Constantiæ* reginæ, quæ *Robertum* alterum filium præferendum volebat, declinarent, novi regis electioni, quandiu pater viveret, non assentiebantur, existimantes reginam temporis progressu ab ea sententia discessuram, et justo regis consilio consensuram. Ex præsulibus illis unus fuit *Fulbertus*, episcopus Carnotensis, ut liquet ex Epistola *Odolrici* episcopi Aurelianensis, sancti Theodoricus successoris, ut anno Mxviii vidimus. Ille ad *Fulbertum* scribit se reginæ odium incurrisse, et a plurimis episcopis clanculum rodi, quod faveret regi in consilio ab eo suscepto *de constituendo rege majori filio*. Scripsit etiam *Fulbertus* ad *Guidonem* Sylvanecti episcopum, atque se ob corporis valetudinem *benedictioni Henrici* interesse non posse. Recitat utramque Epistolam Baronius; sed cum *Henricus* anno superiori coronatus fuerit, evidens est, doctissimum cardinalem unius anni metachronismo peccare. Verum audiendus hac de re Glaber loco citato.

5. *Henricus Hugonis frater anno superiori rex dictus.* — « Post cujus (nempe Hugonis) obitum, cæpit iterum idem rex (sc. Robertus) tractare, quis potissimum ex residuis filius pro se regnare deberet, etc.; coadunatis denique rex metropoli Rhemis regni primatibus, stabilivit regni coronæ Henricum, quem delegerat », quod anno superiori, non vero præsentis, uti scribit Baronius, peractum esse scite demonstrat Mabillonius, lib. 2 de Re Diplom., capite 26, num. 27, cujus verba refero: « Henricum ab anno Mxxvii a patre in consortium regni adoptatum fuisse colligimus, cum ex aliis, tum ex Charta Drogonis comitis, a me edita in fine sæculi iii, data *anno ab Incarnatione Domini Mxxx, Indict. (xiii) regnante rege Franc. Roberto, anno regni sui xlii, et filii ejus concorditer cum eo regnantis anno jam quarto Henrici* ». Id autem valide confirmatur, tum ex variis *Fulberti* Carnotensis Epistolis (Epist. iv, xv, lxx, cv, cxxviii), in quibus Henricum jam regem laudat *Fulbertus*, mortuus IV idus Aprilis die Cænæ Domini, anno Mxxviii secundum veterem calculum, anno Mxxix secundum novum: tum maxime ex litteris assessionis seu coronationis Philippi Primi, ejusdem *Henrici* filii, a Chesnio (tom. iv, pag. 161, Chiffletio Tournu pag. 347), et Marlotto (Metrop. Rhem. tom. ii. pag. 117) relatis, datis *anno Incarnat. Mlviii, Indict. xii*, regnante Henrico rege xxxii, eadem die completo, X kal. Junii, episcopatus autem domini *Gervasii* anno iv, in die sancto *Pentecostes*. Nam si ab anno Mlix per annos xxxii calculum reflectas, annum Mxxvii initii ab Henrico regni primum habebis. At verba illa, *eadem die completo*, referenda sunt, non ad X kal. Junii, sed ad *Festum Pentecostes*. Nam hac die coronatus

dicatur *Henricus*, non eodem die mensis, quo coronatus est filius ejus Philippus : quandoquidem festum Pentecostes an. mxxvii novem diebus citius, id est, pridie idus Maii incidebat. In Diplomatis porro tam Henrici quam Philippi examinandis, accurate expendenda est hæc duplex utriusque epocha, nempe ab initio regno, seu cum patre, seu post mortem patris ; nam pro hac duplici epocha variat calculus in Diplomatis ». Ita vir doctissimus, qui horum postea in lib. 6 non meminit, cum scripsit quæ mox num. 1 ex illo retulimus, nempe in Diplomate Roberti regis, cui scripsere filii ejus, Hugo rex et Henricus nondum rex, loco *anno millesimo decimo octavo*, legendum esse *millesimo vicesimo octavo*, ita ut Hugo eo Christi anno adhuc in vivis fuerit, et Henricus nondum regnarit. Subscriptio itaque Chartæ pro monasterio Latiniacensi editæ pura est, certumque regni Hugonis initium. Præterea Fulbertus non anno insequenti, ut idem Mabillonius censet, sed præsentis demortuus, ut statim ostendo.

6. *Moritur Fulbertus episc. Carnotensis.* — A num. 3 ad 7. In Chronico Delensi ad an. mxxviii legitur : « Defectum luna passa est nocte quæ lucescit in Parasceve Paschæ, quod fuit secundo idus Aprilis. Die vero præcedente Cænæ Dominicæ, depositio domini Fulberti Carnotensis episcopi ». Ubi depositionis nomine dies sepulturæ intelligendus, ita ut sanctus antistes III idus April. seu die xi ejusdem mensis terræ mandatus fuerit, et IV idus Aprilis, seu die decima ejusdem mensis animam Deo reddiderit, quod postremum eruo ex Chronico Vindocinensi, in quo ad annum mxxviii habetur : « Dominus Fulbertus episcopus Carnotensis Ecclesiæ, mirabilis modernorum temporum doctor, obiit in Domino, quarto idus Aprilis », id est, die decima ejusdem mensis. Chronographus vero Malleacensis hanc mortem perperam cum an. dcxxxiii conjungit, sed recte notat eum obiisse *tertio idus Aprilis*, sumpto scilicet obitus die pro die sepulturæ, ut passim ab historicis fit. Denique in ejus Epitaphio mox recitando, *Fulbertus* mortuus traditur an. mxxviii, quarto idus Aprilis. Quare cum juxta regulam a nobis innumeris exemplis comprobata, quando auctores illustrium virorum mortes narrantes uno tantum die inter se differunt, alii de die mortis, alii de die sepulturæ intelligendi sint, non video in dubium amplius revocari posse, quin *Fulbertus* hoc anno die decima mensis Aprilis obierit, sequentique, in quem Cæna Domini incidebat, ejus exequiæ peractæ fuerint. In Chronico quidem Viridunensi *Fulberti* mors consignatur anno mxxvii, Indictione vii ; sed tam in anno quam in Indictione inter se impossibilibus, vel chronographus hallucinatur, vel librarius tam annum quam Indictionem mendose descripsit : nisi forte ille annum accepit ab auctore, qui annum a Paschate exordiebatur. Denique fallitur chronographus Andegavensis, qui hanc mortem cum an. mxxix illigat. Eo enim anno Pascha incidit in diem

sextum mensis Aprilis, ideoque et dies Cænæ Dominicæ in diem tertium ejusdem mensis.

7. *Epitaph. ejusdem Fulberti.* — Hoc *Fulberti* Epitaphium, ejus quidem sepulchro non insculptum, sed antiquum, et relatum a San-Marthanis in episc. Carnotensibus, ex veteri Codice Ms : « Anno ab Incarnatione Domini mxxviii, IV idus Aprilis, obiit dilectus Deo et hominibus pater noster venerandæ memoriæ Fulbertus, suæ tempestatis pontificum decus, lux præclara mundo a Deo data, pauperum sustentator, desolatorum consolator, prædonum et latronum refrænator, vir eloquentissimus et sapientissimus, tam divinis quam in liberalium artium libris, qui ad restaurationem sancti templi suæ diocesis, quod ipse post incendium a fundamento reædificare cœperat, bonam partem auri sui et argenti reliquit, et disciplinæ ac sapientiæ radiis illum locum illuminavit, et clericis suis multa bona fecit ». Porro Fulbertum *Romanum* aut certe *Italum* fuisse, Mabillonius, tom. ii Analect. pag. 565, colligit ex ejus Epist. ii ad Einarðum, in qua Fulbertus consultus quid de quodam ritu sentiret, respondit id ita statui in quodam Codice, quem *a natali patria* inter cætera delexerat, id est, quem *a Romano scrinio*, ut in fine Epistolæ scribit, *prolatum* acceperat.

8. *Mors S. Olai Danorum regis.* — Ad num. 7. Vigorniensis et Westmonasteriensis de Olavo Norvegiæ rege habent : « Anno gratiæ millesimo vicesimo septimo, cum regi Cnutoni fuisset nuntiatum quod Norwegenses regem suum Olavum propter sui simplicitatem nimis vilipenderent, magnam auri et argenti pecuniam magnatibus illius regionis transmisit, rogans omnes propensius, ut abjecto Olavo ipsum susciperent in regem. Qui cum dona quæ eis transmiserat avidis manibus suscepissent, nuntiaverunt ei, ut omni ambiguitate remota, veniret ad eos, quia ad illum suscipiendum omnes inveniret paratos ». Quod Norvegia alias Angliæ annexa fuisset, frequentia bella Anglos inter et Norwegos orta : « Inter Cnuth », inquit Adamus lib. 2, cap. 40, « et Olaph regem Northmannorum (id est, Norvegiarum) continuum fuit bellum, nec cessavit omnibus diebus vitæ eorum, Danis pro imperio certantibus, Northmannis vero repugnantibus pro libertate », et cætera a Baronio recitata. Tandem Canutus hoc anno Norvegiam occupavit : « Cnut rex », ait Huntidoniensis pag. 364, « anno duodecimo ivit ab Anglia cum quinquaginta puppis in Norvegiam, et bello fugavit Olaf regem Norwegensium, regnumque illud recepit in suam subditionem. Cum vero inde redisset in Angliam, rex Olaf rediens in Norvegiam, a patriæ illius gente occisus est. Remansitque Cnut regnum illud, dum vixit ».

9. *Post biennium contigit.* — *Olovi* tamen mors, quam uno tenore recitat Huntindoniensis, nonnisi post biennium contigit : « Anno mxxix », inquit Dunelmensis in Hist. de Gest. Reg. Angl. « Canutus, rex Anglorum, Danorum et Norregano-

rum, ad Angliam rediit ». Tum: « Anno mxxx, sanctus Olavus, quem Canutus rex expulerat, rex et martyr, Haroldi regis Norreganorum filius, in Norrega injuste perimitur a Norreganis ». Genus mortis ejus varie narratur, ut habet Adamus apud Baronium num. 9. Colitur die xxix mensis Julii: « Habuit etiam Olaph rex », inquit Adamus lib. 2, cap. 40, « episcopos et presbyteros multos ab Anglia, quorum monitu et doctrina cor suum Deo pręparavit, subjectumque populum ad regendum commisit. Ex quibus clari doctrina et virtutibus erant Sigafrid, Grimkild, Rodulf, et Bernard. Ii jussu regis ad Suediam et Gothiam, et ad cęteras insulas, quę trans Northmanniam (id est Norvegiam) sunt, accedentes, Barbaris verbum Dei et regnum Jesu Christi evangelizabant. Misit ergo rex nuntios ad archiepiscopum nostrum (nempe Unwanum Bremensem archiep.) cum muneribus, petens suppliciter, ut episcopos ejus benigne susciperet, suosque ad eum transmitteret, qui rudem Nordmannorum populum in Christianitate confortarent ». Quare cum Unwanus anno mxiii archiepiscopus Bremensis dictus fuerit, annoque mxxix, VI kalend. Februarii, ut habet Adamus, mortuus sit, pręcones illi Evangelici intra illud temporis intervallum a sancto Olavo in Norvegiam missi. *Unwano successit Libentius* hujus nominis II.

40. *S. Sigfridus Danis et Svecis fidem Christianam prędicavit.* — Ad num. 8 et seqq. Eodem tempore, quo *Olaus* in Norvegia, *Olaus* alter in Svecia regnabat, ut videre est ex eis quę Baronius refert ex Adamo lib. 2, cap. 41. *Sanctus Sigfridus*, de quo mox locuti sumus, eo regnante in Sveciam venit, cujus profectionis illustre testimonium habetur lib. 8 Revelationum sanctę Birgittę, cap. 46, ubi Deipara Virgo « loquitur sponsę (sc. sanctę Birgittę) dicens: S. Sigfridus archiepiscopus exivit de Anglia, et fecit voluntatem Dei in regno Svecię. Sic ille sacerdos, pro quo tu oras constituat Ecclesiam, etc. » Joannes Magnus, lib. 17 Historię Gothorum et Sueonum cap. 48, Sigfridum archiepiscopum Eboracensem, et ad Suecos primum, non Norvegos evocatum scribit. At cum accuratam archiepiscoporum Eboracensium seriem historici Anglici exhibeant, nulla *Sigfridi* mentione facta, Henschenius ad diem xv Februarii, quo *sanctus Sigfridus* episcopus colitur, existimat *archiepiscopi* titulum in revelationibus sanctę Birgittę *Sigfrido* ob eminentiam legationis ad reges Norvegię et Suedię videri attributum. Sed non dubito, quin *Sigfridus* ad gentes illas legatus Evangelicus destinatus consecratus fuerit archiepiscopus nulli sedi affixus; cum ejusdem rei tot exempla extent. Tempus quo apud Norvegos et Suecos vixit sanctus *Sigfridus*, sic ex Adamo Bremensi an. MLXVII, Bremę canonico creato verosimiliter statuit Henschen. In Norvegiam venit cum ibi regnaret *sanctus Olaus*, ideoque post annum millesimum decimum quintum. Missus est in Sveciam a sancto Olao, ideoque ante pręsentem annum,

quo is e regno pulsus est. Demum superfuit ad tempora circiter *Adalberti* anno mxliiii archiepiscopi Bremensis renuntiati. De laborum ejus sociis, sanctis *Enschyle* et *Davide* aliisque, legendus idem Henschenius.

41. *Moritur Constantinus imp.* — « Nona Novembris die, Indictione xii, subito morbo correptus Constantinus », de instituendo imperii successore cogitavit, adductoque in palatium *Romano Argyro*, datur optio, ut vel oculos sibi erui patiatur, vel dimissa sua legitima uxore, filiam imperatoris ducat, ac Cęsar designetur. Hęsitante eo, uxor ultro comam posuit, ac sæculo renuntiavit. Data ei *Zoe*, una ex tribus Constantini filiabus, triduoque post hic finem vivendi fecit. Hęc summarie ex Cedreno.

42. *Romanus Argyrus ei succedit.* — « Erat », inquit Michael Psellus adhuc ineditus, de Romano Argyro loquens, « vir etiam Gręcanicis educatus litteris, eaque pręditus eruditione, quanta ex Itolorum libris pendet atque doctrinis. Eratque imperator tum lingua vehemens, tum eloquio venustior, statura heros, vultuque ac specie vere imperio digna. Longe plura se scire existimabat quam sciret: cumque imperium suum pręcis illis Antonino, Marcoque Philosopho atque Augusto simile vellet reddere, duobus his dabat operam, litterarum scilicet studiis, armorumque curę. At vero neutrius partis prorsus rudis erat: litteras tantum callebat, quantum procul a profundo et superficie temperat, etc. Paucos ea ætas eruditos tulit, cosque hactenus disciplinis institutos, ut Aristotelis vestibula salutassent, ac Platonica solum Symbola memoriter recitarent: eorum vero quę editoria essent, scirent nihil, nec quantum viri in dialectica, aut ea arte quę vim demonstrandi habet, operam navassent. Quamobrem cum exactum judicium deesset, horum calculi crebro falsi erant. Frequenter nostris ex oraculis divinisque Scripturis quęstiones proponebantur; pleraque tamen dubia insoluta manebant, etc. » Assertit Psellus se vidisse *Romanum*, et cum illo semel sermonem habuisse.

43. *Henricus fit rex Germanię.* — « Anno Dom. mxxviii, Indictione xi », inquit Wippo in Vita Conradi Salici, « imperator Chuonradus filium suum Henricum magni ingenii et bonę indolis puerum, ætate xi annorum, principibus regni cum tota multitudine populi id probantibus, a Peligrino archiepiscopo Coloniensi in regalem apicem apud Aquisgrani palatium sublimari fecerat. Tunc in principali Dominica Paschę consecratus et coronatus Paschalem lætitiā triplicavit. Nam dum in superioribus annis duas coronas, id est, patris et matris suę mundis coronaretur, nunc tertia addita ». Spes pacis crevit, quam rex cum Cęsare fecit: « pręsertim cum is coronatus esset, cujus ætas vita diuturna satis digna fuerat. Deinde diversa regna peragrantes, Cęsar per se, rex sub tutore et actore Augustensi episcopo Brunone, cunctos

rebelles domabant, et foedera pacis ubique feliciter firmabant ».

14. *Synodus Geizletensis.* — « Moguntinus archiepiscopus Aribo », inquit chronographus Hildensheimensis ad hunc Christi annum, « in Geizlete Synodum generalem cum suis suffraganeis episco-

pis habuit. In qua, inter cætera Ecclesiastica, quidam homo ingenuus de homicidio Sigefridi comitis incusatus, candenti se ferro expurgavit. Qui ex decreto Synodali post duas noctes probatus illæsus apparuit ». Meminit hujus Concilii Wolfherrus in Vita S. Godehardi episcopi Hildensheimensis cap. 4.

JOANNIS XX ANNUS 6. — CHRISTI 1029.

1. *Dedicatio Basilicæ Aurelianensis in honorem S. Aniani, cujus Robertus rex fuit studiosissimus.* — Annus sequitur Redemptoris millesimus vicesimus nonus, Indictione duodecima, quo Robertus rex Francorum Christianissimus, convocato episcoporum cœtu, Basilicam a se constructam Aurelianis in memoriam sancti Aniani, ejusdem civitatis quondam episcopi, solemniter ritu voluit consecrari. Rem gestam Annalibus dignam Helgaldus descripsit. De qua dicturus, referenda est in primis causa, cur rex Christianissimus potissimum erga sanctum Anianum propensior esset; simulque cum his bases illæ inspiciendæ sunt, super quas tantam regni Francorum molem ista nova successio, Hugo avus cognomento Magnus, ejusque filius Hugo primus hujus stirpis rex Francorum, Robertus pater et ipse Robertus filius collocarunt: super quas innitens hactenus permaneat inconcussum ac stabile. Idem ipse Helgaldus sincerus historicus, ubi ab Hugone Magno, ejusdemque conjuge Adelaide, femina (ut ait) admirandæ pietatis, recensuit constructa monasteria, erectas Ecclesias, donaque pretiosa in ipsas illata, ista subjicit de cultu sanctorum, quibus eadem stirps regia peculiariter tenebatur addicta¹: « Erant siquidem, inquit, huic generationi speciales amici, sancta videlicet Maria, et pater et dux monachorum sanctus Benedictus, sanctus quoque Martinus, sanctus necnon Anianus, atque victoriosi martyres Christi Cornelius et Cyprianus: optatissimus vero gloriosus martyr Dionysius, ac inclita virgo beata Genovefa ». Sed de cultu speciali sancti Benedicti, in cujus honorem plura erexerant monasteria, subjicit mox ista idem auctor Helgaldus:

2. « Fertur autem dixisse moriens bonus pater: O optime fili, per sanctam et individuum Trinitatem te obtestor, nequando animus subrepat acquiescere consiliis adulantium, vel muneribus, donisque venenatis te ad vota sua maligna adducere cupientium, ex iis abbatibus quæ tibi post Deum perpetualiter delego; neve animi levitate ductus quolibet modo distrahas, diripias, aut ira excitante dissipes. Specialiter vero tibi inculco, nullo pacto ducem omnium, patrem dico Benedictum, a te patiaris divelli, illum apud communem Judicem salutis aditum, tranquillitatis portum, postque carnis obitum, securitatis asylum ». Vidisti, lector, secundum illud Job¹: « Super quo bases illius regni solidatæ sunt », nempe super sanctos, ut de eo dici jure possit²: « Fundamenta ejus in montibus sanctis ». Et eidem Evangelicum illud aptari, quod steterit hactenus contra diversos impetus procellarum ventorum et fluminum, quod fundata sit domus ista supra petram³, permanens semper, si bene collocata fundamenta persistant, casura tunc certo, si positæ bases sanctæ (quod Deus avertat) a fundamentis impie revellantur. Sed quod dicere cœperamus, cur præ cæteris erga sanctum Anianum Robertus rex fuerit studiosus, idem auctor ostendit sequenti oratione, nimirum propensiores fuisse erga Aurelianensem civitatem, cujus sanctus Anianus patronus erat, eo quod ibi natus esset et regeneratus sacro baptismo, adultus, atque unctus in regem. Sed et quod ipse juvenis gravissimo correptus corporis languore, nuncupatis Christo votis, per intercessionem ejusdem sancti fuerit sanitati firmiter restitutus, cum parentes grati in unico filio accepto divinitus beneficio, auream Christi pendentis in Cruce sa-

¹ Helgal, in Vita Roberti reg. p. 68.

¹ Job. XXVIII. — ² Psal. LXXXVI. — ³ Matth. VII.

cram imaginem in ejus primariam Ecclesiam intulerunt. Ipse vero Robertus rex nec immemor tanti a Deo intercessionem Aniani accepti beneficii, quanto sit persecutus amore, studio, officio, pietate ejusdem sancti cultum, ex eodem Helgaldus ista tractante sic accipe :

3. « Præterea construxit, inquit, a novo in urbe Aureliana monasterium S. Aniani, singularis sui apud Deum advocati : qui quam pium sanctæ devotionis amorem erga eundem habuerit, nullus edicere valet, quia illum suum semper post (apud) Deum, adiutorem, protectorem et defensorem habere voluit, ad quoscumque potuisset pergere gressus. Nam uno die a quodam suo speciali amicorum amico interpellatus, ut quid talem et tantum pontificem, et non alios sic sanctos suis sanctis laudibus extolleret : respondisse humillima et piissima voce fertur : Quis est Anianus ? Anianus pro certo est vera nostrorum (mæstorum) consolatio, laborantium fortitudo, regum protectio, principum defensio, pontificum exultatio, clericorum, monachorum, orphanorum et viduarum, egregia et inenarrabilis sublevatio. Et alludens ad circumstantes pueros ait : Num et iste de quo loquimur, Anianus, a pœnis virgarum vobis pueris non est frequens, vera et probata liberatio ? » His autem subjicit de Ecclesia, quam titulo ejusdem sancti Aniani illic erexit, aitque : « Ardens tanti pontificis honore hic redolens flos et decus Ecclesiæ sanctæ et gratia Dei desiderio, eum in altiori volens constituere loco, domum Domini super eum in melius construere cœpit, et Deo cooperante, et sancto Aniano auxilia præbente, ad finem usque perduxit. Habet namque ipsa domus in longitudine tensas quadraginta duas, in latitudine duodecim, in alto decem, fenestras centum viginti tres. Fecit et altaria in ipso monasterio ad laudem sanctorum, numero novemdecim, quorum memoriam hic annotare curavimus; principale in honorem Apostoli Petri, cui supradictus rex associavit coapostolum Paulum in benedictione, cum non antea ibi nisi solius S. Petri esset veneratio. Ad caput sancti Aniani unum, ad pedes aliud, aliud in honore sancti Benedicti. Cætera sunt in honorem eorum quorum nomina sunt adscripta, sancti videlicet Evurtii, sancti Laurentii, S. Georgii, omniumque sanctorum. Item sancti Martini, sancti Mauriti, sancti Stephani, sancti Antonii, sancti Vincentii, sanctæ Mariæ, sancti Joannis, sancti Salvatoris, sancti Mamerti, sancti Nicolai, et sancti Michaelis ». Ita recensens Helgaldus, prout ipsi venerunt in mentem. Subjicit autem et ista de pretiosioribus ornamentis : « Lecticam ipsius sancti Aniani a fronte auro bono et optimo, et lapidibus pretiosis, et argento mero præoccupavit : tabulam ad altare sancti Petri, in cuius honore extat locus, auro bono totam cooperuit. De qua altaris tabula aurea, Constantia nobilis regina, ejus conjux gloriosa, post mortem viri sui sanctissimi, Deo et sancto attribuit Aniano summam scilicet librarum

septem ipsius metalli, in meliorandis a se monasterii facti tectis, quibus ab imis ad superiora apertis, cælum melius cerneretur quam terra. Extitit in ea quantitas auri quindecim librarum probati; quod reliquum fuit, in quibus debuit distribuit, quia erat ei sollicitudo Ecclesiarum Dei, juxta utile senioris sui velle ». De consecratione autem Basilicæ ista subjicit :

4. « Post quæ omnia cupidus sanctæ benedictionis rex Robertus gloriosus, suæ ordinationis, benedictionis et assumptionis in regem anno trigesimo sexto, jussione imperatoria evocavit archipræsules, Gauzlinum Bituricensem et abbatem Floriacensem, Leothericum Senonensem, necnon et Arnulphum Turonensem, quorum præsentiam subsequuntur præsules, Odelricus Aurelianensis, Theodoricus Carnotensis, Bernerius Meldensis, Warinus Bellovacensis, et Rudolphus Silvanectensis. Non defuit etiam præsentia domini et venerabilis Odilonis Cluniacensis abbatis, et aliorum honorum virorum non minimi meriti, cum quibus semper desiderabat colloqui. Ab his pro certo et aliis Dei ministris levatur illud nobile corpus amici Dei Aniani sanctissimi de sepulchro, cum corporibus sanctorum Euspicii, Monitoris et Flosculi confessorum, Bandelii et Scubilli martyrum, et Agiæ matris S. Lupi confessoris : et ab ipso glorioso rege et aliis quos jam prænotavit littera, qui pro tali negotio advenerant, custoditur, laudatur et decantatur in hymnis et laudibus in Ecclesia S. Martini, quoadusque præpararentur utilia et necessaria sanctæ benedictioni. Præparatis ergo omnibus, ab ipsis sanctis sacerdotibus locum ipsum benedici et consecrari solemniter fecit, anno Dominicæ Incarnationis millesimo vicesimo nono, Indict. duodecima. Sumitur itaque humeris inclyti, lætantium simul et gaudentium populorum, et transfertur cum laudibus in templum novum quod ipse inclytus Robertus ædificaverat, laudantes Dominum et S. Anianum in tympano et choro, in chordis et organo, et eum in loco collocant sancto ad honorem gloriam et laudem Jesu Christi Domini nostri, et famuli sui Aniani, speciali gloria decorati.

5. « Expleta benedictione solenni et omnibus quæ ad dedicationem sancti templi pertinebant, vadit cum reverentia nominandus pater patriæ Robertus ante altare sanctissimi Petri et dilecti domini Aniani, in conspectu omnium populorum, et exuens se vestimento purpureo, quod lingua rustica dicitur Rocus, utroque genu fixo in terram, toto de corde ad Deum supplicem fudit prece in his verbis : Gratias, inquit, ago tibi, bone Deus, qui ad effectum meam voluntatem hodie meritis S. Aniani perduxisti, lætificans animam meam de corporibus sanctorum cum eo hodierna die triumphantium. Da ergo, Domine, per hos sanctos tuos, vivis delictorum indulgentiam, defunctis omnibus vitam et requiem sempiternam : tempora nostra prospice, regnum tuum, quod tua pietate, miseri-

cordia, bonitate nobis datum est, rege, dispone, custodi ad laudem et gloriam nominis tui, sancti Aniani virtute mirabili patris patrie, ab inimicis mirabiliter libera. Peracta oratione, ad sua quisque lætus regreditur etc. » Recenset auctor oblatas tunc a rege et a diversis sancto Aniano diversas oblationes, quas referre brevitatis causa prætermittimus, in his paulo diutius immorati, ut cunctis pateat quorum auspiciis jacta sint fundamenta novi regiminis, hætenus feliciter inter immensos turbines permanentis ope sanctorum, quorum fuit ab ejus exordio patrocinium imploratum, atque cultus honorificentissime amplificatus. Ut plane exemplo sit demonstratum ex sancti Evangelii doctrina (quod dictum) nempe, illud mansurum jugiter ædificium, nec ventorum ac imbrium disjici impetu posse, quod est supra petram fundatum, nempe Christum, lapidem angularem, et cohærentes illi lapides vivos, sanctos omnes. At hic invidiam passus, te interpello, lector, judex æquus adsiste. Compellans me Hispanus homo: Cur, inquit, Francorum res sic copiose prosequeris, ut vix sit annus, in quo non sit aliqua eorum mentio, Hispanorum autem secus? cui paucis his satisfeci: Da ut scribam, sive describam potius. Collector sum rerum antiquarum, et ubi ex scriptorum frequentia messis copiosior invenitur, densiores in Annalibus exsurgunt ex messe manipuli; rariores vero, cum ex scriptorum inopia, in sterili messe non impleat manum suam, qui ex ea manipulos colligit. Scito me magno redempturum pretio fore, si quis in tanta scriptorum inopia laboranti, antiquorum monumentorum copiam faceret, quibus eosdem locupletare possemus Annales. Sed reliqua prosequamur.

6. *Concilium Lemovicense: ubi multa de elevatione corporis S. Martialis.* — Hoc eodem anno celebrata est Synodus Lemovicensis, primo nondum evoluto anno a Dedicatione Basilicæ Salvatoris, de qua hæc habentur in scripto Chronico Gaufredi monachii sancti Martialis Lemovicensis cænobii: « Anno Domini millesimo vicesimo octavo, consecrata est Basilica regalis Salvatoris Lemovicæ, decimo quinto kal. Decembr., idque ab episcopis undecim, quorum nomina hæc pagina continet: Jordanus Lemovicensis, Isembertus Pictaviensis, Roho Engolismensis, Arnaldus Petragoricensis, Petrus Gerundensis, Deodatus Cadurensis, Æmilius Albiensis, Arnaldus Rotenensis, Fulco Carcassonensis, Elus Santonensis, Golefredus archiepiscopus Burdigalensis. Hoc factum est tempore Roberti regis Francorum, et imperatorum Constantini Græcorum, et Conradi Romanorum ». Hucusque Gaufredi Chronicon. Acta autem alterius Lemovicensis Synodi post Roberti regis obitum celebratæ, hæc prima Actione habent de habito ibidem hoc anno Concilio:

7. « Hoc quidem verbum, qualiter ante hos annos, hoc est, in primo anno dedicationis hujus Lemovicensis Basilicæ Redemptoris nostri, quam

hodie exultanter nobiscum recolit, viventibus tunc doctissimis rege Francorum Roberto, et Gauzelino metropolitano archiepiscopo Bituricensi, prædecessore vestro, hæc sedes Lemovica non sine enormi auctoritate divina receperit; ut scilicet sanctus Martialis debeat Apostolus appellari, paucis memorare libet. Post multas hujus Capituli alterationes, aliis assentientibus, aliis vero repugnantibus, cum super hac re multæ factæ essent Litanie, ut hoc verbum, nisi Dei esset bona voluntas, in concordia hujus sedis minime resideret: advenit Synodalis ad hanc Ecclesiam conventus, ubi tertia die Synodi omnis sacerdotum generalitas, ac cæterorum clericorum numerositas, una nobiscum nobilium virorum, et legis doctorum adjuncta multitudine (credo) Deo gubernante, unum cor et unam voluntatem hora diei tertia suscepit, taliterque omnibus inspiratum est, ut pacifice et libenter atque voluntarie bona obedientia hæc susceperetur ab omnibus sententia, deincepsque immutabiliter per vestram diœcesim observaretur. Et bene placuit omnibus, qualiter hanc Deo beneplacitam voluntatem acciperemus, ut quemadmodum multitudini novitas videbatur, ita contra hanc altera quidem res nova, sed magnifica et religiosa, adversus omnes æmulos confirmaretur.

8. « Aggregato namque maximo populorum conventu, sacratissimum corpus patroni, nempe sancti Martialis, a suo levavimus tumulo, et piissimo obsequio transtulimus super hoc sanctum altare, quod in honorem beati protomartyris Stephani ipse consecravit. Acta sunt hæc Dominica Resurrectionis die, in ipsa solemnitate Inventionis corporis beati Stephani, nempe tertio nonas Augusti, atque hujus sancti templi consecrationis, quod idem sanctus Martialis primum in omni Gallia dicavit, dirutis quæ in hoc loco pridem Gentilitas coluerat simulacris, etc. » Hæc ibi. Meminit quoque auctor Aquitanie Historiæ, cujus tantum fragmenta supersunt, alterius et ab hac diversæ elevationis sancti Martialis, factamque refert ad propulsandam luem, et mirabilem consecutum narrat effectum, his verbis: « His diebus lues gravissima Lemovicinos devoravit, incendens corpora et exardescendo devorans, donec omnes Aquitanie episcopi, Lemovicæ congregati, corpus beati Martialis ab imo sublatum sepulchro mortaliu visibus ostenderunt, et mox pestis ipsa cessavit. Tenebat tunc præsulatum Lemovicæ Alduinus, qui erat successor Aldegerii, successoris Ebli episcopi ». Porro elevatio ista, de qua dictum est superius, contigit sub horum successore Jordane, et Gauzelino archiepiscopo Bituricense; de quo non prætereant quæ Helgaldus in Vita Roberti regis de ipso tradit summa cum laude; ait enim:

9. « Hujus certe temporibus, Roberti regis videlicet, cujus, adjuvante Deo, facta describimus, fulsit in monasterio Floriacensi, loco celebri, splendidus mundo Gauzelinus abbas, merito sanctis Deo conjunctus operibus, pollens scientia spiritali simul

et humana. Iherant ejus cordi Abbonis magistri prolati sanctæ Scripturæ flores boni, de quibus honestissime imbutus, ita eructabat omnibus, ut possent delectari in cœlestibus. In sanctis eleemosynis largissimus, ut ipse positus in fortissimis frigoribus a se vestes pellium abiciens, pauperes Christi indneret, ut a remuneratōre bonorum præmium perciperet, de quo audiret¹ : Nudus fui, et vos operuistis me : quod uni ex minimis meis fecistis, mihi fecistis ; venite benedicti etc. Hunc perfectus rex ita suis affixit obtutibus, ut eum præ cæteris diligens, suis eum specialiter devinciret consiliis : quæ ab eo probe probata, semper ea habuit honesta, nunquam tamen injusta. In honoribus sæculi eum honorans, attribuit illi honores non minimos, abbatiam Sancti Benedicti, quæ est caput totius ordinis monastici, et episcopatum Bituricensem sancti protomartyris Slephani, principatum tenentis totius Aquitanie, qui fuit et est honor et decus Franciæ ». Hæc de Gauzelino Helgaldus. Extant Fulberti Carnotensis episcopi quatuor ad hunc Epistolæ².

10. At quod ad Concilium pertinet, quod hoc anno diximus celebratum, levis fortasse causa videri potest, ut ob titulum S. Martialis tantum deberet convocari provinciale Concilium, ea præsertim in re, quæ unica sententia definiri citius potuisset, nempe non duodecim tantum, sed discipulos dictos reperiri Apostolos ; insuper et eo nomine in Ecclesia decoratos omnes, qui legitime missi ab Apostolica Sede, populos ad fidem Christianam convertissent, ut de his innumera sunt exempla : quibus duabus rationibus competeret sancto Martiali, ut Apostolus dici jure posset. At quod cum semel quid deducitur in controversiam, crescentibus studiis, quamvis minimum, in immensum augeri soleat, obnitente præsertim pertinacia cedere nescia : plane factum est ut nec unum istud Concilium suffecerit ad quæstionem omnino sedandam, sed opus fuerit etiam alia insuper congregare Concilia, Bituricense, posterius Lemovicense, atque Pictaviense, prout Acta Lemovicensia, quæ apud nos extant, manifeste significant. Quamobrem altercationis hujus in gratiam legentium operæpretium existimavi ex iisdem synodalibus Actis repetendum principium esse, et ipsam causam narrandam quæ præcessit, ut opus fuerit hujusmodi episcoporum convocare Concilia. In alia enim Lemovicina Synodo, eadem ex causa postea iterum congregata, de qua suo loco dicturi sumus, ista in prima Actione narrantur ab Odelrico abbate ita perorante :

11. « Adhuc vivente rege Roberto, cum antecessor meus Ilugo in palatio ei ac Parisiis assisteret cum multitudine nobilium ac doctorum, altercatio inter Francos et Lemovicenses de hujusmodi sancto coram rege fieri cœpit, et ego ibi tunc præsens interfui. Dicebant isti : Vos Franci non recte facitis, qui Martialem cum Apostolis pronuntiatis :

nos recte agimus, quia eum inter confessores recitamus. Vos ultimum Apostolorum dicitis : nos primum confessorum in Litanis dicimus. Quorum litigium archiepiscopus Bituricensis prædictus Gauzelinus compescuit, dicens : Ambæ Injus rei partes nisi uniformes fueritis....., pars altera altera parte justior est, et necesse est ut semper justior et rationabilior prævaleat pars. Nam omnes qui Martialem inter confessores pronuntiant, non bene juste, non bene perspicaciter agere mihi videntur. Ille enim magis sortis est Apostolicæ unus, quam sortis confessorum ; ideo non bene certe agunt, qui nomen ejus auferunt de eo in quo Deus eum posuit gradu, et ponunt ubi Deus non posuit, potius de Apostolico agmine quam de confessorum, qui post martyres sunt serie..... Utique si regis qui adest nomen, non inter regum, sed comitum subjectorum vocabula diceret quis : is aut rusticus diceretur, aut malevolus regis contemptor. Et si rustica simplicitate id fieret, nil moveretur rex animo sed rusticitati facile ignosceret : si vero non simpliciter, sed contemptive diceretur, non dubium quin regis animus ad iracundiam pro contemptu suo accenderetur. Quod si in tali contemptione persisteret, sententiam contra se pro malevolo contemptu sentiret, nec tantum rex quantum subditi comites ejus et principes et amici in contemptorem irati fierent.

12. « Revera scit omnis hæc regio, quia ille prædicator Aquitanie de gradu non confessorum, qui post martyres sunt, existit. Ego autem, si nomen ejus de Apostolico ordine auferrem, timerem ut Apostoli Petri et aliorum indignationem hac in re incurrerem, qui olim in mundo, et nunc in cælo collegam et sodalem suum Martialem præclarorum consortio per sedilia Apostolica habent. Et si nomen ejus permutarem in eum catalogum quo sanctum Benedictum, et Hilarium, et Martinum pronuntio, metuerem quidem iram S. Benedicti, et Hilarii, et Martini, et aliorum incurrere, qui eum in cælo gaudent ordine Apostolico irradiari. Illic nulla invidia etc. » Multisque in laudem Martialis dictis, dicendi finem facit archiepiscopus Gauzelinus, a rege collaudatus. Pergit vero Odelricus :

13. « Nos autem ubi regressi sumus ad hanc urbem Lemovicensem, hac de re Codices antiquos loci nostri perquirere confestim curavi innumeros, tam penes nos quam per universas Aquitanie Ecclesias, invenimus eos Martialem habentes scriptum Apostolum. In antiquis etiam Martyrologii voluminibus, duos ejus discipulos, Alpinianum et Austricianum, scriptos esse ad hæc reperimus Apostolos. Sic quippe legimus in vetustissimis quibusdam : Pridie kal. Julii, natalis S. Martialis, Aquitanie doctoris et Apostoli, cum duobus Apostolis Austriciano et Alpiniano, quorum vita signis et miraculis admodum effulsit. At non ex Archivo tantum Lemovicense satis sunt visa ista in medium attulisse, quin peregrinas etiam Bibliothecas per-

¹ Matth. xxv. — ² Fulb. Ep. xix. xx. xxv. xxvii.

scrutatas volvere, atque ex Orientali etiam Ecclesia afferri testimonia testeque produci. Nam de Constantinopolitana Ecclesia ista in Synodum sunt allata ab Asenario abbate Miciacensi coram Patribus post alia : Olim antequam monachi habitum susceperem, et Hierosolymam proficiscens, apud Constantinopolim in Basilica Sanctæ Sophiæ sabbato Pentecostes solenni interessens officio, memini me audivisse in Litanis Græcis, Martialem inter alios Apostolos post duodecim fuisse a Græcis pronuntiatum ». Sed et quod ad testes pertinet Orientales, hæc clericus Engolismensis in Synodo :

14. « Ante hos plures annos, quidam ex fratribus de monte Sinai ad hanc partem deveniunt Occiduum, Dei dispensante nutu, moribus graves, doctrina Catholica fidei profluentes, vita per omnia honesti, utriusque linguæ periti. Qui cum diu nobiscum Engolismæ fuissent expectantes principem civitatis, et litteris Græcis et Latinis eos videremus ad unguem imbutos : super hac re interrogare curavimus eos, eo tempore, quo hæc regula de Apostoli memoria in hac urbe frequentabatur recuperata potius quam primum inchoata, viventibus rege Roberto, et Gauzelino Bituricensi archiepiscopo. Ego autem Engolismæ positus, ubi etiam ab ineunte ætate educatus sum, dum inter alios quasi sciolus viderer, ante omnes et super omnes huic regulæ repugnabam, putans esse vanum et falsum, sive ex elatione descendisse, quia Martialem audiebam in hac urbe Lemovicensi prædicari esse Apostolum, et incautus rusticorum opinioni meam accommodabam intelligentiam, putans neminem esse Apostolum præter duodecim. Itaque illos conveni Græcos, sciscitans utrum Orientales Martialem nossent. Qui (alter Simeon, alter Cosmas) consono ore responderunt, dicentes : Utique Martialem novimus Apostolum, unum ex Septuaginta duobus. Quibus cum diceremus : Nescimus præter duodecim Apostolos ; interrogaverunt nos : Habetisne, inquit, per istas Occidentales Ecclesias Evangelistam Lucam, qui scribit : alios Septuaginta duos..... a nobis non credi fuisse Apostolos sed tantum discipulos. Illi protinus nos fugientes, et signo crucis se munientes, cæperunt detestari vocem nostram, dicentes : Discedite procul a nobis, miseri, quia hæretici estis, cum non credatis verbis Domini, dicentis ad illos : Ite, ecce ego mitto vos sicut oves inter lupos. Non creditis esse Apostolos illos, quos ipse incarnatus Dominus ad prædicandum misit ? etc. » Hincque vocatus, ostendit expresse aliquot ejus discipulos in Actis Apostolorum et Epistolis Pauli Apostolos. Porro Simeon iste Græcus monachus non amplius est reversus in Orientem, sed remansit in Galliis, ubi inclusus egregia claruit sanctitate, miraculisque illustris inter sanctos relatus est, ut suo loco dicturi sumus, ubi agemus de ipsius obitu.

15. Proditum et probatum æque istud fuit ex Codice venerandæ antiquitatis, Gregoriano nimirum, quem per suos sanctus Gregorius olim misit-

set in Angliam : de quo digna memoria recitantur in Actione prima ejusdem Concilii Lemovicensis. Sic enim Odelricus abbas in Synodo locutus ibidem legitur : « Interim pater allocutus est Concilium, dicens : Ne quis forte nos dicat nunc novum fateri Apostolum, et hactenus non auditum de Apostolatu ejus antiquitate, et quod non olim prænuntiatum est ab antiquis et testificatus fuerit ; iterum perhibebo testimonium, o venerabiles episcopi : Ecce duo sacerdotes ex fratribus nostris coram adsunt, quos olim hac ipsa de causa in Britanniam misi, ut Anglorum (ut reor) a Gregorio præfixam legem annosam diligentius perscrutarentur, et omni submoto mendacio, ad nos referrent. Qui cum ad Anglos pervenissent, tam in martyrologiis eorum quam in Litanis, Martialem ab antiquitate reperiebant Apostolum scriptum. Ad quoddam autem magnum pervenientes monasterium, in quo sanctus Anglorum episcopus requiescit corpore Augustinus (compererunt enim ibi non haberi librum de Actibus beati Martialis) per Litanias tamen et martyrologia in eodem loco invenerunt eundem patronum nomine Apostolico decoratum. Et cum a patre monasterii perquirerent, dicentes : Ut quid Martialem in vestris Litanis prædicatis Apostolum, cum ejus gesta dicatis non haberi penes vos ? ille respondit : Quia ab illo, inquit, tempore, quo primo in hac provincia Christi nomen auditum est, a patribus hoc nostris observatum est, quorum nullatenus mutare possumus traditionem. Scimus quippe doctores nostros priores de Gregorii profluxisse magisterio : attamen sæpius inter nos conferre indagando solemus, quis est iste Apostolus, cujus vocabulum in Evangeliiis et in Actibus Apostolicis minime intuemur. Et quoniam gestorum ejus auctoritatem non habemus, de eo non parum hæsitavimus, et ideo nomen ejus crebro a memoria Apostolica eradere putabamus. Sed e contra cum animadverteremus, quia antiqui Patres nostri non incassum hunc nobis scripserunt Apostolum : idcirco nullo ausu ejus vocabulum a serie Apostolorum abolere audebamus. Vos autem peregrini Galli, qui de ejus estis Apostolatu, qui nobis ejus Actus annuntiat, a cordibus nostris de eo omnem dubitationem abjecistis, et hac de re dudum creberrime Deo supplicabamus certos nos reddi. Nec in adventu vestro derelictos spe nostra videmus, imo exultandum nobis est de tam egregiæ virtutis Domini nostri Jesu Christi discipulo. Multa alia testimonia penes eandem gentem Anglorum, de hujus veritatis vetustate testes veraces narraverunt nobis se comperisse.

« Illud quoque memorandum est, quod ante hos septem annos, rex Anglorum (Cnutus hic erat cognomento Magnus) duci Aquitanie Willelmo regalia munera misit, simulque Codicem litteris aureis scriptum, in quo nomina sanctorum distincta cum imaginibus continebantur. Quod volumen jam olim in Concilio Pictaviensi, dum hac eadem de re quæstio esset, idem dux Willelmus litteris

eruditus, in testimonium antiquitatis pontificibus ostendit. Erat enim ibi Martialis in aliorum Apostolorum catalogo positus. Qui peritissimus princeps dicebat archiepiscopo Burdigalensi et aliis qui ibi aderant episcopis: Conjicere possumus, quam egregiæ auctoritatis sit beatus Aquitanorum patronus, de quo Gregorius in illa sui laboris gente hanc legem tradidit observandam. Nimium imperitorum est dubitare, de quo sanctus papa Gregorius non dubitavit. Videtis ecce, o episcopi, in hoc Codice, qui ad Anglos scriptus est, prætermissum

esse Timotheum, et Cleopham, et Silam, et alios quorum nomina in Evangeliiis et in Actibus Apostolicis, sive in Epistolis Pauli leguntur, quos Apostolos dicitis præter duodecim esse; non tamen prætermissum esse illum nostrum patronum, qui primus Galliarum fuit episcopus, etc. » Hæc ex Actis posterioris Synodi Lemovicensis. Quomodo autem ad hæc de his consulenda fuit Apostolica Sedes, et expectandum quid papa rescriberet: suo loco dicturi sumus. De his modo hæcenus.

Anno periodi Græco-Romanæ 6522 — Anno Æræ Hispan. 1067. — Anno Hegiræ 420, inchoato die 19 Januar., Fer. 1. — Jesu Christi 1029.

— Joannis XIX papæ 6. — Conradi H reg. 6. imp. 3. Romani Argyri imp. 2.

1. *Translatio S. Saviniani archiep. Senonensis.* — A num. 1 ad 6. Recitat Baronius Dedicationem Ecclesiæ Aurelianensis, in memoriam *S. Aniani*, ejusdem civitatis quondam episcopi, a Roberto Francorum rege ædificatæ, quam fuse narrat Helgaldus in hujus regis Vita. Ejus loco hic referam Translationem corporis *S. Saviniani*, Senonensis archiepiscopi primi, factam in Basilica *Vivi*, rege *Roberto* et *Constantia* regina præsentibus cum primoribus regni, in capsam auro gemmisque protectam (ut hæcenus visitur). Promiserat regina, ut refert Odorannus monachus in suo Chronico, si in gratiam regis redire posset, sese exornaturam corpus *S. Saviniani* gemmis et auro, quod diu inclusum plumbo ab antiquis absconditum fuerat sub arvo. « Et regi suggerens sua vota, Deo auxiliante, ad ea implenda paratum illum invenit per omnia. Qui accersiens Odorannum ejusdem loci monachum, qui ad hoc opus perficiendum videbatur idoneus, commisit una cum regina ejus fidei tantæ pietatis opus », inquit idem Odorannus. Translatis a Leotherico archiepiscopo Senonensi sacris ossibus, ipse rex in publica supplicatione sacra lipsana bajulavit cum regia domo: quod singulare pietatis obsequium quotannis recolentes mystæ metropolitani, ea pariter suis humeris subvehunt æmulo devotionis affectu per gyrum urbis in festo *S. Marci*, clero præsentem, magistratibus et populo, ut testatur Mathoudus in Catalogo archiepiscoporum Senonensium, dum de *Leotherico* sermonem habet, qui hanc translationem in Chronicis Mss. Ecclesiæ Senonensis hoc anno consignari affirmat.

2. *Conc. I Lemovicense.* — Ad num. 6 et

seqq. *Lemovicis* duo Concilia habita, in quibus *sancti Martialis*, illius civitatis episcopi primi, apostolatus confirmatus est. Primum recte hoc anno a Baronio consignatum; sed secundum perperam ab eo in annum *xxxiv* dilatum, cum, ut infra visuri sumus, certo constet, illud ad annum *xxxvi* pertinere. Prioris Synodi Acta non extant, sed ex parte recitantur in secunda sessione posterioris. Ejus etiam mentio in priori sessione ejusdem secundi Concilii, pag. 887 et seqq., ubi dicitur, Patres transtulisse tunc corpus sancti Martialis ejusque Ecclesiam consecrassent. « Facta sunt hæc », inquit episcopi, « Dominica Resurrectionis die, in ipsa solemnitate Inventionis corporis *B. Stephani*, atque hujus sancti templi consecrationis, quod idem patronus primum in omni Gallia Deo dedicavit, dirutis quæ in hoc loco pridem gentilitas coluerat simulacris ». Inventio sancti Stephani quæ die tertia mensis Augusti celebratur, hoc anno incidit in Dominicam, quæ sæpe ab antiquis *Dominica Resurrectionis dies* appellatur. In hac Synodo, *Jordanus* episcopus Lemovicensis, ut ibidem videre est, dixit ante hos annos de eadem re factam esse inquisitionem; et cum altercatio hæc ad aures Joannis summi Pontificis pervenisset, cum Epistola sua redarguisse omnes qui contradicunt *Martialem* esse Apostolum, ubi loquitur *Jordanus* de Conciliis Pictaviensi et Parisiensi, de quibus suo loco egimus, significatque iis habitis Joannem papam XIX eam Epistolam scripsisse, de qua infra sermo erit.

3. *Floret S. Symeon Syracusanus.* — Baronius num. 14 refert testimonium *sancti Symeonis* Syracusani, et alterius viri Græci nomine *Cosmæ*,

qui dicuntur asseruisse *Martialem* apud Græcos haberi unum ex LXXII discipulis. Sed testimonium istud non in priori, sed in posteriori Synodo Lemovicensi prolatum, ut in tom. IX Concil. pag. 878 legere est : « Ante hos plures annos, quidam ex fratribus de monte Sinai in hanc partem venerunt Occiduam, Dei disponente nutu, moribus graves, doctrina catholicæ fidei profluentes, vita per omnia honesti, utriusque linguæ periti, etc. » inquit in Synodo quidam clericus Egoлизмensis. Postulat hic locus, ut quid egerit sanctus *Symeon* Syracusanus, postquam anno MXXVIII Antiochia in Belgium venit, ut supra narravimus, exponamus. *Evervinus* seu *Ebervinus* monachus, natione Germanus, et postea abbas monasterii Theologiensis seu Doleiensis, in archiepiscopatu Trevirensi siti, qui in comitatu fuit sancti Symeonis, quando Antiochia in Belgium venit, ejus Vitam scripsit, a Surio ad diem primum mensis Junii recitatam. Ait itaque Evervinus *Symeonem* venisse Rothomagum, ibique Richardum comitem Normanniæ, hujus scilicet nominis III, mortuum comperisse, ideoque ei in mentem venisse, « ut suum patrem charissimum, Richardum scilicet abbatem nosque suos comites inviseret : quod et fecit. Per longum autem tempus moratus est nobiscum », inquit Evervinus, qui per longum tempus nonnisi aliquot menses intelligere potuit, sicuti et clericus Egoлизмensis in Concilio Lemovicensi II, per hæc verba, *ante hos plures annos*, nonnisi tres aut quatuor annos designavit, cum hæc anno MXXXI in Concilio dixerit, et sanctus Symeon anno tantum MXXVIII in Franciam venerit.

4. *Profectio ejus Hierosolymitana cum Poppo archiep. Trevirensi.* — Poppo archiepiscopus Trevirensis, subdit Evervinus, gratia orationis Hierosolymam venit, *huncque famulum Dei eundo et redeundo secum conviatorem habuit*. Post suum reditum, Poppo Symeoni facultatem concessit in sua diœcesi commorandi, et in quadam turri apud Treviros *in festivitate sancti Andreæ illum inclusit*, ubi reclusus usque ad mortem vixit, ad annum nempe MXXXIV quo obiit, ut infra videbimus. Ex quibus perspicuum fit, quæ scribit Hugo Flaviniacensis abbas in secunda parte Chronici Viridunensis num. 26, post hæc verba : « Quid apud Richardum Normanniæ principem egerit (sc. Symeon) sicut in armario Rothomagensi continetur, licet libellus Vitæ ejus hoc sileat, paucis explicemus », hæc, inquam, litteris mandata fuisse a quopiam

monacho monasterii Sanctæ-Trinitatis de Monte prope Rothomagum, parum de rebus ad hunc sanctum pertinentibus edocto. Ibi enim dicitur, *Richardum III* Normanniæ principem, Symeonem commendasse viro nobilissimo, *Gozelino* nomine, eique plurimas largitum esse divitias, quas Symeon ad servos Dei montem Sina habitantes miserit, ac postquam ibidem per biennium mansisset, Viridunum ad Richardum abbatem venisse. Quæ tamen pugnant cum iis quæ de *Symeone* Evervinus itineris ejus socius narrat; cum is affirmet, Symeonem, cum *Rothomagum* venit, comperisse *Richardum* ducem jam vivis excessisse, et doluisse quod locus Sinai frustratus esset eleemosynis ab eo principe illuc mitti solitis. Præterea verum quidem est, *Gozelinum* sancti viri hortatu ædificasse monasterium Sanctæ-Trinitatis in vicino monte Rothomagensis urbis; sed monasterium illud a *Gozelino* vicecomite et *Emmelina* ejus uxore fundatum, *Roberto* Richardi III successore Normanniæ regente, ut patet ex Diplomate hujus principis foundationem illam confirmantis, a Pomerio in Historia abbatiæ Sanctæ-Trinitatis, pag. 72 recitato. Celeberrimum fuit monasterium illud, appellatum monasterium *Sanctæ-Catharinæ in monte*, donec exeunte sæculo XV, prorsus solo æquatum fuit. Mirum est, Hugonem Flaviniacensem, qui fatetur se Symeonis Vitam legisse, non animadvertisse, quæ præfato numero narrat, sibi in plerisque adversari.

5. *Moritur Bruno episc. Augustensis.* — Wippo, in Vita Conradi Salici, postquam gesta ab eo anno superiori retulit, ait : « Anno sequenti, imperator in Bajoaria Ratisponæ Pascha celebravit. Ibi Bruno episcopus Augustensis defunctus est, cujus corpus imperatrix prosecuta, cum filio Henrico rege ad Augustam sedem suam honorifice sepeliri fecerunt : nobilis enim valde fuit ipse episcopus Bruno. Nam dum esset frater Henrici imperatoris, filius erat materlæ Giselæ imperatricis, soror vero ejusdem episcopi nupta Stephano regi Ungarorum, causa fuit Christianitatis primum in gente Pannonica. Episcopatum vero Augustensem Eberhardus suscepit ». Idem ad hunc annum Hermanus Contractus in Auctiori Chronico, et chronographus Hildensheimensis habent. Distinguendus hic *Brunus* seu *Bruno* ab altero ejusdem nominis episcopo etiam Augustensi, qui cum in Prussia Christum annuntiare cœpisset, ab infidelibus occisus est, ut suo loco diximus.

JOANNIS XX ANNUS 7. — CHRISTI 1030.

1. *Bellum Conradi in Hungaros irritum redditur.* — Millesimus atque trigesimus sequitur annus, Indictione decima tertia inchoatus, quo imperator Conradus expeditionem parat adversus Stephanum Hungariæ regem, sed Deo resistente, omnes conatus ejus cito evanuerunt precibus ejusdem sanctissimi regis. Quod ad tempus spectat, a scriptoribus rerum Germanarum hic ipse ejus rei gestæ annus consignatur¹, licet non desint qui in annum sequentem ista rejiciant². At ex Cartuitio hic reddemus historiam³: « Conradus, pacis tranquillitate interturbata, totius Germaniæ viribus et copiis contractis, Pannoniæ infesta signa inferre conatus est. Tum vero rex Stephanus, episcoporum et principum coacto conventu, in patriæ defensionem totius Hungariæ exercitum evocavit. At prius tamen secum perpendens se nihil posse sine Christi adjutorio, manibus ac corde sursum erectis, Dominiæ suæ perpetuæ Virgini et Dei Genitrici suas injurias commendans, in hujusmodi prorupit voces: Si placet tibi, Domina mundi, tuæ partem hæreditatis ab inimicis devastari, et novellam Christianismi plantationem dissipari; ne, quæso, sinas illud imputari diffidentiae meæ, sed potius dispositioni voluntatis tuæ. Si quid commernit culpa pastoris, ipse luat; oves, quæso, insontes ne patiaris affligi. His dictis, tanquam accepta consolatione ab ea, fidenter movit in hostes.

2. « Altera die nuntius venit ad singulos quosque duces exercitus Germanorum, ab imperatore litteras afferens, quibus jubebantur pedem retro referre. Illis ergo discedentibus, sanctus rex divina misericordia adjutum se sentiens, humi se abjicit gratiasque agit Deo et sanctissimæ Genitrici ejus, cujus protectioni seque regnumque suum assiduè precibus commendare solebat. At imperator suorum tam repentina defectione perterritus, sciscitatur quidnam rei ipsis accidisset: audiensque de nuntio, qui eos ipsius nomine redire jussisset, sciensque illum haudquaquam a se missum fuisse, non dubitavit consilio et voluntate omnipotentis

Dei rem gestam ob fidelissimi regis corroborandam spem; seque deinceps ab ejus invadendo regno timore illius Judicis æterni cohibuit ». Hactenus de his ipse.

3. *S. Emericus S. Stephani filius moritur.* — At vero Deus sic pepercit regno, ut tamen in filium regis damna converterit, quæ lucro maximo illi cessere, dum ita hoc anno cum ex hac ærumnosa vita sustulit, ut sempiternam illi beatamque tribueret. Rem gestam idem auctor sic narrat⁴: « Dominicæ Incarnationis anno millesimo trigesimo, vitam hanc corruptibilem cum sempiterna commutavit ejus scilicet filius Emericus, supernorum civium choris adjunctus. Ejus animam, ea ipsa hora qua decessit, cuidam Græcorum episcopo, sanctæ conversationis viro, divinitus revelatum est angelicis manibus in cælos deportari. Cum autem pro sanctitatis suæ meritis summe ab omnibus diligeretur, omnium extitit luctus ingens, in primis vero principum, inter quos pater tanto accepto orbitalis vulnere graviter suspirabat, et pietatis affectu ductus, dolebat se omni posteritatis spe destitutum. At tamen sciens scriptum esse⁵: *Non est sapientia, non est prudentia, non est consilium contra Dominum*, et illud in canonibus: *Nemo propter charorum obitum nimium debet contristari*; posito animi mœrore, totum se contulit ad largam Dei misericordiam promerendam. Cœnobiorum enim et Ecclesiarum ministris, monachis et clericis multa largitus est, multamque ea benevolentia attulit consolationem. Quidquid vero ei superfuit, peregrinis, viduis et orphanis erogavit. Exterarum quoque provinciarum monasteriis regiæ munificæ dona innumera per nuntios suos crebro misit ». Hæc auctor, pergens narrare sanctissimi regis sanctissimos æque mores, et quam post hæc sit passus suorum conjurationem, a qua cum Deus custodivit illæsum, unde experimentum caperet, se ad probationem non autem ad perditionem a Deo tentari permitti, sed ut faceret maximum (quod evenit) cum tentatione proventum.

4. Porro sancti regis sanctus filius ob egregias

¹ Usperg. hoc an. Herm. atque Lamb. — ² Marian. Scot. et Sigebr. — ³ Cartuit. in Steph. c. 16. apud Sur. tom. iv. die xx Aug.

⁴ Cartuit. in Vita Steph. c. 19. — ⁵ Prov. xi.

quæ in eo fulsere virtutes, meruit mortuus semper vivens inter sanctos referri¹, anniversariaque memoria in Ecclesia publice prædicari pridie non. Novembr. ipsa die natali ipsius in cælo adscribi sanctorum catalogo. Quibusnam autem idem rex maxime pius filium imbuisset vitæ sanctissimis institutis, ab eodem auctore sic accipe: « Paterni amoris impulsus stimulis, libellum ei composuit de morum institutione, in quo illum verbis spiritualis adhortationis fideliter et spiritualiter compellabat, docens eum, quemadmodum ante omnia debeat retinere Catholicam fidem, confirmare statum Ecclesiasticum, honorem habere præsulum dignitati, principes et milites amare, iudicii tenax esse, in cunctis suis actibus studere patientiæ, hospites benigne recipere, benignius alere et fovere, sine consilio nihil agere, majores suos semper ob oculos statuere, precibus crebro vacare, pietatem et misericordiam cæterasque virtutes colere et consecretari. His et id genus aliis disciplinis præclarus ille juvenis imbutus est ». Sed quem divinus Spiritus intus docuit, monita patris, veluti prima litterarum elementa cito facileque fecit addiscere, et his longe majora transcendere, verticemque Christianæ perfectionis attingere.

5. *Romani imperatoris Orientalis res pie gestæ.*

— Quod ad res pertinet Orientis, Romanus prope finem anni superioris creatus imperator, hoc anno primo sui imperii « optimis exordiis », inquit Curopalata, « et laudabilibus progressionibus benigne sibi subjectos tractavit, a pietate prius exorsus benefacere. Cum enim nosset non idoneum esse annuum redditum magni templi, quippe cujus fuisset superiori tempore œconomus, et aliorum, quibus ab ejusdem clero mos fuisset ministrari: octoginta auri libras excedendas curavit, quæ adderentur ad ea quæ quotannis suppeditari consuevissent ». Et post alia recensita laude digna subiicit ista: « Præbuit item pecunias infinitas pro salute animæ soceri sui. Eos quoque, qui ab ipso detrimenti aliquid acceperant, consolando curavit ». Et inferius: « Fuit etiam die Pentecostes perturbatio quædam in sacris celebrandis, quod non consensissent metropolitani episcopi sedere ante se syncellos in consessu ». Hæc Curopalata: eadem ex ipso Cedrenus.

6. *De fundatione monasteriorum S. Dominici et S. Silvestri in agro Sorano et Casæmarii, ubi multa ad hæc spectantia.* — At vero ne res patrias, intentus aliis, ingrate nimis præteriens videar contempsisse, dicendum de nobili monasterio hoc anno erecto in Sorano agro, illo ipso loco ubi Fibrenus influit in Lirim, illustrato olim cunabulis Cicero-nis, ut ipse testatur libro de Legibus. Qui enim hoc tempore præerat Soranæ civitati atque Arpino Petrus Rainerii filius, ipsum erigendum curavit. Sciendum vero Soranam civitatem, una cum aliis oppidis, castellis et vicis ipsi subjectis, hoc tempore

fuisse comitatus insignitam honore, ejusque dominum comitem appellatum reperiri apud Leonem Ostiensem, qui ex antiquo Chronico Cassinate ista deprompsit¹: meminitque de Ilildebrando Sorano comite sub anno nongentesimo quinquagesimo quarto. Rursum vero sub anno millesimo sexagesimo meminit Balduini Sorani comitis². Eodem vero honoris titulo perseverasse ejus civitatis ad dominii dominum constat. Sed quos nominavimus Rainerium atque ejus filium Petrum, iidem non comitatus titulo, ut domini, sed alio diverso reperiuntur eidem præfuisse civitati, nempe officio castaldæi, ut ex eodem Leone apparet³, qui eundem qui supra, Rainerium castaldæum appellat Soranæ civitatis. Cæterum pro castaldæo non intelligi dominos, sed potius judices seu gubernatores, ex eodem auctore apparet⁴, cum agit de Castaldæo Beneventano, eo tempore quo ejusdem civitatis dux erat Sico.

7. Petrus igitur Rainerii filius patri succedens, sicut in magistratu, ita et pietate, amplum suis sumptibus erigens monasterium, idem suis bonis locupletavit. Extat de fundatione atque dotatione tunc scriptum Instrumentum, quod hactenus integrum asservatur in membranaceo antiquo Codice abbatiae Casæmarii, quod legendum accepimus a Michaelæ Bonello ejusdem monasterii abbate commendatario, sanctissimæ memoriæ Pii papæ V pronepote; ex quo ista descripsimus:

8. « In nomine Domini nostri JESU Christi. Ab Incarnatione Domini nostri JESU Christi millesimo trigesimo, mense Septembris, Indictione tertia decima, ego domnus Petrus, Senior Soræ et Arpini, filius bonæ memoriæ domni Rainerii ejusdem civitatis, et domna Doda, filia bonæ memoriæ Oderisii comitis, uxor supradicti domni Petri, una cum ejus voluntate et absolutione bona, et spontanea voluntate nostra, declaramus, quia dum quadam die cogitare cœperimus intra nosmetipsos, qualiter in peccatis concepti et nati sumus, et qualiter ab infantia nostra, die noctuque, horis et momentis innumerabilia peccata commisimus, et qualiter in illo terribili judicio de omnibus factis nostris et cogitationibus Deo rationem reddituri sumus, et qualiter ab illo æquissimo Judice unusquisque recipiet secundum opera sua. Et rursus dum cogitare cœpimus, qualiter impii et peccatores, qui hic peccata sua redimere negligunt, in illam pavendam pœnam perpetuo cum diabolo damnabuntur, et qualiter justi et electi Dei in illa æterna beatitudine cum Domino gloriabuntur: subito respexit nos divina pietas, et compunctum est cor nostrum cum tremore et æstuatione cordis; et cœpimus cogitare, et quærere consilium a sacerdotibus et religiosiis viris, qualiter innumerabilia peccata nostra redimere potuissemus, et ab ira æterni Judicis et pœna æterna evadere. Accepimus consilium ab

¹ Rom. Mart. die 14 Nov.

¹ Leo Ost. Chron. Cass. I. II. c. 5. 6. — ² Ibid. I. III. c. 18. —

³ Ibid. I. II. c. 33. — ⁴ Ibid. I. I. c. 21.

eis, præterquam renuntiare sæculo, nihil esse melius quam eleemosynarum virtutem: et de propriis rebus et substantiis monasterium construere, et ibidem cœtus monachorum famulantium Deo coadunare, et ibi secundum regulam et normam beati Benedicti laudem Deo resonare et vota persolvere, et omni tempore pro animabus nostris incessanter orare.

9. «Hoc consilium ab eis libenter et ardentissimo amore acceperimus, et cœpimus querere inter nos melipsos ubi opportunum locum invenire potuissemus. Et sic Deo concedente, invenimus locum in finibus Soræ, ubi dicitur, *Inter formas*, quem habebamus in rebus proprietatis nostræ per Chartulam acquisitionis. Ibi que nos ipsi dominus Petrus et domna Doda simul atque communiter uno animo, mente una, novo fundamento construximus Ecclesiam in honorem Domini nostri Jesu Christi et sanctæ Dei genitricis et Virginis Mariæ: et tradidimus eam in manus viri venerabilis domni Dominici sacerdotis et abbatis, et ibi eum abbatem constituimus, ubi monasterium construxisset, et cœtus monachorum Deo famulantium eo advocasset, etc.» Subjiciuntur his fundi omnes quos in alimenta monachorum iidem donavere ipsi eidem Ecclesiæ et monasterio: quorum cum proluxa valde series est, brevitatis causa omittimus recensere. Apposita demum ipsorum subscriptio, atque testium simulque judicis, una cum signis eorumdem.

10. Accidit vero ut idem monasterium Dei Genitricis nomine erectum, defuncto dicto Dominico primo abbate ejusdem, vitæ sanctitate celebri et gratia miraculorum illustri, quod secundum Leonem Ostiensem¹ accidit anno sequenti, cœperit vocari nomine sancti Dominici, quod perseverat usque in hanc diem: quod et idem Leo testatur, nosque suo loco dicturi sumus anno sequenti. Extat ibidem Diploma Innocentii Tertii, anno nono ejus Pontificatus datum, in quo idem monasterium nominatur simul S. Mariæ Virginis ac S. Dominici.

11. Porro idem vir pietate insignis anno superiori aliud erexerat monasterium, ad majorem civium commoditatem civitati proximum, sub titulo S. Silvestri, ad radicem montis cui ipsa adjaacet civitas. Datum extat de his Diploma Indictione duodecima, mense Januarii. Insuper sunt in eodem Codice venerandæ antiquitatis et aliæ plures donationes ejusdem Petri, aliis factæ monasteriis; sicut et aliæ ab aliis iisdem monasteriis, necnon monasterio Casæmarii, et inter alias reperimus donationem factam a Gregorio de Barono monasterio Casæmarii², septimom illiario Sora distantis, anno Domini millesimo centesimo nonagesimo secundo, Indictione undecima, sub Celestino papa Tertio, anno secundo Pontificatus ejus, die nona mensis Novembris, cum eidem monasterio Girardus abbas

præesset. Aliam insuper factam donationem¹ a Leonardo de Barono eidem monasterio, tempore Bonifacii papæ Octavi, anno secundo ejus Pontificatus, die xi Maii, Indictione nona, anno Domini mcccxvi vidimus, et gavisi sumus antecessores nostros his pietatis insignibus reperisse nobilitatos. Porro eandem ipsam nostram familiam, ita usque ad nostram ætatem de Barono dictam, nos primi mutavimus, illud de Barono cognomentum derivantes in Baronium, more Romano. Sed absit ut præterquam in Domino gloriemur², in ipsa vera nobilitate, quam per adoptionem in filiorum Dei familiam cooplati sumus feliciter consecuti. «Nam si filii, et hæredes; hæredes quidem Dei, cohæredes autem Christi³».

12. Quod autem hic obiter fieri contigit mentio monasterii Casæmarii in agro Verulano, septimo milliario Sora distantis, propagatum illud quidem constat ex dicto monasterio Sancti Dominici, quod ejusdem Codicis vetera monimenta testantur, licet exordio ipsius æmulus auctor (quisquis ille fuerit) antiquius illud Sorano monasterio conetur asserere, erectum nempe anno Redemptoris millesimo quinto. Sed cum descripta inferius monimenta testentur, primos monachos fundatores Casæmarii a Joanne successore S. Dominici, abbate Sorani monasterii, monasticum habitum accepisse: quis non sentiat, hoc propagatum ab illo, licet postea, (ut suo loco dicturi sumus) illud huic subjectum fuerit, ita decernente Honorio Tertio Pontifice, cum monastica disciplina ab eo exolevisset; Casæmarii autem cœnobium floreret recenti observantia, ac proinde ferventiori, Cisterciensium monachorum. Sic itaque loco numeri, millesimi quinti, sit restituendum, millesimi trigesimi quinti, quo tempore ipse Joannes, successor sancti Dominici eidem monasterio Sorano abbas præerat. Sed quæ de monasterii Casæmarii institutione scripta in eo Codice habentur, hic reddamus. Sic se habent:

13. «Anno ab Incarnatione Domini nostri Jesu Christi millesimo quinto (MLXXV), Indictione IV, erant in civitate Verulana quidam boni meriti clerici, qui servantes præcepta Dominica divinaque judicia meditantes ac dicentes: Væ nobis, qui nomine.... clericatus habentes officium, vitam neque canonicam neque monasticam ducimus. Quid de nobis erit? quid in extremo dicturi sumus examine? ad cujus auxilium confugiemus¹? Faciamus nobis amicos de mammona iniquitatis, ut cum ab hac vita migraverimus, recipiant nos in æterna tabernacula. Talia animo volentes atque dicentes, adjunctis quibusdam laicis fidelibus ejusdem civitatis, venerunt ad fundum qui dicitur Casæmarii, in territorio Verulano: videntesque ibi antiqua ædificia, ubi dicitur templum fuisse Martis, distans ab eadem civitate milliariis tribus cum dimidio, ibidem commorari cœperunt, in eodemque loco,

¹ Leo Ost. l. II. c. 62. in fin. — ² Cod. Casæmarii, c. 374. p. 242.

¹ Eod. Cod. c. 350. p. 232. — ² Ephes. I. — ³ Rom. VIII. — Luc. XVI.

auxiliante misericordia Dei, Ecclesiam in honorem sanctorum Joannis et Pauli condiderunt; et non post multum, quatuor ex ipsis, scilicet Benedictus presbyter, Joannes presbyter, Ursus presbyter, et Azzo presbyter, euntes ad venerabilem virum Joannem abbatem Sancti Dominici, susceperunt ab eo habitum sanctæ religionis, indeque in locum jam dictum redeuntes, abbatem unum de suis sibi elegerunt Benedictum, virum religiosum, qui fuit natus in dicta civitate Verulana: et sub eo in dicto loco Christo Domino servierunt etc.» Hæc sunt nobilissimi monasterii primordia, quæ dicto anno contigerunt trigesimo sexto post millesimum, quo et Indictio quarta currit, cum et Joannes jam præerat (ut dictum est), monasterio Sancti Dominici.

14. Quod autem in his sumus, nec scimus an de his rursum agendi tempus dabitur, hic item subjiciendum putamus Diploma Honorii papæ Tertii, quo facta est unio abbatiae S. Dominici cum abbatia Casæmarii, quod in eodem citato superius Codice continetur. Sic enim se habet¹:

«Honorius episcopus, servus servorum Dei, dilectis filiis abbati Casæmarii ejusque fratribus tam præsentibus quam futuris, regularem vitam professis in perpetuum.

«Custodes et cultores licet immeriti constituti a Domino in Ecclesiæ paradiso, sacre religionis gratiosa plantaria in ea cupimus propagari, quæ flores et fructus producentia honestatis, animam Sponsi sua suavitate delectent, totamque reddant Ecclesiam speciosam. Sed quanto nobis ejus gratior est profectus, tanto defectus est gravior, si quando propagata plantaria vitiantur, vel in alienæ vitis amaritudinem corrumpantur, dolore confodimur, et rubore confundimur vehementi, cum nonnunquam sui contagione sincera etiam turbare soleant et turpare. Quare summo est nobis studio providendum, ut quæ adeo a ligno vitæ degenerant, ad quæ debuerant esse odor vitæ in vitam, facta odor mortis in mortem, ut nullo culturæ studio reduci possint ad pristinam qualitatem, de vinea Domini radicitus evellantur, quatenus alia plantentur in ea, quæ gratum Domino fructum tempore suo reddant.

15. «Sane cum monasterium S. Dominici de Sora, cui Dominus in rore cæli, et terræ pinguedine benedixerat, tanquam hortus deliciarum diu in spiritualibus et temporalibus floruisset, et abundasset delectabilium fructuum ubertate, tandem propter malitiam degentium in eodem, qui tanquam tribuli et urticæ, veræ religionis plantariis suffocatis, dissolute viventes, in bonis monasterii prodigaliter grassabantur, usque adeo ibi annuflata fuit omnis observantia regularis, quod quasi cubile draconum multis erat in scandalum et honorem. Sed licet illud studiose tentaverimus reformare, quosdam monachos pestilentes exinde amovendo, et faciendo in aliis monasteriis collocari, et advo-

cato aliunde abbate, si forte posset monasterio succurrere desolato: quia tamen amoti etiam tanquam canes ad vomitum redeuntes, exinde etiam nec Ecclesiastica censura potuerunt arceri, sed fere omnes excommunicati præsumebant celebrare vel potius profanare divina: sicque monasterium iis qui in circuitu ejus sunt, magis ac magis erat in ludibrium et contemptum.

16. «Nos videntes, et dolentes quod Babylonem non poteramus ad libitum etiam diligenti cura sanare, vineam Domini aliis providimus locandam agricolis, et monasterium ipsum cum omnibus Ecclesiis et possessionibus, pascuis, silvis, molendinis, hominibus, et aliis juribus et pertinentiis ejus, monasterio vestro uniendo. Statuimus etiam, ut per vos idem monasterium informetur secundum Cisterciensis ordinis instituta, ita quod ibi semper duodecim monachi de monasterio vestro resideant, Domino famulante: ad quorum custodiam abbas unum instituet ut rectorem, quem quoties voluerit poterit commutare, et sic utrumque monasterium semper sub unius tantum abbatis regimine gubernetur: charissimo in Christo filio nostro Friderico, imperatore Romanorum illustri semper Augusto et rege Siciliæ, quidquid in monasterio illo ad eum pertinuerat vobis de assensu nostro donante, sicut in ejus Privilegio aurea bulla munito plenius continetur. Volentes igitur prænotatam unionem, necnon ejusdem imperatoris donationem perpetuis durare temporibus, eam auctoritate Apostolica confirmamus, et præsentis scripti Privilegio communimus.

17. «Decernimus ergo, ut nulli omnino hominum liceat hanc paginam nostræ unionis constitutionis et confirmationis infringere, vel ei ausu temerario contraire. Si qua vero in futurum Ecclesiastica secularisve persona hanc nostræ Constitutionis paginam, sciens, contra eam venire tentaverit, secundo tertiove commonita, nisi reatum suum congrua satisfactione correxerit, potestatis honorisque sui careat dignitate, reamque se divino Judicio existere de perpetrata iniquitate cognoscat, et a sacratissimo corpore et sanguine Dei et Domini Redemptoris nostri Jesu Christi aliena fiat, atque in extremo examine districtæ subiaceat ultioni. Cunctis autem eidem loco sua jura servantibus sit pax Domini nostri Jesu Christi, quatenus et hic fructum bonæ actionis percipiat, et apud districtum Judicem præmia æternæ pacis inveniat. Amen, Amen.

18. «Ego Honorius Ecclesiæ Catholicæ Episcopus.

«† Ego Hugo Ostiensis et Velitrensis episcopus subscripsi.

«† Ego frater Nicolaus Tusculanus episcopus subscripsi.

«† Ego Leo tit. Sanctæ Crucis in Hierusalem presb. card. subscripsi.

«† Ego Guala Sancti Martini presbyter cardinalis tit. Equitii subscripsi.

¹ Cod. Casæm. c. 5, p. 5. 6.

« † Ego Stephanus Basilicæ duodecim Apostolorum presbyter cardinalis subscripsi.

« † Ego Gregorius tit. Sanctæ Anastasiæ presbyter cardinalis subscripsi.

« † Ego Thomas tit. S. Sabinæ presbyter cardinalis subscripsi.

« † Ego Joannes tit. S. Praxedis presbyter cardinalis subscripsi.

« † Ego Rainerius S. Mariæ in Cosmedin diaconus card. subscripsi.

« † Ego Romanus S. Angeli diaconus card. subscripsi.

« † Ego Egidius Sanctorum Cosmæ et Damiani diaconus card. subscripsi.

« Datum Altari per manum Guidonis capellani domini papæ, kalend. Junii, Indictione nona, Incarnationis Domini millesimo ducentesimo vicesimo secundo, Pontificatus vero domini Honorii papæ Tertii anno sexto ».

19. Habetur ibidem Diploma Friderici imp. quod ad preces ejusdem Pontificis dedit. Sic enim se habet :

« Fridericus, divina favente clementia Romanorum imperator semper Augustus, et rex Siciliæ.

« Edocti per eum qui transfert regna, qui nos constituit sua clementia super gentes, excellere, destruere, disperdere, dissipare, quæ noxia sunt remove, et propagare quæ prosunt : monasterium S. Dominici, situm in territorio civitatis nostræ Soranæ, quod in spiritualibus et temporalibus ita collapsum est, ut vitam improbam monachorum (quod vix adjiciat ut resurgat) per religiosos et Deo placentes Cisterciensis ordinis Fratres in melius reforment, monasterio Casæmarii, cujus fama est celebris, unguentum effusum nomen ejus et recta religio, illud providimus committendum et incorporandum, ut ex hoc nunc et in sæculum sæculi sint ista duo monasteria corpus unum, grex unus et pastor unus, et abbas Casæmarii, qui pro tempore fuerit, de utroque disponat, de utroque provideat et ordinet, secundum statum Cisterciensis ordinis, ut de uno.

20. « Intendentes igitur, et volentes placere summo Pontifici domino Honorio Tertio, reverentissimo et amantissimo patri nostro, qui et nobis, ordinante divina providentia..... et monasterium Casæmarii inter alia sui ordinis plus dilexit, cum ipsius assensu et gaudio cordis concedimus et donamus monasterium Sancti Dominici, quantum ad jurisdictionis pertinet potestatem, monasterio Casæmarii memorato cum omnibus tenimentis, montanis, pascuis, silvis, aquis, capellis, hominibus, libertatibus omnibus, et omni jure suo, ut ita sint unum sub unius dominio pastoris, abbatis videlicet Casæmarii, sicut supra diximus. Turbatores autem temerarios nostræ hujus libertatis et unionis, tanquam rebelles lumini in tempus omne bannimus, et quicumque fuerint, ab imperiali gratia sic se noverint cecidisse, ac si rei principi teaneantur de personis et rebus.

21. « Ad hujus itaque concessionis et donationis nostræ memoriam et roboris firmitatem, præsens Privilegium per manus Joannis de Lauro notarii et fidelis nostri scribi, et bulla aurea typacio nostro impressa jussimus communiari, anno, et mense, et Indictione suprascriptis. Datum apud Verulam (Barutam), anno Dominicæ Incarnationis millesimo ducentesimo vicesimo secundo, mense Aprilis, decimæ Indictionis, domini nostri Friderici Dei gratia invictissimi Romanorum imperatoris semper Augusti et regis Siciliæ anno secundo, Siciliæ vicesimo quarto feliciter. Amen ».

22. Sed accipe demum Diploma de ejusdem monasterii dedicatione facta ab ipso Honorio Tertio Romano Pontifice, quod habetur in eodem Codice : quo innotescit etiam eandem Basilicam ejusdem monast. Casæmarii dedicatam fuisse XVII kal. Octobr., anno millesimo ducentesimo decimo septimo per eundem Honorium, qui cum esset cardinalis, nomine Censius, tituli Sanctorum Joannis et Pauli, erexit Ecclesiam, quæ et fuit consummata sub Innocentio papa prædecessore. Porro eidem consecrationi interfuisse leguntur episcopi cardinales duo, presbyteri cardinales tres, diaconi cardinales septem, et episcopi alii decem. Post hæc vero agi cœptum de unienda abbazia Sancti Dominici eidem monasterio Casæmarii, quod et factum, ut superius dictum est. Diploma autem consecrationis sic se habet :

23. « Honorius Episcopus, servus servorum Dei, dilectis filiis Rainerio abbati, et conventui Casæmarii, salutem et Apostolicam benedictionem.

« Si apud Hæbreos olim, qui fuerunt tempore legis, templi consecratio celebris habebatur (nam Salomon templum, quod David pater ejus ædificare voluit, Domino auxiliante perficiens, consecravit, fecitque tempore illo festivitatem celebrem, et omnis Hierosolyma cum eodem) multo magis nunc sollemnis debet haberi, cum per Jesum Christum data sit gratia, et veritas patefacta. Cum ergo ad consecrandam Ecclesiam vestram a vobis cum multa fuerimus supplicationis instantia invitati, quam in minori officio feceramus propriis sumptibus fabricari : ad locum ipsum cum honorabili cœtu archiepiscoporum, episcoporum et cardinalium accedentes, eandem Ecclesiam, accedente fidelium multitudine copiosa, septimo decimo kal. Octobr. in persona duximus propria consecrandam.

24. « Ut ipsius Ecclesiæ dedicatio veneranda singulis annis devotius celebretur, universis qui ad celebritatem consecrationis ejusdem infra novem dies devote confisi, qui est peccatorum remissio, de injunctis sibi pœnitentiis annum unum misericorditer relaxamus.

« Præterea, ut appareat in ornatu, quod Ecclesiam vestram specialiter intendimus honorare, utendi argenteo thuribulo ac sericis indumentis inter Missarum solemnia diebus Dominicis et festivis liberam vobis concedimus facultatem.

25. « Licet autem monasterium vestrum juris

et potestatis sit Sedis Apostolicæ specialiter : quia tamen ex hoc juris, scilicet proprietatis ipsius specialius est effectum, nos illud sub speciali cura et principali tutela beati Petri suscipimus, cum omnibus rebus quas in præsentiarum justo titulo possidet, aut in futurum justis modis poterit adipisci, ut secundum privilegia prædecessorum nostrorum et nostra, semper eas sine contradictione possideat, gaudens ubique privilegiis et indulgentiis universis tam generalibus quam specialibus a Sede Apostolica impetratis, salvis statutis Concilii gene-

ralis. Cunctos igitur ipsius jura servantes Apostolica benedictio prosequatur, eosque divina Majestas justificet in præsentī, et glorificet in futuro. Turbatores autem ipsius, nisi commoniti resipuerint, reos se divino Judicio de perpetrata iniquitate cognoscant, et muneris Apostolicæ benedictionis expertes. Datum Laterani tertio non. Februar., Pontificatus nostri anno secundo ». Hactenus de rebus patris. Sed de ipso sancto Dominico anno sequenti, quo ex hac vita migravit, dicendum.

Anno periodi Græco-Romanæ 6523. — Anno Æræ Hispan. 1068. — Anno Hegiræ 421, inchoato die 9 Januar., Fer. 6. — Anno Hegiræ 422, inchoato die 29 Decemb., Fer. 3. — Jesu Christi 1030. — Joannis XIX papæ 7. — Conradi II reg. 7, imp. 4. Romani Argyri imp. 3.

1. *Bellum Conradi imp. adversus S. Stephanum Hungariæ reg.* — A num. 1 ad 5. Conradum imp. hoc anno cum exercitu in Hungariam intrasse produnt Lambertus Schafnaburgensis, Hermannus Contractus in utraque editione sui Chronici, ac chronographus Hildensheimensis. Hæc verba Hermannī in fusiori Chronico : « Conradus imp., jamdudum inimicitias cum Stephano Ungariorum rege conflatis, Pannoniam petiit, et quantum fluminibus et paludibus non obstantibus poterat, Rabam devastavit ». Paulo post : « Pax cum Stephano rege Ungariorum redintegratur ». Fusius ad hunc Christi annum rem narrat Wippo in Vita Conradi Salici : « Multæ dissensiones inter gentem Pannonicam et Bajoarios, culpa tamen Bajoariorum factæ sunt : ita ut Stephanus rex Ungarorum multas incursiones et prædas in regno Noricorum, id est, Bajoariorum faceret : unde commotus imperator Chuonradus cum grandi exercitu super Ungaros venit.

2. *Henrici Germaniæ regis opera sopitum.* — « Rex autem Stephanus, minime sufficiens adversus imperatorem, orationibus et jejuniis universo regno suo indictis, præsidium Domini tantummodo flagitabat. Imperator tam munitum regnum fluviis et silvis intrare non valens, multis tamen prædationibus, incendiis, circa terminos regni injuriam suam ulciscens, reversus est, volens tempore opportuniore cæpta sua peragere. Sed filius suus rex Henricus adhuc puerulus, Eigenberto Frisingensi episcopo creditus, legatione Stephani regis pacem rogantis accepta, unico consilio principum regni, patre nesciente, gratiam conciliationis annuit : juste et sapienter agens, qui regem injuste

injuriatum ultro petentem gratiam recepit in amicitiam ».

3. *Expeditio Rom. imp. adversus Saracenos.* — Ad num. 5. Romanus Argyrus imp. in expeditione hoc anno adversus Saracenos suscepta infelix fuit : « Nam cum Nicephorus », inquit Zonaras, « et Joannes (scilicet Tzemisces) imperatores, multas urbes Phœniciæ et Syriæ Romanorum imperio subjecissent ; Basilius, qui secutus est, Bulgaricis expeditionibus occupatus, eas firmando otium non habuit : necque tamen quoad is vixit, illæ ausæ fuerunt jugum servitutis aperle excutere. Cæterum, Constantino rerum potito, et dissolute imperium administrante, Agareni tempus id ad exsequenda ea quæ animis agitarant, commodum esse rati : cæsis præsidiis, urbes occupant. Chalepi vero princeps continentibus excursionibus et populationibus ipsam Antiochiam aliasque finitimas Syriæ gentes Romanæ ditionis vexabat : a quo dux Antiochenus, Constantino adhuc superstite, turpiter victus, plerisque suorum amissis, vix effugerat : cui Romanus, successore dato, ipse quoque ad bellum ivit. Cum autem in itinere Chalepitæ legati cum muneribus multis ei occurrissent, veniam petentes, ac servitutis renovationem et pensionem non solutorum tributorum, quæ imposterum etiam citra tergiversationem daturus esset, pollicentes : quamvis multis illustribus ducibus ab ulteriore progressu tanquam inutili deterrentibus, pacemque suadentibus : tamen cæptis non destitit, Agarenos facile se victurum opinatus, et re bene gesta magnum et memorabile nomen consecuturum.

4. *Græcis infasta fuit.* — « Progressus igitur in Syriam vallum communit. Sed Arabes,

homines audaces atque expediti in celeribus equis, et nudi, utraque valli parte collocatis insidiis: si qui pabulatum aut aqualum exhibant, eos impetu facto cædebant aut capiebant; qua re fiebat, ut et milites et equi præ siti deficerent. Deinde incursionibus illis magis assuefacti, et Romanos ignaviæ damnantes, subito ex montibus decurrere, et clamore Barbarico subtrato, speciem multitudinis ingerentes, quod non densata acie sed laxata excurrerent, citraque ordinem vallum invaderent: omnem exercitum territum in fugam verterunt, atque ipse imperator captus esset, a turbata custodia incustoditus relictus, nisi quidam eum in equum sublatum ad fugam cohortatus esset, metu pæne exanimatum. Romani igitur nullo ordine temereque fugiebant: Barbari vero inexpectata fuga stupefacti, fugientes non sunt persecuti, sed vallum ingressi, paucis illustribus captis, direptoque imperatorio tabernaculo, variarum opum et regiæ magnificentiæ plenum, cæterisque impedimentis in equos suos impositis, recesserunt. Imperator vero studio militum suorum Antiochiam perductus, atque inde propere Byzantium regressus est. Quæ hoc anno contigisse, et Romanos *decima die Augu-*

sti, Indictione decima tertia iter Antiochiam versus ingressos, testantur Curopalates et Cedrenus.

5. *Pallium episcopo Gerundensi a Joanne PP. concessum.* — Hoc anno, cum Petrus episcopus Gerundensis accessisset ad Sedem Apostolicam, et Joanni XIX papæ dixisset, liberaturum se triginta captivos, si vel duodecim in anno vicibus sibi concederet usum pallii, Joannes vir redimendorum Christianorum a Saracenis in Hispania captorum cupidine flagrans, ejus petitioni condescendit, eique potestatem gestandi pallii diebus duodecim illi assignatis concessit. Docuit hoc nos Baluzius, lib. 4 Marcæ Hispanicæ, qui postea in Appendice ejusdem Pontificis Epistolam ad Petrum episcopum Gerundensem datam de Privilegio pallii recitat, in cujus fine legitur: «Scriptum per manum Sergii, scrinarii sanctæ Romanæ Ecclesiæ, mense Aprili, Indictione tertia decima», ideoque hoc Christi anno. Quod quidem Privilegium personale fuit; ait enim Pontifex: «Zelo Dei qui eos proprio sanguine redemit accensi, petitioni tuæ condescendimus, palliumque gestandum duodecim in anno vicibus tibi solummodo concessimus».

JOANNIS XX ANNUS 8. — CHRISTI 1031.

1. *Discordia in aula regis Roberti inalescit.* — Trigesimus primus supra millesimum currit annus, decima quarta Indictione, quo flagrant Galliæ bello civili, filiis cum matre adversus Robertum regem patrem conspirantibus. De his hæc apud Glabrum ¹: «Tunc demum post aliquod temporis spatium illi duo fratres (Henricus et Robertus, filii Roberti regis), firmato amicitiae fœdere, præcipue ob insolentiam matris, cœpere vi invadere vicos et castella sui patris, ac circumcirca diripere quæ poterant bonorum illius: nam ille quem regem fecerat, Drogas illi castrum surripuit, alter vero in Burgundiæ partibus Avallonem atque Bellensem. Pro quibus rex gravi turbatus amore (timore), colligens exercitum, ascendit Burgundiam, bellum plusquam civile paratur. Interea cum idem Robertus rex super his venerabilem pa-

trem Willermum consulisset apud Divionense castrum, quid agere deberet, oransque, ut erat vir totius mansuetudinis et pietatis, qualiter tam pro se quam pro illis Dominum oraret, tale responsum ab eodem suscepit: Meminisse te, o rex, convenit, injuriarum, opprobriorumque patri ac matri a te illatorum in tua juventute, quoniam talia tibi, justo judice Deo permittente a filiis ingeruntur, qualia tu ipse genitoribus ingessisti. Hæc audiens rex, patientissime tulit, seque ultro culpabilem clamans non negavit: deinde post obsidionem ac depopulationem utriusque provinciæ, ad pacem redeuntibus suscepit filios, qui paulisper quieverunt». Sequenti vero anno Robertum ipsum patrem mense Julio tradit esse defunctum. Adeo ut hoc anno ista contigisse, opus sit affirmare.

2. *Obitus S. Dominici abbatis Sorani.* — Moritur hoc anno sanctus Dominicus, abbas primus monasterii Sorani, de quo anno superiori dictum

¹ Glab. l. iii. c. 9.

est. De ejus enim obitus tempore hæc Leo Ostiensis in Chronico Cassinate ¹ : « His diebus, anno scilicet Domini millesimo trigesimo primo, beatus Dominicus, innumerabilium patrator mirabilium, multorumque cœnobiorum fundator, apud Soram Campaniæ civitatem, jam ferme octogenarius migravit ad Dominum, sepultusque est in monasterio Soræ vicino, quod nunc ejusdem vocatur nomine ».

3. *Imago S. Mariæ in Blachernis inventa.* — Quod pertinet ad res Orientales, hoc anno Romanus imperator, totus in erigendis et exornandis Ecclesiis, antiquam Dei Genitricis imaginem, quæ erat in Blachernis, occultatam tempore Constantini Copronymi Iconomachi, reperit, quam et ad cultum pristinum revocavit. Hæc Curopalata, et

ex ipso Cedrenus. Itemque hoc eodem anno, a Zoe imperatrice coactam fuisse sororem Theodoram in ordinem redigi monacharum, ne ut ipsa hæres imperii, aliquid moliretur insidiarum. Hæc Curopalata. Qui et inferius addit, ab eodem imperatore cœptum reedificari templum Hierosolymorum, a Saracenorum principe demolitum. Ait enim : « Cum autem Azizius Ægyptius furore, correptus, multa detrimenta Christianis intulisset, evertissetque templum Domini nostri Jesu Christi Hierosolymis, deinde ipse quoque turpissime vitam finisset : ipsius filius e Romana quadam captiva natus, concessit iis qui vellent templum reedificare. Quod imperator studiose construere festinabat, sed mors quæ illum occupavit, ne id perficeret prohibuit. At successor ejus Michael ad exitum perduxit ».

¹ Leo Ost. l. II. c. 26. in fin.

Anno periodi Græco-Romane 6524. — Anno Æræ Hispan. 1069. — Anno Hegiræ 423, inchoato die 19 Dec., Fer. 1. — Jesu Christi 1031.

— Joannis XIX papæ 8. — Conradi II reg. 8. imp. 5. Conradi Argyri imp. 4.

1. *Henricus et Robertus adversus Robertum patrem Francorum reg. bellum movent.* — Ad num. 1. Anno millesimo vicesimo septimo, Robertus Francorum rex Henricum filium in consortium regni adscivit, quod Hugo filius nati major anno antecedenti obiisset. Constantia quidem regina Roberto minori filio favebat, et magnam procerum et episcoporum partem ad sua studia adduxerat. Verum vicit tunc affectus patris et ratio regni; quippe præterito aut expulso Henrico majore filio, periculum erat ne magna inde exorirentur incommoda. Quia vero Fulbertus Carnotensis episcopus regis animum in recta sententia retinebat, infensissimam sensit Constantiam reginam, ut ex multis sancti hujus præsulis litteris intelligimus. Hic tantum Epistolam xxix, quia brevissimam, refero : « Venerabili patri et coepiscopo suo G. Fulbertus. Ad benedictionem Henrici regiæ prolis voto quidem rapior, sed adversa me corporis valetudo retardat. Tentarem tamen utcumque moderatis equitationibus eo pervenire, si non absterret sævitia matris ejus, cui satis creditur cum mala promittit : fidem facientibus multis et memorabilibus gestis ejus. Qua difficultate prohibitus, rogo vestram charitatem, dilectissime, ut vice mea suadeatis domno archiepiscopo Rhemensi cæterisque primoribus, ne qua occasione differant benedictio-

nem juvenis supradicti. Spero enim illum Deo et bonis omnibus placitum. Valet ». Quæ Epistola anno mxxvii, quo Henricus coronatus, data. Verum post eam coronationem, grave bellum domesticum firmato inter se fœdere adversus patrem Henricum Robertum fratres excitarunt, ut narrat Baronius ex Glabro lib. 3, cap. 9, qui ait, illud hoc anno consopitum; nam Glaber subdit fratres paulisper quievisse, quia anno sequenti, mense Julio, Robertus rex diem clausit extremum. Verum cum ea mors mense Julio currentis anni acciderit, ut infra demonstrabo, finis hujus belli civilis ad annum præcedentem retrahendus.

2. *Moritur S. Dominicus abbas juxta Soram.* — Ad num. 2. Vitam sancti Dominici abbatis juxta Soram, antiquum Italiæ oppidum ad Liris fluvii ripam positum, scripsit Albericus Diaconus, ut lectis est Leo Ostiensis lib. 3, cap. 33. Is Albericus cooptatus fuit in collegium cardinalium ab Alexandro II, et eam vitam ex Ms. Bibliothecæ Casinensis publicavit Bollandus ad diem xxii Januarii, quo sanctus Dominicus abbas colitur. Honorius III papa monasterium Soræ vicinum, cum alio a Soranis post Dominici mortem constructo, in loco Casamarii dicto, septem millibus passuum Sora distante, de quo fuse Baronius anno superiori num. 11 et seqq., Cisterciensibus monachis tradi-

dit, qui utrumque etiamnum tenent. Quæ causa est, inquit Bollandus, cur habitu Cisterciensium pingatur *Dominicus*, quem constat diu ante Cisterciensium reformationem vixisse Casinensibus Benedictinorum institutis. Varia alia cœnobia in Italia a sancto Dominico constructa, ut tam ex Alberico cardinali, quam ex Ludovico Jacobillio, utroque in hujus sancti Vita memorat idem Bollandus. « Obiit autem vir sanctus XI kalendas Februarii, anno ab Incarnat. Domini MXXXI, humatumque est cadaver ejus in monasterio, quod nunc ejusdem cognominatur vocabulo, sito in Campania in vicinia Soranæ civitatis », inquit Albericus. De sancto Dominico fuse Baronius anno superiori.

3. *Fœdus Calpeicum et Theodoræ monachatus*. — Ad num. 3. Amer Chalepi præfecti filius, ut refert Cedrenus pag. 729, *Indictione decima quinta, mense Septembri* ad imperatorem Romanum multis cum donis venit « fœdus pristinum renovari petens, et antiquum tributum se persoliturum promittens ». Ad eam rem missus Theophylactus, qui cum Calpensibus societatem composuit. Cæterum *Zoe Augusta post Exaltationem Crucis*, sororem suam Theodoram rasam in monacharum ordinem redegit, « causata aliter finem insidiis et offensis non posse imponi ». Hæc Cedrenus, qui antea scripserat, Constantino imp. filias tres fuisse, *Eudociam* natu maximam monachatum esse amplexam, minimam Theodoram a conjugio Romani imp. abhorruisse, « sive ob propinquitatem, ut ferebatur, generis, sive quod uxorem ejus sciret adhuc vivere », et mediam, *Zoem* appellatam, Romanum Argyrum ante patris mortem maritum accepisse. Acto postea in ordinem Michaelæ Calaphata, ut infra videbimus, eadem *Theodora*, cognomento Porphyrogenita, a plebe revocata est, et Augusta una cum sorore *Zoe* appellata; qua dignitate per tres menses est usa, donec rerum potestas ad Constantinum Monomachum *Zoes* conjugem devenit; quo tamen imperante, Augustæ titulum servavit. Exincto denique Monomacho, tota rursus ad eam imperii recidit auctoritas, ideoque variantis in se fortunæ sortem experta est *Theodora*.

4. *Templum Hierosolymorum instaurari cœptum*. — Quod narrat hic Baronius ex Cedreno et Curopalate, *Romanum* nempe *Argyrum* cœpisse instaurationem templi Hierosolymitani, quod *Azius* Ægyptius everterat, ostendit templum Hierosolymitanum, non a califa Babiloniensi, ut anno MIX ostendimus, sed a califa Ægypti solo æquatū esse; Cedrenum tamen perstare in errore qui califam illum Azium appellat, licet, ut ibidem vidimus, non ipse, sed ejus filius *Hakemus Blamrilla* in Christianos sævierit. Michael Romani Arggyri successor opus illud absolvit.

5. *Obitus Cadiri Billa califæ*. — « Anno quadringentesimo vicesimo secundo (nempe Hegiræ seu Arabico) obiit Cadirus Billa califa Bagdadensis, mense Dulhiggia. Imperavit autem an-

nos XLI et aliquot menses, quantum temporis nulli califæ ante eum contigit », inquit Elmacinus lib. 3 Hist. Sarac. cap. 6, qui ait postea *Caiim* *Biamrillam* filium in locum ejus subrogatum esse.

6. *Obitus S. Willelmi abbatis Divionensis*. — « Anno Nativitatis Dominicæ MXXXI, Indictione XIV, a nativitate quoque ipsius patris ac Dei cultoris LXX, et ab adventu illius ad Gallias de Italia XII, regnante Conrado imperatore, in Francia nihilominus Roberto rege, die Dominica Circumcisionis venerabili atque ejusdem Nativitatis octava, VI feria mane, dum aurora supervenientis diei pelle-ret tenebras, e mundo transivit » S. Willelmus abbas S. Benigni in urbe Divionensi, inquit Rodolphus Glaber in hujus sancti Vita, cujus in sua Historia lib. 4, cap. 4, meminit, a Bollandis ad diem primum Januarii recitata. Italia oriundus erat Willelmus, nobili prosapia editus, quem D. Maiolus Roma veniens secum adduxit Cluniacum, ætate juvenili florentem, qui non solum jam monachus erat, sed patrem etiam ad vitam monasticam induxerat. Eum præfecit primum Maiolus cœnobio S. Saturnini, et postea monasterio S. Benigni martyris, quod juxta Divionense castrum antiquitus veneratur, ubi divinum cultum, qui in eodem loco omnino defecerat, restituit, et petente Richardo Normanniæ duce hujus nominis II, cœnobiū *Fiscannense* constructum a Richardo Primo reformavit. Rogatu fratrum suorum, *Fructuariense* cœnobiū in rure paterno a Pado fluvio paucis milliaribus distans construxit, illudque præsentē Arduino Italiæ rege sacrari jussit in honorem B. Mariæ, S. Benigni, et omnium sanctorum. « Erant tam monasteria quam cœnobia atque cellulæ monachorum circiter quadraginta, quæ illius patrocinio tute cunctorum bonorum affluebant copiis; fratres vero in ipsis degentes proculdubio plus mille ducenti ».

7. *Congregationem Cluniacensem plurimum propagavit*. — Omni studio satagebat e diversis partibus terrarum colligere viros servituti Christi idoneos. « Contigit illum aliquando cum viro per omnia desiderabili, domno scilicet Odilone, adhuc illo in canonicali habitu degente, de vera animarum salute habuisse colloquium », cœpitque illi attentius suadere, ut negotiis sæculi abjectis se totum Christo daret, sicque illum ad religionem adduxit. Ipsemet Odilo in libello de Actis S. Maioli de S. Willelmo ait : « Et ut pace spiritualium artificum in eadem fabrica (nempe cælesti) laborantium dicam, unus præcipue refulsit, qui nuper rebus humanis excessit et qui plus nobis omnibus laboravit, domnus videlicet abbas Willelmus, de cujus clarissimis actibus et vita laudabili et mirabili conversatione parvitas nostra non sufficit, quod sentit ad plenum referre ». Baronius anno MXXXIII, num. 45, hujus sancti abbatis mortem narrat, quia ejus tempore Vita laudata nondum e tenebris emerserat.

Hoc anno obiit *Robertus* Francorum rex, ut anno *MXIII* demonstrabimus. Præterea Concilia *Bituricense* et *Lemovicense II* celebrata, ut anno *MXIII* videbimus.

JOANNIS XX ANNUS 9. — CHRISTI 1032.

1. *De Apostolatu S. Martialis controversia.* — Sequitur annus Redemptoris millesimus trigesimus secundus, Indictione decima quinta, quo vigente illa controversia in Aquitania de sancto Martiale Christi discipulo, qui primus in ea provincia Evangelium prædicavit, essetne in sacris precibus nominandus Apostolus, sicut in Ecclesia Lemovicensi ab eo erecta hactenus factum esse constaret: contradicentibus aliis nonnullis atque contendentibus, non Apostolum, sed confessorem tantummodo nominandum, consultata est Apostolica Sedes. Quid autem ad hæc Joannes papa responderit, videamus ex Actis Concilii Lemovicensis, de quo suo loco inferius dicturi sumus. Etenim etsi ipsa Joannis papæ non extet Epistola, ejus tamen argumentum satis habetur expressum in dictis synodalibus Actis, in quibus ista leguntur:

2. « Ad hæc venerandus Jordanus Lemovicensis episcopus ait: Multa, charissimi, ante hos annos hac de re facta est inquisitio, quousque hæc altercatio ad aures Apostolicæ sanctæ Romanæ Sedis perveniret; super quo dominus Joannes papa exemplar Epistolæ nobis est dignatus destinare, magnopere testificans Apostolatus ejus gloriam, et redarguens omnes qui eum contradicunt esse Apostolum. Quæ Epistola sacra conservata in promptu habetur, in qua facile claret testimonium verum Romanæ Sedis. Cui Bituricensis archiepiscopus *Ælmo* respondens dixit: Textum Epistolæ papæ Joannis, omnibus Galliarum episcopis directæ ante hos quindecim dies in Concilio Bituricensi, ubi plures episcopi congregati eramus, coram nobis recitari fecimus, etc. » Omnes enim eidem Epistolæ Romani Pontificis assensum tribuisse testatur. Porro una cum Epistola pariter missam fuisse de eodem sancto Martiale Collectam, preces nempe, sive quæ dici consuevit oratio, ex antiquo Codice Gregoriano excerptam: habent eadem Acta Concilii Lemovicensis verbis istis:

3. « Primam orationem de solemnitate Ecclesiæ dedit archiepiscopus, secundam vero audiente

omni Ecclesia, de beati Martialis commemoratione annexuit; quæ oratio in hunc modum continetur:

« Omnipotens sempiterne Deus, qui B. Martialem Apostolum Ecclesiæ tuæ sanctæ præesse voluisti, quæsumus, nobis ejus suffragantibus meritis, pietatis tuæ gratiam largiaris.

« Quam orationem (pergit episcopus) ideo præsertim palam omnibus voluit protulisse, ut testimonium Apostolatus beati patroni clarus assertor libere patefaceret. Quæ oratio cum Secreta et Præfatione, et ea quæ dicitur ad complendum, ideo Gregoriana esse dicitur, quia a Joanne papa Romano ad Lemovicenses directa jamdudum fuerat ». Hæc Acta. In quibus etiam frequenter interlocuti inveniuntur episcopi, tenendum quod Ecclesia Romana probasset, a qua recedere nefas: cum capite enim sentiendum, iidem sæpe obtestati sunt Patres. At de his hactenus.

4. *Joannis papæ concessio monachis Leirensibus facta.* — Hoc anno Joannes papa concessit ad preces Sancii Majoris, regis Navarræ atque Castellæ, monachis monasterii Leirensis, creandi episcopum Pampilonensem: nam antiquis temporibus¹ Pampilonenses episcopi ob Barbarorum incursiones sedem transtulerunt in Leirensē monasterium, quod in Pyrenæis jugis situm est. Cujus concessionis occasione Pampilonæ Concilium habitum est, cui interfuerunt Pontius Ovetensis archiepiscopus, Garsias Anagari, Nunnus Alavæ, Arnulphus Ripagorsæ, Sancius Aragoniæ, hoc est Jaccæ, Julianus Castellæ, hoc est Ancæ episcopi. Actum eo in primis, ut antiqua sedes Pampilonensis episcopo redderetur: quod post obitum ejus, qui tunc erat Pampilonensis episcopus, tempore successoris fuit executioni mandatum. Porro in idem Leirensē monasterium Cluniacensium institutio ab eodem rege est introducta. Ejus enim commendata est religio erga cultum monasticum, qui ad pristinam sanctitudinis formam ibi restituendam usus

¹ Mariana l. VIII. c. ult.

est monachis Cluniacensibus e Gallia petitis, et magno honore acceptis. De ipso etiam rege ab omnibus ferme rerum Hispanicarum scriptoribus fertur, quod jacentem in suis ruinis sepultam Palentinam civitatem restituit, hac oblata divinitus occasione, quod cum in venatione aprum insectaretur, ille fatigatus intra obvios parietes, qui supererant memoriæ Sancti Antonini martyris se recepit, apud relictam ibi sacram aram consistens, tutum asylum, Angelorum custodia vallari consuetum. Sic juxta illud oraculum¹: « Homines et jumenta salvabis, Domine ». Cum rex venabulo illum appeteret, elevatum brachium ad feriendum, mox torpedine redditum sensit inutile, sed reatum agnoscens, martyrem deprecatus, ad pristinum usum sensit divinitus revocatum, didicitque suo

damno, quanta deberetur locis sacris immunitas, etiamsi corruiſſe visa fuissent, ut nec bestiam illuc confugientem lædere licuisset. Sicque ejus eventus occasione regem non solum eam restituisset tradunt Ecclesiam, sed etiam nobilem civitatem iterum incolendi, restitutis mœnibus, auctorem fuisse. Porro Sancium ipsum pictate insignem ex hac vita post triennium migrasse, nempe anno Redemptoris millesimo trigesimo quinto, ejus sepulchralis Inscriptio docet his verbis:

HIC SITVS EST SANCIVS REX PYRENAEORVM MONTIVM ET TOLOSÆ, VIR PER OMNIA CATHOLICVS, ET PRO ECCLESIA, TRANSLATVS EST HIC A FILIO SVO REGE MAGNO FERNANDO. OBIT ERA M. LXXII.

Est hic ipse Christi annus millesimus trigesimus quintus.

¹ Psal. XLV.

Anno periodi Græco-Romanæ 6525. — Anno Æræ Hispan. 1070. — Anno Hegiræ 424, inchoato die 7 Dec., Fer. 5. — Jesu Christi 1032.

— Joannis XIX papæ 9. — Conradi II reg. 9. imp. 6. — Romani Argvri imp. 5.

1. *Jubet Joannes papa, ut S. Martialis Apostolus dicatur.* — A num. 1 ad 4. Post Concilium Parisiense anno mxxiv congregatum, Joannes papa XIX scripsit ad Jordanum Lemovicensem episcopum, cæterosque Galliarum episcopos. Epistolam quam Baronius num. 1 deperditam esse existimabat. Tunc ea extat tom. ix Concil. in qua de S. Martialis Apostolatu Pontifex scribit: « Hinc (nempe Martiali) modo quidam vestrorum, ut audivimus, detrudere præsumunt, quasi nihil sit ei commune cum Apostolis, sed cum confessoribus; hi vero non loqui sed insanire videntur, quia gravati fascibus peccatorum, in cælis judicare contendunt. Petrum denique nostrum, cui claves regni cælorum commissæ sunt, confessorem dicimus, quia Christum confessus est, dicens: *Tu es Christus filius Dei vivi*; et Apostolum dicimus, quia ab ipso Domino ad prædicationem est missus: martyrem nominamus, quia prædicando Christum, martyrio vitam finivit; principem Apostolorum credimus, quia Apostolos constituit, sicut et Marcus baptisinate filius, et Matthias sorte electus, Lucas discipulus Apostoli Pauli, et Barnabas, et quamplures. An forte nolunt hos recipi inter Apostolos, eo quod ab Apostolis sint electi et missi, qui Martialem, eo quod non sit de duodeno numero, Apostolica dignitate nolunt clarum videri? Non putant alios

Apostolos, nisi illos duodecim: et ubi est quod dicit Apostolus Paulus Philippensibus (cap. 2): *Necessarium autem existimaui, Epaphroditum fratrem cooperatorem, et commilitonem meum, vestrum autem Apostolum, et ministrum necessitatis meæ, mittere ad vos.* Simam quoque Judam ab Apostolis Apostolos nominatos invenimus. Anglorum Ecclesiæ usque hactenus beatissimum Gregorium, quem nos Confessorem dicimus, proprium suum Apostolum nominat. Romani Pontifices, quia vice Apostoli funguntur, Apostolici nominantur. Cum igitur Apostoli nomen non sit numeri, sed suffragii, quicumque revelante Deo ad prædicandum mittitur, et sua pia exhortatione et exemplo commissum sibi divinitus populum a potestate diaboli liberat, non incongrue Apostolus dici potest, quia Apostolus missus dicitur. Subjungit Pontifex, ut « celebritas tanti Apostoli in toto terrarum orbe excelsius recolatur » : ædificasse se, et dedicasse in ejus honorem pulcherrimum altare in Basilicam S. Petri, « ubi quotidie ipsius sancti memoria devotissime veneratur ».

2. *S. Martialis sæculo primo in Gallias venit.* — Supponebant Patres utriusque Concilii Lemovicensis *Martialem* unum esse a lxxii discipulis, et Joannes XIX diserte asserit, eum primo Ecclesiæ sæculo vixisse, quæ antiqua Gallorum traditio fuit.

Launius tamen contendit eam traditionem ante annum nongentesimum non prodixisse, et usque ad illud tempus veterem invaluisse qua *Martialis* imperante Decio in Gallias venisse asserebatur ex Gregorio Turonensi, anno sc. Christi ccl. Verum ea opinio, a qua ipsemet Gregorius aliquando discedit, hoc et præcedentibus sæculis paucos sectatores habuit, et pauciores habuisset, nisi exeunte sæculo octavo quidam *Dionysium Areopagitam* cum Dionysio Parisiensi perperam confudissent.

3. *Sedes episc. Pampilonæ reddita.* — Ad num. 4. Garibayus lib. 4, cap. 24, refert ex antiquis Scripturis in Ecclesia Pampilonensi asservatis, sedem ejus episcopalem, quæ jamdiu in Leirensi monasterium translata fuerat, *Æra* *MLXVI*, seu an. Christi *MXVIII*, (non vero currenti, ut habet Baronius ex Mariana) redditam fuisse Ecclesiæ Pampilonensi. Ante Maurorum invasionem Tarracensis civitas, a cujus metropolita sedes Pampilonensis pendebat, civibus nudata fuerat, et post eandem Auscensis archiepiscopus metropolitani munere in universo Navarræ regno functus est. Verum cum *Joannes XXII* sæculo *xiv* sedem Cæsaraugustanam in metropolim exivit, eidem Pampilonensem Ecclesiam subdidit, cui etiamnum paret. *Sanctius Major* Navarræ rex, die *xxix* mensis Septemb. anni Christi *MXIII*, solemne Pampilonæ Concilium celebravit, in quo magna diligentia adhibita, ut antiqui hujus episcopatus limites detegerentur, isque Pampilonem transferretur. Cumque postea *Petri* Aragonensium et Navarræ regis liberalitate, et *Petri a Roda* episcopi piis laboribus ac beneficentia, Ecclesia illa valde dilatata fuisset, *Urbanus II*, dum anno *MXCVI* in Galliis versaretur, Bulla in Monasterio Sancti Pontii Tomeriensis appellati, « die *xxiv* mensis Junii, Indictione *iv*, Pontific. ejus an. *ix* data », *Petrum a Roda* episcopum Pampilonensem, ejusque Ecclesiam in suam protectionem suscepit, et quæ *Sanctii Majoris* tempore gesta fuerant, auctoritate Apostolica confirmavit, uti ex archivis Ecclesiæ Pampilonensis Garibayus lib. 23, cap. 4, ostendit.

4. *Archiep. Auscienses metropolitæ Navarræ.* — Is tamen lib. 4 laudato perperam scripsit, huic Concilio Pampilonensi *Poncium* prætensum metropolitani Ovetensem præfuisse; ut enim prodit Joannes Brizius Martinezius in Historia monasterii Sancti-Joannis Pennatensis, lib. 2, cap. 22, *Aymericus* et *Austindus* per hæc tempora episcoporum Aragoniæ et Navarræ metropolitæ agniti sunt, et in Actis Conciliorum seu conventuum in Leirensi monasterio et Pampilonæ congregatorum, *Marecius* episcopus Aragoniæ primo loco, et *Poncius* Ovetensis ultimo nominatur. Quod scite observavit Brizius; neque enim aut Navarrei, aut Aragonenses, aut Catalani episcopi Ovetensem archiep. pro metropolita unquam habuere. *Diagus*, lib. 2 Hist. comitum *Barcin.* cap. 33 et seq., refert electionem *Guadalli Domnucii* in episcopum *Barcinonensem*, ad eam sedem anno *MXIX* erecti, miraturque in hujus

electionis Decreto a se recitato legi, eam factam esse « assentiente domino Otlone, venerabili primæ sedis Ausciæ archiepiscopo », cum anno *MXXXVIII*, *Guifredus* archiep. *Narbonensis* Ecclesiam *Gerundensem* dedicavit, cujus consecrationis Acta refert *Baluzius* in Appendice ad *Marcam Hispanicam* pag. 1066, in qua *Guifredus* ait eam Ecclesiam esse suæ diocesis. Sed inde tantum inferri potest *Catalauniæ* episcopos modo metropolitæ *Narbonensi*, modo metropolitæ *Ausciensi* paruisse. *Cossartius* tom. ix Concil. pag. 4, refert Concilium *Jaccetanum*, in regno *Aragoniæ* habitum an. *MLXIII*, non vero anno *MLX*, ut perperam ibidem habetur, cui præfuit *Austindus* archiep. *Auxitanus*. Episcopos vero *Aragoniæ* metrop. *Narbonensem* aliquando coluisse nullum occurrit exemplum. Apud *San-Marthanos* in archiep. *Ausciensibus*, *Bernardus* archiep. *Ausciensis* circa annum *DCD* episcopos in Hispania instituisse dicitur, et apud *Sandovalium* legitur, *Sanctio* Aragoniæ rege hujus nominis I, qui *Navarræ* etiam præerat, regnante, *Petrum a Roda* ad episcopatum Pampilonensem promotum, regulam sancti Augustini in suam Ecclesiam cathedrallem introduxisse, assentiente archiepiscopo *Ausciensi*, idque contigisse post an. *MLXXXIII*. Quare consuetudo, ut *Saracenis* in Hispania dominantibus episcopi *Navarræ* et *Aragoniæ* *Ausciensi* metropolitæ subderentur, non solum nunquam interrupta fuit; sed etiam cum utroque regno inceperit videtur. *Sandovalius* in episcoporum Pampilonensium Catalogo refert Acta Conciliorum seu conventuum ad hanc translationem faciendam Pampiloniæ et in monasterio *Leirensi* coactorum, quæ apud ipsum legi possunt.

5. *Sanctius Major Soprarbæ et Ripacuriæ rex primus fuit.* — *Sanctius Major*, hujus nominis III, celeberrimus fuit inter *Navarræ* reges, multasque victorias de *Saracenis* reportavit. In variis Diplomatis dicitur eum regnare « in *Castella*, in *Astoria*, in *Alava*, in *Pampilona*, in *Aragone*, in *Suprarbe*, in cuncta *Gascunia* (id est, *Gasconia*), in *Leione* (id est, *Legione*), in *Asturias* ». Hiarii tituli *Oihenartum* in Notitia utriusque *Vasconiæ*, et *Moretum* in Historia *Navarræ* irretitos tenere, quia non animadverterant *Sanctium Majorem* ditionum a se non possessorum titulos sumpsisse, quod probatu facile esset, si institutum nostrum id pateretur. Uterque tamen late docteq. demonstravit, *Sanctium Majorem* primum fuisse qui *Soprarbæ* et *Ripacuriæ* regis nomen sumpserit, et *Aragonensium* qui *Suprarbarum* reges a sæculo octavo deducunt, finguntque reges qui nunquam fuere, fabulas refulavit. *Dominicus a Ripa*, *Benedictinus* eruditissimus, natione *Aragonensis*, in volumine *Cæsaraugustæ* ab aliquot annis in fol. edito complura congessit ad defensionem antiquitatis regum suorum, fuseque *Moretum* refellit. Verum hic in Dissertatione priori suorum *Annalium Navarræ* tomo annexa, reges omnes, qui in *Ripacuria* et *Suprarbe* ante *Sanctium Majorem* regnasse perhi-

bentur, commentitios esse, ita solide monstravit, ut lis hæc dirempta censi debet.

6. *Ejus obitus.* — Baronius *Sanctii Majoris* mortem cum anno mxxxv recte copulavit, licet Epitaphium ejusdem principis cui innuitur recens sit. Vivebat adhuc *Æra* MLXXII, *octavo kal. Octobris*, anno scilicet Christi mxxxiv, ut patet ex Charta a Moreto lib. 3, cap. 3, recitata, sed illum mense Martio *Æræ* MLXXIII jam vita functum esse docet Charta, ex Chartulario sancti *Æmiliani* pag. 746 descripta, in qua habetur, *Garsiam* Sanctii Majoris filium anno mxxxv, *die II kal. Aprilis* jam regnasse. Denique in libro, quem *Tumbum nigrum Sancti-Jacobi* vocant et in Annalibus Complutensibus a Moreto laudatis, Sanctii Majoris mors cum *Æra* MLXXIII, cum anno scilicet Christi mxxxv, conjuncta legitur. Uxorem duxerat *Majorem Muniam Donam*, Sanctii Castellæ comitis filiam, reginam pietate inclutam, quæ *Æra* MCIV, anno scilicet Christi MLXVI testamentum condidit, annoque insequenti e sæculo migravit. Aliqui scriptores Hispani aliam ei uxorem attribunt, ex qua *Ramirum* suscepit. Hunc ex concubina ortum esse invicte probat Oihenartus loco laudato, pag. 300 et seqq.

7. *Tria regna instituit.* — *Sanctius Major* morti proximus divisiones inter filios suos divisit. *Garsias* *Sanctius* major natu patri in regnum Navarræ successit, cognominatus *Nagerensis*, et Quartus hujus nominis inter Navarræ reges. In trium aliorum filiorum gratiam totidem regna erexit. Majorem partem Castellæ *Fernando* seu *Ferdinando*, *Magno* appellato, dedit, qui ideo primus Castellæ rex dictus est. Antiquum comitatum Aragoniæ regni jure ac prærogativa auxit, illudque *Ramiro* filio suo notho concessit; in gratiam vero *Gonsalis* seu *Gundisalvi* Soprarbem et Ripacurciam regio titulo decoravit, ipseque jam Soprarbæ et Ripacuriæ se regem dixerat. Porro *Gundisalvus*, ut passim historici Hispani tradunt, a quodam servo suo per proditionem occisus fuit, idque anno Christi millesimo trigesimo nono; ex litteris enim ejus apud Sanctum-Joannem Pinnatensem asservatis, constat cum anno antecedenti adhuc in vivis fuisse, annoque millesimo quadragesimo *Ranimirum* in regnum Soprarbæ et Ripacuriæ jam ei successisse. Quare tunc illud cum regno Aragoniæ unitum fuit. De morte trium aliorum *Sanctii Majoris* filiorum suis locis agemus.

8. *Moritur Rudolph. III ultimus Burgundiæ rex.* — *Rudolphus*, hujus nominis III, Burgundiæ Transjuraniæ rex hoc, anno vitam cum morte commutavit, indeque reg. illud per plures annos bellis dilaceratum: « *Rudolphus Ignavus* », inquit Hermannus Contractus in fusiori Chronico, « *Burgundiæ* regulus obiit, et diadema ejus regnique insignia *Conrado imp.* per Seligerum allata sunt, imperatoreque ipsis diebus contra *Misiconem* Sclavorum, qui *Boloni* (id est, *Poloni*) vocantur, regem, exercitum ductante, *Odo* sororis ejusdem *Rudolphi* filius, princeps Gallicæ Campaniæ, re-

gnum Burgundiæ invasit, captis Nuenburg et Murlena castris, sua in eis præsidia posuit ». *Rudolphus III* nullos liberos reliquit, sed inter alias filias *Conradus* ejus pater genuit *Bertam* Odonis primi Campaniæ comitis conjugem, quo ex matrimonio natus *Odo II*, qui *Rudolpho III* demortuo regnum ad se pertinere contendebat. Alias sorores tres habuit *Rudolphus III*, *Giselam* scilicet, *S. Henrici* imperatoris matrem, *Gerbergam* nuptam *Hermanno* *Sneviæ* duci, et matrem *Giselæ* *Conradi* *Salici* uxoris, et *Mathildem*.

9. *Otto Campaniæ dux Burgundiam invadit.* — Wippo utrumque bellum, ab *Hermanno* Contracto memoratum, hoc anno fusius narrat; quod cum ad majorem eorum quæ sequentibus annis in medium afferemus intelligentiam necessarium sit, illud ex eodem Wippone referam: « Anno Dom. mxxxii, *Rudolphus* rex Burgundiæ, avunculus *Giselæ* imperatricis, obiit in pace; cujus regnum comes *Odo* Francigena, filius sororis suæ invasit, et quædam castra munitissima, sive civitates, seu dolo seu bello cepit (loco cepit, secundum horum temporum loquendi modum): nec se regem ausus est facere nec tamen regnum voluit dimittere. Referbat quidam illum dixisse sæpe, quod nunquam rex fieri, sed tamen semper magister esse regis vellet. Eo modo magnam partem Burgundiæ distraxit, licet regnum Burgundiæ *Conrado* imperatori et filio ejus *Henrico* regi, a *Rudolpho* rege, postquam ipse superstes non esset, per jusjurandum jamdudum confirmatum esset.

10. *Conradus imp. Misiconem Poloniæ regem domat.* — « Sed dum *Odo* comes hæc in Burgundia faceret, *Conradus imp.* in Sclavonia cum armis fuerat. Quid ibi ageret, vel qualiter postea *Odonem* repulisset de Burgundia, consequenter dicam (nempe anno sequenti). Supradictus *Bolislavus* dux Bolanorum mortuus (anno nempe xxxv), reliquit duos filios, *Misiconem* et *Otonem*. *Misico* dum fratrem suum *Otonem* persequeretur, expulserat eum in Russiam. Dum ibi aliquantum tempus miserabiliter viveret, cœpit rogare gratiam imp. *Conradi*, ut ipso imperante et juvante restitueretur patriæ. Quod dum imperator facere vellet, decrevit ut ipse cum copiis ex una parte, ex altera frater *Otto* *Misiconem* aggredierentur. Nunc impetum *Misico* ferre non valens, fugit in Bohemiam ad *Udalricum* ducem, cui tunc temporis imperator iratus fuerat. Sed ille ut sic placaret imperatorem, voluit sibi reddere *Misiconem*: quod pactum sceleratum renuit *Cæsar*, dicens se nolle inimicum emere ab inimico. *Otto* restitutus patriæ, et dux factus a *Cæsare*, dum post aliquod tempus minus caute ageret, a quodam familiari suo clam interfectus est. Tunc *Misico* omnibus modis quærebat gratiam imperatricis *Giselæ* et reliquorum principum, ut mereretur redire ad gratiam imperatoris. *Cæsar* misericordia motus dedit sibi veniam, et divisa provincia Bolanorum in tres partes, *Misiconem* fecit tetrarcham: reliquas duas duobus aliis commen-

davit: sic imminuta potestate, minor facta est temeritas. Defuncto Misicone, Casimirus filius ejus (vulgo Monachus cognominatus) fideliter serviebat lucusque imperatoribus nostris ». Quæ uno tenore Wippo recitat, quia Misico Polonorum rex nonnisi post biennium e vivis excessit, ut suo loco dicitur.

11. *Gesta in Oriente.* — « Julii mensis xxviii die », inquit Cedrenus, « quæ fuit septimanæ sexta (ideoque hoc Christi anno) hora noctis secunda, stella trajecit a meridie versus Septentrionem, quæ terram totam fulgore illustraret. Pauloque post tristes nuntii de rebus Romanis allati sunt, Arabes in Mesopotamiam usque ad Melitenam grassari, patriarchas Istro transmissis Mysiam infestare, Sarracenos grassationibus et incendiis ora Illyrici vexanda usque ad Coreyram perrexisse. Ac reliqui sane hostes illæsi domum redierunt. Sarraceni a Ragusinis et Nicephoro patricio Nauplii præfecto, Caranteni filio, male sunt mulctati, prælio victi: et

majorem navium partem cum amisissent, domum redeuntes naufragio in Siculo mari perierunt. Hoc ipso anno fames simul ac pestis Cappadociam, Armeniam, et Honorianam ita afflixerunt, ut incolæ patriis relictis, alias sibi quærerent sedes. Quibus imperator a Mesanactis in urbem rediens cum occurreret, neque ignoraret migrationis causam, coegit eos domum redire, pecunia et aliis ad vitam necessariis rebus eos consolatus. Sed et Michaelus Ancyrae tunc episcopus officium fecit, nihil eorum omittens, quæ ad remedium faciendum famis pestilentiaque malis pertinerent. Die Augusti xiii, qui fuit Dominicus (ideoque hoc Christi anno) hora prima noctis, anno mundi 6540, (juxta computum Constantinopolitanum) magnus fuit terræ motus: et imperator urbem ingressus, nomine suæ prioris uxoris Helenæ recens mortuæ magnam elargitus est pecuniam.

JOANNIS XX ANNUS 10. — CHRISTI 1033.

1. *Conradus imperator iterum in Italia.* — Millesimus trigesimus tertius annus salutis prima Indictione inchoatus sequitur, quo mori contigit Joannem Romanum Pontificem, mense Novembris. Quæ autem præcesserunt, primo dicendum. Hoc ipso anno, quo accidisse testantur Tabulæ astronomicæ solis eclipsim tertio kal. Julii, ipsa die natali sanctorum Apostolorum Petri et Pauli, ut tum Helgaldus, tum etiam Glaber affirmant, qui videre quid ea ipsa die Romæ in Basilica S. Petri contigerit, Glaber ipse quidem sinceræ memoriæ tradidit, quæ in Romanæ Ecclesiæ monumentis desiderantur. Exciderunt quippe ipsa, unde opus sit hinc inde mendicare fragmenta. Res quidem accidit magni momenti, quæ evocavit e Germania Romam iterum imperatorem, detinuitque integrum annum. Quænam ista fuerit, et quomodo se habuerit, a Glabro sic accipe¹: « De qua victoria imperator (Conradus) accepta confidentia, rursus collecto exercitu Italiam pergens, ad ipsam Urbem Romam progrediens, universos rebelliones (perduelles sive rebelles), qui contra eum insurgere

tentaverant, anno integro ibidem degens, prote-rendo compescuit ». Et inferius:

2. « Anno igitur eodem Dominicæ passionis millesimo (secundum ejus computum est ab Incarnatione mxxxiii), die tertia kalendarum Juliarum, sexta feria, luna vicesima octava, facta est eclipsis, seu deliquium solis, ab hora ejusdem diei sexta usque in octavam nimium terribilis. Nam sol ipse factus est sapphiri coloris, gerens in superiori parte speciem lunæ, a sua reilluminatione quarta. Intuitus hominum in alterutrum velut mortuorum pallor conspiciebatur: res vero quæcumque sub aere croci coloris esse cernebantur. Tunc corda humani generis stupor ac pavor tenuit immensus, quoniam illud intuentes intelligebant portendere quiddam fore superventuræ cladis humano generi triste. Nam eadem die, natali videlicet Apostolorum, in Ecclesia beati Petri quidam de principibus Romanorum conspirarunt in papam Romanum, cupientes illum interimere, sed minime valentes, a Sede tamen propria expulerunt. Sed (ut præmissus) tam pro hac re quam pro aliis insolenter patrat, imperator illuc proficiscens, propriæ Sedi restituit ». Hæc Glaber de Joanne papa.

¹ Glab. l. iv. c. 8 et 9.

3. *Joannes XX papa moritur, cui Benedictus IX valde juvenis ob factionem comitis Tusculani subrogatur.* — Quem liquet hoc anno, sexto idus Novembr. diem obiisse, cum sedisset annos novem, menses octo et dies aliquot: certus enim numerus ignoratur, licet divinent alii. Sepultus est autem in Basilica Sancti Petri, inter portam argenteam et Romanam. In ejus locum hoc eodem anno subrogatum fuisse ejus successorem Benedictum, habet Hermannus, Sigebertus et alii. Cum (prohi nefas!) tyrannide Alberici comitis Tusculani, ejus filius puer in sacrosanctam Petri Sedem intruditur, monstrum erigitur, statuiturque portentum. Cum enim morte duorum germanorum Pontificum, Benedicti atque Joannis, et domo sua Pontificatum diu retentum egredi ægro animo ferret, ne id fieret, cum alium non haberet, filium quem habebat ætate puerum, malis artibus in Petri cathedram Angelis reverendam idem Albericus intrusit. En vides quæ sint a principibus toleranda, cum immisceant se quacumque via in electione Romanorum Pontificum: ob idque exclamavi sæpius, et exclamare non desinam, et commonere præsentis et post futuros fratres meos S. R. E. cardinales, ut pro viribus ad sanguinem usque certare laborent, quo omnem principibus aditum ad electionem Romanorum Pontificum obstruant, cum nihil hoc funestius pati Romana Ecclesia consueverit, et pluribus summo ipsius damno contigerit demonstrari, cum eos non principes adiutores, sed tyrannos persecutores in electione Pontificum est experta. Quid potuit Romanæ Ecclesiæ durius ac luctuosius contigisse, quam ut qui tyrannide lupi sunt, de pastore creando decernant et curent? quorum illud unum studium sit, ut præficiatur ovibus pastor ignavus, quo ipsis liberum sit cum velint in oves irrumpere. Nunquam audiat amplius tyrannis ista in Ecclesia Dei, ut Pontificem cogatur accipere a principibus.

4. Ista cum legunt facta perditissimi novatores, Ecclesiæ Romanæ infestissimi perduelles, vociferantur in eam, exclamantque apparere ex iis in ea stigmata Antichristi. Ita quos furor armat, et diabolicus spiritus agitat, in blasphemias concitati prorumpunt. Quos miseros ita animo pacato compello: Facitne ista Ecclesia ipsa Romana, an patitur, cum in eam indignus intruditur, et monstrum aliquod sæculari potentia in sacrosanctam illam Sedem provehitur et exaltatur? Sed quod pati ista coacta sit, jam ipsa facta superius enarrata declarant, et quæ sunt dicenda monstrabunt. Quæ ratio patitur, quæ charitas persuadet, quæ judicii recti discretio imperat, ut præter omne jus fasque ita insurgatis in eam? veluti cum quis in hominem incidat a latronibus spoliatus, vulneribus confossum, sauciatus, in luto ex suo sanguine volutatus, semivivum relictum, in foveamque præcipitatum, non in grassatores ipsos sævissimos ac scelestissimos invehatur, detestatusque eos, contumeliis atque maledictis ultricibus impetat; sed ea

convertat probra cuncta in ærumnosum illum ac miserum, miseriarum plane omnium scopum, ejusque non alliget vulnera compassione, sed conficiens detractio, scalpensque blasphemii, majore crudelitate faciat recrudescere? Ita plane, qui deteriora passam temporibus istis Romanam Ecclesiam conspicientes¹, nihil patientes super contritione Josephi, neque condolentes suffocatae justitiæ, sed concitati furore, perciti amaro zelo, acti tivore, non in auctores malorum jacula probrorum intorquent, sed in eam arcu ferreo obdurata perfidiæ sagittas venenatas immittunt; unde magis dolens ipsa illud exclamare cogatur²: Et super dolorem vulnerum meorum addiderunt. Cum potius³: Si qua consolatio in Christo, si quod solatium charitatis, si qua societas spiritus, si qua viscera miserationis in eis essent, utique exemplo Samaritani compatientes, non blasphemantes, aliquod exhibere solatium eidem Ecclesiæ afflictæ nimium, atque adeo immaniter lacinata curassent. Quæ etsi interdum ad tempus depressa, sed non destituta, sibi bene conscia a Deo factæ promissionis (nempe quod etsi affligi possit, perdi non possit) illud Davidicum repetitum sæpius meditetur summa constantia⁴: « Sæpe expugnaverunt me a juventute mea, etenim non potuerunt mihi: supra dorsum meum fabricaverunt peccatores, prolongaverunt iniquitatem suam. Dominus justus cecidet cervices peccatorum, confundantur et convertantur retrorsum omnes qui oderunt Sion ».

5. Ut autem tantum nefas Albericus attentare præsumperit, præcessisse diximus detestandum exemplum in puerulo electo archiepiscopo Rhemensis, cui ad functiones episcopales obeundas coadjutor fuerat datus episcopus. Sic itaque, quod in primaria Galliarum fuerat sede male præsumptum, in Apostolica usurpari posse cathedra, execranda sibi persuadet ambitio. Quæ non audet furore percita dominandi libido? Quæ non tentat flagrans præfecturæ cupiditas? non parcit legibus quas cæca non videt; non timet Deum quem non considerat; non reveretur homines quos omnes spernit. Ad facinus implendum parat pecunia infelix pater infeliciores filio viam; Romanos quos novit potentiores aggreditur, quos expugnatos auro sibi devincit, quorum emptionem suffragiorum quam conceperat, parit iniquitatem, dum filium in thronum provehit (horrendum ac detestabile visu!) sedentem in eminenti Petri solio puerum.

6. Ingemuit ad adspectum Catholicus orbis, haud mediocriter passus in electione adeo illegitima scandalum, ut intelligere potes ex Glabro tunc superstite, ista vidente, scribente ac detestante. Dum igitur horum temporum diversa mala deplorat, hæc ad postremum ingerit luctuosa⁵: « Insuper, inquit, ad cumulum tanti mali, cum non essent in populo vel rari qui cæteros corrigentes

¹ Amos. vi. — ² Psal. LXVI. — Phil. II. — ³ Psal. CXXVIII. — ⁵ Glab. I. IV. c. 5.

talia redarguerent, impletum est Prophetæ vaticinium, quod ait¹: Et sicut populus sic sacerdos: præsertim cum tum in sæculari potestate, tum etiam in Ecclesiastica religione, totius regiminis personæ constiterant in puerili ætate. Propter peccata enim populi contigit tunc illud Salomonicum, quod ait²: Væ tibi, terra, cujus rex est puer. Nam et ipse universalis papa Romanus, nepos scilicet duorum, Benedicti atque Joannis, qui ei præcesserant, puer ferme decennis, intercedente thesaurorum pecunia, electus extitit a Romanis, a quibus exinde frequenter ejectus ac inhoneste receptus, nulla potestate viguit». Hæc Glaber, qui dum ait ab iis fuisse electum a quibus pariter asserit esse ejectum, sæculares eos homines fuisse liquet, de quibus suo loco dicitur inferius; idemque rursus ea refricans ac deplorans in fine suæ Historiæ, sic perorat: «Ipso quoque in tempore, Romana Sedes, quæ Universalis jure habetur in orbe terrarum, præfato morbo pestifero (nempe simoniaca labe) per viginti quinque annorum spatia miserrime laboraverat. Fuerat enim eidem Sedi ordinatus quidam puer circiter annorum duodecim, contra jus fasque: quem scilicet sola pecunia auri et argenti plus commendavit quam ætas aut sanctitas. Et quoniam infelicem habuit introitum, infeliciorem persensit exitum³, quippe referre turpitudine illius conversationis et vitæ. Tunc vero cum consensu totius Romani populi, atque ex præcepto imperatoris, ejectus est a Sede, et in locum ejus subrogatus est vir religiosissimus ac sanctitate conspicuus, Gregorius natione Romanus: cujus videlicet bona fama, quidquid prior fœdaverat, in melius reformavit.» Hucusque Glaber. Contigisse autem ejus creationem sexto idus Novemb. antiquæ Vaticanæ series Romanorum Pontificum docent; Gregorii autem subrogationem longe postea. Interim autem (quod mireris) tanta vigeat tunc observantia toto Catholico orbe erga Romanam Ecclesiam, ut quemcumque audirent throno insidere Petri, colere eum et venerari non detrectarent, cum non ipsum sedentem, sed eum cujus vice sederet in primis attenderent.

7. Porro in Christiano orbe cognitum fuisse et habitum ipsum Benedictum absque controversia Romanum Pontificem, liquet. Etenim ab eodem petiisse pallium constat et obtinuisse archiepiscopum Hamburgensem Hermannum⁴, ejus successorem Bezelinum, cognomento Alexandrum, et qui eidem subrogatus est Adelbertum. Extant et alia ejusdem monimenta, quibus significatur ipsum exercuisse munera pontificalia. Quando autem et qua ratione ipse sponte se abdicaverit, et iterum rediens ejectus fuerit, suo loco dicendum. Cæterum quod pertinet ad ætatem, cum testetur de ipso Petrus Damiani, ab exordio suæ creationis usque ad finem semper luxuriis inquinatum, plane pos-

sumus intelligere, laud adeo puerum adhuc impuberem fuisse, cui ex natura puritas inest, sed ejus ætatis, qui stimulis concupiscentiæ urgeretur. Sane quidem Hermannus Contractus nuper editus ex Augustano exemplari, auctor qui hoc ipso scribebat tempore, dum hoc anno agit de obitu Joannis et Benedicti subrogatione, de ejus ætate nihil; quod non tacuisset, si adeo impar tanto oneri subeundo fuisset, sed hæc tantum habet: «Defuncto Joanne, Benedictus qui et Theophylactus, ordinatus, licet indignus tanto ordine moribus et factis, sedit annis plus duodecim». Hæc ipse.

8. Sed quod audisti querelam Glabri de Pontificibus simoniace ordinatis, ex nobis vero percepisti, istiusmodi pati potius coactam, quam agere consuevisse Romanam ipsam Ecclesiam: audi quæso, quomodo hæc transigi a tyrannis moris erat, quibus intelligas quomodo revera non ista facere, sed pati invita ipsa Romana Ecclesia cogebatur: exemplumque accipe ex his quæ auctor hujus sæculi, Petrus Damiani, scribit ad N. archiepiscopum, cum agit de Romano Pontifice per simoniam tunc intruso. Incipit Epistola¹: «Litteras sigillo vestræ sanctitatis impressas etc.» Ubi hæc de his, quæ loquimur: «Ille nimirum (in quantum mihi videtur) absque ulla excusatione simoniacus est, quia vobis omnibus ejusdem urbis cardinalibus episcopis reclamantibus, obsistentibus et terribiliter anathematizantibus, nocturno tempore cum armatorum turbis undique tumultuantibus et furentibus inthronizatus est. Dehinc ad marsupiorum patrocinia funesta concurritur, pecunia per regiones, andronas, vel angiportus in populos erogatur; beati Petri venerabilis arca pervaditur; sicque per totam Urbem, velut officinam male fabricantis Simonis factam, vix aliud quam (ut ita loquar) malleorum et incudinum tinnitus auditur. Et, o scelus et ferale prodigium! Petrus cogitur nundinans Simonis ex sua quantitate persolvere², qui Simonem cum omni suo commercio cognoscitur perpetua maledictione damnasse. Quod autem ille crimen hoc palliat, et tractum se vique coactum, quibus potest verbis excusat: hoc ego licet ad liquidum nesciam, tamen et ipse non usquequaque diffiteor. Ita quippe est homo stolidus et deses, et nullius ingenii, ut credi possit nescisse, pro se talia machinari etc.» Ecce tibi ob oculos positum ac repræsentatum, per potentes sæculares homines fieri his temporibus solitam aliquorum intrusionem, frustra dissentientibus ac reclamantibus cardinalibus, quorum illa deploranda conditio erat, vel ut ita pati cogebantur intrusum, qui se inscio talia diceret perpetrata; aut alium eligendo schisma conflarent; vel imperatorum tunc existentium auxilium implorarent, qui armis repellerent vim quam ipsis potentes inferrent. Vidisti ergo perspicuo declaratum exemplo, relatione unius ex cardinalibus ista tractantis atque scribentis, quo-

¹ Isa. XXIV. — ² Eccl. X. — ³ Locus corruptus. — ⁴ Adam l. II. c. 50. et l. III. c. 1.

¹ Cod. VIII. Pet. Vat. p. 82. — ² Act. VIII.

modo non ista facere, sed pati cogerebatur invita, reluctans ac reclamans Ecclesia, oppressa tyrannice a potentia sæculari. Habes ex his suorum verborum interpretationem elucidatam, cum eadem ex causa idem ipse in Epistola ad Firminum exclamans, repetit quæ antea rhythmo desleverat: « Heu ! Sedes Apostolica, orbis olim gloria, nunc, proh dolor ! efficeris officina Simonis. Ferunt incudem mallei, nummi sunt tartarei ». Cum videlicet sæculi potentiores in eam, quæ sunt recitata committerent. Quæ non intelligentes novatores temporis hujus, calumniose Rom. Eccl. vitio vertunt, quæ ipsa nolens (ul dixi) et invita, renitens et reclamans, lugens ac mœrens. pati acerbissime cogerebatur. Quæ omnia Alberici comitis Tusculani factione modo passam esse Romanam Ecclesiam, aperte idem Petrus insinuat¹, dum de ejusdem agit Benedicti ad inferos damnatione, cum per invasionem Joanni patruo eum successisse testatur. Jam vero quæ sunt anni hujus reliqua prosecquamur, de eodem Benedicto inferius alia plura dicturi.

9. *Roberti regis obitus, virtutes et res pie gestæ ; cui succedit Henricus.* — Hoc eodem anno rex Francorum Robertus, vere Christianissimus, ex hac vita migravit XIV kal. Augusti. At quod alii id referunt accidisse anno superiori, ut in his, et reliquis quæ ex his dependent, consulatur historiæ veritati, perquirendum an hoc quo ponimus anno, ipsum ex hac vita migrasse contigerit. Scimus Helgaldum in Vita ipsius disertis verbis profiteri ipsam esse defunctum anno superiori, anno millesimo trigesimo secundo, id ipsumque scriptum reperiri in Fragmentis Historiæ Francorum, positis in Appendice ad Helgaldum et Glabrum. Verum cum idem Helgaldus inferius, ubi agit de morte ipsius, affirmet eum eo anno esse defunctum, quo contigit solis eclipsis XIII kal. Julii, ipsa die natali sanctorum Apostolorum Petri et Pauli, hora sexta diei, vicesimo primo die ab eadem eclipsi XIII kal. Augusti: dubitandi nullus remanet locus, hoc anno, et non superiori eundem regem ex hac vita migrasse. Nam constans assertio est, eandem eclipsim hoc, et non superiori anno contigisse, ex certa demonstratione astronomicarum Tabularum. Et enim hoc anno millesimo trigesimo tertio factum est novilunium tertio kalend. Julii, anno vero superiori millesimo trigesimo secundo, factum est Novilunium IV idus Junii. Itaque eclipsim non anno superiori, sed præsentī oportuit contigisse. His consideratis, reprehenditur jure Sigebertus, qui eandem eclipsim posuit anno superiori: prudentius vero Hermannus posuit hoc anno. Sic etiam Glaber, numerans annos salutis a Christi Passione, ejus ætatis trigesimo tertio, bene ponit eandem eclipsim accidisse anno millesimo, quo præsens annus pariter consignatur, ut paulo inferius dicturi sumus.

10. Tanti regis res præclare gestas, quæ ad pietatem spectant, Helgaldus monachus Floriacensis conscripsit. De eo enim hæc in Fragmentis Francorum Historiæ: « Qui quam devotus fuerit, quam magnificus erga servos Dei, quam assiduus circa Ecclesiam, quam largus in eleemosynis, quanta fundatus humilitate, non est hujus temporis disserere. Hic multas fundavit Ecclesias; vernstavit auro, argento et variis ornamentis, multorum memorias Sanctorum. Quamobrem tribuit ei Omnipotens continuam pacem, ita ut nemo esset qui eum inquietare auderet. Cujus erga Deum devotionis affectum, et insignium opera virtutum, si quis plenius cognoscere voluerit, legat gesta ipsius, ab Helgaldo Floriacensi composita monacho ». Hæc auctor. Extat et jam typis eusum Helgaldi de rege Roberto monumentum posteris traditum. Dicam ex his summam, non quæ fecit aliquando rex pius, sed quæ facere consuevit. « Dabat eleemosynas manu propria, ore proprio figens eorum manibus oscula. Medebatur illis, dum manum tangens eorum vulnera, signansque signo Crucis, omnem ab eis auferebat dolorem infirmitatis ». Superius præterea narrat auctor, ab eodem illuminatum fuisse cæcum, cum quasi per locum manus abluens, aquam aspersit in faciem ejus. De abundantia autem eleemosynarum satis, si reddam hic Helgaldi locum, quo et annus certus obitus consignatur.

11. « Quis autem, inquit, ei mos fuerit dandæ eleemosynæ in sui regni sedibus, non prætermitemus. In Parisiis civitate, Silvanectis, Aurelianis, Divione, Antisiodoro, Avalone, Mileduno, Stampis, in unaquaque harum sede trecentis, vel (quod est verius) mille pauperibus dabatur panis et vini abundantia; et hoc specialius ipso, quod ad Deum transit anno, qui est Incarnationis Dominicæ millesimus trigesimus secundus (MXXXII). Præter hæc, quo ibat, quotidie in sancta Quadragesima, centum aut ducenta jubebat pauperibus dari panis et piscium et vini cibaria. In die autem Cænæ Domini, non videntibus incredibile, videntibus vero et servientibus in tali negotio satis admirabile, cum non minus quam trecenti ipsa die sua providentia congregati, de ejus sancta manu, flexo poplite in terram, unusquisque legumen, piscem, panem, denarium unum sumebat in manibus, et hoc hora diei tertia. Hora itidem sexta, centum clericis pauperibus præbendam panis, piscis et vini concedebat, duodecim unumquemque eorum honorans denariis, corde et ore Davidicos semper decantans psalmos. Post mensam vero, præparans se ad Dei servitium, rex humilis ponebat vestimenta sua, indutus ad carnem cilicio, adjunctoque clericorum collegio, centum sexaginta et eo amplius numero, ad exemplum Domini eorum pedes lavans, capillis capitis sui tergebat, et ad *Mandatum Domini* singulos eorum duobus solidis remunerans, clero præsentē, et diacono adstantē qui lectionem legeret secundum Joannem in Cæna Domini dictam et

¹ Epist. ad Dominicum c. 5.

factam. Talibus factis occupabat se rex meritis gloriosus, loca sanctorum perlustrando toto die sancto Parasceves, et crucem Domini adorando usque in vigilia sanctæ Resurrectionis etc. » Et paulo post :

12. « Hic autem post Deum specialis gloria regum, pro sanctorum Apostolorum numero, quos semper amabat corde benigno, et quorum solemnes festivitates votivo præveniebat jejunio, ad horum exemplum duodecim pauperes secum ducebat, quos specialius ditigebat, quibus ipse erat vera requies post labores. Nam his sanctis pauperibus comparans fortissimos asinorum pullos, ante se ubique pergebant lætantes, Deum laudantes etc. » Sed et quomodo reliquas festivitates Domini celebrare consuevit, sic accipe ab Helgald : « Sanctas noctes, hoc est, Nativitatis Domini, sancti Paschæ et Pentecostes sic totas ducebat insomnes usque ad summum mane, ut nec sedens nec stans somnum caperet, donec quam exspectabat et desiderabat, salutiferam corporis et sanguinis Domini nostri Jesu Christi perceptionem perciperet ». Et de consueta pœnitentia voluntarie ab eo suscipi solita, audi quid tradat : « Erat, inquit, et hoc amatori bonorum in religione pro suarum emendatione culparum, quod a sancto Septuagesimo usque ad Pascha, nulla usus culcitra, frequenter eum suscipiebat ad jacendum fortissima terra ». Hæc ab ipso fieri consueta ; reliqua, si cupis, ipsum auctorem consule, qui de ejus transitu ad Deum hæc breviter habet :

13. « Exire ipse de hoc sæculo paratus, Dominum Jesum Christum suæ salutis atque utilitatis magistrum semper invocabat, ad videndam regis æterni insuperabilem potentiam : Angelos, Archangelos, et omnes Dei sanctos, in auxilium suum venire, voce et signis indesinenter orabat, muniens se semper in fronte et oculis, naribus et labiis, gutture et auribus, per signum sanctæ Crucis, memoria Dominicæ Incarnationis, Nativitatis, Passionis, Resurrectionis et Ascensionis, et gratiæ Spiritus sancti. Habuit hoc ex more in vita, cui nunquam

defuit voluntate (votenti) aqua benedicta. His vero, aliisque refertus bonis virtutibus, sexagenarius (ut credimus, mortem opperiebat intrepidus, et invalescente validæ febris languore, petiit viaticum salutare et salubre vivifici corporis et sanguinis Domini nostri Jesu Christi : sumpto eo, et pauco intervallo facto, ad Regem regum et Dominum dominorum demigrans, felix feliciter felicia promeruit regna. Obdormivit autem in Domino (ut diximus) XIV kal. Augusti, lucescente aurora diei, tertia sabbati, in Mileduno castro, et Parisios deportatus apud Sanctum Dionysium, juxta patrem suum sepelitur ». Hæc et alia auctor, cuncta videns et manu contractans. Qui recensitis monasteriis ab ipso erectis, pro ejus anima has ad Deum preces obtulit ac scripsit :

14. « Deus, qui inter sanctissimos reges famulum tuum Robertum regali fecisti dignitate vigere, præsta quæsumus, ut quorum vicem ad horam gerebat in terris, intercedente gloriosa Dei genitrice Maria cum omnibus sanctis, eorum quoque perpetuo consortio lætetur in cælis, per eundem Dominum nostrum ».

Eo defuncto, successit Henricus jam rex consecratus, peritia militari atque prudentia pollens, ac pietate præstans, qui fratri Roberto Burgundiæ ducatum dedit, matrem vero quam expertus est contrariam, Constantiam, constantia superavit quæ anno abhinc defuncta est. Hæc pluribus in Fragmentis Francorum Historiæ.

15. *Guillelmi abbatis obitus.* — Hoc eodem anno moritur magni nominis hujus temporis Guillelmus abbas Sancti Benigni martyris, discipulus sancti Maioli : cujus res gestas cum in Historia sua, tum seorsum libello de Vita, et virtutibus ejus scripto, ut ipse testatur Glaber prosecutus est ¹. Quem post obitum miracula plurimum commendarunt.

¹ Glab. l. iv. c. 5.

1. *Christiani Saxonie a paganis afflicti.* — Ad num. 1. Glaber lib. 4, cap. 8, narrat paganos, *Leuticos* appellatos, vicinas Saxonum provincias crudeliter devastasse, et *Conradum imp.* in eos ir-

ruentem eosdem compescuisse ac contrivisse. Sed cum Glaber indicet hoc bellum anno sequenti inchoatum esse, et Wippo et Hermannus Contractus in fusiore Chronico, uterque hujus temporis scri-

plor, hanc cladem in annum MXXXIV conferant etisque alii suffragentur; de ea ibidem agemus.

2. *Conradus imp. Burgundiæ rex coronatur.* — Dicit secundo ibidem Glaber, *Conradum imp.* de illa victoria confidentiam accipientem, Romanum progressum esse et universas rebelliones protrivisse. Sed quia Conradus imp. ante annum MXXXVI ad compescendos rebelles sese in Italiam non contulit, ut eo anno monstrabimus, illis ad suos annos remissis, quæ Conradus hoc anno gessit hic referemus: « Anno Domini MXXXIII », inquit Wippo, « imperator Conradus cum filio suo rege Henrico Natalem Domini in Argentina civitate celebravit. Inde collecto exercitu per Solodorum Burgundiam intravit, et veniens ad Palerniacum monasterium, in Purificatione sanctæ Mariæ a majoribus et minoribus regni ad regendam Burgundiam electus est, et in ipsa die pro rege coronatus est: deinde quædam castella, quæ Odo (Campaniæ dux) invaserat, obsedit, sed propter nimiam asperitatem hyemis quæ tunc fuerat, valde impediabatur ». Paulo post: « Imperator reversus ad Turcicum castrum pervenit: ibi plures Burgundionum, regina Burgundiæ jam vidua (nempe Ermengarde) et comes Huperlus et alii, qui propter insidias Odonis in Burgundia ad imperatorem venire nequiverunt, per Italiam pergentes, occurrebant sibi: et effecti sui, fide promissa per sacramentum sibi et filio suo Henrico regi, mirifice donati redierunt. Ejusdem anni æstate, imperator cum exercitu suo super Odonem comitem (voces comitis et ducis promiscue ab hujus temporis historicis usurpantur) in Gallias Francorum venit, dicens, si Odo in Burgundia res alienas injuste quæreret, de suo proprio, juvante Deo, aliquid perdere deberet. Tunc in regno Henrici regis Francorum, in prædiis tamen et beneficiis Odonis tantas devastaciones et incendia fecit imperator, ut ipse Odo necessitate compulsus, humiliter veniens, quæreret veniam, promittens Burgundiam dimittere, et secundum jussionem illius sibi satisfacere. Sic imperator cum suo honore et Odonis damno reversus est ». Idem paucioribus verbis Marianus Scotus et chronographus Hildensheimensis habent, et fusius Ilepidanus. Quare imperator hoc anno, neque in Saxonia bellum gessit, neque in Italiam profectus est.

3. *Eclipsis solaris variorum malorum prænuntiatio.* — Ad num. 2. Refert Baronius ex Glabro lib. 4, cap. 9, signum terribile quod in sole apparuit: « Anno eodem, die Dominicæ Passionis millesimo, die III kalendarum Juliarum, IV feria, luna XXVIII, facta est eclipsis seu deliquium solis ab hora ejusdem diei sexta usque in octavam nimium terribilis, etc. quoniam illud intuentes intelligebant portendere quiddam fore superventuræ cladis humano generi triste. Nam eadem die, Natale videlicet Apostolorum, in Ecclesia B. Petri, quidam de principibus Romanorum conspirantes in papam Romanum, cupientes illum interimere, sed minime valentes, a Sede tamen propria expulerunt. Sed, ut

præmisimus, tam hac re quam pro aliis insolenter patratis, imperator illuc proficiscens propriæ Sedi restituit ». Hujus eclipsis meminere Marianus Scotus, chronographus Hildensheimensis, aliique, et Calvisius in opere Chronologico eam currenti anno visam, ex regulis Astronomicis demonstrat. Verum *Conradum* hoc anno in Italiam profectum esse, et Romanum Pontificem, Joannem nempe XIX, in Sedem restituisse, non dicit Glaber, licet ei hoc Baronius, Papebrocius in Conatu Chronico-Hist. aliique passim affingant, ut anno MXXXVIII ostendimus.

4. *Moritur Joannes XIX PP.* — A num. 3 ad 9. *Joannem XIX* hoc anno extremum diem clausisse, Hermannus Contractus in utraque editione sui Chronici et Sigebertus tradidere, idque indicat sedis ejus duratio; in plerisque enim Catalogis anni novem et dies novem ei tribuuntur, nisi quod in quibusdam librorum errore, loco *dierum IX*, habentur *menses XI*. Quare cum anno MXXIV Pontificatum suscepit ante mensem Octobrem, currenti anno vivere desiit. « Romæ », inquit Hermannus Contractus in auctiori Chronico, « defuncto Joanne, Benedictus IX (hunc ordine VIII ponit, quia Benedictum V ab Oltone M. depositum non numerat) qui et Theophylactus, papa CXLIX ordinatus, licet indignis tanto ordini moribus et factis, sedit annis plus XII. » Glaber vero, lib. 4 cap. 5: « Universalis papa Romanus, nepos sc. duorum, Benedicti atque Joannis, qui ei præcesserant, puer ferme decennis, intercedente thesaurorum pecunia, electus extitit a Romanis ».

5. *Benedict. IX ante diem XVII Novemb. papa ordinatus.* — *Benedictum IX* die nona Decembris ordinatum fuisse, arbitratur Papebrocius in conatu Chronico-Hist., sed ex monumentis Ecclesiæ Trevirensis, Broverus, lib. 11 Annal. Trevir., refert consecrationem Ecclesiæ ejusdem civitatis præsentem legatō a Benedicto IX, post quam *Simeonem Syracusanum* in sanctorum numerum retulit, misso faciam, et hanc Inscriptionem tunc positam, quæ opinionem illam evertit: ANNO DOMINICÆ INCARNATIONIS MXLII, INDICTIONE IX BENEDICTI PAPÆ DECIMO, REGISQUE TERTII HENRICI CONRADI REGIS FILII IV, XV KAL. DECEMBRIS, FERIA QVARTA. Quare cum die decima septima mensis Novembris anni Christi MXLII, *Benedictus IX* Pontificatus annum X numerarit, currenti ante diem illum Pontifex Romanus consecratus fuerat. An vero coram legatis Cæsareis Benedictus hoc anno consecratus fuerit, nullus antiquorum memoriæ prodidit.

6. *Simonia in Italia grassatur.* — Quam deplorendus status Ecclesiæ in Italia hoc tempore fuerit, docet Victor III papa, qui hoc tempore vivebat, in lib. 3 Dialogorum: « Dum negligentia sacerdotum, inquit, Italia a recto religionis tramite paulatim devians labefactaretur, in tantum mala consuetudo adolevit, ut sacræ legis auctoritate postposita, divina humanaque omnia miscerentur: adeo ut populus electionem, et sacerdotes conse-

crationem, donumque sancti Spiritus, quod gratis accipere et dare divina auctoritate statutum fuerat, data acceptaque per manus pecunia ducti avaritia venderent: ita vix aliquanti invenirentur, qui non hujus simoniace pestis contagione fœdati, mundi coram Deo præcepta Dominica observantes existerent. Itaque cum vulgus clericorum per viam effrænatae licentiæ nemine prohibente graderetur, ceperunt ipsi presbyteri ac diacones (qui tradita sibi Sacramenta Dominica mundo corde castoque corpore tractare debebant) laicorum more uxores ducere, susceptosque filios hæredes testamento relinquere. nonnulli etiam episcoporum verecundia omni contempta, cum uxoribus domo simul in una habitare. Et hæc pessima et execranda consuetudo intra Urbem maxime pullulabat, unde olim religionis norma ab ipso Apostolo Petro ejusque successoribus ubique diffusa processerat.

7. *Benedictus IX simoniacus et pravis moribus imbutus.* — « Igilur dum per aliquot annos nonnulli solo nomine Pontificum Cathedram obtinerent, Benedictus quidam nomine, non tamen opere, cujusdam Alberici consulis filius (Magi potius Simonis, quam Simonis Petri vestigia sectatus) non parva a patre in populum profligata pecunia, summum sibi sacerdotium vindicavit: cujus quidem post adeptum sacerdotium vita, quam turpis, quam fœda, quamque execranda extiterit, horresco referre, eo potius qualiter omnipotens Deus in faciem Ecclesiæ sit dignatus respicere, exordia enarrare ». Quæ postea narrat Victor III, annis quibus Roma Benedictus expulsus fuit verbatim referemus. Baronius num. 4 refellit heterodoxos, qui inde sumunt occasionem in Ecclesiam Romanam insurgendi et sagittas venenatas in eam immittendi. Tum num. 7 ostendit *Benedictum IX* in toto Christiano orbe habitum fuisse Pontificem Romanum, ipsumque munera Pontificalia exercuisse; quod confirmari potest ex canonizatione sancti *Simeonis Syracusani* cujus mox meminimus, et ex Concilio Romano, quod tom. ix Concil. p. 1250 recitatur. Acum in eo de monasterio Sancti-Petri foris murum civitatis Perusinae sito, aliisque duobus, quæ *Andreas episcopus Perusinus* in *Benedictum IX*, qui primum monasterium consecraverat, transtulit. Postea enim idem episcopus, se jactando atque injuriam faciendo in quodam archipresbytero Sancti-Constantii, supradicti monasterii Sancti-Petri, ostendit se causare monasterium, atque ad suum jus intromittere, id est, illud repetere. Quare Bonizo abbas hac de re questus est apud *Benedictum IX*, qui Synodale Concilium congregavit, in quo præfatus episcopus dicit se nulla ratione monasterium illud repetere, « atque iterum refutavit coram domino Benedicto papa », id est, dimisit, et in Pontificis jurisdictionem transmisit, ut variis exemplis Ducangius in Glossario ostendit. Adfuere huic Concilio complures episcopi, abbates, diaconi, et alii diversorum

ordinum ». Hoc factum est in præsentia supradicti Benedicti papæ, temporibus domini Chuonradi imperatoris, nonas Novembris, per Indictionem quintam », a kalendis Septemb. ut mos in Italia ferebat, inchoatam, ideoque anno MXXXVI, non vero insequenti, ut perperam in citato tomo Concil. annotatur.

8. *Obitus Roberti Francorum reg.* — A num. 9 ad 13. Non solum Baronius *Roberti* Francorum regis mortem cum hoc anno copulat, sed etiam Calvisius, Bucherius, Petavius, alique viri doctissimi. At in Chronicis Sancti-Petri-Vivi, Sancti-Medardi, Sancti-Dionysii, Odoranni, aliisque quibusdam, hæc mors cum anno millesimo trigesimo primo conjungitur, et id tribus testimoniis, ex Chartis Henrici filii ac successoris erulis, certum esse ostendit Baluzius, lib. 4 Marce Hisp. ad annum MXXXI. Primum exlat in Actis consecrationis Ecclesiæ Rivipullensis in Catalaunia positæ, in cujus fronte legitur: « Anno ab Incarnat. Domini nostri J. C. MXXXII, Æra millesima LXX, Indictione XV, XVIII kalendarum Februariarum, anno primo, quo post decessum venerabilis memoriæ Rodberti regis Francorum, suscepit regni gubernacula filius ejus Henricus ». Robertum autem XIII kal. Augusti., seu die xx mensis Julii demortuum, testatur Helgaldus in ejus Vita. Secundum sumitur ex veteri Charta monasterii Sancti-Cucupathis in pago Vallensi, in cujus calce scriptum est: « Latæ sunt hæ conditiones quarto kal. Julii, anno primo Henrici regis, et Dominicæ Incarnat. trigesimo secundo post millesimum ». Tertium deducitur ex testamento Guifredi comitis Seritanie, scripto Æra LXXII post millesimum, anno trabeationis Domini nostri Jesu Christi xxxv post millesimum, Indictione IV, VI idus Novembris, anno quinto regnante Henrico rege Francigeno ». Mitto varia hujusmodi testimonia a viris eruditis in medium allata, quia hæc certo evincunt Henrici regis initia in diem xx mensis Julii an. MXXXI incidere. Verum quidem est, extare Chartas aliquas istis contrarias; sed quemadmodum plures Ottonis M. in numeris corruptas esse supra ostendimus, ita ut ex iis regni ejus Germanici initium male cum an. DCDXXXVI videatur affixum; sic non desunt Henrici regis Diplomata a librariis in numeris depravata. Legenda Dissertatio Ægidii Laccari de morte Roberti Francorum regis.

9. *Ad annum MXXXI retrahendus.* — Primum fundamentum Baronii fuit Helgaldi auctoris coævi in piissimi hujus regis Vita testimonium: « Quo ad Deum, inquit, transit anno, qui est Incarnationis millesimus trigesimus secundus ». Post aliquot paginas: « Ante suum sanctissimum obitum, qui tertio decimo kalendis Augusti extitit, die passionis Apostolorum SS. Petri et Pauli, sol ad similitudinem quartæ lunæ, subtractis radiis, fuscatus apparuit in toto mundo, etc. Quid autem portenderit, in proximo patuit, cum nil nobis miserius aluit, quam de sua morte dolorem intolera-

bilem reliquerit ». Sed Helgaldus auctor indiligens ex ipsomet corrigendus. Nam paulo post subdit: « Obdormivit autem in Domino XIII kal. Augusti, lucescente aurora diei tertiæ sabbati, id est, die Martis, quæ dies anno MXXXI, non vero an. MXXXII aut MXXXIII, in XIII kal. Augusti, seu diem XX Julii incidit. Ad hæc, eclipsim illam non anno MXXXII, sed anno MXXXIII contigisse, certum et indubitatum. Denique illa non mortem Roberti regis, sed quæ post eam fuere calamitates prænuntiavit. Secundum Baronii fundamentum ex Glabro lib. 4, cap. 4, petitur: « Imminente anno Incarnati Christi millesimo trigesimo tertio, qui est a Passione ejusdem Salvatoris millesimus, obire viri in orbe Romano famosissimi, sacræque religionis signiferi, Benedictus scilicet papa universalis (qui an. MXXIV vita functus est) ac rex Francorum Robertus (anno MXXXI,) Fulbertus quoque Carnoti præsul incomparabilis, vir sapientissimus (qui e vivis excessit an. MXXVIII) necnon prænominatus pater monachorum, fundatorque cœnobiorum eximius Willelmus », Divionensis abbas, cujus mortem ipsemet Glaber in ejus Vita anno MXXXI affigit. Glaber itaque, ut recte eam exponit Chiffletius in Probationibus ad Historiam Trenorciensem, pag. 299, horrendam illam famis ac luis triennio, ac præsertim hoc anno grassatam, cladem descripturus, ejus veluti prognostica, magnorum aliquot viro- rum mortes lotis ante decem annis obitas commemorat. Subjungit enim: « Sequenti itaque tempore (scilicet post mortes memoratas, quarum ultima fuit Roberti regis, anno MXXXI, die XX Julii defuncti) cœpit in universo orbe terrarum fames convalescere, ac interitus pæne universi generis imminere ». Postea toto illo capite calamitates tam a fame quam a pestilentia enatas fusissime describit, quia ejusdem capitis initio utramque intendebat, tanquam a mortibus illis prænuntiatis. Quoad eclipsim, Glaber eam ad mortem Roberti non refert, sed ad alia mala, ut legenti ejus verba patebit.

10. *Robertus Roberti regis filius fit dux Burgundiæ.* — Glaber lib. 3, cap. 9, Roberti regis morte memorata, ait: « Sequenti anno (sc. MXXXII) eodem mense (nempe Julio) atque in eodem castro quo

rex obierat, et ipsa (nempe Constantia Roberti regis uxor) obiit. Henricus nempe rex (Francorum) paternis rebus potitus, germanum suum Robertum constituit Burgundiæ ducem ». Est is primæ stirpis ducum Burgundiæ caput, vixitque usque ad annum MLXXV, ut habet Chron. S. Benigni, in quo ad eum annum legitur: « Obiit Robertus dux Burgundiæ. Successit Hugo, Henrici filii ejus filius ».

11. *Obitus S. Willelmi abbatis Divion.* — Ad num. 15. *Sanctus Willelmus*, Divionensis abbas, an. MXXXI ad cælos evolavit, ut eodem anno num. 6 et seq. legere est.

12. *Christianorum victoriæ de Saracenis.* — Cedrenus, pag. 730, narrat quæ anno mundi secundum Constantinopolitanos 6540, mense Augusto superioris Christi anno finito accidere, et postea ait, per idem tempus Afros Saracenos, cum mille navibus et innumeris classiariis, insulas orasque maritimas multas infestasse; sed cum eorum parte congressum prælio, imperatoris ducem eos fudisse, ac quingentos in compedibus ad eundem misisse. Præterea Edessa a Græcis capta. Narrat etiam Glaber lib. 4, cap. 7, per hæc tempora magnum inter Christianos et Saracenos in Africæ partibus prælium habitum fuisse: « Inilo pugnæ certamine, inquit, diu multumque congressum est. Christiani tamen omnino iulæsi victores apparebant. Ad ultimum quoque tantus horroris tremor invasit Saracenorum exercitum, ut veluti pugnæ obliiti, fugam arripere tentantes, quamvis nequicquam, propriis irretiti jaculis, imo virtute Dei stupentes hæserunt. Christianorum vero quantus erat cuneus divino fortificatus auxilio, tanta eosdem cæde prostravit, ut ex innumerabili multitudine illorum vix pauci evaderent. Motget nempe princeps illorum, qui quasi Moyses ita confuse nominatur, illo prælio dicitur defuisse. Collectisque spoliis, confecerunt ex eisdem plurima argenti talentorum pondera, memores voti quod Deo spoponderant. Est namque mos Saracenorum ad prælia euntium, ut sese phaleris argenti vel auri plurimum perornent. Quod tunc etiam devotioni nostrorum præstitit augmentum, qui protinus miserunt quidquid exinde provenit, ut voverant, ad Cluniense monasterium », cui S. Odilo præerat.

BENEDICTI IX ANNUS 1. — CHRISTI 1034.

1. *Conciliorum frequentia in Gallia, in quibus plura statuta quoad disciplinam.*—Christi Redemptoris annus sequitur trigesimus quartus post millesimum, Indictione secunda, idemque post famem abundans et felix. De quo ita qui vidit Glaber¹: «Anno a Passione Domini millesimo memoratæ cladis penurias subsequente (est namque annus primus post millesimum trigesimum tertium ab Incarnatione Domini) sedatis nimborum imbribus, respectu divinæ bonitatis et misericordiæ, cœpit læta facies cæli clarescere, congruisque æthereis flare, placidaque serenitate magnanimitatem Conditoris ostendere; telluris quoque tota superficies amicabilem virens frugum abundantiam, funditus inopiam expellendo, portendere.» Quod, ut inferius asserit, ubique accidit, ut per quinquennium maxima omnium rerum fuerit abundantia. Quid autem boni Dei benignitas ista pepererit, ab eodem Glabro sic accipe: «Tunc, inquit, primitus cœpere in Aquitanicæ partibus ab episcopis et abbatibus, cæterisque viris sacre religionis devotis ex universa plebe coadunari Conciliorum conventus, ad quos etiam nulla delata sunt corpora sanctorum, atque innumerabiles sanctarum apophoretæ reliquiarum. Dehinc per Arelatensem provinciam, atque Lugdunensem, sicque per universam Burgundiam usque ad ultimas Franciæ partes, per universos episcopatus indictum est, qualiter certis in locis a præsulibus magnatibusque totius patriæ, de reformanda pace et sacre fidei institutione celebrarentur Concilia. Quod etiam tota multitudo universæ plebis audiens, letanter adire, maximi, mediocres ac minimi, parati cuncti obedire, quidquid præceptum fuisset a pastoribus Ecclesiæ, non minus videlicet quam si vox emissa de cælo hominibus in terra loqueretur. Terrebat enim universos elades præteriti temporis, instabatque metus, ne adipiscerentur opulentiam futuræ ubertatis.

2. «Erat quippe descriptio capitalem digesta, qua continebantur tam illa quæ prohibebantur, quam ea quæ devota sponsione omnipotenti Domino offerre decreverant. In quibus potissimum erat, de

inviolabili pace conservanda, ut scilicet viri utriusque conditionis, cujuscumque antea fuissent rei obnoxii, absque formidine procederent armis vacui. Prædo namque aut invasor alterius facultatis legum distictione arctatus, seu bonis facultatum, seu pœnis corporis acerrime mulctaretur: locis nihilominus sacris omnium Ecclesiarum honor et reverentia talis exhiberetur, ut si quis ad ea cujuscumque culpæ obnoxius confugium faceret, illæsus evaderet, nisi solummodo ille qui pactum prædictæ pacis violasset: hic tamen captus ad altare, præstitutam vindictam lueret. Clericis similiter omnibus, monachis et sanctimonialibus, et si quis cum eis per regionem pergeret, honor similiter et reverentia exhiberetur, nullamque vim ab aliquo pateretur. Plurima autem in iisdem Conciliis constituta sunt, quæ perlongum duximus referre. Illud sane memorandum, quod omnibus in commune placuit, qualiter omnibus hebdomadibus sanctione perpetua, sexta die abstineretur a vino et carnibus, et septima, nisi forte gravis infirmitas compelleret, aut celeberrima solemnitas interveniret. Si vero affectio aliqua intercederet, ut hic tenor paululum laxaretur, tres proinde pauperes victu sustentarentur.» Hæc Glaber. Ad quæ plane spectare videntur quæ Sigebertus habet in chronographia sua attentius consideranda, ne videlicet absque discretionem pro bonis mala sumantur. Ait enim:

3. «Istiusmodi decretum a Franciæ episcopis datum est servari subjectis sibi populis. Unus eorum dicit: cælitus sibi delatas esse litteras, quæ pacem monerent renovandam in terra, quam remandavit cæteris, et hæc tradenda dedit populis: Arma quisque non ferret, direpta non repeteret, sui sanguinis vel cujuslibet proximi ultor minime existens, percussoribus cogeretur indulgere. Jejunium in pane et aqua omni sexta feria servarent, et in sabbato a carne et liquamine abstinerent, soloque hoc contenti jejunio, in omnium peccatorum remissionem nullam sibi scirent aliam adjiciendam pœnitentiam, et hæc servare sacramento firmarent. Quod qui nollet, Christianitate privaretur, et exeuntem de sæculo nullus visitaret, nec sepul-

¹ Glab. l. iv. c. 5.

toræ traderet. Alia quoque importabilia quamplura dedere mandata, quæ oneri visa sunt replicare.

4. « Hanc mandatorum novitatem cum multi cupidi novarum rerum libentius justo amplecterentur, Gerardus Cameracensis episcopus, qui solus Lothariensium appendebat ad parochiam Francorum, nullius hortatu potuit adduci ad hæc suscipienda, sed singula capitula refellebat, dicens: Genus humanum ab initio trifariam esse divisum, in orantibus, pugnatoribus et agricultoribus, et unum duorum, et duos unius egere auxilio: ideo debere arma ferri, et rapinas reddi pro auctoritate legis et gratiæ: ultorem percussi, vel occisi, non exacerbari cogendo, sed secundum Evangelium ei reconciliari: jejunium in sexta vel septima feria nec omnibus unum esse imponendum, quia non est una omnibus possibilitas, nec omnes hoc uno jejunio contentos esse, quia non est una omnium poenitendi qualitas. Hæc sacramento firmare, vel sacramenti violationem perjurio augere, non esse utile. Illis contradicentes excommunicari, infirmis visitationem, vel mortuis sepulturam negari, esse detestabile. Sufficere authentica Patrum decreta, et super his neglectis impositum congruenter poenitentiae modum ». Hactenus Gerardus Cameracensis apud Sigebertum, cujus judicio omnium eruditorum, fuisse potiora jura videntur: ut mirandum potius sit, potuisse tot episcopos hujusmodi unius asserta inani revelatione moveri magis, quam divinæ Scripturæ, sanctorumque Patrum decretis, atque Ecclesiæ traditionibus assentiri, et præscribere universæ Ecclesiæ leges, et eas munire poenis, quæ nunquam a majoribus pro gravioribus quoque delictis essent impositæ.

5. Jam ab Apostolorum temporibus vuisse in Ecclesia Catholica Occidentali jejunium sextæ feriæ atque sabbati hebdomadarum constat, de quorum causa et origine et observantia satis dictum est tomo primo Annalium. Quod tepuisse non dubium est, cum remanserit ex eo duntaxat abstinentia ab esu carniū, revocare ipsum ad usum pristinum, ut revera iis diebus fideles per singulas hebdomadas jejunarent more majorum, si ferret ista humana infirmitas, non solum non reprehendendum, sed magnopere laudandum fuisset, sed austeriorem, poenis illis apposis, illisque aliis comitantibus sancire disciplinam, haud tutum, nec dignum Ecclesia videri debuit; quam Apostolus monuit graviore debere incessu procedere, quam inanibus hisce revelationibus traduci, dicens ad Galatas ¹: « Licet nos aut Angelus de cælo evangelizet vobis præterquam quod evangelizavimus vobis, anathema sit ». Et ad Colossenses ²: « Nemo vos seducat, volens in humilitate et religione Angelorum, quæ non vidit, ambulans frustra inflatus sensu carnis suæ, et non tenens caput, ex quo totum corpus etc. » Plane insinuans, universa

isthæc, quantumlibet sancta, justaque videantur, ac pia, capitis Ecclesiæ consensione probanda, priusquam populo observanda tradantur. Unde sæpe merito invenimus esse statutum, ut provincialia episcoporum Concilia ex confirmatione Apostolicæ Sedis vim accipiant. At non absque dedecore Gallicanorum episcoporum accidit, Sede Apostolica inconsulta, pietatis intuitu ista decernere, vel decreta ejusdem judicio examinanda atque probanda negligere.

6. Sed semel male præsumptum, rursum est ab iisdem episcopis usurpatum. Post decennium enim ab iisdem ferias hebdomadarias dilatatas, ut non una Dominica die, sed quatuor hebdomadæ diebus cessarent fideles a strepitu fori, vel privatis dissensionibus, idem Glaber ita testatur ¹: « Contigit vero in ipso tempore, inspirante divina gratia, primitus in partibus Aquitanicis, deinde paulatim per universum Galliarum territorium, firmari pactum propter timorem Dei pariter et amorem, taliter, ut nemo mortalium a feriæ quartæ vespere, usque ad secundam feriam incipiente luce, ausu temerario præsumeret quidpiam alicui hominum per vim auferre, neque ultionis vindictam a quocumque inimico exigere, nec etiam a fidejussore vadimonium sumere. Quod si ab aliquo fieri contigisset contra hoc decretum publicum: aut de vita componeret, aut a Christianorum consortio expulsus patria pelleretur. Hoc insuper placuit universis (veluti vulgo dicitur) ut Tregua Domini vocaretur, quæ videlicet non solum humanis esset fulta præsidii, verum etiam multoties divinis suffragata terroribus. Nam populi et vesani audaci temeritate præscriptum pactum non timere transgredi, in quibus protinus aut divina vindex ira, seu humanus gladius ultor exstitit. Et hoc passim tam frequenter contigit, ut præ sui multitudine sigillatim non queat annotari; et hoc satis juste. Nam sicut dies Dominicus propter Dominicam Resurrectionem venerabilis habetur, et octavus cognominatur: ita quintus, sextus et septimus ob Dominicæ cœnæ, et ejusdem passionis reverentiam debent ab iniquis actionibus separari.

7. « Contigit enim ut dum pæne (sicut jam diximus) per totas Gallias hoc statutum firmiter custodiretur, Neustriæ gentes illud suscipere recusarent. Erat enim hujus rei occasio dissidium superbissimi litigii, quod ortum fuerat inter Henricum regium filium Roberti, et filios supradicti Odonis; qui vicissim incendiis bella miscentes intestina, sibimet damna inferentes non modica, plurimas suorum strages dederunt. Deinde quoque occulto Dei judicio, cœpit deservire in ipsorum plebibus divina ultio. Consumpsit enim quidam mortifer ardor multos tam de magnatibus, quam de mediocribus atque infinis populi: quosdam vero truncatis membrorum partibus reservavit ad futurorum exemplum. Tunc etiam pæne gens totius

¹ Gal. 1. — ² Colos. 11.

¹ Glab. l. v. c. 1. prope fin.

orbis sustinuit penuriam pro raritate vini et tritici ». Hæc Glaber, utcumque conatus iudicio divino confirmare decretum, sed hæc ad pondus sanctuarii sunt referenda. Nam non justificat Dominus stateram iniquam et sacelli pondera dolosa¹. Aut enim loquitur ipse de his quæ ab hominibus injuste fiunt, et dixerim ea quibuscumque diebus esse vetita, et omnes a peccatis feriandos esse dies : vel de his quæ licite fieri possunt ; tunc quæ ratio, ut dictis diebus ab his homines abstinerent, nullo majorum exemplo, imo canonibus repugnantibus, ut quinta dies feriretur ?

8. *Universæ Actiones Concilii Lemovicensis.* — Ut autem propensiori studio ea quæ a Glabro sunt dicta examinemus, atque in primis quod ait, multa Concilia pacis causa hoc anno esse in Galliis congregata, atque primitus in Aquitanie partibus esse cœpta : plane alluisse visus est ad duo Concilia, quæ brevi temporis spatio intercedente, pacis causa sunt celebrata : alterum Bituricis, die tertia mensis Novembris ; alterum Bellovacii, post dies quindecim, nempe die decima octava ejusdem, ab iisdem episcopis, convenientibus Lemovicis ad diem anniversarium consecrationis Basilicæ Salvatoris, ut ejusdem Concilii Acta testantur, quæ apud nos scripta habentur ex Bibliotheca Antonii Augustini ab Hispaniis Romam missa : in quibus pariter eodem contextu ipsum Bituricense Concilium est celebratum, ambo provincialia atque eadem ex causa collecta. Quoniam vero res gestæ Bituricensis Synodi relatæ sunt in Lemovicensi Synodo, hic ipsa Acta Lemovicensia rerum ordine sunt recensenda, atque in primis quæ ad pacem indictam pertinent, ita exorsus est Jordanus Lemovicensis episcopus :

9. « Dolorem cordis mei vobis patefacio, o venerabiles episcopi et reliqui ministri Domini, et clamorem facio de sæcularibus potestatibus, parochianis meis, qui Ecclesiam Dei quietam esse non sinunt, res sanctuarii pervadunt, pauperes mihi commissos et Ecclesiæ ministros affligunt, et me qui eorum pastor sum de pace audire nolunt. Dignum est enim, ut tales qui nobis contraire præsumunt, ab Ecclesiæ communione abscondantur. Nam quicumque nobis subditos conturbant..... cuius vice episcopi legatione funguntur. Ideoque divinæ et Apostolicæ severitate distractionis digni, et a nostro Concilio justo anathemate plectendi, quousque fructuose pœnitendo resipiscant ». Peractis post hæc iis, quæ spectabant ad probationem Apostolatus sancti Martialis, quem titulum aliqui negare præsumpsissent, intra missarum sollemnia adversus pacis perturbatores anathema ab episcopis jaculatur, ipso Jordano Lemovicensi episcopo ista inter alia ad populum perorante :

10. « Audivimus, dilectissimi, verba sancti Evangelii² : Quia venit Filius hominis quærere et salvum facere quod perierat. Ideo enim Salvator

dicitur esse Dominus noster Jesus Christus, quia omnes peccatores vult ad salutem revocare, dicente Apostolo¹ : Fidelis sermo, quia Christus Jesus venit in mundum peccatores salvos facere, quorum primus ego sum. Cumque de fide Zachæi², qui fraudata reddidit in quadruplum, paucis dixisset, atque ad milites deprædantes sive per calumniam vel potentiam res sanctuarii, et pauperum turbam opprimentes, ut Zachæum imitantes juste restituerent quibus rapuerant, retraxisset sermonem, ad ultimum adjecit dicens : Ecce propter vestram pacem, dilectissimi, hic adsunt pastores Ecclesiarum, sancti fratres nostri episcopi, qui ad sublevandum onus mei ponderis, et vos salvandos atque pacificandos, dignati sunt ad hanc urbem convenire, sequentes Domini nostri Jesu Christi exemplum, qui venit quærere et salvum facere quod perierat. Qua de re cum illis moneo vos obtestans in Domino Jesu, quatenus nemo vestrum illis inobtemperans existere præsumat, nemo sese a Concilio isto excusando subducat, sed omnes principes et capita populorum ex Lemovicensi provincia in crastinum et tertium diem ad nos cum pace conveniant, et nullus a nostro cœtu communi secedat, nisi a nobis voluntario animo jussus.

11. « Convenientibus aulem ad Concilium, nemo alteri propter aliquas inimicitias nocere præsumat, sive in facultatibus, sive in domo ejus, neque dum hic steterit, neque dum ad propria redierit, neque ante septem dies, postquam reversus fuerit. Nemo in hac congregatione seditionem generet, neque in urbe, neque extra urbem. Nullus aliquid per viam (vim) rapiat; nullus, ut assolet, quasi propter justas querelas pugnam inire constituat. Nullus hic expeditionem neque equitatum ineat aliquando agendum, sed nihil hic aliud quam pacem quispiam inquirat, si forte pax nobis a Domino tribuatur quieta. Quia hic conventus proprie conventus Domini est, ad inquirendam pacem, ad consolandam sanctam Dei Ecclesiam. Hæc qui observaverit, tanquam filio pacis, imo Dei, et a Domino nostro J. C. et sanctis Apostolis absolutionem confecimus (conferimus) peccatorum, et benedictionem æternam : ut sicut Dominus beato Petro, et hic beato Martiali, ad cuius sacratissimum corpus assistimus, cæterisque Apostolis, virtutem atque potestatem ligandi atque solvendi tribuere dignatus est ; ita peccatorum nexibus absolvere dignetur eos, qui de pace et justitia Deo et nobis, qui ejus vice licet indigni fungimur, obedire festinaverint. Qui autem pacem nostram non susceperint, tanquam non Deum sed diabolum sequentes, huic damnationi quam modo recitare videbimur, subjacebunt. Pax aulem nostra ad nos revertetur, sicut Dominus in Evangelio ait³ : Si fuerit filius pacis, requiescet super illum pax vestra ; sin autem, ad vos revertetur. Tunc jubentibus episcopis, idem qui Evangelium promun-

¹ Mich. VI. — ² Luc. XIX.

¹ 1. Tim. I. — ² Luc. XIX. — ³ Luc. X.

tiaverat, diaconus, sic in tomo chartæ excelsa voce maledictionem coram populo in tribunali coram altari legere cœpit, dicens :

12. « Ex auctoritate Dei Patris omnipotentis, et Filii, et Spiritus sancti, et sanctæ Dei genitricis Mariæ, sancti Petri Apostolorum principis, et beati Martialis, et aliorum Apostolorum, atque omnium Sanctorum Dei, nos episcopi, in nomine Dei specialiter congregati, Æmo archiepiscopus Bituricensis, Jordanus antistes Lemovicensis, Stephanus Aniciensis, Rorico Arvenensis, Ragamundus Mimatensis, Æmiliius Albiensis, Deusdedit Caturcensis, Esimburtus Pictaviensis, Arnaldus Petragoricensis, Robo Engolismensis, excommunicamus illos milites de isto episcopatu Lemovicensi, qui pacem et justitiam episcopo suo firmare, sicut ipse exigit, nolunt aut noluerunt. Maledicti ipsi et adjuutores eorum in malum, maledicta arma eorum et caballi eorum; erunt cum Cain fratricida et cum Juda traditore, et cum Dathan et Abiron qui vivi introierunt in infernum. Et sicut hæ lucernæ extinguuntur in oculis vestris, ita gaudium eorum exstinguatur in conspectu sanctorum Angelorum, nisi ante mortem ad satisfactionem et emendationem, sive pœnitentiam dignam venerint in iudicium episcopi sui. Omnes episcopi et presbyteri candelas ardentes in manibus tenentes, mox eas in terram projicientes exstinxerunt. Ad quod verbum cor populi valde expavit, et omnes clamaverunt dicentes : Sic exstinguat Deus lætitiâ eorum, qui pacem et justitiam suscipere nolunt.

13. « His dictis, dominus Jordanus ait ad populum : Hæc verba maledictionis eodem dicta sunt tenore nuperrime in Concilio Bituricensi in adversarios pacis. Quemadmodum autem inter Bituricenses, Deo adjuvante, pax confirmata est, ita etiam inter Lemovicenses pacem fieri optamus. Post hæc singuli episcoporum et ultimus archiepiscopus de pace populum monuere dicentes : Sicut pastor vester ecce prædicat vobis pacem, ita et nos ejus dicta firmamus uno corde et uno consensu, ex auctoritate Salvatoris Jesu Christi Domini nostri, et beati Petri, atque beati Martialis, sanctorumque aliorum Apostolorum, quibus proprie a Domino collata est potestas ligandi atque solvendi. Quidquid hic pastor vobis a Deo datus confirmat, confirmamus, et quidquid destruit, destruimus : ligamus quos ipse ligat, benedicimus quibus benedicit.

14. « His et hujusmodi peroratis, facto silentio, cum ad horam fractionis Dominici corporis ventum esset, atque ex more archiepiscopus benedictionem populo funderet, superinterseruit beati Martialis nominis benedictionem, ita dicens : Benedicat et custodiat vos omnipotens Deus, domumque hanc sui muneris (numinis) præsentia illustrare, atque suæ pietatis oculos super eam die ac nocte dignetur aperire. Amen. Concedatque propitiis, ut omnes, qui ad solemnitatem anniversariam Dedicationis hujus Basilicæ hodierna die

convenistis, intercedente beato Martiale Apostolo et cæteris sanctis suis, quorum reliquæ hic pio venerantur amore, vobiscum hinc veniam peccatorum vestrorum reportare valeatis. Amen. Quatenus eorum interventione ipsi templum sancti Spiritus, in quo sancta Deus Trinitas jugiter habitare dignetur, effecti, post hujus vitæ labentis excursum ad gaudia æterna feliciter venire mereamini; et cætera quæ episcopali benedictione proferri solitum est ». Qua plenissime impertita, finis impositus est primæ Concilii hujus Actioni.

15. In secunda autem, quæ extat, ejusdem Concilii Actione, post redargutos eos qui negarent sanctum Martialem inter Apostolos Apostolorum nominandum, recitati sunt canones viginti nuper statuti in Concilio Bituricensi : quibus lectis, auditæ sunt diversorum querelæ, ut illæ monachorum Bellovacensis monasterii S. Petri, declamantium, regulari monasterio datum esse secundum abbatem, idque perperam factum a principibus sæcularibus, nempe comite Tolosano, postea comite Petragoricensi, inde vicecomite Combronensi, qui sæculari abbatiam dedit, illi videlicet, qui esset nepos episcopi Caturcensis. Ad quæ audita ista dixerunt episcopi : Ecclesiastica officia non secundum carnis originem, sed secundum meritum virtutem distribui oportet. Cumque ille clericus non monachus, abbas sæculari nobilitate ac generositate magnus, mox vocatus ad Concilium, ante episcopos reus adstaret genibus positus, et super hac re judicaretur secundum canones, ita respondit : O reverentissimi Patres, hanc, rogo, justo iudicio corrigite rem, et libenter consentio. Dixerunt Patres : Idoneum ex regularibus monachis aliquem adducite ante dominum Jordanum, ut ipse eum regulariter ordinet abbatem.

16. His ita definitis, multa que in detestationem sæcularium abbatum et laudem regularium ab eodem Jordano episcopo peroratis; de abbate qui passus fuerat cæsum excommunicatum vicecomitem in loco monasterii sepeliri, actum est. Quod redarguentes episcopi, pluraque in detestationem facti inculcantes, quod excommunicatus ab episcopo ab ullo alio, nec in vita, neque in morte absolvi debeat : ad sui excusationem ita abbas rogatus suam agere causam, respondit dicens exposcenti Jordano Episcopo : O domine pater, de hac re, de qua accusor, veritas vobis nuntiata non est. Absit a me, ut absque vestra licentia aliquando suscipiam excommunicatum : ordo enim voster quanto sublimior est, tanto subjectior, et promptior ad obediendum episcopis ut sit necesse est. In episcopis enim ipsum Dominum honoramus et contemnimus, sicut ipse ait¹ : Qui vos audit, me audit, qui vos spernit, me spernit. Ecce idoneos testes adhibeo, quia ille vicecomes excommunicatus, postquam prædando interfectus est (omnes enim prædantes excommunicari in omni-

¹ Luc. x.

bus Conciliis scimus) me ignorante a militibus suis ad monasterium nostrum deportatus est, cuius corpus neque suscepimus neque sepelivimus, sed sine officio sacro ultra aquam vehi jussimus, ubi milites ipsi, nullo adstante clericorum, sepelierunt illud longe nimirum a loco sacro. Accepta autem defensione abbatis, eoque absoluto ab accusatione falsa : ejusmodi occasione sepulturæ excommunicatorum, rem tunc memoria dignam, quæ nuper contigisset, in medium attulit unus ex episcopis, quam ipsa Acta sic habent :

17. « Tunc episcopus Caturcensis cœpit enarrare dicens : Nuperrime post Concilium Bituricense quidam de excommunicatis eques in nostra diœcesi interfectus est, quem ego, rogantibus amicis et propinquis ejus, nullatenus solvere volui, ut cæteri metum haberent : gravem enim culpam prædantis habuerat. Itaque sine sacerdotis obsequio a militibus apud quamdam Ecclesiam Sancti Petri, non me jubente, sepultus est. Mane autem facto, corpus ejus longe extra cœmeterium projectum, et nudum super faciem terræ inventum est : tumulus autem ubi sepulturam habuerat intactus, et ita ut dimissus fuerat repertus est. Quem iterum milites aperuere, et nihil in eo amplius nisi vestes quibus involutum corpus fuerat invenerunt. Rursus cadaver ibidem sepelierunt, et diligenter tumulum sub enormi pondere terræ et lapidum claudunt : sed die altero projectum cadaver, et tumulum intactum ut supra adspiciunt. Quinque sepeliunt : toties eodem ejectum tenore contuentur. Tanto demum victi stupore, corpus longe a cœmeterio Ecclesiæ terra obruunt. Quo terrore perculsi principes militiæ, pacem nobis, velut optabamus, firmare nequaquam distulerunt. Ad hæc respondit Concilium : Quid hoc aliud est, nisi quia sub oculis hominum arbiter hominum affirmat Ecclesiæ suæ auctoritatem, quia excommunicati a sepultura Christianorum juste ab episcopis segregantur? Tales enim negant fidem, dum latrocinia potius quam pacem sectantur, etc. » Ilis dictis deponendo sub interdicto omnes qui pacem Ecclesiis negant, Odelricus abbas ita proposuit :

18. « Odelricus interea venerabilis pater familiæ beati Martialis, sedens in cathedra juxta primatam Lemovicensem, sacris ut erat indutus ornamentis, dare cœpit consilium episcopis, dicens : Hic vos, charissimi, decernere oportet medicinam, quam contra generalem morbum adhibeatis. Si enim de pace tenenda, sicut est vestra voluntas, principes militiæ Lemovicensis urbis abstinerint, quid contra ista erit agendum? Dixerunt episcopi : Hæc jure petimus, charissime, ipse dato consultum (consilium). Quibus ille : Nisi de pace acquieverint, ligate omnem terram Lemovicensem publica excommunicatione, eo videlicet modo, ut nemo, nisi clericus, aut pauper mendicans, aut peregrinus adveniens, aut infans a bimatu et infra, in toto Lemovicinio sepeliatur, nec in alium episcopatum ad sepeliendum portetur.

Divinum officium per omnes Ecclesias latenter agatur, sed baptismus petentibus tribuatur. Circa horam tertiam signa sonent in Ecclesiis omnibus, et omnes proni in faciem preces pro tribulatione et pace fundant. Pœnitentia et viaticum in exitu mortis tribuatur : altaria per omnes Ecclesias sicut in Parasceve nudentur : et cruces et ornamenta abscondantur, quia signum luctus et tristitiæ omnibus est. Ad missas tamen, quas unusquisque sacerdotum januis Ecclesiarum obseratis fecerit, altaria induantur, et iterum post missas nudentur. Nemo in ipsa excommunicatione uxorem ducat, nemo alteri osculum det, nemo clericorum aut laicorum, vel habitantium vel transcurrentium, in toto Lemovicinio carnem comedat, neque alios cibos, quam illos quibus in Quadragesima vesci licitum est. Nemo laicorum aut clericorum tondeatur, neque radatur, quousque districti principes et capita populorum per omnia sancto obediant Concilio. Si quis vero probatus fuerit aliquo modo hujus vinculi violator, non recipiatur, nisi cum digna pœnitentia : magnopere enim episcoporum excommunicatio est observanda, ne forte plus irascatur furor Domini super nos, et super populum, etc. » Subjicit ibidem de recipiendis pœnitentibus quibuscumque ; sed de his qui paci non consenserint, hæc infert : « Hi tales (inquit Synodus) et privatim excommunicentur, ut sint segregati a communione Corporis et Sanguinis Domini : in Ecclesiam intrandi nullam habeant licentiam, cum Christianis non comedant, neque bibant, neque ambulent, carnem non comedant, vinum non bibant, non tondeantur neque radantur, ad nullas orationes proficisci præsumant : si infirmi fuerint, non visitentur a clerico, morientes in ipsa excommunicatione non sint de loco levati in quo mortui fuerint, nec cooperiantur lino, neque petra, neque aliqua munitione : substantiam eorum nullus pro animabus eorum in elemosinam accipiat.

19. « Dictum in concilio est : Si quis de episcopis aliquotiens timore, vel amore, vel pecunia se inflexerit, ut secundum Concilium non distringat per justitiam illum quem distringere debet et potest ; sive absolverit vivum vel mortuum quem absolvere non debet, aut in aliquo probatus fuerit violare Concilium quod ipse cum aliis episcopis instituit, ab ipsis episcopis deponatur usque ad spatium temporis, quod ipsi episcopi concorditer judicabunt. Dixerunt episcopi omnes : Placet nobis hæc propositio, et sic fiat. Similiter fiat de illo episcopo, qui excommunicatum alterius episcopi suscepit sive vivum sive mortuum, vel in episcopatu suo suscipi a quoquam permiserit vel consenserit ». Hactenus Patres de his quæ spectabant ad pacem conciliandam ac retinendam. Et post alia de Pontifice Romano injuste absolvente excommunicatos ab episcopis, istiusmodi fuit in Synodo querela proposita, quæ ex Actis ipsis totidem hic reddenda est verbis. Sic enim se habent Acta ipsa :

20. « Rursum in Concilio conquisitum est de excommunicatis Aquitanigenis, qui ignorantibus episcopis suis, a Romano papa pœnitentiam et absolutionem accipiunt, et hac de causa pax et Concilium in Aquitania destruitur, dum quos isti ligant, ille injuste absolvit. Ad hæc venerandus Engelricus, cancellarius Sanctæ-Mariæ Aniciensis Ecclesiæ, cœpit explicare, dicens: Stephanus, Arvernensis præsul, ante hos annos Pontium comitem Arvernensem excommunicatione obstrinxit, pro uxore legitima quam dimiserat et aliam duxerat. Quem cum nulla ratione vellet absolvere nisi emendatum, comes a domino papa absolutionem accepit, ignorante papa eum excommunicatum. Quod graviter episcopus ferens, conquestorias litteras Romam Apostolico misit; cum ille in hunc modum remisit Epistolam :

21. « Quod nescienter egi, frater charissime, non mea sed tua est culpa : scis enim, quia quicumque de universa Dei Ecclesia, quæ est in toto orbe terrarum, ad me causa remedii recurrit, impossibile est mihi ejus curam negligere, dicente Domino ad beatum specialiter Petrum ¹ : Petre, pasce oves meas. Quo ergo modo Sedes Apostolica poterit ejicere aliquem de medela, nisi rationabili causa? Debueras certe mihi, antequam illa mortua (morbida) ovis Romam veniret, ejus causam tuis innotescere apicibus, et (ut) eam ego omnimode abjicerem, tuamque firmando auctoritatem, eam anathematis ictu repercuterem. Profiteor quippe omnibus consacerdotibus meis ubique terrarum, adiutorem me et consolatorem potius esse quam contradictorem. Absit enim schisma a me et a coepiscopis meis. Itaque illam pœnitentiam et absolutionem, quam tuo excommunicato ignoranter dederam, et ille fraudulenter accepit, irritam facio et cassam, et de illa nihil aliud speret quam maledictionem, qua satisfacta, tu ipse absolvas ». Hactenus papæ Epistola; pergunt mox Acta :

22. « Dicebant ergo episcopi ad invicem : Frustra hæc querela adversus caput nostrum mulire audet; Apostolicus enim absque culpa est, potius nos culpabiles sumus, nisi litteris nostris ei notum faciamus de quibus volumus ut absolvantur. Cum ergo tales deceperint Apostolicum ut fraudulenter absolvantur ab eo, irrita est illa absolutio : ideoque nec ab eo.... nec de episcopo Engolismense qui præsens est, quod dico, quidam ex suis parochianis excommunicatus ab eo, dum satisfacere nollet, non poterat impetrare ab eo pœnitentiam, qui sine licentia episcopi sui papæ Romano surripuit pœnitentiæ legem, et litteras ex nomine ejus episcopo detulit in Cœna Domini, quibus episcopum rogabat Apostolicus, quatenus illi pœnitentiam quam imposuerat affirmaret. Episcopus vero intelligens fraudem, ait homini : Versa vice, quod ego postulare debueram ab Apostolico, Apostolicus

postulat a me; non credere possum, hoc mandatum ab eo extortum, et hoc tibi nihil utile est; et donec a me vel ab hujus sedis archidiacono, me jubente, accipias pœnitentiam, permane in excommunicatione. Et ejecit eum foras de Ecclesia.

23. « Et dixerunt episcopi : Hoc ab ipsis Apostolicis Romanis et cæteris patribus cautum teneamus, ut parochiano suo episcopus si pœnitentiam imponit, eumque papæ dirigit, ut judicet utrum sit, an non, pœnitentia dignus pro tali reatu : potest eam confirmare auctoritate papæ, non aut levigare, aut superadjicere. Judicium enim totius Ecclesiæ maxime in Apostolica Romana Sede constat. Item si episcopus parochianum suum cum testibus vel litteris Apostolico ad pœnitentiam accipiendam direxerit, ut multoties pro gravissimis fieri solet reatibus, in quibus episcopi ad dignam hæsitant pœnitentiam imponendam : hic talis licenter a papa remedium sumere potest; nam inconsulto episcopo suo, ab Apostolico pœnitentiam et absolutionem nemini accipere licet », propter periculum surreptionis. Et post nonnulla hæc subinferunt : « Sic Apostolici Romani episcoporum omnium sententiam confirmare, non dissolvere debent : quia sicut membra caput suum sequi, illa caput membra sua necesse est non contristare », nisi haud dubium ab eis erratum constet.

24. Subjicit vero mox idem hæc quæ sequuntur, ad ea quæ dicta sunt confirmanda, in exemplum adducta : « Referam vero ad ædificationem, quod dudum de illo milite contigit Vascone, qui, jubente duce Vasconum Sancto (Sanco), seniore suum decollavit : invitatus tamen et terrore ducis et perterritus id egit, interminante irato duce et dicente : Nisi istum occideris, occidam te. Uno ergo ictu seniore suum proprium decollavit. Et gravissimo dolore repletus ad episcopum suum pœnitentiæ causa recurrit. Cui ille compassus dixit : Debueras pro seniore tuo mortem suscipere, antequam illi manus aliquo modo inferres, et martyr Dei pro tali fide fieres; sed gravissimum reatum egisti et nobis inauditum. Nescio tibi consilium ferre pœnitentiæ; sed vade quanto citius ad papam Romanum si tibi ille pœnitentiam concedit, et ego gaudeo et confirmo. Si te ille abjecerit, nunquam nec a me nec ab aliquo invenies pœnitentiam. Quod ille concitus implevit, et cum testibus detulit secum litteras episcopi sui. Et cum Apostolicus, secunda Paschali feria apud S. Petrum sacra agens, post Evangelium resedisset, cœpit ille reus ante eum in conspectu totius Ecclesiæ gravissime plorans et suspirans exclamare, dicens : Pœnitentiam volo, domine, pœnitentiam volo, domine; Apostolicus iis, qui dextra lævaque ei assistebant, ait : Requirit pro qua culpa. Ille inquisitus nihil aliud dicebat, quam : Creatorem meum offendi, Creatorem meum offendi. Cui Apostolicus : Cur, inquit, episcopum tuum non expetebas? et ille : Episcopus meus me misit ad te. Tunc testes

¹ Joan. XXI.

Apostolico suggererunt culpam, atque litteras episcopi protulerunt. Sic Apostolicus episcopo qui a dextris ejus stabat locutus est, dicens : Recogita auctoritatem divinam, quasi pœnitentia hic mortuus possit vivificari, et episcopus ait : Dominus dixit in Evangelio : Omnis qui reliquerit domum, vel fratres, vel sorores, aut patrem, aut matrem aut uxorem, aut filios, aut agros.... » Reliqua desunt. Porro eo tendere visa est episcopi responsio ista, nimirum, ut sæculo renuntians peteret monasterium, ubi ad obitum usque in perpetua viveret pœnitentia. Sed ex iis quæ dicta sunt, illud magnopere observandum, quod inter ipsa missarum solemnina de peccatore pœnitente oblatum iudicium, non est jussum differi nec rejici in aliud tempus peccatorem pœnitentiam implorantem, sed audiri et ejus saluti opportunis remediis consuli. Quod secundum S. Gregorium nullum gratius Deo sacrificium offeratur, quam animarum salus, ipsa conversio peccatorum, propter quos ipsum incruentum Deo sacrificium offeratur.

25. In eadem Lemovicensis Concilii Actione secunda, dum de impedimentis actum est quibus prohiberetur aliquis ad sacros ordines promoveri, recitatum est quod nuper Romanus antistes ad S. Odilonem Cluniacensem abbatem rescripsit; Acta enim ipsa ita se habent : « Ille qui adhuc vivens est, qui Stephanum episcopum dolo occidit, cum non inveniret pro tanto crimine pœnitentiam, Cluniacum cœnobium petiit; monachus ibi effectus est, qui legere et cantare tanquam peritus clericus sciens, ab Odilone abbate cogitabatur offerri episcopo ad gradus altaris. At providenter tractans venerandus abbas, litteris directis ad papam Romanum, consultum expostulat, et crimen monachi intimat. Cui Apostolicus talia remandat :

26. « Impossibile est talem ad aliquem gradum provehi, neque etiam offerre oblationem ad manus sacerdotis, ne forte pro eo uno in plures furor Domini descendat. Sed nec communionem sanctam accipere potest : in exitu autem vitæ pro misericordia ei viaticum detur. Nihil hic aliud quam luctum agat, si illic forte misericordiam inveniat ». Hactenus papæ rescriptum. Pergunt Acta : « Ita hactenus ille vivit, permanens in pœnitentia, non offerens, non communicans ». Illicusque de his quæ spectant ad rescripta temporis hujus Romanorum Pontificum ex Actis Concilii Lemovicensis, hoc tempore, ut vidimus, celebrati, ad declarationem eorum quæ ex Glabro sunt recitata, relinquente multa involuta silentio, addente vero alia plura indigna prorsus episcopis Gallicanis, penes quos, ut vidimus, adversus principes, invadentes res Ecclesiasticas, Apostolica censura vigeat. Tertia autem ejus Synodi Actio a Patribus indictæ desideratur.

27. *S. Odilo recusat archiepiscopatum Lugdunensem.* — Eodem anno, ubi Hermannus archiepiscopus Hamburgensis successit in locum Liben-

tii, pallium accepit a Benedicto Pontifice, de quo plura habet Adam in Chronico ¹.

Eodem anno Conradus imperator Burgundiam sibi relictam a Rudolpho armis subegit, cum et Burchardum Lugdunensem archiepiscopum (ut ait Hermannus ² sui temporis scriptor) genere nobilem et strenuum, sed per omnia scelestum et sacrilegum, cum multis aliis principibus in deditionem accepit, subjugatoque Burgundiæ regno rediit. Hæc ipse. Sed quæ his subjiciat Glaber de Burchardo Seniore agens audiamus ³ : « Fuit igitur in suprataxatis diebus dissensio permaxima post mortem Burchardi archipræsulis Lugdunensis, de præsulatu ipsius sedis, quam plures non justis appetebant meritis, sed instinctu superbæ elationis, primus omnium prædicti Burchardi nepos, ejusdem æquivocus, supra modum superbissimus, relicta sede propria Augustanæ civitatis, procaciter Lugdunensem arripuit : qui post multas perpetratas nequitias captus a militibus imperatoris, perpetuo est condemnatus exilio. Post ipsum vero quidam comes Gerardum filium suum parvulum quemdam arroganter ibidem, sola præsumptione auctore, substituit, et ipse post modicum, non ut pastor ovium, sed veluti mercenarius in fugam versus delituit. Quæ omnia dum perlata fuissent Romano Pontifici, suggestum est ei a viris fidelibus, ut sua auctoritate patrem Odilonem Cluniacensis monasterii abbatem ibidem eligeret consecrari Pontificem. Sic enim totius cleri ac plebis optans acclamabat devotio. Qui protinus mittens eidem patri pallium simul et annulum, imperavit eundem prædictæ civitatis fore archiepiscopum. Sed vir religiosus suæ humilitatis attendens propositum, omnimodis renuit fieri, pallium et annulum suscipiens, illi qui Deo dignus existeret reservavit futuro pontifici ejusdem sedis... » Et post pauca : « Contigit enim postmodum, ut Henricus rex recepto regno Austrasiorum, dum cœpisset (accepisset) hujus dissensionis cladem, condoluit, perquirens quid exinde agere deberet. Cui dum apud Vesontionem devenisset, suggestum est, tam ab episcopis quam ab omni plebe, virum æque tali ministerio dignum, Odelricum scilicet, Lingoniensis Ecclesiæ archidiaconum, Lugduni constitueret pontificem. Qui protinus, ut suggestum fuerat, speciosissimis adornatum indumentis ad præfatam illum destinavit sedem. Illico nempe restituta est totius provinciæ requies, et pax diu optata cum gaudio ». Illicusque de Ecclesia Lugdunensi diu agitata discordiis, ac tandem optimi præsulis substitutione pacata. Ac præterierunt ista et multa alia de S. Odilone Petrum Damiani, qui ejus Vitam conscripsit, sed pertenuem quidem longeque imparem meritis tanti viri, de quo inferius dicendum.

28. *Romano imperatore occiso, Michael per adulteram Zoem ad imperium evehitur.* — Quod

¹ Adam l. II. c. 49. 50. — ² Herm. Contr. edit. ult. ex Cod. Aug. hoc. au. et 1036. — ³ Glab. l. V. c. 4.

ad res pertinet Orientales, hoc anno, Indictione secunda, die undecima mensis Aprilis, Romanus imperator, cum imperasset annos quinque et menses sex, ab adultera conjuge Zoe Augusta veneno parato consumptus paulatim, sed necdum defunctus, opera ejusdem conjugis, et ejus qui in locum ipsius, Michael origine Paphlago, adulter est subrogatus, misere strangulatus interiit. Fuerat Michael arte argentarius, sed forma pulcherrimus, quem impudica femina deperibat, adeo ut nec propinquam viri mortem veneno curam expectare potuerit. Ita enim ut cæcus, ita et aliger quoque ob perniciatam consuevit pingi impudicus Cupido. Etenim nec sacrosanctam pœnosam hebdomadam verita est: nam feria quinta adeo immane facinus perpetravit. Porro Curopalates de inauguratione Michaelis ista subjungit:

29. « Hac nocte, cum sacrosancta Christi tormenta canerentur, accersitus est Alexius patriarcha ab imperatore, ut se cito ad palatium conferat; qui cum præsto fuisset, reperit mortuum imperatorem Romanum. Illato autem triclinio, in suggesto sedens Zoe educit Michaellem, et patriarcham cogit ipsum secum consecrare; qui verbis illius obstupefactus obmutuit, et benedictionem anceps differebat. Verum Joannes cum Zoe, quinquaginta auri libris patriarchæ et quinquaginta clero traditis, effecit, ut dignos eos putaret quos consecraret. Romanus autem imperator, ut diximus, interemptus in monasterio a se recens condito illustri sepelitur, ipso magno Parasceves die. Zoe autem Michaellem, in regio throno a se collocatum, existimavit se pro viro et imperatore servum ac ministrum habiturum; et jam patriis eunuchis in palatium introductis, strenue aggrediebatur publica munera. Verum ei omnia præter spem aperte successere et contra sententiam. Nam imperatoris frater, vir strenuus et rerum peritus, simul atque in regiam ingressus est, fratri metuens, reginæ eunuchos a palatio amovendos curat, et fidelissimas ejus ancillas ejicit, et mulieres sibi cognatione propinquas custodes ejus imposuit, et nulla res aut parva aut magna gerebatur nisi eo volente, et prorsus ab omnibus illa prohibebatur, ac ne balneum quidem attingebat nisi eo volente, etc. » Inferius autem ista subjicit:

30. « Non placuisse autem Deo quæ fiebant, statim ex ipsis exordiis demonstratum est. Undecima enim hora sanctæ et magnæ Dominicæ decedit intolerabilis et violenta grando, adeo ut confringerentur non solum arbores sive fructuosæ sive infructuosæ, sed etiam domus corruerent, et templa usque ad solum, et segetes, et vites. Quare fuit hoc ipso tempore magna omnium frugum et fructuum inopia ». Accidit illud valde prodigiosum, ut quem omnium pulcherrimum Zoe sibi delegerat in maritum, idem novo accidente in vindictam sceleris divinitus orto, fieret deformissimus. Etenim (ut idem subdit Curopalata) arreptus a diabolo, dæmoniacus evasit, a quo horrendis modis distorqueretur, nec valuit ullo remedio, sive sacro per viros

Ecclesiasticos procurato, sive a medicis adhibito, aliquo modo sanari, sed ad obitum usque ostentui factus omnibus mansit in exemplum divinæ vindictæ. Secuta sunt et alia mala iræ Dei indicia manifesta. Nam eodem anno agmina locustarum exorta per triennium sunt omnia usquequaque depasta, cum hæc per visum ostensa fuisse sacro ministro, idem sic recitat Curopalata:

31. « Quidam ex iis qui ministrabant episcopo, per visum ista divina revelatione cognovit. Existimabat videre eunuchum quemdam alba veste indutum, forma splendentem, qui tribus apud se saccis apposis jussus fuerat unum evacuare, deinde alterum, postremo tertium. Qui cum fecisset quod jussus fuerat, primus serpentes et scorpiones eiecit, alter rubetas et aspides, et basiliscos, et cerestas et alia id genus venenata animalia, tertius scarabæos, et culices, et vespas, et alia quædam quæ in posteriore parte gestant aculeum, ut crabrones. Et ille quidem propter id quod viderat mutus erat. At splendidus ille vir, cum eum ad seipsum accersiret: Hæc, inquit, advenere et venient in vos, propter violata Dei jussa, et nefarium facinus admissum in Romanum imperatorem et in ejus cubile: et hæc ita evenere ». Hæc ipse. Qui sequentibus annis quæ accidere infausta recenset, nempe frequentes terræ motus, et terræ hiatus, quibus quinque absorpta sunt oppida, Barbarorum incursiones, siccitates, grandines, et alia id genus ingentia mala.

32. *De Ecclesiis Russa et Polona.* — Hoc eodem anno cultum Ecclesiæ Russicæ propagatum esse a Russorum duce, Longinus in Annalibus Polonorum testatur his verbis: « A bellis ad religionem Jorasdixlaus Russiæ dux conversus, plura monasteria non solum virorum, sed et feminarum, pluresque Ecclesias in Kiiom fundat et ædificat: exstruit deinde sumptuoso muro Ecclesiam Sanctæ Sophiæ, cujus turrin tabulis deauratis tegit; Ecclesiam vero vasis aureis et argenteis, libris, vestibusque pretiosis dotat ».

33. Polonorum vero Ecclesiæ status admodum labefactatur: defuncto enim hoc anno Miecyslao rege, sub quo Bohemi, Moravi, Ruteni et Cisalpini, populi insuper Lubecenses et Magnopolitani, alii que a parente sub jugum redacti, a Polonorum dominio defecere: ad postremum vero in ejusdem Polonorum principatus exterminium, in eligendo rege dissidio scissis inter se principibus, magno provinciæ damno incredibilique Ecclesiarum jactura, septem annorum spatio interregnum perseveravit, expulsa regina, ejusque legitimo regni successore, qui in Germaniam sunt profecti. Casimirus vero, regni legitimus hæres, sapientiori consilio nuntium remittens sæculo, Cluniacensium monachorum arripiens institutum, tunc disciplina florentissimum, Cluniaci mutato ex Casimiro in Carolum nomine et habitu, vitam monasticam solemniter profitetur. Quomodo autem ad regnum fuerit revocatus, suo loco dicetur.

Anno periodi Græco-Romanæ 6527. — Anno Æræ Hispan. 1072. — Anno Hegiræ 426, inchoato die 16 Nov., Fer. 7. — Jesu Christi 1034.

— Benedicti IX papæ 2. — Conradi II reg. 11. imp. 8. Michaelis Paphlagonis imp. 1.

1. *Varia Concilia in Galliis coacta.* — A num 4 ad 8. Glaber lib. 4, cap. 5, scribit : « Anno a Passione Domini millesimo memoratæ cladis penurias subsequente », cœpisse Concilia celebrari in Aquitanix partibus, dein per Arelatensem provinciam atque Lugdunensem indictum esse, « qualiter certis in locis a præsulibus magnatisque totius patriæ de reformanda pace et sacræ fidei institutione celebrarentur Concilia ». Quæ Baronius recte ad hunc annum refert, qui juxta Glabrum millesimus primus est a Passione; annum enim a Passione Domini juxta Glabrum, Epocha Incarnationis annis triginta tribus antecedit. Cossartius tom. IX Concil. pag. 913, in Nota ad ista Concilia diversis locis habita, ea refert ad annum MXXXI, atque deceptum Glabrum, qui scripsit ea anno MXXXIII congregata, eoque anno quo Robertus rex Francorum mortuus est; cum tamen hic anno MXXXI demortuus sit. Verum non dicit Glaber ea anno quo Robertus e vivis excessit coacta, neque Robertum anno MXXXIII vitam cum morte commutasse, sed tantum Roberti et aliorum quorundam illustrium virorum obitus famem et penuriam præcessisse, uti anno superiori num. 9 exposuimus. Ea ilaque Concilia in diversis Galliarum partibus hoc anno celebrata, ut episcopi populum excitarent ad divinam agnoscendam beneficentiam, utque eum recentis calamitatis memoria deterreret a criminibus, præsertimque a privatis inter se bellis, cædibus, et sacrarum rerum direptionibus. Hæc tot Conciliorum occasio fuit, ut idem Cossartius fusius ostendit. Plenam quidem perfectamque pacem his in Conciliis episcopi optassent; sed cum hoc non procederet, conati sunt anno MXLI saltem inducias obtinere, certis præscriptis in hebdomade diebus, quibus ab inferenda cuiquam injuria prorsus abstineretur. Id est quod tunc *Treuga Domini* vocabatur, ut eo anno videbimus.

2. *Ob bella privata, et frequentes cædes.* — Baronius, qui diversa hæc Galliarum Concilia suo anno reddidit, num. 6 perperam scribit quod in illis de pace servanda statutum fuit, rursus post decennium decretum fuisse. Non enim post decennium, sed post septennium, anno nempe MXLI, tentarunt iterum episcopi pacem et justitiam inter privatos statuere, ut eo anno, ad quem pertinet

locus Glabri lib. 5, cap. 4, hoc anno a Baronio num. 6 recitatus, demonstrabimus. Denique neutro anno actum de cessatione *a strepitu fori vel privatis dissensionibus*, ut ibidem Glabrum Baronius interpretatur, sed in Conciliis hoc anno habitis conati sunt Galliarum præsules bella privata, cædes et deprædationes extinguere, et cum non potuissent, anno MXLI aliquot dierum inducias statis temporibus recurrentes instituerunt, quas quatuor postea Concilia Generalia confirmarunt; quod cum non animadvertisset Baronius, n. 5 et 6 Gallicanos præsules reprehendit, qui tamen inde magna laude digni sunt. Sed Baronius hæc in re excusatione dignus, quia ejus ætate pax et induciæ inter privatos, de quibus utroque anno actum, densis tenebris sepultæ erant. Marca lib. 4 de Concordia cap. 14, primus fuisse videtur qui copiosam earumdem explicationem suscepit; qua de re post eum alii. Ex qua cum Hystoria Ecclesiastica variis in locis lucem accipiat, tam hic quam anno MXLI de pace et induciis, de quibus tunc actum est, sermo necessario nobis habendus.

3. *Horum malorum origo.* — Duces itaque et comites, provincias et civitates, quas alias sub regum potestate et ad eorum nutum administraverant, ita hoc et superiori sæculo occupabant tanquam privatas facultates, et tanquam patrimonium ad hæredes transmittabant. *Normannis* enim Gallias infestantibus, et *Caroli M.* familia ad interitum vergente, utrisque facile fuit commissas sibi provincias invadere, sibi que vindicare. Quare vix pax esse potuit, ubi provinciæ, quæ unius erant, plurimorum imperio subdebantur, aut eadem retineri in civitatibus, ubi leges abolitæ essent. Horum exemplo qui minora beneficia præcario a regibus habebant, ea tanquam patrimonium defendere non verebantur; indeque hodie inimicitiae et pugnae ortæ, quibus fovendis multum contulit consuetudo, quæ penes in legem abierat, ut quo semel quis alium occidisset, liceret propinquis cædem ulcisci, et in vindictam quemvis ex interfectoris propinquis impune occidere. Hanc vindictam *Faidam* vocitabant. Tunc ergo quisque suam suorumque injuriam, non in jure coram judice, sed ferro manuque persequabatur, et ingravescente in dies morbo, cædibus, deprædationibus et incendiis Gallia fædis-

sime vastabatur. Quibus incommodis Gallicani præsules prospicere volentes, hoc anno « primitus cœpere in Aquitaniae partibus » inquit Glaber lib. 4, cap. 5, Concilia celebrari, ac « dehinc per Arelatensem provinciam atque Lugdunensem, sicque per universam Burgundiam usque ad ultimas Franciæ partes indictum est, qualiter certis in locis a præsulibus magnatibusque totius patriæ, de reformanda pace et sacra fidei institutione celebrarentur Concilia; » quod tam a majoribus quam ab infimis, quos terrebant præteriti temporis clades, avide exceptum est, ut fuse narrat Baronius num. 1 et seqq. ex Glabro. Hoc etiam anno in Conciliis Bituricensi, Bellovacensi, et an. mxxx1 in Lemovicensi, pax universa indicta, « ita ut nemo seditionem ageret, nullus per viam (vel vim) raperet, nullus, ut solebat, quasi propter justas querelas pugnam inire constitueret, etc. » De hac igitur pace ab omnibus servanda, non vero de cessatione a strepitu fori vel privatis dissensionibus, ut arbitratus est Baronius, actum est. Legendi Marca loco laudato, Dufresnius in Dissert. ad Joinvillam de *Privatis bellis*, M. Antonius Dominicius in Dissert. de *Treuga et pace*, alii que.

4. *Hoc anno actum non est de Treuga Domini.* — Marca loco citato ait, episcopos et proceres provinciarum, in *Aquitania* primum, deinde per reliquas Gallias currenti anno privatis bellis decreto suo inducias induxisse sub nomine *Treugæ Domini*, a Mercurii suprema die usque ad diluculum diei Lunæ subsequentis, ea lege ut nemo ab inimico ultionem exigeret, nemo prædaretur, nec etiam a fideiussore pignus tolleret, pœna capitis aut exilio et excommunicatione in rebelles irrogatis; hancque in rem citat Glabrum lib. 5, cap. 1, ejus locum integrum recitat Baronius num. 6. Verum fallitur præsul doctissimus: *Treuga* enim Domini, ut vocabatur, et quæ eo loco Glaber narrat, non hoc anno, sed anno millesimo quadagesimo primo statuta, ut ibi videbitur. Glaber enim duobus locis citatis de hac pace verba facit, quia duobus diversis annis de ea in Galliis actum, et nonnisi an. mxx1 induciæ illæ constitutæ, postquam scilicet episcopi et magnates animadvertissent, potius non esse pacem inducere, quod vidit Baronius, qui ait hoc anno actum esse de pace, de qua Glaber lib. 4, cap. 5, et post aliquot annos de cessatione a strepitu fori vel privatis dissensionibus, de qua idem Glaber lib. 5, cap. 1, qui tamen merito redarguitur a Marca, quod hujus historici verba male interpretatus sit, et Gallicanos episcopos traduxerit, quasi rem statuerint canonibus repugnantem. Sed hæc omnia magis patebunt anno mxx1, ubi de præfatis induciis seu de *Treuga Domini* prolixè tractabimus.

5. *Concil. Bituricense.* — Ad num. 8. Baronius loquitur de *Concilio Bituricensi*; sed illud ad annum millesimum trigesimum primum retrahendum. In edicto enim Aymonis archiep. Bituricensis post Synodum dato, legitur: « Ego Aymo

archiep. anno Incarn. Dominicæ mxxx1, Indict. xiv, in Conc. Bituricensi, quod actum est kal. Novembris, etc. » Indict. xiv a kal. Januariis, ut sæpius hoc loco et superiori sæculo in Gallia factum invenimus, initium sumit. Aduere huic Concilio quinque episcopi cum suo metropolita: nomen enim *Jordani* episcopi Lemovicensis, quod in laudati edicti sine legitur, librorum errore irrepsit, cum ipsemet, Actione 1 Concilii Lemovicensis II, se ab hoc Concilio Bituricensi abfuisse diserte asserat, ut in eodem Conc. pag. 870 legere est: et pag. 897 ipsemet Jordanus jubeat recitari nomina episcoporum qui præsentibus fuerint Concilio Bituricensi, et nomen ejus lectum non sit cum aliorum nominibus. In isto Concilio Bituricensi conditi canones viginti quinque, quorum primus est de S. Martialis Apostolatu, statuiturque ut non inter confessores, sed inter Apostolos proponatur ac celebretur.

6. *Conc. Bellovacense fictitium.* — Meminit ibidem Baronius Concilii *Bellovacensis*, quod celebratum ait diebus quindecim post *Lemovicense* ab episcopis Lemovicas convenientibus, idque testari Acta Concilii Lemovicensis II. Verum, ut inquit ibidem Cossartius, fieri non potuit, ut episcopi Aquitaniae primæ *Bellovacæ* in Belgica Concilium celebrarent, et intra dies xv tum in Bellovacis tum in Lemovicibus fuerint. *Bellilocense* dicere voluit Baronius, et amanuensis scripsit Bellovacense. Est autem *Bellilocum* monasterium non longe a Lemovicum civitate distans, cujus monasterii mentio in Actis Concilii Lemovicensis II, pag. 898. Sed ibidem non dicitur eo in loco Concilium aliquod habitum fuisse, ideoque Concilium illud, sive Bellovacense, sive Bellilocense, vocaveris mere fictitium.

7. *Conc. Lemovicense. II.* — A num. 9 ad 27. Concilium Lemovicense II, anno millesimo tricesimo primo congregatum, non vero currenti. Initio enim Sessionis primæ dicitur habitum *XIV kalendas Decembris*, idque in festivitate Dedicationis Templi Domini Salvatoris. Tum pag. 876 dicitur eum diem, quo celebratum Concilium, fuisse *quintam sabbati*, id est, feriam quintam, quæ certus anni millesimi trigesimi primi character est. Concilium istud dies xv post Bituricense coactum in Ecclesia protomartyris Stephani. In eo variis documentis sancti Martialis Apostolatus probatus, ejusque memoriam Apostolorum ritu celebrandam secundum Joannis papæ XIX litteras et Bituricensis Synodi decreta, statutum. Mox ad Ecclesiam præsules processere, ubi Aymo archiep. Bituricensis Sacrum solemniter celebravit, et in Oratione Martialem Apostolum appellavit. Post hæc Patres ritu solemniter milites Lemovicenses diœceseos excommunicarunt, qui pacem cum episcopo suo firmare contumaciter renuebant.

8. *Decreta in eo edita.* — In Sessione secunda, sancti Martialis Apostolatus, contra quosdam adversus priora decreta murmurantes, iterum confir-

matius, quemadmodum et Bituricensis Concilii statuta. Nonnullis aliis propositis quæstionibus, conquesti sunt Patres de excommunicatis Aquitanis, qui ignorantibus episcopis suis a Romano Pontifice pœnitentiam et absolutionem accipiebant. Illis auditis, episcopi dixerunt: « Hoc ab ipsis Apostolicis Romanis et cæteris Patribus cautum tenemus, ut parochiano suo episcopus, si pœnitentiam imponit eumque papæ dirigit, ut iudicet utrum sit an non pœnitentia digna pro tali reatu, potest eam confirmare auctoritas papæ aut levigare, aut superadjicere. Iudicium enim totius Ecclesiæ maxime in Apostolica Romana Sede constat. Item si episcopus parochianum suum cum testibus vel litteris Apostolico ad pœnitentiam accipiendam direxerit, ut multoties pro gravissimis reatibus fieri solet, in quibus episcopi ad dignum hæsitant pœnitentiam imponendam: hic talis licenter a papa remedium sumere potest, nam inconsulto episcopo suo, ab Apostolico pœnitentiam et absolutionem nemini accipere licet». Porro cum in hoc Concilio, pag. 872, Odolricus abbas monasterii Sancti-Martialis de Roberto Francorum rege tanquam jam mortuo loquatur, dicatque: « Adhuc vivente rege Roberto, cum antecessor meus Hugo in palatio ei assisteret, etc. » Certum inde eruitur argumentum Robertum regem, die xx mensis Julii anni mxxxv vita functum esse, et die xviii mensis Novembris ejusdem anni Concilium Lemovicense II celebratum.

9. *Libentius archiep. Hamburgensis moritur.* — Ad num. 27. *Libentius II* archiepiscopus Hamburgensis mortuus est, eique *Hermannus* præpositus Ecclesiæ Halberstadensis successit, anno millesimo trigesimo secundo, ut docet Adamus lib. 2, c. 49 et seq., cui chronographus Hildensheimensis suffragatur.

10. *S. Odilo Lugdunensem archiep. recusat.* — *Burchardo* archiepiscopo Lugdunensi anno circiter millesimo vicesimo nono demortuo, inter multos de successore acriter certatum, ut narrat Baronius ex Glabro lib. 5, cap. 4, qui addit, cum suggestum fuisset *Romano Pontifici*, ut Odilonem Cluniacensis monasterii abbatem juxta cleri ac plebis votum ibidem pontificem consecraret, sanctum abbatem ad archiepiscopatum illum suscipiendum adduci non potuisse. Post Baronii mortem Dacherius, tom. II Spicilegii, litteras Joannis papæ XIX ad Odilonem datas publicavit, quibus eum urget Pontifex, ut onus non refugiat, inter alia scribens: « Percepimus injuriam S. Lugdunensis Ecclesiæ petentis te in conjugium, quia competebat, cui etiam salivam in facie jecisti. Obmittimus injuriam sanctæ plebis, cui regimen parcendo soli vitæ tuæ refugisti et refugis. Tacemus quod auctoritatem tantorum præsulum monentium et rogantium ad episcopalem dignitatem accedere posthabuisti, etc. » Paulo post: « Nam hoc sacrum regimen sicut a nullo est temere usurpandum, ita petente Ecclesiæ a nullo tuo simili est vitandum. Quoniam tanto-

rum perditionis reus eris, quantorum saluti exemplo et doctrina prodesse potuisses, etc. » Extat nunc illa Epistola tom. IX Concil. Sed cum sanctus *Odilo* ad honorem illum assumendum nullatenus adduci potuisset, *Odolricus* archidiaconus Lingonensis, vir litteris apprime eruditus, suadente *Halinarde* tunc Sancti-Benigni Divionensis abbate, ab Henrico imperatore Lugdunensis præsul dictus est, ut fuse narrat chronographus Sancti-Benigni, qui Henricum Conradi imp. filium, et ab eo in regni Germanici consortium ascitum *imperatorem* appellat, quia post patrem imperavit. Porro cum *Rodolphus* ultimus Burgundiæ Transjuranæ rex, ad quem civilas Lugdunensis pertinebat, anno mxxxii vivere desierit, eique in regnum Burgundiæ *Conradus* imp. successerit, apparet sedem Lugduensem longo interpontificio laborasse.

11. *Conradus imp. rebelles in Burgundia domat.* — Conradus imp. anno superiori Burgundiæ regnum armis sibi subjecit, ut ibi ostendimus. Gesta autem hoc anno ab eodem imperatore his verbis refert Wippo: « Hujus anni æstate, dum Odo præfatus promissa non attenderet, sed adhuc quamdam partem Burgundiæ, quam injuste invaserat, obtineret, imperator Conradus expeditis Teutonibus et Italis Burgundiam acute adiit: Teutones ex una parte, ex altera archiepiscopus Mediolanensis Heribertus et cæteri Italici ductu Hupertii comitis de Burgundia usque Rhodanum fluvium conveniunt. Augustus veniens ad Genevensis civitatem, Geroldum principem regionis illius et archiepiscopum Lugdunensem atque alios complures subegit: et reversus Castrum-Murat cum fortissimis militibus Ottonis munitum obsidens, vi cepit, et quos intus invenerat, captivos duxit. Cæteri fautores Odonis hoc audientes, solo timore Cæsaris fugerant: quos persecutus Cæsar omnino exterminavit de regno, et acceptis de principibus Burgundiæ multis obsidibus, rediit per Alsatiā ad imperatricem ». Quæ narrat itaque Baronius, hoc quidem anno contigere, sed jam superiori Burgundiam Conradus occuparat, adversus quem postea aliqui rebellaverunt. Heppidannus in *Annal.* idem fere narrat ad annum mxxxiv, sed perperam addit, imperatorem *in festivitate S. Petri ad vincula* coronatum fuisse, et in regnum Burgundionum electum, id enim anno superiori contigit, ut ibidem dictum est.

12. *Moritur Romanus Argyrus imp.* — A num. 28 ad 32. Romanus Argyrus, inquit Cedrenus, « morbo lento correptus est, capitis et barbæ pilis defluentibus, veneno, ut aiunt, ei ab Joanne propinato, qui deinde pupillorum alumnus factus fuit ». Subdit Zoen imperatricem Michaelis Joannis fratris insano amore correptam, ut hunc imperatorem crearet, maritum venenis lentissimis confecisse, Indictione secunda, xv die Aprilis, « quo die sanctæ magnæ feriæ erat solemnitas »; sed loco, xv die Aprilis, legendum cum Curopalate, xi die Aprilis, in quam hoc anno Cæna Domini incidit. Michael Psellus ait rumorem fuisse Romanum

Argyrum veneno sublatum, sed fatetur se id ignorare. Agebantur, inquit, Resurrectionis pervigilia: abiit imperator ante lucem in balneo loturus, ubi obiit, « cum imperium tenuisset annos quinque cum dimidio ». Ei successit *Zoe* ejus uxor, quæ jussit *Michael* saluari imperatorem.

13. *Michael Paphlago ejus successor morbo sontico laboravit.* — Narrat Baronius ex Curopalate hunc Michaelen Paphlagonem, *Zoes* amasium, demoniacum evasisse, eumque ea in re Baronius sequitur. Verum Psellus, qui de Michaelē accurate agit, ait eum morbo sontico laborasse, quod Curopalatem in errorem induxit: « Aliud præterea », inquit Psellus, « adjumento fuit, ut omnem a se procul imperator de illo suspicionem amoveret. Græcus enim quispiam morbus statim a pube illi inciderat. Hæc vero ægritudo cerebri quædam emotio ac vertigo erat quibusdam periodis, nullaque mali indicatione, subito conturbabatur, versabatque oculos et humi collidebatur, et caput ad terram affligebat, atque ad longum tempus quatiiebatur, ac brevi consueta ei vultus species redibat. Videns itaque imperator eo morbo correptum, casum miserabatur, ac insaniam quidem reum habebat, amorum vero et gratiarum ut in animum induceret adduci non poterat. Morbus vulgo prætextus videbatur, insidiarumque composita latebra. Ac plane vera videri poterat ea suspicio, nisi et postea nactus imperium pari vertigine synplogmate laborasset.

14. *Zoe imperatrix obscœnis amoribus dedita.* — « Haud itaque arduum erat imperatori amare eos qui se mutuo deperibant facile enim etiam crediderat. Ut autem ego audiui ex uno eorum qui tum in aula versabantur, viro scilicet qui omnes amoris Augustæ causas noverat, mihi que scribendæ Historiæ argumenta suggessit; volebat quidem imperator prope credere non deperire Augustam Michaelē, inque ejus amoribus esse. At sciebat omnino amare et ex libidinis æstro percitum esse, ne itaque ad multos diffunderet, tolerabile mitiusque habebat, quod cum uno uxor concuisceret; sed eo quod simulate despiceret Augusta effusam implebat libidinem ».

15. *Moritur Misico II rex Poloniae.* — Ad num. 33. Chronographus Hildensheimensis, Misiconis hujus nominis II, Poloniæ regis, mortem hoc anno narrat: « Misacho Polianorum dux immatura morte interiit, et Christianitas ibidem suis a prioribus bene inchoata (a Misicone nempe avo Boleslao patre) et a se melius roborata, flebiliter, prohdolor! disperiit ». Ad hunc etiam annum Chromerus lib. 4 hanc mortem refert, et pluribus narrat turbas post eam in Polonia ortas, quas imputat *Rixæ* seu *Richezæ* reginæ, penes quam erant regia potestas, et *Casimirus* Misiconis filius ac successor, addens reginam veritam, ne irritatis in se hominum animis, magnum aliquod malum in se redundaret, consilium fugæ iniisse. Verum uti an. mxxv, ex ejusdem beatæ reginæ Vita a monacho anonymo

scripta jam diximus, ea antea maritum adulterum deseruerat et ad Conradum imp. sese clanculo contulerat.

16. *Casimirus ejus filius fit monachus.* — Difficultatem tamen facit, quod in eadem Vita, seu potius Elogio Historico, dicitur, nempe *Piligrino* archiep. Coloniensi moriente, Hermannum *Richezæ* fratrem in ejus locum subrogatum fuisse; statimque subjungitur: « Eodem tempore Richeza regina, facto inter se et regem conjugem suum divortio », et cætera loco citato recitata. Hermannus enim in fusiori Chronico, et chronographus Hildensheimensis Piligrini mortem et Hermannii ordinationem in annum mxxxvi conferunt; cum tamen *Misico* currenti anno e vita migrarit. Hæc itaque verba, *eodem tempore*, late interpretanda, existimandumque *Richesam* Misiconem conjugem paulo ante mortem deseruisse et ad Conradum imp. venisse. Quidquid hac de re sit, certum est, post *Misiconis* obitum Poloniæ statum turbatissimum fuisse, et *Casimirum* regem clanculum Cluniacum profectum monachum induisse. Per sex aut septem annos in Polonia miscentur omnia cædibus mutuis, collatisque signis inter cives atque proceres concurritur. Neque ministris sacrorum ac ne ipsis quidem templis parcitur, et in pristinam barbariem ac impietatem, Polonia, objecto vero Dei cultu, relapsura esse videbatur. Ad domestica mala accessere hostiles incursiones, hincque *Jarostlaus* Russiæ dux, et illinc *Prædislaus* Bohemiæ dux, Poloniam infestant, ut fuse narrat idem Chromerus. Udalrici enim Prædislai decessoris interitum hoc anno contigisse affirmat chronographus Hildensheimensis, qui ait: « Udalricus Bohemiæ dux, fratre secato, filio fugato, item sacramenta refringens (cum Conrado imp. firmata), infidelitati institit, et tandem in cœna residens, cibo potuque suffocatus extabuit ». De Richeza in Casimiri morte, et de Casimiri in regnum restitutione infra agemus.

17. *Gesta ab Henrico Germaniæ rege.* — Hermannus Contractus in fusiori Chronico ad annum mxxxiv habet: « Pagani Sclavi Leutizi dicti Saxoniam terminos infestant ». Chronographus vero Hildensheimensis: « Plura et insolita bella inter Liutizos et nostrates ad oppidum Wirbini exorta sunt, in quibus de nostris quidam interfecti sunt et plerique sauciati ». Wippo narrata Couradi imp. in Burgundiam expeditione, de qua mox egimus, subdit: « Interea dum hæc quæ superius dicta sunt imperator in Burgundia faceret, filius suus Henricus rex, licet in puerilibus annis, non segnias Reip. consuluit in Bohemia et in cæteris regionibus Sclavorum: ubi Udalricum ducem Bohemiæ et reliquos quam plures Cæsari adversantes strenue subjugavit, et redeunti patri occurrens, de duplici victoria duplex gaudium populis effecerat.

18. *Leutici pagani a Conrado imp. compressi.* — Deinde collectis copiis de Saxonia super eos qui Lutizi vocantur, quique olim Semichristiani, nunc

per apostolicam nequitiam omnino sunt pagani, imperator venit : ibique conflictum implacabilem mirabiliter diremit. Inter Saxones enim et paganos fiebant ea tempestate multæ dissensiones et incursiones : cumque Cæsar veniret, cœpit quærere ex qua parte pax quæ diu inviolata inter eos fuerat, prius corrumpetur. Dicebant pagani a Saxonibus pacem primitus confundi, id per duellum, si Cæsar præciperet, probari. E contra Saxones ad refellendos paganos similiter singulare certamen, quamvis injuste contenderent, imperatori spondebant. Imperator consulentibus principibus suis, licet non caute satis ageret, hanc rem duello dijudicari inter eos permisit. Statim duo pugiles congressi sunt, uterque a suis electus : Christianus in sola fide quæ sine operibus justitiæ mortua est confidens, et non diligenter attendens quod Deus, qui veritas est, omnia in vero judicio disponit, qui solem suum oriri super bonos et malos facit, qui pluit super justos et injustos, audacter pugnare cœpit. Paganus autem solam conscientiam veritatis, pro qua dimicabat, præ oculis habens, acriter resistebat. Postremo Christianus a pagano vulneratus cecidit. Ex qua re pagani in tantam elationem et audaciam venerunt, ut nisi imperator adesset, continuo irruerent super Christianos, sed imperator ad compescendas incursiones eorum construxit castrum Wirbinam, in quo præsidia militum locabat, et principes Saxoniarum, ut unanimiter resisterent paganis, sacramento et imperiali jussione constringebat; deinde reversus est in Franciam, nempe Orientalem ».

19. *Crudelitas Liuticorum in Christianos.* — Loquitur etiam Glaber lib. 4, cap. 8, de hac *Leuticorum* crudelitate, et victoria de illis a Conrado imp. reportata. Ille *Leuticorum*, quorum hoc et præcedenti sæculo frequens mentio occurrit, situm hactenus valde obscurum his verbis explicat : « Germania, quæ a Rheno flumine sursum versus ad Aquilonarem orbis plagam tendens sumit exordium, gentibus incolitur quamplurimis, ferocissimis atque promiscuis. Inter quas una cæteris crudelior, commanens in ultima parte secundæ Retiæ. Nam prima Retia, licet a Rheno utraque dicantur, in parte ejusdem regni conjacet occidentali. Quæ scilicet corrupte regnum Lotharii vulgo nuncupatur. In altera, ut diximus, gens *Leutico-*

rum barbara omni crudelitate ferocior, cujus vocabulum a luto derivatur. Est enim omnis illorum habitatio circa mare Aquilonare, in paludibus sordentibus, et idcirco *Leutici* quasi *Lulei* vocantur. Hi quoque anno a Passione Domini millesimo (anno nempe Christi *mxm*, secundum ejus sententiam) de suis egressi latibulis vicinas sibi provincias Saxonum ac Barbarorum nimium crudeliter devastantes, res Christianorum ad solum usque deleverunt, etc. »

20. *Situs Leuticorum in Germania.* — Krantz lib. 4 de Sax., Blondellus in Pleniori Assert. Genealogiæ Franc. pag. 23, Mabillonius Sæc. v Benedict. in Notis ad Vitam S. Adalberti episc. Pragensis pag. 862, aliique passim recentiores *Leuticios*, seu *Leuticos*, eos populos interpretantur, qui hodie *Lusati* dicuntur, et in *Silesia* habitant. Verum nominis similitudo viros doctissimos decipit; Glaber enim auctor synchronus eos circa mare Aquilonare habitasse diserte docet, et Ditmarus lib. 7, pag. 106, de *Leuticis* loquens ait : *Qui Abotriti et Wari* vocantur, qui ideo in ducatu *Mecleburgensi* hodierno ac in Occidente *Pomeraniæ* sedes suas habebant. Ditmarus autem anno *mxviii* obiit, et *Obotritos* seu *Abotritos* ac *Waros* ibi habitasse non videtur in dubium revocari posse. Cluverius in *Germania Antiq.* lib. 3, pag. 106, recte probat, *Varinos* seu *Varnos*, qui iidem sunt ac *Wari*, ducatum *Mecleburgensem* incoluisse. Quare eorum situm Glaber seite designavit, licet nulla absurda in medium afferat, ut quando ait *Rhætiam in parte Occidentali Rheni* positam esse, quæ scilicet, subdit, *regnum Lotharii vulgo nuncupatur*, quo nihil falsius. Addit *Rhætiam*, ubi *Leutici*, a Rheno ita appellatam, quod in *Geographia* monstruosum. Sed si exemplo quorundam aliorum scriptorum, qui media ætate vivere, nova nomina fingit, situm tamen *Leuticorum* optime notat, cum ait : « Est enim omnis illorum habitatio circa mare Aquilonare (nempe circa mare Balticum) in paludibus sordentibus ». Quæ vera positio ducatus *Mecleburgici* seu *Megalopolitani*, non vero *Lusatiæ*. Verum hanc difficultatem exhauriemus sæculo sequenti, quo de sancto *Ottone Bambergensi* episcopo et *Pomeranorum* apostolo verba faciemus.

BENEDICTI IX ANNUS 2. — CHRISTI 1035.

1. *In Berengarium hæreticum emergentem pugnat Henricus rex opera Durandi episcopi.* — Sequitur annus Christi millesimus trigesimus quintus, Indictione tertia, quo magnam Synodum Triburiensem collectam esse, Hermannus testatur in Chronico a Canisio nuper edito ex Codice Augustano, sed Acta ejus hactenus latent, vel periere. Quo etiam tempore, Berengarius Turonensis, Andegavensis archidiaconus, cujus error de veritate corporis Christi in sacramento Eucharistiæ negata fuerat (ut vidimus) a Roberto rege damnatus, ut nedum asseri, sed nec audiri eo vivente permissus sit; eo jam defuncto, liberius absque obice hæresim promulgare atque firmare ausus est, annitente Brunone Andegavensi episcopo, quem in eandem vesaniam aucta errorum propagine, non solum decipiendo perduxerat, sed et propugnatorem acerrimum constituerat. Cum vero nefandæ blasphemiae rumor jam Gallias universas implexisset, nec non Germanias pervasisset, Henricus Francorum rex Christianissimus, Roberti parentis ut regni, ita et pietatis hæres, ejus exemplo ad condemnandum errorem, profligandam hæresim penitusque obruendam, ut nullatenus amplius audiretur, ocius exsurrexit, quamvis suorum civili bello teneretur jugiter occupatus; probe scieus, tunc reddi sibi Deum propitium ad debellandos infestos hostes, cum emergentes hæreses comprimuntur, et regia potestate, ne vel mutire audeant, continuo strangulantur; reddique tunc pacificum atque divina protectione securum regnum, cum rex sollicite curat ejus Ecclesiam ab omni prorsus hæresis labe impollutam integramque servare. Quamobrem paterno exæstans zelo, impiger ad conficiendum monstrum ab inferi portis nuper emersum, et magna omnium admiratione, sed majori detestatione auditum, regia tuba milites convocat, cum videlicet totius regni episcopos ad Concilium vocat. Quoniam autem sicut periculosum valde est sine consilio Concilium agere¹: ne id tum faceret suis litteris monuit eum, et quidem justa de causa atque evidenti ratione vir disertissimus atque san-

ctissimus Durandus Leodiensis episcopus, qui licet humili loco natus, tum litteris, tum moribus nobilem illam suo tempore illustravit Ecclesiam. Cujus Epistolam doctissimam quidem, quæ adhuc superest, hic describere ad veritatem in primis intelligendam necessarium duximus. Sic enim se habet ejus inscriptio¹:

2. « Ex Bibliotheca Ludovici Martelli Rothomagensis incipit Epistola Durandi Leodiensis episcopi, de Corpore et Sanguine Domini, contra Brunonem Andegavensem episcopum et Berengarium Turonensem.

« Fama supremos Galliæ fines prætergressa totam Germaniam pervasit, jamque omnium nostrum replevit aures, qualiter Bruno Andegavensis episcopus, item Berengarius Turouensis, antiquas hæreses modernis temporibus introducendo, adstruant Corpus Domini non tam corpus esse quam umbram et figuram Corporis Domini, legitima conjugia destruant, et quantum in ipsis est, baptismum parvulorum everiant. Quos ad revincendum et publice confutandum, eo zelo eoque fervore, quo erga sanctam Ecclesiam divina inspiratione plurimum semper ardetis, aiunt vos Concilium advocasse, ubi tandem illud totius nobilissimi regni vestri ben! nimis turpe opprobrium de medio auferatis, et in æternum, si fieri potest, ab ipsa omnium (hominum) memoria deleatis. O pia voluntas, et vere rege dignissima! quæ utinam effectum habere posset, ut in tanto sacrilegio convictos (quod certe facillimum est) absque ulla dilatione debita ultio consequeretur.

3. « Sed desperamus id fieri posse, cum Bruno existat episcopus: episcopum autem non oportet damnationis subire sententiam præter Apostolicam auctoritatem. Igitur omnes quicumque sumus filii sanctæ matris Ecclesiæ, in maximo dolore positi sumus. Nam plurimum veremur, si illis miserimis et perditissimis viris audientia sancti Concilii (sicut ipsi de pœna securi postulant) permittatur, cum de tanta præsumptione revinctos puniri minime concedatur, gravissima scandala

¹ 1. Mac. v.¹ Habetur tom. III. bib. Sanct. in fin.

in omnium fidelium populo generari. Certe quod videbunt impunitos, et nequaquam a sui gradus honore dejectos : eosdem putabunt ab omni Concilio, aut vinci non potuisse, aut justificados esse ; eruntque (ut ita dicam) novissima pejora prioribus.

4. « Ergo majestatem tuam omnes exoratum vellemus, ut interim illorum impiam sacrilegam et nefariam assertionem audire contemneretis, donec accepta Romanæ Sedis audientia, damnandi potestatem haberetis. Quanquam hujusmodi homines nequaquam oporteat audiri, neque tam est pro illis Concilium advocandum, quam de illorum supplicio exquirendum. Tunc quippe hæretici necessario audiendi fuerunt, quando hæreses ipsæ, et hujusmodi quæstiones, utpote quæ nondum ad unguem discussæ fuissent, in dubium venire potuerunt, ut per congressum certaminis pateret utra pars staret pro defensione veritatis. Quod idem nunc profecto fieri non oportet, quia creberrimis sanctorum Patrum Conciliis, tum etiam venerabilium doctorum clarissimis sententiis ita omnia sunt eliquata, ut ne minimum quidem resederit de omni fæce dubitationis. Sed et nos ex multis, epistolari brevitate cogente, pauca exponemus et proponemus exempla, pertinentia ad corpus et sanguinem Domini. Ait itaque beatus Leo papa etc. » Recitatis enim contra Brunonem et Berengarium sancti Leonis papæ, Cyrilli, Ambrosii, Augustini, Basilii, Eusebii, Hilarii, et Tole-tani Concilii verbatim sententiis, ita perorat : « Quamobrem Brunonem et Berengarium jam anathematizatos arbitramur. Quod si ita est, vere illis audientia Concilii deneganda est : et cum vestris cumque nostris episcopis (si ita vobis videtur) cum amico vestro imperatore, cum ipso papa, quæ vindicta in eos statuatur deliberandum. Est enim justum, ut quorum manus sunt contra omnes ¹, omnium manus etiam contra ipsos excitentur ». Hucusque Durandus. Cujus aureæ plane Epistolæ meminit Guitmundus in Commentario quem scripsit de Corpore et Sanguine Domini ².

5. Illis acceptis Henricus rex Francorum litteris, bene a tanto antistite persuasus, a cœptis creditur destitisse : non enim ipse dum vixit, aliquod fuisse contra Berengarium et socium impietatis collectum Concilium memoria reperitur, sicut aliorum Conciliorum longe minoris momenti. Sed et quod, dum idem Christianissimus rex superstes fuit, nunquam auditus est Berengarius, vel ex suis aliquis quid impium mussitasse ; æque coercitos funestos homines regia jussione fuisse par est credere, atque petiisse abdita silvarum bestias truculentas est dignum existimare : interea vero

spumante ore, rabie acuisse dentes ad nova certamina, eventa monstrarunt. Agemus autem de his suo loco.

6. Quod autem ad Durandum Leodiensem episcopum spectat, falli constat Sigebertum, qui ejus ingressum ponens anno Domini millesimo vicesimo primo, rursum anno post millesimum vicesimum quintum alium in locum ejus subrogatum habet Reginardum, cum tamen ad hæc saltem tempora primordia Henrici regis, ad quem scripsit, pervenisse, nulla dubitatio esse possit. Non sic Hermannus, cum ejusdem Durandi meminit ; qui nequaquam eo termino claudit ejus episcopatum. Vides, lector, prima spicula in virulentum draconem vibrata fuisse a nobilissima Ecclesia Leodiensi, Catholicæ fidei tenacissima, in primis vero ab ejus episcopo Durando, necnon ab ejusdem Ecclesiæ scholastico : inde vero Brixiensi episcopo Adelmanno, cujus lucubrationis superius alia occasione meminimus. Reliqui autem adversus eundem longe postea conscribere. Adelmannus vero (ut superius dictum est) discipulus fuit Fulberti episcopi Carnotensis, cum ejusdem malus auditor Berengarius esset. Extat hujus Epistola ad Berengarium, hac notata inscriptione :

7. « Dilecto in Christo fratri conscholastico Berengario Adelmannus, salutem in Domino. Col-lactaneum te meum vocavi propter dulcissimum illud contubernium, quod cum te adolescentulo ipse ego majusculus in academia Carnotensi sub illo venerabili Socrate (nempe Fulberto) duxi etc. » Hæc, cum jam se palam ab Ecclesia divulsisset Berengarius ; nam post nonnulla ejus exordio posita habet ista : « Avertat Dominus a te, sancte frater, semitas tales, et convertat pedes tuos in testimonia sua, et mendaces ostendat qui famam tuam tam fœda labe maculare nituntur, spargentes usquequaque, ut non solum Latinas, verum etiam Teutonicas aures inter quas diu peregrinor, repleverint, quasi te ab unitate sanctæ matris Ecclesiæ divulgaveris, et de Corpore et Sanguine Domini aliter quam fides Catholica teneat, sentire videaris etc. » Confutat errorem, arguit temeritatem, damnat audaciam, retundit procaciam, hortaturque ad resipiscentiam. His clamoribus undique longe lateque de Berengario sparsis, permotum Henricum Francorum regem ad eam cogendam Synodum quam audisti, jure possumus affirmare. Porro sic zizania exorta usque ad messem excreta, falce Leonis papæ Noni primum duplici Concilio resecata, anno Redemptoris millesimo quinquagesimo, tum Romæ, tum Vercellis, præside eodem Leone Pontifice iisdem ab eo convocatis Conciliis, de quibus suo loco dicturi sumus.

¹ Gen. xvi. — ² Guitmund. l. 1.

Anno periodi Græco-Romanæ 6528. — Anno Æræ Hispan. 1073. — Anno Hegiræ 427, inchoato die 5 Nov., Fer. 4. — Jesu Christi 1035.

— Benedicti IX papæ 3. — Conradi II reg. 12, imp. 9. Michaelis Paphlagonis imp. 2.

1. *Synodus Triburiensis*. — Ad num. 1 et seqq. Accurate Baronius Synodum *Triburianam* cum Hermannus Contractus in Auctiori Chronico hoc anno, perperam vero Cossartius tom. ix Concil. cum Sigeberto anno millesimo trigesimo primo consignat; Hermannus enim est horum temporum scriptor. Recte tamen Cossartius hujus Acta Concilii ex Baldrico in Chronico Cameracensi, lib. 3, cap. 51, narrat: « Triburiæ », inquit Baldricus, « secus Maguntiam imperator Conradus de diversis partibus episcopos convocavit, ut quæ utilitatis et religionis sunt ad invicem conferrent. Qui post aliqua doctorum suorum, hoc habuerunt capitulum: ut si quando jejunium primi mensis, in ea hebdomada qua constat caput jejunii, sicut solet, eveniret, amborum jejuniorum celebritas una officii expletionem completeretur. In hoc rursus moderatissimus pastor Gerardus (sc. Cameracensis episcopus) antiquam Patrum consuetudinem servari monebat; et in altera hebdomada officium primi jejunii celebrandum pro consuetudine antiqua censebat. Cujus oblata sententia visa est congrua, et ab eis decreta est tenenda ». Chronographus Hildensheimensis Concilium istud in annum sequentem differt, indeque idem Cossartius pag. 937, *Triburiense* in duo dividit, quorum prius anno *MXXXI*, posterius hoc vel sequenti anno celebratum fuerit. Sed non dubito quin auctores isti de uno eodemque Concilio verba faciant, quod filius Hermannus Contractus suo anno reddidit.

2. *Berengarius post hæc tempora hæresim suam sparsit*. — Baronius refert *Berengarium*, cujus hæresis a Roberto rege Francorum compressa fuerat, annitente *Brunone* Andegavensi episcopo, eam liberius promulgare ausum esse, sed *Henricum*, Roberti patris successorem totius regni episcopos ad Concilium vocasse, eique silentium imposuisse. Addit Baronius Concilium illud non videri celebratum fuisse, *Theoduno* Leodiensi episcopo regem dissuadente. Verum Concilium illud *Parisiense* anno *MI* celebratum, et *Bruno* anno tantum millesimo quadagesimo septimo Iluberto in episcopatum Andegavensem successit, ut San-Marthani in episcopis Andegavensibus ertlis argumentis demonstrant. Quare *Berengarius*

nonnisi longe post hunc annum errorem suum disseminavit.

3. *Non Durandus sed Deoduinus adversus eum scripsit*. — Refert postea Baronius, num. 2 et seqq., Epistolam *Durandi* Leodiensis episcopi contra *Brunonem Andegavensem episcopum et Berengarium Turonensem*, in qua cum Concilii adversus eundem Berengarium memorati nulla mentio sit, inde cardinalis doctissimus deduxit, præfatum Concilium congregatum non fuisse. Sed ea Epistola non a *Durando*, sed a *Deoduno* seu *Theoduno* Henrici III imperatoris consanguineo et Leodiensi episcopo scripta. *Durandus* enim, ut habet Albericus in Chronico anno *MXXI*, S. Henrici imperatoris opera episcopus Leodiensis dictus, annoque *MXXY* demortuus. Baronio aliisque hæc Epistola errandi causa fuit, errorique occasionem dedit littera *D. Durandi* et *Deoduni* nomen designans. Recte itaque Sigebertus quem Baronius hallucinatum esse credebatur, *Durandi* episcopatus initium et finem collocavit, sed Hermannus Contractus a Baronio citatus *Durandi* mortem non memorat. Porro Epistola illa, cui titulus: *Epist. D. Leodicensis episcopi*, quæ Baronii tempore mutila erat, nunc integra legitur tom. iv *Analect.*, pag. 396 et seqq., a Mabillonio ex Codice Ms. cruta.

4. *Epistola Adelmanni ad Berengarium*. — Quoad *Adelmanni* Brixienensis episcopi Epistolam, a Baronio num. 7 memoratam, qua ille, ut errores suos revocet Berengarium monet, longe post hunc annum data fuit. Ughellus enim tom. v *Italiæ Sacræ*, ait eum Brixiensem Ecclesiam rexisse ab an. *MXLVIII* ad annum circiter *MLXI*. Extat ea in *Biblioth. Patrum*, de qua anno *MXLV* agemus.

5. *Peregrinatio Hierosolymitana frequentior haberi cœpit*. — Glaber lib. 4, cap. 6, postquam superiori capite de pace et abundantia, quæ famem et pestilentiam quibus orbis terrarum valde afflictus fuit subsecuta sunt, verba fecit, ait: « Per idem tempus, ex universo orbe tam innumerabilis multitudo cœpit confluere ad sepulchrum Salvatoris Hierosolymis, quantam nullus hominum prius sperare poterat. Primitus enim ordo inferioris plebis, deinde vero mediocres, post hæc permaximi quique reges et comites ac præsules. Ad ultimum vero,

quod nunquam contigerat, mulieres multæ nobiles cum pauperioribus illuc perrexere. Pluribus enim erat mentis desiderium mori, priusquam ad propria reverterentur, etc. Eodem quippe tempore Odolricus Aurelianorum præsul illuc pergens, quid viderit nobisque narraverit, non prætermittendum videtur miraculum. Die igitur magni illius sabbati, quo ignis mirabilis Dei potentia veniens ab universo populo præstolatur, ibi cum cæteris idem præsul adstabat, etc. Statim vero, ut assolet, Dei virtute erumpens ignis ex una lampadarum, quæ septem ibidem pendere cernuntur, cursim eructando cæteras inflammavit, etc.

6. *Moritur Robertus Normanniæ dux.* — «Tunc etiam inter cæteros Robertus, Normannorum dux, cum ingenti multitudine suæ gentis Hierosolymam proficiscens, detulit secum plurima auri et argenti donaria, erogandi gratia. Qui dum rediret, apud Niceam obiit urbem (in Bithynia positam) ibidemque sepultus quievit. De quo maximum apud suos ideirco extitit iustitium, quoniam non fuerat ei proles matrimonio aliqua ad regimen suscipiendum provinciæ, quamlibet sororem Anglorum regis Cnut manifestum est duxisse uxorem quam odiendo divortium fecerat. Ex concubina tamen filium genuerat, Willelmi nomen atavi ei imponens, cui antequam proficisceretur, universos sui ducaminis principes militantibus adstrinxit sacramentis, qualiter illum in principem pro se, si non rediret, eligerent. Quod etiam statim ex consensu regis Francorum Henrici unanimiter postmodum firmaverunt». Robertum autem hoc anno VI nonas Julii Nicææ demortuum, prodit Gemmeticensis lib. 6, cap. 18; et Ordericus lib. 3 de eo habet: «Inde rediens apud Nicænam urbem Bithyniæ, anno ab Incarnat. Domini mxxxv obiit. Porro Willelmus filius ejus, qui tunc octo annorum erat, ducatum Normannorum suscepit et multorum æmulorum insidiis impetitus lxx annis strenue gessit». Antea de Roberto patre dixerat: «Principatum Normanniæ septem annis et dimidio insigniter tenuit»: ubi dimidium illud late explicandum; annos enim fere octo ducatu potitus est, ut colligitur ex iis quæ regiminis ejus initio diximus. Willelmus iste est hujus nominis II, isque celebratissimus, et Angliam armis subegit.

7. *Obitus Canuti Angliæ reg.* — Anglici scriptores, qui *Roberti* Normanniæ ducis obitum cum anno mxxxi perperam illigant, *Canuti* Angliæ, Daniæ et Norvegiæ regis mortem recte in præsentem conferunt. Ex *Alfgiva*, priusquam Anglorum rex crearetur, filios duos genuerat, *Swanum* et *Haraldum*, quanquam non desint qui *Alfgivam*, non uxorem, sed concubinam vocent. Quidquid hac de re sit, cum Angliæ regno *Emmam* Ethelredi Angliæ regis relictam, *Elfgivam* etiam appellatam, uxorem duxit, et ex ea *Hardicanutum* filium suscepit, et *Gunildam* filiam. Ante suum obitum *Swanum* super Norvegios regem constituit; super Danos *Hardicanutum*, sive *Hardecnutum*; *Harol-*

dum vero Anglorum regem renuntiavit, et postea, «hoc anno, secundo idus Novembris, feria quarta, vita decessit», inquit Hovedenus, qui addit *Emmam* reginam in Angliam resedissee. Ita ille. Verum encomiastes *Emmæ* Anglorum reginæ, qui quæ tunc gesta sunt ignorare non potuit, lib. 2 ait, *Canutum Hardecanutum* filium regem Danorum renuntiassse, et quosdam Anglorum, *regis sui jam defuncti* obritos, *Haraldum* sibi in regem elevisse. Quod cum anno sequenti contigerit, ibi hac de re verba faciemus. Huntindoniensis ait, *Canutum* «filiam suam imperatori Romano cum ineffabilibus divitiis maritasse»; cum autem Wippo, qui hoc tempore vixit, in Vita *Conradi Salici* scribat: «An. Dom. mxxxvi, *Henricus* rex filius imperatoris, *Cnutonis* regis Anglorum filiam nomine *Chunelindem*, pro regina consecratam, regalibus nuptiis in conjugium duxit», quod et *Hermannus Contractus* etiam habet: apparet, non *Canutum*, sed *Hardecanutum* ejus filium, ut scribit *Westmonasteriensis* ad annum mxxli, loco scilicet non suo, *Gunildam* sororem suam *Henrico* Germaniæ regi uxorem tradidisse, et *Huntindoniensem* patri tribuisse quod ad filium referendum erat. Vocat autem *Huntindoniensis* *Henricum Romanum imperatorem*, quia post *Conradi* patris mortem imperavit. *Baronius* anno mxxvii, num. 1 de *Canuto* Romæ agente scribit: «*Henrico* tunc nuptui traditam filiam *Cnuti* regis Daniæ et Angliæ, quem et *Canutum* appellant, nomine *Chunigundem*, *Urspergensis* affirmat». Verum memoria labitur cardinalis doctissimus; *Urspergensis* enim has nuptias cum anno mxxxvi disertis verbis copulat. Quare non erat, cur *Alfordus* hoc anno num. 5. *Baronium*, laudato perperam *Urspergense* abbate, ea in re sequeretur; cum ipsemet anno mxxli, num. 3, fateatur *Malmesburiensem* de Reg. lib. 2, et passim auctores Anglos inter pia *Hardecanutum* facinora *Gunildæ* sororis nuptias numerare.

8. *Expediit Conradi imp. adversus paganos Leuticos.* — Wippo citatus gesta hoc anno a *Conrado* imp. adversus *Leuticos*, qui pagani erant, his verbis narrat: «Sequenti anno idem castrum (nempe *Wirbina*, castrum quod est juxta *Albiam*, inquit *Helmoldus* in *Chron. Slavorum* lib. 1, cap. 18,) a paganis dolo raptum est, et plures nostrorum, qui in eo erant, ab eis occisi sunt. Hinc commotus imperator iterum cum copiis usque *Albim* fluvium venit. Sed cum pagani transitum prohiberent, imperator per aliud vadum fluvii, partem exercitus latenter transmisit: et ita fugatis hostibus, ipse per ripam liberam regionem ingrediens, immensis devastationibus et incendiis, et ubique, nisi in locis inexpugnabilibus, sic humiliauit eos, ut censum ab antiquis impp. propositum et jam auctum *Cunrado* imperatori postea persolverent. Multum enim laboravit *Cunradus* imp. prius, et tum in gente *Slavorum*: unde quidam de nostris quoddam breviarium versifice fecit, quod postea imperatori præsentavit. Ibi legi-

tur, qualiter imperator interdum in paludibus usque femora stabat, pugnans ipse et exhortans milites ut pugnarent; et victis paganis nimis acriter trucidabat eos, pro quadam superstitione illorum nefandissima. Nam fertur ut quodam tempore effigiem ligneam crucifixi Domini nostri Jesu Christi scelerato ludibrio habuissent pagani, et in eam spuerent atque colaphis cæderent, ad extremum oculos eruebant, manus et pedes truncabant. Hæc ulciscens imperator, de captis paganis maximam multitudinem pro una effigie Christi simili modo truncavit, et varia morte delevit. Idcirco in eisdem versibus Cæsar ullor fidei vocatur». Idem hoc anno referunt Hermannus Contractus, chronographus Hildensheimensis et Glaber lib. 4, cap. 8, nisi quod is una serie quæ adversus Leuticos gesta recitat.

9. *Italia domesticis dissidiis dilacerata.* — Pergit Wippo: «Item eodem tempore, magna et modernis temporibus inaudita confusio facta est Italiæ, propter conjurationes quas fecerat populus contra principes: conjuraverant enim omnes Valvasores Italiæ et gregarii milites adversus dominos suos, et omnes minores contra majores, ut

non paterentur aliquid inultum sibi accidere a dominis suis supra voluntatem ipsorum, dicentes: si imperator eorum nollet venire, ipsi per legem sibimet facerent. Hoc cum nuntiatum esset imperatori, fertur dixisse: Si Italia modo esurit legem, concedente Deo bene legibus hanc satiabo; et præparans se anno sequenti, Italiam cum copiis intravit», ut ibidem videbimus. Idem habet Epidamnus in Annal. ad hunc Christi annum. Subdit Wippo: «Interea principes Italici male conceptam conjurationem periculum generale posse scientes: convenerunt simul cum minoribus, et prius exhortationibus et consiliis hoc recens malum destruere conabantur: cum hoc non procederet, tentabant bello superare, sed inito prælio minorum, incredibilis multitudo sola impressione catervatim vicit. Ibi episcopus Astensis indigna statione periit, cæteri fugerunt, et nimium confusi adventum imperatoris ægre spectabant».

10. *Obitus Sancti Majoris Navarrae regis.* — Sanctius Major Navarrae rex, cujus uxor fuit *Majora Munia Dona*, usque ad præsentem annum vitam propagavit, ut anno mxxxii ostendimus.

BENEDICTI IX ANNUS 3. — CHRISTI 1036.

1. *Conradus imperator in Italiam.* — Sequitur millesimus trigesimus sextus Christi annus, Indictione quarta inchoatus, quo Benedictus papa audiens defunctum Hermannum archiepiscopum Hamburgensem, alque in locum ejus subrogatum Alebrandum, virum omnibus virtutibus excultum, ex Ecclesia Coloniensi petiit, ad eum pallium misit. Hæc pluribus Adam, qui res ab eo præclare gestas describit¹.

2. Hoc etiam anno imperator Italiam petiit extremo tempore², ut tumultus compesceret, Veronæque diem Natalem Domini celebravit. Quæ autem reliquæ ejus fuerint in Gallia Cisalpina res gestæ, ut suo singula reddantur loco, dicetur anno sequenti.

Quo anno ex hac vila migravit ad cælestia sanctus Gothardus, episcopus Hildeshemensis, qui plane egregia enituit sanctitate, plurium charismatum donis divinitus illustratus. Cujus res præclare gestas sicut simpliciter ita et fideliter auctor ejus temporis scripsit. Contigit transitus ejus Dominico die infra octavam Ascensionis, sicut ipse spiritu prophetico pollens jam ante sæpe significarat, cum post mediam noctem Matutinas preces inchoantibus fratribus, ventumque esset ad canticum Zachariæ¹, et postremus versus cantaretur a clero: «Illuminare his qui in tenebris et in umbra mortis sedent»; ipse licet in agone desudans, proferens reliqua versus verba illa: «Ad dirigendos pedes nostros in viam pacis», in pace quievit, illustratus a Deo plurimis miraculis, ejusdem egregiæ

¹ Adam l. II. c. 51. — ² Herm. in Chron. hoc et seq. an. ex edit. Can.

¹ Luc. 1.

sanctitatis indicibus. Petat res de eo tunc scriptas, qui viri sanctissimi adhuc plura scire desiderat; hæc enim ad institutum satis.

3. *Clades ingens Polonorum Ecclesiæ.* — Eodem quoque tempore exagitata est Ecclesia Polonorum turbulentissimo interregno, cum provincia illa, civili bello ingravescente, facta est externorum hostium præda, incursantibus eam Bohemis atque Rutenis, cunctaque sacra atque profana prædantibus. Narrat ista fusius Joannes Longinus, canonicus Cracoviensis, qui et Dlugoschus, tantumque malum hoc anno cœptum male propagatum usque ad annum Redemptoris quadragesimum primum narrat, cum creato rege Casimiro, tanquam orto sole, feræ bestię in sua se latibula converterunt. Interea autem interregno durante, Brzetislaus Bohemiæ dux, destitutum rege provinciam dilaceratamque bello civili pervadit, spohat, ac prædatur, non parcens sacris quæ adhuc intacta reperit, nondum ausis nefaria manu Deo dicata dona pertingere, quibus tam in auro quam gemmis ex regni piorum munificentia illæ Ecclesiæ abundabant. Hæc omnia ausus dux Bohemus, impulsore Severo Pragensi episcopo, cujus suasu ab eodem corporibus sanctorum Gnesnensis Ecclesia est spoliata. Nam (ut ait) S. Gaudenzio, loco S. Adalberti, et sanctis martyribus quinque fratribus (de quibus superius) illuc a Boleslao rege translatis, eadem magno honore in Pragensem Ecclesiam transtulere. Insuper imaginem Crucifixi ex auro puro trecentarum pondo librarum, cum imagine Christi pendentis in cruce, triplicis ponderis, tres insuper tabulas primarii altaris ex auro purissimo gemmis ornatas, tunc item ab Ecclesia Gnesnensi per eosdem sublatis Pragamque translatis, in Ecclesia cathedrali fuisse repositas tradit. Hæc insi-

gniora recenset auctor, præter alia innumera divers generis ornamenta in vasis et vestibus sacræ suppellectilis, quæ narrat tunc fuisse direpta.

4. *Contra Alexium patriarcham insidiæ.* — Quod ad res pertinet Orientis, hoc anno adversus Alexium patriarcham Constantinopolitanum Synodum celebrant seorsum episcopi ipsi subjecti, ut eum gradu deponerent, idque in gratiam Joannis fratris imperatoris eum thronum ambientis. At quomodo irritum redditum est omne quod moliti sunt consilium, Curopalata sic narrat: « Cum vero Joannes supra modum Constantinopolis sedem amaret, inita societate Demetrius episcopus Cyzici, Antonius Nicomediæ, Sydæ et Ancyra german fratres, cum aliis metropolitanis consilium iniere de abdicando Alexio et pro ipso Joannem constituendo. Ad quos patriarcha Alexius cum parte Ecclesiæ litteras in hanc sententiam misit, quibus quo minus jure possit, eo magis callida arte illos omnes elusit :

5. « Quando, ut asseritis, non suffragio archiepiscoporum, sed imperatoris jussu ad sedem ascendi contra canones, abdicentur ii quos ego metropolitanos elegi, dum undecim annis cum dimidio insuper Ecclesiam gubernavi. Anathemate etiam percutiantur imperatores tres, quos ipse coronavi, et ita cuiuslibet volenti sedem cedam.

« Hoc nuntio accepto qui cum Demetrio erant, et pudore et metu perfusi (plures enim ab ipso delecti fuerant) quiescere decreverunt ac sifere, et in reliquo Joannes continuavit sedis obtinendæ appetitum ». Hæc Curopalata, qui eodem anno, jam inchoata Indictione quinta, nempe Decembris mense, concussam civitatem terræ motu recenset. Eadem et Cedrenus et alii.

Anno periodi Græco-Romanæ 6529. — Anno Æræ Hispan. 1074. — Anno Hegiræ 423, inchoato die 24 Octob., Fer. 1. — Jesu Christi 1036.

— Benedicti IX papæ 4. — Conradi II reg. 13. imp. 10. Michaelis Paphlagonis imp. 3.

1. *Conradus Imp. Italiam intrat.* — Ad n. 2. « Hoc anno », ut inquit Wippo, « imp. Cunradus cum filio Henrico rege Italiam intravit cum exercitu, et celebravit Natalem Domini Veronæ ». Idem habet Hepidannus, qui ait imperatorem *incipiente hyeme* profectum esse. Quid ibi egerit, anno sequenti referemus.

2. *Moritur S. Godhardus episc. Hildenshei-*

mensis. — S. Godhardus episcopus Hildensheimensis anno millesimo trigesimo octavo ad Deum migravit. Chronographus enim Hildensheimensis ad eum Christi annum scribit : « Eo tempore venerandæ memoriæ sanctus noster Pontifex Godehardus, III non. Maii, videlicet feria vi post Ascensionem Domini, ex hac vita subtractus ad æternam cum Christo perenniter victurus migravit : nobisque

miseris immensam mœstitiam discessu suo contulit. Quem vero ad Deum præcessisse non discredimus; hoc tamen quod sancta ejus ammonitione, fructiferaque virtutum præsentatione præsentialiter privamur, merito semper ingemiscimus». Quare cum anno mxxxviii festum Ascensionis in diem quartum mensis Maii incidat, ejus mors in diem sequentem venit, qui erat feria sexta. Henschenius, ad diem quartum mensis Maii refert in quibusdam Breviariis et Martyrologiis S. Godehardi depositionem ad diem v mensis Maii, in aliis vero ad diem quartum ejusdem mensis recitari. Quare cum Godehardus postridie Ascensionis Domini, ut in ejus Vita legitur, et mox ex chronographo Hildensheimensi vidimus, animam Deo reddiderit, et, uti habet anonymus in Historia ejus canonizationis ab Innocentio II factæ, et ab Henschenio ibidem relatæ, ejus *Translatio* anno mxxxii die quarta mensis Maii peracta fuerit, ex martyrologiis et Breviariorum conditoribus, alii ad diem mortis ejus, alii ad translationis diem respexere.

3. *Canonizatus ab Innocentio II.* — Cum Godehardus sicut in vita ita et post mortem miraculis claret, «anno Dominicæ Incarnationis mxxxviii, obitus vero beati Godehardi nonagesimo», Bertholdus Hildensheimensis episcopus in consensu suorum clericorum de condignis in Ecclesia Dei huic sancto honoribus exhibendis egit; sed cum aliquanto post tempore obiisset, et Bernardus in ejus locum suffectus fuisset, perrexit is ad Innocentium II, qui anno mxxxxi, die xxix mensis Martii Lëodii erat, ubi Lotharium Germaniæ regem imperatorem coronavit, et de communi Ecclesiæ statu cum multis Catholicis viris pertractavit. Bernardus opportunitatem ultro sibi oblatam videns, petiit a Pontifice ut vir Dei canonizaretur. Sed de ejus canonizatione suo loco.

4. *Polonia a Bohemiæ duce devastata.* — Ad num. 3. Cosmas Pragensis decanus refert, *Prædislam* Bohemorum ducem cum ingenti exercitu Guesnam venisse, urbem natura loci et antemurali firmam, «ubi tunc temporis Basilica S. Dei genitricis Mariæ perpeluæ Virginis, pretiosissimus quiescebat thesaurus, scilicet beatissimi Adalberti corpus. Qua mox Bohemi sine Marte potiuntur urbe, et cum magna lætitia intrant sanctæ Dei genitricis abdyta, atque omni præda postposita, solum sibi poscunt dari pro Christo passam sacri corporis pretiosam massam». Subdit Cosmas apertum fuisse sancti Adalberti episcopi Pragensis et martyris sarcophagum, et corpus ejus inventum esse vividum, translatumque Pragam cum corpore sancti Gaudentii et quinque aliorum. Subjungit: «Facta est hæc translatio beatissimi Christi martyris Adalberti anno Domini mxxxix, kalendis Septembris». Hic auctor Historiam Bohemiæ anno mxxxvi scripsit, et senio confectus anno mxcvi decessit. Eamdem translationem postea alii Bohemiæ scriptores retulere. Chromerus tamen, qui lib. 4 de hac Prædislai invasione agit, ait Bohemiæ qui-

dem principem *Guesnam* cepisse, sed ministros Templi, ubi jacebat, pio mendacio *sancti Gaudentii* corpus pro sancto Adalberto rogantibus obtulisse, corpus vero sancti *Adalberti* in adyto templi clam refodisse; illud a Bohemis pro sancto Adalberto raptum, et in Bohemiam asportatum. Quam narrationem Chromerus desumpsit ex Joanne Longino, Cracoviensi canonico, anno millesimo quadringentesimo octuagesimo demortuo. De hac corporis sancti Adalberti Pragam relatione magna animorum contentione Poloni et Bohemi inter se certant, et quilibet sibi sacrum corpus vindicant. Utriusque partis rationes exhibet Henschenius ad diem xxiii Aprilis, quo sanctus Adalbertus colitur.

5. *Gesta in Oriente.* — Ad num. 4. «Anno ab origine mundi 6544», inquit Cedrenus Æra mundi Constantinopolitana usus, «Indictione quarta, verno tempore, Patzinacæ ter impressionem fecerunt in Romanam ditionem, obviis omnibus excisis: et quoscumque cepissent, et nullius habitæ ætatis ratione interfectis, ineffabilibus cruciatibus in captivos debacchati, etc. Mortui sunt etiam Rosorum principes Nosisthlabus, et Jerosthlabus. Et Serbia (sen Servia), quæ morte Romani imperatoris jugum excusserat, rursus imperio conjuncta est. Amere Ægypti Amermunna mortuo (id est califa), uxor ejus Christianæ religioni dedita, cum filio legatos de pace ad imperatorem mittit. Cujus is petitioni assentiens, xxx annorum pacem composuit». Quæ hoc anno in Oriente gesta. Califa ille Ægypti *Alis* appellabatur, et *Tahirus* seu *Taherus* cognominabatur, cujus mortem Elmacinus lib. 3, cap 6, cum anno Hegiræ cxxxvii copulat, proditque *Mustanzirum Billam* filium ei successisse. Quoad Jerosthlabum seu Jarolaum Russiæ ducem, fuit is S. Wolodimiri, qui fidem Christianam in Russiam induxit, filius, cujus filiam Annam Henricus Francorum rex uxorem duxit, qui «post Mathildis reginæ humationem», inquit auctor anonymus Fragmenti Aquitanicæ Historiæ, apud Duchesium t. iv de Henrico rege loquens, «accepit aliam conjugem, videlicet filiam Jurischolt (nomen a librario corruptum) regis Russorum, nomine Annam, quæ ei genuit tres filios, Philippum, Hugonem, Robertum: quorum Robertus puer obiit». Idem in eo tomo legitur in Excerpto veteris Chronici, nisi quod librarii errore Anna dicitur filia *Georgii*, loco Jeroslai. Wippo tamen in Vita Conradi Salici ad annum mxxxiv Mathildem non uxorem sed sponsam Henrici regis fuisse, his verbis testatur: «Eo tempore, filia imperatoris Conradi et Giselæ imperatricis Mathilda, nimium formositate puella, Henrico regi Francorum desponsata, obiit Wormatiæ, ibique sepulta est».

6. *Heraldus Angliæ rex eligitur.* — Mortuo anno superiori *Canuto*, Angli in varias factiones divisi sunt, et nihil in insula tutum esse credebatur. «Cum rex Canutus», inquit Ingulphus Croylandensis abbas, qui hoc sæculo vixit, «in regno fere viginti annos perfecisset, obiit, et Wintoniæ

sepelitur. Cujus duo filii, Haroldus et Hardecnutus, tum de regno disceptantes, videbantur bellum maximum parturire. Nam Dani et Londonienses, Haroldum filium Elfgivæ Northamptoniæ, sed dif-famatum, fictum filium regis Cnuti (ut enim enco-miastes Emmæ Anglorum reginæ lib. 2 scribit, plurimorum assertio perhibet Haraldum fuisse impositum cameræ languentis concubinæ): Angli vero, cum tota cætera terra, potius Edwardum, filium regis Ethelredi, seu saltem Cnuti regis filium Hardecnutum ex Emma regina genitum elige-bant. Hinc perterrita hominum ac mulierum multitudo maxima, cum suis parvulis ac catallis omnibus mobilibus (id est, cum omnibus bonis suis mobilibus catalli nomine expressis, ut videre est in Glossario Ducangii) ad Croylandiam concurrebat, sola suspicione belli supervenientis attracta, ad Mariscorum uligines et alneta, lutumque lacuum, tanquam castrum refugii fortissimum, arbitrati. Hi adventitii universum monasterium multis que-relis et interpellationibus jugiter inquietabant; et tota die in claustrum irruentes, de suis indigentis dominos loci cum blanditiis allicere in suum fa-vorem, tam per servos monasterii quam per se, assidue in monachorum auribus incumbabant. Hinc monachi claustrum relinquentes, vix ad divi-num officium in chorum de dormitorio ausi sunt descendere: vix ad communis mensæ participatio-nem, in refectorium poterant convenire». Ventum tandem ad regis electionem. «Convenerunt apud Oxoniam», inquit Westmonasteriensis ad annum mxxxv, «ad colloquium proceres regni; ut de novo rege creando tractarent ibidem, etc. Sed quo-niam Hardecanutus erat tunc in Dacia; Aelfredus et Edwardus filii regis Ethelredi (et Emmæ reginæ) absentes in Normannia; prævaluit pars Haroldi, et regni Angliæ diademate insignitus, Wintoniam festinavit».

7. *Archiep. Cantuariensis eum coronare recu-sat.* — Verum Haraldum Ælnotum archiepisco-pum Cantuariensem coronare noluisse, docet enco-miastes laudatus: «Electus, metuensque futuri advocat mox archiepiscopum Ælnotum, virum omni virtute et sapientia præditum: imperatque et orat se benedici in regem, sibi que tradi cum

corona regale suæ custodiæ commissum sceptrum, et se duci ab eodem, qui ab alio non fas fuerat, in sublime regi solium. Abnegat archiepiscopus, sub jurejurando asserens se neminem alium in regem (filiis Emmæ reginæ viventibus) laudare vel bene-dicere: Hos meæ fidei Cnulo commisit, his fidem debeo, et his fidelitatem servabo. Sceptrum et co-ronam sacro altari impono, et hoc tibi nec denego nec trado: sed episcopis omnibus, ne quis eorum ea tollat tibi ve tradat, teve benedicat, Apostolica auctoritate interdico. Tu vero si præsumis, quod Deo mensæque ejus commisi invadito. Quid miser ageret, quo se verteret, ignorabat. Intentabat mi-nas, et nihil profecit. Expendebat munera, et nil lucratus doluit, quoniam vir Apostolicus nec va-lebat minis dejici, nec muneribus flecti. Tandem desperatus abscessit, et episcopalem benedictio-nem adeo sprexit, ut non solum ipsam odiret benedictionem, verum etiam universam fugeret Christianitatis religionem. Namque dum alii Ec-clesiam Christiano more missam audire subintra-rent, ipse aut saltus canibus ad venandum cinxit, aut quibuscumque aliis vilissimis rebus sese occupa-vit, ut tantum declinare posset quod odivit. Quod Angli videntes dolebant, sed quia hunc sibi regem elegerant, hunc erubuerunt dejicere, ideoque dis-posuerunt hunc sibi regem finetenus esse».

8. *Haraldi crudelitas adversus filios Ethelredi regis.* — *Haraldus*, cum suis iniquo excogitato con-silio, fecit Epistolam in persona reginæ ad Edwar-dum et Alfridum ejus filios, in Normannia commo-rantes, invitatque ad reditum, promptos civium animos ad eos recipiendos pollicita. Eam Episto-lam recitat laudatus encomiastes. Mittitur ea per certos cursores, et Edwardus ac Alfridus «nimis falsitatis creduli, inconsulte remandant genitrici, unum eorum ad eam esse venturum». Statuto igitur die Alfridus minor natu, «laudante fratre, elegit sibi commilitones: et arripiens iter Flan-driæ, venit in fines». Sed postquam littus Angli-cum contigit, atrocissimis traditi sunt carnificibus, et alii perempti, alii servituti mancipati. Alfridus vero *effossis etiam luminibus, impiissime est occi-sus*. Quod hoc anno contigisse Wigorniensis scribit. Quid actum sit de Edwardo, suo loco dicemus.

BENEDICTI IX ANNUS 4. — CHRISTI 1037.

1. *Benedictus papa Cremonæ coronat Conradum imperatorem.* — Millesimus trigesimus septimus annus exurgit cum Indictione quinta, quo Benedictus papa ad imperatorem Cremonam se contulit laborantem adversum archiepiscopum Mediolanensem, imperii perduellem. De his enim in Hermanni Chronico editionis Canisianæ ista leguntur¹ : « Imperator, celebrato Veronæ Natali Domini, per Brixiam et Cremonam Mediolanum pervenit : idem Papiam adiens, Herimbertum Mediolanensem archiepiscopum infidelitatis accusatum apprehendi jussit, eumque Popponi patriarchæ Aquileiensi custodiendum commendavit. Qui fuga elapsus, cunctis viribus eidem imperatori rebellare contendit. Imperator, Paschali festo Ravennæ acto, territorium Mediolanense repetiit, urbem obsedit, castella, villas, omniaque circum ad rebelles pertinentia vastavit; conjuratorum vero manum facile compescuit, eisque legem quam et propriis habuerant temporibus, scripto roboravit. Papa Benedictus Cremonam ad imperatorem venit. Episcopi Placentinus, Cremonensis et Vercellensis incusati ab imperatore, captique et in exilium missi ». Hæc Hermannus ejus temporis scriptor. Porro ista adversus episcopos decreta, etsi haud inconsulto Romano Pontifice, qui aderat, fecisse existimandum sit; tamen haud Deo placuisse, ex sequenti immissa cælitus ultione per pestilentiam, quæ et suam pergit domum, de quo suo loco dicturi sumus, intelligi facile potest.

2. Sed et quid tunc temporis eidem Conrado imperatori apud Mediolanum regni coronam ad missam accipienti contigerit, ex Sigeberto sic accipe : « Die vero Pentecostes, cum imperator in parva Ecclesia secus urbem coronaretur ad missam, tam gravia fuerunt tonitrua et fulgura, ut aliqui mente exciderent, aliqui exhalarent. Bruno vero episcopus qui missam canebat, et secretarius im-

peratoris cum aliis tribus dixerunt, se inter missarum solemnias vidisse sanctum Ambrosium imperatori indignando comminantem. Tunc imperat. Italia discessit ». Hæc Sigebertus, sed anno non suo, nempe trigesimo nono post millesimum.

3. *Canonizatio S. Simeonis.* — Hoc eodem anno, idem Benedictus papa retulit in sanctorum numerum Simeonem anachoretam inclusum apud Treviros, agente Poppone archiepiscopo Trevirensi, cum idem sanctus eodem anno ex hac vita migrasset : cujus res præclare gestæ, exposcente eodem archiepiscopo, scriptæ sunt ab Evervino abbate¹. Extant ipsæ quidem omni fide consignatæ. Mentio est ejusdem sancti in Actis Concilii Lemovicensis, deque ejusdem inter sanctos facta relatione Trithemius agit hoc anno in Chronico Hirsaugiensi.

4. *Res Hispaniæ.* — Quod ad rerum Hispaniarum statum attinet, bello civili inter se pugnantibus regibus, hoc anno occiso rege Legionensi Veremundo a Magno Fernando Castellæ rege, juncta sunt postea simul in unum duo illa regna. De obitu regis Legionis est vetus sepulchralis inscriptio his verbis :

HIC EST CONDITVS VEREMVNDVS JUNIOR REX LEGIONIS, FILIVS ADEFONSI REGIS. ISTE HABVIT GVERRAM CVM COGNATO SVO REGE MAGNO FERNANDO, ET INTERFECTVS EST AB ILLO IN TAMARA PRÆLIANDO, ERA MLXXV.

Anno sequenti a nece Veremundi occupata Legione, habita est initiatio Fernandi, seu Ferdinandi in regem Legionensem, in Ecclesia Sanctæ Mariæ, coronante cum Servando Legionensi episcopo feria quinta, mense Junii, die ejusdem vicesima secunda, ut auctor est Rodericus. Ex quo tempore idem rex magnopere propagavit principatum : cujus victoriæ causa visitavit profectus Compostellam Jacobum Apostolum, cujus precibus esset de hostibus victoriam consecutus, nuncupata vota persolvens.

¹ Herm. hoc an. et sequenti.

¹ Apud Sur. die 11 Jun. tom. III.

Anno periodi Græco-Romanæ 6530. — Anno Æræ Hisp. 1075. — Anno Hegiræ 429, inchoato die 14 Octob., Fer. 6. — Jesu Christi 1037.

— Benedicti IX papæ 5. — Conradi II reg. 14. imp. 11. Michaelis Paphlagonis imp. 4.

1. *Conradus imp. Italicos compescit.* — Ad num. 1 et seq. Postquam Wippo in libro de Vita Conradi Salici narravit cum hoc anno Natale Domini Veronæ celebrasse, ait : « Inde ad Mediolanum veniens ab Heriberto archiepiscopo magnifice receptus est in Ecclesia Sancti-Ambrosii. In ipsa die (nescimus cujus consilio) pæne gravis tumultus factus est populi Mediolanensis, quærentis ab imperatore, si vellet favere conjurationi eorum. Unde commotus imperator, præcepit ut omnes in urbem Papiensem ad generale colloquium venirent. Quod dum factum esset, cunctis reclamantibus, legem fecit imperator. In ipso Placito quidam Hugo comes, et alii quamplures Italici appellabant archiepiscopum Mediolanensem pro multis causis, quibus eos offenderat. Imperator vero vocato archiepiscopo, præcepit ut satisfaceret omnibus. Quod dum archiepiscopus renueret, sensit imperator omnem illam conjurationem Italiæ ipsius consilio factam esse. Et mox comprehenso illo, retinuit in sua potestate. Deinde commendavit eum in custodiam Popponi patriarchæ Aquilegiensi, et Chunoni duci Carantanorum, qui ab eis ductus est cum imperatorio usque Placentinam civitatem ». Paucis interpositis : « Imperator quæque castella sibi adversa destruxit, et iniquas conjurationes Italiæ, justa lege reducta, exinanivit, et veniens Ravennam, sanctum Pascha ibi celebravit.

2. *Episcopos tres in exilium mittit.* — « Eodem anno in Italia tres episcopi, Vercellensis, Cremonensis, Placentinus, apud imperatorem accusati sunt : quos imperator comprehensos exulati fecit. Quæ res displicuit multis, sacerdotes Christi sine iudicio damnari. Referebant nobis quidem piissimum nostrum Henricum regem, filium imperatoris, salva reverentia patris, clam detestari præsumptionem Cæsaris in archiepiscopum Mediolanensem atque in istos tres : et merito, quia sicut post judicalem sententiam depositionis nullus honor exhibendus est, sic ante iudicium magna reverentia sacerdotibus debetur ». Paulo post : « Eo tempore imperator Mediolanenses nimium afflixit ; et quoniam urbem antiquo opere et maxima multitudine munitam capere non poterat, quod in circuitu fuerat, igne et gladio consumpsit ». Paucis

interjectis : « Eodem tempore papa Cremonæ occurrebat imperatori, et honorifice receptus et dimissus, Romam reversus est. Imperator, disperso exercitu per regiones, ipse ad montosa loca secessit propter refrigerium, quoniam ea æstate magnus calor imminebat ».

3. *Moritur S. Symeon Syracusanus.* — Ad num. 3. Sanctus Symeon Syracusanus, Treviris ab aliquot annis inclusus, præsentem Ebervino qui ejus vitam scripsit, *animum sanctam hora tertia, kalendis Junii*, reddidit creatori, inquit idem Ebervinus. Annum ejus mortis Brouverus, lib. 11 Annal. Trevirensium, ex veteri Diario Bibliothecæ Sancti-Petri Trevirensis eruit. KALENDIS JUNII ANNO MXXXIV. INDICT. II. CONRADO SECUNDO REGNANTE ANNO X. IMPERANTE AUTEM VIII. POPPONE VIDELICET TREVIRORUM ARCHIEPISCOPO HONOREM SUI PONTIFICATUS REGENTE XVIII. OBIT B. SYMEON. Baronius ut hanc mortem in hunc annum differret, inductus est a Trithemio a se laudato. Natus erat in civitate Syracusana nobilissimis parentibus ; cumque Constantinopolim sacris litteris imbuendus missus fuisset, Hierosolymam devotionis causa venit, indeque post aliquot annos ad radices montis Sinai secessit, tandemque Antiochiam, unde in Franciam Trevirosque profectus est, ut suis locis diximus.

4. *Occiso Veremundo III regna Legionis et Castellæ uniuntur.* — Ad num. 4. *Veremundus* Legionensis rex, hujus nominis III, *Podagricus* cognominatus, cum a *Sanctio Majore* Navarræ rege magnis cladibus affectus fuisset, pacem cum eo pepigit Christianæ religioni in Hispania commodam. Data tunc *Sanctia* Veremundi regis soror *Ferdinando* Magno Sanctii Majoris filio, cum jure successionis in utrumque regnum. Verum post Sanctii Majoris mortem, quæ ante biennium contigit, ut ibidem vidimus, *Ferdinandus* tunc Castellæ rex *Veremundum* sororium de finibus lacesivit ; commissoque cum eo prælio interfectus est Veremundus Æra MLXXV, ut liquet ex hujus Epitaphio a Baronio recitato, ideoque hoc Christi anno : *Ferdinandus* victricibus armis continuo Legionense regnum, quod alioqui jure debebatur, occupavit, et ad Legionem regni caput victor exercitus advolvit. « Ferdinandus », inquit Rodericus Toletanus, lib. 6,

cap. 9, « ingrediens Legionem, in regem ab omnibus est receptus, et regali diademate decimo kalendas Jutii a venerabili Servando Legionensi episcopo insignitus est », anno nempe sequenti, quia Rerum Hispanicarum scriptores notant Ferdinandum inauguratum die xxii mensis Junii, *feria quinta*. Postquam autem Ferdinandus Legionensi regno auctus fuit, bellum in Mauros multis victoriis illustre confecit, ut infra videbimus.

5. *Emma Anglorum regina in Flandriam secedit.* — Anno superiori diximus *Haraldi* Angliæ regis jussu, *Alfridum* Ethelredi et Emmæ reginæ filium occisum esse; quod postquam encomiastes ejusdem reginæ narravit, ait: « At regina, tanti sceleris novitate perculsa, quid facto opus sit mente considerat tacita. Animus ejus diversus hue illucque rapitur, et se amplius tantæ perfidiæ credere cunctatur: quippe quæ perempti filii inconsolabiliter confundebatur mœrore, verum multo amplius ex ejusdem consolabatur certa requie. Hinc duplici, ut diximus,angebatur causa, necis videlicet filii miserabili mœstitia, tum vero reliquæ suæ vitæ dignitatisque diffidentia ». Paucis interpositis: « Exteras nationes petere sibi utile credit, quod sagacioratione finetenus perducit. Tamen quas petit non externas sibi experta est fore, quis (id est, quibus) immorans haud secus ac suis colitur decentissime.

Igitur pro re atque tempore quamplurimos potest sibi fidos optimates congregat. His præsentibus secreta cordis sui enucleat. A quibus etiam inito dominæ probato consilio, commeatus classium eorum apparatus exilio. Itaque prosperis rei flatibus transfretant, et cuidam stationi haud longe a castello Bruggensi distantî sese applicant. Hoc castellum Flandrensibus colonis incolitur; quod tum frequentia negotiatorum, tum affluentia omnium quæ prima mortales ducunt, famosissimum habetur. Ille equidem a marchione ejusdem provinciae Balduino magni et invictissimi principis filio, ejusque conjuge Athala, quæ interpretatur nobilissima Francorum regis Rotberti et reginæ Constantiæ filia, honorifice, uti se dignum erat, recipitur. De quibus etiam in prædicto oppido domus regali sumptui apta eidem reginæ tribuitur: cæterum obsonium benigne offertur. Quæ partim illa cum gratiarum actione suscipit, partimque sese non indigere quodammodo ostendit », quod hoc anno contigisse refert Huntindoniensis p. 364. Is Balduinus quintus est hujus nominis, qui an. mxxxvi Balduino IV patri successerat, et præcedentium Flandriæ comitum gloriam facile offuscavit, inquit Meyerus, qui addit, eum *Pium* fuisse cognominatum.

BENEDICTI IX ANNUS 5. — CHRISTI 1038.

1. *Conradus imperator Romam venit ad tyrannidem Pandulphi principis Capuani tollendam.* — Annus adest Redemptoris millesimus trigesimus octavus, Indictione sexta, quo imperator cum Benedicto Pontifice Romam se contulit, ad comprimendam tyrannidem Pandulphi principis Capuani. Sed quæ funesta, antequam Romam se conferret et Parmæ se contineret, acciderint, ab Herimanno sic breviter accipe: « Cum imperator Naialem Domini Parmæ ageret, orto inter Parmenses cives et exercitum tumultu, multi ceciderunt, et pluribus civibus trucidatis, ipsa civitas incendio consumpta est ». Post hæc autem Romam venisse testatur. At hæc de clade Parmensi ad superiorem annum potius pertinere videntur, si ratio habeatur semel

initi instituti a kalendis Januarii annos singulos exordiendi.

2. Porro veniendi Romam et inde in Campaniam adversus Pandulphum duplex legatio Cassinensium monachorum ipsum Conradum imperatorem permovit, ut Leo Ostiensis testatur his verbis¹: « Cum jam omnipotens Deus tantis iniquitatibus tantisque sancti hujus loci direptionibus decerneret modum imponere, et orationes ac gemitus servorum Dei, pupillorumque ac viduarum, pauperumque singultus ac lacrymæ in cælum intra ipsum auditionis sacrarium admissæ essent: anno divinæ Incarnationis millesimo trigesimo oc-

¹ Leo Ost. in Chron. Cass. l. II. c. 66.

tavo, Conradus imperator cum exercitu valido transmissis Alpibus in Italiam venit, adiitque Mediolanum: namque ejusdem civitatis archiepiscopo valde erat infensus. Illuc ex monasterii nostri majoribus quidam adeuntes, qui jam ad illum dudum in Germaniam exposituri calamitates suas profecti fuerant, quænam per tot annos a Pandulpho incommoda, quæ mala quantasque pressuras pertulerint flebiliter conquerentes, denuo illi retulerunt, orantes atque supplicantes, ut venire dignaretur ad beati Benedicti cœnobium, quod majores sui eatenus sub sua protectione reverenter habuerant, et de perniciosi tyranni manibus dignaretur eripere». Hæc de largitione duplici Leo.

3. Sed antequam res gestas adversus tyrannum hic describamus, quis iste fuerit in memoriam revocandum, et quæ facinora ejus fuerint, sunt recensenda. Conradi prædecessor Henricus in Italiam veniens, hunc ipsum Pandulphum principem Capuanum conspirantem cum Græcis adversum Romanum imperium, captivum in Germaniam secum duxit, qui ipso Henrico defuncto, a novo imperatore Conrado obtinuit ut reverteretur in patriam, ubi vitam privatam duceret. Reversus autem, auxilio Græcorum atque Normannorum Capuanum principatum recuperavit, atque Neapolim in suam potestatem redegit: nec his contentus circumcirca loca vastavit, eademque sibi tyrannice vindicavit, et bona monasteriorum, præcipue Cassinensis, sibi sacrilege subegit. De quibus hæc habet idem Leo Ostiensis post alia de eodem viro scelestissimo enarrata, atque de Leone monacho, qui solus resistere ausus est, hæc ait¹: «Nihil tunc monachis reliquum erat, nisi ut cum Jeremia lamentarentur ac dicerent²: Servi dominati sunt nobis, non fuit qui eriperet nos de manibus eorum. Supererat adhuc dominus Leo ille, major Ecclesiæ custos; is die quadam rectorium ingressus, cum servos, ut diximus, ad exequendum id ministerium reperisset, zelo religioso succensus, illos quidem foras cum magno dedecore expulit. Ad fratres vero conversus: Quousque tandem, ait, sub tanto nostri ordinis opprobrio, sub tam iniquo et impio nostrorum servorum dominio remoramur? Et omnes unanimiter hinc exeuntes, ad imperatorem ultra montes proficiscamur, eique nostræ calamitatis historiam plenam lamentis referamus! Ad hanc vocem exhortantis cuncti animos erigentes, simul illum sequi cœperunt. Hoc Todinus (ille servus nequam) per nuntium cognito, festinus ascendit, et illos longiuscule a monasterii porta progressos inveniens, protinus eoque desiliit, atque ad illorum vestigia corruit, orans et multis magnisque precibus postulans, ut redire dignarentur, se pro illorum arbitrio deinceps cuncta facturum. Illi tanta ejus satisfactione et pollicitatione permoti, ut erant benigno animo, sine mora redierunt». Fuit hic famulus monachorum, sed ob insignem nequitiam

præfecit eum monachis Pandulphus princeps, sed tunc de sua temeritate poenas dedit; nam Leo subdit:

4. «Sed quoniam prædictus Todinus in sua nequitia perstitit, non multo post sub Richerio abbate, vindice Deo, a quibusdam nostris captus et tonsuratus, indutusque sacco ad discernendam farinam, more famulorum in pistrino positus est». Porro etsi non omnes tunc profecti sunt monachi ad imperatorem, legatio tamen missa est ad ipsum tunc in Germania existentem. Sed et memorabile quiddam de eodem Pandulpho principe sic subdit: «Præterea princeps post dies aliquot cuidam fidelissimo suo, Adelgisio nomine, jubet, ut quantocius ad monasterium veniat, atque planetam et calicem imperatoris, et nonnulla alia, quæ modo non recolo, Ecclesiæ ornamenta præcipua Aquini et Sexti comitibus sub pignora habenda perniciter deferat. Cumque ille adveniens, cujus rei gratia adesset fratribus aperuisset: quidam ea danda quæ poscebantur, ne irato principe pejora paterentur, censebant. Cumque ille prorsus insisteret, Adam, qui tunc Ecclesiæ curam gerebat: Ego, inquit, quæ requiris, nec tibi, nec ulli prorsus hominum daturus sum, sed ea super ipsum beati Benedicti altare ponam: inde ille qui voluerit aut præsumperit, tollat. Quod cum fecisset, ille mox temerarius audacter accessit; et cum jamjam ad altare manus extenderet, mirabile dictu! protinus in faciem corruit, et vehementissima epilepsi subito paralysique correptus, universis adstantibus mirum de se miserumque spectaculum præbuit, ac de ipsa quidem infirmitate postera die quoquo modo convaluit, et sine effectu ad principem rediit, distorto tamen ore atque oculo usque ad obitum perstitit, cunctisque inquirentibus quoniam id sibi modo contigerit, non sine magna audientium admiratione referebat. Princeps hoc facto aliquantulum quidem reveritus est, sed in mente pessima diu non potuit voluntas bona durare. Post non multum enim temporis, iterum præfatum Basilium præpositum misit, omnemque monasterii thesaurum ad se per illum deferri jussit. De Capuano vero monasterio abstulit argenteas coronas, et codicem unum gemmis ornatum, et planetam citrinam optimam, et tria altaris pallia, cunctaque simul in arce, quam in monte Sanctæ Agathæ qui Capuæ imminet construxerat, condidit: in qua item arce innumera aliarum multarum Ecclesiarum viduarumque et pupillorum spolia, tum dolo tum violentia direpta condiderat». Hactenus Leo de tyrannide principis nefandissimi, ad quam avertendam, ut audisti, ad imperatorem missæ fuere iteratæ legationes: de cujus adventu et rebus ab eo gestis summa cum laude hæc idem auctor enarrat:

5. «Motus his fletibus imperator (ut erat piissimus) Romam concitus venit, ubi aliorum etiam innumerabilium, tam Ecclesiasticorum quam reliqui ordinis virorum innumeras contra Pandul-

¹ Leo Ost. Chron. Cass. l. II. c. 39. 60. 61. — ² Thren. v.

phum querelas accepit : habiloque consilio cum magnatibus suis, virorumque timentium Deum cohortatione commonitus, strenuos aliquot a latere suo viros ad principem mittit, mandans ante omnia, ut nisi indignationem suam vellet protinus experiri, Cassinensi cœnobio universa quæ abstulit bona, restituat, captivos cujuscumque ordinis seu generis viros statim dimittat, bonaque unicuique sua sine imminutione aliqua celeriter reddat. Legati igitur imperatoris Capuam adeunt, multisque frustra cum principe sermonibus habitis, ad imperatorem sine effectu aliquo redeunt : induraverat enim cor ejus Dominus sicut Pharaonis quondam¹, ut quod sponte noluerat facere, cogeretur invitus.

6. « Imperator contemni se a Pandulpho conspiciens, ira succensus, exercitu sumpto Cassinum venit. Cujus ministri, qui præmissi de more fuerant ad apparatus regium procurandum, cum monasterii curiam ingressi essent, Todinus protinus territus clam inter cæteros exiens profugus, arcem occupare festinat. Quod cum fratribus superioris monasterii relatum esset, unus ex senibus, Azo nomine, in medium prodians : Tempus, *inquit*, patres, tacendi transiit, et loquendi jam tempus advenit : descendamus igitur, et regis ministris quæcumque sunt necessaria præparemus. Quo facto, honorifice satis imperator acceptus hospitatusque est. Postridie vero cum uxore pariter et nuru sua beato Benedicto ac fratribus se commendaturus ascendit ad monasterium. Quem cum fratres ingenti cum gaudio et honorificentia summa et gratulatione suscepissent, post orationem illos allocuturus, ingressus est Capitulum. Eo residente, monachi simul omnes consurgentes ante illum se in faciem prosternunt, surgentesque : Ita vos, *inquiunt*, omnes pariter expectavimus, ita facies vestras adspicere optavimus, ita denique adventum vestrum præstolati sumus, sicut justorum animæ in inferno Redemptoris adventum expectasse noscuntur.

7. « Ad hæc lacrymis imperatore suffuso, omnes iterum in facies corruunt, ac demum surgentes, quæ incommoda, quas calamitates perpassi fuerint duodecim ferme per annos, ex quo Pandulphus reversus fuerat, per ordinem referunt : utque tantis cladibus finem dignaretur imponere, per Deum patremque Benedictum ejus loci præsulem obtestantes, exposcunt. Ad hæc imperator jurejurando se ob eam solummodo causam ad has partes transisse affirmat, eumque locum ex corde intimo se honoraturum protecturumque quoad viveret devotissime pollicens, jubet ut duodecim ex eis Capuæ se adeant, ibique quidquid fieri oporteat, illorum se consilio peracturum spondet. Sicque petita benedictione, Capuam profectus est, ut beati Benedicti cœnobium de servilitate nequissimi principis liberaret, ac devotissime illorum orationibus se commendans, posuit super altare beati

Benedicti coopertorium purpureum valde preliosum, auro phrygio ad mensuram palmi in circuitu pulcherrime ornatum.

8. « Interea Pandulphus Augustum Capuæ præstolari nequaquam ausus, una cum abbate memorato in arcem Sanctæ-Agathæ, quam summo studio munitissimam fecerat, per fugam se recepit. Imperator autem in ipsis vigiliis sanctæ Pentecostes ingreditur Capuam, postera die egressus urbem, apud Capuam veterem tentoria figit. Adsunt continuo monachi, orantes ut opera quæ promiserat exequatur, abbatem sibi constitui ante omnia postulantes. Ad quos imperator ex consilio : Non est, *inquit*, hoc meum : vos unum ex vestris eligite. Respondentibus non se habere idoneum, incongruumque asserentibus, inter tot perturbaciones in tanto apice quempiam sine magno vigore ac potentia ordinari, atque ita ex suis optare magnum aliquem præfici, Augustus in priori sententia persistas : Nequaquam, *inquit*, sed de congregatione vestra, sicut beati Benedicti regula præcipit, abbatem idoneum vobis eligite. Illi nihilominus in intentione pristina perseverantes, Augustæ etiam suffragiis suffulti, Richerium tandem, qui tunc Leonensi monasterio præerat, abbatem sibi constitui summis precibus postulabant. Hoc audito, imperator mœstus efficitur : erat enim sibi ille charissimus, et in omnibus negotiis suis utilissimus. At licet primum negare aliquatenus perstiterit, victus tandem monachorum vel ratione vel precibus, acquievit. Eumque advocans, renitentem licet ac plurimum fentem in abbatem eligendum fratribus tradidit.

9. « Interea Pandulphus imperatori per necessarios mandat, veniam postulans, trecentasque auri libras daturum spondens, si ejus gratiam veniamque mereretur. Cujus auri medietatem si in præsentiarum missurum, pro reliqua filium et nepotem obsides itidem missurum pollicens. Annuit imperator. Ille continuo pecuniam et obsides delegat. Quo facto, Pandulphum facti sui protinus pœnitet, ratusque civitatem, Augusto discedente, facile recepturum, aurum reliquum mittere recusavit. Imperator consilio cum suis Capuanisque magnatibus habito, Guaimario Salernitano principi Capuani tradidit principatus honorem. Rainulphum quoque ipsius Gainarii suggestione Aversæ comitem fecit, Adenulphum vero Capuanum archiepiscopum, quem nequam ille Pandulphus carceri manciparat, sedi suæ restituit; eisque Richerium abbatem universamque monasterii causam multum commendans, ut sua hanc vice tuerentur, Pandulphi secum obsides ducens, Beneventum concessit, atque inde per Picenum agrum patriam repctens, expleto vix anno defunctus, Henrico filio reliquit imperium ». Ilucisque Leo. Qui et inferius : « Hic Conradus imperator anno Domini millesimo trigesimo octavo, quo sanctus abbas Richerius ordinatus est, precibus Gislæ conjugis, filiique Henrici et Adeoli episcopi, cancella-

¹ Exod. iv.

rii sui, apud Beneventum Præceptum aureo sigillo bullatum, juxta priorum Augustorum morem de universis monasterii juribus fecit. Benedictus item papa Nonus Privilegium illi secundum Romanorum Pontificum consuetudinem nihilominus scripsit. Guaimarius princeps Præceptum fecit sancto Benedicto cum aurea bulla de omnibus monasterii pertinentiis, specialiter de Sancto-Urbano et Viccalbo, et decima parte totius civitatis Atinæ, etc. » Recitat idem plurimorum oblationes tunc temporis collatas eidem monasterio Cassinensi. Sic Deus, multis gaudiis compensans duodecim annorum afflictionem.

40. Quod autem ad imperatoris reditum spectat, quænam adversa in itinere ipsum pati contigerit in suo exercitu, Hermannus sic recitat: « Imperator cum ultra Romanas partes peragrasset, indeque per Adriatici maris oras remearet, mense Julio ingens exercitum pestilentia invasit, plurimosque passim exstinxit: inter quos Chunebildis regina, Henrici filii uxor, XVII kalend. August. defuncta, et ad castrum Lanaburg translata, ibique sepulta est. Hermannus quoque dux Alemanniæ, suis admodum flebili morte V kalend. August. occumbens, Tridenti tumultus est ». Hæc ipse.

41. *Divina ultio in Pandulphum.* — Sed dicere non prætermittamus quæ aliquandiu post hæc scelestissimum tyrannum Pandulphum secuta sunt mala, cum videlicet ab eo qui aufert spiritum principum ex hac vita divulsus, ad supernum tribunal reus ad sententiam accipiendam vocatus quam meruit, ad pœnam est condemnatus. Idem enim Leo, quæ Deus fieri nota mortalibus voluit, ad aliorum admonitionem ita posteris tradidit¹: « Quo tempore cum Sergius magister militum, qui Neapolitanæ urbi præsidebat, venatum in ipso S. Paschali sabbato pergens, silvam cum pueris ad apros capiendos esset ingressus, ac tensis retibus, ad insequendos eos sese cum canibus per silvam huc illucque diffunderet aper antequam retis laqueo fugiens involveretur, occupatus a venatoribus confossus et captus est. Cum autem hora jam tardior esset, et sol ad occasum vergens atram umbram jam pæne induceret terris, memoratus magister militum, ne noctis tenebris impediretur ad reditum, sumpta secum venatione quam cœperat, omni cum familia domum ocius remeare cœpit: uni ex pueris, Pythagoræ nomine, ut retia colligeret mandans et se perniciousiter subsequeretur. Puer itaque, collectis retibus, cum recto calle dominum suum concitus sequeretur, subito reverendo admodum vultu et habitu monachi ei se obviam conferunt. Cumque timore perterritus quinam essent inquireret, illi: Ne, inquiunt, metuas, tantum sequere nos.

42. « Et cum aliquandiu per eandem silvam graderentur, venerunt ad lacum quemdam cœnosum ac foetidum valde adspectuque terribilem, ibi-

que Pandulphum Capuanum principem, qui paulo ante defunctus fuerat, ferreis nexibus vinctum, atque in illius cœno lacus ad guttur usque demersum mirabiliter ostendunt. Interea, duo nigerrimi spiritus retortas ex agrestibus vitibus facientes, eumque per guttur ligantes, in ipsa lacus profunda merserunt, iterumque sursum extraxerunt. Cumque hæc sæpius facerent, prædictus puer trementi licet voce eum alloquitur, orans ut sibi cur talia pateretur ediceret. Ille vero flens et ejulans roganti puero mox ita respondit: Licet, o puer, pro innumeris sceleribus meis infinita mihi pœna præparata sit, nullam tamen ob aliam causam ista quam cernis excrucior pœna, nisi propter aureum calicem, quem de monasterio beati Benedicti sacrilega ductus cupiditate abstuli, eique moriens etiam restituere neglexi. Sed obnix te precor, ac per JESUM Christum Dominum, cujus ego infelix præcepta contemnens, in hanc sum demersus voraginem mortis, obtestor, ut Capuam ad uxorem meam vel ipse pergas vel nuntium dirigas, qui ei et tormenta quæ patior nuntiet, et ut calicem monasterio sancti Benedicti reddat. Indicat et ille: Quid, inquit, prod est, si ei nuntiavero? non enim quod te viderim vel quod talia patiaris creditura est. Ad quem ille: Hoc, ait, ei signum ex mei parte, quod te miserim, dabis: Quod Pandulphus Gualæ filius calicem ipsum sub pignore habeat, et ut reddita, quam illi debuimus pecunia recipiat illum, ac sancti Benedicti monasterio, omni postposita mora, restituat, sibi celeriter, rogo, insinuare non differas. His dictis, visio ab ejus oculis elabitur. Puer autem mox ut domum regressus est, infirmitate detentus, intra paucos dies defunctus est. Ea vero quæ viderat, quæve sibi fuerant dicta, omnibus ad se venientibus patefecit. Pandulphus etiam ipse, qui causa pignoris calicem apud se habebat, hoc ipso tempore, nescio qua causa, Neapolim pergens, hæc omnia ex ore ipsius Pythagoræ se audisse mihi postmodum retulit, per quem ipse quoque Pythagoras uxori illius omnia quæ de viro ejus viderat vel quæ ipsi mandaverat, Capuæ nuntiavit. Illa sibi potius quam viro consulens, pretium quod vir ejus mutuo acceperat, reddere noluit, neque calicem recipere, neque modo restituere curavit. Hæc huic operi idcirco inferenda putavimus, ut qui ista audierit, metuat etc. »

43. Sed et ad hoc tempus spectare noscuntur, quæ nos, secuti Petrum Damiani¹, ad tempora Ottonis Secundi imp. ea referentem, de ejusdem Pandulphi damnatione ad inferos superiori tomo posuimus, quæ hic fuerant collocanda ex sententia Leonis Ostiensis², exactiori censura res gestas suis quasque temporibus tribuentis, et quod tunc accidit ita narrantis:

44. « Eo etiam tempore, servus Dei quidam Neapolitanæ regionis in prærupta rupe juxta viam publicam solitarius morabatur. Hic dum nocturno

¹ Leo Ost. l. II. c. 62.

² Petr. Dam. Ep. ad Dam. c. 13. — ² Leo Ost. l. II. c. 85.

tempore psalleret, cellulæque fenestram horarum explorator aperiret, videt repente multos nigros homines, velut Æthiopes, longo ordine incedere, onustosque fœno sagmarios minare. Cum quinam essent curiosus inquireret, cujusve rei gratia iumentorum pabulata multa pararent : Dæmones, inquiunt, sumus, neque pecoribus alendis pabula, sed fomenta ignium ferimus hominibus comburendis. Præstolamur enim proxime Capuanum principem Pandulphum, qui jam extremum spiritum fundit. His auditis, vir Dei nuntium protinus Capuam dirigit exploratum : qui veniens, Pandulphum jam mortuum reperit. Quo defuncto, Vesuvius mons in flammam erupit, tantaque resinæ sulphureæ congeries ex eo protinus fluxit, ut torrentem faceret, alque decurrente impetu in mare descenderet». Hæc Leo de visione Pandulphi animæ ad inferos condemnatæ, ostensa tum eremitæ : sicut et alias sæpe Deus significare consuevit ex ignibus ob oculos hominum positis, inferni flammæ iræ Dei vindices nobis invisibiles, ut ejusmodi exemplis hand incongruis ea declaret, quæ sacris eloquiis comminatus est tormenta peccantibus, cum ait Apostolus¹ : «Secundum duritiam tuam et impenitens cor tuum thesaurizās tibi iram in die iræ, et revelationis iusti iudicis Dei.» Nec quod ad fœnum spectat, Apostolico caret (exemplo) monente nihil aliud agere peccantes quam in sui combustionem colligere fœnum et stipulam ad diem Domini, nempe retributionis, «quia», ut ait, «in igne revelabitur».

Cæterum etsi post ejus scelera, pœnas, quas dedit miser hic et apud inferos, modo narrare visum est opportunum; tamen adhuc plures vixisse eum annos liquet. Nam et de molitionibus ejus, postquam Conradus imperator recessit, hæc Leo Ostiensis habet,² : Interea Pandulphus, relicto in arce filio, ad expugnandam Capuam ingenium verlit, seque Constantinopolim contulit cum Basilio suo, opem ab imperatore petiturus. Cui imperator Guaimarii præmonitus nuntiis, non modo nullum adiutorium tulit, verum in exilium protinus egit, ubi duobus annis, quibus imperator ipse superfuit, miseram vitam ducens, relaxatus tandem, et absque ullo effectu reversus est». At secundum elogium reproborum, in Apocalypsi divinitus pronuntiatum³ : «Qui nocet, noceat adhuc; et qui in sordibus est, sordescat adhuc;» aliam injustiorem viam tentat ad recuperandum principatum, dum Northmannos colligens, quos sciret in Italia commorari, illis pro stipendio bona Cassinatensis monasterii pollicetur. Sed eos Deus precibus religiosorum pulsatus destruxit⁴, Rudolpho eorum principe ea die qua erat monasterium invasurus repentina morte subducto. Demum vero per Henricum imperatorem, ingenti auri pondere⁵ persoluto, restitutus in principatum, sed nunquam

conversus ad Deum, talem quem audisti vitæ exitum, perpetuo damnatus incendio, infelix accepit. Quod Deus non ejus causa, cui non profuit, sed ad posterorum utilitatem duplici voluit innotescere visione, quo mortales omnes, præsertim vero principes, discerent pietatem, illud semper ob oculos positum Domini monitum¹ : «Quid prodest homini, si universum mundum lucretur, animæ vero suæ detrimentum patiat? Aut quam dabit homo commutationem pro anima sua?» habentes, atque jugiter ad sobrietatem et prudentiam comparandam animo revolventes.

13. *Polonorum Ecclesia valde agitur.* — Quod spectat ad res Boreales, hoc ipso anno, nobilis Ecclesia Polonorum magnopere fluctuavit, imo dirum est passa naufragium invasione finitimorum Bohemorum sub Brzetislao ipsorum duce. Immanem tragœdiam hanc accurate descripsit ex antiquioribus Annalibus Longinus, cujus cum nobis fides magis probata reddatur, hic totius facti seriem ejusdem verbis totidem describemus. Sic se habet:

«Civili et plus quam civili, nobilium videlicet et popularium furore, regnum Poloniæ Brzetislaus Bohemiæ dux intelligens dilaceratum et collisum et suo rege atque principe destitutum, invadere illud velut paratam prædam, et amplioribus incommodis afficere, nullam illic sciens se resistantiam habiturum constituit. Ad quod illum non solum acceptæ in excæcatione avi sui Boleslai ducis Bohemiæ per Boleslaum Poloniæ regem injuriæ factæ memoria, et livor et odium simulque occupandi alieni regni, aut saltem exterminandi, stimulabat ambitio et prava voluntas. Collecta itaque nobilium et agrestium multitudine, Poloniam ingressus, civitates ejus magis opulentas et insignes, Uratislaviam videlicet et Posnamiam, oppidaque, vicos et villas, quæ civilis stridor nondum deleverat, diripit et exurit. Ad Gnesnam tandem Polonorum metropolim perveniens, illam, quoniam nec situ nec arte munita erat, sed neque defensores habebat, facile capit. Et quoniam in urbe tam vulgata et famosa, nobilem prædam suæ avaritiæ prout rebatur, suffecturam non reperit (neque enim illic nisi vilia mancipia relicta erant) ad prædanda diripiendaque sacra templa animi ambitione æstuante convertit. Sed illico omnipotens Dei dignatio potentiae suæ virtutem ostendens, mirabili prodigio, ne sacer locus maximo et præcipuo suo prædaretur thesauro, providit, et quantum sacrilegii facinus profanus et impius Brzetislaus esset admissurus monstravit. Dum enim dux ipse Brzetislaus Ecclesiam S. Mariæ metropolitam Gnesnensem spoliaturus, advenisset in ipso limine et aditu, tam ipse quam omnes milites sui, et universa plebs cæcitate et morbo lethargico, qui illos amplius quam triduo detinuit, quoties Ecclesiam irrumpere et sacra dirumpere tentabant, fuere percussi. Interea autem dierum illorum trium pietate Agni cælestis, quæ Polonos

¹ Rom. II. — ² Leo Ost. c. 66. — ³ Apoc. XXII. — ⁴ Leo Ost. l. II. c. 76. 77. — ⁵ Ibid. c. 81.

¹ Matth. XVI

verbere suæ plagæ mulctari, non ad extremum tamen consumi permisit, procuratas inducias, pauci ex ministris Ecclesiæ Gnesnensis, qui cæteris metu belli percussis diffugientibus remanserant, corpus S. Adalberti pontificis et martyris in ea conditum, quod verisimiliter Bohemos existimabant sublaturus e loco in quo annis pluribus universali devotione quieverat, abstrahunt, et in loco vili sabulo obrutum recondunt. Sub illis quoque diebus, Brzetislaus, Bohemiæ dux, in quæque propinqua vastationem jusserat extendi, et agrestes capi, in eam spem adductus, quod discordia Polonorum intestina sua quoque vastatione infesta Respub. Polonorum dissoluta Bohemica, fieret augustior. Jam Bohemos et ducem eorum Brzetislaum exanimatio lethargica et cæcitas a spolio in sacra perpetrando trium dierum continuatione deterruerat, resque apud eos, prout dignum erat, in prodigium et religionem versa, futuri sacrilegi facinus, ejusque magnitudinem demonstrans, conceptum furorem dissolvebat. Severus tamen, Pragensis episcopus, qui bello injusto hujusmodi se miscuerat, et Gnesnæ præsens aderat, Bohemorum animos sua sponte in prædam et spolia proclives, ad proseguendam cœptum scelus animat et accendit, asserens lethargiæ et excæcationis incommodum non propter in sacra Ecclesiæ Gnesnensis per eos commitendum spoliū, sed propter veteres Bohemorum prævaricationes et scelera in Catholicam religionem, abutendo illicitis connubiis, perpetrando homicidia, committendo adulteria, sectando chrietates, sabbata diesque festos operibus servilibus violando, incestuose vivendo, sepulturas mortuorum in locis profanis neglectis ædibus et cœmeteriis sacris faciendo, et templis spolia inferendo, pauperes opprimendo, injusta judicia exercendo, commissa accidisse. Ad quorum expiationem Severus pontifex Pragensis, duci et Bohemis triduanum jejuniū indicit. Quo expleto, jusjurandi execratione se adstringunt, ab omnibus enormibus facinoribus, quibus hactenus se inquinaverant, cessaturos. Post hæc Ecclesiam Gnesnensem ingressi, dum solita non ferirentur cæcitate, ad diripienda singula sacra et omnem Ecclesiæ suppellectilem rapacem animorum et manuum ingluviem, lavere eorum divinitatem credentes proposito, intendunt. Correptis autem Ecclesiæ Gnesnensis, qui remanserant, ministris, non probis solum et cruciatibus, sed etiam amplissimis promissis illos sollicitant, ut ubinam corpus beati Adalberti pontificis et martyris depositum sit, ostendant. Et illi quidem prudenti et industriosa vafrice usi, corpus Gaudentii Gnesnensis archiepiscopi, et beati Adalberti germani ostendunt; illudque esse corpus beati Adalberti mentiuntur. Creditum est illico a Bohemis. Nam et sarcophagi, locique et ornamentorum pontificalium, quibus vestitum erat corpus Gaudentii, qualitas fidem figmentis faciebat. Tollunt itaque Bohemi corpus Gaudentii, et immensa lætitia, putantes se corpus beati Adalberti martyris adeptos esse, exultant, et vulgaribus

canticis Ecclesiam Gnesnensem replent. Deinde illud magna solemnitatis pompa de Ecclesia afferunt, et in castra sua traducunt. Quæ quidem ludificatio justissima Dei lege et providentia evenisse Bohemis credenda est. Qui enim verum Dei et suum tunc pontificem pluribus probis contumeliis et injuriis viventem affecerant, qui eum geminata vice de sede sua ignominiose ejecerant, quique sævissima cæde fratres suos et universum genus suum odio et livore necaverant, ejus sacrum corpus Polonis, qui eum susceperant, honorificaverant, ejus monitis salutaribus paruerant, ejus corpus ex Prussia transtulerant, auferre, divinitate decernente, judicati sunt indigni. Sed nec sanctus ipse passus est ossa sua ad gentem apostatricem referri, quæ, quantum in ea erat, et in præsentem in se, et in absentem in suos sæviens, sui nominis memoriam conata est e rerum natura pertinaci animo tollere et abolere: et quorum vivens consortia solebat fugiendo aspernari, ab eisdem non tulit corpus suum contingi, neque in Bohemiam ex Polonia auferri. Convertit post præmissa Brzetislaus Bohemiæ dux animum ad cætera sacra diripienda, et quinque fratrum et martyrum corpora, videlicet Joannis, Benedicti, Isaac, Matthæi et Christini, quos sub Boleslao primo Polonorum rege, in loco ubi nunc est oppidum Cazimierz, eremiticam vitam in arctissima conversatione agentes, monstravimus martyrium passos, quæque Boleslaus rex primus ex loco passionis eorum Gnesnam transtulerat. Imaginem insuper Crucifixi, ex puro auro per Boleslaum Primum Polonorum regem fabrefactam, et trecentas habentem libras, triplici pondere corpus ejus appendentem: item tres tabulas, quibus altare majus adornatum fuerat, auro puro et variis pretiosisque lapidibus et gemmis superbas, per eundem Boleslaum Poloniæ regem donatas, cæteraque Ecclesiæ Gnesnensis vasa et clenodia rapit, et sacrilego facinore Ecclesiam Gnesnensem pluribus suis sacris ornamentis et decoris spoliat. Neque his contentus, campanas nobiles, et in magnitudine, valore atque sono raras aufert, et cum his omnibus, et populi rustici utriusque sexus multitudine, quam captam tenebat, in Bohemiam reversus est: et Pragam in vigilia S. Bartholomæi ingressus, sacras prædas in Ecclesia majori Pragensi collocat et deponit. Captivos vero rusticos Polonorum, inter quos sacerdotes ministrique Dei videbantur (tanta enim erat Bohemorum crudelitas, ut nec a christis Domini manum continerent) in colonias deduci distribuique ordinavit; corpus sancti Christini unius ex quinque fratribus, Moravis instantius petentibus, Olomucensi Ecclesiæ quæ nondum Cathedrali tunc fungebantur honore, donavit: quod apud illam in eam usque diem sub tabulis argenteis auro tinctis requiescit, suoque titulo et nomini cathedra Olomucensis extat dicata ». Hucusque Longinus. Quomodo autem de tot tantisque sacrilegiis anno sequenti delatæ sint per legatos ad hoc

missos ad Romanum Pontificem accusationes, et quid adversus sacrilegos fuerit judicatum; suo ex eodem auctore auditus cris.

16. *S. Stephani Hungariæ regis obitus sanctissimus.* — Hoc eodem anno defunctum esse S. Stephanum Hungariæ regem, qui his temporibus vixere nobiliores chronographi scriptis tradidere, Hermannus et Marianus Scotus, qui et mala post ejus obitum subsecuta singulis certisque annis consignarunt, quæ ut fieri contigerunt, recens audita scripserunt, ut plane solidior eorum fides haberi debeat, quam Cartulii vel Bonfinii recentiorum auctorum, ante annos quatuor ejusdem ad Deum transitum referentium. Leo Ostiensis ad hæc posteriora tempora potius quam anteriora reducens ejus obitum, de oblatione ab eo missa paulo ante ad monasterium Cassinense sic ait¹: « Circa hoc tempus sanctæ memoriæ Stephanus, Hungariæ rex, qui gente sua ad fidem Christi conversa, multis post mortem virtutibus claruit: auream crucem valde pulchram sancto patri Benedicto direxit, multis abbatem flagitans precibus, ut aliquos monachos ad instituendum in illis partibus monasterium mitteret. Cujus votis abbas obtemperans, duos de senioribus monasterii misit ». Quod autem Salomonem ejus successorem ponit, est omnino corrigendum; non enim Salomonem sed Petrum habuit successorem, ut Hermannus ait, sororis suæ filium.

17. De ejus autem ad Deum transitu Cartulii ista²: « Sentiens adesse migrationis tempus, accersitis episcopis et primoribus palatii, Christiano nomine gloriantibus, primum tractavit cum eis de substituendo rege; deinde paterne admonuit eos servare Catholicam fidem quam acceperant, amare justitiam, fraternæ charitati studere, humilitati dare operam: ante vero omnia, novellæ Christianismi plantationi curam et sollicitudinem adhibere. His dictis manus et oculos ad cælum erigens: Regina cælorum, inquit, mundi inelyta reparatrix, tuo patrocinio sanctam Ecclesiam cum clero et episcopis, regnumque cum primatibus et populo tuis precibus commendo. Quibus nunc ego ultimum vale dicens, animam quoque meam tuis manibus committo. Instabat tunc præcipua solemnitas et lætus angelis et hominibus Assumptionis beatissimæ Mariæ dies, in cujus gaudiis ut sui corporis fieret dissolutio, precibus a Domino contendit, lacrymis et gemitibus impetravit, sperans cumulationis misericordiæ se spem habiturum.

18. « Aderat ergo felix ille dies, ejus obitu mox felicitatis aliquam accessionem habiturus: circumstant cum clero episcopi, cum ministris principes et comites. Rex in medio jacens sacram percepit unctionem, sanctamque animam corporis et sanguinis Christi recreatam viatico, anno Domini Incarnationis MXXXIV (MXXXVII), in manus per-

petuæ Virginis et sanctorum angelorum æternæ quietis beatitudini inferendam tradidit ». Illeusque de ejus migratione Cartulius, qui eundem mandatum sepulturæ tradidit Albæregali, in Ecclesia sanctæ Dei genitricis Mariæ ab ipso ædificata, ejusque opera proxime dedicata. At invidia diaboli factum est, ut diu multumque regnum Hungaricum bellis civilibus et externis fuerit exagitatum, non sine magno Christianæ tum coalescentis religionis detrimento.

19. *Orientales per famem et per Sarracenos vexantur.* — Quod ad res pertinet Orientis, Constantinopoli hoc anno, Indictione sexta, tribus ferme mensibus laboratum est terræ motu, et assidua fame afflictus est populus, quando imperator Thessalonicensem archiepiscopum, stipem suis clericis negantem, digno supplicio eundem affectum ac relegatum privat. Sic tum temporis ipso imperatore sibi etiam quæ erant Ecclesiastici juris impie vindicante. Rem gestam Curopalata ita describit: « Cum clerici Thessalonicensenses accusassent Theophanem metropolitanum, ut qui contineret consueta ipsorum cibaria: imperator, qui Thessaloniciæ morabatur, verbis ipsum blandis hortabatur, ne Ecclesiæ populum cibariis a lege concessis privaret; qui cum acerbæ et asperæ se gerens non obediret, decrevit imperator ipsum fraude circumvenire, ejusque avaritiam punire. Mittit igitur quemdam ex suis ministris, ab eo petens mutuari sibi centenarium unum, quoad Byzantio sibi aurum afferretur. At ille adhibito jurejurando inficiatus est se habere nisi triginta libras. Et hunc quidem facessere jussit imperator; missisque qui pæni ejus perscrutarentur, reperit auri centenaria triginta tria, ex quibus clericis dat quæcumque ipsis debebantur a primo anno sacerdotii Theophanis usque ad præsens tempus: reliqua distribuit pauperibus, et metropolitanum ab Ecclesia expellit, in quodam agro relegat, præfecitque metropoli Prometheum etc.

20. « Qua pariter sexta Indictione, Georgius, cognomento Maniacus, militia clarissimus, ad debellandos Sarracenos Siciliam occupantes mittitur: qui feliciter pugnans, primum eorum prostravit exercitum, indeque tredecim civitates cepit, demumque universam insulam sibi subegit ». Hæc Curopalata. De his agens Leo Ostiensis hæc habet¹: « Per idem tempus Maniacus dux ab imperatore Constantinopolitano cum exercitu ad debellandos Sarracenos in Siciliam missus, cum Apuliæ atque Calabriæ milites in auxilium conscivisset, legatos ad Guaimarium, (principem Salernitanum) misit, orans ut Northmannorum illi auxilium mitteret. Ejus ille precibus annuens, Willelmum Drogonem et Winfridum Tancredi filios, qui a Northmannis nuper advenerant, cum trecentis aliis Northmannis militibus misit. Cumque maxima jam Siciliæ pars recuperata esset, et Syracusana civitas capta, eidem

¹ Leo Ost. l. II. c. 79. — ² Cart. in Vita S. Stephan. c. 21. Sur. tom. IV. die Aug.

¹ Leo Ost. l. II. c. 68.

duci a sene quodam S. Luciae mausoleum proditum est, ejusque corpus inde sublatum, et in theca

argentea positum, Constantinopolim cum omni honore et reverentia transmissum est ». Hæc Leo.

Anno periodi Græco-Romanæ 6531. — Anno Æræ Hispan. 1076. — Anno Hegiræ 430, inchoato die 2 Octob., Fer. 3. — Jesu Christi 1038.

— Benedicti IX papæ 6. — Conradi II reg. 13. imp. 12. Michaelis Paphlagonis imp. 5.

1. *Gesta a Conrado imp. in Italia.* — A num. 1 ad 11. Wippo in Vita Conradi Salici, quæ is in Italia sub anni superioris finem ac currenti gessit, hoc modo refert : « Eodem anno hyberno tempore collecto exercitu, imperator transcendens Padum, ad Parmam civitatem venit, ubi Natalem Domini celebravit, inchoante anno Dominicæ Inc. mxxxviii. In ipsa die Nativitatis Domini, inter Teutonicos et cives Parmenses magna seditio orta est, et quidam bene valens vir Cunradus, infertor ciborum imperatoris, cum aliis interfectus est. Unde commotus exercitus gladiis et igne cives aggreditur, et imperator post incendium magnam partem murorum destrui præcepit, ut eorum præsumptionem non fuisse inultam hæc ruina aliis civitatibus indicaret. Deinde imperator transcendens Apenninum montem, in Apuliam tendebat. Imperatrix vero Roman orandi gratia venit; inde ad imp. revertitur. Imp. autem ad terminos imperii sui perveniens, Trojam, Beneventanum et Capuam, aliasque civitates Apuliæ, lege et justitia stabilivit: dissensiones, quæ erant inter Normannos extraneos et indigenas, sola jussione sedavit, et cunctis offensionibus de regno sublatis, feliciter reversus, Viennam venit. Ibi dispositis obsidionibus et insidiis adversus Mediolanenses, qui adhuc sibi rebelles fuerant, cæterisque rebus ad voluntatem suam per regnum compositis, patriam revisere decrevit. Eo tempore, propter nimium calorem nimia contagio pestilentiae exercitum invasit: neque ætatibus neque personis pepercit. Ibi regina Chunelindis, conjux Henrici regis, XV kalend. Augusti, quasi in limine vitæ, ingressu mortis occubuit relinquens tantummodo solam filiolum de rege, quam postea pater Christo desponsans in abbatisam consecrari fecit. Filius imperatricis Hermannus, dux Alemannorum, juvenis bonæ indolis et in rebus bellicis strenuus, eadem peste gravatus, inter manus peritissimorum medicorum V kal. Augusti, non sine magno imperii detrimento obiit. Eodem mense atque sequenti, maxima multitudo exercitus morbo contacta periit ».

2. *Romam venit.* — Idem narrat Hermannus

Contractus in fusiori Chronico, chronographus Hildensheimensis, et Hepidannus, sed nullus eorum *Conradum imp.* Romæ fuisse innuit; imo cum Wippo diserte asserat, imperatricem in eam Urbem profectam, nulla imperatoris mentione facta, qui argumento negativo nimis tribuunt, inde deducere possent, *Conradum* hanc profectionem non instituisse. Verum Victor II papa, qui hoc tempore vivebat, lib. 2 Dialog., Petrus diaconus Casinensis, in Vita SS. Guinizonis et Januarii, monachorum Casinensium, in Actis SS. Bollandianis ad diem xxvi Maii recitata, Leo Ostiensis lib. 2, cap. 66, cujus verba Baronius num. 5 refert, et Glaber lib. 4, cap. 8 et seq., expressis verbis id referunt, isque quid ibi egerit hoc modo recitat: « De qua victoria (nempe quam Conradus anno mxxxv de Leuticis reportavit) idem imperator accepta confidentia, rursum collecto exercitu Italiam pergens, ad ipsam Urbem Romam progrediens, universos rebellionem, (id est, rebelles, ut pluribus ostendit Ducangius in Glossario) qui contra eum insurgere tentaverant, anno integro ibidem degens, prote-rendo compescuit ». Describit postea Glaber eclipsim solarem anno mxxxiii, die vicesima nona mensis Junii visam, cujus verba Baronius anno mxxxiii, num. 2, nosque eo anno, refert, subditque Glaber: « Tunc corda humani generis stupor ac pavor tenuit immensus. Quoniam illud intuentes intelligebant portendere quiddam fore superventuræ cladis humano generi triste. Nam eadem die, Natale videlicet Apostolorum, in Ecclesia beati Petri quidam de principibus Romanorum conspirantes in papam Romanum, cupientes illum interimere, sed minime valentes, a Sede tamen expulerunt. Sed ut præmisimus, tam pro hac re quam aliis insolenter patris, imperator illuc proficiscens, propriæ Sedi restituit. Necnon et alia passim in orbe cum in Ecclesiasticis, tum etiam in rebus sæcularibus multa contra jus fasque patrata ». Verum ex verbis illis Baronius loco laudato, Papebrocius in Conatu Chronico-Hist. ac in Joanne XIX, et plerique omnes qui de Romanis Pontificibus tractationem instituere, male intulerunt, *Joannem* Benedicti IX

decessorem eo anno et die quibus eclipsis solis apparuit, Sede expulsum, et postea a Conrado imp. in eam restitutum. Glaber enim tantum significat deliquium illud solare portendisse mala quæ tunc universo orbi accidere, et nominatim dejectionem Romani Pontificis a dignitate sua, quæ quinquennio post contigit, nempe currenti anno, eodemque die quo eclipsis præfata genus humanum terruerat. Sed laudati scriptores, Glabrum perperam interpretantes, existimarunt, eum non solum affirmare *Joannem papam*, eo die, quo eclipsis illa conspecta, sed etiam eodem anno, Christi sc. mxxxiii, a proceribus Romanorum male habitum licet certum sit, Glabrum *Benedictum Nonum* intendere, non vero Joannem XIX ejus decessorem, quem Conradus imp. non restituit.

3. *Gesta a Conrado imp. in Apulia.* — Victor III papa citatus, Petrus Diaconus, et Leo Ostiensis laudati diserte affirmant imperatorem Roma in Apuliam ad rebelles domandum profectum, quod Wippo et Leo Ostiensis præsentis anno factum expresse asserunt. Diem notat ejus Capuam ingressus Leo Ostiensis, cujus verba num. 8 Baronius recitat, *Agilias sanctæ Pentecostes*, diem scilicet xiii Maii. Idem Victor statum Apuliæ his verbis describit : « Pandulphus Capuanus princeps vir potentissimus ac ditissimus fuit, qui latrocinando, humanum sanguinem fundendo, civitates, oppida, ac aliorum prædia circumcirca manentium crudeliter auferens, suo subdidit dominatui. etc. Insuper etiam omnem thesaurum hujus monasterii (sc. Casinensis) auferens asportavit, etc. Cum vero jam omnipotens Deus tantis sceleribus finem vellet imponere, et lacrymæ et voces pupillorum, viduarum ac pauperum, necnon orationes precesque servorum Dei, in conspectu divinitatis ejus essent admissæ icul scriptum est : *Cor regis in manu Dei est* ; Conradi imp. menti inspiravit, ut ad vindicandas ejus Ecclesias, ac de tyrannorum manibus eruendas, Italiam revisens, (illuc enim anno mxxvii fuit) Romam veniret. Cum igitur Romano exercitu congregato, Italiam ingrediens Romam venisset, optimos ex latere suo viros Capuam mittere placuit Pandulpho principi, cui, ut bona sancti Benedicti injuste a se ablata, omni postposita mora restitueret, etc. Cumque ii qui missi ab imperatore fuerant Capuam venissent, multis cum eodem Pandulpho verbis frustra habitis, ad imperatorem sine effectu reversi sunt. At vero postquam imperator se contemptum a principe vidit, ira commotus, Romæ exercitu moto egrediens, Casinum venit, ac ad B. patris Benedicti limina conscendit, etc. Præfatus igitur Augustus Capuam ingressus, eidem Pandulpho principatus honorem auferens, alterum in locum ejus constituit ». Quæ fusius Baronius ex Leone Ostiensi refert. Erat adhuc in Italia imperator die decima octava mensis Julii, quo *Cunehildis*, ut ex mox dictis liquet, supremum diem obiit, qui ex Italia circa initium mensis Octobris digressus est, post-

quam *Benedictum IX* in Sedis Romanæ possessionem redintegrasset, quod mirum est taceri a Leone Ostiensi, Petro Casinensi, Victore III papa, et a Wippone, qui omnes de iis quæ in Italia egit sermonem habuere.

4. *Heribertus archiep. Mediolani excommunicatur.* — Hermannus Contractus, qui hujus restitutionis mentionem etiam non fecit, addit rem a laudalis auctoribus prætermissam : « Papa archiepiscopum Mediolanensem (nempe Heribertum) imperatori adhuc rebellantem excommunicat ». Quod chronographus Hildensbeimensis his verbis confirmat : « Prædictus Mediolanensium metropolitani ab Apostolico Pontifice, post justas crebras ammonitiones, communi episcoporum decreto, in Paschis anathematizatus, et a cætu fidelium est segregatus. Qui nihilominus in sua obstinatione perduravit, et imperatori pro posse in omnibus præsentem et etiam subsequentem annum incommo-davit ».

5. *Henricus a Conrado imp. patre Burgundiæ rex dicitur.* — Postquam Wippo res gestas ab imperatore in Italia narravit, subdit : « Reversus imperator in Bajoariam, ægrotantem exercitum medicinis et consilio reficiebat : et dum omne regnum serenitate pacis invenisset illustratum, ejusdem anni autumno Burgundiam adiit, et convocatis cunctis principibus regni, generale colloquium habuit cum eis : et diu desuetam atque pæne deletam legem tunc primum Burgundiam prælibare fecerat. Transactis tribus diebus generalis colloquii, quarta die primatibus regni cum universo populo landantibus atque rogantibus, imperator filio suo Henrico regi regnum Burgundiæ tradidit, eique fidelitatem denuo jurare fecit. Quem episcopi cum cæteris principibus in Ecclesiam Sancti-Stephani, quæ pro capella regis Soloduri habetur, deducentes, hymnis et canticis Deum laudabant, populo clamante et dicente, quod pax pacem generaret, si rex cum Cæsare regnaret, reversus imperator per Basileam descendens, Franciam Orientalem et Saxoniam atque Frisiam, *pacem firmando, legem faciendo revisit* ». Ita Wippo.

6. *Moritur S. Stephanus rex Hungariæ.* — A num. 16 ad 19. *Sanctum Stephanum* Hungariæ regem hoc anno spiritum Deo reddidisse, non solum Hermannus Contractus et Marianus Scotus a Baronio laudati; sed etiam Wippo ad an. mxxxviii testantur : « Eodem anno », inquit Wippo, « Stephanus rex Hungarorum obiit, relinquens regnum Petro filio sororis suæ ». Hunc Hermannus *de Venetia natum* dicit. Cartulini in Vita ejus diem emortualem notavit, festum nempe Assumptionis beatissimæ Virginis; sed annus in ea Vita corruptus, ibi enim Stephanus mortuus dicitur « anno Dominicæ Incarnat. millesimo trigesimo quarto » : quod librariis attribuendum, qui in diebus, mensibus et annis memorandis, sive eos cifris exprimant sive integris litteris, sæpe peccant. Ab initio conversionis suæ Stephanus usque ad mortem Ec-

clesiæ favit. Glaber lib. 3. cap. 1, ubi de ejus conversione egit, addit: « Tunc temporis cœperunt pæne universi, qui de Italia et Galliis ad Sepulchrum Domini Hierosolymis ire cupiebant, consuetum iter, quod erat per frelum maris, omittere, atque per hujus regionis patriam transitum habere. Ille vero (nempe S. Stephanus) tutissimam omnibus constituit viam: excipiebat ut fratres quoscunque videbat, dabatque illis immensa munera. Cujus rei gratia provocata innumerabilis multitudo tam nobilium quam vulgi populi, Hierosolymam abierunt ». Innocentius Undecimus ejus festum die secunda mensis Septembris celebrandum instituit, ob victoriam a Christianis eadem die in Budæ expugnatione e Turcis reportatam. Regnum Hungariæ fundavit S. *Stephanus*, quod a posterioribus regibus auctum ad Adriaticum et Euxinum usque extensum, per tot sæcula contra Tartaros et Turcas validissimum Christianorum propugnaculum fuit.

7. *Primus Normannorum in Siciliam adventus*. — Lupus Protospata in Chron. testatur Normannos primum hoc anno in Siciliam venisse: « Descendit Michael patricius et dux, qui et Sfondili vocabatur, et transfretavit cum Maniacho patricio in Siciliam »; quod et chronographus Barenensis habet. Hujus expeditionis causam narrat Leo Ostiensis lib. 2, cap. 68: « Per idem tempus, inquit, Maniacus dux ab imperatore Constantino-politano cum exercitu ad debellandos Saracenos in Siciliam missus, cum Apuliæ atque Calabriæ milites in auxilium conscivisset, legatos ad Gaimarium (qui princeps Salerni erat ejusque amicus) misit orans ut Normannorum illi auxilium mitteret ». Addit Leo, *Gaimarium* ejus precibus annuisse, et aliquot Normannos ad eum misisse. Cumque jam maxima Siciliæ pars recuperata esset, et Syracusana civitas capta paulo post, in sua redeuntibus Græcis atque Normannis, *Saraceni* mox cuncta quæ amiserant receperunt. Sed de his legendus Malatera, Sumontius in Hist. regni Neapolitani, alique, qui referunt Græcos *Normannorum* gloriæ invidentes male eos habuisse.

8. *Ferdinandus M. Saracenos in Lusitania bello vexat*. — In Lusitania vero *Ferdinandus Magnus*, qui nuper Legionense regnum Castellæ regno adjunxerat, victricia arma in Sarracenos etiam vertebat, eosque ad extremos Durii fines in veteris Lusitaniæ parte bello exagitabat. Illi anno superior, Hispaniæ regibus inter se dissidentibus, Castellam, Legionem et Gallæciam devastarant; verum currenti Ferdinandus, post varia minoris momenti oppida eis erepta, *Visum* urbem in intima Lusitania positam circumsevit, ac tandem vi expugnavit, uti narrat Sandovallius in ejus Vita, ex veteri Diario, quod Andreæ Resendii viri doctissimi fuit: « Æra MLXXVI, IV kal. Julii, capitur Visseo a rege Ferdinando, die xviii postquam obsideri cœpta est. Sequenti die hora tertia traditur munitio (arx scilicet a duce Sarraceno valide defensa). Capitur ibi occisor regis Adefonsi (Alphonsi nempe V Legionis regis, ictu sagittæ, dum eandem urbem obsideret, anno mxxvii occisi, ut ibidem insinuvimus), quem rex (nempe Ferdinandus) jussit necare a sagittariis, excavatis prius oculis, ambabus manibus, et pede de armotoste, (erat armotoste instrumentum, quo sagittarius, dum ballistam contenderet utebatur). Eadem Æra, XI kal. Augusti, capitur Lameco ab eodem rege, dedente Zadan Ibn-Huim filius Huvin Abo-Asen post multa pugna. Iste fuit major regulus regulis de Lameco, et multa populavit loca, a Durio usque Tanara et Vauca flumina ». Postea « Æra MLXXVII (anno nempe Christi mxxxix), capiuntur in extrema Durii eis et citra multæ villæ, etc. et usque ad ripa Tagi ». Dein post capta varia veteris Castellæ oppida in regnum Toletanum ingressus *Almenonem*, regem Saracenum vectigalem fecit, uti habet idem Sandovallius, tam in Hispaniæ monasteriis, quam in Vita Ferdinandi regis, qui addit *Ferdinandum*, summa pietate in monasterium S. Petri Cluniacensis affectum, illud annua multorum aureorum pensione impertiisse. Unde non mirum si cognomento *Magni* exornatus fuerit, cum tot illud victoriæ de Mauris reportatæ pepererint.

BENEDICTI IX ANNUS 6. — CHRISTI 1039.

1. *Conrado imp. mortuo succedit filius Henricus.* — Millesimus trigesimus nonus annus sequitur, Indictione septima inchoatus, « quo nonis Junii, ipsa Pentecostes die tertia, Conradus imperator apud Trajectum Frisiae inopinata morte subito decessit ». Hæc Hermannus et alii ejusdem temporis scriptores. Vacat imperium; in regnum autem Germaniæ ejus filius Henricus successit, ab ipso rex antea institutus. Quod autem Glaber¹ anno quadragesimo primo post millesimum contigisse tradat Conradi obitum, error putatur in Codicem irrepsisse, ut loco, unde quadragesimo anno, vitio librorum positum sit **XLI**. Leo autem Ostiensis² hunc annum terminum certum ponit vitæ Conradi imperatoris.

3. *Michael imperator Orientis dæmone torquetur.* — Quod pertinet ad res Orientis, cum Michael imperator, in dies magis magisque a dæmone quo obsidebatur acrius torqueretur, « nec », inquit Curopalata, « inveniret qua ratione se liberaret, misit in omnes regiones et insulas presbyteris singulis nummos duos, monachis unum, baptizavitque recens natos pueros, traditis singulis nummo uno et milliaresis quatuor. Tamen nihil horum profuit, imo vero malum augebatur, opitulante quoque hydropisis morbo. Hoc tempore etiam frequentes terræ motus facti sunt, et imbrium magna vis decidit, grassatusque est morbus, angina dictus, ita ut non possent vivi mortuos efferre ».

Ita infelix Orientalis Ecclesia, ubi schismate se divisit a capite, omnibus charismatibus, quæ sicut unguentum descendebant (ait Psalmus³) in barbam Aaron, et profluebant in totum corpus usque ad oram vestimenti ejus, privata fuisse cognoscitur, ut non fuerit facile reperire qui his temporibus vel unum sanaret energumenum, aliudve aliquod miraculum ederet: nec esset qui iram Dei placare posset, ingruentibus licet gravioribus ubique malis. Hæc quidem ita se habuisse, ipsorum historici, res eorum diffuse prosecuti, ut Curopalata, haud fidem dubiam faciunt. Subdit

autem idem auctor, quod ipse Michael imperator, relicta Joanni fratri imperii cura, jugiter moraretur Thessalonice apud S. Demetrium martyrem, idem supplicans ac petens, ut ab obsidente dæmone liberaretur. Sed etsi levamen aliquod sensit aliquando, nunquam tamen potuit liberari.

3. *Legatio Polonorum ad Benedictum papam.* — Hoc anno (ut Longinus est auctor) missa est legatio ab Ecclesia Polonorum ad Benedictum Romanum Pontificem: quam occasione, sic aperit idem auctor sub hoc eodem Redemptoris anno millesimo trigesimo nono: « Gravem et enormem Gnesnensis Ecclesiæ deprædationem, per impium Brzetislaum Bohemiæ ducem et suum exercitum, in sacrarum et Deo dedicatarum rerum sublacione et in Bohemiam asportatione commissam, metropolitanus Gnesnensis Stephanus Primus, qui successit Bossuthæ, molesto et amaro animo ferens, Rachelini archiepiscopi Cracoviensis, cæterorumque episcoporum Poloniæ communicato consilio, nuntios notabiles Romam mittit, coram summo Pontifice et cardinalibus de perpetrato per ducem Brzetislaum et Bohemos sacrilegio questuros. Qui cum ad Urbem accessissent, et coram Benedicto papa Nono, audientia obtenta, nefanda ducis Brzetislai et Bohemorum facinora, sacrilegia in Deum et sanctos ejus, spolia in sacra et templa, cædem et captivitatem in Orthodoxos et fideles, rapinam in omnes fidei narratione exposuissent, Severum quoque Pragensem episcopum omnium sacrilegiorum hujusmodi participem et conscium fuisse, sacrilegiaque singula ejus suasu et consilio fuisse patrata significassent: Pontifex Romanus non secus quam justum erat motus, longam cum cardinalibus aliisque qui tunc in Urbe aderant prælatis, tenuit deliberationem. Et cum omnium pari unanimique sententia execrabile scelus in Gnesnensem Ecclesiam commissum mucrone Ecclesiastico vindicandum censeretur, diversa tamen edebantur in modo ultionis inferendo vota. Et alii quidem Brzetislaum omni ducali honore et fidelium communionem privandum esse censebant: alii per triennium in exilium agendum, nempe salubrem aliquam peregrinationem ad loca sancta susci-

¹ Glab. l. v. c. 4. — ² Leo Ost. l. II, c. 66. — ³ Psal. CXXXII.

piendo, tanto temporis spatio patria carilurum. Severum vero episcopum Pragensem a pontificali gradu dejiciendum, et in monasterium pro expiatione tanti sceleris perpetuam illic pœnitentiam acturum, trudendum, damnandum esse. Alii tam ducem Brzetislaum quam Severum Pragensem episcopum usque ad plenam omnium sacrorum restitutionem anathematizandos fore. Hæc ultima sententia velut mitior et media ab omnibus accepta est.

4. « Verum quoniam Sedes Apostolica, parte altera non audita, decreta sua promulgare non consuevit; personalis contra ducem Brzetislaum et Severum episcopum Pragensem citatio promulgatur. Quorum nuntii dum Romam advenissent, et pro scelere sacrilegii diluendo verba coram summo Pontifice facerent, scelus illud, de quo per Ecclesiam Polonicam accusabantur, non diffitentur ducem Brzetislaum et episcopum Severum admisisse: non tamen temeritate, inquit, impia, sed devotione et pietate forsitan stulta, sanctorum ossa cæteraque sanctuariorum vasa ex Gnesna sublata, et Pragam relata esse. Belli enim jure, quod Polonorum genti inferebat, credidit se spoliū illud juste Brzetislaus dux noster et populus Bohemicus admisisse. Tum vero papa, nuntiis correptis, stultam et deliram eorum excusationem ostendit; nec licere quantumcumque justo bello Ecclesias Dei suis sanctuariis et rebus Deo dicatis spoliari, aut ossa sanctorum de locis Catholicis sine Sedis Apostolicæ speciali auctoritate et consensu transferri, cum bella hominibus, non cælestibus et sacris indicare conveniat. Proinde autem singula sanctuaria Ecclesiæ Gnesnensi cæterisque Polonorum Ecclesiis erepta aut restituerent, aut tam ducem Brzetislaum quam Severum episcopum Pragensem Apostolico rigore scirent excommunicandum.

5. « Legati vero Bohemorum, omnium ablatorum restitutione ducis et episcopi nomine repromissa, tam ducem quam episcopum ad complendum quæ verbo promiserant obligant, largis

sermonibus pollicendo, tam ducem quam episcopum decreto Apostolico in omnibus devote et humiliter parituros. In hanc pollicitationem dimissi, plerosque cardinalium nuntii Bohemorum adeunt, pluribusque largitionibus et promissis illos sollicitant, ut suis consiliis et suffragiis decretum Apostolicum de restituendis sanctuariis Ecclesiæ Gnesnensi rescindant, aut si rescindere non possent respectibus aliquibus, executionem ejus suspendant. Inescati cardinales pretiis et precibus, cœptam in sacrilegium principemque severitatem et ipsi remittunt, et Pontifici remittendum persuadent. Non convenire, aiunt, gravitati Apostolicæ, ducem Bohemiæ, qui per nuntios suos omnia illicite recepta restitutum, et præceptis Apostolicis se exhibet staturum, censuris aliquibus percelli, et in sugillationem publicam principem parere paratum adduci; ne injuste irritatus, ad rebellionem justam se conferat ». Hæc auctor. Tales erant illi a Benedicto creati sui similes cardinales. Verum ejusmodi judicium hoc anno cœptum, ad quadriennium usque productum cum in Ecclesia Romana inter tres conflatum est schisma, idem demonstrat his verbis quæ sequuntur, cum pergit: « Multifaria tunc erat Sedem Romanam ambientium et de ea contendentium collisio. Nam Sabinensis episcopus, qui se Silvestrum nominabat, et Joannes archipresbyter Sancti-Joannis ante portam Latinam, qui et Gregorius Sextus, contra Benedictum Nonum papatum usurpabant. Quapropter persuasio cardinalium, censurarum promulgationem corrupta mente contra ducem Bohemiæ dissuadentium tunc facile admissa est, et justitia Polonorum concertatione hujusmodi et schismate de papatu protelata et impedita suppressaque, Polonorum pontificibus illam promovere et sollicitare desistentibus; bello insuper civili Poloniæ regnum premente emarcuit ». Hucusque Longinus. Et quidem a Benedicto illo Pontifice quid aliud expectandum erat, quam judicia cuncta recta subverti? At de schismate suo loco dicendum erit.

Anno periodi Græco-Romanæ 6532. — Anno Æræ Hispan. 1077. — Anno Hegiræ 431, inchoato die 22 Sept., Fer. 7. — Jesu Christi 1039.

— Benedicti IX papæ 7. — Henrici III reg. 1. Michaelis Paphlagonis imp. 6.

1. *Obitus Conradi imp.* — Ad num. 4. « Anno Dominicæ Incarnationis MXXXIX », inquit Wippo in Vita Conradi Salici, « dum imperator Cunradus jam in filio suo rege Henrico regni rem, imperii autem spem bene locatam confideret, cumque pæne omnia per regnum ad libitum suum inclinata videret, ipso anno diem sanctum Pentecostes apud Trajectum civitatem Frisiæ celebravit, ubi cum sacratissimam solemnitatem venerando magnifice cum filio et imperatrice coronatus procederet ad mensam, mediocri dolore correptus est, tamen, ne tantæ dici lætitiâ perturbaret, dolorem dissimulavit. Sequenti die, cum morbus lethalis vehementer insisteret, imperatricem cum filio rege ad prandium exire jubet de cubiculo. Interea imperator finem sibi imminere sentiens, sicut in vita sanus, in actu semper constans et strenuus fuit, ita in extremis nihil segnioris fidei permansit: et vocatis episcopis corpus et sanguinem Domini, et crucem sanctam cum reliquiis sanctorum apportari fecerat: et erigens se cum lacrymis valde affectuosus, in confessione pura et oratione intenta, sanctorum communionem et peccatorum remissionem devotissime accipiens, imperatrici et filio regi Henrico per fida monita valedicens, ex hac vita migravit XI nonas Junii, (legendum cum chronographo Hildensheimensi, II nonas Junii) feria II, Indictione VII ». Idem habent alii historici, qui de Conradi Salici morte mentionem fecere. *Trajecti* autem Frisiæ civitatis nomine, non *Trajectum* ad Mosam, *superius* appellatum, sed *Trajectum inferius*, quod tum Frisiæ urbs habebatur, Wippo intelligit. Ea Vita Baronii tempore lucem non viderat, ideoque ex ea historia Ecclesiastica illustranda fuit. « Filius ejus dominus Heinrichus in omni quidem virtutum exhibitione perstrenuus, ante scilicet in specialem regni monarchiam generalis cleri populique præelectione, nunc autem sine quavis contradictionis molestia, summa Christianismi concordia, solio patris, Deo gratias, est inthronizatus », inquit chronographus Hildensheimensis.

2. *Michael imp. ægrotat.* — Ad num. 2. Narrat Baronius ex Curopalate, cum *Michael* imp. in dies magis magisque a dæmone torqueretur, mi-

sisse in omnes regiones pecuniam presbyteris et monachis; morbum tamen, accedente etiam hydropisi auctum esse. Verum initio ejus imperii ex Michael Psello ostendimus, *Michael* a dæmone obsessum non fuisse, sed sonto morbo laborasse.

3. *Templa ædificat.* — « Ceterum », inquit Psellus, « imperator manifeste jam gravi corpore intumuerat, intercutemque aqua laborare cunctis palam erat. Quamobrem tum alia præstabat ut morbum averruncaret, expiationibus usus est lustrationibus, tum et in suburbano pro manibus ad ortum solis illustre templum extruxit, haud omnem ejus crepidinem basinque evertens, sed fundamenta prioribus majora circumducens. Erat enim ibi fanum quoddam nihil ipsum splendidum habens, nec structura insigne. Hoc ille pulchriore forma componens, portasque et xystos exterius fabricatus, ac muris obsepiens, exstructisque ædibus condecorans, divinam religiosæ exercitationis palæstram fecit: omnem prope superiorum imp. in extruendis sacris ædibus ac templis operam ac facultatem obscurans. Certam enim proportionem ima summis concine aptavit, immensumque decus ædificiis rite consertis ac harmonia affinxit, lapidesque nobilissimos præ cæteris stratoque solo adhibuit, auroque et tessellato opere ædem omnem illustravit, necnon picturæ arte, vivisque ac spirantibus (ut quis dicat) imaginibus, ubi par erat, templum perornavit. Præterea lavacrorum gratias aquarumque copiam, quæcumque denique alia oculos oblectare solent, omnemque sensum ad proprium sensibile movere, huic utique templo adjunxit, et [ut ita loquar] contemperavit. Hæc vero præstabat, tum ut Deo honorem haberet, tum etiam, ut ejus famulos sibi propitios redderet, si quomodo tumefacta illius viscera sanarent. Verum nihil amplius erat, completo illi vitæ modulo ac dissoluta compage. Quamobrem ea ille deposita spe, futurum judicium sibi ipse modis omnibus præconciliabat, indeque prorsus iis maculis, quas animo contraxisset, liberari satagebat.

4. *Magiæ false incusatus.* — « Aiunt sane quidam eorum, qui non benevole admodum erga illius affecti familiam sunt, animique libidine judicia ferunt, priusquam is imperii sceptrum capesce-

ret, nefandas quasdam ceremonias eam in rem fuisse adhibitas, visaque obscura eorum spirituum qui aerem obsident, rerum illi summam pollicitam esse, et ex illo ut Deum negaret mercedem poposcisse. Hoc igitur esse aiunt quo torqueretur, mentisque procella quateretur, atque ad ejusmodi expiationes moveretur. Si quidem igitur verus hic sermo, noverint qui illi devotionis socii extiterunt. Sin autem falsus, meus rursus scopus victor exeat. Ad me sane quod affinet, qui sciam ex hominum genio esse ut fingant crimina, haud facile vulgi rumoribus ac calumniis animum accommodo; sed ea quæferuntur argumentis probans, inde mihi ipse rerum fidem statuo. Novi certe hominem, et post adeptum imperium, omnis virtutis edidisse speciem, nec divinis solum templis animum adhibuisse, sed et viris philosophicis operam dedisse ac eximie coluisse. Philosophos autem dico, non qui rerum substantias scrutentur, nec qui mundi primordia quærant, suæ vero salutis principia nulla cura prosequantur; sed qui spreto mundo cum supramundanis ac cælestibus vitam instituant.

5. *Philosophos et gravibus morbis affectos colit.* — « Quis enim eum latuit ejus generis hominum? quam non terræ marisque scrutatus est oram rupiumque anfractus, et antea abditas terræ cavernas, ut quem in eis latitantium deprehenderet? deprehensos autem in regiam adductos, quo non honore prosequeretur? pulvere conspersos detergens illorum pedes, tum illis circumfusus suaviterque deosculans; necnon ipsorum pannos laceros in oculo gestans; atque illos quidem in regio thoro collocans, ipse vero in humile quoddam stratum grandi quodam lapide caput sustinente, se ipse projiciens, aliaque admirationis plena præstabat. Dico autem non cui propositum sit, ut laudationem contexam, sed ut ea quæ gesta sunt in Annales referam. Quod enim vulgo cavere solent, ne cum iis quorum oblata sunt corpora, leprosisque consuetudinem habeant; ille magnificentius quid agebat, qui se ad illos conferret, vultumque exis illorum corporibus ac ulceribus admoveret, atque etiam sinu confoveret, et amplexaretur atque balneis recrearet, velutique dominis servus emptitius illis adstaret. Obstruantur ergo nequissimorum hominum ora, nec eorum linguis maledicis ac calumniæ tinctis veneno imperator subjaceat ». Pluribus postea Psellus de piis ejus foundationibus et exercitiis agit.

6. *Emma regina cum Hardecanutio filio in Angliam redire cogitat.* — Hoc anno Emma Angliæ regina, quæ Haraldi Angliæ regis persecutionem fugiens in Flandriam secesserat, *Hardecanutum* Daniæ regem et *Eduardum* filios ad se vocavit. Rem verbi encomiastes ejusdem reginæ narrabo: « In tanta posita securitate, legatos suo filio mittit Eduardo (est is Eduardus cognomento Confessor, quem regem videbimus) postulatum, ne versus se pigritaretur venire. Quibus ille obau-

diens equum conscendit, et ad matrem usque pervenit. Sed ubi eis copia data est mutuo loquendi, filius se matris fortunas edocet miserari, sed nullo modo posse auxiliari, cum Anglici optimates nullum ei fecerint jusjurandum. Quæ res indicabat a fratre auxilium expetendum, etc. Post cujus reditum, nuntios Hardecanutoni filio suo legat, etc. Ardebat enim animo fratris (nempe Alfridi nefarie occisi) injurias ultum ire, imo etiam matris legationi parere. Hinc utrique rei prævidens, quam maximas potest navium militumque parat, etc. Denique maris ira pacata, omnique tempestate sedata, prosperis flatibus sinus pandit velorum: sicque secundo usus cursu, ad Brugensem sese applicuit portum, etc. Nec longe post filio cum matre morante, et memoratæ visionis promissa spectante (jam enim dixerat in somno ei significatum fuisse Haraldum periturum) nuntii læta ferentes nuntia adventant, qui videlicet Haraldum mortuum nuntiant, qui etiam referunt Anglicos ei principes nolle adversari, sed multimodis jubilationis sibi conlætari: unde regnum hæreditario jure sibi debitum non dedignetur repetere, et suæ dignitati, eorumque saluti juxta in medium consulere.

7. *Mortuo Haraldo Hardecanutus fit rex Angliæ.* — « His Hardecanutus materque animati, repetere statuunt oras aviti regni. Cujus rei fama ut populares impulit aures, mox cuncta dolore et luctu compleri cerneret, etc. Sic toto plangebatur littore, sic ab omni plorabatur populo astante, etc. Tandem vicit amor patriæ, et omnibus viritim osculatis, et flebili eis dicto vale, cum filio suisque altum petit mare, non absque magna lacrymarum utrique fusa ubertate. Igitur principes Anglici parum prævenisse fidentes legatione, antequam ab illis transfretaretur, obvii sunt facti, optimum factu rati, ut et regi reginæque satisfacerent, et se devotos eorum dominationi subderent. His ita peractis, et omnibus suis in pacis tranquillitate compositis, fraterno correptus amore nuntios mittit ad Eduardum, rogans ut veniens secum obtineret regnum. Qui fratris jussioni obediens, Anglicas partes advehitur, et mater amboque filii regni paratis commodis nulla lite intercedente ntuntur. Hic fides habetur regni sociis, hic inviolabile viget lædus materni fraternique amoris ». Qua narratione encomiastes Emmæ reginæ opusculum suum absolvit, cui eo major fides habenda, quod narret quæ videre potuit. Hæc autem partim hoc anno, partim sequenti gesta. Malmesburiensis enim lib. 2 de Gest. Reg. Angl. cap. 12, Huntindoniensis et Simeon Dunelmensis produnt, *Hardecanutum* regem Flandriam devectum ad Emmam matrem hoc anno venisse, et insequenti *Haraldum* regem obiisse.

8. *Canonici regulares ante hoc sæculum non instituti.* — Canonicos regulares, qui communi domo, communi mensa ac communibus bonis ntuntur, et sancti Augustini regulam profitentur,

hoc sæculo initium habuisse, certum tandem esse debet. Nulla enim ante hæc tempora hujus institutionis in scriptoribus Ecclesiasticis apparent vestigia, et Abaelardus prioribus sæculi insequentis annis eam tunc novam fuisse his verbis indicat : « Cur et vos ipsi canonici regulares a vobis ipsis noviter appellati, sicut et noviter exorti, magno ambito murorum claustra extra sepientes more monachorum ab illecebris et tentationibus sæculi manetis divisi ? » Ita ille in Epist. iii, pag. 236, contra quemdam canonic. regul. Nicolaus quidem II in Concilio Romano anno MLIX habito, de canonicis regularibus loquens ait : « Rogantes monemus, ut ad Apostolicam, communem scilicet vitam, summopere pervenire studeant ». Quo similibusve locis Gabriel Pennotus in lib. de canonicis regul. aliique plures innixi, canonicos a tempore Apostolorum in Ecclesia fuisse credidere. Verum ex hoc et aliis hujusmodi locis non magis sequitur hoc vivendi genus ab Apostolis originem sumere, et prioribus Ecclesiæ sæculis viguisse, quam monachos Eliæ et Elisæi tempore jam floruisse, ex eo quod S. Hieronymus, Sozomenus, aliique, horum originem ad utrumque referre videantur; utrobique enim de similitudine vitæ tantum sermo est, quia canonici regulares in communitate viventes, Apostolorum imitatores sunt; ideoque eorum institutio *Apostolica* dici potest. Denique vanum est effugium quorundam scriptorum, qui respondent Abaelardum in præfata Epistola de canonicis Ordinis Præmonstratensis, qui revera novi erant, intelligendum; luce enim meridiana clarius patet Abaelardum loqui de omnibus omnino canonicis regularibus in tota illa Epistola, qua ideo omnes contrariæ sententiæ falsæ demonstrantur.

9. *Nullum certum habent institutorem.* — Frustra quis quæreret horum canonicorum certum auctorem ac institutorem, cum canonicorum regularium societates in variis regionibus erectæ ab una aliqua domo profectæ non sint, sed singulæ pro personarum conditione et temporum ac locorum opportunitate natæ exortæque fuerint. Cum enim canonici præcepta canonum negligerent, et a prisca canonicorum observatione longe deflecerent, non defuere, qui hæc damna reparare, et salubria malis grassantibus remedia adhibere conati fuerint. Quidam sanctam hanc institutionem *Ivoni Carnotensi episcopo*, qui apud Bellovacos canonicos regulares in Ecclesia S. Quintini primus congregavit, magnusque ejus promotor fuit, attribuunt. Verum hæc verba, quæ apud Sigebertum in Chron. ad annum MLXXVIII leguntur, addititia sunt, ut patet ex accurata Auberti Miræi editione, in qua hæc non habentur : « Ab hoc tempore cœpit refflorere in Ecclesia B. Quintini Belvacensi canonicus ordo, primum ab Apostolis, postea a beato Augustino episcopo regulariter institutus, sub magistro Ivone venerabili ejusdem Ecclesiæ præposito, postea Carnotensium episcopo ». Elsi Sigebertus id scripsisset aliud non indicaret, quam hunc ordinem eo anno in Ecclesia S. Quintini tunc primum visum, quod et Sigeberti interpolator tantum intellexit.

10. *Primum eorum monasterium Avenione fundatum.* — Ex variis canonicorum regularium congregationibus aut domibus nulla antiquior *Sanrufensi*, quæ Avenione hoc anno exorta est in Ecclesia Sancti-Rufi extra muros Avenionenses, in æde S. Rufo sacra, quæ congregationi nomen fecit. In libro enim 3 Historiæ Avenionensis, lingua Italica a Fantonio Castruccio Carmelitano scriptæ, cap. 9, refertur Diploma Benedicti episcopi Avenionensis in cujus fine legitur : « Actum publice in Avenione civitate sub die kalendarum Januarii anno Incarnat. Dominicæ MXXXIX ». Ait Benedictus quosdam Ecclesiæ suæ clericos divino amore tactos, scilicet *Arnaudum, Odilonem, Pontium et Durandum* a se postulasse, ut religiose vivere possent in Ecclesia *S. Rufi*, jamdiu deserta et inhabitali, seque eis prædictam Ecclesiam cum decimis et oblationibus aliisque in præfato Diplomate expressa concessisse. Refert postea ibidem hic historicus rescriptum Urbani II, « datum Tricastri, Indictione iii, XIII kal. Octob. anno Dom. Incarnat. MXXVI », concessum « Arberio abbati ejusque fratribus, in Ecclesia S. Rufi extra muros Avenionenses canonicam vitam professis », in quo « omnia », inquit Urbanus, « quæ episcopi Avenionenses Benedictus, Rostagnus, et Gibelinus vestræ Ecclesiæ contulerunt », confirmo.

11. *Priores ejus abbates ignoti.* — Castruccius et San-Marthani in Gallia Christ. tom. iv, nullum monasterii S. Rufi abbatem *Arberio* antiquiorem exhibent, sed quem uterque *Arberium* Jacobus Petitus in Notis ad pœnitentiale Theodori archiep. Cantuariensis pag. 614, *Arbertum* appellat ex chartulario Ecclesiæ S. Rufi, ex quo refert Privilegium ei ac Urbano II concessum « Indict. iii, decimo tertio kal. Octob. anno Dom. Incarnat. MXXVI ». Quod si Arberius idem sit ac Arbertus, jam ab anno MLXXXIV abbatiam S. Rufi regebat; Bernardus enim comes Bisuldunensis in Catalaunia ei donationem quamdam fecit, recitatam in eadem Appendice canonum Theodori archiep. Cantuariensis, in qua dicitur : « Dono Deo et Ecclesiæ S. Rufi quæ sita est super fluvium Rhodani (prope urbem Avenionensem), et domno Arberto ejusdem loci abbati, atque clero ibidem Domino servienti Ecclesiam B. Mariæ Virginis ». Quæ donatio dicitur facta anno MLXXXIV. Baluzius lib. 4 Marcæ Hisp. pag. 465, laudata verba interpretatur de Ecclesia Sancti-Rufi Valentiniæ diœcesis in Delphinatu. Verum nonnisi anno MCLVIII canonici regulares S. Rufi Avenionenses Valentiam traducti sunt, ut infra videbimus. Post *Arberium*, quem mox diximus eundem esse ac *Arbertum*, San-Marthani et Castruccius *Adelbertum* S. Rufi abbatem faciunt, aiuntque Urbanum II ei direxisse rescriptum in scriiniis abbatiae San-Rufensis asservatum. Suspi-

cor tamen tria hæc esse ejusdem abbatis nomina, quorum duo corrupte scripta fuerint. Sed quidquid hac de re sit, initio sæculi sequentis *Letbertum* scriptis clarum abbatem fuisse ostendimus. Series enim horum abbatum accurate nobis digerenda, ut tandem certo constet *Anastasinum* papam, hujus nominis IV, nunquam abbatiæ San-Rufensi præfuisse, licet Onuphrius id tot historicis persuaserit. Porro ordo canonicorum regularium ex initio obscuro in maximam paulatim evasit claritatem et palmites a mari usque ad mare extendens, plurima non solum per Galliam, sed etiam per Hispaniam et Italiam monasteria instituit, multos viros pietate et doctrina præstantes Ecclesiæ dedit, ejusque præter San-Rufensem, aliquæ aliæ supersunt congregationes et familiæ seorsim viventes.

12. *Abbatia Phalempini post San-Rufensem antiquissima.* — Fundata abbatia San-Rufensi, *Sasuvale* postulavit ab Hugone episcopo Tornacensi, quatenus sibi liceret « in villa Falempini,

aut Phalempini », ædificare abbatiam, utque « ibi stabiliret pauperum Christi clerimoniam, eamque sub obtentu charitatis dotaret appendiciis terrarum atque familiarum, unde haberent ipsius abbatiæ clerici alimoniam », quod Sasuvale ab eo hac conditione obtinuit, quod « curam animarum episcopus electo ab ipsis fratribus priori delegabit ipsius catervulæ ». Actum Tornaco anno Incarnat. MXXXIX, « Indict. VII, imperante gloriosiss. rege Henrico an. XII, Hugone præsulatum agente anno IX », ideoque hoc Christi anno, ante diem decimum quartum mensis Maii, quo Henricus Galliæ rex annum regni XII inchoavit. San-Marthani tom. IV Gall. Christ. Chartam foundationis, et nomina variorum abbatum abbatiæ *Phalempini* exhibent, indeque intelligimus, hanc abbatiam ordinis sancti Augustini nunquam San-Rufensi subditam fuisse, ac cito alias in unica domo consistentes in Gallia erectas. Meminit canonicorum Falempini Stephanus Tornacensis in Epist. 272.

BENEDICTI IX ANNUS 7. — CHRISTI 1040.

1. *S. Chunegundis Augustæ obitus.* — Quadragessimus post millesimum incipit annus, Indictione octava, quo decus Germaniæ sancta Chunegundis Augusta, sancti Henrici imperatoris conjux, tam inter sanctimoniales professa, ubi annos quindecim in observantia monasticæ disciplinæ laudabiliter transegisset, tertia Martii ex hac vila ad Deum, præmium acceptura migravit Bambergæ. Quæ cum proxime moritura Augustalia ornamenta ad pompam cadaveris parari videret, hæc dixisse tunc fertur: « Amictus iste non est meus, auferte hinc; ornatus hic alienus est: istis terreno sponso, et his cælesti sum copulata. Nuda de utero matris meæ egressa sum, nuda revertar illuc: his miseræ carnis vilem materiam involvite, et corpus meum juxta tumulum fratris mei ac domini Henrici imperatoris, quem me vocantem video, in proprio locello reponite. Quibus jam dictis, in manum Domini spiritum commendans, migravit in cælum. Cujus sepulchrum Deus pluribus miraculis illustravit.

2. *S. Jacobus pugnat contra Mauros.* — « Hoc eodem anno Magnus Ferdinandus, rex Castellæ et Legionis, obsessam diu Conimbricam civitatem, ope

sancti Jacobi Apostoli, post longam obsidionem in deditionem accepit a Mauris. Porro de auxilio Apostoli regi in præliis impertiri consueto, evidens dubitanti Græco homini argumentum est per visum apertum. Is enim cum religionis causa visitaturus corpus Apostoli ex Oriente venisset Compostellam, tempore obsidionis Conimbricæ civitatis, audiretque multorum sermone firmari, sanctum Jacobum in præliis sæpe visum insidentem armatum equo opitulari fidelibus adversus Mauros: derogans fidem dictis, verbis his illorum assertionem derisit, dicens: Sanctus Jacobus non miles, sed piscator fuit. Sed sequenti nocte per visum admonitus didicit veritatem: siquidem visus est sibi videre eundem armati hominis specie pugnare pro Christianis Apostolum, quo tempore Ferdinandus potitus est civitate, ut certo nuntio cognitum postea fuit. Cum etiam ipse rex Compostellam ad Apostolum venit, eidem de victoria manubias offerens.

3. Hoc eodem anno, assistente et favente Dominico Flabanico duce Venetiarum, celebratum est Venetiis Concilium provinciale in Ecclesia S. Marci sub Urso patriarcha, in quo pleraque spectantia ad

Ecclesiasticam disciplinam statuta fuerunt : quorum meminit in suo brevi Chronico Andreas Dandulus.

4. *Sarraceni divinitus superati.* — Quod spectat ad res Orientis, hoc anno, eadem Indictione octava (ut habet Curopalata) cum, revocato ex Sicilia Maniaco majestatis reo constituto, Sarraceni ex Africa venientes insulam iterum occupassent, sola relicta Messana, quam Catacalus præfectus imperatoris tenebat : eam obsidentes Sarraceni, et jam ob victorias elati, et negligentiores redditi atque socordes cum essent : Catacalus ista intuens, jussit sacrosanctum sacrificium missæ primum offerri, inde vero milites omnes sacra Eucharistia participando muniri ; moxque in hostes irrumpens, imparatos offensos omnes vel trucidavit, vel fugere coegit. Sed accipe rem gestam ab eodem Curopalata : « Quarta autem die, qua consuevimus mediam Pentecosten celebrare, Catacalus, cognomento Combustus, animadversa negligentia et socordia Sarracenorum, et ut illi sine ulla cura et sollicitudine degunt, nihil curantes eorum quæ intra muros fierent, suo exercitu confirmato, cum jussisset sacri-

ficiam incruentum perfici, simulque cum omnibus particeps fuisset divini sacramenti, circiter prandii horam apertis urbis portis, maximo impetu in adversarios erumpit ebrios et crapula onustos. Ipse primum ad tabernaculum Apocaphar insulæ principis adequitat, et ille quidem statim interficitur, mollis et facilis captu præ ebrietate, ejusque tabernaculum perrumpitur. Cadebant etiam alii Sarraceni acervalim præ ebrietate labentes, et inopinato impetu nihil prorsus virtutis memores. Fuit igitur strages totius exercitus, cum Sarraceni sese mutuo obterentes occiderent, ita ut cadaveribus completerentur planities et proximæ convalles et flumina : captaque sunt omnia castra auro et argento et margaritis pretiosisque lapillis referta, quos (ut fertur) medimnis milites divisere. Et ita omnis Sicilia, quæ brevi tempore a Maniaco subacta fuerat, brevi quoque negligentia et vitio ducum, rursum in potestatem Sarracenorum pervenit, cum sola Messana eo modo quo diximus relicta fuisset, iterum recuperata est ». Ilæc Curopalata, ex quo et Cedrenus.

Anno periodi Græco-Romanæ 6533. — Anno Æræ Hispan. 1078. — Anno Hegiræ 432, inchoato die 11 Sept., Fer. 5. — Jesu Christi 1040.

— Benedicti IX papæ 8. — Henrici III reg. 2. Michaelis Paphlagonis imp. 7.

1. *Obitus S. Cunegundis imperatricis.* — Ad num. 1. Baronius, Bollandus ad diem III Martii, aliique, sanctæ *Cunigundes* imperatricis, virginis, conjugis, viduæ, et demum sanctimonialis Benedictinæ mortem cum currenti anno illigant, quia in ejus Vita ab auctore anonymo scripta, cap. 3, de ejus monachatu dicitur : « Quindecim in sancto proposito supervixit annos, tam humilitatis gratia, quam religionis reverentia omnibus admiranda ». Sed cum, ut idem Bollandus fatetur, anonymus ille post annum MCLXXXIX floruerit, major hac in re fides habenda Chronico Hildensheimensi, in quo ad

annum MXXXIII scriptum est : « Piae memoriæ Cunigund imperatrix V Non. Martii obiit (1) ». Nam illud Chronicon a diversis scriptoribus continuatum, et qui hæc scripsit, ab anno MDCXCV ad annum circiter MXL continuationem suam perduxit. Certe quæ is auctor per hæc tempora in litteras mittit, ea se vivente peracta non obscure subinde insinuat, fusiorque est in rebus singulis annis narrandis, quam qui postea idem opus usque ad an. MXXXVII perduxit. Hinc anonymus ille Cunigundam *piae memoriæ* appellat, quia paucis annis antequam continuationi suæ manum admovisset, in cælum

(1) Non abs re exhibetur hic Epitaphium Cunegundæ, quod sepulchro ejus impositum jam inde ab ejus obitu reputaretur, ac refertur ab Udalrico Bambergensi in Codice vulgato ab Ecardo. in Corp. Historic. Germanic. tom. II, col. 5. » Anno MXXXIII Incarnationis Domini. Indict. I, non. Martii, Cunegunt imperatrix, mater pauperum, dives ipsa divitem migravit ad Christum.

Æquali merito Cunegunt sociata marito
Quem vivens coluit, morte locum tenuit.
Felix morte sua, cui vitam contulit illa
Mors immortalem continuumque diem.
Nam veluti granum moriendo vivificatum,
Quæ bene præmisit, centuplicata metuit.

migrarat. Lambertus Schafnaburgensis, qui ipso-
met teste anno *MLVIII* in diœcesi Moguntina vestem
monasticam accepit, et presbyter ordinatus in jeju-
nio autumnali Hierosolymitanum iter suscepit,
Cunigundes mortem eodem quo chronographus
Hildensheimensis anno recitat.

2. *Ab Innocentio III canonizata fuit.* — *Cunigundes* et *Henrici* conjugis sacrarum exuviarum
apud Bambergam Franconiae urbem depositio, et
frequentia ad illas patrata miracula eam valde illu-
strarunt; licet enim *Cunigundis* in monasterio
Confugia, ubi sanctimonialis facta, per annos cir-
citer novem vixerit, et diem extremum obierit,
sepulturam tamen *Bambergæ*, ubi sanctus *Henri-*
cus conjux ejus quiescebat, elegit. Colitur variis
diebus, et in variis Germaniae urbibus, et, ut notat
Bollandus, quemadmodum in Ecclesia Romana pia
viget consuetudo, ut festis sancti Petri Apostoli fiat
commemoratio sancti Pauli Apostoli, ac vicissim in
hujus festis illius recolatur memoria, ita in Eccle-
sia Bambergensi hi sanctissimi conjuges non sepa-
rantur, nec de uno eorum aliquod festum celebra-
tur absque alterius implorato suffragio. Cœptum
maxime agi de *Cunigundis* canonizatione apud
Cœlestinum III papam. Sed cum is anno *MCXCVIII*
vita functus esset, successor ejus *Innocentius III*
eam sanctarum Catalogo adscripsit III kalendas
Aprilis, Pontificatus sui anno III, Christi *MCC*. Bul-
lam canonizationis Bollandus citatus refert.

3. *Conimbria a Ferdinando Legionis rege anno*
MLXIV *capta.* — Ad num. 2. *Ferdinandus* Legio-
nensis rex, omnium Hispaniae principum hac tem-
pestate potentissimus, ob victricia arma in Barbaros
versa *Magnus* cognominatus, *Conimbriam* urbem
hac ætate in Lusitania celeberrimam, hoc anno in
suam potestatem redegit, juxta calculum Mariani
lib. 9 de Reb. Hisp. cap. 2. Hanc victoriam Toleta-
nus lib. 6 de Reb. Hisp. cap. 11, sine ulla chronica
temporis nota refert; verum cum de ea agat, post-
quam capite superiori *Garsio* *Sanctionis* Navarræ
regis cædem quæ anno *MLIV* contigit, ut ibidem
videbimus, narravit, non dubium quin Mariana in
anno captæ *Conimbriæ* deceptus fuerit; eo magis
quo post relatum illam *Ferdinandi M.* victoriam,
statim sermonem habeat de *Translatione reliquia-*
rum S. Isidori ab eodem rege anno *MLXIII* peracta,
ut anno *MLIII* demonstrabimus. Sed conjecturis
opus non est, ubi certa documenta habemus. Scri-
bit enim Sandovallius, *Ferdinandum M.* in regno
Legionensi annum millesimum sexagesimum ter-
tium transegisse, in eoque adhuc fuisse cum legati
sui cum reliquiis sancti Isidori episcopi Hispanensis
ex ea urbe rediere. Ipso autem hujus translationis
tempore, monachi Benedictini monasterii *Lorvanii*
Ferdinandum monuere, *Conimbriam* a Mauris oc-
cupatam non satis munitam esse, eisque facile eripi
posse. Quare rex de ea expugnanda cogitavit, qua
in suam potestatem redacta, præfatis monachis Pri-
vilegium concessit, quod Sandovallius e latino

barbaro in linguam Castellanam vertit, refertque
pag. 12.

4. *Conimbria per menses quinque obsessa.* —
In eo dicitur, monachos *Ferdinandum Carioni* in
regno Legionensi existentem convenisse mense *Ja-*
nuario, *Æra MCI*, anno scilicet Christi *MLXIV*, hunc
exercitum statim congregasse, eodemque mense
Januario *Conimbriam* obsidione cinxisse; sed quia
civitas fortissima erat, Mauri obsidionem per quin-
que mensium spatium tolerarunt, mense scilicet
Februario et quatuor sequentibus; cumque exer-
citus victualibus indigeret, a monachis *Lorvanen-*
sibus per aliquot dies ea suppeditata sunt, sed tan-
dem Mauri oppidum dedidere. Monachi a Ferdi-
nando Magno, ut in suo Diplomate ipse ait,
nihil aliud postularunt quam Ecclesiam et domum
in urbe *Conimbricensi*, et confirmationem Privile-
giorum ab ejus decessoribus sibi largitorum. Datum
tunc a Ferdinando Privilegium illud scriptum
mense Julio, *Æra MCI*, anno scilicet Christi mille-
simo sexagesimo quarto, subscriptumque a tribus
regis filiis *Alphonso*, *Sanctio* et *Garsia*, et a pluri-
bus Castellæ proceribus. Sandovallius refellit fabu-
las posteriorum scriptorum, qui obsidionem *Co-*
nimbricensem septennalem fuisse tradidere, aitque
aliquos historicos Hispanos scribere, sanctum *Jaco-*
bum Apostolum armorum insignibus decoratum
obsidentibus apparuisse, ac diem quo urbs capienda
esset eis apparuisse; quod inter alios habet Rode-
ricus Toletanus loco citato; sed cum neque Ferdi-
nandus Magnus in laudato Diplomate, neque Pela-
gius Ovetensis, neque alii antiqui rei adeo memo-
rabilis mentionem fecerint, hujusmodi apparitio
parum verosimilis.

5. *Hardecanutus fit rex Angliæ.* — *Heraldo*
Angliæ rege hoc anno demortuo, ut superiori dixi-
mus, idque mense *Aprili*, ut habet Malmesburien-
sis, cum *Hardicanutus* Canuti Magni filius in vi-
cino Belgio Brugis ageret, communi civium suffra-
gio et procerum fere omnium electus est, et ante
mediam ætatem, ut Vigorniensis, vel *media æstate*,
ut Westmonasteriensis ait, in Angliam venit, sed
sui imperii tempore nihil egit dignum potestate
regia, subdit Vigorniensis. Nam mox injuriarum
quas vel sibi vel Emmæ reginæ matri suæ Haral-
dus fecerat memor, ipsius Haraldi « corpus effo-
dere, et in Gronnam (id est, paludem) projicere
jussit. Quod cum projectum fuisset, id extrahere,
et in flumen Tamesis mandavit projicere ». Ad hæc,
ipso regni initio gravissimum onus civibus impo-
suit, « ut classiariis suis, per singulas naves viginti
marcas ex pollicito pensitaret », indeque « contu-
meliæ famæ et amoris suo detrimentum injecit », inquit Malmesburiensis lib. 2 de Reg. cap. 12, de-
nique episcopatus ad subsellium suum traxit, de
episcoporum sedibus disposuit, hos pressit, illos
extulit, idque specie pietatis, quæ regnum ejus
non parum obscurarunt.

BENEDICTI IX ANNUS 8. — CHRISTI 1041.

1. *Michaelis imp. obitus.* — Annus quadragessimus primus post millesimum Indictione nona inchoatus sequitur, quo mense Decembris, incepta jam Indictione decima, Michael imperator ejus nominis Quartus, cum regnasset annos septem et menses octo, moritur, confessus poenitere se commissi facinoris in Romanum imperatorem, ac deflens vere poenitentis specimen edidit: creditum autem scelus potius fratris ipsius Joannis machinatione commissum, quam ejus voluntate, viri alioqui pii. Hæc Curopalata, qui addit, eadem hora a Zoe Augusta coronari jussum Michaellem cognomento Calaphatem, filium Stephani patrueilis imperatoris, quem et adoptavit in filium, qui paulo post in eam ingratus, e throno depositam atque in monacham attonsam in exilium misit. Quod cum populo innotuisset, una omnium voce repudiatur lapidibusque insectatur, coactus in sacrum templum confugere, ac revocare Zoen in imperium, licet a populo vocata esset soror ejus Theodora jam detonsa in monacham, ut imperaret. Instans adhuc populus in eum ejusque fratrem, ambos e templo detractos perque vias raptatos privavit oculis. Quod factum est mense Aprilis anno sequenti. Hæc omnia Curopalata, atque ex eo Cedrenus, Zonaras et alii.

2. *Northmanni potiuntur Apulia.* — Idem hic annus consignatur a Leone Ostiensi¹, quo Northmanni Arduino Longobardo duce potiuntur Apulia, superatoque Ducliano Græcorum exercitus principe, eandem provinciam pacifice possident atque inter se dividunt. Qualiter autem facta sit partitio, idem exacte describit. Quam tyrannicum plane ac impium fuerit tum Northmannorum dominium, sanctus Leo papa Nonus narrat in Epistola ad Constantinum Monomachum imperatorem, quem suo loco inferius reddiduri sumus. Agit de his Curopalata anno sequenti, putansque Northmannos, quod e Francia illuc venissent, esse Francos, Francorum nomine eos appellat.

3. *Casimirus ex monacho Cluniacensi rex Poloniæ coronatur, facta ad id potestate per Roma-*

num Pontificem. — Hoc item anno, legationem Polonorum Romam venisse ad Benedictum papam pro impetrando Casimiro Cluniaci professo monacho, quem regem constituerent ad propulsandas innumeras clades, quibus Polonia afflictabatur, Longinus affirmat. Ex quo anno Redemptoris consignato, jam plane evanescit dubitatio illa scriptorum, num videlicet istiusmodi legationem contigerit mitti sub Benedicti Pontificatu, an Clementis, quem nonnisi post sex annos constat sedisse Pontificem. At rem novam Annalibus dignam, totidem verbis quot describitur a Longino, rerum Polonorum scriptore sincerissimo, reddendam putavimus: Sic enim se habet: « Omnibus autem in Polonico regno Rempublicam per desperationem deserentibus, nihilque salutare in commune conferentibus, patriæ occasum cum suo exitio propediem venturum, arcibus aut locis palustribus et inviis proceres et primores inclusi opperiebantur. Republica Polonorum vehementi et interno et externo hoste deformata, et ad extremam pæne internecionem detrusa et dedressa: cum singuli quasi quadam tempestate fuissent jactati, splendor quidam velut e cælo demissus pectora primorum inspiravit. Primores enim et barones Polonici, crebris tractatibus exiguas ejus et exsanguis reliquias salvare cupientes, de summa rerum, et quonam modo status prior et facies reipublicæ reddi posset, consultabant. Et omnium quidem sententiæ congruebant, sine rege et principe neque mala exorta depelli, neque ad debitum ordinem posse regnum reduci. In eligendo tamen et assumendo principe erant varii et diversi. Quibusdam enim placebat aut ex vicinis principibus, aut ex propriis militibus regem eligi. Sed et hæc quoque sententia multas secum difficultates futuras et incommoda trahens, cum verendum esset, ne eligendus, si de principibus vicinis esset, principatum detractaret; si vero de genere proprio, ne in contemptum fastidiumque veniret, damnabatur.

4. « Aliis placebat expulsum et in exilium missum hæredem et filium regium Casimirum quærere, et omnibus modis ad regni reducere regimen; quo vivente certum esset, quemlibet ju-

¹ Leo Ost. l. II. c. 68.

stum et prudentem principem regnum Poloniæ et lacerum et deforme abnuiturum : neque parvipendendam prolem regiam, cui hæreditas et successio debebatur, sed imo avitam in Casimiro sperandam esse indolem ; neque alium extare principem qui reipublicæ regni Poloniæ æque possit et abrogare deformitates, et instaurare ruinas.

5. « Iniquum insuper esse, Boleslai Magni primi Polonorum regis beneficia et in patriam et in se præstita oblitum iri, nepotemque suum eo regno privari, cujus ille virtutis suæ excellentia primus diadema meruit. Hæc sententia cum ab omnibus collaudata et accepta foret, decernentibus judicantibusque singulis proceribus, regionem Polonorum suam dignitatem suumque statum, nisi rege Casimiro recuperato, recuperare et tenere non posse. Post multos itaque tractatus, post varias jactationes simultates et tumultus, finem dissidiis ad hunc modum placuit ponere modumque statuere odiis ; solusque Casimirus dignus visus est, cui regnum legali communi voto eligendi deferrent, quem Deus omnipotens in suæ indignationis nubilo misericordiæ suæ non oblitus, quasi scintillam modicam pro Polonorum restauratione gloriæ voluit conservare. Pontificibus interim et palatinis, ex quibus maxime, Ecclesiastico videlicet et sæculari statu, universum corpus consilii apud Polonos ad promovendam rempublicam concinnatur, nonnullisque aliis baronibus, paucis tamen admodum, in Gnesnensem metropolim iterum convenientibus, Stephanus Gnesnensis archiepiscopus de Casimiro deligendo sententiam dixit, quam omnes sunt secuti.

6. « Nuntii post hæc ad quærendum Casimirum designantur et mittuntur, eo mandato et auctoritate instructioneque fulciti, ut pro illius reductione etiam quæque difficilia subeant, cum in illo uno unica spes miserabilis patriæ consistat. Nuntii autem Polonorum publica executuri mandata, arrepto itinere, primum ad Alemanniam divertunt, et Rikscham Poloniæ reginam, Miezislai Poloniæ olim regis relictam, in Brunswick degentem offendunt, cui cladium et malorum quibus Poloniæ regnum pressum erat magnitudinem, quam et ipsa ex rumoribus intelligebat, exponunt, rogantque, ut ubinam terrarum et gentium filium suum Casimirum invenire possint, eis fideliter nuntiet et declaret. Regina autem Riksha, etsi suas filii-que sui propter exilium illatum injurias ultas esse gaudebat, calamitatum tamen magnitudo etiam muliebrem affectum superabat : propter quod regno Poloniæ tam miserabili et afflicto non poterat non compati, spirituque compassionis impulsa, vivere quidem filium suum Casimirum, sed in religionem sacram B. Benedicti transisse, et monachi habitu et statu in Cluniacensi monast. in Galliis sito perseverantem, regni terreni cupiditate distrahi non posse, et spe concepta legatos frustrandos esse. Terruisset delatio hæc quantumcum-

que constantes viros. Legati tamen Polonorum nihil iis quæ a regina pro indifficilitando et succidendo eorum itinere dicebantur percussi, honorata regina Riksha de iis quæ secum ferebant muneribus, in Gallias profecti, Cluniacum tandem perveniunt, et ducem suum Casimirum monachali habitu vestitum recognoscunt, obortoque lacrymarum imbre, certatim in ejus ruunt amplexus. Felices eos et beatos adstruunt, qui principem suum tanto labore quæsitum vivum et incolumem repere-rint. Ad quem, petita audientia, et de consensu abbatis Cluniacensis obtenta (is erat magnus ille Odilo sanctitate præcipuus) verba faciunt :

7. « Omnium, inquit, pontificum, procerum et nobilium regni Poloniæ nomine ad te venimus, princeps clarissime, oratum, qui solus regnum nostrum, imo tuum Poloniæ labefactum, attollere, et decerptum reintegrare tuerique enixe et egregie potes, si ad regnum Poloniæ te per nos reduci, et illius sceptrum successionem paterna tibi debita regere velis, neque preces nostras et totius patriæ, neque labores nostros, qui te per varias regiones, nationes et populos discurrendo quæsimus, despectum iri sinas. Veni igitur seditiones sedaturus Polonicas et intestinas eradicaturus illorum discordias, hostes abacturus ab eorum faucibus, et regni tui erepturus reliquias ». Et alia pleraque his addidere, quæ vel truculentum Scytham quempiam ad commiserationem movere potuissent : « Recognoscit (pergit auctor) Casimirus dux regni sui proceres, et de illorum adventu júbilo immenso jucundatur et exultat. Quid tamen agat, quem affectum, quem vultum legatis et proceribus Poloniæ, quorum adventus causam ipsis prodentibus habebat non ignotam, exhibeat : penitus ignorat. Jam enim regulam beati Benedicti professus erat, jam et diaconatus gradum suscepserat, alienique juris et arbitrii factus, etiam communionem conversationemque cum legatis, nonnisi abbate permittente, nedum, regressionem in sæculum sibi noverat professionis virtute interdictam. Quæ cum legati Polonorum, duce eorum Casimiro referente, didicissent, abbatem Cluniacensem conveniunt, congruisque muneribus ipsi præsentatis, cur et unde venerunt exponunt, petuntque ob necessitates ingruentes reddi sibi suum regem, regni legitimum successorem.

8. « Abbas autem Cluniacensis, vir ipse eruditus et industrius, prudentum et expertorum virorum communicato consilio, Polonorum legatis respondet, se quidem ad gerendum petitioni et requisitioni eorum morem ex compassione et affectione singulari, ut calamitates Polonici-regni depelli et sanari possint, benevolum atque pronum esse ; non tamen suæ potestatis fore, ut et monachum et diaconum a religione professam emancipet, et in terreni regni regimine, prævaricato professionis suæ tenore, succedere permittat. Proinde supremum in terris tribunal, supremamque potestatem, Sedem videlicet Apostolicam Romanam et

vicarium Christi adirent; et necessitate publica Poloniæ regni, ejusque conditione et statu Summo Pontifici declarato, principem Casimirum reddi deposcerent: ea benignitate summum Pontificem præditum esse, ut afflictorum et calamitosorum precibus non possit non moveri, et regno cui suapte debetur miseratio, propitiationem non præstare non posse: sine vero Apostolicis mandatis in remittendo absolvendoque monacho, quam gravissime pro salute publica perituum. Cluniacensis abbatis responso Polonorum legati accepto, etsi illos non mediocris haberet molestia et amaritudo, quod principem suum regulari professione et diaconatus officio intelligerent irretitum, duplicemque illum nodum non sine plurimorum laborum et difficultatum interpositione solvendum: omnia tamen etiam extrema devovent se perpersuros, dummodo salutem miserabili et afflictæ patriæ referre possint.

9. « Ex Cluniaco itaque facto discessu, rectiori quo possunt itinere Romam contendunt: quo cum incolumes pervenissent, a Benedicto papa Nono benignam audientiam sortiti, quibus bellis, quibus cladibus, cædibus et spoliis regnum Poloniæ, cum ab externis tum a propriis propter carentiam et exultationem stirpis regiæ usque ad internecionem confectum sit: quibus quoque ex causis restitutio principis eorum Casimiri per Cluniacensem abbatem negata sit, declarant. Atque demum Pontificem his compellant verbis: Ex te, sanctissime pater, nostra et totius regni Polonici salus et restauratio pendet: tu solus patriæ nostræ potes sanare discrimen, tu bellicum furorem inhibere. Te patria nostra invocat, te intueor, ad te fiducialibus precibus recurrit. Tua maxime interest, facili auctoritate et decreto ei præstare gloriam et quietem, salutem et integritatem. Per te regionum nostrarum sanari debent vulnera, quibus præter te nemo mederi potest, ut respublica nostri regni Polonici sæva discordia miserabiliter prolapsa, in pristinam prosperitatem, pace confecta vigoreque resumpto, divinitate propitia consurgat. Maturato opus esset, ni cito succursum fuerit, de capite, de fortunis insontium, de totius insuper regni corpore actum esse. Nec semel papam et cardinales petiisse contenti, frequentius petere et instare perseverabant, rogantes ne se frustratos spe abire post tantos labores fatigationesque, triste responsum in patriam referre paterentur. Compateretur summus Pontifex benignitate paterna Polonorum regno, miserabilibus cladibus obtrito, non aliam habenti fiduciam, quam si esset sine capite truncum corpus, sine oculis frons et facies tenebrosa.

10. « Legatione Polonorum Benedictus Nonus audita, quid facto opus foret, aliquanto tempore cum cardinalium collegio cæterisque timoratis viris et jurisperitis deliberat. Res enim et supplicatio nova et sine exemplo ad se delata, non parum in utramque partem difficultatis et periculi secum trahens, alia longaque indagine et lucubra-

tione ut dirigeretur, summum Pontificem impellebat. Nam ex monacho diaconoque laicum efficere, solvere religionis et continentiae votum, transgressionis in divinam legem facinus ingens censebatur; et laboranti afflictoque regno non providere, patetis crudelitatis, quæ a Sede Apostolica, benignam se omnium matrem vocitante, longe abesse debet, erat specimen. Movebant tantæ sanctitatis virum facies miserandæ legatorum, vilis et obsoletus habitus, vultus supplices, demissa supercilia, et verborum humilitas. Intelligebatque vir Apostolicus propter defectum regalis regiminis multas Polonis jacturas accidisse, utpote militum dissensionem, populi concussionem, regni deprædationem, fidei subversionem, episcoporum et sacerdotum indignam oppressionem, virginum deflorationem, et conjugalis pudicitiae contaminationem. Itaque post varios tractatus et concertationes hac in re habitas, dum plures viæ Polonorum legatis a summo Pontifice propositæ, velut duræ et intolerabiles repudiarentur; ea tandem a summo Pontifice decreta, et a Polonorum legatis recepta est. Et tunc demum summus Pontifex legatorum precibus annuit, et Casimirum illis precario regem donat, uxorem illi ducere et filios procreare concedit.

11. « Dona tamen Apostolica exemplum non habentia, nec unquam alicui personæ aut regioni concessa rata esse decernit, si illa lex a Polonorum legatis suscipienda, et perpetuo servanda promittatur, princeps Poloniæ Casimirus, dispensante summo Pontifice, monasterio Cluniacensi exeat, habituque, regula et gradu diaconatus abdicatus, solutus et liber, paternum et avitum regnum instauraturus, illud resumat, nubendi et in spem Poloniæ regni successores generandi habens plenam potestatem; sed tum Polonorum regiones ac regnum, in signum præstiti per Apostolicam Sedem, acceptique in magno necessitatis suæ articulo beneficii, B. Petro et successoribus Romanis Pontificibus de quolibet capite nobilium (capitibus circumscriptis) usualem nummum annis singulis solvere, cæsariem capitis et comam Barbaro more non nutrire, sed auribus patentibus, sed instar religiosorum Latinarum nationum tonsuratum caput gestare, et in præcipuis Christi et Virginis Matris ejus festivitibus, panno lineo albo, in stolæ modum dependente, cervicem exornare, perpetuo sit adstrictum. Ut his tribus insignibus, ex monacho et ex diacono, Apostolica concessione et benignitate, cum aliter concretum periculum dispelli non possit, Polonus regem sibi creatum et redditum recognoscens, tam in Deum quam in religionem Christi sit gratior atque devotior». Ita plane veluti aucto fœnore, ut pro uno sibi oppignorado votis solemnibus monacho, eum cum reddit Ecclesia, Polonos omnes quodammodo tonsura monachos (quod fieri licuit) habitus schemate solemnibus diebus religiosos præ se ferentes, et annui pensatione tributi perpetuo obligaverit. Quo cum nobiles omnes pariter adstrictos tradat Longinus,

miramur quomodo Chromerus ea tributi pensatione minime devinctos fuisse dicat nobiles, neque clericos sacris addictos. Ritum autem illum, ut cum sanctum Evangelium in sacris missarum solemnibus inchoatur, Poloni gladium stringerent, ac mediotenus evaginarent in signum prompti animi in defensionem Evangelii etiamsi opus sit armis, jam a tempore Miezcislai Polonorum regis inolevisse Chromerus tradidit¹. Servavit omnia ista populus sui natura religionis custos, veritatis cultor et amantissimus æqui. Quomodo autem his acce-

ptis a Sede Apostolica perpetuo conservandis decretis, Cluniacum sint reversi legati, litterisque Pontificiis patefactis receperint suum principem eumque reduxerint in Poloniam, a quo profligatis sceleratis, ipsum regnum fuerit in statum optimum revocatum, et quomodo ad debellandos hostes affuerit ei divinum auxilium, angelico ministerio exhibitum, idem auctor pluribus narrat. Sed hæc nobis satis ad institutum. Quomodo insuper in gratiarum actionem monasteria extruxerit, ad quæ habitanda suos ex Galliis vocavit Cluniacenses, idem auctor inferius scribit.

¹ Chrom. l. VIII.

ANNO PERIODI GRÆCO-ROMANÆ 6534. — ANNO ÆRÆ HISPAN. 1079. — ANNO HEGIRÆ 433, inchoato die 31 Aug., Fer. 2. — JESU CHRISTI 1041.

— BENEDICTI IX PAPÆ 9. — HENRICI III REG. 3. MICHAELIS CALAPHATES IMP. 1.

1. *Michael Paphlago imp. fit monachus.* — Ad num. 1. Michael Psellus Michaelis Paphlagonis imperatoris mortem hoc modo narrat : « Imperator ante suam ex corpore translationem, spiritualiorem aliam quærit translationem, contemnitque imperium quo et brevi post erat exuendus, omni-que affectu superior ac libidine ad Denm transfertur. Ne ulla autem molestia ei fieret quod sic transferebatur, ac Deo confessiones dabat, regia profectus, ad monasterium venit quod ipse condiderat, imo potius a bajulis transfertur. Ubi vero in monasterium venerat, templique pavimento genu posuerat, supplices Deo offert preces, ut ejus obtutibus accepta victima videatur; mundaque post consummationem suscipiatur. Sic itaque sibi propitiato ac placabili reddito numine, ipse seipsum voluntariam hostiam sacrificulis ac immolatoribus tradit, qui utrimque virum circumstantes precibusque victimæ præliminaribus in Dei laudes cantico persolutis, imperiale paludamentum purpuraque intextum exuunt, sacrumque Christi pellicium ac cilicium superinducunt, oblatoque capitis integumento ac flemmate, galeam salutarem imponunt: tumque etiam pectore dorsoque cruce armatis, inque viri morem virilisque obtentu animi præcincto illo adversus spiritus nequitiae sic ipsum dimiserunt.

2. *Moritur.* — « Ad ejus sane animi claritatem ac propositum quod attinet, gaudebat ille quidem ac exultabat, ut qui Deo auspice sic vitam mutasset, ac quasi agilis expeditusque ad spiritus viam effectus esset: illius vero familiolam (ac præcipue

seniorum fratrem) mœstitiæ nubes totam occupabat, ut præ miserantis affectu gemitus tenere non posset. Ac nec Augusta doloris compos fuit; sed ubi quodam referente rem audierat, virilem omnem adspectum audenti animo erumpit, vimque sexui facit ac pedes ad eum vadit. Is vero, sive eum pudebat quod tot tantorumque malorum illi auctor extitisset, vel quod ejus quoque oblivio eum cœperat, qua Dei memor erat, ipsam ab ingressu inhibuit, ac illa quidem ad regiam rediit: ipse vero, quod statim vocabat orationis tempus, et ad consueta cantica erat conveniendum, paulatim lentiusque e lectulo exsurgit: pedesque calceaturus, cum non præsto essent consueti monachorum coriacei calcei, sed priore scena needum illi mutata, ægre rem tulit, nudisque pedibus ad templum venit hinc inde ministris suffulcentibus, anhelans jam atque extremos afflans spiritus. Sic itaque rursus ad lectulum reversus illique cubans, tumque etiam quid parum deficiente spiritu, animam Deo dimisit: plurimis per imperii tempus illi gestis ac consiliis habitis. Quæ et ipsa inter se contendens, et ex adverso contraria judicans, plura recte facta delictis illis commissis invenio. Nec sane arbitrer virum hunc potiore frustratum requie, se meliorem vitam consecutum esse. Obiit igitur ac vitam cum morte commutavit, magno scilicet designato opere atque virtute, cum annos septem imperium tenuisset ». Cedrenus dicit mortem ejus contigisse *Decembris x die Indictione decima*, postquam imperasset *annos vii, menses viii*, quos Psellus neglexit. Lupus Protospata in Chron. ait etiam Michæ-

lem mense Decembris hujus anni demortuum, sed diem non exprimit. Zonaras monasterium suburbanum a Michaelē exstructum, in quod secessit, appellatum fuisse dicit monasterium *mirificorum Anargyrorum*, id est, sanctorum Cosmæ et Damiani qui *Anargyri* vocati, quod gratis medicinæ artem exercerent. Ducangius in Constantinopoli Christiana, quia non viderat Michaelis Pselli Historiam hactenus ineditam, hujus monasterii mentionem non facit.

3. *Ante mortem Michaelē Calaphatam Cæsarem dicit.* — Michaelē ægrotante, Joannes ejus frater de se omnique familia sollicitus, consultissimum judicavit, si imperatorem adduceret, ut *Michaelē Calaphatam* nepotem, Cæsarem crearet, quod consilium funestissimum fuit, ut rei declaravit eventus. Solemni itaque indicio conventu; cum simulato filio educta Augusta, quod studebant efficiunt, ipsaque eum in filium assumit, et imperator ad Cæsaris dignitatem provehit. « Porro Joannes tanquam illi universo confecto negotio, summaque rerum in familiam reducta, haud sciebat qua ratione affluente gaudio uteretur, ejusque impos erat. Enimvero hæc ejus molitio ingentium imposterum malorum initium fuit; quique fundamentum visus fuerat omnis familiæ, eversio factus est », inquit Psellus, quem video Zonaram passim exscripsisse. Mortuo itaque Michaelē Paphlagone, Michael Calaphata ejus nepos imperium capessivit.

4. *Normanni Apulia potiuntur.* — Ad num. 2. Leo Ostiensis lib. 2, cap. 68, testatur *Normanōs* Arduino quodam Lombardo duce politos esse Apulia, eamque inter se divisisse, duodecim comites constituentes. Quod hoc anno contigisse his verbis docet: « Anno Dominicæ Nativitatis MXLI, (quo videlicet anno, ipso die festivitatis B. Benedicti Paschalis sabbati dies occurrit) Arduino duce Melphiam primitus (quæ caput et janua totius videtur Apuliæ) sine ulla controversia capiunt ». Hoc autem anno, sancti Benedicti festività in sabbatum ante Pascha incidit. Gesta a præfatis comitibus Guillelmus Apuliensis lib. 1 fuisse narrat. Ante hunc annum Normanni unico oppido a *Ramulfo* ædificato, nempe *Aversa*, potiebantur, ut prodit uterque scriptor.

5. *Casimirus monachus in regnum Poloniæ restituitur.* — Ad num. 3 et seqq. *Poloni*, sævis tempestatibus per sex aut septem annos jactati, sibi tandem mutuo condonant privatas offensas, et comitia Guesnam indicunt, ubi ea sententia vicit, quæ *Casimirum* ubi sit quærendum et reducendum esse censuit. Oratores ad id delecti primores viri, qui *Cluniacum* venientes, inveniunt eum, non modo professum religionem, sed jam diaconum. Deprecantur culpam exili ipsius, orantque ut afflictam et pæne eversam patriam respiciat. Respondet *Casimirus* datam semel Deo atque iis quorum se potestati ultro subjecisset fidem fallere non posse. Oratores omnia sibi tentanda esse rati, abbatem monasterii ad eum, isque eos ad Pontifi-

cem Romanum, qui tunc erat *Benedictus IX*, remittit, a quo impetrant, ut *Casimirus* ad regnum majorum suorum redeat et uxorem ducat, ut fuisse Baronius ex Joanne Longino narrat. Restituitur itaque paterno regno *Casimirus*, qui rebus regni maxima ex parte bene constitutis, cum *Jaroslao* sancti Ulodomiri filio Russorum principe fœdus et affinitatem init; sorore ejus *Maria*, cujus mater Anna, quæ Basillii Porphyrogeneti imperatoris Constantinop. soror fuerat, uxore ducta. Ex hoc conjugio post biennium natus *Boleslaus*, qui post patrem regnavit. Pacato autem per circuitum regno, *Casimirus*, pristinae conditionis memor, *Cluniacum* legationem cum amplis muneribus mittit, petitque sibi destinari aliquot monachos; quos cum obtinisset, domicilia eis in Polonia extruxit, atque templa ad cultum divinum apta ornavit. Quæ fuisse Chromerus lib. 4 narrat.

6. *Institutio induciarum et Treugæ Dei.* — Cum viderent Gallicani episcopi Ecclesiæ comminationes contra bella privata ac cædes non satis proficere, delatæ sunt passim sanctorum reliquæ: et cum malum non cessaret, anno MXXXIV, varia Concilia celebrata, ut unicuique injurias sibi illatas armis ulciscendi prædasque agendi facultas tolleretur. Tandem cum eadem mala perdurarent, ad inventa est pax, *Treuga Dei*, seu *Treuga Domini* appellata, qua confederatio cum episcopis et magnatibus inita, ut certis hebdomadæ diebus ab armis et cædibus aliisque hostilibus factis abstineretur. Hujus *Treugæ* primus meminit Glaber lib. 5, c. 4, quod nomen ab Hispanico *Tregua* deductum videtur, quod, teste eodem Glabro, *primitus in partibus Aquitanicis*, quæ quidem Hispaniæ vicinæ sunt, instituta fuerit. Hæc verba Glabri: « Contigit in ipso tempore, inspirante divina gratia, primitus in partibus Aquitanicis, deinde paulatim per universum Galliarum territorium firmari pactum propter timorem Dei pariter et amorem, taliter ut nemo mortalium a feriæ quartæ vespere, usque ad secundam feriam incipiente luce, ausu temerario præsumeret quidpiam alicui hominum per vim auferre, neque ullionis vindictam a quocumque inimico exigere, nec etiam a fidejussore vadimonium sumere. Quod si ab aliquo fieri contigisset contra hoc decretum publicum: aut de vita componeret, aut a Christianorum consortio expulsus patria pelleretur. Hoc insuper placuit universis (veluti vulgo dicitur) ut *Treuga Domini* vocaretur, quæ videlicet non solum humanis esset fulta præsidiiis, verum etiam multoties divinis suffragata terroribus », et cætera a Baronio anno MXXXIV, num. 6 et seq. ex eodem Glabro recitata.

7. *Treuga Dei a Normannis ægre recepta.* — Existimat ibidem Baronius, hæc post decennium a pace eo anno tentata gesta esse. Verum Hugo Flaviniacensis in Chron. Virdunensi, post Baronii mortem a Labbeo tom. 1 Biblioth. promulgato, loquens de iis quæ ad præsentem annum pertinent, hanc *Treugæ Dei* institutionem ad eum

revocat : « Anno ipso, inquit, Treva Dei primum statuta est et firmata ; et pax ipsa Treva Dei appellata. Quæ non solum humanis præsiidiis, sed et divinis confirmata est terroribus. Quam cum noluisset recipere gens Neustria, viro Dei Richardo (abbate Virdunensi) prædicante ut eam susciperent, quia voluntas Domini erat, et a Deo, non ab homine decretum hoc processerat, ammonente divino iudicio, cæpit in eos desævire ignis qui eos torquebat, et eo anno fere totus orbis penuriam passus est pro raritate vini et tritici. Secuta est e vestigio mortalitas hominum præmaxima, anno ab Incarnat. Domini MCLII. Multi autem eorum qui torquebantur ab igne venientes ad virum Dei, meritis ejus et precibus curabantur medica virtute Dei. Superest adhuc dominus Eduensis episcopus (Helmoinus nempe, ut videre est apud San-Marthanos), vir vitæ longævitate grandævus, qui et referre solitus est, quia cum a sancto Odilone et cæteris ipsa pax divinis revelationibus instituta, Treva Dei appellata, et ab Austrasiis suscepta fuisset, et voluntas omnium in hoc esset una ut ubique servaretur : negotium hoc strenuitati hujus patris nostri Gratiae Dei (ita Richardus Virdunensis vocabatur) ab omnibus impositum est, ut ejus studio et industria pax eadem in Neustria servaretur, eo quod certi essent de eo, quod tanta esset ejus erga omnes et omnium erga eum gratia, ut quidquid servandum doceret, servaretur a cunctis, quidquid vitandum monstraret, id cuncti vitarent. Quamobrem satagit pater venerabilis, ut tantum bonum gratanter ab omnibus susciperetur, sed perversa quorundam voluntas et mens indomita quasi inauditum hoc respuit, quasi qui nolent instituta paterna violare, et nova atque inaudita suscipere. Unde et subsecuta est divina ultio, ignis scilicet in rebelles et contumaces desæviens a Domino, quo torquebantur, qui viro Dei resistere et mandata ejus contemnere non verebantur », etc.

8. *Ab episcopis et proceribus decreta.* — Marca lib. 4 de Concordia, cap. 14, hanc Treugæ Dei institutionem in annum quidem MXXXIV perperam confert, ut ibidem vidimus, sed egregie de ea disserit, atque eam a quatuor Conciliis generalibus confirmatam et relatum in librum Decretalium, sub titulo *de Treuga et pace*. « Bella isthæc privata, inquit, nec legibus probata erant, imo potius, si provocatio, vel potius, ut illius sæculi verbo utar, si *diffidatio* præcessisset, pro jure constituto habebantur ; ita ut in adversarium crede, prædis et incendiis grassari liceret, ut docent Ivo, (Epist. clv) Friderici I (apud abbatem Ursperg.) et Conradi (cap. 10 Bullæ aureæ) leges, a quibus bellorum injuriis abstinendum erat diebus Jovis, Veneris, Sabbati, et Dominica, quos sub finem vitæ præcipuis salutis nostræ mysteriis Dominus consecravit. Decretæ autem fuerunt induciæ istiusmodi, non solum ab episcopis, sed etiam a proceribus cujusque diocesos, ut diserte docent Glaber et Ivo, ut patet ex Treugæ istius constitutione, quæ lata est in An-

glia et Normannia, ex consensu episcoporum et baronum, a *Guillelmo* Primo rege, anno MLXXX apud Ordericum Vitalem, et a *Raimundo Beringario* comite in Barcinonensi comitatu anno millesimo sexagesimo.

9. *A variis Conciliis confirmata.* — « Recepta sunt et amplificata isthæc decreta a Concilio Claramontano sub Urbano II, anno millesimo nonagesimo quinto ; a Romano sub Paschali, anno millesimo centesimo secundo ; a Lateranensi sub Innocentio II, anno millesimo centesimo trigesimo nono ; et ab altero Lateranensi sub Alexandro III, anno millesimo centesimo octuagesimo. Hoc solum discrimen interest inter primam induciarum institutionem et confirmationem, quod a Conciliis festi dies quamplurimi quatuor illis singularum hebdomadarum diebus adjecti fuerint, et a Concilio Lateranensi sub Innocentio II, incendiorum devastatio prohibita. Observandum vero *pacem* et *Treguam* dici hanc a bellis privatis feriatiorem, quod ratione clericorum omnium peregrinorum, mercatorum et agricolarum cum bobus aratoriis, dominarum cum sociis suis inermibus, mulierum omnium, rerum ad clericos monachosque pertinentium, et molendinorum, *pax* ista omni tempore indulta esset ; ratione cæterorum *Tregua* tantum, id est, induciæ aliquot dierum.

10. *Qua pœna ejus violatores puniti.* — « Sane latendum est, excommunicatione mulctatos fuisse pacis et Treugæ violatores, et ad resarciendum damnum læso coactos. Sed episcopi et comitis hæc erat cognitio cæterorumque baronum : qui tamen si cessarent a persequendo armis raptore, excommunicationibus et interdictis ad officium quo se obstrinxerant adigebantur ; ut vice versa eis, qui contra pacis perturbatores decertarent, duorum annorum pœnitentia indulgebatur, aut plurium ad arbitrium episcopi, pro modo laboris. Si raptores istos pacisque violatores ab utraque potestate proscriptos occidi contingeret a quoquam privato *zelo injustitiæ*, non homicidii pœna canonica et ordinaria, sed leviori et remissiori satisfactione culpam illam diluendam docet Urbanus Secundus, qui de hoc solo genere excommunicatorum intelligendus est, non autem de omnibus excommunicatis, ut quidam sibi male feriat persuaserunt. Cujus interpretationis eo libentius hic memini, quod ea leviori posse mihi videatur invidia, quæ ob textum hunc male intellectum creari solet, adversus Summos Pontifices.

11. *Discrimen bella inter publica et privata.* — « Sed hæc omnia trahi non possunt ad bella publica, quæ a regibus, ut res suas repetant aut reipublicæ injuriam illatam ulciscantur, indici solent. Etenim belli gerendi potestas, quæ a Deo regibus collata est in veteri Instrumento, et in principes Romanos disertis verbis lege regia translata, reges liberos præstat ab excommunicatione, quæ in deprædatores et alienorum bonorum invasores a canonibus irrogatur. Quia excommunica-

tioni locus non est, etiam in privatis personis, nisi cum de crimine manifesto et aperto agitur, non autem cum dubitatur de crimine, ut docuit olim *Hincmarus* ex Augustino. Porro sola belli a principe indicti ratio id saltem obtinere debet, ut iustitia niti præsumatur, præcipue cum regia dignitas in munere regio exercendo nullius iudicio sit obnoxia, sed soli divino numini sesubmittat. Quare in ipsa pacis et treugæ promulgatione iura principum conceptis verbis excipiuntur, ut patet ex Indictione pacis et treugæ a Willelmo archiepiscopo Anscitano legato Sedis Apostolicæ post Concilium Romanum anno MCI publicata: *Principibus autem et dominis terrarum iura sua et consuetudines non contradicimus in terris suis*. Deinde pacis illius

infractæ cognitio episcopis commissæ erat, de comitum et diœcesanorum consensu, quæ ex pactis conventis legem accipere debet, ut scripsit Ivo *Cononi* legato; imo et comitibus baronibusque diœceseos pars illius cognitionis competebat. Quæ omnia cum bellis publicis comparata discrimen aperte inter utraque constituunt ». Hæc Marca. Ex quibus lucem accipiunt quæ anno MXXXIV de pace ab episcopis Galliarum procurata diximus, et solvuntur dubia eo anno num. 5 et seq. a Baronio circa eandem proposita. Putavit enim Glabrum de bellis inter principes gestis verba facere, indeque decreta ab episcopis Gallicanis in variis Conciliis defendi non posse perperam credidit.

BENEDICTI IX ANNUS 9. — CHRISTI 1042.

1. *Uvo tyrannus Hungaricam perturbat Ecclesiam, resistente ei S. Gerardo episcopo.* — Millesimus quadragesimus secundus annus Indictione decima incipit, quo Ovo, sive Uvo tyrannus, adversus Petrum regem Hungariæ consurgit, uno resistente ei sancto Gerardo episcopo Chanodiensi. Hic nobilis Venetus¹, ab ineunte ætate monasticum amplexus institutum, pergens Hierosolimam, rediens in Hungaria a sancto Stephano rege detentus, illic consistere cogitur cultor illius Ecclesiæ: ubi post multos labores promotus ad episcopatum, veri pastoris in se formam in omnibus diligenter expressit, potissimum vero in pastoralis constantia, qua irruenti lupo in gregem obsisteret, ac pro viribus propulsaret. Cujus virtutis specimen tunc dedit insigne, cum ad coronationem tyranni vocatus, non solum noluit interesse, sed cum pro concione redarguit; tu sic accipe rem tum gestam memoria dignam:

2. « In ipso die Dominicæ Resurrectionis, ut pater ejus loci regio capiti diadema impositurus adveniret, per honestissimos viros invitatur. At illo renuente, reliqui pontifices regi coronam imponunt, magnoque cleri ac populi comitatu rex ornatus Ecclesiam ingreditur. At vero plenus Spiritu sancto beatus episcopus, stola candida indutus

pulpitum ascendit, regemque his verbis per interpretem alloquitur: Observatio sanctæ Quadragesimæ peccatoribus pro venia, justis pro præmio constituta est, quam tu rex cum cædibus pollueris, mihi que nomen patris præripueris, per te dulcissimis filiis orbato, nullam hodie veniam mereris. Et quia pro Christo meo hodie mori paratus sum, quæ tibi sunt eventura prænuntiabo. Anno tertio regni tui gladius ultionis excitabitur in te, qui tibi regnum improba fraude per vim acquisitum auferet, et cum illo pariter et vitam. Hæc cum regis amici liberalibus instituti litteris attoniti mirarentur, inquebant interpreti ut taceret, episcopum ab ira et indignatione regis servare volentes, iisque interpretes timens assensit. At vero pastor immorigerum interpretem perurget et compellit ut pergat, ita dicens: Denique time, regem honora, patris tui verba edicito. Tandem coactus interpretes, pastoris declaravit sententiam, non mediocriter iram regis reformidans. Postquam autem evenere quæ dixerat beatus episcopus, totius regni incolæ reipsa didicerunt, eum prophetiæ spiritum habuisse ». Prophetasse etiam de suo martyrio post quinquennium futuro in seditione tunc temporis excitanda, idem auctor affirmat. De quo suo loco dicturi sumus. Porro triennii illud tempus usque ad necem tyranni non exactum, sed inchoatum duntaxat intellexisse, declararunt eventa. Nam anno

¹ In vita S. Gerardi apud Sur. die XXIII Sept. tom. v.

millesimo quadragésimo quarto liquet auctoritate Hermanni et aliorum, eundem tyrannum ab Henrico Germaniæ rege debellatum, et Petrum restitutum : idem vero rex eum deprehensum meritum supplicium subire jussit ejus capite amputato.

3. *Constantinus Monomachus imperator.* — Quod autem ad res Orientales pertinet, hoc eodem

anno ejecto ab imperio Michaelis Calaphate, oculisque privato, Constantinus, cognomento Monomachus, qui in exilium missus fuerat a Joanne fratre Michaelis Paphlagonis imperatoris, revocatus, junctusque Zoe in matrimonium, imperator coronatur undecima mensis Junii. Hæc pluribus Cypriota.

Anno periodi Græco-Romanæ 6535. — Anno Æræ Hispan. 1080. — Anno Hegiræ 434, inchoato die 21 Aug., Fer. 7. — Jesu Christi 1042.

— Benedicti IX papæ 10. — Henrici III reg. 4. Constantini Monomachi imp. 1.

1. *Petrus Hungariæ rex regno expellitur.* — Ad num. 4 et seq. Hermannus Contractus in fusiori Chronico ad annum superiorem scribit : « Ipso anno, Ungarii perfidi Ovonem quemdam regem sibi constituentes, Petrum regem suum occidere moliantur ». Tum anno MXLII : Henricus rex (nempe Germaniæ) hyeme Burgundiam invasit, multosque principum se illi subjicientes suscepit, nonnullaque legitime dijudicavit. Ovo Ungariorum tyrannus, ob susceptum a nostro rege Petrum, divisit bifariam exercitum suum, fines Bajoariæ ex utraque parte Danubii deprædans et incendens depopulatur ; sed una pars exercitus ejus a Septentrionali parte Danubii ab Adalberto marchione et filio ejus Luitpaldo ad internecionem cæsa est. Henricus quoque autumnus Pannonias petens, Heimburch et Brecesburg evertit : Septentrionalem Danubii partem, (quia flumina australem et paludes munierant) usque ad Grana flumen vastavit, seu in deditionem accepit ; et pars exercitus bis numero Ungariam incursantibus congregiens, strages magnas effecit, et subactis partium illarum Ungariis, cum Petrum recipere nollent, quemdam alium ex illis, item apud Bohemos exulantem, ducem eis constituit ; quem tamen Ovo statim post discessum regis resistere non valentem, in Bohemiam repulit ». Cum anno etiam superiori Lambertus Schafnaburgensis et Hepidannus in Annal. expulsionem Petri a regno Hungariæ conjungunt, cum præsentis vero chronographus Hildensheimensis et Marianus Scotus in Chron. Hanc opinionem Baronius secutus est, quod *sanctus Gerardus* episcopus *Canadiensis* in Pannonia, (urbs est ad Tibiscum fluvium, ab archiepiscopo Colocensi pendens) *Ovoni* tyranno prædixerit, *anno tertio regni* et principatum et vitam amissurum, ut in hujus sancti præsulis Vita apud Surium ad diem xxiv Septemb. legitur, sed cum an. MXLIV tyrannus perierit, et

seditio in qua S. Gerardus occisus an. MXLVI, non vero an. MXLVII, ut habet Baronius, contigerit, non dubium, quin anno superiori Petrus e regno expulsus sit, infra magis liquebit. Illud etiam certum, bellum istud intestinum Christianitati a paucis annis in regnum illud inductæ plurimum nocuisse.

2. *S. Gerardus episc. Canadii floret.* — Porro Gerardus, Venetis parentibus natus, adhuc puer monachismum amplexus, cum Hierosolimam proficisceretur, eo tempore in Hungariam pervenit, quo *sanctus Stephanus* in ea regnabat, et eo consentiente in eremum secessit. Verum cum tunc sanctus princeps impietati gentis profligandæ incumberet, Gerardum ab eremo revocavit, eumque ad prædicandum populo suo Evangelium destinavit. Deinde Stephanus rex Ecclesiam ad litus Morisii fluminis, juxta quod *Canadium* sedet, extruxit, atque inde *Morissenam sedem* appellavit, et nobiliter ditavit. Quare S. Gerardus cum sancto Stephano ad totam Pannoniam ad fidem Christi adducendam collaboravit, ut habet auctor anonymus in ejus Vita laudata.

3. *Pessimum regimen Michaelis Calaphatæ imp.* — Ad num. 3. Michael Calaphata, inquit Michael Psellus, simul ac imperator renuntiatus fuit, *Constantinum* fratrem ad *Nobilissimi* dignitatem provexit. Erat porro Calaphata *vir vafri et ancipitis ingenii*, qui aliud menteolvebat, alias voces dabat ; cognitione fratrumque nomina seu magis famitiam ludus quidam illi æstimabatur, eisque invidabat, necdum imperii insulas, sed et ignem et aerem, et omnem fortunam, ita ut odium in genus omne mente conderet et confoveret. *Constantinus* aversus animo erat erga Joannem fratrem, quem imperator in locum relegat, *qui latronibus duntaxat addictus esset* : ubi tandem et carnificis manum ejus oculis admovit, ac summe violentam

mortem e vicino attulit. Nihil de republica moderatius *Calaphata* cogitabat; sed statim induxit in animum ut mutaret omnia, et imperatricem contempsit, confectisque in eam criminibus, ut veneficam e cubiculo educit reamque peragit, ac in eam animadvertit quasi scelestissima patrasset. In navim itaque imponit, inque una insularum, quæ e regione urbis sunt, *cui principis nomen*, eam collocat, *ubi cum una duntaxat ancilla egit*. Postea mittit qui detondeant, et monachico habitu induant. Verum postquam omnia susdeque miscuisset, populus coitione adversus tyrannum facta, quod priorem Augustam capere non licebat, illo eam tenente, ad *Theodoram* alteram sororem vertit studium, et e penetrali avellit, atque in apertum educit, et ad magnum Dei Sapientiæ templum ducit. Tum non sola populi pars, sed et honorati quique ac proceres *Theodoram* Augustam acclamant.

4. *Michael Calaphata imperio deponitur.* — Id ubi cognovit tyrannus, assumpto patruo ad sacrum Dii monasterium pergit, mutatoque habitu, supplicis profugique habitum assumit. Imperator et Constantinus educti azylo oculis orbatī sunt. Ubi autem utrique exciderant oculi, sedata est vulgi ferocia, inque illos impetus et grassatio. Ac tum rursus ipsi quoque ad *Theodoram* simul conversi sunt. Duarum porro Augustarum altera regiam et palatium, altera magnum Dei Sapientiæ atrium habebat. Princeps autem senatus animis hærebat, in quam propensior esset; nam et eam plurimum observabant quæ erat in regia ut senio-rem, eamque quæ in templo erat, quod per eam tyrannis dissoluta fuerat, ac cui se spes salutis debere non nesciebant. «Erat igitur illis anceps imperium. Verum senior ac tutum eis dubium solvit: ac tum primum sororem osculatur placideque amplectitur, ac communi utrique sorte velut hæreditatem imperium partitur. Sicque adeo communia professa ambarum jura cum splendidissima pompa sororem accessit, ac imperii consortem sibi que collegam facit. Verum Theodora haud prorsus pudorem erga sororem ponit, aut dignitatis prærogativam illi adimit, sed quæ sunt cultus augustioris defert», inquit Psellus citatus. Idem referunt Zonaras et Cedrenus, qui Michaeli menses quatuor imperii diesque quinque assignant, additque Ce-

drenus Michaelē et Constantinum relegatos esse in monasterium, *xxi die Aprilis, Indictione decima*, hoc scilicet Christi anno. Depositus itaque Michael die *xv*, aut *xvi*, die enim *x* Decembris superioris anni decessor ejus obierat.

5. *Constantinus Monomachus fit imp.* — Verum, subdit Psellus, moribus et indole sorores valde distinctæ erant, indeque senior rursus omnem in se transferre potestatem cogitat. Futurum itaque erat, ut *Constantinus* sceptrorum compos fieret, vir ex antiqua Monomachorum familia. Hic itaque generis nobilitate primas in imperio ferebat, et ubi Romani imperii scepra suscepit, dilexit cum *Zoa* Augusta. Revocatur ab exilio Constantinus, ubi per annos septem, quantum scilicet tempus prior Michael imperium tenuit, versatus erat. «Augustæ itaque cum tertium mensem pari collegio imperium gessissent, illo abdicantur», et Const. Monom. imp. adipiscitur. Is pecuniarum thesauros e vestigio aggressus est effundere, et imperii dignitates ac munera prostituere. Ingeniosissimus cum esset, si quis alius, ut subditorum in se animos transferret, proprie exque indole singulos capiebat et ad se attrahebat. «Sermonibus atque doctrinis haud admodum excultus erat, nec eruditionis habitum ullum paraverat. Hanc enim vero etiam partem æmulabatur, virosque eruditissimos et disertissimos undique in aulam invexit». Postquam priorem uxorem morte amiserat, ad secundas nuptias transiit, duxitque sororis illius Pulcheriæ filiam, quæ quondam Basilio Selero nupta, unicæ prolis filiæque parens extiterat. Quare «quod communibus ex conjugii ratione abutentium legibus erat, earum formidine absterretur patriarcha Alexius. Atque is quidem tempori indulget (dicam et Deo) quæcumque velit: ipsi tamen etiam corollis susceptis haud manus imponit, nuptiis vero copulatos ac corollis donatos salutatur ac recipit». Notat autem Cedrenus matrimonium *die Jejuniū undecima*, currentis scilicet anni, peractum, et postridie *Constantinum* patriarcha coronatum esse. Psellus simul ac Constantinus imperium iniit, illi ministravit in omnibus, *idque in potiore gradu collocatus*, ut ipsemet de se scribit.

Hardecanutī Angliæ regis mors et S. Eduardi ejus successoris electio, ut anno sequenti videre est.

BENEDICTI IX ANNUS 10. — CHRISTI 1043.

1. *Pallium missum Hamburgensi episcopo.* — Annus millesimus quadragesimus tertius Indictione undecima inchoatus sequitur, quo Benedictus papa petitem per legatos pallium misit ad Hamburgensem recens creatum archiepiscopum Adalbertum, suffectum in locum Alebrandi viri sanctissimi. Hæc Adam pluribus, qui de tempore obitus prædecessoris, et ejus digna memoria ejusmodi Epitaphium scripsit ¹ :

« Anno Domini millesimo quadragesimo tertio, contigit depositio dilecti patris Alebrandi, circa diem decimum septimum kal. Maii. Hæc est Indictio undecima.

« Vale in Christo, pater amabilis et tuo gregi nunquam obliviscende : transi ad Pascha cælorum, ubi cum Agno paschali epuleris in azymis sinceritatis et veritatis. Recipere feticiter in æterna tabernacula, ubi cum Angelis indeficua lateris beatitudine. Quandiu enim temporali nobiscum vita fruebaris, pastoralis curæ officia nobiliter implesti vita et doctrina, omnia nobis dulcia : nunc autem raptus es ne malitia mutaret intellectum tuum. Ideoque pius Dominus properavit educere te de medio iniquitatum, ut fructum laborum tuorum pleniter percipias, etiamsi non perfeceris omnia quæ voluisti. Ergo justitia tua manet, et memoriale tuum non derelinquetur in sæculum sæculi ». Hactenus Epitaphium. Porro sedis ejus numerantur ab eodem Adamo anni decem. At res gestas Adalberti fusius est prosecutus idem auctor stylo fideli, tam bona quam mala congerens, ut nec adulator, neque calumniator habendus sit.

2. Eodem anno, defunctis jam duobus filiis Cnuti Anglorum regis ejus in regnum successoribus, ex insperato, ita Deo disponente, omnium consensu eligitur sanctus Eduardus Emma reginæ filius ex Ethelredo parente ², olim legitimo Anglorum rege, coronaturque hoc anno die sancto Paschæ, idque opera Godwini comitis potentissimi, data ei in matrimonium ipsius filia Egitha, virgine honestissima, viri sanctitati haud adeo impare : quam virginem intactamque servatam con-

stans est assertio scriptorum omnium. Porro ista de immensa Dei misericordia erga Ecclesiam Anglicanam divinitus longe ante ostensa fuerunt sancto episcopo. De quo ista Willelmus ¹ : « Viderat quondam somnii revelatione sæculi illius felicitatem Brithwoldus Wintoniensis episcopus, viderat et annuntiaverat. Nam dum tempore regis Cnutonis cælestibus apud Glastoniam lucubraret excubiis, subiissetque illum cogitatio, quæ frequenter angebat, de regia stirpe pæne deleta : hæc meditantis sopor irrepsit. Et ecce in superna raptus videt Apostolorum principem Petrum ipsum Eduardum, qui tunc in Northmannia exulabat, in regem consecrare, cœlibe, (hoc est, absque liberis infœcunda) designata vita, et certo viginti quatuor annorum numero regni computato ; eidemque conquerenti de posteritate, respondere : Regnum Anglorum est Dei, post se providit regem ad placitum sui ». Hæc apud Willelmum. At de sancto Eduardo plura dicenda sunt inferius ordine temporum.

3. *Conventus Constantiensis.* — Hoc anno (liabet Hermannus) ², Henricus rex iterum Pannonias petens ab Ovone vix pactum, satisfactionem, obsides, munera, regnique usque ad Litha fluvium partem accipiens discessit : inde in Alemanniam veniens, in Synodo Constantiensi cunctis qui contra se deliquerant primum ipse debitum omne dimisit ; deinde precibus et hortationibus omnes præsentis Suevigenas, postea in aliis regni sui provinciis idem actum iri satagens, dimissis debitis et inimicitis, sibi invicem reconciliavit, pacemque multis sæculis inauditam efficiens, per edictum confirmavit. Exin Agnetem Willelmi Pictaviensis filiam sponsam suam accipiens, et Moguntiacy reginam inungi faciens, regales apud Ingelheim nuptias celebravit, et in vano histrionum favore nihil pendendo, utile cunctis exemplum vacuos eos dimittendo proposuit. Glaber autem ejusmodi nuptias in annum millesimum quadragesimum quintum rejicit.

¹ Adam l. II. c. 63. — ² Ingulph. hoc anno et Roger. et alii.

¹ Willel. Malmesb. de hist. Reg. Angl. l. II. c. 13. — ² Herm. ex Canisii edict. hoc anno.

4. *Michael Cerularius patriarcha Constantinopolitanus.* — Quod ad res pertinet Orientis, hoc anno Indictione undecima vicesima Februarii defunctus est Alexius patriarcha Constantinopolita-

nus, inque locum ipsius est subrogatus Michael cognomento Cerularius, qui a Joanne germano Michaelis imperatoris actus fuerat in exilium ob tyrannidem affectam. Hæc omnia Curopalata.

Anno periodi Græco-Romanæ 6536. — Anno Æræ Hispan. 1081. — Anno Hegiræ 435, inchoato die 10 Aug., Fer. 4. — Jesu Christi 1043

— Benedicti IX papæ 11. — Henrici III reg. 5. Constantini Monomachi imp. 2.

1. *Albertus fit archiep. Hamburgensis.* — Ad num. 1. Mortuo hoc anno *Bezelino Alebrando*, archiepiscopo Hamburgensi, in ejus locum ab Henrico III Germaniæ rege successit *Albertus* sive *Adalbertus* genere summo prognatus, cujus Vitam Adamus Bremensis lib. 3, cap. 1 et seqq. fuisse perscripsit, « qui », ut ipse cap. 4 de se fateatur, « quotidianam ipsius inspexit conversationem ». Quibus ex verbis intelligimus Adamum hoc tempore floruisse. Addit hic sub nullo alio præsule gravius vel sapius Hamburgensem Ecclesiam a paganis afflictam fuisse. Ab initio statim archiepiscopatus magna ipsum inter et Daniæ regem *Sveonem II* dissensio orta est. Is enim consanguineam suam regis Sueciæ filiam in uxorem ducendo, incesto se contaminaverat : quod cum archiepiscopus factum improbasset, et ut eam a se dimitteret sub pœna interdictionis sacrorum illi denuntiasset, adeo hac re commotus fuit *Sueno*, ut cum religione se potius quam cum uxore divortium facturum renuntiaret : comminatus insuper omnem se Hamburgensem Ecclesiam ferro et igne vastaturum. Tandem tamen *Albertus* regi reconciliatus est, et Hamburgum unde recesserat rediit.

2. *Quo tempore archiepiscopatus Hamburgensis Bremam translatus fuit.* — Saxo Grammaticus lib. 2, hac de re habet : « Cum rex ab antistite per sacram ac salutarem admonitionem incesti reus ageretur, disciplinæ minas opposuit, seque ferro correptionis insolentiam repressurum edixit. Quæ res ab Hamburgensibus maritimi periculi metu ad Bremenses pontificium transtulit ». Quibus in verbis per translationem pontificii, non tituli archiepiscopalis et metropolitane dignitatis ab Hamburgensi ad Bremensem urbem transitio significatur, ut locum illum explicat Lambecius in Orig. Hamburgensi cap. 59, sed temporaria tantum archiepiscopi transmigration. Translatio enim sedis facta anno millesimo ducentesimo vicesimo tertio, postquam per aliquot annos Ecclesias inter Ham-

burgensem et Bremensem de titulo et dignitate archiepiscopali contentio agitata fuisset. Archiepiscopis enim in partem canonicorum Bremensium inclinantibus, extincta penitus est metropolis Hamburgensis, et canonici antiquo honore et jure suo in perpetuum Bremensibus cessere. Idem Lambecius pag. 113, recitat hujus pactionis tabulas anno MCCXXIII scriptas, quibus « Ecclesia Hamburgensis recognoscit titulum et archiepiscopalem dignitatem apud Ecclesiam Bremensem remanere ». Tandem pacificatione Monasteriensi anno MDCXLVII inita, archiepiscopatus iste suppressus.

3. *S. Eduardus anno superiori Angliæ rex creatus.* — Ad num. 2. Malmesburiensis lib. 2 de Gest. Reg. Angl. cap. 13, sanctus Aelredus sive Ealredus abbas Rievallensis in Anglia, in Vita sancti Eduardi confessoris Angliæ regis a Bollando ad diem v Januarii recitata, Hovedenus part. 4 Annal. pag. 439, Wigorniensis, Simeon Dunelmensis, alique, Hardecanut Anglorum regis mortem in annum superiorem conjiciunt, sicuti et sancti Eduardi cognomento confessoris, qui ei successit, electionem. Hovedenus laudatus ait, Hardecanutum sexto idus Julii feria tertia expirasse, sed legendum sexto idus Junii, ut habent novus chronographus Saxo, et Simeon Dunelmensis, ac ex dicendis in morte sancti Eduardi patebit. Subdit Hovedenus : « Cujus frater Eadwardus, annitibus maxime comite Godwino et Wigornienti præsule Livingo, Londoniæ levatur in regem, cujus pater Egelredus », quem a Canuto Hardecanut patre regno spoliatum fuisse suo loco diximus. Post hæc Hovedenus scribit : « Anno ab Incarnatione Domini MXLIII, Eadwardus ab archipræsulibus Edeio Dorobernensi, et Alfrico Eboracensi, aliisque ferme totius Angliæ præsulibus prima die Paschæ, III non. Aprilis, ungitur in regem Wintoniæ », quod Huntindoniensis et Simeon Dunelmensis etiam habent. Hoc autem anno Pascha in illum Aprilis diem incidit. Baronius diem coronationis pro die electionis sumens, Eduardi regis ini-

tium in præsentem annum perperam distulit; citat enim in margine Ingulphum et Rogerium Hovedenum, qui tamen non solum Eduardum hoc anno coronatum scribunt, sed etiam ejus electionem in annum superiorem disertis verbis conjiciunt. Malmesburiensis lib. 2 de Reg. cap. 13, annos Eduardi ab ejus electione; lib. vero 1 Hist. Novellæ ab anno *MXLIII* deducit, scilicet ab ejus coronatione.

4. *Emmam matrem supellectili spoliât.* — Refert Baronius verba Malmesburiensis citati, qui ait longe ante revelatum fuisse sancto Britwoldo Wiltunensis Ecclesiæ episcopo, sanctum Eduardum regnaturum. Hæc Malmesburiensis verba: « Vide rat quondam somnii revelatione sæculi illius felicitatem Britwoldus Wintoniensis episcopus, vide rat et annuntiaverat », quod et in eodem Malmesburiensi lib. 2 de Gest. Pontif. legitur, dum de episcopis Wiltunensibus pag. 247 verba facit. Verum ibidem Britwoldus episcopus Wiltunensis recte appellatur, ideoque ex hoc ultimo loco alius corrigendus, neque dubitandum, quin librariorum errore lib. 12 de Gest. Reg. pro Wiltunensi *Wintoniensis* dictus fuerit, ut Alfordus hoc anno jam monuit. Hovedenus Eduardi coronatione narrata, subjungit: « Eodem anno, post festum sancti Martini, rex cum comitibus Leofrico, Godwino, et Siwardo, de civitate Glavoroa Wintoniam venit improvise: et ut illi consilium ei dederant suæ genitrici (nempe Emmæ reginæ) quidquid in auro, argento, gemmis, lapidibus aliisque rebus pretiosum habuerat, abstulit, vel quia prinsquam rex esset effectus, vel post, minus quam volebat ei dederat, et ei valde dura exlitterat ». Idem habent Westmonasteriensis aliique.

5. *Eo regnante aliqua inordinate facta.* — Malmesburiensis laudatus quæ regni Eduardi primordia obscurarunt his verbis refert: « Fuerunt tamen nonnulla, quæ gloriam temporum deturbarent. Monasteria tunc monachis viduata; prava judicia a perversis hominibus commissa: suppellex matris ejus, præcipiente illo, penitus abrasa; sed harum rerum invidiam amatores ipsius ita extenuare conantur. Monasteriorum destructio, perversitas judiciorum, non ejus scientia, sed per Godvini filiorumque ejus sunt commissa violentiam, qui regis indulgentiam ridebant: postea tamen ad eum delata, acriter eorum exilio vindicata. Mater angustos filii jamdudum riserat annos: nihil unquam de suo largita, hæreditario scilicet odio parentis in protem: nam magis Cautonem, et amaverat vivum, et laudabat defunctum. Præterea congestis undecumque talentis, crumenas infecerat, pauperum oblita: quibus non patiebatur dari nummum ne diminueret numerum. Itaque quod injuste coacervaverat, non injuste ablatum: ut egenorum proficeret compendio et fisco sufficeret regio. Hæc referentibus etsi plurimum fides adhiberi debeat: sanctam tamen mulierem

fuisse comperio, et thesauros suos in ornamenta Ecclesiæ Wintoniæ et aliarum fortassis expendisse ». Hæc a Godvino Cantix comite, summa apud postremos Angliæ reges auctoritate, contra Emmam Eduardi matrem machinata creduntur, quod vereretur, ne plus apud *Edwardum* ejus matris consilia, quam suæ valerent versutiæ: indeque ne regi suspecta matris accusatio esset, adjuutores sibi sceleris legit, quibus plurimum tribui a rege noverat. Eduardus, quod Godvino promiserat, filiam ejus nomine *Æditham* anno sequenti uxorem duxit, cum qua in perpetua virginitate vixit.

6. *Synodus Constantiensis, et conjugium Henrici regis cum Agnete.* — Ad num. 3. Baronius refert ex Hermanno Contracto in fusiori Chronico, Henricum Germaniæ regem *Synodum Constantiensem* celebrasse, in qua iis qui contra se deliquerant debitum omne dimisit. Cum eodem anno Hepidannus, qui hoc tempore florebat, Concilium istud connectit, ideoque non audiendi Marianus Scotus et chronographus Hildensheimensis, qui illud in sequentem annum rejiciunt, quos tamen Cossartius tom. IX Concil. secutus est. Mirum vero Marianum Scotum, qui hoc tempore etiam vixit, idem Concilium cum anno sequenti copulasse, quemadmodum et conjugium Henrici Germaniæ regis cum Agnele Willelmi Pictavorum ducis filia, quod Baronius ex Hermanno laudato hoc anno recte recitat, et Hepidannus laudatus in Annal. ac Lambertus in Chron. asserunt etiam hoc anno factum. Gravius peccavit Glaber lib. 5, cap. 1, qui illud differt in annum *MXLV*, quem Hugo Flaviniacensis abbas in Chronico Virdunensi imitatus est, adeo per hæc tempora scriptores in Chronologia parum diligentes.

7. *Obitus Gisela Augustæ.* — Accurate tamen hoc anno Marianus Scotus in Chronico habet: « Gisla imperatrix mater Henrici regis obiit XVI kalendas Martii, et apud Spiram sepelitur ». Eundem annum exhibent Hermannus Contractus, Lambertus et Hepidannus. Quare fallitur chronographus Hildensheimensis, seu potius ejus continuator, qui id anno sequenti contigisse affirmat.

8. *Michael Cerularius Alexio succedit in patriarchatum CP.* — Ad num. 4. « xx die Februarii, Indict. XI, Alexius patriarcha rebus humanis excedit. Ei sufficitur die Annuntiationis festo Michaelus Cerularius », inquit Cedrenus, cui consentit Zonaras, cum ait eum Constantinopoli sedisse *annos xviii*. Emmanuel Calecas lib. 4 adversus Græcos, asserit post Photium unitatem in Ecclesia Orientali durasse per decem et septem patriarchas usque ad Cerularium; quem ille refert ex Cnropalate, aliis emergentibus casibus, quales homini sæpe superveniunt, simulque invidente pacis adversario, Romanum Pontificem propter azyma Diptychis ejecisse. Sed de hoc schismate infra sermo erit.

BENEDICTI IX ANNUS 11. — CHRISTI 1044.

1. *Schisma in Romana Ecclesia tribus pseudopontificibus laborante.* — Redemptoris annus millesimus quadragessimus quartus duodecima inchoatus Indictione sequitur, quo novo schismate Romana Ecclesia scinditur, de quo temporis huius auctor Hermannus hoc anno sic ait: « Romani Benedictum CL papam multis criminatum Sede sua pellunt, et Silvestrum III quemdam in ejus locum statuunt; quem tamen postea Benedictus quibusdam sibi faventibus excommunicatum depulit, Sedique suæ redditus, seipsum postea privavit, et alium pro se ob avaritiam contra canones ordinavit ». Hæc Hermannus. Qui autem tertius est substitutus, fuit Joannes archipresbyter Romanus.

2. Hæc autem ut quam exactissime cognoscantur, in primis sciendum duas potentissimas viguisse tunc temporis factiones, alteram Tusculanorum comitum, a quibus intrusum vidimus Benedictum; alteram Ptolemæi Romani civis, qui fuit filius Gregorii, quem in Ottonem Tertium rebellasse, suo loco superius vidimus. Fuisse familiam hanc potentissimam, quæ et magna jactantia vane gloriaretur esse Octaviæ gentis¹, Petrus Diaconus tradit, dum hujus filium Ptolemæum itidem nominatum in uxorem duxisse filiam Henrici Quarti imperatoris, enarrat. Benedicti igitur turpitudinem ubique decantatam, a bonis omnibus deploratam, haud diulius ferre valentes Romani ante oculos ipsam habentes, haud veriti sunt potentiam comitum Tusculanorum, qua Urbi imminentes, terrori civibus esse solerent; sed favore adspirante consulis Ptolemæi, Benedictum (ut audivimus) rejecerunt, et alium, quem nominavere Silvestrum, subrogarunt. Erat iste episcopus Sabinensis, qui et malis artibus, nempe collata pecunia, ad Sedem Petri sibi ascensum paravit. De quo Leo Ostiensis, Hermannus omnino consentiens, rem gestam dum narrat, hæc habet²: « Romæ item Benedictus, cum annis duodecim (undecim) Apostolicæ Sedi præfuisset, a Romanis ejectus est, et Joannes Sabinen-

sis episcopus, cui nomen Silvester impositum est, non tamen gratis in Romanum Pontificem subrogatus. Qui cum præfuisset mensibus tribus, Benedictus ille qui prius abrogatus, annitentibus propinquis suis Tusculanis proceribus, pulso Silvestro, Romanam Sedem iterum occupat. Nec multo post invisum se cunctis adspiciens³, Joanni archipresbytero, qui quasi religiosior habebatur, papatu tradito, ipse cupiditates suas liberius executurus, in paternam se recepit domum ». Audiamus modo quæ de his habeat Otto Frisingensis: « Circa idem tempus, pudenda, inquit, confusio Ecclesiæ Dei in Urbe Roma fuit, tribus ibi invasoribus, quorum unus Benedictus dicebatur, Sedem illam simul occupantibus, atque ad majoris miseriæ cumulum divisis simul cum redditibus, patriarchis, uno ad Sanctum Petrum, altero ad Sanctam Mariam Majorem, tertio, id est Benedicto, in palatio Lateranensi sedente, flagitiosam et turpem vitam, ut egomet in Urbe, Romanis tradentibus, audivi, duxere ». Hæc de tribus pseudopontificibus simul Romæ sedentibus Otto, nempe Benedicto, Silvestro, atque Joanne.

3. *Naufragium Gradensis Ecclesiæ.* — Sed quanta ex his oborta mala fuerint, quis numerare sufficiat? etenim pseudopontifices ut ad se allicerent homines, quæque injusta petita libenter eisdem concedebant; ut fecisse noscitur Benedictus, a quo hoc ipso anno, Indictione xii, Poppo patriarcha Aquileiensis, Apostolica Sede multipliciter conquassata, privilegium de subjectione Gradensis Ecclesiæ obtinuit, ac Gradum furtim ingrediens, abominanda cominisit flagitia. Nam Ecclesias incendit, thesauros abstulit, et multas reliquias quas invenit, retulit secum. Pro tanto igitur flagitio, dux Dominicus Contareus et Ursus patriarcha Benedicto papæ litteras mittunt. Sed antequam de tanto ausu coerceretur, idem Poppo sine confessione et viatico moritur turpissime. At dux et patriarcha Benedictum abbatem S. Trinitatis de Brondulo, Joannem Stornatum, et Gregorium clericum nuntios papæ delegantes, irritationemque

¹ Petr. Diac. in Chron. Cass. l. iv. c. 63. — ² Leo Ost. Chron. Cass. l. ii. c. 80.

³ Gratianum hunc alii nominant.

Privilegii Popponi concessi obtinentes, cum ablato-
rum restitutione et suæ sedis approbatione re-
deunt. Tunc dux urbem Gradum dirutam reparare
studuit. Hæc ex Chronico Andree Danduli. Sed
redeamus ad institutam de multiplicibus assertis
Pontificibus narrationem.

4. *Cedentibus pseudopapis, Gregorius VI eligi-
tur, ejus legitimitas propugnatur, et ad quem
dat litteras Petrus Damianus.* — Quod autem in
primis ad Benedictum pertinet, ipsum quidem
magno fidelium scandalo vitam ducentem, sponte
Romanæ Ecclesiæ Pontificatui cessisse persuasione
viri sanctissimi Bartholomæi abbatis Cryptæ Fer-
ratæ, discipuli S. Nili, de quo plura tomo superiori,
ejus Acta significant, in quibus ista leguntur :
« Quomodo venerabilem ipsum universis reddidit
ejus virtus, ut supra diximus, aperte manifestemus.
Qui tunc temporis Apostolicæ Sedi præerat, cum
juvenis esset (quod utinam Deus avertisset) volu-
ptatibus deditus, humanæ fragilitati se præcipitem
dedit. Sed cum tandem ab hoc malo resipuisset, et
malefactorum solutionem et veniam sibi quære-
ret; beatum Bartholomæum sibi fore mediatorem
agnovit, et intercessorem illum sibi decrevit. Qua-
propter advocavit illum majori qua poterat vene-
ratione et honore. Huic rem totam aperit, et op-
portunum remedium quærit. Ipse vero Bartholo-
mæus non est throni celsitudinem veritus, non
dignitatis præstantiam respexit, neque munera et
honores, quod plerique spiritualium medicorum
facere solent, sed mali gravitatem et propterea op-
portunam mali abscissionem illi adhibens, ita in-
quit : Non licet tibi sacra facere, sed potius absti-
nere, et Deum placare quem peccando irritasti.
Ille vero neque tardans, neque procrastinans, sed
quamprimum deposita Sede instar privati hominis
se habebat. Et hæc quidem cum summo Pontifice
Bartholomæus ». Hæc ibi auctor ejus temporis.
Verum eundem Benedictum dimissam repetiisse
Cathedram, certum est.

5. At quodnam primum remedium adhibitum
fuerit ad extinguendam tricipitem bestiam hanc,
portis inferi emergentem, videamus. Illi plane si-
mile excogitatum remedium est, quod in extin-
guendo Cerbero illo fabuloso finxere poetæ, nempe
picea offa opplendo fauces, dando illis menden-
dum aliquid, ut a latratu omnino cessarent. Quis
autem pharmacum istud pararit, quod temporis
illius infelicitas exigebat, videamus. Otto Frisingensis
sic pergens fideliter narrat : « Hunc miser-
rimum statum Ecclesiæ religiosus quidam presby-
ter, Gratianus nomine, videns, zeloque pietatis
matris suæ compatiendo, animadvertens, præfatos
viros adiit, eisque a Sede sancta cedere pecunia
persuasit, Benedicto redditibus Angliæ, quia ma-
joris videbatur esse auctoritatis, relictis. Ob ea
cives præfatum presbyterum, tanquam Ecclesiæ
Dei liberatorem, in summum Pontificem elege-
runt, eumque mutato nomine Gregorium Sextum
vocaverunt ».

6. Hæc sunt quæ loco simoniæ Gregorio ob-
jecta fuere : sed an emptio Sedis, vel redemptio
potius vexationis transactio ista adeo necessaria ad
pellendos intrusos Pontifices fuerit, periti canonum
omnes facile judicabunt. Unum hoc liquet, eum-
dem Gregorium Sextum vere germanum atque le-
gitimum Pontificem a viris sanctissimis atque do-
ctissimis ejus temporis habitum esse, nempe ab
Hildebrando postea Gregorio Septimo, et a Petro
Damiani, et aliis viris in primis simoniacorum ho-
stibus implacabilibus. De Gregorio Septimo ipse
Otto Frisingensis æque testatur, qui ait : « Hunc
Gratianum Alpes transcendentem secutum fuisse
tradunt Hildebrandum, qui postmodum summus
Pontifex factus, ob ejus amorem, quia de catalogo
Pontificum semotus fuerat, se Gregorium Septi-
mum vocari voluit, et sicut in Lucano habes :

Victrix causa diis placuit, sed victa Catoni.

7. « Ita et huic Hildebrando, qui semper in
Ecclesiastico rigore constantissimus fuit, causa
ista, in qua sententia principis et episcoporum
prævaluit, semper displicuit. Ex hinc Romana Ec-
clesia in electione canonica Pontificum in tantum
infirmata invenitur, quod iste quatuorque sequen-
tes ab imperatore ibi positi in Catalogo invenian-
tur ». Hæc ipse. Ac ita quidem. Nam ipse Gregorius
Septimus in Concilio Romano, celebrato anno Re-
demptoris MXXX, ejus vero Pontificatus anno
septimo, recognoscit Gregorium hunc legitimum
papam. Sed et¹ Glaber ejus plane temporis scriptor,
quique ad ipsius Gregorii electionem stylo perve-
nit, summopere Gregorium Sextum laudat, hæc
dicens, post Benedictum ejectum : « Tunc vero cum
consensu totius Romani populi, atque ex præcepto
imperatoris ejectus est a Sede Benedictus, et loco
ejus subrogatus est vir religiosissimus ac sanctitate
perspicuus Gregorius, natione Romanus : ejus
videlicet bona fama, quidquid prior fœdaverat in
melius reformavit ». Hæc adeo de Gregorio gloriosa
Glaber totidem verbis. Ex his autem redarguas
errores aliorum, in primis vero, quod Joannem
archipresbyterum cum Gratiano conflant in unum.
Nam et Petrus Damiani, hujus temporis scriptor,
Gregorium Sextum Gratianum, et non Joannem
antea nominatum fuisse iterum tradit. Cujus ad
eundem Pontificem Epistolam hoc anno datam hic
describere dignum existimamus.

8. Ipse quidem Petrus Damiani, mox ut audi-
vit ejus promotionem et quidem canonicam, ad
ipsum scribens, ipsi congratulatur quod Ecclesia
Dei per ejus electionem, sordibus expurgatis, pri-
stinum decorem sit consecuta. Extat ipsa Epistola
una cum aliis ejusdem Petri in Codice Cassinensi,
quam hic tibi reddendam curavimus. Sic enim se
habet :

« Domno Gregorio sanctissimo papæ Petrus

¹ Glab. l. v in lu.

peccator monachus, debitæ servitutis obsequium.

« Reverendissime domine, Regi regum Christo gratias refero, quia de Apostolica Sede bona semper audire aridis desiderii mei faucibus sitio, largum præconii vestri poculum, multis jam propinquantibus, bibo, qui videlicet haustus tanta suavitatis dulcedine mentis meæ stomachum recreat, ut dum mens interius jubilat, lingua proliuius in hanc vocem laudis erumpat : Gloria in excelsis Deo, et in terra pax hominibus bonæ voluntatis. Vere enim ipse, sicut scriptum est, mutat tempora et transfert regna. Vere, quod per Prophetam suum multo ante prædixit, nunc teste mundo mirabiliter adimplevit : Quia dominatur Excelsus in regno hominum, et cui voluerit ipse dat illud. Latentur ergo cæli et exultet terra, et antiquum sui juris privilegium se recepisse sancta gratuletur Ecclesia. Conferatur jam milleforme caput venenati serpentis, cesset commercium perversæ negotiationis, nullam jam monetam falsarius Simon in Ecclesia fabrices, nulla Ciezi, præsentis providi doctoris absentia, furtiva dona reportet. Jam columba revertatur ad arcam, et virentibus olivæ foliis, pacem nuntiet redditam terris. Reparetur nunc aureum Apostolorum sæculum, et præsentis vestra prudentia, Ecclesiastica refloreat disciplina. Reprimatur avaritia ad episcopales infulas anhelantium : everlantur cathedræ columbas vendentium numulariorum. Veruntamen utrum ista quæ scribimus mundo sperare sit licitum, primo Pisaurensis Ecclesiæ bonæ spei clarum dabit indicium. Nisi enim prædicta Ecclesia de manu illius adulteri, incestuosi, perjuri atque raptoris auferatur, omnis populi spes, quæ de reparatione mundi erecta fuerat, funditus enervatur. Omnes siquidem ad hunc finem oculos tendunt, omnes ad hanc unam vocem aures erigunt. Et si ille tot criminibus obvolutus ad episcopatus arcem restituitur, ab Apostolica Sede boni aliquid ulterius posse fieri penitus denegatur. Tres equidem sunt, quæ testimonium dabunt, Castellana sedes, Fanensis et Pisauriensis, ut in ore duorum vel trium testium stet, omne verbum. In his tribus patenter ostenditur quid spei de cætero relinquatur. Omnipotens Deus te, summe pater, ad conservanda Ecclesiæ suæ jura custodiat, et populum suum ne immerito sub tanto Pontifice gaudere permittat. Ista Petrus ad Gregorium papam recens electum, et quidem canonicè, et quidem legitime, quod tanta ista nonnisi legitime electo papa sint digna, ut plane, si desint alia, ista sufficiant ad demonstrandam ejusdem canonicam electionem omni ex parte purissimam. Non enim ejusmodi fuit Petrus Damiani, qui vellet, hæc scribens, turpiter adulari Pontifici : nam exæstuans zelo Ecclesiasticæ disciplinæ, nemini parcere novit, quin acerbissime arguerit quemcumque sciret eidem adversantem. Ex his etiam intueri, quantæ esset Gregorius æstimationis in orbe, ut eum conscendisse tantam Cathedram Petri, id ipsum fuisset, omnia (ut audisti) mala ab Ecclesia pro-

pulsasse, ac bona omnia postliminio revocasse.

9. Sed quas ad eundem Gregorium de promovendo episcopo Sempronienensi litteras idem dedit, ex eodem Codice sumptas sic accipe :

« Domno Gregorio sanctissimo papæ Petrus peccator, monachus devotissimæ servitutis obsequium.

« Noverit beatitudo vestra, piissime domine, quia pro peccatis nostris clerici digni episcopatus officio, in nostris partibus non inveniuntur. Omnes enim quærunt quæ sua sunt, et non quæ Jesu Christi. Avaritiæ quippe et elationis igne succensi, ambiunt quidem ad sacerdotium promoveri ; sed non student digni sacerdotio fieri. Præesse inhiant, prodesse non curant. Veruntamen pro qualitate temporis et penuria personarum, videtur mihi hic archipresbyter posse ad episcopatus apicem promoveri, si vestræ sanctitatis id decernat auctoritas, excepto quod avaritia (aviditate) honoris æstuat, conscendere ad pastoralis officii culmen anhelat.

10. « Hoc autem vestro relinquatur iudicio : sed si hoc non obsit, cum Sempronienensis Ecclesiæ clericalis ordo in mea mente revolvitur, hic aliquanto cæteris quasi meliusculus invenitur. Quapropter si prudentissimæ vestræ sanctitati placere potest, postquam a clero et populo est electus, postquam ad hoc officium a pluribus utcumque iudicatur idoneus : de ambitione sua pœnitentiam agat, et benedictionem consecrationis accipiat. Veruntamen omnipotens Deus, quid vobis super hac re faciendum sit, per sui spiritus gratiam doceat, et in templo pectoris vestri manifesta voluntatis suæ jura decernat. Unum autem est, unde pietatis vestræ depono clementiam, ut si hunc non consecraveritis : donec me servum vestrum videritis, nulli prædicti episcopatus cathedram tribuatis ». Hæc ad Gregorium papam Sextum Petrus Damiani. De quo non est quod possit dubitari, num potius ad Gregorium Septimum quam Sextum ista scripserit : siquidem ostendetur inferius, eundem Petrum sub Alexandro Pontifice diem obiisse, et ad tempora Pontificatus Gregorii Septimi successoris Alexandri minime pervenisse. Vides igitur, lector, quam fallantur ii, qui inter spurios atque schismate notatos Pontifices rejiciunt Gregorium Sextum, qui tantopere a præcipuo schismaticorum hoste, tanto viro, Petro Damiani meruisset commendari.

11. Cæterum sicut errare noscuntur hi qui Joannem cum Gratiano conflant in unum, ita etiam qui Gregorium inter tres illos improbatos Pontifices numerant : redarguantur enim hi manifeste ex Ottone, qui manifestissime extra tres illos superius recitatos pseudopontifices numerat Gratianum creatum post tres illos Pontificem : sic etiam Panvinus rem intelligens scripsit, nempe Gratianum post illos tres cessare jussos, creatum esse Pontificem, dictumque Gregorium Sextum, eumque pacifice sedisse usque ad Henrici Germaniæ regis in Italiam adventum, duos scilicet

annos et amplius. At Benno schismaticorum signifer, Gregorii Septimi hostis infensissimus, in hunc Gregor. Sextum ejus magistrum virus evo-muit, dicens, hunc quem non Gratianum tantum, sed Joannem Gratianum appellat, mille quingen-tas libras persolvisse Benedicto Nono, ut Pontifex fieret. Sed appello auctoritatem Ottonis viri Ger-mani et sanctitate præstantis superius recitatum, qua absque ambage aliqua significatur, quæ dede-rit, imo habere ac retinere potius permiserit Gra-tianus Benedictum, ut a Pontificatu iterum invaso desisteret. Sed a Bennone omnium mendacissimo et perditissimo improbari, hoc ipsum est ab im-probis separari, et in omnibus commendari pro-barique.

12. *Gregorii papæ inclytæ virtutes et optime res gestæ.* — Quod autem ad ejus administrationem pertinet, Glaber (ut vidimus) his paucis rem absol-vit, dicens: « Cujus videlicet bona fama, quidquid prior fœdaverat, in melius reformavit ». At quæ-nam fuerit ista reformatio, hoc inquirendum. Sane quidem animum ejus zelo exæstuasse, ut quæ tot annorum spatiis coaluissent mala jamque in con-suetudinem conversa essent, de medio tolleret, atque omnino corrigeret, ex iis quæ dicturi sumus facile intelligemus. Quod si (ut est in pro-verbiis) cognoscimus leonem ex unguibus, et ex discipulo magistrum existimare licet, et institutio-nem filiorum ad parentem referre solemus: ex Gregorio Septimo hujus discipulo Sextum Grego-rium, magistrum ejus, qualis fuerit, potenti con-jectura assequi possumus. Libertas enim illa ani-mique constantia, indefessumque studium vindicandi oppressam a principibus Ecclesiam in pristinam libertatem, quæ amplissimis notis in Gregorio Septimo intuemur: utique in Gregorio Sexto hoc primitus eluxere, et ex hoc in ipsum e fonte velut in rivum fluxisse noscuntur. Hujus fuit labor et industria, ut tria illa monstra conficeret, sed non ita feliciter, ut optavit, perficere licuit, cum non-nisi pacta pecunia ex redditibus Ecclesiæ colli-genda, cedere sedibus illi obstinato animo statuissent. Laudatum tunc opus, quod postea in ca-lumniam versum, summum ipsi peperit detri-mentum.

13. Sed quænam creatus consensu omnium Pontifex egerit, videamus. De ipso enim Willelmus bibliothecarius Malmesburiae, qui sequenti sæculo claruit atque scripsit, hæc habet¹: « Erat papa Gregorius Sextus, ante dictus Gratianus, magnæ religionis et severitatis. Is ita Romani Apostolatus statum per incuriam antecessorum diminutum in-venit, ut præter pauca oppida Urbi vicina, et obla-tiones fidelium, pæne nihil haberet, quo se susten-taret. Civitates et possessiones in longinquo positæ, quæ ad jus Ecclesiæ pertinebant, a prædonibus ablatae; tramites publici, et strata viarum per totam Italiam a latronibus stipabantur, ut nullus pere-

grinus, nisi cum majori manu impune transiret. Fervebant totis semitis insidiatorum examina, nec inveniebat viator quo colludio evaderet. Ita in vacuum sicut in pecuniosum furebatur; nec sup-plex habere gratiam, nec resistens pati poterat vio-lentiam. Cessatum est ab omni provincia Romam iter aggredi; quod mallet quilibet per domesticas Ecclesias nummos suos dividere, quam latrun-culos propriis laboribus pascere. Quid in Urbe, unico olim habitaculo sanctitatis? Ibi in medio foro sicarii vagabantur, genus hominum infidum et versutum. Si quis semitarum observatores aliquo transisset artificio, capitis scilicet periculo Apostoli Ecclesiam videre cupiens, in sicarios incidens, nullo modo sine substantiæ, vel salutis damno domum revertebatur. Super ipsa corpora sancto-rum Apostolorum et martyrum, supra sacra altaria gladii nudabantur, et oblationes accedentium vix-dum appositæ, de manibus abripiebantur, abreptæ in comessationes et scortorum abusiones consume-bantur. Tantorum malorum turbo Gregorii papa-tum offendit.

14. « Ille primo leniter (et ut decet Pontificem) magis amore quam terrore cum subjectis agere: delinquentes verbis plus quam verberibus pre-mere: urbani a peregrinorum infestatione, a rapina suorum cessarent; alterum esse contra naturam, ut ille qui communi vesceretur aere, non communi frueretur pace: Christiano inter Christianos libere, quo liberet progrediendum, dum omnes sint ex uno famulitio, omnes unius sanguinis conjuncti coagulo, redempti pretio: alterum contra Dei mandatum, quod præcepit ut qui altario deser-viunt de altario vivant. Præterea domum Dei decere esse domum orationis, non speluncam la-tronum, non gladiatorum conventiculum. Permit-terent oblationes transire in usus sacerdotum, vel in expensas pauperum; provisorum se illis, quos egestas ac rapina compelleret, ut aliquo honesto officio stipem haberent: quos cupiditas exagitabat, ipsi sibi pro Dei timore et sæculi honestate mo-dum ponerent. Invasores Ecclesiastici patrimonii mandatis et Epistolis invitavit, ut aut indebita redderent, aut se jure illa tenere, in Senatu Ro-mano probarent: si neutrum facerent, Ecclesiæ membra se non esse cognoscerent, qui capiti Ec-clesiæ B. Petro et ejus vicario resultarent.

15. « Talia frequenter concionatus, et aut pa-rum aut nihil proficiens, severioribus remediis in-veterato morbo tentavit occurrere, cauterio itaque excommunicationis omnes ab Ecclesiæ corpore re-movit, vel qui talia facerent, vel qui agentibus convivio, vel etiam colloquio participarent. Ilæc ille pro suo officio satis agebat, sed pæne in perni-ciem versa sedulitas. Nam, ut ille dicit¹: Qui eru-dit derisorem, ipse sibi injuriam facit; maligni illi levi admonitione perstricti contra furere, minis auras territare, muros Urbis armis circumsonare,

¹ Wilel. de gest. Reg. Aug. l. II. c. 13.

¹ Prov. IX.

adeo ut pæne papam interimerent. Itaque ferro abscissionis utendum iudicans, arma undecumque et equos conquisivit, milites et equites adornavit. Ac primum Basilicam beati Petri præoccupans, raptos oblationum vel exstinxit, vel effugavit. Inde fortunam sibi aspirare videns, longius progreditur, et si qui resisterent, occisis, prædia omnia et opida multis temporibus amissa in antiquum jus reformavit : itaque pax per multorum segnitiam exulans, per unum hominem in patriam rediit. Securi peregrini insuetas viarum terebant orbitas, læti per Urbem antiquis oculos pascebant miraculis cantantes, donis factis, repatriabant. Quirites interea rapto vivere assueti, sanguinarium vocant illum et indignum esse, qui Deo offerret sacrificium tot cædium conscius. Et ut fieri solet, quod morbus obloquii ab uno serpat in omnes : ipsi etiam cardinales argumenta populi probabant, etc. »

16. Quæ autem subinferuntur de ejus obitu, miraculoque ad januas S. Petri sponte reclusas ad suscipiendum ejus cadaver, haud apud omnes fidem sibi conciliant ; quod scilicet non Romæ, sed in Germania, ubi exul agebat, defunctus esse dicatur. Sed nec nos adeo constanter ea de miraculo suadendo proponimus, fides sit penes auctorem. Illud dicere atque asserere non veremur, ista de statu rerum in melius restituendo invidiam in Gregorium concitasse, eamque peperisse calumniam adversusque eum imperatorem in Italiam provocasse, et ut Sede cederet effecisse, ut suo loco dicetur inferius. Tenuisse vero Sedem Gregorium annos duos et menses octo, Leo Ostiensis cum dicat, plane opus est affirmare, hæc de Gregorii ele-

ctione in fine Aprilis mensis contigisse, cum constet abdicationem ipsius factam esse in fine anni Redemptoris millesimi quadragesimi sexti ; in hisque agendis quæ sunt relata, spatium annorum duorum et octo mensium insumptum fuisse.

Quod ad res pertinet Orientales, cum imper. Constantinus Monomachus pellicem subintroduxisset, Romani Scleri sororem, populo id exprobrante, et ulciscendum clamante, pæne periclitatur. Quomodo autem ista se habuerint, ita Curopalata narrat : « Hoc anno, duodecima Indictione, cum dies festus celebraretur sanctorum quadraginta martyrum, nona die Marlii mensis, cum progressurus esset imperator ad cultum sanctorum publice, seditio a populo concitata est. Cum enim egressus esset multis cum satellitibus e palatio, multisque bonis acclamationibus, et ad templum Salvatoris in Areca pervenisset, atque inde equitaturus esset, et ad martyrum tumultum venturus, repente e media turba exaudita vox est : Nos Scleranam reginam nolumus, neque propter ipsam matres nostræ Porphyrogenitæ morientur Zoe et Theodora : et statim confusa sunt omnia, et perturbatus populus conabatur imperatorem occidere. Et nisi celerrime reginæ Zoe et Theodora e superiori parte prospicientes consternatam multitudinem sedassent, haud pauci periissent, et fortasse ipse quoque imperator, qui sopita perturbatione in regiam reversus est, omisso ad martyres accessu ». Hæc Curopalata, ex quo alii. Reliqua Monomachi, quæ ad bella pertinent, quod nostri instituti non sint, aliis legenda relinquimus.

Anno periodi Græco-Romanæ 6537. — Anno Æræ Hispan. 1082. — Anno Hegiræ 436, inchoato die 4 Jul., Fer. 1. — Jesu Christi 1044.

— Gregorii VI papæ 1. — Henrici III reg. 6. Constantini Monomachi imp. 3.

1. *Benedictus IX, Silvester III et Gregorius VI, eodem tempore papæ.* — A num. 1 ad 16. Victor III papa lib. 3 Dialog., postquam ea quæ de Benedicto IX Pontificatus ejus initio ex illo retulimus protulit, ait : « Denique cum rapinas, cædes, aliaque nefanda in Romanum populum aliquanto per tempora sine ulla dilatione ageret, congregati in unum populi, quia ejus nequitiam amplius ferre nequibant, eum a Pontificatus Cathedra exturbantes, Urbe pellunt ; alterumque in loco ejus, Joannem videlicet Sabinensem episcopum, canonica parvipendentes decreta, substituunt ; qui tribus non,

amplius mensibus Romanæ usus est Cathedræ successionem, Benedicto undique suis cum propinquis infestante Urbem, quia ex consulibus terræ orlus erat, et in eis maxima virtus, Urbe cum dedecore pulsus, suum ad episcopatum reversus est. Benedictus igitur quod amiserat sacerdotium recepit, pristinos tamen mores minime mutavit, secundum quod scriptum est : *Adolescens juxta viam suam, etiam cum senuerit, non recedet ab ea* ; et quia durum est in corde veteri nova meditari, in eisdem pravis et perversis operibus ut ante perseverabat. Cumque se a clero simul et populo propter nequi-

tias suas contemni respiceret, et fama suorum facinorum omnium aures impleri cerneret, tandem reperto consilio (quia voluptati deditus, ut Epicurus magis quam ut Pontifex vivere malebat) cui-dam Joanni archipresbytero, qui tunc in Urbe religiosior cæteris clericis videbatur, non parva ab eo accepta pecunia, summum sacerdotium relinquens tradidit. Ipse vero in propriis se castellis recipiens, Urbe cessit. Interea Joannes, cui Gregorius nomen inditum est (Gregorius nempe hujus nominis VI), cum duobus annis et octo mensibus sacerdotium administrasset, Henricus rex Romanam adiit Urbem », et cætera anno MCLVI recitanda.

2. *Benedictus IX sæpe Pontificatum resumpsit.* — Non dissimilia narrant Hermannus Contractus in Chron. ad annum MCLIV, et Leo Ostiensis, ut videre est apud Baronium num. 1 et seq. « Benedictum papam », inquit Hermannus, « multis criminatum Sede sua pellunt, et Silstrum (legendum Silvestrum) quemdam in locum ejus statuunt, quem tamen postea Benedictus quibusdam sibi faventibus excommunicatum depulit, Sedique suæ redditus, seipsum postea privavit, et alium pro se ob avaritiam contra ordinat », nempe Joannem Gratianum, Gregorium VI in Pontificatu appellatum. Leo vero Ostiensis : « Romæ item Benedictus cum annis duodecim (nempe incompletis, non vero undecim, ut Baronius legendum credidit) Apostolicæ Sedi præfuisset, a Romanis ejectus est, et Joannes Sabinensis episcopus, cui nomen Silvester impositum est, non tamen gratis in Romanum Pontificem subrogatus. Qui cum præfuisset mensibus tribus, Benedictus ille prius abrogatus », et cætera apud Baronium legenda. Tres itaque Pontifices, nempe Silvester III, Gregorius VI et Benedictus IX, uno eodemque tempore Sedem Romanam occuparunt. Cum vero Gregorius VI circa initium mensis Maii currentis anni Pontificatum inierit, ut mox videbimus, et Silvester III menses tres sederit, ut habent Victor III et Leo Ostiensis, sequitur Benedictum IX circa currentis anni initium Sede expulsum fuisse. Anno quidem MXXXVIII e Sede pulsus fuerat, ut eo anno ex Glabro auctore coævo diximus, sed tunc nullus in ejus locum subrogatus, indeque factum, ut Hermannus et Leo Ostiensis, qui rem summarie tractant, primæ illius Benedicti IX expulsionis nullam mentionem fecerint. Verum ut habet idem Glaber lib. 4, cap. 5 : « Intercedente thesaurorum pecunia electus extitit a Romanis, a quibus exinde frequenter ejectus, ac inhoneste receptus, nulla potestate viguit ».

3. *Gregorius VI licet simoniacus inter legitimos Pontifices numeratus.* — *Benedictus Nonus, Silvester Tertius*, antea Joannes Sabinensis episcopus appellatus, et *Gregorius VI*, ante Pontificatum Joannes Gratianus vocatus, simoniaci fuere; Benedictus tamen IX et Gregorius VI inter Pontifices Romanos numerantur, et ut tales habiti sunt, uti de Benedicto IX inter omnes convenit, et de Gre-

gorio VI non videtur dubitandi locus. Hinc Gregorius VII in Concilio Romano anno MCLXXX coacto ait : « Invitus ultra montes cum domino papa Gregorio abii, sed magis invitus cum domino meo papa Leone ». Præterea quando Petrus Damianus electionem ejus accepit, eam canonicam fuisse existimans, ipsi Pontificatum gratulatus est, ut liquet ex ejus ad eum Epistola a Baronio num. 8 recitata. Imo Henricus II imperator, qui eum a Concilio Sutriensi anno MCLXVI deponendum curavit, ut infra videbimus, anno insequenti III nonas Januarii privilegia monasterii Sancti-Petri Perusini confirmans, et imperatores ac Pontifices Romanos qui jam eadem confirmaverant enumerans, ait : « Ita ut ea, quæ ab antecessorum nostrorum tempore imperatorum, etc. et Pontificum Romanorum, Joannis siquidem, Gregorii, etc. Joannis (scilicet XIX), Benedicti (scilicet IX), Gregorii (nempe VI), et præsentis domni Clementis (nempe hujus nominis II), tenuit vel modo tenet, etc. » Ubi Gregorium VI et Benedictum IX inter legitimos Pontifices recenset. Extat illud Diploma tom. II Bullarii Casinensis.

4. *Idem de quibusdam aliis Pontificibus Rom. dicendum.* — Certe Angelus Corarius, *Gregorius XII* in Pontificatu appellatus, a Conciliis tam Pisano, quam Constantiensi, tanquam antipapa sen tanquam male electus depositus fuit, et tamen quia causa ejus melior quam aliorum apparebat, inter veros Pontifices numeratur, licet ipsemet depositioni suæ postea consenserit. *Alexander VI*, numerata pecunia Pontificatum emit, ut non diffitetur Onuphrius in Appendice ad Platinam, quod et testatur Philippus Comminius, historicus sincerus et coævus, lib. 7, cap. 12, qui tamen locum inter legitimos Pontifices semper habuit. Imo potest Pontifex Romanus, si infidelis, hæreticus, aut schismaticus fuerit, dignitate moveri, quod mere personale, et Sedi Apostolicæ nullum præjudicium infert, sicuti *Childerici* regis Francorum, vel *Alphonsi VI* regis Lusitanie depositiones, jus supremum, monarchicum et independens; regum utriusque regni minime lædunt.

5. *Magnus error Ottonis Frisingensis.* — Sed, ut ad Gregorium VI redeam, Otto Frisingensis, qui centum circiter annis post ejus depositionem Chronicon suum elucubravit, cum de illo male edoctus fuisset, non solum Baronium, sed passim omnes alios in errorem induxit, Gregorium VI a tribus Pontificibus simoniaci, qui per hæc tempora Romanam Ecclesiam affligere distinguens, et eum tanquam liberatorem Ecclesiæ exhibens. Hæc ejus verba lib. 6, cap. 23 : « Circa idem tempus pudenda confusio Ecclesiæ Dei in Urbe Roma fuit : tribus ibi invasoribus, quorum unus Benedictus (hujus nominis IX) dicebatur, Sedem illam simul occupantibus, atque ad majorem miseriæ cumulum divisim simul cum redditibus patriarchiis, uno ad S. Petrum, altero ad S. Mariam majorem, tertio, id est, Benedicto, in palatio Lateranensi se-

dente, flagitiosam et turpem vitam (ut egomet in Urbe Romanis tradentibus audivi) duxere. Hunc miserrimum statum Ecclesiæ religiosus quidam presbyter, Gratianus nomine, videns, zeloque pietatis matris suæ compatiendo animadvertens, præfatos viros adiit, eisque a Sede sancta cedere pecunia persuasit, Benedicto redditibus Angliæ, quia majoris videbatur auctoritatis, relictis. Ob ea cives præfatum presbyterum, tanquam Ecclesiæ Dei liberatorem in summum Pontificem elegerunt, eumque mutato nomine Gregorium Septimum (legendum, Sextum) vocaverunt ». Vides Ottonem supponere eodem tempore quatuor Pontifices Romæ visos fuisse, cum tamen Benno hujus ætatis scriptor, omnesque alii trium tantum mentionem faciant, ex quibus Joannes Gratianus unus extiterit, et Gregorius VI nominatus fuerit; quem cum valde laudet Otto Frisingensis, Baronius et plerique alii eum a simoniæ labe immunem fuisse censuere, et Henricum II imperatorem, qui juste eum depnendum judicavit, hujus rei valde insinularunt.

6. *Hermannus et Victor III PP. Gregorium VI pro simoniaci habent.* — Papebrocius vero in Conatu Chronico-Historico fatetur, Ottonem Frisingensem male quatuor Pontifices nobis obtrusisse, sed arbitratur Gregorium VI ex illis tribus unum legitime electum fuisse, et nonnisi ad liberandam Ecclesiam pecuniam dedisse; et ita narrationis Ottonis partem veram esse putat, partem vero falsam. Verum scriptores cœvi hanc communem sententiam plane convellunt. Hermannus enim Contractus scribit in Synodo Sutriensi, de qua suo loco: « Causa errorum Pontificum diligentius ventilata, Gregorium VI convictum pastoralis baculo privatum esse, dein omnium tam Romanorum quam aliorum assensu » Clementem II Pontificem Romanum electum. Secundo, Victor III papa, lib. 3 Dialog. refert Benedictum IX non parva a Gregorio VI accepta pecunia, summum sacerdotium ei reliquisse, et Henricum regem « tres illos, QUI INJUSTE APOSTOLICAM SEDEM INVASERANT, cum consilio et auctoritate totius Concilii » juste depulisse, et ipsummet Gregorium VI post rem ab ea Synodo discussam, agnovisse « se non posse juste honorem tanti sacerdotii administrare, ac semetipsum Pontificalibus indumentis » exuisse.

7. *Bonizo episc. Placentiæ eum pro simoniaci habet.* — Tertio, Lambecius. Tom. II Biblioth. Cæs. lib. 2, cap. 8, ait, in ea Bibliotheca extare volumen Ms. in quo continetur *Bonizonis* episcopi primum quidem Sutrii, postea vero Placentini, qui anno MLXXXIX ob defensionem sanctæ Sedis Apostolicæ et liberlatis Ecclesiasticæ a Placentinis schismaticis, effossis oculis, et omnibus fere membris detruncatis, crudelissime occisus est, ut eo anno refert Bertoldus (cujus verba Baronius in eum Christi annum inseruit) *Decretale*, sive *Syntagma decretorum Ecclesiasticorum ex sacra Scriptura, probatisque Conciliis*; ut et ex *Pontificum Rom. et sanctorum Patrum*, aliorumque *orthodoxorum*

auctorum Monumentis collectum, et secundum locos communes in septem fibros divisum; cui *Proœmii* loco præfixa est *Epitome Historiæ Pontificum Romanorum a sancto Petro ad Urbanum II*, anno MLXXXVIII electum. Titulus hujus Epitomes est: *Chronica Romanorum Pontificum edita a Bonithone Sutrii episcopo, viro per omnia doctissimo*, in cujus fine refert ipse Bonizo, se etiam alios *duos libros* de Pontificibus Romanis scripsisse, quorum *primus*, qui continuit res gestas sub Theophylacto sive Benedicto IX et sequentibus Pontificibus atque antipapis usque ad obitum Gregorii VII, inscriptus fuit AD AMICUM; alter autem, qui comprehendit *Acta primi*, et ex parte etiam *secundi anni Pontificatus Urbani Secundi*, inscriptus fuit, in *Hugonem schismaticum*, hoc est, contra Hugonem cognomento *Candidum*, cardinalem presbyterum Tituli S. Clementis, qui anno MLXI post obitum Nicolai II papæ, caput et antesignanus fuit eorum, qui novum Pontificem Romanum nonnisi consulto et consentiente *imp. Henrico IV*, creandum esse contenderunt.

8. *Egregius locus Bonizonis episc.* — Hæc autem Bonizonis verba de Gregorio VI in fine memoratæ Epitomes scripta: « Cæterum, inquit, si quis de Theophylacto Tusculano (seu de Benedicto IX ante Pontificatum ita appellato) qualiter Joanni (sc. Joanni archipresbytero, Gregorio VI in Pontificatu vocato) sacerdoti vendidit papatum: et quomodo uno eodemque tempore THEOPHYLACTUS ET GREGORIUS (hujus nominis VI), ET SILVESTER (hujus nominis III), Romanum non regebant, sed vastabant Pontificatum: et qualiter Henricus rex, Conradi filius, Romanam Ecclesiam a TALIBUS PERTIBVS LIBERAVIT, gnarus esse voluerit, legat LIBRVM quem dictavi, qui inscribitur AD AMICVM, et ibi inveniet hæc ordinabiliter esse digesta ». Porro Bonizo non ex occasione, sed ex professo de Romanis Pontificibus scripsit, idque non multis a Gregorii VI morte annis; Sutrii, ubi is a Pontificatu depositus, episcopus fuit; vitæ suæ partem prope Urbem Romanam traduxit; *Sutrium* enim nonnisi viginti quinque milibus passuum ab ea distitum; et denique ob defensam Ecclesiæ Romanæ libertatem martyrium pertulit. Quare cum *Gregorium VI* papatum a Benedicto IX emisit in litteras miserit, ejus hac in re testimonium gravissimum censi debet.

9. *De rebus hoc tempore Romæ gestis præclare edoctus fuit.* — Quæ post illa verba subjungit, hujus argumenti vim magis ostendunt, ideoque hic non prætermittenda: « Inveniet autem et ibi papa Clemens (hujus nominis II), electus qualiter sit, qualiterve Henricus rex, imperator ab eodem ordinatus sit; et de Damaso (hujus nominis II), ejus successore, quot in papatu duxerit dies; et de præclaro Leone (hujus nominis IX), quid in papatu egerit, qualiterve vitam finirit; et de Victore (ejus nominis II) ejus successore, quid egerit, aut quid ejus temporibus novum evenierit; et de Stephano (hu-

jus nominis IX, vulgo X), Godefridi ducis germano, et qualiter ejus temporibus patarea (vox hæc suo loco exponetur) apud Mediolanum exorta est; et de Nicolao (hujus nominis II) papa, et de lite quam habuit cum Benedicto (ejus nominis X) invasore, et quid egerit in papatu; et de Alexandro (ejus nominis II) papa et de lite quam habuit cum Cadolo (alias Honorio II) Parmense et de ejus victoria, et quid egerit in papatu et de ejus fine; et de septimo Gregorio, et de ejus electione, et de vita ejus, et moribus, et qualiter ad altare Domini in Nativitate a Centio viro crudeli captus sit, et eo die Dei gratia liberatus, et de werra (id est, bello) quam sustinuit ab Henrico imperatore, et de controversia quam habuit cum Wiberto (alias Clemente III), et de ærumnis quas sustinuit, et de obsidione civitatis et sua, et qualiter a Rotberto Romanorum duce sit liberatus, et qualiter beato fine quieverit, aptissime declarata. Urbani vero Pontificis acta, et de ejus victoria, si quis scire voluerit, legat librum, quem scripsi in HUGONEM SCHISMATICUM, et ibi inveniet ad plenum dilucidata quæ voluerit. Hucusque incipiens a beato Petro Apostolorum principe usque ad nostra tempora (sc. usque ad an. Christi MXXXIX, qui secundus fuit Urbani II) Romanorum Pontificum Acta compendiose digessimus, superest nunc, ut de Privilegiis ad Romanum Pontificem pertinentibus, et de prærogativa ipsius Sedis non profuse, sed succincte, Dei juvante gratia disseramus». Hucusque Bonizonis *Epitome Historiæ Pontificum Romanorum*, quæ *decretorum Ecclesiasticorum libris septem* ab ipso collectis Proœmii loco præfixa est. Profecto periisse opus, quod Annalibus Ecclesiasticis maximam lucem affudisset, summopere dolendum. Hæc tamen sufficiunt ad declarandum quantum is de rebus hoc tempore Romæ gestis edoctus fuerit. Bonizonis opus extabat adhuc tempore Martini Poloni, qui in Proœmio Chronici sui ait se illud compilasse, «ex Chronicis Damasi papæ de gestis Pontificum; item de gestis Bovisii (legendum, Bonisii), episcopi Sutrii, de gestis Pontificum; item ex Chronicis Pauli Romani diaconi card. de gestis utrorumque; item de Chronicis Gilberti de gestis utrorumque; item ex Chronicis Richardi monachi Cluniacensis, etc.» Quæ opuscula vel amissa vel tenebris sepulta.

10. *Bonizoni Clemens II testis oculatus suffragatur.* — Sed redeo ad Gregorium VI, aliamque adversus ejus electionem profero rationem, quæ mihi ineluctabilis videtur. Gretzerus, in libro, quem scriptis de divis Bambergensibus, annoque MDCXI Ingolstadii edidit, Clementis II Gregorii VI successoris immediati Breve Bambergam statim a sua coronatione missum producit, quo Clemens II Ecclesiæ Bambergensi, cujus episcopus erat, cleroque ac populo electionem suam significat, testaturque ab ea divelli sibi gravissimum accidere. Clemens itaque II in ea Epistola pauca præfatus, subdit: «Tanti numinis nutus, te suam

charissimam filiam Babenberg, nobis in sponsam legitimam desponsavit, et arte regere (quantum in nobis fuit) sua propitiatione donavit. Certe nulli marito erga suam uxorem fides purior et amor ardentior quam circa te nobis: nec unquam vel in mentem venit te destituere et alii adhærere. Sed nescio quo divino consilio actum est, ut matri tuæ omniumque Ecclesiarum consociarer, et aliquatenus, non tamen omnino, a te separarer. Ecce enim cum illud caput mundi, illa Romana Sedes hæretico morbo laboraret, et charissimi filii nostri domni Heinrici imperatoris Augusti præsentia ad hoc invigilaret, ad hoc instaret, ut hujusmodi ægritudinem propulsaret; EXPLOSIONIBUS TRIBUS ILLIS QUIBUS IDEM NOMEN PAPATUS RAPINA DEDERAT, inter tot agmina sanctorum, qui aderant Patrum, dignatio cælestis gratiæ nostram indignissimam mediocritatem, cunctis nisibus refragentem, voluit eligi, et altissimi Apostolorum principis vice fungi.

11. *Ejus verba evertunt quæ pro Gregorio VI afferri possunt.* — «Avulsam me tunc a tuo gratissimo latere, sponsa dulcissima, quis dolor apprehenderit, quis mæror confecerit, quo pacto exprimam, nescio, cum nobis omnem modum videatur transgredi. Plus honoris est, plus decoris, plus, inquam, virium Matri, quam Filia, utpote cui omne genu terrestrium flectitur, pro cujus arbitrio janua cæli aperitur et clauditur; adversus quam nec portæ prævalent inferorum. Non tamen tantæ dominationis cupido ostio nostræ mentis irrepsit, cordisque cervicem libenter inflexit. Satis nobis erat, tecum activam bene, contemplativam quoque modo, ducebamus vitam: præsertim cum perfectus amor nec speciem alterius unquam, nec intueretur opulentiam. Testem invocamus aciem divinam, non commentari nos apologiam; illa enim secreta cordis rimatur, cui nulla nox obtenebratur». Commemorat postea Clemens II quomodo Ecclesiam Bambergensem fundator ejus S. Henricus imperator Apostolicis Privilegium muniri curaverit per prædecessores suos *Joannem et Benedictum* (Joannem scilicet XVIII et Benedictum VIII). Sed nec annus, nec dies Brevis Apostolici emissi in fine notatur. Digna certe hæc Epistola quæ in futuram Conciliorum editionem inseratur. Magnam ejus partem refert Papebrocius in Paratipomenis ad Conatum Chronico-Historicum, nec tamen animadvertit hæc verba, «explosionibus tribus illis, quibus idem nomen papatus rapina dederat» omnes suas et aliorum interpretationes in favorem electionis Gregorii VI hactenus in medium allatas prorsus elidere.

12. *Gregor. VI simoniacum fuisse docet chronographus S. Benigni.* — Denique chronographus Sancti-Benigni, qui hoc tempore etiam vixit, tom. I Spicilegii Dacheriani loquens de ordinatione Halinardi Lugdunensis archipræsulis anno MCLVI facta, de Henrico imp. ait: «Eodem anno perrexit memoratus princeps Romam, ibique tunc suscepit coronam imperii, die Natalis Domini, per manus

Clementis papæ. Quem ipse imperator ordinari jussit, et fecit deponi Joannem (in Pontificatu Gregorium VI appellatum,) qui tum cathedræ præsidebat, et Benedictum atque Silvestrum, qui in Concilio tunc habito, examinata eorum culpa, inventi sunt non solum simoniaci, sed etiam pervasores Eccl. Christi. Huic Concilio interfuit ipse domnus Lugdunensium archipræsul, atque memoratus Hugo archiepisc. (nempe Bisuntinensis) aliique plures ex diversis partibus coadunati episcopi ». Mitto Leonem Ostiensem lib. 2, cap. 80, qui eadem de Gregorio VI iisdemque fere verbis ac Victor III refert, quia Angelus de Nuce in Notis ad ejus Chronicon observat, Leonem Ostiensem Casinensem monachum, quæ de Benedicto IX scribit accepisse a Victore III, qui ante Pontificatum Casinensis abbas fuerat.

13. *Duratio Sedis Gregorii VI.*— Hinc certum et indubitatum videtur quod idem Leo de duratione Pontificatus Gregorii VI scribit : « Jam annis duobus et viii mensibus archipresbyter ipse, cui Gregorii nomen papatu est inditum, Apostolicæ Sedi præfuerat ». Idem enim Victor III habet, et in plerisque Pontificum Rom. Catalogis legitur. Quare perperam Papebrocius Gregorio VI annum tantum unum et menses viii præter dies ix attri-

buit, innixus Privilegio ab eodem *Rolando Florentinæ Canonice præposito* indulto, et ab Ughello tom. III, col. 84 recitato, cujus hæ sunt clausulæ : « Scriptum per manum Joannis seriniarii et notarii nostri Lateranensis Palatii. Bene valete. Datum XII kalendas Martii, per manus Petri Diaconi, bibliothecarii et cancellarii sanctæ Apostolicæ Sedis, anno Pontificatus domni Gregorii papæ Sexti primo, Indict. XIV », id est, anno Christi MCLVI. Nam Indictio illa XIV mendose descripta, legendumque, *Indict. XIII*, quæ cum XII kalend. Martii annoque primo Pontificatus Gregorii VI, Christi vero MCLV concurrat. Librarios Indictiones sæpe depravare, omnibus notum. Porro ex Leone Ostiensi, qui prodit, *Silvestrum III* Benedicto IX subrogatum fuisse anno ultimo Pontificatus ejus, intelligimus Victorem III, qui annum quo id factum non exprimit, aliud non designare; cum Leo id ab eo acceperit. Ex quibus tandem omnibus sequitur, *Gregorium VI*, qui circa Natale Christi anni MCLVI depositus fuit, inthronizatum circa initium mensis Maii currentis anni, et *Silvestrum III* circa initium mensis Januarii ejusdem anni Pontificatum invasisse, quo circa finem Martii expulso, *Benedictus IX* papatum resumpsit, quem post mensem vel circiter *Gregorio VI* vendidit.

GREGORII VI ANNUS 2. — CHRISTI 1045.

1. *Legatio Casimiri Poloniæ regis ad Pontificem Romanum solutura obolum S. Petri.* — Sequitur annus Redemptoris millesimus quadagesimus quintus, decima tertia Indictione, quo Casimirus Poloniæ rex compositis Poloniæ rebus, debellatis jam hostibus, promissi memor, de acceptis a Deo beneficiis gratus, legatos Romam ad Sedem Apostolicam mittit, qui impositum tributum denarii sancti Petri Romam ad Pontificem ferrent. Rem gestam pluribus narrat Longinus, qui et Dlugoschus, per singulos annos res Polonorum prosecutus : qui tamen in eo errore lapsus videtur, quod sciens Benedictum papam adhuc fuisse superstitem, ad ipsum putavit ejusmodi missam esse legationem; cum tamen ex his, quæ

anno superiori dicta sunt, satis constet ipsum cecidisse Gregorio. Cum alioqui esse potuit, ut (sicut ait) Benedictus exegerit, acceperit vero Gregorius. Sed audiamus ipsum ista in hunc modum narrantem : « Confirmatum et stabilitum Poloniæ regnum prudentia et industria Casimiri Poloniæ regis, summus Pontifex Benedictus Nonus relatione plurimorum intelligens, gratulatione singulari repletur, liberalem dispensationem Casimiro alias Carolo præstitam, profectum attulisse. Misso autem speciali ad Casimirum Poloniæ regem nuntio, requirit illum, ut justa legatorum Polonorum Apostolicam Sedem, pro sui regis dispensatione plurimis instantiis flagitantium sponsonem, ad suam subsecutam confirmationem capitis census de universis

regni Poloniæ provinciis conquisiti, et conquirendis mandaret pro beato Petro, et suo successore Romano papa, collectoribus Apostolicis singulis annis exhiberi.

2. « Volens Casimirus rex Poloniæ parere patris summo Pontifici Benedicto, primum per legatos Polonorum, deinde per se promissis, generalem omnium suarum provinciarum indicit conventum, in quo et pollicitatio, Apostolicæ Sedi per legatos Polonorum facta, concordî omnium devotione et consensu decreta et innovata est, et universali mandato solutio unius usualis oboli de capite, tam civitates quam oppida vicosque et rura colentium, in duabus provinciis videlicet Gnesnensi et Cracoviensi, ac diocesis eisdem subjectis, videlicet Posnaniensi, Plocensi..... Lubecensi, Culmensi et Camienecensi impetrata. Ab eo quoque tempore regnum Poloniæ factum est Romanæ Ecclesiæ, imo Vicario Jesu Christi summo Pontifici feudate et tributarium : nec unquam tributî prædicti solutionem passum est quacumque occasione aut pacto intermitteri aut rescindi. Videbatur autem census iste, qui denarius S. Petri appellatur, primum Polonis difficilis et gravis, utpote qui secum perpetuam trahebat in Polonos obnoxietatem : postea tamen profectus varios et commoda regno Poloniæ cognitus est præstitisse, et præstare, ut non ab homine, sed ab ipso Deo, generis Polonorum principio impositio ejus credatur profluxisse. Quamvis enim per multa annorum spatia, impositionem præsentem sequentia, regno Poloniæ in plures ducatus et provincias scisso, ipsum a nonnullis finitimis gentibus et nationibus, præsertim a Bohemis et fratribus domus Teutonicæ, nigram crucem in albo habitu deferentibus, in suis provinciis et pertinentiis fuerit occupatum et direptum : nullum tamen tam validum, tam efficax ingenium (quamvis ad id plurimi interpositi fuerint industrii labores et conatus) poterat reperiri, quo proprietas, regno Poloniæ in hujusmodi terris et provinciis competens, potuisset per hujusmodi occupationem aboleri. Quinimo denarius S. Petri prædictus, cæteris testimoniis suppressis, aut vetustate abolitis et consumptis, et injustam terrarum occupationem vociferatur et detegit, et illas de sorte, titulo, jure et proprietate regni Poloniæ fuisse et esse demonstrat. Ab eo siquidem tempore, usque ad diem hanc omnes veteres regni Poloniæ regiones, omnesque Ecclesiæ Poloniæ ditiones uno et perpetuo honore juris usurpato et nunquam intermisso, tributum denarii sanctæ Ecclesiæ Romanæ tradunt præter Camienecensem diocesim, speciali Apostolico privilegio ad preces legati Apostolici capti, et ex diuturna servitute opera Camienecensis episcopi in libertatem restituti, exoneratam et exemptam. Optarem autem ego, ut et Ruthenæ, Lithuanæ Pruthenæque regiones, postea Poloniæ regno unitæ pari censu onerarentur, futuro sæculo futuræque ætati terminos et jura regni Poloniæ testaturæ ». Illicusque Longinus, et ipse

nobilis Polonus veritatis amantissimus : quæ cum Clitomerus prætermiserit, quomodo non inofficiosus arguendus ?

3. *S. Guntheri eremitæ obitus.* — Hoc eodem anno in iisdem Borealibus regionibus, Bohemia scilicet, vir sanctissimus Guntherus, S. Stephani regis Hungarorum cognatus, monachus monasterii Abatahensis sub B. Godeardo abbate, demum eremita in silva Bohemiæ, post exactos ibi annos triginta septem, septimo idus Octobris sanctitate celebris migravit ad Deum, percepturus ab eo sibi paratam coronam justitiæ. Res ab eo gestæ scriptæ extant ab ejus familiaritate notissimo, nunc primum editæ ab Henrico Canisio. « Tantæ molis ædificium erecturus sapienter super firmam petram ponit fundamentum, cum arduæ vitæ institutum aggressurus », inquit auctor, « corde compunctus petiit ab abbate, ut ante professionem liceret sibi Romam petere, et Apostolorum Christi, et aliorum sanctorum intercessionem pro transactæ vitæ devitiis, et pro novæ vitæ ingressu quærere ». Sic usque ad ultimam senectutem proficiens, tandem, sic Deo dispensante, Brzislao duce Bohemiæ, atque Severo episcopo, a quo sacratissimam Eucharistiam accepit, dicta die hoc anno spiritum Deo reddidit : sepultusque ab ipso duce in monasterio Breunoviensi, quod a civitate Pragensi distat viginti stadiis, illustratus est a Deo multis miraculis. Quod ad obitus tempus spectat, consentit et Hermannus, qui hoc eodem anno ejus ad Deum transitum ponit.

4. *Northmanni a monachis opera S. Benedicti devincuntur.* — Hoc eodem anno Northmanni, qui potiti Apulia terribiles redditî erant omnibus ob ingentem arrogantiam præpter victorias partas, vincuntur a monachis Cassinensibus, ope divina S. Benedicti precibus implorata. Res gesta memoria digna scribitur a Leone Ostiense episcopo¹, qui primum tradit, ipsos Northmannos conductos fuisse sub stipendio ad tuendas res monasterii², idque fidelissime sicut et fortissime præstitisse sub Alenupho abbate : postea vero occupare cœpisse vicus et oppida ejusdem, cum³ Richerius abbas eosdem in fidelitatem accepit, nimirum sinens, ea quæ occupaverant, possidere, exigens ab eis juramentum fidelitatis. Sed nec sic ipsis quiescentibus, sed alia loca adhuc occupare tentantibus imo et ipsum abbatem captivum ducere conantibus, Deus obstitit, sancto Benedicto pro suis monachis injuste oppressis subveniente. Quæ omnia ita ab eodem auctore narrantur : « Post hæc Northmannis arcem, quæ nunc S. Andræ dicitur, in suum refugium construere aggressis, mandat abbas ab incepto desistere. Sed illi nihil reveriti, parere noluerunt. Cernens abbas nihil se omnino proficere, Northmannorumque vires diebus singulis crescere : decernit ultra montes huc ultro non rediturus abire, (ad propria scilicet unde venerat

¹ Leo Ost. l. II. c. 72. — ² Ibid. c. 39. — ³ Ibid. c. 71.

reversurus). Sed cum illi id a suis omnino dissuaderetur, consilium, quo pacto se de tam apertis periculis auxilio patris Benedicti tueretur, capere pergit.

« Cum nutu Dei paucis post diebus comes illorum, Rudolphus nomine, non paucis stipatus militibus ad abbatis curiam venit, eundem (ut tunc putatum est) abbatem capturus, aut occisurus. Sed dolor, imo dolus, conversus est in caput ejus.

5. « Nam cum extra Ecclesiam positis armis, eandem Ecclesiam cum omnibus pariter oraturus intrasset : omnes monasterii famuli simul repente conveniunt, equos illorum armaque diripiunt, clausisque Ecclesie januis signa omnia pulsare coeperunt. Audito sonitu, reliqui civitatis homines territi, variis undique armati telis accurrunt, apertisque Basilicæ januis ingressi, Northmannos solis gladiis dudum infregerant, fuis frustra precibus implorantes, fugientibusque cæteris, quindecim ex illis obtruncant, solum comitem supervenientes monachi manu captum vix eripere a tumultu potuerunt. Vincitum igitur ad monasterium carceri tradendum mittunt. Hoc facto, omnem prorsus regionem peragrans nostri, subita formidine arreptos homines aggredientes, præter S. Victoris castrum et S. Andreæ arcem, omnia ferme eo die, Deo auxiliante, receperunt. Deinde nihil morandum arbitrantes, Marsorum comites et Borelli filios, cæterosque fideles in auxilium advocant, et prædicto S. Victoris castro post paucos dies recepto, ad arcem S. Andreæ, in qua et uxor prædicti comitis et Northmanni cæteri confugerant, obsidendam expugnandamque perveniunt. Cumque ibi quindecim fere dies resedissent, et tam munitione loci quam commorantium et repugnantium viribus prævalere non possent : stomachati tandem fratres qui aderant, jam quasi nona diei hora conversi ad milites : Quid, inquit, moras teritis, et nihil agentes tempus frustra consumitis? insurgite tandem, et omnes unanimiter arcem uno impetu aggredi maturate, nihil metuentes : adversus Dei inimicos, contra perjuros nostros, contra latrunculos denique paucos vobis pugna est.

6. « Aderit Deus, sanctissimusque pater Benedictus, qui et adversariis nostris fidei violatæ ac perjurii reis dignam confusionem, et victoriam nobis pro justitia pugnantis afferat. Hac adhortatione vehementer accensi, omnes mox arma corripiant, omni conatu, inimicis reluctantibus, lapidibus, telis, machinis, arcem adoriuntur. Miradicturus sum, sed absque ulla prorsus ambiguitate, verissima. Cum ex utraque parte lapides ac tela mitterentur, Northmannorum tela, seu quoque missilia, veluti valida vi venti retorta in suos a quibus mittebantur, plurimos sauciare coeperunt. Quod ubi Northmanni adverterunt, voluntati Dei contraire non valentes, arcem prolinus reddunt, seque monachorum manibus tradunt, a quibus vix defensi, inermes se ad socios Aversam contulere : equi eorum, arma atque pecunia militibus universa permissa. Statuentibus deinde Aversanis so-

ciorum injurias ulcisci, Guaimarius obstitit. Sicque beati Benedicti meritis et ope, suo juri terra hæc omnis restituta, ex tunc et deinceps a Northmannorum infestatione Dei miseratione quiescit. Expulsi autem sunt Northmanni anno Domini millesimo quadragesimo quinto». Porro tantam victoriam, quam absque hominis necesse monachi obtinuerunt, nonnisi ope S. Benedicti contigisse, quæ præcesserunt visiones ostensæ viris justis significarunt, quas idem Leo subnectens sic narrat¹ :

« Denique ut hæc omnia sancti patris Benedicti voluntate et auxilio gesta credantur, nocte ipsa quæ præcedebat hanc diem, cum rusticus quidam ex castro Cervario, Hieronymus nomine, domi quiesceret, videbatur in somnis se per viam, quæ a castro Mortula ducit, remeare : cum ecce subito monachus quidam reverendi admodum vultus, veluti ex itinere fessus, virgamque gestans manu, illi in via comes adjunctus est. Cumque pariter incedentes ad bivium pervenissent, unde ad villam S. Andreæ divertitur, rogat socium monachus ut parum ex itineris labore requiescat. Et cum resedissent : unde sic lassus adveniret, monachum rusticus inquirere coepit. Ego (inquit ille) diu in Cassino monte constructo monasterio cum fratribus habitavi : sed cum in me ingrati valde essent, illorum molestias ferre non valui, dimissisque eis Hierosolymam adii, ibique quadraginta jam fere annis cum B. Stephano sum remoratus. Nunc autem illorum crebris nuntiis vocatus veni, et si quidem mores suos corrigant, ibidem cum illis habitabo; sin autem, per viam qua veni revertar. Rogatus autem ut nomen ediceret : Ego, inquit, frater Benedictus vocor. Cumque viam qua ad S. Andream pergitur, monachus fuisset ingressus, et quo tenderet, a rustico esset inquisitus : Hac, inquit, pergo, quoniam in arce hac mihi agendum aliquid est. Experrectus autem rusticus, retulit domino suo Mainardo archipresbytero, quod viderat somnium. Sequenti die arx quo prædiximus ordine capta est : hodieque supersunt aliqui ipsius arcis incolæ, qui asserunt in ipso gravi partis utriusque conflictu vidisse se monachum viriliter contra Northmannos dimicantem, suosque ardentem hortantem, cum nemo tunc ex his qui aderant monachis, illi se immiscuerit pugnæ. Ante paucos item dies alii cuidam rustico visum est in somnis, quod B. pater Benedictus virga, quam gerebat manu, Northmannos hujus terræ incolæ insequendo ante se ageret, eosque severissime verberans, cum ignominia de hac terra procul eliminaret, nullo sibi vel modice resistere audente». Ilucusque Leo. Et quidem exitus declaravit miraculum, cum qui leones adversus omnes alias se gentes exhibuere, cum monachis Cassinatibus agni mitissimi extitere : sicque exemplo perspicuo fuerit monstratum, ad Barbaros debellandos sanctorum preces magis conferre quam arma.

¹ Leo Ost. l. II. c. 73.

Anno periodi Græco-Romanæ 6538. — Anno Æræ Hispan. 1083. — Anno Hegiræ 437, inchoato die 19 Julii, Fer. 6. — Jesu Christi 1045.

— Gregorii VI papæ 2. — Henrici III reg. 7. Constantini Monomachi imp. 4.

1. *Polonia sanctæ Sedi vectigalis facta.* — Ad num. 1 et seq. Narrat Joannes Longinus in Historia Poloniæ, *Casimirum* regem hoc anno totius regni comitia convocasse, tumque Romam legatos misisse, qui suo nomine gratias agerent *Benedicto* Pontifici, et Polonici regni tributum penderent. Historia Joanne Longino canonico Cracoviensi et postea episcopo Leopoliensi sæculo xv scripta, quam manuscriptam Baronius habuit, anno mxcii typis mandata fuit cum Historia Polonica, *jussu Casimiri Poloniæ ducis*, a Vincentio Cadlubco Cracoviensi episcopo anno mcccxiv demortuo composita, sed ad nos non pervenit *Benedicti IX* Rescriptum, cujus idem Joannes Longinus meminit.

2. *Hungaria regno Germanico reddita.* — « Petrus rex (sc. Hungariæ, inquit Hermannus Contractus in fusiori Chronico) Heinricum regem (nempe Germaniæ) in festivitate Pentecostes ad se invitatum cum magno apparatu suscepit, et maximis muneribus donavit, eique regnum Pannoniarum, principibus Ungariorum fidelitatem illi et successoribus ejus juramento firmantibus, reddidit (Ovone nempe tyranno anno superiori occiso, ut ibidem Hermannus narrat): quod tamen ab eo ipse dum viveret possidendum recepit. In quo videlicet rex quoddam vetus solarium ascendens, cum multis aliis ædificiis cadente corruit: ipsoque Deo protectante, illæso, Bruno Wirzeburg (id est, Herbipoleos) episcopus lethali ter cum aliis collapsus, post unam hebdomadam septimo kalendarum Junii obiit ». Henschenius ad diem xv mensis Maii varia collegit de hoc S. Brunone episcopo Herbipolensi in Germania, et cum in ejus Epitaphio legatur, eum *sexta kalendarum Junii* obiisse, ait ei potius credendum quam Hermannus, retinendumque *V kal. Junias*. Verum juxta regulam a nobis statutam, et innumeris exemplis comprobata. Hermannus diem mortis, conditor vero Epitaphii diem sepulturæ notavit, qui uterque dies obitus vel depositionis nomine sæpissime exprimitur.

3. *Moritur S. Bruno episc. Herbipolensis.* — Filius fuit *Bruno* Conradi II Carenthanorum seu Carinthiæ ducis, qui in regno Germanico Conrado Salico competitor extitit, et Mechtildis, filiæ Gebhardi dynastæ Quenfortensis et Sophiæ comitissæ

Mansfeldensis: cui Gebhardo frater fuit alius *S. Bruno* episcopus et Apostolus Prussiæ, de cujus martyrio anno mvm verba fecimus. Hanc prosapiam explicat Reufnerus in Auctario Operis Genealogici Βασιλικῶν et ex eo aliisque Henschenius citatus. De Brunone Trithemius in lib. de Script. Ecclesiast.: « Bruno episc. Herbipolensis, Conradi imperatoris Secundi (imo Primi) patruelis, natione Teutonicus, vir in divinis Scripturis studiosus, vita et conversatione sanctissimus, qui ob meritorum suorum excellentiam catalogo sanctorum adscriptus, Franciæ Orientalis singularis patronus habetur, comportavit ex antiquorum Patrum scriptis pulchram expositionem in totum Psalterium ». Composuit et alia opera in Cantica et Symbola, quæ in tomo xviii Biblioth. Patrum editionis Lugdunensis exhibentur. Refert Henschenius et Bruschio in episcopis Herbipolensibus, *Brunonem* anno mxxiii episcopum renuntiatum esse; verum ex Hermanno citato et chronographo Hildensheimensi constat, eum ad eam dignitatem anno mxxxiv promotum.

4. *Adelmannus Berengarium monet ut ab errore resipiscat.* — *Adelmannus* scholasticus Ecclesiæ Leodiensis, cum accepisset *Berengarium* Andegavensem archidiaconum doctrinam de Corpore et Sanguine Domini in Eucharistia orthodoxæ contrariam spargere, scripsit ad eum Epistolam quæ tom. xviii Biblioth. Patrum edit. Lugdunensis legitur, et cujus mentionem facit Baronius anno mxxxv, num. 7, quia eo anno Concilium Parisiense adversus Berengarium indictum putabat, quod tamen anno m. habitum fuisse, eo anno videbitur. Epistolæ inscriptio; « Dilecto in Christo fratri conscholastico Berengario Adelmannus salutem in Domino », quare cum juxta Ughellum tom. v Italiæ Sacræ *Adelmannus*, ab anno m. lvi ad annum circiter m. lxi Brixienis in Italia episcopus fuerit, ea ad Berengarium, qui sicut et ipsemet Fulberti Carnotensis episcopi vitæ sanctitate et doctrina illustris discipulus fuerat, hoc vel alterutro ex duobus sequentibus annis data. Eum pluribus hortatus *Adelmannus*, ut famam suam tam feoda labe non maculet: « Obsecrans, inquit, per misericordiam Dei, per suavissimam memoriam Fulberti, ut pacem Catholicam diligas, neque conturbes Remp.

Christianæ civitatis bene compositam a majoribus nostris, per quam tot milia martyrum contra idololatram et regnum diaboli fortiter certantes triumpharunt, subindeque SS. Doctores bella civilia ab hæreticis commota salutaris eloquentiæ fluminibus restinxerunt, atque eam circumquaque munierunt, ut jam novus hostis nullus oboriri queat, qui adversus eam aliquid nitens non continue mille jaculis desuper ruentibus obruatur: ideo confusi sunt omnes et defecerunt. Ubi enim sunt Manichæi? ubi Ariani? quonam tota illa factio perditissimorum civium evasit? computruit etiam memoria eorum. At vero Ambrosius, Augustinus, Hieronymus et alii plures bestiarum talium oppressores cum laudibus vivunt, quotidieque splendidius efflorescunt. Bonum est, frater, nobis parvulis sub istorum ducum titulis delitescere, quorum tam valida tamque probabilis est apud Ecclesiasticas aures auctoritas, sanctarum virtutum fulgore, cælestis sapientiæ luce præpollens, ut extremæ jam sit dementia, vel de ratione fidei, vel de ordine recte vivendi eis in aliquo refragari. Postea docte ostendit Eucharistiam esse vere substantialiterque Corpus et Sanguinem Domini, solis Christi verbis innixus, ductoque ab omnipotentia divina sacramento.

5. *Ad eandem rem usus est opera Paulini Metensis primicerii.* — Ecclesiam Metensem administrabat hoc tempore *Theodoricus* hujus nominis II, ejus magna sunt in eandem merita, ut ostendit Meurissius lib. 3 de episc. Metensibus. In ejus Ecclesia Cathedrali primicerius erat vir magnæ eruditionis, *Paulinus* nomine, quo Adelmanus usus, ut Berengarium Paulini amicū in viam reduceret. Ait enim Adelmanus in laudata Epistola: « Hæc ante hoc biennium cum audissem, fraternitatem tuam per Epistolam convenire, idque ex teipso certius sciscitandum esse decrevi. Sciens porro familiarem tuum dominum Paulinum Metensem primicerium tibi propriorem, tibi que aliquando viciniorem esse, et mea petitione et sua sollicitatione delegavi sibi hujus negotii executionem. At ille (non enim hac in re laudare eum possum) negligens, sive atterutarum, sive utrumque nostrum, usque adhuc reliquit me suspensum, sed divina gratia nos nunquam negligens, inopinato mihi obtulit melius quam optabam. Quibus ex verbis liquet, primo Berengarium aliquot ante annos quam hæresis ejus in Concilio Romano damnaretur, a pluribus habitum fuisse hæreticum, et auctorem Fragmenti Historiæ Francicæ, a Roberto ad Philip-pum regem perductæ, hæreseos Berengarianæ exordium a superiori Christi anno apposite repetere. Secundo, non defuisse in Gallia qui omnem operam posuerint, ut eum a prava mente revocarent. Tertio, non videri Paulinum primicerium muneri sibi injuncto satisfecisse.

6. *Frollandus ep. Silvanect. Berengario regem conciliat.* — Ex Epistola *Frollandi* episcopi Silvanectensis a Dacherio tom. II Spicitegii publicata, qua excusat non obitum vadimonium, quia morbo

detentus fuerat, seque illi Henricum regem plane conciliasse, intelligimus Berengario non defuisse potentes amicos ac plerosque prave ejus intentionis inscios, qua paulatim detecta, fuisse qui piissimi regis animum ab eo averterant: « Detentus, inquit, utraque infirmitate, non possum, prout disposueram, et tibi mandaveram, huc ad te venire. Sed quæso, ora pro me, et attentius, ut ea liberer quæ animam meam necat ægitudine; et nescio si in hoc præsentī sæculo amplius te, charissime domine, videre potero; sed satage, ut in alio cum tranquillitate merear te videre, etc. quidquid tibi placuerit, mihi remanda. Illud volo fraternitas tua noverit, quod multum firmiter acquisivi tibi gratiam domni mei regis ».

7. *Moritur Aribertus archiep. Mediolanensis.* — Mortuus est hoc anno *Heribertus*, seu *Aribertus de Intimiano*, ut a veteribus, non vero *de Arziaco* vel *Arzago*, uti a recentioribus appellatur, archiepiscopus Mediolanensis, postquam sedisset annos xxvii, uti ostendit Puricellus in Monum. Basilicæ Ambrosianæ num. 213 et 246. Istum uxoratum fuisse primus omnium tradidit Galvancus Flamma, Dominicanus, in suo Chronico Mediolanensi, post annum mccccxxx composito, post annos nempe ccc ab Ariberti morte, eumque secutus est Bernardinus Corio, in Historia sua Mediolanensi circa annum md. Verum duo testes isti facile refelli possunt. Ut enim ait Puricellus lib. 4 de Vita sancti Herlembaldi cap. 92, num. 54, « ejusdem archiepiscopi gesta luculenter ambo (scilicet Arnulphus et Landulphus Senior) et copiose suis Historiis consignarunt, neque tamen uxoris illius, quam præsul ille tunc haberet, mentionem fecerunt ullam, quam tamen cæteroqui facere debuissent, ut appareret, quanti etiam præsulis exemplum sequerentur uxorati per ea tempora sacerdotes, quibus illi (Arnulphus nempe et Landulphus Senior) unice favebant ». Quod quidem sapienter scriptum; et tamen Galvancus Flamma cap. 226, (apud Puricellum, lib. de Vita Arialdi et Herlembardi cap. 92, num. 5,) de *Heriberto de Arzago archiep. Mediol.* tradit, quod duxit uxorem nobilem mulierem *Useriam*, quæ donavit monasterio S. Dionysii *Useriam*. Corio vero lib. ait, *Useriam* fuisse vineam monasterio contiguam. Sed hæc a veritate aliena; Aribertus quidem monasterium Sancti Dionysii in urbe Mediolanensi fundavit, in eoque sepultus est, ut inquit Arnulphus lib. 2, cap. 11: verum neque in hoc historico, nec in Ariberti testamento a Puricello recitato, nec in quamplurimis documentis ab eodem relatis aliqua hujus vineæ mentio, neque alicujus prædii eo nomine appellati, quod prætensa hæc *Useria* ante archiepiscopi testamentum dare debuerat, foundationis demum litteræ vivente imperatore Henrico datæ, Diploma Conradi Salici, quo eæ confirmantur, anno Incarnat. Domini mxxvi datum, aliæque plura hoc sæculo et sequenti a successoribus sancti Henrici et Conradi impp. emissa, de vinea illa ne verbum quidem habent.

8. *Fabula de ejus cum Useria conjugio refellitur.* — « In his igitur omnibus », inquit Puricellus cap. 92, pag. 964, « et singulis Privilegiis eidem monasterio concessis, omnia singillatim enumerantur ejus prædia et bona immobilia: quintem in quarto, quinto, sexto et octavo nominatim exprimitur decima terrarum quæ sunt juxta ipsum monasterium; neque tamen unquam nominata, vel aliquatenus aliter indicata conspicitur vinea illa, *Useriæ* nomine insignis. Quocirca ne ad illud quidem usque tempus ea videtur in ejus potestate monasterii fuisse, atque adeo ne donata quidem ab *Useria*, quæ *Ariberti* esset archiepiscopi uxor. Illuc etiam his accidit, quod neque *S. Arialdus* neque alius quispiam ex ejus fautoribus usquam legitur inter innumeras de sacerdotum conjugii querimonias aliquid unquam innuisse de matrimonio, quo aliquis ex archiepiscopis nostris aliquando illigatus fuisset ». Certe Guido archiepisc. Mediolanensis simoniæ, sed nunquam incontinentiæ accusatus fuit, ut manifeste liquet ex Actis legationis Petri Damiani, quorum partem Baronius an. MLIX, num 45 et seqq. recitat, et quæ integra habentur in Operibus Petri Damiani tom. 3, ubi refert abjurationem hæresis Simoniacorum a Guidone archiepiscopo factam. « Consuetudo damnata, inquit, in hac sancta Ecclesia antiquitus inolevit, etc. Simoniæca videlicet hæresis damnata semperque damnanda venalitas ». Et infra: « Quapropter, etc. damno, detestor ac reprobam judico hanc perverſam, quæ hactenus vixit in hac Ecclesia negotiandi consuetudinem, omnemque simoniacam hæresim. Insuper obligo me, sed et omnes clericos meos etc. » Neque indicat Guido se incontinentium sectæ adhæsisse, sed tantum ait: « Nicolaitarum quoque hæresim nihilominus condemnamus, et non modo presbyteros, sed et diaconos vel subdiaconos ab uxorum vel concubinarum fædo consortio nostris viribus, in quantum possibilitas nobis fuerit, arcendos promittimus ». Guido itaque et Petrus Damiani clericos incontinentes constanter appellant *Nicolaitas*; quo etiam nomine a Pontificibus et Conciliis ac scriptoribus cœlibatum defendentibus vocari solent.

9. *Falsum est fuisse aliquos archiep. Mediolanenses uxoratos.* — *Aribertus* quidem et *Guido* sacerdotes incontinentes Mediolani et in vicinis regionibus tolerarunt, sed nunquam uxores duxerunt. Neque Arnulphus, obstinatus clericorum matrimonii defensor, et Landulphus Senior, qui *Aribertum* laudibus ad cælum extollunt, et tanquam sanctum venerantur, sicuti nec *Guidonis* et *Gothofredi* archiepiscoporum Medionalensium defensores, Pontificum Romanorum infensi hostes eorum exemplum proponunt, aut aliquid de eorum conjugio in medium afferunt. Quare in Longobardia episcopos uxoratos non fuisse, sed simplices tantum sacerdotes certum esse videtur. Pseudo-Datus chronographus Medionalensis, de quo mox, Guido chronographus Mediolanensis Ms. et auctor Chro-

nici, cui titulus *Flos florum*, qui duo postremi sancti Ludovici Francorum regis ætate vixerunt, asserunt undecimo sæculo sacerdotum conjugia plurimos habuisse defensores: « In Synodo Damasi Primi (inquit Pseudo-Datus apud Galvancum Flammam cap. 397, ut refert Puricellus in Monum. Basilicæ Nazarianæ cap. 39,) centum quinquaginta episcoporum celebrata Constantinopoli, ubi beatus interfuit Ambrosius, gravissima dissensio exorta est inter sacerdotes uxoratos ex una parte, et inter sacerdotes sine uxore viventes ex altera parte. Qui sacerdotes sine uxore dicebant sacerdotes uxoratos salvari non posse. Summus Pontifex commisit hanc quæstionem B. Ambrosio, qui sic ait: Perfectio vitæ non in castitate, sed in charitate consistit, secundum illud Apostoli: Si linguis hominum loquar et Angelorum, etc. Ideo lex concedit sacerdotes semel uxorem virginem ducere, sed conjugium non iterare. Si autem mortua prima uxore sacerdos aliam duxerit, sacerdotium amittit ». Idem testimonium refert Puricellus in Vita S. Herlembaldi cap. 92, et Landulphus Senior ibidem a Puricello laudatus de S. Ambrosio habet lib. 1, cap. 11. « Sedente B. Ambrosio, gravissima dissensio orta est coram Apostolico, in Synodo inter sacerdotes monogamos et alios sub virginitate cum castitate degentes. Quod factum Apostolico imperante et aliis episcopis consentientibus datum est in judicio B. Ambrosii, ut quidquid ipse diceret sanctum et firmum teneretur. At B. Ambrosius cognoscens sensus humanos pronos ad peccandum, maxime propter incontinentiam, sciens aliquem nec virginitatem nec castitatem nisi a Deo habere posse, quod in libro de Officiis jam dictaverat, ait: De monogamia sacerdotum quid loquar? quando non tantum permittitur copula et non repetita: et hæc lex est non iterare conjugium. Sicque dicens omnem dissensionem compescuit ».


10. *Sacerdotes Mediolanenses uxorati erant.* — Ex quibus apparet sacerdotes incontinentes librum B. Ambrosii de *Officiis* ad conjugia sua tuenda corrupisse. Nam sanctus doctor in eo loco tantum habet: *De castimonia quid loquar, quando*, etc. solumque loquitur de quæstione quæ tunc agitabatur, an scilicet bigami, seu qui aliam acceperant uxorem ante baptismum, a susceptione sacrorum ordinum, sicuti post baptismum, excluderentur; quia inter Ecclesiæ doctores de sacrorum quidem ministrorum cœlibatu, sed non de hoc capite conveniebat. Hujusmodi exemplaria sancti *Ambrosii* depravata ad nos non pervenire; sed certum, fraudem istam diu latuisse, neque ante sæculum xv in diœcesi Mediolanensi confutatam esse. Auctores enim Mediolanenses, qui a sæculo xiii usque ad decimi quinti finem scripsere, ut Galvancus Flamma, auctor Chronici, cui titulus, *Flos florum*, Petrus Azarius auctor sæculi decimi quinti, Tristanus Chalchus, et Bernardinus Corio Pseudo-Datum et Landulphum


secuti sunt, cosque exscripsere, nec eis rei falsitas suboluit. Habetur locus ille Ambrosii lib. 1 de Offic. cap. 50, de quo videndus novus operum ejus editor, qui tamen non meminit ejus depravationis Mediolani a sacerdotibus conjugatis factæ.


41. *Pars Historiæ Landulphi Senioris duobus Datius perperam attributa.* — Porro Puricellus laudatus passimque alii ante eum Mediolanenses historici, non advertentes Chronicon Ms. quod in Bibliotheca Ambrosiana sub nomine *Chronici Datii Mediolanensis archiepiscopi* asservatur, nihil continere præter partem historiarum *Landulphi Senioris, Arnulphi, et Landulphi Junioris* seu a Sancto-Paulo, historicorum Mediolanensium, (ex quibus prior Historiam suam a primis Ecclesiæ sæculis exorditur, alter a sæculo decimo, tertiusque a fine sæculi undecimi) putarunt *Datios* duos chronologos Mediolani floruisse, quorum prior anno DLI demortuus Mediolanensis archiepiscopus fuit, alter secundum eodem Gregorii Septimi tempore vixit, et homo privatus fuit. Verum *Datius* archiep. Mediolanensis nullum Chronicon lit-

teris mandavit, et alter *Datius* auctor personatus, cui attributum fuit, vel per fraudem, vel per errorem, Chronicon seu pars Chronici Landulphi Senioris, ut jam anno quingentesimo quinquagesimo secundo de *Datii* archiepiscopi Mediolanensis supposititio Chronico verba facientes monstravimus. Puricellus itaque qui nobis fragmenta varia Landulphi Senioris, Arnulphi et Landulphi Junioris suppeditavit, quæ ex eorum Historiis manuscriptis eruit, gentilium suorum falsa traditione deceptus duos nobis *Datios* historicos obtrusit, cum tamen posterior nunquam in rerum natura fuerit, et prior archiepiscopatum quidem Mediolanensem gesserit, sed nullum Chronicon nullamque Historiam scripserit, uti loco citato ostendi. Hinc quod Puricellus de explicatione laudati loci Divi Ambrosii in medium attulit, et partim *Datio chronographo*, partimque *Landulpho Seniori* attribuit, totum est Landulphi Senioris, ut, ni me mea fallit opinio, videri poterit in Historia ejusdem Landulphi si, quod valde optandum, aliquando e tenebris emergat.

FINIS TOMI SEXTIDECIMI.







BR
145
B37
1864
T.16
C.1
ROBA

